


God Nuye Kunwok



The Holy Bible in the Kunwinjku language of Australia

God Nuye Kunwok

The Holy Bible in the Kunwinjku language of Australia

copyright © 2018 Bible Society of Australia

Language: Kunwinjku (Gunwinggu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-12-28

PDF generated using Haiola and XeLaTeX on 18 Apr 2025 from source files dated 28 Dec 2024
1e76c3c7-fc1a-5488-bdac-9a98d749a074

Contents

Genesis	1
Exodus	107
Ruth	210
Psalms	218
Isaiah	375
Matthew	497
Mark	581
Luke	634
John	722
Acts	789
Romans	877
1 Corinthians	918
2 Corinthians	960
Galatians	984
Ephesians	998
Philippians	1012
Colossians	1022
1 Thessalonians	1031
2 Thessalonians	1039
1 Timothy	1044
2 Timothy	1056
Titus	1064
Philemon	1070
Hebrews	1072
James	1100
1 Peter	1111
2 Peter	1123
1 John	1130
2 John	1140
3 John	1142
Jude	1144
Revelation	1147

Genesis

Kerrngehkenh Duninjh God Bolkmarbom Rowk.

Genesis 1:1-31

¹ Kerrngehkenh duninjh God bolkmarbom rowk, kaddum dja kurorre.

² Wanjh minj njale bangmemarnbuyindangimeninj kurorre, dja mak bolklarrkni. Dja kunkak yiman rerrih barrkbom kukku manbu boyoy kanjdji, dja God nuye Namalngmakkaykenh, yiman kunmayorrk rerrih djahdjalrokani kaddum kore kubokehkekebe.

³ Wanjh God yimeng, "Mah, kumwolkayinda." Wanjh kumwolkayindanj.

⁴ Dja God nang manbu kumwolkayindanj, nang kamak rowk. Wanjh nungka welenglarlmey manbu kumhwolkani dja manbu kunkak.

⁵ Dja nungka God ngeykurmeng, manbu kumhwolkani manu wanjh ngeykurmeng barnangarra, dja manbu kunkak, manu wanjh ngeykurmeng kumunun. Wanjh kunkak wam, kunkabel kumwam, wanjh kunbarnangarrakudji kunu.

⁶ God yimeng, "Mah, kunnol kumray kakurrmerren kubulkayh kore kaboyo, ba kabebbehbolarlmang."

⁷ Wanjh God marbom kunnol dja bebbehbolarmey, ngalengman manu kaboyo kanjdjikah, dja mak ngalengman manu kaboyo kaddumkah. Wanjh kundjalmekebe yimerranj.

⁸ Wanjh God welengngeykurmeng kunnol. Wanjh kunkak wam, kunkabel kumwam, wanjh kunu kunbarnangarra bokenh.

⁹ Wanjh God yimeng, "Mah, kukku manbu kaboyo kanjdjikah kore kunnol, wanjh bomornnamiyinda kukudji ba kamrorrebebe." Wanjh kundjalmekebe yimerranj.

¹⁰ Wanjh God welengngeykurmeng kunrorre. Dja kukku manbu bomornnamerrinj kukudji, wanjh kunu ngeykurmeng kurrula. Wanjh God nang kamak rowk.

¹¹ Wanjh God yimeng, "Mah, ngalengman kunrorre bebkemen mankolhdebubuyika, ngalengman manbu kakarrme manmim, dja ngalengman kundulk, kakarrme manbarnem manmim dorreng, manbebbehbubuyika." Wanjh kundjalmekebe yimerranj.

¹² Ngalengman kunrorre ngalkeng mankolhdebubuyika, ngalengman manbu kakarrme manmim, manbebbehbubuyika, dja ngalengman kundulk kakarrme manbarnem manmim dorreng, manbebbehbubuyika. Wanjh God nang kamak rowk.

¹³ Wanjh kunkak wam, kunkabel kumwam, wanjh kunu kunbarnangarra danjbik.

¹⁴ God yimeng, "Mah, manbu kabirriwolkan birrimbebmerrimen kore kungolbeh ngarre kaddum, ba kabirrilarmang barnangarra dja kumunun, kabirribukkarren munguyh ngarrey kurrung dja kudjewk, dja mak ngarre kunbarnangarrabubuyika dja mandjewkbubuyika.

¹⁵ Bedda kaluk birriwolka kungol ngarre kaddum ba kabirribolkwolkan kanjdji kurorre." Wanjh kundjalmekebe yimerranj.

¹⁶ God marbom mankihkimuk bokenh, manbu manwernhkimuk, manu ngalengan kawolkan kawohnan barnangarrakenh, dja manbu manwohbirluyahwurd, manu ngalengman kawolkan kawohnan kumununkenh, dja mankokkarrng warridj kunimarbom.

17-18 Wanjh God welengkurmeng manbu kabirriwolkan, kurrmeng kore kungol ngarre kaddum ba kabirribolkwolkan kanjdji kurorre, dja mak kabenebebbewohrnan barnangarrakenh dja mak kumununkenh, dja mak kabirribebbeharlmang kore kahwolkan dja kore kunkak. Wanjh God nang kamak rowk.

19 Kunkak wam, dja kunkabel kumwam, wanjh kunu kunbarnangarra kunkarrngbalmeng.

20 Wanjh God yimeng, "Mah, nawu kukbubuyika kamimbi wernhmerri-men kore kukku rowk, dja mak nawern nawu welyi birriray kaddumkah kurorre kore kungol ngarre kaddum."

21 Wanjh kunu God marnbom nakihkimuk djenj yiman kayime bird-durrangkan, mak nadjalbubuyika rowk nawu kamimbi nawu kamirndere kukukku, benmarnbom birribebbekukbubuyika rowk. Dja mak nadjalwern rowk nawu welyi benmarnbom birribebbekukbubuyika rowk. Wanjh God nang kamak rowk.

22 Wanjh God benmarneyimeng kunmak kunwok, yimeng, "Ngurrima nawern yaw, ngurrimirndewernworrinen, barlmirrangimen kore kukku manbowarlahbubuyika, dja mak nawu ngurriwelyi, ngurrimirndewernworrinen kore kurorre."

23 Kunkak wam, kunkabel kumwam, wanjh kunu kunbarnangarra five.

24 Wanjh God yimeng, "Mah, kurorre ngalkemen bebbekukbubuyika nawu kamimbi, mayh nadjalwern, nawu kelebuk, dja nawu kawake, dja nawu kele, birribebbekukbubuyika." Wanjh kundjalmekbe yimerranj.

25 God benmarnbom mayh kukbubuyika, kele nawu birribebbekukbubuyika, kelebuk nawu birribebbekukbubuyika, dja mak nawu kawake kurorre birribebbekukbubuyika rowk. Wanjh God nang kamak rowk.

26 Wanjh God yimeng, "Kab ngarrbenmarnbu bininj, yiman ngad rerrih karrirohrok* dja kabirrimarnewohrnan djenj nawu kare kukukku, mak nawern nawu welyi nawu kare kuwonge, dja mak mayh kelebuk, dja kurorre rowk, dja mak mayh rowk nawu kawake kurorre."

27 Wanjh God benmarnbom bininj, yiman nungka rerrih kabirrirohrok. Yiman God nungan rerrih kabirrirohrok benmarnbom. Benmarnbom bu nararangem dja ngaldahdaluk.

28 Kaluk benmarneyimeng kunmak kunwok, dja yimeng, "Ngurrima nawern wurdyaw, bininj ngurrimirndewernworrinen, ngurribarlmirrangimen kurorre dja ngurribolkkarmen. Dja mak ngurrimarnewohrna djenj nawu kare kukukku, mak nawern welyi nawu kare kuwonge, dja mayh rowk nawu kamimbi nawu kahre kurorre."

29 Wanjh God yimeng, "Ngurrina, ngaye ngokko ngakurrmeng ngud-berre bininj mankolhdebubuyika rowk kakarme manmim, manbu karri kurorre kubolkbubuyika rowk, dja mandulkbubuyika rowk kakarme manbarnem manmim dorreng, manmekbe rowk wanjh manme ngud-berre ngurringun.

30 Dja nawu mayh rowk nawu kele, dja mak nadjalwern rowk nawu welyi nawu kare kuwonge, dja mak mayh rowk nawu kawake kurorre, mayh nawarlahkenh rowk nawu kakarme kunngolek bu kamimbi, bedda wanjh ngabenmarnekurrmeng kabirringun manbu kundalk manbu mandalkkuk, dja manbu kundulk kakarme manworrkuk." Wanjh kundjalmekbe yimerranj.

31 Wanjh God nang yehyeng rowk nawu marnbom, nang kamak duninj. Kunkak wam, kunkabel kumwam, wanjh kunu kunbarnangarra six.

* 1:26 Kore Hebrew kayime, "karririkrohrok dja ngad rerrih karrirohrok".

2

*Bu God Yakwong Rowk Dja Ngehmg.**Genesis 2:1-4a*

¹ Kunu wanjh God yakwong rowk bu bolkmahbolkmarnbuni kaddum dja kurorre, dja mak yehyeng rowk nawu kumekbe karri.

²⁻³ Wanjh bu kunbarnangarra seven God ngehmg. Nungka yakwong rowk kore durrmihdurrkmirri, wanjh ngehmg dja ngokko yakwong rowk kore durrmihdurrkmirri bolkmahbolkmarnbuni, kunmekbekenh kunu nungka kukenhmg kunbarnangarra seven, larlmey, marnbom bu kunbarnangarradjamun nungan nuye.

^{4a} Wanjh kunih kunu kayolyolme bu kaddum dja kurorre God bolkmahbolkmarnbuni.

*Bininj dja Daluk nawu Beneyungkih Duninjh.**Genesis 2:4b-25*

^{4b-6} Bu Yawey nawu God bolkmarnbom kurorre dja kaddum, minj kundulk bangmediwirrinj kurorre, dja manmim minj bangmebebmeninj, dja Yawey God minj bangmemunkewemeninj mandjewk kore kurorre, dja minj nangale mak diwirrinj bu bolkiylkbuyi. Djal kukku kumbobebmi kurorrebeh bolkdjuhkeyi rowk.

⁷ Wanjh Yawey nawu God mey kundjulng kore kurorrebeh* dja bimarnbom nayungkih duninjh bininj, biwelengkebbuhmg nuye kunngolek kore kukeb nuye bininj, wanjh bininj mimbiminj.

⁸ Kaluk Yawey nawu God manme dudji kore koyek kabolkngeyyo Eden, wanjh kunmekbe kunu nungka bikurrmg bininj nawu bimarnbom.

⁹ Wanjh nungka Yawey nawu God welengmarnbom kundulk rowk, dangerrinj kurorrebeh, kundulk manbu bininj kanan mandulkmakkaykenh, dja mak manbu kakarrme manme manmakmak. Kumekbe kore manme dudjihdudjindi, kubulkayh, kumekbe dulkdi manbu kahwon bininj kunngolek bu kamimbi munguyh munguyh, dja mak manbadbuyika manbu kahwon kunmayali kore kunmakkenh dja kore kunwarrekenh.

¹⁰ Mankabo balboyakbuni kore Eden, djuhkeyi manme manbu dudjihdudjindi. Kaluk bewhkah yungkikah Eden, wanjh kumekbe kunu mankabo kabolarlmilarlmirranj kabomarnburrinj kunkarrngbakmg.

¹¹ Mankabo manbu karrokme, kangeyyo Pishon, wanjh manu kabalborledme kore kubolkwarlah rowk kunred kabolkngeyyo Havilah.

¹² Kumekbe kunred kahyo gold kunwardde nawu namakkaykenh, dja mak manmakmak parfume yiman kunkalkkid, dja kunwardde kunmakmak duninjh kangeyyo cornelians.

¹³ Manbadbuyika mankabo manbu kabolarlmang, manu wanjh Gihon, kabalborledme kore kunred kubolkwarlah rowk kabolkngeyyo Cush.

¹⁴ Dja mak manbu mankaboberlbuyika manbu karranjbikwon, manu wanjh Tigris, manbu kabalboyakbun koyekkah kunred kubolkwarlah kunbolc Asshur. Wanjh ngalengman manbu kunkarrngbakmg kabalkabore, manu wanjh kangeyyo Euphrates.

¹⁵ Wanjh Yawey nawu God bimey nahni bininj nawu nayungkih dja bikurrmg kore manme dudjihdudjindi kore kunbolc Eden, ba kabolkiylkbun dja kabolknahnan.

* ^{2:7} Ngurrina warridj verse 20. Kore Hebrew kunwok "Adam" kamenyime bininj, dja mak "Adamah" kamenyime kurorrebeh.

16 Wanjh Yawey nawu God biwokrayekwong nahni bininj, yimeng, "Ngudda kamak yingun mandjalwern manbubuyika manbarnem kore maninjmanu kundulk rowk kondah kore manme kahdudjindi.

17 Mandjalkudji manbu kundulk, manbu kahwon kunmayali kore kunmak dja kunwarre, yuwn yingun manmekbe manme. Bu yingun maninjmanu manbarnem, wanjh bonj, yidjalmalngdowen kundjalmekbe kunbarnangarra rerrih."

18 Wanjh Yawey nawu God yimeng, "Minj kunmak bu nahni bininj kahdjalni nadjalkudji. Ngaye ngamarnbun nawu kabibidyikarrme nawu kamak kabenedjarrkni."

19 Wanjh Yawey nawu God benmarnbom mayh kukbubuyika rowk kore kurorrebeh, nawu kare kore kabbal, dja mak marnbom nadjalwern kukbubuyika rowk nawu welyi dja kare kuwonge. Nungka benkang kore bininj ba kanan bu baleh kabenbebbehngeykurrme. Kore baleh bininj benngeykurrmi bedda rowk nawu birrimimbi, wanjh kundjalmekbe birringeyyoy.

20 Wanjh nahni bininj ngeykurrmeng rowk mayh nawu kelebuk, dja mak nawern nawu welyi nawu kare kuwonge, dja mak mayh rowk nawu kare kore kabbal.

Dja bininj minj bimarnengalkemeninj nawu bibidyikarrmeninj kamak benedjarrkniwirrinj.

21 Wanjh Yawey nawu God bikekurrmeng bininj, kerroweng duninj. Bu nungka keyohkeyoy, God mey kunkudji kunbirrkbirrkurrng kore bininjbeh biwelengmokbalhmeng kunkulahwi.

22 Wanjh Yawey nawu God bimarnbom ngalkudji daluk kore kunbirrkbirrkurrngbeh bininj, wanjh bimarnekang kore bininj.

23 Wanjh bininj welengyimeng, "Kalukburrr bebmeng nawu kunmurrng wam kore ngayebeh, dja kunburrr bu ngayebeh kunburrr. Ngahli wanjh kangeyyo ngalbininj kobeng, dja ngaleng kunu kunkukmarnbuyindanj bininjbeh."

24 Kunmekbekenh kunu bininj kabenbenebawon ngalbadjan dja kornkumo, dja kabenebelmerren ngalbininj kobeng nuye wanjh kabenekudjihmen.

25 Namekbe bininj dja ngalbininj kobeng benekukworrhwormni, kaluk minj beneyemeninj.

3

Adam dja Eve Benewokweng God.

Genesis 3:1-24

1 Kaluk nawu nayin namekbe wanjh djalwernhkurrehkurreni dja mak bendjalwernhyurrhkeyi rowk mayhbubuyika rowk nawu kekeleleh kore Yawey nawu God marnbom. Wanjh namekbe nawu nayin balwokdanj bidjawam daluk, yimeng, "Yiddok woybukkih duninj God yimeng, 'Yuwn bu ngunangun manbu manbarnem kore kahdulkdingihdi kondah kore manme kahdudjindi?'"

2-3 Ngalbu daluk yimeng, "Nganangun rowk manme manbu mandulk-bubuyika manbu kondah kahdudjindi, dja God kanbenemarneyimeng, 'Mandjalkudji manbu kubulkayh kahdulkdi, manmekbe manme yuwn ngunangun, yuwn bu mak ngunekarrme, marndi ngunebaldjaldowen.' "

4-5 Wanjh nayin kumyimeng, "Aba. Minj woybukkih ngunedowen! God kaburrbun bu kundjalmekbe kunbarnangarra bu ngunangun wanjh

ngunemayalidangen, nguneyimerran yiman nungka rerrih, ngunebur-rbun bu kore kunmakkenh dja kunwarrekenh.”

6 Wanjh ngalbu daluk dulknang, nang mandulkmakkaykenh dja nang manbarnemmak, dja ngalengan kanjdjiwi wurrmey, yimeng, “Ngadjal-mang ngangun ba ngamayalidangen.” Wanjh mey manmekbe manme, nguneng, wanjh bibalmarnekang nabininj kobeng nawu benedjarrkni, nunganwali balnguneng.

7 Bu benenguneng wanjh kunmayali benemey, benekuknarrinj wanjh benewohburrbom bu beneworrhworr. Wanjh benewam, benemey kun-worr; benebibbom dja benenameng bu benedukarrinj.

8 Wanjh bu wolewolehminj, kunmayorrkmak kumwam, dja bedda nawu bininj dja ngalbininj kobeng benebek kang Yawey nawu God bu regehrey kore manme dudjihdudjindi, kaluk benemarnewarlkarrinj kore kurruhdurrulk.

9 Wanjh Yawey nawu God bikayhmeng namekbe bininj, yimeng, “Ngudda baleh?”

10 Nungka biwokmey, yimeng, “Ngaye bekkang kondah kore manme kahdudjindi dja ngakeleminj, marnewarlkarrinj dja ngakukworrhworr!”

11 Wanjh Yawey nawu God yimeng, “Nangale ngunmarneyimeng yikuk-worrhworr? Yiddok yinguneng manbu manme kore kurrulkbeh bu ngaye wokrayekwong marneyimeng, ‘Yuwn yingun?’ ”

12 Wanjh nawu bininj yimeng, “Ngahli daluk ngalbu ngudda kanwong nganedjarrknikenh, ngaleng wanjh nganwong manmekbe manme man-mekbe kurrulkbeh, wanjh nganguneng.”

13 Wanjh Yawey nawu God bidjawam ngalbu daluk, “Baleh kuhni bu yikurduyimeng?” Ngaleng yimeng, “Nahni nayin ngankoweng ngan-marnekarebuyikawong, kunmekbekenh kunu wanjh nganguneng.”

14 Wanjh Yawey nawu God bimarneyimeng namekbe nayin, yimeng, “Bu kunmekbe yikurduyimeng, wanjh yidjalwake kore kunjam ke munguyh. Ngudda kaluk yingun kundjulng djalmunguyh bu yihmimbi. Kuhni kunyid djalyingan ke, minj mak nawarlahkenh mayhbubuyika kelebuk dja kele, ngudda djal ke kunyid yidjalkudji.

15 Ngaye ngamarnbun ngorrewoneng bu ngunewidnarrenkenh. Ngudda ke wurdwurd dja ngalenggarre wurdwurd kabirribebbehnjirrkerrren munguyh. Ngalenggarre wurdwurd ngundibun kukodj ngundikodjd-jubulhme, dja nguddambu ngurribenbaye kumadbundedj.”

16 Wanjh Yawey God bimarneyimeng ngalbu daluk, “Ngaye kaluk ngakimukwon duninh ke kundjak bu wurdyaw yihmerlem. Kaluk yidjakkbekkan bu wurdyaw karrurrkmirri bu karrangenkenh. Djamku bu baleh kakurduyime bu kunmekbe kundjak ke, dja nawu nabininj kobeng yidjalmarnedjare munguyh, dja nungka ngunmarnewohrnan.”

17 Wanjh Yawey God bimarneyimeng nawu bininj, “Ngudda yibek kang ngalbininj kobeng ke, yinguneng manmekbe manme manbarnem man-mekbe kurrulkbeh, manbu ngaye wokrayekwong marneyimeng, ‘Yuwn yingun.’ Bu kunmekbe yikurduyimeng wanjh kunyid ngunmarnekarrme manbu kunrorre. Bu yidjalmimbi, yingudjngarrhme bu yirurrkmirri djalmunguyh, ba bu kunrorre kangalke manme manbu ngudda ke yingunkenh.

18 Wanjh kangalke kundalk dja kinj manmirrhyi, dja mak yibalwelengn-gun manbu kurralkwaken manrakel.

19 Ngudda kaluk yirurrkmirri kunkimuk duninh kunkebkurrngirn dorreng, ba kunu kunrorre kangalke ke manme. Kunmekbe yikurduyime

munguyh, kaluk yibalwelengdurndeng kukulk. Ngudda yimmarnbuyindanjbeh kukulk, kunmekbekenh kunu yiyawoyhdurndeng. Ngudda wanjh kundjulng, kaluk yiyawoyhdurndeng kundjulng.”

²⁰ Adam bingeykurmeng ngalbininj kobeng nuye Eve*, dja ngaleng kunu ngalbadjan ngalkudji kadberre karriwarlahken nawu karrimimbi.

²¹ Dja Yawey nawu God mey mayh nuye kunkulah berrewoneng bininj dja ngalbininj kobeng, marnbom benbedejongbom benbedjongbuyindi.

²² Wanjh Yawey nawu God yimeng, “Nawu bininj yimerranj yiman ngad rerrih, kakarrme kunmayali bu kaburrbun kore kunmak dja kunwarre. Marndi mak kayawoyhbidyirriyongen kamang manbarnem kore kurrulkbeh manbu kahwon bininj kunngolek bu kamimbi munguyh munguyh, dja marndi kangun wanjh kamimbi munguyh munguyh.”

²³ Kunmekbekenh Yawey nawu God bikukmunkeweng kore kumekbe manme dudjihdudjindi, Eden, ba kabolkyilkbun kurorre kore nungka kummarnbuyindanjbeh.

²⁴ Bu Yawey bidjalbebkeng nawu bininj kore Edenbeh, wanjh kumekbe benwelengkurmeng Cherubim nawu yiman mayh welyi Godbeh, kaluk koyekkah kore manme dudjihdudjindi, nawu birrimarnedurrkmirri nungan God birrimarnebolknahnani, dja nawu mandjawk yiman kunak rerrih djurruhdjurrungi djurrbohjdurrborledmi kore kumekbe bendjanganikenh, ba minj nangale baldarnhrawinj kore kumekbe dulkdi kundulk manbu kahwon bininj kunngolek bu kamimbi munguyh munguyh.

4

Bininj Bokenh Cain Dja Abel Nawu Benedanginj Genesis 4:1-16

¹ Wanjh Adam beneyonginj Eve ngalbu ngalbininj kobeng nuye, wanjh ngaleng yawkani, dja biyawmey nawu Cain. Dja ngaleng yimeng, “Wanjh ngayawmey bininj bu Yawey nawu God nganbidyikarrmeng.”

² Kaluk mak ngaleng biyawmey Abel nawu benedanginj Cain. Abel kaluk nungka bennahnani mayh nawu sheep, dja Cain nungka bolkyilkbuni kurorre.

³ Dja kaluk bu Cain kumkang yikahwi manme manbu kunrorre bimar-nengalkeng, kumkang biwong nawu Yawey.

⁴ Dja Abel nawu nungka wanjh mey mayh nuye nawu nadjdjamanni nawu nawernhmak kunbalem dorrengh, wanjh kumkang biwong Yawey. Wanjh nungka Yawey yimeng kamak bu nang Abel dja nawu nungka balweyakang biwong nungka.

⁵ Dja bu binang Cain dja manbu nungka biwong, wanjh nungka Yawey minj yimeninj kamak. Kunmekbe wanjh Cain nungka yidduy duninj, dja mak kebbumeng.

⁶ Wanjh Yawey bimarneyimeng Cain, “Njalekenh ngudda yihyiddung, dja njalekah mak yihkebbume?”

⁷ Bu ngudda yikurdyime kunmak wanjh minj nuk ngayime ke yimak? Dja bu ngudda minj yikurdyime kunmak, wanjh kunu kunwarre yiman ngunmarneyo kuberrkkah kore kururrdangmaye ke, ngunmadbun, kadjare ngundarrkidmang, dja nguddambu wanjh yiman rerrih yibu, yuwn yimarrkmang.”

* **3:20** Kore Hebrew kunwok “Eve” kamenyime yiman kayime “Kamimbi”. **3:24** Revelation 22:14

⁸ Wanjh Cain bimarneyimeng Abel nawu benedanginj, yimeng, “Kab ngarray kore kabbal.” Bu kumekbe kabbal benehni Cain bibom nawu benedanginj, wanjh bikukkurmeng.

⁹ Wanjh Yawey bidjawam Cain, yimeng, “Nawu ngudda ngunedanginj Abel, kaluk baleh wam?” Wanjh Cain biwokmey, yimeng, “Ngayembu ngawakwan, yiddok ngaye yimankek nganahnan nawu nganedanginj?”

¹⁰ Wanjh Yawey yimeng, “Ngudda baleh yikurduyimeng? Kanbekka, kunkurlba nuye nungka nawu ngunedanginj wanjh yiman ngankayhme kukulkbek.

¹¹ Wanjh kuhni bu ngudda ke kunyid, dja bonj minj mak yiyawoyhbolkyilkbun kunrorre nawu yiman bikurlbabonguneng yibidkenwong nawu ngudda ngunedanginj.

¹² Wanjh bu ngudda yimankek yibolkyilkbun kunrorre, wanjh minj ngunmarnengalke manme. Dja ngudda yiman yikelerlobme yidjalwohrehore munguyh kubolkbubuyika kurorre dja yiredyak.”

¹³ Wanjh Cain bimarneyimeng nawu Yawey, yimeng, “Kuhni bu ngudda kandahmeng wernkih duninj, wanjh ngabekkarren kunrayek duninj.

¹⁴ Bolkkime wanjh ngudda kankukmunkewe minj ngabolkyilkbun, dja mak minj ngamyawoyhre kore ngudda. Ngaye kaluk ngaredyak, dja ngadjalwohrehore munguyh kubolkbubuyika bu ngakelerlobme. Dja nawu yimankek nganggalke wanjh nganbun ngankukkurmeng.”

¹⁵ Wanjh Yawey bimarneyimeng, “Burrkyak, dja bu nangale ngunbun yirrowen, wanjh kunu seven bininjwali kabirridowen.” Wanjh nungka Yawey bikukbimbom Cain ba minj nangale nawu bingalkemeninj bibuyi.

¹⁶ Wanjh Cain wam bolkbawong kumekbe kore Yawey ni, wanjh nungka wam ni kore kubolkwarlah kabolkngeyyo Nod*, koyekkah kore Eden.

Nawu Cain Benkebmawahmeng.

Genesis 4:17-24

¹⁷ Cain wanjh beneyonginj ngalbininjkebong nuye, wanjh ngaleng yawkani, wanjh biyawmey Enoch. Cain rurrkdundulubuni kubolkkimuk wanjh kunu bolkngeykurmeng Enoch, beywurd bolkngeykenkang.

¹⁸ Enoch nunganwali bibornang Irad, nawu nunganwali Irad bibornang Mehujael, Mehujael wanjh bibornang Methushael, dja Methushael nunganwali bibornang Lamech.

¹⁹ Lamech benbenemey daluk bokenh, ngalkudji ngeyyoy Adah, dja ngalbuyika ngeyyoy Zillah.

²⁰ Adah wanjh biyawmey Jabal. Dja nungka Jabal wanjh Mawah bedberre nawu kabirriyo kore dabburlin, dja kabirrimirndenahnan mayh.

²¹ Nawu Jabal benedanginj wanjh ngeyyoy Jubal, dja nungka wanjh Mawah bedberre nawu kabirribun lyre manbu yiman gitar, dja mak kabirribuhme nawu flute.

²² Dja Zillah ngaleng mak biyawmey narangem nawu ngeyyoy Tubal-Cain, dja nungka marnbuni kukbubuyika yehyeng bu wirilmurrng bronze dja iron. Kaluk Tubal-Cain benedanginj ngaldaluk, ngaleng wanjh ngeyyoy Naamah.

²³ Wanjh Lamech benbenemarneyimeng ngalbibininjkebong nawu nuye, yimeng, “Ngudda nawu Adah dja Zillah ngalbibininjkebong ngardduk, kandibekka, kunwok ngardduk ngunebekka. Ngaye ngabom bininj ngakukkurmeng bu nungka werrek nganbom, yawurrinj ngabom bu nungka werrek ngankanjbarrhmey.

* 4:16 Nod kamenyime “kadjalrengehre”.

24 Bu seven bininj birridowimeninj bu Cain nangale bibuyi bikukkurmeninj, wanjh seventy seven bininj kabirridowen bu nangale nganbun ngaye Lamech ngankukkurme.”

Seth Dja Enosh

Genesis 4:25-26

25 Adam beneyawoyhyonginj ngalbininj kobeng nuye wanjh ngaleng biyawmey narangem dja bingeykurmeng Seth. Ngalkai yimihyimi, “God nganwong nabuyika wurdyaw bimarnebolkmey Abel, dja Cain bibom.” †

26 Seth warridj bibornang narangem, dja bingeykurmeng Enosh. Wanjh yiman bu kunmekbe bininj birridedjdjingmangi birrimarne kayhmi Yawey nuye kunngay bu birrihdi yiwarrudj.

5

Nawu Adam Benkebmawahmeng, Kaluk Noah Dorreng.

Genesis 5:1-32

(1 Chronicles 1:1-4)

1 Kuhnj wanjh kabimdi kabenyolyolme Adam nuye nawu benbornang dja nawu benkebmawahmeng. Bu God benmarnbom bininj, wanjh benmarnbom bu kabirrirohrok nungka nawu God.

2 Benmarnbom bininj dja daluk, benmarneyimeng kunmak kunwok, dja bengeykurmeng “Bininj”.

3 Bu Adam mimbini mandjewk 130, wanjh bibornang beywurd nawu nungka benerohrokni, dja bingeykurmeng Seth.

4 Dja bu Seth danginj, Adam djahdjalmimbini mandjewk 800, dja benbalbornabornang birribuyika bebeywurd mak ngalbebeywurd.

5 Wanjh mandjewk nuyeni rowk Adam bu mimbini wanjh nine hundred dja thirty, wanjh doweng.

6 Bu Seth mimbini mandjewk 105, wanjh bibornang nawu Enosh.*

7 Dja bu Enosh danginj, Seth djahdjalmimbini mandjewk 807, dja benbalbornabornang birribuyika bebeywurd mak ngalbebeywurd.

8 Wanjh mandjewk nuyeni rowk Seth bu mimbini wanjh 912, wanjh doweng.

9 Bu Enosh mimbini mandjewk 90, wanjh bibornang Kenan.

10 Dja bu Kenan danginj, Enosh djahdjalmimbini mandjewk eight 815 mak benbalbornabornang birribuyika bebeywurd mak ngalbebeywurd.

11 Wanjh mandjewk nuyeni rowk Enosh bu mimbini wanjh 904, wanjh doweng.

12 Bu Kenan mimbini mandjewk 70, wanjh bibornang Mahalalel.

13 Dja bu Mahalalel danginj, Kenan djahdjalmimbini mandjewk 840, dja benbalbornabornang birribuyika bebeywurd mak ngalbebeywurd.

14 Wanjh mandjewk nuyeni rowk Kenan bu mimbini wanjh 910, wanjh doweng.

15 Bu Mahalalel mimbini mandjewk 65, wanjh bibornang Jared.

16 Bu Jared danginj, Mahalalel djahdjalmimbini bu mandjewk 830, dja benbalbornabornang birribuyika bebeywurd mak ngalbebeywurd.

17 Wanjh mandjewk nuyeni rowk Mahalalel bu mimbini wanjh 895, wanjh doweng.

18 Bu Jared mimbini mandjewk 162, wanjh bibornang Enoch.

† 4:25 Kore Hebrew Seth nuye kunngay kamenyime “Kanwong”.
kayime “bibornang” wanjh yikahwi kamenyime “bimawahmeng”.

* 5:6 Bu Hebrew kunwok

¹⁹ Dja bu Enoch danginj, Jared djahdjalmimbini mandjewk 800, dja benbalbornabornang birribuyika bebeywurd mak ngalbebeywurd.

²⁰ Wanjh mandjewk nuyeni rowk Jared bu mimbini wanjh 962, wanjh doweng.

²¹ Bu Enoch mimbini mandjewk 65, wanjh bibornang Methuselah.

²² Dja bu Methuselah danginj, Enoch munguyh benehdjaldjarrkrey God bu mandjewk 300, dja benbalbornabornang birribuyika bebeywurd mak ngalbebeywurd.

²³ Wanjh mandjewk nuyeni rowk Enoch bu mimbini wanjh 365.

²⁴ Enoch benehdjarrkrey God, kaluk baldjalyakminj, dja God birrarrkidmey bikang.

²⁵ Bu Methuselah mimbini mandjewk one 187, nungka bibornang Lamech.

²⁶ Dja bu Lamech danginj, Methuselah djahdjalmimbini mandjewk 782, dja benbalbornabornang birribuyika bebeywurd mak ngalbebeywurd.

²⁷ Wanjh mandjewk nuyeni rowk Methuselah bu mimbini wanjh 969, wanjh doweng.

²⁸⁻²⁹ Bu Lamech mimbini mandjewk 182, wanjh nungka bibornang beywurd, dja bingeykurmeng Noah[†], mak yimeng, “Nungka kaluk kankangemarnbun kadberre, bu karrihdurkkmirri dja mak karrihgudjngarrhme bulkkidj duninj, bu karribolkyilkbun kunrorre, manbu Yawey marnbom kunyid.”

³⁰ Dja bu Noah danginj, Lamech djahdjalmimbini mandjewk 595 dja benbalbornabornang birribuyika bebeywurd mak ngalbebeywurd.

³¹ Wanjh mandjewk nuyeni rowk Lamech bu mimbini wanjh 777, wanjh doweng.

³² Bu Noah mimbini mandjewk 500, wanjh benbornang Shem, Ham dja Japheth.

6

Bu Birriwarlahkenh Bininj Rowk Birridjalwarreni Duninj.

Genesis 6:1-8

¹ Bu bininj birridedjdjingmey birrimirndewernmerreni kore kurorre, wanjh ngalbebeywurd bindimarnedanginj.

² Wanjh yikahwi nawu birrikukyimi yiman angel rerrih, bu bedda bindinang birrimekbe daluk birrinang birrimakkaykenhni, wanjh bindimey nawu bindibebbehjdjarrngom dja birrimarreni.

³ Wanjh Yawey yimeng, “Kunngolek ngardduk minj munguyh karri kore bininj, dja bedda djalbininjwi, minj kabirrimimbi munguyh, kaluk ngamarnbun mandjewk bedberre bu 120, wanjh kabirridowen.”

⁴ Kaluk kumekbe wanjh birrini kore kurorre nawu birringeyyoy Nephilim, kaluk birrikornamkuyengni duninj dja birrikukkihkimukni dorrengh. Mak rerre birrini bu birrimekbe nawu birrikukyimi yiman angel rerrih birriyoy ngalbebeywurd bedberre bininj, dja bindimarneyawdanginj wurdwurd. Bedda wanjh birrimekbe nawu korrokoni birrihni nawu bindiyurrhkeyi birribuyika, dja bininj birriwarlahkenh bindiburrbuni bindiburlumi dja bindiyolyolmi.

^{5:24} Hebrews 11:5; Jude 14 † ^{5:28-29} Kore Hebrew kunwok, mahni kungey “Noah” kawokyime “kankangemarnbun”.

⁵ Wanjh Yawey bennang bininj rowk nawu birrihni kurorre dja bennang birriwarreminj duninj, dja yehyeng rowk nawu bininj birrihburrbuni kukangebeh bedberre wanjh djalwernhwarreni duninj bu munguyh.

⁶ Wanjh Yawey njilngwarreminj duninj bu bininj benmarnbom kore kurorre, dja kangewarreminj.

⁷ Wanjh kunmekbe Yawey yimeng, "Ngaye ngabenbularrbun bininj rowk nawu ngabenmarnbom, ngabenyakwon rowk nawu kabirrihni kurorre; bininj, mak mayh duninj, dja mayh nawu kawake, dja nawern warridj nawu welyi nawu kare kuwonge, ngabenyakwon rowk, dja nganjilngwarreminj bu ngabenmarnbom."

⁸ Dja nadjalkudji bininj Noah, wanjh Yawey bimakwam bu namakni nuye.

Noah.

Genesis 6:9-22

⁹ Kuhni wanjh kabiyolyolme Noah. Noah wanjh namakni, nungka wanjh nadjalkudjini namakni kore birriwern rowk nawu birridjarrkmimbini. Nungka munguyh benehdjarrkrey God.

¹⁰ Nungka Noah benkarri mak danjbik bebeywurd, Shem, Ham dja Japheth.

¹¹ Dja bininj rowk God bennang birriwarreminj duninj, dja mak wernminj duninj bu birrihburreni kore kurorre rowk.

¹² God bolknang kurorre rowk, nang bolkwarreminj bu bininj rowk kore kurorre birrihkurduyimi kunwarre.

¹³ Wanjh God bimarneyimeng Noah, yimeng, "Ngaye nganjilngbekkar-rinj ngabenyakwon rowk nawu kabirrimimbi, dja wernminj duninj kore kurorre bu kabirrihburren. Kanbekka, marneyime, ngaye bedda ngabenyakwon dja kunrorre dorreng ngabendjarrkyakwon.

¹⁴ Wanjh yimarnbu Ark manbu kabbala mankimuk ke, kundulk manbu karrulkngeyyo cypress yirrulkma yirrundulubu, dja yirurrkmarnbun kunrurkwrern, dja mak yima manbu tar dja yibebeblmen kururk dja mak kuberrk, ba kukku minj kambongimen.

¹⁵ Kuhni wanjh yikurduyimen bu yimarnbun; kuhni kare mankuyengkenh, 140 metres, dja kuni kayime mandedjwarlah, 23 metres, dja bu kakodj wanjh 13 metres.

¹⁶ Yimarnbu mak kaddumkah ngarre ark, dja yuwn yibangmekod-jbalhme. Yiwohbawon 50 centimetres kore kaddum kungorrk ngarre ark. Kaluk kunrurkdangmaye yiname kungorrk, dja balabala yimarnbun danjbik yiman kanjdji, kubulkayh dja mak kaddum.

¹⁷ Dja yina, ngaye wanjh ngamunkewe kundjurh kore kurorre, kabenkebgakke rowk nawu kabirrimimbi kabenyakwon, kabirridowen rowk yehyeng nawu kungolek kakarri kondah kabirrihni kurorre.

¹⁸ Dja kaluk ngarayekwon kunwok ngardduk ngawokkurmerren bu berrebbun ngudda. Ngudda kaluk yibidbun kore kabbala, ngudda, bebeywurd ke, ngalbininjokobeng ke, dja ngalbininjokobeng bedberre bebeywurd ke, wanjh ngurridjarrkbidun.

¹⁹ Ngudda mak yibennigimewe mayh bokenhbokenh nawu kukbubuyika rowk nawu kabirrimimbi, kaluk nakudji narangem dja ngalkudji ngaldaluk birribebbekukbubuyika rowk, ba kunu ngurridjaldjarrkdarrkid.

²⁰ Kaluk nawern mayh nawu welyi birribebbekukbubuyika, mayh duninj birribebbekukbubuyika, dja mayh nawu kawake kurorre birribebbekukbubuyika, kaluk bokenh birribebbekukbubuyika rowk wanjh kabirrimre kore ngudda, ba kunu kabirridjaldarrkid.

²¹ Dja mak manme yika manbu manbubuyika rowk, dja yikarekurrmen, manbu ngudda ngurringun dja mak bedda mayh kabirringun.”

²² Wanjh kuhni Noah kurduyimeng rowk kore God biwokrayekwong.

7

God Munkeweng Kundjurrh Kunkimuk. Genesis 7:1-24

¹ Wanjh Yawey bimarneyimeng Noah, “Yibidbu kore kabbala, ngudda dja nawu ngurrimud ngurridjarrkbidbu, dja ngaye ngalkeng ngudda yidjalkudji nawu ngayime yimak, kore birridjalwern rowk nawu bolkkime ngurridjarrkmimbi.

² Yibenka seven narahrangem dja seven ngaldahdaluk birribebbekuk-bubuyika rowk mayh nawu ngurriyime bele nawu ngurringun, dja mak yibenka nakudji narangem ngalkudji ngaldaluk mayh birribebbekuk-bubuyika rowk nawu ngurriyime burlerri nawu minj ngurringun.

³ Dja mak yibenka seven narahrangem dja seven ngaldahdaluk nawu mayhmayh nawu kare kuwonge, birribebbekukbubuyika rowk. Kuhni wanjh yikurduyimen ba munguyh kabirridjaldarrkid, birribebbekuk-bubuyika rowk kore kubolkbubuyika kurorre.

⁴ Dja kaluk bu kunkodjke seven wanjh ngaye ngamunkewe mandjewk, kadjaldjakdung munguyh bu kunbarnangarra dja kunkak bu kunkodjke forty, dja ngabenbularrbun ngabenyakwon rowk nawu kabirrimimbi nawu ngabenmarnbom.”

⁵ Wanjh Noah kurduyimeng rowk kore Yawey biwokrayekwong.

⁶ Noah wanjh mandjewk nuyeni 600 bu kundjurrh bebmeng kore kurorre.

⁷ Wanjh Noah dja bebeywurd nuye, ngalbininj kobeng nuye, dja ngalbininjkobeng bedberreni nawu bebeywurd, bedda wanjh birribidbom kore kabbala ba minj kundjurrh benkebguyi.

⁸⁻⁹ Dja birridjarrkbidbom warridj mayh duninj nawu bininj birriyimi bele dja burlerri, dja nawern nawu welyi, mak mayh nawu kawake kurorre, narahrangem ngaldahdaluk birribebbekukbubuyika rowk, wanjh Noah birridjarrkbidbom kore kabbala. Kunmekbe kurduyimeng bu God biwokrayekwong.

¹⁰ Wanjh bu kunkodjke seven wanjh kundjurrh kumbemeng kore kurorre.

¹¹ Bu Noah nungka mimbini 600 mandjewk kaluk bu kunbarnangarra seventeen kore dird bokenh, wanjh kukku manbu kanjdjibeh kurorre kumhdjalbobemerrinj, mak yiman ngolduhmeng dja kundjurrh bumi.

¹² Wanjh djahdjaldjakdungi kore kurorre bu kunbarnangarra dja kunkak bu kunkodjke forty.

¹³ Wanjh bu kunmekbe kunbarnangarra Noah bidbom kore kabbala, bebeywurd birridjarrkbidbom nawu Shem, Ham dja Japheth, mak Noah nuye ngalbininj kobeng, dja ngalbininjkobeng bedberre nawu birridanjibik bebeywurd.

¹⁴ Dja mak birridjarrkbidbom mayh kele birribebbekukbubuyika rowk, dja mayh kelebuk birribebbekukbubuyika rowk, dja mak mayh nawu kawake kurorre birribebbekukbubuyika rowk, dja mak mayhmayh birribebbekukbubuyika rowk, birribebbekukbubuyika rowk nawu birriwelyi.

15-16 Kaluk bokenhbokenh birribebbehkukbubuyika rowk nawu birrikarmi kunngolek dja birrimimbini, Noah birridjarrkbidbom kore kabala, ngalkudji ngaldaluk dja nakudji narangem birribebbehkukbubuyika rowk nawu birrimimbini, birringimeng. Kunmekbe birrikurduyimeng bu God biwokrayekwong Noah. Wanjh nungka Yawey biwelengdangbalhmeng bedberre.

17 Wanjh kundjurrh djalbobidbuni munguyh bu kunkodjke forty, dja bowernmerrinj, wayhkeng kabbala kaddumkah wam, kurorre bolkbawong.

18 Wanjh bokihbokimukmeni dja munguyh djahdjalbobidbuni kore kurorre, dja kabala darlkadarlkani kaddum kubokehkekeb.

19 Kaluk bobidburrinj bulkkidj, dja manwarddekyengkuyeng kukku warddebarrkbom rowk.

20 Dja mak munguyh djalbobidburreni bobidbom wernhwarddekodjyibkeng rowk, kaddum balwernhbowayhmeng seven metres.

21 Wanjh nadjalwern rowk nawu birrimimbini nawu birrihrey kurorre birriyakminj rowk; nawern nawu welyi, mayh kelebuk dja kele, nawarlahkenh rowk nawu birrimirnderey kurorre, dja mak bininj rowk.

22 Birriwern rowk nawu birrihni kuberrrkombuk dja birrikarmi kunngolek bu birrimimbini wanjh birridowerrinj rowk.

23 God benbularrbom benyawkwong rowk nawu birrimimbini kurorre; bininj, dja mayh duniinj, dja mayh nawu kawake kurorre, dja nawern nawu welyi nawu kare kuwonge, bedda rowk benbularrbom kore kurorre. Noah nadjalkudji dja nawu birrihdjarrkni kore kabala birridjalmekbe wanjh birridarrkidni.

24 Kaluk manbu kukku yiman wohrnani rerrih kore kurorre bu kunkodjke 150.

8

Bu Bokolurrinj.

Genesis 8:1-19

1 Wanjh God benburrbom Noah dja mayh rowk nawu kele dja kelebuk nawu birridjarrkdahkendi kabala, wanjh nungka God munkeweng kunmayorrk kore kurorre, dja bokohbokolungi.

2 Kukku manbu kumbobebmi kanjdjibeh kurorre wanjh bongurdmeng, dja mak kore ngolduhmi wanjh balhmeng, dja mandjewk ngurdmeng.

3 Dja kukku yeledj djahdjalbokolungi munguyh. Bu kunkodjke 150 wanjh bokolurrinj,

4 dja bu kunbarnangarra seventeen bu dird seven wanjh manbu kabala barndanginj kuwarddekimuk kawarddegeyyo Ararat.

5 Kukku munguyh djahdjalbokolungi bu dird ten. Kaluk bu kunbarnangarrakudji bu dird ten wanjh warddebebmeng birriwarddekodjngan kunwarddebubuyika.

6 Kaluk bu kunkodjke forty yakminj, wanjh Noah dangmarrhmey window kore kabala manbu marnbom kore kabala,

7 dja munkeweng nakudji wakwak, dja namekbe wakwak djahdjalrenghey munguyh madbuni kukku kahbokolungkenh kurorre.

8 Wanjh Noah munkeweng dorddorok ba kanan bu kunubewu kukku bokoluy kore kurorre.

9 Dja nawu dorddorok minj baleh bolkgalkemeninj bu rerrkayi, wanjh bimarnedurndi Noah kore kabala, dja kukku boyohboyoy kurorre rowk.

Wanjh Noah bidbebmeng mey ngalmekbe dorddorok, ngimowong kore nungka di kore kabbala.

¹⁰ Wanjh Noah madbuni kunkodjke seven, wanjh kunu yawoyhmunkeweng dorddorok kabbalabeh.

¹¹ Wanjh bu wolewolehminj ngalmekbe dorddorok bimarnedurndi, dja manmalaworrkerrnge dorrengh kore kukeb ngarre, manbu bolkkime ngaleng malaworrdrumkengbeh kore olive kundulk, wanjh kunu Noah burrbom bu bokolurrinj kore kurorre.

¹² Wanjh yawoyhmadbom kunkodjke seven, dja yawoyhmunkeweng dorddorok, dja kunukka minj ngaleng biyawoyhmarnedurndeyi.

¹³ Wanjh bu Noah mandjewk nuyeni 601, bu kunbarnangarrakudjini bu dirid nakudji wanjh kukku boyakminj kore kurorre dja bolkbukminj. Nawu Noah kodjmarrhmay manmekbe kabbala dja bolknang nang kurorre balbolkbukminj.

¹⁴ Wanjh bu kunbarnangarra twenty seven bu dirid bokenh wernhbolkbukminj rowk.

¹⁵ Dja God bimarneyimeng Noah, yimeng,

¹⁶ “Ngurribebmerrimen kore kabbala, ngudda, ngalbininj kobeng ke, bebeywurd ke dja ngalbininj kobeng bedberre.

¹⁷ Dja yibenbebkemen rowk birribebbhkukbubuyika nawu kabirrimimbi nawu ngurridjarrkdahkendi, nawern nawu welyi, mayh duninj, dja nawarlahkenh rowk nawu kawake kurorre, ba kunu kabirriyawmayawmang kore kurorre, nawern yaw kabirrimang kabirriwernmerren kore kurorre.”

¹⁸⁻¹⁹ Wanjh kunu Noah dja bebeywurd nuye birribebmerrinj, dja ngalbininj kobeng nuye dja ngalbininj kobeng bedberre nawu bebeywurd, birridjarrkbebmerrinj, dja mak mayh rowk; mayh duninj, dja nadjalwern nawu kawake kurorre, nadjalwern nawu welyi, nadjalwern rowk nawu kare kurorre, wanjh birrimirndebebmerrinj kabbalabeh, kaluk bedman nawu birribebbhkukrohrokni; ngalbadjan, kornkumo, yawaw, wanjh birridjarrkbebmerrinj.

Noah Bimarnekinjeng Mayh Bu Biwong Yawey Nawu God.

Genesis 8:20-22

²⁰ Wanjh Noah marnbom altar kunwardde yiwarrudjkenh nuye nawu Yawey, wanjh mey yikahwi kukbubuyika rowk nawu birriyimi bele, kaluk mayh dja mayhmayh, wanjh benkukwurllheng kore manmekbe kunwardde bu biwong rowk Yawey.

²¹ Wanjh Yawey bu nomeng manbu manmanjmakni wanjh nungan burrbom baybaywi, yimeng, “Ngaburrbun bininj rowk wanjh munguyh kabirridjaldjare kunwarre kore kukange bedberre bu birriyayahwurd dja mak bu birridabbolk, dja bonj, ngaye minj kunyawoyhkudji ngayawoyhmarnbun kurorre bu kayidwernmerren bedberre. Dja ngaye minj mak kunyawoyhkudji ngabenyawoyhbun ngabenyakwon rowk nawu kabirrimimbi mayh yiman bu kunihbu ngakurduyimeng.”

²² “Dja bu kunrorre kadjaldi wanjh munguyh kadjalyime bu kamre kore manmim karrudjindangenkenh dja mak bu manme kabirrimoyhman, dja bu kunbonjdjek kamre mak manbu kawurllhmikenh, dja mak bu kurrung kamre dja kudjewk, kunbarnangarra dja kunkak. Kuhni wanjh munguyh kadjalyime, minj kayakmen.”

9

*God Wokkurmerrinj Bu Biberrebbom Noah.**Genesis 9:1-17*

¹ God kunmak kunwok benmarneyimeng Noah dja bebeywurd nuye, dja yimeng bedberre, “Ngurrbenborna birriwern wurdwurd, ngurrimirndewernmerrimen dja ngurrimirndearlmirrangimen kore kurorre.

² Dja kaluk ngundikengeme ngudberre bulkkidj mayh nawarlahkenh rowk nawu kare kurorre, dja nadjalwern rowk nawu welyi nawu kare kuwonge, mayh nawarlahkenh rowk nawu kawake kurorre, dja djenj nawarlahkenh rowk nawu kare kukukku, bedda rowk ngudda ngurrbenmarnewohrna.

³ Dja mayh rowk nawu kamimbi ngaye won ngudberre bu ngurringun, yiman bu kerngehkenh ngaye wong ngudberre mankolhdebubuyika, wanjh bolkkime won yehyeng rowk.”

⁴ “Dja ngaleng, yuwn kunkanj ngurringun nawu kunkurlba dorreng, dja kundarrkid karri kore kukurlba.

⁵ Dja bu bininj dja nuk mayh nabang kabibun bininj kakurlbare karrown wanjh woybukkih ngaye ngayime namekbe nunganwali karrown. Kaluk ngayime karrown mayh nawu kabibun bininj bu karrown, dja mak bininj ngayime karrown nawu kabibun nabuyika bininj bu karrown.

⁶ Dja ngaye God marnbom ngudberre bininj, yiman ngaye God rerrih karrirohrok, kunmekbekenh kunu nawu kabibun bininj bu karrown, wanjh namekbe nunganwali bininj kabirribun kabirrikukurrme.

⁷ Dja ngudda, ngurrbenborna wurdwurd birriwern, ngurrimirndewernmerrimen duninj, ngurribaldjalwernhmirndewernworrimen kore kurorre.”

⁸⁻¹⁰ Wanjh God benmarneyimeng Noah dja bebeywurd nuye dorreng, yimeng, “Ngaye ngarayekwon kunwok ngardduk ngawokkurmerren, berrebbun ngudda dja nawu ngurrbenkebmawahme, dja mak nawarlahkenh rowk nawu kamimbi nawu ngurridjarrkni; nawern nawu welyi, mayh kelebuk dja kele, birrimekbe rowk nawu ngurridjarrkbebmerrinj kabbala, nadjalwarlahkenh rowk nawu kamimbi kore kurorre.

¹¹ Ngaye ngarayekwon maninjmanu kunwok ngardduk ngawokkurmerren berrebbun ngudda minj kunyawoyhkudji kundjurrh kabenyawoyhkebnun kabenyakwon rowk nawu kabirrimimbi, minj kunyawoyhkudji kundjurrh kamre nawu kabolkwarrewon rowk kurorre.”

¹² Dja God yimeng, “Kuhni ngurrina kayime ba ngurriburrun bu ngawokkurmerren bu ngaye berrebbun ngudda dja nawarlahkenh rowk nawu kamimbi nawu ngurridjarrkni. Ngawokkurmerren berrebbun ngudberre, kaluk bedda dorreng nawu yerreyerre kabirridangerren djalmunguyh.

¹³ Ngaye nganameng ngalyod ngardduk kore kungol, kunu wanjh ngurriburrun bu ngaye ngawokkurmerrinj berrebbom ngudda dja ngurriwern rowk nawu ngurrini kurorre.

¹⁴ Bu yarrkka ngaye ngamarnbun kungol kawernmerren kore kurorre dja ngalyod kabebme kawarnamyongen kore kungol,

¹⁵ wanjh kunu ngaburrbun bu ngaye ngawokkurmerrinj berrebbom ngudberre dja mak ngurridjalwern birrikukbubuyika nawu ngurridjarrkmimbi. Minj kunyawoyhkudji kukku kabowernmerren kayimerran kundjurrh bu kabenkebnun rowk nawu kabirrimimbi.

16 Yarrkka bu ngalyod kabebme kore kungol wanjh ngaye nganan dja ngaburrbun bu ngaye God ngawokkurrmerrinj djalmunguyh munguyh, bu berrebbom bininj dja mak birrikububuyika rowk nawu ngurrimimbi kore kurorre.”

17 Kunu wanjh God bimarneyimeng Noah, yimeng, “Kunmekbe wanjh kayime ba ngurriburrbun bu ngarayekwong kunwok ngardduk, ngawokkurrmerrinj berrebbom ngudberre rowk nawu ngurridjarrkmimbi rowk kore kurorre.”

Noah Dja Bebeywurd Nuye.

Genesis 9:18-29

18 Nawu Noah birribebeywurd nuyeni nawu birrimbebmeng kabbal-abeh wanjh Shem, Ham dja Japheth. Ham wanjh bibornang Canaan.

19 Birrimekbe wanjh birridanjik nawu Noah nuyeni bebeywurd dja bedda wanjh mawahmawah kadberre karriwern rowk nawu karrihni kubolkbubuyika rowk.

20 Noah wanjh nungka bolkyilkbuni kurorre, dja kaluk dudji manraket manbu grapes.

21 Wanjh bu bonguneng mankalkkid manraketbeh, wanjh mayahmeng, yongohyoy kuklahlarrkni kururk kore dabburlin nuye.

22 Wanjh Ham nawu bibornang Canaan bikuklarrknang kornkumo dja benbenemarneyimeng birridanginj nuye nawu beneni kuberrk.

23 Wanjh Shem dja Japheth benemey manburrba benekurrmeng kukarlang berrewoneng benengorrkang dja benededjkenhdurndi benekukbar-rkbom kornkumo nawu kuklarrkyoy. Benekebborledmeng kubuyika benebolknang ba minj benekuklarrknayi kornkumo.

24 Kaluk bu Noah kodjkerolkknang bu bonguneng mayahmeng, dja bekkang bu nawu beywurd nayahwurd duninj nuye bimarnekurduyime,

25 wanjh Noah yimeng, “Ngadjare kunyid kamre nuye Canaan kakukmarladjmen duninj, karrurkmirri yiman rerrih birrikarremulewam bedberre nawu birridangerrinj.”

26 Mak kuhni warridj Noah yimeng, “Ngaburlume Yawey, nawu God nuye Shem. Kaluk ngadjare Canaan nuye kabirriyimerran kabindimarnerdurrkmirri Shem nuye.

27 Ngadjare God kabimarnebolkwarahwon Japheth*, dja mak ngadjare Japheth nuye nawu kabenkebmawahme, wanjh kabirridjarrkni kore Shem nuye bininj, dja Canaan nuye kabindimarnedurrkmirri Japheth nuye.”

28 Wanjh bu kundjurrh yakminj, wanjh Noah munguyh djahdjalmimbini bu mandjewk 350.

29 Kaluk mandjewk nuyeni rowk bu mimbini wanjh 950, wanjh doweng.

10

Nawu Bebeywurd Nuye Noah Bindibornang Dja Bindikebmawahmeng Bininj Rowk.

Genesis 10:1-32

1 Kuhni kabenyolyolme nawu Shem, Ham dja Japheth bindibornang mak bindikebmawahmeng. Bedda nawu Shem, Ham dja Japheth nawu Noah benbornang, wanjh bindibornang bebeywurd kaluk yerrekah bu kundjurrh yakminj.

* 9:27 Kore Hebrew kunwok “Japheth” kawokyime yiman “kawernmen”.

Nawu Japheth Nuye.

² Nawu Japheth benbornang* bebeywurd nuye wanjh; Gomer, Magog, Madai, Javan, Tubal, Meshech dja Tiras.

³ Nunganwali Gomer benbornang bebeywurd; Ashkenaz, Riphath, dja Togarmah.

⁴ Dja Javan nuyeni bebeywurd bu benbornang wanjh Elishah, Tarshish, Kittim, dja nawu Dodanim.

⁵ Bedda rowk wanjh bindimawahmeng birriwern bininj nawu birrini kore kurrula darnkih dja kore manyunkurrububuyika. Bedda birrik-aberckwernminj, birriyarlarmeng birribebbehwam kore bedman bedberrekunred, birriyawmud duninj birridjarrkni, kore bedman nawu birriredbo duninj, birribebbehdenbubuyika.

Nawu Ham Nuye.

⁶ Dja nawu Ham benbornang bebeywurd nuye wanjh Cush, Mizraim†, Put dja Canaan.

⁷ Nawu nunganwali Cush benbornang Seba, Havilah, Sabtah, Raamah, Sabtecah. Dja nunganwali Raamah benbenbornang bebeywurd nawu Sheba dja Dedan.

⁸ Dja Cush wanjh mawah‡ nuye Nimrod, nawu nungka yimerranj ngudjmakni duninj, benyurhkheng birribuyika bininj rowk kore kurorre birrihni.

⁹ Dja Yawey warridj yimeng bu nungka Nimrod mayhmakni duninj, wanjh kunu bininj birriyimi, “Yiman yerreh Nimrod, nawu Yawey yimi mayhmakni duninj.”

¹⁰ Kunred nuye bu wohrnawohnani, wanjh dedjdjingmey kore kurehred kabolkngeyyo Babel. Kunmekbe kunred kabolkngeyyo warridj Babylon. Dja mak kore kurehred kabirribolkngeyyo Erech, dja Akkad, dja Calneh kore kubolkwarlah kabolkngeyyo Shinar.

¹¹ Dja kumekbe kunredbeh nungka wam kore kabolkngeyyo Assyria. Kumekbe rurrkdundulubom bolkmarnbom kabolkngeyyo Ninevah, dja mak Rehoboth-Ir, dja Calah.

¹² Dja mak kunred Resen bolkmarnbom kaluk kubulkayh kore Ninevah dja Calah. Kunmekbe kubolkkimuk kaluk kururrkwern duninj.

¹³⁻¹⁴ Dja Mizraim nungka mawah nuye bininj nawu birribebbehdi kore namudbubuyika bedberre, kaluk birringeyyoy Lud, dja mak Anam, dja Lehab, Naphtuh, Pathrus, Casluh, dja mak Caphtor. Kaluk nawu bininj namud bedberre ngeyyoy Caphtor, bindikebmawahmeng bininj nawu Philistiabeh.

¹⁵⁻¹⁹ Nawu Canaan nungka wanjh bibornang Sidon nawu nadjdjaman nuye, dja mak nawu nungka Canaan mawahmawah nuye wanjh bininj nawu Heth§ benkebmawahmeng, dja mak bininj nawu birrikang kore kunred Jebus, dja bininj nawu Amor benkebmawahmeng, dja nawu Gergash benkebmawahmeng, dja bininj nawu birringeyyoy Hiv, dja mak bininj nawu Canaan benkebmawahmeng kore namudbubuyika birringeyyoy Ark, dja mak Arvad, dja mak Zemar, dja mak bininj nawu birrikang kore kunred Hamath, dja kore kunred kabolkngeyyo Sin.

Kaluk bedda nawu Canaan nawu birriyawmud duninj birrikaber-
rkwernminj birriyarlarmeng, dja kunred kubolkwarlah kabolkngeyyo

* **10:2** “Benbornang” kunubewu kamenyime “Benkebmawahmeng.” † **10:6** Mizraim kamenyime warridj kunbolk Egypt. ‡ **10:8** “Mawah” kamenyime warridj “Kornkumo” kore bedberre kunwok.

§ **10:15-19** Heth karohrok nawu Hitt.

Canaan wanjh yiman dedjdjngmey kore Sidon, djalwam kore kunbolk Gaza, darnkih kore Gerar, mak kunmekbe djalwam darnkih kore kunbolk-buyika manbu Sodom, Gomorrah, Admah dja Zeboiim. Kaluk burnbom kore kunred kabolkngeyyo Lasha.

²⁰ Bedda wanjh birrimekbe nawu Ham mawah nuyeni nawu bedman birriyawmud duninjh, nawu mak bedman birribebbehjdjenbubuyika, dja kunred bedberre bu birrini, dja nawu birriredbo duninjh.

Nawu Shem Nuye.

²¹ Dja Shem wanjh benedanginj Japheth. Kaluk nungka Shem nawern-warreni. Nungka wanjh mawah bedberre nawu birriwern Hebrew bininj rowk.

²² Shem benbornang bebeywurd nuye wanjh birringeyyoy Elam, Asshur, Arpachshad, Lud dja Aram.

²³ Dja nunganwali Aram benbornang Uz, Hul, Gether dja Meshech.

²⁴ Dja mak Arphaxad bibornang Shelah, dja nunganwali Shelah bibornang Eber.

²⁵ Eber nunganwali benbenbornang bebeywurd bokenh, nawu nakudji wanjh ngeyyoy Peleg (Peleg kunekke kunngay kayime kalarlmuyindan) dja bu nungka ni wanjh birrirorrelarmey. Dja nawu benedanginj wanjh ngeyyoy Joktan.

²⁶⁻²⁹ Nunganwali Joktan benbornang Almodad, Sheleph, Hazarmaveth, Jerah, Hadoram, Uzal, Diklah, Obal, Abimael, Sheba, Ophir, Havilah dja Jobab. Birrimekbe rowk wanjh Joktan nuyeni bebeywurd.

³⁰ Wanjh kunred bedberre kore birrini dedjdjngmey kore kunred Masha, dja djalwamwi darnkih kore kunbolk Sephar kore kubolkduluhdulum kore koyek.

³¹ Bedda wanjh birrimekbe nawu Shem Mawah nuyeni, nawu bedman birriyawmud duninjh, nawu mak bedman birribebbehjdjenbubuyika, dja kunred bedberre bu birrini dja nawu birriredbo duninjh.

Bu Birribebbehmarnburrinj.

³² Kuhni kabenmulewan bininj mawahmawah bedberre nawu Noah benbornang. Nakka birriyawmud duninjh kabirribebbehngeydingeydi, nawu bedman birriredbo duninjh. Dja birrimekbe kaluk kumekbebeh birriwelengmirndeyarlarmeng birribebbehwam, birribebbehmarnburrinj bedmandeleng birriredbo kore kurorre rowk. Kaluk yerrekah bu kundjurrh yakminj.

11

Bininj Birrirurrkdundulubom Manrurrkkuyeng Duninjh Kore Kunred Babel.

Genesis 11:1-9

¹ Kerrngehkenhni bininj rowk nawu birrihni kurorre wanjh birri-wokkudjini, kundjenkudji birridjarrkwodki.

² Kaluk bu bininj birrihrey koyek wanjh birribolkngalkeng kabbal kore kubolkwarlah kabolkngeyyo Shinar, wanjh kumekbe birriyerrkang.

³ Wanjh bedda birrimarneyimerrinj, "Kab karrimarnbu manwern brick, karrikinje kukunak ba karayekmen." Wanjh birribawong kunwardde bu birrirurrkmarnbuni, dja birrimarnbuni manwern brick, dja tar birrib-arungi bu birribelbmi.

⁴ Wanjh birrimarneyimerrinj, "Kab karrimarnbu kadberre kubolkkimuk, dja karrirurrknamen warridj manrurrkkuyeng duninjh

manbu kadjalewi kaddum kungol, ba karringeykukenworren, dja marndi kandikukyarlarre karribebbehre kubolkbubuyika rowk kore kurorre.”

⁵ Wanjh Yawey kumkoluy kanan kubolkkimuk dja manrurrkkuyeng manbu bininj birrimarnbuni.

⁶ Dja nungka Yawey yimeng, “Bedda bininj wanjh birridjalkudji dja birriwokkudjiwi. Kuhni wanjh yiman birridjaldedjdjingmey, dja kunwern mak kaluk kabirrikurduyime warridj, wanjh bonj yehyeng nawu bedda kabirrikarremarnbun, yimankek kabirrikurduyime, wanjh minj kabirrib-arabun.

⁷ Kab ngarrkolung ngarrbendjenborledke ba bu kabirribebbehwokwak-warren dja kabirrimayahmerren.”

⁸ Wanjh Yawey benyarlarrekeng, benbebbehmunkeweng kumekbebeh birribebbehwam kubolkbubuyika rowk kore kurorre, wanjh birribawong bu kubolkkimuk birrirurkmarbnuni.

⁹ Dja kumekbe wanjh Yawey benbebbehdjenborledkeng dja birribebbehmayahmeng. Wanjh kunmekbekenh kunu kabolkngeyyo Babel. Kunekke kunngey kayime “Birrimayahmeng”. Dja mak kumekbebeh Yawey benyarlarrekeng benbebbehmunkeweng birribebbehwam kubolkbubuyika rowk kore kurorre.

Nawu Shem Benkebmawahmeng Kaluk Abram Dorreng.

Genesis 11:10-32

¹⁰ Kuhni wanjh kabenyolyolme nawu Shem benbornang dja benkebmawahmeng. Kaluk yerrekah mandjewk bokenh bu kundjurrh yakminj, kaluk bu Shem nuyeni mandjewk wanjh 100, nungka wanjh bibornang* Arphaxad.

¹¹ Dja bu Arphaxad danginj Shem djahdjalmimbini mandjewk 500, dja benbalbornabornang birribuyika bebeywurd mak ngalbebeywurd.

¹² Bu Arphaxad mimbini bu mandjewk 35 wanjh nungka bibornang Shelah.

¹³ Dja bu Shelah danginj, Arphaxad djahdjalmimbini bu mandjewk 403, dja benbalbornabornang birribuyika bebeywurd mak ngalbebeywurd.

¹⁴ Bu Shelah mimbini bu mandjewk 30, wanjh bibornang Eber.

¹⁵ Dja bu Eber danginj, Shelah djahdjalmimbini mandjewk 403, dja benbalbornabornang birribuyika bebeywurd mak ngalbebeywurd.

¹⁶ Bu Eber mimbini bu mandjewk 34 wanjh bibornang Peleg.

¹⁷ Dja bu Peleg danginj Eber djahdjalmimbini bu mandjewk 430, dja benbalbornabornang birribuyika bebeywurd mak ngalbebeywurd.

¹⁸ Bu Peleg mimbini bu mandjewk thirty nungka bibornang Reu.

¹⁹ Dja bu Reu danginj, Peleg djahdjalmimbini bu mandjewk 209, dja benbalbornabornang birribuyika bebeywurd mak ngalbebeywurd.

²⁰ Bu Reu mimbini mandjewk 32 wanjh nungka bibornang Serug.

²¹ Dja bu Serug danginj, Reu djahdjalmimbini mandjewk 207, dja benbalbornabornang birribuyika bebeywurd mak ngalbebeywurd.

²² Bu Serug mimbini mandjewk 30, wanjh bibornang Nahor.

²³ Dja bu Nahor danginj, Serug djahdjalmimbini bu mandjewk 200, dja benbalbornabornang birribuyika bebeywurd mak ngalbebeywurd.

²⁴ Bu Nahor mimbini mandjewk 29 wanjh nungka bibornang Terah.

²⁵ Dja bu Terah danginj, Nahor djahdjalmimbini mandjewk 119, dja benbalbornabornang birribuyika bebeywurd mak ngalbebeywurd.

* **11:10** Bu Hebrew “bibornang” kayime warridj “bimawahmeng”.

²⁶ Dja Terah bu mimbini mandjewk 70, nungka wanjh benbornang Abram, Nahor, dja Haran.

Bu Abram Danginj.

²⁷ Kuhni wanjh kabenyolyolme nawu Terah benbornang dja benkeb-mawahmeng. Terah wanjh kornkumo bedberre nawu Abram, Nahor dja Haran. Haran nunganwali bibornang nawu Lot.

²⁸ Kaluk Haran doweng kore kunred bolkgeyyoy Ur kore kubolkwarlah bedberre nawu birringeyyoy Chaldea, kumekbe kore Haran danginj. Dja bu doweng wanjh Terah nawu nuyeni kornkumo, nungka wanjh djaldarrkidni.

²⁹ Abram dja Nahor bindibebbehmey ngalbibininjkobeng. Abram nuyeni ngalbininjkobeng kaluk ngeyyoy Sarai, dja ngalbu Nahor nuyeni ngaleng wanjh ngeyyoy Milcah, ngalbeywurd nuyeni Haran. Nungka Haran wanjh kornkumo berrewoneng Milcah dja Iscah.

³⁰ Dja Sarai ngaleng ngalwurdyakni dja ngalwalirrngwarreni.

³¹ Kaluk Terah benmey beywurd nuye Abram, dja Mawah nuye nawu Lot nawu Haran bibornang, dja mak ngalbininjdooy nuye Sarai, ngalbu Abram nuye ngalbininjkobeng, dja birridolkkang birribolkbawong Ur kunred bedberre bininj nawu birringeyyoy birrikang Chaldea, dja birribalbolkyikani kunred kubolkwarlah Canaan, dja bu birribemeng kabolkgeyyo Haran, wanjh kumekbe birriyerrkang birrini.

³² Terah wanjh mandjewk nuyeni 205 bu mimbini, wanjh doweng kore kunred Haran.

12

God Bimunkeweng Abram Kore Bibolkerrebbom.

Genesis 12:1-9

¹ Yawey wanjh bimarneyimeng Abram, "Yibolkbawo kekik kunred, yibenbawo nawu ngurrimud, dja nawu kornkumo ke nuyeni, dja yiray kore kunred kubolkwarlah gaye kaluk bolkbukkan.

² Ngaye kaluk won birrimirndewern bininj nawu ngudda yibenkeb-mawahme, kabirriyimerran birriredbo nawu birrikuken, dja ngaye kaluk marnekurduyime djal kunmak, dja ngaye kaluk ngeykukenwon, dja ngudda yibenmarnekurduyime kunmak bedberre birriwern nawu ngundingeyburrbun.

³ Nawu ngundimarneyime kunmak, wanjh ngayemanwali ngabenmarneyime kunmak. Dja nawu kabirridjare ke kunyid kabirrimarnbun, ngayemanwali ngabenmarnemarnbun kunyid bedberre. Dja kore ngudda ngabenmarnekurduyime kunmak bedberre nawu birribebbehmud rowk kore kurorre kabirrihbebbehdi."

⁴ Kunmekbe bu Yawey bimarneyimeng, wanjh Abram wam, dja nawu Lot benedjarrkwam. Kaluk mandjewk nuyeni Abram wanjh 75 bu nungka bolkbawong Haran.

⁵ Nungka bikang Sarai ngalbu ngalbininjkobeng nuyeni, mak Lot warridj bikang nawu Abram benedanginj Haran biwakwam, dja mak birri-madjkang rowk yehyeng nawu wernworrinj bedberre, dja bininj nawu bindikarremulewani kore Haran nawu bindimarnedurrkmirri. Wanjh bedda birridolkkang birribolkbawong, birribalbolkyikani kubolkwarlah kabolkgeyyo Canaan. Kaluk bu kumekbe Canaan birribolkmey.

⁶ Abram balhdjalbolkyurrhyurrkeyi kore kubolkwarlah Canaan, kaluk bolkmey kore Shechem kore mandulkkuken dulki manu nuyeni Moreh.

Bu kunmekbe wanjh bininj nawu birrikang Canaan birrihdjalyingkihni kore kumekbe kubolkwarlah.

⁷ Kumekbe wanjh Yawey bimarnebukkarrinj Abram, dja bimarneyimeng, “Kondanjkuu kunred kubolkwarlah ngaye kaluk ngabenbolkwon bininj nawu ngudda yibenkebmawahme.” Wanjh kunu Abram marnbom altar kunwardde yiwarrudjkenh Yawey nawu bimarnebukkarrinj.

⁸ Kaluk kumekbebeh nungka Abram djalwam balhbolkyikani kore kuwarddewardde koyekkah Bethel, dja kumekbe dabburlin nameng. Yiman kubulkayh ni, dja Bethel karrikadkah reddi dja Ai wanjh koyekkah. Kumekbe wanjh marnbom altar kunwardde yiwarrudjkenh Yawey nuye dja yiwarrudj di bikayhmeng Yawey nuye kunngey.

⁹ Kaluk wanjh Abram dolkkang bolkbawong balhdjalley walem balbolkyikani kore kabolkngeyyo Negeb.

Abram Wam Kore Kubolkwarlah Egypt.

Genesis 12:10-20

¹⁰ Kaluk kumekbe kunred kubolkwarlah Canaan wanjh djewkwarrewong bolkdarlehminj dja manme birriyawarreni. Dja bu bolkwarreminj duninj, manme birridjalyawarreni bulkkidj, kunu wanjh Abram koluy wam kore kubolkwarlah Egypt ba kumekbe kadjalwohni waken.

¹¹⁻¹² Bu darnkih bebmeng kore Egypt Abram bimarneyimeng Sarai ngalbininj kobeng nuye, yimeng, “Ngaye ngaburrbun bu ngudda daluk yikukmakkaykenh, dja bu bininj nawu Egyptbeh ngundinan kaluk kabiriyime bu ngudda ngalbininj kobeng ngardduk, wanjh kunu ngandibun ngarrowen, dja ngudda ngundibawon yirrarrkid.

¹³ Wanjh yibenmarneyimen bu ngudda ngarrdanginj, ba ngandinahan ngandimarneyime kunmak nguddakah, dja mak minj ngandibun, ngandibawon ngarrarrkid nguddakah.”

¹⁴ Wanjh bu Abram bebmeng kore Egypt, kaluk bininj nawu Egyptbeh birrinang bu ngalmekbe daluk ngalkukmakkaykenhni duninj.

¹⁵ Bu bininj birringeykimuk nawu birrimarnedurrkmirri Pharaoh nawu nungka king wohnani kore Egypt, bu bedda birrinang wanjh birrikuburlumeng kore Pharaoh, dja birrimey birrikang kore Pharaoh kunrurrk nuye.

¹⁶ Kumekbekenh kunu Pharaoh bimarnekurduyimeng Abram kunmak ngalengkah, dja biwong Abram sheep, bulikki, donkey nawu narahrangem dja ngaldahdaluk, dja mak bininj dja daluk nawu birrimarnedurrkmirri, dja mak mayh nawern nawu camel.

¹⁷ Wanjh Yawey benmarnemarnbom kunyid bedberre Pharaoh dja nawu birrihdjarrkni kore kunrurrk nuye, kunkihkimuk kundjak benhmangi, bu Saraikenh ngalbu Abram nuyeni ngalbininj kobeng.

¹⁸ Wanjh Pharaoh bikayhmeng Abram, dja bimarneyimeng, “Njale bu kuhni kanmarnekurduyimeng? Njalekah minj kanmarneyimeninj bu ngaleng ngalbininj kobeng ke?”

¹⁹ Dja njalekah yiyimeng bu ngaleng ngunedanginj ba kunu ngaye ngamey ngamarnbom ngalbininj kobeng ngardduk? Yina, ngahli wanjh ngalbininj kobeng ke, yika mak yidjallaywi.”

²⁰ Pharaoh benwokrayekwong bininj nuye Abramkah, dja bedda birrimunkeweng ngalbininj kobeng dorrengh nuye, dja mak yehyeng rowk nawu karm.

13

Abram Dja Lot Benebaworrinj Benebebbewam.

Genesis 13:1-18

1 Wanjh kunmekbekenh kunu Abram bolkbawong Egypt, wanjh dolkkang wam kore Negeb, nungka mak ngalbininj kobeng nuye dja yehyeng rowk nawu karrmi, dja Lot warridj birridjarrkwam.

2 Abram wanjh nungka wernhkukenminj, kaluk karrmi nawern mayh, dja mak money yiman silver dja gold.

3 Abram renghehrey yeledj, Negeb bolkbawong, djalwam kore Bethel, dja bebmeng kured kubulkayh kore Bethel dja Ai, kore kerrngehkenhni nameng dabburlin nuye.

4 Kaluk kumekbe kunu kore kerrngehkenh altar marnbom kunwardde yiwarrudjkenh. Wanjh kumekbe Abram yiwarrudj yawoyhdanginj biyawoyhkayhmeng Yawey kunngey nuye.

5 Dja Lot nawu benedjarrkrey Abram, nungka mak karrmi mirndewern mayhbubuyika dja mak dabburlin nawern.

6 Minj bolkmakniwirrinj, minj manwern manme diwirrinj bu yimankek benedjarrkniwirrinj, dja nawern yehyeng benebebbekarrmi, wanjh kunu kunmekbekenh minj benedjarrkniwirrinj.

7 Wanjh kunyid ngalmeng berrewoneng bininj nawu bindimarnedurrk-mirri, kaluk bedman nawu Abram birrimarnenahnani mayh, dja mak bedman nawu Lot nuye birrimarnenahnani wanjh birridangwerreni. Kaluk kumekbe bininj nawu birrihyingkihni kumekbe kunred kubolkwarlah wanjh birrikang Canaan, dja mak bininj nawu birringeyyoy Periz nuye.

8 Wanjh Abram bimarneyimeng Lot, "Yuwn ngarrdurren ngudda ngaye, dja yuwn mak kabirridurren ngudda ke bininj nawu mayh kabirrinahnan dja ngardduk bininj, dja ngad wanjh ngarrmud.

9 Dja yiddok minj yibolknan kabolkwarah, ngarrkuklarlmirra ngarrebbehre. Bu ngudda yibolkdjarrngbun yire kudjakku wanjh bonj ngaye ngare kukun, dja bu ngudda yibolkdjarrngbun yire kukun, wanjh bonj ngaye ngare kudjakku."

10 Wanjh Lot bolknang rowk kabbal kanjdjikanjdji ngarre Jordan mankabo, dja nang bokimukni, dja yiman kayime njilhmi karrmi kubolkwarlahkenh djahdjalley darnkih kore Zoar, bolkrohrokni yiman kayime bu kore manme Yawey dudji kore Eden, dja yiman kayime kubolkwarlah Egypt warridj. Dja bu kunmekbe Yawey minj bangmebolkbularrbuyinj Sodom dja Gomorrah.

11 Wanjh kunu Lot bolkdjarrngbom kunmekbe kabbal rowk ngarre kanjdjikanjdji Jordan mankabo, dja djahdjalej koyek, wanjh kunu kunmekbe benebebbemunkewerrinj.

12 Abram wanjh ni kore kubolkwarlah Canaan, dja Lot ningihni kore kubolkkihkimuk kanjdjikanjdji kore kabbal ngarre Jordan mankabo. Kaluk nungka nameng dabburlin nuye darnkih kore kunred Sodom.

13 Dja bininj nawu birrihni kore Sodom bedda wanjh birrihdjalkadjungi kunwarre, birrihmarneyimi Yawey kunwarre duninj.

14-15 Bu Lot bibawong, wanjh kalukburk Yawey bimarneyimeng Abram, yimeng, "Kore yihdi, wanjh yibolkna kakbi, walem, koyek mak karrkad, kumekbe rowk djarreh kore yihbolknan, kaluk ngaye bolkwon ngudda dja nawu ngudda ke yibenkebawahme, kabirribolkkarrme djalmunguyh munguyh.

16 Dja ngaye kaluk ngabenmarnbun ngudda ke nawu yibenkebawahme kabirrimirndewernmerren duninj, yiman kayime kundjulng

rerrih kabirrimirndeyimerran. Bu yiman bininj kamirnderohrokme kundjulng ngarre kurorre, wanjh ngudda ke nawu yibenkebmawahme yimankek bedmanwali kabindimirnderohrokme.

¹⁷ Wanjh yirrolkka, yidjallay kubolkbubuyika djarreh kore kuninjkuu kubolkwarah, kunmekbe yikurdyuimen dja ngaye bolkwon ngudda.”

¹⁸ Kuu Abram madjwabheng dabburlin nuye dja wam ni kore darnkih oak dulkingihdi mandulkkuken nuye Mamre kore Hebron, dja kumekbe Abram marnbom altar kunwardde yiwarrudjkenh Yawey nuye.

14

Abram Bimdurndiweng Nawu Lot.

Genesis 14:1-16

¹ Kaluk bu kumekbe wanjh kunkarrngbakmeng kings birriwohrnani. Bedda nawu Amraphel nawu wohrnani kore kabolkngeyyo Shinar, dja mak Arioch nawu wohrnani kore kabolkngeyyo Ellasar, Kedorlaomer nawu wohrnani kore Elam, dja Tidal nawu wohrnani kore Goyim.

² Wanjh bedda birrimarnbom kunyid, bindibuni birribuyika kunbidkukudji nawu birribuyika kings, kaluk Bera nawu wohrnani kore Sodom, Birsha nawu wohrnani kore Gomorrah, Shinab nawu wohrnani kore Admah, Shemeber nawu wohrnani kore Zeboim, dja mak king nawu wohrnani kore Bela, kumekbe kunred warridj kabolkngeyyo Zoar.

³ Birrimekbe nawu kunbidkukudji kings birriwokmarnburrinj birriraworrinj kabirribidyikarrmerrenkenh kore kanjdjikanjdji ngarre Siddim, kore bolkkime kabongeyyo “Kurrula Manbu Manbodjirla”.

⁴ Nawu Kedorlaomer benmarnbom birrimekbe kings bu birrimarnedurkmirri kunkuyeng yiman 12 mandjewk, dja bu mandjewkbuyika thirteen, bedda wanjh birriwarnyakminj, minj birriyawoyhmarrkmayi.

⁵ Wanjh bu mandjewkbuyika fourteen, Kedorlaomer dja bedman nawu birriwokmarnburrinj kabirribidyikarrmerrenkenh, wanjh birrimwam miwadj dorreng bedberre, dja bindibom bininj nawu birringeyyoy Rephaim kore kunbolkbolkngeyyoy Ashteroth-Karnaim, dja mak bindibom bininj nawu birringeyyoy Zuz kore kunred nuye Ham, dja mak bindibom bininj nawu Em benkebmawahmeng kore kunbolkbolkngeyyoy Shaveh-Kiriathaim.

⁶ Dja mak bindibom bininj nawu Hor benkebmawahmeng kore kuwarddekimuk ngarre kunbolk Seir, wanjh bedda rowk bindibuni, birrihdjalwam kaluk birriburnbom kore kunred El-Paran kore darnkih kubolkdarleh.

⁷ Bu bindibom rowk wanjh birridurndi kore En-Mishpat, kumekbe kunred warridj kabolkngeyyo Kadesh, wanjh bindibom bindimarnebolkmarnladjwong kunred bedberre bininj nawu Amalek birringeyyoy dja mak nawu Amor benkebmawahmeng birrihni kore kunred Hazazon-Tamar.

⁸ Wanjh kumekbe kunbidkukudji kings nawu birriwohrnani kore Sodom, Gomorrah, Admah, Zeboim dja Bela Zoar, wanjh bindimey miwadj bedberre birriraworrinj ba bu kabirriburren kore kanjdjikanjdji ngarre Siddim.

⁹ Wanjh bindibuni Kedorlaomer nawu king wohrnani kore Elam, Tidal nawu wohrnani kore Goyim, Amraphel nawu wohrnani kore Shinar, dja Arioch nawu wohrnani kore Ellasar, kaluk bedman nawu kunkarrngbakmeng kings wanjh bindibalbuni nawu bedman kunbidkukudji king.

¹⁰ Kaluk kumekbe kore kanjdjikanjdji ngarre Siddim wanjh kudjorlok-wernni, kore mankalkkid bitumen kalkkidyongoyoy, dja bu king nawu benewohnani kore Sodom dja Gomorrah bu bedda benekelerlobmeng,

yikahwi bininj berrewoneng birrimakang kore kudjorlohjdjorlok, dja birribuyika birrikelerlobmerrinj kore birriwarddebidom kuwarddewardde.

¹¹ Dja nawu bedman kunkarrngbakmeng kings nawu birridjarrkrey nawu bindiwiidnani bindibom, wanjh birrikang rowk yehyeng bedberre bininj nawu birrihni kore Sodom dja Gomorrah, dja manme rowk bedberre birrikang dja birriwam.

¹² Dja warridj birridarrkidmey dja birrikang Lot, nawu Abram benedanginj biwakwam, nawu nungka kumekbe ni kore Sodom, dja mak birrikang nawu yehyeng nuye wanjh birridjarrkewam.

¹³ Kaluk nakudji nawu kelerlobmeng, wam bimarneyimeng Abram nawu Hebrew bininj. Dja Abram ni darnkih kore mandulkkuken dulkdingihdi nuyeni Mamre nawu bininj bedberre birringeyyoy Amor, nawu birridanginj Eshcol dja Aner, dja nawu bedda birriwokmarnburrij Abram kabirribidyikarmmerrenkeh.

¹⁴ Bu Abram bekkang bu nungka nawu benemud birrikelehmeng birimey birrikang, wanjh nungka benkayhmeng 318 bininj nawu birriburrbuni bu kabirriburrenkeh, nawu bedda birridanginj kore nungka Abram kunred nuye, dja wanjh bedda bindikadjuy, birridjalwam kore kunred Dan birribebmeng.

¹⁵ Dja bu kukak Abram benlarlmey bininj nuye nawu birriburreni, wanjh bindibom bindikadjuy kore kunred Hobah birribebmeng, kaluk kakkikah kunred Damascus.

¹⁶ Dja nungka Abram durndiweng rowk yehyeng, dja mak bimdurndiweng Lot nawu namud nuye dja mak yehyeng nawu Lot nuyeni, dja mak morlehmorlenj dja birribuyika bininj nawu bindikang.

Nawu Melchizedek Bimarneyimeng Kunwok Kunmak Nuye Abram.

Genesis 14:17-24

¹⁷ Wanjh bu Abram kumdurndi bu benbom Kedorlaomer dja birribuyika kings nawu nungka birribidyikarmmerreni, wanjh king nawu wohrnani kore Sodom kumbebmeng kabirrabke kore kanjdjikanjdji ngarre kunred Shaveh, kaluk kumekbe kunngey kamenyime, "King nuye Kanjdjikanjdji".

¹⁸ Wanjh Melchizedek nawu king bu wohrnani kore kunred Salem, nungka kumyibebmeng buriddi dja wine, nungka wanjh priestni yiwarrudj dingihdi nuye God nawu Kawernhwohrnan duninj.

¹⁹ Wanjh nungka Melchizedek kunmak kunwok bimarneyimeng Abram, yimeng, "Ngadjare God ngunmarnekurduyime kunmak Abram, nawu nungka God Kawernhwohrnan duninj, nawu bolkmarnbom kaddum dja kurorre.

²⁰ Dja ngaburlume God nawu Kawernhwohrnan duninj nawu ngunbidyikarmmeng yibenbom nawu ngundiwiidnani." Wanjh Abram yiman larlmey yehyeng rowk nawu mey dja ten madjyoy, wanjh nakudji kore tenbeh Abram bimadjwoyi Melchizedek.

²¹ Dja namekbe king nawu wohrnani kore Sodom yimeng, "Kanwo ngaye nawu bininj rowk ngardduk, dja nawu yehyeng, wanjh ngudda yidjalkarmmen yingan ke."

²²⁻²³ Dja Abram bimarneyimeng namekbe king nawu wohrnani kore Sodom, yimeng, "Ngaye ngabidwayhmeng nuye Yawey God naw-ernhkuken duninj nawu bolkmarnbom kaddum dja kurorre, dja ngawokkurrmerrinj nuye kunwok kunrayek duninj, ngayimeng bu minj njale ngaye ngakan nawu ngudda ke, minj mak ngawohkan kunyarl kunkudji, dja mak kunyarl ngarre nawu yirrengedjongburren, minj

ngakan ba minj ngudda kaluk yiwohyime bu marndi yimankek ngudda kankukenhmeng.

²⁴ Minj njale ngakan, djal bonj ngakang nawu bininj ngardduk birringuneng, dja nawu yilarmang yibenwon bedberre bininj nawu ngarridjarrkwam yiman Aner, Eshcol dja Mamre, bedda yibenwo nawu bedberre.”

15

Bu God Wokkurrmerrinj Biberrebbom Nawu Abram.

Genesis 15:1-21

¹ Kaluk rerrikah, Yawey nuye kunwok bimarnebebmeng Abram bu yiman biwaralnani rerrih, bu nungka Yawey yimeng, “Abram, yuwn yikele, dja ngaye yiman ngakandename ke, ngabenggurdku bu yimankek ngundibun, dja kaluk ngaye karremulewan bu kunkimuk duninjh.”

² Dja Abram yimeng, “Aba, ngudda Yawey nawu yidjalwohrnan rowk, kaluk njale yimankek ngudda kanwon, dja ngaye munguyh wurdyawyak ngahre, dja ngawakwan wanjh Eliezer nawu nakang Damascus wanjh kamang ngardduk yehyeng?”

³ Mak Abram yimeng, “Yina, ngudda minj wurdyaw kanwoyi, wanjh kunu nakudji nawu nganmarnedurrkmirri nungka wanjh kamang rowk ngardduk bu ngawakwan.”

⁴ Wanjh kaluk kuninjkuwu kunwok Yawey bimarneyimeng, yimeng, “Minj nungka kamang nawu ke yehyeng, dja yingan ke wurdyaw nawu kaluk rerrikah yibornan kore kunburk ke, namekbe kaluk kamang rowk.”

⁵ Dja Yawey bibekeng Abram kuberrk dja yimeng, “Kaddum yingolna, wardibu yimirnderohrokmen mankokkarrng? Wanjh nawu ngudda yibenkebmawahme yiman kunmekbe rerrih kabirrimirndeyimerran!”

⁶ Wanjh Abram biwoybukwong Yawey bu bimarneyimeng, wanjh kunmekbekenh Yawey yimeng, “Abram nungka namak kore ngaye.”

⁷ Mak Yawey bimarneyimeng, “Ngaye wanjh Yawey nawu bebkeng kunredbeh bolngeyyoy Ur, kore bininj nawu Chaldea kabirriini, djahd-jalmikani ba bolkwon kondanjkuwu kunred kubolkwarlah yibolkkarrme.”

⁸ Dja Abram yimeng, “Ngudda Yawey nawu yidjalwohrnan rowk, kaluk baleh kayimerran ba ngaburrbun bu ngaye ngabolkwang rowk?”

⁹ Wanjh Yawey bimarneyimeng, “Kanmarneka bulikki ngaldaluk, mak goat ngaldaluk, dja sheep narangem, kaluk mandjewk bedberre wanjh danjbik, dja yimka warridj dordodorok dja mak korlobok yaw.”

¹⁰ Wanjh Abram benmey rowk bimarnekang wanjh benkukwarlaybom benbebbekukwarlaykurrmekurrmeng, dja nawu mayhmayh minj benbenekukwarlabuyi dja benbenedjalkukmokenkurrmeng.

¹¹ Wanjh bu marram kumkoluy kore mayh kukyohkukyoy, wanjh Abram benkelehmeng.

¹² Bu balhdungyibmi Abram keyonginj wanjh kerroweng duninjh, wanjh yiman kundulmuk kunkak bibarrkbom bikelehmeng duninjh.

¹³ Wanjh Yawey bimarneyimeng, “Kuninjkuwu wanjh yiburru bu woybukkih nawu ngudda ke yibenkebmawahme kaluk kabirridjalwohni kore kunred kubolkwarlah minj bedman bedberrekih, dja birribuyika kabindibongkarrme dja kabindimarbnun kabirridurrkmirri bedberre, dja kabindimarneyime kunwarre yiman kabindikuyindombuyhwe bu mandjewk 400.

¹⁴ Dja ngaye kaluk ngabendung birrimekbe nawu birriredbo nawu kabindimarnedurrkmirri, dja kaluk rerrikah ngudda ke bininj kabirrim-bebme, nadjalwern duninj yehyeng dorreng kabirrimyibebme.

¹⁵ Dja nguddambu, bonj, ngudda kaluk yirrowen kore yiwernhkhoban-jen duninj dja ngundikukdudjeng. Kaluk yimalngre kore mawahmawah ke birriyngkihmalngdokmeng, kaluk kunmodmikenh dorreng.

¹⁶ Kaluk bu ngudda yibenbornan, dja bedmanwali kabindibornan, dja bedmanwali kabindibornan, dja mak bedmanwali, wanjh kaluk kunmekbe wanjh ngudda ke nawu yibenkebmawahme kabirrimdurndeng kondah, dja med rerrih, bininj nawu Amor benkebmawahmeng minj bangmewernhwernmerrimeninj kunwarre bedberre.”

¹⁷ Wanjh bu dungyibmeng dja ngokdanj, kaluk bebmeng djabbirlana kunakkenh kaluk kundolng dorreng, mak kunkong manbu manwoldjen dorreng, wanjh bu benebemeng wanjh benewam kubulkayh kore kukdakukdarrahyoy.

¹⁸ Wanjh bu kundjalmekbe kunbarnangarra Yawey wokkurmerrinj bimarneyimeng Abram biberrebbom, yimeng, “Kaluk ngudda ke nawu yibenkebmawahme ngaye ngabenbolkwon kondanjkuu kunred kubolk-warlah, kabolkdedjdingmang kore mankabo ngarre Egypt, kadjalewi kabolkburnbun kore mankuken mankabo manbu Euphrates.

¹⁹⁻²¹ Kaluk kunred kubolkwarlah bedberre nawu Ken benkebmawah-meng, dja nawu Keniz benkebmawahmeng, dja nawu Kadmon benkebmawahmeng, dja mak ngabenbolkwon ke mawahmawah bedberre kunred nawu Heth benkebmawahmeng, nawu Periz benkebmawahmeng, nawu birringeyyoy Reph, dja mak bininj nawu Amor benkebmawahmeng, dja mak bininj nawu birrikang Canaan, dja nawu Girgash benkebmawah-meng, dja mak bininj nawu birrikang Jebus.”

16

Ngalbu Hagar Biyawmey Ishmael.

Genesis 16:1-16

¹ Kaluk Sarai ngalbu Abram ngalbininj kobeng nuye minj bimarneyaw-mayi. Dja Sarai bikarmeng ngalkudji ngalyawk ngalbu Egyptbeh ngalbu Sarai bimarnedurrkmirri, dja ngaleng wanjh ngeyyoy Hagar.

² Wanjh Sarai bimarneyimeng Abram, yimeng, “Yina, Yawey wanjh nganarnbom minj ngayawmang, wanjh yima ngalbu nganmarnedurrk-mirri, dja nguneyuwn, kunubewu ngaleng kayawmang wanjh namekbe ngaye ngardduk wurdyaw.” Wanjh Abram biwokmarrkme bu Sarai bimarneyimeng.

³ Wanjh kunu bu Abram ni kore kubolkwarlah Canaan bu mandjewk ten, Sarai ngalu ngalbininj kobeng nuye bikang ngalbu bimarnedurrkmirri ngalbu Egyptbeh, dja biwong Abram kabeneyo.

⁴ Wanjh beneyonginj dja kaluk Hagar yawkani.

Dja bu Hagar narrinj wurdyaw kahkan wanjh kunu biwidnani Sarai ngalbu bimarnewohnani.

⁵ Wanjh Sarai bimarneyimeng Abram, yimeng, “Ngudda welengname bu ngaleng nganwidnan, ngaye wong ngardduk ngalbu nganmarnedurrk-mirri nguneyonginj, dja bolkkime bu ngaleng narrinj wurdyaw kahkan, wanjh ngaye nganwidnan. Ngadjare Yawey kandjadme ngarrku, kayime nangale warrewong, ngaye dja kunubewu ngudda.”

⁶ Wanjh Abram bimarneyimeng Sarai, yimeng, “Yina, ngaleng wanjh nguddah ke bu ngunmarnedurrkmirri, yimarnekurduyimen nawu ngudda

vidjare.” Wanjh Sarai binjilngwarrewoni bulkkidj, wanjh kunu Hagar kelerlobmeng bibawong.

⁷ Kaluk nawu angel nuye Yawey bingalkeng Hagar kore kukku manbu njilhmi kore kubolkdarlehni, kaluk manmekbe manbu njilhmi, kaluk darnkih kore manbolh manbu kahre kore kabolkngeyyo Shur.

⁸ Wanjh angel yimeng, “Hagar, ngudda ngalbu yimarnedurrkmirri Sarai, balehbeh yimwam, dja baleh yire?” Ngaleng yimeng, “Ngaye ngakelerlobmeng ngabawong Sarai ngalbu nganmarnewohrnan.”

⁹ Wanjh angel nuye Yawey bimarneyimeng, “Yirrunde kore ngaleng ngalbu ngunmarnewohrnan dja yiwokmarrkma kore ngaleng ngunmarneyime.”

¹⁰ Mak angel yimeng, “Ngaye wanjh Yawey. Ngaye ngamirndewernwon nawu ngudda ke nawu yibenkebmakkahme, dja kabirrimirndewernmerren, minj nangale kabemirnderohrokme.”

¹¹ Mak kuhni warridj angel nawu Yawey nuye bimarneyimeng, “Yina, ngudda wanjh bolkkime yihkan wurdyaw, kaluk yiyawmang narangem, yingeykurrmen Ishmael, dja Yawey bekkang ngudda ke kunnjilngwarre.”*

¹² “Kaluk nungka kayimerran bininj nawu yiman donkey nawu kele, nungka yiman kabenwidnan birribuyika, dja birribuyika kabirriwidnan, dja nungka kayidngalngalke bedberre rowk nawu birridanginj.”

¹³ Wanjh Hagar bingeykurrmeng Yawey bimarnewokdanj, bingeykurrmeng, “Ngudda wanjh God nawu ngarrinan.” Dja ngaleng yimeng, “Ngaye wanjh nganang namekbe nawu ngannan dja minj kanbuyinj.”

¹⁴ Wanjh kunmekbekenh kunu ngaleng bongeykurrmeng kunnad manbu boyoy, bongeykurrmeng. “Kungad nuye nawu kadjalmimbi munguyh dja nganhnan ngaye.”† Kadjalboyoy munguyh kumekbe kubulkayh kore Kadesh dja Bered.

¹⁵ Wanjh Hagar bimarneyawmey Abram beywurd nuye, dja Abram bingeykurrmeng Ishmael.

¹⁶ Abram wanjh mandjewk nuyeni 86 bu Hagar bimarneyawmey Ishmael.

17

God Nawu Yawey Yawoyhwokkurrmerrinj Bedberre Abram Dja Nawu Nungka Benkebmawahmeng.

Genesis 17:1-9

¹ Kaluk bu Abram mandjewk nuyeni yimerranj 99, wanjh Yawey bimarnebukkarrinj dja yimeng, “Ngaye wanjh El-Shaddai.* Ngudda kanwokma, dja munguyh yidjalkurduyimen mandjad bu kundjalmak.

² Ngaye ngawokrayekworren kore ngawokkurrmerren dja berrebun ngudda, dja ngaye ngabenmirndewernwon bulkkidj nawu ngudda yibenkebmawahme.”

³ Wanjh Abram mankang kunkeb bolkdoy kurorre, dja God bimarneyimeng.

⁴ “Dja ngayambu, kuhni wanjh ngardduk bu ngawokkurrmerren berrebun ngudda, wanjh ngudda kaluk yiyimerran Mawah bedberre birribebhemirndewern nawu birriredbobubuyika.

⁵ Bonj yingeyyoy Abram†, dja yidjalngeyyo Abraham, dja ngaye marnbun

* **16:11** Kunngey Ishmael, kayime “God nganbekkabekkan.” † **16:14** Kore Hebrew ngeykurrmeng “Beer Lahai Roi”. * **17:1** Mahni Hebrew kunngey kayime “God nawu Ngarrulkkarrekimuk Duninjh”. † **17:5** Kunngey Abram kayime “Kornkumo Nangeykimuk.”

ngudda bu yiyimerran Mawah bedberre birribebbemirndewern nawu birriredbo. †

6 Ngaye marnbun bu birriwern duninj yibenkebawahme, kaluk ngaye marnbun yiyimerran birribebbemirndebubuyika birriredbo, dja kings kabirrimbebmerren kore nguddahbeh nawu yibenkebmawahme.

7 Dja mak ngaye ngarayekwon kunwok ngardduk ngawokkurrmerren ba minj kawokyakmen kore ngaye berrebbun ngudda dja nawu yibenkebmawahme rowk bu djalmunguyh munguyh. Ngaye wanjh ngadjalyime God ke dja mak bedman bedberre God, nawu kaluk yibenkebmawahme.

8 Kondah kubolkwarlah Canaan kore bolkkime ngudda wakewaken yidjalwodjalwohre, wanjh ngaye kaluk bolkwon kondanjkuu kubolkwarlah rowk, ngudda dja nawu yibenkebmawahme, ngudda ngurridjalbolkkarme bu munguyh, dja ngaye ngadjalyime God bedberre bedda dorrengh nawu yibenkebmawahme.”

9 Wanjh God bimarneyimeng Abraham, “Ngudda wanjh kanwokkarmen kunwok ngardduk bu ngawokkurrmerrij berrebbom ngudda, dja nawu yibenkebmawahme bedmanwali ngandiwokkarme djalmunguyh.”

*Bu Yawey Benbengdayhkeng Kabirrilakkayenworrenkenh.
Genesis 17:10-14*

10 Dja mak God bimarneyimeng Abraham, “Kuhni wanjh ngardduk kunwok bu ngawokkurrmerrij bu berrebbom ngudda dja nawu yibenkebmawahme, nawu kunwok ngudda kandiwockarme. Kaluk narahrangem rowk nawu ngurridjarrkni nanu wanjh ngurridjallakkayenworrimen.

11 Ngurriwern ngurrilakkayenworrimen rowk, kuhni wanjh ngurrimulewarren bu ngaye ngawokkurrmerrij ngudda berrebbom.

12 Djalmunguyh nawu rerrererre kabirridangerren narahrangem rowk nawu ngurrini kaluk ngurrbenlakkayenwo rowk, bu kabirriyawdangen kaluk kunkodjke eight bedberre, ngurrbenlakkayenwo rowk, kaluk bedda dorrengh nawu ngundimarnedurrkmirri ngudberre nawu minj ngudberre Mawah, kaluk nawu bedman kabirridangen kore kured ngudberre ngurrini, dja mak bedman nawu ngurrbenkarremulewan ngurrbenwon kunwardde birriwokbubuyika.”

13 “Bedda wanjh ngurrbenlakkayenwo rowk nawu ngundimarnedurrkmirri, nawu kabirridangen kore ngurrini dja mak nawu ngurrbenkarremulewan. Kuhni bu ngurrikurduyime wanjh kunwok ngardduk bu ngawokkurrmerrij bu berrebbom wanjh yiman kawokbimbuyindangen kuburr ngudberre djalmunguyh.

14 Kaluk narangem nawu minj ngurilakkayenwon wanjh nungka kayimerran yiman minj ngurrimud, dja nungka wanjh bakkeng kunwok ngardduk bu ngawokkurrmerrij berrebbom.”

*God Wokkurrmerrij Bu Ngalbu Sarai Kabimarneyawmang Abraham.
Genesis 17:15-22*

15 Dja mak God bimarneyimeng Abraham, yimeng, “Ngalbu ngalbininj kobeng ke Sarai, bonj yingeybun Sarai, dja kaluk kadjalngeyyo Sarah. §

† 17:5 Kungey Abraham kayime “Nawu Benbornnang Birriwern.” § 17:15 Kungey Sarah kayime “Ngalbu king bibornnang.”

16 Ngaye kaluk ngamarnekurduyime kunmak dja woybukkih ngaye won beywurd ke, bu ngaleng ngunmarneyawmang. Ngaye ngamarnekurduyime kunmak ba kayimerran Makkah bedberre bininj nawu birribebbehmirndewern birriredbobuyika, dja ngaleng nawu kabenkebmakkahme wanjh kumekbebeh kabirrimbeberren kings nawu kabindimarnewohrnan bininj nawu birribebbehmirndewern.”

17 Wanjh Abraham mankang kunkeb bolkdoy kurorre djekmeng dja nungan baybaywi yimeng, “Yiddok bininj kayawbornan beywurd bu mandjewk nuye one hundred? Dja yiddok Sarah kayawmang wurdyaw bu mandjewk ngalenggarre ninety?”

18 Dja Abraham bimarneyimeng God, yimeng, “Bonj, yiddok minj yidjalbawon Ishmael ngardduk beywurd? Kamak bu nungka dorreng yimarnekurduyime kunmak.”

19 Dja God yimeng, “Burrkyak, dja Sarah ngalbininj kobeng ke ngaleng woybukkih ngunmarneyawmang beywurd, kaluk ngudda yingeykurmen Isaac.* Wanjh ngamarnerayekworren nuye kunwok ngardduk dja minj kayakmen, kaluk ngawokkurmerren ngaberrebbun nungka dja nawu kabenkebmawahme djalmunguyh munguyh.

20 Dja wanjh Ishmael nawu, ngaye bekkang bu ngudda kandjawam Ishmaelkah. Yina, woybukkih ngaye kaluk ngamarnekurduyime kunmak, dja ngamarnbun birriwern kabenbornan, dja ngamirndewernwon duninj nawu kabenkebmawahme. Nungka kaluk Mawah bedberre twelve nawu kabindimarnewohrnan birrimirndebubuyika bininj nawu twelve birriredbo, dja ngaye ngabenmarnbun nungka nuye nawu kabenkebmawahme kabirriyimerran birriredbo nawu birriken.

21 Dja ngaleng manbu kunwok ngardduk ngarayekwon, kaluk ngawokkurmerren ngaberrebbun Isaac nawu Sarah kaluk ngunmarneyawmang, bu ngaye ngarrungname bu dird twelve kayakmen.”

22 Kuhni rowk God yakwong kore Abraham benewokdi, wanjh bibawong bidbom.

Abraham Benlakkayenwong Nawu Bininj Nuye.

Genesis 17:23-27

23 Wanjh kundjalmekbe kunbarnangarra Abraham bikang Ishmael nawu beywurd nuye, dja mak benkang rowk bininj nawu birrimarnedurkmirri, bedman nawu birridanginj kore kured nuye, dja mak bedman nawu karremulewam bedberre, kunwardde benwong birribuyika, kaluk nararangem rowk nawu birrini kured nuye, wanjh benlakkayenwong rowk. Kuhni kurduyimeng bu God bimarneyimeng.

24 Abraham nungka wanjh mandjewk nuyeni bu birrilakkayenworrinj wanjh 99,

25 dja mak bilakkayenwong beywurd nuye nawu Ishmael, dja nungka wanjh thirteen bu mandjewk nuye.

26 Kundjalmekbe kunbarnangarra Abraham dja Ishmael nawu nuye beywurd benedjarrklakkayenminj,

27 dja mak bininj rowk nawu birrini kured nuye, bedda dorreng nawu birrimarnedurkmirri, bedman nawu birridanginj kured nuye dja bedman nawu birriwokbuyika benmarnekarremulewam, bedda rowk birridjarrklakkayenminj Abraham dorreng.

* 17:19 Kungey Isaac kayime “Nungka kadjekme.”

18

Nawu Birridanjik Angels Birribemeng Kore Abraham Dja Sarah.

Genesis 18:1-15

¹ Kaluk Yawey biyawoyhmarnebukkarrinj Abraham bu nungka reddi kore mandulkkuken dulkdingihdi nuyeni Mamre. Kaluk barnan-garraburrrk bu wernhdungbahbangni, bu Abraham ni kore kururrkdan-gmaye ngarre dabburlin nuye.

² Wanjh nungka balwohnang bennang bininj danjibk kabirrihdi darnkih nuye. Bu nungka bennang wanjh nungka rlobmeng kumekbe kururrkdan-gmayebeh, bendabkeng dja boddanj kanjdji kurorre.

³ Dja yimeng, "Ngudda nawu ngurriwohrnan, bu ngudda ngurriyime yimankek ngamak, yuwn kandibangmebawon gaye nawu ngamarladj, dja med karridjalwohnin.

⁴⁻⁵ Bu ngudda kandidjalwohmarnebebmeng gaye nawu ngahdurrrk-mirri ngudberre, dja bu ngurrihwirle ngurrihre wanjh kab ngabomang kukku kunboyahwurd ngurridengedjirridjburren dja ngurridjalwohngemen kore kudjurle, dja ngare ngamang manme manyahwurd, ngamkan ngudberre ngurringun, ba ngurringudjmakmen wanjh kunu ngurrire." Bedda birriyimeng, "Mah, kunmekbe yikurduyimen."

⁶ Wanjh Abraham doktorokmeng durndi kore Sarah kore dabburlin, dja bimarneyimeng, "Werrkwerrk yirruuran manwern kandidjdjawa manduyh, yikarrmen yikinjemen manlodkilehkilek."

⁷ Dja nungka rlobmeng kore bulikki mirndemirnderri, mey nakudji kukmak bulikki yaw nawu kanjkelk, dja biwong bininj nawu bimarnerdurrrkmirri, dja nungka kinjeng werrkwerrk.

⁸ Wanjh Abraham kang manbu yiman cheese, dja mak kundjikka dja bulikki yaw nawu ngokko kumyingkihmarnebuyindanj, dja benmarnekur-meng, dja nungka Abraham kumekbe kudjurle djahdjaldarnhdi bedberre bendangmadbuni birrihnguni.

⁹ Wanjh bedda birridjawam, "Baleh Sarah ngalbu ngalbininj kobeng ke?" Abraham yimeng, "Kururrk kahdi kore dabburlin."

¹⁰ Wanjh Yawey yimeng, "Ngaye woybukkih ngamdurneng bu mandjewkbuyika, dja bu kumekbe kabolkyime, wanjh ngalbininj kobeng ke Sarah kayawmang narangem."

Sarah wanjh ngaleng bihbekkani bu dingihdi kore dabburlin kururrkdangmaye, kaluk kubodme nuye.

¹¹ Kaluk Abraham dja Sarah bedda wanjh benewernhkohbanjni, dja yakminj ngarreni Sarah bu yimankek wurdyaw yawmayi.

¹² Wanjh kunu ngalengman Sarah djekmeng baybaywi dja yimeng, "Bu gaye ngakohbanjminj dja mak nabininj kobeng ngardduk nakohbanj waridj, yiddok kuhni nganmarnekurduyimmerran bu ngannjilngmarnebuyi?"

¹³ Wanjh Yawey bimarneyimeng Abraham, "Njalekah Sarah djekmeng dja ngalengman marneyimerrinj bu yimeng, 'Yiddok woybukkih ngayawmang bu gaye ngakohbanjminj?' " Wanjh nungka Yawey yimeng,

¹⁴ "Njale yimankek karayek kore gaye nawu Yawey? Gaye ngamdurneng mandjewkbuyika bu ngarrungnameng, dja Sarah kaluk kayawmang narangem."

¹⁵ Wanjh Sarah keleni wanjh kunu yakwarrinj dja yimeng, "Ngaye minj ngadjekmeninj." Dja nungka yimeng, "Ngudda yiyimeng dja yidjekmeng."

Abraham Bidjawam God Kunred Sodomkenh.

Genesis 18:16-33

16 Wanjh birrimmekbe nawu bininj birridolkkang birribalhrey birribal-hbolknani kanjdji kore Sodom, dja Abraham birribaldjarrkwam nungka kabendjalwohmunkewe wohkah.

17 Wanjh Yawey marneyimerrinj, "Minj nuk ngaye ngamarnewarlkkan Abraham bu baleh ngaye ngokko darnkih ngakurduyime,

18 dja nungka Abraham nawu kabenkebmawahme kabirriyimerran birriredbo nawu birrikuken dja birringudjkimuk, dja kore nungka Abraham kaluk ngabenmarnekurduyime kunmak birribebbehmirnde-bubuyika nawu birriredbo rowk kore kurorre.

19 Dja ngaye korroko ngadjalyingkihdjarrngbom ba bu nungka kaben-wokrayekrayekwon wurdwurd nuye dja bininj nawu kabirridjarrkni, ba bedda kabirrikurduyime kunmak ngandiwokmarrkmang nawu ngaye Yawey ngadjare, ba bu kunu ngaye nawu Yawey ngamarnekurduyime nawu ngaye ngaberrebbom nuye."

20 Wanjh Yawey bimarneyimeng Abraham, yimeng, "Wokwarlahminj duninjh nawu ngawobek kang bedberre nawu kabirriini kore Sodom dja Gomorrah, djaying kunwarre bedberre wernminj duninjh,

21 wanjh ngakolung nganan bu kunmekbe kunwarre duninjh kabir-rihkurduyime nawu ngawobek kang, dja bu burrkyak, wanjh kunu ngaburrbun."

22 Wanjh nawu bininj bokenh beneborledmeng bindibawong benedjal-ley benebalbolkyikani Sodom, dja Abraham djahdjaldi kore kumirrk nuye Yawey.

23 Wanjh Abraham bimarnewam darnkih dja yimeng, "Bu ngudda yiben-bun birriwarre bininj yiddok woybukkih duninjh yibendjaldjarrkbun dorrengh nawu birrimak?"

24 Bu yimankek fifty bininj nawu birrimak kabirriini kore kumekbe kubolkkimuk, yiddok ngudda yibenbun rowk nawu kumekbe kabirriini, minj nuk kunu yibendarrkidbawon rowk bedberrekenh nawu fifty birri-mak?"

25 Ngudda minj nuk yiman kuhni yikurduyime, bu birriwarre yibenbun, minj ngudda yibendjarrkbun dorrengh nawu birrimak. Kunkudjiwi minj yibenbebbehmarneyime nawu birrimak dja birriwarre, kunukka minj ngudda yikurduyime. Ngudda nawu kandjadme ngadberre bininj kubolkbubuyika rowk, wanjh woybukkih yidjalkurduyime kunmak."

26 Wanjh Yawey yimeng, "Bu ngaye ngabenngalke fifty bininj nawu birri-mak kore kubolkkimuk Sodom, wanjh bedda bedberrekenh ngabenbawon kabirridjaldarrkid bininj birriwern rowk nawu kumekbe kabirriini."

27 Wanjh Abraham yawoyhwokdanj yimeng, "Yina, bu ngaye bolkkime minj ngarrangyemeninj bu ngawokdanj ke nawu Yiwohrnan Rowk, dja ngaye nawu yiman rerrih kundjulg mak kunyirrke,

28 wanjh yimankek bu djaldal forty five birrimak bininj kabirriini dja minj yiman fifty? Yiddok ngudda yibenbun rowk bininj nawu kumekbe kubolkkimuk kabirrihni bu five yak nawu birrimak?" Nungka Yawey yimeng, "Bu ngaye kumekbe ngabenngalke forty five birrimak, wanjh minj ngabenbun bininj nawu kumekbe kabirriini."

29 Wanjh kunyawoyhkudji Abraham wokdanj yimeng, "Bu yimankek djaldal forty birrimak yibenngalke?" Wanjh Yawey yimeng, "Bu bedda bedberre nawu forty, minj ngabenbun bininj."

30 Wanjh Abraham yimeng, "Yuwn nuk kandung ngudda nawu Yi-wohrnan rowk, dja kanbawo ngawokdi. Dja bu djaldal thirty yibenngalke

kumekbe?" Wanjh Yawey biwokmey, yimeng, "Minj ngabenbun bininj bu kumekbe ngabenngalke thirty nawu birrimak."

³¹ Abraham yimeng, "Yina, bu bolkkime minj ngarrangyemeninj ngawokdanj ke nawu Yiwohrnan Rowk, dja bu yimankek djal twentywi yibenngalke kumekbe?" Wanjh Yawey yimeng, "Bedda twenty bedberre minj ngabenbun bininj."

³² Wanjh Abraham yimeng, "Yuwn nuk kandung, ngudda nawu Yiwohrnan rowk, dja kanbawo ngayawoyhwokdi kunkudji, dja bu djal tenwi birrimak kumekbe yibenngalke?" Wanjh nungka Yawey biwokmey, yimeng, "Bedda bedberre nawu ten birrimak, minj ngaye ngabenbun bininj nawu kabirrihni kumekbe kubolkkimuk."

³³ Bu Yawey burnbom bu benewokdi Abraham, wanjh nungka bibawong, dja Abraham durndi kured.

19

Angels Bokenh Benemarnebebmeng Nawu Lot.

Genesis 19:1-14

¹ Benemekbe bininj bokenh nawu angels wanjh benebolkmey Sodom bu balhdungyibmi, dja Lot nungka ningihni kore kururrkdangmaye ngarre kubolkkimuk Sodom, dja bu nungka benbenenang nawu bininj bokenh nungka dolkkang benbenedabkeng dja boddanj kanjdji rorrehorrenani.

² Dja benbenemarneyimeng, "Ngudda nawu ngunewohrnan, ngadjare ngunemre nguneyo kore kunurrk ngardduk ngaye nawu ngamarladj. Kumekbe ngunedengedjirridjburren dja nguneyo, dja mak ngunedolkan ngunerewi bu kukabel." Dja bedda beneyimeng, "Burrkyak, ngad nganeyo kondah kuberrk kore berrebbuyen bininj kabirrimirndemornnangerren bu kabirriwokdikenh."

³ Dja nawu Lot kebbabiminj, benbenewernhdjawani wanjh kaluk benewokmarrkme birridjarrkngimeng kore nuye kunurrk. Wanjh nungka benbenemarnemarnbom manmak manme, dja kinjeng mandulmuk kandidjdjawa manbu minj karrmeninj manbu nguklurlmeninjkenh, wanjh benenguneng.

⁴ Bu minj birribangmekodjkeyuwirrinj wanjh bininj rowk nawu birrini kumekbe kubolkkimuk Sodom, nawu birriyawurrinjni dja mak birridabborrabbolkni, birridjalwern rowk wanjh birrirurrkdabkeng Lot nuye kunurrk.

⁵ Dja birrimarnekeyhmeng Lot, birriyimeng, "Baleh bininj nawu benemwam kore ngudda bolkkime? Yibenbenemdjalwohbebkemen ba ngad ngarrbenbenekukburrbun." Kunmekbe birriyimeng, dja birridjareni yimankek birrikaliyuwirrinj bu djal bedman bininj deleng.

⁶ Lot bebmeng kuberrk kore bininj birrihdi dja yerre kumdangbalhmeng.

⁷ Dja yimeng, "Ngaye djawahdjawan ngudberre nawu karridabolk, yuwn kunmekbe ngurrikurduyime kundjalwarre.

⁸ Kandibekka marneyime ngudberre, ngaye ngabenbenekarrme ngalbebeywurd bokenh nawu minj bininj birribangmeyuwirrinj, kab bedda ngabenbenembekke ngurrbenbenemarneyime bu baleh ngudman ngurridjare, dja yuwn njale ngurrbenbenemarneyime nanih nawu bininj bokenh, dja bedda benemwam kore kunurrk ngardduk ngabenbenenahan."

⁹ Dja bedda birriyimeng, "Yibalderrehmen nguddanu!" Dja mak birrimarneymerrinj bu birribek kang nawu Lot, "Nanah nawu bininj nawu kumdjalwohwam nawu nakang baleh, dja nungka yimankek kandjadme

kadberre.” Dja birrimarneyimeng, “Ngad kunwernhwarre ngundimarneyime ngudda, dja bedda nawu bininj bokenh yiman walakkih ngarbenemarneyime.” Wanjh munguyh birriwernhkukdjirrkani Lot dja birridjareni birridangbakkemeninj manu rurrkdangmayebalhmeng.

¹⁰ Dja bedda nawu bininj bokenh nawu benehni kururk benedidbeb-meng benemberldurrmeng Lot, benengimowong kururk benedangbalhmeng.

¹¹ Wanjh bindimimbuyikawong bininj nawu kumekbe birrihdi kuberrkkah kore kururkdangmaye darnkih, bedda yiman birrimidubberranj, nawu birriyawurrinjni dja birridabborrabbolkni, birridjalbolkbirrkahbirrkani, minj birrirurkdangmayengalkemeninj.

¹² Wanjh nawu bininj bokenh benemarneyimeng Lot, beneyimeng, “Yiddok birribuyika yibenkarrme kondah kore kubolkkimuk, bibinjdoj, bebeywurd, ngalbebeywurd, dja mak nuk nangale nawu ngudda ke? Wanjh yibenbebkemen yibenkan kondah kubolkkimukbeh,

¹³ dja ngad ngokko darnkih ngarrbenbularrbun rowk nawu kondanjunu kabirrihni kunred. Yawey wanjh bekkang nawu wokwarlahminj duninj bu kunwarre bedberre nawu kabirrihni kondah kubolkkimuk, wanjh nungka Yawey kanbenemunkeweng nganerurkbularrbun rowk.”

¹⁴ Wanjh Lot wam kore bininj bokenh nawu birrimarrimeninj ngalbebeywurd nuye, yimeng, “Werrkwerrk ngunedolka ngunebolkbawon kondah, dja Yawey ngokko darnkih kabenbun nawu kondah kubolkkimuk kabirrihni.” Dja bedda nawu bibinjdoj nuye beneyimeng bu yimankek kabenbenehmalelmang.

Lot Dja Namud Nuye Birribolkbawong Kunred Sodom Dja Birrikelerlob-meng.

Genesis 19:15-23

¹⁵ Wanjh bu darnkih kumbarrhbuni, nawu angels bokenh benedjurrkdjurrkwong Lot, benemarneyimeng, “Werrkwerrk, yika ngalbininj-kobeng dja mak ngalbebeywurd bokenh nawu kondah ngurrini, yibenka, dja marndi ngurridowen bu God kabendung nawu kondah kabirrihni kubolkkimuk.

¹⁶ Dja Lot bu wohbolkmaddi, bedda nawu angel bokenh bindibidkarmeng nungka, ngalbininj-kobeng nuye dja mak ngalbebeywurd bokenh nuye, dja bindimiyikang kumekbe kubolkkimukbeh kamak rowk, kumekbe beneyimeng bu Yawey bikongibom Lot.

¹⁷ Dja kundjalmekeberrih bu bindibebkeng nakudji yimeng, “Ngurrikelerlobmerrimen, yuwn ngurribolknan yerre, dja yuwn baleh ngurridangen kore kondah kanjdjikanjdji kabbal. Ngurridjalkelerlobmenwi kore kuwarddewardde, dja bu burrkyak marndi ngurridowen.”

¹⁸ Dja Lot yimeng, “Kunukka kunwid, ngudda nawu ngunewohrnan,

¹⁹ kandibekka ngaye nawu ngamarladj, ngudda nguneyimeng bu yimankek ngamak, dja kandimarnekurduyimeng kunwernhmak duninj, kandikongibom bu kandibawong ngarrarrkid, dja minj ngakelerlobme kore kuwardde, marndi kunihbu kunyid nganwohmarnebebme dja ngarowen!

²⁰ Ngunena, kunihbu kubolkkimuk minj djarreh duninj bu ngakelerlobme, dja minj kunwernhbolkkimuk. Kandimunkewemen kumekbe ngakelerlobme, dja yiddok minj kubolkyahwurd, dja kunu minj ngarowen ngadjaldarrkid.”

²¹ Wanjh nakudji yimeng, “Kandibekka, ngaye won kuhni mak bu kandjawam, minj ngabenbun nawu kumekbe kunred kabirrihni kore ngudda yibolkyolyolmeng.

²² Dja werkkwerkk yikelerlobmen, yire kumekbe, dja ngaye minj baleh ngabangmekkurduyime, djalmadbun yibolkmang.” Kunmekbe wanjh kabolkngeyyo Zoar. (Zoar kunekke kungey kayime Kunyahwurd.)

²³ Bu Lot bolkmey Zoar wanjh dungbebmeng.

God Bolkyakwong Rowk Kunred Bokenh Sodom Dja Mak Gomorrah.

Genesis 19:24-29

²⁴ Wanjh Yawey munkeweng manbang manbu rungirungi kore heaven-beh bu djakdungi yiman mandjewk kore bininj nawui birrihni kore Sodom dja Gomorrah.

²⁵ Kuhni wanjh yimeng bu bolkyakwong rowk kubolkkihkimuk kumekbe kanjdjikanjdji kore kabbal, dja benyakwong rowk nawu birrihni kumekbe kubolkkihkimuk, dja mak kolhderuy rowk kumekbe.

²⁶ Dja Lot nuye ngalbininj kobeng bu bimunkebuni Lot, borledmeng bolknang rerre, wanjh kunu kuyimerranj yiman djirla.

²⁷ Wanjh bu kukabel Abraham dolkkang durndi kore kukak benehdi benehwokdi Yawey,

²⁸ dja nungka bolknang kanjdji kore Sodom dja Gomorrah mak kubolkbubuyika rowk kumekbe kanjdjikanjdji, dja nungka nang kundolng manbu dolngdolkkani kumekbe kubolkwarlahbeh, wanjh mandolngkimuk duninj, yiman yerreh manbirludjawurl duninj kore kahrung.

²⁹ Kunmekbe wanjh bu God bolkyakwong kubolkkihkimuk ngarre kanjdjikanjdji, God biburrbom Abraham dja bimunkeweng Lot bibebkeng kumekbebeh, ba minj dowimeninj, bu nungka God benyakwong rowk nawu birrihni kubolkkihkimuk kore Lot.

Lot Dja Ngalbebeywurd Nuye.

Genesis 19:30-38

³⁰ Lot dja ngalbebeywurd bokenh nuye kaluk birribolkbawong Zoar, dja birrini kore kuwarddewardde, dja nungka keleni, minj niwirrinj kore Zoar. Nungka dja ngalbebeywurd nuye birrini kore kuwardderurrk.

³¹ Wanjh kaluk bu ngalbu ngalwernwarre bimarneyimeng ngalwalawalak, yimeng, “Kornkumo ngarrku kohbanjminj, dja minj bininj kondah kani ba bu karriyo, yiman kabirriyime kubolkbubuyika rowk.

³² Kab ngarrbowo kunbang wine nawu kornkumo ngarrku, dja wanjh kaneyo, ba kunu minj kayakmen ngad bu karrimud, bu nungka Ngabbard kayawbornan ngarrku.”

³³ Wanjh bu kunmekbe kumunun benebowong kornkumo manbang wine, dja ngalwernwarre ngimeng beneyonginj kornkumo, dja nungka wakwani bu ngaleng kurrmerrinj dja mak bu dolkkang.

³⁴ Dja bu malaywi wanjh ngalu ngalwernwarre bimarneyimeng ngalwalawalak, “Yina, ngaye kukak nganeyonginj Ngabbard, kab bolkkime mak ngarryawoyhbowo manbang wine, wanjh ngudda yingimen nguneyo ba kunu minj kayakmen nawu karrimud bu Ngabbard kayawbornan ngarrku.”

³⁵ Wanjh kunu beneyawoyhbowong kunbang bu kunmekbe kumunun warridj, dja ngalbu ngalwalawalak dolkkang wam beneyonginj, dja nungka wakwani bu ngaleng kurrmerrinj dja mak bu dolkkang.

³⁶ Kuhni wanjh kunu benemekbe bokenh nawu ngalbebeywurd nuyeni Lot beneyawkani wurdyaw nawu nungka benbenebornang.

³⁷ Ngalwernwarre yawmey narangem, bingeykurrmeng Moab, nungka wanjh mawah bedberre namud nawu kabirringeyyo Moab. (Kaluk Moab kamenhyime “kore ngabbardbeh”)

³⁸ Dja ngalwalawalak ngaleng warridj yawmey narangem, bingeykur-meng Ben-Ammi, nungka wanjh mawah bedberre nawu kabirringeyyo Ammon. (Ben-Ammi kamenyime “Beywurd Bedberre Namud Ngardduk”)

20

Abraham Dja Abimelech

Genesis 20:1-18

¹ Wanjh Abraham dolkkang balhrey balhbolkyikani Negeb. Kaluk yerrkang kubulkayh kore kunred bokenh Kadesh dja Shur dja mak wam djahdjalwohni waken kore Gerar.

² Wanjh bu kumekbe ni Abraham yimeng bu Sarah ngalbu ngalbininjkobeng nuye wanjh yimeng bu benedanginj, wanjh kunu Abimelech nawu king nawu wohrnani kumekbe kore Gerar bikimey Sarah.

³ Dja God bimarnebebmeng Abimelech bukirri bu kumunun, dja bimarneyimeng, “Kanbekka, marneyime, bu ngudda yimey ngalinjngalu daluk wanjh kunu yidjaldowen, dja ngaleng wanjh kabeneni nabininjkobeng ngarre.”

⁴ Abimelech minj Sarah bibangmemarnebebmenginj darnkih wanjh kunu nungka yimeng, “Ngudda nawu yiwohrnani, yiddok ngudda kanbun ngaye ngardduk nawu ngarriredbo nawu minj kunwarre ngarriyimeninj?”

⁵ Dja Abraham nganmarneyimeng bu ngaleng ngaldaluk nuye, dja mak ngalengman yimeng bu nungka benedanginj. Wanjh ngaye bu kuhni ngayimeng ngamey, wanjh woybukkih ngayimeng yimankek kamak, dja minj kunwarre ngayimeninj.”

⁶ Wanjh God biwokmey bukirri, “Ngaye ngaburrbun bu woybukkih yiyimeng yimankek kamak, dja ngaye wanjh karmeng ba minj kunwarre kanmarneyimeninj, kunmekbekenh kunu ngaye dengheng ba minj yikarmeninj.”

⁷ Wanjh bonj, yirrunriwemen ngalbu nuye ngalbininjkobeng, nungka wanjh prophet kanmarnemulewan kunwok ngardduk, dja nungka kaluk ngunmarnedi yiwarrudj ba minj yirrowen. Dja bu minj yirrunriweme, kunu wanjh woybukkih ngayime ke, ngudda dja nawu yibenkarrme rowk, kaluk ngurridjaldowen.”

⁸ Bu malaywi Abimelech dolkkang kukabel, wanjh nungka benkayheng rowk nawu birrimarnedurrkmirri, wanjh kuhni rowk benmarney-olyolmeng dja bedda wanjh birrikeleminj dunijnj.

⁹ Abimelech bikayhmeng Abraham dja bimarneyimeng, “Njale ngudda kanmarnekurduyimeng ngadberre? Njale yiddok ngaye kunwarre ngayimeng ke, bu ngudda kanmarnbom ngaye dja nawu ngabenmarnewohrnani ngundimarneyime kunihbu kunwarre dunijnj? Dja kuhni bu kanmarnekurduyimeng, wanjh yiman bininj kabirriyime yimankek minj nangale kakurduyime.”

¹⁰ Dja mak Abimelech yimeng, “Njale ngudda yiburrbuni bu kuhni kanmarnekurduyimeng?”

¹¹ Abraham biwokmey yimeng, “Ngaye ngamarneyimerrinj, ‘Woybukkih nuk minj nangale kondah kabimarnekele God, wanjh ngandibun ngalbininjkobengkah ngardduk.’”

¹² Dja mak woybukkih ngaleng yiman nganedanginj dunijnj, dja kornkumo nakudji ngarrewoneng dja ngaleng ngalbadjanbuyika ngarre, dja wanjh yimerranj ngalbininjkobeng ngardduk.

¹³ Bu God nganmarneyimeng ngabolkbawon kore Ngabbard ngarrihni, ngawohrey, wanjh ngaye ngamarneyimeng ngalbininjkobeng ngardduk,

ngayimeng, 'Kuhni bu kunmak kandjalmarneyimen, bu baleh yarrkka ngarre, wanjh yiyime bu ngaye ngarrdanginj.' "

¹⁴ Wanjh Abimelech biwong Abraham sheep dja bulikki, dja bininj daluk nawu birrimarnedurrkmirri, dja mak bimarnedurndiweng Sarah ngalbininj kobeng nuye.

¹⁵ Abimelech yimeng, "Yina, kubolkwarlah ngardduk yibolknan dja bu baleh yidjare, kunukka wanjh yini."

¹⁶ Dja mak Abimelech bimarneyimeng Sarah, yimeng, "Ngaye ngawong nawu ngudda ngunedanginj kunwardde nakimuk, ba nawu ngurridjar-rk kabirribularrbun yiman kabirribengmidjdan, dja kabirriyime bonj ngudda minj kunwarre yiyimeninj."

¹⁷⁻¹⁸ Yawey ngokko benmarnbom daluk rowk nawu birrini kore Abimelech nuye kunred minj birriyawmayi, kuhni yimeng bu Sarahkenh ngalbu Abraham nuyeni ngalbininj kobeng. Wanjh Abraham yiwarrudj di bid-jawam God, dja nungka God bimarnbom Abimelech, dja ngalbininj kobeng nuye dja daluk nawu birrimarnedurrkmirri, benmarnbom warridj ba wurdyaw kabirriyawoyhyawmang.

21

Bu Nawu Isaac Danginj.

Genesis 21:1-7

¹ Kaluk Yawey bimarnekurduyimeng Sarah kunmak bu nungka yingkihdjedjenkurrmeng, dja nungka Yawey bimarnekurduyimeng bu nungka biberrebbom.

² Sarah ngaleng wanjh kanihkani wurdyaw dja bimarneyawmey Abraham beywurd bu nungka wernhkohbanjminj, namekbe wurdyaw danginj bu God biyingkihmarnedungnameng.

³ Abraham bingeykurrmeng Isaac beywurd nuye nawu Sarah bimarneyawmey.

⁴ Bu beywurd nuye nawu Isaac bu danginj, kaluk kunkodjke eight nuye wanjh Abraham bilakkayenwong kore God biwokrayekwong.

⁵ Dja Abraham nungka wanjh mandjewk nuyeni 100 bu Isaac nawu beywurd nuye bimarnedanginj.

⁶ Wanjh Sarah yimeng, "God ngannjilngmarnbom bu ngadjekme, dja birriwern rowk nawu kuhni kabirriwobekkan, bedda dorreng kaluk ngarridjarrkdjekme."

⁷ Dja mak ngaleng yimeng, "Nangale yimankek bimarneyimeninj Abraham bu ngaye wurdyaw ngadjikkawoyi? Dja ngaye ngamarneyawmey beywurd bu nungka wernhkohbanjminj."

Abraham Benbenekumunkeweng Hagar Dja Ishmael.

Genesis 21:8-21

⁸ Nawu wurdyaw wanjh djordmehdjordmeni, kaluk djikkabawong. Dja kunbarnangarra bu Isaac djikkabawong wanjh Abraham marnbom muli mankimukkenh.

⁹ Dja Sarah nang bu wurdyaw nawu Hagar ngalbu ngalkang Egypt bimarneyawmey Abraham, nungka wanjh bidjekmiwoni Isaac.

¹⁰ Wanjh Sarah bimarneyimeng Abraham, "Yibenbenekumunkewemen ngalmekbe ngalbu nganhmarnedurrkmirri dja nayaw ngarre, dja namekbe nawu nayaw ngarre ngalbu nganhmarnedurrkmirri, minj nungka kalarlmang nawu yehyeng ke bu yibawon, dja Isaac nuye rowk, nawu ngaye nayaw ngardduk."

11 Wanjh kunu Abraham bimarnenjinlgwarreminj duninjh Ishmael nawu beywurd nuye.

12 Dja God bimarneyimeng, "Yuwn bu kunihbukenh yiwernhnjinlgwarre berrewoneng wurdyaw ke dja daluk ngalbu ngunmarnedurrkmirri. Dja kore Isaac ngaye won mawahmawah ke nawu berrebom, kunmekbekenh yikurduyimen kore baleh Sarah ngunmarneyime.

13 Dja mak ngaye ngabenmirndewernwon mawah nuye nayaw nawu ngalmekbe ngalbu ngunmarnedurrkmirri biyawmey, dja kabirriyimerran biriredbo warridj. Kuhni ngakurduyime bu nungka mak ngudda ke beywurd."

14 Wanjh Abraham dolkkang maninjmanu kukabel, mey buriddi mak kukku budjdjurlung dorrengh nawu mayh kunkulah, dja bingorrkenwong Hagar, dja benbenemunkeweng Hagar dja nayaw ngarre nawu Ishmael. Wanjh kunu benewam benedjalwohrey kore kubolkdarleh ngarre Beer-sheba*.

15 Kaluk bu kukku boyakminj manbu borrahkendi mayh kunkulah, ngaleng bikurrmeng Ishmael kore kudjurle, kaluk mandulkyahwurd.

16 Wanjh wam wurd djarreh, yiman bininj kaburriwe bunarra, kumekbe yerrkang ni, dja ngalengman yimeng, "Minj ngadjare nganan bu wurdyaw karrown." Dja bu kumekbe ni ngaleng wanjh nalkbuhnalkbuni.

17 Wanjh God bibekkkang Ishmael bu nungka dorrengh nalkbuhnalkbuni, wanjh angel nuye God bikayhmeng Hagar kaddumbek dja bimarneyimeng, "Hagar, njale yihkangewarre? Yuwn yikele, dja ngaye God nganalkbekkkang wurdyaw kore kahyo.

18 Mah. Yirrolkka, yiwayhkemen Ishmael dja yibidkarrkarmen, dja ngaye ngamarnbun kabenkebmawahme birriwern, kabirrimirndewernmerren kabirriyimerran biriredbo nawu birrikuen."

19 Wanjh God bimarnbom Hagar bu bolknang dja nang kaboyo kungad. Wanjh kunu ngaleng borrahkendoy rowk kore mayh kunkulah wanjh bibowong Ishmael bonguneng.

20 Wanjh God binahnani nawu Ishmael bu nungka djordmehdjordmeni. Nungka ni kore kubolkdarleh wanjh mayhmakminj duninjh bu bunarra burriweyi.

21 Bu nungka ni kore kubolkdarleh ngarre Paran, wanjh ngalbadjan nuye bimarnemey ngalbininjkobeng nuye kore Egyptbeh.

Abraham Dja Abimelech Benewokmarnburrinj.

Genesis 21:22-34

22 Kaluk yiman kunmekbe rerrih Abimelech kumwam kore Abraham, dja kaluk Phicol dorrengh, bininj nawu benmarnewohnani djuram nuye Abimelech, wanjh Abimelech bimarneyimeng Abraham, yimeng, "God ngunehdjarrkre bu baleh yarrkka ngudda yikurduyime.

23 Kondah wanjh yiwokkurmerrimen kore ngarrhdi, kunwok kunrayek duninjh, God nuye kunngey dorrengh, kanmarneyime bu ngudda minj kunwarre kanmarnekurduyime ngaye dja wurdyaw dorrengh ngardduk, mak mawahmawah kanmarnekurduyimen kunmak, dja mak kubolkwarlah warridj kore ngudda yidjalwohni nawu minj ke kunred, yikurduyimen kunmak, yiman bu ngaye werrk marnekurduyimeng ngudda."

24 Wanjh Abraham yimeng, "Ngaye kuninjkunu ngawokkurmerreren kunwok kunrayek duninjh."

* 21:14 Beersheba kayime "Kungad manbu wokkurmerrinjenh", dja mak "Kungad Bedberre Kunbidkudj dja bokenh."

²⁵ Wanjh Abraham bimarneyimeng Abimelech bu bininj nuye nawu birrimarnedurrkmirri Abimelech birriwam birringadyirurrkme y manu nungan Abraham nuye kungad.

²⁶ Dja Abimelech yimeng, "Ngaye ngawakwan bu nangale kuhni yimeng. Minj korroko kanmarneyimeninj, dja bolkkimewi ngahdjalbekkan."

²⁷ Wanjh Abraham kumkang sheep dja bulikki biwong Abimelech dja bedda nawu Abimelech dja Abraham benewokmarnburrinj.

²⁸ Abraham larlmey seven sheep yaw ngaldahdaluk kore kumirnde nuye dja benkurrmeng bebbehbeh.

²⁹ Wanjh Abimelech yimeng, "Njalekenh yilarlme yibenkurrmeng bebbehbeh nanih nawu seven sheep yaw ngaldahdaluk?"

³⁰ Abraham biwokmey yimeng, "Ngadjare kanbidyimang nanih nawu seven sheep yaw, ba ngurriburrbun ngaye ngangadkaruy manih manbu kahbongadyo."

³¹ Wanjh kunu kunmekbe kunred kabolkngeyyo Beersheba, kunmekbe kabolkngeyyo bu bedda nawu bininj bokenh benewokkurrmerrinj kunrayek duninj kunwok.

³² Bu Abraham Abimelech benewokmarnburrinj kore Beersheba wanjh Abimelech bikang Phicol nawu benmarnewohnani djuram nuye, wanjh benedurndi kore kunbolkwarah bedberre nawu Philistine bininj.

³³ Abraham dulkdudji tamarisk kundulk kore Beersheba, dja kumekbe yiwarrudj di bu bikayhmeng Yawey kunngey nuye God nawu kahdjalmbi munguyh munguyh.

³⁴ Dja Abraham kumekbe ni kunkuyeng kore kubolkwarlah bedberre nawu Philistines.

22

God Birohrokmeng Nawu Abraham.

Genesis 22:1-19

¹ Kaluk rerrekah wanjh God birohrokmeng Abraham. Nungka bikayhmeng, yimeng, "Abraham!" Dja Abraham biwokmey, yimeng, "Kondah ngaye ngahdi, bekkahbekkan."

² Wanjh God yimeng, "Yika ke beywurd, nawu nadjalkudji beywurd ke Isaac nawu yimarnedjare duninj, dja yiray kore kunred kabolkngeyyo Moriah, kumekbe kore kuwarddekimuk ngaye kaluk marnewarddeyolyolme, kumekbe kunu yibun bu yikukwurlhke bu kanwon ngaye."

³ Wanjh kunu Abraham dolkkang kukabel, kurrmeng kubodmeken nuye donkey, benbenekang bininj bokenh nawu benemarnedurrkmirri, dja mak Isaac bikang nawu beywurd nuye. Wanjh rerrngdadjdadjkeng rowk manbu kakinjekenh, wanjh birridolkkang birribolkyikani kore God bimarnebolkyolyolmeng.

⁴ Bu kunbarnangarra danjbik Abraham balwohnang bolknang djarreh.

⁵ Wanjh benbenemarneyimeng bininj bokenh nawu benemarnedurrkmirri, yimeng berrewoneng, "Ngunenin kondah kaluk donkey dorrengh, bu ngaye dja yawurrinj nganere kunukka, nganedi yiwarrudj. Kaluk nganemdurndeng ngorrewoneng."

⁶ Wanjh Abraham rerrngmey manbu kakinjekenh, dja birerrngwong Isaac nawu beywurd nuye bu rerrngkani, dja nungan Abraham kaninhani kuybuk dja mandjawak. Wanjh benebalhdjarrkrey.

⁷ Dja Isaac bimarneyimeng kornkumo nuye nawu Abraham, yimeng, "Ngabba?" Wanjh Abraham yimeng, "Njale yidjare, Korlonj?" Isaac

yimeng, “Yina, ngarrkarrme kuybuk dja kunrerrng, dja kaluk baleh sheep yaw nawu ngarrbun ngarrkukwurlhke ngarrwon God?”

8 Abraham biwokmey yimeng, “Korlonj, God nungan kaluk kanwon sheep yaw bu ngarrbun ngarrkinje ngarrwon.” Wanjh benebalhdjarrkrey.

9 Bu benebebmeng kore God bimarnebolkyolyolmeng, Abraham marn-bom kunwardde yiwarrudjkenh dja rerrngkurrmekurrmeng kaddumkah, wanjh biwelengdukkang Isaac nawu beywurd nuye dja bikurrmeng kaddum kore rerrngyoy kore altar.

10 Wanjh bidyirriyonginj mandjawak mey, yimankek bikuyindulubuyi beywurd nuye.

11 Dja angel Yawey nuye bikayhmeng kaddumbeh, yimeng, “Abraham! Abraham!” Dja nungka yimeng, “Kondah ngaye ngahdi, bekkahbekkan.”

12 Wanjh angel yimeng, “Yuwn yibun nawu Isaac, yuwn baleh yimarnekurduyime, dja bonj, bolkkime wanjh ngaburrbun bu ngudda kanmarnekele ngaye God, bu ngudda minj yinganenghmeninj kankaybuyi beywurd ke, nawu nadjalkudji beywurd ke.”

13 Wanjh Abraham balwohngang dja nang sheep nawu narangem kanemdjardabmeng kore kuyahyay kundulk. Wanjh wam mey namekbe sheep dja bom kinjeng bu biwong God, dja bibawong nawu nuye beywurd, minj bibuyi.

14 Kunu wanjh Abraham bolkngeykurrmeng “Yawey nungan kanwon.” Dja kunu bininj kabirridjalyime bu munguyh kabirriyime, “Kore Yawey nuye kunwarddekimuk nungan kanwon.”

15 Kaluk wanjh angel nawu nuye Yawey wanjh biyawoyhkayhmeng Abraham kaddumbeh,

16 dja yimeng, “Kuhni ngayime ngaye Yawey ngayeman ngawokkurrmer-rinj, kunwok kunrayek duninj, bu ngudda kuhni yikurduyimeng, bu minj yinganenghmeninj kankaybuyi beywurd ke nawu nadjalkudji beywurd ke,

17 wanjh ngaye woybukkih marnekurduyime kunmak, ngaye ngabenmirndewernwon nawu ngudda yibenkebmawahme ba kabirrimirndeyimerran yiman kayime mankokkarrng rerrih kore kungol yinan, dja mak yiman kayime kunkayalanj rerrih kore kukadjid kurrula kahyo. Dja nawu ngudda yibenkebmawahme kaluk kabindibolkyimang kubolkkihkimuk bedberre nawu kabindiwidnan, kaluk kabirribolkkarrme.

18 Dja kore bedda nawu ngudda yibenkebmawahme ngabenmarnekurduyime kunmak birribebbehmirndebubuyika rowk nawu birriredbo kore kubolkwarlahkenh rowk. Kuhni ngakurduyime bu ngudda kanwokmar-kmey kore ngawokdanj ke.”

19 Wanjh kunu Abraham dja Isaac bindimarnedurndi bininj bokenh nawu benemarnedurkmirri Abraham, dja benedolkkang birridjarrkwam kore kunred Beersheba, dja wanjh Abraham kumekbe djahdjalni.

Nawu Nahor Benbornang.

Genesis 22:20-24

20 Kaluk yerrekah wanjh Abraham bekkang bu Milcah warridj bimarneyawmey wurdwurd nuye Nahor nawu Abraham benedanginj.

21-23 Bedda nawu bebeywurd wanjh birringeyyoy Uz, nawu nadjdjaman, Buz nawu benedanginj, dja Kemuel, Chesed, Hazo, Pildash, Jidlaph, dja Bethuel. Bedda wanjh Milcah bimarneyawmey eight bebeywurd nuyeni Nahor nawu Abraham benedanginj. Kaluk Kemuel bibornang Aram. Dja Bethuel nungka wanjh kaluk bibornang Rebekah.

²⁴ Dja mak ngalbuyika ngalbu Nahor bidjalwohmey ngalbu ngeyyoy Reumah, ngaleng wanjh benyawmey Tebah, Gaham, Tahash dja Maacah.

23

Sarah Doweng Dja Abraham Bikukdudji

Genesis 23:1-20

¹ Sarah wanjh mandjewk ngarreni bu djahdjalmimbi wanjh 127,

² wanjh ngaleng doweng kore kunred Kiriath-arba, kunmekbe kunred kabolkngeyyo warridj Hebron kore kubolkwarlah Canaan. Abraham wam bimarnenjingwarreni dja bimarnenalkbuni Sarah bu doweng.

³ Wanjh nungka dolkkang bolkbawong kore ngalbininjokong kukyoy, dja wam kore bininj nawu Heth * benkebmawahmeng, dja wanjh benmarneyimeng,

⁴ "Ngaye ngamwam nawu ngakang kubolkbuyika dja kondah ngadjalwohni, yiddok minj ngurribolkweykan kandibolkwon kore ngakukdudjengkenh ngalbu nganmarnedoweng?"

⁵ Bedda nawu Heth benkebmawahmeng birriwokmey Abraham, dja birriyimeng,

⁶ "Ngudda nawu yikimuk, kanbekka ngadberre. Ngudda nawu yiman yingudjikimuk dja yiwohnawohnan kore ngad ngadberre, wanjh ngalbu ngunmarnedoweng yikukdudje kore kumidj kuwardderurrk kuwarnhmak duninj ngadberre, minj nakudji kore ngad ngunkaybun nawu nungan nuye kumidj ba ngudda yikukdudjeng."

⁷ Abraham dolkkang boddanj kanjdji kumirrk bedberre bininj nawu Heth benkebmawahmeng nawu birrikang kumekbe kunred.

⁸ Dja benmarneyimeng, "Bu ngudda ngurrinjilng ngakukdudjeng ngalbu nganmarnedoweng, wanjh kandibekka, wardi djawan ngudberre, ngudda kandimarnewokdi nawu Ephron, ngurrimarneyime nawu beywurd nuye Zohar,

⁹ ba nungka kabolkweykan ngardduk kunwardderurrk nawu nungan nuye kore kunred Machpelah, kunmekbe kunwardderurrk wanjh darnkih kore nungka nuye kabbal kabalbolkburnbun. Ngurridjawa bolkweykan ngardduk bu kunmak, kore ngudda nawu ngurribekkan, kunwardde ngakukwon rowk nawu nungka rohrokmeng, ba ngabolkkarme ngakukdudjengkenh."

¹⁰ Wanjh nawu Ephron nungka kumekbe birridjarrkni bininj nuye nawu Heth benkebmawahmeng, dja nungka biwokmey Abraham kore bedda birribekkan nawu birridjarrkmirndemornnamerrinj darnkih kore kururrdangmaye ngarre kumekbe kubolkkimuk ni.

¹¹ Wanjh yimeng, "Burrkyak, ngudda nawu kanmarnewohnan, kanbekka, ngaye bolkwon kabbal dja kunwardderurrk dorrengh. Kore bininj ngardduk kabirribekkan, wanjh ngaye bolkwon, wanjh yikukdudje ngalbu ngunmarnedoweng."

¹² Wanjh Abraham yawoyhboddanj kanjdji kumirrk bedberre bininj nawu birrikang kumekbe kunred kubolkwarlah.

¹³ Dja bu bedda birribekkan, nungka bimarneyimeng Ephron, yimeng, "Ngadjare kanbekkan, ngadjare kukwon kunwardde rowk nawu yirohrokmeng ngarre kunmekbe kabbal. Ngadjare kankukyimang kunwardde yikan, kanbolkwon, kumekbe kunu ngakukdudjeng ngalbu nganmarnedoweng."

* 23:3 Nawu Birriedbo Birringeydi warridj "Nawu Hittites".

¹⁴ Ephron biwokmey Abraham, yimeng,

¹⁵ “Kanbekka, ngudda nawu kanmarnewohrnan, kunmekbe kabbal bu bininj kabirriyime yiman 400 silver shekels kanwoyi kunwardde, dja bonj minj njale nuk 400 shekels bu ngudda dja ngaye. Bonj yidjalkukdudje ngalbu ngunmarnedoweng.”

¹⁶ Wanjh Abraham biwokmarrkmey, dja bimarnerohrokmeng Ephron kunwardde nawu Ephron ngeybon kore bedda birribek kang nawu Heth benkebmawahmeng, mandjad rohrokmeng kore mankarre bedberre.

¹⁷⁻¹⁸ Wanjh kunu Ephron nuyeni kabbal kore Machpelah, darnkih kunred Mamre, kaluk kabbal dja kunwardderurrk dorrengh, dja kundulk rowk kore kabbal rowk, wanjh birriwokrayekworrinj bolkyimerranj Abraham nuye kabolkkarrme, bu bininj nawu Heth benkebmawahmeng wanjh birribek kang rowk nawu birrimirndemornnamerrinj darnkih kurrrkdangmaye ngarre kumekbe kubolkkimuk.

¹⁹ Wanjh kaluk Abraham bikukdudji Sarah ngalbu ngalbininj kobeng nuyeni kumekbe kore kuwardderurrk kore Machpelah darnkih Mamre, kabolkngeyyo warridj Hebron, kore kubolkwarlah Canaan.

²⁰ Kuhni wanjh kayolyolme bu bininj nawu Heth benkebmawahmeng birribolkwey kang birribolkwong Abraham kabbal kaluk kunwardderurrk dorrengh, ba kumekbe kabolkkarrme kabenkukdudjengkenh.

24

Abraham Kadjare Isaac Kabenemarren Ngalbininj kobeng Genesis 24:1-61

¹ Abraham wanjh wernhkohbanjminj duninjh, dja Yawey biw-
ernhmarnekurduyiming kunmak rowk dja kunwernhkah.

² Kaluk Abraham bikarrmi nakudji bininj nawu bimarnedurrkmirri korroko duninjh, nawu nahnani yehyeng rowk nawu Abraham karrmi. Wanjh Abraham bimarneyiming, “Yibidkurrmerimen kanjdji kore kurrad ngardduk.

³ Ngadjare yiwokkurrmerren kunwok kunrayek duninjh, kore kungey dorrengh Yawey nawu God kore kaddum dja mak kore kurorre. Yiwokkurrmerren bu ngudda minj beywurd ngardduk yimarnemang daluk ngalbu ngalkang kondah kore karrini bedberre kunred Canaan.

⁴ Dja ngudda yiray kore ngardduk kunred kore ngaye ngarrimud kabirrini, dja kumekbebeh yimarnemang daluk Isaac nuye nawu beywurd ngardduk.”

⁵ Wanjh namekbe nawu bimarnedurrkmirri yiming, “Kunubewu yimankek ngalbu daluk minj kadjare nganemre kondah kubolkwarlah, yiddok kunu beywurd ke ngakan kore kunred kubolkwarlah kore ngudda yimdolk kang?”

⁶ Abraham yiming, “Yuwn kunukka. Yuwn kumekbe yikan nawu beywurd ngardduk.

⁷ Dja Yawey nawu God kore kaddum heaven nganbebkeng kore kornkumo ngardduk ngarrihni, kore kubolkwarlah kore ngarranginj, dja nganmarnewokdanj dja wokkurrmerrij kunwok kunrayek duninjh bu nganberrebbom, yiming bu kondah kubolkwarlah kaluk kabenolkwon nawu ngaye ngabenkebmawahme. Nungka wanjh kabimunkewe angel nguningkih marnedokme, ba beywurd ngardduk yimarnemang daluk kumekbebeh.

⁸ Dja bu daluk minj kanjilng ngunemdjarrkre, wanjh kunu bonj kabu-larrbuyindangen kuhni kunwok kunrayek duninj bu kanmarnewokkur-rmerren. Dja kuhni bu kundjalkudji, yuwn beywurd ngardduk yikan kumekbe.”

⁹ Wanjh kunu namekbe bininj nawu bimarnedurrkmirri Abraham bidkurmerrinj kore kurrad nuyeni Abraham nawu bimarnewohnani, dja bimarnewokkurmerrinj kunwok kunrayek duninj bu dalukkenh Isaac nuye.

Abraham Nuye Bininj Bingaleng Rebekah.

Genesis 24:10-27

¹⁰ Wanjh namekbe bininj kang ten camel mayh nawu nuyeni Abraham nawu bimarnewohnani, dja dolkkang wam, kang nawern namakmak dorrengh nawu Abraham biwong kabenwonkenh, wanjh wam bolkyikani kore nawu Nahor nuyeni kubolkkimuk kore kubolkwarlah Mesopotamia.

¹¹ Wanjh kuberrkakah kore kumekbe kubolkkimuk kaluk kore boyoy kungad birrihbomangi, nungka benmarbom camel birribarddurrukkulhdi. Wanjh dungkedjelkminj bu daluk birrimrey birribomangi.

¹² Wanjh namekbe bininj danginj yiwarrudj, yimeng, “Ngudda Yawey nawu God nuye Abraham, nawu nganmarnewohnan. Ngaye djawan kanbidyikarremen bolkkime, ba kakurduyimerran bu ngamwamkenh, dja yikongibu yimarnekurduyimen kunmak Abraham nawu ngan-marnewohnan.

¹³ Yina, ngaye ngahdi darnkih kore maninjmanu njilhmi kaboyo, dja daluk nawu birrikang kondah kubolkkimuk kabirrimre kabirribomang.

¹⁴ Kab bu ngamarneyime ngalyawk, bu ngayime, ‘Ngadjare kan-marneboma budjdjurlung ke ba ngabongun.’ Dja ngaleng kayime, ‘Yibongu, dja ngabenbowon camel ke warridj.’ Ngalyawk ngalbu kunmekbe kayime, wardi bu ngaldjalmekbenin ngalbu ngudda yimarnedjarrngom nuye Isaac nawu ngunmarnedurrkmirri. Bu kuhni kakurduyimerran, wanjh ngaye ngaburrbun bu ngudda yikongibun nawu ngaye ngan-marnewohnan.

¹⁵ Minj bangmeyakwoyi bu yiwarrudj dingihdi, wanjh kumekbe ngalbu Rebekah kumbemeng budjdjurlung ngorrkani kukkukenh kukarlang ngarre. Ngalmekbe ngalyawk Rebekah wanjh kornkumo ngarreni Bethuel nawu Milcah ngalbadjan nuye, dja ngalbu Milcah ngalbininj kobeng nuyeni Nahor, nawu nungka Abraham benedanginj.

¹⁶ Ngalmekbe ngalyawk ngalkukmakkaykenhni duninj, dja minj bininj benebangmeyuwirrinj. Ngaleng wanjh koluy kore njilhmi boyoy, borrahk-endoy bobarleng budjdjurlung, wanjh kumbidbom.

¹⁷ Wanjh namekbe bininj rlobmeng birrabkeng, dja yimeng, “Ngadjare kanwohbowo manboyahwurd ngawohbongun kore ngudda ke budjdjurlung.”

¹⁸ Ngaleng yimeng, “Yibongu ngudda nawu kanmarnewohnan.” Wanjh ngaleng werkkwerrk koluyhweng budjdjurlung kukarlangbeh, karmeng kore kubid, dja bibowong.

¹⁹ Bu ngaleng yikawong bu bibowong, wanjh ngaleng yimeng, “Ngabomang bedberre nawu camel ke warridj. Ngadjal bomang munguyh bu kabirribongun rowk kabirriboyakwon.”

²⁰ Wanjh kunu werkkwerrk ngaleng boyakbom kore mayh bedberre birriborrahkendongi, dja rlobmeng durndi kore kungad, benmarnebomangi camel nuyeni rowk.

²¹ Dja namekbe bininj bidjalnani wokyak, ba kaluk kaburrbun bu Yawey kabimarnekurduyime nawu kumwamkenh, dja nuk burrkyak.

²² Bu camels birribonguneng rowk birriyakwong, wanjh nawu bininj bebkeng nawu kunkebkenh gold, walakkih dulmuk, dja bokenh gold kunberlikenh ngalengngarre dulmukwurd, wanjh biwong Rebekah.

²³ Wanjh nungka bidjawam, yimeng, "Kanmarneyimen, ngudda nangale ngunbornang? Yiddok kunrurrkkimuk nuye bu ngad ngarriwohyo?"

²⁴ Wanjh ngaleng bimarneyimeng, "Ngaye wanjh kornkumo ngardduk wanjh Bethuel nawu Milcah bimarneyawmey Nahor."

²⁵ Dja yimeng warridj, "Ngad ngarrikarrme kundalk dja manme bedberre mayh, dja mak kunrurrk bu ngurriwohyo."

²⁶ Wanjh namekbe nawu bininj barddurrkkurldanj dja biburlumeng Yawey,

²⁷ dja yimeng, "Ngaburlume Yawey nawu God nuye Abraham nawu nganmarnewohrnan, bu nungka minj bawoyi bu kabikongibun, kunmak kabiidjalmarnekurduyime, kabiidjalburrbun munguyh kabinahnan nawu nganmarnewohrnan. Dja wanjh ngayembu, nungka Yawey mandjad nganmikang ngamwam kore kunred bedberre birrimud nuye nawu nganmarnewohrnan."

²⁸ Wanjh ngalbu ngalyawk ngaleng wanjh rlobmeng, dokmeng kured dja benmarneyimeng rowk nawu birrihni ngalbadjan ngarre kururrk.

²⁹ Dja nawu Rebekah benedanginj nungka ngeyyoy Laban, nungka wanjh doktorokmeng bimarnebebmeng bininj nawu di kumekbe kore njilhmi boyohboyoy.

³⁰ Bu Laban bimarnenang ngaldaluk Rebekah bu kebdjongbuyindi dja berldjongbuyindi, dja bibekgang yolyohyolyolmi bu bininj bimarneyimeng, wanjh kundjalmekbe rerrih nungka Laban wam kore bininj, bingalkeng, kaluk kumekbe djahdjaldi camel dorreng kore njilhmi boyoy.

³¹ Laban yimeng, "Yimray ngarre, ngudda nawu Yawey ngunmarnekurduyime kunmak, dja njalekah yihdi kuberrk? Dja ngokko ngaye ngayingk-ihbolkmarnbom ke dja mak camels bedberre."

³² Wanjh kunu namekbe bininj benewam kore Laban nuyeni kunrurrk, dja Laban bodmeyerrhyerrkkeng nawu camels, dja biwong kundalk dja manme bedberre. Dja mak benmarnebokurrmeng kukku kundengekenh nungka dja bininj nawu birridjarrkrey ba kabirridgedjirridjburren.

³³ Bu manme bimarnekurrmeng kangun, nawu Abraham bimarnerurrk-mirri yimeng, "Minj ngaye ngabangmengun, ngayolyolme werrk bu njale ngamwamkenh." Wanjh Laban yimeng, "Mah yiyolyolmen."

³⁴ Wanjh nungka yimeng, "Ngaye wanjh ngamarnedurrkmirri Abraham.

³⁵ Yawey kunmak duninj bimarnekurduyimeng nungka nawu nganmarnewohrnan, dja nungka kukenminj duninj. Nungka biwong namirn-debubuyika nawu mayh, dja silver dja gold, dja bininj daluk nawu ngarriarnedurrkmirri, dja camels, dja donkeys.

³⁶ Dja Sarah ngalbu ngalbininj kobeng nuyeni nungka nawu nganmarnewohrnan, wanjh ngaleng bimarneyawmey bu kohbanjminj, dja nungka biwong namekbe beywurd yehyeng rowk nawu nuye.

³⁷ Dja nungka nawu nganmarnewohrnan ngandjurrkkang ngawokkurrmerrinj kunwok kunrayek duninj, bu nungka nganmarneyimeng, 'Yuwn beywurd ngardduk yimarnemang daluk ngalbu ngalkang kondah kore karrihni kubolkwarlah bedberre bininj nawu birrikang kondah Canaan.

³⁸ Dja ngudda yiray kore kunred nuyeni kornkumo ngardduk kore ngaye ngarrimud kabirriini, kaluk kumekbebeh daluk yimarnemang beywurd ngardduk.'

39 Kunmekbe nganmarneyimeng, dja ngaye ngamarneyimeng nungka nawu nganmarnewohrnan, ngayimeng, 'Kunubewu yimankek ngalbu daluk minj nganemre.'

40 Dja nungka nganmarneyimeng, yimeng, 'Yawey nawu nganehdjarrkre, nungka kaluk kabimunkewe angel nuye ngunedjarrkre, dja ngunmarnekurduyime kunmak bu ngaye ngayimeng, dja beywurd ngardduk yimarnemang daluk kaluk kumekbebeh kore ngarrimud kore nawu nganbornang nuyeni kunred.

41 Kaluk bu ngudda yikurduyime rowk, wanjh kabularrbuyindangen kore yiwokkurmerrinj kunwok kunrayek duninjh. Bu yire kore ngaye ngarrimud, dja bu bedda minj ngundiwon daluk, wanjh kunu bonj kabularrbuyindangen bu ngudda kanmarnewokkurmerrinj kuhni bu kunwok kunrayek duninjh.'

42 "Kunmekbe wanjh nganmarneyimeng Abraham, dja bolkkime ngamwam kore njilhmi kaboyo dja yiwarrudj ngarranginj ngayimeng, 'Ngudda Yawey nawu God nuye Abraham nawu nganmarnewohrnan, bu ngudda yidjare yikurduyime nawu ngamwamkenh,

43 wanjh yina ngahdi kondah darnkih kore maninjmanu njilhmi kabirrihbomang, kab bu ngalyawk kamre kabomang dja ngamarneyime, "Ngadjare kanwohbowo manboyahwurd kore budjdjurlung ke ngawohbongun."

44 Dja bu ngaleng kayime ngardduk, "Yibongu, dja ngabomang bedberre nawu camels ke warridj." Daluk ngalbu kunmekbe kayime, wardibu ngaldjalmekbenin ngalbu ngudda Yawey yimarnedjarngbom beywurd nuye nawu ngaye nganmarnewohrnan.'

45 "Kuhni ngayimeng, dja bu ngaye minj ngabangmeyakwoyi bu ngawokdi baybaywi kukange ngardduk, wanjh kumekbe Rebekah kumebemeng budjdjurlung ngorrkani kukkukenh kukarlang ngarre, dja ngaleng koluy kore njilhmi kaboyo dja bomey. Ngaye ngamarneyimeng, 'Ngadjare kanbowo.'

46 Wanjh ngaleng werrkwerrk budjdjurlung koluyhweng kukarlangbeh dja yimeng, 'Yibongu dja camels ke warridj ngabenbowon.' Wanjh kunu ngaye ngabonguneng, dja ngaleng benbowong camels warridj.

47 Wanjh ngaye ngadjawam, 'Ngudda nangale ngunbornang?' Wanjh ngaleng yimeng, 'Ngaye kornkumo ngardduk wanjh Bethuel nawu Milcah bimarneyawmey Nahor.' Kunu wanjh ngakebdjongbom ring, dja kunberlkenh ngaberldjongbom.

48 Wanjh ngadjalbarddurrukkurlhdanj bu ngaburlumeng nawu Yawey. Ngaburlumeng nungka Yawey, nawu God nuye Abraham nawu nganmarnewohrnan, dja nungka God mandjad nganmikang ngamwam kore ngurrimud nuye nawu nganmarnewohrnan, ba beywurd nuye ngamarne-mang daluk ngalbu Abraham benedanginj bikebmawahmeng."

49 Wanjh namekbe bininj nawu Abraham bimarnedurrkmirri yimeng bedberre, "Wanjh bu ngudda ngurrimarnewoybuk ngurrimarnekurduyime kunmak nungka nawu nganmarnewohrnan, wanjh kandimarneyimen, dja bu burrkyak wanjh kandimarneyimen ba ngaburrbun bu baleh ngakurduyime."

50 Wanjh Laban dja Bethuel benewokmey beneyimeng, "Kuhni wanjh Yaweybeh, wanjh ngad minj baleh mak ngundimarneyime bu yimankek kamak dja nuk kawarre.

51 Yina ngahli wanjh Rebekah, yima dja ngunere, wanjh bonj benemarrimen beywurd nuye nawu ngunmarnewohrnan, kore Yawey nungka ngunbukkang."

⁵² Bu namekbe bininj nawu Abraham bimarnedurrkmirri bu benebekkang kore beneyimeng, nungka boddanj kanjdji kurorre kore Yawey kumirrk nuye.

⁵³ Wanjh namekbe bininj bebkeng yehyeng namakmak nawu birridjong-burreni silver dja gold, dja mak kunmadj, dja biwong Rebekah, dja warridj ngalbadjan dja narangem benbenewong namakmak.

⁵⁴ Wanjh nungka dja bininj nawu birridjarrkrey birringuneng birribonguneng dja kumekbe birriwohyonginj. Bu nungka dolkkang bu malaywi wanjh yimeng, "Kandimunkewemen ngarrurndeng kore ngan-marnewohrnan."

Rebekah Benbawong Namud Ngarre.

Genesis 24:55-61

⁵⁵ Dja nawu Rebekah benedanginj dja ngalbadjan ngarre beneyimeng, "Kab minj ngalyawk ngarriwohni kondah bu yiman ten kunkodjke, kunmekbe wanjh ngurrire."

⁵⁶ Wanjh nungka yimeng, "Yuwn kandimaddeng, dja Yawey ngan-marnekurduyimeng bu ngamwamkenh. Wanjh kandimunkewemen ba ngare kore nungka nawu nganmarnewohrnan."

⁵⁷ Wanjh bedda beneyimeng, "Wardi ngalyawk nganekayhme nganed-jawan."

⁵⁸ Wanjh benekayhmeng Rebekah benedjawam, "Yiddok ngunere nanih nawu bininj?" Dja ngaleng yimeng, "Yoh ngare."

⁵⁹ Wanjh kunu benemunkeweng Rebekah ngalbu birrimud, daluk dorreng ngalbu bihnahnani birridjarrkwam namekbe bininj nawu Abraham bimarnedurrkmirri, dja bininj nawu birridjarrkrey.

⁶⁰ Wanjh bedda nawu Laban dja ngalbadjan beneyimeng kunmak kunwok ngarre Rebekah, beneyimeng, "Ngalyawk ngalbu kanemud, nganed-jare ngudda wurdwurd ke kabirrimirndewernmerren duninj, dja nawu ngudda ke yibenkebmakkahme kabindibolkyimang kubolkkihkimuk bedberre nawu kabindiwidnan, kaluk kabirribolkkarme."

⁶¹ Kunu wanjh Rebekah dolkkang dja daluk dorreng nawu birrimarne-durrkmirri, wanjh camels birrimorreni, dja birridjarrkwam namekbe nawu bininj.

Isaac Benemarrinj Rebekah.

Genesis 24:62-67

⁶² Bu kumekbe bolkyimi, Isaac nungka bolkbawong Beer Lahai Roi,* dja wanjh nungka wam ningihni kore Negeb.

⁶³ Bu wolewolehminj Isaac wam kore kabbal burrbuhburrbuni, wanjh balwohnang nang camels kabirrimhre.

⁶⁴ Dja Rebekah balwohnang dja bu ngaleng binang Isaac, ngaleng wanjh kumkoluy dja bimarneyimeng nawu Abraham nuye kabimarnedurrkmirri, yimeng,

⁶⁵ "Kaluk nangale nahnani bininj nawu kahdjalle kore kabbal, nawu kamre kandabke kadberre?" Wanjh nawu bininj yimeng, "Nungka wanjh beywurd nuye nawu nganmarnewohrnan." Kunu wanjh ngaleng kummay nawu manburrba ngarre nawu kunkebkenh, dja kebbarrkburrinj.

⁶⁶ Wanjh namekbe bininj bimarneyolyolmeng Isaac yehyeng rowk nawu nungka kurduhkurduyimi.

⁶⁷ Wanjh Isaac bimey ngalyawk Rebekah, bikang kore dabburlin nuye kore ngalbadjan nuye Sarah yoy kunkare, dja Rebekah yimerranj

* **24:62** Hebrew kamenyime, "Kungad nuye nawu kadjalimbi munguyh dja nganhnang gaye."

ngalbininj kobeng nuye. Wanjh Isaac bimarnedjareni. Kunu wanjh nungka njilngmakminj bu ngalbadjan nuyeni ngalbu Sarah bimarnedoweng.

25

Bebeywurdubuyika Nuyeni Abraham.

Genesis 25:1-6

¹ Kaluk Abraham bimey ngalbuyika ngalbininj kobeng ngalbu ngeyyoy Keturah.

² Ngaling bimarneyawmey Zimran, Jokshan, Medan, Midian, Ishbak dja Shuah.

³ Kaluk Jokshan benbenebornang Sheba dja Dedan. Kaluk nawu nunganwali Dedan benkebmawahmeng bininj nawu birribebbehngeyyoy Ashur, dja mak Letush dja mak nawu Leumm.

⁴ Dja Midian nuyeni bebeywurd wanjh Ephah, Epher, Hanoch, Abida dja Eldaah. Birrimekbe rowk wanjh Keturah benyawmey dja benkebmakkahmeng.

⁵ Abraham biyibawong Isaac yehyeng rowk nawu karrmi.

⁶ Dja bu nungka Abraham djahdjaldarrkidni nungka burudjang benwong bebeywurd nuyeni nawu dalukbubuyika nawu nungka bendjalwohmey bindiyawmey. Wanjh benmunkeweng rowk kore kubolkwarlahbuyika, kaluk koyek, ba minj bedda birridjarrkraworrineninj Isaac nawu beywurd nuye.

Bu Abraham Doweng.

Genesis 25:7-11

⁷ Abraham nuyeni mandjewk rowk bu djahdjalmimbini wanjh 175.

⁸ Wanjh nungka ngolekdadjmeng, doweng bu wernhkoibanjminj duninj, dja malngwam kore Mawah nuyeni birriyingkihmalngdokmeng.

⁹ Bebeywurd nuye nawu Isaac dja Ishmael bedda wanjh benekukdudji kore kuwardderurrk kore kunred Machpelah darnkih Mamre, kaluk kore kabbal nuyeni Ephron beywurd nuyeni Zohar nawu mawahmawah nuye Heth.

¹⁰ Mahni kabbal nawu Abraham korrokoni karremulewam bu birri-bolkweykang bininj nawu Heth benkebmawahmeng. Wanjh kumekbe Abraham benekukdudji, dja Sarah kumekbe benemidjraworrinj ngalbu ngalbininj kobeng nuyeni.

¹¹ Bu Abraham doweng wanjh God bimarnekurduyimeng kunmak Isaac nawu beywurd nuye Abraham, dja nungka Isaac yerrkang ni darnkih kore kungad boyoy manbu bongadngeyyoy Beer Lahai Roi.

Nawu Ishmael Benbornang.

Genesis 25:12-18

¹² Kuhni kabiyolyolme Abraham beywurd nuye nawu Ishmael nawu Hagar bimarneyawmey Abraham. Hagar ngaling ngalkang Egyptbeh dja bimarnedurrkmirri Sarah. Wanjh nawu Ishmael benbornang dja benkebmawahmeng nahni bininj rowk.

¹³ Kuhni wanjh birringeyyoy bebeywurd nuye, nawernwarre kangeydi werrk, kabirringeydi rowk, kaluk yerre wanjh nayahwurd duninj kangeydi. Kuhni wanjh birringeyyoy; Nebaioth nawu nadjjaman nuyeni Ishmael, dja Kedar, Adbeel, Mibsam,

¹⁴ Mishma, Dumah, Massa,

¹⁵ Hadad, Tema, Jetur, Naphish dja Kedemah.

16 Kunmekbe wanjh birringeyyoy Ishmael nuyeni bebeywurd. Bedda wanjh birriyimerranj rowk bu birribebbehwohrnani namudbubuyika bedberre. Kunmekbe wanjh birribebbehbolngkeykenhkani warridj kubolkyahwuyawurd bedberre kore birrireddi.

17 Ishmael nuyeni mandjewk rowk bu djahdjalmimbini wanjh 137. Wanjh nungka ngolekdadjmeng, doweng dja malngwam kore mawah nuyeni birriyingkihmalngdokmeng.

18 Dja nungka nawu benkebmawahmeng birrini kore kubolkwarlah, kaluk kabolkdjedjingmang kore kunred Havilah, kadjalewi kabolkburnbun kore kunred Shur, darnkih kore Egypt, dja mak kore karribalhbolkkyikan kunred Asshur. Dja bedda birriyidwernni bindimarneyidngalngalkeyi bedberre birribuyika bininj nawu Abraham benkebmawahmeng.

Jacob dja Esau.

Genesis 25:19-34

19 Kuhni wanjh kabiyolyolme Isaac nawu Abraham nuyeni beywurd. Abraham bibornang nawu Isaac.

20 Kaluk bu Isaac mandjewk nuyeni wanjh forty nungka benemarrinj Rebekah, ngalbu ngalbeywurd nuye Bethuel nawu Aramean bininj, nakang Paddan Aram kore kubolkwarlah Mesopotamia. Dja ngaleng wanjh benedanginj Laban nawu Aramean bininj.

21 Isaac nuyeni ngalbininj kobeng wanjh ngalwalirrngwarreni, wanjh kunu Isaac bimarnedanginj yiwarrudj bidjawam Yawey bu ngalengkenh. Wanjh Yawey bibek kang bu yiwarrudj dingihdi dja ngalbininj kobeng nuye ngalbu Rebekah ngaleng wanjh kanihkani wurdyaw.

22 Kaluk Rebekah bekkabekkarreni namekbe bokenh wurdyaw beneburreni kore kunjam ngalenggarre, wanjh yimeng, "Njalekenh mak ngaye ngahmimbi bu kuhni kurduyimerranj ngardduk?" Kunmekbekenh kunu wanjh ngaleng wam bidjawam Yawey.

23 Dja nungka Yawey bimarneyimeng, yimeng, "Nawu ngudda yibenbeneyawan wanjh kabenebebbheymerran benebebbbehredbubuyika nawu kabenebebbbehmud, nawu kaluk kabenebebbhekuklarlmiyindan. Kaluk mirndebuyika nawu nakudji nuye kabirriwernhngudjikimukmen, nabuyika nawu mirndebuyika nuye nanu wanjh birringudjwarre. Dja nawu kamdokme karrangen, nungka wanjh kabimarnedurrknirri nawu yerre kamdangen."

24 Kaluk bu kumwam ngarre wurdyaw bihbuni wanjh benedanginj narangem bokenh.

25 Nawu werrk danginj nungka wanjh kukkurlbakurlbahni, dja kunburk rowk nuyeni wanjh muddubbeni. Wanjh kunmekbekenh kunu benengeykurrmeng Esau. *

26 Kaluk rerre wanjh nawu benedanginj wanjh danginj. Nungka wanjh bidjalma dkarrmi nawu nawernwarre Esau. Kunmekbekenh kunu nungka wanjh ngeyyoy Jacob. † Isaac wanjh mandjewk nuyeni yimerranj 60 bu Rebekah benbeneyawmey.

27 Kaluk namekbe narangem bokenh benedjordminj. Wanjh Esau yimerranj mayhmakni dja djareni djahdjalley kubehbeberk. Dja Jacob nungka namodmikenhni, nungka djahdjalni kured, djahdjalwohrey kore dabburlin.

* 25:25 Kunekke kungey kayime "Nawu muddubbe". † 25:26 Kunekke kungey kayime, "Nungka kabimadkarme." Mak kayime, "Nungka kabiyirrrumang."

²⁸ Isaac biwernhmarnedjareni Esau, djareni nguyihnguyi mayh nawu Esau bimarnedjangkani. Dja Rebekah ngaleng wanjh biwernhmarnedjareni Jacob.

²⁹ Kaluk kunkudjikenh bu Jacob kinjehkinjeyi manme kunkalkkid, wanjh Esau kumbembeng kuberrkbeh kore renghey, dja nungka bulkkidj djalwernhmarrwedoweng.

³⁰ Wanjh nungka bimarneyimeng Jacob, yimeng, "Werrkwerrk kanwo yihak manmekbe mankukkurlba manme ngangun, dja ngaye ngadjalwernhmarrwedoweng bulkkidj." (Kunmekbekenh kunu wanjh nungka ngeyyoy Edom warridj, dja Edom, kunekke kungey kayime "Kukkurlba".)

³¹ Dja Jacob biwokmey, yimeng, "Kanwo werrk yimweyka nawu nawernwarrekenh, yerre wanjh yingun manme."

³² Esau yimeng, "Yina, ngaye bolk darnkih ngarrowen, dja njalekenh yimanek ngaburrbun nawernwarrekenh?"

³³ Dja Jacob yimeng, "Kanmarnewokkurmerrimen werrk kunwok kunrayek duninjh!" Wanjh Esau wokkurmerrinj kunwok kunrayek duninjh bu bimarneweykang Jacob nawu nungan Esau nuyeni nawernwarrekenh, biwong Jacob.

³⁴ Kunu wanjh Jacob biwong Esau buriddi mak manmekbe mankukkurlba manme kunkalkkid. Wanjh Esau nguneng dja bonguneng wanjh dolkkang wam. Kunu wanjh Esau warnyakminj djalbawong nawu nuyeni nawernwarrekenh.

26

Yawey Bimarnebukkarrinj Isaac.

Genesis 26:1-6

¹ Kaluk kore kumekbe kubolkwarlah wanjh yawoyhdjewkwarrewong bolkdarlehmij, manme birriyawarreni. (Kaluk kunbuyika minj kunkudjiwi bu bolkdarlehmij bu Abraham darrkidni.) Wanjh Isaac wam kore kunred kabolngeyyo Gerar kore kubolkwarlah bedberre Philistines kore nawu king Abimelech wohrnawohnani.

² Yawey bimarnebukkarrinj Isaac, dja bimarneyimeng, "Yuwn yire kore kubolkwarlah Egypt, dja yidjalnin kore kubolkwarlah bu ngaye wokrayekwon.

³ Kondah kubolkwarlah yidjalwohnin wurd kunkuyeng, dja ngaye ngardjarrkre dja marnekurduyime kunmak. Kunmekbe ngayime ke bu ngaye kaluk bolkwon ngudberre, ngudda dja nawu yibenkebmawahme, bolkwon rowk kondanjkuu kubolkwarlahbubuyika, wanjh kunu ngakurduyime, bu ngawokkurmerrinj kunwok kunrayek duninjh nuye kornkumo ke Abraham.

⁴ Ngaye ngabenmarnbun nawu ngudda yibenkebmawahme bininj kabirrimirndeyimerran yiman mankokkarrng kamirndeyime kore kungol, dja ngabenbolkwon kondanjkuu kubolkwarlahbubuyika rowk, dja mak kore bedda nawu yibenkebmawahme, wanjh ngabenmarnekurduyime kunmak birribebbehmirndebubuyika rowk nawu kabirrihni kubolkbubuyika kore kondah kurorre.

⁵ Kunmekbe kunu ngakurduyime bu Abraham nganwokmarrkmangi dja nganwokkarrmi rowk kore ngaye ngahdjareni, dja mak kore ngawokrayekwon, dja mak ngawokkurmerrinj, dja mankarre rowk bu ngakarremarnbon. Kunmekbe rowk nungka kurduhkurduyimi bu nganwokkarrmi." Kuhni Yawey bimarneyimeng nawu Isaac.

⁶ Wanjh kunmekbekenh kunu Isaac ni kore Gerar.

Bu Isaac Dja Rebekah Benekoweng.

Genesis 26:7-11

⁷ Bu bininj nawu kumekbe birrini birridjawam Isaac Rebekahkenh nungka yimeng, “Ngaleng wanjh ngaye nganedanginj.” Nungka keleni bu yimankek yimeninj, “Ngaleng wanjh ngalbininj kobeng ngardduk.” Dja nungka burrbuhburrbuni baybaywi yimeng, “Bininj nawu kondah kunred kabirrini wardi ngandibun Rebekahkah, dja ngaleng ngalkuk-makkaykenh.”

⁸ Bu Isaac kumekbe ni bu korroko wanjh Abimelech nawu king nawu benarnewohnani Philistine bininj, nungka bolknang kanjdji bu nungka dingihdi darnkih kore window, dja benbenenang Isaac benehkeyoy Rebekah ngalbu ngalbininj kobeng nuye.

⁹ Kunu wanjh Abimelech bikayhmeng Isaac dja yimeng, “Yina, ngaleng wanjh ngalbininj kobeng ke, wanjh njalekenh ngudda yiyimeng bu ngunedanginj?” Isaac yimeng, “Ngaye ngayimeng marndi ngandibun bu ngalengkah.”

¹⁰ Wanjh Abimelech yimeng, “Njale kuhni ngudda kanmarnekurduyime ngadberre? Nakudji nawu ngad bininj marndi benewarriboyuwurinj ngalbininj kobeng ke, dja kunu ngudda kanmarnbuyi bu ngad kunwarre ngariyimeninj.”

¹¹ Wanjh Abimelech benwokrayekwong nungka nuye rowk, yimeng, “Nawu kabenbenarneyime kunwarre nanih nawu bininj dja ngalbininj kobeng nuye, namekbe wanjh kadjaldowen.”

Yawey Bimarbnom Isaac Bu Wernhkukenminj dja Kunyi Bimarnebeb-meng.

Genesis 26:12-22

¹² Isaac kaluk dudji manmim kore kumekbe kubolkwarlah, dja bu kunkudjiwi mandjawk nungka mangi manwern duninj manme yiman 100. Yawey bimarnekurduyime ngumak.

¹³ Wanjh nungka kukenminj, dja mak munguyh wernhkukenwernminj, kaluk nungka djalwernhkukenminj duninj.

¹⁴ Nungka benkararmi namirndebubuyika mayh, dja mak birriwern bininj nawu birrarnedurrkmirri, wanjh kunu nawu Philistine bininj birrarnekirnni.

¹⁵ Kaluk kunngad rowk manbu kornkumo nuyeni bininj birringadkaruy bu nungka Abraham regehrey kumekbe, wanjh bedda nawu Philistine bininj birringaddudji rowk.

¹⁶ Wanjh Abimelech bimarneyimeng Isaac, yimeng, “Yiray, kanbawo ngadberre, dja ngudda yiwernngudj kimukminj ngadberre.”

¹⁷ Wanjh kunu Isaac bolkbawong kumekbe, dja wam bolkmarnbnom kore kanjdjikanjdji ngarre Gerar dja kumekbe kunu ningihni.

¹⁸ Isaac nuye bininj birriyawoyhngadkaruy rowk kunngad manbu Philistine bininj birringaddudji bu kornkumo nuyeni nawu Abraham doweng, manbu kerrngehkenh birringadkaruy bininj nuyeni Abraham, bu nungka ningihni kumekbe. Dja Isaac yawoyhbongadngeykurrmeng rowk kunngaykudjiwi bu kornkumo yingkih bongadngeykurrmeng.

¹⁹ Isaac nuye bininj nawu birrarnedurrkmirri wanjh birringadkarungi kumekbe kore kanjdjikanjdji dja birriongalkeng kukku njilhmi.

²⁰ Dja bininj nawu birrarnani mayh nawu birrikang Gerar, dja nawu Isaac nuyeni bininj nawu birrarnani mayh, wanjh birriboyirreni. Dja bedda nawu birrikang Gerar birriyime ngumak, “Maninjmanu kukku wanjh

ngad ngadberre." Wanjh kunu Isaac bongadngeykurmeng "Birridurrinj" bu bedda birriboyirurrinj.

²¹ Wanjh birriyawoyhngadkaruy manbobuyika dja manmekbe warridj birriboyirurrinj, wanjh kunu Isaac bongadngeykurmeng "Kandiwidnan".

²² Wanjh nungka bolkbawong kumekbe, dja bininj nuye birriyawoyhngadkaruy manbobuyika, dja minj birriboyirurrimeninj. Wanjh kunu nungka bongadngeykurmeng "Kubolkwarlah", wokkihyimi dorreng, "Bolkkime wanjh Yawey kanmarnebolklarlahwong ba karrini kamak rowk dja ngad karrimirndewernmerren kondah kubolkwarlah."

Yawey Biyawoyhbukkarrinj Nawu Isaac.

Genesis 26:23-25

²³ Kaluk Isaac bolkbawong kumekbe dja wam kore Beersheba.

²⁴ Wanjh kundjalmekbe kumunun bu bolkmey wanjh Yawey bi-marnebukkarrinj, dja yimeng, "Ngaye wanjh God nuyeni kornkumo ke Abraham. Yuwn yikele, ngaye ngarrdjarrkre, dja ngaye marnekurduyime kunmak, dja ngabenmirndewernwon nawu ngudda yibenkebmawahme. Kuhni ngakurduyime bu Abrahamkenh nawu nganmarnedurrkmirri."

²⁵ Kaluk kumekbe Isaac marnbom altar kunwardde yiwarrudjkenh, dja kumekbe danginj yiwarrudj bikayhmeng kunngey nuye Yawey. Kumekbe nungka nameng dabburlin nuye, dja mak bininj nuye nawu birrimarne-durrkmirri birringadkarungi.

Isaac dja Abimelech Benewokkurmerrinj.

Genesis 26:26-33

²⁶ Dja bu kunmekbe birribalhyimi, Abimelech kumebmeng Gerarbeh, birrimdjarrkwam Ahuzzath nawu nungan nuye bibidyikarmi, dja Phicol nawu benmarnewohnani djuram nuye.

²⁷ Isaac bendjawam, "Njalekenh ngurrimwam kore ngaye dja ngudda wanjh kandiduy kandikukmunkeweng?"

²⁸ Bedda birriwokmey birriyimeng, "Ngad mandjad ngarrihnan bu Yawey ngunehdjarrkre, wanjh kunu ngundimarneyime, wardi karri-wokkurmerrimen kunwok kunrayek duninj, ngad dja ngudda, wardi karriwokmarnburrimen,

²⁹ ba ngudda minj njale kunwarre kanmarneyime ngadberre, yiman rerrih bu ngad minj baleh ngundimarneyimeninj, kunmakwi ngundi-hdjalmarneyimi, dja ngundimunkeweng kunmodmikenh dorreng, dja bolkkime wanjh Yawey ngunmarnekurduyimeng kunmak."

³⁰ Wanjh Isaac benmarnemarnbom mulil, wanjh birringuneng dja birribonguneng.

³¹ Dja wanjh bu kukabel bedda kunu birriwokkurmerrinj kunmekbe kunwok kunrayek duninj. Wanjh Isaac benmunkeweng kabirridurn-deng, wanjh birribawong kunmodmikenh dorreng.

³² Wanjh kunmekbe kunbarnangarra rerrih Isaac nuye bininj nawu birrimarnedurrkmirri birrimarnebebmeng, dja birrimarnemulewam kunngad manbu birringadkaruy. Birriyimeng, "Ngad ngarribongalkeng kukku."

³³ Nungka Isaac bongadngeykurmeng Shiba, dja kunmekbekenh kunu kunmekbe kubolkkimuk munguyh kadjalbolkngeyyo Beersheba.

Nawu Esau Benbenemey Daluk Ngalbu Benedjenbuyika.

Genesis 26:34-35

³⁴ Bu Esau nungka mandjewk nuyeni forty nungka benemarrinj Judith ngalbeywurd nuye Beeru nawu Nahit bininj, dja mak benemarrinj Basemath ngalbeywurd nuye Elon nawu Nahit bininj.

³⁵ Dja bedda nawu ngalbibininjkobeng nuye wanjh bindinjilngwarrewoni Isaac dja Rebekah.

27

Isaac Bimarneyimeng Jacob Kunmak Kunwok Nawernwarrekenh Nuyeni.

Genesis 27:1-40

¹ Bu Isaac wernhkohbanjminj dja wernhmimbulerranj minj njale wernhnay, wanjh bikayhmeng Esau nawu nuye beywurd nawu nadjdjaman, dja bimarneyimeng, "Korlonj." Esau biwokmey yimeng, "Njale yidjare?"

² Isaac yimeng, "Kanbekka, marneyime. Ngaye ngakohbanjminj, dja ngawakwan bu baleh kayime ngarrownen.

³ Mah, wanjh yima bunarra ke dja yiray kore kubehbeberk, yidjangka mayh ngardduk.

⁴ Kanmarnekinjemen namanjmak nawu ngahdjaredjare dja yimkan ngardduk ngangun, ba ngaye marneyime kunmak kunwok, wanjh yerre ngawelengdownen."

⁵ Rebekah ngaleng wanjh bibekkani kore Isaac bimarneyimi Esau nawu beywurd nuye. Dja Esau wam kore kabball kadjangkan mayh kankukyirrundereng,

⁶ Wanjh Rebekah bimarneyimeng nayaw ngarre nawu Jacob, yimeng, "Ngabekkang kornkumo ngorrewoneng bimarneyimeng Nakokok Esau bu yimeng,

⁷ 'Kanmarnedjangka mayh dja kanmarnekinjemen namanjmak ngangun, ba ngaye marneyime kunmak kunwok kumirrk nuye Yawey, rerre wanjh ngawelengdownen.'

⁸ Kunmekbe bimarneyimeng kornkumo ngorrewoneng, wanjh kunu ngayime ke Djedje, kanwokmarrkma kore ngaye wokrayekwon.

⁹ Yiray kore mayh kadberre kamirnderri, dja kanmarneka bokenh goat yaw nawu namak, ba ngaye ngakinje namanjmak nuye kornkumo ke nawu nungan kahdjaredjare.

¹⁰ Dja wanjh kaluk ngudda yimarnekan kornkumo ke ngangun, ba ngunmarneyime kunmak kunwok, rerre wanjh kawelengdownen."

¹¹ Jacob bimarneyimeng Rebekah ngalbu ngalbadjan nuye, yimeng, "Aba, nawu ngardduk Kokok nawu Esau nungka namuddubbe, dja ngaye ngamudyak.

¹² Dja baleh bu kayime Ngabbard ngankukbekkan? Kunu wanjh nungka kayime ngahkowe, wanjh kunukka nungka ngandung, nganmarneyime kunyid kadjare ngardduk, dja minj kunmak kunwok nganmarneyime."

¹³ Wanjh ngalbadjan yimeng, "Djedje, bu yimankek ngunmarneyime kadjare kunyid ke, wanjh kunu nganmarneyimerra ngaye. Dja bonj, kandjalwokmarrkma, dja yiray yimka nawu mayh."

¹⁴ Wanjh Jacob wam mey nawu mayh bokenh benbenemkukakang kore ngalbadjan nuye, dja ngaleng kinjeng namanjmak nawu kornkumo nuye djarehdjareni.

¹⁵ Wanjh Rebekah mey nawu namak duninj kunmadj nuye Esau nawu nayawwernwarre ngalenggarre, mey namekbe kunmadj nawu

ngaleng bihmadjkarmi kumekbe kururrk kore yongohyoy, dja ngaleng bidjongbom nayawwalawalak ngalenggarre nawu Jacob.

16 Dja mak bibiddukkang mayh kunkulah nawu goat dja kukom warridj.

17 Wanjh bibidkenwong nayaw ngarre nawu Jacob namekbe namanjmak dja mak buriddi manbu ngaleng kinjeng.

18 Nungka ngimeng kore kornkumo dja yimeng, "Ngabba." Nungka yimeng, "Ayh! Ngudda yingale, Korlonj?"

19 Wanjh Jacob bimarneyimeng kornkumo, yimeng, "Ngaye wanjh Esau nawu ngawernwarre ke. Ngakurduyimeng bu ngudda kanmarneyimeng. Yirrolkka wanjh yiwohngun yikahwi mayh ngardduk nawu ngahdjangkani, ba kanmarneyime kunmak kunwok ke."

20 Isaac bidjawam beywurd, yimeng, "Njalekah bu werkkwerrk yidjalngalkeng Korlonj?" Jacob biwokmey, yimeng, "Yawey nawu God ke, nungka wanjh nganbidyikarmeng, kamak rowk ngangalkeng."

21 Wanjh Isaac bimarneyimeng Jacob, yimeng, "Yimray darnkih ba bidbekkan Korlonj, ba kunu ngaburrbun ngudda woybukkih beywurd ngardduk nawu Esau, dja kunubewu nawid."

22 Jacob wam darnkih kore kornkumo nuye Isaac, dja nungka bibid-bekkan, wanjh marneyimerrinj, "Kamerlkyme yiman Jacob kunmerlk nuye, dja kabidyime yiman Esau kunbid nuye."

23 Nungka minj biwernhukburrburkbekkeyi dja nungka kunbid nuye bidmudwernni yiman yerreh benedanginj nuye nawu Esau bidyihbidyimi, wanjh kunu nungka kaluk bimarneyimeng kunmak kunwok.

24 Nungka bidjawam yimeng, "Yiddok ngudda woybukkih beywurd ngardduk nawu Esau?" Wanjh Jacob yimeng, "Yoh, wanjh gaye."

25 Wanjh Isaac yimeng, "Korlonj, yimka yikahwi nawu mayh ke nawu yidjangkani, yimka ngangun ba marneyime kunmak kunwok nawu marnehmarnekarmme." Jacob bimarnekang dja nungka nguneng, dja bimarnebokang wine dja bonguneng.

26 Wanjh kornkumo nuye nawu Isaac bimarneyimeng, "Yimdarnhray darnkih Korlonj, ba kanbunjhmang."

27 Wanjh kunu nungka wam kore kornkumo dja bibunjhmey. Bu Isaac bimadjnomeng nungka bimarneyimeng kunmak kunwok, dja yimeng, "A, beywurd ngardduk kakukbanj yiman rerrih kabbal kabanj manbu Yawey marnekurduyimeng kunmak.

28 Ngadjare God ngunwon kunberle kaddumbek kabolkkihwon kab-bal ke, dja manme manwern duninj kadjokodjorden ke, manmim manwern ba yingun, dja mak manbowern wine manbu manbokerrnge yibongun.

29 Ngadjare birrimudbubuyika bininj ngundimarnedurrkmirri, dja mak nawu birribekbehmirndewern ngundimarneboddan. Ngadjare ngudda yibenmarnewohnan nawu ngurrimud, dja nawu ngalbadjan ke kabenkebmaakahme ngundimarneboddan. Nawu kabirridjare kunyid ngundimarnemarnbun, wanjh ngadjare kunyid kabenmarnebebe bedberre, dja nawu kabirridjare kunmak ke, wanjh ngadjare kunmak kabenmarnebebe bedberre."

30 Isaac yakwong kore bimarneyimi kunmak kunwok, dja nungka Jacob bibalhbawoni kornkumo, wanjh kundjalmekbe rerrih benedanginj nuye nawu Esau kumbebmeng kore mayh kumhdjangkanibeh.

31 Nungka warridj mayh kumkinjeng nawu namanjmak dja kumkang kore kornkumo nuye, wanjh bimarneyimeng, "Ngabba, yirrolkka dja yingun yikahwi nawu mayh ngardduk nawu ngahdjangkani, ba kunu kanmarneyime kunmak kunwok kore nguddahbeh."

32 Wanjh kornkumo nuye nawu Isaac bidjawam, yimeng, “Nangale ngudda?” Nungka biwokmey, yimeng, “Ngaye wanjh ngawernwarre Esau.”

33 Wanjh Isaac deldehdeldelmi bulkkidj dja yimeng, “Nangale wanjh nawu djangkang mayh, dja kumkang kore ngaye? Ngaye nganguneng bu ngudda minj yimbangmebebeninj dja ngamarneyimeng kunmak kunwok, dja bonj wanjh nungka woybukkih kunmak kayimerran nuye.”

34 Bu Esau bibekakang kornkumo nuye kunwok, nungka kayhmeng wernkih duninj kunmimnalk dorreng, bu njilngwarreminj duninj, dja bimarneyimeng kornkumo. “Ngaye warridj kanmarneyimen kunmak kunwok, Ngabba.”

35 Dja nungka yimeng, “Nawu ngunedanginj kunwam ngankoweng dja nganyirurrkmey kunmak kunwok nawu marneyimeninj ngudda.”

36 Wanjh Esau yimeng, “Nungka wanjh mandjad kangeyyo Jacob nawu kahkurren. Nungka bokenhkah ngankoweng. Kerrngehkenh nungka nganyirurrkmey nawu ngarddukiwirrinj bu nawernwarrekenh, dja bolkkime nganyirurrkmey bu kanmarneyimeninj kunmak kunwok.” Wanjh Esau bidjawam kornkumo, yimeng, “Minj nuk ngudda kanwohmarnekarrme bu ngaye kunmak kunwok kanmarneyime?”

37 Isaac biwokmey Esau, yimeng, “Yina, ngaye ngamarnbom nungka ngunmarnewohnan, dja nawu ngurrimud rowk ngurrimarnedurrkmirri nungka, dja nungka ngawong manmim dja manbokerrnge wine ba kunmak rowk kani. Dja mak baleh ngaye ngakurduyime ke, Korlonj?”

38 Esau bimarneyimeng kornkumo, yimeng, “Yiddok ngudda kundjalkudji kunmak kunwok yikarrme, Ngabba? Ngaye warridj kanmarneyimen kunmak kunwok, Ngabba.” Wanjh Esau nalkbom wernkih.

39 Wanjh kornkumo nuye nawu Isaac biwokmey yimeng, “Yina, ngudda kaluk yini djarrehkah kore manme manwern kadjokodjordmen, dja mak djarrehkah kore kunberle kaddumbek kabolkkihwon.

40 Bu ngudda yimimbi wanjh mandjawak yikan yibenbunkeh, dja ngudda yimarnedurrkmirri nawu ngunedanginj. Dja kaluk bu yiwunjabmingalme, ngudda yiman rerrih yibakke nawu nungka ngunbongkarrme.”

Rebekah Bimarneyimeng Jacob Kakelerlobme kore Laban Nawu Badjan Nuye.

Genesis 27:41-46

41 Wanjh Esau biwidnani Jacob bu nungka kornkumo bimarneyimeng kunmak kunwok. Dja Esau nungan baybaywi marneyimerrinj, “Ngokko darnkih Ngabbard karrowen karrimarnenjilngwarre, kunu wanjh ngabun ngakukkurrme nawu nganedanginj Jacob.”

42 Bu Rebekah wobekakang bu kuhni yimeng nawu nayawwernwarre ngarre Esau, wanjh ngaleng bikayhmeng Jacob nawu nayawwalawalak ngalengngarre, dja bimarneyimeng, yimeng, “Yina, nawu ngunedanginj Esau, nungka wanjh kakangemarnburren bu kayime kaluk ngunbun ngunkukkurrme.

43 Wanjh kumekbekenh kunu Djedje, kanwokmarrkma, yirrolkka, yikelerlobmen kore ngaye nganedanginj Laban kore Haran.

44 Nungka ngunewohni bu kundedjdjumbungenh, kaluk bu ngunedanginj kayidyakmen.

45 Wanjh bu nungka nawu ngunedanginj kayidyakmen dja kabengmidjdan kore baleh ngudda yimarnekurduyimeng, wanjh kunu ngaye kunwok marnemunkewe ba yimdurndeng kumekbebeh. Dja njalekah yimankek bu kunbarnangarrakudji ngudda benbenedjarrkbalanhmang?”

⁴⁶ Wanjh Rebekah bimarneyimeng Isaac, yimeng, “Ngaye wanjh ngawarnyakminj bu ngamimbi bu bedda daluk birriwern ngalbu mawah-mawah Heth nuye. Wanjh bu Jacob daluk kabimang kore birrimekbe daluk nawu yiman bedda, daluk nawu birrikang kondah kubolkwarlah, wanjh yiman yerreh ngadjaldjare ngarrowen.”

28

Isaac Bimunkeweng Jacob Kunmakkenh Kore Laban.

Genesis 28:1-9

¹ Kunu wanjh Isaac bikayhmeng Jacob dja bimarneyimeng kunmak kunwok, dja biwokrayekwong, yimeng, “Yuwn ngunemarren daluk ngalbu ngalkang kunbolc Canaan.

² Yirrolkka, yiray kore kunred Paddan Aram kore kunrurrk nuye kornkumo ngarre ngalbadjan ke nawu Bethuel. Dja kumekbe yimang daluk ngunemarren, kaluk ngalbeywurd nuye Laban nawu badjan ke.

³ Ngadjare El Shaddaingunmarnekurduyime kunmak, dja mak ngun-maribun bu yibenbornan birridjalwern, kaluk nawu yibenkebmawahme bininj kabirrimirndewern kore kabirrimudbubuyika kabirrihni.

⁴ Ngadjare mak ngunwon ngudda dja nawu yibenkebmawahme, ngun-won kunmak nawu nuyeni Abraham, ba kunu ngudda ngurribolkkarme kunred kubolkwarlah kore bolkkime karrihni, kore minj kadberrekih kunred, kaluk kunred nawu God bibolkerrebbom Abraham.”

⁵ Wanjh Isaac bimunkeweng Jacob, dja nungka wam kore Paddan Aram, kore Laban beywurd nuye Bethuel nawu Aramean bininj, nawu nungka Laban benedanginj Rebekah, ngalbu ngalbadjan berrewoneng Jacob dja Esau.

⁶ Kaluk Esau bekkang bu Isaac kunmak kunwok bimarneyimeng Jacob dja bimunkeweng kore Paddan Aram, ba kumekbe daluk kabimang kabenemarren, dja mak Esau bekkang bu Isaac kunmak kunwok bimarneyimeng Jacob, nungka biwokrayekwong dorreng, yimeng, “Yuwn ngunemarren ngalbu daluk kore nawu Canaan benkebmawahmeng.”

⁷ Dja mak nungka bekkang bu Jacob benbenewokmarrkme y kornkumo dja ngalbadjan, dja bu nungka wam kore Paddan Aram.

⁸ Wanjh Esau bengdayhmeng bu daluk bokenh nuye ngalbu Canaanbeh wanjh benenjingwarrewong kornkumo nuye nawu Isaac.

⁹ Kunu wanjh nungka Esau wam kore Ishmael nawu beywurd nuye Abraham, dja benemarrinj Mahalath ngalbu ngalbeywurd nuye Ishmael, dja benedanginj nawu Nebaioth. Esau wanjh bimey Mahalath dja benrawong ngalbibininjkobeng nawu ngokko benbenekarmi.

Nawu Yawey Bukirri Bimarnebebmeng Jacob Kore Kunred Bethel.

Genesis 28:10-22

¹⁰ Jacob bolkbawong Beersheba, dja wam bolkyikani Haran.

¹¹ Nungka bebmeng kore kubolkkudji dja dungyibmeng, wanjh kumekbekenh kunu nungka kumekbe yonginj. Nungka mey mankudji kunwardde manbu kumekbe yoy, dja kurrmeng kodjbahkodjbarndi, wanjh kumekbe kekurrmerrinj.

¹² Wanjh nungka bukirribom yiman stairs rerrih manbu balhrey kurorrebeh, djahdjalleywi kaddum heaven. Dja kumekbe angels nawu birrimarnedurrkmirri God wanjh birribalbidbuni dja birrimkolungi man-mekbe stairs.

¹³ Wanjh kaluk Yawey bimarnedanginj kungurrid nuye, dja nungka yimeng, “Ngaye wanjh Yawey nawu God nuye Abraham nawu Mawah ke, dja mak God nuye Isaac. Kondah kunred kore yihyo ngaye kaluk bolkwon ngudda dja nawu yibenkebmawahme.

¹⁴ Dja bedda nawu yibenkebmawahme kaluk kabirrimrndeiyimerran yiman kundjulng rerrih kore kurorre, kabirrikaberrkwernmen kabirriyarlarirme, kabirribolkmang karrikad, koyek, dja kakbi, dja mak walem. Dja kore ngudda dja nawu yibenkebmawahme ngaye ngabenmarnekurduyime kunmak bedberre nawu birribebbehmudbubuyika rowk kore kurorre.

¹⁵ Dja kanbekka, marneyime, ngaye ngarrdjarrkre dja mak nahnan bu baleh yarrkka yire, dja mak kaluk durndiwe ngudda kondah kunred kubolkwarlah. Dja ngaye minj bawon, ngadjalkurduyime werrk nawu ngaye berrebom ngudda.”

¹⁶ Wanjh Jacob kodjkerrolkkang dja yimeng, “Woybukkih wanjh Yawey kani kondah dja ngaye minj ngayingkihburrbuyi.”

¹⁷ Wanjh nungka keleminj dja yimeng, “Kondah wanjh ngadjal-bolkkengeme! Kondah kadjalbolkyime God nuye kunrurrk, dja mak kondah kururkdangmaye ngarre kaddum heaven.”

¹⁸ Wanjh kunmekbekenh kunu Jacob dolkkang bu kukabelbuyika dja mey manmekbe kunwardde kore kodjidihkodjdi, dja warddedjabnameng dja yakbom mankalkkid kore manmekbe kunwardde.

¹⁹ Nungka bolkngeykurrmeng kumekbe Bethel. *Dja kerrngehkenhni kumekbe kunred bolkngeyyoy Luz.

²⁰⁻²¹ Wanjh Jacob wokkurrmerrinj kunwok kunrayek duninj, yimeng, “Bu ngudda God ngarrdjarrkre, dja kannahnan kore yiman kunihbu ngahre, dja mak kanwon buriddi ngangun, kunmadj ngadjongburren, ba ngamdurndeng kore Ngabbard ngardduk nuye kunrurrk kunmodmikenh dorreng, wanjh kunu ngudda nawu Yawey ngayime ngudda God ngardduk.

²² Dja maninjmanu kunwardde manbu ngawarddedjabnameng, wanjh kayimerran ngudda God kunrurrk ke. Dja yehyeng rowk bu ngudda kanwon, bu yarrkka yiman ten kanwon, wanjh ngaye nakudji marnedurndiwe bu munguyh.”

29

Jacob Bolkmey Kore Laban Nuye Kunred.

Genesis 29:1-14

¹ Wanjh Jacob dolkkang wanjh regehrey dja bolkmey kubolkwarlah kore kabirrihni birrimudbubuyika bininj nawu birrikang koyek.

² Wanjh kumekbe kore kabbal nungka nang kunngad, dja kumekbe darnkih birriyoy birrimrnedanbik nawu sheep, dja manmekbe kunngad bininj mayh birrimadbuni bindibowoyi. Wanjh kunmekbekenh kunu birrimekbe mayh birriyoy kumekbe. Kunwardde manbu birringadbalhmeng mahni kungad wanjh manwarddekimuk.

³ Dja berrebboyen bu kumirndebubuyika rowk nawu sheep bindimrnedormnamerrinj, wanjh bininj nawu birriahnani sheep birriwarddedjirrkayi, dja sheep birribowoyi. Wanjh kunmekbe birriwarddedurndiweng kore ngaddangbalhmeng.

* **28:19** Bethel kamenyime “God nuye kunrurrk”.

⁴ Wanjh Jacob bendjawam bininj nawu birrinahnani sheep kumekbe, yimeng, “Ngudda nawu karridabbolk, ngudda ngurrikang baleh?” Bedda birriyimeng, “Ngad ngarrikang kunbolk Haran.”

⁵ Wanjh nungka yimeng bedberre, “Yiddok ngurriburrbun Laban nawu Nahor Mawah nuyeni?” “Yoh”, birriyimeng, “wanjh ngarriburrbun.”

⁶ Wanjh Jacob bendjawam, yimeng, “Kaluk nungka kamak?” Wanjh bedda birriyimeng, “Yoh nungka kamak, dja yina, Rachel ngalbu ngalbeywurd nuye ngalih wanjh kamhre, kamhmirndekan sheep.”

⁷ Jacob yimeng, “Ngurrina, kaddum kahdjaldungdi, minj ngurribang-memirndemornname nawu sheep. Wanjh ngurrbenbowo dja ngurrimirndeka kabirridalkngun.”

⁸ Bedda birriyimeng, “Minj kunukka ngarribangmeyime, dja med ngarrimadbun mayh kumirndebubuyika rowk kabindimirndemornname, wanjh kunu ngarriwarddedjirrkkan manbu kahngaddangbalhmiyindi. Kumekbe wanjh sheep ngarrbenbowon kukku.”

⁹ Wanjh bu nungka djahdjaldwokdi, Rachel bebmeng sheep dorrengn nawu kornkumo ngarre nuye, dja ngalengbu bennahnani.

¹⁰ Wanjh bu Jacob binang Rachel ngalbu ngalbeywurd nuye Laban nawu badjan nuye, dja mak nang mayh nuye nawu sheep, Jacob wam warddedjirrkkan manmekbe kunwardde, dja benbowong mayh nawu nuye nawu Laban.

¹¹ Wanjh Jacob bibunjhmey Rachel dja nalkbom wernkih.

¹² Wanjh Jacob bimarneyimeng Rachel bu nungka nayaw nuye kornkumo ngarre, dja bu nungka wanjh nayaw ngarre Rebekah. Wanjh kunu ngaleng rlobmeng bimarneyimeng kornkumo.

¹³ Wanjh kunmekbe rerrih bu Laban biwobekkang Jacob nawu nayaw nuye, nungka dokorrokmeng birrabkeng. Nungka biwanjbimey, bibunjh-mey dja bimbang kore kururrk nuye, wanjh kumekbe Jacob yolyolmerrinj dja bimarneyimeng rowk.

¹⁴ Wanjh Laban yimeng nuye, “Woybukkih ngudda wanjh yawmey duninjh.” Wanjh Jacob benehni bu dird nakudji.

Jacob Bimarnedurrkmirranginj Laban Nawu Biwong Leah Dja Rachel-wali.

Genesis 29:15-30

¹⁵ Kaluk Laban bimarneyimeng Jacob, yimeng, “Bu ngudda ngarrmud minj nuk kunmekbekenh kanmarnedurrkmirri bu minj marnekarremulewan. Kanmarneyimen baleh yiyime karremulewan?”

¹⁶ Wanjh Laban benbenekarrmi ngalbebeywurd bokenh. Ngalwernwarre wanjh ngeyyoy Leah, dja ngalwalawalak ngaleng wanjh ngeyyoy Rachel.

¹⁷ Leah ngalmimwarreni dja Rachel ngalkukmakni dja ngalmakkaykenhni duninjh.

¹⁸ Jacob bimarnedjareni Rachel, wanjh yimeng, “Ngaye marnedurrkmirri seven mandjewk bu ngudda kanwon ngalbeywurd ke ngalwalawalak ngalbu Rachel.”

¹⁹ Laban yimeng, “Kunwernhmak bu won ngudda, minj ngadjare ngawon nabuyika bininj, wanjh kondah yinin kore ngaye.”

²⁰ Wanjh kunu Jacob bimarnedurrkmirranginj bu mandjewk seven ba Rachel bimayi. Dja nungka bu bimarnedjareni Rachel bulkidid, wanjh kunmekbekenh kunu nungka bekkarrinj bu yiman minj kunwern kunbarnangarra bu bimarnedurrkmirranginj.

²¹ Kaluk Jacob bimarneyimeng Laban, yimeng, “Kanwo daluk ngalbu ngardduk. Ngayakwong bu mandjewk seven marnedurrkmirranginj, dja ngadjare nganeyo.”

²² Wanjh Laban benmirndemornnameng birriwern rowk nawu kumekbe kured birrini, dja mulil marnbom benwong.

²³ Dja bu ngokdanj nungka bikang ngalbeywurd nuye ngalbu Leah dja biwong Jacob, wanjh Jacob beneyonginj.

²⁴ Dja ngalkudji ngalbu bimarnedurrkmirri Laban ngalbu ngeyyoy Zilpah, ngaleng wanjh Laban biwong ngalbeywurd Leah kabimarnedurrkmirri.

²⁵ Wanjh yimankek bu barrhbom, kaluk Jacob bikuknang Leahni! Wanjh Jacob bimarneyimeng Laban, “Njale kuhni bu ngudda kanmarnekurduyime? Ngaye wanjh marnedurrkmirranginj bu Rachel ngamayi. Njalekah ngudda kankoweng?”

²⁶ Laban biwokmey, yimeng, “Minj kondah ngarriyime kakarremak bu ngalwalawalak werck bininj kabimang, dja ngalwernwarre werck kabimang bininj.

²⁷ Bonj wanjh, ngunedjalyuwn bu kunbarnangarra seven bu bimulil-mang, wanjh kunu ngundiwon ngalbuyika warridj, bu kanyawoyhmarne-durrkmirri mandjewk seven.”

²⁸ Wanjh Jacob kodjdukmen, nungka benehyoy Leah bu kunbarnangarra seven, wanjh Laban biwong ngalbeywurd nuye ngalbu Rachel ngalbininj kobeng nuye.

²⁹ Ngalkudji ngalbu bimarnedurrkmirri Laban ngalbu ngeyyoy Bilhah, wanjh Laban biwong ngalbeywurd nuye Rachel kabimarnedurrkmirri.

³⁰ Wanjh Jacob benehyoy Rachel warridj, dja nungka biwernhmarned-jareni Rachel, dja Leah walakkih. Dja nungka biyawoyhmarnedurrkmirranginj Laban kunbuyika bu seven mandjewk.

Ngalbu Leah Benyawkani.

Genesis 29:31—30:24

³¹ Bu Yawey binang Jacob minj bimarnedjareniwirrinj Leah, wanjh nungka bimarnbom kamak kayawkan, dja Rachel ngaleng ngalwalirngwarreni.

³² Leah yawkani dja yawmey narangem. Dja ngaleng yimeng, “Yawey nungka burrbom ngardduk bu kunnjilngwarre, dja woybukkih nuk wanjh nabininj kobeng ngardduk bolkkime nganmarnedjare bu kunmekbekenh.” Kunmekbekenh kunu bingeykurmeng namekbe wurdyaw Reuben.*

³³ Kaluk yawoyhyawkani dja bu narangem bimarneyawdanginj, wanjh yimeng, “Bu Yawey bekkang bu minj Jacob nganmarnedjare, kunmekbekenh kunu namekbe warridj nganyawwong.” Kunu wanjh ngaleng bingeykurmeng Simeon.†

³⁴ Wanjh yawoyhyawkani, dja bu narangem bimarneyawdanginj, wanjh ngaleng yimeng, “Kaluk burrk wanjh nabininj kobeng ngardduk nuk nganbelbme, dja ngaye ngamarneyawmey danjbik bebeywurd.” Kunu wanjh ngaleng bingeykurmeng Levi. ‡

³⁵ Wanjh yawoyhyawkani dja bu bimarneyawdanginj narangem, ngaleng yimeng, “Kuninj kunu wanjh ngaburlume Yawey.” Kunu wanjh bingeykurmeng Judah.§ Wanjh Leah ngurdmeng, minj yawoyhyawmayi.

* **29:32** Mahni kunngey Reuben kunubewu kamenyime “Nungka kannang bu nganjilngwarre.”

† **29:33** Mahni kunngey kunubewu kamenyime, “Nungka kanbekkang.” ‡ **29:34** Mahni

kunngey kunubewu kamenyime, “Belbmeng”. § **29:35** Mahni kunngey kunubewu kamenyime “Ngaburlume.”

30

*Bu Rachel Minj Bimarneyawmayi Jacob.**Genesis 30:1-8*

¹ Bu Rachel narrinj bu ngaleng minj Jacob bimarneyawmayi wurdyaw, wanjh ngaleng kirnni bikirnweyi ngalbu benedanginj. Wanjh kunu bimarneyimeng Jacob, “Kanyawwo wurdwurd, dja bu burrkyak, wanjh ngarrownen.”

² Wanjh Jacob birruy, yimeng, “Yiddok ngaye yimankek yiyime God, nawu nungan ngunmarnbom minj yiyawmang?”

³ Wanjh ngaleng yimeng, “Ngahli wanjh Bilhah ngalbu nganmarnedurrkmirri. Ngoneyuwn ba ngaleng nganmarnyawmang, nawu kayawmang, wanjh namekbe ngaye ngardduk wurdyaw.”

⁴ Wanjh kunmekbekenh kunu ngaleng biwong Bilhah ngalbu bimarne-durrkmirri, biwong Jacob bu ngalbininj kobeng yimerranj. Wanjh Jacob beneyonginj.

⁵ Dja ngaleng yawkani bimarneyawmey Jacob beywurd.

⁶ Wanjh Rachel yimeng, “God wanjh yiman ngandjadmeng, yimeng ngamak, nungka nganbekkang bu ngakebdjarrkmi dja nganyawwong narangem.” Kunmekbekenh kunu ngaleng bingeykurrmeng Dan.*

⁷ Bilhah ngalbu Rachel bimarnedurrkmirri wanjh yawoyhyawkani, dja bimarneyawmey Jacob nabuyika beywurd.

⁸ Wanjh Rachel yimeng, “Ngaye yiman nganeyimarrreni bulkkidj ngalbu nganedanginj, dja ngaye ngawinhmeng.” Wanjh kunu ngaleng bingeykurrmeng Naphtali.†

*Bu Jacob Benbornang Birribuyika Wurdwurd.**Genesis 30:9-24*

⁹ Bu Leah narrinj bu ngaleng ngurdmeng, minj kayawoyhyawmang, wanjh ngaleng bikang Zilpah ngalbu bimarnedurrkmirri, dja biwong Jacob kabeneyo.

¹⁰ Wanjh Zilpah ngalbu Leah bimarnedurrkmirri, ngaleng wanjh bimarneyawmey Jacob beywurd.

¹¹ Wanjh Leah yimeng, “Kunukka wanjh kunmak.” Wanjh kunu ngaleng bingeykurrmeng Gad.‡

¹² Zilpah ngalbu bimarnedurrkmirri Leah wanjh bimarneyawmey Jacob nabuyika beywurd.

¹³ Wanjh Leah yimeng, “A! Ngadjalnjlngmak, morlehmorlenj kaluk kabirriyime bu ngaye nganjilngmak.” Wanjh kunu ngaleng bingeykurrmeng Asher.§

¹⁴ Kaluk bolkyimi bu manmim wheat birrimimmoyhmangi, Reuben wam kore kabbal dja ngalkeng mankolhde manme manbu ngeyyoy mandrake*, dja kumkang kore ngalbadjan Leah. Wanjh Rachel bimarneyimeng Leah, “Kab kanwo yikah manbu mandrake manbu nayaw ke ngalkeng.”

¹⁵ Dja Leah bimarneyimeng, “Yiddok minj yiyime bonj bu kanyimey nabininj kobeng ngardduk? Yidjare yikan mandrake warridj manbu nayaw ngardduk ngalkeng?” Wanjh Rachel yimeng, “Kaluk kamak

* **30:6** Mahni kungey kamenyime “Yimeng ngaye ngamak”. † **30:8** Mahni kungey kamenyime “Nganeburren”. ‡ **30:11** Mahni kungey kunubewu kamenyime “Kunmak kunwern”. § **30:13** Mahni kungey kamenyime, “Nganjilngmak”. * **30:14** Mahni mankolhde wanjh daluk birriyimi bu kabenmarnbun bininj kabindimarnedjare.

nguneyuwn Jacob kuninjkuwu kumunun bu ngudda kanwon mandrake manbu nayaw ke ngalkeng.”

¹⁶ Wanjh kunu bu Jacob kumbemeng kabbalbeh bu wolewoleh, Leah wam birrabkeng, yimeng, “Ngudda bolkkime ngarryo, dja ngaye karremulewam ngaweykang mandrake manbu nayaw ngardduk ngalkeng.” Wanjh kunu beneyonginj bu kunmekbe kumunun.

¹⁷ Wanjh God bibek kang Leah, dja yawkani, bimarneyawmey Jacob beywurd nabuyika nawu marnbom kunbidkudji ngalengngarre.

¹⁸ Wanjh Leah yimeng, “God ngankarremulewam bu ngalbu nganmarnedurrkmirri ngawong nabininj kobeng ngardduk.” Wanjh kunu ngaleng bingeykurrmeng Issachar.†

¹⁹ Leah yawoyhyawkani, dja bimarneyawmey Jacob beywurd nabuyika nawu marnbom kunbidkudji dja nakudji ngalengngarre.

²⁰ Wanjh Leah yimeng, “God nganwong burudjang namakmak. Bolkkime wanjh nabininj kobeng ngardduk yiman ngankukenhme, kunmekbe kakurduyime bu ngaye ngamarneyawmey kunbidkudji dja nakudji bebeywurd.” Wanjh kunu ngaleng bingeykurrmeng Zebulun.‡

²¹ Kaluk rerrikah ngaleng yawmey ngaldaluk, dja bingeykurrmeng Dinah.

²² Wanjh yerre God biburrbom Rachel bibek kang dja bimarbnom ba kamak kayawkan.

²³ Wanjh ngaleng yawkani, yawmey narangem dja yimeng, “God nganmarneyakwong bu bininj ngandiwarreweyl.”

²⁴ Ngaleng bingeykurrmeng Joseph, wokkihyimi, “Ngadjare Yawey nganmarnarawon nabuyika narangem.” §

Jacob Nuye Mayh Birrimirndewernmerrinj.

Genesis 30:25-43

²⁵ Wanjh bu Rachel biyawmey Joseph, kaluk yerrekah Jacob bimarneyimeng Laban, yimeng, “Kanmunkewemen ba ngarrurndeng kunred ngardduk.

²⁶ Kanwo ngalbibininj kobeng ngardduk, dja mak wurdwurd nawu ngaye marnehmarnedurrkmirri beddakenh, dja kanmunkewemen ngare. Ngudda yiburrbun bu kunkimuk ngaye marnehmarnedurrkmirri.”

²⁷ Dja Laban bimarneyimeng, yimeng, “Bu ngudda nuk yiyime ngamak, yuwn yire, ngarrnin. Ngaye ngabolbmeng bu mankur dang nganmarneyimeng bu Yawey nganmarnekurduyimeng kunmak bu nguddakenh.

²⁸ Dja bu ngudda njale yidjare marnekarremulewan, wanjh yingeybu, won.”

²⁹ Jacob yimeng, “Ngudda yiburrbun bu ngaye kamak marnehmarnedurrkmirri, dja bu mayh ke kamak rowk ngabennahnani.

³⁰ Bu ngaye minj ngambangmerawinj, wanjh minj ngudda yikarmeninj nawern, dja bu ngaye dorrengh wanjh ngunmarnewernminj duninj, dja Yawey ngunmarnekurduyimeng kunmak kore baleh yarrkka ngaye ngahrey. Dja kaluk baleh kayime bu ngaye ngabenmarnemang bedberre nawu ngaye ngardduk?”

³¹ Wanjh Laban bidjawam, “Kaluk njale won?” Jacob biwokmey yimeng, “Yuwn njale kanwon, dja ngaye mayh ke ngabenyawoyhwon manme, dja ngabendjalnahnann bu kuhni kaluk kanmarnekurduyime.

† 30:18 Mahni kungey kunubewu kamenyime “Ngankarremulewam”. ‡ 30:20 Mahni kungey kunubewu kamenyime “Ngankukenhme”. § 30:24 Mahni kungey kayime “Ngadjare kanyawoyhwon”.

³² Kanmunkewemen ngare bolkkime kore mayh ke kabirrihmirnderri, dja ngabenbebke rowk nawu mayh nawu birrimudbubuyika dja birrikudjirldjirmikenh, dja ngabenbebke rowk sheep yaw nawu birrikukbulerri, dja goat nawu birrikudjirldjirmikenh dja birrimudbubuyika. Bedda wanjh bu ngabenmang wanjh yikarremulewan ngardduk.

³³ Dja kaluk yinan bu ngawoybuk, bu ngudda yirohrokme nawu kankarremulewan. Bu yinan ngaye yimankek ngakarme goat nawu minj mudbubuyika dja minj kukdjirldjirmikenh, dja sheep yaw nawu minj kukburlerri, wanjh namekbe yiyime ngadjirdmey.”

³⁴ Wanjh Laban yimeng, “Mah, kunmekbe ngarrkurduyimen kore ngudda yimeng.”

³⁵ Madjamku kunmekbe yimeng Laban, dja kundjalmekbe kunbarnangarra Laban benbebkeng rowk goat narahrangem nawu birrikuklayirrhlayirmikenh dja birrikudjirldjirmikenh, dja ngaldahdaluk nawu birrimudbubuyikani dja birrikudjirldjirmikenh, birriwern rowk nawu birriwohmudbeleni. Dja mak benbebkeng rowk birrikukbulerri sheep yaw, dja benwong bebeywurd nuye kabindinahnan.

³⁶ Dja bindikang djarreh duninh bu kunbarnangarra danjbik, dja Jacob nungka djahdjalni kured bennahnani birrimirndebuyika nawu Laban nuye mayh.

³⁷ Yiman djamku kuhni Laban kurduyimeng, dja Jacob nungka wanjh dulkberldjobkeng manbu karrulkngeyyo poplar, almond, dja plane kundulk, wanjh dulkmornihmorninjcurrmeng.

³⁸ Wanjh manmekbe kundulk rowk manbu dulkmornihmorninjcurrmi wanjh nungka dulkdjabdjabnameng kumirrk bedberre mayh, kore kukku borrahkendi bedberre mayh kore birrimrey birribonguni. Dja mayh bu birrimrey birribonguni wanjh kumekbe warridj birrimarreni.

³⁹ Wanjh kumekbe birrihdjalmarreni kore kurrulkmihmimirrk kore dulkdjahdulkdjabdjabdi. Dja kaluk yayaw bedberre nawu bindiyawmangi wanjh birrikuklayirrhlayirmikenh, birrimudbubuyikani, dja birrikudjirldjirmikenh.

⁴⁰ Jacob benlarlmey nawu yaw bencurrmeng bebbehbeh, dja mayh nawu mirndehmirnderri nungka benkebborledkeng birribalhbolknani kore Laban nuye mayh birrihmirnderri, nawu birrikuklayirrhlayirmikenh dja birrikukbulerri. Dja wanjh nungka bencurrmeng mayh nuye bebbehbeh, minj bindirawoyi nawu Laban nuye.

⁴¹ Dja yarrkka bu birriwernhgudjmak nawu ngaldahdaluk mayh bindihmangi, wanjh Jacob dulkdjabnamani kore kukku borrahkendi birribonguni, kukok bedberre kundulk, ba kunu birrimarreni kore darnkih dulkdjabdjabdi.

⁴² Dja bu nungka bennani birringudjwarreni myah, wanjh minj dulkdjabnameninj. Wanjh kunu nawu birringudjwarre mayh kaluk Laban nuye, dja nawu birringudjmak wanjh Jacob nuye.

⁴³ Wanjh bu kunmekbe kurduhkurduyimi Jacob wernhkukenminj duninh, dja mayh mirndewernminj nuye nawu sheep dja goat, dja mak benkarri birriwern daluk dja bininj nawu birrimarnedurrkmirri, dja mak camel dja donkey.

31

1 Kaluk Jacob wobek kang bu Laban nuye bebeywurd birriyimi, "Jacob kang rowk nawu Ngabbard nuyeni, dja kore nawu Ngabbard nuyeni nungka kukenminj."

2 Dja mak Jacob nang bu Laban bimarnekebbumi, dja kerrngehkenhni kamakni.

3 Wanjh Yawey bimarneyimeng Jacob, yimeng, "Yirrunde kore kubolkwarlah bedberre nawu mawahmawah ke kore ngudda ngurrimud kabirini, dja ngaye wanjh ngarrdjarrkre."

4 Wanjh Jacob benbenekayhmeng Rachel dja Leah kabenemre kore kabbal kore mayh nuye mirnderri.

5 Dja nungka benbenemarneyimeng, "Ngaye nganan bu kornkumo ngorrewoneng nganharnekebbume dja kerrngehkenhni kamakni. Kunu bonj, dja God nawu Kornkumo ngardduk wanjh nganehdjarrkrey nganbidyikarmeng.

6 Ngudda nguneburrbun bu ngaye ngamarnedurrkmirranginj kornkumo ngorrewoneng kunngudj dorreng ngardduk.

7 Dja kunu yiman djanku, dja nungka ngankoweyi, dja kunwernhkah borledkeyi nawu yimankek nganmarnekarremulewayi, dja God birrengheyi ba minj kunwarre nganmarnekurduyimeninj.

8 Bu nungka yimeng, 'Kaluk mayh nawu birrimudbubuyika wanjh ke bu karremulewan.' Wanjh mayh rowk bindiyawmangi birrimudbubuyikani. Dja bu yimeng, 'Kaluk mayh nawu birrikuklayirrhlayirrmikenh wanjh ke bu karremulewan.' Wanjh mayh rowk bindiyawmangi birrikuklayirrhlayirrmikenh.

9 Kunu God biyimey mayh rowk nawu nuyeni kornkumo ngorrewoneng, dja nganwong ngaye.

10 Kaluk bolkyimi bu mayh bedberreni birrimarreni, ngaye ngabukirribom, ngawohnang nganang mayh nawu goat narahrangem nawu bindihmangi ngaldahdaluk wanjh birrikuklayirrhlayirrmikenh, birrimudbubuyikani dja birrikukdjirrhlayirrmikenh.

11 Dja ngabek kang angel nuye God nganmarneyimeng bukirri, yimeng, 'Jacob!' Dja ngayimeng, 'Ngaye konhda, bekkabekkan.'

12 Dja nungka yimeng, 'Yiwohrna, dja yinan goat rowk nawu narahrangem nawu kabindimang ngaldahdaluk wanjh birrikuklayirrhlayirrmikenh, birrimudbubuyika, dja birrikukdjirrhlayirrmikenh. Kuhni ngakurduyime bu ngaye nganang rowk nawu Laban ngunharnekurduyimi.

13 Ngaye wanjh God, dja marnebebmeng kore kunred Bethel, kore ngudda mankalkkid oil yikalkkidyakbom kore kunwardde manbu yiwarddedjabnameng, dja kore ngudda kanmarnewokkurrmerrinj kunwok kunrayek duninj. Mah. Wanjh yirrolkka yibolkbawo kondah kubolkwarlah, dja werkwerrk yirrunde kore kubolkwarlah kore yirranginj."

14 Bu Jacob kuhni benbenemarneyimeng wanjh Rachel dja Leah benewokmey beneyimeng, "Minj njale Ngabbard nganbeneyibawon.

15 Nungka wanjh nganbenemarnekurduyime yiman bu ngad nganewokbuyika! Nungka nganbenekukweykang dja warridj kahkukyakwon nawu may bu nganbeneweykang.

16 Yehyeng rowk nawu God biyimey Ngabbard, wanjh woybukkih yimerranj ngad ngadberre, dja mak wurdwurd dorreng nawu ngadberre. Wanjh kunu bu baleh God ngunmarneyimeng, wanjh kunmekbe yikurduyimen."

17 Wanjh kunu Jacob dolkkang benkurrmeng wurdwurd nuye dja mak ngalbibininjkobeng kore camel birrimoroni.

18 Dja nungka benmirndemunkeweng mayh nuye kabirrimarnedokme. Yehyeng rowk dorreng nawu wernmerreni nuye kore Paddan Aram wanjh kang, dja birriwam birribolkyikani kore kornkumo nuye nawu Isaac kore kubolkwarlah Canaan.

19 Bu Laban wam benhmuddjobkeyi nawu sheep, wanjh Rachel djalmey wokyak nawu god nawern nuye kornkumo nawu yiwarrudj benmarnedi kore kururk nuye.

20 Dja warridj Jacob bikoweng Laban nawu Arameabeh bu nungka minj bimarneyimeninj kakelerlobme.

21 Nungka kelerlobmeng kang rowk yehyeng nawu nuye, wanjh dolkkang wam djowkkeng mankabo Euphrates dja djahdjalley balbolkyikani kore kurruluhdulum ngarre kabolkngeyyo Gilead.

Laban Bingudjkadjuy Jacob.

Genesis 31:22-42

22 Kaluk bu kunbarnangarra danjbik wanjh bininj birrimarneyimeng Laban bu Jacob kelerlobmeng.

23 Wanjh nungka Laban benkang nawu birrimud dja bindingudjkadjuy bu kunbarnangarra seven, dja bindimarnebebmeng kore kurruluhdulum ngarre Gilead.

24 Wanjh kumekbe kukak God bimarnebebmeng Laban nawu Aramean bininj, bimarnebebmeng bukirri dja bimarneyimeng, "Marndi yinahnar-rimen, dja yuwn njale yimarneyime Jacob nawu kunmak dja kunwarre."

25 Jacob wanjh dabburlin nuye nameng kore kunwarddekimuk ngarre kunbolk Gilead bu Laban bimarnebebmeng, dja Laban dja nawu birrimud birriyonginj kumekbe warridj.

26 Wanjh Laban bimarneyimeng Jacob, yimeng, "Ngudda njale yikurduyimeng? Ngudda kankoweng dja yibenbenekang ngalbebeywurd ngardduk yiman rerrih nawu bininj kabindidukkan daluk kabindikan bu kabirriburren war.

27 Njalekah ngudda manmolk yikelerlobmeng dja kankoweng? Njalekah minj kanmarneyimeninj ba kunu ngaye munkewemeninj bu karriwarnmakmeninj karriwayiniwirrinj bu birridoyi tambourine dja birribuyi lyre.

28 Njalekah ngudda minj yibenbawoyi ngabenbunjhmayi ngabenwok-nayi nawu ngabenkebmanjmeng dja ngalbebeywurd ngardduk? Ngudda kunu yikurduyimeng yiman yerreh yikodjkuluyak.

29 Ngaye wanjh ngakarrme kundulkarre bu marneyime kunwarre, dja bonj, God nawu kornkumo ke nuye wokdanj ngardduk kukak, yimeng, 'Marndi yuwn njale yimarneyime Jacob nawu kunmak dja kunwarre.'

30 Bonj, ngaye ngaburrbun bu ngudda wanjh yibolkbawong bu ngudda yidjareni bulkkidj yirrundereng kore kornkumo ke kani. Bonj kunu, dja njalekah yidjirdmey nayahwurd gods nawu ngardduk?"

31 Jacob biwokmey Laban, yimeng, "Ngaye ngamwam manmolk bu ngakeleni, dja ngaye ngayimeng bu ngudda kanyirurrkmayi ngalbebeywurd ke.

32 Dja bolkkime marneyime, bu yingalke nangale kakarrme gods ke, wanjh bonj namekbe kadjaldowen. Bu nawu ngad karrimud dorreng kabirrinan wanjh kanbukka yehyeng nawu ngaye ngakarrme bu ngudda ke, dja yidjalka." Kaluk Jacob nungka wakwani bu Rachel djirdmey namekbe nawu gods.

33 Wanjh Laban ngimeng kore Jacob nuye dabburlin, dja Leah ngalengn-garre, dja dabburlin berrewoneng benemekbe daluk bokenh nawu bindimarnedurrkmirri, dja minj kumekbe ngalkemeninj nawu god nuye.

Wanjh nungka kumbebmeng kore Leah ngarre dabburlin dja ngimeng kore Rachel ngalengngarre.

³⁴ Rachel wanjh korroko mey nawu gods nuye dja dahkendoy kore camel nuyeni baladji kubodmekenh, dja ngaleng wanjh ngerrehmeng. Bu kumekbe ni Laban wernhmadjyawani kore dabburlin rowk, dja minj ngalkemeninj.

³⁵ Dja Rachel bimarneyimeng kornkumo, yimeng, “Ngudda nawu yiwohnan ngardduk, yuwn kandung bu minj marnedolkan dja ngaye kunbodme ngarrowen.” Wanjh Laban benmadjyawam, dja minj ngalkemeninj namekbe nawu gods nuyeni nawu benmarnedi yiwarrudj kururk nuye.

³⁶ Wanjh Jacob ngukwarreminj dja birruy Laban. Jacob yimeng, “Baleh yiddok ngayimeng? Njale yiddok kunwarre ngakurduyimeng ke bu rerre ngudda kanmunkekadjuy bu kanbuyi?”

³⁷ Ngudda wanjh kanmadjyawam rowk nawu ngahkarrme, njale yiddok yingalkeng nawu ke yehyeng? Wanjh yikurrmen kondah kore ngaye ngarrimud kabirrinan, dja mak ngudda ngurrimud, ba kunu bedda kandidjadme ngarrku, kabirriyime nangale kunwarre yimihiymi, kunubewu ngudda dja ngaye nuk.

³⁸ Ngaye mandjewk twenty ngarrdjarrkni, dja sheep ke ngaldahdaluk dja mak goat minj bindimarneyawdowimeninj. Dja ngaye minj nganguyi nawu sheep narahrangem kore ngudda ke mayh mirndehmirnderri.

³⁹ Dja bu mayh nabang buni bikukdjalkdjalkmangi nawu ngudda ke, wanjh namekbe nawu mayh ke minj ngamkayi kore ngudda bukkayi, dja ngayeman ngakarremulewani. Dja ngudda kandjalyidjawani ngakarremulewani bu mayh bindidjirdmangi bu barnangarrakenh dja mak bu kukakkenh.

⁴⁰ Kunih wanjh kunu ngakurduyimi, bu barnangarra wanjh ngarungi kundungbang dja bu kukak ngabonjdjekdowneni, dja mak minj ngawernhkeyuwirrinj.

⁴¹ Ngaye mandjewk twenty ngani kore ngudda ke kunurrrk. Ngaye mandjewk fourteen marnedurrkmirranginj bu ngalbebeywurd ke bokenh kanwongkenh, dja mak mandjewk six marnedurrkmirranginj bu mayhkenh nawu kekij kanwongkenh. Dja ngudda kunwernhkah yibuyikawoni nawu kankarremulewani.

⁴² Bu God nawu Ngabbard nuye, nawu God nuyeni Abraham, dja nawu Isaac kabimarnekele, bu nungka minj nganbidyikarmeninj, wanjh woybukkih ngudda kankukmunkewemeninj ngalarrkniwirrinj. God nang ngardduk kunmurrngrayek, dja bu ngawernhdurrkmirranginj, dja wanjh kukakni nungka ngunduy.”

Jacob Dja Laban Benewokmarnburrinj.

Genesis 31:43-55

⁴³ Wanjh Laban biwokmey Jacob, yimeng, “Bedda wanjh ngalbebeywurd ngardduk, dja wurdwurd wanjh ngabenkebmanjmeng, dja mayh wanjh ngardduk, yehyeng rowk nawu yihnan nakka wanjh ngardduk. Kunu bonj, dja njale yimankek bolkkime ngabenmarnekurduyime ngalbebeywurd ngardduk dja wurdwurd berrewoneng nawu bedda bindiyawmey?”

⁴⁴ Kuhni yina ngarryimen, wanjh ngarrwokmarnburren ngudda dja ngaye, ba kanmulewan ngarrku.”

⁴⁵ Wanjh Jacob mey kunwardde dja warddedjabnameng.

⁴⁶ Dja benmarneyimeng nawu birrimud nuye, “Ngurriwarddemoyhma.” Wanjh bedda birrimeng kunwardde dja birridulminjameng kukudji, dja kumekbe darnkih birringuneng manme.

⁴⁷ Laban dja Jacob benebebbewarddengeykurrmeng. Laban nuye kunwok wanjh “Jegar Sahadutha”. Dja bu Jacob nuye kunwok wanjh “Galeed”.*

⁴⁸ Laban yimeng, “Maninjmanu manbu birridulminjameng kunwardde wanjh bolkkime kanmulewan ngudda dja ngaye.” Kunmekbekenh kunu warddengeykurrmeng Galeed.

⁴⁹ Dja mak warddengeykurrmeng Mizpah.† Kunmekbe warddengeykurrmeng bu yimeng, “Ngadjare Yawey kanbebbenhannan bu ngudda dja ngaye kore ngarrhbebbeni.

⁵⁰ Bu kunubewu ngudda kunwarre yibenbenemarnekurduyime ngalbebeywurd ngardduk, dja kunbuyika bu ngudda yibenmang dalukbubuyika yibenrawon ngalbebeywurd ngardduk, madjamku minj nangale karrini kannan ngarrku, yiburrbu God kannan bu ngudda dja ngaye.”

⁵¹ Mak Laban bimarneyimeng Jacob, yimeng, “Yina, maninjmanu manbu kunwardde birridulminjameng dja mak manbu kawardeddjabdi bu ngaye ngawarddenameng kubulkayh ngarrku.

⁵² Maninjmanu manbu kunwardde birridulminjameng wanjh kanmulewan, dja maninjmanu manbu kawardeddjabdi wanjh kanmulewan bu maninjmanu kunwardde manbu birridulminjameng ngaye minj ngawarddeyurrhke ngamre kore ngudda, dja ngudda minj yimwarddeyurrhke maninjmanu kunwardde manbu birridulminjameng dja manbu kawardeddjabdi, minj yimre kore ngaye bu kunwarrekenh ngarrmarneyimerren.

⁵³ Nawu God nuyeni Abraham dja nuyeni Nahor, nawu God nuyeni kornkumo berrewonengni, kandjadme ngarrku.” Wanjh kunu Jacob wokkurmerrinj kunwok kunrayek duninjh, kunngey dorrengh God nawu kornkumo nuye nawu Isaac bimarnekeleni.

⁵⁴ Dja Jacob kinjeng mayh God nuye bu yiwarrudj di kumekbe kore kuwarddekimuk, dja benmayhmeng nawu birrimud kabirringun, wanjh birringuneng dja kumekbe birrini bu kukakkuyeng kore kuwarddekimuk.

⁵⁵ Wanjh bu kukabel Laban dolkkang benbunjhmayh nawu benkebmanjmeng dja ngalbebeywurd nuye, dja benmarneyimeng kunmak kunwok, wanjh kunu nungka benbawong dja dokmeng kured.

32

Jacob Yingkihmarburrinj Bu Esau Kabirrabke.

Genesis 32:1-21

¹ Wanjh Jacob djahdjalley, dja angel nuye God birridabkeng.

² Bu Jacob bennang nungka yimeng, “Nanih wanjh God nuye bininj nawu kabirriburrenkenh.” Kunmekbekenh kunu nungka bolkngeykurrmeng kunmekbe kunred Mahanaim.*

³ Jacob benyingkihmunkeweng bininj nuye kunwok kabirriyngkihyirrokme kabirrimarnekan nuye Esau nawu benedanginj nuye kore kunred Seir, kumekbe kubolkwarlah bolkngeyyoy warridj Edom.

* **31:47** Mahni kunngey bokenh kamenyime “Birridulminjameng nawu Kanmulewan”. † **31:49**

Mahni kunngey kamenyime, “Manrurrkkuyeng kabolkahnankenh”. * **32:2** Mahni kunngey kamenyime “Kunred Bokenh”.

4 Jacob benwokrayekwong birrimekbe bininj nawu benmunkeweng, yimeng, "Kuhni wanjh ngurrimarneyimen Esau nawu yiman nganmarnewohnan, ngurriyimen, 'Kuhni wanjh ngunmarneyime Jacob nawu yiman namarladj, kayime ke, "Ngaye ngadjalni kore Laban, kumekbe ngahdjalni munguyh, bolkkime ngambolkbawong.

5 Dja ngabenkarrme bulikki, donkey, sheep, dja goat, dja bininj daluk nawu ngandimarnedurrkmirri, dja wanjh ngaye ngamunkewe kuhni kunwok ngudda marneyime nawu kanmarnewohnan, ba kunu ngudda kunubewu yiyime ngamak." ' Kuhni bu ngurrimarneyime nawu Esau."

6 Kaluk birrimekbe bininj nawu Jacob benmunkeweng wanjh birrimarnedurndi Jacob dja birriyimeng, "Ngad ngarriwam kore ngunedanginj nawu Esau, dja nungka wanjh kamhre ngunhdabke, dja 400 bininj kabirrimdjarrkre."

7 Jacob wanjh keleni dunijnj dja mak kangewarreni dunijnj, wanjh kunu nungka benlarlmey bininj rowk nawu birridjarrkrey benmarnbom mirndebokeh. Dja mak sheep, goat, bulikki, camel, mirndelahlarlmey warridj.

8 Dja nungka burrbom baybaywi, yimeng, "Bu Esau kunubewu kamre kabenbun kabanyakwon nawu birrimirndekudji, wanjh kunubewu birrimirndebuyika kabirrikelerlobme."

9 Wanjh Jacob danginj yiwarrudj yimeng, "Ngudda nawu God nuyeni Mawah ngardduk nawu Abraham, dja mak God nuye Ngabbard Isaac, ngudda Yawey nawu kanmarneyimeng ngarrurndeng kore kubolkwarlah ngardduk dja nawu ngarrimud, dja ngudda kunmak kanmarnekurduyime.

10 Ngaye wanjh ngawarre, minj ngamak bu ngudda kankongibuni kanmarnekurduyimi kunmak, kanburrbuni munguyh kannahnani. Dja bu ngamdjowkkeng manih mankabo Jordan ngadjalkarrmi kunkarndudjwi, dja bolkkime wanjh ngayimerranj nganemirndebokeh.

11 Ngaye djawan kanbekemen kore kunbid nuye nawu nganedanginj Esau, dja ngakengeme, marndi nungka nuk kamre kanbun, dja ngalbabadjan warridj wurdwurd dorreng.

12 Dja ngudda yiyimeng bu ngudda kanmarnekurduyime kunmak, dja yibenmirndewernwon nawu ngaye ngabenkebmawahme, kabirrimirndeyimerranj yiman kunkayalanj kamirndeyime kore kurrula kurrid, nawu minj nangale kamirnderohrokme dja manmirndewern."

13-16 Wanjh Jacob kumekbe yonginj bu kukak, dja kore nungka karrmi nungka djarrngbom nawu kabiwon Esau burudjang; 200 goats ngaldahdaluk, twenty goats narahrangem, 200 sheep ngaldahdaluk, twenty sheep narahrangem, thirty camels ngalbabadjan, dja yayaw bedberre, forty bulikki ngaldahdaluk, ten bulikki narahrangem, twenty donkeys ngaldahdaluk, dja ten donkeys narahrangem. Nungka benwong kabindinahnan bininj nuye nawu birrimarnedurrkmirri, mirndeubuyika kabindibebbehmirndenahnan. Wanjh nungka benmarneyimeng bininj nuye nawu birrimarnedurrkmirri, yimeng, "Ngurriyingkihdokmen, mirndekudji karrokme, wanjh djarrehkahwurd mirndeubuyika, dja djarrehkahwurd mirndeubuyika, bu munguyh."

17 Wanjh nungka biwokrayekwong nawu dokmidokmi, yimeng, "Bu ngaye nganedanginj Esau ngundabke dja ngundjawan, 'Ngudda nangale ngunmarnewohnan, dja baleh yire, dja nangale nuye nanih nawu mayh nawu kahdokme?"

18 Wanjh kunukka ngudda yiyime, 'Bedda wanjh Jacob nuye nawu namarladj. Nungka wanjh ngunwon burudjang bu ngunmarnemunkeweng,

ngudda nawu Esau nawu kanmarnewohrnan, dja warridj nungka kamre rerre.”

19 Dja Jacob benwokrayekwong nayungkih, yerre, wohbulkayh, dja yerre duninj, kaluk birribuyika rowk nawu bindimirndekadjung mayh, benmarneyimeng, “Ngudda kunkudjiwi ngurrimarneyimen Esau bu ngurridabke.

20 Dja mak yuwn ngurribengmidjdan dja ngurriyimen nuye, ‘Jacob nawu namarladj nungka wanjh yerre kamre warridj.’” Kuhnii Jacob yimeng bu nungka burrbom baybaywi, yimeng, “Ngaye kunubewu nganjilngmarnbun, bu ngamunkewe nawu ngawon burudjang ngayingkihdokmihwe, wanjh yerre bu nganan, wanjh kunubewu kamak rowk ngankimang.”

21 Wanjh kunu nawu Jacob kabiwon Esau wanjh yingkihdokmihweng, dja nungan wanjh kumekbe yonginj kured bu kukak.

Jacob Benekommarreni God.

Genesis 32:22-32

22 Wanjh bu kundjalmekbe kumunun, Jacob dolkkang benkang ngalbibininjkobeng nuye nawu benebokenh, dja daluk benebokenh nawu benemarnedurrkmirri, dja bebeywurd nuye nawu eleven, dja bedda birridjowkkeng mankabo Jabbok.

23 Nungka benmey dja benmunkeweng birridjowkkeng mankabo, dja mak yehyeng nuye nawu karrmi warridj nungka munkeweng.

24 Wanjh Jacob nungka djahdjalni nakudjihkudji, dja wanjh nabuyika bininj bimarnebebmeng, wanjh benehdjalkommarreni kunkakkuyeng munguyh kore kumbarrhbom.

25 Bu namekbe bininj narrinj bu nungka minj biburriwemeninj Jacob, nungka bibom kungadmo dja bingadmoyirrhmey bu benekommarreni.

26 Wanjh nungka nawu bininj yimeng, “Kanbawo ngare dja kumbarrhbom.” Dja Jacob yimeng, “Minj bawon yire, bu minj kanmarneyime kunmak kunwok.”

27 Dja nawu bininj yimeng, “Ngudda baleh yingeyyo?” Dja nungka yimeng, “Jacob.”

28 Wanjh nawu bininj yimeng, “Minj munguyh yingeyyo Jacob, dja Israel yidjalngeyyo, kunmekbe yingeyyo bu ngudda ngunedurrkmarrreni God, dja bininj ngurridurrkmarrreni, dja ngudda yiwinhmeng.”[†]

29 Wanjh Jacob bidjawam, yimeng, “Kab ngadjare kanmarneyime, baleh yingeyyo?” Dja nungka yimeng, “Njalekah kandjawan bu baleh ngangeyyo?” Wanjh kunmekbe nungka bimarneyimeng kunmak kunwok.

30 Wanjh Jacob bolkngeykurmeng kunmekbe kunred Peniel, wokkihyimi, “Kunmekbe ngabolkngeykurme bu ngaye nganang God kukeb dja nganbawong ngarrarrkid.”[‡]

31 Wanjh kumdungbebmeng bu nungka bolkyurrrhkeng Peniel, nungka burriwarreminj dja kunngadmo biwarrewoni.

32 Kunmekbekenh kunu bininj nawu Israel benkebmawahmeng djalmunguyh minj kabirringun kunngadmokanj kore kangadmodjinhdjinduluburren, dja kumekbe bininj Jacob bibom.

33

Esau Bimarnebebmeng Jacob.

Genesis 33:1-20

[†] 32:28 Israel kamenyime, “God benekommarreni”.

[‡] 32:30 Peniel kamenyime “Kukeb nuye God”.

¹ Wanjh Jacob bolknang dja nang kaluk Esau kamhre, dja 400 bininj dorreng. Wanjh kunu nungka benlarlmey wurdwurd, dja Leah, Rachel, dja daluk benebokenh nawu bindimarnedurrkmirri, bindibebbehkarrmi wurdwurd.

² Nungka bendokmiweng daluk nawu bindimarnedurrkmirri dja wurdwurd berrewoneng, wanjh Leahwali dja wurdwurd ngalengngarre benkurrmeng yerrekah, dja yerre duninj benbenekurrmeng Rachel dja Joseph.

³ Dja nungka naweleng wanjh dokmi dja balwohboddaboddangeni kurorre kunwerhkah seven, bu nungka balhbebm kore nawu benedanjinj.

⁴ Dja Esau nungka rlobmeng birrabkeng, berlwakbom biwanjbimey, bibunjhme, wanjh benemarnenalkburrinj.

⁵ Wanjh Esau balwohnang bennang daluk dja wurdwurd, wanjh bidjawam Jacob, yimeng, "Birringale nanih nawu ngurridjarrkre?" Jacob biwokmey, yimeng, "Bedda wanjh wurdwurd nawu God burudjang nganwong ngaye nawu ngamarladj."

⁶ Wanjh daluk nawu bindimarnedurrkmirri dja wurdwurd berrewoneng birrimwam dja birrimarneboddanj.

⁷ Wanjh Leahwali dja wurdwurd ngalengngarre birrimwam birrimarneboddanj. Wanjh yerre duninj benemwam Joseph dja Rachel, dja bedda warridj benemarneboddanj.

⁸ Esau bidjawam, "Dja njalekenh nawu birrimrndeubuyika mayh nawu ngabennang?" Wanjh Jacob yimeng, "Ngabenmunkeweng ba ngudda kunubewu yiyime ngamak ngudda nawu kanmarnewohrnan."

⁹ Dja Esau yimeng, "Ngaye ngokko ngakarrme nawern, ngudda nawu ngarrdanginj. Nawu yikarrme, wanjh yidjalkarmen yingan ke."

¹⁰ Wanjh Jacob yimeng, "Burrkyak, ngaye kebdjarrkme, bu ngudda yiyime yimankek ngamak, wanjh kanbidyima nawu ngaye won burudjang. Dja woybukkih ngaye bu kebnan wanjh yiman rerrih God ngakebnan, bu ngudda kamak rowk kankimey.

¹¹ God nungka kunmak nganmarnekurduyimeng burudjang, dja nawu ngakarrme wanjh bonj nawern, kunmekbekenh kunu ngaye kebdjarrkme, kanbidyima nawu ngaye marnemunkeweng won burudjang." Wanjh kuhni nungka bimarneyimi kebbabiminj, wanjh kaluk Esau nungka biyimey.

¹² Wanjh Esau yimeng, "Kab karridjarrkray dja ngaye mak."

¹³ Dja Jacob bimarneyimeng, "Ngudda nawu kanmarnewohrnan, yibur-bun bu wurdwurd birringudjwarre, dja ngabennahan sheep, goat, dja bulikki nawu kabindiyawdjikkawon. Bu yimankek bu kunbarnangarakudji ngabendjirrkkan wernkih, wardi mayh kabirridowarren rowk.

¹⁴ Wanjh kunu ngudda nawu kanmarnewohrnan kanmarneyingkihdokmen ngaye nawu ngamarladj, dja ngaye yeledj ngamdjalle yiman mayh kabirrire nawu ngabendjirrkkan, dja mak yiman bu wurdwurd yeledj kabirrire, kunmekbe ngayime munguyh, kaluk marnebebm ngudda nawu kanmarnewohrnan, kore kunred Seir marnebebm."

¹⁵ Wanjh Esau yimeng, "Wanjh yiyimen kamak ngabenbawon ngurridjarrkre yikahwi nawu bininj ngardduk nawu ngarridjarrkre." Dja Jacob yimeng, "Njalekah yimankek kunmekbe yikurduyime? Ngadjaldjare ngudda yiyime ngaye ngamak, ngudda nawu kanmarnewohrnan."

¹⁶ Wanjh kunu Esau dolkkang kunmekbe kunbarnangarra, baldjal-durndi kore kunred Seir.

¹⁷ Dja yiman djamku Jacob yimeng rawinj kore Seir, dja nungka barlungmeng wam kore kunred Succoth, dja kumekbe nungka rurrknameng kunrurrk nuye dja djurlenameng bedberre mayh. Kunmekbekenh kunu kabolkngeyyo Succoth.*

¹⁸ Wanjh kaluk Jacob bu kumhrey Paddan Arambeh nungka kaluk bebmeng kamak rowk kore kubolkkimuk Shechem kore kubolkwarlah Canaan, dja nungka birriyoy darnkih kore kubolkkimuk.

¹⁹ Dja Jacob karremulewam kunred kore dabburlin nuye nameng, kunwardde 100 silver benwong bebeywurd nuye Hamor nawu kornkumo nuye Shechem bu birribolkweygang.

²⁰ Wanjh kumekbe Jacob marnbom kunwardde yiwarrudjkenh dja nungka warddengeykurrmeng, "God, nawu God nuye Israel."†

34

Bininj Nawu Nakang Kunred Shechem Bidjirdmey Ngalbu Dinah.

Genesis 34:1-17

¹ Kaluk Dinah ngalbu ngalyaw ngarre Leah ngalbu bimarneyawmey Jacob, wanjh Dinah wam kabennan morlehmorlenj ngalbu birrihni kumekbe kunred.

² Kaluk Shechem nawu beywurd nuye Hamor nawu namud Hiv, nawu nungka benmarnewohrnani bininj kumekbe, wanjh bu nungka binang Dinah, wanjh bidjaldarrkidmey beneyonginj.

³ Wanjh nungka bulkkidj bimarnedjareni bikangebakkeng Dinah ngalbu ngalbeywurd nuye Jacob, wanjh nungka bimarnedjareni ngalmekbe ngalyawk dja kunwok kunkerlh bimarneyimeng.

⁴ Wanjh Shechem bimarneyimeng kornkumo nuye nawu Hamor, yimeng, "Kanmarnema ngalbu ngalyawk ba nganemarren ngamarnbun ngalbininj kobeng ngardduk."

⁵ Bu Jacob bekkang bu ngalbeywurd nuye, bininj bimarneyimeng kunwarre, wanjh nungka nuye bebeywurd birrini kuberrk kore kabbal birrinahnani mayh nuye, wanjh kunu Jacob djalngurdmeng, minj baleh bangmeyimeninj, nungka benmadbuni bebeywurd kabirrimdokme kured.

⁶ Wanjh Hamor nawu Shechem nuye kornkumo nungka wanjh wam kabenewokdi Jacob.

⁷ Kaluk Jacob nuye bebeywurd bedda wanjh bu birriwobek kang baleh yimerranj, wanjh birrimbebmeng kabbalbeh. Dja bedda birrikangewarreni duninj, dja mak birriyidduy duninj, bu Shechem kurduyimeng bininj nawu Israel benkebmawahmeng kabirriyime kunwarre duninj birriyemikarrinj, bu nungka beneyonginj Jacob nuye ngalbeywurd, kunu wanjh nungka kunwarre birriyimi minj nangale kurduyimeninj.

⁸ Dja Hamor benmarneyimeng, yimeng, "Nawu beywurd ngardduk Shechem, nungka kabidjalmarnedjare ngalbu ngudda ngurridanginj. Ngaye djawan ngudberre bu ngurriwon kabenemarren kayimerran ngalbininj kobeng nuye.

⁹ Kamak nuk karriworren daluk, ngudda kandiwo ngarrimarren ngudberre ngalbebeywurd, dja ngadmanwali ngalbebeywurd ngadberre ngurrimarren.

¹⁰ Ngudda kamak ngurrini kore ngad, dja ngudda kamak ngurrimre kore kubolkwarlah ngadberre, ngurrini, dja ngurrikarremulewan ngurrimang

* **33:17** Kunekke kungey kayime "Kundjurle".

† **33:20** Hebrew kunwok kayime, "El Elohe Israel".

yehyeng, mak ngurriweykan kondah kore ngadberre kunred kubolkwarlah, dja kaluk kamyawoyhwernworren ngudberre.”

¹¹⁻¹² Wanjh Shechem warridj wokdi, dja benmarneyimeng nawu Dinah ngarre kornkumo dja birridanginj, yimeng, “Ngaye ngadjare ngurriyime nuk ngamak, dja ngaye won bu baleh kandi yidjawan, ngudda ngurriyime bu ngaye won ngudberre dalukkenh ngamang. Bu ngurringeybun nakimuk duninj won ngudberre, wanjh ngaye won nawu baleh ngudda kandi yidjawan, dja kandi jalwo ngalbu ngalyawk ba nganemarren.”

¹³ Wanjh bu ngaldaluk bedberre Dinah kunwarre nungka bimarneyimeng, wanjh kunmekbekenh kunu bedda nawu Jacob nuye bebeywurd bu bindiwokmey Shechem dja kornkumo nuye nawu Hamor, bedda wanjh bindikoweng.

¹⁴ bindimarneyimeng, “Kunukka minj ngad ngarrikurduyime, minj ngarriwon ngalbu ngarridanginj kore bininj nawu minj birrilakkayenwoyi. Kunukka wanjh ngarriyime kundjalwarre duninj ngarriyemikarren.

¹⁵ Ngad ngarriyime kamak ngunemarren bu kuhni kundjalkudji ngurriyime, bu ngudda ngurriyimerran yiman ngad, dja nguririlakkayenworren rowk nawu narahrangem rowk ngudberre.

¹⁶ Bu kunmekbe ngurrikurduyime wanjh ngad biwon ngudberre ngalbebeywurd ngadberre, dja ngarrimang ngalbebeywurd ngudberre ngarriwarren. Wanjh ngarribolkmarbun ngarrini kore ngudda dja karriyimerran yiman karrikudjiwi.

¹⁷ Dja bu ngudda minj ngurrikodjukme nguririlakkayenworrenkenh, wanjh kunu ngad ngarrikan ngalbu ngarridanginj dja ngarrire.”

Narahrangem Bindibom Birrimekbe Bininj.

Genesis 34:18-31

¹⁸ Wanjh nawu bedda birrikarremarrebom berrewoneng Hamor dja beywurd nuye nawu Shechem, wanjh bedda benebekkarrinj kamak rowk.

¹⁹ Wanjh namekbe nawu yawurrinj bimarnedjareni Jacob nuye ngalbebeywurd, wanjh kunu nungka djalwam werkkwerrk, kakurduyime nawu bedda birrimarneyimeng. Dja nungka wanjh nawernhkuken kore nawu birrimud.

²⁰ Wanjh kunu Hamor dja Shechem nawu beywurd nuye benewam kore kururkdangmaye kore kumekbe kubolkkimuk dja birriwokdi bininj rowk nawu birridjarrkni kumekbe kubolkkimuk.

²¹ Wanjh bedda beneyimeng, “Nahni nawu bininj kabirridjare karridabbolkmen, kab ngurriyimen kamak kabirriini kore kubolkwarlah kadberre, kabirrikarremulewan kabirrimang yehyeng mak kabirriweykan. Ngurrina, kondah bu kabolkwarlah, bedda kamak kabirriini. Ngad wanjh karrbenmang ngalbebeywurd bedberre, dja bedda kabindimang ngalbebeywurd kadberre.

²² Dja bedda nawu bininj kabirrikodjukme karridjarrkni yiman karrikudjiwi, bu kuhni karridjalkurduyime, narahrangem rowk ngad kadberre wanjh karrilakkayenworren yiman bu bedda rerrih.

²³ Minj nuk ngurrian bu bulikki bedberre, dja yehyeng nawu kabirrikarme, dja mayhbubuyika bedberre warridj, wanjh nahni rowk kayimerran ngad kadberre? Wanjh kunu karrbenmarnekodjukmen dja kabirribolkmarbun kore ngad karridjarrkni.”

²⁴ Bininj rowk nawu birrimirndemornnamerrinj kore kumekbe kururkdangmaye, wanjh bindimarnekodjukmeng Hamor dja beywurd nuye nawu Shechem. Wanjh narahrangem rowk nawu birrihni kumekbe kubolkkimuk wanjh birrilakkayenworrinj.

²⁵ Bu kunbarnangarra danjibik bu bedda birridjakkbekkani rowk, benebo-kenh nawu Jacob nuye bebeywurd, kaluk Simeon dja Levi nawu Dinah birridanginj, bedda wanjh benemey mandjawakkuyeng berrewoneng, dja benemwam kore kumekbe kubolkkimuk bu minj njale bedda birribur-buyi, dja bindidulubom bindikukkurrmeng narahrangem rowk.

²⁶ Bindidulubom mandjawak, kaluk bedda dorreng Hamor dja beywurd nuye nawu Shechem, dja benemey Dinah kore ngaleng ni kore Shechem nuyeni kunrurk dja birriwam.

²⁷ Nawu birribuyika Jacob nuye bebeywurd bindimarnebebmeng nawu birrikuyoy, dja bedda birrikang yehyeng nawu birringalkeng kore kumekbe kubolkkimuk. Kunmekbe birriyimeng bu bininj bimarneyimeng kunwarre ngalbu bedda birridanginj.

²⁸ Bedda birrikang sheep, goat, bulikki, dja donkey, dja mak yehyeng warridj nawu bedberre kore kubolkkimuk, dja mak kore kabbal.

²⁹ Bedda wanjh birrikang rowk nawu namakmak bedberre, dja daluk rowk warridj bindidukkang bindikang, dja mak wurdwurd bedberre, dja birrikang yehyeng kore kunrurk bedberre.

³⁰ Wanjh Jacob benbenemarneyimeng Simeon dja Levi, "Ngudda wanjh kunyid ngunemarnbom ngardduk, dja bininj nawu birrimdolk kang Canaan dja bininj nawu Periz benkebmawahmeng, nawu kabirini kondah kubolkwarlah, bedda wanjh kaluk ngandiwidnan. Ngaye minj birriwern ngabenkarrme, dja bu bedda kabiriraworren kandidabke kandibunkenh, ngaye dja ngardduk bininj karridowen."

³¹ Dja bedda benewokmey yeyimeng, "Yiddok yiyime bonj kamak bu nungka bidjalmarnekurduyimeng ngalbu ngad ngarridanginj, yiman ngaleng ngalwarre rerrih ngalbininjwern kakukweykaweykarren?"

35

God Yawoyhwokkerrngehmerrinj Kore Wokkurrmerrinj Biberrebbom Jacob.

Genesis 35:1-15

¹ Wanjh God bimarneyimeng Jacob, yimeng, "Yirrolkka, yiray kore Bethel, kumekbe yibolkmarumbu yinin, dja altar kunwardde yiwarrudjkenh yimarnbu ngayekenh, nawu God nawu marnebukkarrinj bu ngudda yikelerlobmeng kore ngunedanginjbeh nawu Esau."

² Wanjh kunu Jacob benmarneyimeng nawu birrimud dja bininj rowk nawu birridjarrkrey, wanjh yimeng, "Ngurribawo rowk nawu birriwok-bubuyika bedberre gods nawu ngurrikarrme, dja ngurrikudjirridjburri-men ngurrikukbeleworrimen, dja kunmadjbele ngurridjongburrimen.

³ Wanjh ngurrimray, wanjh karrire kore Bethel, ba kumekbe ngaye ngamarnbun altar kunwardde yiwarrudjkenh nuye God nawu nganbekkang bu ngaye ngakangewarreni, dja nawu mak nganehdjarrkrey bu baleh yarrkka ngarey."

⁴ Wanjh kunu bedda birriwong Jacob birriwokbubuyika bedberreni gods nawu birrikarmi, mak kunkanemkenh nawu birrikanemdjongbuyindi, birriwong rowk, dja Jacob dudji rowk kanjdji kore oak kundulk kore Shechem.

⁵ Wanjh birriwam, dja God benmarnbom birrikeleminj bininj nawu birrini kubolkkihkimuk rowk kumekbe darnkih, ba minj bindikadjuji Jacob dja nawu birrihdjarrkrey.

6 Jacob dja bedda rowk nawu birridjarrkrey wanjh birrimbebmeng kore kunred Luz, kumekbe kore kabolkngeyyo warridj Bethel, kore kubolkwarlah Canaan.

7 Wanjh kumekbe nungka marnbom altar kunwardde yiwarrudjkenh, dja kumekbe God korroko bimarnebukkarrinj bu nungka kelerlobmeng benedanginjbeh, wanjh kunmekbekenh kunu Jacob bolkngeykurmeng "God nawu kunred Bethelkenh."^{*}

8 Kaluk Deborah ngalbu Rebekah binahnani wanjh doweng, dja birrikududji kanjdji kurrulk oak, kaluk walemkah Bethel. Wanjh kunu birridulkngeykurmeng "Kundulk kore birrinalkbuni"[†].

9 Bu Jacob kumdurndi Paddan Arambek God biyawoyhmarnebukkarrinj dja bimarneyimeng kunmak kunwok.

10 God bimarneyimeng, "Ngudda yingeyyo Jacob, wanjh minj munguyh mak ngundingeybun Jacob, dja Israel yidjalngeyyo."[‡] Wanjh kunu bingeykurmeng Israel.

11 Wanjh God bimarneyimeng, yimeng, "Ngaye wanjh God nawu Ngangudjikimuk Duninj. Ngudda yibenborna birriwern wurdwurd, ngurimirndewernworrimen. Nawu ngudda yibenkebmawahme kaluk kabirriyimerran birreredbo, dja mak birrimirndekihkimuk nawu birreredbo. Dja king kabirrimbebmerren kore nguddahbeh nawu yibenkebmawahme, kaluk kabindibebbehmarnewohrnan birribebbehmirndewern bininj.

12 Dja kunred nawu ngabenbenebolkwong Abraham dja Isaac, wanjh ngudda bolkwon warridj, dja ngabenbolkwon nawu ngudda kaluk yibenkebmawahme."

13 Kaluk God bibawong bolkbawong kumekbe kore benehwokdi.

14 Wanjh Jacob warddedjabnameng kumekbe kore God benehwokdi, wanjh nungka boyakbom manbu bibowong God, dja mak mankalkkid oil yakhom kore manmekbe manbu djabnameng.

15 Kumekbe kore God benehwokdi Jacob bolkngeykurmeng Bethel. §

Rachel Doweng Bu Benjamin Danginj.

Genesis 35:16-20

16 Wanjh bedda birribolkbawong Bethel. Bu birrimhboyenrey kaluk Ephrath djarrehni rerrih, Rachel wurdyaw bihbuni, dja baraburreni.

17 Bu ngaleng barahbaraburreni bu wurdyaw bihbuni, wanjh daluk ngalbu bibidyikarmi wurdyawkenh wanjh bimarneyimeng, "Yuwn yikele, dja yiyawmey narangem nabuyika."

18 Wanjh Rachel kuyindoweng, dja bu ngolekyakmeni ngaleng bingeykurmeng, "Nayaw ngardduk bu ngakangearre." Dja kornkumo nuye bingeykurmeng Benjamin. Kunekke kunngey kayime "Wurdyaw kunbidkunkenh ngardduk."

19 Wanjh kunu Rachel doweng dja birrikududji kore darnkih manbolh manbu kahre kore Eprath. Kumekbe Eprath kabolkngeyyo warridj Bethlehem.

20 Kaluk kaddumkah kore kumidj ngarre Jacob warddedjabnameng, manmekbe manbu kadjalwarddedjabdi munguyh, kabimidjmulewan Rachel ngarre kumidj.

Jacob Nuye Bebeywurd.

Genesis 35:21-26

^{*} 35:7 Hebrew kunwok kayime, "El Bethel". [†] 35:8 Hebrew kunwok kayime, "Allon Bacuth".

[‡] 35:10 Mahni kunngey kamenyime "Kabeneburren God". § 35:15 Mahni kunngey kamenyime, "Kunrurk nuye God".

²¹ Israel yawoyhwam dja dabburlin nameng bewhkah ngarre kunred Migdal Eder.

²² Bu Israel ni kumekbe kubolkwarlah, kaluk Reuben bimarnengimeng beneyonginj Bilhah, ngalbu kornkumo nuyeni daluk ngalbu benedjalwohni, dja Israel wobek kang bu kunmekbe yimeng. Jacob benbornang twelve bebeywurd.

²³ Nawu nayayaw ngarreni Leah wanjh Reuben nawu nadjjaman nuye Jacob, dja mak Simeon, Levi, Judah, Issachar dja Zebulun.

²⁴ Nawu nayayaw ngarreni Rachel wanjh Joseph dja Benjaminj.

²⁵ Nawu nayayaw ngarreni Bilhah ngalbu Rachel bimarnedurrkmirri, wanjh Dan dja Naphtali.

²⁶ Dja nawu nayayaw ngarreni Zilpah ngalbu Leah bimarnedurrkmirri, wanjh Gad dja Asher. Bedda wanjh birribebeywurd nuye Jacob nawu birrimarnedanginj kore Paddan Aram.

Bu Isaac Doweng.

Genesis 35:27-29

²⁷ Jacob kumdokmeng kured kore kornkumo nuye nawu Isaac kore kunred Mamre, darnkih kore Kiriath Arba. Kumekbe mak kabolkngeyyo warridj Hebron kore Abraham ningihni korrokoni, dja mak Isaac kumekbe ni.

²⁸ Isaac djahdjalmimbini bu mandjewk 180.

²⁹ Wanjh nungka ngolekdadjmeng doweng, dja malngwam kore mawah-mawah nuye birriyingkihmalngdokmeng. Bu nungka doweng wanjh nungka wernhkohbanjaminj duninjh. Dja bebeywurd nuyeni nawu Esau dja Jacob benekukdudji.

36

Nawu Esau Benbornang Dja Mak Nawu Benkebmawahmeng.

Genesis 36:1-19

¹ Kuhni wanjh kabenyolyolme Esau dja nawu benbornang dja nawu benkebmawahmeng. (Esau nungka mak ngeyyoy Edom.)

² Esau benbenemey ngalbibininjkobeng kore Canaanbeh daluk, ngalkudji Adah ngalbu ngalbeywurd nuye Elon nawu Nahit bininj, dja ngalbuyika Oholibamah ngalbu ngalbeywurd nuye Anah, nawu nungan nuyeni kornkumo wanjh Zibeon ngalbu ngeyyoy Hiv,

³ dja mak Esau bimey Basemath ngalbu ngalbeywurd nuyeni Ishmael dja ngaleng benedanginj Nebaioth.

⁴ Adah bimarneyawmey Esau Eliphaz. Basemath biyawmey Reuel.

⁵ Dja Oholibamah benyawmey Jeush, Jalam, dja Korah. Birrimekbe wanjh bebeywurd nuye Esau nawu birrimarnedanginj kore kubolkwarlah Canaan.

⁶ Esau benkang ngalbibininjkobeng nuye dja bebeywurd ngalbebeywurd dja bininj nuye rowk nawu birridjarrkni, dja mak benkang mayh nuye rowk, dja yehyeng rowk nuye nawu mangi kore Canaan, dja nungka wam kore kubolkwarlah djarrehkah kore benedanginj nawu Jacob.

⁷ Nawu bedda benebebbekarrmi wanjh nawern duninjh, wanjh kunu minj benedjarrkniwirrinj munguyh, dja kore kubolkwarlah kore benedjalwohningini minj manme manwern yuwirrinj, dja mayh berrewoneng nawern duninjh.

⁸ Wanjh kunmekbekenh kunu Esau nawu mak ngeyyoy Edom, nungka bolkmarnbom ni kore kurruluhdulum ngarre Seir.

⁹ Kuhni kabenyolyolme Esau dja nawu Esau benbornang dja benkeb-mawahmeng. Esau wanjh nungka mawah bedberre bininj nawu birringeyyoy Edom, nawu birrini kore kurruluhdulung ngarre kunred Seir.

¹⁰ Kuhni birringeyyoy Esau nuye bebeywurd dja Mawah nuye. Kaluk benbenebornang Eliphaz nawu nayaw ngarre Adah ngalbu Esau nuye ngalbininjkobeng, dja Reuel nawu nayaw ngarre Basemath ngalbu Esau nuye ngalbininjkobeng.

¹¹ Dja nawu Eliphaz nunganwali bebeywurd nuye wanjh Teman, Omar, Zepho, Gatam dja Kenaz.

¹² Dja namekbe Eliphaz nawu Esau bibornang nungka biwohmey ngalbuyika daluk ngalbu ngeyyoy Timna, ngaleng wanjh bimarneyawmey Amalek. Birrimekbe bininj rowk wanjh Esau nuye ngalbininjkobeng Adah benkebmakkahmeng.

¹³ Dja nawu Reuel benbornang wanjh Nahath, Zerah, Shammah, dja Mizzah. Birrimekbe wanjh Esau nuye ngalbininjkobeng Basemath benkebmakkahmeng.

¹⁴ Dja nayayaw ngarre Esau nuye ngalbininjkobeng Oholibamah, ngalbu ngalbeywurd nuye Anah nawu Zibeon kornkumo nuyeni, wanjh nayayaw ngarre nawu bimarneyawmey Esau wanjh Jeush, Jalam, dja Korah.

¹⁵ Nanih wanjh nawu birriwohrnani kore Esau benkeb-mawahmeng. Bebeywurd nuye Eliphaz nawu nadjdjaman nuye Esau, wanjh nawu birriwohrnani kaluk Teman, Omar, Zepho, Kenaz.

¹⁶ Korah, Gatam, dja Amalek. Birrimekbe wanjh bedda nawu birriwohrnani nawu Eliphaz benkeb-mawahmeng kore kubolkwarlah Edom, bedda wanjh Adah benkebmakkahmeng.

¹⁷ Dja bebeywurd nuye Reuel nawu Esau bibornang, wanjh bedda nawu birriwohrnani kaluk Nahath, Zerah, Shammah, dja Mizzah. Bedda wanjh birrimekbe nawu birriwohrnani, nawu Reuel benkeb-mawahmeng kore Edom, bedda wanjh Basemath benkebmakkahmeng, ngalbu Esau nuye ngalbininjkobeng.

¹⁸ Dja nayayaw ngarre Oholibamah ngalbu Esau nuye ngalbininjkobeng, bedda wanjh nawu birriwohrnani kaluk Jeush, Jalam, dja Korah. Bedda wanjh birrimekbe nawu birriwohrnani nawu Esau nuye ngalbininjkobeng Oholibamah benyawmey, ngalbu ngalbeywurd nuyeni Anah.

¹⁹ Bedda wanjh birrimekbe bebeywurd nuye Esau nawu mak ngeyyoy Edom, dja nawu bindimarnewohrnani birribuyika bedberre bininj.

Nawu Seir Benbornang Dja Benkeb-mawahmeng.

Genesis 36:20-30

²⁰ Bininj nawu birringeyyoy Hor, wanjh birriyingkihni kumekbe kubolkwarlah. Nanih wanjh bebeywurd dja mawah-mawah nuye Seir nawu birrimekbe nawu Hor birringeyyoy. Nawu benbornang wanjh Lotan, Shobal, Zibeon, Anah,

²¹ Dishon, Ezer, dja Dishan. Bedda nawu bebeywurd nuye Seir kore Edom nawu bindimarnewohrnani kore nawu birringeyyoy Hor.

²² Lotan nuye bebeywurd wanjh namud bedberre ngeyyoy Hori dja mak Heman. Dja Timna ngaleng benedanginj Lotan.

²³ Shobal nuye bebeywurd wanjh Alvan, Manahath, Ebal, Shepho, dja Onam dja nawu bindikebmawahmeng.

²⁴ Zibeon nuye bebeywurd wanjh Aiah dja Anah. Nanih wanjh namekbe Anah nawu bongalkeng kore kubolkdarleh bu bennahnani donkey nuye Zibeon nawu kornkumo nuye.

²⁵ Anah benbenebornang Dishon dja Oholibamah ngalbu ngalbeywurd nuye Anah.

²⁶ Dishon nuye bebeywurd wanjh Hemdan, Eshban, Ithran, dja Keran.

²⁷ Ezer nuye bebeywurd wanjh Bilhah, Zaaan, dja Akan.

²⁸ Dishan nuye bebeywurd wanjh Uz dja Aran.

²⁹ Bedda wanjh birrimekbe nawu bindimarnewohnani bininj nawu birringeyyoy Hor. Kaluk birriwohrnani Lotan, Shobal, Zibeon, Anah,

³⁰ Dishon, Ezer, dja Dishan. Bedda wanjh bindibebbehmarnewohnani nawu birringeyyoy Hor kore birribebbehmud kore kubolkwarlah Seir.

Kunkareni Nawu Kings Birriwohrnani Kore Kunred Edom.

Genesis 36:31-43

³¹ Nanih kabirringeydi king nawu birriwohrnani kore kubolkwarlah Edom, bu minj Israel birribangmekarrmeninj king benmarnewohnayi.

³² Bela nawu beywurd nuye Beor, nungka yimerranj king wohrnani kore Edom. Kubolkkimuk nuye bolkngeyyoy Dinhabah.

³³ Bu Bela doweng, wanjh Jobab nawu beywurd nuye Zerah nawu nakang Bozrah, nunganwali wanjh yimerranj king.

³⁴ Bu Jobab doweng, Husham nawu nakang kubolkwarlah bedberre nawu Teman benkebmawahmeng, nunganwali yimerranj king.

³⁵ Bu Husham doweng, wanjh Hadad nawu beywurd nuye Bedad, nawu bibom Midian kore kubolkwarlah Moab, nunganwali yimerranj king. Dja kubolkkimuk nuye bolkngeyyoy Avith.

³⁶ Bu Hadad doweng, Samlah nawu nakang Masrekah, nunganwali yimerranj king.

³⁷ Bu Samlah doweng, Shaul nawu nakang Rehoboth kore mankabo, nunganwali yimerranj king.

³⁸ Bu Shaul doweng Baal Hanan nawu beywurd nuye Acbor, nunganwali yimerranj king.

³⁹ Bu Baal Hanan nawu beywurd nuye Acbor doweng, Hadad nunganwali yimerranj king. Kubolkkimuk nuye bolkngeyyoy Pau, dja ngalbininj kobeng nuye ngeyyoy Mehetabel ngalyaw ngarre Matred, ngalbu ngalbeywurd nuye Mezahab.

⁴⁰ Nanih wanjh birringeyyoy nawu birriwohrnani nawu Esau benkebmawahmeng, kaluk nawu birriyawmud duninj birribolkngeykenkani kunred bedberre. Kaluk Timna, Alvah, Jetheth,

⁴¹ Oholibamah, Elah, Pinon,

⁴² Kenaz, Teman, Mibzar,

⁴³ Magdiel dja Iram. Bedda wanjh birrimekbe nawu birriwohrnani kore Edom. Kunred kore birrini nawu birriyawmud duninj, wanjh birribolkngeykenkani.

Kuhni wanjh biyolyolmeng Esau nawu benkebmawahmeng bininj nawu birringeyyoy Edom.

37

Bu Joseph Bukirrinarrinj Nuye.

Genesis 37:1-11

¹ Jacob ni kore kubolkwarlah bu kornkumo nuye djalwodjalwohrey korroko, kore kubolkwarlah Canaan.

² Nahni kunwok wanjh kabenyolyolme Jacob dja nawu nungka benbornang.

Kunkareni, Joseph nawu yawurrinjni bu mandjewk nuyeni seventeen, wanjh nungka mayh benmirndenahnani, birridjarrknahnani nawu birridanginj, nawu nayayaw berrewoneng Bilhah dja Zilpah nawu kornkumo nuye ngalbibininjkobeng. Wanjh Joseph benmulewam kore kornkumo, yimeng bu bedda kunwarre birriyimi nawu birridanginj.

³ Kaluk Israel biwernhmarnedjareni Joseph, dja nawu birribuyika wurdwurd nuye, nungka yiman walakkih benmarnedjareni. Nungka Joseph danginj bu kornkumo kohbanjminj, kunmekbekenh kunu nungka biwernhmarnedjareni. Wanjh Israel namak duninj bimarnemarnbom Joseph nawu kadjongburrenkenh.

⁴ Wanjh bu nawu birridanginj birrinang kornkumo biwernhmarnedjareni nungka nawu Joseph, wanjh kunu bedda birriwidnani, dja minj baleh kunmak birrimarneyimeninj.

⁵ Kaluk Joseph kodjbukirriwam, dja bu benmarneyimeng nawu birridanginj, bedda birriwernhwidnang.

⁶ Nungka benmarneyimeng, "Kandibekka ngaye ngamulewarren bu ngakodjbukirriwam.

⁷ Kaluk ngad karridalkdukkani kore kabbal, dja kumekbe ngaye ngardduk kundalk mandobbokenh wanjh dalkdolkang dalkdjabdanginj mandjad, dja ngudda ngudberre kundalk birrimirndemornnamerrinj kore ngaye ngardduk kundalk, birrimarnedalkboddanj kore ngaye ngardduk kundalk."

⁸ Wanjh nawu birridanginj birrimarneyimeng, "Yiddok yiwohrnan ngadberre woybukkih, yiddok ngudda kaluk ngundiwokmarrkmang dja ngundimarnedurrkmirri?" Bu nungka kuhni kodjbukirriwam, dja mak bu benmarneyimeng, kunu wanjh birriwernhwidnani.

⁹ Wanjh nungka yawoyhkodjbukirriwam, dja benmarneyimeng birridanginj, yimeng, "Kandibekka, ngayawoyhkodjbukirriwam, dja kaluk kundung, dird dja eleven mankokkarrng ngandimarneboddangeni."

¹⁰ Wanjh bu kuhni bimarneyimeng kornkumo warridj, wanjh nawu kornkumo birruy bimarneyimeng, "Njale kuhni bu yibukirribom? Yiddok woybukkih ngaye dja ngalbadjan ke dja nawu ngurridanginj, wanjh ngarrimre ngarriboddan kurorre kumirrk ke?"

¹¹ Wanjh nawu birridanginj birrimarnekirrni, dja kornkumo nungka wanjh djalkarmeng kunwok kukange nuye.

Bu Joseph Nuye Birridanginj Wanjh Nungka Birrikukweykanj.

Genesis 37:12-36

¹² Kaluk nawu Joseph birridanginj birriwam kabindidalkwon mayh nuye kornkumo bedberre, birriwam darnkih kore kabolkngeyyo Shechem.

¹³ Wanjh Israel bimarneyimeng Joseph, yimeng, "Ngudda yiburrbun bu nawu ngurridanginj kabindidalkwon mayh darnkih kore Shechem. Ngaye munkewe kore bedda." Wanjh bimarneyimeng, "Mah kamak."

¹⁴ Wanjh kornkumo yimeng, "Yiray wanjh dja yinan bu kamak bedda kabirriini nawu ngurridanginj dja mayh warridj, dja yimdurndeng kanmarneyime." Kunu wanjh nungka bimunkeweng kumekbebeh kanjdikanjdji ngarre Hebron, dja wam kore Shechem.

¹⁵ Bu bebmeng kore darnkih Shechem, wanjh nakudji bininj bingalkeng bu nungka Joseph djahdjarengerey kore kabbal, dja bidjawam, "Ngudda njale yihiyawan?"

¹⁶ Nungka yimeng, "Ngabenyawan nawu ngurridanginj, kab kanmarneyime bu bedda baleh mayh kabindidalkwon."

17 Dja namekbe bininj yimeng, "Bedda birriwam dja ngabenbekkang birrimarneyimerrinj, 'Karriray kunred Dothan.' " Wanjh Joseph djahdjalwam benyikang nawu birridanginj, benngalkeng kore darnkih Dothan.

18 Bedda wanjh birrinang bu djarreh kumhrey, dja bu nungka minj bangmebebeninj bedberre, bedda birriwokmarnburinj kabirribunkenh.

19 Bedda birrimarneyimerrinj, "Nanij nawu kamhre nawu munguyh kahkodjbukirrire.

20 Wardi karribu dja karrikukburriwe kore mandjorlokburrk*, kaluk karrimulewan bu karriyime nawu mayh nabang bibom bikukyakyong. Wanjh karrinan bu baleh kayimerran bu nungka kahkodjbukirrire!"

21 Dja Reuben nawu nawernwarre duninj bedberre, bu bekkang kuhni, nungka minj djareniwirrinj kunmekbe birrimarneyimeninj, yimeng, "Yuwn bu karribun!"

22 "Yuwn mak ngurrikurlbawarrhke! Dja wardi ngurridjalburriwemen kore kudjorlok manbu kukkukenh kondah kore kubolklarleh, yuwn baleh mak karrimarneyime." Kuhni nungka Reuben yimeng ba kaluk bibekemeninj kore bedda birrimarneyimeninj, dja birrurndiwemeninj kore kornkumo.

23 Wanjh kunu Joseph benmarnebebmeng nawu birridanginj, bedda wanjh birriyerrkkeng nawu namak duninj nawu djongbuhdjongbuyindi,

24 dja nungka birrikang birriburriweng kore kudjorlok, kaluk kumekbe kudjorlok bukni, minj boyuwirrinj.

25 Wanjh bedda birriyerrkang birrihnguni manme, dja birribolknang bindinang kabirrimhre bininj nawu Ishmael benkebmawahmeng kore Gileadbeh, camel dorreng bedberre nawu birringorrkani namanjmak yiman spices, balm dja myrrh, kabirrikan kore Egypt kore birrihrey.

26 Wanjh Judah benmarneyimeng nawu birridanginj, yimeng, "Njale kaluk karrimang bu karribun nawu karridanginj dja karrikukwarlkan?"

27 Kab karrikukweyka kore bininj nawu Ishmael benkebmawahmeng, dja yuwn baleh karrimarneyime, dja nungka karridanginj bulkkidj." Wanjh nawu birridanginj birrikodjdukmeng.

28 Bedda nawu Ishmael benkebmawahmeng bininj wanjh birribayahmeng dja birriweykani njalehnjale. Bu bindimarnebebmeng, wanjh Joseph birridanginj birriwayhkeng Joseph kudjorlokbeh, dja birrikukweykang bu bedda bindiwong kunwardde nawern, yiman twenty silver shekels, dja bedda birrikang Joseph kore Egypt.

29 Kaluk bu Reuben kumdurndi kore kudjorlok, dja nang Josephyak kumekbe kore kudjorlok, nungka welengdjokkerrinj manburriba nawu djongbuhdjongbuyindi,

30 dja nungka yawoyhdurndi kore birridanginj dja yimeng, "Yawurrinj wanjh wam, dja ngaye baleh ngakurduyime?"

31 Wanjh bedda birrimey Joseph nuye nawu djongburreni, dja birribom goat, dja namekbe nawu Joseph nuye nawu djongburreni wanjh birridjukeng kore goat kunkurlba.

32 Wanjh bedda birrikang namekbe nawu namak duninj nawu djongburreni, birrikang kore kornkumo, dja birriyimeng, "Ngad ngarringalkeng nanij, wardi yikukna, dja kunubewu nuye nawu beywurd ke dja nuk burryak."

33 Wanjh nungka wernhkukburrkang dja yimeng, "Namekbe wanjh nuye beywurd ngardduk. Mayh nabang bibom bikukyakyong, Joseph bonj wanjh, woybukkih bikukdjalkdjalkmey."

* 37:20 Hebrew kunwok kayime, "Kungad manbu Boyakminj".

³⁴ Wanjh Jacob djobkeng manburrba nuye nawu djongbuhdjongbuyindi, dja djongburrinj nawu kunnjilngwarrekenh, dja bimarnenjlngwarreni kunkuyeng kunbarnangarra kunwern.

³⁵ Bebeywurd nuye rowk dja ngalbebeywurd birrimrey nuye kabirrin-jilngmarnbunkenh, dja yiman bendabmeng rerrih, minj njilngmakmeninj. Nungka yimeng, "Bonj, ngadjalnjlngwarre munguyh nuye beywurd ngardduk, kaluk ngayemanwali ngarrowen, ngamalngre kanjdji kore nungka kore kunbolk Sheol."[†] Kuhni yimi kornkumo bu bidjalmarnenalk-buni.

³⁶ Kaluk bininj nawu Midianbeh birrikukweykang Joseph kore kunbolk Egypt. Nawu Potiphar bimey, nawu King Pharaoh bimarnedurrkmirri, dja benmarnewohrnani djamun nawu birrirurrknahnani Pharaoh nuye.

38

Judah Dja Tamar:

Genesis 38:1-30

¹ Wanjh Judah benbawong nawu birridanginj, dja wam beneni nakudji bininj nawu nakang kunred Adullam nawu nungka ngeyyoy Hirah.

² Bu kumekbe ni, Judah binang ngalbebeywurd nuye nakudji bininj nawu Canaan bikebmawahmeng, nawu nungka ngeyyoy Shua. Wanjh Judah benemarrinj dja beneyoy ngalmekbe daluk.

³ Wanjh ngaleng yawkani, kaluk narangem yawmey, kornkumo bingeykurmeng Er.

⁴ Kaluk yawoyhyawkani dja yawmey narangem, bingeykurmeng Onan.

⁵ Wanjh yawoyhyawmey nabuyika warridj, bingeykurmeng Shelah. Ngaleng ni kore kunred Kezib bu nungka danginj.

⁶ Kaluk bu Er djordminj, wanjh Judah daluk bimarnemey daluk nuye nawu beywurd nadjdjaman nuye, ngaleng ngeyyoy Tamar.

⁷ Dja Er nawu nadjdjaman nuye Judah, nungka bu Yawey binang kunwarre djalkadjuy, wanjh kunu Yawey bibom, doweng.

⁸ Wanjh Judah bimarneyimeng Onan, "Nguneyuwn ngalbu beneni Nakokok, bu mankarre kahyo bininj kabeneyo kamarrdjukun nuye nawu nawernwarre bu beneni, ba kunu wurdwurd yibenbornan nawu yiman nungka nuye rerrih."

⁹ Dja Onan burrbom bu wurdwurd benbornayi, bininj birriyimeninj minj nungka nuyeniwirrinj, wanjh kunu bu rey beneyoy ngalbu nawernwarre nuyeni, nungka manduk yakbom kore kurorre, ba minj yawbornayi nuyeniwirrinj nawu benedanginj.

¹⁰ Wanjh Yawey nang bu kuhni kurduhkurduyimi kunwarre, wanjh kunu nungka warridj bibom doweng.

¹¹ Wanjh Judah bimarneyimeng ngalbinjdoy nuye Tamar, yimeng, "Ngudda yidjalkamarrdjukunnin kore kornkumo ke nuye kunrurrk, kumekbe yidjalnin munguyh, kaluk beywurd ngardduk nawu Shelah kadjordmen." (Kunmekbe yimeng bu nungka keleni bu yimankek nunganwali Shelah dowimeninj yiman birridanginj nuye benedoweng.) Wanjh kunu Tamar wam ningihni kore kornkumo ngarreni kunrurrk nuye.

¹² Kaluk rerrikah Judah nuyeni ngalbininj kobeng ngalbu ngalbeywurd nuye Shua, wanjh doweng. Wanjh Judah njilngwahnjilngwarreni, wanjh kaluk bu njilngmakminj wanjh nungka wam bidbom kore kunred Timnah,

[†] 37:35 Sheol kamenyime "Kore nawu birridowerrinj kabirrihni", dja yika "kumidj".

kore bininj birrimuddadjikeyi sheep nuye, dja nawu benedabbolk Hirah Adullumbeh wanjh benedjarrkwam.

¹³ Kaluk bu Tamar bekkang bu nabininjdooy kahre kore Timnah kabirrimuddadjikeyi sheep,

¹⁴ wanjh ngaleng yerrkkerrinj nawu kamarrdjukunkenh bu djongbuhd-jongbuyindi, dja manburrba djongburrinj kebbarrkburrinj, wanjh wam yerrkang ni kore bininj kabirringimen kore kunred Enaim, kaluk kore manbolh manbu kahre kore Timnah. Kunmekbe yimeng bu ngaleng nang Shelah djordminj dja minj biwoyi beneniwirrinj.

¹⁵ Kaluk Judah binang Timnah, dja nungka yimeng bu yimankek ngaleng daluk ngalbu kakukweykarren kore bininj. Kunmekbe nungka yimeng bu ngaleng kebbarrkbuyindi.

¹⁶ Nungka minj burrbuyi bu ngaleng ngalbinjdooy nuye, wanjh nungka wam kore ngaleng ni kore kubolhdid, dja yimeng, "Yimray wanjh, ngarryo." Dja ngaleng bidjawam, "Njale kaluk kanwon ngarryokenh?"

¹⁷ Nungka yimeng, "Ngaye marnemunkewe goat yaw kore ngardduk mayh kamirnderri." Wanjh ngaleng bidjawam yimeng, "Yiddok ngudda kanwon njale ngadjalwohkarrme, kaluk marnedurndiwe bu ngudda yimmunkewe?"

¹⁸ Nungka yimeng, "Njale kaluk yidjare won yidjalwohkarrme?" Wanjh ngaleng biwokmey yimeng, "Kanwo ring kunbidkenh nawu yingan kekikh nawu yiman rerrih yihngeybimdi, kaluk kunyarl dorrengh, dja mak kunkarndudj manbu yihkarndudjkarren." Wanjh kunu nungka biwong, dja beneyonginj. Kaluk ngaleng yawkani nungka nuye wurdyaw.

¹⁹ Wanjh ngaleng bu wam wanjh yerrkkerrinj nawu kebbarrkbuyindi dja yawoyhdjongburrinj kamarrdjukunkenh kunmadj.

²⁰ Kaluk Judah munkeweng goat yaw, bininj nawu benedabbolk nawu nakang Adullam, nungka kang ba daluk bimarnedurndiwemeninj nawu biwong nawu djalwohkarrmi. Nungka kaluk bidjalyawam, minj bingalkemeninj.

²¹ Wanjh bendjawam bininj nawu birrini kumekbe, yimeng, "Baleh daluk ngalbu kakukweykaweykarren kore ngudberre yiwarrudjkenh, ngalbu ni kore kubolhdid kore Enaim?" Bedda birriyimeng, "Minj kondah niwirrinj ngalbu kakukweykaweykarren kore ngadberre yiwarrudjkenh."

²² Wanjh kunu nungka durndi kore Judah ni dja yimeng, "Minj ngangalkemeninj dja mak bininj nawu kumekbe birrini birriyimeng bu minj kumekbe niwirrinj daluk ngalbu kakukweykaweykarren kore bedberre yiwarrudjkenh."

²³ Wanjh Judah yimeng, "Bonj, balkarrmen nawu kahkarrme, marndi bu ngarryawan wanjh bininj kandidjekwiwon ngarrku. Ngaye ngamarne-munkeweng goat yaw, dja minj ngaleng yingalkemeninj."

²⁴ Kaluk rerrikah bu yiman dird danjbik Judah birrimarneyimeng, "Ngalbinjdooy ke ngalbu Tamar wanjh kukweykarrinj kore bininj, dja wanjh kayawkan." Judah yimeng, "Ngurrimbebkemen dja kunak ngurrikukwurhkhemen karrown."

²⁵ Bu birrimbebkeng ngaleng kunwok munkeweng nuye nawu nabininjdooy, yimeng, "Ngaye wurdyaw ngakan nuye bininj nawu nuye nahni." Dja mak yimeng, "Yinan bu yimankek yikukburrknan nangale nuye nawu nahni bininj nuye nawu yiman rerrih kahngeybimdi, kaluk kunyarl dorrengh, dja kunkarndudj?"

²⁶ Wanjh Judah kukburknang dja yimeng, "Ngaleng wanjh ngalmak, dja ngaye ngawarre bu minj ngawoyi beywurd ngardduk nawu Shelah." Dja nungka Judah minj beneyawoyhyuwirrinj.

²⁷ Bu kumwam ngarre wurdyaw bibuni wanjh narahrangem bokenh kanihkani.

²⁸ Bu wurdyaw mahmirri, nakudji bidbebmerrinj, wanjh kunu daluk ngalbu bibidyikarmi wurdyawkenh, kunyarl mey nawu kukkurlbani dja bibendedukkang, yimeng, "Namekbe wanjh bebmeng werkk."

²⁹ Dja bu nungka biddurndiwerrinj, wanjh nawu benedanginj danginj werkkwerkk, wanjh ngaleng yimeng, "Kunukka wanjh ngudda yibe bmeng werkkwerkk." Wanjh kunu nungka ngeyyoy Perez.*

³⁰ Wanjh nunganwali danginj nawu benedanginj nawu bende- dukkayindi kukkurlba kunyarl, wanjh nungka ngeyyoy Zerah.†

39

Joseph Namungukenh Birridangbalmeng.

Genesis 39:1-23

¹ Bininj nawu Ishmael benkebmawahmeng, nawu birrikang Joseph kore Egypt, wanjh birribalkukweykang dja Potiphar bimey. Nungka Potiphar wanjh Egyptbeh bininj nawu king Pharaoh bimarnedurrkmirri, kaluk wohrnani bedberre djamun nawu king Pharaoh birrimarnerurrknahnani.

² Yawey wanjh benedjarrkrey Joseph, dja nungka Joseph bu baleh yimerrangeni nuye wanjh kamak rowk, dja nungka Joseph ni kore kunrurrk nuye Egyptbeh bininj nawu bimarnewohrnani.

³ Bu nungka nawu bimarnewohrnani nang bu Yawey benedjarrkrey Joseph, dja Yawey bibidyikarmi ba bu baleh yimerrangeni nuyeni Joseph wanjh kamak rowk,

⁴ wanjh namekbe bininj Potiphar bimarneyimeng Joseph namak, dja bikurrmeng nungan kabinahnan, dja bimarnbom nungka Joseph ben- marnewohrnani bininj nuye nawu birridurrkmirri kururrk nuye, dja mak bimarnenahnani nawu yehyeng rowk nuye.

⁵ Wanjh kundjalmekbe bu Potiphar yimeng bimarnbom Joseph ka- wohnan kore kunrurrk nuye dja mak kore yehyeng nuye rowk, wanjh munguyh Yawey benmarnekurduyimi kunmak bininj nuye nawu namekbe Egyptbeh bininj. Kuhni Yawey kurduyimi bu nungka Josephkenh. Yehyeng nawu Potiphar karmi wanjh God bimarnekurduy- imi kunmak, kaluk kore kunrurrk dja mak kore kabbal.

⁶ Wanjh kunu nungka bidjalyibawong rowk Joseph wohrnani. Dja bu nungka Joseph bikarmi bimarnedurrkmirri, minj njale burrbuyi nawu Potiphar, nungka djalburrbuni manme nuye manbu nungan ngunihnguni. Dja Joseph nungka wanjh kukmakni dja mak kebmakni warridj.

⁷ Wanjh kaluk ngalbininj kobeng nuye nawu bimarnewohrnani, ngaleng wanjh binani Joseph dja yimeng, "Yimray, ngarryo."

⁸ Dja nungka birrahmeng, yimeng, "Bu gaye ngankarme ngawohnan, wanjh nungka nawu nganarnewohrnan minj njale kaburrbun kondah kore kunrurrk, yehyeng nawu nungka kakarme wanjh nungka ngankur- rmeng ngamarnenahnani.

⁹ Minj nangale nabuyika kawernhwohnan kondah kore kunrurrk, dja gaye ngadjalwohnan. Minj njale ngankaybuyi, dja yidjalkudji ngudda nawu nuye ngalbininj kobeng. Kaluk baleh yimankek gaye kuhni kunwarre duninj ngayime, dja God ngamarneyime kunwarre?"

* **38:29** Kunekke kunngay kayime "Kambebme werkkwerkk". † **38:30** Kunekke kunngay kayime, "Manbu Mankukkurlba Kabame".

¹⁰ Dja madjamku ngaleng munguyh bu kunbarnangarrabubuyika bih-marneyimi, dja nungka Joseph bidjaldahmi, minj beneyuwirrinj dja minj mak niwirrinj kore ngaleng.

¹¹ Kaluk kunbarnangarrakudji bu nungka ngimeng kururrk kore durrrk-mihdurrrkmirri, dja minj nangale mak nawu birridurrrkmirri birriniwirrinj kururrk,

¹² wanjh ngaleng bimarnekarmeng manburra nawu kaddum djong-buyindi, dja yimeng, "Yimray ngarryo." Dja nungka djalbawong manburra kubid ngalenggarre dja kelerlobmeng kuberrk.

¹³ Bu ngaleng nang nungka bawong manburra kubid ngalenggarre dja nungan kelerlobmeng kuberrk,

¹⁴ wanjh ngaleng benkayhmeng nawu birrimarnedurrrkmirri, dja ben-marneyimeng, "Nabininj kobeng ngardduk bim kang nahnani nawu Hebrew bininj kanyemikan kadberre. Nungka ngimeng kondah nganewuwirrin-jkenh dja ngaye ngakayhmeng.

¹⁵ Bu nungka nganbekkang ngaye ngakayhmeng, wanjh nungka bawong manburra nuye kore ngaye dja kelerlobmeng kuberrk."

¹⁶ Wanjh ngaleng kurrmeng manburra nuye Joseph darnkih kore ngaleng ni, dja bimadbuni kamdurndengkenh nawu Joseph bimarnewohnani,

¹⁷ dja kunkudjiwi kunwok bimarneyimeng, yimeng, "Nawu Hebrew bininj nawu ngunmarnedurrrkmirri nawu ngudda yim kang kore ngad, nungka wanjh nganmarnengimeng nganyemikankenh,

¹⁸ dja bu ngaye ngakayhmeng wanjh kundjalmekbe rerrih nungka bawong manburra nuye kore ngaye, dja kelerlobmeng kuberrk."

¹⁹ Wanjh namekbe nawu Joseph bimarnewohnani bu bekkang kuhni kunwok nawu ngalbininj kobeng nuye bimarneyimeng bu yimeng, "Kuhni wanjh kunukka nganmarnekurduyimeng bininj nawu ngudda ngunmarnedurrrkmirri", wanjh nungka kangewurrlhmeng.

²⁰ Wanjh nawu Joseph bimarnewohnani bikang Joseph birrangbalhmeng kore prison, kore bininj nawu king benhdangbalhmi birridangbalhmiyindi, wanjh kumekbe dangbalhmiyindi.

²¹ Dja bu Joseph kumekbe ni kore dangbalhmiyindi, wanjh Yawey benedjarrkrey, bihkongibuni bihmarnekurduyimi kunmak munguyh, dja bininj nawu bennahnani nawu birridangbalhmiyindi, nungka Yawey bimarnbom bimarneyimeng Joseph namak.

²² Wanjh kunu namekbe bininj nawu bennahnani bikurrmeng Joseph benmarnewohnani bininj rowk nawu kumekbe birridangbalhmiyindi kore prison, dja nungka wohrnani kore yehyeng nawu kumekbe prison birrikurduyimi.

²³ Yawey benedjarrkrey Joseph dja bimarnbom bu baleh nungka yimi wanjh kamak rowk yimerrangeni, wanjh kunu namekbe nawu bennahnani minj baleh biyidjawayi kore Joseph nahnani.

40

Joseph Benbenebebbemarnekareyolyolmeng Kunkodjibukirri Berrewoneng Nawu Birridjarrkdangbalhmiyindi.

Genesis 40:1-23

¹⁻² Kaluk yerrekah bininj bokenh benenjingwarrewong nungka nawu benemarnedurrrkmirri, nawu king Pharaoh, nawu wohrnawohnani kubolkwarlah Egypt. Nakudji bininj nawu wohrnani bedberre nawu birrimarnebokani king Pharaoh, dja nabuyika nawu wohrnani bedberre

nawu manme birrimarnekinjeyi nawu king. Nungka wanjh yidduy bu kunmekbe beneyimeng bininj bokenh nawu benekihkimuk benemarnerdurkmirri,

³ wanjh benbenedangbalhmeng kore prison, kore kunrurrk nuye bininj nawu wohnani bedberre bininj nawu king birrimarnerurrknahnani, kaluk kubolkkudjiwi kore Joseph dangbalhmiyindi.

⁴ Wanjh namekbe nawu wohnani bedberre djamun nawu king birrimarnerurrknahnani, wanjh bikurrmeng Joseph kabenbenenahnan, wanjh nungka benbenemarnerdurkmirri, benbenemarnekani manme. Kaluk bedda kunkuyengwurd benedangbalhmiyindi.

⁵ Kaluk kunkudji kumunun king Pharaoh nuye bininj nawu bimarnebokani dja mak nabuyika nawu bimarnekinjeyi manme, nawu benedangbalhmiyindi kore prison, wanjh benebebbekodjbukirriwam, kaluk manbebbekarrebubuyika.

⁶⁻⁷ Kaluk bu kukabel bu Joseph benbenemarnebebmeng benbenenang bedda nawu benekihkimukni benemarnerdurkmirri Pharaoh nawu birridjarrkdangbalhmiyindi, benbenenang bedda wanjh benenjingwarreni. Wanjh kunu Joseph benbenedjawam, "Njalekah bolkkime ngunekebume?"

⁸ Wanjh bedda beneyimeng, "Ngad nganekodjbukirriwam, dja minj nangale kaburrbun bu kanbenemarnekareyolyolme."

Wanjh Joseph benbenemarneyimeng, "God nadjalkudji kaburrbun dja kanmarnekareyolyolme. Wanjh ngadjare kandimarneyime nawu njale ngunekodjbukirriwam."

⁹ Wanjh kunu bininj nawu king bimarnebokani bimarneyimeng Joseph bukirri nawu nuye nungka kodjbukirriwam, yimeng, "Bu ngaye ngakodjbukirriwam nganang manrakel kore kumirr ngardduk,

¹⁰ dja kore manrakel kaluk danjbik manyenhyende, wanjh bu worrbebmerrinj, wanjh kundjalmekbe rerrih mannguy dangerrinj, dja manme mirndedjolengminj manbu grapes.

¹¹ Pharaoh nuye banikkin ngakarrmi kubid ngardduk wanjh ngamey grapes dja ngakalkiddjuwimeng kore banikkin nuye Pharaoh, dja ngabidkewong banikkin nuye."

¹² Wanjh Joseph bimarneyimeng, "Kuhni wanjh kakarreyime. Manbu danjbik manyende kayolyolme kunbarnangarra danjbik,

¹³ kaluk bu minj kabangmeyakmen kunbarnangarra danjbik wanjh Pharaoh ngunbebke dja ngunmarnbun yiyawoyhmarnedurkmirri, dja ngudda kaluk yibidkenwon banikkin yiman bu kerngeghkenh yihkurduyimi bu ngudda yimarnebokani.

¹⁴ Dja yina! Kaluk bu ngudda ke kayimerran kamak rowk, wanjh kanburru ngaye, dja kankongibu kunmak kanmarnekurduyimen, ngadjare kanmulewan kore Pharaoh bu ngabebme kondah kururrkbeh.

¹⁵ Kunmekbe yikurduyimen dja ngaye ngandidjirdmey kore Hebrew ngadberre kubolkwarlah, dja kondah Egypt warridj minj njale kunwarre ngayimeninj ngandikurrmengkenh kondah kubolkwarre kore kururrkmun."

¹⁶ Wanjh bininj nawu king bimarnekinjeyi manme, bu nungka bimarnekarebekkang nabuyika nuye bu kamak rowk, wanjh nungka bimarneyimeng Joseph, "Ngaye warridj ngakodjbukirriwam, ngangorrkani kukodj ngardduk basket danjbik manmekenih.

¹⁷ Kaluk kore basket manbu kaddum duninj, dahkendi manme manbu mankerrikenh manbubuyika nuye Pharaoh, dja mayhmayh birringuni manme kore basketbeh kukodj ngardduk."

¹⁸ Wanjh Joseph yimeng, “Kuhni wanjh kakarreyime. Nawu basket danjbik kaluk wanjh kayolyolme kunbarnangarra danjbik.

¹⁹ Kaluk bu minj kabangmeyakmen kunbarnangarra danjbik wanjh Pharaoh ngunbekke dja ngunkomdjokke wanjh ngunkukbarnname kurruk, dja maymayh ngundikukngun.”

²⁰ Wanjh bu kunbarnangarra danjbik kaluk Pharaoh nuyeni birthday bu burrbuni kore nungan danginj, nungka mulil marnbom bedberre bininj nawu birrikihkimukni birrimarnedurrkmirri, dja nungka benbenebebkeng bininj nawu bimarnebokani, dja nabuyika nawu bimarnekinjeji manme, benbenemkang kore bininj nuye nawu birrimarnedurrkmirri birrikihkimukni.

²¹ Nawu bimarnebokani nungka king bimarbnom biyawoyhmarnedurrkmirri, bibidkenwoni banikkin.

²² Dja nawu bimarnekinjeji manme, nungka bikukbarnnameng kore kurruk, kunmekbe yimerranj bu Joseph benbenemarnekareyolyolmeng.

²³ Wanjh yiman djamku kuninjkuu karreyimerranj, dja bininj nawu king bimarnebokani minj biburrbuyi Joseph, bidjalbengmidjanj.

41

Joseph Bimarnekareyolyolmeng Pharaoh Nuye Kunkodjbukirri.

Genesis 41:1-36

¹ Kaluk rerrikah bu mandjewk bokenh, wanjh Pharaoh kodjbukirriwam. Nungan bukirriburrinj kore yimankek darnkih mankabo Nile dingihdi.

² Wanjh kumekbe nang seven birrikukmak dja birridjurdudjurduh bulikki birrimbidburrinj kore kukabobeh, birringuni kunbak.

³ Wanjh kumekbe birribuyikawali seven bulikki birrimbidburrinj yerre nawu birrimowarreni dja birrimurrngbebmerrinj. Wanjh kumekbe birridjarrkdi nawu bulikki rowk, kumekbe kore kurrid ngarre Nile mankabo.

⁴ Wanjh nawu birrimowarreni birrimurrngbebmerrinj bulikki bindikuknguneng bindiyakwong rowk nawu birrikukmakni birridjurdudjurduhni. Wanjh Pharaoh kodjkerrollkang.

⁵ Kaluk nungka yawoyhkeyonginj, wanjh yawoyhkodjbukirriwam. Kumekbe nang seven manburrrkimukni dja manmakni manme djordmereni kore kundalkudji.

⁶ Wanjh kumekbe kaluk yerre kolhdebebmerrinj seven manmowarreni manme manbu yiman manmayorrkwurhkenh kinjeng.

⁷ Wanjh manmekbe manme manbu manmowarreni bindinguneng manbu manmak manburrrkimuk manme, bindiyakwong rowk. Wanjh Pharaoh kodjkerrollkang, yimerrinj, “A! Ngaye ngakodjbukirriwam.”

⁸ Wanjh kunu bu kukabel nungka kangewarreminj, dja benmarnekayhmeng birriwern rowk bininj nawu birrikurdangni nawu birrini kore Egypt dja mak nawu birrimayaliwernni bininj, dja Pharaoh benmarneyimeng kore kodjbukirriwam, dja minj nangale mak bimarnekareyolyolmeninj Pharaoh.

⁹ Wanjh bininj nawu wohrnani bedberre nawu benmarnebokani king Pharaoh, nungka bimarneyimeng Pharaoh, yimeng, “Ngaye bolkkime ngabengdayhmeng bu kunwarre ngayimeng.

¹⁰ Bu ngudda Pharaoh kanbeneduy nawu ngundimarnedurrkmirri, dja kanbenekurrmeng ngaye dja bininj nawu wohrnani bedberre nawu manme ngundimarnekinjeji, kanbenedangbalhmeng kore kunurrrk nuye bininj nawu kawohrnani bedberre nawu ngundimarnerurrknahnan.

11 Kaluk ngad nganekodjbukirriwam bu kunkakkudji, nungka dja ngaye nganebebbekodjbukirriwam manbebbekharrebuyika.

12 Wanjh kumekbe ngarridjarrkni yawurrinj nawu Hebrew, nawu bimarnerurrkmirri bininj nawu kabenmarnewohrnan nawu ngundimarnerrknahn. Wanjh bu ngad nganemarneyimeng namekbe Hebrew, nungka wanjh nganbenebebbekharrekarreyolyolmeng ngarrewoneng kore nganebebbekodjbukirriwam.

13 Dja bu nungka nganbenemarnekareyolyolmeng wanjh kundjalmeke kurduyimerranj, ngaye kandurndiweng yawoyhmarnedurrkmirri, dja bininj nawu manne ngunmarnekinjeji, nungka wanjh yikubarnnameng kore kurrulk."

14 Wanjh Pharaoh bimunkeweng bininj kabikimang Joseph, wanjh werkkwerkk birribebkeng kore dangbalhmiyindi kubolkwarre kore kururkmunun. Wanjh bu nungka djawurrkburrij dja djongburrij namak, wanjh kumwam bimarnebebmeng king Pharaoh, danginj kumirrk nuye.

15 Wanjh Pharaoh bimarneyimeng Joseph, "Ngaye ngakodjbukirriwam, dja minj nangale nganmarnekareyolyolme, dja ngaye wobekkkang bu ngudda yibekkan nawu bininj kakodjbukirrire wanjh ngudda yimarnekareyolyolme."

16 Wanjh Joseph biwokmey Pharaoh, yimeng, "Ngaye ngawid, dja God ngunmarnekareyolyolme kunmak ngudda nawu king Pharaoh."

17 Wanjh Pharaoh bimarneyimeng Joseph, "Kanbekka, bu ngakodjbukirriwam wanjh ngaye ngahdi kore kurrid ngarre Nile mankabo,

18 wanjh seven bulikki birridjurdudjurdud dja birrikumak birrimbidburrij kore kukabobeh Nile, dja birringuni kunbak.

19 Wanjh seven birribuyika bulikki bedmanwali birrimbidburrij nawu birridjalmowarreni duninj, birrimurrngbebmerrinj, birrikukyimi yiman minj kab korroko nganayi kore kubolkwarlah Egypt rowk.

20 Wanjh bulikki nawu birrimowarreni birrimurrngbebmerrinj, bedda wanjh bindinguneng bindiyakwong nawu seven birridjurdudjurdud bulikki nawu birrimbebmerrinj werkk.

21 Dja bu bindinguneng, kunmekbe birridjalkukyimi yiman rerrih minj bindinguyi, dja birridjalmurrngbebmerrinj munguyh, yiman bu kerrngekenh birrikukyimi. Wanjh ngakodjkerrollkkang."

22 "Dja mak nganang bu ngakodjbukirriwam seven manme djordmereni kore kundalkudji, kaluk manburkkimuk dja manmak,

23 dja seven manme manbu manweleberrkni manmowarreni dja mak yiman manmayorrkwurllhmiakenh kinjeng, wanjh manmekbe kolhdedanggerrinj rerre.

24 Wanjh manme manbu manmowarreni bindinguneng manbu seven manmakni. Dja ngaye kuhni ngabenmarneyimeng birrikurdang, dja minj nangale nganmarnekareyolyolmeninj."

25 Wanjh Joseph bimarneyimeng Pharaoh, yimeng, "Nawu ngudda Pharaoh yikodjbukirriwam wanjh mandjalkudjiwi. God nguningkih-bengdaykheng bu baleh darnkih kakurduyime.

26 Nawu seven birrimak bulikki wanjh ngundimarnemulewan seven mandjewk, dja seven manmak manme wanjh seven mandjewk. Nawu yikodjbukirriwam wanjh mandjalkudji.

27 Dja seven nawu birrimowarre bulikki nawu birrimurrngbebmerrinj nawu yerre bindimarnebidburrij, wanjh ngundimarnemulewan seven mandjewk, dja manbu seven manlarrk manme manbu yiman kunmayorrk wurllhmi kinjeng, manekke warridj wanjh ngundimarnemulewan seven

mandjewk bu kabolldarlehmen, manme kayakmen kore kubolldwarlah Egypt rowk.

²⁸ Wanjh kunmekbe bu ngayimeng ke nawu king Pharaoh, God nguningkih bengdayhkeng bu baleh kakurduyime darnkih.

²⁹ Kaluk kamre seven mandjewk bu manme manwern duninjh karrikarme kore kubolldwarlah Egypt rowk.

³⁰ Dja rerrikah wanjh kamre seven mandjewk bu minj kadjordmen manme, karridjalyawarren rowk. Wanjh bininj kaluk karribengmidjan kore manme manwern karrikarmi kore Egypt, kadjalbolldwarremen duninjh.

³¹ Wanjh bu kunmekbe kayimerran kadjewkwarremen rowk, karyawarren duninjh, wanjh kunmekbekenh kunu kaluk karribengmidjan kore manwern karrikarmi.

³² Dja bu bokenh yikodjbukirriwam, wanjh kunu ngunbukkan bu nungka God wokrayekworrinj duninjh, dja nungan God darnkih kakurduyime kore ngunbukkang."

³³ Mak Joseph yimeng, "Wanjh kunu yidjarrngbu bininj nawu mayalimak dja kaburrbun yeledj kabenmarneyime, dja yikurmen kawohnan kore kubolldwarlah Egypt.

³⁴ Dja mak yibenkurmen bininj nawu kabirribolldknahnan, dja bu mandjewk seven bu manme manwern wanjh bedda kabirrimang yikah manme. Birriwarlahkenh bininj birrika kunkarngbakmeng manbu manme bedberre, dja mankudji kabindiwon nawu kabirrimang kabirikarekurme.

³⁵ Kaluk bu kamre mandjewk kore manme manwern wanjh manme kabirrimang kabirikarekurme bu ngudda Pharaoh yiwohnan yibenmarneyimen kabirikarekurme kore kubolldkihkimuk, wanjh kumekbe kunu kakareyo.

³⁶ Manmekbe manme kakareyo ba bu kaluk karringun bu kamre seven mandjewk kore kabolldarlehmen karriyawarren kore kubolldwarlah Egypt. Kunmekbe yikurduyimen ba minj bininj karridowen bu manmeyak kondah kubolldwarlah Egypt."

Pharaoh Bikurmeng Joseph Bu Kawohnan Kore Egypt.

Genesis 41:37-57

³⁷ Bu kunmekbe Pharaoh bekkang nungka dja bininj nuye birrikihkimuk nawu birrimarnedurrkmirri, wanjh birribekkarrinj kamak bu kuhni kabirrikurduyime.

³⁸ Wanjh Pharaoh bendjawam bedda nawu birrikihkimuk nuye, "Minj nuk nabuyika karringalke bininj yiman nungka Joseph nawu kunmalng God nuye kakarrme?"

³⁹ Wanjh kunu Pharaoh bimarneyimeng Joseph, "Bu God kuhni rowk ngunbukkang, minj nangale nabuyika kaburrbun yeledj kabenmarneyime, dja minj nangale mayalimak yiman ngudda.

⁴⁰ Ngudda wanjh yibenmarnewohnan bininj nawu kabirri kururk ngardduk, dja bininj rowk ngardduk ngundiwokmarkang kore yibenwokrayekwon. Dja ngudda yidjalwohrnan, dja gaye ngadjalkudji nawu king ngawernwohrnan."

⁴¹ Wanjh Pharaoh bimarneyimeng Joseph, "Yina gaye kurrmeng ngudda yiwohnan kubolldwarlah rowk Egypt."

⁴² Wanjh Pharaoh bidyerrkerrinj nawu biddjongbuyindi nawu nungan king ngeydi, dja bibiddjongbom Joseph, dja bidjongbom manburriba namak duninjh, dja bimangi Wong Wirlmurrng gold chain.

43 Dja bikurrmeng karrahkenhdi kore wirbarra, nungka king nuye nawernhmakni dja Joseph nuye manmakni rerrih. Wanjh bininj birikayhmeng nuye Joseph bu kumhrey, "Ngurrimarnewayhmen." Kunu wanjh bimarnbom kawohrnan kubolkwarlah rowk Egypt.

44 Dja mak Pharaoh bimarneyimeng Joseph, "Ngaye wanjh Pharaoh, dja bu ngudda minj yibenmarnekodjduhme bininj, minj baleh kabirrikurduyme kore kubolkwarlah rowk Egypt."

45 Wanjh Pharaoh bingeykurrmeng Joseph Zaphenath-paneah, dja biwong daluk benemarrinj ngalbu ngeyyoy Asenath, ngalbeywurd nuye Potiphera nawu wohrnani yiwarrudj bedberre kore kunred On. Wanjh Joseph rey kubolkbubuyika rowk kore kubolkwarlah Egypt.

46 Joseph wanjh mandjewk nuyeni thirty bu dedjdjingmey bimarnedurkmirri king Pharaoh nawu wohrnani kore Egypt. Wanjh Joseph bu di kore kore Pharaoh wanjh bebmeng, dja wam renehrey kore kubolkbubuyika rowk kore kubolkwarlah Egypt.

47 Wanjh bu mandjewk seven manme manwern djordmerreni, manwern duninj,

48 dja nungka manme mangi bu mandjewk seven kore manwern birikarmi kore Egypt, dja nungka karekurrmi kore kubolkkihkimuk. Kore kubolkkihkimukbubuyika nungka bebbekarekurrmi manme manbu djordmerreni kumekbe kore kabbal darnkih kore kubolkkimuk, kudjalmekbe darnhkarekurrmi.

49 Wanjh Joseph karekurrmi manmim mandjalwernkenh duninj, yiman kamirndeyime kunkayalanj kore kurrid kurrula, kaluk minj munguyh bimbuyi rohrokmeninj, dja manwern duninj, minj nangale rohrokmeninj.

50 Bu minj kumbangmeyimerrangimeninj bu mandjewk kawarremen, wanjh Joseph benbenebornang bebeywurd bokenh. Asenath ngalbeywurd nuye Potiphera nawu bininj yiwarrudj wohrnani bedberre kunred On, ngalmekbe Asenath bimarneyawmey Joseph.

51 Joseph bingeykurrmeng nadjdjaman Manasseh. Dja yimeng, "Kunmekbe ngangeykurrmeng bu God nganmarnbom ngabengmidjdanj kumurrngayek ngardduk, dja mak yiman ngabengmidjdanj nawu ngarimid."*

52 Dja nawu nawalawalak nungka wanjh bingeykurrmeng Ephraim. † Dja nungka yimeng, "Kunmekbe ngangeykurrmeng bu God nungka nganmarnbom ngayerdwernminj kore kondah kubolkwarlah kore nganjlingwarreni."

53 Wanjh mandjewk seven bu manme manwernni kore kubolkwarlah Egypt kaluk yakminj,

54 dja dedjdjingmey bu seven mandjewk bininj birriyawarrinj manme bu Joseph yimeng. Kubolkbubuyika rowk birriyawarreni, dja kore kubolkbubuyika rowk kore kubolkwarlah Egypt wanjh manme yongohoy.

55 Kaluk bu birriwernhmarrwedoweni bininj kore Egypt rowk, wanjh kunnalk dorrenghni bininj birrikayhmi Pharaoh, birridjawani manmekah. Dja Pharaoh benmarneyimeng rowk bininj nawu Egyptbeh, "Ngurriyay kore Joseph, dja bu baleh ngunmarneyime, kunmekbe ngurrikurduymen."

56 Wanjh bu warlahminj manme birriyawarreni kubolkwarlah rowk Egypt, Joseph dangmarrhmay kunrurrk rowk kore manme karehkareyoy,

* 41:51 Mannaseh kayime "bengmidjdanj". † 41:52 Kunekke kungey kayime "Wernminj."

dja weykani bedberre bininj nawu Egyptbeh. Dja djewkwarreminj duninj, meyakminj kore kubolkwarlah Egypt rowk.

⁵⁷ Dja mak bininj birrimdolkarrinj kubolkbubuyika rowk, birrimrey kore Egypt kore Joseph mimwey kahweykani. Kunmekbe birrikurduyimi bu birriyawarreni duninj kubolkbubuyika rowk kurorre.

42

Joseph Nuye Birridanginj Birriwam Kore Egypt.

Genesis 42:1-6

¹ Bu Jacob bekkang manme manbu manmim birrikarrmi kore Egypt, wanjh nungka benmarneyimeng bebeywurd nuye, yimeng, "Njalekah ngudda ngurrihdjalkuknarren?"

² Dja mak yimeng, "Kandibekka, ngaye ngabek kang bu manmim kabirrikarrme kore Egypt. Ngurriray kumekbe dja ngurrikan kunwardde ngurrimimmang kadberre, ba kunu karridarrkid dja minj karridowen."

³ Wanjh ten nawu Joseph birridangerrinj birriwam kabirrimang manmim kore Egypt.

⁴ Dja Jacob keleni bu Benjaminj birridjarrkrawinj, marndi baleh yarrkka kunyid biwohmarnengalmeninj, wanjh kunmekbekenh kunu nungka minj bimunkewemeninj Benjaminj nawu Joseph ngalbadjan ngalkudji berrewoneng.

⁵ Wanjh kunu Israel nuye bebeywurd birrimdjarrkbebmeng birribuyika bininj nawu birrimwam kabirrimang manmim, dja manme birriyawarreni kore kubolkwarlah Canaan warridj.

⁶ Kaluk Joseph wohrnawohrnani kore kubolkwarlah Egypt, dja nungka wanjh mimweykani bedberre bininj rowk. Wanjh kunu bu Joseph nuye birridangerrinj birribebmeng, birrimarneboddanj kanjdji birrirorrenani.

Joseph Benkoweng Nawu Birridanginj.

Genesis 42:7-26

⁷ Bu Joseph bennang nawu birridanginj nuye, wanjh kundjalmekbe benkukburknang, dja bu baleh yarrkka benhmarneyimi, wanjh yiman yerreh benkukwakwani, dja warridj bu wokdi bedberre wanjh yiman yerreh benduy, dja bendjawam, "Ngudda balehbeh ngurrimdolkang?" Bedda birriwokmey, "Ngad ngarrimdolkang kubolkwarlah Canaan, manme ngarridjare ngarrimang."

⁸ Kaluk Joseph benkukburknang nawu birridanginj, dja bedda minj nungka birrikukburknayi.

⁹ Wanjh nungka bengdayhmeng bu korrokoni benbukirribom. Wanjh benmarneyimeng, "Ngudda ngurrimwam ngurribolknabolknan, wardi ngurribolkyawan kore baleh yimankek ngurrimkuningimen kandibun!"

¹⁰ Bedda birriwokmey birriyimeng, "Ngudda nawu yiwohrnan, burkyak, ngad nawu ngarrimarladj, ngad wanjh ngarrimwam manme ngarrimang."

¹¹ Ngad wanjh kornkumo nadjalkudji ngadberre, ngad nawu ngarrimarladj wanjh ngarriwoybuk, minj ngarrimrawinj ngarribolknabolknankenh."

¹² Wanjh nungka yimeng bedberre, "Burkyak, dja ngurrimwam ngurribolkyawan kore baleh yimankek ngurrimkuningimen kandibun"

¹³ Dja bedda birrimarneyimeng, "Ngad nawu ngarrimarladj wanjh twelwe ngarridangerrinj, kornkumo nakudji ngadberre, nawu kani kore kubolkwarlah Canaan. Yina, nawu nayahwurd duninj bolkkime kabenedjarrkni Ngabbard, dja nakudji yakminj."

14 Joseph benmarneyimeng, “Wanjh yiman ngaye ngayimeng ngudberre, ngudda ngurrimwam ngurribolknabolknan.

15 Dja kuhni wanjh ngakurduyime rohrokme ngudberre. Ngawokrayekworren Pharaoh nuye kungey dorreng, bu nayahwurd minj kamre, ngudda minj kondah ngurribolkbawon.

16 Ngurrimunkewemen nakudji kabimkan ngurridanginj nawu nayahwurd, dja ngurribuyika ngurridangbalhmiyindi kore prison, ba kunu kunwok ngudberre ngarohrokme, ngaburrbun bu ngudda kunwoybuk ngurriwokdi. Dja bu burrkyak, wanjh ngawokrayekworren kore Pharaoh kungey dorreng bu ngudda woybukkih ngurrimwam ngurribolknabolknankenh.”

17 Wanjh nungka bendangbalhmeng rowk bu kunbarnangarra danjbik.

18 Kaluk bu kunbarnangarra danjbik Joseph benmarneyimeng, “Kuhni ngurrikurduyimen dja ngurridarrkid, dja ngaye ngamarnekele God.

19 Bu ngudda bininj nawu ngurriwoybuk wanjh nakudji nawu ngurridanginj dangbalhmiyindin kondah kore prison, dja ngurribuyika nawu wanjh ngurridurnderren, dja manmim ngurrikan bedberre nawu kabirini kured ngudberre nawu kabirihmarrwe.

20 Dja ngurrimdjalka nayahwurd duninj ngurridanginj, ba kunu kunwok ngudberre ngaburrbun kunwoybuk, dja minj ngurridowen.” Wanjh bedda birrimarnekkodjukmeng.

21 Dja bedda birrimarneyimerrinj, “Woybukkih wanjh ngad kunwarre karrimarneyimeng nawu karridanginj. Ngad karrinang nungka kangewarreni bu nungka kandjawadjawani kadberre bu minj karribuyi, dja ngad minj karrimarrkmayi, wanjh kunmekbekenh kunu karrikangewarre, kuhni kurduyimerranj kadberre.”

22 Reuben benwokmey, “Ngaye ngayimeng ngudberre, ‘Yuwn kunwarre ngurrimarneyime nawu yawurrinj.’ Dja ngudda minj kandimarrkmayi, wanjh bolkkime ngadmanwali kunwarre kumwam kadberre bu kunkurlba nuye karremulewayindanj.”

23 Bedda minj birriburribuyi bu Joseph benbekkani, dja nungka bu wokdi bedberre wanjh kunwokbuyika kunwok wokdi, dja nabuyika biwokmulewani benmarneyolyolmi bu bedberrekih kunwok.

24 Wanjh nungka Joseph benbodmekenh Wong dja dedjdjingmey nalkbuni, dja kaluk benmarneborledmeng yawoyhwokdi bedberre. Dja benmarneyimeng bininj nuye birrimey Simeon birridukkang kore kumirrk bedberre nawu birridanginj.

25 Joseph benwokrayekwong bininj nuye kabindimarnebarlke baladji bedberre nawu birridanginj nuye, manmim kabirridahkendong, dja kunwardde kabindibebbehmarnedurndiwe kore baladji bedberre, dja mak kabindiwon manme kabirrirekenh. Bu kuhni bindimarnekurduyimeng.

26 bedda manmim birridelengkurmeng kubodme kore donkeys bedberre, wanjh birriwelengbolkbawong.

Nawu Birridangerrinj Birrikeleminj.

Genesis 42:27-38

27 Bu kukak birriwohyonginj wanjh kumekbe nakudji dangmarrhmey baladji nuye, manme kabiwon donkey nuye, wanjh nungka nang kunwardde nuye yongohyoy kore kurrangmaye baladji!

²⁸ Wanjh benmarneyimeng nawu birridanginj, yimeng, “Kunwardde ngardduk ngandimarnedurndiweng. Kondah kahyo kore baladji ngardduk.” Wanjh bedda birrikangewarreminj dja birriborledmerrinj birrideldemeng dja birriyimeng, ²⁹“Baleh kuhni bu God kanmarnekurduyiming kadberre?”

²⁹ Bu birrimarnebebmeng kornkumo bedberre nawu Jacob kore kubolkwarlah Canaan, wanjh birrimarneyimeng rowk nawu benmarnekurduyimerranj. Birriyimeng,

³⁰ “Bininj nawu kawohrnan kumekbe kubolkwarlah, yiman yerreh kanduy ngadberre, kanmarneyimeng yiman bu ngad ngarriwam ngarribolknahbolknanikenh.

³¹ Kunmekbe nungka yimeng ngadberre, dja ngad ngarrimarneyimeng, ‘Ngad ngarriwoybuk bininj, minj ngarrimrawinj ngarribolknabolknankenh,

³² dja ngad twelve ngarridangerrinj, kornkumo nakudji ngadberre. Nakudji yakminj, dja nawu nayahwurd duninj bolkkime kabeneni Ngabbard kore Canaan.’

³³ Kunmekbe ngarriyimeng, wanjh namekbe bininj nawu kawohrnan kumekbe kubolkwarlah kanmarneyimeng ngadberre, ‘Kuhni wanjh ngaburrbun bu nguddambu ngurriwoybuk bininj. Ngurribawo nakudji nawu ngurridanginj kondah kore ngaye nganeni, dja ngurrika manme bedberre nawu ngurrihdjarrkni kured nawu kabirrimarwe dja ngurridurnde.

³⁴ Dja ngurrimka nawu nayahwurd duninj ngudberre nawu ngurridanginj, ngurrimka kore ngaye ba kunu ngaye ngaburrbun bu ngudda minj ngurrimrawinj ngurribolknabolknankenh, dja ngudda wanjh ngurriwoybuk bininj. Wanjh kunu marnedurndiwe ngudberre nawu ngurridanginj, dja ngudda kamak ngurrire baleh yarrkka kondah kubolkwarlah dja ngurribayahme dja mak ngurriweykan njalehnjale.’”

³⁵ Bu bedda birriyakwong bu birrimarneyimi kornkumo, wanjh bedda birriwelengyabom manme, wanjh birribebbehobbokenhngang kunwardde bedberre benmarnebebbeyoy kore baladji bedberre! Bu bedda dja kornkumo bedberre birridobbokenhngang nawu kunwardde wanjh birrikeleminj.

³⁶ Wanjh Jacob nawu kornkumo bedberre benmarneyimeng, “Ngudda kandibeyurdyakwon. Joseph yakminj, Simeon yakminj, dja bolkkime ngurridjare ngurrikan Benjaminj. Kuninjkuu wanjh nganmarnekurduyimerranj kunwarre duninjh.”

³⁷ Wanjh Reuben bimarneyimeng kornkumo, yimeng. “Bu ngaye minj ngamyirrundeng ke Benjaminj wanjh bonj, ngardduk beywurd bokenh yibennebun. Kanwo Benjaminj nganahnan dja ngaye ngamyirrundeng ke.”

³⁸ Dja Jacob yimeng, “Beywurd ngardduk minj kumekbe ngurridjarrkre, nawu benedanginj ngalbadjan ngalkudji berrewoneng doweng ngokko, dja nungka nadjalkudji kahdi. Bu yimankek ngurrire, nungka baleh yarrkka kunyid kabiwohmarnengalme, wanjh kunu kandimarnbun ngaye nawu ngabulu, kunnjilngwarre dorreng ngarrowen ngamalngre kore Sheol.”

43

*Birriyawoyhdurndi Kore Kunbolk Egypt, Benjaminj Dorreng.
Genesis 43:1-14*

¹ Kaluk manme birridjalyawarrinj bulkkidj kumekbe kore kubolkwarlah Canaan.

² Wanjh kunu bu bedda birringuneng rowk manmim manbu birrimey kore Egypt, wanjh kornkumo bedberre benmarneyimeng, “Ngurridurnde dja ngurrimayowymang manyahwurd manme kadberre.”

³ Wanjh Judah bimarneyimeng, yimeng, “Nawu bininj kanwokrayekwong ngadberre, yimeng bu ngarridanginj minj ngarrikan wanjh nungka minj ngariyawoyhkebnan.

⁴ Wanjh Ngabba, bu ngudda yimunkewe nawu ngarridanginj ngarridjarrkre, wanjh kunu ngarrire ngundimarnemang manme.

⁵ Dja bu minj yimunkewe, wanjh kunu minj ngarrire, dja namekbe bininj kanmarneyimeng ngadberre bu minj ngarrikan nawu ngarridanginj, wanjh minj nungka ngariyawoyhkebnan.”

⁶ Wanjh Israel bendjawam, “Njalekah kunmekbe kandimarnekurduyiming bu kunwarre, ngurrimarneyimeng namekbe bininj bu ngurrikarme nabuyika nawu ngurridanginj?”

⁷ Bedda birriwokmey birriyiming, “Nungka kandjawadjawani munguyh ngadkenh dja nawu karrimud, bu yimeng, ‘Yiddok kornkumo ngudberre kadjaldarrkid?’ dja, ‘Yiddok nabuyika ngurrikarme nawu ngurridanginj?’ Dja ngadbu ngarridjalwokmawokmangi kore kandjawadjawani ngadberre. Minj nuk ngarriburrbuyi nungka yimeninj, ‘Kondah yimka nawu ngurridanginj.’ ”

⁸ Wanjh Judah bimarneyimeng kornkumo nuye nawu Israel, yimeng, “Yimunkewemen yawurrinj bu ngaye ngakan, wanjh ngarrire werrk ba ngad dja ngudda dja wurdwurd ngadberre karridjaldarrkid, dja minj karridowen.

⁹ Ngaye ngayeman ngawokkurmerren nganahnann kamak rowk, ngudda kanwo ngaye nganahnankenh. Bu ngaye minj ngamdurndiwe ke kondah yiyawoyhdarrkidnan, wanjh ngaye kandjalwelengnamen munguyh bu ngarrarrkid.

¹⁰ Dja bonj bu minj karridenghkerrimeninj, ngarrirawinj dja ngarrimdurndeyi bokenhkah.”

¹¹ Wanjh Israel nawu kornkumo bedberre benmarneyimeng, “Bu yiman bu ngurridjalle, wanjh kuhni ngurrikurduyimen. Ngurridahkendo kore baladji ngudberre yikahwi nawu namakmak, nawu kondah kubolkwarlah karrikarme, dja ngurrikan ngurriwon burudjang namekbe bininj, ngurrikan manyahwurd balm manbu karrikukdelkkerrenkenh, dja nayahwurd mankung, dja mak manmanjmak spice dja myrrh, dja pistachio nut dja almond.

¹² Dja bokenh kunwardde ngurribebbekhan, dja ngurriwon kunwardde nawu ngundimarnedurndiweng kore kurrangmaye baladji ngudberre. Kunubewu mungu ngundimarnedurndiweng ngudberre.

¹³ Dja ngurrika warridj nawu ngurridanginj, dja ngurridjaldurnde kore namekbe bininj werrkwerrk.

¹⁴ Dja ngadjare God nawu Ngudj kimuk Duninj* kabimarnbun ngunkongibun namekbe bininj, ba nungka kabimmunkewe nabuyika nawu ngurridanginj, dja Benjaminj dorreng ngurrimdjarrkdurndeng. Dja ngaye bu ngandimarnedowen wurdwurd, wanjh bonj ngandidjalmarnedowen.”

Joseph Benkimey Nawu Birridangerrinj.
Genesis 43:15-34

* 43:14 Hebrew kunwok kayime “El Shaddai”.

15 Wanjh kunu bedda nawu bininj birrikang nawu kabirriwon burudjang, dja mak kunwardde bokenh manbu birringalkeng kore baladji bedberre, dja mak Benjaminj warridj birrikang. Bedda birridokorrokmenng birriwam kore Egypt dja birrimarnebebmeng Joseph, birridanginj kumirrk nuye.

16 Bu Joseph bennang Benjaminj dorreng, nungka bimarneyimeng bininj nawu bimarnedurrkmirri kunrurrk nuye, yimeng, "Nanih nawu bininj yibenka kore ngardduk kunrurrk, yibu mayh, dja manme yiyingk-ihmarnbu, bedda wanjh ngarridjarrkngun bu barnangarraburrk."

17 Namekbe bininj kurduyimeng kore Joseph bimarneyimeng, dja benkgang bedda nawu birridangerrinj kore Joseph nuye kunrurrk.

18 Wanjh bedda nawu birridangerrinj bu benkgang kore Joseph nuye kunrurrk wanjh kunu birrikeleminj, bedda birrimarneyimerrinj, "Bu kerrngehkenh kunwardde birrimdurndiweng kadberre birridahkendoy kore baladji, wanjh kunmekbekenh kunu kondah kankang kadberre. Nungka kadjare kandarrkidmang kadberre dja kanmarnbun bu karrimarnedurrkmirri, dja mak kamang donkey kadberre."

19 Wanjh kunu bedda birriwam kore namekbe bininj nawu bimarne-durrkmirri Joseph, birriwokdi nuye kore kururrkdangmaye bu birribalhngimi,

20 birriyimeng, "Ngudda nawu yiwohnan, ngad ngarrimwam kondah kerrngehkenhni manme ngarrimey.

21 Dja bu ngariwam ngarriwohyonginj kukak, baladji ngadberre ngarridangmarrhmey, ngarribebbehkukngalkeng kunwardde rowk nawu ngarriwong manmekenh, wanjh yongohyoy kore kurrangmaye baladji. Wanjh ngarrimkang ngarrimyawoyhdurndiweng.

22 Dja ngad ngarrimkukkang warridj nabuyika kunwardde nawu manmekenh ngarrimang. Ngad ngarriwakwan bu nangale baladji dorreng warddedurndiweng ngadberre."

23 Wanjh nungka yimeng, "Bonj kamak, yuwn ngurrikele. Nawu God ngudberre dja nuye kornkumo nawu ngudberre, nungka ngunwong namakmak kore baladji ngudberre. Dja ngaye wanjh ngayingkihmey nawu kunwardde ngudberre." Bu kuhni yimeng wanjh nungka Simeon bimbebkeng bedberre.

24 Namekbe bininj nawu Joseph bimarnedurrkmirri benngimewong kore Joseph nuye kunrurrk, benbowong kukku birridangedjirridjurrinj, dja benwong manme donkey bedberre birringuni.

25 Bedda nawu birridangerrinj birribekgang bu kaluk manme kabirringun kumekbe, wanjh kunu birriyingkihmarbom nawu kabirriwon Joseph burudjang bu nungka kambembe barnangarraburrk.

26 Bu Joseph kumdokmenng kured, bedda birriwong burudjang nawu birrimkang kururrk, dja birrimarnebodanjanj kanjdji kurorre.

27 Nungka bendjawam bu yimankek birrimak, dja wanjh nungka yimeng, "Dja nawu nakohbanj kornkumo ngudberre nawu kandimarney-olyolmeng, yiddok nungka kamak? Yiddok munguyh kadjaldarrkid?"

28 Wanjh bedda birriwokmey birriyimeng, "Nungka nawu yiman namarladj nawu kornkumo ngadberre, nungka wanjh kadjaldarrkid dja kamak kani." Wanjh bedda birrimarneboddangeni birrikukenhmi.

29 Bu nungka Joseph bolknang dja binang Benjaminj nawu nungka benedanginj, ngalbadjan ngalkudji berrewoneng, nungka bendjawam, "Yiddok nanih nawu nayahwurd duninj ngudberre nawu ngurridanginj nawu kandimarneyolyolmeng?" Dja mak bimarneyimeng Benjaminj, "Ngudda nawu yawurrinj, ngadjare God ngunmarnekurduyime kunmak."

³⁰ Wanjh bu binang namekbe nawu benedanginj, nungka Joseph bimarnekangenalkbom duninj, wanjh nungka djalbebmeng werkkwerkk bolkyawam ba kanalkbunkenh. Nungka ngimeng kore nungan nuye kunrurk kore yongohyoy, dja kumekbe bimarnenalkbom.

³¹ Kaluk bu kebdjirridjburrinj rowk wanjh nungka kumbebmeng, kangerayekworrinj dja yimeng bedberre nawu birrimarnedurrkmirri, "Ngurrinka manme."

³² Nungka nakudjihkudji ni dja birriwong manme, dja nawu birridanginj, bedman birridjarrkni bebbehbeh birringuni, dja bininj nawu Egyptbeh nawu kumekbe birringuneng, bedman bebbehbeh birridjarrkni. Kunmekbe birriyimi bu bininj nawu Egyptbeh minj kabirridjarrkngun nawu Hebrew bininj, dja bininj nawu Egyptbeh kabirriwarnyak duninj kabirridjarrkngun.

³³ Wanjh nawu birridanginj bedda bu Joseph nuye bininj benmarneyimeng kabirriyerrkan birrimirrkemey, wanjh benbolkbukkang kore birriyerrkarrinj, nawernwarre werkk yerrkang, yerre walawalakko, yerre wanjh nayahwurd duninj balyerrkang. Wanjh kunu birrinarrinj dja birrikangebarrhmeng.

³⁴ Bu manme bindimarnemey kore Joseph nungka ni, wanjh Benjamin nuyeni manme mandjalwern duninj. Wanjh mulil bedda birridjarrknguneng bu Joseph dorrengh, birribonguneng warridj, birrinjilngmarnburreni.

44

Bu Manmolk Birrikurmeng Nakudji Silver Banikkin Kore Benjamin Nuye Baladji.

Genesis 44:1-13

¹ Wanjh Joseph biwokrayekwong bininj nawu bimarnedurrkmirri kururk nuye, yimeng, "Nanih nawu bininj baladji bedberre yibenmarnebarlkemen, manme yibenmarnedahkendo, yirohrokmen manwern duninj manbu darnkih kabirribarabun kabirringorrrkan. Dja yibenbebbehmarne-durndiwemen kunwardde bedberre, yikurrmen kore kurrangmaye baladji bedberre.

² Wanjh yikurrmen ngardduk banikkin nawu silver, kore kurrangmaye baladji nuye nawu nayahwurd duninj, dja kunwardde dorrengh nuye yikurrmen nawu nungka karremulewam manmimkenh nuye." Wanjh nungka djalkurduyimeng rowk nawu Joseph bimarneyimeng.

³ Wanjh bu kumbarrhbuni, nani nawu bininj nawu birridangerrinj, wanjh bindimunkeweng donkey dorrengh bedberre kabirriren.

⁴ Minj djarreh birribolkbawoyi kubolkkimuk bu Joseph bimarneyimeng namekbe bininj nawu bimarnedurrkmirri, yimeng, "Werkwerkk yibenkadju birrimekbe bininj dja bu yibenmarnebebe yibenmarneyimen, 'Njale ngudda ngurrimarneyimeng kunwarre nawu nungka kunmak ngunmarneyimeng? Dja njalekenh ngurridjirdmey nawu silver banikkin nuye?"

⁵ Dja wanjh namekbe nawu banikkin wanjh nanu nuye nawu nganmarnewornan kahbongubongunkenh, dja mak mankur dangkenh kahbonangan ba bu kaburrbun baleh bininj kabirrikurduyime. Kuhni wanjh kunwarre duninj ngudda ngurrikurduyimeng."

⁶ Wanjh bu nungka bebmeng bedberre, kuhni kunwok rowk nungka benmarneyimeng.

7 Dja bedda birrimarneyimeng, “Njalekah ngudda nawu kanmarnewohrnan kuhni kunwok yiyime? Ngad nawu ngarrimarladj, minj yiman kunmekbe ngarrikurduyime.

8 Dja warridj ngarrimdurndiweng ngudberre kubolkwarlah Canaanbeh kunwardde nawu ngarringalkeng kore baladji ngadberre, wanjh kunu njalekah yimankek ngarridjirdmang silver mak gold nawu kayo kore kunrurk nuye nawu ngunmarnewohrnan?

9 Bu yingalke kore ngad nawu ngarrimarladj, wanjh namekbe nawu kakarrme, bonj, karrown dja ngarribuyika ngundimarnedurrkmirri ngudda nawu kanmarnewohrnan.”

10 Wanjh nungka yimeng, “Kunu bonj, dja bu ngangalke nawu nangale kakarrme, wanjh namekbe nanu nganmarnedurrkmirri, dja ngurribuyika wanjh bonj, minj biwelengname ngudberre.”

11 Wanjh werkkwerkk bedda rowk birribebbehkoluyhweng baladji bedberre kurorre dja birridangmarrhmey.

12 Wanjh namekbe bininj nawu bimarnedurrkmirri Joseph dedjdjingmey yawahyawani. Wanjh yawam kore nawernwarre werkk, djalwam kore walawalakko rowk, dja yerre duninh yawam kore nayahwurd duninh nuye. Dja banikkin badngalkeng kore Benjaminj nuyeni baladji!

13 Bu kuhni yimeng bu ngalkeng wanjh bedda birrimadjdjalkmarinjinj manburra bedberre nawu birridjongbuyindi, wanjh birriyayoyhkurmeng baladji bedberre kore kubodme donkey dja birridurndi kubolkkimuk.

Nawu Judah Mulewarrinj Bu Djawadjawam Nawu Joseph.

Genesis 44:14-34

14 Bu Judah dja nawu birridanginj birrimbebmeng kore Joseph nuye kunrurk, wanjh Joseph kumekbe djahdjalni, dja bedda birrimarne-mankarrinj kore kurorre.

15 Wanjh Joseph benmarneyimeng, “Njale kuhni bu ngudda ngurrikurduyime? Minj nuk ngurriburrnun bu bininj nawu yiman ngaye wanjh ngarrikurdang, ngarrikarrme nawu kanbukkan baleh bininj ngurrikurduyime, bebke ngudberre?”

16 Wanjh Judah yimeng, “Njale nuk ngad ngundimarneyime ngudda nawu kanmarnewohrnan? Njale nuk ngariyime? Baleh yimankek ngarrikurduyime ngarrimulewarren bu minj kuhni ngariyimeninj? God nungka nganmarnekarrebebkeng bu kunwarre ngariyimeng ngad nawu ngarrimarladj. Wanjh kumekbe ngad kaluk ngundimarnedurrkmirri ngudda nawu kanmarnewohrnan, ngad dja nungka warridj nawu bimarnengalkeng banikkin karmi.”

17 Dja Joseph yimeng, “Kunukka minj ngaye ngakurduyime! Nadjalkudji nganmarnedurrkmirri namekbe bininj nawu bimarnengalkeng banikkin karmi, dja nguddambu bonj, kunmodmikenh dorreng ngurridurnde kore kornkumo ngudberre.”

18 Wanjh Judah biyikang darnkih dja yimeng, “Ngudda nawu kanmarnewohrnan, ngaye nawu ngamarladj, wanjh djawan kanbawo ngawokdi ke ngudda nawu kanmarnewohrnan, dja yuwn kandung ngaye nawu ngamarladj, dja madjamku ngudda yiman ngunerohrok yerreh nungan nawu Pharaoh.

19 Ngudda nawu kanmarnewohrnan, ngudda kandjawam ngad nawu ngarrimarladj, ngudda yiyimeng, ‘Yiddok ngurrikarrme kornkumo, dja nuk nawu ngurridanginj?’

20 Dja ngad ngundimarneyimeng, 'Ngad ngarrikarrme kornkumo nawu nakohbanj, dja mak ngarridanginj nawu nayahwurd duninj, nawu bimedanginj Ngabbard bu kohbanjminj. Nawu benedanginj nuye wanjh doweng dja nungka nadjalkudji kahdi nawu ngalbadjan ngalkudjihni berrewonengi, dja Ngabbard kabimarnedjare bulkkidj.' "

21 "Wanjh ngudda kanmarneyimeng ngadberre nawu ngarrimarladj, yiyimeng, 'Yimka kondah kore ngaye, ba ngaye ngakuknan nganan kumim ngardduk.'

22 Dja ngad ngundimarneyimeng nawu kanmarnewohrnan, ngariy-imeng, 'Nungka nawu yawurrinj minj kabibawon Ngabbard, dja bu kabibawon wanjh kunu Ngabbard nawu karrowen.'

23 Wanjh ngudda kanmarneyimeng ngadberre nawu ngarrimarladj, yiy-imeng bu minj ngarrimdjarrkre nawu ngarridanginj nayahwurd duninj ngadberre, ngad minj ngundiyawoyhkebnan.

24 Wanjh bu ngad ngarridurndi kore nungka nawu namarladj nawu Ngabbard, ngad ngarrimarneyimeng kunwok rowk nawu ngudda nawu kanmarnewohrnan yiyimeng ngadberre."

25 "Wanjh kaluk bu Ngabbard ngadberre yimeng, 'Ngurriyawoyhray, ngurrima kadberre manyahwurd manme.'

26 Wanjh ngad ngarrimarneyimeng, 'Minj ngarrire. Bu nayahwurd duninj ngarridjarrkre, wanjh kunu ngarrire, dja minj ngariyawoyhkebnan namekbe bininj bu minj nungka dorreng nayahwurd duninj ngarridjarrkre.'

27 Wanjh kunu nungka nawu namarladj nawu Ngabbard, wanjh kanmarneyimeng ngadberre, yimeng, 'Ngudda ngurriburrbun bu ngalbu ngalbininj kobeng ngardduk nganmarneyawmey narahrangem bokenh.

28 Nakudji nganbawong dja ngayimeng woybukkih wanjh mayh bikukdjalkdjalkmey, dja minj ngayawoyhnayi.

29 Bu ngurrikan nahni warridj, nganbawon dja bu yimankek baleh yarrkka kunyid kabiwohmarnengalme, ngudda wanjh kandimarnbun ngaye nawu ngabulu, wanjh kunnjilngwarre dorreng ngarrowen, ngamalngre kore Sheol.' "

30-31 Kuhni yimeng Judah biyolyolmeng kornkumo, wanjh mak yimeng nawu Judah, "Kunmekbekenh wanjh bu ngamarnebebme nungka nawu namarladj Ngabbard, dja namekbe nawu yawurrinj minj ngarridjarrkre, wanjh kunu nungka bu kannan ngadberre nungka yak, nungka wanjh karrowen, dja ngad ngarrimarnbun nungka nawu namarladj Ngabbard ngadberre nawu bulu, kunnjilngwarre dorreng karrowen kamalngre kore Sheol. Kunmekbe kayimerran bu nungka wanjh yiman kabidjalburrbun nawu yawurrinj, nungka kabidjalmarnemimbi.

32 Dja ngaye nawu ngamarladj, ngayeman ngawokkurmerrinj nuye nawu yawurrinj bu Ngabbard ngamarneyimeng, 'Bu ngaye minj ngamdurndiwe ke, wanjh kunu ngaye kandjalwelengnamen ngudda Ngabba munguyh bu ngamimbi.' "

33 Wanjh kunu Judah yimeng, "Kunmekbekenh wanjh ngaye nawu ngamarladj wanjh djawan, ngaye kondah ngahni nungkakenh nawu yawurrinj, dja marnedurrkmirri ngudda nawu kanmarnewohrnan, dja nungka bonj, yibawo karrurndeng, nawu ngarridanginj birridjarrkurdnde.

34 Dja minj mak ngaye baleh ngayime ngarrurndeng kore Ngabbard bu nawu yawurrinj minj nganedjarrkre. Ngaye minj ngadjare nganan kunnjilngwarre Ngabbard nuye."

45

*Joseph Mulewarrinj Bedberre Nawu Birridanginj.**Genesis 45:1-15*

¹ Wanjh Joseph minj munguyh kangerayekworrimeninj kore bininj kumirrk bedberre nawu birrimarnedurkmirri. Wanjh kunu nungka kayhmeng yimeng, “Ngadjare ngurriray kandibawo rowk.” Wanjh kunu minj nangale mak Joseph birridjarrkniwirrinj bu nungka mulewarrinj bedberre nawu birridanginj.

² Dja nungka wernkih duninjh nalkbom, birrinalkbekkang bininj nawu Egyptbeh, dja kaluk Pharaoh dja nawu birrini kururk nuye birriwobekkkang.

³ Joseph yimeng bedberre nawu birridanginj, “Ngaye wanjh Joseph. Yiddok ngardduk kornkumo kadjaldarrkid?” Wanjh kunmekbe nawu birridanginj nuye minj mak baleh birriyimeninj yimankek birriwokmayi, dja birrikeleminj duninjh bu nungka dorreng benmarnedanginj.

⁴ Wanjh Joseph benmarneyimeng nawu birridanginj nuye, “Mah, ngadjare ngurrimdarnhray.” Bu kunmekbe birrikurduyimeng birridarnhyikang wanjh nungka benwelengmarneyimeng, “Ngaye wanjh karridanginj nawu Joseph nawu ngudda kandikukweykang kore Egypt.

⁵ Dja bonj, yuwn ngurrikangewarre, dja yuwn mak ngurriwelengnamerren bu ngaye kandikukweykang kondah, dja God nganmunkeweng ngamyngkihdokmeng ngudberre ba bu nungka kangehke dja minj mak karridowe rowk.”

⁶ “Dja kuhni gayime. Kanbekka. Dja mandjewk bokenh kamarnbun bu minj manme karrikarmineninj kondah kubolkwarlah Egypt, dja mak kaluk bu five mandjewk minj bininj kabirribolkkarung kabirrimimdudjengkenh, minj mak kabirrimimmoyhmang.

⁷ Dja God nganmunkeweng ngamyngkihdokmeng ngudberre, ba kunu yikahwi nawu ngudberre bininj ngurridjaldarrkid kondah kurorre. Nungka wanjh ngungehke kundulkarre duninjh nuye dorreng ba ngurriwern ngurridjaldarrkid.”

⁸ “Kunmekbe wanjh, minj ngudda kandimmunkewemeninj kondah, dja nungka God nganmunkeweng. Nungka nganmarnbom yiman kornkumo rerrih nuye Pharaoh, ngabenmarnewohrnan bedberre bininj nawu kabirriini kururk nuye, dja ngawohrnan kore kubolkwarlah Egypt rowk.”

⁹ “Wanjh werkkwerkk ngurridurnde kore Ngabbard, dja ngurrimarneyimen, ‘Kuhni wanjh beywurd ke nawu Joseph ngunmarneyime, “God nganmarnbom ngawohrnan kore kubolkwarlah Egypt rowk. Wanjh yimray kore ngaye djalwerkkwerkk, dja yuwn yiwohbolkmaddeng.

¹⁰ Ngudda kaluk yini kore kunred Goshen, darnkih kore ngaye, ngudda, dja mak wurdwurd ke, dja mak mawahmawah ke, dja mak mayh nawu sheep, goat, bulikki, dja mak yehyeng rowk nawu yikarrme.

¹¹ Ngaye kaluk won manme kumekbe, dja five mandjewk kamre bu kadjewkwarremen, minj manme kadjordmen. Bu minj yimre ngudda dja nawu ngurridjarrkni dja nawu ke rowk, wanjh ngurridjalyawarren duninjh.” Kuhni ngurrimarneyime nawu nganbornang.”

¹² Mak Joseph yimeng bedberre nawu birridanginj, “Ngudda wanjh ngudman kandikuknan, dja Benjaminj ngudda warridj nawu ngarrdanginj kannan, dja wanjh woybukkih ngaye nawu ngawokdi ngudberre.

¹³ Ngurrimarneyimen Ngabbard bu ngandikukwong kondah kore Egypt, dja mak ngurrimarneyolyolmen yehyeng nawu ngurrianang. Dja ngurrimka Ngabbard kondah, djalwerkkwerkk ngurrimka.”

14 Wanjh nungka bimarneberlwakbom kukom nuye Benjaminj dja bimarnenalkbom, dja Benjaminj nunganwali bimarnenalkbom.

15 Dja nungka benbunjhmey rowk nawu birridanginj dja benmarnenalkbom. Wanjh kaluk rerrickah bedda nawu birridangerrinj birriwokdi nuye.

Bu Pharoah Dorreng Birrinjilngmakminj.

Genesis 45:16-24

16 Kaluk kore Pharaoh nuye bininj birriwobek kang bu Joseph nuye birridanginj birrimwam Egypt, wanjh Pharaoh dja bininj nuye nawu birrikihkimuk, nawu birrimarnedurrkmirri Pharaoh, bedda rowk birrinjilngmakminj.

17 Pharaoh bimarneyimeng Joseph, yimeng, "Yibenmarneyimen nawu ngurridanginj bu ngayimeng ngadjare bedda birrimadjkurrmen kubodme bedberre nawu mayh bedberre dja birridurnden kore kubolkwarlah Canaan.

18 Wanjh kumekbe bindima kornkumo dja mak bininj rowk ngudberre, dja kabirrimyawoyhdurdeng kore ngaye. Wanjh ngaye bolkwon ngudberre kore kuwerhbolkmak kondah kubolkwarlah Egypt, dja munguyh ngurringun manme manmak duninj.

19 Dja mak ngaye Pharaoh wokrayekwon ngudda Joseph, wanjh yibenmarneyimen bu kabirrikan wirbarra kondah Egyptbeh ba kabirrimdahkendan wurdurd dja ngalbibininjkobeng, dja mak nawu kornkumo ngudberre, wanjh birrimray kondah rowk.

20 Dja mak yibenmarneyimen, 'Yuwn ngurrijilngwarre bu yehyeng ngurribawon nawu ngudberre. Bonj, dja ngurridjalbawo, dja kondah kore kubolkwarlah Egypt kunwernhmak duninj ngarre ngurrimang.'" Kuhni rowk nawu Pharaoh bimarneyimeng Joseph.

21 Wanjh nawu bebeywurd nuye Israel kunmekbe birrikurduyimeng. Joseph benwong wirbarra bu Pharaoh biwokrayekwon, dja mak manme benwong kabirrirekenh.

22 Benbebbehmadjwong rowk kunmadmakmak, dja Benjamin nungka wanjh biwong kunwardde nakimuk, 300 silver shekels, dja kunmadjwern duninj.

23 Dja kuhni wanjh bimarnemunkeweng kornkumo nuye, kaluk ten donkeys nawu birringorrkani namakmak duninj nawu nakang kumekbe Egypt, dja ten donkeys ngaldahduk nawu birringorrkani manmim dja manme dja yehyeng nuye kornkumo bu kamrekenh.

24 Wanjh nungka Joseph benmunkeweng nawu birridanginj nuye dja benmarneyimeng, "Yuwn ngurridurren bu ngurrire."

Bu Birriwokmulewam Jacob Kore Joseph Benmarneyimeng.

Genesis 45:25-28

25 Wanjh birriwam birriwelengbolkbawong Egypt, birrimarnebebmeng kornkumo bedberre nawu Jacob kore kubolkwarlah Canaan.

26 Wanjh birrimarneyimeng, "Joseph nungka kadjaldarrkid. Nungka kawohrnan kore kubolkwarlah Egypt rowk." Jacob wanjh kukkangebarhmeng dja minj benwoybukwoyi.

27 Dja kaluk bu bedda birriwokmulewam rowk bu Joseph benmarneyimeng, dja mak bu nang wirbarra manbu Joseph bimarnemunkeweng kabikankenh, wanjh kunu nungka Jacob nawu kornkumo bedberre wanjh yawoyhkangemarrminj.

28 Wanjh Israel yimeng, "Bonj, ngaburrbun kadjaldarrkid Joseph nawu beywurd ngardduk. Ngare nganan dja yerre wanjh ngawelengdown."

46

*Bu Yawey Bimarnebukkarrinj Nawu Jacob.**Genesis 46:1-7*

¹ Wanjh kunu Israel bolkbawong wam, nungka kang yehyeng rowk nawu nuye. Bu nungka bolkmey Beersheba, nungka bom mayh kinjeng nuye God. Nahni God wanjh God nuyeni Isaac warridj, nawu Jacob bibornang.

² Dja kunmekbe God bimarnewokdanj Israel bu yiman nungka biwaral-nani bu kukak, yimeng, "Jacob, Jacob!" Wanjh Jacob biwokmey, yimeng, "Kondah gaye."

³ Wanjh God bimarneyimeng, "Ngaye wanjh God. Dja ngaye God nuye nawu ke kornkumo. Yuwn yikele bu yire kore Egypt, dja bu kumekbe yini ngaye kaluk won birrimirndewern bininj nawu ngudda yibenkebawahme, kabirriyimerran birriredbo nawu birrikuken.

⁴ Ngaye ngudda ngarrdjarrkre Egypt, dja woybukkih ngaye durndiwe kondah warridj. Dja nungka kaluk Joseph yimarnedowen kore nungka nguned.

⁵ Wanjh Jacob bolkbawong Beersheba, dja bebeywurd nuye Israel birrikang Jacob nawu kornkumo bedberre, dja wurdwurd bedberre, dja ngalbibininj kobeng bedberre bindikang, birridahkendi kore wagon manbu Pharaoh munkeweng kabenkanken.

⁶ Dja birrikang warridj mayh bedberre dja yehyeng bedberre nawu birrikarmi, nawu benmarnewernminj kore kubolkwarlah Canaan. Wanjh Jacob dja bedda rowk nawu nungka benbornang dja nawu benkebawahmeng wanjh birriwam rowk kore Egypt.

⁷ Nungka benkang rowk bebeywurd dja mawamawahmikenh, ngalbebeywurd dja ngalmawahmikenh. Birriwern rowk nawu benbornang dja benkebawahmeng birridjarrkwam Egypt.

*Nawu Birridjarrkwam Jacob Kore Egypt.**Genesis 46:8-27*

⁸ Jacob dja nawu nungka benbornang dja benkebawahmeng nawu birrimwam Egypt, kuhni wanjh birringeyyoy birrimekbe nawu Israel benbornang dja benkebawahmeng. Reuben nungka Jacob nuyeni nawu nadjdjaman.

⁹ Reuben bebeywurd nuye wanjh Hanoch, Pallu, Hezron, dja Carmi.

¹⁰ Simeon bebeywurd nuye wanjh Jemuel, Jamin, Ohad, Jakin, Zohar, dja Shaul nawu nungka nayaw ngarreni daluk ngalbu ngalkang Canaan.

¹¹ Levi bebeywurd nuye wanjh Gershon, Kohath dja Merari.

¹² Judah bebeywurd nuye wanjh Er, Onan, Shelah, Perez, dja Zerah. (Bedda nawu Er dja Onan wanjh ngokkokenh benedoweng kore kubolkwarlah Canaan.) Nawu Perez nungan nuye bebeywurd wanjh Hezron dja Hamul warridj birridjarrkwam.

¹³ Isaachar bebeywurd nuye wanjh Tola, Puah, Jashub, dja Shimron.

¹⁴ Dja Zebulun bebeywurd nuye wanjh Sered, Elon, dja Jahleel.

¹⁵ Birrimekbe wanjh nayayaw ngarreni Leah nawu bimarneyawmey Jacob kore Paddan Aram, dja warridj ngalbebeywurd nuye ngalbu Dinah. Nanih nawu bebeywurd dja ngalbebeywurd, dja mawamawahmikenh nuye Jacob nawu Leah ngarreni wanjh thirty three.

¹⁶ Gad bebeywurd nuye wanjh Zephon, Haggi, Shuni, Ezbon, Eri, Arodi, dja Areli.

17 Asher bebeywurd nuye wanjh Imnah, Ishvah, Ishvi, dja Beriah. Ngaldaluk bedberre wanjh Serah. Beriah nungan nuye bebeywurd wanjh Heber dja Malchiel birridjarrkwam.

18 Birrimekbe wanjh nayayaw ngarreni Zilpah ngalbu Laban biwong Leah ngalbeywurd nuyeni. Bedda nawu Zilpah bimarneyawmey Jacob wanjh sixteen bebeywurd dja mawamawahmikenh dja ngalmawahmikenh nawu Zilpah ngarreni.

19 Dja nayayaw ngarreni Rachel ngalbu ngalbininj kobeng nuye Jacob, wanjh Joseph dja Benjaminj.

20 Bu Joseph ni kore kubolkwarlah Egypt wanjh bebeywurd nuye benedanginj nawu Manasseh dja Ephraim, nawu ngalbadjan berrewoneng wanjh Asenath ngalbeywurd nuyeni Potiphera, nawu nungka yiwarrudj wohnani bedberre kore kunred On.

21 Benjaminj bebeywurd nuye wanjh Bela, Becher, Ashbel, Gera, Naaman, Ehi, Rosh, Muppm, Huppm, dja Ard.

22 Birrimekbe wanjh nayayaw Rachel ngarreni nawu Jacob benbornang. Bedda wanjh fourteen bebeywurd nuye Jacob dja mawamawahmikenh nawu Rachel ngarreni.

23 Dan beywurd nuye wanjh Hushim.

24 Naphtali bebeywurd nuye wanjh Jahzeel, Guni, Jezer, dja Shillem.

25 Birrimekbe wanjh nayayaw ngarreni Bilhah ngalbu Laban biwong Rachel ngalbeywurd nuyeni. Bedda wanjh nawu Bilhah bimarneyawmey Jacob, wanjh seven nawu bebeywurd dja mawamawahmikenh nawu Bilhah ngarreni.

26 Bedda nawu birridjarrkwam Egypt Jacob dorreng, nawu nungka benbornang dja nawu benkebawahmeng wanjh 66 bininj dja daluk. Dja nawu ngalbininj kobeng bedberre minj bindirohrokmeninj.

27 Dja nawu bebeywurd nuye Joseph nawu benedanginj kore Egypt, bu bedda dorreng wanjh 70 bininj dja daluk bu Jacob dja nungka nuye nawu birriwam kumekbe Egypt.

Joseph Benbengdayhkeng Nawu Nuye Namud Bu Kabirrimarnebebm Pharaoh.

Genesis 46:28-34

28 Jacob bimunkeweng Judah yingkihdokmeng kore Joseph, kabimarneyime kabimdabke kore Goshen, wanjh birriwam kore kunred Goshen.

29 Wanjh Joseph mey nuye wirbarra, dja wam kore Goshen kabirrabke kornkumo nuye nawu Israel. Bu Joseph bimarnebebmeng wanjh kundjalmeke rerrih nungka biwanjbimey nuye kornkumo dja bimarnenalk-bom kunkuyeng.

30 Wanjh Israel bimarneyimeng Joseph, yimeng, "Bonj, bu ngayeman yawoyhkebnang ngudda, ngaburrbun yidjaldarrkid, wanjh kamak ngarrown."

31 Wanjh Joseph benmarneyimeng nawu birridanginj dja birriwern nawu kornkumo nuye birridjarrkni, yimeng, "Ngaye ngare nganewokdi Pharaoh, ngamarneyime, 'Ngaye ngarridanginj dja Ngabbard dja bininj nuye rowk nawu birrini kore kubolkwarlah Canaan wanjh birrimwam kore ngaye."

32 Bedda nawu bininj wanjh mayh kabirrinahnan dja birrimmirndey-orkeng nawu sheep, goat, dja bulikki bedberre, dja mak birrimkang yehyeng bedberre nawu kabirrikarme.' Kunmekbe wanjh ngayime nuye Pharaoh mulewan ngudberre."

³³ “Dja bu nungka Pharaoh ngunkayhme ngudberre ngurringimen nuye dja ngundjawan ngudberre, ‘Ngudda baleh ngurridurkmirri?’”

³⁴ Wanjh ngudda ngurridjalwokma, ngurriyimen, ‘Ngad nawu ngarrimarladj, ngad ngarrinahnan mayh bu ngariyawurrinj dja munguyh ngarridjalnahan, yiman Mawah ngadberre birrikurduyimi.’” Mak Joseph yimeng bedberre, “Bu kuhni ngurriyime wanjh ngunbolkwon ngurrini kore kunred Goshen, dja Egyptian bininj kabindinjirrhmiwon rowk bininj nawu mayh kabirrinahan, minj kabirridjarrkni.”

47

Nawu Pharaoh Benbolkwong Israel Dorreng.

Genesis 47:1-12

¹ Wanjh Joseph wam ngimeng kore Pharaoh, dja bimarneyimeng, yimeng, “Kornkumo ngardduk dja nawu ngarridanginj birrimwam, kaluk sheep, goat, dja bulikki bedberre birrimirndeyorkeng, dja mak birrimkang yehyeng nawu kabirrikarme, birrimwam kubolkwarlah Canaan-beh dja bolkkime kabirrinini kore kunred Goshen.”

² Wanjh Joseph benmey yikah kubidkudji nawu birridanginj dja benbang kore Pharaoh kumirrk nuye.

³ Pharaoh bendjawam, “Ngudda baleh ngurrikurduyime ngurridurkmirri?” Dja bedda birrimarneyimeng Pharaoh, “Ngad nawu ngarrimarladj, ngad wanjh mayh ngarihdjalnahan, yiman mawahmawah ngadberre birrikurduyimi.”

⁴ Wanjh birrimarneyimeng Pharaoh, “Ngad ngarrimwam ngarridjare kondah kubolkwarlah ngariwohni, dja kore kubolkwarlah Canaan minj karralkdi bedberre mayh ngadberre nawu ngarrimarladj, dja bolkwarminj duninj bu djewkwarwong, wanjh bolkkime ngundidjawan ngarridjare kanbolkwon ngadberre nawu ngarrimarladj, ngarrini kore kunred Goshen.”

⁵ Wanjh Pharaoh bimarneyimeng Joseph, yimeng, “Kornkumo ke dja nawu ngurridanginj birrimwam kore ngudda.

⁶ Bu bedda baleh kabirridjare kabirrinini wanjh bonj kumekbe yibenbolkwo. Kornkumo ke dja nawu ngurridanginj yibenbolkwo kore kuwernhbolkmak, bonj birrinin kore kunred Goshen. Dja bu yibenburrhun yikah kore bedda nawu birrimak, wanjh yibenkurren kabirrinahan mayh ngardduk.”

⁷ Wanjh Joseph bimkang Jacob nawu kornkumo nuye bingimiwong kore Pharaoh, bimarndanginj kumirrk nuye, wanjh Jacob bimarneyimeng Pharaoh kunmak kunwok.

⁸ Wanjh Pharaoh bidjawam Jacob, yimeng, “Ngudda kaluk baleh yimi mandjewk ke bu yimimbi?”

⁹ Wanjh Jacob bimarneyimeng Pharaoh, yimeng, “Ngaye mandjewk ngardduk bu ngadjalwohreywohrey wanjh 130 mandjewk. Minj nawern mandjewk ngamimbiniwurrinj dja mak kunrayek nganmarnebebm. Ngaye bu mandjewk ngardduk minj yiman bedda nawu mawahmawah ngardduk bu birridjalwohreywohrey.”

¹⁰ Wanjh Jacob biwoknang bimarneyimeng Pharaoh kunmak kunwok. Dja wanjh bibawong Pharaoh dja wam.

¹¹ Wanjh Joseph benbolkwong kornkumo nuye dja nawu birridanginj, kuwernhbolkmak benbolkwong kunred Rameses kumekbe kore Pharaoh biwokrayekwong.

¹² Dja mak Joseph manme benwoni nawu kornkumo nuye, dja birri-dangerrinj, dja birriwern rowk nawu birridjarrkni kornkumo, manme benmarnerohrokmi bedberre. Nawu benkarrmi wurdwurd birriwern wanjh manwern benwoni, dja nawu wurdwurd birrimirndeyahwurd benkarrmi wanjh manyahwurd benwoni.

Bu Djewkwarreminj Duninj Joseph Weykani Manme Bedberre.

Genesis 47:13-26

¹³ Wanjh kore kubolkwern rowk bolklarlehminj duninj, bu djaldjewk-warreni munguyh, kunmekbekenh wanjh minj manme birrikarrmeninj. Egypt dja Canaan bolkwarreminj duninj bu kunmekbekenh mandjewk djewkwarrewong.

¹⁴ Bininj nawu birrini kore Egypt dja Canaan wanjh birribayahmi manme, dja birrikukwong rowk Joseph kunwardde bedberre, birriyak-wong bu manmim birrimimangi, dja nungka kang kunwardde kore kunrurrk nuye Pharaoh.

¹⁵ Wanjh bu kunwardde bedberre kuyakminj rowk, bininj nawu birrini kore Egypt dja Canaan, wanjh birriwern Egyptian bininj birrimwam kore Joseph, birrimarneyimeng, "Kanwo ngadberre manme. Njalekah yimankek ngarridowen kore ngudda kumirrk ke? Dja kunwardde ngadberre wanjh yakayakminj."

¹⁶ Wanjh Joseph benwokmey, yimeng, "Kandiwo mayh ngudberre dja ngaye won ngudberre manme bu ngudda kandiwon mayh. Kunekke wanjh ngurrikurduyimen dja wanjh kunwardde badyakminj ngudberre."

¹⁷ Wanjh kunu bedda birrimkang mayh bedberre kore Joseph birriwong, dja nungka benwong manme bu bedda birriwong djarrang, sheep, goat, bulikki dja bedberre. Wanjh nungka benwoni manme bu bedda birriwoni mayh bu namekbe mandjewkkenh.

¹⁸ Dja bu namekbe mandjewk yakminj, wanjh mandjewkbuyika bedda birrimwam kore nungka dja birrimarneyimeng, "Ngad minj ngarriwarlkan ke nawu kanmarnewohrnan, bu kunwardde rowk ngadberre wanjh kuyakayakminj, dja mayh rowk ngadberreni, bolkkime wanjh ngudda ke rowk nawu kanmarnewohrnan. Minj njale mak ngarrimkarme bu ngundiwon ngudda nawu kanmarnewohrnan, ngarridjalkarme ngadman kunburrk ngadberre dja mak kabbal ngadberre.

¹⁹ Njalekah ngad yimankek ngarridowen kore ngudda kumirrk ke, ngad ngarridowen dja kunred warridj ngadberre karowen? Kandjarrkma ngadberre kabbal dja ngad warridj kanma, ngarridjarrkweykarren kabbal dorreng manmeken ngadberre. Dja ngad bu kabbal dorreng ngadberre wanjh ngarrimarnedurrkmirri nawu Pharaoh. Dja kanmimwo manmim ba ngarridarrkid dja minj ngarridowen, dja minj kunred kabolkmarnladjmen duninj."

²⁰ Wanjh kunu Joseph bolkbayahmeng rowk kubolkwarlah Egypt, Pharaoh bimarnemey, dja Egyptian bininj rowk birribolkweykang kabbal bedberre rowk bu manme birridjalyawarreni bulkkidj duninj. Wanjh kunred kubolkwarlah bolkyimerranj Pharaoh nuye,

²¹ dja bininj nawu nungka benmarnebom birrimarnedurrkmirri kubolk-wernkenh rowk kore Egypt.

²² Kunbolkkudji nungka minj bolkmayi, kaluk kunred bedberre bininj nawu birriwornani yiwarrudj bedberre, dja bedda munguyh kunwardde Pharaoh benwoni. Wanjh namekbe kunwardde bu Pharaoh benwoni wanjh bedda birrimangi manme, wanjh kunu minj bedda birribolkweykayi kunred bedberre.

²³ Wanjh Joseph benmarneyimeng bininj, yimeng, “Kandibekka, ngaye wanjh bonj djarrkmey ngudberre dja kabbal dorreng ngudberre ngamarnebolkmey Pharaoh. Manih wanjh manmim ngudberre ngurrimimudjeng kore kabbal.

²⁴ Dja bu ngurrimimoyhmang bu yiman kunbidkudji baladji ngurribarlke, wanjh nakudji ngurriwo Pharaoh bu munguyh, dja nawu kunkarrngbalmeng baladj wanjh ngurrikarme ngudberre, yikah ngurrimimudjeng kore kabbal, dja yikah ngudberre manme ngurringun, ngudda dja nawu ngurridjarrkni, dja wurdwurd ngudberre kabirringun.”

²⁵ Wanjh bedda birriyimeng, “Ngudda kannghekkeng ngarridarrikid, wanjh bonj ngudda nawu kanmarnewohrnang ngarridjare kanmarneyimen bu ngarrimak, dja bonj, kamak ngad Pharaoh ngarrimarnedurrkirri.”

²⁶ Wanjh kunu Joseph mankarre marnbom ngarre kubolkwarlah Egypt, munguyh kadjalkarreyime bu bininj manme kabirrimoyhmang kunbidkudji yarrkka, wanjh Pharaoh kabirriwon mankudji. Kundjalkudji kunred minj bolkyimerrangimeninj Pharaoh nuye, kaluk kunred bedberre nawu birriwohrnani bedberre yiwarrudj.

Joseph Bimarnewokkurmerrinj Jacob.

Genesis 47:27-31

²⁷ Wanjh kunu bininj nawu Israel benkebmawahmeng birrini kore kubolkwarlah Egypt kore kunred Goshen, dja yeheyng bedberre benmarnewernmerreni, dja wurdyaw nawern birrimey, birrimirndewernminj duninj.

²⁸ Wanjh Jacob ni kore kubolkwarlah Egypt bu mandjewk seventeen, wanjh Jacob nuye mandjewk bu nungka mimbini wanjh 147.

²⁹ Wanjh bu ngokko darnkih kumwam nuye bu nungka nawu Israel kadjaldowen, nungka bimkayhmeng Joseph nawu beywurd nuye dja bimarneyimeng, “Bu ngudda yiyime ngamak, wanjh yibidkurmerrimen kurrad ngardduk, dja kanberrebun bu ngudda kunmak dja kunwoybuk kanmarneyime. Yuwn kankukdudjeng kondah kore Egypt,

³⁰ dja bu ngamalngre kore mawahmawah ngardduk, wanjh ngadjare ngakukyo kore bedda kabirrikukyo. Kankukka kondah Egyptbeh dja kankukdudjeng kore bedda kabirrikukdudjindi.” Joseph biwokmey, yimeng, “Ngaye kunmekbe ngakurduyime bu ngudda yiyimeng, Ngabba.”

³¹ Dja Jacob yimeng, “Kanmarnewokkurmerrimen kunwok kunrayek duninj.” Wanjh nungka Joseph wokkurmerrinj kunwok kunrayek duninj. Wanjh Israel nungka welengboddanj kore kunkarndudj manbu karndudjkarreni, bu biburlumeng God.

48

Bu Jacob Benbenemarneyimeng Kunmak Kunwok Nawu Joseph Nuye Bebeywurd.

Genesis 48:1-22

¹ Kaluk rerrikah wanjh bininj bimarneyimeng Joseph, yimeng, “Kornkumo ke wanjh kahdownen.” Wanjh kunu Joseph benbenekang bebeywurd nuye Manasseh dja Ephraim birridjarrkwam.

² Wanjh bu bininj bimarneyimeng Jacob, yimeng, “Beywurd ke nawu Joseph wanjh ngunmarnebebmeng”, wanjh Israel kumngudjrayekworrinj kumdolkkang kumhni kore balabbala.

³ Jacob bimarneyimeng Joseph, yimeng, “El Shaddai ngranmarnebukkarinj kore kunred Luz kore kubolkwarlah Canaan, dja kumekbe nungka ngranmarneyimeng kunmak kunwok,

⁴ dja ngranmarneyimeng, ‘Ngaye marnbun ngudda bu yibenbornan birriwern wurdwurd, dja nawu yibenkebmawahmen wanjh kabirrim-irndewernmen, dja mak kabirribebbehmirndeyimerran birribebbehmirn-dekihkimuk, dja ngaye ngabenbolkwon kumekbe kunred kore bolkkime yihdi ba bu kabirribolkkarme djalmlunguyh.’”

⁵ Kunmekbe yimeng Jacob biwokmulewam God, dja kuhni mak nungka bimarneyimeng Joseph, yimeng, “Bonj, dja kuhni yina kayime, bebeywurd ke bokenh nawu ngundimarnedanginj kondah kore Egypt bu ngaye minj ngambangmerawinj ke, bedda wanjh kabeneyimerran yiman ngardduk rarih bebeywurd. Ephraim dja Manasseh bedda wanjh kabeneyimerran ngardduk yiman Reuben dja Simeon ngardduk.

⁶ Bu yimankek wurdwurd birribuyika ngundimarnedangen yerrekah, bedda wanjh ngudda ke, dja Ephraim dja Manasseh kabenebolkweykan kabindimolkwon kumekbebeh.

⁷ Kunmekbe ngakurdyime Rachelkah bu doweng. Bu ngaye ngar-rurndengi Paddanbeh, wanjh ngakangewarreni bu Rachel doweng kore kubolkwarlah Canaan bu karribalhrey, darnkih karribebmeninj Ephrath. Wanjh ngaye kumekbe ngakukudji darnkih kore manbolh manbu kare Ephrath.” (Kumekbe kunred wanjh kabolkngeyyo warridj Bethlehem.)

⁸ Bu Israel benbenenang Joseph nuye bebeywurd wanjh nungka bid-jawam, yimeng, “Benengale beddanu?”

⁹ Joseph bimarneyimeng kornkumo, “Bedda wanjh bebeywurd ngard-duk nawu God ngranwong kondah kore Egypt.” Wanjh Israel yimeng, “Ngadjare yibenbenemka kore ngaye ba ngaye ngabenbenemarneyime kunmak kunwok berrewoneng.”

¹⁰ Dja Israel nungka wanjh wernhmimbulerranj dja kohbanjminj, nungka minj njale wernhnayi. Wanjh kunu Joseph bebeywurd nuye benbenemkang darnkih, dja kornkumo nuye benbenebunjhmei benbenewanjbimey.

¹¹ Israel bimarneyimeng Joseph, yimeng. “Ngaye ngayimeng bu minj ngudda yawoyhkebnayi, dja God nungan kurduyimeng ngardduk ngabenbenenang wurdwurd ke warridj.”

¹² Wanjh Joseph benbenekoluyhweng kore Israel beneni kubard nuye, dja nungka Joseph boddanj kanjdji rorrehrorrenani.*

¹³ Wanjh Joseph benbenekang, Ephraim bikang kubidkun nuye bikur-meng kore Israel nuye kudjakku, dja Manasseh Joseph bikang ku-biddjakku nuye bikurmeng kore Israel nuye kukun, wanjh kumekbe benbenekang darnkih kore Israel ni.

¹⁴ Dja nungka nawu Israel bidkurmerrinj kunbidkun nuye kore Ephraim nuye kukodj, madjamku nungka Ephraim nawalawalak, dja berlyurhkerrij bidkurmerrinj kunbidjakku nuye kore Manasseh nuye kukodj, madjamku Manasseh nungka wanjh nadjdjaman.

¹⁵ Wanjh nungka Israel bimarneyimeng Joseph kunmak kunwok, yimeng, “Ngadjare God nawu Mawah ngardduk nawu Abraham dja Ngabbard Isaac benemarnedurrkmirri, God nawu ngandjalnahnani ngan-mikani bu ngayahwurdni dja munguyh ngandjalnahnani, dja mak bolkkime ngannahnani.

^{48:3} Ngurrina kore Genesis 17:1 * ^{48:12} Bu bedda beneni kubard nuye Israel, nungka benbenemarnbom yiman bebeywurd nuye.

16 Nungka angel nawu nganbebkeyi bu baleh yarrkka kunwarre nganmarnebebmi. Ngadjare nungka kabenbenemarnekurduyime kunmak nanih nawu yawurrinj bokenh. Ngadjare kunngey ngardduk dja kunngey berrewoneng Ngabbard Isaac, dja ngardduk Mawah nawu Abraham kandingeykerrngehme ngadberre, kunmekbe kabaldjalyimeran munguyh munguyh. Dja ngadjare nawu kabindikebmawahme kabirrimirndewernmen kore kurorre."

17 Bu Joseph nang kornkumo nuye bidkurmerrinj kunbidkun nuye kore Ephraim nuye kukodj, wanjh nungka Joseph minj djareniwirrinj. Wanjh kunu nungka bibidkarmeng kornkumo nuye kunbid, bibidwayhkemeninj kore Ephraim nuye kukodjbeh, bibidkurmenninj kore Manasseh nuye kukodj.

18 Joseph bimarneyimeng kornkumo, yimeng, "Kuwid Ngabba, nanih wanjh nadjjaman, yibidkurmerrimen kunbidkun ke kukodj nuye."

19 Dja kornkumo nuye birrahmeng yimeng, "Ngaburrbun Korlonj, ngaburrbun. Nungka warridj Manasseh wanjh kabenkebmawahme namirndewern bininj, dja warridj kabirrimirndekukenmen. Dja nawu nawalawalak nuye kabiyurrhke, dja nawu kabenkebmawahme wanjh kabirriwernhmirndeyimerran birribebbehmirndewern nawu birredbo."

20 Kunmekbe kunbarnangarra nungka Israel benbenemarneyimeng kunmak kunwok, yimeng, "Bininj nawu Israel benkebmawahmeng kaluk bingeybun ngorrewoneng bu bedda kabindimarneyime bininj kunmak kunwok, kaluk kabirriyime, 'Ngarridjare God ngunmarnbun ngurriyimeran yiman Ephraim dja Manasseh.' " Bu kuhni yimeng nawu Israel nungka birrokmiweng Ephraim, dja Manasseh bikurmeng rerre.

21 Wanjh Israel bimarneyimeng Joseph, yimeng, "Kanbekka, ngaye ngokko darnkih ngarrowen, dja God ngurridjarrkre munguyh dja ngunkan ngudberre ngurridurndeng kore kunred bedberre nawu mawahmawah ngudberre.

22 Dja ngudda nawu yibenmarnewohrnan nawu ngurridanginj, ngaye kaluk bolkwon kore kawohdulung kunred Shechem kore ngaye ngabenbolkyimey bininj nawu Amor benkebmawahmeng bu mandjawak dja bunarra ngardduk ngabenbuni."

49

Jacob Benmarneyimeng Bebeywurd Nuye Bu Baleh Kaluk Kabenbebbekurduyimerran.

Genesis 49:1-28

1 Wanjh Jacob benkayhmeng bebeywurd nuye dja yimeng, "Wurdwurd, ngurrimray nadjakerryih dja nakokokyih ngurrimirndemornnamerrimen ngardduk dja kandiwokekkan ngaye bu marneyime ngudberre. Ngadjare marneyime ngudberre bu kaluk baleh kabebbekurduyimerran ngudberre yerrekah.

2 Ngaye wanjh nawu nakornkumo ngudberre bu ngakarme kunngey bokenh. Kunkudj ngangeyyo Jacob dja mak kunbadbuyika ngangeyyo Israel bu nungan God nganngewong. Kandibekkekabekka bolkkime."

3 "Ngudda nawu Reuben, ngudda wanjh ngardduk nawernwarre duninj nawu nadjjaman, nawu kundung ngarryu. Bu ngaye ngayawurrinj dja ngangudjmakni wanjh ngudda nawu yirrokmgeng bu bornang. Ngudda nawu yikimuk duninj dja mak balhberr yirri ngardduk.

4 Minj mak bu yibenmarnewirriherren dja mak yibenmarnewohrnan birrikilehkilek nawu ngurridangerrinj. Minj ngudda kunu yimarnburren

yimak dja yidjalyimerran yiman kayime kukku manbu kabore dja kaboyarlarmme bebbehbeh. Dja ngudda kunu yiwam yiyonginj kore kunmadj ngardduk bu kanmarnbom ngayemeng bulkkidj.”

5-6 “Simeon dja Levi ngudda nawu ngunedjaldanginj duninjh. Ngudda wanjh ngurrbenbuni bininj bu kunkare mandjawakyi bu ngunedjalyid-dungi dja mak ngurrbendjalbuni burudjang. Dja mak ngurrbenmarneyil-dadjkeyi mayh bedberre bu yimankek marlehmarlelh ngunehyimi. Ngaye minj ngadjare kaneraworren bu kuninjkuu kunwarrekeh kunmekke bu ngudda nguneburrbun kore ngunemayaliyime ngonewoneng.

7 Bu ngudda munguyh ngunedjalyiddung dja ngunekukbengwarren dja mak ngunemimkongiyakmen wanjh ngaye ngadjare God ngunbened-jarrkdung ngunebokenh. Ngudda nawu ngunekebmawahme nawu ngonewoneng wanjh nakka kabirribebbehmirndeyarlarmme kore wanjh ngaye ngabenkebmawahme nawu birribuyika. Wanjh kunukka ngudda nawu ngurrimud minj mak ngurrikukenworren ngudmandeleng, dja larrk.”

8 “Ngudda nawu Judah, wanjh nawu ngurridanginj ngundiburlume. Bu ngudda wanjh munguyh yibendjalyurhke bininj nawu yimankek bir-ribang ngundibun. Wanjh kuninjkukenh nawu ngudda ngurridanginj wanjh ngundimarneboddan ngudda ke.

9 Ngudda yiman kayime nawu lion kukyawurrinj nawu nabang duninjh. Ngudda wanjh yire dja yibun ke mayh, wanjh bu yimdurdeng wanjh yingehme bu yikeyokenh. Minj nangale kelebuk bu kamre ngunkod-kedolkkayhwe kore yihkeyo.

10 Ngudda nawu ngurrimud wanjh kabindingalke nawu kings bu kabindimarnewohrnankenh bininj nawu ngabenkebmawahme nawu kabirringeyyo Israel kore ngaye ngabenngewon. Kaluk bu yerrekah wanjh nakudji kambahme nawu yibenkebmawahme ke, dja nungka wanjh nawu king duninjh kayimerran, wanjh birriwarlahkenh bininj kabirriwokmarrkmang nuye.*

11 Kaluk yerrekah nungka kamre, wanjh kakan yaw djarrang kakeb-bongname kore mandulkbarnemmak kahdi manbu grapes. Kaluk nungka kamadjdjirridjburren kore mankalkkidbeh grapes, yiman kayime man-bokurlbah rerrih.

12 Dja mak nungka kabongun manbowern mankalkkid manbu grapes-beh wanjh kunmin nuye kamimburlerran bu kamimkakyongen. Dja mak manbowern kabongun yiman kayime kore kundjikkabah wanjh kunyidme nuye kabelemen.”

13 “Ngudda nawu Zebulun, ngudda wanjh yireddi kore kukadjid mankarndan ngarre adjbud. Wanjh manbu mankimuk kabbala kamre karrangen kore ngudda yireddi ba bu yidarnhnahnan bu kamak rowk kahdi. Ngudda ke kunred wanjh kayawbolkkimuk bu kare kangurdme kore kabolkngeyyo Sidon.”

14-15 “Dja ngudda nawu Issachar, ngudda wanjh yiman kayime djarrang nawu nangudjrayek kamadngorrkan, bu karrurrkmirri kunrayek dja bu kabolknan kanan kore kurralkmak, wanjh kayerrkan kangudjgehme kumekke. Dja nungka munguyh kadjaldurrkmirri, dja mak bu bininj kabirridjaldjurrkan wanjh nungka munguyh karrurrkmirri bedberre.”

16 “Ngudda nawu Dan yibenkebmawahme nakka wanjh kabindidjadme birribuyika bininj nawu ngaye ngabenkebmawahme.

* 49:10 Hebrew kungey nuye wanjh “Shiloh”.

17 Ngudda wanjh kaluk yiman kayime nayin nabang nawu kahdi kurrid manbolh dja kabimadbun djarrang kabibun ba bu nawu kahmorneni kaddum wanjh kabiburriwe kore kurorre kamankan kubodme nuye.”

18 “Ngudda nawu Yawey, ngaye wanjh madbun bu ngudda kannghehke!”

19 “Ngudda nawu Gad, yikahwi bininj kabirridjare ngundibun dja ngundimarnedjirdmang, kaluk yinganwali yibenyikadjung dja mak yibenyimang rowk.”

20 “Ngudda nawu Asher, ngudda ke kunbolk wanjh munguyh kakarme manme manmakmak, yiman kayime manbu kings kabirringun.”

21 “Ngudda nawu Naphtali, ngudda yiman kayime mayh nawu deer kanemdulkwern ngalbu kayawkarme nayawmakmak kilehkilek.”

22 “Dja ngudda nawu Joseph, ngudda yiman kayime manrakelmak manbu kadjordmen kore njilhmi kahdi darnkih, dja manbu manyenhyende wanjh makka kawernmerren dja kabarnemwelehwelme manbu manme.

23-24 Dja kaluk yikahwi bininj birridjareni kunyid dorrengh ngundiya-meninj mankole, dja mak bedda yimankek ngundidjalkuyinjbuyi dja bedda minj ngundidjorrngmayi bu ngundibuyi. God nawu dulkarrekimuk ngunmurrngrayekwong ngudda. Ngaye nawu Jacob ngamunkekadjung namekbe nawu God dulkarrekimuk ngardduk. Nungka kabennahnann bininj ngaye nawu ngabennegeyiwong Israel yiman kayime shepherd kanahnann mayh nuye nawu sheep. Nungka wanjh yiman kayime kunwarddekimuk manbu balhberr karri bedberre.

25 Nungka wanjh ngardduk God ngaye nawu nakornkumo ke, dja mak ngudda ke God wanjh nungka munguyh ngunbidyikarme. Nungka wanjh nadjalkudji nadjaldulkarrekimuk duninj mak ngunwon nawu namakmak kore kaddumbek dja mak nawu kanjdjibek. Dja warridj namak ngunnahnann ngudberre nawu ngurrimud ba bu munguyh kabirriyawwernmerren, dja mak mayh bedberre kabirriyawwernmerren.”

26 “Ngaye wanjh kornkumo ke dja ngadjare kuhni wanjh God kakurduyime ke bu kundjalwernhmakmak duninj bu karri munguyh. Ngaye wanjh ngadjare kuninjkuwu God ngunmarnekurduyime nawu ngudda ngaye ngardduk beyurd Joseph. Dja mak ngudda wanjh yidjalwernhkuken bedberre nawu ngurridangerrinj.”

27 “Dja ngudda nawu Benjaminj, ngudda wanjh yiman kayime dalkken nabang nawu marrwedowikenh kahre. Dja bu malahmalaywi ngudda yibun mayh bu yingun yiworrkmiworren, dja bu wolewoleh kayimerran ngudda yibun mayh wanjh yikukdjalkdjalkmang yiwarlaykurmekurme bebbekbeh.”

28 Kuhni rowk yimeng nawu Israel. Wanjh nungka benbebbekmarneyimeng rowk bebeyurd nuye bu baleh kaluk kabenbebbekmarnekurduyimerran bedberre. Nungka benmarneyolyolmng rowk bedberre birimekbe nawu twelve bebeyurd nuye, nawu kaluk birribekbehymerranj twelve nawu birribekbehmarnbom namud bedberre bininj nawu Israel benkebawahmang. Nungka nawu kornkumo benwong kunwok kunmak bedberre, benbebbekmarneyimeng rowk kunwok manbu mandjalkarredjadni manbu bedberrekah.

Jacob Doweng Kore Egypt Dja Birrikukudji kore Kunbolk Canaan.

Genesis 49:29-33

29 Wanjh Jacob benwokrayekwong, yimeng bedberre, “Ngaye ngokko darnkih ngarrowen, ngamalngre kore mawahmawah ngayekenh birriyingkihmalngdokmeng. Kaluk kandikukudjeng kore mawahmawah

kadberre kabirrikukdudjindi kore kuwardderurrk kore kabbal nuyeni Ephron nawu Heth bikebmawahmeng.

³⁰ Kaluk kore kuwardderurrk kore kabbal kore Machpelah, koyekkah Mamre kore kubolkwarlah Canaan, kaluk kuwardderurrk manbu Ephron nawu Heth bikebmawahmeng bolkweykang, Abraham bibolkyimey kabbal dorreng karribolkkarmekenh karrbenkukdudjengkenh.”

³¹ “Kumekbe bindikukdudji Abraham dja Sarah ngalbu ngalbininjokobeng nuye, kumekbe bindikukdudji Isaac dja Rebekah ngalbu ngalbininjokobeng nuye, dja kumekbe mak ngaye ngakududji Leah.

³² Kaluk kabbal dja kuwardderurrk manbu kumekbe karri wanjh Mawah benbolkyimey bu bininj nawu Heth benkebmawahmeng birribolkweykang.”

³³ Bu Jacob yakwong bu benwokrayekwoni bebeywurd nuye, wanjh nungka dengewayhmeng kore balabbala wanjh balwelengngolekdadjmeng baldoweng, malngwam kore mawahmawah nuyeni birriyingkihmalngdokmeng.

50

Joseph Bimarnenalkbuni Jacob Nawu Kornkumo Nuye.

Genesis 50:1-14

¹ Wanjh Joseph kukburriwerrinj kore kornkumo kukyoy dja bimarnenalkbuni bikukbunjhmangi.

²⁻³ Bu kumekbe wanjh mankarre yoy bedberre nawu Egyptian bininj bu bininj nawu downi wanjh munguyh birridjalkukbarungi bu forty barnangarra. Wanjh Joseph benwokrayekwong bininj nawu birrimarnedurrkmirri nawu birriburrbuni nawu bedman birridoweni bindikukbarungi ba minj birrikuknudmeninj, benmarneyimeng kabirrikukbarung kornkumo nuye nawu Israel. Wanjh kunu bedda birrikukbarungi, birridjalkukbarungi munguyh bu kunbarnangarra forty. Dja nawu birriwern Egyptian bininj munguyh birrihdjalmarnenalkbuni kunbarnangarra seventy.

⁴ Dja bu yakminj birrimarnenalkbuni wanjh Joseph wokdanj bedberre bininj nawu birridjarrkni Pharaoh, benmarneyimeng, “Bu nuk ngudda ngurriyime ngaye ngamak, ngaye djawan ngudberre ngadjare ngurrimarneyime Pharaoh

⁵ kuhni kunwok bu ngardduk kornkumo ngandjurkkang ngamarnewokkurmerrinj kunwok kunrayek duninjh. Bu nungka darnkih dowehdowni nungka nganwokwong nganmarneyimeng ngakukdudjeng kore kumidj nungan yingkihmidjmarbom nungan nuye kore kubolkwarlah Canaan. Wanjh kunu ngaye djawan Pharaoh, kanmunkewemen ngakukdudjeng kornkumo ngardduk wanjh ngamdurndeng.”

⁶ Wanjh Pharaoh biwokmey yimeng, “Yiray wanjh yikukdudje kornkumo ke bu nungka ngundjurkkang yimarnewokkurmerrinj kunwok kunrayek duninjh.”

⁷ Wanjh Joseph wam kabikukdudjeng kornkumo nuye, kaluk birridjarrkwam bininj nawu birrikihkimuk birrimarnedurrkmirri Pharaoh, dabborrabbolk nawu birridjarrkni Pharaoh, dja dabborrabbolk rowk nawu birrini kore kubolkwarlah Egypt.

⁸ Dja mak birridjarrkwam rowk nawu Joseph birridjarrkni, dja birridanjinj nuye, dja nawu kornkumo birridjarrkni. Bedda birridjarrkwam dja birridjalkudji birrini kore Goshen, nawu wurdwurd bedberre dja mayh nawu sheep, goat dja bulikki, bedda wanjh minj birridjarrkrawinj, dja birrini kore Goshen.

⁹ Dja mak wirbarra dorreng birridjarrkwam dja bininj nawu birrimor-neni djarrang. Wanjh nawu birriwam wanjh birrimirndewern duninj.

¹⁰ Kaluk birribolkmey kore kunrurrk bininj kabirrimimkarrhkarrhme kore kunred Atad, kaluk bewhkah Jordan mankabo, wanjh kumekbe birrimarnenalkbuni wernkih duninj, dja birrikangewarreni duninj, dja kumekbe Joseph bimarnenijlungwarreni kornkumo nuye bu kunbarnan-garra seven.

¹¹ Bu bininj nawu birrikang kumekbe kubolkwarlah Canaan bindinang birrinjlungwarreni kore kabirrimimkarrhkarrhme kore kunred nuye Atad, wanjh birriyimeng, "Nahni bininj nawu Egyptbeh kabirrikarrme kundowikenh dja kabirrimarnenijlungwarre duninj." Wanjh kunmekbekenh kunu birribolkngeykurmeng Abel-Mizraim*.

¹² Wanjh kunu bebeywurd nuye Israel birrimarnekurduyimeng bu nungka benwokrayekwong.

¹³ Bedda birrikukkang kore kubolkwarlah Canaan dja birrikududji kore kuwardderurrk kore kabbal kore Machpelah, koyekkah Mamre kore Ephron nawu Heth bikebmawahmeng bolkweykang Abraham. Nungka wanjh wardderurrkmey kabbal dorreng kabirribolkkarmekenh kabindikududjengkenh.

¹⁴ Wanjh bu Joseph bikukdudji kornkumo nuye, nungka durndi kore Egypt, birridjarrkdurndi birridanginj nuye dja mak birriwern rowk nawu birridjarrkwam nawu birrikududjikenh kornkumo nuye.

Joseph Benmarneyimi Kunmak Nawu Birridanginj.

Genesis 50:15-21

¹⁵ Wanjh bu kornkumo bedberre doweng, kunu wanjh birridanginj nuye Joseph birriburrbuni, birrimarneyimerrinj, "Wardi kunubewu Joseph kanwidnan kadberre dja kanmarnedurndiwe kunwarre bu ngad kunwern kunwarre karrimarnekurduyimi."

¹⁶ Wanjh kunu bindimunkeweng bininj kore Joseph dja birrimarneyimeng, "Kornkumo ke kanwokrayekwong ngadberre bu minj bangmedowimeninj, yimeng,

¹⁷ "Kuhni wanjh ngurrimarneyimen Joseph, "Ngaye djawan ngudda Joseph bu yibengmidjda kunwarre nawu ngurridanginj ngundimarneyimeng, dja ngaburrbun kunwarre kunwern ngundimarnekurduyimi." Kuhni yimeng kornkumo ke dja ngad nawu karridanginj wanjh ngundidjawan kab yibengmidjda kunwarre ngadberre nawu ngarrimarne-durrkmirri God nuye nawu kornkumo ke." Wanjh bu kuhni kunwok birriyimeng bindiwokmulewam nawu birridanginj rowk, Joseph wanjh nalkbom.

¹⁸ Wanjh birridanginj nuye birrimyikang birrimankarrinj kumirrk nuye birrimarneyimeng, "Yina, ngad ngundimarnedurrkmirri."

¹⁹ Dja Joseph benmarneyimeng, "Yuwn ngurrikele. Yiddok gaye yimankek ngurriyime God?"

²⁰ Ngudda wanjh bonj, ngurridjareni kunwarre nganmarnekurduyimerrangimeninj ngardduk, dja God djareni kunmak ba bu birriwern kabirridjaldarrkid yiman bu bolkkime yimerranj.

²¹ Wanjh kunu yuwn ngurrikele, gaye nahnan ngudberre, manme won warridj ngudda dja wurdwurd ngudberre." Wanjh kuhni kunmakmak benmarnewokdi munguyh benkangemarnmarnbuni.

* 50:11 Mahni kungey kayime "Kore bininj nawu Egyptbeh kabirrimarnenalkbun".

*Bu Joseph Doweng.**Genesis 50:22-26*

²² Wanjh Joseph ni kore kubolkwarlah Egypt, nungka dja birriwern rowk nawu kornkumo nuyeni. Wanjh Joseph mumbini bu mandjewk 110.

²³ Joseph bennang nawu benkebmawahmeng, nawu Ephraim benbor-nang, dja wurdwurd nuye Machir nawu beywurd nuye Manasseh, bedda warridj Joseph bendjarrkmey kore kubard nuye bu birridanginj.

²⁴ Wanjh Joseph benmarneyimeng nawu birrimud, yimeng, "Ngaye ngokko darnkih ngarrowen. Dja God kaluk kamre ngunbidyikarme ngud-berre, dja ngunkan ngudberre ngurribolkbawon kondanjkuu kubolk-warlah, ngunkan kore kubolkwarlah kore benmarnewokkurmerrinj Abraham, Isaac dja Jacob, nungka benmarnewokkurmerrinj kunwok kunrayek duninj bu kaluk kanbolkwon kadberre."

²⁵ Wanjh Joseph bendjurrkkang birriwokkurmerrinj kunwok kunrayek duninj bininj nawu Israel benkebmawahmeng, yimeng, "God kamre ngunbidyikarme ngudberre dja ngudda kandimurrngkan kondahbeh."

²⁶ Wanjh kunu Joseph doweng bu nungka mandjewk nuyeni wanjh 110. Wanjh birrikukbaruy dja birrikukdahkendoy kore kundulk kumekbe kore Egypt, djahdjalkukdahkendi minj birrikukdujeyi.

Exodus

Bininj Nawu Israel Benkebmawahmeng

Exodus 1:1-7

¹⁻⁵ Kunkare wanjh nakudji bininj ni nawu kungey bokenh ngeyyoy. Kaluk Israel dja Jacob kungey bokenh nuye. Nungka dja nawu bebeywurd nuye birridjarrkwam kore Egypt. Kaluk bedda wanjh birringeyyoy Reuben, Simeon, Levi dja Judah, Isaachar, Zebulun, dja Benjamin, Dan dja Naphtali, Gad dja Asher. Dja mak bedda bindidbebbekang ngalbihbininj kobeng dja wurdwurd bedberre nawu bedman birridjarrkyoy. Bedda rowk nawu Jacob nungka benbornang dja nawu benkebmawahmeng rowk, wanjh seventy ni. Dja mak nabuyika beywurd nuye Israel nawu ngeyyoy Joseph, nungka wanjh ngokko yingkihni kore Egypt.

⁶ Kaluk yerrekah wanjh Joseph doweng, dja nawu birridanginj nuye birridowerrinj rowk. Dja mak bininj nawu birridjarrkdabborrabbolkni wanjh birridoweng rowk.

⁷ Kaluk binihbininj nawu Israel benkebmawahmeng, bedda wanjh bindikarrmi birriwern wurdwurd. Birriwern duninj wurdyaw birriyawmahyawmarrinj, birrimirndewernmerrinj, birribalmirndekimukminj kore kumekbe birrihdi kubolkwarlah Egypt.

Pharaoh Benmarnekarrerayekwong Bininj Nawu Israel Benkebmawahmeng

Exodus 1:8-14

⁸ Kaluk yerrekah wanjh nakerrnge king wanjh dedjdjingmey wohrnani kumekbe kubolkwarlah Egypt. Bedda birringeybom nawu Pharaoh. Kaluk nungka minj biwobekkayi nawu Joseph.

⁹ Wanjh Pharaoh benmarneyimeng bedberre nungka nuyeni bininj nawu birriredboni, yimeng, "Kandibekka. Ngurrina nanih bininj nawu Israel benkebmawahmeng, wanjh bedda birrimirndewernminj dja birringudjikimukminj, wardi kunubewu kandingudjyurrhke kadberre.

¹⁰ Dja baleh nuk ngad kandiymowon? Kab karrbenmarneyingkiharremarnbu, wardi kabirrimirndewernmerren munguyh dja bu bininj kabirrimre kandibunkenh, bedda nawu Israel benkebmawahmeng kaluk kabirriraworren nawu kandiwidnan, kandibun kadberre dja mak kabirrire kubolkbubuyika, kabirribolkbawon kubolkwarlahkenh kadberre." Kumekbe bu Pharaoh benmarneyimeng nuye bininj.

¹¹ Kumekbekenh kunu wanjh bindikurrmeng bininj nawu bindidjurrkani bindimarnbuni bininj nawu Israel benkebmawahmeng bu birridjaldurrkmirri bedberre munguyh, ba bu birrikangedombuyhweyi bu kundulmuk duninj birringorrkani bedberre. Wanjh bininj nawu Israel benkebmawahmeng birrimarnerurrkmarnbom manrurrkwern manbu Pharaoh nuye kore nungka karehkarekurrmi yehyeng nuye. Kaluk benebolkngeyyoy Pithom dja Ramses.

¹² Bininj nawu Egyptbeh wanjh bindiwarrewoni nawu Israel benkebmawahmeng. Dja bonj, djal djamku kuhni bindimarnekurduyimi. Bu bindihdjaldjurrkkani kunrayek duninj munguyh, wanjh bedda bininj nawu Israel benkebmawahmeng wanjh birridjalmirndewernmerreni munguyh dja birridjalkaberrkwernmerreni warridj. Wanjh nawu bininj

birrikang Egypt kaluk bindikengemi bedda nawu Israel benkebmawahmeng dja mak bindiwarweyeyi bu bindimarneyimi bedberre.

¹³ Wanjh kunmekbekenh kunu birrimekbe bininj nawu birrikang Egypt bindimarbnuni bininj nawu Israel benkebmawahmeng bu birridjaldurrkmirri bedberre bulkkidj duninjh.

¹⁴ Bindimarbnom bindimarnedurrkmirri kore kunrurrkkenh birrimangi birrimarnbuni brick dja tar, dja mak kunbubuyika birrihdurrkmirri kore dudjhdudjindi manu manmeken. Kaluk bedda nawu bininj birrikang Egypt wanjh birrimimkongiyakni bedberre bininj nawu Israel benkebmawahmeng. Bindidjaldurrkkani munguyh, dja mak bindidjalnjilngwarrewoni munguyh.

Pharaoh Djareminj Kabenbun Nawu Wurdwurd Narahrangem

Exodus 1:15-22

¹⁵ Wanjh nawu Hebrew daluk, wanjh ngalbihbininj kobeng bedberre bininj nawu Israel benkebmawahmeng, wanjh bu bedda wurdyaw bindimarneyawdangeni wanjh daluk bokenh bindibidyikarrmi. Bedda benengeyyoy Shiphrah dja Puah. Kaluk wanjh Pharaoh benbenemarneyimeng benemekbe daluk, yimeng berrewoneng,

¹⁶ "Bu ngurrbenbidyikarrme nawu Hebrew daluk bu wurdyaw karangan, dja bu ngunenar narangem, wanjh nguneyawbu, dja bu ngaldaluk, wanjh bonj, nguneyawbawo karrarrkid."

¹⁷ Dja bedda nawu daluk bokenh wanjh benekengemi God, wanjh minj benekurduyimeninj nawu king benbenewokrayekwong, dja bindidjaldar-rkidbawoni narahrangem rowk.

¹⁸ Kaluk kunmekbekenh kunu nungka king nawu wohrnani kore Egypt benbenekayhmeng bedda nawu daluk bokenh, dja yimeng berrewoneng, "Njalekah kunih bu ngunekurduyimeng, dja narahrangem ngurrbendar-rkidbawong?"

¹⁹ Bedda nawu daluk bokenh benemarneyimeng Pharaoh, beneyimeng, "Ngad yimanek kunmekbe nganekurduyimeninj. Dja nawu Hebrew daluk minj kabirrirohrok nawu daluk birrikang Egypt, dja bedda nawu Hebrew daluk wanjh birringudjmak dja mak werkkwerrk kayawdangeni bedberre, bu minj ngad nganembangmebolkmang bu ngarrbenbidyikarrmeken." Kuhni bu benemarneyimeng nawu king.

²⁰ Bu kunmekbe benekurduyimeng benemekbe daluk bokenh, wanjh God kunmak benbenemarnekurduyimeng, dja bininj nawu Israel benkebmawahmeng wanjh birridjalimirndewernminj munguyh dja birribalmirndekimukminj duninjh.

²¹ Dja God benbeneyawwong benemekbe daluk bokenh nawu bindibidyikarrmi birribuyika daluk bu wurdyaw benhbuni. Kunmekbe God benbenemarnekurduyimeng bu bedda benemarnekeleni nawu nungka God.

²² Wanjh Pharaoh benwokrayekwong bedberre rowk nawu bininj nuye, nawu nungan birriredbo, yimeng, "Narahrangem rowk nawu kabindimarneyawdangeni bedberre nawu Hebrew bininj dja daluk, wanjh ngudda ngurrbenyawburriwemen kore mankabo, dja ngaldahdaluk rowk wanjh ngurrbendjaldarrkidbawo."

2

Bu Moses Danginj

Exodus 2:1-4

¹ Bu kumekbe bolkyimi nakudji bininj nawu Levi bikebmawahmeng wanjh benemarrinj daluk ngalbu ngaleng warridj Levi bikebmawahmeng.

² Kaluk ngaleng yawkani ngaldaluk. Kaluk yerrih wanjh yawoy-hyakani dja narangem bimarneyawdanginj. Dja bu ngaleng nang namekbe wurdyaw kukmakni wanjh biyawwarlkkang bu dird danjibik.

³ Wanjh ngalmekbe daluk bu minj munguyh biyawwarlkkayi, wanjh kumekbe basket mey manbu birrimarnbom kundalk manbu mandalkkuyeng kukabo dingihdi. Wanjh manekke basket mey, baru manbu yiman tar yerrih bu belbmeng ba kukku minj bongimeninj. Wanjh ngalbadjan bimey wurdyaw bikurrmeng kore basket, dja bened-jarrkkang ngalyaw dorrengh, benekang kore mankabo kurrid ngarre. Kumekbe wanjh benekurrmeng benewarlkkang kore kurralak manbu mandalkkuyeng.

⁴ Kaluk ngalbadjan durndi kured dja ngalyaw ngarre, ngalbu benedanginj nawu wurdyaw, dingihdi djarrehbeh ba bu binahnani djarreh wurd nawu narangem bu baleh bimarnekurduyimerrangimeninj.

Pharaoh Nuye Ngalbeywurd Biyawngalkeng Moses.

Exodus 2:5-10

⁵ Kaluk ngalbu Pharaoh nuye ngalbeywurd wam kumekbe kore mankabo wurlebmeninij, dja daluk nawu birribidyikarmi birrihdjalley kore kurrid ngarre mankabo. Ngaleng wanjh nang basket kore kurralak yongohyoy, dja bimunkeweng ngalyawk ngalbu bihmarnedurrrkmirri, yimeng, "Yimka nawu basket!"

⁶ Ngalmekbe ngalbu ngalbeywurd nuye Pharaoh, bu dangmarrhmey basket, dja biyawwang nawu wurdyaw. Kaluk namekbe wurdyaw nalkbuni, wanjh ngalbu ngalyawk biyawkongibom. Wanjh ngaleng yimeng, "Ahwurd! Nanih wanjh nadjalkudji nawu Hebrew wurdyaw."

⁷ Wanjh ngaldaluk ngalbu benedanginj nawu namekbe wurdyaw, beb-meng bidjawam ngalmekbe ngalbeywurd nuye Pharaoh, yimeng, "Yiddok minj ngare ngakimang ngalkudji ngalbu Hebrew daluk ngunmarneyawd-jikkawon?"

⁸ Wanjh Pharaoh nuye ngalbeywurd yimeng, "Mah, yiray." Wanjh ngalyaw wam bimey ngalbadjan nuye nawu wurdyaw.

⁹ Wanjh Pharaoh nuye ngalbeywurd bimarneyimeng, "Yika nanih nawu wurdyaw, dja yinahna ngardduk, wanjh ngaye karremulewan." Wanjh ngalbu ngalbadjan bimey namekbe wurdyaw dja binahnani.

¹⁰ Kaluk bu djordminj, ngaleng biyawwong Pharaoh nuye ngalbeywurd wanjh namekbe wurdyaw yimerranj ngalengngarre, dja bingeykurrmeng Moses. Kuhni bu ngalengman yimeng, "Ngaye ngabebkeng kukkubeh, wanjh kunmekbekenh kunu ngangeykurme Moses kangeyyo*."

Moses Bibom Nakudji Bininj Nawu Egyptbeh

Exodus 2:11-14

¹¹ Kaluk bu Moses djordminj, dja nungka wanjh bininj yimerranj. Wanjh kaluk nungka bebmeng wam kore nawu Hebrew bininj birrihni nawu nungka birrimudni, dja kumekbe bennang bindimarnedurrrkmirri bininj nawu birrikang Egyptbeh. Bennang kore bindidjurrkkani bindimarnbuni kunkimuk bindimarnedurrrkmirri. Dja kumekbe binang nakudji bininj nawu Egyptbeh bihbuni nawu Hebrew bininj nungan Moses birrimudni.

* 2:10 "Moses" kawokyime "bebkeng" kore Hebrew kunwok.

12 Wanjh nungka Moses djalwerhbolknanganang rowk, dja bu minj nangale nayi, wanjh nungka bibom namekbe bininj nawu Egyptbeh, wanjh bikukkurmeng, dja bikukdudji kore kukayalanj bikukwarlkkang.

13 Kaluk malamalayihni Moses bebmeng, dja benbenenang benebokenh nawu Hebrew bininj bedmandeleng benehburreni dja wanjh njilngwarreminj. Wanjh nungka bidjawam nawu nakudji yidngalkeng, bimarneyimeng, "Njalekah yihbun nawu ngunedjalmud duninj?"

14 Wanjh namekbe bininj biwokmey, yimeng, "Ngayh! Dja nangale ngunkurmeng bu ngudda kanhmarnewohrnani, dja kandjadme ngadberre? Yiddok ngudda yidjare kanbun ngaye, yiman kayime ngudda yibom bininj nawu Egyptbeh?" Wanjh kunu Moses keleni dja baybaywi burrbuhburrbuni marneyimerrinj, "Woybukkiah wanjh bininj rowk kabirriburrbun bu baleh ngakurduyimeng."

Moses Wam Yonginj Kore Kubolkkimuk Kabolkngeyyo Midian

Exodus 2:15-22

15 Kaluk yerrekah bu Pharaoh biwobekkkang kore Moses kurduyimeng, wanjh nungka karremarnbom bu bibuyikenh. Wanjh Moses kelerlobmeng bolkbawong Egypt dja mak bibawong Pharaoh. Nungka wanjh wam kore kubolkwarlal bolkngeyyoy Midian. Kumekbe djalwohrey, wanjh kalukburk nungka yerrkang ni kore kungad darnkih.

16 Kaluk kumekbe kore kubolkwarlal Midian nakudji bininj ni nawu ngeyyoy kunngay bokenh. Reuel dja Jethro kunngay bokenh nuye. Nungka wanjh priestni, wohrnawohrnani yiwarrudj bedberre. Dja nungka benkarmi seven ngalbebeywurd. Kaluk bedda nawu seven birriyawkyawkni birriwam kore kungad birribomangi birriborrhkendongi kore manbu boyohboyoy bedberre mayh, sheep dja goat nawu nuye kornkumo bedberre.

17 Kaluk yikahwi bininj nawu birrihahnani mayh wanjh birrimwam bindimunkeweng bedda nawu yawkyawk, dja Moses dolkkang benbidyikarmeng nawu yawkyawk, bu bennghekkeng bedberre, dja mak benbowong mayh bedberre nawu mirndehmirnderri.

18 Kaluk bu bedda birridurndi kore kornkumo bedberre, nungka bendjawam, "A! Njalekenh ngudda djalwerkwerrk ngurrimbebmeng bolkkime, dja kuhni nuk kundedjumbungni?"

19 Wanjh bedda birriwokmey birriyimeng, "Nakudji nawu bininj nakang Egypt kannghekkeng ngadberre kore bininj nawu mayh kabirrinahnani kandimarnekurduyimi kunwarre. Dja warridj nungka kanmarnebomey dja mayh benbowong."

20 Wanjh Reuel bendjawam ngalbebeywurd nuye, yimeng, "A! Kaluk baleh kunu nawu bininj kahni? Njalekah ngurribawong? Dja ngurri-ray, ngurrimkimang ba kangun manme."

21 Wanjh Moses bekkarrinj kamak kumekbe kadjalni kore namekbe nawu bininj kore ni. Kaluk ngalkudji ngalbeywurd nuye bininj ngalbu ngeyyoy Zipporah nungka biwong Moses benemarrinj.

22 Dja ngalang bimarneyawmey narangem wanjh Moses yimeng, "Ngaye ngamwam ngani kore kubolkwarlal minj ngardduk kunred." Wanjh kunmekbekenh kunu bingeykurmeng Gershom.

Bininj Nawu Israel Benkebmawahmeng Wanjh Birrinjilngwarreminj

Exodus 2:23-25

23 Wanjh Moses dingihdi bu kunkuyeng kore Midian. Kalukburk namekbe king nawu wohrnani kore Egypt wanjh doweng. Kaluk bininj

nawu Israel benkebmawahmeng wanjh munguyh birrinjilngwarreni dja birrikayhmi kunnjilngwarre dorrengh kore birribongdi kore bininj nawu birrikang Egypt bindikurrmeng, dja bindimarnbom bindimarnedurrk-mirri. Wanjh kumekbekenh kunu birrikayhmi bu yimankek nangale benbidyikarrmeninj. Birrikayhmi kore God benbekkang.

²⁴ Wanjh God bendjalbekkang bu birrikayhmi kunnjilngwarre dorrengh. Dja God burrbom bu kunkare nungka wokkurrmerrinj benberrebbom Abraham, Isaac dja Jacob.

²⁵ Dja nungka God bennang birrimekbe bininj nawu Israel benkebmawahmeng wanjh burrbuni kore benmarnekurduyimerranj dja benkon-gibom.

3

Yawey Nawu God Bimarnebukkarrinj Moses

Exodus 3:1-10

¹ Moses nahnani mayh kumirnde nuye Jethro nawu bindoy nuye. Nawu nungka Jethro priestni dingihdi kore Midian. Wanjh Moses benmirn-dekang mayh djarreh kore kubolldarleh borledmikenh, dja bebmeng kore mandulumkimuk kawarddengeyyo Horeb. Kunmekbe kunred wanjh God nuye kunwarddekimuk.

² Kaluk kumekbe angel nuye Yawey bimarnebukkarrinj dingihdi kore kunak manbirluwoldjen kumbemmereni kore mandulkyahwurd. Moses wanjh nang manekke kundulk, dja mak kunak nang dja minj dulkrui.

³ Wanjh Moses yimeng, "Ngaray darnkih nganan manihbu kunbuyika duninj dja njalekah minj karrulkrung."

⁴ Bu Yawey binang Moses wam dulknang, wanjh nungka bikayhmeng kore kurrulkbeh yimeng, "Moses! Moses!" Wanjh Moses yimeng, "A! Ngaye wanjh konhda ngahdi. Bu bekkabekkan."

⁵ Wanjh God yimeng, "Yuwn yimre darnkih, dja yirrengeyerkrerrimen nawu yihdengedjongbuyindi, wanjh kunukka kore yihdi wanjh kubolld- jamun ngardduk."

⁶ Dja mak God yimeng, "Ngaye wanjh God nuye kornkumo ke. Ngaye wanjh God nawu nuye Abraham, dja mak God nuye Isaac, dja mak God nuye Jacob." Wanjh Moses djudkurlmeng dja kebwarlkkarrinj dja nungka keleni bu yimankek binayi God.

⁷ Wanjh Yawey yimeng, "Ngaye woybukkih nganang kunnjilngwarre bedberre ngardduk bininj nawu kabirriini kore Egypt, dja ngabenbekkang bu birrikayhmi kore bininj nawu birrikang Egypt kabindidjurrkdjurrkwon bulkkidj. Ngaye ngaburrbun rowk kabirrihdjakbekkan.

⁸ Wanjh kumekbekenh kunu ngaye ngamkoluy ba ngabenbebeke kore bininj nawu birrikang Egypt kabindimarnekurduyime kunwarre. Ngabenbebeke Egyptbeh, dja ngabenkan kore kubolkmak kabolkwarlah duninj, kumekbe kore manme manmakkaykenh manwern duninj kadjokodjordmerren. Kumekbe kunred kore bininj bolkkime kabirrihni nawu birribebbehwokbubuyika nawu kabirribebbehmirndengeyyo bininj nawu Canaan benkebmawahmeng, dja mak bininj nawu Heth benkebmawahmeng, dja mak bininj nawu kabirringeyyo Amor, dja mak nawu kabirribebbehngeyyo Periz bininj, dja mak Hiv bininj, dja mak nawu birrikang kunred Jebusbeh."

⁹ "Dja bolkkime kanbekka. Ngabenbekkang bininj nawu Israel benkebmawahmeng, bu birrikayhmi, dja nganang bu bininj nawu Egyptbeh kabindidjurrkdjurrkwon munguyh kabindikuyindombuyhwe.

10 Kunmekbekenh ngaye wanjh munkewe ngudda kore Pharaoh, ba yibenbebke ngardduk bininj nawu Israel benkebmawahmeng kabirrim-bebme kumekbe kore Egyptbeh. Mah, wanjh yiray!”

Nawu Yawey God Bimarneygmulewarrinj Nawu Moses

Exodus 3:11-15

11 Wanjh Moses bimarneyimeng God, yimeng, “Ngaye nuk ngawarre bu minj nuk ngare kore Pharaoh ngabenbebke bininj nawu Israel benkebmawahmeng kore Egyptbeh?”

12 Dja God bimarneyimeng, “Ngaye kaluk ngarrdjarrkre. Bu yibenbebke Egyptbeh wanjh kondah ngurrimre bu kandimarnedi yiwarrudj kore maninjmanu kunwarddekimuk. Kunmekbe wanjh kaluk yiburrbun bu woybukkih ngaye munkeweng.”

13 Wanjh Moses bimarneyimeng God, yimeng, “Yina, wardi bu ngaye ngare kore kabirrihni, ngabenmarnebebme birrimmekbe bininj nawu Israel benkebmawahmeng, dja ngabenmarneyime, ngayime, ‘God nganmunkeweng ngaye, namekbe wanjh God bedberre nawu mawahmawah, nungka nganmunkeweng.’ Dja bu kuhni ngabenmarneyime, wardi ngandidjawan, ngandimarneyime, ‘Baleh kaluk kangeyyo nahni nawu God ngunmunkeweng?’ Bu kunmekbe ngandimarneyime, ngaye baleh ngabenmarneyime?”

14 Wanjh God bimarneyimeng Moses, yimeng, “Ngaye nawu ngay- ingkihyingkihi dja ngahni munguyh.” Dja mak God yimeng, “Kuhni wanjh yibenmarneyimen bininj nawu Israel benkebmawahmeng, wanjh yiyimen, ‘Namekbe nawu nganmunkeweng kangeyyo “Ngaye nawu ngay- ingkihi bu munguyh munguyh.” ’ Kuhni wanjh kungey nuye.”

15 Kuhni warridj God bimarneyimeng Moses, yimeng, “Kuhni wanjh yibenmarneyimen bininj nawu Israel benkebmawahmeng, yiyimen, ‘Yawey nawu God nganmunkeweng nganwam ngudberre. Nungka wanjh God ngudberre nawu mawahmawah. Nungka wanjh God nuye Abraham, dja nungka God nuye Isaac, dja God nuye Jacob.’ Kuhni bu yibenmar- neyimen. Kuhni wanjh ngadjalngeyyo munguyh munguyh, kaluk nawu rerrererre kabirridangerrinj wanjh kunmekbe ngandidjalngeybun Yawey bu munguyh munguyh.” Kuhni bu Yawey nawu God bimarneyimeng Moses.

Yawey Nawu God Bimarneyolyolmeng Moses Kore Kaluk Kakurduyime

Exodus 3:16-22

16 Wanjh Yawey biyawoyhmarneyimeng Moses, yimeng, “Yiray wanjh, dja yibenmirndemornnamen dabborrabbolk bininj nawu Israel benkebmawahmeng, dja yibenmarneyimen bu ngaye marnebebmeng nawu Yawey, dja ngaye nawu God bedberre nawu mawahmawah Abraham, Isaac dja Jacob. Dja yibenmarneyimen bu ngaye ngabennang bu baleh bindihmarnekurduyimi kore Egypt,

17 dja ngabenmarnewokkurmerren bu woybukkih duninj ngabenbe- bke Egyptbeh kore kabirrinjilngwarre, dja ngabenkan kore kubolkwarlah nawu bininj kabirrihni kore Canaan, dja mak nawu Heth benkebmawahmeng, dja mak bininj nawu birringeyyoy Amor, dja mak nawu kabirribebbehngeyyo Periz, dja mak nawu Hiv bininj, dja mak bininj nawu birrikang kunred Jebus. Kaluk kunred kore manme manwern kadjokodjormerren. Kuhni wanjh yibenmarneyimen.

18 Wanjh bedda bininj nawu Israel benkebmawahmeng dabborrabbolk wanjh ngundibekkan. Kaluk ngurridjarrkray kore king nawu kawohnan kore Egypt ngurrimarneyimen, ‘Yawey nawu God ngadberre nawu

Hebrew bininj, wanjh kumwam bebmeng ngadberre, wanjh kunukka bolkkime ngundidjawan kanmunkewe ngadberre kunkak danjbik kore kubolkdarleh ba bu mayh ngarrimarnebun nuye Yawey nawu God ngadberre.' Kuhni wanjh ngurrimarneyimen namekbe nawu king." Kuhni bu God bimarneyimeng Moses.

¹⁹ Dja mak God bimarneyimeng, "Ngaye ngaburrbun bu nungka king nawu kawohrnan Egypt minj ngunmunkewe ngudberre, kalukburrk bu ngaye ngawernhdjurrkan namekbe nawu king, ngadjurkkan kundulkarre dorreng wanjh kunu ngunmunkewe ngudberre.

²⁰ Wanjh ngayeman kaluk ngakurduyime kundulkarre dorreng bedberre bininj nawu birrikang Egypt, bu ngayeman ngabenbun rowk, ngabenmarneyime kundjalwern bu kabirrikunikangebarrhme. Kunmekbe kaluk wanjh namekbe nawu king ngunmunkewe ngudberre."

²¹ "Dja mak kunbuyika ngakurduyime. Ngaye ngabenmarbun bininj nawu Egyptbeh ngundimarneyime kunmak, ba bu ngurrire, minj ngurribidlarrkre.

²² Kaluk ngudberre daluk rowk kabindiyidjawan daluk Egyptbeh nawu kabirridarnhmarnedi dja nawu kabirriwohni kore kunrurk ngudberre, kabindiyidjahwon yehyeng manmakmak nawu ngurridjongburren silver dja gold dja mak kunmadj, dja wanjh ngurrbendjongbu nawu bebeywurd dja ngalbebeywurd ngudberre. Kunmekbe wanjh ngurribenyiyakwon kunmakmak bedberre bininj nawu Egyptbeh."

4

Yawey Nawu God Biwong Moses Kundulkarre Nuye

Exodus 4:1-9

¹ Wanjh Moses biwokmey Yawey nawu God, yimeng, "Dja kaluk baleh ngayime bu ngabenmarneyime bininj nawu Israel benkebmawahmeng, dja bedda minj ngandiwoybukwon dja minj mak ngandibekkan, dja wanjh kabirriyime bu yimankek ngudda Yawey minj kanmarnebebmeninj?"

² Wanjh Yawey bimarneyimeng Moses, yimeng, "Ngudda njale nakka yikarrme kubid ke?" Moses yimeng, "Mahni wanjh kundulk ngarrulkkarrme."

³ Yawey yimeng, "Yirrukburriwemen kurorre." Wanjh Moses dulkburriweng kurorre, wanjh manekke kundulk djalkukyimerranj nayin duninj, wanjh Moses kelerlobmeng.

⁴ Wanjh Yawey bimarneyimeng, "Yidarrkidma kuberd." Wanjh kunu Moses bidyirriyonginj, mey nawu nayin, wanjh yawoyhdulkyimerranj kundulk kore kubid nuye.

⁵ Wanjh Yawey bimarneyimeng, "Kuhni yikurduyimen bedberre ba kabirriwoybukwon bu ngaye marnebukkarrinj, ngaye nawu Yawey, ngaye nawu God bedberre nawu mawahmawah. Ngaye wanjh God nuye Abraham, dja mak God nuye Isaac dja mak God nuye Jacob."

⁶ Kuhni mak Yawey bimarneyimeng Moses, yimeng, "Yibidngimen kore namekbe nawu yidjongbuyindi." Wanjh Moses bidngimiworrinj, dja bu bidbebkerrinj wanjh kundjak bimey kubid bidkulahwarreminj, bidbeleminj duninj yiman yerrih delek.

⁷ Wanjh Yawey yimeng, "Yiyawoyhidngimen." Wanjh kunu yawoyhidngimeng, dja bu bidbebkerrinj kumekbe wanjh bidmakminj rowk, bidkulahmakminj yiman kunkulah rowk kubuhburrk nuye.

⁸ Wanjh Yawey yimeng, "Kuhni yibenmarnekurduyimen bu yibenbukkan kundulkarre ngardduk. Kundulk werrk yibenbukka dja bu

minj ngundiwoybukwon dja minj mak ngundiwokbekkan wanjh kuhni kunbuyika yibenbukka kunbidwali ba bu kunukka nuk ngundiwerhwoy-bukwon.

⁹ Dja bu minj ngundiwoybukwon dja minj mak ngundiwokbekkan bu manekke bokenh yibenbukkan, wanjh yiboma kukku kore mankabo, dja yiboyakbu kuberrkkombuk wanjh manekke kukku kaboyimerran kunkurlba kumekbe kore kuroorre.”

Yawey Nawu God Bimarnekangewurhmenng Moses

Exodus 4:10-17

¹⁰ Wanjh Moses bimarneyimeng Yawey, yimeng, “Aba! Yina nawu kanmarnewohrnan, ngaye ngadjalwokmayaliwarre. Minj kerngeghkenh ngawokmayalimakniwirrinj dja bu ngudda kanmarnewokdanj ngaye ngadjalwokmayaliwarre bolkkime. Ngaye yeledj ngawokdi dja ngadjenkelk.”

¹¹ Wanjh Yawey bimarneyimeng, “Yina! Yiburrbun ngaye nawu Yawey ngabenmarnbun bininj bu kabirriwokdi, dja bu kabirridangdubbe, dja bu kabirrikanemdubbe. Ngabenmarnbun warridj bininj bu kabirribolknan dja nuk kabirrimimbunjemen. Dja ngaye wanjh Yawey ngabenmarnbun bininj kabirriyimerran kore ngadjare.

¹² Kunu wanjh yiray, dja ngaye bidyikarme bu yiwokdi, ngayeman kunwok bukkabukkan bu baleh ngudda yibenmarneyime.”

¹³ Wanjh Moses yimeng, “Ngudda nawu kanmarnewohrnan, djaldjawan nabuyika yimunkewemen.”

¹⁴ Wanjh kunu Yawey kangewurhmenng dja bimarneyimeng Moses, yimeng, “Kab, dja nawu ngudda ngunedanginj nawu Aaron nawu Levi ngunbenedjarrkkebmawahmeng. Ngaburrbun bu nungka wokmak. Kaluk nungka kamhre bolkkime ngundabke, dja bu ngunnan, nungka wanjh kakangemarmarmen.

¹⁵ Ngudda kaluk yimarneyimen dja mak yiwokwon kunwok nawu nungka kaluk kayime, ngaye kaluk bidyikarme bu yiwokdi, dja nungka mak ngabidyikarme bu kawokdi. Ngaye benbenebukkan bu baleh ngunekurduyime.

¹⁶ Nungka kaluk kawokdi ke, kore ngudda yidjare kabenmarneyime bininj. Dja ngudda yiman God rerrih kore yimarneyime baleh kabenmarneyime.

¹⁷ Dja mak ngudda maninjmanu kundulk yirrulkkan kore kubid ke, ba yibenbukkan kunbubuyika kundulkarre ngardduk, ba kabirriburrbun bu ngaye marnebukkarrinj ngudda.” Kuhni wanjh Yawey bimarneyimeng Moses.

Moses Bolkbawong Midian Dja Durndi Kore Egypt.

Exodus 4:18-23

¹⁸ Wanjh Moses durndi kore bindoy nuye Jethro dja bimarneyimeng, “Kab djawan bu kanmunkewe, ngarrurndeng kore Egypt ngabennan nawu ngarrimud ba bu bedda kunubewu kabirridjaldarrkiddi.” Wanjh Jethro bimarneyimeng Moses, yimeng, “Mah, wanjh kamak bu yire.”

¹⁹ Kaluk bu kerngeghkenh Moses djahdjalni kore Midian, wanjh Yawey bimarneyimeng, “Bininj rowk nawu birridjareni ngundibuyi, bedda wanjh birridoweng, dja wanjh yirunde kore Egypt.”

²⁰ Wanjh kunu Moses benmey ngalbininj kobeng nuye dja bebeywurd nuye, benkurrmeng kore kubodme nuye mayh nawu donkey birrimorzeni

dja birridjarrkdundi kore kubolkwarlah Egypt, dja Moses dulkkah-dulkkani kubid nuye kundulk manbu God nuye.

²¹ Wanjh Yawey bimarneyimeng Moses, yimeng, “Bu ngudda yirrundereng kore Egypt, wanjh yikurduyimen rowk kore Pharaoh kumirrk nuye, yibukka kunbubuyika rowk bu namakmak nawu ngaye dulkarrewong. Yibukka dja bonj, yiman djamku yibukkan, dja ngaye munguyh ngakangerayekwon ba nungka minj bininj kabenmunkewe.

²²⁻²³ Dja ngudda kaluk yimarneyimen Pharaoh, yiyime, ‘Kuhni bu Yawey ngunmarneyime, Mah. Wanjh yibenmunkewemen ngardduk bininj nawu Israel benkebmawahmeng ba ngandimarnedi yiwarrudj. Dja bedda wanjh yiman kayime nadjdjaman rowk ngardduk. Dja bu ngudda kandahme minj yibenmunkewe, kunukka wanjh ngaye ngabun beywurd ke nawu nadjdjaman.’ Kuhni bu yimarneyime nawu Pharaoh.”

Yawey Nawu God Minj Bibuyi Beywurd nawu Moses Nuye.

Exodus 4:24-26

²⁴ Wanjh Moses dja nawu birrimudni birribolkbawong Midian dja birriwam. Birridjalwam wanjh birriwohyonginj wohka. Kaluk kumekbe kore birriyonginj, wanjh Yawey bendabkeng bu yimankek bibuyi dowimeninj Moses nuye wurdyaw nawu nadjaman.

²⁵⁻²⁶ Wanjh Zipporah ngalbu Moses nuye ngalbininj kobeng, mey kunwardde manbu manwarddemirrhmak dja birradjkeng bilakkayenwong nayaw ngarre, wanjh bikulahkurmeng kore kurrenge nuye nayaw, dja mak ngaleng bimarneyimeng nawu wurdyaw, yimeng, “Woybukkih wanjh ngudda nawu ngardduk kunkurlbakenh.” Kunmekbe yimeng bu bilakkayenwong wurdyaw. Wanjh kumekbekenh kunu Yawey birrarrkidbawong namekbe nayaw dja minj bibuyi.

Aaron Birrabkeng Moses.

Exodus 4:27-28

²⁷ Kaluk Yawey bimarneyimeng Aaron, yimeng, “Yiray kore kubolkdarleh yirrabke Moses.” Wanjh nungka wam birrabkeng kore God nuye kunwarddekimuk, dja bibunjhmey.

²⁸ Wanjh Moses bimarneyimeng kunwok rowk nawu God bimarneyimeng bu bimunkeweng, dja mak kunbubuyika rowk namakmak nawu Yawey biwokrayekwong Moses, kaluk kakurduyime kabenbukkabukkankenh bu God bimarnebebmeng. Kuhni rowk Moses bimarneyimeng Aaron.

Bininj Nawu Israel Benkebmawahmeng Birriburlumi Yawey Nawu God

Exodus 4:29-31

²⁹ Wanjh Moses dja Aaron benebolkbawong manwarddekimuk bolkngeyyoy Horeb, dja benewam kore kubolkwarlah Egypt. Kaluk bu kumekbe benebebmeng, wanjh bindimirndemornnameng rowk dabborrabbolk bedberre bininj nawu Israel benkebmawahmeng.

³⁰ Dja Aaron benmarneyimeng kunwok rowk nawu Yawey bimarneyimeng Moses, dja mak kurduyimeng namakmak kundulkarre dorrengh kore bininj birrinani benhbukkani bu Yawey bimarnebebmeng.

³¹ Wanjh bedda nawu bininj birriwoybukwong, dja bu birribek kang bu Yawey kunwam bedberre kabenbidyikarmekenh, dja bu nungka nang kunjilngwarre bedberre, wanjh bedda birridjudkurlmi birriburlumeng nuye.

5

*Moses Dja Aaron Benebebmeng Kumirrk Nuye Pharaoh**Exodus 5:1-5*

¹ Kaluk bu yerrekah Moses dja Aaron benewam kore Pharaoh benemarneyimeng, "Yawey nawu God ngadberre bininj nawu Israel kankebmawahmeng, kuhni wanjh ngunhmarneyime, 'Ngudda Pharaoh, yibenmunkewemen ngardduk bininj ba bu ngandimulilmang ngandikukenwon kore kubolkdarleh.'"

² Dja Pharaoh yimeng, "Nangale kaluk Yawey bu yimankek ngaye ngawokmarrkmang dja munkewe ngudberre bininj nawu Israel ngunkebmawahmeng? Ngaye ngakukwakwan Yawey, dja warridj minj munkewe ngudberre."

³ Wanjh bedda nawu Moses dja Aaron benemarneyimeng, "God nawu ngadberre Hebrew bininj, bebmeng ngarrewoneng, wanjh ngundidjawan bu kanmunkewemen ngadberre, kunkak danjbik ngarrire kore kubolkdarleh, mayh ngarribun dja yiwarrudj dorrengh ngarridi nuye God ngadberre nawu Yawey. Bu minj ngarrire wardi Yawey kundjak kamunkewe ngadberre kanbun dja nuk kabenmunkewe bininj bu kanbun mandjawak." Kuhni bu Moses dja Aaron benemarneyimeng nawu Pharaoh.

⁴ Dja bonj, namekbe nawu wohrnawohnani kore Egypt minj benebekkayi, dja benbenemarneyimeng, yimeng, "Ngayh! Ngudda Moses dja Aaron, njalekah ngurrbendjurrkan bininj nawu Israel benkebmawahmeng kabirribawon kabirridurkmirri? Bonj. Dja ngurridjarrkdurkmirrin rowk."

⁵ Mak Pharaoh yimeng, "Dja ngunena! Ngudberre bininj nawu Israel benkebmawahmeng wanjh birrimirndewernminj, dja ngudda ngurrbengurdke kore kabirridurkmirri."

*Pharaoh Benwokrayekwong Bininj Nawu Israel Benkebmawahmeng**Exodus 5:6-18*

⁶ Bu kundjalmekbe kunbarnangarra wanjh Pharaoh benwokrayekwong bininj nuye nawu birribangni nawu bindidjurrkkani bininj nawu Israel benkebmawahmeng, dja mak benwokrayekwong yikahwi bininj nawu Israel benkebmawahmeng nawu bindinahnani bedmandeleng. Bedda wanjh bindinahnani nawu birriredboni bininj bu birridurkmirrikenh.

⁷⁻⁸ Pharaoh benmarneyimeng birrimekbe bininj rowk, yimeng, "Nahn bininj nawu Israel benkebmawahmeng minj kabiriwernhdurkmirri. Kunmekbekenh kunu wanjh kuhni ngandidjawan, kabirriyime, 'Kamunkewemen ngadberre ngarrire mayh ngarribun dja yiwarrudj dorrengh ngarridi God ngadberre.' Bonj. Karrbenmarnerayekwo. Dja ngudda bu ngurrbendalkwon brickskenh kabirrihmarnbun, wanjh bonj kunukka, bolkkime yuwn ngurrbendalkwon, dja bedman birriray birridalkma bedman bedberre. Madjamku bedman kabirridalkyawan, dja munguyh kabirridjalmarnbun nawernkenh brick, yiman kerngeghkenh birrimirnbuni bu ngurrbendalkwoni dorrengh, dja yuwn kabirriwornirndeyahwurdmn brick manbu kabirrihmarnbun.

⁹ Ngurrbenmarnewernwo kabirridurkmirri ba kabirridaldurkmirri, dja minj kabirribekkan nawu kabindihkowe." Kuhni bu Pharaoh benmarneyimeng bininj nuye.

¹⁰ Wanjh kunmekbekenh wanjh bininj nawu bindidjurrkkani dja bininj nawu bindiwohnani wanjh birrimbebmeng dja bindimarneyimeng bininj nawu Israel benkebmawahmeng, wanjh birriyimeng, "Pharaoh yimeng bu nungka ngundalkkaybun.

11 Mak Pharaoh yimeng bu ngudman ngurriray ngurridalkma kore baleh yarrkka ngurridalkngalke, dja ngurridjalmarnbu yiman kunyungkih ngurrihmarnbuni nawernkenh brick. Minj mak kawohmirndeyahwurdmen nawu ngurrimarnbuni ngurridurkmirri.”

12 Wanjh kunu bininj nawu Israel benkebmawahmeng birriyarlah-yarlarmeng birriwam kubolkbubuyika rowk kore kubolkwarlah Egypt, birridalkmangi brickskenh kabirrimarnbun.

13 Wanjh bininj nawu bindidjurkkani bindiwernhdjurkdjurkwoni bulkkidj, birriyimi, “Kunbarnangarrabubuyika ngurridjalmarnbu nawernkenh brick yiman kunyungkih rerrih ngurrihmarnbuni bu ngundidalkwoni.”

14 Yikahwi bininj Israel nawu benkebmawahmeng, wanjh Pharaoh bendjarrngbom benkurrmeng kore bindimarnewohnani birribuyika bininj nawu Israel benkebmawahmeng. Dja Pharaoh nuye bininj nawu bindidjurkkani bedda wanjh bindiwidbikheng birrimekbe nawu bindikurrmeng kabindimarnewohnankenh bininj nawu Israel benkebmawahmeng, bindiwidbikhkeyi bindidjawani dorrengh, “Njalekenh minj baleh ngurriyakwoyi ngurrihmarnbuyi nawernkenh brick yiman kunyungkih ngurrihmarnbuni?”

15 Wanjh bedda bininj nawu Israel benkebmawahmeng, nawu bindimarnewohnani birribuyika, wanjh birriwam kore Pharaoh birrimarneyime kunnjilngwarre dorrengh, “Njalekenh kuhni bu kunrayek kanmarneyime ngadberre nawu ngarrimarladj?

16 Djaldjamku minj ngad kandidalkwon ngadberre nawu ngarrimarladj, ngandidjalmarneyime ngarrimarnbun brick. Dja yina, njalekenh ngandiwidjbiheke ngad nawu ngarrimarladj? Kuhni wanjh djalburudjang dja ngudda ke bininj wanjh ngandikebrokwarrewong ngadberre.” Kuhni bu birrimarneyimeng Pharaoh nawu bininj Israel benkebmawahmeng.

17 Dja wanjh Pharaoh yimeng, “Ngudda wanjh ngurringudjwarre dja minj ngurriwernhdurkmirri! Kunmekbekenh kunu ngurriyime, ‘Mah. Karrisay karribun mayh bu mak karrimarnedi yiwarrudj Yawey nuye.’ Kuhni bu ngurriyime. Wanjh bonj.

18 Ngurridurnde ngurridurkmirrin, dja minj mak dalkwon ngudberre dja ngurridjalmarnbu nawernkenh brick yiman kunyungkih ngurrihmarnbuni.”

Bininj Nawu Israel Benkebmawahmeng Bindiwelengnameng Moses Dja Aaron

Exodus 5:19-21

19 Bedda nawu birriwohrnani bedberre bininj nawu Israel benkebmawahmeng, bu birriwokbekkang, wanjh kunu bedda birriburrbom mankarreyek duninh bebmeng bedberre.

20 Wanjh bu birribawong birribebmeng kore Pharaoh kunrurrk nuye wanjh bindimarnebebmeng bindidabkeng Moses dja Aaron nawu bindimadbuni kuberrk,

21 dja bindimarnemeng, “Ngudda wanjh ngunemarnbom kunyid dja ngurrbenmarnbom Pharaoh dja bininj nuye nawu kabirrimarnedurkmirri wanjh kandiwidnan kadberre, dja yiman rerrih ngurrbenbidnakenwong mandjawak kandibunkenh. Wanjh kunmekbekenh kunu ngad ngarridjare Yawey ngunbenenan dja ngunbenedjuhun ngorrewong.”

Moses Dangingj Yiwarrudj Bu Bidjawam Nawu Yawey God

Exodus 5:22-23

²² Wanjh Moses yawoyhdanginj yiwarrudj kore Yawey dja yimeng, “Ngudda nawu Yawey, njalekenh kunwarre yibenmarnekurduyime ng bedberre nanih bininj nawu Israel benkebmawahmeng? Dja njalekenh ngaye kanmunkeweng bedberre bu kondah?”

²³ Bu ngawam kore Pharaoh ngudda Yawey marnewokdanj, nungka wanjh kundjalwarre kahkurduyime bedberre nanih bininj nawu Israel benkebmawahmeng. Dja ngudda minj kanwohbidyikarmeninj bu kanbekemeninj ngad nawu bininj ke. Dja djalburryak.”

6

Yawey Benmarnewokkurmerrinj Bininj Nawu Israel Benkebmawahmeng.

Exodus 6:1-9

¹ Wanjh Yawey bimarneyimeng Moses, yimeng, “Mah! Dja bolkkime wanjh yinan bu baleh ngamarnekurduyime Pharaoh, ngayeman nawu ngarrulkarrekimuk ngamarnbun nungka kaluk kabenmunkewe kabirrire bininj nawu Israel benkebmawahmeng. Yoh, wanjh, dja mak ngaye nawu ngarrulkarrekimuk ngamarnbun Pharaoh kabendjirrkkan dorrengh ba kabirribolkbawon kubolkwarlah nuyee.”

² Wanjh God biyawoyhmarneyimeng Moses, yimeng, “Ngaye wanjh Yawey.

³ Ngaye ngabenbebbehmarnebebmeng ngabenbebbehmarnekukbukarrinj Abraham, Isaac dja Jacob. Dja bedda minj ngabenmarnengeybukarrimeninj bu ngahngeyyo Yawey, dja birridjalburrbuni bu ngegeyyo El Shaddai.

⁴ Dja ngabenmarnewokrayekworrinj kunwok ngardduk warridj nawu ngawokkurmerrinj ngabenberrebom bu kaluk ngabenbolkwon kubolkwarlah Canaan, kore birridjalni kore minj bedberrekihniwirrinj kunred.

⁵ Dja mak warridj ngabenbekkang bininj nawu Israel benkebmawahmeng bu kunnalk dorrengh ngandikayhme dja nawu bininj Egyptbeh yiman kabindhongkan rerrih, dja wanjh ngaye ngaburrbun kore ngawokkurmerrinj ngabenberrebom korroko.”

⁶ “Kunmekbekenh kunu yibenmarneyimen bininj nawu Israel benkebmawahmeng, kanwokmulewa ngayime bedberre, ‘Ngaye wanjh Yawey, nawu ngayeman bebke ngudberre kore ngundihdjurrkkani ngurrihdurkmirri bedberre bininj nawu Egyptbeh, ngaye yerrkke ngudberre kore ngundihbongkarme rerrih. Ngaye ngabidyirriyongen kunngudj dorrengh ngardduk bu bebke ngudberre. Dja warridj ngabenwelengname bininj nawu Egyptbeh kore ngabenmarnekurduyime kunkimukkenh duninj.

⁷ Ngaye mang ngudberre dja mak marnbun ngurriyimerran ngardduk bininj, dja ngaye ngayimerran God ngudberre. Kaluk bu kunmekbe ngakurduyime, wanjh ngurriburrbun bu ngaye wanjh Yawey nawu God ngudberre, dja ngaye bebkeng ngudberre kore bininj nawu Egyptbeh ngundihbongkarmi.

⁸ Kaluk ngaye kan ngudberre kore kubolkwarlah ngaye ngawokkurmerrinj kunwok kunrayek duninj kore ngabenbolkwonkenh Abraham, Isaac dja Jacob, wanjh kunmekbe kubolkwarlah ngaye bolkwon ngudberre ngurribolkkarme. Bonj. Kumekbe ngayime, ngaye nawu Yawey.’ Kuhni yibenmarneyimen bininj nawu Israel benkebmawahmeng.”

⁹ Kuhni rowk bu God bimarneyimeng Moses, wanjh Moses benmarneyimeng bininj nawu Israel benkebmawahmeng, dja bedda minj birribekkayi Moses. Kumekbekenh minj birribekkayi dja bininj nawu Egyptbeh

bindidjurrkkani bindimarnbuni kunkimuk bindimarnedurrkmirri yiman bindibongkarmi rerrih, dja kunu wanjh minj birribekkayi, dja birrid-jalkangewarreni.

Yawey Benbeneyawoyhmunkeweng Aaron Dja Moses

Exodus 6:10-13

¹⁰ Wanjh Yawey bimarneyimeng Moses, yimeng,

¹¹ “Yiray kore Pharaoh nawu kawohrnan kubolkwarlah Egypt dja yimarneyimen kabenmunkewe bininj nawu Israel benkebmawahmeng kabirrire ba kabirrimarnebolkbawon kubolkwarlah nuye.”

¹² Dja Moses biwokmey Yawey, yimeng, “Yina, nahni bininj nawu Israel benkebmawahmeng minj ngandibekkan ngaye. Dja bonj, njalekah yimankek kuhni Pharaoh nganbekkan ngaye nawu ngadjalwokwarre?”

¹³ Wanjh Yawey benbenewokrayekwong Moses dja Aaron, dja wokrayekwon berrewoneng bu kabindibebkekenh bininj nawu Israel benkebmawahmeng kore kunbolk Egyptbeh.

Kunngey Bedberre Nawu Mawahmawah Moses Dja Aaron Berrewoneng

Exodus 6:14-25

¹⁴ Nanih wanjh kabirringeybimdi nawu birriwohrnani kore nawu bedman birribebbehmunni. Reuben nawu Israel beywurd nuye nawu nadjd-jaman wanjh bebeywurd benbornang Hanoah, Pallu, Hezron dja Carmi. Bedda wanjh Reuben nuye birrimudni duninjh nawu bindingeykenhkani.

¹⁵ Nawu Simeon benbornang bebeywurd nuye wanjh Jemuel, Jamin, Ohad, Jakin, Zohar dja Shaul. Nungka nawu Shaul ngalbadjan nuye daluk ngalbu ngalkang Canaan. Bedda wanjh Simeon nuye birrimudni duninjh nawu bindingeykenhkani.

¹⁶ Nanih wanjh birringeyyoy nawu Levi benbornang dja benkebmawahmeng. Levi bebeywurd benbornang Gershon, Kohath, dja Merari. Nungka Levi djahdjalmimbini 137 mandjewk.

¹⁷ Nawu Gershon benbenebornang bebeywurd nuye nawu birrimudni duninjh wanjh Libni dja Shimei.

¹⁸ Nawu Kohath benbornang bebeywurd nuye wanjh Amram, Izhar, Hebron, dja Uzziel. Kohath djahdjalmimbini 133 mandjewk.

¹⁹ Nawu Merari benbenebornang bebeywurd nuye wanjh Mahli dja Mushi. Nanih wanjh Levi nuye birrimudni duninjh nawu benbornang dja benkebmawahmeng.

²⁰ Amram benemarrinj ngalkornkumo nuye ngalbu ngeyyoy Jochebed, ngaleng bimarneyawmey Amram bebeywurd nuye Aaron dja Moses. Nungka Amram djahdjalmimbini 137 mandjewk.

²¹ Izhar benbornang bebeywurd nuye, wanjh Korah, Nepheg dja Zichri.

²² Uzziel benbornang bebeywurd nuye, wanjh Mishael, Elzaphan dja Sithri.

²³ Aaron benemarrinj Elisheba, ngalbeywurd nuye Amminadab, dja mak ngaleng benedanginj Nahshon. Dja ngaleng Elisheba bimarneyawmey Aaron bebeywurd nuye Nadab, Abihu, Eleazar dja Ithamar.

²⁴ Nawu Korah benbornang bebeywurd nuye wanjh Assir, Elkanah dja Abiasaph. Bedda wanjh Korah nuye birrimudni duninjh nawu bindingeykenhkani.

²⁵ Eleazar nawu beywurd nuye Aaron wanjh benemarrinj ngalkudji ngalbeywurd nuye Putiel, dja ngaleng bimarneyawmey Phinehas.

Nanih wanjh kabirringeybimdi nawu birriwohrnani kore Levi nuye birribebbehmudni, nawu bedman birribebbehmudni duninh kabirridjarrkngeydingeydi.

Yawey Benbeneyawoyhwokrayekwong Moses Dja Aaron

Exodus 6:26-30

²⁶ Bedda wanjh benemekbawi Aaron dja Moses nawu Yawey benbenemarneyimeng, "Ngurrbenbebbehmirndemornnamen bininj nawu Israel benkebmawahmeng, dja ngurrbenbebbehmirndebebke Egyptbeh."

²⁷ Dja bedda wanjh benemekbe nawu benewokdi nuye Pharaoh nawu wohnani kore Egypt, beneyimeng kabindibebke bininj nawu Israel benkebmawahmeng Egyptbeh. Bedda wanjh benedjalmekbawi Moses dja Aaron.

²⁸ Bu Yawey wokdanj nuye Moses kore Egypt,

²⁹ nungka bimarneyimeng, "Ngaye wanjh Yawey. Pharaoh nawu kawohnan kore Egypt yimarneyimen yehyeng rowk nawu ngaye wokwong."

³⁰ Dja Moses bimarneyimeng Yawey, yimeng, "Yina! Ngaye ngawokwarre wanjh njalekah yimankek Pharaoh nganbekkan?"

7

Yawey Biwokrayekwong Moses

Exodus 7:1-7

¹ Wanjh nunganwali Yawey bimarneyimeng Moses, yimeng, "Yina, ngaye marbun ngudda ba bu yiyimerran yiman God rerrih bu yire kore Pharaoh, dja Aaron nawu ngunedanginj ngamarnbom ba bu kayimerran yiman prophet ke rerrih, wanjh nungka ngunwokmulewan kore Pharaoh.

² Ngudda kaluk yiwokdin kunwok rowk nawu ngaye wokrayekwon, dja Aaron nawu ngunedanginj, nungka wanjh kabimarneyime Pharaoh kabenmunkewe bininj nawu Israel benkebmawahmeng kabirrimarnebolkbawon kubolkwarlah nuye.

³ Dja kunu bonj. Ngaye wanjh ngadjalmarnbun Pharaoh kakangerayekmen. Dja djamku ngaye ngawernwon nawu ngabukkan kundulkarre dorrengh kondah kore kubolkwarlah Egypt, dja ngabenkangebarrhke.

⁴ Djal bonj, Pharaoh minj ngunbenewokmarrkmang. Wanjh kunmekbe ngayime ngabendjadme duninh bininj nawu Egyptbeh dja ngabenbun. Dja ngaye ngabenmirndeiyebeme ngardduk bininj nawu Israel benkebmawahmeng, kabirribebme Egyptbeh.

⁵ Bu kunmekbe ngayime ngakurdyime rowk ngabidyirriyo ngaye ba ngarrulkarrebukkarren bedberre bininj nawu Egyptbeh dja ngabenbebke bininj nawu Israel benkebmawahmeng kore kunred bedberre kabirridjarrknibeh, wanjh kunu bininj nawu Egyptbeh kaluk kabirriburrbun bu ngaye wanjh Yawey." Kuhni bu yimeng Yawey.

⁶ Wanjh Moses dja Aaron kuhni benekurdyimeng rowk nawu Yawey benbenewokrayekwong.

⁷ Dja bu Pharaoh birriwokdi wanjh Moses mandjewk nuye wanjh 80, dja Aaron 83.

Kundulk Dulkyimerranj Nayin

Exodus 7:8-13

⁸ Wanjh Yawey benbenemarneyimeng Moses dja Aaron, yimeng,

9 “Kaluk bu Pharaoh ngunbenemarneyime, wanjh kayime, ‘Mah, ngunekurduyimen kundulkarre dorreng, ba bu ngaye ngaburrbun bu ngudda ngunemulewarren bu ngunewoybuk.’ Bu kuhni Pharaoh ngunbenemarneyime, wanjh kunu ngudda Moses yimarneyimen Aaron karrulkmgang kundulk nuye karrulkburriwe kore Pharaoh kumirrk nuye, wanjh karrulkyimerran nayin.”

10 Wanjh kunu Moses dja Aaron benewam kore Pharaoh dja benekurduyimeng nawu Yawey benbenewokrayekwong. Aaron dulkburriweng kundulk nuye kumirrk bedberre Pharaoh dja bininj nuye nawu birrimarnedurrkmirri, wanjh dulkyimerranj nayin.

11 Wanjh Pharaoh benkayhmeng bininj nawu birrimayaliwernni dja mak nawu birrimarrkidjbuni nawu birrikang kumekbe Egypt, dja bedda warridj kumekbe rerrih birrimarnbom kunkurdang.

12 Bedda rowk birribebbehdulkburriweng kundulk bedberre wanjh dulkyimerranj nayin. Dja kundulk manbu Aaron nuye wanjh benkukn-guneng benkukyakwong kundulk bedberreni manbu nayin birrikukyimer-ranj.

13 Yimankek djamku, dja Pharaoh djalkangerayekminj munguyh kore Yawey yingkihyimeng, dja nungka Pharaoh minj benbenewokmarrkmayi Moses dja Aaron.

Kukku Boyimerranj Kunkurlba

Exodus 7:14-25

14 Wanjh Yawey bimarneyimeng Moses, yimeng, “Pharaoh kangerayek-minj ngundahme, minj kabenmunkewe bininj nawu Israel benkebmawah-meng.

15 Kaluk bu malamalaywi nungka Pharaoh kare kore mankabo, wanjh yirruulkan kundulk manbu yimerranj nayin, dja yimadbun Pharaoh kore kurrid ngarre mankabo.

16 Wanjh yimarneyimen nungka nawu Pharaoh, kanwokmulewa bu ngayime nuye, wanjh yiyimen, ‘Yawey nawu God ngadberre nawu Hebrew bininj, wanjh nganmunkeweng kore ngudda Pharaoh ba marneyime kanmunkewe ngad nawu bininj nuye ba ngarrimarnedi yiwarrudj kore kubolkdarleh. Dja yina, ngudda minj yibangmewokmarrkmayi.

17-18 Mah, wanjh yina, mahni kundulk manbu ngahdulkarre wanjh ngaborrhmgang mankabo, wanjh manekke kukku kaboyimerran kunkurlba. Dja nawu djenj kore mankabo nakka karrowerren rowk dja mankabo kaluk kabonudbanjmen bulkkidj, dja bininj nawu Egyptbeh kabirribowirrihne minj kabirribongun. Wanjh kuhni kayime nungka nawu Yawey, bu nungka kaluk kakurduyime ba bu yiburrbun bu nungka Yawey.’ Kuhni yimarneyime nawu Pharaoh.” Kuhni kunwok bu Yawey God biwokwong Moses bu kabimarneyime Pharaoh.

19 Wanjh Yawey bimarneyimeng Moses, “Yimarneyimen Aaron kar-rulkmgang manekke kundulk nuye dja kapidwayhme kore kukku manbu kaborri kore kubolkwarlah Egypt. Kaluk mankawowern dja mak manlab-barlwern, ba bu kabokurlbamen rowk. Kore kubolkwarlah rowk Egypt kukku kadjalbokurlbamen rowk manbu kukku kaboyo njilhmi rowk kore karrulkmirnderri dja mak kore manwarddebarrarn, manekke warridj kaboyimerran kunkurlba.”

20 Moses dja Aaron benekurduyimeng rowk kore Yawey benbenewokrayekwong. Wanjh Aaron dulkwayhkeng kundulk nuye bu Pharaoh dja bininj nuye nawu birrimarnedurrkmirri birrinang, wanjh bobarrhme

manbu mankabo, dja kukku rowk kumekbe kore mankabo wanjh boy-
imerranj kunkurlba.

²¹ Dja djenj kore mankabo wanjh birridowerrinj, dja bonudminj bulkkidj
wanjh kunu bininj nawu Egyptbeh minj birribonguyi kukku kore manekke
mankabobeh. Wanjh kukku bokurlbahminj rowk kore kumekbe kubolk-
warlah Egypt.

²² Dja birrikurdang nawu birrikang Egypt, wanjh kunmekbe kunkudjiwi
birrikurduyimeng bu mankurdang bedberre, wanjh kunu Pharaoh djalka-
ngerayekni munguyh bu Yawey yingkihiyemeng, minj benbenemarrkmayi
Moses dja Aaron.

²³ Wanjh Pharaoh balborledmeng ngimeng kore kunrurrk nuye, dja minj
kuhni mak balwohburrbuyi.

²⁴ Dja bininj rowk nawu Egyptbeh wanjh bu minj birribonguyi kukku
kore mankabobeh, wanjh kunu birribolkkarungi birringadkarungi kore
mankabo darnkih birriboyawani bu kabirribongunkeh.

²⁵ Bu Yawey boborledkeng rowk manbu mankabo wanjh kaluk yerrekah
wanjh seven kunkodjke.

8

*Yawey Mirndemunkeweng Nadjalwern Dunijnh Kordbolbok Kore Kubolk-
warlah Egypt.*

Exodus 8:1-15

¹ Wanjh Yawey bimarneyimeng Moses, yimeng, “Yiray yingimen kore
Pharaoh dja yimarneyimen bu ngaye Yawey ngayime nuye benmunkewe-
men bininj ngardduk ba ngandimarnedi yiwarrudj,

² dja bu ngandahme minj kabemunkewe, wanjh kumekbe ngayiddung,
dja wanjh kordbolbok ngamirndekurme kore kubolkwarlah nuye.

³ Kaluk kore mankabo kamirndewernmerren kordbolbok dja kumek-
bebeh kabirrimirndebeberren kore kunrurrk nuye Pharaoh, kadjalle
kore kunrurrk kore kahyo dja mak kore balabbala nuye kore nungka
Pharaoh kakodjkeyo. Mak kamirndere kore kunrurrk bedberre bininj
nawu Pharaoh kabirrimarnedurrkmirri dja bininj rowk nuye, dja mak
kore manme kabirrikinje, dja kore kandidjdjawa kabirrimarnbun.

⁴ Kordbolbok kaluk karrolkan kore Pharaoh dja bininj rowk nuye
dja kore bininj rowk nawu kabirrimarnedurrkmirri nuye. Kuhni bu
yimarneyimen Pharaoh.”

⁵ Wanjh kuhni mak Yawey bimarneyimeng Moses, yimeng, “Yimarneyi-
men Aaron kundulk dorrengh nuye bidwayhmen kore mankabo rowk dja
mak kore kulabbarl rowk, dja kamarnbun kordbolbok kamirndebeber-
ren kore kubolkwarlah Egypt.”

⁶ Wanjh kunu Aaron bidwayhmeng kore kukku ngarre Egypt, wanjh
kordbolbok mirndebebermerrinj bolkbahmeng rowk kubolkwarlah Egypt.

⁷ Dja nawu birrikurdang kunkudjiwi birrikurduyimenj mankurdang
bedberre, birrimirndebebkeng kordbolbok kore kubolkwarlah Egypt.

⁸ Wanjh Pharaoh benbenemarnekayhmeng Moses dja Aaron, dja yi-
meng, “Ngunedjawa Yawey kakan kordbolbok kanbawon ngaye dja mak
bininj ngardduk, wanjh kunukka ngabenmunkewe bininj nawu Israel
benkebmawahmeng kabirribun mayh nuye Yawey, yiwarrudj kabirridi
dorrengh.”

⁹ Moses bimarneyimeng Pharaoh, yimeng, “Mah wanjh. Ngadjare
ngudda kanmarnedungname bu yiwarrudj marnedi ngudda, dja ngaben-
marnedi yiwarrudj bedberre bininj nawu ngundimarnedurrkmirri, dja

ngudda ke bininj rowk, ba kordbolbok kayakmen kore ngudda dja kunrurrk ngudberre, dja kubolkkudji kore mankabo kordbolbok kadjaladi.”

10-11 Wanjh Pharaoh yimeng, “Kaluk malaywi kanmarnedi.” Moses yimeng, “Ngaye ngakurduyime bu ngudda kandjawam. Kaluk ngunmarnekurduyimerran, ba bu ngudda yiburrbun bu minj nangale mak nabuyika yiman kabenerohrok Yawey nawu God ngadberre. Kordbolbok kaluk ngunbawon ngudda dja kunrurrk ngudberre, kabindibawon bininj nawu ngundimarnedurrkmirri dja ngudda ke bininj rowk, dja kubolkkudji kore mankabo kordbolbok kadjaladi.”

12 Wanjh Moses dja Aaron benebebmeng benebawong Pharaoh, wanjh Moses yiwarrudj di kunkayhmi dorreng kordbolbokkenh nawu Yawey benmirndemunkeweng kore Pharaoh.

13 Wanjh kunmekbe Yawey kurduyimeng bu Moses bidjawam, wanjh kordbolbok dowerrinj rowk kore kubolkwarlahkenh rowk, kore kunrurrk dja kabbal.

14 Dja birrikukmornnameng nawu kordbolbok dja bolknudbanjni duninh.

15 Wanjh yiman djamku bu Pharaoh nang God bibawong bu kordbolbok dowerrinj, nungka Pharaoh yawoyhkangerayekminj bu Yawey yingkihiyime, dja minj benbenebekkayi Moses dja Aaron.

Yawey Munkeweng Nadjalwern Duninh Mudmudwali Mirndebebmerrinj Bedberre

Exodus 8:16-19

16 Wanjh kunu Yawey bimarneyimeng Moses, yimeng, “Yimarneyimen Aaron dukwayhkemen kundulk nuye kabolkdong kundjulng ngarre kurorre ba bu manbu kundjulng kamirndeyimerran mudmud kubolkwernkenh rowk kore kubolkwarlah Egypt.”

17 Wanjh kunmekbe beneyimeng. Aaron bidwayhmeng kundulk nuye dorreng, bolkdoy kundjulng ngarre kurorre, wanjh mudmud mirndebebmerrinj kore bininj dja mayh. Kundjulng rowk kubolkwernkenh rowk kore kubolkwarlah Egypt wanjh yimerranj wernminj mudmud.

18 Wanjh bininj nawu birriburrbuni kunkurdang birrirohrokmi birrimirndebebkemeninj mudmud manbu kunkurdang bedberre, dja birridulka-rreyawarrinj. Wanjh nawu mudmud djahdjalmirnderri kore bininj dja mayh.

19 Wanjh birrimekbe bininj nawu birrikurdang birrimarneyimeng Pharaoh, birriyime, “Kuhni wanjh God nungan kurduyimeng.” Bu kuhni birriyime wanjh djaldjamku, dja Pharaoh djalkangerayekni munguyh kore Yawey biyingkihmulewam dja minj benbekkayi.

Yawey Munkeweng Djonedwali Bu Mirndebebmerrinj Kubolkwarlah Egypt

Exodus 8:20-32

20 Wanjh Yawey bimarneyimeng Moses, yimeng, “Malaywi ngudda yirrolkka bu kukabel dja yimadbu Pharaoh bu nungka kare kore kukku. Dja bu yinan, wanjh yimarneyimen, ‘Kuhni Yawey kayime ke, “Ngudda yibenmunkewemen bininj ngardduk ba ngandimarnedi yiwarrudj.

21 Dja bu ngudda yibendenghke, minj yibenmunkewe bininj ngardduk, wanjh yina, ngaye ngamirndemunkewe djoned nawern kamirndebebmerren kore ngudda dja bininj ke nawu ngundimarnedurrkmirri, dja bininj ke rowk, dja kore kunrurrk ngudberre. Kaluk kunrurrk rowk ngudberre

nawu Egyptbeh wanjh kamirndebarlme djoned, dja kore kurorre wanjh kabolkbalkhme rowk nawu djoned.

²² Dja bu kunmekbe marnekurduyime, wanjh ngaye mak ngabolklarlang kunred kabolkngeyyo Goshen kore bedda nawu bininj ngardduk kabirriini ngakurduyime kundjalbuyika bedberre. Kumekbe wanjh djoned minj kamirndebebmerren. Kuhni kaluk ngakurduyime ba bu ngudda Pharaoh kaluk yiburrbun bu ngaye wanjh Yawey ngahdjalni kondah kore kunred ke.

²³ Kuhni bu ngakurduyime wanjh yiman bebbehbeh ngabenbebbehkurme nawu bininj ngardduk dja nawu ngudda ke bininj. Kaluk malaywi kunukka ngaye ngakurduyime ngunwernhbukkankenh ngudda nawu Pharaoh." Kuhni bu Yawey ngunmarneyime ngudda nawu Pharaoh.' Kuhni yimarneyime nawu Pharaoh."

²⁴ Kuhni yimeng Yawey wanjh kaluk kunmekbe kurduyimeng. Nawern duninh djoned mirndebebmerriinj kore Pharaoh nuye kunrurrk, dja kunrurrk bedberre bininj nuye nawu birrimarnedurrkmirri, dja kore kubolkwarlah Egypt rowk, kaluk namekbe djoned wernhbolkwarrewong rowk.

²⁵ Wanjh kunu Pharaoh benbenekayhmeng Moses dja Aaron dja yimeng, "Ngurriray, ngurribun mayh nuye God ngudberre yiwarrudj ngurrimarnedi dorrengh kondah kore Egypt."

²⁶ Wanjh Moses yimeng, "Kunukka minj kunmak bu yimankek ngariyime, dja bininj ke nawu Egyptbeh kabirriwarnyak duninh bu ngad ngarribun mayh ngarriwon Yawey nawu God ngadberre. Wanjh bu yimankek ngad yiwarrudj ngarridi ngarrimarnebun mayh dorrengh ngarribun kore bininj nawu Egyptbeh ngandinan, minj nuk kunukka ngandidong kunwardde ngandikukkurrme.

²⁷ Kunu wanjh ngarridjalle kunkak danjbik kore kubolkdarleh, kaluk kumekbe ngarribun mayh nuye Yawey nawu God ngadberre. Kumekbe ngarikurduyime kore nungka kaluk kanwokrayekwon ngadberre."

²⁸ Wanjh kunu Pharaoh yimeng, "Ngaye munkewe ngudberre, ngurribun mayh nuye Yawey nawu God ngudberre ngurridi yiwarrudj dorrengh kore kubolkdarleh. Kundjalkudji, yuwn djarreh ngurrire. Dja yiwarrudj kandimarnedin ngaye dja ngurridjawa bu nganmarnebenngmidjan ngayekenh."

²⁹ Wanjh Moses yimeng, "Yina, ngaye ngabebme bawon ngudda, wanjh ngarri yiwarrudj nuye Yawey ngadjawan bu malaywi djoned kamirndedurnderren rowk, ngundibawon ngudda nawu Pharaoh, dja bininj ke nawu ngundimarnedurrkmirri, dja bininj rowk. Kunmekbe ngayime. Dja kundjalkudji yuwn yiyawoyhkurren Pharaoh, bu kandenghke ngad nawu bininj nuye, dja wanjh kanmunkewemen ba ngad ngarribun mayh nuye Yawey, yiwarrudj ngarridi dorrengh."

³⁰ Wanjh Moses bebmeng bibawong Pharaoh dja yiwarrudj di Yawey nuye.

³¹ Dja Yawey kurduyimeng nawu Moses bidjawam, benmirndebebkeng djoned bindibawong Pharaoh, dja bininj nuye nawu birrimarnedurrkmirri dja bininj rowk nuye, minj nawohkudji djoned diwirrinj.

³² Wanjh kuhni yiman djaldjamku, dja kuninjku warridj Pharaoh yawoyhkangerayekminj dja minj benmunkewemeninj bininj nawu Israel benkebmawahmeng.

Exodus 9:1-7

1 Wanjh Yawey bimarneyimeng Moses, yimeng, “Yiray yingimen kore Pharaoh dja yimarneyimen, Yawey nawu God ngadberre Hebrew bininj, kuhni wanjh kayime ke ngudda Pharaoh, ngunmarneyime, “Yibenmukewemen bininj ngardduk ba ngandimarnedi yiwarrudj.

2-3 Dja bu ngudda kandahme minj yibenmukewe, dja munguyh yibendenghke. Wanjh kanbekka, marneyime, ngaye Yawey kundjak kunrayek ngamunkewe kore mayh ngudberre nawu kamirnderri kore kabbal, kaluk djarrang, dja mayh nawern nawu donkey, camel, sheep dja goat.

4 Dja ngaye yiman bebbehbeh ngabekurrme mayh bedberre bininj nawu Israel benkebmawahmeng dja mayh ngudberre bininj nawu Egyptbeh. Kundjalbubuyika ngabenbenebebbemarnekurduyime, ba minj nawohkudji kawohdowerrren kore mayh rowk bedberre bininj nawu Israel benkebmawahmeng.

5 Dja ngaye Yawey ngarrungnameng malaywi, wanjh kunu ngakurduyime kondah kore kubolkwarlah Egypt.” Kuhni bu Yawey ngunmarneyime.” Kuhni bu Yawey biwokwong Moses bu bimarneyimeng Pharaoh.

6 Wanjh kuhni yimeng Yawey. Wanjh bu malaywi nungka kunihbu kurduyimeng. Mayh nawu bininj bedberre nawu Egyptbeh, wanjh dowerrinj rowk, dja nawu mayh bedberre bininj nawu Israel benkebmawahmeng, wanjh bonj, minj nawohkudji dowimeninj.

7 Wanjh Pharaoh benmunkeweng bininj, wanjh birrinang bu minj nawohkudji dowimeninj mayh bedberre bininj nawu Israel benkebmawahmeng. Kuhni wanjh yiman djaldjamku rerrih, dja Pharaoh djalyawoyhkangerayekni munguyh, minj benmunkewemeninj bininj nawu Israel benkebmawahmeng.

*Yawey Munkeweng Bulngwali Bu Benmayi Bininj Nawu Egyptbeh**Exodus 9:8-12*

8 Wanjh Yawey benbenamarneyimeng Moses dja Aaron, yimeng, “Nguneray kore kabirrikinje brick manbu kunrurrk kabirrimarnbun. Nguneray kumekbe kore kunak karung, dja ngunewohma kubid yikahwi kunyirrke manbu kahyo. Dja Moses ngudda kaddum yiburriwemen manekke kunyirrke bu Pharaoh kanan.

9 Wanjh kaluk kayimerran kundjulng manbu kabolkbarrkbun kore kubolkwarlahkenh ngarre kubolkwarlah Egypt. Manekke kundjulng kaluk kamarnburren bulng. Wanjh kabirrimokmen nawu bininj dja mayh kore kubolkwarlah Egypt rowk.”

10 Wanjh kunu benemey kunyirrke manbu yoy kore brickskenh birrikinjeyi, dja benewam benedanginj kore Pharaoh kumirrre nuye, dja Moses burriweng kaddum, wanjh manekke kunyirrre yimerranj bulng, dja benmarnbom bininj dja mayh birrimokminj dja moknudminj.

11 Dja bininj nawu birriburrbuni kunkurdang, bu bulng benmey, wanjh kunmekbekenh kunu bedda minj baleh birriyimeninj yimanek birribebeninj birridangimeninj kore Moses. Dja bulng birrikarmi bedda nawu birrikurdangni, dja mak birriwern rowk bininj nawu Egyptbeh.

12 Kuhni wanjh yimanekni djamku dja Yawey biyawoyhkangerayekwong, wanjh nungka Pharaoh minj benbenewokmarrkmayi bu Yawey biyingkihmarneyimeng Moses.

*Yawey Munkeweng Namarrkon Dja Mankurrk Manyawkihkimuk.**Exodus 9:13-35*

13 Wanjh Yawey bimarneyimeng Moses, yimeng, "Malaywi wanjh yimalaydolkkkan bu kumkabel djarreh, dja yiray yimarnedangimen Pharaoh kumirrk nuye dja yimarneyimen bu gaye Yawey nawu God bedberre nawu Hebrew bininj, wanjh ngayime, 'Yibenmunkewemen bininj ngardduk ba ngandimarnedi yiwarrudj.

14 Dja bu kandahme, wanjh bolkkime gaye marnemunkewe kunbubuyika rowk nawu kunmurrngrayek nawu yiman ngunkangebarrhke ngudda Pharaoh, dja bininj ke nawu ngundimarnedurrkmirri, dja bininj ke rowk. Kuhni ngakurduyime ba ngudda yinjilngwarremen dja yiburrbun bu minj nangale nabuyika god karri kore kurorre rowk nawu yiman gaye Yawey nganerohrok.

15 Dja yina! Bu gaye ngadjareniwirrinj wanjh korroko ngamunkewemeninj kundjak ngurridjaldowimeninj, ngudda dja bininj ke rowk ngur-yiakmeninj.

16 Dja gaye bawong ngudberre ngurridarrkid ba bu bukkan ngardduk kundulkarre. Gaye bawong ngudberre ngurridarrkid ba kungey ngardduk kandingeyyolyolme kandiwobekkan kore kubolkwarlahkenh rowk.

17 Ngudda wanjh munguyh yikimukworren, dja minj yibenmunkewe ngardduk bininj.'

18 'Wanjh kanbekka, marneyime. Malaywi bu yiman kunihbu karrungdi gaye ngamunkewe mankurk mandjalkimuk duninj yiman kunwardde kahdjakdung. Kadjaldjakdung yiman minj korroko djakduyi kondah kore Egypt.

19 Kunu wanjh yibenmunkewemen bininj kabirrimang mayh dja mak yehyeng rowk nawu karri kore kabbal, kabirringimowon kore kudjurlemek. Kumekke yikurduyimen dja bininj dja mayh rowk nawu kabirridjaldi kore kabbal nawu minj nangale kabindimang kabindikan kured, wanjh mandulumuk mankurk kaluk kabenbun yiman kunwardde kadjakdung, dja kabirridowen rowk, bininj dja mayh.'

20 Kuhni yimeng Yawey, wanjh kunu Pharaoh nuye bininj nawu birrimarnedurrkmirri, nawu birriwokkengemi Yawey nuye kunwok, bedda wanjh bindimarneyimi bininj bedberre nawu bindimarnedurrkmirri dja mak mayh nawu bedberre birrikelerlobmerreni rowk kore kururk.

21 Dja birribuyika bininj nawu minj birriwokwoybukwoyi Yawey nuye kunwok, bedda wanjh birrimarlemangi dja bindidjalbawoni bininj nawu bindimarnedurrkmirri dja mayh bedberre, kore kabbal bindidjalbawoni.

22 Wanjh bu malaywibuyikani, Yawey bimarneyimeng Moses, yimeng, "Mah wanjh, yibidwayhmen kaddum ba dulmuk duninj mankurk kadjakdung kore kubolkwarlah Egypt rowk, kabenbun bininj dja mayh dja mak manme rowk manbu birridudji kore kabbal, kabun rowk kore kubolkwarlah Egypt."

23 Wanjh Moses kundulk nuye dulkwayhkeng kaddum, wanjh Yawey munkeweng namarrkon nawen dja mankurk mandulumuk, dja namarrkon bolkdongi bu kunak dorrengh. Wanjh Yawey marnbom dulmukminj duninj mankurk djakduy kore kubolkwarlah Egypt.

24 Kaluk dulmuk duninj mankurk yiman kunwardde djakdungi, dja namarrkon djahdjalmayhkeyi yiman kunak rerrih munguyh kore mandulumuk mankurk bu warrawarrhmi. Nawu mankurk wanjh wernhdulumukminj duninj djahdjaldjakdungi bulkkidj yiman minj korroko djakduyi kore kubolkwarlah rowk Egypt kunkuyeng kore kerrngehkenh duninj dja mak bolkkime.

²⁵ Manekke mankurk bom yakwong yehyeng rowk nawu dingihdi kore kabbalubuyika kore kubolkwarlah rowk kore Egypt, kaluk bininj dja mayh benbom dja mak bom yakwong manme manbu birridudji kore kabal, dja dulkdoy dulkbakkabakkeng kundulk rowk manbu dulkdingihdi kore kabbalubuyika rowk.

²⁶ Dja kudjalbolkkudji kore kunred Goshen kore bininj nawu Israel benkebawahmeng birrihni, kumekbe minj djakduyi mankurk.

²⁷ Wanjh Pharaoh bimunkeweng bininj benbenekayhmeng Moses dja Aaron dja benbenemarneyimeng, yimeng, "Kuninjkunu wanjh ngaye kunwarre ngayimeng. Yawey nungka kunmak kahdjalkurduyime, dja ngaye dja bininj ngardduk ngarrihkurduyime kunwarre.

²⁸ Ngunedjawa Yawey dja ngarriwunjibmingarlmeng bu namarrkon nakihkimuk dja mak mandulmuk duninjh mankurk. Ngaye munkewe ngudberre, dja minj mak ngurrini kondah."

²⁹ Moses bimarneyimeng, yimeng, "Bu ngaye ngabebme kondah kubolkkimukbeh, wanjh kundjalmekbe rerrih ngabidwayhme kore Yawey, ngadjawan, wanjh namarrkon kangurdme, dja mandulmuk mankurk minj kayawoyhdjagung. Kunmekbe ngakurduyime ba ngudda kaluk yiburrbun bu kondanjkuu kunred wanjh Yawey nuye.

³⁰ Dja bonj, kuhni yiman djaldjamku rerrih dja ngudda dja bininj ke nawu ngundimarnedurrkmirri, ngaye ngaburrbun bu minj ngurribangmekengeme Yawey nawu God." Kuhni Moses bimarneyimeng Pharaoh.

³¹ Mahni mankurk mandulmuk benmarnewarrewong manbu dudjindi. Yikahwi manbu dudjindi manmim manbu kangeyyo flax dja barley, makka wanjh mankurk djalarrewong duninjh. Dja barley makka wanjh mimbebmerrinj, dja flax manu wanjh karrmi mannguy. Kunmekbekenh kunu wanjh warreminj.

³² Dja manmim manbu wheat dja makka wanjh yerre kadjordmen wanjh kunmekbekenh kunu manekke manmim mandjalmakni, minj mankurk warrewoyi.

³³ Kaluk Moses wanjh bebmeng bolkbawong kubolkkimuk kore Pharaoh ni, dja wam bidwayhmeng kore Yawey, yiwarrudj di, wanjh namarrkon dja mandulmuk duninjh mankurk djalnngurdmeng rowk, minj djakduyi kore kubolkwarlah Egypt.

³⁴ Kuhni wanjh yiman djamku rerrih dja bu Pharaoh nang ngurdmeng rowk mandulmuk mankurk, dja mak namarrkon, wanjh nungka yawoyhyimeng kunwarre, dja munguyh djalkangerayekworrinj. Nungka dja mak bininj nawu birrimarnedurrkmirri birriyawoyhkangerayekworrinj.

³⁵ Wanjh kuhni Pharaoh kangerayekni dja minj benmunkewemeninj bininj nawu Israel benkebawahmeng. Kumekbe bu Yawey yingkihiyiming Moses biwokwong.

10

Yawey Munkeweng Djadedde Nadjalmirndewern Duninjh

Exodus 10:1-20

¹ Wanjh Yawey bimarneyimeng Moses, yimeng, "Yiray, yingimen kore Pharaoh, dja ngaye ngabenkangerayekwong nungka dja bininj nuye nawu kabirrimarnedurrkmirri. Kuhni ngakurduyimeng ba ngaye ngabenbukkan kuhni bu kunbubuyika. Kundulkarre dorreng ngardduk nawu ngakurduyime kore bedda,

2 dja mak ngakurduyime ba ngudda ngurrbenmarneyime bebeywurd dja mak mawahmawah, ngurrbenmarneyime bu baleh ngaye ngakurduyime ngabenyemikan bininj nawu Egyptbeh, dja bu baleh manu kunbubuyika bu ngakurduyime kore bedda ngabenbukkankenh. Ngudda rowk kaluk ngurriburribun bu ngaye wanjh Yawey.”

3 Wanjh Moses dja Aaron benewam benengimeng kore Pharaoh dja benemarneyimeng, “Kuhni kayime Yawey nawu God ngadberre nawu Hebrew bininj, wanjh yimeng, Yiddok munguyh ngudda kandahme bu minj yimarladjworren kore ngaye nawu Yawey? Yibenmunkewemen bininj ngardduk ba ngandimarnedi yiwarrudj.

4 Dja bu ngudda kandahme, minj yibenmunkewe bininj ngardduk, wanjh kuhni ngaye marneyime, malaywi ngaye ngamunkewe djadedde kore kunred kubolkwarlah ke,

5 kaluk kabirribolkbarmel rowk kubolkwarlah ba bu minj nangale kawohbolknan, dja kabirringun kabirriyakwon manbu dulmuk mandjewk minj yakwoyi, dja kundulk rowk ngudberre nawu karri kore kabbal wanjh kabirringun kabirriyakwon.

6 Kaluk kabarlmerren nawu kunrurrk ke dja kunrurrk bedberre nawu ngundimarnedurrkmirri, dja kunrurrk bedberre bininj rowk nawu Egyptbeh. Kabolkyimerran yiman minj korroko birrinayi nawu kornhkorokumo dja mawahmawah ngudberre. Minj birrinayi bu kerrngehkenh birrimwam dja minj mak yerre birrinayi, kaluk bolkkime kabirridjalnan. Mah, kuhni bu ngunmarneyime ngudda nawu Pharaoh.” Bu kuhni Yawey biwokwong wanjh Moses bimarneyimeng Pharaoh. Kaluk bu kuhni bimarneyimeng, wanjh nungka balborledmeng bebmeng bibalbawong Pharaoh.

7 Wanjh bininj nawu birrimarnedurrkmirri Pharaoh birrimarneyimeng, “Kaluk baleh kayime nanih bininj yibawon kunyid kamarnbun kadberre? Yibenmunkewemen djalbininjwi ba kabirridi yiwarrudj nuye Yawey nawu God bedberre. Minj nuk yibangmeburribun bu Egypt djalbolkwarreminj?”

8 Wanjh kunu bininj nuye Pharaoh bindimey Moses dja Aaron, bindimdurndiweng kore Pharaoh, dja nungka benbenemarneyimeng, “Bonj. Ngurriray, ngurrimarnedi yiwarrudj Yawey, nawu God ngudberre. Dja mak ngurringalehgale ngurridjarrkre?”

9 Wanjh Moses yimeng, “Ngad wanjh ngarridjalmulilmang Yawey, wanjh kunmekbekenh kunu ngarriwern ngarrire, wurdwurd dorrengh dja kohbakohbanj, kaluk ngarridjarrkre bebeywurd dja ngalbebeywurd dorrengh, dja mak mayh ngadberre nawu ngarrbenmirndekarme.”

10 Wanjh Pharaoh kurrinj bu yimeng, “A, yoh! Kamak ngurriray mak Yawey ngurriray, ngudda dja wurdwurd dja daluhdaluk ngudberre.” Kuhni bu yimeng. Dja burrkyakni. Nungka burrburreni bu kurreni dja kunyid karrmi bedberre bu kunmekbe benmarneyimi. Wanjh benmarneyimeng, “Dja burrkyak, ngaye ngaburribun ngudda ngurridjare kunyid ngurringalke.

11 Ngurrbenbawo wurdwurd dja daluhdaluk. Djalbininjwi ngurriray ngurridi yiwarrudj Yawey nuye, dja kunmekbe wanjh ngurridjare.” Kunmekbe yimeng Pharaoh dja benbenekuburriweng kore nungkahbeh nawu Moses dja Aaron.

12 Wanjh Yawey bimarneyimeng Moses, yimeng, “Yibidyrriyongimen ba bu yibidwaymen kore kubolkwarlah Egypt djadeddekenh, ba kabirrimirndebeberren kore kubolkwarlah Egypt, kabirringun kabirriyakwon manme manbu mankurk minj yakwoyi.”

13 Wanjh Moses dulkwayhkeng kundulk nuye kaddumkah kore kubolkwarlah Egypt, dja Yawey marnbom kunmayorrk koyekbeh kumwam, kumekbe kunbarnangarra dja mak kumunun djahdjalley kore kubolkwarlah Egypt munguyh, dja bu kukabel manekke kunmayorrk benmirndeyibeb-meng djadedde.

14 Dja nawu djadedde mirndebemerrinj kore kubolkwarlah Egypt rowk, dja birriyerrkang kore kunred rowk Egypt, kaluk nadjalmirndewern duninj, mirndeyimi yiman minj nangale nayi korroko, dja minj nangale kayawoyhnan bu rerrererreh,

15 dja namekbe djadedde djalbolkbarrkbom kubolkwarlah rowk, bolkyimerranj yiman bolkburlerranj rerrih, dja birringuneng manme rowk kore kumekbe kubolkwarlah dja mak manme manbu di kore kundulk manbu dulmuk mandjewk minj yakwoyi. Minj manwohkudji manme diwirrinj kaluk kundulk dja manbuyika manme manbu di kore kabbal, djalyakayakminj kore kubolkwarlah Egypt rowk.

16 Wanjh Pharaoh djawerrkwehwerrkwerrk benbenekayhmeng Moses dja Aaron, dja yimeng, "Ngaye kunwarre ngayimeng nuye Yawey nawu God ngudberre, dja mak ngudda warridj benbenemarneyimeng kunwarre.

17 Wanjh kunwohkudji kandimarnebengmidjdan dorreng kunwarre ngardduk, dja ngunedjawa Yawey nawu God ngudberre kadjalmanng kakan kuninjkuu kundulmuk kundjak ngayebeh bu nganhbunkenh."

18 Wanjh Moses bebmeng bibawong Pharaoh dja bidjawam Yawey.

19 Wanjh Yawey borledkeng kunmayorrk, wanjh mayorrkkimukminj dja borledminj bu kumwam karrikadbeh, dja benmirndewayhkeng djadedde benmirndemunkeweng kore kurrula manbu kabongeyyo Manborodjme. Minj nawohkudji djadedde wohdiwirrinj kore kumekbe kubolkwarlah Egypt rowk.

20 Dja yiman djaldjamku rerrih dja Yawey bikangerayekwong Pharaoh, dja nungka Pharaoh minj benmunkewemeninj bininj nawu Israel benkeb-mawahmeng.

Yawey Marnbom Kunkak Manbu Mandulmuk Bu Bolkbarrkbom Kubolkwarlah Egypt

Exodus 10:21-26

21 Wanjh Yawey bimarneyimeng Moses, yimeng, "Yibidwayhmen kaddum ba kakakmankan mandulmuk kunkak kore kubolkwarlah Egypt."

22 Wanjh Moses bidwayhmeng kaddum, dja kakmankang kunkak manbu kundulmuk. Djalkakyoy kore kubolkwarlah Egypt rowk bu kunbarnangarra danjbik.

23 Dja bu kumekbe kunbarnangarra danjbik bininj nawu Egyptbeh minj birrinarrimeninj, dja mak minj nangale dolkkayi bu bebmeninj kuberrk kore birrini. Dja bininj nawu Israel benkebawahmeng rowk wanjh bendjalmarnebolkwolkani kore kunred kumekbe kore birrini.

24 Wanjh Pharaoh bikayhmeng Moses, yimeng, "Bonj wanjh ngurriray, ngurrimarnedi yiwarrudj Yawey, dja kamak wurdwurd warridj ngurridjarrkray dja ngalbihbininj kobeng warridj. Dja kundjalkudji, mayh ngudberre nawu ngurrbenmirndekarme, wanjh ngurrbenbawo, birrinin kondah."

25 Dja Moses yimeng, "Kunbuyika mak marneyime. Kanwo mayh nawern ba bu ngarrimarneben ngarrimarnekinje bu ngarriwon Yawey nawu God ngadberre.

26 Ngad wanjh ngarridjalkan mayh rowk ngadberre warridj, minj mak nawohkudji mayh ngarriwohbawon kondah, dja ngarrikan nawu

ngarrimarnedi yiwarrudj dorrengh Yawey nawu God ngadberre. Dja minj ngarribangmehurrbun bu baleh nanu ngarribun bu yiwarrudjkenh Yawey nuyeu. Kaluk bu ngarribebme wanjh kunmekbe ngarriburrbun."

Moses Bibengdayhkeng Nawu Pharaoh

Exodus 10:27-29

²⁷ Kuhni wanjh yiman djaldjamku dja Yawey bikangerayekwong Pharaoh, dja nungka minj benmunkewemeninj.

²⁸ Wanjh Pharaoh bimarneyimeng Moses, yimeng, "Yidjallay, kanbawo ngaye. Dja yina, yinahnarrimen, yuwn yimdurndeng kanyawoyhkebnan, dja bu ngudda kanyawoyhkebnan wanjh kundjalmekbe kunbarnangarra rerrih ngaye wanjh bun, dja ngudda yirrowen."

²⁹ Wanjh Moses yimeng, "Kuhni bu ngudda yiyime kunukka wanjh kunwoybuk, ngaye minj yawoyhkebnan ngudda."

11

Yawey Benyngkihngdayhkeng Bininj Nuyeu Bu Kabenbunkenh Nawu Nawehwernwarre Rowk Kore Egypt

Exodus 11:1-10

¹ Wanjh Yawey bimarneyimeng Moses, yimeng, "Kundjalwohkudji ngakurduyime ngabenbun Pharaoh dja bininj rowk kore nawu Egyptbeh, wanjh kumekbe kaluk rerrickah ngunmunkewe ngudberre rowk, dja bu kunmekbe kayime ngunmunkewe, wanjh ngundjurrkkan bulkkidj duninj.

² Wanjh bolkkime yibenmarneyimen bininj nawu Israel benkebmawahmeng, yibenmarneyimen bininj rowk dja daluk rowk kabindiyyidjawan bininj nawu Egyptbeh nawu kabindibebbehdarnhmarneni kabindiwon yehyeng namakmak nawu kabirridjongburrenkenh silver dja gold."

³ Kaluk Yawey benmarnebom bininj nawu Egyptbeh bu bindimarnekurduyimi kunmak nawu Israel benkebmawahmeng. Dja mak bininj nawu birrimarnedurrkmirri Pharaoh dja bininj rowk nawu Egyptbeh, bedda wanjh birriyimi bu nungka nawu Moses wanjh nakimuk dja nakuken duninj.

⁴ Wanjh Moses bimarneyimeng Pharaoh yimeng, "Kuhni Yawey ngunmarneyime, wanjh kayime ke, 'Bolkkime kukakburlhdjan bu ngaye nawu Yawey ngare kore ngurrihni kubolkwarlah Egypt,

⁵ dja nawu nadjdjaman rowk kore kubolkwarlah Egypt wanjh kabirridowen. Ngaye ngaban nawu ngudda yibornag nadjdjaman ke, mak ngadjalle ngabenbun rowk nawu birrikihkkimuk birriwern, dja kaluk bedda dorrengh nawu bedman daluk nawu birrimarladj kabindimarnekurdkmirri birribuyika manmim kabirrimimberelhme, dja mak ngabenbun rowk nawu mayh nadjdjaman.

⁶ Dja kaluk bulkkidj duninj ngurrinalkbun kore kubolkwarlah Egypt rowk, ngurrinjilngwarremen ngurriwernhnalkbun yiman minj korroko ngurrinalkbuyi, dja minj mak rerre ngurrinalkbun yiman kunihbu ngurriyime.

⁷ Dja bedda nawu Israel benkebmawahmeng, ngaye minj kuninjkuu ngabenmarnekurduyime. Djal burrkyak kuhni. Minj njale mak kakurduyimerran bedberre. Kuhni ngaye nawu Yawey ngakurduyime rowk, ba kaluk ngurriburrbun bu ngaye bebbehbeh bebbehmarnekurduyime ngudda nawu Egyptbeh bininj, dja bininj nawu Israel benkebmawahmeng.' Kuhni bu Yawey ngunmarneyime ngudda nawu Pharaoh."

⁸ Mak Moses bimarneyimeng nawu Pharaoh, yimeng, "Nanih rowk nawu ngundimarnedurrkmirri Pharaoh wanjh kabirrimre kore ngaye ngarri, dja kanjdji ngandimarneboddan, ngandimarneyime, 'Ngurrray! Ngudda dja bininj rowk nawu ngundikadjung.' Wanjh rerrikah bu kunmekbe kabirriyime ngardduk, wanjh ngare." Bu kuhni Moses yimeng rowk, wanjh kangewurhlmi duninj dja bebmeng bibawong Pharaoh.

⁹ Kaluk Yawey biyingkihmarneyimeng Moses, yimeng, "Pharaoh minj ngunbekkan. Kuhni kayime ba bu bolkkime ngaye ngawernwon kunbubuyika kundulkarre dorrengh nawu ngakurduyime kore Egypt."

¹⁰ Moses dja Aaron benekurduyimeng rowk kuhni bu kunbubuyika nawu kundulkarre dorrengh kore Pharaoh kumirrk nuye, dja Yawey bikangerayekwong Pharaoh, dja nungka minj benmunkewemeninj bininj nawu Israel benkebmawahmeng bu birribolkbawoyi kubolkwarlah nuye.

12

Yawey Benwong Bininj Nawu Israel Benkebmawahmeng Mulil Manbu Nungka Bendarrkidbawongkenh

Exodus 12:1-13

¹ Wanjh Yawey benbenemarneyimeng Moses dja Aaron kore kubolkwarlah Egypt beneni, yimeng,

² "Maninjmanu dird wanjh kayimerran ngudberre kaluk karrokme kore dirdbubuyika ngarre, bu kayimerran munguyh munguyh kore mandjewk nakerrnge.

³ Ngurrbenmarneyimen birridjalwern rowk bininj nawu Israel benkebmawahmeng, bu birridjarrkmirndemornnamerrinj kore yiwarrudj kore kunbarnangarra ten ngarre maninjmanu dird. Wanjh birribebbehma mayh yaw* kaluk bedberre nawu kabirridjarrkyo, kaluk nakudji mayh djarrkbedberre nawu kunrurrkkudji kabirridjarrkyo.

⁴ Dja bu yikahwi nawu kabirridjarrkyo minj birriwern, minj kabiringon kabirriyakwon mayh yaw, wanjh kunu birribuyika nawu kabindarnhmarneyo wanjh birridjarrkma nakudji mayh yaw, dja birrimirnderohrokmerrimen nawu kabirridjarrkngun kabirriyakwon, wanjh birrimekbe birridjarrkma mayh yaw.

⁵ Dja nawu lamb kaluk nadjalmaknin ngurribebbehma minj kakarrme kunmok, kaluk narangem nawu nakudji mandjewk nuye, kaluk sheep yaw dja goat yaw.

⁶ Dja namekbe mayh yaw ngurridjalbebbekharmen kaluk bu fourteen kunbarnangarra ngarre maninjmanu dird, wanjh kumekbe ngurridjalwern bininj nawu Israel ngunkebmawahmeng rowk ngurrimirndemornnamerren yiwarrudj, dja ngurrbenbu mayh yaw ngudberre bu kabalbolkmununen.

⁷ Wanjh yikahwi kunkurlba ngurrima ngurridelkke kururrkdangmayekenh ngarre kunrurrk kore ngurringon nawu mayh. Ngurribaru kunkurlba kore kundulk bokenh manu kadjabdi kunrurrkdangmayekenh, dja manbuyika kundulk manbu kaddumkah karrulkyirriyo kururrkdangmaye ngarre.

⁸ Mayh yaw wanjh ngurrikerribu dja ngurrikanjngu kundjalmekbe kumunun rerrih, ngurringon mandulmuk kandidjdjawa dorrengh, dja warridj manworrbang kunwor.

* 12:3 Kunubewu sheep yaw nawu lamb, dja nuk nenikud yaw.

9 Yuwn ngurriwohngun mankanjuk, dja yuwn mak ngurrikinje kore kukku, dja mandjalkerrikenh ngurringu. Kaluk ngurringun kunkodj, kundad, kunnjam, kundiw, kundayken, dja kundurddu dorreng.

10 Yuwn bu yikahwi ngurriwohbawon malamalaywi kawohyo, dja nawu kadjalwohoyo malamalaywi wanjh ngurridjalkanjakwo rowk kore kunak.

11 Kuninjkuwu wanjh ngurriyime bu ngurringun. Wanjh ngurridjongbuyindi ngurrirekenh, ngurringadmodukkarrimen dja mak ngurridengedjongbuyindi, dja kunkarndudj ngurrikarndudjkarren kubid dja djalwerrkwerck wanjh ngurringun. Mahni wanjh mulil ngardduk, ngaye nawu Yawey, dja ngurringun nawu mayh bu ngaye darrkidbawonkenh ngudberre.”

12 “Dja ngaye ngadjalle kore kubolkwarlah Egypt bu kunmekbe kumun, dja ngabenmarnebu rowk nawu nawehwernwarre rowk kumekbe kore kubolkwarlah Egypt, kaluk bininj dja mayh warridj nawu kelebuk, dja ngaye ngabendjadme ngabenbu nawu god nawarrewarre rowk bedberre bininj nawu Egyptbeh. Ngaye wanjh Yawey.

13 Dja mahni kunkurlba ngurribarungi, kaluk nganbukkenh ngudberre kore kunrurk ngurrini, dja bu nganan kunkurlba, ngaye darrkidbawon ngudberre, minj njale kundjak ngunmang ngunbunkenh bu ngabenbu nawu kabirrihni kore kubolkwarlah Egypt.” Kuhni wanjh Yawey benbenemarneyimeng Moses dja Aaron.

Yawey Benwong Mulil Manbu Buriddi Minj Kakarrme Manguklurlmikenh

Exodus 12:14-20

14 Wanjh Yawey benbeneyawoyhmarneyimeng, yimeng, “Kuninjkuwu kunbarnangarra wanjh kayimerran kunbarnangarra ngurriburrbunkenh munguyh, wanjh bu kuninjkuwu kunbarnangarra kandimulilmang ngaye nawu Yawey. Ngurrikarremarbu ba nawu yerreyerre kabirridangen kabirridjalmarbu kuninjkuwu kunbarnangarra ngandimulilmang djalmunguyh munguyh.

15 Bu seven kunbarnangarra kaluk ngurridjalngun mandulmuk kandidjdjawa, dja kunbarnangarra manbu karrokme wanjh ngurribebke manbu manguklurlmikenh, yuwn kayo kururk ngudberre. Dja nangale nawu kangun manbu kakarrme manguklurlmikenh bu kunmekbe seven kunbarnangarra rowk, wanjh namekbe nawu kangun ngurridjalbekemen, ngurribawo nadjalkudji nungandeleng kahdjalmi.

16 Kunbarnangarra manbu karrokme wanjh ngurrimirndemornameren bu kundjamun ngayekenh, dja bu seven kunbarnangarra ngurrimirndemornameren kundjamun bu ngayekenh nawu Yawey. Minj nangale kawohdurckmirri bu kunmekbe kunbarnangaradjamun bokenh, kundjalkudji ngurridjalmarbu manme manbu ngurringunkenh.”

17 “Ngudda kaluk ngurrimarbu mulil kandidjawakenh manbu mandulmuk, dja bu kuninjkuwu kunbarnangarra ngaye mirndebebekeng ngudberre kore ngurribebbehmirnderri kubolkwarlah Egyptbeh. Wanjh kunmekbekenh kunu ngurrikarremarbu kandimulilmang ngudda dja nawu rerrererre kabirridangen bedmanwali ngandimulilmang bu kuninjkuwu kunbarnangarra djalmunguyh.

18 Kaluk dird manbu karrokme wanjh bu kunbarnangarra fourteen bu kabaldungyibme, wanjh ngurringun. Mandulmuk kandidjdjawawi ngurridjalngun, kaluk ngurriburnbu bu kunbarnangarra twenty one, bu kabaldungyibme.

¹⁹ Bu kunmekbe kunbarnangarra seven yuwn mannguklurmlikenh kayo kore kunrurrk ngudberre, dja bu yimankek nangale kangun manbu kakarrme mannguklurmlikenh, wanjh ngurridjalbebkemen, ngurribawo nadjalkudji nungandeleng kahdjalni. Bu djamku namekbe danginj kore ngudberre, dja kunubewu nawokbuyika nawu kawohyo kore ngudda, wanjh kunu ngudda ngurridjalbebkemen.

²⁰ Minj njale ngurriwohngun manbu kakarrme mannguklurmlikenh, dja kore kunrurrk rowk ngudberre ngurridjalngu mandulmuk kandidjdjawa." Kuhni rowk Yawey benbenemarneyimeng Moses dja Aaron.

Moses Benmarneyimeng Kore Yawey Biwokwong Nuye.

Exodus 12:21-28

²¹ Wanjh Moses benkayhmeng rowk bininj nawu Israel benkebmawahmeng dabborrabbolk, dja benmarneyimeng, "Ngurridjarrngbu mayh yaw, nakudji ngurribebbehma ngudberre nawu ngurrimud nawu ngurrirohroke ngurridjarrkngun, wanjh ngurribu mayh yaw ngarre Yawey kandarrkidbawongkenh.

²² Dja ngurrimang kunworr manbu kangeyyo hyssop, dja manekke kunworr ngurridjuhke kore kunkurlba mayh nuye manbu ngurribodahkendoy kore djabirlana. Wanjh ngurridulkbarung kaddumkah kore ngurribalngimeng dja mak bokenh kurlirrih, ngurridulkbarung kunkurlba manbu kahyo kore djabirlana, dja mak minj nangale kabebme kururrkbehb bu kukakkuyeng.

²³ Dja Yawey kawohre kabenbun bininj nawu Egyptbeh, wanjh bu kanan kunkurlba kaddumkah kururrkdangmaye dja kore kurlirrih bokenh, wanjh kunu nungka karurrkdangmayeyurrhke ngudberre, dja kabirrahme nawu kabenbun bininj, ba minj kangimen kunrurrk ngudberre ngunbunkenh."

²⁴⁻²⁵ "Yawey ngunbolkerbebbom kubolkwarlah, dja nungka kaluk ngunbolkwon. Wanjh bu ngurribebme ngurribolkmgang kumekbe kubolkwarlah maninjmanu wanjh ngurrimarnbun, ngurrikarremarnbun ba munguyh ngurriburrbun mulil ngurrimarnbun kore ngaye marneyimeng, ngudda dja nawu ngurrbenkebmawahme djalmunguyh munguyh.

²⁶ Dja bu narahrangem ngudberre ngundidjawan kabirriyime, 'Baleh kakarreyime maninjmanu mulil ngurrimarnekurduyime nuye Yawey?'

²⁷ Wanjh bu kuhni kabirriyime, ngudda ngurrbenmarneyimen, 'Maninjmanu wanjh karriburrbun Yawey nuye bu kandarrkidbawongkenh. Karrikurduyimen bu nungka kanmarnerurrkyurrhke ngad kadberre kunrurrk, bininj nawu Israel kankebmawahmeng bu ngarrihni kore Egypt. Nungka benbom bininj nawu Egyptbeh dja ngad nawu kandarrkidbawong. Kunmekbekenh kunu karrbenbun nawu mayh.' Kuhni bu ngurrbenmarneyimen ngudberre narahrangem." Bu kuhni Moses yimeng rowk, wanjh bininj rowk bedda birridjudkurlmeng bu birriburlumi Yawey.

²⁸ Wanjh bedda bininj nawu Israel benkebmawahmeng birriwam birridjalkurduyimeng rowk nawu Yawey benbenewokrayekwong Moses dja Aaron.

Yawey Benbom Rowk Nawu Nawehwernhwarreni Kore Kubolkwarlah Egypt.

Exodus 12:29-32

²⁹ Kaluk bu kumununbulhdjarn Yawey benbom rowk nawehwernwarre kore kubolkwarlah Egypt, bibom beywurdwernwarre nuye Pharaoh nawu

wohrnani. Bendjalbom rowk nawehwernwarre. Kaluk bedda bedberre warridj nawu birridangbalhmiyindi kore kururrkmunun prison, benbom nawehwernwarre bedberre rowk bininj nawu Egyptbeh, dja mak nawehwernwarre rowk nawu mayh kelebuk benbom, wanjh birridowerrinj rowk.

³⁰ Wanjh Pharaoh dja bininj nuye nawu birrimarnedurrkmirri dja bininj rowk nawu Egyptbeh, wanjh birrikakdolkkarrinj dja birribebbehnalkbuni bulkkidj duninj kore kururrkbubuyika rowk kumekbe kore Egypt dja kore kururrkbubuyika bedberre nawehwernwarre birridoweng.

³¹ Bu kunmekbe kukak rerrih wanjh Pharaoh benbenekayhmeng Moses dja Aaron, wanjh benbenemarneyimeng, yimeng, "Bonj. Wanjh ngurridolka ngurriray kandibawo ngadberre, ngudda dja bininj nawu Israel benkebmawahmeng wanjh ngurriray ngurriddi yiwarrudj Yawey nuye bu ngudda nguneyimeng.

³² Ngurrbenmirndeka mayh bu ngudda nguneyimeng, dja ngurridjalaywi. Dja bu ngaye warridj, yidjawa Yawey bu ngandimarnekurduyime kunmak ngardduk."

Bininj Nawu Israel Benkebmawahmeng Birribolkbawong Kubolkwarlah Egypt.

Exodus 12:33-42

³³ Wanjh bininj nawu Egyptbeh bindidjurrkdjurrkwoni bininj nawu Israel benkebmawahmeng. Birridjareni bindimunkewemeninj djalwerrkewerrkewerrk bindimarnebolkbawoyi, kubolkgarlah bedberre, birriyiyeng, "Wardi ngarridowerrren rowk bu minj ngurrire!"

³⁴ Wanjh kunu bininj nawu Israel benkebmawahmeng birrimey buriddi bedberre bu minj birribangmekurrmeninj mannguklurilmikenh, dja minj mak birrikinjemeninj, dja djabirlana manbu kandidjawakenh birrikarmeninj wanjh birridukkang kore kumadj bedberre birringorrkang kukarlang.

³⁵ Dja bedda bininj nawu Israel benkebmawahmeng ngokko birrikurduyimeng warridj nawu Moses benmarneyimeng, ngokko bindidjawani bininj nawu Egyptbeh kabindiwon yehyeng namakmak nawu birridjongburreni silver dja gold, dja mak kunmadj.

³⁶ Yawey benmarnbom bininj nawu Egyptbeh bindimarneyimeng nawu Israel benkebmawahmeng kunmak, bindiyidjalyibawong rowk yehyeng nawu bindiyidjawam. Bu kuhni birriyiyimeng wanjh bininj nawu Israel benkebmawahmeng bindikukuyiyakwong bininj nawu Egyptbeh.

³⁷ Wanjh bedda bininj nawu Israel benkebmawahmeng birribolkbawong kubolkkimuk kabolkgneyyo Rameses. Kumekbe birrihni kore kubolkgwarlah Egypt. Birribolkbawong, birridjalwam kurrenge, wanjh birribebmeng kabolkgneyyo Succoth. Bedda wanjh birrimirndewernni. Kaluk bininjwi wanjh birridjalwernhmirndewernni duninj dja mak daluk dja wurdwurd dorreng birridjalwern, minj bindirohrokmeninj.

³⁸ Dja mak birrimirndebubuyika birridjarrkrey nawu birriwokbubuyika, dja mak birriwern duninj mayh bindimirndekani.

³⁹ Dja manekke buriddi nawu birrikukyibebmi Egyptbeh wanjh birrikinjeng mandulmuk buriddi, dja minj birribangmekurrmeninj manu mannguklurilmikenh bu Egypt birrihni, dja bindimunkeweng Egyptbeh djalwerrkwerrkni. Minj nangale birriwohmaddeyi, dja mak minj birriy-ingkihmarnbuyi manme bedberre.

⁴⁰ Kaluk mandjewk rowk bu bininj nawu Israel benkebmawahmeng birrihni kore Egypt wanjh 430 mandjewk.

⁴¹ Kaluk bu 430 mandjewk balyakminj wanjh kundjalmekbe kunbarnangarra rerrih, Yawey nuye bininj birriwern rowk birrimirndebebmeng bu birribolkbawoni kubolkwarlah Egyptbeh.

⁴² Kunmekbe kumunun wanjh Yawey djahdjalwohrnani kunkakkuyeng bennahnanikenh nuye bininj benbebkengkenh kubolkwarlah Egyptbeh, wanjh kunmekbekenh kunu kuninjkuu kumunun bininj nawu Israel benkebmawahmeng kabirrimarnbun kumunun bu minj kabirrikodjkeyo bu kukakkuyeng Yawey nuye. Kuhni birrikurduyimeng bedda dja nawu rerrererre kabirridangerren djalmunguyh.

Mankarre Ngarre Mulil Manbu Bendarrkidbawongkenh.

Exodus 12:43-51

⁴³ Wanjh Yawey benbenemarneyimeng Moses dja Aaron, yimeng, "Kuhni wanjh kakarreyime mulilkenh bu darrkidbawongkenh. Bininj nawu birriwokbuyika minj kabirringun, birribawo.

⁴⁴ Dja bininj rowk nawu ngurrbenmang bu bininj kabindiweykan, ngurrbenkukwon kunwardde, bedda nawu ngurrbenmang ngundimarnerdurkmirrikenh wanjh kamak kabirringun bu ngurrbenlakkayenwon werrek.

⁴⁵ Dja bininj nawu kabirridjalwohdi kore ngudda, bedda wanjh minj kabirringun. Dja mak bininj birriwokbuyika, nawu kabirrihdurkmirri ngudberre nawu ngurrbenkarremulewan, bedda warridj minj kabirringun.

⁴⁶ Dja bu ngurringun ngurridjalngun kore kundjalurrkkudji, yuwn ngurriwohkanjan kuberrk, dja yuwn nawohkudji kunmurrng ngurrimurrngbakke nanu mayh nuye ngurribun.

⁴⁷ Ngurridjalwern rowk bininj nawu Israel ngunkebmawahmeng wanjh ngurringun mulil."

⁴⁸ "Dja bu bininj nawu birriwokbuyika kabirrihni kore ngudda, dja kabirridjare mulil ngardduk ngurridjarrkngun, kore ngaye Yawey dar-
rkidbawongkenh, wanjh ngurrbenlakkayenwo narahrangemwi bedberre rowk, dabborrabbolk nawu binihbininj, dja mak nawu wurdwurd bedberre. Wanjh kunu bedda ngurriraworren ngurringun mulil. Bu bedda kabirriyimerran yiman bininj rerrih nawu birridanginj kore ngudda. Dja bininj nawu minj nangale bilakkayenwoyi wanjh yuwn nawohkudji kore bedda kaluk kangun.

⁴⁹ Kaluk mankarrekudji ngudberre rowk nawu ngurridanginj kured dja nawu kabirridjalwohni kore ngudda." Kuhni bu Yawey benbenemarneyimeng Moses dja Aaron.

⁵⁰ Wanjh bininj nawu Israel benkebmawahmeng rowk kunmekbe birrikurduyimeng. Birridjalkurduyimeng bu Yawey benbenewokrayekwong Moses dja Aaron.

⁵¹ Dja bu kundjalmekbe kunbarnangarra rerrih Yawey benmirndebebkeng kubolkwarlah Egyptbeh dja namudbubuyika birribebbehrey.

13

Nawu Yawey Kabenmarnbun Nawu Nawehwernwarre Rowk Bu Kabirriyimerran Djal Nungan Nuye

Exodus 13:1-2

1-2 Yawey bimarneyimeng Moses, yimeng, "Nawu nawehwernwarre rowk ngurrbenmarumbu nadjamun ngardduk. Nawu nayungkih karrangen ngudberre rowk ngudda bininj nawu Israel benkebmawahmeng wanjh ngayeman ngardduk, bininj dja mak mayh kelebuk."

³ Wanjh Moses benmarneyimeng bininj nawu Israel benkebmawahmeng, yimeng, "Kuninjkuu kunbarnangarra ngurridjalburru. Kumekbe kunbarnangarra bu karribebmeng Egyptbeh, karribebmeng kubolkwarlahbeh kore karrbenharnedurrkmirri yiman bu karribongdi rerrih. Dja nungka Yawey kungudj nuye kanbekkeng kunmekbekenh kunu ngurridjalburru bu munguyh. Wanjh yuwn njale ngurringun buriddi manbu kakarrme mannguklurmlikenh.

⁴ Karribawon Egypt bolkkime kuninjkuu kunbarnangarra kore maninjanu dird manbu karrokme manbu kangeyyo Abib.

⁵ Ngurriburru bu Yawey kunwok kunrayek duninh nuye wokkurrmerinj korroko. Benyngkihbolkerrebbom mawahmawah, yimeng bu kaluk kanbolkwon kunbolkmak kore manwern manme kadjordmen. Kaluk wanjh Yawey ngunyibeme ngudberre kumekbe kunbol kubolkwarlah. Bolkkime wanjh kumekbe kunbol bedberre nawu Canaan benkebmawahmeng, dja nawu Heth benkebmawahmeng, dja nawu kabirribebbehgeyyo Amor dja Hiv, dja nawu birrikang kunred Jebus. Wanjh bu kumekbe Yawey ngunyibeme, ngurrimarabu kuhni mulil bu kuninjkuu dird manbu karrokme kudjewkbubuyika rerrih."

⁶⁻⁷ "Bu seven kunbarnangarra ngurringu buriddi manbu minj kakarrme mannguklurmlikenh, dja bu kunbarnangarra seven kayakmen, wanjh mulil ngurrimarabu nuye Yawey. Bu kunmekbe seven kunbarnangarra rowk ngurringun mandulmuk buriddi manbu minj kakarrme mannguklurmlikenh, dja kore kubolkwarlah rowk yuwn kawohyo manu mannguklurmlikenh manme, dja mak buriddi manbu kakarrme mannguklurmlikenh.

⁸ Dja bu ngurrimarabu manu mulil ngurrbenmarneyimen bebeywurd ngurriyimen, 'Kuhni karrikurduyime karriburrukenh bu baleh Yawey kanmarneyimeng bu nungka kanbekkeng Egyptbeh.'

⁹ Kunmekbe ngurriyime dja maninjanu mulil wanjh yiman rerrih manu kawohbimdi kubid ngudberre ngunbukkankenh dja mak kawohbimdi kumilh ngunbengdayhkekenh ba Yawey nuye mankarre ngurriburru ngurringeyhnguybu dja nungka Yawey kanbekkeng kadberre nungka kungudj nuye.

¹⁰ Kunmekbekenh kunu wanjh maninjanu mankarre mulilkenh karriburru. Karrimarabu mulil yerreyerre kudjewkbubuyika bu kuninjkuu dird." Kuhni rowk bu Moses benmarneyimeng bininj nawu Israel benkebmawahmeng.

*Moses Benbukkang Kore Mankarre Manbu Nawehwernwarrekenh.**Exodus 13:11-16*

¹¹ Wanjh Moses benmarneyimeng, yimeng, "Kaluk Yawey ngunyibeme ngudberre kore kunmekbe kubolkwarlah bedberre nawu bindimarneyimi bininj nawu Canaan benkebmawahmeng. Kumekbe bu nungka Yawey kunwok kunrayek nuye wokkurrmerinj, kanbolkerrebbom kadberre, dja warridj mawahmawah dorreng kadberre. Wanjh kaluk bu Yawey ngunbolkwon.

12 Wanjh ngurriwo nayungki rowk nawu karrangen. Nawehwernwarre rowk nawu narahngem nawu mayh kelebuk ngudberre, bedda wanjh kabirridjalyime nungka Yawey nuye.

13 Dja nawu donkey nawernwarre ngurriyidurndiwemen ngudberre, ngurribidyimang Yawey bu ngurriwon sheep yaw, dja bu minj ngurridurndiwe nawu donkey wanjh ngurridjudbakkemen. Dja nawu nawehwernwarre nawu bebeywurd ngudberre ngurrbenbidyima Yawey ngurbenyikarremulewa ngurbendurndiwemen ngudberre.”

14 “Dja bu yerrih bu bebeywurd ngundidjawan bu njalekenh kuhni ngurrikurduyime, wanjh ngurrbenmarneyimen, ‘Yawey kungudj nuye kanbekeng Egyptbeh kore karrihbongdi.

15 Dja bu Pharaoh djahdjalkangerayekni kandahmi, minj kanmunkewemeninj, kunu wanjh Yawey benbom rowk nawehwernwarre kumekbe kore kubolkwarlah Egypt, kaluk nawehwernwarre bedberre nawu bininj dja mak mayh kelebuk. Wanjh kunmekbekenh kunu ngad karribun mayh narahngem nawu nayungki karrangen, karribun, karrikinje Yawey nuye. Dja nawu nawehwernwarre nawu bebeywurd kadberre bedda wanjh karbenyikarremulewan karribenbidyimang Yawey karribendurndiwe kadberre.

16 Kuhni karrikurduyimen wanjh yiman rerrih manu kawohbimdi kubid ngudberre ngunbukkankenh dja mak kawohbimdi kumilh ngunmarnemulewankenh bu Yawey kanbekeng Egyptbeh kungudj kunkimuk nuye.’ Kuhni bu ngurrbenmarneyime nawu bebeywurd ngudberre.”

Yawey Benmikani Bininj Nawu Israel Benkebmawahmeng.

Exodus 13:17-22

17 Kuhni wanjh kayolyolme bu Pharaoh benmunkeweng bininj nawu Israel benkebmawahmeng, God benmikang kore kubolkdarleh djarreh, dja bu manbolh manbu darnkih minj benmikayi dja wardi bindinarnebebebeninj bininj nawu Philistiabeh. Dja bu birriburrimeninj wanjh God yimerrinj, “Wardi bininj nawu Israel benkebmawahmeng kabirrimayaliborledme kabirridurdeng Egypt.”

18 Wanjh kunmekbekenh kunu God benmikang djarreh kore manbolh manbu kare kore kubolkdarleh, kadjalle kore darnkih kurrula kabongeyyo Red Manbokurlba*. Bininj nawu Israel benkebmawahmeng birribolkbawong Egyptbeh birrikani nawu bindibunikenh birribuyika nawu bindidabkemeninj.

19 Wanjh bu Moses bolkbawong Egypt, wanjh kang Joseph nuye kunmurrng dja Joseph korroko wokkurmerrij kunwok kunrayek bedberre bininj nawu Israel benkebmawahmeng, kuhni wanjh yimeng, “Woybukkih wanjh God kaluk karrire ngunbidyikarmekenh, wanjh kunmekbe kandidjalmurrngka bu ngurrire kondahbeh.”†

20 Bu bininj nawu Israel benkebmawahmeng birribolkbawong Succoth wanjh birriwohyonginj kabolkngeyyo Etham kore darnkih kubolkdarleh.

21 Bu kunbarnangarra yarrkka Yawey benmarnedokmi kore kungol manbu nungka djabnameng kumirrk bedberre benmikanikenh, dja bu kumunun yimerrangeni nungka benmarnedokmi, rungi yiman kunak manbu nungka djabnameng benmarnebolkwolkani ba bu birrirawinj kunbarnangarra dja mak kunkak.

13:12 Ngurrina Luke 2:23 * 13:18 Mahni kurrula kakarrme kungeybuyika yiman “kurrula kore kurralkkuyeng kawernmerren”. † 13:19 Ngurrina warridj kore Genesis 50:25

²² Dja manekke manu kungol manbu djabnameng minj benwohbawoyi bu kunbarnangarra yarrkka. Dja bu kunkak yarrkka, wanjh manbu kunak minj benwohbawoyi, dja munguyh djahdjaldokmi kumirrk bedberre bininj nawu Israel benkebmawahmeng.

14

Yawey Benwokrayekwong Bininj Nawu Israel Benkebmawahmeng Kore Yingkihkarremarnbom

Exodus 14:1-4

¹⁻² Wanjh Yawey bimarneyimeng Moses, yimeng, “Yibenmarneyimen bininj nawu Israel benkebmawahmeng kabirridurndeng kabirriyo darnkih kabolkngeyyo Pi Hahiroth, kubulkayh ngarre kabolkngeyyo Migdol dja Manbokurlba. Birriyuwn kurrula darnkih borledmikenh ngarre kabolkngeyyo Baal Zephon.

³ Wanjh Pharaoh kaluk kayime bu ngudda bininj nawu Israel ngunkebmawahmeng ngurridjalwakhun, dja minj ngudda baleh ngurriyime, kubolkdarleh ngunbalhmeng ngudberre.

⁴ Kunmekbe nungka kayime, dja ngaye Yawey ngakangerayekwon dja nungka ngunkadjung ngudberre. Kaluk bu ngaye ngabenbun Pharaoh dja miwadj nuye rowk wanjh ngaye ngangeykukenmen, dja kumekbe wanjh bininj nawu Egyptbeh kaluk kabirriburrhun bu ngaye Yawey.” Wanjh bininj nawu Israel benkebmawahmeng birrikurduyimeng bu nungka yimeng bedberre.

Pharaoh Dja Bininj Nuye Bindikadjuy Bininj Nawu Israel Benkebmawahmeng

Exodus 14:5-14

⁵ Kaluk bu nungka nawu wohrnani kore Egypt, bu birrimarneyimeng bu bininj nawu Israel benkebmawahmeng birrikelerlobmeng birriwam, wanjh nungka nawu Pharaoh dja bininj nuye nawu birrimarnedurrkmirri wanjh birrimayaliborledmeng bedberre dja birriyimeng, “Njale kuhni bu ngad karrikurduyime, bu karrenmunkewe bininj nawu Israel benkebmawahmeng, dja bedda minj mak kandimarnedurrkmirri?”

⁶ Wanjh kuhni Pharaoh yingkihkurmeng chariot nuye dja mak benkung miwadj nuye birridjarrkwam, dja mak

⁷ birrikang chariots rowk ngarre Egypt kaluk 600 manu manwernhmak duninh, dja bininj nawu birriwohrnani chariots ngarre rowk.

⁸ Dja Yawey bikangerayekwong Pharaoh nawu wohrnani kore Egypt ba kabindikadjung bininj nawu Israel benkebmawahmeng bu bedda birrihdjalley minj birrimarnekeleniwirrinj Pharaoh.

⁹ Bedda bininj nawu Egyptbeh bindikadjuy, kaluk Pharaoh nuye djarrang, chariots dja bininj nawu chariots birridahkendi, djarrang bindidjurrkkani. Wanjh kaluk bindimarnebebmeng bininj nawu Israel benkebmawahmeng kore birriyoy kore kurrula darnkih kabolkngeyyo Pi Hahiroth borledmikenh ngarre Baal-Zephon.

¹⁰ Bu Pharaoh dorreng bindimarnebebmeng darnkih, wanjh bininj nawu Israel benkebmawahmeng birriwohrnang wanjh bindinang bininj nawu Egyptbeh kabindimhkadjung, wanjh kunu birrikeleminj duninh, dja bedda birrimarneka yhmeng Yawey.

¹¹ Dja birrimarneyimeng Moses birriyimeng, “Yiddok kumidjyak kore Egypt bu ngudda kanbebkeng ba bu ngarridowen kondah kubolkdarleh? Njale ngudda kanmarnekurduyimeng bu kanbebkeng Egyptbeh?”

12 Dja bu karrihni kore Egypt, ngad kuhni wanjh ngundimarneyimeng, ‘Kanbawo ngadberre, ngarrbendjalmarnedurrkmirri bininj nawu Egyptbeh.’ Wanjh kunmakniwirrinj bu ngarrbenmarnedurrkmirrinj, dja kunwarre bu kondah kubolkdarleh ngarridowen.”

13 Kuhni birriyimeg, wanjh Moses yimeg bedberre, “Yuwn ngurrikele, ngurridjaldin kelebuk, dja ngurrina bu Yawey ngunmarnedurrkmirri bolkkime ngungehke. Dja bedda bininj nawu Egyptbeh ngudda ngurrbennan bolkkime, wanjh minj ngurriyawoyhbennan bu munguyh munguyh.

14 Yawey nungka kabenbun ngudberre, minj baleh ngurrikurduyime, ngurridjalngurdmen dja ngurridjaldin.”

Yawey Bengehkeg Bininj Nawu Israel Benkebmawahmeng Dja Benbom Bininj Nawu Egyptbeh

Exodus 14:15-31

15 Wanjh Yawey bimarneyimeng Moses, yimeg, “Njalekah kandikayhme? Yibenmarneyimen bininj nawu Israel benkebmawahmeng kabirridjalle.

16 Yirrukma kundulk ke, dja yibidwayhmen kaddumkah ngarre kurrula dja yibolarlma, ba ngudda bininj nawu Israel ngunkebmawahmeng ngurridjalle kubolkbuk kurorre kubulhdjarn kurrula.

17 Dja ngaye ngabenmarnbun bininj nawu Egyptbeh ba ngundiwidnan dja ngundidjalkadjung ngudberre, dja kaluk ngangeykukenmen bu ngabenbun rowk Pharaoh nuye bininj namirndewern, chariots nuye, dja bininj nuye nawu kabindidjurrkkan djarrang.

18 Dja bu kunmekbe ngayime ngangeykukenmen bu ngabenbun wanjh kunu bininj nawu Egyptbeh kabirriburrbun bu ngaye wanjh Yawey nawu nawernhkimuk duninj.” Kuhni bu Yawey bimarneyimeg Moses.

19 Wanjh God nuye angel nawu benmarnedokmi bininj nawu Israel benkebmawahmeng nawu mirnderey, wanjh borledmeng benmunkebuni, dja kunnngol manbu djabdihdjabdi benmarnedokmi wanjh borledmeng danginj kubodme bedberre.

20 Kunmekbe danginj kubulkayh bedberre bininj nawu Egyptbeh dja bininj nawu Israel benkebmawahmeng birribebbehmirnderrri. Dja bininj nawu Israel benkebmawahmeng benmarnebolkwolkani manmekbe kunnngol, dja bininj nawu Egyptbeh benmarnebolkmarnbom kumunun rerrih. Wanjh kuhni minj baleh birriyimeninj bindimarnebebeninj darnkih kukakkuyeng dja minj birriburrimeninj.

21 Wanjh Moses bidwayhmeng kaddumkah ngarre kurrula dja Yawey boyarlarrkeyi kurrula kukakkuyeng bu nungka kunmayorrrkimuk munkeweng koyekbeh, nungka bolkmarnbom kubolkbuk kore kurrula bu boyarlarrkeng bobebbehdi.

22 Dja bininj nawu Israel benkebmawahmeng birridjalley dja birridjowkkeng kurrula kore kubolkbuk kanjdji, dja manu kurrula wernhbowayhmi kaddum kukun dja kudjakku bedberre.

23 Wanjh bininj nawu Egyptbeh bindikadjung, nadjalwern rowk nawu Pharaoh nuye djarrang, chariots, dja bininj nawu bindidjurrkkani djarrang, wanjh djal bindikadjung kore kubolkbuk kore kurrula.

24 Dja bu kumbarrhbuni, Yawey nawu di kaddum kore kunak dja kunnngol manu djabdihdjabdi, wanjh nungka kanjdji bennang bininj nawu Egyptbeh nawu birrimirnderey, dja benmarnbom benkelehmeng.

²⁵ Nungka marnbom nawu chariots bedberre kuyinyibmeninj, dja yeledj birrihdjalley birribarabuni, wanjh bedda bininj nawu Egyptbeh birriyimeng, “Aba bonj! Karrikerlobmen karrbenbawon bininj nawu Israel, dja Yawey kabenbidyikarme kanbun kadberre nawu Egyptbeh.”

²⁶ Wanjh Yawey bimarneyimeng Moses, yimeng, “Yibidwayhmen kaddumkah ngarre kurrula ba kaborrurnderren kore bininj nawu Egyptbeh, chariots bedberre dja bininj nawu kabindidjurrkan djarrang bedberre.”

²⁷ Wanjh kunu Moses bidwayhmeng kaddumkah ngarre kurrula, wanjh bu kumbarrhbuni borrhurnderrinj kore berrehboyen boyihboyimi, dja bininj nawu Egyptbeh bu yimankek birrikelerlobmeninj wanjh birridjalbebmeng kore kurrula, kumekbe Yawey benbom benyakwong rowk.

²⁸ Kurrula borrhurnderrinj, benbarrkbom chariots dja bininj nawu djarrang bindidjurrkani dja namirndewern nuye Pharaoh nawu bindikadjuj kore kurrula, benkebngakkeng rowk. Minj nawohkudji darrkidniwirrinj birrimekbe bininj nawu Egyptbeh.

²⁹ Dja bininj nawu Israel benkebmawahmeng, bedda ngokkokenh birribebmi birridjalley kore kurrula kore kubolkbukni, bu manu kurrula wernhbwayhmi kaddum kukun dja kudjaku bedberre.

³⁰ Kuhni kunbarnangarra wanjh Yawey kurduyimeng bu bennghekkeng kore bininj nawu Egyptbeh bindibuyi. Wanjh bininj nawu Israel benkebmawahmeng bindinang bininj nawu Egyptbeh birrikukyoy kore kurrula ngarre kurrid.

³¹ Wanjh bu bininj nawu Israel benkebmawahmeng birrikurdunang Yawey kurduyimeng kundulkarre kunkimuk dorreng bu benbom bininj nawu Egyptbeh, wanjh bedda birrimarnekeleminj Yawey, dja birriwoybukwong Yawey dja mak birriwoybukwong Moses nawu bimarnedurrkimirri nuye.

15

Moses Dja Bininj Rowk Birrimarnewayinidanginj Nawu Yawey

Exodus 15:1-18

¹ Wanjh maninjmanu mankarre bininj nawu Israel benkebmawahmeng dja Moses dorreng, wanjh birriwayinidanginj nuye Yawey, bu birriyimeng, “Ngaye ngamarnewayini nuye Yawey nawu winhmeng rowk, dja karriburluburlumen munguyh. Nakka wanjh benkukburriweng kore kurrula benkebnungeng djarrang nawern dja nawu birriwarre duninj bininj birrimorneri.

² Ngamarnewayini Yawey nungka namakkaykenh. Nungka wanjh ngardduk God dja ngadjalburume bu nungka ngannghekkeng, dja nawu dulkarrekimuk duninj dja nganngudjwon ngardduk. Nungka wanjh God bedberre nawu ngandikebmawahmeng, dja ngaye wanjh ngangeyburluburlume.

³ Nungka Yawey kumekbe kangeyyo. Dja mak nungka Yawey kadjare kabeneburren nawarrewarre dja kabenbun.

⁴ Nungka benkukburriweng Pharaoh nuye djarrang dja wirrbarra, dja bininj nuye nawu birringudjbang kore Kurrula manbu Manborodjme* dja wanjh birrikebngakmeng rowk.

⁵ Kurrula kunkimuk benkukbarrkbom, wanjh birriyibmerrinj yiman kunwardde kore kanjdji kurrula.

* **15:4** Mahni kurrula kakarme kunngeybuyika yiman “kurrula kore kurralkuyeng kawernmerren”.

⁶ Ngudda Yawey yibenbom rowk bininj nawu ngundiwirrihmeng dja ngudda kunberlkukun ke makka wanjh kundulkarre duninjh kakarme bu yibenkukyakwong rowk.

⁷ Ngudda king duninjh nawu yiwernhdulkarrekimuk, dja bininj nawu minj ngundiwokmarrkmayi nakka wanjh yibenburriweng. Manbu kunkangeyid ke makka yiman kayime kunak mankimuk bu karung, wanjh kunmekbe ngudda yikangeyidyimeng bu bininj yibenbom rowk yiman kayime kunak kayakwon mandalkdarleh.

⁸ Ngudda bu yingolekburriwerrinj kore kukeb ke, dja kundjalmekbe rerrih kukku manbu borokani djaldjabdanginj, wanjh manbu kukku bodjabdi yiman warnamyonginj kukuwi, dja kore kubulkayh kurrula, makka wanjh borayekminj yiman kayime bokedjelkminj duninjh.

⁹ Nawu nganwirrihmeng, nakka wanjh burlumerreni, bu yimiyimi, 'Ngaye ngabenngudjkadjung dja ngabendarrkidmang, wanjh ngabenbun dja ngamang bedberre namakmak nawu kabirrihkarme dja kunbid ngardduk bu ngabenbun mandjawakwi, dja ngabenkukyakwon rowk.'

¹⁰ Bonj, dja ngaleng ngudda yingolekburriwerrinj bu yibenbarrkbom kukku wanjh benkebnguneng dja birrikukyibmerrinj kanjdji kore kurrula manbu yiman kayime wirlmurrng manwernhdulmuk.

¹¹ Yawey, ngudda minj nangale nabuyika god ngunerohrok! Minj nabuyika god kakukbame kunmakmakkenh yiman ngudda. Minj nabuyika god nakurdumak yiman ngudda kore yikurdumakkaykenh yiman kunkimuk duninjh yidjalkurduyime ba bininj ngundimarnekangebarrhme.

¹² Bu ngudda yiberlyirriyongen kunberlkukun ke, wanjh manbu kunrorre makka karrangmarrhmire wanjh nawu ngudda ngurriyidko bininj kabirridjalkukyibmerren.

¹³ Dja ngad nawu kangehking bininj wanjh kanka bu yirrokdokme ngadberre ngudda nawu kandjalmarnedjare munguyh munguyh. Dja wanjh kandjalbolhbukkabukkan ngadberre, ngudda ke kunngudj dorreng bu kanmikan kankurme kore kubolkdjamun ke.

¹⁴ Wanjh birriwarlahkenh bininj kore kubolkbubuyika, bu ngundiwobekkan, wanjh bedda kabirrideldelme bu kunktele dorreng. Dja mak bininj nawu kunbolk Philistia kabirriyo wanjh kabirriwernhnjilngwarremen.

¹⁵ Dja nawu kabirriwohrnawohrnan kore kunbolk Edom nakka wanjh kabirrikelemen duninjh; dja mak nawu birringudjbang bininj birrikang Moab wanjh kabirrikukdeldelme kunktele dorreng. Dja mak bininj nawu birrikang kunbolk Canaan, wanjh nakka kabirridjalkelerlobme.

¹⁶ Bedda wanjh kabirridjalwernhkelemen duninjh bu bedda kabirrinan ngudda ke kunngudj, ngudda nawu Yawey. Bedda wanjh kabirringurmerren bu kunktelekenh. Wanjh kunmekbe nawu ngudda ke bininj kabirrihre, birrimekbe bininj nawu ngudda yibenbekeng kore birridurrkmirri bu birribongdi, wanjh djal kamak kabindihuyurrhke.

¹⁷ Kaluk yibenkan, yibenkurme nawu ngudda ke bininj kore ngudda kunwarddekimuk manbu yibolkdjarrngbom ba bu yihni. Mahni kunbolkdjamun yibolkmarnbom kubid ke, ngudda nawu Yawey, dja kumekbe wanjh ngudda yirurrkmarnbom kunrurrk manbu Temple kore yihyo.

¹⁸ Kaluk ngudda Yawey wanjh king duninjh dja yidjalwohrnan rowk, munguyh dja munguyh."

Ngalbu Miriam Wayinidanginj Mankong Ngarre

Exodus 15:19-21

¹⁹ Nawu djarrang bedberre, dja bininj nawu birribarndi kore djarrang birridedjbongdongi bendorrorkkeyi, namekbe wanjh kukku benkebung-geng. Nungka Yawey benbarrkbom manmekbe kurrula nawu bininj birrikang Egypt. Dja bedda nawu Israel benkebmawahmeng bedda wanjh birrimelmeng kunbolkdarleh kore bodjalkmiwam manbu kurrula. Wanjh birridjaldjowkkeng rowk. Mahni wanjh birriwayini.

²⁰ Wanjh Miriam, ngalbu prophetni wayinidanginj. Ngalka wanjh Aaron benedanginj, dja mey tambourine karrmi kubid. Wanjh birriwern daluhdaluk rowk birrimunkekadjuy, birribuni tambourines dja mak birriborrkkeyi.

²¹ Miriam benmarnewayini, yimeng. "Karriwayinin nuye nawu Yawey, dja nungka wanjh namakkaykenh dja kanmarnewinhmeng! Nungka benkukburriweng djarrang dja bininj nawu birrimorneri, dja birringak-meng kore kurrula."

Manbowarre Kukku Bomanjmakminj

Exodus 15:22-27

²² Kaluk Moses benkang nawu Israel benkebmawahmeng kore kubolk-darleh kabolkngeyyo Shur. Kumekbe bedda birribolkbawong kore Kurrula Manborodjme, dja birrihdjalley kore kubolkdarleh bu kunkodjke danjbik dja kukkuyak birrihdjalley.

²³ Birriwam birribebmeng kore kabolkngeyyo Marah, wanjh kumekbe kukku boyoy, dja mak minj birribonguyi dja ngaleng manbowarreni. (Wanjh kumekbekenh birribolkngeykurmeng Marah manbu kamenmenyime "kukku manbo manbodjan".)

²⁴ Kaluk nawu binihbininj birriyolyolmi bu birrinjilngwarreni dja birridjawam Moses, "Kab, njale ngarribongun? Dja kukku yak!"

²⁵ Wanjh Moses danginj yiwarrudj bu bulkkidj duninj, bu bidjawam Yawey. Dja Yawey bibukkang kundulk. Bu Moses dulkmey wanjh nungka dulkburriweng kore kukku. Wanjh kundjalmekbe rerrih manmekbe kukku wanjh bomanjmakminj bu kamak birribonguneng.

Kumekbe Yawey benwong mankarre manbu ba kabirriwokmarrkmang, dja mak nungka kumekbe rerrih benrohromeng ba kanan bu kabirriw-ernhkarrme nungka nuye mankarre.

²⁶ Yawey yimeng, "Ngudda bu ngurriwernhmarrkkang rowk nawu wokrayekwon ngudberre, dja ngurridjalkurduyime rowk kore manbu ngayime mandjad, wanjh minj mak bun ngudberre kunwern kundjakwi manbu yiman kayime ngamunkeweng bu benbom bininj nawu birrikang Egypt. Ngaye Yawey nawu marnbun ngudberre ba minj ngurridulkkihngalme."

²⁷ Wanjh nawu Israel benkebmawahmeng birriwam birribebmeng kore kunred Elim. Kaluk kumekbe kunred karrmi manbowern kukku kore njilhmi yoy, kaluk manmekbe kukku birrirohromeng twelwe njilhmi. Dja mak manbu marrunj makka seventy dulkmirnderri kumekbe. Wanjh bedda kumekbe birrimadjkurmeng dja birriyonginj kore kukku darnkih.

16

Yawey Benwong Manme Manbu Birringeybom "Manna"

Exodus 16:1-36

¹ Birridjalmirndewern duninj nawu Israel benkebmawahmeng birribolkbawong kumekbe kunred Elim dja birriwam birribolkmey kore

kubolkdarleh kabolkngewyo Sin, kuburldjarn kore kunred Elim dja kunwarddekimuk Sinai. Kaluk birribebmeng bu kunbarnangarra fifteen dja dird nakudji bu yerre birribolkbawong kore kunred Egypt.

² Wanjh nawu Israel benkebmawahmeng bedda wanjh birrinjilngwarreni wanjh birrimarnewokkihjnurluhnjurlukmi Moses dja Aaron kumekbe bu birrihdi kore kubolkdarleh.

³ Wanjh bindimarneyimeng, birriyimeng, "Ngad wanjh kamakniwirrinj bu Yawey kanbuyi ngadberre kore kunred Egypt. Kaluk kumekbe ngarriyerrkang ngarrikinjeng kunkanj dja ngarriworrrkmiworrinj. Dja wanjh ngudda kanbekkeng ngadberre dja kankang kore kubolkdarleh ba bu ngarrimarwedowen dja wardi ngarridjalyakmen kondah."

⁴ Wanjh Yawey bimarneyimeng Moses, "Ngaye kaluk ngamunkewe manme ngudberre bu kawarrawarrhme kaddumbek yiman kayime mandjewk. Kaluk nahni bininj wanjh birriray kuberrk kunkodjke rowk, dja kabirrimoyhmang manme. Birrimoyhma djal kunkodjkekudjikenh kabirringun. Ngaye ngadjare ngabennan birrimekbe nawu Israel benkebmawahmeng bu kabirrikurduyime kore ngaye ngabenbengdayhke. Ngabenrohrokme.

⁵ Dja bu kunkodjke six, bedda wanjh kabirrimoyhmang manbu manme manwern ba bu kunkodjke bokenh kabirringun. Wanjh kabirrikurmekurrme bu kayingkihyo bedberre."

⁶ Wanjh Moses dja Aaron bindimarneyimeng birrimekbe bininj rowk nawu Israel benkebmawahmeng, "Bu karrungyibme bolkkime wolewoleh ngudda wanjh ngurriburrbun bu nungka Yawey wanjh nadjalkudji nawu ngunbekkeng ngudberre kore ngurrihbongdi kunred Egypt.

⁷ Dja mak bu malaywi, bu kukabel, ngudda wanjh ngurrinan Yawey nuye kunmakmak duninj ba bu ngurriwohburrbun bu nungka ngurridjarrkdi. Dja nungka wanjh ngunbekkang ngudberre bu ngurrimarnewokkihjnurlukmi nuye. Ngad minj njale, bu kandihmarneyime ngarrewoneng, dja nakka wanjh nungka Yawey ngurrihmarneyimi."

⁸ Wanjh Moses yawoyhwokdi, yimeng bedberre, "Nawu Yawey nungan kakurduyime ngudberre, bu kunbarnangarrawern ngunwon ngudberre kunkanj bu wolewoleh ngurrikanjngunkenh, dja mak bu kunkabelwern nungka ngunwon manwern buriddi kore ngurridjare. Nungka ngunbekkang bu ngurrinjinlgwarreni dja ngurrimarneyolyolmi nuye. Dja ngad wanjh nganeyeng! Minj ngudda ngandiyolyolmi, dja wanjh Yawey ngurrimarnewokkihjnurluhnjurlukmi."

⁹ Kaluk Moses bimarneyimeng Aaron, "Yiray yibenkayhmen nawu Israel benkebmawahmeng rowk. Yibenmarneyimen bu kabirrimornamerren kore kumirrk nuye Yawey, dja nungka wanjh benbekkang bu kabirriwokkihjnurluhnjurlukmi."

¹⁰ Bu kunmekbe Aaron wokdiwokdi bedberre nawu Israel benkebmawahmeng, wanjh bedda birribolknang kore kubolkdarleh. Dja birridjalnang bu kumbolkwolknang wernkih duninj manbu kunmakmak Yawey nuye bu bebmeng kore kunngol.

¹¹⁻¹² Wanjh Yawey bimarneyimeng Moses, yimeng, "Ngaye ngabekknang bu baleh birrihyimi nawu Israel benkebmawahmeng bu ngaye ngandiyolyolmi. Dja yibenmarneyimen, "Bu kunbarnangarrawern kabalhdungyibme, ngudda wanjh ngurringun kunkanj, dja bu kunkabelwern ngudda wanjh buriddi ngurringun dja ngurriworrrkmiworren. Kuhni wanjh ngurriwohburrbun bu ngaye Yawey nawu God ngudberre."

13 Wanjh bu balkngokdangeni, mayhmayh nawu dji-rndi mirndewern-minj bebmeng dja bolkbarrkbom kore kured birrihyoy, dja bu kumekbe kukabel wanjh kunberle kurrmeng kore birrihyoy kured.

14 Wanjh bu manmekbe kunberle yakminj rowk, wanjh manme yoy, manbu manyahwuyahwurd, mankubeleni manbu kukyimi ice.

15 Bu kunmekbe birrinang nawu Israel benkebmawahmeng, wanjh birrimarneyimerrinj, "Kaluk mahni njale?" Dja minj bedda birriburrbuyi manmekbe manme. Wanjh Moses benmarneyimeng, "Mahni wanjh buriddi manbu Yawey ngunwong ngudberre ba ngurringun.

16 Dja nungka Yawey ngunwokrayekwong ngudberre bu yimeng, 'Ngudda wanjh ngurribebbehmoyhma manmekbe manme ngudberre. Ngurridjalmoyhma manbu namud ngudberre kabirriyakwon kore ngurribebbehoy. Ngurridjalmoyhma ba bu kabirribebbehngun rowk yiman kayime nakudji djabirlana kahdahkendi.' "

17 Wanjh nawu Israel benkebmawahmeng kunmekbe birrikurduyimeng. Yikahwi bininj nawu birringormangi manwern, dja yikahwi nakka birrimangi mandjalyahwurd

18 Wanjh birrirohromeng. Dja bininj nawu mangimangi manwern, nakka wanjh birriyakwong rowk, mak nabuyika bininj nawu moyhmangi manyahwurd, bedda warridj birringuneng rowk. Dja nawu birrimekbe birrimoyhmangi bu birrirohrokmerreni birrimangi bu djal birringunikenh.

19 Wanjh Moses benmarneyimeng, "Yuwn bu ngurrikarekurrme bu malaywikenh."

20 Dja yikahwi nawu minj birriwokmayi Moses bu benmarneyimeng dja bedda birridjalkarekurrmeng bu malamalaywihkenh. Wanjh bu kumbar-rhomb, manme manbu birrikarekurrmeng wanjh makka warreminj dja yol k dundulubom. Wanjh Moses benduy birrimekbe bininj.

21 Bu kunkabelwern bedda birridolkkani birrimoyhmangi manme manwern bu birrikurrmikurrmi, wanjh bu kunmekbe dungbidbuni, wanjh bolkrungi dja manbu manme djalyoy kurorre, wanjh makka kelkdangeni dja yakminj.

22 Wanjh bu kunkodjke six nawu birrimekbe bininj birrimangi bu birrimngormangi bokenhkah, ba bu kabirribebbehngun yiman nakudji djabirlana birrikurrmi. Wanjh bininj nawu bindiwohrnani bedberre wanjh birriwam birrimarnemulewam Moses.

23 Wanjh Moses yimeng bedberre, "Kuhni wanjh Yawey wokrayekwong ngudberre, yimeng, 'Malaywi wanjh ngurringehmen, dja kunukka kunkodjke Sabbath manbu kunbarnangarradamun ngardduk. Dja bolkkime ngurrikinjemen manbu ngurridjare ngurrikinje, dja warridj ngurrikarekurrmen yikahwi manme bu malaywikenh.' "

24 Wanjh bedda birrikurrmekurrmeng bu malaywikenh, dja kaluk maninjmanu manme minj warremeninj dja yol k minj dundulubuyinj manmekbe manme.

25 Wanjh bu kunbarnangarra Sabbath Moses benmarneyimeng, "Bolkkime wanjh ngurringu manme manbu ngurrihoyhmangi wolewolekenh. Dja bolkkime wanjh kunkodjke manbu Sabbath nuye Yawey. Minj njale mak ngurringalke kurorre kore ngurrihmang manme.

26 Ngudda wanjh ngurrimoyhmang manbu manme bu kunkodjke six, dja bu manbuyika kunkodjekudji, makka Sabbath, wanjh burrkyak. Minj manme kahyo."

²⁷ Kaluk bu yimerranj kunkodjke bu kunbidkudji dja bokenh, yikahwi nawu bininj birriwam yimankek birrimoyhmayi manme, dja larrk, birriyawam minj njale mak yuwirrinj kore kurorre.

²⁸ Wanjh nawu Yawey bimarneyimeng Moses, "Balehkah kabolkyime bu ngudda nawu bininj kandiwokmarrkmang bu wokrayekwon dja bengdayhke ngudberre?"

²⁹ Ngurrina, ngaye Yawey wong ngudberre manbu kunbarnangarra Sabbath. Kunmekbekenh kore kunkodjke six, wanjh ngaye won manme manwern, manbu bokenh kunkodjke ngurringun. Dja kore kunbarnangarra seven, wanjh ngudda ngurridjalnin rowk kore ngurrihni kured. Yuwn nangale kabalre kore kubuyika."

³⁰ Wanjh bedda birringehmi kore kunbarnangarra seven.

³¹ Wanjh bininj nawu Israel benkebmawahmeng birringeykurmeng manmekbe manme "Manna." *Kaluk kukyimi manmim dja manyah-yuwahwurd dja mak manbelebeleh kaluk manjyimi yiman kayime buriddi manbu mankung rawong dorreng.

³² Kaluk Moses yimeng, "Nawu Yawey wokrayekwong dja yimeng, 'Ngurrikarekurrmen yikahwi manmekbe manme bedberre nawu ngurbenkebmawahme bu yerrekah. Ba kabirrinan manekke manme manbu ngaye wonihwoni ngurrihnguni kore kubolldarleh bu bebkeng ngudberre kore Egypt ngurrihbongdi.'"

³³ Wanjh Moses bimarneyimeng Aaron, "Yima ngalng dja yirrahkendo manekke manme, yiman bokenh litres. Wanjh yikurrmen kore kumirrk nuye Yawey, dja kadjalyo bedberre nawu karrbenkebmawahme bininj."

³⁴ Kaluk yerrekah Aaron kurduyimeng bu Yawey biwokrayekwong nawu Moses. Nungka mey manbu manme dja dahkendoy kore ngalng, dja kurrmeng namekbe ngalng kore kumirrk ngarre manwarddebala bokenh manbu kawokbimbuyindi kore kunwok kunwoybuk kore Yawey wokkurrmerrinj, ba bu bininj kabirriburrbun kunwoybuk kunwok manbu Yawey wokdanj.

³⁵ Kaluk birrimekbe nawu Israel benkebmawahmeng birrihnguni manmekbe manme bu mandjewk 40 kaluk bu birribebmeng kore kunbolk Canaan, dja kumekbe birriyoy munguyh.

³⁶ (Kaluk nawu birrirohrokmi manbu manna makka bu djal mandjad, scales dorreng kore birrirohrokmeng bokenh litres, kore birriwarlahkenh bininj birrikurduyimi.)

17

Bu Kukku Bobebmeng Kore Kuwarddebeh

Exodus 17:1-7

(Numbers 20:1-13)

¹ Kaluk birridjalwern rowk nawu Israel benkebmawahmeng birribolk-bawong kumekbe kubolldarleh kabolkngeyyo Sin dja birrirengehrey kore nawu Yawey benwokrayekwong. Dja birrihdjalwohyoy waken kore kubolkbubuyika. Wanjh birribebmeng bu birriyonginj kore kunred Rephidim, dja minj kukku boyuwirrinj kumekbe bu bedda birrihbonguyinj.

² Wanjh kunu birridangwerrinj Moses dja birrimarneyimeng, "Ngarridjare kukku ngarribongun, dja kanbowo!"

* **16:31** "Manna" kamenyime, "Nakka njale?"

16:33 Ngurrina Hebrews 9:4

16:34 Exodus

Wanjh Moses yimeng bedberre, “Njalekenh ngaye bu ngaye kandidung? Dja njalekenh nungka Yawey kumekbe ngurrirohokme?”

³ Kaluk bedda birriwernhkombukdoweng bu birridjaldjareni kukku birribonguyi, wanjh bedda birriyolyolmi Moses bu birriyimeng, “Njalekenh ngudda kanbekeng ngadberre kore Egyptbeh? Yiddok kanbekeng dja kankang ngad, dja mak wurdwurd dja mayh ngadberre dorreng ba bu ngarridjaldowe kondah kore kukkuyak?”

⁴ Wanjh Moses bikayhmeng nawu Yawey, bu bidjawam, “Kab, baleh ngakurduyime bedberre? Wanjh darnkih bu ngandikodjdong kunwardde ngandikukkurme.”

⁵ Wanjh nawu Yawey bimarneyimeng Moses, “Yiray yirrokdokmen bedberre bininj, dja yibenka yikahwi nawu kabindihmarnewohrnan nawu Israel benkebmawahmeng, birrimekbe ngurridjarrkay. Dja mak yir-rulkkanaka kubid ke manekke kundulk manbu yibowidjibhkeng Mankabo Nile. Dja wanjh yiray!

⁶ Kaluk ngaye ngarri kumekbe kore kumirrk ke, ngarri darnkih kore kuwardde ngarre kore kunred Horeb. Wanjh yiwarddedong kundulkwi manbu yihkarme, kaluk kukku kambobebme kore kuwarddebeh ba kabirribongun birrimekbe bininj.” Moses wanjh kuninjkuu kurduyime dja bedda nawu dabborrabbolk nawu kabindimarnewohrnan nawu Israel benkebmawahmeng nakka wanjh birrihdi birrihkurdunani Moses.

⁷ Kaluk Moses kunmekbe bolkngeykurmeng kunney bokenh, Massah dja mak Meribah. Kaluk Meribah kamenyime, “birrirohokmeng” dja mak manngaybuyika Massah wanjh kamenyime, “birridangwerrinj.” Kuhni bu bedda nawu Israel benkebmawahmeng birridangwerreni, dja birrirohokmeng bu birrikewkmi nawu Yawey, bu birriyimeng, “Yiddok woybukkih nawu Yawey ngarrihdjarrkdi?”

Bininj Nawu Amalek Benkebmawahmeng Birribuyi Bininj Nawu Israel Benkebmawahmeng

Exodus 17:8-17

⁸ Kaluk kumekbe Rephidim bininj nawu Amalek benkebmawahmeng birrimwam bindibuni nawu Israel benkebmawahmeng.

⁹ Wanjh Moses bimarneyimeng Joshua, “Yibendjarrngbu yikahwi bininj kadberre dja ngurrire ngurriburren birrimekbe bininj nawu Amalek benkebmawahmeng. Dja bu malaywi ngaye ngabidbun ngarrangen kore mandulum dja ngarrulkkkan kore kubid ngardduk mahni kundulk manbu God nuye.”

¹⁰ Joshua biwokmarrkmeiy Moses wanjh nungka dja bininj nawu benkang wanjh birriwam birriburreni nawu Amalek benkebmawahmeng. Wanjh bedman Moses, Aaron dja Hur birriwam birribidbom kore mandulum.

¹¹ Kaluk bu Moses berlwayhmi kaddum, wanjh nakka nawu Israel benkebmawahmeng birriwinhmi, dja bu nungka berlkolungi wanjh nakka Amalek benkebmawahmeng birriwinhmi.

¹² Wanjh bu Moses djalberlwayhmi kunkuyeng, nungka berlwarremeni, wanjh benemekbe Aaron dja Hur benekurrmeng kunwardde kanjdji nuye, ba kabirayekwon bu kayerrkan. Wanjh Aaron dja Hur beneberlmey Moses beneberlwayhkeng kaddum kaluk benebebbehedi dja Moses kuburldjarn di berrewoneng. Kaluk bedda benehdjalberlkarrmeng ba minj beneberlbarlanhmayi. Wanjh kunmekbe birrikurduyimeng bu kalukburrk, wanjh dungyibmeng.

¹³ Wanjh kunu Joshua dja bininj nuye, bindibom mandjawak dorrengh birrimirndewern djamun* nawu Amalek benkebmawahmeng.

¹⁴ Kaluk nawu Yawey bimarneyimeng Moses, "Yibimbu kore djurra bu kuninjkunukenh birriburrinj ba bu bininj kabirriburrbun munguyh. Dja yibengdayhkemen nawu Joshua bu yibimbunkenh. Dja wanjh ngabenngybularrbun nawu birrimekbe Amalek benkebmawahmeng bu ngabenkukyakwon kore kondanjku kurorre."

¹⁵ Wanjh Moses marnbom manbu altar dja kumekbe bolkngeykurrmeng, "Yawey, nungka yiman kayime ngardduk kunmadj nawu banner."

¹⁶ Moses yimeng, "Ngaye ngabidwayhmeng kaddum kore Yawey kahni dja kawohrnan rowk. Nungka Yawey kaluk kabenbun bininj nawu Amalek kabenkebmawahme bu munguyh dja munguyh."

18

Nawu Jethro Kabidjahwon Moses

Exodus 18:1-12

¹ Bininj nawu ngeyyoy Jethro wanjh birroybom Moses, dja nungka wanjh priestni kore kunbolk Midian. Kaluk Jethro wobekgang rowk bu baleh benmarnekurduyimerranj Moses dja mak bininj nawu Israel benkebmawahmeng kore Yawey benbekeng kore kunbolk Egyptbeh birrihbongdi.

²⁻⁴ Wanjh Moses nuye ngalbininj kobeng ngeyyoy Zipporah, dja benbenyawmey narahngem bokenh. Kaluk nawu nawernwarre nakka wanjh ngeyyoy Gershom*, dja kunmekbe bu danginj, Moses yimeng, "Ngaye wanjh ngadjalwokbuyika bu ngamwam kore kubolkbuyikabeh." Dja nawu nawalawalak, nakka wanjh bingeykurrmeng Eliezer†. Kaluk bu danginj, Moses yimeng, "Nawu God nuye ngardduk ngabbard, nungka wanjh nganbidyikarmeng. Nungka nganngengkeng kore king nawu kawohrnan kunbolk Egypt bu djareni nganbuyi."

Wanjh Moses benmunkeweng Zipporah dja nawu wurdwurd bu birriwam kore Jethro, nawu birroybom Moses. Wanjh Jethro benkimay kore nuye.

⁵ Kaluk Jethro nawu Moses birroybom, benkang Moses nuye ngalbininj kobeng Zipporah dja nayayaw ngalengngarre, wanjh birriyikang Moses. Kaluk nungka Moses yongohoy kore kubolkdarleleh darnkih kore kuwarddekimuk manbu God nuye.

⁶ Kaluk nungka Jethro djalyingkihwokmunkewerrinj werck kore Moses bu yimeng, "Ngaye Jethro, nawu doybom ngudda, wanjh ngarrimhre kore ngudda, ngalbininj kobeng dja narahngem ngarre, nawu benbenyawmey."

⁷ Wanjh Moses wam birrabkeng nawu birroybom dja kumekbe bimarnebarddurrukkurlhdanj, bibunjhmey dja benedjawarrinj bu kamak rowk bedda bu benebebbendi, wanjh benewam benengimeng kore Moses nuye dabburlin.

⁸ Kaluk Moses bimarneyolyolmeng Jethro njalehnjale kore Yawey benbom benkukyakwong rowk bedberre nawu king Egyptbeh dja mak nuye bininj. Dja mak nungka benbidyikarmeng nawu Israel benkebmawahmeng. Dja mak Moses bimarneyolyolmeng bu birrihrey kunrayek

* **17:13** "Djamun" kayime "Soldiers".
yiman kayime "nawu djenbuyika bininj".

* **18:2-4** Ngurrina kore Acts 7:29. Gershom kamenyime
† **18:2-4** Eliezer kamenyime yiman kayime "Ngardduk
God nganbidyikarme".

dorrengh, kore kubolkdarleh kore kukku birriboyawani dja manme birriyawani, wanjh nungka Yawey bendjalnghehkeng.

⁹ Bu kunmekbe Jethro bekkang rowk, nungka wanjh njilngmakminj bu Yawey nungka kunmak kurduyimeng bedberre nawu Israel benkeb-mawahmeng dja benbekeng kore kubid bedberre bininj nawu birrikang Egypt kore bindibongkarrmi.

¹⁰ Wanjh nungka yimeng, “Ngaburlume nawu Yawey! Nungka ngun-gehkeng kore kubid bedberre Pharaoh dja bininj nawu Egyptbeh. Dja mak bennghehkeng rowk bininj nawu Israel benkebmawahmeng kore kubid bedberre bininj nawu Egyptbeh!”

¹¹ Dja wanjh bolkkime ngawohburrbun bu nungka Yawey wernhdulka-rrekimuk duninj, dja kabenyurrhke birribuyika nawu gods. Kunmekbe nungka kurduyimeng bedberre bininj nawu birridjalburlumerrinj, kore bindinjirrhmiwoni nawu Israel benkebmawahmeng.”

¹² Wanjh Jethro, nawu Moses birroybom, kumkang mayh bu kuk-wurlhkeng nuye God, dja mak nabubuyika bu bimarnekurmeng kore God. Aaron dja nawu bindimarnewohrnani bininj nawu Israel benkeb-mawahmeng, birrimyikang Moses nuye nabininj djo ba birridjarrknguni manme manbu mandjamun kore God.

Moses Bendjarrngbom Bininj Nawu Kabindidjadmekenh

Exodus 18:13-27

(Deuteronomy 1:9-18)

¹³ Wanjh bu kunkodjkebuyika Moses yerrkang kore bendjadmeng bininj nawu birridangwerreni, dja kabenmarneyime bu nangale nakka kakarrme mandjad, dja nangale kadjare kunwarre. Wanjh bedda birriwakbuyinguneng Moses bu birrimadbuni kunbarnangarrakuyeng, kore kumkabelbeh dja kaluk kangokdan.

¹⁴ Bu kunmekbe Moses nuye nabininj djo binang nawu Moses bu karrehkarremarnbuni bedberre, wanjh bidjawam, “Njale ngudda yiben-marnekurduyime bedberre birriwern bininj? Dja njalekenh ngudda yidjalkudji yiyerrkan dja yibendjaddjadme bedberre, dja bedda wanjh djal kabirrimadburren kukabel nawu kukak kayimerran!”

¹⁵ Wanjh Moses bimarneyimeng, “Kunukka wanjh kabirrimre kore ngaye bu kabirridjare ngaye ngabenbengdayhke kore God kadjare kabir-rikurduyime.

¹⁶ Bu birrimekbe bininj kabirridangerren, bedda kabirrimre kore ngaye wanjh ngaye ngakarremarnbun bedberre baleh nawu kunmak kayime. Dja ngaye ngakarreyolyolme bedberre manbu God nuye mankarre, dja mak manbu kabenbengdayhke.”

¹⁷ Wanjh Moses nuye bindoy bimarneyimeng, “Ngudda minj yikurduyime mandjad.

¹⁸ Ngudda dja birrimekbe bininj nawu ngundihiyikan wanjh nakka ngurringudjwarremen. Dja kuhni kundjalkimuk bu yihdurkmirri, dja yuwn bu kunukka yikurduyime yidjalkudji.

¹⁹ Mah. Dja ngaye kanbekkabekka bu marneyime, dja ngaye ngadjare God bu ngunedjarrkdi. Wanjh ngunewokdi God bedberre birrimekbe bininj dja yibenmulewa bu yimarneyime nawu God kore bedda kabirridangwerrenkenh.

²⁰ Wardi yibengdayhkemen bedberre mankarre dja mak manbu God kabenbukkabukkan, dja yibenbukkabukka kore mandjad kabirri dja baleh bu kunmak kabirrikurduyime.”

21 “Wanjh yibendjarrngbu yikahwi bininj nawu birrikurdumak kore nawu birriwern Israel benkebmawahmeng kabirrihdi, ngurridjaldjarrngbun bininj nawu kabirrikengeme God dja mak nawu kabindidjalwirrihme birribuyika bininj nawu kabirrikurren dja nawu birriedjwarlah. Yibenbebkemen birrimekbe bininj nawu yibendjarrngbun, dja yibenkurrme ba bu kabindinahnan nakka wanjh kabindilarlmang birriwern bininj rowk bu kabindibebbehnanan. Yikahwi kabindimarnewohrnan kore one thousand bininj, yikahwi bu kabindimarnewohrnan one hundred bininj, dja mak yikahwi nawu kabindimarnewohrnan kore fifty bininj, yikahwi bu kabindimarnewohrnan kore ten.

22 Yibenmarnbu birrimekbe birrimak bininj bu munguyh kabindidjadme kore bininj kabirridurrenkenh. Dja bininj rowk wanjh kabirrimkan manbu mankarrekilehkilelkenh dja kabindidjadme kamak rowk. Dja wardi bu mankarredulmukkenh kabenmarnebebme, wanjh birrimka kore ngudda bu yibendjadmekenh. Bu kuhni kabirriyime, nakka nawu yibendjarrngbun bininj, wanjh ngundingehke, dja minj yiyawoyhngorran manbu mandulmuk duninh. Bedda warridj wanjh ngurridjarrkngorran.

23 Dja bu kuhni yikurduyime kore God ngunwokwon, wanjh kunukka yidjalkurduyime kore yihdurkmirri, dja minj yingudjyarwarren. Wanjh nawu birriwern bininj nakka wanjh kabirridokmerren kured bu kabirinjilmak.” Kuhni rowk nawu Jethro bimarneyimeng Moses.

24 Wanjh Moses bibekgang bu nabininjdoj nuye bimarneyimeng, wanjh nunganwali kurduyimeng rowk.

25 Nungka bendjarrngbom yikahwi bininj nawu birrikurdumak kore bininj nawu Israel benkebmawahmeng birridjarrkdi, dja benmarnbom bu kabindimarnewohrnan bininj nawu birrimirndebuyika yiman thousands, dja mak hundreds dja mak fifties dja mak nawu tens.

26 Bedda wanjh munguyh bindidjadmeng, dja bu kunrayek benmarnebebmeng, wanjh birriwam birridjawam Moses bu mankarrekenh. Manbu mankilehkilel, wanjh bedman birridjalyolyolmi dja birribebbedjadmi.

27 Kaluk Moses bimunkeweng nuye nabininjdoj Jethro bu wanjh wam durndi kore nuye kunred.

19

Nawu Israel Benkebmawahmeng Birriyonginj Kore Kunwarddekimuk Sinai

Exodus 19:1-25

1-2 Wanjh bininj nawu Israel benkebmawahmeng birribolkbawong Rephidim, bedda wanjh birriwam birribebmeng kore kubolkdarleh kabolkngeyyo Sinai. Kaluk bedda birribolkmarnbom, birrihyoy kore kubolkdarleh darnkih kore kuwarddekimuk Sinai. Bu kunmekbe bolkyimi dird danjbik bu yerre birribolkbawong Egypt.

3 Wanjh nungka Moses bidbom kore kuwarddekimuk biyikang God. Wanjh Yawey bikayhmeng Moses kore kuwarddekimukbeh dja bimarneyimeng, “Yibenmarneyimen kuhni bedberre nawu Jacob nuye bininj, bedda nawu Israel benkebmawahmeng.

4 Yiyimen, ‘Ngurridjalwern ngurrinang bu baleh ngaye ngakurduyimeng bedberre bininj nawu kabirrihni Egypt. Dja ngudda ngurriburrbun bu ngaye bebkeng ngudberre yiman kayime namarddorl kawayhke yaw ngalenggarre, dja mak kang ngudberre kondanjkuu kore ngaye.

⁵ Mah. Bu ngudda munguyh kandiwokmarrkmang dja ngurrikarme kunwok ngardduk rowk kore ngurrikurduyime bu ngaye ngadjare, wanjh kunukka ngurriyimerran bu djal ngardduk bininj nawu ngaye marnedjare dja menemey ngudberre ngurridjalkudji kore kubolkbubuyika kondah kurorre.

Nawu birriwarlahkenh bininj rowk kore kondah kurorre, wanjh nakka ngabenkarme.

⁶ Dja ngudda wanjh ngurridjalkudji ngurriyimerran priests kore ngaye ngadjare, dja mak ngurriyimerran rowk bu ngurridjalkukdjamun duninj ngardduk.' Wanjh kunjnkunu kunwok ngudda yibenmarneyimen nawu Israel benkebmawahmeng."

⁷ Wanjh Moses kumkoluy kore Yawey benehwokdi dja benkayhmeng daborrabbolk nawu bindimarnewohni bedberre bininj rowk. Moses kumekbe benmarneyolyolmeng kore Yawey biwokrayekwong bu kabenmarneyime.

⁸ Wanjh birriwern rowk nawu bininj birriyimeng, "Kore Yawey yimeng rowk, ngad wanjh kundjalmekbe ngarrkurduyime." Wanjh Moses durndi kore Yawey balhkani kunwok bedberre nawu Israel benkebmawahmeng.

⁹ Yawey bimarneyimeng Moses, "Ngaye ngamre yikan ngudda kungolbulerri dorreng ngabarrkburren, dja bu ngawokdangen, wanjh birrimekbe nawu Israel benkebmawahmeng kaluk nganbekkan wanjh munguyh ngundiwoybukwon ngudda." Wanjh Moses bimarneyolyolmeng Yawey bu baleh bedda birriyingkihyimeng nawu Israel benkebmawahmeng.

¹⁰ Wanjh Yawey bimarneyimeng Moses, "Yiray kore birrimekbe bininj dja yibenbengdayhkemen bu kabirrimarnburren yiman birridjamun bininj ngardduk, bu bolkkime dja mak malaywi. Yibenmarnbu warridj bu kabirriyingkihmardjirridjbun ngayekenh.

¹¹ Dja ngurriyingkihdin ngardduk bu danjbikkah malaywibuyikakenh. Bu kumekbe kunbarnangarra ngaye nawu Yawey wanjh ngamkolung kore Kuwarddekimuk Sinai, dja ngandinan birriwern bininj nawu kumekbe kabirrihni.

¹² Dja yibolkmarmbu bedberre dja mak nawu mayh bedberre ba minj kabirrire kumekbe darnkih kore kunwarddekimuk Sinai. Yibenmarneyimen, 'Yuwn bu ngurriwarddebidbun dja mak minj ngurriwarddekarme kondah kanjdji ngarre. Bininj nawu kawarddekarme nakka wanjh karrown.

¹³ Bininj nawu kawarddekarme, wanjh minj nangale kare darnkih bu kabikarme kubid dorreng. Nakka wanjh birrikodjdo kunwarddewi, dja nuk bunarra birridulubu. Bininj dja nuk mayh bu kawarddekarme, kunukka yuwn kahdjaldarrkiddi.'

Kaluk yerre bu trumpet kakayhme, kumekbe wanjh kabirrire rowk darnkih kore kuwarddekimuk kanjdji ngarre."

¹⁴ Wanjh kumekbe nungka Moses yawoyhkoluy kuwarddebeh kabenyikan nawu kurorre kabirrihdi, dja wanjh benyingkihmarnbom kore Yawey. Dja bedda birrimardjirridjbom kunmadj bedberre.

¹⁵ Wanjh Moses benmarneyimeng, "Ngurriyingkihmarnburrimen bu kunkodjke danjbik. Dja mak yuwn ngurrikalikarren bu kumekbe kabolkyimerran."

16 Kaluk yerrekah bu kunkak bokenh, bu kumkabel kumwan, wanjh namarrkon bebmeng, mayhkemayhkeyi dja ngurduldulmeng. Dja kunngolburlerri dorreng bebmeng kore kaddum kuwarddekodj. Dja mak birribekkang trumpet wokdanginj wernkih duninj bu kayhmeng. Wanjh birriwern rowk bininj nawu birrimirnderri wanjh birrikukdeldelmi kunkele dorreng.

17 Wanjh Moses wam benkimey birrimekbe nawu Israel benkebmawahmeng kuberrkkah kore birrihni, ba kabirrimirrkmarren God. Wanjh birrimirndedanginj kore darnkih kuwarddekimuk kanjdji ngarre, dja birrimadbom nawu Yawey.

18 Kaluk manmekbe kunwarddekimuk Sinai warddebarrkbuyindi kundolng dorreng, dja Yawey kumkoluy kumekbe kunak dorreng. Manmekbe kundolng makka wanjh dolngwam kaddum yiman kayime bu karriwurlhke kunak manbirlukimuk duninj. Dja mak manbu kuwarddekimuk bolkrokrokani wernkih duninj.

19 Dja manbu trumpet kayhmikayhmi dja wernhwokdarrahmeng. Wanjh Moses wokdanj, dja God biwokmey bu wokdanginj kore ngurduldulmeng birribekkang.

20 Wanjh bu nungka Yawey kumkoluy kore kuwarddekodj Sinai, dja bikayhmeng Moses bu kabalbidbun kore kaddum kuwarddekimuk. Wanjh Moses wam, bidbom.

21 Wanjh nungka Yawey bimarneyimeng Moses, "Yiray, yikolu kurorre dja yibenbengdayhkemen birrimekbe bininj bu minj kabirridjirrkarrren dja kabirrikukmurmierren, dja wardi kabirrimelme kore ngurrbenmarnebolkmarnbom, bu yimankek kabirridjare ngandikuknan ngaye. Bu kumekbe kabirrikurduyime nakka wanjh birridjalwern bu kabirridowen."

22 Dja mak nawu priests, bu kabirrimre kore ngaye nakka wanjh kabirriyingkihmarburren kore ngayekenh. Dja bu minj kabirrimarnburren kore ngaye nawu Yawey, wanjh ngaye ngabenbun."

23 Nungka Moses wanjh bimarneyimeng Yawey, "Birimekbe bininj minj kabirrimbidbun manbu kunwarddekimuk Sinai, dja nakka wanjh ngudda kanmarneyimeng ngadberre, 'Ngurribolkmarne bu minj kabirrire kore darnkih kahwarddekimuk, dja nakka wanjh kadjalbolkdjamun.' "

24 Wanjh Yawey bimarneyimeng Moses, "Yirrunde yinkimang Aaron ngunemdjarrkbidbu, dja yuwn nawu priests dja nawu birribuyika bininj kabirridjirrkarrren bu yimankek kabirrimbidbun kore ngaye. Dja bu kabirrikurduyime, wanjh ngaye Yawey ngabenbun."

25 Wanjh Moses koluy kore bininj birrimirnderri, dja benmarnemulewam kore baleh Yawey bibengdayhkeng.

20

God Benwong Manbu Kunbidbokenh Mankarre Mankimuk Nuye

Exodus 20:1-17

(Deuteronomy 5:1-21)

1 God wokdanj, kunih kunwok rowk nungan yimeng,

2 "Ngaye wanjh Yawey nawu God ngudberre, nawu bebkeng ngudberre kore kunbolk Egyptbeh, kore ngurrbenhmarnedurrkmirri nawu ngundihbongkarmi.

3 Yuwn bu ngurrbenwohkadjung nabubuyika nawu gods, dja ngaye ngadjalkudji duninj God ngudberre."

4 “Yuwn bu ngurrimarnbun ngudberre yehyeng nawu idols, yiman kabenekukrohrok njalehnjale nawu kaddumwaken, mak kanjdjibeh kondah kurorrewaken, mak kukkuwaken kayo kore kaborri kanjdji.

5 Yuwn bu ngurrimarnebodan nawu idols mak yuwn bu ngurriburiburlume nawu idols. Dja ngaye Yawey nawu God ngudberre, wanjh ngakirnwern. Kunmekbekenh kunu ngaye kaluk ngabendung bininj nawu ngandiwidnan ngardduk, dja bu bedberre mawahmawah bedmanwali ngandiwidnan, wanjh bedda warridj ngabendung.

6 Dja ngaleng, ngaye munguyh ngabendjalmarnedjare duninj birrimirndewern bininj dja nawu mawahmawah bedberre bu ngandimarnedjare dja kabirriwokmarrkmang manbu mankarre ngardduk. Kuhni ngakurdyime munguyh munguyh.”

7 “Yuwn bu kandingeywarrewon ngaye. Dja ngaye, Yawey nawu God ngudberre. Minj ngayime namak bininj nawu kunmekbe kayime ngardduk.”

8 “Ngudda munguyh ngurriburrbu kunbarnangarra manbu Sabbath, dja munguyh ngurridjalmarnbun maninjmanu kunbarnangarradjamun bu djal ngaye ngardduk.

9 Dja bu six kunbarnangarra wanjh ngurridurkmirrin dja ngurriyakwo rowk kore ngurrikarme bu ngurrikurdyime,

10 dja kunbarnangarra seven, mahni wanjh Sabbath ngardduk, ngaye Yawey nawu God ngudberre. Kunukka wanjh ngurridjalngehmen, dja yuwn ngurridurkmirri, ngayime ngudda, dja wurdwurd ngudberre, dja mak bininj dja daluk nawu ngundihmarnedurrkmirri, dja mak mayh ngudberre, dja mak bininj nawu kubolkbubuyikabeh ngurriwohyo kore kunred ngudberre. Yuwn nangale karrurkmirri bu kunbarnangarra Sabbath.

11 Dja ngaye wanjh Yawey ngabolkmarnbom kaddum dja kurorre, dja mak kurrula, dja mak yehyeng rowk ngamarnbom nawu kurorrewaken, dja mak kungolwaken dja mak kukkuwaken. Bu ngarrurkmirranj six kunbarnangarra. Kaluk bu kunbarnangarra manbu seven, kunukka wanjh ngangehmeng. Kunmekbekenh kunu ngaye Yawey ngamarneyime kunmekbe Sabbath kunbarnangarra seven wanjh ngayimeng bu kunbarnangarramak, dja ngamarnbom kunbarnangarradjamun ngardduk.”

12 “Ngurbenbenebekka dja ngurbenbenenahna kornkornkumo nawu ngudberre, dja ngalbabadjan ngudberre, ba bu kunkuyeng ngurridjaldar-kiddi kore kunred ngaye bolkwon ngudberre.”

13 “Yuwn nangale ngurribun ngurrikukkurme.

14 Yuwn nangale bininj kabiwohkodjekmang daluk ngalbu minj ngalbininj kobeng duninj nuye, dja yuwn bu daluk kabiwohkodjekmang nawu bininj minj nabininj kobeng duninj ngalenggarre.

15 Yuwn njale ngurridjirdmang.

16 Yuwn ngurrikurren bu ngurrimulewan nabuyika.

17 Yuwn ngurriwurrmang nawu birribuyika kunrurk bedberre, dja yuwn bu mak ngurbenwurrmang ngalbininj kobeng bedberre ngalbu kabindibebbehkarme, dja yuwn bu mak ngurbenwurrmang bininj dja daluk nawu kabindihmarnedurrkmirri, dja mak nawu mayh bedberre dja mak yehyeng rowk nawu birribuyika bedberre, yuwn ngurriwurrmang.”

20:12 Ngurrina Matthew 15:4; 19:19; Mark 7:10; 10:19; Luke 18:20; Ephesians 6:2-3 **20:13** Ngurrina Matthew 5:21; 19:18; Mark 10:19; Luke 18:20; Romans 13:9; James 2:11 **20:14** Ngurrina Matthew 5:27; 19:18; Mark 10:19; Luke 18:20; Romans 13:9; James 2:11 **20:15** Ngurrina Matthew 19:18; Mark 10:19; Luke 18:20; Romans 13:9 **20:16** Matthew 19:18; Mark 10:19; Luke 18:20 **20:17** Ngurrina Romans 7:7; 13:9

Bu Birrimarnekeleminj Nawu God

Exodus 20:18-21

(Deuteronomy 5:22-33)

¹⁸ Bu bininj nawu Israel benkebmawahmeng kunmekbe birribek kang ngurdulmeng dja trumpet kayhmeng, dja mak birrinang bu mayhmayhkeyi, dja mak kundolng wayhmiwayhmi kore kuwarddekimukbeh, bedda wanjh birrikeleminj duninj bu birrideldelmeng. Wanjh djarrehkah birridanginj dja minj birrimdarnhderrehmeninj kore darnkih kunwarddekimuk.

¹⁹ Kaluk bedda birrimarneymeng Moses, "Djal yingan ngudda yiwokdin ngadberre ba ngad wanjh ngundibekkan. Dja yuwn bu nungan God kawokdi ngadberre, dja kunukka ngarridowen."

²⁰ Wanjh Moses benmarneymeng bedberre, "Yuwn bu ngurrikele. Dja nungka God kumwam bu ngunrohrokme ngudberre. Nungka kadjare ngudberre bu ngurrikengeme munguyh nuye, ba kunukka minj ngurriwokburriwe nuye."

²¹ Wanjh bedda djarreh birridanginj minj birridarnhderrehmeninj kore darnkih kunwardde, dja nungka Moses wam darnkih kore kunngolburleri kore God kumkoluy ningihni.

Yawey Benbengdayhkeng Bu Birrimarnbom Manbu Altars Nuye

Exodus 20:22-26

²² Wanjh nawu Yawey bibengdayhkeng Moses, yimeng, "Kuhni yibenmarneymen nahni bininj nawu Israel benkebmawahmeng, 'Nguddabidju ngurrinang bu gaye ngawokdanj kore ngudda bu ngawokdanginj kore kaddum heavenbeh. Kuhni wanjh marneymeng,

²³ "Yuwn ngurrihmarnebodan nabubuyika gods yerrih, dja gaye ngadjalkudji kanmarnebodan. Yuwn bu ngurrihmaribun gold dja silver ba bu kakukyimerran yiman god nayahwurd kore ngurridjare.'"

²⁴ "Dja ngaleng ngurrimarnbu altar manbu kunkulk dorrengh ngardduk, ba mayh kandimarnebu ngardduk yiman nawu sheep dja nanikud dja bulikki. Yikahwi ngurriwurhke ba kukmokenh karung, dja mak yikahwi ngurridjalkanjinje ba bu ngurridjarrkungun kunmodmikenh dorrengh ngayekenh. Wanjh ngamre marnekurduyime kunmak ngudberre bu baleh kabolkyime ngadjare bu bininj ngandingeyburlume.

²⁵ Bu ngurrimang kunwardde bu ngurrimarnbu altar ngardduk, yuwn bu ngurrimarnbu tools dorrengh bu ngurridadjadje kunwardde kore baleh ngurrikukmarnbu. Wanjh kunukka ngurriwarrewon dja minj mandjamun ngardduk.

²⁶ Dja yuwn bu bininj kabidbun steps kore altar ngardduk, wardi biribuyika bininj kabirrinan kore dedjlarrk kanjdji kunmadj, dja kawarre.'"

21

Mankarre Manbu Kabindimarnedurrkmirrikenh Bininj Nawu Slaves

Exodus 21:1-11

(Deuteronomy 15:12-18)

¹ Wanjh Yawey bimarneymeng Moses, "Mahni mankarre makka wanjh yibenkarrewon nawu Israel benkebmawahmeng. Ngurrbenmarneymen,

² 'Bu yikukbayahme nawu Hebrew* bininj, kaluk nawu ngunmarne-durrkmirri, wanjh nakka nanu kahdjaldurrkmirri ke bu kunbidkudji dja nakudji mandjewk. Dja bu kabolkyimerran seven mandjewk, wanjh ngudda yimungawemen namekbe bininj bu kare. Nungka minj njale mak ngunkarremulewan.

³ Dja bu namekbe bininj minj bikarrmeninj ngalbininjjobeng bu dedjingmang ngunmarnedurrkmirri, nakka wanjh ngunbawon kadjalre dalukyak. Dja bu yiman bikarmeng ngalbininjjobeng bu dedjing-mang ngunmarnedurrkmirri, wanjh nakka ngalbininjjobeng dorreng kabenedjarrkre bu nungka ngunbawon.

⁴ Nawu kabimarnewohrnan bininj nawu kabihdurrkmirri nuye wanjh kabiwon daluk kabenemarren, dja ngalbu daluk ngalka wanjh kabenyaw-mang narahrangem dja ngaldahdaluk, wanjh ngalmekbe daluk dja nawu ngalenggarre wurdwurd nakka wanjh kabirridi munguyh kore namekbe nawu kawohrnan. Dja bu kabimunkewe namekbe nawu kabihdurrkmirri nuye kare, wanjh nadjalkudji kare, kabenbawon ngalbininjjobeng dja nawu wurdwurd.'

⁵ 'Dja nawu kabihmarnedurrkmirri kayime, "Ngaye ngamarnedjare nawu ngahmarnedurrkmirri, dja mak ngabenmarnedjare ngalbininj-jobeng ngardduk dja mak wurdwurd ngardduk. Wanjh ngaye ngadjare ngahdi munguyh, dja minj ngare."

⁶ Wanjh nawu kawohrnan bininj kabikan namekbe nawu kabih-marnedurrkmirri kore nawu kabindidjadme.† Dja yerre kabiname kore door kundulk dja kabikanemdulubun wirlmurrng dorreng. Wanjh kunmekbe kakurduyimerran nuye bu kabidjalmarnedurrkmirri munguyh dja munguyh.'

⁷ 'Bu bininj kabikukweykan ngalbeywurd nuye ba kabongdi dja kabi-marnedurrkmirri nabuyika bininj, wanjh minj nawu namekbe kabi-marnewohrnan kabibawon kare. Minj karohrok yiman narahrangem bu kabirridurrkmirri.

⁸ Dja bu nawu kawohrnan kabikukbayahme ngalmekbe daluk bu kabi-marnedurrkmirri bu kunmekbekenh kadjare kabenemarren, dja kamayal-iborledme dja minj kabimarnedjare, wanjh nungka bidurndiwemen nawu kornkumo bu kabikukbayahme. Mak yuwn bu nawu kabimarnewohrnan kabikukweykan ngalmekbe daluk kore nawu birriwokbuyika bininj. Dja nungka minj kunmak bimarnekurduyimeninj ngalmekbe daluk.'

⁹ 'Dja bu bininj kabikukbayahme daluk ngalbu kabihmarnedurrkmirri dja kabiwon ngahli daluk ba kabenemarren nuye nabeywurd, wanjh kabimarnbun ngalmekbe daluk yiman ngalbeywurd nuye rerrih.'

¹⁰ 'Dja bu bininj kabimang ngalbuyika daluk bu kayimerran ngalkerrnge ngalbininjjobeng, wanjh kunukka minj kabidenghke ngalbu ngalyungkih bu kangun manme, dja bu kunmadj kadjongbuyindi dja bu kabeneyo nahni bininj.

¹¹ Bu maninjmanu danjbik nungka bininj minj kabiwon, wanjh kunukka nahni bininj wanjh bibawo ngalmekbe daluk bu kare, dja minj ngalka kunwardde kabikarremulewan warridj.' "

Mankarre Manbu Kabirriburrenkeh Bu Kabirrilonburren

Exodus 21:12-27

* **21:2** "Hebrew" kamenyime "nawu Israel bikebmawahmeng". † **21:6** Kore Hebrew kunwok, wanjh yikahwi djurra kabimbuyindi, "kabikan kore God".

12 Dja Moses yimeng bedberre kore Yawey biwokwong bedberre, yimeng, "Nangale nawu bininj kabibun nabuyika bininj bu kabibun kabikukkurrme wanjh nungka ngurribu nunganwali karrownen.

13 Dja bu namekbe bininj kabibun nabuyika bininj bu djal mungu, wanjh kunukka God kadjalbawon bu kunmekbe kadjalkurduyimerran, wanjh kamak bu namekbe bininj kelerlobmen kore kunbolk ngabolkmarnbun.

14 Dja bininj nawu kakarremarnburren dja kabibun kabikukkurrme nabuyika bininj, wanjh nakka nanu nunganwali ngurribu bu karrownen. Mak bu yiman kahdi kawernhkarrme kore altar ngardduk wanjh ngurrid-jalyerrkkemen ngurrika kubolkbuyika dja ngurribu karrownen."

15 "Nangale nawu kabibun nuye kornkumo dja nuk ngalbadjan nuye wanjh nakka ngurribu ba karrownen.

16 Dja mak nangale nawu kabadjirdmang nabuyika bininj dja kabikuk-weykan dja yiman mak kabihdjalkarrme bu ngurridarrkidmang, wanjh nakka ngurribu, ngurrikukkurrme.

17 Nangale nawu kunwarre kayime berrewoneng kornkumo dja ngal-badjan bu kadjare kabenedowe, wanjh nakka ngurribu, karrownen."

18 "Bu bininj bokenh kabenedangwerren, wardi nakudji kabikodjdong nabuyika kunwardde dja yika kunbid nuye kabirrong, dja kabimarnbun kakanjbabang dja minj kabibulkkidjmang dja wanjh nakka nanu kahdja-lyo dja minj mak kabalwohre.

19 Dja kaluk namekbe bininj nawu kanjbabangni, bu karrollkan kawohrewohre kurobbe, kunkarndudj dorrengh, wanjh namekbe nawu bikodjdoy nakka nanu minj ngurriwelengname. Dja nakka bikar-remulewa nawu bikodjdoy, dja mak bibidyikarmen bu kabinahnan kaluk bu rerrikah nawu karrulkkihni kamakmen dja kayawoyhdurckmirri."

20 "Dja bininj nawu kabenkarrme bininj dja daluk nawu kabirrimarne-durckmirri, dja bu kabibun daluk yika mak bininj nawu kabihmarne-durckmirri kundulk dorrengh, wanjh kunubewu nawu kabihmarnedurck-mirri karrownen kundjalmekbe rerrih. Bu kuhni kakurduyimerran, wanjh nahni bininj nunganwali ngurridong.

21 Dja nawu kahdurckmirri karrulkkihni bu kunkodjke nakudji yika bokenh, dja kamakmen, karrollkan, wanjh nawu kabihmarnewohrnan nakka minj mak ngurribun. Dja bininj nawu kabimarnedurckmirri wanjh nungan nuye."

22 "Bu bininj bokenh yiman kabeneburren dja kabenebun ngalbu ngalmerlemyi kumekbe kahdi, dja kabemarnbun wurdyaw ngarre kambebmen dja kabarrkendowen, wanjh kawarre. Dja bu minj benelorkemeninj ngalmekbe daluk kore kunburck ngarre, wanjh namekbe bininj nawu biwarrewong wanjh nakka karremulewa kunwardde bu baleh yarrkka ngalbu daluk ngalenggarre nabininj kobeng kadjare, bu nawu kabindidjadme bininj kabirribawon.

23 Dja bu yiman kundjak kangalme kunkimuk duninh ngalenggarre kunburck, wanjh ngurribu namekbe bininj nawu biwarrewong. Kuhni wanjh mandjadkenh ngurrirohokmen. Bu daluk karrownen, wanjh nawu biwarrewong warridj karrownen.

24 Ngurrikarremarnbu munguyh ba bu mandjaldjad. Bu bininj kawayhke yiman nakudji kunmim nabuyika nuye, wanjh nungan-wali kakarremulewan nakudji kunmim nuye; bu kunyidmekudji kabi-marnewarrhke, wanjh kakarremulwan kunyidmekudji nuye; bu kunbid karradjke, wanjh kunbid nuye kakarremulwan; bu kurrenge karradjke, wanjh kakarremulwan kurrenge.

25 Bu kabikulahwurlhke, wanjh nunganwali kakarremulewan bu nungka kakulahrung. Dja bu kabilonbun, wanjh karohrok nunganwali kakarremulewan yiman kayime kamang kunlon.”

26 “Dja nawu bininj kabenkarrme nawu kabirrimarnedurrkmirri, dja bu kabirrong nuye bininj yika daluk nawu kabihmarnedurrkmirri dja kabimimdong, dja kamimwarremen, kaluk namekbe bininj wanjh bimunkewemen nawu kabihmarnedurrkmirri kare dja bikarremulewa kunmimenh.

27 Dja bu kabirrong dja kabiyidmebakke dja kabiyidmewarrhke namekbe nawu kore kabihmarnedurrkmirri yiman daluk yika bininj, wanjh namekbe bininj nawu kawohrnan bimunkewemen kare dja bikarremulewa kore biyidmewarrhkengkenh.”

Mankarre Manbu Mayh Nabang

Exodus 21:28-36

28 “Yiman bu kayime nawu bininj nuye bulikki kabibun bininj yika daluk, wanjh ngurribu namekbe bulikki bu ngurrikodjdong kunwardde dja ngudda mak yuwn ngurringun namekbe bulikki. Dja bininj nawu bulikki nuyeni nakka wanjh minj ngurriwelengname.

29 Dja bu namekbe bulikki kerrngehkenhni benhbuyi birriwern bininj kunmarddor dorrengh, dja bu bininj nawu karrmi wanjh birriyingkih-bengdayhkeng dja minj dangbalhmeninj nawu bulikki, wanjh kunbuyika. Dja kuhni bu kabibun bininj dja yika daluk, wanjh ngurribu namekbe bulikki kunwardde dorrengh, dja mak bininj nawu mayh nuye wanjh nungan warridj ngurribu.

30 Dja bu namud nuye bininj nawu bulikki biwarrewong kabirridjare namekbe bininj bu kabenkarremulewan, wanjh bonj, nakka ngurridar-kidbawon bu nungka kabenkukwon money kore kabirridjare.

31 Mahni mankarre wanjh kayolyolme warridj kore bulikki yimankek kabibun wurdyaw.

32 Dja bu bulikki kabenbun bininj dja daluk nawu kabirrimarne-durrkmirri nabuyika bininj, wanjh nungka nawu bulikki nuye, wanjh kabikukwon nakimuk djilba nawu money, yiman 30 shekels, dja namekbe bulikki wanjh ngurridjaldo ba karrownen.”

33 “Wardi bu bininj kabolkkarung kudjorlok, dja nuk minj kadjor-lokbarrkbn bu kunmakkenh, kunubewu mayh kamre kamankan kore kudjorlok, dja karrownen, yiman bulikki dja nuk donkey.

34 Bu kuhni kayimerran, wanjh bininj nawu minj djorlokbarrkbuyinj, wanjh kabikarremulewan bininj nawu karrmi mayh nawu mankang. Dja bininj nawu djorlokbawong, wanjh kakukkarrme mayh nawu doweng.”

35 “Bu bininj bokenh kabenebebbekarrme bulikki bokenh, dja nakudji wanjh kabibun nabuyika bull bu karrownen, wanjh nahni bininj bokenh kabenekwalaybun mayh nawu doweng, dja mak kabeneuweykan nawu karrarrkid mayh, dja kabenekukwalaybun nawu money.

36 Dja mak nawu bininj nuye bulikki bu kunyungkihni benhbuni birribuyika mayh dja nawu nuye bulikki minj dangbalhmeninj, wanjh bikarremulewa bu yiman kabiwon bulikki nakerrnge. Dja bulikki nawu doweng, nakka wanjh nunganwali kakukmang bu kayimerran nuyekih.”

Exodus 22:1-15

1 Wanjh Moses benyawoyhbengdayhkeng, bu yimeng, “Bu bininj kadjirdmang bulikki yika sheep dja mak kabun dja nuk kakukweykan, wanjh kunukka kabikarremulewan kunbidkudji bulikki kore bininj nuyeni nawu bulikki, dja kabikarremulewan kunkarrngbakmeng nawu sheep kore bininj nawu sheep nuyeni.”

2 “Kaluk nawu dedjorlkwern bininj bu karurrrkbakke kururrrk ba bu kadjirdmang njalenjale bu kukak, dja bininj nawu kunrurrrk nuye kabadarrkidmang dja kabibun, dja mak bu namekbe dedjorlkwern karrown, wanjh bininj nawu bibom minj kawowarre kore kunkurlba nuye nawu dedjorlkwern.

3 Dja ngaleng, bu kuhni kakurduyime yerrekah bu kumbarrhbom, dja bu kabibun namekbe dedjorlkwern bininj kore kunbarnangarra, wanjh kunbuyika, dja kunwarre kurduyimeng bu bikurlbawarrhkeng nawu dedjorlkwern.

Bininj nawu dedjorlkwern wanjh kakarremulewan bu kadjirdmang njalenjale, dja kabikukwon bininj nawu nuye kunmadj djirdmey. Kaluk bu nahnj nawu dedjorlkwern minj njale mak kakukkarrme nawu nuyekihniwirrinj, wanjh kunukka nungka ngurrikukweyka yiman kayime slave ba kakarremulewarren nawu kore benhmarnedjirdmangi.”

4 “Bu nangale bininj nawu dedjorlkwern kadjirdmang mayh yiman kayime bulikki, dja nuk donkey dja yika nawu sheep, dja bu birribuyika bininj kabirringalke bu kadjalkarrme mayh nawu kadjaldarrkid, wanjh nakka kabikarremulewan bininj nawu nuye mayh bu bokenhkah kore mayh nakudji.”

5 “Dja bininj nawu yiman kabawon bulikki nuye yika djarrang dja mak sheep nuye bu kare karralkngun kore manme karrudjindi, dja yika kore manrakel kahdi, dja bu namekbe bininj kabawon mayh nuye kaballe kore nabuyika bininj nuye kunbolk kore kabaldalkngun, wanjh namekbe bininj nawu mayh nuye kabikarremulewan nabuyika bininj nawu manme dja kundalk bimarneyakwong.”

6 “Kab bininj nawu yiman kawurlhke kunak, dja manmekbe kunak kabirluwarlahmen kore kundalk manmirrhyi, dja kabalbirluwarlahmen kore kabball nuye nawu bininj nabuyika dja kabalrung nuye manme manbu dudjehdudjengi, wanjh namekbe bininj nawu wurlhkeng kunak, wanjh kabikarremulewan nabuyika bininj nawu kore manme nuye bimarneruy.”

7 “Bininj nawu kabikukwon money dja nabubuyika namakmak kunmadj kore namekbe nabadbuyika bininj bu kabimarnekarrme nuye, dja mak bu dedjorlkwern kangimen kumekbe kunrurrrk dja kadjirdmang namekbe money dja namekbe kunmadj, dja bu bininj kabirridarrkidmang nawu dedjorlkwern bininj, wanjh nakka kabikarremulewan bokenhbokenh nawu kore djirdmey.

8 Dja bu bininj minj kabirringalke nawu dedjorlkwern, wanjh namekbe nawu kunrurrrk nuye ngurrika kore nawu kabirridadmekenh bininj, ba bu kabirribekkarren dja kabirriyime bu kunubewu nungandeleng djirdmayi njalehnjale nawu nabuyika nuye.”

9 “Bu yiman bininj bokenh kabeneidangwerren nawu njale yarrkka yiman kayime donkey, sheep, bulikki, kunmadj dja njalenjale nawu warrhkerrinj, mak bu bedda kabenebebbeyime, ‘Nahnj ngardduk!’ dja yiman kabenewelengnamerren, wanjh benemekbe bokenh bininj beneray kore bininj nawu kabindidadmekenh. Wanjh namekbe bininj nawu kabirriyime bu kawowarre, wanjh kabikarremulewan bokenhbokenh nawu namekbe beneredbo bininj.”

10 “Kunmekbe rerrih mak bu bininj yiman kabidjawan nawu nuye ngunerredbo bu kabimarnenahnan nawu donkey, bulikki sheep dja mak nabubuyika mayh, wanjh bu yiman namekbe mayh karrownen dja yika kalonburren, dja yika dedjorlkwern kadjirdmang nawu mayh, dja minj nangale kaburribun kore baleh wam namekbe mayh.

11 Wanjh bu nahni bininj bokenh kabenedangwerren namekbe mayhkenh, wanjh namekbe bininj nawu bimarnenahnayi nahni mayh wanjh wokkurmerrimen kore kumirrk nuye Yawey. Bu kamulewarren bu minj bikilekmeninj namekbe mayh, wanjh nabuyika bininj nawu nuyekih mayh biwokmarrkma namekbe bininj dja minj kabikewkme, dja bininj nawu yimankek bimarnenahnayi mayh wanjh minj kabikarremulewan.

12 Dja bu namekbe mayh nawu woybukkih birridjirdmey bu nahni bininj nahnayi, wanjh nakka bikarremulewa bininj nawu mayh nuye.

13 Dja bu yiman nabang mayh kamre kabun nawu mayh bu kumekbe bininj kanahnan, dja wanjh kakanjdadjadje, wanjh kakukmang kakukkan kabenkukbukkan birriwern bu woybukkih bibom nabang mayh, wanjh kunukka kabirriburribun ba namekbe bininj minj kabikarremulewan nabuyika nawu mayh nuye.”

14 “Mak bininj nawu kabibidyikarme mayh nawu nabuyika bininj nuye, wanjh namekbe mayh kamankan bu karradbakme mak yika bu karrownen, dja bu bininj nawu mayh nuye minj kumekbe karri, wanjh bininj nawu karrmi mahni mayh bu kurduyimerranj, mayh nakka nanu bikarremulewa namekbe nawu nuye mayhkenh.

15 Dja ngaleng bu bininj nawu nuyekih mayh karranhmadbun nuye mayh bu kuhni kakurduyimerran, wanjh nabuyika bininj nawu bidjawam bihbidyikarme wanjh minj kabikarremulewan. Bu yiman namekbe mayh kabibidyikarme bu moneykenh, wanjh kunukka money nawu ngokko bikukwong, wanjh kakarremulewayindan kabarrkbun nawu kore mayhkenh karrownen nawu bihbidyikarri.”

Mankarre Manbu Dalukkenh Dja Bininjkenh Dja Mak Moneykenh

Exodus 22:16-31

16 Wanjh Moses benyawoyhbengdayhkeng, yimeng, “Yiman bininj kabingalke daluk ngalbu minj bininj birriberrebbuyi dja mak minj bininj benbangmeyuwirrinj, dja bu kabikowe bu kabimang kabeneyo ngalmekbe daluk, wanjh kunukka kabebenekarremulewan ngalbadjan dja kornkumo bu kabenemarrenkenh, dja nungka bikarrikenh ngalmekbe daluk bu kabimarnbun ngalbininj kobeng nuye.

17 Dja bu kornkumo ngalenggarre daluk kabidahme namekbe bininj minj kadjare kabimang ngalbeywurd nuye, wanjh namekbe bininj bidjalkukwo karrohok money bu kabikarremulewan kabenemarrenkenh ngalenggarre daluk ngalbu minj bininj beneyuwirrinj.”

18 “Ngalngale daluk ngalbu kahkurduyime kunwarre yiman kayime murnde kamang dja marrkidjbu kamarnburren, wanjh ngurribu, ngurrikurrikenh.”

19 “Ngurribu ngurrikurrikenh nangale bininj nawu yiman kayime kunwarrekenh kabeneyo nawu mayh.”

20 “Dja mak ngurribu nangale bininj yika daluk nawu mayh kabiwon dja kamarneban nuye nawu nabuyika god. Yawey nakka nadjalkudji God duninj kadberre.”

21 “Yuwn bu ngurribenwarrewon nawu birriwokbuyika bininj. Ngurriburribun ngudda wanjh ngurriwokbuyikani bu ngurrihni Egypt.”

²² “Dja yuwn bu mak ngurrimarnedjirdmang ngalenggarre ngalbu kamarrdjukun dja mak nawu ngalbadjanya dja kore kornkumoyak.

²³ Bu kunmekbe ngurrikurduyime bedberre dja bedda kabirrikayhme Yawey ba bu kabenbidyikarmekenh, wanjh woybukkih, nungka kabenbekkabekkan.

²⁴ Dja Yawey kayiddung ngudberre dja kunukka bun ngudberre dja ngurridowen mandjawakwi. Wanjh nawu ngalbibininjkobeng ngudberre nakka wanjh kabirriyimeran kamahkamarrdjukun dja wurdwurd ngudberre nawu ngurrbenbornang nakka wanjh birrimarladj kabirridi.”

²⁵ “Bu ngurrbenkukwon waken kunwardde bininj nawu Yawey nuye, nawu minj njale kabirrikukkarme, yuwn bu ngurrikurduyime yiman nawu kunwardde kabenhwonowon ba bininj kunwernkenh kabirrikukdurndiwe. Yuwn bu ngurrbenjanwohme bu kunwern kunwardde ngundimarnekukdurndiwe.

²⁶ Dja bu yikukwon waken nawu ngunerredbo ba bu yibidyikarme, dja nungka ngunwon nuye kunmadj bu yikarme kore kunwardde ngunkukdurndiwekenh, wanjh nahni kunmadj yiwo kunbarnangarra rowk bu darnkih kabaldungyibme ba bu kakakdjongbuyindi.

²⁷ Dja wanjh nakka nadjalmekbe nakudji kunmadj nawu kadjongbuyindi bu kahkukballmerren ba bu kakodjkeyo kamak. Bu burrkyak, dja kunu nungka kabikayhme Yawey bu kunmekbekenh, wanjh nungka kabibidyikarme, dja nungka nawu mimkongiwersn.”

²⁸ “Yuwn bu ngurrimarneyime kunwarre God nuye, dja yuwn bu mak kunwok kunwarre ngurrimarneyime nuye nawu kawohrnan ngudberre bininj.”

²⁹ “Yuwn bu mak ngurridahme nawu Yawey nuye manbu manmim dja yika mankalkkid ngurrimangi, dja yika wine ngurribomarnbom kore ngurriborrahkendoy kore ngalngkimuk ngudberre. Dja mak ngurriwo nabebeywurd ngudberre nawu kaluk nadjaman rowk.

³⁰ Karohrok yerrih bu ngurriwo bulikki dja sheep yayaw ngudberre nawu nadjaman rowk. Ngaleng ngurrbenbawon ba kabirrihni kore ngalbadjan bu seven kunbarnangarra, dja kore kunkodjke eight, wanjh ngurriwo nawu Yawey.”

³¹ “Kaluk ngudda wanjh Yawey nuye bininj. Wanjh kunukka yuwn bu ngurringun kukanj nawu nabang mayh kabun. Dja ngurrikanjburriwemen mahni kukanj kore duruk kabirrikanjgun.”

23

Mankarre Manbu Kabirrinahnarrenkenh

Exodus 23:1-9

¹ Moses benbukkabukkang manbu mankarrekenh Yawey nuye, yimeng, “Yuwn ngurrire ngurrihyolyolme bu ngurrbenkowe bininj. Yiman kayime bu ngurrire kore court, yuwn ngurribidyikarme nawu nawarre bininj bu ngurrikurren kore court.”

² “Dja mak yuwn bu ngurrbenngunjdjikan birriwersn bininj kore kabirrikurduyime kunwarre. Dja yuwn mak ngurrbenngunjdjikan birriwersn bininj nawu court kabirrire dja kabirridjalkurren ba bu kabirriwarrewon manbu mandjad mankarre.

³ Bu bininj nawu namarladj kahre kore court, kunubewu ngurridjare ngurribidyikarme, dja bonj, yuwn bu ngurrimarnewarrewon manbu mandjad mankarre nuye nahni nawu namarladj.”

4 “Bu ngurrinan mayh nawu bulikki yika donkey kabalhbengmayahme nuye nawu ngunehyidko, dja bonj, ngurriyikan nuye.

5 Mak kunmekbe rerrih kayime nawu nguneyidko nuye djarrang bu kamakan kabibakke nawu dulmuk kunmadj kahngorran, wanjh yuwn mak ngurribawon bu ngurrire. Dja ngurribidyikarmen nawu nguneyidko bu ngurriwayhke namekbe djarrang ba bu kamak karrangen.”

6 “Bu namaraldj bininj kare court, wanjh ngurrikarreyolyolmen bu djal mandjad nuye. Yuwn bu ngurriwarrewon nawu minj nakuken.

7 Dja mak yuwn ngurrikurren bu ngurrimulewan bininj kore ngurriwiddjung nungka kore court. Ngurrimulewa bu djal mandjad. Dja bininj nawu minj kunwarre kurduyimeninj, dja yika bininj nawu kundjalwoybuk kawokdi, wanjh yuwn bu ngurribun. Dja nawu Yawey minj kabibawon nawu nawarre bininj bu kare.”

8 “Bu nawarre bininj kadjare ngunkukwon money ba bu ngurrikurren kore court, wanjh yuwn ngurrimang mahni kunwardde kore kamweykan. Namekbe kunwardde wanjh ngunmayaliwarremen ba bu minj ngurridjalburrbun bu mandjadkenh, dja kunukka ngurribalhwernhwarrewon bininj nawu minj kunwarre kurduyimeninj.”

9 “Yuwn bu ngurrbenwarrewon bininj nawu birrikang kubolkbuyika kore ngurrihni. Ngurriburrbu kunkareni bu ngurrihni Egypt, wanjh ngudda ngurriwokbuyika bedberre nawu birrikang Egypt.”

Yikahwi Yawey Nuye Mankarre Manbu Sabbathkenh

Exodus 23:10-13

10 “Bu mandjewk kunbidkudji dja nakudji ngudda wanjh ngurridjaldudjeng manme kore kabbal ngudberre, dja bu kadjolengmen wanjh ngurrimoyhmanj bu ngurringunkenh.

11 Wanjh bu mandjewk nawu kayimerran kunbidkudji dja bokenh, wanjh nakka minj ngurribolkkarung dja minj mak kunmekbe ngurridudjeng manme. Dja bu manme kadjordmerren kumekbe, wanjh nakka ngurrbenwo birribuyika bininj nawu minj birrikuken, dja bu bedda kabirribawon yikahwi, wanjh ngurrbenwon mayh nawu kurralkwaken. Kunmekbe rerrih ngurrikurduyimen manbu grapes dja olives manbu kadjordmerren ngudberre kore mandjewk manbu Sabbath.”

12 “Ngurridjaldurrkmirrin bu kunkodjke six, dja bu kayimerran kunkodjke seven, wanjh ngurringurdmen, dja kunukka ngurridjalngehmen. Kuhni mak kayimerran bedberre mayh dja bininj nawu kabirrihdurkmirri ngudberre. Ngayime bulikki, mak donkeys, mak slaves nawu birridanginj kore ngudberre namud, dja mak nawu birridjenbubuyika ngurrihni. Bedda rowk wanjh minj kabirridurkmirri kore manbu Sabbath ba bu kabirringehme.”

13 “Kab ngurrinahnarrimen dja ngurriburrbu rerrih bu ngurrikurduyime rowk kore Yawey ngunmarneyimeng ngudberre. Yuwn bu mak ngurrbenkayhme bu ngurrbenngyebun nabubuyika nawu gods. Namekbe nawu gods wanjh yuwn bu ngurringeybun, dja kunngyebudberre minj kambembe kurrangbeh ngudberre.”

Mankarre Manbu Mulil Danjbik Bu Mandjewkwern

Exodus 23:14-19

(Exodus 34:18-26; Deuteronomy 16:1-17)

¹⁴ Moses benmarneyimeng kore Yawey benwokrayekwong, yimeng, "Kuhni wanjh Yawey yimeng, 'Bu mandjewkbbubuyika rowk, wanjh ngurrikarmen danjbikkah mulil bu ngaye kandimulilmang, dja kunmekbe ngurrikurduyimen munguyh.'

¹⁵ 'Ngurrikarmen mulil manbu buriddi minj kakarme manguk-lurlmikenh. Mandjalmekbe ngurridjalngun bu kunkodjke rowk seven, kore wokrayekwong ngudberre bu ngurrihni kunbolk Egypt. Ngurrikarmen mahni mulil kore kabolkyime dird Abib, dja kunmekbe dird bu ngurribemeng kunbolk Egypt.'

'Minj nangale mak kambebme kumirrk ngardduk bu nungka djal bidlarrk.

¹⁶ Kab ngurrikarmen mulil ngarre manme manbu kore ngurrimang mandjoleng kore kabbal ngudberre ngurridudjengi, dja ngurridjalngu manbu manyungkih ngurrimang. Dja warridj ngurrikarmen mulil manbuyika ngarre bu kahyiburnburn nawu mandjewkkudji kore ngurriyakwon bu ngurrimoyhmang rowk manme kore ngudberre kabbal.

¹⁷ 'Mandjewkbbubuyika rowk wanjh kuhni bu ngurrikarme maninj-manu danjbik mulil. Dja bu ngurrikarme mulil, wanjh kuhni danjbikkah, wanjh bininj rowk ngudberre ngurrimray ba ngurribemerren kore kumirrk ngardduk. Ngaye wanjh Yawey nawu Ngahwohrnan Rowk.'

¹⁸ 'Bu kandimarnekinje mayh nawu kandiwon ngaye, wanjh yuwn bu kunmekbe kandiwon buriddi warridj manbu kakarme manguk-lurlmikenh. Dja mak bu kandimarnekinje kore maninjmanu mulil, wanjh yuwn bu ngurrikarekurme manbu mayh nuye kunbalem ba kayo bu kunkodjekudji kukabelkenh ngurrikinje.

¹⁹ Dja mandjewkbbubuyika ngurrima manme manbu manyuhyungkih dja manmakaykenh ngurrimang, dja ngurrimka kore kunrurrdjamun ngardduk, ngaye Yawey wanjh God ngudberre.'

'Dja bu ngurrikinje nanikud yaw, wanjh yuwn bu ngurridjuhke ngurrikinje kore ngalbadjan ngarre kundjikkakenh.' "

God Benwong Angel Nuye Bu Karrokme Bedberre

Exodus 23:20-33

²⁰ Moses benmarneyimeng kore nawu Yawey benbengdayhkeng, dja yimeng, "Nawu Yawey ngunmarneyime, 'Yina! Ngaye wanjh ngamunkewe ngardduk angel bu karrokme ngudberre, nawu ba ngunnahnan kore ngurrirengahre. Kaluk ngunkanahkan ngudberre kore kunred ngaye ngayingkihbolkmarnbom ngudberre.

²¹ Ngurriwokbekkabekka dja ngurriwokmang kore baleh ngunmarneyime ngudberre. Yuwn bu ngurridahme. Kunukka minj ngunmarnebegmidjdan ngudberre bu ngurridahme, dja ngaye Yawey ngamunkeweng.

²² Dja bu ngurribekkabekkan yeledj bu kayime ngudberre dja mak ngurrikurduyime bu ngaye wokrayekwon ngudberre, wanjh kunukka ngabenbun nawu ngundiwidnan, dja ngabendahme bininj nawu ngundidahme.'

²³ 'Wanjh nawu angel ngardduk nungka karrokme ngudberre bu ngunkan kore kunredbubuyika kore kabirrihyo bininj kabirringeyo Amor, dja nawu Heth benkebmawahmeng, dja nawu kabirringeyo Periz, dja nawu Canaan benkebmawahmeng, dja nawu kabirringeyo Hiv, dja mak nawu birrikang kunred Jebus. Kaluk nakka ngaye ngabenbun ngabenkuyakwon rowk.'

²⁴ 'Yuwn bu ngurrimarnebodan dja ngurriburlume bedberre nawu nabubuyika gods. Yuwn bu mak ngurrikurduyime bu yiman bedda kabirrihurduyime kore yiwarrudj bedberre. Dja ngaleng ngurribakbakkemen

nawu idols bedberre, dja ngurribakkemen dja ngurriburriwe maninjmanu kunwarddekuyeng nawu bedda kabirridjabname kurorre dja kabirriyime yimankek kuwarddedjamun.

²⁵ Ngaye wanjh Yawey ngudberre God. Bu ngudda kandimarnebard-durrukkurlhdan ngardduk ngadjalkudji, wanjh kunukka ngamarnekurduyime kunmak ngudberre manmekenh dja kukkukenh, dja ngaye wanjh kundjak ngawe ngudberre.

²⁶ Mak morlehmorlenj ngudberre bu kabirriyawmang minj kayawdown ngudberre. Dja mak won ngudberre kunngolekkuyeng ba kunkuyeng ngurridarrkiddi.'

²⁷ 'Dja bininj birriwern nawu ngundidung dja mak ngundinjirrhmiwon, nakka wanjh ngabenmarnbun bu ngaye wernkih ngandikengeme ngaye. Dja bininj nawu ngurrihburren, ngaye wanjh ngamayaliwarrewon. Dja nawu ngurriyidko bininj, wanjh ngabenmarnbun bu kabirriborledkerren dja kabirrikelerlobme ngundibawon ngudberre.

²⁸ Ngaye ngabenmarnbun nawu ngurriyidko ba bu ngurriwinhme dja ngurrbenbun. Ngaye ngabenburriwe bininj nawu kabirringeyyo Hiv, dja bininj nawu Canaan benkebmawahmeng, dja nawu Heth benkebmawahmeng ba kabirribolhbawon manbolh ngudberre kore ngurrire ngurribolkmang.

²⁹ Dja ngaleng, minj ngabendjirrkan birrimekbe bininj bu yiman kayime nakudji mandjewk. Dja yiman bu werck ngabendjirrkkayi, wanjh kunukka kunred manbu kabolkdarlehme dja mayh nawu birribang kabirriwernmerren ngudberre.

³⁰ Dja ngaleng yeleyeledj ngabendjirrkan ba kaluk ngurrimirndewernem bu ngurribolkmang kumekbe kunred ngurrini.'

³¹ 'Mahni kunred won ngudberre karredjingman kore Kurrula manbu Manborodjme* dja kayiburnbun kore Kurrula Mankimuk†. Dja mak karredjingmang kore kubolkdarleh, dja kabolkdadjme kore mankabo Euphrates. Dja won ngudberre kundulkarre ba ngurridjalle bu ngurribolkmang, dja ngurrbenburriwe birrimekbe bininj nawu kumekbe kunred kabirrihni.

³² Yuwn bu ngurriwokmarnburren birrimekbe bininj dja mak minj ngurrbenyikadjung nawu gods bedberre.

³³ Yuwn bu mak ngurrbenbolkwon kunred ba bu ngurridjarrkni, dja wardi kunukka ngaye kandibengmidjan dja kunwarrehwarre ngundibalwukan birrimekbe bininj bu ngundibukkan ngurriboddan bedda bedberre gods. Wanjh kunukka kadjalwarre bu ngudmandeleng ngurriwarreworren dja ngurridowen.' "

24

God Dja Bininj Nuye Birriwokmarnburrinj

Exodus 24:1-11

¹ Wanjh Yawey bimarneyimeng Moses, "Ngudda Moses, dja mak Aaron, Nadab, Abihu dja birribadbuyika 70 daborrabbolk nawu birrikang Israel nuye mawahmawah, wanjh ngurrimray kore ngaye bu ngurribarddurrukkurlhdan ngardduk, kaluk djarrehbeh.

² Wanjh Moses nakudji bu darnkih kamderrehme ngardduk ngaye nawu Yawey; dja nawu birribuyika rowk, nakka yuwn kabirrimdarnhre. Dja

* **23:31** "Kurrula manbu Manborodjme" wanjh kungey bokenh kakarrme yiman, "Kurrula kore Kurralkuyeng Kawernmerren." † **23:31** Kurrula Mankimuk kangeyyo warridj, "Mediterranean Sea".

mak nawu birrimirndebuyika bininj rowk, nakka wanjh minj kabirrimre kore kuwarddekimuk bu minj kabirrimdjarrkre Moses dorrengh.”

³ Moses yolyolmeng bedberre bininj nawu Israel benbekmawahmeng, manbu kunwok rowk dja mankarre rowk nuye Yawey. Wanjh birrimirndewern birriwokmey birridjarrkymeng, “Ngad wanjh ngarridjalkurduyime rowk kore Yawey yimeng.”

⁴ Wanjh Moses biwokbihbimbom rowk kore Yawey yimeng.

Kaluk bu djarreh kumhkabelni Moses dolkkang wanjh marnbom altar kore darnkih kuwarddekimuk kanjdjikah. Wanjh warddedjabnameng bebbehbeh twelve kunwarddewardde manbu menmenyimeng kunmokokurr kunbubuyika bedberre bininj nawu Israel benkebmawahmeng. Twelve kunwardde bebbehkadjurrinj twelve kunmokokurr.

⁵ Wanjh Moses benmunkeweng yawuhyawurrinj bu mayh birrimarnemokenkinjeng nawu Yawey, dja mak birrimarnebom nuye bulikki yaw ba bu birridjarrknguni kore birrikarmi kunmodmikenh nuye Yawey.

⁶ Moses kurlbamey kunkurlba kore birribom nawu mayh, kurlbawarlaybom wanjh dahkendoy kore yikahwi bannikin, dja mak mey warlaybuyika kunkurlba dja djuhdjuhkeng kore altar.

⁷ Wanjh mey namekbe djurra nawu kore wokbimbuyindi manbu Yawey benmarnewokkurmerrinj. Wanjh benmarnebimngeybom bedberre nawu bininj rowk, ba bu birriwokbekkani. Wanjh bedda birriyiming, “Ngad ngarridjalkurduyime rowk kore Yawey yimeng dja ngarridjalwokmarrkmang nungka.”

⁸ Wanjh Moses ngalngmey bannikin nawu kunkurlba dahkendi wanjh kurlbaburriweng kore bininj nawu birrihdi, dja benmarneyimeng, “Mahni kunkurlba kamenmenyime manbu kore Yawey nungan wokkurmerrinj ngudberre kore maninjmanu kunwok rowk nuye.”

⁹ Kaluk Moses, Aaron, Nadab, Abihu dja mak seventy bininj nawu dabborrabbolk birrihwohrnani bininj nawu Israel benkebmawahmeng, wanjh birriwam, birribdbom kore kuwarddekimuk.

¹⁰ Wanjh birridarrkidnang God bedberre nawu Israel benkebmawahmeng. Nungka danginj kore manbolkbabalaba manbu blue sapphire kuyimi yiman kunnog manbu djalblue medjyimi!

¹¹ Birrimekbe bininj nawu bindihwohrnani nawu Israel benkebmawahmeng birrinang God, dja nungka God minj benbuyi. Wanjh birringuneng manne dja mak birribonguneng kumekbe.

God Bikayhmeng Moses Bu Warddebidbom Kore Kunwarddekimuk

Exodus 24:12-18

¹² Wanjh Yawey bimarneyimeng Moses, “Yimbidbu kondah kuwarddekimuk kore ngaye. Dja kumekbe yirrin, ba won manbalabala kunwardde manbu ngabimbom mankarre rowk ngardduk dja kunwok manbu ngabenwokrayekwon bedberre, ba bu yibenbukkabukkan nawu birrimekbe bininj.”

¹³ Wanjh Moses dja Joshua, nawu bihmarnedurrkmirri dja bibidyikarmi, benebidbom kore God nuye kuwarddekimuk.

¹⁴ Dja Moses benyngkihmarneyimeng nawu dabborrabbolk, “Ngurridin kondah kandimadbu kaluk nganemdurdeng ngudberre. Nahni nawu Aaron dja mak Hur, nakka wanjh ngurridjarrkdi. Bu nangale bininj kabirridangwerren wanjh kabindidjawan nahni bininj bokenh ba kabindimarnekarnemarnbun.”

¹⁵ Kaluk bu Moses wam warddebidbom kore kuwarddekimuk, kaluk mahni kunngol wanjh warddebarrkbom.

¹⁶ Dja kunmakmak nuye Yawey kunkoluy kaddumbek kore kuwarddekimuk Sinai, dja manbu kunngol dingihdi warddebarrkbom bu kunkodjke six. Wanjh bu kunkodjke balmarnburrinj seven, Yawey bikayhmeng Moses kore kunngolbeh.

¹⁷ Bu nawu Israel benkebmawahmeng bininj, nakka bu birrinang manbu kunmakmak nuye Yawey, wanjh birriyimi kunak kunkimuk duninj rungihrunji kaddum kore kuwarddekimuk.

¹⁸ Wanjh Moses wam ngimeng kore kunngol, wanjh balwarnhbdbom kaddum duninj kore kuwarddekimuk. Kumekbe kunu nungka danginj bu kunkodjke forty kunkak dja kunbarnangarra.

25

Bu Birriwoni Namakmak Kore Yawey Benmarneyimeng

Exodus 25:1-9

(Exodus 35:4-9)

¹⁻² Wanjh Yawey bimarneyimeng Moses, “Yibenmarneyimen nawu Israel benkebmawahmeng kabirrimkan ngandiwon ngardduk namakmak. Yimangamang ngardduk kore birribebbekudjikudji bininj kabirridjare ngundiwon ngardduk.

³ Nahni namekbe namakmak yimang bu ngundiwon yiman wirlmurrng manbu gold, dja mak silver, dja bronze.

⁴ Dja warridj kunyarl manbu kukblue, dja kukpurple dja kukkurlba, dja mak manburrba linen namakmak dja nanikud kunngabek,

⁵ dja mak kabirrimkan ngardduk ngundiwon sheep narangem kunkulah nawu birrimedjmarnbom mankurlba, dja kunkulah ngarre marndingunjgunj dja mak kundulk manbu acacia.

⁶ Ngundiwon mak kunkalkkid manbu oliveskenh ba ngurrikinjekenh kore lamps; dja mak manbu spices bu kabirrimarnbun mankalkkidmanjmak manbu kabindikodjdjuhkekenh bininj dja mak bu kabirrimarnbun manmanjmakaykenh incense;

⁷ dja warridj ngundiwon manwarddemakmak manbu onyx, dja nabubuyika jewels nawu kabirrikurrme kore nawu ephod* dja mak kore nawu nadjamunkenh kunmadj nawu kuberrekalk kabibalhme.”

⁸ “Dja yibenmarneyimen bu kabirrirurrrkarnbun ngardduk manbu manrurrdjamun, dja ngaye wanjh ngamre ngarridjarrkni kore bedda.

⁹ Ngurrimarnbu manmekbe manrurrdjamun kore bukkabukkan manbu kore ngurriyimowon ba kamak bu ngurrimarnbu rowk.”

God Benbengdayhkeng bu Birrinameng nawu Ark

Exodus 25:10-22

(Exodus 37:1-9)

¹⁰ Wanjh Yawey biwokrayekwong Moses, yimeng, “Yibenmarneyimen nawu bininj, ‘Kuhni wanjh Yawey kanwokrayekwong kadberre bu yimeng, “Ngurrima manbu acacia kundulk ba ngurrimarnbun Ark. Bu kakuyeng wanjh nakka 110 centimetres dja bu kawarlahwarla wanjh nakka 110 centimetres, dja bu kaddum ngurrirohrokme nakka wanjh 70 centimetres.

* **25:7** Nahni nawu priest berrekaldjongbuyindi kunmadj nawu birringeybom, “Ephod”. Namekbe kunmadj kuyimi shirt yerrih dja wanjh namadjamun.

11 Kaluk ngurridukka yiman ngurribaru kururrkbeh wirlmurrng gold duninj kore kuberrkbeh dja mak kumelk ngarre Ark, dja mak ngurrikurme nakuyeng wirlmurrng gold bu ngurriwakbuyingun kurrid ngarre kore kaddum.

12 Dja mak ngurrimarnbu kunkarrngbakmeng wirlmurrng gold rings manbu ngarre Ark, dja ngurribelbmen kore kunkarrngbakmeng kundenge ngarre, kaluk bokenh rings kore kudjaku dja mak bokenh kore kukun.

13 Dja mak ngurrimarnbu mandulkkuyeng bokenh manbu acacia kundulk, kaluk ngurribaru rowk manbu wirlmurrng gold.

14 Wanjh manmekbe mandulkkuyeng ngurringimewo kore nawu rings kahdi kore kurrid ngarre Ark, ba kamak bu bininj kabirringorrkan manmekbe Ark.

15 Manmekbe bokenh mandulkkuyeng wanjh ngurribawo, djaldin munguyh kore Ark. Dja yuwn bu ngurriwayhke."

16 "Yerre wanjh ngaye Yawey won manwarddebalabala bokenh manbu kabimbuyindi ngardduk kunwok kunwoybuk bu ngaye ngawokkurrmerinj ngudberre. Wanjh ngurridahkendo kumelk ngarre Ark." "

17 "Wanjh lid nawu kaddumkenh ngarre Ark ngurrimarnbu wirlmurrng gold duninj.[†] Kaluk nahni kakuyeng 110 centimetres, dja bu kawarlahwarla nakka wanjh 70 centimetres."

18 "Dja mak ngurridongorro namekbe gold ba ngurrimarnbun nawu kakukyime Cherubim bokenh, wanjh ngurrbenbenekurmen kurrid ngarre lid bu kabenebbehdi.

19 Kaluk benemekbe Cherubim benebbehedin, nakudji kurridkudji din, dja mak nabuyika din kurridbuyika. Kaluk ngurrbenbenemarnbu bu kabenebelbmerren lid dorreng.

20 Namekbe bokenh Cherubim wanjh kunwel kabenewelwarlahmen kaddum, kaluk lid kabenebarrkbun, dja mak kabenemirrknamen kore kabenebbehdi dja kabenenan kanjdji kore lid kabenehdi."

21 "Wanjh ngurrikurmen namekbe lid kaddum kore Ark, dja rerrih wanjh ngurridahkendong nahni manwarddebala bokenh nawu kaluk won, manbu kabimbuyindi kunwok kunwoybuk manbu ngawokkurrmerinj ngudberre.

22 Kaluk ngaye ngamre karrinarren kumekbe, kaddumkah kore lid dja kubulkayh kore cherubim bokenh kabenehdi kore Ark nawu kakarme manwarddebalabala bokenh manbu kabimbuyindi ngardduk kunwok kunwoybuk kore ngawokkurrmerinj ngudberre. Wanjh kumekbe kaluk won ngardduk mankarre rowk manbu ngudberre nawu Israel ngunkebawahmeng." Kuhni rowk Moses benbengdayhkeng kore Yawey bimarneyimeng.

God Benbengdayhkeng bu Birrinameng Manbalabala Mandjamun Nuye

Exodus 25:23-30

(Exodus 37:10-16)

23 Wanjh Moses yawoyhwokdi bedberre yimeng, "Nawu Yawey nganmarneyimeng, 'Yibenbengdayhkemen kore ngaye wokrayekwon ngudberre, dja yiyimen, "Ngurrimarnbu manbalabala table manbu acacia kundulk, kaluk bu kakuyeng 100 centimetres, dja bu kawarlahwarla kunukka 50 centimetres, dja mak bu kakuyeng bu kaddum ngurrirohrokme nakka wanjh 75 centimetres.

[†] 25:17 Manbu kaddumkah yikahwi birringeybom, "Kore God kahyerrkan bu kandjadme kore kunkongi kunwern nuye warridj". Ngurrina Leviticus 16:10-20, dja Hebrews 9:5

²⁴ Wanjh ngurribaru wirlmurrng gold duninj kuberrkkah rowk ngarre, dja mak ngurrikurme nakuyeng wirlmurrng gold kore kungorrk bu kawakbun kaddumkah ngarre.

²⁵ Dja mak ngurrimarnbu kundulkyahwurd manbu kabelbmiyindi kore table ngarre kurrihidrid rowk kore kaddumkenh, kaluk eight centimetres bu kanjdji kore kaddum, dja mak ngurrikurme nakuyeng wirlmurrng gold warridj kore maninjmanu kundulk.

²⁶ Wanjh ngurrimarnbun warridj kunkarrngbakmeng wirlmurrng gold rings dja kabirribelbme kore kunkarrngbakmeng kurrid ngarre table, kanjdji kore ngarre kahdaddi.

²⁷ Ngurrima namekbe rings dja ngurrikurmen kore darnkih kundulk nawu kahwakbuyingun kaddumkah kore table, ba kamak bu bininj kabirrikarme manmekbe mandulkkuyeng manbu kabirringorrkanken.

²⁸ Kaluk manmekbe mandulkkuyeng bokenh wanjh ngurrimarnbun acacia kundulk, dja ngurribaru wirlmurrng gold duninj. Kaluk bu bininj kabirringorrkan manbu table wanjh kabirrikarme mahni mandulkkuyeng bokenh bu kabirriwayhke."

²⁹ "Yerre wanjh ngurrimarnbu wirlmurrng gold duninj manbu yehyeng rowk ngarre manbu manbalabala, yiman plates dja bannikin, ngalng nawern nakka manbu winekenh ngurribodahkendong bu ngurribowon nawu Yawey kore ngurriboyakarrbun kumekbe."

³⁰ "Dja mak kumekbe kore manbalabala wanjh munguyh ngurrikurme kurmen manbu kandidjawa ba kabimulewan bu ngudda ngurrihdi kore ngaye ngardduk kubolkdjamun. Maninjmanu buriddi kadjaldi munguyh kore kumirrk ngardduk." " Kuhn rowk wanjh Moses benbengdayhkeng kore Yawey bimarneyimeng.

God Benbengdayhkeng bu Birrinameng manbu Kakarrme Lamps

Exodus 25:31-40

(Exodus 37:17-24)

³¹ Wanjh Moses yawoyhwokdi bedberre yimeng, "Nawu Yawey nganarneyimeng, 'Yibenbengdayhkemen kore ngaye wokrayekwon ngudberre, dja yiyimen, "Ngurridongorro wirlmurrng gold duninj ba bu ngurrimarnbun lampstand, manbu lamp kore ngurrihbarnname, wanjh ngurrirawon namekbe ngurribelebelbmen nawu cups kakukyime yiman mannguyyaw dja mak mannguy duninj. Wanjh ngurrimarnbu rowk ba bu djal nadjalburkkudji.

³² Manmekbe lampstand bu ngurrimarnbun kakarrme six manyende kaluk karringihdi kore kungorrk ngarre, yiman danjbik kore kurridkudji dja danjbik kore kurridbuyika.

³³ Kaluk manbu manyendewern wanjh makka kabebbehkarme danjbik cups kakukyime yiman mannguy ngarre almond mak kunmekbe kayime rerrih manbu five manyende kabebbehkarme yiman kayime almond mannguy. Kaluk namekbe six cups makka kabebbehkarme manbu kakukyime mannguy dja kunworr. Dja mak manbu six manyende manbu kahbebehdhi kore lampstand makka wanjh kadjalrohrok rowk.

³⁴ Dja mak ngurriyawoyhmarnbu kunkarrngbakmeng cups kakukyime yiman almond mannguy kabarndi kore lampstand. Wanjh kunmekbe rerrih karohrok nawu namekbe cups kabebbehkarme mannguy dja kunworr.

³⁵ Ngurrikurmen manmekbe mannguy kanjdji kore kahbebbehyendi manbu kore kamhbelbmikenh kore lampstand. Wanjh manbu lampstand

kore manmekbe six manyende kamhbelbmikenh wanjh makka karohrok rowk.

³⁶ Bu ngurrimarnbun mahni rowk, wanjh ngurridongorro nawu wirlmurrng gold duninj, dja ngurrimarnmarnbu ba bu kaburkkudjihmen rowk, yiman lampstand burrk ngarre, dja mak manyehyende, dja mak mannguyyawayaw.”

³⁷ “Kaluk ngurrimarnbu seven lamps manbu kunkalkkid kahrungkenh, dja ngurribarnnamen kore maninjmanu lampstand ba kamak kabolk-wolkan kore kumirrk ngarre.

³⁸ Manbu ngurrirradjke kunyarl manbu karung kaddum kore lamp, dja mak manbalabala nayahwurd nawu ngurrikurrme kanjdji kore lamps wanjh ngurrimarnbu rowk wirlmurrng gold duninjhw.

³⁹ Ngurrima 34 kilograms nawu gold ba ngurrimarnbun namekbe lampstand dja mak njalehnjale ngarre.

⁴⁰ Dja ngurrinahnarrimen bu ngurrimarnbun rowk kore ngamarneyi-meng dja ngabukkang Moses kore kuwarddekimuk bu nganehwokdi.”””

26

God Benbengdayhkeng Bu Birrinameng Dabburlin Manrurkdjamun Duninj Nuye

*Exodus 26:1-37
(Exodus 36:8-38)*

¹ Wanjh Moses benmarneyimeng bininj nawu Israel benkebmawah-meng, yimeng, “Kuhni wanjh Yawey kanwokrayekwong kadberre bu yimeng, ‘Ngurrimarnbu Manrurkdjamun Dabburlin ngardduk. Ngurrimadjamun ten kunmadj bu kabarndi yiman kayime kawarnamyo nawu curtains. Ngurrbenkurrme bininj bu kabirrimadjamun. Bedda birrima nawu linen manburrrba namakmak dja kabirribibbun kunyarlwi manbu medjbuyika yiman kukblue, kukkurlba dja kukpurple. Dja mak ngurrima nawu bidmak bininj bu kabimbibbun bim nawu Cherubim kore manburrrba rowk nawu curtains.

² Kaluk namekbe manburrrba kadjalrohrok rowk, 12 metres bu kakuyeng dja bokenh metres bu kawarlahwarla.

³ Wanjh kunbidkudji manburrrba ngurrirawon bu yibibbun ba kakukkudji bu kamokendi, mak kunmekbe rerrih ngurriyawoyhyimowon nawu nabadmirndebuyika manburrrba ba ngurrimokenbibbun.

⁴⁻⁵ Wanjh ngurrimarnbun namekbe curtains ba bu kabelmerren dja kakudjihmerren ba bu kawakbuyingun rowk kore Manrurkdjamun Dabburlin. Namekbe nawu kunbidkudji manburrrba ngurrimokennamen. Wanjh ngurrimarnbu fifty loops kukblue manburrbawi, kore kayiburnbun nawu manburrrba dja mak nabadbuyika mokenh nawu nakka wanjh ngurriyawoyhkurrme fifty loops. Kaluk namekbe loops nakka wanjh yiman kabenemirrkmarren.

⁶ Dja mak ngurrimarnbun fifty gold nginj ba ngurribelbme namekbe manburrrba nawu kore bokenh wanjh kakudjimen.

⁷ ‘Mak ngurriyawoyhmarnbun nabuyika dabburlin nawu kabarrkbun kore kaddum namekbe Manrurkdjamun Dabburlin. Kaluk nahni wanjh ngurrimarnbu kunbid bokenh dja nakudji manburrrba nawu curtains kore goat kunngabekwi.

⁸ Kaluk namekbe manburrba ngurrirrohrokme bu karohrok rowk, 14 metres bu kakuyeng dja bokenh metres bu kawarlahwarla.

⁹ Wanjh kunbidkudji manburrba ngurrirawo bu ngurribibun ngurrimokenmarnbun. Yerre kunbidkudji dja nakudji nawu manburrba bu ngurirawon yiman ngurriyimowong nawu nayungkih ngurrimarnbom. Wanjh ngurribakbakke nawu sixth manburrba bu ngurribokenhme kore kurrangmaye ngarre dabburlin.

¹⁰ Mak ngurriyawoyhmarnbun fifty loops kore kurrid kayiburnbun nawu manburrba ngarre nakudji mokenh, mak kunmekbe ngurriyawoyhyimowon nawu nabubuyika.

¹¹ Wanjh yerre ngurrimarnbu fifty nginj nawu bronze wirlmurrng, nawu kahkardmang nawu loops. Wanjh ngurrikurrme kore loops ba kabelbmerren dja karaworren bu kadjalkudjihmerren namekbe dabburlin manbu kabarrkbunkeh.

¹² Dja mahni manburrba wanjh kayurrhke wurd nawu Manrurrkdjamun Dabburlin, dja ngurridjalbawon kawelhwelme kore borledmikkenh Manrurrkdjamun Dabburlin.

¹³ Wanjh kumekbe djal 50 centimetres kawelhwelme kore kungurrid ngarre manmekbe Manrurrkdjamun Dabburlin, ba bu yiman kakukbalhme bu kamak.'

¹⁴ 'Dja mak ngurrimarnbun nabadbuyika kunmadj nawu ngarre Manrurrkdjamun Dabburlin ba bu karurrkbarrkbun. Kaluk nakka ngurrimarnbun kunkulahwi sheep ngarre medjmak kunrodjbe, wanjh ngurribalbarrkbun warridj nawu kunkulahwi marndingunjungunbeh.'

¹⁵ 'Ngurrima acacia kundulk ba ngurridjabdjabname mandulkdjad bu kakarrme manbu kawarnamyo ngarre Manrurrkdjamun Dabburlin.

¹⁶ Kaluk nabebbehkudji nawu mandulkdjad wanjh nakka four metres bu kakuyeng dja 70 centimetres bu kawarlahwarla,

¹⁷ dja mandulkdjad nawu kadjabdi, wanjh kabebbehkarrme nawu kundadkenh ba kabebbehdi kore kurrid. Kunmekbe ngurriyimowo nawu nadjalwern kundulk frames bu ngurrimarnbun yiman kerrngehkenh ngurriyimowon.

¹⁸ Kaluk ngurrimarnbu twenty frames ngarre walemkah kore Manrurrkdjamun Dabburlin.

¹⁹ Namekbe nabebbehkudji nawu mandulkdjadkenh wanjh kakarrme bokenh wirlmurrng silver mandadkenh bu ngurrikurrme kanjdji, kundulkyahwurd yiman kayime kundad manbu ngurridjadnamen nawu mandulkdjad bokenh.

²⁰ Mak ngurriyawoyhmarnbu twenty mandulkdjadkenh ngarre kakbikah kore Manrurrkdjamun Dabburlin,

²¹ dja forty silver mandadkenh ngarre, bokenh ngarre kabebbehkudji nawu mandulkdjadkenh.'

²²⁻²³ 'Ngurrimarnbu kunbidkudji dja nakudji namekbe mandulkdjadkenh ba kabibodmebarrkbun kaluk karrikadkah kore Manrurrkdjamun Dabburlin, dja mak bokenh ngarre kurrid kore kubodme.

²⁴ Wanjh namekbe nawu bokenh mandulkdjadkenh wanjh nakka bokenh ngurribelbmen wirlmurrng ring dorreng, kore kanjdji dja mak kore kaddum. Namekbe bokenh mandulkdjadkenh nawu kahdi kore kurrid bokenh wanjh kunmekbe ngurriyimowo.

²⁵ Bu kumekbe karri kunbidkudji dja danjbik nawu mandulkdjadkenh kore kawarnamyo kubodme ngarre manbu Manrurrkdjamun Dabburlin, dja mak karringidi sixteen silver mandadkenh, yiman bokenh bokenh karri kore mandulkdjadkenh rowk.'

26 'Ngurrimarnbu mandulkkuyeng kore acacia kundulk ba ngurri-belbme nawu mandulkdjadkenh kahdjabdjabi kore kurrid ngarre Manrurrkdjamun Dabburlin. Wanjh ngurrimarnbu kunbidkudji ba kakarrme ngarre kurridkudji.

27 Dja nabadbuyika kunbidkudji rerrih namekbe mandulkkuyeng ngurrimarnbun ba kakarrme mandulkdjadkenh kore kurridbuyika. Dja mak kunbidkudji ngurrimarnbun ngarre nawu mandulkdjadkenh kore karrikadkah kahdjabdi, kore kubodme duninj ngarre Manrurrkdjamun Dabburlin.

28 Dja mak nawu mandulkkuyeng kahdi kore kubulkayh wanjh nakka ngurrikurmen wohka din kore kundulk frames, ba kakadjung kore kurridkudji ngarre Manrurrkdjamun Dabburlin, kumirrk kore kubodme ngarre.'

29 'Mak ngurribaru gold wirlmurrng dorreng nawu mandulkdjadkenh rowk, dja mak ngurrimarnbu rings kaluk gold wirlmurrng ngarre kurrid kore namekbe mandulkdjadkenh ba kakarrme nawu mandulkkuyeng, dja nakka warridj ngurribaru wirlmurrng goldwi.'

30 'Wanjh ngurridjabnamen manbu Manrurrkdjamun Dabburlin bu djal bulkkidj, kore ngaye Yawey ngayolyolmeng dja ngabukkang Moses kore kuwarddekimuk nganehwokdi.'

31 'Nahni mak ngurrimarnbu mankudji manbuyika curtain. Kaluk ngurrimang manburra manbu namakmak linen, dja ngurribibu kunyarl makka kukblue kamedjyime, dja mak kukpurple dja mak kukkuriba. Dja ngurrikurmen bininj nawu kawernhburrbun bu kabimbibbun bim nawu Cherubim kore manburra.

32 Wanjh ngurriwelhwelkemen namekbe manburra nawu wirlmurrng gold nginj dorreng kore kunkarrngbakmeng mandulkdjad manbu acacia kundulk nawu ngurriyngkihbarung wirlmurrng gold dorreng, dja ngurridjabnamen kore kunkarrngbakmeng wirlmurrng silver manbu mandadkenh ngarre.

33 Dja ngurriwelhwelkemen namekbe manburra kore nginj kaddum, dja ngurrikurme namekbe Ark nawu kakarrme manwarddebalabala bokenh manbu kabimbuyindi ngardduk kunwok kunwoybuk kore ngawokkurmerrinj ngudberre, dja ngurrikurmen kore borledmikkenh nawu curtain. Nahni curtain nakka wanjh yiman kawarnamyo kubulkayh kore Kunbolk manbu Kubolkdjamun dja mak kore Kunbolk manbu Kuwernhbolkdjamun Duninj.

34 Wanjh ngurrikurmen manbu lid ngarre Ark ba karrangbalhme, dja wanjh ngurribalkurmen Ark kore Kunbolk manbu Kuwernhbolkdjamun Duninj.

35 Dja ngurrikurmen manbu manbalabala kuberrkkah kore manburra kahdi, kaluk kakkikah Manrurrkdjamun Dabburlin. Wanjh ngurrikurmen nawu lampstand kaluk walemkah kore kubuldjarn ngarre table.'

36 'Kaluk ngurrimarnbu manburra curtain nawu kurrangmaye ngarre kore Manrurrkdjamun Dabburlin. Bu ngurrimarnbun wanjh ngurrima nawu linen manburra namakmak bu nawu bidmak bininj madjmarbom, dja ngurribibbun kunyarlwi manbu medjbuyika yiman kukblue, kukkuriba dja kukpurple.

37 Dja ngurrimarnbu nginj nawu wirlmurrng gold, dja mak kunbidkudji mandulkdjad kaluk acacia kundulk wanjh ngurribarung wirlmurrng gold dja ngurridjabname. Ngurriyawoyhmarnbun. Warridj kunbidkudji

wirlmurrng bronze mandadkenh kore ngurridjabname.' Kuhni rowk nawu Yawey kanwokrayekwong."

27

God Benbengdayhkeng Bu Birrinameng Altar Kore Birrimarnekinjeng Mayh

*Exodus 27:1-8
(Exodus 38:1-7)*

¹ Wanjh Moses benmarneyimeng bininj nawu Israel benkebmawah-meng, yimeng, "Kuhni wanjh Yawey kanwokrayekwong kadberre bu yimeng, 'Ngurrimarnbu manbu altar ngardduk. Makka acacia kundulk ngurrimang dja ngurrimarnbun 130 centimetres bu kaddum. Dja mak ngurrimarnbun square 230 centimetres bu kakuyeng dja mak 230 centimetres bu kawarlahwarla.

² Mak ngurrimarnbu four yiman kayime kunkanemdulk kahkanem-dulkdarrnghme kabebbehdi kore kunkarrngbakmeng kurrid ngarre dja kabelbme rowk kore altar ba kakudjimen rowk altar dorreng. Wanjh yerre ngurrikurmekurme wirlmurrng bronze kore kuberrkkah rowk ngarre namekbe altar.'

³ 'Kaluk ngurrima wirlmurrng bronze dja ngurrimarnbu yehyeng nawu altar ngarre, yiman nawu djabirlana ngarre kunburlekenh dja kunbalem raworinj, dja nawu shovels, bannikin dja forks nawu kunkanjkenh dja mak pans ngarre kunak ba kamak bininj kabirribirlukanakan.

⁴ Dja mak ngurrimarnbu nakimukkenh wirlmurrng bronze screen ba kakarme kore kunak karung, dja mak ngurrikurmen kunkarrngbak-meng wirlmurrng bronze ring kore kurrid rowk manbu screen ngarre, ba bu bininj kabirrikanahkan.

⁵ Wanjh ngurrikurmen namekbe screen kore kumelk altar kanjdjikh kore kumaye ngarre, kaluk wohkah kaddum dja minj ngurriwernhkoluy-hwe.'

⁶⁻⁷ 'Dja mak ngurrimarnbu mandulkkuyeng bokenh acacia kundulkwi, manbu bininj kabirridulkgimewo kore kahrurrk rings kore kurrid ngarre altar, ba bu kabirriwayhke. Wanjh ngurribalbaru nahni mandulkuyeng kaluk wirlmurrng bronze.

⁸ Ngurrimarnbu namekbe altar bu kundulk manbalabala, wanjh yerre kore kanjdji kaluk kumelk nakka ngurribawon kamelkdjorlok. Ngurriy-imewo bu ngurrimarnbun altar bu yiman ngayingkihbukang Moses kore kuwarddekimuk.' Kuhni wanjh Yawey kanwokrayekwong kadberre."

God Benbengdayhkeng bu Birrimarnbom Manbu Kawarnamyo Kabolk-wabmingun nawu Manrurrkdjamun Dabburlin.

*Exodus 27:9-19
(Exodus 38:9-20)*

⁹ Wanjh Moses yimeng, "Dja kuhni warridj Yawey kanbengdaykeng kadberre, yimeng, 'Ngurrimarnbu manburrbawi manbu kawarnamyo kore kuberrkkah Manrurrkdjamun Dabburlin. Nawu manburrba nakka wanjh ngurriyirrikurmen namekbe manburrba bu ngurriwarnamkan dja ngurrirrohroke 46 metres bu kakuyeng. Wanjh ngurrimarnbu namekbe curtains manburrba nawu linen namaknak bu birriridjmeng.

¹⁰ Dja wanjh ngurriwelhwelkemen namekbe curtains kakaridi dorreng wirlmurrng silver nawu nginj kore nakukkuyeng wirlmurrng silver,

manbu belbmi kore mandulkdjad ngarre kabebbehdangen kore bronze wirlmurrng mandadkenh. Kaluk twenty manbu mandulkdjad kahdi.

11 Kaluk kore kabbikah nakka ngurrirohrokme 46 metres kakuyeng. Wanjh karohrok yerre ngurriwelhwelkmen nawu manburra curtains kakaridi dorrengh wirlmurrng silver nawu nginj kore nakukkuyeng wirlmurrng silver; manbu belbmi kore mandulkdjad ngarre kabebbehdangen kore bronze wirlmurrng mandadkenh. Kaluk twenty manbu mandulkdjad kahdi.”

12 “Dja manbu karrikadkah kore courtyard nakka ngurriwarnamka manburrbawi 22 metres bu kakuyeng, kaluk ten mandulkdjad kadjabdjabdi, dja mak ten mandadkenh dorrengh kore kumekbe kahwarnamyo.

13 Kunmekbe kayime rerrih kore koyekkah courtyard, kore kamdung-behme. Wanjh nakka ngurrirohrokme 23 metres bu kakuyeng.

14 Kore kurridkudji ngarre kurrangmaye, wanjh kunukka manburra kawelhwelme nawu seven metres bu kakuyeng, kakarrme danjbik mandulkdjad dja mandadkenh ngarre ba kadjabdikenh.

15 Mak kore kurridbuyika ngarre kurrangmaye, kunmekbe rerrih ngurriyimowo bu ngurriwelhwelke manburra dja ngurrirohrokme bu seven metres bu kakuyeng, wanjh danjbik mandulkdjad manbu karayekwon dja mak kabaldengebarndi kore danjbik mandadkenh.”

16 “Kore kurrangmaye ngarre kuberrkkah wanjh kunukka ngurriwelhkemen manburra nawu ngurrirohrokme nine metres bu kakuyeng. Ngurrimadjmarnbun nawu curtains nawu namakmak linen manburrbawi, dja nawu bidmak bininj kabimbibbun kunyarlwi manbu medjbuyika yiman kukblue, kukkurlba dja kukpurple. Ngurriwelhkemen mahni curtain kore kunkarrngbakmeng mandulkdjad manbu ngurridjadjabname kore kunkarrngbakmeng madulkdad ngarre.

17 Kaluk manmekbe mandulkdjad manwern manbu kawarnamyo kore kuberrkkah wanjh makka kakarrmerren nawu nakukkuyeng wirlmurrng silver dja nginj dorrengh nawu wirlmurrng silver; dja mak kabebbehdangen kore mandadkenh ngarre manbu wirlmurrng bronze.”

18 “Dja manbu kuberrkkah ngarre Manrurrkdjamun Dabburlin, wanjh makka ngurrirohrokme 46 metres kakuyeng dja 23 metres bu kawarlahwarla, wanjh ngurribalwelhwelhkemen manburra bu kawakbuyingun manmekbe kuberrkkah rowk, nakka wanjh 230 centimetres kaddum. Dja manbu curtains manburra manbu linen namakmak. Dja nawu mandadkenh mandulkdjad ngarre wanjh ngurrimarnbun wirlmurrng manbu bronze.

19 Njalehnjale nawu ngurridurrkmirrikenh kore Manrurrkdjamun Dabburlin, wanjh ngurrimarnbun wirlmurrng bronzewi. Ngayime yiman tentpegs dorrengh.*’ Kuhni rowk wanjh Yawey kanwokrayekwong.”

God Benwokrayekwong bu Birrimkang Mankalkkid.

*Exodus 27:20-21
(Leviticus 24:1-4)*

20 Wanjh Moses yimeng, “Dja kuhni warridj Yawey kanbengdaykeng kadberre, yimeng, Ngudda nawu Moses, wanjh yibenkayhmen bininj nawu Israel benkebmawahmeng bu kabirrimkan ke mankalkkid manbu olives duninj, ba bu kamak karung kore ngurriwurlhke nawu lamps kunkakwern rowk bu kabolkburlerran.

* **27:19** Ngurrina Exodus 38:20. Nawu wirlmurrng bronze bu birridjabinami kandjikenh kore Manrurrkdjamun Dabburlin kore kuberrkkah, dja mak kore kanjdjikenh manburra nawu curtains ba bu minj welhwelmi.

²¹ Aaron dja nawu benbornang rowk, nakka wanjh birrinahna lamps rowk manbu kahrung munguyh kore kumirrk ngardduk, ngaye nawu Yawey. Kaluk kukakkuyeng kore kambarrhgun, wanjh bedda kunbar-nangarra rowk kabirrimarnbun lamps ba kadjalwurhke kuberrkkah kore manburrba kahdi kumirrk ngarre Ark nawu kakarrme manward-debala bokenh kore kabimbuyindi manbu kunwok kunwoybuk ngaye ngawokkurrmerrinj ngudberre. Kumekbe kahdi kore Manrurrdjamun Dabburlin kore ngaye ngamre bu djahwon ngudberre.

Nawu Israel kabenkebmawahme rowk wanjh kabirrimarrkmang mahni mankarre bu kundjalmekbe rerrih munguyh.' Kuhni rowk nawu Yawey kanwokrayekwong kadberre."

28

God Benbengdayhkeng Bu Kabirribibun Kunmadj Nawu Priests Bedberre

Exodus 28:1-14

(Exodus 39:1-7)

¹ Yawey bimarneyimeng Moses, yimeng, "Yibenkayhmen nawu ngunedanginj Aaron bu ngunyikan, kaluk kabenkan nawu nungka benbornang Nadab, Abihu Eleazar, dja Ithamar. Wanjh yibenlarlma birrimekbe ba minj kabirridjalrohrok birribuyika bininj nawu Israel benkebmawahmeng, dja nakka wanjh kabirriyimerran priests kabirridur-rkmirri ngardduk.

² Yimarnemarnbu kunmadj nuye Aaron nawu ngunedanginj ba birribuyika bininj kabirriyime nungka nakuken dja mak kabirriburlume.

³ Yibenmarneyimen nawu birrikodjkuluwern bininj nawu ngaben-marnbom birrikurdumak, wanjh yibenbengdayhkemen ba kabirribibun kunmadj nuye Aaron ba bu yikurme bu kayimerran priest nawu nganmarnedurrkmirri.

⁴ Namekbe kunmadj kabirrimarnbun nawu kaberrrekaldjongburren, dja mak nawu Ephod dja mak nawu kuberrkkah karri nawu robe, dja mak nawu kanjdji robe kadjongbuyindi nawu kakarrme bim warridj, dja mak nawu kakodjdjongbuyindi nawu turban kore kakodjdukkarren, dja manburrba nawu kangadmodukkarren. Birrimekbe bininj kabirrimarn-bun kunmadj bedberre Aaron dja nawu benbornang warridj. Wanjh dja ngandimarnedurrkmirri ngardduk.

⁵ Dja mak birrimekbe birrikurdumak bininj nawu kunmadj kabirrih-marnbun wanjh nakka kabirrimang kunyarl manbu wirlmurrng gold, dja mak kunyarlribuyika manbu kukblue, dja kukpurple dja kukkurlba, dja mak manburrbamak manbu linen."

⁶ "Ngudda ngurrimarnbun warridj nawu nadjamun vest kangeyyo ephod. Ngurrimang kunyarl manbu medjibubuyika, yiman kukblue, kukpurple, dja kukkurlba. Ngurribibbu gold kunyarl dorrengh dja linen manburrbamak. Dja ngurribibun kunyarlwi yiman bim namak kore mahni kunmadj.

⁷ Kaluk ngurrikurme yiman straps bokenh kore kukarlang bokenh ba bu kabirrimadjudukkarren, dja wanjh ngurridjalkkenhnamen kore kurrid ngarre kunmadj.

⁸ Dja mak kabirribibun manburrba nakuyeng ba nawu priest kar-rukkarren ephod dorrengh. Dja kabirriname kore kandjdjikh ngarre

nawu ephod. Mahni manburrba karohrok bu manburrbamak linen kore kunmadjbuyika birrimarnbom.”

9-11 “Kaluk ngurrimang bokenh manwarddemak manbu Onyx, dja mak ngurringalkemen nakudji bininj nawu karrurkmirri bu kanamename yiman jewels, dja nawu bidmak. Wanjh nungka karradjdadjke manwarddemak bokenh bu kabenbimngeybimbun nawu bebeywurd nuye Jacob kumekbe kore manwardde onyx bokenh. Six kunngey kore mankudji kunwardde dja manwarddebuyika makka birribuyika six. Dja ngurribngeynamen bu nawu nawernwarre beywurd karrokme werkk wanjh ngurrihdjalle kanjdji kore nayerre duninj nawu nawalawalak. Yerre wanjh nahni bininj kaname gold wirlmurrng manbu kabebbehwakbuyingun mahni manwarddemak bokenh.

12 Wanjh namekbe manwarddemak bokenh ngurridjalkkenhnamen kore bokenh straps nawu kore nadjamun vest ba ngurriburrbun bu ngaye minj ngabenbengmidjdan birrimekbe rowk twelve kunmokukurr bedberre nawu Israel benkebmawahmeng. Kaluk Aaron kadjongbuyindi nawu ephod kore kabirrihngeydi kore kukarlang nuye yiman kayime kangeygorrkan kore kumirrk ngaye ngardduk nawu Yawey.

13 Wanjh ngurrimarnbom mahni bokenh gold wirlmurrng manbu kawernhkarme nawu kunwardde bokenh.

14 Wanjh ngurrimarnbu warridj bokenh kunyarl chains kaluk wirlmurrng gold duninj bu ngurridukkarrukkan yiman kayime kunyarl rope. Yerre wanjh ngurridjalkkenhnamen namekbe wirlmurrng chains kore bokenh gold wirlmurrng kilehkilek ba kakarme namekbe manwardde bokenh.”

Bu Birrinameng Nawu Priests Kabirridjongbuyindi Kunberrekalkkenh

Exodus 28:15-30

(Exodus 39:8-21)

15 “Ngurrimarnbun warridj kunmadj bu nawu nakimuk priest kaberekalkbalhmerren ba kawernhburrbu kore God kadjare bininj rowk bu kabirrikurduyime. Ngurrimarnbun dja ngurribibbun bu ngurribimbun karohrok bu ngurrimarnbom nawu ephod, dja warridj manburrba wanjh karohrok bu nakareni.

16 Nawu kabihberrekalkbalhme nakka wanjh square 22 centimetres bu kakuyeng dja 22 centimetres bu kawarlahwarla, dja mak ngurribakke ngurrimarnbun bokenh ba kamarnburren yiman nawu pocket yerre.

17 Wanjh ngurrikurmekurmen kunkarrngbakmeng manwarddemak manbu gems kore kuberrekalk kaluk kore kaddum wanjh ngurrikurme nakka wanjh ruby, yibeng topaz, yerre garnet;

18 wanjh nabadbubuyika kunwardde yikurmekurme nawu row bokenhkah, wanjh ngurrikurmen manwarddemak manbu emerald, sapphire, dja diamond

19 dja kanjdji kore danjbikkah nawu nakka wanjh ngurrikurmen manwarddemak manbu turquoise, dja mak agate dja mak amethyst.

20 Dja mak kore yerre duninj wanjh ngurrikurmen manbu beryl, cornelia dja mak jasper. Ngurribebbehnamen namekbe twelve manwarddemak rowk kore gold wirlmurrng kabebbehkarme.

21 Kaluk ngurrirohrokmen kunbidbokenh dja bokenh nawu manwarddemak nawu kore kabihberrekalkbalhme, kaluk nabebbehkudji nawu manwarddemak wanjh kakadjurren nabebbehkudji beywurd rowk nuye Israel benbornang. Dja ngurringeynamen mankudji mankudji kunngey bedberre kunbidbokenh dja bokenh kunnguya ngudberre.”

²² “Ngurrimarnbu warridj chains kaluk wirlmurrng gold duninj ngurriyimowon yiman kunyarl ngarre nawu kabiberrekalkbalhme nawu priest.

²³ Dja mak ngurrimarnbun bokenh wirlmurrng gold rings wanjh ngurrikurmen kaddumkah kore kurrid bokenh nawu nahni kunberrekalkkenh kunmadj.

²⁴ Ngurridukka nawu bokenh chains kore bokenh gold rings kore kurrid ngarre.

²⁵ Mak ngurridukka nahni bokenh chains kore bokenh gold wirlmurrng manbu manwarddemak onyx kawernhkarme, kaluk ngurribarnnamen kore kunkarlang ngarre straps kaluk kumirrk ngarre nawu ephod.

²⁶ Wanjh ngurrimarnbu bokenh gold rings wanjh ngurrikurmen kore bokenh kurrid bebehdin kanjdjikh kore nawu kabihberrekalkbalhme dja mak kururrkbehh kurrid kore nawu ephod.

²⁷ Dja mak ngurriyawoyhmarnbu bokenh gold rings wanjh ngurridukka kanjdji kore nawu kukarlang kahdi straps kore kumirrk ngarre. Ngurrikurmen darnkih kore kabelbmikenh, kaluk kaddumkah kore nawu ngokko birribibbom belt ngarre nawu ephod.

²⁸ Ngurridukka namekbe rings nawu kore kunberrekalkkenh dja ngurrirawo rings kore nawu ephod. Kaluk ngurridukka blue kunyarl dorreng. Wanjh kabalbelmikendin kaddum kore belt nawu birribibbuni, ba minj kawarrhme.”

²⁹ “Wanjh bu Aaron kangimen kore kubolkdamun, nungka wanjh djongburrimen kabihberrekalkbalhme kunmadj nawu kakarremarnburrenkenh, dja nawu kakarme kungey kabirrihngeydi nawu kunnguya rowk bederre mawahmawah nuye Israel. Kuhn kakurduyime ba bu ngaye Yawey wanjh munguyh ngabenburrbun ngardduk bininj rowk.”

³⁰ “Kaluk ngurrikurmen nawu Urim dja Thummim* kanjdji kore nawu kabihberrekalkbalhme ba kabenedi darnkih kore Aaron nuye kundurddu bu kamre kubolkdamun dja karrangen kumirrk ngardduk. Nakka munguyh djaldjongbuyindin bu kamngime kore ngaye, ba bu kaborlhme kore baleh ngabenwokrayekwon bininj nawu Israel benkebmawahmeng.”

Bu Birribibbuni Kunmadj Nawu Priests Kabirridjongburrenkenh

*Exodus 28:31-43
(Exodus 39:22-31)*

³¹ “Mak ngurrimarnbu nawu nakuyengkenh kunmadj namekbe nanu wanjh nawu Aaron kadjongbuyindi kanjdji kore ngarre nawu ephod, dja birribibbu kore djal blue manburrba manbu kukblue.

³² Mak ngurrimarnbu kawohrurrk kaddum ngarre kore Aaron kakomdi. Kaluk kawakbuyingunkenh nawu kunkomkenh ngokko birribibbu nawu narayek manburrba ngarre kahrurrk kukodj ba minj kadjalkmire.

³³⁻³⁴ Kore kanjdjikh nawu namekbe nakuyeng kunmadej, wanjh ngurrikurmen yeng bokenh. Ngurrimang kunyarl manbu madjbubuyika yima kukblue, dja kukpurple dja kukkurlba, dja ngurribibbu nawu kakukyime mandjoleng manbu pomegranates, dja mak ngurrimarnbu nayahwurd wirlmurrng gold bells. Wanjh ngurrikurmen nawu bells dja mak nawu pomegranates kanjdji kore kuberrkka nawu kunmadj, kaluk gold bells kahbebehdi kubuldjarn kore pomegranates nawu kahdi bebehdi.

³⁵ Wanjh nawu Aaron djongburrimen namekbe kunmadjukuyeng munguyh bu karrurrkmirri yiman priest. Bu kamngimen dja kabebme

* **28:30** Nawu Urim dja Thummim wanjh yeng bokenh nawu priest karrmi bu bidjawam baleh kore God djareminj.

kore kubolkdjamun bu kamre kore kumirrk ngardduk, wanjh nawu bells kabun kawokdi bu nungka karengahre, dja wanjh Aaron minj karrownen.”

³⁶ “Dja mak ngurrimang gold duninh dja ngurridongohdo bu manbalabala kamarnburren dja mak kakuyenghmen, dja ngurriderrmen ba kabimbuyindi bu ngurrihngeynamen, ‘Kukdjaman kore nawu Yawey nuye.’

³⁷ Wanjh ngurrimang kunyarl nawu kukblue, dja ngurridukkan namekbe gold wirlmurrng kabimbuyindi dorrengh kore kumirrk ngarre turban nawu Aaron kahkodjdukkayindi.

³⁸ Wanjh Aaron kakanakan kore kumill nuye bu kamkan nawu njalennale nadjamun bu bininj nawu Israel benkebmawahmeng kabirridjare ngandiwon. Wardi bu kabirribarabun kore ngandiwonkenh, wanjh ngadjalan kore Aaron kadjongbuyindi, dja wanjh gaye nawu Yawey ngadjalnijngmak kore bedda ngandiwon njalehnjale.

³⁹ Dja mak ngurrima linen manbu manburrbamak medjkilelh, dja ngurrimarnbu kunmadj nawu shirt dja nawu kakodjdukkarrenkenh nuye Aaron. Mak ngurrimarnbu nuye nawu kukarlang kawelhme nawu nawarlah dja nakuyeng, kaluk nawu bidmak kabibbun bim kumekbe kunyarl dorrengh.”

⁴⁰ “Mak ngurrbenmarnemarnbu bedberre nawu Aaron bebeywurd rowk kunmadj namakmak, yiman shirts, dja nawu kakarlang kawelhme, dja nawu kabirrikodjdukbuyindi. Kuhni ngurrikurduyimen ba birriwern bininj kabindiburlume dja kabirriyime bu birrikuken.

⁴¹ Wanjh namekbe kunmadj ngurrimang ngurrbendjongbu Aaron nawu ngunedanginj, dja mak nawu nabebeywurd nuye. Kaluk ngurrbenkodjuhkemen olive mankalckid ba kabirriyimerran kabirridurrkmirri yiman priests. Kunukka wanjh ngudda kanwon nahni bininj rowk.”

⁴² “Mak ngurrimarnbu bedberre nawu kanjdjikenh kabirrihdjongbuyindi ba kabenbarrkbunkenh kore kungorrk dja kore kunkarre kaluk kaddumkah. Kuhni wanjh minj bininj kabindikuknan kumekbe kore kunburrk bedberre.

⁴³ Wanjh Aaron dja bebeywurd nuye, wanjh birridjongburrimen nahni kunmadj munguyh bu kabirringimen Manrurrkdjamun Dabburlin kore gaye ngamre bu djahwon ngudberre, dja mak bu kabirrimre darnkih kore altar bu kabirridurrkmirri ngardduk yiman priests kore kubolkdjamun. Bu minj kabirridjongbuyindi namekbe kunmadj nawu kanjdjikenh, wanjh kabirriwawarreworren dja kunukka wanjh kabirridowen.

Wanjh mahni mankarre kahdjalyo munguyh bedberre Aaron dja nawu mawahmawah nuye.”

29

God Benbengdayhkeng Bu Kabenmarnbun Bijnj Nawu Priests Nuye

*Exodus 29:1-37
(Leviticus 8:1-36)*

¹ Wanjh nawu Yawey bimarneyimeng Moses, yimeng, “Kuhni bu ngurrikurduyime bu ngurrbenmarnbun Aaron dja mak nabebeywurd nuye bu kabirriyimerran priests nawu ngandimarnedurrkmirri gaye. Ngurrima nakudji bulikki yaw, dja bokenh sheep kaluk narangem bokenh nawu minj njale kabirrikarme.

² Ngurrikinjemen buriddi bu ngurrimarnbun kandidjawa manbu mangkulurmlikenhyak, dja ngurriawon kunkalkkid manbu olives. Yikahwi buriddi mak ngurrimarnbun bu kunkalkkid olives yak. Yikahi buriddi

warridj ngurrimarnbun kakukyime cakes kaluk ngurribarung olive kunkalkkid dorreng.

³ Wanjh ngurridahkendo manmekbe manme kore kundjabarrk, dja ngurrimka kandiwon ngaye bu kandimarnebun namekbe nawu bulikki dja mak sheep narangem bokenh."

⁴ "Kaluk ngurrbenkan Aaron dja nabebeywurd nuye kore kurrangmaye ngarre Manrurrkdjamun Dabburlin kore ngaye ngamre bu djahwon ngudberre, wanjh kunmekbe ngurrbenkukdjirridjibun kukkuwi.

⁵ Wanjh ngurrimadjmang nahni kunmadj dja ngurridjongbun Aaron nawu kanjdjikenh, dja mak nabuyika kunmadj nawu kanjdjikenh ephod, dja mak ngurridjongbu ephod, dja mak nawu kunberrekalk kabalhme, dja yerre ngurringadmodukka belt dorreng.

⁶ Wanjh ngurribalkodjdukka nawu turban kore kukodj nuye, dja mak ngurribarnnamen nadjamun manbalabala gold kore kabimbuyindi, 'Kukdjamun kore nawu Yawey nuye.'

⁷ Yerre ngurrimang manmekbe mankalkkid manbu ngurrikodjdjuhkekenh, wanjh ngurrikodjdjuhkemen ba kunu ngurrimarnbun kayimerran priest.

⁸ Wanjh ngurrbenka nabebeywurd nuye wanjh nawu kanjdjikenh kunmadj namekbe ngurrbendjongbu.

⁹ Dja mak ngurrbenkodjdukka kunmadj dja ngurrbenngardmorrukka nawu manburra belt ngurrimarnbom, dja Aaron dorreng. Wanjh Aaron dja nawu mawahmawah nuye nakka wanjh priests kabirriyimerran, dja ngawokrayekwong bu kadjalyo munguyh bedberre. Kuhni bu ngurrikurduyimen bu ngurrimarnbun Aaron dja nabebeywurd nuye bu kabirriyimerran priests."

¹⁰ "Kaluk ngurrimka namekbe bulikki darnkih ngarre Manrurrkdjamun Dabburlin kore ngaye ngamre bu djahwon ngudberre, wanjh Aaron dja nabebeywurd nuye kabirribidkurrmerren kore kukodj nuye namekbe bulikki.

¹¹ Yerre wanjh ngurribu namekbe mayh kore kumirrk ngardduk nawu Yawey kaluk darnkih kurrangmaye ngarre Manrurrkdjamun Dabburlin kore ngaye ngamre bu djahwon ngudberre.

¹² Dja wanjh kunbidwi ngudberre ngurrima yikahwi manbu kunkurlba nuye bulikki dja ngurridelkkemen kore kurrid kaddumkah ngarre altar, dja mak yerre ngurrikurlbayakarrbu kore kanjdji kumelk ngarre altar.

¹³ Wanjh ngurrimang kunbalem bulikki nuye kore kanjdji nawu kakar-me yiman kayime manngam, kaluk kore kundiwi dja mak ngurrima kundaykenh bokenh dja kunbalem dorreng ngarre, wanjh ngurrikinjemen rowk kore altar.

¹⁴ Dja ngaleng ngurridjalmang kunkanj kunkulah, dja mak njalehnjale ngarre kunnjam nuye namekbe bulikki wanjh ngurrikan kuberrkkah djarreh kore ngurrihdi, dja kumekbe wanjh ngurriwurlhkemen. Kuhni ngurrikurduyime yiman kayime bu kabularrbuyindan ngudberre kunwarre."

¹⁵ "Dja mak ngurrima nakudji sheep nawu narangem, wanjh Aaron dja nabebeywurd nuye kabirribidkurrmerren kore kukodj nuye.

¹⁶ Wanjh ngurribu, ngurrima kunkurlba dja manbu makka ngurridjuhdjuhkemen kore kurrihidrid kunkarrngbakmeng ngarre altar.

¹⁷ Wanjh ngurrikukdjobjobke nawu narangem sheep bu ngurrikilelhme. Dja mak ngurridjirridjbu kukku dorreng nawu kunnjam kore kahyo dja kunkarre nuye, wanjh ngurrirawo kunkodj dja mankilekilelh nawu ngurridjobdjobjeng.

18 Yerre wanjh ngurrimokenkinjemen kore altar ba kunak kakanjyakwon rowk. Kaluk namekbe mayh wanjh kandimarnekinje ngaye nawu Yawey, dja bu nganome manbu kundjawuymak wanjh ngaye nganjilngmak, dja namekbe mayh ngudda kandiwong ngaye nawu Yawey.”

19 “Wanjh ngurrimang nawu nabuyika narangem sheep, dja Aaron dja nabebeywurd nuye kabirriyawoyhbidkurrmerren kore kukodj nuye.

20 Ngurribu wanjh ngurrikurlbamang yikahwi nuye, wanjh ngurbenkanembarung kundurrk kore kukun bedberre birrimekbe Aaron dja nabebeywurd nuye. Dja mak ngurribaru kore kunbidbadjan bedberre kaluk kubidkukun, dja mak kurrenge bedberre kaluk manbu kundengebadjan kore kurrengekun bedberre. Wanjh ngurribaldelkdelkke kunkurlba kore kunkarngbakmeng kurrihidirrid rowk ngarre altar.”

21 “Dja mak ngurrima yikahwi maninjmanu kunkurlba kore altar kakurlbarri, wanjh ngurriborawo kunkalkkid dorrengh manbu ngurrikodjdjuhkekenh nawu priests. Wanjh ngurrikukdelkkemen Aaron dja mak kunmadj nuye, dja mak nabebeywurd nuye dja kunmadj bedberre. Kunukka wanjh bedda kabirriyimerran ngardduk duninj, dja kunmadj bedberre dorrengh.”

22 “Dja mak ngurridadjkemen kunbalem kore nahni narangem sheep, dja mak kunberdbalem dja mak kunbalem nawu kore kanjdji kahyo. Mak ngurridadjke kunmakmak manbu kundiw, dja kundaykenh bokenh dja kunbalem ngarre dorrengh, dja mak kundadkun dorrengh. Kaluk nahni sheep ngurribom kore ngurribenmarnbom nawu priests.

23 Yerre ngurrimang basket buriddi dorrengh manbu mannguklurlmikenhyak, nawu ngurrikurrmeng kore kumirrk ngardduk nawu Yawey. Wanjh kunmekbe ngurrilodmang nakudji buriddi, dja cake manbu marnbuyindanj olive kunkalkkid dorrengh dja nakudji biscuit kaluk manbinjbinj.

24 Wanjh ngurrikurrmekurrme manekke manme kore kubid bedberre Aaron dja nawu benbornang, dja ngurribenmarneyimen bu ngandiwon ngaye nawu Yawey. Bedda wanjh birriwayhkemen kore kumirrk ngardduk kubidwi bedberre bu kabirriberlwayhme.

25 Wanjh ngurrimang manekke manme kore kubid kabirrihkarmme dja ngurrikurrme kaddum kore mayh ngurrimokenkinje. Kuhni yiman kayime kandiwon manme. Bu nganome karung, wanjh nganjilngmakmen ngudberrekenh.

26 Ngudda nawu Moses, yerre wanjh yikanjmang kunberrekalk nuye sheep narangem kore ngurrimarnbom Aaron bu yimerranj priest, wanjh kanwo ngaye nawu Yawey. Yiwayhkemen kubid ke bu yiberlwayhme. Kaluk bu ngurrimarnbun Aaron bu kayimerran priest, wanjh maninjmanu kunkanj wanjh ngudda ke kore ngurriyikadjurren nawu mayh.”

27 “Ngudda yibenmarnema kunkanj bedberre Aaron dja nawu nabebeywurd dorrengh dja yibenmarnekurrmen bedberre. Ngayime nawu kunberrekalkkenh dja mak kundadkenh kunkanj kore narangem sheep nawu ngurribom dja bedda birrikanjwayhkeng kore kumirrk ngardduk.

28 Kaluk ngakarremarnbun ngudberre bu manmekbekenh dja wanjh kayo munguyh. Bu bininj nawu Israel benkebmawahmeng kabirrikinje mayh dja kabirridjarrkngun kore kunmodmikenh ngardduk dorrengh, wanjh munguyh bindikanjwo nawu Aaron dja nabebeywurd nuye manbu kunberrekalkkenh dja kundadkenh. Kuhni wanjh ngaye ngandikanjwon, ngaye nawu Yawey.”

29 “Kaluk yerrekah bu nawu Aaron karrownen, wanjh kunmadj nadjamun nuye ngurrbenwo nawu mawahmawah nuye. Bu ngurrbenkodjujuk birrimbekbe bininj kunkalkkiddjamun dorrengh dja ngurrbenmarnbun nawu priests, wanjh kunmekbe kabirridjongburren nahni kunmadj nawu Aaron nuyeni.

30 Kaluk yerrekah bu Aaron nuye beywurd kayimerran priest, kumunke nuye nawu Aaron, wanjh djongburrimen namekbe kunmadj kadjongbuyindi bu kunkodjke seven kore nungka kamngimen dabburlin manbu kore ngaye ngamre bu djahwon ngudberre, bu nungka karrurrkmirri kore Kubolkdjamun.”

31 “Wanjh ngurrima nahni sheep nawu narangem bu ngurribun kore ngurrbenmarnbun Aaron dja nawu bebeywurd nuye bu kabirriyimerran nawu priests. Kaluk ngurrikanjinjemen kore kurobbe kubolkdjamun.

32 Wanjh Aaron dja nawu beybeywurd nuye birriray kore kurrangmaye ngarre Manrurrkdjamun Dabburlin kore ngaye ngamre bu djahwon ngudberre, wanjh kumekbe bedda kabirrikanjngun manmekbe kunkanj nawu sheep narangem, dja mak kandidjawa manbu kahdahkendi kore nahni kundjabarrk.

33 Bedda wanjh kabirridjarrkngun mahni kunkanj, manbu kandikanjwong ngaye nawu Yawey ba bu ngabenmarnebegmidjdanj kunwarre bedberre, bu kunmekbe ngurrbenmarnbom birriyimerranj priests ngardduk, dja kore ngaye ngabenmarnbom birridjamun nawu djal ngardduk. Kuhni wanjh minj nangale mak kakanjngun maninjmanu kunkanj, dja wanjh nakka mandjamun duninj.

34 Kaluk yerre bu kabirriyimerran priests, dja bu kabirrikanjngun kore sheep narangem dja mak manbu buriddi, wardi bu kabirribawon mahni manme kadjalyo bu kukabel kamre, wanjh makka ngurriwurlhkemen ba kayakmen rowk. Yuwn bu bininj kabirringun dja wanjh makka mandjamun manme.”

35 “Kuninjkuwu ngurrikurduyimen kore wokrayekwong ngudberre bu ngurrikurduyimen bedberre Aaron dja nawu bebeywurd nuye. Kaluk ngurridurrkmirrin kunkodjke seven bu ngurrbenhmarnmarnbun kabirriyimerran nawu priests.

36 Bu kunkodjkekudjikudji wanjh ngudda ngurribu nakudji bulikki ngardduk dja ngurrikinjemen ba bu ngaye ngamarnebegmidjdan kunwarrekeh. Kunukka ngayime bu mahni altar wanjh burlerranj kore ngadjare, dja wanjh ngurrimarnbun ba kamakmen. Ngurribun mayh dja mak ngurridelkkemen manbu altar ba kayimerran ngaye ngardduk ngadjalkudji.

37 Ngurrihdjalkurduyimen rowk bu kunkodjke seven. Wanjh kunukka namekbe altar kayimerran mandjamun duninj, dja nawu nangale bininj, dja njalehnjale nawu kawohkarme namekbe altar wanjh nakka warriidj kayimerran nadjamun.”

Bu God Benbengdayhkeng Bu Kunkodjkeuern Kabirriwon Nuye

Exodus 29:38-46 (Numbers 28:1-8)

38 Wanjh Yawey biyawoyhwokdi dja bimarneyimeng nawu Moses, “Bu kunkodjkekudjikudji munguyh wanjh ngurribu dja kandimarnekinjemen bokenh lambs kore altar, kaluk nawu nakudji mandjewk berrewoneng.

39 Wanjh ngurribu nakudji lamb bu kumkabel dja nabadbuyika lamb wanjh yerre ngurribu bu kabalhgokdan.

⁴⁰ Kaluk bu kukabel, bu ngurribun nawu nayungkih lamb ngard-dukkenh, wanjh nakka ngurrikinjemen warridj nakudji kilogramme manbu kandidjawa dja mak nakudji litre kunkalkkid duninj manbu olives kore ngurriyingkihrawong. Dja mak ngurriyakbu kurorre nakudji litre manbu wine, dja kunukka yiman kandiwon ngaye nawu Yawey.

⁴¹ Kaluk bu wolewoleh duninj, kabolkburlerran, wanjh kandimarnebu nabadbuyika lamb. Bu kunmekbe kabolkyime wanjh kandiwo warridj kandidjawa, dja kunkalkkid manbu olives, dja mak manbu wine, karohrok bu malamalaywi ngurriyimowong. Maninjmanu kandiwon ngaye nawu Yawey, dja bu ngurrikinje wanjh nganome manbomanjmak, wanjh ngawarnmakmen."

⁴² "Kaluk ngurrikurduyimen kuninjkuu rowk munguyh munguyh. Kaluk kandimarnekinjemen namekbe mayh kore ngahdi, kore kumirrk kurrangmaye ngarre Dabburlin kore ngaye ngamre bu djahwon ngudberre. Bu kunmekbe wanjh, ngarrmarren ngudda nawu Moses, dja ngawokdan ke.

⁴³ Dja mak ngarrinarren bininj nawu Israel benkebmawahmeng kumekbe warridj. Kaluk kumekbe ngamdjaldi kunwerhnmakmak ngardduk dorreng bu ngawernhbolkwoalkan kunmekbe, dja wanjh kabolkyimerran kunbolkdjamun ngardduk."

⁴⁴ "Dja mahni Manurrkdjamun Dabburlin kore ngaye ngamre bu djahwon ngudberre dja mak manbu altar, makka wanjh ngamarnbun bu kayimerran rowk kore ngardduk duninj. Dja mak ngabenmang Aaron dja nabebeywurd nuye dja ngabenmarnbun bu kabirryimerran priests ngardduk nawu ngandimarnedurrkmirri.

⁴⁵ Wanjh ngarridjarrkni nawu Israel benkebmawahmeng dja mak ngabenmarnewohrnan, dja ngaye wanjh God duninj bedberre.

⁴⁶ Bedda wanjh kabirriburrbun bu ngaye nawu bedberre God ngangeyyo Yawey, dja ngaye ngabenbebkeng kore kunbolk Egyptbeh, ba bu kamak ngarridjarrkni. Ngaye Yawey nawu bedberre God." Kuhni rowk bu Yawey bimarneyimeng nawu Moses.

30

God Benbengdayhkeng Bu Birrimarnbom Altar Manbu Kabirrikinje Mankalkkidmanjmak

*Exodus 30:1-10
(Exodus 37:25-28)*

¹ Wanjh Yawey yawoyhwokdanj bimarneyimeng Moses, "Ngurrimarnbu altar kaluk acacia kundulk dorreng manbu ngurriwurlhke incense mankalkkidmanjmak.

² Kaluk ngurrimarnbun bu square fifty centimetres kakuyeng dja mak fifty centimetres kawarlahwarla, dja mak 90 centimetres bu kaddum. Dja mak ngurrimarnbu manbu kunkanemdulk ngarre makka wanjh yiman kayime kukkudji karaworren manmekbe burrk ngarre altar.

³ Wanjh ngurribarrkbun bu ngurrikurrmen wirlmurrng gold duninj, kore kaddum dja kungorrk rowk, dja mak kunkanemdulk warridj. Dja mak mankuyeng manbalabala manbu wirlmurrng gold, wanjh ngurrikurrmen kore altar kaluk kawakwabbun kumekbe.

⁴ Dja mak ngurrimarnbu kunkarrngbakmeng wirlmurrng gold rings dja ngurrikurrmen kanjdji kore manbalabala kawakbun bokenh bokenh kore kurrid bokenh. Kaluk nahn rings kakarrme mandulkkuyeng bokenh bu bininj kabirrikanahkan nawu altar.

⁵ Manbu mandulkkuyeng bokenh, makka ngurrimarnbu acacia kundulk, kaluk ngurribaru wirlmurrng gold duninj.

⁶ Wanjh ngurrikurmen namekbe altar kore kuberrkka ngarre curtain nawu kabarndi kumirrre nawu Ark manbu kakarme manwarddebala bokenh nawu kabimbuyindi kunwok kunwoybuk kore ngawokkurmerrinj. Kumekbe kaluk kumirrre ngarre lid nawu kahbarrkbun namekbe Ark. Wanjh kumekbe kaluk ngaye ngamre karrinarren.”

⁷⁻⁸ “Ngadjare manbu mankalkkidmanjmak bu kahdjaltung kunkodjekudjikudji munguyh munguyh kore kumirrre ngardduk nawu Yawey, dja nawu mawahmawah ngudberre wanjh bedmanwali kabirridjalwurlhke munguyh. Kaluk Aaron nungka wanjh wurlhkemen namekbe incense nawu namanjmak kore altar munguyh munguyh bu kukabelwern, bu kamre kanahan nawu lamps. Wanjh yawoyhwurlhkemen manbu mankalkkidmanjmak incense kunkodjke rowk bu wolewoleh nungka kamre kawurlhwurlhke lamps.

⁹ Yuwn bu ngurrimang manmekbe altar bu kandimarnekinje nawu nawarre incense. Dja bu njalehnjale kandiwoyi dja kandimarnekinje, yiman mayh, dja yika manmim, wanjh yuwn bu ngurrikinj kore manmekbe altar, dja yuwn bu mak kandimarneboyakbun manbu wine kore manmekbe altar.

¹⁰ Dja bu mandjewkbubuyika wanjh Aaron kunkudjikenh kayawoyh-marnbun manmekbe altar ba kayawoyhyimerran manmak kore ngaye. Nungka wanjh delkkemen mahni kunkurlba kore kunkamendulk ngarre altar. Nungka wanjh kangang mahni kunkurlba kore mayh bu ngurribun ba bu ngaye Yawey gabengmidjan ngudberre kunwarre rowk. Wanjh kumekbe kahdjalkurduyimerran mandjewkbubuyika munguyh munguyh. Kaluk nahn nawu altar nakka wanjh djal ngaye ngardduk nawu Yawey.”

God Benbengdayhkeng Bu Kabirrikarremulewan Nuye Nawu Yawey

Exodus 30:11-16

¹¹⁻¹² Wanjh Yawey yawoyhwokdanj, bimarneyimeng Moses, “Bu ngurbenrohrok bu ngurriyime baleh kayime birimekbe bininj nawu Israel benkebawahmeng, kaluk bu kunmekbe kabolkyime, wanjh biribebhekudjikudji bininj kandikarremulewan ngaye Yawey, yiman kayime kabirribebhekukbayahmerren ba kundjak kunkimuk nawu minj kamarnbuyindan bedberre yerre bu ngurbenrohokme.

¹³ Kaluk bininj nawu ngurbenrohrokme wanjh kabirribebhekukkurme yikahwi money nawu nakudji coin* ngarre kubolkdjamunkenh. Kaluk namekbe money, nakka wanjh bedda ngandikukwon ngaye nawu Yawey.

¹⁴ Wanjh bininj nawu ngurbenrohrokme bu nawu mandjewk bedberre 20 dja mak nawu kabindibalyurrhke nawu mandjewk twenty, wanjh bedda rowk ngandikukwo rowk namekbe kunwardde nawu Yawey.

¹⁵ Bu ngandikukwon money ba yiman kayime kabirridarrkidurndiwerren kore ngardduk, wanjh nawu bininj yiman kukwarddekimuk wanjh nakka minj kabirrikukkurme nawern, dja ngaleng namekke nadjalkudji coin. Dja mak bininj nawu minj nakimuk money kabirrikukkarme, wanjh nakka kabirridjalkukkurme namekbe nakudji coin.”

¹⁶ “Ngurrimang rowk kore kabirrikukkurme ngardduk dja wanjh ngurribayahme njalehnjale nawu ngarre kabirridurkmirrikenh kore Manrurrkdamun Dabburlin kore ngaye ngamre bu djahwon ngudberre. Kaluk kuhni wanjh ba Yawey kadjalburrbun bu bininj nawu Israel

* **30:13** Ngurrina Matthew 17:24

benkebmawahmeng wanjh yiman kayime birridarrkidbayahmeng bedberre kundarrkid.”

God Benbengdayhkeng Bu Birrimarnbom Nawu Kabirridjirridjburrenkenh.

Exodus 30:17-21

17-18 Wanjh Yawey bimarneyimeng Moses, “Ngurringalngmarnbu nakimukkenh bannikin nawu kaluk wirlmurrng manbu bronze, dja mak nawu kahdedjbarndi kaluk wirlmurrng bronze yerrih, ngarre nawu priests kabirrihdjirridjburrenkenh. Wanjh ngurrikurrmen namekbe banikkin dja mak nawu kahdedjbarndi kubulkayh kore Manrurrkdjamun Dabburlin kore ngaye ngamre bu djahwon ngudberre, dja kore altar, wanjh kukku yiborrakendong kore nawu banikkin.

19 Wanjh Aaron dja nabebeywurd nuye kabirribiddjirridjburren dja kabirridengedjirridjburren kukkuwi kore namekbe banikkin.

20 Bu bedda kabirringimen kore Manrurrkdjamun Dabburlin kore ngaye ngamre bu djahwon ngudberre, wanjh birrikukdjirridjburrimen kukkuwi ba minj kabirridowen. Dja mak bu kabirrimre kore altar bu kabirridurrkmirri yiman priests bu ngandimarnebun ngardduk nawu Yawey dja kabirrikinje,

21 wanjh birribiddjirridjburrimen dja birridengedjirridjburrimen ba kunukka minj kabirridowen. Mahni mankarre manbu Aaron dja mawahmawah nuye bu kabirriwokmang bu kuninjkuu rerrih munguyh.”

God Benbengdayhkeng Bu Kabirrikodjbarurrenkenh Nuye Mankalkkid Dorreng.

Exodus 30:22-33

22-25 Wanjh Yawey bimarneyimeng Moses, “Ngurrima spices nawu namakmak yiman six kilograms kunkalkkid myrrh, mak three kilograms nawu namanjmak cinnamon, dja three kilograms namanjmak cane, dja six kilograms cassia. Wanjh ngurrirohrokmen namekbe rowk kore mankarre kayime. Dja mak ngurrimang kunkarrngbakmeng litres olive kunkalkkid, wanjh ngurrirow rowk bu kakalkkidmarnburren yiman kayime manmanjmak perfume. Kaluk wanjh kamarnbuyindan manbu mandjamun olive kunkalkkid. Dja maninjmanu mankalkkidmanjmak wanjh ngurrimang dja ngurrbenkodjbarung bininj bu ngayekenh.

26-28 Kaluk ngurridjuhkemen namekbe kunkalkkid kore Manrurrkdjamun Dabburlin kore ngaye ngamre bu djahwon ngudberre, dja mak kore Ark nawu yirrahkendoy manwarddebala bokenh manbu kabimidi kunwok kunwoybuk ngardduk ngawokkurrmerrinj, dja manbu table dja njalehnjale ngarre, dja nawu lampstand dja nawu tools ngarre, dja mak altar kore ngurrikinje mankalkkidmanjmak, dja mak nabuyika altar kore kabirrikinje mayh nawu ngandiwon ngardduk, dja mak nawu tools ngarre, mak banikkin nakimuk, dja nawu kahdedjbarndi ngarre.

29 Ngudda kunu ngurrimarnbun bu kayimerran mandjamun rowk. Kaluk njalenjale bu kakilekme wanjh kunu nadjamun duninj kayimerran warridj.”

30 “Wanjh kunkalkkid ngurrima ngurrbenkodjduhke Aaron dja nabebeywurd nuye ba kabirriyimerran djal ngaye ngardduk bininj, dja ngandimarnedurrkmirri yiman priests.

³¹ Ngudda Moses yibenmarneyimen nawu Israel benkebmawahmeng, 'Nawu Yawey kayime nahni nawu kunkalkkid wanjh nakka nuye nadjamun bu kuninjkuu bininj kabindikodjdelkkeren munguyh munguyh bu kabirriyngkihmarbunren kabirridurrkmirri nuye yiman priests.

³² Dja yuwn ngurrbenkodjduhkerren maninjmanu kunkalkkid dorrengh nawu kunburk bininj, dja mak yuwn bu ngudmandeleng ngurrikalkkidmarbun maninjmanu mankalkkid. Wanjh nakka ngurriwerhburrbun bu mahni mankalkkid wanjh mandjaldjamun duninj.

³³ Dja bu nangale bininj kakalkkidmarbun namekbe perfume nawu manmanjmak, dja mak bininj nawu kabikodjdelkke bininj nawu minj priest, wanjh nakka nanu ngaye ngayarlarke kore nawu bininj nuye rowk.' "

God Benbengdayhkeng Bu Birrimarnbom Mankalkkidmanjmak

Exodus 30:34-38

³⁴ Wanjh Yawey bimarneyimeng Moses, "Ngurrima nahni nawu manmak spices, yiman resin, onyx, galbanum, dja frankincense duninj. Ngurribebbehwayhme bu ngurrirohroke bu karohrok kahbebehyo.

³⁵ Ngurrirawo maninjmanu spices ba kamarnburrren incense manmanjmak bu kabanj, dja mak djila ngurrirawon ba bu manmak kadjalyime dja mak mandjamun duninj. Kuhni karohrok bu bininj kabirriyime nawu perfume kabirrimarnbun.

³⁶ Wanjh ngurridongorro yikahwi mahni incense, kaluk ngurrimarnbun kundjulng, wanjh ngurri ngurrikurrmen kumirrk ngarre Ark kore kahdahkendi manwarddebal bokenh kore kabimdi kunwok kunwoybuk ngawokkurrmerrinj. Kaluk kukmekbe kore Manrurrdjamun Dabburrlin kore ngaye ngamre bu djahwon ngudberre. Kumekbe wanjh ngamre bu karrinarren. Kaluk manmekbe incense wanjh ngurriwerhburrbun bu ngurriyime mandjaldjamun duninj.

³⁷ Yuwn bu ngurrimarnbun manmekbe incense bu ngudman ngudberreh. Ngurriyimen bu mandjaldjamun ngardduk nawu Yawey.

³⁸ Nangale nawu kamarnbun manmekbe mankalkkidmanjmak kore nungka kadjare, wanjh nakka ngawohyarlarke kore bininj nuye."

31

God Benbenedjarrngbom Nawu Bezalel Dja Aholiab

Exodus 31:1-11

(Exodus 35:30—36:1)

¹⁻² Wanjh Yawey bimarneyimeng Moses. "Yina, ngaye wanjh ngamey Bezalel nawu beywurd nuye Uri kaluk kore kunmokukurr ngarre Judah. Kaluk Uri nawu nakka wanjh beywurd nuye Hur.

³ Kaluk ngaye ngakurrmeng Namalngmakkaykenh ngardduk ngaye nawu God, dja kangebarlkeng. Dja mak ngawong manbu ba nakurdumak bu karrurrkmirri kore njalenjale kamarnbun, dja kamayaliwernmen ba nawern nawu karrurrkmirri.

⁴⁻⁵ Kaluk nungka wanjh kabimbun nawu bimmak, ba bu bininj kabirrimarnbun njalehnjale nawu kore gold, silver dja wirlmurrng manbu bronze, dja ba kabirridadjke nawu jewels bu kabirrikurrmekurrme, dja mak kore kabirrimarnbun njalehnjale kundulkwi, dja mak kundjalwern bu kabirrimarnbun.

⁶ Dja mak ngaye ngamey Oholiab nawu beywurd nuye Ahisamach nawu kumdolk kang kunmokukurr Dan. Dja nungka wanjh kabenedjarrkdurkmirri Bezalel. Warridj ngaye wanjh ngabenwong birridjalwern bininj

nawu kabirrimarnmarnbun rowk kore ngawokrayekwong ngudberre, ba bu birrikurdumak.

⁷ Ngayime nawu Manrurrkdjamun Dabburlin kore ngayme bu djahwon ngudberre dja manbu Ark kore manwarddebala bokenh kahdi nawu kabimdi kunwok kunwoybuk ngaye ngawokkurrmerrinj, dja mak nawu kaddumkah ngarre dja mak njalehnjale nawern ngarre nawu dabburlin.

⁸⁻⁹ Nahni mak karawoyindan nawu namekbe manbalabala dja njalehnjale ngarre, yiman kayime gold lampstand dja njalehnjale nawu ngarre, dja altar ngarre nawu ngurriwurlhke manbu incense, dja altar ngarre nawu kandimarnekinjekenh mayh, dja njalehnjale ngarre nawu kabirrikarrme, yiman kayime mak banikkin nakimukkenh dja mak nawu ngarre kanjdjikenh.

¹⁰ Dja mak ngabenwong bedda nawu kabirribibbun kunmadj nadjamun nuye Aaron nawu priest, dja mak nabebeywurd nuye manbu kunmadj bedberre ba kabirridjongbuyindi bu kabirridurkmirri yiman priests.

¹¹ Mak nawu kabirrimarnbun nawu namakmak kunkalkkid olive bu bininj kabindikodjdjuhkekenh, dja mak manmanmak incense manbu ngurriwurlhke kore kubolkdjamun. Kaluk birrimekbe bininj wanjh kabirrimarnbun namekbe rowk nawu kore ngaye wokrayekwong ngudberre."

God Benmarnemarnbom Kunbarnangarra Manbu Sabbath

Exodus 31:12-18

¹²⁻¹³ Wanjh Yawey bimarneyimeng Moses, "Yibenmarneyimen nawu Israel benkebmawahmeng, 'Ngurriwernhburrbu Yawey nuye kunkodjke manbu Sabbath. Bu ngurrikurdyime wanjh ngurriborlhme bu ngaye Yawey ngunburrbun dja mak ngudda kandiburrbun. Dja mak nawu mawahmawah ngudberre kuhni birrikurdyimen warridj. Kuhni bu ngurridjalburrbun rowk bu ngaye nawu Yawey, wanjh marnbun ngudberre bu ngudda djal ngaye ngardduk bininj.'"

¹⁴ "Ngurrimarnbu manmekbe Sabbath kunbarnangarra djamunnin ngudberre. Dja bu nangale bininj kawarrewan manmekbe Sabbath wanjh namekbe bininj ngurribu, karrownen. Dja mak nangale nawu karrurkmirri bu Sabbath kore djal nungan kadjare wanjh ngurribawo dja minj ngurriyawoyhraworren.

¹⁵ Kaluk bu six kunkodjke makka wanjh ngurridurkmirri, dja manbu kunkodjke seven, wanjh mahni Sabbath ba bu ngurrigehmekenh. Maninjmanu kunkodjke wanjh ngardduk, dja ngaye wanjh Yawey. Nangale nawu karrurkmirri kore djal nungan kadjare bu Sabbath nakka wanjh ngurribu, karrownen.

¹⁶ Ngudda nawu Israel ngunkebmawahmeng dja warridj nawu mawahmawah ngudberre, wanjh ngurrikarrmen manmekbe Sabbath munguyh munguyh. Mahni Sabbath wanjh kamenyime bu ngaye ngawokkurrmer-ring ngudberre rowk.

¹⁷ Wanjh manmekbe manbu Sabbath kunbarnangarra makka wanjh munguyh munguyh ngunbengdayhke ngudda nawu Israel ngunkebmawahmeng, dja mak ngaye nganbengdayhke bu ngaye nawu Yawey ngamarnbom kaddum rowk dja mak kurorre rowk bu ngarrurkmirri six kunbarnangarra, dja bu kunbarnangarra seven wanjh makka minj ngarrurkmirriwurrinj dja wanjh ngameheng." Kuhni rowk bu Yawey bimarneyimeng nawu Moses.

¹⁸ Bu Yawey ngurdmeng benehwokdi Moses kore Mount Sinai, nungka biwong bokenh kunwardde manbalabala kaluk manbu kunwok kunwoy-buk nuye Yawey wokbimbuyindi, kaluk nungan God bihbimbom nuye kunbidwi kore maninjmanu manwarddebala bokenh.

32

Bu Birrimarneboddanj Idol Nawu Birrimarnbom

Exodus 32:1-35

(Deuteronomy 9:6-29)

¹ Kaluk bininj nawu Israel benkebmawahmeng wanjh birrimadbom kunkuyeng nawu Moses, dja nungka minj kumkoluyi kore kuwarddebeh. Wanjh birrimirndeyikang nawu Aaron dja birrimarneyimeng, "Mah. Yimarnbu kadberre god ba kanmarnedokme kadberre. Dja namekbe bininj Moses nawu kanyibemeng kadberre kore Egypt, minj karriburrbun bu baleh nungka bimarnekurduyimerranj."

² Wanjh Aaron benmarneyimeng, "Mah. Ngurriyerrkkemen dja ngurrimka nawu kabirrihkanemdjongbuyindikenh, manbu gold wirlmurrng nawu bedberre ngalbihbininj kobeng ngudberre dja mak ngalbebeywurd dja nabebeywurd ngudberre."

³ Wanjh birriwern rowk birriyerrkkerrinj kore kunkanemkenh, dja birrikang dja birriwong Aaron.

⁴ Wanjh nungan Aaron mangimangi kore birriwong rowk, dja kinjeng bu mey gold wirlmurrng duninj, wanjh kukmarnbom idol bedberre. Kaluk kukmarnbom wirlmurrng gold mandjawakwi bu kukyimi bulikki yaw. Wanjh birrimekbe bininj birriyimeng, "Ngurrina! Ngad nawu Israel kankebmawahmeng! Dja nahnj wanjh god nawu kanbekkeng kadberre kore Egyptbeh!"

⁵ Kaluk bu Aaron nang baleh bu kurduyimerranj wanjh nungka marnbom altar kore kumirrk nuye namekbe bulikki yaw, dja yimeng bedberre, "Bu malaywi wanjh ngad karrimulilmang nawu Yawey."

⁶ Wanjh bu kumdungbebmi malaywi bedda birridolkarrinj. Wanjh birrimey mayh, dja yikahwi birrimokenkinjeng kore altar, dja yikahwi mak birribom bu birridjarrknguni kore kunmodmikenh nuye Yawey. Kaluk birriyerrkang, birridjarrknguneng dja birribonguneng, wanjh yerre birridolkang dja birridedjingmey bu kunwarre duninj birrikurduyimi.

⁷ Wanjh Yawey bimarneyimeng Moses kore kuwarddekimuk, yimeng, "Werrkwerrk eykolu kore kondahbeh! Birrimekbe bininj nawu yibenbekkeng kore Egyptbeh wanjh nakka birriwarreworrinj dja ngandibodme ngardduk."

⁸ Bedda wanjh werkwerrk ngandiwokbawong ngardduk kore ngabenwokrayekwong. Dja bedda wanjh birrimarnbom idol bu wirlmurrng goldwi, dja kakukyime nawu bulikki yaw. Wanjh birrihmarneboddangeni namekbe nawu idol, dja mak birriwoni nuye bu birrimarnebom mayh, dja mak birriyimeng, "Ngurrina! Ngad nawu Israel kankebmawahmeng! Dja nahnj wanjh god nawu kanbekkeng kadberre kore Egyptbeh!"

⁹ "Ngaye ngabennang birrimekbe bininj bu minj kandiwokmarrkmang ngaye dja kabirrikangerayek ngardduk."

¹⁰ Bonj, yuwn bu kandengkhe, dja kanbawon ba wanjh ngayiddung duninj bedberre bu ngabenbularrbun. Ngudda yiwid, dja ngaleng marnbun ngudda ba yibenkebmawahme birribuyika bininj birridjalwern, dja kabirrimirndewernmerren dja mak kabirringeykimuk."

11 Wanjh Moses yimankek bimarnbuyi nawu Yawey, nawu God nuye, bu kabenkongibunkeh. Wanjh yimeng, "Ngudda nawu Yawey, bu kundulkarre dorreng yibenbekkeng birrimekke bininj nawu Israel benkebmawahmeng kore Egyptbeh. Bu kore kubid ke dja kunngudjikimuk ke yibenbekkeng. Dja njalekenh bu yiyiddung dja yibenbun?"

12 Dja bu kunmekke yikurduyime, wardi bininj nawu Egyptbeh kabirriyime, 'Njalekenh Yawey benbekkeng kore birrihbongdi dja benkang kore kuwarddewardde kumekke benbularrbom rowk?' Wanjh ngaye djawadjawan bu yuwn yiyiddung, dja yibawo. Yimayaliborledmen dja yuwn bu yibenbularrbun nawu bininj ngudda ke.

13 Yiburrbu kore ngudda yiwokkurmerrinj bedberre Abraham, dja Isaac dja Jacob. Ngudda yingeykurmerrinj bu yibenmarnewokkurmerrinj, yiyimeng, 'Kalukburk ngaye wanjh ngabenmarnbun nawu mawahmawah ngudberre bu kabirrimirndeyimerran yiman kayime mankokkarng kawernmerren kore kunngol, dja mak ngabenbolkwon kore ngabenbolkkerbbom, ba bu mawahmawah bedberre wanjh kabirribolkkarme mahni kunred bu munguyh munguyh.' " Kuhn bu Moses bimarneyimeng nawu Yawey.

14 Wanjh kunmekbekenh nawu Yawey mayaliborledmeng, dja minj benbuyi birrimekke bininj kore nungka benyingkihngendayhkeng bu benbularrbuyikenh.

15-16 Wanjh Moses yawoyhkoluy kore kuwarddekimukbeh, kaluk kumyikoluy dja karrmi kubid nuye manwarddebalabala bokenh manbu bimbuyindi kumirrk dja kubodne ngarre manbu kunwok kunwoybuk nuye bu Yawey wokkurmerrinj. Namekke manwarddebala bokenh wanjh God nungan marnbom. Nungan mak bimbom mankarre nuye, bu warddedadjkeng kore maninjmanu kunwardde.

17 Kaluk Joshua benbekkang bu birrikayhkayhmi birrimekke bininj, wanjh bimarneyimeng Moses, "Ngabekkan nakka yiman nuk kabirrihburren kore kured yiman nawu birriyidko bininj bindimarnebebmeng!"

18 Wanjh Moses yimeng "Burrkyak. Nakka minj kabirrihburren. Minj kabirrihkayhme bu bindibom birribuyika bininj. Dja nakka wanjh kabirrihdjalwayini kore ngabenbekkan."

19 Bu Moses bebmihhebmi darnkih kore kured, wanjh nungka nang namekke bulikki yaw idol, dja mak bennang nawu bininj birriborrkeyi. Wanjh nungka yidduy duninj dja mak wohburriweng manmekke kunwardde bokenh dja warddebarrabarrmeng kore kurorre darnkih kore kanjdjjakah kuwarddekimuk.

20 Wanjh mey namekke bulikki yaw idol dja kinjeng ba wirlmurrng gold yawoyhyimerranj dja djulngdongohdoy marnbom yiman kundjulng, wanjh rawong kukku dorreng, benmarnbom bininj nawu Israel benkebmawahmeng bu birribonguneng manmekke kukku manbu gold dorreng.

21 Wanjh Moses bidjawab Aaron, "Baleh nahn bininj birrikurduyimeng ke bu ngundimarnbom yibenkang kore kuhni birrikurduyimeng kunwarre duninj?"

22 Wanjh biwokmey yimeng, "Nawu Kanmarnewohrnan, yuwn ngaye kandung! Ngudda yiburrbun bu birrimekke bininj kabirridjare bu kabirrihdjalurduyime kunwarre!"

23 Bedda mak ngandimarneyimeng, 'Namekke Moses nawu nganbekng ngadberre kore Egyptbeh, wanjh minj ngarriburrbun bu baleh bimarnekurduyimerranj nuye. Kab ngudda yimarnbu kadberre god nawu kanmarnedokme kadberre.'

24 Wanjh ngabenmarneyimeng bu birrimkang nawu kabirrihkanemd-jongbuyindi. Wanjh bedda birrikanemyerrkyerrkkerrinj dja ngandiwong wanjh ngaburriweng kore kunak, dja wanjh nahni mayh kukkebmeng!"

25 Kaluk Moses wohburrbom bu Aaron benbawong birrimekbe bininj bu birridjalkurduyimi kore bedman birridjaldjareni, dja minj birriyawoy-hwokmayi nuye. Dja bedda birriwarreworrinj dja benmarnbom nawu kabirriyidko bedberre bu bindidjekniwong.

26 Wanjh Moses dolkkang danginj kore kurrangmaye ngarre kunbolk kore birrihni, dja kayhmeng, yimeng. "Birringalehngale nawu Yawey nuye bininj, wanjh nakka birrimray kondah kore ngaye!" Wanjh bininj rowk nawu Levi benkebmawahmeng birrimdolkkarrinj birridangerrinj kore Moses dingihdi.

27 Wanjh Moses benmarneyimeng birrimekbe bininj nawu Levi benkebmawahmeng, "Yawey nawu God nuye Israel benkebmawahmeng rowk, kuhni wanjh kayime, 'Bininj rowk ngurrima sword dja ngurribarnkur-rmen kore ngurringadmodukkarren. Wanjh ngurriray kore kurehred ngudberre dja ngurribenbu nawu ngurridanginj dja nawu djawirna ngudberre, dja mak nawu ngurriedbo bininj.'"

28 Wanjh nawu Levi benkebmawahmeng birrikurduyimeng kore Moses benwokrayekwong. Wanjh kunmekbe kunbarnangarra birriwern bininj birridoweng yiman 3000.

29 Wanjh Moses benmarneyimeng, "Bolkkime ngudda ngurrikurrmer-rinj bu ngurriymerranj djal Yawey nuye bininj. Ngudda ngurriwokmarr-mey dja ngurribenbom beybeywurd dja nawu ngurridangerrinj ngudberre. Kunmekbekenh kunu nawu Yawey ngunmarneyimeng kunmak ngudberre bolkkime."

30 Wanjh bu kunbarnangarrabuyika Moses benmarneyimeng bininj rowk, "Ngudda ngurrikurduyimeng kundjalwarre duninj. Dja wanjh bolkkime ngabidbun kuwarddekimuk kore Yawey dja ngadjawadjawan nungka bu wardi ngunmarnebengmidjan ngudberre."

31 Wanjh Moses durndi kore Yawey dja bimarneyimeng, "Birrimekbe bininj bedda wanjh kunwarre kunkimuk birriyimeng. Bedda wanjh birrimarnbom idols manbu gold duninj, nawu yimankek gods bedberre.

32 Dja bolkkime wanjh ngaye djawan bu yimarnebengmidjan kunwarre bedberre. Dja bu burrkyak, wanjh kanngybularrbu ngaye kore nawu djurra yibenngyimbom ngudda ke bininj rowk."

33 Wanjh Yawey bimarneyimeng Moses, "Ngaye ngabengybularrbun kore djurra ngardduk nawu kunwarre birrihyimi dja minj ngaye ngandi-wokmarrkmayi.

34 Dja wanjh yiray, yibenka nawu ngaye ngardduk bininj kore ngabolky-olyolmeng ke, kaluk yiburru bu angel ngardduk karrokorrokme ngudberre. Kaluk bu rerrihkah ngaye wanjh ngabenbun birrimekbe bininj kore kunwarre birrihyimi."

35 Kaluk yerrekah Yawey munkeweng kundjak kunkimuk bu benbuni nawu Israel benkebmawahmeng. Nungka benduy bu bedda birrid-jirrkang Aaron bu benmarnemarnbom nawu bulikki yaw nawu gold wirilmurrng duninj.

33

Yawey Nawu God Benduy Bininj Nuye

Exodus 33:1-6

¹ Wanjh Yawey bimarneyimeng Moses, “Mah, yibolkbawo kondah kore ngurrihni, ngudda dja bininj yibenbekkeng kore kunbolk Egyptbeh. Dja wanjh ngurriray kore kunred ngaye ngabenberrebbom bu ngawokkur-merrinj bedberre nawu mawahmawah ngudberre Abraham, Isaac dja Jacob dja mak bedberre nawu kabindimawahme.

² Ngaye kaluk ngamunkewe angel bu kahdokdokme ngudberre ba ngunbolhbukkan, dja ngabendjirrkkan nawu kumekbe kabirrihni nawu Canaan benkebmawahmeng, dja bininj nawu kabirringeyyo Amor, dja nawu Heth benkebmawahmeng, dja mak nawu kabirribebbehngeyyo Periz dja mak nawu Hiv, dja mak nawu birrikang kunred Jebus.

³ Kab ngurridjallay kunmekbe kore mahni kunbolkmak, kore manme kawernermerren ngudberre. Dja bonj, ngaye minj mak karridjarrkre. Wardi wohbun ngudberre kore manbolh ngurrire, dja wanjh ngudda nawu kandidjalwokburriwe ngaye munguyh.”

⁴ Bu nawu Israel benkebmawahmeng birribek kang manmekbe kunwok kunrayek, bedda wanjh birriwernhnjilngwarreminj, dja minj birrihdjong-buyindiwirrinj nawu namakmak jewelry dorreng,

⁵ Kuhn bu wanjh Yawey biyngkihmarneyimeng Moses, “Yibenmarneyimen nawu Israel benkebmawahmeng bu bedda munguyh ngandjalwokburriwe ngaye. Bu ngaye ngabenmikayi ngarridjarrkreji bu djalkunded-jumbung, nakka wanjh ngabenbun. Dja bonj, birriyerrkyerrkkerrimen nawu jewelry, wanjh kaluk ngayeman nganjilngmarnburren bu baleh ngakurduyime bedberre.” Kuhn bu Yawey bimarneyimeng Moses bedberre.

⁶ Wanjh nawu Israel benkebmawahmeng birriyerrhyerrkkeng nawu jewelry bedberre rowk kore birrihni kuwarddekimuk Sinai. Dja bu birribolkbawong birrirey, wanjh minj munguyh birriyawoyhdjongbuyindiwirrinj nawu jewelry.

Bu Moses Marnbom Dabburlin Nuye Kore Yawey Benewokdi

Exodus 33:7-11

⁷ Nungka Moses munguyh kani nawu dabburlin nuye, wanjh djabnami djarrehkah kore kabirrihyongoyo kured. Kaluk Moses ngeykur-meng namekbe dabburlin, “Dabburlin manbu kore Yawey karridabkerrenkenh”*. Dja nangale nawu djareni kabidjawan Yawey nawu yiman njale djareni wanjh wam kore mahni “Dabburlin manbu karridabkerren Yawey” kore djarrehwurd kuberrkkah kore birrihyoy.

⁸ Dja yiman baleh yarrkka Moses rey kore namekbe dabburlin, wanjh birriwern bininj birridolkkarrinj dja birridangerrinj kore kurrangmaye bedberre dabburlin rowk, dja birribalmunkenang Moses bu balngimeng kore mahni dabburlin.

⁹ Bu Moses balngimi kore dabburlin nuye, wanjh manbu kungol kunkuyeng kumngolkolungi wanjh dangeni kore kurrangmaye ngarre manmekebe dabburlin bu Yawey benewokdi Moses.

¹⁰ Bu bininj nawu Israel benkebmawahmeng birrinani manmekbe kungol kumkolungi dja danginj kore kurrangmaye ngarre dabburlin, wanjh bedmanwali birriboddanginj, bebbehbeh rowk kumekbe kore kurrangmahdangmaye bedberre dabburlin.

¹¹ Wanjh Yawey benehwokdi Moses kaluk benemirrkarrinj bu benehwokdi yiman kayime bininj nawu djawirna bokenh kabenehwokdi. Wanjh bu beneyakwoni bu benehwokdi wanjh nungka Moses durndengi

* 33:7 Mahni wanjh manbuyika dabburlin, yuwn bu Manrurrdjamun Dabburlin.

kured. Dja bininj nawu bibidyikarmeng Moses minj bolkbawoyi kore dabburlin. Kaluk nungka wanjh Joshua nawu Nun bibornang.

Bu Moses Bidjawam Yawey Bu Bimarnekukbukkarinj Nuy

Exodus 33:12-17

¹² Wanjh Moses bimarneyimeng Yawey, “Ngudda kanmarneyimeng bu ngaye ngabenkan nahni nawu bininj dja minj yiyimeninj bu nangale yimunkewe ba nganedjarrkre. Dja mak ngudda kanmarneyimeng, ‘Ngaye burrbun ngudda dja mak ngeyburrbun ke, dja mak ngaye nganjilngmak ke!’

¹³ Bu ngaye njilngmarnbom ke, wanjh kanbukkabukka manbu ngokko yikarremarnbun, ba ngaye wanjh burrbun ngudda, dja mak ba kanmarnenjilngmak munguyh. Yiburru bu nahni birriwern bininj nawu ngabenmirndekan, wanjh nakka ngudda ke bininj.”

¹⁴ Wanjh Yawey biwokmey yimeng, “Ngaye kaluk karridjarrkre, dja mak won ngudberre ba ngurringehme.”

¹⁵ Wanjh Moses bimarneyimeng, “Bu ngudda minj karridjarrkre, wanjh yuwn kankumunkewe ngadberre bu ngarribolkbawon kondanjku.

¹⁶ Dja bu ngudda minj karridjarrkre, wanjh minj nangale mak kaburrbun bu ngudda yinjilngmak ngadberre, ngaye dja nawu ngudda ke bininj rowk. Dja bu ngudda minj karridjarrkre ngaye dja nahni ngudda ke bininj, wanjh minj ngarribuyikaworren bedberre nawu birribuyika bininj rowk nawu kondah kabirrihni kore kurorre.”

¹⁷ Wanjh Yawey bimarneyimeng Moses, “Mah! Ngaye wanjh ngakurdyime kunmekbe kore ngudda kandjawam, dja mak kannjilngmarnbun ngardduk, dja mak ngeyburrbun ngudda.”

Moses Nang Yawey Nuy Kunwernhmakmak Duninj

Exodus 33:18-23

¹⁸ Wanjh Moses yimeng, “Bolkime wanjh kanmarnekukbukkarimen ba nan bu ngudda yidjalwernhmakkaykenh.”

¹⁹ Wanjh Yawey bimarneyimeng Moses, “Ngaye nawu Yawey wanjh bukan ngardduk kunmakmak rowk kore kumirrk ke, dja ngangey-mulewarren ngardduk ba kanngeybekkabekkan. Ngaye ngadjalkongibun bininj nawu ngadjare, dja nangale nabuyika bu wardi ngabendjalwarnyak, wanjh minj ngabenkongibun.

²⁰ Dja med, ngudda ngaleng minj kankebnan ngaye. Bu nangale nakka djal bininj nawu ngankebnan nakka wanjh bonj, karrown.”

²¹ Wanjh Yawey yawoyhyimeng, “Manbu kunwardde kahdi kaluk darnkih kore ngaye, wanjh kumekbe yibarndin.

²² Dja bu kunwernhmakmak ngardduk ngunyurhke kumekbe, wanjh ngaye kurrme kore kahwarddebarrarn yerre wanjh kukbalhme kunbid ngardduk bu kumekbe yurhke.

²³ Kaluk bu ngabidwayhme wanjh kunbodmewi kandjalbodmenan, dja manbu kunkeb makka yuwn nangale kankebnan.”

34

Bu Yawey Kumkoluy Kunngol Dorreng Kore Moses Dja Biyawoyhwong Mankarre

Exodus 34:1-9

(Deuteronomy 10:1-5)

1 Wanjh Yawey bimarneyimeng Moses, “Yiyawoyhdadjdadjke bokenh kunwardde manbalabala, yiman yimi manbu manyungkihni, dja kaluk ngayawoyhbimbun karohrok bu bimbuyindi maninjmanu manyungkih kunwardde, manbu ngudda yibakkeng.

2 Bu malamalaywi, wanjh yiyingkihmarburrimen bu kukabel, dja yimbidbu kore kaddum mahni kunwarddekimuk. Kaluk kumekbe yikur-merrimen kore kumirrk ngardduk.

3 Minj nangale mak ngunemdjarrkre dja mak minj nangale karri darnkih kore kuwarddekimuk. Yiman mak kayime nawu mayh kumirnde, nakka mak minj kundalk kangun darnkih kore kuwarddekimuk.”

4 Wanjh Moses dadjkeng bokenh kunwardde manbalabala, yiman yimi nawu kerrngehkenh karrmihkarrmi. Wanjh bu kumhkabelni nungka dolkkang, wanjh warddebidbom, yiman bu Yawey bimarneyimeng, dja mak kang kunbid nuye, dja yibidbom manbu kunwardde bokenh.

5 Kaluk kumekbe nungka Yawey kumkoluy kunngol dorrengh wanjh benehdjarrkdi Moses, wanjh Yawey ngeymulewarrinj nuye kungey.

6 Wanjh Yawey bimirrkuyrrhkeng Moses dja yimeng, “Ngaye wanjh Yawey. Ngaye Yawey nawu God, dja ngaye ngamimkongiwern duninj, dja ngabenmarnekurduyime kunmak bedberre bininj rowk bu djal burudjang. Minj ngayiddung werrkwerrk dja ngaleng ngaye munguyh ngabenmarnedjare bininj rowk, dja minj mak ngakurren bu kowe.

7 Ngabendjalmarnedjare munguyh birridjalwern rowk nawu bininj. Ngabenmarnebularrbun kunwarre bedberre nawu ngandiwokburriwe dja kabirriyime kunwarre. Dja bonj, ngaleng wanjh ngabenbun bininj nawu kabirridjaldjare kunwarre kabirriyime. Kaluk ngabenbun mawahmawah bedberre nawu birrimekbe birriwarre bininj bu kunmekbe kunwarrekenh. Kaluk bedmanwali ngabenbun nawu kunwarre kabirridjalyime dja mak wurdwurd bedberre dja mak mawahmawah dja doydoyh kabindihyime.” Kuhni rowk yimeng nawu Yawey.

8 Wanjh kundjalmekbe rerrih Moses boddanj kore kurorre dja wanjh biburluburlumi nawu Yawey.

9 Moses yimeng, “Ngudda nawu yiwohrnan rowk, bu ngudda yinjilng-mak ngardduk, wanjh karridjarrkray ngaye dja mak nawu nahni bininj rowk. Ngaye ngabenburrih nahnai bininj minj kabirridjare ngundi-wokmarrkmang, dja djawan ngudda kanmarnebengmidjda ngadberre nawu nawarrehwarre ngarikarrme dja ngadberre kunwarre. Dja kanka ngadberre ba ngariyimerran ngudda ke bininj duninj.”

Yawey Benmarnewokkurrmerrinj Bu Bokenhkah

Exodus 34:10-28

(Exodus 23:14-19; Deuteronomy 7:1-5; 16:1-17)

10 Wanjh Yawey yimeng, “Ngaye ngawokkurrmerren ngudberre. Ngaye wanjh ngakurduyime kunkimuk duninj kundulkarre ngardduk dorrengh kore kumirrk ngudberre. Ngakurduyime manbu minj nangale nabuyika bininj nayi kondah kore kurorre dja kore kabolkbubuyika rowk. Dja mak nawu bininj ngurrihdjarrkdi, wanjh nakka kabirrinan ngardduk kundulkarre. Ngaye, nawu Yawey, wanjh ngadjalkurduyime kunmakmak ngudberre dja wanjh ngurrikangebarrhme.

11 Dja bu kandiwokmarrkmang kore wokrayekwon bolkkime, wanjh nakka ngabenkelekadjung ngudberre nawu bininj rowk, ngayime nawu kabirringeyyo Amor, dja nawu Canaan benkebmawahmeng, dja nawu Heth benkebmawahmeng, dja mak nawu kabirribebbehngeyyo Periz, dja

mak Hiv, dja nawu birrikang kunred Jebus, dja ngaleng ngurridjalkurduyime bu gaye marneyime gudberre.”

12 “Kaluk bu ngurringime kunbolkbubuyika bedberre birrimekbe bininj, wanjh yuwn bu ngurriwokmarnburren bedda dorreng, wardi ngundarrkidmang kore kungarlkwarre.

13 Dja wanjh ngurribakbakemen bedberre altars, dja manbu kunwardde kore kabirrimarneboddan nawarre, dja ngurridjobkemen kundulkdjamun ngalenggarre god ngalbu ngaldaluk kangeyyo Asherah.

14 Dja mak yuwn ngurrimarneboddan nabuyika god, dja gaye nawu Yawey wanjh ngadjalkudji God gudberre, dja gaye yiman kayime ngakirnwern gudberre.”

15 “Dja mak ngurriahnarrimen bu minj ngurriwokmarnburren nawu bininj kumekbe kunbolk kabirrihni. Wardi mak bu kabirrimarneboddan nawu gods bedberre dja kabirribun mayh bu kabindiwon bedberre nawu god, wanjh ngundidjawan bu wardi ngurriworren dja ngurribalmarneboddan nawu bedberre gods dja mak ngurridjarrkngun mulil nawu kore mayh kabirrikinje gods bedberre.

16 Dja ngurriahnarrimen warridj bu ngurrbenmang yawkyawk nawu kumekbe kabirrihni ba bu ngurrbenwon nawu nabebeywurd gudberre bu kabirrimarrenkenh, wardi birrimekbe yawkyawk wanjh kabirridjalmarneboddan bedberre gods, dja wardi kabindimarnbun bebeywurd gudberre bu kabirriraworren dja kabirridjarrkboddan namekbe nawu gods.

17 Dja mak yuwn ngurrimarnbun idols bu kore ngurrikinje nawu wirilmurrng bu ngurrikukmarnbun idol nawu god.”

18 “Dja ngaleng ngurrimulilma mulil manbu buriddi minj kakarme mannguklurilmikenh. Kaluk bu kunkodjke seven wanjh kunmekbe ngurringun manme manbu minj kakarme manbu kahnguklurlike kandidjawa kore gaye wokrayekwong ngudberre. Kuhni bu ngurrikurduyimen kore gaye dungnameng ngudberre, yiman dird nawu kangeyyo Abib, dja namekbe dird bolkyimeng bu ngudda ngurrimbebmeng kore Egyptbeh.”

19 “Nawu ngalbabadjan kabindihkarmekharmen kaluk nadjahnadjan nakka wanjh gaye ngardduk rowk bininj, yiman mak mayh nawu nadjaman kaluk nawu kahdangarren kore yihmirndekarme ke.

20 Bu ngurridjare ngurribayahme nadjaman nawu donkey wanjh kandikarremulewan nakudji lamb, dja bu minj yidjare yirrunndiwe namekbe nawu donkey yaw wanjh yidjudbakkemen.

Dja mak ngurribendurndiwemen bu ngurrbenkukbayahmen nawu nadjahnadjan nabebeywurd bininj gudberre.”

“Minj nangale mak kamre karrangen kumirrk ngardduk bu djal bidlarrk.”

21 “Kaluk ngudda ngurridjaldurrkmirri bu six kunkodjke, dja manbu kamarnburren kunkodjke seven makka wanjh ngurringehmen. Kaluk bu yiman ngurrihdudjeng manme ngarre kabolkyime, dja mak bu kabolkyime kore ngurridjolengmang manme, bonj, kunmekbe ngurridjalngehmen bu kunkodjke seven.”

22 “Ngurrimulilma ngarre mulil manbu Djandikenh, bu ngurrimoyhmang manbu manyungkih manme manbu wheat bu ngurridjolengmang, dja mak ngurrimulilma ngarre kudjurlekenh kayimerran, dja ngurrimang manbu mandjoleng kore kabarndi.”

23 “Kaluk bu mandjewkbubuyika, wanjh binihbininj rowk ngudberre birrimbebmen danjikkah bu kandimarneboddan kore kumirrk ngardduk, ngaye Yawey nawu Ngabenmarnewohrnan Rowk nawu God ngudberre nawu Israel ngunkebmawahmeng.

24 Bu ngurribolkbawon ngudberre kunred, dja ngurrimre rowk kore maninjmanu mulil danjbik, wanjh yuwn ngurriburrbun bu birribuyika bininj kabirribolkdjirdmang ngudberre. Burrkyak, dja ngabenggurdk. Ngaye ngabenkukburriwe bininj rowk nawu bolkkime kabirrihni kubolkbubuyika ba bu ngurringimen ngurribolkkarrme, dja mak ngabolkwarahwon kunred ngudberre.”

25 “Bu kandiwon mayh, dja ngurrikinje kore altar, yuwn bu kumekbe kandiwon buriddi manbu mannguklurmlikenh kakarrme dorrengh. Dja mak bu ngurrikarrme mulil manbu ngaye darrkidbawongkenh, wanjh yuwn bu ngurrikarekurrme yikahwi manme bu kunkodjkebuyikakenh.”

26 “Ngaye nawu Yawey ngudberre God dja ngudda wanjh ngurrimka kore ngaye yikahwi manme manyungkih bu ngurridedjingmang ngurrimoyhmang.”

“Dja mak yuwn ngurrikinje nawu sheep yaw, dja yika goat yaw, wanjh yuwn bu ngurrikinje kore ngalbadjan ngalengngarre kundjikkakenh.”

27 Wanjh Yawey bimarneyimeng Moses, “Yibihbimbu nahn kunwok rowk, dja ngaye ngawokkurrmerren kore namekbe kunwok rowk bedberre nawu Israel benkebmawahmeng, dja mak ngudda ke warridj.”

28 Kaluk Moses yerrkang bu kunkodjke forty dja kunkak forty, kore kuwarddekimuk bu Yawey benehdjarrkdi. Kaluk minj kukku bonguyi dja mak manme minj nguyi bu kumekbe dingihdi. Wanjh kumekbe Moses bihbimbom kore kunwardde manbalabala kunwok rowk nawu Yawey wokkurrmerrinj nuye, manbu Kunbidbokenh Mankarrekikhkimuk.

Bu Moses Nungka Kebbamibami

Exodus 34:29-35

29 Moses wanjh nungka kumyikoluy kore Kunwarddekimuk Sinai, bu karrmi kubid nuye kunwardde bokenh manbalabala manbu bimbuyindi kunwok kunwoybuk nawu Yawey wokkurrmerrinj. Dja Moses wanjh kebbami duninj bu kunmekbekenh nungka benehwokdi Yawey, dja minj mak burrbuyi bu nungan kebbami.

30 Bu Aaron dja birribuyika bininj nawu Israel benkebmawahmeng birri-nang Moses, wanjh minj birridarnhrawinj kore nungka, dja birrikenbang nuye bu kebbamibami duninj dja wanjh birridjalkeleminj.

31 Dja Moses benkayhmeng bedberre Aaron dja mak nawu bindiwohrnawohrnani kore binihbininj rowk, wanjh birridurndi bu darnkih nuye, dja nungka benmarnewokdanginj bedberre.

32 Kalukburk bininj rowk nawu Israel benkebmawahmeng birriyikang darnkih. Dja wanjh Moses benwoni mankarre rowk manbu kore Yawey biwong bu benewokdi kore kuwarddekimuk Mount Sinai.

33 Kaluk bu yakwong kore benmarneyolyolmi, wanjh nawu Moses nungan kebbarrkburrinj manburrbawi.

34 Dja bu nungka ngimi darnh dabburlin bu kabenewokdi nawu Yawey, wanjh kebwerhmerrinj nawu kore kebdjongbuyindi kaluk bu benewokdi nawu Yawey kaluk bu kumyawoyhbebmi. Bu bebmi wanjh benmarneyolyolmi nawu Israel benkebmawahmeng kore baleh Yawey biwong dja bimarnerayekwong bu Moses kabenwon.

³⁵ Kaluk bedda birridjalkebnani bu djalkebbami. Bu yakwong kore benmarneyimeng, wanjh nungka yawoyhkebbarrkurrinj kaluk yerrekah kakebarrhmerren bu yawoyhngimi bu Yawey kabenewokdi.

35

Bu Moses Benbukkabukkang Mankarrekimuk Manbu Kunkodjke Sabbathkenh

Exodus 35:1-3

¹ Moses benmornnameng rowk bininj nawu Israel benkebmawahmeng wanjh benmarneyimeng, "Kuhni kunwok wanjh nawu Yawey ngunwokrayekwong ngudberre, dja ngaye marneyime kore nungka nganwokwong ngudberre. Nungka yimeng,

² 'Ngudda ngurrikarme six kunbarnangarra ba bu ngurridurkmirri. Dja manbu kahmarnburren kunbarnangarra seven, makka wanjh kunbarnangarradamun ngudberre. Kaluk makka ngaye ngardduk bu kunmak kandimarneyime dja kunu ngurringehmen. Dja nangale nawu karrurkmirri bu kunbarnangarradamun, nakka wanjh ngurribu.

³ Dja mak yuwn ngurriwurlhke kunak bu karung kore kured ngudberre bu kunmekbe kunkodjke Sabbath.' "

Bu Birriwoni Namakmak Manbu Dabburlinkenh Kore Yawey Benwokrayekwong

Exodus 35:4-9

(Exodus 25:1-9)

⁴ Wanjh Moses benmarneyimeng nawu Israel benkebmawahmeng rowk kore birrimirnderri, yimeng, "Kuhni wanjh nawu Yawey kanwokrayekwong.

⁵ Njalehnjale nawu ngurrihkarme, wanjh yika ngurrikan ngurriwon Yawey. Bu ngurridjare wanjh ngurrimkan ngurriwon nuye Yawey manbu wirilmurrng, yiman gold, silver, dja bronze.

⁶ Dja mak bu ngurridjare wanjh ngurriwo Yawey manburrba linen namakmak, dja mak kunyarl manbu kukblue, kukpurple dja mak kukkurlba, dja mak manburrba birrimarnbom goat kunngabek dorrengh.

⁷ Dja nuk ngurrimka kunkulah nawu narangem sheep kaluk birrimarnbom kakukkurlbamen. Dja mak ngurrimka kunkulah ngarre marndingunjunj, dja mak kundulk manbu acacia.

⁸ Dja mak ngurrimka manbu olive kunkalkkid ngarre lamps, yika manbu spices bu kabirrirawon kunkalkkid ngarre olives ba bu kabirrikodjbarang nawu priests, dja mak kunkalkkid manbu ngurrimarnbun incense manbu mankalkkidmanjmak.

⁹ Dja mak ngurrimka manwarddemak yiman onyx, dja mak nabubuyika nawu jewels bu kabirrikurme kore ephod nawu nakimuk priest nuye, dja mak kore nawu kabenhberrekalkbalhme nuye."

Njalehnjalekenh Ngarre Manrurrdjamun Dabburlin

Exodus 35:9-19

(Exodus 39:32-43)

¹⁰ Wanjh Moses yawoyhwokdi benmarneyimeng nawu Israel benkebmawahmeng, "Ngudda nawu ngurriwernhburrbun nawu ngurrimarnbun njalehnjale wanjh ngurrimray ngurrimarnbu njalehnjale rowk kore Yawey kanwokrayekwong kadberre.

11 Ngayime nawu Manrurrkdjamun Dabburlin kuberrkkah, dja mak nawu kaddum kahbalhme nawu dabburlin, ngayime nawu nginj, dja nawu kundulk frames, dja mak mandulkdjad, dja nawu mandulk bu kabirridjabname, dja mandadkenh ngarre.

12 Dja mak manbu Ark, dja mandulkuyeng ngarre manbu kabirriwayhkekenh, dja mak manbu kaddumkah ngarre dorrengh, dja nawu manburrba nawu kawelhwelme kore kumirrk ngarre.

13 Dja mak ngurrimarnbu manbu manbalabala table, dja kundulk bokenh mankuyeng bu kabirrikanakankenh, dja mak njalehnjale nawu ngarre kore manbalabala kabarnhbarndi, dja mak kandidjawa manbu kanhbengdayhke kadberre bu God kumwam karridjarrkdi;

14 dja mak lampstand bu kabolkwolkankenh, dja nawu njalehnjale ngarre dja mak kunkalkkid ngarre;

15 dja mak manbu altar kore kabirrikinje mankalkkidmanjmak, dja mak mandulkuyeng ngarre nawu kabirrikanakankenh, mak kunkalkkid manbu karrbenkodjjuhkekenh, dja mak manbu mankalkkidmanjmak ngarre. Dja mak manburrba manbu kawelhwelhdi kore kurrangmaye ngarre Manrurrkdjamun Dabburlin.

16 Dja mak ngurrimarnbu nawu altar ngarre kore mayh kabirrimarnekinje nuye Yawey, mak nawu ngarre wirlmurrng bronze screen kaluk mandulkuyeng, dja mak nawu tools ngarre, dja mak wirlmurrng bronze banikkin nakimukkenh, dja ngarre mandadkenh.

17 Dja mak ngurrimarnbu manburrba manbu kawelhwelhdi ngarre kuberrkkah manbu Manrurrkdjamun Dabburlin, dja nawu kundulk nawern kadjabdi dja mak manbu mandadkenh ngarre, dja mak manburrba ngarre kore kabirribalhgimen kumekbe ngarre kuberrkkah.

18 Dja mak ngurrimarnbu tentpegs ngarre kanjdjikenh ngurridjabname manbu Manrurrkdjamun Dabburlin, dja mak kore kurberrkkah ngarre, dja mak kunyarl ngarre.

19 Ngurrimarnbu manburrba ba bu ngurrimadjmarnbu kunmadj kukdjamun ba bu Aaron dja nawu nabebeywurd nuye kabirridjongburren bu kabirridurrkmirri yiman priests kore Yawey nuye kubolkdjamun."

Wanjh Birriwokmey Rowk Kore Moses Benwokrayekwong

Exodus 35:20-29

20 Wanjh bu Moses yakwong yolyohyolyolmi bedberre nawu Israel benkebmawahmeng, bedda wanjh benbawong dja birriwam.

21 Wanjh nawu birridjareni birrimkang birrimarnekurrmeng nuye Yawey namakmak ngarre Manrurrkdjamun Dabburlin kore nawu Yawey kamre bu kabendjahwon bedberre. Dja mak bedda birrimkang njalehnjale ngarre yiman kunmadj nawu priests bedberre namekbe dorrengh.

22 Birridjalwern nawu bininj dja daluk birrimkang njalehnjale namakmak nawu gold jewelry pins, earrings, rings dja bracelets. Kaluk bedda birridjareni dja birrikurrmeng rowk bu birrimarnekuwayhkeng kunbid bedberre kore kumirrk nuye Yawey.

23 Dja mak bininj nawu birrikarmi kunyarl manbu kukblue, dja kukpurple dja kukkurlba, dja linen manburrbamak, dja nawu birrikarmi nanikud kunggabek dja yika narangem sheep kaluk kunkulah dja medjyimi mankurlba, kunkulah ngarre marndingunjung, wanjh bedda birrimkang rowk bu birrimarnekurrmeng kore Yawey.

24 Birriwern birrimkang rowk nuye Yawey wirlmurrng nawu silver dja bronze, dja mak bininj rowk nawu birrikarmi acacia kundulk birrimkang

bindiwong nawu birridurrkmirri kore Manrurrkdjamun Dabburlin birri-nami.

²⁵ Dja mak daluk nawu kabirriwernhburrbun wanjh birrimarnbuni kunbidwi bedberre yiman kunyarl medjbuyika yiman kukblue, kukpurple dja mak kukurlba, dja mak manburrbamak linen, wanjh birrimkang bindiwong.

²⁶ Dja mak daluk rowk nawu birrikurdumakni bu birrimarnbuni kunyarl kaluk nanikud kunngabek nuye, wanjh birrimarnbuni kore birridjareni.

²⁷ Dja nawu kabirriwohrnawohrn nan bininj wanjh nakka birrimkang manwarddemak onyx dja nabubuyika jewels bu kabirrikurrme ngarre ephod dja nawu kabihberrekalkbalhme nawu priest.

²⁸ Dja mak birrimkang manbu spices dja olive kunkalkkid ngarre lamps, dja mak kunkalkkid manbu kabindikodjdjuhkekenh, dja mak ngarre kunkalkkid manbu mankalkkidmanjmak ngarre.

²⁹ Wanjh birridjalwern rowk bininj nawu Israel benkebmawahmeng birrimkang nawu namakmak birrikarrmi bu birriwong nawu Yawey. Bedda birridjareminj bu birrikurduyimeng, bininj dja mak daluk ba bu birridurrkmirri dja birriyakwong rowk kore Yawey benmarnewokwong bedberre bu biyingkihmarneyimeng nawu Moses.

Moses Benbenemulewam Nawu Bezalel Dja Oholiab

Exodus 35:30-35

(Exodus 31:1-11)

³⁰ Wanjh Moses benmarneyimeng nawu Israel benkebmawahmeng, "Ngurrina! Nungka Yawey bidjarrngbom nakudji bininj nawu kumdolkang kore namud nuye Judah. Nahni bininj nawu Bezalel nawu beywurd nuye Uri, dja nawu Hur bikebmawahmeng. Bedda wanjh nawu Judah benkebmawahmeng.

³¹ Kaluk Yawey bikukbarlkeng Namalngmakkaykenh nuye God dja biwong kunmayali ba bu kawernhburrbun bu kamarnmarnbun njalehnjale manwern manubuyika.

³²⁻³³ Nungka wanjh nakurdumak bu kawernhburrbun bu kamarnbun yehyeng nawu kore wirmurrng gold, silver dja bronze, dja mak kadjob-djobke kunwardde, dja mak jewels wanjh kabalkurrme kore wirmurrng, dja kundulk kamarnbun dja mak kunbubuyika warridj nungka kamarnbun.

³⁴ Yawey wanjh benbenedjarrngbom Bezalel dja mak nabuyika bininj nawu kangeyyo Oholiab ba bu benemekbe bininj kabindibalbukkan nawu birribuyika bininj warridj. Oholiab nakka wanjh kamdolkang kore namud nuye Dan, dja beywurd nuye Ahisamach.

³⁵ Yawey wanjh benbukkabukkang birrimmekbe birriwern bininj ba bu kabirrimarnbun nawu njalehnjale dja mak kabirrikarrebimbun kore kabirrihdadjke wirmurrng dja kunwardde. Wanjh bedda mak kabirribibbun kore linen manburrbamak, kaluk karaworren kunyarl manbu kukblue, kukpurple dja mak kukurlba. Bedda wanjh birrikurdumak rowk."

36

Bininj Birrikurrmi Kundjalwern Ba Birrinami Manrurrkdjamun Dabburlin

Exodus 36:1-7

¹ Wanjh Moses benyolyolmeng dja benmarneyimeng, “Nahni bininj nawu Bezalel, dja mak nawu Oholiab dja mak birribuyika birriwern bininj nawu Yawey benmarnbom birrimayalimakminj dja birrikurdumakminj ba bu kabirrimarnbun manbu Yawey nuye Manrurrkdjamun. Bedda wanjh kabirridurrrkmirri rowk kore Yawey wokrayekwong.”

² Kaluk Moses benkayhmeng Bezalel, dja mak nawu Oholiab dja mak birriwern bininj nawu Yawey benmarnbom birrikodjcurludjad dja birrikurdumak. Birrimekbe bininj birridjareni birridurrrkmirri kumekbe.

³ Wanjh Moses benwong kunwardde dja njalehnjale rowk kore nawu Israel benkebmawahmeng birrikurrmekurrmeng bu kabirrirurrrkmarnbunkenh ngarre Manrurrkdjamun Dabburlin. Dja mak nawu Israel benkebmawahmeng rowk birriyibebmi kore Moses, dja birrihdjalkurmi bu kukabelbubuyika rowk. Wanjh bedda birridjaldjareminj bu birrikurmi.

⁴ Kaluk nawu birrikurdumakni bininj birrihdurrrkmirri kore birrihrurrrkmarnbuni manbu manrurrkdjamun nuye Yawey, wanjh birribawong kore birrihdurrrkmirri.

⁵ Dja birriyikang Moses birrimarneyimeng, “Bonj. Nawu kunwardde dorrengh kabirrimhdjalkan munguyh kore Yawey nganmarneyimeng bu ngarikurduyime wanjh nadjalwern duninj! Wanjh kamak bu kabirridjalbawon.”

⁶ Wanjh Moses benwokrayekwong bedberre nawu Israel benkebmawahmeng kore birridi kunred, dja benmarneyimeng bu nawu kabirrihkurme nawu kunwardde dorrengh kore Yawey nuye manrurrkdjamun, wanjh bedda kabirringurdme rowk. Dja wanjh bedda birringurdmeng birrikurmi.

⁷ Dja nawu kunwardde dorrengh nakka wanjh barlmeng kore bedda birrihkurmi ba kamak kabirriyakwon rowk kore birridurrrkmirrikenh kumekbe.

Birriwern Birrimarnmarnbuni Yehyeng Rowk Manbu Dabburlin Manrurrkdjamunkenh

Exodus 36:8-38

(Exodus 26:1-37)

⁸ Yikahwi bininj nawu birridurrrkmirri wanjh birrikodjcurludjad, dja birrimekbe wanjh birrimarnbom ten manburrrba nawu curtains manbu welhdiwelhdi yiman warnamyoy ngarre Manrurrkdjamun Dabburlin. Bedda birribibbuni manburrrba manmak nawu linen, kunyarl dorrengh nawu kukblue, kukkuriba dja mak nawu kukpurple. Dja mak nakudji bininj nawu wernhburrbuni bibbuni yiman bim nawu Cherubim kore manburrrba.

⁹ Kaluk namekbe curtains nawu birrimarnbom nakka wanjh rohrokni rowk, twelve metres bu kakuyeng dja bokenh metres bu karrirdwarlah.

¹⁰ Nawu five curtains nakka wanjh birribelebelbmeng yiman birri-nameng kukudji, mak nawu nabuyika five wanjh kunmekbe rerrih birriyimowong yiman nawu nayungki birrimarnbom.

¹¹ Wanjh birrimey manburrrba nawu kukblueni, dja birribibbom loops, dja birribelbmeng kore kurrihdurrid ngarre nayerre curtain kore five nawu belbmerrinj, dja wanjh nabuyika five, nakka wanjh kunmekbe rerrih birriyimowong.

¹² Kaluk namekbe nawu loops marnbuyindanj fifty kore nakudji curtain mak kunmekbe rerrih bu karohrok nawu nayerre curtain. Dja nawu loops wanjh rohrokni dja mirrkmarrinj kore namekbe curtains bokenh.

¹³ Dja mak birrimarnbom fifty nginj, nawu wirlmurrng gold ba kabelbmerren nawu curtains wanjh kabalraworren bu kamarnbuyindan mandjalkudjikenh kawarnamyo bu birribarnnameng kore ngarre dabburlin.

¹⁴ Dja mak birrimarnbom nabadbuyika curtain bu birribarnnameng kaddum kore Manrurrkdjamun Dabburlin ba bu kakodjbarrkun. Birrimey nawu nanikud kunngabek, dja birrimarnbom eleven manburra curtains.

¹⁵ Kaluk namekbe eleven manburra nakka wanjh karohrok rowk, thirteen metres bu kakuyeng dja bokenh metres bu karrirdwarlah.

¹⁶ Wanjh nawu birribibbom five curtains bu birrirawong birrimarnbom nakudji nakimukkenh, dja mak nabadbuyika six manburra wanjh birrirawong yimerranj nabuyika nakukkudji nakimuk.

¹⁷ Wanjh birribibbom fifty loops kore kurrihdirrid ngarre nayerre curtain kore nawu five curtains raworring nadjalkukkudji, dja kunmekbe rerrih birriyimowong kore nawu six curtains raworring.

¹⁸ Kaluk wanjh birribalmarnbom fifty nginj nawu bronze wirlmurrng, ba karaworren kore bokenh ngarre curtains ba kamarnbuyindan mandjalkudji.

¹⁹ Mak birribadyawoyhmarnbom bokenh dabburlin bu birrikurmeng kuberrkkah rowk kore Manrurrkdjamun Dabburlin. Kaluk nakudji dabburlin birrimarnbom kunkulah nuye sheep narangem nawu birrimedjarnbom manmedjkurba, dja mak bu birrimarnbom nabuyika, wanjh birribibbom kunkulah ngarre marndingunjunj ba bu birribarbkomenh kuberrkkah kore Manrurrkdjamun Dabburlin.

²⁰ Wanjh birridjabnameng kundulk frames kaluk acacia kundulk ba karayekwon manbu Manrurrkdjamun Dabburlin.

²¹ Kaluk nawu nabebbehkudji kundulk frame nakka wanjh four metres bu kakuyeng dja bu kawarlahwarla nakka wanjh 70 centimetres.

²² Nawu frames rowk karrmi mandulkdjad bokenh manbu djabnamikenh, mankudji kore kurridkudji dja mak kurridbuyika kabebbedhi. Kaluk nawern rowk nawu frame manbu karaworren dja kammarnbuyindan bu kundjalkudjiwi.

²³ Kaluk birrimarnbom twenty frames ngarre Manrurrkdjamun Dabburlin kaluk kore walemkah,

²⁴ dja mak birrimarnbom forty mandadkenh manbu wirlmurrng silver ba birribebbedjabnameng mandulkdjad ngarre frames rowk.

²⁵ Dja mak birrimarnbom twenty frames ngarre Manrurrkdjamun Dabburlin kore kakkikah

²⁶ dja mak forty mandadkenh manbu wirlmurrng silver ba bu frames rowk bebbehkarrmi bokenh, dja mandulkdjad birridjabnameng, bokehbokeh kore frames rowk.

²⁷ Bedda mak birrimarnbom six frames kaluk karrikadkah ngarre Manrurrkdjamun Dabburlin kurredjkah,

²⁸ dja mak bokenh frames ngarre kurruhbe kore Manrurrkdjamun Dabburlin.

²⁹ Kaluk namekbe bokenh frames birribokenhmeng bu birrirawong kore kanjdji dja mak kore kaddum. Kaluk ring nawu wirlmurrng belbmeng namekbe bokehbokeh frames. Kunmekbe birriyimowong kore kurrubbedubbe bokenh.

³⁰ Wanjh dingihdi eight frames dja mak 16 mandadkenh manbu wirlmurrng silver. Kaluk bokenh mandadkenh kabebbedhi kore kanjdji ngarre nabebbehbuyika nawu frames.

³¹⁻³² Wanjh birrimarnbom fifteen mandulkdjad manbu acacia kundulk, dja birrikurrmeng kubulkayh kore frames rowk bu belbmikenh kurridkudji kore kurridbuyika ngarre frames bebbehbeh. Wanjh birrimarnbom kunbidkudji mandulkdjad kore kurridkudji ngarre Manrurrkdjamun Daburlin, dja mak kunbidkudji mandulkdjad kore kurridbuyika ngarre, dja mak kunbidkudji ngarre karrikadkah ngarre Manrurrkdjamun Daburlin, kore kurrejdkah.

³³ Birrikurrmeng nahni mandulkdjad rowk nakudji nakudji bebbehdi kore frames manbubuyika, dja birrikurrmeng rowk kore kubulkayh, wanjh yiman kayime kukyimerranj mandulkkuyeng duninjh kare kurredj kore karrokme kurrid bokenh ngarre dabburlin.

³⁴ Wanjh birribaruy manbu wirlmurrng gold duninjh mahni mandulkdjad rowk, dja mak nawu frames rowk. Dja mak birrinameng manbu wirlmurrng gold dorreng nawu rings kore kurrihdirrid nawu frames ba bu kakarreme mandulkdjad, bebbehbeh nakudji mandulkdjad kore mankudji frame.

³⁵ Wanjh birrimarnbom manburrba nawu curtain, bu birribibbuni kunyarl nawu medjyimi kukblue, dja kukpurple dja mak kukkurlba. Birribibbuni nawu manburrba manbu manmak linen. Kaluk bininj nawu wernhburrbuni wanjh bibbuni bim nawu Cherubim kore nawu curtains.

³⁶ Wanjh birrimarnbom kunkarrngbakmeng mandulkdjad kaluk acacia kundulk ngarre manburrba nawu curtain, dja mak birribaruy mahni kundulk rowk manbu wirlmurrng gold duninjh. Dja mak birrimarnbom manbu wirlmurrng gold nawu nginj ngarre mandulkdjad bu djabdidjabdi, dja mak nawu kunkarrngbakmeng wirlmurrng silver mandadkenh ngarre ba bu birridjabnameng nawu kunkarrngbakmeng mandulkdjad.

³⁷ Wanjh kore nawu kurrangmaye ngarre Manrurrkdjamun Daburlin, nakka wanjh birrimarnbom manburrba manmak manbu linen, dja birrimarnbom kunyarl nawu medjyimi kukblue, dja mak kukpurple dja mak kukkurlba. Dja nahni curtain karrmi bim warridj dja wanjh kukmakni.

³⁸ Dja mak birrimarnbom kunbidkudji mandulkdjad bebbehkarrmi nginj nawu nginj, dja mak manbu mandadkenh ba bu birridjabnameng mandulkdjad, dja kore kaddumkah birribaruy mahni mandulkdjad rowk manbu wirlmurrng gold duninjh, dja warridj wirlmurrng gold birribaruy kore mandulkdjad rowk. Kaluk birrimarnbom manbu mandadkenh bu wirlmurrng bronze.

37

Bu Birrimarnbom Ark Manbu Karrmi Kunwarddebala Bokenh

Exodus 37:1-9

(Exodus 25:10-22)

¹ Nawu Bezalel marnbom manmekbe manbu Ark kaluk acacia kundulk. Marnbom bu 110 centimetres kakuyeng dja 70 centimetres bu kahdirwarlah, dja mak 70 centimetres bu kaddum rohrokmeng.

² Wanjh nungka baruy wirlmurrng gold duninjh kore kururrk dja kuberrk, dja mak kuyengmeng wirlmurrng gold duninjh dja kurrmeng bu wakbuyinguneng nawu Ark.

³ Mak nungka marnbom kunkarrngbakmeng wirlmurrng gold rings ngarre wanjh belbmeng kore kunkarrngbakmeng kurrenge ngarre Ark, bokehbokenh kore kurrid bokenh ngarre.

⁴⁻⁵ Wanjh marnbom mandulkdjad mankuyeng bokenh, kaluk acacia kundulk, wanjh kaluk balbaruy wirlmurrng gold duninjh. Wanjh dulkngimewong mahni kundulk bokenh kore rings nawu kahdi kurrid ngarre Ark ba bu bininj kabirringorrrkan.

⁶ Dja mak marnbom kaddumkah ngarre Ark, kaluk wirlmurrng gold duninjh dja mak namekbe manbu kaddumkenh nakka wanjh 110 centimetres bu kakukkuyeng dja 70 centimetres bu kawarlahwarla.

⁷ Wanjh nawu Bezalel dongohdoy namekbe wirlmurrng gold duninjh dja marnbom nawu kukyimi Cherubim bokenh, wanjh yiman belbmeng kore lid.

⁸ Kaluk namekbe mayh bokenh benebelbmikenhdi kore nawu kaddumkenh benemirrkmarreni kore benebebbehdi kore kurrid bokenh ngarre Ark.

⁹ Benewelwarlahminj kaddum, yiman benebarrkbuni namekbe kaddumkenh, dja mak benemirrkmarreni kumekbe, dja wanjh benebolknang manbu kaddumkah ngarre ark.

Bu Birrimarnbom Manbalabala Ngarre Manrurrkdjamun Dabburlinkenh

Exodus 37:10-16

(Exodus 25:23-30)

¹⁰ Kaluk nawu Bezalel dorrengh birrimarnbom manbalabala table manbu acacia kundulk; nakka birrimarnbom wanjh 90 centimetres kakuyeng, 50 centimetres bu kawarlahwarla, dja 70 centimetres bu kaddum rohrokmeng.

¹¹ Wanjh bedda birribarungi mahni manbalabala bu gold wirlmurrng duninjh, dja mak birrimarnbom manbu gold wirlmurrng bu nakuyengkenh dja manbik, wanjh birrikurrmeng bu yiwakbom kore maninjanu manbalabala.

¹² Wanjh birrimarnbom mandulkbik kore kaddumkah kurrid ngarre table, kaluk rohrokmeng eight centimetres bu kore kaddum kaluk kahdjabdjabdi kore kurridirrid ngarre table, wanjh birribalkurrmeng nakuyengkenh gold bu yiwakbom ngarre kaddumkah.

¹³ Dja mak birrimarnbom kunkarrngbakmeng wirlmurrng gold rings ngarre nawu manbalabala, dja mak birribelbmeng kore kunkarrngbakmeng kore kurruhbe kunkarrngbakmeng kore kurrenge ngarre kahdingi-hdi kanjdji.

¹⁴ Kaluk namekbe nawu rings birrikurrmeng kurruhbe darnkih kore kaddumkah ngarre manbalabala, dja mandulkdjad karrmi bu bininj kabirridulkngimewon dja kabirrikanakan mahni manbalabala.

¹⁵ Kaluk mahni mandulkdjad makka wanjh birrimarnbom acacia kundulk dja birribaruy bu gold wirlmurrng duninjh.

¹⁶ Dja mak birrimarnbuni njalehnjale rowk ngarre manbu manbalabala, bu wirlmurrng gold duninjh birrimarnbom, yiman plates, banikkin, cups, dja mak jars nawu ngarrekih bu kabirrihborrakendongkenh wine manbu bininj rowk birrimarnekurmi nuye nawu Yawey.

Bu Birrimarnbom Nawu Lampstand

Exodus 37:17-24

(Exodus 25:31-40)

¹⁷ Wanjh birrimarnbom lampstand kaluk wirlmurrng gold duninjh, dja dongidongi bu kukyimerranj manbadjan ngarre lampstand, dja mak nawu mandadkenh kore birridjabnamikenh. Dja nawu cups kore lamps birrikurrmikenh, wanjh birrimarnbuni gold duninjh bu kukyimi mannguy

dja njalehnjale dorreng ngarre mannguy, wanjh belbmeng rawong manbadjan dja mandadkenh.

¹⁸ Birrimarnbom six manbu yiman manyeyende bu belbmikenhdi kore kurrid ngarre lampstand, kaluk danjbik karri kore kurridkudji dja mak danjbik kore kurridbuyika.

¹⁹ Dja mak manbu manyendekudjikudji bebbehkarrmi danjbik cups manbu kuyimi almond mannguy, dja nawu cups nawern bebbehkarrmi njalehnjale ngarre mannguy. Kaluk namekbe manyende kabebbehdi kore lampstand nakka wanjh karohrok rowk.

²⁰ Kaluk mak kunkarrngbakmeng cups kuyimi yiman almond mannguy belbmi kore manbadjan lampstand dja mak bebbehkarrmi nawu njalehnjale ngarre mannguy.

²¹ Kaluk manbu six manyenhyende makka bebbehberlwarlahminj kore lampstand makka wanjh djalrohrokni rowk. Dja kanjdji kore kaddumkah manyende bokenh wanjh mannguykenh belbmi, manbuyika belbmi kanjdji kore manyende bokenh manbu kubulkayh, dja manbadbuyika belbmi kanjdji kore manyende bokenh manbu manyerre.

²² Manbu mannguy, dja manyenhyende dja manbadjan ngarre lampstand makka birrimarnbom bu birridongohdoy nadjalkudji wirlmurrng gold duninh dja djalburrkudji.

²³ Dja mak birrimarnbom seven gold lamps ngarre namekbe lampstand, dja mak manbalabayahwurd dja manbu kabirribirlumarnbunkenh, wanjh wirlmurrng gold duninh rowk.

²⁴ Bu birrimarnbom lampstand dja mak njalehnjale rowk ngarre, wanjh birrimay mankimukkenh burrk mankudji manbu gold wirlmurrng manbu birrirohromeng 34 kilograms.

Bu Birrimarnbom Altar Ngallengarre Kore Kabirrihkinjekenh Manbu Mankalkkidmanjmak

Exodus 37:25-29 (Exodus 30:1-5)

²⁵ Wanjh birrimarnbom altar manbu mankalkkidmanjmak kabirrikinje. Kaluk birrimarnbom kore acacia kundulk bu birrinameng 50 centimetres bu kakuyeng mak 50 centimetres bu kawarlahwarla, dja mak 90 centimetres bu kaddum. Dja kore kukebkakebkale ngarre altar, makka wanjh kunbidbakmeng nawu kunkanemdulk djalbelbmikenhdi kore manburrk ngarre altar.

²⁶ Dja mak birribalbarungi gold duninh kore kaddum dja mak kore kurrihdirrid, dja mak kore kunkanem ngarre altar, dja mak birribalkurrmeng wirlmurrng gold nawu nakuyengkenh bu wabminguneng manburrk ngarre.

²⁷ Bedda wanjh birrimarnbom dja birrinameng gold rings darnkih kore kaddumkah, kaluk bokenh kore kurridkudji, dja mak bokenh kore kurridbuyika ngarre altar, dja bininj nawu kabirringorrrkan altar wanjh kabirringimewon mandulkdjad bokenh kore rings.

²⁸ Dja mahni mandulkdjad bokenh birrimarnbom kore acacia kundulk, dja mak birribalbaruy wirlmurrng gold duninh.

²⁹ Dja mak birrimarnbom mankalkkidmanjmak mandjamun manbu kabirrikodjbarungkenh nawu priests, dja mak birrimarnbom nawu manmanjmakaykenh incense duninh yiman mankalkkidmanjmak perfume.

38

Bu Birrimarnbom Altar Manbu Kabirrimarnekinje Mayh Nuye God Dja Mak Nawu Banikkin Nakimuk Duninj Manbu Kabirridjirridjurrenkenh

*Exodus 38:1-8
(Exodus 27:1-8)*

¹ Wanjh bedda birrimarnbom altar manbu birribomkenh mayh bu birrimarnekinjeng nuye God. Kaluk birrimarnbom kundulk nawu acacia dja rohrokmeng 230 centimetres bu kakuyeng, mak 230 centimetres bu kawarlahwarla, dja mak 130 centimetres bu kaddum karohrokme.

² Kaluk birrimarnbom kunkarrngbakmeng kunkanemdulk kore kur-ridbubuyika, dja nahni kunkanemdulk rowk bu raworinj manburk ngarre altar. Dja mak birribalkurrmeng wirlmurrng nawu bronze ba belbmiyindanj kore kungorrk dja mak kore kaddum ngarre nawu altar.

³ Mak birrimay wirlmurrng manbu bronze dja birrimarnbom nawern tools nawu altar ngarre, bu bininj kabirrikinje mayh, yiman djabbirlana, dja mak shovels, banikkin manbu kunkurlba kabirrihdjuhkekenh, dja mak nawu forks ngarre manbu kunkanjkenh, dja banikkin manbalabala nawu kabirrikanakankenh manbu kunyirke.

⁴ Mak birrimarnbom nakimukkenh screen manbu wirlmurrng bronze ba kakarme kunak bu karung kore kaddum altar, dja birrinameng kanjdji kaluk kururrk ngarre altar, kanjdji kore rim dja wohkah kore kanjdji.

⁵⁻⁶ Dja mak birrimarnbom nawu wirlmurrng bronze rings dja mak birrimarnbom mandulkdjad bokenh manbu acacia kundulk, dja birribalbaruy wirlmurrng bronze. Wanjh birribebbehngimowong kore kunkarrngbakmeng rings kore kurruhe ngarre altar.

⁷ Wanjh bininj birringimowoni nawu mandulkdjad kore rings. Kaluk birridulkurrmeng kurridkudji dja mak kurridbuyika, ba bu kamak rowk kabirriwayhke dja mak kabirringorrkan nawu altar.

Manbu altar wanjh birrimarnbom ngarre kundulkbalabala dja ngaleng birribawong kore kumelk bu kalohlorrk.

⁸ Yikahwi morlehmorlenj wanjh birrimarnedurrkmirri nuye Yawey kore kurrangmaye ngarre Manrurrkdjamun Dabburlin kore Yawey kamre kabendjahwon nawu Israel benkebmawahmeng, dja birrimekbe daluk birribebbehkarmmi baddumanj nawu wirlmurrng bronze. Wanjh nawu birrimarnbuni njalehnjale kore dabburlinkenh, wanjh birrimay nahni baddumanj bedberre dja birrimarnbom banikkin nakimukkenh bu kabirridjirridjurrenkenh, dja mak birrimarnbom manbu kanjdjika ngarre, makka wanjh wirlmurrng bronze dorrengh.

Bu Birrimarnbom Kahwarnamyo Kore Kuberrkkah Manrurrkdjamun Dabburlin

*Exodus 38:9-20
(Exodus 27:9-19)*

⁹ Kaluk bedda birribolkmarnbom kuberrkkah ngarre dabburlin. Wanjh birrimarnbom manburra curtains bu kunmekbe warnamyoy. Kaluk kore walemkah nawu manburra nakka wanjh 46 metres bu kakuyeng dja mak birrimarnbom manburra manbu manmak linen.

¹⁰ Kaluk nawu curtains nakka birriwelhwelkeng kore wirlmurrng silver nginj nawu birridukkang silver kunyarl dorrengh kore mandulkdjad djabdidjabdi. Kaluk twenty mandulkdjad birridjabnameng kore twenty mandadkenh manbu wirlmurrng bronze.

¹¹ Dja kore kakkabah wanjh karohrok birrimarnbom nawu curtains.

¹² Dja mak kore karrikadkah ngarre kuberrkkah nawu curtains nakka wanjh 23 metres bu kakuyeng. Kaluk nawu curtains welhwelmi kore silver nginj nawu birridukkang kore ten mandulkdjad silver kunyarl dorreng. Dja birridjabnameng mandulkdjad kore ten mandadkenh manbu wirlmurrng bronze.

¹³ Dja mak kore kamdungbebme, yiman koyekkah, makka mak 22 metres bu kakuyeng. Dja nawu kurrangmaye ngarre dabburlin di kore koyekkah.

¹⁴ Dja kore kurridkudji kore kurrangmaye nakka curtains welhwelmi dja birrididrohromeng bu darnkih seven metres, dja welhmi kore danjbik mandulkdjad djabdjdjabdi kore danjbik mandadkenh.

¹⁵ Mak kore kurridbuyika kurrangmaye namekbe curtains wanjh seven metres bu kakuyeng, kaluk kakarme danjbik mandulkdjad dja danjbik mandadkenh.

¹⁶ Nadjalwern rowk nawu curtains kore wakbuyinguni kuberrkkah wanjh nakka birrimarnbom manburra manbu manmak linen.

¹⁷ Mak nawu mandadkenh rowk ngarre mandulkdjad, nakka wanjh birrimarnbom wirlmurrng bronze. Dja nawu nginj dja kunyarl bu birridukkang kore mandulkdjad, wanjh birrimarnbom wirlmurrng silver duninh, dja mak kore kukodjkenh ngarre posts nakka birribaruy silver duninh warridj. Nadjalwern nawu posts kahdingihdi kore kuberrkkah nakka wanjh dukkayindi silver kunyarl dorreng.

¹⁸ Nawu curtain ngarre kurrangmaye kore kuberrkkah, nakka birribibuni kunyarlwi manbu kukblue, kukpurple dja kukkurlbani, dja manburra manbu manmak linen. Namekbe curtain wanjh kukmakni yiman bu birriwernhburrbuni bininj birribibuni. Nawu curtain nakka wanjh nine metres bu kakuyeng mak 230 centimetres bu kaddum, karohrok nawu nabubuyika curtains dingihdi kore kuberrkkah ngarre dabburlin.

¹⁹ Kaluk namekbe curtains welhwelhdhi kunkarrngbakmeng mandulkdjad dja mak kunkarrngbakmeng mandadkenh manbu wirlmurrng bronze. Dja nawu nginj dja kunyarl wanjh birrimarnbom wirlmurrng silver, dja mak kore kukodj ngarre mandulkdjad nakka mak wirlmurrng silver birribaruy.

²⁰ Nadjalwern nawu tentpegs bu birridjabnami kandjikenh kore dabburlin, dja mak kore kuberrkkah ngarre manburra nawu curtains, nakka wanjh birrimarnbom wirlmurrng bronze rowk.

Bu Mandjalwern Birrimangi Bu Birrimarnbuni Njalehnjale Ngarre Manrurrdjamun Dabburlin

Exodus 38:21-31

²¹ Kondah kabimbuyindi yehyeng rowk bu bininj birrimangi bu birrimarnbuni njalehnjale nawu ngarre Manrurrdjamun Dabburlin kore kahdi manwarddebala bokenh manbu Yawey biwong Moses. Manekke manwarddebala bokenh kabimbuyindi kore Yawey nungan wokkurmerinjin kunwoybuk dorreng. Kaluk bu bininj birrimarnbuni njalehnjale ngarre dabburlin, wanjh Moses benwokrayekwong nawu Levi benkeb-mawahmeng bu kabirribimbun yehyeng rowk kore nahni djurra. Kaluk bininj nawu ngeyyoy Ithamar, nawu Aaron bibornang, wanjh wohrnawohnani rowk kore birribimbuni nahni djurra.

²² Nawu Bezalel nawu beywurd nuye Uri, nawu mawahmawah nuye Hur kore namud nuye Judah, nungka wanjh marnbom njalehnjale kore Yawey biwokrayekwong Moses.

23 Nabuyika bininj nawu ngeyyoy Oholiab nawu beywurd nuye Ahisamach kore namud nuye Dan, namekbe wanjh bibidyikarmeng Bezalel. Nawu Aholiab nungka kurdumakni, dja wernhburrbuni bu bim bom mankarre ngarre manbu birrimarnbunikenh, dja nungka mak marbnurnbunibuni kore wirlmurrng dja mak kore kunwardde, dja mak njalehnjale yiman nawu bibbuni kunmadj bu kamak bibbuni kore kunyarl nawu kukblue, dja kukpurple dja mak nawu kukkurlba, dja mak manburra manbu manmak linen.

24 Nawu wirlmurrng gold duninh manbu birriwong Yawey ba bu birrimarneng njalenjale ngarre Manurrkdjamun Dabburlin, wanjh birrirohromeng kaluk 1000 kilograms kore bedberre mankarre.

25-26 Bu Moses benrohromeng dja benngeybim bom bininj nawu Israel benkebmawahmeng, wanjh birridjalwern yiman 603550 bininj nawu birridabbolkni. Wanjh birrimekbe bininj rowk birribebbhong yeng nawu silver dja wanjh wernhmerrinj bu birrirohromeng namekbe 3400 kilograms kore bedberre mankarre.

27 Kaluk namekbe silver nawu 3400 kilograms nakka wanjh birrimey dja birrimarnbom one hundred mandadkenh ngarre Manurrkdjamun Dabburlin, dja mak ngarre manburra nawu curtain. Kaluk birrimarnbom mandadkenh bu bebbekarmi 34 kilograms nawu wirlmurrng silver.

28 Dja mak bedda birrimey 30 kilograms nawu silver dja birrimarnbom nginj nawu ngarre mandulkdjad dja mak birribaryu nawu kore kukodj ngarre mandulkdjad dja mak kunyarl ngarre manbu silver bu birridukkang.

29 Nawu wirlmurrng manbu bronze kore birriwong nuye Yawey* nakka birrirohromeng 2400 kilograms.

30 Kaluk bedda birrimey nawu wirlmurrng bronze dja birrimarnbom nawu mandadkenh ngarre kore kurrangmaye Manurrkdjamun Dabburlin kore Yawey kamre bu kabendjahwon bedberre, dja mak birrimarnbom altar dja screen manbu bronze wirlmurrng, dja mak tools nawu ngarre altar.

31 Dja mak birrimey mahni wirlmurrng bronze dja mak birrimarnbuni mandadkenh ngarre manburra kahwelwelme kaluk kawakbuyingun kore kuberrkkah ngarre dabburlin, dja ngarre kore kururrkdangmayekenh. Dja mak birrimarnbom nawu tentpegs bu birridjabnami kanjdjikh ngarre dabburlin dja mak ngarre manburra nawu kawakbuyingun kore kuberrkkah ngarre.

39

Bu Birrimarnbom Kunmadj Nawu Priests Kabirridjongburren

Exodus 39:1-7

(Exodus 28:1-14)

1 Wanjh bininj nawu birridurrkmirri kore Manurrkdjamun Dabburlin, bedda birrimey kunyarl manbu kukblue, dja mak kukpurple dja mak kukkurlba, wanjh birrimarnbuni kunmadj bedberre nawu priests ba kabirridjongbuyindi bu kabirridurrkmirri kore kubolkdamun. Bedda birrimarnbom manbu nadjamun kunmadj nuye Aaron, kore Yawey biwokrayekwong nawu Moses.

2 Wanjh birrimarnbom nawu ephod manbu wirlmurrng gold duninh, dja birribibbom kunyarl nawu kukblue, dja mak kukpurple dja mak kukkurlba. Birribibbuni rowk manburrbawi manbu manmak linen.

* 38:29 Bu birriwayhkeng kubid bedberre kore kumirrk nuye Yawey.

³ Dja mak birridongohdoy namekbe wirlmurrng gold bu birribelngwong, wanjh birridjobdjobkeng bu birrikuyengwong dja yiman kunyarl kukkuyengni birrimarnbom. Kaluk nawu birriwernehburrbuni bininj birrimekbe nanu birrimarnbom namekbe gold bu birriyimowong karaworren namekbe kunyarl nawu kukblue, kukpurple, dja mak kukkurlba, dja mak kore manburrba manmak linen manbu birriridjmeng.

⁴ Kaluk birrimarnbom nawu kunkarlangkenh bokenh nawu ngarre ephod, dja belbmeng kore kurrid ngarre ba bu karrukayindi kaddumkah kore kukarlang bokenh nawu priest.

⁵ Dja mak nawu kunnadmokenh namakmak ngarre ephod wanjh birribibbuni kunyarl nawu gold, dja mak kukblue, dja mak kukpurple dja mak kukkurlba. Birribibbom kore ephod bu belbmiyindanj. Birrimarnbom manburrbawi manbu manmak linen nawu birriridjmeng. Kuhni rowk birrimarnbom kore Yawey biwokrayekwong nawu Moses.

⁶ Wanjh birribebbehkurmeng manwarddemakkaykenh kangeyyo onyx kore wirlmurrng gold bu belbmikenh ngarre, dja mak birriwarddedadjkeng bu bindingeynamehnameng twelve bebeywurd nuye Israel.

⁷ Wanjh birribelbmeng namekbe manbu manwarddemakkaykenh kore kunkarlang ngarre ephod, ba bu nawu priests minj kabindibengmidjan nawu bebeywurd rowk nuye Israel. Kuhni wanjh birrimarnbuni rowk kore Yawey biwokrayekwong Moses.

Birrimarnbom Nawu Kunberrekalkkenh Nuye Nawu Priest

Exodus 39:8-21

(Exodus 28:15-30)

⁸ Wanjh birrimarnbom kunmadj nawu kaberekalkbalhme yiman kabarrkbun nawu ephod. Kaluk birribibbuni karohrok kore birrimarnbom nawu nadjamun vest, bu kunyarl nawu gold, dja mak kukblue, dja mak kukpurple dja mak kukkurlba. Birribibbuni kore manburrbawi manmak manbu linen kunyarlwi.

⁹ Nakka wanjh kukyimi square, 22 centimetres bu kakuyeng dja 22 centimetres bu kawarlahwarla, kaluk birribakkeng bu madjyimerranj yiman pocket.

¹⁰ Wanjh yerre birrikurmeng manwarddemakkaykenh nawu jewels dja birribelbmeng kunkarngbakmeng bu yirriyoy. Wanjh nawu kore kaddum belbmiyindi nawu manwarddemak nawu ruby, dja mak topaz, dja mak quartz manbu kukkarlba.

¹¹ Nawu kanjdji kore bokenhkah wanjh birribelbmeng manwarddemak nakka wanjh turquoise, dja mak sapphire, dja mak emerald.

¹² Dja mak nawu kanjdji, kore mahni danjbik, wanjh birribelbmeng manwarddemak manbu jacinth, dja mak agate, dja mak amethyst;

¹³ Wanjh nawu yerre duninh nakka wanjh birribelbmeng chrysolite, onyx dja jasper. Wanjh birribebbehbellmeng rowk manbu manwarddemak kore wirlmurrng gold bu wernhkarmikarmi.

¹⁴ Kaluk bindibebhehngeynameng kungey bedberre nawu nabebeywurd nuye Israel kore nawu kunwardde jewels kaluk twelve birrirohromeng. Birringeybimbom nabebbehkudji nawu kunwardde jewel rowk bebhkarmi kungey kungey nawu kore twelve namud bedberre nawu Israel benbebmawahmeng.

¹⁵ Mak birrimarnbom wirlmurrng nawu gold duninh chains bu birridukkarrukkang yiman birriyimowong kukyimi manbu kunyarl rope nawu kunberrekalkkenh.

¹⁶ Dja mak birrimarnbom bokenh gold manbu kukyimi mannguykilelh dja bokenh rings nawu gold yerrih kaluk birribelbmeng kaddumkah ngarre kore kurrid bokenh nawu kunberrekalkkenh.

¹⁷ Wanjh birribalbelbmeng nahni bokenh gold chains kore bokenh gold rings kore kurrid ngarre namekbe nawu kunberrekalkkenh,

¹⁸ Mak birribelbmeng bokenh kore kurridbuyika nawu kore ngarre chains dja bokenh gold mannguy. Wanjh birribelbmeng namekbe gold chains kore bokenh nawu kunkarlang ngarre straps dja mak nawu kore kumirrk ngarre nawu ephod.

¹⁹ Dja mak birriyawoyhmarnbom nabuyika bokenh wirmurrng gold rings wanjh birrikurmeng kanjdjikh kore ngarre nawu kunberrekalkkenh, mak kore kururkbeh kurrid darnkih kore nawu ephod.

²⁰ Dja mak birribadmarnbom nabuyika bokenh gold rings kaluk nawu kare kore kanjdji ngarre nawu kunkarlangkenh straps bu karri kore kumirrk ngarre nawu ephod, darnkih kore kungadmokenh ngarre nawu ephod.

²¹ Dja mak birrimey nawu kukblue kunyarl dja birridukang nawu rings ngarre kunberrekalkkenh kore rings ngarre nawu ephod, ba bu kabelbmikenh kore kungadmokenh. Kuhni birrimarnbom ba bu nawu kunberrekalkkenh minj kawelhwelme kore ephod. Wanjh kunmekbe birrikurduyimeng rowk dja birrimarnbom kore Yawey biwokrayekwong nawu Moses.

Bu Birrimarnbom Kunmadjbubuyika Bedberre Nawu Priests

Exodus 39:22-31

(Exodus 28:31-43)

²² Wanjh bedda birrimey manburrba manbu kukblue, birrimarnbom kunmadj nakuyeng nawu priest kabirridjongbuyindi kanjdjikh, dja kuberrkka karri nawu ephod. Bedda birriyingkiharnbom manmak manburrba bu birribibbuni namekbe nawu kunmadj.

²³ Birrimarnbom bu kawohrurrk kore kubulkayh ngarre manburrba nawu kuberrkka kahdi, rawoyindanj nawu kunkomkenh collar nawu ngokko birriyingkihbbom wanjh bu wakbuyinguneng kore kahrurrk ba kunukka minj kamadjdjalkmire.

²⁴ Wanjh yerre birribibbuni yiman manbarnem manbu pomegranates bu birribelbmeng kanjdjikh kurrid ngarre nawu nakuyeng kunmadj. Birribibbuni kaluk kunyarl kukblue, dja mak kukpurple dja mak nawu kukkurlba, dja mak linen nawu birriridjmeng bu kunyarl birrimarnbom.

²⁵ Mak birrimarnbom wirmurrng gold duninh nawu bells nakilehk-ilelk, wanjh birriwelhwelkeng kore nawu pomegranates birrikurmeng kanjdjikh kore nawu nakuyeng kunmadj.

²⁶ Wanjh kore kanjdji ngarre nawu nakuyeng kunmadj bu kuberrkka wanjh kumekbe di nawu bells kubulkayh nawu pomegranates bebbehbebbi. Wanjh nawu priest namekbe munguyh djongbuyindi bu wam durkmirrurrkmirri yiwarrudjkenh. Kaluk kunmekbe rowk kore Yawey biwokrayekwong Moses.

²⁷ Wanjh birribibbom warridj kunmadj nawu manburrba milemakkaykenh bedberre nawu Aaron dja nabebeywurd nuye,

²⁸ dja mak birribalmarnbom turbans nawu kabirrikodjdukkarrenkenh, dja mak nawu kabirrimilhdukkarrenkenh, dja mak kunmadj nawu kanjdjikh kabirridjongbuyindi, wanjh kaluk milemakkaykenh manburrba dorrengh.

²⁹ Dja mak birrimarnbom kunngadmokenh namakkaykenh, kaluk manburra ngarre nawu milemakkaykenh linen, dja mak kunyarl manbu kukblue dja mak manbu kukpurple dja mak manbu kukkurlba. Dja birribibunibim kore namekbe kunmadj. Kuhni birrimarnbom rowk kore Yawey biwokrayekwong Moses.

³⁰ Wanjh bedda birrimarnbom warridj manbalabala nawu wirlmurrng gold duninj manbu birribelngwong, yiman birribimbom kunwok bu bimdebimdi. Wanjh birribelbmeng kore Aaron nuye turban nawu kodjdjungbuyindikenh. Nakka wanjh kunkodjkenh nawernhdjamunni. Nawu birrimarnbuni wanjh birriwirrkmenng birringeynameng bu birribimbom, "Nakka Wanjh Yawey Nuye."

³¹ Wanjh birridukkang namekbe nawu gold manbalabala kore nawu turban kaluk kukblue kunyarl dorreng, kore Yawey kunmekbe biwokrayekwong Moses.

Bu Birriyakwong Birrimarnbuni Yehyeng Rowk Ngarre Manrurrdjamun Dabburlin

*Exodus 39:32-43
(Exodus 35:10-19)*

³² Wanjh bininj nawu birrihdurkmirri kore mahni Dabburlin kore Yawey kamre kabendjahwon bedberre bininj nawu Israel benkebmawahmeng, wanjh birriyakwong rowk. Birrimekbe bininj nawu Israel benkebmawahmeng wanjh birridjalkurduyimeng rowk kore Yawey biwokrayekwong Moses.

³³ Yerre wanjh birriwong Moses manbu Manrurrdjamun Dabburlin dja mak njalehnjale ngalengngarre yiman nawu nginj, dja mak nawu kundulk frames dja mak kundulk crossbars, dja mak mandadkenh dja mandulkdjad bu djabdidjabdi.

³⁴ Dja mak nawu kahbarrkbunkenh, kaluk birrimarnbom kore sheep kunkulah manbu birrimedjmarnbom kukkurlba, dja mak nawu kahbarrkbunkenh nawu birrimarnbom kunkulah ngarre marndingunjungun, dja mak manburra nawu kahdangmayebalhme kore kurrangmaye ngarre kore kuboldjamun duninj.

³⁵ Dja mak birriyakwong birrimarnbom nawu Ark manbu kakarme manwarddebala bokenh kore kabimbuyindi kunwok kunwoybuk bu Yawey wokkurmerrinj. Dja mak birriyakwong nawu mandulkdjad manbu kabirrikanahkankenh manbu Ark, dja mak nawu kaddumkah ngarre kahdangbalhmikenh.

³⁶ Dja mak birriyakwong manbu manbalabala dja ngalng rowk ngarre, dja mak kandidjawa manbu kabenhbukkabukkan bu God kahdi.

³⁷ Dja mak nawu lampstand nawu birrimarnbuni bu wirlmurrng gold duninj, dja mak lamps nawern kumekbe kahdi, dja mak njalehnjale ngarre, dja mak manbu olive kunkalkkid ngarre bu kabirriwurlhkekenh kunak.

³⁸ Dja mak birriwong Moses nawu altar birrimarnbom, kaluk birribaruy gold, dja mak kunkalkkid nawu nungka kabenkodjdjuhke bu kabemarnbun bininj nawu priests, dja mak incense nawu namanjmak duninj, dja mak manburra nawu kahbalhme kore kurrangmaye ngarre dabburlin.

³⁹ Dja mak nabadbuyika altar kaluk birrimarnbom manbu wirlmurrng bronze dja ngarre screen, dja mak mandulkdjad bu kabirringorrkankenh. Dja mak nawu njalehnjale ngarre, dja mak banikkin nakimuk nawu kabirridjdirridburrenkenh, dja nawu kanjdjikenh kore kabirribarnname.

40 Mak birriwong Moses nawu manburra curtains nakimuk ngarre kuberrkka dabburlin, dja mak mandulkdad dja mandadkenh kore kabirridjabname, dja mak nabadbuyika manburra curtain nawu kahbalhme kurrangmaye kore kuberrkka, dja mak kunyarl dja tentpegs ngarre kanjdjika kabirridjabname kuberrkka nawu curtains. Dja mak tentpegs dja njalehnjale rowk nawu kore Manrurrdjamun Dabburlin manbu kore Yawey kamre kabendjahwon bedberre.

41 Wanjh bedda birrimadjkang kunmadj birribibbuni nawu priests bedberre ba kabirridjongburren bu kabirridurkmirri nuye Yawey kore kubolkdamun. Kaluk nawu manmadjdjamun manbu nuye Aaron dja mak manmadjbuyika kunmadj manbu bedberre nawu nabebeywurd nuye, ba bu kabirridjongbuyindi bu kabirridurkmirri priests.

42 Wanjh nawu Israel benkebmawahmeng birridurkmirranginj rowk kore Yawey biwokrayekwong Moses.

43 Wanjh Moses wam wernhnang kore birridurkmirranginj dja mak wohng bu birrikurduyimeng kamak rowk kore Yawey wokrayekwong. Wanjh Moses benmarnedi yiwarrudj dja bidjawam Yawey bu kunmak kabenmarnekurduyime bedberre.

40

Yawey Nawu God Bibengdayhkeng Moses Bu Kabirridjabname Nawu Manrurrdjamun Dabburlin

Exodus 40:1-15

1 Wanjh Yawey bimarneyimeng Moses

2 “Bu kunbarnangarra yungkih kaluk bu dirid nawu kahdokme, ngurridjabdjabnamen nawu Manrurrdjamun Dabburlin, kaluk nawu dabburlin manbu kore ngaye Yawey ngamre djahwon ngudberre.

3 Wanjh kumekbe ngurrikurmen nawu Ark manbu kakarme manwarddebala bokenh kore kunwoybuk kunwok ngawokkurmerrinj. Dja mak manburra ngurriwelwelkemen kore kumirrk ngarre Ark.

4 Wanjh ngurrimngimowo manbalabala table dja ngurrikurmekurme njalehnjale nawu ngarre kumekbe. Kaluk lampstand ngurrimngimowo dja ngurrinamehnamen nawu lamps kore lampstand.

5 Wanjh ngurrikurmen nawu gold altar ngarre kabirrikinje mankalkkidmanjmak kore kumirrk ngarre Ark kore manwarddebala bokenh kahdi nawu kabimdi kunwok kunwoybuk bu ngawokkurmerrinj. Yerre wanjh ngurribarnnamen manbu manbuyika curtain manburra kore kurrangmaye ngarre nawu Manrurrdjamun Dabburlin.”

6 “Wanjh ngurrimang nawu altar manbu kandimarnekinje mayh nawu kandiwon, dja ngurrikurmen kore kumirrk ngarre nawu Manrurrdjamun Dabburlin kore ngaye Yawey ngamre djahwon ngudberre.

7 Dja mak nawu nawernhkimuk bannikin nawu ngurridjirridjburrenkenh, wanjh ngurrikurmen kore kubulkayh nawu Dabburlin dja altar, dja mak kukku ngurriborakendong ba kabobarlme.

8 Wanjh ngurrimanen manbu kawarnamyu kawakbuyingun nawu kuberrkka ngarre Dabburlin, dja ngurribalarnnamen manburra nawu curtain ba kawelhwelme kore kurrangmaye.” Kuhni rowk Yawey bimarneyimeng nawu Moses bu biwokrayekwong.

9 Wanjh Yawey biyawoyhwokrayekwong nawu Moses, yimeng, “Kaluk bu yinameng rowk, wanjh yimang olive kunkalkkid manbu yibenkodjdjuhkekenh nawu bininj, wanjh yirrelkemen kore Manrurrdjamun Dabburlin, dja mak nadjalwern rowk nawu kumekbe kahyo. Kuhni

yikurduyimen ba bu mahni Manrurrkdjamun Dabburlin dja njalehnjale ngarre, wanjh kayimerran djal gaye ngardduk duninh.

¹⁰ Yerre wanjh yirrelkkemen kunkalkkidwi kore altar manbu kandi-marnemokeninje mayh nawu kandiwon gaye, dja mak yehyeng rowk ngarre. Wanjh kuhni yimarnbun rowk bu gaye ngardduk.

¹¹ Dja mak yirrelkkemen warridj namekbe kunkalkkid dorreng h nawu nakimukkenh bannikin, dja ngarre kanjdjikh. Kuhni wanjh yimarnbun bu djal gaye ngardduk."

¹² "Wanjh yibenmang Aaron dja nabebeywurd nuye dja yibenka kore kurrangmaye ngarre Manrurrkdjamun Dabburlin kore gaye ngamre bu djahwon ngudberre, wanjh kunmekbe yibenkukdjirridjbu kukkuwi bu ngayekenh.

¹³ Wanjh nawu manmadjdjamun nakka wanjh yidjongbu nawu Aaron. Dja mak yikodjdelkkemen kunkalkkid dorreng h dja kanmarnekurrmen ba bu nungka nganmarnedurrkmirri yiman gaye ngardduk priest.

¹⁴ Dja mak yibenka nawu Aaron benbornang wanjh yibendjongbu nawu kunmadj bedberre.

¹⁵ Wanjh yibenkodjdelkkemen namekbe mankalkkid dorreng h karohok bu yiman nawu kornkumo bedberre yiyimowong, ba bu kabirriyimerran priests ngardduk ngandimarnedurrkmirri. Bu kuhni yiyime, wanjh kunukka kadjalyirriyo bedberre bu kabirridurrkmirri priests, nawu mak mawahmawah kabindibalyime warridj munguyh." Kuhni rowk bu Yawey biwokrayekwong nawu Moses.

Wanjh Moses Kurduyimeng Rowk Kore Yawey Biwokrayekwong Nuye

Exodus 40:16-33

¹⁶ Wanjh Moses kunmekbe kurduyimeng rowk kore Yawey biwokrayekwong nuye.

¹⁷ Wanjh Moses dja nawu Israel benkebmawahmeng birrinameng Manrurrkdjamun Dabburlin. Birridjabnameng bu kore kunyungkih kunbarnangarra kore dird nawu kahdokme dja mak mandjewk nawu munkekadjuy nawu kahdokme bu bedda birriwelengbolkbawong kunbolk Egypt.

¹⁸ Kaluk bu birridjabnameng nawu Manrurrkdjamun Dabburlin, wanjh birrikurmeng manbu mandadkenh ngarre mandulkdjad, dja mak birri-marnbom nawu mandulkdjad frames, dja mak birringimiweng mandulkdjad kore kubulkayh frames, dja wanjh birridjabnameng mandulk rowk kore djabdidiabi.

¹⁹ Wanjh yerre Moses dorreng h birrikodjbarrkbom nawu manburrba kore Manrurrkdjamun Dabburlin, dja mak nawu kaddumkah dabburlin balbarrkbom warridj kunmekbe kore Yawey biwokrayekwong nawu Moses.

²⁰ Wanjh Moses mey nawu manwarddebala bokenh manbu kabimdi kunwok kunwoybuk kore Yawey wokkurmerrinj, dja dahkendoy kore Ark. Wanjh kurrmeng mandulkuyeng kore rings ngarre Ark wanjh yerre kurrmeng nawu kaddumkah ngarre ba kahdangbalhme.

²¹ Wanjh kang nawu Ark kore Manrurrkdjamun Dabburlin, dja wel-hwelkeng manburrba bu minj nangale bininj kanan nawu Ark manbu kakarme manwarddebala bokenh kore kunwoybuk kunwok Yawey wokkurmerrinj. Kuhni kurduyimeng kore Yawey biwokrayekwong.

²² Wanjh Moses kurrmeng nawu manbalabala kore Manrurrkdjamun Dabburlin manbu kore Yawey kamre kabendjahwon bedberre, kuber-rrkah ngarre manburrba nawu kahwelwelme kumekbe.

²³ Wanjh balmey kandidjawa nawu bininj birriwong Yawey, dja kurrmeng kore table, kore Yawey biwokrayekwong nuye.

²⁴ Mak Moses kurrmeng nawu lampstand kore Dabburlin manbu kore Yawey kamre kabendjahwon bedberre, kaluk walemkah, borledmikenh ngarre manbalabala.

²⁵ Wanjh balwurlhkeng nawu lamps kore kumirrk nuye Yawey, kore Yawey biwokrayekwong.

²⁶ Wanjh Moses kurrmeng nawu gold altar kore Dabburlin manbu kore Yawey kamre kabendjahwon bedberre, kaluk kore kumirrk ngarre manburra nawu kahwelhelme.

²⁷ Wanjh kinjeng nawu manmanjmakkaykenh incense kumekbe, kore Yawey biwokrayekwong.

²⁸ Yerre wanjh welhwelkeng manburra nawu curtain kore kurrang-maye ngarre Manrurrdjamun Dabburlin.

²⁹ Wanjh Moses kurrmeng altar kore kabirrihkukkinje mayh nawu kabirriwon Yawey, kaluk darnkih kore kurrangmaye ngarre Manrurrdjamun Dabburlin, manbu kore Yawey kamre kabendjahwon bedberre. Wanjh biweng mayh nawu bininj birriwong Yawey, mokenh bimarnekinjeng nuye, dja manmim warridj kinjeng, manbu birriyngkihwong Yawey. Kuhni rowk Moses kurduyimeng kore Yawey biwokrayekwong.

³⁰ Wanjh Moses dorrengh birrimey nawernhkimukkenh bannikin nawu kabirridjirridjburrenkenh dja birrikurrmeng kubulkayh Dabburlin manbu kore Yawey kamre kabendjahwon bedberre, dja kore nawu altar, wanjh kukku borrahkendoy.

³¹ Kaluk Moses, Aaron dja nawu Aaron benbornang wanjh manmekbe kukku djal bedda bedberre bu birribiddjirridjburreni dja mak birridengedjirridjburreni.

³² Kaluk bedda birridjirridjburreni bu birrimarnburrij ba bu birringimi kore Manrurrdjamun Dabburlin manbu kore Yawey kamre kabendjahwon bedberre, dja mak bu birrirey darnkih kore nawu altar. Kuhni rowk wanjh Yawey biyngkihwokrayekwong nawu Moses.

³³ Wanjh Moses dorrengh birrinamehnameng nawu kuberrkkah kore wakbuyinguneng manbu altar dja mak manbu Manrurrdjamun Dabburlin. Dja mak birriwelhwelkeng nawu manburra curtain kore kurrangmaye ngarre kuberrkkah manbu Dabburlin. Kuhni wanjh Moses yakwong rowk kore bimarnedurrkmirranginj nawu Yawey.

Yawey Nawu God Kumwam Kore Dabburlin Manrurrdjamun Nuye Dja Bedda Birrinang Kunmakmak Duninh Nuye

Exodus 40:34-38

(Numbers 9:15-23)

³⁴ Wanjh manmekbe kunngol barrkbom kore Dabburlin manbu kore Yawey kamre kabendjahwon bedberre, dja mak kunmakmak duninh nuye Yawey barlmeng rowk kore Manrurrdjamun Dabburlin.*

³⁵ Bu kunngol barrkbom, dja mak kunmakmak duninh nuye Yawey bolkbarmiyindi kore Manrurrdjamun Dabburlin manbu kore Yawey kamre kabendjahwon bedberre, wanjh kunmekbekenh kunu Moses minj gimeninj manbu Manrurrdjamun Dabburlin.

³⁶ Kaluk bu manmekbe kunngol wayhmi kore Manrurrdjamun Dabburlin, wanjh nawu Israel benkebawahmeng birridolkani bu birribolkawoyi birrirey kuredbuyika.

* **40:34** Ngurrina warridj Isaiah 6.4; Revelation 15.8

³⁷ Dja bu manmekbe kunnngol djahdjaldi kore Manrurrkdjamun Dabburlin, wanjh kunukka minj birrirawinj. Bedmanwali birrihdjaldi kubolkkudji kaluk bu ngolwayhmi. Bedda munguyh birridjalmadbuni kore manbu kunnngol.

³⁸ Bu yarrkka birrirey nawu Israel benkebmawahmeng rowk, wanjh manbu kunnngol nuye Yawey barrkbuni nawu Manrurrkdjamun Dabburlin bu barnangarra rowk. Dja bu kukak rowk, wanjh kunak kakrunji kore kunnngol. Wanjh bedda birrinang rowk.

Ruth

Ruth dja Naomi

Ruth 1:1-5

¹⁻² Korroko nawu Israel benkebmawahmeng minj birribangmekar-meninj nawu king. Nawu birrikukenni bininj bindidjadmi birriwar-lahkenh bininj rowk. Wanjh kumekbe nakudji bininj ni nawu nakang kunred Bethlehem kore kubolkkimuk Judah. Nungka ngeyyoy Elimelech. Ngalbininj kobeng nuyeni ngalu ngeyyoy Naomi. Dja bebeywurd bokenh nuye benengeyyoy, nakudji ngeyyoy Mahlon, dja nabuyika nawu ngeyyoy Chilion. Bedda rowk wanjh birridi kore Bethlehem (Kaluk mahni kunbolk yikahwi birringeybuni Ephrathah.) Wanjh bedda birridjarrkdolkkang, birribolkbawong Bethlehem dja birriwabmeng djarreh kore kunbolk Moab. Kaluk djewkwarrewong kore Judah, dja bolkdarlehminj, wanjh manme yakminj kore kubolkwarlah Judah. Kumekbekenh wanjh birriwam.

³ Bu kumekbe birriwam waken birrihni, wanjh Elimelech doweng kumekbe, benwakwam ngalbininj kobeng dja bebeywurd nuye.

⁴ Birrihni, kalukburk bebeywurd benemekbe, daluk bindibebbehmey nawu benemekbe nawu daluk bokenh benengeyyoy ngalkudji ngeyyoy Orpah, dja ngalbuyika ngeyyoy Ruth. Kunmekbe birrirerrkang mandjewe nawnen ten.

⁵ Birrirerrkang korroko, wanjh bedmanwali bebeywurd benedoweng, nawu ngokko kornkumo berrewonengni nungka dokmeng doweng. Wanjh ngalbadjan minj karrmeninj nabininj kobeng dja yayaw ngarre.

Ruth dja Naomi Benedjarrkdurndi Kore Bethlehem

Ruth 1:6-22

⁶ Kaluk bu kumekbe birrihni Moab, Naomi bekkang bu Yawey yawoy-hdjewkmarnbom bedberre kore ngalenggarre kunred Judah, dja manme manrakel bekkang djordmerrinj, karmi manwern manme. Bu kunmekbe bekkang wanjh welengbolkbawong kumekbe kore ningihni Moab, dja ngalbinj morne ngarre bedda dorreng birridjarrkbolkbawong.

⁷⁻⁸ Wanjh birrimahmirranginj birrirawinj kore kunred Judah. Bu birribaldolkkarrinj birribalhrey, Naomi benbenemarneyimeng, “Kab ngunebekkarrimen ba ngunedurdeng kore ngurrimud kabirrihni. Kaluk bu ngunedurdeng ngadjare Yawey ngunbenenahnan, yiman kayime ngurribenenehnanhi nawu ngabenbeneyawmey bu benehmimbini, dja gaye dorreng kandihdjarrkahnani.

⁹ Dja ngadjare bu Yawey kaluk ngunbenemarnekarrimarbnun, bu ngunebbbehmang bininj ba ngundibebbehnanhi kunmak.” Wanjh Naomi benbenebunjhmey benbenewoknang, wanjh kumekbe benemar-nalnbom.

¹⁰ Wanjh benewelengmarneyimeng berrewoneng ngalbinj morne, “Bur-kyak, ngad minj nganedurdeng, dja kanedjarrkay kore ngudda ngur-rimud kabirrihni.”

¹¹⁻¹³ Wanjh Naomi benbenemarneyimeng, “Yuwn kab kandimaddeng, dja ngunedurnde. Wanjh nuk minj ngayenu ngamerlem ba ngayaw-mang ngorrewoneng bambu ngurriyawoyhmarren. Ngunedurnde, minj kunu ngayenu ngangudjak nganeyawoyhmarren bininj, dja ngayenu wanjh ngangudjarreminj ngakohbanjminj. Bu yiman nganjilngniwirinj, kuninj kunu kumunur yimankek nganemarrimeninj bininj, ngayawmayi wurdyaw, kunubewu minj ngurribenbenemadbuyi bu benedjardmeninj.

Nguddambu wanjh kunu ngunekohbanjmeninj. Marndi nuk minj ngurrbenbenemadbuyi ngurrimarrimeninj, dja birribuyika ngundimayi ngorrewoneng. Nguneburrbun bu kakarrewarre, dja Yawey nganbodmekenhwong bu doweng ngardduk nabininj kobeng dja bebeywurd birridjarrkdoweng. Ngayambu kunmekbekenh kunu benbenekongibun ngorrewoneng.”

14 Wanjh beneyawoyhmarnenalkbom, wanjh ngalbu Orpah bibunjhmey ngarre ngalbinjmorne, biwoknang wanjh durndi kore ngarrekih kunred. Ngalbuiyika ngalu Ruth, ngalu wanjh bimaddi.

15 Wanjh Naomi bimarneyimeng ngalbu Ruth, “Yina, ngalbu ngudda ngunehbardkoni durndi kore nawu ngurrimud, dja ngudberre nawu ngurrimarnedi yiwarrudj, dja kab yimunekadju, ngunedjarrkdurdeng.”

16 Wanjh Ruth biwokmey, “Yuwn yikebbabi kanhdjawan munguyh yimanek bu yiyime bawon, bad burrkyak, minj bawon mak ngarrurdeng. Bu yiman baleh yire kunukka ngardjarrkre, kore baleh yiyo, kunu ngardjarrkyo. Woybukkih duninj nawu namud ngudda ke, nakka djarrkngarrku, nawu ngudda ke God, nakka djarrkngarrku yerreh.

17 Bu baleh kore yarrkka yirrowen kumekbe wanjh ngaye mak ngarrown, kudjalbolkkudjiwi kandibebbehkukdudjeng. Woybukkih duninj marneyime minj bawon, dja kundjalkudji bu ngudda nuk yirrowen, dja kunubewu ngaye nuk, wanjh kunu kankuklarmang ngarrku, djalbonj. Bu yiman kowe, wanjh kunu kamak nganbun nawu Yawey.”

18 Bu Naomi binang Ruth njilngrayekminj, bimaddi duninj bu minj durndeyi kore ngarrekih kunbolk, wanjh Naomi ngurdmeng bimenbawong.

19 Wanjh benebaldjarrkwam benedjarrkbebmenng Bethlehem. Bu benebalbebmenng kumekbe bininj daluk birriwern bu bindinang birrikangebarrhmeng, wanjh bindiyolyolmi berrewoneng. Nawu daluhdaluk birrihdjawarreni, “Yiddok ngahli Naomi?”

20-21 Wanjh Naomi benwokmey, yimeng, “Yuwn kandiyawoyhngyebun Naomi bu kunmak, dja kandingeybu Mara* bu kunnjilngwarre. Dja God nawu ngudjkimuk duninj† wanjh nungka marnbom ngardduk bu kunwernhrayek. Bu kondah ngabolkbawong ngakarrmi nawern, dja nungka Yawey ngandurndiweng bu ngabidlarrkminj. Njalekah wurd munguyh kandihngyebun Naomi? Bu Yawey ngandjalwarreweng ngaye. Yoh, nungka nawu Ngudjkimuk Duninj, wanjh ngandjalwernhwarreweng ngaye.”

22 Wanjh kunih kunmekbe kunu bu Naomi kumdurndi kore kunbolk Moabbah, dja ngalbinjmorne ngarre Ruth benemdjarrkwam kumekbebeh kore ngalengngarre kunred. Bedda benebolkmey Bethlehem bu kerngehkenh dedjdjimgmey birrihmangi manme manbu kangeyyo barley.

2

Ruth dja Boaz

Ruth 2:1-23

1 Kumekbe kore kunred Bethlehem wanjh nakudji bininj di nawu nakukenni duninj, dja ngeyyoy Boaz. Nungka wanjh namudni Elimelech nawu Naomi ngalengngarre nabininj kobeng.

* **1:20-21** Naomi kamenyime “kamak rowk”. Dja Mara kamenyime “manbu manjwarre duninj”.

† **1:20-21** Hebrew kayime “El Shaddai”

² Bu Ruth dja Naomi benehdi Bethlehem, wanjh Naomi bidjawam ngarre ngalbinjmorne, “Kanmunkewemen ngare kore kabbal kabirrihmang manmim ba ngare ngamoyhmang manbu yikahwi kabirrihbabawon. Kaluk ngangalke bininj nawu minj ngandahme, ngarrurrkmirri ngamoyhmang kore kumunke nuye.”* Naomi biwokmey, bimarneyimeng, “Mah wanjh yiray Ngalkurrng.”

³ Wanjh Ruth dolkkang wam kore kabbal, moyhmangi kumunke bedberre bininj nawu ngokko birrihmimmangi, wanjh mungu baldjalwam bebmeng kore Boaz kabbal nuye, nawu Elimelech benemudni.

⁴⁻⁵ Kaluk nungan Boaz kumbadbebmeng Bethlehem, wanjh Boaz benmarneyimeng birrimekbe bininj nawu birrihmarnedurrkmirri. Wanjh benmarneyimeng, “Ngadjare Yawey ngurridjarrkre.” Bedmanwali birriwokmey birriyimeng, “Ngudda warridj ngarridjare ngunnahnun kunmak rowk nawu Yawey.” Wanjh Boaz bidjawam nakudji bininj nawu wohrnani bedberre kumekbe nawu birrihdurrkmirri, wanjh Boaz djawayhmeng, “Ngahli daluk nangale kabenemud?”

⁶⁻⁷ Wanjh nawu wohrnani bininj biwokmey bimarneyimeng, “Ngahli ngalu ngalredbuyika kumdolkkang Moabbeh, Naomi benemdjarrkwam. Wanjh ngaleng ngandjawan nganmarneyimeng, ‘Kamak bu ngarrurrkmirri ngare kumunke bedberre ngamimmoyhmang?’ Wanjh djaldurrkmirrangi kukabelkuyeng, dja kundjalkudji ngehmenng ni kudjurle.”

⁸⁻⁹ Wanjh kunmekbekenh Boaz bimarneyimeng ngalmekbe daluk, “Kanbekka daluk, wokrayekwon, yuwn mak yire yimoyhmang kabbalbuyibuyika, dja ngurridjaldjarrkray nawu ngaye ngardduk yawkyawk ngalbu kabirrihdurrkmirri. Yinahna manmekbe kabbal munguyh manbu kabirrihdurrkmirri, kumunke yiray bedberre. Dja ngabenmarneyimeng nawu bininj ngardduk ngandihmarnedurrkmirri minj ngundikebkangbun. Bu yikombukdown, yiray yibongun kore yawuhyawurrinj kabirrihborrahkendong kore budjdjurlung.”

¹⁰ Bu kunmekbe bekkang bimarneyimeng nawu Boaz, wanjh ngalmekbe daluk barddurrkkurldanj mankang kunkeb bolkdoy kurorre, wanjh ngalengmanwali biwokmey, bimarneyimeng, “Njalekah nguddanu kankelkelkibun, njale ngudda kanhnahnun ngayenu nuk kannan ngawokbuyika?”

¹¹ Wanjh nunganwali biwokmey, yimeng, “Ngabekkani ngandimarneyimi birriwern bu nguddakah kunwern bu yihnahnani ngalbinjmorne ke bu doweng nabininj kobeng ke, dja bu yibenbenebawong ngalbadjan dja mak kornkumo, dja mak bininj ke dja kunred ke yibolkbawong, dja yimwam kondanj kunu ngurriraworrinj kore minj korroko bininj yibenkukburrbuyi.

¹² Kaluk ngadjare Yawey nunganwali ngunmarnekurduyime kunmak yiman nguddahbu yihkurduyimi yibenhahnani bedberre. Dja yimbadwam kore Yawey nawu God ngadberre nawu Israel ngankebmawahmeng, bu ngunnahnun munguyh. Wanjh ngadjare ngunwernhwon kunmakmak bulkkidj duninj.”

¹³ Wanjh ngalengmanwali biwokmey, yimeng, “Nguddanu wanjh yimak. Bu kunmekbe kanhmarneyime kanhnjilngmarnbun, dja yiman bu yiyime ngaye ngamak. Ngadjare kuhni kandjalmarneyime, dja bonj, ngaye ngaldjalwarre kore yawkyawk ngundimarnedurrkmirri.”

¹⁴ Bu darnkih birrihngunikenh manme, Boaz bimarneyimeng Ruth, “Yibekarrimen yimre ba won manme yingun, yilodduhke kore kunkalkkid yiman kayime wine rerrih.” Wanjh yerrkang kore kungurrird

* 2:2 Nurrina Leviticus 19:9-10; Deuteronomy 24:19

bedberre nawu manme birrihdjobkeyi kore birrihdurrkmirri, wanjh Boaz balweykang manbu mankerrikenh manmim, bibalwong Ruth. Nguneng manmekbe manmim manbu mankerrikenh, worrkminj, dja yikahwi bawong.

¹⁵ Wanjh nguneng rowk manme dja dolkkang wam yingkihdokmeng kore birrihmimmoyhmangi. Wanjh Boaz benwokrayekwong bininj birrihdjobkeyi manmim, benmarneyimeng, “Ngurribawo ngahli daluk, kamoyhmang manmim kore mandobbokenh kore kayongoyo, dja yuwn ngurridjangan.

¹⁶ Dja mak ngurribalmarnedurrkdurrkma yikahwi kore mandobbokenbeh, ngurrikurrmekurmen, kaluk ngalengman kaballe kamoyhmang, dja yuwn ngurriyirrun.

¹⁷ Wanjh munguyh djalmimmoyhmangi dja djalwam dungyibmeng, wanjh manbarnem ngarlahngarlhkeng, wanjh mimbarlmeng manwern mandobbokenhkimuk[†].

¹⁸⁻¹⁹ Wanjh kang kured, balkanakang birrelengbukkang ngalbinjmorne ngarre, wanjh bebkeng manmekbe manbu manbarnangarrakenh manbu bawong, wanjh biwong ngalbinjmorne. Wanjh ngalbinjmorne ngarre bimaddjawam, “Baleh kab kunu yihmimmoyhmangi? Nangalehmayh nanu kabbal nuye yihdurrkmirri? Ngadjare God kabimarneyime kunmak namekbe bininj nawu ngunhahnani.”

Wanjh Ruth ngalengmanwali bimwokmey ngalbinjmorne ngarre, bimarneyimeng, “Ngahdurrkmirri kore kabbal nuye bininj nawu djaying kangeyyo Boaz.”

²⁰ Wanjh Naomi welengyimeng, “Ngadjare Yawey kunmakmak kabiwon. Nahni bininj nawu yingeybom, Boaz, nanu wanjh namud ngad ngarrku darnkih duninj, mankarre kahyo namekbe nanu nungka wanjh bu karrurrkmirri ngarrku kannahn warridj.[‡] Bu kuhni ngunmarneyimeng ngaburrbun bu Yawey minj kabengmidjdan bu kanberrebun kadberre, dja kanhwon kunmakmak nawu djedjenkurmeng kadberre rowk, nawu karrimimbi dja ngarrku bininj dorrengh nawu birridowerrinj.”

²¹ Wanjh Ruth biwokyolyolmeng Boaz kore biwokrayekwong, bu bimarneyimeng, “Yirarnhdurrkmirrin kore nawu ngaye ngardduk bininj kabirrihdurrkmirri, yidjalle yiburnbun bu kabirriyakwon manu manmim ngardduk.”

²² Wanjh Naomi yimeng, “Wanjh kunmak kunu Ngalkurrng, bu ngurridjarrkdurrkmirri daluhdalukdeleng nawu nungan nuye kabirrihmarne-durrkmirri, dja yuwn yire kabbalbubuyika, wardi ngundikebkangbun.”

²³ Wanjh Ruth djalkurduyimi kunmekbe munguyh, birrihdjarrkrey daluhdaluk nawu Boaz nuye birrihmarnedurrkmirri, ngaleng dorrengh birrihdjarrkmimmoyhmangi. Wanjh mimyakminj manbu manmim kangeyyo barley, dja mak manbuyika manbu wheat. Ngaleng benehdjalyoy munguyh ngarre ngalbinjmorne.

3

Ruth dja Boaz Benekarremarnburrinj

Ruth 3:1-18

¹ Kalukburrk wanjh Naomi bimarneyimeng ngarre ngalbinjmorne, “Ngalkurrng, kab ngakarremarnbun bu bininj ba ngunemarren bambu kunmak rowk yini?”

[†] 2:17 Yiman kayime 10 kilograms. [‡] 2:20 Leviticus 25:25

2 Namekbe yiburrbun nawu Boaz, yawkyawkbubuyika ngurrihdjar-rkdurrkmirri kore kabbal. Yuwn yikukbengmidjdan, nakka wanjh ngad ngarrku namud. Kanbekka, marneyime, kuninjkuu kumunun nungkambu kabadre kakakmimkarrhkarrhme kumekbe kore kabirrihmimbun.

3-5 Mah. Wanjh yiwurlebmen yikukdelkdelkkerrimen nawu manjmakmak, dja yidjongburrimen nawu namakmak. Wanjh bu yibekkarren wanjh yibalkolu kunmekbe kore kabirrihmimbun. Dja yuwn yibangmekukbebme nuye, dja yibawo med, yimengordmadbu kangun kabongun kayakwon. Bu kakeyongen, med yikodjkebawo kakerrowen, wanjh kunmekbe kunu yiballay yirrengewerrhme nuye, wanjh yikekurrmerren. Kaluk nungan ngunmarneyime bu baleh yikurdyuime." Wanjh Ruth ngalengmanwali bibalwokmey ngalbinjmorne ngarre, yimeng, "Wokkar-me rowk bu yarrkka kanhmarneyime."

6-7 Wanjh Ruth balkoluy kumekbe kore birrihmimbuni, kundjalmekbe kurduyime ngu bu ngalbinjmorne ngarre bihwokrayekwoni bihmarneyimi. Kaluk Boaz bu nguneng dja bonguneng bekkarrinj kangemakminj, marmarrminj duninj, wanjh wam kekurrmerrinj kore manmim mimluhmimlulhdi. Kaluk Ruth baldjemhdjemhmiwam, birrengewerrhmeng wanjh balkekurrmerrinj.

8 Kumununburk Boaz lorrmen, wanjh borledmeng darnhkangebar-rhmeng binang daluk kahdarnhkeyo kurrenge nuye.

9 Wanjh bidjawam, "Ngalngale nguddanu?" Wanjh ngalengmanwali bibalwokmey yimeng, "Ngayenu Ruth, ngudda nawu darnkih ngarmud ngadberre nawu ngudda kanmarnewohnan. Wanjh ngadjare ngudda kannanhan dja ngarrmarren."

10 Boaz yimeng, "Wanjh ngaye ngadjare Yawey ngunmarnekurdyuime kunmak ngudda nawu ngalyahwurd ngardduk*. Kerrngehkenh bu yingulkmakni bu kunmekbe yihdjalyimi yihnahnani ngalbinjmorne ke, wanjh ngunemdjarrkwam, dja bolkkime kunmekbe kayime yerreh yiwernhngulmakminj duninj, bu minj yawurrinj yiyawayi ngunemarrimeninj nawu nakuken dja mak nawu namarladj.

11 Wanjh kanbekka, yuwn yikele, dja birrimirndewern rowk nawu kondah kabirrihni, kabirriburrbun bu nguddanu yidjalmak daluk. Kaluk kunmekbe ngakurdyuime ke bu ngudda yarrkka kandjurkkan.

12 Woybukkih wanjh ngaye kunu namud darnkih ke nawu marnewohnan, dja mak nabadbuyika bininj kumekbe kamhdi nawu mak darnkih duninj namud ke.

13-14 Med dja bolkkime kumunun yikeyuwn, kaluk malamalaywi ngare ngabekkan namekbe nawu bininj bu kunubewu ngunmarnewohnan. Bu baleh kayime, nungka kadjaremen ngunnahan, wanjh kunu bonj, dja bu minj kadjaremen ke ngunnahan, wanjh kunu ngayeman nahnan. Ngarayekwon kunwok kore Yawey nawu kadjalmimbi munguyh. Med yikeyuwn, kaluk kabarrhbun."

Wanjh Ruth balkekurrmerrinj kore kurrenge nuye. Dolkkang bu djarreh kumhkabelni ba minj nangale biwernhkukburrknayi. Boaz yimeng, "Minj ngadjare nangale kabekkan bu daluk kumwam kondah kore kabirrimimbun."

15 Dja mak bimarneyimeng ngalmekbe Ruth, "Yiyerrkkerrimen nawu kaddum yidjongbuyindi yimwaynamen." Balwaynameng wanjh nungka dahkendoy manbu manmim manwern, wanjh bimimngorrenkewong kore

* 3:10 Hebrew kayime "my daughter"

kukarlang ngarre. Wanjh Ruth balbidbom yirrunndi balwam kore kukadjeh.

¹⁶⁻¹⁷ Balwam bimarnebebmeng ngalbinjmorne ngarre, binang kumhdi bimdjawam, “Kaluk kuhni yiddok kamak rowk Ngalkurrng bu yiwam?” Wanjh Ruth ngalengmanwali bimbawokmey bimarneyolyolmeng rowk kore Boaz bihmarnekurduyimi. Dja mak bibadmarneyimeng ngalbinjmorne ngarre, yimeng, “Dja nungka minj djareniwirrinj ngaye ngamlarrkurdndeyi kore ngudda. Kunmekbe kunu nganwong manih manbu manwern manme.”

¹⁸ Naomi biwokmey bimarneyimeng, “Med, yibengyirrin Ngalkurrng†, kaluk yibekkan bu kunwok bu kamarnbuyindan, minj bolkkime bu kabolkmang, dja werrkwewerrkwerrk kadjalle ngunmarnekarremarnbun.”

4

Boaz Dja Bininj Nawu Namud Nuye Benewokmarnburrinj Ngalbu Ruthkenh

Ruth 4:1-12

¹ Wanjh Boaz bidbom kore birrihmirdemornnamerreni birrihyolyolmi mankarre kore kururrkdangmaye ngarre kore kukadjeh, kumekbe yer-rkang ningihni. Kaluk Elimelech nuyeni namud darnkih duninj nawu Boaz biyolyolmeng kumhdjalley. Wanjh Boaz bimarneyimeng, “Buyh! Ngudda nawu yihre, dabbolk! Yimbarlungmen, kondah yiyerrka.” Wanjh kumbarlungmeng yerrkang.

² Wanjh Boaz benmey kunbid dja kunbid nawu birribuyika bininj birrihkimuk, benmarneyimeng, “Kondah ngurrimyerrkarrimen.” Wanjh bedmanwali birriyerrkarrinj.

³ Wanjh Boaz biwelengmarneyimeng namekbe namud nawu ngokko bikimey*, yingkihyingkihni kumekbe, bimarneyimeng, “Naomi ngalbu kumdurndi Moabbeh kadjare kaweykan kabbal kunyahwurd bu nuyeni nawu ngad kanemud Elimelech.

⁴ Ngamwam ngadjareminj bengdayhke marneyime, yirrangduluburri-men kayime kore kumirr k bedberre nawu karrihni, nanih birrihkimuk dorrengh, nawu kabirriwohrnan kore kunred. Ngudda bu yidjaremen yirrunndiwe, wanjh kunu yirrunndiwemen, dja bu burrkyak, wanjh kanmarneyimen ba ngaburrbun. Minj mak nangale nabuyika karrurndiwe, dja ngudda nawu yikukdokme dja ngaye yerre balhmarnedi.” Namekbe bininj kumyimeng, “Ngoyh, ngarrurndiwe manmekbe kabbal.”

⁵ Wanjh Boaz balyimeng, “Bu yiman yirrangduluburren kunekke kabbal kore kubid Naomi, wanjh kunu Ruth dorrengh yimang, ngalbu kamarrdjukur ngalkang Moabbeh, ba bu wurdyaw yibornan wanjh nuye namekbe nawu doweng ba kabbal kakarrme kore nuyeni manbu bolkwakwam nawu doweng.”

⁶ Wanjh namekbe nabuyika namud yimeng, “Ngayenu nuk minj ngarrurndiwe manmekbe kabbal, kakarrewarre, minj kunmekbe ngakurduyime. Bu yimankek ngarrurndiwe, wanjh kunu minj ngad ngadberre wurdwurd, dja nabuyika nuye nawu doweng. Dja yingan yimang yidjaldurndiwemen manmekbe kabbal dja ngayenu kakarrewarre minj ngarrurndiwe.”

⁷⁻⁸ Kuninjkuu korroko kore Israel, bu birrikurduyimi, birridurndiweyi birriworreni birrimulewarreni bu kunwoybuk yongeni, wanjh

† 3:18 Hebrew “my daughter”

*

4:3 Nahni bininj wanjh wohrnowhrnani kunbolk nuyeni Elimelech.

nakudji balwelengdengeryerrkerrinj biwong nabuyika. Kunmekbe kunu mankarre yoy bedberre bu karremarnbuyindangeni. Wanjh bu namekbe nawu namud nawu kumhkukdokmi nuye nunganwali bimarneyimeng Boaz, “Yingaz ke wanjh yirrangduluburrinen manmekbe kabbal.” Wanjh kumbadyerrkerrinj nawu kundengekenh, nawu ngokko kumhwokdi, dja biwong.

⁹ Wanjh Boaz benwelengmarneyimeng nawu birrikihkimuk kumekbe birrihdjarrkni, dja mak nawu birriwern bininj, yimeng, “Ngudda wanjh bolkkime kandinang kunmekbe ngakurduyimeng, ngarrangduluburrinj kore Naomi namekbe rowk nawu bedberreni Elimelech dja bebeywurd nuye bokenh Chilion dja Mahlon.

¹⁰ Dja Ruth warridj ngalbu Moabbeh, kamarrdjukun nuyeni Mahlon, ngaleng warridj ngamang ngardduk ngalbininj kobeng, ba ngabornan beywurd bu bininj wanjh kawayhke kungey kore nuye nawu doweng, kore kunred nungan nuye kabolkkarme ba kungey nuye nawu doweng minj kadjobme kore namud nuye dja kore kunred nungan nuyekih. Ngudda rowk kandinang bolkkime bu kunmekbe ngakurduyimeng, ba bu ngurriyolyolme bu kandinang bu kunmekbe ngakurduyimeng.”

¹¹ Wanjh namekbe nawu bininj birrihminderri kore kurrangmaye kumekbe kukadjeh, birrikihkimuk warridj birriyimeng, “Yoh ngundinang bu kunmekbe yikurduyimeng, kaluk ngariyolyolme. Dja ngarridjawan Yawey kabimarnbun ngalmekbe daluk ngalbu kunnngimeng kore ngudda bu kayimerran yiman Rachel dja Leah nawu benehmangi nawern wurdyaw nuyeni Jacob, wanjh yikukenmen dja ngundiburrbun rowk nawu kabirriini kore kunred Bethlehem.

¹² Mak ngad bu ngarridjare bu Yawey ngunwon wurd nawern kore ngalinjngalu daluk, kamarnbuyindan namud ke yiman karohrok Perez nuye namud nawu wurdyaw berrewonengni Judah dja Tamar.”

Bu Ruth Yawmey Narangem

Ruth 4:13-16

¹³⁻¹⁴ Wanjh Boaz bimey Ruth ngalbininj kobeng nuye, wanjh benebalmarrinj, benewam kore kunred nungka nuyeni, kumekbe benehyoy. Beneyonginj, wanjh Yawey benbenewong nawu wurdyaw bu yawmey narangem. Wanjh morlehmorlenjbubuyika birrimarneyimeng Naomi, “Karriburumen duninj Yawey nawu ngunkarmeng, bu munguyh minj yiniwirrinj yimudyakniwirrinj[†]. Ngarridjare namekbe wurdyaw birriwern kabirriburlume dja kangeykukenenmen kore Israel.

¹⁵ Ngalbu ngudda ngalbinj morne ke ngunmarnedjare duninj, dja bu yikarmeninj kunbidkudji dja bokenh seven yayaw nawu bininj, wanjh yinjilngmakniwirrinj, dja ngalinjngalu yikarme Ruth, ngalbinj morne ke ngalbu ngunwernhnjilngmarnbun duninj, wanjh ngaleng ngalbu yawmey namekbe narangem, nawu yihyime Makkah. Wanjh nungka nawu namekbe ngunkangekerrngehme, dja yiman ngunkukkerrngehme bu yikohbanjmen.”

¹⁶ Wanjh Naomi bimey namekbe wurdyaw, biwanjbikarrmi, binahnani.

King David Nuye Mawahmawah

Ruth 4:17-22

¹⁷ Dja kaluk nawu morlehmorlenj kumekbe birrimhdarnhyoy, birimekbe nanu birringeykurrmeng Obed, birriwokkihiyimeng dorrengh, “Naomi, bimarnedanginj Namakkahmikenh.” Wanjh namekbe nawu

Obed kaluk bu dabbolkminj wanjh bibalbornang Jesse, kalukburrk Jesse bibalbornang David.

¹⁸⁻²² Nahni wanjh birrimekbe nawu Perez nuye namud birribalhornabornarreni. Perez kornkumo, beywurd nuye Hezron. Hezron kornkumo, beywurd Ram. Yibeng Ram bibalbornang Amminadab nuye beywurd. Yibeng Amminadab kornkumo, bibalbornang Nahshon. Yibeng nunganwali Nahshon, bibalbornang Salmon beywurd nuye. Salmon kornkumo, bibalbornang Boaz nuye beywurd. Yibeng Boazwali bibalbornang, kornkumo Boaz, beywurd nuye Obed. Yibeng nunganwali Obed kornkumo, bibalbornang Jesse beywurd. Dja Jesse kornkumo, David wanjh beywurd. Kumekbe wanjh kunu kabalyirriyo kore birribalhornabornarreni. Bonj.

Psalms

1

Baleh Manbolh Karrire?

Psalm 1

¹ Bininj nawu kadjalwarnyak kabekkabekkan kunwok bedberre biribuyika bininj nawu kunwarre kabirrikurduyime, wanjh nakka God kabimarnekurduyime kunmak. Nahni bininj minj kabenngunjdjikka biribuyika bininj nawu kunwarre kabirriyime, mak minj kabirriraworren bininj nawu kabirridjekmiwon God bu kabirrimalehmalelwon.

² Nawu namak bininj, wanjh kunbuyika kakurduyime. Nungka kadjalborlhme Yawey nuye mankarre manbu kabinjilngmarnbun. Nungka kadjalburrbun mahni mankarre kunbarnangarrakuyeng dja mak kunkakkuyeng.

³ Namekbe bininj yiman kayime manbu kahdulki darnkih kore mankabo. Manmekbe kundulk kaluk kakarme manwern manme, dja mak minj kamarlaworrdowen. Wanjh kore njalehnjale kakurduyime, wanjh kunmak rowk kabimarnebebe.

⁴ Dja nawu birriwarre bininj minj kunmekbe kakurduyimerran bedberre. Bedda wanjh yiman kayime kundalkdarleh manbu kunmayorrk kabuhbuhme dja kadjalburriwe.

⁵ God kabendjadme dja kabenwarrewan nahni birriwarre bininj. Wanjh minj bedda kabirriraworren nawu God nuye bininj bu kabirridjarrk-marnedi yiwarrudj nuye.

⁶ Kaluk nawu Yawey munguyh kabendjalnahnannawu birrimak bininj; dja nawu birriwarre bininj wanjh nakka kabenbawon kabirridjalyakmen.

2

Nawu Kawohrnan Rowk Kamulewarren

Psalm 2

¹ Njalekenh bininj nawu kabirriwohrnan kunredbubuyika bedberre kabirridjalkarremarnburren bu kabirrikurduyime kunwarre? Dja njalekenh birriwarlahkenh bininj rowk kabirrimarnburren bu kunwarrekenh kabirrikurduyime? Bu kabirrirohrokme, wanjh kabirridjalbarabun!

² Nawu kings dja princes kondah kurorrebeh wanjh kabirriwokburriwe nawu Yawey. Bedda wanjh manmolk kabirribekkarren bu kabindibunkenh Yawey dja mak namekbe bininj nuye nawu bikodjdjuhkgeng mankalckid dorreng*.

³ Bedda kabirriyime, "Mah! Karriwe God nuye wilmurrng chains, dja karringekkerren kore nungka kandukkang bu kankarme!"

⁴ Dja God nawu king duninj kahni kore heaven, wanjh kabendjekmiwon bedberre. Nawu Kawohrnan Rowk kabenmalelwon bedberre.

⁵ Wanjh kabendung bu kabenwokrayekwon, dja kayiddung bedberre, mak kabenmarnbun kabirridjalkelemen.

1:3 Jeremiah 17:8

2:1 Acts 4:25-26

* 2:2 "Nawu bikodjdjuhkgeng" kamenyime "nawu Messiah."

⁶ Wanjh kamulewarren bedberre, kayime, “Ngaye wanjh ngakurmeng king duninh nawu ngaye ngamunkeweng kore kunred Zion, kore kuward-dekimuk ngardduk, manbu kubolkdjamun duninh!”

⁷ Wanjh namekbe nawu king kayime, “Ngaye ngamulewan kore nawu Yawey nganbengdayhkeng, yimeng ngardduk, ‘Ngudda wanjh beywurd ngardduk. Bolkkime ngaye ngayimerranj ke kornkumo.

⁸ Kanmarrkdjawan njalehnjalekenh, dja ngaye won ngudda kunbolc rowk kore birriwarlahkenh bininj kabirrihni, dja wanjh kondah kurorre rowk kayimerran ngudda ke.

⁹ Ngudda yiman yibenbakkebakke kundulkwi wirlmurrng dorrengh; yibendjalbarrhke yiman kayime plate.’”

¹⁰ Mah, wanjh ngudda nawu kings rowk, ngurrinaharrimen dja kandibekkekakkan kore marnebengdayhke, ngudda nawu ngurrben-marnewohnan binihbininj kondah kurorre!

¹¹ Ngurrimarnedurrkmirrin nawu Yawey dja ngurrimarnekelenin. Ngurrikukdeldelmen bu ngurrinjilngmarrmarr nuye.

¹² Ngurriburlumen nawu nuye Beywurd ba minj kawernhdung dja ngunbularrbun ngudberre, dja wardi ngurridjaldowe bu ngurriwokbur-riwe nuye. Nungka wanjh karrung kundjalburrikudji. Dja bininj nawu kabirridjare nungka kabennghehke, wanjh kabirrinjilngmak.

3

King David Dingihdi Yiwarrudj Bu Kangewarreni

Psalm 3

¹ Ngudda Yawey, ngaye ngabenkarrme birriwern bininj nawu ngariyidko! Birridjalwern ngandiwirrihme!

² Birriwern bininj ngandiyolyolme, dja kabirriyime, “Nawu God minj kabibidyikarrme.”

³ Ngaye wanjh ngaburrbun bu ngudda Yawey nawu yiw-ernhmakkaykenh, dja ngudda kankukdjurruddi yiman shield ngardduk dja kankangemarnbun.

⁴ Wanjh ngaye ngakelekayhme nuye nawu Yawey, dja nungka ngankayh-mimang kore kaddum kuwarddekimuk kubolkdjamun nuye kahni.

⁵ Bu ngakekurrmerren wanjh ngadjalkodjkeyongen. Kaluk ngayawoyh-dolkan, dja nawu Yawey nganahnan ba ngadjaldarrkiddi.

⁶ Kunmekbekenh ngaye minj ngabenkengeme birridjalwern duninh bininj bu kabirrimyorrme dja ngandidjokohme kuhri kuhri.

⁷ Yawey, yirrolka! Kannghekemen, ngudda nawu God ngardduk! Yibendjalbun nawu ngandiwirrihme, yibenkiyarrkdo dja yibeniyidme-bakke bedberre bininj nawu kunwarre kabirriyime.

⁸ Yawey ngudda yidjalkudji kannghehke kore ngarribongdi. O Yawey, ngarridjare ngudda kunmak kanmarnekurduyime ngad bininj ke.

4

Ngaye Ngarri Yiwarrudj Bu Ngakodjkekurrmerren

Psalm 4

¹ Ngudda nawu God ngardduk, ngaye ngakayhme dja ngadjare kan-bekkekakkan dja kanwokmang. Ngaburrbun ngudda bu yidjalmak

duninjh. Bolkkime kankongibu dja kanbekkan bu yiwarrudj ngarri. Dja kunyid nganmarnengalmeng dja wernmerrinj ngardduk.

² Ngabenmarneyime nawu birriwern bininj, ngayime, “Ngudda nawu djalbininj, njalekenh kandidjalngeywirrihme? Yiddok ngudda munguyh ngurrimunkekadjung kunwok manbu minj kunwoybuk, ngudda nawu ngurrbenyawan gods nawu kabirrikurren munguyh?”

³ Ngurriburru! Nawu Yawey bendjarrngbom bininj nuye nawu kunmak kabirridjalkurduyime. Mak nungka nganbekkan gaye bu yiwarrudj ngarri nuye.

⁴ Mah, ngudda bininj bu ngurriyiddung, wanjh bu yuwn kunwarre ngurriyime. Mak bu ngurrikodjkekurrmerren wanjh ngurridjalburru bu njale kunmayali ngurrikarrme baybaywi kore kukange, dja kunu ngurridjalwoyak.

⁵ Ngurriwo dja ngurribu mayh nawu Yawey kadjare. Ngurridjalwoy-bukwo dja ngurriwokmarrkma nuye.”

⁶ Birriwern bininj kabirrihdjawayhme, bu kabirriyime, “Kaluk nangale kanwon kunmakmak kunwern kunmak? Ngudda Yawey, kanna ngadberre kunkongi dorrengh.”

⁷ Dja gaye ngayime bu ngudda Yawey kankangebarlkeng ngardduk kunnjilngmak dorrengh ke. Gaye ngawernhnjilngmakminj kore ngudda, dja birribuyika bininj kabirrinjilngmak bu kabirrikarrme manwern manme dja manbomak manbu wine.

⁸ Dja mak gaye ngakodjkekurrmerren dja ngadjalkeyo kunmodmikenh dorrengh bu kunmekbekenh ngudda Yawey yidjalkudji kannahnan dja kangehke munguyh.

5

Bininj Nawu Kabiburlume Yawey Nawu Kawohrnan Rowk

Psalms 5

¹ Ngudda nawu Yawey, kanbekkabekka gaye bu yiwarrudj ngahdi! Mak kanbekkan bu gaye ngahngolekdurrrkmarren.

² Ngudda wanjh king ngardduk dja mak God ngardduk. Wanjh kanbekkabekka kore ngakayhme dja djawahdjawan ngudda bu kanbidyikarmekenh. Gaye wanjh ngahdjaldi yiwarrudj bu marrkdjawan ke, ngudda nawu Yawey.

³ Bu kunkabel rowk ngudda kanwokbekkan. Kunkabelbubuyika gaye ngamkan kunwok ngardduk kore kumirrk ke, dja yeledj ngadjalmadbun kaluk bu ngudda kanwokmang.

⁴ Ngudda minj ngurrirohrok nabubuyika gods. Ngudda minj yinjinngmak kore njalenjale nawu nawarre. Kaluk nawu birriwarre bininj nakka minj ngurridjarrkyo kore ngudda.

⁵ Mak bininj nawu kabirrihburlumerren nakka minj kabirridi kore kumirrk ngudda ke. Ngudda wanjh yibenwidnan bininj rowk nawu kunwarre kabirrikurduyime.

⁶ Ngudda yibenbularrbu bininj nawu kabirrihkurrehkurren dja mak nawu kabindibalkowe birribuyika. Kaluk ngudda nawu Yawey yibenwernhwidnan bininj nawu kabindibun kabindikukurrme birribuyika.

⁷ Gaye wanjh, ngudda kanmarnedjare bulkkidj duninjh, dja kunmekbekenh kunu gaye ngamre dja ngamngime kore ngudda ke kunred. Mak

ngabarddurrukkurlhdan dja marnebodan ke, kore manrurrkdjamun manbu temple ke.

⁸ O Yawey ngudda, ngaye ngabenkarrme birriwern bininj nawu ngandi-widnan. Ngudda nawu mandjad duninj yidjalburrbun, wanjh kanka kore mandjad manbolh. Mak yibolhdjaddjadwo ke manbolh kore kumirrk ngardduk.

⁹ Nawu birrimekbe birriwarre bininj wanjh munguyh kabirridjalkur-rehkurren dja minj kunwoybuk kabirridjalwokdi. Bedda wanjh kabir-ridjare bu kabindiwarrewon nawu birribuyika bininj. Bedberre kunwok, makka yiman kayime kumidj kawokdi kore kurorre. Bedberre kundjen, wanjh kadjare kadjalkurrehkurren munguyh.

¹⁰ O God, yibendjadmen dja yibenwarrewan. Warridj ngadjare kabirrikukkolong kore manwarrehwarre mankarre kabirrihmarnbun. Bedda minj ngundiwokmarrkmang, wanjh yibenkukmunkewemen ba bu kanbawon munguyh.

¹¹ Dja bininj nawu kabirrimre kore ngudda ba yibenkukdjurrudin, wanjh nakka birriwernhnjilngmaknini! Dja mak munguyh birriwayinin kunjilngmak dorrengh. Mak yibenkukbarrku kunbid ke dorrengh, ba kunukka kamak kabirriini birrimekbe nawu ngundimarnedjare duninj.

¹² O Yawey, woybukkih ngudda kunmak yibenmarnekurduyime bininj nawu yibenmakwan. Mak yibenkukbalhme dja yibenmarnekukdjurrudin bedberre.

6

Karridi Yiwarrudj Bu Kunrayek Kambebme Kadberre

Psalm 6

¹ Ngudda nawu Yawey, yuwn kanbun bu yiyiddung ngardduk. Mak yuwn kanbengyolyolme kunrayek dorrengh kore ngudda bu kan-marnekangewurlhme.

² Yawey kankongibu! Ngaye ngangudjwarreminj. Kanmarnbu! Ngaye ngawernhabang kore kunmurrng rowk ngardduk.

³ Mak ngakagewarre duninj dja baleh kabolkyime bu ngudda kan-bidyikarrme? Yiddok kunkuyeng duninj?

⁴ O Yawey, yimborledmen dja kannghehke kore ngabongdi. Ngudda kandjalmarnedjare munguyh munguyh, wanjh kunmekbekenh kunu kannghekemen.

⁵ Bu ngad bininj ngarridowen, wanjh minj ngundiyawoyhburrbun. Nangale bininj mak ngunyawoyhburlume bu kahkukdudjindi kanjdji kore kumidj?

⁶ Ngaye ngangudjyakworrinj kore ngadjakbekkabekkani munguyh. Mak kunkakkuyeng nganalkkihyoy. Wanjh manbu kunmadj ngahdahkendi makka madjkihminj kunmimnalk ngardduk dorrengh.

⁷ Mak ngawernhnjilngwarreminj duninj, dja kunmekbekenh minj ngawernhbolknan. Mak ngamimwarreminj kunmimnalk dorrengh bu nawu ngarriyidko bininj ngandinjilngwarrewong.

⁸ Ngudda bininj nawu kunwarre ngurrikurduyime, wanjh kandibawo, ngurri-ray! Nawu Yawey, nakka nganbekkang kore ngahnalkbunalkbuni.

⁹ Nawu Yawey nganbekkang kore ngakayhmeng dja ngadjawam bu ngankongibun. Mak nawu Yawey nganwokmang kore ngahdi yiwarrudj nuye.

¹⁰ Bininj rowk nawu ngandiyidko, wanjh kabirriyemengalme, dja kabirikangewarremen. Bedda wanjh kundjalburrikudji kabirridjalbarabun, mak kabirridurnden dja ngandidjalbawon ngardduk.

7

Bu King David Dingihdi Yiwarrudj.

Psalm 7

¹ Ngudda Yawey, nawu God ngardduk, ngaye ngawarlkkarren kore ngudda ba bu kannahnan. Kanneghkemen kore birriwarre bininj rowk nawu ngandihkelekadjung.

² Wardi bedda ngandibun ngandikukdjalkdjalkmang yiman nabang lion. Bedda kabirridjare ngandikan kore minj nangale nganbidyikarme, dja wanjh ngandibun.

³ O Yawey, ngudda nawu God ngardduk! Ngaye minj nangale bininj ngawarrewoyi.

⁴ Mak nawu nganedabbolk nakka minj ngawarrewoyi. Dja minj mak ngadjirdmayi nuye bininj nawu nganeyidko bu djal burudjang.

⁵ Bu kuhni ngaye ngakurduyimeninj wanjh ngudda yibawo bininj nawu ngarriyidko bu ngannudjkadjung, ngandarrkidmang dja ngandibun, kaluk bu ngankukbawon kore kurorre ngahkukyo.

⁶ Wanjh ngudda nawu Yawey, wardi yiyiddu! Yibenbu nawu ngaye ngandihnjirrhmiwon. Dja yibenmarnekurduyimen mandjad kore yibendjadme.

⁷ Mak ngadjare yibenmirndewo bininj nawu kubolkbubuyikabeh kore ngudda yihyerrkan kore throne kaddum yihbarndi. Ngudda yibenmarnewohrnawohrn rowk.

⁸ Ngudda nawu Yawey yibendjadmen nawu kubolkbubuyikabeh bininj rowk! Mak ngaye warridj kandjadmen ngudda nawu Yiwernhwohnan Duninj! Ngudda wanjh kankangedjadme dja kanrohrokme wardi bu ngaye ngamak bininj.

⁹ Ngudda kanmayalinan dja mak kankangenan warridj, wanjh ngudda nawu kundjalmak yidjalkurduyime. Mak ngadjare bu ngudda yibenmarnbu nawu birribang bininj bu kabirringurdme kabirrihkurduyime kunwarre. Dja kannahna ngadberre bininj nawu ngundiwoybukwon.

¹⁰ Ngudda God nawu Yiwernhwohnan Duninj, ngudda wanjh kankukdjurruddi yiman shield ngardduk, mak yibennahnan munguyh bininj nawu mandjad kabirrikurduyime.

¹¹ Ngudda yinan kore kunmak kadjalkurduyimerran dja yibendjadme bininj bu djal mandjad. Wanjh ngudda kunbarnangarrabubuyika yiyid-dung wernkih kore yibennan bininj nawu kunwarre kabirrikurduyime.

¹² Bu baleh yarrkka nawu ngurriyidko minj kabirriborledme dja kabirribawon kunwarre bedberre, wanjh ngudda yidjurrbun nawu mandjawak dja kamarnbun bunarra kunkak dorreng ba bu yibenbun.

¹³ Ngudda wanjh yiyingkihmarnbun manbu yibenbunkenh. Manbu bunarra dorreng yingkih mang ba bu yiwurlhe bu yibenmarnewe nawu nawarre bininj.

¹⁴ Nawu nawarre bininj nakka kabirrimayalimarnburren ba bu kunwarrenkenh kabirrikarremarnbun dja kabirrikowekowe.

¹⁵ Wanjh birrimmekbe bininj nawu kunmekbe kabirrihkurduyime nakka wanjh kabirribolkkarung kanjdji duninj, wanjh bedmanbidju kumekbe kabirrikukwarrhme.

¹⁶ Manbu kunyid kabirrimarnbun makka wanjh kamdurndeng bedberre bedda, wanjh kabirrikodjkuluwarremen kore bedmandeleng kunwarre kabirrikurduyime.

¹⁷ Ngudda Yawey nawu yidjalkurduyime kunmak kore djal mandjad munguyh munguyh, dja kunmekbekenh ngaye ngawayini ke bu ngey-burluburlume ngudda Yawey nawu Yiwerhwohrnan Duninj.

8

Yawey Nawu Kanmarnewohrnan Kadberre Ngad Nawu Djal Bininj

Psalm 8

¹ Ngudda nawu Yawey, nawu Yiwohrnan ngadberre! Manbu kungey ke, wanjh manwerhngemakkaykenh duninj kore kubolkbubuyika rowk kondah kurorre! Dja ngudda nawu yihni kaddum kore heaven kore ngudda ke kunmakmak duninj.

² Ngudda yibenbukkang nawu wurdwurd dja nawu birribarrken bu bedda warridj ngundiburluburlume. Dja bininj nawu ngurriyidko wanjh yibenbularrbun rowk, dja yibenbun nawu yimankek kabirrimarnburren bu ngundinjirrke.

³ Bu ngaye ngabolknan kaddum kore heaven manbu yimarnbom kunbidwi ke, dja nganan manbu dird dja mankokkarrng manbu yikurrmeng kumekbe, wanjh ngaye ngadjawarren,

⁴ Adju! Njalekenh ngudda kanmarnemarrkwarre ngad nawu binihbininj? Kab njalekenh mak kannahnan ngadberre nawu djal bininj duninj?

⁵ Mak ngudda kankurrmeng ngad bininj darnkih kore ngudda nawu God duninj ba bu ngad ngarridarnhdi kore ngudda. Mak ngudda kanmarnbom ba bu ngarrimak dja ngarringeykimuk.

⁶ Ngudda kankurrmeng ba bu ngarriwohrnawohrnan kore njalehnjale rowk nawu ngudda yimarnbom kunbidwi ke. Wanjh ngad kunu ngarriyurrhke rowk kore yehyeng rowk yimarnbom, yiman

⁷ nawu sheep, dja mak bulikki, dja nawu mayh kurralkwaken,

⁸ mak nawu kungolwaken mayhmayh, dja djenj nawu kurrulawaken, mak njalehnjale nawu kayo kore kurrula kanjdji kukku.

⁹ Yoh, ngudda Yawey nawu Yiwohrnan rowk ngadberre, manbu kungey ke makka manwerhngemakkaykenh duninj dja ngundingegeburlume kore kubolkbubuyika rowk kondah kurorre!

9

Karriwayini Bu Karriburlume Nawu Kawohrnan Rowk

Psalm 9

¹ Ngaye djalburlume ngudda nawu Yawey kunkange ngardduk dorrengh, dja mak ngabenbengdayhke bedberre birriwern ba bu bedda kabirrikangebarrhme dja ngundiburluburlume kore yirurrkmirrikenh kundulkarre dorrengh ke.

² God, nawu Yiwerhngudjikimuk duninj, ngaye djalmanjbun, mak ngawayini nguddakenh kunnjilngmak dorrengh bu burluburlume.

³ Dja bu ngundimirrkmang nawu ngaye ngarriyidko bininj, wanjh kabirrikelerlobme dja kabirrimankan kaluk kabirriyakmen rowk kore kumirr ke.

⁴ Ngudda yiyerrkan kore yibenhdjadmeken, dja yibendjadme bininj kore djal mandjad dja kunwoybuk. Ngaye warridj ngudda kandjadmeng, dja ngudda wanjh kanmakwam dja kanmulewam bu ngaye ngamak.

⁵ Ngudda yibenwokdjalwong nawu kubolkbubuyikabeh dja yibenbom nawu birriwarre bininj. Ngudda yibenngeybularrbom dja nakka kabirridjalngeyyak munguyh munguyh.

⁶ Birrimekbe nawu ngarriyidko wanjh birriyakayakminj rowk. Mak kore kuredbubuyika bedberre birrihni ngudda yibenmarnerrrbakbakngeng. Bolkkime minj nangale kabenyawoyhburrbun.

⁷⁻⁸ Ngudda Yawey wanjh yidjalwohrnan munguyh munguyh dja yihni kore throne kore yiyingkikhukumarnburrinj bu yibendjadmeken birriwarlahkenh bininj rowk kore kondah kurorre. Ngudda yibendjaldjadme djal mandjad duninh. Mak ngudda yibenhnahnan birriwern rowk bininj kore ngudda ke kunmakkenh.

⁹ Ngudda Yawey yidjalkudji nawu yibenbidyikarrme bu kunyid kawernmerren bedberre. Wanjh nawu birrimarladj bininj nakka kabirrimrlobme kore ngudda.

¹⁰ Binihbininj nawu ngundingeykukenhme nakka wanjh ngundiwoybukwon, dja ngudda yidjalwoybuk dja minj mak yibenbodmewon. Kaluk kunmekbekenh bedda ngundimarrkkebbun.

¹¹ Ngudda Yawey yidjalwohrnawohrnan kore Zion* wanjh ngad ngundimarnewayini dja ngundiburluburlume. Mak ngundimulewan bu ngarbenbengdayhke bininj nawu kubolkbubuyika kabirrihni ba bu kabirriborlhme kore ngudda yikurduyimeng.

¹² Ngarriburrbun bu ngudda Yawey minj munguyh yibengmidjan kunwarre bedberre bininj nawu birrinarmandeyi dja yibendjalbun. Dja mak ngudda munguyh yibenkayhmibekkan bininj nawu kabirribongdi.

¹³ Nawu Yawey kankongibu! Yibenna nawu ngarriyidko bininj bu ngandinjirrhmiwon. Ngaye wanjh darnkih bu ngarrowen. Ngadjare kanbebken!

¹⁴ Kannghekemen ba bu ngawayini ke kore kurrangmaye ngarre kunred Zion. Kunmekbe kore ngadjalnjlngmak kore ngudda kanbidyikarrmeng.

¹⁵ Birribuyika bininj kore kubolkbubuyika yiman birrikukwarrarwarhmeng kore benmanbidju birribolkkaray, mak birriwarreworinj kore bedman kunwarre birrikurduyimeng.

¹⁶ Ngudda nawu Yawey yihdjalkurduyime djal kunmak bu yibendjadme bininj mandjaldjad duninh, dja bininj rowk ngundikurdunan. Dja nawu birriwarre bininj nakka wanjh bedmandeleng kabirriwarreworren kore kunwarre kabirridjalkurduyime.

¹⁷ Wanjh nawu birriwarre bininj nakka kabirrire kore kunred ngarre kundowikenh† dja kabirridjarrkni birribuyika bininj nawu kubolkbubuyikabeh nawu ngudda ngundiwirrihmeng.

¹⁸ Ngudda Yawey minj yibenbengmidjan bininj nawu birrimarladj dja mak bininj nawu kunyid dja kunrayek kabenmarnewernmerren.

¹⁹ Ngudda Yawey, wardi yidjalkurduyimen kore yidjare! Yuwn yibenbawon nawu kubolkbubuyikabeh bininj bu bedda kabirriwinhme. Wanjh yibenmirndekurrme kore ngudda ke court bu yibendjadmeken.

* 9:11 Zion manbu kunngeybuyika Jerusalem. † 9:17 Kore Hebrew kabolkngeyyo, "Sheol".

²⁰ Mak yibenmarnbu birrimekbe bininj bu kabirrikukdeldelme kunkele duninj dorrengh ba bu kabirrinarren bu bedda djal bininj birringudjwarre.

10

Bu Karridjawan Yawey Nawu Kawohrnan Rowk Bu Kanbidyikarme.

Psalm 10

¹ Ngudda Yawey, njalekenh yihdi djarreh? Kunrayek nganmarnewernmerrinj ngardduk dja njalekenh ngudda bolkkime yihwarlkkarren?

² Birriwarre bininj kabirriburlumerren dja mak nawu birribang bininj nakka kabindingudjkadjung nawu birrimarladj bininj, dja kabindidarrkidmang kore mankarre manwarre manbu bedda kabirrikarremarnbom.

³ Nawu birriwarre nakka kundjarewern, dja kabirriburlumerren kore kunwarre bedberre. Bedda kabindimakwan nawu birridedjwarlah bininj, dja mak ngundiwidnan ngudda nawu Yawey.

⁴ Bedda kabirriwernhburlumerren kaluk kunmekbekenh bedda minj kabirrikangeborledkerren kore ngudda, mak minj ngundimarnedjare ngudda God.

⁵ Birrimekbe nawu birriwarre bininj wanjh kabirrikukenworren dja kabirriburlumerren. Minj kabirriwernhburrbun manbu mankarre ngudda ke, mak munguyh kabindidjalnjirke nawu kabirriyidko bedberre.

⁶ Kore kukange bedberre bedda kabirrihyimerren, "Ngad minj njale kanbun kadberre! Ngad nakka karrihdjalnjilngmak munguyh munguyh, dja minj mak kunrayek kambembe kadberre."

⁷ Bedda wanjh kunwok kunwarre kabirriyime dja warridj kabirridjalkurren dja kabindiyol birribuyika bininj. Birrimekbe birridjalwarre bininj wanjh kabirriyolyolme kore kabirrikarremarnbun bu kunwarre kabirrikurduyime.

⁸ Bedda wanjh kabirriwarlkwarkkarren kuberrkkah kore kurrambalk, kabirrihmabun nawu djakwarre bininj kumekbe kamyimowon wanjh kabirridarrkidmang dja kabirribun.

⁹ Nawu nawarre bininj yiman lion nawu kahmarrwedowen. Nakka kahwarlkkayindi kore kurralk dja kabimadbun bininj nawu namarladj kamre, dja karrolkkarren kabitarrkidmang kore walabbi dja kabibalkukdorrorrke.

¹⁰ Nawu nawarre bininj yiman nabang dja ngudjbang duninj, wanjh kabenbun birrimak bininj.

¹¹ Wanjh nawu nabang bininj kanjdji kayimerren, "Nawu God minj kaburrbun! Nakka kahmimbalmiyindi dja minj ngannan kore ngaye ngakurduyime."

¹² Mah, Yawey, yirrolkka ngudda nawu God, wardi yibidwayhmen dja yiberlyirriyun ba yibenbidyikarmen bininj nawu ngundimarnedjare dja bedda kabirridjalngudjwarre.

¹³ Nawu birriwarre bininj ngundinjirrhmiwon dja njalekenh bedda kabirriyimerren kanjdji kore kukange bedberre, "Nungka God minj ngandjadme!"

¹⁴ Dja ngudda God yihbennan kore kunwarre kabindiwarrewon bedberre nawu birrimarladj bininj. Ngudda yiburrbun kore kunyid kawernmerren dja yidjare yibenbidyikarme. Bedda nawu birrimarladj wanjh kabirrikurmerren kore ngudda yibenbidyikarme, dja ngudda yiman kornkumo duninj bedberre nawu kornkumo yak.

¹⁵ Mah! Wanjh yibenberlbakkakemen nawu birriwarre bininj. Yibenbu ba yibenngurdke nawu manmolk kabirrihkurduyime kunwarre.

¹⁶ Ngudda Yawey wanjh king duninj munguyh munguyh, dja nawu birriwarlahkenh bininj nawu birriwarre kore kubolkwarlahkenh, nakka kaluk kabirridarrkidyakmen kondah kore kurorre.

¹⁷ Ngudda yibenbakkabekkan nawu birrimarladj bininj kore bedda kabirridjare yibenbidyikarme. Ngudda munguyh yibenkangemarnbun mak yibenbakkabekkan bu kabirrikayhme dja ngundidjawadjawan.

¹⁸ Mak ngudda yibennahnawu birrimarladj bininj, dja mak bininj nawu kabirribongdi kore nawu birribang duninj bindikurrmeng. Ngudda yibennahnawu ba kunukka minj nangale nawu kahni kondah kurorre kabenyawoyhkehleme birribuyika.

11

Yawey Nawu Kawohrnan Rowk Kannahnawu.

Psalm 11

¹ Ngakelerlobme kore Yawey nawu munguyh ngankukdjurrudan bu ngangehme bu kamak rowk. Dja njalekenh bu kunukka kadjimarneyime, "Waw! Yikelerlobmen yirrolka yiman mayhmayh karrollan, dja yiwarrarren kore kuwarddekimuk!"

² Ngurrina! Nawu birriwarre bininj ngokko birriyingkihmarbnom nawu bunarra bedberre, dja kabirriwarlkayindi kore munhmunun dja kabindidulubun nawu birrimak bininj.

³ Nawu nawoybuk bininj, nakka baleh kakurduyime bu kunwarre kawernhmerren?" Kuhni yikahwi bininj kabirriyime.

⁴ Nawu Yawey kayerrkan kore throne nuye, kaddum kore temple manbu manrurkdjamun nuye. Nungka wanjh kabenkurdunan binihbininj kanjdji kondah kore kurorre, ba bu kaburrbun rowk kore bedda kabirrikurduyime.

⁵ Nawu Yawey kabenrohrokme bininj rowk, nawu birrimak dja nawu birriwarre. Nungka kabenwirrihme kukange nuye dorrengh bininj nawu kabirridjalmanjgun bu kunwarre kabirrihkurduyime.

⁶ Nakka wanjh kabenmarneburriwe kunyirrke dja manbirlukimuk bu kabenkinje birrimekbe nawu birriwarre bininj, dja mak kabenmarne-munkewe kunmayorrkwarre bu kabenkukbukwon.

⁷ Nungka Yawey nakka nadjalkudji nadjalmak duninj. Nungka kadjaldjare bu bininj kabirridjadmerren bu djal mandjad duninj. Dja birriwern bininj nawu kunmak kabirrikurduyime nakka kaluk kabirrikenban.

12

Bu Kuniyid Kawernmerren Kadberre Wanjh Karridi Yiwarrudj.

Psalm 12

¹ Ngudda Yawey kanbidyikarmen! Birriwern bininj nawu ngundiwoy-bukwong nakka wanjh birridarrkidyakminj rowk! Nawu birrimak bininj ngudda ke, wanjh bonj, minj kabirrihni kondah kurorre.

² Bininj rowk kabirrikurrekurren bu kabirrikowerren, dja minj nangale mak nawoybuk dja kabirridjalkurren munguyh.

³ Wanjh birrimekbe nawu kabirrihburlumerren yiddok minj yibend-jendjobdjobke?

⁴ Bedda wanjh kabirrihburluburlumerren dja kanjdji baybaywi kabirriyimerren, "Ngad wanjh ngariyolyolme kore ngad ngarridjare, dja minj

nangale kandabke. Dja wanjh karriwokdangen ba bu karrimang rowk manbu karridjare!"

⁵ Wanjh Yawey kayime, "Mah. Ngaye ngarrollkan dja ngabenbidyikarme bininj nawu birringudjwarre dja mak nawu birrimarladj Ngabenbekkan bedda kabirrikayhme dja ngabenkukdjurrudan ba bu birriwarre bininj minj kabindimarneyime kunwarre." Kuhni yimeng nawu Yawey.

⁶ Dja nawu Yawey wanjh nawoybuk kore kawokkurrmerren, wanjh manbu kunwok nuye makka yiman kayime silver manbu bininj kabirriwolngwon seven times kore kunak.

⁷ O Yawey, kankukbalhmen ngadberre kore nawu birriwarre bininj ngandiwirrihme. Kannahna ba bu ngarringehme munguyh munguyh.

⁸ Nawu birriwarre bininj wanjh kabirrihdjalrenghe bu kabirriburluburlumerren, dja birridjalwern nakka kabirriburlumerren kore kundjalwarre duninhj kabirrikurduyime.

13

Karridjawan Yawey Nawu Kawohrnan Rowk Bu Kannghekekenh.

Psalm 13

¹ Ngudda Yawey, baleh kabolkyime? Yiddok ngudda bu kanbengmidjan ngaye? Bu yiddok munguyh munguyh? Mak yiddok kunkuyeng bu ngudda kanmarnekebwarlkkarren?

² Ngaye ngawarnyak kunmayali kunwarre ngakarme. Yiddok ngaye ngahdjalinjingwarre munguyh bu barnangarrakuyeng? Mak yiddok munguyh ngandihdjalbun nawu ngarriyidko?

³ Yawey! Ngudda ngardduk God, kanwokma bu yiwarrudj ngahdi dja djawahdjawan. Kanmimbayhkemen, wardi ngadjalmimburdme bu ngarrowen.

⁴ Wanjh kunu kabirriyime nawu ngaye ngarriyidko, "Bonj, wanjh ngad ngarriwinhmeng!" Bedda wanjh kabirrimarmarr ngayekenh bu ngamakan.

⁵ Bonj, ngaleng wanjh ngaye ngawernhburrbun bu ngudda kanhmarnedjare munguyh munguyh. Dja kore kukange ngardduk wanjh ngadjalmarmarr duninhj kore ngudda kannghekekenh.

⁶ Yoh, ngaye ngadjalwayini munguyh nuye Yawey, dja nungka ngandjalmarnekurduyime kunmak rowk.

14

Bu Karrbennan Nawu Birriwarre Bininj

Psalm 14

¹ Yikahwi bininj baybaywi kabirriyimerren, "God yak, dja God minj nakka kahdi!" Kuhni kabirriyime bininj nawu birribengwarr! Bedda wanjh kabirridjare kabirridjalkurduyime kunwarre. Minj kunmak kabirrikurduyime. Minj nangale bininj kakurduyime kunmak. Bonj, minj nakudji namak.

² Nawu Yawey kahni kaddum wanjh kamhbolknan kanjdji ba kabennan bininj rowk. Nungka kadjare kabengalke bininj nawu mayaliwern dja nawu kabirriyawan nawu God.

³ Dja larrk. Minj nangale bininj namak kahdi. Bedda wanjh birridjalwarrewarreminj rowk, dja birridjalbawong God. Minj nangale kakurduyime kunmak. Bonj, minj nadjalkudji namak kahdi.

4 Adju! Bedda nawu birriwarre bininj, baleh kabolkyime bu bedda kabirriborlhme? Minj bedda kabirringeykayhme nawu Yawey, dja kabindidjalbun Yawey nuye bininj dja kabindiyakwon.

5 Kumekbe kabirrihni Yawey nuye bininj, dja kabirriwernhkelemen. Dja God nungka kabirridjarrkdi. birrimak bininj, dja mak kabenbidyikarrme.

6 Ngudda nawu ngurriwarre bininj, ngurrikarrewarrewon bedberre bininj nawu birrimarladj, dja med, kabirrikelerlobme kore Yawey nawu kabennahnan.

7 Wanjh ngaye ngadjare nangale nawu kamdolckkan kore Zion ba kamre kabenbebke bininj nawu Israel benkebmawahmeng kore kabirribongdi! Bu Yawey, kabenmarnekurduyime kunmak bedberre nawu bininj nuye, wanjh nawu Jacob nuye namud birrinjilngmarmarrnin, dja nawu Israel benkebmawahmeng, nakka wanjh birriwernhnjilngmakmen.

15

Nangale Namak Bu Kahyo Kore Yawey?

Psalm 15

1 O Yawey kanbekka bu djawan! Nangale bininj namak bu kahyo kore ngudda kubolckdjamun ke? Nangale yidjare bu kahyo kore mandulum manbolckdjamun ke?

2 Nakka bininj nawu minj kunwarre kakurduyime, dja warridj kadjalkurduyime kore kunmakkenh. Namekbe bininj wanjh kadjalwokdi kukangebhe nuye kore kunwoybuk, dja minj kakurren.

3 Mak minj kabiolyolme kunwarrekenh nawu beneredbo bininj, dja minj mak kabiwarrewon. Minj kabimulewan nabuyika bininj bu kabiwowarrewon.

4 Namekbe bininj wanjh kabiwirrihme bininj nawu nawarre dja nawu nabang. Dja kabenburlume bininj nawu kabirriwoybukwon nawu Yawey. Namekbe bininj, bu kawokkurmerren, wanjh minj kamayaliborledme bu kunwarddekenh, dja bonj, kadjalkurduyime kore kunwok nuye.

5 Nungka mak kabenbidyikarrme nawu kabirridjawan kunwarddekenh, dja minj karredjwarlahmen. Kadjalmbun yeledj kaluk bu kabirikukdurndiwe. Nahni bininj namak, minj kayawan kunwardde ba bu kabimarnekurren bininj kore court.

Bininj nawu kakurduyime kuhni rowk, wanjh nungka kadjalldi dja minj kamankan munguyh munguyh.

16

Nawu Kawohran Rowk Kabennahnan Bininj Nuye.

Psalm 16

1 Ngudda nawu God, ngaye ngamwam kore ngudda ba bu kannahnan, dja ngadjare kanngehke!

2 Ngaye ngamarneyimeng nawu Yawey, "Ngudda wanjh kanmarnewohnan ngardduk. Minj njale namakmak ngahkarrme, djald ngudda yidjalkudji."

3 Ngabenburrbun Yawey nuye bininj nawu kondah kubolckkimuk kabirrihni. Bedda birrimak duninh dja ngandinjilngmarnbun.

4 Dja birribuyika bininj nawu kabirrimarnebodan nabubuyika gods, yiman idols, nakka wanjh kunyid kawernmerren bedberre. Dja ngaye minj ngarriraworren bininj bu kabirrimarnekine mayh bedberre idols.

Dja minj mak ngabenngeybun kungey bedberre birribuyika gods bu ngarri yiwarrudj.

⁵ Yawey, ngudda yidjalkudji kanmarneyingkihkurrmeng kunmak ngardduk dja kannjilngmarnbun munguyh. Ngudda wanjh kanmarnebolknahan munguyh.

⁶ Ngudda kanwon namakmak, dja kanmarnekurduyime bu djal kunmakkenh, dja gaye wanjh madbun ke kunnjilngmak dorreng.

⁷ Gaye ngaburlume Yawey nawu nganbengdayhke munguyh. Mak bu kukakwern, gaye ngadjalbekkan bu nungka nganbukkabukkan kanjdji kore kukange ngardduk.

⁸ Gaye wanjh munguyh ngadjalburrbun nawu Yawey yiman bu ngakebnan kore kumirrk ngardduk. Nungka kahdarnhdi kore kubolkkukun ngardduk, wanjh kunu minj njale mak ngankukrokayhwe.

⁹ Wanjh kunmekbekenh kunu ngawernhnjilngmak dja ngayolyolmerren bu ngadjalmarmarr kore nungka. Mak ngadjalngehme kore nungka kannahan.

¹⁰ Dja ngudda Yawey minj kanbawon bu ngakukdujdjindi kore kumidj. Mak minj yibawon bininj nawu namak ke bu kakuknudmen.

¹¹ Ngudda wanjh kanbolhbukkang manbolhmak ba bu ngadjaldarrrkiddi. Kaluk kankangenjilngmarnbun bu ngudda munguyh ngarrhdjar-rkdi, dja kankurrme kore kubidkukun ke ba ngadjalwernhnjilngmak bu munguyh munguyh.

17

Bu King David Danganj Yiwarrudj.

Psalm 17

¹ Yawey, gaye minj kunwarre ngayimeninj! Ngadjare ngudda kankayh-mibekkan ngahdi yiwarrudj. Kanbekkabekka dja gaye minj ngakurren bu ngayolyolmerren.

² Ngudda yidjalkudji kandjadme bu djal mandjad. Ngudda munguyh yinan kore kunmak dja kunwarre kakurduyimerran, wanjh ngadjare ngudda kannan bolkkime.

³ Ngadjare bu kankangeburrbun dja kukak dorreng kankangerohrokme, dja minj kunwarre yingalke, dja minj ngayimeninj. Ngadjalkarremarnburrinj ba bu minj ngawokdi kore kunwarrekenh.

⁴ Gaye minj ngakurduyime kore birribuyika bininj kabirrikurduyime. Dja ngadjalwokmarrkmang manbu kunwok ke ba bu minj ngabenngunj-djikan nawu birribang bininj.

⁵ Ngadjalkadjungi manbolh ke. Mak minj ngawohmankayi. Ngadjal-renghey bu ngudda djalmunkekadjungi.

⁶ Gaye ngaburrbun bu ngudda kanbidyikarrme, wanjh kunmekbekenh bu ngarri yiwarrudj dja djawadjawan. Wanjh kanbekka dja kanwokma!

⁷ Ngudda yihdulkarrekimuk, dja kangehke ngad bininj kore kunbid kukun ke, dja ngad ngarrimrlobmeng kore ngudda ba yibendabke nawu birriyidko ngadberre. Kanmarnebukkarren ba ngarriburrbun ngudda kandjalmarnedjare, dja ngarridjalkangebarrhme.

⁸ Kanwernhnahna munguyh, dja kankukbalhmen mak kanwarlkka kore kanjdji kubid ke yiman mayhmayh yaw kawarlkayindi kanjdji kore kuwel ngarre ngalbadjan.

⁹ Yuwn yibenbawon nawu birriwarre bininj bu bedda ngandiwabmin-guneng ba bu ngandidjokohme dja ngandibun.

¹⁰ Bedda minj kabindikongibun birribuyika dja nakka kabirridjal-burlumerren munguyh.

¹¹ Ngokko wanjh ngandihkelekadjungu kurih kuhrih dja ngandidabd-abkeng. Bolkkime wanjh ngandiwerhkhuknan ba ngandibun.

¹² Dja bedda yiman lions nawu kabirrimarrwedowen kabirriyawan manme, mak bedda yiman lion nakimuk bu kahwarlkkayindi kore kungarre ba bu ngankukdjalkmang.

¹³ Yawey! Wardi baleh kab yikurduyime. Yirrolka dja yibenbu birrimekbe nawu birriwarre bininj bu mandjawak dorrengh ke. Dja kannghehkemen, dja wardi bedda ngandibun.

¹⁴ Wanjh yiberlyirriyun kubid ke dja kannghehkemen kore nawu birri-warre bininj ngandibongkarrme. Bedda kabirridjaldjare manbu kondah kurorrebeh, kaluk kabirradjaldarrkidbolkyakmen.

Dja ngad bininj nawu ngudda kanmarnedjare, wanjh kandjalwon manme, dja mak yibenworrkmiwon wurdwurd ngadberre, dja mak nawu mawahmawah ngadberre, nakka kaluk manwern kabirrikarrme.

¹⁵ Dja ngaye minj kunwarre ngayimeninj bu ngawarrewoyi. Kaluk ngaye wanjh kebnan ngudda! Bu ngarrollkan kore ngakeyo dja ngamimbayh-men, wanjh ngaye kebnan dja ngadjalwernhnjilngmakmen.

18

Bu King David Wayini Bu Bimanjbom Nawu Kawohrnan Rowk.

Psalm 18:1-19

¹ Yawey, ngaye marnedjare ngudda nawu kanmurrngrayekwon.

² Yawey wanjh nakka ngardduk kunwardde manbu manrayek, mak ngannahan dja ngangehke. Nungka ngardduk God nawu ngankuk-balhme, dja ngakelerlobme kore nungka ba ngannahan. Nungka munguyh ngankukdjurrudi dja mak ngangehke. Ngaye wanjh ngawar-lkarrren kore nungka ngankurrme.

³ Ngaye munguyh ngakayhme nawu Yawey, dja ngad bininj rowk wanjh karriburluburlumen! Nungka wanjh nganbebke kore birribang bininj nawu ngariyidko.

⁴ Nungka ngangehkeng kore manbu yiman kundowikenh ngarre kunyarl, makka ngandukkarrukkayi, warridj kukku manbu bodjurrubuhi ngankuyinngakkeng.

⁵ Mak ngankukdukkadukkang kunyarl manbu kumidj ngarre, mak kundowikenh nganbongkarrmeninj ngardduk.

⁶ Ngahkarrmi kunkimuk kunrayek, wanjh ngaye ngakayhmikayhmi nawu Yawey. Ngadjalkayhmi nungka nawu God ngardduk ba ngan-bidyikarrmeng. Nungka wanjh ngankayhmibek kang kore nuye templebeh dingihdi, wanjh kanwokmangi kore kuncanem nuye.

⁷ Wanjh nungka yiddungi, dja kondah kurorre makka bolkwodjor-rhmiyindanj, dja manbu kunwarddekimuk makka wanjh deldelmeng nawu kanjdjiwi kurredjmad!

⁸ Wardi kundolng dolngbebmi kore kukeb nuye dja yiman wehmiwehmi manbirluworldjenbabang kore kurrangbeh yiman kunyirreke manbang duninj.

⁹ Wanjh nungka dangmarrhmay manbu kunngol yiman kayime manbur-rba dja kumkoluy kunmayorrkkimuk dorrengh kore kumhdengebarndi.

10 Nungka kumwam yiman kayime morneni kore kubodmebodme bedberre mayh nawu birriwelyi dja wanjh dolkarrinj kaddum. Yiman kayime nungka renehrey kore kunmayorrk dorreng.

11 Mak manbu kunkak makka yiman kukbarrkburrinj, dja kunngol manbu kore namarrkon kangurdulme, makka ngolbalhmeng bu nungka yiman djongburrinj.

12 Kore nungka dingihdi wanjh bolkwaydi wernkih duninj, dja wanjh munkeweng manyirrkerrk, dja namarrkon mayhkemayhkeyi kunkimuk yiman kunak duninj, dja wanjh kunngolburlerri djalkmiwam.

13 Wanjh wokdanginj nawu Yawey! Wokdi yiman kayime ngurdulmi kunkimuk kore kaddumbek! Kunwok nuye nawu Nawernhkimuk Duninj wanjh wokwarlahminj.

14 Nungka benkelekadjungu bunarra dorreng bu benyarlarrrkeng nawu birriyidko nuye. Nungka benbuni manbu namarrkon kunkimuk dorreng.

15 Nungka yiddungi dja kebbuhmi, wanjh darrarrhmi kore kurrula, wanjh manbu mankabokimuk makka boyakmerreni wanjh bu bolkbukmeni nakka bolkdjorlokni kanjdji duninj.

16 Wanjh kunmekbe nungka nganberlmey kore kaddumbek, dja nganwayhkeng kore kurrulaburldjarn ngahdjuhmiyindi.

17 Mak nganbebkeng kore birringudjbang bininj nawu ngarriyidko bu bedda birridjareni ngandibuyi. Bedda wanjh birringudjbang dja ngaye larrk.

18 Bedda ngandimarnebebmeng bu kundjak kundulmuk wernmerrij ngardduk. Bu kunmekbe kunbarnangarra ngandibuyi, dja Yawey nganyikarmeng dja wanjh kamak.

19 Kaluk nungka nganbebkeng dja ngankurmeng kore kubolkmak. Nungka wanjh nganngekhengk dja nungka njilngmakminj ngardduk.

Bu Nawu Yawey Kanmarnekurduyime Kunmak.

Psalm 18:20-26

20 Ngudda Yawey yikurduyimeng kundjalmak ngardduk bu ngaye mandjad ngahrey, dja kanwong kore nganmarnekurrmeng kahdjedjenyo ngardduk bu ngaye minj kunwarre ngayimeninj.

21 Ngaye ngadjalkurduyimeng kore ngudda ke mankarre, dja minj bodmewoyi dja bawoyi ngudda nawu God ngardduk bu kunwarre ngakurduyimeninj.

22 Kore kunmayali ngardduk nakka ngadjalkarrme mankarre ke. Minj mak ngabengmidjan kore ngudda ke kunwok manbu kanwokwong.

23 Ngaye djalwernhwokmarrkmang mak nganahnarren ba bu minj kunwarre ngakurduyime.

24 Ngudda Yawey yikurduyimeng kundjalmak ngardduk bu ngaye mandjad ngahrey, dja kanwong kore nganmarnekurrmeng kahdjedjenyo ngardduk bu ngaye minj kunwarre ngayimeninj.

25 Yawey ngudda yibenmarnekurduyime kunmak bedberre bininj nawu ngundidjalwoybukwon kore yibenmarnewokkurmerrinj bedberre, dja mak ngudda yibenmarnekurduyime kunmak bedberre nawu birrimak bininj.

26 Bininj nawu kabirriwarnyak kunwarre kore kukange bedberre dja minj kabirrimayaliborledme, wanjh ngudda yibendjalmarnedjare bedberre dja minj yibenbawon. Dja bininj nawu kabirridjare ngundidjalwokwarrewon ke, nakka wanjh yibendjالبengwarrewon bedberre.

King David Kabimanjbun God Nawu Nadjalkudji Bibidyikarmeng.

Psalm 18:27-50

²⁷ Ngudda yibennghehke bininj nawu birrimarladj. Bininj nawu kabiriburlumerren, wanjh ngudda yibenmarnbun bu kabirriyemengalme.

²⁸ Dja ngudda Yawey wanjh kanhdjalkangewolkan munguyh dja ngudda munguyh yimarnbun manbu kunkak kore ngani bu nganmarnebolkwolkayindan.

²⁹ Ngudda mak kanbidyikarrme ba ngabenbun birriwern bininj nawu birribang. Ngudda God ngardduk dja kanwayhke ba ngabidbun kore kawarnamhyo kunkimukkenh.

³⁰ Ngayolyolme God nawu mankarre kamarnbun wanjh mankarremakkaykenh duninj, dja mak nuye kunwok wanjh kunwok kundjal-mak duninj. Yoh. Nawu Yawey kabenkukballhme nawu kabirrikelerlobme kore nungka ba bu kabenbidyikarrme.

³¹ Ngudda Yawey, yidjalkudji God! Ngudda God ngadberre, yidjalkudji nawu kunwardderayek duninj ngadberre kore ngarriwarlkkayindi.

³² Nungka God nadjalkudji nganwon kunngudj, dja mak nungka nganmikan kore manbolh mandjad.

³³ Warridj nganmarnbun bu wernkih ngarlobme yiman mayh nawu deer. Dja nungka nawu nganbidyikarrme bu ngarrencegebarndangen kaddum kore kuwarddekimuk.

³⁴ Mak nganbidbukkabukkan bu ngarriburrenkenh bininj kore war, warridj kunberl ngardduk nganwong kunngudj ba bu ngarrowkke nawu manbang bunarra.

³⁵ Ngudda yidjalkudji nawu kankukdjurruddi ba bu ngaye ngawinhme. Ngudda yiman yiboddan ba bu kanbidmang ngardduk kunbidkun dja kanngeykimukwon.

³⁶ Mak manbolh kore ngahre nakka yibolkbirrhmeng ngardduk ba bu ngaye ngahdjare kamak rowk dja minj mak ngabungkarrkbun.

³⁷ Nawu ngarriyidko bininj, nakka munguyh ngabenngudjkadjuy dja ngabenyurrhkeng bedberre wanjh ngabenbom. Minj ngangurdmeninj dja ngabendjalyakwong.

³⁸ Ngaye ngabenbuni, yiman kayime ngabenkukdjubulhmeng, wanjh birrikukwarrarrrhmi kore kurrenge ngardduk dja minj birriyawoyh-dokkayi.

³⁹ Yawey, ngudda nawu kanngudjmarnbom kore ngarriburrenkenh ba bu ngawinhmeng. Warridj yibendjurrkkang nawu ngarriyidko bininj bu ngandimarneboddan kore kurrenge ngardduk.

⁴⁰ Nawu ngaye ngandiwidnan bininj ngudda yibenmarnbom bu birrikel-erlobmerrinj ba bu ngaye ngawinhmeng dja ngabenyakwong.

⁴¹ Bedda birrikelekayhmi bu nangale kabenkayhmibekkan, dja djalburrkyak, minj nangale benbekkayi. Bedda ngundikayhmi ke, dja minj yibenwokmayi.

⁴² Ngabendjubudjubulhmi yiman kundjulng ngabenmarnbuni dja kunmayorrk benbubuhmi. Ngaye ngabenyakarrbuni yiman kunkih kore manbolh.

⁴³ Yawey ngudda kanbekkeng kore bininj ngardduk nawu ngandidungi, mak ngudda kanmarnbom bu ngabenmarnedokme birribuyika bininj bedberre nawu birridjenbubuyika dja bolkkime bedda ngandihmarnedur-rrkmirri ngaye.

⁴⁴ Bedda ngandibekkabekkan dja werkkwerrk ngandiwokmarrkmang. Bininj nawu kubolkbubuyikabeh wanjh ngandikengehme.

⁴⁵ Bedda kabirridjalkale dja kabirridjalkangewarremen. Kabirrimbeherren kunkele dorreng kore kabirrihyongoyo.

⁴⁶ Yawey, gaye djalmanjibun dja burluburlume! Ngudda nawu yidjalmimbi munguyh. Ngudda nawu yiman manwarddekimuk kore ngawarlkarren. Wanjh ngarriwern bininj rowk ngundingyeburluburlumen.

⁴⁷ Mak kankidmey bu yibenbom, dja yibenkurmeng nawu kubolk-bubuyikabeh kore kubid ngardduk.

⁴⁸ Warridj kore bininj nawu ngarriyidko wanjh ngudda kankukbalhmi dja kanmarnbom bu ngawernhdokme bedberre birridjalwern nawu ngandiwirriheng. Ngudda kanbekeng kore nawu birribang bininj ngandibuyi.

⁴⁹ Yawey, gaye djalburluburlume munguyh bu ngarriraworren bininj kore kubolkbubuyika rowk Gaye wanjh ngeyburluburlume ngudda ke kungey.

⁵⁰ Ngudda yidjarrngbom bininj ke, dja yimarnbom king. Wanjh yiwong kundulkarre dja kunu nungka winhmeng munguyh. Ngudda wanjh yibendjalmarnedjare David nawu yikodjdjukeng, dja mak nawu mawahmawah nuye munguyh munguyh.

19

Kore Kunmakmak Nuye God Dja Mankarre Nuye

Psalm 19

¹ Bu karriboldknan, dja karribekkan manbu kaddum duninjh, wanjh yiman kahyolyolme manbu God nuye kunmakmak, dja manbu kunnngol makka kabimulewan God nawu marnbom rowk kunbidwi nuye.

² Mak bu kunbarnangarrabubuyika dja djalmunguyh manbu kunnngol kabihmulewan dja kabihyolyolme nawu God. Mak kabalyime manbu kunkakwern bu kanmarneyime God nuye kunmayali kunwern.

³ Minj kunwokkudji kawokdi, dja birriwarlahkenh bininj rowk nawu kabirriwokdi kunwokbubuyika, wanjh bedda kabirribekkabekkan kore kunnngol kahmulewan.

⁴ Dja maninjmanu kunwok kare kubolkwarlahkenh rowk, dja maninjmanu kunwok kahdjale djarreh duninjh kore kubolkbubuyika rowk.

God marnbom kaddum duninjh, yiman dabburlin djabnameng ngarre kundung bu kahdi.

⁵ Wanjh nawu kundung kawayhme yiman bininj kambebmen bu kabimang ngalbininjkobeng bu mulil ngarre kabenemarrenkenh.

Dja mak nawu kundung yiman kayime nawu ngudjbang bininj bu karlobme kunnjilngmak dorreng, dja kabenyurhke birribuyika rowk.

⁶ Dja mahni kundung wanjh kambebme, kare, kayibme, kamyawoyhdurdeng kore kaddum kunnngol. Minj nangale kawarlkarren nuye nawu kundungbang.

⁷ Kaluk mankarre nuye nawu Yawey, makka mandjalmakaykenh duninjh, dja wanjh kanmalngkerrngehme kadberre. Manbu kore Yawey kanbukkabukkan kadberre manbu kunwok, wanjh minj kankowe. Warridj kunmayali kabenwon nawu birrikodjkuluwarre bininj.

⁸ Mak kore nawu Yawey kayolyolme kadberre bu makka mandjad; makka warridj kanmarnbun bu karrikangenjilngmak. Mak kore kanmarnewokrayekwon, nakka wanjh yiman kayime kanmarnewernhbolkwolkan kadberre.

⁹ Bu ngad karrikelemen nawu Yawey, wanjh kamak kore nungka; nakka djalmunguyh karrimarneboddan. Mak kore kawokmarnburren kadberre, makka djal mandjad duninh, dja manmakkayhkenh.

¹⁰ Nawu wirlmurrng gold nakka walakkih bu karridjare. Dja karriwernhdjarenin manbu kunwok nuye Yawey kore wokmarnburrinj kadberre. Dja kore Yawey nuye njalehnjale nawu karremarnbom, makka manwernhmanjmakkayhkenh dja karrokme manbu mankung manmanjmak.

¹¹ Ngudda nawu Yiwohrnan rowk, ngudda bu kanbukkabukkan dja kanbengdayhke ba bu ngaye wokmarrkmang ke, wanjh ngaye nawu marnedurrkmirri ke, ngawohmang nawu kahdjedjenyo ngardduk.

¹² Minj ngad bininj ngarriwernhburrbun kore ngarrihkurduyime kunwarre. Dja ngaye djawan bu yibengmidjda ngardduk kunwarre ngakurduyime manbu kawarllkayindi.

¹³ Dja yuwn kanbawon ngaye nawu marnedurrkmirri ke bu ngaye ngamarnburren kunwarre ngakurduyime. Ngaye wanjh ngawarnyak bu kunwarre ngandjurrkkan. Ngadjare kunukka kamak ngani, minj njale ngawarrewon kore ngudda, dja minj kunwarre duninh ngakurduyime.

¹⁴ Nawu Yawey! Ngadjare kunwok ngardduk dja mak kunmayali ngardduk kore baybaywi ngabekkarren, bu kamakmen rowk kore ngudda. Mak ngadjare bu njilngmarnbun ngudda yidjalkudji nawu kannahnan dja kangehke ngaye.

20

Yiwarrudj Karridi Bu Karriwinhmekenh

Psalms 20

¹ Ngarrri yiwarrudj dja ngadjawan Yawey ba ngunbekkan dja ngungehke bu ngudda kunrayek yikarrme. Ngadjare God nawu ngeykimuk duninh, nawu Jacob bimarneboddanj, wanjh ngundjalnahan.

² Nakka kahdi kore kubolkdjamun duninh nuye, wanjh ngadjawan bu ngunmarnemunkewe nawu ngunbidyikarrme. Nakka wanjh kahdi kore Zion, wanjh ngadjare mak ngunnahan kunmekbebeh.

³ Ngadjawan bu kaburrbun nawu namakmak ke nawu yikurrmeng nuye, wanjh kanjilngmakmen bu njale ngudda yimarnekinjeng bu yiwong nuye.

⁴ Mak ngadjawan Yawey bu kakurduyime nawu njale ngudda yidjare kore kukange ke. Mak ngadjawan bu ngunbidyikarrme ba bu kakurduyimerran rowk ngudda yikarremarnburren.

⁵ Ngudda nawu king, wanjh ngudda kaluk yiwinhme, dja warridj karrimulilmang mak manmadjmak karriwayhke kore kunngay nuye nawu God kadberre. Wanjh ngarridjare nawu Yawey wanjh ngunmarnekurduyime rowk kore ngudda yidjawan.

⁶ Bolkkime ngaye ngaburrbun bu Yawey kabingehke nahn bininj nawu bikodjdjuhkenge nuye. Mak kabiwernhbekkan kore kaddumbek bu kahdi kubolkdjamun nuye. Nakka narrulkarrekimuk duninh kore kubidkun nuye dja kabingehke.

⁷ Yikahwi bininj kabirriyime bu kabirrinahnarren nawu djarrang dja chariots dorrengh, dja ngad wanjh karridjalwoybukwon kunngay nuye Yawey nawu God kadberre.

⁸ Kaluk birrimekbe bininj wanjh nakka kabenbungwarrewon wanjh kumekbe kabirrimankan, dja ngad nakka karridengerayekmen bu mandjad karridi.

⁹ Yawey, yiwo kunngudj ke king nawu yidjarrngbom ba bu nungka kadjalwinhme. Kanwokma ngadberre bu ngarridi yiwarrudj ngundidjawan.

21

Karrimanjbun Nawu Kawohrnan Rowk Bu Karriwinhmeng.

Psalm 21

¹ Yawey, ngudda yiwernhdulkarrekimuk duninj, dja nawu bininj ngudda yidjarrngbom dja yimarnbom king, wanjh kunmekbekenh king nawu ngudda yimarnbom wanjh kawernhmarmarr duninj. Nungka wanjh mulil kakarrme kore kunwernkah yimarnbun kawinhme kore kabirriburren birriyidko nuye.

² Ngudda yikurduyimeng kore nungka wernhdjareni kore kukange nuye dja ngudda minj yikaybuyi.

³ Ngudda yikimey namekbe bininj nawu yidjarrngbom, dja yiwong kunmakmak kunwern. Mak yikodjdjombom nawu manmak duninj gold crown manbu kings kabirrikodjdjongbuyindi.

⁴ Nungka ngundjawam bu kunkuyeng kadjalminbi wanjh ngudda yiwong kundarrkid ba bu kadjaldarrkiddi munguyh munguyh.

⁵ Ngudda yiwong kunngudj ba bu nungka kunwernkah winhmeng. Wanjh kunmekbekenh nungka wernhkukeminj duninj. Mak ngudda yingeykimukwong dja yimarnbom bu wernhkimukminj.

⁶ Woybukkih ngudda yimarnekurduyimeng kunmak bu munguyh munguyh. Dja yinjilngmarnbom bu darnkih yihdi nuye ngudda nawu yiwernhmakkaykenh.

⁷ Namekbe nawu king ngunwokmarrkmang dja ngundjalwoybukwon ngudda Yawey. Ngudda wanjh yidjalmarnedjare munguyh munguyh, dja kunmekbekenh nungka kahdjaldi dja minj nangale kakukrokayhwe.

⁸ Yawey ngudda yibendarrkidmang nawu ngurriyidko bininj, kunbidkukun ke dorrengh. Ngudda yibendjالبongkurrme nawu ngundiwidnan rowk, kubidkukun ke dorrengh.

⁹ Bu ngudda yibenmarnebebme wanjh yibenwurhke yiman kunak kabirrikukrung kore kunkangeyid ke. Nakka kaluk manbirluwoldjen kabenkuyakwon. Ngudda yiman mayh yibenkukwukme.

¹⁰ Ngudda kaluk yibenbularrbun nawu namud rowk bedberre kondah kore kurorre, wanjh nawu mawahmawah bedberre kabirridarrkidkukyakayakmen.

¹¹ Kore kabirrihkarremarnbun yimankek ngundikanjcurrmeninj bu ngundibuyi dja makka kaluk kayimerran bu djalburryak, kabirridjalbarabun.

¹² Ngudda yibenmarnbun bu kabirrikelerlobmerren. Yimarnburren bu yiburriwe bunarra kore bedda.

¹³ Mah, Yawey ngudda wanjh ngurriwernhgudjbang duninj, wanjh ngad ngundiburuburlume. Dja mak ngarriwayini ke dja ngundi-iburlume bu yikarrme kundulkarre duninj.

22

Bininj Nawu Kadjalkangewarre Dja Kabikayhme Nawu God.

Psalm 22

¹ Ngabba God! Ngabba God! Njalekenh ngaye kanbodmekenhwong dja kandjalbawong? Mak njalekenh bu ngudda djarreh yihdi bu minj

kanbekkan kore ngahdjalngeyngeyyime dja ngakayhme ke ba bu yimre kanbebke?

² Ngabba God! Woybukkih ngaye ngadjalkayhmiyo kunbarnangarakuyeng, dja ngudda minj kanwokmang, mak kumunukuyeng warridj ngakayhme. Minj ngaye ngangurdme.

³ Ngaye ngaburrbun bu ngudda King dja Yidjaldjamun duninj, mak ngudda yiwohrnan kore kaddum duninj yiyerrkan kore bininj nawu Israel benkebmawahmeng ngundiburluburlume.

⁴ Nawu mawahmawah ngadberre nakka ngundiwoybukwong. Bedda ngundimarrkmangi dja kunekbekenh ngudda yibennghehkeng.

⁵ Bu ngudda ngundimarnekayhmi wanjh nakka yibenbidyikarrmi. Mak bu ngundimarrkkebbuni nakka minj yibendahmeninj.

⁶ Ngaye wanjh ngadjalwarre, dja yiman ngayeng, minj bininj duninj ngaye. Bininj rowk ngandiborrkbun dja mak birriwern ngandiwidnan, minj ngandimarnedjare.

⁷ Mak birrimekbe nawu ngandikuknan nakka ngandidjekmiwon, bedda kabirridjenbebme ngardduk dja kabirrikodjburdeburdebme.

⁸ Bedda ngandimarneyime, "Yikayhmen nawu Yawey, ba kunubewu ngunbidyikarrme! Ngudda yiyime nungka yimankek ngunmarnedjare, dja njalekenh minj ngunnghehke?" Kuhn wanjh ngandimarneyime.

⁹ Dja ngudda nawu Yiwohrnan Rowk yibidyikarmeng ngalbadjan ngardduk bu nganyawmey kamak rowk. Mak kanmarnbom bu wokmar-kmey kore ngabarrkenni rerihi.

¹⁰ Bu kunmekbe kunbarnangarra ngarranginj, ngudda wanjh kannah-nani; mak ngudda yidjaldi God ngardduk munguyh, bu ngalbadjan ngardduk nganyawmey dja mak bolkkime.

¹¹ Wanjh yuwn bu djarreh yihdi dja yuwn bu mak kanbawon. Manbu kunyid makka darnkih nganmarnebebme, dja minj nangale nabuyika nganbidyikarrme.

¹² Nawu ngandiwirrihme bininj wanjh ngandidjokohmeng yiman kayime nawu birribang bulikki. Bedda yiman birridulkarrekimuk bulikki nawu birrikang Bashan, dja bedda wanjh ngandidahme munguyh.

¹³ Birrimekbe nawu ngariyidko nakka yiman lions nawu kabirrimar-rwe dja ngandimarnedangbarrme!

¹⁴ Wanjh ngaye ngarrulkarreyakminj, yiman kayime kukku manbu kabirriboyakarrbun kore kunkuk, dja kunmurrng ngardduk minj kamur-rngbelmbibelbmikenh, dja mak kunkange ngardduk yiman kadjalkelkdan dja kawarremen.

¹⁵ Manbu kungudj ngardduk makka wanjh bukminj, mak kundjen ngardduk ngadjenbelmerrinj kore kaddum kurrang ngardduk. Ngudda wanjh kanbawong bu kankukurrmeng kore kundjuling, kore darnkih ngakuyindowimeninj.

¹⁶ Birriwarre bininj ngandimarnemirndebebme dja ngandid-jokohmeng yiman kayime duruk birribang. Korroko ngandibiddulubom, dja mak ngandidengedulubom ngardduk.

¹⁷ Bu ngakukmorarraminj dja ngakuknarrinj kunmurrng ngardduk. Birriwern bininj ngandikuknan dja kabirriburlumerren ngardduk.

¹⁸ Mak kunmadj ngardduk kabirridjalmang dja kabirrihidirri kunkod ba kabirribebbehmadjkarrrme.

19 Ngudda nawu Yawey, yuwn bu djarreh yihdi ngardduk. Ngudda yidjalkudji nawu kunngudj kanwon, wanjh yimray werrkwerrk bu kanbidyikarme.

20 Kanngehkemen kore bininj nawu kabirridjare ngandibun mandjawakwi. Kandarrkidnahna kore bininj yiman kayime nabang duninjh duruk ngandibun kundulkarre dorrengh bedberre.

21 Warridj kabirriyime yiman kayime lions dja kabirridjare ngandibaye. Birrimekbe bininj yiman kayime bulikki nabang duninjh nawu kadjare ngandidulubun kunkanemwi.

22 Ngaye wanjh ngeymulewan ke bu ngarridjarrkdi bininj nawu ngarridangerrinj. Bu ngaye dja nawu ngudda ke bininj ngarridi, wanjh ngaye burluburlume ke.

23 Ngudda bininj nawu ngurrikele nawu Yawey, wanjh ngurriburluburlumen. Ngudda nawu Jacob ngunkebmawahmeng, wanjh ngurringeyburlume. Ngudda nawu Israel ngunkebmawahmeng, wanjh ngurrimarnebodda nawu Yawey.

24 Nungka wanjh binahnani nuye bininj kore kunrayek kunkimuk bimarnebebmeng. Minj bidjalbawoyi. Minj mak bimarnekebwarrkkarimeninj nuye. Bonj, nahni bininj bikayhmeng Yawey bu kabibidyikarmekenh, dja wanjh Yawey biwokbekkang.

25 Ngaye wanjh burluburlume kore ngarrimirndemornnamerren rowk. Ngaye ngadjaldi kumirrk bedberre bu ngakurdyuime kore ngaye marneyingkihwockurmerren.

26 Bu kumekbe nawu birrimarladj bininj wanjh kabirringun dja kabirriworrkmiworren. Dja bininj nawu kabirridjare nawu Yawey, wanjh kabirridjalburlume nuye. Wanjh kundjalmak benmarnekurdyimerra munguyh!

27 Kaluk birriwarlahkenh bininj rowk kondah kurorre wanjh kabirriwohburrbun nawu Yawey, dja wanjh kabirrikangeborledkerren kore nungka. Bininj kore namudbubuyika rowk kore kubolkbubuyika rowk, wanjh bedda kabirrimarneboddan nuye.

28 Nawu Yawey wanjh nadjalkudji kawohnawohnan rowk, dja nungka kabenmarnewohnan kore kubolkbubuyika rowk.

29 Nawu birrikuken bininj rowk kondah kurorre wanjh kabirrimarnekarreme mulil nuye nawu Yawey, dja mak kabirrimarneboddan nuye. Dja mak bininj nawu kabirridowerren rowk, bedda wanjh kabirrimarneboddan nawu Yawey. Minj bedman kabirrimibiworren!

30 Bininj nawu kabirringalme yerrekah, wanjh kabirrimarnedurrkmirri nawu Yawey. Kaluk nawu mawahmawah kadberre, dja mak nawu bedmanwali kabindikebmawahme, wanjh bedda warridj kabirriborlhme nawu Yaweykenh.

31 Birrimekbe bininj rowk wanjh kabirrimulewan bu Yawey kabidjaldjadme mandjad duninjh. Bedda kabindibengdayhke wurdwurd nawu minj birringalmeninj. Nawu Yawey wanjh nungan kurduyimeng rowk.

23

Nawu Kawohnan Rowk Ngannahnan Ngaye Yiman Shepherd Kamirndenahnan Nawu Sheep Nuye.

Psalm 23

¹ Nawu Yawey ngannahnan ngardduk yiman kayime namak shepherd kamirndenahnan mayh nuye sheep. Nungka kanwon kunmak kunwern dja minj njale mak ngadjare!

² Nungka ngankurrme ba bu ngangehme kamak rowk kore kabbal manbu kakarrme mandalkmak. Dja mak nungka ngankanakan kore ngabongun manbomak kukku, bu kunmodmikenh dorreng.

³ Nawu Yawey ngankangemarnbun bu nganmalngkerrngehme. Nungka nganbolkbukkan kore manbolh manbu kunmakkenh ngarre ba bu ngaye ngangeyburlume nuye.

⁴ Bu ngaye ngayakmen, bu ngarrowen, yiman kayime ngare kore kunkak nganbarrkbun, wanjh bonj, minj ngakele kunwarrekenh, dja ngadjalburrbun ngudda Yawey ngarrdjarrkre munguyh. Ngudda yikarrme manbu kunkarndudj kore kubid ke bu kankangemarnbun, wanjh kunmekbekenh ngaye ngadjalkangemak.

⁵ Ngudda kanmarneyingkihmarbnun mulil kore kumirrk bedberre bininj nawu ngaye ngarriyidko, dja mak kankodjdjuhke mankalkkidmak dorreng. Ngudda wanjh yihdjaltborrahkendong kore banikkin ngardduk dja kabobarlme kore kaddum ngarre bu yiman kayakarrbun.

⁶ Woybukkih, wanjh manbu kunkongi dja kunmakmak ke makka nganehdjaldjarrkdi munguyh, dja ngadjalyo munguyh munguyh kore kunrurrk ngudda ke nawu Yawey.

24

Bu Karriburlume Yawey Nawu God Dja King Duninjh.

Psalm 24

¹ Kondah kurorre rowk dja njalehnjale nawu kahdi kurorre, nakka wanjh Yawey nuye. Birriwarlahkenh bininj rowk nawu kabirrihni kubolkbubuyika kore kondah kurorre, nakka wanjh Yawey nuye.

² Nungka wanjh bolkmarnbom kunbolk rowk bu kurrmeng kanjdjikh kore kurrula duninjh, dja kore kukku kaboyo bolknang kanjdji duninjh.

³ Kaluk nangale bininj namak ba bu kabidbun kore kurrulum nuye Yawey? Nangale bininj kangime kore kubolkdjamun nuye nawu Yawey?

⁴ Nakka nawu kunmak kadjalkurduyime dja mak kadjalburrbun kore kunmakkenh, dja mak minj kabimarneboddan nawu idols, dja minj mak kakurren bu kawokkurmerren.

⁵ Namekbe namak bininj wanjh nawu Yawey kabimarnekurduyime kunmak. Kaluk God nawu kabingehke wanjh kaidjalmakwan.

⁶ Kuhni kabirrikurduyime birriwern bininj nawu kabirriyawan God. Yoh, birrimekbe bininj kabirridjare ngundikebnan, ngudda God nuye Jacob.

⁷ Mah, wanjh. Ngurrina! Ngurridangmarrhma manbu mankare duninjh gates ba kamngimen king nawu namakkaykenh duninjh.

⁸ Kaluk nangale nahni nawu namakkaykenh king? Nungka wanjh Yawey nawu narrulkarrekimuk duninjh, dja nawu kabenyurrrhke birriwarre bininj kunngudj nuye dorreng kore kabirriburren.

⁹ Mah, wanjh ngurridangmarrhma manbu mankare gates ba kamngimen king nawu namakkaykenh duninjh!

¹⁰ Kaluk nangale nahni nawu namakkaykenh king? Nungka wanjh Yawey nawu wernhdulkarrekimuk duninjh! Nungka nadjalkudji king namakkaykenh duninjh.

25

*Bininj Kahdi Yiwarrudj Kore God Nawu Kabinahnan.**Psalm 25:1-10*

¹ Ngudda Yawey, ngaye ngamalngkurrmerren kore ngudda!

² Ngudda nawu God ngardduk, ngaye wernhwoybukwon ngudda. Yuwn kanbawon bu ngayemengalme! Mak yuwn yibenbawon nawu ngarriyidko bu ngandidjekmiwon kore ngandibun.

³ Nangale bininj nawu ngunwoybukwon nakka wanjh minj kayemengalme. Dja bininj nawu kabindikowe birribuyika bininj bu kunwarrekenh, wanjh kabirriwernhyemengalme.

⁴ Nawu Yawey, kanbukkabukkan kore yidjare ngakurduyime, mak kanbolhbukka ba ngakurduyime kore kunmakkenh.

⁵ Kanka kore kunwoybuk ke, dja kanbukkabukkan warridj. Kuhni ngudda yiyime dja ngudda God ngardduk nawu kannggehke, dja ngaye woybukwon bu barnangarrakuyeng rowk.

⁶ Nawu Yawey, yidjalburru ngudda bu kanwernhkongibun dja kandjalmarnedjare kore kunkareni dja mak bolkkime.

⁷ Yuwn mak yiburrbun manbu kunwarrehwarre kore ngaye ngakurduyimi bu ngayawurrinjni, bu ngaye wokburriweyi ngudda. Ngudda kandjalmarnedjare, wanjh kunmekbekenh kunu kandjalburru, dja ngudda Yawey wanjh yidjalmakkaykenh.

⁸ Nawu Yawey wanjh nakka nadjalmak duninj, dja kunmak kadjalkurduyime. Kunmekbekenh kunu wanjh kabenbukkabukkan nawu birriwarre bininj ba kabirriborlhme nuye kore mandjad kabirrire.

⁹ Nungka kabenkan bininj nawu minj kabirrikukdokmibuyhwerren ba bu kabirrikurduyime kunmak, dja mak kabenbolhbukkabukkan nuye manbolh.

¹⁰ Nawu Yawey kandjalmarnedjare dja minj kankowe ngad bininj nawu karriwokmarrkmang mankarre nuye kore wokkurrmerrinj kadberre.

*Yawey Nakka Kandjalnahnan.**Psalm 25:11-15*

¹¹ O Yawey, ngaye wernhwarrewong ngudda dja ngadjare yibengmidjda kunwarre rowk ngardduk kore yiwokkurrmerrinj ngudda ke kunngey dorrengh.

¹² Nangale bininj kabimarnekelemen dja kabimarneboddan nuye nawu Yawey? Wanjh kabibukkan namekbe bininj ba bu kadjalle kore nawu kawohrnan rowk bimarnekarremarnbom nuye.

¹³ Wanjh namekbe bininj kadjalkuken munguyh, dja mak wurdwurd nuye kabirribolkmang kumekbe kunred kore kabirriní.

¹⁴ Nawu Yawey kayimerran djawirna bedberre bininj nawu kabirri-marneboddan, dja mak kabenbukkan bedberre kunwok manbu nungka yingkihwokkurrmerrinj.

¹⁵ Ngaye ngadjalnan Yawey nawu nadjalkudji nganbidiyikarmekenh ba bu nganbebke kore kunwarre nganbongkarme.

*Ngaye Ngadjawan Nawu Yawey Bu Kanbidiyikarme.**Psalm 25:16-22*

¹⁶ Yawey, yimborledmen dja kankongibu ngaye, dja ngadjalkudji ngarri dja kunyid wernmerrinj ngardduk.

¹⁷ Manbu kunnjilngwarre ngardduk makka munguyh kahwernmerren. Ngadjare yiwemen nawu njalehnjale nganhnjilngwarrewon munguyh.

18 Wanjh yina ngardduk kunrayek dja kore ngahdjakbekkan, dja yibengmidjda ngardduk kunwarre rowk.

19 Yawey yibenmirndena nawu ngaye ngarriyidko! Mak yibenna bu bedda ngandiwerhwhidnan duninj!

20 Kankukdjurrudin ba bu ngadjaldarrkid, dja kanngehkemen. Ngaye djalyoybukwon, wanjh yuwn kanbawon bu ngayemikarren.

21 Ngaye kunkange dorrengh woybukwon, dja mak wokmarrkmang, wanjh ngadjare bu ngudda kannahnan ba bu ngadjalmalngdarrkid.

22 O God, kanngehkemen ngad bininj nawu Israel ngankebmawahmeng kore kunrayek rowk ngarrikarme.

26

Bu Nadjalmak Bininj Kahdi Yiwarrudj.

Psalm 26

1 Yawey, ngaye djawan bu ngudda kanmakwan. Ngaye mandjad ngadjalkurduyime munguyh, dja warridj ngaye wanjh woybukwon, dja minj mak kewkme, dja minj mak ngamarrkbaworrineninj ke.

2 Yawey, ngaye ngadjare bu ngudda kandjadme. Kanmayalirohrokmen dja kanwerhkhanganen ngardduk.

3 Dja kunu ngaye minj ngabengmidjdan bu ngudda kandjalmarnedjare, dja wanjh ngadjalkurduyime munguyh kore ngudda ke kunwoybuk.

4 Ngaye minj ngarridjarrkraworren bininj nawu kabirrihkurrekurren dja nawu kabirriburluburlumerren.

5 Dja ngaye ngawarnyak ngarrimirnderri bininj nawu kabirrikurduyime kunwarre, dja ngabendjalbodmewon birriwarre bininj rowk.

6 Ngaye yiman ngabiddjirridjburren bu ngamulewarren minj kunwarre ngakurduyimeninj dja ngaye ngadjalboddan kore altar ngudda ke ngudda nawu Yawey.

7 Mak ngawayini ke kore kurobbe, dja burluburlume ngudda, bu ngaye mulewan kore kunmakkaykenh duninj ngudda yidjalkurduyime munguyh.

8 Yoh, Yawey, ngaye mak ngamarnedjare kunrurk manbu temple ke kore ngudda yihni, kumekbe kore ngarrinan kunmakmak ke bu kahbolkwolkan.

9 Yuwn bu kanbularrbun ngaye yiman yikurduyime bedberre nawu birriwarre bininj. Mak yuwn kanbun bu ngarrowen kankukkurrme yiman bu yibenhmarnekurduyime nawu birrimarndeyi bininj.

10 Bedda wanjh birriyidwern dja kabirridjirdmang money dja minj kabirridjare kunmak kabirriyime.

11 Ngaye wanjh ngadjalkurduyime kunmak, dja minj kunwarre ngayime. Wanjh kankongibu dja kanngehkemen.

12 Wanjh bolkkime ngahdi kunmak dorrengh kore kubolkrayek! Ngaye ngarriraworren bininj nawu ngundimarnemirnderri dja kunmekbe wanjh ngaye djalburluburlume ngudda nawu Yawey.

27

Ngadjalburlume Yawey Nawu Kawohrnan Rowk Bu Nungka Kangehekenh.

Psalm 27

¹ Nawu Yawey nakka nganmarnebolkwolkan dja mak ngannehke. Ngaye wanjh minj nangale nabuyika ngakengeme. Nungka nawu Yawey ngankukbalhme, kaluk minj ngayawoyhkele djal bininj.

² Bu nawu birriwarre bininj kabirrimre ngandibun bu yiman ngandikukngun, dja mak bininj nawu ngariyidko dja nawu ngandiwidnan ngandibun, wanjh kabirribarabun dja kabirridjalmankan.

³ Kunukka bonj, bu bininj birridjalwern ngandiwakbuyingun, wanjh nakka minj ngakengewarre. Mak bu nawu ngariyidko kabirrimre bu ngandibun, wanjh nakka ngadjalmarrkmang nawu Yawey, dja minj ngakele.

⁴ Ngaye ngahdi yiwarrudj, dja kundjalkudjikenh ngadjawan nawu Yawey. Ngaye ngadjare bu ngayo munguyh kore nungka nuye kunrurrk. Mak ngaye ngadjare ngayawan Yawey kore nuye temple, dja mak ngadjare ngadjalan nungka nawu namakkaykenh.

⁵ Bu kunrayek nganmarnebebbe, nawu Yawey ngankukbalhme kore kayo. Nungka nganwarlkan kore dabburlin manrurrkdjamun nuye. Ngandjalkurrme kaddum kore manwarddekimuk.

⁶ Nungka nganbidkenwon nawu ngariyidko bu ngabenyurrhke bedberre nawu ngandiwakbuyingun. Wanjh ngamarnekinje mayh nuye nawu Yawey, kore Nadjamun Dabburlin nuye, dja ngadjalmarnewayini bu ngaburlume nuye. Ngadjalwayini nuye dja ngawernhmarmarr dorrengh.

⁷ Nawu Yawey, kanbekka bu kayhkayhme. Kankongibu dja kanwokma.

⁸ Manbu kunkange ngardduk makka nganmarneyime bu ngaye yawayawan ngudda ba bu kebnan ke, wanjh ngamwam bu yawan ba kebnan ngudda nawu Yawey.

⁹ Kanna, dja yuwn kanmarnekebwarkkarren bu kanbawon. Yuwn bu kandung ngaye nawu marnedurrkmirri ke ngudda nawu munguyh kanbidyikarme. Ngudda wanjh God nawu kannehke wanjh yuwn kanmunkewe dja mak kanbawon ngaye.

¹⁰ Ngalbadjan dja kornkumo ngardduk bu yimankek ngandibawoyi, ngudda Yawey wanjh kandjalkimang.

¹¹ Nawu Yawey, kanbukkabukka manbu ngudda ke manbolh. Ngaye ngabenkarme birriwern bininj nawu ngariyidko, dja kanmika ba ngakurduyime mandjad.

¹² Yuwn bu yibenbawon nawu ngariyidko bininj bu bedda ngandimang, dja nakka ngandimarnekurrehkurren bu ngayekenh ba bu ngandibun.

¹³ Ngaye ngawernhwoybukwon mak ngani bu nganan kunmakmak nuye nawu Yawey bu ngaye ngadjaldarrkiddi kondah kurorre.

¹⁴ Wanjh ngurrimadbu nawu Yawey ba nungka ngunbidyikarme, mak ngurrimurrngayeknin dja ngurrikelebuknin ba ngurrimadbun nungka bu ngunbidyikarme ngudberre.

28

Yiwarrudj Karridi Bu Yawey Kannehkekenh.

Psalm 28

¹ O Yawey! Ngaye wanjh ngakayhme ke, ngudda nawu yiman kunwarddekimuk kore ngaye ngawarlkkarren! Yuwn kandahme dja kanbidyikarmen bu yiwarrudj ngarri. Dja bu minj kanwokmang nakka wanjh ngaye yiman ngakolung bu ngarriraworren bininj nawu birridowerrinj.

² Kanbekkabekka kore yiwarrudj ngahdi dja djawahdjawan bu ngudda kanbidyikarme. Ngaye wanjh ngaberlwayhme kore ngabolknan kubolkdjamun duninj ke.

³ Yuwn kankan kore birriwarre bininj ngarriraworren, nawu kabirrikurren bu yimankek yeledj kabirriwokdi dja nakka djal manmolk kabirrihmarnbun kunyid.

⁴ Yibenmarnbu bu kabirridjakekkan! Warridj yibenbu kore kunwarre kabirrihkurdyime. Yibenwo kunwarre duninj yiman bu bedda birridjareni bindiwoni birribuyika bininj.

⁵ Bedda nakka minj kabirridjare bu kabirribekkan kore kunmak ngudda yihkurdyime kubid ke. Wanjh ngudda yibenbularrbu dja yibenkukbawo munguyh kore kabirrihkukyo.

⁶ Yawey, ngaye djalburlume bu ngudda kanbekkang kore ngakayhmeng bu yiwarrudj ngahdi, dja wanjh ngudda kankongibom.

⁷ Ngudda nakka shield ngardduk bu kankukdjurruddi, kunmekbekenh ngaye woybukwon duninj. Ngudda kanbidyikarmeng, wanjh ngaye ngamarmarr duninj dja kunu mulilmang dja mak ngawayini bu manjbun ngudda.

⁸ Warridj kunngudj yibenwon nawu bininj ke, mak yibennggehke dja yibennahn bininj nawu yibendjarrngbom.

⁹ Yimray Yawey bu kanngehke ngadberre. Kunmak kanmarnekurdyimen ngadberre bininj nawu ngudda ke rowk. Ngudda wanjh yiman kayime shepherd ngadberre dja munguyh kanwanjbikarme ngadberre.

29

Yawey Nawu Kawohrnran Rowk Kawokdi Kore Namarrkon Dja Mak Kore Manbu Kunmayorrkkimuk.

Psalm 29

¹ Ngudda ngurrikihkimuk nawu ngurrihni kore heaven, wanjh nguringeyburluburlumen nawu Yawey! Ngurriyimen nakka wanjh nadjal-makkaykenh dja narrulkarrekimuk duninj!

² Ngurriburlumen Yawey nawu nangeymakkaykenh duninj. Nawu Yawey nakka nawernhkukdjamun duninj dja yiman kahbame kunmakmak nuye dorreng, wanjh ngurrimarnebodda!

³ Nawu Yawey kawokdi, wanjh manbu kurrula kabiwokmarrkmang. God nawu Namakkaykenh kawokdi yiman kayime kangurdulme kaddun dja kawokngoyowhme djarreh kore manbu kurrula. Bu kawokdi wanjh kawokyurhke kunwok ngarre kurrula duninj.

⁴ Yawey nakka wernhwokkimuk duninj. Nawu Yawey kawokdi kundulkarre dorreng nuye nawu kawohrnran rowk.

⁵ Kunwok nuye Yawey kahdulkbakkakke manbu cedar kundulk, mak kabolkdjalkdjalkmire kundulk manbu cedars manbu kahdulkmirnderri kore kunred Lebanon.

⁶ Nungka kabolkrokayhwe kubolkkimuk Lebanon bu kabolkdohdolkkan yiman bulikki yaw. Mak kamarnbun kuwarddekimuk manbu Hermon kabolkdolkkan yiman bulikki yaw nawu nabang.

⁷ Bu nawu Yawey kawokdi, nakka yiman kayime namarrkon kamayhmayhke dja kabolkdongorrong.

8 Bu nawu Yawey kawokdi, wanjh manbu kubolldarleh kahbolokahrokkan. Bu nungka kawokdi wanjh kabolldeldelme kubolldarleh kore kabolkngeyyo Kadesh.

9 Bu nawu Yawey kawokdi, nakka karrulkbordledke kundulk manbu oaks, dja kunworr ngarre makka kaworrkudjkudjmire.

Dja birriwern nawu kabirrihni kore manrurrkdjamun temple nuye, wanjh kabirriburlume bu kabirrikayhme kabirriyime, "Nawernhakkaykenh Duninj!"

10 Nawu Yawey nakka kahyerrkan kaddum duninj, dja kawohrn kore kabodjurrbuhme kukku munguyh munguyh. Yawey wanjh king duninj nawu kawohrn rowk munguyh munguyh.

11 Nawu Yawey wanjh kunngudj kabenwon bininj nuye, dja mak kabenwon kunmodmikenh nuye ba kamak kabirrihni.

30

Bu God Nawu Yawey Nganngengkeng.

Psalm 30

1 Ngaye burloburlume ngudda nawu Yawey! Ngudda kanbekkeng kore kumidjbeh dja yibenwarrewong nawu ngarriyidko ba minj birrimulilmayinj dja birriburlumerrimeninj ngayekenh.

2 Yawey ngudda nawu God ngardduk! Ngakayhmi bu ngarrangeni yiwarrudj dja djawam bu kanbidyikarmekenh, wanjh ngudda kanmarnbom.

3 Yawey, ngudda kandolkkayhweng kore kundowikenh, dja kanngengkeng ba minj ngakoluyi kanjdji duninj kore kubolkwarre.

4 Ngudda ngurriwern bininj nawu Yawey nuye, ngurrimarnewayinin! Ngurriburlumen, ngurringeyburlumen kunngedydamun nuye.

5 Bu yarrkka nungka kayirrun kadberre, nakka minj kahdjalkangedi bu kunkuyeng, dja manbu kunkongi nuye kahdjaldi bu munguyh munguyh. Bu karrinalkbun kunkakkuyeng, karrimarmarr duninj bu kamdungbehme.

6 Bu ngaye ngabekkarrinj kamak rowk, wanjh ngaburrbuni bu baybaywi ngayimerrinj, "Ngaye minj nangale mak nganwodjorrhme!"

7 Yawey, ngudda nakka ngarrdabbolkni, ngudda kannahnang dja kanmarnekukdjurrudanginj. Dja bu ngudda kanmarnekebwarrlkarrinj ngardduk, wanjh ngaye ngakeleminj dja ngakangewarreminj.

8 O Yawey, ngaye ngarri yiwarrudj bu ngakayhmeng ke, djawahdjawani ngudda, wanjh ngayimeng, "Nawu Yiwohrnan Rowk kankongibu!"

9 Yiddok baleh kunmak kakurduyimerran bu ngaye ngarrown dja bu ngakukdudjindan kore kumidj? Mak bu kundjulng ngayimerran kunukka baleh ngayime bu ngudda burlume dja mak ngamulewan bu ngudda yidjalwoybuk duninj?

10 Yawey ngaye ngadjare kanbekkabekkan dja kankongibu. Kanbidyikarmen Yawey!

11 Bu nganjilngwarreni ngudda kankangeborledkeng bu nganjilngmakminj, wanjh ngaye marneborrkeng. Wanjh ngaye minj ngadjalnjilngwarreni dja ngudda kanmarnbom bu ngamarmarrminj duninj.

12 Wanjh kunu ngawayini ngudda djahdjalburluburlume kunkange dorrengh ngardduk, mak minj ngangurdme. Ngudda Yawey wanjh God ngardduk, wanjh djalmanjbun bu munguyh munguyh.

31

Yiwarrudj Karridi bu Yawey Nawu Kawohrnan Rowk Kannahnankenh.

Psalms 31

¹ Yawey ngaye ngamwam ngawarlkkarren kore ngudda kannahnan. Yuwn kanbawon bu yerrekah ngayemekarren. Ngudda nawu yidjalkurduyime kunmak wanjh kanngehkemen.

² Mak kanwokma bu ngaye djawahdjawan dja werkkwerrk yimray kanngehkemen! Ngudda yiman manwarddekihkimuk ngardduk dja mak ngudda yiman manrurrk mankimuk kore ngani kamak rowk ba minj nangale nganbun.

³ Bu kunmekbeken wanjh kanka mandjad kore ngudda yidjare, dja kanbolkbukkabukkan dja kanka munguyh, ngudda nawu yiwernhngeykimuk duninj.

⁴ Bu ngamankan kore ngandimarnebolkkaruy dja kandidarrkidmang ngardduk, wanjh kanbebkemen kore ngabongdi ba bu ngawarlkarren kore ngudda nawu yidjalkudji kannahnan munguyh.

⁵ Ngaye ngamalngkurrmerren kore kubid ke. Yawey ngudda God nawu Yidjalwoybuk, wanjh kanbebkemen kore kunwarre ngahdi.

⁶ Ngaye ngabenwidnan bininj nawu kabirrihmarnebodan nawarrewarre idols. Dja ngaye wanjh djalwoybukwon ngudda nawu Yawey.

⁷ Ngudda yimimkongiwern duninj kaluk kunmekbeken ngaye mulilmang dja ngawernhmarmarr kore ngudda kanmarnedjare. Ngudda kannani rowk kore ngahdjakbekkani, wanjh ngudda kankangeburrbuni kore ngaye ngawernhnjilngwarreni.

⁸ Ngudda minj kanbawoyinj nawu ngarriyidko ngandibuyi, dja kankurmeng kore kubolkmak ngarri.

Bu Yawey Nawu God Kanbidyikarme.

Psalms 31:9-18

⁹ Kankongibu Yawey! Ngaye ngawernhnjilngwarreminj dja ngakuyinmimdubberran. Warridj nganalkbun munguyh dja kunu ngawarreworren kunburk dja mak kunmalng ngardduk.

¹⁰ Ngaye munguyh ngadjalnjlngwarre duninj. Ngadjalnalkbun munguyh munguyh, wardi darnkih ngarrowen. Manbu kunrayek wanjh nganggudjyakwon, dja mak ngabekkarren yiman ngamurrngkelkan.

¹¹ Birridjalwern bininj ngandiwidnan dja mak nawu ngarredbo ngandiwarrewan. Nawu ngardduk djawirna wanjh bedda ngandikengeme. Bu bedda kandinan djarreh ngamre, wanjh kabirrikelerlobme bu kandibawon.

¹² Bedda kabirriyime ngaye yimankek ngarroweng, dja minj mak ngandiyawoyhburrbun. Bedda ngandikukburriwe yiman kayime ngaye ngaburriwe cup nawu bakmeng.

¹³ Ngabenbekkabekkan birriwern bininj bu munguyh ngandiyolyolme kore ngandimarnekurrehkurren. Ngaye wanjh ngakele bu munguyh dja birriwern bininj kabirrikarremarnburren bu ngaye ngandibun ba ngarrowen.

¹⁴ Dja bonj, ngaye ngadjalkangekurrmerren kore ngudda, Yawey. Ngaye marneyime, "Ngudda Yawey wanjh God ngardduk!"

¹⁵ Ngudda yidjalkudji yibolknameng rowk kore ngaye ngarranginj dja mak kore ngarrowen. Kanngehkemen kore ngandiwidnan bininj, dja bininj nawu ngandikelekadjung.

¹⁶ Kannahna dja kankongibu ngaye nawu marnedurrkmirri ke. Ngudda nawu kanmarnedjare munguyh munguyh wanjh kandjalngehke.

¹⁷ O Yawey, yuwn bu kanbawon ngaye ngayemengalme, dja ngakayh-meng ke bu kanbidyikarmekenh. Dja ngaleng, yidjalmarnbu nawu birri-warre bininj bu bedman kabirriyemengalme, dja yerre kabirridjalkukyo kore kumidj.

¹⁸ Bedda wanjh kabirriburlumerren dja kabirriwidnan nawu birrimak bininj, dja kabindiyolyolme bu kunwarre dorrengh. Mah, wanjh yiben-ngurdkemen kore kabirrikurrehkurren ba bu kabirriwokyak.

¹⁹ Ngudda wanjh yimakkaykenh. Ngudda yidjehdjenkurrmeng kun-makmak bedberre bininj nawu ngundikengeme. Ngudda yibenwon birrimakebe bininj kunmakmak kore birriwarlahkenh bininj ngundikur-dunan.

²⁰ Yibenwarlkan kore ngudda yihni ba kabirringehme, dja birri-warre bininj minj kabindimarnekurduyime kore kabirrikarremarnbur-ren. Yibennahnan kore ngudda ke kunred dja bininj nawu kabindiyoly-olme minj kabindidjuhun kumekbe.

²¹ Ngaye ngaburluburlumen nawu Yawey! Nungka wanjh woybukkih kanmarnedjareminj wernkih duninh bu birriwarre bininj ngandiwab-minguneng bu ngandibuyi.

²² Ngaye ngakeleni duninh, dja ngayimeng, "A! Ngudda minj kannan ngaye!" Dja bonj, ngudda wanjh kanbekkang kore ngakayhmi bu djawadjawam kankongibunkenh dja kanbidyikarmekenh.

²³ Ngudda bininj rowk nawu Yawey nuye, wanjh ngurrimarnedjarenin! Nungka wanjh kandjalnahnan ngad bininj nawu minj karribawon kore karriwoybukwon. Dja bininj nawu bedman kabirriburlumerren, wanjh nakka kabenkun kore kunwarrekenh bedberre.

²⁴ Mah, ngurrimurngrayeknin, dja ngurrikangemarnburrimen ngudda bininj rowk nawu ngurridjalmadbun nawu Yawey.

32

Kunukka Kunmak Bu Karriwarnyakmulewarren Kunwarrekenh Kad-berre.

Psalm 32

¹ Kawernhnjilngmak nawu bininj bu God kabimarnebengmidjan kun-warre nuye, dja kabimarnebularrbun rowk manbu kunwarrekenh nuye.

² Kahnjilngmak nawu bininj bu Yawey minj kabidjadme dja kabiwar-rewan. Kahnjilngmak namekbe bininj nawu minj kadjare kakurren kore kukange nuye.

³ Ngaye, bu ngaye kunwarre ngakurduyimeng dja minj ngawarnyak-mulewarrimeninj, dja ngadjaldi wokyak, wanjh ngabekakang ngangud-jwarreminj kore kunmurrng ngardduk. Dja ngaye ngadjalngeyngyeyimi bu barnangarrakuyeng.

⁴ Yoh, Yawey, barnangarrawern dja mak kunkakwern ngudda kandul-mukwoni bu kunwarrekenh ngardduk. Mak kunngudj ngardduk makka yakminj rowk yiman kayime manbu kundungbang nganngudjwarrewon.

⁵ Wanjh ngawarnyakmulewarrinj bu ngayolyolmerrinj bu marneyimeng ngudda. Minj mak ngawarlkkayi kunwarrekenh ngardduk. Ngaye wanjh marneyimeng ngudda Yawey, bu ngayimeng, "Ngaye ngamulewarren ke kore kunwarre ngakurduyimeng." Wanjh ngudda yibularrbom rowk ngardduk kunwarre.

6 Wanjh kunmekbekenh kunu ngayime ngudberre bininj nawu ngundingeyburrbun, nakka wanjh yiwarrudj birrdin bu ngudda ngundiy-awayawan. Mak kunrayek manbu kawayhme bedberre, yiman kukku bu kahbokimukmen wanjh kunukka minj kabirrikebngakme.

7 Ngudda Yawey wanjh yidjalkudji ngardduk nawu kankukbalhme, dja bu kunrayek kabebme ngardduk ngudda kankukdjurruddi. Ngudda kankurrme kore ngarriwayini bu ngarriyime, "Ngudda Yawey wanjh kanggehkheng ngadberre."

8 Wanjh nawu Yawey kayime, "Ngaye bolhbukkabukkan kore mandjad yibolhkadjung, mak ngaye bengdayhke dja nahnan ngudda kore yire.

9 Dja yuwn bu yimayaliyimerran yiman djarrang nawu minj njale kaburrbun. Dja nakka bininj kabibongkanakan kunyarl dorreng h ba kunukka kabidarnhyikan."

10 Nawu birriwarre bininj nakka kabirrikarme kunrayek kunwern. Dja Yawey kabenmarnedjare bininj nawu kabirrikangewoybukwon, dja nuye kunmakmak nakka kabenwakbuyingun bu munguyh.

11 Mah, wanjh ngudda nawu ngurrimak bininj, ngurrinjilngmaknin dja ngurrimarmarr kore Yawey. Ngudda nawu ngurrimayalimak, wanjh ngurridjalwayinin nuye bu ngurridjalmarrr.

33

Bu Karridjalburlume Nawu Kawohrnan Rowk Kunnjilngmak Dorreng.

Psalm 33

1 Ngudda ngurrimak bininj, wanjh ngurriwayinin nawu Yawey bu kunnjilngmak dorreng. Ngudda nawu ngurriwokmarrkmang, wanjh kamak bu ngurriburluburlume nuye.

2 Ngurribu harps dorreng h bu ngurridirri manbu ten kunyarl kakarme ba bu ngurrimarnewayini dja ngurriburlume.

3 Mak ngurrimarnewayinin nuye manbu mankarrekerrnge. Ngurribu instruments bu kamak rowk, dja mak ngurrikayhme nuye bu ngurrimarmarr duninjh.

4 Nawu Yawey wanjh djal kunwoybuk kawokdi dja mak kunwok nuye djalmandjad. Nungka kakurduyime rowk kore kawokkurmerren.

5 Warridj nawu Yawey kadjare bu ngudda kunmak ngurrikurduyime dja mak bu djal mandjad ngurridjadmerren. Nungka kandjalarnedjare ngad karriwarlahkenh bininj nawu kurorre karrihni.

6 Mak nungka marnbom kaddum dja njalehnjale ngarre kore kunwok nuye.

7 Nawu Yawey bomornnameng manbu kurrula, dja manbu kaburrrk wanjh makka djalbokurrmeng kanjdji ba bu kahborri munguyh.

8 Mah wanjh ngad karriwarlahkenh bininj nawu kondah kurorre karrihni, karrimarnebarddurrukkurhlha Yawey nawu nadjalkudji kawohrnan rowk.

9 Bu kunmekbe nungka wokdanginj mahni kurorre wanjh bolkmarn-buyindanj! Manbu kurorre rowk biwokmarrkmey kore nungka yimeng.

10 Mak bu ngad karriwarlahkenh bininj karrikarremarnbun kunwarre, wanjh Yawey kabularrbun mankarrewarre kadberre bu kakarrewar-rehwarrewon.

11 Dja kore nungka kakarremarnbun, nakka kadjaldi bu munguyh munguyh. Nungka kadjalcurduyime kore nungka karremarnburren bu munguyh munguyh.

¹² Bininj nawu kabirrimarnebodan Yawey dja kabirriyime nungka God bedberre, wanjh nungka kabenmarnekurduyime kundjalmak bedberre. Nungka wanjh bendjarrngbom dja benmarnbom bu djal nuye bininj.

¹³ Nawu Yawey kahdi kaddum kore heaven dja kabolknan kanjdji kore kurorre. Kaluk kabennan birriwarlahkenh bininj rowk.

¹⁴ Kahyo kaddum kore nuye, dja wanjh kannan karriwarlahkenh kadberre rowk nawu kondah kurorre karrihni.

¹⁵ Nungka nawu kunmayali kanwon karriwarlahkenh bininj rowk dja kankurdunan, dja mak kanmayalinan rowk kadberre kore njale karrikurduyime .

¹⁶ Nawu birrikihkimuk nawu kings, bu kabenmirndekarrme birrid-jalmirndewern nawu armies, wanjh bonj, minj kabirringehkerren kore nawu birriyidko bedberre. Mak bininj nawu birringudjbang, wanjh bonj, nakka minj kabirrimarnburren bu kabirringehkerren.

¹⁷ Dja warridj bu kabirriburren war, minj kabirrimarnemarrkkurrmerren bedberre nawu djarrang nabang bu kabenkan kore minj nangale kabenbun.

¹⁸ Kaluk nawu Yawey kabennahan bininj nawu kabirrimarnekele dja mak kabirrimarnekkurrmerren kore nungka, mak bu kabirrimarrkmang kabirriwernhburrbun bu nungka kabenmarnedjare munguyh.

¹⁹ Warridj nungka minj kabenbawon bu bedda kabirridowen, dja mak kabendarrkidwon kore manme kayakmen dja kunmarrwekenh kawernmerren bedberre.

²⁰ Ngad wanjh karrikurrmerren kore nawu Yawey, nawu nadjalkudji kanbidiyikarme dja kankukdjurruddi kadberre.

²¹ Karridjalkangenjilngmak nungkakenh, dja karridjalwoybukwon nungka nawu nangeydjamun duninjh.

²² O Yawey, kandjalmarnedjarenin ngadberre, dja ngudda yidjalkudji bu ngundimadbun dja ngundimarrkkebbun ngudda.

34

*Bu Karrimanjbun God Nawu Kunmak Kanmarnekurduyime. **

Psalm 34

¹ Ngaye ngahdjalburlume nawu Yawey bu djal munguyh. Minj ngangurdme bu ngaye ngadjalburlume.

² Ngaye wanjh ngaburlume nawu Yawey ngardduk kukange dorrengh! Nawu birrimarladj bininj nakka wanjh birriwokbekka nawu Yawey, dja kabirrimarmarr duninjh.

³ Mah, wanjh karridjarrkneykimukwon nawu Yawey, ngaye dorrengh. Mak karridjarrkneyburlumen nuye.

⁴ Ngaye ngayawayawam dja ngadjawadjawam nawu Yawey, wanjh nungka nganwokmey, dja nganngengkeng kore kunktele kunwern ngahkarrmi.

⁵ Bininj nawu nungka kabirriyikan nakka kabirrinjilngmak dja yiman kabirrikebbame, dja minj mak kabirriyemengalme.

⁶ Ngaye nakka ngamarladjni dja bu ngakayhmeng nawu Yawey, nungka wanjh ngankayhmibekakang dja nganbekkeng kore kunrayek kunwern ngahkarrmi.

* **34:** David karremarnbom maninjmanu Psalm bu kelerlobmeng dja bimarnewarlkayindi kubolkbuyika. Nungka marnburrinj bu yiman kayime bengwarr yimiyimi ba bu benkoweng bininj kunmekbe. Wardi yibimna kore 1 Samuel 21:10-15

⁷ Nawu angels birriwern nuye nawu Yawey wanjh kabindidjurrduddi bininj rowk nawu kabirrimarnekele nuye, wanjh kabengehke.

⁸ Wardi yiman kayime ngudda yimanbekka bu yirohrokmen nungka nadjalmak duninj nawu Yawey. Bininj nawu kabikurrmerren kore Yawey wanjh nakka kunmak kabimarnekurduyime.

⁹ Ngudda nawu bininj nuye Yawey, wanjh ngurrimarnekelenin. Bininj nawu kabirrikele nuye, nakka kaluk kabirrikarme njalehnjale nawu kabirridjare.

¹⁰ Mayh nabang duninj yiman lions, wanjh kabirringudjyakworren dja kabirridjalmarrwedowen. Dja bininj nawu kabirridjalmadbun Yawey, nakka wanjh kabirrikarme namakmak nawern.

¹¹ Wurdwurd! Ngurrimray ngaye kandibekkan, dja bukkabukkan ngudberre ba bu ngurrimarneboddan Yawey.

¹² Bu ngudda ngurridjare ngurridarrkiddi kunkuyeng, dja mak bu ngurridjare ngurrinan kunmodmikenh, wanjh kuhni ngurrikurduyimen.

¹³ Yuwn bu ngurriwokdi kunwarrekenh dja mak ngurringurdkerimen kore ngurrikurrekurren.

¹⁴ Yuwn bu mak ngurridjalkurduyime kunwarre. Ngurribawo, dja ngurrikurduyimen djal kunmakkenh. Ngurridjarenin kunmodmikenh, dja ngurrimarnburrinen bu kamak rowk ngurrini kunmodmikenh dorrengh.

¹⁵ Nawu Yawey kabennahnan nawu birrimak bininj dja nungan kabebekkabekkan bu kabirrikayhme nuye.

¹⁶ Nawu birriwarre bininj nakka kabenwirrihme, dja kabengeybular-bun ba bu minj nangale kabenyawoyhburrbun kondah kurorre.

¹⁷ Yawey kabenkayhmibekkan nawu birrimak bininj bu kabirrimarnekeyhme nungka, dja munguyh kabenbebke bu kunrayek kawernmerren bedberre.

¹⁸ Mak nungka karrarnhdi bedberre bininj nawu kabirrikangewarre, dja bininj nawu kabirrimarrkbaworren dja kabirrikangewarre, wanjh nakka kabengehke.

¹⁹ Bininj nawu nadjalmak kunubewu kunrayek kabebme nuye. Wanjh Yawey kaluk kabibebke dja kabingehke munguyh.

²⁰ Nungka kabiwerhnahnan ba minj kunwohkudji kunmurrng nuye kawohbakme.

²¹ Nawu nawarre bininj, wanjh kunwarre kabibun. Dja bininj nawu kabirriwidnan nawu namak bininj, nakka wanjh God kabendjadme dja kabenwarrewan bedberre.

²² Nawu Yawey kabengehke nawu kabirrihmarnedurrkmirri nuye. Bininj nawu kakurrmerren kore Yawey kabinahnan, nakka wanjh kani kamak, dja Yawey minj kabiwarrewan.

35

Bu Karridjare Nawu Kawohnan Rowk Kanbidyikarme.

Psalms 35

¹ Yawey! Ngudda yibendabkemen bininj nawu ngaye ngandiwidnan. Wardi yibenbun bininj nawu ngaye ngandibun.

² Kankukbalhmen yiman bu yidjurrudangen kore ngaye, dja kanbidyikarmen kore kunyid wernmerrinj ngardduk.

³ Bininj birribang ngandiwerhkhadjung bu ngandibunkenh. Yimka mankole dja lama ke, dja yibenbu. Kankangemarnbu bu kanmarneyimen, “Ngaye wanjh ngehke!”

⁴ Bininj nawu kabirridjare ngandibun wanjh ngadjare bedda kabirridjalbarabun dja kabirriyemekarren. Bedda nawu birridjareni yimankek ngandibuyi, wanjh yibenkelekadju ba kabirridurnderren kungele dorrengh.

⁵ Yawey, ngadjare mak yimunkewemen nawu angel ngudda ke, ba kabenkukwe nahni bininj yiman kunmayorrk kahburriwe kundalkdarleh.

⁶ Warridj yibenmarnbu bu kabirrikelerlobme kore kubolkmunun bu ngudda ke angel kabenhkelekadjung.

⁷ Dja ngaye minj njale ngawarweoyi bedberre. Bedda bu djal burudjang wanjh kabirriyingkihmarburren kore ngandidarrkidmang ngardduk bu yimankek ngandibun. Bedda ngandimarnebolkaruy kanjdji duninh.

⁸ Wanjh yibenmarnbu kabirrikangebarrhme bu yibenbun. Ngadjare bedman kabirriwohmankan kore kudjorlok manbu bedmanbidju birri-marnbom, ba bu kabirribularrbuyindan.

⁹ Wanjh kunu nganjilngmakmen kore ngudda nawu Yawey. Ngadjal-marmarr bu ngudda wanjh kanngehke.

¹⁰ Ngaye ngakayhme, kukange ngardduk dorrengh bu ngayime, “Minj nabuyika god yiman ngudda Yawey! Minj nangale ngunerohrok! Ngudda yibengehke nawu birrimarladj bininj kore nawu birribang kabindiwar-rewon. Warridj yibengehke nawu birrimarladj kore nawu birribang bininj kabindimarnedjirdmang.”

¹¹ Nawu birribang bininj kabirrikurrehkurren bu ngandidjuhun kore minj njale ngaburrbun. Bedda ngandimarnekarrremarnbun.

¹² Ngaye ngadjalkurduyime kunmak, dja bedda ngandidjaldjuhun ba bu ngandiwon kunwarre. Wanjh ngaye ngakukmayahme dja mak ngakangearremen duninh.

¹³⁻¹⁴ Bu bedda birridulkihyoy, wanjh ngaye nganjilngwarreni bedberre dja ngabenmarnenalkbuni, warridj minj manme nganguyinj. Dja ngad-jaldanginj yiwarrudj bedberre. Dja bu ngudda minj yibenmarnbuyi kore ngaye djawani, wanjh ngaye ngadjalbolknani bu nganalkkihrey bu ngaye yiman rerrih ngahmarnenalkbuni nawu nganedabbolk dja ngalbadjan ngardduk.

¹⁵ Wanjh birrimekbe nawu ngandiwidnani birrinjilngmakmeni bu ngandinang ngaye ngamankang. Birrimirndemornnamerrinj manmolh ba bu ngandidjekmiwong. Bedda birriraworrinj nawu birridjenbuyika bininj dja ngandimarnekurrehkurreni.

¹⁶ Bedda yiman kayime bininj nawu kabirriwirrihme God dja ngandi-wabminguneng dja ngandidjekmiwong dja ngandiwidnani.

¹⁷ Dja ngudda Yawey yidjaldi yibennahnan bu kunmekbe ngandi-marnekurduyime. Wanjh nuk kanbidyikarmen, wardi ngandibun. Kanngehke ngaye kore bedda ngandikuyinbun yiman lions nabang dja wardi ngarrowen.

¹⁸ Dja bu bininj ke kabirrimirndemornnamerren ngaye warridj, wanjh ngaye kaluk burluburlume ngudda dja mak manjbun kore kumirrk bedberre.

¹⁹ Yuwn yibenbawon nawu ngaye ngandiwidnan bu kabirrinjilngmak ngayekenh. Nakka ngandiwidnan bu djal mankarrebudjang. Bedda wanjh kabirriburlumerren bu ngaye ngandidjekmiwon.

²⁰ Birrimekbe nawu birriwarre bininj wanjh minj kabirridjare kunmodmikenh. Bedda wanjh kabindimarnekurrehkurren bininj nawu kabirrihdjalni kamak rowk kore kurorre.

²¹ Namekbe nawu birriwarre bininj ngandidarrkidjubun bu kabirriyime, "Yah! Kunukka wanjh ngudda yikurduyimeng! Ngad wanjh ngundinang kunmim ngadberre!"

²² Ngudda nawu Yawey! Ngudda yibenkurduyung rowk kore bedda ngandimarnekurduyimi. Dja yuwn kanbawon bu yidjaldi djarreh!

²³ Ngudda God ngardduk! Ngudda wanjh kanmarnewohnawohnan! Wanjh kankidma, dja kanbidyikarmen.

²⁴ Yawey, ngudda nawu God ngardduk. Wanjh yibenbukka bininj nawu ngandidjubun bu ngaye ngaye ngamak bininj, bu djal mandjad ngakurduyime. Dja yuwn bu yibenbawon bu bedda ngandidjekmiwon.

²⁵ Mak yuwn bu yibenbawon bedda kabirrimarneyimerren ngayekenh, "Bonj, wanjh karridarrkidmey nahni nawu karrihdjareni bu karrimarnekarewarrehwarrewong!"

²⁶ Bedda nawu kabirrinjilngmakmen ngayekenh bu ngandinan ngamankan, wanjh ngadjare yibenmarnbun bu kabirridjalbarabun dja kabirriyemekarren.

²⁷ Dja bininj nawu ngaye ngandiburlume bu ngudda kanmakwan, wanjh bedda kabirridjalnjilngmaknin dja ngundidjalwayini ke bu kabirrikayhme munguyh munguyh, kabirriyime, "Karridjalburluburlumen nawu Yawey! Nungka wanjh kabirrokiwe nuye bininj nawu kabimarnedurrrkmirri!"

²⁸ Wanjh ngaye ngayolyolme bu mulewan nguddakenh, dja ngayime bu ngudda yidjalkurduyime kundjalmak bu munguyh. Dja mak ngaye burluburlume ngudda kunbarnangarrakuyeng bu munguyh.

36

Nawu Birriwarre Bininj Minj Kabirrimarnebodan Nawu God.

Psalm 36:1-4

¹ Kuhni ngaburrrbun kanjdji kore kukange ngardduk. Ngayolyolme bininj nawu birriwarre, dja kunwarre bedberre. Bedda wanjh minj kabirrimarnekele God, dja minj nungka kabirridjalwokmarrmang.

² Nahni bininj nawu nawarre, wanjh kaburlumerren. Nungka kayimerren, "Ngaye ngamak!" Minj mak kahmulewarren kunwarrekeh nuye, dja minj kawirrihime nuye kunwarre.

³ Nahni bininj nawu nawarre wanjh bu kawokdi, wanjh kunwok kunwarre kayime, dja mak kahkurrehkurren. Nungka mayaliwarreminj, dja bawong kore kunmak kurduyimeninj.

⁴ Nahni bininj nawu nawarre, bu kakeyo manbalabala nuye, minj kakodjkeyo, dja baybaywi kadjalkarremarnburren kunwarrekeh. Nungka wanjh kakebrokmarnburren kore kunwarre. Minj mak kaburriwe kunmayaliwarre.

Yawey Nawu God Wanjh Nadjalmakkaykenh Duninjh.

Psalm 36:5-12

⁵ Nawu Yawey, ngudda wanjh kanmarnedjare bulkkidj duninjh, dja kunkimukkenh yiman kayime kaddum heaven. Ngudda mak kanmarneyime bu djal kunwoybuk duninjh. Nakka kunkimuk duninjh yiman kaddum duninjh.

⁶ Nawu Yawey! Ngudda yidjalkudji yikurduyime kundjalmak duninj bu munguyh munguyh, dja minj kunwarre yiyime. Kunwok kunmak ke kad-jaldi yiman kayime kuwarddekimuk. Dja mak ngudda kandjadme ngad bininj bu djalmadjad duninj. Bu kanmarnewokdi kore kandjadmekenh wanjh mahni kunwok ke kahburrk duninj yiman kore kurrula. O Yawey, ngudda kannahnan ngad bininj dja mak yehyeng rowk nawu kahdarrkid, wanjh yidjalnahan rowk.

⁷ Ngudda kanmarnedjare ngad bininj bu bulkkidj duninj! Nawu ngarrikuken bininj dja mak nawu ngarrimarladj, wanjh ngarrimre kore ngudda yidjalkukdjurrudi ngadberre.

⁸ Kumekbe wanjh ngarridjalngun dja ngarribongun manwern kore ngudda kanwon rowk, dja kanworrkmiwon bu kanwon manme manmak-mak ke. Kamak bu kanwon kunmakkenh kore ngudda ke kunwernkenh.

⁹ Ngudda yidjalkudji yimarnbun manbu kundarrkidkenh, dja ngad kandarrkidwon, manbu ngudda ke! Dja mak ngudda kanmarnebolkwolkan ngadberre kore ngudda ke, ba bu ngad ngarribolknan mandjad.

¹⁰ Ngad nawu ngundiburrbun, wanjh ngarridjare ngudda kandjal-marnedjare munguyh. Ngad nawu ngarryime bu djal kunmak ke, wanjh ngarridjare ngudda kanmarnekurduyime kunmak ke bu munguyh.

¹¹ Kannahnan ngaye, dja nawu kabirriburlemerren bininj wardi ngandimelme, dja nawu birriwarre bininj wardi ngandimarnbun bu ngakelerlobme.

¹² Dja wanjh ngahnan nawu kabirrikurduyime kunwarre, wanjh kabir-ridjalyo kore yibenkukburriweng, dja minj mak kabirriyawoyhdolkan.

37

Bininj Nawu Birrimak Dja Bininj Nawu Birriwarre.

Psalm 37

¹ Yuwn bu ngurrinjinlgwarremen bedberre nawu birriwarre bininj. Dja yuwn bu mak ngurrikirnwe bedberre nawu kabirrikurduyime kunwarre.

² Nakka birriwarre bininj wanjh yiman kayime kundalk manbu kah-darlehmen. Dja bedda warridj yiman kayime mankolhdemak, dja kaluk kabirridjalbukmen.

³ Ngudda wanjh ngurridjalkangekurmerren nawu Yawey, dja ngurrid-jalkurduyimen kunmak. Ngurridjaldin kamak rowk kore kurorre.

⁴ Ngurrimarnenjinlgmarnburrimen kore nawu Yaweykenh. Dja nungka wanjh ngunwon kunmakmak kore ngurridjare.

⁵ Ngurrikurmerrimen kore Yawey bu ngunbolhbukkan dja mak ngunnahnan. Ngurrikangekurmerren kore nungka, dja nungka ngun-marnekurduyime kunmakkenh.

⁶ Kaluk nungka ngunmarnbun ba bu ngurrimak bininj, yiman kayime ngurrikukbame! Nungka mak ngundjadme dja ngunmakwan, ba ngurri-bolkwolkan yiman kayime manbu kundungbang.

⁷ Ngurridjaldin dja ngurridjalmadbun yeledj nawu Yawey, dja yuwn bu ngurrinjinlgwarremen bininj bedberre nawu kabirrikurduyime kunwarre kore kabirrikarremarnburren.

⁸ Yuwn bu mak ngurriyiddung bedberre. Dja yuwn bu ngurrbenburrbun munguyh. Wardi kunmekbe ngurrimarnburren ngudmandeleng bu ngurriyime kunwarre.

⁹ Kaluk birrimmekbe nawu birriwarre bininj, wanjh God kabenngey-dadjke. Ngudda nawu ngurridjalmadbun nawu Yawey, wanjh nungka ngunbolkwon kunbolk nuye.

¹⁰ Med, dja darnkih kabolkyime wanjh nawu birriwarre bininj kabirrid-jalyakmen. Bu kuhni ngurrbenyawan, wanjh bonj, minj ngurrbenngalke.

¹¹ Dja bininj nawu minj kabirriburlumerren wanjh kabirribolkmang dja kabirridjalgehme, kunmodmikenh dorreng.

¹² Bininj nawu birriwarre, wanjh kabindimarnekarremarnburren kunwarrekeh bedberre birrimak bininj, dja kabindimarneyidmeyerren.

¹³ Dja nawu Kawohrnan Rowk kabendjaldjekme nawu birriwarre bininj. Kaluk nungka kaburrbun kore kabolkyime bu nungka kabendjadme bedberre.

¹⁴ Nawu birriwarre bininj kabirrikarme mandjawakkimuk, dja bonarra kabirrikarme, ba bu kabindibun nawu birrimarlaj dja mak nawu minj birrikuken. Bedda kabirridjare kabindibun nawu birrimak bininj.

¹⁵ Dja ngaleng nawu mandjawakkimuk kabirrikarme wanjh kabirikangeduluburren. Dja nawu bonarra bedberre wanjh kadjalbakme rowk.

¹⁶ Bininj nawu birrimak minj birrikuken, dja kamak rowk! Bininj birriwern nawu birridjalwarre, wanjh kabirrikarme kunwern, dja wanjh kawarre!

¹⁷ Nawu birriwarre bininj bedberre kundulkarre, wanjh karrulkarreyakmen rowk. Dja nawu Yawey kabenbidyikarme nawu birrimak bininj.

¹⁸ Bininj nawu minj kabirriyime kunwarre, wanjh nawu Yawey kaben-nahnan munguyh. Dja kabenmarnekarme kunmakmak kore kadjehd-jenyu munguyh.

¹⁹ Bu kunrayek kabenmarnebebme nawu birrimak bininj, wanjh kabirridjalre kamak. Bu manme yak kore kunbolk rowk, wanjh bedda minj kabirrimarrwe, dja kabirriworrrkmiworren.

²⁰ Dja nawu birriwarre bininj kabirridjalyakmen rowk. Nawu birriyidko nawu Yawey, wanjh kabirridjalyakmen yiman kayime mannguymak, dja yiman kayime kundolng kare.

²¹ Nawu birriwarre bininj wanjh kabirridjalmang njalehnjale, dja minj kabindimarnedurndiwe bedberre nawu birrikarmi. Dja ngaleng birrimak bininj wanjh birridjalnjilngmak bu kabirriweykan njalehnjale.

²² Bininj nawu Yawey kabenmarneyime kunmak, wanjh kabirribolkmang dja kabirrihyo kore kubolkmak. Dja bininj nawu Yawey kabenwarrewan, wanjh kabenngey-dadjke bedberre.

²³ Bininj nawu kadjare kabirridjare kabirribolhkadjung nuye Yawey, wanjh Yawey kabenbidyikarme ba minj kabirrimankan.

²⁴ Wardi bu namak bininj kabungbarrkbun, wanjh minj kamankan kunkimukkeh. Nawu Yawey kaberyirriyongen dja kabikarme.

²⁵ Ngaye wanjh ngayawurrinjni, dja wanjh bolkkime ngaye ngakohbanj, dja minj ngabennayinj bininj nawu birrimak bu kunrayek kabenbularbun, dja wurdwurd bedberre minj mak kabirriwernhmarrwedowen.

²⁶ Bedda wanjh kabirrinjilngmak bu kabindiwon njalehnjale kore birrimarlaj bininj, dja nawu wurdwurd bedberre, wanjh God kabenmarneyime kunmak.

²⁷ Mah, ngurribawo kunwarre, dja ngurridjalkurduyimen bu djal kunmak. Bu kuhni ngurriyime, wanjh ngurridjalyo munguyh kore kubolkmak.

²⁸ Bu kuhnikenh, nawu Yawey kabenmarnedjare bininj nawu kabir-rikurduyime bu dja mandjadkenh. Dja minj mak kabenbawon nawu nuye birrimak bininj. Nungka kabenmarnebidjurrudi bu munguyh. Dja nawu birriwarre bininj, wanjh Yawey kabenburriwe nawu bedberre wurdwurd.

²⁹ Yawey kabenwon kunbolk bedberre nawu birridjalmak ba bu kabir-ridjalyo kumekbe bu munguyh munguyh.

³⁰ Nawu namak bininj kawokdi bu kunmakkenh, kore God nuye kunmayali, dja bu kawokdi wanjh mandjad duninjh.

³¹ Nungka wanjh kaburrbun God nuye mankarre kore kukange, dja kadjalre kore manbolhmak dja minj kamankan.

³² Nawu birriwarre bininj kabirridjare kabindibun nawu birrimak bininj, dja kabindimarnewarlkkarren ba kabindidarrkidmang.

³³ Dja nawu Yawey minj kabenbawon bu kabindibun. Bu birriwarre bininj kabindidjadme, wanjh Yawey kabenbidyikarme bininj birrimak.

³⁴ Mah, dja ngurridjalmdabun nawu Yawey, dja ngurridjalmarrkmang kore ngunbukkan. Wanjh nungka ngunngeykimukwon ba bu ngunbolkwon ngudberre kunbolk. Kaluk bu nungka kabenburriwe nawu birriwarre bininj, wanjh ngudda ngurrbenan kore kabenmarnekurduy-imerran.

³⁵ Ngaye ngakurdunang bininj nabang dja nawu nawarreni. Wanjh nungka wernhkimukworrinj yiman kayime kundulmak bu kadjordmen kore kundjulngmak ngalenggarre.

³⁶ Dja bonj, nungka wanjh werrkwerrk djalyakminj rowk! Ngaye ngayawam, dja larrk, yakminj, bonj.

³⁷ Ngurrbenngunjdjikka bininj nawu minj kabirriyime kunwarre, dja kabirridjalkurduyime kunmak! Bininj nawu kadjare kunmodmikenh, wanjh nakka kahre munguyh.

³⁸ Dja ngaleng bininj nawu birriwarre, wanjh kabirribularrbuyindan. Minj kabirrire munguyh.

³⁹ Nawu Yawey kabenngheke birrimak bininj, dja nungka yiman kayime kabendjurrudi bedberre munguyh, ba bu kabirridjarrkdi nuye bu kunyid kabenmarnewernmerren.

⁴⁰ Yawey kabenbidyikarme dja mak kabenbebke kore birriwarre bininj kabindibongkarme, dja mak kabenngheke munguyh. Kunmekbekenh kunu bedda wanjh kabirridjalwarlkkarren kore nungka kabennahan.

38

Bu King David Dingihdi Yiwarrudj.

Psalm 38

¹ O Yawey, bu yiyiddung ngardduk, wanjh yuwn bu kanbengyolyolme, dja yuwn bu mak kanwernhdung bu ngaye njilngwarrewong.

² Ngaye ngababang kore ngudda kandulubom bonarra ke dorrengh, dja kore ngudda kanwidjbihkeng wernkih duninjh.

³ Ngaye ngabekkarren bu ngarrowen kanjdji kore kuburrk ngardduk, bu kuhni ngudda kandjaldung. Ngaye ngabakkabakkeng ke mankarre, dja kunu ngamurrngwarreworrinj.

⁴ Ngaye wanjh kunwarre ngayimi, dja ngadjalburrburren munguyh bu ngaye ngadjalwarre duninjh, wanjh ngadjalkangewarre.

⁵ Ngaye wanjh ngadjalwarre bininj dja ngabengwarrminj, wanjh kunmekbekenh ngamokwernminj, dja ngamoknudminj.

⁶ Ngaye wanjh ngadjalnjlngwarreminj dja mak ngangudjywarren. Ngadjalnalkkihre kundowikenh bu kunbarnangarrakuyeng.

⁷ Mak ngawernhbabang kore kunbodne ngardduk, dja kunburrk rowk ngardduk wanjh kadjalwarrewarremen.

⁸ Ngaye ngangudjywarren munguyh, dja minj ngaye ngamurrngrayek-worren. Kaluk ngadjalkongiburren dja ngakangewarre duninj.

⁹ Ngudda nawu kanmarnewohrnan, ngudda kankangenan baybaywi kore kukange ngardduk, dja yiburrbun kore njalehnjale ngaye ngadjaldjare. Ngudda kanbekkabekkan kore ngaye ngangolekwerren.

¹⁰ Yoh, ngahdurddubekkarren bu wernkih kawokdi. Ngaye ngangudjakmen, dja mak ngamimwarremen, minj ngawernhbolknan.

¹¹ Ngaye ngadjalmokwern dja djawirna ngardduk ngandidjalbawon, minj kabirrimre darnkih ngaye. Nawu namud duninj bininj ngardduk minj kabirrimyikan kore ngaye.

¹² Nawu ngariyidko bininj kabirridjare ngandibun, dja ngandimarnekunidi. Bedda ngandiyolyolme bu ngandiarrewonkenh. Bu djal barnangarrakuyeng wanjh kabirrikarremarnburren ba bu ngandikowe.

¹³ Ngaye yiman kayime ngabengwarr dja minj ngabekkan kunwok. Mak ngaye yiman kayime ngadjenwarreminj, dja minj ngawokdi.

¹⁴ Ngaye ngayimerran yiman bininj nawu minj nangale kabiwokbekkan dja minj nangale kabiwokmang.

¹⁵ Ngaye wanjh ngabengdi dja ngamaddi ngudda nawu Yawey! Kaluk ngudda kanwokmang, ngudda nawu God ngardduk bu yiwohrnawohrnan rowk.

¹⁶ Dja ngaye ngayimeng, "Yuwn yibenbawon bu ngandimarneburlumeren, dja ngandidjekmiwon kore ngaye ngarengeyirrebme."

¹⁷ Bolkkime wanjh ngaye ngabekkarren bu ngadjalyirrebme dja ngamankan. Mak ngadjaldjabbekkan munguyh.

¹⁸ Wanjh ngawarnyakmulewarren kore ngaye kunwarrekenh ngayimi. Ngaye wanjh ngawernhkangewarreworren kunwarrekenh ngardduk.

¹⁹ Ngabenkarrme birriwern nawu ngariyidko, dja bedda birringudjang warridj. Mak nawu ngandiwirrihme bu djal burudjang, wanjh birridjalwern.

²⁰ Bininj nawu ngaye kunmak ngabenmarnekurduyime, wanjh kabirriborledme dja ngandiarrewon, mak bu ngaye kunmak ngakurduyime, wanjh bedda ngandiwirrihme.

²¹ O Yawey, yuwn bu kandjalbawon. Yuwn bu mak djarreh yire, ngudda nawu God ngardduk.

²² Yimray werkkwerkk ba kanbidyikarmen, ngudda nawu kanmarnewohrnan dja nawu kanngehke.

39

Bu Ngad Bininj Karrisarrkid Bu Djal Kundedjumbung.

Psalm 39

¹ Ngaye ngayimerrinj kanjdji baybaywi ngardduk, "Ngaye ngadjalnahnarren, dja minj ngabaworren bu ngawokdi kunwok kunwarre. Ngaye yiman ngarrangdukkarren bu ngarridjarrkdi kore nawu birriwarre bininj." Kuhni ngayimi kore baybaywi.

² Wanjh ngadjaldi wokyak, dja minj njale ngayimeninj. Minj ngawokdi-wirrinj, yibeng kunwok kunwarre, dja kunwok kunmak. Larrk. Dja bonj, ngadjalnjinlgwarreminj.

³ Kaluk ngakangewurilmeng. Ngaburrbuni, dja wanjh ngarruy. Wanjh ngawokdanginj kundjen ngardduk.

⁴ Ngayimeng, “Ngudda nawu Yawey, ngadjare kanbukkan kore baleh kabolkymie bu ngaye ngayakmen ngarrowen. Ngaye baleh kayime mandjewk ngardduk? Kanbukkan ba bu ngawernhburrbun bu ngad bininj wanjh woybukkih minj kunkuyeng ngarridjaldarrkiddi.

⁵ Ngudda kanmarnbom ngaye yiman yeng. Ngarranginj, dja werkkwerkk ngayakmen. Ngudda yibenwon bininj rowk kunngolek ngudda ke, dja wanjh bonj, kabirringolekyakmen ba kabirridarrkid bu djal kundedjungbung.

⁶ Ngad nawu bininj, wanjh yiman kunwoyik. Ngarrirengheh baleh-baleh, dja bu djal burudjang. Ngarrimang njalenjale, dja ngarriburrbun kaluk ngarrbenmarnebawon dja birringale kabirrimang?”

⁷ “Ngudda nawu Kanmarnewohnan, ngaye bolkkime ngayawarren. Dja bonj, ngaye ngadjalkangekurrmerren kore ngudda, dja djalmadbun munguyh.

⁸ Kannghekemen kore ngaye kunwarre, dja ngakurduyimi kunwarre kunwern bu ngaye ngawarreworinj. Yuwn kanbawon bu nawu birribengwarr bininj ngandidjekmiwon.

⁹ Ngaye minj njale ngawokdi, dja minj ngamulewarremeninj. Dja ngudda yingan kankurrmeng kore ngahdi bolkkime kunyid dorreng.

¹⁰ Ngadjare ngudda yingurdmen kore kandung, dja yiman kunbid ke kanwidjibihkeng dja darnkih ngarrowen!

¹¹ Ngudda kandung ngad bininj rowk, dja kanbun kore kunwarrekenh ngadberre. Kaluk yibenmarneburriwe njalehnjale namakmak bedberre nawu birrikuken. Bininj rowk wanjh yiman kayime kayakmen werkkwerkkerr kore kunngolek kadjalyakmen.”

¹² “O Yawey, kanbekka bu ngahdi yiwarrudj ke. Kanwokbekka bu ngaye djawan bu kanbidyikarrme. Ngaye nganalkbun, dja yuwn bu kanmarneborledkerren. Ngaye wanjh djarrehbeh ngamwam kore ngudda, ngaye yiman ngadjenbuyika, yiman mawahmawah ngardduk warridj.

¹³ Yuwn bu kanwernhnan, ba ngayawoyhmarrmarr. Kaluk darnkih ngarrowen dja ngadjalyakmen, bonj.”

40

God Nawu Kanbidyikarrme Dja Kannghehke.

Psalm 40

¹ Ngaye ngahdjaldi bu ngahdjalmadbuni nawu Yawey. Wanjh nungka nganburrbom dja ngankayhmibekkkang.

² Nungka nganbekkeng kore kanjdji kudjorlok ngabongdi bu darnkih ngarroweng. Nungka nganbekkeng kore kukih bu ngayibmeninj dja kankurrmeng kore kubolkrayek ba bu ngarey kamak rowk.

³ Dja mak nganwong mankong mankerenge dja ngawayini bu ngaburlume nawu God kadberre. Mak birriwern bininj kuhni kabirrikurdunan, wanjh bedda kabirriburlume dja kabirrikangekurrmerren kore nawu Yawey.

⁴ Bininj nawu kabirriwoybukwon Yawey wanjh bedda kabirriwernhnjilngmak. Bedda minj kabindiwoybukwon bininj nawu kabirriburlumerren dja kabirrimarnebodan nawu nabubuyika gods.

⁵ Ngudda Yawey nawu ngardduk God, ngudda yikurduyimeng kunwern bu yihdurkmirri kundulkarre kunkimuk dorrengh ngadberre. Ngudda kanmarneyingkihkarremarnbom bu kunwern! Minj nangale nabuyika god yiman ngudda. Minj nangale bininj ngunmayaliburrbun, dja minj nangale kawernhburrbun rowk kore ngudda yikurduyime kundulkarre ke. Dja kundjalwern duninj.

⁶ Ngaye bolkkime ngawohburrbun bu ngudda minj yidjare ngad bu ngundiwon dja ngundimarnekinje mayh ba bu ngarridi yiwarrudj. Ngudda wanjh kanbukkkabukkang ba bu ngaye ngaborlhmeng bu ngudda minj yidjare bu manbubuyika woyi kore kunwarrekenh ngardduk bu ngaye marnekurrmeninj.

⁷ Wanjh ngaye ngayimeng, "Yina! Ngaye ngamwam kore djurra kabimbuyindi bu nganyolyolme. Kuhni wanjh kayime:

⁸ "Ngaye ngawernhnjilngmak bu ngakurduyime kore ngudda yidjare, ngudda nawu God ngardduk. Manbu mankarre ke ngudda kanbukkkang dja yiman kabimbuyindi rowk kore kukange ngardduk."

⁹ "Wanjh ngayolyolme bedberre bininj ngudda ke kore ngarrimirnderri. Ngaye wanjh mulewam bedberre kumekbe bu ngudda kanngehke ngadberre. Maninjmanu kunwok ngannjilngmarnbom dja ngarrinjilngmak-minj. Ngudda Yawey yiburrbun bu ngaye minj ngawokngurdkerrimeninj, dja bonj, ngaye djalmulewan.

¹⁰ Ngaye minj ngawarlkayinj manbu kunwok kunmak nguddakenh kore kukange ngardduk. Ngaye ngabenmarneyime birridjalwern bininj nawu ngarrimirndemornnamerrinj bu ngudda kanmarnebegmidjdan ngadberre kunwarre, dja mak kanngehke. Ngudda wanjh kandjalmarnedjare dja minj kanbawon bu munguyh munguyh. Kuhni rowk wanjh ngaye ngayolyolmeng bedberre bininj. Ngaye minj ngabenmarnewarlkayinj maninjmanu kunwok nguddakenh."

¹¹ "Ngudda nawu Yawey, kandjalkongibu kore ngudda kandjalmarnedjare, dja yuwn bu kanbawon. Ngudda wanjh kanmarnedjare dja mak yidjalkurduyime kore yiwokkurrmerrinj, wanjh kunmekbekenh ngaye ngadjalngehme.

¹² Bolkkime manbu kakangeyid makka nganmarnewernmerren ngardduk. Dja ngardduk kunwarre wanjh djalwernmerrinj, dja ngannjilngwarrewong, yiman kayime ngangarrnghmang, dja minj mak ngayawoyhbolknan. Ngaye ngadjalkangebarrhme dja ngadjaldowe."

¹³ "O Yawey, ngaye manjbn bu kanngehkemen, dja kanbidyikarmen werrkwerkk ngudda nawu Yawey.

¹⁴ Dja bininj nawu kabirridjare ngandibun, wanjh yibenmarnbu bu kabirriyemingalme dja kabirridjalbarabun. Dja nawu kabirridjare ngandinjlingwarrewon, wanjh yibenmunkewemen ba kabirrikelerlobmerren kunyemi dorrengh.

¹⁵ Yikahwi bininj ngandiborrkbun bu ngandidjekmiwon, wanjh ngad-jare yibenngurdkemen kunyemi dorrengh."

¹⁶ "Dja bininj nawu ngudda ngundiyawayawan nakka wanjh yibenmarnbu bu kabirriwernhnjilngmak. Dja bininj nawu ngundimarnedjare, bedda nawu ngudda yibenngengkeng, wanjh wardi birrihdjalyimen munguyh, 'Nawu Yawey wanjh Nadjalwernhkimuk Duninj!'

¹⁷ Dja ngaye wanjh ngamarladj dja ngadjalyawarren. Dja ngudda nawu God ngardduk, ngudda yiwohnawohnan rowk, dja bonj, ngudda kanburrbun! Ngudda yidjalkudji nawu kanbidyikarme dja ngardduk nawu kanngheke. Mah, werrkwerrk kannghekemen!”

41

Bu Karridjawan God Bu Kankongibunkeh.

Psalm 41

¹ Bininj nawu kabenkongibun nawu birrimarladj bininj, nakka wanjh kadjalnjilngmak. Dja nawu Yawey kabibingehke namekbe bininj bu kunrayek kawernmerren nuye.

² Nawu Yawey kabinahnan dja kabimarnbun ba bu nungka kadjal-darrkid dja minj karrowen. Birribuyika bininj kabirriyime bu Yawey kabimarnekurduyime namekbe bininj. Yawey minj kabibawon bu nawu birriyidko bininj kabirrimarnebebe.

³ Yawey kabimarnbun namekbe bininj bu darnkih karrowen dja nungka kamakmen dja kadjalyo kamak rowk.

⁴ Ngaye wanjh ngadjaldi yiwarrudj, bu ngayimeng, “Yawey, kankongibu! Ngaye ngabakkeng ke mankarre wanjh kandjalmarmbu ngardduk!”

⁵ Nawu ngarriyidko bininj wanjh kabirridjawanren bu kunwarrekenh ngandimarneyime, “Adju, dja baleh kabolkyime bu nahninjanu bininj karrowen, dja mak kunngey nuye kangeyyakmen?”

⁶ Bu bininj nawu nganeyidko kamre bu nganewokdi, wanjh kadjalkurren. Nungka kadjare ngankowe, dja bu nganbawon wanjh kabalrengehre bu ngandiyolyolme kore kurobbe.

⁷ Birriwern bininj nawu ngandiwirrihime wanjh kabirringayawkworren ngayekenh. Bedda kabirridjare kunrayek duninj nganmarnebebe.

⁸ Bedda kabirriyime, “A! Nakka karrowen. Kundjak kunkimuk kabimang, dja minj kayawoyhdolkan kore kahkeyo!”

⁹ Dja nakudji bininj nawu djawirna duninj ngardduk, nahni warridj nganbawong. Ngaye ngakangekurmeng, dja nganedjarrknguni manme. Bonj, nungka wanjh bolkkime ngandjalwirrihime.

¹⁰ Ngudda nawu Yawey kankongibu! Kandolkkayhwemen ba ngabenbun bininj nawu ngandiwirrihime.

¹¹ Bu bedda minj ngandibun, wanjh ngaye ngawernhburrbun bu ngudda kamarnenjlngmak.

¹² Ngaye minj kunwarre ngayimeninj, dja ngudda kunmekbekenh kanbidyikarmeng dja kankurmeng bu ngahdjaldi kore kumirrk ke bu munguyh munguyh.

¹³ Mah! Karrisurluburlumen Yawey, nawu God kadberre bininj nawu Israel kankebawahmeng. Karrisurluburlume bu djal munguyh munguyh. Amen, dja Amen!

42

Bu Karrisjare Karridi Darnkih Kore God.

Psalm 42

¹ Nawu mayh deer nakka kakombukdownen dja kadjare kukku kabongun. Wanjh kunmekbe rerrih karohrok ngaye ngadjare ngudda nawu God ngardduk!

² Ngaye ngamarnedjare God nawu kahdarrkid! Ngadjare ngarrarnhkurmerren duninh kore nungka. Dja baleh kabolkyime bu ngare nungka nganenarren kore kumirrk nuye?

³ Ngaye ngadjalnalkbun bu barnangarra rowk dja mak kumununwern, dja minj mak ngangun manme. Mak bu barnangarrakuyeng bininj nawu ngandiwidnan wanjh ngandimarneyime, “Ngayh! Baleh nawu God ngudda ke?”

⁴ Bu ngawernhnjilngwarre wanjh ngakangemulewarren kore God, dja kuhni yarrkka ngaburrbun kore kunrayek kumbebmi ngardduk. Mak ngaburrbun bu birribuyika bininj ngarrihdjarrkrey kore God nuye Temple bu ngarriwayini dja ngarriburlumi dorrengh. Kaluk ngabenmarnedokmi bu ngarrimirndevidbuni ngarriwernhnjilngmak dorrengh kore mulil ngarrimarnemarnbuni nuye!

⁵ Dja njalekenh ngaye ngenjilngwarre dja ngakangewarre bolkkime? Wanjh ngadjalkangekurmerren kore God ba ngayawoyhburlume nungka nawu nganngheke dja God ngardduk.

⁶ O God ngardduk! Ngaye woybukkih ngadjalnjlngwarre kore kanjdji kukange ngardduk. Dja bonj, ngaye ngaburrbun bu ngudda yikurduyimeng kunkimuk, kore Jordan Mankabo karredjingmangbeh, kaluk darnkih kuwarddehwardde manbu kawarddengeyyo Hermon dja Mizar.

⁷ Kunrayek munguyh durndiwerreni ngardduk, yiman kayime kukku manbu kabowarrhme kaddumbek wanjh nganbuni, dja kore ngudda ke kurulla wanjh yiman kanbarrkbom.

⁸ Dja ngaleng wanjh kunbarnangarrawern nawu Yawey ngandjal-marnedjare bu munguyh. Dja bu kumunun rowk, wanjh ngamarnewayini nuye, mak ngarri yiwarrudj nuye God nawu kanmalngmimbiwon.

⁹ Wanjh ngamarneyime God nawu yiman kunwarddekimuk ngardduk, “Njalekenh ngudda kanbengmidjdanj? Mak njalekenh bu ngahdjarengehere kunnjlngwarre dorrengh kore nawu ngarriyidko ngandihdjaldungi?”

¹⁰ Birrimekbe nawu ngarriyidko bininj wanjh ngandimarnbun bu ngadjakbekkan duninh, dja munguyh ngandimarnedjekme dja ngandimarneyime, ‘Baleh nawu God ngudda ke?’ ”

¹¹ Wanjh njalekenh bu ngahnjlngwarre dja mak ngakangewarre duninh? Bonj! Wanjh ngakangekurmerren kore God dja ngayawoyhburlume munguyh God ngardduk nawu nganngheke.

43

Ngahdi Yiwarrudj Bu Ngadjalburlume nawu Ngardduk God.

Psalms 43

¹ O God, kanmulewa dja kanmakwan ngaye. Bininj nawu ngundiwirrihne ngudda dja bedda kabirridjare ngandiowarrewon, dja ngadjare ngudda yibenbengdayhke bu ngaye minj kunwarre ngayimeninj. O God kanngehkemen kore birriwarre bininj nawu ngandimarnekurren.

² Ngudda korroko kannahnani, dja bolkkime njalekenh kanbawong? Njalekenh yibenbawon nawu ngarriyidko bininj bu ngandiwirrihne dja ngandimarnekurduyime kunwarre ba bu ngadjalrenghehere kunnjlngwarre dorrengh?

³ Mah, ngudda kanmarnebolkwolka dja mak kanbukkabukkan kunwoy-buk ke, ba bu kandurndiwe kore ngudda ke kuwarddekimuk kubolkdja-mun ke, dja kore ngudda yiyo.

⁴ Ngudda nawu God, bu kuhni kanmarnekurduyime, wanjh gaye ngare kore altar ngudda ke, dja ngakinje mayh bu won kore yidjare. Ngudda kannjilngmarnbun wernkih duninj bu munguyh, dja wanjh gaye ngahdirri kore nawu harp dja ngawayini bu gaye burlumburlume ngudda God, nawu God ngardduk.

⁵ Adju? Njalekenh gaye ngahnjilngwarre, dja mak ngakangewarre? Ngaye wanjh ngamarnburren bu ngadjalwoybukwon nawu God, dja ngayawoyhburlume nungka nawu God ngardduk. Nungka nawu ngan-gehkheng.

44

Karridjawan God Bu Kanbidyikarmekenh.

Psalm 44

¹ O God, ngarriburrbun bu nawu mawahmawah ngadberre ngundikur-dunang korroko bu ngudda ngurrikurduyimi kundulkarre ke dorrengh. Ngad ngarrbenbekkabek kang bu ngundimulewam nguddakenh.

² Bedda birriyolyolmi kore ngudda yibenburriweng birribuyika bininj kubid ke, dja yibenkurrmeng mawahmawah ngadberre bu yibenbolkwong. Dja yibenkukberelhmeng nawu birribuyika bininj dja yibenbekheng ngadberre mawahmawah kore birribongdi.

³ Minj bedmandeleng bu birriwinhmeng dja bindiburriweng birribuyika bininj bu birridjalme y bedberre kunbolk. Nawu mawahmawah ngadberre minj birringudjbangniwirrinj kore bindibuni. Kaluk yingan yiben-bidyikarmeng kundulkarre ke dorrengh, dja kore yibenmarnebukkarrinj bu woymbukkih yibendjalmarnedjareni.

⁴ Ngudda God, wanjh king duninj ngardduk dja kanmarnewohrnan. Ngudda kanmarnbun ngad bininj nawu Jacob ngankebmawahmeng bu karringehme yerrekah bu ngarriburren.

⁵ Ngudda wanjh kanbidyikarme bu ngarrbendurndiwe nawu ngandi-widnan bininj. Ngad ngarrbenbun nawu ngarriyidko kore ngudda ke kungey.

⁶ Gaye minj ngaburlumerren bu ngakarme ngardduk bunarra dja mandjawak. Minj nakka nganbidyikarme kore ngarriburren.

⁷ Ngudda God wanjh yidjalkudji kangehkheng kore ngarriburrinj nawu ngarriyidko bininj. Ngudda yibenmarnbom bu kabirriyemengalme bininj nawu ngandiwirrihmeng.

⁸ Yoh, ngad wanjh ngundiburluburlume ngudda God bu kunbarnangarra rowk. Ngad wanjh ngundingeyburlume ngudda bu ngundimanjbun munguyh munguyh.

⁹ Dja med, bolkkime wanjh njalekenh ngudda kanwarnyakminj dja kanyemikang ngadberre? Dja njalekenh ngudda minj mak karridjarrkku-nireyi kore ngarriburreni?

¹⁰ Ngudda kanmarnbom bu ngarrikelerlobmerrinj bu ngarrbenkengemeng nawu ngandibuni. Nawu ngandiwirrihme bininj wanjh ngandimarnemey njalehnjale nawu ngadberreni.

¹¹ Ngudda kanbawong kore birriwarre bininj ngandibuni yiman sheep, dja ngad wanjh ngarrikeleyarlarmerrinj kore kunred bedberre birribuyika bininj.

¹² Ngudda yiman kayime kankukweykang ngad nawu bininj ke, dja birribuyika bininj ngandibalkukbayahmi bu ngundikarremulewan yiman nadjalyahwurd money. Bu djal burudjang ngudda kankukweykang!

¹³ Nawu ngarridarnhni bininj ngandinang kore baleh yikurduyimeng ngadberre dja bolkkime wanjh ngandiyolyolme dja mak ngandidjekmion.

¹⁴ Ngudda wanjh kanmarnbom ngadberre bu birriwern nawu birridjenbubuyika bininj kabirrikodjbordebme ngadberre dja warridj ngandiyolyolme.

¹⁵ Dja kunu ngaye wanjh ngadjalyemengalme kunbarnangarrakuyeng dja kunyemi nganmey. Ngadjalbolknan kanjdji kunyemi dorreng.

¹⁶ Ngabenbekkan birriwern nawu ngandiwiidjung dja ngandidarrkidyolyolme. Nawu nganeyidko nakka wanjh munguyh kadjare nganbun.

¹⁷ Dja njalekenh kuhni kurduyimerranj ngadberre? Ngad minj ngundibengmidjdangimeninj mak ngarribakkemeninj mankarre ke kore kanmarnewokkurmerrinj ngadberre.

¹⁸ Ngad minj ngundibawoyi kore kukange ngadberre, dja mak minj ngarribolhbawoyi ngudda ke manbolh.

¹⁹ Dja bonj, ngudda wanjh kanwarrewam ngadberre dja ngarridjalngudjywarren kore kubolkwarre. Warridj kankurmeng kore kunkak duninj manbu kundowikenh kanbarrkbom.

²⁰ Dja njalekenh? Minj ngundingeybengmidjdangimeninj ke kunngey, ngudda nawu God ngadberre. Mak minj ngarriboddangimeninj nabuyika god nawu birridjenbuyika bedberre.

²¹ Ngudda kanmayaliburrbun ngadberre nawu bininj ngarriwarlahkenh, dja minj njale kawarlkayindan ke. Yoh, ngudda kankangeburrbun!

²² Dja bonj, ngudda kanbawon kore bininj kandidjaldung ngadberre bu nguddakenh kunbarnangarrakuyeng. Bedda kabirriyime ngad yiman mayh nawu sheep bu kandidjalbun munguyh.

²³ Ngudda nawu Yiwohrnan Rowk! Njalekenh ngudda yidjalkeyo? Mah, yirrolkka! Yuwn bu munguyh kandjalbodemewon.

²⁴ Njalekenh kanmarnewarlkarran ngadberre? Yuwn bu yibengmidjdan bu ngad ngarrihdjakkbekkan dja kunrayek duninj bebmeng ngadberre!

²⁵ Yoh, woybukkih ngad ngarridjalmakang kurorre kore ngarridjalngudjyakminj, yiman ngarrikukyo kore kundjulng.

²⁶ Mah! Ngudda nawu kanmarnedjare munguyh ngadberre, wanjh kunmekbekenh yimray kandjalbebkemen ngadberre!

45

Bu Karrbenbenemarnewayini Nawu King Dja Mak Ngalbininj kobeng Nuye.

Psalm 45

¹ Mah. Ngakarme kunwok kunmakkayhkenh kore kukange ngardduk. Wanjh kunmekbekenh ngawokdi bu ngaye ngayolyolme nawu king. Manbu kundjen ngardduk, nakka yiman pen rerrih bu bininj kabimbun nawu kawernhburrbun. Wanjh kuhni ngayime:

² Ngudda king ngardduk, wanjh ngudda yiwernhkukmak bu yibenyurhkeng nawu birribuyika bininj. Nawu God ngunmarnekurduyimeng

kunmak munguyh munguyh, dja kunmekbekenh ngudda yidjalwokdi kunwok manbu kunmakkenh.

³ Ngudda nawu yirrukarrekimukenh! Mah, yikanahkan mandjawakkimuk ke. Ngudda yiman yidjongburrimen namakmak yiman king duninj ba bu bininj rowk ngundiburluburlume.

⁴ Ngudda king duninj bu yimornenin djarrang dja yiwinhme kore ngurriburren. Ngudda wanjh yiwinhme kore kunwoybukkenh dja kunmakkenh, dja kore yidjadmen bu djal mandjad. Dja ngaleng ngudda minj yingan yiburlumerren. Mah, yidjalkurdumak bu yibenbun nawu birriwarre bininj kunbidkukun dorrengh ke.

⁵ Ngudda nawu king, wanjh manbu bunarra ke kabendulubun kundurddu bedberre bininj nawu ngurriyidko. Bininj nawu kunredbubuyikabeh nakka wanjh kabirrimankarren kore yibenkumelme rowk.

⁶ Ngudda God wanjh king duninj, dja yidjalwohrnawohrnan rowk bu munguyh. Ngudda wanjh munguyh yidjaldjadme bu kamak rowk kore ngudda yibenmarnewohrnan bininj.

⁷ Ngudda yidjare kore djal kunmakkenh, dja yidjalwidnan kore kunwarre, wanjh kunmekbekenh God ngudda ke ngundjarrngbom kore nawu ngurridabbolk yibenyurhkeng, dja ngunnjilngmarnbom yiman kayime ngunkodjdelkkeng mankalkkid dorrengh.

⁸ Manbu kunmadj ke yidjongbuyindi nakka kamadbanj nawu manmanjmak manbu myrrh, dja mak manbu aloes, dja mak manbu cassia. Ngudda king duninj, dja kore manbu manrurrkkimuk ke, wanjh bininj kabirridirri instruments ke ba ngundinjilngmarnbun.

⁹ Nawu ngalbebeywurd nuye nawern kings, nakka wanjh kabirrihdi kumekbe kabirriraworren birribuyika daluk nawu ngudda yibukukenhme. Dja kore kukun ke kahdi ngalbininj kobeng ke, ngalbu kadjongbuyindi kunmadj manbu birribibbom gold duninj nawu kubolkkimuk Ophirbeh.

¹⁰ Ngudda nawu ngalbininj kobeng bu nahni king duninj ngunmarnedjareminj, wanjh kanbekkabekka dja yiwernhburrbu kore marneyime. Yibendjalbengmidja nawu namud ke bininj, dja nawu kornkumo nuye birriredbo, dja yibendjalbawo.

¹¹ Bolkkime wanjh nawu king ngunkuknan dja kunmekbekenh ngunmarnedjare dja kayimerran nawu ngunmarnewohrnan. Wanjh nungka yimarnebodda.

¹² Birrikuken daluk ngalbu birrimdolk kang kukadje Tyre birrim kang ke nawern namakmak bu ngundiwon. Mak nawu birrikuken bininj kabirridjare ngundidjawan bu yibenmarnekurduyime kunmak bedberre.

¹³ Ngalkukmakkaykenh duninj ngalbu princess dja birribibbom gold warridj nawu ngalengngarre kahdjongbuyindi.

¹⁴ Ngudda nawu king, yina! Ngahli daluk nawu ngunemarren kamre. Kahdjongbuyindi kunmadj namakkaykenh. Ngahli wanjh kabirrimkan kore ngudda. Dja mak ngalbu ngalyawkyawk ngalengngarre kabirrimunkekadjung, dja wanjh kabirrimre.

¹⁵ Bu kabirribebme dja kabirringimen kore manrurrk mak ke, bedda wanjh kabirriwernnjilngmak dja kabirrimarmarr duninj bu kabirrimirndengimen.

¹⁶ Nawu mawahmawah ngudberre kaluk bu kabirriyakmen, wanjh ngudda yibenmarnbun nawu bebeywurd ke ba kabirriwohrnawohrnan kubolkbubuyika rowk kore kurorre.

¹⁷ Wanjh ngamarnbun kunngey ke bu bininj rowk ngurriyime ngudda yingeykimuk duninh, dja minj mak ngundingeybengmidjdan munguyh munguyh kore kubolkbubuyika rowk. Wanjh birriwarlahkenh bininj rowk ngundiburlume bu munguyh munguyh.

46

Bu God Kankukdjurrudi.

Psalm 46

¹ God nungka kannahnan bu karrikelerlobme kore nungka. Mak kunnudj kanwon kadberre. Nungka karrihdjarrkdi bu baleh yarrkka kunrayek dja kunyid kambembe kadberre, wanjh nungka kanbidyikar-me.

² Kunmekbekenh kunu minj karrikele. Bu kondah kunred kabolkd-jalkmire dja wardi manbu kunwarddekimuk makka kawarddewarrarwar-rhmerren kore kurrula kanjdji, bonj, ngad nakka minj karrikele.

³ Manbu kurrula kawernhwokdi dja djarna kabun, mak manbu kun-warddekihkimuk makka wanjh kawodjorrhmiyindan. Dja ngad minj mak kumekbe karrikele.

⁴ Mankudji mankabo manbu kamkan kunnjilngmak kore kukadje nuye God. Kunmekbe kore kubolkdjamun nuye God kahni, nungka nadjalkimuk duninh nawu kawohrn nan rowk.

⁵ Nungka kumekbe kukadje kahni wanjh minj kabolkwodjorrhmiyindan. Nungka kabibidyikarme bu kamhkabel djarreh.

⁶ Kunredbubuyika kunukka yarrkka, nakka kabolkwodjorrhmiyindan. Nawu kabirriwohrnawohrn nan kabirrimarrkbaworren. Bu God karrarrar-rhme wanjh kabolkmarnbun kurorre bu kabolkelkelndan dja kayimerran yiman kukku.

⁷ Yawey nawu kabenkarme birridjalmirndewern duninh soldiers nuye, wanjh nakka karrihdjarrkdi. Nungka wanjh God nuye Jacob wanjh kandjurrudi kadberre dja kannahnan.

⁸ Mah, wanjh ngurrinray dja ngurrina nawu Yawey kore nungka kurduyimeng bu bolkbularrbom kubolkwern kondah kurorre.

⁹ Nungka kanbengurdke wars bu bininj kabirriburren kondah kubolk-warlahkenh kurorre. Dja kabenmarnebakke bedberre mankole dja bunarra dja manbu kunbid birrikarmi bu birriburrenikenh, wanjh kadjalburriwe kore kunak.

¹⁰ Wanjh nungka kayime, "Ngurringurdmen dja ngurriburru bu ngaye God. Ngudda bininj rowk wanjh kaluk kandingeyburluburlume kore kubolkbubuyika rowk, dja kandingeyburlume kondah kurorre."

¹¹ Yawey nawu kabenkarme birridjalmirndewern duninh soldiers nuye, wanjh nakka karrihdjarrkdi. Nungka wanjh God nuye Jacob wanjh kandjurrudi kadberre dja kannahnan.

47

God Nawu Yawey Kawernhwohrnan Duninh.

Psalm 47

¹ Mah, wanjh karribiddowkmen kunnjilngmak dorrengh, ngad nawu karriwarlahkenh bininj rowk! Mak karrimarnekayhmen nawu God bu karriwernhnjilngmak!

² Bininj rowk birrimarnekelenin nawu Yawey, nawu Nawernhkimuk Duninjh! Nungka wanjh king nakihkimuk duninjh, dja kahdjalwohrnawohran kore kubolkwarlahkenh rowk.

³ Nungka kanwong kundulkarre nuye bu karriwinhmeng dja mak kamarnbom bu karrbenmarnewohran bedberre nawu birridjenbubuyika bininj.

⁴ Dja bolkdjarrngbom kunred kore kanbolkwong kadberre, bu karrihni kunmak dorreng, ngad bininj nawu mawahmawah nuye Jacob nawu God bimarnedjareni.

⁵ Yawey nawu God bidbom kaddum. Wanjh birriwern kabirikaykayhme nuye kunnjilngmak dorreng, dja yikahwi mak kabirribuhbuhme wernkih duninjh kore trumpets.

⁶ Mah, wanjh karrimarnewayinin nawu God! Karrisidjalburluburlumen nawu king kadberre! Karriwernhwayinin kore nungka.

⁷ Nungka wanjh king duninjh nawu kawohran kore kubolkwarlahkenh rowk kondah kurorre. Karriburluburlumen nuye, mankong dorreng wanjh karriwayinin kore nungka.

⁸ God kahyerrkan manbu throne nuye kore kawohrnanken. Nungka wanjh kabenmarnewohran birriwarlahkenh bininj kore kubolkbubuyika rowk.

⁹ Bu kunkare God biyingkihberrebom Abraham, dja bolkkime birriwern bininj nawu kabirringeykimuk kabirrimre kore kubolkbubuyikabeh dja kabirrimirndemornnamerren Abraham nuye bininj dorreng. Nawu God kabenmarnewohran birridjalwern kings nawu kabirriwohrnawohran kore kubolkbubuyika rowk. Nungka wanjh nangeyewernhkimuk duninjh.

48

Bu Kabirriburlume God Kore Kunred Nuye Zion.

Psalm 48

¹ Karriburluburlumen nawu Yawey. Nungka wanjh nawernhkimuk duninjh, dja kamak bu karriburlume munguyh. Nungka wanjh God kadberre, dja kahdi kore nuye kunredkimuk, kurrurrkmirnderri kore kuwarddekimuk kabolkngeyyo Zion, manbu kubolkdjamun nuye.

² Maninjmanu kuwarddekimuk Zion wanjh kubolkmakkaykenh, dja kunwarddekihkimuk duninjh.* Birriwarlahkenh bininj kabirrimarmarr bu kabirribolkburrbun dja God nawu king nawernhkimuk duninjh kahyo kumekbe.

³ God kahyo kunmekbe bu bininj kabengehke, warridj nungka kabenmarnedjurruddi nawu bininj nuye ba bu kamak rowk kabirrihni.

⁴ Nawu kings birriwern birrimornnamerrinj bu yimankek kabirrirurrkbakke kore Zion.

⁵ Dja kaluk bu birribolknang, wanjh birrikangebarrhmeng, dja birrikeleminj duninjh, wanjh birrikelerlobmerrinj.

⁶ Bedda birrikukdelmeng duninjh, dja kundjak benkarmeng yiman kayime daluk ngalbu kadjakbekkan kore darnkih kayawmang.

⁷ Dja ngudda nawu God yibenbularrbom yiman kayime kunmayorrkimuk bu kamre koyekbeh dja kahdjerrknadjerrkname nawern kabbala nawu Tarshishbeh.

* **48:2** Kore Hebrew kakarme warridj, "yiman kayime kuwarddekimuk kabolkngeyyo Zaphon".

48:2 Matthew 5:35

⁸ Ngad ngarriwobek kang kore God kurduyime, dja wanjh bolkkime ngarrinang kore kunred kururkweren nuye Yawey nawu Narrulkarrekimuk Duninj, nawu God kadberre. God wanjh kabolknahan kumekbe munguyh munguyh ba bu kamak rowk.

⁹ O God, ngad ngarri kore manurrkdjamun manbu Temple ke, dja kumekbe ngarridjalburrun bu ngudda kanmarnedjare munguyh munguyh.

¹⁰ Nawu bininj nawarlahkenh kondah kurorre ngundengeyburlume dja wanjh ngundiburluburlume kore djarreh kubolkbubuyika rowk. Ngudda yikurduyime djal kunmakkenh kunbidkukunwi ke.

¹¹ Kunmekbekenh kunu bininj nawu birrikang kuwarddekimuk Zion wanjh kabirrimarmarr kore ngudda. Warridj ngudda God wanjh yidjaddjadme kundjalmak dorrengh, wanjh bininj nawu Judah benkeb-mawahmeng ngundimarnenjilngmakmen kore kabirriyo kuredbubuyika bedberre.

¹² Kandibekka ngudda bininj rowk kumekbe. Mah, wanjh ngurridjalrenggray kore kunred Zion. Ngurrirenggray dja ngurrirohrokmen kururkkimuk ngarre.

¹³ Mak ngurribolka kore kawarnamhyo mankimuk dja mandjalmur-rnggrayek manbu kabolkwakbuyingun ngarre. Mak ngurrina rowk, kaluk yerrekah ngurribolkmulewan bu ngurribenmarneyime nawu mawah-mawah ngudberre.

¹⁴ Kaluk ngurribenmarneyimen, "Namekbe God, wanjh God kadberre munguyh munguyh. Nungka wanjh kandjalkan munguyh munguyh."

49

Nawu Birrikuken Bininj Minj Kabirringehkerren.

Psalm 49

¹ Kuhni ngurribekka ngudda ngurriwarlahkenh bininj rowk nawu kubolkbubuyika rowk ngurrihni. Kandibekka ngurridjalwern bininj rowk kore kondah kurorre ngurrihni.

² Kandibekka nawu ngurridjalyeng dja mak nawu ngurriwohrnawohnan. Kandibekka nawu ngurrikuken bininj, warridj nawu ngurrimarlaj.

³ Ngaye won ngudberre kunwok manbu mayalimak. Kore kukangebeh ngardduk ngayime ba bu ngudda wanjh ngurrimayalibayhme.

⁴ Ngaye wanjh ngabenbekkabekkan bu bininj kabirriyolyolme kunwoy-bukkenh. Bu ngahdiri instrument nawu lyre kore ngawayini, wanjh kunu ngayolyolme kunwok manbu kanbukkabukkankenh ngad bininj rowk, dja ngayolyolme kore baleh kakarremenmenyime kunwok manbu kamenwarlkayindi.

⁵ Yiddok ngakelemen bu kunrayek kambebme ngardduk? Yiddok ngandihkehleme nawu birriwarre bininj bu ngandiwakbuyingun ngardduk?

⁶ Bedda nawu njalenjale kabenmarrkkan yiman nawu namakmak, dja kabirriburlumerren bu kabirriyime bedda birrikuken duninj.

⁷ Minj nangale bininj kabayahme kunmalng nuye nabuyika bininj. Minj kakarremulewan kore God ba bu kabikukbayahme nabuyika ba bu kayawoyhdarrkiddi.

⁸ Bininj minj karribayahme kundarrkid bu djal nawern money karrikukarme. Dja larrk, minj karribayahme manbu kundarrkid.

⁹ Kunukka minj nangale bininj kakarremulewan nuye God ba bu kabibawon karrarrkid munguyh, dja minj karrowen bu kakuknudmen kore kumidj.

¹⁰ Bininj rowk kabirridowe. Bininj nawu birribengwarr dja mak bininj nawu birrikodjkuludjad, wanjh bedda rowk kabirridjaldowe. Kabindimarnekukbawon nawu kabirrikukkarrme dja birribuyika bininj kabirrimang rowk.

¹¹ Yikahwi bininj nawu birringeykimuk wanjh kabirribolkngeybun ba kabolkngeykenhdan bedberre. Dja bonj, bedda warridj kabirridjaldowe dja kabirridjaldi kore kumidj munguyh munguyh.

¹² Bininj nawu nawernhkuken minj kangehkerren, dja kahdjaldowen yiman kayime mayh.

¹³ Kuhnı kabenmarnekurduyimerran bininj nawu kabirridjalbumen, dja mak bininj nawu kabindikadjung, dja kabindibekkabekkan bedberre.

¹⁴ Bedda rowk wanjh kabirridowerran yiman sheep yerreh, dja wanjh kabirrire kore kumidj. Kumekbe wanjh kundowikenh kabenmirndehnan! Bedda wanjh bonj, kabirrikunudmen kore kumidj. Minj kabirridurnden kore kururkumak bedberre. Nawu birrimak bininj wanjh munguyh kabindimarnewohrnan nawu birriwarre.

¹⁵ Dja ngaye, wanjh God nganngheke kore kundowikenh, dja woybukkih nungka ngankimang ba ngahdi kore nungka.

¹⁶ Yuwn bu ngurrikangewarre bu ngurrinan bininj nawu kakukenworren, dja kadjedjenkurrme kunkimuk.

¹⁷ Bu nungka karrowen, wanjh minj njale kakukkan kore kundowikenh. Minj kakukkarrme kore kanjdı kapolung.

¹⁸ Bu nawu nakuken bininj kahdarrkid wanjh kanjilngmak dja kaburlumerren. Bininj rowk kabirriburlume.

¹⁹ Bonj, nungka wanjh kare kore kundowikenh karohrok nawu birribebmawahmeng birriyingkihdoweng. Minj kabirriyawoyhnan kore kabolkwolkan.

²⁰ Bininj nawu kaburlumerren, bu minj kawernhburrbun kunmak, wanjh karohrok mayh nawu kadjaldowe.

50

Nawu Kawohrnan Rowk Nadjalkudji Kandjadme Ngad Bininj Rowk.

Psalm 50

¹ God nawu Narrulkarrekimuk Duninj, nawu kangeyyo Yawey, wanjh kawokdangen, dja kabenkayhme birriwarlahkenh bininj bu kabirrire kore nungka. Wanjh djarrehbeh kabirrimre kore koyekbeh dja mak kore karrikadbeh.

² God wanjh kahdi kore kunred Zion, manbu kubolkmakkaykenh nuye. Dja karrikuknan bu nungka nawernhmakkaykenh duninj.

³ Nakka wanjh God kadberre, dja nungka kawokdi. Nungka kamre manbirlukimuk dorreng, dja manbirluwoldjen kangun rowk kore kamre. Warridj kamkan namarrkon dja kunmayorrkımuk bu kamre!

⁴ Nungka kabenkayhme nawu kabirrihni kaddum kore heaven, dja mak kabenkayhme bininj nawu kurorre kabirrihni. Nungka kabendjadme bininj nuye.

⁵ Nungka kayime, "Ngurribenmirndemornnamen bininj nawu birriwokkurrmerrinj ngardduk kore ngandiwong dja ngandimarnebom mayh ngardduk."

⁶ Kaddum kunngol rowk kamulewan God bu nungka kadjalkurduyime mandjad duninj. Dja nungan nadjalkudji kandjadme ngad bininj rowk.

⁷ Wanjh God kayime, “Ngudda nawu ngardduk bininj, wanjh kandibekkabekka. Ngaye ngawokdangen bu welengname ngudberre, ngudda nawu Israel ngunkebmawahmeng. Ngaye God, wanjh ngudberre God.

⁸ Ngudda kanwon njalehnjale dja mayh, dja kandimarnekinje kunbarnangarrawern. Bonj, kamak. Dja minj ngayiddung ngudberre bu kunmekbekenh.

⁹ Dja med, ngaye minj ngadjare bulikki kore kunrurrkbeh ngudberre, dja minj ngadjare nenikud ngudberre ngurrimirndekarrme.

¹⁰ Kaluk mayh rowk wanjh ngardduk. Ngakarrme mayh nawu kuberrk kare, dja mak bulikki kore kubolkbubuyika kunwern duninj.

¹¹ Ngawernhburrbun mayhmayh nawu karrolkan kore kuwarddekimuk. Mayh nawern nawu kelebuk wanjh ngardduk rowk.”

¹² “Bu ngaye ngamarrwedoweyi, wanjh minj ngamulewarren ngudberre. Ngayingkihkarre kurore rowk, dja mayh rowk.

¹³ Yiddok ngurriyime bu ngaye ngangun kunkanj ngarre bulikki, dja ngabongun kunkurlba ngarre nenikud? Burrkyak.

¹⁴ Yuwn bu kanwon manme. Dja ngaleng kanmanjbun ngaye nawu God. Kuhni kanwo. Dja bu ngurriwokkurmerren bu kanberrebbun, wanjh maninjmanu ngurridjalkurduyimen kore ngaye nawu Nakimuk Duninj God.

¹⁵ Ngudda kankayhmen bu kunyid kambembe ngudberre, dja wanjh ngaye ngehke ngudberre ba bu ngudda kandiburlume.” Kuhni bu God yimeng.

¹⁶ God kunbuyika kabenmarneyime nawu birriwarre bininj, kayime, “Adju! Njalekenh ngudda ngurribengdayhkerren manbu ngardduk mankarre? Dja njalekenh ngurriyolyolme kore ngaye wokkurmerrinj ngudberre?

¹⁷ Ngudda minj kandibekkabekkan kore ngaye bukkabukkan njalehnjalekenh. Ngurridjalwokburriwe ngardduk kunwok.

¹⁸ Ngurriwarren bininj nawu birridedjolkwern rowk, dja ngurridjar-rkkurduyime bininj nawu kabirridjirdmarren.

¹⁹ Ngudda munguyh ngurriyolyolme kunwarrekenh, dja munguyh ngurrikurrehkurren.

²⁰ Ngurbenwarrewan dja ngurriwiddjung bininj nawu namud duninj ngudberre!

²¹ Kuhni rowk ngurrikurduyimi, dja ngaye minj bengdayhkeyi, dja ngadjaldi. Wardi ngurriyimeninj bu ngaye ngurrirohrok? Dja burrkyak, ngaye bolkkime ngawernhyiddung, dja bengdayhke ngudberre, dja karrikebnarren bu ngaye welengname ngudberre.”

²² “Mah, wanjh kandibekka ngudda nawu kandjalbengmidjdan ngaye nawu God, dja bu burrkyak, wardi kukdjalkmang, dja minj nangale ngungehke.

²³ Bininj nawu nganwon njalenjale bu ngaye nganmanjbun warridj, wanjh kunu nganburlume. Dja mak bininj nawu kadjalre kore manbolh ngardduk, wanjh ngaye God ngadjalngehke.” b

Psalm 51

1 O God, ngudda nawu munguyh kandjalmarnedjare, wanjh kandjalkongibu! Ngudda yiwernhmimkongiwern duninjh! Kanmarnebularrbu ngardduk kunwarre rowk.

2 Kankangedjirridjbu dja kanmarneburriwe kunwarre rowk ngardduk, dja kankangemarnbu ba minj ngayawoyhwokburriwe ke.

3 Yoh, wanjh kumekbe kunwarre ngakurduyimi bu minj wokmarrkmayinj. Ngaye munguyh ngadjalburrbun bu ngahkurduyimi kunwarre kore ngudda.

4 O God, ngaye ngakurduyimeng kunwarre duninjh kore yidjalkudji ngudda ke. Ngaye ngudda yidjalkudji njilngwarrewong bu ngaye wanjh ngakurduyimeng kundjalwarre manbu kore ngudda yiwarnyak duninjh. Bu kumekbekenh ngudda djalmadjad kandjuhun kore ngaye ngakurduyime kundjalwarre. Ngudda wanjh kunmak yiyime bu ngaye kanwarrewan.

5 Woybukkih, ngaye nawu ngadjalyingkihwarreni duninjh bu ngarranginjbeh, dja mak bu ngadjalningihni kore ngalbadjan kuwarlirng ngarre.

6 Ngudda yidjare bu marnekangewoybukworren bulkkidj duninjh. Dja yingan kankangebukkabukkan munguyh ba bu ngaborlhme ngudda ke kunmayali.

7 Mah, wanjh kanwernhkangebelewo, yiman kayime kankukdjuhke manbu kunmalaworr hyssop dorreng. Kankangedjirridjbu ba ngadjalwernhkangebelemen duninjh, yiman rerrih snow kadjalwernhbame.

8 Ngadjare kannilngmarnbun wernkih duninjh. Ngudda korroko kannurrngengerrehmeng, dja bolkkime wanjh ngadjare ngamarrmarr kore ngudda.

9 Yimirrkboredmen, ba bu minj yiyawoyhnan kunwarre ngardduk, dja mak kanmarnebularrbun kundjalwarre rowk kore ngaye ngakurduyimi.

10 Ngudda God, kankangekerrngehmen, ba bu kunmak duninjh kunmayali ngakurduyime, dja kanmarnbu ba minj ngakangeborledme bu bodmewoyi ke.

11 Yuwn bu kankukmunkewe kore ngad ngarrdjarrkre, dja mak yuwn bu kanyimang nawu Namalngmakkaykenh ke kore kukange ngardduk.

12 Kanyawoyhnjilngmarnbu kore ngudda kanngehekenh. Kankangemarnbu warridj ba ngaye wokmarrkmang ngudda munguyh dja minj ngamarrkbaworren.

13 Kaluk bu kuhni yikurduyime ngardduk, wanjh ngaye ngabenbukkabukkan bininj nawu ngundiwokwirriheng, ba bu bininj birriwarre kabirrimdurnden kore ngudda.

14 Yoh, ngudda God ngardduk, ngudda nawu kanngehke ngaye, wanjh kanbekemen kore kuninjkuu kunwarre bu ngabenbuyi bininj. Bu kuhni yikurduyime wanjh ngaye ngawayini kurobbe bu mulewan ngudda, dja ngayime ngudda wanjh yidjalkurduyime kunmak duninjh.

15 Ngudda nawu Yiwohnan Rowk, kanwokmarnbu ba bu werknin ngaye djalbururlume.

16 Ngaye ngaburrnbun bu ngudda minj yidjare nawu mayhwi ngundimarnekinje. Ngudda yiman yidjareniwirrinj wanjh ngaye woyi nawu mayh sheep ngakinjei ke, wanjh kunukka ngaye yawoyhnjilngmarnbuyi ngudda. Dja burrkyak, ngudda minj yidjare bininj ngundidjalmarnekinje mayh.

¹⁷ Ngudda kunbuyika yidjare. Bu bininj kabirridjalwarnyakmulewarren dja kabirrinjilngwarreworren bu kabirriburrbun bedberre kunwarre, wanjh ngudda yibenbekkabekkan dja minj yibenwirrihme.

¹⁸ O God, yibenkongibu bininj kore kured Jerusalem dja mak yiben-bidyikarmen bedberre kore yidjare. Yiyawoyhbolkmarribu manbu kawarnamyongarre Jerusalem.

¹⁹ Bu ngudda kuhni yibenmarnekurduyime, wanjh nawu bininj ke mandjad kabirridjalkurduyime ba bu ngudda yinjilngmakmen. Wanjh bedda kunu ngundiwon mayh nawu sheep dja mak bulikki bu ngundiwon dja kabirrikinje kore altar ngudda ke.

52

Bu God Kandjadme Ngad Bininj.

Psalms 52

¹ Ngudda bininj kunukka bonj bu ngurrimurrnggrayek dja munguyh ngurriburlumerren kore kunwarre ngurrikurduyime. Kunbarnangarakuyeng ngudda ngurriburlumerren. Dja njalekenh? God wanjh korroko ngunwarreweng ngudberre.

² Warridj manwarrehwarre ngurrikarremarribun. Bu ngurriwokdi, wanjh ngurridjalyime kunwarre dja mak ngurrikurrehkurren.

³ Ngurrimanjngun kunwarre dja ngurriwarnyak kunmak.

⁴ Ngurridjare ngurribenmarneyime djal kunwarre bedberre birribuyika bininj. Ngudda wanjh ngurridjalkurrehkurren bu munguyh.

⁵ Wanjh kunmekbekenh kunu God ngunbun ngudberre, dja ngunbularbun dja minj ngurriyawoyhmakmen. Nungka ngundarrkidmang kore kured ngudberre dja ngundjalkukkan djarreh kore ngurrihni. Nungka wanjh ngunkukyerrkke ba ngunburriwe djarreh kore bininj kabirridar-kiddi kondah kurorre.

⁶ Bu God kabenyimewon kore birriwarre bininj, wanjh nawu birrimak bininj kabirrimarnekelemen nuye. Dja mak kabindidjekmiwon bedberre nawu birriwarre bininj, dja kabirriyime,

⁷ "Ngurrina! Birrimekbe bininj minj birriwoybukwoyi God bu benahnay bedberre. Dja ngaleng bedda birriburlumerreni bu yimankek birrikukeniwirrinj duninj, dja mak birriyimi bu money bedberre yimankek kabenbidyikarme! Mak bindiwarrewoni birribuyika bininj ba bu bedman yimankek birrimurrnggrayekworrimerinij."

⁸ Ngaye wanjh ngadjalkurrmerren kore God nawu kanmarnedjare munguyh munguyh dja minj mak nganbawon. Kunmekbekenh ngaye wanjh nuye bininj, dja ngahdjaldi kamak rowk.

⁹ Yoh, God, ngaye wanjh burluburlume bu munguyh kore ngudda yikurduyimeng rowk ngardduk. Warridj bu ngarrimirndemornnamerren, ngudda ke bininj dorreng, wanjh kunmekbe ngaye ngeymulewan bu ngudda yingeymak, dja djalburluburlume ke.

53

Bu God Kabenmarribun Birriwarre Bininj Bu Kabirriyemengalme.

Psalms 53

¹ Nawu birribengwarr bininj kabirriyimerren kanjdji kore kukange bedberre, "Kondah nuk minj God karri!" Birrimekbe bininj kabirridjalkurduyime kunwarre duninj. Minj nakudji kakurduyime kunmak.

² Wanjh God kabolknan kanjdji kurorre kore nungka kahni kaddum heaven, dja kabenkurdunan birriwarlahkenh bininj rowk. Nungka kadjare kabinan nangale nawu kabirrimenmenburrbun kunmakkenh, dja mak kabinan bu nangale bininj nawu kabiwokmarrkmang nungka.

³ Dja burrkyak, bedda birriborlekerrinj rowk nawu birriwarlahken bininj dja mak bedda birriwarreminj duninh. Minj nangale nawu kakurduyime kunmak. Minj nakudji. Bu djalburrkyak!

⁴ Wanjh God kayime, “Yiddok nawu birriwarre bininj minj kabirrimayalibayhme bu kabirriburrbun? Nakka wanjh kabindibun dja kabindiyakwon nawu bininj ngardduk yiman kayime buriddi rerrih bu kabirringun. Birrimekbe birriwarre bininj minj kabirridi yiwarrudj bu ngaye ngandikayhme.”

⁵ Wanjh birrimekbe birriwarre bininj birrikangebarlmiyindanj kunktele, dja mak minj njale diwirrinj nawu kabenkelehme! Ngudda nawu Israel ngunkebmawahmeng, God kaluk kabenbun nawu ngundibun ngudberre dja kabenmurrngburriwe. Nungka kabenwidnan duninh dja ngunmarnbun bu ngudda ngurrbenmarnbun bedberre bu bedda kabirriyemengalme.

⁶ Wanjh ngarri yiwarrudj bu nungka God kamre kore kunred Zionbeh dja kabengehke nawu Israel bininj! Bu nungka kabenkukenwon nuye bininj, wanjh nawu Jacob benkebmawahmeng kabirridjalnjilngmakmen dja kabirrimarrmarrnin.

54

God Nawu Kanbidyikarrme Bu Bininj Kandiwidnan.

Psalm 54

¹ O God, ngudda yirrulkarrekimuk! Wanjh kanngehkemen. Ngudda nawu yimurngrayek duninh dja yingudjwern, wanjh kanbekkemen.

² O God, kanbekkabekka kore yiwarrudj ngahdi bu djawahdjawan. Kanwokbekka kore ngaye ngawokdi.

³ Birridjenbubuyika bininj ngandibun. Nakka birribang dja kabirridjare ngandibun bu ngarrowen. Bedda minj ngundimarnekele ngudda nawu God.

⁴ Dja ngadjalburrbun woybukkih bu God nganbidyikarrme. Nawu Kawohrnan Rowk wanjh munguyh nganhkarrme.

⁵ Ngadjare nungka karrurndiwe kunwarre bedberre bininj nawu ngandimolkyolyolme, ba bedman kabirriwarreworren. Nungka minj munguyh nganbawon, dja wanjh kabenbularrbun nahni nawu ngandiwidnan ngardduk.

⁶ Kamak bu ngaye won njalehnjale dja ngadjalkurrme ngardduk kore ngudda nawu Yawey. Dja mak ngaye ngeyburluburlume ngudda ke kungey ngudda nawu yindjalngeymak.

⁷ Mak ngudda yidjalkudji kanbekkeng kore ngawarredongi. Mak nawu ngarriyidko bininj wanjh ngabenang kumim ngardduk bu birrimakang.

55

Nawu God Kanbekkabekkan Bu Yiwarrudj Karridi.

Psalm 55

¹ O God, bu ngahdi yiwarrudj djawahdjawan, wanjh kanbekka dja yuwn bu kanwokdahme bu ngaye djawan bu kankongibun.

² Kanbakkabekka dja wanjh kanwokmang. Ngaye ngadjalwernhkange-warreminj dja ngadjalngeynggeyyime bu djawadjawan kore ngudda.

³ Dja ngandimarneyiddung ngardduk nawu ngandiwidnan bininj, wanjh kunmekbekenh ngahkele. Bedda ngandidarrarrhmiwon. Ngandiwon kunyid dja ngandiwidnan duninjh.

⁴ Dja kunkimuk duninjh kunkele ngakarrme, dja mak ngaw-ernhmenkengeme nawu kundowikenh.

⁵ Ngahkukdeldelme bu kungelekenh, dja ngamayaliwarremen bu ngad-jalburrbun munguyh bu kunwarre duninjh ngawernhkengeme.

⁶ Ngayimerrinj bu kunwel ngakarrmeninj wanjh ngarrollkayi ngarawinj djarreh bu ngangehmeninj.

⁷ Yoh. Ngaye wanjh ngarawinj djarreh kore kubolldarleh nganiwirrinj.

⁸ Dja mak werkkwerkk ngabolkngalke bu ngakodjbarrkbuyindiwirrinj kore mahni kunyid manbu yiman kayime kunmayorrrkimuk bu nganbun.

⁹ Ngudda nawu Yiwohrn Rowk, yibenmayaliborledkemen ba kunukka minj kabirriwokdi mandjad. Dja nganan kunyid kawernmerren kore birriwern bininj kabirrinj dja kabirriburren.

¹⁰ Yidwernmerrinj bedberre bininj nawu kabirrihni kumekbe kunred-kimuk Birriwern bininj birribangminj kumekbe dja kabirridurrinj dja mak kabirriwidnarren bu barnangarrakuyeng dja kumununkuyeng.

¹¹ Kunrayek kawernmerren warridj bedberre nawu kabirrihni kore kumekbe kunredkimuk. Bininj kumekbe wanjh kabirrikehmerren dja mak kabirrikurrehkurren munguyh.

¹²⁻¹³ Ngudda nawu djawirna duninjh ngardduk, nawu ngarrdabbolk dja ngarmarnedjaremerren, njalekenh ngudda mak kanyolyolme dja kandjekmiwon? Nawu ngariyidko kabirriyime dja wanjh ngaye ngadjaldi kamak, dja wardi ngamarnewalkkarren nuye. Dja ngudda?

¹⁴ Yiburrbu kore ngarrdjarrkrey bu ngarrwokdi dja ngarrborlhmi, mak ngarrdjarrkdi yiwarrudj kore temple. Wanjh kamak rowk.

¹⁵ Dja nawu ngariyidko bininj, wanjh ngadjare kundowikenh kaben-mang. Nakka wanjh birriwimem bu birrikolung kanjdji kore kundowikenh ngarre kunred Sheol. Wanjh kunwarre kahdi kore kukange bedberre nawu ngariyidko.

¹⁶ Dja ngaye wanjh ngamarnekayhme nawu God, dja wanjh nungka nawu Yawey ngangehke.

¹⁷ Ngadjaldi yiwarrudj bu ngakayhmi kore nungka bu munguyh kore kukabel, dja mak kore barnangarra dja mak bu kumunun. Ngadjald-jawadjawan bu kunwarre nganmarnarayekwon, dja wanjh nawu Yawey nganwokbekkan.

¹⁸ Bu kuhrikuhri ngarriburren, wanjh nungka nganmalngngehke dja ngankurme bu kamak rowk. Birriwern duninjh bininj ngandi-marnebebum kunyid dorreng dja kabirridjare ngandibun ngarrown.

¹⁹ God nawu yingkihwohnrnawohrnani rowk bu munguyh munguyh, wanjh nganbekkan bu ngabenmulewan nahni birriwarre bininj, dja wanjh nungka kabendung dja kabenburriwe, kunmekbekenh bu bedda minj munguyh birriborledkerrimeninj kore kunmak birrikurduyimeninj, dja minj mak birrimarnekeleninwirrinj nawu God.

²⁰ Nahni bininj nawu ngaye nganedabbolk wanjh nungka borledmeng dja kabenbun nawu djawirna benkarri. Nungka wanjh djalwokbakkeng kore benmarnewokkurmerrinj.

²¹ Makka djal kaddukaddum kore nungka yimihyimi, dja kanjdji kore kukange nuye, nakka minj kunwoybukniwirrinj, dja nungka kurrehkur-reni bu yolyohyolyolmi. Nungka wokdi bu kamak rowk, dja djareni benbuyi bininj mandjawak dorrengh.

²² Bonj, wanjh kumekbe kayime bu kunrayek kambebme ngudberre, wanjh ngurriyibawon rowk kore nawu Yawey ba ngunmarnebebme dja ngunbidyikarrme. Minj ngunbawon ngudda nawu ngurrikangewoybuk bu nangale ngunkukwarrhke.

²³ Ngudda nawu God, wanjh yibenkukburriwe nawu birribang bininj kore kumidj ba kabirrikuknudmen. Bininj nawu kabindibun birribuyika, dja nawu kabindikowe, wanjh bedman kabirriwohdowe bu kabirridjald-abbolk. Dja ngaye, bonj, wanjh ngakangekurmerren kore ngudda.

56

*Ngaye Ngakangekurmerren Kore Ngudda God.**

Psalm 56

¹ O God, kankongibu! Bininj ngandiwerhkhadjung ba bu ngandibun, dja barnangarrakuyeng nawu ngarriyidko ngandidjaldarnhbun.

² Nawu ngandiwirrihme ngandibun kunbarnangarrakuyeng. Birriwern nawu kabirriburlumerren kore ngandibun.

³ Bonj, bu ngaye ngakelemen, wanjh ngakangekurmerren kore ngudda.

⁴ Ngaye ngamarnekurrmerren nawu God, dja ngaburlume nuye kunwok. Ngaye ngawoybukwon nawu God, dja minj ngayawoyhkelemen. Baleh mak ngandimarnekurduyime nawu djal bininj?

⁵ Nawu ngandiwidnan bininj wanjh barnangarrakuyeng ngandiwokborledke bu ngandiyolyolme. Bedda munguyh ngandimarnekarrremarnburren bu yimanke ngandibun.

⁶ Bedda kabirrimornnamerren manmolk ngarddukenh, dja kabirriwarlkkayindi ba bu ngandikurdunan kore njalehnjale ngakurduyime. Bedda kabirridjaldjare ngandibun ngarrowen.

⁷ O God, yuwn bu yibenbawo bu kabirrikelerlobme kore ngudda yiyiddung. Wardi yibendu birriwern bininj kore kubolkbubuyika, wanjh yibenburriwemen bedberre kanjdji.

⁸ Ngudda God yiburrbun rowk bu bininj ngandinjilngwarrewong kundwernkenh. Ngudda yiman kayime kanmimnalkdahkendongi kore budjurlung ke, dja yibimbuyi kunmimnalk rowk ngardduk kore djurra ke.

⁹ Dja bu ngarrangen yiwarrudj dja marnekayhme ke, wanjh kundjalburrikudji birrimekbe nawu ngandiwidnan wanjh kabirrikelerlobme! Ngaye ngaburrbun bu kuninjkuu nawu God nganehdjarrkdi dja nganbidyikarrme.

¹⁰ Nungka nawu God, dja ngaburlume nungka nawu wokkurrmerrinj. Nungka nawu Yawey, dja ngaburlume nuye kunwok rowk.

¹¹ Ngaye ngadjalkangekurrmerrinj kore God, wanjh ngaye minj ngayawoyhkelemen. Baleh mak ngandimarnekurduyime nawu djal bininj?

¹² O God, ngaye ngawokkurrmerrinj kore ngudda, wanjh kunmekbekenh ngaye ngakurrmekurrme namakmak kore ngudda ba bu manjmanjibun ke.

¹³ Ngaye ngaburrbun ngudda kanbebkeng kore kundowikenh, dja kanwayhkeng kore ngamankayi. Kumekbekenh wanjh ngaye won namakmak

* **56:** King David bimbom mahni Psalm bu nawu Philistines birridarrkidmey dja birribongkarrmi kore kunred Gath. Ngurribinna kore 1 Samuel 21:13-15

nawu marnekurrmeng. Wanjh ngaye ngahre kore kumirrk nuye God nawu kanmarnebolkwolkan ba bu ngadjalmimbi kore nuye.

57

*Ngaye Ngarrri Yiwarrudj Bu God Kanbidyikarmekenh.**

Psalm 57

¹ O God kankongibu! Kandjalkongibu! Ngaye ngamkelerlobmeng kore ngudda dja ngakangekurrmerren ba yidjurrudin ngardduk. Ngaye ngakurrmerren kore ngudda ba kanbarrkbun, ngahdjaldi kore ngudda kaluk bu yerrekah manbu kunyid nganmarneyakmen.

² Ngaye wanjh ngamarnekayhme nawu Nawernhkimuk God Duninh. Nungka munguyh kakurduyime kore yingkiharremarnbom ngardduk.

³ Nungka nganbekkan kore kaddum kahni, wanjh nganngheke dja kabendung bininj nawu ngandiwerhkhadjung dja bedda kabirriyimen-galme. God wanjh kanmarnedjare dja minj kanbawon munguyh munguyh.

⁴ Ngaye ngarridjarrkdi birribang bininj nawu birriwarre duninh. Bedda kabindibun bininj, warridj kabindiyolyolme bu kabindimarnekowe bininj.

⁵ Dja ngadjaldjare ngudda bu bininj rowk ngundiburluburlume kore kaddum yihni. O God, yibenmarnbu birriwarlahkenh bininj kondah kurore ba bu ngundinan bu ngudda yiwerhnmakkaykenh duninh.

⁶ Nahni birriwarre bininj wanjh birrikarremarnbom bu ngandidarrkid-mang. Wanjh ngaye ngawernhkarrewarreminj. Bedda wanjh ngandi-marnekarremarnbom ngandibungkarrebom, dja bonj, wanjh bedmande-leng birrimankang!

⁷ O God, ngaye ngadjalkangewoybuk kore ngudda, dja minj ngamar-rkbaworen kore nguddakenh. Wanjh ngaye marnewayini ke, dja mak ngamarnmarnbun music kore ngudda.

⁸ Mah, ngadjare ngakabeldong ba bu ngarrirri nawu instruments, nawu harp dja lyre. Ngaye ngawernhdirri bu kumkabel djarreh bu ngaye yiman kayime ngadjurhme nawu kundung!

⁹ Wanjh ngaye manjbun ngudda nawu Yiwohrnan Rowk, ba bu birriwarlahkenh bininj ngundingeybekkan kore kubolkbubuyika rowk. Ngaye ngawayini bu burluburlume ngudda kore birridjenbubuyika bininj ngarridjarrkni.

¹⁰ Ngudda kandjalmarnedjare munguyh munguyh kore kanjdji dja mak kaddum kore heaven. Ngudda wanjh yidjalwoybuk duninh dja minj kankowe kandjdji dja mak kaddum kore kunnol.

¹¹ Dja ngadjaldjare ngudda bu bininj rowk ngundiburluburlume kore kaddum yihni. O God, yibenmarnbu birriwarlahkenh bininj kondah kurore ba bu ngundinan bu ngudda yiwerhnmakkaykenh duninh.

58

Bu Karridjawan God Kabenbun Birriwarre Bininj.

Psalm 58

* 57: Nawu David kelerlobmeng dja warlkkarrinj kore kuwardderurrk bu nawu King Saul djareni bibuyi. Ngurrina 1 Samuel 22:1, 24:3

¹ Ngudda bininj nawu ngurrbenmarnewohrnawohrn dja ngur-
ringeykimuk, yiddok ngurridjalyime kore mandjad bu ngudda ngurbend-
jadme bininj? Yiddok ngurbendjaddjadme bininj kore kunwoybuk dja
kunmak dorrengh?

² Burrkyak duninh! Ngudda bu kanjdji baybaywi ngurridjaldjare
kunwarre ngurrikurduyime. Munguyh ngurrbenbun bininj kore kondah
kurorre.

³ Nawu birriwarre bininj wanjh kabirridedjingmang kunwarre kabirriy-
ime bu bedda kerrngehkenh kabirringalme dja kabirrikurrehkurren kore
birridjalyahwurd! Bedda kabirridjalre kore bedberre manbolh.

⁴ Bedda yiman kayime nabang nayin, dja kabirrikarrme manbang kore
kurrang bedberre. Mak kabirrikanembalherren yiman nayin nabang
nawu cobra.

⁵ Dja mak minj kabindibekkan birrimak bininj bu kabirriwokdi, yiman
cobra nayin minj nangale bininj kabibekkan.

⁶ O God Yawey, nawu birriwarre bininj kabirriyime yiman kayime
nabang lions, wanjh yibenyidmebakkemen bedberre, dja wardi yibenyid-
meyerrkke kore kurrang bedberre!

⁷ Ngadjare bu kabirridjalyakmen rowk yiman kukku bu kaboyakmen
kore kurorre. Ngadjare mak bu kabirridjalbarabun kore kunwarre
kabirrikurduyime.

⁸ Ngadjare mak bu kabirridjaldowe yiman duberrk bu kakukkelkdan
dja kadjalyakmen rowk. Ngadjare bu bedda kabirridjaldowe yiman
nabarrken nawu karrowen bu kangalme, dja minj kabolknan.

⁹ Ngadjare God wanjh kundjalburrikudji kabuhme kunyid duninh
dorrengh bu kabenkukburriwe birriwarre bininj, dja kabirriyakwon
rowk.

¹⁰ Nawu birrimak bininj wanjh kabirrinjilngmak bu kabindinan birri-
warre kore God kabenbun bedberre dja karrengejdjuhme kore bedberre
kunkurlba.

¹¹ Kaluk birriwarlahkenh bininj rowk kabirriyime, "Yoh, woybukkih.
God kabenwon kunmakmak nawu birrimak bininj. Nungka wanjh
woybukkih kandjadme ngad karriwarlahkenh bininj kondah kurorre."

59

Karridjawan God Bu Kannehkekenh.

Psalm 59

¹ O God, kannehkemen kore ngarriyidko bininj nawu ngandiwidnan.
Kankukdjurrudin dja yikahwi bininj ngandimarnebebme wardi ngandi-
bun.

² Kanbekkemen kore birriwarre bininj nawu kabirridurkmirri kore
kunwarrekenh Kannehkemen kore bininj nawu kabirridjare ngaye
ngakurlbare.

³ Yina! Bedda kabirriwokworren wanjh kabirriwarkarren ngardduk.
Nawu birribang bininj manmolk ngandimarnekarremarnbun. Nawu
Yawey! Yiburrbun bu ngaye minj ngabenwarweyoi bedberre.

⁴ Bedda ngandidung bu djalburudjang. Ngaye minj kunwarre ngayi-
meninj. Dja bonj, bedda kabirridjaldjare ngandibun. Wanjh djawahd-
jawan bu yimray yinan kore kunmekke kunrayek wernmerrinj ngardduk!

⁵ Yawey, ngudda God nawu yibenmirndekarrme birridjalwern armies,
dja ngudda God ngadberre bininj nawu Israel ngankebmawahmeng!

Wanjh yirrollkka bu yibenbun birriwern bininj nawu birrikang kubolkbubuyikabeh. Yuwn bu yibenkongibun nahni birriwarre bininj nawu kabindiweykan birribuyika bininj.

⁶ Birrimekke bininj wanjh bedda kabirrimdurnderren kore kukadje bu kabalhdungyibme. Bedda kabirrirengehre yiman kayime duruk nabang bu kabirridowme dja kabirriywarren bu kabindibun bininj.

⁷ Ngudda Yawey wanjh yibenbekkabekkan kabirridarrahme kore kunwarrekenh kabindimarneyime birribuyika bininj. Bu kabirriwokdi, wanjh kabirridjare kabindiwarrewon birribuyika bininj. Bedda kabirriymerren warridj, "Minj nangale kanbekkan kore karriwokdi!"

⁸ Dja ngudda Yawey wanjh yibendjekmiwon! Mak yibennjirrhmiwon nawu birriwarlahkenh bininj nawu minj bedda ngudda ke.

⁹ Ngaye ngakangekurmerren kore ngudda dja yingudjikimuk dunijn dja ngabolknan dja madbun ngudda bu yimre. Ngudda God yiman kayime kunredkimuk kore ngawarlkarren ba bu minj njale ngankilekme.

¹⁰ Ngudda God ngardduk nawu kanmarnedjare. Wanjh yimray darnkih dja nganedjarrkdi. Kanbawo bu ngabendjaldjekmiwon nawu ngarriyidko bininj.

¹¹ Nawu kawohrnan Rowk, ngudda nawu kankukdjurruddi. Djawan bu ngudda minj yibenbun birrimekke birriwarre bininj bu kabirridowerren. Bu yibenbularrbun wanjh ngad bininj ngudda ke kunubewu ngarribengmidjan bu njalekenh yibenbom nawu birriwarre bininj. Kamak bu yibendjalmarnbun bu bedda kabirridjalmayahme kunngudj ke dorrengh dja wanjh yibendjalkoluyhwemen.

¹² Bedda wanjh kabirriwokdi kunwarrekenh, dja wanjh kabirridjalyime kunwarre, wanjh ngadjare yibenkardmang kore kabirriburlumerrenkenh. Bedda mak kabirriwokdi kunwokwarre, dja mak kabirrikurrehkuren.

¹³ Ngudda yiyiddu bedberre dja yibenbularrbu bu yibenkuyakwon rowk. Kunukka birriwarlahkenh bininj kore kubolkbubuyika rowk djarreh wanjh ngundiwobekkan bu ngudda God yibenmarnewohrnan nawu Jacob benmawahmeng.

¹⁴ Nawu ngarriyidko bininj wanjh bedda kabirrimdurnderren kore kukadje bu kabalhdungyibme. Bedda kabirrirengehre yiman kayime duruk nabang bu kabirridowme dja kabirriywarren bu kabindibun bininj.

¹⁵ Dja mak yiman duruk nabang bedda kabirriyawan manme, dja bu minj kabirringalke manwern, wanjh kabirriyidmebukkarren.

¹⁶ Ngayeman wanjh ngawayini kore mulewan ngudda ke kunngudjikimuk. Mak bu malamalaywi rowk ngaye ngawayini kore ngudda kandjalmarnedjare. Ngudda yiman kayime kunred kunmak kore ngawarlkarren, dja bu kunyid kabebme ngardduk, wanjh ngamkelerlobme kore ngudda.

¹⁷ O God, ngudda kanwon kunngudj ke, dja ngaye wanjh ngawayini bu burluburlume ngudda nawu kankukdjurruddi. Ngakurrmerren kore ngudda God nawu kandjalmarnedjare.

60

Bu Karridjawan God Kannghekekenh.

Psalm 60

¹ O God, ngudda kanwirrihmeng ngadberre, dja nganbom. Ngudda nganduy dja nganngudjyakwong. God ngudda kandungi, wanjh bolkkime kanyawoyhmarnbu!

² Ngudda yibolkrokayhweng kondah kubolk ngadberre dja yibolkdjalkmey. Bolkkime wanjh yibolkmarumbu dja wanjh kabolkwarrewarren.

³ Ngudda kanwong kunrayek duninj ngadberre ngad nawu ngudda ke bininj. Bu kuhni yiman kayime ngudda kanbowong kumbang dja ngad yiman ngariworromkang.

⁴ Ngudda yibenbengdayhkeng bininj nawu ngundimarnekele ba minj kabirribularbuyindan. Bedda wanjh kabirriwarlkarren kore ngudda ba bu birriyidko bininj minj kabindibun.

⁵ Bolkkime wanjh kangehkemen kubidkukun ke ngad bininj nawu kanmarnedjare. Mak kanwokma kore ngarriidi yiwarrudj.

⁶ Wanjh God wokkurrmerrinj kore nuye kunmakmak, yimeng, "Ngawinhme rowk, dja ngabolkyarlarrke kunbolk nuye Shechem, dja ngabolkrohrokme kore kanjdjikanjdji kunbolk kabolkngeyyo Sukkoth.

⁷ Kunbolk kangeyyo Gilead, wanjh ngardduk, dja mak kunbolk nuye nawu Manasseh. Kore kunbolk Ephraim nuye wanjh ngabenmang soldiers ngardduk kumekbe. Dja kore kunbolk nuye nawu Judah, kumekbebeh ngadjarrngbun nawu king ngadjare.

⁸ Dja mak kunbolk Moab bedberre, wanjh ngakurrme yiman ngardduk ngalng bu ngabiddjirridjburren. Mak manbu kunbolk Edom bedberre, wanjh ngakurrme kanjdji kore ngaburriwe nawu ngarrendjongurenkenh bu ngarrencegerkkarren. Dja mak ngakayhme bu ngabenbun dja ngawinhme bininj kore kunbolk Philistiabeh."

⁹ O God, yiddok kankan kore kukadje kore kawarnamyo kunkimuk manbu kabirriburrenkenh? Nangale ngankan gaye kore kunbolk bedberre nawu kabirringeyyo Edom?

¹⁰ Aba, yiddok woybukkih ngudda nawu God kanwirrihmeng dja kanbawong? Yiddok yibenbawong dja minj yibenbidyikarme nawu soldiers ngadberre bu kabirriburren nawu ngariyidko bininj?

¹¹ Ngundidjawadjava bu kanbidyikarme kore nawu ngariyidko kabirrimre! Minj nangale djal bininj ngarriidjawan dja bedda birridjalngudjwarre.

¹² Ngarriburrbun bu nawu Godk nadjalkudji ngarriidjarrkre wanjh ngarriwihme. Nungka wanjh kabenkoluyhwe kurrenge nuye bininj nawu ngariyidko.

61

Bu Karrikayhme God Kore Kanbidyikarmekenh.

Psalm 61

¹ Ngudda nawu God ngardduk, kankayhmibekkabekka bu ngahdi yiwarrudj dja djawahdjawan!

² Ngaye kured ngabolkbawong djarreh, wanjh kankayhmibekka bu djawahdjawan! Ngaye ngakangewarre. Wanjh kanka kore ngudda kannahnan ba bu ngadjalni kamak rowk.

³ Ngudda wanjh kannahnan dja kanbidyikarme bu nawu ngandiwidnan ngandimarnebebme.

⁴ Ngaye ngadjare ngamre darnkih ngarriidjarrkni kore ngudda munguyh munguyh ba yikudjurrudan ngardduk dja kankukbalhme.

⁵ Ngudda kanbekkang kore ngawokrayekworrinj ke, ngudda nawu God. Dja ngudda wanjh ngokko kanwong nawu yidjehdjenkarme ngadberre bininj rowk nawu ngundingeykengeme ke.

⁶ Ngaye nawu king kondah ngadjare kanwo mandjewe k nawern ba ngarrarrkiddi bu kunkuyeng, dja minj darnkih kabolkyimerran bu ngarrowen.

⁷ Warridj ngadjare ngadjalwohrnan kore kumirrk ke munguyh munguyh. Ngudda wanjh kanmarnedjare dja minj kandjalbawon, wanjh kunu kankukdjurrudin.

⁸ Wanjh ngaye ngadjalwayini bu burluburlume ke munguyh munguyh, dja ngamkan kunbarnangarrawern bu wonowon ke kore ngayingkih-wokkurrmerrinj ke.

62

Karikurmerren Kore God Nawu Kannahn Kadberre.

Psalms 62

¹ Ngaye wokyak ngahdjaldi bu ngahmadbun God kamre. Nungka nadjalkudji nganngheke.

² Dja nungka wanjh nadjalkudji ngandjurruddi dja nganngheke. Nungka wanjh ngannahn dja nganbidyikarrme ba bu ngaye ngawinhme dja minj njale nganrokayhwe.

³ Adju! Ngudda bininj nawu kandidung ngaye! Ngaye wanjh ngandjwarre, yiddok munguyh kandidjalbun? Ngurriburrbun ngaye minj ngakarrme bu ngakandenamerren.

⁴ Ngudda ngurridjare bu kandiburriwe kore ngahni kaddum, dja kandingeywarrewon. Ngurrinjinngmarnburren bu kandiwowarrewon. Ngurrikurrekurren. Ngurriwokdi kunwok kunmak bu kurobbe, dja kore baybaywi kukange ngudberre wanjh kandikidname.

⁵ Ngaye wanjh ngadjalmarrkebbun nadjalkudji nawu God ngardduk, dja ngaye wokyak. Ngakurmerren kore nungka nawu ngadjalwoybukwon munguyh.

⁶ Dja nungka wanjh nadjalkudji ngandjurruddi dja nganngheke. Nungka wanjh ngannahn dja nganbidyikarrme ba bu ngaye ngawinhme dja minj njale nganrokayhwe.

⁷ God nungan nganngheke, dja mak nganmakwan. Ngawarlkarren kore nungka yiman kunwarddekimuk kore nganngheke, dja nungka nawu ngudj kimuk duninj dja ngandjurruddi.

⁸ Ngudda nawu ngardduk binihbininj, ngurrikurmerren nawu God munguyh munguyh. Ngurrimulewarren manbu kunrayek rowk bu ngurrikarrme, dja nungka kannahn ba karrikangengemen.

⁹ Ngad bininj rowk nakka yiman bu karringolekwerren karohrok nawu birrikuken dja nawu birrimarlaj. Ngad yiman djale yeng, djale kukwob, minj karriidulmuk.

¹⁰ Yuwn bu karrikurmerren bedberre nawu kabirriburrehburren, dja yuwn bu mak karriidjirdmang njalehnjale, dja wanjh karribawo rowk. Bu karrikukenmen, wanjh yuwn bu karrikurmerren kore nawu karrikukkarrme.

¹¹ Kunwernhkah ngawobekkani nawu God bu nakka nadjalkudji kakarrme kundulkarre rowk.

¹² Yoh, woybukkih ngudda kanmarnedjare munguyh munguyh. Ngudda nawu Yiwohrn Rowk kanmarnekurrme manbu kahdjehdjeno ngadberre bininj rowk kore kunmak ngarikurduyime bu kondah kurorre ngarrihni.

63

*Karridjare Bulkkidj Bu God Karridjarrkni.**Psalm 63*

1 Ngudda God, ngudda wanjh God ngardduk, ngaye ngadjare bu ngarrdjarrkni. Ngaye marnedjare ngudda kore kukange ngardduk, ngaye yiman kayime bininj nawu kakanjbukmen. Ngaye yawan ngudda yiman kayime bininj nawu kakombukdowe bu kaboyawan kubolklarleh kore kukku yak.

2 Ngaye nang ngudda kore yihni kubolkdjamun ke. Wanjh ngaye nang bu ngudda yirrukarrekimuk duninj, dja mak yidjalmakkaykenh.

3 Ngudda wanjh kandjalmarnedjare bulkkidj duninj. Bu ngaye ngarrarrkidbaworren, wanjh kamak, dja ngaburrbun bu ngudda kandjalmarnedjare. Wanjh ngaye kunu burluburlume ngudda kore kurrang ngardduk.

4 Dja bu ngaye ngadjaldarrkid wanjh ngaye burluburlume kunkodjke-bubuyika rowk kaluk bu ngarrowen. Ngaye ngaberlwayhme bu yiwarrudj dorrengh ngahdi kore ngudda ke kunngey.

5 Warridj ngudda kanmalngworrkmiwon kore kunmakmak kunwern kanwon, wanjh ngaye ngawernhnjilngmak bu marnewayini ke ngardduk kurrang, bu kunjilngmak dorrengh.

6 Bu ngaye ngalorrhmiyo, wanjh burrbuhburrbun yerrih bu kunkakkuyeng.

7 Bu kunmekbekenh ngudda munguyh kanbidyikarmi. Ngaye ngakurrmerren kore ngudda bu kannahnay yiman kayime mayhmayh yaw kakurrmerren kanjdji kore ngalbadjan ngarre kunwel. Wanjh ngawayini kunnjilngmak dorrengh kunmekbe.

8 Ngaye wanjh munguyh wernhkarrme ngudda kore kukange ngardduk, dja kubidkukun ke kanwernhkarrme ba minj ngamanan.

9 Bininj nawu kabirridjare ngandibun, wanjh bedman ngaleng kabirikolung kanjdji duninj kore kunred ngarre kundowikenh.

10 Wardi kabirridowe mankimuk mandjawakwi kore kabirribur-renkenh, dja dalkken kaluk kabindikanjngun.

11 Dja nawu king kadjalmarrmarr kore God! Bininj rowk nawu kunwoybuk kabirridjalyime kore kunngey nuye God, wanjh bedda kabirriburluburlume. Dja bininj nawu kabirrikurrehkurren, wanjh kabirridjalwokyakmen.

64

*God Kanbidyikarme Bu Birriwarre Bininj Kandiwarrewon.**Psalm 64*

1 O God kanbekkabekka kore ngahdi yiwarrudj, dja kunyid wernmerrinj ngardduk! Nawu ngarriyidko bininj kabirridjare ngandibun, dja yimdjurruddin ngardduk!

2 Kanwarlka ba bu birriwarre bininj nawu ngandimarnekarrremarnbun minj ngandingalke. Bedda nawu kabirrimirnderri bu kunwarre kabirridjarrkkurdyime.

3 Bedda wanjh kabirriyolyolme nakka yiman kabindikangewarrewon birrimak bininj, dja kabindimarneyime kunwok kunwarre ba bu kabindinjilngwarrewon. Kundjen bedberre yiman mandjawakmirrmak, dja kunwok kunyidkenh bedberre yiman mankole mankebmak.

⁴ Birrimekbe birriwarre bininj minj kabirrikele. Wanjh kabindimarnekunidi nawu birrimak bininj, dja kundjalburrikudji kabindidulubun.

⁵ Bedda wanjh kabirrikangerayekworren ba bu kabirrikarremarnbun bu kunwarrekenh kabindimarneyime. Mak kabirrikarremarnbun bu kabindidengekardmang nawu birrimak bininj. Dja kabirriyimerren, "Minj nangale kannan kore kunwarre karrikurduyime!"

⁶ Kabirrikarremarnbun bu kabirrikurduyime kunwarre duninh, dja kabirriyimerren, "Ngad wanjh karrikarrekarme kore karrikurduyime dja wanjh kamak rowk!" Bininj minj kabirrimayaliburren dja minj kabirrikangeburrburren, dja kanjdji baybaywi kabirriyimerren.

⁷ Dja bonj. God nungan wanjh kundjalburrikudji kabenmarnekarrewarwewon, yiman kabenlonbun mankolewi.

⁸ Nungka wanjh kabenbularrbun bu kumekbekenh birriwokdi kunwok kunwarre. Birriwern birribuyika bininj wanjh kabindinan kore kabenmarnekurduyimerran bedberre, wanjh kabindimarnekodjbordebordebme dja kabindiwiddjung.

⁹ Kaluk birriwarlahkenh bininj rowk wanjh kabirrimarnekele nawu God. Bedda kabirriyolyolmerren dja kabirriburrbun kore God kurduyime.

¹⁰ Mah, nawu birrimak bininj wanjh birriwernhmarrmarr kore Yawey, dja kabirrirlobme kore nungka ba kabennahnan. Bedda nawu kabirridjaldjare kunmak kore kukange bedberre, wanjh birriburluburlumen nuyel!

65

Bu Karriburlume God Dja Mak Karrimanjbun Nuye.

Psalms 65

¹ O God, ngundiburluburlume bu ngarridi kore kukadje Zion. Mak ngarrikurduyime rowk kore ngad korroko ngundimarnewokkurmerrinj.

² Ngudda yibenbekkabekkan nawu ngundimarnedi yiwarrudj, dja kumekbekenh kunu birriwarlahkenh bininj rowk kabirrimre kore ngudda.

³ Kunwarre kunwern ngarrikarmi dja wanjh ngarriwernhnjilngwarreni dja minj ngarribidyikarmerrimeninj. Wanjh yingan kanmarnebegmidjdanj ngadberre.

⁴ Bu ngudda yibendjarrngbun yikahwi bininj dja yibenkan darnkih ba bu kabirrihyo kore ngudda ke kunrurrkkimuk. Wanjh birrimekbe bininj kabirrinjilngmarr. Dja kunmakmak kunwern kahdi kumekbe kore ngudda ke temple manbu kunrurrkdjamun, wanjh ngarrimang dja yiman ngarriworrrkmiworren.

⁵ Ngudda kanwokmang kore ngarridi dja yikurduyime ngadberre kore kundulkarre dorreng ke, dja mak kore ngudda ke kundjalmak. Ngudda wanjh God nawu kannggehke, dja bininj birriwarlahkenh kore kubolkbubuyika rowk kondah kurorre, dja nawu kabirrihni bewh djarreh kore borledmikenh kurrula, wanjh ngundimarnekangekurrmerren.

⁶ Ngudda yibolkmarnbom kundulkarre ke manbu kuwarddekimuk rowk. Ngudda yidjalngudjworrinj kunngudjikimuk ke.

⁷ Ngudda yibongurdke kurrula bu kunmayorrk borokayhweng wernkih duninh. Yidjalngurdke kore borrolkani kunkimuk. Ngudda karohrok yibenngurdke bininj nawu birriburreni.

⁸ Birriwarlahkenh bininj nawu kondah kurorre kabirrihni, wanjh ngundikurdunan kundulkarre ke dorrengh, dja wanjh kabirrikangebarhme. Bedda wanjh ngundimarnewayini ke kunjilngmak dorrengh, kore kamdungbebme dja mak kore karrungyibme!

⁹ Ngudda God nawu yibolknahtan dja yibolkduhke kondah kurorre rowk kore ngarrihni. Yibolkmarbun ba manwern manbubuyika manme kadjordmerren. Ngudda God nawu yibobarlike mankabowern ba kunbolk bedberre bininj kabenwon manmim manbu manme bedberre. Ngudda wanjh yiyingkikhkarremarbnom bu kuhni yikurdyime.

¹⁰ Mak yibolkduhdjuhke kore manme kabirridudjeng ba manme kakolhdebeberren. Yibolkmarbun dja yimunkewe mandjewk ba bu kunkulk kakelkdan.

¹¹ Bu mandjewkbubuyika kare wanjh yimarbun bu manme kawernmerren, dja kabirridahkendong kore wirbarra dja wanjh kabarlme rowk.

¹² Kore kubolkdarleh wanjh yibolkmarbun ba bu mandalkmak kawernmerren, dja kore manduludulum rowk wanjh kamirndewernmerren mayh nawu kabirringun mahni kundalk, dja wanjh bininj kabirrinjilngmakmen.

¹³ Kore kabal rowk, wanjh kabirrimirndekarme nawern mayh nawu sheep dja goat kore mandalkmak. Dja kore kanjdji wanjh manmim manwern kabolkbarrkbun. Mahni yiman kayime bu kunbolk kakayhme dja kawayini kunjilngmak dorrengh kore ngudda!

66

Karriwernhburlumen Nawu God.

Psalm 66

¹ Mah, ngudda ngurriwarlahkenh bininj nawu kondah kurorre ngurrihni! Wanjh ngurrimarmarnin duninj dja ngurrimarnekeyhmen nawu God. Ngurridjalburluburlumen nuye.

² Ngurriwayinin bu ngurringeyburlumen! Ngurridjalburlumen God nawu nawernhmakkaykenh.

³ Ngurrimarneyimen God, “Ngudda ngurrikurdumak, dja ngurriyime kunwernhmak duninj! Ngudda yidjaldulkarrekimuk duninj, dja nawu ngurriyidko wanjh ngundiwernhkengehme.

⁴ Yehyeng rowk kondah kurorre, dja mak ngad ngarriwarlahkenh bininj rowk wanjh ngundimarneboddan. Ngundidjalngeyburlume ngudda ke kungey.”

⁵ Ngurrimray dja ngurrina kore God kurduyimeng, bu kunwern kanarnekurduyimeng kadberre karriwarlahkenh bininj bu kundulkarre duninj nuye.

⁶ Nungka wanjh kurrula bodjalkmey ba bu nawu mawahmawah kadberre birridjowkkeng bu birrimelmeng kurrenge kore kukayalanj manbu bukminj. Wanjh kunmekbe karrikurdunang dja wanjh karrimarmarninj.

⁷ God wanjh kawohnran rowk kundulkarre dorrengh munguyh munguyh. Nungka kabennangahnan birriwarlahkenh bininj kubolkbubuyika rowk. Bininj nawu kabirriwokburriwe God, wanjh yuwn bu kabirringeykimukworren.

⁸ Yoh, ngudda ngurriwarlahkenh bininj rowk wanjh ngurridjalburlumen God kadberre. Ngurridjalburlumen bu ngurriwayinin wernkih duninj.

⁹ Nungka wanjh kanhdjalkarrme kadberre munguyh ba bu karridjaldar-kid, dja minj mak kanbawoyinj bu karrimankayi.

¹⁰ Ngudda nawu God kanrohrokmi ngadberre yiman kayime bininj kabirribelewon manbu silver kore kunak kunwernhbang kabirrikinje. Kuhni yiman kayime ngudda kanrohrokmen.

¹¹ Ngudda kankang kore ngarridukkayindi, dja mak yiman kanngorrken-wong ngadberre nawu ngandulmukwong.

¹² Dja yibenbawong bininj birriwarre bu kandiwarrewong. Ngad kunu ngarrirey kore kurrungbang yiman kunak, dja mak kore kundjurrh. Dja bonj, ngudda kankang bu kanbekeng kore kubolkmak bu ngarringehme.

¹³ Ngaye wanjh ngamre kore Temple manbu kunurrk ke ba bu marnekinje mayh ngardduk kore ngayingkihwokkurrmerrinj ke.

¹⁴ Bu ngakarrmi kunyid kunkimuk, wanjh ngaye ngayemanbidju ngawokkurrmerrinj bu kundjen ngardduk ngawokdi.

¹⁵ Wanjh kunmekbekenh ngamkan mayh nawu kunbalem dorrengh, yiman mayh nawu sheep nararangem, bu ngundimarnekinje kore altar. Ngaye ngamkan won nawu bulikki dja mak nawu nanikud.

¹⁶ Ngudda bininj nawu ngurrikengehme nawu God, wanjh ngurrimray kandibekka bu ngaye ngayolyolmerren dja marneyime kore nawu God nganmarnekurduyimeng ngardduk.

¹⁷ Yoh, ngaye ngadjalkayhmi nuye kurrang ngardduk. Ngaye ngakayh-meng nuye bu ngaburluburlumi warridj.

¹⁸ Bu yiman ngadjareniwirrinj kunwarrekenh baybaywi kore kukange ngardduk, wanjh kunukka nawu Kawohrnran Rowk minj nganbakkabekkayi.

¹⁹ Dja bonj, nungka nawu God woybukkih nganbekkang dja nganwok-mey ngaye kore ngahdi yiwarrudj.

²⁰ Mah, karriburluburlumen nawu God. Minj nganwokburriweng kore yiwarrudj ngahni bu ngahdjawani, dja minj mak ngurdmeng kore nganmarnedjareni.

67

Bu Karridjare Bininj Rowk Kabirriburlume Nawu God.

Psalms 67

¹ Ngad karrihdi yiwarrudj dja ngundidjawan ngudda God bu kankongibun ngadberre, dja kanmarnekurduyimen kunmak, dja mak kandjalnan mimkongiwern duninj.

² Kuhni ngarridjare ngudda God ba bu birriwarlahkenh bininj kondah kurorre kabirrihni wanjh ngundikurdunan kore yikurduyime kamak rowk, dja mak kabirriburrbun ngudda nawu yibennggehke bininj kore kubolkbubuyika rowk.

³ Ngudda nawu God! Ngad ngarridjare birriwarlahkenh bininj rowk bu ngundidjalburlume ngudda. Bedda nawu kabirrihni kubolkbubuyika rowk, wanjh ngundidjalburlumen!

⁴ Ngudda yibenmarnewohrnran birriwern rowk bu djal mandjad, dja yibenbolhbukkan bininj nawu kabirrihni kubolkbubuyika rowk ba kabirriburrbun kunmakkenh. Kunmekbekenh kunu wanjh birridjalwarlahkenh bininj ngundidjalmarnemarrharr dja ngundimarnewayini kore kabirrinjilngmak nguddakenh.

⁵ Yoh, ngudda nawu God, wanjh ngarridjare birriwarlahkenh bininj ngundiburluburlume. Ngarridjare bininj birridjalwern rowk wanjh ngundidjalburlume.

⁶ Kaluk bu kuhni kabirriyime, wanjh ngudda nawu God duninj ngadberre kanmarneyime kunmak ke, dja yibolkmarbun ngadberre kunred ba bu manme kawernmerren ngadberre.

⁷ God wanjh kanmarneyime kunmak, dja bininj rowk nawu kabirrihni kubolkbubuyika rowk, wanjh kabirrimarnekelemen nuye.

68

Bu God Kabenbun Nawu Kabirriwidnan Nuye.

Psalm 68

¹ O God, yirrolkka dja yibenburriwe bininj nawu ngurriyidko ba bu kabirrikelerlobmerren bedda nawu ngundiwidnan.

² Yidjalbubuhmen ba yibenyarlarrkemen yiman kundolng kadjalle bu kunmayorrk kaburriwe. Nawu birriwarre bininj nakka wanjh kabirridarrkidyakayakmen kore kumirrk ke yiman kayime ngolin kakelkdan bu kunak kamre darnkih.

³ Dja nawu birrimak bininj kabirrimarmarr dja kabirrinjilngmakmen kore kumirrk nuye God. Kabirrimarnekeyhme bu kunnjilngmak dorreng nuye.

⁴ Mah wanjh karrimarnewayinin nuye nawu God, karringeyburlumen nuye. Karrimulewa nungka nawu kahre kore kunngol. Nungka wanjh kangeyyo Yawey, dja karridin kumirrk nuye bu kunnjilngmak dorreng.

⁵ Nungka kahdi kore kunrurrk manurrkdjamun nuye, dja kabennahnan nawu birrimarladi bininj yiman kayime kornkumo duninj bedberre. Warridj kabenkukdjurrudi nawu kamahkamarrdjukun.

⁶ God kabenbolkwon bininj nawu namudyak ba bu kahdi kore bininj nawu kabirriwanjbimang yiman namud duninj nuye. Warridj kabenbke bininj nawu kabirribongdi ba kabirrire kamak rowk. Dja bininj nawu kabirriwokburriwe God nuye, wanjh bedda kabirridi kore kubolklarleh.

⁷ O God, ngudda yibenkani ngudda ke bininj kore yibenmarnedokmi. Ngudda yibenkang kore kubolklarleh birrirengehrey.

⁸ Ngudda God bedberre nawu Israel benkebmawahmeng, dja ngudda yidjalkudji God kore kunwarddekimuk Sinai. Bu yibebmeng wanjh mahni kurorre bolkrokani kore kumirrk ke, dja mandjewk djakdungi kaddumbeh.

⁹ Ngudda yimarnbom mandjewk bu djakdungi kamak rowk ba bu bolknjurlhkeng ngudda ke kunbolk.

¹⁰ Dja ngudda ke bininj birriboikmey dja birrihni kumekbe. Ngudda nawu yiwernhkuken duninj dja yibenwonowong nawu birrimarladi bininj.

¹¹ Nawu Kawohran Rowk wokrayekwong bininj bedberre, dja birridjalwern birrimulewam kore God yimeng. Wanjh birriyimi,

¹² "Ngurrina! Nawu kings dja bedberre armies wanjh kabirrikelerlobmerren!" Wanjh bininj birrimak kabirrimadjmangi kunmadj nawu birriyidko bedberre birribawong.

¹³ Birringalkeng yehyeng nawu wirlmurrng gold dja silver birrimarnbuni kuyimi mayh nawu doddorok, dja birrinang kunmud ngarre kukbami. Adju, njalekenh yikahwi ngudberre ngurridjaldi kured dja minj ngurridjarrkemyi namekbe namakmak?

14 God nawu dulkarrekimuk duninj benburriweng nahni nawu kings kore kubolkkimuk, wanjh munkeweng snow bu mankani kore kuward-dekimuk Zalmon.

15 Kunwarddekimuk rowk kore kunbolk Bashan wanjh birribolk-makkaykenh, dja birrikihkimuk rowk.

16 Yikahi kabirribarndi kaddum kore mahni kunwarddekimuk, dja njalekenh bedda kabirrinan kunkirn dorreng, kore God bolkdjarrngbom bu kahdi? Kumekbe wanjh nawu Yawey nungan kadjaldi munguyh munguyh.

17 Nawu Kawohrnan Rowk kakarrme wirbarra nawern duninj yiman millions. Dja kumwam kore kuwardde Sinai dja ngimeng kore manrur-djamun nuye.

18 Ngudda God nawu Yawey, ngudda wanjh yibidbom kaddum duninj dja yibenkani birridjalwern bininj nawu ngudda yibendarrkidmey, dja birriwern bininj nawu ngundiwokweyi, wanjh bonj, ngundidjalwong namakmak rowk. Dja ngudda wanjh yidjaldi munguyh kore ngudda ke.

19 Wanjh karriburluburlumen nawu Kawohrnan Rowk. Nungka munguyh kanmarnengorrkan kadberre narrulumuk duninj manbu karrikarrme. Nungka wanjh God nawu kanngheke.

20 Nawu God kadberre, wanjh kanngheke. Nungka Yawey nawu Kawohrnan Rowk kadberre, dja kanngheke kore kundowikenh.

21 Woybukkih wanjh God kabenkodjberelhme nawu kabirriwidnan. Bedda nawu kabirridjaldjare kabirrikurduyime kunwarre, wanjh nungka kabenkodjberrelhme bedberre kunkodj rowk.

22 Nawu Kawohrnan Rowk kayime, "Ngaye ngabendurndiwe kore kunbolk Bashanbeh, dja mak ngabenbidbuyhwe bedberre kore kurrula kanjdji duninj.

23 Kuhni ngakurduyime ba bu ngudda ngurrimelme kunkurlba nawu ngurriyidko bedberre bu kakurlbare. Dja nawu duruk gudberre kabirrikurlbabelenghme kunwern."

24 O God, ngudda yiwinhme munguyh bu yidjalle kore yidjare, dja birridjalwern ngundikurdunan. Ngudda nawu God dja mak king ngardduk wanjh yimre kore manrurrdjamun ke.

25 Ngudda ngurrimdjarrke birriwern bininj. Yikahwi nawu kabirriway-irenghehe wanjh kabirrimdokme, dja mak yawkyawk nawu kabirridon-gohdong tambourines.

26 Bu karriidjalwern karrimirndemornamerren nuye, wanjh karriburluburlumen nawu Yawey, ngad nawu Israel kankebmawahmeng rowk.

27 Yikahwi kadberre nakka wanjh Benjamin benkebmawahmeng, dja kabirridokdokme rowk bu kabirrire. Dja mak birriwern birrikihkimuk bininj kore nawu Judah benkebmawahmeng wanjh bedda mak karrihni. Dja kabirrihni mak nawu birrikihkimuk bininj nawu Zebulun dja Naphtali bindikebmawahmeng.

28 O God, kanbukka kundulkarre ke manbu karohrok bu kunkareni yikurduyimi kunwern kadberre kunngudj kunkimuk ke dorreng.

29 Bu ngudda yidjalni kore kunred Jerusalem dja yihni manrurrdjamun ke, wanjh kings nawern kamkan namakmak bu ngundiwon.

30 Mah, wanjh yibendu bininj nawu kabirrihni kunbolk Egypt. Nakka yiman yerrih nabang mayh nawu kare kore kurralkkimuk kurrird manka-bo. Warridj yibendu birriwarlahkenh bininj kore kubolkbubuyika ba bu

ngunmarneboddan dja ngundiwon wirlmurrng silver namakmak. Bedda yiman kayime bulikki birribang, dja wurdwurd bedberre warridj. Dja bininj nawu kabirridjare kabindibun birribuyika, wanjh yibendjalburriwe balehbaleh.

³¹ Bininj nawu Egypt kabirrihni wanjh ngundimarnemunkewe kunwok bedberre. Dja bininj nawu kabirrihni kore kunbolk Ethiopiah, wanjh ngundimarneboddan ngudda nawu God.

³² Mah, ngurriwarlahkenh bininj rowk kore kondah kurorre, wanjh ngurrimarnewayinin God. Ngurriburluburlumen nawu Kawohrhan Rowk.

³³ Ngurriburlumen nungka nawu kare kaddum munguyh munguyh dja bu kawokdi kunkimuk duninjh, wanjh kawokyime yiman namarrkon kangardulme

³⁴ Karrimulewa bu God wanjh Narrulkarrekimuk Duninjh. Nungka nawu kawernhwohrnan Rowk kore bininj nawu Israel benkebmawahmeng. Dja nawu kanbukkan nuye kunngudj kore kaddum.

³⁵ Ngudda God nawu yihni manrurrkdjamun ke, wanjh ngudda kankangebarrhke! Ngudda God kadberre nawu Israel kankebmawahmeng, wanjh ngudda kanwon ngad nawu ngudda ke bininj kundulkarre dja kunngudj ke.

Mah, wanjh kabirriburluburlumen nawu God!

69

God Nakka Nadjalkudji Nawu Kanngehke.

Psalm 69

¹ Ngudda nawu God, kanngehkemen, dja ngokko darnkih ngakuyinyibme kore kuburrk duninjh!

² Ngadjalyibme kanjdji duninjh, dja minj baleh kore kubolkrayek ngabolkmelme. Ngamdjuhmeng kore manbu kuburrk duninjh! Manbu kundjurrh kanwayhke!

³ Ngakelekayhmeng kunkuyeng ba bu kanbidyikarmekenh, dja ngadjalngudjyakmen. Ngakomwarremen warridj kore ngakayhkayhmi. Warridj ngawernhbolknan bu ngabengyirri ke, ngudda nawu God ngardduk, dja ngadjalmimwarrewarremen.

⁴ Bininj birriwern duninjh ngandiwidnan bu djal burudjang, dja kabirriwernhmerren. Bedda birringudjbang dja kabirridjare ngandibun dja mak ngandimarnekurren bu ngandiwirrihme. Bedda kabirridjare bu ngaye ngabenwon bu ngayidurnden njalenjale manbu minj ngaye ngadjirdmayi.

⁵ God ngudda kanmayaliburrbun dja ngaye wanjh ngabengwarr. Bu ngaye ngawarlkayi ngardduk kunwarre, wanjh ngudda kandjalnan dja yiburrbun rowk kore kunwarre rowk ngardduk.

⁶ Yawey, ngudda God nawu Yirrulkarrekimuk Duninjh dja ngudda yiwohrnan rowk, wanjh kanbekkabekka! Kunubewu bininj nawu ngundiyawayawan kabirriyemengalme bu ngayekenh, dja ngawarnyak duninjh. Ngudda God ngadberre nawu Israel ngankebmawahmeng, kanbidyikarmen ngardduk ba bu bininj rowk nawu ngundimarneboddan minj kabirriwewarremen bu ngayekenh.

⁷ Nakka nguddakah bu bininj ngandiwidnan, dja mak kunyemi nganmang bu ngandimarneyime kunwarre.

⁸ Ngaye yiman ngawokbuyika rerrih bedberre nawu ngarrimud, dja mak minj ngandimarnedjare nawu ngarridangerrinj.

⁹ Ngaye ngabolkdjare duninj kore kunrurrk ke, wanjh ngakangerung yiman kunak nganwurlhke. Dja bu bininj ngundimarneyime kunwarre, wanjh kunu ngaye ngandimarneyime kunwarre.

¹⁰ Bu ngaye ngare manmeyak ba bu ngahdi yiwarrudj ke, dja mak nganalknalkkihre nguddakenh, wanjh bedda munguyh ngandidjekmiwon.

¹¹ Bu ngaye ngadjongburren nawu nawarre kunmadj kore kundowikenh, wanjh bedda ngandidjalyolyolmi.

¹² Birriwern bininj ngandidjalyolyolme. Dja bininj nawu kabirribongun kunbang nakka kabirrihwohkarremarnbun mankarre bu kabirriwayini kore ngandiyolyolme.

¹³ Dja ngaye, nakka ngahdjaldi yiwarrudj bu djawahdjawan ngudda nawu Yawey! Bu yinjilngmak wanjh yibolknamen bu kanwokmang kore kanmarnedjare bulkkidj. Ngaye ngaburrbun bu ngudda kangehke munguyh dja minj kanbawon.

¹⁴ Ngaye ngayibme kore kubolkkih. Kanwayhkemen ba bu kanbebke. Bininj birriwarre wanjh munguyh ngandiwidnan! Ngaye ngabekkarren yiman kayime ngakebngakme kore kukku kuburrk duninj. Wanjh djawahdjawan bu kangehke kore bininj nawu ngariyidko.

¹⁵ Dja yuwn yibenbawon ngandidjokohme, dja bu burrkyak, wanjh yiman kayime kundjurrh kanburriwe, dja mak ngarrowen yiman kayime ngadjalkolung kanjdji duninj kore kurorre.

¹⁶ Yawey, kanwokma! Ngaburrbun ngudda yidjalmakkaykenh dja kanmarnedjare. Yimborledmen dja kanna, ngudda nawu yiwernhmimkongi-wern duninj.

¹⁷ Yuwn bu kanmarnewarlkkarren ngaye nawu ngarrurrkmirri ke munguyh. Werrkwerkk kanwokma, dja ngahkarrme kunrayek kunkimuk.

¹⁸ Yimray darnkih kore kukange ngardduk, dja kangehkemen, kanbekmen kore nawu ngariyidko bininj ngandibongkarre.

¹⁹ Ngudda yiburrbun kore baleh ngaye ngandimarneyime. Ngaye wanjh ngayemengalmeng dja ngawowarreminj. Ngudda yibenburrbun bininj nawu ngariyidko.

²⁰ Dja mak ngudda yiburrbun kore bedda ngandiwidjungji dja ngandimarnbom ngawernhkangewarre duninj. Ngayawam nangale bininj bu ngandikongibun, dja larrk, minj nangale djaremeninj bu ngankangerayekwoyi ngardduk.

²¹ Dja kunbuyika kabirriyime. Bedda wanjh ngandidjalwon manme manbu manbang duninj, dja ngandibowon manbu manbobang duninj bu ngabongun.

²² Bonj! Ngadjare bu bedman kabirringun kore mulil dja kabirriyolyolmeren, wanjh ngadjare kunwarre kabendarrkidmang dja kabenbongkurrme.

²³ Mak ngadjare bu yibenmarnbun kabirrimimkakkakme bu minj kabirriyawoyhbolknan. Ngadjare mak bu munguyh kabirridjalkukdeldele.

²⁴ O God, yibenkukbarlike bedberre ngudda ke kunkangeyid, dja yibenwernhdung bu yibendarrkidmang kore kabirrikelerlobme.

²⁵ Mak ngadjare minj kabirrihdjalyo kore bedberre kunbol, dja minj nangale kahdi kore bedberre dabburlin.

²⁶ Ngudda God kanbuni ngad nawu bininj ke, dja mak kanmarnbom ngadberre bu ngarribabang. Dja kumekbe wanjh birrimakbe birriwarre bininj ngandidjalyolyolme dja ngandiwirrihme ngadberre.

²⁷ Mah, wanjh yibenwiddjung kore kunwarre kunwern kabirrikurdyime dja yibenbun wernkih duninh. Yuwn bu yibennghehke, dja yibendjalbawo.

²⁸ Dja yibenngeybularrbun kore kabirringeybimbuyindi kore ngudda ke djurra nawu kundarrkidkenh. Yibenngeyburriwemen kore ngarringeybimidi, ngad bininj nawu ngudda kanmakwan bu ngarrimak kore ngudda.

²⁹ Ngaye minj kunjilngmak ngakarme dja ngahdjalkangewarre munguyh. O God kanwayhkemen ngudda ke kundulkarre dorrengh.

³⁰ Wanjh ngaye ngangeyburlume God kore ngamarnewayini nuye, warridj ngangeymakwan nuye bu ngadjalmanjmanjbun.

³¹ Wanjh kunukka nganjilngmarnbun nawu Yawey. Kuhni nungka kadjare, minj wernkih kadjare ngamarnebun bu ngamarnekinje bulikki kunkanem dja kundenge dorrengh!

³² Nawu birrimarladi bininj bu ngandibekkan kore kuhni ngayime, wanjh kabirrinjilngmakmen. Ngudda bininj nawu ngurridjare God, wanjh ngurrikangemakmen kore nungka.

³³ Nawu Yawey kabenbekkabekkan nawu birrimarladi bininj, dja minj kabenbodmewon nuye bininj kore bedda kabirrihbongdi.

³⁴ Mah! Ngadjare kunngol dja kurorre bu kabirriburlume nuye. Dja kurrula warridj, dja djenj dja njalehnjale nawern nawu kahre kanjdji kumekbe, wanjh birriburlumen nawu Yawey.

³⁵ Woybukkih God wanjh kabenggehke nawu kabirrihni kukadje Zion, dja mak kabenmarnemarnbun kuredbubuyika kore kubolkkimuk Judah, ba bu bininj kabirribolkmang dja kabirrihyo munguyh.

³⁶ Dja mak mawahmawah bedberre nawu kabirrimarnedurrkmirri God, wanjh kabirribolkmang kumekbe. Bininj nawu kabirridjare nuye kunngay, wanjh bedda kabirriyo kumekbe.

70

Bu Karrikayhme Nawu God Bu Kuntele Dorrengh.

Psalm 70

(Psalm 40:13-17)

¹ O God, yimray werkkwerkk kannghehkemen ngardduk! Ngudda nawu Yawey, werkkwerkk kanbidyikarmen!

² Yikahwi bininj kabirridjare ngandibun bu ngarrowen, wanjh ngadjare bedda rowk kabirriyemengalme dja kabirridjalmayahme. Mak yikahwi bininj kabirridjare bu kunyid kawernmerren ngardduk, wanjh ngadjare ngudda yibenkeborledke ba bu bedda kabirridurnderren kunyeme dorrengh.

³ Mak yikahwi bininj ngandidjekme dja ngandimarneyime kunwarre, dja ngadjare bedda kabirridjalbarabun dja kabirridjalyemengalme.

⁴ Ngadjare bininj rowk nawu ngundiyikan ngudda bu ngundimarnenjilngmakmen, dja kabirrimarmarr kore ngudda. Dja mak ngadjare bininj rowk nawu ngundimanjbun bu ngudda yibennghehkengkenh, wanjh munguyh kabirridjalyime, "God kadberre nakka wanjh nangeywerhkimuk duninh!"

⁵Ngaye wanjh ngangudjyak dja mak ngadjalmarladj! O God werrkwerkk yimray kore ngaye! Ngudda nawu Yawey! Ngudda kannggehke, wanjh werrkwerkk yimray ba kanbidyikarme.

71

Ngaye Munguyh Munguyh Ngadjalurlume Yawey Nawu God Ngardduk.

Psalm 71

¹Ngudda Yawey, ngadjare ngakurrmerren kore ngudda kannahnan. Yuwn bu kanbawon kore ngayemengalme.

²Ngudda munguyh yidjalkurduyime kore kunmakkenh dja minj kunwarre yikurduyime, wanjh kunmekbekenh kanbidyikarmen dja kannghekemen ngardduk. Kanbekka bu ngakayhme kore ngudda, wanjh kannghekemen.

³Ngadjare ngamkelerlobme munguyh kore ngudda ba bu kankukdjurruddi. Ngudda yiyimeng bu yidjare ngaye ngangehme, wanjh kunmekbekenh ngaye ngadjare ngawarlkayindi kore ngudda, kore ngudda kannggehke.

⁴Ngudda nawu God ngardduk, kanbekemen kore kubid bedberre bininj nawu birriwarre duninj, dja kannghekemen kore nawu birribang dja nawu birriwarre duninj bininj nawu ngandiwerhkharme.

⁵Ngaye munguyh burrbuburbuni dja mak madbumadbuni ngudda Yawey nawu Yiwohrnan Rowk, dja kunmekbekenh ngaye djawahdjawan bu bolkkimekenh. Bu ngaye ngadjalyawurrinjni ngaye woybukwoni ngudda, dja bu bolkkime warridj.

⁶Bu ngayoy kore kuwalirng dja bu ngangalmeng dja mak bolkkime, wanjh ngudda kannahnan. Ngudda kanbekkeng kore kuwalirng ngalbadjan ngardduk ngarre. Wanjh ngaye munguyh burluburlume ngudda.

⁷Birriwer bininj ngandikurdunan munguyh, dja ngudda kannahnan dja kankarme kore ngayo bu kamak rowk.

⁸Ngaye ngadjare burluburlume ke bu kunbarnangarra rowk, dja mak ngadjare munguyh bu yolyolme ngudda nawu yiwernhmakkaykenh.

⁹Bu ngaye ngakohbanjmen, wanjh yuwn bu kanmunkewe djarreh kore ngudda. Ngaye bu ngangudjwarremen, wanjh yuwn bu mak kandjalbawon.

¹⁰Ngaye kuhni djawan bu kunmekbe nawu ngariyidko ngardduk bolkkime ngandiiddjung bu ngandiyolyolme ngardduk. Bininj nawu kabirridjare ngandibun, wanjh ngandimarnekarremarnburren.

¹¹Bedda wanjh kabirriyime, "Yoh! God bibawong namekbe bininj. Mah, wardi karrikelekadju dja karridarrridkidmang. Minj nangale kamre kabingehke!"

¹²O God, yuwn bu yidjaldi djarreh ngardduk, dja wanjh yimray werrkwerkk dja kanbidyikarmen ngudda nawu God ngardduk!

¹³Ngadjare birrimekbe bininj nawu ngandiiddjung bu kabirridjalyakmen kunyeme dorrengh. Bedda nawu kabirridjare ngandibun wanjh ngadjare kabirriyemengalme bulkkidj duninj.

¹⁴Dja ngaye munguyh djalyoybukwon ngudda Yawey. Dja burluburlume wernkih duninj.

¹⁵Ngaye mulewan ngudda kunbarnangarrakuyeng. Ngaye ngayolyolme ngudda ke kundjalmakkenh dja kore ngudda kannghekemenh. Ngaye minj ngawernhburrubun rowk bu yikurduyime, dja wanjh kundjalwern duninj.

¹⁶ Dja mak ngamre ngabengdayhke bininj rowk bu ngudda wanjh yirrulkarrekimuk dunijnh kore njalehnjale yikurduyime, ngudda wanjh Yawey nawu yiwohrn rowk. Ngaye ngabenbengdayhke bu ngudda yidjalkudji yidjalkurduyime kore kundjalmakkenh.

¹⁷ O God, ngudda munguyh kanbukkabukkan bu ngaye ngayawurrinjni, dja mak bu bolkkime. Dja ngaye wanjh mulewan ngudda yidjalkurdumak kore yikurduyime kundulkarre dunijnh ke.

¹⁸ O God, kaluk yerrekah bu ngaye ngakohbanjmen dja ngakodjburmen, wanjh yuwn bu kanbawon. Ngadjare ngabenbengdayhke nawu mawahmawah ngardduk bu nguddakenh kundulkarrekimuk! Ngaye ngadjare ngabenmarneyime nawu kabirrimre yerreh bu ngudda wanjh yiwernhgudjbang dunijnh!

¹⁹ O God, ngudda nawu munguyh yikurduyime kundjalmak kunwern, dja nawu kabirrihni kore heaven wanjh ngundiwobekkan kore ngudda bu yikurduyime djal kunmakkenh. Kab, nangale mak yiman ngunerohrok?

²⁰ Ngudda kankurrmeng bu kunyid ngakarrmi bu ngannjilngwarrewong, dja ngaleng ngudda kandarrkidkerrngehmen. Bu ngaye ngahyo kanjdji dunijnh kore kurorre, ngudda wanjh kanyawoyhdolkkayhwe ngaye kore kunmekbe.

²¹ Dja warridj kanyawoyhngeykimukwon dja kanyawoyhkangemarnbun.

²² O God, ngudda minj kankowe dja minj kanbawon munguyh, dja kunmekbekenh ngaye burluburlume ngudda bu ngahdirri kore yiman harp ngabun. Yoh, wanjh ngaye ngawayini dja ngabun instrument nabuyika yiman lyre, bu burluburlume ngudda, nawu yidjamun dunijnh ngadberre nawu Israel ngankebmawahmeng.

²³ Ngudda kanmalngbebkeng kore kunwarrekenh ngabongdi, dja wanjh ngawernhkayhme bu kunnjilngmak dorrengh kore ngadjalwayini bu burluburlume ngudda.

²⁴ Ngaye ngadjalyolyolme kunbarnangarrakuyeng bu mulewan ngudda nawu kanbidyikarrmeng kore djal kunmakkenh ngudda ke. Birrimekbe bininj nawu birridjareni ngandibuyi, wanjh ngudda yibenmarnbom bu kabirriyemengalme dja kabirridjalmayahme.

72

Bu Karrimarnedi Yiwarrudj Nuye Nawu King.

Psalm 72

¹ Ngudda nawu God, ngarridjare yibukkabukka bininj nawu yimarnbom king, ba bu nungka kadjadme djal mandjad dunijnh, yiman ngudda. Nungka yiman beywurde ke, wanjh yibukkabukkan ba bu kadjalkurduyime kore djal kunmakkenh yiman ngudda.

² Nahni nawu king ngudda ke, wanjh kabendjadme bininj ngudda ke, kore kunmakkenh. Dja mak kabenwohrnawohrn mandjad dorrengh bininj ke nawu kabirrikarme kunrayek bu kabenmarnebebe.

³ Wanjh kunu kabolkmakmen kore kuwarddewardde dja kurrulum rowk ba bu bininj rowk kabirrikukenmen dja mak kabirrihdi munguyh bu kunmak dorrengh dja kunwarre yak.

⁴ Namekbe nawu king kabenbidyikarme bininj nawu kabirrikarme kunyid, dja mak kabennggehke wurdwurd nawu birrimarladj. Nungka wanjh kabadjubulhme nangale nabang bininj nawu kabenbongkarme birribuyika.

⁵ Namekbe nawu king wanjh munguyh kahdi kunkuyeng duninjh, yiman kundung dja dird minj kayakmen, dja kore bininj kabindimawahme, dja bininj yerre kabindimawahme mandjewk manwern.

⁶ Bu kuhni kunmak kakurduyime, wanjh yiman kayime mandjewk kadjagung kore kabbal kore kurralk kadjordmerren, dja kore kadjuhke bu kabolkngheke kurorre rowk.

⁷ Bu kuhni namekbe nawu king kawohrnawohrn, wanjh nawu birrimak bininj kabirridjaldi kunmak dorrengh, dja bininj rowk wanjh kabirrikukenmen kunkuyeng kaluk bu dird kabalyakmen.

⁸ Nahni king wanjh kawohrn rowk kubolkwarlahbubuyika kore mankabokimuk ngarre kore kubolkwern kondah kurorre.*

⁹ Bininj rowk nawu kabirrihni kore kubolldarleh wanjh kabirribodan nuye, dja bininj nawu kabirrinjirke, nakka wanjh kabirrimankan kurorre dja kabirridjulngbelenghme!

¹⁰ Birribuyika kings kore kubolkkimuk ngarre Spain, dja kore manyunkurrubuyikabeh warridj kore djarreh duninjh, wanjh bedda kabirrimkan namakmak bu kabirriwon.

¹¹ Birriwern rowk nawu nabubuyika kings wanjh kabirrimarnebodan kore kumirrk nuye. Bininj birriwarlahkenh kore kubolkbubuyika rowk kondah kurorre, wanjh kabirrimarnedurrkmirri nuye.

¹² Nungka wanjh kabengheke birrimarlaj bininj nawu kabirrikayhme nuye, dja mak nawu kunrayek wernmerrinj bedberre, dja nawu minj nangale kabenbidyikarme.

¹³ Nungka kabenkongibun bininj nawu birringudjwarre, dja nawu kabiriyawarren bu manmekenh. Dja kabengheke ba minj kabirridjaldowe.

¹⁴ Nungka kabengheke bu bininj birribang kabindibongkarme dja kabindibun. Nungka kawarnyak bu nuye bininj kabirrikurlbare.

¹⁵ Mah, wanjh ngadjare nawu king kahdarrkiddi munguyh munguyh! Mak ngadjare bininj nawu birrikang kore kunbolk Sheba wanjh birrimka nawern gold bu kabirriwon nuye. Ngadjare bininj rowk kabirrimarnedi nuye dja birridjawa God bu kabimarnekurduyime kundjalmak.

¹⁶ Mak ngadjare manne kawernmerren kore kunbolk nuye, kore manne karrudjindi kaddum kore kurrulum warridj. Mak ngadjare manbarnem kawernmerren yiman kayime manne kadjordmen kore kubolkkimuk Lebanon. Dja mak ngadjare bininj nawu kondah kabirrihni bu kabirriwernmerren yiman kayime kurralk kawernmerren kore kabbal.

¹⁷ Mak ngadjare nawu king nuye kungey kare munguyh munguyh, dja minj kayakmen yiman kayime nawu kundung minj kayakmen.

Kaluk God kabimarnbun naninjnanu king ba bu nungka kabenmarneyime kunmak bedberre nawu birriwarlahkenh bininj kore kubolkbubuyika rowk, dja bedda wanjh kabirridjawan God bu kabimarneyime kunmak nuye namekbe nawu king.

¹⁸ Mah, karriburluburlumen Yawey, nawu God nuye Israel! Nungka nadjalkudji kakurduyime kundulkarre dorrengh ba karrikangebarrhme.

¹⁹ Karriburlumen munguyh munguyh nuye kungey, nungka nawu God duninjh. Karridjaremen bu nuye kunmakmak kawarlahmen ba karriwarlahkenh bininj karrinan. Amen! Amen!

²⁰ Bonj. David nawu Jesse hibornang bimbong maninjmanu yiwarrudj manbu kondah kabimbuyindi. Wanjh yakwong rowk kore bimbuni.

* 72:8 Mahni mankabo ngeyyoy Euphrates. Ngurrina Zechariah 9:10

73

*God Kanmarnekurduyime Kunmak.**Psalm 73*

¹ God wanjh woybukkih nungka kunmak duninh kabenmarnekurduyime bininj nawu Israel benkebmawahmeng. Nungka kabenmarnedjare bininj nawu kabirridjare djal kunmak kore kukange bedberre.

² Dja ngaye wanjh darnkih bu ngabengmidjdangimeninj kore God kakurduyime. Ngaye ngakuyinbarlanhmey manbu kunwoybuk Godkenh.

³ Ngaye wanjh ngakirnwernworrinj bu ngabennang bininj nawu birriburlumerinj. Dja mak ngabennang bininj bu birrikukenworrinj kore kunwarre birriyimi. Wanjh ngaye kunmekbekenh ngakongiburrinj dja ngakirnwernworrinj.

⁴ Ngayimeng bedda minj kunrayek birringalmeninj dja minj birridjakbekkayi, dja bedda kunu wanjh birrikukmakni dja birridjalmur-rngayekni.

⁵ Bedda minj kabirrikarme kunyid yiman birribuyika bininj, dja mak minj kunrayek kabirrikarme yiman birribuyika bininj.

⁶ Bu kunmekbe wanjh bedda kabirriburlumerren dja kabirringoyhnarren. Dja mak birriyimerranj birribang duninh.

⁷ Bedda djal birrikuken duninh, dja kabirridjaldarewern kore kukange bedberre.

⁸ Bedda kabindidjekmiwon dja kabindiwidnan birribuyika bininj. Bedda kabindimarnbun bininj bu kabirrikelemen kore kabindidjurrkan.

⁹ Bedda wanjh kabirriyime kunwok kunwarre bu kabirriyolyolme God nawu kahni kore heaven. Dja mak bedman kabirridjalburlumerren bu kabirriyolyolmerren kore kubolkbubuyika kondah kurorre.

¹⁰ Yikahwi birribuyika bininj bu kabindibekkan wanjh kabirrikodjuhme, dja kabindidjalmakwan nahni birriwarre bininj.

¹¹ Bedda kabirriyime, "Yiddok woybukkih God kaburrbun rowk? Yiddok God nawu Nakimuk kaburrbun rowk kore kayimerran kondah?"

¹² Bonj. Karrbenna nahni bininj nawu birriwarre. Bedda kabirridi djal kamak rowk, dja kabirridjalkukenmen!

¹³ Dja ngaye njalekenh bu ngadjalmarnburrinj bu kunmak ngadjaldjareni? Ngaye minj ngakurduyimeninj kunwarre. Aba, njalekenh? Yiddok bu djalburudjang?

¹⁴ Ngaye nganjilngwarre bu kundungkuyeng. Bu malahmalaywi wanjh ngakangewarre kore ngaye ngabekkarren bu ngawarrewoyi. Kuhni ngayimerrinj kanjdji baybayi.

¹⁵ God, bu ngaye ngadjareniworrinj kuhni ngawokdiworrinj kurobbe, wanjh kunu nawu ngudda ke bininj rowk ngabenwarrewoyi, yiman kayime ngabenweykayi.

¹⁶ Kunmekbekenh ngadjareni ngaburrrkburrrkbebkayi bu kuninjkurowk. Dja burrkyak, kuhni kunrayek duninh minj ngaye ngawernhburrrkburrrknayi.

¹⁷ Kaluk ngangimeng kore manrurrkdjamun nuye God. Wanjh kunu kumekbeh ngamayalibayhmeng bu ngaburrrkburrrkbebkang bu kaluk kakurduyimerran bedberre nawu birriwarre bininj.

¹⁸ Ngudda wanjh yibenkurmeng kore kubolkyirrekyirrek ba bu kabirrimankan kore kubolkwarre dja kabirridowen.

¹⁹ Bedda kundjalburrikudji kabirribularrbuyindan, dja kungele kabenkukburriwe djarreh.

²⁰ Ngudda God nawu Yiwohrnan, bu ngudda yirrolkkan wanjh kunu yibendjekmiwon bu bedda yiman yibenbukirrinang, bedda wanjh yeng.

²¹ Bu ngaye ngakangewarreni wanjh kunu ngayidduy kore kukange ngardduk.

²² Ngaye ngawarreni dja ngamayaliyakni yiman kayime mayh nawarre. Minj njale mak bu ngaburrkburrkbebkayi nguddakenh, ngaye yimi djal mayh.

²³ Dja med. Woybukkih ngudda munguyh ngarrdjarrkre darnkih ngaye, dja mak ngudda kanbidkarrkarme kubidkukun ngardduk.

²⁴ Ngudda munguyh kanhkan kore mandjad ke bu kanhbengyolyolme dja kanhbukkan. Kaluk bu yerrekah wanjh kankimang kore ngudda nawu yidjalwernhmakkayhkenh.

²⁵ Ngaye minj nangale ngakarrme nawu nabuyika kore heaven dja ngudda yidjalkudji. Wanjh minj njale mak ngadjare nawu kondah kurorrewaken dja wanjh ngudda yidjalkudji.

²⁶ Manbu kunburrk dja kunmayali ngardduk wanjh makka kangudjwarremen. Dja ngudda nawu God ngardduk kankangemurrngrayekwon, dja ngudda wanjh ngaye ngardduk bu munguyh munguyh.

²⁷ Kaluk birrimekbe bininj nawu djarreh kabirrimarnedi God, wanjh nakka kabirridowen. Ngudda yibenbun bu yibenyakwon rowk bininj nawu ngundibadmewon dja ngundibawon ke.

²⁸ Dja ngaye wanjh darnkih ngahdjaldi kore God, kunukka wanjh kunmak duninh. God nawu Yawey nganmarnebidjdurrurddi dja ngadjalkurrmerren kore nungka kanbalhme. Ngaye wanjh mulewan ngudda bu ngabenmarneyime birriwern kore baleh ngudda kanmarnekurduyime kunmak.

74

Karridjawan God Bu Kabenbun Bininj Nawu Kabirriwirrihme.

Psalms 74

¹ O God, njalekenh ngudda munguyh kanbawon ngadberre? Ngudda yiddok kandjalwidnan ngad nawu ngudda ke bininj?

² Kanburrbu ngad bininj ngudda ke nawu kunkareni kandjarrngbom, dja kanmarbom ngudda ke duninh bininj. Kanburrbu ngad nawu kanmirndebebkeng kore ngarribongdi ba kanmirndenahnan yiman ngudda ke kunnguya. Warridj yibolkburrbu kunwarddekimuk Zion kore ngudda ke kunred!

³ Bolkkime yibolkna kukadje Zion, dja yina bu rurrkwarrawarrhmeng rowk. Nawu ngundiwidnan bininj birribakkeng yehyeng rowk ngarre kunrurrkdjamun manbu ngudda ke Temple.

⁴ Bedda nawu ngundiwidnan birringimeng kumekbe kore ngudda kankimey. Bedda wanjh birrikayhmeng bu birriyimi birriwinhmeng, dja kunu birridjabnameng flags bedberre bu kabirriburlumerrenkenh.

⁵ Birrikang kurdburru bedberre yiman kayime birridulkdadjkeyi bu kabirribolkrobewon,

⁶ dja ngaleng birridjaldadjkeng rowk kore kururrk dja birribolkwarrewong duninh. Manbu kundulk ngad ngarrimarnbuni kore kururrk, wanjh birridjaldadjkeng.

⁷ Wanjh birrirurrkwurhlheng ngudda ke mandjamun kunrurrk kore ngudda yihngedyi.

⁸ Dja mak bedda birriyimerrinj, “Mah, wanjh karrbenngerrehme rowk!” Wanjh birrirengehrey birriwurlhkeng rowk kore kunbol k ngadberre kore ngad ngundimarneboddangeni ngudda nawu God.

⁹ O God, minj ngundikurdunan kundulkarre ke dorrengh! Dja ngudda ke nawu prophets wanjh birridarrkidyakminj rowk. Dja minj nakudji bininj ngadberre kaburrbun bu baleh kabolkyime kangurdme kore kadjalkurduyimerran ngadberre.

¹⁰ O God, baleh kabolkyime bu yibenbawon nawu ngundiwidnan ngundidjaldjekmiwon? Yiddok munguyh ngundidjalngeywarrewewu ngudda ke kunngey?

¹¹ Dja ngudda yiddok minj yibenbun? Mah, wanjh yibidyirriyuwn kubidkukun ke dja yibenbularrbun!

¹² Ngudda God wanjh ngardduk king bu kerrngehkenhni yiwohna-wohrnani ngardduk. Dja kunwernhkah ngudda kannggehkenng ngadberre kondah kurorre.

¹³ Bu ngudda ke kundulkarre dorrengh yibolarlmey bu yibodjalkmey manbu kurrula, dja yikodjbarhkeng nakimuk mayh nabang nawu kurrula kahyo.

¹⁴ Mahni nakimuk mayh nawu ngeyyoy Leviathan, nawu nawarre, ngudda wanjh yikodjngerrehmeng, yikukdjokkeng dja yibenwong mahni kunkanj kore mayh nawern nawu kubolldarle kabirridi ba kabirribalngun.

¹⁵ Ngudda yingan yirrangmarrhmangi kurorre ba kambobebme kukku kore njilhmi dja kore kaborlobme djarreh. Dja mak ngudda yingan yibongurdkenng ba mankabokimuk manwern djalbolldarleminj rowk.

¹⁶ Ngudda yingan yimarnmarnbun barnangarra dja mak kumunun. Warridj ngudda yinameng kundung dja mak dird.

¹⁷ Ngudda yingan yinameng kurorre rowk bu kadjaldi kore yibolkkurmeng. Warridj ngudda yimarnbom kurrung dja mak yekke.

¹⁸ O Yawey, ngudda yibenburrbu nahn bininj nawu ngundiwirrihme bu ngundidjekmiwon, dja mak birribengwarr bininj ngundingeydjekmiwong.

¹⁹ Dja yuwn bu kanbawon ngad ngudda ke bininj nawu kanmarnedjare, dja wardi nawu birribang bininj ngandibun ngarridowe. Yuwn bu kanbengmidjan ngad bininj ngudda ke. Ngad wanjh bolkkime ngarridjalmarladj duninj.

²⁰ Yiburrbu kore kanmarnewokkurmerrinj ngudda ke kunwok. Kondah kore ngarrihni wanjh kunwarre wernmerrinj dja bolkmarnbom yiman kubolkkakmunun.

²¹ Yuwn bu mak kanbawon bu ngarrikelerlobme kunyeme dorrengh, ngad nawu ngandiarrewon nawu birribang bininj. Ngarridjare bu birri-marladj bininj dja mak nawu minj birrikuken wanjh ngundingeyburlume rowk.

²² O God, yirrolkka yibenbu nawu ngurriyidko! Yuwn yibenbengmidjan birribengwarre bininj nawu ngundidjekmiwon bu barnangarakuyeng!

²³ Dja yibenbekkabekkan nawu ngurriyidko bu kabirrikayhme, dja kabirriwokdiwokdi munguyh.

75

God Nawu Kandjadme Ngad Bininj Rowk.

Psalm 75

¹ Ngad ngundimanjbun ngudda nawu God. Ngudda yihni darnkih kore ngad, wanjh ngundimanjbun. Birriwern bininj ngundimulewan ngudda yidjalkruduyime kunmak kunwern.

² God kayime, "Ngaye ngadjalkudji ngarrungname kore ngabendjadme bininj. Dja ngaye ngabendjadme birriwarlahkenh bininj bu djal mandjad.

³ Bu kurorre karokarokan dja mak bininj birriwarlahkenh kabirikuldeldelme, wanjh ngaye ngadjalkudji ngawernhkarrme rowk dja ngabolkmarnbun kanjdji ngarre.

⁴ Ngaye ngabenmarneyime bininj nawu kabirriburlumerren, ngayime, 'Yuwn bu ngurriyawoyhburlumerren!' Dja mak ngabenmarneyime nawu birriwarre bininj, 'Yuwn bu ngurridjaldokmiwerren kore birribuyika bininj.

⁵ Yuwn bu ngurringeykimukworren kore kumirrk ngardduk!'"

⁶ Minj nangale bininj kabendjadme birriwarlahkenh bininj! Minj nangale nakang koyek dja nuk kore karrikadbeh, dja minj nangale bininj nawu kakkibeh dja nuk walembek kakurmerren ba bu kabendjadme bininj.

⁷ Dja God nakka nadjalkudji kabendjadme bininj. Nungka kabenkoluyhwe yikahwi bininj, dja birribuyika wanjh kabendolkkayhwe.

⁸ God nawu Yawey kakarrme kubid nuye nakudji cup dja nungka barlkeng kunyid nuye yiman manbobang duninh. Nungka kabenbowon birriwarre bininj ba kabirribongun rowk. Minj kabirribowon mandjal-boyahwurd kore cup.

⁹ Dja ngaye, wanjh munguyh munguyh ngadjalburlume God nuye nawu Jacob. Ngaye ngawayini bu ngadjalburlumekenh nuye.

¹⁰ Nungka kayime, "Ngaye ngarrulkarreyakwon kundulkarre bedberre nawu birriwarre bininj. Dja nawu birrimak bininj, wanjh ngabenwon kundulkarre."

76*God Nawu Kawinhme Munguyh.**Psalm 76*

¹ Bininj nawu kabirrihni kore kubolkkimuk Judah kabirriburrbun nawu God. Dja bininj nawu Israel benkebmawahmeng wanjh kabirringeyburlume nuye.

² Nungka nawu God kahdi kore kunred nuye Jerusalem.* Nungka wanjh kahyo kore kuwarddekimuk Zion.

³ Kumekbe wanjh nungka bakkeng arrows bedberre nawu birriyidko nuye, dja mak bakkeng rowk bedberre mandjawak dja njalehnjale rowk birrikarmi bu kabirriburrenkenh.

⁴ Manbu kuwarddekimuk manbolkmakkaykenh, wanjh yeng. Dja ngudda wanjh yidjalwernhmakkaykenh, ngudda nawu God duninh.

⁵ Yibenbom rowk nawu ngurriyidkoni bininj. Bedda nawu birrikelebukni, dja bonj, yibenmarnedjirdmey manmakmak bedberre, dja bolkkime wanjh kabirridjalngudyawarren, dja wanjh kabirridjalkodjkeyo kore kundowikenh.

⁶ Ngudda Jacob nuye God, bu ngudda yibenmarnebuhmeng kukeb ke, wanjh birrimekbe bininj dja mak djarrang bedberre, birridoweng dja minj mak kabirrirokan.

* 76:2 Jerusalem kangeyrohrok Salem.

7 Wanjh kunmekbekenh ngad wanjh ngarriwarlahkenh bininj ngundikengeme ngudda nawu Yawey. Bu ngudda yiyiddung wanjh minj nangale bininj kahdangen kore kumirrk ke!

8 Ngudda yidjalyerrkang kore kaddum heaven dja kunmekbe ngudda yibenwarrewam nawu ngundiwirrheng bu yibendjadmeng rowk. Dja ngad ngarriwarlahkenh bininj kondah kurorre, wanjh ngarridjalwoykakni kunkele dorreng.

9 Ngudda yirranginj bu yidjalwokdanj bu kandjadmekenh. Ngudda kunu yibenngengkeng bininj nawu kabirribongdi kondah kurorre.

10 Bu bininj ngundidung, wanjh bonj, yibenmarnbun bu ngundidjalburlume ngudda. Ngad nawu kandarrkidbawong wanjh ngundidjalkengeme.

11 Mah, ngurrimarnewokkurrmerrimen nuye Yawey nawu God ngudberre, dja ngurridjalkurduyimen kore ngurrimulewarrinj. Mak ngudda nawu ngurrini kubolkbubuyika darnkih, wanjh ngurrimka nuye namakmak dja ngurriwo. Nungka wanjh kanmarnbu ngad bininj rowk bu karrikengeme nuye!

12 Nungka kabengkangarrewon nawu birrikihkimuk bininj nawu kabindiwohrnawohrnan, dja mak nawu kings bedberre birrikihkimuk. Wanjh bedda kabirrikengeme nahni nawu God.

77

Yuwu Bu Ngabengmidjan Kore God Nganmarnekurduyimerranj.

Psalm 77

1 Ngaye ngawernhkayhme kore God dja ngadjawam bu nganbidyikarmekenh. Ngawernhkayhme ba bu nungka nganwokmang.

2 Bu kunyid nganmarnebebme wanjh ngayawam nawu Kawohrnan Rowk. Bu kunkakkuyeng ngaye ngabidyirriyongen nuye, dja bonj, minj ngakangengehmeninj.

3 O God, ngaye burrbun ngudda bu ngangolekdurkmarren. Ngaye ngaburrburren baybaywi bu nguddakenh, dja larrk, ngangudjywarren kore kukange ngardduk.

4 Ngudda wanjh kanmimbayhke bu ngadjalmimke. Kaluk minj ngawokdi. Ngaye ngadjalwernhnjilngwarre duninj wanjh ngaye ngadjalwoyak.

5 Ngadjalburrbun bu kunkarekenh, kore ngokko ngayimi.

6 Ngayimerrinj, "Ngadjare ngayawoyhburrbun mankong ngardduk manbu ngawayini bu kunkakkuyeng. Ngaye ngadjare ngaburrburren baybaywi." Wanjh ngayawarreni kore kukange ngardduk, bu ngayimi,

7 "Yiddok nawu Kawohrnan Rowk ngandjalwirrihme ngardduk bu munguyh? Yiddok minj nganyawoyhmarnedjare ngardduk?"

8 Yiddok munguyh bawong kore nungka kanmarnedjareni? Yiddok mayaliborledmeng kore ngokko wokkurrmerrinj ngardduk dja wanjh bonj?

9 Yiddok bengmidjanj kore nungka ngankongibun ngardduk? Yiddok minj nganyawoyhkongibun bu ngandjalyiddungkenh?"

10 Kuhni rowk ngayimi, dja med, kaluk ngawohburrbom, bu ngayimi, "A, yiddok God nawu Nakimuk Duninj, ngudjwarremeninj?"

11 Ngaye ngaburrbun rowk kore Yawey kurduyimi kundulkarre ke dorreng.

¹² Kaluk ngadjalburrbun bu baleh kuhni kamenyime, dja baleh ngudda kanbukkan bu yikurduyime njalehnjale.

¹³ O God, ngudda yidjalkurduyime kore kundjalmak. Minj nabuyika god nakimuk yiman ngudda nawu God ngadberre.

¹⁴ Ngudda God duninj, nawu yikurduyime kundulkarre dorrengh ba bu bininj birriwarlahkenh rowk ngundikurdunan dja kabirriyime ngudda yirrulkarrekimuk.

¹⁵ Ngudda wanjh kanbekkeng, dja kanngehkeng kunngudj ke dorrengh nawu ngudda ke bininj, nawu bindikebmawahmeng Jacob dja Joseph.

¹⁶ Bu kunmekbe wanjh manbu kurrula ngunnang ngudda nawu God dja yiman kelerlobmeng. Dja manbu kurrula borokahrokani kore kuburk duninj.

¹⁷ Mandjewk nakimuk djakdungi kore kunngolbeh, dja mak ngolngurdulmi kore namarrkon mayhkemayhkeyi kaddum.

¹⁸ Mak kunmayorrkkimuk wokdi yiman kayime ngudda yimarnbom wernhgurdulmi rowk. Ngudda ke namarrkon warridj, wanjh bolkwolkang kondah kurorre, dja wanjh bolkrokarakani wernkih duninj!

¹⁹ Ngudda yiwam dja yibolhmarnbom kore kurrula yibowayhkeng, kore yiwam kanjdji kore kurrula manbokimuk. Kaluk minj nangale ngunboknayi kore yimelmeng.

²⁰ Ngudda wanjh yibenmirndeyormeng ngudda ke bininj. Ngudda yibenbenekurrmeng Moses dja Aaron bu bindimirndekani.

78

Bu Karrbenbukkabukkan Nawu Karrbenbornan Ba Bu Bedda Kabirri-borlhme Nawu Kawohnan Rowk.

Psalm 78:1-8

¹ Kandibekka nawu ngardduk bininj rowk! Ngaye bengdayhke ngudberre, dja kandiwokekkabekkan.

² Ngaye ngayolyolme kunwok manbu ngunmarnbun ngurrimayalimak. Dja mak ngayolyolme kunwok manbu warikawarlkayindi bu kunkare duninj.

³ Mahni kunwok wanjh karribek kang dja karriborlhmeng. Nawu mawahmawah kadberre kandibukkabukkang bu kandibidnakenwong.

⁴ Yuwn bu karribenaybun wurdwurd kadberre, dja karribenbukkabukkan bu karriyolyolme Yawey nawu kundulkarrekimuk duninj nuye kore nungka kurduyimi kunwern kunmak dorrengh ba bu karriburlume.

⁵ Nungka wanjh benwong nawu Jacob benkebmawahmeng mankarre nuye, dja mak benwokrayekwong nahni bininj nawu Israel benkebmawahmeng. Nungka benbengdayhkeng nawu kadberre mawahmawah ba bu bindibukkabukkang bedberre wurdwurd.

⁶ Nungka kadjare nawu wurdwurd kabirriborlhme kore nungka benwokwong nawu kornkorkumo, dja wanjh bedmanwali bu kabirridjordmen, kabindibalbukkabukkan nawu wurdwurd bedberre bu kaluk yerrekah kabindikarme.

⁷ Bu kunmekbe kabirriborlhme nawu bininj rowk, wanjh kabirrikangewoybukwon nawu God, dja minj mak kabirribengmidjan kore nungka kurdukurduyimi, dja kabirridjalwokmarrkmang nuye.

⁸ Bu kunmekbe wanjh minj kabindingunjdikkan nawu mawahmawah bedberre bu birriwokweyi God dja minj birriwokmarrkmayi nuye. Minj birriwernhwoybukwoyi, dja birridjalbawong God kore kukange bedberre.

Bu Kunkareni God Nuye Bininj Minj Birriwokmarrkmayi.

Psalm 78:9-20

⁹ Bininj nawu Ephraim benkebmawahmeng wanjh birriwam bonarra dorreng bu bindibuyi nawu birriyidko, dja bonj, birridjalkelerlobmeng dja birridjaldurderrinj kured.

¹⁰ Bedda minj birrikurduyimeninj kore birriyingkihwokkurmerrinj nuye God, dja minj birridjalwokweng nuye mankarre.

¹¹ Birribengmidjdanj kore nungka kunwern benmarnekurduyimi kundulkarre nuye dorreng kore bedda birrikurdunang.

¹² God wanjh kurduyimi kundulkarre dorreng kore mawahmawah bedberre birrikurdunang bu bedda birridi kore kabalkimuk bolkngeyyoy Zoan kore kubolkkimuk Egypt.

¹³ Nawu Yawey boyarlarrkeng manbu kurrula dja benmarnedokmeng bu birridjowkkeng. Nungka marnbom manbu kurrula bu wernhbowayhmi yimerranj yiman warnamwarnamyonginj bokenh.

¹⁴ Kaluk God benmarnekurrmi kunngolkudji nuye ba benbolhbukkani kunbarnangarra rowk kore balehbaleh birrireyi. Dja kunkak rowk wanjh benmarnekurrmi manbirlukimuk ba bolkwolkani bedberre.

¹⁵ Mak God benbowong kukku. Nungka warddebarrhkeng kore kubolldarleh ba bu benbowong kukku manbowern duninj kore kanjdjibeh duninj wernhbobemeng.

¹⁶ Nungka marnbom kukku borlobmirlobmi kore kunwarddekimuk yiman kayime mankabo duninj.

¹⁷ Dja bonj! Bedda wanjh birridjalbakkeyi nuye mankarre. Kore kubolldarleh birrirey wanjh birridjalwokburriweyi kunwok nuye God nawu nakimuk duninj.

¹⁸ Bedda birrikebdjarrkmeng God bu benwoyi manme manbuyika manbu birridjalmanjnguni. Kunu birridjareni bu birrirohrokmi nawu God.

¹⁹ Bedda wanjh kunwarre birrimarneyimeng nuye God bu birriyimerinj, "Ngayh! Yiddok woybukkih God kanworrkmiwon manme manmak dorreng kondah kore kubolldarleh?"

²⁰ Ngad karrinang Moses bu warddedoy dja manbowern kukku borlobmeng dja yimerranj mankabo duninj. Dja med, yiddok God woybukkih kanwon buriddi warridj? Yiddok God kanwon kunkanj ngad nawu bininj nuye?"

Nawu Yawey Bendungi Nuye Bininj Dja Benwong Manme.

Psalm 78:21-31

²¹ Bu nawu Yawey benbekkang, wanjh wernhyidduy dja benbom bedberre nawu Jacob benkebmawahmeng kunak dorreng. Nungka wanjh yidwernni duninj bedberre nawu mawahmawah nuye Israel.

²² Bedda minj birriwoybukwoyi God, dja minj mak birrikangekurrmerimeninj kore kubid nuye ba kabenngehkekenh.

²³ Dja bonj, nungka wanjh benwokmey. Nungka wokrayekwong kunngol kore kaddum, dja kunngol wanjh dangmarrhmay.

²⁴ Dja benwong manme kore kaddumbek yiman mandjewk mankang, dja maninjmanu manme wanjh birringeybom manna, dja wanjh birringuneng.

²⁵ Bedda djal bininj birringuni maninjmanu manme bedberre nawu angels. God benmarnemunkeweng dja wanjh birriworrrkmiworrrinj.

²⁶ Dja mak nungka munkeweng kunmayorrrk kore koyekbeh, dja bebkeng kundulkarre dorrengh nuye kunmayorrrk kore walembek.

²⁷ Bu kunmekbe kurduyimi wanjh God benwoni kunkanj kundjalwern duninj. Dja benmarnemunkeweng mayhmayh nawu wernhmirdewernmerrinj duninj bedberre dja wanjh birribuni birringuni.

²⁸ God mirndemunkeweng ba mirndekolungi kore kubulkayh dabburlin bebbehbebbek bedberre.

²⁹ Wanjh birringuninguni dja birriworrrkminj rowk. God wanjh benwong kore manbu birridjareni.

³⁰ Dja bedda birridjaldjareni birringuyi kunwern, wanjh birridjaln-guninguni.

³¹ Kunmekbe wanjh God yawoyhyidduy bedberre, dja benbom nawu birringudjbangni bininj dja mak benwarrewong yawurrinj nawu Israel benkebmawahmeng.

God Nuye Bininj Birridjalkurduyimi Kunwarre.

Psalms 78:32-37

³² Dja bonj, bedda wanjh birridjalkurduyimi kunwarre. Bedda birrikurdunang kore God benmarnekurduyimeng kundulkarre nuye dorrengh, dja birridjalkewkmi.

³³ Kumekbekenh kunu God benkangewarrewong, dja bedda birridjalyakminj bu birridowerrinj kungele dorrengh.

³⁴ God benbuni yikahwi bedberre dja birridoweng, wanjh birribuyika birriwarnyakmulewarrinj. Birriborledkerrinj kore nungka, dja werrkwerk birridanginj yiwarrudj.

³⁵ Birriwohburrbom bu God bendjurruddi bedberre, nahn nawu Nawernhkimuk Duninj bengekeng.

³⁶ Dja bonj, minj birriyimeninj kunwoybuk dorrengh. Birridjalkurrinj munguyh.

³⁷ Minj birriwoybukwoyi kukange bedberre, dja birridjalbawoni kore birrimarnewokkurmerrinj nuye.

God Benkongibom Nuye Bininj.

Psalms 78:38-39

³⁸ Dja bonj, God wanjh bendjalkongibuni. Nungka benmarnebengmidj-danj kunwarre bedberre dja minj benbularrbuyi. Kunwernhkah nungka ngurdkerrinj bu yidwernminj dja minj yidduy duninj bedberre.

³⁹ Nungka burrbuburrbuni bu bedda wanjh djal bininj nawu minj munguyh kabirridjaldarrkid, dja kabirridjalyakmen rowk.

God Nuye Bininj Birriwokburriweng.

Psalms 78:40-43

⁴⁰ Bedda kunwernkah birriwokburriweyi bu birridi kore kubolkdarleh. Kunwernhkah birrinjingwarrewong nawu God.

41 Bedda nawu Israel benkebmawahmeng wanjh kunwernhkah birirohrokmi dja birrinjilngwarrewong God nawu Nadjamun Duninj bedberre nawu Israel benkebmawahmeng.

42 Birridjalbengmidjdanj kore nungka benbekkeng kundulkarre nuye dorrengh bu birriyidko bininj bindibongkarrmi.

43 Dja mak birribengmidjdanj kore God kurduyimeng kundulkarre nuye dorrengh dja benkangebarrhkeng bininj nawu birrikang kubolkkimuk Egypt. Dja bu birrini kabbalwarlah bolkngeyyoy Zoan kore birrikurdunang warridj.

Bu God Benbom Bininj Nawu Bindibongkarrmi Nuye Bininj.

Psalm 78:44-51

44 Kumekbe wanjh God bomarnbom mankabo rowk bu mahni kukku boyimerranj kunkurlba, ba bu minj nangale birribonguyi.

45 Benmarnemunkeweng djoned nawern bu benmarnemirndewernmerrinj dja bennjilngwarrewong. Dja warridj kordbolbok benmarne-munkeweng nawern duninj ba bu benmarnebolkarrewong.

46 Nungka benmarnemunkeweng djadedde nawern ba bu kangun manne bedberre kore kabbal djordmeni, dja mankolhde bedberre wanjh yakwong rowk.

47 Kaluk God benmarnemunkeweng mandulmuk mankurk dja benmarneyakwong bedberre mandjoleng manbu barndibarndi kore manrakel rowk, dja mak bolkkedjelkwong ba bu mandjoleng manbu figs kore kundulk barndibarndi wanjh yakminj rowk.

48 Mahni mankurk benbom bulikki, dja namarrkon nakimuk benbom mayh nawu birrimirndenahnani.

49 Kuhni God yimerranj bu yidwernmerrinj bedberre. Nungka yiddungi dja bendjadmi bedberre, dja kuhni kurduyimeng ba bu benbengdayhkeyi kundowikenh bedberre.

50 Minj kangemarnburrimeninj bu yidyakmeninj, dja bendjalbom bedberre bininj nawu birrikang Egypt. Nungka benwong kundjak kunkimuk dja wanjh birriwern birridoweng.

51 God wanjh benbom nawu nawewernhwarre rowk nawu birridanginj kore namud rowk bedberre nawu birrihni Egypt.

God Benneghkeng Nuye Bininj.

Psalm 78:52-55

52 Kaluk wanjh God benkang nuye bininj yiman kayime shepherd kamirndekanakan mayh nuye. Benbolhbukkabukkani kore kubolldarleh ba bu birrirey kamak rowk.

53 Benkang kamak rowk ba bu birridjalkeleyakni. Dja bininj nawu birriyidko wanjh kurrula bendjalbarrkbom.

54 God benkani dja birribolkmey nuye kunbolk. Benkang kore kuwardekimuk nuye, manbu nungka bolkmey kubidkukun nuye dorrengh.

55 God wanjh benburriweng bininj rowk nawu birriyingkihdi kore kubolkbubuyika dja benbolkwong nuye bininj ba bu munguyh kabirrihni kumekbe. Benbebbebolkwong nawu namudbubuyika bedberre bininj nawu Israel benkebmawahmeng.

Bu God Nuye Bininj Birrimarnbom Nungka Wernhyidduy Bedberre.

Psalm 78:56-64

⁵⁶ Dja bonj. Nahni bininj nawu Israel benkebmawahmeng birridjal-rohrokmeng God nawu Nakimuk Duninj, dja birriwarnyakminj kore nungka benwokrayekwong. Minj birrimarrkmayi nuye mankarre.

⁵⁷ Bindingunjdjikkang nawu mawahmawah bedberre, dja birridjalbod-mewoyi nawu God. Minj birriwernhwoybukwoyi dja birridjalkurrekur-rinj.

⁵⁸ Bedda birribolknameng kubolkwern kore birrimarneboddangeni nawu idols. Kuhn wanjh benmarnbom God bu kirnwernmerrinj dja wanjh yidduy duninj bedberre.

⁵⁹ Nungka benbekkang bu kuhni birrikurduyimi, wanjh wernhyidduy, dja benwarnyakminj rowk nawu bininj nuye nawu Israel benkebmawah-meng.

⁶⁰ Wanjh nungka bolkbawong manbu yonginj kore kunred Shiloh, kore nungka kurrmerrinj nuye bu dingihdi darnkih kore bininj kondah kurorre.

⁶¹ Dja mak benbawong birribuyika bininj nawu birriwarre bu birridjird-mey manbu Ark nuye. Mahni Ark wanjh benbengdayhkeyi nuye bininj ba birriburrbuyi God nuye kundulkarre dja mak kunmakmak.

⁶² Dja benbawong nawu birriyidko bininj bu bindibuni mandjawakwi nawu djal nuyekih bininj! Nungka wanjh benmarneyidduy duninj nuye bininj rowk.

⁶³ Kaluk kunak benkuyakwong birriwern nawu yawurrinj nuye. Ngalbu yawkyawk birridowerrinj, minj birringalkemeninj bininj bu birrimarrimeninj.

⁶⁴ God nuye bininj nawu birrimarnedurrkmirri nuye yiman priests, wanjh birriyidko bininj bindidjalbom mandjawak dorreng. Dja mak bindidabkeng ngalbu birrikamarrdjukun bedberre bu bindimarnenalk-buyi.

Nawu Kawohrnan Rowk Benmarnedjarrngbom King Bedberre.

Psalm 78:65-72

⁶⁵ Kuhni rowk kurduyimerranj bedberre nawu God nuye bininj. Dja nawu Kawohrnan Rowk wohdolkang yiman kayime bininj nawu kod-jewarreni. Mak yiman kayime ngudjbang bininj nawu keyonginj bu mayahmi kunbangkenh bu karrolkkarren.

⁶⁶ Wanjh bendurndiweng nawu birriyidkoni bininj dja birriyemengalmi munguyh munguyh.

⁶⁷⁻⁶⁸ Kaluk djarrngbom nakudji namud, bendjarrngbom bininj nawu Judah benkebmawahmeng. Bendjalwarnyakni bininj nawu Joseph benkebmawahmeng, dja minj mak bendjarrngbuyi mawahmawah nuye nawu Ephraim. Nungka bolkdjarrngbom kuwarddekimuk kabolkngeyyo Zion manbu kabolkmanjgun.

⁶⁹ Kumekbe wanjh rurrkmarnbom kunrurrk mandjamun nuye. Rurrk-marnbom bu manrurrkkimuk kaddum ba bininj birriyimeng kare kore kaddum heaven. Dja mak wernhrurrkmarnbom dja minj karokayhme, dja kadjaldi munguyh yiman kurorre manbu nungka marnbom.

⁷⁰⁻⁷¹ Kaluk yerrekah bidjarrngbom David nawu bimarnedurrkmirri. Bi-wayhkeng kore kurralk mirndenahnani mayh nawu sheep dja bikurrmeng

bu yimerranj king nawu bennahnani bininj nawu Jacob benkebmawahmeng. Bennahnani God nuye bininj nawu Israel benkebmawahmeng, yiman shepherd kamirndenannan nawu mayh.

⁷² Wanjh King David bennahnani kamak rowk. Minj kunwarre benmarnekurduyimeninj dja wanjh nungka kunmayalimak dorreng bu bennahnani.

79

Bu Karrijawan God Kanbidyikarmekenh.

Psalm 79

¹ Ngudda God! Bininj nawu birrikang kubolkbubuyika wanjh birrimwam bu kabirribolkdjirdmang ngudda ke kunbolk. Bedda wanjh birrirurkwarrewong ngudda ke Temple manrurkdjamun, dja birrirurkrebakkabakkeng kunrurk rowk kore kukadje Jerusalem.

² Bindibom dja bindikubawong birriwern nawu ngundimarnedurrkmirri bininj ba mayhmayh kabirrikanjgun kore kabirrikukyo. Mayh nawu nabang kabenkukkanjgun bininj nawu ngundiwoybukwong.

³ Nahni birribang bininj wanjh bindikurlbawarrhkeng bedberre nawu bininj ke yiman kukku birridjalboyakarrbuni kore kuberrkkah kukadje Jerusalem. Minj nangale bininj kahdjaldarrkid bu kabenkukudjeng nawu birridowerrinj.

⁴ Bonj, wanjh ngandiarrewan bininj nawu kabirrihni kubolkbuyika darnkih. Bedda wanjh ngandikukyolyolme dja ngandidjekmiwon ngadberre.

⁵ Ngudda nawu Yawey, ngundidjawan bu yiddok munguyh kandjaldung? Yiddok yidjalkirn kunkimuk duninj, yiman manbu manbirlukimuk?

⁶ Wardi yibendu bininj nawu birrikang kubolkbubuyika bu nawu ngundidjalwarnyak ngudda. Kumekbe birriwern bininj kore kubolkbubuyika minj ngundingeykayhme.

⁷ Bedda wanjh bindibom bininj nawu Jacob benkebmawahmeng, dja birribolkwarrewarrewong kunred bedberre.

⁸ Ngadberre mawahmawah birribakkeng ke mankarre, dja yuwn bu kandung ngad nawu bolkkime ngarrihni. Ngarridjare ngudda bu werkwerrk kankongibun ngadberre, dja bolkkime ngarriwernhkgawarre duninj.

⁹ O God nawu kanngehke, ngundidjawan kanbidyikarmen bolkkime ba bu birriwern bininj ngundingeyburlume. Kanbebkemen kore kunyidkenh, dja mak kanmarnebengmidjda kore ngudda kungey dorreng.

¹⁰ Dja bu burryak, wanjh bininj nawu kubolkbubuyikabeh wardi kabirriyime, "Ngayh! Nakka God bedberre wanjh baleh wam?" Mah, ngarridjare ngundikurdunan bu yibenbun bininj nawu kubolkbubuyikabeh nawu bindikurlbayakwong bininj nawu ngundimarnedurrkmirri.

¹¹ Yibenbekkabekka bininj nawu kabirribongdi bu kabirridjalkayhme kunnjilngwarre dorreng. Nawu birriwarre bininj bindiwarrewam dja kaluk kabindibun kabindikukkurrme, wanjh yibennghekemen kundulkarre ke dorreng.

¹² Ngudda nawu yiwohrnan rowk, birrimekbe bininj ngundiwirrihmeng bu kunwarre ngundimarneyimeng, wanjh ngarridjare ngudda yibenbun wernkih duninj bu kunmekbekenh.

¹³ Wanjh ngad nawu bininj ke, yiman kanmirndenahnan yiman kayime sheep kore kurralkmak ke, wanjh ngundidjalmanjbun munguyh munguyh. Dja nawu mawahmawah ngadberre, dja bedmanwali bu kabindikemawahme warridj, wanjh ngundidjalburlume warridj munguyh munguyh.

80

Karridjawan God Bu Kanngehke Kadberre.

Psalm 80

¹ God, ngudda kannahnan ngad nawu Israel ngankebmawahmeng yiman shepherd kamirndenahnan sheep nuye. Bolkkime wanjh kanbekkabekkan kore ngarridi yiwarrudj! Ngudda nawu kankan ngad nawu Joseph ngankebmawahmeng, wanjh kanbekkabekka. Ngudda nawu yiyerrkan kore throne kubulkayh kore nawu cherubim ke, wanjh ngarridjare kanmarnekukbukkarren ngudda ke kunwernhmakkaykenh dorreng.

² Ngad bininj nawu namud bedberre Ephraim, dja mak Benjamin dja mak Manasseh wanjh ngundidjawan bu ngudda yimray kanngehkemen ngadberre rowk ba bu ngundikurdunan kore yikurduyime ngudda ke kundulkarre duninj.

³ O God kanyawoyhmarnbu ngadberre. Yinjilngmakmen ngadberre ba bu kanngehke.

⁴ Ngudda Yawey nawu God, yibenkarrme yiman soldiers birridjalwern kore heaven. Yiddok munguyh kandjaldung ngad nawu ngudda ke bininj? Yiddok djal munguyh minj kanbekkan kore ngarridi yiwarrudj?

⁵ Ngudda kannjilngwarrewong dja kanmarnbom ngarridjalnalkbuni kunkimukkenh.

⁶ Birribuyika bininj nawu kubolkbubuyikabeh wanjh ngandiwidnan dja ngandimarnekarrremarnbun ngadberre. Bedda wanjh ngandidjaldjekmion.

⁷ Ngudda God nawu yibenkarrme birriwern soldiers kore heaven, wanjh kanyawoyhmarnbu! Yinjilngmakmen ngadberre ba bu kanngehke.

⁸ Bu kunkare ngudda yimkang manrakel kore Egyptbeh. Yibenburriweng birriwern bininj dja yibenbolkmey bedberre, dja yirrudji mahni manrakel.

⁹ Yibolkbirrhmeng kore yirrudji, dja kolhdewernmerrinj, djordminj, wanjh warlahminj bu bolkbarkeng kumekbe.

¹⁰ Wanjh manrakel warlahminj dja wernhkimukminj, wanjh bolkdjurlewong kore kuwarddekimuk. Mahni manrakel wanjh kuyengmeng warridj dja yurhkweng rowk kundulkbuyika manbu cedars.

¹¹ Kaluk manyende ngarre warlahminj dja bolkmey kore kurrula manbu Mediterranean, dja mak mankolhdebuyika ngarre wanjh kolhdebebmene kore darnkih mankabokimuk Euphrates.

¹² Dja bolkkime njalekenh ngudda yibakkeng manbu kawarnamyong ngarre manrakel ke, dja yibenbawong bininj birriwern kabirringime dja kabirridjalmang manbarnem manbu grapes ngarre?

¹³ Warridj bikkibik nabang kore kuberrk wanjh kabirribakkabakke mahni manrakel, dja mayh nawu kelebuk warridj kabirringun dja kabirriyakwon manbu grapes ngarre.

14 Mah, wanjh yimdurnden kore ngad, ngudda God nawu yibenkarrme birriwern soldiers kore heaven! Kandina kore yihni heaven dja yinan njale nganmarnekurduyimerran. Yinahna maninjmanu manrakel!

15 Ngudda wanjh yirrudji kubidkukun ke mahni manrakel. Ngudda yidjordmiweng kore yingan yidjareni yiman kayime yidjordmiweng nabeywurd ke.

16 Bolkkime nawu bininj birridadjkeng maninjmanu manrakel dja birriburriweng kore kunak. Ngudda wanjh yiyiddung bedberre dja yibennan ba bu kabirridjalyakmen.

17 Ngudda kanmarnedjare ngadberre, ngad nawu ngarrihni kore kubidkukun ke. Wanjh kanmurrnggrayekwo. Ngudda kandjarrngbom dja kandjordmiweng ngad nawu bebeywurd ke.

18 Bu kuhni yikurduyime wanjh minj ngundiyawoyhbodmewon bu ngundibawon ngudda. Kanyawoyhmimbiwon dja munguyh ngundidjalngeykayhme.

19 Ngudda Yawey, ngudda God nawu yibenkarrme birriwern soldiers kore heaven, wanjh kanyawoyhmarnbu! Yinjilngmakmen ngadberre ba bu kanngheke.

81

Bu Nawu Kawohrnan Rowk Kanbengdayhke Ngad Nuye Bininj.

Psalms 81

1 Karriwayinin wernkih duninh nuye God nawu kanwon kunngudj. Kariikayhmen kunwernhnjilngmak dorreng bu karriburlume nawu Jacob nuye God!

2 Mah, karriwayinin bu ngurridirri manmak music kore guitar dja njalehnjale karribun.

3 Bu mulil kariikarrme manbu dirdkenh kakerrngehmen, dja mak bu bokurlurikenh karrimulilmang, wanjh karribuhmen nawu kunkanem ba kawokdi wernkih.

4 Kuhni bu Jacob nuye God nakka kanbengdayhkeng dja karremarnbom kadberre nawu Israel kankebmawahmeng.

5 Nungka wanjh benmarnekurrmeng maninjmanu mankarre bedberre nawu Joseph nuye namud, bu nungka benbom soldiers nawu birrikang Egypt. Bu kunmekbe wanjh karriwokbekkang Yawey bu wokdanginj dja minj karrikommelkburrbuyi.

6 Wanjh nawu Yawey yimeng, "Ngaye wanjh ngehke kore ngurringor-rkani manbu mandulmuk dja kore ngurrikanahkang mandulmuk basket kabarlmiyindi.

7 Ngudda wanjh ngurrikayhmeng kore ngurrinjilngwarreni, dja ngaye bebkeng ngudberre. Ngaye wanjh wokmey ngudberre dja ngaye ngawar-lkkayini kore kunngol, namarrkon dorreng. Kaluk yerre wanjh ngaye rohrokmeng ngudberre kore kabolkngeyyo Meribah."

8 "Mah, wanjh kandiwernehbekka nawu ngardduk bininj, dja beng-dayhke ngudberre kunrayek dorreng. Ngaye yawoyhdjawan bu kandibekkabekkan, ngudda nawu Israel ngunkebmawahmeng.

9 Yuwn bu ngurrimang nabubuyika gods nawu birridjenbuyika bininj birrimarnbom. Yuwn bu ngurrbenmarnebodan nahni nawu gods nawarre.

¹⁰ Ngaye wanjh Yawey nawu God ngudberre. Ngaye wanjh bebkeng ngudberre kore Egyptbeh ngurribongdi. Mah, wanjh bolkkime ngurridan-gbarren ba won ngudberre manme.”

¹¹ “Dja bonj, bininj ngardduk, nawu Israel benkebmawahmeng, minj ngandiwokbekkayinj, dja minj mak ngandiwokmarrkmayi.

¹² Wanjh kunmekbekenh ngaye ngabenbawong ba birrikurduyimeninj kunwarre kore bedman birridjareni kanjdji kore birrikangerayekni.”

¹³ “Aba, kawarre! Ngadjare bininj ngardduk bu ngandiwokbekkan dja ngandimunkekadjung kore ngabenbukkan manbolhmak ngardduk!

¹⁴ Bu kuhni wanjh werrkwerrk duninj ngaye ngabengurdke bininj nawu birriyidko bedberre. Ngaye wanjh ngabidyirriyongen kubid ngard-duk dja ngabenbularrbun bininj nawu kabindiwirrihme ngardduk bininj.

¹⁵ Bininj nawu ngandiwirrihme ngaye nawu Yawey, wanjh kaluk ngandimarnekelemen. Kaluk ngabendjalbun bu munguyh munguyh.

¹⁶ Dja ngudda nawu ngardduk bininj, bu kandiwokbekkan wanjh ngaye worrkmiwon ngudberre manmimmak manbu wheat, dja mak mankung manmanjmak manbu bod kabirrimarnbun.”

82

God Nawu Kawohrnan Rowk.

Psalms 82

¹ Nawu God Duninj Kawohrnan kore nawu birriyahwuyahwurd gods kore kabirrimirndemornnamerren. Nungka wanjh kabendjadme bedberre.

² Nungka kabendjawan, “Njalekenh ngudda minj mandjad bu ngur-rbendjadme nawu birriwarre bininj? Dja ngurrbenbidyikarme bininj nawu kabirrikurduyime kunwarre?”

³ Wanjh ngaleng ngurrbenbidyikarme nawu birriyahwurd dja nawu birrikornkumoyak bu bininj birriwarre kabindiwarrewon. Dja mak ngurrbennahna bininj nawu birrimarladj, dja nawu birribuyika bininj kabindibongkarme kore kunwarrekenh.

⁴ Mak ngurrbengehkemen nawu birringudjwarre dja nawu minj birrikuken bininj. Ngurrbenbebke kore birriwarre bininj kabindibongkar-me.”

⁵ God yimeng, “Nahni nawu gods birriyahwurd, wanjh minj njale kabirriwernhburrhun! Minj kabirriborlhme njalehnjale. Kabirrire balehbaleh dja bedda yiman birrimimbunje. Kawarre! Dja wanjh kurorre rowk kabolkrokarakokan bu kunwarrekenh ngudberre.”

⁶ Wanjh God benmarneyimeng, “Ngaye marneyimeng, ‘Ngudda wanjh gods rerrih. God nawu Nakimuk Duninj ngunbornang ngudberre,

⁷ dja bonj, ngurribaldowe yiman bininj duninj kabirridjaldowe rowk. Ngudda ngurriyawoyyahwurdmen, yiman kayime kings rowk.’ ”

⁸ O God, ngadjare ngudda yirrolkan dja yibendjadme birriwarlahkenh bininj rowk kore kurorre. Kaluk ngudda yidjalkudji wanjh yiben-marnewohrnan rowk.

83

Karriджawan Galeng Bu Kabendjalburriwe Nawu Birriwarre Bininj.

Psalms 83

1 O God, yuwn bu yidjalwoyak. Dja yuwn bu yingurdme dja mak yidjaldi bu minj yibidrokane.

2 Yina! Nawu ngurriyidko bininj wanjh ngundiwoke dja ngundiwdung. Bedda nawu ngundiwirrihme wanjh kabirrikimukworren ba bu ngundiuyurrhke.

3 Bedda wanjh ngandikowe ngad nawu bininj ke, dja ngandimarnekaremarbnun kunwarrekenh. Bedda kabirriwokmarnburren bu ngandibun ngad bininj nawu ngudda kandjalmarnedjare.

4 Bedda kabirriyimerren, "Mah, karrbenbularrbun nahni bininj rowk nawu Israel benkebmawahmeng. Kab karringybularrbun Israel nuye kunngey ba bu minj nangale mak kangeyburrbun."

5 Bedda kabirrimayalikudjihmen kore kunwarrekenh. Kabirribidyikarrmerren bu kabirrimre ngundibun ngudda.

6 Bedda nawu Lot benkebmawahmeng, dja birriraworrij bininj kore Edombeh, dja mak nawu Ishmael benkebmawahmeng, dja mak bininj nawu birrikang kunbolk Moab, dja mak bininj nawu Hagar benkebmawahmeng.

7 Bininj warridj nawu birrikang kubolkbubuyika Gebal, dja mak Ammon dja mak Amalek, dja mak Philistia dja mak Tyre.

8 Bininj nawu birrikang kunbolk Assyria wanjh birriraworrij warridj. Bedda nawu Assyriabeh wanjh birringudjbang, dja kabindibidyikarrme nawu Lot nuye mawahmawah. Wanjh birriraworrij rowk.

9-10 Mah, wanjh yibenmarnekurduyimen karohrok bu kunkare yikurdyimeng bedberre bininj nawu birrikang Midian. Yibenbenebom nawu Sisera dja Jabin kore kunbolk Endor, darnkih mankabo Kishon. Nahni bokenh wanjh benekuknudminj kore kurorre.

11 Yibenbu warridj nawu birrikimuk bedberre bininj kore nawu ngundiwirrihme. Yikurdyimen karohrok kore yibenbom bininj nawu birrikang Midian bu yibenbenebom Oreb dja Zeeb nawu benekimuk bininj, dja mak yibenbenebom nawu Zebah dja Zalmunna, nawu bindimarnewohnani bininj kore Midian.

12 Bedda wanjh birriyiming, "Mah, karrire karribolkmgang kubolkmak nuye God."

13 Ngudda nawu God ngardduk, ngadjare yibenkukburriwe yiman kunmayorrk kawekundjulng. Yibenkukburriwemen yiman kundalk manbu darlehminj bu kunmayorrk kawek.

14 Yibenkadju yiman kayime manwurk kare dja kangun kundulk rowk kore karrulkmirnderri, dja kadjalung kore kunwarddekimuk dorreng.

15 Yibenkelekadju bu yibenmarnemunkewe kunmayorrk kimuk dorreng, dja yibenkelehen bu namarrkon yibenmarnewe.

16 Yibenmarnbu ba bu kabirriyemengalme, dja ngundibalngeyyawan ngudda nawu Yawey.

17 Nahni birriwarre bininj wanjh ngadjare munguyh kabirridjalyemengalme dja kabirridjalkele duninj. Yibenmarnbu bu bedda kabirridjalyakmen bu kunyeme dorreng.

18 Ngudda yibenbukkan bu ngudda yidjalkudji nawu yingeyyo Yawey dja ngudda yidjalkudji yiwernhkimuk duninj dja yiwohnawohnan rowk kore kubolkwarlahkenh kondah kurorre.

84

Bu God Kabinjilngmarnbun Nawu Namak Bininj.

Psalm 84

¹ O Yawey, ngudda nawu yibenmirndekarrme soldiers birridjalwern, wanjh ngaye ngabolkburlume kore ngudda yihyo, wanjh kubolkmakkaykenh!

² Ngadjare wernkih duninjh bu ngangime Temple manbu manurrkdjamun ke, ngudda nawu Yawey. Ngadjaldjare kukange dorreng ngardduk, dja wardi ngarrown bu minj ngare kumekbe. Ngaye ngawayini kunburrk dja kukange ngardduk dorreng kore God nawu kahdaldarrkid munguyh munguyh. Ngadjalwayini nuye, kunnjilngmak dorreng.

³ Nganan mayh kahyo kore ngudda, dja karedmarnburren yawyaw ngarre bu kayawdjordmekenh. Kumekbe darnkih kore ngudda ke altar, ngudda Yawey nawu yibenmirndekarrme birriwern soldiers. Ngudda wanjh king ngardduk dja mak God duninjh ngardduk.

⁴ Bininj nawu kabirriyo kore ngudda ke kunurrk wanjh kabirridjalnjilngmak, dja bedda ngundimarnewayini bu ngundidjalburluburlume ke munguyh munguyh.

⁵ Bininj nawu yibemurngrayekwon wanjh kabirrinjilngmak. Bedda wanjh kabirridjare kabirrire djarreh ba bu ngundinan kore kukadje Zion.

⁶ Bu kabirribarrarnmang kore kabolkngeyyo Baca, wanjh kabirribolkmarnbun kabolkmakmen, kunngad kunwern dorreng. Bu kudjewk kunyungkih kamre, wanjh manlabbarl manwern kabarmiyindan kumekbe.

⁷ Birrimekbe bininj kabirringudjwernmerren kore kabirridjalle, kaluk kabirribebme kore Zion, dja kabirribebbehbemerren kore kumirrk nuye God.

⁸ O Yawey God, ngudda nawu yibenmirndekarrme birridjalwern soldiers, wanjh kanbekka kore ngahdi yiwarrudj ke. Ngudda nawu Jacob nuye God, kanbekka!

⁹ O God, yinahna ngadberre king nawu ngannahnan ngadberre. Yidjalmarnekurduyimen kunmak namekbe king nawu yingan yidjarrngbom dja yikodjdjuhkeng.

¹⁰ Ngaye ngadjare ngarri kore ngudda Temple manbu manurrkdjamun ke. Wanjh kubolkmakkaykenh, dja kubolkbubuyika wanjh minj ngadjare ngarri. O God ngardduk, ngawarnyak bu ngayo kururrkmak bedberre nawu birriwarre bininj, dja wardi kamak bu ngamre darnkih kuberrkkah kururkdangmaye kore ngudda ke kunred?

¹¹ Nawu Yawey God, wanjh nungka yiman kayime kundung dja nawu kannahnan ngad bininj. Yawey kabenwon namakmak bininj birrimak, dja kabenngeykimukwon. Minj mak kabenkaybun bininj nawu minj kabirridjalkurduyime kunwarre, dja mak kabenwon kunmakmak rowk.

¹² Ngudda Yawey nawu Yibenmirndekarrme birriwern soldiers! Bininj nawu ngundjalwoybukwon wanjh nakka kawernjilngmak duninjh.

85

Bu Nawu Yawey Kanmarnebengmidjan Kunwarre Kadberre.

Psalm 85

¹ Yawey ngudda kunkare kankongibom ngad nawu ngarrihni kore ke kunbol. Mak ngudda kanmarnbom ngad nawu mawahmawah Jacob nuye bu ngarriyawoyhyimerranj ngarrikuken.

² Ngudda kanmarnebengmidjdanj kunwarre ngadberre nawu ngudda ke bininj. Ngudda kanmarnebarrkbom kunwarre ngadberre.

³ Ngudda yiyiddungi ngadberre, dja yimayaliborledkerrinj wanjh minj yibenbuyi. Ngudda yikangeboredkerrinj kore kunyid kunwern yikarrmi.

⁴ O God, ngudda nawu kannghehke, wanjh kanyawoyhmarnbu! Yiyawoyhbawo kore kanmarneyiddung kadberre.

⁵ Yiddok kandung ngadberre bu munguyh munguyh? Yiddok yibendjal-dung munguyh nawu wurdwurd dja mak nawu ngarrbenmawahme?

⁶ Yiddok yidjare kanyawoyhngheke ngad bininj ke, ba bu ngundimar-nenjinlgmarrmarr?

⁷ O Yawey, kandjalmarnedjare munguyh munguyh dja kannghekemen kadberre!

⁸ Mah, wanjh ngaye ngawokbekkabekkan kore Yawey nawu God kawokdi. Nungka kanmarnewokkurrmerrinj ngad nuye bininj, bu kanwon kunmodmikenh nuye. Dja yimeng bu karridurnderren kore kunwarre karrikurduyimi, yiman bu karribengwarrmen, wanjh kawarre!

⁹ Woybukkih, bininj nawu kabirrimarnekele nawu Yawey, wanjh nungka kamre darnkih dja kabenggehke. Bu kuhni kakurduyime wanjh karriburluburlume nuye kunmakmak duninj kore kondah kubolk kadberre.

¹⁰ Nawu Yawey kandjalmarnedjare munguyh, dja nakka nadjalwoybuk nawu munguyh kadjalkurduyime kore kayingkihwokkurrmerren kadberre. Nungka wanjh kunmak kadjalkurduyime, dja warridj kanwon nuye kunmodmikenh.

¹¹ Ngad nawu kurorre karrihni, wanjh munguyh karriwoybukwon nungka nawu kannahnan kore kaddum heavenbeh, bu kanmarneyime bu ngad karrimak bininj kore nuye.

¹² Wanjh woybukkih, nawu Yawey kanwon nuye manbu djal kunmakkenh, wanjh manme kanmarnewernmerren kore kunbolck kadberre.

¹³ Nungka kayingkihbolhmarnburren kore kunmakkenh nuye, dja nungka yerreh kamre.

86

Bu Ngadjawan Nawu Yawey Bu Nganbidyikarmekenh.

Psalm 86

¹ O Yawey kanbekkabekka dja kanwokma! Ngaye wanjh ngangudjwarre dja minj ngabidyikarmmerren.

² Kandarrkidnahna dja ngaye wanjh marnedjare ngudda. Ngudda wanjh God ngardduk dja ngaye marnedurrkmirri dja mak ngakangekurrmerrinj kore ngudda. Wanjh kannghekemen.

³ Kankongibu Yawey, dja ngaye wanjh ngadjalkayhme bu djawadjawan bu kunbarnangarrakuyeng.

⁴ Ngaye ngahdi yiwarrudj kukange dorreng ngardduk, wanjh kannjinlgmarnbu ngudda nawu Yiwohrnan Rowk.

⁵ Ngudda nawu Yiwohrnan Rowk, yibenmarnebengmidjdan bininj dja ngudda yidjalmak. Dja yibendjalmarnedjare bulkkidj duninj bininj rowk nawu ngundikayhme.

⁶ Wanjh kanbekkabekka bu ngaye ngahdi yiwarrudj kore ngudda nawu Yawey. Ngaye djawadjawan bu kankongibunkenh.

⁷ Bu kunyid kambembe ngardduk, wanjh kumekbe werkkwerkk ngakayhme ke dja ngudda wanjh kanwokmang.

⁸ Ngudda nawu Yiwohrnan Rowk dja minj nabuyika god yiman ngudda ngunerohrok. Minj nangale nabuyika god kakurduyime kunwern yiman ngudda.

⁹ Ngudda yibenbebbehmarnbom bininj rowk kore kubolkbubuyika kabirribebbehni, wanjh kaluk bedda kabirrimre ngundimarneboddan kore kumirrk ke, ngudda nawu Yiwohrnan Rowk, dja ngundingeyburlume.

¹⁰ Ngudda yidjalkimuk duninjh dja yikurduyime kunwern wanjh kunu ngarrikangebarrhme. Ngudda wanjh yidjalkudji God duninjh.

¹¹ O Yawey, ngadjare kanbukkabukkan kore manbolh ke ba bu ngare kumekke kunwoybuk ke dorrengh. Kankangedjirridjbu ba bu ngaye ngakelemen ngudda ke kunngey.

¹² Ngaye wanjh burluburlume ke kukange dorrengh, ngudda God ngardduk nawu Yiwohrnan Rowk. Ngaye wanjh ngeyburluburlume ngudda ke kunngey munguyh.

¹³ Ngudda wanjh kanmarnedjare ngardduk bulkkidj duninjh, dja kanmalngbebkeng kore kundowiken.*

¹⁴ O God, bininj nawu kabirriburlumerren kabirridjare ngandibun bolkkime. Nakka birribang bininj dja kabirrimirndemornnamerren ba bu ngandibun ngarrowen. Bedda minj ngundiburrbun ngudda nawu God.

¹⁵ Dja ngaburrbun bu ngudda nawu Yiwohrnan Rowk wanjh yimkongiwn duninjh, dja kankongibun munguyh. Ngudda minj werkwerrk kandung, dja kandjalmadbun. Ngudda kandjalmarnedjare dja minj mak kanbawon.

¹⁶ Mah, wanjh kanna ngardduk dja kankongibu. Kanwon kundulkarre ba ngangudjbangmen. Kanngehkemen ngaye dja ngalbu nganyawmey wanjh ngunmarnedurrkimirri.

¹⁷ Kanbukkabukkan kunmakkenh ke bu nawu ngarriyidko bininj bu ngannan wanjh kabirriyemengalme. O Yawey, ngudda munguyh kanbidiyikarme dja kannjilngmarnbun.

87

Bu Karribolkburlume Kukadje Jerusalem.

Psalms 87

¹ God nawu Yawey marnbom nuye kunredkimuk kore kaddum kuwarddekimuk manbu kubolkdjamun nuye.

² Yawey kadjare kahyo kore Zion, dja yuwn bu mak kunbolk kunbubuyika bedberre bininj nawu Jacob benmawahmeng.

³ Bininj nawu birrikang kubolkbubuyika rowk wanjh kabirribolkburlume kunbolk kunkimuk Zion, God nuye kunredkimuk.

⁴ God kabenyolyolme bininj bu kayime, "Ngaye ngabenbekkan bininj nawu ngandingeyburlume ngaye nawu birrikang Rahab ngalengngarre kunred, dja kore Babylonbeh, dja nawu birrikang Philistia, dja mak bininj nawu birrikang kunred bokenh Tyre dja Cush. Wanjh ngayime nahni wurdyaw, 'Namekbe wurdyaw wanjh nungka danginj kore Zion.'"

⁵ Dja woybukkij duninjh bininj kabindimarneyolyolme bininj nawu birrikang Zion, bu kabirriyime, "Birrimekbe bininj wanjh birridanginj ngalengngarre kunbolk Zion. God nawu Nadjalwernhkimuk duninjh wanjh kabolknahan munguyh."

^{86:9} Revelation 15:4

*

^{86:13} "kore kumidj kanjdji" kayime kore Hebrew kunwok, "kore Sheolbeh".

⁶ Nungan Yawey kakarrme djurra kore kabirringeydi binihbininj rowk, wanjh kabimarnengeybimbun bininj nawu danginj kore Zion, wanjh kabimbun, "Nanihnjanu bininj wanjh danginj kore Zion."

⁷ Dja nawu kabirridirri music, wanjh kabirriwayini bu kabirriyime, "Ngudda Zion yidjalkudji kanwonowon kundjalmak rowk kore kungad ke!"

88

Bu Karrikayhme God Kore Kumirrk Nuye.

Psalm 88

¹ Ngudda Yawey, nawu God ngardduk, ngudda nawu kannghekkeng, ngaye ngadjalnalkbun kunbarnangarrakuyeng. Dja bu kukakkuyeng warridj ngaye ngakayhme kore kumirrk ke.

² Ngadjare kanbekkan kore ngahdi yiwarrudj. Kanbekkabekkan bu ngakayhme.

³ Ngakangewarre duninj dja kunyid wernmerrinj ngardduk. Ngaye wanjh darnkih ngarrowen.

⁴ Ngaye wanjh darnkih bu ngandidudjeng kore kumidj, dja ngadjalnagdudjwarreminj.

⁵ Bininj ngandibawong yiman kayime kabirridjalkukbawon nawu birridowerrinj bininj. Ngaye ngayime yiman kayime bininj ngandibom dja ngadjalkukyo kore kumidj. Wardi minj kanburrbun dja ngahdi djarreh dja minj ngudda kannahnan.

⁶ Ngudda kankoluyhweng kanjdji duninj kore kubolkmunun.

⁷ Dja mak kandjaldung, wanjh ngaye ngakangewarre duninj. Ngaye ngabekkarren bu yiman ngudda kankukberelhmeng.

⁸ Yibenmarnbom nawu djawirna duninj ngardduk bu ngandidjalwarnyakminj, dja kabirriyime ngaye ngakukwarre. Minj baleh ngare bu ngakelerlobme, ngadjalbongdi kore ngudda.

⁹ Warridj ngamimwarreminj bu kunyidkenh ngakarrme.

Aba Yawey, ngaye wanjh ngakayhme ke bu djawadjawan kunbarnangarrawern. Ngaye ngaberlwayhme kore kumirrk ke.

¹⁰ Dja bonj, yiddok yibenmarnekukbukkarren bininj nawu birridowerrinj ba ngurrikangebarrhke? Yiddok kabirriyawayhdolkkan bu ngundiburlume?

¹¹ Bininj nawu kumidj kabirrikukyo, yiddok ngundiwobekkan bu ngudda yibenmarnedjare bininj? Yiddok bininj ngundimulewan bu ngudda yidjalwoybuk duninj bu kabirrihni kumekbe kore kabirrikuknudmen rowk?

¹² Yiddok bininj nawu kabirridi kore kumunun duninj ngundikurdunan bu ngudda yikurduyime kundulkarre dorrengh ke? Yiddok kabirriburrbun kore ngudda yidjalkurduyime kundjalmak duninj, dja bedda wanjh kabirriyo kore kabirrimayaliyakmen?

¹³ Bonj, wanjh ngaye ngakayhme ke ngudda Yawey. Bu kunbarnangarra rowk wanjh ngahdi yiwarrudj kore kumirrk ke.

¹⁴ Dja njalekenh ngudda kanwarreweng ngarrduk, dja njalekenh ngudda kanmarnekebborledmeng?

¹⁵ Bu ngaye ngayawurrinjni dja bolkkime ngaye ngakarrmi kunyid kunwern, dja ngaye munguyh darnkih ngarrowen. Ngudda wanjh kankelehmeng. Ngaye ngakangewarreni dja minj mak ngaye ngabidyikarmerren.

16 Ngudda kandung kunkimuk, dja munguyh kanwernhkangewarrewong dja minj baleh ngayime.

17 Ngudda kandung yiman kukku kanngahke, wanjh ngadjalyibme kanjdji.

18 Ngudda yibenmarnbom ngardduk djawirna duninj bu ngandidjalbawong, mak yibenkang bininj nawu ngandimarnedjareminj. Ngaye yiman ngadjalkarrme kumunun duninj.

89

Bu Karrimarnewayini Yawey Nawu Kandjalmarnedjare Munguyh.

Psalm 89:1-18

1 Ngawayini bu ngaburluburlume Yawey nawu kanmarnedjare munguyh munguyh. Ngabengdayhke birridjalwern bininj nawu kohbakhohbanj dja mak nawu birringudjbang ba bu bedda ngundiburrbun ngudda Yawey nawu yidjalwoybuk dja minj kanbawon.

2 Ngaye ngabenbengdayhke bu ngayime ngudda kanmarnedjare munguyh munguyh. Ngudda wanjh kandjalmarnedjare kore yihdjaldi kaddum heaven manbu minj kayakmen.

3 Ngudda ziyolyolmerrinj bu yiyimeng, "Ngaye ngawokkurmerrinj bu ngaberrebbom David, nawu ngaye ngadjarrngbom. Ngaye ngawokkurmerrinj nungka nawu kanmarnedurrkmirri.

4 Ngaye Yawey ngamarneyimeng, 'Ngaye won ngudda nawern bininj nawu yikebmawahme, ba bu bininj nawu yibenngyebun wanjh kings kabirriyimmerran munguyh munguyh.'" Kuhni yiyimeng.

5 Kore kaddum heaven rowk wanjh ngundiburlume bu yidjalkurduwern, ngudda Yawey. Dja nawu birridjalmak bininj bu kabirrimornameren, wanjh ngundiburlume ngudda bu ngurriyime yidjalwoybuk duninj.

6 Minj nangale nabuyika nakimuk kore heaven karohrok nawu Yawey. Minj nangale nawu kabirrihni kore heaven wanjh kabenerohrok nawu Yawey.

7 Birrimak bininj nawu kabirriwohrnawohrnan, wanjh kabirridjalmarnekele God. Nungka wanjh nawernhdulkarrekimuk dja kabenyurhke bedberre rowk.

8 Ngudda Yawey nawu God, wanjh ngudda yibenmirndekarme armies kore heaven! Nangale mak ngunerohrok? Ngudda Yawey wanjh yingudkimuk duninj, dja ngarriburrbun ngudda wanjh yidjalwoybuk munguyh munguyh.

9 Ngudda yiwohrnan rowk kore kurrula manbu kaborokayhme dja kabobidbidun. Bu kumayorrk kabowayhme kore kurrula, wanjh ngudda yingurdke rowk.

10 Ngalbu Rahab wanjh mayh ngalbang dja ngalkimuk duninj, wanjh yidjalkukberelmeng bu doweng. Mak ngudda yibenyarlarangkeng nawu ngurriyidko bininj kundulkarre dorrengh ke.

11 Kaddum rowk wanjh ngudda ke, dja mak kurorre rowk. Ngudda yibolkmarbom kurorre rowk dja yimarnbom yehyeng nawu kahdi kondah.

12 Ngudda yibolknameng kakbi dja mak walem. Manbu kuwarddekimuk Tabor dja Hermon, wanjh yiman kayime kabenewayini kunnjilngmak dorrengh bu ngundingeyburlume.

¹³ Ngudda yidjalkudji yirrulkarrekimuk duninj! Yidjalwernhgudjbang, dja kubidkukun ke wanjh kawinhme rowk kunngudj dorrengh.

¹⁴ Ngudda yidjalwohrnan rowk bu munguyh yibendjadme djal mandjad duninj, dja minj njale kunwarre yiyime munguyh. Ngad ngundiburrbun bu ngudda kandjalmarnedjare dja minj kankowe bu munguyh.

¹⁵ Bininj nawu ngundiborlhmeng dja wanjh ngundingeyburlume, wanjh birrinjilngmak duninj. Bedda wanjh ngurridjarrkre kore ngudda bu yibenmarnebolkwolkan, ngudda nawu Yawey.

¹⁶ Bedda ngundingeyburlume kunnjilngmak dorrengh bu kunbarnan-garrakuyeng. Mak kabirrimarrmarr bu ngundiburrbun ngudda yidjalkurduyime kore djal kunmakkenh.

¹⁷ Ngudda yibenngeykimukwon dja yibenwon ngudda ke kunngudj dorrengh nawu bininj ke. Ngudda yidjare bu kanmurrngrayekwon dja kanggeykimukwon ngadberre.

¹⁸ Woybukkih wanjh ngudda Yawey yidjarrngbom nahn king nawu kannahnan. Ngudda God nawu Nadjamun Duninj ngadberre nawu Israel kankebmawahmeng, wanjh kanwong nahn king ngadberre.

Bu God Bidjarrngbom Nawu King David.

Psalm 89:19-37

¹⁹ Yawey, ngudda kunkareni yiyolyolmeng bedberre nawu ngundiwoybukwoni, yiman kayime bu ngundiwaralnang dja ngundibekkanng bu ngudda yiyimeng. ‘Ngaye ngamurrngrayekwon nakudji bininj nawu nangudjbang soldier. Ngaye ngadjarrngbom nahn bininj kore ngudberre, dja ngangeykimukwong.

²⁰ Namekbe bininj kangeyyo David, nawu nganmarnedurrkmirri dja ngalkeng. Ngaye wanjh ngakodidjuhkgeng manbu mankalkkidmak mandjamun ngardduk.

²¹ Ngaye ngawernhkarrme kubid ngardduk, dja ngabidyikarrme kunberlwi ngardduk.

²² Minj nangale nawu kabiwirrihme wanjh kabibun bu kabimarnbun kakarremulewan. Minj mak birriwarre bininj kabirriyurrhke.

²³ Bininj nawu kabirriwirrihme, wanjh ngaye ngabenkukberelhme. Ngabenkukburriwe bininj nawu kabirriwidnan.

²⁴ Ngaye ngamarnedjare munguyh munguyh dja minj ngabawon, dja ngangeykimukwon nuye kore kunngey ngardduk.

²⁵ Ngakurrme ba kadjalwohrnan kore kurrula bu kunbidwi nuye, dja kawohrnan mak mankabo rowk kore kubidkukun nuye.

²⁶ Nungka wanjh kankayhme, dja kanmarneyime, ‘Ngudda wanjh Kornkumo ngardduk, dja God ngardduk, dja mak kannggehke ngardduk, yiman kayime manwarddekimuk kore ngawarlkkarren.’

²⁷ Dja warridj ngamarnbun kayimerran nadjaman duninj ngardduk, dja ngamarnbun king nawu kabenyurrhke birribuyika kings rowk kore kondah kurorre.

²⁸ Ngaye ngadjalmarnedjare munguyh munguyh. Manbu ngawokkurmerren nuye wanjh minj kawokyakmen.

²⁹ Ngabenmarnbun nuye mawahmawah bu kabirriyimerran kings nawu kabirriwohrnan munguyh, dja manbu kadjalle munguyh yiman kayime heaven.

³⁰ Bu David nuye bebeywurd kabirribawon mankarre ngardduk, dja minj kabirriwokmarrkmang manbu mankarre ngabenwon,

³¹ wardi bu minj ngandiwokebkan dja kabirriwokburriwe ngardduk, dja bu kabirribawon kunwok manbu ngabenmarnewokkurmeng,

³² wanjh gaye ngabenbun kundulk dorreng, ngabenwidjbihke kundjalkimuk.

³³ Dja bonj. Gaye minj ngaborledkerren bu ngadjalmarnedjare munguyh munguyh. Minj ngabawon kore ngadjalwoybuk kore nuye.

³⁴ Minj mak ngabawon kore gaye ngabenmarneyingkihwokkurmerrinj, dja minj mak ngawokborledkerren kore gaye ngawokdi bedberre.

³⁵ Gaye korroko ngawokkurmerrinj nuye nawu king David. Gaye wanjh ngadjalmak duninj dja minj ngakowe kore gayime nuye.

³⁶ Ngayimeng bu ngabenmarnbun bininj nawu nuye mawahmawah, wanjh kabirrire munguyh. Dja bedda kabirriwohrnan yiman David bu munguyh munguyh.

³⁷ Kabirridjalre yiman nawu dird kare munguyh, nawu gaye nganyolyolme kore kaddum." Kuhni rowk nawu Yawey yimeng.

Bu Birrinjilngwarreminj Kore Kunwarrekenh Bimarnekurduyimerranj Nawu King.

Psalm 89:38-45

³⁸ Aba, njalekenh ngudda Yawey yiwarnyakminj dja yidjalbawong nawu king ngadberre? Ngudda wanjh yikodjbaruy, dja njalekenh yiyiddung nuye?

³⁹ Ngudda wanjh yiwokburriweng kore yiwokkurmerrinj nuye, dja yidjalburriweng nawu kodjdjongbuyindi crown nuye kore kundjulng.

⁴⁰ Ngudda yibakkabakkeng kawarnamyo kore kured nuye, dja mak yirurrkbakkeng kururrkbubuyika nuye kore nungka kurmerrinj bu kabirriburrenkenh.

⁴¹ Birribuyika bininj kabirridjirdmang njalehnjale nuye, dja nawu birriredbo nuye wanjh kabirridjaldjekmiwon.

⁴² Njalekenh yibenbidyikarmeng nawu birriwirrihmi nahni nawu king? Yibennjilngmarnbom bedberre rowk nawu birriyidko nuye.

⁴³ Ngudda yiman kayime yidjurrhwarrewong mandjawakkimuk nuye, dja nawu birriwirrihmi wanjh yibenmarnbom birriwinhmeng dja nawu king ngudda ke yidjalbawong bu djalbarabom kore birriburri.

⁴⁴ Ngudda yingeywarrewong dja yibularrbom nawu kunmakmak nuye. Ngudda yiman yidjalburriweng chair kore yerrkang bu wohrnawohrnani.

⁴⁵ Ngudda wanjh yingudjyakwong nuye dja kabekkarren yiman bu djalkohbanjminj. Dja mak yimarnbom ba kayemengalme duninj.

Birrikayhmi Nawu Yawey Bu Benbidyikarmeng.

Psalm 89:46-52

⁴⁶ Adju, ngudda nawu Yawey, yiddok kandjalmarnewarlkarrren bu munguyh? Yiddok munguyh yidjaldung dja yikangewurlhme?

⁴⁷ Kanburrbun bu gaye djal bininj dja ngadjaldarrkiddi bu kundjald-edjumbung! Njalekenh bu ngudda kanmarnbom ngad bininj bu djal burudjang ngarridarrkiddi.

⁴⁸ Nangale bininj kahdjaldarrkid munguyh dja minj mak karrownen? Bonj, minj nangale bininj kangehkerren kore kumidjbeh.

⁴⁹ Ngudda nawu Yiwohrn Rowk! Yiddok yiwarnyakminj nawu David? Kunkare ngudda yimarnedjareni dja yimarnewokkurmerrinj nuye, yiddok yimayaliborledmeng?

⁵⁰ Ngudda nawu Yiwohrnan Rowk, kanburrbun ngaye nawu marnedur-
rkmirri ke. Yiwerhnburrbun bu birriwern nawu birridjenbuyika bininj
ngandidjekmiwon, dja ngandikangewarrewong ngardduk.

⁵¹ Bininj nawu ngundiwirrihme ngudda nawu Yawey, wanjh ngaye
warridj ngandidjekmiwong. Bedda wanjh munguyh ngandidjekmiwon
ngaye nawu kandjarrngbom dja kanmarnbom king kore baleh yarrka
ngare.

⁵² Bonj, wanjh karridjalburlumen Yawey munguyh munguyh! Amen dja
Amen!

90

Bu Moses Danginj Yiwarrudj.

Psalm 90

¹ Nawu Yiwohrnan, bu kerngeghkenhni duninj dja wanjh bolkkime
ngad ngarridi munguyh kore ngudda.

² Bu yerre kondah kurorre yibolkmarbom dja kunwarddekimuk
warridj yibebkeng, bu kerngeghkenhni duninj dja mak bu yerreyerre,
ngudda djal God nawu ngudda yidjalyingkihni mak yihdjalni munguyh
munguyh.

³ Bu bininj kabirridowen ngudda yibendurndiwe kore kunkulk kabir-
ridurndeng. Bu yiyime bedberre “Ngurridurnden kore kunkulk, ngudda
nawu djalbininj.”

⁴ Kore ngudda yinan nawu thousand mandjewk, ngudda yiyime
nakka djal kunbarnangarrakudji manbu ngokko wam, dja yiman kayime
kunkakkudji kare.

⁵ Ngudda yibenyakwon bininj yiman kayime kundjurrh kabenkukkan.
Bininj rowk yiman djal kundalk manbu kahkolhdebebebu bu kunkabel.

⁶ Bu kukabel kayimerran wanjh nakka kabirrikerngehme, dja bu
kumunun kayimerran wanjh kunukka yiman kayime kundalk karralkdar-
lehen dja wanjh kabirridowerren.

⁷ Wanjh bu yiyiddung ngadberre nawu bininj, kunukka wanjh kand-
jalyakwon. Bu yikangewurihme, nakka kanwerhkelehme ngadberre.

⁸ Dja yikurrmeng kunwarre ngadberre kore kumirrk ke, mak yinan
manbu manwarlkkaykenh kunwarre ngadberre manbu minj ngarrimule-
wan kurobbe yiman bu ngudda kankangewolkang.

⁹ Ngudda kandjaldung munguyh ngadberre bu nawern mandjewk
ngarriwe, yerre wanjh ngarribalburnbun. Ngarringolekwerren dja ngar-
ridowen.

¹⁰ Dja mandjewk nawu ngadberre bu ngarrimimbi nakka seventy,
dja bu yiman ngarribalmurrngrayek nakka kabalderrehme ngadberre
eighty. Wanjh kunmekbe kayime nawu mandjewk ngarriwingalme, Bu
mandjewk rowk ngadberre, wanjh ngarrialdurrkmirri wernkih duninj,
dja mak ngarriidjakkabekkan. Wanjh makka werkkwerkk kare, yerre
wanjh ngad ngarribalre.

¹¹ Minj nangale kawerhnburrbun bu kundulkarre dorrengh yiyiddung
kundulkarre ke dorrengh. Bu yiyiddung kunkimuk nakka kankelehme
ngadberre kunkimuk.

¹² Mah, wanjh kanbukkabukka ngadberre ba ngarriburrbun manbu
kunngolek ngadberre makka mandedjdjumbung, dja mak bu ngarri-
borlhme kunmayali ke kore kukange ngadberre

¹³ Ngudda Yawey, yimdurnden kore ngadberre bu munguyh. Baleh kabolkyime bu yimdurndeng? Yibenkongibu bininj nawu ngundimarnerdurrmirri.

¹⁴ Kanmarnedjaremen munguyh munguyh dja kankongibu yiman kankukbarlkemen bu kukabelbubuyika kayimerran munguyh. Wanjh kuhni bu ngundimarnenjinlgmak dja ngundimarnewayini munguyh munguyh kore ngarridarrrkiddi.

¹⁵ Dja wanjh kanwo kunnjinlgmak ngadberre ba kabularrbuyindan manbu kunnjinlgwarre bu kunkuyeng ngarrihkarrmi kerrngehkenh. Dja kannjinlgmarnbun kunkuyeng yiman bu ngad kunkuyengni ngarrinani djal kunwarrekenh.

¹⁶ Mak kanbukkan ngad nawu ngundimarnerdurrmirri kore kunmak ngudda yihkurduyime. Yibenbukkabukkan ngadberre wurdwurd dorrengh ba bu kabirrinan ngudda ke kundulkarre manbu kunwernhmakmak.

¹⁷ Ngudda Yawey, nawu God ngadberre kanmarnekurduyimen kunmak! Mak kanbidyikarmen ngadberre bu ngarriyakwon rowk kore ngarrikurduyime kunbidwi ngadberre. Dja kanmarnekurduyimen ba bu ngarriwernhmarnbun kunmak dorrengh kore kunbid ngadberre.

91

Yawey Nawu God Ngardduk Kannahan.

Psalm 91

¹ Bininj nawu kayo munguyh kore God nawu Nawernhkimuk Duninj kahbinahnan, wanjh kangehme kumekbe. God nawu Nawernhkimuk wanjh nungka yiman kabimarnedjurlewon namekbe bininj.

² Wanjh ngaye ngamarneyime Yawey, "Ngaye ngakelerlobme kore ngudda ba bu kannahan. Ngudda wanjh ngardduk God, dja ngaye ngakangekurmerren kore ngudda."

³ God nungka ngunbebke kore nawu kawarlkayindi ngunbungkardmang bu ngunbongkarrme. Dja mak ngunmarnbun kore kundjak kunkimuk ngunmang.

⁴ Nungka ngunkukbarrkbun yiman yerreh namarddol kayawbarrkbun maymayh yaw, kaluk ngunkurrme kore kanjdji kuwel nuye bu yiwarlkkayindi. Mak kunwoybuk nuye ngunkukbalhme dja ngandjurruddi kore nungka kayingkihwokkurmerren.

⁵ Wanjh yuwn bu yikelemen njalehnjale ngunmarnebebme bu kumun. Mak bu barnangarra kayimerran minj yikengeme manbu bunarra bu kabirriburriwe kore ngudda.

⁶ Bu kumununbubuyika, wanjh yuwn bu yikele bu kundjak kamre ngunmang. Mak yuwn bu yikelemen kore kunwarre kunkimuk bu kabebme kore kunbarnangarraburrk.

⁷ Bu ngurriburren yiman war, kunubewu kore kungurrird ke nakka one thousand bininj kabirridowen, mak kunubewu ten thousand bininj dja ngudda minj njale ngunbun. Ngudda wanjh kamak yihdi.

⁸ Wanjh yihdjaldi bu yibenhnan nawu birriwarre bininj kabirrihmankarren bu nungka God kayiddung bu kabenhbun bedberre.

⁹ Mah, bu ngudda ngurrikelerlobme dja ngurriyuwn kore nawu Kawohnan Rowk wanjh ngurridi munguyh kamak rowk kore ngunnahan. Nungka wanjh Yawey nawu Nadjalwernhkimuk duninj, dja ngaye ngankukbalhme dja nawu ngannahan.

¹⁰ Bu kuhni ngurrikurduyime, wanjh minj njale nawu nawarre kakurduyimerran ngudberre, mak nawu kundjak kunbang duninh minj kamdarnhderrehme kore kured ngurrihni.

¹¹ Nungka kabenwon kunwok kunrayek bedberre angels nuye bu ngunmulewan, ba bu ngundiwerhnahnahn kore baleh yarrkka ngurrire.

¹² Bedda wanjh ngundimang dja ngundiwayhke kaddum kore kubid bedberre, ba kunwardde minj ngunwohdengedong.

¹³ Mak ngurrbenkukmelme lion nawu mayh nabang duninh, dja nayin nabang duninh. Yidjalmelme dja yibenbun kurrenge ke.

¹⁴ Wanjh Yawey kayime, “Nanihnjanu bininj wanjh nganmarnedjare ngaye, nakka wanjh ngangehke. Ngamarnekukdjurruddin bininj nawu ngaye nganngeyburrbun.

¹⁵ Bu nungka ngankayhme, wanjh ngaye ngawokmang. Bu baleh yarrkka kunrayek kabebme bedberre, ngaye kunmekbe ngarrihdjarrkdi. Ngaye ngangehke dja mak ngangeykimukwon.

¹⁶ Kaluk ngabenngolekkuyenghme bu kunkuyeng kabirrihdarrkiddi. Dja mak ngabenbukkabukkan bu ngabengehkekenh.”

92

Kamak Bu Karrimanjbun Nawu Kawohrnan Rowk.

Psalm 92

¹ Kunukka kundjalmak bu ngundimanjbun ngudda nawu Yawey. Dja kamak bu ngundimarnewayini kore ngudda nawu yingeymakkaykenh, ngudda nawu God Yiwernhkimuk Duninh.

² Bu malamalaywibubuyika rowk, wanjh ngundimulewan bininj rowk bu ngudda munguyh kandjalmarnedjare, dja kumunun rowk wanjh ngundimulewan bininj rowk bu ngudda nawu minj munguyh kanbawon.

³ Ngarridirri manbu instrument kakarrme ten kunyarl, dja mak kore harp bu ngarrimarnbun manmakkenh music bu ngudda wanjh ngundimulewan.

⁴ Ngaye wanjh nganjilngmakmen kore nganan kore kunwern yikurduyime kundulkarre ke Yawey! Wanjh ngaye ngawayini kunnjilngmak dorrengh bu nganan kore ngudda yimarnmarnbun kore ngudda ke kubid.

⁵ O Yawey ngudda wanjh yikurduyime kundjalwern dja kunwernhkimuk duninh! Dja ngudda wanjh yidjalmayalidulmuk.

⁶ Nawu birribengwarr bininj minj ngundimayaliburrbun, dja nawu birriwarre bininj minj ngundimenmenbekkan kore ngudda yimayaliyime.

⁷ Bedda minj kabirrimenmenburrbun bu birriwarre bininj wanjh kabirridowerren yiman kundalk manbu kadjordmerren, dja bonj, kadal-lehmen, karrownen. Nawu birriwarre bininj kabirriwernmerren dja kabirrikurduyime kunwarre ba bu kabirrikukenworren, dja bonj, kaluk kabirridjalbularrbuyindan rowk.

⁸ Dja ngudda Yawey yidjaldi munguyh kaddum kore heaven, dja yidjalwohrnawohrnan rowk!

⁹ Woybukkih! Bininj nawu ngundiwidnan ngudda Yawey, wanjh kabirridowerren. Dja bininj nawu kunwarre kabirrikurduyime wanjh kabirriyarlarmerren.

¹⁰ Dja ngaye wanjh ngayime ngudda kanmurrngrayekwong ba ngan-gudjbangmen yiman kayime nabang bulikki. Ngudda kankodjdjuhkeng mankalckidmak dorreng.

¹¹ Ngaye wanjh ngabennang kunmim ngardduk nawu ngarriyidko bu birridjalmakang kore birribarabom. Dja kore kuncanem ngardduk wanjh ngabenbekkang birriwarre bininj nawu ngandibuyi bu bedda birrikelekayhmi.

¹² Dja nawu birrimak bininj, nakka kaluk kabirrikangebarlmiyindan kunmakmak nuye nawu Yawey. Kabirridjordmen yiman kayime kundulk-mak cedars kore kubolckkimuk Lebanon.

¹³ Nawu birrimak bininj yiman kayime kundulk nawu Yawey djabna-meng kore kuberrckah kunrurrk nuye, dja wanjh kabirridjaldi kamak rowk.

¹⁴ Nawu birrimak bininj bu kabirrikohbanjmen, wanjh bedda yiman kayime kundulk manbu kadjalkarme mandjolengmak bu munguyh. Bedda yiman kayime kundulk manbu ngudjbang dja kadjalkarme kun-malaworrmak.

¹⁵ Bedda wanjh kabirrimulewan bu kabirriyime, "Nawu Yawey, nakka djal mandjad duninjh kayime. Nungka minj kunwarre kayime munguyh munguyh. Dja ngakurrmerren kore nungka dja ngandjalnahan ba bu minj njale ngankilekme!"

93

Yawey Nawu God Wanjh King Duninjh.

Psalm 93

¹ Nawu Yawey kawohrnan rowk! Nungka king duninjh dja kad-jongbuyindi namakmak duninjh kunmadj nawu kingskenh. Nungka narrulkarrekimuk duninjh ba bu kabenbun rowk.

Nungka bolkmarnbom rowk kondah kurorre, dja minj nangale kabolckrokayhwe.

² Ngudda Yawey wanjh yidjalwohrnawohrnang rowk bu kerrngehkenh duninjh, dja mak munguyh munguyh.

³ Kurrula yiman kawayini kore ngudda Yawey. Kurrula yiman kakayhme wernkih duninj bu kayolyolme ngudda ke. Manbu kunmayorrk kunkimuk kabobun kurrula, dja kabomurrngrayekworren kore ngudda.

⁴ Ngudda Yawey wanjh yidjalwernhkimuk duninjh dja yiyurrhkeng kurrula nawu kawernmerren. Nawu kurrula kabobidbun, dja ngudda wanjh yidjalkimuk duninjh, dja yidjalyurrhke rowk. Yawey, wanjh ngudda yidjalngudjkimuk duninjh, dja yibenyurrhke rowk nawu heaven kabirrihni.

⁵ Yawey, ngudda yikarremarnbom mankarre duninjh manbu kadjaldi munguyh. Kore ngudda yihdi, wanjh kubolckdamun duninjh, dja kundjal-mak kahdi munguyh munguyh kore manrurckdamun ke.

94

God Kandjadme Ngad Karriwarlahkenh Bininj Rowk.

Psalm 94

¹ O Yawey, ngudda God nawu kandjadme dja kanbun ngad bininj. Ngudda nawu kandjadme bu djal mandjad duninjh, wanjh kanmarnekuk-bukkarren ba bu ngundinan kore yirrung duninjh.

² Ngudda nawu kandjadme ngad ngarriwarlahkenh bininj rowk kondah kore kurorre, wanjh yimray. Yibenbun bininj nawu kabirriburlumerren kore kunwarre kabirriyime.

³ Nahni nawu birriwarre bininj wanjh munguyh kabirridjalmarrmarr, dja kawarre! O Yawey, baleh kabolkyimerran bu ngudda yibenngurdke nawu birriwarre bininj? Yiddok kunkuyeng?

⁴ Bedda munguyh kabirriyolyolmerren bu kabirriburlumerren. Nawu birriwarre bininj kabirridjalkimukworren munguyh.

⁵ O Yawey bedda kabindibun nawu ngudda ke bininj. Bedda kabindiwarrewon nawu ngudda ke bininj.

⁶ Bedda wanjh kabindibun daluk ngalbu kamarrdjukun, dja mak nawu birridjenbuyika bininj. Bedda mak kabindibun dja kabindikukburriwe nawu birrimarlaj wurdwurd nawu birrikornkumoyak.

⁷ Birrimekbe birriwarre bininj kabirriyime, "Nawu Yawey minj kankurdunan! Nahni God nawu Jacob nuye, minj kaburrbun!"

⁸ Ngudda nawu ngardduk bininj, wanjh ngurrinaharrimen! Yikahwi ngudda ngurribengwarr! Ngudda nawu ngurrikodjikuluyak, wanjh ngurridjalmayalimarnburrimen!

⁹ God kanwong kuncanem kadberre, yiddok ngurriyime bu nungka minj njale kabekkan? Nungka kanwong kunmim, yiddok ngurriyime bu nungka minj kabolknan?

¹⁰ Ngurriburrbun bu Yawey kabenbun birribang bininj kore kubolk-bubuyika rowk, dja yiddok ngurriyime minj mak kanbun ngad bininj? Nungka wanjh kanbukkabukkan ngad bininj rowk ba bu njalenjale karriborlhme, yiddok ngudda ngurriyime bu nungka minj njale kaburrbun?

¹¹ Bonj, nawu Yawey kanmayaliburrbun, ngadberre ngad nawu djal bininj, dja nungka kayime bu ngad karrimayaliwarre.

¹² Ngudda Yawey, bu yirrunng nangale nawu bininj, dja bu yibengdayhke, wanjh nakka kanjilngmak, dja ngudda yibukkabukkan kore ngudda ke mankarre.

¹³ Nahni bininj bu kunyid kabimarnebebe me wanjh kadjalle kamak rowk kaluk bu nawu nawarre bininj kamankan kore kumidj bu kabimadbun!

¹⁴ Dja woybukkih nawu Yawey minj kabenbodmewon nawu nuye bininj rowk. Minj munguyh kabenbawon bininj nawu nungka bendjarrngbom.

¹⁵ Nungka wanjh kanyawoyhdjadme bu djal mandjad nuye, dja bininj nawu kabirridjaldjare kunmak, wanjh kabirridjaldjare manbu mandjad-kenh.

¹⁶ Adju! Nangale nganmarnebebe me bu kabengurdke nawu birriwarre bininj? Dja nangale kamre dja kanbidyikarme bu nawu birriwarre bininj ngandimarnebebe me?

¹⁷ Bu Yawey minj nganbidyikarmeninj, wanjh ngarrowimeninj, dja ngahdiwirrinj kore kundowikenh kore ngadjalwoyak bu munguyh.

¹⁸ Dja bonj, ngaye ngakayhmeng bu ngayimeng, "A! Ngarrengyirrebme!" Wanjh ngudda Yawey nawu kandjalmarnedjare dja kanwayhkeng ba minj ngamankayi.

¹⁹ Ngaye bu ngakangewarre wanjh ngudda kankangemurrnggrayekwon ba nganjilngmakmen.

²⁰ Ngudda minj yibenbidyikarme nawu birridjalwarre kings. Bedda nawu kunrayekkenh kabindimarnewohrnan bedberre bininj bu kabirrikarremarnbun mankarrewarre.

²¹ Bedda kabirriraworren bu kabindimarnekurduyime kunwarre bedberre nawu birridjalmak bininj, dja kabindiwarrewan kore court ba bu kabindibun.

²² Dja ngaye, wanjh nawu Yawey yimerranj kubolkmak ngardduk kore ngangehme. Ngaye ngakelerlobme kore God ngardduk ba nganbalhme, yiman bu ngawarlkkarren kore kuwarddekimuk.

²³ Nungka wanjh kabenkarremulewan kore bedberre kunwarre. Kabenbularrbun kore bedda kunwarre kabirriyime. Yawey nawu God kadberre wanjh kabenbularrbun.

95

Bu Karrimarneboddan Dja Karrimarrkmang Yawey Nawu Kawohrnan Rowk.

Psalms 95

¹ Mah, wanjh ngurrimray karriwayinin nuye nawu Yawey, dja karri-marnemarmarnin! Kab karrikayhmen bu karriburluburlume nungka nawu kangehke kadberre.

² Karrimirndemornnamerrimen kore kumirrk nuye bu karriwerhman-jbun, dja mak karriwayinin nuye dja karrimarnedirri music dorreng.

³ Kuhni karrikurduyime dja nungka nawu Yawey nakka djalwern-hulkarrekimuk dja nakimuk God duninj, dja mak king duninj nawu kabenyurrhke bedberre birribubuyika gods.

⁴ Nungka kakarime kubid nuye kanjdji duninj kore kondanjku-nukuror, mak manbu manwarddekuyeng kaddumkah, makka warridj nungka nuye.

⁵ Mak manbu kurrula, makka nuye rerrih, dja wanjh nungka marnbom. Dja mak nungka welengbolkmarnbom mahni kurorre kunbidwi nuye.

⁶ Mah, wanjh ngurrimray karrimarneboddan nuye Yawey dja kar-ridjalburluburlumen. Nungka kanmarnbom kadberre, wanjh karridjal-marnebarddurrulkurldan kore kumirrk nuye.

⁷ Nungka wanjh God kadberre, dja kannahnan ngad nuye bininj, yiman kayime shepherd kamirndenahnan mayh nawu sheep kore kubolkmak nuye.

Wanjh bolkkime ngurribekkabekka kore nungka kawokdi, kore kayime,

⁸ "Yuwn bu ngurrikangerayeworren dja kandibodmekenhwon yiman birriyimeng nawu mawahmawah ngudberre kore bolkngeyyoy Meribah dja Massah kore kubolkdarleh.

⁹ Kumekbe nawu mawahmawah ngudberre ngandirohrokmenng dja ngandiiddungi, dja kunukka birribengmidjdanj kore ngandikurdunani ngaye bu kunmak ngabenhmarnekurduyimi.

¹⁰ Wanjh kundjalkuyengkenh ngaye ngabenyiddungi bedberre bininj bu kudjewk forty, dja ngayimeng bedda minj birrimayalimak bininj, dja minj nganwokmarrkmayinj kore ngadjareni bu birrirawinj.

¹¹ Wanjh kumekbekenh kunu ngayidduy dja ngawokkurrmerrinj bu minj kabirringimen kore ngayekenh ba bu kabirringehme." [Exodus 17:7]

96

Karriwayinin Mankong Mankerrnge Kore Yawey.

Psalm 96

1 Ngudda ngurriwarlahkenh bininj rowk kore kubolkbubuyika rowk, wanjh ngurrimarnewayinin nawu Yawey. Ngurridjalwayinin manbu mankarrekerrnre nuye nawu Yawey.

2 Ngurriwayinin nawu Yawey, dja ngurringeyburluburlumen! Munguyh ngurrimulewa kunbarnangarra rowk bu nungka wanjh kannghehkeng!

3 Ngurrbenbengdayhke bininj birriwarlahkenh rowk, bu ngurriyime nakka nadjalmakkaykenh God. Ngurrbenmarneyimen bininj nawu birriwokbubuyika rowk, bu nungka wanjh kakurduyime kunwern kundjal-dulkarrekimuk dorrengh.

4 Kaluk nawu Yawey nakka wanjh nawernhkimuk dja nadjal-makkaykenh ba bu bininj kabirriburlume. Bininj rowk wanjh kabirri-marnekelemen wernkih duninjh nuye nawu God duninjh. Nungka wanjh kabenyurhke birrikilehkileh gods nabubuyika yerre.

5 Birribuyika gods nawu bininj birridjenbubuyika bindimarbnom, nakka djal idols manbu minj njale kakurduyime. Dja nawu Yawey naweleng wanjh marnbom kore karrinan kaddum rowk.

6 Nungka kahdi kore kubolkmakkaykenh, dja kakarme nadjal-makkaykenh rowk. Nungka wanjh narrulkarrekimuk duninjh dja mak nakukmakkayhkenh duninjh. Wanjh yehyeng rowk, dja mak bininj rowk kabirridjalmarneboddan nuye.

7 Ngudda bininj rowk nawu ngurrimudbubuyika ngurribolkbubuyik-abeh, wanjh ngurrimulewa bu nawu Yawey nadjalmakkaykenh duninjh, dja nawernhdulkarrekimuk.

8 Ngurriyimen bu nungka nawernhngyekimuk duninjh! Ngurriyika njalenjale bu ngurrimarnekerme bu ngurriwon bu ngurringimen kurrrk nuye.

9 Ngurrimarnebodda nawu Yawey bu ngurrire darnkih kore nuye nawu God duninjh namakkaykenh. Ngurriwarlahkenh bininj rowk kore kurorre, wanjh ngurrikukdeldelmen kore kumirrk nuye!

10 Mah, ngurriwarlahkenh bininj rowk, wanjh ngurriyimerrimen, "Nawu Yawey kawohrnan rowk!" Dja kondah kurorre kore karrihni, wanjh nungka marnbom dja minj nangale kabolkrokayhwe. Nungka nawu Yawey wanjh kabendjadme bininj birridjenbubuyika rowk bu djal mandjad duninjh.

11 Nawu kabirrihni kaddum kore heaven, wanjh birriwernhnjilngmakmen nuye. Nawu kabirrihni kondah kurorre, dja nawu kurrulawaken warridj, wanjh birridjalkayhmen nuye, kunnjilngmak dorrengh.

12 Mayh rowk, dja njalenjale nawu kahyo kore kurorre wanjh birrid-jalnjlilngmaknin. Kaluk kundulk rowk kore kuberrk kurrulkwern wanjh yiman kabirrimarnewayini bu kunnjilngmak dorrengh.

13 Kaluk yehyeng rowk dja bininj rowk kore kondah kurorre birriwayinin kore kumirrk nuye Yawey bu nungka kamre kabendjadme rowk. Nungka wanjh kabendjadme birriwarlahkenh bininj rowk bu djal mandjad dja kunwoybuk dorrengh.

97*Nawu Kawohrnan Rowk Wanjh King Duninjh.**Psalm 97*

1 Nawu Yawey kawohrnan rowk! Nakka wanjh king duninjh. Birriwarlahkenh bininj rowk wanjh birriburluburlumen nuye! Bininj kore

kubolkbubuyika rowk nawu kabirrihni djarreh, wanjh birrimarnenjinglmarrmarr nuye.

² Nawu Yawey kahdi kore kungol kundulmuk dja kumunun kunkimuk kadjongburren. Nungka kahyerrkan kore kawohrnankenh. Nungka wanjh kadjadme bu djal mandjad duninj, dja mak kore kunmakkenh.

³ Nungka kamunkewe manbirlukimuk kore kumirrk nuye ba bu kabenwurlhke dja kabenbun nawu birriyidko nuye.

⁴ Nungka mak kamunkewe namarrkon nuye dja kabolkwolkan kondah kurorre rowk. Birriwarlahkenh bininj kabirrinan dja wanjh kabirridelme.

⁵ Kuwarddekihkimuk wanjh kabirridjalkelkdan kore kumirrk nuye Yawey nawu kawohrnan rowk kore kondah kurorre.

⁶ Kungol rowk kabimulewan bu nungka kadjalkurduyime kunmak. Birriwarlahkenh bininj rowk kore kurorre, wanjh kabirrinan bu nungka nadjalkudji God nadjalmak.

⁷ Bininj nawu kabirrimarneboddan nawu idols, dja kuhni kabirriburlumerren, wanjh kabirriyemengalme rowk. Kaluk nawu birribuyika gods wanjh birridjalburlumen nawu Yawey!

⁸ Bininj nawu kabirrihni kore Zion kabirriwokbekkan nawu Yawey, wanjh kabirridjalmarrmarr duninj. Bininj nawu Judah benkebmawahmeng, nawu kabirrihni kore kunredbubuyika, wanjh bedda warridj kabirrinjinglmak bu kunmekbekenh ngudda nawu Yawey kabendjadme bu djal mandjad duninj.

⁹ Ngudda nawu Yawey, ngudda wanjh yibenyurrhke rowk dja yidjalwohrnan rowk kore kondah kanjdji kurorre. Ngudda yidjalngeykimuk duninj kore yibenyurrhke rowk nawu birribuyika gods.

¹⁰ Ngudda bininj nawu ngurrimarnedjare nawu Yawey, wanjh ngurridjalwirrihmen kunwarre. Nawu Yawey kabenkukdjurruddi bininj nuye ba bu kabirridjaldarrkid. Nungka kabenbebke kore birriwarre bininj kabindibongkarme.

¹¹ Nungka mak kabenmarnebolkwolkan nawu birrimak bininj, dja kabennjinglmarnbun bininj nawu kabirridjare ba bu kabirrimarrmarr kore nungka.

¹² Ngudda nawu ngurrimak bininj, wanjh ngurridjalmarrmarr kore Yaweykenh. Ngurrimanjbu dja ngurringeyburlumen nungka nawu nangeydamun duninj.

98

Karrimarnewayinin Yawey Nawu Kawohrnan Rowk.

Psalm 98

¹ Mah! Karriwayinin mankerenge mankong bu karriburlumen nawu Yawey! Nungka wanjh kurduyimeng kunwern kunmakmak! Nungka bengehkeg bininj kubidkukun dja kunberl kunmurrnggrayek nuye dorrengh.

² Nawu Yawey mulewarrinj ba bu bininj rowk kabirriburrbun nungka wanjh kabennehkeg. Nungka benbukabukkang birriwarlahkenh bininj rowk kondah kurorre ba kabirriburrbun nungka wanjh kadjalkurduyime kundjalmak duninj.

³ Nungka wokkurmerrinj bedberre bininj nawu Israel benkebmawahmeng, dja wanjh woybukkih kurduyimeng rowk kore yimeng. Nungka

wanjh kabendjalmarnedjare dja minj kabenbawon. Kaluk birriwarlahkenh bininj rowk birrinang nawu God kadberre bu munguyh kabendjalngehke bininj.

⁴ Mah! Wanjh ngudda ngurriwarlahkenh bininj rowk nawu ngurrikang kubolkbubuyika rowk, wanjh ngurriwernhburluburlumen nuye Yawey. Ngurriburluburlumen bu ngurriwayiwayinin nuye kunwernhnjilngmak dorrengh!

⁵ Ngurrimarnewayinin mankongmak bu ngurriburluburlumen nawu Yawey instruments dorrengh. Ngurridirri bu ngurribun nawu kore harps.

⁶ Mak ngurribuhen kore trumpets dja kunkanem yiman horns, dja ngurriwernhkayhmen kunnjilngmak dorrengh nuye Yawey, nawu king kadberre.

⁷ Ngudda kurrula, dja nawu djenj rowk kore kanjdji, wanjh ngurridarahmen bu kunwok kunkimuk. Ngudda nawu kurorre, dja nawu bininj dja mayh rowk kabirrihni, wanjh ngurridjarrkwayinin nuye.

⁸⁻⁹ Ngudda nawu mankabo rowk, wanjh ngurribiddowkmen kore nungka kunnjilngmak dorrengh! Ngudda nawu kuwarddekimuk rowk, ngurridjarrkwayinin kunnjilngmak dorrengh kore kumirrk nuye nawu Yawey.

Dja nungka kamre dja kabendjaddjadme birriwarlahkenh rowk bininj kore kondah kurorre. Kaluk nungka kabendjadme bu djal mandjad, dja kabenbehdjadme bu kundjalmakkenh.

99

God Nawu Yawey Wanjh King Duninj Dja Kawohrnan Rowk!

Psalm 99

¹ Birriwarlahkenh bininj nakka kabirrikukdeldelme bu nungka Yawey kawohrnan kubolkwarahkenh rowk. Nungka yiman kahyerrkan kore nawu cherubim bokenh kabenebarndi. Mah, kondah kore kurorre rowk wanjh kabolkdeldelme duninj!

² Nawu Yawey kahni kore kunred Zion, yiman king duninj nawu kawohrnan rowk kore kubolkbubuyika rowk, dja kabengeyyurrhke bininj rowk.

³ Ngudda Yawey, yidjalkudji yiwernhdulkarrekimuk duninj, mak bininj ngundingeyburlumen bu kunquele dorrengh! Ngudda wanjh yidjalwernhdjamun Duninj.

⁴ Ngudda nawu King Duninj, ngudda ngurrikarme kundulkarre rowk, dja yidjaldjare bu bininj kabirrikurduyime kundjalmak. Ngudda wanjh kanbidyikarmeng ba bu ngarridjadmerren bu djal kunmak dja mandjad warridj. Ngudda kunu kanmarnekurduyimeng ngad nawu Jacob nuye mawahmawah.

⁵ Mah wanjh, karriburluburlumen Yawey nawu God kadberre! Karimarneboddan kurrenge nuye nawu kahyerrkan kore heaven. Nungka wanjh Nadjalwernhdjamun duninj.

⁶ Nawu Moses dja Aaron, nakka wanjh nuye priests bokenh. Mak nawu Samuel dingihdi yiwarrudj nuye. Bedda wanjh birrikayhmeng nawu Yawey, dja wanjh nungka benwokmey.

⁷ Nungka wanjh kumwokdangeni kore kunngolbeh, dja nuye bininj wanjh birriwokmarrkmangi mankarre nuye manbu benwong.

⁸ Ngudda Yawey nawu God ngadberre, yibenbekkabek kang ngudda ke bininj bu ngundidjawani. Ngudda wanjh yibenmarnebengmidjan

kunwarre bedberre. Dja ngaleng ngudda yibenbuni bininj nawu birrikurduyimi kunwarre.

⁹ Wanjh karriburluburlumen Yawey nawu God kadberre, dja karri-marneboddan nuye kore kuwarddedjamun nuye. Yawey nawu God kadberre, nakka wanjh Nawernhdjamun Duninjh.

100

Bu Karriburlume Dja Karrimanjbun Nawu Kawohrnan Rowk.

Psalm 100

¹ Mah! Karriwernhkayhmen nawu Yawey bu karrimarrmarrnin duninjh, ngad karriwarlahkenh bininj nawu karrihni kubolkbubuyika rowk.

² Mak karrimarnebodda nuye bu kunwernhnjilngmak dorrengh. Kar-rimirndemornnamerren kore kumirrk nuye, dja karriwayinin bu karrid-jalnjlilngmak nuye.

³ Ngad karrimulewan bu Yawey wanjh God duninjh. Nungka wanjh kanmarbom kadberre, ngad nawu nungka nuye bininj yiman, dja kanmirndekarme yiman kayime sheep nuye dja kankurrmeng kore kubolkmak nuye.

⁴ Mah. Karringimen kore nungka nuye kunrurrk dja karridjalmanjbu nuye! Karridi kumekbe kore nungka kahdi dja karringeyburluburlumen. Karridjalmanjbu nuye dja karringeyburlumen nuye.

⁵ Nawu Yawey nungka nadjalmak duninjh, dja kandjalmarnedjare munguyh munguyh. Nawu Yawey minj kabawon nuye kunwok manbu kanmarnewokkurrmerrinj dja nungka kadjalkurduyime bolkkime dja yerrekah bu munguyh munguyh.

101

King David Kabendung Nawu Birriwarre Bininj.

Psalm 101

¹ Nawu Yawey, ngaye ngawayini bu ngayolyolme ngudda bu kan-marnedjare munguyh, dja kandjadme bu djal mandjad duninjh. Ngaye marnewayini kore ngudda.

² Ngaye ngadjare bu munguyh ngakurduyime bu djal kunmak, dja minj kunwarre ngakurduyime. Dja ngaleng, baleh kayime bu ngudda yimre darnkih ngaye? Ngaye nganahnarren kore ngayekenh kunred, dja minj mak kunwarre ngakurduyime.

³ Ngaye minj nganan kunwarrekenh, dja minj mak ngaburrbun. Ngabenwidnan bininj nawu ngundibodmewon dja kunwarre kabirriyime. Ngaye ngabendjalbawon ba minj ngarriraworren.

⁴ Minj mak ngaye ngakurren, dja minj ngadjare ngaborlhme kore kunwarrekenh.

⁵ Bu ngabekkan bininj nawu manmolk kabimarneyolyolme kunwar-rekenh nabuyika bininj, wanjh ngadjalwohburriwe kore ngayekenh. Dja mak bininj nawu kaburlumerren dja kangeykimukworren, wanjh ngadjalnngurdke.

⁶ Dja bininj nawu kabirriwokmarrkmang God, wanjh ngabenmakwan, dja ngabenkimang ba kabirrimre ngarridjarrkyo kore ngaye. Warridj bininj nawu minj kabirridjalkurduyime kunmak, wanjh ngabenbawon bu ngaye ngandimarnedurrkmirri.

⁷ Kaluk bininj nawu kabindikowe birribuyika, wanjh minj ngarriyo kore ngaye. Bininj nawu kabirrikurrehkurren wanjh ngabenburriwe kore ngayekenh.

⁸ Bu kunkabelwern ngaye wanjh ngabenbularrbun birriwarre bininj nawu kondah kubolkkimuk kabirrihni. Ngaye wanjh ngabenburriwe kore kondah kukadje manbu Yawey nuye.

102

Bininj Nawu Kangewarreminj Wanjh Danginj Yiwarrudj.

Psalm 102

¹ Yawey! Kanbekkabekkan bu ngahdi yiwarrudj! Ngakayhme bu djawadjawan kanbidyikarmekenh, wanjh kanbekkabekka!

² Bu ngakarrme kunyid, wanjh yuwn bu yikebborledme kore ngahni. Bu ngakayhme ke, wanjh kanwernhbekka, dja werrkwerrk kanwokma!

³ Ngaye darnkih ngarrowen yiman kundolng werrkwerrk kayakmen kore kunmayorrk. Ngaye wanjh ngamurrngbabang dja ngabekkarren yiman kayime ngardduk kunmurrng kawurlhme kore kunak.

⁴ Ngakangebekkarren yiman kayime ngakangedarlehmen. Ngaye bonj, ngadjalbengmidjdan bu ngangun manme.

⁵ Ngaye ngangeyngeyyime wernkih duninj, dja kunu ngakukmorarra dja bininj ngandimurrngnan.

⁶ Ngaye yiman kayime maymayh nawu djurrul kore kubolkdarleh, nawu karrolkan kore kubolkbiniyjak.

⁷ Ngaye minj ngakodjkeyo. Ngayimerranj yiman kayime maymayh nawu nadjalkudji kahdi.

⁸ Kunbarnangarrakuyeng bininj nawu ngandiwirrihme wanjh ngandidjekmiwon. Bedda nawu ngandiyolyolme dja bu kamahmahmerren wanjh ngandingeybun ngardduk kunngey.

⁹ Ngadjalngun kunburle, dja ngadjalbongun manbu kunmimnalk ngardduk boraworrinj.

¹⁰ Kuhni rowk kurduyimerranj ngardduk kunmekbekenh ngudda wanjh kandung ngardduk bu kunkimuk, dja ngudda wanjh kankukmey kankukburriweng.

¹¹ Bolkkime wanjh kundowikenh kamre darnkih, yiman kayime kabolkmununmen bu wolewoleh duninj. Ngadjalyakmen yiman kayime kundalk bu kahdarlehmen.

¹² Dja ngudda Yawey wanjh king duninj munguyh. Ngudda yidjalyerkan kore kaddum. Birriwarlahkenh bininj rowk ngundingebyurlume bu munguyh munguyh.

¹³ Kaluk yirrolkan bu yibenkongibun bininj kore kunred Zion. Kaluk kabolkyime bu ngudda yibenmarnedjaremen. Bolkkime wanjh bolkyimeranj bu kuhni yikurduyime.

¹⁴ Bininj kumekbe nawu ngundimarnedurrkmirri wanjh kabirribolkmannjgun. Rurrkwarrewarreminj kumekbe dja bonj, bedda kabirridjalbolkmannjgun.

¹⁵ Kaluk birriwarlahkenh bininj rowk kabirrikelemen ngudda ke kunngey, ngudda Yawey. Birriwern rowk kings nawu kabirriwohrnawohran kore kurorre wanjh ngundimarnebodan kore kunmakmak duninj ke.

¹⁶ Nawu Yawey kayawoyhbolkmarnbun kunred Zion. Nungka wanjh kanmarnekukbukkarren bu karrinan nuye kundjalmakmak duninj.

17 Nungka wanjh kabenbekkabekkan nawu birrimarladj bininj bu kabirrihdi yiwarrudj, dja minj kabenwarrewan bu kabirridjadjawan.

18 Mah, wanjh ngadjare bimbuyinda maninjmanu kunwok ba bu bininj nawu karrbenmawahme, nawu minj bolkkime birribangmengalmeninj, wanjh bedmanwali kabirriburluburlume nawu Yawey.

19 Karrbenmarneyime bu Yawey bolknang kanjdji kore nungka dingihdi kaddum duninj kore kubolkdjamun nuye. Nungka dingihdi heaven dja wanjh bolknang kondah kurorre.

20 Dja benbekkang nawu birribongdi bininj bu birringeyngeyyimi, dja wanjh benbengkeng nawu birrimadbuni bu kabindibunkenh.

21 Kunmekbekenh kunu bininj kabirringeymulewan nawu Yawey kore kunred Zion. Kabirriburluburlume kore kukadje Jerusalem.

22 Kuhni kabirrikurduyime birriwarlahkenh bininj rowk kore kubolk-bubuyika rowk kabirrimirndemornnamerren ba bu kabirrimarnebodan nawu Yawey.

23 Nawu Yawey nganngudjykwong kore ngarrarrkiddi. Nungka wanjh dedjumbunghmeng nawu mandjewk ngardduk bu ngaye nadjaldarrkiddi.

24 O God, ngudda yidjaldjarrkid munguyh munguyh dja minj yiyakmen. Yuwn bu kankan kondahbeh, dja ngadjalngudjbang.

25 Ngudda kunkare duninj yibolkmarnbom kondah kurorre. Dja mak yimarnbom kubid ke manbu heaven kore kaddum.

26 Mahni rowk kayakayakmen, dja ngudda yidjaldi munguyh munguyh. Yehyeng rowk kawarrewarremen yiman kunmadj nawu nakare. Wardi yidmadjburriwe dja nakerrnge yidjongburren.

27 Ngudda wanjh yidjaldi dja minj yikukbuyikahmen bu munguyh. Ngudda yidjaldarrkid bu mandjewk mandjewk ke, dja minj yiyakmen.

28 Bininj nawu ngundimarnedurrkmirri kaluk bu kabindibornan wanjh nahni wurdwurd kabirrihni kamak rowk kore kumirrk ke. Dja bedmanwali kabindimawahme, wanjh yerre bedda warridj kabirridi kamak rowk kore ngudda.

103

Ngaye Ngaburlume Yawey Nawu Kunmak Nganmarnekurduyime.

Psalm 103

1 Ngaye ngaburlume nawu Yawey kore kukange ngardduk! Nungka kunngey nuye wanjh kundjamun duninj dja kumekbekenh ngaye ngangeyburlume kunmarrk ngardduk dorrengh.

2 Ngaye ngaburlume nawu Yawey kore kukange ngardduk! Dja yuwn bu ngabengmidjan kore nungka nganmarnekurduyime kunmak rowk.

3 Nawu Yawey kabengmidjan kunwarre rowk ngudberre, dja mak kawe kundjak rowk ngudberre bu ngurridulkkihngalme.

4 Nawu Yawey ngunnggehke kore kundowikenh dja mak ngunmarnedjare kore kunmakmak dja kunkongi nuye.

5 Wanjh ngunmarnekurduyime kunmak ba bu ngurrire kamak rowk, dja ngunyawoyhkerrngehme ba bu ngurringudjbangmen yiman namaddorl bu karrollkan.

6 Nawu Yawey nakka kakurduyime mandjaldjad kore kunmakkenh bedberre nawu birrimarladj bininj bu birribuyika bininj yiman kabindikoluyhwe.

⁷ Bu kunkareni nawu Yawey bimarnemayalibukkarrinj Moses, dja mak benbukkabukkang bininj nawu Israel benkebmawahmeng kore bedda birrikurdunani.

⁸ Nawu Yawey wanjh mimkongiwern duninj, dja minj werkkwerkkayiddung. Nungka wanjh kandjalmarnedjare munguyh munguyh.

⁹ Nungka minj munguyh kanwiddjung bu kandjadme kadberre, dja minj mak munguyh kahdjalkangeyiddi ngadkenh.

¹⁰ Nawu Yawey minj kanbun kadberre kore kunwarre karriyime. Mak minj kankarremulewan kadberre kore kunwarrekenh karriyime.

¹¹ Nungka wanjh kabenmarnedjare bulkkidj duninj bininj rowk nawu kabirrimarnebodan nuye. Kumekbekenh wanjh nungka kaburriwe djarreh duninj kunwarre rowk kadberre.

¹² Nungka kadjalwe manbu kunwarre kadberre djarreh duninj, yiman djarreh karrikad duninj kore koyek duninj.

¹³ Nawu Yawey kabenkongibun wurdwurd nuye. Nungka yiman kayime bininj kabenhkongibun wurdwurd nawu kabenbornan.

¹⁴ Nungka kanwernhburrbun kore ngad karrimarnbuyindanj, dja kaburbun bu ngad yiman djal kunkulk.

¹⁵ Ngad bininj nakka yiman kundalk manbu kakolhdebebe, dja werkkwerkkarrown. Mak karriidjorden yiman mannguy manbu kawernmerren kore kabbal.

¹⁶ Kaluk bu kunmayorrk kabubuhme, wanjh manmekbe mannguy kayakmen, kabolkbawon munguyh. Dja ngad bininj wanjh kuhni karohrok karriidarrkiddi bu djal kundedjumbung.

¹⁷ Dja nawu Yawey minj kabenbawon bininj nawu kabirrimarnekele nuye, dja kabendjalmarnedjare munguyh munguyh. Mak nungka kabenmakwan nawu wurdwurd dja mawahmawah bedberre.

¹⁸ bu bedda kabirridjalkarrme nuye kunwok manbu nungka yingkih-wokkurrmerrij, dja kabirriburrbun munguyh bu kabirriwokmarrkmang nuye.

¹⁹ Nawu Yawey bolkmarnbom kore kahyerrkan kaddum heaven. Wanjh nungka king duninj dja kadjalwohrnawohrnan rowk kaddum dja kurorre.

²⁰ Ngudda nawu angels nuye Yawey, wanjh ngurriburluburlumen. Ngudda ngurridulkarrekimuk dja ngurrikurduyime kore nungka kayime bu ngurriwokmarrkmang kunwok nuye.

²¹ Ngudda ngurridjalwern duninj nawu ngurrihid kaddum heaven, ngudda warridj ngurriburlumen nawu Yawey! Ngudda nawu ngurrih-marnedurkmirri kore kayime ngudberre, wanjh ngurriburluburlumen.

²² Nawu Yawey marnbom yehyeng rowk dja kawohrnawohrnan kubolkbubuyika rowk kore kaddum dja mak kore kurorre. Wanjh nakka rowk birridjalburlumen Yawey.

Mah! Ngaye ngadjare ngaburluburlume nawu Yawey kukange dorrengh ngardduk.

104

Karriburlumen Yawey Nawu Nangeywerkhkimuk Duninj.

Psalm 104

¹ Ngaye ngaburlume nawu Yawey, kukange ngardduk dorrengh!

Ngudda Yawey wanjh God ngardduk, dja yidjalwernhkimuk duninjh. Ngudda nawu king duninjh. Ngudda yidjalmakkaykenh yiman bu yidjongburren namadjmak duninjh.

² Ngudda yikukbame wernkih duninjh yiman kayime yikukdjongbuyindi manbu kabolkwolkankenh. Ngudda mak yinameng kunngol kaddum rowk yiman bininj kabarrkburren dabburlin.

³ Ngudda yidjalyo munguyh kaddum duninjh kore yibolkmarnbom kunrurrk ke. Yidjalre kurih kurih yiman kunngol yibarndibarndi, dja yidjalre yiman kayime kunmayorrk ngukan.

⁴ Mahni kunmayorrk wanjh yimarnbom bu ngunmarnewokkanahkan djarreh ngudda ke kunwok. Dja mak yimarnbun manbirluworldjen bu ngunmarnedurrkmirri.

⁵ Ngudda yibolkdjabnameng kondah kurorre rowk wernkih duninjh ba minj nangale kayawoyhbolkrokayhwe.

⁶ Dja yibolkbarrkbom kurrulawi yiman yibolkdjombom kondah kurorre rowk. Manbu kurrula barrkbom kaddum kore kuwarddekimuk.

⁷ Kaluk ngudda yiwokdanginj kunwok kunrayek dja kurrula wanjh keleminj dja borrunderrij. Manbu kurrula ngunwokbekkang kore yiwokdi yiman namarrkon kunkimuk ngurdulmeng, wanjh kelerlobmeng.

⁸ Mahni kundjurrh wanjh bokoluy kore kuwarddekimuk dja barlkeng kore kanjdji kunbolk, kumekbe kore yiyinkingihbolkmarnbom borrunderi rowk.

⁹ Ngudda yibolknameng dja minj kabakke bu kayawoyhbarlke kondah kurorre rowk. Kabodjaldi kunronj rowk kore ngudda yibokurrmeng.

¹⁰ Ngudda yingadmarnbom ba kabobebme dja kaborlobme kore kanjdjikandji dja mankabo mankimuk kaborlobme kanjdji kubulkayh kore kuwarddewardde.

¹¹ Kaluk mayh rowk kabirribongun maninjmanu kukku rowk, nawu kelebuk dja mak nabang mayh yiman donkeys nawu kahdi kurralk.

¹² Mayhmayh warridj kabirriredmarnbun darnkih kore kukku, dja kabirriwayini kore manyeyende kundulk ngarre.

¹³ Yimunkewe mandjewk kore kaddumbek yihni bu kadjuhke kuwarddekimuk. Wanjh kore kondah kurorre rowk, manwern manbu kawernmerren kore ngudda yimarnbom.

¹⁴ Ngudda yimarnbun mankolhdebubuyika manwern, yiman kundalk yidjordmiwe ba bu bulikki kangun, dja yimarnbun mankolhde manbu bininj kabirridjordmiwe ba bu kabirrimang manme kore kurorrebeh.

¹⁵ Ngudda warridj kanmarnemarnbun ngad bininj manrakel ba bu ngarribomarnbun wine bu ngarribongun dja ngarrinjilngmarnburren. Mak kanwon mankalkkid oil ba ngarrinjilngmakmen warridj. Dja ngudda kanwon buriddi ba bu ngarridjalngudjbang.

¹⁶ Ngudda Yawey yidjabnameng kundulkwern ngudda ke kore kunbolk Lebanon, dja yimunkewe mandjewk kunwern ba bu karrulkdjordme kamak.

¹⁷ Mayhmayh kilekilek kabirrireddi kore manyeyende, dja mayhmayh nakimuk, yiman ngalkordowh wanjh kabirrireddi kore kundulkkuyeng manbu firs.

¹⁸ Mayh nabang nawu nenikud kabirridi kaddum duninjh kore kuwarddewardde, dja mayh nabuyika yiman kayime rabbits wanjh kabirriwarlkarren kore kuwardderurrk.

19 Ngudda yimarnbom nawu dird ba bu ngarrirohrokme baleh kabolkyime mandjewkbubuyika. Nawu kundung yimarnbom dja kaburrbun baleh kayime bu kakoluyhwerren.

20 Kaluk yimunkewe kumunun, dja kunkak kayimerran. Wanjh mayh nabang kabirrirengehre bu manme kabirriyawan.

21 Dja mayh nawu lions nabang wanjh kabirriwokdi wernkih bu kabirridjare kabun ba bu kakanjngun. Bedda kabirriyawan manme manbu God bu kabenwon.

22 Bu kambarrkbun wanjh manmol k kabirridurnderren kore kured dja kabirrikeyo bu kunbarnangarraburrk.

23 Kuhni kabolkyime wanjh bininj rowk kabirribebme dja kabirridurrrk-mirri kunbarnangarrakuyeng. Dja kabirribawon kore kabirridurrrkmirri bu wolewoleh duninh.

24 Nawu Yawey! Ngudda yikurduwern bu yimarnbom nawern duninh nawu njalehnjale! Djalwoybukkih duninh, ngudda yimayaliwern. Ngudda yibenmarnbom mayh nawern, dja yibenkurmekurmeng kore kubolkwarlahkenh rowk.

25 Kurrula yimarnbom makka mankimuk dja manwarlah, dja wern-hwernmerrinj duninh mayh nawu kukkuwaken kani, nakihkimuk dja kilehkileh kabirridjaldarrkid kumekke.

26 Kabbala manwern nakka karrurndiwerren kore kurrula, dja Leviathan nawu mayh nakimuk ngudda yimarnbom nakka yiman kahdirri kumekke.*

27 Nahni mayh rowk nakka wanjh ngudda ngundjalmadbun bu manme yibenwonowon kore yirrunname bu yikurduyime.

28 Wanjh bedda kabirrimang dja kabirringun manbu yibenwon; kore kubid ke ngudda bu yibenworrkmiwon.

29 Dja bu yikebborledme bedberre wanjh bedda kabirrikelerlobme, dja bu kunngolek yimang bedberre wanjh kabirridowen dja kabirridurndeng kore kundjulng bedberre.

30 Dja bu yimunkewe Namalngmakkaykenh ke, wanjh yibenmarnbun bu mankerenge kundarrkid yibenwon, dja yikerrngehmen yehyeng rowk kondah bu kurorre.

31 Nawu Yawey, ngarridi yiwarrudj bu kunmakmak ke kahdjaldi munguyh munguyh, dja mak ngarridjare ngudda yinjinlgmarnburren bu yinan rowk kore yikurduyime.

32 Bu kondah kurorre ngudda yimbolknan wanjh kunukka kabolkrokahrokan. Dja bu yikarrme kore kuwarddekimuk, wanjh nakka kundolng karrolngbebme kaddum.

33 Wanjh ngaye ngahdjawayini munguyh kore ngudda Yawey, dja warridj djahdjalburlume munguyh ngudda God ngardduk, kaluk bu ngangolekyakmen.

34 Wanjh kore ngahburrburren baybaywi, ngaye ngadjare bu kuhni ngaye njilngmarnbun, dja ngudda Yawey wanjh yidjalkudji nawu ngaye kannjilngmarnbun.

35 Wanjh yibenbu yibenkukyakwon nawu birriwarre bininj kondah kurorre kabirrihni. Ngaye wanjh kunkange dorrengh djalburlume ngudda nawu Yawey. Wanjh ngaye burluburlume ngudda nawu Yawey.

105

God Kabenmarnedjare Nuye Bininj Munguyh Munguyh.

* 104:26 Job 41:1; Psalm 74:14; Isaiah 27:1

*Psalm 105**(1 Chronicles 16:8-20)*

¹ Mah! Ngurrimanjbu nawu Yawey, dja ngurringeykayhmen. Ngurrimulewa bu ngurrbenbengdayhke birriwarlahkenh bininj rowk kore nungka kurdukurduyimi.

² Ngurrimarnewayinin dja ngurriburluburlumen. Ngurriyolyolmerren kore ngurrikurdunang kore kunmakmak nungka kurdukurduyimi rowk.

³ Ngurringeyburlumen nuye kungey, nungka nawu ngeymakkaykenh duningh. Ngudda bininj nawu ngurriyawayawan nawu Yawey, wanjh ngurrikangemarrmarr duningh!

⁴ Ngurridjaldjarenin bu ngurrikebnan nawu Yawey, nawu narrulkarrekimuk duningh. Ngurridjalyawa nuye kukeb bu munguyh munguyh.

⁵⁻⁶ Kab ngudda nawu Abraham ngunkebmawahmeng, nahnin nawu bimarnedurrkmirri Yawey, dja mak ngudda nawu Jacob nuye bebeywurd rowk, nawu Yawey ngundjarrngbom, wanjh ngurribengka rowk bu nungka kurdukurduyimi kundulkarre dorrengh nuye kore ngurrikangebarrhmeng, dja mak ngurriburru bu kore mankarre kanwong bu kandjadmekenh.

⁷ Nawu Yawey nakka God kadberre! Nungka kandjadme ngad karriwarlahkenh bininj rowk karrihni kondah kurorre.

⁸ Nungka rayekwong kunwok nuye bu wokkurmerrinj kadberre, dja kadjalburrbun munguyh munguyh. Nungka wokrayekwong kunwok nuye ba kawokbimbuyindi bedberre bininj nuye dja minj munguyh kawokyakmen.

⁹ Nungka wokrayekwong dja wokkurmerrinj biberrebbom nawu Abraham, dja yerreh wokkurmerrinj nawu Isaac warridj.

¹⁰ Dja mak mulewarrinj bu wayoyhwokrayekworrinj nuye nawu Jacob, dja mak yolyolmerrinj bu bimarneyimeng nawu Israel dorrengh. Benmarneyimeng bu nuye kunwok wokkurmerrinj wanjh kadjaldi munguyh munguyh.

¹¹ Kuhni yimeng bu wokkurmerrinj dja kawokbimbuyindi bu kayime, "Ngaye wanjh bolkwon ngudberre kunbolk Canaan, dja ngurribolkkarrme ngudberre munguyh munguyh."

¹² Nahni nawu nuye bininj wanjh kerrngehkenhni birrimirndeyahwurd, dja minj birribangmebolkkarmeninjin kunmekbe kunbolk Canaan. Birridjalrenghey kumekbe.

¹³ Bedda birridjalrenghey kubolkbubuyika kumekbe kore birriwern kings birribebbehbolkwornani.

¹⁴ Wanjh Yawey minj benbawoyi birribuyika bininj bu bindibongkarmeninjin, dja bendabkeng. Nungka Yawey bendungi kings nawu bindinani nuye bininj, yimeng.

¹⁵ "Yuwn yibenkilekme bininj nawu ngaye ngabendjarrngbom bu ngandimarnedurrkmirri, dja yuwn bu mak yibenwarrewon birrimekbe nawu prophets ngardduk!"

¹⁶ Kaluk Yawey bolkwarrewong Canaan ba bu mandjewk ngurdmeng, dja wanjh manme yakayakminjin rowk. Nungka bularrbom manme bedberre.

¹⁷ Kunmekbe wanjh bimunkeweng nakudjin bininj bu yingkihdokmeng bedberre kore Egypt. Namekbe bininj ngeyyoy Joseph, dja nawu

birridangerrinj birriweykang dja birribuyika bininj birribongkarrmi ba benmarnedurrkmirri.

¹⁸ Bedda wanjh birridengedukkang Joseph wirlmurrng dorrengh dja wanjh dengemokminj. Dja mak birrikomdukkang nuye wirlmurrng dorrengh.

¹⁹ Kaluk Joseph yingkihyolyolmi kore yerre kurduyimerranj, dja bu kunmekbe bolkyimi, wanjh Yawey nuye kunwok wanjh woybukkendanj.

²⁰ Wanjh king nawu bolkwohnani kore Egypt bibebkeng nawu Joseph. Nahni king wanjh nakimuk duninj kore birriwarlahkenh bininj.

²¹ Dja bikurrmeng Joseph bu bimarnedurrkmirri dja mak bu wohrnawohnani manwern nawu king nuye.

²² Dja mak biwong Joseph bu kabenbukkankenh rowk nawu bebeywurd nuye king, dja mak nawu birrikihkimuk bininj nuye ba bu birrimayaliwernminj.

²³ Kaluk God nuye bininj birringimeng kore kubolkkimuk Egypt, wanjh Jacob dja nawu namud nuye birriwam birrihni kore kunred bolkngeyyoy Ham*, dja minj bedberreniwirrinj kunred.

²⁴ Dja Yawey benmarnbom nuye bininj ba bu birriwernmerrinj duninj, dja bindiyurhkeng nawu birriyidko bedberre.

²⁵ Wanjh Yawey benkangemarnbom birrimekbe nawu birriyidkoni bu bindiwirrihmeng bininj nawu birrimarnedurrkmirri nuye, dja bedda wanjh birrikarremarnburrinj bu bindibuyi.

²⁶ Wanjh kunmekbe Yawey benbenemunkeweng Moses, nawu bimarnedurrkmirri, dja mak Aaron, nawu bidjarrngbom.

²⁷ Kaluk Moses dja Aaron benekurduyimi God nuye kundulkarre dorrengh kore Egypt. Bindibukkabukkang God nuye kundulkarre kumekbe kore kunbolk Ham.

²⁸ Bininj nawu birrikang Egypt birridjalwokburriweng Yawey kore benwokrayekwong, wanjh nungka marnbom bedberre kunbolk bu bolkkakmunun yimerranj.

²⁹ Kaluk bomarnbom kukku rowk bedberre bu yimerranj kunkurlba. Wanjh djenj nawern bedberre mirndedoweng.

³⁰ Dja mak kordbolbok wernhmirdewernmerrinj kore bedberre kunbolk. Kordbolbok mirndengimeng kururrk kore bininj nawu birrikihkimuk keyyoy.

³¹ Nawu Yawey wokdanginj, dja wanjh bod warridj wernhmirdewernmerrinj, dja mak mayh kilehkilelk warridj warlahminj kore kunbolk rowk bedberre.

³²⁻³³ Dja nawu Yawey marnbom mandjewk bedberre bu wernhbonjdjekmeng dja rayekminj bu mankurrr nakihkimuk yimerranj, dja warwharrhmeni benbom bedberre manrakel dja kundulk manbu karrmi mandjoleng. Namarrkon warridj dulkbakkabakkeng kundulk rowk kore kunbolk bedberre.

³⁴ Wanjh nawu Yawey yawoyhwokdanginj, dja nawu djeddedde birrimirdewern duninj birribebmeng, dja minj nangale bininj mirnderohrokmeninj dja kundjalwern duninj.

105:17 Genesis 37:28; 45:5 **105:19** Genesis 39:20—40:23 **105:20** Genesis 41:14 **105:21** Genesis 41:39-41 * **105:23** Kunbolk Ham kunngeybuyika ngarre kunbolk Egypt. **105:23** Genesis 46:6; 47:11 **105:25** Exodus 1:7-14 **105:26** Exodus 3:1—4:17 **105:28** Exodus 10:21-23 **105:29** Exodus 7:17-21 **105:30** Exodus 8:1-6 **105:31** Exodus 8:16-17,20-24 **105:32-33** Exodus 9:22-25

³⁵ Djeddedde birringuni mankolhde rowk manme kore kubolk bedberre. Manme nawu dulkdi kore kabbal rowk, wanjh djeddedde djal yakwong rowk.

³⁶ Kaluk Yawey benbom nawu nawehwernwarre rowk kore namud-bubuyika bedberre kore Egypt. Bedda nawu bininj birrikang Egypt bu nadjdjamanbubuyika bindibebbehbornang.

³⁷ Wanjh nawu Yawey kuhni kurduyimeng wanjh benbekeng bininj nawu Israel benkebmawahmeng kore Egyptbeh. Birringorrkani manwern nawu silver dja gold. Bedda wanjh birringudjbangni rowk, dja minj birridoweni.

³⁸ Bininj nawu Egypt birrikang wanjh bindikengemeng, dja bu bindinang birribolkbawong birriwam, wanjh bedda warridj birrinjilngmakminj.

³⁹ Wanjh Yawey benmarnekurmeng kunnngol bu benbarrkbom, dja mak kunak benwong bu kunkakwern benmarnebolkwolkang bedberre.

⁴⁰ Nawu Israel benkebmawahmeng birridjawam nungka, dja wanjh benmarnekang mayhmayh yiman djirndi, dja benwong buriddi manbu heavenbeh bu benworrkmiwong.

⁴¹ Nungka mak wardedemarrhmei dja kukku manbowern bobebmeng, yiman kayime mankabo duninj borlobmi kumekbe kore kubolkdarleh.

⁴² Yawey burrbuburrbuni bu kunkare kore nungka yingkihwokkurrmerin-j kunwok kundjamun nuye Abraham nawu bimarnedurrkmirri.

⁴³ Wanjh kuhni rowk Yawey kurduyimeng bu benbekeng nuye bini-hbininj nawu birrihebmeng birrimarmarni dorreng. Nahni nawu nungka bendjarrngbom, wanjh benbekeng dja wanjh birriwayini kun-jilngmak dorreng!

⁴⁴ Dja mak benwong kunbolkbubuyika bedberre nawu birridjen-bubuyika bininj. Wanjh nawu Israel benkebmawahmeng birridjalmei manbu birribuyika bininj birriyingkihmarnbuni.

⁴⁵ Kuhni rowk nawu Yawey kurduyimeng bedberre ba bu bedda kabirriwokmang kore nungka benwokwong, dja kore nungka benwong mankarre nuye.

Mah, wanjh Hallelu Yah!

106

Bu Karingeyburlumen Yawey Nawu Kawohrnan Rowk.

Psalms 106:1-5

¹ Karriburlumen nawu Yawey! Karrimanjbu nawu Yawey, dja nakka namak! Nungka wanjh kandjalnarnedjare munguyh munguyh.

² Nangale bininj nawu kabimulewan kore nawu Yawey kahkurduyime bu kundulkarre kunkimuk nuye? Nangale bininj nawu kabiwern-hburluburlume munguyh munguyh?

³ Wanjh Yawey kunmak kabenmarnekurduyime bininj nawu kadjald-jadme kore mandjad, dja mak nawu munguyh kadjalkurduyime kore kunmakkenh.

⁴ O Yawey, kanburrbu ngaye kaluk bu ngudda yibenkongibun ke binih-bininj. Bu yibennggehke bedberre, wanjh ngaye warridj kanbidyikarmen.

⁵ Kuhni ngadjare ba bu ngarridjarrkkarme ke kunmakmak, ngad nawu ngudda kadjarrngbom. Dja mak ngadjare warridj ngarriwernhnjilngmak

ngad nawu ngudda ke namud. Dja mak ngaye warridj ngarridjarrkdi bininj nawu ngudda ke, dja wanjh ngundiburluburlume.

Kunkareni Wanjh God Nuye Bininj Birriwokweyi Nuye.

Psalm 106:6-18

⁶ Dja bonj. Ngaleng wanjh ngundiwokweng yiman kayime ngadberre mawahmawah birrikurduyimi. Ngad wanjh kunwarrekenh ngarrikurduyimi kore ngarridjareni. Dja ngad wanjh ngarriwarre bininj.

⁷ Ngad nawu mawahmawah bu birrihni kore kunbolk Egypt wanjh birridjalbengmidjanj kore ngudda yikurduyimeng kundulkarre dorrengh ke. Minj birridjalburrbuyi kore ngudda yibenmarnedjareni bulkkidj duninjh, dja bedda wanjh ngundiwokweyi kore darnkih kurrula manbu Manbokurlba.

⁸ Dja bonj, ngudda yibennghekkeng ba bu birriwarlahkenh bininj ngundungeyborlhme ngudda ke bu ngundikurdunan kore kundulkarre ke dorrengh.

⁹ Ngudda Yawey yidjalwokrayekwong kurrula manbu Manbokurlba dja wanjh wohbukminj kumekke. Wanjh yibengkang ngudda ke bininj kore kanjdji ngarre kurrula yiman kayime birrirey kore kubolkdarleh.

¹⁰ Kuhni wanjh yibennghekkeng kore bininj nawu bindiwirriheng bindikuyinjdarrrkidmey. Ngudda yibennghekkeng kore kubid bedberre.

¹¹ Manbu kurrula wanjh benngakkeng birrimekbe nawu birriyidko bininj, dja minj nangale bedberre yawoyhdarrkiddiwirrinj.

¹² Bu kuhni ngudda Yawey yibenmarnekurduyimeng, wanjh bedda birriyawoyhwoybukwong kore ngudda yiwokkurmerrinj bedberre, dja wanjh birriwayini bu ngundiburluburlumi.

¹³ Dja med, bedda werrkwerkk birriyawoyhbengmiddanj kore Yawey benmarnekurduyimi, dja minj birriwoknadbuni bu benbengdayhkeyikenh.

¹⁴ Wanjh birrirey kore kubolkdarleh dja birridjarewernminj. Birridjurkkang nawu God bedberre kumekbe.

¹⁵ Wanjh nungka benwong kore birridjawani, dja mak benmarne-munkeweng kundjak kunkimuk bedberre.

¹⁶ Kumekbe kore kubolkdarleh wanjh birrikirndanginj dja birriwurrmey Moses dja mak nawu Aaron, nawu Yawey bikurrmeng bu bimarnedurrk-mirri nuye.

¹⁷ Wanjh manbu kurorre dangmarrhmiwam dja bikuknguneng nawu Dathan, dja mak bininj nawu Abiram nuye wanjh benkukbarrkbom.

¹⁸ Warridj kunak wernhwurllheng bedberre nawu bindikadjungu dja benkuyakwong nawu birriwarreni bininj.

Nawu Mawahmawah Kadberre Birrimarnbom Nawu Idol Bu Birrimarne-boddangeni.

Psalm 106:19-23

¹⁹ Bedda birrimarnbom idol manbu wirlmurrng gold. Nakka kuyimi bulikki yaw, dja wanjh birriboddangeni nahnii idol.

²⁰ Bedda wanjh birribodmewong God duninjh nawu Naw-ernhakkaykenh, dja birridjaldjareni idol nawu kuyimi mayh nawu kundalk kangun!

²¹ Birridjalbengmidjdanj kore God bennghekkeng bedberre kore kunbolc Egypt, bu benmarnekurduyimi kunwern kore kundulkarre duninj nuye.

²² Nungka wanjh kunwernhmk kurdukurduyimi, dja birrikangebarhmeng kore Kurrula Manbu Manbokurlba.

²³ Kaluk kunmekbekenh God yimeng djareminj benbularrbuyi nuye bininj, wanjh Moses, nawu God bidjarrngbom wanjh danginj kumirrk nuye nawu God, dja biwernhdjawam bu bawong kunyid nuye dja minj bularrbuyi bedberre.

Bu God Nuye Bininj Birridjalwokweyi Nuye.

Psalm 106:24-39

²⁴ Kaluk yerrekah bedda birridjalbolckwarnyakminj manbu kunred kunmak, dja minj birriwoybukwoyi kore God benmarnewokkurmerrinj.

²⁵ Birridjaldi kore dabburlin bedberre dja birriwokkihjnurluhnjurlukmi. Minj birriwokmarrkmayi nawu Yawey.

²⁶ Wanjh kunmekbekenh nawu Yawey wokrayekwong bu benbeng-dayhkeng nungka wanjh kabenbun kore kubolckdarleh,

²⁷ dja kabenyalarcke nawu mawahmawah bedberre ba kabirribebbedhi kore bininj nawu birridjenbubuyika kore kubolckbubuyika kunwern.

²⁸ Kaluk bu birribebmeng kore kunbolc Peor, wanjh birriraworrinj bininj kumekbe bu birrimarneboddangeni god nawu kangeyyo Baal, dja birridjarrknguni manme manbu bininj bindiwoyi kore bindimarneboddangeni nawu birridowerrinj bininj.

²⁹ Bu kuhni kunwarre birridjalkurduyimi wanjh birrinjilngwarrewong nawu Yawey dja nungka yidduy bedberre. Wanjh kundjak kunkimuk bebmeng bedberre.

³⁰ Bu kunmekbe kurduyimerranj wanjh nakudji bininj ngeyyoy Phinehas dolckang dja benbom nawu birriwarreni bininj, wanjh kundjak ngurdmeng.

³¹ Bu kuhni nungka kurduyimeng, wanjh nawu Yawey yimeng nakka munguyh nadjalmak bininj nuye.

³² Bu birribolckmey kungad ngarre kunbolc Meribah, wanjh birrinjilngwarrewong nawu Yawey dja nungka yidduy bedberre. Dja mak birriwarrewong Moses dorreng.

³³ Bedda wanjh benmarnebom Moses kangewurhlmeng, dja nungka wokdanginj dja kunwarre yimeng.

³⁴ Nawu Yawey wokrayekwong bedberre bu bindibularrbuyi nawu birriwarre bininj rowk, dja bonj, minj birriwokmarrkmayi dja minj bindibom.

³⁵ Dja kunbuyika bedda birriyimi, dja birriraworrinj birrimekbe bininj dja birringunjdkkang kore kunwarre birriyimi.

³⁶ Birrimarneboddangeni bedberre idols, dja birriyimerranj bu yiman birribongdi kumekbe.

³⁷ Bedda bindibom bebeywurd dja ngalbebeywurd bedberre ba bindikukwoyi nahni idols, bindikukkurmeng kore idols bedberre nawu birrikang Canaan.

³⁸ Bindibom wurdwurd nawu birridjalmakni bu bindikurlbawarrhkeng, dja kundowikenh bedberre wanjh birribolckwarrewong kumekbe kunbolc.

³⁹ Dja mak birrikangeburlerriworrinj bu kuhni kunwarre birrikurduyimi. Kunu birrimarnburrinj yiman daluk birriwarre ngalbu kabirridjirdmarren bininj.

Bu Nawu Yawey Bendungi Nuye Bininj.

Psalm 106:40-48

⁴⁰ Wanjh kunmekbekenh nawu Yawey wernhyidduy bu bendungi nuye bininj. Nungka wanjh bendjalwidnang bedberre nawu djal nuyekih bininj.

⁴¹ Wanjh benbawong nuye bininj ba birribuyika bininj nawu birriyidkoni wanjh bindibongkarrmi dja bindiwernhwohrnani.

⁴² Bedda nawu birriyidko bedberre wanjh bindimarnarayekwong dja bindidjurrkdjurrkkang kundulkarre bedberre dorreng.

⁴³ Wanjh nawu Yawey bennghekkeng kunwernhkah, dja bonj, birridjalwokburriweyi, dja wanjh birridjalwarworreni kore kunwarre bedberre.

⁴⁴ Dja God wanjh bendjalbekkabekkani kore birrikayhmi, dja benburbom bu birrikangewarreminj duninj.

⁴⁵ Dja mak burrbom warridj kore benmarnewokkurmerrinj bedberre bu benberrebom, dja nungka benmarnedjareminj bulkkidj duninj dja benkongibom bedberre.

⁴⁶ Benmarnbom bininj rowk nawu bindibongkarrmi bu bindikongibuni nuye bininj.

⁴⁷ Aba, ngudda Yawey nawu God ngadberre, wanjh bolkkime kangehkemen dja kanmirndemornnamen kore ngarribebbehni kubolkbubuyikabeh, ba bu ngundimanjbun kore ngudda ke kunngey, dja ngundiburlume ngudda kore kunmakmak duninj ke.

⁴⁸ Mah, wanjh karridjalburluburlumen Yawey nawu God kadberre nawu Israel kankebmawahmeng, bu djal munguyh munguyh. Ngad bininj rowk karriyimen, "Amen!" Wanjh karriburlumen nawu Yawey!

107

Bu Karrimanjbun Nawu Kawohrnan Rowk.

Psalm 107

¹ Ngurrimanjbu nawu Yawey, dja nakka nadjalmak duninj. Nungka kandjalmarnedjare munguyh munguyh.

² Kumekbe ngurriyimen, ngudda nawu Yawey ngunnghekkeng kore nawu ngurriyidko ngundibongkarrmi.

³ Ngudda warridj nawu ngunmangi kore kubolkbubuyika ngurrikang kore koyek, dja mak karrikad, dja mak walem dja mak kakbi, dja ngunmornnameng rowk kore nuye.

⁴ Yikahwi bininj birribolkmayahmi kore kubolkdarleh birrirengehrey. Minj birribolkmayi kubolkmak kore birriyuwurrinj.

⁵ Bedda birrimarrwedoweni, mak birrikombukdoweni. Wanjh darnkih birriyakmeninj.

⁶ Wanjh birrikayhmi nawu Yawey kore kunyid kunwern benmarnewernmerrinj, dja nungka bennghekkeng kore birridi kunnjilngwarre dorreng.

⁷ Kaluk nungka benkanakang kore manbolhdjad, dja benkurmeng kunred kunkimuk kore birriyonginj.

⁸ Mah, wanjh birridjalmanjbu nawu Yawey! Nungka wanjh kabendjal-marnedjare bu munguyh munguyh. Mak nungka kandjalmarnekurduyime kunmakkenh kadberre ngad nawu bininj rowk.

⁹ Nawu Yawey nungan kanbowonowon ngad nawu karrikombukdowe, dja mak kanworrkmiwon ngad bininj nawu karrimarrwe.

¹⁰ Yikahwi bininj birriyerrkani kore kubolkmunun dja wanjh birrikangewarreni bu kundowikenh. Bedda birribongdi dja birridukkayindi chains wirlmurrng dorreng.

¹¹ Kuhnı benmarnekurduyimerranj kore bedda birriwokweng God nuye kunwok, dja birridjalwirrihmeng God nawu Nakimuk Duninj dja benbengdayhkeyi.

¹² Kunmekbekenh kunu God benkurrmeng kore birridurrrkimirri kunrayek duninj dja birridjalkangewarreminj. Bedda birringudjwarreminj dja birrimankang, dja minj nangale bininj benbidyikarmeninj.

¹³ Kaluk birrikayhmeng kore nawu Yawey bu benbidyikarmeng kore kunyid birrikarmi. Dja nungka wanjh bengehkeng kore birrikangewarreni.

¹⁴ Benbekeng kore kubolkmununbeh manbu kundowikenh, dja benmarnebakng wirlmurrng chains nawu bendukkang.

¹⁵ Mah, wanjh birridjalmanjbu nawu Yawey! Nungka wanjh kabendjal-marnedjare bu munguyh munguyh. Mak nungka kandjalmarnekurduyime kunmakkenh kadberre ngad nawu bininj rowk.

¹⁶ Yawey wanjh karrangbakbakke manbu manrayek duninj, dja karadajke wirlmurrng steel bars ba kabenbekke bininj.

¹⁷ Yikahwi bininj wanjh birrimarnekarrebakkeng God nuye mankarre, dja munguyh birrikurduyimi kunwarre. Wanjh kunu birriyimerranj birribengwarr duninj. Kunmekbekenh kunu wanjh kunrayek wernmerrinj bedberre.

¹⁸ Minj birridjareniwirrinj birringuyi manme, dja darnkih birridowimeninj.

¹⁹ Bu kuhni birribekkarrinj kore kunrayek kunwern birrikarmi, wanjh birrimarnekarreyhmi nawu Yawey, dja nungka bengehkeng kore kunrayek bedberre.

²⁰ Nungka wokmunkeweng nuye kunwok, dja kunu benmarnbom birrimekbe bininj kore birridowinalgalmeninj, dja mak bengehkeng kore kumidjbeh.

²¹ Mah, wanjh birridjalmanjbu nawu Yawey! Nungka wanjh kabendjal-marnedjare bu munguyh munguyh. Mak nungka kandjalmarnekurduyime kunmakkenh kadberre ngad nawu bininj rowk.

²² Bedda wanjh birriwo dja birrimarnekinje mayh nuye nawu Yawey ba bu kabirrimanj bun. Mak birriwayinin nuye kunnjilngmak dorreng dja birrimulewa kore Yawey kakurduyime kunkimukkenh.

²³ Yikahwi bininj birrireyi kabbala kore kurrula. Bedda birriweykani dja birribayahmi njalehnjale kore djarreh kurrula borledmikenh.

²⁴ Bedda birrikurduyanı Yawey kurduyimi kore kurrula kanjdji duninj, dja wanjh birrikangebarrhmeng.

²⁵ Wanjh Yawey wokdanj dja marnbom kunmayorrrk kunkimuk manbu borokayhweng kurrula dja bowayhmi kaddum.

²⁶ Kabbala bedberre wanjh wohbidbuni dja wohkolungi, kaddum dja kanjdji. Wanjh birriwernhkeleminj dja birriyimi bu birrikebngakmeninj.

²⁷ Bedda wanjh birrimankani yiman bininj nawu kodjworrromkang kunbangkenh. Minj birriburruy bu baleh birrikurduyimeninj!

28 Wanjh birrikayhmeng nawu Yawey bu kuhnikenh, dja nungka benbidyikarmeng kore birridjalnjilngwarreni.

29 Nungka wanjh ngurdkeng kunmayorrk ba yeleyedj kurrula borokani dja minj yawoyhbobidbuyi kunkimuk.

30 Wanjh bedda birrinjilngmakminj bu birrikarrinj kurrula makminj. Dja nungka benkang kamak rowk bu birribolkmey kore kunbolk birrid-jareni.

31 Mah, wanjh birridjalmanjbu nawu Yawey! Nungka wanjh kabendjal-marnedjare bu munguyh munguyh. Mak nungka kandjalmarnekurduyime kunmakkenh kadberre ngad nawu bininj rowk.

32 Bedda wanjh birriburlumen Yawey kore kabirrimirndemornnamerren nawu bininj rowk nuye. Dja mak birriburlumen nuye kore kabirrimirnderri kabirriyolyolme nawu birrikihkimuk dja nawu kabirriwohrnawohnan.

33 Nawu Yawey kabolkbuyikahwon, dja kamarnbun mankabo mankimuk bu kabolkyimerran kabolkdarlehmen. Nungka mak kaboyakwon kore kungad kambobebme, dja wanjh kurorre yiman kakombukdowen.

34 Yawey wanjh bennang bininj nawu birrihni kumekbe bu birriyimi kunwarre, wanjh kunmekbekenh nungka bolkbom kunbolk kore manme manwern djolengminj, ba bu djila wernmerrinj dja wanjh kulkwarreminj kumekbe.

35 Kaluk nungka kakurduyime kunbuyika warridj. Nungka kabolk-marnbun kore kubolkdarleh ba bu kabarlmiyindan manbowern dorrengh. Nungka mak kabolkmarbnun kubolkdarleh ba bu kungad kambobebme.

36 Nungka kabenkan bininj nawu kabirrimarrwedowen ba bu kabirridi kumekbe. Bedda wanjh kabirrirurrkmarnbun kururkweren ba bu kabirridjaldi munguyh.

37 Wanjh bedda kabirrimimwe kore kabbal, dja kabirridudje manbu mankolhde manrakel. Dja wanjh manwern manme kadjolengmen ba bu kabirrimang.

38 Wanjh Yawey kabenmarnekurduyime kunmak bedberre, dja bedda wanjh birriwernmirndewernmerrinj. Dja mak Yawey kabenmarnenahan mayh nawern bedberre nawu kabirrikarrme dja minj kamirndeyah-wurdmen nawu mayh.

39 Wanjh God nuye binihbininj birrimirndeyahwurdminj, dja birribuyika bininj bindibom dja bindibongkurmeng. Kunrayek dja kunnjilngwarre bebmeng bedberre,

40 wanjh Yawey kabendung birrikihkimuk bininj nawu kabindiwarrewon nuye bininj. Dja benmarnbom birrimekbe birriwarre bininj bu kabirridjalrengahre kore kubolkdarleh manbu manbolhyak.

41 Dja bennghekeng bininj nawu birrimarladj, dja benmarnbom ba bu kabirrimirndewernmerren kore namud rowk bedberre. Bedda wanjh mirndewernmerrinj yiman mayh kamirndewernmerren.

42 Nawu birrimak bininj kabirrikurdunan kumekbe kore God kakurduyime, wanjh kabirrimarrmarr. Dja nawu birriwarre bininj wanjh kabirridjalwokyakmen!

43 Ngudda bininj nawu ngurrimayalimak, wanjh ngurridjalborlhmen rowk kore nawu Yawey kakurdukurduyime, dja ngurrimenmenbekkan kore nungka munguyh kandjalmarnekurduyime bulkkidj duninj.

108

God Kanbidyikarrme Ngad Bu Bininj Kandiwirrihme.

Psalm 108

(Psalm 57:7-11; 60:5-12)

¹ O God, ngaye minj ngakangewarre. Ngadjalwayini kukange dorreng h ngardduk bu burluburlume ke.

² Bu kumhkabel djarreh ngaye ngarrolkkan dja ngahdirri kore instrument yiman harp dja mak lyre.

³ Ngaye manjbun ke ngudda nawu Yawey ba bu birriwarlahkenh bininj ngandibekkan kore ngarrihni. Dja mak ngawayini bu mulewan ngudda ba bu bininj nawu kubolkbubuyikabeh rowk wanjh ngundiwobekkan.

⁴ Ngudda wanjh munguyh kanmarnedjare bulkkidj duninj kondah kurorre dja mak kaddum kore heaven. Ngudda yidjalwoybuk, dja minj kanbawon munguyh kondah kurorre dja mak kaddum kore heaven.

⁵ O God, ngadjare ngundingeyburlume nawu heaven kabirrihni, dja mak ngadjare bu birriwarlahkenh bininj rowk nawu kabirrihni kondah kurorre bu ngundiburrbun ngudda yidjalwernhmakkaykenh duninj.

⁶ Mah, ngadjare kanwokmang bu ngahdi yiwarrudj. Kanbidyikarrmen ngad nawu ngudda kanmarnedjare bininj. Kangehkemen ngudda ke kunbidkukun dorreng h.

⁷ Wanjh God nawu nadjalmak duninj wanjh yingkihwokkurrmerrinj dja yimeng, "Ngaye wanjh ngawinhmeng, dja ngabolkmang kunbolk Shechem dja mak kanjdjikanjdji kore kunbolk Sukkoth. Ngaye ngabolkdadjadjde dja ngabenwon ngardduk bininj ba bu kabirribebbehbolkmang.

⁸ Kunbolk Gilead wanjh ngardduk, dja mak kunbolk Manasseh. Kunbolk Ephraim, wanjh ngaye ngardduk yiman ngakodjdjongbuyindi. Dja kunbolk Judah wanjh ngakarrme kunbid ngardduk kunkarndudj manbu kingskenh.

⁹ Kunbolk Moab, wanjh yiman ngalng ngardduk kore ngabiddjirridjburren! Ngadjalburriwe nawu kurrengekenh ngardduk kore kunbolk Edom, dja wanjh ngardduk kunbolk. Dja mak ngakayhme kunnjilngmak dorreng h bu ngabenbun bininj nawu kunbolk Philistia kabirrihni."

¹⁰ Adju, nangale ngankan kukadje kore minj birribang bininj kandibun kumekbe. Mak nangale ngankan kore kunbolk Edom?

¹¹ Yiddok ngudda nawu God kankan kadberre? Yiddok kanbawong bu ngarriburren bininj nawu kandiwirrihme? Yiddok minj karridjarrkre ngudda dorreng h bu ngarriburren nawu ngariyidko bininj?

¹² Ngundidjawan bu kanbidyikarrme bu nawu ngandiwidnan bininj ngandibun. Minj nangale mak nganbidyikarrme, dja bonj, bedda djal bininj.

¹³ Dja bu ngudda God kanbidyikarrme, wanjh ngarriwinhme dja ngarribenmelme birrimekbe nawu ngariyidko bininj.

109

Bu Karrimulewarren Kore Kunyid Kambebme.

Psalm 109

¹ O God, ngaye burluburlume ngudda, dja yuwn bu yidjalwoyak!

² Nawu birriwarre bininj ngandiwidjung ngardduk. Bedda kabirrikur-rehkurren bu ngandiwoyolme dja minj kunwoybuk kabirriwokdi.

³ Bedda ngandiwirrihme dja munguyh ngandiyolyolme dja ngandiwid-djung manburudjang.

⁴ Ngaye wanjh ngahdjaldi yiwarrudj dja mak ngayimeng bu yimankek bedda ngandimarneyimeninj ngaye djawirna bedberre, dja bonj, bedda ngandidjalwelengname.

⁵ Ngaye kunmak ngakurduyimeng bedberre, dja bedda kunwarre kabirrikurduyime ngardduk! Ngaye ngabenmarnedjareni, dja bedda wanjh ngandiwirrihme!

⁶ O God, ngadjare yikurrmen nawu nakka nawu nganwirrihme kore court. Dja yimunkewemen nabuyika nawarre bininj bu kahdi kore kukun nuye dja wanjh kapidjubun.

⁷ Dja yibenmarnbun nawu court kabirrihni bu kabirriwarrewan dja kabirriyime nakka kunwarre kurduyimeng. Bu nahni nawu nganwirrihme kahdi yiwarrudj kore court, wanjh ngadjare yibekka bu kad-juhburren kore kunwok nuye.

⁸ Yuwn bu kunkuyeng karrarrkid, dja nabuyika bininj kamre dja kamang nuye kore karrurrkmirri.

⁹ Mak yibenmarnbu nuye wurdwurd bu kabirrikornkumoyakmen, dja ngalbu ngalbininj kobeng nuye wanjh kayimerran kamarrdjukun.

¹⁰ Warridj ngadjare bu wurdwurd nuye kabirriyimerran birrimarladj dja bu birrirurkyak, dja wanjh kabirridjalyawayawan manme.

¹¹ Mak kore minj kabenkarremulewan, wanjh ngadjare bininj kabirrimang nawu nuye njalehnjale rowk. Bu nungka kahdurrrkmirri dja kad-jehdjengkurre manwern, wanjh ngadjare nawu birrimudbuyika bininj kabirrimang rowk.

¹² Yuwn mak nangale bininj kabikongibu, dja minj mak birribuyika bininj kabindikongibun nawu wurdwurd nuye.

¹³ Nawu nungka nuye namud wanjh nakka birribularrbuyinda ba bu yerrekah wanjh bininj rowk kabindingeybengmidjan.

¹⁴ Ngadjare nawu Yawey kaburrbun rowk kunwarre bedberre nawu birrikebmawahmeng nahni nawu ngaye nganeyidko. Dja mak ngadjare Yawey minj kabimarnebengmidjan kunwarre ngalenggarre ngalbu biyawmey ngardduk nganeyidko.

¹⁵ Ngaye ngadjare nawu Yawey bu kaburrbun munguyh kunwarre bedberre rowk nawu namud nuye nahni nawu nganeyidko! Ngadjare mak bu Yawey kabengeybularrbun bedberre kondah kurorre.

¹⁶ Nahni nawu nganeyidko wanjh kongiyakni, dja bendungi nawu birrimarladj bininj dja nawu manme birriyawani, dja mak nawu birrikangewarreni, kaluk bu birridowerrinj rowk.

¹⁷ Mak nungka birrikayhmi nawarre bu benwarrewoni nawu birrimak bininj. Bonj, ngadjare bu nuye kunwok kunwarre wanjh kawarreworren. Nungka minj djareniwirrinj bu kunmak benmarneyimeninj birribuyika bininj, dja wanjh ngadjare bu minj nangale kabimarneyime kunmak nuye.

¹⁸ Nungka wanjh munguyh kunwarrewarre benmarneyimi birribuyika, yiman kayime nuye kundjen. Wanjh ngadjare mahni kunwok kunwarre nuye bu karrurnderren kore nungka dja kabiwernhkangewarremen.

¹⁹ Ngadjare mahni kunwok kunwarre nuye bu kabikukbalhme yiman kunmadj kunwarre, dja mak kabikukdukan yiman kunyarl kore kunburk nuye.

²⁰ Ngudda nawu Yawey, kuhni rowk ngadjare yibenmarnekurduyime bu yibenbun birrimekbe bininj kore kunwarre rowk ngandimarneyimi.

²¹ Ngudda Yawey yidjalwohrnan rowk! Kanbidyikarmen ba bu bininj ngundidjalngeyburlume. Kannghehkemen ngardduk, ngudda nawu kandjalmarnedjare kore kunmakkenh ke.

²² Ngaye wanjh ngamarladj, dja mak ngangudjywarren. Warridj ngaye ngawernhnjilngwarre yiman ngauhdurdubabang.

²³ Manmekbe nganhkuyindombuyhwe dja ngadjalyakmen, ngarrownen yiman mayh nawu bod.

²⁴ Ngadjalmarrwe dja minj njale mak nganguyi, dja ngabarddeldelme. Warridj ngakanjyakayakmen dja ngabirrkbirrknarren ngardduk.

²⁵ Bininj nawu ngandidjuhun ngandikukdjekmiwon. Bu ngandinan wanjh ngandimarnekebnjiwkmire.

²⁶ O Yawey, ngudda nawu God ngardduk, ngudda kanmarnedjare munguyh, dja wanjh kannghehkemen.

²⁷ Yibenbukkabukkan nawu ngarriyidko ba kabirriborlhme bu ngudda yidjalkudji nawu kannghehke.

²⁸ Wardi bedda ngandimarneyime kunwarrekenh, dja ngudda wanjh kanmarnekurduyime kunmak, dja kunmekbekenh ngaye nawu marne-durrkmirri wanjh ngawernhnjilngmak.

²⁹ Wanjh bedda kaluk birriyemengalmen yiman kunyemi kabendjong-bun, dja birridjongbuyinda kunyemi yiman kayime kunmadj kunwarre.

³⁰ Ngaye wanjh ngamanjbun nawu Yawey bu ngakayhme wernkih duninj kurrang ngardduk. Ngaburluburlume warridj kore ngarrimirdemornnamerren birriwern bininj.

³¹ Ngarriburrnun bu nungka kadjaldi darnkih kore kukun nuye nawu namarladj, dja kabadarrkidngehke kore bininj nawu kabirriwarrewan kore court dja wardi kabirribun bu karrownen.

110

Yawey Nawu Kawoornan Rowk Bimarnewokkurmerrinj Nawu Jesus.

Psalm 110

¹ Yawey nawu Kawoornan Rowk bimarneyimeng nawu ngan-marnewoornan, yimeng, "Yiyerrka kore kukun ngardduk. Kaluk ngabenkurreme bininj nawu ngurriyidko kanjdji kore ngudda ke kur-enge."

² Kaluk bu ngudda yiwernhwohrnan yiman king kore kunred Zion, wanjh ngaye Yawey dulkarrewon ngudda ba bu yibenmarnewoornan nawu ngurriyidko bininj rowk kore kubolkbubuyika bedberre.

³ Kaluk bu ngudda yire yibenbunkenh nawu ngurriyidko, wanjh birriw-ern bininj ke kabirridjare ngurridjarrkre bu kabirriburrenkenh. Kuhni bu ngudda yidjongbuyindi nawu manburrba ngarre yiwohnankenh nawu king, dja ngudda ke yawurrinj rowk kabirrimre, dja bedda wanjh birringudjbang.

⁴ Nawu Yawey wokkurmerrinj kore kunngey nuye, dja minj kamayal-iborledme. Nungka yimeng, "Ngudda wanjh yiyimerran nawu priest bu yirrurkmirri munguyh munguyh yiman kayime nawu Melchizedek."

⁵ Nawu Yawey kahdi darnkih kukun ke, ba bu ngunbidyikarme. Dja bu nungka kayiddung, nakka wanjh kabenun nawu birribubuyika kabirrihwohrnawoornan kings.

⁶ Mak nungka kabendjadme birriwarlahkenh bininj rowk kore kubolkbubuyika kabirrihni, dja kabenkukyakwon birriwern, dja mak kabenkukberelhme bininj rowk nawu kabirriwohrnawohrn nan kondah kurorre.

⁷ Kaluk bu karengehre kahbolhkadjung wanjh kawohbongun kukku manbu kaborlobme kumekbe darnkih, ba kayawoyhngudjkkerrngehmen, dja wanjh kawinhme munguyh.

111

Karriburlumen Nawu Kawohrn Rowk.

Psalm 111

¹ Karriburluburlumen nawu Yawey! Ngaye wanjh ngamanjbun Yawey bulkkidj duninj kore ngaye karriraworren bu karrimirndemornnameren bininj nawu karrimak kore nungka.

² Nawu Yawey nakka nakurdumak duninj. Bininj nawu kabirrikurdunan, wanjh kabirrinjilngmakmen dja kabirridjalburrbun munguyh kore nungka kurdukurduyimeng.

³ Nungka kahdurrkimirri kunmakkenh dja karriburrbun wanjh nungka God nawu king duninj. Nawu kunmakmak nuye wanjh kadjaldi munguyh munguyh.

⁴ Nungka kanbukkabukkang ba minj karribengmidjdan kore nungka kurdukurduyimi kundulkarre dorrengh. Nawu Yawey wanjh kadjal-marnedjare dja nungka wernhmimkongiwern duninj.

⁵ Nungka kabenwon manme bininj nawu kabirrimarnekele nuye. Dja kadjalburrbun munguyh munguyh manbu benmarnewokkurmerrinj bininj nuye.

⁶ Nungka yiman benmarnekukbukkarinj nuye binihbininj bu benmarnekurduyimi kunwern kundulkarre nuye dorrengh. Kaluk benwong nuye bininj kubolkbubuyika bedberre birribuyika bininj nawu birriyoy.

⁷ Yawey kakurduyime bu djal kunmak rowk. Kahdurrkimirri kunbidwi nuye, wanjh kamak, dja kadjadme warridj bu djal kunmakkenh. Minj mak kakurren, dja kadjalwokdi bu djal kunwoybuk dorrengh.

⁸ Bu kakurme nuye kunwok, wanjh minj kawokyakmen, kadjaldi munguyh munguyh. Minj kakurren dja kadjalyime kunwoybuk duninj dja kunwok kunmak ba bu karriwokmarrkmang.

⁹ Nungka benngengkeng bu benbekeng nuye bininj kore birribongdibeh. Nungka yingkihwokkurmerrinj ba bu maninjmanu kunwok wanjh kadjaldi munguyh munguyh. Wanjh Yawey nadjalngeymakkaykenh, ba bu karrimarnekele.

¹⁰ Bu karrimarnekele nawu Yawey, wanjh kunu karrikodjkuludjaden. Bininj nawu kabimarnewokmarrkmang, wanjh nakka kamayaliwernmen. Mah, wanjh karriidjalburlumen nawu Yawey munguyh munguyh.

112

Nawu Birrimak Bininj.

Psalm 112

¹ Karriburlumen nawu Yawey! Bininj namak nawu kabimarnekele nawu Yawey, wanjh kadjalmarrmarr. Nungka kadjare kabiwokmarrkmang Yawey dja wanjh kadjalwernhnjilngmak.

² Namekbe bininj nuye mawahmawah wanjh birringeykimuk kore kunred bedberre. Dja mak God kabenmarnekurduyime kunmak bedberre rowk.

³ Dja namekbe bininj nuye namud, wanjh kabirrikukenmen dja kabirrikarme kunwern. Bedda wanjh munguyh kabirridjalkurduyime kunmakkenh.

⁴ Yawey kabimarnebolkwolkan nuye bininj nawu namak. Nungka nawu mimkongiweren dja kabenmarnekurduyime kundjalmak birribuyika bininj.

⁵ Bininj nawu kabenbidyikarme birribuyika bininj, dja kaweykan bedberre, wanjh nungka kamang kunmakkenh.

⁶ Nawu namak bininj minj kabarabun munguyh. Birribuyika bininj wanjh kabirridjalburrbun munguyh.

⁷ Nawu namak bininj kabiwernehwoybukwon nawu Yawey bu munguyh. Minj nungka kakelemen bu kunrayek dja kunyid kabimarnebebe.

⁸ Minj mak kakangewarremen dja kakelemen. Nungka kaburrbun bu nawu birriyidko nuye wanjh kabirriyakmen dja nungka kawinhme.

⁹ Namekbe bininj kabenwon kunwern kunmakmak kore nawu birrimarladj bininj, dja djalburudjan. Nungka munguyh kahmimkongiweren, dja birribuyika bininj kabirringeykukenwon.

¹⁰ Dja nawu birriwarre bininj kabirrikurdunan kore kahyime, dja wanjh kabirriyidung. Bedda wanjh kabirrimarneyidmebayerren nuye, dja bonj, minj njale kabirrimarnekurduyime kore kabirridjare.

113

Karriburluburlumen Nawu Kawohrnan Rowk.

Psalm 113

¹ Mah, wanjh karriwernehburlumen nawu Yawey!

Ngudda nawu ngurrimarnedurrkmirri nuye, wanjh ngurridjalngey-burlumen nawu Yawey!

² Ngadjare karriwarlahkenh bininj rowk bu karriburlume nawu Yawey nuye kungey, bolkkime dja mak munguyh munguyh.

³ Ngadjare ngad karriwarlahkenh bininj karringeyburlume kungey nuye Yawey, kunbarnangarra rowk kore kundung kambarrhbunbeh, dja kore karrungyibme.

⁴ Nawu Yawey nadjalkudji kabenmarnewohrnan rowk bininj kore kubolkbubuyika rowk. Nungka nadjalkudji nadjalwernehmakkaykenh dja kabenyurhke rowk kore kaddum heaven.

⁵ Minj nangale nabuyika kabenerohrok nawu Yawey, God kadberre. Nungka wanjh kahyerrkan kaddum yiman king duningh kore kubolkmakkaykenh,

⁶ Nungka kahboddan ba bu kahnan kore kunngol dja kurorre.

⁷ Nungka kabendolkkayhwe nawu birrimarladj bininj kore kundjulng kabirrihni, dja kabenbebeke bininj nawu kabirriyawarren kore kubolkwarre kabirrihni.

⁸ Dja kabenkurme ba kabirridjarrkyerrkan nawu birrikuken dja nawu birrikihkimuk bininj bedberre.

⁹ Nungka mak kabimarnbun daluk ngalbu ngalwalirrngwarre ba bu kabenyawmang, dja kahdi kunjilngmak dorrengh kore kured ngalenggarre.

Mah, wanjh karriburlumen nawu Yawey.

114

God Nawu Yawey Bennghekkeng Bininj Nuye Kore Egyptbeh.

Psalm 114

¹ Bininj nawu Israel benkebmawahmeng birribolkbawong kore kunred Egypt. Bedda nawu Jacob nuye namud wanjh birribebmeng, dja bindibawong kunred bedberre bininj nawu birridjenbuyika.

² Bedda wanjh Judah nuye mawahmawah. Bu bedda birribolkbawong Egypt wanjh birriyimerranj bu djal God nuye bininj. Bedda nawu Israel nuye mawahmawah wanjh birriyimerranj bininj kore djal God kabenmarnewohnawohnan.

³ Bu kunmekbe bolkyimi, wanjh kurrula bikurdunang Yawey dja kelerlobmeng! Dja mak mankabo Jordan borledmerrinj dja wohdurnderrinj kore borlobmirlobmi.

⁴ Dja mak manbu kuwarddekimuk rowk bolkdorrolkang, yiman kayime mayh nawu sheep karrohdolkan!

⁵ Ngudda nawu kurrula, njalekenh yikelerlobmeng? Dja ngudda mankabo Jordan, njalekenh yikebrokborledkerrinj?

⁶ Ngudda manbu kuwarddekimuk, njalekenh ngudda yibolkdoldolkang yiman nawu mayh?

⁷ Mah, ngudda nawu kurorre kore kubolkwarahkenh rowk, wanjh ngurribolkdeldelmen dja nawu Kawohnan Rowk kahdi darnkih! Nungka nawu Jacob nuye God!

⁸ Nungka bolkmarnbom dja bolkbuyikawong manbu kunwardde bu bolkyimerranj manlabbar! Manwardderayek wanjh nungka marnbom yimerranj kungad kore kukku kambobebme!

115

Yawey nawu Nadjalkudji God Duninj.

Psalm 115:1-8

¹ O Yawey, minj nabuyika ngarringeyburlume, dja ngudda yidjalkudji ngundingeyburlume bu munguyh. Dja yuwn bu ngarriburlumerren ngad bininj. Ngudda yidjalkudji nawu munguyh kandjalmarriedjare dja minj munguyh kanbawon.

² Birriwarlahkenh bininj nawu kondah kurorrebeh kabirriyime, "A! Nawu god ngudberre, nakka baleh wam?"

³ God kadberre kahdi kaddum kore heaven, dja kadjalkurduyime kore nungka kadjare.

⁴ Birrimekbe bininj kabirrimarneboddan idols bedberre, wanjh nakka djal yeng. Bininj birrimarnbom bu djalkunbidwi bedberre kore birrikuknameng wirilmurrng silver dja gold.

⁵ Maninjmanu idols wanjh kundang kabirrikarme dja minj kabirriwokdi; kabirrikarme kunmim, dja bonj, minj kabirribolknan.

⁶ Kunkanem kabirrikarme dja minj njale kabirribekkan; kabirrikarme kunkeb dja minj kabirrinome.

⁷ Mahni idols kabirribiddi, dja minj kabirrikarme; mak kundenge kabirrikarme, dja minj baleh kabirrire. Bedda kabirrikarme kunkom dja bonj, minj kabirriwokdi.

⁸ Mah, wanjh ngadjare bininj nawu kabirrimarnbun nawu idols bu bedda wanjh kabirriyimerran karohrok yiman manbu idols bedberre.

Bu Karridjalwoybukwon Yawey.

Psalm 115:9-18

⁹ Ngudda bininj nawu Israel ngunkebmawahmeng, wanjh ngurridjalkangekurrmerren nawu Yawey. Nungka wanjh ngunbidyikarme dja ngunkukdjurrudi ngudberre.

¹⁰ Ngudda bininj nawu Aaron nuye namud, ngurridjalkangekurrmerren nawu Yawey. Nungka wanjh ngunbidyikarme dja ngunkukdjurrudi ngudberre.

¹¹ Ngudda bininj nawu ngurrikele nawu Yawey, wanjh ngurridjalkangekurrmerren nuye. Nungka wanjh ngunbidyikarme dja ngunkukdjurrudi ngudberre.

¹² Nawu Yawey kanburrbun kadberre, dja kanmarnekurduyime kunmak. Nungka kanmarnekurduyime kunmak kadberre nawu Israel kankebmawahmeng. Dja mak kabenmarnekurduyime bininj kore namud nuye Aaron.

¹³ Nawu Yawey kabenmarnekurduyime kunmak bedberre bininj nawu kabirrikele nuye, nawu birringeyyahwurd dja mak nawu birringeykimuk bininj rowk.

¹⁴ Ngadjare nawu Yawey ngunwon birridjalwern bininj nawu yibenborrang dja mak nawu yibenkebmawahme.

¹⁵ Ngadjare Yawey ngunmarnekurduyime kunmak, nungka nawu marnbom kaddum heaven dja mak kondah kurorre.

¹⁶ Kaddum duninh kore heaven wanjh djal Yawey nuye, dja ngaleng kondah kurorre wanjh kanbolkwong ngad nawu djal bininj.

¹⁷ Bininj nawu birridowerrinj minj kabirriburlume nawu Yawey, dja kabirridjalwoyak kore birrikoluy.

¹⁸ Dja ngad wanjh karriburluburlume nawu Yawey bu bolkkime dja mak munguyh munguyh. Mah, wanjh karriburluburlumen nawu Yawey!

116

Bu Karrimarnedjare Nawu Yawey.

Psalm 116

¹ Ngaye ngamarnedjare nawu Yawey! Ngaye ngakayhmeng bu ngayimeng, "Kankongibu!" Dja wanjh nungka nganbekkabekkkang.

² Nawu Yawey nganbekkabekkkang, dja wanjh ngaye ngadjalkayhme bu ngadjawadjawan munguyh kore ngaye ngahdjaldarrkid.

³ Manbu kundowikenh ngankuyinjdukkang! Ngaye ngayimi bu ngakukyuwerrinj kore kumidj, dja ngaye wanjh ngadjalkeleni. Dja ngaye ngawernhnjilngwarrewarreminj.

⁴ Wanjh kunmekbekenh ngaye ngakayhmeng kore kungey nuye nawu Yawey, dja ngayimeng, "O Yawey, kangehkemen!"

⁵ Nawu Yawey nakka kanmarnedjare dja kadjalkurduyime kore djal kunmakkenh. Nahn nawu God kadberre, wanjh mimkongiwern duninh.

⁶ Nawu Yawey kabennahan bininj nawu kabirridjalwoybukwon yiman wurdwurd duninh. Bu kunkareni manbu kunyid nganmarnayekminj ngardduk dja wanjh nungka ngangehkkeng.

⁷ Mah, wanjh ngaye ngayimerren kore kukange ngardduk, “Mah, ngad-jalmalngnehe! Nawu Yawey nganmarnekurduyimeng kundjalmak bu kunwernhkah.”

⁸ Ngudda nawu Yawey, wanjh kanmalngnehekeng kore kundowikenh. Nungka mak kanmimnalkbornduy, dja mak kanwernhkarmeng kore ngakuyinjman kang.

⁹ Dja kunmekbekenh kunu ngaye munguyh nganedjarrkre nawu Yawey kore baleh yarrkka ngare bu ngahdjaldarrkid kondah kurorre.

¹⁰ Ngadjalwoybukwong nawu Yawey. Dja wanjh ngamarneyimeng, “Ngaye wanjh ngakangewarreminj bulkkidj duninj!”

¹¹ Bu ngakangewarreni, wanjh gayimeng, “Bininj rowk wanjh kabir-ridjalkurrehkurren!”

¹² Adju, baleh ngaye ngakarremulewan nawu Yawey bu nungka ngan-marnekurduyimeng kunmak kunwern?

¹³ Wardi ngaye ngangalngwayhke bu ngabowoyi manbu wine bu ngabonguyi, bu ngamanjibun bu nungka ngannegekeng.

¹⁴ Bu ngarrimirndemornnamerrinj bininj nuye dorreng, wanjh ngaye ngawon Yawey kore ngaye ngayingkihwockurrmerrinj nuye.

¹⁵ Nawu Yawey kanjilngwarremen bu nawu bininj nuye kabirridowen.

¹⁶ Ngaye wanjh woybukkih ngudda ke bininj nawu marnedurrkmirri ke, ngudda nawu Yawey! Ngalbu nganyawmey wanjh ngunmarnedurrkmirri warridj. Dja ngudda wanjh kanbongyerrkkeng kore wirlmurrng dorreng ngarrukkayindi.

¹⁷ Nawu Yawey, ngaye wanjh ngabun mayh ngardduk ba bu manjibun ngudda, dja wanjh ngeykayhme ngudda.

¹⁸ Dja kore ngarrimirndemornnamerren ngudda ke bininj rowk, wanjh ngaye ngakurduyime kore ngokko marnewokkurrmerrinj.

¹⁹ Kunmekbe ngakurduyime kore kuberrkakah kurrambalk ngudda ke nawu Yawey, kumekbe kore kukadje Jerusalem.

Mah, wanjh karridjalburluburlumen nawu Yawey!

117

Ngurridjalwern Bininj Rowk, Wanjh Ngurriburlumen Nawu Kawohnan Rowk.

Psalm 117

¹ Ngudda bininj nawu ngurrihni kubolkbubuyika rowk, wanjh ngur-riburlumen nawu Yawey! Ngudda ngurriwarlahkenh bininj rowk nawu ngurridjenbubuyika, wanjh ngurringeyyolyolmen bu nungka Nadjalmak-mak!

² Nungka wanjh kandjalmarnedjare kunkimuk duninj. Nawu Yawey wanjh munguyh munguyh kanmarnekurduyime kore kanmarnewokkur-merrinj kore kunkongi nuye.

Mah, wanjh karridjalburluburlumen nawu Yawey*.

118

Karrimanjibun Nawu Yawey.

Psalm 118

116:10 2 Corinthians 4:13 **117:1** Romans 15:11 * **117:2** “Karridjalburlumen Yawey” karohrok “Hallelujah!” kore Hebrew kunwok.

1 Karrimanbu nawu Yawey. Nungka wanjh nadjalmak dja kandjal-marnedjare munguyh munguyh.

2 Ngad nawu Israel kankebmawahmeng wanjh karriyimen, "Nungka wanjh kanmarnedjare munguyh munguyh!"

3 Bininj nawu Aaron nuye namud, nawu kabirrihdurrkmirri nuye, wanjh bedda warridj birriyimen, "Nungka wanjh kanmarnedjare munguyh munguyh!"

4 Mah, wanjh ngurriwern bininj bu ngurrimarneboddan *nawu Yawey ngurriyimen, "Nungka wanjh kanmarnedjare munguyh munguyh!"

5 Ngaye bu ngakangewarreni duninjh wanjh ngakayhmeng nawu Yawey. Dja nawu Yawey nganwokmey dja nganbekkeng kore ngabongdi.

6 Nawu Yawey ngannahnan dja nganbidyikarme, wanjh minj mak ngakelemen kore bininjkenh. Nawu bininj nakka minj ngandikilekme.

7 Nawu Yawey ngannahnan dja nganbidyikarme. Kaluk ngaye wanjh ngabennan nawu ngarriyidko bininj bu kabirridjalbarabun.

8 Yuwn bu ngurrikelerlobme bu ngurrikurrmerren kore bininj bu ngunbidyikarmmekenh, dja ngaleng, ngurrikelerlobmen dja ngurrikurrmerren kore nawu Yawey bu ngunwernhnahnan.

9 Yuwn bu mak ngurrikurrmerren kore nawu kabirriwohrnawohrnan bininj, dja wanjh ngurridjalkurrmerren kore nawu Yawey, dja wanjh kamak rowk bu ngunkukdjurrudi.

10 Bininj birriwern kore kubolkbubuyikabeh nawu ngarriyidkoni, wanjh ngandidabkeng, ngandiwabminguneng, dja bonj, ngaye ngabenbom rowk kore kungey nawu Yawey nuye.

11 Kurih kurih ngandimarnebebmeng dja bonj, ngaye ngabenbom rowk kore kungey nuye nawu Yawey.

12 Bedda birrimirndewernmerrinj kore ngaye bu ngandibunkeh, dja bonj, werkkwerkk birridjalyakminj rowk. Ngaye ngabenbom rowk kore kungey nuye Yawey.

13 Bedda wanjh ngandikuyinjukkburriweng bu ngarrarnhmankayi, dja bonj, nawu Yawey nganbidyikarmeng.

14 Nawu Yawey nakka wanjh nadjalkudji nganwon nuye kundulkarre, dja mak nadjalkudji ngamarnewayini. Nungka wanjh kannggehking.

15 Bininj nawu Yawey kabenmakwan, wanjh bedda kabirrinjilngmarrmarr kore kabirriyo, bu bedda kabirriwayini nuye kabirriyime, "Nawu Yawey kadjalkurduyime kunkimuk kubidkukun nuye.

16 Nungka naweleng kahkurduyime kunwern dja kunkimuk kunberlkukun nuye dja berlngudjbang duninjh. Kabidwayhme kubidkukun nuye kunkel yak, ba kadjalkurduyime kunwernhkimuk duninjh."

17 Ngaye bonj, minj kunu ngarrown munguyh, dja ngaye ngayawoyh-mimbimen, kaluk ngamulewan Yawey nawu ngayolyolime kore nungka kurdukurduyimi.

18 Nawu Yawey nganduy kunkimuk, dja ngaleng minj nganbawoyi bu munguyh ngakukuyuwirrinj kore kundowikenh.

19 Kandimarnedangmarrhma ba bu ngangimen kore kundjalmakkenh. Ngaye ngadjare ngangimen ba bu ngamanjibun nawu Yawey.

20 Kondah kahdangrurrk kore nawu Yawey kahdi, dja bininj nawu nungka kabenmakwan wanjh kabirringimen.

118:1 1 Chronicles 16:34; 2 Chronicles 5:13; 7:3; Ezra 3:11; Psalm 100:5; 106:1; 107:1; 136:1; Jeremiah 33:11 * 118:4 "kabirrimarneboddan" kunubewu kamenyime "kabirrimarnekele" 118:6 Hebrews 13:6 118:14 Exodus 15:2; Isaiah 12:2

²¹ Ngudda nawu Yawey, ngaye manjbun bu kunmekbekenh ngudda kanbekkang dja kanwokmey ngardduk, dja wanjh ngudda kanngehkeng.

²² Nakudji bininj wanjh nungka yiman kayime manbu kunwardde bu bininj nawu birrirurkmarbnuni birridjalwirrihmeng, wanjh yerrekah nungka wernhkukenminj duninj, yiman manmekbe kunwardde bu bininj kabirrikurme kore kanjdji ba bu kabirrirurkmarbnun bulkkidj.

²³ Kuhni wanjh Yawey kurduyimeng rowk, kore ngad karrikurdunang dja ngad wanjh karrikangebarrhmeng.

²⁴ Bolkkime kuninjkuu kunkodjke nawu Yawey kodjkemarnbom. Karriwarnmakmen dja karrinjinlmgmarrma bu bolkkime kunbarnangarra.

²⁵ Yawey, wardi kanngehkemen, dja kanbidyikarmen ba bu ngarrikurduyime kore ngarridjare.

²⁶ Bininj nawu kamre kore Yawey nuye kunngey, wanjh nadjalmak! Wanjh ngad karriburlumen nuye bu karrihni kore kururk nuye nawu Yawey.

²⁷ Yawey wanjh God duninj. Nungka kanmarnebolkwolkang kadberre. Kunmekbekenh karridjarrkbidbun kore nuye altar dja karrimarnebun mayh kore karrihdi yiwarrudj.

²⁸ Ngudda ngardduk God, dja ngaye wanjh manjbun ngudda! Ngudda ngardduk God, dja wanjh ngaye ngeykimukwon ngudda!

²⁹ Mah, karrimanjbu nawu Yawey, dja nungka nadjalmak, dja mak kandjalmarnedjare munguyh munguyh.

119

Bu Karriwokmarrkmang Nawu Kawohrnan Rowk.

Psalm 119:1-8

¹ Kabirrinjinlmgmak bininj nawu kunmak kabirridjalkurduyime. Bedda wanjh munguyh kabirriwokmang Yawey nuye mankarre.

² Mak kabirrinjinlmgmak bininj nawu kabirrihdjalkarme mankarre nuye dja kabirrihdjalrohroke bu kabirrimarrkmang kore kukange bedberre.

³ Bedda minj kabirrikurduyime kunwarre dja kabirrihdjalle kore nawu Yawey kabolhbukkabukkan.

⁴ Yawey, ngudda kanwong ngadberre kunmayali kunmak ke dja kandibukkabukkang bu ngundiwokmarrkmang munguyh.

⁵ Dja ngaye ngadjare ngakangarayekworren bu djalwokmarrkmang kore ngudda kanwokraykewon.

⁶ Ba kunukka minj ngayeme bu ngaburrbun manbu ngudda ke mankarre rowk.

⁷ Ngaye wanjh burluburlume kunkangewoybuk dorrengh bu ngaborlhborlhme mankarre ke manbu mandjad duninj.

⁸ Ngaye wanjh wokmarrkmang kore ngudda kanbengdayhke warridj. Yuwn bu kanbawon ngadjalkudji ngarri.

Bu Karriwokmarrkmang Yawey Nuye Mankarre Rowk.

Psalm 119:9-16

⁹ Yawey, kunukka baleh bu nawu nayayawurrinj yika mak ngalyawkyawk bu munguyh kabirrikurduyime kunmak? Bedda wanjh ngundiwokmarrkma kore ngudda yiwokdi.

¹⁰ Ngaye wanjh kunkange dorreng ngardduk bu yawahyawan, dja yuwn kanbawon bu ngabawon ngudda ke mankarre rowk, yiman kayime ngabolhmayahme.

¹¹ Mak manbu kunwok ke ngawernhkarrme kore kukange ngardduk ba kunukka minj kunwarre ngakurduyime kore ngudda.

¹² Yawey, ngaye munguyh djalburluburlume, dja wanjh kanbukkabukkan mankarre ke.

¹³ Kore kurrang ngardduk wanjh ngayolyolme manbu mankarre rowk kore ngudda yiwokdanj yiman kurrange ke.

¹⁴ Kore ngahkarrme mankarre ke makka nganmarnbun bu nganjilngmak yiman kayime nawu nawern kunwardde kabinjilngmarnbun bininj nakuken.

¹⁵ Mak ngani dja ngaburrbun ke mankarre kore ngaye ngabekkebekaren munguyh, wanjh ngadjawarren bu baleh kore yidjare ngaye ngare.

¹⁶ Ngaye ngadjalnjilngmak kore ngudda kanwokwon ngadberre, wanjh minj mak ngabengmidjan kore ngudda ke kunwok.

Bu Karrimarrmarr Duninh Kore Karriburrbun Nawu Kawohnan Rowk Nuye Mankarre.

Psalm 119:17-24

¹⁷ Ngaye nawu munguyh ngahdurckmirri kore ngudda, wanjh djawad-jawan bu kanmarnekurduyimen kunmak ngardduk ba bu ngahdarrkiddi kamak rowk dja mak ngawokmarrkmang kunwok ke.

¹⁸ Mak kanmimbayhkemen ba nganan manbu kunwoybuk kunmakkayhkenh kabimdi kore mankarre ke.

¹⁹ Yuwn kanmarnewarlkkan ngardduk manbu mankarre ke. Ngaye yiman ngamarladj dja ngahdjaltrenghehre kondah kurorre.

²⁰ Ngaye munguyh ngadjaldjare wernkih duninh bu ngawernhborlhme manbu mankarre ke.

²¹ Ngudda mandjad yiyime bu yibendung bininj bedberre nawu kabirrihburlumerren dja nawu minj kabirrimarrkmang ke mankarre. Nakka wanjh kadjalwarre duninh bedberre.

²² Ngaye wanjh ngahmarrkmang ke mankarre. Yuwn yibenbawon nawu birriwarre bininj bu ngandijekmiwon dja ngandiwidnan.

²³ Bu bininj nawu kabirrihwohrnahwohrnan ngandiyolyolme bu ngandikurrenwan, wanjh bonj, ngaye nawu marnedurckmirri wanjh ngadjalburrbun manbu kunwok ngudda yiwokkurmeng.

²⁴ Manbu ngudda kanwokbukkabukkan, makka ngannjilngmarnbun dja mak nganbengdayhke ba bu kunmak ngakurduyime.

Bu Karrimarnburren Karriwokmarrkmang Mankarre Nuye Nawu Kawohnan Rowk.

Psalm 119:25-32

²⁵ Ngokko darnkih bu ngadjalkukyo kore kundjulng. Kanwo kunngolek, kore ngudda yiwokkurmerrinj ba bu ngadjaldarrkiddi.

²⁶ Ngaye ngayolyolmerrinj kore baleh ngaye ngahkurduyimeng, dja ngudda kamwokmey! Wanjh kanbukkabukka kore ngudda yidjare.

²⁷ Mak kanbidyikarmen bu ngamayalibayhme kore kunmayali ke nganbukkabukkan. Wanjh ngadjalburrbun kukange ngardduk kore ngudda ke kundulkarre.

²⁸ Ngaye wanjh ngakangewarre yiman darnkih ngarrowen. Kankangemurrngrayekwo kore ngudda ke kunwok kabimbuyindi.

²⁹ Kandurndiwemen ba bu minj ngayawoyhre kore kunwarrekenh. Ngudda nawu yidjalmimkongiwarn, wanjh kanbukkabukkan ngudda ke mankarre.

³⁰ Ngaye ngadjarrngbom manbolh manbu kunwoybukkenh; mak ngakangemarnburrinj ba bu ngaye wokmarrkmang ke mankarre rowk.

³¹ Yawey, ngaye ngawernhkarrme ke mankarre rowk, dja minj ngabarlanhmang. Yuwn kanbawon bu ngayemengalme.

³² Ngudda kankangemarnbom dja ngadjare yiman ngarlobme bu ngadjalmunkekadjung kore ngudda kanwokrayekwon.

Bu Karrijawan Nawu Kawohnan Rowk Bu Kanbukkabukkan.

Psalm 119:33-40

³³ O Yawey, kanbukkabukkan ba bu ngamarrkmang ke kunwok manbu yimulewarrinj, dja ngaye ngahdjalkarrme munguyh munguyh.

³⁴ Mak kanmayalibayhkemen ba bu ngawernhkarrme ke mankarre dja wernhwokmarrkmang ngudda kore kunkange dorrengh ngardduk.

³⁵ Kunukka kanbolhbukkabukka bu ngadjalle kore ngudda yidjare. Kunmekbe ngadjare ba bu nganjilngmarnburren.

³⁶ Mak kankangeborledkemen ba bu ngadjaremen ngakadjukadjung ke mankarre rowk kore kabimbuyindi, kaluk minj ngadjare ngakukenworren.

³⁷ Kanmimborledkemen ba minj ngayawoyhnan nawu yehyeng nawarrehwarre, dja kanngehkemen kore ngudda yiyimeng ba bu ngaye ngadjaldarrkiddi.

³⁸ Ngudda kanmarnewokkurmerrinj ngaye nawu marnedurrkmirri ke. Ngadjare kuhni yikurduyimen ngardduk kore kunmekbe kunwok ke ba bu bininj rowk ngundimarnekelemen.

³⁹ Manbu ke mankarre makka mandjalmak, wanjh ngadjare yidjalwe kunyeme ngardduk manbu ngahkelemen.

⁴⁰ Ngaye ngadjaldjare kunmayali kunwern ke. Ngudda yidjalkurduyime kundjalmak, wanjh kunmekbekenh kanngehke ba bu ngadjaldarrkiddi kore ngudda.

Bu Karrikangekurrmerren Kore Mankarre Nuye Nawu Kawohnan Rowk.

Psalm 119:41-48

⁴¹ Yawey, ngadjare kanbukkabukkan bu kunwern ngudda kanmarnedjare, dja mak kanngehkemen kore ngudda kanmarneyingkihwokkurrmerinj.

⁴² Ngaye ngadjalwokwoybukwon kore ngudda yiyime. Dja kunmekbekenh ngaye ngabenwokdurndiwe bininj nawu kunwarre ngandimarneyime dja ngandidjekmiwon.

⁴³ Kanbidyikarrmen ba ngayolyolme djal kunwoybuk ke. Ngaye ngadjalmarrkebbun kore mandjad kahyime manbu mankarre ke.

⁴⁴ Ngaye ngadjalmarrkmang ngudda ke mankarre bu munguyh-munguyh.

⁴⁵ Ngaye ngarohrokme bu ngaborlhme ngudda ke kunmayali rowk, wanjh kunmekbekenh ngaye ngadjalrengehre kamak rowk.

⁴⁶ Bu ngarrangen kumirrkings bedberre wanjh ngaye djalmulewan, dja ngabenbengdayhke manbu ngudda ke mankarrekenh, dja minj ngayemengalme.

⁴⁷ Ngaye ngadjare bu ngamarrkmang kunwok ke kore kanwokwon, dja kunu ngadjalnjilngmak.

48 Mak ngaburlume kunwok ke manbu kanwokwong. Ngaye yiman ngadjalmarnedjare manbu kunwok ke yiwokdi.

Bu Karriwernhburrbun Mankarre Nuye Nawu Kawohrnan Rowk.

Psalm 119:49-56

49 O Yawey, ngaye ngadjare yidjalburrbun kore ngudda kanmarnewokkurmerrinj ngardduk, ngaye nawu marnedurrkmirri kore ngudda. Ngudda wanjh kankangemarnbom dja kunmekbekenh minj ngaye ngamarrkbaworren.

50 Bu kunrayek kanmarnewernmerren wanjh ngaburrbun ngudda ke kunwok kore kanmarnewokkurmerrinj, wanjh manbu kunwok ke kanwon kundarrkid.

51 Bininj nawu kabirrihburlumerren nakka munguyh ngandiborrkbun, dja ngaye minj ngabawon ngudda ke mankarre.

52 Ngaye ngadjalburrbun mankarre ke manbu ngudda Yawey kanwong bu kunkare duninh, wanjh ngadjalkangemakmen.

53 Dja nawu birriwarre bininj nakka ngandimarnbun bu ngahyiddung bedberre nawu birridjalbawong mankarre ke.

54 Kore baleh yarrkka ngani, wanjh ngamarnewayini kunwok manbu ngudda yiwokdan.

55 Bu kunkakkuyeng ngaye ngeyburrbun ngudda nawu Yawey. Wanjh ngaye ngadjalmarrkmang mankarre ke.

56 Wanjh kuhni ngadjalkurduyime munguyh, bu ngaye ngamarrkmang kunmayali rowk ngudda ke.

Karridjaldjarenin Manbu Mankarre Nuye Nawu Kawohrnan Rowk.

Psalm 119:57-64

57 Yawey, ngaye yiman karrme ke, dja minj njale mak ngadjare. Ngaye ngawokkurmerrinj bu ngawokmarrkmang ke kunwok bu ngudda yiwokdi.

58 Ngaye ngadjare wernkih duninh bu kebnan, dja kunu yawayawan ngudda. Kankongibu kore ngudda kanmarnewokkurmerrinj.

59 Mak ngamayalibekkarren kore baleh ngakurduyimi, wanjh ngamarnburrinj bu ngadjalmarrkmang ngudda ke mankarre manwern.

60 Ngaye kunu ngamarnburren bu djalwerrkwerkk ngadjalkurduyime kore ngudda kanwokwongkenh.

61 Kunubewu nawu birriwarre bininj nakka ngandidukkarrukkang kunyarl dorrengh, dja bonj, ngaye minj ngabengmidjdan manbu mankarre ke.

62 Kaluk kumununburrk wanjh ngaye ngarrollkan dja manjbun ngudda, kunmekbekenh kore mankarre ke manbu kayolyolme djal kunmakkenh.

63 Ngaye djawirna bedberre bininj nawu ngundimarneboddan dja mak kabirridjaldjare kunmayalimak manbu ngudda kanwon.

64 Yawey, ngudda kanmarnedjare ngad ngarriwarlahkenh bininj, yiman bu kunmakmak ke kabolkbarlmikan kondah kurorre rowk! Wanjh kanbukkabukkan ba bu ngawernhborlhme kunwok ke.

Nawu Kawohrnan Rowk Nuye Mankarre Kannjilngmarnbun.

Psalm 119:65-72

65 Yawey, ngaye ngahdjaldurrkmirri kore ngudda yidjare. Ngudda wanjh kanmarneyime kunmak kore ngudda kanmarnewokkurmerrinj.

66 Ngaye ngawoybukwon ke mankarre. Wanjh kanwo kunmayali kunmak ngudda ke ba bu ngakodjkuludjaden.

67 Bu kerrngehkenhni kunrayek bebmihbebmi ngardduk wanjh kunwarre ngakurduyimi, dja bolkkime wanjh ngadjalwoybukwon ke kunwok kore ngudda kanwokwong.

68 Ngudda yidjalmak, dja mak yidjalkurduyime kunmakkenh. Wanjh kanbukkabukka kore ngudda yidjare dja yimulewarren.

69 Bininj nawu kabirrihburlumerren nakka ngandimarnekurrekurren, dja ngaye ngadjalkarrme ngudda ke kunmayali kunwern kore kukange ngardduk.

70 Birrimekbe bininj birridjalbang dja kunkongi yak. Dja ngudda ke mankarre ngannjilngmarnbun.

71 Wanjh kadjalmak ngardduk bu ngaye ngadjakbekkang. Bu kuhni nganmarnekurduyimi wanjh nganmarnbom bu ngawernhbekkabekakang kore ngudda yimulewarrinj kore yidjarekenh.

72 Bu ngudda yiwokdi kore yimulewan mankarre ke, wanjh mahni kunwok ngadjaldjare munguyh. Mahni mankarre ke manwernhmakkaykenh bu karrokme money nadjalwern duninj.

Nawu Kawohnran Rowk Kabendjadme Djal Mandjad Duninj.

Psalm 119:73-80

73 Ngudda kankukmarnbom kunbid ke, wanjh kanwo kunmayali ke ba ngawernhborlhme ngudda ke mankarre.

74 Ngaye ngakangewoybukwong kore ngudda ke mankarre. Wanjh ngadjare bininj nawu ngundimarnebodan bu bedda kabirrimarmarr bu ngaye ngandinan.

75 Yawey, ngaye ngaburrbun manbu mankarre ke makka mandjad kahyime. Kunmekbekenh ngaye ngaye ngaburrbun bu ngudda yidjalwoybuk bu kanwon kunrayekkenh.

76 Dja ngadjalburrbun ngudda kandjalmarnedjare, dja mak kanmarnewokkurmerrinj, wanjh kunmekbekenh ngadjalkangemakmen.

77 Ngaye ngakarrme ke mankarre manbu kannjilngmarnbun, wanjh kankongibu ba bu ngahdjaldarrkid.

78 Dja yibenmarnbu nawu kabirrihburlumerren bininj bu bedda kabirriyeme kunmekbekenh bu birrihyimi ngaye ngahkurreni. Dja ngaye wanjh ngadjalburrbun kunmayali ke.

79 Wanjh bininj nawu ngundimarnebodan, nakka wanjh birrimdurnderrimen kore ngaye. Bedda nawu kabirriburrbun ngudda ke mankarrewern.

80 Ngaye ngadjare ngawokmarrkmang rowk manbu kunwok kore kanwokwong. Dja ngawarnyak bu ngayemengalme kore ngudda.

Bu Karkikayhme Dja Karridjawan Nawu Kawohnran Rowk Kanbidyikarmekenh.

Psalm 119:81-88

81 Yawey, ngaye yiman ngakangengudjwarreminj kore madbuhmadbun ngudda bu kangehke, dja bonj, ngaye ngadjalkangekurmerrinj kore kunwok ke.

82 Mak ngamimwarremen bu ngahyawan munguyh nawu kanberrebom. Ngaye djawan ngayime, "Yiddok werrkwerrk ngudda kanbidyikarme?"

⁸³ Ngaye madbun ngudda dja ngadjalkukwarremen dja mak ngakange-warremen. Dja bonj, yuwn bu ngaye ngabengmidjdan ngudda ke kunwok kore yimulewam.

⁸⁴ Yiddok kunkuyeng bu madbuhmadbun? Baleh kabolkyime bu yibenbun nawu ngaye ngandiwidnan?

⁸⁵ Bininj nawu kabirrihburlumerren wanjh kabirriwirrihme mankarre ke. Dja kabirrikarremarnburren ba yimankek ngaye ngandidarrkidmang.

⁸⁶ Ngaye ngadjalwoybukwon kunwok kore ngudda kanwokrayekwon. Dja kanbidyikarmen! Birrimekbe bininj nawu kabirrihkurren nakka ngandiwirrihme bu djal burudjang.

⁸⁷ Bedda darnkih ngandikuyinjakwong, dja bonj, ngaye minj ngabeng-midjangimeninj ngudda ke mankarre rowk.

⁸⁸ Ngudda kandjalmarnedjare, wanjh kunmekbekenh kannahnan ba bu ngadjaldarrkid. Wanjh ngaye wokmarrkmang kore ngudda yiwokdi.

Manbu Mankarre Nuye Nawu Kawohran Rowk Minj Kayakmen.

Psalm 119:89-96

⁸⁹ Ngudda Yawey, ngudda ke kunwok kadjaldi munguyh dja minj kadjobme. Makka kahdjaldi munguyh munguyh kore kaddum heaven;

⁹⁰ Ngudda yidjalwoybuk munguyh munguyh kore yiwokdi, dja minj yikowe. Ngudda yibolkmarbom kondah kurorre. Ngudda yimarnbom, dja makka kahdjaldi.

⁹¹ Manbu mankarre ke kadjalyirriyo bolkkime dja munguyh. Yehyeng rowk ngunmarnedurrkmirri.

⁹² Ngudda ke mankarre nganjilngmarnbun ba bu ngamarrmarr dun-inj. Dja bu burrkyak, wanjh kunukka bu kunyid nganmarnewernmer-rinj, wardi ngarowmeninj.

⁹³ Ngaye minj ngabengmidjdan manbu ngudda ke kunmayali rowk, dja ngudda kanmimbiwong kore ngaye wokmarrkme.

⁹⁴ Kannggehkemen dja ngaye wanjh ngudda ke bininj. Ngaye wanjh munguyh ngadjare ngaborlhme mankarre manwern ngudda ke.

⁹⁵ Nawu birriwarre bininj ngandikunidi ba bu ngandibun, dja ngaye ngahdjalburrbun manbu ngudda ke mankarre manwern.

⁹⁶ Nganan bu kondah kurorrebeh wanjh kayakayakmen rowk. Dja manbu ngudda mankarre ke wanjh kadjaldi munguyh, dja minj munguyh kayakmen.

Ngaye Ngamarnedjare Mankarre Nuye Nawu Kawohran Rowk.

Psalm 119:97-104

⁹⁷ Ngadjare munguyh ngahnan ngudda ke mankarre. Mak ngahdjalbur-rbun munguyh bu kunbarnangarrakuyeng.

⁹⁸ Manbu ngudda kanwokrayekwong, wanjh ngahdjalburrbun bu munguyh. Mak mahni kunwok ke nganmayalimarnbun bu ngamay-aliwernmen. Wanjh ngabenyurrhke kunmayali bedberre bininj nawu ngarriyidko.

⁹⁹ Ngaye ngadjalburrbun ngudda ke mankarrebubuyika ba bu ngawern-hburrburkbekkan. Wanjh ngayimerran bu ngabenyurrhke bininj nawu ngandihbukkan.

¹⁰⁰ Ngaye wokmarrkmang kore ngudda kanbukkan kunmayali ke, wanjh kunmekbekenh ngaye ngamayalimak dja ngabenyurrhke nawu dabborrabbolk.

101 Ngaye ngadjaldjare wokmarrkmang ngudda ke kunwok, wanjh kumekbekenh ngaye ngamarnburrinj ba bu minj ngare kore kunwarrekenh.

102 Ngudda wanjh nguddabidju kanbukkabukkang, wanjh minj ngabawoyi mankarre ke.

103 Ngudda ke kunwok, wanjh makka manmanjmakaykenh kore ngahdangkenhni, dja nawu mankung nakka walakkih manjmak.

104 Manbu mankarrebubyika ke nganmayaliwon manbu kunmakkenh, dja ngadjalwarnyakmen ngare kore birriwarre bininj kabirrihbolhkadjung.

Nawu Kawohnan Rowk Nuye Kunwok Nganmarnebolkwolkan.

Psalm 119:105-112

105 Yawey, ngudda ke kunwok yiman kayime torch rerrih bu ngandengewolkan dja mak ngudda kanmarnebolkwolkan ngardduk kore ngare dja mak ngudda nganmikan.

106 Ngadjalkurduyime kore ngayingkihwokkurrmerrinj bu ngadjalwokmarrkmang mankarre ke. Kuhn ni ngawokkurrmerrinj, wanjh ngadjalyime.

107 Korroko bu ngahdjaldjakbekkani bu kunkimuk. Yawey, kanmimbiwo kore kunwok ke kabimbuyindi.

108 Mak kankayhmima bu ngaye burluburlume kurrangbeh ngardduk, dja mak kanbukkabukka ngudda ke mankarre.

109 Ngaye ngahdjalarredong munguyh dja wardi ngarrowen, dja bonj, minj ngabengmidjan manbu kunwok ke.

110 Nawu birriwarre bininj kabirridjare ngandidarrkidmang, dja ngaye minj ngabawoyi kore ngudda kanbukkabukkangkenh.

111 Ngahdjalkarrme munguyh munguyh manbu ngudda ke mankarrebubuyika, dja kumekbekenh ngaye ngawernhnjilngmak kore kukange ngardduk.

112 Mak ngaye ngadjare ngahdjalarhrokme munguyh ngakurduyime kore ngudda yidjare, wanjh kalukburrk bu yerrekah wanjh ngayirrowen.

Nawu Kawohnan Rowk Wokkurrmerrinj Kadberre.

Psalm 119:113-120

113 Ngabenwidnan nawu minj ngundimarnedjare duninj, dja ngaye ngamarnedjare duninj manbu mankarre ke.

114 Ngudda wanjh kanahan dja mak kankukbalhme. Wanjh ngaye ngamarrkbaworrinj kore kunwok ke.

115 Ngurriray, ngudda nawu ngurriwarre bininj! Yuwn bu karriraworen dja ngaye ngadjalkurduyime kore God ngardduk nganwokwon.

116 O God, kanbidyikarrmen dja kannahnan kore ngudda kanmarneyingihwokkurrmerrinj ba bu ngaye ngadjaldarrkid. Yuwn kanbawon bu ngadjalmarrkwarremen dja wardi ngamarrkbaworen.

117 Mak kankarren ba kunukka ngadjalni kamak rowk. Dja mak munguyh ngadjalburrbun kore ngudda yidjare.

118 Ngudda yibenbodmewon bininj rowk nawu minj kabirridjalbawon mankarre ke. Bedda kabirrimayalimarnburren dja bonj, bedda kabirridjalbarabun.

119 Mak yibenburriwe nawu birriwarre bininj rowk yiman kayime rubbish karrihburriwe. Wanjh kumekbekenh ngaye ngamarnedjare kunwok manbu ngudda yimeng bu kanbengdayhkeng.

¹²⁰ Ngudda wanjh kankelehme dja ngaye yiman ngakukdeldelme kore ngudda. Wanjh kumekbekenh ngaye ngakele dunijnh bu ngudda kandjadme ngad bininj rowk kore ngudda ke mankarrekeh.

Ngadjare Nawu Kawohrnan Rowk Bu Kanbukkabukkan Nuye Mankarre.

Psalm 119:121-128

¹²¹ Ngaye ngadjalkurduyimeng kore djal kunmakkeh dja mak kore kunwoybuk dorreng. Wanjh yuwn kanbawon kore bininj nawu ngarriyidko ngandikuniyo ba bu ngandibun.

¹²² Ngadjare bu ngudda kannahnan, ngaye nawu ngahdurrrkimirri ke, dja yuwn yibenbawon bininj nawu kabirrihburlumerren bu yiman ngandibongkarrme.

¹²³ Ngaye ngamimwarrehwarreminj bu ngaye kunkuyeng boyenmadbun ngudda bu yimre dja kannggehke. Wanjh ngadjare kannggehkemen kore yiyingkihwokkurrmerrinj.

¹²⁴ Kanmarnekurduyimen kore ngudda munguyh kandjalmarnedjare, dja mak kanbukkabukka kore ngudda yidjare ngaye ngakurduyime.

¹²⁵ Ngaye nawu ngahdurrrkimirri ke. Wanjh kanmayalibayhkemen ba ngawernhmenmenbukkan manbu mankarrebubuyika ke.

¹²⁶ Ngudda Yawey! Bolkkime wanjh yidjalkurduyimen bu yibenbu birrimekbe bininj nawu kabirribakke ngudda ke mankarre.

¹²⁷ Ngaye wanjh ngadjare bulkkidj dunijnh bu bekkabekkan kore ngudda kanwokrayekwon.

¹²⁸ Mak ngaye wokmang ke kunwok rowk kore kanbengdayhke, dja ngawidnan manbu manbolh kore nawu birriwarre bininj kabirribolhkadjung.

Nawu Kawohrnan Rowk Kanbolhbukkan Manbolh Kore Ngare Dja Mak Kannggehke.

Psalm 119:129-136

¹²⁹ Ngudda bu yiyolyolmerren, wanjh mahni kunwok mandjalmak dunijnh! Wanjh kunmekbekenh ngaye ngakarrme maninjmanu kunwok ke kore kukange ngardduk.

¹³⁰ Bu bininj ngundiwokbekkan kore ngudda yiwokdi, wanjh mahni kunwok kabenmayalibayhke bininj rowk ba bu kabirriburrrkburrrbekkan kore ngudda yidjare kabirrimenmenmang.

¹³¹ Ngaye ngadjare bulkkidj dunijnh ngabekkan ke mankarre. Dja kumekbekenh ngaye ngokko darnkih ngahngolekwarremen.

¹³² Yimborledmen bu kannan dja kankongibu yiman bu ngudda munguyh yibenmarnekurduyime bedberre bininj nawu kabirridjare ngudda ke kunngey.

¹³³ Mak kanmika kore manbolhmak ba minj ngamankan. Kanbidyikarremen kore ngudda kanmarnewokkurrmerrinj ba bu kunwarrekeh minj nganbongname.

¹³⁴ Kannggehkemen kore bininj nawu wardi ngandibun ba bu ngaye ngadjalburrbun munguyh ngudda ke kunmayali.

¹³⁵ Mak kankongibu ngaye nawu marnedurrrkimirri ke, dja kanbukkabukka ngudda ke mankarre rowk.

¹³⁶ Birridjalwern bininj ngundiwokburriwe kore ngudda yibenbengdayhke mankarrekeh ngudda ke, wanjh kunmekbekenh ngaye nganalkbun wernkih dunijnh.

Nawu Kawohrnan Rowk Nuye Mankarre Wanjh Manmakkaykeh.

Psalm 119:137-144

137 Nawu Yawey, ngudda munguyh yidjalkurduyime kunmak, mak manbu mankarre manwern ke makka djal mandjad duninjh.

138 Manbu mankarre manwern ngudda yimarnbom makka mandjad duninjh, mak ngudda yidjalkarremarnbu kunwoybuk ke duninjh.

139 Bininj nawu ngandiwirrihime wanjh bedda ngundidjalwokbengmid-danj kore ngudda yiwokdi. Wanjh ngaye ngawernhkangewurhlhme bu kunmekbekenh.

140 Ngudda yiwokkurrmerrinj kunwok ke, makka djal woymbukkih bu kunwoybuk, wanjh ngaye nawu ngahdurrkmirri ke ngadjare duninjh maninjmanu kunwok.

141 Ngaye minj ngakuken, dja birribuyika bininj ngandiwidnan. Dja bonj, ngaye minj ngabengmidjdangimeninj kunwok ke.

142 Mak manbu kunmakmak ke makka munguyh kahdjalle dja minj kadjobme. Mak manbu kore kanbukkabukkang ngadberre makka wanjh mandjalwoybuk.

143 Bolkkime wanjh kunrayek bebmi ngardduk dja ngaye wanjh ngakangewarre. Nakka bonj. Ngaye ngahdjalkarrme kunwok ke kore kukange ngardduk, dja manbu ngannjilngmarnbun.

144 Ngudda yimulewarren, dja mahni kunwok ke wanjh mandjad duninjh dja kadjaldi munguyh munguyh. Mah, kanbukkabukka ba bu ngamenmenmang kore ngudda, wanjh kunu kanmimbiwon.

*Nawu Kawohrnan Rowk Kankayhmibekkan Kore Karridi.**Psalm 119:145-152*

145 Nawu Yawey, kanbekka bu ngakayhme kukange dorreng bu djawahdjawan. Ngadjare kanwokmang ba bu ngadjalkarrme mankarre rowk ngudda ke.

146 Kankayhmibekka! Kannghehkemen ba bu ngadjalwokmarrkmang kunwok kunwoybuk kore ngudda yiwokdi.

147 Kumkabel djarreh wanjh ngaye ngarrolkkan bu ngakayhme, dja djawan bu kanbidyikarrme ba bu ngaye ngadjalkangekurrmerren kore kunwok ke.

148 Minj mak ngameyo kumununkuyeng dja ngahdjallorrhmiyo ba bu ngadjalburrbun kore yiwokkurrmerrinj.

149 Ngudda kanhmarnedjare wanjh kunmekbekenh kanwokbekka! Nawu Yawey, ngudda kandjadme bu djal mandjad, wanjh kunmekbekenh kandarrkidwon.

150 Bininj nawu ngarriwirrihime kabirridjare kunwarre nganmarnekurduyimerran, dja bedda kabirrimre darnkih. Bedda minj kabirridjare kabirrire darnkih kore ngudda ke mankarre!

151 Dja ngudda nawu Yawey yidjaldarnhdi kore ngaye. Mak manbu mankarre ke makka mandjalwoybuk rowk.

152 Bu kernnghekenh duninjh ngaye ngaborlhmi manbu ke kunwok kunwoybuk manbu yiwokdi, dja kahdjalle munguyh munguyh.

*Nawu Kawohrnan Rowk Nakka Mimkongiwern Duninjh.**Psalm 119:153-160*

153 Yawey, ngaye minj ngabengmidjdangimeninj mankarre ke. Wanjh kannu ba yinan kunrayek nganmarnewernmerrinj dja wanjh kannghehkemen!

154 Ngudda kanmulewa dja kanmakwan ba bu kanbebkemen kore ngahbongdi. Ngudda kanmarnewokkurmerrinj ngardduk, wanjh kunmekbekenh kandjaldarrkidwo.

155 Nawu birriwarre bininj kabirridi djarreh kore ngudda minj yiben-gehke. Bedda minj kabirridjare ngudda ke mankarrebubuyika.

156 Nawu Yawey, ngudda yimimkongiwern duninj! Kanmimbiwo kore mankarre ke kahyime.

157 Birriwern nawu ngariyidko kabirridjare ngandibun, dja manbu ngudda ke kunwok kunwoybuk, makka minj ngabawon.

158 Ngagenwidnan duninj bininj nawu minj woybukkih ngundidjalwoy-bukwon. Bedda minj ngundiwokmarrkmang kore ngudda kanwokrayek-wong ngad bininj rowk.

159 Yiburru ngaye ngadjare duninj kunmayali ke. Ngudda kanmarned-jare wanjh kunmekbekenh kandjalmimbiwo.

160 Makka mandjalwoybuk rowk manbu kunwok ke, mak manbu mankarre rowk ngudda ke, makka mandjaldjad duninj dja minj kad-jobme munguyh munguyh.

Ngaye Ngakangekurrmerren Kore Kunwok Nuye Nawu Kawohrnan Rowk.

Psalm 119:161-168

161 Nawu kabirriwohrnawohrnan bininj nakka ngandidjalwirrihme bu djal burudjang. Dja ngaye ngakangedeldelme kunkelekenh bu ngabur-bun ngudda ke kunwok.

162 Ngaye nganjilngmak duninj bu ngaye ngabekkan ngudda ke kun-wok, yiman kayime bininj nawu kakukngalke money nadjalwern duninj.

163 Ngabendjalwidnan bininj nawu kabirrihkurren dja ngaye ngadjald-jare mankarre ke.

164 Bu ngarohrokme seven times bu kunbarnangarrawern ngaye djal-burluburlume manmekbekenh mankarre mandjad duninj ngudda ke.

165 Bininj nawu kabirridjare mankarre ke wanjh munguyh kabirrihd-jaldi kunmodmikenh dorreng. Nakka wanjh minj njale kabenbungkar-rgbun.

166 Nawu Yawey, ngaye madbuhmadbun bu kannggehke. Ngaye djalwok-marrkmang kore ngudda kanwokrayekwong.

167 Ngaye ngahkarrme kunwok kunwoybuk ke kore kukange ngardduk. Ngaye ngadjare wernkih duninj mahni kunwok ke.

168 Ngudda wanjh kankurdunan munguyh kore baleh yarrkka ngayime. Ngaye wanjh ngamarrkmang ngudda ke kunwok kunwoybuk, dja mak ngudda ke kunmayali.

Ngaye Ngaburlume Nawu Kawohrnan Rowk Dja Nungka Ngandarrkid-won.

Psalm 119:169-176

169 Yawey kankayhmibekka bu ngaye ngahdi yiwarrudj. Ngudda kanwokkurmerrinj wanjh kunmekbekenh ngadjare kanmayalibayhke.

170 Mak kankabekabekka bu yiwarrudj ngahdi dja djawahdjawan. Ngudda yiwokkurmerrinj dja kunmekbekenh kannggehkemen.

171 Ngudda kanbukkabukkan mankarre rowk ngudda ke, wanjh kun-mekbekenh ngaye burluburlume kore kurrang ngardduk.

¹⁷² Ngaye ngaburrbun kore ngudda kanwokrayekwon wanjh mandjad rowk, dja kunmekbekenh ngawayini kundjen ngardduk. Ngawayini bu ngamulewan ngudda ke kunwok.

¹⁷³ Ngaye ngakangekurrmerrinj kore ngudda kanwong kunmayali ke. Dja holkkime yimray kanberlma bu kanbidyikarmekenh.

¹⁷⁴ Yawey, ngaye ngadjaldjare bu ngudda kannggehke. Mak ngadjare ngudda ke mankarre manbu kannjilngmarnbun.

¹⁷⁵ Kankangemimbiwo ba ngaye burluburlume, mak ngadjare mankarre ke bu nganbidyikarme.

¹⁷⁶ Ngaye ngawarrebore manbolhbubuyika yiman kayime sheep nawu mayahmeng. Dja kanyawa! Kanngalkemen, dja ngaye minj ngabengmidjdangimeninj manbu kunwok kore ngudda kanwokwong.

120

Bu Karriджawan Yawey Nawu Kannggehke.

Psalm 120

¹ Ngaye ngakarrmi kunyid kunwern, dja ngamarnekayhmeng nawu Yawey. Wanjh nungka nganwokmey!

² O Yawey, kannghekemen kore bininj nawu kabirrikurrekurren dja nawu ngandikowe.

³ Dja ngudda bininj nawu ngurrikurrehkurren, baleh ngurriyime bu God ngunmarnekurduyime ngudberre? Mah, ngurridjawanren bu baleh kakurduyime bu ngundung dja ngunbun ngudberre.

⁴ Kunubewu ngundulubun bonarra dorrengh, yiman kayime soldier ngundulubun kundulkwi kebmirrkamak dorrengh. Dja wardi ngunbarrk-bun ngudberre manbu kunyirrke dorrengh!

⁵ Kawarre duninj! Dja ngaye ngarridjarrkdi bininj birriwarre kore kunbolk Mesech, dja mak kore kunbolk Kedar.

⁶ Ngaye kunkuyeng gayerrkani bu ngarrihdjarrkni bininj nawu minj kabirridjalwarnyak kunmodmikenh.

⁷ Ngaye wanjh ngadjare kunmodmikenh, dja bedda, burrkyak. Bedda kabirridjaldjare kunyid dja kabirriyawan bu kabirriburren war.

121

Nawu Yawey Nadjalkudji Kannahnan.

Psalm 121

¹ Ngaye ngabolknan kaddum kore kuwarddekimuk, ngabolkyawan bu ngaye ngadjawarren yiddok nangale nganbidyikarme.

² Nawu Yawey, nungan nadjalkudji nganbidyikarme, nungka nawu bolkmarnbom kore kunngol kaddum dja mak kondah kurorre.

³ Minj ngunbawon bu yirrengeyirrebme! Nungka minj kahmimke nawu ngundjalnahnun munguyh.

⁴ Woybukkih, nungka nawu kabennahnun bininj nawu Israel benkebmawahmeng, nakka minj kahmimke, dja minj mak kakodjkeyo.

⁵ Yawey nungan ngunnahnun dja kahdarndi kore kubidkukun ke. Nungka yiman ngundjurlawon.

⁶ Wanjh manbu kundung minj ngunwarrewon bu barnangarra, dja mak dird warridj minj ngunbun bu kukak.

⁷ Yawey ngunwernhnahnun, dja minj njale nawarre ngunbun, dja ngundjaldarrkidnahnun ba minj yirrowen.

⁸ Mak Yawey ngundjurrukan bu ngunehdjarrkre kore baleh yarrkka yire dja yirrurndeng, bu bolkkime dja munguyh munguyh.

122

Bu Karribidbun Kore Kururrk Nuye Nawu Kawohrnan Rowk.

Psalm 122

¹ Yikahwi bininj ngandimarneyimeng, “Mah! Wardi karrire kore Yawey nuye kunrurrk!” Wanjh ngaye nganjilngmakminj!

² Bolkkime ngad ngarridanginj kondah kore kukadje Jerusalem. Ngar- ringimeng kore kawarnamyo dangmarrhmiyindi ngarre.

³ Jerusalem wanjh manbolkmakkaykenh kunredkimuk Dja nawu bir- yiyidko bininj minj kabirrimngimen kore kawarnamyo mankimuk ngarre.

⁴ Bininj nawu namudbubuyika nuye Yawey wanjh kabirrimbidbun kabirrimornnamerren kondah kore Jerusalem ba bu kabirridjalmanjbun nawu Yawey, bu kunmekbekenh nungka benyingkihwokrayekwong bed- berre nawu Israel benkebmawahmeng.

⁵ Bu kunkare wanjh kings nawu bindiwohrnawohrnani Israel birriyer- rkanj kondah kore King David nuye kunrurrk ba bu bindidjadmi bininj bedberre.

⁶ Ngad wanjh karrbenmarnedi bininj nawu kabirrihni kore Jerusalem, bu karridjawan God kabenwon kunmodmikenh, wanjh karriyime, “Ngad- jare God ngunwon kunmodmikenh nuye ngudda bininj nawu ngurridjare ngurringime kore Jerusalem.

⁷ Mak ngadjare God ngunwon kunmodmikenh ngudda bininj nawu ngurrihni kore Jerusalem, dja mak ngunnggehke ngudda bininj nawu ngurrihni kururrkimuk kumekbe.”

⁸ Ngabenburrbun nawu namud ngardduk dja mak nawu djawirna ngardduk, wanjh ngayawoyhdi yiwarrudj, dja ngayime, “Ngadjare God ngunwon kunmodmikenh nuye, ngudda nawu ngurrihdi kore Jerusalem!”

⁹ Dja mak ngaburrbun kukadje nuye God kadberre nawu Yawey, wanjh ngadjaldi yiwarrudj, dja ngadjawan God bu kabolknahnan Jerusalem, dja mak ngadjare kabenmarnekurduyime kunmak bedberre nawu kabirrihni kumekbe.

123

Ngad Ngundimadbun Ngudda Nawu God Ngadberre.

Psalm 123

¹ Ngaye ngabolknan kaddum kore ngudda yihni kubolkmak heaven. Ngadjare nan ngudda nawu king duninj, kore ngudda yiyerrkan bu yidjalwohrnan rowk.

² Ngad wanjh ngundimadbun bu kannahnan dja kanbidiyikarrme. Ngad ngundibidnan ke yiman kayime bininj kabirribidnan nawu kawohrnan rowk bedberre nawu kabirrimarnedurrkmirri. Yoh, ngad wanjh ngundi- madbun ngudda Yawey nawu God ngadberre, yiman kayime ngalyawk kabibidnan kubid ngalenggarre ngalbu kabimarnewohrnan kore ngaleng kabimarnedurrkmirri. Ngad wanjh ngundidjalmadbun kaluk bu yerrekah ngudda kanwernehkongibun ngadberre.

³ Ngudda nawu Yawey, wanjh kankongibu! Kandjalkongibu ngad, dja birriwern bininj nawu birriwarre wanjh ngandiwirrihme dja ngandiyoly- olme ngadberre.

⁴ Nawu birrikuken bininj warridj wanjh munguyh ngandimarnedjekme! Mak bininj nawu kabirridjalburluburlumerren wanjh kunkuyeng ngandidjalnjirrhmiwon.

124

Nawu Kawohrnan Rowk Kanbidyikarmeng.

Psalm 124

¹ Ngad nawu Israel kankebmawahmeng, wanjh bolkkime karriyime, "Nawu Yawey kanbidyikarmeng dja wanjh karriwinhmeng!"

² Woybukkih nungka kanbidyikarmeng bu bininj birriwarre wanjh kandinjirrhmiwong kadberre, dja birridjareni kandibuyi.

³ Bedda kandiwernduy, dja birridjareni kandibularrbuyi, yiman mayh kandidatarrkidmayi dja kandikuknguyi.

⁴ Ngad yiman karrikebngakmeninj kore kundjurrh kankayi, dja karriy-ibmeninj kandji kore kukku.

⁵ Karridjalyakmeninj kore kundjurrh kunkimuk kankukburriweyi. Dja bonj, nawu Yawey kanbidyikarmeng dja kanbidyikarmeng kadberre.

⁶ Mah, wanjh karridjalmanjbun nawu Yawey! Nungka kanbebkeng kore bedda kandikanjdjalkmayi kunyidme bedberre.

⁷ Nawu Yawey kanbebkeng kadberre dja karribebmeng yiman mayh-mayh kabebme karrolkan kore bininj kakuyinbongkarmme.

⁸ God nawu kangeyyo Yawey wanjh marnbom kunngol kaddum dja mak kondah kurorre. Nungka wanjh nadjalkudji kandjalbidyikarmme kadberre bu munguyh.

125

Ngad Bininj Nawu Karrikurrmerren Kore Nawu Kawohrnan Rowk Wanjh Karridjalni Bu Djal Kamak.

Psalm 125

¹ Bininj nawu kabirridjalwoybukwon nawu Yawey, bedda wanjh kabir-rikangerayekmen dja kabirrihdjalni munguyh, yiman kayime kunward-dekimuk Zion manbu minj njale kabolkrokayhwe ba bu kabolkwodjor-rhmiyindan.

² Nawu Yawey kabennahnan bulkkidj duninh nawu bininj nuye, bolkkime dja mak munguyh munguyh, yiman kayime kunwarddekimuk kabolkwakbuyingun kukadje Jerusalem.

³ Nungka minj kabenbawon nawu birriwarre bininj bu kabindi-marnewohrnan nawu birrimak bininj, kore kunbolk manbu Yawey benbolkwong. Bu birriwarre bininj kabirribolkwohrnan munguyh, wanjh kunukka kunubewu kabindibalbukkan nawu birrimak bininj bu bedman-wali kabirribalkurduyime kunwarre.

⁴ Ngudda nawu Yawey, yidjalkurduyimen kunmak bedberre bininj nawu kunmak kabirrikurduyime, dja nawu kabirridjaldjare kundjalmak kore kukange bedberre.

⁵ Dja bedda nawu kabirrikangeboredkerren kore kunwarrekenh kabir-rikurduyime, wanjh bedda kabirriraworren birribuyika birriwarre bininj warridj. Kaluk Yawey kabenkukburriwe rowk.

Mah. Ngadjare bininj nawu Israel benkebmawahmeng kabirrikarmme kunmodmikenh nuye.

126

Karriwayinin Kore Nawu Kawohrnan Rowk Kannghekkengkenh.

Psalm 126

¹ Bu Yawey kanbebkeng kadberre kore karribongdibeh, dja kandurndiweng kore kunred Zion, wanjh ngad karriyimi yiman karridjalbukirrinang bu kamak rowk.

² Karrimarrmarni dja karridjaldjekmeng bu munguyh. Karriwayini mankong manbu kunnjilngmakkenh. Bininj nawu birridjenbuyika, wanjh kandiyolyolmeng kadberre dja birriyimeng, "Nawu Yawey benmarnekurduyimeng kundjalwern kundulkarre nuye dorrengh!"

³ Woybukkih, nungka nawu Yawey kanmarnekurduyimeng kunkimuk, dja karridjalwernhnjilngmakminj duninjh.

⁴ O Yawey, kanwon kunmak nawu ngarriwarrhmeng, kanmarnbun ba ngarriyimerran yiman kayime mankabo kaborlobme kore kunbolk kubolkdarleh kabolkngeyyo Negev.

⁵ Bininj nawu manmim kaburriwe bu karrudjeng kurorre, wanjh kunubewu kanalkkihre bu karrurkmirri. Kaluk yerre bu kadjolengmang manwern nuye, wanjh nungka kawayini dja kahmarrmarr duninjh.

⁶ Yoh, bininj nawu kabirrire kabirrikan manmim bu kabirridudjeng, kabirrinalkihre dorrengh, wanjh kabirrimdurdeng kabirrimkan manbu mandjoleng manwern, dja wanjh kabirriwayini bu kabirrinjilngmak.

127

Bu Karribidbun Kuwarddekimuk.

Psalm 127

¹ Bu bininj nakka kabirrirurrkmarnbun, wanjh makka kawarrhme, dja bonj, birribengwarreworinj. Dja bu Yawey karurrkmarnbun kunurrk, wanjh kadjaldi munguyh. Bu djal bininj kabindimarnenahnan kunred kunkimuk kore rurrkmirnderri kabirriyo, wanjh bonj, kabirridowe rowk nawu kabirrihni. Dja bu Yawey nungan kabolknahnan bedberre, wanjh kamak rowk.

² Bininj nawu kakabeldong dja kadjaldurrkmirri kunbarnangarakuyeng dja mak kunkakkuyeng dja minj kunkuyeng kakodjkeyo, wanjh wardi minj kamang kore kadjare. Dja Yawey kabikodjkeykurrme bininj nawu kabimarnedjare.

³ Yawey kabimarnbun bininj bu kabenbornan bebeywurd, yiman kayime kunmakmak kabiwon.

⁴ Bininj nawu kabenbornan bebeywurd bu nungka dja yawurrinj, wanjh nakka kabenkarme bebeywurd yiman kayime kakarme army nuye.

⁵ Bininj nawu kabenbornan birriwern bebeywurd, wanjh kanjilngmak duninjh. Bu kabirriburren nawu birriyidko bedberre, wanjh kabirriwinjhme dja kabindidurndiwe.

128

Bininj Nawu Kabimarnekele God Wanjh Kadjalnjilngmakmen.

Psalm 128

¹ Ngudda bininj bu yimarnekele Yawey dja mak yibolhkadjung kore Yawey ngunbukkan, wanjh ngudda yidjalmarrmarr duninjh!

² Kaluk Yawey ngunmarnekurduyime kunmak, dja yingun manme manbu ngudda ke kore yirurrkmirri kubid ke, dja ngudda yidjalni kamak rowk.

³ Ngallbininj kobeng ke, wanjh kakurduyime kunmak rowk kore ngunehdi, dja bebeywurd ke wanjh kabirridjalmak rowk kore ngurridjarrkungun manme.

⁴ Bu kuhni nawu Yawey kabenmarnekurduyime bininj rowk nawu kabirrikelemen nuye.

⁵ Mah, ngadjare nawu Yawey ngunmarnekurduyime kunmak ke munguyh munguyh kore Zionbeh, ba bu yibolknan kukadjeh Jerusalem kadjalbolkmak kunbarnangarra rowk bu yidjaldarrkiddi.

⁶ Dja warridj yidjaldarrkid kunkuyeng ba bu yibendarrkidnan mawah-mawah ke.

129

Bu Bindiwidnani Bininj Nawu Israel Benkebmawahmeng.

Psalm 129

¹ Ngudda nawu Israel ngunkebmawahmeng ngudberre, yiddok nawu ngurriyidko ngundibuni munguyh bu ngurriyahwurdni dja mak bu bolkkime?

² Yoh. Bu ngayawurrinjni, wanjh ngandibuni kunkimuk nawu ngandiwidnani, dja bonj, minj ngandidjalbularrbuyi.

³ Bedda wanjh ngandibodmeyilkyilkbom, dja ngandimarbnom kunbulidj kunwern kore kubodme ngardduk ba kakukyime yiman kore bininj kabolkyilkbun kabbal.

⁴ Dja Yawey nawu nadjalmak duninjh wanjh nganbebkeng kore birimekbe birriwarre bininj ngandibongkarrmi

⁵ Ngadjare bininj nawu kabirribolkwidnan kukadje Jerusalem, wanjh nakka kaluk kabirrikelerlobmerren dja kabirridurnderren kunyeme dorrengh.

⁶ Mak ngadjare bedda kabirriyimerran yiman kundalk kahkolhdebebm kore kaddum kurrambalk, manbu werrkwerrk karralkdarlehmen dja minj karralkdjordmerren.

⁷ Bedda yiman kurralkwarre manbu minj nangale bininj karralkmoyhmang dja karralkdukkadukkan.

⁸ Mak yuwn bu nangale nawu manbolh kabirriwohre bu kabirriyime bedberre nawu kabirribolkwidnan Jerusalem, "Nawu Yawey ngunmarneyime kunmak! Ngad wanjh kunmak marneyime kore kunngey nuye nawu Yawey."

130

Karikayhmeng Bu Nawu Kawohrnan Rowk Kanngehke.

Psalm 130

¹ Ngudda nawu Yawey! Kunkimuk duninjh kunrayek bebmeng ngardduk wanjh ngudda balkayhme kondahbeh kore kanjdji duninjh!

² Kanwokbekka, ngudda nawu Yiwohrnan Rowk! Ngahdi yiwarrudj djawahdjawan bu kankongibun, wanjh kankayhmibekka!

³ Yawey, ngudda nawu Yiwohrnan Rowk, bu ngudda minj kanmarnebenmidjdangimenin ngad bininj bu kunwarrekenh ngadberre, wanjh minj mak karridjaldarrkiddiwirrinj.

⁴ Dja ngudda woybukkih kandjalmarnebengmidjan ngadberre munguyh, wanjh kunmekbekenh kunu ngad bininj rowk wanjh ngundidjalmarnekele.

⁵ Wanjh ngaye ngadjalmadbun nawu Yawey. Ngaye ngardduk kunmalng kabimadbun, dja ngaye ngamarrkkurrmerren kore kunwok nuye.

⁶ Yoh, ngaye ngardduk kunmalng kabimadbun nawu Kawohnan Rowk. Ngaye ngamadbun bu nungka kamre, dja bu kunkuyeng ngankan ngaye ngahdjalmadbun munguyh, yiman kayime bininj nawu kakakbolknahan dja kamadbun bu kambarrkbun yerreh.

⁷ Ngudda bininj nawu Israel ngunkebmawahmeng, ngurridjalwoybukwo Yawey nawu kandjalmarnedjare kadberre rowk munguyh munguyh, dja nungka kandjalbebke munguyh kore kunwarre kunwern kanbongkarrme.

⁸ Nungka naweleng kanngehke kadberre kore kunwarre rowk, ngad rowk nawu Israel kankebmawahmeng.

131

Ngaye Yiman Kayime Wurdyaw Bu Ngakangekurrmerren Nawu Kawohnan Rowk.

Psalm 131

¹ Ngudda nawu Yawey, ngaye minj ngaburlumerren; minj mak ngakimukworren kore birribuyika bininj, dja mak minj ngadjare ngakurdyime kunkimukkenh. Minj mak ngawernhburrbun manbu kunmayali mandulmukkenh.

² Dja bonj, ngaye ngakangemarnburrinj yiman wurdyaw kangurdme bu ngalbadjan kabiwanjbikarrme. Kuhni wanjh ngaye ngakarrme kunmodmikenh.

³ Wanjh ngudda nawu Israel ngunkebmawahmeng! Ngurrimarrkbaworrimen nuye nawu Yawey bu bolkkime dja mak munguyh.

132

Nawu Kawohnan Rowk Bolkdjarrngbom Kukadje Zion.

Psalm 132

¹ O Yawey, yuwn bu yibengmidjan nawu David bu kore kunrayek karmihkarrmi.

² Ngudda yiburrbun bu nungka kunwok ngunmarnekurrmerrinj ngudda nawu Yawey. Nungka wanjh ngunberrebbom ngudda nawu Jacob nuye God nawu Yiwernhdulkarrekimuk Duninj.

³ Bu David wanjh kuhni yimeng, "Ngaye minj ngarrokme kured dja minj mak ngakodjkeyo.

⁴ Mak minj ngangehme bu ngakodjkekurrmerren.

⁵ Kaluk bu ngabolknalke nuye Yawey. Ngayawan kunred kunmak kore nawu Jacob nuye God kahyo. Nungka nawu Narrulkarrekimuk Duninj."

⁶ Bu ngarridi darnkih kore kukadje Ephrathah, wanjh kumekbe ngarriwobekang nawu Ark kore God wokkurrmerrinjenh. Dja wanjh ngarringalkeng kore kabbal bolkngeyyoy Jearim.*

⁷ Wanjh ngad ngarriyimeng, "Mah! Wanjh karriray kore Yawey kahni dja karrimarnebodan kore kurrenge nuye!"

⁸ Wanjh ngarridi yiwarrudj bu ngarriyimeng, “Ngudda Yawey, wanjh yirrolkka dja yimray kore kunred ke bu yingehme. Dja mak yimyika nawu Ark manbu kanbukkan ngudda ke kundulkarre duninj.

⁹ Ngarridjare mak nawu priests ngudda ke wanjh munguyh djal mandjad kabirrihdjalkurduyime, dja ngudda ke binihbininj wanjh kabirriwayini bu kunnjilngmak dorreng!”

¹⁰ “Yawey, ngudda yimarnewokkurmerrinj David nawu ngunmarne-durrkmirri, dja yuwn bu yirrahme nahni king nawu yidjarrngbom.

¹¹ Ngudda Yawey yiwokkurmerrinj nuye David, dja minj munguyh yimayalborledkerren. Ngudda yimarneyimeng, ‘Kaluk ngaye ngakurme nakudji beywurd ke bu kawohrnan yerre bu ngudda yirrowen.

¹² Bu nawu yibenbornan rowk kabirridjalkarreme kunwok ngardduk kore ngawokkurmerrinj, dja manbu ngabenbukkabukkan, wanjh nawu yerre kabindibornan, bedman warridj kabirribalwohrnan bu munguyh.’ Kuhni nawu Yawey bimarneyimeng David.”

¹³ Nawu Yawey bolkdjarrngbom kukadje Zion[†] dja djareminj bu marnbom kunred nuye kumekbe.

¹⁴ Bu nawu Yawey yimeng, “Kondah wanjh ngadjare ngayerrkan bu ngawohrnawohrnan, dja ngadjareni ngani kondah bu munguyh munguyh.

¹⁵ Wanjh ngaye ngabolkmarnbun bu kunwern kakarreme njalehnjale, mak nawu birrimarladj kabirrihni wanjh nakka kaluk ngabenworrkmiwon.

¹⁶ Nawu priests ngalenggarre Zion, wanjh ngabenmarnbun bu birridjalmak bininj. Dja nawu ngardduk duninj binihbininj, wanjh ngandimarnekayhme kunnjilngmak dorreng.”

¹⁷ “Kondah wanjh ngamarnbun nakudji nawu David nuye mawah-mawah bu kayimerran nawu nakimuk dja kawernhwohrnan. Nungka nawu ngaye ngadjarrngbom wanjh nganahn munguyh.

¹⁸ Dja nawu birriyidko bu kabirriwidnan nakka kaluk ngabenmarnbun bu kabirriyemengalme, dja nahni nawu king ngadjarrngbun wanjh yiman kawolkayindan kunmakmak nuye dorreng.”

133

Bu Karrimarnedjaremerren Kore Nawu Kawohrnan Rowk.

Psalm 133

¹ Kuhni kundjalmak duninj bu nawu God nuye bininj kabirrimarnburen bu kabirridjarrkni kamak rowk kore kabirrikudjihmen yiman bu birridangerrinj duninj!

² Bu kuhni kabirriyime, wanjh yiman nawu manjmak kunkalkkid bu Moses bikodjdelkkeng Aaron nawu priest. Wanjh mahni kunkalkkid delkmidelkmi kanjdji kore Aaron nuye kundjaworrk, dja mak djuhking manburrba nuye nawu komdukkayindi.

³ Mak bu God nuye bininj kabirrikudjihmen yiman birridangerrinj duninj, wanjh yiman kayime kunberle kamankan kore mandulum Mount Hermon wanjh kabalwarrhme kore kurrulurrulom ngarre mandulum Mount Zion warridj. Kumekbe wanjh Yawey kabenmarnewokkurmerrin bininj nuye kunwok kunmakmakkenh manbu ngarre kundarrkid munguyh munguyh bedberre.

132:11 2 Samuel 7:12-16; 1 Chronicles 17:11-14; Psalm 89:3-4; Acts 2:30 [†] **132:13** Zion kangeyrohrok Jerusalem. **132:17** 1 Kings 11:36 **133:2** Exodus 29:4-7

134

Karriburlumen Nawu Kawohrnan Rowk Kore Kukak.

Psalm 134

¹ Ngudda nawu ngurrimarnedurrkmirri nawu Yawey bu ngurrikakdur-
rkmirri kore Yawey nuye manrurrkdjamun, wanjh ngurriburluburlumen
nuye.

² Ngurribidwayhmen kaddum nuye nawu Yawey kore ngurrihni nuye
manrurrkdjamun, dja ngurridjalburlumen nuye.

³ Mah, wanjh karridjawa Yawey nawu marnbom kaddum heaven
dja mak kanjdji kurorre ba bu nungka kandimarnewokkurrmerren
kunmakkenh kore kunred nuye Zion kahni.

135

Nawu Yawey Nuye Kunngey Wanjh Kadjalngeyyo Bu Munguyh.

Psalm 135

¹ Wardi karriburlumen nawu Yawey! Ngurringeyburlumen. Ngudda
nawu ngurrimarnedurrkmirri Yawey, wanjh ngurringeyburluburlumen
nuye kunngey!

² Ngudda nawu ngurrimarnedurrkmirri kore Yawey nuye temple, dja
kore kuberrkkah manbu God kadberre nuye kunrurrk.

³ Ngurriburlumen nawu Yawey dja nungka wanjh nadjalmak duninjh.
Ngurriwayinin bu ngurringeyburlume, dja nungka nangeymakkaykenh.

⁴ Nawu Yawey bendjarrngbom bininj nawu Jacob benkebmawahmeng
dja benmarnbom djal nuye bininj. Birrimekbe nawu Israel benkebmawah-
meng, wanjh Yawey bendjarrngbom bu kabenkarrme nuye duninjh.

⁵ Ngaye ngaburrbun bu Yawey wanjh nawernhkimuk duninjh. Nungka
wanjh kawohrnan rowk kadberre, dja kabenyurrhke birribuyika gods
rowk.

⁶ Kore nawu Yawey nungan kadjare, wanjh kadjalkurduyime kore
kaddum heaven, dja mak kore kurorre, dja mak kore kurrula dja kanjdji
kuburrk duninjh.

⁷ Nungka kamarnbun kunngol bu kawayhme wanjh mandjewk ka-
munkewe kore kubolkbubuyika rowk, mak kamunkewe namarrkon dor-
rengh. Nungka mak kabebke kunmayorrk kore nungka kadjehdjenkarrme
kunwernkenh.

⁸ Yawey nungan benbom nawu nadjaman rowk bedberre birrikang
kunbolk Egypt, yiman bininj dja mayh bu benbom.

⁹ Nungka kurduyimi kunwern kundulkarre nuye dorrengh bu bir-
rikangebarrhmeng nawu Pharoah dja nawu birrimarnedurrkmirri kore
kunbolk Egypt, dja mak benwarrewong.

¹⁰ Kaluk kore kubolkbubuyika nawu Yawey benbuni birriwern bininj
nawu birrihni kumekbe, warridj nawu birrikihkimuk kings bedberre,

¹¹ yiman nawu Sihon, king bedberre bininj nawu Amor benkebmawah-
meng, dja mak Og nawu king kore kunred Bashan, dja mak kings nawern
rowk kore kubolkkimuk Canaan.

¹² Yawey bolkmey bedberre kunbolk dja benbolkwong bininj nawu
Israel benkebmawahmeng bu kabirribolkkarrme munguyh.

¹³ Yawey, manbu kunngey ke makka minj munguyh yingeyyakmen.
Birriwarlahkenh bininj rowk wanjh munguyh ngundiwobekkan kore
ngudda yikurduyimekenh.

14 Mak Yawey kabenmakwan nuye binihbininj. Dja kabenkongibun nawu kabirrimarnedurrkmirri.

15 Bininj nawarlahkenh kore kubolkbubuyika wanjh kabirrimarne-boddan idols bedberre nawu kabirrikukname kunbid bedberre, manbu wirlmurrngwi silver dja gold.

16 Nahni idols kabirrikarrme kundang dja kunmim, dja nakka minj kabirriwokdi, dja minj mak kabirribolknan.

17 Warridj kunkanem kabirrikarrme dja minj njale kabirribekkan, mak minj kabirringoleknghehme.

18 Wanjh kunmekbe karohrok kabirriyimerran bininj nawu bedman-bidju kabirrihmarnbun.

19 Wanjh ngudda nawu Israel ngunkebmawahmeng, ngurriburluburlumen nawu Yawey. Ngudda nawu namud nuye Aaron, wanjh ngurriburluburlumen nawu Yawey.

20 Ngudda warridj nawu namud nuye Levi, ngurriburluburlumen nawu Yawey. Ngudda bininj rowk nawu ngurrimarnekele nawu Yawey, wanjh ngurriburluburlumen nuye.

21 Mah, bininj nawu ngurridi kukadje Zion, wanjh ngurriburlumen Yawey nawu kahni Jerusalem. Wanjh ngurriburluburlumen nawu Yawey!

136

Nawu Kawohrnan Rowk Kandjalmarnedjare Munguyhmunguyh, Wanjh Karrimanjbu!

Psalm 136

1 Nawu Yawey nakka nadjalmakkayhkenh, wanjh karrimanjbu! Nungka kandjalmarnedjare bu munguyhmunguyh!

2 Nungka wanjh God duninj, dja kadjalwernhdokme gods nawu birribubuyika, wanjh karrimanjbu! Nungka kandjalmarnedjare bu munguyhmunguyh!

3 Nungka kabenmarnewohrnan rowk birribuyika nawu kabirriwohrnawohrnan, wanjh karrimanjbu! Nungka kandjalmarnedjare bu munguyhmunguyh!

4 Nungka nadjalkudji nawu kakurduyime kunwern kunmakmak ba bu karrikangebarrhme. Nungka kandjalmarnedjare bu munguyhmunguyh!

5 Nungka kawernhburrbun kunmayali rowk, wanjh marnbom kaddum kunnngol. Nungka kandjalmarnedjare bu munguyhmunguyh!

6 Nungka bolkwarahwong manbu kunrorre kore kurrula. Nungka kandjalmarnedjare bu munguyhmunguyh!

7 Nungka marnbom kundung dja mak dird. Nungka kandjalmarnedjare bu munguyhmunguyh!

8 Mak kundung marnbom ba kawohrnan ngarre manbu kunbarnan-garra. Nungka kandjalmarnedjare bu munguyhmunguyh!

9 Mak dird dja mankokkarrng warridj marnbom bu kabirrimarnewohrnan ngarre kumunun. Nungka kandjalmarnedjare bu munguyhmunguyh!

10 Nawu Yawey benbom nadjaman binihbininj rowk nawu birrikang Egypt. Nungka kandjalmarnedjare bu munguyhmunguyh!

11 Mak benbebkeng bininj nawu Israel benkebmawahmeng kore Egypt birrihbongdi. Nungka kandjalmarnedjare bu munguyhmunguyh!

12 Nungka bidyirriyonginj ba bu benmarnekurduyimeng kore kundulkarre dja kunngudj nuye. Nungka kandjalmarnedjare bu munguyhmunguyh!

13 Kaluk nungka kurrula bodjalkmey manbu Red Sea. Nungka kandjalmarnedjare bu munguyhmunguyh!

14 Dja benberlkang bininj nawu Israel benkebmawahmeng kore kuburldjarn mankabo dja benyidjowkeng borledmikenh. Nungka kandjalmarnedjare bu munguyhmunguyh!

15 Dja nungka benkebngakkeng nawu Pharaoh dja nuye soldiers kore Red Sea. Nungka kandjalmarnedjare bu munguyhmunguyh!

16 Mak nawu Yawey benkani bininj nuye kore kubolldarleh birrirey. Nungka kandjalmarnedjare bu munguyhmunguyh!

17 Nungka benbom birrihkimuk kings nawu birriwohrnawohrnani kumekke. Nungka kandjalmarnedjare bu munguyhmunguyh!

18 Benbularrbom rowk nawu birridulkarrekimuk kings. Nungka kandjalmarnedjare bu munguyhmunguyh!

19 Nungka bibom King Sihon nawu benmarnewohrnani bedberre bininj nawu birringeyyoy Amor. Nungka kandjalmarnedjare bu munguyhmunguyh!

20 Warridj bibom king nawu ngeyyoy Og bu nungka benmarnewohrnani bininj kore kunbolk Bashan. Nungka kandjalmarnedjare bu munguyhmunguyh!

21 Dja mak bolkmangi manbu kings bedberre kunred dja benbolkwong bininj nuye. Nungka kandjalmarnedjare bu munguyhmunguyh!

22 Wanjh nungka benbolkwong bininj nawu birrimarnedurrkmirri, bedda nawu Israel benkebmawahmeng. Nungka kandjalmarnedjare bu munguyhmunguyh!

23 Bu ngad yiman karrimarladj, wanjh nawu Yawey kandjalburrbuni, dja minj kanbawoyi kadberre. Nungka kandjalmarnedjare bu munguyhmunguyh!

24 Mak kanbebkeng kore nawu karriyidko bininj kandibongkarmi. Nungka kandjalmarnedjare bu munguyhmunguyh!

25 Mak nungka marnbom mayh rowk kore kurrula dja wanjh kabenowonowon manme. Nungka kandjalmarnedjare bu munguyhmunguyh!

26 Wanjh karrimanjbu God nawu kahni kore kaddum heaven! Nungka kandjalmarnedjare bu munguyhmunguyh!

137

Nawu Israel Bininj Birriwayini Kunnjilngwarre Dorreng Kore Kubollduyika Birribongdi.

Psalm 137

1 Ngarrini kore mankabowern ngarre kunbolk Babylon, dja ngarribolkburrbuni kunred Jerusalem, dja ngarridjalnalkbuni.

2 Nawu harps ngadberre wanjh ngarribarnhbarnameng kore kundulk manbu kayendewarrhme kanjdji manbu karrulngeyyo willows.

3 Kaluk bininj nawu ngandikang kumekbe dja ngandibongnameng wanjh ngandiwokrayekwong, birriyimeng, "Mah, ngurriwayinin bu Jerusalemkenh!" Bedda birridjareni bu ngarrbennjilngmarnbuyi bu ngandibekkayi.

⁴ Dja njalekenh ngarriwayini Yawey nuye mankarre kore birridjen-buyika bedberre kunbolk?

⁵ Aba, bu ngaye bolkbengmidjdan ngudda kunred Jerusalem, wanjh ngawarnyak bu ngayawoyhdirri nawu harp, yiman kayime ngabidwar-remen.

⁶ Nawu kunred Jerusalem, ngaye bolkburrbun dja ngawernhnjilngmak bu ngaburrbun kore ngahni. Bu ngaye bolkbengmidjdan dja wardi bolkwarrewan, wanjh minj ngadjare ngayawoyhwayini, yiman kayime bu ngadjenbukmen.

⁷ O Yawey, yibenburrbu bininj nawu birrikang Edom, dja yiburrbun kore bedda birrikurduyimeng kumekbe bu birribang bininj birribolkmey Jerusalem. Yibenbekkang bu birriyimi, "Mah! Ngurribolkbularrbu! Ngurriwarddeburriwemen rowk kore kurorre!"

⁸ Dja kubolkbuyika kunred Babylon, ngudda yerre ngundibolkbularrbuyindan. Bininj nawu ngundirurrkbun rowk, wanjh kabirrinjilngmakmen. Kuhni karohrok bu ngudda wanjh kandimarnekurduyimeng ngadberre.

⁹ Dja birrimekbe birribang bininj nawu ngundibun, wanjh kabindidar-rkidmang nawu barrken rowk ngudberre, dja wanjh kabindiyawbun bu kabindiyawburriwe kore kunwardde. Kaluk birrimekbe bininj wanjh kabirrinjilngmakmen.

138

Bu Karrimanjibun God Nawu Yawey.

Psalm 138

¹ Nawu Yawey, ngaye manjibun ngudda kukange ngardduk dorreng! Birribuyika gods birriwarre, wanjh ngandibekkan bu ngaye marnewayini ngudda bu djalburluburlume ke.

² Ngaye ngaboddan kore ngudda ke kunrurrk manbu Temple manrurrkjamun, dja ngaye ngeyburlume ngudda bu manjibun kore ngudda kandjalmarnedjare munguyh, dja minj kanbawon munguyh. Ngudda yingeykimukworrin ba yingeyyurrhke kunngeybubuyika, dja yikurrmeng ke kunwok ba karrokme rowk.

³ Ngaye ngakayhmeng dja werkkwerrk ngudda kanwokbekkang dja kankangemarnbom dja kankangemurrngrayekwong.

⁴ Kaluk birriwarlahkenh kings nawu kondah kurorre bu ngundiwokbekkan kore yiwokdi kundjen ke, wanjh ngundidjalmanjibun ngudda nawu Yawey.

⁵ Wanjh bedda kabirriwayini bu kabirriyolyolme ngudda ke manbolh. Dja ngudda ke kunmakmak wanjh kunwernhkimuk duninjh.

⁶ Yawey nawu nawernhkimuk duninjh kahni kore kaddum duninjh, dja bonj, nungka kabendjalnahan nawu birrimarladi bininj. Dja bininj nawu kabirriburlumerren, nakka wanjh kabennan bu djal djarrehbeh.

⁷ Bu kunyid nganmarnewernmerren wanjh ngudda kannahan bu bu ngadjaldarrkiddi. Ngudda yibidyirriyo bu yibendabke bininj nawu ngandiwirrihme. Ngudda kannggehke kunbidkukunwi ke.

⁸ Yawey karrurrkmirri dja kayakwon kore nungka karremarnbom bu ngayekenh. Yoh, Yawey ngudda kanmarnedjare munguyh munguyh. Yuwn bu kanbawon ngaye nawu ngudda kanmarnbom kunbidwi ke.

139

Nawu Kawohnran Rowk Kankangenan Dja Kannanhan Munguyh.

Psalm 139

¹ Ngudda nawu Yawey, ngudda kankurdunan dja kankangenan munguyh. Ngudda yiwernhburrbun rowk kore ngayekenh.

² Ngudda yiburrbun bu kore ngayerrkan, mak bu kore ngarrolkkan. Ngudda ngokko kanmayaliburrbun djarrehbeh.

³ Mak yiburrbun kore baleh yarrka ngare, bu ngabebme kuberrk, dja mak kore ngakodjkeyo. Ngudda kanwernhburrbun kore ngaye ngakurduyime.

⁴ Dja mak bu ngakuyinwokdi kore baleh ngayime, wanjh ngudda Yawey ngokko yidjalyingkihburrbun kore ngawokdangen.

⁵ Ngudda kanbalhme, kore kumirrk dja kubodme, ngudda kankarrme kore kubid ke.

⁶ Ngudda yiburrbun rowk, dja bulkkidj kanwernhburrbun. Wanjh ngakangebarrhme kore kunmekbe kunmak ngudda ke. Ngaye minj ngawernhburrbun kunmekbe kunkimuk nguddakenh bu yikurduyime.

⁷ Kaluk baleh bu ngaye ngakelerlobme dja ngawarlkkarren nuye nawu Namalngmakkaykenh ke? Ngudda kanmarnedokme munguyh bu baleh yarrkka ngare.

⁸ Wardi bu ngabidbuyi kaddum kore heaven, wanjh ngudda nakka kumekbe yihdi! Mak bu kanjdji ngarrudjindayi kore kumidj, wanjh ngudda yihdi kumekbe warridj.

⁹ Mak bu ngawelnamerrimeninj dja ngarrollkayi ngarawinj koyek, dja nuk ngayerrkayi djarreh, kore kurrula borledmikenh,

¹⁰ Wanjh ngudda kumekbe kankan dja mak kankarrkarmeninj kubid-kukun ke.

¹¹ Wardi bu ngayimerrimeninj, "Kaluk kunkak nganwarlkkkan, manbu kore kankukwolkan makka wanjh kunkak kaluk kabarrkbun."

¹² Dja bonj, ngudda manbu kunkak minj makka kakakyo ke, makka kabolkwolkayindi yiman barnangarra. Kunkak dja kunbarnangarra makka kadjalrohrok rowk kore ngudda yidjalbolkwolkan rowk.

¹³ Ngudda kankangemarnbom, mak kankukmarnbom bu ngahni kore kuwalirrng ngarre ngalbu ngalbadjan ngardduk.

¹⁴ Wanjh ngaye djalburluburlume ngudda bu kankuknameng ngardduk. Kuhni yikurduyimeng kundulkarre dja kunmak dorrengh. Wanjh ngaye ngawernhburrbun kore kukange ngardduk bu ngudda yikurdumak dun-injh, dja kunmak rowk ngudda yikurduyime.

¹⁵ Ngudda kannang bu kunmurrng ngardduk marnbuhmarnbuyindageni bu manmolk kore ngalbadjan ngardduk kuwalirrng, yiman kayime bu kanmarnbom kore kanjdji kurorre.

¹⁶ Ngudda yiman ngokko kannang kore ngaye minj bangmemarnbur-rimeninj! Bu minj ngabangmengalmeninj ngudda korroko yiyingkihimbom djurra ke ngardduk kunbarnangarra rowk bu yerrekah ngadjaldar-kiddi.

¹⁷ O God, ngaye minj ngaburrbun ke kunmayali! Ngaye ngadjare ngawernhmayaaliburrbun ngudda ke. Ngudda yidjalmayalikimuk dja yiburrbun kundjalwern.

¹⁸ Ngaye bu yimanek ngarohrokmeninj ke kunmayali, dja nakka bonj, minj ngarohrokme, yiman kayime kunkayalanj manbu kahyo kore adjbud bu ngarohrokmeninj. Kaluk bu ngamalaydolkkkan nakka ngudda kumekbe ngarrhdjarrkdi.

¹⁹ O God, ngadjare yibenbun nawu birriwarre bininj. Wanjh ngaye ngayime, "Ngudda bininj nawu ngurridjare kandibun kunkurlba dorreng, wanjh kandibawo!"

²⁰ O God, birrimekke bininj wanjh kunwok kunwarre kabirriyime ke. Bedda wanjh ngundingeywarrewon.

²¹ Ngaye wanjh ngabenwidnan bininj nawu ngudda ngundiwidnan; dja nawu minj ngundiwokburriwe, wanjh ngaye mak ngabenwidnan.

²² Kunmekbekenh bu ngaye ngabenwidnan duninjh. Nakka ngaye mak ngabenmarneyime bu bedda ngarriyidko.

²³ O God, kanwernhkangena, kanrohrokmen dja yiwernehburrbu njalehnjale kore ngaye ngahburrbun. Kanmayalidjadme kore ngaye kanjdji baybaywi ngaburrburren.

²⁴ Mak kanna bu njale nawu nawarre yarrkka ngakarrme. Dja kanka kore manbolh mandjad manbu nganyingarrngmang ba bu ngarrarrkid munguyh munguyh kore ngudda.

140

Ngadjawan Nawu Kawohrnan Rowk Bu Kanngheke.

Psalms 140

¹ O Yawey, kannghekemen kore nawu birriwarre bininj ngandibun. Kankukdjurrudin bu nawu birribang bininj ngandimarnebebe.

² Bedda wanjh kabirrikarremarnburren kunwarrekenh kore kukange bedberre. Kabirridjaldjare bu bininj rowk kabirriburren munguyh.

³ Bedda yiman kayime nayin nabang duninjh. Bu kabirriwokdi wanjh yiman kayime kabindibaye birribuyika bininj manbang warridj bu kabindibunkenh.

⁴ O Yawey, kannahna ba bu bininj nawu kabirrikurduyime kunwarre duninjh minj ngandidarrkidmang. Kannghekemen kore birribang bininj nawu kabirridjare ngandibungkarribun dja ngarrowen.

⁵ Bininj nawu kabirriburluburlumerren wanjh kabirridjare ngandidarrkidmang. Bedda wanjh manmolk ngandimarnekurrmeng manbu nganbungkarribun kore manbolh ngare. Bedda munguyh ngandimarnekarrremarnburren bu ngaye ngarrowenkenh.

⁶ Ngaye ngayime, "O Yawey, ngudda wanjh God ngardduk. Wanjh kanwokbekka bu ngakayhme dja djawahdjawan bu kankongibun.

⁷ Yawey, ngudda nawu Yiwohrnan Rowk, ngudda wanjh kannghekeng, dja kankukdjurriddi bu ngarriburrinj nawu birriwarre bininj.

⁸ O Yawey, yuwn yibenbawon bu birriwarre bininj kabirrikurduyime kunwarre kore bedman kabirridjare. Yibenkarrewarrewon kore birrikarrremarnburrinj. Dja bu burrkyak, wanjh bedda kabirridjalburlumerren."

⁹ "Bedda wanjh birrikarremarnbom bu ngandibunkenh, dja ngadjare yidjaldurndiwe maninjmanu kunwarre bu bedman wanjh kabenbun bedberre.

¹⁰ Ngadjare yiman kunyirrke kamwarrhme dja kabenkodjrung bedberre! Wardi yibenkukburriwe kore manbirlukimuk kunak, dja nuk yibenkukburriwe kore kudjorlokkimuk manbu kukih dorreng, ba bu minj bedda kabirriyawoyhbidburren.

¹¹ Yikahwi bininj kabindimarnekurren birribuyika, dja ngadjare ngudda yibendabke ba bu kabirridjalbarabun kore bedda kabirridjare. Ngadjare

werrkwerrk bu kunwarre dunijnh kabenbularrbun nawu birribang bininj.”

¹² “O Yawey, ngaye ngawernhburrbun bu ngudda yibennahnawu birrimarladj bininj dja yibenbidyikarrme nawu minj birrikuken bu bedda kabirringime kore court.

¹³ Woybukkih wanjh kunmekbekenh nawu birrimak bininj ngundid-jalngeyburlume, dja bininj nawu ngudda yibenmakwan, wanjh kamak kabirridi kore ngudda.”

141

Bu Kabolkburlerran Wanjh Ngahdi Yiwarrudj.

Psalm 141

¹ O Yawey, ngaye ngakayhme ke bu djawan ngudda. Yimray werrkwerrk kore ngaye. Kanbekkabekka bu ngaye ngakayhme ngudda.

² Ngadjare yiburrbun kore ngaye ngahdi yiwarrudj, wanjh kanbekkan yiman kayime yinome mankalkkidmanjmak kore kumirr ke. Ngaye bu marnebidwayhme yiman kayime bininj kabirribidwayhme nawu ngundimarnekinje mayh nawu ngundiwon bu kumunun rowk.

³ O Yawey kanbidyikarrmen dja kandangnahna kundangwel ngardduk . Yuwn kanbawon bu ngawokdi kore kunwarre.

⁴ Kanbidyikarrmen ba djal kunmak ngadjaldjare kore kukange ngardduk. Yuwn bu kanbawon ngare ngarriraworren birriwarre bininj bu ngaridjarrkkurduyime kunwarre. Kanbidyikarrmen dja ngaye ngawarnyak ngare kore mulil kabirrikarme dja kabirringun manme manbu manmanjmak.

⁵ Bu kunwarre ngayime, wanjh ngadjare namak bininj ngan-marnebebme ngandung! Bu nungka nganbengyolyolme, wanjh kamak. Wardi ngudda Yawey kanbidyikarrmen bu ngaye ngabekkan kore kunmakkenh nganwon namekbe bininj. Mahni kunwok nuye yiman kayime mirridjin nawu nganmarnbun.

Dja nawu birriwarre bininj wanjh ngahdi yiwarrudj bedberre dja ngadjare kabirribawon kore kunwarre bedberre.

⁶ Kaluk nawu birriwarre bininj birrikihkimuk wanjh kabirrimankan kaddumbek kore kuwarddekekale dja kabirridowe. Bu kunmekbe kakurduyimerran, wanjh birribuyika nawu birriwarre bininj kabirridjaremen bu ngandibekkabekkan kunwok ngardduk.

⁷ Ngayimeng, “Nahni birriwarre bininj wanjh birribularrbuyindanj dja kunmurrng bedberre kahbebbehdi kurorre darnkih kore kumidj ngarre Sheol.”*

⁸ Ngaye wanjh munguyh ngamimborledmen kore ngudda God nawu nganmarnewohnan. Ngaye ngawarlkarren kore ngudda ba bu kannahnawu. Yuwn bu yibenbawon birriwarre bininj ngandibun bu ngarrowen.

⁹ Bedda ngandimarneyingkihmarbnom manbu ngandengkardmang dja nganbungkarrkbun. Wanjh kannghehkemen!

¹⁰ Wardi yibenbawo nahni birriwarre bininj bu kabirribungkarrkburren dja kabirrimankan kore manbu ngandimarnekurrmeng bu ngandidar-kidmang. Dja ngaye wanjh ngadjalle kamak rowk.

* **141:7** Sheol kamenyime, “kunbol kore nawu birridowerrinj kabirrihmalngdi”

142

Bu King David Bimarnekayhmeng Nawu Kawohrnan Rowk.

Psalm 142

¹ Bu ngaye ngahdi yiwarrudj wanjh ngaye ngakayhme nawu Yawey ba bu nganbidyikarme. Ngaye ngamarrkdjawadjawan Yawey ba bu kankongibun.

² Ngadjalyolyolmerren kunwernkenh nawu ngannjilngwarrewon, dja ngamulewarren ba bu nganbekkan kore njale kunrayek nganmarnewernmerren.

³ Bu darnkih ngadjalmarrkbaworren, wanjh ngudda Yawey nganbolh-bukkabukkan. Ngaye ngabolhkadjung manbolh kore nawu ngandiwidnan bininj manmolk ngandimarnekurmeng manbu ngandibungkarrkbun dja ngandidarrkidmang.

⁴ Ngaye ngabolknan darnkih kungurrird ngardduk, dja larrk, minj nangale bininj kahdi bu nganbidyikarme dja ngankukdjurruddi. Bonj, minj nangale bininj ngandarrkidnahnan.

⁵ Ngudda nawu Yawey, ngaye ngadjalkayhme dja ngadjare kanbidyikarme. Ngayime, "Ngudda Yawey wanjh yidjalkudji nawu kankukdjurrudin. Ngaye marnedjare ngudda dja minj nangale nabuyika ngadjare kore ngahdarrkiddi kondah kurorre."

⁶ Kankayhmibekkabekka dja ngaye ngakangewarre duninjh, dja ngawernhnjilngwarreminj. Kanneghkemen kore nawu ngandiyidko ngandibongkarme. Bedda wanjh birringudjbang dja ngaye ngadjalngudjyawarren.

⁷ Kunrayek duninjh ngankarme, dja djawahdjawan bu kanbekkemen. Kaluk ngaye ngeyburluburlume kore ngarrimirderri nawu ngudda ke bininj rowk dorreng, bu kunmekbekenh ngudda wanjh kunmak kanmarnekurduyimeng.

143

Bu Ngarridjawan Nawu Kawohrnan Rowk Bu Kanbidyikarme.

Psalm 143

¹ O Yawey, ngaye ngahdi yiwarrudj djawahdjawan bu kankongibun. Wanjh kanbekkabekka bu ngakayhme kore ngudda. Ngudda nawu kanmarnedjare munguyh dja mak yidjalkurduyime kore kunmakkenh, wanjh kanneghkemen.

² Ngaye wanjh ngahdurckmirri ke, dja yuwn bu kandjadme bu kanwarrewan. Ngad ngarriwarlahkenh bininj rowk ngarriyime kunwarre, dja bu ngudda kandjadme ngadberre, wardi bonj, ngudda kanwarrewan.

³ Bininj nawu ngarriyidko wanjh ngandikelekadjuy dja ngandikukburriweng. Nungka nganbongkarme kore kubolkmunun, yiman kayime bininj nawu kunkare birridoweng kabirridjalkukyo.

⁴ Kunmekbekenh ngaye wanjh ngakuyinmarrkbaworren, dja ngadjalka-ngewarre duninjh.

⁵ Ngadjalburrbun kunkareni kore baleh ngudda kanmarnekurduyimeng. Ngadjalbanken ngudda bu kunwern yikurdyimi kunbid ke dorreng, dja ngaye ngadjalburrbun nguddakenh.

⁶ Wanjh ngabidwayhme kore kumirr ke! Ngaye yawahyawan ngudda ke yiman kayime kubolkdarleh kadjare mandjewk!

⁷ Mah, wanjh werrkwerkk kanwokma Yawey, dja ngaye wanjh ngadjalnjilngwarwarremen. Yuwn bu kanmarnekebwarlkkarren ngardduk. Ngaye bu minj kebnan wanjh ngayimerranj yiman kayime ngarowen.

⁸ Bu kukabel rowk wanjh kanbukkabukkan bu ngudda kandjalmarnedjare munguyh. Ngaye woybukwon dja ngakurrmerren kore ngudda. Mah, wanjh kanbukkan manbolh kore yidjare ngare, dja ngaye wanjh yiwarrudj ngahdi kore kukange ngardduk.

⁹ O Yawey, kannghehkemen kore bininj nawu ngandiwirrihme. Ngaye wanjh ngamkelerlobmeng kore ngudda ba bu ngabenmarnewarlkkarren.

¹⁰ Ngudda wanjh God ngardduk! Wanjh kanbukkabukka ba bu ngaye ngakurduyime kore ngudda yidjare. Ngadjare ngudda ke namalng-makkaykenh wanjh kankan ba ngare kore manbolhmak.

¹¹ O Yawey, kannahna bu ngadjaldarrkiddi ba bu bininj rowk ngundingeyburlume ke. Ngudda nawu yidjalkurduyime kundjalmak, wanjh kuhnikenh kanbekkemen kore kunyidwern ngakarrme.

¹² Ngudda nawu kanmarnedjare, wanjh kunmekbekenh yibenngurd-kemen nawu ngarriyidko bininj. Yibenbularrbu rowk nawu ngandi-wirrihme. Dja ngaye wanjh ngadjaldurrrkimirri kore ngudda.

144

God Kanbidyikarrme Dja Kanbukkabukkan.

Psalms 144

¹ Ngaburlume Yawey, nawu ngankukdjurruddi ngardduk. Nungka kanbukkabukkan dja nganyingkihmarbun ba bu ngabenbun bininj kore ngarriburren.

² Nungka nawu nganmarnedjare dja ngannahnan bu munguyh. Ngakelerlobme ngadjalwarlkkarren kore nungka dja wanjh nungka nganbe-bke kore kunyidkenh. Nungka mak kabenkurrme bininj ba ngaben-marnewohnan.

³ Adju, Yawey! Bu kandinan ngad bininj, wanjh ngad njale mayh? Dja bonj, ngudda kannahnan, dja njalekenh? Bininj yiman kayime yeng, dja bonj, ngudda kandjalburrbun.

⁴ Ngad bininj wanjh ngarridjalyakmen yiman kunmayorrr kare. Ngad minj kunkuyeng ngarridarrkiddi, dja bonj, ngarridowe.

⁵ Ngudda nawu Yawey, wanjh ngurridangmarrhma kore heaven dja yimkolu kore ngad. Yidjalkarrmen kubid ke nawu kunwarddekihkimuk bu yimarnbun kundolng kambehme.

⁶ Wardi yibenmarnemunkewe namarrkon ba bu kamayhkemayhke kunkimuk nawu ngurriyidko, dja kabenburriwe.

⁷ Bu ngaye yiman ngakuyinngakme kore kuburrrk, wanjh yimbidyir-riyuwn ngardduk kore kaddumbek dja kanbebe. Kannghehkemen kore bininj nawu birridjenbuyika bu ngandibongkarrme kundulkarre bedberre dorrengh.

⁸ Bedda minj kunwoybuk kabirriyolyolme dja kabirridjalkurrekurren. Bedda kabirridjalkowe munguyh.

⁹ Ngaye wanjh ngawayini mankongerrnge kore ngudda nawu God. Ngaye ngahdirri manbu lyre, instrument manbu ten kunyarl kakarrme bu ngaye marnemarnbun music kore ngudda.

¹⁰ Ngaye ngawayini ke, ngudda nawu yibenbidyikarrme kings ba bu kabirriwinhme kore kabirriburrenkenh. Ngudda wanjh yibebkeng

David, nawu ngunmarnedurrkmirri kore bininj birridjareni birribuyi mandjawak mankimuk dorrengh.

¹¹ Wanjh kannghehkemen kore birridjenbuyika bininj nawu ngandi-bun. Bedda minj kunwoybuk kabirriyolyolme dja kabirridjalkurrekurren. Bedda kabirridjalkowe munguyh.

¹² Bu ngudda kanbidyikarme wanjh nawu ngarrbenbornnan bininj kabirridjaldjordmen dja kabirrimurngrayekmen warridj. Dja ngalbu ngarrbenbornnan ngaldahdaluk, wanjh kabirriyimerran birrikuk-makkaykenh.

¹³ Bu ngudda kanbidyikarme wanjh ngarrimang manwern manme dja njalehnjale ngarridjehdjenkurrme nawern. Dja mayh nawu sheep ngadberre kawernhmirdewernmerren kore kabbal ngadberre.

¹⁴ Dja bulikki ngadberre wanjh kundulkarre duninj kabirridorrorkke mandulumukkenh manme manwern. Dja mak bininj nawu kabirrimre ngandibuyi ngadberre, wanjh kabirridjalbarabun! Minj ngandidar-rkidmang bu ngandikan kore ngandibongkarme. Minj nangale kore ngadberre bu kabirrikelekayhme.

¹⁵ Kunu wanjh kunwoybuk bu nungka Yawey kanbidyikarme kadberre, wanjh karriwernhnjilngmak. Nawu Yawey nakka God kadberre, wanjh kunu karriwernhnjilngmak duninj.

145

Bu Karriburlume God Nawu King Duninj.

Psalm 145

¹ Ngudda nawu God ngardduk dja king duninj. Ngaye wanjh mulewan ngudda bu yidjalwernhmak dja yingeykimuk duninj. Dja ngaye wanjh ngeyburlume bu munguyh munguyh.

² Kunbarnangarra rowk ngaye burluburlume ke. Ngaye wanjh munguyh munguyh ngeyburluburlume ngudda ke kunngey.

³ Nawu Yawey nakka nawernhkimuk duninj, dja bininj rowk birriburrbun nuye. Ngad nawu bininj minj ngarriwernhburrbun kore ngudda yidjalwernhkimuk duninj.

⁴ Bininj rowk wanjh kabindibukkabukkan nawu mawahmawah bedberre bu ngudda nawu Yawey wanjh yiwernhkurdu mak. Ngundiolyolme kore ngudda yikurduyime kundulkarre ke dorrengh.

⁵ Ngaye wanjh ngadjalburrbun munguyh bu ngudda yidjalmakkaykenh dja duninj kore yiwohnawohrn rowk kundjalmak ngudda ke dorrengh. Dja makngadjalburrbun munguyh kore ngudda yidjalkurduyime kunkimuk kunakkenh, ba bu kankangebarrhkeng ngad bininj.

⁶ Bininj rowk ngundiolyolme kore ngudda ke kundulkarrekimuk bu yibenkangebarrhkeng nawu bininj rowk. Ngaye mak mulewan ke kore yikurduyimeng kunwernkenh kunkimuk duninj.

⁷ Wanjh bininj rowk ngundimulewan bu kabirriyolyolme dja kabirriburrbun bu ngudda yidjalkurduyime kundjalmak. Bedda wanjh ngundimarnewayini kunnjilngmak dorrengh kore kabirriburrbun ngudda yidjalkurduyime bu djal mandjad.

⁸ Nawu Yawey nakka mimkongiwarn duninj dja kankongibun kadberre. Minj mak werrkwerrk kayiddung kadberre, dja kandjalmarnedjare bulkkidj duninj.

⁹ Nawu Yawey wanjh kanmarnekurduyime kunmak kadberre karriwarlahkenh bininj rowk. Nungka marnbom yehyeng rowk, dja ngad warridj kanmarnbom, dja nungka kandjalkongibun kadberre rowk.

¹⁰ O Yawey, ngad ngarriwarlahkenh bininj ngundiburlume, ngad nawu ngudda ke bininj wanjh ngundiolyolme bu ngudda yidjalmak.

¹¹ Ngundimulewan bu ngarriolyolme kore ngudda yiwohnawohnan rowk kunmakmak dja kundulkarre ke dorreng.

¹² Wanjh birriwarlahkenh bininj rowk kabirriborlhme bu ngudda yibenbukkabukkan kore yikurduyime kundulkarre kunkimuk duninj, dja kore ngudda yiwohnawohnan bu djal kunmakmak dorreng.

¹³ Ngudda yidjalwohrawnawohnan rowk munguyh munguyh, dja minj yingurdme bolkkime dja yerrekah munguyh munguyh.

¹⁴ Nawu Yawey kabendolkkayhwe birriwern nawu kabirrimankan, dja kabenbidbuyhwe nawu kabirringudjywarren kore kabirringorran manbu mandulmuk.

¹⁵ Birriwarlahkenh bininj rowk ngundibidnan bu ngundimadbun ngudda yibenwonowon manme bu bedda kabirriyawan kore kabolkyimerran mandjolengkenh.

¹⁶ Ngudda yibidyirriyo ba yibenwon namakmak kore nawu kabirridar-
rowk ba bu kabirriworrkmen.

¹⁷ Nawu Yawey kadjalkurduyime bu djal kunmakkenh. Dja nungka munguyh kandjalkongibun ngad karriwarlahkenh bininj rowk.

¹⁸ Nungka kahdarndi bininj nawu kabikayhme bu kahdi yiwarrudj kukangewoybuk dorreng.

¹⁹ Nungka kabenmarnekurduyime kore bininj nawu kabirrikelu bu bedda kabirridjawadjan. Nungka kabenkayhmibekkan dja wanjh kabenngeheke.

²⁰ Nawu Yawey kabennahnan rowk bininj nawu kabirrimarnedjare. Dja nawu birriwarre bininj wanjh nungka kabenbularrbun.

²¹ Ngaye ngamulewan nawu Yawey bu ngadjalurlume munguyh. Ngadjare yehyeng rowk dja mayh rowk dja nawu bininj rowk bu kabirringeyburlume Yawey nuye kunngeydjamun bu munguyh munguyh.

146

Ngad Wanjh Karriburlumen nawu Yawey.

Psalm 146

¹ Karriburluburlumen nawu Yawey! Ngaye ngadjalurlume nawu Yawey, kunkange ngardduk dorreng.

² Ngaye ngadjalurlume nawu Yawey bolkkime dja munguyh kore yerrekah ngayakmen. Ngaye ngamarnewayini nawu God ngardduk bolkkime dja munguyh bu ngadjaldarrkid.

³ Yuwn bu ngurrbenwoybukwon bininj kondah kurorrebeh nawu kabirriwohrawnawohnan, dja nawu kabirrikimukworren. Minj bedda kandingheke.

⁴ Bedda kaluk kabirridowen dja mak kabirrikukdudjindan. Wanjh kundjalmekbe rerrih bedberre kunmayali wanjh kayakayakmen rowk.

⁵ Wardi ngurriwoybukwon nawu God nuye Jacob, dja nungka nad-
jalkudji ngunbidyikarme dja ngunnjilngmarnbun. Ngurridjalmadbun Yawey, nawu God ngudberre, nawu ngundjalngeheke dja ngunnjilngmarn-
bun.

⁶ Nawu Yawey wanjh welengmarnbom kunnjol, dja mak kurorre, dja mak kurrula, dja mak marnbom mayh rowk nawu kahmirnderri kumekbe. Nungka munguyh kakurduyime kore nungan wokkurrmerrinj.

⁷ Nungka kabenmarneyime bininj kunmak nawu birribuyika kabindimarneyime kunwarre bedberre. Nungka kabenwon manme nawu kabirrimarrwe bininj. Nawu Yawey kabenbebke nawu kabirribongdi kore prison.

⁸ Nungka mak kabenmimbayhke nawu birrimibunje bininj, ba bu kabirribolknan. Dja nungka kabenwayhke bininj bu birribuyika kabindikukburriwe bedberre. Nawu Yawey kabendjalmarnedjare bininj nawu kabirrikurduyime kunmak.

⁹ Yawey kabennahnawu bininj nawu kubolkbubuyikabeh bu ngad karriraworren. Nungka mak kabenbidyikarrme wurdwurd nawu birrikornkumoyak, dja mak daluk ngalbu kamahkamarrdjukun. Dja nawu bininj birridjalwarre, wanjh nungka kabenkarrewarrewon bedberre ba bu minj kabirriyakwon kore kabirridjare.

¹⁰ Yawey nawu God ngudberre wanjh kadjalwohrnawohrnawu munguyh munguyh ngudberre nawu ngurriyo kore kukadje Zion, kaluk bolkkime, dja yerrekah duninh bu mawahmawah ngudberre kabirrire. Mah, wanjh karriburluburlumen nawu Yawey!

147

Karriburluburlumen Nawu Yawey.

Psalm 147

¹ Karriburluburlumen nawu Yawey! Nungka wanjh God kadberre, dja kamak rowk bu karrimarnewayini nuye. Bu karriburlume nungka wanjh kunmak bu karrikurduyime, dja karrinjinlgmak.

² Nawu Yawey kabolkmarbun kunred Jerusalem dja kabenmirde-mornname kunmekbe bininj nawu Israel benkebmawahmeng bu birridi kunkuyeng kore kubolkbubuyika.

³ Mak Yawey kabengkamarnbun birrimekbe bininj nawu birrikangewarre, dja kabenmarbun nawu kabirrikarrme kumorninj.

⁴ Nawu Yawey nakka nadjalkudji kurrmeng mankokkarrng rowk, dja kabenbebbehngeyibun kinjkinj rowk.

⁵ Nungka nawu Kawohrnawu Rowk, wanjh nadjalngeykimuk dja mak narrulkarrekimuk duninh. Kaburrbun yehyeng rowk, kunmayali rowk kakarrme.

⁶ Nawu Yawey kabennahnawu bininj, dja nawu birriwarre bininj, wanjh kabenkukburriwe kurorre.

⁷ Mah, wanjh karrimarnewayinin nawu Yawey kore karrimanjmanjbun. Nungka nawu God kadberre, wanjh karrimarnebun nuye kore nawu instruments harps.

⁸ Nungka wanjh kangolbarrkbun dja kangolburlerriwon, bu kamunkewe mandjewk kore kurorre rowk. Nungka wanjh kamarnbun kundalk bu kawernmerren kore kurrulow.

⁹ Nungka kamarnbun rowk manme manbu bulikki kangun, dja mak manbu mayh nawu ravens bu kakayhme kunmarrwe dorrengh.

¹⁰ Nawu Yawey minj kanjinlgmak bu kanan djarrang namak nawu ngudjbang. Dja minj mak kanjinlgmak bu kabinan bininj nawu namurgrayek.

¹¹ Dja nawu Yawey kawernhnjinlgmak bedberre bininj nawu kabirrimarnekele, dja kabirridjalwoybukwon nungka nawu kabenmarnedjare munguyh munguyh.

12 Ngudda nawu ngurrihni Jerusalem, wanjh ngurringeyburlumen nawu Yawey! Ngudda nawu Zion ngurrihni, wanjh ngurriburluburlumen nawu God ngudberre!

13 Nungka murrngrayekwong kunrurrk dja kurrang kore ngurrihni kamak rowk, dja ngunmarnekurduyime kunmak ngudda nawu ngurrihni Jerusalem.

14 Mak nungka ngunkukdjurruddi ba bu birribuyika bininj minj kabirrimre bu ngundibun. Kunmekbekenh wanjh ngurriddi kore kunmodmikenh. Dja mak nungka ngunwon manme mandjalmak.

15 Nawu Yawey kamunkewe nuye kunwok kore kondah kurorre bu kawokrayekwon, dja mahni kunwok nuye wanjh kawarlahmeng werrk-werrk.

16 Nungka wanjh kaburriwe kubolkwern manbu snow manbu kakukyime wool nawu kukbele. Dja mak kawernhburriwe frost yiman kayime bininj kaburriwe kunburlebele kore kurorre.

17 Nungka wanjh kawernburriwe hail kore kaddumbek yiman kayime kunwardde mankilehkilek. Adju, nangale kahdi kamak bu nungka kabolkmarbnun rowk bu yekke duninj?

18 Kaluk yerre wanjh kamunkewe nuye kunwok, dja bonj, kabolk-wurlhmen, dja manbu ice wanjh kayawoyhyimerran kukku. Nungka kamunkewe kunmayorrkmak, dja mankabo rowk kayawoyhborlobme.

19 Nawu Yawey benbukkang nawu Jacob nuye mawahmawah ba bu kabirriwokmang nuye kunwok. Nungka mak benbengdayhkeng bu benwong Israel nuye mawahmawah manbu mankarre dja kunwokrayek nuye rowk.

20 Nungka minj mak benmarnekurduyimeninj birribuyika bininj nawu birridjenbubuyika. Bedda minj kabirriburrbun nuye mankarre.

Mah, wanjh karriwernhburlumen nawu Yawey.

148

Birriwern Bininj Rowk Birriburluburlumen Nawu Kawohnan Rowk!

Psalm 148

1 Mah! Karriburluburlumen nawu Yawey!

Ngudda nawu ngurrihni kaddum kore heaven, wanjh ngurridjalburlumen nawu Yawey kumekbe kore kaddum.

2 Ngudda nawu Yawey nuye angels, dja nawu ngurrimarnedurrkmirri yiman soldiers nuye, wanjh ngurriburluburlumen!

3 Ngudda nawu kundung, dja mak ngudda nawu dir, wanjh nguneburluburlumen. Ngurriburlumen ngudda nawu mankokkarrng kore ngurrikukbamebame.

4 Ngudda nawu kunngol rowk, wanjh ngurriburlumen. Ngurriburlumen ngudda nawu kurrula kore kaddum yidjalboyo.

5 Ngaye wanjh ngadjare yehyeng rowk nawu Yawey marnbom bu kabirridjalngeyburluburlume. Nungka wokrayekwong, wanjh djalmarnbuyindanginj rowk.

6 Nungka wanjh kurrmekurrmeng kore kahdjalni munguyh munguyh. Nungka wokrayekwong dja nuye kunwok kadjaldi munguyh dja minj kawokyakmen.

7 Nawu yehyeng rowk kondah kurorre, wanjh burluburlumen nawu Yawey. Ngudda mayh nakimuk nawu kurrulabeh, dja nawu ngurrihdar-kiddi kanjdji duninj kore kuburrrk, wanjh ngurriburluburlumen!

8 Ngudda nawu namarrkon, ngudda mankurrrk, ngudda snow dja ngudda kunngol rowk, dja mak ngudda kunmayorrkkimuk, ngurriwern nawu ngurridjalwokmarrkmang nuye nawu Kawohrnan Rowk, wanjh ngurriburlumen!

9 Ngudda kuwarddekimuk, dja ngudda mandulum rowk, ngudda kundukbubuyika bu manme yibarnemdangen, ngudda nawu kundulkkuyeng dja kundulkmak,

10 ngudda mayh nabang rowk, dja nawu bulikki rowk, ngudda nawu mayh kilehkilek dja mak mayhmayh nawu ngurridolkan bu ngurrire, wanjh ngurriburlumen nawu Kawohrnan Rowk!

11 Dja ngudda kings nawu bininj bu ngurrbenmarnewohrnan birribuyika kore kubolkbubuyika rowk, dja mak ngurriwarlahkenh bininj nawu ngurrihni kumekbe, ngurrikihkimuk bininj warridj,

12 ngudda nawu yawurrinj dja mak yawkyawk, ngurrikohbahkohbanj dja nawu wurduwurd! Wanjh ngurridjalwern rowk ngurriburluburlumen nawu Yawey!

13 Wanjh bedda rowk birringeyburluburlumen nawu Yawey! Manbu kunngey nuye wanjh kabenggeyyurhke kunngeybubuyika rowk dja wanjh nadjalwernhngeykimuk duninj. Minj njale mak nadjalwernhmak duninj yiman nungka kore kondah kurorre dja mak kore kaddum heaven.

14 Nawu Yawey bingeykimukwong nakudji nawu narrulkkarrekimuk bedberre nawu nuye bininj, ba bu bedda kabirringeyburlume namekbe nawu king. Bedda nawu Israel benkebmawahmeng dja Yawey kabenmarnedjare duninj.

Mah, wanjh karriburluburlumen nawu Yawey!

149

Bu Karrimarnewayini Nawu Kawohrnan Rowk.

Psalm 149

1 Mah, karriburluburlumen* nawu Yawey!

Karriwayinin nuye mankongkerrnge kore karrimirndemornnamerren, ngad bininj nuye nawu karridjalwoybukwon nawu Yawey.

2 Ngad bininj rowk nawu Israel kankebmawahmeng, wanjh karriwernhmarrmarnin bu karriburrbun nungka kanmarnbom. Mak karrinjilngmakmen nuye nawu king kadberre, ngad nawu karrihni kunred Zion.

3 Karringeyburlumen nuye kunngey kore karrimarneborrke! Karri-marnebun nawu cymbals dja harps bu karriburlume nuye.

4 Yawey kanmarnedjare ngad nuye bininj dja wanjh kadjalnjlngmak kadberre. Dja bininj nawu minj bedman kabirriburlumerren, wanjh Yawey kabengehke dja kabenggeykimukwon.

5 Wanjh bininj nuye birridjalburlumen God bu kunmekbe kunmak kabenmarnekurduyime. Bedda wanjh birridjalwayinin nuye kunnjilngmak dorreng bu kukakkuyeng.

6 Wanjh birrikayhmen bu birriburlumen nawu God. Mak birrikarmen kunbid bedberre nawu mandjawak manmirrmak duninj.

* 149:1 Karriburlumen kayime "Hallelu Yah" kore Hebrew kunwok.

⁷ Bedda wanjh kabindibun bininj nawu birrikang kubolkbubuyika bu kabebun nawu birriwarre bininj rowk.

⁸ Warridj birrimekbe nawu God nuye bininj wanjh kabindidukkadukkan wirimurrng chains dorrengh kings nawu kabirriwohrnan kore birriwarre bininj, dja kabindibongkurme wirimurrng chains dorrengh.

⁹ Kuhni kabirriyime kore God benmarnebimbom nawu birriwarre bininj, bu nuye bininj wanjh kabindibun. Kuhni wanjh kabirriwinhme duninh nawu God nuye bininj rowk.

Mah, wanjh karriburluburlumen nawu Yawey!

150

Karriburlumen Nawu Kawohrnan Rowk Munguyh Munguyh.

Psalm 150

¹ Karriburlumen nawu Yawey!

Karriburlumen nawu God kore kubolkdamun nuye! Karriidjalburlumen kore kahni kaddum heaven, kunngudj kunwern nuye dorrengh.

² Karriburlumen nungka nawu kakurduyime kunwern kundulkarre nuye dorrengh! Karriburlumen nungka nawu nadjalwernhkuken duninh!

³ Karriburlumen nawu Yawey bu karribuhbuhme nawu trumpet, dja karriburlumen bu karriidrii nawu gitar dja nabubuyika instruments dorrengh.

⁴ Karriburlumen bu karribun nawu tambourine kore karrimarneborrke nuye. Dja mak karriburlumen bu karriidrii nawern nabubuyika instruments yiman harp dja flute.

⁵ Karriwernburlumen kore karrimarnbun kunwok kunkimuk bu karribiddowkmerren cymbals dorrengh.

⁶ Mah, ngad nawu karriidjarrkdarrkiddi, wanjh karriidjalburlumen Yawey nawu kanwong kunngolek nuye.

Karriidjalburluburlumen nawu Yawey!

Isaiah

Yawey Nawu Kawohrnan Rowk Kabendung Nuyé Bininj

Isaiah 1:1-20

¹ Nahni Isaiah, nawu beywurd nuyé Amos, kaluk nungka waralnang bu God biyingkihbuk kang kore baleh kakurduyimerran kore kunbolk bokenh Judah dja Jerusalem. Kuhni wanjh Isaiah waralnani bu bolkyimi kore kunkarrngbakmeng kings birriwohrnani kore Judah, kaluk bedda nawu birringeyyoy Uzziah, Jotham, Ahaz dja Hezekiah.*

² Nawu Yawey yimeng, “Kandibekka, nawu kaddum heaven ngurrihni dja nawu kurorre ngurrihni. Ngaye ngabendjordmiweng nawu wurdwurd ngardduk dja mak ngabenbidyikarmeng warridj dja bedda ngandiwockburriweng.

³ Mayh yiman bulikki dja donkeys nakka kabirriburrbun bininj nawu kabenmirndekarme dja mak kabenwon manme. Dja bininj nawu Israel benkebmawahmeng nakka minj ngandiburrbun ngaye. Mak minj kabirrimayalibayhme.

⁴ Wanjh kadjalwarre! Ngudda ngurridjalwarre duninj bininj dja kunwarre ngurrihkurduyime, dja munguyh ngurriwarreworren. Ngudda ngandiwirrihmeng dja ngandibodmewong ngaye nawu Yawey, dja ngaye ngadjalkudji God nawu Djamun Duninj ngudberre bininj nawu Israel ngunkebmawahmeng.

⁵ Njalehkenh bu ngudda ngurridjare ngurrihdjalkanjabang? Mak njalekenh bu ngurrihdjaldahme nungka nawu kadjare ngunbidyikarme. Ngurrikarme kumorninj kunwern kore kukodj ngudberre, warridj ngurrikangewarre duninj.

⁶ Kore kunburrk ngudberre makka minj kamak. Kore kanjdji kurrenge ngudberre dja kaddum kore kukodj wanjh ngurrikarme kunmok dja kumorninj, dja minj ngurrimarnburrimeninj yiman bu mankalkkid ngurribaruyi kunmok rowk. Ngurrihdjalkarme nawu nawarrehwarre kore kubuhburrk ngudberre.

⁷ Dja mak ngudberre kunbolk bolkwarreminj. Kukadje ngudberre bebbehbolkwurllheng rowk kunak dorreng. Ngurrbendarrkidnan nawu ngurriyidko bininj bu kabirridjaldjirdmang manme njalehnjale ngudberre.

⁸ Wanjh kukadje Jerusalem birribawong yiman kayime manrurrklarr kahdi kore kabbal ngarre manrakel. Kukadje Jerusalem yiman kayime kunred manbu soldiers birriroledminguneng ba bu birrirurkbakkeng.

⁹ Ngaye Yawey nawu nawernhdulkarrekimuk duninj, dja ngaye ngabenbawong yikahwi ngudberre bu kabirridarrkiddi. Dja bu burkryak, wanjh kunukka birridarrkidkukyayakmeninj karohrok bu benmarnekurduyimerranj bininj birrihni kore Sodom dja Gomorrah. Kuhni yimeng God nawu Yawey.

¹⁰ Ngudda bininj nawu Jerusalem ngurrini, ngudda ngurriyimerranj yiman kayime nawu birriwohrnawohrnani kunkareni kore Sodom. Mak ngurriyime yiman kayime bininj nawu kunkareni birrihni kore Gomorrah. Mah, wanjh bolkkime ngurribekkabekka kore nawu Yawey ngunmarneyime. Ngurriborlhmen kore nawu God kadberre kanbukkabukkan.

* **1:1** 2 Kings 15.1–7; 15.32–16.20; 18.1–20.21; 2 Chronicles 26.1–32.33 **1:9** Genesis 19.24; Romans 9.29

11 Wanjh nawu Yawey kayime, “Ngaye minj ngadjare nahni nawern mayh ngudda ngurrihkinje ba kandiwon ngardduk! Ngawarnyakminj ngudberre nawu ngurrihkinje sheep dja kunbalem nuye nawu namakmak mayh. Minj nganjilngmak kore nawu kunkurlba bulikki dja lambs, dja mak nanikud bu ngurrihkinje. Ngaye ngayingkihkarreme manwern duninj ngardduk.

12 Bu ngurrimre ngurribodan kore kumirrk ngardduk, wanjh nangale ngundjurrkang bu ngurribolkarrewon kore temple ngardduk kuberrkkah?

13 Ngudda yiman kandikowe bu ngurrimkan mayh nawu kandi-marnebnun. Wanjh ngurridjalbawo! Ngaye ngawidnan nawu mankalkkid-manjmak ngurrihkinje ngardduk. Minj mak ngadjare bu mulil ngurrikarreme nawu dirdkenh, dja mak bu mulil ngurrikarreme manbu kunbar-nangarradamunkenh dja mak manbubuyikakenh bu ngurrimirndemor-namerren kore ngurridjalkurren. Ngaye ngadjalwarnyak duninj.

14 Mak ngawidnan kore ngurrihmarnbnun mulil manbu nakerrnge dirdkenh, dja mulil manbubuyika warridj, dja nakka rowk ngannudjwarrewon bu ngaye yiman ngahngorran.

15 Bu ngurribidwayhme yiwarrudj ngurridi kandidjawanken, ngaye minj bekkabekkan ngudberre. Mak bu kunwernhkah ngurridi yiwarrudj, ngaye bodmewon ngudberre. Dja ngudda ngurribidburlerri ngunbid-delkdelkeng kunkurlba dorrengh.

16 Wanjh ngurribiddjirridjburrimen dja ngurrikukdjirridjburrimen. Ngaye minj ngadjare ngayawoyhnan ngudberre kunwarre, dja wanjh ngurringurmden bu kunwarre ngurrihkurduyime.

17 Wanjh ngurriborlhmen bu ngurrikurduyime kunmak. Ngurriyawa bu djal mandjadkenh ngurridjaddjadme. Ngurribenkangemurrnggrayekwo bininj nawu birribang kabindibongkarreme. Mak ngurri-ray kore court ba bu ngurribenbidyikarreme nawu birrimarladj bininj dja nawu kamahka-marrdjukun daluk, dja ngurribenmarnewokdin bedberre.”

18 Wanjh nawu Yawey kunbuyika mak kayime ngudberre, “Ngurrimray, ba kuhni karriyolyolmerren! Bu kunwarre ngudberre makka yiman kakurlbakurlba, wanjh ngaye marnbnun ngudberre ba bu ngurrikange-belemen yiman kayime snow! Bolkkime ngurrikangewarre kore kunwarrekenh ngudberre, dja wanjh ngaye kangemarnbnun ba bu ngurrimak bininj.

19 Dja bu ngurriborledmerren kore ngardduk dja wanjh kandiwokmar-rkmang, wanjh kunukka manme manmak ngurringun manbu ngurridud-jeng kondah kunbolk ngudberre.

20 Dja ngaleng, bu minj kandiwokmarrkmang dja kandiwidnan, nakka wanjh bawon ngudberre dja ngundibun mandjawakwi birribuyika nawu ngurriyidko.” Kuhni rowk yimeng nawu Yawey kore kurrangbeh nuye.

Yawey Kabendung Bininj Kore Kukadje Jerusalem

Isaiah 1:21-31

21 Bu kerrngehkenhni bininj nawu Jerusalem birrihni birrikangewoy-bukwong nawu Kawohnan, wanjh bolkkime bedda kabirrimarnebodan nawu idols. Bu kerrngehkenhni nakka djal kunmak birrikurduyimi, dja bolkkime bedda birrimardeyi rowk.

22 Ngudda bininj nawu Jerusalem ngurrihni, kunkare wanjh ngudda ngurrimakni bininj yiman silver nawu namakni money, dja bolkkime ngurriyimerranj yiman manwarre manbu bininj kabirridjalburriwe, dja

mak ngudda yiman wine manbomak manbu boraworrinj kukku dja bomanjwarreminj.

²³ Nawu ngundihmarnewohrnan bininj, nakka wanjh kabirriwokburriwe mankarre nuye God, dja mak birriraworrinj nawu kabirrihdjirdmadjirdmang. Mak kabirridjare kunwardde kabirrimang kore kunwarrekenh kabirrihyime, dja mak kabindikarremulewan bu kabindikowe birribuyika bininj. Bedda minj kunmak kabindimarnekurduyime nawu birrimarladj wurdwurd dja nawu kamahkamarrdjukun daluk. Minj kabindidjadme bu kunmakkenh, dja birridjalkongiyak kore court.

²⁴ Mah, wanjh bolkkime ngurriwernhbekka Yawey nawu Nawernhdulkarrekimuk Duninj God ngudberre nawu Israel ngunkebmawahmeng, bu yimeng, "Ngudda, nawu kandiwidnan, minj ngurriyawoyhmarnbun ngardduk kunyid. Ngaye kaluk karremulewan ngudberre kore baleh ngurrikurduyimeng.

²⁵ Mak ngaborledme ngudda ngudberre wanjh ngadjirridjbun nawu kunwarre ngudberre yiman kayime manbang duninj soap. Wanjh kabebmerren nawu nawarrehwarre ngunhkukburlerriwon kore kuburrkbeh ngudberre.

²⁶ Mak ngabendjarrngbun birridjalmak bininj ba ngundidjadme mandjad, dja mak ngundibukkabukkan kore kunmakkenh, yiman birrimekbe ngurrbenhkarmi bu kerrngehkenhni. Wanjh kuhni bu ngayime, bininj kabirringeybun Jerusalem bu kukadje kore bininj kabirriyime kunmak, dja mak kumekbe kabirrihni bininj nawu birridjalkangewoybuk." Kuhni bu Yawey yimeng.

²⁷ Nawu Yawey kadjalkurduyime kore kunmakkenh munguyh kunmekbekenh nungka kabenbebke bininj nawu kabirrihni kunred Zion[†] ba minj kabirriyawoyhbongdi. Bedda bu kabirriwarnyakmulewarren dja kabirribawon kunwarre, wanjh nungka kabenneghke kunmakkenh nuye dorrengh.

²⁸ Dja bininj nawu kabirriwokburriwe nawu Yawey, dja nawu kabirridjalkurduyime kunwarre, wanjh bedda kabirridarrkidkukyakmen.

²⁹ Wanjh Yawey kayime, "Ngudda kaluk ngurriyemengalme bu ngurrihmarnebodan nawu nabubuyika gods nawu ngurrihkurrmeng kore oak kundulk. Dja mak ngurridjalyeme kore ngurribolkdjarrngbom dja ngurridudjindi manme kore ngurriboddangeni nawu idols.

³⁰ Ngudda yiman kayime kundulk oak manbu kunmalaworr ngarre kahmalaworrdownerren bu kukku kaboyakmen dja kabolkdarlehmen kore manme ngurridudji.

³¹ Bininj nawu birringudjbang wanjh nakka yiman mandalkdarleh bu kabirrikinje kore kunak. Nungka kakurduyime kunwarre kunkimuk, dja mahni bininj dja mak nuye njalenjale kore kurduyimeng, wanjh yiman kawurlhme, dja minj nangale kabirludombun mahni kunak."

2

Kunmodmikenh Manbu Munguyh Munguyh Kadjaldi

*Isaiah 2:1-5
(Micah 4:1-3)*

¹ God biwong Isaiah nawu beywurd nuye Amoz mahni kunwok manbu kayolyolme kunred bokenh ngarre Judah dja mak Jerusalem kore baleh kabenmarnekurduyimerran bedberre bininj nawu kabirrihni.

[†] 1:27 Zion kungeybuyika ngarre Jerusalem.

² Kaluk yerrekah kuwarddekimuk kore mandjamun kunurrk* nuye Yawey kahrurrkdi, makka wanjh kawarddekukenmen duninh. Kaluk kawarddewayhme kaddum kabenkodjan manbu manduluhdulum, wanjh bininj nawu birrikang kubolkbubuyika nakka rowk kabirrimyor-me.

³ Kunukka yarrkka kubolkbubuyika nawu bininj kabirrihni wanjh kabirrimre dja kabirriyimerren, “Ngurrimray, karrire kore kuwarddekimuk nuye nawu Yawey†, kore Temple nuye God nawu Israel bininj bedberre. Wanjh nungka kanbukkabukkan kadberre kore nungka kadjare karrikurduyime. Mak karrimarrkmang kunwok nuye kore kanbolhbukkan kadberre. Kaluk kore Jerusalemeh kabebme manbu kunwok nuye nawu Yawey. Nungka kamwokdangen kore Zionbeh bu njalenjale kabenmarneyime nawu bininj nuye.”

⁴ Kaluk nungka kakarremarnbun dja kunwok kamarnbun bedberre nawu kore kubolkbubuyika kabirrihni. Wanjh nawu mandjawak bedberre nakka kabirrimarnbun ploughs dja mak mankole bedberre nakka wanjh kabirrimarnbun mandjawak nawu kundulkkenh kabirrihdadjike. Wanjh nawu kubolkbubuyika kabirrihbebbehni nakka wanjh minj kabirribur-ren. Minj mak kabirriyawoyhmarnburren bu kabirriburren war.

⁵ Wanjh ngurrimray, ngudda nawu Jacob nuye mawahmawah, dja karrikurduyime kunmak kore nawu Yawey kanmarnebolkwolkan kadberre.

Ngokko Darnkih Kamre Kunbarnangarra Nuye Nawu Kawohrnan Rowk.

Isaiah 2:6-22

⁶ Nawu Yiwohrnan, ngudda yibenbawong bininj ke nawu Jacob nuye mawahmawah. Bedda bindibalmayalimey birribuyika bininj nawu koyek-beh. Mak yiman bedda kabirrimulewan kore baleh kakurduyimerran bu yerrekah yiman nawu Philistines kabirrihyime, wanjh bedda birrimey rowk manbu kunmayali bedberre nawu birridjenbuyika bininj.

⁷ Kore kunred kabirrihni nakka birrikarmi nadjalwern silver dja gold; mak nadjalwern namakmak kabirridjenkar-me. Mak djarrang mindewernmerrinj bedberre, warridj nawern chariots kabirrikarme.

⁸ Mak nadjalwern idols kabirrikarme kore bedda kabirrihni. Wanjh bedda kabirrimarnebodan namekbe idols nawu bedmanbidju birrimarnbuni kunbidwi bedberre.

⁹ Kaluk kabirriyemengalme, dja kabirridjudkulme kunyemi dorrengh. Ngudda nawu Yawey, wanjh yuwn bu yibenmarnebengmidjdan kunwarre bedberre!

¹⁰ Bedda wanjh kabirrikelerlobmen kore kuwardderurrk yimankek kabirriwarlkarren! Warridj kabirribolkkarung kandji kurorre ba kabirriwarlkarren nuye nawu Yawey bu kamre kundulkarre dja kunmakmak dorrengh nuye!

¹¹ Bininj nawu kabirrihburlumerren nakka wanjh kabirrikukkolung kanjdji, mak kabirridjudkulme bu kunyemi duninh kabirriyemengalme. Bu kunmekbe kunbarnangarra kabolkyimerran wanjh nakka Yawey nadjalkudji nawu kadjalngeyukuken.

¹² God nawu Yawey, nakka nawernhdulkarrekimuk duninh djarrirna-meng kunbarnangarrakudji kore benmarnekarremarnbom bininj nawu kabirrihburlumerren yimankek bedda kabirridjalngeykimuk. Wanjh Yawey kabenkoluyhwe ba bu kabirriyemengalme.

* 2:2 “mandjamun kunurrk” kayime Temple. † 2:3 “kuwarddekimuk nuye Yawey” kakarme kungeybuyika “Zion”. 2:4 Joel 3:10 2:10 2 Thessalonians 1:9, Revelation 6:15

¹³ Nungka kaluk karrulkbakbakke manbu cedar kundulk manbu mankang Lebanon, dja mandulkkihkimuk oak manbu mankang Bashan.

¹⁴ Dja nungka kabolkkoluyhwe manwarddekihkimuk dja mandukuyengkuyeng.

¹⁵ Mak manwern manrurrkkuyengkuyeng, dja manrurrkkimuk manbu soldiers birrimarnbom, nakka karurrkbakke rowk.

¹⁶ Mak kabbala rowk kore kabirrihbayahme njalehnjale, mak kabbala manbu mankukmakmak dja mankimuk, wanjh nungka kadjalyibke rowk.

¹⁷ Wanjh kunyimekbe nawu bininj kabirrihburlumerren wanjh nakka kaluk kabirridjalngurdme bu kabirriburlumerren, mak kabirridjudkulme kunyemi dorrengh. Wanjh kunyimekbe kunbarnangarra nawu Yawey nadjalkudji nadjalngeykimuk duninj.

¹⁸ Dja idols rowk nawu bininj kabirrihmarneboddan nakka wanjh kayakayakmen.

¹⁹ Bu kunmekbe kunbarnangarra wanjh nawu bininj kabirrikelerlobmerren kore kuwardderurrk dja kore kuwarddehwardde mak kabirribolkarung kandji kurorre kore kabirriwarlkarren nuye nawu Yawey bu kamre kundulkarre dja kunmakmak nuye dorrengh.

²⁰ Wanjh kunyimekbe nawu bininj kabirrihburlumerren bedberre idols manbu mayh nawarre kakukyime manbu bedda birrimey silver dja gold bu birrikuknameng dja birrihmarneboddangeni.

²¹ Wanjh kunyimekbe bedda kabirrirolbmerren kore kuwardderurrk dja kuwarddebarrahbarrarn bu yimankek kabirriwarlkarren nuye nawu Kawohnan bu kamre darnkih kundulkarre dja kunmakmak nuye dorrengh, ba bu karrolkkan dja kadjalrokayhwe mahni kurorre kabolkdeldelme.

²² Wanjh kuhni ngurribawo kore bininjdeleng ngurribenmarrkmarren bu yimankek ngurringehkerren, dja nakka bininjwi. Nawu bininj wanjh kaluk kabirridowerren rowk. Bedda yiman yeng, dja minj baleh kabirrikurduyime bu ngundibidyikarme.

3

God Kabendjadme Judah dja Jerusalem

Isaiah 3:1-15

¹ Wanjh kuhni ngurriburrbu. Yawey nawu Kawohnan rowk wanjh Nawernhdulkarrekimuk Duninj. Nungka kamang rowk njalehnjale kore Judah dja Jerusalem kabirrihkarme, yiman manme dja kukku, wanjh kamre kamang rowk.

² Nawu Yawey kamre kabenmang kabenkan yikahwi bininj kore Jerusalembeh. Bedda nawu birringeykimuk, mak nawu birriwernhbang soldiers, mak bininj nawu kabindihjadme dja nawu prophets, mak nawu birrikurdang dja mak nawu dabborrabbolk,

³ mak nawu kabirrihwohnan kore soldiers dja nawu government kabirrihwohnan, mak nawu councillors, dja nawu kabirriwernburrbun kabirrihmarnmarnbun njalehnjale, dja mak nawu yimankek kabirrimulewan kore baleh kayimerran bu yerrekah. Yawey kabenkan rowk.

⁴ Wanjh nawu Kawohnan kayime, "Kaluk ngabenmarnbun yawuhyawurrinj bu kabirridokme ngudberre, mak wurduhwurdurd nawu minj kabirriwernhurrbun wanjh bedda ngundimarnewohnan.

⁵ Mak bininj rowk kabirriburren. Birriwern bininj nawu birriedbo wanjh kabirriwirrihmerren. Nawu yawuhyawurrinj dja yawkyayawkyawk minj kabindiwokmarrkmang nawu dabborrabbolk.

Nawu birriwarre bininj kabindiwockburriwe nawu birringeykimuk bininj."

⁶ "Kaluk bu kunyimekbe kabolkyimerran, nakudji bininj kabidarrkid-mang nawu benedanginj dja kabimarneyime, 'Ngudda yihkarrme nawu coat bu yidjongburren, wanjh ngudda yirrokmek kadberre. Wardi ngudda yiwohnawohnan kore mahni manbu rurrkbakabakmeng kore karihni.'

⁷ Dja nawu benedanginj karrollan wanjh kakayhme kayime, 'Ngaye minj bidyikarrme. dja ngaye minj ngakarrme manme dja kunmadj kore kurrambalk ngardduk. Minj ngudda kanmarnbun bu ngaye ngarrokme!'"

⁸ "Kuhni wanjh kakurduyimerran dja bininj nawu Jerusalem kabirrihni warridj bininj nawu Judah kabirrihni wanjh kabirriwarreworren. Bedda kabirriwokdi kunwarre, dja mak kabirrihkurduyime kunwarre duninj bu kabirriwokburriwe nawu Yawey. Kuhni rowk kabirriyime kore kumirrk nuye nawu nadjalwernhmak duninj.

⁹ Bedda birriwarreworring, dja minj kabirriyemengalme! Bedda wanjh kabirrikebrayek, dja kabirridjalburlumerren kore kunwarre bedberre. Bedda yiman birriwarre bininj nawu kunred Sodom birrini, nawu birriburlumerreni kore kunwarre birrikurduyimi. Mak minj kabirriwarlkarren kore baleh kabirrihkurduyime. Wanjh kunukka kadjalwarre duninj bedberre, dja wanjh bedmanbidju birriwarreworring dja kaluk kabirridjaldowe.

¹⁰ Dja bininj nawu kunmak kabirrikurduyime nakka wanjh kadjalmak rowk bu kayimerran bedberre. Dja mak kabirrimang nawu kahdjedjenyo bedberre kore kunmak birrihdjalkurduyimi.

¹¹ Dja nawu birriwarre bininj, nakka wanjh kadjalwarre duninj bedberre! Bedda bindimarnekurduyimi kunwarre birribuyika bininj, wanjh bedmanbidju kabirridowerren bu kunwarre duninj kabenmarnekurduyimerran.

¹² Ngudda yawurrinj, ngudda kundjalwarre ngurrbenmarnekurduyime nawu ngaye ngardduk bininj. Kunmekbekenh kunu wanjh morlehmorlenj nakka ngundibalmarnewohnan. Ngudda bininj ngardduk, bininj nawu ngurrbenmunkekadjung wanjh ngundihkebrohwarrewon dja minj ngundibolhbukkan kore manbolhmak." Kuhni rowk yimeng nawu Yawey.

¹³ Wanjh nawu Yawey kayerrkan kore court dja kabendjadme bininj rowk.

¹⁴ Nungka kabendjadme nawu dabborrabbolk dja nawu kabindimarnewohnan nuye bininj. Wanjh nungka kabenwiddjung dja kabenmarneyime, "Ngudda ngurrbenwarrewong birribuyika bininj kondah. Ngurrbenyimangi njalehnjale nawu birrimarladj bedberre, wanjh ngudman ngurribalkukenworreni.

¹⁵ Kaluk kunukka njalekenh bu ngudda yiman ngurrbenkukberelhmeng nawu bininj ngardduk. Njalekenh kunmekbe ngurrihkurduyime bedberre?" Wanjh kuhni kahyime Yawey nawu Kawohnan Rowk. Nungka wanjh Nawernhdulkarrekimuk Duninj.

Nawu Yawey Kabenbengdayhke Morlehmorlenj Kabirrihni Jerusalem

Isaiah 3:16-25

¹⁶ Nawu Yawey kayime, "Morlehmorlenj nawu Jerusalem kabirrihni nakka kabirriburlumerren. Bedda kabirriwohrewohre dja kaddum kabirrikodjwayhme bu kabirrire. Bedda kabirrikukan bininj bu kabindiborrkbun, dja kabirrirengehre yiman birriwarre daluk. Bedda kabirrihmaddukkayindi yehyeng nawu kadjirliidjirime bu kabirrire.

¹⁷ Wanjh ngaye ngakurmekurrme kunmok kore kukodj bedberre wanjh kabirrikodjmokmen birrimekbe morlehmorlenj nawu birrikang Jerusalem. Ngaye ngabenmarnbun bu yiman kabirrikodjbarlahmen.”

¹⁸ “Bu kunyimekbe kunbarnangarra wanjh ngaye ngabenyimang rowk nawu kabenhmarnbun kabirrihburlumerren, bu kabirrimahmaworren nawu kabirrimadukkayindi, dja nawu kabirrimilhdukkayindi, mak nawu kabirrikomdjongbuyindi yiman kakukrohrok dird.

¹⁹ Dja mak nawu kabirrikanemdulubuyindi, mak nawu kabirribended-jongbuyindi, dja nawu kabirrikodjbarrkbuyindi,

²⁰ nawu scarves bedberre, dja chain nawu kunmadkenh bedberre, dja belts nawu manburra kore kabirringardmodukkarren, mak budjurlung nawu namanmak kunkalkkik karrakendi, dja manbu charms,

²¹ dja signet rings nawu kabirribiddjongbuyindi, mak rings nawu kebbordkenh bedberre,

²² dja nawu namakmak manburra njalenjale, capes, shawls, dja purses,

²³ dja mak baddumanj bedberre, linen dresses, turbans nawu kabirrikodjdukkayindi, dja mak nawu nakuyengkuyeng kunmadj nawu kundokjenh.

²⁴ Kuhni bu ngayime, wanjh bedda minj mak kabirrikukbarurren nawu mankalkkidmanmak dja nakka wanjh kabirrikukbanjmen. Mak minj kabirringardmodukkayindi belts nawu manburra dorrengh, dja nakka wanjh kaluk kunyarl kabirringardmodukkayindi nawu yiman kabenbongkarrme rerrih. Mak minj kabirringabekmarnmarnburren bu kabirringabekbuyikaworren, dja nakka kaluk kabirrikodjbarlahmen. Mak minj madjmakmak kabirridjongbuyindi, dja bedda kaluk kabirridjongburren nawu kunnjilngwarrekenh kunmadj. Mak minj birrikumakkaykenh kabirrire, dja bedda kaluk kabirriyemengalme.

²⁵ Kaluk bininj birriwern ngudberre kore kunredkimuk Jerusalem, wanjh kabirriburren kore war, dja bedda wanjh kabirridowerren mandjawakwi.

²⁶ Wanjh birrimekbe nawu kabirrihni kore Jerusalem kaluk kabirrinjilngwarremen. Yiman kayime kamarrdjukun, ngalbu kabimarneyakayakmen njalehnjale rowk ngarre dja kadjalyerrkan kore kundjulng dja dedjlarrrk.

4

Bu Bininj Kabirriyakmen Kore Jerusalem

Isaiah 4:1

¹ Kaluk bu kunyimekbe kabolkyimerran, wanjh seven morlehmorlenj kabirridarrkidmang nakudji bininj dja kabirrimarneyime, “Ngad ngaringun manbu manne ngadberrekih dja kunmadj warridj ngadman ngarrimarnbun, dja kanmarnbu ngalbihbininj kobeng ke! Ba kunukka kanyemebularrbun ngadberre.”

Manyende Nuye Nawu Kawohnan Rowk

Isaiah 4:2-6

² Bu kunyimekbe kunbarnangarra kamre, wanjh Yawey kamarnbun yehyeng rowk nuye ba bu kayimerran namakkaykenh duninj ba bu bininj kabirriburlume. Kaluk bu kabenmarnekurduyimerran birrimekbe nawu kabirridaldarrkiddi kore Israel, wanjh nungka kabennjilngmarnbun dja kabenkukenwon duninj bu kabirrikurdunan kore Yawey kabenmarnebolkmarnbun bedberre ba mandjoleng kawernmerren bedberre.

³ Mak bininj rowk nawu kabirrihdjalni kore Zion, bedda nawu kabirrid-jaldarrkiddi kore Jerusalem, nakka kaluk Yawey kabenmakwan dja nuye bininj.

⁴ Nungka Kawohrnan Rowk kaluk kabenkangedjirridjibun bu kawe kunwarre bedberre birrimekbe morlehmorlenj nawu kabirrihni kore Jerusalem. Mak kabenkurlbadjirridjibun kumekbe kore birrihkurlbawar-rhmi nawu birridowerrinj kore Jerusalem. Kuhni kakurduyime kunak dorreng, bu djal mandjad kabendjadme.

⁵ Wanjh nawu Kawohrnan kabolkbarrkibun kuwarddekimuk Zion kundolngwi, dja mak kabenkukbarrkibun bininj rowk nawu kabirrimirnderri kumekbe kundolngwi. Nungka kakurrme kundolng bu barnangarra rowk dja bu kumunon nakka manbirluwoldjen kabenmarnebolkwolkan. Wanjh nawu Kawohrnan Rowk nuye kunmakmak duninj, wanjh kabenbarrkibun birrimekbe bininj dja yiman kayime mankimuk dabburlin.

⁶ Dja yiman kayime kundjurle bedberre bu kabendjurlewon kore kur-rungbang, dja mak kabolkmarnbun kamak rowk bu kabirriwarlkkayindi ba mandjewk nakimuk minj kabenbun.

5

Yawey Nawu Kawohrnan Rowk Kabenyolyolme Nuye Binihbinij nawu Bu Birriwokweyi Nuye

Isaiah 5:1-7

¹ Yawey yolyolmerrinj yimeng, “Kandibekka bu ngaye ngawayini ngardduk djawirna. Nungka bolkkarmeng kore dudji manrakel manbu grapes dja madbuni bu kadjolengmen. Yoh, nawu ngaye ngamarnedjare djawirna ngardduk, wanjh nungka bolkkarmeng kore dudji manrakel kore kurrulkmak.

² Nungka kulkmarbnom, moyhmangi dja burriweng nawu kunward-dekilehkilek yoy kore kunbolk nuye, dja mankulkmakkaykenh yingkih-marbnom. Kaluk wanjh nungka bolkkaruy dja kumekbe dudji manbu manmakkaykenh grapevines mak rurrknameng tower kore kuburldjarn ba bu bininj kabirribolkwohnan nuye. Nungka yawoyhbolkkaruy dja marbnom kore bininj kabirrimelme grapes bu kabirrikalkkidbebke. Wanjh ngehmgeng, dja bolkmaddi bu manbarnem manmak kumbarn-dangemeninj. Dja larrk, kawarre! Mahni manbarnem wanjh djal manbarnemwarre duninj!

³ “Wanjh nawu ngardduk djawirna kayime, ‘Ngudda bininj nawu ngur-rihni kore Jerusalem, dja kore kubolkkimuk Judah. Wanjh kandidjadmen kore ngaye dja mahni vineyard ngardduk bu nganedurren.

⁴ Baleh mak ngakurduyimeninj manbu vineyard ngarre kore ngaye ngarrudji yimankek bu kamak? Dja yimankek ngayimi manmak grapes kadjordmen, dja burrkyak, mak njalekenh manwarre grapes ngan-marnebebmeng?

⁵ Wanjh bolkkime marneyime ngudberre kore baleh ngayimewon manbu vineyard ngardduk. Ngaye ngayerrkke manbu hedge kore kawarnamyo, dja ngakinje. Mak ngabakke kunwardde manbu kawarnamyo. Wanjh bininj kabirribolkmelme manbu manrakel.

⁶ Mak ngabolkwarrehwarrewon kumekbe kabbal. Wanjh kundalk kabaldjokodjordmen, dja minj nganahnan mahni manrakel. Kaluk manngarrewarre kadjordmerren yiman mikardihkardird. Kaluk ngaye

ngarrabke kunngol ba bu mandjewk minj kumekbe kadjakdung.''' Kuhni yimeng nawu Yawey.

⁷ Bu Yawey nawu narrulkarrekimuk duninj bolkyolyolmi nuye manraket, wanjh nungka benyolyolmeng bininj nuye nawu Israel benkebmawahmeng. Bininj nawu birridanginj kore namud nuye Judah, nakka wanjh yiman kayime manraket manbu Yawey kamarnedjare. Nawu Yawey bennani ba mandjad birridjalreyi, dja burrkyak, nakka birrihdjalburreni kunkurlba dorreng. Yawey benkurdunani bu kore yimankek kundjalmak birrikurduyimeninj, dja burrkyak, ngaleng bendjalbekkani birrikayhmi bu kunyid birriworreni.

Kawarre Duninj Bedberre Nawu Birriwarre Bininj

Isaiah 5:8-30

⁸ Wanjh kadjalwarre duninj ngudberre nawu ngurrirurkmang manrurkweren, mak manwern kabbal ngurribolkkarme! Wanjh minj kawohbolkyo mak kunyahwurd bedberre nawu birribuyika dja ngudda wanjh ngurribolkmang rowk. Kaluk wanjh ngundibawon ngurridjalkudji ngurrihni kumekbe kunbolk.

⁹ Yawey nawu Dulkarrekimuk Duninj kuhni yimeng kore ngaye ngawokbekkang, yimeng, ''Kaluk kabolkymerran bu mahni manrurkrmakmak makka kururrkbakabakme, dja manbu manrurkkihkimuk makka larrk, dja minj nangale bininj kahyo.

¹⁰ Bu kunyimekbe kamre, wanjh manraket rowk, minj kamarnburren manwern mankalkkid, dja mandjalyahwurd mandjoleng kabebme. Dja mak bininj nawu kamimburriwe manwern manmim kore kunkulk nuye, wanjh kadjalmang mandjalyahwurd manme kore corn nuye.

¹¹ Mak kadjalwarre bedberre bininj nawu kabirrikabelnan dja kabirriboyawan kunbang bu kunkabelwern, wanjh kabirrihdjalkakwohre bu kumununburrk. Manmekbe kunbang kabenmarnbun bu kabirriwernhorromkan.

¹² Kore mulil bedberre bedda kabirrikarme instruments yiman lyres dja harps dja tambourines dja flutes. Bedda kabirribongun manbowern kore mulil bedberre. Kaluk bedda minj kabirriburrbun kore Yawey kurduyimeng, mak minj kabirriburlume nuye kore durrrkmirranginj kubid nuye.

¹³ Wanjh kumekbeken bininj birribuyika kabirrimre kandidarrkid-mang kandikan kadberre kore kubolkbuyika. Ngardduk bininj minj ngarriwernhorlmeninj. Mak nawu birrikihkimuk bininj ngadberre nakka kaluk kabirridowen bu kunmarwekenh, dja nawu birrimarladi bininj ngadberre nakka kaluk kabirrikombukdowen.

¹⁴ Wanjh kunbolk ngarre kundowikenh nakka kadjare birriwern kabirrikududjindan kore kakulkdjalkmire wanjh kumekbe kabirrikukwarawarrhmerren. Birridjalwern birriwarre bininj kabirrikolung kumekbe, yiman nawu birringeykimuk, dja nawu kabirriwarreworren dja nawu kabirridjalborrkurren.

¹⁵ Bu kunmekbe kayimerran wanjh bininj rowk kabirriyemengalme. Nawu birrikuken bininj mak nawu birrimarladi, nakka wanjh kaluk kabirrikolung, mak kunyemi kabenmang nawu kabirrihburlumerren.

¹⁶ Dja nawu Yawey nawu Nawernhdulkarrekimuk Duninj nakka kaluk kabirriburluburlume kore mandjad kabendjadme. Nungka God nawu Kukdjamun Duninj, wanjh yiman kakukbukkarren bedberre bu nungka nakukdjamunkenh kore mandjad duninj kahdjalkurduyime.

¹⁷ Kaluk kore rurrkbakmeng, wanjh nawu sheep kumekbe kabirrim-irndere kore baleh kabirridjare kabirringun kurralk. Mak nawu lambs kabirridalkngun kundalk kore rurrkbakabakmeng bedberre birrikuken bininj kernngehkenh birrihni.

¹⁸ Mak kadjalwarre bedberre nawu munguyh kunwarre kabirrihkurduyime! Mak kadjalwarre bedberre nawu minj kunmak kabirrikurduyime dja kabirridjalkowe, makka yiman kabirridukkayindi dja kabirridorrorrke manmekbe kunwarre.

¹⁹ Warridj kadjalwarre bedberre nawu kabirriyime “Yiddok nawu God minj werrkwerrk bu kakurduyime kore nungan yimeng. Ngad ngarridjare ngarrinan bu kakurduyimerran! Mak kore nungka yimankek karremarnbom nawu nakukdjamunkenh wardi werrkwerrk wanjh kurduyimerrangimen nuye. Ngad ngarridjare ngarriburrbun bu njale nakka.”

²⁰ Mak kadjalwarre bedberre nawu kabirriyime kore kunwarre nakka kunmak! Kadjalwarre bedberre nawu kabirriyime kore kunmak nakka kunwarre! Kadjalwarre bedberre nawu kabirriyime manbu kumunun nakka barnangarra dja manbu barnangarra nakka kumunun, mak bu njale nawu manjwarre nakka manjmak dja nawu manjmak nakka manjwarre.

²¹ Kadjalwarre bedberre bininj nawu kabirriyime yimankek bedda kabirriwernhburrbun mak kabirriwoybukwon bu bedda yimankek birri-mayaliwern!

²² Kadjalwarre bedberre bininj nawu manbang kabirribongun munguyh, wanjh kabirriburlumerren mak nawu kunbang kabirriborawon dja kabirribalyolyolme manbu minj manwoybuk.

²³ Bedda kabirrikan kunwardde ba kabindibebke nawu birriwarre bininj kore kabirrihrurrkkendi dja minj kunmak kabindimarnekurduyime nawu birrimak bininj bu kabindidjadme kore court.

²⁴ Nakka kaluk kabirridowerren rowk yiman mandalkdarleh manbu karung kore kunak. Yiman mankolhde manbu mandedjmad ngarre kanudmen dja kanguydown, wanjh kunmayorrk kabubuhme yiman kundjulng. Bedda birriwokweng Yawey nawu kawohrnan rowk, nawu Wernhdulkarrekimuk Duninjh, dja birriwidnani kunwok nuye nawu Nakukdjamunkenh God bedberre nawu Israel benkebmawahmeng.

²⁵ Kumekbekenh nawu Yawey kayiddung wernkih duninjh wanjh dja kaberlwayhme bu kabenbun kabenkukyakwon rowk nawu nuye bininj. Manbu kunwarddekimuk makka kawarddewodjorhmerren dja bininj kabirrikukyo kore manbolh yiman manwarre nawu kurorre kahyongoyo. Dja nawu Kawohrnan Rowk nakka kahdjalyiddung bu munguyh kabenhbn nawu bininj nuye.

²⁶ Nawu Yawey kawahyke kunmadj manbu banner bu kabendurndiwe bininj nawu djarreh kabirrihni. Mak kabenkayhme bininj nawu djarreh duninjh kabirrihni kubolkbubuyika. Wanjh ngurrina! Bedda ngokko kabirrimhre birrimekbe nawu ngurriyidko!

²⁷ Bedda nawu kabirrimre wanjh minj nakudji bedberre kangudjwarremen dja kaminkengalme. Bedda kabirrimarnmarnburren bu kabirriburren. Bedda kamak kabirriyingkihngardmodukkayindi mak nawu kabirrihdengedukkayindi nakka minj kayarldjobme bedberre.

²⁸ Dja nawu bunarra bedberre nakka kebmak rowk dja bows warridj nakka birriyingihmarnmarnbome bu kabindidulubunkenh. Mak djarrang bedberre nakka dengerayek yiman kunwardde, dja nawu chariots bedberre nakka karlobme werrkwerrk yiman kayime kunmayorrk.

²⁹ Bu kabirrikayhme nakka yiman lion, kaluk wernkih yiman nawu birringudjbang lions kabirrikayhmirlobme bu kabindidarrkidmang dja kabindihkan nawu kabirriyidko. Mak minj nangale kabenngurdke bu kabindakan birrimekbe bininj.

³⁰ Wanjh bu kunyimekbe kunbarnangarra, bedda kabirrikayhme yiman kurrula kahdulkarrewokdi bu kabidbubidbun. Kaluk bu bininj kabirribolknan kore kunbolk Israel nakka kadjalnan kunkak dja kunyid kabolkbarrkbun rowk, dja kore kabolkwolkayindi wanjh kadjalkakbakme rowk.

6

Yawey Bikayhmeng Dja Bimarnbom Isaiah Bu Nungka Yimerranj Prophet Nuye

Isaiah 6:1-8

¹ Ngaye Isaiah ngayolyolmerren kore kunkare nganang nawu Kawohnnan Rowk. Kuhni nganmarnekurduyimerranj bu kunmekbe mandjewk bolkyimi bu King Uziah doweng. Ngaye nganang nawu Kawohnnan Rowk yerrkang kore mankimuk throne nuye, kaddum duninh kore kubolkmak. Nungka wanjh djongbuyindi kunmadj nawernhkuyengkenh nawu bolkbarrkbom manbu kunrurrk temple.

² Warridj ngabennang nawu Seraphs birrimhdi kaddumkah kore nawu Kawohnnan ningihni. Kaluk nawu Seraphs wanjh birriwelyi six kunwel birribebbhkarmi. Bokenh kunwel kore birrikebbalhrreni, manbuyika bokenh kunwel nakka birridengebarrkburreni, dja wanjh birridolkani manbuyika bokenh kunwel dorreng bu birrirey.

³ Wanjh nawu Seraphs birrikayhmerreni, birriyimi, "Nawu Yawey narrulkarrekimuk duninh, dja nakka nadjaldjamun duninh! Nakka nadjaldjamun duninh! Nungka kahdi kunmakmak nuye dorreng kore kubolkbubuyika rowk kondah kurorre!"

⁴ Bu bedda birrikayhmi, wanjh manbu temple kunrurrk worrhmiyindanj, dja wanjh kundolng bebmeng, dja dolngbarlmeng rowk kore kururrk temple.

⁵ Wanjh ngakelekayhmeng, ngayimeng, "Aba! Ngaye wanjh ngadjalyakmen! Ngaye ngadjalwarre duninh! Ngaye wanjh kundjalwarrekenh ngadjalwokdi kore kurrang ngardduk, dja ngaye ngarridjarrkdi bininj rowk nawu kabirriwokdi kunwarre! Dja wanjh bolkkime nganang kunmim ngardduk nakka nawu king duninh, nungka wanjh Yawey narrulkarrekimuk duninh!"

⁶ Wanjh nawu Seraph nakudji karmi tongs, dja mey manbu wernhyirkeoy kore altar, wanjh dolgang dja kumwam kore ngaye, karmi kubid nuye manbu kunyirrke.

⁷ Wanjh ngandangkenhwong mahni kunyirrke, dja yimeng, "Yina! Mahni kunyirrke ngundangwelkilekmeng, dja wanjh kunwarre ke bularbuyindanj, dja manbu kunwarre yikurduyimi, makka wanjh karremulewayindanj."

⁸ Wanjh kunmekbe rerrih ngawokbekkang kunwok nuye nawu Kawohnnan Rowk, yimeng, "Kaluk nangale bininj ngaye ngamunkewe? Nangale bininj kare ngadberrekenh?"

Wanjh ngayimeng, “Ngaye kondah ngahdi. Dja ngaye kanmunkewemen!”

⁹ Wanjh nawu Kawohrnran Rowk yimeng, “Wanjh yiray kuhni yiyolyolmen bininj bedberre, ‘Ngudda ngurribekkabekkan dja bonj, ngudda minj ngurrimayalibayhme. Mak ngurrinangahnan dja bonj, minj ngurriwernhburrhun.’

¹⁰ Yibenmarnbu nahni bininj bu kabirrimayaliyakmen. Yibenkanembalmen dja mak yibenmimbalmen. Bu bedda yimankek kabirrinan kunmim bedberre dja kabirribekkan kunkanem bedberre, wanjh kabirrimdurndeng ngardduk ba bu ngabenmarnbun.”

¹¹ Wanjh ngadjawam, “Nawu Yiwohnrnan, kaluk baleh kabolkyime bu kuhni ngakurdyime? Yiddok kunkuyeng?” Dja nungka yimeng, “Kore kuredkihkimuk ngarre kubbolk Israel kadjalrurkbakme rowk, dja bininj kumekbe wanjh kabirriyakmen. Kore bininj rowk kabirridjalbawon kururk rowk bedberre, dja kahdjalbolkyo kabolklarrk kore kabbal dja kuberrk dja minj nangale kabolknahnan.

¹² Yikurdyimen kore ngaye won kaluk bu ngaye nawu Ngawohrnran ngabenmunkewe bininj rowk bu kabirrire kubolkbuyika djarreh, dja kabirribolkbawon kahdjalbolkyo.

¹³ Kaluk bu birridjalkudji bininj kabirrihdjalni, wanjh ngaye ngaya-woyhbolkbularrbun. Nahni bininj nakka yiman oak kundulk manbu kabirridulkdjobke dja mandedjmadwi kabirribawon kahdi. Wanjh nawu bininj nakka yiman manmekbe mandedjmad manbu kaluk kayawoyhdulkdangen. Ngayime bu bininj ngardduk karohrok. Bedda wanjh yerrekah kabirrihyawoyhmirndewernmen.

7

Yawey Byingkihmulewam Nakudji Wurdyaw Nawu Ngeyyoy Immanuel

Isaiah 7:1-17

¹ Kunkare nawu Uzziah bibornang Jotham, dja nungka bibornang Ahaz. Wanjh Ahaz yimerranj king dja wohrnani kore kubolkkimuk Judah. Bu kunmekbe wanjh kunyid bebmeng kunred Jerusalem. Birridanjbig kings birribebmeng dja birridjareni bindibuyi bininj nawu Jerusalem. King Rezin wohrnani kore kunbolk Aram dja mak King Pekah, nawu beywurd nuye Remaliah, wohrnani kore kubolkkimuk Israel. Bedda birribebmeng kore Jerusalem bu kabirriburrenkenh, dja birridjalbarabom. Minj bindimarnebolkmayi Jerusalem.

² King Ahaz nawu wohrnani kore Judah mey kunwok manbu yimeng, “Bininj nawu birrikang Aram dja nawu birrikang Israel nakka wanjh birrimirnderaworinj.” Bu kuhni kunwok birribekkan wanjh bininj nawu birrihni kore Judah nakka birrikeleminj. Birrideldelmeng duninj yiman kundulk bu kunmayorrk kabubuhme.

³ Wanjh nawu Yawey bimarneyimeng Isaiah, “Ngudda dja nawu beywurd ke nawu kangeyyo Shear-Jashub nguneray ngunenanan Ahaz. Bolkkime kahdi kore kukku kaborlobme kaluk kaddumkah manbolh kore bininj manburrba kabirrimarnbun.

⁴ Wanjh yimarneyimen Ahaz, ‘Yinahnrarimen. Yingurdmen dja yuwn bu yinjilngwarre. Yuwn benemekbe bininj bokenh ngundikelehme, nawu Rezin dja Pekah nawu beywurd nuye Remaliah. Yuwn bu yikengeme kunkangeyid berrewoneng. Bedda djal yeng. Bedda yiman kundulk bokenh bu kadjaldi kunak kundolng dorrengh, dja minj kawurllhme.

⁵ Bedda benekarremarnbom bu ngundibunkenh, bu beneyimeng,

⁶ “Ngarre karrbenbun nawu Judah kabirrihni dja ngarrbolkwarrewon. Wanjh ngarrbolklarimrann dja ngarrmarnbun nawu beywurd nuye Tabeel bu kayimerran king bedberre.”

⁷ Dja ngaye Yawey ngawohnawohnan rowk, dja ngayime, “Kore bedda benekarremarnbom, nakka minj kakurduyimerran.

⁸ Kore kubolkkimuk Aram makka wanjh Damascus, dja namekbe nawarre king kangeyyo Rezin, nungan kawohnan kore Damascus. Kaluk bu sixty-five mandjewk kayimerran wanjh bininj nawu Ephraim kabenkebmawahme kabirridjalyarlarmerran dja minj kabirriyawoyh-mirnderaworren.

⁹ Dja kore kubolkkimuk Ephraim kakarrme kunredkimuk Samaria. Dja bininj nawu kawohnan kumekbe, wanjh djal beywurd nuye Remaliah. Bu ngudda minj kandjalwoybukwon ngaye nawu Yawey, wanjh kunukka ngudda yidjaldowen.” Kuhni yimeng nawu Yawey.

¹⁰ Wanjh Yawey biyawoyhdjawam Ahaz bu bimarneyimeng,

¹¹ “Kandjawa ngaye nawu Yawey ba bu bukkabukkan bu woybukkih ngaye ngawokurrmerren ke. Wanjh kandjawa njale nawu yidjare bu kakurduyimerran kore kandji duninjh kurorre mak kunubewu kaddum duninjh kore heavens.”

¹² Dja bonj, Ahaz yimeng, “Ngaye minj djawadjawan bu kanbukkan njalenjale, dja mak minj yiman rohrokmeninj ngudda nawu Yawey.”

¹³ Wanjh Isaiah biwokmey, yimeng, “Ngudda bininj nawu mawah-mawah ke David, wanjh kandibekka! Yiddok kunukka kawarre bu yibenmarnewarnyakmen bininj nawu ngundimadbun? Dja mak yiddok kunmekbe rerrih bu yikurduyime nuye nawu ngardduk God?”

¹⁴ Bonj. Wanjh nungan nawu Kawohnan Rowk kaluk ngunbukkabukkan. Kaluk ngurrinan ngalkudji ngalyawk ngalbu minj bininj benebangmeyuwirrinj, dja kayawmang narangem, dja mak kabingeykurme ‘Immanuel’.

¹⁵⁻¹⁶ Nahni wurdyaw bu kadjordmen wanjh kangun yiman cheese, dja mak mankung, dja med, ngudda werkk ngurribolknan kubolkkimuk bokenh kore bininj kabirriyo nawu ngudda ngurrbenmarnekelemen, dja ngurrinan kore mahni kunbolk bokenh kabolkwarrewarremen rowk, dja bininj kabirridjalyakmen kumekbe, dja mak kings bokenh ngarre wanjh kabeneyakmen warridj. Bu yerre kuhni kakurduyimerran rowk, wanjh nahni wurdyaw nawu kangeyyo Immanuel, wanjh korroko kaborlhme ba bu kawarnyak kunwarre dja kadjaldjare kunmak.”

¹⁷ Wanjh bolkkime Yawey nawu Kawohnan Rowk kamunkewe kunrayek duninjh bu kunrayek kambembe kore ngudda dja kore bininj ngudda ke, dja mak kore kornkumo ke dja nuye bininj. Makka kaluk karayekwernmerren duninjh yiman kurduyimeng bu kunkareni Israel dja Judah beneyarlarmeng. Wanjh nawu Kawohnan Rowk kabimkan king nawu Assyria kawohnan bu kamre ngurriburrenkenh.”

Nawu Kawohnan Rowk Kabenrayekwon Bininj Nawu Judah Benkebmawahmeng

Isaiah 7:18-25

¹⁸ “Bu kunyimekbe kunbarnangarra, wanjh nawu Kawohnan Rowk kabenkayhme bininj nawu Egyptbeh. Wanjh bedda kabirrimre kabirriwernmerren yiman bod kabembe kore Egypt ngarre mankahkabo. Mak

nungka kabenkayhme bininj nawu birrikang kunbolk Assyria, dja bedda kabirrimre yiman bod nawu mankungenh kawernmerren.

¹⁹ Birrimmekbe bininj nawu Judah ngurriyidko nakka kaluk kabirriyo kore kuwarddebarrahbarran dja mak kore kuwarddehwardde, kore kinj manmirrhyi, dja kore manlabbarl rowk.

²⁰ Bu kuhni kunbarnangarra nawu Kawohnan Rowk wanjh kabimang bininj kawohnan rowk kore kunbolk Assyria. Nungka kamre mandjawakmirrmak nuye dorreng ba bu kabimarnedurrkmirri God. Nungka wanjh ngungabekdadjke, dja ngunkarremuddadjke mak ngundjawurrkdadjke.

²¹ Wanjh bu kunyimekbe kunbarnangarra kayimerran, bu nangale bininj kadjalkarme nakudji yaw bulikki dja bokenh sheep nawu darrkid.

²² Wanjh walakkihwurd milk kakarrme bu kangun milk curds. Mak birrimrndejudkjudji bininj nawu kabirridjaldarrkiddi kondah kunbolk, wanjh kumekbe nakka kabirrihdjalgun milk curds dja mak mankung.

²³ Bu kunyimekbe kunbarnangarra wanjh kabolkwarremen kondah. Kore bininj birridudji one thousand manrakel manmak, dja birriweykani dja birrikumey money nawern duninj, wanjh manrakel kayakmen dja kundalkwarre kadjordmen, dja mak kinj manmirrhyi kadjordmerren kumekbe.

²⁴ Kaluk bininj kabirriyawan kore kabirrihwarlbun mayh nawu kare kungarrewarre dja kinj manmirrhyi.

²⁵ Bu kerrngehkenhni bininj birridurrkmirri kore kubolkmak kumekbe bu manme birridudjengi kore kurruluhdulum, wanjh yerrekah minj nangale kare kumekbe, dja kundalkwarre dja kinj manmirrhyi djokkodjordmerrinj wanjh kabenkelemen. Nakka sheep dja bulikki kumekbe kabirrire bu kabirridalkgun.

8

Yawey Bengdayhkeng Isaiah Bu Bininj Birribang Kabirrimre Kore Assyriabeh

Isaiah 8:1-10

¹ Nawu Yawey nganmarneyimeng, "Yima nawu nakimuk djurra manbu scroll dja yibimbu bimkimuk yiyime, 'Nawu Werrkwerrk Kamre Bu Kadjirdmang.*'

² Kaluk yibenbenekayhmen bokenh bininj nawu ngundinan, bedda wanjh Uriah nawu priest dja Zechariah nawu beywurd nuye Jeberekiah. Nahni benebokenh kabenedjalwokdi kore kunwoybuk."

³ Wanjh ngawam kore ngalbininj kobeng ngardduk ngalbu prophet dja nganeyonginj, wanjh ngaleng yawkani wurdyaw dja yawmey narangem. Kaluk nawu Yawey nganmarneyimeng, "Yingeykurrmen namekbe wurdyaw 'Nawu Werrkwerrk Kamre Bu Kadjirdmang'.

⁴ Dja namekbe king nawu kawohnan kore kubolkkimuk Assyria wanjh nungka werrkwerrk kamre kakan rowk nawu namakmak ngarre kukadje Damascus dja mak kubolkkimuk Samaria. Kuhni kayimerran yerre bu namekbe wurdyaw ke kawokdi bu kayime 'Karrang' dja 'Ngabba'."

⁵ Kaluk nawu Yawey yawohwokdanj ngardduk, nganmarneyimeng,

⁶ "Ngaye nawu Ngadjalwohrnan Rowk ngadjareni ngabennahnayi kunmodmikenh dorreng nahni bininj nawu Judah benkebmawahmeng. Ngawoyi kunmodmikenh ngardduk yiman kayime mankabo Shiloah

* **8:1** Mahni kungey kore Hebrew kayime "Maher Shalal Hash Baz"

kabenbowon kukku bedberre dja kamak rowk. Dja bonj, bedda wanjh ngandiwirrihmeng dja bedda kabindikengeme King Rezin dja King Pekah nawu beywurd nuye Remaliah.

⁷ Wanjh kunmekbekenh ngaye nawu Ngawohnran Rowk ngabenmunkewe bininj kore Assyriabeh kundulkarre kunkimuk warridj. Nawu king bedberre kamre kabenbun bininj kore Judah. Bedda kabenbularrbun yiman kayime mankabo mankimuk Euphrates bu kamarnburren kundjurrh dja kabalborlobme karrkad kore manberrk.

⁸ Birrimekbe birribang bininj kore Assyriabeh wanjh kabindibirrhmiere kunbolk Judah yiman kukku kaburrkmen bu kabolkbarrkbun kunbolk rowk dja darnkih kabengakme bininj.

Dja ngudda Immanuel, ngudda yibennan nahnii bininj kaluk kabirriyarlarrme yiman mayhmayh bu kawelwarlahmen wanjh kabirribolkbarrkbun kumekbe kunred ke." Kuhni yimeng nawu Kawohnran Rowk.

⁹ Ngurrikayhmen kungele dorrengh, ngudda nawu bininj kubolkbubuyikabeh. Kandibekkabekka ngudda nawu djarreh duninj kunbolk ngurrihdi. Kaluk ngudda ngurridowerren. Ngurrimarnmarnburrimen bu ngad kandibuyi! Dja kaluk ngudda ngurridowerren!

¹⁰ Mah! Wanjh ngurriyingkihkarremarnbu bu kandibunkenh. Dja bonj, God nungan ngarridjarrkdi. Wanjh ngurridjalbarabun.

Isaiah Kayolyolmerren Bu Kabimulewan Kore Yawey Bibengdayhkeng

Isaiah 8:11-22

¹¹ Nawu Yawey nganbengdayhkeng dja nganwokrayekwong. Nungka yimeng bu ngaye minj ngabenmunkekadjung birribuyika bininj wanjh yimeng,

¹² "Bininj nawu kabirrihni kore Judah kabirrihyime yimankek birribuyika kabirrihkarremarnbun bu bedda kabindidung, dja ngudda yuwn yibenwoybukwon. Yuwn bu mak ngurrikele karohrok bu bedda kabirrikele, dja yuwn bu yikengehme kore bedda kabirrikengehme.

¹³ Dja yidjalburrbu bu ngaye Yawey wanjh ngawernhdulkarrekimuk duninj. Ngudda yiyimen bu ngaye ngadjamun duninj. Wanjh ngaye ngadjalkudji bu ngudda kankengehme, dja yidjalelemen kore ngardduk.

¹⁴ Mak ngaye yiman kubolkdjamun duninj bedberre bininj nawu kubolkkimuk Israel kabirrihni, dja mak bininj nawu Judah kabirrihni. Dja mak ngaye yiman manwarddekimuk manbu kabenbungkarrkbun bininj. Dja mak ngaye yiman walabbi manbu kabendarrkidmang bininj nawu birrikang Jerusalem.

¹⁵ Birriwern bininj kaluk kabirrimankan kore mahni manwarddekimuk dja kabirrimurrngbakabakme. Bedda kabirridjardabmerren dja kabirridjalbongdi."

¹⁶ Wanjh kandibekka. God nganwokwong mahni kunwok kunwoybuk nuye. Wanjh ngurridjalwokkarmen ngudda bininj nawu ngaye bukkabukkan.

¹⁷ Ngaye wanjh ngamadbun nawu Yawey. Nungka benmarnekebwarkkarrinj bedberre bininj nawu Jacob benbornang, dja ngaye ngadjalwoybukwon nungka.

¹⁸ Ngaye wanjh kondah ngahdi ngardduk wurdwurd dorrengh ngarrihdjarrkdi. Bedda nawu Yawey nganwong nahnii wurdwurd. Kaluk nungka

kankurmeng ba bu ngarrbenhbukkabukkan bininj nawu Israel benkeb-mawahmeng ba bu kabirriborlhme Yawey nawu nawernhdulkarrekimuk duninh nawu kahni kore Mount Zion,

¹⁹ Yikahwi bininj kabirriyime, “Ngurrbendjawa nawu nakurdang dja nuk marrkidjbu bu baleh kakurduyimerran ngudberre!” Aba, kawarre. Bedda wanjh kabirringayawkme dja kabirriwokdi kore djal bedman. Njalekenh bu God nuye bininj minj kabirridjawan God bedberre bu baleh yerre kakurduyimerran? Dja njalekenh bininj nawu kabirrihmimbi bu kabindidjawan bininj nawu kabirridudjindi kurorre?

²⁰ Dja kore God korroko ngunbukkabukkang, manmekbe wanjh ngurrid-jalmarrkma. Nungka kanwong kunwoybuk bu kanyingkih bengdayhkeng. Bu nangale bininj kadjalwokdi kunbuyika, wanjh nakka minj kaburrbun kunwoybuk.

²¹ Bedda kaluk kabirridjakkbekkan dja kabirrimarrwedowen mak kabirrihdjalwohrehore. Bu kabirribekkan kabirriwernhmarrwedowen, wanjh bedda kabirriyidung dja kabirribolknan kaddum ba bu kabindidung king bedberre dja mak God bedberre.

²² Kaluk kabirridjalnan kanjdji kore kurorre dja kabirrinan djal kunyid, dja mak kunkangewarre dja mak kunkak duninh. Wanjh bedda kaluk kabenburriwe kore kunkak duninh bu kabirrihni.

9

Nawu Yawey Kanyingkih bengdayhkeng Bu Kaluk Jesus Kamre Kadberre

Isaiah 9:1-7

¹ Bininj nawu kunrayek wernmerrinj bedberre wanjh kaluk kabirriyawoyhnjilngmakmen. Kunkareni God benmarladjwong bininj nawu birrihni kore kunbolk bokenh Zebulun dja mak Naphtali. Kaluk bu yerrekah God kabenkukenwon bedberre. Wanjh kabolkmarbun bu kabolkkimukmen kore kabolkyirriyo manbolh ngarre kurrula kangeyo Mediterranean. Kumekbe yungkikah mankabo manbu Jordan, dja mak kakkikah kore kunbolk Galilee, kumekbe kore bininj nawu minj Jews kabirrihni.

² Bininj nawu birrihdjalmayahmi kore kubolkkakmunun, wanjh wern-hbolkwolkayindanj bedberre! Bininj nawu munguyh birridjalkeleni kundowikenh, wanjh kabirrinan kamak rowk kore benmarnewolkayindanj.

³ Ngudda Yawey, ngudda yibenmarnbom birrimekbe bininj birrimirndewernmerrinj dja mak yibennjilngmarnbom. Bedda wanjh kabirriwernhmarrmarr kore kumirrk ke, yiman kayime bininj nawu kabirrimanang manbu manme mandjoleng kore kabbal birrihdudjengi. Bedda wanjh kabirrimarmarr yiman kayime bininj nawu kabirriwinhme kore kabirriburren war dja kabirrimoyhmag njalenjale manbu birriyidko bininj birridjalwarrhkeng.

⁴ Yibenbekkeng kore birribuyika bininj bindibuni dja bindimarnbom bu bindimarnedurrkmirri. Ngudda yibenbom birrimekbe birriwarre bininj, karohrok bu ngudda kunkareni ngudda yibenbom bininj nawu birrikang kunbolk Midian dja bendulmukwoni bininj nawu Israel benkeb-mawahmeng ba bu birringorrkani dulmuk. Wanjh nakka ngudda yibenmarneyerrkkeng rowk bedberre.

⁵ Kaluk kayakmen rowk kore armies kabirriburrenkenh. Namekbe nawu soldiers kabirridengedjongbuyindi wanjh kabirriburriwe kore kunak. Mak nawu kunmadji bedberre djuhmiyindi kunkurlba dorrengh, wanjh nakka kabirriburriwe kore kunak.

⁶ Bolkkime wanjh nakudji wurdyaw danginj kadberre! God kanwong nuye beywurd. Kaluk nungka wanjh kadjalwohrnan rowk. Wanjh kariwarlahkenh bininj karringeybun namekbe wurdyaw kunngyebubuyika yiman, “Namakkaykenh nawu kanbukkabukkan”, dja mak “God nawu wernhdulkarrekimuk”, dja mak “Kornkumo nawu kamimbi munguyh munguyh”, dja mak “Prince* nawu kawohrnan kore kunmodmikenh”.

⁷ Nungka wanjh kadjalwohrnan rowk bu munguyh munguyh, kundulkarre dja kunmodmikenh dorrengh, dja kare munguyh. Mak nungka kawohrnan kore David nuye throne[†] dja kore bininj rowk nuye. Mak kabennahn bedberre kunmakmak dja mandjad dorrengh, kore karredjingmangbeh dja minj kayakmen bu munguyh munguyh. Yawey nawu narrulkarrekimuk duninj, wanjh nungka kamarnbun rowk ba kayimeran kore nuye.

God Kabenwernhyiddung Israel Bininj

Isaiah 9:8-21

⁸ Nungka Kawohrnan Rowk wokmunkewerrinj kore bininj nawu Jacob benkebmawahmeng. Kaluk manmekbe kunwok kayime bu God kabendjadme bininj nawu kabirrihni kore Israel.

⁹ Wanjh birriwern bininj nawu Ephraim benkebmawahmeng dja mak bininj rowk nawu birrihni kore kubolkkimuk Samaria, nakka kaluk kabirriburrbun bu God benbom bininj kore kunbolk Israel. Bedda wanjh kabirriburlumerren, wanjh kuhni bedda kabirriyime,

¹⁰ Mahni kururrkwern makka warrawarrhmeng dja ngad wanjh ngarri-marnbun bu ngarriyawoyhwarddekurrmekurrme! Mak kundulk warridj birridulkdjobdjobkeng kundulk manbu figs. Ngad wanjh ngarriyawoyhdulknamehname manbu mandulkkihkimuk manbu Cedars.

¹¹ Dja nawu Yawey kabenmarnuldulkarrekimukwon bininj nawu kubolkbubuyikabeh bu kabindiwirrihme dja kabirrimre kabindibunkenh.

¹² Bedda wanjh birrikang koyekbeh kore kubolkkimuk Syria, dja birribuyika mak nawu Philistines nakka kabirrimre karrikadbeh. Bedda wanjh birrimkunirey bu Israel kabirriburren yiman nabang mayh kabindibaye. Dja bonj, nawu Kawohrnan Rowk nakka minj yiddowimeninj. Nungka munguyh kabenhdjaldung nawu Israel benkebmawahmeng.

¹³ Nawu Kawohrnan Rowk benbom dja bonj, bedda minj birrikangeborledkerrimeninj bu birridurndeyi kore nungka. Bedda minj birriyawayi.

¹⁴ Wanjh kunmekbekenh nawu Yawey kabenbun rowk bininj nawu kabirrihwohrnawohrnan dja mak nawu kabindibukkabukkan kore Israel. Nungka wanjh kabenburriwe rowk bu kundjalkudji kunbarnangarra.

¹⁵ Birrimkebe bininj nawu daborrabbolk dja mak nawu birringeykimuk, dja mak prophets nawu kabindibukkan kore bedda kabirridjalkurrehkurren.

¹⁶ Bedda nawu kabindibukkabukkan kore Israel, wanjh minj bindibukkayi mandjad kore kunwoybuk, dja bindikoweng, bu

* 9:6 “Prince” kamenyime, “nawu beywurd nuye king” † 9:7 “throne” kamenyime, “kore king kahyerrkan” 9:7 Luke 1:32-33

bindibukkang bininj manbu manbolhwarre ba bu kabirribolhkadjung dja kabirribolhmayahme.

¹⁷ Wanjh nawu Kawohrnan Rowk minj kabenmarnenjlmgmak nawu yawuhyawurrinj. Mak minj kabenkongibun nawu birrimarladj dja nawu kamahkamarrdjukun. Birriwern rowk bininj kumekbe wanjh birrimarneyarlarmerrinj nawu God dja djal kunwarre kabirribalhkurduyime. Bu bedda kabirriwokdi, wanjh munguyh kabirridjalyime kunwarrekenh.

Wanjh nawu Yawey kakurduyime kuhni rowk, dja bonj, minj kayidyakmen. Nungka wanjh kamarnburren bu kabendjalbun.

¹⁸ Kaluk manbu kunwarre bedberre makka yiman kunak bu kahbirluyahwurd dja kabalbirlukimukmen mak kahdjalle kabirluwarlahmen kore kuberrk, kangun mankarre manwern manbu werkkwerkkawurhime. Kaluk kundolng ngarre kawayhme kaddum. Nakka yiman kabenyolyolme nawu bininj bu kabirriwernhwarremen dja minj kunmak kabirrikarme kore kukange bedberre.

¹⁹ Yawey nawu Narrulkarrekimuk Duninj kahdjalyiddung, dja nungka yiman kabolkwurhke manbu kunbolk. Wanjh nawu bininj kumekbe nungka yiman kabenkukburriwe kore kunak, dja bedda minj kabirribidyikarmerren.

²⁰ Kunukka kabirrimarrwedowen, dja kabirringun nawu njale kabiringalke kore kukun bedberre. Kabirringun, dja nakka kaluk kabiriyawoyhmarrwedowen. Mak kabirringun manbu kabirringalke kore kudjakku bedberre dja nakka minj kabirriwernhworrkmen. Wanjh bedda kaluk kabindikungun wurdwurd bedberre nawu birridowerrinj.

²¹ Wanjh bininj nawu kunmokukurr Manasseh kabindikungun bininj nawu kunmokukurr Ephraim kabirrihni, dja bininj nawu Ephraim kunmokukurr wanjh kabindikungun bininj nawu Manasseh kunmokukurr. Wanjh bedda kaluk kabirriraworren dja kabindinjirrhmiwon bininj nawu kunmokukurr Judah kabirrihni. Kuhni rowk kabenmarnekurduyimerran, dja bonj, nawu Yawey kabendung, dja minj yidyakmeninj. Nungka kadjalmarnburren bu kabendjalbun.

10

Yawey Nawu Kawohrnan Rowk Kabendjadme Birriwarre Bininj

Isaiah 10:1-4

¹ Kadjalwarre bedberre nawu kabirrihkarremarnbun mankarre manwarre. Bedda nawu kabirrihkarremarnbun ba bu kabindimarnarayekwon nawu birribuyika bininj.

² Bedda minj kunmak kabindimarnekurduyime nawu birrimarladj. Dja nakka kabindiyimang rowk bedberre. Mak kabindiyibawon birribuyika bininj bu kabindimarnedjirdmang njalehnjale nawu kamahkamarrdjukun bedberre. Warridj nawu njale kabirridjare nakka kabindidjalyimang bedberre wurdwurd nawu kornkumoyak.

³ Ngudda nawu ngurrihkarremarnbun kunwarrekenh, bu nawu Kawohrnan Rowk nuye kunbarnangarra kamre, dja nungka ngundjadme ngudberre, kaluk baleh ngudda ngurrikurduyime? Bu kunyid kamhbebme djarrehbeh wanjh ngudda baleh ngurriyime? Kaluk kore nangale bininj ngurrirobme nuye ba ngunbidyikarme ngudberre? Mak baleh ngurriwarlkan nawu njalenjale nawern namakmak ngudberre?

⁴ Minj baleh mak ngurrikurduyime dja wanjh ngurrimankarren kurorre kunkele dorrengh dja ngurriaworren bininj nawu kabirrihbongdi. Mak ngurrimankarren kore nawu birridowerrinj kabirrihkuyongoyo.

Kuhni rowk Yawey nawu kawohrnan rowk kakurduyime, dja bonj, nungka minj kunyid nuye yidyakmeninj. Nungka wanjh kadjalmarnburren bu ngunbun ngudberre.

Nawu Yawey Kabendjadme Bininj Nuye Dja Mak Bininj Nawu Assyri-abeh.

Isaiah 10:5-34

(Isaiah 14:24-27, Nahum 1:1-3:19, Zephaniah 2:13-15)

⁵ Nawu Kawohrnan kahyime, “Kadjalwarre bedberre nawu Assyria kabirrihni! Ngaye ngabenmunkewe bedberre bu yiman kabirrihkan kunkangeyid ngardduk kore bininj nawu ngaye ngabendjadme.

⁶ Wanjh bedda ngabenmunkewe ba kabindibun bininj nawu birriyarlarrmeng nuye God. Bedda ngandimarnbun bu ngayiddung wanjh kunmekbekenh ngaye ngabendjurrkan bininj nawu birrikang Assyria ba kabindibun nawu bininj kabirrihni Judah. Mak kabindiyimang rowk njalehnjale nawu kabirrihkarrme dja kabindikumelme ba kabirrikukyo kore kukih.”

⁷ Dja king nawu kawohrnan kore kunbolk Assyria nakka wanjh kunbuyika kaburrbun. Nungka kakarremarnbun bu kabenbularrbun bininj birriwern rowk kore kubolkbubuyika.

⁸ Wanjh nungandeleng kaburlumerren bu kayime, “Nawu soldiers ngardduk, nakka yiman kings rowk dja kabindiwohnrnawohrnan.

⁹ Bedda bindibom bininj rowk kore kukadje Calno dja mak kore kukadje Carchemish. Mak kunmekbe yerrih karohrok bu karrbenbom bininj kore kubolkkimuk Samaria dja kukadje Damascus.

¹⁰ Kaluk ngaberlwayhmeng dja ngabenbolkmey kubid ngardduk kunbolk bedberre nawu kabirrimarneboddan idols. Birrimekbe bininj kunwardde birrimarnbuni namakmak idols bu birriboddangeni, dja nawern duninj birrikarmi. Kaluk kukadje Jerusalem dja kore kubolkkimuk Samaria nakka walakkih birrikarmi.

¹¹ Ngaye ngokko ngabolkmey bu ngabenbom namekbe dorreng nawu kabirrihmarneboddan kore Samaria. Wanjh kunmekbe yerrih karohrok ngaye ngabenmarnekurduyime bininj nawu Jerusalem kabirrihni dja mak bedberre idols.” Kuhni yimeng king nawu wohrnani kore Assyria.

¹² Kaluk bu Yawey kayakwon rowk bu kabenbun bininj kore kuwardkimuk Zion dja mak kore kukadje Jerusalem, wanjh nungan kayime, “Bolkkime ngaye ngabenbun nahn king nawu kawohrnan rowk kore Assyria, dja nungka munguyh kahdjalburlumerren. Nungka wanjh kadjalkimukworren.

¹³ Namekbe king kayime, ‘Kore ngayebidju ngadjalkudji ngakurduyime ng rowk kundulkarre ngardduk! Ngaye wanjh ngakodjkuludjad duninj dja kunmekbekenh kunu ngaye ngakurduyimeng kunwern. Ngaye ngangimeng kubolkbubuyika kunwern, dja ngabenyimangi namakmak bedberre bininj kumekbe. Ngaye ngabenbongkurrmeng nawu kings bedberre. Ngaye wanjh ngabang duninj dja ngarrulkarrekimuk duninj.

¹⁴ Nawu njalehnjale namakmak bedberre nakka wanjh ngaye rowk ngarrurndiweng bu ngabenyimey. Minj nangale mak nganyimayi dja nganbuyi dja minj baleh mak birrikurduyimeninj bu ngandingurdkemeninj. Kuhni ngayimeng yiman kayime bininj kadjirdmang wirrarr ngarre mayhmayh kore kareddi.”

¹⁵ Wanjh nawu Yawey kayime, “Yiddok namekbe king marnburrinj yimankek nungka nakuken duninj dja minj ngeye kanburrbun? Nungka

kadjalburlumerren kore kumirrk ngardduk! Yiddok kamak? Yiddok kurdburru kaburlumerren kore kubid bininj nawu karrulkdjobke?"

¹⁶ Wanjh kunmekbekenh kunu Yawey nawu narrulkkarrekimuk duninj kamunkewe kundjak kore bininj birribang soldiers nawu Assyri-abeh. Nawu king bedberre kabenburlume, wanjh kabirringudjwarremen. Mahni kundjak kabenyakwon yiman kunak manbu kabirluwarlahmen wanjh nawu njalehnjale nakka kayakwon rowk.

¹⁷ Yawey nawu God kabenmarnebolkwolkan bedberre nawu Israel benkebmawahmeng. Mak nungka kayimerran yiman manbirlukimuk duninj dja kunbarnangarrakudji kabenwurlhke rowk.

¹⁸ Kore bedberre kubolkkimuk kubolkmak Assyria, wanjh Yawey kabolkwarrewarrewon bu karung njalehnjale bedberre. Wanjh bininj kumekke kabirriyemerran yiman bininj nawu kabirridjaldulkkihngalme dja walakkihwalakkih kabirringudjwarremen bu kabirribalhdowen.

¹⁹ Kaluk bu kuhni kayimerran, wanjh mandulkkudjihkudji kahdjal-dulkdi, dja wurdyaw karrulkrohrokme bu baleh kayime kundulk kahd-jaldulkdi.

²⁰ Wanjh bu kunmekke kabolkymerran, bininj nawu kabirrihdjaldi kore Israel benkebmawahmeng wanjh birridjalkudji. Bedda nawu namud nuye Jacob minj kabindihyawoyhmarrkebbun birrimekbe nawu bindibom, dja kabirriborledkerren bu kabirrikangewoybukwon Yawey nawu Nadjalkudjamun Duninj bedberre nawu Israel.

²¹ Bu kuhni kayimerran wanjh kabirrihdjalkudji nawu Jacob nuye namud kabirrihdjalyo, dja birrimekbe kabirrimdurndeng kore God nawu narrulkkarrekimuk duninj bedberre.

²² Ngudda bininj nawu Israel mawahmawah nuye, kunukka bonj. Bu ngurrimirndewernni yiman kayime kunkayalanj kore adjbud, wanjh kaluk ngurrimirndeyahwurmden nawu ngurrimdurndeng. Kaluk nungan God bendjadmeng dja benwarrewam birriwern bininj, dja nungka kabendung kore benmarneyimeng. Nakka wanjh mandjad bu kakurduyime.

²³ Woybukkih, kaluk nungka Yawey nawu narrulkkarrekimuk duninj kabenbun bininj birriwern kondah kunbolk, kore ngokko wokkurrmerinj. Dja kadjalyakayakmen rowk.

²⁴ Kuhni wanjh Yawey wokdanginj, nungka nawu narrulkkarrekimuk duninj dja kawohrnran rowk, wanjh kayime, "Ngudda nawu bininj ngardduk nawu ngurrihni kore Jerusalem, yuwn ngurrbenkengehme bininj nawu kabirrihni kore Assyria. Bedda ngundiwidjbihkeyi kundulkwi yiman bininj nawu Egypt ngundibuni ngudberre bu kunkareni.

²⁵ Kaluk darnkih duninj bu ngaye ngabawon kore ngayiddung ngudberre. Ngaye minj ngayawoyhyiddung ngudberre, dja ngaborledme ngabenbun nawu kabirrihni kore Assyria. Kaluk ngabenbularrbun kunkangeyid dorrengh ngardduk."

²⁶ Nungka Yawey nawu narrulkkarrekimuk duninj kabenwidjbihke whip dorrengh. Dja kabenyimewon yiman nawu birrikang Midian bu benbom kore kuwardde manbu kawarddengeyyo Oreb. Warridj kundulk kawayhke kaddum kore kurrula yiman kurduyimeng kore Egypt.

²⁷ Wanjh birrimekbe nawu birrikang Assyria kore ngundihngorrlenwoni nawu ngunhdulmekwoni nakka wanjh kaluk kayerrkmerren rowk ngudberre. Dja ngurribekke kore bedda ngundibongkarrmi dja ngurriw-ernhdurkmirri bedberre.

²⁸ Nawu bininj birrikang Assyria nakka wanjh darnkih kabirribebme kore kabolkngeyyo Aiath. Dja kabirriwohngimen kore kunred Migron.

Mak manbu manme bedberre makka kabirridjehdjenkurrme kore kunred Micmash.

²⁹ Dja kabirriballe kaddum kunwarddekimuk. Wanjh bolkkime kunun kabirriyo kore kunred Geba. Mak bininj nawu kabirrihni kore kukadje Ramah nakka kaluk kabirrikeleme duninj. Dja nawu kabirrihni kore kukadje Gibeah nakka kaluk kabirrikelerlobmerren. Bedda nawu king Saul nuye namud.

³⁰ Dja ngurridarrarrhmen ngudda nawu ngurrihni kore kunred Gallim! Mak ngudda nawu ngurrihni kore kunred Liashah, wanjh ngurribekka! Mak nawu kabirrihni kore kunred Anathoth, wanjh kawarre ngudberre!

³¹ Mak nawu kabirrihni kore kunred Madmenah nakka kabirrikelerlobmerren. Dja nawu kunred Gebim kabirrihni, nakka werkkwerkkabirrihwarlkkarren.

³² Wanjh bu kuninjkuu kunbarnangarra birrimekbe bininj nawu birrikang Assyria kaluk kabirriwohnghehme kore kunred Nob. Dja kabindimarnebidwodjorrhmerren bininj nawu Kuwarrdekimuk Zion kabirrihni, kore kukadje Jerusalem.

³³ Ngurrina! Nawu Yawey narrulkkarrekimuk duninj kawohnnan rowk, wanjh kabenbun yiman bu kundulk karrulkdadjke. Wanjh nawu birrikihkimuk nakka kaluk kabirrimankarren kore kurorre yiman bininj karrulkdjobke kundulkkimuk.

³⁴ Yiman kayime kundulk kahmankarren bu bininj kabirrihdulkdjobke kurdburru dorrengh. Nungka wanjh kunmekbe kabenmarnekurduyime bininj kore kubolkkimuk Lebanon. Kuhni kayime nungka nawu Narrulkkarrekimuk Duninj.

11

Kaluk Nawu King Duninj Karrangen

Isaiah 11:1-9

¹ Ngad karriburrbun rowk bu bininj kabirridulkdjobke, wanjh mandedjmad kabirribawon kore kurorre. Kaluk mankerenge kundulk kadjordmen kore maninjmanu mandedjmadbeh. Kaluk mahni kundulk kakarreme manyende, dja nakudji manyende wanjh kamarnbun mandjoleng. Wanjh kamenyime bu king duninj kamre. Kaluk nungka karrangen kore namud nuye Jesse.

² Kaluk Yawey Namalngmakkaykenh nuye kabikukbarlmikan namekbe king ba bu kabiwon kunmayali kunmak, dja kabibukkan kundjalwern, dja mak kabimarnbun namekbe king ba bu kabenbukkabukkan birriwern bininj bu mandjadkenh. Warridj nahni Namalngmakkaykenh kabiwon kundulkarre, dja mak kabibukkan ba bu nungka kabiwernhburrbun nawu Yawey kore kabimarrkmang nuye.

³ Kaluk namekbe king kadjalnjilngmak bu kabiwokmarrkmang nawu Yawey.

Nungka kabendjadme bininj rowk bu djal mandjad. Nakka minj kabendjalkuknan bininj kore kurobbe. Nungka minj kabiwdjalwobekkan bininj bu birribuyika kabirriyolyolme. Burrkyak. Wanjh bu kabiwdjadme wanjh kabikangenan kanjdji, dja kabiwdjadme bu mandjad duninj.

4 Kabennan nawu birrimarladj bininj, dja kabenmarnedjadme bu kunmakkenh. Bu kabennan bininj nawu kabirrimarrwe, wanjh kabenmarnenowokdi bedberre kore kubolkwarlahkenh rowk. Bu nungka kawokdangen, wanjh kurorre yiman kabolkdeldelme. Dja bu nungka kabuhme kunngolek nuye, wanjh kabenbun nawu birriwarre bininj.

5 Nungka munguyh kadjalkurduyime kunmak, dja munguyh kawokdi bu djal kunwoybukkenh, dja minj kakurren.*

6 Kaluk bu nungka kawohrnan rowk, wanjh kunwern kabuyikamen. Mayh nabang nawu wolf minj kayawoyhbun nawu lamb, dja leopard nabang duninj wanjh kabenedjarrkre nawu goat dja kamak rowk. Mayh rowk kabirridjalworren rowk, minj kabirriburren dja minj kabirribangmen. Kamak bu wurdyaw kabenkebkakanan.

7 Bulikki dja bears nakka kabirridjarrkngun dja yayaw bedberre nakka kabirridjarrkkeyo. Nawu lions nakka wanjh kundalk kabirridalkngun yiman kayime bulikki.

8 Mak nayaw nakka kamak bu kadjaldirri darnkih kore nayin nabang nawu cobra kahreddi, mak kaberngimen nawu wurdyaw kore kunred nuye nawu nabang nayin.

9 Minj mak bininj kabirridurren kore ngaye ngani kore kuwarddekimuk Zion. Dja birriwarlahkenh bininj rowk kabirriborlhme Yawey, dja kunmayali nuye kabolkbarlmikan kondah kurorre rowk yiman kayime kukku kabarlmikan kurrula duninj.

*Kaluk Yawey Kabenmirndemornname Nuye Bininj Kore Kubolkbubuyik-
abeh.*

Isaiah 11:10-16

10 Bu kunmekbe kabolkymerran, wanjh namekbe king nawu David bibeBMWahme kore namud nuye Jesse, wanjh nakka kahdjaldi kore birriwarlahkenh bininj rowk kore kurorre wanjh kabirrihnan, dja kabirrimirndemornnamerren kore nungka. Dja kore nungka kahni, nakka kabolkbarlmiyindan kunmakmak nuye.

11 Wanjh bu kunyimekbe nawu Kawohrnan Rowk kabidyirrikurmerren bokenhkah ba bu kabendurndiwe dja kabenmornname bininj nuye nawu birridjalkudji kabirrihni. Birrimekbe nawu God nuye bininj kabirrihni kore kubolkkimuk Assyria, dja mak Egypt kore kakbi dja walem kabirrihni. Mak nungka kabendurndiwe kore kubolkbubuyika yiman Cush, Elam, Hamath, Babyonia, dja mak kore kubolkwern manyunkurr rowk kore kurrula mankimuk.†

12 Kaluk nawu Kawohrnan Rowk yiman kaddum kabiwayhke namekbe king ba bu bininj birriwarlahkenh kabirrinan kore kubolkbubuyika rowk. Mak bu nawu birriwarlahkenh bininj kabirriwohburrhun bu nungka kabenmornname bininj nuye nawu birriyarlarmeng dja kabirribebbehdi. Bedda nawu birrikang Judah, nakka birriyarlarmerrinj yikahwi birriwam kakbi, yikahwi walem birriwam, mak yikahwi nakka koyek dja karrikad birriwam. Wanjh nawu Kawohrnan Rowk kabendurndiwe kore kabenmirndemornname.

13 Wanjh bu kunyimekbe bininj nawu Israel benkeBMWahmeng kabirringurdme kore kabindinjirrhmiwon bininj nawu Judah benkeBMWahmeng. Dja bininj nawu kunmokokurr nuye Judah, wanjh bedmanwali kabirridjalngurdme kore kabindinjirrhmiwon bininj nawu Israel nuye kunmokokurr.

¹⁴ Dja ngaleng kabeneraworren nawu Judah dja Israel bu werkkwerrr kabindikolung dja kabindibun nawu Philistine bininj nawu kabirrihni karrikad. Kaluk nahni bokenh kunmokukurr kabenedjarrkre kore koyek dja kabindiyimang rowk nawu njalehnjale namakmak bedda kabirrihkarrme nawu bininj kumekbe. Mak kabindibun bininj nawu birrikang kubolkkimuk bokenh Edom dja Moab. Mak bininj kore kunbolk Ammon kabirrihni, nakka wanjh kabindidjalwokmarrkmang Israel dja Judah.

¹⁵ Nawu Yawey kaluk kabolkdarlehwon kurrula kangeyyo Manbokurlba kore kubolkkimuk Egypt. Mak kamunkewe kundulkarre duninj nuye manbu kumayorrk manbu manmayorrkwurhkenh bu kaboyakwon mankabo manbu Euphrates. Warridj kabolkdjalkmang mahni mankabo mankimuk ba bu kamarnbun kukku kaborlobmerren kore seven mankabokilekileh ba kunukka kamak bu bininj kabirridjowkke kurrenge.

¹⁶ Wanjh kunukka kabenmarnebolhmarnbun manbolhmak bedberre bininj nuye nawu kabirribolkbawon Assyria. Kunukka yiman karohrok bu nawu Israel bininj birribolkbawong Egypt dja birridjowkkeng kurrula.

12

Karriwayinin Nuye Yawey Kunjilngmak Dorreng

Isaiah 12:1-6

¹ Bu kunmekbe kabolkyime, wanjh ngudda ngurriyime, "Ngaye wernhburluburlume ngudda Yawey! Bu kerrngehkenhni ngudda kandungi, dja bolkkime burrkyak, ngudda minj kandjaldung. Ngudda wanjh kannjilngmarnbun.

² Woybukkih, God nakka kanngeheke. Wanjh kunmekbekenh ngaye minj ngayawoyhkele, dja ngaye ngadjalwoybukwon nungka.

Nawu Yawey nganwon kunngudj. Nawu Yawey nganmarnbun bu ngawayini nuye. Nungka wanjh nganneghkeng."

³ Yoh, nawu God ngunneghkeng wanjh ngurrimarrmarr duninj, yiman bininj nawu kakombukdown bu kabongun kukku kore kungadmak.

⁴ Bu kunyimekbe kunbarngarra, wanjh ngudda ngurriyime, "Karriburlumen nawu Yawey, warridj karingeymulewa nuye kunngey. Karbenmarneyimen birriwarlahkenh bininj rowk kore baleh nungka kurduyuyimeng. Mak karbenmarneyime bu nungka nangeywernhkimuk duninj.

⁵ Karriwayinin nuye nawu Yawey, dja nungka kurduyuyimeng bu kundjalmak duninj. Wardi birriwarlahkenh bininj rowk kabirriburrun kore baleh nungka kurduyuyimeng."

⁶ Nawu Nawernhukudjamun Duninj ngudberre nawu Israel nguringeyyo, wanjh nakka ngurridjarrkdi kore ngudda. Wanjh kunmekbekenh ngurrikayhmen dja ngurriwayinin wernkih duninj kunjilngmak dorreng ngudda nawu ngurrihni kore kukadje Zion.

13

God Kabendung Bininj Kore Kukadje Babylon

Isaiah 13:1-22

(Isaiah 47:1-15, Jeremiah 50:1-51:64)

¹ Ngaye wanjh Isaiah, nawu beywurd nuye Amoz. God nganwokwong kunwok manbu kayolyolme kukadje Babylon. Kuhni wanjh nganmarney-imeng.

² Nawu Yawey yimeng, "Mah! Yiwayhkemen manburrbba nawu banner kore kaddum kuwarddekimuk kore kundulkyak. Dja bininj nawu soldiers yibenkayhmen dja yiberlwayhmen bu yibenkimang. Yibenwokwon bu kabirringimen kore gates ngarre kukadje Babylon kore bininj kabirrihni nawu kabirrikimukworren.

³ Kaluk ngayebidju ngabenkimey birrimekbe bininj nawu ngabenkuk-larlme yiman kayime ngardduk rerrih. Wanjh ngabenkayhmeng ba yiman kabirrikanahkan ngardduk kunkangeyid. Kaluk bedda kabirrin-jilngmakmen bu ngaye ngabenyurhke nawu birriwarre bininj."

⁴ Ngurribekka kore kuwarddekimuk, ngurrbenbekka yiman bininj birridjalwern kabirrihyorrme dja kabirrikayhme. Ngurribekka birriwern bininj kabirrikayhme kore kubolkbubuyikabeh bu kabirrihmirndemorn-namerren. Yawey nawu Narrulkarrekimuk kabenhkayhme bininj nuye bu kabindibun birriwarre bininj.

⁵ Kaluk nahni bininj kabirrimdolkang djarreh kore kubolkbubuyika dja kore kaddumbek heaven djarreh duninj wanjh bedda kabirrimhder-rehme. Nawu Yawey kayidung, dja benkimey bininj birribang. Kabir-rimre bu kabolkbularrbun kunred bedberre bininj nawu kabendung.

⁶ Mah! Wanjh ngurrikelekayhmen dja ngokko darnkih kamhre kunbarnangarra nuye nawu Yawey. Nawu Narrulkarrekimuk kamre bu ngundjalbun ngudberre.

⁷ Kaluk kunkele kabennatudjarrewarrewon, dja kunkange bedberre nakka kabirrikangewarrewarremen.

⁸ Kabirriwernhkelemen. Bedda kabirribabang dja kabirrikangewar-remen yiman kayime daluk kadjakbekkabekkan bu darnkih kahyawmang wurdyaw. Dja mak bininj kabirrikebnarren kunkele dorreng, dja kabirridjalyeme bu kuhni kabolkyimerran.

⁹ Ngurrina, kunbarnangarra nuye nawu Yawey wanjh darnkih kamhre. Wanjh kunukka kundjalwarre. Nungka wanjh kawernhyiddung duninj dja kabenmarnayerkwon. Nungka kabolkbularrbun dja mak kabenbul-larribun birriwarre bininj nawu kabirrihni kumekbe.

¹⁰ Bu kuhni kunbarnangarra wanjh mankokkarng rowk kore kaddum minj kahbame dja makka minj kabirribolkwolkan. Mak kundung bu kam-dungwayhme nakka kadjalburlerran, dja dird warridj minj kabolkwolkan.

¹¹ Nawu Yawey kayime, "Ngaye Yawey wanjh ngabenbun bininj bir-riwarlahkenh rowk kondah kurorre bu kunwarrenh bedberre. Mak bininj nawu kabirriburlumerren nakka ngabenmarnbun yiman birri-marladj kabirriyimerran. Dja bininj nawu birribang, ngaye wanjh ngabenyahwurdwon.

¹² Ngabenyakwon bininj birriwern, dja birridjalkudji kabirridjaldi. Minj nangale kabengalke bininj nawu kabirridjaldarrkid, dja kabirridjaldi bebbehbebbeh dja kabirrimirndekudjimen.

¹³ Bu kunnembekenh kunu ngaye ngamarnbun kaddum kore heaven bu karreldele, dja ngabolkrokayhwe kurorre ba bu kawayhke walakkih. Ngaye ngakurduyime bu kabolkyime kunbarnangarra ngardduk kore kunkangeyid ngardduk kawurlhme, ngaye nawu Yawey Ngahdulkar-rekimuk."

14 Birriwern bininj kore Babylon wanjh bedda kabirrikelerlobmerren yiman mayh nawu deer nawu bininj kabirriwarlbun. Bedda yiman yerrih sheep nawu shepherd bu kabendjalmirndebawon. Kabirribebbe-hdurnderren kore bedberrekih kunred kunwern, kore nawu birriredbo kabirrihni.

15 Dja nangale nawu soldiers kabirridarrkidmang, nakka wanjh kabir-ridulubun mankolewi, dja yikahwi wanjh kabirribun mandjawakwi.

16 Dja wurdwurdkilekileh bedberre wanjh nawu soldiers kabindi-wernhkukwayhke dja kabindibun bu nawu Babylon birrikang wanjh kabirrikurdunan. Kabirrnann warridj bu nawu soldiers kabirridjald-jirdmang yehyeng rowk bedberre, dja mak kabindidjirdmang bedberre ngalbihbininj kobeng dja kabindimarneyime kunwarrekenh.

17 Ngaye nawu Yawey ngabenmarnbun bininj nawu Medes kabir-ringeyyo bu bedda warridj kabindidung bininj kore Babylon. Bedda minj kabirridjare gold dja silver. Burrkyak.

18 Bedda wanjh bunarra dorreng kabindibun nawu birringudjbang bininj. Minj mak kabindikongibun wurdwurdkilekileh. Dja minj kabindibawon wurdwurd birriyawkimuk.

19 Birriwern bininj kabirribolkburlume kukadje Babylon, dja kabirriy-ime nakka wanjh kadjalbolkmakkaykenh duninj. Dja mak bininj nawu birrikang Babylon nakka kabirriburlumerren bedberre kunredkimukkenh Djal bonj, God kabolkbularrbun rowk Babylon yiman kayime nungka kunkareni benbom rowk nawu birrihni kore kukadje bokenh Sodom dja Gomorrah.

20 Wanjh munguyh kadjalbolklarrknin. Minj nangale kayawoyhyo kumekbe munguyh munguyh. Bininj nawu Arabs minj kabirriyo; minj nangale shepherd kamirndenahnan sheep kumekbe.

21 Djal mayh nabang kayho kumekbe. Warridj mayh kore kubolk-darlehbeh, yiman dalkken, wanjh kangime kururrk kumekbe. Yikahwi mayhmayh nawu djurrul kabirrihyo, mak nanikud kabirrihdohdolkan kore kurrambalk kumekbe.

22 Mayh nabang duninj yiman hyena dja jackal wanjh kabirridjal-njokme kore kurrambalkmak bedberre, dja kore kunrurrkkimuk manbu armykenh. Kuhni kakurduyimerran wanjh darnkih kamhre bu kabolkbul-larribuyindan.

14

Yawey Kabenkongibun Dja Kabendjarrngbun Nuye Bininj

Isaiah 14:1-3

1 Nawu Yawey kabenyawoyhkongibun nawu Jacob nuye bininj. Nungka kabenyawoyhdjarrngbun nawu Israel nuye bininj. Kabenkurrme rowk kore bedberre kunbol. Wanjh nawu birridjenbubuyika bininj kabirrimre dja kabirriraworrren bininj nawu Jacob benkebmawahmeng dja kabirriy-imerran namud bedberre.

2 Birribuyika bininj nawu kubolkbubuyikabeh nakka kabindibidyikar-me nawu bininj nuye Jacob dja nuye Israel, dja kabindikan kore kunred bedberre. Bu kunmekbe wanjh Israel nuye bininj kabindidarrkidmang bedda nawu birribolkbubuyikabeh bininj dja kabindimarnbun ba bu bedda kabindimarnedurrkmirri. Daluk dja bininj rowk kabirrimerran yiman kayime kabindidjalmarnedurrkmirri bedberre kore kunbol nuye

Yawey. Kaluk bu kunkareni bininj birribang bindibongkurrmeng nawu Is-
rael nuye bininj, dja bolkkime wanjh bedmanwali kabindimarnewohrnan
birrimmekbe nawu birribangni ba bu kabirribongdi.

³ Bu kuhni dunbarnangarra kamre nawu Yawey ngungehke ngudberre
kore kundjak dja kunrayek ngurrikarme kore bedda ngundibongkarrmi
kore ngurrbenmarnedurrkmirri.

Kaluk Yawey Kabimalngmunkewe Nawu Nawarre King Kore Kanjdji

Isaiah 14:4-21

(Isaiah 47:1-15, Jeremiah 50:1-51:64)

⁴ Bu kunmekbe kunbarnangarra, ngudda ngurrimarnewayini mahni
mankarre nuye bu ngurriwiddjung king nawu kawohrnan kore Babylon.
Ngurriyime, "Nahni nawu kanbuni wanjh kayakmen! Nungka minj
kayawoyhyiddung!

⁵ Nawu Yawey dulkbakkeng mankole bedberre nawu birriwarre bininj.
Dja mak bakkeng kundulk manbu scepter bedberre nawu birriwohrnani
kumekbe.

⁶ Nawu nabangni king wanjh benbuni birriwern bininj kundulkwi
manbu scepter. Benbuhbenbuni bedberre munguyh. Nungka wanjh
yiddungi munguyh dja bendjalbuni bininj kore kubolkbubuyika, wanjh
benmarnbom birridjalkeleminj.

⁷ Dja bolkkime wanjh bedda kabirrihni kamak rowk dja kabirringehme.
Kabirridjalwayini bu kunnjilngmak dorreng.

⁸ Yiman kundulk yiman pine dja cedar, makka kabirrinjilngmak bu
ngundinan! Bedda yiman kabirriyime, 'Ya! Bolkkime wanjh Yawey
ngankukburriweng kurorre. Wanjh minj nangale nabuyika kamre
ngankukdadjke ngadure.'

⁹ "Mak kore birridowerrinj kabirrihkukyo kanjdji, nakka ngundikimang
bu yingimen. Nawu birriwohrnani kondah kurorre bu birridarrkiddi,
wanjh bedda kabirrimalngdolkarren ba ngundidabke. Bedda kings nawu
kunkare birriwohrnani kore kubolkwarlahkenh rowk, wanjh kabirri-
dolkarren kore thrones bedberre.

¹⁰ Bedda rowk ngundikukmarnmarnbun bu kabirriyime, 'A, ngudda
yiyimerranj yiman ngad! Minj karrikarme kundulkarre dja karridjal-
ngudjyak rowk.'

¹¹ Bininj rowk ngundiburlumi bu yikarrmi kundulkarre, wanjh bonj,
yimwam kondah kore kumidj, dja kayakmen rowk kore yikarrmi. Minj
nangale ngunyawohmarnedirri instrument nawu harp. Kondah wanjh dja
yolk dja bod ngankukbarrkbun kanjdji dja kaddum.'

¹² "Ngudda yimankang kanjdji duninh yiman kayime mankokkar-
rng kawarrhme kore heavenbeh. Ngudda yiman yimi mankokkarrng
nawu kambarrhbunkenh, dja bolkkime yimankang. Ngudda yiben-
marnewohrnani birriwarlahkenh bininj rowk, wanjh Yawey ngankukbur-
riweng dja yimankang kore kurorre.

¹³ Ngudda yimarneyimerrinj kore kukange ke, 'Ngaye wanjh ngabidbun
kore heaven. Ngaye ngakurrmerren kore throne ngardduk kaddum
duninh bu ngabenyurrhke mankokkarrng God nuye. Ngaye wanjh ngay-
erkan kore throne ngardduk kaddum kore kuwarddekimuk bedberre
nawu gods. Yoh, ngaye ngakurrmerren kore kaddum duninh kore
kunwarddekimuk djang.

14 Ngaye wanjh ngarrolkan dja ngadjalyurhke kungol rowk. Ngaye ngamarnburren bu ngayimerran nganerohrok God nawu nawernhkimuk duninjh.'

15 Dja bonj, ngudda wanjh God ngunkoluyhweng kanjdji duninjh, kore kumidj,"

16 "Bolkkime wanjh bininj ngundiwarnhkuknan, dja kabirridjawanren bu baleh kurduyimerranj ke, dja kabirridjawanren, 'Yiddok naninjanu bininj nawu bolkrokayhweyi? Yiddok nungka nawu benmarnbuni birriwarlahkenh bininj birrikeleni?'

17 Yiddok naninjanu bininj nawu bolkmarnbom kunred rowk bu bolkyakminj, dja kunredbubuyika benmarnebularrbom? Yiddok nungka nawu kunyid kunirey nawu benmangi dja minj benbawoyi bu birridurndeyi kunred bedberre?"

18 "Yoh. Birriwern kings nawu birriwohrnawohrnani, nakka birridoweng dja kabirrikukyo bebbehbeh kore kumidj manbu manrurrkmak bedberre.

19 Ngudda nakka ngundikukbekeng kore kumidj, yiman kayime bininj kabirribakke manyendewarre dja kabirridjalyendeburriwe. Dja ngudda nakka ngundidjalkukburriweng kanjdji duninjh kore kubolkdjorlok. Ngudda yidjalkukyo kore kuwarddewardde. Dja bininj bindikukburriweng nawu birriburreni mandjajakwi dja birridowerrinj, wanjh ngundidjalkukbarrbom. Ngudda yiman kakukyo bu bininj kabirridjalkukmelme bu kabirrire.

20 Ngudda minj ngundikukdudjeng yiman kings duninjh kabindikumarnmarnbun. Burrkyak. Ngudda nakka kunbuyika ngundikukkurme, dja kunmekbekenh kunu ngudda yibolkwarrewong kore ngudda ke kunred, dja namud ke yibenbuni. Bininj kabirriyime ke, 'Nahni nawarreni, dja nawu nungka benkebmawahmeng wanjh minj karrbenyawayohyolyolme. Minj mak kabalngeyyirriyo kungey nuye.

21 Mah, karriyingkihbolkmarnbun kore karrbenbun bebeywurd rowk nuye, dja kornhkornkumo bedberre wanjh birridjalwarreni bininj. Minj kabirriyawoyhkimukworren bu kabirribolkdjirdmang dja kabirrimarnbun bedberre kunredwern kore kubolkwarlahkenh rowk."'

Kaluk Yawey Kabolkbularrbun Kunredkimuk Babylon

Isaiah 14:22-27

22 Wanjh Yawey nawu narrulkarekimuk duninjh kayime, "Ngaye ngarrolkan dja ngabenbun bedberre. Ngangeybularrbun kunbolk Babylon, dja ngabenburriwe bininj nawu kabirridjalyo kunmekbe. Ngabenbun bedberre warridj ngalenggarre wurdwurd dja mawahmawah rowk. Kuhnikenh ngaye ngadjalwokdanj ngaye nawu Yawey.

23 Ngabolkwarrewon kukadje Babylon ba minj bininj kabirrihyo. Djal mayhmayh yiman djurrul kabirrihni, dja kunbolk kumekbe ngabolkmarnbun ba kukku kabobarlme rowk. Ngabolkwarrewon yiman kayime ngabolkbirrhme kunyid dorreng." Kuhn yimeng Yawey nawu nadjalkarekimuk duninjh.

24 Yawey nawu narrulkarekimuk duninjh wokkurmerrinj, bu yimeng, "Woybukkih. Kore ngaye ngakarremarnbom, wanjh nakka kadjalkurduyimerran. Ngaye wanjh ngayingkihkarremarnbom, wanjh kadjaldi.

25 Ngaye ngabenkukberelme nawu birrikang Assyria kore ngardduk kunred. Ngabenkukmelmelme kore kuwarddehkimuk ngardduk.

Ngaye ngabennghehke bininj ngardduk nawu nungka benkomdukkani kunrayek, dja benngorrkenwoni kundulmukkenh.

²⁶ Ngabenmarnekarremarnbom bininj birriwarlahkenh kore kubolk-bubuyika rowk. Ngaye ngabidyirriyongen bedberre nawarlahkenh bininj rowk.

²⁷ Ngaye Yawey nawu ngarrulkarekimuk duninj, wanjh ngayingkihkarremarnbom, dja minj nangale ngannurdke. Ngaye ngabidyirriyonginj, dja minj nangale ngandabke.”

God Kabendung Bininj Nawu Philistines

Isaiah 14:28-32

²⁸ Mahni kunwok kumwam kore nganwong nawu Kawohrnan Rowk. Kaluk namekbe mandjewk bu king Ahaz doweng.

²⁹ Ngudda bininj nawu ngurrihni kore Philistia! Yuwn ngurribangmen-jilngmak! Namekbe nawu wohrnawohrnani nawu ngunhbuni ngudberre, wanjh nakka doweng. Dja nakka nabuyika kamngalme nawu nabang rerrih. Wanjh namekbe nawu nakerrnge ngunbun ngudberre yiman nayin nabang duninj.

³⁰ Kaluk bininj ngardduk nawu birrimarladj duninj, nakka kunmak rowk bu kabirringun manme, dja kabirrikodjkekurmerren kore kunyidyak. Dja nawu namud ngudda ke, nakka ngabenbun dja warridj bedda kabirrimarrwedowen. Bedda wanjh kabirriyakmen rowk.

³¹ Yoh, ngudda nawu ngurrihyo darnkih kore kururrkdangmaye mankimuk, wanjh ngurridjalkelekayhmen! Ngudda nawu ngurrihyo kore kururrk kunwern, wanjh ngurridjalwernhnalkbu. Ngudda bininj rowk nawu Philistia ngurrihyo, wanjh ngurridjalwarlkarrimen. Ngurrina! Kundjulg karrolkan kore bininj birriwern kabirrimre kakkibeh. Birrid-jalbang rowk kabirrimre bu ngundihkuniyikan.

³² Kaluk njale ngurriyolyolme bedberre bininj nawu birrimdolkkang kunmekbe kunred? Mah, ngurriyimen, “Nawu Yawey bolkmarnbom Zion kabolkrayek rowk, dja wanjh bininj nuye nawu kabirrinjilngwarre, wanjh kabirringime kunmekbe ba bu nungka kabenmarnedjurrudi.”

15

God Kabendung Bininj Nawu Kabirrihni Kubolkkimuk Moab

Isaiah 15:1-9

(Isaiah 25:10-12, Jeremiah 48:1-47, Ezekiel 25:8-11, Amos 2:1-3, Zephaniah 2:8-11)

¹ Mahni kunwok kabenmulewan bininj nawu kunbolk Moab kabirrihni. God nawu Yawey kabendung bedberre dja nungka nganwokwong kunwok kore nungka benmarneyingkihkarremarnbom. Wanjh nungka yimeng, “Kore kubolkkimuk kangeyyo Ar dja kubolkbuyika kabolkngeyyo Kir, wanjh makka kabolkyakmen. Kaluk kunkakkudjini kumekbe kunred bokenh kabolbularrbuyindan.

² Bininj nawu kabirrihni kore kunred Dibon, wanjh kabirribidbun kore kurrulom bedberre, dja kore temple bedberre bu kabirridjalnalkbun dja kabirrikunikayhme kunnjilngwarre dorreng. Bininj nawu birrikang Moab wanjh kabindimarnekayhme dja kabindimarnenalkbun bedberre

nawu birrimdolkkang kunred Nebo dja mak Medeba. Kaluk kabindimarnekodjbarlaworren mak kabindimarnedjaworrkdjobkerren bu kunnjilngwarrekenh.

³ Mak kabirridjaldjongburren nawarre manburra bu kabirrire kurobbe. Bedda wanjh kabirribarndibarndi kaddum kurrambalk, dja mak kabirrimirndere kore kurobbe dja bedda rowk kabirriwernhnalkbun dja kabirridjalngudjwarreworren bu kunnjilngwarre dorreng.

⁴ Bininj warridj nawu kabirrihni kunred bokenh Heshbon dja mak Elealeh wanjh kabirrikayhme kunnjilngwarre dorreng. Bininj nawu kabirrihni kunred Jahaz wanjh kabindibekkan djarrehbeh. Kunmekbekenh kunu bininj birribang nawu birrikang Moab wanjh bedda warridj kabirrikayhme, dja wanjh kabirriwernhkelemen.

⁵ Ngaye mak, ngabenmarnenalkbun kukange dorreng bedberre bininj nawu birrikang Moab. Yikahwi bedda kabirrikelerlobmerren djarreh kore kunred Zoar. Kabirrikelewarlkarren kore kunred kabolnggeyyo Eglath Shelishiyah. Bedda kabirribidbun kore manbolh ngarre kunred Luhith, dja kabirrinalkihrlombe bu kabirrire manbolh ngarre kunred Horonaim. Kabirridjalnjilngwarremen bu kabirriburrbun darnkih bu kabirridjalyakmen.

⁶ Dja manbu kukku kahborri kore kabolnggeyyo Nimrim, makka boyakminj rowk. Mak kundalk kumekbe dalkdarlehminj, dja manbu mankolhde wanjh kolhdedowerrinj. Minj baleh kadjaldi manu manmalawormak.

⁷ Wanjh nawu bininj kore njalehnjale kabirrihkarrme nawu birrikurmkurmi, wanjh kabirriyikan rowk dja kabirrikelerlobe. Bedda kabirribarrarmang kore kabolnggeyyo “Kundulk Kunwern Manbu Willows”, dja bewh kore borledmikenh.

⁸ Bedda wanjh kabirridjalkayhmire kore kunbolk Moab, dja birriwern kabindikayhme dja birriwern kabindikayhmibekkan. Bedda kabirrinhnalkbun wernkih duninj, kaluk bininj nawu kabirrihni Eglaim, wanjh kabindibekkan. Dja mak bininj nawu kabirrihni kunred bokenh Beer dja Elim, wanjh kabindibekkan bu kabirridjalnalkburren kunnjilngdorreng.

⁹ Kukku manbu kahboyo kore kabolnggeyyo Dimon, makka wanjh kunkurlba kabarlme. Dja ngaye nawu Yawey, wanjh ngamkan kunyid mankimuk duninj kore kunred Dimon. Ngaye ngabun bininj nawu kabirrihni kore Moab, dja mak nawu kabirrirolbmerren kumekbe, yiman kayime lion kabenbun.” Kuhn bu nawu Yawey yimeng.

16

Bininj Nawu Kabirrihni Kubolkkimuk Moab Wanjh Kabirrinalkbun

Isaiah 16:1-14

(Isaiah 25:10-12, Jeremiah 48:1-47, Ezekiel 25:8-11, Amos 2:1-3, Zephaniah 2:8-11)

¹ Ngudda bininj nawu ngurrikang kukadje Sela kore kubolldarleh dja borledmikenh, wanjh ngurrimunkewemen mayh nawu lambs namirndewern bu ngurrinjilngmarnbun king nawu kawohnan kumekbe, nawu kahdi kore kurrulum Zion.

² Morlehmorlenj nawu birrikang kunbolk Moab, nakka yimankek kabirridjowkke kore mankabo Arnon. Bedda yiman kayime mayhmayh yaw nawu kabirriwelmalmalme bu ngalbadjan kabenkukburriwe kore birrireddi.

³ Kaluk bedda kabindidjawan bininj nawu Judah birrikang, wanjh kabirriyime, “Kandibengdayhke! Kandimayaliwo! Kandikima kore kundjurlamak ngudberre! Ngad ngarrikelerlobmerren, dja kandiwarlkka. Minj kandiburriwe ba ngandibun nawu ngandiwirrhme!

⁴ Ngundidjawan bu kandibawon ngad ngarrihni kondah ba karridjarkni, ngad nawu Moab ngarrikang, dja ngarrimkelerlobmeng. Kandikukdjurruddi bu bedda kabirrimre nawu kabirridjare ngandibun.” Kumekbe kabirriyime.

Dja ngayime bininj birribang nakka kabirridarrkidkukyakmen. Kunyiid kayakmen. Bedda kabirridjalyakmen kore kunred ngudberre.

⁵ Bu kumekbe kayimerran, wanjh king nakerrnge kamre bu kawohrnan kondah. Kaluk nahni kamdolkan kore namud nuye David, dja namekbe king kabenmarneyime djal mandjadkenh dja kabenmarnedjare bininj. Nungka werrkwerkk kakurduyime kunmak, dja kabendjadme bininj kore djal kunwoybukkenh.

⁶ Ngad ngarrbenwobek kang birrimekbe bininj nawu birrikang Moab bu kabirriburluburlumerren dja kabirrimarnburren bedda birrikinkimuk mak kabirringeykimukworren. Bedda wanjh bedman kabirridjalkurren. Bonj, wanjh bu kabirriyolyolmerren makka kunkarremenmen minj kakarreme.

⁷ Kumekbekenh kunu wanjh kabirriwernhnalkbun birrimekbe bininj nawu birrikang Moab. Warridj kabirrinjilngwarremen mak kabirrinalkihre kunbolk bedberrekenh. Bedda kabirriyawan manme manbu birrihnguni kore kunbolk Kir-Hareseth, dja larrk.

⁸ Dja kabbal manbu kahdi kore Heshbon mak manrakel manbu grapes kahdi kore kunred Sibmah, wanjh kadjolengwarremen. Dja manrakel manbu grapes makka birribakbakkeng nawu kubolkbubuyikabeh kabirriwohrnawohrnan. Bu kunkareni manmekbe manrakel mandjoleng djalyirriyoy djarreh kore kubolkkimuk ngarre Jazer balwam, dja kore kubolklarleh balwarlahminj kore kurrula manbokimuk* dja bewh borledmikenh.

⁹ Wanjh ngaye dorreng ngarridjarrknalkbun bininj birrikang kunred Jazer manmekbekenh ngarre manrakel manbu grapes, warridj nawu birrikang kukadje bokenh Heshbon dja Elealeh. Ngawernhnalkbun kunmimnalkwern dorreng. Minj kadjolengbarnhbarndi manme bu kunukka ngarrinilngmakmeninj dja ngarriwayiniwirrinj kunnjilngmak dorreng.

¹⁰ Yoh. Minj mak kabirrinjilngmak dja kabirrimarrmarr bu djolengbarnhbarndiwirrinj manme kore kurrulkwern birridudjengi. Mak manrakel manbu grapes warridj. Minj mak kabirrimelme grapes kore winepress. Nawu Kawohrnan Rowk benwokngurdengkore birrikayhmi kunnjilngmak dorreng manmekbe manmekenh.

¹¹ Kumekbekenh kunu ngabenmarnenalkbun kukange dorreng bedberre nawu birrikang Moab yiman harp kahdirri bu bininj kabirridowe. Mak ngaye nganjilngwarreminj duninj bedberre nawu birrikang Kir-Hareseth.

¹² Bu bininj birrikang Moab nakka kabirribidbun bu kabirrimarne-bodan yiwarrudjkenh bedberre kore kurrulum kaddum, dja kabirriwernhrohrokme yiwarrudj bedberre, wanjh larrk, minj njale kabenmarnekurduyimerran bu kunmak.

¹³ Kuhni rowk nawu Yawey kerngeghenhni benyolyolmeng birrimekbe nawu Moab bininj.

* 16:8 Manbu kurrula bolkkime kangeyyo Dead Sea.

14 Wanjh bolkkime nungka kayime, “Bu mandjewk danjbik kare (kuhni bu bininj nawu ngundimarnedurrkmirri karohrokme mandjewk) wanjh njalenjale kabirrikurmekurrme kunwern bedberre nawu Moab kabirrihni wanjh kadjalwarwarremen dja kadjalyakmen. Dja bininj birriwern nawu birrikang Moab wanjh birribuyika bininj kabindidjek-miwon dja kabindiwirrihme. Birriwern kabirriyakmen dja birridjalkudji nawu kabirridjaldarrkiddi, dja nakka wanjh kabirridjalkudji, wanjh kabirringudjwarremen.”

17

Yawey Kayiddung Bininj Kore Kukadje Damascus Dja Kore Kubolkkimuk Israel

Isaiah 17:1-11

1 Nawu Yawey benyingkihyolyolmeng kukadje Damascus, wanjh yimeng, “Ngurrina! kunred kunkimuk Damascus wanjh kabolkyakmen, karurkwarrrhwarrrhme rowk.

2 Mak kunredbubuyika kore kubolkkimuk Syria, wanjh bininj nawu kabirrihni kumekbe, bedda kabirridjalyakmen. Kaluk mayh kamirndew-ernmerren kumekbe dja kelebuk bu bininj yak.

3 Bininj nawu Ephraim* benkebmawahmeng, wanjh kabirrikele, dja minj nangale kabenbidyikarmme. Dja nawu king bedberre bininj nawu kukadje Damascus kabirrihni, nakka kayakmen. Birriwern bininj nawu kabirridjaldi Syria wanjh kabirriyakmen, dja birridjalkudji kabirridjaldarrkiddi, wanjh kabirriyimerran kabirrirohrok bininj nawu Israel benkebmawahmeng.” Kuhni rowk yimeng Yawey nawu narrulkarrekimuk dunjnh.

4 Dja mak nawu Yawey yimeng, “Bu kumekbe kunbarnangarra kamre, wanjh bininj nawu Jacob† benkebmawahmeng kabirriwarrrhke namakmak bedberre, dja kabirridjalyimerran yiman birrimarladi.

5 Bedda kabirriyimerran yiman kayime manbu corn karrulkdi bu bininj kabirridulkdadjke dja kabirrimoyhmang. Dja bedda yiman kayime bu bininj kabirrimang rowk nawu manme mandjoleng kore kabbal kanjdji kabolkngeyyo Rephaim, dja kabirriyakwon rowk.

6 Djal yikahwi bedberre bininj wanjh kabirridjaldarrkiddi. Dja mak bininj nawu Israel benkebmawahmeng wanjh yiman kayime kundulk manbu olives kabarnemdangen bu bininj kabirrimangahmang olives rowk. Wardi nahni bininj kabawon djal mandjalkudji olives kore kundulk. Kuhni ngayimeng, ngaye Yawey, nawu God bedberre bininj nawu Israel benkebmawahmeng.

7 “Kaluk bu kumekbe kunbarnangarra, bininj wanjh kabirrikangeborledkerren kore God nawu benmarnbom, nungka nadjalkudji nadjalkukdamun bedberre nawu Israel benkebmawahmeng, dja bedda kabirridjawan bu kabenbidyikarmmeken.

8 Minj mak kabirriyawoyhbodan kore altars manbu bedda birriwelengmarnbom bu kunbidwi bedberre. Minj kabirriyawoyhburlumerren kore bedda kabirrimarnbun kore birrimarneboddangeni ngalbuyika god ngalbu Asherah, bu birrimarnekinjeyi mankalkkidmanjmak kore altars ngalenggarre manbu bedda birriwelengmarnbom kunbidwi bedberre.

* 17:3 Nawu Israel bikebmawahmeng Ephraim. Ngurrina Genesis 48 17:3 Jeremia 49:23-27, Amos 1:3-5, Zechariah 9:1 † 17:4 Jacob wanjh kunngeybuyika nuye Israel. Ngurrina Genesis 32:28

⁹ Bu kumekbe kunbarnangarra kamre, wanjh bininj nawu kabirrihni kore kubolkkimuk wanjh kabirrikelerlobme dja kabirridjalbawon kunrurk manbu manmurrngrayek bedberre. Dja kunbolk rowk bedberre kabolkwarremen kore djal manngarre manwarre kawernmerren.[‡]

¹⁰ Yoh, ngudda ngurribengmidjdani God nawu ngunneghkeng, ngudda minj ngurriyawoyhburrpun God nawu ngunmarnekukdjurrudi, nungka nawu yiman kayime kuwarddekimuk ngudberre. Kunmekbekenh kunu ngurridudji manngarrebbuyika manbu manmak ba bu ngurrimarnebod-dangen nawu birribubuyika gods.

¹¹ Ngurriyimerren bu kuhni ngunmarnedjolengwernmen, dja bonj, bu mannguy kamnguybebme, wanjh minj manme ngurrimang, dja djolengyak. Dja kunbuyika ngunmarnekurduyimerran, manbu kunyid dja kundjak kawernmerren ngudberre munguyh.”

Yawey Kabenbun Bininj Nawu Kabirriwirrihme

Isaiah 17:12-14

¹² Bininj birridjalwern nawu kubolkwarlahkenhbeh, wanjh kabirriyid-dung dja kabirridjarrkkayhme kunwok kunkimuk bedberre yiman kayime kurrula kawernhwokdi. Bedda kabirrikayhme kunwokkimuk duninj! Wanjh kawarre bedberre!

¹³ Bedda kabirrimre ba kabindibun, werrkwerkk kabirrimre yiman kundjurrh kunkimuk. Dja God kabendung dja kabendurndiwe, yiman kayime kunmayorrkkimuk kadjalwe kundalkdarleh dja kunmalaworrardleh.

¹⁴ Bu kunkodjkebbuyika kabolkbulerran, bedda kabirridjare ngad yimankek karrbenkelemen bedberre. Dja bonj, bu malamalaywi kamre, wanjh karrbolknan dja bedda birriyakminj rowk. Kunmekbe kabenmarneyimerran bedberre nawu kabirridjare kandiwarrewon dja kabirridjird-mang kadberrekenh.

18

*God Kabendung Bininj nawu Kabirrihdi Kubolkkimuk Cush**

Psalm 18:1-7

(Zephaniah 2:12)

¹ Ngabekkan mayhmayh bu mirndewernerrinj dja kabirriwelmalmalme. Kuhni kore kunbolk bewhbeh kore mankabo ngarre kunbolk Cush.

² Bininj nawu Cush birrikang wanjh kabirrimre werrk kore kabala manbu birrimarnbuni kundalkwi[†]. Kabirrimre kore mankabo kabongeyyo Nile, dja kabirrimkan kunwok bedberre ba bu karribekkan. Bonj, ngaye ngabenmarneyime, “Ngurridurnden kore kunred ngudberre. Ngurriyidurnde kunwok ngadberre dorreng manbu wokwon bolkkime. Ngurridurnden kunred ngudberre kore mankabowern kaborlobme dja kabolkdadjadajke. Kumekbe kore ngudberre bininj rowk kabirrihni, nawu birringudjbang rowk. Bedda wanjh birrikornamkuyeng dja birrikurlahmak. Birriwarlahkenh bininj kabindikengehme bedberre.” Kuhni karrbenmarneyime.

[‡] **17:9** Yikahwi djurra kabimbuyindi, “Karohrok bu kunkareni bininj nawu Hivite dja Amorite birrikelerlobmeng bu nawu Israel bininj bindibuyi.” Ngurrina Joshua 11:3, 24:11 **17:10** Ngurrina

Isaiah 1:29 * **18:** Kubolkkimuk Cush wanjh bolkkime kabolkngeyyo Ethiopia. [†] **18:2** Kuhni kayime “papyrus”.

³ Wanjh ngaye ngabenbengdayhke birriwarlahkenh bininj rowk, wanjh ngayime, “Kandibekkabekka ngudda bininj nawu ngurrihni kubolk-bubuyika rowk kondah kurorre. Ngurribolkna kaddum kore kuward-dekimuk! Wardi ngurrian kunmadj nawu flag karrolkkan ba bu ngurrimenbekkabekkan. Dja mak ngurribekka nawu trumpet kawokdi wernkih ba bu ngurrimarnburrenkenh!

⁴ Nawu Yawey nganmarneyimeng, ‘Ngaye ngahdi kaddum dja ngabolknan kore kanjdji kurorre. Djal yeleyeledj ngadjalbolknan bu kabolkyime kore ngudda ngurrimoyhmang manme ngudberre. Ngaye ngabolknan yeledj duninj yiman kayime kabolkwokyak kore kukak, dja yiman kayime kundung djalwoyak kabame bu kunbarnangarraburrk.

⁵ Kaluk ngadjalbenbularrbun bininj nawu Cush kabirrihni. Ngaye ngabenbun bu yerrekah kabirrimoyhmang manbu grapes, bu yerrekah kanguywarrwarrhme dja kawernhdjolengmen. Bu kumekbe kabolkyime, wanjh nawu birriyidko bininj kabindibun rowk bininj nawu Cushbeh. Kabindidjalbularrbun yiman kayime mandjawakkimuk kayendedjobke kore kunduk.

⁶ Nawu soldiers bedberre kabirridowe dja kabirridjalkukyo kore mayhmayh dja mak nawern mayh nabang wanjh kabirrikungalke. Bu kurrung kabolkyime mayhmayh kabirringun kunkanj ngarre kunburrk bedberre, dja bu kabolkyimerran yekke, wanjh nabang mayh kabirringun kunmurrng bedberre.”

⁷ Bu kunmekbe kundung wanjh birriwern bininj kabirrimre dja kabirriwon manwern kore Yawey nawu narrulkarrekimuk duninj. Bedda kabirrimre kore kubolkmak manbu mankabo kabolkyarlarrke. Bedda wanjh birrikornamkuyeng dja birriwernhgudjbang, dja birrikurlahmak. Bedda kabirriwokdi kundjenbuyika. Birribuyika bininj rowk kabindikengehme bedberre. Bedda wanjh kabirrimkan nawern namakmak dja kabirriwon Yawey bu kabirrimre kore mandulum Zion. Kore kumekbe kunbolk wanjh bininj kabirringeyburlume kunngey nuye Yawey nawu narrulkarrekimuk duninj.

19

God Kabendung Bininj Nawu Kabirrihni Kubolkkimuk Egypt

Isaiah 19:1-15

¹ Nawu Yawey nganwong mahni kunwok manbu kabenyolyolme bininj nawu kabirrihni kore kubolkkimuk Egypt. Ngurrina! Yawey kamhre, kahbarndi kore kunngol dja werrkwerrk kamhre dja kangimen kore Egypt! Wanjh idols bedberre bininj kumekbe kabirrideldelme kore kumirrk nuye Yawey. Dja mak bininj kumekbe kabirriwernhkelemen dja kabirrikangebarrhme.

² Wanjh Yawey kayime, “Ngaye ngabenmarnbun nawu bininj birrikang Egypt bedmandeleng kabirriburren. Nawu birridanginj bininj kabirriburren. Mak bininj nawu kabirrihdarnhni, nakka kaluk kabirridarnhburren. Dja mak birriwern rowk kabirriburren, kunred dja kunred, kunbolk dja kunbolk wanjh kabirridjalburren.

³ Wanjh bininj rowk nawu Egyptbeh nakka kabirrikellemen. Ngaye ngabenwarrehwarrean kore kabirrikarremarnbun ba bu kabirriyawarinj kore kabirrikarremarnbun. Bedda kaluk kabindidjawan nawu idols bedberre kore baleh bedda kabirrikurduyime, dja mak kabindidjawan mam nawu birridowerrinj bininj dja mak nawu birrikurdang bininj.

4 Bedda nawu birrikang Egypt, nakka ngabenbidkenwon nawu nabang duninh king, nawu minj kabenkongibun bedberre. Nungka wanjh munguyh kabenmarneyiddung dja kabenmarnewohrnan." Kuhni kayime Yawey nawu Narrulkarrekimuk Duninh.

5 Wanjh kukku ngarre kore Mankabo Nile, makka kaluk kaboyakmen. Kore mankabo kahre bolkkime, wanjh kabolkdarlehmen rowk, dja kundalk kore kukadjid ngarre wanjh kadarlehmen.

6 Kore kukku kaborlobme bolkkime, nakka kaluk kabolkbanjmen, dja kundalk manbu kahdingihdi kore kukadjihkadjid, makka wanjh karralkweleberrkmen.

7 Kunmekbe rerrih kayimerran manbu kahkolhdebebemerran kore mankabo Nile, dja mak kore kabbal, makka kakahdedarlehmen. Kunmayorrk kabalbubuhme dja kawe rowk kundjulng dja manme manmim karrudjindi, dja kayakmen rowk kore Nile mankabo darnkih.

8 Warridj bininj nawu djenj kabirrihmanamang kore mankabo Nile, nakka kaluk kabirrinalkbun. Bedda nawu kabirriwe wakkidj dja nginj dja mak nawu kabirriwe walabbi kadjuhke wanjh kabirridjalnjilngwarremen.

9 Mak bininj nawu kabirrimarnmarnbun manburra nawu flax, bedda warridj kabirrinjilngwarremen. Dja bininj nawu kabirrimadjmarnbun manbu namak manburra, wanjh kabirridjalmarrkbaworren.

10 Bininj nawu kabirribibbun dja kunmadj kabirrimarnbun wanjh, bedda warridj kabirrikangwarremen. Warridj bininj rowk nawu kabindimarnedurrkmirri birribuyika, wanjh nakka kabirridjalnjilngwarremen duninh.

11 Bininj nawu kabirriwohrnawohrnan kore kukadje Zoan, nakka yiman birribengwarr. Mak bininj nawu kabirriwernhburrbun mankarre nuye Pharaoh, nakka minj kabirrimarneyime mandjad bu kabirribengdayhke nuye. Kunukka njalekenh kabirrimarneyime nungka bu bedda kabirriwernhburrbun? Warridj njalekenh kabirriyime bu bedda yimankek birrimdolkang kore nawu birriyungkih namud bedberre nawu kings?

12 Adju, ngudda nawu king yibenmarnewohrnan kore Egypt, baleh birriwam ngudda ke bininj nawu kabirriwernhburrbun? Wardi ngundibukkan kore Yawey nawu Narrulkarrekimuk Duninh yingkihkarremarnbom ngudberre nawu ngurrihdi kunbolk Egypt.

13 Bininj nawu kabirriwohrnawohrnan kore kukadje Zoan wanjh bedda birriyimerranj birribengwarr rowk. Dja mak bininj nawu kabirriwohrnawohrnan kore kukadje Memphis, wanjh minj kabirriburrbun kunwoybuk. Nawu birrikihkimuk bininj minj mandjad bindibukkayi bininj kore Egypt. Bindidjالبukkang kunwarrekenh.

14 Nawu Yawey nungan benmayaliwarrewong nahn birrikimuk bininj, ba bu bindimarnbom bininj rowk kore Egypt kabirriyimerran yiman bininj nawu kabirriworromkan, dja kabirrimankan, kabirrikurllhngermerren kore kabirriwebme.

15 Bonj, minj nangale bininj kore Egypt kaburrbun kore baleh kabirrikurduyime. Birrimekbe bininj rowk, yiman birrikihkimuk dja mak nawu birringeyahwurd, dja mak nawu birrikuken dja mak nawu birrimarladj, nakka bininj rowk minj kabirribidyikarmerren.

Kaluk Bininj Nawu Egypt Kabirrihni Kabirrimarneboddan Nawu Yawey

Isaiah 19:16-25

16 Kaluk bu kunbarnangarrabayika kamre, wanjh bininj nawu Egypt kabirrihni nakka kabirrikelemen yiman birringudjyak bininj. Bedda kaluk

kabirrikengehme nawu Yawey nawu Nawernhdulkarrekimuk Duninj bu nungka kamre kaberlwayhme bu kabenbun bedberre.

¹⁷ Bu bininj nawu Egypt birrikang kabindingeybekkan bininj nawu Judah benkebmawahmeng wanjh kabirrikukdeldelme kungele dorreng. Bedda kabirriwohburrbun bu Yawey nawu Nawernhdulkarrekimuk Duninj kabenmarnekarremarnbun kaluk bu kabenbun bedberre nawu Egyptbeh bininj.

¹⁸ Bu kunmekbe kabolkyimerran wanjh bininj nawu kabirrihni kunbidkukkudji kukadje kore kubolkkihkimuk Egypt wanjh kabirridjenbuyikamen dja kabirriwokdi Hebrew kunwok*. Mak birrimekbe bininj kabirriwokkurmerren bu kabirrimarrkmang Yawey nawu Nawernhdulkarrekimuk Duninj. Kaluk kunkudji kukadje kore kubolkkimuk Egypt, nakka kabirribolkngeybun "Kubolkkimuk Ngarre Kundung".

¹⁹ Dja bu kunmekbe kunbarnangarra kamre, wanjh bininj kabirriname altar nuye nawu Yawey kore kubulhdjan kunbolk ngarre Egypt. Warridj kabirridjabname kunwardde mankuyeng nuye Yawey darnkih kore Egypt kaberrkraworren kunbubuyika kunbolk.

²⁰ Kaluk maninjmanu kunwardde kabenbukkan bininj nawu kabirrihni Egypt bu Yawey nakka woybukkih Nawernhdulkarrekimuk Duninj ba bu bedda kabirrimenmenbekkan. Kaluk bu birribuyika bininj kabirrimre kabindidung, wanjh nawu Egyptbeh bininj kabirridjalkayhme nawu Yawey, wanjh nungka kabimunkewe nakudji nawu kabennahnan dja kabengehke bedberre bu nawu kabindiyidko kabirribebme.

²¹ Kuhni kayime nawu Yawey dja yiman kabenmarnekubukkarren bedberre nawu kabirrihni Egypt, dja bu kunmekbe kunbarnangarra wanjh bedda kabirriyime bu Yawey kawohnan rowk bedberre, dja bedda wanjh kabirrimarnebodan nuye. Bedda wanjh kabirrikan dja kabirriwon nuye manbu namakmak bedberre, warridj kabirriwokkurmerren dja kabirridjalmarrkmang nuye kore kabirriwokkurmerrenkenh.

²² Nawu Yawey kabendung bininj nawu Egyptbeh. Kabenmarne-munkewe kundjak bedberre. Dja med, bu kuhni kayime wanjh Yawey kabenmarnbun bedberre warridj, ba bu kabirrimarnewarnyakkmulewarren dja kabirridurndeng kore nungka. Bedda wanjh kabirriborledkerren dja kabirridjawadjawan nawu Yawey, wanjh nungka kabenbekkabekkan dja kabendjalmarnbun bedberre.

²³ Bu kunmekbe kunbarnangarra kamre, wanjh manbolh manmak kore kore kunbolk Egyptbeh, dja kaburnbun kore kubolkkimuk Assyria. Wanjh bininj nawu Assyriabeh kabirrire kore Egypt, dja nawu Egyptbeh bininj kabirrire kore Assyria. Kabirridurnderren rowk. Dja bininj rowk kore nahni kunbolk bokenh, wanjh kabirriraworren dja kabirrimarnebodan nawu Yawey.

²⁴ Bu kunmekbe kunbarnangarra wanjh kubolkkimuk danjbik kabirri-raworren, bininj nawu Assyria dja Egypt kabirrihni, dja mak bininj nawu Israel benkebmawahmeng. Wanjh kunukka kabindidjarrkmarneyime kundjalmak bedberre birriwarlahkenh bininj kore kubolkbubuyika rowk kundah kurorre.

²⁵ Wanjh Yawey nawu Nawernhdulkarrekimuk Duninj kabenmarneyime kunmakkenh bedberre. Nungka wanjh kayime, "Ngaye wanjh ngakurduyime kunmak ngudberre rowk, ngudda bininj ngardduk nawu ngurrihni Egypt, dja mak ngudda nawu ngurrihni Assyria nawu ngaye

* **19:18** Manbu Hebrew kunwok wanjh bininj nawu Israel benkebmawahmeng kabirriwokdi kore kunbolk Canaan.

marnbom kubid ngardduk, dja mak ngudda bininj nawu Israel ngunkeb-mawahmeng, ngudda nawu ngaye djarrngbom.”

20

Isaiah Nawu Prophet Rengehrey Bu Dedjlarrkni

Isaiah 20:1-6

¹ Nakudji bininj ngeyyoy Sargon nawu king bedberre bininj kubolkkimuk Assyria benmunkeweng armies nuye. Nungka biwokwong bininj nawu benmarnewohrnani soldiers bu kabirribolkmang kukadje Ashdod dja kabindibun nawu bininj kumekbe kabirriini.

² Bu kunmekbe bolkyimerranginj, wanjh nawu Yawey biwokrayekwong Isaiah nawu beywurd nuye Amoz, dja bimarneyimeng karrengeyerkrkerren nuye sandals, dja mak kamadjyerrkrkerren nawarre kunmadj nawu djongbuyindi. Wanjh Isaiah biwokmarrkney dja djahdjalrenghehrey bu kukworrworni, dja mak minj dingedjongbuyindiwirrinj.

³ Kaluk bu bininj nawu Assyriabeh birribolkmey Ashdod, wanjh Yawey yimeng, “Ngurrina! Isaiah nawu nganmarnedurrkmirri djalrenghehrey mandjewk danjbik bu dedjlarrkni dja dengelarrkni warridj. Kuhni wanjh kamenmenyime bu kabenmarnekurduyimerran bininj nawu kabirriyo kore kunbolk kunkimuk bokenh, Egypt dja mak Ethiopia.

⁴ Bininj nawu king bedberre kore Assyria wanjh kabenkanakan bininj nawu kabendarrkidmang kore kubolkkimuk bokenh Egypt dja mak Ethiopia. Bedda wanjh birrikukworrworr dja minj njale kabirridenged-jongbuyindi. Bedda rowk nawu kabenkanakan, yiman kohbahkohbanj dja nawu birringudjbang dja kunyeme dorreng bu kabirrire bininj nawu Egyptbeh bu djal dedjlarrk rowk.

⁵ Yikahwi ngudberre ngurriyimi bu bininj nawu Egyptbeh dja nawu Ethiopiabeh, wanjh kabirrimre dja ngundibidyikarrme kunngudj bedberre dorreng. Dja bonj, bolkkime ngudda ngurrinjilngwarre kunyeme dorreng, dja minj ngurrbendjalmadbun.

⁶ Bu kunmekbe kabolkyimerran wanjh ngudda bininj nawu ngurriyo kubolkkimuk Philistia, darnkih kore kurrula, wanjh ngurriyime, ‘Aba! Kawarre! Karrbenmadbuni birrimekbe bininj bu kandibidyikarrmeninj, dja nakka bonj, kunwarre duninj benmarnekurduyimerranj. Minj nangale kankukdjurrudi bu king nawu Assyriabeh kamre kanbun! Baleh karrikelerlobme? Wardi kanbun dja karriyakmen rowk!’”

21

God Nawu Yawey Kayingkihbolkyolyolme Babylon

Isaiah 21:1-10

¹ Mahni kunwok kabolkyolyolme kubolldarleh manbu kurrula darnkih*. Wanjh birriwern bininj nawu birribang kabirrimre werkrwerkr kore kunred bedberre bu kabindibun bininj nawu kabirrihni Babylon. Bedda kabirribebme kore walembeh kubolldarleh. Bedda wanjh kabindikengehme bininj rowk, dja kabirriyorrme yiman kayime kunmayorrk duninj bu kabirribolkwarrowon.

² Ngaye ngawaralnang kore kunwarre duninj kabebme. Ngawaralnang bininj nawu kabirrikurrekurren, kabirriburren dja kabirriyakworren.

Mah! Ngadjare bininj nawu birrikang kubolkkimuk bokenh Edom dja Media, wanjh birrimirndemornnamerren dja kabindibun bininj nawu kabirrihni kukadje Babylon ba bu minj bedda kabindiyawoyhwarrewon birriwern birribuyika bininj.

³ Bu kuhni ngawaralnang wanjh ngawernhkeleminj dja ngadjakbekkani, ngababangni yiman kayime daluk bu kabiyawmang. Ngaye ngakangebarhme dja yiman ngamayaliwarremen bu kunmekbe kunwarre nganan.

⁴ Ngadjalkodjwurmeng, dja ngakukdeldelme kunkele dorrengh bu ngawaralnang kunmekbe kunwarre duninj. Ngaye ngadjaldjareni bu mahni kunbarnangarra kayakmen, dja bonj, bu dungyibmeng wanjh ngadjalkele duninj.

⁵ Bu kuhni ngayawoyhwaralnang, wanjh ngabolknang yiman kayime bininj kore kukadje Babylon birridjarrknguni manbu mulil mandjalmak. Birriyerrkang kore kunmadjmak, dja birribonguni warridj. Wanjh kundjalburrikudji ngabekgang bininj kayhmi wernkih duninj, yimeng, "Ngudda nawu ngurrikihkimuk soldiers, ngurrimarnburrimen bu ngurriburren bininj nawu kabirrimre kandibuyi!"

⁶ Kuhni ngawaralnang. Dja mak nawu Yawey nganmarneyimeng, "Yimunkewemen nakudji bininj ba kabolknan, dja yimarneyimen bu kahmulewan njalehnjale kakurduyimerran kore kabolknan.

⁷ Bu kabennan bininj kabirrimre kore djarrang kabirrimorneni manbu djarrang kabirridorrorkke, dja mak bininj kabirrimorneni kore donkey dja mak mayh nawu camel, wanjh kadjalwernhbolknan kore baleh bedda kabirrikurduyime."

⁸ Wanjh namekbe bininj nawu bolknabolknani kayhmeng, yimeng, "Ngudda yikimuk, ngaye ngadjaldi kaddum kore kunrurrkkuyeng bu ngabolknani kunbarnangarra rowk. Dja kukakkuyeng warridj ngadjaldi kore ngudda kankurmeng."

⁹ Wanjh kundjalmekbe yerre wanjh bininj birribebmeng birribarndi kore chariots manbu djarrang birridorrorkkeyi. Wanjh bininj nawu kabolknan kakayhme, kayime, "Kunred Babylon wanjh bolkwarrewarreminj! Nawern idols nawu birrimarneboddangeni kumekbe wanjh kukbakabakkmeng rowk dja birriwarrhmeng kurorre."

¹⁰ Wanjh ngaye ngayimeng, "Ngudda nawu bininj ngardduk, ngudda ngurridjakbekgang duninj kore kunrayek bebmeng ngudberre, dja ngaye kunwok kunmak ngakarme nuye Yawey Nawernhdulkarrekimuk Duninj manbu nganwong ngudberre, nahn nawu God ngudberre bininj nawu Israel ngunkebmawahmeng."

Mahni Kunwok Kayingkihbolkyolyolme Kubolkkimuk Bokenh Edom Dja Arabia

Isaiah 21:11-17

¹¹ Mahni kunwok kabolkyolyolme kunbolk Edom. Nakudji bininj nganmarnekayhmeng kore Edombeh[†], "Ngudda djamun nawu yibolknahnan kondah! Yiddok darnkih bu kumhkabel? Wanjh kanmarneyimen bu baleh kabolkyime kunkak kayakmen."

¹² Wanjh ngaye ngawokmang dja ngayime, "Kumhkabel darnkih kamre, dja med, kaluk kayawoyhbolkburlerran yerrekah. Bu ngudda yidjare yimdurdeng nganyawoyhdjawan, wanjh kamak."

^{21:9} Revelation 14:8, 18:2 † ^{21:11} Kore Hebrew kabimbuyindi kunbolk bokenh Dumah, dja Seir. Kumekbe kunbolk bokenh kore kubolkkimuk Edom.

¹³ Mahni manbuyika kunwok kabolkyolyolme kubolkkimuk Arabia. Wanjh ngayime, “Ngudda bininj nawu ngurrikang Dedanbeh, ngudda ngurriyo kore kubolkkdarleh ngalengngarre Arabia.

¹⁴ Ngurrbenwonowo kukku nawu kabirikombukdowe bininj bu ngundimarnebebme. Dja ngudda warridj, ngudda bininj nawu ngurrikang Tema, wanjh ngurrbenwonowo manme bedberre bininj nawu kabirrikelerlobme.

¹⁵ Bedda wanjh kabirrikelerlobme kore bininj bindibuyi mandjawak mankimuk dorrengh, dja mak bindibuyi bonarra dorrengh. Kuhni benmarnekurduyimi dja birrikuyindoweni kore war kabirriburren.”

¹⁶ Wanjh nawu Kawohrnan Rowk nganmarneyimeng, “Bu nakudji mandjewk kayakmen, bu kundjalmekbe kabolkyime, wanjh bininj birrik-ihkimuk dja birringeykimuk kore kunbolk Kedar wanjh bonj, kabirridjalngeyyahwurdmen.

¹⁷ Yikahwi bedberre wanjh birrikelebuk dja birribang, nawu kabirrikarme bonarra kore kabirriburrenkenh. Dja bonj, kaluk birridjalkudji bedberre kabirridjaldarrkid. Ngaye Yawey, God ngudberre nawu Israel ngunkebmawahmeng wanjh ngadjalwokdanginj.”

22

Bu Yawey Kayingkihbolkyolyolme Kukadje Jerusalem

Isaiah 22:1-14

¹ Mahni kunwok kayingkihbolkyolyolme kunbolk kabolkngeyyo “Kuwarddebarrarn kore Kabirribolknan*.” Adju, ngudda bininj nawu ngurribidbom kaddum kore kurrambalk ngudberre, njalekenh ngurrinjilngwarrewong? Dja njalekenh ngudda ngurribidbom kore kaddum ngarre kurrambalk ngudberre?

² Kondah ngudberre kukadje kawarremen, dja kunyid kawernmerren. Yikahwi ngudberre kabirrikayhkayhme, dja birridjalwern kabirribongun manbowern dja kabirrimayahme. Dja mak bininj nawu birridowerrinj, wanjh minj nangale bindibuyi man

djawakwi, dja minj birriburrimeninj kore wars!

³ Bininj nawu ngundimarnewohrnan ngudberre, nakka wanjh birrikelerlobmerrinj, dja bonj, birribuyika bininj bindidarrkidmey rowk, dja minj birriburrimeninj. Yoh, ngudda nawu ngundidjarrkdarrkidmey kore baleh yarrkka ngurrbenmarnekelerlobmeng nawu birriyidko. Bedda wanjh djarreh duninj birrimwam ngundingalkeng.

⁴ Wanjh ngaye ngayimeng, “Yuwn mak kankuknan! Dja kanbawon ngadjalwernhnalkbun. Kaluk ngaye ngardduk bininj wanjh birribular-ribuyindanj, wanjh yuwn bu kannjilngmarnbun!”

⁵ Wanjh Yawey nawu Nawernhdulkarrekimuk Duninj, wanjh yingkihdungrohrokmeng bu bininj benmunkeweng ngundikuniyikang. Kaluk ngurrikele bu nawu ngurriyidko ngundikukmelmelme kore kabolkngeyyo “Kawarddebarrarn kore Karribolknan!”. Bu kunmekbe kunbarnangarra wanjh nawu ngurriyidko ngundimarnerrurkkabakbakke ngudberre, dja wanjh madjamku ngurrikelekayhme kore kuwarddekimuk.

⁶ Bininj nawu birrikang kunbolk bokenh Elam, dja Kir, nakka ngundibun bonarra dorrengh, dja kabirribarndi kore chariots, dja mak kore djarrang kabirrimorneni. Mak bedda birrikarmi kubid bedberre manbu birrikudjurriddikenh.

* 22:1 “Kuwarddebararn kore kabirribolknan” kamenyime kore kunbalanda, “Valley of Vision.”

⁷ Manbu manbolkmakkaykenh ngudberre kanjdjikanjdji nakka wanjh djarrang dja chariots manwern wanjh bolkbarrkbom, mak kore kubolkkikhkimuk ngurrihni nakka bininj birrimirndewern kabirrimorneri djarrang wanjh birribolkwakbuyinguneng kukadje ngudberre.

⁸ Ngudda bininj nawu Judahbeh, ngurridjaldi kore ngundibun, dja nawu Yawey minj ngunyawoyhdjurruddi kore bininj ngundibun.

Wanjh ngudda ngurrikurduyimi bu ngurringehkerrimeninj. Kore kumekbe bolkyimi, ngudda ngurribekeng manwern njalehnjale manbu ngurriburrenkeh, manbu dingihdi kore kunrurk ngarre king nawu dulkmirnderribeh.

⁹ Mak ngurrimarnmarnbuni kore warddewarrhmeni manbu warnamyoy kuberrkakah kore David nuye Kunredkimuk Wanjh ngudda ngurrimarnbom yiman kungad ba kunronj bowernmerrinj ngudberre, kore kanjdji kunbolk ngudberre.

¹⁰ Mak ngurrirohrokmeng kurrambalk kunwern kore Jerusalem, kaluk ngurriururkwarhkeng dja ngurrimoyhmangi kunwardde dja ngurrikang ngurrimarnbom kore kuberrkakah warddewarrhmeng.

¹¹ Ngurrimarnbom warridj manbu kungad ba kumbarlmeng kukku kore manbu kungadkare, kore kuburldjarn warnamyoy bokenh. Dja med, bu ngurrikurduyimeng rowk, wanjh minj ngurriburribuyi Yawey, nawu marnbom rowk. Ngudda minj ngurribekkayi nawu yingkihkarremarnbom rowk bu kunkare duninj.

¹² Nungka nawu Yawey Nawernhdulkarrekimuk Duninj, wanjh ngunkayhmeng ngudberre bu kunmekbe kunbarnangarra, dja ngunmarneyimeng ngudda bu ngurrinalkbuyi dja ngurrikayhmeninj nuye, bu ngurringabekdurrmarrimeninj, dja bu ngurridjongburrimeninj kunmadj nawu kundowikenh.

¹³ Dja bonj! Ngurriyimeng kunbuyika! Ngurrijilngmarnburren dja ngurringun mulil, ngurribun mayh nawu bulikki dja nawu sheep ba bu ngurrikanjgun, dja mak ngurribongun manbang manbu wine. Ngurriyimerren, "Mah! Karringu dja karribongu! Kaluk malamalaywi wanjh karridowe!"

¹⁴ Yawey Nawernhdulkarrekimuk Duninj nganbuk kang bu nganmarneyimeng, "Ngaye minj munguyh ngabengmidjdan bedberre kunwarre bu kuhni birrikurduyimeng. Dja bonj, kaluk kabirridowerren."

Nawu Yawey Biwokwong Isaiah Bu Kabibengdayhke Nawu Shebna

Isaiah 22:15-25

¹⁵ Kuhni warridj Yawey Nawernhdulkarrekimuk Duninj nganmarneyimeng, "Yiray kore Shebna, nawu kawohrnan rowk kore kunrurk manbu king nuye, dja yidjawa, yiyimen,

¹⁶ 'Adju! Ngudda Shebna, njalekenh ngudda kondah yihni? Nangale ngunmarneyimeng kamak bu yiwarddedjobke ba yimarnbun kumidj ke kore ngundikukkurrme bu yirrowen?

¹⁷ Kanbekkabekka ngudda nawu yingudjbang bininj! Yina! Yawey kaluk ngundarrkidmang dja ngunkukburriwe djarreh.

¹⁸ Nungka ngunkukdornname wernkih yiman kayime ball ngunkukmarnbun, wanjh ngunburriwe kore kubolkwarre, dja kumekbe wanjh yirrowen. Kumekbe yidjaldi. Ngudda yiburlumerrinj manbu ngudda ke chariotskenh, wanjh bonj kadjaldi kumekbe. Dja bininj nawu yimarnedurkmirri, wanjh nakka yiyemikan, dja kayeme ke!

¹⁹ Yoh, ngaye yimang ngudda kore yihdurrkmirri. Ngudda nawu yiman kaddum yihbarndi, wanjh kanjdji yikolung!

²⁰ Kaluk bu kunmekbe kunbarnangarra kamre, wanjh ngamunkewe Eliakim, nawu nganmarnedurrkmirri. Kaluk nakka beywurd nuye Hilkiyah.

²¹ Ngaye ngadjongbun nawu Eliakim manburrba ngudda ke. Dja ngangadmodukkan kunmadj ke, dja ngawon kundulkarre ba bu karrur-
rkmirri kore ngudda yibawong. Kaluk nungka kayimerran yiman kayime kornkumo bedberre bininj nawu kabirrihni Jerusalem, dja bininj rowk nawu namud nuye Judah.

²² Mak ngaye ngawon Eliakim nawu key ngarre namud nuye David. Bu nungka karrangmarrhmag wanjh nakka minj nangale karrangbalhme, mak minj nangale karrangmarrhmag bu nungka karrangbalhme.

²³ Ngaye Yawey wanjh ngamarnbun Eliakim ba minj nangale kabirokay-
hwe, dja kadjaldi. Dja birriwern bininj kabindiburlume bininj kore nuye namud.

²⁴ Dja bininj rowk nawu nuye namud kabirriburlumerren nungkakenh dja wanjh kabirrimarrkebbun bu kabenbidyikarme. Bedda wanjh kabir-
riwernhkarme, dja wanjh kabirridulmukmen yiman kayime nawern banikkidja njalehnjale bu kabarndi kore kundulk.

²⁵ Dja ngaye Yawey nawu Ngawernhdulkarrekimuk Dunijnh, wanjh marneyime, bu kunmekbe kabolkyime, wanjh nahni namud rowk kabir-
ridulmukwon nawu Eliakim, yiman kayime kabirridulmukwon kundulk dja karrulkbakke, wanjh Eliakim dja mak nuye namud rowk, wanjh kawarrawarrhme." Kuhni rowk yimeng nawu Yawey.

23

Bu Yawey Kabenmarnewokmunkewe Bedberre Bininj Kore Phoenicia

Isaiah 23:1-17

¹ Nawu Yawey nganwong mahni kunwok kaluk kabenyngkihyolyolme bininj nawu kabirrihni kore kukadje Tyre. Wanjh ngurriwernhnalkburri-
men ngudda bininj nawu ngurribarnbarndi kore kabbala manbu kukadje Tarshishbeh! Kukadje Tyre, nakka wanjh bolkbularrbuyindanj! Manbu kurrambalk karurrkmirnderri kumekbe, dja kore kabbala kahdangerran, makka yakayakminj rowk. Dja kunwok benmarnebebmeng kore kunbolk Cyprusbeh.

² Dja ngudda bininj nawu ngurrihni kukadje Sidon, ngudda nawu njalehnjale ngurrihweykan, wanjh ngurridjalngurdmerrimen. Bininj nawu kurrula kabirridurrkmirri kore kabbala manwern, bedda wanjh ngundikukenwong.

³ Manbu kabbala manwern reyi kurrula dunijnh, kore djarrehbeh, dja kumkani ngudberre manmim manmeken manbu djordmerreni kore kukadjid mankabo Nile, kore kunbolk Egypt. Ngudda ngurriweykani bedberre manmim dja ngurrikukenworrinj ngudda nawu Tyre ngurrihni.

⁴ Mak ngudda bininj nawu ngurrikang kukadje Sidon kore kurrula darnkih, wanjh ngurriyemengalme. Ngudda ngurriyime yimankek ngurringeykimuk dja ngurribang. Mah, dja ngurribekkabekkan dja manbu kurrula yiman kayime kakayhme ngudberre, kayime, "Ngaye minj ngabenyawmayi wurdwurd, dja minj ngabekkarrimeninj kore wurdyaw nganbuyinj. Ngaye minj ngabendjordmiweyi yiman nabebeywurd dja ngalbebeywurd."

⁵ Bu bininj kabirrihni kore Egypt kabindiwobekkan bininj nawu Tyre bu baleh benmarnekurduyimerranj bedberre, wanjh bedda warridj kabirrinjilngwarremen.

⁶ Ngudda nawu ngurrihni kore kunbolk Phoenicia, manbu kurrula darnkih, wanjh ngurriwernhalkburrimen, dja ngurridjowkkemen ba ngurribidbun kore kubolkkimuk Spain.

⁷ Yiddok maninjmanu kunredkimuk Tyre, kore korrokoni bininj birriwernhnjilngmakni munguyh? Dja bu korroko duninj birribolkmarnbom? Dja bininj ngarre birrirengehrey kore kubolkbubuyika bu birribolkmangi? Yiddok?

⁸ Manbu Tyre wanjh kunred kunkimuk, dja yurhkeng kubolkbubuyika. Nawu kabirrihni Tyre wanjh birridjalkimuk, dja bindimarnbom bindingeykimukwong birribuyika bininj. Nawu birriwey kahweykani bininj kore Tyre, wanjh yiman birriwohrnawohrnani duninj. Kaluk, bolkkime nangale karremarnbom bu bininj kabindibun bininj kore Tyre?

⁹ Wanjh Yawey Nawernhdulkarrekimuk Duninj, nungka nadjalkudji benmarnekarremarnbom ba kunyemi kabenmang nawu birriburlumereni dja nawu birrikukenworreni, dja mak bininj rowk kore kubolkwarahkenh bu bedda birriburlumerreni.

¹⁰ Ngudda bininj nawu ngurrikang Tyre, wanjh ngurriwabmen kore mankabo Nile dja ngurrikulkmarnbun ba ngurridudjeng manme kumekbe. Ngudda minj ngurridjalyo kore Tyre, dja bolkwarreminj. Kore ngudberre kabballa dangedanginj wanjh bolkyakminj.

¹¹ Nawu Yawey berlyirriyonginj kore kurrula dja benmarnbom bininj nawu kabirrihni kubolkbubuyika bu kabirrideldelme bu kabirridjalkelemen nuye. Mak wokkurrmeng bu kunrurkkimuk duninj ngalenggarre kubolkkimuk Phoenicia bu kabularrbuyindan rowk.

¹² Mak Yawey benmarneyimeng bininj nawu kabirrihni kore kunred Sidon, yimeng, "Kore ngurrihkarrme mulil dja ngurrijilngmarnburren kore kunwarre ngurrikurduyime, nakka wanjh bonj, yakminj, bularrbuyindanj. Ngudda wanjh minj ngurriyawoyhdarrkiddi. Mak bu yiman ngurrikelerlobme kore kunbolk Cyprus, nakka minj baleh mak ngurringehme bu ngurrini kunmak."

¹³ "Ngurrina kore baleh nawu Assyriabeh bininj bindimarnekurduyimeg bininj nawu kabirrihni kore kukadje kunkimuk Babylon. Bedda nawu soldiers birrimwan birriyingkihmarburrinj wanjh birribolkwarrwong kumekbe kunred, dja birribolkmarnbom kumekbe, wanjh djal mayh nawu kurralkwaken kabirrihredi bolkkime.

¹⁴ Bininj nawu ngurrihbarnhbarndi dja ngurrire djarreh kore manwern kabballa kore kunred Tarshishbeh, wanjh ngurrikayhmen dja ngurrikangwarremen! Ngudda ngudberre kunrurk kunkimuk wanjh yakminj, bularrbuyindanj rowk.

¹⁵ Ngokko kamhre ngalenggarre kumekbe kunred kabolkngeyyo Tyre bu bininj kabirribolkbengmidjdan, dja kaluk seventy mandjewk ngarre, wanjh bininj kabirriyawoyhbolkburrbun. (Kaluk namekbe mandjewk karohrok nuye bininj nawu king.) Kaluk bu kayakmen namekbe seventy mandjewk, wanjh manbu kukadje Tyre kunred, makka kayimerran yiman ngalwarre daluk bu bininj kabirrimarnewayini kabirriyime,

¹⁶ Ngudda yidjalwarre duninj daluk, ngudda korroko ngundibengmidjdanj. Mah, wanjh ngudda yiwohrewohray kore kumekbe kubolkkimuk, yiyawoyhwayinin ngudda ke mankong manwern, dja yidjaldirridirri instrument ke, wardi bu bininj ngundikuknan dja ngundiyawoyhburrbun.

¹⁷ “Kaluk bu kayakmen namekbe seventy mandjewk, wanjh Yawey kabenbawon bininj nawu Tyre kabirrihni bu kabirriyawoyhkurduyime kunwarrehwarre, yiman kayime daluk kakukweykarren kore bininj birriwern nawu kondah kubolkwarlahkenh kurorre kabirrihni.

¹⁸ Dja nawu money nawern kamang minj kadjehdjenkurme, dja nawu Yawey kakukmang rowk dja kabenkukwon bininj nuye ba bu kabirribayahme manme manwern, dja mak kunmadj namakmak bedberre.”

24

God Nawu Yawey Kanmarnebolkbularrbun Kondah Kurorre

Psalms 24:1-13

¹ Kandibekka! Yawey kamre kabolkwarrewon kubolkbuyika rowk kondah kurorre. Kabolkwarrewon dja kabenburriwe bininj nawu kabirrihni ba bu kabirriyarlarreme.

² Nungka kabendung bininj rowk, dja minj nangale kabenbawon. Nungka kabendung nawu priests dja mak bininj nawu minj priests. Nungka kabendung nawu kabirriwohrnawohrn bininj dja mak bininj nawu kabindimarnedurrkmirri. Nungka kabirrunng daluk ngalbu kabimarnedurrkmirri. Kabendung bininj nawu kabirriweykaweykan dja mak nawu kabirribayahme; kabendung bininj nawu kabenkukwon money dja mak bininj nawu kabirridjayawoyhme moneykenh. Yawey kabendung birriwarlahkenh bininj rowk.

³ Bu kumekbe wanjh kurorre rowk kabolkwarrewarremen dja minj kayawoyhbolkmakmen. Kuhni rowk nawu Yawey wokkurrmeng.

⁴ Kaluk kunbolk kondah kurorre wanjh kabolkbukmen dja karrarlehmen. Kunbolk rowk kangudjyakmen. Kondah kanjdji dja mak kaddum kunngol yiman kanudnudmen rowk.

⁵ Bininj nawu kondah kurorre birrihni wanjh bedda birribolkwarrewong. Bedda birridjalwokweng God nuye mankarre rowk, dja mak birriwokbakkeng kunwok nuye God manbu benmarnewokkurrmerrinj bedberre bu nungka yolyolmerrinj munguyh kabenmarnedjare.

⁶ Kunmekbekenh kunu God bendjadmeng dja benmarnebolkwarrewong bininj rowk kondah kurorre. Nungka benwarrewam dja kunu kabirridjaldowe dja kabirriyakmen. Wanjh birridjalkudji kabirridjaldarrkid bu karridjaldi.

⁷ Manbu manmekenh manrakel kahdarlehme, dja minj bininj kabirringalke manbu wine. Larrk. Bedda kunu kabirrinjilngwarremen dja minj birrikarmeninj mulil.

⁸⁻⁹ Minj mak kabirriyawoyhbongun ba bu kabirriwayini kunnjilngmak dorreng, dja minj nangale kabun drums dja guitar. Manbu wine bedberre manjwarreminj.

¹⁰ Bininj nawu kabirrihi kore kururrkwern, wanjh kabirridjalkele rowk, dja kabirriwernhdangbalhme kururrk kore kabirrihni.

¹¹ Yikahwi kabirrikayhmi kore manbolh kabirrire kabirriboyawan manbu kunbang. Dja larrk. Minj nangale kanjilngmak. Minj nangale kayawoyhmarrmarr kore kondah kurorre.

¹² Bonj, kumekbe kukadje kore kabirrihni, wanjh rurrbakabakmeng rowk. Dja mak nawu birribang bininj birribakkeng manbu warnamyoy ngarre kunredkimuk

¹³ Kuhni kakurduyimerran kore kubolkububuyika rowk kondah kurorre. Kayakayakmen rowk, yiman olive kundulk bu bininj kabirridulkbun ba bu kamoyhmang mandjoleng, dja kabirrimoyhmang grapes rowk kore manrakel. Kundulk dja manrakel rowk wanjh mandjoleng yak.

Yiddok birriwarlahkenh Bininj Kabirriburlume Yawey Nawu God?

Isaiah 24:14-##

¹⁴ Bu kuhni kakurduyimerran, wanjh yikahwi bininj nawu kabirridjal-darrkid, wanjh bedda kabirriwayini kunnjilngmak dorreng. Yikahwi nawu kabirrihi kore karrikad, wanjh kabirrimulewan nawu Yawey bu nungka king duninj.

¹⁵ Mah, wanjh ngudda bininj warridj, nawu ngurrihni kore koyek, dja kore manyunkurr kore kurrula, wanjh ngurriburluburlumen nawu Yawey! Ngurringeyburlumen Yawey nawu God bedberre bininj rowk nawu Israel benkebmawahmeng.

¹⁶ A! Karrbenbekkan djarrehbeh bininj kabirriwayini bu kabirriyime, "Karriwernhburlumen Nadjalkudji nawu Namak Duninj!"

Dja med. Ngaye ngayimeng, "Ngaye bonj, ngabekkarren bu ngakuk-morramen. Wardi ngadjaldowe. Birriwern bininj ngandikukweykan! Bedda wanjh kabirrikurrehkurren dja ngandimulewan ngardduk."

¹⁷ Ngudda bininj nawu ngurrihni kondah kurorre, wanjh kandibekka! Kaluk ngurriwernhkelemen dja ngurrikelerlobme. Wanjh bonj, ngurrid-jalbarabun, minj ngurringehkerren.

¹⁸ Bu kunmekbe kakurduyimerran, minj nangale bininj kabebme. Bininj nawu kakelerlobme wanjh kamankan kore kumidj. Bininj nawu kayawoy-hbidbun kore kumidj, wanjh kadjardabme kore njalenjale kakukdukkan. Bu kunmekbe kabolkyime, wanjh mandjewk kunkimuk duninj kadjak-dung kore kaddum heavenbeh, dja mak kanjdji kurorre kabolkrokrokan.

¹⁹ Wanjh manbu kurorre kabakabakme, dja kubolkwarlah kabolkdjalk-mire.

²⁰ Kondah kurorre kore karrihni wanjh yiman kayime bininj nawu kabengkokan bu nungka bonguneng kunbang. Kurorre rowk yiman kayime bininj kamankan bu kakodjmayahme. Bininj rowk nawu karrihni kondah kurorre wanjh karriwernhnjilngwarre bu karriburrbun woybukkih ngad karriwokburriweng nawu God, dja bonj, ngad karriid-jalmarrkbaworrinj, dja minj mak karriyawoyhdolkkan.

²¹ Bu kunmekbe kunbarnangarra wanjh Yawey kabendung nawu bir-ribang duninj kore kaddum heaven, dja mak kabendung bininj nawu kabirriwohrnawohrnan kondah kurorre.

²² Nungka kabenmirndekurrme kanjdji kore kururrrkdangbalhmekenh dja kabendukkadukkan ba bu kabirribongdi bu kunwern kunbarnangarra. Kaluk kabenbun.

²³ Bu kunmekbe kunbarnangarra nawu dird kakebwarlkarren, dja nawu kundung kangurdme dja minj mak kabame. Bu kunmekbe kunbarnangarra wanjh Yawey nawu Nawernhdulkarrekimuk Duninj kamre bu kawohnawohrnan rowk kore Jerusalem, kore manbu kunward-dekimuk Zion. Nawu kohbahkohbanj kore Zion wanjh kabirrinan nuye kunmaktak duninj.

25

Karriburluburlume Nawu Yawey

Isaiah 25:1-5

¹ O Yawey, ngudda wanjh God ngardduk, dja ngaye ngabodan kumirrk ke, mak ngeyburlume ngudda ke kungey. Woybukkih ngudda yidjalkurduyimeng rowk kore yiyngkikhkarremarnbom kunkare dja yiyngkikhmulewarrinj.

² Ngudda yibenwarrewong bininj nawu ngandiwirriheng. Yirurrk-bakkabakkeng kunurrk kore kukadje rowk bedberre nawu birridjen-buyika soldiers. Minj bedda kabirriyawoyhrurrkmarnbun bu munguyh.

³ Wanjh kunmekbekenh kunu birriwarlahkenh bininj nawu birringud-jbang wanjh ngundiburlume, dja bininj birriwern nawu kabindibun birribuyika, wanjh bedda warridj ngundimarnekelemen.

⁴⁻⁵ Ngudda munguyh yibennahnan nawu birrimarladi bininj dja nawu birringudjyak bu kabirrikangewarre dja birrikelerlobmeng kore ngudda. Nawu birribang bininj kabindibun birribuyika bininj yiman kayime kunmayorrkkimuk kabenbun bininj. Dja ngudda yibenngheke dja yibenkurme kore kubolkmak bedda nawu ngundikayhme. Nawu birribang bininj yiman kayime kundungbang bu kabengudjyakwon bininj, dja ngudda yibennahnan nawu ngundikayhme, ngudda yibenmarnekurmerren yiman kayime mandjurlemek bedberre bu kabirringehme. Nawu birribang bininj kabirrikayhme kabirriburlumerren bu kabindibunkenh birribuyika bininj. Wanjh ngudda yibendjalngurdke rowk.

Nawu God Kabenmarneyingkiharnbun Mulil Bedberre Birriwarlahkenh Bininj Nuye

Isaiah 25:6-9

⁶ Kondah kore kunwarddekimuk Zion Yawey nawu nawernhdulka-rrekimuk duninj wanjh kabenmarneyingkiharnbun mulil bedberre birriwarlahkenh bininj nawu birrikang kubolkbubuyika rowk. Kaluk kabirrimre rowk kondah kore kuwarddekimuk Zion. Wanjh Yawey kabenmarnekurme bedberre manme manwern dja manmak, dja manbu wine manbomanjmak.

⁷ Kondah kore kunwarddekimuk Zion, nungka kawayhke kundowikenh manbu kabenbarrkbun bedberre birriwarlahkenh bininj kore kubolkbubuyika rowk kondah kurorre.

⁸ Nungka kabularrbun kundowikenh munguyh munguyh, dja kabenkeborndung kunmimnalk bedberre bininj rowk. Dja mak kabenmarnbun nuye bininj nawu birrikang kubolkbubuyika rowk ba bu minj kabirriyawoyhyemengalme munguyh. Kuhn rowk yimeng nawu Yawey!

⁹ Bu kunmekbe kunbarnangarra, bininj kabirriyime, "Woybukkih, nakka wanjh God kadberre. Karriwoybukwong dja nungka wanjh kannghekkeng. Nakka wanjh Yawey nawu karriwoybukwong. Mah, wanjh karrimarrmarnin dja karridjalnjilngmakin kore nungka kannghekkenghen."

Kaluk Yawey Kabendung Bininj Kore Kubolkkimuk Moab

Isaiah 25:10-12

¹⁰ Nawu Yawey kabolknahnan kondah kunwaddekimuk Zion. Dja bininj nawu birrikang kubolkkimuk Moab, wanjh nungka kabenmelme kore kurorre yiman kayime bininj kamelme kurduk ngarre bulikki kore kurralk.

¹¹ Bedda wanjh kabirriyo kurorre yiman bininj nawu kayibme kore kukku. Bedda nawu kabirriburlumerren dja kabirriyimerren bu birrikurdumak, wanjh nungka kabenmarnbun kabirriyemengalme.

¹² Nawu Yawey kabenbun kore kabirridi kunrurrk kunkimuk bedberre. Nungka kabenkukburriwe kore kundjulng.

26

Kaluk Yawey Nuye Bininj Kabirrimarnewayini

Isaiah 26:1-19

¹ Kaluk yerrekah, bu kuhni nawu Yawey kakurduyime, wanjh nuye bininj kabirriwayini mahni mankong kore kubolkkimuk Judah. Wanjh kabirriwayini bu kabirriyime, "Ngad wanjh ngarrihni kore kukadje kunkimuk, dja minj nangale kanbun kondah. God nungan kankukdjurruddin yiman kayime kawarnamyo kadberre.

² Mah, wanjh karridangmarrhma manbu gates mankimuk duninjh ba bu birrimak bininj kabirringimen, bedda nawu kabirridjalwoybukwon God.

³ Ngudda Yawey yibenwon kunmodmikenh duninjh bininj nawu ngundidjalburrbun munguyh, dja ngundidjalwoybukwon.

⁴ Ngudda bininj rowk, wanjh ngurridjalwoybukwo Yawey munguyh munguyh. Nawu Yawey nungan nadjalkudji kandjalnahan.

⁵ Nungka kabenkoluyhwe bininj nawu kabirriburlumerren. Bininj nawu birrihdi kore kubolkkimuk dja minj birrikelemeninj nuye, wanjh bonj, nawu Yawey bakkabakkeng rowk manbu mankimuk warnamyoy bedberre.

⁶ Bedda bindibuni birriwern birrimarladj bininj, dja bolkkime birrimekbe nawu birrimarladj bininj kabindimarnebolkmelme nawu birriburlumi bininj bedberre kunredkimuk

⁷ O Yawey, ngudda kanmarnebolhmarnbun ngad bininj nawu ngudda kanmakwan. Ngudda yidjalkudji kandjadme ngad ngarriwarlahkenh bininj bu djal mandjad dja kunmak dorrengh. Dja ngudda yibolhmarnbom ngadberre.

⁸ Ngad ngarridjalmarrkmang ngudda ke mankarre, yiman kayime ngarridjalre kore manbolhmak ngudda yimarnbom. Dja mak ngundimadbn ngudda. Ngudda wanjh yidjalkudji ngad ngundimarnedjare kukange dorrengh, dja mak ngarridjaldjare ngundingeyburlume kore kubolkbubuyika rowk.

^{9a} Ngaye marnedjare ngudda kukange ngardduk dorrengh! Ngaye marnedjare kukakkuyeng dja mak bu malamalaywi

^{9b} Bu ngudda Yawey yibendjadme birriwarlahkenh bininj rowk, wanjh bedda kunu kabirriborlhme kunmakkenh.

¹⁰ Bu ngudda yibenkongibun nawu birriwarre bininj, wanjh bonj, minj bedda kabirriwernhborlhme. Bedda kabirridjarrkoyo kore birrimak bininj, dja bonj, bedda wanjh kabirridjalkurduyime kunwarre. Minj mak ngundiburluburlume ngudda Yawey nawu king duninjh.

¹¹ Ngudda yibidwayhmeng ba bu yibenbun, dja bedda minj ngundinan. Ngadjare birrimekbe birriwarre bininj bu ngundinan kore ngudda yibenmarnedjare ngudda ke bininj. Wardi nawu birriwarre bininj kabirriyeme! Dja mak yibenwurlhke bininj nawu ngurriyidko, dja nawu ngundiwirrihme.

¹² Ngudda Yawey yidjalkudji kanwon kunmodmikenh, dja mak kanmarnbun ba bu ngarrikukenmeng. Minj ngad ngarrimarnburrimeninj.

¹³ Ngudda Yawey yidjalkudji God ngadberre. Birribuyika bininj ngandiwohnwahrnani, dja ngudda Yawey yidjalkudji ngundingeyburlume.

¹⁴ Nahni bininj nawu ngandiworhnani wanjh birriyakminj rowk, minj kabirridjaldarrkid. Kukange bedberre minj kabirriyawoyhdolkkan. Ngudda wanjh yibenduy dja yibenwarrewong. Wanjh bolkkime minj nangale bininj kabenburrbun nahni bininj nawu ngudda yibenbularrbom.

¹⁵ Yawey, ngudda kanmarnekurduyimeng kunwern ba bu bolkkime ngadberre kunbolk wanjh bolkwarlahmeng. Wanjh kunu birriwern bininj ngundiburluburlume.

¹⁶ Yawey, bu ngad ngarrimwam kore ngudda dja ngarriwarnyakmulewarrinj kunnjilngwarre dorreng, ngudda kandungi dja kanbuni. Wanjh ngarridjaldi yiwarrudj bu ngarriwokdi djal yeleyeledj.

¹⁷ Bu ngad ngarrimwam kore kumirrk ke, wanjh ngad ngarriyimi yiman kayime daluk ngalbu kadjakbekkan bu wurdyaw kabibun karrangenkenh. Ngarridjalkayhmi kundjak dorreng kore kumirrk ke.

¹⁸ Dja minj woybukkih ngarriyawmayi, dja wurdyaw yak. Ngad minj njale ngarrimarnbuyinj, dja bonj, ngarridjalbarabom. Bininj rowk kondah kurorre wanjh minj birriyawoyhdarrkidwirrinj.

¹⁹ Kaluk bininj ngudda ke nawu birridowerrinj wanjh kabirriyawoyh-mimbimen, kunburrk bedberre kabirriyawoyhdarrkidmen. Bu ngudda ke bininj kabirrikodjkeyo kore kumidj, wanjh bedda birridolkka dja birrikayhmen kunnjilngmak dorreng! Ngudda Yawey yibenkangedar-kidwon bininj ke nawu kunkare birridoweng. Ngudda wanjh kangehke yiman kayime kunberle karrarrkidwon kurorre bu kunkabel.

Bu Yawey Kabendjadme Dja Mak Kabenmarnbun Bininj

Isaiah 26:20-21

²⁰ Kandibekka ngudda nawu ngardduk bininj! Ngurringimen kururrk dja ngurridangbalhmen. Nawu Yawey kamre kayiddung warridj, wanjh ngurriwarlkkarrimen waken ngurrimadbun bu nungka kare.

²¹ Ngurrina! Nawu Yawey kamre kore heavenbeh kahdi. Nungka kamre kondah kurorre ba bu kabenbun birriwarlahkenh bininj nawu birrikurduyimi kunwarre. Yikahwi bininj kabindibun birribuyika dja manmolk kabindikuarlkan. Kaluk bu Yawey kamre wanjh manbu kurorre kabenkukbekke birrimekbe bininj nawu birridudjindi.

27

Nawu Yawey Kabennahn Bininj Nawu Israel Benkebmawahmeng

Isaiah 27:1-13

¹ Bu kumekbe kunbarnangarra Yawey kabun mayh nabang duninj nawu kangeyyo Leviathan. Nahni mayh yiman kayime nayin naw-ernhkimuk nawu kahdi kurrula, dja munguyh kawake dja mak kakuk-dornnamerren. Kaluk Yawey kabun nahni Leviathan mandjawakkimuk nuye dorreng.

² Bu kumekbe kunbarnangarra Yawey kabenmarnewayini nuye binih-bininj nawu bedda yiman kayime nuye manrakel grapes manbu nungka dudji. Wanjh kayime,

³ "Ngaye Yawey munguyh ngabolknahnun kunbarnangarrawern dja mak bu kunkakkuyeng, dja mak ngabolkdjuhke kukkuwi. Ngaye minj ngabawon nakudji nawu nawarre bu kakilekme.

⁴ Ngaye minj ngabendjaldung bedberre nawu bininj ngardduk. Bu bedda yimanniwirrinj mikardihkardird wanjh ngaye ngabenbuyi dja ngabenkukwurihke bu kabirriyakmen rowk.

⁵ Dja ngadjaldjare bedda kabirrimre kore ngaye ba bu kabirrikurmerren kore ngabennahn. Yoh, ngadjare kabirrimre kore ngaye bu kabirridjare kunmodmikenh dorrengh.”

⁶ Kaluk yerrekah, wanjh bininj nawu Jacob benkebmawahmeng kabirriwernmerren yiman kayime mankolhde kadjordmerren bu kayimerran nakimuk kundulk. Ngayime bininj nawu Israel benkebmawahmeng bu kabirriwarlahmen yiman kundulk kawernmerren ba bu birriwarlahkenh bininj kondah kurorre kabirrimoyhmang manbarnem manwern ngarre.

⁷ Nawu Yawey nungka bendungi nuye bininj nawu Israel benkebmawahmeng, bendungi djal kundjalyahwurd. Minj birriwern birridowerrinj nawu Israel nuye bininj. Dja Yawey benbom wernkih duninj bininj nawu birriwirrihmeng nawu Israel benkebmawahmeng.

⁸ Yawey bendungi nuye bininj dja benmirndemunkeweng djarreh kore kunred bedberre nawu birridjenbuyika bininj. Benburriweng yiman kayime kunmayorrk kunkimuk kore koyekbeh kabenburriwe bininj.

⁹ Bolkkime bininj nawu Israel benkebmawahmeng kabirriboddan kore idols. Bu bedda kabirriwarnyakmulewarren dja kabirriwayhke altars nawu idolskenh dja mak kabirriwarddedjubulhme kunwardde ngarre, dja mak kabirriburriwe yehyeng manbu kabirriboddankenh nawu god nawarre kangeyyo Asherah. Bu kuhni rowk kabirrikurduyime, wanjh Yawey kabenmarnebenmidjdan bedberre kunwarrekenh.

¹⁰ Bininj rowk kabirriredbawon kunredbubuyika, dja kururrkkimuk kunwern wanjh djal bininj yak, dja kabolkymerran yiman kubolkdarleh. Mayh kahyo kore kumekbe, dja kahmirndengun kurralk dja kundulk, dja kamirndekodjkeyo kumekbe.

¹¹ Bu kunmekbe karrulkdarlehme wanjh manyende rowk kawarrhme, dja daluk kabirrimre kabirrimoyhmang. Bininj nawu Israel benkebmawahmeng wanjh karohroh, yiman kayime kundulk bu kadarlehme, bedda birribodmewong dja minj kabirridjalburrrbun Yawey. Kumekbekenh nungka nawu benmarnbom wanjh minj kabenkongibun, dja minj kabenmarnemimkongiwern.

¹² Kaluk yerrekah, bu kunbarnangarrakudji, wanjh Yawey kabenmirndename nuye bininj. Nungka karengehre kabenbebbemirndemang kore kubolkkimuk kubulkayh mankabo Euphrates dja kore kabolkberrkraworren kunbolk Egypt. Wanjh kabenmirnderohroke bininj rowk, dja ngudda warridj nawu bininj nuye.

¹³ Bu kuhni kunbarnangarra kamre wanjh bininj birriwern kabirribekkan manbu trumpet mankimuk duninj kawernhkayhme. Yawey nuye bininj nawu kabirridowerrren kore kunbolk Assyria kabirrimre kore mandulum manbu manbolkdjamun ngarre kunredkimuk Jerusalem. Dja mak bininj nawu kabirrihni kore kunred Egypt, kabirrihdjarrkdi nawu birridjenbuyika kumekbe, wanjh bedda warridj kabirrimre Jerusalem. Dja kunmekbe wanjh birrimekbe bininj kabirrimarnebodan nawu Yawey.

28

Nawu Kawohrnran Rowk Kabenbengdayhke Bininj Nawu Israel Benkebmawahmeng

Isaiah 28:1-6

¹ Nawu Kawohnan Rowk kabendung birrihkimuk bininj nawu Ephraim benkebmawahmeng. Birrimekbe bininj kabirriwohnan kore kukadje Samaria dja kabirridjare kabirrikimukworren. Bonj, bedda kabirridjalbongun dja munguyh kabirriworromkan! Kuhni kunbolc bedberre kabolkngeyyo Ephraim, wanjh kubolcmak dja manme manwern kadjolengmen kumekbe. Kumekbekenh nahni bininj nawu Ephraimkenh wanjh kabirriburlumerren. Aba, kawarre! Kunyiid kabenmarnekurduy-imerran dja kunbolc bedberre kadjalwarrhme.

² Ngurrina! God nawu Kawohnan Rowk, nakka kabenkarmme bininj nawu birridulkarrekimuk duninj, dja kabenmunkewe ba bu kabindimarnebolkwarrewon kunred bedberre bininj nawu Ephraim kabirrihni. Nahni bininj nawu Assyriabeh wanjh kabirribularrbun rowk yiman kayime kunmayorrk kunkimuk duninj, dja yiman kayime mandjewk nakimuk, dja mankurk mandulumuk, dja mak yiman kundjurrh kunkimuk duninj!

³ Bininj nawu Ephraim benkebmawahmeng kabirridjalbongun kunbang, dja kabirriburlumerren kunred Samariakenh. Wanjh darnkih kamre bu bedda kabirribolknan kadjalbolc bularrbuyindan bedberre.

⁴ Kunred Samaria karurrkdi darnkih kubolcmak kore manme kawernmerren, dja bonj, kahdjalyakmen. Kakukwarremen yiman kayime mannguy manmakkaykenh bu kabaldarlehmen, dja yiman mandjoleng manbu bininj kadjalngun dja kayakwon.

⁵ Bu kunmekbe kunbarnangarra Yawey nawu Narrulkarrekimuk Duninj kamre dja bininj nuye nawu kabirridjaldarrkid wanjh kabirrinan nuye kunmakmak.

⁶ Nungka kabenbidyikarmme bininj nawu kabindidjadme ba bu kabirrikurduyime mandjad duninj. Mak nungka kabenwon kunngudj bedberre bininj nawu soldiers ba bu minj birribang bininj kabirringime kore kunred bedberre.

Yikahwi Prophets Wanjh Birribonguneng Manbowern Kunbang

Isaiah 28:7-13

⁷ Bolkkime wanjh bininj kabirrikurduyime kunwarre. Karrbennan bininj nawu prophets dja mak bininj nawu priests bu kabirriworromkan. Kabirribongun kunwern kunbang dja kabirribengmayahme. Birrimekbe nawu prophets bu kabirriwaralnan wanjh minj kabirrimenmenmang. Nawu priests minj kabirrikarremarnbun bu djal mandjad, dja kabirrib-arabun.

⁸ Bedda kabirriwehmewehme kore kabirriyerrkan! Kabirridjalbolcwarrewon kunbolc bedberre.

⁹ Bedda wanjh ngandiwirrihme, dja ngandiyolyolme, kabirriyime, "Ngayh! Nangale mayh? Nangale nungka kabenbukkabukkan? Minj karridjare karribekkan nuye kunwok! Kunubewu nungka kayime bu kabenbukkabukkan wurdwurd birrikilehkih dja nawu djal barrken.

¹⁰ Bu nungka kayolyolme dja kanbukkan, wanjh kawokdi walakki walakki yiman bu kabenbukkan wurdyaw nayahwurd, dja menyak!" Kuhni ngayekenh ngandimarneyolyolme.

¹¹ Bonj. Bu gaye minj kandibekkekkan, wanjh God kabenmunkewe birridjenbuyika bininj ba bu ngurrbenbekkekkan. Bedda ngundibukkabukkan kundjen bedberre dja kuhni bu ngurrimenmenbekkan God nuye kunwok.

¹² God nungan ngundingehkeyi ngudberre, dja bonj, ngurridjalwarnyak-minj. Nungka ngundikangemarnbuyi, dja ngudda ngurridjalwokwirrih-meng.

¹³ Kunmekbekenh nawu Yawey kamunkewe kunwok nuye dja ngudda ngurriyime bu nungka kawokdi yiman kayime daluk kabimarneyime wurdyaw nakilehkileh. Ngudda minj ngurridjare ngurribekkan, dja kuhni minj ngurrimenmenbekkan. Kumekbekenh kunu kunyid kawernmerren ngudberre. Bu ngurrire wanjh ngurrimankan. Bininj birribang kabirrimre bu ngundibun ngudberre, wanjh ngundidarrkidmang dja ngundidukkadukkan ngundibongkarme.

Yawey Benyinkihbengdayhkeng Kore Baleh Nungka Kakurduyime Kore Kunred Zion

Isaiah 28:14-22

¹⁴ Bolkkime kandibekkabekka, ngudda bininj nawu ngurriburlumerren kondah kunred Jerusalem, ngudda nawu ngurrbenmarnewohnawohnan nahni bininj rowk. Ngurribekka kunwok nuye nawu Yawey bu bolkkime kawokdi.

¹⁵ Nawu Yawey kayime, "Ngudda ngurriyolyolmerren dja ngurriburlumerren, ngurriyime, 'Ngad wanjh karringurdheng kundowikenh, dja minj karrikolung kore kumidj. Bu kundjak kunkimuk kamre, wanjh karringehme, minj karridowe. Ngad wanjh karridjalkurrehkurren ba bu karridjaldi kamak.' Kuhni ngudda ngurriyime.

¹⁶ Mah, wanjh bolkkime kandibekka ngaye Yawey dja ngawernhwohna-wohnan rowk. Ngurrina, ngaye ngawarddekurrme manwarddebala mankimuk kore kukadje Zion, ba bu kunurrkma kahdi kaddum mahni kunwardde ngardduk, dja minj karokan. Mahni kunwardde wanjh manwarddemakkaykenh, dja bininj nawu kahdi kumekbe minj kakange-warenren.

¹⁷ Dja mak ngaye rohrokme ngudberre dja djaddjadme, ba bu ngran kunwarre ngurrikurduyime. Kaluk ngamunkewe kunmayorrk dja mankurk ba bu kadjalwe ngudberre kunwok kore ngurrikurrekurren, dja mak kundjurrh kabolkbularrbun kore ngurriwarlkarren.

¹⁸ Bu kumekbe kayimerran, wanjh kundowikenh ngunbun, dja woybukkih ngurrikukkolong kore kumidj. Bu manbu kundjak kunkimuk kamre, wanjh ngurridjaldowe.

¹⁹ Manbu kundjak kunkimuk ngunbun malamalaywiwern, dja mak kunbarnangarrowern dja mak kunkak rowk, wanjh kamre ngunbun." Bu kuhnikenh ngurrimenmenbekkan, wanjh ngurriwernhkelemen.

²⁰ Ngudda ngurriyime yiman kayime bininj nawu kayawan kore nungka kakodjkeyo, dja bonj, minj kakarrme kunmadj namak, dja balangkid nuye nadjaldedjumbung.

²¹ Ngurriburrbu Yawey bu kurduyimeng kore kunwarddekimuk Perazim, dja mak kore kabbal Gibeon. Nungka karrolkan dja kayawoyhkurduyime kondah, karrurrkimirri bu kunbuyika duninj kakurduyime. Nungka wanjh kakurduyime kore kayingkihkarremarnburren. Ngad bininj minj karriwernhburrbun.

²² Mah, wanjh bolkkime ngurringurdmen bu kandidjekmiwon. Bu burrkyak, wanjh wirlmurrng mandulmuk ngundukkadukkan dja minj

baleh ngurrikelerlobme. Yawey nawu kawohrnan rowk, dja narrulkarrekimuk duninjh, wanjh nungan nganyingkih bengdayhkeng kore nungka karremarnbom bu kamre kabolkbularrbun kadberre kunbolk rowk.

Yawey Nawu God Kabenbukkan Bininj Ba Bu Kabirrimenmenbekkan Kunmayali Nuye

Isaiah 28:23-29

²³ Kandibekkabekka! Kandiwokma dja kandimenmenbekka bu bolkkime marneyime.

²⁴ Ngurriburrbun bininj nawu farmers. Bedda kabirrikulkbun kabbal ba bu kabirrimimburriwe kunmim manbu manmekenh. Bininj nawu farmer kabirridjaldjalkmire dja kamarnmarnbun kunrorre ba bu kamak kamimburriwe kumekbe.

²⁵ Nungka kamimburriwe yiman manmim manbu caraway, dja nuk manbu cummin. Dja mak karrudjen manmimbuyika yiman manbu wheat dja barley, dja mak spelt. Kamimdudjeng rowk kore nungka kadjare.

²⁶ God nuye kabibukkan ba bu kawernhburrbun bu manme kadjordmiwe.

²⁷ Ngayime mandjoleng manbu carraway dja mak cummin, nakka minj kamang manmim ngarre bu mankimuk tractor kabun. Burrkyak, nungka kakan kundulkyahwurd bu kabun dja kamimmang ngarre.

²⁸ Dja mak ngurriburrbun bininj nawu kamanamang manmim manbu wheat. Nungka kabun walakkih ba manmim kamimwarrhme, dja kabimimdjubulhme manwarddebala dorreng ba bu kamarnbun kandidjawa flour. Nawu farmer kawernhburrbun, dja nakurdumak.

²⁹ Kuhni rowk Yawey nawu Narrulkarrekimuk Duninjh kabenbukkabukkan bininj. Bu nungka kayingkihkarremarnbun, wanjh nungguh kakurduyimerran. Nungka wanjh mayaliwern duninjh dja mak kaburrbun kunmakmak rowk.

29

Kaluk Baleh Kabenmarnekurduyimerran Bininj Nawu Kabirrihyo Jerusalem

Isaiah 29:1-8

¹ Ngudda nawu ngurrihni kukadje Jerusalem*. Kumekbe kahdi manbu altar God nuye, dja king David bolkmey dja yoy kumekbe. Dja bonj, Jerusalem kabularrbuyindan! Kunubewu kudjewk kunkudji dja nuk kunwern bu ngurrikarme mulil ngudberre, wanjh bonj.

² Wanjh ngaye God nawu Yawey ngamre kunyid dorreng kore Jerusalem. Ngudda ngurriholkngeybun God nuye altar, dja bu ngaye ngamre ngudda wanjh ngurrikangewarremen duninjh bu ngurrinan kunkurlba kakurlbare balehbaleh kore kukadje ngudberre. Kakurlbawernmen yiman kayime kore altar manbu mankimuk.

³ Yoh, ngaye ngamre kunyid dorreng, dja ngadjaldi darnkih yiman bu ngawakbuyingun ngudberre. Ngaye ngamarnburren bu bun ngudberre.

⁴ Ngaye wanjh bun dja kukburriwe ngudberre. Ngudda ngurridi kanjdji kurorre dja bu ngurriwokdi wanjh ngurriwokyahwurd kanjdji kore kundjulngbeh yiman mam kawokdi!

⁵⁻⁶ Kaluk bu kuhni kayimerran ngudberre, wanjh Yawey Narrulkarrekimuk Duninjh kamre kundjalburrikudji bu ngungehke ngudberre.

* **29:1** Kore Hebrew kunwok kayime "Ariel", dja Ariel kamenyime bokenh - "Nawu Lion Nuye God", dja mak "Altar nuye God."

Nungka kamre yiman namarrkon kunkimuk duninjh. Wanjh bininj nawu ngundiwirrihme kabirribekkan karrurldurlme wernkih duninjh, dja mak kabirribekkan kabolkrokrokan. Bedda nawu birribang, dja bonj, nawu Yawey kabenkukburriwe yiman kundjulng dja kundalkdarleh bu kunmayorrk kahbun. Nawu Yawey kabenkukkinje rowk yiman manbirlukimuk duninjh.

⁷ Bu kunmekbe rerrih birrimekbe bininj kore kubolkbubuyikabeh nawu kabirridjare kabirribow Jerusalem kore God nuye altar kahdi, wanjh kabirridjalyakmen rowk! Bedda birrimwam army dorreng darnkih kore Jerusalem bu bindiwakbuyinguneng dja birridjareni bindibuyi bininj kumekbe, wanjh bonj, kabirridjalyakmen yiman kayime bukirri wanjh kayakmen. Bininj nawu kabukirrinan, wanjh karrollkan, dja bonj, minj kayawoyhnan kore kunkak bukirrinang.

⁸ Ngayime yiman bininj nawu kamarwedowe dja kabukirrinan manme, bu karrollkan, wanjh kadjalmarrwe! Dja wardi bininj nawu kakombukdowe kabukirrinarren kabongun kukku, bu karrollkan kahdjalkombuk dja kabekarren bu kangudjwarremen. Wanjh kuhni kayime nawu birribang bininj bu Yawey kabengurdke kore kabindibun bininj nawu kabirrihni kore kuwarddekimuk Zion ngarre Jerusalem.

Bedda Minj Kabirriwokmarrkmang Nawu Yawey

Isaiah 29:9-14

⁹ Mah, wanjh ngudda bininj nawu Jerusalem ngurrihni, ngurridjal-marnburrimen bu ngurriwernhmayahme dja ngurribengwarrmen. Yuwn bu ngurribolknan, dja ngurrimenborledmen kore ngurrinan. Dja mak ngurrimarnburren bu ngurribengkokan kunbang yak. Minj ngurribongun dja bonj, ngurridjalmankan!

¹⁰ Nawu Yawey nungan ngunkodjkekurmeng ba bu ngurridjalker-roweng. Dja mak benmimbalhmeng kunmim bedberre nawu prophets ba bu minj njale kabirrimenburrin. Bininj nawu kabirriyingkihburribun kore kamre yerrekah, wanjh bedda warridj Yawey benkodjbarrkbom.

¹¹ Wanjh bolkkime minj ngurrimenmenbekkan kore ngaye bukkabukkan. Ngurriburrbu. Bu Kunwok ngardduk yiman kabimbuyindi kore scroll, dja nahn djourra karrornnamerren wernkih duninjh, seal dorreng. Wardi ngurrika nahn scroll dja ngurriwon bininj nawu kabimngeybon, dja nungka kayime, "Ngaye minj ngabimngeybon, dja bonj, nahn scroll kakarrme seal, dja minj ngaye ngamarrhmang.

¹² Dja kunubewu ngurriwon nabuyika bininj dja ngurrimarrkdjawan, "Wardi yibimngeybu ngadberre!" Dja namekbe bininj kayime, "Aba, ngaye ngawakwan bu ngabimngeybonkenh."

¹³ Wanjh ngurribekkabekka kore nawu Yawey kayime ngudberre, "Nahn bininj ngandimarneboddan bu djal kunwokwi, dja minj kore kukange bedberre. Bu bedda ngandiburlume kore yiwarrudj, wanjh djal bedberre mankarre kore bininj kabirrikarremarnbun, dja yuwn bu ngardduk.

¹⁴ Wanjh kunmekbekenh ngaye ngabenyawoyhkangebarrhke nahn bininj, kore kunwernkenh ngabenbukkan. Bedda nawu birrimayaliwern, wanjh bedberre kunmayali kadjalyakmen. Dja mak bininj nawu birrikodjkuludjad, wanjh bedda yiman kabirrikodjkuluyahwurdmen."

Kaluk Nawu Yawey Kabenmarnbun Ba Bu Kabirrihni Kamak Rowk

Isaiah 29:15-24

¹⁵ Bininj nawu kabirriyime, “Minj nangale kannan ngad bu karrikurduyime kunwarre! Minj nangale kaburrbun!” Bedda wanjh kabirrikkurduyime kunwarre kore kunkak duninj, dja kabirriyime yimanke bu kabirriwarlkayindi kore Yawey minj kabenmayaliburrbun kore kabirrikarremarnburren.

¹⁶ Wanjh ngabenmarneyime, ‘Ngudda wanjh ngurridjalborledke rowk! Ngurriburrbun nawu potter kamang delek dja kamarnmarnbun cup dja bowl. Yiddok nahni cup dja bowl kabimarneyime nawu potter, “Ngayh! Ngudda minj kanmarnbuyi. Ngudda minj njale yiwernhburrbun!”’

¹⁷ Kandibekka. Kunbuyika kakurduyimerran wanjh darnkih kamre. Manbu karrulkwern kore Lebanon wanjh kabolkyimerran kabbal kore manme kawernmerren, dja mak kabbalbuyika wanjh kabolkyimerran kuberrk duninj.

¹⁸ Bu kuhni kunbarnangarra kamre, wanjh nawu birribengwarr bininj kabirriwobekkan kunwok manbu kawokbimbuyindi kore scroll. Dja mak nawu birrimimbunje bininj kabirriyawoyhbolknan dja minj kabirridjalni kore kubolkmunun.

¹⁹ Bininj nawu minj kabirriburlumerren, wanjh kabirrimarnemarmarr nawu Yawey. Dja Yawey nawu Nadjalmak Duninj Bedberre Israel bininj, wanjh kabennjilngmarnbun nawu birrimarlaj bininj.

²⁰ Dja bininj nawu birribang, wanjh kabirridjalkukyakmen. Bininj nawu kabirridjekmiwon nawu God, wanjh bedda warridj kabirridjalkukyakmen. Bininj nawu kabirridjalburrbun kunwarrekenh, wanjh God kabenbularrbun.

²¹ Dja mak kabenbularrbun bininj nawu kabirrikurrehkurren dja kabindiyolyolme birrimak bininj kore court. Nahni birriwarre bininj kabirriwarnyak kunwoybuk.

²² Kunmekbekenh kunu nawu Yawey kawokdi. Nungka nawu bingehkeng Abraham wanjh kuhni kabenmarneyime bininj rowk nawu Jacob benkebawahmeng. Wanjh yimeng, “Ngudda nawu Jacob nuye bininj, minj ngurriyawoyhyeme, dja minj ngurriyawoyhkele.

²³ Kaluk ngurrbennan wurdwurd nawu ngaye won ngudberre kunbid ngardduk, wanjh kandimarneyime bu ngaye Ngadjalmak Duninj, ngaye nawu Jacob nganmarneboddanj. Ngudda mak kandingeyburlume dja yawn bu kandingeywarrewan. Ngudda wanjh kandingjalkengeme ngaye nawu Israel nuye God.

²⁴ Bu kuhni rowk kayimerran, wanjh bininj nawu birribengwarr kabirriborlhme dja kabirrimayalimakmen. Dja mak bininj nawu kabirriwokkihnruluhnjurlukme, wanjh kabirridjare kabirriwernhborlhme.” Kuhni rowk nawu Yawey yimeng.

30

Yawey Bendjawam, “Njalekenh Ngurriraworrij Bininj Nawu Egyptbeh?”

Isaiah 30:1-7

¹ Nawu Yawey kayime, “Nahni bininj yiman ngaye ngardduk wurdwurd minj ngandiwokmang, dja ngandidjalwokwe ngardduk. Wanjh kunyid kamre bedberre. Bedda kabirrikarremarnburren kore djal bedman, dja minj ngardduk. Kabirriraworren birribuyika bininj ba bu kabirribidyikarmerren. Dja ngaye ngardduk Namalngmakkaykenh minj

benbengdayhkeyi bu kunmekbekenh. Bedda kunu kunwarre duninj kabirrikurduyime.

² Nahni bininj kabirrire kore kunbolc Egypt dja kabirrimarrkdjawan nawu Pharoah bu nungka kabenbidyikarrme dja kabennahnan. Kabirriyawan kunbolc kore kabirringehme. Bedda minj ngaye ngandidjawayi, dja kawarre.

³ Bonj. Marneyime ngudberre bu Pharoah minj ngunwernhnahnan, dja kunu ngurriyemengalme. Ngudda ngurridjare ngungehke, dja burrkyak, ngurridjalnjlngwarremen.

⁴ Ngudda ngurrbenmunkeweng bininj birrikikhimuk ngudberre kore Egypt dja birrikang ngudberre kunwok, dja bedda ngokko birribebmeng kore kunred Zoan dja mak kore kunred Hanes.

⁵ Bonj. Ngurriwarreworren. Bininj kore kunbolc Egypt minj ngundibidyikarrme, dja kunu ngurribarabun dja ngurriyemengalme." Kuhni yimeng God nawu Yawey.

⁶⁻⁷ Nawu God wokdanj dja yolyolmeng mayh nawu kahyo kore kubolc-darleh kabolcngeyyo Negev, wanjh nganmarneyimeng, "Ngudda bininj nawu Judah ngunkebmauwahmeng, ngudda ngurrbenmunkeweng yikahwi bininj ba bu kabindimarrkdjawan bininj nawu Egypt kabirriyo. Ngudda ngurridjare bu bedda yimankek ngunbidyikarrme. Dja bininj nawu ngurrbenmunkeweng wanjh birridahkendoy baladji manwern njalenjale manbu manmak, ba bu kabindikarremulewan nawu Egypt bininj. Birrikurrmeng rowk kore donkeys dja camels bedberre bu kabirrikanahkan. Wanjh bolckime kabirrire kore kubolcwarre duninj. Kunubewu mayh nabang duninj kare kumekbe, yiman lions dja mak nabang duninj nayin nawern.

Bonj, wanjh kabirribarabun. Bininj nawu Egypt kabirridi minj ngunbidyikarrme. Bedda birringudjyak. Ngaye ngabenngeybun 'Rahab ngalbu daluk minj kabidrokan.'" Kuhni yimeng Yawey nawu God.

Bininj Nawu Kabirridjalwokwe Yawey Nuye Kunwok

Isaiah 30:8-18

⁸ Dja mak God nganmarneyimeng, "Mah, yiray yibimbun rowk bedberre kore manbalabala, dja mak kore djurra nawu scroll. Kaluk kabirribimngeybun ba bu kabirriburrbun munguyh kore ngayimeng bedberre.

⁹ Nahni bininj wanjh munguyh ngundiwokwe dja kabirrikurrehkurren, dja minj kabirridjare ngandibekkan kore ngaye nawu Yawey ngabenbukkabukkan.

¹⁰ Bedda kabindimarneyime bininj nawu kabirrinan kunwoybukkenh, 'Ngurringurdmen, dja minj ngurriyawoyhnan kore kunwoybukkenh!' Dja mak kabindimarneyime nawu prophets, 'Yuwn bu kandibengdayhke kore kunmakkenh! Yuwn bu kandimarneyime kunwoybukkenh. Ngad wanjh ngarridjare ngarridjalmayalikarrme djal ngadberre.

¹¹ Ngudda nawu prophets wanjh munguyh kandidabke kore ngarridjare karrire manbolh ngadberre. Wanjh kandibawo! Yuwn bu kandibengdayhke kore kunngey nuye God nawu Nadjalkudji Nadjalmak Duninj kore Israel!"

¹² Kunmekbekenh nawu Nadjalkudji Nadjalmak Duninj kore Israel kayime, "Ngudda kandiwoyburriweng kore ngaye bengdayheng ngudberre. Ngudda ngurridjare bu ngurridjalbang dja ngurridjalkurrehkurren.

¹³ Bonj, wanjh ngaye djamed ngudberre dja ngurridjalwarre. Ngudda yiman kayime manrurrkmak, dja med, kundjalburrikudji ngurriwarwarrhme yiman kunrurrk manbu karurrkwarrhme.

14 Ngudda wanjh ngurridjalwarreworren, dja minj mak ngurriya-woyhkurduyime kunmak. Ngurridjalbarabun rowk dja minj ngurriyawoy-hbidyikarmmerren."

15 Kuhni wanjh Yawey nawu Kawohrnran Rowk, dja Nadjalkudj Nad-jalmak Duninj kore Israel, wanjh kayime, "Ngayimeng ngudda ngurri-warnyakhmulewarren dja ngurringehmen kore ngaye, dja wanjh ngaye ngehke ngudberre. Bu ngudda ngurringurdmen dja kandidjalwoybukwon ngaye, wanjh ngurringudjmakmen. Kuhni ngaye marneyimeng.

16 Dja ngudda kandimarneyimeng, 'Aba, ngad wanjh ngarrimorreni djarrang ba bu ngarridjalkelerlobme. Ngad wanjh ngarrimang djarrang nawu kabirrirlobmerlobme werkkwerkk ba bu ngarringehkerren!' Kuhni ngurriyimeng. Dja med, bininj nawu ngundikadjung wanjh bedda werkkwerkk duninj ngundingudjkadjung, dja ngundiyrhke.

17 Ngudda ngurriwern bininj dja ngurrikelerlobme bu ngurrinan nad-jalkudji bininj kamre ngunbun! Bu ngurbennan kunbidkudji bininj nawu birribang, wanjh ngurridjalkelerlobme! Ngudda wanjh ngurrimirndeyah-wurdmen rowk. Kaluk kahdjaldjabdi kundulk dja flag nakudji ngudberre kore kurulum."

18 Kaluk Yawey kadjaldjare ngunkongibun ngudberre. Nungka kadjare karrolkan ba bu ngunbidyikarme kunkongi nuye dorrengh. Nungka nawu Yawey munguyh ngundjadme bu djal mandjad, dja bininj nawu kabirriwoybukwon wanjh kabirridjalmarmarr kore nungka.

Nawu Yawey Kabenkongibun Nuye Bininj

Isaiah 30:19-26

19 Ngudda nawu ngurrihi kunred Zion, ngudda nawu kukadje Jerusalem ngurrihyo, wanjh kaluk ngurribawon munguyh kore ngurrinalkbun. Nawu Yawey ngunbekkabekkan bu ngurrikayhme nuye dja ngurridjawan bu nungka ngunbidyikarmekenh. Wanjh werkkwerkk ngunbidyikarme. Nungka mimkongiwern duninj.

20 Nawu Yawey kadjare ngurriborlhme nuye. Kunmekbekenh nungka ngunwon kunrayek duninj bu djal yikahwi. Kuhni kayime dja nungka kadjare ngurrinan kunmim ngudberre, dja minj ngurriyawoyhy-awayawan Yawey. Nungka wanjh munguyh ngunbukkabukkan.

21 Bu baleh ngurrire kore kubolkdjaku dja nuk kubolkkukkun wanjh ngurriwokbekkan Yawey kawokdi kore kurredj ngudberre, kayime, "Mahni manbolh manmak, wanjh kuhri ngurridjallay!"

22 Bu kunmekbe kayimerran, wanjh ngurriburriwe nawu idols ngudberre. Nakka yiman silver dja gold ngurrimarnbom, dja bonj, ngurridjalburriwe yiman nawarrewarre nawu kukbanj duninj, dja ngurrbenmarneyimen, "Bonj, ngurriray!"

23 Nawu Yawey ngunmarnemunkewe mandjewk ba bu manmim ngurrimiburriweng wanjh kadjordmerren. Kaluk nungka kamarnbun manme manwern kambembe ba bu ngudda dja nawu mayh ngudberre ngurringun kunwern. Nawu mayh ngudberre kabirridalkngun kore kabbal manbu karralkwernmen.

24 Yiman bulikki dja mak djarrang nawu donkeys, bu kabirrikurllkmarnbun ngudberre, wanjh kabirringun mandjalwern manme.

25 Kaluk bininj nawu ngundiwirrihme kabirribarabun, dja birriwern kabirridowarren kore kabirriburren. Dja mak kunurrk bedberre kawar-rwarhme. Bu kuhni kayimerran, wanjh kukku manbowern kabore ngudberre kore mandulum dja kore kuwarddekimuk.

²⁶ Bu kuhni kakurduyimerran, wanjh nawu dird kahbame yiman kayime kundung, dja mak nawu kundung kahwernhbame kunkimuk duninj kangujwernmerren yiman seven kunbarnangarra! Kuhni rowk kayimerran kore kunmekbe kunbarnangarra bu nawu Yawey kabenmarnbun nuye bininj, kamarnbun bedberre bininj nawu nungka benlonbom.

Nawu Yawey Kabendung Bininj Nawu Kabirrihni Kubolkkimuk Assyria

Isaiah 30:27-33

²⁷ Ngurrina kuhri! Yawey nawu Nangeykimuk kamre djarrehbeh. Nungka kayiddung wernkih duninj, dja kamre manbirlukimuk dja kunnngol dorreng! Nungka kayiddung bu kawokdi kunwok kunrayek. Kaluk nuye kunwok kayime kunak manbu kabenbularrbun bininj.

²⁸ Bu nungka kabuhme nuye kunnngolek, wanjh yiman kayime kundjurrh manbu kabenkebgakme birriwern bininj. Nungka yiman kabenkukburdehme birriwarlahkenh bininj kore kubolkbubuyika bedberre dja kabendjaddadme bininj rowk. Nungka wanjh kabenkanahkan kore kubolkwarre, yiman bininj kakan djarrang.

²⁹ Dja ngudda, ngurriwid. Ngudda nawu bininj nuye, wanjh ngurriwayini kunnjilngmak dorreng. Ngudda ngurrikarme mulil nuye nawu Yawey kore ngurrikakwayiniyerrkan nuye. Yikahwi ngudberre kabirribuhbuhme nawu flutes bu ngurridjarrkbidbun kore mandulum nuye Yawey nawu manwarddekimuk duninj ngudberre ngudda nawu Israel ngunkebmawahmeng.

³⁰ Nawu Yawey kawokdi wernkih duninj yiman king nakimuk duninj ba kabenmarnbun birriwarlahkenh bininj kabirriwokbekkan. Nungka mak kabenmarnbun ba bu kabirrikurdunan nungka kawernhyiddung, dja kabendung bedberre manbirlukimuk dorreng, dja mak bu kabenmarne-nunkewe mandjewk nawernhkimuk, namarrkon dja mak mankurrrk dorreng.

³¹ Kaluk nawu Yawey kawokdi wernkih duninj bu kabendung bininj nawu birrikang kunbolkkimuk Assyria. Nungka kabenbun kundulkwi nuye dja bedda kabirriwernhkelemen.

³² Bu nungka kabenbun, kabenbun, kabenbun kunkarndudj nuye wanjh bininj nuye yiman bedman kabirribun drums dja guitar! Dja nawu Yawey kabenbun kunberlwi nuye nawu Assyriahbeh bininj.

³³ Kunkare duninj nawu Yawey bimarneyingkihbolkmarnbom nuye king nawu kawohnan kore Assyria. Kunmekbe kunbolk kabolkgeyyo Topheth, dja kudjorlokkimuk, dja mak kudjorlokwarlah. Kunrerrng kunwern kahdi kumekbe. Kaluk nawu Yawey kabuhme yiman manbirlukimuk dja kabikukwurlhke namekbe king nawu kawohnan kore kunbolk Assyriah.

31

God Nawu Yawey Nakka Nadjalkudji Kanngheke

Isaiah 31:1-9

¹ Yikahwi bininj kore ngad wanjh kabirrire kubolkkimuk Egypt dja kabindidjawan nawu Egpytbeh bininj bu kabindibidyikarme. Birrimekbe bininj kabirriyime, "A, nawu Egypt bininj bedda kabirrikarme djarrang dja chariots nawern duninj, dja birriwern soldiers kore army bedberre. Wanjh bedda yimankek kandibidyikarme!." Kwarre! Birrimekbe bininj minj kabirridjawan Yawey, nawu God Nadjamun Duninj kadberre nawu Israel kankebmawahmeng.

² Nungka nawernhmayaliwern dja kabenwon kunrayek duninj bedberre birriwarre bininj. Minj kamayaliborledmerren kore nungka kawokkurmerren. Nungka kabenbun birriwarre bininj, dja mak birribuyika nawu kabirridjarrkkurduyime kunwarre.

³ Bininj nawu birrikang Egypt, nakka djal bininj, dja yuwn bu yiman kayime gods. Bedberre djarrang wanjh djal djarrang duninj, dja minj kahdjaldarrkid munguyh. Bu Yawey kabenmarnekurduyime kore nungka kadjare bu kabenbun birriwarre bininj dja birribuyika nawu kabindibidyikarme, wanjh bedda rowk kabirrimankan dja kabirriyakmen.

⁴ Nawu Yawey nganmarneyimeng, "Yiburrbun bu nabang duninj lion kaban mayh nawu sheep, dja kunubewu birriwern shepherds kabirrimandemornamerren ba bu yimankek kabirriwayhke namekbe lion. Bedda kunubewu kabirriwernhkayhme, dja bonj, nahni lion kadjalkukngun mayh nawu bom, dja minj kakelerlobme. Mah, kuhni karohrok bu ngaye Yawey nawu nawernhdulkarrekimuk duninj bu ngamkolung kore kuwarddekimuk Zion ba bu ngabenbun birriwarre bininj kumekbe, wanjh minj nangale bininj ngandidabke.

⁵ Ngaye Yawey dja ngarrulkkarrekimuk duninj. Ngaye ngabolknahnan kukadje Jerusalem yiman kayime mayh karolkan kaddum bu kabennahnan yayaw ngarre. Ngaye wanjh ngabenmarnedjurrudi bininj kore Jerusalem, dja ngabennggehke. Ngaye wanjh ngabendarrkidbawon ba bu kabirridjaldarrkid."

⁶ "Mah, ngudda nawu Israel ngunkebmawahmeng, ngudda kandiwoke dja kandinjirrkeng ngaye ngadjalkudji, wanjh bolkkime ngurrimdurndeng kore ngaye.

⁷ Bu ngurrimdurndeng, wanjh kunmekbe kunkodjke ngurriwern rowk ngurridjalwarnyakmen manbu silver dja gold idols nawu ngurrimarnarnbom kunbid ngudberre kore kunwarre ngurridjareni.

⁸ Kaluk kubolkkimuk Assyria kabolkyakmen. Yuwn bu bininj kabirribolkyakwon, dja ngaye ngabenbun rowk. Soldiers nawu Assyriabeh wanjh kabirrikelerlobme kore kabirriburrenkenh, dja nawu birringudjbang bininj nawu Assyriabeh, wanjh kabirringime kore kabirridjaldongdi.

⁹ Dja mak bininj nawu kabenmarnewohnawohnan bedberre kabirriwarnyakmulewarren kuntele dorreng. Dja nawu birrikihkimuk soldiers wanjh kabirriwernhkelerlobme!

Kuhni rowk ngaye Yawey ngayime. Bininj kore kunredkimuk Jerusalem ngandimarnebodan dja ngandimarnekinje mayh bedberre ngayekenh."

32

Nawu Birrimak Bininj Dja Mak Nawu Birriwarre Bininj

Isaiah 32:1-8

¹ Kandibekka! Kaluk yerrekah nakudji namak king kawohnan kunmak dorreng dja minj kakurren. Birribuyika bininj nawu birrikihkimuk wanjh bedda warridj kabirriwohrawnawohnan dja kabindidjadme bininj rowk kore djal kunmakkenh.

² Bu kunmekbe kabolkyimerran, wanjh birrimekbe bininj nakka birrimak. Bedda kabirridjalkurduyime kunmak bu kabindiwernhnahnan dja kabindibidyikarme bininj rowk. Dja mak kabindimarnekurduyime bu djal kunmak dorreng.

³ Bu kunmekbe kabolkyimerran, wanjh birriwern bininj kabirrimakmen. Nawu birrimimbunje bininj wanjh kabirribolknan dja kabindinan

birribuyika. Dja mak bininj nawu birribengwarr wanjh kabirriwern-hbekkan ba bu kabirriwokmenmang kore birribuyika kabirriwokdi.

⁴ Bininj nawu birrimayaliwarre wanjh nakka kabirrimayalimakmen ba bu kabindiborlhme birribuyika, dja kabirriyongkihkarremarnburren kore kunmak. Dja mak bininj nawu kabirriwokdungdurlurleme wanjh kabirriwokmakmen ba bu birribuyika bininj kabindiwokmenmang.

⁵ Bolkkime bininj kabindiburlume nawu birrikodjkuluyak bininj, dja kabirriyime yimankek nakka birrikodjkuludjad. Kaluk yerrekah wanjh bonj, kabindiwokburriwe bedberre. Bolkkime bininj kabindiburlume nawu birriowarre bininj, dja yerrekah bonj, bedda kabindidjalwarewan.

⁶ Nawu birrikodjkuluwarre bininj, wanjh kabirriyolyolme kunwarrekeh dja minj kunwoybukkenh. Bedda wanjh kabirridjalmayaliyawarren ba bu kunwarre kabirriyime. Bedda minj kabirriburrbun kore God kadjare, dja mak kabirringeywarrewan nawu Yawey. Minj mak kabindibidyikarme bininj nawu kabirrimarrwe dja nawu kabirrikombukdowe. Minj kabindiwon manme, dja minj mak kabindibowon kukku, dja kabindidjalkaybun.

⁷ Bininj nawu birriowarre wanjh munguyh kabirridjalkurduyime kunwarre. Bedda kabirrikarremarnburren kore kunwarre kabirrikurduyime bu kabindiwarrewon nawu birrimarladi bininj. Minj kabindiwokmarrkmang bu nawu birrimarladi bininj kabindikayhme bu kabirriyawarren dja kabirridjare birrimak bininj kunubewu kabindibidyikarme bedberre.

⁸ Dja bininj nawu birrimak, wanjh nakka kabirrikarremarnburren dja kabirridjalkurduyime kunmak, dja minj kabirribawon manbu kunmakkenh.

God Benyngkih bengdayhkeng Daluk Bu Bedberre Kunbolk Kabolkwarremen

Isaiah 32:9-14

⁹ Ngudda daluk ngalbu ngurridjaldi kamak rowk, wanjh kandibekkekabekka. Ngudda minj ngurrikangewarre, dja ngurriburlumerren, wanjh kandiwokmarrkma kore bolkkime ngawokdi.

¹⁰ Bolkkime ngurridjalnjilngmak, dja med, bu kundjewk kunkudji kamre, wanjh manrakel manbu grapes kadjaldarlehmen rowk, dja mak manme manbu manbarnembubuyika, wanjh bonj, kayakayakmen rowk. Kunmekbekenh wanjh ngurrikukdeldelme kunkele dorreng.

¹¹ Ngudda daluk wanjh bolkkime ngurriyimerren bu ngudda ngurridjaldi kunmodmikenh, dja minj ngurrikele. Wanjh bonj, ngurrikukdeldelmen dja ngurrimadjiyerrkerrimen dja ngurridjongburrimen nawarre kunmadj manbu kundowikenh.

¹² Ngurridjalberrekalkburrimen bu ngurrinan kubolkmak ngudberre kabolkwarremen, dja bu ngurrinan manbarnemmak kayakmen rowk.

¹³ Dja mak bu ngurribolkan kunbolk ngardduk kore ngardduk bininj kabirriho, wanjh manbu mikardihkardird kawernmerren dja kabolkwarrewon mahni kunbolk rowk. Yoh, dja ngurrinalkbu bu ngurrinan kururkweren kore bininj birriyoy kunnjilngmak dorreng, dja bolkkime minj kabirriyawoyhnjilngmarnburren kunmekbe.

¹⁴ Kaluk bu ngurrbennan soldiers rowk kabirridjalbolkbawon manurrkkimuk bedberre, dja kabirridjalyakmen. Dja mak ngurrinan kore kururkweren kunredkimuk ngudberre wanjh bonj, bininj kayakmen, dja mayh nabang kahmirnderri munguyh, yiman donkeys dja sheep dja goats.

Bu God Benyngkih bengdayhkeng Bu Nungka Kabolkmarbun Bedberre

Isaiah 32:15-20

¹⁵ Kaluk yerrekah God kanyawoyhmarnemunkewe nuye Namalng-makkaykenh kore kaddumkah. Bu kuhni kabolkyimerran wanjh kubolk-darleh kamarnburren kabbal kore karrulkwernmerren manbu manbarnemmak. Dja kabbal kore manne karrudjindi wanjh kakukyime yiman jungle manbu manngarrekihkimuk!

¹⁶ Bu kuhni kabolkyimerran wanjh bininj rowk kabirrikurduyime kunmak, dja mak kabirridjadmerren bu djal mandjadkenh. Kunmekbe kore nawu Yawey kadjare.

¹⁷ Birriwern bininj kabirridjalkurduyime kunmak, dja kunmekbekenh kunu wanjh kunmodmikenh kabenmarnebebme. Bedda wanjh kabirridi kamak rowk, dja minj mak kabirriyawoyhkelemen.

¹⁸ Ngardduk bininj rowk kabirridjalyo kore kubolkmak dja kunmodmikenh dorreng. Minj njale kabenmarnerurrkbakke, dja mak minj nangale kabenkangewarrewon kumekbe.

¹⁹ Yoh, ngudda wanjh ngurridi kamak rowk. Dja bu mankurk mankimuk karrulkbakkabakke kundulk rowk kore kurrulkwern, wanjh ngudda kamak ngurrihni. Dja mak bu kunrurk rowk karurkwarrawar-rhme kore kuredkimuk ngudberre, wanjh kadjalmak ngudberre!

²⁰ Bonj, bu kuhni rowk kayimerran, wanjh kunu God ngunmarnekurduyime kunmak nuye. Ngudda wanjh ngurridjaldudjen manmim darnkih kukadjid kore kaborlobme kukku. Dja mak ngurrimirndekurme mayh ngudberre kore balehbaleh ba kurralk kabirringun.

33*Ngudda God Nawu Yawey Kanbidyikarmen!**Isaiah 33:1-9*

¹ Ngudda bininj nawu kandiwirrihme, ngudda nawu ngurridedjdjolkwern, dja mak ngudda wanjh kandiweykang. Minj nangale ngundiweykayi dja minj nangale ngundibuyi. Wanjh bonj, kaluk ngudmanwali kunwarre ngunmarneyimerran. Darnkih kamre kunbarnangarra bu bininj birribuyika ngundimarnedjirdmang dja mak ngundiweykan ngudberre.

² Ngudda nawu Yawey ngad ngundidjawan bu ngudda kankongibun, dja ngad wanjh ngundidjalmaadun. Kanmurrngayekwon bu malamalayiwern, dja kanngheke kore kunyid kawernmerren ngadberre.

³ Bu ngudda kamre kanbidyikarme dja yiwokdangen, wanjh yiwokyime namarrkon kangurdulme ba bu bininj rowk kabirrikelerlobmerren, bedda nawu ngandibuyi ngadberre! Bu ngudda yirrolkan, wanjh bininj nawu birribolkbubuyikabeh wanjh kabirriyarlarrme rowk!

⁴ Dja ngudda nawu ngurriwern ngurribubuyika binihbininj, kaluk ngurbennan birribuyika bininj ngundibun kore ngurriburren, dja ngundimarnedjirdmang yehyeng rowk ngudberre. Bedda ngundimarnebebme yiman djadedde kabirrimirndewernmerren!

⁵ Nawu Yawey nakka Nangeywerhkimuk duninj, dja nungka kahyo kaddum duninj heaven. Nungka kamre kanmarnbun ngad bininj nawu kunredkimuk Zion, ba bu mandjad karriyime, dja mak karridjalkurduyime kunmakkenh.

⁶ Nungka kanmarnbun dja minj bininj kandiroyahwe. Nungka mak kanngheke munguyh. Kanbukkabukkan dja kanwon nuye kunmayali. Ngad wanjh karriwokmarrkmang dja karribodan kore nungka.

⁷ Ngurrina! Bininj nawu birrimurrnggrayek wanjh kabirrikelekayhme kore kurobbe! Dja mak bininj nawu kabindingurdke bininj nawu kabirriburren, wanjh bedman kabirridjalnalkbun kunnjilngwarre dorreng!

⁸ Minj nangale karengehre djarreh kore manbolh, dja kunktele kawernmerren. Bininj nawu kabirrikarremarnburren, wanjh kabirridjalwokbakke. Bininj rowk kabirridjalwokburriwerren, dja kabirriwarrewarren.

⁹ Kunrorre bedberre kabolkdarlehmen yiman kanjilngwarremen, dja kabolkwarrewarren. Kunbolk Lebanon kadjalbukmen yiman kayemengalme. Dja kubolkmak manbu Sharon, wanjh kabolkyimerran kubolkdarleh kabolkngeyyo Arabah. Kore kunbolk Bashan dja mak kore kunbolk Carmel, wanjh kunmalaworr kawarrhwarhme kore kundulk rowk.

Yawey Kabenbengdayhke Nawu Kabirriyidko Bininj Nuy

Isaiah 33:10-16

¹⁰ Nawu Yawey yimeng, "Bolkkime ngaye ngarrolkan. Bolkkime ngaye ngakurduyime kundulkarre ngardduk dorreng, dja ngudda wanjh kandimulewan bu ngaye ngawernhkimuk duninj.

¹¹ Ngudda ngurriyingkihkarremarnbun dja bonj, ngurridjalbarabun munguyh; ngudda wanjh ngudman ngurridjalbularrburren.

¹² Ngurriwarreworren, dja ngurriyakworren yiman kayime kunak kangun kunrereng.

¹³ Ngadjare ngurriwarlahkenh bininj nawu djarreh ngurrihni bu kandi-wobekkabekkan. Dja mak ngudda nawu darnkih ngurrihni, wanjh ngandimulewan ngaye bu ngahdulkarrekimuk duninj." Kuhni yimeng nawu Yawey.

¹⁴ Birriwarre bininj nawu kabirriyo kunredkimuk Zion kabirrideldelme kunktele dorreng. Bedda minj kabirridjare nawu God. Wanjh bolkkime kabirriyime, "Aba! God kandjadme yiman kunak kankukwurlhke munguyh munguyh! Yiddok karridjaldarrkid?"

¹⁵ Nangale namak bininj? Ngabenmulewan bininj nawu kabirrikurduyime djala kunmakkenh, dja kabirriwokdi kunwok manbu kunmakkenh. Bedda minj kabirridjirdmang money bedberre nawu birrimarlaj bininj. Minj mak kabirrikarremarnbun bu kunwarre kabirriyime, dja minj kabirriraworren nawu birribang bininj bu bedda kabirridjare kabindibun birribuyika. Bedda minj kabirridjare kunwarre.

¹⁶ Bininj nawu kuhni rowk kabirriyime, wanjh bedda kabirringehme kore kubolkmak, kore minj nangale kabindibun. Kumekbe wanjh bedda munguyh kabirikarreme bureddi dja kukku. Kuhni rowk kabenmarnekurduyimerran nawu birrimak bininj.

Kaluk Yawey Kanmarnekurduyime Kunmakkenh

Isaiah 33:17-24

¹⁷ Kaluk yerrekah ngudda ngurrinan kunmim ngudberre nawu namak king kabolkwohrnan rowk kore kubolkwarlah duninj nuy.

¹⁸ Dja birribang bininj nawu ngundiwohrnawohrnani kunrayek dorreng, bedda nawu birridjenbubuyika, wanjh bonj, birriyakminj. Minj mak ngurrbennan kore birridjirdmangi money ngudberre, dja ngundibuni.

¹⁹ Birrimekbe bininj nawu birriwokdi kundjenbuyika manbu minj ngurrbenmenmenbekkayi, dja nawu birriburlumerrinj, wanjh bonj, minj ngurrbennan munguyh.

²⁰ Mah wanjh! Ngurribolkna kunredkimuk Zion kore karrikarrme mulil kunbubuyika. Ngurribolkna kunredkimuk Jerusalem kunmim ngudberre dorreng! Kunmekbe kubolkmak dja kunmodmikenh dorreng. Minj nangale kabolkrokayhwe, kadjaldi munguyh.

²¹ Kunmekbe wanjh Yawey kanwohrnawo hrnan kundulkarre kunkimuk nuye. Kaluk karriyo kumekbe kore mankabokimuk kaborlobme manbomak dorreng. Minj birriwarre bininj kabirrimbebme kore kabbal bedberre darnkih kore ngad.

²² Nawu Yawey nungan nadjalkudji kandjadme kadberre. Nungka nadjalkudji kanwon mankarre rowk kadberre. Nawu Yawey wanjh nadjalkudji king duninh kadberre. Nungka wanjh munguyh kannggehke kadberre.

²³ Bininj nawu karriyidko, wanjh minj kandibun kumekbe. Bu kabirrimre kabbal bedberre wanjh kabirribarabun. Nawu kabbal bedberre kawarrewarremen; djumbala dja kunyar! wanjh kabakbakme dja balayarrang kawarrhme. Bu birrimekbe birribang bininj kabirrimre, wanjh karrrenbun, karrrikumang bedberre namakmak. Nawu nabirl bininj kadberre, wanjh bedda warridj kabirridjalkukmang.

²⁴ Bu kunmekbe kunbarnangarra, wanjh minj nangale kayawoyhdulkkihngalme kore kunred Zion. Dja Yawey kabenmarnebengmidjdan bedberre kunwarre.

34

Yawey God Kabendung Bininj Nawu Kabirrinjirrkke

Isaiah 34:1-17

¹ Ngudda ngurriwarlahkenh bininj rowk, wanjh ngurrimray kandibekkabekka! Ngudda nawu ngurrikang kubolkbubuyika rowk, wanjh kandiwerhnbekka! Ngadjare kubolkbubuyika kondah kurorre wanjh kandibekkan, dja mak mayh dja mak mayhmajh, dja mak nawu kurrulakenh dja manbu kundulk dja manbu kadjordmerren kore kunbolkbek, wanjh kanbekkabekka kore ngawokdi!

² Nawu Yawey kabendung kunbolkbubuyika dja nawu armies bedberre rowk. Nungka wanjh bendjadmeng dja kabenbularrbun rowk.

³ Bedda wanjh kabirridowe dja kabirrikukyo kore birribuyika kabindidjalkukburriwe, dja kabirrikanjudme. Bedberre kunkurlba manbowern kadjaldi kore kunwarddekimuk.

⁴ Bu kunmekbe kunbarnangarra wanjh mankokkarrng rowk kore kadum wanjh kayakayakmen, dja manbu kunngolwarlah kahdornamerren yiman djurra. Manbu mankokkarrng rowk wanjh kawarrawarrhme yiman kunmalaworr manbu karrarlehme, dja mak yiman kayime manbarnem kawarremen dja kawarrhme kore kundulkbeh manbu figs.

⁵ Nawu Yawey kayime, "Ngaye Yawey ngaye ngamarnbom mandjawak, dja ngamre ngamkan mahni mandjawak ngardduk ba bu ngabenbininj rowk nawu kabindibun ngardduk bininj kore kunredkimuk Zion. Ngaye korrokko ngabendjadmeng rowk birrimekbe bininj nawu birrikang Edom, dja ngaye ngabenbularrbom rowk."

⁶ Kaluk nawu Yawey kabenbininj kore kunredkimuk Bozrah, yiman kayime bininj kabimarnebinun mayh nawu lambs dja mak nawu goats bu kabiwon God. Wanjh kunkurlba dja kunbalem ngarre kundaykenh nahn mayh wanjh kabarung Yawey nuye mandjawak. Nungka kabenbinun kore kubolkkimuk Edom.

⁷ Bu Yawey kabenbun bininj kunmekbe, wanjh mayh rowk kahmirn-debun warridj, yiman bulikki narangem yaw, dja bulikki nakihkimuk. Bu kuhni kayimerran wanjh kunkurlba kunwern kadjuhke kubolklarlah kunmekbe, dja mak kunbalem kunwern kadjuhke kore kundjulng.

⁸ Nawu Yawey bolknameng kumekbe kunbarnangarra bu kabenbun bininj nawu kabirriyidko bedberre nuye bininj nawu kabirriyo kore kunredkimuk Zion, dja mak bu nungka kabengenheke nuye bininj.

⁹ Nungka mak kabenwarrewon bininj nawu kabirrihyo kunbolkkimuk Edom. Nungka wanjh kamarnbun ngarre mankabo ba bu kukku kaboyimerran yiman tar. Dja mak kamarnbun kundjulng ngarre ba kayimerran manbang manbu sulphur dja kawurlhke. Dja mak kabolkwurlhke manbirlukimuk dorreng yiman tar karung manbirluworlhdenkimuk.

¹⁰ Manbu kundolng karrolkkan munguyh munguyh, dja minj kangurdme kukakkuyeng dja mak kunbarnangarrakuyeng. Wanjh mahni kunbolk kahdjalbolklarrk munguyh munguyh, dja minj nangale bininj kare kumekbe munguyh munguyh.

¹¹ Djal mayhmayh kahyo kumekbe, yiman djurrul, dja mak korddol, dja mak ngokngok. Nawu wakwak kahreddi kumekbe warridj. Nawu Yawey kakurduyime rowk, dja kabolkwarrewon Edom ba bu kabolkyimerran yiman bolkyimi kerngeghkenhni bu minj nungka bangmebolkmarnbuyi kurorre.

¹² Bininj ngarre kunbolk Edom nawu birribolknahnani, dja mak bininj nawu birrikihkimukni, wanjh kabirriyawarewun dja bedda birribolkyak! Kaluk bedda wanjh kabirridjalyakmen rowk.

¹³ Manbu djinhdjinh kawernhdjordmerren dja karurrkwarrewon kunrurrkimuk ngarre. Manbu mikardihkardird warridj karurrkwarrewon kunrurrkimuk ngarre armies bedberre. Nawu mayh nabang yiman dalkken, dja djurrul kahyo, djal bonj.

¹⁴ Mayh nawarre kabirriwernmerren kore kubolklarlehbeh, dja mak nawu nabang goats kabirrikayhmerren kumekbe. Mayh nawu kadjalakre wanjh kabolkngalke kumekbe ba kangehme.

¹⁵ Kumekbe wanjh djurrul karedmarnbun ba bu kawirlarrkngukdi. Kaluk yayaw ngarre kabirribebmerren dja ngaleng kayawnahnan ngarre mayh yaw kanjdji kore kuwel ngarre. Dja mak mayhmayh nabang kamirndemornamerren kumekbe, narahrangem dja ngaldahdaluk.

¹⁶ Mah! Wanjh ngurrima djurra nawu scroll nuye Yawey dja ngurribimna kore kayime, "Nawu Yawey kabennahnan mayh dja mayhmayh. Minj nakudji kayakmen, dja narahrangem rowk kakarrme ngaldahdaluk rowk bebbehbeh, Nawu Yawey wokkurmerrinj kurrang nuye, wanjh kurduyimerranj kore nuye kunwok. Nawu Namalngmakkaykenh nuye kamirndekurrmekurme rowk.

¹⁷ Nungka kabenbolkwon, dja kamirndekurrmekurme kore nungka kadjare kabirriyo, dja mak kamirndenahnan bebbehbeh kore nungka kadjare ba bu kamirnderri kamak rowk. Wanjh mayh kahdjalbebbehmirnderri kumekbe bu munguyhmunguyh.

35

Ngad Karrimarnemarrmarr Duninj God Nawu Kannghehkeng

Isaiah 35:1-10

¹ Kaluk bininj nawu kabirrihni kore kubolkdarleh wanjh kabirrinjilngmakmen, dja bininj kore kunbolk kore mandjewk yak, wanjh bedda kabirrimarmarr. Dja kunbolk kore bininj yak, wanjh mannguy kawernmerren, dja kamak rowk!

² Dja mannguy kadjalmedjmakmen, dja yiman kayime kanjilngmakmen, dja kakayhme bu kadjalmarmarr duninj! God wanjh kamarnbun kubolkdarleh ba kabolkyimerran kubolkmakkaykenh yiman kayime Lebanon, dja Carmel dja Sharon. Wanjh kunu kunmakmak nuye Yawey nawu God duninj kakukbukkarren.

³ Mah, wanjh ngurribidmurrngayekworrimen ngudda nawu minj ngurribidrokan. Dja ngurribardrayekworrimen ngudda nawu ngurribarddelme.

⁴ Ngurribenmarneyimen bininj nawu kabirrikele, “Ngurringudjmakmen, dja yuwn bu ngurrikele. Ngudda ke God kamre dja ngungehke ngudberre. Nakka nabang, wanjh kabenbun nawu ngundiwirrihme.”

⁵ Bu kunmekbe wanjh nungka kabenmimbayhke bininj nawu birrimibunjeni, dja kabenkanemmarbun bininj nawu birribengwarr.

⁶ Bu kunmekbe wanjh nawu birribirl bininj kabirrirohdkarren yiman mayh nawu deer. Bininj nawu djenwarre, wanjh kabirrikayhme kunnjilngmak dorreng! Kore kubolkdarleh, wanjh kabobebme kukku kunwern, dja wanjh mankabo kaborlobme kore mandjewkyak.

⁷ Dja kore kukayalanj manbu karrung, wanjh kabolkyimerran yiman manlabarlmak. Mak kore kunbolk manbu yiman kayime kakombukdowe, wanjh kukku kambobebme kore kungad kunwern. Kore kubolkwarre, kore mayh nabang nawu jackals yoy, wanjh kabolkyimerran kubolkmak, dja kundalk dja mak papyrus kadjordmerren.

⁸ Kaluk manbolh kare kumekbe manbu kabolhngeyyo “Manbolh bedberre nawu Birrimak Bininj.” Nawu birriwarre bininj minj kabirrire. Bininj nawu kabirrire kore God nuye manbolh, wanjh djal bedberre. Bininj nawu kabirrimayaliwarreworren, wanjh burrkyak, bedda birriwarre dja minj kabirrire kore maninjmanu manbolh.

⁹ Dja mahni manbolh wanjh manbolhmak, dja minj nabang mayh kahdi, yiman lions, dja mayh nawu kabenbun bininj. Larrk, minj kahdi. Bininj nawu Yawey kabennggehke, wanjh djalbedman kabirrire.

¹⁰ Bininj nawu Yawey benkukbebkeng kore birribongdi, wanjh kabirrimdurndeng! Kabirriwayini bu kabirringime kore kunred Zion. Kabirrimarmarr munguyh munguyh kore Yawey kabenkodjdjuhke bedberre. Kabirrinjilngmak dja kabirridjalmarmarr munguyh, dja minj kabirriyawoyhnjilngwarremen, dja minj mak kabirringolekwerren bu kunwarrekenh.

36

Nawu King Sennacherib Djareni Yimankek Benbuyi Bininj Kore Jerusalem

Isaiah 36:1-22

(2 Kings 18.13-27; 2 Chronicles 32.1-19)

¹ Bu King Hezekiah wohrnaworhnani kubolkwarlah Judah bu kunkuyeng yiman fourteen mandjewk. Wanjh King Sennacharib nawu wohrnaworhnang kubolkwarlah Assyria kumwam army nuye dorreng, dja soldiers nuye bindibom bininj nawu Israel benkebmawahmeng kore kunredbubuyika dja birridjalbolkmey rowk.

² Bu nawu Assyriabeh bininj kuhni birriyakwong, wanjh bedberre king benmunkeweng nuye soldier nakimuk dja army nuye ba bu kabindibun bininj kore Jerusalem. Bedda wanjh birribolkbawong kunred Lachish, dja birrimwam kore Jerusalem dja birriyawam king Hezekiah. Wanjh Sennacherib nuye army birridanginj kore kuberrkkah Jerusalem, darnkih kore manlabbarlyahwurd manbu kaborri kukku ngarre Jerusalem. Yikahwi bininj birridurkmirri kumekbe nawu bindimarnemadjirrid-jbuni.

³ Dja bu bindinang bindimarnebebmeng, danjbik bininj nawu birrihkimuk kore Jerusalem wanjh birribebmeng bu bindidjawam nawu Sennacherib nuye army. Bedda wanjh Eliakim nawu beywurd nuye Hilkiah, dja mak Shebna, dja mak Joah, beywurd nuye Asaph. Hilkiah nungka bimarnenahnang kururkkimuk kore King Hezekiah dingihdi. Shebna wanjh secretary nuye king, dja Asaph nahnani king nuye djurra nawern.

⁴ Wanjh bu soldier nakimuk nawu wohrnaworhnani bedberre soldiers, bu bennang namekbe danjbik bininj birribebmeng, wanjh nungka benwokrayekwong, yimeng, "Ngurriray, ngurribengdayhke King Hezekiah bu ngurriyime maninmanu kunwok. Wanjh ngurriyime, 'Kuhni rowk King Sennacherib kayime ngudberre. Nungka nawu nakimuk duninj, dja nakka king kawohnan rowk kore Assyria. Wanjh nungka kayime, "Njalekenh ngudda yiburlumerren, dja minj ngaye kankengehme?"

⁵ Ngudda yiyime yimankek yikarrme kunmayalimak dja yibenkarrrme birriworn soldiers ba bu kanbun ngaye? Bonj, yidjalkurren. Nangale ngunbidiyikarrme bu ngaye kanwokburriwe?

⁶ Yina! Ngudda yimankek yiyime, 'Ngad wanjh ngarrbenmadbun bininj nawu Egyptbeh bu kandibidiyikarrme.' Dja kawarre! Nahni Pharoah nawu king bedberre nakka wanjh ngudjwarre, dja minj ngunbidiyikarrme. Nungka yiman kundulk manbu kabakme bu bininj kakan yiman kandudjkarren.*

⁷ Dja mak ngudda kanmarneyime, 'Ngad ngarrimadbun Yawey nawu God ngadberre bu kamre kanbidiyikarrme.' Yiddok minj ngurriburrbu bu ngaye king Hezekiah ngabularrbom rowk manbu altars nuye Yawey kore kubolkbubuyika, dja ngunmarneyimeng ngudda nawu Jerusalem ngurridi bu ngudda ngurrimarneboddan ngudberre God kondah, kore kudjalbolkkudji. Yiddok ngurriburrbun?" Kuhni rowk kayime King Sennacherib.' "

⁸ Wanjh nawu soldier nakimuk nakang Assyria yawoyhwokdanginj, yimeng, "Kandibekka. Nawu ngardduk king Sennacherib, nawu kawohnan rowk kore kunbolkkimuk Assyria, wanjh ngunwoyi ngudberre 2000 djarang, dja med, minj ngurrbenkarrrme 2000 bininj nawu kabirrimorreni!

⁹ Yiddok ngurriyime bu ngudda yimankek ngurribenburriwe bininj nawu Sennacherib nuye? Ngudda ngurringudjywarren, dja ngad wanjh ngundidjalbularrbun. Wardi ngurribendjalmadbun bininj nawu Egyptbeh ngundibidiyikarrme chariots dja djarrang bedberre dorrengh?

¹⁰ Ngad ngarrimwam kunbolk ngudberre ba bu bun ngudberre dja ngarribolkwarrewon ngudberre. Dja kandibekka! Woybukkih nawu Yawey nganbidiyikarrme bu ngad ngundibun! Nungka nganmarneyimeng bu ngamre bun ngudberre!" Kuhni rowk yimeng bininj nawu benmarneworhnani army nuye king Sennacherib.

¹¹ Bu kuhni birribekkkang, wanjh Eliakim, Shebna dja Joah birridjawam nahni nakimuk soldier, wanjh birriyime, "Aba! Kornbayeng, djawahd-jawan bu ngudda ngurridjalwokdi Aramaic kunwok, manbu kundjen ngudberre. Ngad wanjh ngarriborlhmgeng dja ngarrimenmenbekkan.

Yuwn bu ngurriyawoyhwokdi Hebrew manbu ngadberre bininj rowk kabirriwokdi, dja nahni bininj kabirrihni darnkih kore kaddum kawar-namyo, wanjh ngundimenmenbekkan!"

12 Wanjh namekbe soldier nawu benmarnewohnani rowk yimeng, "Yiddok nawu ngardduk king nganmunkeweng ba bu wokwon ngudda ngurridjaldanjbig bininj dja mak king Hezekiah? Burrkyak! Nahni bininj nawu kandidarnhwokbekkan, nakka bedberre warridj. Bu ngad ngundiwabmingun ngudberre kore kunbolkkimuk, wanjh nahni bininj warridj kabirriwernhmarrwedowen. Ngurriwern rowk ngurridjalngun kunduk ngudberre, dja mak ngurridjalbongun mandirle ngudberre."

13 Wanjh nawu nakimuk soldier wernhdarrahmeng kore Hebrew kunwok, yimeng, "Mah, ngurriwern bininj, wanjh kandibekka bu marneyime ngudberre kunwok nuye king nawernhdulkarrekimuk nawu kawohna-wohrnan rowk kore Assyria.

14 Kuhni ngunmarneyime, 'Yuwn bu ngurriwoybukwon king ngudberre Hezekiah! Nungka minj ngungehke ngudberre.

15 Bu nungka ngunmarneyime, "Ngurridjalwoybukwon nawu Yawey! Kaluk woymbukkih Yawey kangehke kondah kore kubolkkimuk. Nawu king nakang Assyria minj kaboldkjirdmang kadberre!" Yuwn bu ngurri-wokbekkabekkan."

16 Wanjh nawu nakimuk soldier yimeng, "Yuwn bu ngurriwokbekkan nuye, dja king ngadberre kore Assyria wanjh ngunmarneyime kunbuyika, wanjh kayime, 'Mah, ngurrimbehmerrimen kuberrkka kore ngaye, ba bu karridjarrkdi kunmodmikenh dorrengh! Wanjh ngurridjarrkngun ngurringun mandjoleng ngudberre manbu grapes dja mak figs manbu ngurribebbekkarre, dja warridj ngurridjarrkbongun kukku kore kungad ngurribebbekkarre.

17 Kaluk yerre wanjh ngaye ngamre kan ngudberre kore kunbolk ngard-duk. Kumekbe wanjh kubolkmak karohrok kore ngudberre kunbolk, dja kadjolengmarnburren mandjalwern, yiman wheat dja grapes. Kunmekbe kakarre manrakel, dja mak buriddi mandjalwern."

18 "Yuwn bu ngurriwoybukwon Hezekiah nawu king ngudberre bu ngunmarneyime, 'Nawu Yawey kamre kangehke'. Kawarre. Ngurribur-bu. Yiddok gods nabubuyika bindingehkeyi bininj kore kubolkbubuyika? Burrkyak. Ngadberre king kore Assyriabeh wanjh kabenmarnebolkdjird-mang rowk!

19 Ngarriboldkjirdmey kore kunbolk Hamath, dja kore kunbolk Arpad dja mak kunbolk Sepharvaim. Baleh nakka gods bedberre? Ngad mak ngarriboldkjirdmey kunbolk Samaria, dja god bedberre minj bengehkekng bininj kumekbe kore ngurriwernhkarmeng kubid ngadberre.

20 Nawern gods bedberre bininj kore kubolkbubuyika birrihni wanjh birribarabom. Minj nangale god nganburriweyi kore kunbolk bedberre, dja ngarridjalbolkdjirdmey. Adju, yiddok ngurriyime yimankek Yawey kamre nganbun ba bu ngabolkbawon Jerusalem?" Kuhni yimeng nawu kabenmarnewohnan soldiers nuye King Sennacherib."

21 Bininj nawu Jerusalem birrihni wanjh birribekkang, dja birriwokyak, minj nangale bedberre birriwokdiwirrinj. Bedda birridjalwokyak, dja minj birriwokmayi. Nawu king Hezekiah benyengkih bengdayhkeng bu birridjalwokyak.

22 Wanjh nahni birridanjbig bininj birrimadjdalkmarrinj, birridurndi kore King Hezekiah, dja birriwokmulewam nawu nakimuk soldier ben-marneyimeng. (Nahni nawu birridanjbig bininj wanjh Eliakim nawu beywurd nuye Hilkiah, dja mak Shebna dja mak Joah, beywurd nuye

Asaph. Hilkiyah nungka bimarnenahnang kururrkkimuk kore King Hezekiah dingihdi. Shebna wanjh secretary nuye king, dja Asaph nahnani king nuye djurra nawern.)

37

Nawu Isaiah Biyengkibengdayhkeng King Hezekiah

Isaiah 37:1-7

(2 Kings 19.1-7)

¹ Bu King Hezekiah wokbekkang maninjmanu kunwok, wanjh wernhn-jilngwarreminj. Nungka madjdjalkmarrinj nawu djongbuyindi, dja djong-burrinj kunmadj manbu manburlerri duninj. Wanjh wam ngimeng kururrk manbu Yawey nuye temple.

² Dja mak benmunkeweng yikahwi bininj nuye ba birridjawayi Isaiah nawu beywurd nuye Amoz. Nawu Isaiah wanjh prophetni. Nahni birridanjbig bininj birringeyyoy Eliakim nawu worhnani kururrk kore king dinghidi, dja mak Shebna, nawu king nuye secretary, dja mak nawu birrikihkimuk priests. Bedda birriwam dja birridjongbuyindi manburrba manburlerri.

³ Bu birribebmeng kore Isaiah, wanjh birrimarneyimeng, "Kuhni yimeng nawu Hezekiah, wanjh yimeng, 'Bolkkime kunbarnangarra wanjh kunwarre wernmerrinj duninj kadberre, dja minj karrinan kunmak kamre. Wanjh karryeme! Ngad yiman barrken nawu minj kamkuyindangen dja ngalbadjan kadjalngudjyakmen.

⁴ Nawu king bedberre Assyriabeh bininj bimunkeweng nangeykimuk bininj nuye dja bebmeng kondah bidjekmiwong God kadberre nawu kahdjaldarrkid munguyh! Kunubewu Yawey nawu ngudda ke God kawokbekkan manbu kunwarre kunwok namekbe bininj yimeng. Kunubewu Yawey kabiwokbekkan dja kabirrungh nahni bininj. Wanjh kunmekbekkenh kamarnedi yiwarrudj ngad nawu ngarridjaldarrkid kondah."

⁵ Bu namekbe birrikimuk bininj nuye Hezekiah birribebmeng dja birrimarneyimeng nawu Isaiah,

⁶ wanjh nungka benmarneyimeng, "Ngurrimarneyimen nawu ngun-marnewohrnan bu Yawey kayime, 'Yuwn bu ngurrikangewarre bu ngurrbenwokbekkan bininj nawu kabirrimarnedurrkmirri king nawu Assyriabeh. Bedda wanjh ngaye ngandiyolyolmeng kunwarre kunwok dorrengh.

⁷ Dja kanbekkabekka! Ngaye ngakurrme namalngwarre kore kukange nuye nawu king Assyriabeh. Wanjh bu nungka kawokbekkan kunwok nungkakenh, wanjh werkkwerkk kayawoyhdurdeng kore nuye kun-bolkkimuk, dja bu kabebme kumekbe, wanjh yikahwi bininj kabirribun mandjawakwi."

King Sennacharib Minj Biwoybukwoyi Nawu Yawey, Dja Nungan Djal-burlumerrinj

Isaiah 37:8-13

(2 Kings 19:8-13)

⁸ Kaluk nawu King Sennacherib nuye nakimuk bininj biwobekkan bu bolkbawong kore kunred Lachish dja durndi kunred Libnah ba bu benbuni bininj kunmekbe. Dja nawu nakimuk bininj nuye wam kunmekbe.

⁹ Kaluk king Sennacharib biwobekkan bu king Tirhakah benmirn-dekang army nuye ba bu kabindibun nawu Assyriabeh bininj. Nawu

king Tirhakah nakka Ethiopiabeh, dja nuye binihbininj kore army wanjh Egyptbeh bininj. Bu kuhni rowk wobek kang, wanjh Sennacharib bimbom djurra bu yolyolmerrinj dja djalburlumerrinj. Nungka benwong namekbe djurra bininj nuye dja benmunkeweng bu kabirribengdayhke king Hezekiah. Bedda birriwam birriwokwong kunwok nuye Sennacharib.

¹⁰ Bedda birrimarneyimeng, "Nawu king Sennacherib yimeng, 'Kanbekka! Yuwn yidjalwoybukwon ngudda ke God. Nungka minj ngunbidyikarme. Nungka ngunmarneyimeng bu yimankek ngad nawu Assyriabeh bininj minj ngundibun ngudda kore Jerusalem."

¹¹ Yina. Ngudda kanwobek kang bu ngad nawu Assyriabeh bininj wanjh ngarrbenbuni birriwern bininj kore kubolkbubuyika kore ngarrbenmarnebolkarwewong bedberre. Yiddok woymbukkih ngudda ngurginghme bu ngad ngundibun? Burrkyak.

¹² Ngaye mawahmawah korroko bindibuni bininj kore kunredkimuk bedberre kore kunred Gozan, dja mak Harran dja Rezech. Dja mak bindibom rowk bininj nawu Bethedenbeh kore kunred Telassar. Gods bedberre nawu birribebbekarmi minj benngehkeyi kore mawahmawah ngardduk bindibom.

¹³ Ngad wanjh ngarrbenbom rowk kings kore kunredkimuk Hathan, dja mak Arpad, dja mak kore Sepharvaim dja Hena dja Ivvah!' Kuhni rowk nawu king Sennacharib yimeng."

Bu Hezekiah Danginj Yiwarrudj

Isaiah 37:14-20

(2 Kings 19:14-19)

¹⁴ Bu King Hezekiah benbek kang maninjmanu kunwok, wanjh mey djurra nawu birrikang, dja nungan bimngyebom. Wanjh bidbom kore Temple manbu Yawey nuye dja kurrmeng nahni djurra kore kumirr kuye Yawey.

¹⁵ Dja King Hezekiah danginj yiwarrudj bu bidjawayhmeng nawu Yawey.

¹⁶ Wanjh yimeng, "O Yawey, ngudda nawu Yiwerndulkarrekimuk Duninj! Ngudda wanjh God ngadberre nawu Israel ngankebmawahmeng, dja ngudda yiman yidjaldi kondah kore kubulkayh nawu cherubim bokenh. Ngudda yidjalkudji God duninj bu yidjalwohrnawohrn rowk kubolkbubuyika rowk kondah kurorre. Ngudda wanjh yimarnbom kaddum kore heaven, mak dja kanjdji kurorre rowk.

¹⁷ Bolkkime ngadjare kanbekkabekkan ngudda nawu Yawey! Wardi yimimbayhmen dja kanna ngadberre. Dja mak yiwokbekkan kunwok nuye nawu Sennacharib munkeweng bu ngunngeywarwewon ngudda God nawu yihdjaldarrkkid munguyh.

¹⁸ Ngad rowk ngarriburrbun bu woymbukkih birrimekbe kings nawu kawohrnawohrn kore kunbolk Assyria wanjh bindibuni birridjalwern bininj dja mak bindimarnebolkbularrbom bedberre kubolkbubuyika.

¹⁹ Birrimekbe kings birrimey gods bedberre birribuyika bininj dja birriweng kore kunak, birriyakwong rowk. Dja nahni gods wanjh yuwn bu gods duninj, dja bininj birrimarnbom kubid bedberre kundulkwi dja mak kunwarddewi.

²⁰ Dja bolkkime ngudda Yawey nawu God duninj ngadberre wanjh yimray kangehken ngadberre kore kubid nuye Sennacharib ba bu birriwarlahkenh bininj rowk kore kubolkbubuyika wanjh kabirriburrbun bu ngudda Yawey wanjh yidjalkudji God duninj." Kuhni yimeng king Hezekiah bu danginj yiwarrudj.

Isaiah Biwokwong King Hezekiah Yawey Nuye Kunwok

*Isaiah 37:21-35
(2 Kings 19:20-34)*

²¹ Wanjh Isaiah, nawu beywurd nuye Amoz, bimarnewokmunkeweng nawu Hezekiah. Wanjh yimeng, "Kuhni kayime Yawey nawu God kadberre ngad nawu Israel kankebmawahmeng. Nungka yimeng, 'Kamak bu ngudda yirranginj yiwarrudj dja kandjawam Sennacheribkenh, nungka nawu king kawohrnan kore Assyria. Wanjh kunmekbekenh kunu, ngaye ngawarrewan bolkkime.

²² Kuhni rowk ngaye nawu Yawey ngamarneyime nawu Sennacherib, "Ngudda nawu Sennacherib, kanbekka! Bininj ngardduk nawu kabirrihni Jerusalem, wanjh ngundiwirrihme dja mak ngundidjaldjekmiwon! Bedda wanjh ngundimarnekebnjiwkmire ngudda bu yidjalkelerlobme.

²³ Adju. Ngudda yingale? Ngudda kanmarneyimi kunwarre, dja mak kanngewirrihmeng. Dja mak kandungi dja bu ngudda yiburlumerrinj. Bolkkime kanbekka! Ngaye wanjh Ngadjalkudji Ngadjaldjamun Duninj God kore Israel."

²⁴ "Ngudda yibenmunkeweng bininj ba bu ngaye ngandingeywarrewong ngaye nawu ngawohrnawohrnan rowk. Ngudda yiburlumerrinj bu kunwern yimulwarreni. Ngudda yiyimeng, 'Ngaye ngabidbom kaddum duninj kurrulum kore kunbolk Lebanon! Dja mak ngaye ngarrulkd-jobkeng kundulkuyeng manbu Cedars, dja mak manbu pines man-makkaykenh! Ngaye wanjh ngabidbom kaddum duninj kumekbe dja ngamey kundulkmak rowk!

²⁵ Ngaye wanjh ngangadbuni kore kubolkbubuyika, dja ngabonguneng kukku bedberre bininj. Ngaye wanjh ngamelmeng kurrenge ngardduk kore Egypt, dja kunu ngaboyakwong mankabo rowk kumekbe." Kuhni ngudda yiyimeng."

²⁶ "Mah, kanbekka ngudda king Sennacherib! Yiddok minj kanwobekkanngaye nawu Yawey? Ngaye wanjh ngakarremarnbom rowk. Ngaye kunkareni ngayingkihkarremarnbom, dja bolkkime ngamarnbom bu kurduyimerranj! Ngudda yimulewarren bu yirurrkbakkeng kunredkimuk duninj kunbubuyika, dja bonj, ngaye wanjh marnbom ngudda yikurduyimeng.

²⁷ Ngudda ngurrbennang birrimekbe bininj nawu birridulkarreyak bu kabirriyemengalme. Bedda wanjh yiman mankolhde kadjordme kore kabbal, dja mak yiman kurralk kadjordme kore kurrurk kaddum manbu kundung kadarlehwon rowk."

²⁸ "Dja ngaye wanjh mayaliburrbun ngudda, ngaye nan munguyh kore ngudda yikurduyime, dja kore baleh yarrka yirenghe. Dja ngaye ngawernhburrbun bu ngudda kandung wernkih duninj.

²⁹ Dja ngaye ngaburrbun bu ngudda yidjalkangewurlhke dja mak yidjalburlumerrin munguyh. Wanjh bolkkime ngaye ngakurrme nginj mankimuk kore kukeb ke, dja mak ngakurrme djarrangkenh kore kurrang ke. Kaluk ngaye kebborledke dja munkewe ba yirurnden kore manbolh manbu ngudda yimkadjuj bu kondah yimbebmeng."'''

³⁰ Wanjh nawu Isaiah yawoyhyimeng, "Nawu Yawey nguningkih beng-dayhke ngudda nawu King Hezekiah. Nungka kamarnbun kunbubuyika kakurduyimerran ba bu ngudda yiwernhburrbun kore nungka kakurduyime yerre. Bu kudjawk bolkkime, wanjh ngurringun manme manbu kadjordmerren ngalengmanwi, dja mandjawk manbu kamre, wanjh ngurringun mankolhde manbu kayawoyhbebmerrin ngalengmanwi. Dja med, kore mandjawk manbu danjbik kamre, wanjh ngurrimimburriwemen

dja ngurrimoyhma manme bu ngurringun. Dja mak ngurrimimdudjeng manrakel manbu grapes manwern kabarnemdangan, dja wanjh ngurringu rowk.

³¹ Kuhni kamenmenyime bu yikah bininj nawu Judah nuye, wanjh kabirridjaldarrkid dja mak kabirriwernmerren yiman mankolhde karradkarme kanjdji, dja mak kakarme manbarnem manwern.

³² Ngayime bu yikahwi bininj kabirridjaldarrkid kore Jerusalem. Bedda kabirrimornmerren dja kabirringehme kore kurrulum Zion. God nawu Yawey Narrulkarrekimuk Duninh, kawernhmarnburren bu kayakwon rowk.”

³³ “Kunmekbekenh kunu nawu Yawey kabiyngkihyolyolme king nawu kawohran rowk kore kunbolk Assyria. Wanjh kayime, ‘Nungka minj kamngimen kondah kore kunredkimuk Jerusalem. Minj kamang kondah nuye bunarra. Minj mak kamre kondah nuye shield dorreng. Dja minj mak kabolkmarnbun kunkulk ba bu kabidbun kaddum manbu kawarnamyo ngudberre.

³⁴ Nungka wanjh kadjaldurdeng kore nungka kumwambah. Minj nungka kamngimen kondah kuredkimuk kore ngurriyo.

³⁵ Ngaye ngarednahnan kondah Jerusalem, dja ngehke ngudberre rowk kondah. Kuhni ngakurduyime kore ngaye ngadjare, dja mak bu ngaburrbun King David nawu ngaye nganmarnedurrkmirri.’ Kuhni rowk yimeng Yawey.”

Bu King Sennacherib Doweng

Isaiah 37:36-38

(2 Kings 19:35-37)

³⁶ Kaluk nakudji angel nuye Yawey wam kore nawu Assyriabeh soldiers birriyoy dja benbom birriwern. Nakka 185 thousand bininj birridoweng. Bu kumkabel birribuyika bininj birridolkkang kumekbe, wanjh bindikuknang birrikukyoy nawu birridowerrinj.

³⁷ Wanjh namekbe Assyriabeh king, Sennacherib, bolkbawong kumekbe dja durndi kore kunredkimuk Ninevah, dja danginj kumekbe.

³⁸ Kaluk kunbarnangarrabayika, nungka boddangeni kore god nuye nawu ngeyyoy Nisroch. Wanjh bebeywurd bokenh nuye benebom mandjawakwi, dja benekelerlbohmeng, benewam kore kunbolkkimuk Ararat. Bedda benengeyyoy Adrammelek dja Sharezer. Nawu nabadbuyika beywurd nuye, nawu ngeyyoy Esarhaddon dingihdi dja nungan yimerranj king nakerrnge.

38

King Hezekiah Bekkarrinj Bu Doweni Kunkimuk

Isaiah 38:1-8

(2 Kings 20.1-11; 2 Chronicles 32.24-26)

¹ Bu kuhni yimerrangeni, wanjh King Hezekiah bekkarrinj bu doweni kunkimuk dja darnkih kayakmen. Wanjh Prophet Isaiah nawu beywurd nuye Amoz wam bidjahwong, wanjh bimarneyimeng, “Nawu Yawey ngunbengdayhkeng bu yimeng, ‘Yiyngkiharnburrimen dja ngudda bonj, darnkih yirrowen. Minj yimakmen kore yirrowen kunkimuk.’”

² Bu King wokbekkang Yawey nuye kunwok, wanjh kebborledkerrinj kore wall, dja dingihdi yiwarrudj bu bidjawayhmeng nawu Yawey.

³ Nungka yimeng, “Ngudda nawu Yawey, wardi kandjalburrbu kore ngayekenh bu munguyh ngadjalrenghey kore ngudda yidjareni, dja

ngaye woybukwong dja ngadjalkurduyimi kunmak manbu ngudda ke!"
Wanjh nungka njilngwarreminj dja wernhnalkbom.

4 Wanjh nawu Yawey biwokwong Isaiah. Nungka yimeng,

5 "Yiray yimarneyimen nawu Hezekiah, 'Kuhni yimeng Yawey, "Ngaye Yawey God nuye King David nawu mawah ke, dja ngaye bekkabek kang bu ngudda yidjaldi yiwarrudj, dja mak ngaye nang kunmimnalk ke. Kunmekbekenh kunu ngaye won ngudda fifteen mandjewk bu yidjaldarrkid.

6 Dja kunbuyika ngayime. Ngaye wanjh ngehke ngudda dja mak ngabennehke rowk birriwarlahkenh bininj nawu kabirriyo kondah kore kunredkimuk. Bu King nawu Assyriabeh kamre, wanjh ngaye nahnan ngudberre dja ngehke ngudberre rowk.

7 Ngaye nawu Yawey bukkabukkan kunbuyika duninj ba bu ngudda yiburrbun bu ngaye woybukkih ngakurduyime kore ngaye ngawokkurmerrij. Kuhni ngayime.

8 Yiburrbun steps manbu King Ahaz marnbom, wanjh bu kundung karrungre yinan kundjurle ngarre, wanjh ngamarnbun mahni kundjurle karredjkendurnden ten steps. Kuhni wanjh kunbuyika duninj, dja bu yinan, wanjh yiburrbun kore ngaye marneyimeng." " Kaluk kuhni kurduyimerranj bu woybukkendanj kore Yawey biyingkih bengdayhkeng.*

King Hezekiah Marnbom Mankong Bu Bimanjbom God

Isaiah 38:9-20

9 Kaluk King Hezekiah nawu wohrnani kore Judah, makminj kore doweni. Wanjh kunmekbekenh nungka bimbom mankarre nuye.

10 Nungka bimbom, "Ngaye ngayimeng woybukkih bu darnkih ngarrowimeninj. Dja ngadjawarren bu njalekenh ngarrowen bolkkime? Njalekenh bu minj ngadjaldarrkid kunkuyeng?

11 Dja mak ngayimeng minj ngayawoyhnan Yawey kondah kore bininj kabirridarrkid, dja minj ngayawoyhbennan binihbininj nawu kabirrihni kondah kurorre. Ngayimeng bonj, ngabenbawon rowk.

12 Ngayimeng kundarrkid ngardduk wanjh kayakmen yiman kayime dabburlin manbu bininj kawarrhke. Mak ngabekkarrinj bu kundarrkid ngardduk kadjobme werkkwerrk, dja minj ngaye ngaburnbun rowk kore ngayimeninj. Ngayimeng bonj, God yiman kandarrkiddadje.

13 Ngaye ngadjaldi kunkakuyeng dja ngakangewarreni. Ngayimeng nawu God yiman nganmurrngbakkebak kang kore kukak dja kunmunun, yiman nawu lion nganbun. Ngadjalyimeng bonj, God yiman nganyakwong.

14 Ngangudjwarrewarreminj dja ngakayhmi yiman mayhmayh kunkele dorrengh. Ngangeyngeyyimi, dja ngaminwarreminj bu ngadjalbolknani kaddum kore heaven. Ngadjaldi yiwarrudj dja ngayimeng 'Ngudda nawu Yiwohrn Rowk, yimray kanbidyikarmen!'"

15 "Bolkkime baleh ngayime? Kuhni rowk bu nganmarnekurduyimeranj wanjh Yawey nungan marnbom. Dja nungan nganbengdayhkeng. Kunmekbekenh kunu ngaye minj ngaburlumerren. Ngaye ngadjaldi dja ngamayalibekkarren kore nganmarnekurduyimerranj bu ngaye djalyeledj ngare munguyh.

16 'Ngudda nawu Yiwohrn Rowk, ngudda kuhni rowk kanmarnekurduyime ngad nawu djal bininj ba bu ngarridjarrkid. Kamak bu ngudda kanmarnbom dja kanwon kundarrkid.

* 38:8 Ngurrina warridj kore verses 21-22

¹⁷ Yoh. Ngaye ngaburrbun ngudda kanmarnedjare, dja kunmekbekenh kunu ngudda kanwong kunrayek. Ngudda wanjh kannghehkeng kore kundowikenh, dja mak kanmarnebengmidjdanj kore kunwarre rowk ngakurduyimeng.’”

¹⁸ “ ‘Bininj nawu kabirridowerren dja kabirridi kore kumidj wanjh minj bedda ngundiburlume. Kundowikenh minj ngunburlume. Bininj nawu birridoweng wanjh minj kabirriyawoyhburrbun bu ngudda yidjalwoybuk munguyhmunguyh.

¹⁹ Bininj nawu kabirridjaldarrkid, bedda wanjh ngundiburlume, dja ngaye warridj, ngaye burluburlume bolkkime. Nawu kornkornkumo dja ngalbadjan ngundimulewan bu bedda kabindibukkabukkan nawu wurdwurd bedberre.’”

²⁰ “Nawu Yawey kanngheke kadberre, dja ngad wanjh karrire karringimen kore Yawey nuye Temple, dja karriwayini instrument dorrengh manbu kakarrme kunyarl kunwern. Karridi kumekbe kaluk bu karriyarnem karridowe.” Kuhni rowk nawu Hezekiah bimbom bu mankong manbom.

Nawu Prophet Isaiah Biyngkih bengdayhkeng King Hezekiah Bu Yawey Kabimarnbun

Isaiah 38:21-22

²¹⁻²² Bu kerrngehkenh Hezekiah dedjingmey downi, wanjh nungka bidjawam nawu Isaiah, “Yiddok woybukkih ngaye ngamakmen dja ngayawoyhbidbun kore Yawey nuye Temple? Njale kanbengdayhke kore Godbeh, ba bu ngaye woybukwon?” Wanjh Isaiah benbengdayhkeng bininj nuye king, yimeng, “Ngurrikinjemen manbarnem manbu figs dja yimarnbun mirridjin. Wanjh ngurridelke kore bulng kakarme, wanjh kamakmen.” †

39

Bininj Nawu Birrikang Kubolkkimuk Babylon

Isaiah 39:1-8

(2 Kings 20:12-19)

¹ Bu kunmekbe bolkyimerranj nakudji bininj ngeyyoy Merodach Baladan benmarnewohrnani bininj rowk kore kubolkkimuk Babylon. Nungka wanjh king bedberre, dja nuye kornkumo ngeyyoy Baladan. Wanjh Merodach biwobekkan king Hezekiah wanjh downi dja yawoyh-makminj. Wanjh kunmekbekenh nungka bimarnemunkeweng djurra dja mak namakmak.

² Wanjh King Hezekiah benkimey bininj nawu birrikang nahn djourra dja namakmak, dja mak benbukkang bedberre yehyeng rowk nuye nawu karrmi kore djehdjenkurmeng, yiman silver, dja mak gold, dja mak manbu manmakkaykenh manme, dja mak mankalkkidmanjmakkenh. Mak nungka benbukkang njalenjale rowk manbu kabirriburrenkenh nuye. King Hezekiah minj njale bawong, dja benbukkabukkang rowk kore kururkkimuk nuye dja kore kubolkwarah nuye kunbolkkimuk.

³ Wanjh nawu prophet Isaiah wam bidjawam Hezekiah nawu king, yimeng, “Adju, nahn bininj baleh birriyimeng, dja nakka balehbeh birrimwam?”

Wanj Hezekiah yimeng, “Bedda birrimwam djarrehbeh. Bedda wanjh birrimwam kore kunbolk Babylon bu ngaye ngandinang.”

† 38:21-22 Ngurrina warridj kore verse 7

4 Wanjh Isaiah yimeng, “Dja baleh birrinang kondah kunrurrk kunkimuk ke?”

Wanjh Hezekiah yimeng, “Ngaye ngabenbukkan rowk manbu ngakar-me kore kadjehdjeno ngardduk. Ngabenbawang birrinang rowk.”

5 Wanjh Isaiah bimarneyimeng Hezekiah, “Mah, wanjh yiwokbekka kore Yawey nawu Narrulkarrekimuk Duninj kayime ke. Nungka yimeng,

6 “Kaluk birriwern bininj nawu birrikang Babylon kabirrimre kabirri-mang njalenjale rowk manbu yikarrme kondah kururrkkimuk ngudda ke dja kabirriyikan kore Babylon. Ngayime yehyeng rowk manbu mawah-mawah ke birrikurmikurmi kore bolkkime kahdjehdjeno, wanjh bonj, kayakmen rowk. Woybukkih duninj marneyime bu kuhni darnkih kamre bu kabolkyimerran.

7 Dja mak yikahwi bininj ke, nawu ngudda yibenbornan, wanjh bedda warridj. Bininj nawu birrikang Babylon kabirrimre kabindikan bedberre kunbolk. Kumekbe wanjh kabindikorndadjke, dja kabindimarnbun ba bu kabirridurrrkimirri kunurrkkimuk nuye king nawu kawohnan rowk kore Babylon.”

8 Wanjh Hezekiah biwokbekkang Isaiah nuye kunwok, wanjh nungan burrbuni baybaywi, bu yimerrinj, “A, ngaleng! Minj njale nganwarrewon kore ngahdjaldarrkid.” Wanjh kunmekbekenh bimarneyimeng Isaiah, “Mah. Mahni kunwok nuye Yawey ngudda bolkkime kanwong, wanjh kamak rowk!”

40

Yawey Nawu God Kadberre Kamre!

Isaiah 40:1-11

1 Nawu God ngudberre kayime, “Yibenmarneyolyolmen kunmak bedberre ngardduk bininj ba kabirrikangemakmen dja kabirrinjilngmakmen.

2 Yeleyedj yibenmarneyolyolmen nawu kabirrihni kore Jerusalem. Dja yibenbengdayhkemen bu kunkuyeng bedda birridjakkekkani, dja bonj, birriyakwong rowk. Dja mak kunwarre bedberre, makka wanjh bularrbuyindanj. Dja yibenmarneyimen bu ngaye nawu Yawey ngaben-duy dja ngabenbuni bu bokenhkah karremulewayindanj kore bedberre kunwarre.”

3 Bininj nakudji kakayhme, nakka bu kayime, “Ngurribolhmarnbu nawu Yawey nuye kore kubolklarlah dja bininj yak. Ngurribolhdjaddjaden manbolhkimuk nuye God kadberre bu kamre kore kubolklarleh.

4 Ngurribolhmarnbu kore kubolkdjorlok, mak ngurribolhyirrekwo nuye kore kurruhdulom, dja kore kuwarddewardde warridj, nakka ngurri-bolhrohrokmen dja ngurribolhmarnbu kore kubolkwarre ba bu kabolk-makmen kore kamre.

5 Wanjh nawu Yawey kabenmarnebukkarren kunwernhmakkenh nuye dorrengh, ba birriwarlahkenh bininj rowk kabirridjarrknan. Kaluk kuhni rowk nawu Yawey nunganbidju wokkurmerrinj.”

6 Ngaye ngawokbekkang wokdanginj bu nganmarneyimeng, “Mah! Yikayhmen!” Wanjh ngayimeng, “Kaluk njale ngamulewan?” Wanjh yimeng, “Yiyimen bu birriwarlahkenh bininj nakka yiman kundalk. Bedda bedberre kunmakmak rowk, wanjh yiman kayime mannguy kore kabbal kanguybebme dja werrkwerkk karrowen.

⁷ Kundalk makka wanjh karrarlehmen, dja mannguy kawarrhwarhme. Wanjh nawu Yawey kamunkewe kunmayorrk, yiman bu nungka kabuhirme, wanjh kabun rowk. Kaluk bininj, wanjh kumekbe karohrok bu kabirriyakmen rowk. Yoh, bininj wanjh karohrok manbu kundalk.

⁸ Manbu kundalk makka wanjh karrownen, dja mannguy mak kayakayakmen, dja manbu kunwok nuye God kadberre, wanjh kahdjaldi bu munguyh munguyh.”

⁹ Ngudda nawu yibenmarnekan kunwok kunmak bu yibenmarneyime nawu kabirrihni kunredkimuk Zion, ngudda wanjh yiray, yiwarddebidbu kaddum duninj kuwarddekimuk. Yoh, ngudda nawu yimulewan kunwok kunmak bedberre nawu kabirrihni Jerusalem, wanjh yiwarnhkayhmen bu wernkih yibenmarneyime, dja yuwn bu yikele! Yibenmarneyimen nawu kabirrihni kunredbubuyika kore kubolkwarlah Judah, wanjh yiyimen, 'Nahninjanu kondah wanjh God ngudberre!'

¹⁰ Wanjh ngurrina! Yawey nawu kawohrnan rowk kamre kundulkarre dorrengh! Nungka wanjh kangudjbang duninj, dja kunmekbekenh kunu kawohrnan rowk. Dja ngurrina! Nungka kamkan nawu djehdjenyoy bu kabenwon bininj nuye. Kakarreme dorrengh kunmakmak bu kabenwon.

¹¹ Ngurrina! Nungka wanjh kabennahan nuye binihbininj yiman kayime shepherd kabenmirndenahnan sheep nuye. Nungka wanjh kabenwanjbimang dja kabenngorrkan bininj nawu kabenmarnedjare, yiman kayime shepherd kangorrkan lamb yaw. Mak nungka kabenkan yariyarl duninj ngalbabadjan kabindikarme yayaw.

Yawey Nungka Nadjalkudji God Duninj

Isaiah 40:12-20

¹² Nangale bininj kamang kurrula duninj kore kunbid nuye ba bu karohrokme? Dja nangale bininj kabidwayhme ba bu karohrokme kunngol rowk kore kaddum? Dja nangale bininj kakarreme kubid nuye kundjulng rowk kore kurorre? Dja nangale bininj kawayhke kuwarddekimuk dja kurrulum rowk ba bu karohrokme?

¹³ Dja nangale bininj kabibengdayhke nawu Yawey ba bu kabikebrohmarnbun? Dja nangale bininj kabibukkabukkan nawu Yawey?

¹⁴ Yiddok Yawey kamre kabidjawan bininj ba bu kaburrbun kore baleh kakurduyime? Yiddok djalbininj kabibukkabukkan nawu Yawey?

¹⁵ Nawu Yawey kayime bu kubolkwarlahkenh rowk, wanjh djal yeng, yiman kundjulng. Nungka karohrokme manyunkurr dja kayime nakka djal wob.

¹⁶ Nungka minj kadjare karerrngmang kore kurrulkwern ngarre kunbolkkimuk Lebanon. Dja minj mak kadjare kakinje mayh nawern rowk kore Lebanonbeh.

¹⁷ Nawu Yawey kadjalwarnyak kubolkwarlahkenh rowk. Nungka kayime bu kubolkbubuyika rowk, wanjh djal yeng.

¹⁸ Adju, nangale karohrok nawu God? Dja nakka nangale kakukrohrok? Baleh ngudda ngurriyime?

¹⁹ Nungka minj karohrok idols nawu bininj kabirrimarnbun kunbid bedberre, dja mak kabirrikukbarung wirlmurrng gold duninj.

²⁰ Yikahwi bininj nawu birrimarladj kabirridjalmang kundulk duninj dja kabirrimarnbun idols bedberre. Dja mak kabindiyawan nawu

birribidmak bininj ba bu kabindimarnemarnbun idol manbu kundulkwi ba bu kahdjaldi, dja minj kadjalmankan.

Yawey Nakka Nadjalkudji Nawernhdulkarrekimuk Duninj

Isaiah 40:21-31

²¹ Adju, yiddok minj ngurriwernhburrbun? Yiddok minj ngurriwobekkayinj? Bu kerrngehkenh ngundimarneyimi, yiddok minj ngurribekkayinj? Wardi minj ngurriwernhmenmenmayi bu God nakka bolkmarnbom rowk bu kerrngehkenh duninj.

²² Nungka king duninj dja kahni kaddum kore heaven bu kabolknan kanjdji kondah kurorre. Kandjalnan ngad bininj rowk yiman kayime bu ngad bininj karrinan djadedde nawu mayh kukkilehkileh. Nungka kakurme kunngol yiman kayime bininj kamarnbun kundjurle nuye. Nungka kakurme kunngol kore kubolkwarlahkenh rowk yiman kayime bininj kadjurlemarnbun dabburlin ba bu kahyo.

²³ Nungka kabenmarnbun birringeykimuk bininj bu kabirriyimerran birrimarladj. Bininj nawu kabirriwohrnawohrnan kondah kurorre, wanjh God kabenmarnbun bu kabirriyimerran yiman djal yeng.

²⁴ Nahni nawu nakihkimuk bininj yiman kayime mankolhde nawu karrudjindi. Bu karredjingmang kadjordmerren, bu kahdulkdadwernmerren, wanjh Yawey kabuhme bedberre, dja kabirridulkdarlehmen. Bedda yiman kayime kundalkdarleh bu kunmayorrkkimuk kaburriwe.

²⁵ God nawu nadjalkudji nadjamun duninj kandjawan, kayime, "Nangale bininj bu ngurriyime ngaye yimankek nganerohrok? Nangale nakka nganyurrhke?"

²⁶ Mah, wanjh ngurribolkna kaddum kore kunngol. Nangale marnbom? Nungka nawu kanmarnewurhke mankokkarrng mandjalwern bu bebbehbeh. Nungka wanjh benngeybom rowk. Nungka kawernhkarme rowk, ba bu minj nakudji kakukyakmen. Nungka nawu narrulkarrekimuk duninj, dja kunngudj nuye minj kayakmen.

²⁷ Njalekenh ngudda ngurrijiwkmire ngudda nawu Jacob ngunkeb-mawahmeng? Njalekenh ngudda ngurriwokihnjurluhnjurluhme, ngudda nawu Israel ngunkebawahmeng? Ngurriyime, "Yawey minj kannahan! God minj kanyawoyhkongibun."

²⁸ Adju! Minj ngurriburrbun? Wardi minj ngurriwobekkayinj? Yawey wanjh God duninj dja kahdjaldarrkid munguyh munguyh. Nungka bolkmarnbom kondah kurorre rowk. Nungka minj kangudjwarremen, dja minj kahmimke bu munguyh. Nungka kakarme kunmayali kundjalwern, dja minj nangale bininj kawernhburrbun bu nungka nuye kunmayali.

²⁹ Nungka kabengudjwon nawu birringudjwarre bininj, dja kabenwon kundulkarre nuye bininj nawu kundulkarre yak.

³⁰ Yawurrinj kabirringudwarremen, dja kabirridjare kabirrikodjkeyo. Bininj nawu birringudjbang kabirribungkarrkbun, kabirrimankan.

³¹ Dja bininj nawu kabirrikangekurrmerren nawu Yawey, wanjh kabirringudjbangmen. Bedda kabirridolkan yiman kayime mibbarr karolkan. Bedda wanjh kabirridjalrobmerlobme dja minj kabirringolekwarremen. Bedda kabirridjalrengehre munguyh dja minj mak kabirringudjywarren.

41

God Nawu Yawey Kamulewarren Dja Kabendung Nawu Idols

Isaiah 41:1-7

1 Yawey kayime, “Ngurringurdmen ngudda ngurriwarlahkenh bininj rowk nawu ngurrihni kubolkbubuyika rowk! Yuwn bu ngurriwokdi kore kumirrk ngardduk. Kaluk ngaye djawadjawan dja kunmekbe wanjh ngudda ngurriwokdangen. Mah. Ngurrimarnburrimen ba bu ngaye djadme kore court ngardduk.”

2 “Kandimarneyimen. Nangale bimarnbom nahn bininj nawu koyekbeh bu nungka kumwam kondah dja kabenbun birriwern bininj? Nangale bimarnbom ba bu nungka kabendjirdmang kunbolk kunwern, dja mak kabennudjyakwon kings nawern? Nangale bimarnbom ba bu nungka wanjh benbom rowk mandjawakwi nuye dja bendulubom bonarrawi nuye. Dja mak benkukburriweng yiman kayime kunmayorrk kaburriwe kurralkdarleh.

3 Namekbe bininj kabennudjkdjung baleh yarrka kabirrire, dja nungka kadjalre werrkwerkk.”

4 “Mah, kandimarneyimen. Nangale marnbom bu kuhni rowk kurduyimerranj? Nangale kawohrnan rowk kore bininj nawu kerngeghkenh birriyungkih dja mak nawu bolkkime kabirridi? Yoh, ngaye wanjh. Ngaye nawu Yawey ngarri kerngeghkenhni duninj, dja kaluk ngahdjaldi bu kadjalburnbun rowk.”

5 “Bininj nawu kabirrihni djarreh duninj wanjh ngandikurdunang kore ngakurduyimeng, wanjh kabirrikukdeldelme kunkele dorreng! Bedda wanjh ngandimarnemornamerren dja kabirrimre kore ngaye.

6 Kabirribidyikarrmerren dja kabirrimarneyimerren, ‘Ngadburung, yidjalmurrnggrayeknin!’

7 Bininj nawu kamarnbun kundulkkenh, nakka kabimurrnggrayekwon bininj nawu kamang gold dja kamarnmarnbun njalenjale. Bininj nawu kakarreme hammer kabimurrnggrayekwon bininj nawu kamang wirlmurrng dja kamarnbun njalenjale. Bedda kabirridjarrkmarnbun nawu idols, dja kabirriburlumerren bu yimankek kamak rowk kabirrimarnbun.” Kuhni kayime nawu Yawey.

Yawey Kabenkangemarnbun Nuye Bininj

Isaiah 41:8-20

8 Nawu Yawey kayime, “Ngudda bininj nawu Israel ngunkebmawahmeng wanjh kandimarnedurrkmirri ngardduk! Ngudda nawu Jacob ngunkebmawahmeng, dja ngaye djarrngbom ngudberre! Abraham nawu ngardduk djawirna ngunkebmawahmeng ngudberre.

9 Ngaye mey ngudberre kore djarreh duninj ngurrihni, dja kurrmeng kondah kore ngaye. Ngaye wanjh kayhmeng ngudberre kore djarreh duninj ngurrihni kore kurorre, dja marneyimeng, ‘Ngudda wanjh kanmarnedurrkmirri!’ Ngaye djarrngbom ngudberre dja minj bodmewoyinj.

10 Mah, wanjh yuwn bu ngurrikele! Ngaye ngahdjaldi kore ngudberre. Yuwn bu ngurrikangewarre, dja ngaye wanjh God ngudberre. Ngaye murrnggrayekwon dja bidyikarrme dja nahn. Ngaye wernhkarrme ngudberre kore ngardduk kunbid kunmak.”

11 “Bininj nawu ngundiwirrihme, wanjh bedda kabirriyemengalme dja kabirridjalbarabun. Bininj nawu kabirridjare ngundidabke, wanjh kabirriyimerran yiman yeng, dja kabirridjalyakmen.

12 Bu ngudda ngurrbenyawan nawu ngurriyidko bininj, wanjh bonj, minj ngurrbenngalke. Bininj nawu kabirridjare ngundibun, wanjh kabirridjalyakmen rowk.”

13 “Kuhni rowk ngaye ngamarnbun kayimerran, ngaye Yawey nawu God ngudberre. Ngaye wanjh bidkarrme ngudberre kunbidkukun, dja marneyime, ‘Yuwn ngurrikele, dja ngaye bidyikarrme.’

14 Ngudda bininj nawu Israel ngunkebmawahmeng, wanjh ngudda yiman wurdyaw nawu ngudjwarre. Dja bonj, yuwn bu ngurrikele. Ngaye Yawey ngadjaldjamun duninjh, dja ngaye wanjh bidyikarrme. Ngaye nawu ngehke ngudberre.

15 Kandibekka. Ngaye murrngrayekwon ngudberre ba bu ngurriyimeran yiman nabang duninjh, dja ngurribolkbun kurrulum dja kuward-dekimuk wanjh ngurridjubulhme rowk.

16 Ngurridjalburriwe kuwardde dja kunkulk kore kaddum ba bu kunmayorrk kadjalwe rowk. Bu kuhni kayimerran, wanjh ngudda kandimarnenjinlmgarmarr ngaye nawu Yawey, dja mak kandiburlume ngaye ngadjalkudji ngadjaldjamun duninjh ngudberre, ngudda nawu Israel ngunkebmawahmeng.”

17 “Yikahwi ngudberre bininj wardi kabirrikukyakenworren, dja mak yikahwi kabirrikombukdowe bu kabirriboyawayawan kukku. Wanjh ngaye nawu Yawey, nawu ngadjaldjamun duninjh ngudberre nawu Israel ngunkebmawahmeng ngabekkabekkan kore bedda kabirridi yiwarrudj, dja minj ngaye ngabenbodmewon.

18 Wanjh ngamarnbun bu mankabo kaborlobme kore kaddum kuward-dekimuk, dja mak ngamarnbun kungad kambobebme kore kabbal kanjdji. Ngaye wanjh ngabolkmarnbun kubolkdarleh bu kabolkyimerran kunbolk manbu kulabbarlwern. Manbu kore bolkdarlehmeng, wanjh ngamarnbun kungad kunwern kambobebme.

19 Dja mak kore kubolkdarleh ngaye ngadjabname kundulkbubuyika yiman Cedars dja mak Acacias dja mak Myrtle dja mak kundulk manbu olives kabarnemwernmerren. Ngaye ngamarnbun kundulk karrulkwernmerren kore kubolkwarre, yiman kundulk manbu pines, dja mak manbu fir kundulk, dja mak manbu cypress.

20 Bininj nawu kuhni kabirrinan wanjh bedda kabirriwohburrbun dja mak kabirrimenmenbekkan kore ngaye ngakurduyimeng kubidwi ngardduk, ngaye nawu Yawey. Kabirriburrbun bu ngaye ngamarnbom rowk, ngaye nawu ngadjaldjamun duninjh ngudberre nawu Israel ngunkebmawahmeng.” Kuhni rowk wanjh Yawey yimeng bu mulewarrinj.

Yawey Kabendjadme Bininj Nawu Kabirrimarneboddan Idols

Isaiah 41:21-24

21 God nawu Yawey kayime, “Ngudda nawu ngurrimarneboddan nawu idols, wanjh ngurrimray kore kumirrk ngardduk!” Kuhni yimeng Yawey nawu King Duninjh bedberre bininj nawu Jacob benmawahmeng. Dja mak yimeng, “Mah, ngurrikandenamerren dja ngaye wanjh djadme ngudberre.

22 Ngurrimka manbu idols ngudberre ba bu ngabekkan kore kabirriyime. Yiddok ngandyingkih bengdayhke bu baleh kaluk kakurduyimerran? Dja kunubewu bedda ngandibukkabukkan kore kunkarekenh kurduyimerranj, ba bu ngaye ngamenmenmang. Adju, ngandimarneyimen bu baleh darnkih kanmarnekurduyimerran?

23 Mah, ngudda nawu idols, wanjh ngadjare ngandibukkabukkan ba bu ngayingkih marnburren kaluk bu baleh kamre yerreh. Bu kuhni ngurriyime, wanjh ngaburrbun bu ngudda wanjh gods duninjh.

Kunubewu ngurrikurduyime njalenjale kunngudj dorrengh, kunubewu kunwarre nuk kunmak. Bu kuhni ngurriyime wanjh ngarrikelemen dja ngarrikukdeldelme.

²⁴ Bonj, ngudda nawu idols wanjh ngurridjalngudjyak, dja minj njale ngurrikurduyime. Ngudda yiman djal yeng. Bininj nawu ngundimarneboddan wanjh birridjalwarre duninjh.”

Yawey Kamulewarren Kore Baleh Nungka Kakurduyime.

Isaiah 41:25-29

²⁵ Wanjh God nawu Yawey yimeng, “Ngaye ngadjarrngbom nakudji bininj nawu koyekbeh, dja nungka nabang duninjh. Wardi nungka kamre kore kakkibeh bu kabenbun bininj. Nungka wanjh kabendjalbun nawu kabirriwohrnawohrn bininj yiman kayime bininj nawu kamelme delek kurrenge nuye.

²⁶ Adju, nangale kore ngudberre yingkihmulewam kore kuhni kakurduyimerran? Ngurrimulewa ba bu ngad ngarrimarneyime bu nahni idol wokdanj kunwoybuk dorreng? Burrkyak. Ngudda nawu idols minj njale ngurriyngkihmulewayi. Ngurridjalwokyakni, dja minj nangale ngunbekkayi bu ngurriwokdiwirrinj kunwok.

²⁷ Ngaye nawu Yawey wanjh ngayungkih bu ngabenbengdayhkeng bininj kore kunred Zion bu baleh darnkih kamre bedberre. Ngaye ngamunkeweng nakudji bininj bu kakan ngardduk kunwok kore kunredkimuk Jerusalem. Dja nungka benmarneyimeng, ‘Ngurrina! Ngudberre bininj kabirrimdokme kondah, dja kamak rowk!’

²⁸ Bu ngaye Yawey ngabolknang kore idols birridi, minj nakudji ngalkeyi nawu kunwok karrmeninj. Ngaye ngabendjawayi njalenjalekenh dja minj nakudji ngawokmayi, bedda djal wokyak.

²⁹ Nahni idols rowk wanjh djal yeng, dja minj gods duninjh. Minj njale kabirrikurduyime. Bedda wanjh birringudjyak, dja minj kundulkarre kabirrikarreme.” Kuhni rowk nawu Yawey yimeng.

42

Namekbe Nawu Kabimarnedurrkmirri Yawey

Psalm 42:1-9

¹ God nawu Yawey kayime, “Nahni bininj nganmarnedurrkmirri. Ngaye ngawon kunngudj. Ngaye ngadjarrngbom namekbe bininj dja ngaye ngamarnenjinlgmak nuye. Wanjh ngaye ngawong Namalngmakkaykenh ngardduk bu ngakangebarlkeng. Kaluk nungka kabendjadme birriwarlahkenh bininj rowk nawu kabirribebhehdi kubolkbubuyika ba kabirriborlhme manbu kundjalngmak ngardduk.”

² “Namekbe nawu nganmarnedurrkmirri minj kakayhme wernkih, dja minj mak kawokdi wernkih duninjh kore kurobbe bu kawokdangen.

³ Nungka minj kabakke kundulkbik, dja minj mak kabirludombun yiman candle. Dja bonj, nungka munguyh kabendjadme bininj djal mandjadkenh dja kore kunwoybukkenh.

⁴ Minj kangudjywarren kore kuhni karrurrkmirri, dja minj kakangewarremen. Kaluk kabenmarnbun bininj rowk kore kondah kurorre bu kabirrire mandjad duninjh. Bininj rowk nawu djarrehbeh nawu kabirrihni kore kubolkbubuyika, wanjh bedda kabirrimadbun nungka bu kabenbukkabukkan.”

⁵ God nawu Yawey wokdanginj dja kuhni kayime. Nungka nawu marnbom kaddum kunngol duninjh, dja warlahwong, mak bolkwarlahwong kondah kurorre rowk, dja mak marnbom rowk nawu kahdarrkid. Nungka

wanjh kandarrkidwong ngad karriwarlahkenh bininj rowk, dja wanjh kanwong kunnngolek.

⁶ Wanjh nungka yimeng, “Ngaye Yawey wanjh kayhmeng ngudda, dja wong ngardduk mankarre mandjad. Ngaye bidkarme ngudda ke bu wernhkarme, dja ngaye nahnan dja marnbun ngudda ba bu birribuyika bininj rowk ngandiwoybukwon kore ngabenmarnewokkurrmerren bedberre. Dja ngudda yibenmarnebolkwolkan bedberre bininj rowk nawu minj Jews.

⁷ Kaluk ngudda yibenmimbayhke nawu birrimidubbe bininj rowk. Dja mak ngurrbenbebke bininj nawu kabirribongdi jail, dja ngurrbendolkkayhwe bininj nawu kabirribongdi kore kubolkkakmunun.”

⁸ “Ngaye wanjh ngangeyyo Yawey. Ngaye ngadjalkudji God duninj, dja minj ngabenbawon bininj kabirriburlume god nabuyika dja nawu idols.

⁹ Ngurrina! Manbu ngayingkihyolyolmi wanjh kurduyimerranj rowk. Dja bolkkime ngaye yingkihngendayhke manbu kunkernge kamre, dja yerrekah wanjh karredjingmang kakurduyimerran.”

Karrimarnewayinin Dja Karriburlumen Nawu Yawey

Isaiah 42:10-13

¹⁰ Mah, wanjh karrimarnewayinin mankong mankerenge nuye nawu Yawey! Ngad karriwarlahkenh bininj kore kubolkbubuyika rowk, wanjh karriburlumen nawu Yawey, mankong dorrengh. Ngudda bininj nawu ngurrire kabbala djarreh kore kurrula, wanjh ngurriburlumen. Dja mayh nawern nawu kahdi kurrula, ngudda warridj ngurriburlumen nungka nawu ngunmarnbom! Bininj rowk nawu ngurrihyo kunbolkbuyika kuhri djarreh duninj, ngudda warridj ngurriburlumen nawu Yawey!

¹¹ Ngudda bininj nawu ngurrihyo kore kubolkdarleh dja kore kunredbubuyika kumekbe, wanjh ngurriburlumen nawu Yawey! Ngudda bininj nawu ngurrihyo kunbolk Kedar nuye, wanjh ngurriburlumen! Dja mak ngudda bininj nawu ngurrihyo kore kunred kunkimuk Sela ngurribidbu kuwarddekimuk dja ngurrimarnekeyhmen Yawey kunnjilngmak dorrengh!

¹² Bininj nawu kabirrihyo kore manyunkurr dja mak darnkih kore kurrula, wanjh ngurriburlumen rowk nawu Yawey dja ngurrimulewa nuye kunmakmak.

¹³ Nawu Yawey kadjare kabenbun nawu kabirriwirrihme nuye, dja kambembe yiman bininj nawu ngudjbang duninj, kabenyawan ba bu kabirriburren. Nungka kakayhme bu kabenbun, kabenyurrhke rowk.

God Kawokkurrmerren Bu Kabenbidyikarme Nuye Bininj

Isaiah 42:14-17

¹⁴ Yawey nawu God kayime, “Bu kunkuyeng ngaye minj ngawokdiwirrinj, dja minj ngabenwokmayi ngardduk bininj. Bonj. Bolkkime wanjh darnkih kamre bu ngaye ngabenmarnekurduyime. Ngadjakbekkan yiman kayime daluk ngalbu wurdyaw kabibun bu karrangkenh, dja ngaleng kakayhme, kangolekdjarrdjarmen dja darnkih kangolekyakmen!

¹⁵ Ngaye wanjh ngabolkwarrewon manbu kuwarddekimuk, dja mak mandulum rowk. Ngaye ngahdarlehwon kundalk dja kundulk. Ngaye ngabun mankabo bu kadjalbukmen, dja mak kulabbarl wanjh ngabun ba kayimerran yiman kukkuyak.

16 Dja nawu birribunje bininj, wanjh ngabenmimmarnbun ba bu kunkak bedberre kayimerran kubolkwolkkayindi. Dja mak ngabenmarnebolh-marnbun bedberre ba bu kamak kabirrire kore manbolhmak manbu minj birribolhburrbuyinj. Kuhni rowk ngaye ngabenmarnekurduyime, dja minj mak ngabendjalbawon.”

17 Birribuyika bininj nawu kabirriwoybukwon nawu idols, dja nawu kabirriyime, “Ngudda nawu gods ngadberre,” wanjh ngaye ngabendjal-durndiwe bedberre kunyeme kunkimuk dorrengh.”

Bininj Nawu Israel Benkebmawahmeng Minj Kabirribekkabekkan Nawu Yawey

Isaiah 42:18-25

18 Nawu Yawey yimeng, “Ngudda nawu yiman ngurrikanemdubbewor-inj, wanjh kandibekkabekka! Dja mak ngudda nawu ngurrimimburd-meng, wanjh ngurrimimbayhmen dja ngurribolka!

19 Ngudda nawu kandimarnedurrkmirri, ngudda ngurriwernhmimburd-meng ba minj kandinan, dja ngudda nawu ngurrikarme ngardduk kunwok manbu ngawokmunkeweng, ngudda wanjh ngurrikanemdubbe-worinj ba minj kandiwokbekkabekkan. Ngudda nawu ngurrikurrmerrinj kore ngaye nawu Yawey kandimarnedurrkmirri, yiddok woybukkih ngudda ngurrimimwarreminj, dja ngurrikanemdubberranj?

20 Ngudda woybukkih kandikurdunang kunmim dorrengh ngudberre kore kunwern ngakurduyimeng, dja bonj, minj njale ngurriborlhmeninj. Ngudda ngurrikanemmak, dja bonj, minj kandibekkan.” Kuhni yimeng nawu Yawey.

21 Nawu Yawey karremarnbom mankarre manmakkayhkenh ba bu ngurriwokmarrkmang dja ngurriburlumen nuye mankarre. Kuhni djareminj dja wanjh njilngmakminj ba karremarnbom.

22 Dja burrkyak. Ngudda bininj nuye ngurriwarreworren, dja bolkkime ngurribongdi kore prison, dja yikahwi ngurrimankang kore kudjor-lokkimuk dja minj ngurribidbun. Minj nangale bininj ngungehke, dja birribuyika bininj ngundidjalkan dja ngundiweykan. Minj nangale bininj kayime, “A! Ngurrbendurndiwe nahni bininj nawu Yawey nuye!”

23 Adju, nangale bininj ngudberre nganwokbekkan? Yiddok nangale kadjare nganwernhbekkan bolkkime ba bu ngandiwokmang yerrekah?

24 Mah, ngurriburrbu ngudda bininj nawu Jacob ngunkebmawahmeng, dja mak ngudda nawu Israel ngunkebmawahmeng! Nangale ngunkur-meng kore birriwarre bininj ngundidukkang dja ngundiweykan? Woy-bukkih, nawu Yawey nungan bawong bu kuhni kurduyimerranj kadberre. Nungka nawu ngad karriwokburriweng dja karrimarnekurduyimeng kunwarre. Minj karriwokmarrkmayi, dja minj karrimarrkmayi nuye mankarre.

25 Kunmekbekenh nungka wernhyidduy kadberre, dja bawong kunrayek duninj kanmarnebebmeng kore birribuyika bininj karriburrinj, dja karriwern karridoweng kore manbirlukimuk. Dja bonj, minj karrimen-menmayi, dja minj karrimayaliborledkerrimeninj kore nungka djareminj.

43

Yawey Nakka Nadjalkudji Nawu Kangehke

Isaiah 43:1-7

1 Bolkkime nawu Yawey kawokdi. Nungka wanjh ngunmarnbom ngudberre bininj, ngudda nawu Jacob nuye mawahmawah! Dja ngunmarnbom ngudberre bininj nawu Israel ngunkebmawahmeng. Wanjh Yawey ngunmarneyime, "Yuwn bu ngurrikele! Ngaye wanjh ngunbebkeng kore ngurribongdi. Ngaye ngeykayhmeng ngudberre, dja ngudda wanjh ngardduk bininj.

2 Bu kundjurrhkimuk kamre, dja bu ngudda ngurridjowkke kuburrk kukku kore mankabo, wanjh ngaye dorreng karridjarrkre ba bu kamak ngurrire dja minj ngurrikebngakme. Dja bu ngurringimen kunak, wanjh minj ngurrikukwurlhme dja ngurridowe. Makka manbirlukimuk minj ngunkukwurlhke."

3 "Ngaye Yawey nawu God ngudberre, dja ngaye ngadjalkudji ngadjamun duninj ngudberre nawu Israel nuye mawahmawah dja ngaye ngehke ngudberre. Ngaye ngaburriwe kubolkkimuk Egypt ba bu ngunbebke ngudberre kore ngurribongdi. Ngaye ngadjalbawon kunbolk bokenh Cush dja mak Seba ba bu ngaye bebkeng ngudberre."

4 "Ngaye wernhmarnedjare ngudda! Ngayime bu ngudda ngurrimak bininj, dja ngaye makwan ngudberre. Kunmekbekenh kunu ngaye ngabenbawon nawu birribuyika bininj dja kubolkbubuyika kunwern ba bu ngaye ngehke ngudberre ba bu ngudda wanjh ngurridjaldarrkiddi.

5 Wanjh yuwn bu ngurrikele, dja ngaye karridjarrkdi. Kaluk ngaye ngabenmirndemang wurdwurd ngudberre kore karrikad dja mak kore koyek kabirrihng dja ngabendurndiwe kore ngudda.

6 Ngaye ngamarneyime kunbolk kore kakbi, 'Mah, ngurribenbawon ba kabirrimre!' Dja mak ngamarneyime kunbolk manbu walem, 'Yuwn yibendabke!' Ngaye ngadjare ngardduk bininj rowk kabirridurnderren kore djarrehbeh kabirribebbehni, nawu wurdwurd ngardduk rowk, narahrangem dja mak ngaldahdaluk.

7 Bedda wanjh ngardduk bininj. Ngaye ngabenngaybom, dja ngabenmarnbom bu ngabenmimbiwong ba bu bedda ngandiburluburlume." Kuhni rowk nawu Yawey yimeng.

Bininj Nawu Israel Benkebmawahmeng Kabirrimulewan Nawu Yawey

Isaiah 43:8-13

8 Nawu Yawey kayime, "Ngurrimirndeka bininj nawu kabirrikarme kunim, dja birridjalmimbunje, dja mak bininj nawu bedda kabirrikarme kunkanem, dja kabirridjalebngwarr!

9 Birriwarlahkenh bininj rowk kabirrimirndemornnamerren kore kubolkbubuyikabeh rowk. Yiddok yikahwi bedberre birriyingkih-mulewayi kore baleh kakurduyimerran? Yiddok yikahwi bedberre kabirriyingkihburrun kore baleh yerre kakurduyimerran? Mah, bedda wanjh kabirrimkan birribuyika bininj nawu bindibek kang kore birriyingkih-mulewam kunwoybuk dorreng. Wardi birriwern bininj kabirriyime 'Yoh! Woybukkih!'"

10 "Bonj. Ngudda wanjh kandiyolyolme kunwoybuk dorreng ngardduk, ngaye nawu Yawey. Ngaye djarrngbom ngudberre ba bu kandimarnedur- rkmirri, dja ngaye djarrngbom ngudberre ba bu kandiburrbun dja mak kandiwoybukwon, dja mak ngurriwernhburrun bu ngaye wanjh God duninj. Minj nabuyika god manburrimenin dja diwirrinj bu dokmeninj ngardduk, dja minj nabuyika god kamre yerrekah.

11 Ngaye ngadjalkudji, ngaye wanjh Yawey, dja minj nabuyika ngungehke ngudberre."

12 “Ngudda ngurriburrbun bu woybukkih duninjh gaye bukkabukkang ngudberre bu ngayingihbengdayhkeng, dja gaye wanjh ngehkheng ngudberre. Gaye minj yiman djenbuyika god kore ngudberre. Mah, kandimulewa bu ngurriyime gaye wanjh God duninjh. Kuhni ngayime.

13 Gaye ngadjaldi munguyhmunguyh, kunkare dja bolkkime. Minj nangale bininj kanmarnewarlkarren, dja gaye ngadjalkukkarme. Bu gaye ngakurduyime kore baleh ngadjare ngayime, wanjh minj nangale karrurndiwe.” Kuhni rowk yimeng nawu Yawey.

Yawey Benkongibom Bininj Nawu Israel Benkebmawahmeng

Isaiah 43:14-21

14 Nawu Yawey kawokdi ngudberre. Nungka wanjh ngunbebheng kore ngurribongdi. Nungka nawu nadjalkudji nadjamun duninjh ngudberre nawu Israel ngunkebmawahmeng. Wanjh kayime, “Gaye ngamkan birriwern rowk nawu Babylonbeh bininj, dja ngabenmeng. Ngabendahkendong kore kabbala bedberre manbu birrimarnbom ba bu bedman birriburlumerrinj. Wanjh ngabenkan kondah. Kuhni ngabenmarnekurduyime bu djal ngudberrekenh!

15 Gaye Yawey, ngudberre God dja gaye ngadjamun duninjh. Gaye marnbom ngudberre, ngudda nawu Israel ngunkebmawahmeng. Wanjh gaye king duninjh ngudberre.”

16 Nawu Yawey wokdanj ngudberre. Nungka nawu ngunmarnewayhkeng kurrula duninjh ba ngurridjowkkeng kore kunbolhdarleh.

17 Nungka wanjh bengkang djarrang dja chariots dorrengh, dja mak birridjalwern djamun kore Egyptbeh, wanjh benbom rowk. Bedda birrikukyoy, dja minj kabirriyawoyhdolkkkan. Nungka wanjh benbom yiman kayime bininj kabirludombun candle.

Wanjh bolkkime Yawey kanbengdayhke kadberre, kayime,

18 “Ngurridjalbawo rowk nawu kunkarekenh. Yuwn bu munguyh ngurridjalburrbun kore kunkare ngunmarnekurduyimerranj.

19 Wanjh bolkkime kandikurduna kore gaye ngakurduyime kunker-ngekenh. Bolkkime wanjh kambebme. Yiddok ngurrinan? Gaye ngabolhmarnbun kore kubolldarleh, dja mak ngamarnbun kukku manbomak kaborlobme kunmekbe.

20 Kunmekbekenh wanjh mayh nabang ngandiburlume gaye, ngayime dalkken dja djurrul, kunmekbekenh bu gaye ngabenbowon kukku kore kubolldarleh, dja ngamarnbun kukku kaborlobme munguyh kore kubolkwarre. Gaye ngakurduyime ba ngabenbowon bininj ngardduk ba bu kabirribongun, birrimekbe bininj nawu ngabendjarrngom.

21 Gaye ngabenmarnbom kore ngadjareni, dja bedda ngandiburlume dja ngandimulewan.”

Nawu Yawey Kabendjadme Bininj Nuyé Nawu Israel Benkebmawahmeng

Isaiah 43:22-28

22 Wanjh Yawey yimeng, “Ngudda nawu Jacob ngunkebmawahmeng, ngudda minj kandingeykayhmeninj dja ngurriwunjnjibmingalmeng ngayekenh.

23 Minj kandimarnekinjeyi sheep nawu mayh, bu kandiwoyinj. Minj kandiburlumeninj kore ngurrikurrmeng njalenjale ngudberre bu ngayekenh. Ngurriburrbu bu gaye minj djurrkkayinj ngudberre bu

djawayinj munguyh ba bu kandiwoyinj manme dja mankalkidmanjmak. Minj ngadjareniwirrinj bu njilngwarrewoyinj bu djawahdjawayinj munguyh.

²⁴ Minj kandimarnebayahmeninj mankalkkidmanjmak mak minj kandiwoyinj kunbalem dorreng kore mayh bu kandimarnebuyinj. Larrk. Dja kunbuyika ngudda ngurridjalkurduyimeng. Ngudda kandinjilngwarrewong bu ngurrikurduyimi kunwarre, mak kandingudjwarrewong bu ngudda kandiwokweng mankarre ngardduk.

²⁵ Njalekenh kuhni kandimarnekurduyimeng ngaye nawu munguyh ngadjare ngawernhbularrbun ngudberre kunwarre. Ngaye wanjh ngadjare. Ngaye ngadjare ngadjalbengmidjdan ngudberre kunwarrekenh bu munguyh.

²⁶ Mah. Ngurrimray ngurriyolyolmen kore ngaye ngayimeng. Karribekarren dja karridangwerren! Ngurrimulewarrimen. Yiddok ngurriyime bu ngudda ngurridjalmak, dja minj ngurrikurduyimeninj kunwarre.

²⁷ Ngaye ngaburrbun bu nayungkih mawah ngudberre kurduyimeng kunwarre. Dja mak bininj nawu ngaye ngabenmunkeweng ba bu ngundibukkabukkan, wanjh bedda warridj ngandidjalwokweng.

²⁸ Nawu birrikihkimuk bininj ngudberre bolkwarrewong manbu kururdkjamun ngardduk. Wanjh kunmekbekenh ngaye ngabenyememulewan bu ngabendung bininj nawu Israel benkebmawahmeng. Bedda nawu Israel benkebmawahmeng dorreng. Woybukkih, ngaye ngabenbawon birriwarre bininj bu kabindiwirrihme ngardduk bininj.”

44

Nawu Yawey Nakka Nadjalkudji God Duninj

Isaiah 44:1-8

¹ Nawu Yawey kayime, “Kandibekka ngudda nawu Jacob ngunkebmawahmeng, ngudda kandimarnedurrkmirri. Ngaye djarrngbom ngudberre nawu Israel nungkebmawahmeng.

² Ngaye Yawey, dja ngaye marnbom ngudberre. Ngaye marnbom ngudberre kore kuwalirng ngalbadjan ngudberre. Dja ngaye wanjh bidyikarme ngudberre. Yuwn bu ngurrikele ngudda Jacob nawu kandimarnedurrkmirri. Yuwn bu ngurrikele ngudda nawu ngurringeyyo Jeshurun*, ngaye wanjh djarrngbom ngudberre.

³ Ngaye ngabolkdjuhke kunbol ngudberre manbu bolkdarlehmeng, ngamarnbun kukku kaborlobme kore kubolkbuk. Dja mak ngaye ngamunkewe Namalngmakkaykenh ngardduk bu ngabenkangebarlike wurdwurd ngudberre. Ngaye ngabenmarnekurduyime kunmak bedberre nawu mawahmawah ngudberre.

⁴ Bedda wanjh kabirridjordme yiman kundalk kawernbeberren kore kabbal kubolkmak, dja mak bedda kabirrikuyenghme yiman kundulk manbu poplars kadjordmerren darnkih kore mankabo kaborlobme.

⁵ Yikahwi bininj ngudberre wanjh kabirriyime, ‘Ngaye nawu Yawey nuye bininj.’ Birribuyika kabirriyime, ‘Ngaye ngangeyyo Jacob!’ Dja mak birribuyika kabirribimburren kore kubid bu bim kayime, ‘Nawu Yawey nuye.’ Birrimekbe ngudberre mawahmawah rowk wanjh kabirringeyburren ‘Israel’.” Kuhni yimeng nawu Yawey.

⁶ Kuhni warridj nawu Yawey kayime, “Ngaye nawu Yawey. Ngaye ngabenmarnewohrnawohrnan bininj nawu Israel benkebmawahmeng,

* 44:2 Jeshurun kamenyime “nawu kunmak kabirridjalkurduyime”

dja mak ngaye ngabennghehke bedberre. Ngaye Yawey ngawernhdulka-rrekimuk duninj. Ngaye ngayungkih duninj, ngadjalyingkihni bu kerrngehkenh duninj, dja mak ngaye wanjh ngayerre dja ngadjaldi yerre duninj. Ngaye minj ngayakmen munguyh munguyh. Ngaye ngadjalkudji God duninj dja minj nangale nabuyika god kahdi.

⁷ Adju, kab nangale yiman ngaye nganerohrok? Mah, wanjh nungka kambemen dja kurobbe yolyolmerrimen! Ngadjare nungka kamhdi kumirrk ngardduk dja nganmarneyime kunwern kurduyimerranjeni bu kerrengehkenhni ngabenmarbom ngardduk bininj, dja mak baleh yerre kakurduyimerran. Kamak bu nungka nganyingkihbukkan kore baleh kakurduyimerran.

⁸ Ngudda ngardduk bininj, wanjh yuwn bu ngurrikukdeldelme dja yuwn bu ngurrikele bu bolkkimekenh. Ngaye kunkare yingkih bengdaykeng ngudberre bu marneyimeng kore baleh bolkkime kakurduyimerran. Ngudda ngurriwernhburrbun bu ngaye God duninj dja minj nangale nabuyika god kahdi. Ngaye yiman manwarddekimuk ngudberre, dja minj ngawobekkayi nabuyika god kahdi nawu yiman ngaye.

Bu Karrbenmarnedjekme Bininj Nawu Kabirrimarnbun Idols

Isaiah 44:9-20

⁹ Bininj nawu kabirrimarnbun idols nakka wanjh yiman yeng. Nawu idols bedberre nakka bonj, minj njale kunmak kabirrikurduyime. Bininj nawu kabirrimarnebodan idols wanjh yiman kayime kabirrimibunje, dja minj njale kabirriburrbun. Bedda wanjh kabirriyemengalme.

¹⁰ Nangale bininj kamarnarnbun kubidwi nuye idol nawu god nuye? Nahni idol minj njale kabimarnkurduyime!

¹¹ Bininj rowk nawu kabirrimarnbun idols wanjh kabirriyemengalme. Bedda nawu birrikurdumak, dja bonj, nakka djal bininj. Bu kabirriburlumerren, wanjh kabirridjalwernhkelemen, dja kabirridjaljemekarren.

¹² Ngurriburrbu kore bininj kabirrimarnbun idols. Bininj nawu kamarnbun njalenjale kore wirlmurrng, nakka kamang njalehnjale dja kawurlhke kore kunyirrke. Kumberl nuye bininj wanjh kakarrme kundulkarre, dja wanjh kabun wirlmurrng, hammer dorrengh, ba kakukname idol. Dja med! Namekbe bininj kamarwedowe dja kangudjywarren. Kabekkarren bu kakodjmayahme, dja kakombukdowe.

¹³ Nabuyika bininj nawu kamarnbun idols wanjh kamarnarnbun njalenjale kundulkwi. Nungka wanjh kamang kundulk dja kabimbun bim. Kamang chisel manbu manmirrkmak dja kadulkdadje kore karohrokme dja kabimbun. Wanjh kamarnbun kundulk ba bu kakukyime bininj nawu nakukmak. Wanjh kakurrme nahni idol kore kurorre nuye ba bu kamarnebodan.

¹⁴ Kunubewu kadjobke kundulkmak, yiman cedar, dja kunubewu cypress dja oak. Kamadbun bu kundulk kakimukmen kore kurobbe. Yikahwi kabirrimindudje kundulk yiman pines, dja mandjewk kadjordmiwe mahni kundulk.

¹⁵ Wanjh nahni bininj karerrngmang kundulk dja yika kakurrme kunak ba bu kakuwan. Wanjh nungka kakinje manme nuye warridj kore kunak, mak kakinje buriddi nuye. Yikahwi kundulk kamang kamarnbun god nuye, dja kadjaldi yiwarrudj ngarre. Nungka wanjh kamarnebodan nawu idol!

16 Nahni bininj wanjh kawurlhke yikahwi mahni kundulk kore kunak ba bu kakinje manme. Kakinje kunkanj, kakanjngun dja kaworrkmen. Dja warridj kakuwan kore mahni kunak, dja kayimerren, "Ah, ngabekkarren kamak rowk! Ngadjalnan mahni manbirlumak!"

17 Dja mak yikahwi kundulk kadjaldulkdi, wanjh kamang kamarbun god nuye, dja kamarneboddan namekbe nawu idol dja kaburlume! Nungka wanjh kadjaldi yiwarrudj dja kadjawan, "Kannghehkemen, ngudda nawu god ngardduk!"

18 Bonj, birrimekbe bininj minj njale kabirriwernhburrbun, dja minj njale kabirrimenmenbekkan. Bedda yiman kabirridjalmimbunje duninj ba minj kabirribolknan. Bedda yiman birrimayaliyakworrinj, wanjh minj njale kabirriborlhme.

19 Birrimekbe bininj minj kabirridjawarren, "Aba! Yikahwi kundulk ngawurlhkeng ba bu ngakinjeng buriddi dja kunkanj. Ngaye nganguneng mahni manme. Dja njalekenh gaye ngamarbom nawu nawarrewarre kore mahni kundulk? Yiddok ngamarneboddan idol manbu djal kunduk?"

20 Burrkyak, minj kuhni kayimerren. Dja nungka kamarrbekkarren dja kawarreworren. Minj nungka kangehkerren. Minj mak nungka kayimerren, "Ah! Njale nakka nawarre ngakarme kubid ngardduk, dja namekbe idol kakurren, dja kankowe!"

Nawu Yawey Kadjalwohrnan Rowk Kamarbun Yehyeng Rowk Dja Kanngheke Kadberre

Isaiah 44:21-28

21 Nawu Yawey kayime, "Ngudda nawu Jacob ngunkebmawahmeng, wanjh kandibekka dja kuhni ngurriburrbu. Ngurriburrbun ngudda nawu Israel ngunkebmawahmeng, wanjh gaye kandimarnedurrkmirri. Ngaye marnbom ngudberre ba bu kandimarnedurrkmirri, dja gaye minj munguyh bengmidjdan ngudberre.

22 Gaye ngaburriweng kunwarre ngudberre yiman kayime kunmayorrk kawe kunngol, dja gaye ngaweng kunwarre ngudberre yiman kunmayorrk kawe kunkarndum bu kamdungbebme. Mah, wanjh ngurrimdurnden kore gaye, dja gaye yingkihnghehkeng ngudberre."

23 Mah! Ngudda nawu kunngol kaddum rowk, wanjh ngurriwayinin kunnjilngmak dorreng! Dja kore kanjdji duninj kurorre, wanjh ngudda warridj ngurriwernhkayhmen! Ngudda nawu kuwarddekimuk rowk, wanjh ngurridjingga ngurriwayini, dja mak ngudda kundulk rowk kore ngurridulkwern, wanjh ngurriwohwayinin! Kunmekbekenh ngurriwayini nawu Yawey bennghehkeng bininj nawu mawahmawah nuye Jacob dja kuhni nungka bukkarrinj kunmakmak nuye dorreng kore bininj nawu Israel benkebmawahmeng.

24 Kuhni nawu Yawey yimeng, "Ngaye Yawey nawu ngehkeng ngudberre. Ngaye marnbom ngudberre kore kuwarlirng ngurridi! Ngaye Yawey dja gaye ngamarbom yehyeng rowk. Ngaye ngadjalkudji ngawarlahwong manbu kunngol rowk, dja mak gaye ngadjalkudji ngabolkmarnbom kurorre rowk bu ngabolkwarlahwong.

25 Bininj nawu kabirrikurren ngayekenh, dja mak nawu marrkidjbu, wanjh gaye ngabenmarnbun bu kabirridjalebngwarr dja kabirriyemengalme. Bininj nawu birrikodjkuludjad, wanjh gaye ngabenmarnbun bu kabirridjalyime yeng, dja kabirriwokmenyak.

²⁶ Dja ngaye ngardduk bininj nawu ngandimarnedurrkmirri, wanjh ngaye ngabenwon kunwok ngardduk ba bu kabirriyingkihmulewan, dja ngaye ngakurduyime. Mak ngamarnbun kunwok bedberre nawu ngaye ngamukewe ba bu kawoybukendan. Ngaye ngayingkihbolkolyolme Jerusalem dja ngayime bininj kabirriyawoyhdurndeng dja kabirriyo kumekbe. Dja mak ngayime 'kururkwerbnubuyika kore Judah, wanjh bininj kabirriyawoyhrurrkname kumekbe, dja kore rurrkwarwarhmeng, wanjh ngaye ngayawoyhmarnbun rowk'.

²⁷ Mak ngaye Yawey ngawokrayekwon kurrula duninh, ngayime, 'Djalbukmen, dja ngabongurdke mankabo kabore kore ngudda!'

²⁸ Ngaye Yawey wanjh ngayingkihbengdayhke nawu king Cyrus, ngayime 'Ngudda wanjh ngaye marnbun yiman kayime shepherd dja yidjalkurduyimen rowk kore ngaye ngadjare.' Wanjh nungka kare kabolkyolyolme Jerusalem, kayime, 'Mah, bininj birrirurrknamen ba kabolkkerrngehme.' Dja mak nungka kamulewan manbu Temple kumekbe, kayime, 'Mah, bininj birrirurrknamen manbu Temple kanjdji ngarre!' Kuhni rowk ngayime ngaye nawu Yawey."

45

Nawu Yawey Kabimarnbun King Cyrus Bu Kabimarnedurrkmirri Nuyé

Isaiah 45:1-8

¹ Nawu Yawey bidjarrngbom Cyrus dja bimarnbom king yimerranj, dja mak bimunkeweng ba bu kangime kubolkbubuyika kunbolk dja kabenmarnewohnan bedberre bininj kumekbe. King Cyrus kabendulkarreyakwon nabubuyika kings. Yawey kabidyikarme Cyrus dja kabimarnedangmarrhmang gates ngarre kunbubuyika kubolkwarlah, ba bu nungka kangime. Wanjh Yawey kabibengdayhke Cyrus dja kayime,

² "Ngaye ngarrokme dja ngayingkihbolhmarnbun ngudda ke. Ngaye ngawarddeburriwe kuwarddekimuk ba bu yire. Ngaye ngabakke gates manbu wirlmurrng bronze dja ngarradjke manbu kawarnamyó ba bu ngudda yingime kore ngudda yidjare.

³ Kaluk ngaye won namakmak bedberre nawu molkkenh kahdjehdjenyo kore kubolkkak. Bu kuhni ngakurduyime, wanjh kunmekbekenh ngudda yiwohburrbun bu ngaye Yawey, ngaye God bedberre bininj nawu Israel benkebmawahmeng. Wanjh ngaye ngeykayhmeng."

⁴ "Ngudda minj kanmarneboddangimeninj bolkkime, dja bonj, ngaye ngeykayhmeng dja ngeykimukwon ngudda ba bu yibenbidyikarme bininj nawu mawahmawah bedberre Jacob nawu ngandimarnedurrkmirri. Bedda wanjh mawahmawah Israel nawu ngaye ngabendjarrngbom.

⁵ Ngaye nawu Yawey, dja minj nabuyika god kahdi. Ngaye ngadjalkudji god, dja minj nabuyika god kahdi. Ngudda minj kanmarneboddangimeninj, dja bonj, ngaye wanjh murrngayekwon ngudda.

⁶ Ngaye kuhni ngayime ba bu birriwarlahkenh bininj rowk nawu birrikang kore baleh kamdungbebme dja kore karrungyibme wanjh bedda rowk ngandiburrbun bu ngaye Yawey, ngadjalkudji God duninh, dja minj nabuyika god kahdi.

⁷ Ngaye ngadjalkudji ngabolkwolkan dja mak ngamarnbun kunkak. Ngaye ngadjalkudji ngabenmarnekurduyime kunmak rowk bininj bedberre, dja mak ngabenwon kunrayek. Ngaye Yawey ngakurduyime kuhinjku rowk."

8 “Ngaye ngawokrayekwon kunngol bu yiman kakoluyhwe kunmak ba bu bininj rowk kabirridjalkurduyime kundjalmak ngardduk. Ngadjare kunmakkenh kamkolong kore bininj rowk yiman kayime mandjewk kamdjakdung bedberre kore kunngolbeh. Dja ngawokrayekwon kubolk-warlah rowk kore kurorre. Ngayime bu ngaye ngabennghehe bininj kumekbe, wanjh bedda kabirribaldjalkurduyime kunmak. Kuhni rowk ngaye Yawey ngakurduyime.”

God Nadjalkudji Kamarnbun Yehyeng Rowk

Isaiah 45:9-19

9 Nawu Yawey kayime, “Bininj nawu nganwokburriwe wanjh kawernhnjilwarremen. Ngaye wanjh ngabenmarnbun bininj rowk yiman kayime nawu potter kamarnbun pots dja njalenjale. Bininj nawu potter kamang delek kore kubid nuye, dja kamarnbun kore nungka kadjare. Yiddok manbu delek kabi djawan namekbe bininj, ‘Baleh ngudda kankukmarnbom?’ Yiddok delek kabiwarrewan bininj nawu marnbom?”

10 Yiddok wurdyaw kabi djawan kornkumo nuye, ‘Njalekenh ngudda kamarnbom bu ngaye ngakukwarre?’ Yiddok barrken kabi djawan ngalbadjan nuye, ‘Njalekenh kanyawmey?’ Kawarre! Nahni bininj wanjh kawernhnjilngwarremen.”

11 “Ngaye Yawey ngadjalkudji Ngadjamun Duninj bedberre bininj nawu Israel benkebmawahmeng, dja ngaye ngabenmarnbom bedberre. Yuwn bu nangale bininj ngandidjawan bu njalehnjalekenh. Ngaye ngayingkihyolyolme kore baleh kakurduyimerran bedberre nawu ngardduk wurdwurd. Njalekenh bu bininj ngandibengdayhke kore baleh ngakurduyime bu ngamarnbun njalehnjale kubid ngardduk?”

12 Ngaye wanjh ngabolkmarnbom kurorre dja mak ngabenmarnbom bininj rowk nawu kabirriyo kumekbe. Ngaye ngamarnbom kubid ngarddukwi kaddum kunngol dja ngangolwarlahwong, dja mankokkarng manwern rowk ngadjalkurrmekurrmeng.”

13 “Bolkkime ngaye ngarrolkkayhwe nawu Cyrus ba bu kakurduyime kunmakkenh ngardduk. Ngaye ngabidyikarrme ba bu kayakwon mandjad duninj kore nganmarnedurrrkmirri. Ngayingkihbolhmarnbun nuye ba bu kayawoyhrurrkname ngardduk kunbolkkimuk Jerusalem, dja kabenbebke ngardduk bininj nawu kabirribongdi. Minj nangale kabi djurrkwon bu kuhni nungka kakurduyime, dja minj mak bininj kabikarremulewan bu kuhnikenh.”

14 Kuhni warridj nawu Yawey kayime bu kabenbengdayhke nawu Israel benkebmawahmeng, “Kaluk ngurrikukmang kunwardde manbu money rowk bedberre bininj nawu kabirrihni kunbolk Egypt dja mak kunbolk Ethiopia. Dja mak ngurrbenkukdjirdmang nawu birrikornamkuyeng bininj nawu birrikang kubolkkimuk Seba. Bedda rowk kabirrimre kore ngudda ba bu ngundimarnedurrrkmirri. Ngudda ngurridukkadukkan chains dorrengh, dja bedda wanjh ngundidjalmunkekadjung. Kaluk bedda nguundimarnehodan kumirr ngudberre dja nguundimarrkdjawan bu kabirriyime, ‘Woybukkih God duninj ngurrire, dja minj nabuyika god kahdi! Minj nabuyika god duninj!’”

15 Ngudda Yawey wanjh God duninj, dja woybukkih ngudda yiman yikukwarlkkarren. Ngudda God bedberre nawu Israel benkebmawahmeng, dja ngudda yibennghehe bedberre.

¹⁶ Bininj rowk nawu kabirrimarnbun idols, wanjh bedda kabirriyemengalme, dja kabirriwowerworren. Bedda kabirridjarrkkelerlobme kunyeme dorreng.

¹⁷ Dja bininj nawu Israel benkebmawahmeng, wanjh Yawey kabengehke bedberre dja kabirridjalngehme munguyh munguyh. Minj kabirriyemengalme, dja minj nangale kabenwarrewan munguyh munguyh.

¹⁸ Nawu Yawey nungan marnbom kunngol rowk. Nungka wanjh nadjalkudji God duninj. Nungka bolkmarnbom kurorre rowk ba bu kahdjaldi munguyh. Minj marnbuyi bu kadjalbolklarrk, dja bolkmarnbom ba bu bininj kabirriyo kumekbe. Nungka kayime, "Ngaye wanjh Yawey, dja ngadjalkudji God duninj. Minj nabuyika god kahdi."

¹⁹ Ngaye minj manmolk ngawokdiwirrinj, dja minj ngamayaliwarlkayi. Dja minj ngawokrayekwoyinj nawu Israel benkebmawahmeng bu djalburudjang ngandiyawahyawan kore kubolklarleh. Ngaye Yawey ngadjalwokdi bu djal kunwoybuk dorreng. Mak ngaye ngamulewan manbu djal mandjakdenh."

Yawey Kabenmarneyolyolmerren Bedberre Birriwarlahkenh Bininj Rowk

Isaiah 45:20-25

²⁰ Kuhni kayime God nawu Yawey, "Ngudda bininj rowk kore kubolkbubuyika ngurrihdi, wanjh ngurrimray, ngurrimirndemornnamerren. Ngurrikelerlobmen kondah dja ngaye. Bininj nawu kabirrikanahkan idols nawu birrimarnbom kundulkwi, wanjh birrimayaliyak. Bedda kabirridjaldi yiwarudji gods nawu minj kabengehke.

²¹ Mah, ngurrimray ngurriyingkih-mulewa kore njale kakurduyimerran yerrekah. Ngurriyolyolmerren kurobbe dja ngurrikarremarnburrimen. Kab, ngaye djawan. Nangale yingkih-mulewan ngudberre kunkare duninj ba bu ngurriburrbuyi kore bolkkime ngunmarnekurduyimerran? Wanjh ngaye! Ngaye nawu Yawey yingkih-bengdayhkeng. Ngurriburrbun minj nabuyika god kahdi. Ngaye wanjh kundjalmak ngakurduyime dja mandjakdenh, dja mak ngaye ngehke ngudberre. Minj nabuyika god kahdi."

²² "Mah, wanjh ngurrimborledkerrimen kore ngaye, ngudda ngurriwarlahkenh bininj rowk kore kubolkbubuyika rowk! Dja ngaye ngehke rowk, ngaye nadjalkudji God, dja minj nabuyika god kahdi."

²³ Ngaye ngawokkurrmerrinj ngardduk, dja minj ngakurren. Ngawokdi, dja wanjh ngardduk nunwok kahdjaldi munguyh munguyh. Kaluk yerrekah wanjh bininj birriwarlahkenh rowk ngandimarnebodan, dja birriwarlahkenh bininj rowk kabirrimulewarren bu ngaye ngandidjalburlume.

²⁴ Bedda wanjh ngandiyolyolme bu kabirriyime, 'Nawu Yawey nadjalkudji kakarrme kundjalmak duninj, dja mak kunngudj duninj.'"

Bininj nawu kabirriwirrihme dja kabirridung nawu Yawey, wanjh kaluk kabirrire kore nungka, dja wanjh kabirriyimengalme.

²⁵ Dja nawu Yawey kabenbekbe dja kabengehke bininj nawu Israel benkebmawahmeng rowk, ba bu bedda kabirridjalburlume.

46

Nawu Yawey Wanjh Nakka Nadjalkudji God Duninj

Isaiah 46:1-13

1 Nawu Yawey kayime, “Bininj nawu kabirrihni kubolkwarlah Babylon wanjh kabindimarneboddan yehyeng nawu birrimarnbom, nahni wanjh idols nawu kabenengeyyo Bel dja Nebo. Dja bonj, bolkkime nahni idols bedman ngandimarneboddan. Dja bininj kabirribarnname nahni idols kore mayh nawu donkey bu kanakan. Dja nahni donkey kangudjwar-remen bu kakan namekbe idols nawu benekukdulmuk!

2 Nahni bokenh idols kabenedjalboddan, dja minj kabenengehkerren. Bininj nawu kabirrimarneboddan, wanjh minj kabirringehke idols bedberre. Kabirrire, idols dorrengh, kore kunred nuye birribang bininj nawu kabindidukkadukkan rowk, yiman bininj dja namekbe idols bedberre.”

3 “Ngudda nawu Jacob ngunkebmawahmeng, dja mak ngudda bininj nawu kunbolk Israel ngurridjaldi. dja ngurridjaldarrkid bolkkime, wanjh kandibekkabekkan, wanjh kandibekkabekka. Ngaye Yawey nah-nani munguyh kore ngurridi kuwarlirng dja ngurridanginj dja wanjh bolkkime djalnahan bu yiman kanakan ngudberre.

4 Kaluk bu ngurrikohbanjmen dja ngurribulumen, wanjh ngaye Yawey bidyikarme ngudberre. Ngaye marnbom ngudberre dja mak nahnan, dja ngaye wanjh ngorrkan ngudberre dja mak ngehke ngudberre.”

5 “Kandimarneyimen, nangale nabuyika karohrok ngaye? Nangale yiman kayime ngaye? Yiddok ngurrirohrok nabuyika, dja yiddok nangale nganyurrhke?

6 Yikahwi bininj nawu birrikuken wanjh kabirrirohrokme manbu gold dja silver bedberre dja kabirrikarremulewan bininj nawu bidmak dja kabirridjawan nungka bu kabirriname idols kukgold dja kuksilver. Wanjh bedda kabirrimarneboddan dja kabirrimarnedi yiwarrudj!

7 Bedda kabirriwayhke dja kabirringorrkan nahni idol, dja kabir-rikurme kore kadjaldi. Nawu idol minj karokan! Yikahwi bininj kabirrikayhme namekbe idol, dja bonj, minj nakka kabiwokmang, dja wokyak. Nahni idol minj kabennehke bininj bu kunyid kawernmerren bedberre.”

8 “Ngudda nawu ngurriwarre bininj, wanjh ngurriwernhburrbu kore ngaye ngakurduyimeng, dja yuwn ngurribengmidjdan gayekenh.

9 Ngurriburrbu baleh kurduyimerranj bu kunkare, kuhni bu ngaye ngakurduyimeng ngudberre. Ngaye ngadjalkudji God duninj, dja minj nabuyika god kahdi. Minj nabuyika god nganerohrok ngaye.

10 Ngaye ngayingkihulewam kore yerrekah kakurduyimerran, dja kaluk woybukkih kuhni yerrekah kakurduyimerran. Dja mak ngaye bolkkime ngayingkihulewam bu baleh yerre kakurduyimerran. Ngayoly-olme dja ngayime, ‘Ngaye ngadjalkurduyime kore ngaye ngadjare. Ngaye ngayingkihkarremarnbom dja kuhni wanjh kakurduyimerran.’”

11 “Ngaye ngakayhme nakudji bininj nawu kamre koyekbeh djarreh dja nungka kakurduyime rowk kore ngaye ngayingkihkarremarnbom, dja nungka yiman kayime namaddor! nawu nabang mayh. Ngaye ngamarnbun rowk kakurduyimerran, dja ngaye ngakurduyime rowk kore ngaye ngayingkihulewarrinj.

12 Wanjh bolkkime kandibekka ngudda nawu ngurrikangerayek, ngudda nawu ngurridjare kunwarre ngurridjalkarme.

13 Manbu kunbarnangarra ngardduk kundjalma duninj, wanjh kamre darnkih. Ngaye werrkwerkk ngamkan manbu kunmakkaykenh ngardduk. Ngaye wanjh ngabennehke bininj nawu kabirriyo kunred Jerusalem, dja ngabenbukkabukkan ngarre bininj rowk bu ngaye ngadjalmakkaykenh.”

47

*Bu Yawey Kabenyiddung Bininj Nawu Kabirrihyo Babylon**Isaiah 47:1-15*

¹ “Ngudda nawu ngurriyo kunred Babylon, ngudda ngurriyimerren bu yimankek ngurrimak bininj, dja burrkyak. Mah, wanjh ngurrikolong kanjdji dja ngurriyerrka kore kundjulng. Ngurriyahwurdmen, dja minj ngurriyawoyhyerrkan kaddum yiman bu ngurringeykimuk. Ngudda bininj nawu Chaldeabeh ngurridjalayerrka kurorre. Kunkare bininj ngundingeybuni, ‘Nawu Ngurrikukmak,’ dja mak ‘Nawu Ngurrikuken.’ Dja bolkkime burrkyak.

² Ngurrimang mahni manbalabala dja ngurrimimdjubulhme manbu wheat manmim ba bu ngurrimarnbun kandidjdjawa. Ngurrimadjyerrkerimen nawu namak ngurrikodjdjongbuyindi. Ngurriwayhke duredj nawu ngurridjongbuyindi dja birriwern bininj ngundinan kunbard ngudberre bu ngurridjowkke mankaboyahwurd.

³ Bedda wanjh ngundikukan ngudberre ngurridedjlarrh, dja mak ngundinan kore ngurriyemalgme. Ngaye ngayiddung ngudberre dja wanjh bebbهبun ngudberre rowk.”

⁴ Kuhni yimeng nungka nawu kanngheheng. Nungka wanjh kangeyyo “Yawey nawu narrulkarrekimuk duninj”. Nungka nadjalkudji nadjalw-ernhmakkaykenh kadberre nawu Israel kankabmawahmeng.

⁵ Wanjh nawu Yawey yimeng, “Ngudda nawu Babylon ngurrihyo, ngurriray kore kubolkmunun dja ngurriyerrka djalwoykyak. Bininj ngundingeybuni, ‘Ngudda ngurriwohrnawohrnan kubolkbubuyika rowk!’ Dja bolkkime burrkyak! kuhni kabirriyawoyhyime.

⁶ Ngaye Yawey ngabendjalduy ngardduk bininj, dja kunmekbekenh ngaye yiman kayime ngabenbodmewong dja ngabenkurrmeng kore kubid ngudberre kore kunbolk Babylon. Dja ngudda ngurrbenwirrihmeng, dja minj mak ngurrbenkongibuyi. Ngudda ngurrbenmarnbom kohbahkohbanj bu birridurrrimirri kunrayek.

⁷ Ngudda ngurriyimi, ‘Ngayh! Ngad wanjh munguyh karrbenwohrnawohrnan yiman queen duninj!’ Minj ngurrimayalibekkarrimeninj dja minj ngurriburrbuyi kore kunyid wardi ngunmarnekurduyimerran bu yerrekah.”

⁸ “Kandibekka ngudda nawu ngurridjarewern, ngudda nawu ngurriyimerren, ‘Ngaye kamak ngahni, dja minj njale ngandiwarrewon.’ Dja mak ngurriyimerren, ‘Ngaye yiman God, dja minj nangale mak nganerohrok. Minj nangale nganmarnedowe, dja ngardduk wurdwurd minj kabirridowe munguyh.’

⁹ Dja ngaye marneyime bu kuhni rowk wanjh kundjalburrikudji ngunmarnekurduyimerran. Kuhni rowk ngunmarnekurduyimerran bu kunbarnangarrakudji! Nawu nabininj kobeng ke dja mak wurdwurd, wanjh kabirriyakmen rowk. Ngudda yiyime bu yimankek yikarreme kundulkarre kunkimuk, dja yikurdang, dja bonj, minj yibidyikarmerren.

¹⁰ Ngudda ngurriburlumerren ngudberre kunwarrekenh! Ngurriyimi, ‘Minj nangale ngannan kore kunwarre ngakurduyime.’ Ngudda ngurrimayaliwern dja ngurriyime bu ngudda ngurrikodjkuludjad. Kunmekbekenh ngurriyime, ‘Ngaye wanjh ngadjaldi! Dja minj nangale mak nganerohrok.’ Wanjh ngayime, bonj, ngurridjalwarreworren.

¹¹ Wanjh marneyime bu kunyid ngunmarnebebme kundjalburrikudji, dja minj ngurringehkerren kundulkarre ngudberre dorreng. Ngudda

yiman ngurrikurdang, dja bonj, minj ngurribidyikarmerren. Minj nangale ngurrikarremulewan ba bu ngunbawon ngurrire kamak.”

¹² “Mah! Ngurridjalkurduyimen rowk kore ngurridjare, ngudda nawu ngurrikurdang! Ngudda munguyh ngurriyimi kore ngurriyahwurdni dja mak bolkkime. Adju? Kunubewu ngurrikurdumak? Wardi ngurbenkelehme bininj!

¹³ Ngurridjalborlhmeng kunwarrekenh, dja kuhni wanjh ngurridjalngudjwarreworinj. Yikahwi ngudberre nawu kabirriborlhme mankokkarrngkenh ba bu kabirriyime bu yimankek kabirriyingkihyolme kore yerrekah kakurduyimerran ngudberre kore dirdbubuyika. Wanjh ngurrbendjawa birrimekbe bininj bu ngunbidyikarme!

¹⁴ Dja kawarre! Bedda wanjh kabirrikurung yiman kayime mandalkdarleh. Minj kabirringehkerren kore manbirluworldjen. Yuwn bu bininj kakinje manme kore manmekbe kunak, dja minj nangale kayerrkan kakukkuwan kore manmekbe kunak kunkimuk duninj.

¹⁵ Woybukkih, birrimekbe birrikurdang bininj minj ngunbidyikarme ngudberre. Ngudda munguyh ngurribenmarnedurrkimiri, dja ngurribekbakkani, dja bonj, bedda wanjh ngundidjalbawon dja kabirrire kore bedda kabirridjare. Minj nadjalkudji bedberre ngungehke.”

48

Nawu Yawey Kabenyngkih bengdayhke Nuye Bininj Kore Baleh Kaluk Kabenmarnekurduyimerran

Isaiah 48:1-11

¹ Kandibekka ngudda nawu Jacob ngunkebmawahmeng. Ngudda ngurringeyburren “Israel” dja ngurriburrbun bu Judah ngunkebmawahmeng. Ngudda ngurringeybun Yawey bu ngurriwokkurmerren, dja mak ngurridi yiwarrudj kore kunngey nuye God nawu Israel nuye. Dja bonj! Kunukka wanjh ngurrikowe, dja minj ngurrikurduyime kunmak kore nungka kadjare!

² Ngudda ngurriburlumen bu ngurrimulewarren. Ngudda ngurriyime, “Ngad ngarrihyo kore kunredkunkimuk manbu God nuye!” Dja ngudda ngurriyime bu yimankek ngurridjalwoybukwon Israel nuye God nawu kangeyyo Yawey Narrulkarrekimuk Duninj.

³ Ngaye Yawey kunkare ngaye ngayingkih mulewam bu yerre kurduyimerranj. Ngamulewam ba bu ngurriburrbuyi. Dja kundjalburrikudji ngaye ngamarnbom bu kurduyimerranj.

⁴ Ngaye ngaburrbom bu ngudda ngurrikangerayekni dja minj kandibekbayinj, dja minj mak kandiwokmarrkmayi.

⁵ Kunmekbekenh kunu ngayingkih mulewam kunkareni ba bu ngurriwohburrbuyi dja minj ngurriyimeninj, ‘Kadberre idols marnbom kore kurduyimerranj. Nahni nawu gods kadberre manbu wirilmurrng dja kunduk karrimarnbom, nakka wanjh birrimarnbom rowk bu kurduyimerranj’

⁶ Mah. Ngudda kandingkih bekkang, dja mak kandikurdunang kore ngamarnbom kurduyimerranj. Bolkkime yiddok ngurriyime bu ngaye Yawey ngamarnbom. Bolkkime wanjh ngaye yingkih bengdayhke kunkerrngekenh kaluk yerrekah kayimerran. Kuhni ngabebke manbu warlkawarl kayindi, dja minj ngurriyingkih burrbuyinj.

⁷ Bolkkime ngaye ngamarnbun kayimerran, dja kunkare wanjh burkyak. Ngudda minj ngurriburrrbuyinj, dja yuwn bu bolkkime ngurriyime, 'A ngaleng! Ngad ngokko ngarriburrbom.'

⁸ Ngudda minj ngurribekkayinj dja minj mak ngurrimenmenbekkayinj. Ngudda wanjh ngurribengwarri. Ngaye ngawernhburrbun bu ngudda munguyh kandidjalwokburriwe mak kandikowekowe.

⁹ Yoh, ngayidduy ngudberrekenh. Dja bonj, minj bolkkime bun ngudberre, dja ngaye ngadjaldi ba bu bininj rowk ngandingeyburlume. Dja minj mak ngadjare bularrbun bu yakwon ngudberre."

¹⁰ "Kandibekka. Ngaye ngamarnbom kunrayek ngudberre ba bu rohrokmeng, yiman kayime bininj karung wirlmurrng silver bu kabelewon dja kayimerran silver duninj. Kunmekbekenh ngaye rohrokmeng kunrayek dorrengh.

¹¹ Kuhni ngakurdyuime kore ngaye ngadjare djal ngayeman. Minj nangale ngangeyyolyolme bu kunwarrekenh. Yuwn bu bininj kabirringeyburlume nabuyika, dja ngaye ngadjalkudji ngandingeyburlume."

Nawu Kawohnan Rowk Kabenbebke Nuye Bininj Kore Kabirribongdi

Isaiah 48:12-16

¹² Nawu Yawey kayime, "Kandibekkabekka, ngudda nawu Jacob ngunmawahmeng. Ngudda nawu Israel ngunkebmawahmeng dja ngaye kayhmeng ba bu ngurrimre kore ngaye! Ngaye nawu ngayungkih duninj dja mak nawu ngayerre duninj. Ngaye wanjh!

¹³ Ngaye ngabolkmarnbom kurorre rowk kunbid ngardduk. Ngamarnbom kaddum duninj dja ngawarlahwong kubidkukun ngardduk. Bu ngaye ngakayhme kaddum dja kurorre, wanjh yehyeng rowk ngandiwokmarrkmang."

¹⁴ "Mah, ngudda ngurriwern, wanjh ngurrimirndemornnamerren kore ngaye dja kandibekkabekka. Yiddok nawu idols ngudberre ngundiyingkih mulewam kore ngaye ngakurdyuime? Burrkyak. Ngaye ngadjarrngbom nakudji nabang bininj nawu kangeyyo Cyrus bu nganmarnedurrrkmirri. Nungka wanjh kabenbun nawu birriwarre bininj birrikang Babylon. Nungka kakurdyuime kore ngaye Yawey ngadjare.

¹⁵ Ngaye wanjh ngawokdi, ngaye ngadjalkudji, dja ngadjarrngbom namekbe bininj, dja ngamkan bu nganmarnedurrrkmirri. Wanjh nungka kayakwon rowk kore ngaye ngadjare."

¹⁶ "Mah, ngurrimray darnkih dja kandibekkan. Ngaye minj manmolk ngakurdyuime. Ngaye munguyh ngayingkih mulewarren dja bu kakurdyumerran, wanjh ngaye ngahdi kumekbe." Kuhni rowk nawu Yawey yimeng.

Dja ngaye nawu Isaiah ngayolyolmerren dja ngayime Yawey nawu Kawohnan Rowk nganmunkeweng Namalngmakaykenh nuye dorrengh.

Nawu Yawey Benmarnekarremarnburrinj Nuye Bininj

Isaiah 48:17-22

¹⁷ Kuhni wanjh nawu Yawey kawokdi. Nungka nawu ngungehke, dja nadjalkudji nawu nawernhdjamun God kore Israel. Nungka wanjh yimeng, "Ngaye Yawey nawu God ngudberre. Ngaye bukkabukkan ba bu ngurriburrrbun kore kunmakkenh. Dja mak ngaye bukkabukkan ba bu ngurrire manbolhmak.

18 Dja njalekenh ngudda minj kandibekkayinj bu bukkang mankarre ngardduk? Bu ngudda kandiwokmarrkmayi ngardduk wanjh ngudda munguyh ngurriniwirrinj kamak rowk kunmodmikenh dorrengh. Dja mak ngurridjalmakniwirrinj bininj kore ngame.

19 Bu ngame kandiwokmarrkmayi, wanjh wurdwurd dja mak mawah-mawah ngudberre birriwernniwirrinj yiman kukayalanj kore adjbud, manbu bininj minj kabirrirohrokme. Bedda birridarrkidiwirrinj dja minj birringeyyakwoyinj kore kumirrk ngardduk."

20 Wanjh bolkkime ngurribolkbawo Babylon. Ngurribebmerrimen dja ngurrikelerlobmen! Ngurrirengehere dja ngurrikayhmen kunnjilngmak dorrengh, bu ngurriyime, "Nawu Yawey ngannghekkeng ngad nawu ngarrimarnedurrkmirri, ngad nawu mawahmawah nuye Jacob!"

21 Kunkare nawu Yawey benyormey nuye bininj bu birrirengehrey kore kubolldarleh. Kumekbe kubolldarleh kukkuyak, dja bedda minj birrikombukdowimeninj. Nawu Yawey warddebom kunwardde ba bu kukku bobebmeng borlobmeng bedberre.

22 Nawu Yawey kayime, "Bininj nawu birriwarre, wanjh minj kabirringehme."

49

Bininj Nawu Kabimarnedurrkmirri Yawey Kayolyolmerren

Isaiah 49:1-7

1 Kandibekkabekkan ngudda nawu ngurrihyo djarreh kore kurrula borledmikenh, dja ngudda nawu djarreh ngurrihyo kore kubolkbubuyika. Nawu Yawey ngandjarrngbom bu ngame ngadjaldi kuwarlirng kore ngabangmengalmeninj, dja kunmekbe nganngewong. Dja mak nungka nganmarnbom bu ngamarnedurrkmirri.

2 Nungka nganmarnbom ba bu ngawokdi mandjad duninh bu nganwong nuye kunwok. Nungka nganwarlkkang munguyh kore kubid nuye. Nungka nganmarnbom ba bu ngayimerranj yiman kayime nuye arrow nawu mankebmak, dja nganwarlkkang kore ngalng nawu arrowskenh nuye.

3 Wanjh nganmarneyimeng, "Ngudda nawu yingeyyo Israel, wanjh ngudda kanmarnedurrkmirri ba bu bininj ngandiburlume ngame bu nguddakenh."

4 Kuhni nganmarneyimeng, dja ngame ngayimeng, "Aba! Ngame ngarrurrkmirri kunwern dja bonj, ngadjalbarabom. Ngame ngangudjyakkorrinj bu djal burudjang. Dja bonj, nawu Yawey nungan ngandjalnahnan dja nungka nawu ngardduk God, wanjh yiman ngankarremulewan kore ngarrurrkmirrikenh."

5 Bu kunkare nawu Yawey nganmarnbom kore kuwalirng ba bu ngamarnedurrkmirri. Nungka djareni bu ngame ngabendurndiweyi bininj nawu Jacob benkebmawahmeng ba bu bedda kabirridurnden kore nungka. Nungka djareni bu ngabenmirndemang birrimekbe bininj nawu Israel benkebmawahmeng kore kubolkbubuyika birribebbehdi. Nawu Yawey nganmakwan dja ngangeykimukwong. Nungka wanjh nganwong nuye kundulkarre.

6 Nawu Yawey nganmarneyimeng ngardduk, yimeng, "Minj yiyakwoyi rowk kore kanmarnedurrkmirrikenh, dja ngame ngadjare kunbuyika yihdurrkmirri, dja kunkimuk duninh. Ngudda werkk yibenmarnbun

kunnguya rowk nawu Jacob nuye bininj ba bu kabirriyawoyhngeykimukmen. Bedda nawu Israel benkebmawahmeng nawu ngabennahnann, wanjh yibundurndiwemen kore ngaye. Dja bolkkime ngadjare kunbuyika yikurduyimen, dja kunmekbekenh ngaye marnbun bu yibenmarnebolkwolkan bedberre bininj nawu minj Jews. Kuhni yikurduyime ba bu ngaye ngabennghehke birriwarlahkenh bininj nawu kabirrihni kubolkbubuyika rowk kore kondah kurorre.”

7 Wanjh nawu Yawey wokdanginj. Nungka nawu kabennghehke bininj rowk nawu Israel benkebmawahmeng, dja nungka nadjamun duninj bedberre. Wanjh Yawey bibengdayhkeng namekbe bininj nawu kabimarnedurrkmirri nuye. (Birridjalwern bininj nawu minj Jews kabirriwirrihme dja kabirridjalwarnyak namekbe bininj. Nungka wanjh kabemarnedurrkmirri kings warridj.) Wanjh nawu Yawey bimarneyimeng namekbe bininj, “Kaluk birrimekbe nawu kings wanjh bedda kaluk ngundiburlume bu ngudda yire darnkih, dja nawu princes ngundimarneboddan. Kuhni ngunmarnekurduyimerran bu kunmekbekenh ngaye Yawey minj ngakurren, ngadjalkurduyime kore ngawokkurrmerren. Dja ngaye djarrngbom ngudda. Ngaye nawu God Nadjamun Duninj bedberre nawu Israel benkebmawahmeng.”

Yawey Kayingkihmulwarren Kore Kabennghehke Bininj Nawu Israel Benkebmawahmeng

Isaiah 49:8-26

8 Kuhni wanjh Yawey yimeng, “Kaluk yerrekah kabolkyimerran bu ngaye ngehke ngudda. Ngaye wanjh wokmang kore kanmarnekayhme dja bidyikarrme ngudda. Ngaye werhnahnann ngudda dja kukdjurruddi. Ngaye marnbun ba bu birriwern bininj ngundinan dja kabirriborlhme bu ngaye Yawey ngawokkurrmerrinj. Bu ngudda kanmarnedurrkmirri wanjh kunmekbe ngaye ngabenmarnebolkmarnbun kunbolk bedberre ba bu kabolkmakmen. Ngabenmarnedurndiwe.

9 Ngaye ngabenmarneyime nawu kabirribongdi bininj, ‘Mah, ngurrimdolcka!’ Dja mak ngabenmarneyime bininj nawu kabirridjaldi kore kubolkmunun, ‘Mah! Ngurriaray kamak rowk!’ Dja bedda kabirrire yiman kayime sheep kabirringun kundalk kore manbolh darnkih. Dja ngabenmarnbun yiman sheep bu kabirringalke kundalkmak kore kurrumanbu bolkdarlehi.

10 Wanjh bedda minj kabirrimarrwedowe, dja minj mak kabirrikombukdowe. Bedda minj kabirrikuklardmen kore kubolkdarleh. Nawu kundung minj kabenbun. Nakudji nawu kabenkongibun wanjh kabemirndekanakan kore manbomak kunronj kaborri kungad.

11 Bu kunmekbe kabolkyimerran, wanjh ngaye ngabolhmarnbun kore kuwarddekimuk, dja ngayingkihbolhmarnbun ngardduk manbolh kore ngardduk bininj kabirrirenghehe dja yuwn bu kabirrikolong kore kanjdji.

12 Wanjh yina! Ngardduk bininj kabirrimre djarrehbeh, yika kore kakkibeh, yikahwi karrikadbeh dja mak yikahwi kabirrimre walembeh kore kunbolk Egypt.” Kuhni yimeng nawu Yawey.

13 Mah, ngudda manbu kunngol rowk, wanjh yidjalwayinin yiman kayime bininj kabirriwayini! Dja ngudda nawu kurorre, wanjh yiywayinin dja yinjinlgmaknin yiman bininj. Ngudda kuwarddekimuk rowk, wanjh ngudda warridj ngurriwayinin yiman bininj! Ngurriburru Yawey kabengkangemarnbun nuye bininj, dja kabenkongibun bininj nuye nawu benmarneyidwernmerrinj.

14 Dja bonj, bininj nawu kabirrihni kunred kunkimuk Jerusalem, wanjh kabirriyime, "Aba! Nawu Yawey kandjalbawong, dja kandjalbengmidj-danj!"

15 Wanjh nawu Yawey kayime, "Burrkyak! Yiddok daluk kabibawon barrken nawu kabidjikkawon? Yiddok minj kabimarnedjare nawu bimarnedanginj? Kunubewu yikahwi daluk minj kabinahnan wurdyaw nawu biyawmey, dja ngaye Yawey minj munguyh bawon ngudberre.

16 Ngurrina! Ngaye mandjawakwi ngabimbom ngudberre kungey rowk kore kubidmirrk ngardduk! Ngaye burrbun ngudberre munguyh munguyh, dja minj munguyh bengmidjdan."

17 "Nawu wurdwurd ngudberre kabirrimdurnden werrkwerrk, dja nawu birriwarre bininj nawu ngundiwerhwarrewong, wanjh bolkkime ngundibawon dja kabirrire.

18 Mah, wanjh ngurribolkna kuhri dja kuhri! Ngurrbenna nawu wurdwurd rowk ngudberre kabirrimrindemornnamerren dja kabirrimre kore ngudda. Woybukkih duninj ngawokkurmerren ngudberrekenh, ngaye nawu Yawey dja yingkihmarneyime bu ngudda ngurrbenburlumen nawu wurdwurd ngudberre, dja ngurrbenkarrme dja ngurrbenmulewan bu bedda birridjalmak."

19 "Yoh, kunkare wanjh ngurrimarladjni, dja ngudberre kunbolk wanjh bolkwarreminj. Dja bolkkime wanjh ngurriwerhwarlahmen dja ngurribarlke kunbolk ngudberre! Birrimekbe bininj nawu ngundiwarrewoni, wanjh bonj, kabirrihdjalni munguyh djarreh duninj.

20 Kunkare wanjh ngurridi djarreh kore kunbolk bedberre birridjenbuyika, dja kumekbe wanjh ngurrbenmey wurdwurd. Bolkkime wanjh ngurrbenbekkan ngudberre wurdwurd bu bedda kabirriyime, 'Kondah kore karrihni, wanjh yiman kubolkdjokko! Ngad ngarridjare kandibolkwon manbu kubolkwarlah.'

21 Bu kuhni kabirriyime, wanjh ngudda ngurriyimerren kore kukange, 'Nangale benbornang nahn wurdwurd ngardduk? Ngaye ngabenbalanhmey ngardduk wurdwurd duninj, dja minj ngayawoyhyawmey. Ngaye wanjh bininj ngandiburriweng dja ngandimunkeweng djarreh, dja minj nangale nganmarnedjareniwirrinj. Dja nangale bendjordmiweng nahn wurdwurd rowk? Ngaye wanjh bininj ngandidjalbawong ngadjalkudji, dja nahn wurdwurd balehbeh?'"

22 Wanjh Yawey nawu kawohnawohnan rowk kayime, "Ngurrina! Ngaye ngabenmarnewokmunkewe bininj nawu minj Jews kore kubolkbubuyika. Ngaye ngabenmarnewokmunkewe ba bu birriwarlahkenh bininj ngandibekkan. Dja bedda wanjh kabirrimre kore ngaye, kabindikarreme bebeywurd ngudberre kore kunberl, dja mak kabindiyawmornekan nawu ngalbebeywurd ngudberre.

23 Bu kuhni kamkurduyimerran, wanjh kings duninj bedda kabirrimerran yiman kornhkornkumo bedberre wurdwurd ngudberre, dja ngalbu queens kabirrimerran yiman ngalbabadjan bedberre. Bedda wanjh ngundimarneboddan kumirrk ngudberre, kabirridjalbolknan kanjdji dja ngundiburlume ngudberre. Bu kuhni rowk kayimerran, wanjh ngurriwerhburrbun bu ngaye nawu Yawey, dja bininj rowk nawu ngaye ngandiwoybukwon, wanjh ngaye minj ngabendjalbawon, dja ngabendjalnahan."

24 Kunubewu ngudda ngurriyime, "Aba! bu bininj birribang duninj kabirridjirdmang njalenjale, dja mak kabindibongkarrme bininj nawu bindidarrkidmey, wanjh bonj, minj nangale bininj kabenbebeke njalenjale dja kabengehke bininj'.

²⁵ Wanjh Yawey ngunwokmang, dja kayime, “Yoh, kuhni rowk wanjh kakurduyimerran. Ngaye wanjh ngabenbun birribang bininj nawu ngudda ngundibun. Ngaye ngakukmang manbu birridjirdmey. Dja ngabenbekke nawu wurdwurd ngudberre.

²⁶ Ngaye ngabenmarnbun bininj nawu ngundibun ba bu bedda kabirriburrendeleng, dja kabirringurren kunkanj bedberre, dja mak kabirribongun kunkurlba bedberre yiman kunbang kabirribongun. Bu kuhni ngayime wanjh birriwarlahkenh bininj rowk kore kondah kurorre wanjh kabirriwohburrbun bu ngaye Yawey, dja ngaye ngehke ngudberre, dja ngaye bebke ngudberre kore ngurribongdi. Ngaye wanjh God nawu ngudjikimuk duninjh nuye Jacob.”

50

Nawu Yawey Kabendjawan Nuye Bininj Bu Njalekenh Bedda Birridjal-bodmewong

Isaiah 50:1-3

¹ Nawu Yawey kayime, “Yiddok ngurriburrbun bu njalekenh ngaye munkeweng ngudberre? Yiddok bu djal burudjang? Burrkyak. Ngurriburrbun bininj nawu kabimunkewe ngalbininjkobeng nuye wanjh kabiwon djurra bu kabiyolyolme njalekenh kabimunkewe. Dja ngaye minj ngakurduyimeninj bu munkeweng ngudberre. Minj ngabimbuyinj djurra bu bawongkenh. Wardi minj ngurriburrbun bu ngaye kurrmeng ngudberre kore kubid bedberre birribuyika bininj nawu ngandikarremulewan? Wanjh burrkyak. Ngudda ngurridjalkurduyimi kunwarre kunwern, dja kunmekbekenh kunu ngaye munkeweng ngudberre rowk dja mak ngalabadjan ngudberre warridj.

² Ngaye ngadjareni ngangehkeyi ngudberre, dja ngurriwarnyak-minj. Ngaye mak ngeykayhmeng ngudberre, dja minj kandiwokmayi. Njalekenh? Yiddok ngaye ngangudjwarre bu minj bebkeyi ngudberre? Yiddok ngaye ngarrulkarreyahwurd bu minj ngehkeyi ngudberre? Ngurriburrbun bu ngaye ngarrulkarrekimuk duninjh! Ngaye ngawokkurrmeng dja kurrula yimerranj kubolkdarleh! Ngaye ngamarnbun mankabokimuk bu kadjalyimerran kukayarlanj dja djenj karrowen kore kukkuyak dja kakuknudmen.

³ Ngaye ngamarnbun kunngol kakakyimerranj, yiman kayime bininj kadjongburren kunmadj manbu kundowikenh.” Kuhni kayime nawu Yawey.

Bininj Nawu Kabimarnedurrkmirri Yawey Kayolyolmerren

Isaiah 50:4-11

⁴ Bininj nawu kabimarnedurrkmirri Yawey kayime, “Yawey nawu Kawohrnan Rowk nganbukkabukkang dja nganwokwong, ba bu ngaburrbun kunwok manbu kabenmurrnggrayekwon bininj nawu birringudjwarre. Nungka mak ngandolkkayhwe kunkabelbubuyika dja ngawokbekkabekkan kore kawokdi ba bu ngawernhborlhme.

⁵ Yawey nawu Kawohrnan Rowk nganmayalibayhkeng dja ngaye minj ngawokburriweyi, minj mak ngadjalbodmewoyi nuye.

⁶ Bu bininj ngandiwidjbihkeng kunyarl dorrengh kore kubodme ngarduk, wanjh ngabenbawong birrikurduyimeng. Dja minj ngabenngurdkeyi bininj bu ngandidjaworrkyerrkkeng. Minj mak ngaye ngakebbarrkburri-meninj bu bininj ngandidjekmiwong dja ngandikebnunjweng.

⁷ Dja bonj! Minj ngayemengalme. Yawey nawu Kawohrnan Rowk nungan nganbidyikarme. Kunmekbekenh ngaye ngadjaldi bu bedda ngandidjekmiwon dja minj ngabenmarnemarrkbaworren. Ngaburrbun bu minj nangale bininj nganwodarrewon.

⁸ Yawey kumwam darnkih ngardduk. Kaluk nungka nganmakwan, dja nangale nganwelengname? Nangale bininj nganwiddjung? Mah, kumray nakka ba bu nganekebnarren! Nangale nakka?

⁹ Yawey nawu Kawohrnan Rowk nungan nganbidyikarme, dja nangale bininj nawu nganwarrewan kore kunwarrekenh? Bedda wanjh kabirridjalyakmen rowk, yiman kayime kunmadj nakare kadjalnudmen dja borlborl kahngun."

¹⁰ "Mah! Nangale bininj kore ngudberre kabimarnekele nawu Yawey? Dja nangale mak nawu nganwokmarrkmang ngaye nawu Yawey ngamarnedurrkmirri Yawey? Bininj nawu kabirridjalrengahre kore kukak duninh dja minj kabirrikarme bu kabolkwolkankenh, wanjh nakka birridjalwoybukwo kore kabirridjalburrbun kunngay nuye Yawey, dja kabirridjalkurmerren kore nawu God bedberre."

¹¹ "Kaluk ngurribuyika bininj nawu ngurrikakre ba bu ngurrikurduyime kunwarre, wanjh kandibekka. Ngudda yimankek ngurribirlukan manbu ngudman ngurriwurlhkeng ba bu kukak ngurrire, wanjh ngurridjallay kore ngurrimarnebolkwolkarrimen! Kuhni wanjh ngaye marnekurduyime ngudberre! Ngaye marnbun ngudberre ba bu ngurridjalyo kundjak duninh dorrengh."

51

God Nawu Yawey Kabenkangemarnbun Nuye Bininj Kore Kunred Zion

Isaiah 51:1-8

¹ Nawu Yawey kayime, "Kandibekkabekka ngudda nawu ngurridjare bu ngaye makwan dja marneyime bu ngudda ngurrimak bininj. Ngudda nawu kandiyawan ngaye nawu Yawey. Mah, ngurriburrbu kore balehbeh ngudda ngurribebmeng, dja balehbeh ngurrikang. Ngudda yiman kayime kunwardde manbu ngaye bebkeng kore manwarddekimuk. Ngaye yiman ngawarddedjobjkeng dja kukmarnbom ngudda.

² Mak ngurriburrbu Abraham nawu kornkumo ngudberre, dja mak Sarah ngalbu ngunyawmey. Bu kerrngehkenh ngaye ngakayhmeng nawu Abraham, wanjh nungka nadjalkudji. Wanjh ngaye ngakurduyimeng kunmak dja ngamarnbom bu nungka benkebmawahmeng birridjalmirndewern bininj."

³ "Bolkkime wanjh ngaye Yawey ngakangemarnbun ngudberre rowk nawu Zion ngurrihni. Bu ngabolknan kore ngurrihni, wanjh nganan bolkwarrewarreminj, dja ngaye wanjh kongibun ngudberre. Kaluk ngaye bolkkerrngehme ba bu kubolkdarleh ngudberre kabolkyimerran kunbolk Eden, dja mak manbolkwarre ngudberre kayimerran yiman bu ngaye ngayeman ngarrudji manmekenh dja mandjoleng kawernmerren. Bu kuhni rowk ngayime, wanjh ngurrimarmarr duninh kumekbe, ngurrijilngmak dja kandimanjbun kore ngurriwayini ngardduk."

⁴ "Wanjh kandibekka ngudda nawu ngardduk bininj, ngudda nawu ngurriwern bininj ngardduk, wanjh kandiwokekkan kore ngayime. Ngaye wanjh ngawokmunkewe ngardduk kore kubolkbubuyika. Ngabenbukkabukkan ba bu kabirriwohburrbun bu ngaye wanjh ngadjadme mandjad duninh, yiman bu ngabenmarnebolkwolkan.

⁵ Kuhni wanjh kamre darnkih bu ngaye wanjh ngabennghehke birri-wern bininj kore kubolkbubuyika bedberre, dja ngabenmarnemarnbun mankarre bedberre. Bininj nawu kabirrihyo djarreh duninj kore manyunkurrubuyika, wanjh ngaye ngandimadbun bu ngabenbidiyikar-me ngardduk kunngudj dorrengh.

⁶ Mah, wanjh ngurribolkna kaddum kore heaven, dja mak ngurribolkna kanjdji kore kurorre. Boleh kakurduyimerran? Wanjh kadjalyakmen rowk. Manbu kaddum wanjh kayakmen yiman kundolng kadolngyakmen. Dja manbu kurorre wanjh kadjalwarremen dja kayakmen yiman nakare kunmadj kadjalnudmen. Bu kunmekbe wanjh bininj nawu kabirriini kore kurorre kabirridowe yiman bod nawern kadjalyakayakmen. Bonj, bu kuhni rowk kayimerran, ngaye ngadjalnghehke munguyhmunguyh, dja ngaye ngadjalkurduyime kundjalmak rowk, dja minj ngabawon munguyhmunguyh."

⁷ "Ngudda bininj nawu ngurriburrbun kore kunmakkenh, ngudda nawu ngurrikarme ngardduk mankarre kore ngudberre kukange. Yuwn bu ngurrbenmarnekelemen djal bininj nawu ngundiwirriheme dja nawu ngundiwoyolme kunwarrekeh. Yuwn ngurriwernhkelemen.

⁸ Bedda wanjh kabirridowe. Bedda yiman kayime kunmadj nawu yolk kangun, dja kabirridjalyakmen. Ngaye wanjh ngadjalkurduyime kunmak, wanjh minj kayakmen munguyhmunguyh. Dja bininj nawu ngaye ngabennghehke, wanjh kabirridjalngeheme munguyhmunguyh."

Bu Isaiah Kabidjawan Nawu Yawey

Isaiah 51:9-16

⁹ Ngudda nawu Yawey, wanjh yirrolkka!* Kanbidiyikarmen! Ngudda kanngehke kundulkarre ke dorrengh, yiman bu ngudda bennghehke bininj bu kunkare duninj! Ngudda kunkare yikukdadkjeng bu yibom ngalmekbe mayh ngalwarre dja ngalkimuk, ngalbu ngeyyoy Rahab!

¹⁰ Dja mak ngudda yingan yibolkmarnbom kubolkdarleh kore kubulkayh kurrulum kuburrk, ba bu bininj nawu ngudda yibennghehke wanjh birridjowkkeng!

¹¹ Bininj rowk nawu ngudda yibennghehke, wanjh kabirrimwayinidurn-deng kore kunred Zion, dja bedda wanjh kabirriwernhmarrmarr duninj munguyhmunguyh. Bedda kabirridjalnjilngmak, dja kunjilngwarre kadjalyakmen, minj mak kabirriyawoyhngolekwerren.

¹² God nawu Yawey kayime, "Ngaye wanjh ngadjalkudji kangemarnbun ngudberre. Dja njalekenh ngurrbenkengeme nawu djalbininj? Nakka wanjh kabirridowe yiman kayime kundalk kadarlehen.

¹³ Yiddok kandibengmidjdanj ngaye Yawey nawu marnbom ngudberre? Ngaye marnbom kaddum dja mak kanjdji kurorre, dja njalekenh ngudda ngurridjalkele munguyh bu ngurrbenkengeme birribang bininj nawu ngundidung dja mak kunrayek ngundiwon dja kabirridjare ngundibun? Nakka bonj, minj ngundikilekme, dja ngurridi kamak.

¹⁴ Ngudda nawu ngurribongdi, wanjh darnkih kamre bu ngurribebme ngurrire, dja ngurridjaldarrkid kore kurobbe. Mak ngurrikarme man-wern manme."

¹⁵ "Kuhni ngayime, Yawey nawu God ngudberre. Ngaye ngabobidjihme manbu kurrula ba bu kaborrolkan kunwok kunkimuk dorrengh. Ngaye ngangeyyo Yawey nawu Ngahdulkarrekimuk Duninj.

* 51:9 Nawu Isaiah kabimbun kore nungka kawokdi verses 9-11.

¹⁶ Ngaye ngawokkurmeng ngardduk kunwok kore kurrang ngudberre, dja mak ngaye kukdjurruddi ngudberre kubid ngardduk. Ngaye nawu ngakurmeng kaddum heaven, dja mak ngabolkmarnbom kanjdji kurorre, ngaye wanjh marneyime ngudberre, 'Ngudda wanjh ngardduk bininj!'"

Nawu Yawey Kabenkongibun Nuye Bininj Dja Kabenkangerayekwon

Isaiah 51:17-23

¹⁷ Ngudda bininj nawu ngurrihni kunred Jerusalem, wanjh ngurridolkka! Ngurribidbuyhwerrimen! Ngaye dungi ngudberre dja ngudda ngurribekkarrinj yiman kayime bu ngurribonguneng manbang duninj kore banikkin ngardduk.† Dja ngurriboyakwong mahni manbang rowk manbu ngaye wong ngudberre dja ngurriyimerranj yiman bu ngurri-mayhmeng.

¹⁸ Minj nangale bininj kore ngudberre bebeywurd namakniwirrinj bu ngunkan kubid nuye kore kunmakkenh. Minj nangale nabeywurd nawu ngurridjordmeng namakniwirrinj bu ngunbidyikarmme.

¹⁹ Ngurrikarmme kunrayek bokenh ngunmarnebebmeng. Kunyungkih wanjh birribang bininj ngundibolkwarrewong, dja yerreh birriwern ngudberre wanjh ngurrimarrwedoweni. Aba! Nangale ngunkangemarnbun dja ngunkongibun?

²⁰ Bebeywurd ngudberre kabirringudjyawarren dja kabirrimankan. Bedda kabirringudjyakmen yiman kayime mayh bu bininj kabendubbe-name. Bedda kabirriwernhbekkan Yawey nawu God ngudberre kabendung.

²¹ Mah, wanjh bolkkime kandibekka ngudda nawu kunrayek ngunmarnebebmeng. Kuhni ngunmarnekurduyimerranj, dja ngurrimayah-meng, dja ngaleng yuwn bu kunbangerkenh.

²² Kuhni kayime Yawey nawu Kawohnawohrnran Rowk, nungka nawu God ngudberre, nawu ngunkukdjurruddi ngudberre. Wanjh kayime, "Ngurrina! Ngudda ngurribonguneng manbang duninj kore banikkin ngardduk dja ngurrimayahmi. Ngayime ngaye wernhdungi ngudberre, dja bolkkime ngamang mahni banikkin kore kubid ngudberre, dja yuwn bu ngurriyawoyhbongun kore ngaye ngayiddungeh.

²³ Kaluk ngabennakenwon mahni banikkin kore bininj nawu ngundiwirrihime. Ngabenmulewan bininj nawu ngundimarneyimeng, 'Ngurridjalyuwn kore kurorre ba bu ngundimelme kubodme ngudberre!' Kuhni bu ngurrimarnburrinj yiman manbolh ba bu birrimekbe bininj ngundibodmemelmeng.

52

Nawu Yawey Kabenngheke Nuye Bininj

Isaiah 52:1-12

¹ Ngudda bininj nawu ngurrihni Zion, ngurridolkka! Ngurrimur-rngayeknin! Ngudda nawu ngurrihyo kore God nuye kunredkimuk Jerusalem, wanjh ngurridjongburrimen namakmak kunmadj! Bininj nawu minj kabirriwoybukwon God, dja mak bininj nawu kabirridjare kunwarre, minj kabirriyawoyhngime kore ngudda.

² Mah, ngudda nawu ngurribeybeywurd ngarre Zion, wanjh ngurridolkka kore kundjulng ngurriyerrkan, dja ngurriwemen wirlmurrng

† 51:17 Ngurrina Matthew 26:39-42; John 18:11 51:17 Revelation 14:10, 16:19 52:1 Revelation 21:2,27

chains nawu ngundikomdukkang. Ngurridjalyerrka kore throne ngudberre, ngudda bininj nawu ngurrikang Jerusalem.

³ Ngurribekka kore nawu Yawey ngunmarneyime, “Kerrngehkenh birribang bininj ngundidjalkang kore ngurrbenmarnedurrkmirri, dja minj money ngundimarnekaremulewam ngudberrekenh. Dja gaye ngehke ngudberre, minj money marnekarremulewan.”

⁴ Kuhn warridj Yawey nawu Kawohrn Rowk kayime, “Kerrngehkenh nawu bininj ngardduk birriwam walem bu birriwabmeng kore Egypt. Dja bolkkime bininj birribang nawu birrikang Assyria wanjh kabindibongkar-me ngardduk bininj.”

⁵ Wanjh Yawey kayime, “Adju, baleh gaye ngakurduyime? Nahni bininj ngardduk wanjh birribang bininj bindikang dja minj bindimarnekaremulewayi. Dja nahni birribang bininj kabindimarnewohrn dja kabindidjekmiwon!” Kuhn kayime nawu Yawey. Dja mak yimeng, “Nahni birriwarre bininj wanjh munguyh ngandingeywirrihme ngardduk.

⁶ Bonj, gaye wanjh ngabenbukkabukkan ngardduk bininj ba bu ngandingeyborlhme, dja bu kunmekbe ngakurduyime, wanjh kabirriburr bun bu gaye wanjh ngayingkihyolyolmerren. Woybukkih kunu gayeman.” Kuhn rowk nawu Yawey yimeng.

⁷ Kamak rowk bu namekbe bininj kamre kore kaddum kuward-dekimukbeh, dja nungka kamkan kunwok kunmak. Nungka kahmulewan kunmodmikenh dja mak kunwok kunmak. Kahmulewan kore God kanninghekenh! Nungka wanjh kanbengdayhke bininj rowk kore kunred Zion, dja kayime, “God ngudberre kawohrn rowk, nungka nawu king dunijnh!”

⁸ Ngurrbenbekka bininj nawu kunkakuyeng kabolknanganan kore Jerusalem. Bedda kabirrihnan kunmim bedberre nawu Yawey kamdurdeng kore kunred Zion wanjh kabirridjarrkkayhme wernkih dunijnh kunnjilngmak dorreng.

⁹ Ngudda nawu ngurrihni Jerusalem kore jole bolkwarreminj, wanjh bolkkime ngudda ngurridjarrkwayinin kunnjilngmak dorreng. Ngurriburr bun Yawey ngunkangemarnbom ngudberre nawu nuye bininj, dja ngunnghekkeng ngudda nawu ngurrikang Jerusalem.

¹⁰ Nawu Yawey kanningheke kundulkarre nuye dorreng ba bu birriwarlahkenh bininj nawu kabirrihni kubolkbubuyika wanjh kabirrikurdunan God kadberre bu kanningheke.

¹¹ Mah, ngudda nawu ngurrikanahkan banikkin manbu nawu Yawey nuye, wanjh ngurribemerrimen dja ngurriray. Yuwn bu ngurrikilekme nawu nawarrekenh, dja ngurridjalmarnburrimen bu ngurriyime manbu kundjalmakkenh.

¹² Dja med, yuwn bu ngurrire kungele dorreng. Yuwn bu ngurriburrirlobme. Yawey nawu God nuye Israel ngunmarnedokme, dja mak ngundarnhkadjung ba bu gunnahn.

Kunyid Kawernmerren Namekbe Bininj Nawu Kabimarnedurrkmirri Yawey

Isaiah 52:13-15

¹³ Nawu Yawey kabiyolyolme bininj nuye nawu kabimarnedurrkmirri, wanjh kayime, “Ngurrina, nahni nawu nganmarnedurrkmirri nakka kurdumak. Kaluk nungka kakurduyime bu djal kunmakkenh. Wanjh nungka kaluk kangeykimukmen, dja bininj birriwarlahken kabirriburluburlume.

¹⁴ Bu kunkare wanjh birriwern bininj birrikangebarrheng bu nungka birrikebnang. Kunyiid kunkimuk bikukwarrewong. Minj bininj duninj kuyimeninj. Wanjh kunu bininj minj birriwernhukkuburrknayi kore kukbuykaminj.”

¹⁵ “Bolkkime nungka kabenkukdjuhke kunkurlba nuye birriwern bininj kore kubolkbubuyika rowk. Wanjh nawu kings birrikihkimuk, wanjh nakka kabenmarnbun bu kabirrikangebarrhme dja kabirridjalwokngurdmen. Wanjh kumekbe kabirrinan dja kabirribekkan kore njalehnjale nawu minj korroko birribangmebekkayi dja mak minj birriwobekkayi bu kerrngehkenhni, wanjh kabirrimenmenbekkan.” Kuhni yimeng nawu Kawohrnan Rowk.

53

Mahni Bim Kabiyingkihyolyolme Jesus

Isaiah 53:1-12

¹ Adju! Nangale ngandiwoybukwong bu karrimulewani kunwok nuye God? Mak nangale bininj binang Yawey bu bimarnebukkarrinj kundulka-re nuye dorreng?

² Bininj nawu kabimarnedurrkmirri Yawey djordmeng kore kumirrk nuye, dja Yawey bidjalnahnang. Nungka djordmeng yiman mankolhde manbu kahbebme kore kurorre, dja yiman kayime manmim kayimerran mankolhde kore kubolkdarleh. Nungka kukmakaykenhniwirrinj dja minj kuyimeninj king. Ngad minj karrimarnedjareniwirrinj. Djal burrkyak. Nungka djalkukwarreni.

³ Bininj rowk birriwidnang, dja birrinjirrhmiwong. Nungka mak karrmi kunkimuk kunrayek, dja wernhnjilngwarrewarreni. Ngad wanjh karribodmewong. Minj nangale birridjareniwirrinj bu birrikuknayi, dja ngad kunu karriyimi nungka djal yeng.

⁴ Kaluk nungka djakbekkang kore ngad kadberre kunwarre karrikurduyimeng. Nungka ngorrkang kunnjilngwarre kadberre bu ngad wanjh karridjakbekkayinj. Dja ngad yimankek karrihyimi bu God bihbuni kore nungkakenh, dja biwelengnameng, bibom.

⁵ Dja nakka wanjh ngadkenh kunwarrekenh bu birridulubom. Dja mak kadberre kunwarrekenh bu birriberehmgeng. Wanjh kumekbe kore nungka birribom, wanjh makka ngad kanmarnbun kadberre bu karrikarme God nuye kunmodmikenh. Wanjh kunmorninj nuye kankangemarnbun kadberre rowk.

⁶ Ngad karrihdjalbengmayahmi yiman sheep rerrih. Karrihdjalrenghey bebbehbeh kore karrijdareni bu kunwarrekenh. Dja nawu Yawey bidjadmeng namekbe bininj kore ngadkenh kunwarre karrikurduyimeng, ngad karriwarlahkenh bininj rowk.

⁷ Nungka wanjh yiman mayh nawu lamb bu bininj kabirribun. Bu bedda birriwidjbihkeyi, dja birribuni, nungka minj wokdiwirrinj bu benduyi. Nungka minj kayhmeninj, yiman kayime lamb kore bininj kabirrimuddajke.

⁸ Nawu birriwarre bininj birridarrkidmey, birrimarnekurrij, dja birrikanjcurrmeng bu karrownenkenh. Minj wurdyaw biyawmayinj, dja nangale kabenburrbun nawu mawahmawah nuye. Nungka wanjh doweng, dja darrkiddadjmeng kore bininj kabirridjalnimbi. Ngaye ngardduk

bininj rowk wanjh birrikurduyimi kunwarre dja kunmekbekenh nungka djakbekkang dja doweng.

⁹ Nungka minj nangale bibuyinj, dja minj nangale bikowimeninj. Dja bonj, bu doweng, wanjh birrikukkurmeng kore kabindikududjeng nawu birriwarre bininj. Mak birridudji nungka kore nawu birrikuken bininj bedberre kumidj.

¹⁰ Nawu Yawey nungandeleng yingkihkarremarnburrinj bu bibom nahni bininj dja mak bimarnbom bu wernhnjilngwarreminj. Nungka wanjh karrowen kore Yawey bimarnekarremarnbom ba bu Yawey kanarnebengmidjan kunwarre kadberre. Bonj, wanjh bu naninjnanu bininj karrowen wanjh kadjalyawoyhmimbimen munguyh, mak kabenan nawu kabenkebmawahme nuye. Nungka wanjh kakurduyime dja kayakwon rowk manbu nawu Yawey kadjare dja kabiदनakenwon.

¹¹ Nawu nadjalma bininj ngardduk nawu kanmarnedurrkmirri, wanjh kakangedjakbekkan, wanjh yerre kabolknan kore kabolkwolkayindi kundarrkid dorreng, mak nungka kaburrbun bu minj djalburudjang djakbekkabeckang. Warridj birriwern bininj wanjh kabirriborlhme nungkakenh, dja kunu God kabenmakwan bedberre dja kabiwelengname nahni nadjalma bininj ba bu nungka kangorran bedberre kunwarre.

¹² Wanjh nawu Yawey kahyime, “Nahni nawu nganmarnedurrkmirri kanjkurmerrinj bu kurlbawarrhmeng, dja doweng. Nungka birriwarorinj nawu birriwarre bininj, dja benmarnengorrkang kunwarre bedberre birridjalwern bininj. Nungka mak benmarnewokdi bedberre kore ngaye ngabendjadmekenh. Bu kunmekbekenh rowk kunu ngaye ngabalngeykimukwon, dja ngakurrme kore nawu birrikihkimuk dja nawu birridulkarrekimuk ba bu kamang kunmakmak.”

54

Nawu Yawey Kabenmarnedjare Bininj Nuye

Isaiah 54:1-10

¹ Nawu Yawey kayime, “Ngudda ngardduk bininj kore kunred Zion, ngudda yiman kayime ngalwarlirngwarre daluk, dja wurdyaw yak. Bolkkime wanjh ngurriwayinin bu ngurriwernhnjilngmakmen dorreng! Ngudda yiman kayime daluk minj wurdyaw bibuyi bu karrangenkenh, wanjh bolkkime ngurrikayhmen kunnjilngmak dorreng! Bolkkime ngudda ngurriyimeran yiman kayime daluk ngalbu wurdyawyak bu kabenyawmang wurdwurd dja kabiyurrhke daluk ngalbu nabininjkobeng kabikarme.

² Mah, wanjh ngurriurrrknamen dabburlin kore ngurrihyo dja ngurriwarlahwon. Ngurriwernhnamen kunyar! dja manbu ngurridjabnamekenh ngarre dabburlin.

³ Ngayime bu yerrekah nawu mawahmawah ke kabirriwarlahmen kore kubolkkukun dja mak kore kubolkdjakku. Bedda wanjh kabindibebke birriwern bininj nawu kabirridi kubolkbubuyika ba bu kabirribolkmang bedberre kunredbubuyika dja kabirriyo munguyh kumekbe.”

⁴ “Yuwn bu ngurriyawoyhke! Ngudda minj ngurriyemengalme, dja minj birribuyika bininj ngundidjekmiwon. Kaluk ngurribengmidjan kunwarre ngurriyimi bu ngurringudjbangni. Minj mak ngurridjalburrbun bu ngudda kunkareni ngurrikamarrdjukunni.

⁵ Bolkkime wanjh God nawu ngunmarnbom ngudberre wanjh ngunmey dja yimerranj nabininjkobeng ke! Nungka kahngeyyo Yawey nawu Narrulkarrekimuk. Nungka nawu Nadjalkudji Nawernhdjamun Duninj nuye Israel, wanjh nungan ngungehkheng ngudberre. Nungka wanjh God duninj nawu kabenmarnewohrnan birriwarlahkenh bininj kore kurorre rowk kabirrihni.”

⁶ Nawu ngudda ke God kayime, “Ngudda yiman kayime ngalyawk ngalbu nabininjkobeng birra dja bidjalbawong dja kuhni bu wernhn-jingwarreminj duninj. Bonj, Bolkkime nawu Yawey ngunkayhme dja mak ngunkimang ngudberre yiman kayime bininj kabikayhme ngalbinin-jkobeng ngalbu korroko bibawong.”

⁷ Nungka nawu Yawey kayime, “Ngaye bawong ngudberre bu kundjald-edjumbung, dja bolkkime ngadjare bu ngurrimdurndeng kore ngaye, dja ngaye wernhmarnedjare!

⁸ Ngaye ngayidduy ngudberrekenh dja ngakebborledkerrinj ba bu minj karrikebnarren. Dja bolkkime ngaye wernhkongibun ngudberre, dja minj yawoyhbawon. Ngaye wanjh wernhmarnedjare munguyh. Kuhni ngayime Yawey nawu nehke ngudberre.”

⁹ “Ngaburrbun bu kunkare Noah darrkiddi, dja ngaye ngawokkurrmer-rinj. Ngayimeng, ‘Yuwn bu ngayawoyhmunkewe kundjurrh kunkimuk bu ngabenkebhgakke bininj kondah kurorre.’ Wanjh bolkkime ngaye ngawokkurrmerren bu minj ngayawoyhyiddung ngudberre, dja minj munguyh ngaye yawoyhbun ngudberre.

¹⁰ Mahni kuwarddekimuk, wardi kawarddedeldelme, dja kunubewu mandulum rowk kadjalyakmen, wanjh djalbonj, ngaye marnedjare dun-injh ngudberre, dja ngardduk kunwok kore ngawokkurrmerrinj, kore kunmodmikenh ngardduk ngamulewarrinj, wanjh kahdjaldi munguyh.” Kuhni rowk yimeng nawu Yawey, dja nungka ngundjal marnedjare dja ngunwernhkongibun.

Nawu Yawey Kabenmarneyingkihkarremarnburren Bininj Nuye Nawu Kabirrihni Jerusalem

Isaiah 54:11-17

¹¹ Nawu Yawey kayime, “Ngudda bininj nawu ngurrihni kunredkimuk Jerusalem, ngudda ngunmarneyidwernmerrinj dja ngurridjalkangewarre duninj. Minj nangale ngunbidyikarmeninj. Ngaye wanjh kange-marnbun ngudberre. Ngaye ngayawoyhmarnbun Jerusalem manwardde-makkaykenh dorrengh ba bu ngurridjaldi kamak rowk.

¹² Ngaye ngamarnbun walls dja gates ba bu Jerusalem kayimerran kururkmakkaykenh, manwarddemak dorrengh manbu kahbamebame.

¹³ Dja ngaye bukkabukkan rowk ngudberre bininj nawu ngurrihni Jerusalem ba bu ngurridjaldi kunmodmikenh dorrengh.

¹⁴ Bininj rowk kore ngudda wanjh birrimak, dja kabirridjalkurduyime kunmak, dja kunmekbekenh ngurrimurrngayekmen. Minj ngurriya-woyhkelemen, dja minj nangale kabirrimre bu ngundiwarrewon.

¹⁵ Bu bininj birribuyika kabirrimre kabirridjare ngundibun, wanjh djal bedman, minj ngaye ngabenmunkewe, dja bedda wanjh kabirribarabun, kabirridowerren.”

¹⁶ “Kandibekka! Ngaye wanjh ngabenmarnbom bininj nawu kabir-ridurkimirri kunak dja wirlmurrng dorrengh, nawu kabirrimarnbun mandjawk manbu kabirriburrenkenh. Dja mak ngaye ngabenmarnbun

bininj nawu soldiers dja bedda kabirrikan mandjawakkimuk ba bu kabindibun bininj.

¹⁷ Dja bolkkime bu bininj kabirrimre dja kabirridjare ngundibun ngudberre mandjawak dorreng, wanjh kabirribarabun. Bininj nawu ngundiwiddjung, wanjh ngurriwokdurndiwe bedberre dja ngurrbenngur-dke. Kuhni rowk ngunmarnekurduyimerran ngudberre ngudda nawu kandimarnedurrkmirri ngaye nawu Yawey. Ngaye wanjh bidyikarme ba bu ngurriwinhme munguyh. Kuhni rowk wanjh ngaye Yawey ngawokkurrmerrinj.”

55

Yawey Nawu Kawohrnan Rowk Kadjare Kabennahn Nuye Bininj

Isaiah 55:1-13

¹ Yawey nawu Kawohrnan Rowk kayime, “Ngudda nawu ngurrikombuk-dowen wanjh kandibekka! Ngurrimray dja ngurribongun kukku manbu ngaye bowon ngudberre. Dja mak ngudda nawu minj ngurrikukkarme money, ngurrimray ngurribayahme manme dja ngurringu manbu ngaye won ngudberre bu djal burudjang. Ngurribayahmen manbu wine dja milk ngardduk. Kaluk makka minj ngurrikarremulewan.

² Njalekenh ngurridjalkukwe nawu money bu ngurridjalbayahme manwarre manme? Dja njalekenh ngurridurrkmirri ba ngurribayahme manbu minj ngunworrkniwon ngudberre? Mah, wanjh kandibekka ba bu ngurrikurduyime kore ngaye ngayime ngudberre ba kunukka ngur-ringun manbu manmakmak manme. Kuhni wanjh ngurrikangemarmarr duninjh.”

³ “Kandiwozbekka dja ngurrimray ngaye kandiyyika. Kandibekkabekka ba bu ngaye won kundarrkid ngudberre! Ngaye wanjh marnewokkur-merren ngudberre, dja mahni kunwok kadjaldi munguyh munguyh. Ngaye marnedjare ngudberre munguyh munguyh yiman bu kunkare ngaye ngamarnewokkurrmerrinj nawu David.

⁴ Ngurrina! Ngaye ngamarbnom David bu nganmarneyolyolmeng dja benmarneyimeng birriwarlahkenh bininj. Ngaye ngarrulkarrewong dja ngangeykimukwong nuye bu kabenmarnewohrnawohrnan birridjalwern bininj kore kubolkbubuyika.”

⁵ “Wanjh woybukkih ngudda ngurrbenkayhme nawu kubolkbubuyik-abehe bininj minj bolkkime ngurrbenburrbun. Kaluk birriwern bininj nawu minj ngurrbenburrbun, wanjh bu bolkkime bedda kaluk kabir-riwrlobmerren dja ngurriwarorren bu ngayekenh. Ngaye wanjh Yawey ngudberre God, dja ngadjalkudji ngadjamun duninj ngudberre ngudda nawu Israel ngunkebmawahmeng. Dja ngaye wanjh marnom ngardduk kunmakmak dorreng bu ngurrimak dja ngurringeykimuk.” Kuhni rowk yimeng nawu Yawey.

⁶ Mah, wanjh ngurriborledmen nuye nawu Yawey dja ngurridin yiwar-rudj. Ngurrikayhmen nungka bu darnkih kahdi, ba ngunbidyikarme ngudberre.

⁷ Bininj nawu kunwarre kabirrihkurduyime wanjh nakka birringurd-men. Mak birriwarre bininj wanjh birribawo kore kabirrihburrbun kunwarre. Bu bedda kabirrikangeborledkerren nuye nawu Yawey nawu God kadberre, wanjh nungka kabenkongibun dja kabenmarnebengmidjdan bedberre kunwarre rowk.

⁸ Wanjh Yawey kayime, “Ngaye kunmayali ngardduk minj karohrok manbu ngudda ngudberre kunmayali, ngaye minj karrirohrok. Ngaye ngakurduyime kunbuyika duninj, dja ngudda ngurridjalkurduyime ngudberrekenh.

⁹ Manbu kaddum duninj kungol, wanjh djarreh, dja kunmekbe kayime manbu kore ngaye ngamayalimarnburren wanjh yurrhke ngudberre, dja minj nangale bininj ngaye nganerohrok. Ngudda ngurrire kuhri kuhri, dja ngaye wanjh ngadjalre kore ngaye ngadjalkudji ngadjare.”

¹⁰ “Manbu ngardduk kunwok makka yiman kayime mandjewk dja snow kamankan kaddumbek bu kabolkdjuhke kurorre. Minj kabarabun. Wanjh munguyh kamarnbun bu kamkolhdebeberren, wanjh kadjordmerren manne dja manmim kabalmarnbuyindan ba bininj kabirringun, dja mak kabirridudjen manbu manmim.

¹¹ Wanjh kunmekbe yiman kayime manbu kunwok rowk ngardduk bu ngawokdi. Wanjh mahni kunwok ngardduk kakurduyime kore ngadjare, minj kabarabun bu kamdurndeng kore ngaye. Mahni kunwok ngardduk karrurrkimirri dja kayakwon kore ngaye ngayingkihkarremarnbom. Ngawokmunkewerren, wanjh kuninjkuu kakurduyimerran rowk.”

¹² “Wanjh ngudda nawu bininj ngardduk, wanjh ngurribebme kore ngurribongdibeh dja ngurrire kunnjilngmak dorrengh. Ngaye ngamre bebke ngudberre ba bu ngurrimdurndeng kunmodmikenh dorrengh. Manbu manduluhdulum dja kunwarddekimuk nakka yiman ngundimarnewayini ngudberre, dja kundulk rowk yiman kabirribiddowkme!

¹³ Kore manmirrhyimirrhyi bolkkime kamirnderri, wanjh kabolkyimerran ba kadjordmerren manbu manmakkaykenh kundulk. Bu manmirrhyi kahdalkdi manbu kinj, wanjh manngarremak kadjordmerren kumekbe. Kakurduyimerran ngudberre ba kandiwernehburrbun munguyh ngaye nawu Yawey. Bu munguyh munguyh kandidjalburrbun bu kunmekbe kandikurdunan.” Kuhni yimeng nawu Yawey.

56

Nawu Yawey Kabenmarnedjare Birriwarlahkenh Bininj Rowk

Isaiah 56:1-8

¹ Kuhni nawu Yawey kanmarneyime kadberre, “Ngurridjalkurduyimen kore mandjadkenh, dja mak kore kunmakkenh. Kaluk darnkih kabolkyimerran bu ngaye wanjh ngamre ngehke ngudberre, dja kuhni kandinan ngaye nawu ngadjalmak duninj.

² Bininj nawu kuhni munguyh kabirridjalkurduyime wanjh ngaye ngabenmarnekurduyime kunmak bedberre. Bininj nawu kabirriwernehburrbun manbu kunbarnangarra Sabbath ngardduk, dja minj kabirribaworren bu kabirriwarrewon mahni kunbarnangarra, wanjh ngaye ngabenmarnekurduyime kunmak bedberre.”

³ “Bininj nawu birrimwam birriraworrinj ngardduk bininj wanjh yuwn bu kabirriyime, ‘Aba! Nawu Yawey minj kanbawon ngaye bu ngarriraworren nuye bininj!’ Dja bininj nawu bindikornamdadjkeng dja wurdyawyak, wanjh nakka yuwn bu kabirriyime, ‘Aba! minj ngaye ngabenkebmawahme! Ngaye ngawarre!’

⁴ Kuhni nawu ngaye Yawey ngayime birrimekbe bininj, ‘Ngudda nawu ngundikornamdadjkeng, bu ngurriwernehburrbun ngardduk Sabbath kunbarnangarra, dja mak bu ngurridjalkurduyime kore ngaye ngadjare, dja mak ngurriwernehkarme kore ngaye ngawokkurrmerren,

⁵ wanjh ngaye ngeykimukwon ngudberre kore ngardduk Temple ba bu bininj ngundungeyburrbun munguyh. Kuhni wanjh kunkimuk ngayime, dja bu ngurrbenbornan bebeywurd dja ngalbebeywurd, wanjh djal kunyahwurd! Ngaye ngeywon ngudberre kungey manbu minj munguyh kayakmen.' " Kuhni yimeng nawu Yawey.

⁶ Nawu Yawey kabenyolyolme birribuyika bininj, kayime, "Ngaye ngadjare bininj kabirrimre kore ngaye. Nawu birridjenbubuyika bininj, bu bedda kabirrikurrmerren kore ngaye, dja kabirridjare ngandimarne-durrkmirri dja ngandimarnedi yiwarrudj, dja bu bedda kabirriwern-hburrbun kunbarnangarra manbu Sabbath dja minj kabirriwarrewon mahni kunbarnangarra, dja mak bu kandidjalwoybukwon kore ngaye ngawokkurrmerren,

⁷ wanjh ngaye ngabenkan kore kuwarddekimuk kubolkdjamun ngardduk. Dja mak ngaye ngakimang kore kunrurrk ngardduk manbu yiwarrudjkenh dja ngabennjilngmarnbun kumekbe. Bedda wanjh ngandiwon namakmak, dja ngandimarnekinje mayh kore altar ngardduk, wanjh ngaye nganjilngmakmen bedberre. Kuhni ngayime dja ngadjare birriwarlahkenh bininj kabirrimre kubolkbubuyikabeh kore ngardduk kunrurrk ba bu bedda rowk kabirridi yiwarrudj."

⁸ "Ngaye nawu Yawey dja ngadjalworhran rowk. Wanjh ngayolyolmerren bu ngaye ngabenmirndemang bininj nawu Israel benkebmawahmeng kore kubolkbubuyika kabirrimbedbehi. Kaluk ngaye ngabenmirndemang birribuyika bininj warridj dja ngabenkurrme bu kabirriraworren dja kabirridjarrkmirndewernmerren nawu korroko birrimirnderri." Kuhni rowk nawu Yawey kayime.

Bu Yawey Kabendung Yikahwi Nuye Bininj Nawu Birrikihkimuk

Isaiah 56:9-12

⁹ Nawu Yawey kakayhme kayime, "Ngudda mayh nabang nawu ngurrikang kabbal dja mak nawu ngurriyo kore manberrk, wanjh ngurrimray, ngurrbenbaye yikahwi bininj ngardduk nawu birriwarre.

¹⁰ Ngaye ngabenkurmeng yikahwi bininj ba bu kabindinahnan birribuyika ngardduk bininj rowk, dja bonj, bedda minj bindinahnai. Bedda wanjh yiman kayime kabirrimimubbe, dja kabirrimayaliyak. Bedda minj kabirribolknan, yiman kayime duruk nawu wokyak, bu kabirridjaldjare kabirribukirrinan dja kabirridjalkodjkeyo munguyh.

¹¹ Bedda wanjh yiman kayime duruk nawu kabirridjalgun munguyh dja minj kabirriworrrhmiworren. Dja mak bedda yiman kayime birrimayaliyak shepherds nawu kabirridjalnahnarren kore djal bedman.

¹² Bedda yiman kayime kabirribebbehkayhme, 'Mah! Karrire karribomang manbang ba bu karribongun manbowern! Yoh, bolkkime kamak, kaluk malaywi wanjh kawernhmak!''

57

God Nawu Yawey Kabendung Bininj Nawu Kabirrimarneboddan Idols

Isaiah 57:1-13

¹ Bu birrimak bininj kabirriyakmen, yiddok ngurridjawarren bu njalekenh? Burrkyak. Bininj nawu birrikongiwersn wanjh God kabenkan kore kunwarre yak. Dja minj nangale kamenmenbekkan bu njalekenh.

² Bininj nawu kabirridjalkurduyime kunmak, wanjh kabirringimen kore kunmodmikenh. Minj kabirridjaldowe bu kabirridjalyakmen. Kunmekbe kabirrire kore kabirringehme.

³ Wanjh nawu Yawey kayime, “Ngudda nawu ngurridjalkurduyime kunwarre, wanjh ngurrimray! Ngudda nawu ngurrikurdang, dja ngudda nawu ngurrikadjurren daluk dja bininj kore kunwarrekenh, dja mak ngudda nawu ngurridjalwarre bininj nawu birriwern ngundiweykan kore kunwarrekenh.

⁴ Nangale ngurridjekmiwon, dja mak nangale ngurrimarnedjenwelhme bu ngurrimarneyime kunwarre? Ngudda wanjh ngurrikurrehkurren dja mak ngurriwokburriwe nawu God.

⁵ Ngudda munguyh ngurriwurlhme bu ngurridjaldjare kunwarre, dja ngurridjirdmarren dja ngurriyo darnkih kore idols kabirridjabdi. Ngudda ngurrire kanjdji kore kuwarddebarrarn dja ngurribenbun wurdwurd ngudberre bu ngurrimarneboddan nawu idols. Kuhri kuhri ngurrikurduyime!

⁶ Ngudda ngurrikolung kanjdji kore kuwarddebarrarn dja ngurrimoyh-mang kuwardde manbu mankilehkileh, dja ngurrikan ngurrimarnbun idols. Nakka wanjh ngudda ngudberre gods. Woybukkih ngudda ngurribenmarneyakarrbun wine manbomak, dja ngurribenmarnekurme manme. Kuhni rowk ngurriyime, dja baleh ngudda ngurriyime, yiddok ngaye makwan ngudberre? Burrkyak.

⁷ Ngudda ngurriwarddebidbun kaddum dunijnh kore kuwarddekimuk ba bu ngurridjirdmarren bininj dja daluk. Ngayime kumekbe warridj ngurrimarneboddan kore idols ngudberre.

⁸ Dja ngaye ngaburrbun kore kurehred ngudberre ngurribimbarnna-meng nawarre bim nawu idols bimbuyindi. Ngaye kandibawong dja ngurrimadjyerrkerrinj kore manbalabala ba bu ngudda yiman ngurrikuknarren nawu idols. Ngudda wanjh ngurrikurmerrinj kore idols.

⁹ Dja mak ngurribarurren manbu oil, dja mak manbu mankalkkid-manjmak, dja ngurrire ngurrimarneboddan kore Molech, nawu idol ngudberre. Ngudda wanjh munguyh ngurriwayawawan nakerrnge nawu idols, ngurriyawan djarreh kore kubolkubuyika, dja mak ngurriyawan kanjdji kuroorre kore kundowikenh!

¹⁰ Kuhni ngurriyimi, dja wanjh ngurringudjyakworrinj. Dja minj ngurrikayhmeninj ‘Bonj, karribarabom!’ Ngudda ngurringudjworrinj dja minj mak ngurribawoyi.”

¹¹ “Nangale nabuyika god ngurrkengeme kunkimuk ba bu ngaye Yawey kankoweng? Ngudda wanjh kandidjalbengmidjdanj dja minj kandiya-woyhburrbuyinj. Minj mak ngurriburrbuyinj kore kukange ngudberre. Yiddok ngaye ngadjalwoyakiwirrinj bu kunkuyeng? Yiddok kuhnikenh bu minj kandikengeme ngaye?”

¹² Wanjh bolkkime ngaye djadme ngudberre kore kurobbe. Ngaye rohrokme ngudberre kore baleh ngurriyime kunmakkenh ngudberre, dja kore baleh yiman ngurrikurduyime, dja bonj, ngaye wanjh warrewan ngudberre.

¹³ Bu kandimarnekayhme dja kandimarrkdjawan bu ngaye bidyikarme, wanjh ngaye marneyime kunubewu nawu nawern idols ngudberre minj ngundibidyikarme. Dja burrkyak! Kunmayorrk kabenkan djarreh nawu idols ngudberre. Kunmayorrk kunyahwurd wanjh kabenkukburriwe. Dja bininj nawu ngandiwoybukwon ngaye, wanjh kabirridjaldarrkid kunbol bedberre dja ngandimarneboddan kore Temple ngardduk.” Kuhni rowk yimeng God nawu Yawey.

Nawu Yawey Kadjare Kabenmarnebengmidjan Kunwarre Bedberre Nuye Bininj

Isaiah 57:14-21

¹⁴ Nawu Yawey kayime, “Ngadjare ngardduk bininj kabirrimre kore ngaye, dja minj njale kabendabke. Ngurriyingkihbolhmarnbu.

¹⁵ Ngaye Yawey dja ngadjalwohrnawohrnan rowk. Ngaye ngangey-djamun. Ngaye God duninj, dja ngaye ngadjaldarrkid munguyh munguyh. Ngahdi kore kubolkdjamun kaddum heaven, dja mak ngaye ngahdi kukange bedberre bininj nawu kabirriwarnyakhmulewarren kore kunwarre, dja minj bedman kabirriburlumerren. Ngaye wanjh ngabengkemarnbun bedberre bininj, dja ngabennjilngmarnbun ba bu minj kabirrimarrkbaworren.

¹⁶ Ngaye kerrngehkenh ngabengolekwong nawu bininj ngardduk dja minj ngadjare bu ngabengkangewarrewon bedberre. Kunmekbekenh kunu minj ngaye munguyh ngabendung dja ngabenwidjdjung bedberre.

¹⁷ Bedda woybukkih birriyimi kunwarre kore birridedjwarlahworrinj. Wanjh ngaye ngayidduy dja ngakebborledkerrinj bedberre. Ngabenbuni dja bedda birridjalkurduyimi kunwarre.

¹⁸ Ngaye ngabekurdunang bu kunwarre birriyimeng, dja med, bolkkime ngaye ngadjaldjare bu ngabenmarnbun. Ngaye wanjh ngabenganakan kore kunmakkeh dja ngabenbidyikarme. Dja mak ngaye ngabengkangemarnbun bininj kore Israel nawu kabirrimarnenalk-bun kundowikenh.

¹⁹ Bu kuhni ngayime, wanjh birrimekbe bininj nawu Israel benkeb-mawahmeng ngandiburluburlume. Ngaye ngabenwon kunmodmikenh ngardduk bedberre nawu darnkih kabirrihni dja mak nawu djarreh.

²⁰ Dja nawu birriwarre bininj, bedda yiman kurrula bu kunmayorrk kabobidbuyhwe, kundjulng kanjdjibeh dorreng. Bedda minj kabiringehme.

²¹ Dja ngaye nawu Yawey ngayime bu nawu birriwarre bininj minj kabirrimang kunmodmikenh ngardduk.”

58

Bu God Benbengdayhkeng Nuye Bininj

Isaiah 58:1-12

¹ Nawu Yawey bibengdayhkeng Isaiah, bu yimeng, “Yikayhmen wernkih duninj! Yuwn bu yidjalwokyak dja yuwn bu djal yeledj yiwokdi. Ngadjare yibenbengdayhkemen ngardduk bininj nawu ngandiwokweng. Birrimekbe nawu Jacob benkebawahmeng, wanjh yibenbenmarneyimen bu bedda birrikurduyimeng kunwarre.

² Bedda kandikowe. Bedda ngandiyawan kunbarnangarra rowk, dja kabirridjare yimankek kabirriborlhme kore ngayekenh, yiman bininj nawu woybukkih kabirrikurduyime kunmak dja minj ngandibawon ngardduk mankarre, ngaye nawu God bedberre. Bedda kabirriyime bu yimankek kabirridjare ngaye ngabenwon mankarre mandjad, dja mak yimankek kabirridjare ngandimarneboddan kunnjilngmak dorreng. Kuhni rowk kabirriyime bu djal kundangwi.”

³ “Bedda wanjh kabirriyime, ‘Ngad wanjh ngarribawong manme ba bu ngarridi yiwarrudj kore ngudda, dja njalekenh minj kanbekkayi? Ngad

wanjh ngarridjalngeyyahwurdworrinj, dja ngudda minj kannayi. 'Kuhni kabirriyime.'

"Bonj. Ngaye Yawey ngabenmarneyime bedberre, 'Yoh, ngudda ngurridahmerren dja bu djalburudjang! Bu kuhni kunbarnangarra bu ngurriyime, wanjh ngurridjalkurduyime kunbuyika warridj, kuhni kore ngurridjare. Ngudda ngurrbenwiddjung bininj nawu ngundimarnedurrk-mirri!

⁴ Yuwn bu manme ngurridahmerren, dja ngaleng ngurridjalyidwern-worren, dja ngurridjaldangwerren, mak ngurriburren. Bu kunmekbe ngurridjalyime, wanjh minj ngaye bekkabekkan bu kandidjawan.

⁵ Kunubewu ngurriyime bu ngaye ngadjare ngurridjaldahmerren kunkodjekudji, dja ngurridjalyahwurdworren. Kunubewu ngurriyime bu ngaye ngadjaldjare bu ngurridjudkurlime yiman kundalkkuyeng, dja wardi ngurrikeyo kore kunmadjwarre, dja ngurrikukbarurren manbu kunburlewi. Kunubewu ngurriyime bu nakka wanjh ngaye Yawey ngadjare ba bu nganjilngmak? Dja burrkyak.

⁶ Ngaye wanjh kunbuyika ngadjare. Kandibekkabekka. Ngadjare ngurrbenbidyikarrmen bininj nawu ngurrbenwarrewon, birrimekbe nawu ngurrbenmarnekurduyimeng bu minj mandjadkenh. Bedda yiman kayime kabirrikomdukkayindi wirlmurrng dorreng. Wanjh ngadjare ngurrbenbekkemen bininj nawu ngurrbenbongkurmeng nawu minj kunwarre birriyimeninj.

⁷ Dja warridj ngurrbenwonowon manme ngudberre ba bininj nawu kabirrimarrwedowe bininj ngurridjarrkngun. Ngurrbenkima nawu birrimarladj dja nawu birriredyak bininj kore ngudberre. Mak ngadjare ngurrbenjdongbu nawu birrimadjyak, dja yuwn bu mak ngurrbenbodmewon bininj nawu ngurrimud duninj."

⁸ "Bu kunmekbe rowk ngurrikurduyime, wanjh yiman kayime ngurribolkwolkan yiman kamdungbebme, dja ngurrimakmen werkkwerkk. Bu ngurrire balehbaleh, wanjh birriwern bininj ngundiwobekkan bu ngudda ngurrimak, dja mak ngaye nawu Yawey, wanjh wernhnahnan ngudberre ngayekenh kunmakmak dorreng.

⁹ Bu kunmekbe ngurrikurduyime, dja bu kandikayhme, wanjh kumekbe kabolkyime ngaye Yawey wanjh ngundiwokmag. Bu kandikayhme ngurriyime 'Kanbidyikarrmen!', wanjh ngaye ngayime, 'Ngaye kondah!'"
"Bu ngurringurdmen kore ngurrbenwarreworren, dja mak ngurribawo kore ngurriwiddjurren dja kore ngurriyolyolmerren kunwarrekenh,

¹⁰ dja bu ngurrbenmarnekurmerren dja ngurrbenbidyikarme bininj nawu kabirrimarrwedowe, dja bu ngurrbenbidyikarme bininj nawu kabirribongdi, bu ngurrikurduyime kuhni rowk, wanjh ngudda ngurriyimerran yiman kumunun kabolkwolkan kore kukak, dja mak ngunmarnekurduyimerran yiman kunkakkuyeng bu kayimerran kunkodjke duninj.

¹¹ Dja warridj ngaye nawu Yawey wanjh munguyh bolhbukkabukkan ngudberre ba bu ngurrire kamak rowk, dja won ngudberre manme kore kubolkdarleh. Ngaye wanjh murrnggrayekwon ngudberre. Ngudda ngurridi yiman kayime kubolkmak kore manme karrudjindi dja kakarme kukku kunwern, dja warridj ngurridi yiman kayime kungad manbu minj kaboyakmen.

¹² Yikahwi bininj kore ngudda wanjh ngurrimarnmarnbun kore kunrurrk yakayakminj bu kunkare. Ngudda ngurriyawoyhmarnbun manbu kunrurrkmak. Bininj ngundimarneyime 'Nawu kabirrimarnbun walls

manbu warnamyoy bakkabakmeng, dja kabirrirurrkmarnbun kururkwer-
 ern ba bininj kabirrihyo." ' Kuhni yimeng nawu Yawey.

Bu Karriwokmarrkmang Yawey Nuye Mankarre Manbu Sabbathkenh

Isaiah 58:13-14

¹³ Nawu Yawey kayime, "Bu ngudda ngurriyime kunkodjke manbu Sabbath bu kunkodjedjamun duninj ngardduk, wanjh yuwn ngurrikurduyime kore djal yingan ngurridjare. Bu ngudda ngurriwernhnjilngmarnburren bu kunkodjke Sabbathkenh wanjh kandimarrkma mankarre ngardduk manbu Sabbathkenh. Bu kunmekbe kunkodjke wanjh yuwn bu ngurrire kore ngurridjare, yuwn bu mak ngurridjalborrke dja yuwn bu mak ngurridjalyolyolme kunwarre.

¹⁴ Bu kuhni ngurriyime, dja ngurriwokmarrkmang mankarre ngardduk manbu Sabbathkenh, wanjh kandimarnenjlngmakmen kore ngaye. Wanjh ngaye ngeykimukwon ba birriwarlahkenh bininj rowk ngundiburlume, dja ngudda wanjh ngurrimang mandjalmak kore mahni kunbol kore ngabolkwong Jacob nawu ngunkebmawahmeng. Ngaye nawu Yawey ngayimeng rowk kore kurrangbeh ngardduk."

59

Nawu Isaiah Kabendjadbonghme Yawey Nuye Bininj

Isaiah 59:1-8

¹ Kunubewu ngudda ngurriyime yimankek Yawey nakka minj kundulkarre kakarrme dja minj ngunnehke. Dja mak wardi ngurriyime yimankek nungka bengwarr dja minj ngunbekkan kore ngurrikayhme bu ngurridjare nungka ngunbidyikarrme.

² Burryak. Nungka ngunbekkan dja minj ngunwokmarrkmang, dja njalekenh? Kuhni kayime ngudberre kunwarrekenh. Ngudda ngurrikurduyimi kunwarre, dja kuhni wanjh ngurrikurrmerrinj djarreh kore God kahdi. Ngudda ngurrikurduyimi kunwarre dja kuhni wanjh ngurrimarnbom nungka ngunmarnekebborledkerrinj.

³ Ngudda wanjh kunkurlba ngurribiddjuhkerrinj. Ngurriwowerrewor-
 rinj. Ngudda wanjh ngurrikurrehkurrinj dja mak ngudda manmol kore ngurridjalyolyolme kunwarrekenh.

⁴ Minj nangale bininj ngudberre kadjare ngurridjadmerren bu djal mandjadkenh. Minj nangale bininj kayolyolmerren kunwoybuk dorrengh. Ngudda ngurriwern ngurridjalyolyolmerren bu djal burudjanken, dja minj kunwoybuk ngurrimulewarren. Ngudda wanjh ngurridjare ngurri-
 marnbun kunyid dja ngurrikurduyime kunwarre.

⁵ Ngudda yiman kayime nayin nabang nawu kawirlarrkngukden. Bininj nawu kangun mahni wirrarrk wanjh karrown. Bu mahni wirrarrk kabakme, wanjh nayin yaw kambebme. Ngudda yimankek kardab nawu kamarnbun red ngarre.

⁶ Dja kunyarl ngarre kardab minj kamak bu bininj kamarnbun kun-
 mad. Ngudda yimankek ngurridjongburren kunwarrewi, dja minj kuhni ngurriwarlkarren! Burryak. Kuhni rowk ngurriyime wanjh kunwarre duninj, dja munguyh ngurriburren kundowiken dorrengh.

⁷ Ngudda wanjh ngurrirobmen kore ngurrikurduyime kunwarre, dja ngurribenkurlbawon bininj. Ngudda ngurriburrbun kore djal kunwar-
 rekenh munguyh. Bu baleh yarrka ngurrire, wanjh ngurribolkwarrewon.

⁸ Ngudda minj ngurriburrbun kunmodmikenh, dja mak minj ngurrire kore mandjadkenh. Ngurribolhwarrewon manbolh ba kabolhmarnburren

barlibarli, dja bininj nawu kabirrire kumekbe wanjh kabolkmayahme dja kunmodmikenh yak.

Bu God Nuye Bininj Kabirriwarnyakhmulewarren.

Isaiah 59:9-15a

⁹ Yawey nuye bininj kabirriyime, “Ngahwurd! Bokkime karriwarreworren, dja minj mandjad karridjadmerren. Minj karriburrbun bu karrikurduyime kunmak. Karriyawan kore kanmarnebolkwolkayindi, dja larrk, kadjalbolkmunun kore ngad. Karridjalle kore kukak dja kunwarrekenh.

¹⁰ Ngad karriyimerranj yiman karrimibunje bininj! Karridjalbidwayhme ba bu karrire yeleyedj. Bu karrire kunbarnangarraburrk, bonj, minj karriwernholknan dja karridjalmanan. Ngad yiman karringudjyak bininj, yiman bu karridjaldarrkid.

¹¹ Karridjalkangewarre, dja karringeyngeyime yiman mayh nawu kamarrwedowe. Ngad karriyawayawan kunmak, dja bonj, minj karridjadmerren bu mandjad dorreng. Karridjare bu nangale kangehke, dja bonj. Larrk.

¹² O Yawey, ngarriwarnyakhmulewarren bolkkime. Ngarrikurduyimi kunwarre kunwern kore ngudda kankurdunang, dja kunmekbekenh ngudda kanwarrewan. Ngad munguyh ngarridjalburrbun ngadberre kunwarre, dja ngarriyimulewarren bu woybukkih, ngarridjalbakkeng ke mankarre.

¹³ O Yawey, ngad wanjh ngundikoweng dja ngarridjalwokburriweng ngudda ke mankarre rowk. Ngad wannjh ngundibodmewong ngudda nawu God ngadberre. Ngad wanjh ngarrikurrehkurren bu baybaywi ngarrikarremarnburren, dja mak ngarriarnburren bu ngarribakkabakke ke mankarre rowk.

¹⁴ Kunmekbekenh minj minj ngarridjadmerren mandjad dorreng kore court, dja ngarriwarnyak kunmak. Minj ngarridjare kunmak. Minj ngarriyolyolme kunwoybukkenh, dja ngarridjalkurren munguyh.

^{15a} Ngad minj ngarriyawan kunwoybuk, dja ngarridjalwirrihime bininj nawu kawarnyak kunwarre kayime.

Nawu Yawey Karremarnburrinj Bu Kabengehke Nuye Bininj

Isaiah 59:15b-21

^{15b} Nawu Yawey bennang nuye bininj, dja nang bedberre kunwarre bu minj birridjadmerreninj kore mandjadkenh. Wanjh kunmekbekenh nungka yidduy.

¹⁶ Nungka wanjh kangebarrhmeng bu minj nangale bininj kabendiyikarme nawu birrimarladj dja nawu birringudjwarre bininj. Wanjh nungan kumwam dja benbidyikarmeng. Wanjh nungka bengehke keng bedberre, kunngudj dja kunmak nuye dorreng.

¹⁷ Kuhni wanjh yiman berrekaldjongburrinj kunmakkenh nuye, dja mak yiman kodjdjongburrinj nuye kahnehkekenh. Dja mak nungka djaldjareminj bengehkeyi bininj nuye dja kabendung bininj nawu bindiwarrewong bedberre. Nungka wernhdjareminj bu kayimerran kamak rowk, dja kuhni yiman kayime djongburrinj nawu kunmadj nakimuk nuye.

¹⁸ Nawu Yawey kabenbun bininj rowk nawu kabirriwirrihime dja kabirrikurduyime kunwarre. Kabenbun birriwarlahkenh rowk birrimekbe bininj kore kubolkbubuyika warridj.

¹⁹ Kunmekbekenh wanjh birriwern bininj kabirrikelemen nawu Yawey, yiman bininj nawu kabirrihni djarreh kore karrikad, dja mak kore koyek. Bedda wanjh kabirringeykengehmen nuye dja mak kabirriburlume nuye kundulkarre. Wanjh nungka kamre yiman kayime kundjurrhkimuk bu nungka kabuhme dja kaboburriwe.

²⁰ Wanjh nawu Yawey kayime, “Ngaye nawu ngehke ngudberre bu ngamre kore kunredkimuk Zion. Ngudda nawu mawahmawah nuye Jacob, bu ngurriwarnyakkumulwarren kore kunwarre ngudberre, wanjh ngaye ngamre ngehke. Kuhni ngaye ngayime, ngaye nawu Yawey.

²¹ Mak ngaye Yawey marneyime bu ngawokkurmerren ngudberre. Ngaye ngakurrmeng Namalngmakkaykenh ngardduk ngudberre dja minj ngunbawon. Ngakurrmeng ngardduk kunwok kore kurrang ngudberre, dja kore kurrang bedberre wurdwurd ngudberre. Bolkkime ngurrikarme ngardduk kunwok, dja kaluk yerrekah nawu ngurrbenkebmawahme, wanjh bedda warridj kabirridjalkarme, dja munguyh munguyh kahdi kunwok ngardduk.” Kuhni rowk yimeng nawu Yawey.

60

Bu Yawey Kabolkwolkan Kukadje Jerusalem

Isaiah 60:1-22

¹ Ngudda nawu ngurrihni kunred Jerusalem, wanjh ngurridolka! Ngurridin kore kumwolkayindanj ngudberre, yiman bu ngurrikukbame! Nawu Yawey nungan nuye namakmak ngunmarnebolkwolkang.

² Ngurrina! Birribuyika bininj kore kubolkbubuyika bedberre wanjh kabirridjaldi kunkak duninjh manbu kabenbalhme. Dja ngudda ngurri-nan Yawey nuye kunmakmak duninjh bu nungka ngunmarnebolkwolkang yiman kayime nawu kundung kawernhbame.

³ Kaluk bu kunmekbekenh wanjh birriwern nawu birridjenbubuyika bininj kabirrimre kore ngudda, dja kings bedberre wanjh kabirrinan kore Yawey kawernhbolkwolkan ngudberre yiman kamdungbebme kore kunbarnangarrakerrnge ngudberre.

⁴ Wanjh kunu ngurribolka! Ngurrbennan kabirrimirndewernmerren nawu kabirrimre kore ngudda. Nawu bebeywurd ngudberre kabirrimre kore djarrehbeh. Dja ngalbebeywurd ngudberre warridj kabirrimre, dja nawu Yawey kabenngorran yiman kayime wurdwurd.

⁵ Kuhni rowk ngurrikurdunan, dja ngurrimarmarr duninjh. Ngudda ngurrideldelme bu kunnjilngmak dorreng. Kaluk birribuyika bininj kabirrimkan namakmak bedberre ba bu ngundiwon. Kabirrimkan kunwernkenh bedberre kore kabbala ba bu ngundiwon.

⁶ Kaluk ngurrimirndemang mayh nawu camels nawern, nawu kabir-rimirndekan kore kubolkbuyika yiman Midian dja Ephah. Birriwern bininj kabirrimre kore kunbolk Shebabe warridj, kabirrimyikan wirl-murrng gold dja mankalkkidjmanjmak ba bu ngundiwon. Bedda wanjh kabirrimulewan kunwok kunmak bu kabirriyolyolme kore nawu Yawey kurduyimeng.

⁷ Wanjh nawu Yawey kayime, “Nawu mayh sheep namirndewernkenh kore kunbolk Kedar, wanjh ngurrimirndemang rowk! Nawu sheep narangem rowk kore Nebaioth, wanjh kabirrimre ba bu ngudda kandi-marnekinje kore manbu altar ngardduk. Dja wanjh ngaye nawu Yawey ngamarnbun ngardduk Temple kunrurrk bu mandjalmakkaykenh dun-injh.”

8 “Adju, njale ngahnan karenghe yiman kunngol kaddum kabirringolre, dja yiman kayime doddorrok bu kabirridokme kore rehred bedberre?”

9 Nahni kabbala manbu kunred Tarshishbeh, dja nawern kamre kore manyunkurr djarrehbeh, kamkan silver dja gold dja mak wurdwurd ngudberre kabirridahkendi. Bedda wanjh kabirrdjare ngaye ngandingeykukenwon, ngaye Yawey nawu God ngudberre ngudda nawu Israel ngunkebmawahmeng, dja ngaye ngadjalkudji ngadjaldjamun duninj ngudberre. Ngaye wanjh ngeykimukwong dja mak kukenwong ngudberre.”

10 “Bininj nawu birrikang kubolkbubuyika wanjh kabirrimre ngundimarnerrkmarnbun manbu kawarnamyoy kore kunredkimuk ngudberre. Nawu kings bedberre wanjh bedda ngundimarnedurrkmirri ngudberre. Yoh, ngaye korroko dungi ngudberre dja buni kore ngayidduy ngudberre. Bonj. Bolkkime wanjh ngaye wernhkongibun ngudberre.

11 Ngudda bolkkime ngurridangbawon kurrangkimuk kore ngudda kunredkimuk. Kamak bu kadjaldangmarrhmiyindi kunbarnangarra dja kunkak. Wanjh bininj nawu birridjenbubuyika kabirrimngimen kore ngudda wanjh kabirrimkan ngundiwon kunmakmak bedberre kore birribolkbubuyikabeh. Nawu kings bedberre warridj ngundiburlume yiman bu ngurrbenyurrhke rowk.

12 Bu yikahwi bininj kore kubolkbubuyika ngundiwirrihme dja minj mak ngundimarnedurrkmirri, wanjh bedda kabirribularrbuyindan.”

13 “Ngabenmarnbun bininj bu kabirrirurrkname kunredkimuk Jerusalem, dja mak kabirrimarnbun manbu Temple ngardduk bu kakerrngehmen. Bedda wanjh kabirrimkan kundulk manbu manmakmak kore kunbolkkimuk Lebanonbeh, ngayime manbu pine kundulk, dja mak juniper dja cypress kundulk. Bu birrimkebe bininj kabirriyakwon rowk kore kabirrirurrkmarnbun, wanjh birriwarlahkenh bininj ngandibolkburlume kore ngaye ngahdi.

14 Nawu mawahmawah bedberre bininj nawu ngundiwirrihme, nakka wanjh ngundimarnebodan kore kurrenge ngudberre. Bininj rowk nawu boyen ngundiyojolmi kunwarrekenh wanjh kaluk kabirrimre dja ngundimarnebodan. Dja birrimkebe bininj wanjh kabirribolkmulewan bu Jerusalem wanjh nawu Yawey nuye kunredkimuk, dja mak kabirriyime bu Zion wanjh kunred nuye nawu nadjalkudji nadjalmak duninj God bedberre bininj nawu Israel benkebmawahmeng.”

15 “Ngudda wanjh kunkuyeng ngurridaldi dja ngurrinjlngwarreni, dja minj nangale mak birrimrawinj bu ngundidjahwoyi. Dja mak bininj birriwern ngundidjalwirrihmi. Bolkkime wanjh ngaye kukmarnbun dja ngeykimukwon ba bu ngudda dja nawu ngurrbenmawahme, wanjh ngurridaldi kunnjilngmak dorreng bu munguyh munguyh.

16 Binihbininj kore kubolkbubuyika dja mak kings bedberre wanjh ngundinahnan, yiman kayime ngalbadjan kayawnahnan ngarre wurdyaw. Wanjh kunu ngurriburrbun bu ngaye Yawey ngungehkenh ngudberre. Ngaye God ngudberre nawu Israel ngunkebmawahmeng, dja ngawernhdulkarrekimuk. Ngaye wanjh bebkeng ngudberre kore ngurribongdi.”

17 “Bolkkime ngurrikarrme djal bronze, wanjh ngaye won gold. Bolkkime ngurrikarrme iron, wanjh ngaye won ngudberre silver. Dja bu ngudda ngurridjalkarrme kundulk, wanjh ngaye won ngudberre wirlmurrng bronze. Bu ngurrikarrme djal kunwardde, wanjh ngaye won ngudberre manbu iron. Ngaye won ngudberre ngardduk kunmodmikenh

bu yiman ngunmarnewohrnan, dja mak ngaye won ngudberre ngardduk kundjalmak, ba bu yiman ngunmarnewohrnan mandjad duninj.

¹⁸ Bu kuhni ngayime, wanjh kunyid kadjalyakmen kore kubolkwarlah ngudberre. Dja minj mak ngurriyawoyhbolknan bu karurkbakbakme kore ngurrihyo. Ngaye wanjh munguyh kukdjurruddi yiman kayime kawarnamy ngudberre. Ngudda wanjh ngehke ngudberre, dja ngundidjalburlume. Kumekbe wanjh kandiburluburlume dja ngurriyime bu ngaye nahang dja ngehke ngudberre.”

¹⁹ “Ngaye nawu Yawey bolkwolkan ngudberre munguyh munguyh, dja nawu kundung dja dird, nakka bonj, ngaye ngadjalkudji bolkwolkan ngudberre kore kunbarnangarra dja mak kore kunkak. Ngaye God ngudberre wanjh kandidjalburluburlume.

²⁰ Minj manbu kundung kayawoyhyibme dja minj mak dird karowen. Ngaye nawu Yawey ngadjalkudji bolkwolkan ngudberre munguyh munguyh. Dja minj mak ngurriyawoyhnjilngwarremen.

²¹ Bu kuhni kayimerran, wanjh ngudda ngurriwern bininj ngurridjalkurduyime kunmak, dja munguyh ngurriwernhbolkkarme kore ngurrihdi. Ngudda ngardduk bininj rowk. Ngaye marnbom kunbidwi ngardduk, dja mak ngaye kurrmeng kumekbe yiman bu mimdudji ngudberre. Kuhni ngakurduyimeng ba bu birriwarlahkenh bininj rowk wanjh ngaye ngandiburluburlume.

²² Wanjh ngurriwernmerren dja mak ngurrimurrngrayekmen. Yikahwi namud kore ngudberre bininj, nawu birridjalmirndekudji, wanjh bedda kabirrimirndewernmerren duninj. Bu kabolkyimerran kore ngaye ngayingkihkarremarnbom, wanjh werkkwerrk ngaye ngadjalkurduyime rowk.”

61

Nawu Yawey Nuye Messiah Yingkihyolyolmerrinj

Isaiah 61:1-3

¹ Yawey nawu Kawohrnan Rowk nganwong Namalngmakkaykenh nuye. Nungka wanjh ngandjarrngbom dja nganmunkeweng kore birrimarladi bininj ba bu ngabenbengdayhke. Ngabenmarneyime kunwok kunmak, dja mak ngabengkangemarnbun bininj nawu birrikangewarre, dja mak ngabenmarneyime bininj nawu kabirribongdi bu kabirribebme dja kabirrire. Ngaye ngabenmarneyime bininj nawu kabirribongdi kore kubolkmunun duninj bu bedda kabirribebme.

² Nawu Yawey nganmunkeweng ba bu ngabenbengdayhke bininj rowk bu nungka bolkkime kamre kabenbidyikarme. Nungka wanjh kabenbun bininj nawu kabindibongkarme God nuye bininj. Dja mak ngaye ngabengkangemarnbun bininj rowk nawu kabindimarnenalkbun bininj nawu birridoweng.

³ Dja mak ngaye ngabennahnan bininj nawu kabirrihni kunred Zion bu kabindimarnenalkbun nawu birridoweng bininj. Ngaye ngabennjilngmarnbun bu kabirrimarrmarr dja yuwn bu kabirriyawoyhkukbarurren kunburle dorrengh. Ngaye ngabengkangemarnbun yiman bu ngabenkodjelde mankalkidmak ba bu minj kabirriyawoyhkangewarreworren. Ngaye ngabenmarnbun bu bedda munguyh kabirriburlume nawu God, dja minj kabirrimarrkbaworren kore kabirridjalnjilngwarre. Bu kunmekbe wanjh bedda yiman kayime kundulkmak manbu Yawey karrudjeng dja

kabirridjalkurduyime kore kunmakkenh nuye. Kunmekbekenh wanjh birriwarlahkenh bininj kabindinan Yawey nuye kunmakmak duninj, wanjh bedda kabirriburlume.

Isaiah Kabenmarneyime Kunwok Kunmak

Isaiah 61:4-11

⁴ Kaluk Yawey nuye bininj kabirriyawoyhrurkmarbun kunrurk kunwern manbu rurrkwarrheng rowk kore kunkare birriyoy. Bedda kabirriyawoyhmarbun kunredkimuk manbu bolkwarreminj kore nawu mawahmawah bedberre birriyoy.

⁵ Nawu Yawey kayime, “Bu kunmekbe kayimerran, wanjh birrid-jenbuyika bininj ngundimarnedurrkmirri ngudberre. Bedda kabirrim-irndenahnan ngudberre mayh, dja mak kabirribolknahan ngudberre kunbolk manbu manmekenh karrudjindi, dja kore manrakel manbu grapes karrudjindi, wanjh bedda ngundimarnedurrkmirri.”

⁶ “Ngudda wanjh bininj ngundingeybun ngudberre priests duninj nuye nawu Yawey. Bedda ngundingeybun ngudberre ‘Nawu ngurrimarne-durrkmirri God kadberre.’ Ngudda ngurrimang manmakmak bedberre birribuyika bininj kore birribolkbubuyikabeh, dja ngurriburlumerren bu Yawey ngunkukenwon.

⁷ Ngudda minj ngurriyawoyhyeme, dja minj nangale ngundiyawoyhd-juhbn ngudberre. Ngaye won ngudberre manbu ngardduk kunmakmak. Ngurridjalyo kore kunbolk ngudberre, dja ngurridjalmarmarr duninj munguyh munguyh.”

⁸ “Ngaye nawu Yawey, ngaye ngadjare bu ngudda ngurridjadmerren bu djal mandjackenh kore mankarre, dja ngadjalwarnyau bu bininj kabirribangmen dja kabindiwirrihime birribuyika bininj, dja kabirrikurduyime kunwarre. Ngaye minj ngakurren, dja woybukkiah ngaye ngabenkarremulewan nawu bininj ngardduk. Ngaye wanjh ngabenmarnewokkurmerren bedberre manbu kunwok ngardduk bu kahdjaldi munguyh munguyh.

⁹ Kaluk yerrekah nawu mawahmawah bedberre kabirringeykimukmen kore kubolkbubuyika rowk. Birriwern bininj kabindiburrbn bu bedda ngardduk bininj. Birriwern bininj kabindinan wanjh kabindiolyolme bu kabirriyime, ‘Yoh, bedda wanjh nawu Yawey benmarnekurduyimeng kunmak!’ ”

¹⁰ Nawu Messiah kayime, “Ngaye ngamarnenjlngmakmen wernkih duninj nuye nawu Yawey. Kore kukange ngardduk wanjh ngamarnen-jlmgmarnburren God ngardduk. Nungka wanjh nganmarnbom ba bu ngabenengehke, dja ngadjalkurduyime kundjalmak duninj nuye. Nungka yiman ngankukmarnbom bu ngakukmakkaykenh kore nungka kadjare, yiman kayime nawu nakaliyi dja ngalbininjkbong nuye kabenemarnburren kunmadj dja njalenjale kore kabenemarrenkenh.

¹¹ Kaluk Yawey nawu Kawohrnan Rowk kabenmakwan bininj nuye, ba bu bedda kabirriburlume kore kubolkbubuyika rowk kabirrihni. Manbu mankolhde kabebme kore kunkulk, dja manme kawernhmerren kore manmim karrudjindi. Wanjh karohrok, nawu Yawey kakurduyime rowk kore nungka yingkihwokkurmerrinj.”

62

*Yawey Kabenmarnedjare Nuye Bininj Nawu Kabirrihni Kunredkimuk Zion**Isaiah 62:1-12*

¹ Ngaye ngadjare ngabenkangemarnbun bininj nawu kabirrihni Jerusalem. Minj ngadjalni ngawokyak bedberrekenh bininj nawu kabirrihni Zion*. Ngaye ngadjare Yawey kabengehke nuye bininj nawu kabirrihni kunmekbe, dja kabenmarnbun kabirriyimerran birridjalmak ba bu birriwarlahkenh bininj kabindinan. Bedda wanjh kabirriyimerran yiman kabindibolkwolkan birribuyika bininj rowk.

² Kaluk birriwarlahkenh bininj rowk ngundinan bu God ngunmakwan ngudberre. Nawu kings rowk bedberre birriwarlahkenh bininj wanjh ngundinan bu ngudda yiman kayime ngurriwerhnmakkaykenh. Nawu Yawey nungan ngungeybun bu ngungeywon kungey kunkerrnge ngudberre.

³ Yawey nawu God ngudberre ngunkarrme kubid nuye yiman kayime king kakarrme manbu kadjongburrenkenh nuye, dja makka wanjh manmakkaykenh.

⁴ Bininj ngundimulewam bu yiman ngundingebyom, "God bendjalbawong bedberre!" Mak birribolkolyolmi ngudberre kunbolk bu birriyimi, "Mahni kunbolk yiman kayime daluk ngalbu nabininjkobeng bidjalwarnyakminj!" Kuhni birriyimi. Dja bolkkime wanjh bedda kabirriyime kunwok kunbuyika bu kabirriyime, "God nakka kabenmarnedjare yiman nakaliyi kabimarnedjare nuye ngalbininjkobeng!" Nawu Yawey ngunmakwan ngudberre dja ngunmarnebolknahnan, wanjh kunmekbekenh birribuyika bininj ngundimarneyime, "Bedberre kunbolk yiman yerrih ngalbininjkobeng ngalbu kahnjilngmak kore nabininjkobeng ngarre."

⁵ Kaluk nawu God ngudberre nawu ngunmarnbom dja ngunmarnedjaremen bulkkidj duninj yiman kayime nawu ngudjbang bininj kabimang daluk nuye bu kunnjilngmak dorrengh.

⁶ Ngaye ngabenkurrmeng bininj nawu ngundimarnenahnan ngudberre ngudda nawu ngurrihni kunredkimuk Jerusalem. Ngadjare bedda kabirridjaldi yiwarrudj kunbarnangarrakuyeng dja mak kunkakkuyeng, munguyh munguyh. Minj kabirringurdme. Bedda munguyh birrimay-alidurndiwe kore nungka wokkurmerrinj.

⁷ Kabirridjarokdi dja minj kabirringurdme kaluk bu Yawey kabolkmarnbun Jerusalem, ba bu birriwarlahkenh bininj rowk kore kondah kurorre kabirribolkburlume kunredkimuk Jerusalem.

⁸⁻⁹ Nawu Yawey wokkurmerrinj kunmekbekenh dja kaluk nungka kakurduyime kundulkarre nuye dorrengh. Nungka yimeng, "Bonj, ngaye minj ngabenbawon nawu birriyidko bininj ngudberre kabirrimre kabirringun ngudberre manme dja kabirribongun ngudberre wine. Burkryak, minj kabirriyawoyhkurduyime nawu birridjenbubuyika bininj. Ngudda nawu kunrayek ngurridurkmirri, wanjh ngudda ngurringun dja ngurribongun, dja kunmekbekenh ngurriburlume nawu Yawey. Ngudda nawu ngurrimoyhmang manbu manme, wanjh ngurringun. Ngudda nawu ngurrimoyhmang manrakel manbu grapes dja ngurrimarnbun manbu wine, wanjh ngudda ngurribongun kuberrkkah kore ngardduk Temple manbu kunrurk mandjamun." Kuhni yimeng nawu Yawey.

¹⁰ Ngudda nawu Jerusalem ngurrihni, ngurribebmerrimen kore kunredkimuk dja ngurriyingkihbolhmarnbu bedberre birrimirndebuyika bininj

* 62:1 Zion karohrok Jerusalem.

nawu kabirrimhdurnderren. Mah, dja birrimdjalngimen rowk kore gates ngarre kunredkimuk Zion! Ngurriburriwemen kunwardde manbu kabanmarnebolhwarrewon. Mak ngurriwayhkemen manburra nawu banner ba birriwarlahkenh bininj kabirrinan kore kubolkbubuyika rowk.

¹¹ Ngurrina! Nawu Yawey mulewarrinj nuye dja benmarneyimeng bininj rowk kore kubolkbubuyika rowk. Wanjh yimeng, “Ngadjare bininj kore kunredkimuk Zion bu kabirribekkan maninjmanu kunwok. ‘Ngudda nawu yiman kayime wurdwurd nuye Zion, Ngurribolkna! Dja ngurrina nahni nawu ngungehke ngudberre wanjh kamhre! Nungka kamre dja ngunrohrokme, kaluk ngunwon kunmakmak nawu kakarrme.’”

¹² Birrimekbe bininj wanjh kabirringeykendan, “Bininj nawu Yawey nuye, nawu nungka bennehkeng.” Dja ngudda ngurringeykendan, “Nawu God kabennahan, nawu kabirrihni kore kunredkimuk manbu God minj bolkbawong.”

63

God Kabenbun Birriwarre Bininj Dja Kabengehke Bininj Nuye

Isaiah 63:1-6

¹ Bu karridjwarren, “Nahni nangale bininj kamhre kore kunredkimuk Bozrahbeh kore kunbolk Edom? Adju! Nangale nakka? Nungka kahdjong-buyindi manbu kurlbakurlba manburra namakmak. Dja kamhre kundulkarre kunkimuk dorreng.” Wanjh nawu Kawohrnan Rowk kayime, “Nakka wanjh ngaye bu ngawokdi! Ngaye ngadjalwernhdulkarrekimuk duninh ba ngabengehke rowk. Ngaye ngawinhmeng.”

² Wanjh ngayimeng, “Aba, dja njalekenh nawu manburra ke kurlbakurlba, yiman kayime ngudda yimelmeng grapes bu kunkalkkidkenh?”

³ Wanjh nawu Kawohrnan Rowk yimeng, “Ngaye ngadjalkudji ngahrey bu ngamelmeng, minj nangale bininj nawu birrikang kubolkwarlah rowk nganbidyikarmeninj ngardduk. Ngayiddungi dja kunmekbekenh ngawernhmelmeng dja ngabenkukduwimeng kore kurorre. Wanjh kunkurlba bedberre ngandelkdelkkeng kore kunmadj ngardduk.

⁴ Ngaye ngakarremarnburrij bu kabolkyimerran bu ngabendjadme dja ngabendung nawu birriyidko bininj, dja ngabengehke nawu bininj ngardduk.

⁵ Wanjh ngaye ngabolknang, dja minj nangale bininj nganbidyikarmeninj. Ngakangebarrhmeng bu minj nangale nganedjarrkdiwirrinj. Kaluk ngadjalkudji ngakurduyimeng kundulkarre ngardduk warridj dja nakka kunkangeyid ngardduk bu ngamurrngrayekworrinj.

⁶ Wanjh ngamelmeng kubolkbubuyika kunwern, nawu ngabenydduy. Ngayydduy bedberre, wanjh ngabenmarnbom bu birrikodjmayahmeng, dja ngabolkdelkdelkkeyi kunkurlba bedberre kore kurorre.” Kuhni yimeng nawu Kawohrnan Rowk.

Ngaye Ngaburlume Yawey God nawu Kankongibun

Isaiah 63:7-14

⁷ Mah. Wanjh ngaye munguyh ngayolyolme Yawey nawu mimkongiwarn duninh dja kanmarnedjare munguyhmunguyh. Dja mak ngayolyolme kore baleh nungka kurduyimeng ba bu karriburlume. Ngaburlume Yawey nawu kanmarnekurduyimeng kunmak kunwern kadberre, ngad nawu

Israel kankebmawahmeng. Nungka wanjh kankongibun kadberre dja kannahnan dja munguyh kandjalmarnedjare duninj.

⁸ Nawu Yawey yimeng, "Woybukkih bedda wanjh ngaye ngardduk bininj wanjh wurdwurd ngardduk dja minj ngandikowe." Kuhni yimeng Yawey dja nungka wanjh benneghkeng mawahmawah kadberre.

⁹ Bu bedda birridjakkekkang, nakka nungka warridj djakkekkang, wanjh nungka kumwam kore bedda dja nungan benneghkeng. Nungka benmarnedjareminj dja benkongibom, wanjh benbebkeng kore birri-bongdi, benwayhkeng dja benngorrkang. Kuhni kurduyimeng bedberre bu kunkareni.

¹⁰ Dja bonj. Bedda birridjalmunkebawong, dja mak birrinjilngwarrewong nawu Namalngmakkaykenh nuye. Wanjh kunmekbekenh nungka yimerranj bedberre nawu yidko, dja benbuni bu birriburri.

¹¹ Bu kunmekbe yimerranj, wanjh birrimkebe bininj nuye birridjalwohburrbuni bu kunkarekenh, kore Moses darrikidni dja nawu benkani. Dja birridjavarreni, "Kab, baleh God nawu kankang kore Red Sea Moses dorrengh, yiman kayime shepherd kadberre? Baleh God nawu kanmarnemunkeweng Namalngmakkaykenh nuye bu karrihdjarrkdi?"

¹² Baleh nungka nawu bibidyikarrmeng Moses kundulkarre duninj nuye? Dja nawu bolarlmeng manbu kurrula ba bu bininj rowk kabirridjalburlume nungka bu munguyh munguyh?

¹³ Baleh nungka nawu kankang kandji kore kurrula ba bu karridjowkkeng yiman kayime djarrang karlobmerlobme kamak rowk kore kabbal, dja minj karrimankayi."

¹⁴ Nawu Namalngmakkaykenh nuye Yawey benkang nuye bininj kore birringehmeng dja birrihni kamak rowk, yiman bulikki kahmirnderri kore kubolkmakkaykenh. Ngudda nawu Yawey kumekbe kurduyimeng ba bu birriwarlahkenh bininj ngundingeyburlume.

Bu Karringeykayhmen Yawey Nawu God Kadberre

Isaiah 63:15-19

¹⁵ "Yawey, kanna kore heavenbeh, kore ngudda yihni. Ngudda nawu yiyerrkan kore kaddum, kore ngudda ke kunbolk kunmakmak kadjalbame! Mah! Yidjalngudjworrimen! Ngudda yiddok nawu yidulkarrekimuk duninj? Njalekenh ngudda minj kanyawoyhkongibun, dja minj kandjalnahnawon.

¹⁶ Ngudda nakka ngad ngadberre Kornkumo! Nawu Abraham nakka kunubewu minj nganburrbun ngadberre bu mawahmawah nuye. Dja nawu Israel kunubewu minj kankukburrnkan ngadberre bu ngad nawu ngarrimud nuye. Dja ngudda Yawey wanjh kornkumo duninj ngadberre. Ngad wanjh ngundingeyburrbuni bu kunkare dja mak bolkkime ngudda nawu kanngehkeng.

¹⁷ Nawu Yawey, njalekenh ngudda yiman kanmunkewe bu ngarribawon manbolh ke. Mak njalekenh bu ngudda yiman kankangerayekwon ba bu minj ngundimarnebodan? Mah! Yimdurnden kore ngad dja kanbidyikarrmen ngad nawu ngundimarnedurrkmirri, ngad djal ngudda ke bininj bu kunkare dja mak bolkkime.

¹⁸ Ngad nawu ngudda ke bininj wanjh ngarribolkkarrmi kubolkdjamun ke dja ngarribolknahnani bu kundjaldedjumbung. Dja bonj, bolkkime nawu ngarriyidko birribolkwarrwong kunmekbe kunbolk ke.

¹⁹ Ngad wanjh ngudda ke bininj bu kunkare mak bolkkime, dja bedda nawu birriwarre bininj minj yibenngyebuyi bu ngudda ke bininj dja minj ngundiwokmangi.

64

Bu Karringeykayhmen Yawey Nawu God Kadberre

Isaiah 64:1-12

¹ Yawey! Ngad ngarridjare bu ngudda yidjaldjalkma kunngol bu yirrangmarrhmang heaven dja yimkolung kondah kanjdji kore kurorre! Ngarridjare manbu kunwarddekimuk kabolkrokarakon kore kumirrk ke!

² Yimkolu dja yibenbukkabukkan bininj nawu ngundiwirrihme ba bu bedda ngundingeyburrbun. Yibenkangewurlhmen yiman kayime kunak kamarnbun kukku kabonodnodmang. Mah, wanjh yibenmarnbu birriwarlahkenh bininj rowk kore kubolkbubuyika bu ngundiwerhkengehme dja ngundimarnekukdeldele!

³ Kunkare wanjh ngudda kunwern yikurduyimi kundulkarrekimuk dorrengh, kore ngad minj ngarriyingkihburrbuyi. Kunmekbe yimkoluy kondah wanjh manbu kunwarddekimuk rowk bolkrokarakoni bu yiman birrinang kundulkarre ke.

⁴ Ngudda wanjh yidjalkudji God duninj. Bu kunkare dja bolkkime minj nangale bininj biwobekkayi nabuyika God. Mak minj nangale bininj binayi kunmim nuye nabuyika God. Minj nangale mak bikurdunayi nabuyika God yiman ngudda. Ngudda yidjalkudji nawu kanmarnekurduyime kunmak ngad nawu ngundiwoybukwon munguyh.

⁵ Ngudda yire darnkih ba bu yibenbidyikarme bininj nawu kabirridjaldjare kunnjilngmak dorrengh bu kunmak kabirridjalkurduyime, dja nawu ngundiwokmarrkmang ke. Dja ngaleng bu ngad ngundiwokweyi, wanjh ngudda kanyidduy. Aba! Nangale nabuyika kanngheke?

⁶ Ngarrriwarlahkenh bininj wanjh yiman kayime ngarririkwarreworring kunwarre dorrengh. Bu ngarrikurduyime kunmakmak, wanjh yiman djalburudjan, dja yiman kunmadj bu nuhnudminj ngarridjongbuyindiwirring. Ngad yiman kunmalaworr manbu worrdowerrinj, dja kunwarre ngadberre kanwayhke yiman kunmayorrkimuk kaburriwe kunmalaworr.

⁷ Minj nangale kore ngad ngunngyeykayhme, dja minj nangale mak kadjare bu ngunwerhkkarme. Kunmekbekenh ngudda wanjh kanbodmewong dja kanmarnewarlkarrinj ngadberre kore minj ngundiya-woyhkebnan. Ngudda wanjh kanbawong bu ngarrikukwarrewarremen ngadmanbidju kore ngarrikurduyime kunwarre.

⁸ Kawarre Ngabba! Ngudda Yawey wanjh ngadberre kornkumo! Ngudda kankukmarnbom yiman kayime bininj nawu kamang delek dja kamarnbun ngalng bu kaborrahkendong. Ngudda yidjalkudji kanmarnbom kunbidwi ke.

⁹ Yawey, yuwn bu kanhdjaldung kunwerhkimuk duninj! Yuwn bu mak yidjalburrbun kunwarre ngadberre munguyh munguyh! Kanna ngad nawu bininj ke rowk, dja kannahna!

¹⁰ Ngudda ke kubolkkimuk kubolkdjamun, makka wanjh bolkyimerranj kabolklarrk rowk! Zion bolkwarreminj, dja minj nangale kayo. Mak Jerusalem djalburryak, nakka bolkbularrbuyindanj rowk.

¹¹ Dja manbu temple, manbu kunrurrkmak dja kubolkdjamun duninj, dja kore mawahmawah ngadberre ngundidjalburuburlumi, wanjh kunak

bularrbom dja rurrkwurlhkeng. Dja wanjh njalehnjale namakmak rowk nawu ngarrimarnedjareni, wanjh yakayakminj rowk.

¹² Aba, wanjh bolkkime Yawey, yiddok minj kanbidyikarme ngadberre? Yiddok minj yiwokdi ngadberre? Dja yiddok minj yidjalngurdme bu kanwerndhdung munguyh munguyh?

65

Bu God Kandjadme Dja Mak Kannehke Kadberre

Isaiah 65:1-16

¹ Yawey nawu kawohnan rowk yimeng, "Ngaye ngabenmarnekuk-bukkarrinj bedberre bininj ngardduk, dja bonj, minj ngandidjawadjawayinj. Ngaye ngadjareni bu bedda ngandingalkeng, dja bonj, minj ngandiy-awayi. Ngabenmarneyimeng birriwarlahkenh bininj ngardduk, 'Ngaye! Ngaye wanjh kondah ngahdi!' Dja bonj, minj ngandingeykayhmeninj."

² Bu kunbarnangarrakuyeng ngabenmarnebidyirriyonginj, dja ngabengyirri bedberre bininj nawu ngandiwokweyi. Bedda wanjh kabirridjalkurduyime kunwarre. Bedda kabirridjurrkkarren kore kunmayali bedberre.

³ Kunbarnangarrakuyeng bedda wanjh ngandimarnewokburriwe kore kumirrk ngardduk. Bedda kabirrimarnebodan idols kore bedberre kunbolkdjamun, dja kabirrimarnekinje manbu manmanjmak kore altars nawu birrimarnbom manbu kunwarrekenh.

⁴ Mak bedda kabirrire kunmunun rowk kore kumihmimidj bu kabirridjalyirri molkkenh. Mak bedda kabirrikanjgun nawu bikkibikki, dja kabirridjalkanjinje mayh nawu nawarrewarre ba kabirribongun kunkalkkid.

⁵ Birrimekbe bininj wanjh kabirriyime, 'Ngurridin djarreh. Yuwn bu kandimdarnhyikan. Ngad wanjh ngarikukdjamun duninj!' Wanjh bedda yiman kundolng kamhbebe kukeb ngardduk, yiman kunak bu kadjalrung munguyh."

⁶ "Ngurrina! Kadjalbimbuyindi kore ngahnan bu kayime, 'Ngaye minj ngadjalngurdme. Dja nakka ngabenmarnekarremulewan bedberre kunwarrekenh kabirrihkurduyime. Ngadjalwon rowk bedberre."

⁷ Ngaye bun bedberre kore kunwarre birrikurduyimi, dja kore nawu mawahmawah bedberre birrikurduyimi." Kunmekbe rowk yimeng Yawey. Dja mak yimeng, "Bedda wanjh birrikinjeng mayh nawu bindiwong idols kore kuwarddekimuk, dja wanjh ngandiyemikang ngaye kore kurrulum rowk. Wanjh ngaye yiman ngabendjalyakarrbun rowk ngardduk kunyid bu ngabenbun bedberre."

⁸ Wanjh Yawey yawoyhwokdanj, yimeng, "Ngaye minj ngabenbularrbun rowk. Ngurriburrbin bininj kabirrinan grapes manbu kanudmen, dja kabirriyime, 'Karribawo, yikahwi manrakel wanjh kadjalmak, dja yuwn karridjalwe. Med, walakkih wurd kunkalkkidmak kayo!' Wanjh karohrok ngaye bu ngabendjalnahan bininj nawu woybukkih ngandimarnedurrk-mirri kore ngardduk bininj. Ngaye minj ngabenbularrbun birridjalwern rowk."

⁹ Ngaye ngabenmarnbun yikahwi bininj nawu Israel kabenmawahme, dja mak nawu Judah kabenmawahme, ba bu kabirribolkkarme ngardduk kuwarddekimuk rowk. Birrimekbe nawu ngaye ngabendjarngbun, wanjh kabirribolkmang. Ngaye nawu ngandimarnedurrk-mirri, wanjh kabirriyo kumekbe."

10 “Bu kuhni kabolkyimerran, ngabolkmarnbun kabbal kabolkngeyyo Sharon bu karralkwernmen ba bu sheep namirndewern dja kabirridalkngun kumekbe. Mak ngabolkmarnbun kuwarddebarran kabolkngeyyo Achor, ba bu mayh kamirnderri kumekbe dja kamirndengehme. Bu kumekbe ngabenyolyolme ngardduk bininj nawu ngandiyawam.”

11 “Dja ngaleng ngudda ngurribuyika wanjh kandimunkebawong, dja ngurribengmidjanj kunwarddekimuk kunbolkdjamun ngardduk. Dja mak ngudda yiman ngurrimarnebodan idol kangeyyo ‘kunmak kamre kore ngaye’, dja ngurrikarrme mulil nuye idol nawu kangeyyo ‘bu njale kanmarneyimerran, wanjh kamak’.

12 Wanjh bonj, ngaye marnbun bu ngudda ngurridowe kundjawakwi. Ngudda ngurrimankan kore ngundibun ngurridowe rowk. Kunmekbekenh ngayime ngudberre. Ngaye wanjh kayhmeng ngudberre dja minj kandiwokmayinj. Mak bu bengyolyolmi dja nakka minj kandibekkayi. Ngudda wanjh ngurridjalkurduyimi kunwarre kore kumirrk ngardduk, dja ngurridjalyimeng kore ngaye ngawidnang.”

13 Mah, bu kunmekbe kunu Yawey, nawu kawohrnan rowk, wanjh kayime ngudberre, “Bininj nawu ngandimarnedurrkmirri, nakka kabirriworrkmen, dja ngudda nawu ngurriwarre bininj wanjh ngurrimarrwedowen. Bedda kabirrikomnjulme, dja ngudda wanjh ngurridjalkombukdowen. Bedda kabirridjalmarrmarr, dja ngudda wanjh kunyemi ngunmang rowk.

14 Bininj nawu ngandimarnedurrkmirri wanjh kabirriwayini kunnjilngmak dorrengh dja kabirrikangemarrmarr. Ngudda nawu ngurriwarre bininj, wanjh ngurridjalkayhme dja ngurridjalnjilngwarremen. Mak ngurridjalnalkbun wernkih duninj dja ngurrikangewarremen.

15 Ngudda kunngey ngudberre wanjh ngurribawo bininj nawu ngaye ngabendjarrngbun bu ngundingeywirrihme ngudberre. Ngaye Yawey, ngawohrnan rowk, wanjh bun ngudberre, dja ngurriyakmen. Dja ngabenngeywon kunngeybuyika bininj nawu woybukkih ngandimarnerdurrkmirri.

16 Nangale bininj nawu kabenmarneyime kunwok kunmak nawu kabirrihni kumekbe kunbolk, wanjh nakka ngankayhme ngaye God ngadjalkudji nawu ngawokdi kunwoybuk. Dja bininj kore kunmekbe kunbolk, bu kadjare kawokkurmerren, wanjh kawokkurmerren kore kunngey ngardduk, ngaye God ngadjalkudji nawu ngawokdi kunwoybuk. Kaluk ngabengmidjanj kunwarre bedberre bu kernngehkenh birrikurduyimi.”

Nawu Yawey Kabolkerrngehme Kaddum Heaven Dja Kanjdji Kurorre

Isaiah 65:17-25

17 “Ngurrina! Ngaye ngayawoyhbolkkerrngehme mahni kaddum dja kondah kurorre. Dja mak ngadjalbengmidjanj rowk kore kunkarekenh. Minj ngayawoyhburrbun.

18 Bu ngaye ngabolkmarnbun rowk, wanjh ngurriwernhnjilngmarrmarrnin munguyh. Ngaye ngayawoyhbolkkerrngehme kunredkimuk Jerusalem ba ngurridjalnjilngmakmen, dja bininj nawu kabirrihni, wanjh ngandinjilngmarnbun bu ngamarrmarr.

19 Ngaye nganjilngmak bu ngabolkburrbun Jerusalem, dja mak ngabenmarnemarrmarr bu ngabenburrbun bininj nawu kabirrihni kumekbe. Bu kuhni kayimerran, wanjh minj nangale kayawoyhnalkbun kumekbe, dja minj nangale kangadjjihme bu kunnjilngwarre dorrengh.”

20 “Kaluk minj kabirridowe nawu birribarrken wurdwurd. Mak nawu bininj kabirridarrkid bu djal kunkuyeng duninj. Nakhobanj duninj minj karrown, dja djalngudjmak. Bininj rowk wanjh kabirridjalkohbanjmen duninj yiman kudjawk 100 bu minj kabirridowe! Bininj kunubewu karrown bu minj 100 yimerrangimeninj, wanjh kabirriyime nakka kunubewu kidni.

21 Bininj rowk wanjh kabirrirurrkname dja bedmandeleng kabirriyo. Bedda kabirridudjeng manrakel, dja bedmandeleng kabirringun manbu manbarnem ngalenggarre.

22 Minj mak kuhni kabirriname kunurrk dja kabindimarnebawon birribuyika bininj bu kabirriyo. Dja minj kabirridudjen manmekenh ba bu kabindiyibawon birribuyika bininj bu kabirringun manbu manbarnem. Minj kuhni kabenmarneyawoyhkurduyimerran. Ngaye ngardduk bininj wanjh kabirridjalmimbi kunkuyeng duninj yiman kayime bu kundulk kadjalmimbi. Bedda nawu ngabendjarrngbun bininj, wanjh kabirrinjilng-marnburren kore kabirrikurduyime kunbidwi bedberre.

23 Binj mak kabirridurrkimirri bu djal burudjang. Minj mak kabindiyawoyhyawmang wurdwurd nawu kabirriwarrewarren. Ngaye nawu Yawey, wanjh ngabendjalmarnekurduyime kunmak bedberre dja warridj nawu bedda kabindimawahme bininj.

24 Ngaye ngabenbangmebekkan bedberre bu yerre kabirridi yiwarrudj kore ngandikayhme. Bu minj birribangmeyakwoyi kore kabirridi yiwarrudj, wanjh ngabenbekkabekkan rowk.

25 Bu kuhni kayimerran rowk, ngaye ngamarnbun mayh nabang dja nawu kelebuk wanjh kabirridjarrkngun kunmodmiken dorrengh, yiman nawu lamb dja wolf. Dja nawu lion wanjh kadjalngun kundalk yiman bulikki. Kaluk nawu nayin nakka kahdjalgun kundjulng. Kuhni rowk kore ngaye ngardduk kunwarddekimuk manbu kubolkdamun, wanjh minj nangale kabiwarrewon nabuyika bininj, dja minj nangale kayime kunwarrekeh.” Kunmekbe rowk yimeng nawu Yawey.

66

Bu Yawey Kamarnbun Kaddum Dja Kurrore Bu Kakerrngehmen Rowk

Isaiah 66:1-24

¹ Kuhni kayime Yawey, “Kore kaddum heaven, nakka kore ngaye ngahni yiman kayime throne ngardduk gayerrkan. Dja kore kurorre, wanjh nakka yiman kayime ngahdengebarndi. Dja ngudda bininj, yimankek ngurrimarnbun kurrambalk ngardduk? Kaluk baleh kunurrk kore ngangehme?”

² Ngurriburru ngayebidju ngabolkmarnbom njalehnjale rowk kaddum dja kurorre. Kunmekbekenh yehyeng rowk marnbuyindanginj.” Kuhni nawu Yawey yimeng. “Dja bininj nawu minj kabirriburlumerren, minj mak kabirrikimukworren, dja ngandimarnekele bu ngandiwokmarrk-mang, wanjh birrimekbe bininj wanjh ngaye ngabenmarneyime kunmak.”

³ “Yikahwi birribuyika bininj ngandinjilngwarrewon. Bu ngandimarnebu bulikki, wanjh ngaye ngayime bedda yiman namarndeyi! Dja bu ngandiwon lamb ngardduk, wanjh ngayime bedda yiman duruk ngandimarnebu! Dja bu ngandiwon ngaye manmim manbu wheat, wanjh ngayime ngandiwoyi kunkurlba nuye bikkibikki! Dja bu ngandimarnekinje manmanjmak ngardduk, wanjh ngaye ngayime bedda yiman

kabirrimarnebodan idol. Kaluk birrimmekbe bininj birrikebrokmarn-burrinj kore birridjaldjareni. Kabirridjare kunwarrewarre duninj kore kunmalng bedberre.

⁴ Wanjh kunmekbekenh ngaye ngadjare ngabenwirrihme dja ngabenbun bedberre. Ngaye ngabenmarnekurduyime kore bedda kabirridjalkelemen. Kaluk ngaye ngabenkayhmeng bedberre, dja minj ngandiwokmayi. Mak ngaye ngawokdi bedberre, dja minj nangale ngandiwokbekkayi. Bedda birridjalkurduyimi kunwarre kore kumirr ngardduk, dja birridjaldjareni kore ngandinjilngwarrewong.” Kuhni yimeng nawu Yawey.

⁵ Mah, ngudda nawu ngurrimarnekuikleleme bu nawu Yawey kawokdi ngudberre, wanjh bolkkime ngurribekkabekka kore kayime. Nawu Yawey kayime, “Nawu ngurridangerrinj bininj ngundiwirrihme bu ngardduk kunngeykenh, dja ngundidjalbebke. Dja mak ngundidjekmiwong bu birriyimi, ‘Mah! Ngarridjare ngarrinan Yawey bu nadjalmak duninj, dja ngudda bu ngurrinjilngmak!’ Bonj, bedda wanjh kaluk kabirriyemengarrimen.

⁶ Adju, ngurribekkabekkan nawu kabirrikayhme kore kururrkmir-nderri dja kore Temple kunurrk. Njalekenh? A, nakka ngaye Yawey ngabenbun nawu ngariyidko ngardduk kore kunwarrekenh bedberre.”

⁷ “Mah, wanjh ngurriburrbu. Daluk ngalbu kamerlem, bu kayawmang, wanjh werkk kababang, kaluk yerre wanjh karrangen nawu nabarrken. Yuwn bu kadjalyawmang werkk, dja minj kabekkarren.

⁸ Minj nangale bolkwobekkayi bu kuhni kurduyimerrangimeninj. Dja minj nangale naya. Yiddok bininj birrimirndewernmerrinj kore kubolkkimuk kore djal kunbarnangarrakudji? Burrkyak. Minj kayimeran bu kundjalburrikudji. Dja kunbuyika duninj, bu kunbolk Zion, wanjh werkkwerkk duninj kabenyawmang ngalengngarre wurdwurd!

⁹ Ngaye nawu Yawey ngakan daluk bu kayingkihmarnburren wurdyawkenh, dja wanjh minj ngabawon, ngadjalmarnbun bu kayawmang. Bu ngayingkihmarnbun daluk, yiddok ngaye ngabalhme ngalengngarre kunwarlirng? Burrkyak.

¹⁰ Mah! Wanjh ngurrimarnemarmarr ngalengngarre kunredkimuk Jerusalem, dja ngurrimarnenjlilngmaknin, ngudda nawu ngurrimarnedjare. Ngudda nawu ngurrimarnenalkbuni, wanjh bolkkime ngurriwernhmarmarr ngalengngarre!

¹¹ Kaluk ngudda yiman ngurribongun kore kundjikka ngalengngarre dja ngurrinjilngmakmen. Ngurridjalbongun kunkimuk, dja ngurrimarnemarmarr ngaleng nawu ngunwon kundjalkimuk.”

¹² “Kuhni mak ngayime ngudberre, ngaye nawu Yawey. Ngaye ngawon Jerusalem kunmodmikenh ngardduk manbu kaborlobme yiman kayime mankabo. Ngaye mak ngawon namakmak nadjalwern duninj kore kubolkbubuyikabeh, yiman kayime mankabo mankimuk bu kaborlobme. Ngalbu kunredkimuk Jerusalem yiman kayime ngalbadjan ngunkanahkan kore kuberl ngarre, ngudda ngurribongun kore kundjikka ngarre, dja ngurriyerrkan yiman wurdyaw kore kunkarre ngarre.

¹³ Ngaye wanjh njilngmarbnun ngudberre yiman kayime ngalbadjan kabikangemarnbun wurdyaw ngarre. Dja ngurrikangemakmen ngudda bu ngurrinjilngwarreni Jerusalemkenh.”

¹⁴ “Bu kuhni ngurrinan kakurduyimerran, wanjh ngurrikangemarmarr, dja ngurriwernhmakmen yiman kayime kundalk bu kadjaldjordme. Ngaye nawu Yawey wanjh marnebidbukarrinj ngudberre

nawu kandimarnedurrkmirri. Dja nawu birriyidko ngardduk, wanjh ngabendjaldung kunkimuk.”

¹⁵ Ngurrina! Yawey kamre kunak dorrengh. Manbu chariots nuye waridj wanjh kamre yiman kayime kunmayorrk kunkimuk duninjh. Nungka wanjh kayiddung wernkih duninjh, dja kabendung manbirluworldjen dorrengh!

¹⁶ Kaluk Yawey kabendjadme birriwarlahkenh bininj rowk kunak dja kundjawak dorrengh. Dja kabenbun birriwern bininj.

¹⁷ Kuhni nawu Yawey kayime, “Bininj nawu kabirrikudjamunworren bu kunwarrekenh, dja bu kabirridjirridjburren kore kabirrimarneboddan idols, wanjh kunwarre duninjh kabirriyime. Bedda wanjh kabirridjarrkre kore kurralk ba kabirrikanjngun bikkibik dja nawu rats, dja nabubuyika nawarwarre mayh. Ngange kabirrimunkekadjung? Wanjh bedda kabirridjarrkyakmen! Kuhni ngaye ngayime nawu Yawey.

¹⁸ Ngaye ngaburrbun kore kabirrikurduyime kunwarre, dja kore kabirrimayaliburrbun, wanjh ngaye ngayingkihmarburren bu ngamre dja ngabenmirndemornname birriwarlahkenh birrimak bininj rowk, kore kubolkbubuyikbeh, dja bu birridjenbubuyika rowk. Wanjh kabirrimirnderri dja ngaye ngardduk kunmakmak ngandinan.

¹⁹ Mak ngaye ngakurrme yiman kayime bim ngardduk kore bedda. Yikahwi ngaye ngabenmunkewe nawu kabirridjaldarrkid bininj ba kabirrire kore kubolkbubuyika, yiman Tarshish, Libya dja Lydia kore bininj kabirrikurdumak bonarra dorrengh, dja mak kore Tubal dja mak Greece, dja warridj kore manyunkurr kunwern kore djarreh duninjh, kore bininj minj ngaye ngandiwoekkay, dja minj ngandinayi ngardduk kunmakmak. Bedda nawu ngabenmunkewe wanjh ngandiyolyolme bu kabindibeng-dayhke ngayekenh bu ngadjalmakkaykenh.

²⁰ Kaluk kabindimkan bininj nawu ngurridangerrinj rowk nawu birrikang kubolkbubuyikabeh, dja kabirrimre rowk kore ngardduk kunwarddekimuk kubolkdjamun kore Jerusalem, dja bedda kandiwon birimekbe bininj ba bu ngabenkarme, ngaye nawu Yawey. Bedda wanjh kabirrimre bu kabirrimorneni djarrang dja nuk donkey, yikahwi mak kabirrimre kabirribarndi chariots, dja kabirrimorneni mules dja camels dorrengh. Kabindikan kore kunurrkdjamun manbu Temple ngardduk, yiman kayime nawu Israel benkebmawahmeng kabirrimkan manmim manbu kahdahkendi kore ngalng nawu kukbele, bu kandiwon ngaye nawu Yawey.” Kuhni nawu Yawey yimeng, dja mak yimeng,

²¹ “Dja mak ngabendjarrngbun yikahwi birrimekbe bininj ba kabirriyimmeran priest dja mak yikahwi Levites.”

²² Wanjh nawu Yawey mulewarrinj, yimeng, “Mak ngayawoyhbolkker-ngehme manbu kaddum dja kurorre, dja kadjaldi munguyh munguyh kore kumirrk ngardduk, wanjh kunmekbe rerrih karohrok manbu kungey ngudberre kadjaldi. Dja mak nawu mawahmawah ngudberre kabirridjaldi munguyh.

²³ Birriwarlahkenh bininj rowk kabirrimre ngandimarneboddan kore kumirrk ngardduk bu kunbarnangarradjamun rowk, dja bu nakerrnge dird kore nakerrnge dird.

²⁴ Mak kabirribehme dja kabindikunan nawu birridowerrinj birimekbe nawu ngandidjalwokweyi ngardduk. Yolke wanjh kabennudngun nakka minj karrowerren, mak kunak makka minj kabirludowen. Wanjh birridjalwern bininj kabindiwirrihme bedberre.” Kuhni rowk yimeng Yawey.

Matthew

Nawu Bininj Birrikebmawahmeng Nuye Jesus

Matthew 1:1-17

(Luke 3:23-38)

¹ Nahni nawu namud nuye Jesus Christ nawu David bikebmawahmeng, dja mak nawu Abraham warridj bikebmawahmeng.

² Nawu Abraham nakka wanjh kornkumo nuyeni Isaac. Isaac kornkumo nuyeni Jacob. Jacob benbornang rowk bedberreni Judah dja mak nawu birridangerrinj.

³ Judah kornkumo berrewonengni Perez dja Zerah, dja mak ngalbadjan berrewonengni ngalbu Tamar. Perez kornkumo nuyeni Hezron. Hezron kornkumo nuyeni Ram.

⁴ Ram kornkumo nuyeni Amminadab. Amminadab kornkumo nuyeni Nahshon. Nahshon kornkumo nuyeni Salmon.

⁵ Salmon kornkumo nuyeni Boaz, dja ngalbadjan nuyeni wanjh ngalka Rahab. Boaz kornkumo nuyeni Obed, dja ngalbadjan nuyeni wanjh ngalka Ruth. Wanjh Obed kornkumo nuyeni Jesse.

⁶ Jesse kornkumo nuyeni David nawu kingni. David kornkumo nuyeni Solomon. Kaluk nawu Uriah nuye ngalbininj koreng wanjh biyawmey Solomon.

⁷ Solomon kornkumo nuyeni Rehoboam. Rehoboam kornkumo nuyeni Abijah. Abijah kornkumo nuyeni Asa.

⁸ Asa kornkumo nuyeni Jehoshaphat. Jehoshaphat kornkumo nuyeni Jehoram. Jehoram kornkumo nuyeni Uzziah.

⁹ Uzziah kornkumo nuyeni Jotham. Jotham kornkumo nuyeni Ahaz. Ahaz kornkumo nuyeni Hezekiah.

¹⁰ Hezekiah kornkumo nuyeni Manasseh. Manasseh kornkumo nuyeni Amon. Amon kornkumo nuyeni Josiah.

¹¹ Josiah wanjh kornkumo bedberreni Jeconiah* dja mak nawu birridangerrinj nuye. Kunmekbe bolkyimi bininj nawu Israel benkebmawahmeng bindikang kore kunbolk Babylon kore bedda birribongdi.

¹² Kaluk bu yerre bindikang kore Babylon, Jeconiah wanjh bibornang Shealtiel. Shealtiel wanjh kornkumo nuyeni Zerubbabel.

¹³ Zerubbabel kornkumo nuyeni Abiud. Abiud kornkumo nuyeni Eliakim. Eliakim kornkumo nuyeni Azor.

¹⁴ Azor kornkumo nuyeni Zadok. Zadok kornkumo nuyeni Akim. Akim kornkumo nuyeni Eliud.

¹⁵ Eliud kornkumo nuyeni Eleazar. Eleazar kornkumo nuyeni Matthan. Matthan kornkumo nuyeni Jacob.

¹⁶ Kaluk Jacob bibornang nawu Joseph, nabininj koreng ngaleng ngarereni ngalbu Mary. Wanjh Mary biyawmey Jesus, nawu kangeyyo Christ.

¹⁷ Wanjh namekbe fourteen bininj nawu birriyungkihni nawu mawahmawah kore kumdedjingmeybeh Abraham nawu yiburnbom kore David. Mak fourteen bininj nawu birriyungkih mawahmawah kore David nuye bolkyimi, kaluk kumekbe bindimey nawu bininj bindikang kore Babylon. Mak kumekbe nawu fourteen bininj birriyungkih nawu mawahmawah bu

* 1:11 Jeconiah karohrok Jehoiachin.

kumekbe bolkyimi bindikang kore Babylon bu kunmekbeni ngarre Christ† danginj.

Bu Jesus Christ Danginj
Matthew 1:18-25
(Luke 2:1-7)

¹⁸ Kuhnı wanjh yimerranj bu Jesus Christ danginj. Mary, ngalbu ngalbadjan nuye wanjh birriberrebbom Joseph bu kabenemarrenkenh, dja medni, minj bedda benebangmemarrimeninj, wanjh ngaleng djalkuk-bekkarrinj bu kukdulmukni kore kundulkarrebeh nuye Namalng-makkaykenh.

¹⁹ Kaluk Mary ngalengngarre nabininj kobeng Joseph, nungka nawu namakni bininj, wanjh nungka minj djareniwirrinj bu biyemimulewayinj kore kurobbe, dja nungka karremarnbom bu kabidjalbawon kore minj kurobbe.

²⁰ Kaluk kunmekbe bu Joseph kuninjku bu burrbuhburrbuni, wanjh angel nuye nawu Kawohnan Rowk bimiyikang kore bukirri. Kaluk nawu angel bimarneyimeng, "Joseph, nawu mawahmawah ke David, yuwn yikele bu yimang ngalbu Mary bu yikan kore kured. Dja nawu wurdyaw kahyawkan nakka wanjh Namalngmakkaykenh biyawwong.

²¹ Kaluk ngaleng kayawmang narangem, wanjh ngudda yingeykurrmen 'Jesus', dja nungka nawu kabennegehke bininj rowk nuye kore kunwar-rebeh bedberre.‡

²² Kuhnı wanjh kurduyimerranj kore nawu Kawohnan Rowk bu bimarneyimeng nawu prophetni Isaiah, bu yimeng,

²³ "Kaluk ngahli ngalyawk wanjh kayawkan. Kaluk bu kabiyawmang narangem, wanjh bininj kabirringeybun 'Immanuel', kaluk mahni kungey kayime 'God kumwam kore ngad karridjarrkdi.' "

²⁴ Wanjh Joseph dolkkang, djalkurduyimeng kore angel nuye Kawohnan Rowk bimarneyimeng. Wanjh Joseph benemarrinj ngalbu Mary dja bikang kore kured nuye,

²⁵ dja minj bedda benebangmeyuwirrinj kaluk bu yerrekah bu yawdanginj nawu wurdyaw. Wanjh Joseph bingeykurrmeng namekbe wurdyaw Jesus.

2

Bininj Nawu Birrikodjkuludjad Birrimarneboddanginj Jesus
Matthew 2:1-12

¹ Jesus wanjh danginj kore kunred kabolkngeyyo Bethlehem kaluk kore kubolkkimuk ngarre Judea bu kunmekbe bolkyimi Herod nawu King wohnawohnani. Wanjh bu kumekbe Jesus danginj, yikahwi bininj nawu birrikodjkuludjad* nawu birridolkkang koyekbeh, wanjh birrimwam kore Jerusalem.

² Wanjh bedda birridjawayhmeng, "Baleh nawu wurdyaw danginj nawu king bedberre bininj nawu Jews? Wanjh ngad ngarrinang mankokkarrng nuye kore koyek ngarrihni, wanjh ngarrimwam ba bu ngad ngarrimarne-boddan nuye."

† 1:17 "Christ" karohrok kungeybuyika "Messiah". Nahni bokenh kungey kamenyime "nawu God bikodjdelkkeng bu bidjarrngbom". ‡ 1:21 "Jesus" karohrok "Joshua", dja nahni kungey bokenh kamenmenyime "nawu Kawohnan Rowk kanengehke". 1:23 Isaiah 7:14 * 2:1 Yikahwi bininj kabindingeybun "nawu Magi".

³ Kaluk bu kuninjkuwu kunwok King Herod bekkang, nungka wanjh njilngwarreminj, dja mak bininj rowk warridj nawu kumekbe birrihni kore kunbolk Jerusalem.

⁴ Wanjh Herod benkayhmeng birrikihkimuk nawu kabirriwohrnan priests dja nawu mankarre kabindihbukkan bedberre kore kunred Jerusalem, wanjh bendjawam bu baleh nawu Christ danginj.

⁵ Kaluk bedda birrimarneyimeng, "Kore kunred Bethlehem kore kubolkkimuk Judea ngarre. Nawu prophet biyingkihimbom bu biyingkihulewam, kuhnikenh kore djurra, kore kayime,

⁶ 'Ngudda kunred Bethlehem, kore kunbolk ngarre Judah, ngudda nawu kunbolkmak, dja yiyurhke rowk kore kubolkbubuyika ngarre Judah. Wanjh ngudda kumekbebeh kore ngudda, kamre nawu bininj kabenmarnewohrnan bininj rowk, dja nanihnjanu bininj nadjalkudji nawu kabennahan bininj ngardduk nawu Israel benkebmawahmeng, yiman kayime nawu shepherd kamirndenahnan mayh nuye.' " [Micah 5:2]

⁷ Wanjh King Herod benkayhmeng dja benmarnewokdanginj manmolk birrimekbe bininj nawu koyekbeh, dja bendjawam bu baleh bolkyimi manbu mankokkarrng benmarnebebmeng bedberre.

⁸ Wanjh King Herod benmunkeweng birrimekbe nawu bininj kore kunred Bethlehem, dja benwokrayekwong benmarneyimeng, "Ngurriyawa namekbe wurdyaw, dja kaluk bu ngurringalke, ngurrimray werkrerrk bu kandimarneyime ba ngayemanwali ngare ngabodnan nuye."

⁹ Kaluk bu kunmekbe benmarneyimeng nawu king, wanjh bedda birribolkbawong dja birriwam. Wanjh mankokkarrng manbu birrinang kore koyek, wanjh makka djalkukdokmi bedberre wanjh kaluk danginj kore kumekbe wurdyaw yongohyoy.

¹⁰ Kaluk bu birrimekbe bininj birrinani manbu mankokkarrng, bedda wanjh birridjalnjilngmakminj.

¹¹ Wanjh birrimwam kore kururrk kore wurdyaw yongohyoy kaluk ngalbadjan dorreng bindidjarrkngalkeng ngalbu Mary. Wanjh birrimarneboddanginj bu bedda birriburlumeng nungka nuye. Yerre wanjh birridangmarrhmey nawu namakmak birrimhkani bu birriwong nuye. Kaluk nawu gold duninj, dja mak manbu mankalkkidmanjmak incense dja mak myrrh manbu mankalkkidmanjmak.

¹² Wanjh God benbengdayhkeng bukirri bu minj kabirridurdeng kore King Herod, wanjh bedda birridjaldurndi kore bedberre kunbolk, kore manbolhbuyika ngarre birriwam.

Jesus Nuye Ngalbadjan dja Kornkumo Benekang Kore Kunbolk Egypt Matthew 2:13-15

¹³ Kaluk bu kumekbe birribolkbawong nawu bininj birrikang koyekbeh, wanjh angel bimarnebebmeng Joseph kore kunkodjbukirri, dja bimarneyimeng, "Yirrolka! Yibenbeneka wurdyaw dja ngalbadjan dorreng, dja ngurridjarrkkelerlobmen kore kunbolk Egypt, dja King Herod kabiyawan nawu wurdyaw kadjare kabibun. Wanjh ngurridin kumekbe kunbolk kore Egypt kaluk yawoyhmarneyime ngudberre bu kunmekbe ngurribolkbawon."

¹⁴ Wanjh kukak yerreh Joseph dolkkang wanjh birriwam Egypt, bu benbenekang wurdyaw dja ngalbadjan.

¹⁵ Wanjh kumekbe birrihni kore kunbolk Egypt kaluk bu yerrekah wanjh King Herod doweng. Kuhni yimerranj kore Kawohrnan Rowk bimarneyimeng nawu prophet Hosea bu yimeng, “Kaluk gaye ngakayhme nawu beywurd ngardduk kore Egyptbeh.” [Hosea 11:1]

*Nawu King Herod Benbom Wurdwurdwurdwurd Kore Kunred Bethlehem
Matthew 2:16-18*

¹⁶ Bu Herod benburbom birrimekbe bininj nawu koyekbeh birrikoweng, nungka wanjh wernhyidduy duninj. Wanjh benwokrayekwong nawu kabirrihdurkmirri nuye bu kabindingalke nawu narahrangem rowk nawu bokenh mandjewk bedberre, dja mak nawu birribalkilehkilek, kore kunred Bethlehem dja mak darnkih kore kumekbe kunred, bu kabindibunkenh rowk. Kuhni King Herod kurduyimeng, dja burrbom njale kundung bu wurdyaw danginj, nawu koyekbeh bininj birrimulewam.

¹⁷ Wanjh woybukkendanginj bu yimerranj kore nawu prophet Jeremiah bimbom, yimeng,

¹⁸ “Kore kunred ngarre Ramah wanjh birribek kang daluk kanalkkihrey dja wernhnjilngwarreminj duninj. Wanjh ngalmekbe ngalbu Rachel benmarnenalkbuni ngaleng ngarre wurdwurd mak, dja mak minj djareni-wirrinj bu nangale binjilngmarnbuyi, dja birrimekbe wurdwurd wanjh ngarre birridoweng.” [Jeremiah 31:15]

*Mary dja Joseph Benedurndi Kunred Nazareth
Matthew 2:19-23*

¹⁹ Kaluk bu King Herod doweng, nawu angel nuye Kawohrnan Rowk bimarnebebmeng Joseph kore kunkodjbukirri, kore birrihni kunbolk Egypt.

²⁰ Wanjh nawu angel bimarneyimeng, “Yirrolka, yibenbeneka ngalbadjan dja wurdyaw, dja ngurridurnden kore kunbolk ngarre Israel. Dja bininj nawu birridjareni birribuyinj nawu namekbe wurdyaw wanjh bedda birridowerrinj.”

²¹ Wanjh Joseph dolkkang benbenemey wurdyaw dja ngalbadjan wanjh birridurndi kore kunbolk Israel.

²² Kaluk bu Joseph biwobek kang Archelaus, nawu beywurd nuyeni King Herod wohrnawohrnani kumekbe kunbolk kore kornkumo nuye wohrnani kore kunbolk ngarre Judea. Wanjh Joseph keleni, minj rawinj kumekbe niwirrinj. Kaluk kunmekbe bu angel biyawoyhbengdayhkeng Joseph kore kunkodjbukirri, nungka wanjh wam kubolkbuyika kore kubolkkimuk ngaleng ngarre, kunbolk Galilee.

²³ Kaluk kore kunred kabolnggeyyo Nazareth, wanjh kumekbe bedda birrihni. Wanjh kumekbe woybukkendanj manbu kunwok kore nawu prophets birriyingkihyolyolmi nawu Jesuskenh, “Nungka nawu Nakang Nazarethbeh”.

3

*John Yingkihbolkmarnbom Nuye Jesus
Matthew 3:1-12*

(Mark 1:1-8; Luke 3:1-9,15-17; John 1:19-28)

¹ Wanjh kumekbe rerrih John nawu benkukduhkeyi bininj, wanjh kunwam kore kubolkdarleh kore kubolkkimuk Judea, dja wanjh yolyolmi.

² Dja benmarneyimi, “Ngurrikangeborledkerrimen, dja ngurridjalba-won kunwarre ngudberre. God wanjh kamre darnkih ngudberre kore heavenbeh.”

³ God biyingkih mulewam John, bu biwokwong Isaiah nawu bimbom, dja yimeng, "Nakudji bininj kakayhme kore kubolkdarleh, kayime, 'Ngurriyngkihmarnebolhmarnbu manbolh nuye nawu Kawohrnan Rowk. Ngurribolhdjaddjawo nungka nuye!' " [Isaiah 40:3]

⁴ Kaluk John djongbuyindi kunmadj yiman mayh nawu camel kungabek marnbom. Dja mak leather nawu ngardmodukkayindi, mak djalnguni djadedde dja mak mankung.

⁵ Kaluk birrimirndewern bininj birrihrey kore nungka. Birriwern birrimwam kore Jerusalem, dja mak kore kubolkwarlah Judeabeh dja mak nawu birrikang kunredbuyika darnkih mankabo Jordan.

⁶ Bedda birriyormeng birriyikang John, wanjh kumekbe birriwarnyakmulewarreni kunwarre bedberre, wanjh John benkukdjuhkeng kore mankabo Jordan.

⁷ Kunu wanjh John bennang birrimirndewern nawu Pharisees dja mak nawu Sadducees birrimhrey birridjareni nungka benkukdjuhkemeninj, wanjh yimihyimi bedberre, "Ngudda nawu yiman rerrih nabang nayin! Nangale nguningkih bengdayhkeng ngudberre ngurrimhkelerlobme, ba yimankek God minj ngunkinje ngudberre nawu nungka kamhre ngundjadme?"

⁸ Ngurriburrbun bu yiman mandulkmak kabarnemdangan manmak manme, ngudda wanjh ngurrikurduyimen kunmak manbu ngunmulewan ngudberre bu woybukkih ngurribawong kunwarre dja ngurrikangeborledmeng kore God.

⁹ Dja yuwn bu mak ngurridedjdjimgang ngurrimarneyimerren, 'Ngad kunu wanjh Abraham Mawah kadberre!' Dja ngayime ngudberre, wanjh God kakarrme kundulkarre maninjmanu kunwardde kakukborledke bu kabenmarnbun wurdwurd nuye Abraham!

¹⁰ Dja ngokko wanjh kurdburru kahdjurryo kore kurredmahdedjmad ngarre kundulk, dja kundulk rowk manbu minj kabarnemdangan manmak manne wanjh manmekbe rowk karruldkjobke karrulkburiwe kore kunak kahrung."

¹¹ "Ngaye bonj, ngaye kukdjuhke ngudberre kukkuwi bu ngudda ngurribawon kunwarre ngudberre dja ngurrikangeborledkerren kore God. Dja ngaye yiman ngangudjyahwurd, dja nabuyika nawu nawernhgudjkimuk duninj kamre. Ngayenu ngawarre, minj ngamak bu yimankek ngamarnekan nuye nawu kahdengedjongbuyindi. Wanjh nungka kaluk ngunkukdjuhke kore Namalngmakkaykenh dja mak kunak dorreng.

¹² Nungka yiman rerrih kakarrme kundulk nawu kamimbunkenh ba kawernhwerrwerrhme, dja mak ba manmim duninj manbu kangeyyo wheat, nungka kamimngimowon kore kunrurrk nuye kore kahkarekurme, dja manbu manwerrk, kaluk kawerrkkinje kore kunak nawu minj nangale kabirludombun, dja kadjarung munguyh munguyh." Kuhnj wanjh John benbengdayhkeng.

John Bikukdjuhkeng Nawu Jesus

Matthew 3:13-17

(Mark 1:9-11; Luke 3:21-22)

¹³ Wanjh kunmekbe rerrih Jesus bolkbawong Galilee dja bimarnebeb-meng kore mankabo Jordan, dja bidjawam John bu bikukdjuhkeyi.

¹⁴ Kaluk John biwokmey yimeng, "Ngudda kandjalkukdjuhkeyi ngardduk, dja njalekenh ngudda yimwam kandjawam ngaye?"

¹⁵ Wanjh Jesus bimarneyimeng, "Aba, bonj. Yidjalkurduyimen bu bolkkimekenh, ba ngarrkurduyime kunmak rowk kore God kadjare." Wanjh John njilngmakminj.

¹⁶ Kaluk bu Jesus kukdjuhmi, wanjh werrek kumhbidbuni kore karrkad. Wanjh kundjalburrikudji yerre, kaddum kore kunngol dangmarrhmiwam, dja Jesus binang Namalngmakkaykenh kumkolongi yiman dorddorok yerre, dja barndanginj kore nungka.

¹⁷ Wanjh kumdjalwokdanj kore heavenbeh, yimeng, "Nahni nawu ngardduk beywurd, nawu ngawernhmarnedjare. Ngaye wanjh ngawernhjinlgmak nuye."

4

Nawu Namarnde Duninjh Bidjurrkkani Jesus

Matthew 4:1-11

(Mark 1:12-13; Luke 4:1-13)

¹ Kaluk nawu Namalngmakkaykenh bikang Jesus kore kubolkdarleh ba bu Namarnde duninjh kabitjurrkkan.

² Jesus minj nguyinj manme dja dingihdi yiwarrudj forty kunbarngarra dja forty kunkak bu manme yak. Bu burnbom wanjh djal marrwedoweni kunkimuk.

³ Wanjh nawu Namarnde Duninjh bimarnebebmeng nawu bidjurrkkang, wanjh bimarneyimeng, "Bu ngudda woybukkih duninjh God nuye beywurd, wanjh yidjalmarneyimen nahni kunwarddekilehkilek bu kayimerran buriddi duninjh."

⁴ Dja Jesus biwokdurndiweng, yimeng, "Mahni kunwok kabimdi, kayime, 'Buriddi minj kabitarrkidwon bininj, burryyak. Bu God kawokdi, wanjh mahni kunwok rowk kabitarrkidwon.'" [Deuteronomy 8:3]

⁵ Wanjh nawu Namarnde Duninjh bikang Jesus kore rurrkmirnderri kore kubolkmak nuye God, wanjh bikurmeng kaddum kore kunrurk manbu Temple.

⁶ Wanjh bimarneyimeng, "Bu ngudda woybukkih duninjh God nuye beywurd, wanjh yidjalburriwerrimen kanjdji. Dja kabimdi kayime, 'God ngunmarnemunkewe nuye angels.' Dja mak kayime, 'Angels ngunkukwayhke kubid bedberre, ba bu minj yibungkarrkbun bu kunwardde yimelme.'" [Psalm 91:11-12]

⁷ Dja Jesus biwokdurndiweng, yimeng, "Kunbuyika mak kabimdi bu kayime, 'Yuwn bu yirohrokme nawu Kawohrnan Rowk, nawu God ke.'" [Deuteronomy 6:16]

⁸ Wanjh nawu Namarnde Duninjh biyawoyhdjurrkang. Bikang kaddum kore kurrulum kunkimuk dja bibolkbukkabukkang kubolkwarlahkenh rowk, dja kunwern kunmakmak yonginj kore kubolkbubuyika.

⁹ Wanjh Namarnde Duninjh bimarneyimeng, "Ngudda bu yibardurrukkurlhdan ngaye dja kanmarneboddan, wanjh ngaye won kuhni kubolkwarlahkenh rowk."

¹⁰ Dja Jesus bimarneyimeng, "Yiray kanbawo ngudda nawu Satan. Manbu kabimdi kayime, 'Ngurrimarneboddan nadjalkudji God nawu Kawohrnan Rowk ngudberre. Minj nangale nabuyika ngurrimarnedurkmirri.'" [Deuteronomy 6:13]

¹¹ Wanjh nawu Namarnde Duninjh bidjalwohbawong Jesus. Wanjh kundjalburrikudjini, wanjh nawu angels birrimarnebebmeng dja birribidyikarmeng.

Jesus Dedjingmey Benbukkabukkani Kore Kunbolk Ngarre Galilee

Matthew 4:12-17

(Mark 1:14-15; Luke 4:14-15)

¹² Kaluk bu Jesus biwobek kang John nawu birribongkarrmi kore prison, wanjh nungka durndi kore kunbolk Galilee.

¹³ Bolkbawong kunred Nazareth dja wabmeng yoy kore kunred Capernaum, darnkih kore manbokimuk kore kubolkkimuk kabenebolkngeyyo Zebulun dja Naphtali.

¹⁴ Bu kuhni kurduyimerranj, wanjh woybukendanj God nuye kunwok, kore Isaiiah yingkihimbom kunkareni, bu yimeng,

¹⁵ “Ngudda nawu ngurrihni kore kunbolk Zebulun dja mak kore kunbolk Naphtali, darnkih kore manbolh kahbolhre kore kurrula ngarre, kore borledmikenh bewhbeh kore Jordan mankabo, ngudda nawu ngurrihni kore kunbolk Galilee nawu ngurridjarrkyo bininj nawu minj Jews, wanjh kandibekka.

¹⁶ Bininj nawu munguyh kabirridjalni kore kubolkmunun wanjh bedda kabirribirlunan kore kambolkwolkkayindi rowk! Bedda nawu kabirrihyo kore kundowikenh ngarre kore kabenwarrewonkenh, kaluk God kabemarnebolkwolkan bedberre.” [Isaiiah 9:1-2]

¹⁷ Wanjh kunmekbeni bu bolkyimi, Jesus dedjingmey weykahweykani nuye kunwok, bu yimiyimi, “Ngurriwarnyakmulewarrimen dja ngurribawon kunwarre ngudberre. God kamre kore heavenbeh, dja wanjh darnkih kamhre.”

Jesus Benkayhmeng Yikahwi Bininj Nawu Birrimangi Djenj

Matthew 4:18-22

(Mark 1:16-20; Luke 5:1-11)

¹⁸ Kaluk bu Jesus regehrey kore kukadjid ngarre Kurulla manbu Galilee, wanjh balwohngang benbenenang bininj bokenh. Nakudji karrmi kungey bokenh, Simon Peter dja Peter, dja nawu benedanginj ngeyyoy Andrew. Kaluk bedda benedurrkmirri djenj benemangi mak beneweyi nakimukkenh walabbi kore manbokimuk.

¹⁹ Kumekbe Jesus benbenemarneyimeng, “Ngunemray ngaye kandimunkekadju. Dja benbenemarnbun bu bininj ngurribenang.”

²⁰ Wanjh kundjalmekebe yerre, bedda benebawong walabbi benewoneng, dja benedjalmunkekadjuy Jesus.

²¹ Kaluk Jesus djahdjalley bewh. Wanjh benbenenang benebadbuyika nawu benedanginj yerreh, kaluk kabenengeyyo James dja John, kaluk benemekbe bebeywurd nuye Zebedee. Wanjh bedda birrihbarndi kore kabbala Zebedee dorreng, dja birrihyingkihmarbnuni walabbi bedberre. Jesus wanjh benbenekayhmeng.

²² Wanjh kundjalmekebe yerre benedjalbawong nawu kornkumo dja kabbal, dja wanjh benedjalmunkekadjuy Jesus.

Jesus Benmarneweng Kundjak Bedberre Birriwern Bininj

Matthew 4:23-25

(Luke 6:17-19)

²³ Wanjh Jesus regehrey kubolkbubuyika kore Galilee, benbukkabukkani kore bedberre kunrurrk manbu ngarre yiwarrudj bedberre, dja yolyolmi kunmak kunwok manbu kore God kawohnnan rowk, dja benmarbnuni nawu kundjak manbubuyika birrihkarrmi.

²⁴ Wanjh nungka Jesus wovarlahminj bu birriwobekkang kore kunred rowk ngarre kubolkkimuk Syria, wanjh bininj bindimkani nawu birdulkkihni kore nungka. Mak bedda birridoweni manbubuyika kundjak birrikarrmi. Yikahwi nawu kunkimuk birridjakkbekkani, mak yikahwi nawu namarnde bindikarrmi, dja yikahwi nawu birrikukdeldelmi dja birrikukrayekrayekmeni, dja mak birribuyika nawu birribirlni. Wanjh Jesus benmarnebom rowk.

²⁵ Birriwern bininj nawu birrimdolkkanj kore Galilee, dja kore kabolkngeyyo "Ten Towns", dja mak kore Jerusalem dja Judea, mak kore kabenehkebkalenarren Mankabo Jordan, wanjh birridjal mirndewern duninj birrimunkekadjung Jesus.

5

Jesus Benbukkabukkani Bininj kore Kurrulum Birrihni

Matthew 5:1—7:29

¹ Bu Jesus benmirndenang birrimhyorrmerreri wanjh nungka wam kore kurrulum kumekbe yerrkang ningihni. Kaluk nawu benbukkabukkani nuye wanjh birriyikang,

² dja dedjingmey bu benhbukkabukkani, dja kuhni yimihyimi.

God Kabenmarnekurduyime Kunmak Bedberre Nawu Kabirrikurduyime Kore Nungka Kadjare

Matthew 5:3-12

(Luke 6:20-23)

³ Jesus yimeng, "Bininj nawu minj kabirriburlumerren, nakka wanjh God kabenmarnekurduyime kunmak, dja wanjh kayimerran king bedberre.

⁴ Mak bininj nawu bolkkime kabirrimarnenalkbun nawu benmarnedoweng, nakka wanjh God kabenmarnekurduyime kunmak, dja kabenjilngmarnbun.

⁵ Mak nawu bininj minj kunyid kabirriyawan, wanjh nakka God kabenmarnekurduyime kunmak, dja kabenwon kubolkwern bu kondah kurorre.

⁶ Mak bininj nawu munguyh kabirridjaldjare bu munguyh kabirridjalkurduyime kunmak, nakka wanjh God kabenmarnekurduyime kunmak, dja kaluk God kabenkukbarlmikenwon kunmakmak nuye dja wanjh kabirriworrkmen.

⁷ Mak nawu kabindikongibun birribuyika bininj, nakka wanjh God kabenmarnekurduyime kunmak, dja nungan kabendjalkongibun bedberre.

⁸ Dja mak bininj nawu minj kabirriburrbun kunwarre, dja kabirridjalburrbun kunmak, wanjh God kabenmarnekurduyime kunmak, dja wanjh nakka kabirridarrkidnan nawu God.

⁹ Mak nawu kabindimarnbun bininj bu kabirringurdmen kore kabirriburrenkenh, nakka wanjh God kabenmarnekurduyime kunmak, dja kaluk birriwern kabindimarneyime bu God kabenbornan.

¹⁰ Bu bininj kabirriwokmarrkmang God, dja bu kunmekbekenh kunu birribuyika kabindinjirrhmiwon, wanjh nakka God kabenmarnekurduyime kunmak, dja mak kayimerran king bedberre."

¹¹ "Ngudda nawu kandikadjung, bu bininj ngundimarneyime kunwarre, dja bu munguyh kabirrikurrehkurren bu ngundiwiddjung, dja kunwarre ngundimarneyolyolme bu ngayekenh, wanjh God nakka ngundjalmarnekurduyime kunmak.

¹² Wanjh ngurridjalmarrmarr, dja mak ngurrinjinlgmaknin, kaluk ngudda wanjh ngurrimang nawern namakmak bu yerrekah nawu kahd-jedjenyo ngudberre kore heaven. Dja wanjh karohrok bininj kunmekbe kunwarre bindimarnekurduyimi nawu birriyongi prophets birrihni korroko." Kuhni rowk wanjh Jesus benmarneyimeng.

*Ngad Yiman Kayime Djirla Dja Mak Yiman Ngad Karribolkwolkan
Matthew 5:13-16
(Mark 9:50; Luke 14:34-35)*

¹³ Dja Jesus yawoyhyimeng bedberre, "Ngudda yiman kayime djirla nawu kabirridjalbarung kore kunkanj ba bu kakanjrayekmen kunkod-jkewern, minj mak kakanjnudmen. Wanjh kunmekbe kamenmenyime bu yimankek yibenngurdke bininj birriwarlahkenh rowk bu kabirrikurduyime kore kunwarre. Dja bu minj kuhni ngurrikurduyime, wanjh yiman kayime ngurriyimmerran djirla manbu kawarremen kamanjyakmen, dja bininj kabirriburriwe dja kabirrimelme."

¹⁴ "Mak ngudda kunmekbe rerrih karohrok manbu lightkenh kaben-marnebolkwolkan nawu birriwarlahkenh bininj. Ngudda mak ngurrirohrok kunred manbu manrurkweren kaddum kore kurrulum manbu minj kawarlkayindi!

¹⁵ Kaluk bininj minj kabirribirluwarlkan bu kabirribirlukurrme kanjdji kore banikkin ngarre. Dja nakka wanjh kabirribirlubarnname kore balabala ba bu kabolkwolkan bedberre nawu kabirrihyo kore kurrambalk. Ngudda yiman kayime ngurrirohrok manbu manmekbe kunak.

¹⁶ Wanjh kunmekbe rerrih, ngudda ngurbenmarnebolkwolka birribuyika bininj, ba bu ngundikurdunan kore kunmak ngurrihkurduyime wanjh kabirrimanjbun Kornkumo ngudberre nawu heaven kahni." Kuhni rowk Jesus benmarneyimeng.

Jesus Kanbengdayhkeng Ngad Bu Karriwokmarrkmang Manbu Mankarre Nuye

Matthew 5:17-20

¹⁷ Jesus yawoyhyimeng bedberre, "Ngudda yimankek ngurrihyime bu ngaye ngamwam ngabularrbuyinj Moses nuye mankarre dja mak kore prophets nawu ngundihbukkabukkani. Djal burryyak. Ngaye ngamwam ba bu ngakurduyime kore bedda birriyingkihimbom ngardduk.

¹⁸ Woybukkih duninh marneyime ngudberre, minj njale kabularrbuyindan kore mankarre kabimbuyindi. Minj kayakmen manbu kundjalyahwurd duninh kore kabimbuyindi, wanjh yerrekah bu kayiburnbun rowk kaddum dja mak kondah kurorre wanjh kabalyakmen rowk. Manbu mankarre rowk kabimbuyindi, wanjh kadjalkurduyimmerran.

¹⁹ Wanjh nawu kabakke manbu manbubuyika mankarreyahwurd, dja mak bu kabenbalbukkabukkan nawu birribuyika bininj bu minj kabirrimarrkmang manmekbe mankarreyahwurd, wanjh nakka minj kangeykimuk kore God nawu King Kawohrnan Rowk. Dja nangale nawu kamarrkmang manmekbe manbu mankarre, dja mak bu kabenbalbukkan nawu birribuyika bininj bu kabirrimarrkmang manmekbe mankarre, wanjh nakka kakukenmen kaddum kore God nawu King Kawohrnan Rowk.

²⁰ Dja wanjh marneyime mandjad, ngurriwernhmarrkma God nuye mankarre dja yuwn ngurrbenngunjdjikan nawu Pharisees, dja nawu mankarre kabindihbukkan. Bedda minj kabirriwernhkkarme God nuye mankarre. Ngudda wanjh kunukka ngurrbenyurhkkemen kore ngurrid-jalmarrkma mankarre rowk, dja bu burryyak, wanjh minj ngurringimen kaddum kore God kawohrnan rowk." Kuhni rowk Jesus yimeng.

Jesus Yolyolmi Bu Karrihkangeyidbabbikenh.

Matthew 5:21-26

²¹ Wanjh Jesus yawoyhyolyolmeng dja yimeng, “Ngudda ngurribek kang nawu mawahmawah ngudberre nawu kunkare God benbengdayhkeng, yimeng, ‘Yuwn nangale kabibun nabuyika kabikukkurrme. Nangale nawu kabibun kabikukkurrme nabuyika bininj, wanjh nakka ngadjaldjadme dja ngabun’.

²² Dja ngaye wanjh bolkkime marneyime ngudberre, bu yirung nawu ngunedanginj, wanjh kunukka Ngabbard God ngundjadme dja ngunbun. Mak bu kunwarre duninj yimarneyime nawu ngunedanginj, wanjh nakka ngundidjadme bininj nawu kabirriyerrkan kore Sanhedrin. Dja bu ngudda yimarneyime nawu ngunedanginj, ‘Ngudda yidjalebengwarr!’, wanjh kunukka yiarreworren dja Ngabbard God ngunburriwe kanjdji ba bu yikurung kore hell.

²³ Mah wanjh, bu yiwon God nawu namakmak yikurrme kore altar, dja kunubewu ngudda yiburrbun nawu ngunedanginj kadjalnjlngwarre bu nguddakenh,

²⁴ wanjh yikurrmen dja yibawon nawu namak yiwoyinj God darnkih kore altar, dja yiray ngunewokmarnburrimen werck nawu ngunedanginj. Yerre wanjh yimdurndeng wanjh yiwon God nawu njalehnjale namak.”

²⁵ “Dja mak bu nawu nguneyidko ngunkurrme kore court, wanjh werckwerck yimarnbu namekbe bininj bu ngunedabbolknin kore manbolh ngunerengehre. Dja bu burrkyak, wardi kunukka nawu nguneyidko ngunkukweykan kore judge, wanjh nawu judge kabibalbidkenwon djamun nawu ngunbalkurrme kore yibalrurrkkendi.

²⁶ Wanjh marneyime bu woybukkih duninj, ngudda minj yibolkbawon kumekbe kore yihurrkkendi dja ngaleng yiyakwon rowk nawu kore yikarremulewan.” Kuhni rowk Jesus yimeng bedberre.

Jesus Benbengdayhkeng bu Bininj dja Daluk Kabenemarrenkenh.

Matthew 5:27-32

(Matthew 19:9; Mark 10:11-12; Luke 16:18)

²⁷ Wanjh Jesus yimeng, “Ngudda ngurribek kang kore kunkareni, bu bininj birriyimi, ‘Manbu mankarre kayime, yuwn yibalkurduyime kunwarre bu yibaldjirdmang daluk ngalbu ngokko kakarme nabininj kobeng, mak bininj nawu ngokko kakarme ngalbininj kobeng.’

²⁸ Dja ngaye wanjh marneyime ngudberre, nangale nawu kabinan ngalbu daluk ba bu kabikukwurrmang, wanjh nungka kadjare kunwarre kabimarneyime ngalmekbe daluk, mak kore kukodjukulú nuye nakka wanjh ngokko kunwarre yingkihiyimeng ngaleng ngarre ngalmekbe daluk.

²⁹ Dja bu kunmim kukun ngunmarnbun bu kunwarre yiyime, wanjh yimimbekerrimen dja yimimburriwemen. Kunukka kamak bu yiwe yikahwi kunkilehkilek kore kunburck ke dja wardi mak ngunmokenkukburriwe kore hell.

³⁰ Mak manbu kunbid kukun bu ngunmarnbun kunwarre yiyime, wanjh yibiddadjerrimen dja yiburriwemen. Wanjh kunukka kamak bu yiwe yikahwi kunburck ke dja wardi ngunmokenkukburriwe kore hell.”

³¹ Kuhni mak Jesus yimeng, “Ngurriburrbun kore mankarre kahyime, ‘Nangale nawu kabibawon ngalbininj kobeng nuye wanjh nakka kabiwon djurra kore kahbimbuyindi bu kabenebaworrenkenh.’ [Deuteronomy 24:1]

³² Dja ngaye marneyime ngudberre, nangale nawu kabibawon ngalbininj kobeng nuye wanjh kunukka nakka kabibalhdjurrkkan bu kunwarre kabalkurduyime bu kabibalmang nabuyika bininj. Dja med, ngaleng, bu ngalmekbe ngalbininj kobeng kabimang nabuyika bininj dja kabeneyo, wanjh kunmekbe nawu nabininj kobeng kabibawon. Kuhni bu mandjad. Kuhni mak bu nangale kabenemarren ngalmekbe daluk ngalbu kabibawon nabininj kobeng ngaleng ngarre, kunukka wanjh kunwarre kakurduyime bu kabenemarren ngalmekbe daluk ngalbu ngokko kabibawon nawu nayungki benehni." Kuhni rowk bu Jesus yimeng.

*Yeledjnin bu Ngurriwokkurrmerren.
Matthew 5:33-37*

³³ Wanjh Jesus yimeng, "Ngudda ngurribekkan kore korroko manbu mankarre benbenghdaykeng nawu ngad kadberre namud, 'Yuwn ngurribakke kore ngokko ngurriwokkurrmerren nuye nawu Kawohnan Rowk!'

³⁴ Dja ngaye marneyime ngudberre, yuwn bu ngurriwokkurrmerren! Yuwn ngurriwokkurrmerren bu ngurringeymang kaddum heaven, dja kumekbe wanjh kore God kahni.

³⁵ Mak yuwn ngurringeymang kondah kurorre dja kumekbe wanjh God kahmelme. Mak yuwn ngurriwokkurrmerren bu ngurringeymang Jerusalem, dja kumekbe kunred nuye nawu nawernhkimuk King!

³⁶ Mak minj ngudmandeleng bu ngurringeymarren kore ngudberrekhi ngurriwokkurrmerren. Wanjh kunukka ngurridjalngudjwarre, dja manbu manwohkudji kunngabek minj mak yimarnbu bu yiwohngabekburleri mak yika yiwohngabekbele.

³⁷ Dja bu ngurridjare ngurriwokkurrmerren, wanjh kuhni kunbuyika ngurridjalyimen, 'Yoh', mak yika 'Burrkyak.' Wanjh kunukka woybukkih bu ngurriyime. Dja bu ngurribalwernwon bu ngurribalyime kunwern, wanjh makka kumdolkkang kore nawu Nawarre Duninh." Kuhni rowk bu Jesus yimeng.

*Yuwn Ngurrbenbun nawu Ngundibun Ngudberre.
Matthew 5:38-42
(Luke 6:29-30)*

³⁸ Wanjh Jesus yimeng, "Ngudda ngurribekkan kore manbu mankarre yimeng, 'Bu bininj ngunmarneyidngalke ke, wanjh yidjalbun. Bu nungka ngunmimdong, wanjh ngudda yimimdo. Bu nungka ngunyidbakke, wanjh ngudda yiyidbakkemen nuye!'

³⁹ Dja ngaye wanjh marneyime ngudberre, yuwn ngurridangwerren nawu nawarre bininj. Bu nangale bininj ngunkiyarrkdong kore kukun, wanjh yiborledmen, dja yibawon ngunkiyarrkdong kore kudjaku wardij!

⁴⁰ Mak bu bininj ngunkan kore court ba bu ngunmarnbun yikarremulewan njalehnjale, dja wardi nawu judge ngunmarneyime, 'Yiwo nahni bininj nawu shirt ke!', wanjh yidjalwo. Dja ngaleng, yidjalwon ke manburra warridj.

⁴¹ Mak bu bininj ngundjurrkkan bu ngunedjarrkre mankudji kilometre wanjh yimarneyimen bu yire bokenh kilometres nungka dorreng.

⁴² Kuhni mak kunbuyika marneyime, bu nangale ngundjawan njalehnjale, wanjh yiwo. Yuwn yikaybun nangale nawu kadjare bu ngundjawan." Kuhni rowk bu Jesus yimeng.

*Jesus yimeng, "Ngurribenmarnedjarenin nawu Ngurriyidko Bininj."
Matthew 5:43-48
(Luke 6:27-28,32-36)*

⁴³ Wanjh Jesus yimeng, "Ngudda ngurribekkang kore manbu mankarre kayime, 'Ngurrimarnedjarenin nawu ngurriedbo, dja ngurribenwidna nawu ngurriyidko.' [Leviticus 19:18]

⁴⁴ Dja ngaye wanjh ngayime ngudberre, ngurribenmarnedjarenin nawu ngurriyidko. Ngurridin yiwarrudj bedberre nawu ngundirring.

⁴⁵ Bu kuhni yikurduyime, wanjh kunukka woybukkiah duninh bu ngudda wurdwurd nuye Kornkumo ngudberre nawu heaven kahni. Dja nungka wanjh kamarnbun manbu kundung bu karrungbebme dja kabenwolkan nawu birrimak bininj dja mak nawu birriwarre bininj, mak mandjewk kamunkewe bedberre nawu kunmak kabirrikurduyime dja nawu kunwarre kabirrikurduyime.

⁴⁶ Kaluk bu ngudda ngurribenmarnedjare djalbininj nawu bedda ngundi-marnedjare, wanjh nakka minj ngurrimang nawu namakmak kahdjed-jenyo ngudberre. Mak bininj birriwarre nawu manbu taxkenh kunwardde kabirrihmang, nakka wanjh kunmekbe yerreh kabirrimarnedjaremerren.

⁴⁷ Mak bu ngurrikimang birridjalkudji nawu ngurridangerrinj bininj, wanjh ngudda minj ngurribenyurrhke birribuyika bininj nawu kabirrikurduyime karohrok. Wanjh bininj nawu minj kabirriburrbun God duninh, nakka wanjh kabirrikurduyime!

⁴⁸ Mah, wanjh kandibekkka. Ngudberre Kornkumo nawu heaven kahni, wanjh kadjalkurduyime kundjalmak munguyh munguyh. Wanjh ngudda ngurrikurduyimen karohrok kore nungka, dja ngurridjalkurduyime kundjalmak munguyh munguyh."

6

*Bu Manmolk Karrbenbidyikarme Birribuyika Bininj
Matthew 6:1-4*

¹ Jesus yimeng, "Wanjh ngurriahnarrimen! Bu ngurrikurduyime kore kunmak, yuwn ngurrikurrmerren kore nawu birriwern bininj bu ngundikurdunan dja mak ngundiburlumen. Bu kuhni ngurriyime, wanjh kunukka Kornkumo ngudberre nawu heaven kahni minj ngunwon nawu njale kahdjehdjeno ngudberre.

² Bu ngurriweykan njale yibenwon nawu birrimarladjja bininj, yuwn bu ngurrikurduyime kore kurobbe, yiman bininj nawu kabirrikurrehkur-ren nawu bedda kabirrihkurduyime, nawu kabirrihburluburlumerren bu kabirrihweykan nawu njale kabindihwon ba bu birriwern bininj kabindimakwanken. Mak kunmekbe kabirrikurduyime kore kunurrk manbu yiwarrudjkenh bedberre, mak kore manbolh. Dja mak bedda kabirridjare birribuyika bininj kabindiburlume. Wanjh ngaye marneyime ngudberre bu woybukkiah duninh, birrimekbe bininj wanjh birrimey nawu kahdjehdjeno kore kondah kurorrebeh.

³ Dja ngaleng, bu ngudda kuhni ngurrikurduyime bu njale ngurribenwon bininj nawu birrimarladjja, wanjh manmolk bu ngurribenwo. Dja yuwn kabirriburrbun nawu birribuyika bininj kore baleh ngudda ngurrikurduyime.

⁴ Kaluk bu manmolk ngurridjalkurduyime, wanjh God nawu Kornkumo ngudberre ngunnan kore manmolk ngurrikurduyime, wanjh nunganwali ngundjalwon nawu kahdjehdjeno ngudberre." Kuhni rowk Jesus yimeng.

Jesus Kanbukkabukkang Bu Ngad Karridi Yiwarrudj

Matthew 6:5-15

(Luke 11:2-4)

⁵ Wanjh Jesus yimeng, “Bu yiwarrudj ngurridi, yuwn ngurrikurduyime yiman bininj nawu kabirridjalkurrehkurren. Bedda kabirridjare kabirridi kore kunrurrk manbu yiwarrudjkenh, dja mak kore manbolh ngarre, kaluk kore kurriirkah. Kunmekbe bedda kabirridjare birriwern bininj kabindinan bu yiwarrudj kabirrihdi. Dja woybukkih duninh marneyime ngudberre, bu bedda wanjh ngokko birrimey rowk bedberre nawu djehdjenyoy kondah kore kurorre.

⁶ Ngudda ngaleng, bu ngurridi yiwarrudj, wanjh ngurriray kore ngurrihyo dja ngurridangbalhmen manbu door, bu ngurridi yiwarrudj nuye nawu Kornkumo ngudberre, nawu minj nangale kabihdarrkidnan. Djal nungan ngunan rowk kore manmolk ngurrikurduyime, wanjh ngunwon ngudberre nawu namakmak kakarrme ngudberre.

⁷ Bu yiwarrudj ngurridi, yuwn ngurrikurduyime yiman bininj nawu minj kabirriwernhburrbun kore God. Bedda kabirrihyolyolme dja minj kabirriwernhkarreburrbun bu kabirriyolyolme. Wanjh yimankek bedda kabirriyime God kunubewu kabenbekkan bu kabirrihyolyolme mandjalwern kunwok!

⁸ Wanjh yuwn ngurrikurduyime yiman bedda. Dja wanjh Kornkumo ngudberre kaburrbun nawu njale ngurrihdjare wanjh yerre bu ngurribaldjawan.

⁹ Wanjh bu yiwarrudj ngurridi, wanjh kuhni ngurriyimen, ‘Ngabba nawu ngadberre, yihni kore heaven, ngarridi yiwarrudj kore kungey ke, bu ngundidjalngeyburlume munguyh nawu bininj rowk.

¹⁰ Ngarridjare bu ngudda Kanmarnewohrnan munguyh. Kaluk ngarridjare kamkurduyimerran kore ngudda yidjare, yiman kore heaven, dja mak kondah kurorre.

¹¹ Dja mak kanwo manme ngadberre bu bolkkime munguyh.

¹² Dja mak yibengmidjda ngadberre kunwarre, yiman bu ngad ngarbenbengmidjan bedberre birribuyika bininj nawu ngandimarnekurduyime kunwarre.

¹³ Mak kanbidyikarmen ngadberre, ba kunwarre minj ngarrikurduyime, dja mak kannahna warridj wardi ngandjurkkan ngadberre nawu namarnde duninh.’ ” Kuhni wanjh Jesus benmarneyimeng.

¹⁴ Nawu Jesus yawoyhyimeng, “Yoh, bu ngurribengmidjan kunwarre bedberre birribuyika bininj, wanjh Kornkumo ngudberre kahni kore heaven, wanjh nunganwali ngundjalmarnebengmidjan ngudberre bu kunwarrenh ngudberre.

¹⁵ Dja bu minj nangale ngurrbenmarnebengmidjan kunwarre birribuyika bininj, wanjh God nawu Kornkumo ngudberre minj kabengmidjan kunwarre ngudberre.” Kuhni wanjh Jesus benbengdayhkeyi.

Bu Karribawonkenh Manme Kore Karridi Yiwarrudj

Matthew 6:16-18

¹⁶ Jesus yimeng, “Bu manme ngurribawon kore ngurridi yiwarrudj, yuwn bu ngudda ngurrimarnburren ngurrikebbume yiman bininj nawu bedmandeleng kabirrihburluburlumerren kore kabirrihkurduyime. Bedmandeleng kabirrinjilngwarreworren bu birribuyika bininj wanjh kabirrinan kore manme minj kabirringun. Dja marneyime ngudberre bu woybukkih duninh, nakka ngokko wanjh birrimey nawu namakmak kondah kore kurorrebeh, djalbonj.

¹⁷ Ngudda ngaleng, nawu ngurribawon manbu manme kore ngurridi yiwarrudjenh, wanjh ngurridjalngabekburrimen dja ngurridjalkebdjir-riddjurrimen.

¹⁸ Nawu birribuyika bininj minj kabirriburrbun bu ngudda ngurribawon manme. Wanjh nadjalkudji nawu Kornkumo ngudberre, nawu minj nangale kabihdarrkidnan, wanjh namekbe ngundjalnan kore ngurrikurduyime bu manmolk, wanjh ngundjalwon nawu kahdjedjenyo ngudberre." Jesus wanjh benmarneyimeng kuhni rowk.

Bu Karriidjalburrbun Namakmak Kore Heaven Karri

Matthew 6:19-21

(Luke 12:33-34)

¹⁹ Wanjh Jesus yimeng, "Yuwn ngurrimarnedurrkmirri njalehnjale nawu ngunmarrkkan ngurridjare ngurrimang bu kondah kurorre. Wanjh nakka bininj kabirridjirdmang, dja nuk kabalnudmen, dja wanjh kayakayakmen, dja minj karri munguyh.

²⁰ Dja ngaleng ngurridjalngabekburrimen God ba ngunmarnedjehd-jenkurrme ngudberre kore heaven. Kumekbe wanjh karri, dja minj nangale kadjirdmang, dja minj kanudmen. Kadjaldi munguyh.

²¹ Kore namakmak ngudberre karri, wanjh kunukka ngurridjalburrbun munguyh kore kukange." Kuhni rowk bu Jesus yimeng.

Njale Karrinan?

Matthew 6:22-23

(Luke 11:34-36)

²² Wanjh Jesus yimeng, "Manbu kunmim ngudberre makka wanjh kawolkayindi kore kunburrk ngudberre. Bu ngurrimimmak wanjh kunburrk ngudberre makka kawolkayindi rowk.

²³ Dja bu ngurrimimwarre, wanjh kunburrk ngudberre kakakyongen rowk, dja ngurrikangebarlimiyindi kunwarrehwarre."

Nangale Karrimarnedurrkmirri?

Matthew 6:24

(Luke 16:13)

²⁴ Wanjh Jesus yimeng, "Minj nangale kabenbenemarnedurrkmirri berrewoneng benebokenh nawu kabenewohnan. Wardi kunukka kabiwidnan nakudji dja kabimarnedjare nabuyika. Mak kunubewu kabimunekadjung nakudji dja kabimunkebawon nabuyika. Wanjh kumekbe kayime minj God ngurrimarnedurrkmirri dja kunbuyika money ngunbalmarrkkan. Wanjh kunukka kunwid, dja ngurriburrbu baleh nawu ngurridjare ngurrimarnedurrkmirri."

Yuwn Njale Ngunnjilngwarrewon

Matthew 6:25-34

(Luke 12:22-34)

²⁵ Wanjh Jesus yimeng, "Wanjh marneyime ngudberre, yuwn ngunnjilngwarrewon ngudberre manme manbu ngurringun dja manbu ngurribongun, mak kunmadj warridj nawu ngurridjongburren kore kunburrk! Ngurriburrbun ngudberre kundarrkid wanjh manmekbe manbu mandjalkuken, dja yuwn bu manme. Mak ngurriburrbu nawu kunburrk, dja yuwn bu djal kunmadj.

²⁶ Kaluk ngurriburrbun mayhmayh nawu kungol kahre. Minj bedda kabirridudjenj manmim wanjh kadjordmen kabaldjolengmen wanjh kabirrimoyhmang kabirrikurrmekurrme kore kurrambalk mankimuk. Burrkyak. Dja Kornkumo ngudberre kore heaven kahni, wanjh namekbe

kabenwon mayhmayh rowk manme ba kabirringun. Dja wanjh ngurriwohburrbu bu ngudda ngurrikuken dja nawu mayhmayh nakka walakkiah.

²⁷ Dja kunbuyika ngurriburrbun. Yiddok ngurrimarnburren bu ngurridarrkiddi kunbarnangarrakudji? Burrkyak, dja minj ngurrijingwarre bu kumekbekenh.

²⁸ Wanjh njalekenh ngurrimarrkwarre kunmadjkenh? Ngurrina mangyuy manbu kore kabbal kahdi. Dja ngurrina bu kahdjokadjordmen. Minj kabirridurrkmirri dja kabirrimarnbun kunmadj bedberre.

²⁹ Wanjh marneyime ngudberre nawu King Solomon minj djongbuyindiwirrinj kunmadj manbu manmedjmakkaykenh duninjh yiman kayime mangyuy.

³⁰ Mah, wanjh, bu God kabolkmarnbun bu kabolkmedjmakmen bu karrudjeng njalehnjale kore kabbal, mak bu bolkkime kahdjalkmak, kaluk bu malaywi kabirribalburriwe kore kunak kabalrung. Wanjh ngaleng nungka ngundjongbun ngudberre bu kunmakmak ngurrikukdjongbuyindi. Wanjh njalekenh minj ngurriwernhwoybukwon nungka?

³¹ Mah, wanjh yuwn bu ngurrimarrkwarre dja ngurriyime, 'Njale ngad ngarringun?' Mak ngurriyime, 'Njale ngad ngarribongun?' Mak kunbuyika ngurriyime, 'Njale ngad ngarridjongburren?'

³² Bininj nawu minj kabirriburrbun God duninjh, wanjh kunmekbe kabirriyime kabirribalburrbun njalehnjale nawu wanjh kabirridjaldare mangyuyh. Wanjh ngudberre Kornkumo nawu heaven kahni kaburrbun rowk bu ngudda ngurrihdjare namekbe rowk.

³³ Dja ngurridokmibuyhwemen kore God nawu king kawohrnan, dja ngurriyime bu nakka kawernhdokme kunbubuyikakenh. Dja ngurridjaldjarenin nuye kunmakmak kore kadjare. Wanjh nawu njalehnjale ngurridjare nakka wanjh kaluk ngunmarnekurre bu ngurrimang warridj.

³⁴ Mah, wanjh yuwn bu ngurrimarrkwarre manbu malaywikenh. Kunbarnangarra rowk kakarme kunwarre kunwern ngalenggarre. Dja bonj, ngurridjalmadbu bu kamre."

7

Yuwn bu Ngurridjadmerren

Matthew 7:1-6

(Luke 6:37-38,41-42)

¹ Wanjh Jesus yimeng, "Yuwn bu ngurriwarrewarren, bu ngurridjadmerren. Bu ngurriwiddjurren ngudberre wanjh kunu God ngunmarneyime bu ngurriwarre.

² Kaluk bu ngurridjadmerren kunrayek dorreng, wanjh God ngundjadme ngudberre kunrayek. Bu ngurrirohrokmerren, wanjh kunu God ngundjalrohrokme ngudberre.

³ Dja njalekenh bu bininj kahmimnan dja kayolyolme kundjulng kahyo kore kumim nuye nawu benedanginj nuye, dja kunukka minj nungandeleng kahmimnarren kore manbu kundulk kunkimuk kahwarnamyoy kore kumim nuye?

⁴ Wanjh njalekenh bu kabimarneyime, 'Med, ngawe ke kundjulng manbu kahyo kore kumim ke,' dja minj kaburrbun bu manbu kundulk kahwarnamyoy kore kumim nuye?

⁵ Nakka wanjh kahburlumerren! Dja karrulkwemen werrek kundulk manbu kahwarnamyoy kore kumim nuye. Yerre wanjh kanan mandjad ba bu kawe kundjulng manbu kahyo kore kumim nuye nawu benedanginj."

⁶ “Mak njalehnjale nawu God nuye yehyeng rowk, wanjh yuwn ngurriwon nawu duruk. Dja yuwn bu ngurriburriwe namakmak nuye God kore bikkibik. Wardi kabirridjalmelmelme dja mak kunukka kabirriborledme wanjh ngundibaye.”

Ngurridjawa God nawu Njale Ngurridjare

Matthew 7:7-12

(Luke 11:9-13)

⁷ Wanjh Jesus yimeng, “Njale nawu ngurridjawayhme nawu God, wanjh kunukka ngurrimang. Mak njale nawu ngurriyawan nakka wanjh nguringalke. Dja bu ngurridangdongorong wanjh nakka karrangmarrhmire ngudberre.

⁸ Birriwern rowk nawu kabirridjawayhme nakka kabirrimang. Dja nawu kabirriyawan nakka wanjh kabirringalke. Mak karrangmarrhmire bedberre nawu kabirridangdongodong.

⁹ Bu wurdyaw ngunyidjawan kandidjawa yiddok ngudda kunwardde yiwon?

¹⁰ Dja kunubewu nayin yiwon bu ngunyidjawan djenj?

¹¹ Kunukka bonj, bu ngudda yiman djal ngurriwarre bininj, dja nakka ngurridjalburrbun bu ngurrbenwon namakmak nawu wurdwurd ngudberre, wanjh nawu Kornkumo ngudberre kahni heaven wanjh ngun-yurhke, dja kabenwon namakmak birriwern rowk nawu kabirridjawan.”

¹² “Wanjh ngudda nawu bininj munguyh ngurridjalkurduyimen bedberre ba bu manmekbe mandjalkudjiwi ngundimarnekurduyime ngudberre. Kuhni wanjh kahkarreyo rowk kore Moses dja nawu birriyungkihni prophets kandibukkang.”

Manbu Manbolhdjokko

Matthew 7:13-14

(Luke 13:24)

¹³ Wanjh Jesus yimeng, “Ngurringimen kore gate manbu mandjokko. Dja nangale nawu kangimen kore manbuyika gate manbu manwarlah, wanjh kahre kore kadjalbularrbuyindan. Dja ngaleng birriwern bininj kabirringimerren kore manmekbe gate.

¹⁴ Dja bininj nawu kangimen kore manbu manyahwurd gate dja kare kore manbolhdjokko, wanjh kare kore karrarrkid munguyh munguyh. Wanjh birrimirndekudjukudji kabirringalke manmekbe manbolh.”

Ngurrbenkurdunan Bininj

Matthew 7:15-20

(Luke 6:43-44)

¹⁵ Wanjh Jesus yimeng, “Ngurrinaharrimen kore bedberre nawu kabirrihkurrehkurren prophets. Yimankek bedda ngundiyikan bu yalyal yiman kayime mayh nawu sheep, dja nakka birriwarre, birribang yiman kayime nawu dalkken.

¹⁶ Wanjh ngudda ngurrbenburrbun birrimekbe bininj kore baleh kabirrihurduyime. Njalehnjale namakmak minj kamdolkkan kore bininj nawu birriwarre, wanjh karohrok manbu grapes minj kamdolkkan kore kinj manmirrhyi. Dja manbu figs minj kamdolkkan kore kundalk.

¹⁷ Mak kunmekbe karohrok rerrih, manbu kundulk manmak kakarrme manmak manme. Dja manbu kundulk manwarre makka kakarrme manwarre manme.

¹⁸ Kaluk kundulk manbu manmak makka minj kakarrme bu kabarnem-dangen manbarnemwarre, dja manbu kundulk manwarre minj kakarrme bu kabarnemdangen manbarnemmak.

¹⁹ Manwern kundulk manbu minj kakarrme manbarnemmak, makka wanjh kabirridulkdjobke dja kabirriburriwe kore kunak.

²⁰ Wanjh kunmekbe karohrok bedberre nawu kabirrihkurren prophets bu ngurrbenkurdunan kore baleh kabirrihkurdyime. Yiddok bedda yiman kayime kundulk manbu kakarrme manbarnemmak, dja kunubewu bedda yiman kundulk manbu kabarnemkarrme manwarre.”

Yuwn bu Djal Kunwokwi Bu Karriburlume Nawu Kawohrnan Rowk.

Matthew 7:21-23

(Luke 13:25-27)

²¹ Wanjh Jesus yimeng, “Birriwern bininj ngandimarneyime, ‘Nawu Yiwohnrnan Rowk! Ngudda nawu Yiwohnrnan Rowk!’ Dja bonj, minj birriwern rowk kabirringimen kore God nawu King kahdi. Bininj nawu kabirrikurdyime kore God nawu Kornkumo ngardduk nawu kahni heaven, wanjh bedda birridjalkudji nawu kabirringimen kore kubolkmak heaven.

²² Kaluk bu kunbarnangarra yerreh duninh, kore ngabendjadme bininj rowk, wanjh birriwern bininj ngandimarneyime, ‘Ngudda Yiwohnrnan ngadberre, dja ngad ngarriwokdanj kore kunngey ngudda ke, mak ngarriweyi namarnde bedberre nawu benhbongkarrmi dja mak kunwern ngarikurdyimi kundulkarre ke dorreng!’

²³ Wanjh gaye ngabendarrkidmarneyime birrimekbe bininj bu gayime, ‘Ngurriray, ngudda nawu kunwarre ngurrihkurdyime. Gaye minj kukburrbuyinj ngudberre.’ ”

Bu Karriwokburriwe Jesus, Wanjh Karrinjinlgwarreworren

Matthew 7:24-29

(Luke 6:47-49)

²⁴ Wanjh Jesus yimeng, “Bininj nawu kabirribekkan kunwok ngardduk dja kabirrimarrkmang nakka wanjh yiman kayime bininj nawu nameng kurrambalk kore kuwardde.

²⁵ Wanjh mandjewk djakduy nakimuk dja kundjurrh kumwam, mak kunmayorrkimuk bebmeng, wanjh bom manmekbe kurrambalk. Dja minj rurrkbakkemeninj dja kunu kahrurrkdangen kore manwarddebalabala.

²⁶ Dja bininj nawu kabirribekkan kunwok ngardduk dja minj kabirri-marrkmang, wanjh nakka yiman kayime bininj nawu rurrknameng kore kukayalanj.

²⁷ Wanjh mandjewk djakduy nakimuk, dja kundjurrh kumwam, mak kunmayorrk bebmeng wanjh bom manmekbe kurrambalk, wanjh manmekbe kurrambalk rurrkwarrhmeng, dja rurrkbakkabakkeng.”

²⁸ Kaluk bu Jesus burnbom yolyohyolyolmi, wanjh birrimekbe bininj nawu birrimirnderri, birrikangebarrhmeng bu birribekkanj.

²⁹ Dja nungka minj yolyolmeninj yiman bininj nawu kabindih-bukkabukkan mankarre bedberre. Nungka yolyolmi yiman bininj nawu kundulkarre dorrengh.

8

Jesus Bimarnbom Bininj nawu Kurlahwarreni

Matthew 8:1-4

(Mark 1:40-45; Luke 5:12-16)

¹ Kaluk bu Jesus kumkoluy kore kurrulumbek, birrimirndewern bininj birrimunkemey.

² Dja kumekbe wanjh nakudji bininj nawu kulahwarreni bimiyikang Jesus dja boddanj kumirrk nuye dja yimeng, "Nawu Yiwohrnan, ngudda yikarreme kundulkarre bu kankulahbelewon bu ngudda yidjare."

³ Wanjh Jesus bidyirriyonginj dja bikarrmeng namekbe bininj, wanjh bimarneyimeng, "Ngaye ngadjare marnbun. Dja yidjalmakminen!" Wanjh kundjalmekbe rerrih namekbe bininj djalmakminj.

⁴ Dja kumekbe Jesus bimarneyimeng nawu bininj, "Yuwn nangale mak yimarneyime bu kunihkenh. Dja yiray yikukbukkarimen nuye priest, wanjh yiwo namakmak kore Moses yimeng bedberre bininj nawu birrimakmeni, ba kuhni ngundiwoybukwon."

Jesus Bimarnbom Bininj Nawu Nakuken Soldier Bihmarnedurrkmirri

Matthew 8:5-13

(Luke 7:1-10; John 4:43-54)

⁵ Bu Jesus balngimeng kore kubolkkimuk ngarre Capernaum, kumekbe nakudji bininj nawu benwohrnani soldiers biyikang, kongiburreni nuye bu bibidyikarrmeninjenh.

⁶ Wanjh bimarneyimeng, "Nawu Yiwohrnan, nawu nganhmarnedurrk-mirri kahyo kured dja kahdownen. Kaluk minj karokan dja kababang mak kabikadjukadjung!"

⁷ Wanjh Jesus bimarneyimeng namekbe soldier, "Kaluk ngare ngamarn-bun."

⁸ Dja nawu soldier yimeng, "Nawu Yiwohrnan, ngaye minj ngamak ba bu yimre kore kurrambalk ngardduk. Dja yidjalwokdin ba kamakmen nawu nganhmarnedurrkmirri, dja wanjh kakurduyimerran kore yiyime.

⁹ Kaluk ngaye ngabenhkarrme birrikihkimuk nawu kore ngandimarneyime dja ngabenmarrkmang. Mak ngabenkarrme soldiers bu ngabenmarneyime dja ngandiwokmarrkmang. Bu nakudji ngamarneyime, 'Yiray!' wanjh nungka kare. Mak bu nabuyika ngamarneyime, 'Yimray!' wanjh nungka kamre. Dja nawu nganhmarnedurrkmirri kore kunred, bu kuhni ngamarneyime, 'Kuhni yikurduyimen!' wanjh nungka kunmekbe kadjalkurduyime."

¹⁰ Kaluk bu kuhni Jesus bekkang, nungka wanjh kangebarrhmeng dja borledmeng kore nawu birrimunkekadjung dja benmarneyimeng, "Ngaye marneyime ngudberre bu woybukkih duninj, minj nangale bininj nawu Israel bibeBMWahmeng bu nganayi nawu wernhkanngewoybukni duninj ngardduk yiman nahni soldier.

¹¹ Dja kandibekka. Birriwern bininj kabirrimre kore koyek dja karrikad wanjh kabirriyerrkan manme kabirridjarrkngun Abraham, Isaac dja Jacob kore God nawu king kawohrnan.

¹² Dja bininj nawu yimankek kumekbe birriwerrinj wanjh nakka God kabenkuburriwe kuberrk kore kubolkmunun, kore bininj kabirrihd-jalkayhme dja kabirriyidmeyerren bu kabirrikanjabang munguyh."

¹³ Wanjh Jesus bimarneyimeng namekbe soldier, "Yirrokmnen. Dja nawu ngunhmarnedurrkmirri, nakka kaluk kamakmen bu kore yiwoybukwong wanjh kakurduyimerran nuye." Wanjh nahni nawu bimarnedurrkmirri nawu soldier, wanjh makminj kore kumekbe dungyimi.

Jesus Benmarnbom Birriwern Bininj

Matthew 8:14-17

(Mark 1:29-34; Luke 4:38-41)

14 Bu Jesus wam kore Peter nuye kurrambalk, nungka binang Peter nuye ngalbinjbalak dulkkihdulkkihyoy dja karrmi kundjak manbu kuk-wurluwurlhmi, wanjh djalyonginj kore manbalabala.

15 Kaluk Jesus bibidkarmeng, wanjh namekbe kundjak bibawong. Wanjh ngaleng dolkkang dja manme bibalhwoni Jesus.

16 Kaluk bu balhngokdangeni birriwern bininj nawu namarnde bindih-bongkarrmi wanjh bindimkang kore Jesus. Kaluk bu Jesus wokdanginj dja burriweng namarnde rowk bu bindihkarrmi wanjh nakka bindibawoni, mak nawu birridulkkihyoy nakka mak benmarbnuni.

17 Jesus kuninjkuu kurduyimeng ba kunwok manbu God biwong Isaiah, wanjh kawoybukkenhdan, kore bimbom, dja kayime, "Nungka djakbekkang bu ngad wanjh karridjakkbekkayi, dja ngorrkang rowk nawu nawarrehwarre kadberre." [Isaiah 53:4]

Bininj Nawu Birridjareni Birrimunkekadjuji Jesus

Matthew 8:18-22

(Luke 9:57-62)

18 Bu Jesus bennang nawu birrimirndewern bininj birriwakbuyin-guneng, wanjh benwokrayekwong nawu benbukkabukkani nuye bu kabir-ridjowkke nungka dorreng kore borledmikenh ngarre manbokimuk.

19 Kunmekbe wanjh nakudji nawu kabenhbukkabukkan mankarre bimiyikang Jesus dja bimarneyimeng, "Nawu Kanhbukkan. Kore baleh yire wanjh ngaye djalmunkekadjung!"

20 Wanjh Jesus bimarneyimeng, "Kore kabolkrurk kumekbe kareddi nawu dalkken, mak nawu mayhmayh nakka kakarrme kunred kore kayo, dja ngaye nawu Bininj Duninj minj baleh ngakarrme kunred bu kore ngayo."

21 Nabadbuyika bininj nawu Jesus bimunkekadjung wanjh bimarneyimeng, "Nawu Yiwohrnan, med, ngare ngakukdudjeng werrk ngardduk kornkumo."

22 Dja Jesus bimarneyimeng, "Ngaye kanmunkekadju, dja yibenbawo bedman kabirrikududjerren bedda nawu birrimalngdoweng bininj."

Jesus Ngurdkeng Kunmayorrk Kunkimuk

Matthew 8:23-27

(Mark 4:35-41; Luke 8:22-25)

23 Wanjh Jesus bidbom kore kabbala, dja nawu benbukkabukkani nuye birridjarrkwam.

24 Kumekbe kore kurrula, wanjh kunmayorrkikum bebmeng bedberre bu kundjalburrikudji, dja kukku manbu bobidbom kore kabbala. Dja Jesus nakka kodjkeyoy.

25 Wanjh nawu benbukkabukkani birriwam birridjurlhmeng, dja birri-marneyimeng, "Nawu Yiwohrnan, kangehkemen ngadberre! Dja wardi ngerringakme!"

26 Wanjh benmarneyimeng, "Njalekenh ngudda ngurrihkele? Yiddok ngudda minj kandiwernhwoybukwon?" Wanjh Jesus dolkkang, wokwong bu mandjad manbu kukku dja kunmayorrk, wanjh kumekbe djalnurgd-merrinj rowk.

27 Nawu benbukkabukkani wanjh birrikangebarrhmeng, dja birriyimer-reni, "Nahni nangale bininj? Nawu kunmayorrk dja kukku kabiwokmar-rgmang!"

Jesus Benbenemarnbom Bininj Bokenh Nawu Namarnde Nawern Bindi-hbongkarrmi

Matthew 8:28-34

(Mark 5:1-20; Luke 8:26-39)

²⁸ Bu Jesus djowkkeng bebmeng borledmikenh kore bedberre nawu Gadarene* bininj, wanjh bu kumekbe bininj bokenh benebebmeng nawu namarnde nawern bindihbongkarrmi. Kaluk benemekbe bininj bokenh beneyoy kore nawu korroko birrikududjindi dja mak benebangni duninh dja bininj nawu kumekbe birrihni minj makka birriyimewoyi bu birrirawinj kumekbe.

²⁹ Wanjh benemekbe bininj benekayhmeng, beneyimeng Jesus, "Nawu Beywurd nuye God, njale yidjare ngarrewoneng? Yiddok yimwam bu kanbenebun ngarrewoneng bolkkime, dja minj darnkih bu kabolkyime ngarrewoneng bu nganedowe!"

³⁰ Kaluk kumekbe darnkih bik wanjh birrimirnderri dja birringuni.

³¹ Wanjh namarnde birrikongiburrinj nuye Jesus, "Bu kandjurrkkan ngadberre ngarrbenenebawon, wanjh kanmunkewemen kore nawu bik kabirrihmirnderri."

³² Wanjh Jesus benmarneyimeng, "Ngurriray!" Wanjh nawu namarnde bindibawong nawu bininj bokenh dja bik bindiyikang. Wanjh kundjal-burrikudji bikkibik rowk birrirolobmerrinj kanjdikanjdji kore kurrulum wanjh birridjuhmeng kore manbokimuk birribalkebgangkeng.

³³ Wanjh bininj nawu birrihmirndenahnani namekbe bik, wanjh birrikelerlobmerrinj kore kururkweren, dja bindimarnemulewam bu bikkibik nawu birringangkeng dja mak baleh kurduyimerranj nawu bininj bokenh bu Jesus benburriweng namarnde rowk.

³⁴ Wanjh kundjalmekbe rerrih, nawu bininj birrihni kore kubolkkimuk birriwam birriyikang nawu Jesus. Kaluk bu birringalkeng wanjh birri-marrkdjawani bu kabolkbawon kumekbe.

9

Jesus Bimarbnom Bininj Nawu Nabirlni

Matthew 9:1-8

(Mark 2:1-12; Luke 5:17-26)

¹ Wanjh Jesus wam bidbom kore kabbala, dja djowkkeng durndi kore nuyekih kunredkimuk bolkngeyyoy Capernaum.

² Bu kunmekbe, wanjh yikahwi bininj birrimkang nakudji nawu nabirlni kore Jesus, kaluk nungka kodjkeyoy kore mat. Bu Jesus bennang birimekbe bininj bu birrikangewoybukni, wanjh bimarneyimeng namekbe nabirl, "Korlonj, yuwn yimarrkwarre, dja nawu kunwarre ngudda yiyimi, wanjh bularrbuyindanj rowk."

³ Kaluk yikahwi nawu mankarre kabindihbukkan birrimarneyimerinjin, "Nahni bininj kawokdi yimankek nungka kayime God, dja wanjh kawarre!"

⁴ Nungka Jesus benkodjkuluburrbom, wanjh yimeng, "Njalekenh ngudda ngurrihburrban kunwarrehwarre?"

⁵ Dja baleh mak ngayime, 'Ngudda kunwarre ke bularrbuyindanj', mak kunbuyika kuhni ngamarneyimeninj, 'Yirrolkka dja yiray'?

* 8:28 Yikahi bindingeybom "nawu Gerasenes" dja "nawu Gergasenes".

⁶ Ngaye bukkun ngudberre bu ngaye nawu Bininj Duniñh, wanjh ngakarrme bu ngabenmarnebengmidjdan kunwarre bedberre bininj kon-dah kurorre.” Wanjh Jesus bimarneymeng namekbe nabirl, “Yirrolka, yima ngudda ke mat, dja yirrokmn kured.”

⁷ Wanjh namekbe bininj dolkkang dja dokmeng kured.

⁸ Kaluk bininj nawu birrihmirnderri kumekbe bu birrinang kore kurduyimerranj, bedda wanjh birrikeleminj dja birriburlumeng God bu benwong bininj manbu kundulkarre nuye.

Jesus Bimey Matthew

Matthew 9:9-13

(Mark 2:13-17; Luke 5:27-32)

⁹ Bu Jesus balhbolkhawoni kumekbe, nungka binang bininj nawu ngeyyoy Matthew ningihni kore kabirriharremulewan taxes. Wanjh Jesus bimarneymeng, “Ngaye kanmunkekadju!” Wanjh nungka dolkkang dja bimunkemey Jesus.

¹⁰ Kaluk bu yerrekah Jesus dja nuye benbukkabukkani birringuniñguni manme kore Matthew nuye kurrambalk, dja birriwern nawu tax kabirrihmang dja nawu birriwarre bininj wanjh birrimwam kumekbe birrihdjarrknguni manme.

¹¹ Kaluk nawu Pharisees, bu bindinang, wanjh bindidjawam nawu benbukkabukkani, “Njalekenh nawu ngunhbukkabukkan kabirrihdjarrkngun manme nawu birriwarre bininj dja nawu tax kabirrihmang?”

¹² Bu Jesus benbekkang, wanjh nungka yimeng, “Nawu birridulkiyi bininj nakka kabirridjare doctor, dja nawu birrimakmak nakka wanjh minj kabirridjare doctor.

¹³ Dja ngurriway wanjh ngurriburrbu kore baleh kahmenmenyime kore kabimbuyindi, ‘Makka walakkih ngadjare nawu mayh ngurrihkinje ngayekenh, dja nawu ngawernhdjare nakka wanjh ngurribenkongibun bulkkidj duniñh nawu bininj’. [Hosea 6:6] Ngaye minj ngamrawinj bu ngabenkimang nawu birrimak bininj. Dja ngamwam bu ngabenkimang nawu birriwarre.”

Jesus Nuye Bininj Birribawong Manme Bu Birridjaldi Yiwarrudj.

Matthew 9:14-17

(Mark 2:18-22; Luke 5:33-39)

¹⁴ Bu kunbarnangarrakudjini yikahwi benbukkabukkani nuye John birrimyikang Jesus dja birridjawam, “Njalekenh nawu Pharisees dja ngad bu yika ngarribawon manme ba bu ngarridi yiwarrudj, dja nawu ngudda ke yibenbukkabukkan minj kunukka kabirrikurduyime?”

¹⁵ Wanjh Jesus yimeng, “Bu bininj nawu daluk benemarrinj, kaluk nuye nawu birridabbolk minj kabirrinjilngwarre bu nungka dorrengh kabirrihdjarrkdi. Kaluk bu yerrekah kamre nuye nawu daluk kabenemarren bu kabenbawon kare, wanjh kunmekbe bedda kabirribawon manme bu kunnjilngwarrekenh.”

¹⁶ “Kaluk bu kunbuyika marneyime. Minj nangale kabibbun nawu kayahwurdmen manburra manbu mankerenge kore kahrurrk nawu nakare badjubadju. Dja bu kunmekbe kakurduyime, wanjh namekbe manburra kayahwurdmen dja kadjalkmire kore badjubadju.”

¹⁷ “Mak, bininj minj kabirriborrahkendong manbokerrnge wine kore nakare baladji nawu kulah birrimarnbom. Dja wardi kabarrhme nawu baladji wanjh kaboyakarrburen manbu wine, mak nawu baladji wanjh kabalwarremen. Dja ngaleng kabirriborrahkendong manbokerrnge wine kore nakerrnge baladji. Wanjh kunukka kadjalmak rowk.”

Jesus Bimimbiwong Ngalyawk Dja Bimarnbom Daluk Ngalbu Bimadjkarmeng

Matthew 9:18-26

(Mark 5:21-43; Luke 8:40-56)

18 Bu Jesus djahdjalyolyomi kuninjkuu, nakudji bininj nawu kawohnan kunurrk manbu yiwarrudj, wanjh bimiyikang, barddurrukkurlhdanj kore kumirrk nuye Jesus, wanjh bimarneyimeng, "Ngalbeywurd ngardduk bolkkime doweng. Dja bu yimre yibidkurrmerren ngaleng ngarre wanjh kunukka kayawoyhdarrkidmen."

19 Wanjh Jesus dja nawu benbukkabukkani nuye birridolkkarrinj dja birridjarrkwam namekbe bininj.

20 Wanjh bu birrireyi, ngalkudji daluk ngalbu kurlbahkurlbarey bu twelwe mandjewk, kumwam kore kubodme nuye Jesus wanjh wohkarmeng nawu kunmadjkuyeng nuye, kaluk kore kanjdji kurrid.

21 Kaluk ngaleng kanjdji baybaywi yimihyimi, "Bu ngakarrme kunmadj nuye wanjh kunukka ngamakmen."

22 Kaluk Jesus borledmeng binang ngalmekbe daluk dja bimarneyimeng, "Korlonj, yinjilngmaknin, dja ngudda wanjh yimakminj kore kanwoybwong." Wanjh ngalbu daluk makminj kundjalmekbe rerrih.

23 Wanjh Jesus benebalwam namekbe bininj nawu kawohnan kore kurrambalk nuye. Dja bennang birriwern bininj kumekbe birrinalkbuni dja birribuhmi flutes kore kundowikenh, wanjh bolkwokwernni.

24 Wanjh Jesus benmarneyimeng, "Ngurriray. Ngahli wurdyaw minj dowimeninj, dja ngalka kahdjalkodjkeyo." Kaluk bininj nawu kumekbe birrihdi bedda wanjh birridjekmiwong.

25 Wanjh bu bindikukbebkeng kore kurrambalk, wanjh Jesus wam kore ngalmekbe ngalyawk yongohyoy dja bibidmey, wanjh ngaleng dolkkang yawoyhmimbiminj.

26 Wanjh nungka wowarlahminj kore kumekbe kubolkwarlah.

Jesus Benbenemarnbom Bininj Bokenh Nawu Benemimdubbeni

Matthew 9:27-31

27 Kaluk bu Jesus balhbolkbawoni, wanjh bininj bokenh nawu benemim-dubbeni kumekbe benemunkemey, dja bedda benedjalkayhmirey, "Nawu Beywurd nuye David! Kanbenekongibu ngarrewoneng!"

28 Bu Jesus balngimeng kururrk, benemekbe bininj bokenh birridjar-krngimeng. Wanjh Jesus benbenedjawam, "Yiddok ngudda ngunewoybuk-won bu ngaye benbenemarnbun ba bu kamak ngunebolknan?" Wanjh bedda beneyimeng, "Yoh, nawu Yiwohrnan."

29 Wanjh Jesus benbenemimkarmeng bu yimeng, "Ngudda kandiwoy-bukwong wanjh kadjalkurduyimerran kore ngunedjareminj."

30 Dja bedda benedjalbolknang. Wanjh Jesus benbenewokrayekwong mardabbabba yimeng, "Yuwn ngunemulewarren bedberre bu kunin-jkunukenh."

31 Dja bedda benedjalwam benedjalmulewani bu Jesuskenh kore kumekbe kubolkwarlahkenh.

Jesus Bimarnbom Bininj Nawu Wokyakni

Matthew 9:32-34

32 Kaluk bu benemekbe bininj bokenh benebalhbolkawoni, yikahwi bininj birrimkang nabadbuyika kore Jesus. Kaluk namekbe bininj minj wokdiwirrinj. Nawu namarnde bihbongkarrmi.

33 Wanjh bu Jesus bikukburriweng nawu namarnde, dja mak bininj nawu wokyakni wanjh nungka wokdanginj. Kaluk nawu bininj birrihdi,

bu birrinang wanjh birrikangebarrhmeng dja birriyimeng, “Kuhni minj nangale mak birrikurdunayinj kondah kore ngad karrihni nawu Israel kankebmawahmeng!”

³⁴ Dja nawu Pharisees birriyimi, “Nawu kawohrnan bedberre namarnde, namekbe wanjh kabihwon Jesus kundulkarre nuye bu kahbekekenh bedberre namarnde.”

Jesus Benkongibom Bininj Rowk.

Matthew 9:35-38

³⁵ Wanjh Jesus regehrey kubolkwern kore kubolkubuyika benbukkabukkani bininj kore kunrurrk manbu yiwarrudj, dja yolyolmi bedberre manbu Manmakkykenh Kunwok bu God kawohrnan rowkkenh, dja mak benmarbnuni bedberre nawu birrihkarrmi kunbubuyika kundjak.

³⁶ Kaluk bu nungka bennang birriwern bininj, wanjh benkongibuni, dja bedda birridjakkbekkani dja mak birringudjwarreni, yiman kayime mayh sheep nawu birrihmayahmi bu minj birrikarmeninij shepherd ba bu bennahnayi.

³⁷ Wanjh Jesus benmarneyimeng nuye benbukkabukkani, “Manme mandjoleng manbu karrudjindi kore kabbal, dja nakka birrimirndeyahwurd bu kabirridurkmirri.

³⁸ Dja ngurridjawa nawu kawohrnan kore karrudjindi rowk, ba kabenmunkewe birriwern bininj bu kabirriyikarmerren.”

10

Jesus Benwong Kundulkarre Bedberre Bininj Nuye

Matthew 10:1-4

(Mark 3:13-19; Luke 6:12-16)

¹ Wanjh Jesus benkayhmeng twelve nawu benbukkabukkani nuye dja benwong kundulkarre ba kabirriwe namalngwarre dja mak kabindimarnbun bininj nawu kunbubuyika kundjak kabirrihkarrme.

² Kaluk nahni twelve nawu benbukkabukkani, wanjh birrihngeyyoy; yiman Simon nawu kunbuyika kangeyyo Peter, dja nawu benedanginj Andrew. Benezbuyika mak, nawu James dja John nawu bebeywurd nuye Zebedee.

³ Dja birribuyika nawu Philip dja Bartholomew, Thomas dja Matthew nawu tax mangihmangi, James nawu beywurd nuye Alphaeus, Thaddaeus,

⁴ Simon nawu birringeybom Zealot, dja Judas nawu bimarnewirrihmerinij Jesus dja bikukweykang.

Jesus Benbengdayhkeng Nawu Benbukkabukkani Dja Benmunkeweng

Matthew 10:5-15

(Mark 6:7-13; Luke 9:1-6)

⁵ Bu Jesus minj benbangmemunkewemeninj birrimekbe twelve nawu benbukkabukkani nuye, wanjh benwokwong bedberre, bu yimeng, “Yuwn ngurre kore bininj nawu minj Jews mak kubolkubuyika kore Samaritans kabirrihni.

⁶ Dja ngaleng ngurridjalre kore bininj nawu Israel benkebmawahmeng, nawu yiman sheep kabirrihbengmayahme.

⁷ Bu kumekbe ngurre, wanjh ngurrbenbukkabukkan bu kuhni ngurriyimen, ‘God nawu king, wanjh darnkih wanjh kamhre bu ngurrinan!’ Kuhni ngurrbenmarneyimen.

⁸ Mak ngurrbenmarnbu nawu kabirrihdulkkihyo, dja mak ngurrben-dolkayhwemen nawu birridoweng, mak ngurrbendjirridjbu nawu birrikulahwarre, dja mak ngurriwemen nawu namarnde rowk. Ngaye

won mahni kundulkarre ngudberre bu minj njale kakarremulewayindan dja wanjh ngurrbenbidyikarrmen birribuyika bininj bu minj mak njale ngundikarremulewan.

⁹ Yuwn bu kab kunwardde ngurrikukkan nawu gold, silver dja copper.

¹⁰ Mak yuwn ngurrikan baladji dja kunmadj nabubuyika ngudberre, mak nawu nabubuyika nawu ngurrihdengedjongbuyindi, dja mak kundulk manbu ngurrihkarndudjkarren. Dja ngurribun bu nangale nawu kahdurrmirri, wanjh nanu kamak kabirrikarremulewan.

¹¹ Kaluk bu ngurribalngimen kore karurrkmirnderri, wanjh nguringalkemen bininj nawu namak ba bu ngunbolkwon. Dja wanjh ngurriyo mahni kunrurrk dja kaluk yerrekah bu ngurribolkbawon.

¹² Mak bu ngurribalngimen kore kurrambalk, wanjh ngurriyimen, 'Kunmodmikenh ngurrihdjarrkni.'

¹³ Dja bu bininj nawu kumekbe kabirrihdi bu ngundikimang, wanjh manmekbe kunmodmikenh ngurribenyibawo bedberre birridjarrkdin. Dja bu minj ngundikimang, wanjh ngurridurndiwemen.

¹⁴ Dja bininj nawu minj kabirridjare bu ngundikimang dja mak minj kabirridjare kunwok kabirribekkan ngudberre, wanjh ngurrbenbawo birrimekbe bininj kore kurrambalk, dja kubolkkimuk, dja ngaleng ngurrihdengedjulngwerrimen bu ngurribawon kore bedda.

¹⁵ Wanjh marneyime ngudberre bu djal woybukkih duninh, bu kamre kunbarnangarra ngarre bu God kabendjadmekenh bininj rowk, wanjh kunukka kadjalwarre duninh bedberre bininj nawu minj ngundibekkayi, kore kumekbe kunred. Ngudda ngurriburrbun kore God benbolkbullarrbom kunred Sodom dja Gomorrah, wanjh kuhni kabenmarneyime birrimekbe bininj, dja wanjh kawernhbolkbullarrbun." Kuhni bu Jesus bengdayhkeng.

Jesus Bengdayhkeng Nawu Benbukkabukkani Bu Kunrayek Kabenmarnebehme

Matthew 10:16-25

(Mark 13:9-13; Luke 21:12-17)

¹⁶ Kaluk Jesus benyawoyhmarneyimeng nawu benbukkabukkani, benmarneyimeng, "Wanjh kandibekka, ngaye munkewe ngudberre kore bininj nawu birriwarre. Dja ngurrimayalimakin yiman kayime nayin dja ngurridjakwarrenin yiman kayime doddorok.

¹⁷ Dja ngurrinahnarrimen bedberre bininj. Wardi ngundimang dja ngundikurrme kore court dja mak ngundiwidjbihe kore kunrurrk manbu yiwarrudj.

¹⁸ Wanjh kunukka ngayekenh bu ngundikan dja ngundiname kore kumirrk bedberre nawu governors dja nawu kabirrihwohrnan kings, wanjh ngurrbenmarneyimen birrimekbe dja bininj nawu minj Jews wanjh ngurrbenmarneyime manbu djal kunwoybuk bu ngayekenh.

¹⁹ Kaluk bu ngundimang, yuwn bu ngurrinjlingwarre kore baleh ngurriyime bu ngurriwokdi. Kaluk kunmekbe kabolkyime, wanjh kunukka ngunwon ngudberre bu kore ngurriyime.

²⁰ Nakka minj djal ngudman ngurriwokdi dja nakka wanjh Namalng-makkaykenh nuye Kornkumo ngudberre ngunbidyikarrme ba bu ngurriburrbun kore ngurriwokdikenh.

²¹ Kaluk nawu birridangerrinj nakka kabindikukweykarren ba bu birriwarre bininj kabindibun, mak nawu kokorkumo kabindikukweykarren wurdwurd bedberre ba bu kabirridowe. Mak wurdwurd wanjh

kabindimarnewokburriwe nawu kokornkumo dja ngalbabadjan, dja kabirriborledme kabindikanjkurrme bedberre ba bininj kabindibun.

²² Wanjh birriwern bininj ngundinjirrhmiwon kunmekbekenh bu gaye kandihkadjung, dja bininj nawu kahdjalkangewoybuk ngardduk munguyh bu kayiburnbun, wanjh nakka kabirringehme munguyh munguyh.

²³ Mak kore bininj ngundinjirrhmiwon ngudberre, wanjh ngurriaray kubolkbuyika. Dja marneyime woybukkih duninjh, minj ngurriyakwon kore ngurridurrrkmirri rowk kore kubolkkihkimuk ngarre Israel bu ngurribolknan bu yerrekah ngamre nawu Bininj Duninjh.

²⁴ Bininj birriwarre wanjh kannjirrhmiwon gaye nawu ngabenbukkabukkan, dja wanjh ngudda warridj ngundinjirrhmiwon, ngudda nawu gaye bukkabukkan. Bedda kandinjirrhmiwon gaye nawu ngawohrnan ngudberre, dja mak ngudda wanjh ngundinjirrhmiwon ngayekenh.

²⁵ Ngudda wanjh kandingunjdjikan, ngudda nawu gaye bukkabukkan, dja nawu kandimarnedurrrkmirri. Wanjh kunmekbekenh ngundinjirrhmiwon. Birrimekbe bininj wanjh ngandingeybuyi Namarnde nawu Beelzebub! Wanjh ngundiwernhngewarrewon duninjh ngudberre warridj!" Kuhni wanjh Jesus benbengdayhkeng.

God Karrikengemen Dja Yuwn Bu Bininj

Matthew 10:26-31

(Luke 12:2-7)

²⁶ Jesus benyawoyhmarneyimeng nuye nawu benbukkabukkani, benmarneyimeng, "Dja wanjh yuwn ngurrbenkengehme birrimekbe bininj, wardi kunukka nawu njalehnjale kabirrikurduyime kunubewu bolkkime kahwarlkkayindi, dja wanjh nakka kabebme kurobbe karri, dja nawu manmolk kabirrikurduyime bu bolkkime, wanjh kaluk kabebme kurobbe, ba bu birriwern kabirriburrbun.

²⁷ Bu baleh yarrkka gaye marneyime kore yiman kumunun, wanjh ngudda ngurrimulewa kore kabolkwolkayindi. Ngaye ngayawkme bolkkime bu bengdayhke ngudberre, dja wanjh yerrekah ngudda ngurridarrahen wernkih duninjh kore kurobbe ba birriwern bininj ngundibekkan!

²⁸ Yuwn mak ngurrbenkengeme bininj nawu ngundibun kunburrkwi dja minj kabirribun manbu kunmalng ngudberre. Dja nadjalkudji wanjh ngurrikengemen, nawu kunburrrk dja warridj kunmalng kabularrbun kore hell."

²⁹ "Nawu bokenh mayhmayh nawu kilehkilelk, bu kabirrirohrokme wanjh nakka kare nakudji cent, dja Kornkumo ngudberre kadjalnahan, dja kaburrbun bu wardi nakudji kakukwarrhme kore kurorre.

³⁰ Yiman mak kunggabek rowk ngudberre, wanjh makka God rohrokmeng reriuh.

³¹ Wanjh yuwn bu ngurrikele. Dja nawu Kornkumo ngudberre nawu bininj, wanjh ngundjalwernhmarnedjare duninjh, dja yuwn bu mayhmayh." Kuhni bu Jesus yolyolmeng bedberre nawu benbukkabukkani.

Bu Karrbenmarnemulewarren Bedberre Birribuyika Bininj

Matthew 10:32-33

(Luke 12:8-9)

³² Wanjh Jesus yawoyhyimeng nawu benbukkabukkani, "Bu ngurrbenmarneyime birribuyika bininj bu ngudda gaye ngardduk bininj, wanjh kunukka mulewan ngudberre bu ngamarneyime ngardduk Kornkumo nawu heaven kahni bu ngudda wanjh gaye ngardduk.

³³ Dja bininj nawu nganwaralkukwakwan gaye bu kayolyolmerren kore birribuyika bininj, wanjh kunukka ngamarneyime Ngabbard ngardduk bu nahni bininj minj gayekeh.” Kuhni bu Jesus yolyolmerrinj.

Bininj Kabirrinjirrhmiworren Bu Jesuskenh

Matthew 10:34-39

(Luke 12:51-53; 14:26-27)

³⁴ Wanjh Jesus yimeng nuye benbukkabukkani, “Yuwn ngurriyime bu gaye ngamkang kunmodmikenh rowk kondah kurorre. Dja gaye wanjh ngamkang kunyid, yiman mandjawak.

³⁵ Ngaye ngamwam kore kabimbuyindi bu kayime, ‘Bu ngabenborledke nabebeywurd bu kabindirring kokornkumo bedberre, dja ngalyayaw kabindirring nababadjan, mak nawu nayayaw kabindhkar-me kabindirring ngalbibinjmorne bedberre.

³⁶ Nawu ngurriyidko duninj wanjh nakka nawu ke namud!’ [Micah 7:6]

³⁷ Bininj nawu kabenwernhmarnedjare nawu ngalbadjan dja kornkumo, dja gaye nganmarnedjare djal walakkih, nakka wanjh minj namak bu gayekeh. Mak nawu kabenwernhmarnedjare nayaw dja ngalyaw, dja gaye djal walakkih, wanjh kunmekbe rerrih karohrok nakka minj namak bu gayekeh.

³⁸ Nangale nawu minj kahngormang manbu kundulk cross nuye, dja nganmunkekadjung, wanjh nakka minj namak bu gayekeh.”

³⁹ “Mak bu ngudda minj ngurridjare ngurridowen wanjh nakka minj mak yibalkarme manbu kundarrkid. Dja bu ngurrikanjkurmerren bu gayekeh ngardduk, wanjh kunukka ngurridjalmalngmimbi bu munguyh munguyh.” Kuhni rowk bu Jesus yolyolmi.

God Kabenwon Namakmak Bedberre Bininj Nawu Kabindibidyikarme

Nuye Bininj

Matthew 10:40-42

(Mark 9:41)

⁴⁰ Kaluk Jesus benmarneyimeng nuye nawu benbukkabukkani, “Nangale nawu ngunkimang wanjh kunukka gaye ngankimang. Mak nangale nawu gaye ngankimang wanjh nakka kabikimang nawu nganmunkeweng.

⁴¹ Mak nangale kabikimang nawu prophet bu kuhnikenh nungka kamakwan nawu prophets, wanjh nakka nunganwali kamang namakmak nawu God kabenwon prophets rowk. Dja mak nangale kabikimang nawu namak bininj bu kuhnikenh nakka kabenmakwan birrimak bininj, wanjh nakka kunmekbe rerrih kamang namakmak kore God kabenwon birridjalmak bininj.

⁴² Mak nangale kabibowon kukku kunboyahwurd nakudji nawu ngardduk bininj, bu kuhnikenh nungka kabenmakwan gayekeh nawu ngabenbukkabukkan, wanjh nakka minj munguyh kabarlanhmang namakmak nawu kore kahdjedjenyo nuye.”

11

Jesus Biyolyolmi John Nawu Benkodjdjukeyi Bininj

Matthew 11:1-19

(Luke 7:18-35)

¹ Bu kunmekbe Jesus burnbom benwokwong bedberre nawu benbukkabukkani nuye, wanjh nungka bolkbawong kumekbe dja wam kore

kubolkkilelelh kaluk kore kubolkkimuk ngarre Galilee ba kumekbe wanjh kabenbukkabukkan dja kayolyolme bedberre.

² Bu kunmekbe bolkyimi, John nawu benkodjdjuhkeyi nakka wanjh rurrkkendi kore prison, dja nungka wanjh biwobekkanng nawu Christ kore kurduhkurdyimi. Wanjh John benmunkeweng nawu benbukkabukkani nuye bu birridjawam Jesus.

³ Wanjh birriyimeng, "Yiddok ngudda namekbe nawu birrihmulewam kamre? Dja kunubewu ngarrimadbun nabuyika?"

⁴ Wanjh Jesus benwokmey yimeng, "Ngurriray ngurrimarneyimen John kore ngurribekkan rowk, dja kore ngurrikurdunang.

⁵ Nawu birrimimdobbe nakka kabirribolknan, dja nawu birribirl nakka kabirrire, mak nawu birrikulahwarreni nakka wanjh birrikulahmakminj, mak nawu birribengwarni nakka wanjh kabirribekkan, mak nawu birridoweng nakka birrimyawoyhdolkani kore kundowikenh, dja nawu birrimarladj nakka kabirribekkan Kunwok manbu Manmakaykenh Duninh.

⁶ Dja kore ngaye ngahkurduyime, wanjh God kabenwon kunmakmak bedberre bininj nawu minj ngandiwirrihme." Kuhni bu Jesus yolyolmerinj.

⁷ Kaluk nawu John nuye benbukkabukkani bu birriwam, wanjh Jesus dedjingmey benhmarneyolyolmi birriwern bininj nawu kumekbe birrihdjarrkdi bu nungkakenh John, wanjh yimeng, "Bu ngurriwam kore kubolkkardleh wanjh kaluk njale ngurridjareni ngurrinang? Bu ngurrinang John, yiddok nungka yiman kayime kundalk manbu kunmayorrk weng?"

⁸ Dja njale ngurriwam ngurrinang? Yiddok bininj ngurrinang nawu manmadjmakkaykenh djongbuyindi? Burrkyak. Bininj nawu manmadjmakkaykenh kabirridjongbuyindi nakka kabirriyo kore kurrambalk bedberre kings nawu kabirrihwohrnawohrnan.

⁹ Wanjh njale ngurriwam bu ngurrinang? Yiddok nawu prophet? Yoh, wanjh marneyime ngudberre, nawu John, nakka wanjh prophet, dja wanjh prophet duninh.

¹⁰ Kuhni wanjh bimbuyindanj bu nungka biyolyolmeng, 'Nawu Kawohrnan Rowk yimeng, "Ngamunkewe nawu kakan kunwok ngardduk bu kayirrokme, dja kayingkihbolhmarnbun ke." ' [Malachi 3:1]

¹¹ Dja marneyime bu woybukkih duninh, minj nangale nawu kondah kurorre danginj bu kabiyurrrhke John nawu kabendjuhke bininj. Djal bonj, nawu birriwarlahkenh rowk nawu kabirrihni kore God nawu king kawohrnan rowk bedberre, wanjh bedda kabirrihyurrrhke John.

¹² Kunyimekbe bu John ningihni wanjh bu bolkkime yimerranj, God wanjh kundulkarre dorreng marnbuni nuye kore nungka kawohrnan, dja birribang bininj bedman kabirrirohrokme bu kabirringime ba bu kabirriwohrnan kunmekbe.

¹³ Nawu birriyungki prophets dja manbu mankarre nuye Moses birriyolyolmi rowk, kore God benwoni kunwok nuye, dja wanjh John kumwam yerre.

¹⁴ Dja bu ngurrbenwoybukwon kore birriyimeng, wanjh John nakka Elijah, nawu birriyongkihulewam bu kumhrey.

¹⁵ Ngudda bininj nawu kandiwozbekkan, wanjh kandimenmenbekka!"

¹⁶ "Baleh mak ngayime bedberre bininj nawu kuninjku kabirrihni? Kaluk bedda yiman njale? Bedda yiman kayime wurdwurd nawu kabirrihni kurobbe kore birriweykani yehyeng rowk, dja kabirrikayhmerren,

¹⁷ 'Ngad ngundimarnebuhmeng nawu flute ngudberre dja ngudda minj ngurriborrkkemeninj! Dja mak ngarrikongiburreni bu ngarriwayini dja ngudda minj ngurrinalkbuyi!'

¹⁸ Bu John kumwam nungka minj manme nguyi dja bonguyi yiman nawu birribuyika bininj. Dja bedda birriyimeng, 'Nakka namarnde kakarrme!'

¹⁹ Dja bu ngaye, nawu Bininj Duninj ngamwam dja manme manwern nganguni dja wine ngabonguni, wanjh bininj kabirriyime, 'Ngurrina! Nungka mandjalwern manme kangun dja wine manbowern duninj kabongun, mak nungka kabirridabbolk nawu tax kabirrihmang dja nawu birriwarre bininj.' Dja bonj, ngaleng wanjh kunmayalimak kabukarren bu kayime mandjad kore baleh kakurduyime." Kuhni rowk Jesus yimeng.

Jesus Benbengdayhkeng Nawu Bininj Minj Birribawoyi Kunwarre Bedberre

Matthew 11:20-24

(Luke 10:13-35)

²⁰ Wanjh Jesus dedjingmey benmarnebolkyolyolmi bu benwarrewani yikahwi bininj nawu birrihni kore kubolkbubuyika kunred kore Jesus durrrkmihdurrrkmirri kundulkarre dorreng nuye. Dja bininj nawu kumekbe birrihni nakka minj birriwarnyakmulewarrimeninj bu birribawoyinj manmekbe bedberre kunwarre.

²¹ Wanjh Jesus benyolyolmeng, yimeng, "Kadjalwarre ngudberre nawu ngurrihni kore kunred Korazin! Mak kadjalwarre ngudberre nawu ngurrihni kore kunred Bethsaida! Dja manbu kundulkarre dorreng kore ngahkurduyimi ngudberre, bu kunkareni ngaye ngakurduyimeninj kore kunred bokenh Tyre dja mak Sidon, kaluk bininj nawu kumekbe birrihni nakka wanjh birriwarnyakmulewarrimeninj nuye God bu kerrenghekenh duninj. Mak birridjongbuyindiwirrinj nawu madjwarreni, dja birridudjerrimeninj bu birrikukbarurrimeninj kunburle dorreng ba bu birriborledkerrimeninj nuye God.

²² Dja marneyime ngudberre nawu bolkkime ngurrihdi, bu kamre ngarre bu God kabenyidjadmekenh, wanjh kunukka kadjalwarremen bedberre bininj nawu kabirrihni kore kunred Sidon dja mak Tyre, dja ngudda wanjh kadjalwernhwarre duninj!

²³ Dja ngudda nawu ngurrihni kore kunred Capernaum, yiddok ngudda yimankek ngurriwayhkerren kaddum kore heaven? Burrkyak, ngudda kaluk God ngunkukburriwe kore kanjdji duninj.*

Dja manbu ngahdurrrkmirri ngudberre kundulkarre dorreng makka bu kunkare kurduyimerrangimeninj kore kunred Sodom, wanjh kunukka minj bolkyakmeninj dja djahdjaldiwirrinj bu kuhni bolkyimeninj kore bolkkime.

²⁴ Wanjh marneyime ngudberre, bu kamre ngarre kunbarnangarra bu God kabenyidjadmekenh bininj rowk, wanjh bininj nawu kunred Sodom kabirrihni nakka wanjh kabenmarnewarremen bedberre, dja ngaleng, ngudda ngunmarnewernhwarremen ngudberre." Kuhni wanjh Jesus benmarneyimeng.

Jesus Kadjare Bininj Rowk Bu Kabirringehmekenh Kore Nungka.

Matthew 11:25-30

(Luke 10:21-22)

²⁵ Bu kunmekbe bolkyimi, wanjh Jesus dingihdi yiwarrudj, bu yimeng, "Ngabba, ngaye burlume ngudda nawu Yiwohrnan Rowk kore kaddum dja

* **11:23** Kore kabolkngeyyo "Hades". Ngad yika karriyime, "Hell".

mak kurorre. Ngudda yibenmarnewarikkang nawu njalehnjale bedberre bininj nawu bedda birrimayaliwern dja mak nawu kabirriwernhburrbun. Dja ngaleng yibenbukkabukkang bininj nawu minj kabirriwernhburrbun nawu yiman kayime wurdwurd rerrih.

²⁶ Yoh, Ngabba, kuhni wanjh ngudda nawu yiwerndjareminj bu yikurduyimeng, dja mak yidjalnjilngmarnburrinj.”

²⁷ Wanjh Jesus yimeng, “Nawu Kornkumo ngardduk nganwong nadjalwern nawu njalehnjale rowk. Mak minj nangale bininj kabiwernhburrbun nawu Beywurd, dja nadjalkudji nawu Kornkumo nuye. Dja mak God nawu Kornkumo minj nangale kabiburrbun dja nadjalkudji Beywurd nuye, dja mak nawu bininj kabendjarrngbun bu kabenbukkankenh bu nuye Kornkumo.”

²⁸ “Mah, ngudda nawu ngurringudjarreminj dja mak nawu ngunhdulmukwon ngudberre nawu ngurrihdjalngorrkan, wanjh ngurrimray kore ngaye ba won ngudberre nawu ngurringehmekenh.

²⁹ Ngurrimarrkma ngardduk manbu kunwok ba ngurriburrbun kore ngaye bukkabukkang ngudberre, dja minj kakarrerayek bu ngudberre. Ngaye nawu minj ngabang dunijnh, dja mak minj ngaburlumerren ngudberre. Wanjh ngudda ngurrimalngngehme kore ngaye ngardduk.

³⁰ Kore bukkahbukkan ngudberre wanjh djawan bu ngurrimarrkmang kaluk mahni mankelk. Dja mak kore won ngudberre manbu ngurringorran wanjh makka kawobmen.”

12

Jesus Nungka Kawohnan Kore Kunbarnangarra Sabbath

Matthew 12:1-8

(Mark 2:23-28; Luke 6:1-5)

¹ Bu kunmekbeni Jesus wanjh renginey kore kabbal kaluk kore manmin dudjihdudjindi manbu manmekenh. Kaluk kunbarnangarradjamunni manbu Sabbath. Wanjh nawu benbukkabukkani nuye birrimarwedoweng, wanjh birrimoyhmangi manmekbe manmin dja birringuni.

² Wanjh nawu Pharisees bindinang, dja birrimarneyimeng Jesus, “Yina! Nawu benbukkabukkani ke kabirribakke mankarre manbu kunbarnangarradjamunkenh.”

³ Wanjh Jesus yimeng, “Yiddok ngudda minj ngurribimnaya kore djurra bu David dja nawu bininj nuye birrihdjarrkrey bu birrimarwedoweng?*

⁴ Bu nungka ngimeng kore God nuye kunrurrk, mey manbu mandjamun kandidjawa dja benwong birridjarrknguneng nawu bininj nuye birrihdjarrkrey. Kaluk mankarre kayime manmekbe kandidjawa minj kabirringun birribuyika bininj, dja nakka birridjalkudji priests kabirringun.

⁵ Dja mak ngudda minj ngurrinaya kore djurra manbu mankarre nuye Moses bu nawu priests kamak kabirridurrrkmirri kore temple bu kunbarnangarra djamun? Dja minj nangale kayime bu bedda birribakkeng mankarre bu kunbarnangarradjamun.

⁶ Wanjh marneyime ngudberre bu kondah karri nawu nawernhkimuk dja makka walakkih manbu temple.

⁷ Kore djurra kahyime, ‘Ngudda kandihwon nawu mayh bu kanmarnek-inje, dja bonj, ngadjare ngurribenkonigibun bedberre birribuyika bininj!’ [Hosea 6:6] Minj ngudda ngurriwernhburrbun manmekbe kunwok kore baleh kahmenmenyime. Bu ngudda kunmayali ngurrikarmeninj wanjh minj ngurribendjadmeninj nawu minj kunwarre birriyimeninj.

* 12:3 1 Samuel 21:1-6

⁸ Dja ngaye nawu Bininj Duninj, dja ngawohrnan manbu kore kunbarnangarradjamun ngarre." Kuhni bu Jesus yolyolmerrinj.

Jesus Bimarnbom Bininj Nawu Bidwarreni

Matthew 12:9-14

(Mark 3:1-6; Luke 6:6-11)

⁹ Wanjh Jesus bolkbawong kumekbe dja wam kore kunrurrk manbu yiwarrudjkenh bedberre.

¹⁰ Wanjh kumekbe ni bininj nawu bidwarreni. Mak yikahwi Pharisees birrikarayawani ba birridjuhbuyi nawu Jesus, dja birridjawam, "Yiddok kunukka kamak bu yibenmarnbun bininj kore kunbarnangarradjamun manbu Sabbath?"

¹¹ Wanjh Jesus yimeng, "Bu nangale ngudberre wardi kakarrme nawu mayh sheep, wanjh bu namekbe mayh kakukwarrhme kore kudjorlok, kaluk yiddok ngudda ngurriwayhke wanjh ngurribebke bu kamankan?"

¹² Kaluk nawu mayh minj kunmak yiman nawu bininj. Wanjh kunukka kamak bu ngurrikurduyime kunmak kore kunbarnangarradjamun."

¹³ Wanjh kumekbe Jesus bimarneyimeng bininj nawu bidwarreni, "Yibidyirrikurmerrimen!" Wanjh nungka bidyirrikurmerrinj, dja yawoyhbidmakminj bulkkidj duninj.

¹⁴ Wanjh nawu Pharisees birribawong dja birriwam birrihkarremarnbuni bu kabirribunkenh Jesus.

God Bidjarrngbom Jesus Bu Kabimarnedurrkmirri

Matthew 12:15-21

¹⁵ Jesus wanjh benburrbuni kore baleh nawu Pharisees birrihkurduyimi, wanjh nungka kumekbe bolkbawong. Wanjh birriwern bininj birrimunkemey, dja Jesus benmarnbom rowk yikahwi bininj bedberre nawu birridulkkihyoy.

¹⁶ Mak benbengdayhkeyi birrimekbe bu minj kabindimarnemulewan bu nungka nangale.

¹⁷ Nungka kuninjkuu kurduyimeng ba kawoybukkenhdan God nuye kunwok kore Isaiah nawu prophet yimeng,

¹⁸ "Nahni wanjh ngadjarrngbom bu karrurrkmirri ngardduk. Dja ngamarnedjare, mak ngannjilngmarnbun, dja ngawon ngardduk Namalngmakdaykenh, ba kabenmarneyime birriwarlahken bininj kore ngaye ngabdjadme bu djal kunmakkenh.

¹⁹ Nungka minj kabendangwe dja mak karrarrahme. Minj kakayhme kore manbolh.

²⁰ Mak minj kabakke manbu manbiwhmikenh manyahyaw dja minj karrombun manbu kahbirluwoldjendowen, kaluk bu yerre kamarnbun kundjalmak bu kawinhme.

²¹ Wanjh birriwarlahkenh rowk bininj nawu minj Jews, wanjh bedda kabirrimarnekurmerren kore kunngey nuye." [Isaiah 42:1-4]

God Biwong Jesus Kundulkarre Ba Bu Benburriweyi Namarnde Rowk.

Matthew 12:22-32

(Mark 3:20-30; Luke 11:14-23; 12:10)

²² Wanjh yikahwi bininj birrimkang kore Jesus nakudji nawu namarnde bibongkarmi, dja nungka mimdubbeni dja minj wokdiwirrinj. Wanjh Jesus bimarnbom, dja nungka wanjh wokdi dja bolknani.

²³ Wanjh birriwern bininj birrikangebarrhmeng dja birriyimeng, "Nahni bininj kunubewu Beywurd nuye David!"

24 Kaluk nawu Pharisees bu birribekkang kuhni wanjh bedda birriyime, “Jesus nakka kakarme kundulkarre nuye Beelzebub nawu kabenmarnewohnan namarnde rowk, dja kuhni bu Jesus kabenmarnewe bedberre nawu namarnde kabenhkarme.”

25 Dja Jesus benmayaliburrbuni birrimekbe Pharisees kore birriburrbuni, wanjh nungka benmarneyime, “Ngurriburrbun bu kubolkwarlahkenh kore bininj kabirriburren wanjh kabirrikukyakworren. Dja kore kubolkkimuk nawu birredbo kore birrilarmarinj wanjh nakka bolk kabirriyakworren. Dja mak kore namud, bu kabirriburren wanjh kabirriyakworren.

26 Mak nawu Namarnde Duninh, bu kadjurrkarren, wanjh nakka nungan kalarlmarren mak kore kahni makka minj munguyh kayirriyo.

27 Dja ngudda ngurrihyime ngaye ngahkarme Beelzebub nuye kundulkarre bu ngahwe nawu namarnde. Dja bu yiman woybukkih, wanjh baleh kundulkarre ngudda ngurrihkarme bu yikahwi ngudberre kabirriwe nawu namarnde? Dja bedda wanjh ngundidjadme kore ngaye kandidjubun.

28 Ngaye wanjh ngakarme kundulkarre kore God nganwong nuye Namalngmakkaykenh bu namarnde ngawe. Wanjh kuhni kamenyime bu God ngokko kumwam dja kawohnan bolkkime ngudberre.”

29 “Dja kunbuyika marneyime. Bu nangale kadjare kangimen kore bininj nawu dulkarrewern nuye kurrambalk wanjh kadjirdmang nuye njalehnjale, wanjh nakka kabirrukkarrukkan werre namekbe nawu dulkarrewern bininj. Wanjh kabaldjirdmang njale kore kurrambalk.

30 Kaluk nangale nawu minj ngaye nganedjarrkni, nakka wanjh nganjirrhmiwon. Mak nangale nawu minj nganedjarrkdurrrkmirri nakka wanjh nganwarrewon.

31 Dja wanjh marneyime ngudberre, baleh kore kunwarre ngurrikurduyime dja mak wardi ngurriyime kunwokwarre bu ngurriyolyolme God, nakka wanjh God kabengmidjan ngudberre. Dja kunbuyika bu nangale kabimarneyime kunwarre kore nawu Namalngmakkaykenh, wanjh nakka minj kabengmidjan nuye kunwarre.

32 Dja nangale bu nganwarrewan ngaye nawu Bininj Duninh, nakka wanjh God kabengmidjan nuye kunwarre. Dja nangale kabiwarrewan nawu Namalngmakkaykenh, nakka wanjh God minj kabengmidjan nuye kunwarre bu bolkkime dja mak bu yerrekah munguyh.” Kuhni bu Jesus yolyolmi.

God Kankangenan Kore Karriwokdi

Matthew 12:33-37

(Luke 6:43-45)

33 Wanjh Jesus benmarneyime, “Manbu kundulk manmak, makka wanjh kamarnbun manme manmak. Dja manbu manwarre kundulk makka kamarnbun manwarre manme. Wanjh ngurrina manbu kundulk kore baleh karrulkyime mak manme bu kakarme wanjh kumekbe ngurriburrbun.

34 Ngudda ngurriwarre bininj, dja njalekenh bu ngurrihyime kunmak? Bu bininj kawokdi, wanjh njalehnjale manbu barikeng nuye kukange, wanjh kunmekbebeh kambebme nuye kunwok.

35 Bininj rowk kabirribekbe njalehnjale kore kukange bedberre kahyo. Nawu birrimak bininj nakka kabirrikarme kunmakmak kore kukange bedberre dja nawu birriwarre bininj nakka kunwarrehwarre kabirrikarme kore kukange bedberre.

³⁶ Dja marneyime ngudberre bu kamre ngarre kunbarnangarra bu God kabenyidjadmekenh, birriwern bininj rowk kabirriwarreworren kore bedmanbidju kunwok kunwarre rowk bu birrihyimi.

³⁷ Wanjh bu kunmekbe kunbarnangarra God kabenmarneyime bu bedda birrimak dja kunubewu birriwarre kore baleh bedda ker-
ngehkenhni birrihyimi." Kuhni bu Jesus benbengdayhkeng.

Bininj Birridjawayhmeng Jesus Kore Baleh Kabenmarnekurdyime Kundulkarre Dorreng

Matthew 12:38-42

(Mark 8:11-12; Luke 11:29-32)

³⁸ Wanjh yikahwi Pharisees dja nawu mankarre kabindihbukkabukkan birriwokmey Jesus, birrimarneyimeng, "Nawu Kanhbukkabukkan, ngad ngarridjare ngundikurdunan kore yikurdyime kundulkarre dorreng ke ba yiman ngudda kanmarnebukkarrrenkenh."

³⁹ Wanjh Jesus benwokmey, yimeng, "Bininj nawu bolkkime kabirrihni kabirridjare ngaye ngandikurdunan kundulkarre dorreng, nawu birridjalwarre, nawu minj bedda kabirrimarnebodan nadjalkudji nawu God duninj. Bonj. Minj ngaye ngakurdyime kundulkarre dorreng bedberre, burrkyak. Dja korroko bininj birrikurdunang kore prophet nawu Jonah bimarnekurdyimerranj bu God nuye kundulkarre dorreng, kaluk bedda kabirriyawoyhkurdunan.

⁴⁰ Bu nungka ningihni kore kunjam nuye nawu djenj nakimukkenh bu kunkodjke danjbik dja kunkak danjbik, wanjh kadjalrohrok bu ngaye nawu Bininj Duninj ngani kore kanjdji kurorref bu kunkodjke danjbik dja mak kunkak danjbik.

⁴¹ Kaluk bu kunbarnangarra ngarre bu God kabenyidjadmekenh, wanjh bininj nawu birrimdolkkan kunred Ninevah wanjh kabirrimdolkkarren ngurriwarorren ngudda nawu bolkkime ngurrihni, wanjh ngundimarneyime bu ngudda ngurridjalwarre. Bu kunmekbekenh kunu Jonah yolyolmeng bedberre nawu kunred Ninevah birrihni, bedda nawu birribawong kunwarre dja mak birrikangeborledmeng nuye God. Ngaye marneyime ngudberre, bolkkime ngaye nawu ngawernhkimuk ngahdi kondah dja Jonah nakka wurd walakkih.

⁴² Dja mak bu kunbarnangarra ngarre bu God ngunyidjadmekenh, daluk ngalbu kawohrnan kore kubolkwarlahkenh kore walem ngarre, wanjh ngaleng ngurridjarrkdolkkan nawu ngurrihdarrkiddi bolkkime. Kaluk ngaleng ngunmulewan ngudberre bu ngudda wanjh ngurriwarre, mak ngaleng kumdolkkan djarrehbeh bu kabibekkan Solomon nawu kore bimarneyolyolmeng kore kunmayali manbu manmakkenh. Wanjh marneyime ngudberre nawu kondah kahdi, nakka wanjh kawernhdokme kabiyurhke nawu Solomon." Kuhni wanjh Jesus yolyolmerrinj.

Nawu Namalngwarre Nakka Nawern Kabirrimdurdeng Kore Nakudji Bininj Nuye

Matthew 12:43-45

(Luke 11:24-26)

⁴³ Wanjh Jesus benyawoyhmarneyimeng, "Bu namalngwarre kambebme kore bininj, wanjh nakka kadjalwohre kore kubolkdarleh ngarre dja mak kabolkyawan kore baleh yimankek kangehme, nungka minj kabolkngalke.

† 12:40 Jesus bolkyolyolmeng "hell".

⁴⁴ Wanjh namekbe kunmalng kayime, ‘Mah, wardi ngadjaldurndeng kore kubolkkare kore ngambolkbawongbeh.’ Kaluk bu nahni namalngwarre bu karrurndeng, wanjh kayawoyhbolknan bu kanan kamak rowk, kabolklarrkdi dja mak kabolkkele rowk.

⁴⁵ Wanjh nungka kare kabendjalkimang birribuyika nawu seven kunmalng birriwernhwarre duninjh, wanjh kumekbe kabirrire bu kabirriini. Kaluk nahni bininj kore birrimarnengimeng, wanjh biwernhmarnekimukmen nuye kunyid. Wanjh kunmekbe karohrok bedberre bininj nawu bolkkime kabirrihni.” Kuhni rowk bu Jesus yimeng.

Jesus Nuye Ngalbadjan Dja Mak Nawu Birridanginj

Matthew 12:46-50

(Mark 3:31-35; Luke 8:19-21)

⁴⁶ Kaluk bu kunmekbe Jesus benhmarneyolyolmeng bininj nawu kumekbe birrihmirnderri, ngalbu ngalbadjan nuye dja nawu birridanginj wanjh nakka kuberrk birrihdi, kaluk bedda birridjareni birringimeninj ba birriwokdiwirrinj nungka Jesus.

⁴⁷ Wanjh nakudji bininj bimarneyimeng Jesus, “Ngalbadjan ke dja nawu ngurridanginj kabirrihdi kuberrk, dja kabirridjare ngurriwokdi.”

⁴⁸ Kaluk nungka yimeng, “Ngalngale ngardduk ngalbadjan? Dja birringalehngale nawu ngaye ngarridanginj?”

⁴⁹ Wanjh nungka benwidjuy nawu benbukkabukkani nuye dja yimeng, “Nahni wanjh nawu ngalbadjan dja nawu ngaye ngarridanginj.”

⁵⁰ Kaluk bininj dja daluk nawu kabirrikurduyime kore Kornkumo ngardduk nawu heaven kahni kore kadjare, nakka wanjh ngarridangerrinj, dja ngayekenh ngalbabadjan rowk.”

13

Jesus Biyolyolmeng Manbu Parable Bininjkenh Nawu Burriweyi Manmim

Matthew 13:1-23

(Mark 4:1-20; Luke 8:4-15)

¹ Bu kunmekbe kunbarnangarrakudjini rerrih Jesus wanjh rurrkbawong kore kurrambalk dja wam kore kadjid ngarre manbokimuk, dja kumekbe yerrkang.

² Wanjh birrimirndewernmerrinj bininj dja birriwakbuyinguneng, dja nungka dolkkang bidbom, yerrkang kore kabbala dahkendanj, dja nawu bininj benbawong birrimhdi kore kukadjid.

³ Kumekbe wanjh Jesus yolyolmeng bedberre kunwern bu benhbukkani kore kunwarlkkaykenh kunwok manbu parables. Wanjh yimeng, “Kandibekka! Bininj nawu farmer wam kore kabbal manmim burriweyi.

⁴ Kaluk bu mimwehmimweyi, wanjh yikahwi mimwarrhmi kore manbolh, wanjh mayhmayh kumrey mimnguni.

⁵ Mak yikahwi mimwarrhmerreni kore kuwarddehwardde, kore kunkulk minj manwern yuwirrinj. Wanjh manmekbe manmim werkkwerkk djordmerreni, dja kunkulk minj manwern yuwirrinj bu kanjdji wernhkulkrawingj.

⁶ Kaluk bu dungbebmeng, manmekbe mankolhde rungi wanjh baldarlehmeni, kaluk kumekbekenh minj wernhdedjmadrawingj kanjdji bu bolkdulubuyi.

⁷ Mak yikahwi manmim warrawarrhmerreni kore kundalk manbu kinj manmirrhyi. Kaluk mahni kundalkwarre djordmerreni wanjh bidjurrudjudmi manbu manmak mankolhde.

⁸ Dja yikahwi mimwarrarhmi kore kukulkmak wanjh djordmerreni dja marnbuni manmak manme. Yikahwi marnburrinj one hundred dja mak yikahwi manbuyika wanjh marnburrinj sixty dja mak yikahwi thirty. Kaluk wernhyurrheng manmim manbu bininj burriweyi.

⁹ Kaluk ngudda bininj nawu kandibekkan wanjh kandimenmenbekka!"

¹⁰ Wanjh nawu benbukkabukkani nuye Jesus nungka birrimyikang dja birridjawam, "Njalekenh ngudda yihdjalyolyolme kunwarlkkaykenh manbu parables bu yibenmarneyime nawu bininj?"

¹¹ Kaluk Jesus yimeng, "Ngudda wanjh djarrngbom ngudberre, dja ngaye won ngudberre, ba bu ngurriburrbun manbu manwarlkkaykenh bu ngayolyolme kore God nawu king kawohnan. Dja nawu birribuyika, nakka wanjh minj kabirriburrbun manbu manwarlkkaykenh kunwok, dja ngaye minj ngabenwoyi.

¹² Bininj nawu kabirrimayalibayhme nakka wanjh kabirriwernhburrbun kore kunwern, mak kabirriyawoyhmang nawern. Dja nawu minj kabirriwernhburrbun, mak njalehnjale nawu kabirrikarme nakka wanjh kabirribalanhmang rowk.

¹³ Wanjh kunmekbekenh ngaye ngahyolyolme bu kunwarlkkaykenh kunwok. Kaluk bedda kabirribolknan, dja minj kabirriwernnhan, mak kabirribekkan dja minj kabirriwernhburrkburrkbekkan kore baleh kahkarremenmenyime.

¹⁴ Wanjh kunmekbe kabirrihkurduyime kore baleh Isaiah nawu prophet yimeng wanjh makka woybukkenhdanj. Nungka yimeng, 'Ngudda ngurribekkabekkan munguyh dja minj ngurriwernhburrkburrkbekkan. Mak ngurribolknanganan dja nakka ngurrihdjalmimdubbe rerrih dja minj njale ngurriburrbun.

¹⁵ Dja nahni bininj birrikangerayekminj. Bedda birrikanemdubberranj dja mak birrimimdubberranj. Wanjh minj kabirrinan kore kunmim, dja minj kabirribekkan kunkanem dorrengh, dja kabirriburrkburrkbekkan kore kukange.

Dja bu birrimayalibayhmeninj, dja birrikanemmakniwirrinj, dja birriburrkbekkayi kore kukange, wanjh kunukka birriburrbuyi bu birrimdurndeyi kore ngaye dja ngabenmarnbuyi.' [Isaiah 6:9-10]

¹⁶ Dja ngudda, wanjh God kunmak kurduyimeng ngudberre, bu ngunmimbayhkeng ba bu ngurrinan, dja ngunkanemmarnbom ba ngurriwernhbekkan.

¹⁷ Wanjh marneyime ngudberre bu woybukkih duninj, birriwern prophets dja nawu birrimakni bininj, bedda birridjareni birrinayi nahni njalehnjale nawu bolkkime ngudda ngurrihnan, dja bedda minj birrinayi. Mak birridjareni birribekkayi manbu bolkkime ngudda ngurrihbekkan, dja bedda burryak.

¹⁸ Mah. Wanjh ngurribekka kore parable kahmenmenyime manmekbe manwarlkkaykenh kunwok kabiyolyolme nawu mimburriweyi.

¹⁹ Manmim manbu warrarhmengh kore manbolh, wanjh makka yiman kayime bininj nawu kabekkan kunwok kayolyolme kore God nawu king, dja minj kaburrkburrkbekkan. Wanjh nawu Nawarre Duninj kamre kahdarrkidmang manmekbe kunwok kore kukange nuye, wanjh kakan.

²⁰ Mak manmim manbu kawarrarhme kore kuwarddehwardde, makka wanjh yiman kayime bininj nawu kabekkan kunwok, wanjh werrkwerkkamenmenbekkan bu kunnjilngmak dorrengh!

²¹ Kaluk manmekbe kunwok minj kawernhre kanjdji bu yiman kabikangedulubun nawu bininj, mak minj kunkuyeng kani. Kaluk

bu kunyid kabebme, dja nawu bininj kabirriyolyolme kore nungka bu maninjmanu kunwokkenh, wanjh werkkwerrk kadjalawon.

²² Mak manmim manbu warrawarrhmi kore kundalk manbu kinj manmirrhyi, makka yiman kayime bininj nawu kabekkan kunwok, kaluk kambebmerren manbu kunmarrkwarrehni dja njalehnjale namakmak nawu kondah kurorrewaken kabibalbengwarrewon, wanjh kabalbengmidjdan manbu kore bekkang manmak kunwok dja kabiidjokohme nawu nawarrehwarre kore kabalburrbun wanjh manbu kunwok minj kadjordmen kore kukange nuye.

²³ Dja manmim manbu warrawarrhmi kore kubolkmak, makka yiman bininj nawu kabekkan kunwok wanjh kaburrbun dja kamayalibayhme. Kaluk manmekbe kunwok kadjordmen dja kabalwernmerren kore kukange nuye, bu kawernmerren yiman one hundred, dja mak sixty, mak yikahwi thirty." Kuhni bu Jesus yolyolmeng nuye nawu benbukkabukkani.

Jesus Yolyolmerrinj Mandalkwarrekenh Kore Manwarlkkaykenh Manbu Parable

Matthew 13:24-30

²⁴ Wanjh Jesus yawoyhyolyolmeng bedberre manbuyika parable manbu kawarlkayindi, bu yimeng, "Kore God nawu King kawohrnan rowk, nakka yiman kayime bininj nawu mimburiweyi manmimmakni kore kabbal nuye.

²⁵ Kaluk kunmekbeni kukak rerrih, bu nungka kodjkeyonginj, wanjh bininj nawu beneyidkoni kumwam dja mak mimburiweyi manbu manmimwarreni ngarre kundalk kore kumekbe kabbal, dja bu yakwong, wanjh wam.

²⁶ Wanjh kaluk yerrekah, manbu manmimmakni kolhdebebmerrinj dja karrmi manbu manmimkerrnge, dja mak manbu mandalkwarre warridj djordmerrinj.

²⁷ Kaluk nawu bininj nuye kabirrih marnedurrkmirri birrimyikang dja birrimarneyimeng, 'Ngudda yirrudji manmak manmim kore kabbal dja makka mak balehbeh mandalkwarre bebmerrinj?'

²⁸ Wanjh nawu bininj yimeng, 'Nawarre nawu ngaye nganeyidko namekbe nganmarnekurduyimeng kunwarre.' Dja nawu birrih marnedurrkmirri namekbe bininj birriyimeng, 'Yiddok yidjare ngarridalkdurkmang manbu mandalkwarre bu ngarriwe?'

²⁹ Dja nahni bininj biwokmey, yimeng, 'Burrkyak. Ngurridjalbawo bu ngurridalkdurkmang, wanjh kunukka wardi ngurribaldurkmang manbu mankolhdemak dorrengh.

³⁰ Dja ngurridjalbawo manmekbe mandalkwarre bu kabenedjarrkdjardmen manbu manmimmak dorrengh. Bu kadjolengmen manbu manme, wanjh ngabenmarneyime nawu kabirrihdurkmirri, bu mandalkwarre werkk kabirridalkyerrkke, kabirridalkrawon kabirridalkdukan, dja kabirridalkburriwe kore kunak. Wanjh yerreh kabirridukkarrukkan manbu mandalkmak manbu wheat dja kabirrikurme kore kunurrrk manmeken ngardduk."

Jesus Yolyolmeng Manbuyika Parables Bu Kanbukkan God Nawu King Kawohrnan Rowk.

Matthew 13:31-33

(Mark 4:30-32; Luke 13:18-21)

³¹ Wanjh Jesus yolyolmeng manbuyika parable manbu kunwarlkkenh kunwok, yimeng, "Kore God nawu kawohrnan rowk, nakka yiman kayime mustard manmim bu bininj dudji kore kabbal nuye.

³² Kaluk manmekbe manmim manwernhyahwurd duninjh, dja bu kadjordmen, nakka wanjh kawernhdulkkimukmen. Makka walakkih manbu manwern mankolhde kabirrihdudjeng. Bu kadjurlekimukmen wanjh mayhmayh nawern kamre karedmarnbun kore manyenyende ngarre manmekbe kundulk."

³³ Mak kunkudji Jesus yawoyhyolyolmeng bedberre manbadbuyika. Nungka yimeng, "Mak kore God nawu king kawohrnan rowk, makka yiman yeast manbu mannguklurlimikenh kore daluk karawon kandidjawa manwern dorreng, bu kamarnbun kanguklurlme rowk."

Bu Njalekenh Jesus Yolyolmi Bu Djal Parables.

Matthew 13:34-43

(Mark 4:33-34)

³⁴ Kuhni rowk wanjh Jesus yolyolmi bu mulewani njalehnjale bedberre nawu birriwern bininj, mak yolyolmi kore benbukkani warridj. Minj yolyolmeninj bu kurobbe, dja yolyolmi manbu kunwarlkkayindi kunwok manbu parables.

³⁵ Jesus kurduyimeng, wanjh makka woybukkenhdanj kunmekbe kore nawu prophet yimeng, "Ngaye kaluk ngadjalyolyolme kore parables manbu kunwok manwarkkayindi. Ngayolyohyolme kurobbe njalehnjale manbu warlkkawarlkkayindi bu kore kunred minj bangmebolkmarnbuyindangimeninj bu kerngehkenhni." [Psalm 78:2]

³⁶ Jesus wanjh benbawong kumekbe dja ngimeng kore rurrkngimeng kore kurrambalk. Nawu benbukkabukkani nuye birrimyikang birrimarneyimeng, "Wardi yiyolyolmen ngadberre bu baleh kahkarremenmenyime manmekbe manbu parable kore yihmulewani manbu kundalkkenh."

³⁷ Wanjh Jesus yimeng, "Bininj nawu dudji manbu manmimmak kore kabbal wanjh nakka yiman kayime ngaye nawu Bininj Duninjh.

³⁸ Manbu kabbal, makka wanjh mahni kurorre kubolkwarlahkenh, yiman kubolkwarlahkenh rowk. Mak manbu manmimmak, nakka wanjh God nawu king nuye bebeywurd. Dja manbu mandalkwarre, makka bininj nuye nawu Nawarre Duninjh.

³⁹ Mak nawu manmimwarre manbu mimburrhburriweyi, nakka wanjh Namarnde Duninjh. Manbu kore kamindjolengmen, wanjh kabirrimimmoyhmang manbu wheat ngarre, makka wanjh bu kayiburnbunkenh mahni kurorre. Dja nawu kabirrihdurkmirri, nakka wanjh God nuye angels nawu kabindimanamang bininj nawu God nuye.

⁴⁰ Mah wanjh. Manbu mandalk bu kabirridalkmornname bu kabirriwurlhkekenh, wanjh kunmekbe kayime bu kakurduyimerran kore baleh kabolkyimerran bu mahni kurorre kabularrbuyindan rowk.

⁴¹ Bu kunmekbe kabolkyimerran, ngaye nawu Bininj Duninjh ngabenmunkewe ngardduk angels nawu ngaye ngawohrnan rowk, ba bu kabirrimang manbu kunwarrekenh rowk nawu benwarrewoni bininj, dja mak kabindimornname birrimekbe bininj nawu birribakkeyi nuye mankarre.

⁴² Wanjh bedda kabindikukburriwe kore kunak manbu manbirluwern manbu, manbu kahdjaltung, kore kabirridjalnalkbun dja mak kabirridjalwernhyidmebayerren.

⁴³ Dja nawu birrimak bininj, nakka kaluk kabirrikukwolkayindi yiman kayime kundung kore kornkumo bedberre nawu king kawohrnan rowk.

Dja ngudda bininj bu kandibekkan, wanjh ngurridjalburrrkburrkbekka." Kuhni bu Jesus benmarneyimeng.

Jesus Yolyolmeng Danjbik Manbu Parables Bu Benbukkang Kore God Kawohnanken Rowk

Matthew 13:44-52

44 Jesus yimeng, "Kore God kawohnan rowk, nakka yiman kayime njalehnjale yeng namakmak nawu warlkkayindi kore kabbal. Wanjh bu kunbarnangarrakudjini, nakudji bininj ngalkeng namekbe namakmak. Wanjh yawoyhwarlkkang kore manmekbe kabbal. Kaluk nungka njilingmakminj, wanjh wam weykang rowk nawu njalehnjale nungka nuyeni dja bolkbayahmeng manmekbe kabbal."

45 "Mak kunmekbe rerrih kayime kore God kawohnan rowk, nakka yiman bininj nawu kaweykan pearl. Nungka wanjh munguyh yawayawani nawu pearls nawu namakmaki.

46 Kaluk bu ngalkeng nakudjini pearl namakkaykenh, wanjh nungka wam weykang njalehnjale nawu nuyeni wanjh wam bayahmeng namekbe nawu pearl mankudjini."

47 "Mak kore God kawohnan rowk makka wanjh yiman kayime walabbi rerrih bu bininj kabirridjuhke kore manbokimuk kurrula wanjh kabirrimang nawern djenj nawu kukbubuyika.

48 Kaluk bu kabarlme kore walabbi wanjh bininj kabirridorrork kore kukadjid. Wanjh kabirriyerrkan dja kabirrikudjarrngbun nawu namakmak djenj, nakka birridahkendongi kore kundjabarrk. Dja nawu nawarre djenj, nakka birridjalukburriweyi.

49 Kaluk kunmekbe kayimerran kore kondah kurorre bu kayiburnbunkenh rowk. Nawu angels wanjh kabirrimre kabenkuklarlmang bedberre nawu birriwarre dja nawu birrimak bininj.

50 Kaluk nawu birriwarre bininj nakka wanjh angels kabindikuburriwe kore manbu kunak kadjalwernhrung, kore kabirrihdjalnalkbun dja kabirriyidmeyerren munguyh."

51 Wanjh Jesus bendjawam bininj nawu benbukkabukkani nuye, "Yiddok ngurrimayalibayhmeng kore namekbe njalehnjalekenh?" Dja bedda birriyimeng, "Yoh, Ngad ngarriburrbun."

52 Wanjh Jesus benmarneyimeng, "Kunmekbekenh kunu bininj nawu kabenbukkabukkan mankarre, dja bu kawernhburrbun kore God nawu king kawohnawohnanken, wanjh namekbe bininj yiman rerrih bininj nawu kakarme kunrurrk, dja kamkan nakerrngkerrnge namakmak dja nakarekare namakmak kore kabendjarrkyo kore kunrurrk nuye."

Jesus Nuye Birriredbo Wanjh Birriwarnyakminj Nungka

Matthew 13:53-58

(Mark 6:1-6; Luke 4:16-30)

53 Bu Jesus burnbom yolyohyolyolmi bedberre manbu parables, wanjh nungka bolkbawong kumekbe.

54 Dja wam kore nuye kunred wanjh kumekbe benhbukkabukkani kore kunrurrk manbu yiwarrudjkenh, wanjh bedda birrikangebarrhmeng dja birriyimeng, "Baleh nahni bininj kahmang manbu kunmayali dja kundulkarre bu kuhni kahkurduyime?"

55 Nakka yiddok beywurd nuye nawu carpenter? Dja yiddok ngalbadjan ngalka Mary? Mak yiddok nawu birridanginj nuye nakka James, Joseph, Simon dja Judas.

⁵⁶ Dja yiddok woybukkih, nawu ngaldahdaluk nuye nakka nahni karrihni kondah? Ngayh! Dja balehbeh nahni bininj mey rowk kore karribek kang dja karrinang?"

⁵⁷ Wanjh birrinjilngwarreminj bu kunmekbe Jesus kurduhkurduyimi. Dja Jesus benmarneyimeng, "Nawu prophet nakka kabirrikimang kore kubolkwern, dja kore nuye kunred, dja kore nuye namud, nakka kabirridung, dja minj kabirrikimang."

⁵⁸ Wanjh nungka minj mak durrrkmirriwirrinj manbu kundulkarrekenh kumekbe, dja bedda minj birriwoybukwoyi.

14

Nawu King Herod Bibom John Nawu Benkukdjuhkeyi

Matthew 14:1-12

(Mark 6:14-29; Luke 9:7-9)

¹ Bu kumekbe bolkyimi Herod nawu wohrnani kore kubolkkimuk Galilee, biwobek kang Jesus.

² Wanjh benmarneyimeng nawu kabirrihmarnedurrrkmirri, "Nawu Jesus nakka wanjh John nawu benhkodjdjuhkeyi, nawu kumyawoyhmim-biminj! Kunmekbekenh nungka kahdurrrkmirri kundulkarre kunkimuk dorrengh."

³ Kaluk bu kerrngehkenhni Herod nuye bininj birriberlmey John, birridukkarrukkang wanjh birridangbalhmeng rurkkerurrrkendi kore prison. Herod benmarneyimeng bu birrikurduyimeng rowk bu ngalmek-bekenh daluk Herodias, ngalbu ngalbininj kobeng nuyeni Philip, nawu Herod benedanginj. Dja ngalbu Herod bimey.

⁴ Kaluk John bihmarneyimi Herod, "Bu yimey Herodias ngunemarrinj, wanjh yibakkeng mankarre."

⁵ Wanjh kunmekbekenh nungka Herod djareni bibuyi namekbe John, dja keleni bu benkengehmi bininj birriwern, dja bedda birriyimi John bu nungka prophetni.

⁶ Wanjh bu bolkyimi kore Herod nuyeni birthday, ngalyaw ngalbu ngaleng ngarreni Herodias bimarneborrrkeng Herod dja mak nawu kumekbe birrihdjarrkni, dja Herod wanjh warnmakminj ngalenggarre ngalyawk.

⁷ Wanjh nungka wokkurmerrinj bu njale kabiwon nawu ngaleng kadjare.

⁸ Kaluk Herodias bibengdayhkeng ngalyaw ngaleng ngarre, dja wanjh ngaleng bidjawam Herod, "Kanwo kunkodj nuye John nawu benhkodjdjuhkeyi. Kaluk kodjdahkendin kore platter."

⁹ Wanjh nawu King Herod njilngwarreminj, dja bonj, nungka wokkurmerrinj dja birriwern birriwobek kang. Wanjh benwokwong kore ngaleng daluk bidjanwohmeng.

¹⁰ Nungka wanjh benmunkeweng djaman nuye bu kabirriyikan John kore kahrurrrkendi wanjh kabirrikomdadjke.

¹¹ Bu kunmekbe birrikomdadjkeng wanjh birrikodjdahkendoy kore platter dja birrikang, birriwong ngalyawk, wanjh balkang biwong ngalbadjan ngalenggarre.

¹² Wanjh nawu John nuye benbukkabukkani birrimwam birrikumey John dja birrikang birrikukdudji. Yerre wanjh birriwam birrimarnemulewam Jesus.

Jesus Benworrkmiwong Bedberre 5000 Bininj

Matthew 14:13-21

(Mark 6:30-44; Luke 9:10-17; John 6:1-14)

¹³ Bu kunmekbe Jesus biwobekkang John bu birribom doweng, nungka wanjh bidbom kore kabbala dja rawinj kubolkbuyika djarreh kore minj nangale diwirrinj. Dja birriwern bininj birriwobekkang kore wam, wanjh birrimunkekadjuj kurorre kore birrimdolkkarrinj kubolkbubuyikabeh.

¹⁴ Kaluk bu Jesus kumkoluy kore kabbalabeh, nungka bennang birridjalmirndewern birrihmadbuni. Wanjh benkongibom dja benmarnbuni bedberre nawu birridulkkihyoy kumekbe.

¹⁵ Kaluk bu balhngokdangeni, nawu benbukkabukkani nuye birrimyikang Jesus dja birrimarneyimeng, "Minj nangale kondah kayo, dja mak kahngokdan warridj. Dja yibenmunkewemen nawu bininj kabirrire ba kabirribayahme manme bedberre kore kubolkkimuk."

¹⁶ Dja nungka Jesus yimeng, "Minj mak karrbenmunkewe. Dja ngudda ngurrbenwo manme kabirringun."

¹⁷ Wanjh bedda birrimarneyimeng, "Ngad wanjh ngarrihdjalkarme kunbidkudji kandidjawa dja bokenh djenj."

¹⁸ Kaluk Jesus yimeng, "Ngurrimka manbu kandidjawa dja djenj kore ngaye."

¹⁹ Wanjh benmarneyimeng nawu bininj rowk bu kabirriyerrkarren kore kurralk. Dja mey manbu kunbidkudji kandidjawa dja bokenh djenj, bolknang kaddum, dja bimanjbom Kornkumo manmekbe manmekenh. Wanjh lodbakkeng manbu kandidjawa dja benwong nawu benbukkabukkani nuye, wanjh bedda bindibalwong bininj nawu kumekbe birrihmirnderri.

²⁰ Wanjh birringuneng, dja birriworrkminj rowk. Dja manme manbu minj birriyakwoyi, wanjh nawu benbukkabukkani birridahdahkendoy kore twelve kundjabarrk dja wanjh birribarlkeng rowk.

²¹ Kaluk nawu binihbininj birrihmirnderri nakka birrimarnburrinj five thousand nawu manme birringuneng dja nawu morlehmorlenj dja wurdwurd nakka minj bindirohrokmeninj dja bedda warridj birringuni.

Jesus Wam Kurrenge Kore Kubokehkekeb Ngarre Manbokimuk

Matthew 14:22-33

(Mark 6:45-52; John 6:15-21)

²² Wanjh kundjalmekebe rerrih Jesus benmarneyimeng nawu benbukkabukkani nuye bu kabirribidbun kore kabbala dja kabirridokme nuye dja kabirridjowkke borledmikenh. Dja nungka Jesus bolkmaddi yerre ba kabenmunkewe nawu bininj bu kabirridokmerren.

²³ Bu kunmekbe benmunkeweng, nungka wam nadjalkudji kore kurrulum ba karri yiwarrudj. Dja wanjh ngokko balhngokdangeni, bu Jesus nakudji dingihdi.

²⁴ Kaluk kunmekbe bolkyimi, manbu kabbala wanjh ngokko djorlkmeng dja birrihdi kore djarreh burldjarn manbokimuk. Dja manmekbe kabbala minj mayorrkkadjuyi, kaluk kunmekbe borrolkani manbu manbokimuk.

²⁵ Kaluk bu djarreh kumhkabelni, Jesus wanjh renginehrey kubokehkekeb kore kukku dja benhyikani nuye nawu benbukkabukkani.

²⁶ Wanjh nawu benbukkabukkani nuye birrinang, dja birriwernhkeleminj, dja birriyimeng, "Nakka wanjh mam!" Dja wanjh birrikayhmi kuntele dorreng.

²⁷ Kaluk Jesus werrkwerkk benmarneyimeng, "Yuwn ngurrikangewarre! Dja ngaye Jesus. Yuwn mak ngurrikele!"

²⁸ Wanjh Peter yimeng, "Nawu Yiwohrnan. Bu woybukkih ngudda, wanjh kanmarneyimen ba ngamre yikan ngudda kore kukku."

²⁹ Wanjh Jesus yimeng, "Yimray!" Dja Peter koluy kore kabbala dja degebarhnbarndi kore kukku kubokey, bu renginehrey biyikani Jesus.

³⁰ Kaluk bu Peter nang manbu kukku dja kunmayorrk bu kimuhkimukmeni wanjh nungka keleminj dja yibmihyibmi kanjdji. Kaluk bikayhmeng Jesus, "Nawu Yiwohrnan kangehkemen!"

³¹ Wanjh kundjalmekbe rerrih Jesus berlyirriyonginj dja birrarrkidmey. Wanjh bimarneyimeng, "Njalekenh ngudda kanhkewkme? Yiddok minj kanwernhwoybukwon?"

³² Kaluk bu benebidbom kore kabbala, manbu kunmayorrk wanjh mayorrkdowneng.

³³ Wanjh nawu kabbala birrihbarndi birriboddanj nuye Jesus dja birriyimeng, "Woybukkih duninj ngudda Beywurd nuye God!"

Jesus Benmarnbom Nawu Birridulkkihni Kore Kunred Gennesaret

Matthew 14:34-36

(Mark 6:53-56)

³⁴ Kaluk bu birridjowkkeng borledmikenh, wanjh birribidbom kore kukadjid ngarre Gennesaret.

³⁵ Mak bininj nawu kumekbe birrihni birrikukburrknang Jesus, wanjh birrimulewam bu bindibalmarnewokmunkeweng birribuyika bininj kore kubolkwarlah, bu Jesus kunwam kumekbe, wanjh bindimkang nawu kundjak birrihkarmi kore nungka.

³⁶ Mak birridjanwohmeng bu nungka benbawoyi nawu kundjak birrikarmi bu birriwohkarmeninj kunmadj nuye. Dja nawu birrimadjkarmi rowk wanjh birrimakminj rowk.

15

God Nuye Mankarre Dja Bininj Bedberre Mankarre

Matthew 15:1-20

(Mark 7:1-23)

¹ Bu kunmekbeni yikahwi Pharisees dja nawu kabindihbukkabukkan mankarre birrimyikang Jesus. Kaluk bedda birrimdolkkan kore Jerusalem. Wanjh birridjawam birriyimeng.

² "Njalekenh nawu yibenbukkabukkan minj kabirrikurduyime kore nawu mawahmawah kadberre kanwon? Dja wanjh minj kabirribiddjirridjburren werrk wanjh yerre manme kabirringun."

³ Wanjh Jesus yimeng, "Mak ngudda, njalekenh minj ngurrimarrkmang manbu God nuye mankarre? Wardi ngurridjaldjare ngudberre mankarre.

⁴ Ngurriburrbun God yimeng, 'Ngurrbenbenemarrkma ngalbadjan dja kornkumo ngudberre', dja mak yimeng, 'nangale bininj nawu kunwarre kabenbenemarneyime nawu ngalbadjan dja kornkumo, wanjh nakka ngurribu karrowen!' [Exodus 20:12; 21:17]

⁵ Dja ngudda ngaleng ngurriyime kamak bu nawu bininj kabenbenemarneyime kornkumo dja ngalbadjan, 'Ngaye ngahkarme nawu ba benbenebidyikarmeninj dja wanjh ngokko ngawong God.'

⁶ Dja kamak bu minj kabenbenenahnan ngalbadjan dja kornkumo nuye. Wanjh ngudda kunu ngurrbenbukkabukkan bininj bu minj kabindimarrkmang ngalbadjan dja kornkumo. Ngudda ngurriwokwe God nuye kunwok dja ngurridjare bininj kabirrimarrkmang manbu ngudberrekih kore ngurrihurduyime.

⁷ Ngudda nawu ngurridjalkurrehkurren! Isaiah wanjh mandjad yimeng bu ngudda wanjh ngunhyolyolmi, bu yimeng,

⁸ 'Nahni bininj ngandiburlume ngaye, dja nakka kabirriyime kore djal kurrangbeh, dja kore kukange bedberre nakka burrkyak, ngandiwirrihme.

⁹ Bu kabirrihbodan ngardduk, wanjh djal burudjang. Dja warridj kabindihbukkabukkan mankarrebubuyika manbu djal bininj birrikar-remarnbom, dja yuwn bu God nuye!' " [Isaiah 29:13] Kuhni bu Jesus benmarneyimeng.

Jesus Yolyolmeng Bu Kunkangekenh

Matthew 15:10-20

¹⁰ Wanjh Jesus benkayhmeng nawu binihbininj bu birrihimirnderri, wanjh benmarneyimeng bedberre, "Kandibekka dja ngurrimayalibayhmen kore marneyolyolme ngudberre.

¹¹ Manme manbu ngurringun, makka minj ngunmarnbun bu ngurriyimeran ngurriwarre bininj. Dja ngaleng kunwok kore kurrangbeh kambebme, makka wanjh ngunmarnbun ba bu minj ngurrimarnebodan nuye God bu mandjad duninjh."

¹² Wanjh nawu benbukkabukkani nuye Jesus birrimdarnhyikang wanjh birridjawam, "Yiddok ngudda yiburrbun bu nawu Pharisees birriyidduy kunmekbekenh kore ngudda yiyolyolmeng?"

¹³ Kaluk Jesus yimeng, "Manbu mankolhdewarre, kore Kornkumo ngardduk kore heaven kahni wanjh minj karrudjindi, wanjh makka mankolhdewarre God karredjmaddurkmire dja kaburriwe rowk.

¹⁴ Wanjh ngurrbenbawo birrimmekbe Pharisees. Nakka birrimidubbe rerrih, dja bu bininj nawu mimdubbe kabiberlan nabuyika bininj nawu mimbunje, wanjh nakka kabenedjarrkkukwarrhme kore kubolkdjorlok."

¹⁵ Wanjh Peter yimeng, "Kaluk kunukka baleh yiyimeng yiyolyolmeng manmekbe parable kore kunwok kawokwarlkkayindi?"

¹⁶ Wanjh Jesus bendjawam nawu benbukkabukkani, "Yiddok ngudda ngurrihdjalmayaliyak?

¹⁷ Ngudda minj ngurriburrbun bu manme ngurrikurme kore kurrang ngudberre wanjh kaballe kore kunnjam wanjh kabalbebme kore kunburrk ngarre?

¹⁸ Dja kunwok rowk manbu kambebme kore bininj nuye kurrang, wanjh kambebme kore kukangebeh nuye, dja kabimarnbun ba minj kabimarnebodan nuye God bu mandjad.

¹⁹ Kore kukange kanjdjibeh kambebme kunmayali manbu manwarrehwarre, kore bininj kabirriburren, mak kabirrimarnedjirdmarren bininj dja daluk warridj, ngalbininj kobeng dja nabininj kobeng kabenebebehmang ngalbuyika daluk dja nabuyika bininj, dja mak kabirridjirdmang njalehnjale, dja mak kabirrikurren bu kabirrikowerren, dja mak kabirrimarneymerrren kunwarrehwarre kunwok.

²⁰ Wanjh manmekbe manbu kabenmarnbun bininj bu minj mandjad kabirrimarnebodan God. Bu bininj minj kabirribiddjirridjburren dja manme kabirringun werrk, wanjh nakka minj kuhni kabenwarrewon, dja bedda kabirrimarnebodan nawu God bu djal kunmak." Kuhni bu Jesus yolyolmeng.

Jesus Bibidyikarmeng Daluk Ngalbu Minj Jewniwirrinj

Matthew 15:21-28

(Mark 7:24-30)

²¹ Wanjh Jesus bolkbawong kumekbe kore ningihni dja wam kore kunred bokenh bolkgeyyoy Tyre dja Sidon.

²² Ngalkudji daluk ngalbu yoy kumekbe, wanjh bimarnebebmeng nuye Jesus. Ngalka minj Jewniwirrinj, dja wanjh Canaanbeh. Wanjh bimiyikang Jesus dja kayhmikayhmi bu yimeng, "Nawu Yiwohrnan! Ngudda nawu Beywurd nuye David, kankongibu! Dja ngalyaw ngardduk kakarrme namarnde nawu kabiwernhwarrewon, nawu kabihbongkarrme."

²³ Wanjh Jesus minj wokdiwirrinj bu biwokmayi ngalmekbe daluk. Dja wanjh nawu benbukkabukkani nuye birrimiyikang Jesus dja birrimarneyimeng, "Yimarneyimen ngalmekbe daluk kare dja munguyh kanhkadjung dja mak kakayhmire."

²⁴ Wanjh Jesus bimarneyimeng ngalbu daluk, "God nganmunkeweng kore birridjalkudji bininj nawu Israel benkebmawahmeng, dja bedda kabirrihdjalmayahme yiman sheep."

²⁵ Wanjh ngalbu daluk bimyawoyhyikang Jesus dja barddurrukkurlhdanj kore kumirrk nuye dja yimeng, "Nawu Yiwohrnan, kanbidiyikarrmen!"

²⁶ Wanjh Jesus bimarneyimeng, "Yina! Kunukka minj kunmak bu manme ngabenyimang nawu wurdwurd dja ngawe kore duruk bedberre bu kabirribalngun."

²⁷ Kaluk ngalbu daluk yimeng, "Yoh, nawu Yiwohrnan, dja mak duruk kabirringun manme manbu mandjudjulng kawarrawarrhmerren kore table nawu kawo hrnan bedberre."

²⁸ Wanjh Jesus yimeng, "Daluk! Ngudda kanwernhwoybukwon! Dja kuhni wanjh ngakurduyime kore kandjawam." Wanjh kundjalmekbe rerrih ngalmekbe daluk ngarre ngalyaw djalmakminj.

Jesus Benmarnbom Birriwern Bininj

Matthew 15:29-31

²⁹ Bu kumekbe Jesus bolkbawong, nungka wam renehrey kore kukadjihkadjid ngarre manbu kurulla Galilee. Wanjh balbidbom karrkad kore kurrulum dja kumekbe yerrkang ningihni.

³⁰ Wanjh birriwern duninh birrimyormeng kore nungka, dja bindimkani nawu minj birrireyi dja birridjalngudjyakni, dja nawu birribirlni, birrimindubbeni, dja nawu minj birriwokdiwirrinj, dja mak birriwern bindimkang bindikurrmeng kore Jesus nuye kurrenge, wanjh nungka benmarnbom rowk.

³¹ Wanjh nawu birriwern bininj birrikangebarrhmeng bu bindinang birrimekbe birriwokdi nawu minj koroko bu birriwokdiwirrinj. Mak nawu birribirlni, nakka birrimurrngayekminj. Nawu birringudjwarreni nakka birrirey, mak nawu birrimindubbeni nakka birribolknani. Bedda wanjh birriburlumeng dja birrimanjbuni God nawu wo hrnawo hrnani bininj nawu Israel benkebmawahmeng.

Jesus Benmarnemarnbom Manme Bedberre Nawu 4000 Bininj.

Matthew 15:32-39

(Mark 8:1-10)

³² Kaluk nawu Jesus benkayhmeng nawu benbukkabukkani nuye dja yimeng, "Ngabenkongibun nahni bininj, dja bedda ngarridjarrkyerrkang bu kunbarnangarra danjbik, mak minj njale birringuyi. Wanjh minj ngadjare ngabenkukmunkewe bu kabirrimarwure. Wardi kunukka kabirriwohkukmankan bu kabirribalhdokme kured."

³³ Wanjh nawu benbukkabukkani birrimarneyimeng, "Baleh ngarrimang manbu manwern manme ba ngarrbenwon nahni bininj? Ngadjarreh karrihdi dja karribolkbawong kore kururkweren."

³⁴ Dja Jesus yimeng, “Baleh kayime manbu manlod kandidjawa ngurrihkarreme?” Bedda birriyimeng, “Kunbidkudji dja bokenh, mak yikahwi kilekilelh djenj.”

³⁵ Wanjh Jesus benmarneyimeng nawu bininj bu kabirriyerrkarren kore kurorre.

³⁶ Wanjh nungka mey manbu seven kandidjdjawa, dja djenj dja biyimanjbom Ngabbard God. Yerre wanjh lahlarlme y manbu kandidjawa wanjh benwong nawu benbukkabukkani nuye nahni djenj dja buriddi. Wanjh bedda bindibalwong bininj nawu kurorre birrihni.

³⁷ Wanjh nawu bininj birringuneng birriworrkminj rowk. Yerre nawu benbukkabukkani nuye birridahdakhendoy dja birribarlkeng seven baskets manbu manme bu yikahwi bininj birribabawong.

³⁸ Kaluk bininj nawu birringuneng maninjmanu manme, nakka bindirohrokmeng four thousand bu djal binihbininj. Kaluk daluhdaluk dja wurdwurd birriraworrinj kumekbe.

³⁹ Bu kunmekbe Jesus benmirndemunkeweng nawu bininj birridokmerrinj kore kured wanjh nungka bidbom kore kabbala dja wam kore kubolkkimuk ngarre Magadan.

16

Bininj Birridjareni Jesus Bu Benmarnekurduyimenj Kundulkarre Dorreng

Matthew 16:1-4

(Mark 8:11-13; Luke 12:54-56)

¹ Nawu Pharisees dja Sadducees wanjh birrimyikang Jesus dja birridjareni birrirohrokmeninj. Dja birridjawam bu kabenbukkan kundulkarre nuye God.

² Kaluk Jesus yimeng, “Bu kunngol kakurlbakurlbamen bu kabalhgokdan wanjh ngudda ngurriyime manbu mandjewk yak, dja manmak rowk.

³ Dja bu kukabel kunukka ngurriyime mandjewk kamre, wanjh kunukka kangolburlerran dja kangolkurlbamen. Manmekbe wanjh ngurrinan bu ngunbukkan ngudberre kore kungol dja ngurriburrbun kore baleh kamenmenyime. Mak kunmekbe karohrok, bu ngurrinan baleh kore ngahkurduyime bu bolkkime, dja ngudda minj ngurriburrbun kore kahmenmenyime.

⁴ Birriwern bininj nawu bolkkime kabirrihni wanjh birridjalwarre, dja birrimarneborledmeng kore God. Bedda wanjh kabirridjawayhme ngarre kundulkarre kore God kakurduyime, wanjh bedda minj kabirrimang, dja mandjalkudji kore Jonah bimarnekurduyimerranj.” Wanjh kumekbe Jesus benbawong dja wam.

Jesus yimeng, “Ngurrinaharrimen Wardi Ngurriwarrebore Kunbuyikakenh.”

Matthew 16:5-12

(Mark 8:14-21)

⁵ Nawu Jesus nuye benbukkabukkani wanjh birridjowkkeng kore kurrula borledmikenh, dja birribengmidjanj manbu kandidjawa minj birrikayi.

⁶ Kaluk Jesus benmarneyimeng, “Ngurrinaharrimen! Wardi ngundibengwarrewon ngudberre nawu Pharisees dja Sadducees bu kabirriyolyolme ngudberre manbuyika kunwok, yiman kayime mannguklurmikenh kore kunmayali ngudberre.”

7 Wanjh nawu benbukkabukkani birrimarneyimerrinj bu baleh menyimeng, dja birriyiming, "Nungka kuhni yimeng bu ngarribengmidj-danj manme minj karrimkayi."

8 Dja Jesus burrbuni bu bedda birrihyolyolmi wanjh bendjawam, "Aba, ngudda nawu minj kandiwarnhwoybukwon! Njalekenh ngudda ngurrihyolyolme bu manme minj ngurrimkayi?"

9 Dja yiddok ngurrihdjalmayaliyak munguyh? Ngurriburrbun manbu kunbidkudji kandidjawa kore karrbenworrkmiwong 5000 bininj? Mak ngurriburrbun bu ngudda ngurrihmoyhmangi yikahwi manme kore birrihbawoni manbu kumdolkang kore kunbidkudji kandidjawa?

10 Mak ngurriburrbun manbu seven kandidjawa kore karrbenworrkmiwong 4000 bininj dja nawern baskets ngurrihdadahkendoy kore birribabawong?

11 Wanjh gaye minj ngayolyolmeninj ngudberre manbu kandidjawakenh! Njalekenh ngudda minj ngurriburrbun? Gaye ngahyime ngudberre bu ngurrinahnarrimen bedberre nawu Pharisees dja Sadducees kore kabirriyolyolme, wanjh yiman kayime mannguklurilmikenh."

12 Wanjh kumekbe nawu benbukkabukkani nuye birriwohburrbom bu Jesus minj yolyolmeninj manbu kandidjawa kahnguklurke dja nakka wanjh benhmarneyimi bu kabirrinahnarren bedberre nawu Pharisees dja Sadducees bu kabindibukkabukkan.

Peter Bimulewam Jesus Bu nungka Nawu Christ

Matthew 16:13-20

(Mark 8:27-30; Luke 9:18-21)

13 Bu Jesus kumwam kore kunred ngarre Caesarea Philippi, wanjh bendjawam nawu benbukkabukkani nuye, yimeng, "Kaluk baleh bininj rowk kabirriyime bu gayekenh, nawu Bininj Duninj?"

14 Wanjh nawu benbukkabukkani birriyiming, "Yikahwi kabirriyime ngudda wanjh John nawu kabenkodjdjuhke. Dja birribuyika kabirriyime ngudda wanjh Elijah, dja mak birribadbuyika kabirriyime ngudda Jeremiah, dja nuk kunubewu prophet nawu nabuyika. Kunekke kabirriyime ke."

15 Wanjh Jesus benwokmey, yimeng, "Dja ngudda, baleh ngurriyime yimankek gaye nangale?"

16 Wanjh Simon Peter yimeng, "Ngudda wanjh Christ*, ngudda Beywurd nuye God nawu kadjalmimbi munguyh."

17 Wanjh Jesus yimeng, "Simon nawu beywurd nuye Jonah! God ngunmarnekurduyimeng kunmak, dja makka minj nangale bininj ngunbukkayi. Dja nakka djal Kornkumo ngardduk nawu heaven kahni, ngunbukkang bu gaye nangale.

18 Wanjh gaye ngeykurme Peter, kore kamenmenyime 'Kunwardde'. Kaluk kore kondah kunwardde gaye ngamarnbun manbu ngarre yiwar-rudj, kaluk manbu kundulkarre ngarre hell makka minj kangurdk.

19 Mak gaye won nawu keys kore ngaleng ngarre God kawohrnan rowk. Ngudda yibenbalwokrayekwon bininj nawu kondah kurorre ba bu kabirriburrbun kore God nawu kahni heaven wanjh yingkihwokrayekwong bedberre kore kunmakkenh dja kore kunwarrekenh."

20 Wanjh Jesus benwokrayekwong nawu nuye benbukkabukkani bu minj nangale kabirrimarneyime bu nungka nawu Christ.

* **16:16** (Dja mak kore verse 20) "Christ" karohrok kungeybuyika "Messiah".

Jesus Yolyolmerrinj Bu Nungka Karrowenkenh

Matthew 16:21-28

(Mark 8:31—9:1; Luke 9:22-27)

21 Bu kunmekbe bolkyimi Jesus wanjh dedjingmey benbengdayhkeng nawu benbukkabukkani nuye bu nungka kare kore Jerusalem, kore nawu dabborrabbolk kabirrihwohrnan, mak nawu birrikihkimuk priests, dja mak nawu mankarre kabindihbukkabukkan, bu kabirridarrkidmang, dja kadjakbekkan kunwernkenh. Nungka mak benmarneyimeng bu birrimekbe bininj kabirribun karrown, dja bu kunbarnangarra danjbik wanjh God kabirrolkkahywe kore kumidjbeh.

22 Wanjh Peter bimey Jesus dja binameng, wanjh bimarneyimeng bu yuwn kunukka kahyime. Dja yimeng, "Aba, burrkyak nawu yiwohrnan! Kuhni minj kakurduyimerran ngudda ke!"

23 Kaluk Jesus borledmeng, bimarneyimeng Peter, "Ngudda yiman Satan nawu namarnde duninh, dja yiray, kanbawo! Ngudda yidjare kanhmirrkadake dja yihburrbun yiman bininj kore kabirrihburrbun, dja minj yidjalburrbun njalehnjale nawu nuye God."

24 Wanjh Jesus benmarneyimeng nuye benbukkabukkani rowk, "Bininj nawu kadjare nganmunkekadjung, wanjh nakka bawo njalehnjale nawu kahdjare, dja ngorrma manbu kundulk cross wanjh nganmunkekadju ngaye.

25 Mak bu ngudda ngurridjare bu ngurrikanjengehkerren, wanjh kunukka ngurridjalmaingdowe. Dja bu ngurrikanjkurmerren kore ngundibun bu ngayekenh, wanjh kunukka ngurridjalmaingmimbimen.

26 Kaluk njale kunmak kabimarnekurduyimerran bininj nawu kamang njalehnjale rowk manbu kondah kurorrebeh bu kadjalmaingdowen? Yiddok bininj kabayahme nuye kunmalng ba bu kamalngdurndiwerran?

27 Ngaye nawu Bininj Duninh ngamyawoyhdurndeng, ngardduk Korunkumo nuye kunmakmak dorrengh, dja angels warridj ngarrimre. Bu kunmekbe kabolkymerran, ngaye wanjh ngabenbebbehwon bininj rowk nawu kahdjedjeno bedberre kore kunmak birrikurduyimeninj.

28 Dja marneyime ngudberre bu woybukkiah duninh, yikahwi bininj nawu kondah kabirrihdi, nakka minj kabirribangmedowen dja kabirrinan werkk nawu Bininj Duninh bu kamre kore kadjalwohrnan rowk."

17

Jesus Kukbami Dja Birriwokdi Moses Dja Elijah.

Matthew 17:1-13

(Mark 9:2-13; Luke 9:28-36)

1 Bu six kunbarnangarra yimerranj, Jesus benkanng Peter, James dja John, nawu James benedanginj, wanjh birriwam kore manwarddekuyeng birribidbom kore birridjalkudji birridi.

2 Kaluk kore kumirrk bedberre birrimekbe nawu benbukkabukkani, wanjh Jesus nuye kunburkk kukborledkerrinj; manbu kunkeb nuye mak kebwoykayindi yiman kundung, dja kunmadj nuye nakka madjbami yiman kore kahbolkwolkayindi.

3 Wanjh kundjalburrikudji bindinang Moses dja Elijah bu birrihwokdi Jesus.

4 Wanjh Peter bimarneyimeng Jesus, "Nawu Yiwohrnan, kunukka kamak bu ngad kondah karrihni. Dja bu ngudda yidjare, wanjh ngamarnbun danjbik kudjurl, wanjh nakudji nawu ngudda ke, nabuyika Moses nuye mak nabadbuyika Elijah nuye."

⁵ Kaluk bu kunmekbe Peter wokdihwokdi, manbu kumhngolbami kungol benbarrkbom. Wanjh kore kungolbeh kumwokdanj yimeng, "Nahni ngardduk Beywurd nawu nganjilngmak nuye dja ngamarnedjare warridj. Dja wanjh nungka ngurribekka!"

⁶ Kaluk nawu benbukkabukkani bu birriwokbekkang, bedda wanjh birriwernhkeleminj dja birridjalmakang kurorre, dja birridjalrorrenang kanjdji.

⁷ Dja Jesus benyikang wanjh benkarmeng dja yimeng, "Ngurridolkka! Yuwn ngurrikele."

⁸ Bu kunmekbe birridolkang bedda birribolknang dja birridjalnang Jesus nakudji dingihdi.

⁹ Wanjh bu kunmekbe birrimhkolungi kuwarddebeh, Jesus benbeng-dayhkeng, "Yuwn nangale ngurrimarnemulewan kore ngurrinang dja ngaleng kandimulewan yerre bu God ngandolkayhwe ngaye nawu Bininj Duninj kore kumidjbeh."

¹⁰ Wanjh nawu benbukkabukkani nuye birridjawam Jesus birriyimeng, "Njalekenh nawu mankarre kabindihbukkan kabirrihyime bu Elijah kamdokme werkk?"

¹¹ Kaluk Jesus yimeng, "Bedda wanjh mandjad birriyimeng bu Elijah kamre dja kayawoyhmarbun rowk kore warrewarreminj.

¹² Dja ngaleng wanjh marneyime bu nawu Elijah ngokko kumwam, dja bedda minj birrikuburrknayi. Bedda birridjalkurduyimeng nuye kore birridjareni birrimarnekurduyimeninj. Wanjh bu kaluk kunmekbe rerrih wanjh karohrok bu nganmarnekurduyimerran ngaye nawu Bininj Duninj bu ngadjakbekkan kore kubid bedberre."

¹³ Wanjh kumekbe nawu benbukkabukkani nuye birrimayalibayhmeng bu Jesus bihyolyolmi Elijah, wanjh kunu benbengdayhkeng bu Johnkenh nawu Benkodjjuhkeyi bininj.

Jesus Bimarbnom Wurdyaw Nawu Namarnde Bikarmeng

Matthew 17:14-21

(Mark 9:14-29; Luke 9:37-43a)

¹⁴ Bu Jesus dja benbukkabukkani nuye birrimdurndi kore bininj birriwern birrimirnderri, wanjh nakudji bininj bimiyikang Jesus dja boddanj kanjdji kore kumirrk nuye.

¹⁵ Dja yimeng, "Nawu Yiwohrnan, yikongibu ngardduk beywurd. Nungka kahkarrme kundjak kore kunkodjkulu, dja kahdjakbekkan kunkimuk, mak munguyh kahkukwarrhme kore kunak dja kore kukku.

¹⁶ Wanjh ngamkang kore nawu yibenbukkabukkan dja bedda minj birrimarnbuyi dja birribarabom."

¹⁷ Wanjh Jesus yimeng, "A! Ngudda bininj minj kandiwernhwoybukwon. Yiddok munguyh ngaye karrihdjarrkni kondah kurorre? Dja kandinjilngwarrewon. Wanjh ngurrimka kondah kore ngaye."

¹⁸ Kumekbe Jesus bimarneyimeng nawu namarnde ningihni kore wurdyaw. Wanjh nawu namarnde kumbebmeng, dja nawu wurdyaw djalmakminj kundjalmekbe rerrih.

¹⁹ Kaluk bu yerrekah nawu benbukkabukkani nuye birrimiyikang Jesus kore nakudji ningihni dja birridjawam, "Njalekenh bu ngad minj ngarribebkemeninj nawu namarnde?"

²⁰ Wanjh Jesus benmarneyimeng, "Ngudda minj kandiwernhwoybukwoyi. Dja marneyime ngudberre bu woybukkih, bu kandiwoybukwon djal walakkih, bu djal kunyahwurdenk kandiwernhwoybukwon, wanjh bonj, ngurrimarneyime manbu mandulum bu kahderrehme kumekbe kore

kahdi dja karrangen kubuyika. Wanjh kunukka kadjalkurduyimerran bu kandiwerhwoybukwon. Wanjh minj mak ngurribarabun kore ngurriyime.

²¹ Nahni namarnde nawu bolkkime ngurribekemeninj, wanjh bu ngurribawon manme ba bu ngurridi yiwarrudj kunkuyeng, wanjh kuhni bu ngurribekke nanihnjanu nawarre.”

Jesus Yawoyhyolyolmerrinj Bu Karrowenkenh

Matthew 17:22-23

(Mark 9:30-32; Luke 9:43b-45)

²² Bu Jesus dja nawu benbukkabukkani nuye birrihmornnamerreni kore kubolkkimuk Galilee, wanjh nungka yimeng bedberre, “Bininj wanjh ngandikukweykan ngaye nawu Bininj Duninj, dja ngandibidkenwon birriwarre bininj.

²³ Wanjh bedda ngandibun, dja ngarrowen. Kaluk bu kunbarnangarra danjibk wanjh God nganyawoyhdolkkayhwe dja ngarrarrkiddi.” Wanjh bu kuninjkuwu birribekkanngawu benbukkabukkani nuye bedda wanjh birriwerhnhjilngwarreminj.

Jesus Yolyolmeng Bu Tax Kabirrikarremulewanken

Matthew 17:24-27

²⁴ Kumekbe bu Jesus dja bininj nawu benbukkabukkani nuye birrimwam kore kunred Capernaum, bininj nawu birrihmangi tax kore ngarre temple birrimyikang Peter. Dja birrimarneyimeng, “Yiddok nawu ngunhbukkabukkan ngudberre minj kahkarremulewan nawu tax nawu kunwardde ngarre temple?”

²⁵ Wanjh Peter benwokmey, yimeng, “Yoh, nungka wanjh kahkarremulewan mahni manbu tax.”

Bu bedda birrimdokmeng kured, Jesus bimiyikang Peter dja bidjawam, bu yimeng, “Simon, ngudda baleh yiyime? Yiddok nawu kabirrihwohrnawohrnan kondah kurorre kabirrihni, yiddok bedda kabirrihmang nawu tax bedberre bebeywurd bedberre, dja mak bininj nawu birribubuyika?”

²⁶ Wanjh Peter yimeng, “Nakka nawu birriredbubuyika kabirrihkarremulewan.” Wanjh Jesus yimeng, “Dja nawu bebeywurd bedberre nakka wanjh bedda minj kabirrikarremulewan.

²⁷ Wanjh ngad minj karridjare bu karrbenwarrewon nawu bininj kabirrikukmang tax bolkkime. Wanjh yiray, yiyarldjuhke wakkidj kore manbokimuk, dja yimang nawu djenj kaluk bu kumekbe yimang nakudji. Yirrangbarrkemen namekbe djenj, dja yinan kumekbe coin nakimukkenh. Wanjh yika namekbe coin ba bu yikarremulewan nawu tax, ngudda dja ngaye ngarrku.”

18

Nangale Bininj Nawu Nawernhkimuk Kore God Kawohrnan Rowk?

Matthew 18:1-6

(Mark 9:33-37; Luke 9:46-48)

¹ Bu kumekbe bolkyimi nawu benbukkabukkani nuye birrimyikang Jesus dja birridjawam bu nangale kunubewu nawernhkimuk kore heaven.

² Wanjh Jesus bikayhmeng wurdyaw nawu kumwam dja bikurmeng bu danginj kore kumirr bedberre nawu benbukkabukkani.

³ Dja yimeng, “Ngaye marneyime ngudberre, bu minj ngurriborledkerren dja ngurriyimerran yiman wurdwurd, wanjh ngudda minj ngurringimen kore heaven, kore God nawu King duninj kawohrnan.

⁴ Bininj nawu minj kaburlumerren, dja kadjaldi yiman nahni wurdyaw, wanjh nakka nawernhkimuk duninj kore God kawohrnan rowk."

⁵ "Mak bu ngurrbenkimang nawu wurdwurd kore ngaye kunngeykenh, wanjh kunukka ngaye wanjh kimang ngudberre warridj.

⁶ Dja kunukka kadjalwarre duninj bininj nawu kabibukkan nadjalkudji wurdyaw ngardduk bu kabalyime kunwarre. Nahni bininj nakka wanjh kamak bu kadjaldjuhen kore kurrula, kaluk manwarddekimuk dorreng kakomdukkayindi!" Kuhni bu Jesus yimeng bedberre.

Njale Kanbukkan Bu Kunwarre Karrikurdyime?

Matthew 18:7-9

(Mark 9:42-48; Luke 17:1-2)

⁷ Wanjh Jesus yawoyhyimeng, "Wanjh kunwarre duninj kabenmarnbun bininj bu kunwarre kabirribalyime. Wanjh mahni kunred bolkwowarreminj kunmekbekenh! Kunwarre wanjh kamre munguyh, dja bininj nawu kamkan kunwarre wanjh kunwarre duninj kabimarnekurdyimerran nuye!

⁸ Mah, wanjh kandibekka! Bu kunbid dja kundenge ke ngunmarnbun bu kunwarre yiyime wanjh yidjobkemen dja yiburriwemen. Wardi bu yibidkudji, dja yirrenggekudji, dja kunukka kadjalmak bu yiwe yikahwi kunburrrkbeh ke ba bu yidarrkiddi munguyh. Dja bu yikarremeninj bokenh kunbid dja bokenh kundenge dja yidjareniwirrinj yidjalwarreniwirrinj, wanjh kunukka God ngunkukburriwemeninj kore kunak manbu kadjalrung munguyh.

⁹ Mak bu kunmim ke ngunmarnbun kunwarre yiyime, wanjh yimimbekerrimen, dja yidjalburriwe ke kunmim ماندکدی ba bu yirrarrkid munguyh munguyh. Dja bu yikarreme bokenh kunmim, dja yidjalwarre, ngunkukburriwe kore kunak ngarre hell." Kuhni bu Jesus benmarneyimeng.

Mayh Nawu Bengwabom

Matthew 18:10-14

(Luke 15:3-7)

¹⁰⁻¹¹ Jesus yolyolmeng bedberre, dja yimeng, "Ngurrinahnarrimen. Ngudda yimankek ngurriyime nahni wurdwurd minj birrikuken. Wanjh bengdayhke ngudberre bedda kabindikarreme angels kore heaven kabirrihni nawu kabirrihkebnan God nawu Kornkumo ngardduk.

¹² Mah, dja ngurrimenmenbekka. Bu bininj kakarreme 100 mayh nawu sheep, dja nakudji kabengmayahme, wanjh nungka kabenbawon nawu ninety nine kore kurrulum dja kare kayawan nadjalkudji nawu kukbengwabom.

¹³ Dja marneyime ngudberre bu woybukkih duninj, bu kunmekbe kangalke nawu kukbengmayahmeng, wanjh kunukka nungka kanjilngmakmen dja minj kabenburrbun birribuyika mayh nawu birrihdarnhdi.

¹⁴ Wanjh kunmekbe rerrih kadjalrohrok nuye nawu Kornkumo ngudberre kore kahni heaven wanjh minj kadjare nawohkudji nayahwurd nuye kabalbengmayahme." Kuhni bu Jesus yolyolmeng.

Bu Bininj Ngunmarnekurdyime Kunwarre

Matthew 18:15-20

(Luke 17:3)

¹⁵ Jesus yawoyhyimeng bedberre, "Bu nabuyika bininj nawu nganwoybukwon ngaye, ngunmarnekurdyime kunwarre, wanjh yiray yimarneyimen bu nakudji kahdi. Bu yiman nungka ngunbekkan, wanjh kunukka

yibidyikarmeng dja nungka kayimerran bu ngunedanginj bulkkidj duninh.

¹⁶ Dja bu minj nungka ngunbekkan, yibenbeneka benebokenh dja mak wardi birridanjbig bininj nawu ngandidjarrkwoybukwon ngaye Jesus, dja ngurridjarrkray bu nguneyawoyhwokdi namekbe nawu ngundjalwarrewong, dja mak birrimekbe nawu ngurridjarrkre wanjh ngundibekkan. Ngurriburrbun kore kabimbuyindi, kayime, 'Bu benebokenh dja nuk birridanjbig bininj kabirridjarrkmulewan bu birridarrkidnang, wanjh kunukka kunwoybuk kabirriyime.' [Deuteronomy 19:15]

¹⁷ Dja bu ngundjaldahme ngudberre, wanjh ngurrbenmarneyimen birriwern nawu yiwarrudj bedberre warridj. Dja bu kabendahme nawu yiwarrudj bedberre bu minj kabembekkan, wanjh ngurrimarneyime bu namekbe bininj kayimerranj yiman kayime nawu bininj kahmang tax, dja nuk yiman bininj nawu minj kabiwernhburrbun God duninh.

¹⁸ Wanjh woybukkih duninh marneyime ngudberre, bu gudda ngurrikarremarnbun kondah kore kurorre, wanjh God nungka ngokko karremarnbom kore heaven.

¹⁹ Dja mak bendayhke ngudberre kore kamenmenyime. Bu bininj bokenh kondah kurorre ngurrihni kabenewokmarnburren kore njalehn-jalekenh bu yiwarrudj kabenedi, wanjh nawu Kornkumo ngardduk kahni kore heaven kabenededjalwon nawu njale kabenedjawan bu kabenedi yiwarrudj.

²⁰ Kuhn bu djalwoybukkih yiman benebokenh mak yika birridanjbig bininj kabirrimre kabirridjarrkdi kore kunngey ngaye ngardduk, wanjh nakka ngaye dorreng ngarrihdjarrkdi."

*Bu Ngad Karribengmidjarren Kore Jesus Nuye
Matthew 18:21-35*

²¹ Wanjh nawu Peter bimiyikang Jesus dja bidjawam, "Nawu Yiwohrnan, baleh kab kayime ngaye ngarohrokme bu ngamarnebengmidjdan ngardduk nawu nganedanginj, bu nungka kunwarre nganmarnekurduyime ngardduk? Yiddok kamak ngamarnebengmidjdan nuye bu ngayime sevenkah?"

²² Wanjh Jesus yimeng, "Dja marneyime, minj mak kore seven bu yimarnebengmidjdan nuye dja kundjalwern ngarre, yiman seventy-seven.

²³ Kandibekka. Ngurriburrbun kore God nawu kawohrnran rowk, wanjh yiman kayime nawu king nawu kondah kurorre kahni, nawu benmarneyimeng bu bolkimerranj nawu birrihmarnedurrkmirri nawu bedmanwali birrikarremulewayi kore nungka benwoni.

²⁴ Bu kunmekbe dedjingmey bu kurduyimeninj, wanjh bininj birrimyimingeng nakudji bininj nawu minj bikukwoyi nawern million dollars bu bikarremulewayi nawu king.

²⁵ Wanjh namekbe bininj minj kukkarmenininj nawern kunwardde bu bikarremulewayi nawu king. Wanjh nawu king benmarneyimeng nawu birribuyika bu nungka kabirrikukweykan mak ngalbininj kobeng nuye dja mak wurdwurd dorreng nuye, dja mak njalehnjale nungka nuye rowk ba bu king kakukmang money nuye kore nawu bindikukbayahmengbeh nahn bininj dja namud dorreng.

²⁶ Wanjh nawu bininj bimarnebarddurrukkurldhanj nuye, dja bimarnekongiburrinj nawu king, yimeng, 'Kankongibu! Dja med! Kaluk karremulewan kunwardde rowk nawu minj kukwoyi!'

²⁷ Wanjh nawu king bikongibom namekbe bininj, bimarneyimeng bu minj bikarremulewan, dja bidjalbawong bu wam.

28 Kaluk bu nahni bininj bebmeng kore king bibawong, wanjh bingalkeng nabadbuyika bininj nawu minj bikarremulewayi nungka nadjalayahwurd nawu kunwardde. Wanjh nungka biberlmey bikomdjuwimeninj, wanjh wernkih bimarneyimeng, 'Kankarremulewa nawu ngudda minj kankukwoyi!'

29 Kaluk nahni nabuyika bininj bimarnemakang kanjdji dja bimarnekongiburrinj nuye, bu bimarneyimeng, 'Kankongibu dja kaluk karremulewan nawu kunwardde, minj nawu kukwoyi.'

30 Kaluk nawu nayungkihni bininj nakka minj bibalkongibuyi nawu nabuyika. Dja nahni bininj nawu king bibawong, wanjh nungan benmarneyimeng djamun bu birrikurrmeng nabuyika bininj kore kahrurrkkendi prison wanjh bu kayakwon rowk kore kabikarremulewan wanjh kunukka kamak kabirrimunkewe kare."

31 "Kaluk birribuyika bininj nawu birrimarnedurrkmirri king, bu birrinang baleh kurduyimerranj, wanjh bedda birrinjilngwarreminj. Dja birriwam birrimarnekarremulewam rowk nawu king.

32 Wanjh nawu king bikayhmeng namekbe nayungkihni bininj nawu kabiharnedurrkmirri, dja mak bimarneyimeng, 'Ngudda nawu yidjalwarreni bininj! Bu ngudda kanmarnekongiburrinj ngardduk wanjh ngaye marnebengmidjdani ke kore minj kankarremulewayi, dja mak marneyimeng bu minj kanbalyawoyhkarremulewan.

33 Dja ngudda wanjh yidjalkongibuyi nawu namekbe bininj nawu ngunedjarrkdurrkmirri, bu yiman ngaye yiman kongibom ngudda!'"

34 "Wanjh nawu king yidduy duninj dja bikurrmeng kahrurrkehrurrkkendi kore prison, ba bininj kabirribun nawu prison kabirridurrkmirri, kaluk bu nungka kayakwon rowk bu kabikarremulewan nawu minj bikarremulewayi."

35 Dja Jesus benmarneyimeng, "Mah, ngudda wanjh ngurriburrkburkkekka! Bu bininj nawu ngunedanginj ngunwarrewon, wanjh yidjalmarnebengmidjda kore kukange ke. Dja bu burrkyak, wanjh ngardduk Kornkumo kore heaven kahni, wanjh kakurduyime karohrok ke bu namekbe king nawu kondah kurorrebeh."

19

Jesus Yolyolmeng Bu Nabininjkobeng Dja Ngalbinijkbeng Karribaworenkenh

Matthew 19:1-12

(Mark 10:1-12)

1 Bu Jesus burnbom kore kuhni yolyohyolyolmi bedberre, wanjh nungka bolkbawong kore Galilee dja wam kore kunred ngarre Judea, kaluk kore borledmikenh ngarre Jordan mankabo.

2 Wanjh birrimirndewern bininj birrimunkemey dja wanjh nungka kumekbe benhmarnbuni nawu birridulkkihni.

3 Wanjh yikahwi Pharisees birrimiyikang Jesus dja yimankek birrikowemeninj bu birrirohrokmeninj. Birriyimeng, "Yiddok kuhni kamak bu bininj kabibawon ngalbinijkbeng nuye bu nungan kadjare kare bu djalnjalahnjalekenh?"

4 Wanjh Jesus benwokmey, yimeng, "Ngudda wanjh ngurrinang kore djurra, bu kayime, 'Bu kerngeghkenh duninj God nawu marnbom yehyeng rowk, wanjh benbenarnbom narangem dja ngaldaluk.' [Genesis 1:27]

5 Wanjh God yimeng, 'Bininj wanjh kabenbenebawon ngalbadjan dja kornkumo dja kare kabenemarren ngalbu ngalbininj kobeng nuye, wanjh kabenemarnburren bu beneburrrkudji.' [Genesis 2:24]

6 Mak minj kabenemarnburren benebokenh, dja nakka kunburrrk bokenh kabenemarnburren bu kabenekudjihmen. Wanjh God benbene-marnbom bu benekudjihminj, dja yuwn nangale bininj kabenbeneyarlar-ke."

7 Wanjh nawu Pharisees birriyime, "Dja njalekenh mak Moses kurrmeng kunwok bu bininj kabibawon nuye ngalbininj kobeng, wanjh kabi djalwon djurra nawu kabibawonkenh dja kabi djal munkewe."

8 Kaluk Jesus yimeng, "Moses yimeng kamak bu ngurrbenbawon nawu ngalbihbininj kobeng ngudberre bu kuhniken ngudda wanjh ngurrikangerayek bininj, dja ngudda minj ngurrimarrkmayi God nuye kunwok. Dja manbu ngurribaworrenkenh, makka minj kurduyimerrangimeninj bu kerrngehkenh duninhj.

9 Wanjh marneyime ngudberre, bu nangale nawu kabibawon ngalbininj kobeng nuye bu djal burudjang, dja kabibalmang ngalbuyika daluk wanjh kunukka kunwarre kakurduyime. Kaluk ngahli ngalbininj kobeng nawu bibawong, wanjh minj beneyuwirrinj nabuyika bininj."

10 Wanjh nawu benbukkabukkani nuye birrimarneyime, "Bu kunmekbe kayimerran berrewoneng bu bininj dja dalukkenh, wanjh kunukka mak minj karrimarren munguyh!"

11 Wanjh Jesus benwokmey, yimeng, "Kandibekka. Minj birriwern rowk kabirrimarrkmang mahni kunwok ngaye marneyime bolkkime, dja God benmarnbom bu yikahwi bininj kabirrimarrkmang.

12 Ngayime kakarreyika kore njalekenh nawu bininj minj kabindimang daluk. Yikahwi bininj bu kore birridanginjbeh, wanjh minj kabirrikarme bu kabindibornan wurdwurd. Bedda wanjh birrimanembey-wurdyak. Yikahwi nawu minj kabeneyo daluk, wanjh bininj bindimarnbom bu birriyime. Dja mak birribuyika nawu minj kabirridjare bu daluk bindimang bu kuhniken kabirridjaldjare kabirrimarnedurrkmirri kore God kawohrnan rowk. Wanjh bininj nawu kadjare kamarrkmang maninjmanu kunwok manbu kabirrimarrenkenh, wanjh kamak, kadjal-marrkmang." Kuhni bu Jesus benmarneyolyolmeng.

Jesus Kabenkimang Wurdwurd

Matthew 19:13-15

(Mark 10:13-16; Luke 18:15-17)

13 Wanjh birriwern bindimang wurdwurd bedberre kore Jesus ba kabidkurrmerren dja yiwarrudj karri bedberre. Kaluk nawu benbukkabukkani nuye wanjh bindidungi.

14 Dja wanjh Jesus yimeng, "Ngurrbenbawo nawu wurdwurd kabirrimre kore ngaye! Dja yuwn ngurrbendenghke. Kaluk wurdwurd wanjh kabirrihni kore God kawohrnan rowk, dja mak bininj warridj nawu kabirriyime yiman birrimekbe wurdwurd."

15 Wanjh bu kunmekbe Jesus bidkurrmerrinj bedberre nawu wurdwurd, wanjh nungka kumekbe bolkbawong wam.

Jesus Benyolyolmi Nawu Birrikuken Bininj

Matthew 19:16-30

(Mark 10:17-31; Luke 18:18-30)

16 Bininj nakudji bimiyikang Jesus dja bidjawam, "Nawu kanhbukkabukkan, baleh kore kunmak ngakurduyimen bu ngamalngdarrkid bu munguyh munguyh?"

17 Wanjh Jesus bimarneyimeng, “Njalekenh kanhdjawan bu kunmakkenh? God nadjalkudji namak. Dja bu yidjare yirrarrkiddi munguyh, wanjh yidjalmarrkma kore mankarre God nuye kahyime.”

18 Kaluk nawu bininj yimeng, “Baleh manbu manngale mankarre?” Dja Jesus yimeng, “Ngudda minj nangale yibun yikukkurrme. Yuwn bu mak yimarnedjirdmang daluk ngalbu nuye nabuyika bininj. Yuwn bu mak yidjirdmang njalehnjale. Yuwn bu yibenmarnekurren birribuyika bininj.

19 Dja warridj yibenbenemarrkma ngalbadjan dja kornkumo ke, dja yimarnedjarenin nawu ngunerdbu yiman kayime bu yingandeleng yimarnedjarenin.” [Exodus 20:12; Leviticus 19:18]

20 Wanjh nawu nayawurrinj yimeng, “Ngaye ngamarrkmey rowk nahni njalehnjale. Dja balehwali mak ngakurduyime?”

21 Jesus yimeng, “Bu ngudda yidjare yimarnburren nawu nadjalmak bininj, wanjh yiray yiweykan njalehnjale nawu yihkarrme, mak nawu kunwardde wanjh yibenwo nawu birrimarladj. Bu kuhni ngudda yikurduyime, wanjh kunukka namakmak yikarrme kore heaven. Wanjh yerreh yimbalre wanjh ngaye kanmunkekadjung.”

22 Kaluk bu kunmekbe bekkang nawu nayawurrinj, nungka njilngwarreminj, dja nungka kaluk nakukenni.

23 Wanjh Jesus benmarneyimeng nuye benbukkabukkani, “Marneyime ngudberre woybukkih duninj, kuhni wanjh kadjalkarrerayek nuye nawu nakuken bininj bu kangimen kubolkmak heaven kore God kawohnan rowk.

24 Yoh, marneyime ngudberre kunukka mayh nakimuk nawu camel minj kangimen kore kahdangurrk manbu kururrk, bonj, dja burrkimuk. Wanjh kadjalrohrok nawu nakuken bininj minj kangimen kore God nuye kubolkmak.”

25 Bu Jesus nuye benbukkabukkani kunmekbe birribekbang, wanjh bedda birrikangebarrhmeng dja birridjawam, “Bu kunmekbe, wanjh nangale nawu God kabingehke?”

26 Dja Jesus bennanganang, wanjh yimeng, “Kuhni wanjh bininj minj kabirrikurduyime, dja ngaleng God nadjalkudji bu kadjalkurduyime rowk kore njalehnjalekenh.”

27 Wanjh Peter bimarneyimeng Jesus, “Ngad ngarribawong njalehnjale dja ngudda ngundimunkekadjung. Wanjh ngad mak njale ngarrimang?”

28 Kaluk Jesus benmarneyimeng, “Ngaye marneyime bu woybukkih duninj, kalukburk bu yerrekah, bu ngaye nawu Bininj Duninj ngayerkan kore throne ngardduk kore heaven, wanjh ngudda nawu ngaye kandihmunkekadjung, wanjh ngurriyerrkan kore twelve thrones, dja ngurrbendjadmekenh nawu twelve kunmokukurr nawu Israel benkeb-mawahmeng.

29 Dja nawu birribabawong kurrambalk, dja bindibabawong nawu birridangerrinj, ngalabadjan, kokornkumo, dja wurdwurd, mak kore kabirrihdurkmirri farms, dja ngaye ngandimunkekadjuy, wanjh nakka bininj rowk kabirrimang nawern kore birribabawong, mak bedda kabirridjalmalngmimbi bu munguyh munguyh.

30 Dja birriwern nawu kabirridokmibuyhwerren bolkkime, nakka wanjh kabirrikurdurndeng yerre. Dja nawu birriwern nawu yerre kabirrihdi bolkkime, nakka wanjh kabirrikukdokme.” Kuhni bu Jesus yolyolmeng.

*Bu God Nungan Kandjalwon Kore Kadjare Kadberre Djal Burudjang
Matthew 20:1-16*

¹ Jesus yolyolmeng yimeng, “Ngayolyolme kore God nuye kawohnan rowk. Wanjh nakka yiman kayime bininj nawu kabolkkarme nuye kunred. Kaluk kumkabelni nungka wam, benmey bininj ba kabirridurkmirri kore vineyard nuye, kore manrakel manbu grapes kadjolengmen.

² Kaluk namekbe bininj benmarneyimeng kabenkarremulewan birimekbe bininj bu kabirridurkmirri kunbarnangarrakudji. Bu nungka benmarnewokrayekwong kabenkarremulewan 100 dollars, dja benmunkeweng kore vineyard ba kabirridurkmirri.

³ Kaluk yerrekah, bu nine o'clock yimerranj, wanjh namekbe bininj wam kore shops dja bennang birrimirndebuyika bininj kumekbe birrihdi, kaluk minj bedda birridurkmirriwirrinj.

⁴ Wanjh benmarneyimeng, ‘Kab ngurrimray ngurridurkmirrin kore ngaye ngardduk vineyard, wanjh kunukka karremulewan mandjad ngudberre.’

⁵ Wanjh birriwam birrihdurkmirri kore vineyard nuye namekbe bininj. Mak kunyawoyhkudji yawoyhwam bu twelve o'clock, dja mak three o'clock kunmekbe rerihi kurduyimeng.

⁶ Kaluk bu five o'clock yimerranj, wanjh yawoyhdurndi kore shops wanjh bennang birribadmirndebuyika bininj kumekbe birrihdi. Wanjh bendjawam, ‘Njalekenh ngudda ngurrihdi kondah barnangarrakuyeng dja minj njalekenh ngurridurkmirri?’

⁷ Kaluk bedda birrimarneyimeng, ‘Minj nangale nganwoyi kore ngaridurkmirriwirrinj!’ Wanjh nawu bininj benmarneyimeng, ‘Mah, ngurrimray ngurridurkmirri kore ngaye ngardduk vineyard.’

⁸ Kaluk bu baldungyibmi, namekbe bininj nawu bolkkarmi nuye kunred, wanjh bimarneyimeng nawu kabenhmarnewohnan kore nawu kabirrihdurkmirri, ‘Yibenkayhmen ba yibenkarremulewan. Wanjh yibendokmibuyhwemen werrek nawu birriyerre ngabenhmangi bininj, wanjh yerre yibenbalwon nawu birriyungkih bininj birridedjingmey.’

⁹ Kaluk nawu birrihdurkmirri kore benmey bu five o'clockni wanjh birrimey werrek bedberre kunwardde, kaluk birribebbehmey 100 dollars.

¹⁰ Mak bininj nawu kerngehkenh duninj benkimey birrimey kunwardde bedberre. Kaluk bedda yimankek birriyimeng nawernhkimuk kabenkukwon, dja burrkyakni. Bedda warridj birrimey money manbu kadjalkukrohok nawu birriyerre bininj birrimey.

¹¹ Kaluk bu birribebbehmenemey nawu kunwardde, bedda wanjh wokkihnyayanayawkmi bu birrimarneyimi namekbe bininj nawu bolkkarmi kunred manbu vineyard.

¹² Wanjh bedda birriyimeng, ‘Birrimekbe bininj nawu birridurkmirranginj bu nakudji hour. Dja ngudda yibenmarnekarremulewam kore karohok yiman ngad nawu ngaridurkmirranginj barnangarrakuyeng kore kurrungbang.’

¹³ Dja nawu bininj nuyeni vineyard wanjh bimarneyimeng nawu nakudji bininj, ‘Nawu ngarrdabbolk, ngaye minj djirdmayi ngudda. Ngudda ngurriyimeng kamak ngurridurkmirri bu ba bu ngurrimang kunbarnangarrakudji ngarre naninjnanu kunwardde.

¹⁴ Wanjh yima nawu kunwardde ke, dja yiray. Ngaye wanjh ngadjare ngabenwon bininj nawu yerre ngabenkimey nadjalkudjiwi kunwardde manbu karohok rowk nawu kore ngudda kukwong.

¹⁵ Nakka ngarddukkih money, wanjh kamak bu ngabenkukwon money kore ngaye ngadjare. Dja yiddok yikirnwern bu ngadjare ngabenwon nawu birribuyika bininj? ”

¹⁶ Wanjh Jesus yimeng, “Kuhni ngamenmenyime kore ngayime. Birimekbe bininj nawu bolkkime kabirrimre yerre, nakka wanjh kabirribalkukdokme. Dja nawu kabirrikukdokme bolkkime, nakka wanjh kabirrimre yerre duninjh.”

Jesus Yolyolmerrinj Danjikkah Bu Nungka Karowenkenh

Matthew 20:17-19

(Mark 10:32-34; Luke 18:31-34)

¹⁷ Bu Jesus renegehrey bu bidbuni kore Jerusalem, wanjh nungka benmey nawu benbukkabukkani nuye dja benmarneyimeng manmolk,

¹⁸ “Ngad wanjh karrihidbun kore Jerusalem. Dja ngaye nawu Bininj Duninjh wanjh ngandikukweykan kore nawu birrikimuk priests dja nawu kabindihbukkan mankarre, wanjh ngaye ngandidjadme ba bu ngandibun ngarrown.

¹⁹ Kaluk ngandikukweykan kore bininj nawu minj Jews nawu ngandidjekmiwon dja ngandiwidjbihe whips dorrengh, wanjh ngandikukbarnname kore kundulk cross. Kaluk yerrekah bu kunbarnangarra danjibik, God wanjh nganyawoyhdolkkayhwe kore ngadjaldarrkiddi.” Kuhni bu Jesus yolyolmerrinj.

Bu Nangale Kadjare Kabenmarnedokme Kore Jesus Nuye Bininj

Matthew 20:20-28

(Mark 10:35-45)

²⁰ Wanjh ngalkudji daluk kumwam kore Jesus, dja nayayaw bokenh warridj birrimdjarrkwam. Nawu Zebedee benbenebornang benemekbe bininj, dja bedda wanjh Jesus benbenebukkabukkani. Ngalmekbe daluk boddanj kumirrk nuye Jesus dja bidjawam kore kakurduyime ngaleng ngarre.

²¹ Wanjh Jesus djawayhmeng, “Ngudda njale yidjare?” Kaluk ngaleng yimeng, “Bu yiwohrnan rowk yiman king duninjh, wanjh ngadjare nayayaw ngardduk kabenehi kumekbe kore kukun dja kudjaku ngudda ke.”

²² Dja Jesus benbenemarneyimeng, “Ngudda minj nguneburrbun kore njale kandihdjawayhme. Kaluk kundjak mandulumuk duninjh nganmarnebehe. Kuhni wanjh yiman kayime ngaye ngabongun maninjmanu kundjak kore banikkin ngardduk, dja yiddok ngunebongun warridj?” Wanjh nawu nayayaw beneyimeng, “Yoh, wanjh ngad nganebongun.”

²³ Kaluk Jesus benbenemarneyimeng, “Ngudda wanjh woybukkih kaluk ngunebongun kore ngaye ngardduk banikkin. Dja minj ngayime bu nangale kani kore kukun dja kudjaku ngardduk. Makka minj ngayeman, dja nungan nawu Kornkumo ngardduk bu kayime kore kabenbenemarneyingkihbolkmarnbun.”

²⁴ Wanjh nawu birrimirndebuyika ten nawu benbukkabukkani bu bindiwobekgang kunmekbe, bedda birriyidduy dja bindiduy nawu benedanginj.

²⁵ Wanjh Jesus benkayhmeng, dja benmirndemornnameng dja benmarneyimeng, “Ngudda ngurriburrbun bu nawu kabirriwohrnawohrnan kore bininj nawu minj Jews, wanjh kabindidjurrkadjurrkan nawu bininj bedberre. Mak nawu birrikihkimuk bininj nawu kabindiwohrankenh

bedberre, wanjh kabirrikarrme kundulkarre bu kabindimarnewohrnan mardabbabba nawu bininj.

²⁶ Wanjh yuwn ngudda kunmekbe ngurrikurduyime kore bedda kabirrikurduyime. Dja kunbuyika ngudberre. Bu nangale ngudberre bu kadjare kakimukmen, wanjh kurrmerrimen bu kabenmarnedurrkmirri nawu ngurribuyika.

²⁷ Mak nangale kadjare karrokmiwerren, wanjh nakka kurrmerrimen bu karrurrkmirri ngurribuyika, yiman slave rerrih.

²⁸ Wanjh kunmekbe rerrih karohrok gaye nawu Bininj Duninj. Gaye minj ngamrawinj bu birribuyika ngandimarnedurrkmirri. Dja ngamwam bu ngarrurrkmirri bedberre birribuyika dja mak ngakanjurrmerren bu ngabenmarnekarremulewan kore ngabenbebke birriwern bininj." Bu Jesus wanjh kuhni yolyolmerrinj.

*Jesus Benbenemarnbom Benebokenh Bininj Nawu Benemimbunjeni
Matthew 20:29-34*

(Mark 10:46-52; Luke 18:35-43)

²⁹ Bu Jesus dja benbukkabukkani nuye birribalhbolkawoni kore kunred Jericho, bininj birrimirndewern duninj birrimunkemey Jesus.

³⁰ Wanjh bininj bokenh nawu benemimbunjeni benehni kore manbolh darnkih wanjh benewobekgang bu Jesus renehrey benbeneyuhyur-rhkeyi, wanjh bedda benekayhme, "Nawu Yiwohrnan, ngudda beywurd nuye David, kanbenekongibu ngarrewoneng!"

³¹ Kaluk nawu birriwern bininj bindidungi dja bindimarneyimeng bu kabenengurdme kabenehkayhme, dja bedda benekayhmi bu wernkih duninj, "Nawu Yiwohrnan, beywurd nuye David, kanbenekongibu ngarrewoneng!"

³² Jesus wanjh benbenebekgang dja danginj wanjh benbenemarneyimeng, "Baleh ngunedjare ngakurduyime ngurrewoneng?"

³³ Kaluk bedda beneyimeng, "Nawu Yiwohrnan, ngad nganedjare nganebolknan."

³⁴ Wanjh Jesus benbenekongibom benemekbe bininj bokenh dja benbenemimkarmeng, Wanjh kundjalmekbe rerrih bedda benebolknang bu kamak rowk. Wanjh kumekbe benemunkemey Jesus.

21

Bininj Birriburlumeng Jesus Bu Ngimeng Kore Jerusalem.

Matthew 21:1-11

(Mark 11:1-11; Luke 19:28-38; John 12:12-19)

¹ Bu Jesus dja nawu benbukkabukkani nuye birrihbebmi darnkih kore Jerusalem, bedda wanjh birriwohdanginj kore kunred Bethphage kaluk kore kurrulum kabolnggeyyo Olives. Wanjh kumekbebeh Jesus benbenemunkeweng benebokenh nawu benbenebukkabukkani nuye.

² Dja benbenemarneyimeng, "Nguneray kore kurrurrkwern, dja bu ngunengimen, kumekbe ngurrbenengalke donkey bokenh, kaluk ngal-badjan dja yaw kore kabenehdukkayindi. Wanjh ngurrbenbeneyerrkmen dja ngurrbenbenemka kore gaye.

³ Dja bu nangale ngundjawan ngurrewoneng bu njalekenh ngurrbenehenkan nawu donkeys, wanjh nguneyimen bu nawu kawohrnan kadjare berrewoneng, kaluk nungka ngunyimunkewe werrkwerrk."

⁴ Kuhni kurduyimerranj ba bu kore God wokkurrmerrinj makka wanjh woybukkenhdanj bu kore prophet yimeng,

⁵ “Ngurrbenmarnemulewa bininj nawu kabirrihni kunbolk Zion, ‘Ngur-rina! Nahni king nawu kawohrnan ngudberre kamhre ngunhyikan ngudberre. Kaluk nungka minj nabang, dja kamhmorneni kore donkey, nawu mayh yaw.’ ” [Zechariah 9:9]

⁶ Wanjh nawu benbenedukkabukkani benewam benekurduyimi kore Jesus benbenemarneyimeng.

⁷ Benekang donkey dja mak yaw ngalenggarre, dja benebarrkbom kunmadjwi bedberre, dja Jesus mornedanginj.

⁸ Kaluk birridjalmirndewern bininj birriyerrkkerrinj kunmadj nakuyeng bedberre dja birrikurmi kore manbolh. Birribuyika wanjh birriduldadjkeng manyende dja birrikurmeng birribolkbarrkbom manbu manbolh.

⁹ Birridjalwern wanjh birrimarnedokmi, dja yikahwi birrimirndewam birrimunkekadjung, wanjh birrikayhmirey, bu birriyimi, “Mah, karriyime Hosanna* nuye nahni nawu Beywurd nuye David! Nahni nawu kamhre kore kungey nuye nawu Kawohrnan Rowk, wanjh nakka God bidjalkurduyime kunmak rowk! Karriyimen Hosanna God nuye nawu kaddum kahni!” [Psalm 118:26]

¹⁰ Bu Jesus ngimeng kore Jerusalem, wanjh bininj rowk nawu birrihni birrikangebarrhmeng dja birridjavarreni, “Nangale nakka bininj?”

¹¹ Dja birriwern bindiwokmangi bu birriyimi, “Nahni wanjh Jesus, nawu prophet nakang Nazareth kore kubolkkimuk Galilee.”

Jesus Benburriweng Yikahwi Bininj Kore Templebeh.

Matthew 21:12-17

(Mark 11:15-19; Luke 19:45-48; John 2:13-22)

¹² Wanjh Jesus djalwohngimeng kore Temple kuberrkkah, dja benburriweng bininj nawu birriweykani dja birribayahmi kumekbe. Nungka wanjh benmarnewayhkeng manbalabala bedberre bininj nawu money birriweykani, dja mak bininj nawu birriweykani dorddorok mayh.

¹³ Nungka yimeng, “Kabimbuyindi kore kayime, ‘Ngaye kunrurk ngardduk, makka kunrurk yiwarrudjkenh,’ dja ngudda ngaleng ngurri-marnbom yiman kunwardderurk kore ngudda nawu ngurrihdjirdmahd-jirdmang ngurrihni.” [Isaiah 56:7; Jeremiah 7:11]

¹⁴ Wanjh birriwern bininj nawu birrimimbunje, dja mak nawu birribirlni, wanjh birriwam kore Jesus bu dingihdi kore Temple, dja Jesus benmarnbuni rowk.

¹⁵ Dja nawu birrikihkimuk priests dja nawu bindibukkabukkani mankarre bedberre birrikurdunani kunmak rowk kore Jesus kurduyimi, dja mak bindibekakang kore wurdwurd birrikayhmi kore Temple, dja birriyimi, “Hosanna nuye Beywurd nuye David!”. Wanjh bedda birriyid-dungi.

¹⁶ Birridjawam Jesus, birriyimeng, “Yiddok ngudda yibenbekkan nahni wurdwurd bu ngundimulewan ngudda?” Wanjh Jesus benwokmey yimeng, “Yoh. Dja yiddok minj ngurribimngeybuyi kore kabim-buyindi, kayime, ‘Ngudda God yibenmarnbun wurdwurd bu ngundidjal-burluburlume.’ ” [Psalm 8:2]

¹⁷ Wanjh Jesus benbawong, bolkbawong Jerusalem dja wam kore kubolkyahwurd Bethany, dja yonginj kunkakkuyeng kumekbe.

Jesus Dulkwarrewong Manbu Fig Kundulk.

21:18-22

(Mark 11:12-14,20-24)

* 21:9 “Hosannah” kamenyime “Kannghehkemen”.

18 Bu malaywibuyikani, bu dunghebmi, wanjh Jesus yawoyhdurndeyi kore Jerusalem. Nungka wanjh marrwedoweni.

19 Wo hrnang wanjh nang manbu fig kundulk darnkih kore manbolh. Wanjh darnhwam, dja burrkyak, minj karmeninj manme manbu figs, dja djal kunmalaworrwi djahdjaldi. Wanjh Jesus yimeng, "Ngayime bu minj yiyawoyhkarrme manme kamkukbarndangen munguyh." Wanjh kundjalburrikudji mahni kundulk wanjh dulkdoweng, darlehminj rowk.

20 Dja bu nawu benbukkabukkani birrinang kore kurduyimerranj, wanjh birrikangebarrhmeng, dja birridjawam Jesus, "Djal werkkwerkkni duninj kundulk dulkdarlehminj, dja nuk baleh yikurduyimeng?"

21 Jesus benwokmey, yimeng, "Ngaye marneyime djal kunwoybuk duninj, ngudda bu kandiwernehwoybukwon, dja minj ngurrikewkme, ngudda warridj ngurrikurduyime kundulkarre dorreng, yiman gaye ngamarneyimeng mahni kundulk. Ngudda warridj ngurrimarneyime maninjmanu mandulumuk mankimuk, 'Mah! Yiray, yikukburriwerrimen kore kurrula!' Dja kakurduyimerran ngudberre.

22 Bu kandiwoybukwon, wanjh ngurridjalmang njalehnjale kore ngurridjawadjawan kore ngurridi yiwarrudj." Kuhni wanjh Jesus benmarneyimeng.

Balehbeh Jesus Kundulkarre?

Matthew 21:23-27

(Mark 11:27-33; Luke 20:1-8)

23 Kaluk bu nungka Jesus benbukkabukkani bininj kore kunurrk manbu temple, wanjh nawu birrikihkimuk priest dja mak daborrabbolk birrikihkimuk, wanjh birrimarnebebmeng. Dja birridjawayhmeng Jesus, "Ngudda kanmarneyimen ngadberre balehbeh ngudda yiwohrnan bu kuhni yarrkka yihkurduyime, dja nangale ngunmarnbom bu kuhni yihwohrnan?"

24 Wanjh Jesus benwokmey, yimeng, "Ngaye mak wohdjawan ngudberre bu kundjalkudji, kaluk bu kandimarneyimen, wanjh gaye mak marneyime kore ngudda kandidjawan.

25 Bu John benkukduhkeyi, yiddok ngurriyime nungka nuye kadumbek dja nuk ngurriyime bininjbeh?" Wanjh bedman birrihdjawanreni, birriyimerrinj, "Bu karriyime, heavenbeh, wanjh kunu nungka kayime, 'Wanjh njalekenh ngudda minj ngurriwoybukwoyi?'"

26 Dja bu karriyime, 'Bininjbeh', wanjh kunu karrikele, bu birriwern rowk ngad bininj nawu Israel kankebmawahmeng, dja bedda kabirriyime bu woymbukkih John nakka wanjh propheti."

27 Wanjh kunu birriwokmey Jesus, birriyimeng, "Ngad ngarriwakwan bu balehbeh John benhkukduhkeyi." Wanjh Jesus yimeng bedberre, "Wanjh gaye minj mak marneyime ngudberre bu balehbeh gaye ngawohrnan bu kuhni yarrkka ngahkurduyime."

Jesus Bendjawam Nangale Kabiwokmarrkmang God Bu Woybukkih?

Matthew 21:28-32

28 Jesus yolyolmeng bedberre. Yimeng, "Mah, kandibekka dja kandimarneyime kore baleh ngurriyime. Nakudji bininj benbenebornang bininj bokenh. Wanjh kunkudjikenh bimarneyimeng nawu nawernwarre, yimeng, 'Korlonj, yiray kanmarnedurrkmirri kore vineyard bolkkime'.

29 Nahni beywurd nuye yimeng, 'Ngawarnyak!' Kaluk yerrekah, wanjh mayaliborledmeng, dja wam durrkmirri.

30 Dja nawu kornkumo wam bidjawam nawu nawalawalak bu nungka kahdurrmirri, dja nahni beywurd yimeng, 'Mah, Ngabba. Wanjh ngare.' Dja med, nungka minj rawinj bu durrmirrangimeninj."

31 Wanjh Jesus bendjawam, "Nangale bininj biwokmarrkmei kornkumo benewoneng?" Wanjh birriyimeng, "Nawu nawernwarre." Wanjh Jesus benbengdayhkeng, yimeng, "Woybukkih marneyime ngudberre. Bininj nawu tax kabirrikumang, dja birridjalwarre daluk, wanjh bedda kabirringime werrek kore God kawohnan, dja ngudda wanjh yerre.

32 Bu kuninjkonukenh, John bebmeng ngudberre dja ngunbukkang kunmakkeh, dja ngurridjalwokweng nuye. Dja nawu birriwarre bininj dja daluk birriwoybukwong John. Ngudda ngurbennang warridj, dja minj ngaleng ngurrimayaliborledmeninj kore kunwarrekenh bu ngurriwoybukwoyl." Kuhni bu Jesus benmarneyimeng.

Jesus Yolyolmerrinj Kore Manbu Parable

Matthew 21:33-46

(Mark 12:1-12; Luke 20:9-19)

33 Wanjh Jesus yimeng, "Kandibekka, dja ngaye ngayolyolme manih manbuyika parable manbu kunwarlkkaykenh kunwok. Nakudji bininj nawu karmmi kunbolok, wanjh dudji manrakel manwern kore kabbal nuye, dja marnbom fence mankimuk, bolkkaruy kudjorlok kore bininj birrimelmi manbu grapes, dja mak marnbom kunurrk kunkuyeng ba bininj kabarndi kabolknahn kaddumbek. Bonj. Wanjh benkurrmeng bininj bu birrimarnedurrmirri kore birribolknahnani nuye ba bu birrikarremulewayi. Wanjh nungka wam kubolkbuyika, kaluk kunkuyeng bu ningihni.

34 Kaluk bu darnkih ngarre manme kadjolengmen, wanjh namekbe bininj benmunkeweng birridanjebik nawu birrimarnedurrmirri, ba birrimayi manme mandjoleng manbu manrakelbeh.

35 Dja bedda nawu birribolknahnani wanjh bindidarrkidmey. Nakudji birriwidjibikeng, nabuyika wanjh birribom doweng, dja nawu nabadbuyika birridongi kunwarddewi.

36 Wanjh nawu wohrnawohnani benmunkeweng birribuyika bininj nuye ba bu birrimoyhmayi manbu mandjoleng, dja birriwern. Dja bonj, birriwarre bininj wanjh bindibom bedda warridj.

37 Bonj. Kaluk yerreh duninj, wanjh nawu wohrnawohnani bimunkeweng nuye beywurd nuye. Nungka burrbuni bu yimerrinj, 'Woybukkih, bedda birriwarre bininj wanjh kabirriwokmarrkmang ngaye ngardduk beywurd duninj.'

38 Dja birrimekbe bininj nawu birrimarnenahnani kabbal bu birrinang nawu beywurd, wanjh kunu birrihdjawarrene, kaluk birriyimeng, 'Nanih nawu wanjh beywurd, kaluk kamang maninjmanu kabbal bu nuye kornkumo karrowen. Wardi karribu ba ngadman karrimang nawu nuyeniwirrinj.'

39 Wanjh bedda birridarrkidmey, birrikukburriweng kuberrkkah kore manrakel kahdudjihdudjindi, wanjh kumekbe birribom birrikukkurrmeng.

40 Kaluk baleh kabenmarnekurduyime nahni nawu nuye kabbal bu kabenmarnebebme?"

41 Wanjh nawu birribekkani Jesus birriyimeng, "Nungka kabenbularrbun rowk nawu birriwarre duninj bininj. Dja mak birribuyika kabenwon manmekbe kabbal kore manrakel kahdudjindi ba kabirriwon mandjoleng bu kadjolengmarnburren."

⁴² Wanjh Jesus yimeng, “Bolkkime wanjh kunbuyika marneyime bu ngayolyolmerren. Yiddok ngurribimnaya kunwok kore kawokbimbuyindi kore God nuye kunwok bu kayime, ‘Yikahwi bininj birrirurkmar-nuni, birriwarreweng mankudji manbu kunwarddekimuk, wanjh mand-jalmekbe manbu kaluk yimerranj bu manwernhkuken kawernhdokme dja birrikurrmeng kore kaddum kururrk. Nawu Kawohrnan rowk kuhni kurduyimeng, dja karridjalburlume nuye bu karrikurdunang.’ [Psalm 118:22-23].

⁴³ Mah, dja marneyime ngudberre, bu kunmekbekenh wanjh God kabenbawon birribuyika bininj ba bu kabirrimngimen kore nungka kawohrnan rowk. Ngudda bonj, minj ngurriyawoyhbolkkarme. Nungka kabenwon bininj nawu kabirribolkmarnbun ba kadjolengmen.

⁴⁴ Dja maninjmanu kunwardde ngayolyolmeng, wanjh bininj nawu kabirrimankan kore manmekbe kunwardde, wanjh kabenkukdjalkdjalk-mang, dja bu kunwardde ngalengman kamankan bininj kabengerrehme, wanjh kabenkukdjubulhme duninh.” Kuhni Jesus benmarneyimeng.

⁴⁵ Dja bu kuhni birribekkang bininj nawu birrikihkimuk priest, dja nawu Pharisees, wanjh birriburrbom bu Jesus bedda benyolyolmeng.

⁴⁶ Wanjh birribolkyawani birridjareni birriberlmayi bu kundjalmekbe rerrih, dja birribawong, bu kunmekbekenh kunu bindikengemeng bininj rowk nawu birriyimi bu Jesus nungka prophetni.

22

Jesus Yolyolmi Mulil Manbu God Kadjare Kankimang Matthew 22:1-14 (Luke 14:15-24)

¹ Kaluk Jesus yawoyhyolyolmeng bedberre kore parable manbu kunwok menwarlkkayindi. Nungka yimeng,

² “Kandibekka. Ngaye ngayolyolme ba ngundibukkan. Kore God kawohrnan rowk, wanjh nakka yiman kayime king nawu manme yingkihkurrmeng manwern, kaluk beywurd kabimullimang bu daluk kabenemarren.

³ Wanjh ngokko benkimey birriwern bininj bu kabirrimre kore mulil manbu kabenemarrenkenh. Kaluk bu kunmekbe manbu manme yingki-hyoy, nungka wanjh benmunkeweng nawu kabirrihmarnedurrkmirri bu kabindikayhme birrimkebe bininj. Dja nawu bininj minj birridjareni-wirrinj bu birrimrawinj.

⁴ Wanjh nawu king benmunkeweng birribuyika nawu kabirrihdur-urkmirri nuye, dja benmarneyimeng, ‘Ngurrbenmarneyimen birrimkebe nawu ngabenkimey bu manme ngokko kahyingkihyo. Ngabom bulikki dja yaw bulikki nawu burrkimuk, mak njalehnjale nawu ngokko kahyingki-hyo. Dja birrimray kore mulil. Mah, ngurrbenmarneyimen.’

⁵ Kaluk nawu bininj minj bindimarrkmayinj nawu king kabirrimarne-durrkmirri dja birribalwam kunbubuyika birribalhdurrkmirri bedman. Yikahwi nawu birriwam birribalhdurrkmirri kore kabbal bedberre, dja birribuyika nawu nakka birribalwam kunbuyika birribalhdurrkmirri.

⁶ Dja nawu birribuyika nakka bindidarrkidmey nawu birrimarrkin-jwam, wanjh kunmekbe bindidungi, bindibom dja bindikukkurrmeng.

⁷ Wanjh nawu king wernhyidduy bu bekkang bindibom nawu ben-munkeweng, wanjh benmunkeweng nuye soldiers ba bedmanwali bindi-buni nawu birriwarre bininj, dja bindimarnerrurkwurhengkeng bedberre rowk kore birriyoy.

⁸ Kaluk bu yerrekah, nawu king yimeng bedberre nawu kabirri-marnedurrkmirri, 'Mah, manbu manme wanjh ngokko kayingkihyo, dja ngabenkimey birrimekbe bininj, wanjh bedda birridjalwarreni.

⁹ Dja wanjh ngurriyay kore manbolh, kaluk kore kurrihidirrid, kumekbe ngurrbenkima nawu ngurrbenngalke djal birringale bu kabirrimre kabirringun kore mulil manbu kabenemarrenkenh.'

¹⁰ Wanjh nawu kabirrihdurrkmirri nuye nawu king birriwam bindikimangi nawu bindinani kore manbolh birrihdi, nawu birriwarreni dja nawu birrimakni bininj rowk. Wanjh birrimirndengimeng kore kururkkimuk, wanjh nakka bininj birribarlmeng.

¹¹ Kaluk nawu king bu kumngimeng benhnani nawu bininj birrihmirderri, wanjh kumekbe binang nakudji bininj nawu minj djongbuyindi-wirrinj ngalengngarre kunmadj kabenemarrenkenh.

¹² Wanjh nawu king bimarneyimeng, 'Nawu ngarrdabbolk, kaluk baleh ngudda yimngimeng kondah? Ngudda minj yidjongbuyindi kunmadj manbu ngalengngarre kabenemarrenkenh' Dja nawu bininj minj baleh mak yimeninj.

¹³ Wanjh nawu king benmarneyimeng nawu kabirrihdurrkmirri, 'Ngurriberidukka nanihnjanu bininj, dja ngurridengedukka. Dja ngurrikukburriwemen kuberrk kore kubolkmunun, kore bininj kabirrinalkbun dja mak kabirriyidmeyerren bu kabirridjakkbekkan.' Kuhn yimeng nawu king."

¹⁴ Wanjh Jesus yawoyhyimeng, "God kabenkimang birriwern bininj, dja nakka birridjalmirndeyahwurd bu kabendjarrngbun."

Bu Karrikarremulewan Government

Matthew 22:15-22

(Mark 12:13-17; Luke 20:20-26)

¹⁵ Wanjh nawu Pharisees birribolkbawong kumekbe dja birriwam birrihkarremarnbuni kore birrikowemeninj Jesus bu yimeninj kunwarre.

¹⁶ Wanjh bedda bindimunkeweng nawu bedberrekih bindibukkabukkani dja yikahwi bininj nawu birringeyyoy Herodians. Wanjh birrimarneyimeng Jesus, "Nawu kanhbukkabukkan, ngad ngarriburrbun bu ngudda yiwoybuk bininj dja mak yibenhbukkan kunwoybuk dorreng kore God kadjare bininj kabirrikurduyime. Dja minj yimayaliborledme bu bininj ngundidjurrkwon, dja minj yinjilngwarre bu bedda birrikihkimuk.

¹⁷ Wanjh kunu kanmarneyimen ngadberre kore ngudda yihurrbun. Yiddok kamak bu ngarrikarremulewan Caesar dja kunubewu burrkyak?"

¹⁸ Dja Jesus ngokko benmayaliburrbuni bu kunwarre birridjareni, wanjh yimeng, "Ngudda nawu munguyh ngurrikurrekkurren! Njalekenh kandirohrokme yimankek ngudda kandidarrkidmang?"

¹⁹ Wanjh kandibukka coin nawu ngurrihkarremulewan tax." Dja wanjh birrikang nawu coin.

²⁰ Wanjh Jesus djawayhmeng, "Kaluk nangale kahbimdi dja kahngeydi kore coin?"

²¹ Bedda birriyimeng, "Caesar nuye." Wanjh Jesus yimeng bedberre, "Wanjh ngurriwo Caesar njalehnjale nawu Caesar nuye, dja njalehnjale nawu God nuye, wanjh ngurriwo God."

²² Kaluk nawu bininj bu kumekbe birribekkan kore Jesus yimeng, bedda birrikangebarrhmeng wanjh birribawong birriwam.

Yiddok Karridolkkan Kore Kundowikenh?

Matthew 22:23-33

(Mark 12:18-27; Luke 20:27-40)

²³ Bu kunmekbe kunbarnangarra rerrih, yikahwi Sadducees birrimyikang Jesus dja birridjawam. Kaluk nawu Sadducees birriwoybukwoni bu bininj minj kabirriyawoyhdolkan kore kumidjbeh.

²⁴ Dja birriyimeng, “Nawu Kanhbukkabukkan, Moses yimeng bu bininj kakarme daluk wanjh karrownen bu manembeywurdyak, wanjh nawu benedanginj namekbe wanjh kabenemarren kabibalkamarrdjukun nuye, ba bu kabalmarneyawbornan wurdyaw nuye bininj nawu doweng.

²⁵ Mah, dja baleh ngudda yiyime. Kunkudjikenh kumekbe birrihdi seven nawu birridanginj. Kaluk nayungki nawu daluk mey wanjh nungka doweng. Dja mak manembeywurdyakni minj wurdyawbornayi. Kaluk nawu nungka benedanginj bikamarrdjukunmey ngalmekbe daluk.

²⁶ Wanjh namekbe bininj nawu bikamarrdjukunmey ngalbu daluk wanjh nakka mak doweng. Mak kunkudjiwi kurduyimerranj bedberre birrimekbe nawu birridangerrinj bu birridowerrinj rowk.

²⁷ Yerre wanjh daluk wali baldoweng.

²⁸ Kaluk bu God kabenyawoyhdolkayhwe bininj kore kumidjbeh, kaluk baleh nawu bininj ngalbininjkobeng duninj nuye?”

²⁹ Wanjh Jesus yimeng, “Ngudda yiddok minj ngurrikodj kulubayhme bu kunmekbekenh ngudda minj ngurribimnan kore baleh kahyime, dja mak minj ngurriburrbun manbu God nuye kundulkarre.

³⁰ Kaluk bu bininj kabirrimyawoyhdolkan kore kumidjbeh, bedda minj kabirrimarren. Dja kabirriyimerran yiman angels kore heaven kabirriini.

³¹ Dja kore bininj kabirrimdolkkarren kore kumidjbeh, yiddok minj ngurribimnayi kore djurra bu nakka God ngudda ngunhmarneyimi ngudberre bu yimeng.

³² ‘Ngaye nawu God nuye Abraham, nawu God nuye Isaac, dja nawu God nuye Jacob.’ [Exodus 3:6] Nungka minj God bedberre nawu birridowerrinj dja nakka God bedberre nawu kabirrihdarrkiddi.” Kuhn bu Jesus yolyolmeng bedberre.

³³ Wanjh bininj birriwern rowk nawu birribekkan kore Jesus yolyolmeng, wanjh birrikangebarrheng.

Manbu Mankarrekuen Duninj

Matthew 22:34-40

(Mark 12:28-34; Luke 10:25-28)

³⁴ Wanjh nawu Pharisees birriburrbom nawu Sadducees minj birridangwerrimeninj Jesus dja nungka burrbuni bu benwokdurndiweyi, wanjh birrimekbe Pharisees birrimornnamerrinj Jesus dorrengh bu birridjawayi.

³⁵ Wanjh nakudji Pharisee burrbuni rowk kore mankarre nuye Moses, wanjh nungka bidjawam Jesus bu birohrokmenh, yimeng,

³⁶ “Nawu kanhbukkabukkan, baleh manbu mankarre manwernhkarrekuen duninj?”

³⁷ Jesus biwokmey, yimeng, “Ngurrimarnedjarenin nawu Kawohnan Rowk nawu ngudberre God, bu kunkange ngudberre dorrengh, kunmalng dorrengh, dja kunmayali dorrengh. [Deuteronomy 6:5]

³⁸ Mahni wanjh manmekbe manyungkih dja manwernhkarrekuen duninj.

³⁹ Dja mak manbadkarrebuyika manbu karohrok yiman manyungkih, bu kayime, ‘Yimarnedjarenin nawu nguneredbo bininj, karohrok yiman kayime yingandeleng yimarnedjaremerren.’ [Leviticus 19:18]

⁴⁰ Manmekbe bokenh makka mankarrekikhikum. Manbuyika mankarre manbu nuye Moses bimbom dja mak nawu kore prophets korroko birribimbuni, makka mankarrekilehkilek.”

Jesus Bendjawam Pharisees Bu Kuhnikenh David Nuye Beywurd.

Matthew 22:41-46

(Mark 12:35-37; Luke 20:41-44)

41 Bu kunmekbe nawu Pharisees birrimornnamerrinj, wanjh Jesus bendjawam, yimeng,

42 “Ngudda baleh ngurriyime bu namekbe Messiah?*” Dja nangale bibornang?” Wanjh bedda birriyimeg, “Nungka Messiah, nakka wanjh nawu Beywurd nuye David.”

43 Wanjh Jesus benmarneyimeng, “Mah. Dja njalekenh nawu Namalng-makkaykenh bimarneyimeng David bu kabingeybun nawu Messiah ‘Nawu Kawohrnan’ kore kabimbuyindi,

44 ‘Nawu Kawohrnan Rowk bimarneyimeng nawu ngardduk kawohrnan, “Yiyerrka kore ngaye ngardduk kukun dja yimadbun, kaluk ngaye ngabenkurrme nawu ngundiwidnan kanjdji kore kurrenge ke.”’ [Psalm 110:1]

45 Bu David kabingeybun nawu Christ ‘Nawu Kawohrnan’ dja kunukka mak baleh nawu Christ bu djal beywurd nuye David?” Kuhni Jesus bendjawam.

46 Wanjh minj nangale mak biwokdurndiwemeninj Jesus bu biwokmayi, kaluk yerrekah bu kunmekbe kunbarnangarrani minj nangale kelebukni-wirrinj bu biyawoyhdjawayi.

23

Jesus Benyolyolmeng Nawu Pharisees Dja Mak Nawu Kabindih-bukkabukkan Mankarre Nuye Moses

Matthew 23:1-12

(Mark 12:38-40; Luke 11:37-52; 20:45-47)

1 Wanjh Jesus benmarneyimeng bininj nawu birrihmirnderri dja mak nawu benbukkabukkani nuye, yimeng,

2 “Nawu mankarre kabindihbukkan, dja nawu Pharisees wanjh kabirikarrme kundulkarre bu ngundimarneyime kore Moses mankarre nuye kahyime.

3 Wanjh ngudda ngurrimarrkma dja ngurrikadjukadju kore baleh ngundimarneyime ngudberre. Dja yuwn bu mak ngurrikurduyime kore bedda kabirrihkurduyime. Burrkyak. Bedda minj kabirrikurduyime kore kunmak ngundibukkabukkan.

4 Kore bedmandeleng kabirrihmarnbun manbu mankarre wanjh kabindingorrenkonw birribuyika bininj kore kabindidjurrkkan, dja bedda minj kabindibidyikarrme bu kabindidjalbawon kore kunrayekkenh.

5 Mak njalehnjale rowk kore kabirrihkurduyime bu kabirriburlumerren dorrengh kore kumirrk bedberre birribuyika bininj. Kaluk kabirrikub-bukkarren kore kabirridjongbuyindi kunmadj nawu yiwarrudjkenh.

6 Mak kabirridjare kabirriini kore manmakmak seats kore mulil kabirringun, dja mak bu kabirrimornnamerren kore kunrurrk manbu yiwarrudjkenh, nakka bedda kabirriini kore manbu kahdokmerren.

7 Bedda mak kabirridjare bu bininj birriwern kabindiburlume kore kurobbe, dja mak kabirridjare bininj kabindimarneyime, ‘Ngudda Nawu Kanhbukkabukkan’.

8 Mah. Bedman. Dja ngudda minj ngurringeyburren ‘Nawu Kanhbukkabukkan’, dja ngurriyikingihkarrme nadjalkudji nawu ngunhmarnewohrnan. Dja ngudda nakka ngurridangerrinj rowk.

* 22:42 “Messiah” kangeyrohrok “nawu Christ”.

⁹ Mak yuwn bu nangale ngurringeybun 'Kornkumo Duninjh' kore kondah kurorre. Dja ngudda ngurriyingkihkarreme nadjalkudji Kornkumo, nawu heaven kahni.

¹⁰ Mak yuwn bu ngundimarneyime 'Nawu Kanbukkabukkan', dja ngokko ngurrihkarrme nakudji nawu ngunhbukkabukkan ngudberre, nahn nawu Christ.*

¹¹ Nangale nawu kadjare karrokme ngudberre bu nakimuk duninjh, nakka wanjh kakurrmerren bu kadjaldurkmirri ngudberre.

¹² Kaluk nangale nawu kakukdokmibuyhwerren, wanjh nakka kayawoy-hdurndeng yerre. Dja nawu minj kakukdokmibuyhwerren, nakka wanjh God kakimukwon." Kuhni bu Jesus yimeng.

*Jesus Bendungi Pharisees Dja Bininj Nawu Bindibukkabukkani Mankarre
Matthew 23:13-36*

(Mark 12:38-40; Luke 11:37-52; 20:45-47)

¹³⁻¹⁴ Wanjh Jesus yimeng, "Kadjalwarre duninjh ngudberre ngudda nawu ngurrbenhbukkabukkan mankarre dja ngudda nawu Pharisees! Ngudda nawu ngurridjalkurrehkurren! Ngudda ngurrbenhmarnedang-balhme bininj bu minj kabirringimen kore God kawohrnan rowk. Mak nguddabidju minj ngurringimen dja ngurrbenhdahme birribuyika bininj nawu kabirridjare kabirringimen.

¹⁵ Kadjalwarre duninjh ngudberre ngudda nawu ngurrbenhbukkabukkan mankarre dja ngudda nawu Pharisees! Ngudda wanjh ngurridjalkurrekurren! Ngudda ngurrire djarreh kubolkbubuyika rowk ba ngurriyawan nakudji bininj nawu ngurribukkabukkan. Wanjh ngurrimarnbun namekbe bininj bu nadjalwerhwarre duninjh yiman ngudda ba bu ngurridjarrkre kore hell."

¹⁶ "Kadjalwarre duninjh ngudberre! Ngudda yimankek ngurrbennahnan nawu birribuyika bininj, dja burrkyak ngudda ngurrimimdubbe. Ngudda ngurrbenbukkan bininj bu minj kabirriwokkurrmerren kore kungey nuye Temple. Ngurrbenmarneyime bu kunukka minj baleh mak kabirriyime. Mak ngudda kamak ngurriyime bu bininj kawokkurrmerren kore kungey ngalenggarre gold nawu kore temple kahdi dja wanjh kakurduyime kore wokkurrmerrenj.

¹⁷ Ngudda ngurrimimdubbe dja ngurribengwarr! Dja kaluk baleh nawu nawernhkimuk? Yiddok gold mak kunubewu temple kore kahmarnbun nawu gold bu kahdjamunmen?

¹⁸ Mak ngudda ngurriyime, bu bininj kunrayek kunwok kakurrmerren kore manbu altar, wanjh kunukka minj njale kamenyime. Dja ngurriyime bu bininj kunwok kunrayek kakurrmerren kore namakmak nuye kakurrme nawu kahyo kore altar, wanjh kunukka kamak.

¹⁹ Ngudda ngurrimimdubbe bininj! Kaluk baleh nawu nawernhkimuk? Yiddok namakmak nawu kurrmeng, dja kunubewu altar kore manbu kahmarnbun namekbe namakmak bu kahdjamun?

²⁰ Bininj nawu kawokkurrmerren bu kunrayek kakurrme kore altar wanjh nakka kunrayek kakurrme kore njalehnjale kore kaddum namekbe altar.

²¹ Mak bininj nawu kawokkurrmerren bu kunrayek kakurrme kore Temple wanjh nakka kunrayek kakurrme kore kungey nuye nawu kahdi kore Temple.

* 23:10 "Christ" karohrok kungeybuyika "Messiah".

22 Nangale nawu kawokrayekworren kore kunngey ngarre heaven wanjh nakka mak kunrayek kunwok kahyime kore kunngey nuye God nawu kahni dja mak nawu kahbarndi kore throne.

23 Wanjh kadjalwarre duninj ngudberre, nawu mankarre ngurrbenhukkabukkan dja ngudda nawu Pharisees! Ngudda ngurridjalkurrehkurren! Ngudda ngurrihwon God kundjalyahwurd kore njalehnjale yeng nawu ngurrihkarme yiman mandjoleng nawu mint, dill dja cummin warridj. Dja ngaleng, ngudda minj ngurrimarrkmang manbu mankimukkenh mankarre. Ngayime minj ngurrbendjadme bu djal mandjad, dja mak minj ngurrbenkongibun, dja minj mak ngurrikangewoybuk. Mahni wanjh mankarrekuken kore ngurrikurduyimeninj, dja mak mankarrekilehkilek warridj.

24 Kunukka ngurrbennahan nawu bininj dja nakka ngurrimidubbe rerrih! Ngudda nakka mankarrekilehkilek ngurriyolyolme, dja manbu mankarrekikhikum makka burryak!

25 Dja kadjalwarre duninj ngudberre, nawu mankarre ngurrbenhukkabukkan dja ngudda nawu Pharisees! Ngudda nawu ngurridjalkurrehkurren! Ngudda yimankek ngurrimarnburren ngurrimak ba bu birribuyika bininj ngundinan ngundimakwan dja kore kanjdji kukange ngudberre nakka njalehnjale ngurrimanjngun dja ngurridjalburrun kore ngudberrekenh.

26 Pharisees, ngudda ngurrimidubbe! Ngurrikangebeleworrime werrk, ba kunukka ngurrikurduyime kunmak kore kurobbe.

27-28 Kadjalwarre duninj ngudberre, nawu mankarre ngurrbenhukkabukkan dja ngudda nawu Pharisees! Ngudda nawu ngurridjalkurrehkurren! Ngudda yimankek ngurriyime ngurrimak ba bu birribuyika bininj ngundinan ngundimakwan dja kore kanjdji kukange ngudberre wanjh ngurridjalwarre duninj, dja mak ngurrikurrehkurren.

Ngayime bu ngudda yiman yerrih kunmidj. Kore kuberrkkah, wanjh bininj kabirribolkmarbnun bu kamak rowk, dja bu kanjdji wanjh kawarre, dja kakanjnudmen.

29 Kadjalwarre duninj ngudberre nawu mankarre ngurrbenhukkabukkan dja ngudda nawu Pharisees! Ngudda wanjh ngurridjalkurrehkurren! Ngudda ngurrimarnbun kunwardde yiman kunmidj bedberre nawu prophets dja mak kore kabirrihkukyo nakka ngurrbenmidjmarnmarnbun nawu birrimak bininj.

30 Wanjh ngurriyime bu yimankek ngudda bu ngurridiwirrinj kunkareni, wanjh minj ngurriraworrimeinj nawu mawahmawah kadberre bu bindibuyi nawu prophets.

31 Dja nakka woybukkih ngudda wurdwurd bedberre nawu mawahmawah ngurrbenhyime nawu kore bindihbuni dja bindikukkurrmi nawu prophets.

32 Dja wanjh ngurriyakwo manbu kore bedda birridedjingmey nawu mawahmawah ngudberre, dja wanjh kandimarnekurduyimen kunwarre ngardduk!

33 Ngudda ngurridjalwarre duninj nawu ngurribornayindanj kore birriwarre bininj! Minj baleh ngurrikelerlobme bu minj ngurringimen kore hell.

34 Wanjh kuhni marneyime ngudberre, ngaye ngabenmunkewe ngudberre nawu prophets, dja nawu kabirriwernhkarreburrun dja nawu ngundibukkabukkan ngudberre. Wanjh yikahwi nakka ngurrbenbun ngurrbenkukbarname. Dja yikahwi nakka ngurrbenbun kore kunrurrk

manbu yiwarrudjkenh ngudberre mak ngurrbenkelekadjung kore kunred dja kunred.

³⁵ Wanjh kunmekbekenh ngurriwowaarreworren kore kunwarre ngurbenymarnekurduyimi nawu birrimakni bininj kore kondah kurorre. Bu kumdedjingmey kore namakni bininj Abel kurlbawarrheng, kore Zechariah nawu beywurd nuye Berakiah nawu ngurribom kore kuburldjarn ngarre temple dja altar.

³⁶ Wanjh marneyime ngudberre bu woybukkih duninj, ngudda bininj nawu bolkkime ngurrihdarrkiddi wanjh nakka kunwarre kakurduyimeran ngudberre bu kunmekbekenh kunwarre ngurrihkurduyimi bedberre nawu birrimakni bininj." Kuhni bu Jesus yimeng bedberre.

Jesus Benkongibuni Bininj Nawu Birrihni Kunred Jerusalem
Matthew 23:37-39
(Luke 13:34-35)

³⁷ Wanjh Jesus bolkyolyolmeng kore Jerusalem dja yimeng, "Ngudda kunred Jerusalem! Jerusalem! Nawu bininj ngudda ke bindihbuni nawu prophets dja mak bindikodjdongi kunwardde bindikukurrmi nawu God benmunkeweng ngudberre. Kunwernhkah ngadjareni ngabenmornnameninj bininj ke, yiman kayime djukdjuk ngalbu kayawmornname ngaleng ngarre yayaw kore kanjdji kuwel ngarre, dja ngudda minj ngurridjareniwirrinj bu kunmekbe ngakurduyimeninj.

³⁸ Dja wanjh ngurrina! Manbu temple ngudberre makka wanjh kabirridjalbawon manrurrklarrk kahdjalarrrkdi dja mak kabirrimirnde-larrmerren.

³⁹ Dja marneyime ngudberre, ngudda minj kandihyawoyhnan ngaye kaluk bu yerrekah bu ngurriyime, 'God kabimarnekurduyime kunmak nuye namekbe nawu kamre kore kungey nuye nawu Kawohnan Rowk!' " [Psalm 118:26] Kuhni bu Jesus nungan yolyolmerrinj.

24

Jesus Yingkihyolyolmi Bu Kayiburnbunkeh Rowk
Matthew 24:1-14
(Mark 13:1-13; Luke 21:5-19)

¹ Bu kunmekbe Jesus bolkbawoyi kore temple kuberrkkah. Wanjh nawu benbukkabukkani nuye birrimiyikang dja birrirurrkbukkang manmekbe temple dja ngalengngarre kunrurrkbubuyika kumekbe.

² Kaluk Jesus yimeng, "Ngudda ngurrihnan mahni kunrurrk rowk? Wanjh marneyime ngudberre bu woybukkih duninj, kaluk yerrekah, wanjh minj manwohwarddekudji kawarddebarndi kore manbuyika bu kabenebelbmiiyindi. Dja nakka wanjh kawarrawarrhmerren rowk kore kurorre."

³ Kaluk bu yerrekah Jesus wanjh ningihni kore Mandulum manbu Olives, wanjh nawu benbukkabukkani nuye birrimiyikang kore nungka nadjalkudji yerrkang. Dja birriyime, "Kanmarneyimen ngadberre, kaluk baleh kabolkyime bu kuhni kakurduyimeran? Dja njale nawu nganbukkan ngadberre kore ngunmulewan bu darnkih ngudda yimayohyurdndeng dja mak bu kayiburnbunkeh ngarre kondah kurorre?"

⁴ Wanjh Jesus yimeng, "Ngurrinaharrimen bu minj nangale ngunkowe ngudberre.

⁵ Birriwern kabirrimre kore kunngey ngardduk, wanjh kabirriyime yimankek ngaye, bu kabirriyime, 'Ngaye wanjh nungka Christ*,' wanjh bedda kabindikowe nawu birriwern bininj.

⁶ Dja warridj ngurriwobekkan bu wars kabirriburren, dja kabirrimulewan bu kabirriburren kunyid kamhre, dja makka yuwn ngunkelehme bu ngurrikele. Kuhni wanjh kadjalkurduyimerran, dja med, kaluk manbu kayiburnbunkenh, wanjh yerrekah.

⁷ Kubolkkihkimuk wanjh kabirriburren kubolkkimukbubuyika. Dja warridj nabubuyika kings wanjh kabirriburren. Dja manme kayakmen rowk bedberre birridjalwern bininj, mak kore kubolkbubuyika wanjh kunrorre karorredjalkmire.

⁸ Kaluk kuhni wanjh karrokme bu karredjingmang manbu kunyid yiman kayime nawu nakerrnge wurdyaw bu kahberrkmang.

⁹ Bu kunmekbe kabolkyime, wanjh ngudda mak ngundidarrkidmang ba bu ngundikurme kore birriwarre bininj bu ngundimarladjwon, mak ngundibun ngurridowen. Dja birriwarlahkenh bininj rowk kore kondah kurorre, wanjh ngundiwidnan kunmekbekenh bu ngayekenh.

¹⁰ Wanjh birriwern bininj kabirribawon kore kunwoybukkenh kabirrihre dja kabirriborledme kabirrikanjkurrmerren dja kabirriwidnarren.

¹¹ Mak bu kunmekbe wanjh birriwern prophets nawu kabirrikurrehkurren kabirrimre dja kabindikowe nawu bininj birriwern.

¹² Dja manbu kunwarre makka wanjh kawarlahmen bu kawernmen mak kabenmarnbun birriwern bininj minj kabirriwernhmarnedjaremerren.

¹³ Dja ngaleng bu ngurrihdjalkangewoybuk munguyh kore kayiburnbunkenh, wanjh God ngungehke.

¹⁴ Mak bu kunmekbe, wanjh mahni kunmak kunwok manbu kabiyo-lyolme God kore kawohrnran rowk, wanjh birriwern kabirrimulewan kunwoybuk dorrengh kore kubolkwarlahkenh, wanjh kunyimekbe makka kamre manbu kore kayiburnbunkenh." Kuhni rowk bu Jesus yingkihmulewam bedberre.

Bu Kunyid Kunkimuk Duninj Kamre Yerre

Matthew 24:15-28

(Mark 13:14-23; Luke 21:20-24)

¹⁵ Wanjh Jesus yimeng, "Daniel nawu prophetni yolyolmeng manbu nadjalwarre duninj nawu kanbunkenh." [Daniel 9:27] Kaluk nakka ngurrinan kahdi kore kubolkdjamun. Ngudda nawu ngurrinahnani djurra wanjh nakka ngurrimayalibayhmen kore baleh kakarremenmenyime.

¹⁶ Wanjh bu kunyimekbe kabolkyime, bininj nawu birrikang Judea nakka wanjh kabirrikelerlobmerren kore kuwarddewardde.

¹⁷ Bu bininj kabirribarndi kore kaddum kukodj ngarre kurrambalk, wanjh nakka yuwn bu kabirrikolung kanjdji dja kabirrimang njale nawu bedberre.

¹⁸ Mak bu yihdi kore kabbal, yuwn mak yirrunndeng yimang ke nawu kunmadj nakuyeng ke.

¹⁹ Kaluk bu kunyimekbe kayimerran, wanjh kadjalwarre duninj bedberre nawu morlehmorlenj birrimerlemyi dja nawu wurdwurd birrikilehkilek kabindihkarrme!

²⁰ Ngurridin yiwarrudj bu minj kayimerran bu yekke, mak kunbarnan-garradjamun kayimerran. Bu kumekbe kakurduyimerran wanjh kunukka ngudda ngurrikelerlobmerren.

* 24:5 Dja kore verse 23. "Christ" karohrok kunngeybuyika "Messiah".

21 Mak bu kunmekbe kayimerran mandjalkimuk kunyid kabebme. Kaluk manmekbe kunyid makka minj kurduyimerrangimeninj bu kerngerkenh duninj bolkmarnbuyindanj dja wanjh kore bolkkime, dja bu yerreyerre minj kayawoyhkurduyimerran kunmekbe.

22 Wanjh God dedjumbunghmeng manmekbe kunyid, dja bu burrkyak, wanjh minj nangale kadjaldarrkiddi munguyh. Dja nungan God kamarnbun bu karredjumbunghme ba kabenbidyikarrme bininj nawu nuye bendjarrngbom.

23 Wanjh bu kunmekbe kabolkyime, bu nakudji bininj ngunmarneyime, 'Yina, nahnii nawu Christ!' Mak nabuyika ngunmarneyime, 'Nakka kahdi!' Wanjh nakka yuwn ngurrbenwoybukwon.

24 Yikahwi bininj kabirrimbebmerren nawu kabirrikurrehkurren bu kabirringeykurmerren Christ, dja mak bininj nawu kabirringeyburren prophets, dja wanjh kabirridjalkurren, wanjh kabirrimre kabirrikurduyime kunwern bu yimankek God nuye kundulkarre dorrengh, bu yimankek kabindikowe warridj nawu God nuye bendjarrngbom bininj. Wanjh kuhni kabirrirohrokme.

25 Dja wanjh yingkihbangdayhkeng ngudberre bolkkime bu kuninjkunukenh ba kunukka yerre kaluk kakurduyimerran kunmekbe.

26 Mak bu bininj ngundimarneyime, 'Nawu Christ kahdi kore kubolkdarleh,' wanjh ngudda yuwn ngurrire kumekbe. Dja mak bu ngundimarneyime, 'Nawu Christ nakka kahni kore mahni kurrambalk,' wanjh yuwn yibenwokmarrkmang.

27 Dja bu ngaye nawu Bininj Duninj ngamre, wanjh birriwarlahkenh bininj ngandinan. Dja ngaye ngamre yiman kayime nawu namarrkon kamayhke kore koyek dja karrikad.

28 Kore baleh yarrkka nawu bininj kawohdown kakukyo wanjh mayhmayh nawu kabirringun kunkanj wanjh kabirrimornamerren kumekbe."

Bu Jesus Nawu Bininj Duninj Kamdurnheng

Matthew 24:29-31

(Mark 13:24-27; Luke 21:25-28)

29 Wanjh Jesus yimeng, "Wanjh bu manmekbe kunyid kayakmen rowk, manbu kundung makka kunkak kabarrkbun, dja nawu dird nakka wanjh minj kayawoyhbolkwolkan. Mak nawu mankokkarrng nakka kamwarrawarrhmerren kaddumbeh. Dja yehyeng rowk ngarre kaddum makka kawodjorrhmiyindan. [Isaiah 13:10; 34:4]

30 Wanjh bu kunyimekbe kabolkyime, wanjh birriwarlahkenh bininj kabirringolnan dja wanjh kabirriwohburrbun bu ngaye nawu Bininj Duninj ngamre. Wanjh bininj nawarlahkenh nawu kondah kurorre kabirrihni nakka wanjh kabirrinalkbun bu kundowikenh. Wanjh ngandinan ngaye nawu Bininj Duninj ngamhre kore kungol kaluk kundulkarre dja kunmakmak duninj dorrengh.

31 Kaluk bu kabirribekkan trumpet kakayhme wernkih duninj, wanjh ngabenmunkewe angels ngardduk bu kabindimanamang bininj nawu God bendjarrngbom kore kubolkwarlahkenh kondah kunred dja kore kungol rowk." Kuhni bu Jesus yolyolmeng.

Jesus Yimeng Bu Karriidjalbolkmaddi Kaluk Bu Nungka Kamre

Matthew 24:32-35

(Mark 13:28-31; Luke 21:29-33)

32 Wanjh Jesus yimeng, "Wanjh kumekbe ngurriburrbun kore yolyolme ngudberre manbu fig kundulk. Kore manyende ngarre kakelkelkmen dja

kunmalaworr kabebmerren, wanjh kunukka ngurriburrbun bu kurrung ngokko darnkih kamhre.

³³ Wanjh kunmekbe karohrok, bu ngurrian kuhni rowk kakurduy-imerran kore ngayolyolmeng, wanjh ngurriburrbun bu ngokko darnkih kahbolkdarnkihmen bu ngaye ngahmarnmarnburren bu ngamre.

³⁴ Dja marneyime ngudberre bu woybukkih dunijnh, kuhni bu njalehnjale kakurduyimerran bedberre nawu birriwarlahkenh bininj bu bolkkime kabirrihmimbi.

³⁵ Mahni kurorre dja kunngol makka wanjh kayakmen dja manbu kunwok ngardduk makka minj kayakmen." Kuhni wanjh Jesus yimeng.

Minj Nangale Kaburrbun Kore Baleh Kabolkyime Jesus Kamdurdeng

Matthew 24:36-44

(Mark 13:32-37; Luke 17:26-30,34-36)

³⁶ Wanjh Jesus yimeng, "Minj nangale mak kaburrbun bu baleh kuhni kabolkyime. Angels nawu heaven kabirrihni nakka minj kabirriburrbun, mak ngaye nawu Beywurd, minj ngaburrbun. Dja nadjalkudji God nawu Kornkumo kaburrbun bu baleh kabolkyime.

³⁷ Bu ngaye nawu Bininj Dunijnh ngamre, nakka yiman kayime bu Noah ningihni kurduyimerranj nuye.

³⁸ Kaluk bu korrokoni bu wanjh yerre kundjurrh kunkimuk dunijnh bebmeng, bininj birringuni dja birribonguni, birrimarreni mak wurdwurd bedberre bindibalwoni bu birrimarreni. Birridjalkurduyimi kaluk bu Noah bidbom kore mahni kabbala.

³⁹ Bedda minj birriyingkihburruy bu kaluk bu kundurrh kunkimuk dunijnh wanjh nakka benngakkeng rowk. Dja wanjh kunmekbe karohrok kayimerran bu ngaye nawu Bininj dunijnh ngamre.

⁴⁰ Wardi bu bininj bokenh kabenedjarrkdurrrkmirri kore kabbal, wanjh nawu nakudji nakka wanjh God kabimang, dja nabuyika nakka wanjh kabibawon karri.

⁴¹ Mak bu daluk bokenh kabenedjubulhme manmim bu kabenehmarnbun manme, wanjh God kabimang ngalkudji daluk, dja ngalbuyika yerre karri.

⁴² Mah, ngudda wanjh ngurrimarnmarnburrimen ba bu ngurribengyirri dja kandihmadbun, dja minj ngurriburrbun bu baleh kabolkyime ngaye nawu Kawohnan Rowk ngudberre bu ngamre.

⁴³ Dja mak kuhni ngurriburrbu. Bininj nawu kakarrme kurrambalk, nakka kahbengyirri dja kayingkihkunidi. Nungka minj kaburrbun bu baleh kabolkyime nawu kahdjirdmadjirdmang bininj kakakre bu karurkbakke nuye.

⁴⁴ Wanjh kuhni karohrok ngurrimarnburrimen munguyh, dja ngaye nawu Bininj Dunijnh ngamre dja minj ngurriburrbun bu baleh kabolkyime dja wardi minj kandimarnekokkoyirri ngaye." Kuhni bu Jesus yimeng.

Karridurrrkmirri Dja Minj Karribengmidjan Bu Jesus Kamdurdeng

Matthew 24:45-51

(Luke 12:41-48)

⁴⁵ Wanjh Jesus yimeng, "Mah, ngurriburrbu bininj nawu mayaliwern dja nawoybuk. Nawu kabimarnewohnan nuye kabikurrme nahn bininj ba bu kabemarnewohnan birribuyika nawu kabirridurrrkmirri, dja wanjh kabenwon manme bu karrungrrohokme bedberre.

⁴⁶ Wanjh bu nawu kawohrnan nuye kamdurndeng dja kabikurdunan nawu biyikurrmeng, wanjh namekbe bininj kunmak kabidjalyime.

⁴⁷ Dja marneyime ngudberre bu woybukkih duninj, namekbe nawu kawohrnan wanjh kabibeke nawu bininj bu kabikurrme kore kawohrnan njalehnjale nungka nuye.

⁴⁸ Dja ngaleng bu kunbuyika kayime, dja wardi namekbe bininj nawarreni, dja kaburrbun baybaywi kore kukange nuye bu kayime, 'Nawu kawohrnan ngardduk nakka minj kambangmedurndeng werrek,'

⁴⁹ Wanjh nungka karredjingmang bu kabenbun nawu birribuyika kabirrihdjarrkduurkmirri nuye nawu kawohrnan dja wanjh nungka kabenmang nawu birridjarrkwarre ba kabirribongun dja kabirringun bu kabirriworromkan dorreng.

⁵⁰ Nahni namekbe bininj minj marnburrimeninj bu bimadbuyi mak minj bimarnebolkwohnayi. Wanjh kunmekbe kabolkyime nawu kawohrnan wanjh kamdurndeng kabimarnebebme.

⁵¹ Wanjh nawu kawohrnan kabiwidjbihke dja kabikukburriwe kore nawu birrikurrekurreni bininj, kumekbe kore kabirrihdjalkayhme dja kabirriyidmeayerren."

25

Karriyingkihmarburrimen Nuye Nawu Kawohrnan Bu Kamdurndeng Matthew 25:1-13

¹ Jesus yolyolmeng bedberre bu yimeng, "Bu God kamre dja kawohrnan rowk, njale kakurduyimerran? Wanjh, nakka yiman kayime nawu ten yawkyawk ngalbu djawirna ngalengngarre ngalbu ngalkaliyi, nawu birrimey bedberre lamps dja birrikakwam birrihmadbuni nawu nakaliyi.

² Kaluk nawu kunbidkudji yawkyawk nakka birribengwarr, dja ngaleng nawu birribuyika nakka wanjh birrimayaliwernni.

³ Wanjh nawu birribengwarrni birrimey lamps bedberre, dja minj birrikayi nawern kunkalkkid ba bu birriyawoyhborkakendoyi kore lamps.

⁴ Dja nawu birrimayaliwern nakka wanjh birribebbehmey lamps bedberre dja mak bannikin dorreng manbu birriborkakendoy kunkalkkid ba bu kabirriyawoyhborkakendong lamps bu kaboyakmen bedberre.

⁵ Dja nawu nakaliyi minj kumbangmerawinj, wanjh bedda birrimimkod-jkengalmeng rowk wanjh birrikodjkeyonginj.

⁶ Kaluk bu kumununburrk yimerranj nakudji bininj kayhmeng, yimeng, 'Nawu nakaliyi kamhre! Dja ngurrimray ba karrikimang!'

⁷ Wanjh nawu yawkyawk birrimdolkarrinj rowk dja birrimarnbuni bedberre nawu lamps.

⁸ Nawu birrimayaliyak bindimarneyimeng nawu birrimayaliwern, 'Kandiwo yikahwi kunkalkkid ngudberre, dja darnkih kahbirluyakmen ngadberre.'

⁹ Kaluk nawu birrimayaliwern birriyimeng, 'Burrkyak! Mahni kunkalkkid ngarrihkarrme wanjh kayakmen yerre, wanjh minj mak kar-rilarlmarren. Dja ngurriray kore bininj nawu kabirrihweykan kunkalkkid kumekbe ngurribendjawa ba ngundiwon ngudberre dja ngurribayahme.'

¹⁰ Wanjh kunmekbe bu birriwam nawu birrimayaliyak birrihbayahmi kunkalkkid, nawu nakaliyi wanjh kumwam. Nawu birrimayaliwern nakka birridjarrkngimeng nawu nakaliyi kore manme birrihnguni mulil. Mak manbu door makka dangbalhmiyindanj.

¹¹ Kalukburrk wanjh nawu birribuyika yawkyawk birrimdurndi wanjh birriyimeng, 'Ngudda nawu yikimuk, yirrangmarrhma ngadberre ba ngadbu ngarribalngimen.'

¹² Dja nawu nakaliyi yimeng, 'Ngaye marneyime woybukkih duninh, ngaye minj kukburrbun.'

¹³ Wanjh kunmekbe kayime ngudberre dja wanjh ngurriyingkihmar-nurrimen ngardduk, dja minj ngurriburrbun bu baleh kabolkyime ngaye ngamre." Kuhni bu Jesus yolyolmeng.

Jesus Yolyolmeng Manbu Ba Bu Karrimarnedurrkmirri Nuye God

Matthew 25:14-30

(Luke 19:11-27)

¹⁴ Jesus yawoyhyolyolmeng, yimeng, "Bu God kawohrnan rowk, baleh kakurduyime? Nakka yiman kayime bininj nawu mahmirrirawinj kubolk-buyika waken. Wanjh bu kunmekbe bolkbawoyi, nungka benkayhmeng nawu birrimarnedurrkmirri dja benmarneyimeng bu kabirrinahnann nuye nawu njalehnjale kore kabenyikurrme.

¹⁵ Wanjh benbebbehwong money. Wanjh bikukwong nakudji bininj five thousand dollars, dja nabuyika wanjh bikukwong two thousand dollars. Mak bininj nabadbuyika, wanjh nakka bikukwong djal one thousand dollars. Wanjh benyikurrmeng rowk dja madjmey, wam.

¹⁶ Wanjh bininj nawu karmihkarrmi five thousand dollars nakka wanjh balwam durrkmirri, dja wanjh nungka marnbom bu wanjh ten thousand dollars yimerranj.

¹⁷ Mak kunmekbe rerrih kurduyimeng nawu two thousand dollars karmihkarrmi, bu kukmarnbom nuye bu four thousand dollars.

¹⁸ Dja nawu one thousand dollars karmihkarrmi nakka wam bolkaruy kore kurorre dja dudji kumekbe warlkkang mahni kunwardde money nawu kawohrnan nuye.

¹⁹ Wanjh kalukburrk bu kunkuyengkenh, nawu kawohrnan kumdurndi dja bendjawam nawu birrimarnedurrkmirri bu baleh birriyimowong nuye nawu kunwardde.

²⁰ Wanjh bininj nawu karmihkarrmi five thousand dollars kukbebkeng, dja kumyawoyhbebkeng nawu kore kukmarnbom bu rawong dja bimarneyimeng, 'Nawu Yiwohnrnan, ngudda kanwong five thousand dollars wanjh ngawam ngamarnbom ten thousand. Yina ngamkang ke.'

²¹ Wanjh nawu kawohrnan yimeng, 'Ngudda yikurduyimeng kunmak, dja yimak bininj nawu kanmarnedurrkmirri ngardduk. Ngaye yibawong walakkih kore yikuknahnani, dja bolkkime wanjh kurrme ba yinahnann yehyeng nawern ngardduk. Mak yimray ba bu ngarrdjarrknjilngmak!'

²² Wanjh bininj nawu karmihkarrmi two thousand nakka kumwam kore nawu kawohrnann dja yimeng, 'Nawu Yiwohnrnan, ngudda kanwong two thousand dollars bu nganahnani ke, wanjh namekbe two thousand ngakang dja ngamarnbom four thousand bu ngarawong!'

²³ Wanjh nawu kawohrnann yimeng, 'Ngudda yikurduyimeng kunmak kore kanmarnedurrkmirri, ngudda nawu yimak bininj. Ngaye yikurrmeng walakkih bu yikuknahnani ngardduk, dja bu bolkkime wanjh yinahnann yehyeng nawern ngardduk. Mak yimray ba ngarrdjarrkni kore ngarrdjarrknjilngmak.'

²⁴ Wanjh bininj nawu karmihkarrmi djal one thousand dollars bimiyikang dja yimeng, 'Nawu yiwohnrnan, ngaye ngaburrbuni bu ngudda nakka yirayek bininj. Ngudda yimoyhmang njalehnjale nawu minj yirrudjeji. Mak yimanamang manme manbu minj yimimburriweyi.

²⁵ Wanjh ngaye ngakeleni dja ngakang nawu one thousand dollars kanwong wanjh ngarrudji kurorre. Dja yina, nahni nawu money ke ngamkang.'

²⁶ Kaluk nawu kawohrnan yimeng, 'Ngudda nakka yidjalwarre dja mak yingudjwarre duninh! Yiddok ngudda yiburrbuni bu ngaye ngamangi manme manbu djolengmeni manbu minj ngaye ngarrudjeji mak ngamang manme manbu minj ngaye ngamimdudjeji?'

²⁷ Wanjh kunu ngudda yikurrmeninj nawu kunwardde ngardduk kore bank ba ngamdurndeyi wanjh balkimukmeninij walakkih.'

²⁸ Wanjh nawu kawohrnan yimeng bedberre nawu birrimarnedurrk-mirri, 'Ngurriyima namekbe one thousand dollars dja ngurriwo nawu ten thousand kahkarrme.

²⁹ Birrimekbe nawu kabirrikarrme nawern wanjh nakka kabirribal-wernworren bu nadjalwern kabirrikarrme. Dja nawu minj nawern kabirrikarrme nakka wanjh kabindiyimang rowk nawu njalehnjale.

³⁰ Ngurrikukburriwemen namekbe bininj kuberrk, kore kubolkmunun kore bininj kabirrinalkbun dja kabirriyidmebayerren.' " Kuhni bu Jesus yolyolmeng bedberre.

Jesus Yolyolmerrinj Bu Kamdurndeng Dja Mak Bu Kandjadmekenh Ngad Nawu Bininj Rowk

Matthew 25:31-46

³¹ Jesus yawoyhyolyolmeng, yimeng, "Ngaye nawu Bininj Duninh, kaluk yerrekah ngamyawoyhdurndeng kore kunmakmak dorrengh ngardduk dorrengh, dja mak angels ngardduk ngarrimdjarrkre. Wanjh ngaye ngayerrikan kore throne ngardduk ba birriwarlahkenh kabirriburrbun ngaye wanjh God kore heavenbeh.

³² Birriwarlahkenh bininj rowk nawu kondah kurorre kabirrihni kore kubolkbubuyikabeh, nakka wanjh kabirrimirndemornnamerren kore kumirrk ngardduk. Wanjh ngaye ngabenlarlmang dja ngabenbebbekurrme yiman shepherd kayime bu kabenlarlmang nawu sheep dja mak nawu nanikud.

³³ Wanjh ngaye nawu Bininj Duninh ngabenkurrme nawu birrimak bininj kore kukun ngardduk, dja mak nawu birriwarre bininj, nakka ngabenkurrme kore kudjaku ngardduk.

³⁴ Wanjh ngaye nawu king duninh ngabenmarneyime nawu kukun ngardduk ngabenkurrmeng, 'Ngurrimray ngudda nawu ngardduk kornkumo ngunmarnekurduyimeng kunmak duninh ngudberre, ba bu ngurrini kore ngunmarneyingkihbolkmarnbom ngudberre kore kerngehkenhni duninh bu bolkmarnbuyindanj rowk. Wanjh ngurribolkmang bu bolkkime.

³⁵ Kuhni kayimerran ngudberre bu kuninjkukenh, bu ngaye ngamar-rweni, wanjh ngudda kandiwong manme. Mak bu ngakombukdoweng, wanjh ngudda kandibowong ngabonguni. Mak bu ngakudji ngani kore ngabolkbawong djarreh kore ngardduk kunred, wanjh ngudda kandingi-moweng kore kurrambalk ngudberre.

³⁶ Mak bu ngahrey kunmadjyak, minj njale ngadjongbuyindiwirrinj, dja ngudda kandimadjwong ngadjongburrinj. Ngaye ngahdoweni, ngudda kandinahani. Dja mak bu ngarurrkkehndi kore prison, ngudda ngurrimrey dja kandidjahwoni!'"

³⁷ "Wanjh nawu birrimak bininj kabirriyime, 'Nawu Yiwohrnan, kaluk kore baleh ngad ngundinani bu yimarrwerey wanjh ngad manme ngundi-woni, mak kore yikombukdoweni ngad wanjh ngundibowoni yibonguni?'

38 Mak baleh kore yini yikudji bu djarreh yimrey wanjh ngundingi-mowoni kore kurrambalk ngadberre? Dja baleh ngundinani yimadjyak yirey wanjh ngundiwoni kunmadj bu yidjongburreni?

39 Baleh ngundidulkkihnahnani bu yirrukkijoy mak bu yihdurrrkenhdi kore prison ngad wanjh ngundidjahwoni?"

40 "Wanjh ngaye nawu king dunijnh ngabenwokmang, ngayime, 'Ngaye marneyime ngudberre bu woybukkih dunijnh, njalehnjale kore ngurrikurduyimeng bedberre nawu birrimarladjja bininj ngaye nawu ngaridanggerrinj, wanjh kunukka ngaye warridj kandimarnekurduyimeng ngardduk.'

41 "Dja wanjh ngaye, nawu king dunijnh, ngabenmarneyime kore nawu kudjakku ngabenkurrmeng, 'Ngudda nawu ngurrikid bininj, wanjh kandibawo, dja ngurriray kore kunak manbu kahdjajlung munguyh manbu ngabenmarneyingkihbolkmarnbom bedberre nawu namarnde dunijnh dja nawu angels nuye!

42 Dja kuninjkukenh. Ngaye nawu ngamarrweni, dja ngudda minj njale kandiwoyi bu nganguyinj. Mak bu ngakombukdowneni, wanjh minj kandibowoyi.

43 Ngaye ngani ngakudji bu djarreh ngabolkbawong kunred ngardduk, dja ngudda minj kandingimowoyi kore kurrambalk ngudberre. Mak bu kunmadjyak ngarri, ngudda minj kandimadjwoyi ba ngadjongburrimeninj. Mak bu ngarrulkkijoy, ngudda minj kandinahnayi, dja mak bu ngahrurrrkenhdi kore prison ngudda minj kandidjahdjawoyi!"

44 "Wanjh bedda bedmanwali kabirriyime, 'Nawu yiwohnan, baleh kore ngundinang bu yihmarrweni? Dja kore yikombukni, kore yidjalkudji yihni, mak yimadjyak yirey, mak yirrukkini dja yirurrrkenhdi kore prison? Kaluk kuhni baleh kore ngundinang dja minj ngundibidyikarremeninj?'

45 Wanjh ngaye nawu King, ngabenwokmang, ngabenmarneyime, 'Ngaye marneyime ngudberre bu mak woybukkih dunijnh, kore baleh yarrkka minj ngurrikurduyimeninj bedberre nawu birrimarladjja bininj ngardduk, wanjh ngudda mak kunukka minj kandimarnekurduyimeninj kore ngaye ngardduk.'

46 Dja mak Jesus yimeng, "Wanjh birrimekbe birriwarre bininj nakka wanjh kabirrire kore ngaye ngabendung munguyh munguyh. Dja nawu birrimak bininj nakka kabirrire bu kabirridarrkiddi munguyh munguyh." Kuhni rowk bu Jesus yimeng.

26

Bu Birriwokmarnburrinj Bu Kabirribun Jesus

Matthew 26:1-5

(Mark 14:1-2; Luke 22:1-2; John 11:45-53)

1 Kaluk yerrekah bu Jesus burnbom kunmekbe yimihyimi, wanjh benmarneyimeng nuye nawu benbukkabukkani,

2 "Ngudda ngurriburrbun bu malaywibuyika wanjh kunukka kunbarangarra ngaleng ngarre Passover mulil. Wanjh bu kunmekbe kabolkyime ngaye nawu Bininj Dunijnh ngandibidkenhwon kore nawu birriwarre bininj bu ngandibun kore kundulk cross."

3 Kaluk nawu birrihikimuk priests dja nawu dabborrabbolk nawu bindiwohrnani bininj, wanjh birrimirndemornnamerrinj kore kunrurrrkimuk nuye nawu nakimuk dunijnh priest ngeyyoy Caiaphas.

⁴ Kumekbe kore bedda birriwokmarnburrinj bu molkkenh kabirrimang Jesus wanjh kabirribun.

⁵ Kaluk bedda birriyimerrinj, “Ngad minj karribangmekurduyime bu mulil karrihkarrme dja med rerrih, dja wardi kunukka mak kabirriyid-dung nawu birriwern bininj.”

Daluk Ngalbu Bikodjdjuhkeng Jesus Bu Karrowenkenh

Matthew 26:6-13

(Mark 14:3-9; John 12:1-8)

⁶ Wanjh Jesus ningihni kore Bethany kaluk kore kurrambalk nuye nawu birringeybom Simon nawu Kulahwarre.

⁷ Bu kunmekbe, wanjh ngalkudji daluk bimiyikang dja kumkang nawu alabaster budjdjurlung kaluk dahkendi nawu namanjmakaykenh kunkalkkid. Wanjh ngaleng yakbom kore Jesus kukodj nuye kore nungan neykenhdi bu manme ngunihnguni.

⁸ Wanjh nawu benbukkabukkani nuye birriyidduy bu birrinang ngalmekbe daluk kore kurduyimeng. Wanjh birridjawam, “Njalekenh ngudda yiwe rowk nawu namanjmakaykenh kunkalkkid?”

⁹ Nakka wanjh yiweykayi ba yimayi nakimuk kunwardde ba bu yibenkukwoyi nawu birrimarladj bininj.”

¹⁰ Wanjh Jesus burrbuni kore baleh bedda birriyimeng, wanjh nungka yimeng, “Njalekenh ngudda ngurrihdung ngahli daluk? Ngaleng kurduyimeng bu kunmak duninj ngardduk.

¹¹ Ngudda wanjh ngurrbenhdjalkarrme nawu birrimarladj bininj bu djal munguyh, dja ngaye minj kandikarrme munguyh.

¹² Dja ngahli daluk yakbom nawu mankalkkidmanjmak kore kuburrk ngardduk bu nganyingkihmarbun bu bininj ngandikukudjeng.

¹³ Wanjh marneyime ngudberre bu woybukkih, kore baleh yarrkka manbu manmak kunwok kabirriweykan kore kubolkwarlahkenh rowk kore kondah kurorre, wanjh ngahli daluk kore baleh kurduyimeng wanjh nakka kabirrimulewan warridj, ba bu bininj birriwarlahkenh wanjh ngaleng kabirriburrbun.”

Judas Bimarnewirrimerrinj Jesus

Matthew 26:14-16

(Mark 14:10-11; Luke 22:3-6)

¹⁴ Nakudji kore nawu twelve benbukkabukkani, nawu ngeyyoy Judas Iscariot, wanjh wam benyikang nawu birrikihkimuk priests bu kabirri-wokdikenh.

¹⁵ Nungka bendjawam, yimeng, “Njale kandikarremulewan bu Jesus bidnakenwon ngudberre?” Wanjh bedda birrikukwong kunwardde nawu thirty silver coins.

¹⁶ Wanjh bu yerrekah, Judas dedjingmey bolkyawani bu baleh kabolky-ime kabikukweykan Jesus.

Jesus Dja Nawu Benbukkabukkani Birridjarrknguni Manbu Passover Mulil

Matthew 26:17-25

(Mark 14:12-21; Luke 22:7-14,21-23; John 13:21-30)

¹⁷ Kaluk bu kunbarnangarrayanggih ngarre mulil manbu Kandidjdjawa Manlodbinjbinj, nawu benbukkabukkani nuye birrimiyikang Jesus dja birridjawam, “Baleh yidjare ngarriyingkihmarbun ba manme yingun manbu Passover mulil?”

18 Wanjh Jesus yimeng, “Ngurriray kore kubolkkimuk wanjh ngurrinan nahni bininj dja ngurrimarneyime, ‘Nawu kanbukkabukkan kayime ngokko wanjh darnkih kamhre kabolkyimerran nuye. Dja ngaye ngadjare Passover mulil ngarridjarrkungun nawu ngabenbukkabukkan ngardduk kaluk kore ngudda ke kurrambalk.’”

19 Wanjh nawu benbukkabukkani birridjalkurduyimeng kore Jesus benmarneyimeng bedberre, dja birriyingkihmarbom kore Passover mulil kabirringun.

20 Kaluk bu balngokdanj, Jesus wanjh neykenhdi kore table, birrihdjarrkunguni nawu twelve benbukkabukkani nuye.

21 Wanjh bu kunmekbe birrihnguni manme, Jesus yimeng, “Ngaye woybukkih ngayime ngudberre, nakudji ngudberre ngankukweykan kore birriwarre bininj.”

22 Kuhni benmarbom nawu benbukkabukkani nuye birrinjilngwarreminj. Wanjh birribebbehmarneyimeng Jesus, “Nawu Yiwohrnan, yiddok ngaye kukweykan ngudda. Ngaye?”

23 Dja Jesus yimeng, “Nawu nganedjarrkbiddjuhmeng kore banikkin, wanjh namekbe nawu ngankukweykan.

24 Kaluk nganmarnekurduyimerran ngaye nawu Bininj Duninj kore kayingkihbimbuyindi ngardduk. Dja ngaleng kadjalwarre duninj nuye namekbe bininj bu ngankukweykan ngaye nawu Bininj Duninj. Dja kunukka kamakniwirrinj nahni bininj bu nungka minj berrkmayi.”

25 Wanjh Judas, nawu bikukweykan Jesus benbidkenwong nawu birriwarre bininj, wanjh bimarneyimeng Jesus, “Nawu kanhbukkabukkan, ngaye ngawid, dja woybukkih.” Wanjh Jesus yimeng, “Yoh, nakka wanjh ngudda.”

Bu Jesus Mulewarrinj Nuye Kunburrk Dja Kunkurlba

Matthew 26:26-30

(Mark 14:22-26; Luke 22:15-20; 1 Corinthians 11:23-25)

26 Kaluk bu kunmekbe bedda birrihnguni manme, Jesus wanjh lodmey manbu kandidjawa dja biyimanjbom God, yerre wanjh lodbakkeng. Wanjh benwong nawu benbukkabukkani nuye dja yimeng, “Ngurrima mahni kandidjawa dja ngurringu. Mahni kunburrk ngardduk.”

27 Wanjh banikkin wali ngalngmey, biyimanjbom God, wanjh benbowong nuye benbukkabukkani, dja yimeng, “Ngurriwern ngurribongu mahni.

28 Mahni ngardduk kunkurlba manbu kamenyime bu kunkerrngehkenh kore God wokkurrmerrinj bu mulewarrinj nungka kadjare kabenmarnebgmidjan bininj. Mahni kunkurlba ngardduk kayakburren bedberre birridjalwern bininj ba bu God kabengmidjan bedberre kunwarre.

29 Wanjh kuhni bengdayhke bu ngayime ngudberre, ngaye minj ngayawoyhbongun mahni mandjoleng manrakelbeh, kaluk karriyawoyhdjarrkongun bu yerrekah kumekbe kore Ngabbard ngardduk kawohrnan rowk.”

30 Kaluk bu birriwayiniyerrkang manbu yiwarrudjkenh, wanjh birriwam kore kunbolk Mandulum Olives.

Jesus Biyingkihulewam Bu Peter Kabiwaralkukwakwan

Matthew 26:31-35

(Mark 14:27-31; Luke 22:31-34; John 13:36-38)

31 Wanjh Jesus benmarneyimeng nawu benbukkabukkani nuye, “Bu bolkkime kukak ngudda kandikukbawon dja ngurrikelerlobme, dja kunmekbe wanjh kahyime kore djurra, ‘Ngaye ngabun nawu shepherd dja

nawu mayh sheep wanjh nakka kabirrikelerlobmerren kore kubolk-bubuyika.' [Zechariah 13:7]

³² Kaluk bu yerrekah God ngandolkkayhwe kore kumidjbeh, wanjh ngayingkihdokme ngudberre kore kunbolk Galilee."

³³ Dja Peter yimeng, "Nakka birriwern kaluk kabirrikelerlobme bu nguddakenh, dja ngaye kunukka minj ngayime."

³⁴ Kaluk Jesus bimarneyimeng, "Ngayime woybukkih, bu bolkkime kukak bu yerre rooster kakayhme, ngudda kaluk kanwaralkukwakwan bu danjikkah."

³⁵ Dja Peter yimeng, "Kunukka minj ngayime bu waralkukwakwan! Dja wardi kunukka ngarrdjarrkdownen!" Mak nawu birriwern benbukkabukkani nuye nakka kunmekbe rerrih birriyimeng.

*Jesus Wam Dingihdi Yiwarrudj Nakudjukdji Kore Kunbolk Gethsemane
Matthew 26:36-46*

(Mark 14:32-42; Luke 22:39-46)

³⁶ Wanjh Jesus birridjarrkwam nawu benbukkabukkani nuye kore kabolkngeyyo Gethsemane. Dja benmarneyimeng, "Kondah ngurrinin dja ngare kuni, ngarri yiwarrudj."

³⁷ Nungka ben kang Peter dja benbokenh bebeywurd nuye Zebedee, dja nungka dedjingmey bu njilngwarreminj mak kangewarreminj.

³⁸ Wanjh benmarneyimeng, "Ngaye ngawernhkangewarre dja darnkih nganhkagedjalmanng. Dja kondah ngurrinin, ngurrilorrrhmiyuwn bu ngaye karrihni."

³⁹ Kaluk bu balwam djarrehkah wurd, kumekbe kukburriwerrinj kumirrk nuye kore kurorre dja yiwarrudj danginj, wanjh yimeng, "Ngabba, bu kuhni kamak, wanjh yuwn kanbowon nahni banikkinn bu ngabongun manbu kore ngadjakbekkankenh. Dja bonj, yidjalkurduyimen kore ngudda yidjare, minj kore ngaye ngadjare."

⁴⁰ Wanjh Jesus durndi kore nawu benbukkabukkani nuye benkurmeng dja benngalkeng birrihkodjkeyoy. Wanjh bimarneyimeng nawu Peter, "Ngudda minj karridjarrkwohrnaya bu nakudji hour?"

⁴¹ Dja ngurrilorrrhmiyuwn mak yiwarrudj ngurridin ba kunukka kungudj ngunwon ngudberre mak nawarre minj ngundjurrkkan dja ngunmarnbun bu ngurriyime kunwarre. Dja kunmalng ngudberre makka kadjare kunmak kayime, dja kungudj kore kunburrk ngudberre makka manngudjwarre."

⁴² Wanjh Jesus yawoyhdurndi yiwarrudj yawoyhdanginj, yimeng, "Ngabba, bu minj baleh mak kunbuyika bu ngabongun manbu banikkinn kore ngadjakbekkankenh, wanjh djawan kore yidjare bu kadjalkurduyimerran ngaye."

⁴³ Wanjh yawoyhdurndi benngalkeng nawu benbukkabukkani nuye birrihyawoyhkeyoy, kaluk birrikodkedulmukni.

⁴⁴ Wanjh Jesus durndi danjikkah danginj yiwarrudj, dja kundjalkudjiwi yawoyhyimeng.

⁴⁵ Wanjh Jesus yawoyhdurndi kore benbukkabukkani nuye birrihkeyoy dja yimeng, "Yiddok ngudda ngurrihdjalkodjkeyo dja ngurrihdjalngehme? Ngurrina! Dja wanjh ngokko kambolkyimerran kamre darnkih, bu bininj ngankukweykan ngaye nawu Bininj Duninj bu birriwarre bininj ngandikarrme."

⁴⁶ Wanjh ngurridolka, dja karrire. Dja ngurrina, nahni nawu bininj kamhre nawu nganmarnekukweykan."

Jesus Wanjh Birrimey

Matthew 26:47-56

(Mark 14:43-50; Luke 22:47-53; John 18:3-12)

⁴⁷ Bu Jesus munguyh djahdjalwokdi, Judas kumwam, nawu birrihdjarrkrey twelve nawu Jesus benbukkabukkani. Dja birriwern bininj birrimdjarrkwam kaluk birrimkani mandjawak dja kundulk. Nawu birrikihkimuk priests dja nawu dabborrabbolk nawu birriwohrnanikenh bininj wanjh bindimunkeweng.

⁴⁸ Ngokko Judas karremarnbom bu kabenbengdayhke, bu yimeng, "Bininj nawu ngabunjhmang wanjh namekbe Jesus nawu ngurrimang."

⁴⁹ Kaluk kundjalmekbe rerrih Judas biyikang Jesus dja yimeng, "Nawu kanhbukkabukkan! Kamak by ngarrkebnarren." Yerre wanjh bibunjh-mey.

⁵⁰ Wanjh Jesus yimeng, "Nawu ngarrdabbolk, wanjh yidjalkurduyimen kore yinwamkenh." Wanjh birrimmekbe nawu birrimyormeng birrimwam birridarrkidmey Jesus.

⁵¹ Kaluk bu kunmekbe birrimey Jesus nakudji nawu Jesus nuye benbukkabukkani durrmeky nawu mandjawakkimuk, dja biwohkanemdjokeng nawu bimarnedurkmirri nawu kabenmarnewohrnan priests.

⁵² Dja Jesus bimarneyimeng namekbe nawu nuye bibukkabukkang, "Yirrunriwemen nawu mandjawakkimuk kore yimey. Nawu mandjawakkimuk kabirrimang nakka wanjh mandjawakkimuk kabenbun.

⁵³ Ngudda wardi minj ngurriburrbun bu ngadjareniwirrinj ngadjawayi Ngabbard, wanjh benmunkewemeninj birriwernkenh angels yiman twelve armies.

⁵⁴ Dja bonj, ngadjare nganmarnekurduyimerran kore Bible kabimbuyindi ngardduk, dja nganyolyolmeng kunkare."

⁵⁵ Wanjh Jesus benmarneyimeng birriwern nawu birrimkuniwam, "Ngudda kandikuniyikang mandjawak dja kundulk dorrengh yiman ngaye ngabang yerreh. Bu kunbarnangarrakuyeng rowk ngaye ngahni kore Temple kuberrkkah bu ngabenhbukkani, dja ngudda minj kunmekbe yerreh kandimayi.

⁵⁶ Dja wanjh kuninjkurowk kore baleh kurduyimerranj wanjh kawoybukkenhdan kore prophets birribimbom nawu korroko birrihni." Kuhni bu Jesus yimeng. Wanjh nawu benbukkabukkani nuye wanjh birrikukbawong dja birrikelerlobmerrinj.

Jesus Danginj Kore Kumirrk Bedberre Nawu Sanhedrin Birrihni

Matthew 26:57-68

(Mark 14:53-65; Luke 22:54-55,63-71; John 18:13-14,19-24)

⁵⁷ Birrimmekbe bininj nawu birridarrkidmey Jesus, wanjh birrikang kore kurrambalk nuye Caiaphas, nawu benmarnewohrnan priests, kore nawu mankarre kabindihbukkan, dja nawu birrikihkimuk bininj wanjh birrimornmerrinj.

⁵⁸ Kaluk nawu Peter nakka kumunke bedberre regehrey wanjh bebmeng kore kuberrkkah kurrambalk nawu kabenmarnewohrnan priest nuye, wanjh kumekbe ngimeng dja yerrkang birrihdjarrkni nawu djamun ba kabennan bu baleh kabirrimarnekurduyime nawu Jesus.

⁵⁹ Wanjh nawu birrikihkimuk priests dja nawu birriwern kore council bininj, birrikarreyawani kunwok manbu kunwoybukyak kore kabirridjuhunkenh Jesus wanjh kunukka kabirribun.

60 Birriwern bininj birrimwam wanjh bindihkoveyi bu nungkakenh, dja nawu council minj njale birringalkemeninj bu benedjarrkmulewayi ba birribuyi. Kaluk wanjh benebokenh bininj benewam beneyimeng.

61 “Nahni bininj yimeng, ‘Ngaye ngarurrkbakke manbu Temple God nuye wanjh ngayawoyhrurrkname bu kunkodjke danjbik.’”

62 Wanjh nawu kabenmarnewohrnani priests, danginj, dja bimarneyimeng Jesus, “Yiddok ngudda minj yibenbenewokmang? Yiddok benekebe bininj ngundimulewan bu kunwoybukkenh?”

63 Dja nungka Jesus minj biwokmayinj. Wanjh nawu benmarnewohrnani priests biyawoyhmarneyimeng Jesus, “Ngaye marneyime kore kundulkarre nuye nawu karrarrkid God bu yiyolyolmerrimen kunwoybuk dorrengh ngadberre bu ngudda nawu Christ*, nawu Beywurd nuye God.”

64 Wanjh Jesus yimeng, “Yoh. Makka ngudda ke kunwok. Dja marneyime, kaluk bu yerrekah ngudda kandinan ngaye nawu Bininj Duninj ngahni kore kukun nuye God nawu Dulkarrekimuk Duninj, dja wanjh ngamhre kunnngol dorrengh kore kaddumbeh.”

65 Kaluk bu kuhni bibek kang nawu benmarnewohrnang priest wanjh madjdjalkmarrinj, dja yimeng, “Nahni bininj yimeng kunwarre kore God! Wanjh minj nabuyika mak karridjare nawu kabirriwiddjung, dja ngudda ngurribek kang rowk kore kunwarre yimeng nuye God.

66 Kaluk baleh ngudda ngurriyime?” Wanjh bedda birriyime, “Nakka wanjh dowimen.”

67 Wanjh kumekbe bedda birrikebnunghmeng dja birrihbuni biddjurddu dorrengh bedberre. Dja nawu birribuyika nakka birriwidjbihkeyi.

68 Mak birrimarneyimeng, “Yimulewarrimen ngadberre bu yimanek ngudda nawu Christ! Mah, wanjh kanmarneyimen kunwok kore Godbeh, kaluk nangale ngunbom!”

Peter Biwaralkukwakwam Jesus

Matthew 26:69-75

(Mark 14:66-72; Luke 22:56-62; John 18:15-18,25-27)

69 Kaluk durrrkmidurrrkmirri wanjh kumwam kore nungka, dja bimarneyimeng, “Ngudda ngunehdjarrkdi Jesus nawu Galileebeh.”

70 Dja Peter benmarneyimeng nawu kumekbe birrihdi, “Ngaye minj ngaburrbun nawu ngurrihyolyolme!”

71 Bu kumekbe bolkbawong kore courtyard wanjh balhdi kore gate, dja ngalbadbuyika ngalyawk binang. Wanjh ngaleng benmarneyimeng nawu bininj kumekbe birrihdi, “Nahni bininj nakka benehdjarrkdi Jesus nawu Nazarethbeh.”

72 Kunyawoyhkudji Peter wokrayekworrinj bu burryyak, dja yimeng, “Woybukkih ngayime ngudberre, ngaye minj ngaburrbun nahni bininj!”

73 Kaluk bu birribalhani bu minj kunkuyeng, yikahwi bininj nawu kumekbe birrihdi birrimyikang Peter dja birrimarneyimeng, “Woybukkih, ngudda dorrengh ngurrihdjarrkmunkekadjungi Jesus, wanjh ngundiwokbek kang bu yihwokdi yiman nawu Galileebeh kunwok.”

74 Wanjh Peter djalwokrayekworrinj kore God nuye kunngey, bu yimeng, “Ngaye ngakukwakwan nameke bininj!” Wanjh kundjalmekbe rerrih nawu rooster wanjh kayhmeng.

* 26:63 (Dja kore verse 68). “Christ” karohrok kunngeybuyika “Messiah”.

⁷⁵ Kumekbe wanjh Peter burrbom kore Jesus bimarneyimeng, “Bu yerre nawu rooster kakayhme wanjh ngudda kanwarlalkukwakwan danjibikkah.” Wanjh Peter bebmeng kuberrk dja wernhnalkbuhnalkbuni kunkimuk.

27

Jesus Birrikang Kore Pilate

Matthew 27:1-2

(Mark 15:1; Luke 23:1-2; John 18:28-32)

¹ Bu djarreh kumhkabelni, nawu birrikihkimuk priests dja nawu kabirriwohrnawohrnan dabborrabbolk birriwokmarnburrinj bu Jesus wanjh kabirribun karrownen.

² Kaluk bedda birridukkarrukkang wanjh birrikang kore governor nawu ngeyyoy Pilate.

Nawu Nungan Judas Komdukkarrinj Doweng

Matthew 27:3-10

(Acts 1:18-19)

³ Judas nawu bikukweykang Jesus kore birriwarre bininj, nang bu birriwokmarnburrinj bu kabirribun Jesus. Wanjh nungka njilngwarrem-inj kore baleh nungka Jesus bimarnekurduyimeng. Wanjh durndiweng money manbu thirty silver coins kore nawu birrikihkimuk priests bedberre dja mak nawu kabirriwohrnawohrnan,

⁴ dja benmarneyimeng, “Ngaye kunwarre ngayimeng! Bu bidkenhwong ngudberre Jesus nawu minj kunwarre yimeninj.” Wanjh nawu birriwohrnani bininj birrimarneyimeng, “Dja baleh mak? Makka wanjh djalyingan ke. Minj ngad mak ngadberre.”

⁵ Wanjh Judas kukburriweng nawu kunwardde kore temple. Yerre kunu wanjh wam dja komdukkarrinj nungandeleng.

⁶ Wanjh nawu kabirriwohrnan priests birrimoyhme nawu kunwardde bu kukburriweng kore temple dja birriyimeng, “Kore mankarre kadberre kahyo minj karrikurrme nawu kunwardde manbu kunkurlbakenh kore temple ngarre, dja nawu kadjalkarremulewayindan kore bininj bu karrownen.”

⁷ Wanjh birriwokmarnburrinj bu namekbe kunwardde birrikukkur-meng bu birribolkbayahmeng kore kabolkngeyyo Potter nuye Kabbal. Bedda birridjareni birribolkmarnbuyinj ba bu kabindikukudjeng bininj nawu birriwokbuyika nawu birrihni kunred Jerusalem, nawu kabirrid-owen kumekbe.

⁸ Kunmekbekenh bedda bolkkkime kabirribolkngeybn mahni kabbal, “Kadjalbolkkurlbarri”.

⁹ Wanjh makka woybukkenhdanj, kore Jeremiah nawu prophet bimbom, yimeng, “Birrimey nawu kunwardde thirty silver coins, kore bininj nawu Israel benkebmawahmeng birrikarremarnbom bu karremulewayindanj nuye.

¹⁰ Wanjh birrikukkurmeng namekbe kunwardde bu birribolkbayah-meng kabbal bedberre nawu kabirrimarnbun delek, kore nawu Kawohrnan nganwokrayekwong.” [Jeremiah 32:6-9]

Pilate Bidjawam Jesus

Matthew 27:11-14

(Mark 15:2-5; Luke 23:3-5; John 18:33-38)

11 Wanjh Jesus danginj kore kumirrk nuye Pilate nawu governor, dja nungka bidjawam, “Yiddok ngudda king nawu bedberre Jews?” Dja Jesus yimeng, “Yoh. Makka ngudda ke kunwok.”

12 Kaluk nawu birrikihkimuk priests dja nawu dabborrabolk birridjuh-buni Jesus, dja nungka minj wokdiwirrinj.

13 Wanjh Pilate bimarneyimeng Jesus, “Yiddok ngudda minj yiben-bekkan bu ngundihdjuh bun kore njalehnjalekenh?”

14 Dja Jesus minj kunwokkudji yimeninj, bu minj benwokmayi kore kunwernkenh birridjuh bun. Wanjh nawu Pilate wernhkangebarrheng bu kunmekbekenh.

Pilate Benbidkenwong Jesus Kore Djamun Bu Kabirribiddundulubun

Matthew 27:15-26

(Mark 15:6-15; Luke 23:13-25; John 18:39—19:16)

15 Bu kudjewkbubuyika kaluk bu ngarre Passover mulil nawu governor wanjh benmarnebawoni nakudji bininj nawu kore birridjarngbom nawu birrimirnderri bininj.

16 Wanjh bu kunmekbeni nakudji bininj rurrkkendi, nawu ngeyyoy Barabbas. Kaluk namekbe birriwern birriburrbuni bu nawernhwarreni duninh.

17 Bu bininj birrimornnamerrinj kore Pilate wanjh nungka bendjawam, yimeng, “Nangale ngurridjare ngamunkewe ngudberre, Barabbas dja kunubewu Jesus nawu kangeyyo Christ?”

18 Kaluk nawu Pilate burrbuni bu birrimekbe bininj birribidnakenwong Jesus kore nungka bu bedda wanjh birridjalkirnwern.

19 Kaluk bu Pilate ningihni kore kabindihdjadmekenh seat, ngalbinin-jkobeng nuye kunwok bimarnemunkeweng, yimeng, “Yuwn baleh ngurri-marnekurduyime namekbe bininj, dja nungka minj njale warrewoyi. Dja bolkkime ngabukirribom nungka, wanjh ngannjilngwarrewong.”

20 Dja nawu birrikihkimuk priests dja nawu dabborrabolk bindidjur-krwoni bininj nawu birrimirnderri kumekbe bu kabirrimarnedjawayhme nuye Barabbas kabirribekbe dja nawu Jesus wanjh kabirribun.

21 Kaluk Pilate yimeng, “Ngabenbenekarrme Barabbas dja Jesus. Wanjh nangale nawu ngurridjare ngamunkewe ngudberre?” Wanjh bedda birriyimeng, “Barabbas!”

22 Pilate djawayhmeng, “Dja nawu Jesus, baleh ngayimewon, nawu kangeyyo Christ?” Wanjh bedda rowk birriyimeng, “Ngurribiddundulubu kore kundulk cross!”

23 Dja nawu Pilate yimeng, “Dja njalekenh? Njale nungka warrewong?” Wanjh bedda wernkih birrikayhmeng, “Ngurribiddundulubu kore kundulk cross!”

24 Bu Pilate nang minj baleh nungka kurduyimeninj dja nawu bininj ngokko birrihyiddungi, wanjh nungka kukku bomey dja biddjirridjurrinj kore kumirrk bedberre bedda bininj. Dja yimeng, “Ngaye wanjh minj kandidjuh bun bu nahni bininj karrown. Dja nakka wanjh ngudda ngurridjareminj bu kakurduyimerran!”

25 Wanjh nawu bininj rowk birriyimeng, “Ngad dja nawu wurdwurd ngadberre kaluk wanjh ngadberre bu nungka karrown.”

26 Wanjh Pilate bibekeng Barabbas bedberre. Dja nawu Jesus nakka wanjh benbidnakenwong bininj nawu birriwidjihkeng whips dorrengh. Dja wanjh benmarneyimeng djamun bu kabirribiddundulubun kore cross kundulk.

Nawu Djamun Birriborrkbuni Jesus

Matthew 27:27-31

(Mark 15:16-20; John 19:2-3)

²⁷ Nawu governor nuye djamun birringimewong Jesus kore bedberre kunrurrkkimuk, dja mak birriwern nawu djamun birriwabminguneng nuye.

²⁸ Wanjh birriyerrkkeng kunmadj nuye dja birridjongbom nawu madjd-jongbuyindi yiman kayime kings kadjongburren, manbu medjkurlbakurlbah manburra.

²⁹ Dja djamun birrimey kinj manmirrhyi, wanjh birrimarnbom crown nawu kunkodjkenh, yerre birrikodjongbom. Dja birrikurrmeng kundulk kore kubidkun nuye, wanjh birriboddanj kore kumirr k nuye mak birrihkkborrkuni, bu birrimarneyimi, "Ngundiburlume ngudda king bedberre bininj nawu Jews!"

³⁰ Warridj birrikuknunjhmi. Dja birrimey kundulk wanjh birrihdjum-duhkeyi kunwern.

³¹ Bu bedda birriburnbom kunmekbe birrihborrkuni, wanjh birriyerrkkeng nawu medjkurlbakurlbah manburra djongbuhdjongbuyindi dja birridjongbom nawu nuyekih kunmadj. Yerre wanjh birrikang bu kabirribiddundulubunkenh.

Jesus Birrikubarnnameng

Matthew 27:32-44

(Mark 15:21-32; Luke 23:26-43; John 19:17-27)

³² Kaluk bu birribalhyibemi kuberrkkah, kumekbe birriwohnarrinj nakudji bininj nawu Cyrenebeh, nawu ngeyyoy Simon, dja birrimarnbom nungka kangorran kundulk cross nuye Jesus.

³³ Wanjh birribebmeng kore kabolkngeyyo Golgotha, manbu kamenyime "Kunbolk ngarre Kunkodjngalng".

³⁴ Nawu djamun wanjh birribowoyi Jesus wine kaluk birrirawong gall. Kaluk bu Jesus bomanjbekkang manmekbe wine wanjh nungka warnyakminj dja minj bonguyi.

³⁵ Kaluk bu bedda birrikudunhdulubom kore kundulk cross, wanjh birrihdirri yiman kunkod rerrih ba bu nangale kawinhme wanjh nakka kakan nawu kunmadj nuye.

³⁶ Wanjh nawu djamun kumekbe birrirerrkang dja birrinahnani.

³⁷ Warridj birrikurrmeng nawu ngeybimdi kore kukodj nuye Jesus kore yimihyimi, "Nahni Jesus nawu King bedberre bininj nawu Jews."

³⁸ Warridj benebokenh bininj nawu benededjolkwernni, wanjh kumekbe bindidjarrkkubarnnameng Jesus dorreng, nakudji kukbarndi kore kukun nuye dja nabuyika nakka kukbarndi kore kudjakk nuye.

³⁹ Bininj nawu birrirey dja birriwohyurrrhkeyi, nakka kunwarre birriyimi nuye Jesus dja mak birrikodjbordebordedmi nuye,

⁴⁰ dja birriyimi, "Ngudda yiyimeng bu yirurrkbakke manbu Temple dja kaluk yiyawoyhrurrkname bu kunkodjkedanjbig! Dja bolkkime wanjh yingehkerrimen! Dja yimkolu kore cross kundulkbeh bu ngudda woybukkih Beywurd nuye God!"

⁴¹ Wanjh nawu birrikihkimuk priests dja nawu kabindihbukkabukkan mankarre, mak nawu daborrabolk warridj birrikukkilekmi Jesus.

⁴² Dja birriyimeng, "Nungka bengehkkeng birribuyika bininj, dja minj kangehkerren nungan! Mak nungka wanjh king kadberre nawu Israel bininj! Dja wanjh kumkolu kore cross kundulk ba kunukka karriwoybukwon!"

⁴³ Nungka kabiwoybukwon God, dja bolkkime wanjh God bingehkemen, bu nungka kabimarnedjare. Kuhn! wanjh nungkabidju yimeng, 'Ngaye Beywurd nuye God.'

⁴⁴ Mak kunmekbe rerrih nawu bininj bokenh beneyimi nawu bindidjar-rkkukbarnameng Jesus dorrengh bu benehdungi.

Jesus Doweng

Matthew 27:45-56

(Mark 15:33-41; Luke 23:44-49; John 19:28-30)

⁴⁵ Kaluk bu twelve o'clock dungyimi, wanjh kumekbe kubolkkwarlahkenh nakka kakkbalmeng rowk, kaluk benkarmeng danjbik hours.

⁴⁶ Kaluk bu wolewoleni yiman three o'clock yimerranj, Jesus kayhmeng wernkih, bu yimeng, "Eloi! Eloi! Lama sabachthani?" Kaluk kunukka yimeng, "Ngardduk God! Ngardduk God! Njalekenh ngaye kanbawong?" [Psalm 22:1]

⁴⁷ Kaluk yikahwi bininj nawu kumekbe birrihdi birribek kang wanjh birriyimeng, "Nakka kabihkayhme Elijah!"

⁴⁸ Wanjh nakudji bininj rlobmeng werrkwerkk dja mey nawu sponge dja djuhkeng kore vinegar, wanjh duk kang kore kundulk yerre wanjh bibowoyi Jesus bu kabongun.

⁴⁹ Dja nawu birribuyika bininj nakka birriyimeng, "Med, karribawo, dja wardi karrinan Elijah kamre ba kabingehke!"

⁵⁰ Wanjh Jesus yawoyhkayhmeng kunkimuk, yerre wanjh nungandeleng baworrinj bu doweng, dja malngbaworrinj.

⁵¹ Dja kundjalburrikudji nawu manburrba barndihbarndi kore Temple kururrk nakka wanjh djalkmiwam bu marnburrinj bokenh, kaddum kundjalkmiwam nawu koluy kanjdji. Warridj bolkrokani dja wardded-jalkmiwam.

⁵² Mak nawu kumidj kore birrihkukdudjindi nakka dangmarrhmiwam bedberre, wanjh birriwern nawu God nuye bininj nawu birridowerrinj, nakka wanjh birriyawoyhmimbiminj.

⁵³ Kaluk bu Jesus yawoyhdolkkang kore kumidjbeh, wanjh bedmanwali birrimyawoyhdolkkarrinj kumidjbeh dja birriwam kore kubolkkimuk kubolkdjamun kore birriwern bininj bindinang.

⁵⁴ Nawu djamun birrinahnani Jesus wanjh birrihdi, dja nawu centurion nawu kawohrnan bedberre dorrengh. Bu birrinang kunbolkkolokrokani, dja njalehnjale rowk kurduyimerranj, wanjh bedda birriwernhkeleminj dja birriyimeng, "Woybukkih duninj. Nahni bininj wanjh Beywurd nuye God!"

⁵⁵ Birriwern morlehmorlenj nawu birrimunkekadungi Jesus kore Galilee dja birrihnahnani, nakka birrimhdi djarreh kore cross kundulk, wanjh birrihdjalnani.

⁵⁶ Bedda nawu Mary Magdalene, dja Mary ngalbu ngalbadjan berrewoneng James dja Joseph, mak ngalbuyika Mary ngalbu ngalbadjan berrewoneng James dja John nawu Zebedee benbenebornang.

Jesus Birrikukkurmeng kore Kuwardderurrk

Matthew 27:57-61

(Mark 15:42-47; Luke 23:50-56; John 19:38-42)

⁵⁷ Kaluk bu balngokdangeni, nakudji bininj ngeyyoy Joseph bebmeng. Nakka Aramatheabeh. Nungka wanjh kukenni, dja Jesus nuyeni yimerranj bu bibukkabukkani. Wanjh nungka kumdolkkang kore kunred kabolkngeyyo Arimathea, dja kumwam kore Jerusalem.

⁵⁸ Dja wam biyikang Pilate wanjh bikukdjanwohmeng Jesus. Wanjh Pilate benwokwong nawu djamun nuye ba Jesus kabirrikukwon nawu Joseph.

⁵⁹ Wanjh nawu Joseph bikukmey nawu Jesus dja bikukdukkang nawu kukbele manburra.

⁶⁰ Dja bikukkang bikukkurmeng kore kuwardderurrk. Kaluk makka wanjh Joseph nuye, dja mankerngeni kore nungka warddedjobkeng. Wanjh warddedjirrkang manwarddedulum kore dangbalhmeng kore rurknirurrkni wanjh bolkbawong dja wam.

⁶¹ Kaluk Mary Magdalene dja ngalbuyika Mary dorreng, wanjh benedjaljerrkani borledmikenh kore kururrk kurobbe.

*Djamun Birribolknahnani kore Jesus Birrikurmeng
Matthew 27:62-66*

⁶² Kaluk bu kunbarnangarrabuyikani, manbu kunbarnangarra Sabbath, wanjh nawu birrikihkimuk priests dja nawu Pharisees wanjh birriyikang Pilate.

⁶³ Dja birriyimeng, "Nawu yikimuk, ngad ngarriburrbun bu namekbe nawu kurrehkurreni, bu darrkihdarrkidni wanjh kuhni yimeng, 'Bu kunkodjkekanjbik yerre, wanjh ngaye kaluk ngayawoyhdolkkang kore kundowibeh.'

⁶⁴ Dja yibenwokrayekwo ba kabirridangmayenahnan kore kuwardderurrk bu kayimerran kunbarnangarradanjbik yerre. Dja nawu benbukkabukkani nuye wardi kabirrimre kabirrikukdjirdmang wanjh kabindibalmarneyime birribuyika bininj bu nungka yawoyhdolkkang kore kundowibeh. Bedda wanjh birrikurrinj bu kerngekhenni, dja bu kabirrimulewan nungka dolkkang, wanjh kabirriwernehkurrekuren bu kunkimuk duninj!"

⁶⁵ Wanjh Pilate yimeng, "Mah! Wanjh ngurribenka yikahwi djamun ba kabirriwerndangmayenahnan kore baleh ngudda ngurriburrbun."

⁶⁶ Wanjh birriwam birridangmarnbom dja birrikurmeng seal ba minj nangale karrangmarrhmang. Warridj bindikurmeng yikahwi djamun bu birridangmayenahnani.

28

*Jesus Yawoyhdolkkang Kore Kumidjbeh
Matthew 28:1-10*

(Mark 16:1-8; Luke 24:1-12; John 20:1-10)

¹ Bu kunbarnangarra ngarreni Sabbath yakminj, wanjh ngokko Sunday kumhyimerrangeni bu djarreh kumhbarrhbuni, wanjh Mary ngalbu Magdalabeh, dja ngalbadbuyika Mary benewam benebolknang kore kumidj manbu kuwardderurrk.

² Kaluk kundjalmekbe rerrih kunkimukkenh bu bolkrokang. Dja angel nuye nawu Kawohnan Rowk kumkoluy kore heavenbeh, bu wam kore kuwardderurrk, wanjh warddedjirrkang manbu manwarddekimuk. Wanjh yerrkang kaddum kore kuwardde.

³ Kaluk nungka kukbelebami yiman bu namarrkon kahmayhke, dja manbu kunmadj djongbuhdjongbuyindi makka madjbele duninj yiman kayime snow!

⁴ Dja djamun nawu birrihdangmayenahnani wanjh bedda birriwernehkeleminj bu birrinang nawu angel, dja mak birrikukdeldelmi, dja mak birriyimerranj yiman birridoweng rerrih.

⁵ Wanjh nawu angel benbenemarneyimeng nawu morlehmorlenj bokenh, "Yuwn ngunেকে. Dja ngaye ngaburrbun bu ngudda ngunehyawan Jesus nawu birrikukbarnnameng kore kundulk cross.

⁶ Wanjh nungka minj kondah karri. Dja nakka God birrolkkayhweng kore yimeng ngudberre. Dja ngunemray, ngunebolknan kore kunburrk nuye birrikukkurmeng.

⁷ Dja werrkwerrk nguneray ngurrbenmarneyimen nawu benbukkabukkani nuye, bu nguneyimen, 'Jesus yawoyhdolkkang kore kundowibeh. Mak nungka kayingkihdokme ngudberre kore Galilee ngunmadbun, dja ngudda wanjh kumekbe kaluk ngurrinan.' Kuhni ngurrbenmarneyimen. Dja ngaye ngamwam bu kunmekbe ngamulewam ngunewoneng."

⁸ Kaluk nawu morlehmorlenj benebolkbawong kumekbe dja benemarrk-injrlombeng. Bedda benenjinngmakni, mak bedda benekeleminj warridj. Wanjh benerey bu bindimarnemulewayi nawu benbukkabukkani nuye Jesus kore baleh kurduyimerranj.

⁹ Kaluk bu birribalhrey, wanjh kundjalmekbe rerrih Jesus benbened-abkeng dja benbenemakwam. Wanjh nawu morlehmorlenj bokenh benemyikang darnkih dja benemarneboddangeni nuye dja benedengekarmeng.

¹⁰ Wanjh Jesus benbenemarneyimeng, "Yuwn ngunেকে. Dja nguneray ngurrbenmarneyimen nawu ngaye ngarridangerrinj bu kabirrire kore Galilee, kaluk kumekbe ngandinan."

Djamun Bindimarnemulewarrinj Kore Nawu Birrikihkimuk Priests.

Matthew 28:11-15

¹¹ Wanjh bu kunmekbe nawu morlehmorlenj bindiyikang bininj nawu benbukkabukkani nuye Jesus, wanjh yikahwi djamun nawu birrihdangmayenahnani birriwam kore kunredkimuk dja mak bindimarneyolyol-meng nawu birrikihkimuk priests kore baleh kurduyimerranj bedberre.

¹² Wanjh nawu priests birrimornnamerrinj bininj nawu dabborrabolk deleng, dja birrikarremarnbom. Bu bedda bindikarremulewam nawu djamun nakimuk kunwardde.

¹³ Dja bindimarneyimeng, "Ngurrbenmarneyimen nawu bininj bu bininj nawu Jesus benbukkabukkani birrimwam kukakni bu birrikukdjirdmey kore ngudda ngurrihkodjkewakwarrinj.

¹⁴ Bu nawu governor ngunwobekkan bu kuninjkunukenh, wanjh nakka kaluk ngadman ngarriwokdi, dja ngudda yuwn ngurrimarrkwarre."

¹⁵ Wanjh nawu djamun birrikukmey nawu kunwardde money dja mak birrikurduyimeng kore bindidjalmarneyimeng bedberre. Wanjh nawu Jews bininj munguyh kabirrimarneyolyolmerren manbu maninjmanu mankarre bu mak bolkkime warridj.

Jesus Benmunkeweng Nuye Nawu Benbukkabukkani Bu Kabindimarnbun Birriwern Bininj Kabirrimunkekadjung Jesus

Matthew 28:16-20

(Mark 16:14-18; Luke 24:36-49; John 20:19-23; Acts 1:6-8)

¹⁶ Nawu birrimekbe eleven benbukkabukkani nuye birriwam kore Galilee wanjh birribalwam kore mandulum, kore Jesus benyingkihmarneyimeng bu kumekbe kabirrinaren.

¹⁷ Wanjh kumekbe bedda birrinang Jesus dja birrimarneboddanj nuye. Kaluk yikahwi nawu benbukkabukkani nuye minj birriwernhwoybukwoyi bu nungka wanjh dolkkang.

¹⁸ Wanjh Jesus kumwam darnkih bedberre dja benmarneyimeng, “Nawu God nganwong ba ngakarrme kundulkarre rowk dja ngawohrnan rowk kore kaddum heaven dja kondah kurorre!

¹⁹ Dja wanjh ngurriray kore birriwarlahkenh bininj nawu birrim-dolkkang kubolkbubuyikabeh dja ngurrbenmarnbu ba ngaye ngandikad-jung. Mak ngurrbenkodjuhkemen kore kungey nuye nawu Kornkumo, Beywurd dja Namalngmakkaykenh,

²⁰ dja ngurrbenbukkabukkan kunwern rowk kore marneyimeng ngudberre ba bu ngaye ngandiwokmarrkmang. Dja woybukkih ngaye dorreng kaluk karridjarrkre munguyh, mak bu kaluk kayiburnbunkenh rowk.”

Mark

John Biyingskihmarnebolhmarnbom Nuye Jesus

Mark 1:1-8

(Matthew 3:1-12; Luke 3:1-17; John 1:19-28)

¹⁻² Mahni kunwok manmak manbu kabihyolyolme Jesus Christ, nawu beywurd nuye God. Kuhni dedjingmey kore Isaiah nawu prophetni bimbom, biyingskihwokmulewani korrokokenh, bu yimeng, "Kuhni God yimeng, 'Kanbekka! Ngaye ngamunkewe bininj nawu nganmarnewokdi ngaye ngardduk, bu kayingskihbolhmarnbun ke.

³ Kore kubolkdarleh nahni bininj kahkayhmire kahyime, "Manbolh ngurribolhmarnbu nuye nawu Kawohnan Rowk! Kaluk manbolhdjadin bu ngurrimarnbu nuye!" "' [Malachi 3:1; Isaiah 40:3]

⁴ Wanjh namekbe John nawu benhkukdjuhkeyi bininj, bebmeng kore kubolkdarleh dja benmarnemulewani, benmarneyimeng bininj birriwern, "Ngurriborledmen nuye nawu Kawohnan dja ngurribawo kunwarre ba God ngunmarnebengmidjan kunwarre ngudberre, dja mak ngurrikukduhmen dorrengh!"

⁵ Wanjh kunred bokenh kore Judea dja Jerusalem birriwern bininj birriyormi bu birriyikani John. Wanjh kumekbe birriwaryakmulewarreni kunwarre bedberre, bu John benkukdjuhkeyi kore mankabo Jordan.

⁶ John nawu djongbuyindi kunmadj nawu marnbom kore kunngabek mayh nuye nawu camel. Dja mak nawu kunngardmokenh dukkayindi, dja mak djalnguni djadedde dja mankung.

⁷ John yolyolmeng bedberre bu yimeng mahni kunwok, "Nakudji bininj kamre nawu wernhdulkarrekimuk duninj nawu nganyurhke ngaye. Ngaye minj ngamak bu ngabodan ngarreneyerrke nawu kahdengedjongbuyindi nuye.

⁸ Ngaye kukdjuhke ngudberre kore kukku, dja nungka ngunkukdjuhke ngudberre kore Namalngmakkaykenh dorrengh."

Nawu Namalngmakkaykenh Kumkoluy Kore Jesus

Mark 1:9-11

(Matthew 3:13-17; Luke 3:21-22)

⁹ Wanjh kunmekbe rerrih Jesus bolkbawong Nazareth kore Galilee dja wam kore John ningihni, wanjh kumekbe John bikukdjuhkeng Jesus kore mankabo kabongeyo Jordan.

¹⁰ Kaluk bu Jesus kumhbidbuni kore kukadjid, wanjh bolknang kaddum nang kunnol dangmarrhmiwam dja Namalngmakkaykenh yiman dordorok rerre kumkoluy kore nungka.

¹¹ Wanjh wokdanginj kore heavenbeh, yimeng, "Ngudda nawu Beywurd ngardduk. Ngaye wanjh ngawernhnjilngmakminj ke."

Namarnde Duninj Bidjurrkkang Jesus

Mark 1:12-13

(Matthew 4:1-11; Luke 4:1-13)

¹² Wanjh kundjalmekbe rerrih nawu Namalngmakkaykenh bikang Jesus dja mak bimunkeweng kore kubolkdarleh.

¹³ Kore kumekbe kubolkdarleh Jesus yerrkang bu kunkodjkewern forty, dja mak birridjarrkni mayh nawu birribang. Kore kubolkdarleh bu

ningihni, nawu Namarnde Duninj wanjh bihdjurrkkani. Kumekbe angels birrimarnebebmeng birrihnahnani Jesus.

Jesus Dedjingmey Bu Karrurkmirri

Mark 1:14-15

(Matthew 4:12-17; Luke 4:14-15)

¹⁴ Kalukburrk bu bininj birrikurmeng John kore prison, wanjh Jesus wam kore Galilee weykahweykani manbu manmakkaykenh kunwok nuye God.

¹⁵ Wanjh benmarneyimi, "Kuhni wanjh darnkih ngokko kamhre bu God kawohrnan rowk. Dja wanjh ngurrikangeboredmen dja ngurriwoybukwo kunwok manbu manmakkaykenh!"

Jesus Benkayhmeng Kunkarrngbakmeng Bininj

Mark 1:16-20

(Matthew 4:18-22; Luke 5:1-11)

¹⁶ Kaluk bu Jesus renehrey kore kukadjid ngarre manbokimukkenh kabongeyyo Galilee, wanjh balwohnang benbenenang Simon dja Andrew, nawu Simon benedanginj. Beneweyi walabbi kore kukku bu djenj benemangi. Kaluk bedda benedurrkmirri nawu djenj benemangi.

¹⁷ Wanjh kumekbe Jesus benbenemarneyimeng, "Ngunemray ngaye kandikadju, ba bu benbenemarnbun bu bininj ngurrbenmang yiman djenj ngunemangi."

¹⁸ Wanjh kundjalmekbe rerrih Simon dja Andrew benebawong walabbi berrewoneng, nawu benebebbekarrmi, dja benemunkekadjuy Jesus.

¹⁹ Kaluk Jesus djahdjalley, dja minj djarrehniwirrinj, wanjh benbeneyawoyhnang beneadbuyika bininj, nawu kabenengeyyo James dja John nawu bebeywurd nuye Zebedee. Wanjh bedda benabarndi kore kabbala dja benemarnmarnbuni walabbi berrewoneng.

²⁰ Mak kornkumo berrewoneng nawu Zebedee dja nawu birrihdurkmirri nuye kumekbe birrihdjarrkbarndi kore kabbala bebeywurd dorrengh. Wanjh kundjalmekbe rerrih Jesus benbeneyawoyhkayhmeng benemekbe nawu benedanginj, wanjh kunmekbe rerre bindibawong birribuyika dja nawu kornkumo dorrengh, dja benemunkekadjuy Jesus.

Jesus Weng Nawu Namalngwarre

Mark 1:21-28

(Luke 4:31-37)

²¹ Jesus dja nawu benbukkabukkani nuye birriwam kore kunred kabolnggeyyo Capernaum. Wanjh kaluk kunbarnangarra Sabbath, Jesus wam werik ngimeng kore kunrurrk yiwarrudjkenh manbu Synagogue, wanjh dedjingmey benbukkabukkani kumekbe.

²² Nawu bininj kumekbe birrihdi birrikangebarrhmeng bu birribekkani nungka yolyolmeng bu yiman kayime nungka wohrnani rowk, minj karohrok nawu bininj mankarre kore kabindibukkan.

²³ Bu kumekbe Jesus dingihni, nakudji bininj di kore kunrurrk yiwarrudjkenh, kaluk nungka karrmi namalngwarre. Wanjh namekbe namalngwarre kayhmeng yimeng,

²⁴ "Jesus nawu Nazarethbeh! Njale yidjare? Yiddok yimwam bu kanbenebun? Dja ngaye burrbun ngudda. Ngudda God nuye nawu Yikukdamun Duninj!"

²⁵ Wanjh Jesus bimarneyimeng bu biwokrayekwong, "Yingurdmen! Dja yibebmen yibawo nahn bininj!"

²⁶ Wanjh nawu namalngwarre bimarnbom namekbe bininj bu deldel-meng kunkimuk duninjh. Kunmekbe rerreh nawu namalngwarre kayh-meng wernkih duninjh, dja wanjh bebmeng, wam bibawong namekbe bininj.

²⁷ Kaluk birriwern bininj nawu birrinang dja birrikangebarrhmeng. Dja wanjh birridjavarreni bu birrimarneyimerreni, "Kaluk baleh kuhni kurduyimerranj? Nahni bininj kahyolyolme mankarrekerrnge, dja mak kahyolyolme yiman kayime nawu kawohrnan duninjh. Nungka kaben-marneyime nawu namalngwarre nawern, dja kabirriwokmarrkmang!"

²⁸ Wanjh manmekbe kunwok warlahminj kore kubolkwarlah Galilee bu Jesuskenh.

Jesus Benhmarnbuni Birriwern Bininj

Mark 1:29-34

(Matthew 8:14-17; Luke 4:38-41)

²⁹ Wanjh Jesus dja nawu benbukkabukkani birribolkbawong kore kunrurrk ngarre yiwarrudjkenh dja birribalwam, James dja John dorreng, kore kunrurrk berrewoneng Simon dja Andrew.

³⁰ Kaluk Simon nuye ngalbinjalak yoy bu dowehdowneni dja karrmi kundjak. Wanjh bininj nawu kumekbe birrihni birrimarneyimeng Jesus bu ngalengkah.

³¹ Wanjh Jesus biyikang kore ngaleng yongohyoy, wanjh bibidmey, birrolkkayhweng. Kaluk kundjalmekebe rerreh manbu kundjak bibawong, wanjh ngaleng makminj. Wanjh ngaleng wam kinjeng manme dja benwong birringuneng.

³² Kaluk bu balngokdanj bolkmununminj, birriwern bininj bindimkani nawu birringorengni kore Jesus, mak nawu namarnde benkarrmi, nakka mak bindimkani kore Jesus.

³³ Wanjh kumekbe kunred nawu birrihni birrimirndemornnamerrinj rowk kore kururrkdangmaye ngarre kurrambalk.

³⁴ Wanjh kumekbe Jesus benhmarnbuni birriwern nawu manbubuyika kundjak birrihkarrmi. Dja benbebkeyi namarnde nawu kukbubuyika bindihbongkarrmi nawern. Kaluk namarnde birrikukburrbuni Jesus, wanjh kunmekbekenh Jesus minj benbawoyinj bu birrimulewayi.

Jesus Dingihdi Yiwarrudj Kore Kubolkmudmikenh

Mark 1:35-39

(Luke 4:42-44)

³⁵ Bu kunkodjkebuyikani, bu djarreh kumhkabelni, Jesus kakkolkkang dja bolkbawong kore yongohyoy, bu djahdjalkakyoy rerreh. Wam bolknalkeng kore minj bininj birriwerrinj, wanjh kumekbe yiwarrudj danginj.

³⁶ Wanjh yerre, Simon dja nawu birribuyika bininj birriwam birrihd-jalyawani Jesus.

³⁷ Kaluk bu birringalkeng wanjh birrimarneyimeng, "Birriwern bininj ngundihyawan!"

³⁸ Wanjh Jesus yimeng, "Ngad wanjh karrire kubolkbubuyika darnkih, kore karurrkmirnderri ba bu ngayolyolme kumekbe bedberre. Wanjh kunmekbekenh ngaye ngamwam."

³⁹ Wanjh birridjarrkrey kore kubolkwarlahbubuyika ngarre kunred Galilee. Nungka yolyolmi kore kunrurrk yiwarrudjkenh, dja mak benbebkeyi bedberre nawu namarnde bindihbongkarrmi.

Jesus Bimarnbom Bininj nawu Kulahwarreni

Mark 1:40-45

(Matthew 8:1-4; Luke 5:12-16)

⁴⁰ Nakudji bininj kundjak karrmi. Kaluk kulahmokmokni dja bimiyikang Jesus wanjh kumwam barddurrukkurlhdanj dja bimarnekongiburrinj Jesus bu yimeng, “Ngaburrbun ngudda bu kanmarnbun. Dja bu yidjare wanjh kanmarnbu.”

⁴¹ Wanjh Jesus bidjalwernhkongibom namekbe bininj. Wanjh berlyir-riyonginj, bikarrmeng dja yimeng, “Ngaye ngadjare marnbun. Dja wanjh yidjalmakmimen!”

⁴² Wanjh kundjalburrikudji rerrih manmekbe kundjak bibawong nawu bininj wanjh yawoyhkulahmakminj.

⁴³ Wanjh Jesus bimarneyimeng namekbe bininj bu kare werrk, dja biwernhwokrayekwong yimeng,

⁴⁴ “Yuwn nangale yimarnemulewan bu kuhni ngakurduyimeng ke. Dja ngaleng yidjallay yikukbukarrimen kore nawu yiwarrudj kahdurkmirri, wanjh yiwo njale namak kore God, bu ngudda yimakminj. Yiwo nawu njale namak kore Moses wokkurmerrinj ba kabembukkan bininj bu ngudda yimakminj.”

⁴⁵ Dja bonj, namekbe bininj bolkbawong kumekbe dja wam, benmarney-olyolmeng birriwern bininj bu Jesus bimarnbom. Kaluk kunmekbekenh Jesus minj ngimeninj kore rurrkmirnderri ba minj nangale binayi. Dja djahdjalley kore kunred minj nangale diwirrinj. Dja birriwern bininj birriyorrmerreni nawu birrikang kubolkbubuyikabeh birribeberreni kore nungka ni.

2

Jesus Bimarnbom Bininj Nawu Nabirlni

Mark 2:1-12

(Matthew 9:1-8; Luke 5:17-26)

¹ Kaluk yerrekah kunkodjke bokenh, wanjh Jesus kumdurndi kore Capernaum. Wanjh birriwern bininj birriwobekang bu kumdurndi kore kunred nuye kumekbe ni.

² Wanjh birrimarnebebmeng kore nungka, dja birrimirndewern duninj bindidjokkhemeng kore kurrangmaye darnkih. Wanjh Jesus yolyolmeng bedberre nuye kunwok.

³ Wanjh yikahwi bininj birrimbebmeng, birrimkang nakudji bininj nawu nabirl. Kunkarrngakmeng bininj birrimngorrkani kunmadj dorrengh kore nungka yongohyoy.

⁴ Bedda minj baleh birribolngalkemeninj birringimowoyi kore Jesus, dja birrimirndewernni duninj bindidjokkhemeng. Wanjh kunu bedda birribdbom kukodj kore kaddum, wanjh birriyerrkkeng dja birriduhkeng kaddumbek kore Jesus dingihdi kanjdji, wanjh kumekbe birrikoluyhweng namekbe nawu nabirl kunmadj dorrengh.

⁵ Bu Jesus bennang bedberre birriwernhwoybukwong, wanjh nungka bimarneyimeng nawu nabirl, “Korlonj, kunwarre ke wanjh bularrbuyindanj rowk.”

⁶ Kaluk yikahwi bininj nawu bindibukkani manbu mankarre, wanjh birrihni kumekbe, wanjh bedda yiman birrihdjawarreni bedman bu birriburreni, birriyimi,

⁷ “Adju! Njalekah nahni bininj kayime kunwarre? Nungka wanjh kawokdi kunwarre kore God nuye. Minj nangale bininj kabimarnebeg-midjan kunwarre, dja God nadjalkudji kabularrbun kunwarre.”

8 Wanjh kundjalmekbe rerrih Jesus burrbom kore nungan kunmalng nuye kore birriburriburribun bedmandeleng. Wanjh nungka benmarneyimeng, "Njalekenh ngudda ngurrihdjawanren kore kukange ngudberre?"

9 Kandimarneyimen, yiddok kuhni kakelk, bu ngamarneyime nahni nawu nabirl, 'Kunwarre ke bularrbuyindanj rowk', dja nuk bu ngadjalmarneyimeninj, 'Mah, yirrolkka, yimadjmang dja yiray'?

10 Dja wanjh ngadjare ngudda ngurriburribun bu ngaye nawu Bininj Duninj, dja God nganmarnbom ngawohrn bu ngaye ngabularribun bininj bedberre kunwarre kondah kore kurorre." Wanjh kunmekbekenh kunu Jesus bimarneyimeng namekbe nawu nabirl,

11 "Ngaye marneyime, yirrolkka, yimadjma nawu yihyoy, dja yirrokmeng kured!"

12 Wanjh kundjalmekbe rerrih nungka dolkkang, madjmey, dja dokmeng kured kore birrinang Jesus kurduyimeng. Wanjh bedda rowk birrinang, dja birrikangebarrhmeng duninj, wanjh birriburlumi God, dja birri-marneyimi, "Nawu ngad karrinang kundjalbuyika duninj bolkkime, bu minj karriburribuyi."

Jesus Bikayhmeng Nawu Levi

Mark 2:13-17

(Matthew 9:9-13; Luke 5:27-32)

13 Kaluk bolkbawong kunmekbe dja yawoyhwam, kore kukadjid manbokimuk. Dja birrimirndewern bininj birriwam kore nungka. Wanjh Jesus dedjingmey benbukkabukkani.

14 Kaluk Jesus renehrey wanjh binang Levi, nawu beywurd nuye Alphaeus. Nungka ningihni kore kururk ngarre kunwardde kukmangi kore kabirrikarremulewan taxes. Wanjh Jesus bimarneyimeng, "Ngaye kanmunkekadju, yimray ngarre!" Wanjh Levi dolkkang dja bimunkemey Jesus.

15 Kaluk bu yerrekah, Jesus dja nawu benbukkabukkani birringuni manme kore Matthew nuye kurrambalk. Dja warridj birriwern bininj nawu tax birrikukmangi dja mak nawu birriwarre bininj wanjh birrimwam bu birridjarrknguni manme. Bedda birrimirndewern bininj birriwarre nawu mak birrimunkekadjung Jesus.

16 Kaluk nawu mankarre birriburribun Pharisees, bu bindikurdunani Jesus birridjarrknguni manme nawu birriwarre bininj, dja mak nawu tax kabirrihkukmang warridj, wanjh bindidjawam Jesus nawu benbukkabukkani, bu birriyimeng, "Njalekenh Jesus kabirrihdjarrkngun dja kabirrihdjarrkbongun birrimekbe nawu tax kunwardde kabirrikukmang dja mak nawu birridjalwarre bininj?"

17 Bu Jesus benbekkang, wanjh yimeng bedberre, "Kuhni wanjh ngurriburribu. Bininj nawu kabekkarren bu kamak rowk, wanjh minj kadjare doctor. Dja bininj nawu kahdulkkihyo, nakka wanjh kadjare doctor. Mah, kuhni ngaye minj ngamrawinj bu ngakayhme bininj nawu namak, dja ngaleng ngamwam bu ngabenkayhme bininj nawu birriwarre."

Bu Jesus Yolyolmerrinj Bedberre

Mark 2:18-22

(Matthew 9:14-17; Luke 5:33-39)

18 Kaluk bininj nawu John benbukkabukkani nuye, dja mak bininj nawu Pharisees, wanjh minj bedda birringuyinj manme kundedjumbung, bu birridjaldi yiwarrudj. Wanjh yikahwi nawu birribuyika bininj birrimwam kore Jesus dja birridjawam, "Njalekenh bininj nawu John nuye, dja mak bininj nawu Pharisees kabindibukkan, wanjh kabirribawon manme bu

kabirridi yiwarrudj, dja bininj nawu ngudda yibenbukkabukkan minj kabirribawon manme bu kunmekbekenh?"

¹⁹ Wanjh Jesus yimeng bedberre, "Bu mulil kabirrimarnbun bu yiman bininj daluk kabenemarren, wanjh nawu djawirna nuye nawu nakaliyi, wanjh yiddok bedda kabirribawon manme bu nungka kabirrihdjarrkni? Burrkyak.

²⁰ Dja kaluk yerrekah, bu namekbe nawu nakaliyi kabenbawon bedberre, wanjh kunu kabirribawon manme."

²¹ Wanjh Jesus yimeng, "Minj nangale kawohdjalkmang manburrba kore kunmadjkerrngebeh kanamekenh kore kunmadjkare. Wardi bu yimankek kunmekbe kayime bininj, wanjh nawu nakerrnge kadjalkmiyindan, dja kawarremen nawu nakare, wanjh minj kabenemadjrohrok. Wanjh kamadjwarremen rowk.

²² Dja mak minj nangale kaborrhkendong manbu wine manbokerrnge kore nakare budjdjurlung nawu mayh kunkulah. Wardi bu yimankek kunmekbe kayime bininj, wanjh manbu manbokerrnge kadjalkmire namekbe kunkulah, wanjh kaboyakarrburren, dja mak manbu mankulahkare mankulahwarre. Dja manbu wine manbokerrnge, bininj kabirridjalborrahkendong kore nakerrnge kunkulah budjdjurlung."

Jesus Benbukkang bu Sabbath Ngarre

Mark 2:23-28

(Matthew 12:1-8; Luke 6:1-5)

²³ Kaluk bu kunbarnangarra manbu Sabbath, Jesus dja mak nawu benbukkabukkani birrihdjarrkrey kore dalkmirnderri manbu karmi manme. Wanjh nawu benbukkabukkani, bedda wanjh birridurrdurkmangi.

²⁴ Wanjh nawu Pharisees birrimarneyimeng Jesus, "Yina! Njalekenh kuhni kabirrikurduyime bu kabirrihbakke manbu mankarre Sabbath ngarre?"

²⁵ Jesus benwokmey yimeng, "Ngudda yimankek ngurribimnani kore God nuye kunwok kore kawokbimdi bu kuhni David kurduyimeng bu nungka dja bininj nuye birribekkkang birrimarrwedoweni dja birridjawarinj?"

²⁶ Wanjh kunu nungka ngimeng kore God nuye kunrurrk, kore priest nakimuk ni, nawu Abiathar. Dja David lodmey buriddi manbu mandjamun kumekbe yoy. Wanjh nungka nguneng manmekbe buriddi, warridj benwong bedberre nawu birrihdjarrkrey. Dja mankarre kahyo manmekbe buriddi ngarre, bu minj nangale kangun, djal priestswi kabirringun."

²⁷ Dja mak benmarneyimeng, "God marnbom manbu Sabbath kunbarnangarra dja kanwong ngad bininj. Minj kanmarnbuyinj bininj ba yiman karridjalmarneboddan manbu Sabbath.

²⁸ Wanjh kunmekbekenh kunu, ngurriburrbun bu ngaye nawu Bininj Duninj ngawohrnan kore Sabbath kunbarnangarra warridj."

3

Bu Kunbarnangarra Manbu Sabbath Jesus Bimarnbom Nakudji Bininj

Mark 3:1-6

(Matthew 12:9-14; Luke 6:6-11)

¹ Kaluk Jesus yawoyhngimeng kore kunrurrk yiwarrudjkenh. Nakudji bininj ni kumekke, nawu kunbid nuye bidwelemikenhni.

² Wanjh yikahwi bininj birrihni nawu birridjareni birridjuhbuyi Jesus, wanjh kunu birridjalnani Jesus bu yimankek nungka kabimarnbun nahni

bininj bu kunbarnangarra ngarre Sabbath, ba kunu birringalkeyi bu kabirridjadmekenh.

³ Wanjh Jesus bimarneyimeng namekbe bininj nawu bidwarreni, yimeng, “Yirrolkka, yirrangimen kondah kubulkayh bedberre.”

⁴ Wanjh Jesus bendjawan nawu birrikurdunani, benmarneyimeng, “Ngaye djawan ngudberre, baleh kakarreyime Sabbath ngarre bu kunbarnangarradjamun? Yiddok kunmak bu karriyime bolkkime, dja kunubewu ngurridjare karriyime kunwarre? Yiddok karrikanjmarnbun karridar-rkidwon nahni bininj, dja kunubewu kunmak bu karribun nahni bininj?” Dja birrimekbe bininj wanjh minj birriwokdiwirrinj.

⁵ Wanjh Jesus bennang, dja benduy rowk. Nungka njilngwarreni bedberre dja benkangeburrbom bu bedda wanjh birrikangerayekminj. Wanjh Jesus bimarneyimeng bininj nawu bidwarreni, “Yibidyirriyuwn.” Wanjh nungka bidyirriyonginj, wanjh bidyimerranj yiman kerrngehkenh duninj bidyibidyimi.

⁶ Wanjh bininj nawu Pharisees birribolkbawong, birribebmeng, wanjh kundjalmekbe rerrih birrimayalibekkarreni Herod nuye bininj dorrengh, nawu birridjarrkkarremarnbuni bu birribuyinj Jesus.

Birriwern Nawu Birridoweni Birridjareni Jesus Kabenmarnbun

Mark 3:7-12

⁷ Kaluk Jesus dja nawu benbukkabukkani birribolkbawong dja birriwam kore manbokimuk darnkih. Dja birrimirndewern duninj nawu birrikang Galilee bindimunkekadjungi.

⁸ Wanjh birrimirnderaworrinj bininj nawu birrikang Judeabeh, bu bindimunkekadjungi. Dja warridj bininj nawu birrikang Jerusalem, dja mak bininj birrikang kunbolk Idumea, dja bininj nawu birrimwam djarreh kore Jordan dja bewhkah, dja mak bininj nawu birrikang Tyrebeh dja Sidonbeh birrimwam. Bedda wanjh birriwobekgang Jesus kore kurdukurdyimi, wanjh birrimirnderaworrinj kore nungka.

⁹ Kunmekbekenh kunu Jesus benmarneyimeng nawu benbukkabukkani bu kabirrimarnekkurme mankudji manyahwurd kabbala nuye, dja birrimirndewern duninj bu birriwernmerrinj wardi yimankek kabirrikuknger-rehme.

¹⁰ Kaluk birriwern nawu birridulkkihyoy, wanjh birridjareni bu birrikarmeninj Jesus ba benmarnbuyinj, dja kunmekbekenh birrikuyinj djurrkkayi. Birriburrbuni bu nungka benmarnbuni birriwern.

¹¹ Dja mak namalngwarre rowk bu birringang Jesus, wanjh birribebbemarnemankani kore kumirrk nuye, dja birribebbekayhmi, bu birriyimi, “Ngudda nawu God nuye Beywurd!”

¹² Dja Jesus benwokrayekwoni nawu namalngwarre rowk, kunrayek duninj, bu minj birrimulewayinj.

Jesus Bendjarrngbom Nawu Twelve Bininj

Mark 3:13-19

(Matthew 10:1-4; Luke 6:12-16)

¹³ Kaluk Jesus wam bidbom kore mandulum, dja benkayhmeng yikahwi bininj nawu nungka benmarnedjareni. Wanjh birriwam kore nungka di.

¹⁴ Wanjh Jesus bendjarrngbom birrimekbe nawu twelve bininj nawu benngyekurmeng “apostles” ba bu kabenmunkewekenh. Nungka djaldjareni bu kabirridjarrkre dja mak kabenmunkewe ba bu kabirriyolyolme yiwarrudj.

¹⁵ Kaluk djareni bu kabenwon kundulkarre ba bu kabindikukburriwe nawu namarnde nawern.

16 Wanjh benkurremng birrimekbe nawu twelve nuye bininj. Bedda wanjh birringeyyoy Simon nawu Jesus bingeykurremng Peter,

17 dja James nawu beywurd nuye Zebedee, dja John nawu James benedanginj. Nahni bokenh bininj Jesus benbenengyebom Boanerges. Nahni kungey kamenyime "Beywurd nuye Namarrkon".

18 Dja birribuyika birringeyyoy Andrew, Philip, Bartholomew, Matthew, Thomas dja James nawu beywurd nuye Alphaeus, dja mak Thaddaeus, dja Simon nawu birriyimi, "Nawu nabang dja kadjare kabendung bininj nawu birrikang Rome",

19 dja warridj Judas Iscariot, nungka kaluk kabikukweykan Jesus.

*Jesus Yolyolmerrinj Bu Benbengdayhkeng Nungka Wernhdulkarrekimuk
Mark 3:20-30
(Matthew 12:22-32; Luke 11:14-23; 12:10)*

20 Wanjh Jesus ngimeng kunrurrk, dja birrimirndewern bininj birrimirndemornnamerrinj nuye kore kumekbe kunred, dja kunu nungka dja bininj nuye minj manme birringuyinj, dja bindidangdjangnang.

21 Dja bininj nawu yikahwi namud nuye Jesus, wanjh birriwobek kang dja birriwam bu birrimayinj, dja birriyimerrinj, "Nungka wanjh bengwarminj!"

22 Yikahwi nawu bindibukkabukkani mankarre birrimwam, birrimkoluy kore Jerusalembek, wanjh bedda birriyimeng, "Jesus nakka kakarrme namarnde nawu kangeyyo Beelzebul nawu kawohnnan kore namarnde rowk. Kunmekbekenh kunu nungka Jesus kawu nawu namarnde rowk!"

23 Wanjh Jesus benkayhmeng bu birrimwam darnkih, dja dedjingmey bu yolyolmeng parables bedberre. Wanjh yimeng, "Adju, yiddok ngudda ngurriyime bu Namarnde Duninj kakukbekkerren nungandeleng?"

24 Burrkyak. Ngurriburrbun bu bininj nawu kabirridjarrkyo kore kubolkkudji, bu kabirriburren wanjh kunu kabirrikukyakworren, dja mak kabirribolkkwarrewon!

25 Dja nakudji namud bedberre bu birrimekbe bininj kabirriburren, wanjh kabirriyakworren, dja kunu namud bedberre wanjh kayakmen rowk.

26 Kunmekbekenh kunu marneyime, bu nawu Namarnde Duninj kaburren nungandeleng, wanjh bonj, minj karri, dja wanjh bolkkime kadjalyakmen.

27 Wanjh kunu kandibekka, dja ngurriburrbun kunbadbuyika. Bu nangale kadjare kangimen kore bininj nawu dulkarrewern kurrambalk nuye bu yimankek kadjirdmang nuye njalehnjale, wanjh nakka kabirrukkarukkan werrek namekbe nawu dulkarrewern bininj. Wanjh kabibalmarnedjirdmang njale kore kurrambalk nuye.

28 Dja wanjh marneyime kunwoybuk ngudberre, baleh yarrkka kunwarre ngurrikurduyime dja mak baleh yarrkka kore ngurriyime kunwarre nuye God, wanjh nakka God ngunmarnebengmidjdan ngudberre.

29 Dja nangale bininj kabimarnewirrihmerren nawu Namalngmakkaykenh, wanjh nakka God minj kabimarnebengmidjdan nuye kunwarre bu munguyh munguyh. Nahni bininj wanjh yiman kadjalkurduyime kunwarre dja kawarreworren bu munguyh munguyh."

30 Jesus kunmekbe yimeng bu kuninjkunukenh, bedda birriyimi, "Nungka kakarrme namalngwarre."

Jesus Nuye Namud Duninjh

Mark 3:31-35

(Matthew 12:46-50; Luke 8:19-21)

³¹ Kunmekbekenh kunu birrimarnebebmeng Jesus nuye ngalbadjan dja mak nuye birridangerrinj. Birridi kore kuberrkkah dja birrimarnewok-munkeweng nuye.

³² Birrimirndewern bininj birridjarrkdi nungka dorreng, wanjh birrimarneyimeng, "Yina! Ngalbadjan ke dja nawu ngurridangerrinj kabirrihni kuberrk dja mak ngundiyawan."

³³ Jesus benwokmey, yimeng, "Nangale ngaye nganyawmey, dja mak ngarridangerrinj?"

³⁴ Wanjh nungka bendjalnani bininj nawu birriwakbuyinguni dja mak birridjarrkyerrkang nungka dorreng, wanjh yimeng bedberre, "Ngurri-narrimen rowk! Ngudda yiman ngaye ngardduk ngalbabadjan, dja mak karridangerrinj!"

³⁵ Nangale nawu kabiwokmarrkmang God kore kadjare, wanjh nakka ngaye ngarridanginj nawu bininj dja daluk, dja warridj ngaye ngardduk ngalbabadjan."

4

Jesus Benbukkabukkani Bu Yolyolmi Parables Manbu Manwarlkkaykenh Kunwok

Mark 4:1-9

(Matthew 13:1-9; Luke 8:4-8)

¹ Kaluk Jesus wanjh wam kore manbokimuk ngarre kukadjid dja kumekbe yawoyhdedjingmey bu benbukkabukkani. Wanjh birrimirndewern bininj birriwakbuyinguneng, dja nungka dolkkang, bidbom, yerrkang kore kabbala dahkendanj, wanjh nawu bininj benbawong birrimhdi kore kukadjid.

² Kumekbe wanjh Jesus yolyolmeng bedberre kunwern bu benhbukkani kore parables, manbu manwarlkkaykenh kunwok. Bu benmarneyolyolmi bedberre, wanjh yimeng,

³ "Kandibekka! Nakudji bininj wam kore kabbal dudjehdudjengi manmim.

⁴ Bu balhmiburriweyi kore kabbal, yikahwi manmim mankarrinj kore manbolh, wanjh mayhmayh birrimwam, birringuneng rowk, birriyakwong.

⁵ Mak yikahwi mimwarrhmerreni kore kuwarddehwardde, kore kunkulk minj manwern yuwirrinj. Wanjh manmekbe manmim werrk-werrk djordmerreni, dja kunkulk minj manwern yuwirrinj bu kanjdji wernhrawinj.

⁶ Kaluk bu dungbebmi, manmekbe mankolhde kolhderungi wanjh baldarlehmeni, kaluk kumekbekenh minj wernhdedjmadkoluyi kanjdji bu bolhdulubuyi.

⁷ Mak yikahwi manmim warrwarrhmerreni kore mikardihkardird. Kaluk benedjarrkdjordmerrinj, wanjh manbu mankardidj mankonyikonyi kolhdedjokkohmeng, dja minj manbarnem karrmeninj.

⁸ Kaluk yikahwi manbu manmim, wanjh mimwarrwarhmi kore mankulkmak. Wanjh djordmerreni dja marnburrinj manwern manme. Yikahwi wernmerrinj bu marnburrinj thirty, dja mak yikahwi manbuyika wanjh marnburrinj sixty, dja mak yikahwi one hundred."

⁹ Wanjh Jesus yawoyhwokdi, yimeng, “Bu ngurrikarme kunkanem kore ngurribekkan, wanjh kandiwokma.”

*Jesus Benbengdayhkeng Nuye Nawu Benbukkabukkani Ba Bu Kabirribur-
rkburrkbekkan Manbu Manwarlkkaykenh Kunwok Parables*

Mark 4:10-20

(Matthew 13:10-23; Luke 8:9-15)

¹⁰ Wanjh birrimirndewern birribuyika bininj birribawong Jesus. Dja ngaleng birridjarrkni nawu nuye benbukkabukkani, dja mak yikahwi nawu birribuyika bininj. Wanjh bedda birridjawam manbu manwarlkkaykenh kunwokkenh.

¹¹ Wanjh benmarneyimeng, “Ngudda wanjh God kadjare ngunbukkabukkang ngudberre yehyeng rowk yiman kawarlkkayindi bu nungkakenh nawu Kawohrn Rowk. Dja nawu birribadbuyika bininj, minj kabirriburkburrkbekkan, wanjh bedda kabirridjalbekkan bu kawarlkkayindi kunwok, manbu parable,

¹² dja ‘Bu kabirrinan kore kurobbe, wanjh minj kabirriwernhburrkburrknan kanjdji baybaywi dja bu kunwok kabirriwokbekkan, wanjh minj kabirriwernhburrkburrkbekkan. Dja bu kabirriwernhburrbun, wanjh kunu kabirrikangeborledmen ba bu God kabenmarnebgmidjan kunwarre bedberre.’” [Isaiah 6:9-10]

¹³ Wanjh Jesus benyawoyhmarneyimeng, “Yiddok, minj ngudda ngurriburkburrkbekkan mahni kunwok manbu parable? Adju. Kunubewu bu burrkyak, wanjh kunu yiddok ngurriwernhburrkburrkbekkan manbu manbuyika manwern parables? Wanjh, kandibekka.

¹⁴ Bininj nawu manmim kamimburriwe, wanjh yiman kawe kunwok manmak.

¹⁵ Kaluk manmim manbu mankarrinj kore manbolh, wanjh kabenyolyolme bininj nawu kabirribekkan kunwok, wanjh Satan nawu Namarnde duninj kamre werkwerrk kamanamang, kakan manmekbe kunwok kore kukangebeh bedberre, kore yiman warrhmeng.

¹⁶ Wanjh karohrok bu manmim manbu kawarrawarrhme kore kuwarddehwardde, makka wanjh yiman bininj nawu kabirribekkan kunwok, wanjh werkwerrk kabirriwokmarrkmang bu kunnjilngmak dorreng.

¹⁷ Kaluk bedda yiman rerrih manmim manbu mandedjmadyak, dja kabirridjalwoybukwon bu kundedjumbungkenh. Bu kunyid kabenmarnebebme dja mak bu kabindidung bininj nawu kabirriwarnyak kore God nuye kunwok, wanjh kundjalmekebe rerrih bedda kabirribawon dja kabirrimankan.

¹⁸ Mak manmim manbu warrwarrhmi kore mikardidj manbu manmirhyi, makka yiman bininj nawu kabirribekkan kunwok,

¹⁹ kaluk bu kambebmerren manbu kabenmarrkwarrewon dja mak nawu njalehnjale namakmak kondah kurorrebeh, dja mak bu kabirridjare nawern, wanjh kunu kabenbalbengwarrewon dja mak kabirribalbgmidjan. Wanjh yiman bedda minj kabirrikarme manbarnem.

²⁰ Dja manmim manbu mankarrinj kore mankulkmak, wanjh kabenyolyolme bininj nawu kabirribekkan kunwok dja bulkkidj kabirrikarme kukange bedberre, kabirrimarrkmang, wanjh bedda yiman mankolhde manbu kahwernmerren yiman kayime manmim mandjalwern, bu kamarnburren one hundred, dja mak yikahwi manbuyika wanjh marnburinj sixty, dja mak yikahwi thirty.” Kumekbe wanjh Jesus yolyolmeng.

Jesus Yolyolmeng bu Ngad Karribolkwolkankenh

Mark 4:21-25

(Luke 8:16-18)

²¹ Jesus yawoyhyimeng bedberre, “Minj nangale kawurlhke lamp bu kakurme kanjdji kore banikkin, dja mak kadjalkurme kanjdji kore balabala. Burrkyak! Dja bu nawu kawurlhke lamp, wanjh kabarnname kaddum ba bu kabolkwolkankenh.

²² Karohrok bu marneyime, yehyeng rowk nawu bolkkime kawarlkayindi, wanjh bininj kaluk kabirrinan kurobbe. Dja bolkkime minj kabirriburrbun kore kawarlkayindi, wanjh kalukburrrk kambebme kurobbe ba bininj kabirrinan.

²³ Ngudda bininj nawu ngurrikarme kunkanem, wanjh kandiwernehbekkal!”

²⁴ Dja mak Jesus benyawoyhmarneyimeng bedberre, “Ngurrinahnarri-men ba bu ngurriburrrkburrkbekkan kore ngurribekkan. Bu ngurridjare kandiwokbekkan wanjh ngurriwernehmenmenbekka warridj. Dja mak ngaye won manwern kunmayali manbu manmak.

²⁵ Bininj nawu nganmenmenbekkang, wanjh ngaye ngabukkan manwern manmakmak. Dja bininj nawu minj kadjare nganbekkan, wanjh nanu God kabimarnbun bu minj njale kayawoyhburrbun.”

Jesus Yolyolmeng bu God Kawohnan Rowk

Mark 4:26-29

²⁶ Dja mak Jesus benyawoyhmarneyimeng bedberre, “Kore God kawohnan rowk, wanjh yiman kayime bininj nawu kamimburriwe kore kukulk, wanjh kamak.

²⁷ Wanjh kunkak kamre, bu bininj kakodjkeyo, wanjh bu kunkabel kamre, wanjh karrolkan, kalukburrrk manbu manmim ngalengmandeleng kakolhdemarnburren dja kadjordmihwerren. Dja nahni bininj nawu mimburrweng, minj kaburrbun bu baleh marnburrinj kurduyimerranj.

²⁸ Manbu kukulk kamarnbun manme manwern bu djal ngalengmandeleng, mankolhde manyahwurd werck, kaluk kabaldjordmen kaddum, wanjh yerre manme kawernmerren kore kaddum.

²⁹ Kaluk bu kawernhdjolengmen, wanjh nawu bininj karradjke dja kamang manwern manme bu kayimerran kore kayiburnbunkenh.”

Jesus Yolyolmeng Manbuyika Kunwok Bu God Kawohnankenh Rowk

Mark 4:30-32

(Matthew 13:31-32; Luke 13:18-19)

³⁰ Wanjh Jesus yimeng bedberre, “Bu bukkabukkan ngudberre, ngadjare marnemulewan ngudberre yiman kayime bim ba bu ngurrimenmenbekkan kore God kawohnankenh rowk. Mah, dja manbu parable marnemulewan ba bu ngurriburrrkburrkbekkan.

³¹ Wanjh kore God kawohnankenh rowk, yiman kayime manmim manyahwurd duninj, yiman mustard manmim. Kaluk bu bininj karudjen kore kukulk, manbu mandjal mimyahwurd duninj yiman minj karohrok manbuyika manmim,

³² dja bu kawernhdjordmen, wanjh kayimerran kundulk kawernhkimukmen duninj kore manbuyika kundulk, dja kakarme manyehyende mankihkimuk, wanjh mayhmayh karedmarnbun kore mandjurlemek ngarre.”

Manbu Kunwok Manwarlkaykenh

Mark 4:33-34

(Matthew 13:34-35)

³³ Jesus munguyh benmarneyolyolmi kore bininj manbu kunwok manwarlkaykenh parables. Yolyolmeng kunwern manbu manwarlkaykenh, walakkih dja walakkih benbukkabukkani ba bu kabirrimenmenbekkan.

³⁴ Minj yolyolmeninj kore kurobbe, dja ngaleng djalyolyolmi manwarlkaykenh kunwok yiman parables. Dja ngaleng djalyolyolmi bininj nuye nawu benbukkabukkani bu bedda benbengdayhkeyi rowk bu mandjad duninj.

Jesus Mayorrkngurdheng Manmayorrkimuk

Mark 4:35-41

(Matthew 8:23-27; Luke 8:22-25)

³⁵ Bu kunmekbe kunbarnangarra, bu balngokdanj, Jesus yimeng bedberre nawu benbukkabukkani nuye, "Mah. Karridjowkke borledmikenh kore manbokimuk."

³⁶ Wanjh bindibawong bininj nawu birrimirndewern, birridjalkang Jesus dja birribalhrey kore kabbala. Dja mak birribuyika bininj birridjarrkwan manbu kabbalabubuyika.

³⁷ Wanjh kunmayorrk mankimuk benmarnebebmeng bedberre, dja kukku bobidburrinj dja bendjuhkeng bedberre. Kaluk manbu kabbala wanjh bobabobarlmi, dja darnkih birrikuyinyibmeninj.

³⁸ Jesus wanjh keyoy pila dorreng kore kabbala kurredj. Wanjh nuye nawu benbukkabukkani birridjurlhmeng birrimarneyimeng, "Nawu kanbukkabukkan! Yiddok minj kanbidyikarme ngadberre, dja wardi karringakme!"

³⁹ Wanjh Jesus dolkkang, dja duy kunmayorrk dja mak kukku bimarnewokdanginj, "Yingurdmerrimen dja mak yidjaldin!" Wanjh kunu djalngurdmerrinj rowk, minj njale mak wohrokayi.

⁴⁰ Dja nungka benmarneyimeng nawu benbukkabukkani, "Njalekenh ngudda ngurrikele? Yiddok ngudda minj kandiwoybukwon ngaye?"

⁴¹ Wanjh bedda birrikeleminj duninj, dja mak birrimayahmeng. Birrimarneyimerrinj, "Adju! Kaluk nangale nahn bininj nawu kawokrayekwon kunmayorrk dja mak kukku, wanjh nungka kabenewokmarrkmang?"

5

Jesus Benkukburriweng Nawern Namalngwarre Duninj

Mark 5:1-20

(Matthew 8:28-34; Luke 8:26-39)

¹ Wanjh birribolkmey borledmikenh manbokimuk kore kunred bedberre nawu Gerasene* bininj.

² Bu nungka Jesus balkoluy kore kabbalabeh, wanjh kunmekbe kunu birrabkeng nakudji bininj nawu djahdjalni kore midjmirnderri kuwarderurrkwernni. Dja namalngwarre duninj nawern birrikarmi namekbe bininj.

³ Wanjh namekbe bininj ni munguyh kore kunred manbu midjmirnderri. Minj nangale mak bikukdukkayinj nawu wirlmurrng birrirohrokmi dja larrk.

⁴ Birrirohrokmi kunwernhkah. Birridukkadukkani nawu wirlmurrng chain, kore kubid dja kurrenge nuye, wanjh nungka bakbakkeyi rowk, dja minj nangale bininj bingurdkemeninj, dja nungka wernhdulkarrekimukni duninj.

* 5:1 Yikahi bindingeybom "nawu Gadarenes" dja "nawu Gergasenes".

⁵ Kaluk nungka renginehrey kunkakkuyeng dja kunbarnangarrakuyeng kore kumidjwern, dja mak kore mandudulum kaddum. Wanjh nungka munguyh djadjalkayhmirey, dja mak kanjyilkburreni kunwarddeyi.

⁶ Wanjh nungka binang Jesus djarrehbeh, dja rlobmeng darnkih, bimarnebarddurrukkurlihdanj kore kumirrk nuye.

⁷ Dja nungka wernkih wokdanginj, yimeng, "Njalekenh ngudda yimwamkenh, wardi kanhwarrewon, ngudda Jesus nawu Beywurd nuye God nawu Kawernhwohrnan Duninj? Ngudda yiwokkurrmerrimen kore God bu ngudda minj kanmarnbun bu ngadjakbekkan."

⁸ Kunmekbekenh kunu bimarneyimeng dja Jesus korroko biwokrayekwong, "Ngudda nawu yimalngwarre duninj, yimbemmen wanjh yibawo nahni bininj!"

⁹ Wanjh Jesus bidjawam, "Ngudda baleh yingeyyo?" Dja biwokmey, yimeng, "Ngaye ngangeyyo 'Nawu Ngarriwernkenh', dja mak ngarridjalwern."

¹⁰ Dja wanjh nahni nawern namalngwarre duninj birriwernhdjawam Jesus bu minj benmunkewemeninj kore djarreh kubolkbuyika.

¹¹ Kaluk kumekbe kunred bikkibikki mirnderri duninj birridalknguni kore mandulum.

¹² Dja nawu birrimalngwarre duninj birriwernhdjawam Jesus, birri-marneyimeng, "Kab kanbawo dja kanmunkewemen kore bikkibikki ba bu ngarrbenmarnengimerren."

¹³ Wanjh Jesus bendjalbawong bu birribebmerrinj birriwam dja bindimarnengimeng nawu bikkibikki. Wanjh birriwern bik birrirobmerinj birrimankarrinj kore kungarlkwarre, birringakmeng kore kukukku. Kaluk bikkibikki nawu birrimirndewernni 2000.

¹⁴ Yikahwi bininj nawu birrinahnani bikkibikki birrinang bu baleh kurduyimerranj, wanjh bedda birrikelerlobmerrinj, bindimarnemulewam bedberre nawu kumekbe kubolkkimuk birrihni, dja mak nawu birrihni kore kabbal kore manme birrihdudjengi birrihni. Wanjh birridjalwern bininj birriwam bu kabirrinan kore kurduyimerranj.

¹⁵ Wanjh bindimarnebebmeng Jesus dja bininj, nawu nawern namarnde birrimirndebawong, dja nungka ni kore Jesus nuye kurrenge, kaluk djongbuyindi kunmadj dja warridj bengmakminj, wanjh bedda birrikeleminj.

¹⁶ Dja bininj nawu birridarrkidnang Jesus bimarnekurduyimeng namekbe bininj, dja mak baleh kurduyimerranj nawu bikkibikki bedberre, wanjh bindimarnemulewam bininj bedberre nawu birribebmeng.

¹⁷ Wanjh kunu birriwern birrimarrkdjawam Jesus bu kabolkbawon kubolkkimuk bedberre.

¹⁸ Wanjh kunu Jesus bidbom kore kabala dja nahni bininj nawu namalngwarre birribawong bihdjawani Jesus, dja djareni benedjarrkrawinj.

¹⁹ Kaluk Jesus birrabkeng, dja bimarneyimeng, "Yirrunde kured ke, dja yibenmarneyimen bininj ke, bu baleh kunmak Nawu Kawohrnan ngunmarnekurduyimeng bu nungka ngundjalwernhkongibom."

²⁰ Wanjh nawu bininj wam benmarneyolyolmi bininj rowk nawu birrihni kore kubolkwern ngarre Decapolis*. Benmarneyolyolmi bu baleh kunwernmak Jesus bimarnekurduyimeng. Wanjh birriwern bininj rowk birrimarnekegabharrmeng duninj.

† 5:20 Decapolis kamenyime "ten towns".

Jesus Birrolkkayhweng Ngalkudji Ngalyawk Dja Mak Bimarnbom Daluk Ngalbu Kurlbahkurlbarey

Mark 5:21-43

(Matthew 9:18-26; Luke 8:40-56)

²¹ Kaluk Jesus yawoyhdjowkkeng manbokimuk dja bu bolkmey borledmikenh, wanjh birrimarnemirndemornnamerrinj nuye. Nungka dingihdi kore darnkih kukadjid.

²² Kaluk nakudji bininj bimarnebebmeng. Nungka ngeyyoy Jairus, dja mak wohrnani kunrurrk manbu yiwarrudjkenh. Bu nungka binang Jesus, wanjh bimarnemankang kore kurrenge nuye.

²³ Dja bidjalwernhmarrkdjawam Jesus, yimeng, "Ngaye ngardduk ngalbeywurd ngalyahwurd kadjakkimuk duninh, dja darnkih karrownen! Yimray ba yibidkurmerren ngalenggarre bu kamakmen dja mak kar-rarrkidmen!"

²⁴ Wanjh Jesus benedjarrkwam Jairus.

Kaluk birrimirndewernni birrimunkekadjungu dja mak birrimirndedjokkohmeng Jesus nuye.

²⁵ Wanjh ngalkudji daluk di, ngalbu kurlbahkurlbarey munguyh bu mandjewk nawern twelve.

²⁶ Ngaleng wanjh rey kore nawern doctors nawu bedda birriwarrewoni kore benkukwong nawern kunwardde, dja kukykwong rowk, dja bonj, djal bekkarrinj bu minj makmenin, dja ngalengman djalwarrewarreni.

²⁷ Kaluk biyingkihwobekang Jesus, wanjh bimarnebebmeng kubodmebeh nuye kore birrimirndewern bininj, dja djalwohkarrmeng nawu manburra nakuyeng nuye nawu Jesus djongbuhdjongbuyindi.

²⁸ Ngaleng burrbuburrbuni, "Wardi bu ngadjalkarrme nuye kunmadj, wanjh ngamakmen."

²⁹ Wanjh kundjalburrikudji rerrih bimarneyakminj ngarre bu kurlbahkurlbarey. Dja kukbekkarrinj kore kunburrk bu djalwernhmakminj kore djakbekkabekkani.

³⁰ Wanjh Jesus warridj kundjalmekbe rerrih bekkarrinj bu kundulkarre nuye bebmeng, wanjh borledmeng, yimeng bedberre nawu birrimirnderri, "Adju. Nangale nanu nganmadjkarrmeng?"

³¹ Wanjh nawu nuye benbukabukkani birriyimeng, "Ngayh, yibenmirndena nawu ngundidjokkohme! Dja njalekenh yiyimeng, 'Nangale ngankarrmeng?' "

³² Dja Jesus bolknani bu bolkyawani nangale nawu bimadjkarrmeng.

³³ Wanjh ngalmeke daluk, bu bekkarrinj bimarnekurduyimerranj, ngaleng kukdeldelmi dja mak bimarnekeleminj, bu bimarnemankang kore kurrenge nuye Jesus, dja wanjh bimarnemulewarrinj kore kunwoybuk.

³⁴ Wanjh Jesus bimarneyimeng, "Korlonj, ngudda wanjh kanwoybukwong, wanjh kunmekbekenh kunu yimakminj. Mah, yiray kunmodmikenh dorreng, bu yidjalmaknin rowk kore kundjak yikarmi."

³⁵ Bu Jesus balwokdi, wanjh bininj birrimbebmeng nawu birrihni kore kurrambalk nuye nawu wohrnawohnani kunrurrk manbu yiwarrudjkenh, wanjh birrimarneyimeng Jairus, "Ngalbu ngalbeywurd ke, wanjh bonj, korroko doweng. Wanjh yidjalbawo Jesus, yuwn bu munguyh yidjurrkan nawu kanbukabukkan."

³⁶ Dja Jesus bendjalwokbawong kore birrimarneyimi Jairus, dja Jesus bimarneyimeng, "Yuwn yikele. Kandjalwoybukwo."

³⁷ Wanjh benkang Peter dja James, dja John nawu James benedanginj. Bendengkeng nawu birribuyika bininj, bu bedda bindibawong birriwam.

³⁸ Bu birribebmeng kururk nuye Jairus, wanjh Jesus benbekkang bininj nawu kumekbe birrihni birridjalnjilngwarreni, birrinalkbuni dja birridjalkayhmi wernkih duninjh.

³⁹ Wanjh Jesus ngimeng kurrambalk, wanjh benmarneyimeng, “Njalekenh ngurrinjilngwarworren, dja mak ngurrinalkbun? Ngahli wurdyaw minj dowimeninj, dja ngaleng kadjalkodjkeyo.”

⁴⁰ Wanjh bedda kunu birridjekmiwong.

Dja Jesus benbekkeng rowk kore kuberrkkah, dja benkang nawu kornkumo, ngalbadjan dja nawu benbukkabukkani nuye, wanjh birringimeng kururk kore ngalmekbe wurdyaw yongohyoy.

⁴¹ Wanjh bibidkarmeng, dja bimarneyimeng, “Talitha kum!” Mahni kunwok kamenyime, “Ngudda ngalbu wurdyaw, ngaye marneyime bu yirrolkka!”

⁴² Wanjh ngaleng dolkkang kundjalmekbe rerrih, dja wohrewohrey kundenge ngarre. Ngaleng mandjewk ngarreni, wanjh twelve bu yimerranj. Wanjh kundjalmekbe rerrih birridjalkangebarrhmeng rowk.

⁴³ Wanjh Jesus benwokrayekwoni duninjh bu minj nangale bininj kabiwokmulewan kore birriwern kabirriwobekkan. Dja mak benmarneyimeng bu kabirriwon ngalmekbe wurdyaw manme ba kangun.

6

Bininj Birrimarnewarnyakni Jesus Kore Kunred Nuye Nazareth

Mark 6:1-6

(Matthew 13:53-58; Luke 4:16-30)

¹ Wanjh Jesus bolkbawong kumekbe dja kumwam kore kunred nuye. Kaluk nawu benbukkabukkani nuye birriwam nungka dorrengh.

² Bu kunbarnangarra manbu Sabbath, wanjh dedjingmangi benhbukkabukkani kore kunururk manbu yiwarrudjkenh. Wanjh birriwern nawu birribekkkang birrikangebarrhmi dja mak birrimarneyimerreni, “Balehbeh nahni bininj kahmang kunwok manbu karribekkan? Nangale bimayaliwong bu yimankek kawernhburrbun rowk? Dja mak balehbeh kundulkarre bu kahkurduyime kubid nuye kunwernhmak duninjh?”

³ Dja nungka nakka wanjh carpenter kadberre! Nungka wanjh ngalbadjan ngalka Mary, mak nawu birridangerrinj James, Jose, Judas dja Simon. Dja mak nawu ngaldahdaluk nuye nakka karrihni!” Wanjh bedda birrimarnekdjdjohmi nuye.

⁴ Wanjh Jesus benmarneyimeng, “Kandibekka. Nangale bininj nawu prophet, nakka wanjh bininj kabirrikimang kore kubolkwern. Dja kore nungan nuye kunred, nakka kabirridung, minj kabirrikimang nawu nuye namud dja mak nawu kabirridjarrkni!”

⁵ Wanjh nungka minj mak durrkmirriwirrinj manbu kundulkarre dorrengh. Bendjalkarrmi kubid nuye yikahwi nawu birridulkkihni bu benmarnbuni kumekke kunred. Djal bonj.

⁶ Kaluk Jesus kangebarrhmeng bu bedda minj birriwoybukwoyinj kumekke kore Nazareth.

Wanjh nungka regehrey kudjalbolkwern kore kubolkbubuyika bu benhbukkani.

Jesus Benmunkeweng Twelve Bininj Nawu Benbukkabukkani

Mark 6:7-13

(Matthew 10:1,5-15; Luke 9:1-6)

7 Wanjh Jesus benkayhmeng nuye twelve nawu benbukkabukkani, dja benwong kundulkarre ba kabirriwe namalngwarre bedberre nawu kabirrihkarrme. Benmunkeweng bu birriwam bokenhbokenh.

8 Kaluk Jesus benbengdayhkeng, yimeng, "Yuwn njale ngurrikan kore ngurrire. Ngurridjalka kunkarndudj, dja minj njale mak ngurrikan. Yuwn ngurriodkan buriddi, dja mak baladji, yuwn mak ngurrikukkan nawu kunwardde kore ngurringadmodukkayindi.

9 Mah, ngurridengedjongburrimen kundengekenh, dja yuwn mak ngurrimadjan bokenh nawu ngurridjongburrenkenh."

10 Dja mak benmarneyimeng, "Bu ngurribembe kore kunred, wanjh bu ngurringalke bininj nawu ngunkimang, kore kunrurrk nuye ngurringimen, kumekbe manrurrkkudjiwi ngurridjalyuwn, kalukburrk ngurribolkbawon.

11 Dja bu ngurribembe kore kunred, dja bedda nawu kabirrihni kunmekbe minj nangale ngunkimang dja minj ngundibekkan, wanjh bu kunmekbe kunred ngurribolkbawon, wanjh ngurridengedjulngwerrimen ba kundjulng ngarre kunmekbe kunred ngundengebawon. Kunmekbe kunu ngurrikurduyimen ba ngurrbenmarnemulewan bininj bu kunwoy-buk dorreng."

12 Wanjh twelve nawu benbukkabukkani nuye birriwam bindimarney-olyolmi bu bindimarneyimi, "Ngurriwarnyakkumulewarrimen!"

13 Wanjh bedda bindikukburriweyi nawern namarnde nawu bininj birrikarmi, dja mak bindimarnbuni birriwern nawu birridulkkihni bu bindidjalkodjdjuhkeyi manbu oil kunkalkkid dorreng."

King Herod Bibom John Nawu Benkukdjuhkeyi

Mark 6:14-29

(Matthew 14:1-12; Luke 9:7-9)

14 Kaluk bu Herod nawu kingni, nungka wobekkanng rowk bu baleh Jesus kurduhkurduyimi kundulkarre dorreng, dja birriwern bininj birringey-burrbom Jesus. Yikahwi birriyimi John yawoyhmimbiminj kumidjbeh, kumekbekenh kunu nungka kahkarrme kundulkarre kore kakurduyime kunwern.

15 Birribuyika mak birriyimi, "Jesus nungka wanjh Elijah!" Dja mak birribadbuyika birriyimi bu nungka wanjh prophet yiman kayime nawu korroko birriwokmulewani God.

16 Dja wanjh Herod biwobekkanng Jesus, nungan yimeng, "Nungka nawu John yawoyhmimbiminj, dja nawu ngardduk bininj birrikomdjobkeng!"

17 Kaluk bu kerrngehkenhni Herod nungan wanjh benmunkeweng bininj bu birrimey John dja birridukkang wanjh birridangbalhmeng rurrkkerurrkkendi kore prison. Herod kunmekbe kurduyimeng bu ngalmekbekenh daluk Herodias, ngalbu ngalbininjjobeng nuyeni Philip, nawu Herod benedanginj. Dja Herod bimey Herodias wanjh benemarrinj.

18 Kaluk John bihmarneyimi Herod, "Kunukka minj kunmak bu yimey ngalbu ngalbininjjobeng nuye nawu ngunedanginj, dja yikarrebakkeng."

19 Kunmekbekenh kunu ngalbu Herodias birrunji John, dja djareni birribuyinj. Dja burrkyak, minj marnbuyinj Herod bu bimarnekurduyimeninj.

20 Dja kunu Herod bimarnekeleni John dja binahnani, dja yimi bu John nungka wanjh namak dja God nuye bininj. Kaluk Herod bibekkani John bu wokdanj, wanjh kodjmayahmi duninj. Dja bonj, djaldjareni bibekkani munguyh.

21 Wanjh kumwam ngarre kunbarnangarra bu John karrowenkenh. Kaluk kunmekbe kurduyimerranj bu Herod nuyeni birthday. Wanjh

benmarnemarnbom mulil mankimuk. Manme kurrmeng bedberre birrikihkimuk nawu kabirrihwohrnawohrn government, dja nawu kabirrihwohrnan kore djamun, dja nawu birringeykihkimuk bininj kore Galileebeh.

²² Wanjh ngalyawk ngalbu Herodias biyawmey kumwam kumekbe dja borrkeng bedberre. Kaluk bu ngaleng borrkeng, Herod dja nawu manme birrihdjarrknguni, birrinjilngmakminj. Wanjh King Herod bimarneyimeng ngalmekbe ngalyawk, "Ngaye won njalehnjale nawu yidjare. Wanjh kandjawa!"

²³ Kaluk djalwokkurrmerrinj bu bimarneyimeng ngalbu ngalyawk, "Njalehnjale nawu kandjawan nakka wanjh won. Mak won ngardduk kore ngawohrnan bu ngarrbolklarlmirran kunred!"

²⁴ Wanjh ngalbu ngalyawk bebmeng, wam kore ngalbadjan bidjawam, "Kab njale ngadjawan nawu king nganwon?" Wanjh ngalbu ngalbadjan yimeng, "Yidjawa ngunwon kunkodj nuye John nawu benhkukdjuhkeyi."

²⁵ Wanjh ngalmekbe ngalyawk werkkwerrk durndi kore king dja bimarneyimeng, "Ngadjare kanwon kunkodj nuye John nawu benhkukdjuhkeyi. Bolkkime kanwo ngardduk kore ngalngbalabala."

²⁶ Wanjh nawu king wernhnjilngwarreminj. Dja nungka wokkurrmerrinj ngaleng ngarre ngalbu ngalyawk bu kabiwon njale nawu kadjare. Mak nawu bininj kumekbe birrihdjarrknguni manme birribekkang bu nungka wokkurrmerrinj. Wanjh minj mak djareniwirrinj bu bibaldahmeninj ngalbu ngalyawk bu bidjawam.

²⁷ Kaluk werkkwerrk bimunkeweng nakudji djamun bu kabikodjkan nawu John. Wanjh nawu djamun wam bibom John kore rurrkkendi.

²⁸ Wanjh bimkodjkan dja bikodjdahkendoy kore ngalngbalabala dja biwong ngalmekbe ngalyawk, wanjh ngaleng kang biwong ngalbadjan ngaleng ngarre.

²⁹ Kaluk nawu John nuyeni nawu benbukkabukkani birriwobekkan bu baleh kurduyimerranj nuye. Wanjh birrimwam birrimey kunburrrk nuye dja birrikang birrikududji kore kuwardderurrk.

Jesus Benworrkmiwong 5000 Bininj

Mark 6:30-44

(Matthew 14:13-21; Luke 9:10-17; John 6:1-14)

³⁰ Kaluk bininj nawu Jesus benmunkeweng, wanjh birrimdurndi kore Jesus birridjarrkdi, dja wanjh birrimarnemulewani kore birrihkurduyimi bu bindihbukkani kunwok nuye.

³¹ Wanjh birrimirndewern bininj birrimrey birribalhrey Jesus dja nawu benbukkabukkani nuye dorrengh. Minj manme mak birringuyi dja bindidandjanganang. Kaluk benmarneyimeng, "Ngurrimray, karrire kore minj nangale karri kumekbe ba bu karringehme."

³² Wanjh birribidbom kabbala dja birriwam birribolkmey birridjalkudji kore minj nangale diwirrinj.

³³ Dja bonj, birriwern bininj bindinang bu birribolkbawong wanjh bindiburrbuni. Kaluk birriwern bininj nawu kubolkbubuyikabeh birri-lobmerrinj kurrenge kore Jesus rengehrey. Wanjh birribolkmey werkk, rerre Jesus dja nuye bininj wanjh birribalbebmeng.

³⁴ Kaluk bu Jesus bidbom kore karrkad nungka benmirndenang bininj birriwern birriyingkihmadbuni kumekbe, wanjh benkongibom, kaluk bennani yiman kayime mayh rerrih nawu sheep rerrih dja nawu shepherd minj birrikarmeninj. Wanjh kumekbe manwern dedjingmey benbukkabukkani bedberre.

³⁵ Mak ngokko wanjh ngokdanj, Jesus nuye nawu benbukkabukkani birrimyikang dja birrimarneyimeng, "Minj nangale mak kondah kayo. Dja ngokko wanjh kahngokdan.

³⁶ Dja yibenmunkewemen birriray ba bu kabirrire kore kabbal dja mak kore kururkmirnderri ba bu manme kabirribayahme dja kabirrikukkarme nawu kunwardde bedberre."

³⁷ Wanjh Jesus benwokmey, yimeng, "Ngudda wanjh, ngurrbenwo manme kabirringun." Wanjh bedda birrimarneyimeng, "Minj ngarribayahme manwern manme ba bu ngarrbenwon rowk nahni nawu bininj! Dja minj ngarrikukkarme nadjalwern kunwardde. Bu ngad ngarridurrkmirriwirrinj bu dird eight, wanjh ngarrikukmayi*, dja bonj."

³⁸ Wanjh Jesus bendjawam, "Kandimarneyimen baleh kayime manbu manlod kandidjdjawa ngurrihkarmme bu bolkkime? Wardi ngurriay ngurrinan." Kaluk bu birrirohromeng, wanjh birrimarneyimeng, "Ngarrihkarmme kunbidkudji kandidjdjawa dja djenj bokenh."

³⁹ Wanjh Jesus benmarneyimeng nuye nawu benbukkabukkani bu bindibengdayhkeng bininj rowk bu kabirriyerrkan kore mandalkmak kore birribebbehmokenhni.

⁴⁰ Wanjh birriyerrkarrinj rowk dja birrini bu birribebbehmokenhni mak bindirohrokmi 50 dja 100.

⁴¹ Wanjh Jesus mey nawu djenj dja manlod buriddi, wanjh bolknang kaddum dja bimanjibom Ngabbard God bu manmekbekenh manme. Wanjh rerre lodbakkeng wanjh benwong nuye nawu benbukkabukkani ba bindibalwong bininj nawu kumekbe birrihmirnden. Mak karohrok kurduyimeng ngarre nawu djenj.

⁴² Wanjh birrimekbe bininj birriwern wanjh birringuneng birriworrk-minj rowk.

⁴³ Wanjh nawu benbukkabukkani birridahkendoy twelve kore kundjabarrk yikahwi buriddi dja djenj manbu birriwarrhkeng bu birrihguni.

⁴⁴ Kaluk nawu birrimekbe bininj birrihmirnderri nakka bindirohromeng 5000 binihbininj nawu manme birringuneng.

Jesus Rengehrey Kurrenge Bomelmelmi Kubokehkekeb Manbokimuk
Mark 6:45-52

(Matthew 14:22-23; John 6:15-21)

⁴⁵ Wanjh kundjalmekeberrih Jesus benmarneyimeng nawu benbukkabukkani nuye bu kabirribidbun kore kabbala wanjh kabirrimarne-dokme borledmikenh kore Bethsaida. Dja nungka kaluk rerre kare. Nungka wanjh bolkmaddi rerre dja kabenmunkewe nawu bininj birriwern birrihmirnderri.

⁴⁶ Kaluk bu benmunkeweng birridokmerrinj kured wanjh nungka wam kore manduluhdulum bu karri yiwarrudj.

⁴⁷ Kaluk kunmekbe kukak yimerranj, nawu benbukkabukkani nuye birrihdahkendi manbu kabbala, wanjh kuburldjarn birrihdi kore manbokimuk. Dja mak nawu Jesus nakka wanjh nadjalkudji dingihdi kore karrakdah.

⁴⁸ Wanjh nungka bennang nawu benbukkabukkani nuye bu birrihkar-rikmi wernkih dja kunmayorrk manbu benhdurndiweyi. Kaluk bu djarreh kumhkabelni Jesus benyikang regehrey bomelmelmi kore kubokehkekeb manbokimuk ngarre. Wanjh djahdjalwam benyurrhyur- rhkeyi nawu kore kabbala birrihbarndi.

* 6:37 Kunubewu \$50000.

⁴⁹ Kaluk nawu benbukkabukkani nuye birrinang regehrey kore kubokehkekeb, wanjh bedda birriyimeng yimankek nungka mamni dja mak kunwoyik, wanjh bedda birrikelekayhmeng.

⁵⁰ Kaluk bu birrinang, bedda birrikeleminj duninjh. Wanjh kundjalburrikudji Jesus wokdanj, yimeng, "Ngaye! Ngurrikangerayeknin! Dja yuwn bu ngurrikele!"

⁵¹ Wanjh Jesus bidbom kore kabbala birrihdjarrkbarndi. Dja manbu kunmayorrk makka wanjh djalngurdmerrinj. Wanjh nawu benbukkabukkani wanjh birrikangebarrhmeng bulkkidj duninjh.

⁵² Kaluk bu birrikurdunang Jesus benwong manme dja benworrkmiwong 5000 bininj, wanjh minj birriburrbuyi bu baleh menmenyimi. Dja minj birrimayalimayi.

Jesus Benmarnbuni Nawu Birridulkkihoy kore Gennesaret
Mark 6:53-56

(Matthew 14:34-36)

⁵³ Bu kunmekbe bolkyimi birridjowkkeng borledmikenh, wanjh birribidbom kukadjud ngarre Gennesaret. Wanjh kabbala kumekbe birridukkang.

⁵⁴ Wanjh bu birrimkoluy kore kabbalabeh, bininj nawu kumekkebeb birrinang Jesus wanjh werck bedda yikahwi birrikuburrknang nungka.

⁵⁵ Wanjh birrirobmerreni kore kubolkkimuk kumekbe bu bindimangi bindimkani manbalabbala nawu birriyoy birridulkkihdulkkihni. Bindikani kore Jesus nawu birriwobekgang bu baleh yarrkka nungka rey.

⁵⁶ Jesus nungka regehrey kore kubolkkihkimuk dja kubolkyahyahwurd dja mak rey kabbal kumekbe kore kubolkkudji. Dja mak baleh rey, wanjh bindimdjalikani munguyh nawu birridulkkihni kore bininj nawu kabirribayahme njalehnjale. Kaluk birridjaldjareni duninjh bu birrimadjkarmmi nuye kunmadj kore kurrik ngarre. Wanjh nawu birrimadjkarmmi, bedda wanjh birridjalmakmeni rowk.

7

Njale Kanmarnbun Ngad Bininj Bu Karriyimerran Karriwarre Bininj?
Mark 7:1-23

(Matthew 15:1-20)

¹ Yikahwi Pharisees dja nawu bindibukkabukkani mankarre, wanjh birrimdolkhang kore Jerusalem dja birrimornnamerrinj nuye Jesus.

² Kumekbe bindinang yikahwi nawu benbukkabukkani Jesus nuye bu bedda birribidburlerreni bu birringuni manme. Bu kuhni kahyime minj birribidbele wanjh kunukka minj birribiddjirridjburrimeninj kore Pharisees birrikarremarnbuni bedberre bininj bu kunmekbe kabirrikurduyime.

³ Kaluk nawu Pharisees dja mak birriwern bininj nawu Jews minj manme kabirringun bu minj kabirribiddjirridjburren werck kore mankarre yingkihiyoy manbu mawahmawah bedberre birrikarremarnbom nawu birriyungkini birrihni.

⁴ Dja mak bu kabirribayahme njalenjale kore bininj kabirriweykaweykan, wanjh minj kabirringun dja kabirridjirridjbun werck kore bedman kabirriyimowon. Dja mak kabirrikadjung mankarre kore mawahmawah bedberre bu kunkare birrihkurduyimi. Mak kunmekbe yerreh kabirrikurduyime bu kabirringalngdjirridjbun banikkin, djabirlana dja njalehnjale, dja mak ngalngbalabala kore kabirriyerrkankeh bu kabirringun.

⁵ Wanjh kunmekbekenh kunu nawu Pharisees dja nawu mankarre bindibukkabukkani ngarre birrimarneyimeng Jesus, "Nawu ngudda ke yibenbukkabukkan minj mankarre kabirrikadjung kore mawahmawah kadberre ngandiwong. Bedda kabirringun manme werrek bu birribid-burlerri. Kaluk njalekenh kuhni kabirrihkurduyime?"

⁶ Wanjh Jesus benwokmey yimeng, "Ngudda nawu ngurridjalkurrehkurren! Isaiah wanjh mandjad yimeng bu mahni kunwok nguningkihyolyolmeng ngudberre. Bu nungka bimbom yimeng, 'God yimeng, "Nahni bininj ngandimarneyime kunmak bu kunwokwi bedberre. Dja kunkange bedberre nakka djarreh kabirrihdi ngardduk.

⁷ Bu ngandimarnebodan, nakka bedda yiman ngandidjalmalehmaleh-won. Dja bininjkenh mankarre kabirridjalmarrkmang dja mak kabindibukkabukkankenh." ' Kumekbe wanjh Isaiah bimbom." [Isaiah 29:13]

⁸ Dja mak Jesus yimeng, "Ngudda nawu, ngurridjalbawong God nuye mankarre. Dja ngaleng ngurridjalkarme manbu kore djal bininjkenh kabirrikurduyime.

⁹ Ngudda yimankek ngurriyime ngurrimak bu ngurriborrkwan God nuye kunwok ba bu ngurrikadjung manbu ngudberrekoh kore ngurrihyolyolme!

¹⁰ Ngurriburrbun bu Moses yimeng, 'Ngurrbenbenewokmarrkma ngalbadjan dja kornkumo.' Mak kuhni Moses yimeng, 'Nangale nawu kayime kunwarre berrewoneng ngalbadjan dja kornkumo, nakka wanjh birriwern bininj kabirribun karrowen.' [Exodus 20:12; 21:7]

¹¹ Dja ngaleng ngudda nawu Pharisees ngurribukkabukkan bininj bu kahyime nuye ngalbadjan dja kornkumo, 'Ngaye wanjh benbenebidyikarmeninj ngurrewoneng. Dja mak benbenewoyinj nawu namakmak, wanjh nakka God nuye, dja minj benbenewon.'

¹² Ngudda kunu ngurridahme namekbe bininj bu kakurduyime kunmak berrewoneng ngalbadjan dja kornkumo nuye.

¹³ Ngudda ngurrbenhbukkabukkan bu minj kabirrimarrkmang kore God yimeng. Ngudda ngurrbenbukkan manbu ngurrikarremarnbom ngudberre, dja mak ngurrbenwon. Mak ngudda kunwern ngurridjalkurduyime."

¹⁴ Wanjh Jesus benyawoyhkayhmeng nawu bininj birrimirnderri kore nungka, dja yimeng, "Kandibekka ngaye dja ngurrimayalibayhmen kore ngahyime ngudberre.

¹⁵⁻¹⁶ Njale kabimarnbun bininj bu kayimerran nawarre? Minj njale kangun kore kuberrkkah kabimarnbun bu nawarre. Dja ngaleng bininj rowk kabirridjaljdare kunwarre, wanjh kunu kabirrimarnburren bu minj birrimak bininj!"

¹⁷ Wanjh Jesus benmirndebawong dja ngimeng kore kururk. Kaluk nawu benbukkabukkani nuye wanjh birridjawam manbu manmekbekenh manwarlkaykenh kunwok kore yolyolmeng.

¹⁸ Wanjh Jesus yimeng, "Yiddok ngudda ngurrihdjalmayaliyak munguyh? Wanjh ngurriburrbun bu njale kangimen kore bininj bu kuberrkkah wanjh minj kabimarnbun kayimerran nawarre bininj.

¹⁹ Kaluk manme minj kare kore bininj nuye kukange, dja makka kare kore kunjam, wanjh kabalbebme kore kuburkbeh nuye." (Kuhni bu Jesus yimeng wanjh kunukka menyimeng bu manme manbubuyika, wanjh kamak bu bininj kabirringun.)

²⁰ Mak Jesus yimeng, "Njalehnjale nawu kambebme kore bininjbeh, namekbe wanjh kabimarnbun bu nawarre bininj.

12-22 Kaluk namekbe nawu njalehnjale nawarrehwarre karredjing-mang kore kukange nuye bininj, kore kukodjkulu nuye kaburrbun kunwarrehwarre, kayimerran nawu kadjare kunwarre kayime kore kundjarekenh, dja kore dedjdjorlkwernkenh, dja mak kayimerran namrndeji, dja mak kadjare daluk dja bininj kabenedjirdmarrenkenh, dja mak kabirridedjwarlahmen, dja mak kayidwernmen, dja mak kakurren, dja mak kayemeyakmen, dja mak minj kabirriweykan njalehnjale, dja mak kabimarnekowe, dja mak kawernhkimukworren, dja mak kadjalmayaliwarremen.

23 Wanjh kunwarrehwarre rowk kamdolckkan kore bininj nuye kukange nawu kamarnburren bu kayimerran nawarre bininj kore mankarrekenh."

Jesus Bidiyikarmeng Daluk Ngalbu Minj Jewniwirrinj

Mark 7:24-30

(Matthew 15:21-28)

24 Wanjh Jesus kumekbe bolkbawong dja wam kore kunred darnkih Tyre. Wanjh wam ngimeng kore kurrambalkkudji, dja minj mak djareniwirrinj bu nangale burrbuyi bu nungka kumekbe dingihni. Kaluk werkkwerkk birringalkeng nawu birrihni.

25 Kaluk ngalkudji daluk biwobekkan bu Jesus nungka kumekbe ningihni. Kaluk ngalyaw ngaleng ngarre namalngwarre nawu bihkarmi. Wanjh werkkwerkk ngalmekbe daluk kumwam kundjalmekbe rerrih kore Jesus dja mankang kurrenge nuye.

26 Kaluk ngalmekbe daluk minj ngalka Jewniwirrinj. Ngalka wanjh Greekni, danginj kore Phoenicia, kore kubolkkimuk Syria. Wanjh bimarrkdjawam Jesus bu kawe namekbe namarnde nawu bihbongkarmi ngalyaw ngaleng ngarre.

27 Wanjh Jesus bimarneyimeng ngalmekbe daluk, "Aba, burrkyak. Minj bidiyikarme. Kuhni wanjh ngaye ngabenbidiyikarme werkk wurdwurd nawu Israelbeh, yiman kayime ngabenworrkmiwon bedberre. Minj kamak bu ngaye ngabenmarnekan bedberre manme dja ngadjalburriwe kore duruk kabirringun!"

28 Wanjh ngalbu daluk biwokmey, yimeng, "Nawu yiwohrnan, kunukka yiyimeng bu kunwoybuk, ngudda yiyime yimankek ngaye duruk rerrih, dja ngaleng nawu duruk kabirrihndi kore kanjdji table wanjh nakka kabirringun kundjulng manme manbu wurdwurd kabirriwarrrhke!"

29 Wanjh Jesus biwokmey, yimeng, "Manmekbe kore yiyimeng, makka wanjh manmak kunwok. Dja kunmekbekenh yiray, dja nawu namarnde bihbongkarmi ngalbu ngudda ke ngalyaw, wanjh bibawong."

30 Wanjh ngalbu daluk dokmeng kured dja bingalkeng ngalyaw ngaleng ngarre yoy kore kunmadj, dja nawu namarnde yakminj.

Jesus Kurdumakni Bu Bimarnbom Nawu Bengwarrni Bininj

Mark 7:31-37

31 Wanjh Jesus bolkbawong kumekbe kore kunred darnkih kore Tyre dja ngimeng kore Sidon balwam kanjdji kore manbokimuk manbu Galilee, wanjh balwohngimeng kore kubolkkimuk bolkngeyyoy Decapolis*.

32 Kaluk bu kumekbe ningihni, yikahwi bininj birrimkang nakudji nawu bengwarrni dja mak minj wokdiwirrinj bulkkidj. Wanjh nawu birrimkang birrimarrkdjawam Jesus bu kabimarnebidkurmerren nuye.

* 7:31 Decapolis kameniyime "ten towns".

³³ Wanjh Jesus bimey namekbe bininj dja benebalwam djarrehkah dja bindibawong nawu kumirnde kumekbe birrihdi. Wanjh Jesus bidkurrmerinj kore namekbe bininj nuye kukanem, dja mak bidnunjhmerinj dja bidkurrmerinj kore kudjen nuye nawu bininj.

³⁴ Wanjh Jesus bolknang kaddum kore heaven dja ngolekdurkmarrinj, wanjh yimeng, "Ephphatha!" (Kunukka kamenyime, "Yirrangmarrhmiray.")

³⁵ Wanjh kundjalmekbe rerrih namekbe bininj kanemmakminj, dja benbekkang mak wokdanginj kamak bu djenmakminj.

³⁶ Wanjh Jesus benwokrayekwong birrimekbe bininj birrihdi bu minj nangale kabirrimarnemulewan kore baleh kurduyimerranj bu bimarnbom namekbe bininj. Kaluk bu benmarneyimi, nakka munguyh bir-mulewani kunwerhhkah.

³⁷ Wanjh bedda birrikangebarrheng duninj, dja birriyimeng, "Jesus nungka kakurduyime kore njalehnjale kamak rowk. Bu kabenmarnbun nawu birribengwarr bu kabirribekkan, dja mak nawu birridangdubbe nakka kabenmarnbun bu kabirriwokdi."

8

Jesus Benworrkmiwong 4000 Bininj

Mark 8:1-10

(Matthew 15:32-39)

¹ Bu kunmekbe nawu benbukkabukkani birrihni Jesus dorreng, wanjh birriwern bininj birrimornnamerrinj nuye. Kaluk bedda mak minj manme birrikarrmeninju bu birringuyi. Wanjh Jesus benkayhmeng nawu benbukkabukkani nuye, wanjh nungka yimeng,

² "Ngabenkongibun nahni bininj nawu kabirrihmirnderri. Bedda ngarrihdjarrkdi ngaye bu kunkodjkejanjbik, dja bolkkime minj njale mak kabirrikarme bu kabirringun.

³ Minj ngabenmunkewe wardi kabirrimarrwedurdeng kured. Bu kabirrire manmeyak, wanjh kunukka wardi kabirriwohkukwarrhme manbolh, dja yikahwi kabirrihyo djarreh."

⁴ Wanjh Jesus nuye nawu benbukkabukkani birriwokmey birriyimeng, "Ngad karrihdi djarreh minj kurrambalk darnkih karrarnhrurkdi. Dja mak baleh karrimang manme ba bu karrbenwon nahni bininj kabirringun?"

⁵ Wanjh Jesus djawayhmeng yimeng, "Baleh kayime kandidjdjawa manlod ngudda ngurrihkarrme?" Wanjh bedda birriyimeng, "Ngarrihkarrme seven manbu kandidjdjawa."

⁶ Wanjh Jesus benmarneyimeng birrimekbe bininj nawu birrimirnderri bu kabirriyerrkarren kore kurorre kabirri. Wanjh nungka lodmey manbu seven kandidjdjawa dja biyimanjbom God. Rerre wanjh lodbakkeng dja benwonowong nawu benbukkabukkani nuye. Mak yimeng bu kabindibalwonowon nawu birrimirndeni. Wanjh kunmekbe birrikurduyimeng.

⁷ Nawu benbukkabukkani birrihkarmi mak yikahwi djenj kukkilelhlkilelk, wanjh Jesus kunmekbe rerreh kurduyimeng bu biyimanjbom God wanjh benmarneyimeng nawu benbukkabukkani bu bindibalwong nawu birrimirnderri.

⁸ Wanjh nawu birrimirnderri birringuneng rowk, dja birriworrkminj. Kaluk nawu benbukkabukkani birrimoyhmangi, dja birribarlkeng seven kundjabarrk kore birrihbawoni yikahwi manbu manme.

⁹ Kaluk nawu bininj kumekbe birrihmirnderri nakka bindirohrokmenj four thousand nawu manme birringuneng. Kaluk bu birringuneng birriworrkminj Jesus benmunkeweng.

¹⁰ Wanjh kundjalburrikudji nungka bidbom kore kabbala mak nawu benbukkabukkani nuye birridjarrkwam kore kubolkkimuk ngarre Dalmanutha.

Jesus Yolyolmerrinj Bu Benbengdayhkeng Nawu Benbukkabukkani

Mark 8:11-21

(Matthew 16:1-12)

¹¹ Nawu Pharisees wanjh birrimyikang Jesus dja birridjareni birridangwerrinj. Kaluk bedda birridjareni birrirohrokmeninj. Wanjh kundbekenh birridjawam Jesus bu kabenmarnekurduyime kundulkarre dorrengh ba bu birriwoybukwoyi bu nungka woybukkih kumdolkkang kore Godbeh.

¹² Wanjh Jesus wernhgolekwerrinj, dja yimeng, "Njalekenh bininj nawu bolkkime kabirrihdi kabirridjare kabirriwernhnan bu ngakurduyime God nuye kundulkarre dorrengh? Wanjh woybukkih duninjng ngaye marneyime ngudberre bu minj ngurrimang nawu ngurrihdjare ngurrian."

¹³ Wanjh benbawong, wam bidbom kore kabbala wanjh baldjowkkeng borledmikenh.

¹⁴ Nawu benbukkabukkani nuye birrihkarmi mandjallodkudji kandidjdjawa kore kabbala. Dja birribengmidjanj bu minj birrimkayi manwern.

¹⁵ Wanjh Jesus bendjajokwong bu yimeng bedberre, "Ngurriahnarimen! Ngurrikangerayekworrinen bedberre Pharisees dja mak nawu Herod. Yuwn ngundimayaliwernwon kunmayali manwarre bedberre wardi bu ngundimayaliwarrewon. Bedda yiman yerreh bininj nawu kakurme mannguklurlmikenh kore buriddi dja wanjh kanguklurlme."

¹⁶ Wanjh nawu benbukkabukkani nuye birridjawarrinj bedmandeleng bu njalekenh nungka kuhni yimeng bedberre. Wanjh bedda birrimarneyimerreni bu kuhni minj birrikarrmeninj manlod kandidjawa.

¹⁷ Jesus burrbuni bu kuhni birrihwokdi bedmandeleng kore birrihyolyolmi, wanjh bendjawam, "Njalekenh ngudda ngurrihyolyolme manmekenh bu manlod yak? Adju, yiddok ngudda minj ngurriyayinj dja ngurrimayalibayhmeninj? Dja yiddok ngurrikangerayek?"

¹⁸ Ngudda ngurrimimdi dja njalekenh minj ngurriwernhbolknan? Ngudda ngurrikanemdi dja yiddok minj ngurriwernhbekkan? Yiddok ngurribengmidjanj?

¹⁹ Ngaye ngalarlmeij kunbidkudji kandidjdjawa nawu bedberreni five thousand bininj. Yiddok ngurriburrbun bu baleh kayime kundjabarrk ngurribarlkeng manbu mandahdawah manme kore minj birringuyi?" Wanjh bedda birriyimeng, "Twelve kundjabarrk."

²⁰ Wanjh Jesus benyawoyhdjawam, yimeng, "Dja mak ngurriburrbun bu seven manlod kandidjdjawa bu ngalarlmeij bedberreni nawu four thousand bininj bu birringuneng. Dja kaluk ngurriburrbun bu baleh kayime nawu kundjabarrk ngurribarlkeng bu ngurrimoyhmangi?" Wanjh bedda birriyimeng, "Seven."

²¹ Wanjh Jesus benmarneyimeng, "Ngudda ngurriburrbun kore njalehnjale ngakurduyimi, dja njalekenh ngudda minj ngurrimayalibayhmeninj bu ngurrimenmenmayi?"

Jesus Bimarnbun Nawu Mimbunjeni Bininj

Mark 8:22-26

²² Wanjh Jesus dja nawu benbukkabukkani nuye birrimwam kore Bethsaida. Yikahwi bininj birrimkang nakudji nawu mimbunjeni kore Jesus dja birrimarrkdjawam bu kabikarrme kunbid namekbe bininj.

²³ Wanjh Jesus bibidmey nawu mimbunjeni dja bikang kuberrkkah kore rurrkmirnderri. Wanjh Jesus nunjhmeng, dja bimimbaruy kunnun dorreng, dja bidkurmerrinj kore namekbe bininj nawu bidjawam, "Kamak yibolknan bolkkime?"

²⁴ Wanjh nawu bininj bolknang dja yimeng, "Yoh, ngabenhnan bininj, dja nakka kakukyime yiman kundulk kabirrihre!"

²⁵ Kaluk Jesus yawoyhbidkurmerrinj kore kumim nuye bininj. Wanjh nungka wernhmimbayhmeng. Dja mimmakminj, wanjh bolknani bu kamak rowk.

²⁶ Mak Jesus bimarneyimeng bu karrokme kured, dja yimeng, "Yuwn bu yingimen kondah kore rurrkmirnderri."

Peter Bimulewam Bu Jesus Nungka Nawu Christ

Mark 8:27-30

(Matthew 16:13-20; Luke 9:18-21)

²⁷ Jesus dja nawu benbukkabukkani nuye birribalwam kore kubolkkilek-ilelh kaluk kubolkkimuk ngarre darnkih Caesarea Philippi. Kaluk bu manbolh birribalhrey Jesus bendjawam, "Nawu bininj kabirriyime yimankek ngaye nangale?"

²⁸ Kaluk bedda birriyimeng, "Yikahwi kabirriyime ngudda John nawu benkodjdjuhkeyi. Birribuyika kabirriyime ngudda Elijah. Mak birribaduyika kabirriyime ngudda nawu nabuyika prophet."

²⁹ Wanjh Jesus bendjawam, "Dja ngudda, ngurriyime yimankek ngaye nangale?" Wanjh Peter biwokmey, yimeng, "Ngudda wanjh nawu Christ!"*

³⁰ Jesus benwokwong nuye nawu benbukkabukkani, "Yuwn ngurrbenmarneyime birribuyika bu ngaye nangale."

Jesus Mulewarrinj Bu Nungka Karrowenkenh

Mark 8:31-38

(Matthew 16:21-28; Luke 9:22-27)

³¹ Wanjh Jesus dedjingmey yolyolmeng bedberre bu nungka nawu Bininj Duninj wanjh kunwern ngarre bu kadjakbekkanken. Nungka yolyolmerrinj bedberre bu nungka, nawu Bininj Duninj, wanjh kabirriwarnyakmen nawu daborrabbolk, dja nawu kabirrihwohrnan priests, dja nawu kabindibukkabukkan mankarre. Nungka mak yolyolmeng bedberre bu kabirribun, karrowen, wanjh kayawoyhdolkkkan kumidjbeh kaluk bu kunkodjkedanjik.

³² Jesus yolyolmerrinj mandjad bu kore kabimarnekurduyimerran yerrekah. Wanjh Peter bimey Jesus bidjarrirnameng dja bimarneyimeng, "Yuwn kunukka yihyime!"

³³ Dja Jesus borledmeng, bennang nuye nawu benbukkabukkani, wanjh mandjad bimarneyimeng Peter, "Ngudda kanbawo, ngudda nawu yiman Namarnde Duninj! Ngudda yiburrbun njalehnjale yiman birriwarlahkenh bininj dja minj yiburrbun njalehnjale kore God."

³⁴ Wanjh Jesus benkayhmeng nuye nawu benbukkabukkani dja nawu kumekbe birrihmirnderri warridj, dja yimeng, "Bu nangale kadjare nganmunkekadjung, wanjh nakka kawarnyakmulewarren dja kabawon

* **8:29** "Christ" karohrok kunngeybuyika "Messiah". Nahni bokenh kunngey kamenyime "nawu God bikodjdelkkeng bu bidjarrngbom".

kore njalehnjale nawu kahdjare. Dja yiman kadjalngormang manbu kundulk cross nuye, dja wanjh gaye nganmunkekadjung.

³⁵ Dja nangale nawu kadjare kakanjngehkerren, nakka wanjh kadjaldowen. Mak nangale nawu kakanjkurrmerren bu ngayekenh, dja ngaleng ngarre manbu kunwok kunmak, wanjh nakka kadjalmimbi munguyh munguyh.

³⁶⁻³⁷ Bininj nawu karrowen, minj nuk njale kakarrme ba bu kamyawoyhdarrkiddurnden.

³⁸ Nawu bininj bolkkime kabirrihni wanjh nakka kabirrihdjalkurduyime kundjalwarre kore kabirrimarneboddan nawu nawarre. Dja bolkkime bu nangale nawu nganyemikan ngayekenh nawu Bininj Duninj, dja kayemikan kunwok ngardduk, wanjh kunukka mak gaye ngayemikan bu ngamdurndeng kundulkarre dorrengh nuye nawu ngardduk kornkumo dja nawu birrikukdjaman angels."

9

¹ Wanjh Jesus benmarneyimeng birrimekbe bininj, "Woybukkih duninj gaye marneyime ngudberre, ngudda yikahwi nawu ngurrihdingihdi kondah wanjh nakka ngurrinan God kamre bu kawohrnan rowk kundulkarre dorrengh bu yerrekah ngurridowen."

Jesus Kukbuyikaminj dja Madjbelebami

Mark 9:2-13

(Matthew 17:1-13; Luke 9:28-36)

² Bu yimerranj six kunbarnangarra, Jesus benkang Peter, James dja John bu birriwam kore kaddum mandulumkimuk. Kaluk birridjalkudji birriwam. Wanjh kumekbe nawu benbukkabukkani nuye birrinang Jesus bu kukbuyikahminj kore kumirrk bedberre.

³ Kaluk nawu kunmadj nuye djongbuhdjongbuyindi, nakka madjbelebami, mak wernhbelebami kore minj nangale mak marnbuyi bu medjrohrokniwirrinj.

⁴ Wanjh Elijah dja Moses benembemeng kumirrk bedberre, dja birrihwokdi Jesus.

⁵ Wanjh Peter bimarneyimeng Jesus, "Nawu kanhbukkabukkan! Kuhni kamak bu ngad karrimwam kondah. Mak ngarrimarnbun kundjurle danjbik kondah! Mankudji ngudda ke, mankudji nuye Moses dja manbadbuyika nuye Elijah."

⁶ Kaluk Peter minj burrbuyi bu baleh yimiyimi, dja mak benebuyika nawu Jesus benbukkabukkani, bedda wanjh birriwernhkeleminj.

⁷ Wanjh kunmekbe rerrih kunngol marnburrinj dja kumkoluy benbarrbom. Dja kumwokdanginj kore kungolbeh. Kaluk yimeng, "Nahni ngardduk Beywurd nawu ngamarnedjare bulkkidj. Dja wanjh ngurriwokmarrkma!"

⁸ Wanjh bu kunmekbe yimerranj Peter, James dja John birridjalbolknabolknang, dja birrinang Jesus nadjalkudji kumekbe dingihdi.

⁹ Kaluk bu Jesus dja nawu benbukkabukkani nuye birrihkolungi kore kuwarddebeh, nungka benwokwong yimeng, "Yuwn nangale ngurrimarneyime kore ngurrinang. Dja ngurridjalmadbu nawu Bininj Duninj bu kamyawoyhdolkan kore kumidjbeh. Wanjh kunmekbe ngurrimulewan."

¹⁰ Wanjh nawu benbukkabukkani nuye, birriwokmarrkme yimeng dja minj birrimulewayi kore birrinang. Dja ngaleng birrihdjajarreni bu nungka njalekenh yimiyimi bu yimeng "kamyawoyhdolkan kore kumidjbeh".

11 Wanjh birridjawam Jesus, "Njalekenh nawu kabindihbukkabukkan mankarre kabirrihyime bu Elijah wanjh kamdokme werrk?"

12 Wanjh Jesus benmarneyimeng, "Bedda wanjh birriyimeng mandjad bu Elijah kamdokme werrk. Kaluk nungka Elijah kamarnbun njalehnjale bu kore kayingkihi. Mak njalekenh kore djurra kahyime nawu Bininj Duninh wanjh kadjakbekkan kunwern dja mak bininj kabirridjalwarnyakmen nuye?"

13 Dja ngaleng ngaye marneyime, Elijah wanjh woybukkih nungka koroko kumwam, dja bedda birrimarnekurduyimi kunwarre bu birridjareni, kore yingkihimbuyindanj bu kabimulewan nawu Elijah."

Jesus Bimarnbom Wurdyaw Nawu Namalngwarre Bikarrmi

Mark 9:14-29

(Matthew 17:14-20; Luke 9:37-43a)

14 Wanjh Jesus, Peter, James dja John birridurndi kore birribuyika nawu benbukkabukkan birrihi. Wanjh bindinang nawu kabindihbukkabukkan mankarre birrihdangwerreni, dja mak birribadbuyika bininj bindiwakbuyinguneng.

15 Kaluk nawu bininj birriwern birrinang Jesus, wanjh kundjalmekbe rerreh birriwernhkangebarrhmeng, dja birrirlobmeng, birrikimey.

16 Wanjh Jesus djawayhmeng bedberre, "Njalekenh ngudda ngurrihdangwerren nawu kabindihbukkabukkan mankarre?"

17 Kaluk nakudji biwokmey kore kumirndebeh, "Nawu kanhbukkabukkan, ngaye ngamkang ngardduk beywurd kore ngudda. Dja nungka kakarme namalngwarre nawu bihbongkarrmi, dja bimarnbom ba minj kayawoyhwokdi.

18 Mak kabimang dja kabikukburriwe kore kurorre, dja nungka kanunjdjabun kore kurrangbeh, dja kayidmebayerren, dja kakukrayekrayekmen. Kaluk ngabendjawam nawu ngudda yibenbukkabukkan bu kabirribekbe nawu namalngwarre dja minj birringudjbang bu birrikurduyimeninj."

19 Wanjh Jesus biwokmey dja benmarneyimeng birriwern, "Ngudda bininj holkkimekenh minj kandiwerhwoybukwon! Mak baleh kabolkymerran bu karrihdjarrkni? Mak baleh wali bu djahdjalmadbun ngudberre? Mah, wanjh ngurrimka namekbe wurdyaw kore ngaye."

20 Wanjh yikahwi bininj birrimkang namekbe wurdyaw kore Jesus. Kaluk bu namekbe namalngwarre nawu bihbongkarrmi bu binang Jesus, wanjh kundjalmekbe rerre bimarnbom namekbe wurdyaw bu kukdeldel-meng, dja mankang, kukbarlbarlmi kore kurorre dja nunjdjabom.

21 Wanjh Jesus bidjawam nawu kornkumo nuye wurdyaw, "Baleh bolkyimi bu kuhni bimarnekurduyimi nuye?" Kaluk nawu kornkumo yimeng, "Bu nungka yahwurdni.

22 Mak munguyihibirriweyi kore kunak dja mak kore kukku ba bibuyi dowimeninj. Bu ngudda baleh yikurduyime nuye, wanjh kanbenekongibu dja kanbenebidyikarrme ngarrewoneng."

23 Wanjh Jesus bimarneyimeng nawu kornkumo, "Ngudda kankewkme bu kanmarneyimeng, 'Yiddok ngudda yikarme bu kanmarnekurduyime?' Dja ngaleng minj njale karayek nuye nawu bininj bu nganwoybukwon ngaye."

24 Kaluk kundjalmekbe rerreh nawu kornkumo kayhmeng, "Ngaye woybukwon walakkih! Dja kanbidyikarrmen ba wernhwoybukwon!"

25 Mak Jesus benmirndenang nawu bininj kumekbe birrirlobmerrinj bu kabirrinan baleh kakurduyimerran, wanjh birruy namekbe nawu namalngwarre, yimeng, "Ngudda nawu yibengwarrewong dja yiwokyakwong!"

Ngaye wokrayekwon yimbebmen kore namekbe wurdyaw dja mak minj yiyawoyhngimen nuye!"

²⁶ Wanjh nawu namalngwarre kayhmeng, dja bimarnbom namekbe wurdyaw bu wernhkukdeldelemeng. Rerre wanjh kumbemeng, bibawong wam. Kaluk nawu wurdyaw djahdjalyoy kurorre dja kukyimi yiman doweng rerreh. Dja birriwern bininj birriyimeng, "Nakka doweng!"

²⁷ Dja wanjh Jesus bibidmey nawu wurdyaw dja biwayhkeng bu dolkkang danginj.

²⁸ Wanjh Jesus wam ngimeng kore kurrambalk. Kumekbe nawu benbukkabukkani nuye birrihni birrikudji, dja birridjawam, "Njalekenh ngad minj ngarribebkemeninj nawu namalngwarre?"

²⁹ Wanjh Jesus yimeng, "Kumekbe nawu namalngwarre, nakka bininj minj kabebke, bu djal yiwarrudj karri werrek."

Jesus Kayawoyhyolyolmerren Bu Karrowenkenh

Mark 9:30-32

(Matthew 17:22-23; Luke 9:43b-45)

³⁰ Wanjh Jesus dja nawu benbukkabukkani nuye birribolkbawong kumekbe dja birrirengehrey kore kubolkkimuk Galilee. Kaluk Jesus minj djareniwirrinj nangale bu burrbuyi kore baleh bedda birrihdi.

³¹ Dja kunu nungka djareni birrikudji birridiwirrinj nawu benbukkabukkani nuye ba bu nungan yolyolmeninj bedberre. Wanjh yimeng bedberre, "Ngaye nawu Bininj Duninj wanjh ngandibdnakenwon kore bininj nawu birriwarre duninj bu ngandibun wanjh ngarrowen. Kaluk bu kunkodjkedanjik ngaye wanjh ngayawoyhdolkkkan kore kumidjbeh."

³² Nawu benbukkabukkani nuye minj birrikodjkulubayhmeninj bu birriburrbuyi kore Jesus menmenyimi. Dja mak birrikeleni bu minj birridjawayhmeninj.

Nangale Bininj Kawernhdokme?

Mark 9:33-37

(Matthew 18:1-5; Luke 9:46-48)

³³ Wanjh Jesus dja nawu benbukkabukkani nuye birribolkmey kore Capernaum, mak birriwam birringimeng kururk kore kurrambalk. Wanjh Jesus bendjawam, "Kaluk njale ngudda ngurrihyidangwerreni kore manbolh karrihrey?"

³⁴ Kaluk minj birriwokmayi, dja manbu birrihyidangwerreni kore manbolh makka wanjh birrihyimi nangale nawu nawernhkimuk bedberre.

³⁵ Wanjh Jesus yerrkang dja benkayhmeng nuye twelve nawu benbukkabukkani, dja yimeng, "Bu nangale kadjare kayimerran karrokme ngudberre, wanjh nakka kakurrmerren yerre duninj, dja kabenhmarnerdurrkmirri bedberre birribuyika."

³⁶ Wanjh Jesus bimey wurdyaw dja binameng kore bedda birrimhdi. Wanjh biwanjbimey namekbe wurdyaw dja yimeng,

³⁷ "Bu nangale kabenkimang wurdwurd yiman kayime nahni wurdyaw kore ngaye ngardduk kunngey, wanjh kunukka ngaye ngankimang. Mak bu bininj ngaye ngankimang wanjh kunukka nungka kabikimang nawu ngaye nganmunkeweng warridj."

Jesus yimeng, "Nangale nawu bininj minj kannjirrhmiwon, wanjh nakka karridjalkudji."

Mark 9:38-41

(Luke 9:49-50)

38 Kaluk John bimarneyimeng Jesus, “Nawu Kanhbukkabukkan, ngad ngarrinang bininj nawu ngunhngeybuni bu bebkeyi nawu namarnde. Dja ngad ngarrimarneyimeng bu kangurdme, dja nungka minj ngad karridjarrkre.”

39 Wanjh Jesus yimeng, “Yuwn bu ngurringurdke namekbe bininj. Nangale nawu ngaye nganngeybun bu baleh kakurduyime kundulkarre dorrengh, wanjh nakka minj kaborledme bu ngaye nganmulewan kunwarrekenh.

40 Bininj nawu minj kannjirrhmiwon kadberre wanjh ngad kunu kanmarrkwan.

41 Wanjh woybukkih marneyime ngudberre, bininj nawu yiman ngunbowon kukku bu kunmekbekenh nungka kaburrbun ngudda Christ nuye bininj, wanjh nungka kamang namakmak nuye kahdjhedjenyo.”

Jesus Benbengdayhkeng Bu Kabirrinahnarren

Mark 9:42-50

(Matthew 18:6-9; Luke 17:1-2)

42 Jesus yimeng, “Ngurbennahna wurdwurd nawu ngaye ngandimunkekadjung. Nangale bininj kabimarnbun nadjalkudji wurdyaw bu kabalkurduyime kunwarre, wanjh kadjalwarre duninj. Kunubewu kamak namekbe bininj bu kabirrikuburriwe kore kuburk duninj, manwarddekimuk dorrengh kore kunyarl kakomdukkayindi nuye, wanjh kabalkebgakme!”

43-44 “Dja bu kunbid ke ngunmarnbun kunwarre yikurduyime, wanjh yibiddjobkerrimen! Kunukka kadjalmak bu yiwe yikahwi kunbid ke ba bu yidjalmimbi munguyh munguyh. Dja bu yidjalbid di kunbid bokenh ke bu yikarrme wanjh kunukka yire kore kubolkwarre duninj, kore manbu kunak kahdjaltung munguyh dja minj kabirludowen.”

45-46 “Mak bu kundenge ke ngunmarnbun kunwarre yiyime, wanjh yidjaldengedjobkerrimen. Wanjh kunukka kamak bu yibirlmen, dja yidjalmimbi munguyh. Kunukka kadjalwarre bu kundenge bokenh ke bu yikarrme wardi ngunkukburriwe kore kubolkwarre duninj.”

47 “Dja mak kunmim ke bu ngunmarnbun kunwarre yiyime, wanjh yimimbebkerrimen. Kunukka kamak bu yimimkudji yingimen kore God kawohrn rowk. Mak kawarre bu kunmim bokenh yikarrme, wardi kunukka ngunkukburriwe kore kubolkwarre duninj.

48 Kumekbe wanjh yol karr munguyh, dja mak kunak minj kabirludowen.” [Isaiah 66:24].

49 Jesus yawoyhyimeng, “Kunak rerrih makka kabenrohrokme bininj ba kabirriyimerran birrimak. Mahni yiman kayime djirla mak kamarnbun kunkanj bu kakanjmanjmakwon.

50 Kaluk nawu djirla nakka namak. Dja bu kamanjyakmen, wanjh kunukka minj nangale kayawoyhmarnbun bu kamanjdangen. Wanjh ngurriyimerra yiman kayime djirla namak duninj, dja mak ngurridjar-kray kunmodmikenh dorrengh.”

10

Jesus Yolyolmeng Kore Nabininj kobeng Dja Ngabininjkobeng Kabirribaworrenkenh

Mark 10:1-12

(Matthew 19:1-12; Luke 16:18)

1 Kaluk Jesus bolkbawong kumekbe dja wam kore kubolkkimuk ngarre Judea dja mak borledmikenh ngarre Jordan mankabo. Kaluk kumekbe

birriyawoyhmirndebebmerrinj nuye. Wanjh Jesus benmarneyolyolmeng kore nungka kurduhkurduyimi munguyh.

² Wanjh yikahwi Pharisees birrimwam kore Jesus birridjareni bedda birrirohrokmeninj. Wanjh birridjawam bu birriyimeng, “Bininj nawu kabibawon ngalbininj kobeng nuye, yiddok kunukka nungka kabakke manbu mankarre?”

³ Wanjh Jesus benwokmey yimeng, “Baleh kayime mankarre nuye Moses bu ngunwokrayekwong ngudberre?”

⁴ Wanjh bedda birriyimeng, “Moses benbawoni binihbininj bu bindidjalbawoni bindimunkeweyi nawu ngalbihbininj kobeng bedberre bu djurra dorreng bindiwoni nawu kabenebaworrenkenh.”

⁵ Wanjh Jesus yimeng, “Moses ngunwong mahni mankarre ngudberre bu kunmekbekenh ngudda ngurrikangerayekni!

⁶ Dja bu kerrngehkenh duninj God marnbom kuhni kunbuyika, bu nungka benmarnbom bininj werrk, rerrih benbenemarnbom narangem dja ngaldaluk. [Genesis 1:27]

⁷ Wanjh kunmekbekenh kunu nawu bininj kabenebawon ngalbadjan dja kornkumo dja kabimang yiman kabikukbelbme ngalbu ngalbininj kobeng nuye.

⁸ Wanjh benemekbe bininj dja daluk kabene marnburren bu yiman kabeneburkkudjimen. Dja kunmekbe kayime nawu bininj dja daluk minj kabenekubokenh dja nakka benekukkudjiwi bu kabenedjarrkdarrkiddi. [Genesis 2:24]

⁹ Wanjh bonj. God wanjh benbenemarnbom bu benekukbelbmerrinj. Minj nangale mak kabenebenekuyarlarre.”

¹⁰ Kalukburrk, Jesus dja nawu benbukkabukkani nuye birriyawoyhni kore kurrambalk. Kumekbe birriyawoyhdjawam Jesus kunmekbekenh manbu bininj dja daluk kabenebaworrenkenh.

¹¹ Jesus yimeng bedberre, “Nangale nawu kabibawon ngalbininj kobeng nuye dja kabibalmang ngalbuyika daluk wanjh kunukka kunwarre kakurduyime, dja kabiwarrewon ngalbininj kobeng.

¹² Mak kunmekbe rerreh kayime bu daluk kabibawon nabininj kobeng ngaleng ngarre dja kabibalmang nabuyika bininj wanjh kunukka kundjalwarre duninj kayime.”

Jesus Kabenkimang Wurdwurd

Mark 10:13-16

(Matthew 19:13-15; Luke 18:15-17)

¹³ Yikahwi bininj bindimkang wurdwurd kore Jesus ba bu nungka benkarrmi bedberre. Wanjh nawu benbukkabukkani nuye bindiduy bu bindidengkeng nawu bininj minj birrimkayinj nawu wurdwurd kore Jesus nuye.

¹⁴ Kaluk bu Jesus bennang nawu benbukkabukkani birrikurduyimeng, wanjh nungka benmarneyidduy, dja benmarneyimeng, “Ngurrbenbawo! Birrimray kore ngaye nawu wurdwurd. Dja yuwn bu ngurriyime bu ngurribendenghke. Bininj nawu kabirridjare kabirrihdi kore God Kawohrnan rowk, wanjh bedda kabirriyimerran yiman kayime nahni wurdwurd.

¹⁵ Woybukkih duninj marneyime ngudberre, bininj nawu kabirridjare kabirringimen kore God kawohrnan rowk, wanjh kabirrimarnburren yiman kayime wurdwurd birrikilehkilek bu kabirriyimerran. Dja bu burrkyak, wanjh kunukka minj kabirringimen kore God kawohrnan rowk.”

¹⁶ Wanjh Jesus benwanjbikarrmi birrimkebe wurdwurd, benkodjkarri dja bidjawani God bu kabenmarnekurduyime kunmak bedberre.

Nawu Nakuken Duninh Bininj

Mark 10:17-31

(Matthew 19:16-30; Luke 18:18-30)

¹⁷ Jesus mahmirri bu wanjh kabenbawon, dja nakudji bininj rlobmeng kore nungka dja bimarnebarddurrukkurlhdanj kore kumirrk nuye, wanjh bidjawam, "Nawu ngudda yimak kanhbukkabukkan, baleh ngakurduyime ba bu God nganmarnbun bu ngarrarrkid munguyh munguyh kore nungka?"

¹⁸ Wanjh Jesus yimeng, "Njalekenh yiyimeng bu ngaye ngamak? Minj nangale namak dja nadjalkudji God.

¹⁹ Ngudda yiburrbun manbu mankarre: 'Minj nangale yibun. Minj yimarnedjirdmang nabuyika bininj nuye daluk. Mak minj yidjirdmang njalehnjale bedberre birribuyika bininj. Dja mak minj yikurren bu yimulewan nawu nabuyika bininj kore court. Mak minj yikurren bu yiwokkihyime kurrobe. Dja yibenbenewokmarrkma ngalbadjan dja kornkumo ke!' " [Exodus 20:12]

²⁰ Wanjh nawu bininj yimeng, "Nawu kanhbukkabukkan, ngaye ngawokmarrkmangi rowk mahni mankarre bu ngayawurrinjni."

²¹ Kaluk bu Jesus binang mandjad, wanjh bimarnedjareminj. Dja yimeng, "Manbadkudji bu yikurduyime. Yiray dja yiweyka njalehnjale nawu yihkarrme, dja mak nawu kunwardde money yibenkukwo nawu birrimarladj bininj. Wanjh kaluk ngudda yimang namakmak kore heaven. Wanjh rerre yimray kanmunkekadjung ngaye."

²² Wanjh namekbe bininj kebbuhmeng bekkang bu kunmekbe Jesus bimarneyimeng, wanjh nungka njilngwarreminj bu bibawong, wam. Kaluk nungka karrmi nawern namakmak dja mak nungka nakukenni.

²³ Mak Jesus bennang bininj nawu birrihni kumekbe, wanjh benmarneyimeng nawu benbukkabukkani, "Kadjalkarrerayek bedberre nawu nawern namakmak kabirrihkarrme bu yimankek kabirringimen kore God kawohrnan rowk!"

²⁴ Kaluk nawu benbukkabukkani nuye birrikangebarrhmeng kumekbe bu birribek kang Jesus yimeng. Dja mak yawoyhyimeng, "Ngudda nawu wurdwurd ngardduk, karayek duninh bu bininj kabirringimen kore God kawohrnan rowk!"

²⁵ Dja mak kadjalwernhrayek nuye bininj nawu kahkarrme nawern namakmak wanjh minj kangimen kore God kawohrnan rowk, yiman kayime mayh nawu camel bu kangimen kore mandangdjokko."

²⁶ Kaluk nawu benbukkabukkani nuye birriwernhkangebarrhmeng dja birrimarneyimerrinj, "Kaluk nangale nanu God kabingehke?"

²⁷ Jesus bennang dja benmarneyimeng mandjad, "Bininj minj kabirringehkerren. Dja God nadjalkudji kakurduyime kore nungka njalehnjale kakurduyime rowk."

²⁸ Kaluk Peter bimarneyimeng Jesus, "Yina! Ngad ngarribawong njalehnjale ngadberre rowk, bu ngudda ngundimunkekadjung!"

²⁹ Jesus yimeng, "Woybukkih duninh marneyime ngudberre. Birriwern bininj nawu kabirribawon yehyeng rowk bu ngayekenh, ngayime kabirribawon kunred bedberre, dja yiman kayime kabindibawon narahrangem, ngaldahdaluk, ngalbabadjan, kornkornkumo, wurdwurd dja kunred bedberre. Kabirridjalbawon rowk bu ngayekenh, dja mak ngarre manbu manmakkyakenh kunwok.

³⁰ Wanjh bedda kabirrimang one hundred nawu njalehnjale kabirribawon, ngayime kondanjkuwu kunred nakka kakarme manwern kunred, narahrangem, ngaldahdaluk, ngalbabadjan, wurdwurd, dja kunred.

Dja warridj kabirrimang kunwern kunyid, yiman kabindinjirrhmiwon nawu birriwarre bininj. Dja mak kaluk yerrekah bu kamre kunkerngeh kabolkymerran, wanjh bedda kabirridjaldarrkiddi munguyh munguyh.

³¹ Dja birriwern nawu kabirridokmiwerren bu bolkkime wanjh nakka kabirrikudurdeng rerre bu kalukburrk bu kamre bedberre, dja mak birriwern nawu kabirrimre yerreh, wanjh kabirriyimerran bu kabirrikudokme."

Jesus Yolyolmerrinj Danjikkah Bu Nungka Karrowenkeh

Mark 10:32-34

(Matthew 20:17-19; Luke 18:31-34)

³² Wanjh Jesus dja birriwern bininj birrihdjarrkbolhkadjungi manbu bolhrebolhrey kore Jerusalem. Kaluk Jesus dokdokmi bedberre. Nawu benbukkabukkani nuye birrikangebarrhmeng, dja mak birribuyika bininj nawu bindihmunkekadjungu rerre nakka wanjh birrihkeleminj. Wanjh Jesus benyawoyhkimey nawu twelve benbukkabukkani nuye dja mak bendjarrirnameng birriwokkihrey kore birrikudji. Wanjh Jesus dedjingmey bu benyawoyhmarneyimeng bu baleh kabimarnekurduyimerran nuye kore Jerusalem.

³³ Wanjh yimeng, "Ngad karribidbun kore Jerusalem. Kumekbe wanjh ngaye nawu Bininj Duninj, nakudji bininj ngankukweykan bedberre nawu birrikihkimuk priests dja mak nawu kabindihbukkabukkan mankarre. Kaluk bedda ngandikanjkurme bu ngaye ngarrowenkeh. Wanjh bininj nawu minj Jews bedda ngandibun.

³⁴ Kaluk bedda wanjh ngandidjekmiwon dja ngandikununjhme. Mak ngandiwidjbihe kunyarl dorreng, dja wanjh ngandibun, ngarrowen. Kaluk bu kunkodjkekanjbi bu kunmekbe ngarrowen, ngaye wanjh ngayawoyhdolkan kore kumidjbeh."

James Dja John Benemarrkdjawam Jesus Bu Kabenbenebidyikarmekenh

Mark 10:35-45

(Matthew 20:20-28)

³⁵ Nawu James dja John bebeywurd nuye Zebedee, benemyikang Jesus dja benedjawam, benemarneyimeng, "Nawu kanhbukkabukkan, ngad nganedjare ngundidjawan ba bu yikurduyime ngarrewoneng."

³⁶ Wanjh Jesus yimeng, "Njale kaluk ngunedjare ngakurduyime ngurrewoneng?"

³⁷ Kaluk bedda beneyimeng, "Wanjh rerrekah bu yiwohrnan rowk kunmakmak dorreng ke, wanjh kamak bu ngudda kanbenekurmen ngarrewoneng bu ngenani kore kukun dja kudjaku ke."

³⁸ Wanjh Jesus yimeng, "Ngudda minj njale nguneburrbun nawu ngunehdjawayhme. Kaluk kundjak mandulmuk duninj nganmarnebebme. Kuhni wanjh yiman kayime ngaye ngabongun maninjmanu kundjak, dja yiddok ngunebongun warridj? Dja ngaye wanjh ngandidjuhke kore kundowikenh. Yiddok ngunedjuhme warridj bu karohrok ngaye?"

³⁹ Wanjh bedda beneyimeng, "Yoh, ngad mak kunmekbe nganekurduyime!" Kaluk Jesus yimeng berrewoneng, "Woybukkih duninj ngudda ngunbenemarnekurduyimerran karohrok bu ngaye nganmarnekurduyimerran.

⁴⁰ Dja ngaleng, ngaye minj nangale ngadjarrngbun bu kabeneni ngarduk kore kukun dja kudjakku. Bedda ngokko kabengeyde kumekke.”

⁴¹ Wanjh bu kunmekbe bindiwobek kang nawu birrimirndebuyika ten nawu benbukkabukkani, bedda wanjh bindiduy nawu James dja John.

⁴² Wanjh Jesus benkayhmeng nawu benbukkabukkani nuye. Dja yimeng, “Ngurrina. Ngudda ngurriburrbun bu bininj nawu minj Jews kabindikarrme nawu kabirriwohrnawohrnan nawu kabirrikimukworren dja kabindimarnedokmiwerren birribuyika. Bedman wanjh kabirrikurduyime kunmekbe, dja mak kabirriburlumerren bu kabirrikarrme kundulkarre bedberre.

⁴³ Ngudda wanjh yuwn ngurrikurduyime kore yiman bedda kabirrikurduyime. Mak bu nakudji kadjare kakimukworren kore ngudberre, wanjh kurrmerrimen ba ngunmarnedurkmirri ngudberre ngurribuyika.

⁴⁴ Dja bu nangale kadjare kawernhdokmiwerren ngudberre, wanjh nakka werrek durkmirrin ngudberre yiman kayime nawu kahbondi ngudberre.

⁴⁵ Wanjh kunmekbe yerreh karohrok, ngaye nawu Bininj Duninj minj ngamrawinj bu birriwern ngandimarnedurkmirrikenh, dja ngamwam bu ngaye ngabenmarnedurkmirri, dja mak ngakanjurrmerren bedberre birriwern bininj ba ngabenbebke kore kabirrihbongdi.”

Jesus Bimarnbom Bininj Nawu Mimbunjeni

Mark 10:46-52

(Matthew 20:29-34; Luke 18:35-43)

⁴⁶ Wanjh birribebmeng kore kunred kabolkngeyyo Jericho. Kaluk Jesus dja nawu benbukkabukkani nuye mak birrimirndewern bininj nawu bindihmunkekadjungi, wanjh birribolkbawoyi kore rurrkmirnderri kumekbe. Wanjh bininj nawu mimbunjeni ningihni kore kurrird ngarre manbolh dja bendjanwohmeng bu birrikongibuyi dja birriwoyi njalenjale. Kaluk nungka ngeyyoy Bartimaeus nawu beywurd nuye Timaeus.

⁴⁷ Wanjh nungka biwobek kang Jesus nawu Nazarethbeh regehrey bihyurrhkeyi. Wanjh bimarnekayhmeng, “Jesus, Beywurd nuye David, kankongibu ngaye!”

⁴⁸ Mak birriwern bininj birringurdkeyi dja birrimarneyimi bu kangurdme. Dja nungka djalkayhmi wernkih duninj, yimeng, “Nawu Beywurd nuye David! Kandjalkongibu!”

⁴⁹ Wanjh Jesus danginj dja yimeng, “Ngurrikayhmen nungka bu kamre.” Wanjh birrikayhmeng namekbe bininj nawu mimbunjeni, dja birrimarneyimeng, “Yinjilngmakin! Dja yirrolkka. Jesus ngunhkayhme.”

⁵⁰ Wanjh nawu mimbunjeni bininj dolkkang werkkwerkk, madjburriwerrinj nuye kunmadj, wanjh bimiyikang Jesus.

⁵¹ Kaluk Jesus bidjawam, “Njale ngudda yidjare bu ngakurduyime ke?” Wanjh nawu mimbunjeni yimeng, “Nawu kanhbukkabukkan, ngaye ngadjare ngayawoyhbolknan.”

⁵² Wanjh Jesus yimeng, “Yiray! Dja ngokko yimakminj bu kunmekbekenh ngudda kanwoybukwong.” Wanjh kundjalmekbe rerreh namekbe bininj mimbayhmeng dja yawoyhbolknang rowk. Dja mak bimunkemey Jesus kore birribalhrey.

11

Birriwern Bininj Birriburlumeng Jesus Bu Ngimeng Kore Jerusalem

Mark 11:1-11

(Matthew 21:1-11; Luke 19:28-40; John 12:12-19)

1 Kaluk Jesus dja nawu benbukkabukkani nuye birrimhdarnhbebmi kore Jerusalem. Kaluk birrimwam kore kubolkyahwurd bokenh ngarre Bethphage dja mak Bethany, darnkih kore kurrulum manbu Karrulk-mirnderri Olives. Wanjh kumekbe Jesus benbenemunkeweng benebokenh nawu benbukkabukkani nuye.

2 Wanjh benbenemarneyimeng, “Nguneray kore kumekbe kore karur-rkmirnderri, dja ngunebolkn. Kaluk bu ngunebalngimeng, kumekbe ngunenгалke mayh donkey yaw karrukkayindi, nawu minj nangale morneniwirrinj. Wanjh nguneyerrkkemen dja ngunemka kondah kore ngaye.

3 Dja bu nangale ngunbenedjawan ngurrewoneng bu njalekenh ngunekurduyime, wanjh kuhni ngunemarneyimen, ‘Nawu Kawohrnan Rowk kadjare, dja mak werrkwerrk nungka ngunmarnedurndiwe.’ ”

4 Wanjh nawu benbenebukkabukkani benewam dja benengalkeng namekbe donkey yaw kodjdukkayindi kuberrk kore manbolh, kaluk darnkih kururrdangmaye kore kunrurrk, wanjh beneyerrkkeyi.

5 Wanjh yikahwi bininj nawu kumekbe birrihdi wanjh bindidjawam, “Baleh ngudda ngunehkurduyime? Njalekenh ngunehyerrkke nawu yaw donkey?”

6 Wanjh nawu benbenebukkabukkani benewokmulewam kore Jesus benbenemarneyimeng. Wanjh nawu bininj bindiyimunkeweng, benekang nawu yaw donkey.

7 Wanjh benekang kore Jesus, dja benebodmebarrkbom nawu donkey kunmadj berrewoneng. Wanjh Jesus bidbom morneni.

8 Dja mak birriwern bininj birrimarnekurmi kunmadj bedberre kore manbolh, dja birribuyika birriyendedadjkeyi kunmalaworrh dorrengh kore kabbal darnkih, dja birrimalaworrhkurmi kore manbolh.

9 Wanjh bininj birriwern birridokmi nuye Jesus dja birribadbuyika wanjh birridjalkadjungi, dja birriwern rowk birrikayhmi, birriyimi, “Hosanna!” Nahni kamre kore kungey nuye nawu Kawohrnan Rowk, wanjh karridjare God kabimarnekurduyime kunmak duninj!” [Psalm 118:25-26]

10 Dja mak birriyimi, “Bolkkime wanjh kamre bininj nawu kawohrnan rowk nawu namud nuye David, kadberre kornkumo! Hosanna kore nungka nawu kaddum heaven kahni!”

11 Wanjh Jesus ngimeng Jerusalem, kaluk balngimeng kore kunrurrk yiwarrudjkenh manbu Temple, wanjh nungka bolknanganang bu nang njalehnjale. Kaluk ngokko balhdungborledmi, wanjh nungka wam kore Bethany mak birridjarrkwam nawu twelve nawu benbukkabukkani nuye.

Kundulk Manbu Minj Manme Karrmeninj

Mark 11:12-14

(Matthew 21:18-19)

12 Kaluk bu kunkodjkebuyikani nungka balhbolkbawoni Bethany, wanjh nungka marrwedoweng.

13 Wohnang wanjh nang djarreh manbu fig kundulk dingihdi dja kunworr manwern karrmi. Wanjh manmekbe dulkyikang ba kanan manme manbu figs bu kahdjolengbarndi. Dja burrkyak, minj karmeninj manme manmekbe kundulk, dja kunmalaworrwi djahdjaldi. Kaluk kunukka minj ngarreniwirrinj bu dungyimi bu manme kukdiwirrinj.

* 11:9 “Hosannah” kamenyime “Kanngehkemen”.

¹⁴ Wanjh Jesus bimarnewokdanginj manmekbe kundulk, yimeng “Minj nangale kangun manme kore nguddabeh munguyh.” Kaluk nawu Jesus nuye nawu benbukkabukkani birribek kang bu kunmekbe nungka yimeng.

Jesus Bendungi Bininj Kore Manbu Temple

Mark 11:15-19

(Matthew 21:12-17; Luke 19:45-48; John 2:13-22)

¹⁵ Wanjh Jesus bebmeng kore Jerusalem wanjh balwam kore kuberrkkah manbu Temple ngarre. Kaluk kumekbe dedjingmey bu benhkukbe-bkeyi bininj nawu birrihbayahmi dja nawu birrihweykani njalehnjale. Mak dedjdjoknameng tables bedberre nawu kore birrihworreni nawu nakububuyika nawu kunwardde. Dja borleborledkeng bedberre manbu birriyerrkani kore birrihweykani dorddorok.

¹⁶ Mak Jesus minj benyibawoyi njalehnjale nawu birringimowoyi kore kuberrkkah ngarre manbu Temple.

¹⁷ Wanjh kumekbe Jesus benbukkabukkani bedberre bu yimeng, “Kore djurra kahwokbimdi kahyime, ‘Ngardduk kunrurrk makka ngarre kore bininj nawu birrikang kubolkbubuyika bu kabirrimre dja kabirridi yiwarrudj. Dja ngudda ngaleng ngurribolkmarnbom kore bininj nawu kabirrihwarlkkayindi nawu birridedjdjolkwern.’ ” [Jeremiah 7:11]

¹⁸ Wanjh nawu birrikihkimuk priests dja mak nawu mankarre kabindi-hbukkabukkan bu birribek kang rowk maninjmanu kore wokkihyimeng. Wanjh birridjalkarreyawani kore baleh kabirrikurduyime bu kabirribun Jesus. Bedda birrikengehmi, bu kunmekbekenh birriwern bininj birrikangebarrhmi bu nungka birriwokbek kang kore benmarneyolyolmi bu benbukkabukkang bedberre.

¹⁹ Wanjh bu baldungborledmi Jesus dja nawu benbukkabukkani nuye birribolkbawong kumekbe kore rurrkmirnderri.

Jesus Benbukkang Bu Kabirriwoybukwonkeh

Mark 11:20-26

(Matthew 21:20-22)

²⁰ Kaluk bu kukabelbuyikani, Jesus wanjh regehrey mak birrihdjar-krey nuye nawu benbukkabukkani. Wanjh birrinang maninjmanu fig kundulk, bu dulkdarlehminj dja dulkdoweng, mandedjmad dorrengh.

²¹ Kaluk Peter dulkburrbuni manmekbe wanjh bimarneyimeng Jesus, “Nawu Kanhbukkabukkan, yina! Bu wolewolehni ngudda yiduy manmekbe kundulk. Wanjh bolkkime dulkdarlehminj dja dulkdoweng!”

²² Wanjh Jesus yimeng, “Ngurriwernhwoybukwo God.

²³ Woybukkih duninj bu marneyime ngudberre, bininj nawu kayime mahni manwarddekimuk, ‘Yiray, dja yiwarddewarrhmen kore kurrula!’ Dja bu minj yikewkme, dja mak yiwoybukwon kore yiyime, wanjh yidjalnan bu kadjalkurduyimerran, wanjh God ngunmarnekurduyime ke.

²⁴ Wanjh marneyime ngudberre bu ngurridjawayhme ngarre njalehnjale kore ngurrikangekurrmerren, dja ngurriyime bu woymbukkih ngunmarnekurduyime, wanjh kunukka yimang.

²⁵⁻²⁶ Dja mak, bu ngudda yihdi yiwarrudj, wanjh yihburru werck bu ngunedurrinj nabuyika bininj nawu njalekenh bu nguneyirurrinj, wanjh yidjalbengmidja nuye. Wanjh bu kuhni yikurduyime, nawu kornkumo kahni heaven nunganwali ngunmarnebengmidjdan kunwarre ke.”

Nawu Kabirrihwohrnawohrnan Birrimarnekekwkeng Jesus

Mark 11:27-33

(Matthew 21:23-27; Luke 20:1-8)

²⁷ Wanjh Jesus dja nawu benbukkabukkani nuye birriyawoyhwam kore Jerusalem. Kaluk bu Jesus renehrey kore Temple kuberrkkah, dja nawu kabirrihwohrnan priests, dja mak nawu kabindibukkabukkan mankarre, dja mak nawu kabindimarnewohrnan dabborrabbolk, wanjh birrimyikang Jesus.

²⁸ Dja birrimarneyimeng, “Kanmarneyimen ngadberre! Njale yihkar-me kore nahni njalehnjale yihkurduyime? Dja kuhni nangale ngunwong?”

²⁹ Wanjh Jesus yimeng, “Ngaye wanjh djawan ngudberre mandjalkudji. Wanjh ngudda kandiwokmang, yerre wanjh marneyime ngudberre kore nangale nawu nganwong bu mahni yarrkka ngahkurduyime.

³⁰ Wanjh kandidjalmarneyimen, bu John benhkodjdjuhkeyi bininj, kaluk balehbeh kumdolkang? Yiddok kore Godbeh dja kunubewu kore bininjbeh? Wanjh kandiwokma!”

³¹ Wanjh bedda birridangwerreni bu kumekbekenh Jesus bendjawam, dja birrimarneyimeng, “Bu ngad karryime nawu John kabenhkodjdjuhke kumdolkang kore God, wanjh Jesus wardi kayime, ‘Dja mak njalekenh minj John ngurriwoybukwoyi?’

³² Dja bu karryime, ‘Kore bininjbeh’ wanjh birriwern bininj wardi kandi-dung.” Kaluk birrimakebe nawu bindihmarnewohrnani bindikengehmi birriwern bininj nawu birriyimi bu woybukkih John nakka prophetni.

³³ Wanjh nawu bindihmarnewohrnani birrimarneyimeng Jesus, “Ngad ngarriwakwan.” Kaluk Jesus yimeng, “Wanjh minj mak marneyime ngudberre bu nangale nuye bu nahni njalehnjale ngahkurduyime.”

12

Jesus Yolyolmerrinj Bu Nungka Nawu God Nuye Beywurd Mark 12:1-12

(Matthew 21:33-46; Luke 20:9-19)

¹ Jesus benmarneyolyolmi parable manbu manwarlkaykenh kunwok. Wanjh yimeng, “Nakudji bininj nawu kunred karrmi, nawu dudji man-rakel manwern manbu grapes bu djolengwernmerrinj. Birriwodjwarnah-warnamkang dja birribolkkarungi kore ngarre manbu grapes birrimelmi. Mak marnbom kunrurrk ba birribdbom birribolknahnani warridj. Wanjh benyikurmeng yikahwi nawu birrihmarnedurrkmirri bu kabirrinahnan nuye dja nungka wanjh wam kubolkbuyika.

² Kaluk bu yerrekah manmekbe grapes wanjh djolengminj dja kumwam ngarre bu birrimoyhmangikenh. Wanjh nakudji bimunkeweng nawu kabihmarnedurrkmirri kore birrimakebe nawu birribolknahnani, ba kabir-rimarnelarlmang manbu manme.

³ Dja bedda birridarrkidmey dja birribom. Wanjh birridulkkih-munkeweng bu minj njale mak birriwoyi.

⁴ Wanjh bininj nawu karrmi kunred bimunkeweng nabadbuyika bininj nawu bimarnedurrkmirri. Kaluk nakka birridjumduhkeng dja kunwar-rehwarre birrimarneyimeng.

⁵ Mak biyawoyhmunkeweng nabuyikawali, dja nakka wanjh birribom birrikukkurmeng. Birriwern benmunkeweyi namekbe bininj dja nakka bindidjalbuni nawu birrihmarnedurrkmirri dja bindingorengmunkeweyi mak yikahwi nakka bindibuni bindikukkurrmi, birriidoweni.

⁶ Wanjh nawu bininj bibalhkarrmi nadjalkudji bu kabimunkewe. Kaluk nakka wanjh beywurd nuye nawu biwernhmarnedjareni dunijnh. Wanjh

bimunkeweng dja marneyimerrinj, 'Birrimekbe bininj minj baleh kabiriyime nuye, dja nahnı nawu beywurd ngardduk!' Wanjh bimunkeweng.

7 Kaluk bedda nawu birridi kunred nuye, wanjh bedda birrimarneyimerrinj, 'Nahnı beywurd nuye! Dja mahnı kunred wardi nungka kamang bu kornkumo kabiwon. Mah, dja karrıbu wanjh kunukka ngad kadberre karrımang.'

8 Wanjh birrimey namekbe beywurd dja birribom birrikukkmeng, wanjh birribalkukburriweng kuberrkkah kore manrakel dulkmırnerri."

9 Dja Jesus bendjawam, "Kaluk baleh kayime namekbe bininj nawu kunred nuyekih? Wanjh kamre kabenbun nawu kore benyikurmeng birrimekbe bininj. Wanjh mahnı kunred, kabenbalwon birribadbuyika bininj.

10 Yiddok ngudda ngurribengmidjanj bu minj ngurribimngeybuyi kore djurra kahbımbuyındi bu kayime, 'Manbu kunwardde kore bininj kabirrihmarınbun wanjh birriwarddeburriweng, dja bolkkime marnbuyındanj manwarddekuen dunınj, manbu kabirrikurme werkk kore kunurrk.

11 Nawu Kawohnan Rowk kuhni wanjh kurduyimeng, wanjh kundjalmakkaykenh bu karrıng kurduyimerranj.' " [Psalm 118:22-23] Kuhni rowk nawu Jesus yolyolmi.

12 Wanjh birrimekbe bininj nawu birrihwohınowhırnani bininj nawu Jews, wanjh birriburrbunı kunmekbe kore yolyolmeng parable bu wanjh bedda benhyolyolmi, dja kunmekbekenh birridjareni birridarrıkmayı nawu Jesus. Kaluk bedda bindikengehmi birriwern birribuyika bininj nawu birrimarnemırnderri Jesus nuye, wanjh bedda birridjalbawong, dja birriwam rowk.

Yikahwi Bininj Yımankek Birrikoweyi Jesus

Mark 12:13-17

(Matthew 22:15-22; Luke 20:20-26)

13 Kaluk bu yerrekah, nawu birrihwohınowhırnani bindımunkeweng yikahwi bininj kore Jesus. Bedda wanjh nawu Pharisees dja mak yikahwi bininj nawu birridjareni King Herod. Dja bedda birridjareni Jesus birrimayı bu kawohyime kunbuyika kunwok.

14 Wanjh birrimyikang kore nungka dja birrimarneyimeng, "Nawu Kanhbukkabukkan, ngad ngarriburrbun bu ngudda yiwoybuk bininj. Ngudda mak minj yikele bu baleh nawu bininj nawu birribuyika kabirrihburrbun bu nguddahkah. Dja yidjalweykan kunwoybuk dorreng manbu kore God kadjare. Wanjh kanmarneyimen ngadberre, yiddok kunukka kunmak dja nuk kunwarre bu ngarrikarremulewan money nawu taxes nuye Caesar?"

15 Yiddok ngarrikarremulewan dja kunubewu burrkyak?"

Dja nungka Jesus ngokko burrbunı bu kore birrikurduyimeninj bu birrikoweyi nuye. Wanjh yimeng, "Njalekenh bu yımankek ngudda kandikowe ba kandımayı ngaye? Dja ngurrimka ngardduk silver coin ba nganan."

16 Wanjh birriwong Jesus namekbe coin. Dja nungka djawayhmeng, "Nangale kahbımdı kore coin? Mak nangale kahngedyı?" Wanjh bedda birriyimeng, "Nawu Caesar."

17 Kumekbe Jesus benmarneyimeng, "Bonj. Wanjh ngurriwo Caesar njalehnjale nawu nuyekih. Dja kore God, wanjh ngurriwo njalehnjale nawu God nuye." Kaluk kunmekbe bu birribekıng Jesus yimeng bedberre, wanjh birrikangebarrıhmeng.

Bininj Nawu Sadducees Yimankek Birrikoweyi Jesus

Mark 12:18-27

(Matthew 22:23-33; Luke 20:27-40)

18 Wanjh yikahwi nawu Sadducees birrimyikang Jesus. Kaluk nawu Sadducees kabirriyime bininj bu kabirridowen, wanjh minj mak kabirriyawoyhdolkkan kore kundowikenh. Wanjh birridjawayhmeng Jesus.

19 Wanjh birriyimeng, "Nawu Kanhbukkabukkan, kore Moses bimbom, yimeng bu nakudji bininj karrowen, dja kabibawon ngalbininj kobeng kakamarrdukundi dja wurdyawyak, wanjh nawu benedanginj nuye kabenemarren ngahli daluk, ba bu wurdyaw kabenemarnekarme nuye nawu nayungkih doweng.

20 Kaluk yimankek kumekbe birridi seven bininj nawu birridanginj. Wanjh nayungkih nawu bimey daluk dja nungka wanjh doweng mak manembeywurdyakni, minj karmeninj wurdyaw.

21 Rerre wanjh nabuyikawali bikamarrdjukunmey ngalbu daluk. Wanjh nungka mak doweng rerreh dja manembeywurdyakni rerreh. Mak nabuyika kunmekbe rerreh yimerranj nuye.

22 Kaluk birriwern nawu birrimekbe seven birridanginj, birribebbehmey ngalmekbe daluk ngalkudjiwi dja bedda birridowerrinj rowk. Kaluk birrimekbe nawu birridanginj minj birribornayi wurdyaw. Wanjh rerre ngalmekbe daluk doweng.

23 Dja ngaldjalkudji ngalmekbe daluk bedberreni birrimekbe nawu seven birridanginj. Wanjh kaluk yerrekah, bu bininj kabirridolkarren kumidjbeh, kaluk baleh nawu bininj nuyekih duninj ngalmekbe daluk?"

24 Wanjh Jesus yimeng, "Njalekenh ngudda ngurriwarrewong bu ngurridjalbawong kunwoybuk? Yiddok ngudda minj ngurriburrun kore baleh kahyime nawu djurra? Mak yiddok ngudda minj ngurriburrun manbu God nuye kundulkarre?"

25 Wanjh bukkabukkan. Bu bininj kabirridolkarren kore kumidjbeh, minj kabirriyawoyhmarren, dja bedda wanjh kabirriyimerran bu karohrok nawu angels kore heaven."

26 "Kaluk ngudda ngurrinang djurra kore baleh God yimeng bu bininj kabirridolkarren kore kumidjbeh. Dja nawu kayolyolme kore Moses bimbom bu kundalk manbu runghrunji, wanjh kabimdi kayime bu God kuhni bimarneyimeng Moses, 'Ngaye nawu God nuye Abraham, dja nawu God nuye Isaac, dja nawu God nuye Jacob.' [Exodus 3:6]

27 Wanjh nawu God nakka bininj bedberre nawu kabirrihdarrkiddi, minj nakka bedberre nawu birridowerrinj. Ngudda nawu Sadducees wanjh minj ngurriwernhburrubun kore kunwoybuk ngarre."

Manbu Mankarrekukenh Duninj

Mark 12:28-34

(Matthew 22:34-40; Luke 10:25-28)

28 Kaluk nakudji bininj kumwam kore Jesus. Nungka nawu kabindihbukkabukkan mankarre. Kaluk nungka benbekkang bu Jesus birrihdangwerreni nawu Sadducees dja Pharisees. Dja mak bininj binang Jesus bu benwokdurndiweyi kunwok manmak benmarneyimi kore bedda birrimdjawani. Wanjh nungka kumwam dja bidjawam Jesus, "Baleh manbu mankarre mankkukenh, bu karrokme mankarrebubuyika ngarre?"

29 Kaluk nungka Jesus yimeng, "Manbu karrokme mankarrebubuyika wanjh makka mahni, 'Ngurribekka ngudda nawu Israel ngunkebawahmeng! God nawu Kawohran kadberre, wanjh nakka nadjalkudji Kawohran Duninj.

³⁰ Ngurrimarnedjarenin nawu Kawohrnan ngudberre God bu kunkange dorrenghnin, dja mak kunmalng dorrengh, dja mak kunmayali dorrengh, dja mak kungudj dorrengh.' [Deuteronomy 6:4-5]

³¹ Dja manbadbuyika mankarrekukenh, makka wanjh, 'Yimarnedjarenin nawu ngunerdbu bininj yiman kayime ngudda yimarnedjaremerren yingandeleng bulkkidj duninjh.' [Leviticus 19:18] Kaluk mahni mankarre bokenh wanjh makka manwernhkukenh duninjh, dja mak karrokme mankarrebubuyika ngarre rowk."

³² Wanjh nahni bininj nawu bidjawam Jesus yimeng, "Nawu kankabukkan, makka wanjh manmak bu yiyimeng. Ngudda mandjad bu yiyimeng kore yiyolyolmeng njalehnjale. God wanjh nadjalkudji nawu Kawohrnan dja minj nabuyika God mak kabenerohrok.

³³ Kaluk ngad wanjh karrimarnedjare bulkkidj duninjh bu kunkange dorrengh, kunmayali dorrengh, dja kungudj dorrengh. Mak karrimarnedjare nawu ngarriedbo bininj yiman kayime karrimarnedjaremerren. Wanjh mahni mankarre makka manwernhkukenh duninjh, manbu kayurrhke mankarrekilek kore karriwon njalehnjale kore God dja mak bu karrimarnekinje mayh."

³⁴ Wanjh Jesus binang nawu bininj bu yimeng mandjad. Dja bimarneyimeng, "Ngudda wanjh darnkih bu yingimen kore God kawohrnan rowk." Kaluk bu yerreyerre, minj nangale bininj kelebukniwirrinj bu birridjawayi Jesus.

Jesus Biyolyolmeng King David

Mark 12:35-37

(Matthew 22:41-46; Luke 20:41-44)

³⁵ Wanjh Jesus yolyohyolyolmi bedberre kore Temple kore kuberrkkah. Dja yimeng, "Njalekenh nawu kabindihbukkabukkan mankarre kabirrihyime bu Christ* nakka beywurd nuye David?

³⁶ Kaluk nawu David naweleng, kore nawu Namalngmakkaykenh bimarnewokdi, wanjh yimeng, 'God nawu Kawohrnan Rowk bimarneyimeng nawu Kawohrnan Rowk ngardduk, "Yinin kore kukun ngardduk, ba bidkenhwon nawu ngundinjirrhmiwon kore ngudda bu yibenkukmelme bedberre." ' [Psalm 110:1]

³⁷ Ngurribekkang? David nungandeleng bingeybom Christ biyingkihmarneyimeng 'Nawu Kawohrnan ngardduk' dja yiddok kunukka bu Christ beywurd nuye David?"

Bu Jesus yolyolmi, wanjh nawu bininj birriwern birrimarnemornnamerinj dja kunnjilngmak dorrengh bu birribekkani.

Jesus Benyolyolmi Bininj Nawu Bindibukkabukkani Manbu Mankar- rekenh

Mark 12:38-40

(Matthew 23:1-36; Luke 20:45-47)

³⁸ Wanjh Jesus munguyh yolyolmi bedberre birriwern bininj. Bu yimeng, "Ngurrinahrriwern bedberre nawu kabindihbukkabukkan mankarre! Bedda nawu kabirridjare bu kabirriwohrewohre dja mak kabirridjongbuyindi kunmadj manbu kabenmarnbun bedda kabirrikukenworren. Mak kabirridjare bu bininj kabindimakwan kore birribuyika.

³⁹ Mak kabirridjare kabirriyerkan kubolkkuken kore yiwarrudjkenh kunrurrk, dja mak kore mulil bu manme kabirringun.

* 12:35 "Christ" kangeyrohrok "nawu Messiah".

⁴⁰ Bedda nawu kabindikuyimang dja mak kabindimarnedjirdmang nawu kamahkamarrdjukun kore kururrk bedberre. Wanjh rerre bedda yimanek kabirribalmarnburren bu birrimak kore kabirrihdedjikyungme bu kabirrihi di yawarrudj. Kalukburk God kabendjadme bu kunkimuk duninj, dja mak kabenbun birrimakebe bininj kunmekbekenh.”

Jesus Biburlumeng Ngalkudji Ngalkodjmongni Daluk

Mark 12:41-44

(Luke 21:1-4)

⁴¹ Jesus wanjh ningihni kore darnkih nawu kunwarddekenh money birrihkukdahkendongi box kore Temple kuberrkka. Wanjh bennani bininj bu birrihkurrmi nawu kunwardde money. Kaluk birriwern bininj nawu birriwarddekimukni bu birridahkendongi nawern money kore Temple ngalenggarre.

⁴² Wanjh kumekbe ngalkudji daluk ngalbu ngalkodjmongni kumwam dja kurrmeng bokenh nawu kilehkilek yiman coins. Kaluk namekbe minj nabalwernniwirrinj yiman bokenh cents.

⁴³ Kaluk Jesus wanjh benkayhmeng nawu benbukkabukkani nuye. Dja yimeng, “Woybukkih duninj marneyime ngudberre. Ngahli ngalbu ngalmarladj ngalkodjmong kurrmeng djal bokenh kilehkilek. Mak ngaleng kurrmeng rowk nawu karmihkarrmi, dja benyurrhkeng birribuyika nawu birrikurrmi kore kunwarddekenh box.

⁴⁴ Nawu birrikuken kabirrikarme nawern namakmak, dja bedda birridjalkurrmeng nawu minj birridjareniwirrinj birrikarmeninj. Dja ngahli daluk, ngalka ngalmarladj wanjh ngaleng kurrmeng rowk nawu karmihkarrmi. Mak ngaleng minj karmeninj namekbe kunwardde ba bu bibidyikarmerrimeninj bu manme mayinj, wanjh ngaleng kurrmeng rowk.”

13

Jesus Benbengdayhkeng Kore Kayiburnbunkenh Rowk

Mark 13:1-13

(Matthew 24:1-2; Luke 21:5-6)

¹ Bu Jesus balhrurrkbawoni manbu Temple, nakudji nuye nawu benbukkabukkani, bimarneyimeng, “Yina, Nawu Kanhbukkabukka! Mahni Temple manwurrrkmakkaykenh dja kakarme manwarddekihkimuk.”

² Wanjh Jesus yimeng, “Mahni ngurrihnan mankimuk kunurrk? Kaluk manwarddekudjihkudji kawarrawarrhmerren. Dja minj manwohwarddekudji kawohbarndi kore manwarddebuyika.”

³ Kalukburk bu yerrekah, Jesus wanjh ningihni kore mandulum kabolkngeyyo Olives, kaluk borledmikenh kore Temple. Dja nungka birrihdjarrkni birridjalkudji Peter, James, John dja Andrew. Wanjh bedda birridjawam Jesus bu manmolk,

⁴ “Kanmarneyimen ngadberre, bu baleh kabolkyime nahn nialehnjale kakurduyimerran? Dja njale karrinan bu kamenmenyime bu darnkih kamre?”

⁵ Wanjh Jesus dedjingmey bu yolyolmi bedberre, “Ngurrinaharrimen bu minj nangale ngunkowe ngudberre.

⁶ Birriwern bininj kabirrimere wanjh kungey ngardduk bu ngandingeybun. Dja bedda kaluk kabirribebbehmulewarren bu kabirriyime, ‘Ngaye wanjh nawu Christ.’ Wanjh kabindikowe birriwern bininj.

⁷ Mak ngurrbenwobekkan nawu war kabirriburren dja ngurribekkan kabirriyolyolme kore kabirriburren bu ngokko kamhre. Dja ngaleng

yuwn ngurrikele. Nahni nawu njalehnjale wanjh kurduyimerra, dja kayiburnbunkeh minj werkkwerkk kamre, dja med.

⁸ Wanjh bininj birriwern kabirriburren dja kunred kabirribolkyiburren. Dja ngurribekkan bula kabolkrokran kore kubolkbubuyika ngarre. Dja warridj manme kayakayakmen bedberre bininj kore kubolkbubuyika. Kaluk kuhni bu bolk kayimerran nakka yiman kayime daluk ngalbu wurdyaw kabihbun bu kahmahmirranj.

⁹ Ngudda wanjh ngurrinaharrimen. Wardi bininj ngundimang dja ngundikurre kore court. Mak bedda ngundibun whips dorreng kore kunrurrk manbu yiwarrudjkenh ngarre. Dja ngundidjurrkkan bu ngurridangen kore kumirrk bedberre nawu kings dja governors, wanjh ngurrimulewan kunwoybuk dorreng bedberre bu ngayekenh.

¹⁰ Kaluk kore kayiburnbun, dja wanjh manbu manmakaykenh kunwok wanjh makka ngurrimulewan bedberre birriwarlahkenh bininj werkk.

¹¹ Mah wanjh. Bu ngudda ngundimang dja ngundidjadme, yuwn bu ngurrinjilngwarremen kore baleh ngurriyime. Dja ngurridjalyimen kore God ngunwon bu ngurriyime. Kaluk minj nguddabeh bu ngurriwokdi, dja nakka wanjh Namalngmakaykenh kahwokdi ngudberre.

¹² Mak bu kumekbe wanjh nawu birridangerrinj nakka wanjh kabirriweykarren kore kabindibunkeh. Mak kokorkumo kabindiweykan nawu bebeywurd bedberre bu kabindibunkeh. Mak nawu wurdwurd bu kabindiwokburriwe ngalbabadjan dja kokorkumo bedberre wanjh kabindidjalmunkewe kore kabirridowe.

¹³ Birriwern bininj ngundidjalwirrihme kunmekbekenh bu gaye kanmunkekadjung. Dja bininj bu kabirridjalmurrngrayek munguyh dja kabirrihdjaldi kore kabalyiburnbun rowk, nakka wanjh ngabenngheke.”

Jesus Benbengdayhkeyi Bu Kunwarrekeh Kamre

Mark 13:14-23

(Matthew 24:15-28; Luke 21:20-24)

¹⁴ Jesus benmarneyimeng bininj nawu birrihdi, “Ngudda kaluk ngurrinan nawu nawarre duninj bu kabenbun dja kabularrbun*, mak ngurrinan namekbe nawu nawarre bininj kahdi kore nungka minj nuye. Ngudda nawu ngurrihbimnan nahni djurra wanjh ngurrimayalibayhmen kore baleh kahmenmenyime. Kaluk bu kunmekbe kayimerran, bininj nawu kabirrihni kore Judea wanjh nakka birrikelerlobmen kore kuwarddehwardde.

¹⁵ Nawu bininj kahbarndi kaddum kore kurrambalk nuye, minj mak kakolung kanjdji dja mak minj kangimen kururrk kore kamang njalehnjale nuye kurrambalk.

¹⁶ Dja mak bu bininj kahdi kore kabbal, wanjh minj mak karrurndeng kamang nuye nawu kadjongbuyindi.

¹⁷ Kaluk bu kunmekbe kayimerran, wanjh kakarrerayek duninj bedberre nawu birrimerlemyi daluk dja mak nawu kabindihyawdjikkawon!

¹⁸ Dja ngurridin yiwarrudj ba kuhni minj kakurduyimerran bu yekke.

¹⁹ Wanjh bu kunmekbe kabolkyimerran, wanjh kunyid kawernmerren. Kaluk kundjalkimuk duninj kunyid kawernmen kore minj korroko yimeninj bu kerrngehkenh duninj, bu God bolkmarnbom mahni kurorre. Kaluk minj kayawoyhkurduyimerran bu yiman kunmekbe werkk kayimerran.

²⁰ Mak God kahdedjumbunghme nawu nawarrewarre bu kabolkyimerran yerrekah. Dja bu minj karredjumbunghme, wanjh kunukka

* **13:14** Daniel 9:27

minj nangale mak kadjaldarrkid. Dja nungka God karredjumbunghme bedberre nawu bininj nuye kore nawu bendjarrngbom.

²¹ Wanjh bu kunmekbe, nakudji bininj wardi kayime, 'Yina, nakka nawu Christ!†' Mak nabuyika wardi kayime, 'Nakka kahdi!' Wanjh yuwn ngurbenwoybukwon.

²² Wanjh yika bininj kabirrimbebme nawu kabirrikurrehkurren. Kabirriyime, 'Ngaye nawu Christ!' Dja mak nawu kabirrihkurrehkurren prophets kabirrimre, dja kabindibukkan manbu kundulkarre dorrengh, dja mak kabirrikurduyime manbubuyika ba bedda kabindirohrokme bu yimankek kabindibengwarrewon bininj nawu God bendjarrngbom.

²³ Dja ngudda wanjh ngurrinahnarrimen. Dja ngaye kunu wanjh yingkihbengdaykheng ngudberre bu kuninjkukenh kabalkurduyimeran yerrekah."

Jesus Yolyolmerrinj Bu Nungka Kamyawoyhdurdengkenh

Mark 13:24-27

(Matthew 24:29-31; Luke 21:25-28)

²⁴ Wanjh Jesus yimeng, "Kaluk bu kayakmen kore kabirridjakbekkankenh, bu kunmekbe kabolkyimerran kore kabimbuyindi bu kayime, 'Wanjh manbu kundung makka kakakyongen kamimburleran. Dja nawu dird nakka minj kabolkwolkan.

²⁵ Mak nawu mankokkarrng nakka kawarrawarrhmerren kore kadumbek. Nawu birrimalngwarre duninj kore kaddum kahbirrihdi, kabirrikarrme kundulkarre, wanjh kabirrideldelmibebme.'" [Isaiah 13:10; 34:4]

²⁶ "Bu kunmekbe kabolkyimerran, wanjh bininj rowk kabirrinan nawu Bininj Duninj kamhre kore kungol dorrengh, dja mak kundulkarre manbu mankimukkenh duninj kore kunmakmak dorrengh.

²⁷ Kaluk nungka wanjh kabenmunkewe nuye angels kore kubolkbubuyika rowk kondah kurorre, dja mak kore kaddum heaven. Wanjh angels kabindimanamang bininj rowk nawu Bininj Duninj bendjarrngbom."

Kuhni Bu Ngurrinan Baleh Kayimerran Kore Kayiburnbun

Mark 13:28-31

(Matthew 24:32-35; Luke 21:29-33)

²⁸ Wanjh Jesus yimeng, "Manbu fig kundulk ngunbukkan ngudberre bolkkime, dja wanjh ngurriborlhmen. Bu manyende ngarre green kayimerran dja kakelkkelkmen, dja manmarlaworkerrnge kadjordmerren, wanjh kunukka ngurriburrbun bu darnkih kamhre ngarre kurrung.

²⁹ Wanjh kunmekbe karohrok bu ngurrinan kuhni njalehnjale ngayimeng kahkurduyimerran, wanjh ngurriburrbun bu darnkih kamhre ngarre bu kayiburnbunkenh rowk. Yiman kayime darnkih kore kururkdangmaye!

³⁰ Woybukkih duninj marneyime ngudberre. Kuhni bu njalehnjale nawu kakurduyimerran, bu bininj nawu yiman bolkkime kabirrihni wanjh nakka kabirrinan bu kakurduyimerran.

³¹ Maninjmanu kunred, kunrorre, dja kunngol makka wanjh kadjalyakmen rowk, dja kunwok manbu kore ngaye ngayime, makka minj kayakmen."

† 13:21 "Christ" kangeyohrok "nawu Messiah".

Minj Nangale Kaburrbun Njale Kundung Bu Kayiburnbun Rowk

Mark 13:32-37

(Matthew 24:36-44)

³² Jesus yimeng, “Minj nangale mak kaburrbun manbu kunbarnangarra dja njale kundung bu kabolkymerran. Angels nawu kabirrihni heaven minj kabirriburrbun, dja ngaye nawu God nuye Beywurd, minj ngaburrbun. Dja nadjalkudji God nawu Kornkumo kaburrbun.”

³³ “Wanjh ngurriahnarrimen! Kaluk ngurrihdjalmarnburrimen bu ngurridi yiwarrudj. Ngudda minj ngurriburrbun njale kundung bu kunmekbe kayimerran.

³⁴ Nakka yiman kayime bininj nawu kare djarreh kubolkbuyika. Kabawon nuye kurrambalk dja kabenyibawon nawu kabirrihmarne durrrkmirri bu kabirrimarnerurrknahnan. Mak kabenbebbewon bu kabirridurrrkmirri. Mak kabimarneyime nakudji nawu karrangnahnan bu kabengyirri. Kuhni karohrok bu ngaye marnehmarneyime ngudberre bu bolkkime.

³⁵ Ngudda wanjh ngurriyingkihmarburrimen. Dja minj ngurriburrbun bu baleh kabolkyme kamdurndeng nawu kawohrn nuye kurrambalk. Kunubewu kamre bu wolewoleh, dja kunubewu kumununburrrk, mak kunubewu djarreh kamhkabel, mak kunubewu bu karrungbebme!

³⁶ Mak wardi kamdurndeng bu werkkwerkk. Bu ngudda ngurrimarnmarburren wanjh kunukka minj ngungalke bu ngurrihkodjkeyo.

³⁷ Wanjh ngaye kuhni marneyime ngudberre mak ngabenmarneyime birriwern bininj: ‘Ngurrimarnburrimen!’ ”

14

Bininj Birrihwokmarnburreni Bu Kabirridjare Kabirribun Jesus

Mark 14:1-2

(Matthew 26:1-5; Luke 22:1-2; John 11:45-53)

¹ Kaluk wanjh yimerranj kunkodjke bokenh bu kamre ngarre mulil manbu Kunkare Bendarrkiddbawongkenh dja mak mulil manbu Kandid-djawan Manlodlurlmiyak. Nawu kabirrihkihkimuk priests dja nawu kabindihbukkabukkan mankarre nakka wanjh birrihwokmarnmarnburreni bu yimanke nawu birrikowemeninj Jesus bu manmolk birriberlmayi, wanjh birribuyi karowen.

² Dja bedda birriyimarne merrinj, “Minj kunukka karribangmekurduyime bu kabirrihkarrme manbu mulil. Dja wardi bininj kabirrimirndewernmen bu kandiyiddungkenh kore kurobbe.”

Ngalbu Daluk Bikodjdelhkeng Jesus Manbu Manjmakkaykenh Dorreng

Mark 14:3-9

(Matthew 26:6-13; John 12:1-8)

³ Bu kunmekbe wanjh Jesus nungka ningihni kore Bethany. Kaluk manme ngunihnguni kore kurrambalk nuye Simon, nawu birringeybuni “kurlahwarre”. Bu kumekbe Jesus ningihni, ngalkudji daluk kumwam kore nungka, dja karrmi budjdjurlung nawu dahkendi manjmakkaykenh perfume manbu nakimuk kunwardde bayahmeng. Mahni perfume marnbuyindanj nardbeh. Wanjh ngalmekbe daluk bakkeng nawu budjdjurlung dja yakbom kore kukodj nuye Jesus.

⁴ Yikahwi bininj nawu kumekbe birrihdi birrikurdunang, wanjh birriduy ngahli daluk. Wanjh birrimarneyimerrinj bu birriyime, “Njalekenh weng rowk namekbe manjmak perfume?”

⁵ Nakka nuk bu karri durrrkmirriwerrinj mandjewk ngarre nakudji bu karribayahmeninj. Wanjh karriweykayi, dja kunwardde kandikukwoyi

wanjh karrbenbadkukwoyi nawu birrimarladj bininj.” Wanjh birri-marnewokdanginj wernkih ngalenggarre.

⁶ Wanjh Jesus yimeng, “Yuwn kunyiid ngurrimarnbun ngaleng ngarre! Njalekenh ngurrihdung? Ngaleng kurduyimeng bu kundjalmak duninj ngardduk.

⁷ Dja ngudda kaluk ngurrbenboyenkarrme nawu birrimarladj dja ngurrbenbidiyikarrme bu ngurridjare. Dja ngaye minj boyenkahwi kandikarrme.

⁸ Ngahli daluk kuhni djalkurduyimeng ngardduk kore karrmi. Bu yakbom nahni manjmak kunkalkkid kore kuburk ngardduk, wanjh kuhni kurduyimeng yiman kayime ngandikukbarungkenh bu yerrekah kore ngarrowen. Dja ngandikukmarnbunkenh bu ngandikukkurrme kore kuwardderurrk.

⁹ Woybukkih duninj marneyime ngudberre, manbu manmakaykenh kunwok ngardduk, wanjh kawarlahmen kore bininj bedberre nawu kubolkbubuyika kunred kabirrihni. Mak kubolkwern kabirriweykan mahni kunwok, kore baleh ngahli daluk kurduyimeng. Wanjh birriwern bininj ngaleng kabirriburrun.”

Nawu Judas Biweykang Jesus

Mark 14:10-11

(Matthew 26:14-16; Luke 22:3-6)

¹⁰ Wanjh nakudji bininj kore twelve nawu benbukkabukkani nuye Jesus, kaluk Judas Iscariot, wam birrihwokdi nawu birrikihkimuk priests. Wanjh Judas kabikukweykang Jesus kabenbidnakenhwon.

¹¹ Kaluk nawu priests birrinjilngmakminj bu kunmekbe birriwok-bek kang dja birriwokkurrmerrinj bu kabirrikarremulewan Judas. Wanjh kumekbe dingihdi madbuhmadbuni bu baleh kaluk kabolkyime bu kabikukweykan Jesus kabenwon.

Jesus Birridjarrknguneng Mulil Manbu Bendarrkidbawongkenh

Mark 14:12-21

(Matthew 26:17-25; Luke 22:7-23; John 13:21-30)

¹² Kuhni wanjh yimerranj kunbarnangarra kumdokmi ngarre Mulil manbu Manlodbalabala Kandidjdjawa. Kaluk kuhni wanjh bininj nawu Jews bedberreni, bu kabirrikinjeyi nawu mayh yaw lambs kore God kunkudjikenh benbengdayhkeng bu kunkareni Bendarrkidbawongkenh. Kaluk Jesus nuye nawu benbukkabukkani, nungka birrimyikang, dja birrimarneymeng, “Yiddok ngarrire ngarriyingkihmarbun njalehnjale kore ngaleng ngarre manbu Bendarrkidbawongkenh mulil. Dja baleh yidjare yingun manbu manme?”

¹³ Wanjh Jesus benbenemunkeweng benebokenh nawu benebukkabukkani nuye dja benbenemarneyimeng, “Nguneray kore karurrkmirnderri. Wanjh bininj nawu kahbongorrkan kukku banikkin dorreng kumekbe ngurrinaren. Wanjh namekbe ngunemunkekadju.

¹⁴ Kaluk bu nungka kare kangimen kore kurrambalk, wanjh kuhni ngunemarneyimen bininj nawu nuye kurrambalk, ‘Nawu Kanhbukkabukkan kadjawayhme bu kanbenebolbukkan ngarrewoneng kunurrk kore kabirringun manme manbu Bendarrkidbawongkenh mulil nawu kabenbukkabukkan nuye warridj.’

¹⁵ Wanjh kaluk nahni bininj ngunbenebolkwon manurrkkimuk kore kaddumkah. Kunmekbe wanjh nguneyingkihbolkmarnbu kadberre.”

¹⁶ Wanjh nawu benebokenh nawu benbukkabukkani bindibawong benewam kore rurrkmirnderri. Kaluk bu kunmekbe Jesus yimeng wanjh

djalkurduyimerranj. Dja bedda wanjh beneyingkihmarbom manbu mulilkenh.

¹⁷ Kaluk bu wolewoleh yimerranj, Jesus dja nawu twelve nawu benbukkabukkani nuye birridjarrkwam birringimeng kore kurrambalk.

¹⁸ Wanjh bu kunmekbe birrihnguni manme, Jesus yimeng, "Woybukkiah duninjh marneyime ngudberre. Nakudji bininj ngudberre nawu ngankukweykan. Kaluk nahni bininj nawu nganedjarrkngun manme bu bolkkime."

¹⁹ Kaluk nawu benbukkabukkani nuye bu birribek kang kunmekbe yimeng wanjh bedda birrinjilngwarreminj. Dja mak birribebbehmarneyimi Jesus, "Burrkyak, minj gaye, dja ngawid?"

²⁰ Wanjh Jesus yimeng, "Nakudji namekbe nganhnjirrhmiwon kore ngudda nawu twelve bininj. Nawu nganedjarrkdjuhke kandidjawa kore banikkin wanjh namekbe nanu.

²¹ Ngaye nawu Bininj Duninjh wanjh ngare ngarrowen, kore djurra kahbimbuyindi bu kadjalkurduyimerran. Dja kadjalkarrewarre nuye nawu bininj bu ngankukweykan gaye nawu Bininj Duninjh. Dja kunukka makniwirrinj nuye namekbe bininj bu minj kumngalmeninj."

Jesus Benwong Nuye Nawu Benbukkabukkani Buriddi dja Manbu Wine

Mark 14:22-25

(Matthew 26:26-30; Luke 22:14-20; 1 Corinthians 11:23-25)

²² Kaluk bu kunmekbe manme birrihnguni, Jesus lodmey manbu kandidjawa dja biyimanjbom Kornkumo wanjh lodbakkeng dja benwong nawu benbukkabukkani nuye dja benmarneyimeng bedberre, "Ngurrima. Mahni kandidjawa makka kamulewan kunburk ngardduk."

²³ Wanjh Jesus mey nawu banikkin, dja biyiyawoyhmanjbom nawu Kornkumo, wanjh benbowong nuye nawu benbukkabukkani. Kaluk birribonguneng rowk.

²⁴ Wanjh Jesus yimeng, "Mahni kamulewan kunkurlba ngardduk manbu kakarremarnbun mankarre kore God benmarnewokkurmerrinj bedberre nawu bininj nuye kunkare. Kaluk ngakurlbayakburren ngudberre dja mak birriwern bininj.

²⁵ Woybukkiah duninjh marneyime ngudberre, gaye minj ngayawoyhbongun wine manbu kondah kurorrebeh, dja kalukburk bu kunbarnnagarra kamre kunmekbe wanjh ngayawoyhbongun maninjmanu wine kore God kawohran rowk."

Jesus Dja Nawu Benbukkabukkani Birriwam Kore Mandulum Ngarre Bolkngeyyoy Olives

Mark 14:26-31

(Matthew 26:31-35; Luke 22:31-34; John 13:36-38)

²⁶ Wanjh bedda birriwayiniyerrkang hymn, wanjh birriwam kore Mandulum ngarre bolkngeyyoy Olives.

²⁷ Kumekbe Jesus benmarneyimeng nawu benbukkabukkani nuye, "Ngudda minj kandiwerhwoybukwon ngaye. Dja kore djurra kabimbuyindi bu kahyime, 'Ngaye ngabun nawu Shepherd, wanjh nawu mayh sheep nuye kabirrikelerlobmerren rowk bebbehbeh.' [Zechariah 13:7]

²⁸ Kaluk bu yerrekah gaye ngayawoyhdolkan kore kumidjbeh, gaye ngarrokme ngudberre dja mak ngare kore Galilee."

²⁹ Wanjh Peter yimeng, "Nahni nawu birribuyika wanjh nakka wardi ngundibawon wanjh kabirrikelerlobme. Dja gaye burrkyak! Ngaye minj kunukka gayeime!"

³⁰ Kaluk Jesus yimeng, “Woybukkih duninh marneyime ngudda, bu bolkkime kukak ngudda wanjh kanwaralkukwakwan! Dja mak kumekbe yiyime danjikkah wanjh rerre bawurl kakayhme bu bokenhkah.”

³¹ Wanjh Peter biwokmey bu wernkih wokdanginj yimeng, “Ngaye minj munguyh kunukka ngayime bu waralkukwakwan! Ngaye wanjh ngarrdjarrkdownen!” Mak birribuyika nawu benbukkabukkani rowk wanjh kunmekbe rerreh birridjarrkyimeng.

Jesus Danginj Yiwarrudj Nakudjikudji Kore Kabolkngeyyo Gethsemane
Mark 14:32-42

(Matthew 26:36-46; Luke 22:39-46)

³² Jesus dja nawu benbukkabukkani nuye birribebmeng kore kabolkngeyyo Gethsemane. Wanjh Jesus benmarneyimeng, “Kondah ngurridin dja ngare yiwarrudj ngarri.”

³³ Wanjh benkanng Peter, James, dja John, dja birridjarrkwam. Kaluk Jesus ngokko dedjingmey djalwernhnjilngwarremeni duninh.

³⁴ Dja benmarneyimeng, “Ngaye kunnjilngwarre kunkimuk bu ngahkar-me. Kunkange ngardduk nganhkangedjalkmang bu kunnjilngwarre dorrengh wardi bu ngarrowen. Dja kondah ngurridin ngurribolknahna.”

³⁵ Wanjh Jesus wam djarreh yungkihkah, kumekbe mankarinj kore kurorre dja danginj yiwarrudj, bu bidjawam Ngabbard God bu wardi kuhni minj yimerrangimeninj nuye.

³⁶ Wanjh yimeng, “Abba!* Ngabba! Ngudda njalehnjale yikurduyime. Dja yuwn kanbowon mahni banikkin nawu kore ngahdjakbekkankenh. Dja bonj. Ngudda yikurduyimen kore ngudda yidjare, dja yuwn kore ngaye ngadjare!”

³⁷ Wanjh Jesus durndi kore nawu benbukkabukkani nuye benbawong dja benngalkeng birrikodjkeyonginj. “Mah!” Jesus bimarneyimeng Peter, “Ngudda nawu Simon, njalekenh ngudda yihkodjkeyo? Dja minj ngurridjarrkwohrnayinj bu kundung nakudji?”

³⁸ Mah. Ngurriwohrna dja ngurridin yiwarrudj wardi kunu minj nawarre ngundjurrkan. Manbu kunmalng ngudberre makka kadjare kunmak kakurduyime, dja kore kunburk ke, wanjh kunukka yidjalngudwarre.”

³⁹ Mak Jesus yawoyhwam yiwarrudj yawoyhdanginj kunmekbe djalyimi kubolkkudji.

⁴⁰ Kaluk yawoyhdurndi bennang nawu benbukkabukkani nuye birrihdjalkeyoy mak bedda birrikodjkedulumukni. Wanjh minj birriburribuyi bu baleh birrimarneyimeninj Jesus.

⁴¹ Kaluk bu Jesus danginj yiwarrudj danjikkah, dja yawoyhdurndi kore nawu benbukkabukkani nuye benbawong. Wanjh benmarneyimeng, “Yiddok ngudda ngurrihdjalkeyo dja ngurridjalngudjngehme? Wanjh bonj! Kundung kumwam ngarre bu ngaye nawu Bininj Duninh wanjh ngankukweykan ba bu birriwarre bininj ngandibun.

⁴² Ngurridolka! Karrire, dja nahni kamhre bininj nawu ngankukweykan.”

Bu Birridarrkidmey Jesus

Mark 14:43-52

(Matthew 26:47-56; Luke 22:47-53; John 18:3-12)

⁴³ Kaluk bu Jesus djahdjalkwokdi, kumekbe Judas nawu birridjarrkreji twelve nawu benbukkabukkani, benmarnebebmeng, birriwern bininj

* 14:36 “Abba!” kayime “Ngabba!” kore kunwok bedberre.

nawu birrimkani mandjawak dja kundulk bu birribuyinj Jesus. Kaluk bedda bindimunkeweng nawu birrikihkimuk priests dja nawu mankarre kabindhukkabukkan dja mak dabborrabbolk nawu birriwohrnani bininj.

⁴⁴ Kaluk nawu Judas ngokko karremarnbom bu kabenkokmalidj mang, bu kayime, "Bininj nawu ngabunjhmang, namekbe nanu wanjh nungka. Ngurrima dja ngurrinahnan bu ngurrikan."

⁴⁵ Wanjh Judas wam werkkwerkk kore Jesus dja bimarneyimeng, "Nawu Kanhbukkabukkan!" Wanjh nungka bibunjhmej.

⁴⁶ Wanjh bininj birrimdjarrkwam Judas dorrengh bu birridarrkidmey Jesus.

⁴⁷ Nakudji nawu benbukkabukkani nuye kumekbe dingihdi darnkih wanjh durkmey nawu mandjawak dja bikanemdjobkeng nakudji bininj nawu bihmarnedurkmirri nawu kabenmarnwohrnan kore priests rowk.

⁴⁸ Wanjh Jesus benmarneyimeng nawu birriwern bininj, "Ngudda ngurrimwam mandjawak dorrengh dja kundulk dorrengh ngurrimkang bu ngudda kandidarrkidmey. Yiddok ngurriyime ngaye yimankek ngabang dja mak ngawowarre?"

⁴⁹ Bu kunbarnangarra rowk ngaye karrihdjarrkdi bu ngahyolyolmi ngudberre kore Temple kuberrkkah, dja ngudda minj kumekbe kandi-mayi. Bonj. Wanjh kamak bu mahni njalehnjale nawu djalkurduyimerra ngaye bu kabimbuyindi kore djurra wanjh woybukkenhdanj."

⁵⁰ Wanjh nawu benbukkabukkani nuye Jesus birrikukbawong rowk, dja birrikelerlobmerrinj.

⁵¹ Kaluk nakudji nayawurrinj, nawu bihmunkekadjungu Jesus, nawu djongbuyindi manburrba namak, dja birridarrkidmayi nungka warridj,

⁵² wanjh manburrba nawu djongbuhdjongbuyindi nakka madjyerrk-meng nuye. Dja kelerlobmeng kuklahlarrk dja bawong manburrba nuye.

Jesus Dangingi Kumirrk Bedberre Bininj Nawu Sanhedrin Birrihni

Mark 14:53-65

(Matthew 26:57-68; Luke 22:54-55,63-71; John 18:13-14,19-24)

⁵³ Kaluk bininj nawu Jesus birrimey birrikang kore kunred nuye nawu Priest Kabenmarnwohrnan. Wanjh nawu birrikihkimuk priests, dja mak nawu dabborrabbolk birringeykimuk, dja mak nawu mankarre kabindhukkabukkan, wanjh kumekbe birrimornnamerrinj rowk.

⁵⁴ Wanjh Peter benmunkekadjungu djarreh yerrih wanjh ngimeng kore kuberrkkah kurrambalk manbu nuye nawu Priest Kabenmarnwohrnan, dja kumekbe yerrkang birrihdjarrkni nawu birridurkmirri, kore kukkuwani kunak.

⁵⁵ Kaluk nawu birrikihkimuk priests dja nawu bininj rowk nawu council birriyerrkani, yimankek birrikarreyawayi njale nuye Jesus ba bu kabirribun karrownen. Dja bedda minj njale birrikarregalkemeninj nuye ba bu kabirribun.

⁵⁶ Kaluk birriwern bininj birrimwam birriyolyolmeng nungka dja birridjalkurreni. Dja minj birriwokmarnburrimeninj kore baleh minj bedda birriyimeninj.

⁵⁷ Wanjh yikahwi birribuyika bininj birrimdollkang dja bindikoweng bu Jesuskenh. Bedda birriyimeng,

⁵⁸ "Ngad ngarribekkang nahnini bininj yimeng, 'Ngaye ngarurrbakke mahni Temple manbu bininj birrimarnbom. Kaluk bu yerrekah bu kunkodjedanj bikk, ngayawoyhrurkmarbnun manbuyika Temple manbu minj bininj kabirrimarnbun.'"

⁵⁹ Njalehnjale kore nahni bininj birrimarneyimeng minj birriwokmarn-burrimeninj.

⁶⁰ Wanjh nawu Kabenmarnewohrnan priests, dolkkang, danginj kore kumirrk bedberre dja bimarneyimeng Jesus, “Yiddok ngudda minj yibenwokdurndiwe bu yiwokdjurrudin kore bininj kabirrihyime ke? Njalekenh bu birriyimeng?”

⁶¹ Kaluk nungka Jesus minj wokdiwirrinj, minj benwokdurndiwemeninj. Wanjh nawu kabenmarnewohrnan priests biyawoyhdjawan kunkudji, bu bimarneyimeng, “Yiddok ngudda Messiah†, nawu Beywurd nuye God nawu karriburlume?”

⁶² Wanjh Jesus yimeng, “Yoh. Ngaye wanjh nungka. Kaluk bu yerrekah ngudda kandinan ngaye nawu Bininj Duninj bu ngahni kore kukun nuye nawu Dulkarrekimuk duninj, mak ngudda kandinan ngaye kamre kunggol dorreng kore kaddumbeh.”

⁶³ Kaluk bu kunmekbe bibek kang Jesus, nawu kabenmarnewohrnan priests wanjh birruy, dja mak madjdjalkmarrinj dja yimeng, “Minj karrijare nabuyika nawu kabimulewan nuye!

⁶⁴ Ngudda ngurribek kang rowk bu kuninjku bimarneyimeng kunwarre God. Dja baleh ngudda ngurriyime?” Wanjh bedda birriyimeng rowk bu Jesus wanjh kunwarre yimeng dja nungka wanjh dowimen.

⁶⁵ Yikahwi bininj nawu kumekbe birrihdi birrikununjmi Jesus. Mak birrimimbalmi kunmadj dorreng, dja birribuni birribiddurndulmerrinj nuye. Dja birrimarneyimeng, “Mah. Mandjad yiyimen ngudda nawu prophet! Yimulewa nangale ngunbom?” Wanjh bininj nawu djamun birrikang kore birribuni.

Peter Biwaralkukwakwam Jesus Bu Danjikkah

Mark 14:66-72

(Matthew 26:69-75; Luke 22:56-62; John 18:15-27)

⁶⁶ Wanjh Peter nawu djahdjani kanjdji kore kuberrkkah, kaluk ngalbu ngalkudji ngalyawk kore birrimarnedurrkmirri nawu kabenmarnewohrnan priests, kumekbe kunwam kore birrikukkuwani.

⁶⁷ Wanjh ngaleng binang Peter kuwani kore kunak. Kaluk biwernhnang, ngalmekbe daluk yimeng, “Ngudda ngunehdjarrkrey nahni bininj nawu nakang Nazarethbeh, nawu kangeyyo Jesus!”

⁶⁸ Dja Peter yimeng bu nungka minj benedjarrkrawinj Jesus. Wanjh yimeng, “Ngaye ngakukwakwan! Minj ngaburrbun nawu njale yihyolyolme.” Wanjh Peter bolkbawong dja wam kore kurrangmaye ngarre kuberrkkah.

⁶⁹ Kaluk ngalmekbe ngalkudjiwi ngalyawk biyawoyhnang Peter kumekbe, wanjh benmarneyimeng birribuyika bininj nawu kumekbe birrihdi, “Nahni bininj nakka wanjh birrimekbe nawu birrihdjarrkrey Jesus!”

⁷⁰ Wanjh Peter yawoyhyimeng makka minj kunwoybuk. Kaluk bu kund-edjumbungni, bu rerrih yikahwi nawu birrihdjarrkdi Peter, birriyimeng, “Yoh. Ngudda woybukkih ngurridjarrkrey Jesus. Dja ngudda wanjh yimdolk kang kore Galilee warridj.”

⁷¹ Kuhni wanjh Peter wokkihyimeng kunwarre wokdanginj bu djareni God bibuyinj, dja wokkurrmerrinj bu yimeng, “Ngaye ngamulewarren duninj ngudberre bu minj ngakukburrbun nahni bininj nawu ngurrihyolme!”

† 14:61 “Messiah” kangeyrohrok “Christ”.

⁷² Kaluk bu kunmekbe Peter yimeng, wanjh kundjalmekbe rerrih, nawu bawurl yawoyhkayheng. Wanjh kumekbe Peter burrbom kore Jesus bimarneyimeng, “Rerre kunu bawurl kakayhme bokenhkah, ngudda kaluk kanwaralkukwakwan, dja kunmekbe yiyime danjikkah.” Wanjh Peter djalwernhnjilngwarreminj dja nalkbom wernkih duninj.

15

Bu Birrikang Jesus Kore Pilate Kabidjadmekenh

Mark 15:1-5

(Matthew 27:1-2,11-14; Luke 23:1-5; John 18:28-38)

¹ Bu darnkih kumhkabelni, nawu birrikihkimuk priests, dja mak dabborrabbolk birringeykimuk, dja mak nawu mankarre kabindih-bukkabukkan, dja mak bininj rowk nawu birriyerrkani kore council, wanjh werrkwerrk birriwokmarnburrinj bedmandeleng bu baleh kabir-rikurduyime nuye Jesus. Wanjh bedda birridukkarrukkang Jesus dja birrikang bu birribidnakenwong Pilate.

² Wanjh Pilate bidjawam Jesus, “Yiddok ngudda nawu king bedberre nawu Jews bininj?” Dja Jesus yimeng, “Kore ngudda yidjalyime.”

³ Kaluk nawu birrikihkimuk priests birridjuhuni Jesus bu kunwernkenh birriyolyolmi.

⁴ Wanjh Pilate biyawoyhdjawam Jesus bu yimeng, “Ngudda yibenhnan nahni bininj bu ngundihduhban kunwern ngundimarneyime. Dja njalekenh ngudda minj yibenwokmang?”

⁵ Dja nungka Jesus minj mak benwokmayi. Wanjh Pilate nawu nungka kangebarrheng bu kuhnikenh.

Birriwern Bininj Birridjareni Birribom Jesus

Mark 15:6-15

(Matthew 27:15-26; Luke 23:13-25; John 18:39—19:16)

⁶ Bu manwern mandjewk bu mulil manbu Bendarrkidbawongkenh ngarre, nawu Pilate bibekeni nakudji bininj kore dukkahdukkayindi yiman prison. Wanjh bibekeng bedberre nakudji bininj nawu birriwern birriwernhmarnedjareni.

⁷ Kaluk bu kunmekbe bolkyimi, birriwern bininj nawu birriwarreni birridjarrkdukkayindi kore prison. Bedda wanjh birribakkeng mankarre kunwern dja bindimarnemarnbuni kunyid kunwern bedberre birriwarlahkenh bininj, dja mak nawu bindibuni bindikukburriweyi yikahwi bininj. Nakudji nawarre bininj nawu dukkahdukkayindi nungka ngeyyoy Barabbas.

⁸ Wanjh nawu bininj birrimirndewern birrimiyikang Pilate dja birridjawam bu kabibebke nawu kahrurrkkendi nawu kurdukkurduyimi bu kerngehkenh.

⁹ Wanjh Pilate bendjawam, “Ngudda yiddok ngurridjare bu ngabebke nawu king ngudberre ngudda bininj nawu Jews?”

¹⁰ Kaluk Pilate ngokko burrbuni bu nawu birrikihkimuk priests birribidnakenwong Jesus bu kunmekbekenh bedda birridjalkirnewei.

¹¹ Wanjh nawu kabirrihmarnedokme priests bindidjurrkkang nawu birriwern bininj ba kabirridjawan Pilate bu kabibebke Barabbas, dja Jesus nakka wanjh nawid.

¹² Kaluk Pilate benyawoyhdjawam birrimiekbe bininj, “Kaluk baleh ngamarnekurduyime nahni bininj nawu ngurrihyime king ngudberre bininj nawu Jews?”

13 Wanjh bedda birrimkaykahkayhmi, birrimyimeng, “Ngurrikukbarnnamen kore kundulk cross!”

14 Pilate yimeng, “Dja njalekenh? Nungka njale warrewong?” Dja bedda birrimhdjalkayhmi wernkih duninjh, “Ngurrikukbarnnamen kore kundulk cross!”

15 Nungka Pilate djareni bu bennjilngmarnbuyi birrimmekbe bininj nawu birrimirnderri kumekbe. Wanjh nungka bibebkeng Barabbas bedberre. Dja mak benmarneyimeng bu kabirriwidjibihke Jesus kunyarl dorreng. Wanjh nungka benbidnakenwong nawu Jesus kore djamun bu kabirrikukbarnname kore kundulk cross.

Nawu Djamun Birrikukborrkuni Jesus

Mark 15:16-20

(Matthew 27:27-31; John 19:2-3)

16 Wanjh nawu Pilate nuye djamun birrikang Jesus kore Pilate nuye kunrurrk kuberrkkah (manbu kore kabolkngeyyo Praetorium). Mak bedda bindikayhmeng birribuyika djamun rowk bu birrimirnderri.

17 Wanjh birridjongbom nawu Jesus kunmadj nawu purple manburra. Wanjh birrimey kinj manbu manmirrhyi bu birrimarnbom crown, wanjh yerre birrikodjongbom nuye.

18 Wanjh birridedjimgmey bu birrimarneyimi, “Ngudda yikimuk king bedberre nawu Jews bininj!”

19 Wanjh birridjumduhkeng Jesus kunwernhkah kundulk dorreng bu birrikodjbarhmangi. Mak birrikuknunjhmi dja birrikukborrkuni, birrimalelmangi bu birrimarneboddangeni dja birrimarnebarddurrkkurldangeni nuye.

20 Kaluk bu birriburnbom kunmekbe birrimarneyimi kunwarre, wanjh nawu djamun birriyerrkkeng nawu purple manburra djongbudjongbuyindi dja birridjongbom nawu nuyekihni kunmadj. Wanjh yerre birrimyibebmeng kuberrk bu kabirribunkenh kore kundulk cross.

Bu Birrikukbarnnameng Jesus Kore Kundulk Cross

Mark 15:21-32

(Matthew 27:32-44; Luke 23:26-43; John 19:17-27)

21 Kaluk nakudji bininj nawu nakang Cyrenebeh kumhrey kore kabalbeh dja balhngimeni kore kubolkkimuk. Dja namekbe bininj ngeyyoy Simon nawu kornkumo nuyeni Alexander dja Rufus. Wanjh nawu djamun birrimdjurrkkang namekbe Simon bu kangorran manbu kundulk cross nuye Jesus.

22 Wanjh birrikang Jesus kore kabolkngeyyo Golgotha. Kore kabirribolkngeyibun, “Kore kabolkyime kunkodjngalng”.

23 Kaluk kumekbe Golgotha nawu djamun yimankek birribowoyi Jesus manbu wine bonguyi. Dja manmekbe wine birrirawong manbu myrrh. Kaluk Jesus warnyakminj, minj bonguyi.

24 Wanjh birribiddulubom Jesus kore kundulk cross. Dja nawu kunmadj nuye nakka wanjh birridirri bu birrimadjalarlmarrinj bu birrimarnemadjweykarreni kunmadj nuye.

25 Bu birribom Jesus wanjh dungyimeng nine oclock bu malahmalaywini.

26 Kaluk birribombom kore djurra bu bimulewam Jesus nawu birridjubom. Wanjh bimbuyindanj yimeng, “Nahni bininj wanjh king bedberre nawu Jews bininj.”

27-28 Dja warridj bindibiddundulubom bininj bokenh nawu bedda benededjolkwernni. Nakudji kukbarndi kore Jesus nuye kukun, dja nabuyika kore kudjaku nuye.

29 Bininj birriwern nawu birrinang, wanjh birrimarnekedjborledmi, birridjekmiwoni dja birriyimi kunwarre nuye, birrimarneyimi, "Yoh! Ngudda yidjareni yingan yirurrkbakkemeninj manbu Temple dja yiya-woyhrurrkmarnbun bu kunkodjke danjbik!

30 Mah! Wanjh yingehkerrimen dja yimkolu kore kundulk crossbeh!"

31 Nawu birrikihkimuk priests dja nawu bindibukkabukkani mankarre wanjh bedda mak birridjekmiwoni Jesus bu bedda birrikukyolyolmi, bu birrimarneyimerrinj, "Nungka bennghekgeng birriwern bininj, dja bolkkime minj nungan kangehkerren!

32 Nahni nawu yimankek Messiah*, dja nuk king kadberre nawu Israel kankebawahmeng. Mah, wanjh bolkkime karrinan nungka kamkolong kore kundulkbeh cross. Ba bu ngad karrikurdunan wanjh karriwoybukwon!" Dja bininj nawu birridjarrkkukbarndi warridj benedjekmi nuye.

Bu Jesus Doweng

Mark 15:33-41

(Matthew 27:45-56; Luke 23:44-49; John 19:28-30)

33 Bu kunbarnangarraburrk yimerranj, wanjh kunred rowk bolkmunandanginj yiman kunkak rerreh yonginj. Dja bolkmununni kaluk three oclock bu wolewoleh yimerranj.

34 Bu dungyimi three oclock, Jesus kayhmeng wernkih, yimeng, "Eloi! Eloi! Lama sabachthani?" Mahni kunwok kamenyime "Ngardduk God! Ngardduk God! Njalekenh ngudda kanbawong?" [Psalm 22:1]

35 Yikahwi bininj nawu birribekkanj dja birriyiming, "Ngurribekka! Nahni kabimarnekayhme Elijah!"

36 Wanjh nakudji bininj rlobmeng dja djuhkeng kelkkelk kore wine manbu manbomanjwarre, kurrmeng kore kurrulk dja bidangkenhwong Jesus ba bu kabongun. Mak nahni bininj yimeng, "Med, karrinan werck! Kunubewu Elijah kamre kabikoluyhwe!"

37 Wanjh Jesus kayhmeng wernkih, bu ngolekyakminj doweng.

38 Kunmekbe bolkyimi manbu manburra mankimuk barndi kore Temple kururrdangmaye, wanjh djalkmiwam kaddumbek kore kanjdji.

39 Dja nakudji djamun, nawu benmarnewohnani birribuyika djamun, wanjh nungka dingihdi kumirrk nuye Jesus. Bu bikurdunang Jesus doweng, wanjh yimeng, "Nahni bininj wanjh woybukkik beywurd nuye God!"

40 Kaluk yikahwi daluhdaluk kumekbe birrihdjarrkdi, birrihnani djarrehbeh. Kaluk bedda Mary ngalbu Magdalabeh, ngalbuyika Mary ngalbu benbeneyawmey James nawu Nawalawalak dja mak nawu Jose. Dja mak ngalbadbuyika daluk ngeyyoy Salome dingihdi.

41 Kaluk bedda birrimunkekadjungu Jesus kore kunred Galilee dja birrihnani. Kaluk birriwern daluhdaluk birribubuyika birrihni, nawu birrimdjarrkwam Jesus dorreng kore kunred Jerusalem.

Bu Birrikukkurrmeng Jesus Kore Kumidj Manbu Kuwardderurrk

Mark 15:42-47

(Matthew 27:57-61; Luke 23:50-56; John 19:38-42)

42 Kaluk balngokdangeni dja kunmekbe kunbarnangarra bu bininj birriyingkihmarburreni manbu Sabbathkenh.

* 15:32 "Messiah" kangeyrohrok "Christ".

⁴³ Kunmekbekenh kunu nakudji bininj ngeyyoy Joseph nawu nakang Arimatheabeh, bu nungka kelebukni wam kore Pilate bu bidjawam bu bikukdjanwohmeng Jesus nuye kunburrrk. Joseph nakka djareni bu God kamre kawohrnan rowk. Nungka yerrkang kore councils, kore birribuyika bininj birrikarremakwam nuye.

⁴⁴ Bu Pilate biwobek kang Jesus werkkwerrk doweng, wanjh nungka kangebarrhmeng, wanjh bikayhmeng bidjawam nabuyika djamun nawu nakimuk bu yiddok woybukkih nungka Jesus doweng.

⁴⁵ Nawu djamun bimulewam bu doweng, wanjh kunu Pilate bibawong Joseph bu bikukkang Jesus kunburrrk nuye.

⁴⁶ Wanjh Joseph bayahmeng namakmak manburrrba, wanjh wam, bikukkoluyhweng Jesus kore kundulkbeh cross dja bikukdukkang kunmadj. Wanjh bikukkang bikukkurmeng kukyoy kore kumidj manbu birriwarddedjobkeng kore manwarddewardde ngarre. Kaluk nungka warddedjirrkang manwarddekimuk ba karrangbalhmiyindan kunmidj kore kunwardderurrk.

⁴⁷ Kaluk daluk bokenh benebolknang kore bikukkurmeng Jesus, nakka wanjh Mary ngalbu ngalkang Magdalabeh, dja mak ngalbuyika Mary ngalbu biyawmey Jose.

16

Jesus Dolk kang Kore Kumidjbeh

Mark 16:1-8

(Matthew 28:1-8; Luke 24:1-12; John 20:1-10)

¹ Bu yakminj kunbarnangarra manbu Sabbath ngarre, birridanjib morlehmorlenj birridjareni kabirrire kore kumidj. Bedda Mary ngalbu Magdalabeh, dja mak ngalbuyika Mary ngalbu James biyawmey, dja mak Salome. Bedda birribayahmeng nawu kalkkidmanjmak. Dja mak birridjareni Jesus birrikukbaruyinj rowk.

² Kaluk bu Djandini bu kumhbarrkbuni, wanjh birriwam kore kumidj.

³ Bu bedda wanjh birridjawanreni bu nangale kabenmarnewarddedjirrkkan bedberre kore kunwardderurrk.

⁴ Wanjh birribolknang dja birrinang manbu manwarddekimuk ngokko yiman birriwarddedjirrkang.

⁵ Wanjh birribalngimi kore kuwardderurrk kore kunmidj, dja birrinang nakudji bininj nayawurrinj ningihni kore kukun. Kaluk nungka djongbuyindi namadjkuyeng nawu madjbeleni, wanjh birriwernhkangebarrhmeng.

⁶ Dja nungka yimeng bedberre, "Yuwn ngurrikele. Ngudda ngurriyawan Jesus nawu Nazarethbeh, nawu birribiddundulubom. Wanjh bonj, nungka yawoyhdolk kang, minj kahdi kondah. Ngurribolknana kondah kore birrikukkurmeng.

⁷ Mah, ngurriray ngurrbenmarneyimen nawu benbukkabukkani nuye, dja mak Peter dorreng. Ngurrbenmarneyimen, 'Jesus dokmeng ngudberre kore Galilee. Kaluk ngurrinan kunmekbe. Kaluk nungka ngokko yingkihmulewarrinj ngudberre.' "

⁸ Wanjh birribehmeng kore kumidjbeh bu birrikelerlobmeng. Birrikudeldelmi dja mak birrikangebarrhmeng. Minj nangale birri-marnemulewayi, dja bedda birrikeleni.

*Jesus Bimarnekukbukarrinj Mary Ngalbu Magdalabeh**

Mark 16:9-11

(Matthew 28:9-10; John 20:11-18)

⁹ Kaluk bu Jesus dolkkang kore kundowikenh ngarre, bu djarreh kumh-barrhbuni Djandini, wanjh nungka bimarnekukbukarrinj bu ngaleng ngalyungkihni Mary ngalbu Magdalabeh. Korroko Jesus bimarneweng seven namarnde nawu bihkarrmi.

¹⁰ Wanjh ngalbu Mary wam bimulewam bu benbengdayhkeng nawu benbukabukkani nuye nawu birrimarnenalkbuni dja birrimarnenjing-warreni bu Jesus doweng.†

¹¹ Wanjh ngaleng benmarneyimeng Jesus kahdarrkid, dja ngaleng bu binang, wanjh bedda minj birriwoybukwoyi.

Jesus Benbenemarnekukbukarrinj Bininj Bokenh Nawu Benemunkekadjungi

Mark 16:12-13

(Luke 24:13-35)

¹² Kaluk yerrekah, Jesus benbenemarnekukbukarrinj benebokenh bininj nawu benemunkekadjungi, bu benedjalrey kore kurrarradalk.

¹³ Dja benemekbe bininj benedurndi bindimarneyimeng birribuyika bininj, dja bedda minj bindiwoybukwoyi.

Jesus Benmunkeweng Bininj Nawu Benbukabukkani Nuye

Mark 16:14-18

(Matthew 28:16-20; Luke 24:36-49; John 20:19-23; Acts 1:6-8)

¹⁴ Wanjh yerrekah bu Jesus benmarnekukbukarrinj eleven bininj nawu benbukabukkani nuye bu bedda birringuni manme. Jesus benduy bu minj birriwoybukwoyi dja mak bindiwokweyi kore bindibengdayhkeyi. Bu kunmekbekenh minj bindiwoybukwoyi nawu birridarrkidnani Jesus kaluk bu nungka yawoyhdolkkang kore kundowikenh ngarre dja mak bedda birrimulewam.

¹⁵ Dja mak Jesus benmarneyimeng, "Mah. Ngurriray kubolkwarlahkenh rowk, dja ngurriyolyolmen kunwok manmak ba ngundibekkan nawu birriwarlahkenh bininj rowk nawu Ngabbard benmarnbom.

¹⁶ Bininj nawu ngaye ngandiwoybukwon, dja nawu kabirrikukdujhme kore ngayekenh, wanjh God kanbengeheke. Nawu minj ngandiwoybukwon, wanjh God kabenwarrewe.

¹⁷ Bininj nawu ngandiwoybukwon, wanjh kabirrikurduyime kundulkarre dorrengh kore kungey ngardduk. Bedda wanjh kabindikukburriwe namarndemarnde, dja mak kabirriwokdi manwokbubuyika manbu manwokkerrnge.

¹⁸ Dja mak nawu kabirrikarrme nabang nayin kore kubid, dja mak kabirribongun manbang duninj, wanjh nunu kabirridjalmak. Kaluk bu kabindikarrme nawu birridulkkih, wanjh kabindimarbnun bu bedda kabirrimakmen."

* **16:8** Kore Mark bimbom, wanjh burnbom kore verses 8. Wanjh nabuyika bininj bimbom verses 9 kore 20. † **16:10** Yikahwi manbuyika djurra manbu nakare kakarrme mahni kunwok kore verses 9 dja 10. Kaluk yerrekah, birrimemekbe daluk bindimarneyimeng Peter dja birribuyika bininj nawu birridjarrkrey. Birriwokmangi kore angelbeh kore benwokwoni, dja birrimulewani, dja mak kunyahwurd kore bindimarneyimeng. Kaluk yerrekah, Jesus nungan benmunkeweng rowk ba bu kabindimarneyime birriwarlahkenh bininj bu God kabengehekenh munguyh munguyh, dja mak kunwok nuye wokyarlarmeng kore koyek dja mak karrikad. Kaluk mahni kunwok nuye mandjamun duninj, minj kawokyakmen munguyh.

Bu Jesus Dolkkang Wam Kore Heaven

Mark 16:19-20

(Luke 24:50-53; Acts 1:9-11)

¹⁹ Bu Jesus yakwong benhmarnewokdi bedberre, wanjh God biwayhweng bikang kore heaven, bu nungka yerrkang kore kukun nuye.

²⁰ Wanjh nawu benbukkabukkani nuye birriwam bindimarneyolyolmi kore kubolkbubuyika rowk. Kaluk Kawohrnan Rowk birridjarrkduurk-mirri, dja mak benwong bu birrikurduyimi kundulkarre dorrengh ba bu birriwern bininj birrinang dja bindiwoybukwoni kore bindimarneyolyolmi.

Luke

Luke Mulewarrinj bu Njalekenh Nungka Bimbom

Luke 1:1-4

¹⁻⁴ Ngudda nawu Theophilus, nawu yingeykimuk, ngaye Luke marnebimbom ke nahni djurra ba kunukka yiwernhburrbun bu kundjalwoybuk duninj nawu korroko ngundihmarnemulewani. Birrimekbe bininj nawu kerrngehkenhni birridarrkidnang dja birrikurdunani Jesus, dja yiman birrimarnedurrkmirri nuye kunwok, wanjh kandibidnakenwong rowk, dja kunu yikahwi bedda birriwern wanjh birrirohrokni bu birribimbuni birrimulewani kadberre. Ngaye wanjh ngabenbekkabekkgang, dja ngabendjawani bu munguyh. Wanjh ngayeman ngadjareni ngabimbuni rowk mandjad duninj ke, bu kabimbuyindan kunwern manbu marnbuyindanj dja woybukkenhdanj kadberre.

Nawu Angel Ngeyyoy Gabriel Biyingkihbengdayhkeng Zechariah Beywurdkenh John nawu Benkukduhkeyi

Luke 1:5-25

⁵ Bu King Herod wohnawohrnani kore kubolkwarlah kabolkngeyyo Judea, kaluk kumekbe ni nakudji bininj nawu priestni, nawu ngeyyoy Zechariah. Kaluk nawu Zechariah birrihdjarrkdurrkmirri priests nawu birringeyyoy Abijah nuyeni. Ngalbu Zechariah ngalbininj kobeng nuyeni, ngaleng warridj nawu Aaron bikebmawahmeng. Dja ngaleng ngeyyoy Elizabeth.

⁶ Kaluk Zechariah dja Elizabeth benemakni kore God, dja mak bedda benehwokkarmi dja benehmarrkmangi rowk God nuye mankarre, dja mak bedda minj benewokwemeninj nawu God nuye benwokrayekwong bu nungka wokkurrmerinj.

⁷ Dja bedda minj benekarmeninj wurdyaw, dja ngaleng Elizabeth ngalwalirngwarreni, dja mak bedda benedjalkohbanjni.

⁸ Wanjh bolkyimerranj bu bininj nawu Zechariah birrihdjarrkdurrkmirri kore kumirrk God nuye, bu bedmanwali yiwarrudj birridi nungka dorrengh.

⁹ Kore mankarre bedberre yoy, birringeybimdi kore djurra, wanjh nakudji mey djurra nawu nungka Zechariah ngeydihngeydi. Wanjh nungka wam kinjeng kalkkidmanjmak kore kururkkburhlhdjan temple yiwarrudjkenh God nuye.

¹⁰ Bu kumekbe bolkyimi bu nungka kinjehkinjeyi kururkk manbu kalkkidmanjmak, wanjh bininj nawu birrimirndewernmerrinj nawu birrimhdjalley kabirrimarnebodan God, bedman kuberrkkah birrihdi yiwarrudj.

¹¹ Wanjh kundjalmekebe bimarnebebmeng nakudji angel nawu Kawohrn Rowk bimarnemunkeweng, dja bimarnedanginj Zechariah kukun kore kubolkkuken ngarre altar manbu kalkkidmanjmakkenh.

¹² Wanjh bu Zechariah binang, nungka kangebarrhmeng dja wernhkeleminj.

¹³ Wanjh nawu angel bimarneyimeng, "Yuwn yikele Zechariah! Dja God ngunbekkang bu ngudda yidjawam, dja ngalu ngalbininj kobeng ke Elizabeth kaluk kayawmang narangem ngudda ke. Kaluk ngudda yingeykurmen John.

14 Kaluk nahni wurdyaw ngunnjilngmarnbun dja mak warridj yikangemarmarmen, dja mak birriwern kabirriwarnmakmen bu nungka kar-rangen.

15 Kaluk nawu Kawohrnran Rowk kabimarneyime nahni wurdyaw bu kayimerran nakuken, dja nungka minj njale kabongun manu manbang yiman wine dja njalenjale. Dja Namalngmakkaykenh kabikukbarlike bu karrangen, dja mak munguyh kadjalkukbarlmiyindi.

16 Mak nungka kabenkan birriwern bininj nawu Israel benkebmawah-meng bu kabirrimdurndeng kore nawu Kawohrnran Rowk, nawu God bedberre.

17 Kaluk nungka kabiyingkikhmarnedokme nawu Kawohrnran Rowk, kore kundulkarre nuye Namalngmakkaykenh yiman Elijah kurduhkurduyimi. Bu kuhni kunu kunmekbe kadjalkurduyime kabenkangeboredke nawu kokornkumo, ba bedda kabirriyawoyhborledme kabindiyawoyhmarned-jare nawu wurdwurd bedberre. Dja bininj nawu kabirrihwokwe God, kaluk nungka John kabenmayaliboredke, kabirrimayaliyimerran yiman birribuyika nawu kunmak kabirrihyime. Kaluk kunih rowk kakurduyime nawu beywurd ke, ba kabenyngkihkhukmarnbun bininj, ba bu kabirri-madbun nawu Kawohrnran Rowk."

18 Bu kuhni bekkang rowk Zechariah, wanjh bimarneyimeng namekbe angel, "Kaluk baleh bu kuhni yimankek ngaburrbun kakurduyimerran? Dja ngaye wanjh ngakohbanj, dja mak ngalbininj kobeng ngardduk ko-hbanjminj warridj."

19 Dja namekbe angel biwokmey yimeng, "Ngaye wanjh Gabriel! Ngaye ngahdi kore kumirrk nuye God, dja nungka nganmunkeweng ngunmar-neyime bu bengdadjikekenh kuhni kunwok kunmak.

20 Kanbekka, marneyime, ngudda minj kanwoybukwoyi bu marneyi-meng, dja God bolknangeng bu kaluk kamarnbuyindan kore kunmekbe kunwok. Wanjh ngudda minj kanwoybukwoyi, wanjh kunu yidjalwoyak-men, minj ziyawoyhwokdi. Kaluk bu kuhni kakurduyimerran, kunukka wanjh ziyawoyhwokdi."

21 Bininj nawu kuberrkkah birrihmirnderri birrihmadbuni Zechariah, birrihmayahmi bu nungka munguyh ningihni kururrk.

22 Kaluk bu nungka bebmeng, yimankek wokdiwirrinj bedberre, dja wokyakminj. Wanjh nungka kunbidbewih benmarneyolyolmi, dja wanjh kunu birriburrbom bu nungka nang kunbuyika nawu Godbeh bu kurur-krburlihdjan dingihdi.

23 Kaluk bu yakminj bu nungka durrkmirri kore kunurrk yiwarrud-jkenh, wanjh dokmeng kured.

24 Kaluk ngalbininj kobeng nuye Elizabeth wanjh kanihkani wurdyaw. Dja ngalengman yiman warlkkarreni rerrih, bu djahdjalni kured bu kunbidkukudji dir.

25 Dja ngalengman marneyimerrinj, "Nawu Kawohrnran Rowk ngannang dja kaburrbun bu bininj ngandihwarreweyi, dja nungka nganmarneyime bu ngamak, wanjh kuhni nungka nganmarnekurduyimeng, ba minj munguyh ngandihwarrewe nawu ngaye ngarriedbo."

Angel Gabriel Biyingkibengdayhkeng Mary Wurdyawkah Jesus

Luke 1:26-38

26 Kaluk bu dirbuyika six yimerranj, God bimunkeweng namekbe angel Gabriel kore kubolkkimuk kabolkngeyyo Nazareth, kore kubolkwarlah Galilee.

²⁷ Bimunkeweng bimarnebebmeng ngalyawk ngalbu minj bininj benebangmeyuwirrinj. Dja ngalbu mak birriberrebbom bininj benemar-rimeninj nawu ngeyyoy Joseph, nawu King David benemudni. Ngalmekbe ngalyawk kaluk ngeyyoy Mary.

²⁸ Namekbe angel kumwam bimarneyimeng, "Ngudda ngalbu God ngun-marneyimeng bu ngudda yidjalmak dja wanjh nungka ngunedjarrkre!"

²⁹ Wanjh bu Mary bekkang kunmekbe kunwok, ngaleng njilngwarreminj dja mayahmeng duninj, dja ngalengman burrbuhburrbuni bu yimankek njalekah kuhni bimarnewokdanj.

³⁰ Wanjh nawu angel bingeybom yimeng, "Mary, yuwn yikele. God nungka namakni ke.

³¹ Dja kanbekka, marneyime, kaluk ngudda yikukdulmukmen dja yiyawmang narangem, dja yingeykurrmen nahni wurdyaw Jesus.

³² Kaluk nungka nakuken duninj, dja kangeyyo 'Beywurd nuye God nawu Nadjalwernhkimuk Duninj'. Dja God nawu Kawohrn Rowk, wanjh kabimarnbun nungka king ba kawohrn kore David wohrnani korroko.

³³ Kaluk nungka kadjalwohrnan munguyh munguyh kore nawu Jacob ngurrimud, minj kadjobme nuye, dja munguyh kadjalwohrnan."

³⁴ Mary biwokmey angel nawu kunwok kumhkani, bimarneyimeng, "Kaluk baleh kuhni kakurduyime? Dja ngayenu minj bininj nganebang-meyuwirrinj."

³⁵ Wanjh namekbe angel biwokmey, bimarneyimeng, "Namalng-makkaykenh kaluk ngunyikan, dja God nawu Kawernhwohrnan Duninj, kaluk kundulkarre nuye ngunbarrkbun. Bu kuhni kakurduyime, wanjh namekbe nanu nawu yiyawmang wanjh djal God nuye, kaluk kangeyyo Beywurd nuye God.

³⁶ Kuhni mak marneyime. Elizabeth ngalbu ngudda ngunemud, ngaleng mak bolkkime kayawkan narangem, dja ngaleng ngalkohbanj. Dja dird six kamarnbun bu kahkan, ngalbu birrihmarneyimi ngaleng ngalwalirrngwarreni.

³⁷ Dja minj njale karayek kore nungka God."

³⁸ Wanjh Mary yimeng, "Ngoyh, ngaye ngadjalmarnedurrkmirri nawu Kawohrn Rowk. Bonj, ngadjare ngandjalmarnekurduyimerran kun-mekbe kunwok bu ngudda kanmarneyimeng." Dja namekbe angel wanjh bibawong, wam.

Mary Wam Bidjahwong Elizabeth Ngalbu Zechariah Nuye Ngalbinin-jkobeng

Luke 1:39-45

³⁹ Wanjh kumekbe bolkyimi Mary marnburrinj wanjh djaldokor-rokmeng kore kurruludulum ngarre Judea, wanjh bolkmey kore kubolkkimuk kore Zechariah benehni.

⁴⁰ Wanjh ngaleng ngimeng kore kunrurrk berrewoneng, dja bidjawam Elizabeth.

⁴¹ Bu Elizabeth bibekgang Mary bidjawam, wanjh kunu Elizabeth ngarre wurdyaw rokang wernkih kore kunjam ngarre. Dja mak Namalng-makkaykenh biwohkukbarlkeng ngalbu Elizabeth.

⁴² Wanjh kunu bimarneyimeng Mary, kunkayhmi dorrengh, yimeng, "Ngudda wanjh God ngunmarnekurduyimeng ngudda kunwernhmk duninj, yiman minj kurduyimeninj ngadberre nawu dalukbubuyika. Dja nawu yiyawan, nungka mak God wanjh kabimarnnekurduyime kunmak duninj.

⁴³ Dja ngaye ngakangebarrhmenng bu kuhni nganmarnekurduyimerranj bu ngudda yimwam kore ngaye, ngudda ngalbu ngalbadjan nuye nawu Kawohrnran Rowk ngardduk.

⁴⁴ Dja marneyime, bu ngaye bekkang ngudda kandjawam, wanjh ngabekkang wurdyaw rokang wernkih kore kunjam ngardduk bu mar-marrminj duninjh.

⁴⁵ Dja wanjh yinjilngmak nguddanu bu yiwoybukwong bu kamarnbuyin-dan rowk kore God ngunmarneyimeng.”

Mary Wayini Mankong Ngalenggarre Bu Biburlumeng God

Luke 1:46-56

⁴⁶⁻⁴⁸ Mary yawoyhyimeng, “God bu ngannang nganburrbom ngaye nawu ngahmarnedurrkmirri, nawu ngaye yiman ngayeng rerrih, wanjh nungka kunmak nganmarnekurduyimeng. Kunmekbekenh kunu wanjh ngaye bulkkidj duninjh ngaburlume kunkange dorreng ngardduk! Dja ngakunikangemarrmarr kore nungka God nawu nganhnghekeng.

Kunmekbekenh kunu kaluk bininj nawu rerre kabirridangerren, wanjh ngandimulewan, kabirriyime bu ngaye nganjilngmak duninjh nuye.

⁴⁹ Dja nungka God nawu Nadjalkudji Nawernhdulkarrekimuk duninjh nganmarnekurduyimeng kunkimuk duninjh, nungka wanjh Nadjalngey-djamun.

⁵⁰ Dja nungka kankongibun bininj rowk nawu nungka karrimarnekele. Kandjalkongibun munguyh, yiman benhkongibun nawu birriyungki, mak ngadmanwali kankongibun, dja nawu rerre kabirridangerren, bedmanwali kabenkongibun rowk.

⁵¹ Nungka wanjh kurdukurduyimi kunwern bu kundulkarre kunkimuk duninjh nuye. Mak benyarlarreng nawu bedman birriburlumerreni kore kanjdji baybaywi bedberre.

⁵² Nungka mak benkukmarladjwong nawu birrikukenworreni bu birri-wohrnawohrnani, dja nungka kankukenwong bininj nawu karrikukmar-ladjni.

⁵³ Nawu karrimarrwedowen, nungka kanworrkmiwon bu nungka nuye kunmakmak. Dja nawu birrikarmi nawern, wanjh nungka benmunkeweng birribidlarrk.

⁵⁴ Nungka kumwam kanbidyikarmeng kadberre nawu Israel kankeb-mawahmeng, nawu nungka karrimarnedurrkmirri, wanjh djareminj kanmarnemimkongiwernni kadberre.

⁵⁵ Kuhni kurduyimeng kore nungka korroko biberrebom Mawah Abraham, dja mak nawu birribuyika nawu mawahmawah kadberre, bu nungka kankongibun ngad munguyh munguyh.”

⁵⁶ Wanjh Mary benedjarrkni Elizabeth, bu yiman dird danjbik, wanjh durndi kured.

John Nawu Benkukdjuhkeyi Danginj Berrewoneng Zechariah dja Elizabeth

Luke 1:57-66

⁵⁷ Wanjh bu kumwam ngarre Elizabeth bu wurdyaw bihbuni, wanjh yawdanginj narangem.

⁵⁸ Dja bu bininj nawu birriedboni dja nawu birrimud ngalenggarre birribekkang bu God kunmekbe bimarnekurduyimeng bu bikongibom bulkkidj duninjh, wanjh bedda warridj birridjarrkwarnmakni Elizabeth dorreng.

⁵⁹ Kaluk bu kunkodjke eight birrimwam bu birrilakkayenwong namekbe wurdyaw. Bedda wanjh birringeykurrmeninij Zechariah, kornkumo benedjarrkngeyuwirrinj.

⁶⁰ Dja ngalbadjan yimeng, "Kunukka kunwid, dja karringeybu John."

⁶¹ Wanjh kunu bedda birriyimeng, "Minj nangale ngurrimud kunmekbe kangeyyo."

⁶² Wanjh kornkumo birridjawam, bu kunbidbewih birridjawam bu nungka yimankek baleh djareniwirrinj bingeykurrmeninij.

⁶³ Wanjh nungka djanwohmeng kundulk bu kabimbunkenh. Wanjh bu birriwong, nungka Zechariah bimbom, "Nungka wanjh John kangeyyo." Kunu wanjh birriwernhmayahmeng rowk.

⁶⁴ Wanjh kundjalburrikudji rerrih nungka God bimarnbom Zechariah yawoyhwokdanj, wanjh biburlumeng God.

⁶⁵ Wanjh nawu kumekbe kunred birrihni, bedda rowk birrikeleni, dja nawu birrihni kumekbe kore kubolkwarlahkenh kore kurruluhdulum ngarre Judea, bedda wanjh kuhni birrimulewani, dja mak mahni kunwok djalwarlahminj.

⁶⁶ Dja nawu birriwern rowk nawu birribekkani wanjh birrihburrbuni munguyh, dja mak birriyimi, "Nahni wurdyaw baleh kaluk kayimerran?" Dja birrinang bu God bihkarrmi bulkkidj.

Zechariah Biburlumeng God

Luke 1:67-80

⁶⁷ Kaluk Namalngmakkaykenh biwohkukbarlkeng Zechariah, nawu John nuye kornkumo, wanjh biwokmulewani nawu God bimarneyimeng, yimeng,

⁶⁸ "Karriburlumen nawu Kawohrn Rowk, God kadberre nawu Israel kankebmawahmeng. Nungka kumwam dja kanmarnekarremulewam kunkimuk bu kanbekkeng kadberre nawu bininj nuye.

⁶⁹ Nungka kanwong kadberre nakudji nawu ngudjkimuk duninj nawu kangehke kadberre^{*}, nawu nungka benemud King David nawu God bihmarnedurrkmirri.

⁷⁰ Kuhni wanjh God bu kurduyimeng wanjh wokkurrmerrinj korroko duninj, kore bininj birridjalmak nungan nuye, nawu prophets bu birriwokmulewani.

⁷¹ Bedda birriyimi bu nungka kaluk kanbidyikarrme bu kangehke kadberre kore bininj rowk nawu kandinjirke mak nawu kandiwidnan.

⁷² Kuhni kakurduyime kore nungka benkongibom nawu mawahmawah kadberre, dja kahwokkarrmerren kunwokdjamunkenh nungka nuye bu wokkurrmerrinj.

⁷³ Bu nungka wanjh biberrebbom bulkkidj Mawah Abraham bu wokkurrmerrinj kunwok kunrayek duninj.

⁷⁴ Nungka bimarneyimeng bu nungan God kanbidyikarrme kadberre, kanbekke kore bininj nawu kandiwidnan, ba bu ngad karrimarnedurrkmirri nungka, dja minj njale kankelehme,

⁷⁵ dja ngad nawu nungan nuye, bu karridjaldarrkid, wanjh karridjal-marnekurduyime munguyh kunmak nawu nungka kadjare.

⁷⁶ Dja ngudda John, nawu wurdyaw ngardduk, kaluk God ngunmarnbun prophet, nawu yiwokmulewan kunwok nuye God nawu Nawernkimuk

* **1:69** "Nakudji nawu ngudjkimuk duninj nawu kangehke" karohrok kore yikahwi kunwok kabirriyime "kuncanem nawu kangehke", dja kore Kunbalanda kayime "horn of salvation".

Duninjh. Kunmekbe wanjh ngudda yiyingkihmarnebolhmarnbun manbolh nuye.

⁷⁷ Dja ngudda yibenbukkabukkan bininj nuye ba kabirriburrbun bu nungka kabennegehe bu kabengmidjan kunwarre bedberre.

⁷⁸ Kuhni kakurduyime ngad kadberre God bu kanwernhkongibun duninjh, wanjh kaluk nungka nawu kaddumbekh kambembe, yiman rerrih kamdungbebme kadberre,

⁷⁹ ba kanwolkan nawu karrihni kore kubolkmunun, dja nawu kundowikenh yiman kanhkehleme munguyh, dja nungka kaluk kanmikan kadberre kore karriburrbun nungka nuye kunmodmikenh." Kuhni bu Zechariah wanjh yolyolmi.

⁸⁰ Kaluk namekbe wurdyaw djordmehdjordmeni, dja kunmalng nuye mak murrngrahmurrngrayekmeni. Kaluk nungka ni kore kubolkdarleh, kumekbe djahdjalni munguyh wanjh kalukburrk bebmeng kukbukkarinj bedberre bininj nawu Israel benkebmawahmeng.

2

Mary Bimarneyawdanginj Jesus

Luke 2:1-7

(Matthew 1:18-25)

¹ Bu John barrkenyoy, kaluk nawu wohrnani rowk kumekbe, nawu ngeyyoy Caesar Augustus, wanjh benwokrayekwong bindingeynamikenh bininj rowk kore kubolkwarlahkenh rowk ngarre Rome.

² Kuhni wanjh nawu kerngeghkenh bindingeynami bu nawu Quirinius wohrnani kore kabolkngeyyo Syria.

³ Wanjh bininj rowk birriwam bindingeynamikenh, kaluk birribebbewham kore kubolkkihkimuk bedberre.

⁴ Dja mak Joseph bolkbawong kubolkkimuk kabolkngeyyo Nazareth kore kubolkkimuk Galilee, dja wam kore David nuyeni kubolkkimuk kabolkngeyyo Bethlehem kore Judea. Dja nungka wanjh David benemudni, nawu mawahmawah nuye.

⁵ Nungka Joseph wanjh wam birringeynamikenh, kaluk Mary benedjar-kwam ngalbu birriberrebbom, dja ngaleng kukdulmukni.

⁶ Bu kumekbe benehni wanjh kumwam ngarre bu wurdyaw bihbuni,

⁷ wanjh yawdanginj narangem nadjdjaman. Ngaleng birrukkang man-burrba, dja bikurrmeng kore manbu kurralkkenh, kore mayh birringuni. Kaluk minj baleh benerurrngalkemeninj kore kunrurrk duninjh, dja birrirurrkmeny rowk.

Angel Birriyawmulewam Jesus Kore Shepherds Nawu Birrikahnani Mayh

Luke 2:8-21

⁸ Kumekbe kubolkkudjiwi kaluk djarrehkah, bininj nawu shepherds birrihkakni kukak kore kabbal, mayh birrihmirndenahnani bedberre.

⁹ Kaluk angel kumwohbebmeng bedberre. God nuye kunmakmak yiman benbarrkbom rerrih bu benmarnebolkwolkang kore birrihni, dja bolkbameng duninjh, wanjh birrikeleminj duninjh.

¹⁰ Wanjh nawu angel benmarneyimeng, "Yuwn ngurrikele, dja kandibekka, marneyime ngudberre, ngaye ngamwam bengdayhke ngudberre kuhni kunwok kunmak, ngurriwernhwarnmakmen rowk ngudda bininj nawu Israel ngunkebmawahmeng.

11 Bolkkime kuninjkuu kumunun, kore David nuyeni kubolkkimuk, wanjh danginj ngudberre nawu ngunnehke, nawu nungan God ngunberrebom. Kaluk nahni nabarrken wanjh Christ* nawu Kawohnan rowk!

12 Kaluk kuhni ngurrina kayime, bu wurdyaw ngurringalke, karukkayindi manburba, dja kore kurralk kayo manbu mayh kangun kurralk bedberre.”

13 Bu kuhni yimi, wanjh birrimirndewern bininj birridjalwohbebmerrinj kaddumbek, birridjarrkdi namekbe angel. Birriburlumi God, birriyimi,

14 “Bulkkidj duninj karriwernhburlumen God nawu kaddum kahni. Dja kunmodmikenh nuye kabenwon bininj nawu nungan kabenmarnekurduyime kunmak.”

15 Wanjh bu angels bindibawong birridurnderrinj rowk kaddum, wanjh bininj nawu shepherds birrimarneyimerrinj, “Karriray Bethlehem, karinan nawu Kawohnan Rowk kanbengdayhkeng kadberre bu kuhni kurduyimerranj.”

16 Wanjh birriwam birridokorromeng dja bindingalkeng Mary dja Joseph, dja nabarrken yoy kore manbu kurralk birringuni nawu mayh.

17 Kaluk bu bedda birrinang wanjh bindiwokmulewam angel bu benmarneyimeng namekbe wurdyawkah.

18 Birriwern bu bindibekang bedda nawu shepherds bu birrimulewam, wanjh birrimayahmeng rowk.

19 Dja Mary djalkarmeng maninjmanu kunwok kore kukange ngarre, ngalengman baybaywi djahdjalburrbuni.

20 Wanjh nawu shepherds birridurnderrinj kore birriyingkihahnani. Bulkkidj duninj birriburlumi God bu birribekang dja birrinang, wanjh djalkurduyimi rowk nawu angel bindimarneyimeng.

21 Kaluk bu kunkodjke eight wanjh kumwam bu nawu wurdyaw birilakkayewong, dja mak birringeykurmeng Jesus. Kunmekbe kunney angel biyingingheywong bu ngalbadjan minj bibangmeyawkayi.

Ngalbadjan Dja Kornkumo Benekang Jesus Kore Temple

Luke 2:22-24

22 Wanjh kaluk bu kumwam kore Moses nuye mankarre kabimbuyindi bu daluk kabirrikudjirridjburren wurdyawkenh, wanjh Joseph dja Mary benekang Jesus kore Jerusalem ba bu benewong nawu Kawohnan Rowk.

23 (Kaluk kawokbindi kore nawu Kawohnan Rowk nuye mankarre, “Bu narahrangem rowk nawu nadjjaman, bedda wanjh birridjamun nungan God nuye dja kornkumo ngalbadjan wanjh kabeneyawwon.” [Exodus 13:2])

24 Dja mak kabimdi kore mankarre nuye nawu Kawohnan Rowk, bu ngalbadjan kornkumo kabenewon priest mayhmayh nawu kelebuk, kabunkenh God nuye, kaluk yikahwi bokenh korlobok, dja yikahwi wanjh bokenh doddorok yaw.† Wanjh kunmekbe beneyimeng nawu Mary dja Joseph.

Nawu Simeon Biburlumeng God Bu Jesuskenh

Luke 2:25-35

25 Kaluk kumekbe ni kore Jerusalem nakudji bininj nawu ngeyyoy Simeon, nawu namakni bininj, dja God nuye mankarre karmmi rowk. Dja mak nungka bidjalnadbuni God bu Israel nuye mawahmawah benkangemarnbuyi. Dja Namalngmakaykenh benehdjarrkrey.

* 2:11 (Dja verse 26 warridj) “Christ” karohrok kunneybuyika “Messiah”. Nahni bokenh kunney kamenyime “nawu God bikodjdelkkeng bu bidjarrngbom”. † 2:24 Leviticus 12:8

²⁶ Kaluk Namalngmakkaykenh biyingkihmarneyimeng bu nungka minj kabangmedowen, dja kabinan werrk Christ nawu Kawohrnan Rowk benberrebbom.

²⁷ Bu kunmekbe wanjh Namalngmakkaykenh bimiyikang kore temple kunrurrk yiwarrudjkenh. Wanjh ngalbadjan kornkumo benemyawngimowong Jesus nawu barrken, benemarnekurduyimeninj kore mankarre yoy,

²⁸ wanjh nungka Simeon biwanjbimey, biburlumi God, yimeng,

²⁹ “Ngudda nawu yidjalwohrnan rowk, bonj, ngaye nawu marnedur-rkmirri, wanjh kamak kanmunkewemen ba ngarrowen, kunmodmikenh dorrengh ngudda ke, kore ngudda kanyingkihmarneyimeng.

³⁰ Dja ngaye nganang kumim ngardduk, nungka nawu ngudda kanwong kanngehkekenh,

³¹ bu yiyingkihkarremarnbom ba bininj birriwokbubuyika rowk ngundikurdunan,

³² Kaluk mak nawu minj Jews bininj kabirrinan nawu kabenmarnewolkan dja kabenbukkan ngudda kekenh. Dja mak kankukenwon ngad Israel nawu ngudda ke bininj.”

³³ Dja nawu kornkumo dja ngalbadjan bedda wanjh benemayahmi bu Simeon kuhni yimeng bimulewam Jesus.

³⁴ Dja Simeon benbenemarneyimeng, “Ngadjare God ngunbenemarneyime ngorrewoneng kunmak.” Dja mak bimarneyimeng ngalbadjan, “Kanbekka, marneyime, nahnai nawu wurdyaw God bimmunkeweng ba yiman kabenlarlmang bininj, kabenmarnbun birriwern kabirribawon God wanjh kabirrikukmarladjmen, dja mak kabenmarnbun birriwern bu kabirriyikan wanjh kabenkukenwon kore God. Mak nungka wanjh kanbukkan bu baleh God kakurduyime, dja birriwern kabirriyiwirrihme.

³⁵ Dja mak God bimmunkeweng ba nungka kabenmarnbun bininj birriwern bu kabirrimayalibukkarren. Dja ngudda nawu ngalbadjan, wanjh yidjakekkan yiman rerrih mandjawak ngunkangedulubun.”

Ngalkudji Ngalkohbanj Ngalbu Prophetni Wanjh Bimanjbom God Bu Jesuskenh

Luke 2:36-38

³⁶ Kaluk mak kumekbe ni ngalkudji prophet ngalbu biwokmulewani God, ngalbu ngeyyoy Anna, dja kornkumo ngarreni ngeyyoy Phanuel, dja bedda birrimudni Asher. Dja ngaleng wanjh ngalkohbanj duninj. Bu yawkyawkni benemarrinj bininj, benehni bu mandjewk seven, wanjh nungka doweng.

³⁷ Wanjh ngaleng ngalbu kamardjukun djahdjalni munguyh bininj yak, dja wanjh kohbanjminj, mandjewk eighty four ngalengngarreni. Dja ngaleng minj rurrkbawoyi kore Temple, bu munguyh munguyh djahdjaldi yiwarrudj dja boddangeni kore God, barnangarra dja mak kukak, dja manme bawoni ba bu bihdjawani God bu kunwernhkah.

³⁸ Wanjh bu kunmekbe Jesus birrihni kururrk, kundjalmekbe rerrih Anna benmarnebebmeng, wanjh bimanjbom God, dja mak bimulewani Jesus kore bininj nawu birrihmabuni bu God kabenyerrkemeninj bininj nawu Jerusalem birrihni nawu yiman birrihbongdi rerrih.

Bu Jesus Djordmeng

Luke 2:39-52

³⁹ Wanjh Jesus nuye ngalbadjan dja kornkumo benekurduyimeng rowk manbu mankarre kahyo God nuye. Wanjh bu beneyakwong rowk

wanjh birridurndi kore Galilee, kore kubolkkimuk bu bedda birrihni kabolkngeyyo Nazareth.

⁴⁰ Dja nawu wurdyaw djordmehdjordmeni, dja mak kunmalng nuye murrngrahmurrngrayekmeni, kunmayalimak nuye wernmehwernmeni, dja God bihmarnekurduyimi kunmak nuye.

Jesus bu Yawurrinjni

Luke 2:41-52

⁴¹ Nawu Jesus nuye ngalbadjan dja kornkumo benerey mandjewk-bubuyika kore Jerusalem bu mulilkenh manbu God bendarrkidba-wongkenh.

⁴² Dja bu nungka Jesus balyawurrinjni, bu twelve mandjewk nuye, wanjh birridjarrkwam yiman bininj nawu Israel benkebmawahmeng rowk birriyimi.

⁴³ Dja bu birriyakwong rowk manbu mulil, nawu ngalbadjan dja kornkumo bolkbawong dja benedurndengi kured, dja Jesus kunmekbe nungan bolkmaddi, Jerusalem ningihni, dja nawu kornkumo ngalbadjan benewakwani.

⁴⁴ Bedda beneyimi bu yimankek nungka dorreng birridjarrkdurndeyi birribuyika nawu birridjarrkmirndewern, wanjh kunu birridjalwam bu kunbarnangarrakudji. Wanjh bu beneyawani kore nawu birrimud dja mak nawu bindiburrbuni.

⁴⁵ Dja minj benengalkemeninj, wanjh benedurndi Jerusalem bu beneyawani kumekbe.

⁴⁶ Kalukburrk bu kunkodjke danjbik wanjh benengalkeng kore temple kunrurrk manbu yiwarrudjkenh. Nungka kumekbe ningihni kubulkayh kore birrihmirnderri nawu bindibukkabukkani mankarre, nungka benhbekkani dja mak benhdjawani kunwern.

⁴⁷ Dja bininj rowk nawu birribekkani Jesus wanjh birrimayaliburlumeng nungka nuye kunmayali, dja mak bu benhwokmangi kamak rowk.

⁴⁸ Bu ngalbadjan dja kornkumo benenang Jesus wanjh benekangebar-rhmeng. Dja ngalbadjan bimarneyimeng, "Djedje, njale kuhni kanbene-marnekurduyimeng? Dja marneyime, Ngabbah dja ngaye ngundihyawani nganekangewarreni duninh."

⁴⁹ Dja nungka benbenemarneyimeng, "Njalekah kandiyawani, yiddok minj nguneburrbuyi bu ngaye ngahdjalni kore kunrurrk nuye Kornkumo ngardduk kore nungka kadjare?"

⁵⁰ Dja bedda minj benewernhburrkburrkbekyayi bu kuhni nungka benbenemarneyimeng.

⁵¹ Wanjh nungka Jesus birridjarrkdurndi Nazareth, dja nungka benbenemarrkmangi munguyh, dja ngalbu ngalbadjan kuhni rowk djalw-ernhkarmeng kore kukange ngarre.

⁵² Dja Jesus nungan mayahmayaliwernmeni, dja mak balhdjordmeni, dja wernmeni bu God bihmarneyimi Jesus namakni, dja mak bu bininj warridj birrimarneyimi Jesus namakni.

3

John Nawu Benkukdjuhkeyi

Luke 3:1-20

(Matthew 3:1-12; Mark 1:1-8; John 1:19-28)

¹ Kaluk rerrikah bu mandjewk fifteen nuye Tiberius Caesar bu djalwohrnani kore kubolkwarlahkenh rowk kabolkngeyyo Rome, dja

mak kumekbe kore kubolkwarlahbubuyika ngarre Rome, birribebbe-hwohrnani; Pontius Pilate wohrnani kore kabolkngeyyo Judea, Herod kore Galilee, dja Philip nawu Herod benedanginj wanjh wohrnani kore Ituraea dja Trachonitis, dja Lysanias wohrnani kore Abilene.

² Dja mak bininj nawu benengeyyoy Annas dja Caiaphas, bedda wanjh benekihkimukni priests. Wanjh kumekbe rerrih God biwokrayekwong John nawu beywurd nuye Zechariah, bu nungka John ningihni nadjalkudjini kore kubolkdarleh.

³ Wanjh kunu nungka wam, regehrey kore kubolkwarlahkenh rowk darnkih kore mankabo Jordan, benmarneyolyolmi benmarneyimi, "Ngurrikudjuhmerimen dja ngurrimulewarrenkenh bu ngurribawon kunwarre ngudberre, ngurriborledme kore God, ba kunu nungka kabengmidjan kunwarre ngudberre."

⁴ Kuhni bu John kurduyimi wanjh yingkihwokbimbuyindi kore djurra nawu Isaiah bimbom bu biwokmulewani God, bu yimeng, "Nakudji kakayhme kore kubolkdarleh, kayime, 'Ngurriyingkihmarnebolhmarnbu manbolh nuye nawu Kawohrnan rowk. Ngurribolkdjaddjadwo nungka nuye."

⁵ Manbu kuwarddebarrarn rowk, dja kunwardde rowk manu manwarddekikhkimuk dja mak manwarddekilehkilelk, kaluk kabolhmarnbuyindan rowk, dja manu manbolhbarli kabolkdjaddjadmen, dja manbolhwarrehwarre kabolkmarnbuyindan.

⁶ Dja birriwarlahkenh bininj rowk kaluk kabirrinan bu baleh God kakurduyime kore kabengehkekenh.'" [Isaiah 40:3-5]

⁷ Kunu wanjh John benmarneyimi birrimirndewern nawu birrimhrey birridjareni nungka benkukdjuhkemeninj, yimihyimi bedberre, "Ngudda nawu yiman rerrih nabang nayin! Nangale nguningkihbengdayhkeng ngudberre ngurrimhkelerlobme, ba yimankek God minj ngunkinje ngudberre, bu kamhre nuye bu kandjadme bininj?"

⁸ Yiman mandulkmak kabarnemdangan manmak manme, ngudda wanjh karohrok ngurrikurduyimen kunmak, bu ngunmulewan ngudberre bu woybukkih ngurribawong kunwarre, dja ngurriborledmeng kore God. Dja yuwn ngurridedjdjingmang ngurrimarneyimerren, 'Ngad kunu wanjh Abraham Mawah kadberre.' Dja ngayime ngudberre, bu God kadjaremen wanjh kakarrme kundulkarre maninjmanu kunwardde kakukborledke kamarnbun wurdwurd nuye Abraham.

⁹ Dja ngokko wanjh kurdburru kahdjurro kore kurredjmahdedjmad ngarre kundulk, dja kundulk rowk manbu minj kabarnemdangan manmak manme wanjh manmekbe rowk karrulkdjobke karrulkburiwe kore kunak kahrung."

¹⁰ Wanjh bininj nawu birrimirndewern birrihdjawani, "Kaluk baleh ngarrikurduyime?"

¹¹ Wanjh nungka John benwokmey, yimeng, "Bininj nawu kakarrme bokenh nawu kahdjongburren, wanjh madjarlma dja biwo nawu minj kakarrme, dja nawu kakarrme manme, yiman kunmekbe rerrih kurduyimen, larlma biwo nawu meyak."

¹² Yikahwi bininj nawu bindimarnemangi kunwardde tax bedberre nawu bindimarnewohrnani, bedda warridj birrimhrey birridjareni John benkukdjuhkemeninj, wanjh birridjawam, "Ngudda nawu kanbukkabukkan ngadberre, kanmarneyimen baleh ngarrikurduyime?"

¹³ Nungka benwokmey benmarneyimeng, "Yuwn ngurrbenkukdjanwohme nawern kunwardde, dja mandjad ngurrbendjawa ngundidjalkukwon nawu kabirriwohrnan ngundiwokrayekwong."

14 Mak djamun warridj birridjawam, "Dja ngadkunu baleh ngarrikurduyime?" Wanjh nungka yimeng bedberre, "Yuwn nangale ngurrikukyirurrkmang ngunkukwon kunwardde ngudberre, dja yuwn nangale ngurridjuhban nawu manungkenh. Dja nawu ngundikukwon ngurridurrk-mirrikenh, ngurridjalyime, 'Bonj kamak.'"

15 Bininj birribekkarreni bu kunubewu darnkih kurduyimerrangimeninj kunkimuk. Dja bininj rowk birrihburrbuni kukange bedberre, yiman rerrih birridjwarreni, "Yiddok nungka nuk nahni nawu Christ* nawu God kanberrebbom kadberre?"

16 Wanjh kunu John yimeng bedberre rowk, "Ngaye bonj, kukdujukhe ngudberre kukku, dja ngaye yiman ngangudjyahwurd, dja nawu naw-ernhgudjkimuk kamre. Ngayenu ngawarre, minj ngamak bu yimankek ngarrencegyerrkke nawu kahdengedjongbuyindi. Wanjh nungka kaluk yiman ngunkukdujukhe rerrih, bu Namalngmakkaykenh dja mak kunak dorrengh.

17 Nungka yiman rerrih kakarrme kundulk nawu kamimbunkenh ba kawernhbolkwerrhme, dja mak ba manmim duninj manbu kangeyyo wheat, nungka kamimngimowon kore kunrurrk nuye kore kahkarekur-rme, dja manbu manwerrk, kaluk kawerrkkinje kore kunak nawu minj nangale kabirludombun, dja kadjalrung munguyh munguyh."

18 Dja mak warridj kunbubuyika kunwern benmarneyolyolmi benkangeborledkemeninj, bu nungka kunwok kunmak benbengdayhkeyi bedberre nawu bininj.

19 Kaluk nawu Herod wohrnawohnani kore Judea, dja nungka wanjh John bibengdayhkeng dja birruy Herod bu kuninjkunukenh nungka bidjirdmey dja benemarrinj Herodias ngalbu ngalbininjkobeng nuye nawu Herod benedanginj. Dja mak nungka kunwarrebuyika kunwern yimiyimi.

20 Wanjh kaluk rerre nungka Herod kunwernhwarre yimeng, bu John birrangbalhmeng kore prison.

John Bikukdujukeng Jesus

Luke 3:21-22

(Matthew 3:13-17; Mark 1:9-11)

21-22 John korroko benkukdujukkeyi bininj birriwern, dja mak Jesus warridj bikukdujukeng. Wanjh nungan Jesus bu yiwarrudj dingihdi, wanjh ngolduhmeng, dja Namalngmakkaykenh kumkoluy, kukyimi yiman doddorok rerrih, dja yerrkang kore nungka. Dja mak nakudji kaddumbeh kumwokdanj, yimeng, "Ngudda wanjh ngardduk beywurd nawu marned-jare duninj, dja ngaye marneyime bu ngudda wanjh yimak."

Nawu Jesus Nuye Mawahmawah

Luke 3:23-38

(Matthew 1:1-17)

23 Jesus bu nungan dedjdjingmey renehrey benbukkabukkani, wanjh nungka mandjewk nuye wanjh darnkih thirty. Dja nungka Jesus yimankek bedda birriyimi nawu kornkumo nuyeni Joseph, dja Joseph kornkumo nuyeni nawu ngeyyoy Heli,

24 Wanjh nunganwali Heli kornkumo nuyeni Matthat. Matthat nuyeni kornkumo wanjh Levi, nawu nunganwali kornkumo nuyeni Melchi. Melchi kornkumo nuyeni wanjh Jannai, dja nungka nuyeni wanjh ngeyyoy Joseph.

* 3:15 Christ kangeyrohrok "nawu Messiah".

²⁵ Joseph nuyeni kornkumo wanjh Mattathias, nawu nunganwali kornkumo nuyeni Amos. Amos kornkumo nuyeni wanjh Nahum, nawu Esli kornkumo, Esli nuyeni kornkumo Naggai,

²⁶ nawu nungan kornkumo nuyeni Maath. Maath nunganwali kornkumo nuyeni wanjh Mattathias, nawu nunganwali kornkumo nuyeni ngeyyoy Semein. Semein kornkumo nuyeni wanjh Josech, nawu nungka nuyeni ngeyyoy Joda,

²⁷ nawu nunganwali kornkumo nuyeni wanjh Joanan. Joanan kornkumo nuyeni Rhesa, nawu kornkumo nuyeni ngeyyoy Zerubbabel, nawu nunganwali kornkumo nuyeni Shealtiel. Shealtiel kornkumo nuyeni Neri,

²⁸ nawu kornkumo nuyeni Melchi, nawu kornkumo nuyeni wanjh Addi, nawu nunganwali kornkumo nuyeni wanjh Cosam. Cosam kornkumo nuyeni Elmadam, nawu nungka nuye kornkumo ngeyyoy Er,

²⁹ nawu nunganwali kornkumo nuyeni Joshua, nawu nungka nuyeni wanjh Eliezer. Eliezer kornkumo nuyeni wanjh Jorim, nawu nungan nuyeni ngeyyoy Matthat, nawu nunganwali kornkumo nuyeni Levi,

³⁰ nawu Simeon kornkumo nuyeni. Simeon nuyeni kornkumo Judah, nawu kornkumo nuyeni ngeyyoy Joseph, nawu nunganwali kornkumo nuyeni wanjh Jonam. Jonam nuyeni kornkumo Eliakim,

³¹ nawu kornkumo nuyeni Melea, nawu nungka nuye wanjh Menna, nawu nunganwali kornkumo nuyeni Mattatha. Mattatha nuyeni kornkumo Nathan, nawu nungka nuyeni kornkumo David,

³² nawu nungan nuyeni wanjh Jesse, nawu nunganwali kornkumo nuyeni Obed. Obed nuyeni kornkumo Boaz, nawu nungan nuyeni wanjh Salmon[†], nawu nungka nuyeni kornkumo Nahshon,

³³ nawu nunganwali kornkumo wanjh Amminadab, nawu nuyeni kornkumo Ram. Ram nuyeni kornkumo wanjh Hezron, nawu nuyeni kornkumo ngeyyoy Perez, nawu nunganwali kornkumo nuyeni Judah.

³⁴ Judah nuyeni kornkumo Jacob, nawu nungka nuyeni wanjh Isaac, nawu nunganwali nuyeni Abraham. Abraham nuyeni kornkumo Terah nawu nuyeni kornkumo Nahor,

³⁵ nawu nungka nuyeni wanjh Serug, nawu nunganwali kornkumo nuyeni Reu. Reu nuyeni kornkumo ngeyyoy Peleg, nawu nungan nuyeni wanjh Eber, nawu mak nungka nuyeni kornkumo wanjh Shelah,

³⁶ nawu nunganwali nuyeni Cainan. Cainan kornkumo nuyeni wanjh Arphaxad, nawu kornkumo nuyeni Shem, nawu nungka nuyeni kornkumo Noah, nawu nunganwali nuyeni Lamech.

³⁷ Lamech kornkumo nuyeni ngeyyoy Methuselah, nawu nungan nuyeni kornkumo ngeyyoy Enoch, nawu nunganwali nuyeni wanjh Jared. Jared nuyeni kornkumo Mahalalel, nawu Kenan nuyeni kornkumo,

³⁸ nawu nungka nuyeni wanjh Enosh, nawu nunganwali kornkumo nuyeni wanjh Seth. Seth nuyeni kornkumo wanjh Adam, nawu nungka kornkumo nuyeni wanjh God.

4

Bu Satan Nawu Namarnde Duninjh Bidjurrkkang Jesus

Luke 4:1-13

(Matthew 4:1-11; Mark 1:12-13)

¹ Jesus wanjh kukbarlmuyindi Namalngmakkaykenh, dja bolkbawong Jordan mankabo. Wanjh Namalngmakkaykenh bidjalmikani kore kubolkdarleh.

[†] 3:32 Salmon kakarrme kunngeybuyika "Sala".

² Wanjh bu dingihdi kumekbe nawu Namarnde Duninj bihdjurrkkani bu kunkuyeng kunkodjke forty. Dja Jesus minj njale nguyi bu kunmekbe kurduyimi nuye. Kalukburrk wanjh nungka bekkarrinj wernhmarrwedoweng.

³ Wanjh Namarnde bimarneyimeng Jesus, “Bu ngudda woybukkih Beywurd nuye God, wanjh yimarneyimen manih kunwardde bu kayimerran buriddi.”

⁴ Wanjh Jesus biwokmey, yimeng, “Kawokbimdi kore God nuye mankarre, ‘Minj bininj kamimbi bu djal manme kangun.’” [Deuteronomy 8:3]

⁵ Wanjh Satan yiman rerrih Jesus bikang bu benedjarrkbidbom kaddum, wanjh kumekbe Satan bibolkbukkang kubolkbubuyika rowk kore bininj birrihni. Wanjh kunmekbe rerrih werkkwerrk djalbolknang rowk.

⁶ Wanjh Satan bimarneyimeng, “Ngaye bolkwon ngudda ba yiwohran kuninjkuu kubolkbubuyika rowk, dja mak kunu yingeykukenmen rowk bedberre. Dja wanjh ngaye ngardduk ngawohran bu nganbolkwong, dja bu ngaye ngadjare nangale ngabolkwon, wanjh ngadjalwon.

⁷ Ngudda wanjh bu kanmarnebodan, wanjh kuninjkuu rowk kayimeran ngudda ke, yingan yidjalwohrnan rowk.”

⁸ Wanjh Jesus biwokmey, yimeng, “Kawokbimdi kore God nuye mankarre, ‘Ngurrimarnebodda God ngudberre nawu Kawohran Rowk, dja nungka nadjalkudji ngurrimarnedurrkmirrin.’” [Deuteronomy 6:13]

⁹ Wanjh Satan yiman rerrih bikang Jesus kore Jerusalem, bikurrmeng dingihdi kaddumkah duninj kore temple kunrurrk manbu yiwarrudjkenh. Wanjh bimarneyimeng, “Bu woybukkih ngudda Beywurd nuye God, yikukburriwerrimen kanjdji,

¹⁰ dja kawokbimdi kore God nuye mankarre, ‘Nungka kabenwokrayek-won angels nuye ba ngundinahnan,’

¹¹ dja kubid bedberre ngundikan, marndi ngundengedong kunwardde.” [Psalm 91:11-12]

¹² Wanjh Jesus biwokmey, yimeng, “Dja mak kabimbuyindi, kayime, ‘Yuwn yidjurrkkan yirohrokme God ke nawu Kawohran rowk.’” [Deuteronomy 6:16]

¹³ Wanjh bu Satan yakwong rowk kore bidjurrkkani Jesus, wanjh bibawong, dja ngaleng madbuni bu bekkarrimeninj kabolkyime kamak ba kabiyawoyhdjurrkkan.

Jesus Durndi Kore Kunbolk Galilee

Luke 4:14-30

(Matthew 4:12-17; Mark 1:14-15)

¹⁴ Wanjh Jesus durndi kore Galilee, Namalngmakkaykenh dorrengn nawu bihdulkarrewoni, dja birriwobekkani nawu birrihni kumekbe kubolkwernkenh rowk.

¹⁵ Wanjh nungka regehrey kore kubolkwarlah Galilee benbukkabukkani kore bedberre synagogues, manbu kunrurrk yiwarrudjkenh. Dja birriwern rowk birriburlumi nungka.

Bininj Birriwarnyakminj Jesus Kore Nazareth

Luke 4:16-30

(Matthew 13:53-58; Mark 6:1-6)

¹⁶ Kaluk Jesus bolkmey Nazareth kore nungka djordminj korroko. Wanjh bu kunbarnangarra Sabbath bolkyimi, kunkodjke seventh bu kunbarnangarradamun God nuye, nungka Jesus wam ngimeng kore

synagogue, yiman berrebboyen nungka yimihyimi bu Sabbath. Wanjh nungka dolkkang danginj bu kabenmarnebimngeyhngeybunkenh.

17 Wanjh birriwong scroll kore nawu prophet Isaiah bimbuni bu biwokmulewani God. Wanjh Jesus dangmarrhmey, ngalkeng kore kuninjkunu kunwok kawokbimdi,

18 “Nawu Kawohrnan Rowk nuye Namalngmakkaykenh nganehdjar-rkre, dja nungka ngankukbarrkbom ba kunwok kunmak ngabenbeng-dayhke bedberre nawu birrimarladj. Dja mak nungka nganmunkeweng ba ngabenmarneyolyolme bedberre nawu kabirridukkayindi bu nungka kabenbebke. Dja mak ngabenbengdayhke bedberre nawu birrimindubbe bininj bu nungka kabenmarnbun kabirriyawoyhbolknan. Dja mak kabenbebke kabirrire kamak rowk bininj nawu kunwarre yiman kabenbongkarrme.

19 Dja mak ngabenmarneyolyolme bininj birriwern bu bolkkime kumwam mandjewk kabolkyime kore God kabenmarnekurduyime kunmak.” [Isaiah 61:1-2]

20 Wanjh bu Jesus bimngeyhngeybom yakwong, wanjh nungka dangbalhmeng namekbe djurra, dja biwong bininj nawu nahnani, wanjh yerrkang, dja birriwern rowk nawu kumekbe birrimirnderri, bedda wanjh birridjalkuknani.

21 Wanjh Jesus dedjingmey bu benmarneyimeng, “Bolkkime bu ngurrihbekkani kunih bu kunwok God nuye, wanjh marnbuyindanj.”

22 Dja birriwern rowk birriburlumi dja birrimayahmi bu nungka kunmak kunwok wokdihwokdi. Wanjh birridjavarreni, “Nahni yiddok Joseph nuye beywurd?”

23 Wanjh Jesus benmarneyimeng, “Ngaburrbun bu ngudda ngurridjare kandimarnegeyibun nawu ngudda ngurrihyime, ‘Ngudda doctor nawu yibenmarnbun, wanjh yingan yimarnburrimen!’ Dja mak kandimarneyimen, ‘Mah, dja yihkurduyime konhda kured yiman ngundiwobek kang bu yikurduyimi kore kabolkngeyyo Capernaum.’

24 Woybukkih ngayime ngudberre, bininj nawu prophet, nakka nanu wanjh bininj nawu birriredbo minj kabirrimarnedjare kore kabirrihdjarrkni.

25 Dja ngurriburrbu korroko bu Elijah renegehrey, dja mak bu mandjewk minj djakduyi bu mandjewk danjbik dja mak dird six, dja minj manme birrikarmeninj kore kubolkwarlah rowk kore birrihni nawu Israel benkebmawahmeng. Dja woybukkih ngayime ngudberre, birriwern daluk birrihni kore Israel nawu birrikamarrdjukunni.

26 Wanjh kunu God minj bimunkewemeninj Elijah kore ngalwohkudji nawu Israel birrihni, dja bidjalmunkeweng kore kabolkngeyyo Zarepath kore Sidon, kore ngalkudji daluk kamarrdjukun ngalbu kumekbe ni.

27 Dja warridj yiman kunmekbe rerrih bu Elisha renegehrey, prophet nawu biwokmulewani God, wanjh birriwern birrihni kore kunbolk Israel bedberre nawu birrikarmi kundjak birrikulahwarreni. Minj nakudji kumekbe bimarnbuyi bu kulahmakmeninj, dja Elijah bimarnbom nadjalkudji, Naaman nawu nakang Syriabeh.”

28 Wanjh bu kunmekbe birribek kang, birriwern rowk nawu kumekbe birrimirnderri kore synagogue, wanjh birrikangeyidduy duninjh.

29 Wanjh kunmekbe birridolkkarrinj birrikumkumeweyi kuberrkkah kore kumekbe kubolkkimuk, dja birrikang kore kurrid ngarre kuwardde kore rurrkdjabdjabi bedberre kubolkkimuk. Bedda birridjareni birrikukburriwemeninj kumekbebeh.

³⁰ Dja nungka Jesus balhdjalley kubulkayh kore birrimirnderri, dja mak djalwamwi.

Jesus Burriweng Nawu Namaingwarre

Luke 4:31-37

(Mark 1:21-28)

³¹ Wanjh Jesus wam koluy kore kubolkkimuk kabolkngeyyo Capernaum, kore Galilee. Dja bu kunbarnangarra Sabbath nungka dedjingmey benbukkabukkani bininj birrihni kumekbe.

³² Bedda nawu birribekkani wanjh birrikangebarrhmi bu nungka benbukkabukkani, dja bu wokdi bedberre wanjh yiman rerrih wohrnani bedberre.

³³ Kaluk kumekbe ni kore synagogue manbu kunrurrk yiwarrudjkenh, nakudji bininj nawu namarnde nawu namaingwarre wanjh bikarrmi, wanjh namekbe bininj kayhmeng wernkih duninj, yimeng,

³⁴ "Aba kanbawo! Njalekenh ngudda yimwam kanhwarrewon ngadberre, ngudda nawu Jesus Nazarethbeh? Yiddok yimwam kanbun ngadberre? Ngaye kukburrbun, ngudda wanjh nawu Yimakkaykenh nawu nungan God nuye!"

³⁵ Dja Jesus birruy, yimeng, "Yingurdmen dja yibebmen, yibawo namekbe bininj." Wanjh nawu namarnde bikukburriweng nahni bininj kore kurorre kubulkayh kore bedda birrimirnderri, dja bebmeng bibawong, dja nawu bininj minj njale wohdjakbekkayi.

³⁶ Wanjh kunu birrikangebarrhmeng rowk dja warridj birrimarney-imerrinj, "Njale kuhni bu kunwok nuye? Dja yiman nungka kawohrnan dja mak warridj kundulkarre dorrengh, bu nungka kunrayek kunwok kabenwon nawu namaingwarre, dja wanjh kabirribebme!"

³⁷ Wanjh kunu birriwobekkani Jesus nawu birrihni kumekbe kubolkw-ernkenh rowk.

Jesus Benmarnbom Birriwern Bininj

Luke 4:38-41

(Matthew 8:14-17; Mark 1:29-34)

³⁸ Wanjh Jesus dolkkang bolkbawong kumekbe kore synagogue kunrurrk yiwarrudjkenh, dja wam bebmeng kore Simon nuyeni kunrurrk, wanjh ngimeng. Wanjh Simon nuyeni ngalkinjbalak downi kunkimuk, kundjak bimey dja kukwurlhmeng duninj, dja birridjawam Jesus bu kabimarnbun.

³⁹ Wanjh Jesus dolkkang bimarnedanginj, wanjh duy nawu kundjak, wanjh kundjak bibawong, makminj, wanjh kundjalburrikudji rerrih ngaleng dolkkang bennahnani benwoni manme.

⁴⁰ Wanjh bu baldungyibmi birriwern rowk nawu bindikarrmi nawu birrihdowedoweni kundjakkubuyika, wanjh bindimkang kore Jesus, wanjh nungka bebbehidkurmerrinj bedberre rowk wanjh benmarnbom.

⁴¹ Dja mak namarndemarnde warridj birribebmerreni bindibawoni kunkayhmi dorrengh, birriyimi, "Ngudda wanjh Beywurd nuye God!" Dja nungka bendungi benwokngurdkeyi. Kuhni yimi bu bedda birriburrbom bu nungka nawu Christ*.

Jesus Benmarneyolyolmi Kore Kubolkwarlah Judea

Luke 4:42-44

⁴² Kaluk bu kukabel, nungka Jesus bolkbawong wam kore minj nangale bininj niwirrinj. Wanjh birrimirndewern birriyawani, wanjh

* **4:41** Christ kangeyrohrok "nawu Messiah".

birrimarnebebmeng birridenghkeyi birrimarneyimi, “Yuwn kanbawon ngadberre.”

⁴³ Dja Jesus benmarneyimeng, “Yuwn kandidenghke, dja ngadjalle ngabenbengdayhke kunwok kunmak bu God Kawohrnan rowkkeh. Ngabenbengdayhke nawu kabirrihni kubolkkihkimukbubuyika warridj, dja wanjh kunmekbekenh nganmunkeweng.”

⁴⁴ Wanjh kunu Jesus rengehrey kore kubolkwarlah Judea, benmarney-olyolmi kore kunrurrkbubuyika synagoges.

5

Jesus Bendjarrngbom Bininj Nawu Benbukkabukkani

Luke 5:1-11

(Matthew 4:18-22; Mark 1:16-20)

¹ Kaluk kunkudjikenh bu Jesus dingihdi kore kukadjid manlabbar-kimuk duninjh bongeyyoy Gennesaret*, dja birrimirndewern bininj birridjokkohmeng Jesus kabirribekkankenh God nuye kunwok benbukkabukkani bedberre.

² Wanjh kumekbe Jesus nang kabbala bokenh manbu djenjkenh, manbu bininj birribawong birrinameng kumekbe kurrid, dja birrimekbe bininj wanjh birridjirridjbuni walabbi bedberre.

³ Wanjh Jesus bidbom kore mankudji kabbala, kaluk Simon nuyeni. Wanjh Jesus bimarneyimeng, “Yiwohdjirrka walakkih kore kukku.” Wanjh kumekbe Jesus yerrkang kore kabbala. Kaluk kumekbebeh benbukkabukkani bininj nawu birrimirnderri.

⁴ Wanjh bu Jesus yakwong bu benbukkabukkani, kunmekbe bimarneyimeng Simon, “Yidjirrka kore kuburrrk, dja ngurriburriwemen walabbi ba djenj ngurringormang.”

⁵ Wanjh Simon biwokmey yimeng, “Ngudda nawu kanmarnewohrnan, ngad ngarrihburiweyi bu kunkakkuyeng ngarriwerndurrrkmirri, dja minj njale ngarrimayi. Dja bonj, bu ngudda kanmarneyime, wanjh kunukka gaye ngayawoyhdombuyhwe nawu walabbi.”

⁶ Wanjh bu kunmekbe birrikurduyimeng, birringormey nadjalwern duninj djenj, dja walabbi bedberre kuyindjalkmireyi.

⁷ Wanjh kunbidbewih bindimkayhmeng kabindibidyikarmekenh nawu kabbalabuyika birrihrey birrihdjarrkdurrrkmirri. Wanjh kunu birrimwam dja birridjalbarlkeng rowk manmekbe kabbala bokenh, wanjh kuyinyibmeninj.

⁸ Dja bu kunmekbe Simon Peter nang, wanjh nungka mankang kore Jesus kubard nuye, yimeng, “Kanbawo, ngudda nawu Yiwohrnan, dja ngayenu ngawarre, minj ngawokmarrkmang God nuye mankarre.”

⁹ Kunmekbe yimeng bu nungka kangebarrhmeng, dja warridj nawu birridjarrkrey, bedda dorrengh birrikangebarrhmeng bu djenj birringormey.

¹⁰ Kaluk James dja John dorrengh nawu bebeywurd nuyeni Zebedee, nawu Simon birrihdjarrkdurrrkmirri dja birrihworreni warridj.

Wanjh Jesus bimarneyimeng Simon, “Yingurdmen, yuwn yikele, dja bonj ngudda djenj yihmangi, wanjh kaluk bininjwali yibenmang munguyh.”

¹¹ Wanjh bedda bu birriyibemeng kabbala kore kuberrk, wanjh birridjalbawong yehyeng rowk, dja nungka Jesus birrimunkekdajuy.

* 5:1 Bolkngeyyoy warridj “Kurrula manbu Galilee”.

Jesus Bimarnbom Nakudji nawu Kulahwarreni

Luke 5:12-16

(Matthew 8:1-4; Mark 1:40-45)

¹² Wanjh bu Jesus ni kore kubolkkudji, kaluk kubolkkimuk, mak kumekbe ni nakudji bininj nawu kundjak karrmi kulahwarreni duninj. Wanjh bu nungka binang Jesus, nungka mankang kanjdji, rorrehorrenani wanjh bihdjaldjawani, yimeng, "Ngudda nawu Yiwohrnan, bu yidjaremen wanjh yikarrme kundulkarre kanmarnbunkenh."

¹³ Wanjh kunu Jesus bidyirriyonginj bikarrmeng, yimeng, "Ngaye ngad-jare, wanjh yimakmimen." Wanjh kundjalburrikudji rerrih mokdowerrinj rowk, kundjak bibawong, dja makminj.

¹⁴ Wanjh Jesus biwokrayekwong, yimeng, "Yuwn nangale kanmulewan, dja yidjallay kore priest bu yibukkarrimen, dja yiwon mayh kabunkenh, kore kayime mankarre manbu Moses bimbom, ba bininj rowk kabirribur-bun bu woybukkih yimakminj."

¹⁵ Wanjh yiman djamku Jesus bingurdkemeninj, dja djalwernhwokwar-lahminj duninj, dja kunu birrimirdewern birrimirndemornamerreni kabirribekkankenh, dja mak kabenmarnbunkenh nawu birrihdoweni

¹⁶ Wanjh kunu Jesus nungan yarrkka bendjalbawoni, rey kore kubolk-darleh, dja kumekbe dingihdi yiwarrudj.

Jesus Bimarnbom Nakudji Nawu Birlni

Luke 5:17-26

(Matthew 9:1-8; Mark 2:1-12)

¹⁷ Kaluk kunkudjihkenh bu nungka Jesus benbukkabukkani bininj, wanjh kumekbe birrini yikahwi nawu Pharisees dja mak yikahwi bininj nawu bindihbukkabukkani mankarre. Dja bedda birrimdolkkarrinj kubolkyahwurdubuyika rowk kore Galilee, dja mak Judea, dja yikahwi mak birrimdolkkarrinj Jerusalem. Dja Jesus karrmi nawu Kawohrnan Rowk nuye kundulkarre ba kabenmarnbunkenh bininj.

¹⁸ Wanjh yikahwi bininj birrimkang kaluk nakudji nawu birlni, kunmadj dorreng nawu nungka yongohoy, birribolkyawani dja birridjareni birringimowoyi kururk, bu birrikurmeninj kore Jesus nuye kumirrk.

¹⁹ Dja minj baleh birribolkngalkemeninj birringimowoyi dja birrim-irndewern duninj bindidjokohmeng. Wanjh kunu bedda birribidbom kadduw kore kurrambalk, wanjh birriduhkeng roof, wanjh kumekbe bir-rikoluyhweng namekbe nawu nabirl kunmadj dorreng, birrikurmeng kubulkayh kore birrimirnderri, kaluk kore Jesus kumirrk nuye.

²⁰ Wanjh bu Jesus benkurduang bedberre bu birriwoybukwong, nungka bimarneyimeng nawu birlni, "Ngarrdabbolk, kunwarre ke wanjh bularrbuyindanj rowk."

²¹ Wanjh kunu Pharisees dja bininj nawu bindibukkani mankarre, bedda wanjh yiman birrihdjawarreni rerrih bu birriburrbuhburrbuni, birriyimi, "Minj nangale nabuyika kabularrbun kunwarre, dja God nadjalkudji. Kaluk nangale nuk nahni nawu kawokdi yiman God? Dja kawarre!"

²² Kaluk Jesus burrbom bu kunmekbe birriburrbuhburrbuni, wanjh nungka benmarneyimeng, "Njale ngudda ngurrihdjawarren kukange ngudberre?"

²³ Kandimarneyime bu baleh kakelk, bu ngamarneyime kunwarre nuye bularrbuyindanj rowk, dja nuk bu ngadjalmarneyime nahni bininj bu karrollkan kare?

²⁴ Dja wanjh ngadjarre ngudda ngurriburrbun bu ngaye nawu Bininj Duninj, God nganmarnbom ngawohrnan bu ngaye ngabularrbun bininj bedberre kunwarre." Wanjh kunmekbekenh kunu Jesus bimarneyimeng

nawu nakerrnge kadjalkmiyindi, dja warridj nawu yimankek kaname kore nakare, wanjh minj kabenemedjrohok.

³⁷ Dja kunbuyika mak, minj nangale kaborrahkendong manbu wine manbokerrnge kore nakare budjdjurlung nawu mayh kunkulah. Wardi bu yimankek kunmekbe kayime bininj, wanjh manbu manbokerrnge kadjalkmang namekbe kunkulah nakare, dja mak kaboyakarrburren, dja warridj nawu kunkulah kadjalwarremen.

³⁸ Dja ngaleng manbu wine manbokerrnge ngurridjalborrahkendong kore nakerrnge kunkulah nawu budjdjurlung.

³⁹ Kaluk minj nangale nawu kabongun manbokare wine, kaluk kabodjare manbokerrnge, dja kadjalyime, 'Bonj, manu manbokare manbomanmak.' "

6

Jesus Benbukkabukkani Mankarre Ngarre Sabbath

Luke 6:1-5

(Matthew 12:1-8; Mark 2:23-28)

¹ Kaluk bu kunbuyika kunkodj manbu Sabbath, nungka Jesus dja mak bininj nuye nawu benbukkabukkani, bedda birrihdjarrkrey kore kabbal kore kundalk dudjindi manbu karrmi manmim. Wanjh Jesus nuye bininj wanjh birridurrkmangi manbu mandjoleng, birribudjubudjuhmi, wanjh birriminguni.

² Kunmekbe wanjh yikahwi nawu Pharisees birriyimeng, "Njalekah kuhni ngurrihkurduyime, dja ngurrihbakke mankarre manbu Sabbath ngarre?"

³ Wanjh Jesus benwokmey yimeng, "Ngudda yimankek ngurribimnayi kore God nuye kunwok, kabimidi bu David dja nawu birrihdjarrkrey, bu birribekkarrinj birrimarrwedoweni,

⁴ wanjh kunu nungka ngimeng kore God nuye kunrurrk, mey buriddi mandjamun manbu kumekbe yoy. Wanjh nungka nguneng manmekbe buriddi, warridj benwong bedberre nawu birrihdjarrkrey. Dja mankarre kahyo manmekbe buriddi ngarre, bu minj nangale kangun, djal priestswi kabirringun."

⁵ Dja Jesus benmarneyimeng, "Ngaye nawu Bininj Duninj wanjh ngawohnan kore kunkodjke Sabbath."

Bu Kunbarnangarra Sabbath Jesus Bimarnbom Nakudji Bininj

Luke 6:6-11

(Matthew 12:9-14; Mark 3:1-6)

⁶ Kaluk bu kunbuyika kunkodjke manbu Sabbath Jesus ngimeng kore synagogue manbu kunrurrk yiwarrudjkenh dja wanjh benbukkabukkani. Kaluk kumekbe ni nakudji bininj nawu kunbidkun nuye bidwelemikenhni.

⁷ Wanjh nawu Pharisees dja mak bininj nawu bindibukkabukkani mankarre, bedda birriwernhnani Jesus, dja birridjareni birrinayi bu yimankek nungka kabimarnbu bu kunbarnangarra Sabbath, ba kunu birringalkemeninj kabirridjuhunkenh.

⁸ Dja Jesus benmayaliburrbom bu kunmekbe birriburrbuhburrbuni, wanjh bimarneyimeng namekbe bininj nawu bidwarreni, yimeng, "Yir-rolkka, yirrangimen kondah kubulkayh." Wanjh namekbe bininj dolkkang danginj.

⁹ Wanjh Jesus benmarneyimeng nawu birrihnani, yimeng, "Adju. Ngaye djawan ngudberre, baleh kakarreyime Sabbath ngarre? Yiddok kunmak

kariyime, dja nuk kunwarre? Yiddok kunmak karrikanjmarbun karridarrkidwon bininj, dja nuk kunmak bu karribun bininj?”

¹⁰ Wanjh Jesus bendjalnang rowk, dja bimarneyimeng nawu bidwarreni, “Yibidyirriyuwn.” Wanjh kunmekbe bidyirriyonginj, wanjh bidyimerranj yiman kerrngehkenh duninj bidyidiyimi.

¹¹ Wanjh bedda birrikangeydduy duninj, dja birridedjingmey birri-marneyimerreni bu baleh birrimarnekurduyimeninj Jesus.

Jesus Bendjarrngbom Twelve Bininj

Luke 6:12-16

(Matthew 10:1-4; Mark 3:13-19)

¹² Kaluk Jesus wam kore mandulum, yiwarrudj dingihdi, wanjh bu kunkakkuyeng nungka dingihdi yiwarrudj kore God.

¹³ Kaluk bu malamalaywihi wanjh nungka benkhaymeng nawu nuye benbukkabukkani, wanjh beddabeh bendjarrngbom twelve nawu bengeykurmeng warridj apostle.

¹⁴ Birrimekbe nawu Jesus bendjarrngbom, kaluk birringeyyoy Simon nawu Jesus bingeykurmeng Peter, dja Andrew nawu Simon benedanginj, dja James, John, Philip, Bartholomew,

¹⁵ Matthew, Thomas, dja James nawu beywurd nuye Alphaeus, dja nabuyika Simon nawu birriyimi Zealot,

¹⁶ dja Judas nawu kornkumo nuyeni ngeyyoy James, dja mak nabuyika Judas nawu ngeyyoy Iscariot, nawu nungka kaluk bikukweykang Jesus.

Jesus Benbukkabukkani Dja Mak Benmarbnuni Birriwern Bininj

Luke 6:17-19

(Matthew 4:23-25)

¹⁷ Wanjh Jesus birridjarrkkoluy, wanjh nungka danginj kore kabbal. Kumekbe birrimirnderri birriwern nuye nawu benhbukkabukkani dja mak birrimirndewern duninj bininj nawu birrimdolkarrinj kubolk-warlahkenh rowk ngarre Judea, Jerusalem dorrengh, dja warridj nawu birrimdolkarrinj kubolkbuyika, kaluk kunred bokenh kakkikah kore kurrula darnkih, kabenebolkngeyyo Tyre dja Sidon.

¹⁸ Bedda birrimwam birridjareni nungka kabirribekkan dja warridj kabenmarbnun kore birrihdoweni. Dja bininj nawu namalangwarre nawern bindihbengwarrewoni, bedda wanjh Jesus benmarbnun.

¹⁹ Dja nawu birrimirndewern rowk birridjareni nungka birriwohkar-meninj, bu kundulkarre bebmi nungkabeh dja benmarbnun rowk.

Jesus Benmarneyimeng Bininj Nuye Bu Kabirrinjilngmakmen Kore God

Luke 6:20-26

(Matthew 5:1-12)

²⁰ Wanjh Jesus bennani nawu nuye benhbukkabukkani wanjh yimeng, “Ngurrinjinlgmak nawu ngurrimarladj, dja kunu ngudberre God ngokko ngunngimowong kore kawohrnan rowk.

²¹ Ngurrinjinlgmak nawu bolkkime ngurrihmarrwe, dja kunu kaluk ngurriworrkmen. Ngurrinjinlgmak ngudda nawu bolkkime ngurrihnalk-bun, dja kunu kaluk ngurridjekme.

²² Ngudda nawu kandimunekadjung gaye nawu Bininj Duninj, ngudda wanjh ngurrinjinlgmak bu ngayekah ngundiwidnan bininj, dja bu ngundikukmunkewe ba minj ngurriyawoyhraworren, dja bu ngundiyo-ly-olme kabirriyime ngurriwarre, dja mak bu yiman rerrih ngundinge-ybu-larrbun, minj ngundinge-ybun, dja mak bu ngundiwarrewe.

23 Wanjh bu kunmekbe ngundimarneyime, kunu ngurriwarnmaknin bulkkidj duninj dja ngurridjalmarmarr. Dja marneyime ngudberre, kunu wanjh God ngunkarremulewan kunkimuk kore heaven, dja ngurriburru nawu mawahmawah bedberre yiman kunmekbe rerrih kunwarre bindihmarneyimi bedberre bininj nawu prophets.

24 Kunrayek duninj kambembe ngudberre nawu ngurrihkuken, dja wanjh bonj, ngokko ngurrimey rowk nawu ngunkangemarnbom.

25 Dja kunrayek duninj kambembe ngudberre nawu bolkkime ngurriworrrkminj, wanjh kaluk ngurrimarrwedowen. Kunrayek duninj kambembe ngudberre warridj, nawu bolkkime ngurrihdjekme, dja kaluk ngurrinjilngwarremen kundowikenh, dja ngurrinalkbun.

26 Kunrayek duninj kambembe ngudberre bu bininj rowk ngundihburlume bolkkime, dja wanjh nawu mawahmawah bedberre nawu ngundimakwan, yiman kunmekbe rerrih bindihburlumi birriwarre prophets nawu korroko birrihkurreni."

Jesus Benmarneyimeng, "Ngurrbenmarnedjarenin nawu Ngundiwidnan."

Luke 6:27-36

(Matthew 5:38-48; 7:12)

27 "Ngudda nawu kandihbekkan, marneyime ngudberre, ngurrbenmarnedjarenin nawu ngurriyidko, dja ngurrbenmarnekurduyimen kunmak bedberre nawu ngundiwirrihme.

28 Ngurridjarenin kunmak bedberre nawu kabirridjare kunwarre ngudberre, ngurrbenmarnedin yiwarrudj bedberre nawu kunwarre ngundimarneyime.

29 Dja mak nawu ngunkiyarrkbarrhmang kondahbeh, wanjh yiborledmen kubuyika ngunkiyarrkbarrhmang. Dja nawu ngunmadjyimang nakudji nawu yiman kaddum yihdjongburren, yuwn yikaybun nabuyika nawu yiman kanjdji yihdjongburren.

30 Ngurrbenwo bedberre rowk nawu ngundiwidjawan, dja nawu kakan yehyeng ngudberre, yuwn ngurridjawan bu ngunmarnedurndiwe.

31 Dja nawu ngurridjare bininj ngundimarnekurduyime ngudberre, wanjh yiman kunmekbe rerrih ngurrbenmarnekurduyimen bedberre.

32 Dja bu ngurrbendjalmarnedjare nawu bedda warridj ngundimarnedjare, njalekah yimankek ngurriyime bu kunukka kunmak? Dja wanjh nawu birriwarre bininj, bedda warridj kabindimarnedjare nawu bedmanwali kabindimarnedjare.

33 Dja bu ngurrbenmarnekurduyime kunmak bedberre nawu bedmanwali ngundimarnekurduyime kunmak ngudberre, njalekah yimankek ngurriyime bu kunukka kunmak? Dja nawu birriwarre bininj yiman kunmekbe rerrih kabirrikurduyime warridj.

34 Dja bu ngurrbenwohwon waken bedberre nawu ngurribekkarren bedmanwali ngundiwon, njalekah yimankek ngurriyime bu kunukka kunmak? Dja nawu birriwarre bininj kabindiwohwon waken bedberre nawu birriwarre, ba kunu bedmanwali kabindimarnedurndiwe nawu yiman karohrok rerrih nawu bedda werk bindiwong.

35 Dja wanjh ngurrbenmarnedjarenin bininj nawu ngurriyidko, dja ngurrikurduyimen kunmak bedberre, dja ngurrbenwohwo waken, dja yuwn ngurriwunjabmingalme bu ngurrbenhbidyikarme, wanjh kunu

God ngunkarremulewan kunkimuk, dja ngurriyimerran ngurribebeywurd nuye nawu Kawernhwohrnan duninj, dja nungka wanjh kabemarnekurduyime kunmak bedberre nawu minj kabirrimanj, dja nawu mak kunwarre kabirridjalkadjung.

³⁶ Ngurrbenkongibu bininj yiman Kornkumo ngudberre ngunkongibun.”

Jesus Benmarneyimeng, “Yuwn ngurrbenwarrewe bininj.”

Luke 6:37-42

(Matthew 7:1-5)

³⁷ “Yuwn ngurrbenwarrewe bininj, wanjh kunu God minj ngunwarrewe, dja yuwn bu mak ngurrbendjadme bininj, wanjh kunu God minj ngundjadme. Ngurrbenmarnebularrbu bedberre kore ngunmarnekurduyimeng kunwarre, wanjh kunu God ngunmarnebularrbun kunwarre ngudberre.

³⁸ Bu ngurrbenwo bininj, wanjh God ngunwon ngudberre. Ngunwon kunwern duninj yiman karohrokme ngudberre, wanjh ngunmarnebarlke duninj, dja yikah kayakarrburren. Dja wanjh yiman rerrih ngurrrohrokme bu ngurrbenwon bininj, wanjh yiman kunmekbe rerrih God karohrokme bu ngunwon ngudberre.”

³⁹ Dja mak Jesus benmarneyimeng parable manbu kunwarlkkaykenh kunwok, yimeng, “Yiddok bininj nawu mimdubbe kabiyikan nabuyika bininj nawu mimdubbe? Minj nuk kunu kabenedjarrkmankan kore kudjorlok?

⁴⁰ Bininj nawu kabibekkan nawu kabibukkabukkan, nungka wanjh minj kabiyurrhke nawu kabibukkabukkan. Bu kaborlhme rowk kore kabibukkan, wanjh kunu kayimerran karohrok yiman nungka rerrih nawu kabibukkabukkan.

⁴¹ Dja njalekah yihnan manbu manbik kore kumim nuye nawu ngurridanginj, dja minj yiburrknan manbu yiman manwodj kore yingan ke kumim?

⁴² Dja njalekah yimarneyime namekbe, ‘Ngarrdabbolk, kab ngabeke manbik manbu kumim ke ngunmarneyo,’ bu minj yingan yinan manwodj manbu ngunmarneyo kumim ke? Ngudda wanjh yihdjalkurren! Yibebkemen werrk manwodj manbu kayo kumim ke, wanjh kunu mandjad yinan ba yibebke manbik manbu kahyo kumim nuye nawu ngunedanginj.”

Jesus Benyolyolmi Bininj Nawu Birriwarre Dja Mak Nawu Birrimak

Luke 6:43-45

(Matthew 7:17-20; 12:34-35)

⁴³ “Ngurriburrbun bu kundulk mandulkmak minj kabarnemdangan manwarre manme, dja mak minj mandulkwarre kabarnemdangan manmak manme.

⁴⁴ Dja bininj kabebbehkukburrbun mandulkbubuyika bu kanan manme manbu kabebbehkarrme. Dja manbu manmanawarn minj karrimang kore mandorrk manbu manmirrhyi, dja warridj manbu mankardabad minj karrimang kore kinj manbu manmirrhyi.

⁴⁵ Dja nawu namak bininj kabebke kunmak kukangebeh kore nungka kabimarnekareyo kunmak, dja nawu nawarre bininj kabebke kunwarre kore nuye nawu kabimarnekareyo kunwarre. Dja nawu kabiwarnhkangebarlke kukange nuye bininj, wanjh kunmekbe kambebme kurrang nuye bu kawokdi.”

Jesus Benyolyomeng Bininj Nawu Birrimayaliwern Dja Mak Nawu Birribengwarr

Luke 6:46-49

(Matthew 7:24-27)

⁴⁶ “Dja njalekah ngudda kandimarneyime, ‘Ngudda Yiwohrnan ngadberre,’ bu minj kandiwokmarrkmang nawu yarrkka wokwon ngudberre?”

⁴⁷ Bininj rowk nawu yiman kamre kore ngaye kabekkan kunwok ngardduk, wanjh kunmekbe nganwokmarrkmang munguyh. Mah, dja ngaye bukan ngudberre bu yiman nangale namekbe kabenerohrok.

⁴⁸ Nahni bininj nawu nganwokmarrkmang, wanjh yiman kabenerohrok rerrih bininj nawu rurrkdundulubom, nawu bolkkaruy kanjdji duninj, dja nawu kunrurrkenh karayekwon kaluk nameng kore kuwardde. Kaluk bu bobidurreni dja kundjurrh rurrkbuni, manmekbe kunrurrk rurrkayekni, minj baleh yimeninj wohrurrkburriwemeninj, dja nungka wanjh kamak rowk rurrkmarnbom.

⁴⁹ Dja bininj nawu kabekkan kunwok ngardduk, dja minj nganwokmarrkmang, wanjh namekbe bininj yiman kabenerohrok rerrih bininj nawu rurrkdundulubom, djalnameng kurorrewi, minj nameninj nawu karurrkayekwon, dja bu mankabo rurrkbuni, manmekbe kunrurrk djalrurrkmankarrinj kundjalmekbe rerrih, dja rurrkbakabakmeng duninj.”

7

Nakudji Soldier Nawu Minj Jew Biwoybukwong Jesus

Luke 7:1-10

(Matthew 8:5-13; John 4:43-54)

¹ Bu Jesus yakwong rowk nawu nungan djareni benmarneyolyolmi bedberre nawu birrihbekkan, wanjh kunu nungka wam ngimeng kore kubolkkimuk Capernaum.

² Kaluk kumekbe ni nakudji nawu benmarnewohrnani djamun nawu birrikang Rome. Dja nungka bikarrmi nakudji nawu bimarnekarmulewam bihmarnedurrkmirri, nawu nungka bimarnedjareni bulkkidj, nawu mak downi kunkimuk, ngokko darnkih nuyeni bu ngolekdadjmeninj.

³ Bu namekbe nawu djamun benmarnewohrnani, bu nungka biwobekkanng Jesus, wanjh nungka benmey yikahwi dabborrabbolk nawu Israel benkebmawahmeng, dja benmunkeweng kore Jesus bu kabirridjawan bu kamre kabimarnbun bininj nuye nawu bihmarnedurrkmirri.

⁴⁻⁵ Wanjh birriwam birrimarnebebmeng Jesus, dja birriwernhdjawam kunkange dorreng, yiman birridjurrkkang rerrih, birriyimeng, “Dja nungka namak bu kunmekbe yimarnekurduyime yimarnemarnbun bininj nuye, dja nungka kanmarnedjare ngad bininj nawu Israel kankebmawahmeng, dja nungan kanmarnerrknameng synagogue kunrurrk yiwarrudjkenh ngadberre nawu kondah ngarrihni.”

⁶ Wanjh kunu Jesus birrihdjarrkrey. Dja bu ngokko darnkih birribemeninj kore kunrurrk nuye, wanjh namekbe nawu benmarnewohrnani djamun, benmunkeweng yikahwi nawu nuye birridabbolk, birrimwam kore Jesus birrimarneyimeng nawu namekbe benwokwong, “Ngudda nawu yiwohrnan, bonj yibawo, minj djurrkkan yimre, dja ngaye ngawarre, minj ngamak bu yimankek yimre kore ngaye ngardduk kunrurrk.

⁷ Kunmekbekenh kunu ngaye minj mak ngamrawinj kore ngudda, dja ngaye ngayeng. Dja ngudda yidjalwokdin dja kanmarnemarnbu nahni bininj ngardduk.

⁸ Kaluk ngaye wanjh nabuyika nganmarnewohrnan, dja ngayemanwali ngabenmarnewohrnan djamun. Bu ngamarneyime nakudji 'Yiray!' wanjh kare, bu nabuyika ngamarneyime, 'Yimray!' wanjh kamre, dja ngardduk bininj nawu nganhmarnedurrkmirri, bu nungka ngamarneyime, 'Kuhni yikurduyimen!', wanjh kadjalkurduyime."

⁹ Bu kunmekbe Jesus bekkang wanjh mayahmeng nuye, dja nungka balborledmeng bedberre nawu birrimirndewern nawu birrihkadjungi, dja yimeng bedberre, "Ngayime ngudberre, minj baleh ngangalkemeninj nakudji nawu yiman nungka kayime nganwernhwoybukwon, kondah mak kore Israel minj ngangalkemeninj."

¹⁰ Wanjh bedda nawu bininj benmunkeweng nawu djamun benmarnewohrnani, bu bedda birridurndi kore kunrurrk nuye, wanjh birrinang namekbe nawu nuye bihmarnedurrkmirri, birrinang makminj rowk.

Jesus Birrolkayhweng Nayaw Nawu Kamarrdjukun Ngarreni

Luke 7:11-17

¹¹ Kaluk Jesus wam kore kubolkkimuk kabolkngeyyo Nain, dja nawu bininj nuye nawu benhbukkabukkani, dja mak birrimirndewern bininj birrihdjarrkrey.

¹² Kaluk bu darnkih kumbebmi kore kururkdangmaye kabirrihngimeren kunmekbe kubolkkimuk, wanjh kumekbe birribebmerreni bininj nawu birridulkngorrkani, kabirrikukdudjeng bininj nawu nadjalkudji duninj wurdyaw ngarreni ngalbu ngalbadjan, dja ngaleng mak kamarrdjukunni. Dja birrimirndewern duninj nawu birrikang kunmekbe kubolkkimuk birrihdjarrkrey ngalmekbe daluk.

¹³ Bu Jesus nawu Kawohrnan Rowk binang ngalmekbe daluk, wanjh biwernhkongibom dja bimarneyimeng, "Yuwn yinalkbun."

¹⁴ Wanjh nungka kumwam wohdulkkarmeng manbu kundulk, dja nawu birridulkngorrkani wanjh birridanginj. Dja nungka yimeng, "Ngudda nawu yawurrinj, ngayime ke, yirrolkka!"

¹⁵ Wanjh namekbe nawu doweng dolkkang ni, dja dedjdjimgmey wokdi. Wanjh Jesus biwong ngalbadjan nuye.

¹⁶ Wanjh birrikeleminj rowk dja wanjh birriburlumi God, birriyimi, "Nakuken prophet kanmarnebebmeng." Dja mak birriyimi, "God kumwam kanbidyikarmekenh ngad nawu bininj nuye."

¹⁷ Wanjh birriwobekkani bu kuhni birrimulewani kumekbe kubolkwarlahkenh rowk ngarre Judea, dja mak kubolkwernkenh rowk kore darnkih Judea.

Jesus Biyolyolmi John Nawu Benkukdjuhkeyi

Luke 7:18-35

(Matthew 11:2-19)

¹⁸ Nawu John nuye benhbukkabukkani, bedda birrimarnemulewam kuhni rowk kore nungka.

¹⁹ Dja nungka benbenekayhmeng bokenh nawu nuye benhbukkabukkani, benbenemunkeweng kore Jesus nawu Kawohrnan Rowk bu kabenedjawan, "Yiddok ngudda namekbe nawu ngarriburrbun kamre? Dja ngudda yiddok yiwid, dja yiddok nabuyika karridjalmadbun?"

²⁰ Wanjh bu benemarnebebmeng Jesus wanjh beneyimeng, "John nawu kabenkukdjuhke bininj, wanjh kanbenemunkeweng kore ngudda, bu ngundidjawan, 'Yiddok ngudda namekbe nawu ngarriburrbun kamre? Dja ngudda yiddok yiwid, dja yiddok nabuyika ngarridjalmadbun?'"

21 Wanjh bu kunmekbe rerrih Jesus benmarnbom birriwern nawu kundjakkubuyika birridoweni, yikahwi nawu birridjakkekkani bulkkidj, dja warridj benmarnbom nawu namalngwarre bindikarrmi, dja birriwern nawu birrimimdubbeni, nungka benmarnbom kabirriholknan.

22 Wanjh Jesus benbenewokmey nawu John benbenemunkeweng, yimeng, "Nguneray, ngunemarneyimen John bu baleh bolkkime ngunenang dja ngunebek kang. Nawu birrimimdubbeni, bedda wanjh kabirrihbolknan, nawu birriburriwarreni, bedda wanjh kamak kabirrihre, nawu kundjak birrikarrmi birrikulahwarreni, bedda wanjh birrimakminj. Nawu birrikanemdubbeni, bedda wanjh kabirrihbekkan, nawu birrihdoweng, bedda wanjh ngabendolkayhweyi kumidjbeh kabirrihdarrkid, dja nawu birrimarladj, bedda wanjh ngabenbengdayhke kunwok kunmak bedberre.

23 Dja kanjilngmak bininj nawu minj ngankukmidjbun mak minj ngankewkme dja nganbawon."

24 Bu benemekbe bininj nawu John benbenemunkeweng benebolkbawong, wanjh Jesus dedjdjimgmey benmarneyolyolmi bedberre nawu birrihimirnderri, kaluk Johnkah bihyolyolmi, yimeng, "Njale yimankek ngudda ngurridjareni ngurrinayi bu ngurriwam kore kubolkdarleh? Yiddok ngurridjareni ngurrinayi nawu yiman mandalkkuyeng manbu kunmayorrk karokayhwon?"

25 Dja bu burrkyak, wanjh djawan njale ngurriwam ngurridjareni ngurrinayi? Yiddok ngurridjareni ngurrinayi bininj nawu djongburrimeninj namak? John nakka nawid, dja marneyime ngudberre, bininj nawu medjmakkaykenh kabirrihdjongburren, dja mak yehyeng nawu namakmak kabirrihkarrme, bedda wanjh kabirriyo kore kunrurrkmak bedberre king nawu kabirriwernhwohrnan.

26 Dja njale ngurriwam ngurridjareni ngurrinayi? Yiddok ngurridjareni ngurrinayi prophet? Yoh wanjh ngayime ngudberre, nungka wanjh prophet, dja prophet nawu nakuken duninj.

27 Nahni wanjh namekbe nawu kabimarnewokbimdi kore God nuye kunwok bu kayime, 'Kanbekka, marneyime, ngaye God ngamunkewe ngardduk bininj nawu nganmarnekan kunwok ba nguningkihmarnekme, manbolh nguningkihmarnebolhmarnbun.'" [Malachi 3:1; Exodus 23:20]

28 Dja mak Jesus yimeng, "Ngayime ngudberre, kore nawu bininj birriwarlahkenh rowk wanjh John kabenmarnedokme, bedda rowk rerre kabirrimarnedi. Dja bolkkime wanjh nangale nawu yiman nadjalyahwurd duninj kore God kabenmarnewo hrnan, kaluk namekbe yiman kakukdokme dja John rerre kabimarnedi."

29 Bu kuhni birribek kang, wanjh nawu bininj birriwern rowk, dja nawu tax kunwardde bindimarnemangi, bedda wanjh birriyimeng bu God kahkurduyime kunmak. Kuhni birriyimeng bu kunmekbehkenh bedda John benkukdjuhkeyi.

30 Dja nawu Pharisees dja mak bininj nawu bindibukkabukkani mankarre, bedda yiman rerrih birridjalweng kore nawu God djareni bedberre. Kuhni birrikurduyimeng bu bedda minj birridjareniwirrinj bu John benkukdjuhkemeninj.

31 Mak Jesus yimeng, "Njale ngayolyolme ngunmulewan bininj nawu bolkkime ngurrimimbi? Njale kaluk ngurrirohrok?"

32 Ngudda wanjh ngurrirohrok wurdurd nawu kabirrihni kurobbe kore bininj birriwern kabirrihbayahme njalenjale, dja nawu kabirri-marneyimerren, 'Ngad bimarnebhummeng ngudberre mako, dja ngudda

minj ngurriborrkkemeninj, dja warridj ngad ngarriwayini yiman bininj dowimeninj rerrih, dja ngudda minj ngurrinalkbuyi.'

³³ Dja John nawu benkukduhkeyi, bu nungka kumwam, minj buriddi nguyi, dja minj manbang bonguyi, dja ngudda ngurriyimi, 'Nakka namarnde kabihkarrme.'

³⁴ Dja ngaye nawu Bininj Duninh ngamwam ngahngun dja ngahbongun, dja ngudda ngurriyime, 'Yina, nakka nawu kawernhngun manme, dja mak kawernhbongun manbang, dja warridj nungka kamarnburren kabirridab-bolkmen bininj nawu kabindimarnemang tax kunwardde, dja mak nawu birriwarre bininj.' " Mak Jesus yimeng,

³⁵ "Dja bininj rowk nawu kabirridjare God nuye kunmayali, bedda wanjh kabirrimayalimulewan bu nungka nuye kunmayali wanjh kundjal mak kabirrikurduyime."

Jesus Yolyolmi Bu God Kanmarnebengmidjankenh

Luke 7:36-50

³⁶ Kaluk nakudji Pharisee wanjh bikimey Jesus kabenedjarrkngun. Wanjh Jesus wam kore kunrurrk nuye dja neyhneykendi manme nguni.

³⁷ Wanjh kaluk ngalkudji daluk ngalbu ni kunmekbe kubolkkimuk, ngalbu kunwarre yimihyimi. Bu ngalmekbe daluk bekkang bu Jesus kumekbe kahngun manme kore Pharisee nuye kunrurrk, wanjh ngaleng kumwam kumkang djabbirlana mankalkkidmanjmak dorrengh.

³⁸ Wanjh ngaleng danginj kubodme nuye kaluk kore kurrenge, dja nalkbuhnalkbuni, dja mimnalkwarrahwarhmi birrengedjuhkeyi kunnalk ngarreni, dja warridj birrengedorndungi kunngabek ngarreni, dja birrengibunjhmangi, dja mak warridj birrengabarungi mankalkkidmanjmak.

³⁹ Wanjh bu kunmekbe nang namekbe Pharisee nawu bikimey, wanjh nungan kanjdjiwi marneyimerrinj, "Bu nahni bininj wanjh woybukkih prophet, wanjh burrbuyi bu ngalngalemayh ngalmekbe daluk ngalbu kabihkarrme, dja mak burrbuyi bu ngalkka baleh kakurduyime, dja ngaleng bu kunwarre kahdjalburrbun."

⁴⁰ Kunu wanjh Jesus bingeybom bimarneyimeng, "Simon, ngakarrme bu yehyeng marneyime." Wanjh biwokmey, yimeng, "Mah, ngudda nawu kanhbukkabukkan, kanmarneyimen."

⁴¹ Jesus yimeng, "Nakudji bininj ni nawu benbenewohwoni bininj kunwardde, kaluk bedda benemarnedurndiwemeninj. Nakudji biwong yiman twenty thousand dollars, dja nabuyika biwong yiman two thousand dollars.

⁴² Bu bedda kaluk beneyawarreni, minj benemarnedurndiwemeninj, wanjh nungka benenedjalmarnebularrbom rowk." Wanjh Jesus yimeng, "Kanmarneyimen, baleh nanu kaluk kabiwarnharnedjare?"

⁴³ Wanjh Simon biwokmey, yimeng, "Namekbe nuk nawu bimarnebularrbom kunwernhkimuk." Wanjh Jesus yimeng, "Ngudda mandjad yiyimeng."

⁴⁴ Wanjh bimarneborledmeng binang ngalbu daluk dja bimarneyimeng Simon, "Ngudda yiddok yinan ngahli daluk? Bu ngamngimeng kore kunrurrk ke bu kankimey, minj ngudda kanwohbowoyi kundengekenh, dja ngaleng ngandengedjuhkeyi kunnalk ngalengngarre, dja ngandengedorndungi kunngabek ngalengngarre.

⁴⁵ Ngudda minj kanwohibunjhmangi, dja ngaleng minj wohngurdmeninj, bu ngamngimeng dja mak munguyh nganhdengeibunjhmangi.

⁴⁶ Ngudda minj kanwohkodjbaruyi kunkalkkid, dja ngaleng ngandengebarungi mankalkkidmanjmak.

⁴⁷ Kunu wanjh ngayime ke, kunwarre ngalengngarreni, bu kunkimuk, wanjh bularrbuyindanj rowk, wanjh kunu ngaleng nganmarnedjare kunkimuk, dja nawu bininj kore kunyahwurd kabimarnebularrbuyindanj kunwarre, wanjh walakkih nganmarnedjare.”

⁴⁸ Wanjh Jesus bimarneyimeng ngalbu daluk, “Kunwarre ke bularrbuyindanj rowk.”

⁴⁹ Wanjh kunu nawu birridjarrknguni birridedjdjingmey bedman birri-marneyimmerreni, “Kaluk nangale nahn, nawu warridj kunwarre kabular-rbun?”

⁵⁰ Wanjh Jesus bimarneyimeng ngalmekbe daluk, “Ngudda bu kanwoybukwong, wanjh kunu God ngungehkheng. Wanjh bonj, yidjallay, kunmodmikenh dorreng.”

8

Bu Morlehmorlenj Birrihdjarrkrey Jesus

Luke 8:1-3

¹ Kaluk rerrickah Jesus regehrey kore kuredbubuyika, kaluk kore kubolkkihkimuk dja mak kubolkyahwuyahwurd, kumekbe regehrey benmarneyolyolmi, dja mak benbengdayhkeyi kunwok kunmak bu God Kawohrnan rowkkeh. Dja nawu twelve bininj nuye nawu apostle birridjarrkrey.

² Dja warridj yikahwi daluk nawu Jesus benmarnbom, yikahwi nawu bindikarrmi namalngwarrewarre, dja yikahwi nawu birridoweni. Kaluk bedda wanjh Mary ngalbu ngeyyoy Magdalabeh, ngalbu seven namalngwarre birrikarrmi, Jesus benbekheng benmunkeweng.

³ Dja mak Joanna ngalbu ngalbininjkebeng nuye Chuza nawu King Herod bimarnerrknahnani, dja Susanna warridj. Bedda wanjh birrihdjarrkrey Jesus, dja warridj birriwern birribuyika daluk. Dja nawu bedda birrikukkarrmi, wanjh bindiwoni bu bindibidyikarrmi nungka Jesus dja nawu bininj nuye.

Jesus Benmarneyolyolmeng Bu Bininj Kabirribebbekkan God nuye Kunwok

Luke 8:4-15

(Matthew 13:1-23; Mark 4:1-20)

⁴ Wanjh bu birrimirndewern duninj birrimarnebebmeni kunred-bubuyikabeh, kaluk kubolkkihkimuk, wanjh Jesus benmarneyolyolmeng parable manbu kunwarlkkayken kunwok, yimeng,

⁵ “Nakudji bininj wam dudjehdudjengi manmim. Bu balhmimburiweyi kore kabbal, yikahwi mankarrinj kore manbolh, wanjh kaluk bininj birrimelmeli, dja warridj mayhmayh kumwam, nguneng rowk, yakwong.

⁶ Yikahwi manmim mankarrinj kore kudjidmihdjidmi, dja bu mimkol-hdebebmeng, wanjh dowerrinj dja kukkuyak.

⁷ Dja yikahwi manmim mankarrinj kore mikardihkardird. Kaluk benedjarrkdjormerrinj, wanjh manbu mankardird mankonyikonyi kol-hedjokkohmeng.

⁸ Dja yikahwi manmim mankarrinj kore kukulkmak, wanjh kunu djordmerrinj, wanjh manbarnem karrmi mandjalbarnemwern duninj yiman kayime 100 times wernhyurhkheng manbu manmim bu bininj burriweng.” Bu kuhni Jesus yimeng, wanjh wernhkayhmeng, yimeng, “Bu ngurrikarrme kunkanem kore ngurrihbekkanen, wanjh ngurribekka!”

⁹ Wanjh bu bininj nuye nawu benhbukkabukkani, bedda birridjawam bu baleh kamenmenyime manmekbe kunwok manbu kunwarlkkaykenh.

¹⁰ Wanjh Jesus yimeng, “Ngudda wanjh ngokko God ngunbengdayhkeng ngudberre dja ngurriburrbun yehyeng nawu yiman warlkkayindi kore nungka Kawohrnan Rowkkenh. Dja nawu birribadbuyika, bedda kabirridjalbekkan rowk bu kunwarlkkaykenh kunwok, parable manbu, ba kunu bu kabirrinan minj kabirriwernhburrkburknan, dja bu kabirribekkan minj kabirriwernhburrkburkbekkan.” [Isaiah 6:9] Kunmekbekenh kunu ngabenmarneyolyolme kore parables.

¹¹ Wanjh Jesus yimeng, “Kuninjkuu wanjh kuhni kunwok kamenmenyime. Manbu manmim kayime God nuye kunwok.

¹² Dja manmim manbu mankarrinj kore manbolh, wanjh kabenyolyolme bininj nawu kabirribekkan kunwok, dja Satan nawu Namarnde Duningh kamre kamang kunmekbe kunwok kore kukange bedberre, wanjh kakan ba bu minj kabirriwoybukwon mak minj God kabengehke.

¹³ Dja manmim manbu mankarrinj kore kudjdmihdjidmi kabenyolyolme bininj nawu bu kabirribekkan kunwok, wanjh kabirrimang kabirrikuniwarnmakmen, dja bedda yiman rerrih manmim manbu mandejmadyak bu kunkange bedberre minj kawernhnjilng. Dja kabirridjalwoybukwon bu kundeddjumbungkenh, dja bu Satan nawu Namarnde kabendjurrkkan kabenrohrokme, wanjh kunu kabirridjalwarrhme.

¹⁴ Dja manmim manbu mankarrinj kore mikardird kabenyolyolme bininj nawu kabirribekkan kunwok, dja bu kabirriballe wanjh nadjalwern nawu ngarre kurorre, nawu kabenhjilngwarrewon, dja yimankek kabirrikukenworren, dja njalenjale nawu bedman kabirridjare, nanih rowk wanjh nawu kabenkagedjokkohme, dja bedda wanjh yiman manme manbu minj kadjolengmen dja kawernmerren.

¹⁵ Dja manmim manbu mankarrinj kore kukulkmak, wanjh kabenyolyolme bininj nawu kabirribekkan kunwok dja bulkkidj kabirrikarrme kukange bedberre, kabirrimarrkmang, dja bedda wanjh birrikangewoybuk, dja birrikangemak. Bedda wanjh munguyh kabirrikarrme madjamku baleh, wanjh yiman karrudjindan kukange bedberre kawarlahmen kunmekbe kunwok yiman kabarnemdangen rerrih kunmekbe kunwok kore kukange bedberre. Karri munguyh dja bebbehbeh kabirrikurduyime bu God kabenmarnedjare bedberre dja minj mak kabirriwarnyakmen munguyh. Bu kunmekbe kabirriyime wanjh yiman kayime manmim kabarnemdangen rerrih.”

Jesus yimeng, “Kaluk yerrekah bininj kabirrinan kore bolkkime kawarlkayindi.”

Luke 8:16-18

(Matthew 4:21-25)

¹⁶ “Dja minj nangale nawu kawurlhke lamp bu kadjalbarrkbun, dja minj mak kawolkkkan kanjdji kore balabbala. Dja bininj nawu kawurlhke lamp wanjh kabarnname kaddum ba bininj nawu kabirringimerren wanjh kabenmarnebolkwolan.

¹⁷ Dja yehyeng rowk nawu bolkkime kawarlkayindi wanjh kaluk bininj kabirrinan rowk kore kurobbe, dja nawu bolkkime minj kabirriburrbun wanjh kaluk bininj kabirribekkan dja kabirriburrbun.

¹⁸ Wanjh kunu wardibu mandjad ngurribekkabekkan. Bininj nawu ngokko mey, wanjh God kabiwon kunwern, dja bininj nawu minj mayi God nuye, wanjh namekbe nanu God kabiyimang rowk warridj nawu nungka kayime yimankek karrmeninj.”

Jesus Benyolyolmi Nangale Nawu Nuye Namud

Luke 8:19-21

(Matthew 12:46-50; Mark 3:31-35)

19 Wanjh ngalbadjan nuye Jesus, dja nawu birridanginj nawu narahrangem, birrimwam kore nungka ni, dja minj birrimarnebebbeninj darnkih dja birrimirndewern bindidjokkohmeng.

20 Wanjh nakudji bininj bimarneyimeng Jesus, yimeng, "Ngalbadjan ke dja nawu ngudda ngurridanginj kabirridi kuberrk, kabirridjare ngundinan."

21 Wanjh kunu Jesus benmarneyimeng, "Bininj nawu kabirribekkan God nuye kunwok dja kabirriwokmarrkmang, wanjh ngaye ngayime bu bedda wanjh ngalbadjan ngardduk dja mak nawu ngaye ngarridanginj."

Jesus Ngurdheng Kunmayorrkimuk

Luke 8:22-25

(Matthew 8:23-27; Mark 4:35-41)

22 Kaluk bu kunbarnangarrabuyika Jesus benmarneyimeng bininj nawu benhbukkabukkani, "Karridjowkke borledmikenh kore maninjmanu manlabbarlkimuk duninjh." Wanjh birridjarrkbidbom kabbala, dja wanjh kunu birriballey.

23 Bu kumekbe birribalhrey wanjh Jesus nungka kodjkeyonginj. Kaluk wanjh kunmayorrkimuk bebmeng bedberre kore kurrulabeh, dja kukku bongihbongimi kore kabbala bobahbobarlimi, dja birrikuyinggakmeng.

24 Wanjh bininj nuye birridjurlhmeng Jesus, dja birriyimeng, "Ngudda nawu kanbukkabukkan ngadberre, wanjh karrihngakme!" Wanjh nungka dolkkang, ngurdheng kunmayorrk dja mak kukku manbu bobidbobidbuni, wanjh kunu ngurdmeng rowk, minj njale wohrokayi.

25 Dja nungka benmarneyimeng, "Baleh ngunmarnewam ngudberre bu yimankek kandiwoybukwoyi?" Wanjh birrikeleminj dja mak birrimayahmeng birrimarneyimerrinj, "Kaluk nangale nawu bininj nawu warridj kawokrayekwon kunmayorrk dja mak kukku, dja kabimarrkmang?"

Jesus Bimarnbom Bininj Nawu Namarnde Nawern Birrikarrmi

Luke 8:26-39

(Matthew 8:28-34; Mark 5:1-20)

26 Wanjh birridjalley kabbala birribebmeng kore bininj birrihni nawu birrikang kunred bolkngeyyoy Gergasa*, kaluk borledmikenh kore Galilee.

27 Bu nungka Jesus balkoluy wanjh birrabkeng nakudji bininj kumekbe kubolkkimukbeh. Kaluk nungka namarnde nawern birrikarrmi, dja nahni bininj minj korroko djongburrimeninj njale, dja warridj minj korroko niwirrinj kore kunrurrk, dja djahdjalanj kore kumidj midjmirnderri.

28 Bu nungka binang Jesus wanjh kunu kayhmeng dja mankang kore kumirrk nuye, dja wernkih duninjh kayhmeng, yimeng, "Njale ngudda yimwam kanhwarrewon Jesus, ngudda nawu Beywurd nuye God nawu Kawernhwohrnan Duninjh? Ngaye djawahdjawan, yuwn kanmarnbun ngadjakbekkan!"

29 Kuhni yimeng bu Jesus biwokrayekwong nawu namalngwarre bu kabebme kabibawon nawu bininj. Dja kunwernhkah bihmangi bulkkidj, dja kunu bininj birrihnahnani, birridukkani wirlmurrng kubid dja mak kurrenge, dja nungka djalbakeyi rowk, dja nawu namekbe namalngwarre bihdjalmunkeweyi kore kunbolkbubuyika manbu bininjyak.

* 8:26 Yikahi bindingeybom bininj kumekbebeh, "nawu Gerasenes" dja "nawu Gadarenes" dja mak "nawu Gergasenes".

³⁰ Wanjh Jesus bidjawam nawu namarnde, “Ngudda baleh yingeyyo?” Dja nungka yimeng, “Ngangeyyo Nawu Ngarriwernkenh.” Kunmekbe ngeyburrinj dja birriwern nawu namarnde birrimarnengimi kore nahni bininj.

³¹ Dja bedda nawu namarnde birriwernhdjawam birriyimeng, “Kab, yuwn kanwokrayekwon kanmunkewe ngadberre ngarrikolung kore kanjdji duninj kore kabirridjakkbekkan!”

³² Kaluk kumekbe birriwern duninj bikkibikki birridalknguni kumekbe kore mandulum, dja nawu namarnde birriwernhdjawam birriyimeng, “Kab kanmunkewemen kore nanih nawu bikkibikki.” Wanjh Jesus bendjalbawong birribebmeng birriwam.

³³ Wanjh kunu nawu namarnde nawern birribebmeng birribawong nawu bininj, dja bindimarnengimeng nawu bikkibikki, wanjh birriwern rowk birrilobmerrinj birrimankarrinj kore kungarlkwarre, birringak-meng kukukku.

³⁴ Bu bininj nawu birrinahnani bikkibikki birrinang bu baleh kurduy-imerranj, wanjh birrikelerlobmeng, birrimulewam rowk bedberre nawu kumekbe kubolkkimuk birrihni, dja mak nawu birrihni kore kabbal kore manme birrihdudjengi birrihyoy.

³⁵ Wanjh bininj birribebmeng kabirrinan baleh kurduyimerranj, wanjh birrimarnebebmeng Jesus, birringalkeng bininj nawu namarnde birribawong, dja nungka ni kore Jesus nuye kurrenge, kaluk djongbuyindi kunmadj dja warridj bengmakminj. Wanjh kunu birrikeleminj.

³⁶ Dja nawu Jesus birrihdjarrkrey nawu birrinang rowk, bedda wanjh bindimarnemulewam bu baleh Jesus yimeng bu bimarnbom namekbe bininj nawu birrihkarmi namarnde.

³⁷ Wanjh kunu birrimirndewern rowk nawu birrihni kore kumekbe kubolkwarlah bedberre Gergasenes birridjawam Jesus kabenbawon bedberre dja kare, dja birridjalwernhkeleminj duninj. Wanjh kunu Jesus bidbom kore kabbala karrurndengkenh.

³⁸ Bininj nawu namarnde birribawong bihdjalwernhdjawani Jesus, yimeng, “Ngadjare ngarrdjarrkre.” Dja Jesus bimunkeweng, yimeng,

³⁹ “Yirrunde kured ke, dja yibenmarneyimen bu baleh kunwernhmak God ngunmarnekurduyimeng.” Wanjh nawu bininj wam benmarneyolyolmi bininj rowk nawu birrihni kore kumekbe kubolkkimuk, benmarneyolyolmi bu baleh kunwernhmak Jesus bimarnekurduyimeng.

Jesus Birrolkkayhweng Ngalbeywurd Nuye Jairus Dja Mak Bimarnbom Daluk Ngalbu Kurlbahkurlbarey

Luke 8:40-56

(Matthew 9:18-26; Mark 5:21-43)

⁴⁰ Bu Jesus kumdurndi, wanjh nawu birrimirndewern bininj nawu birrihmadbuni wanjh birriwarnmakminj bu birrinang, dja birridabkeng.

⁴¹ Wanjh kumekbe bimarnebebmeng nakudji bininj nawu ngeyyoy Jairus, nawu wohrnani kore synagogue kunrurk yiwarrudjkenh. Wanjh nungka mankang kore Jesus kurrenge nuye dja biwernhdjawam, djareni Jesus rawinj kore kunrurk nuye,

⁴² dja nungka nuyeni ngalbeywurd ngalbu ngaldjalkudjini wurdyaw nuyeni, ngalbu mandjewk ngarreni darnkih twelwe, wanjh ngalmekbe ngalyawk doweni kunkimuk, ngokko darnkih ngolekdadjmeninj. Bu Jesus kumekbe regehrey, wanjh birrimirndewern birridjokkohmeng.

⁴³ Wanjh ngalkudji daluk ngalbu kurlbahkurlbarey munguyh bu mandjewk nawern twelve, dja mak minj nangale karmeninij kundulkarre bu bimarnbuyi.

⁴⁴ Wanjh ngalmekbe daluk bimarnebebmeng kubodme nuye, wanjh djalwohkarrmeng nawu yiman kunyarl nawu welhwelmi kore manburra nuye nawu Jesus djongbuhdjongbuyindi. Wanjh kunburrikudjiwi rerrih bimarneyakminij ngarre bu kurlbahkurlbarey.

⁴⁵ Wanjh Jesus yimeng, "Nangale nanu nawu ngankarrmeng?" Wanjh bu birriwern birriyakwarrinj, Peter yimeng, "Ngudda nawu kanbukkabukkan ngadberre, birrimirndewern ngundidjokkohme, ngundingerrengerrehme."

⁴⁶ Dja Jesus yimeng, "Nakudji ngankarrmeng dja ngaburrbun bu kundulkarre nganmarnewam."

⁴⁷ Wanjh ngalbu daluk bu burrbom bu birrikurdunang, wanjh kunu ngaleng kumwam kukdeldelmi, dja mankang kumirrk nuye, wanjh ngalengman bimarneyimeng kore birrimirndewern bininj birribekkani, mulewarrinj bu njalekenh bikarrmeng, dja mak bu kundjalburrikudji rerrih bu bikarrmeng wanjh djalmakminij bu bimarnbom.

⁴⁸ Wanjh Jesus bimarneyimeng, "Korlonj, ngudda kanwoybukwong, wanjh kunu ngaye marnbom. Bonj, yidjallay kunmodmikenh dorrengh."

⁴⁹ Bu nungka balwokdi, wanjh nakudji bininj kumbebmeng nawu ningihni kore Jairus nuye kunrurrk, wanjh nungka kumwam bimarneyimeng Jairus, "Ngalbu ngalbeywurd ke, wanjh bonj korroko doweng, wanjh yibawo, yuwn munguyh yidjurrkkan nahni nawu kanbukkabukkan."

⁵⁰ Dja Jesus bu kumekbe bibek kang, wanjh nungka bimarneyimeng Jairus, "Yuwn yikele, dja kandjalwoybukwo, wanjh kunu ngamarnbun."

⁵¹ Wanjh bu birribebmeng kore kunrurrk, nungka Jesus minj nangale nabuyika benngimowoyi, birridjalkudji birridjarrkngimeng wanjh Peter, John, James, dja mak kornkumo dja ngalbadjan ngarreni ngalbu ngalyawk.

⁵² Wanjh nawu kumekbe birrihni, bedda birriwern birrimarnenalkbuni dja mak birriberrekalkdorreni. Dja Jesus benmarneyimeng, "Yuwn ngurrinalkbun, dja ngalkka minj dowimeninij, dja kahdjalkeyo."

⁵³ Wanjh kunu birridjekmiwong, dja birriburrbom bu woymbukkih doweng.

⁵⁴ Dja nungka bibidkarrmeng, wanjh wernkih wokdanj, yimeng, "Ngarduk wurdyaw, wanjh yirrolkka!"

⁵⁵ Wanjh kunmalng ngalengngarre bimarnedurndi, wanjh ngaleng dolkkang kundjalmeke rerrih, dja nungka benmarneyimeng, "Ngurriwo manme ba kangun."

⁵⁶ Wanjh nawu ngalbadjan kornkumo benekangebarrhmeng, dja nungka benbenewokrayekwong, yimeng, "Yuwn nangale ngurrbenmarneyime bu kuhni kurduyimerranj."

9

Jesus Benmunkeweng Nawu Twelve Bininj Nuye Bu Kabirriyolyolmekenh dja Kabindimarnbunkeh

Luke 9:1-6

(Matthew 10:5-15; Mark 6:7-13)

¹ Kaluk Jesus benkimew nawu twelve bininj nuye, benmirndemornnang, wanjh nungka bendulkarwong dja benmarnbom kabirriwohrnan ba bu nawu namarnde rowk kabindimunkewe, dja kabindimarnbun bininj nawu kabirridowen kundjakbubuyika.

² Dja mak nungka benmunkeweng bu kabirriyolyolme God nuye bu Kawohnan rowk, dja kabindimarnbun nawu kabirridowe bininj.

³ Dja benmarnewokrayekwong, yimeng, "Yuwn njale ngurrikan bu ngurrirekenh, yuwn ngurrikan kundulk, mak baladji, yuwn mak ngurridodkan buriddi, yuwn mak ngurrikukkan kunwardde, dja yuwn mak ngurrimadjukan bokenh nawu ngurridjongburren.

⁴ Dja bu ngurribebme kore kunred, wanjh bu ngurringalke nawu ngunyiyo, wanjh kunrurrk nuye ngurringimen, kumekbe kunrurrkkudji ngurridjalyuwn, kaluk ngurribolkbawon.

⁵ Dja bu ngurribolkmgang kore bininj nawu kabirrihni kunmekbe kunred minj ngunkimang ngunyiyo, wanjh bu kunmekbe ngurribolkbawon, wanjh ngurridengeborrhborrdjerlmen ba kundjulng ngarre kunmekbe kunred ngundengebawon. Kunmekbe ngurrikurduyime ba ngurrbenmulewan bu kunwarre kabirridjalburrbun."

⁶ Wanjh kunmekbe Jesus benmarneyimeng benmunkeweng, wanjh bedda birriwam kore kubolkyahwuyahwurdbubuyika, bedda bindibeng-dayhkeyi kunwok kunmak, dja mak bindimarnbuni nawu birrihni kumekbe kunred rowk.

King Herod Kodjmayahmeng Bu Biwobekgang Jesus

Luke 9:7-9

(Matthew 14:1-12; Mark 6:14-29)

⁷ Kaluk bu Herod nawu wohrnani, nungka wobekgang rowk bu baleh Jesus kurduhkurduyimi, dja nungka djalwernhkodjmayahmeng duninj bu yikahwi bininj birriyimi John yawoyhmimbiminj kumidjbeh,

⁸ dja yikahwi birribuyika birriyimi Elijah benmarnebebmeng, dja mak birribuyika birriyimi bu nakudji prophet nawu korroko birriwokmulewani God wanjh yawoyhmimbiminj.

⁹ Wanjh Herod yimeng, "Adju, nawu John wanjh nungka ngakomd-jobkeng, dja kaluk nangale nuk nahni nabuyika ngahwobekkan kuhni bu kunbubuyika kayime?" Wanjh nungka djareni binayi Jesus.

Jesus Benworrkmiwong 5000 Bininj

Luke 9:10-17

(Matthew 14:13-21; Mark 6:30-44; John 6:1-14)

¹⁰ Bu nawu apostles birrimdurndi kore Jesus wanjh birrimarnemulewam bu baleh bedda birrihyimi. Wanjh nungka benkang bedman birrikudji, birriwam darnkih kore kubolkkimuk kabolkngeyyo Bethsaida.

¹¹ Kaluk bu birrimirndewern bininj nawu munguyh birrikadjuji, wanjh birriburrbom bu Jesus kumekbe birriwam, wanjh bedda warridj kumekbe birrimunkekadjuji. Wanjh nungka warnmakminj bu bennang, dja benkimey, wanjh yolyolmeng bedberre bu God Kawohnan rowkkeh, dja benmarnbom nawu birridoweni.

¹² Kaluk bu dungkolungi, nawu twelve bininj nuye birriwam kore nungka birrimarneyimeng, "Yibenmunkewemen nawu birrimirndewern ba kabirrire kore darnkih kubolkyahwurdbubuyika, dja mak kabbal kore manme kabirrihdudjeng kabirrihyo, ba kabindingalke nawu kabindiyyo dja mak kabindiwon manme, dja ngadkunu karrihni kondah kore minj nangale kayo."

¹³ Dja nungka yimeng bedberre, "Ngudda wanjh ngurrbenwo manme kabirringun." Dja bedda birriyimeng, "Ngad minj manwern ngarrikar-rme, ngarridjalodkarme kunbidkudji buriddi, dja mak djenj bokenh ngarrikarme. Yiddok ngarrire wanjh ngarrimang manme bedberre nawu birrimirndewern?"

14 Dja nawu birrihni wanjh birrimirndewern duninj, dja nawu bininj wanjh darnkih five thousand. Wanjh Jesus benmarneyimeng bininj nuye nawu benhbukkabukkani, yimeng, "Mah, ngurrbenmarneyimen kabirriyerrkan, kaluk ngurrbenbebbemirndemornnamen fifty kore kumirdebubuyika rowk."

15 Wanjh kunmekbe bindimarneyimeng dja birriyerrkang rowk.

16 Wanjh Jesus mey manbu five buriddi dja mak djenj bokenh, wanjh nungka bolknang kaddum biburlumeng kornkumo, bakkeng rowk, wanjh benwong nawu bininj nuye bu bindiwoni nawu birrimirndewern bininj.

17 Wanjh nawu birriwern rowk birringuneng dja birriworrkminj. Wanjh Jesus nuye bininj birrimoyhney manwern mandawh manbu birribawong, kaluk twelve baskets birribarlkeng.

Peter Bimulewan Jesus Bu Christ Nawu God Kanberrebbom

Luke 9:18-20

(Matthew 16:13-19; Mark 8:27-29)

18 Kaluk bu Jesus dingihdi yiwarrudj nakudjihkudji, dja bininj nuye nawu benhbukkabukkani bedda warridj birridjarrkni. Wanjh nungka bendjawam, "Nawu bininj birrimirndewern ngaye yimankek kabirriyime nangale?"

19 Wanjh birriwokmey, "Ngudda yimankek kabirriyime John nawu benkukdjuhkeyi, nawu mak yikahwi kabirriyime yimankek ngudda Elijah, dja nawu birribadbuyika kabirriyime bu ngudda nakudji prophet nawu korroko birriwokmulewani God wanjh yawoyhmimbimij."

20 Wanjh Jesus yimeng, "Dja ngudda yimankek ngurriyime ngaye nangale?" Wanjh Peter biwokmey Jesus, yimeng, "Ngudda nawu Christ*, nawu God nuye."

Jesus Benyngkihmarneyimeng Kadjabekkankenh Dja Kayawoyh-dolkkankenh.

Luke 9:21-22

(Matthew 16:20-21; Mark 8:31-33)

21 Wanjh Jesus benwokrayekwong duninj, "Yuwn nangale ngurrbenmarneyime bu kuhni ngaye Christkenh."

22 Dja mak yimeng, "Kayngkihwokdjedjenyo bu ngaye nawu Bininj Duninj, kaluk ngadjaldjakbekkan duninj kore nawu daborrabbolk, dja warridj nawu birrikihkimuk priest, dja nawu kabindibukkabukkan mankarre. Bu bedda ngandirohrokme rowk, ngandikunkunewe yiman ngaye ngayeng rerrih, kaluk ngandibun ngarrowen. Dja kaluk bu kunbarnangarra danjbik God nganyawoyhdolkkayhwe kore ngayawoyhmimbimen."

Jesus Benbengdayhkeng Bininj Nawu Kabirrimunkekadjung Bu Baleh Kabenmarnerayekmen

Luke 9:23-27

(Matthew 16:24-28; Mark 8:34—9:1)

23 Wanjh Jesus benmarneyimeng bedda rowk, "Bu bininj kadjare nganmunkekadjung, wanjh namekbe nanu djalmarrkbaworrimen nawu nungan kadjare, dja bu malaywibubuyika rowk munguyh wanjh yiman rerrih dulkngorrika nuye kore yiman kakanjurrmerren rerrih, dja ngaye nganmunkekadju.

* 9:20 Christ kangehrokok "nawu Messiah".

²⁴ Dja nawu kadjare nungan kanahnarren kakanjngehkerren, wanjh nanu kaluk kadjaldowen, dja nawu nungan kamarrkbaworren yiman kakanjkurrmerren ngayekah, wanjh nanu kaluk kangehkerren.

²⁵ Dja njale kaluk kakarme bininj nawu yiman yehyeng rowk kamang nawu kurorrenh, dja bu nungan kadjalwarreworren kamunkewerren kubolkwarre?

²⁶ Dja nawu kayemengalme ngayekenh, dja mak kunwokkenh ngardduk bu ngahwokdi, namekbe nanu kaluk ngaye nawu Bininj Duninj ngayemanwali ngamarneyeme, bu ngaye ngamre kunmakmak dorrengh ngardduk, dja mak kunmakmak nuye Kornkumo ngardduk, dja mak bedberre kunmakmak nawu birrimakkaykenh angel.

²⁷ Dja ngayime ngudberre woybukkiah bu yikahwi nawu kondah karrihi kaluk minj kabirribangmedowen kore kabirrinan werck bu God Kawohrnan rowk."

Jesus Yimerranj Bu Kukkami Kunmakmak Dorrengh Nuye

Luke 9:28-36

(Matthew 17:1-8; Mark 9:2-8)

²⁸ Bu kuhni Jesus benmarneyimeng wanjh kaluk bu darnkih kunkodjke eight, wanjh nungka Jesus warddebidbom karri yiwarrudj, dja mak benmey Peter, John, dja James, dja birridjarrkwam.

²⁹ Kaluk bu Jesus dingihdi yiwarrudj wanjh kebbuyikaminj dja kunmadj nawu djongbuhdjongbuyindi wanjh madjbeleminj duninj yiman kayime namarrkon kamwayhke.

³⁰ Kaluk kumekbe benebokenh bininj benebebmeng, kaluk bedda wanjh Moses dja Elijah

³¹ Wanjh bedda benedjalbebmeng God nuye kunmakmak dorrengh, dja birriwokdi ngarre bu ngokko darnkih kamarnbuyindan kore Jesus kakurduyime bu karrownkenh kore Jerusalem.

³² Kaluk Peter dja nawu birrihni wanjh birrimimdulmukminj duninj, wanjh bu birrimimbayhmeng birrinang Jesus nuye kunmakmak bu kukkami, dja mak bindinang benemekbe bininj nawu Jesus birridjarrkdi.

³³ Wanjh bu benemekbe bininj benebalhbawoni Jesus, wanjh Peter bimarneyimeng Jesus, "Ngudda nawu kanmarnewohrnan, wanjh kamak bu ngad karridi, wardi ngarridjurlebu danjbik, mandjurlekudji ngudda ke, dja mandjurlekudji Moses nuye, dja mak mandjurlekudji Elijah nuye." Dja nungka minj burrbuyi bu baleh yimi bu wokdi.

³⁴ Dja bu kuhni balhwokdi wanjh kunngol benmarnebebmeng, yiman rerrih benkukbarrkbom dja birrikeleminj bu birringolngimeng.

³⁵ Wanjh birribekgang nakudji wokdanj kungolbeh yimeng, "Nanij wanjh Beywurd ngardduk, nawu ngaye ngadjarrngbom, nungka wanjh ngurribekka."

³⁶ Wanjh balwokdanj kaluk birrinang Jesus nadjalkudji dingihdi. Wanjh bedda birringurdmeng, minj nangale birribangmemarneyimeninj bu baleh bedman birrinang.

Jesus Bimarnbom Yawurrinj Nawu Namalngwarre Bihkarrmi

Luke 9:37-43a

(Matthew 17:14-18; Mark 9:14-27)

³⁷ Wanjh malaywi bu birriwarddekoluy wanjh birrimirndewern duninj birridabkeng Jesus.

³⁸ Kaluk kunmekbe nakudji bininj nawu kumekbe birrimirnderri wanjh kayhmeng, yimeng, "Ngudda nawu kanbukkabukkan, djawahdjawan

bu yinan ngardduk beywurd, dja nungka wanjh nadjalkudji dunijnh wurdyaw ngardduk,

³⁹ dja namalngwarre kabihmang dja kunu kadjalwohkayhme, wanjh namalngwarre kabimarnbun kakukbarlbarlme, kaluk kahnunjdjabun. Nahni namalngwarre kamdurndeng munguyh, dja wanjh kawernhwarrewon dja karrown!

⁴⁰ Dja ngaye ngabendjaldjawani bininj nawu ngudda ke yibenhbukkabukkan, ngadjareni bedda birribekbemeninj namekbe namalngwarre, dja wanjh birridulkarreyawarreni birribarabom."

⁴¹ Wanjh Jesus yimeng, "Ngudda nawu bolkkime ngurrimimbi, nawu minj ngurriwoybukwon God, dja mak ngurridjaldjare kunwarre, kaluk baleh kayime karridjarrkni, dja baleh kayime madbun ngudberre bu yimanek ngurriwoybukwon?" Wanjh bimarneyimeng nawu kornkumo, "Mah. Yimka nawu beywurd ke kondah."

⁴² Bu wurdyaw bu balhrey, namekbe namalngwarre biwohkukburriweng dja bimarnbom kukbarlbarlmeng. Wanjh Jesus birruy namekbe namarnde, wanjh bimarnbom wurdyaw, dja birrurndiweng kore kornkumo.

^{43a} Wanjh birriwern rowk birrikangebarrhmeng bu birrinang God nuye kunmakkaykenh dunijnh.

Jesus Yimeng Bu Nakudji Bininj Kabikukweykan

Luke 9:43b-45

(Matthew 17:22-23; Mark 9:30-32)

^{43b} Dja bu birribalhmayahmi rowk nuye bu yehyeng nawu nungka kurduhkurduyimi, wanjh nungka benmarneyimeng bininj nuye nawu benhbukkabukkani, yimeng,

⁴⁴ "Ngurriwernhbekka manih manu kunwok bu marneyime bolkkime, ngurridahkendo kukodjkulu, dja ngaye nawu Bininj Dunijnh ngokko darnkih ngandikukweykan kore bininj."

⁴⁵ Wanjh kuhni bu Jesus benmarneyimeng, bedda minj birrimenmayi dja mak manu kunwok benmarnewarlkkayindi ba minj birriwernhburrburrkbekkayi, dja mak birrikeleni bu birridjawayi kuhni kunwokka wernhmulewayi.

Jesus Nuye Bininj Birridurreni Bu Nangale Kabenmarnekudokmikenh

Luke 9:46-48

(Matthew 18:1-5; Mark 9:33-37)

⁴⁶ Kaluk Jesus nuye benhbukkabukkani, wanjh bedda birridangwerreni birridjavarreni bu nangale kore bedda kaluk kabenmarnekudokme nawu birribuyika bedberre.

⁴⁷ Wanjh bu nungan Jesus burrbom bedman bedberre bu birriburburrbunni kukange bedberre, wanjh nungka bimey nakudji wurdyaw, wanjh binameng kore nungka nuye kungurrird.

⁴⁸ Wanjh benmarneyimeng, "Nangale nawu kabikimang nahni wurdyaw kore kunngey ngayekah, wanjh kunu ngaye ngankimang, dja nangale nawu ngaye ngankimang, wanjh kabikimang warridj nawu ngaye nganunkeweng. Kaluk bininj nawu nadjalyahwurd dja nawu kamre yerre ngudberre, nungka wanjh namekbe nanu nawu ngunbalmarnekekudokme ngudberre."

Bininj Nawu Bingebyuni Jesus Benhbekeyi Namarnde

Luke 9:49-50

(Mark 9:38-40)

⁴⁹ John wokdolkkang, yimeng, "Ngudda nawu kanmarnewohrnan ngadberre, ngad ngarrinang nakudji bininj nawu ngunhngyebuni dja

benhbekeyi namarnde, dja ngad ngarringurdkemeninj bu minj nungka dorreng ngundidjarrkmunkekadjung.”

⁵⁰ Wanjh Jesus bimarneyimeng, “Yuwn ngurringurdke, dja bininj nawu minj ngunyiwirrihme bu ngurrihkurduyime, wanjh yiman rerrih nungka ngunbidyikarme.”

Bininj Nawu Samariabeh Minj Birrikimayi Jesus

Luke 9:51-56

⁵¹ Kaluk bu darnkih kumhrey nuye Jesus God kabiwayhke kabikan kaddum heaven, nungka Jesus njilngbekkarrinj bu kunmekbe djahdjalley kore Jerusalem.

⁵² Wanjh nungka benmunkeweng yikahwi bininj kabirriyingkihdokme nawu birrimarnekanani kunwok. Bedda birriwam birribebmeng kore kubolkyahwurd, kaluk kunred bedberre bininj nawu Samariahbeh, kumekbe birribebmeng birriyingkihmarnebolkmarnbuyi.

⁵³ Dja bininj nawu birrihni kumekbe kunred wanjh bedda minj birrikimayi Jesus, dja birriburrbom nungka Jesus njilngbekkarrinj regehrey Jerusalem.

⁵⁴ Wanjh James dja John nawu nuye Jesus benbenehbukkabukkani, bu bedda benenang kunmekbe birriyimeng, wanjh beneyimeng, “Ngudda nawu Yiwohrnan Rowk, ngudda yidjare ngad ngarrimarnekayhme kunak kamkolung kaddumbek kabenkukkinje rowk?”

⁵⁵ Dja Jesus balborledmeng benbeneduy.

⁵⁶ Wanjh kunmekbe birribaldjalley kore kunredbuyika kubolkyahwurd.

Bininj nawu Birrimunkekadju Jesus.

Luke 9:57-62

(Matthew 8:19-22)

⁵⁷ Bu birribalhrey kore manbolh, kaluk nakudji bininj biwohmarneyimeng Jesus, “Ngaye munkekadjung ngudda bu baleh yarrkka yire.”

⁵⁸ Dja Jesus bimarneyimeng, “Nawu dalkken kakarme kudjorlok kore kayo, dja nawu mayhmayh kawelyi warridj red kakarme red, dja ngaye nawu Bininj Duninj minj ngabolkkarme ngayeman ngardduk bu ngakodjkeyo.”

⁵⁹ Dja Jesus bimarneyimeng nabuyika bininj, “Kanmunkekadju.” Dja nungka yimeng, “Nawu Yiwohrnan, kanmunkewemen werrk ba ngare ngakududjeng kornkumo ngardduk.”

⁶⁰ Wanjh Jesus bimarneyimeng, “Yibawo, dja nawu yiman bedman birridowerrinj rerrih, bedda wanjh bindikukudujimen nawu bindimarneweng. Dja nguddanu, yidjallay, yibenbengdayhke bininj bu God Kawohrnan rowk.”

⁶¹ Kaluk bininj nabuyikawali yimeng, “Ngaye wanjh munkekadjung ngudda, ngudda nawu Yiwohrnan, dja kanmunkewemen werrk, ngabenwoknan nawu kured kabirrihni.”

⁶² Jesus bimarneyimeng, “Bininj nawu bidkurrmerrinj kore kundulk dedjdjimgmey kabolkkarang mandjad, dja munguyh kahborledme kahbolknan rerre, wanjh nakka minj namak bu yimankek kahdurkimirri kore God Kawohrnan rowk.”

10

Jesus Benbukkang Dja Benmunkeweng Seventy Bininj

Luke 10:1-12

¹ Kaluk wanjh Jesus nawu Kawohrnan Rowk bendjarrngbom seventy bininj, wanjh benmunkeweng, birriyingkihdokmi nuye kore kured-bubuyika kaluk kubolkkikhkimuk, dja mak kubolkkububuyika rowk kore nunganwali darnkih kabebme. Wanjh bu benmunkeweng bedman bokenh, dja mak bedman bokenh, birribebbehrey.

² Dja benmarneyimeng, "Yiman manme manbu djolengminj wanjh manwern duninj, dja nawu kabirrimoyhmang wanjh birrimirndeyahwurd. Wanjh ngurridjaldjawa nawu nuye kabbal bu kabenmunkewe birriwern kabirrimarnemoyhmang manmekbe manbu yiman mandjoleng manme.

³ Mah. Ngurriray. Dja kandibekka, marneyime ngudberre, ngaye munkewe ngudberre, yiman ngurrikukyime lamb nawu mayh kelebuk, ngurrire kore bininj birribang nawu yiman dalkken.

⁴ Yuwn ngurrikanahkan nawu kunwarddekenh ngurrikudahkendong, dja yuwn mak ngurrikan baladji, dja yuwn ngurrikan nabuyika nawu ngurridengedjongburrenkenh. Dja mak yuwn nangale ngurriwohnraren birribuyika bu ngurrihre manbolh.

⁵ Bu yarrkka ngurringimen kunrurrk, ngurriyimen werck, 'Ngadjare God ngunwon ngudberre kunmodmikenh nuye!'

⁶ Dja bu kumekbe kani bininj nawu kadjare God nuye kunmodmikenh, wanjh kunu kunmodmikenh nawu ngurriyidjawan God wanjh kabiwon, dja bu bininj minj kadjare God nuye kunmodmikenh, wanjh kunu ngunmarnedurdeng ngudberre kunmodmikenh nawu ngurridjareni nuye.

⁷ Dja mak kore kunrurrkkudji ngurridjalnin ngurringun ngurribongun manbu bedda ngundiwon, dja nangale nawu kahdurrkimirri wanjh nanu kamak kabirrikarremulewan. Yuwn ngurriwohrewohre ngurriyo kunrurrkbubuyika.

⁸ Bu yarrkka ngurribebme kore kunred kubolkkimuk dja bu ngundikimang, wanjh ngurringun manbu ngundimarnekurme.

⁹ Dja ngurrbenmarnbu nawu kumekbe kabirrihni nawu kabirridowen, dja ngurrbenmarneyime, 'Wanjh ngokko darnkih kumwam bu God ngunmarnewohrnan ngudberre.'

¹⁰ Dja bu yarrkka ngurribebme kore kunred kubolkkimuk, kore bininj minj ngundikimang, wanjh kunu ngurribebmen kore manbolh kore kumekbe kunred dja ngurriyimen,

¹¹ 'Kundjulng konhda kuredbeh manbu kandengebelbmeng ngadberre, wanjh ngad ngarridengeborndurren ngarridjulngwe rowk, kunu bimulewan ngudberre bu kunwarre ngurrihdjalburrbun. Kunu bonj, wanjh kuhni ngurriburrbu, ngokko darnkih kumwam bu God Kawohrnan rowk.' "

¹² Dja Jesus yimeng bedberre nawu benmunkeweyi, "Ngayime ngudberre, kaluk bu kamre God ngundjadme bininj, wanjh nawu kabirrihni kumekbe kunred, bedda wanjh wernkih kabirridjakkbekkan, dja nawu birrihni kore kabolkngeyyo Sodom, bedda wanjh yiman walakkih kabirridjakkbekkan."

Jesus Bolkwarreweng Kore Bininj Minj Birriwarnyakmulewarremeninj Kore Kunwarrekenh

Luke 10:13-16

(Matthew 11:20-24)

¹³ Dja mak Jesus yimeng, "Aba! Ngudda bininj nawu ngurrihni kabolkngeyyo Chorazin, dja ngudda mak nawu ngurrihni kabolkngeyyo Bethsaida, wanjh kunrayek duninj kamyimerran ngudberre! Bu kumekbekenh kunu ngudda wanjh ngurringun bu ngaye ngakurduyimeng kundulkarre dorreng. Dja bu bininj nawu birrihni kabenebolckngeyyo

Tyre dja Sidon, bu kunmekbe yimankek ngakurduyimeninj bedberre, wanjh ngokko birribawoyi kunwarre birriroledmeninj kore God, dja birriwiwirinj kunmadj birridjongbuyindiwirrinj nawu kunyemekenh, dja warridj birribarurrimeninj kunyirrike dorreng!

14 Kaluk bu kamre God ngundjadmekenh bininj rowk, wanjh ngudda nawu ngurrihni kore Chorazin dja Bethsaida, ngudda wernkih ngurrid-jakbekkan, dja bedda nawu birrihni kore Tyre dja Sidon, bedda wanjh yiman walakkih kabirridjakbekkan.”

15 “Dja ngudda nawu ngurrihni kore kabolkngeyyo Capernaum, yimankek ngudda ngurriyime God ngunkukenwon ngunkan heaven? Dja wanjh burrkyak, ngudda wanjh ngunkukburriwe ngudberre ngun-yemikan ngurrire kanjdji duninj kore kubolkwarre*.”

16 Dja mak Jesus yimeng bedberre nawu benmunkeweyi, yimeng, “Bininj nawu ngunwokmarrkmang ngudberre, wanjh gaye nganwok-marrkmang. Dja bininj nawu ngundjalwarnyak, wanjh gaye warridj nganwarnyak. Dja ngaleng bininj nawu nganwarnyak gaye, wanjh kunu kabidjalwarnyak nahni nawu gaye nganmunkeweng.”

Jesus Benmarnenjinlgmakminj Bininj Nuye

Luke 10:17-24

(Matthew 11:25-27; 13:16-17)

17 Kaluk bu nawu birrimekbe seventy bininj nawu Jesus ben-munkeweng, kaluk bu birrihrey wanjh birrimdurndi, wanjh birrikuni-warnmakni, birriyimeng, “Ngudda nawu Yiwohrnan, bu ngudda ngundi-hngeybuni, wanjh namarnde warridj kandiwokmarrkmangi!”

18 Wanjh Jesus benmarneyimeng, “Namarnde Duninj nawu mak kangeyyo Satan, nungka wanjh gaye ngahnani bu mankang kaddumbekh yiman rerihi namarrkon bu kahmayhke.

19 Dja gaye marnbom ngudberre ba ngurrikarrme kundulkarre ngard-duk ba ngurrimelme nabang nayin dja mak marla, dja mak ngurriwe kundulkarre nuye nawu ngunwidnan ngudberre, dja minj njale kunwarre ngunmarneyime ngudberre ngurridjakbekkan.

20 Dja kunu bonj, yuwn bu kunmekbekenh ngurriwarnmakmen, bu nawu namalngwarre rowk ngundiwokmarrkmang. Dja ngaleng ngurrid-jalwarnmaknin bu ngurringeybimbuyindi kore Heaven.”

21 Wanjh kunmekbe rerihi Namalngmakkaykenh bikangemarnbom Jesus wernhakangemarrminj, dja yimeng, “Ngabba, ngudda nawu Yiwohrnan rowk kore kaddum heaven dja mak kondah kurorre, gaye burluburlume ngudda bu kuhni yibenmarnewarikkang bedberre nawu kabirriwernhburrbun dja mak birrimayaliwern, dja yibenbukkabukkang bininj nawu yiman wurdyaw rerihi. Yoh Ngabba, dja kuhni wanjh yingan ke yinjilngni kore yidjareni.”

22 Dja mak kunih Jesus benmarneyimeng nawu seventy bininj, yimeng bedberre, “Yehyeng rowk wanjh Ngabbard nganwong, dja minj bininj kabirriburrbun bu nangale nawu Beywurd, nadjalkudji Kornkumo kabiburrbun bu nangale Beywurd, dja minj bininj kabirriburrbun bu nangale Kornkumo, nadjalkudji nawu Beywurd kabiburrbun bu nungka nangale, dja warridj bininj nawu Beywurd kadjare kabenbukkan, wanjh bedda warridj kabirriburrbun bu nungka nangale nawu Kornkumo.”

23-24 Wanjh Jesus benmarneborledmeng bedberre nawu bininj nuye nawu benhbukkabukkani bu bedman birrihni birridjalkudjihkudji, dja

* 10:15 Kabolkyolyolme “hell” dja kore kunwok bedberre, “Hades”.

yimeng, “Dja ngayime ngudberre, bu birriwern nawu korroko birriwokmulewani God, dja mak king nawu korroko birriwohrnawohrnani, bedda wanjh birridjareni birrinayi nawu ngudda bolkkime ngurrihnan, dja minj bedda birrinayi. Dja warridj birridjareni birribekkayi nawu ngudda bolkkime ngurrihbeikkan, dja minj bedda birribekkayi. Wanjh ngurrinjilngmak nguddanu nawu ngurrihnan.”

Jesus Biyolyolmi Bininj Nawu Bikongibom Nuye Beneyidkoni
Luke 10:25-37

²⁵ Kaluk nakudji bininj nawu wernhburrbuni mankarre, wanjh dolkkang bidjawam Jesus bimayalirohromeng, yimeng, “Ngudda nawu kanhbukkabukkan ngadberre, kaluk baleh ngaye ngakurduyime ba kakar-emarnbuyindan bu ngaye ngarrarrkid kore God munguyh munguyh?”

²⁶ Jesus biwokmey, yimeng, “Kaluk njale kawokbimdi kore mankarre, kaluk baleh ngudda yibekkan kakarreyime?”

²⁷ Wanjh namekbe bininj biwokmey yimeng, “Kuhni wanjh kawokbimdi, ‘Nawu God ke nawu Kawohrnan rowk, yimarnedjarenin kunkange dorreng, kunnjilng dorreng kunnudj dorreng, dja kunmayali dorreng.’ Dja mak kayime, ‘Yibenmarnedjarenin birribuyika bininj nawu ngurridarnhni, yibennahna dorreng, yiman bu yingan yimarnedjaremerren yinahnarren dorreng.’” [Deuteronomy 6:5; Leviticus 19:18]

²⁸ Jesus bimarneyimeng, “Ngudda wanjh mandjad kanmarneyimeng, bu kunmekbe yikurduyime wanjh kunukka yirrarrkid.”

²⁹ Dja namekbe bininj djareni Jesus bu kabiyime nungka kunmakkenh bidjawam, wanjh kunu biyawoyhdjawam, yimeng, “Dja kaluk nangale nawu ngudda yiyime birribuyika bininj nawu ngarridarnhni?”

³⁰ Wanjh Jesus biwokmey, bimarneyolyolmeng yimeng, “Nakudji bininj rengehrey, kaluk Jerusalem bolkbawong dja rengehrey kore kunred Jericho, wanjh bu balhrey birrimarnebebmeng bininj nawu kabirrihdjird-mang kabirribong dorreng. Bedda wanjh birrikukyerrkkeng, dja birribom birrikukmarladjwong, wanjh birribawong namekbe nawu birrikukmarladjwong duninj, kuyindowimeninj.

³¹ Wanjh nakudji nawu priest kumhrey mungu manmekbe manbolh, dja bu nungka binang wanjh bibaldjalkukyurrrhkeng djarrehkah.

³² Wanjh yiman kunmekbe rerrih yimeng nabuyika nawu Levi bikeb-mawahmeng. Wanjh bu nungka bebmeng kore namekbe bininj kuyoy, bu binang wanjh nunganwali bibaldjalkukyurrrhkeng djarrehkah.

³³ Dja kaluk nakudji bininj nawu nakang Samariabeh, nungka mak kumekbe djahdjalley, wanjh nungka bebmeng darnkih kore namekbe bininj kuyoy. Wanjh bu binang nungka bikongibom.

³⁴ Wanjh darnhwam kore nungka yoy, dja bimokdjirridjbom kunkalkkid olive oil dja mak wine, dja bimokdukkang. Wanjh biwayhkeng bibarnnameng kore nungka nuye mayh donkey, bimornekani, dja bimbang kore kunrurrk kore bininj kabirriwohyo, dja kumekbe binahnani.

³⁵ Kaluk bu malaywi, wanjh nungka bebkeng kunwardde nad-jalkimukkenh, wanjh biwong nawu wohrnani kunmekbe kunrurrk, dja yimeng, ‘Yinahna nahni bininj, dja bu ngudda warridj yimarnekarremulewan njale, wanjh ngaye kaluk won bu ngamdurndeng.’”

³⁶ Wanjh bu Jesus bimarneyolyolmeng rowk, wanjh bidjawam namekbe bininj nawu birohromeng, yimeng, “Nawu birridanjibik bininj ngabenmarneyolyolmeng nawu birrihrey, kaluk baleh nanu ngudda yiyime bimarneyimerranj yiman nabuyika nawu bimarnedarnhni bininj nawu birribom?”

³⁷ Wanjh nungka biwokmey, yimeng, "Namekbe wanjh nawu bikongibom bibidyikarrmeng." Wanjh Jesus bimarneyimeng, "Yiray wanjh, dja yiman kunmekbe rerrih yikurduyimen."

Jesus Benbenedjahwong Martha Dja Mary

Luke 10:38-42

³⁸ Wanjh bu Jesus dorrengh birribalhrey wanjh birribebmeng kore kubolkyahwurd rurrkmirnderri, wanjh ngalkudji daluk ngalbu ngeyyoy Martha, ngaleng wanjh Jesus bikimey, nungka ngimeng kore ngalengngarre kunrurrk.

³⁹ Wanjh ngalbu Martha benedanginj ngeyyoy Mary, ngaleng wanjh yerrkang ni kore kurrenge nuye Jesus nawu Kawohrnan Rowk, bihbekkani bu nungka wokdihwokdi.

⁴⁰ Dja ngalbu Martha ngalengman kunwern durrrkmirri bihbengwernwoni, wanjh Martha kunu wam kore Jesus bimarneyimeng, "Ngudda nawu Yiwohrnan ngadberre, ngudda minj kankongibun bu ngaye nganedanginj nganbawong ngaye ngakudjihkudji ngahdurrrkmirri? Yimarneyimen nganbidyikarrme."

⁴¹ Dja Jesus nawu Kawohrnan Rowk biwokmey, yimeng, "Martha, Martha, ngudda kunwern yihburrbun ngunhbengwernwon wanjh yihnjilngdukarrren.

⁴² Yuwn bu kunwern yihburrbun, dja kundjalkudji yiburrbu nawu kunmak ke. Mary wanjh djarrngbom nawu kunwernhmak, dja minj nangale kabiyimang."

11

Jesus Benbukkani Bininj Nuye Bu Yiwarrudj Kabirridi

Luke 11:1-13

(Matthew 6:9-15; 7:7-11)

¹ Kaluk bu Jesus ni kore kubolkkudji, dingihdi yiwarrudj. Wanjh bu yakwong, kaluk nakudji nawu bininj nuye nawu benhbukkabukkani wanjh bimarneyimeng, "Ngudda nawu Yiwohrnan ngadberre, baleh ngarriyime bu ngarridi yiwarrudj, kanbukkabukka ngadberre yiman John benbukkabukkani yiwarrudj nawu bininj nuye."

² Wanjh Jesus benmarneyimeng, "Bu ngurridi yiwarrudj wanjh ngurriyimen, 'Ngabba, kab ngarriwarlahkenh rowk nawu ngundihngeybekkan, ngundimarnekelenin dja yuwn ngundihngeyborrkibun. Kab ngudda ke bu Yiwohrnan rowk kubolkwarlahkenh rowk kamarnbuyindan, kunray.

³ Kab bu kunbarnangarrabubuyika, ngudda kanwo ngadberre manme bu kunmekbe kunbarnangarrakenh.

⁴ Kab ngudda yibularru kunwarre ngadberre nawu ngarrihyimi. Dja ngadkunu ngarrihbularrbun kunwarre bedberre birribuyika bininj nawu kandihmarneyime. Dja yuwn kankan ngadberre kore Namarnde kandjurrkkan ngadberre.' "

⁵ Dja Jesus benmarneyimeng, "Yimankek bu nakudji nawu ngurrihirnderri kabikarrme nawu benedabbolk, kaluk bu kabimarnebebmekumununburrrk kabimarneyime, 'Ngarrdabbolk, kanwo manlod danjbik buriddi, dja ngaye kaluk won ngudda.

⁶ Dja nakudji nabuyika nawu nganedabbolk kumdolkkang kubolkbuyikabeh djalwohbebmeng wanjh kare, dja minj njale ngakarrme ba ngawon.' "

* 11:4 Ngurrina warridj kore Matthew 6:9-13.

⁷ Dja Jesus bendjawam, “Dja yiddok namekbe nawu kahni kururk wanjh kabiwokmang nawu kabiloddjanwohme bu kayime, ‘Aba! Yuwn kanlorrke, dja ngokko ngarridangbalhmiyindi, dja wurdwurd ngardduk dja ngaye ngarrihdjarrkyo, wanjh kakarrewarre, minj ngarrollkan mak won.’?”

⁸ Wanjh Jesus yimeng, “Ngayime ngudberre, madjamku namekbe minj karrollkan kabiwon bu nungka benedabbolk, dja bu kebbabi kabihdjawan munguyh, wanjh kunmekbekenh kunu nungka karrollkan kabiwon rowk nawu kadjare.

⁹ Dja ngayime ngudberre, ngurridjawa dja ngunwon ngudberre, ngurriyawa dja ngurringalke, ngurridongohdo dja karrangmarrhmire ngudberre.

¹⁰ Dja birriwern rowk nawu kabirridjawan wanjh kabirrimang, dja nawu kabirriyawan wanjh kabirringalke, dja nawu kabirridongohdong wanjh kabenmarnedangmarrhmire.

¹¹ Dja ngudda nawu ngurrikokorkumo, kaluk bu beywurd ngundjawan djenj, wanjh minj yiwon nabang nayin,

¹² dja bu ngundjawan wirlarrk, wanjh minj yiwon marla.

¹³ Dja wanjh ngudda nawu ngurriwarre bininj, bu ngurriburrbun ngurrbenwon wurdwurd ngudberre namakmak, wanjh nawu Kornkumo nawu kaddum kahni heaven, nungka wanjh kawernhburrbun kabenwon Namalngmakaykenh bedberre nawu kabirridjawan.”

Jesus Benbekeng Namarnde Nawern

Luke 11:14-23

(Matthew 12:22-30; Mark 3:20-27)

¹⁴ Kaluk rerrickah bu Jesus bibebkeyi namarnde nawu bimarnbuni bininj wokyakni. Dja bu namekbe namarnde bebmeng bibawong bininj, wanjh nahni bininj dedjingmey wokdi. Dja nawu birrimirndewern bininj birrimayahmeng.

¹⁵ Kaluk yikahwi birriyimeng, “Bu nungka kabenhbebke nawu namarnde wanjh Beelzebul kabirrukarrewon, nawu nungan Beelzebul kabenmarnewohrnan nawu namarndemarnde.”

¹⁶ Dja mak birribuyika bininj birridjurrkkang birridjareni nungka benmarnekurduyimeninj kunbuyika heavenbeh bu benbukkayi ba mulewarrimeninj bu nungka Christ nawu God benberrebbom.

¹⁷ Dja nungka Jesus burrbuni bu bedda baleh bedman birrihburrbuni kanjdjiwi, wanjh kunu nungka benmarneyimeng, “Bu bininj nawu kabirrihni kubolkwarlah bedberre kabirridurren dja yiman kabirriyarlarmerren, wanjh kunu kawarremen king bedberre dja nuye kunbol. Dja karohrok kore bininj nawu kabirrihni kunredkudji kabirriyidnarren dja wanjh kabirriyarlarmerren, wanjh bonj, bedberre namud kayakayakmen rowk.

¹⁸ Mah, wanjh djawan bu nawu Satan nuye namarndemarnde kore nungka kabenmarnewohrnan yiman rerrih kabirriyarlarmerren, wanjh baleh kayime bu nungka yimankek kabenmarnewohrnan munguyh? Kuhni ngayime ngudberre bu ngudda ngurriyimeng, ngaye ngabenbebke namarnde bu nungka Beelzebul nganhdukarewon.

¹⁹ Dja kunbuyika djawan, bu kuhni yimankek ngabenbebke namarnde bu nungka Beelzebul nganhdukarewon, dja nangale kabenhdulkarewon nawu ngudda ngudberre bininj nawu kabindihbebke namarnde? Kunmekbekenh kunu wanjh bedda ngundidjadme ngudberre.

²⁰ Dja bu ngaye God nuye kunbid ngandulkarrewon ba ngabenbebke narnde, wanjh kunu ngurriburrbun bu ngunmarnebebmeng ngudberre kore God Kawohrnun rowk.

²¹ Wanjh bu bininj nawu ngudjmak nawu kakarme yehyeng kabenbunkenh dja kabenngurdkekenh, bu nungka karurrknahnan nungan nuye kunrurrk, wanjh yehyeng rowk nawu nuye wanjh kamak rowk, minj nangale kadjirdmang.

²² Dja kaluk bu nakudji nawu nawernhgudjmak kabimarnebebme, wanjh kabibun kabiyurrhke, nungka kakarme. Wanjh kabikukyerrkke nawu yiman wirlmurrng nungka kukbarrkbuyindi, nawu nungka burrbuni yimankek kamakni, dja mak yehyeng nawu nungka mangihmangi bu benbuni birribuyika, wanjh namekbe nawu nawernhgudjmak kabiyimang rowk kabenwon nungka nuye bininj.”

²³ Mak Jesus yimeng, “Dja bininj nawu minj nganbidyikarme bu ngahdurkimirri, namekbe wanjh yiman rerrih nganyiwirrihme. Dja nawu minj nganedjarrkmirndemornname ngardduk, namekbe wanjh kabenyarlarrke.”

Jesus Benbengdayhkeng Bu Wardi Namalngwarre Nawern Kabirrim-durdeng

Luke 11:24-28

(Matthew 12:43-45)

²⁴ Dja mak Jesus yimeng, “Bu namalngwarre kabebme kabibawon bininj, wanjh kahdjalle kore kukkuyak kabolkyawan kangudjngehmekenh, wanjh bu minj kabolkngalke, nungan kamarneyimerren, ‘Ngaye ngarrurdeng kore bininj nawu yiman kunred ngardduk nawu ngambebmengbeh.’

²⁵ Dja bu kamre kabinan namekbe bininj yiman nawu kunrurrk, bu birribolkbirrhmeng birribolkmarnbom rerrih,

²⁶ wanjh nungka kare kabenkimang seven nawu namalngwarrewarre nawu birriwernhwarre duninj, dja kabirridjarrkngimen, kumekbe kabirrihni, wanjh kunu kunwernhwarre duninj kabimarneyimerran namekbe bininj bu yerreyerre, dja bu kerngeghkenh wanjh walakkihni.”

²⁷ Bu kuhni yimi Jesus, kaluk ngalkudji daluk kore kumekbe kumirnde wanjh kayhmeng bimarneyimeng, “Ngalnjlilngmak ngalbu ngunmerlemkenhkani dja mak ngundjikkawoni.”

²⁸ Dja nungka Jesus biwokmey yimeng, “Kunu bonj, dja kabirriwernhnjilngmak nawu kabirribekkan God nuye kunwok dja kabirriwokmarrk-mang.”

Bininj Nawu Birridjareni Birrikurdunayi Jesus Kundulkarre Nuye Dor-reng

Luke 11:29-32

(Matthew 12:38-42; Mark 8:12)

²⁹ Wanjh bu bininj birrimirndewernmerreni, Jesus dedjdjimgmey yimeng, “Bininj nawu bolkkime kabirrimimbi wanjh kunwarre kabirridjalburrbun. Kaluk kabirridjare kunbuyika God kakurduyime bu kabenbukkan kabenmarnemulewan bu ngaye Christ nawu God benberrebom. Dja bonj! Minj njale God kabenbukkan kabenmarnemulewan bedberre. Kabendjalbukkan nawu yiman Jonah benbukkang birribuyika bininj bu korroko.

³⁰ Ngurriburrbun bu njale God bimarnekurduyimeng Jonah, ba bu benbukkang benmarnemulewan bininj nawu Ninevah birrihni, wanjh yiman kumekbe rerrih kaluk ngaye nawu Bininj Duninj, God wanjh nganmarnekurduyime ngaye ba bu kabenbukkan kabenmarnemulewan nawu bolkkime kabirrimimbi.

³¹ Dja kunbuyika mak ngaye marneyime. Daluk ngalbu queen wohnani kore walem, kaluk ngaleng warridj kambembe bu God ngundjadme bininj rowk, dja yiman ngaleng kabenwarrean nawu bolkkime kabirrimimbi, bu ngaleng korroko kumwam kumdolkang djarrehbeh dja bimayalibekang nawu Solomon. Dja ngayime ngudberre, bolkkime ngaye ngahdi dja ngayurrhke nawu Solomon.

³² Dja bininj mak nawu Ninevah birrihni, bedda warridj kabirribembe bu God ngundjadme bininj rowk, dja yiman kabenwarrean nawu bolkkime kabirrimimbi. Kaluk bedda wanjh birribekang Jonah benmarneyolyomeng, wanjh birriwohbwong kunwarre bedberre dja birrihorledmeng kore God. Dja ngayime ngudberre, bolkkime ngaye ngahdi dja ngayurrhke nawu Jonah.

Jesus Benmarneyimeng Bu Yiman Kayime Kabirrikukwolkayindi

Luke 11:33-36

(Matthew 5:15; 6:22-23)

³³ Dja mak Jesus yimeng, "Minj nangale nawu kawurlhke lamp kaluk kawolkkan, minj mak kabarrkbun djabbirlana. Burrkyak. Bininj nawu kawurlhke lamp wanjh kabarnname kaddum, ba bininj nawu kabirrimimerren wanjh kabenmarnebolkwolkkan.

³⁴ Nawu kunmim ngudberre wanjh yiman lamp rerrih ngunkukwolkkan baybaywi, dja bu yimimmak, wanjh yikukwolkayindi rowk, dja bu yimimwarre, wanjh yiman kunburk ke kakakdi rowk.

³⁵ Wanjh wardi yinahnarrimen, marndi nawu yimankek ngunkukwolkay wanjh yiman kunkak rerrih.

³⁶ Dja bu yikukwolkayindi rowk dja minj baleh ngudda yiman yiwokukkakdi, wanjh kunu yikukwolkayindi rowk yiman rerrih bu lamp kahrung ngunmarnebolkwolkkan."

Jesus Benhbengdungi Pharisees Dja Mak Nawu Mankarre Bindibukkabukkani

Luke 11:37-54

(Matthew 23:1-36; Mark 12:38-40; Luke 20:45-47)

³⁷ Bu Jesus yakwong bu wokdihwokdi bedberre, nakudji Pharisee wanjh bikimey kabenedjarrkngun. Wanjh Jesus ngimeng kururrk, yerrkang, neyhneykendi kangunkenh.

³⁸ Wanjh namekbe nawu Pharisee mayahmeng bu binang Jesus minj bidjirridjburrimeninj werkk bu mankarre yoy bedberre.

³⁹ Dja Jesus nawu Kawohnan bimarneyimeng, "Ngudda nawu Pharisees ngudda ngurringalngbelewon kuberrkkah ngarre banikkin dja mak djabbirlana, dja nguddambu bu kanjdji kukange ngudberre wanjh ngurikangebarlmiyindi bu ngurridjaldjarewernworren dja mak bu kunwarre ngurridjalkadjung.

⁴⁰ Ngudda ngurrimayaliyak! Kab God nawu marnbom kuberrkkah, yiddok minj nungka marnbuyi kururrkkah warridj?

⁴¹ Dja ngurrbenkongibu nawu birrimarladij, ngurrbenwon kunkange dorreng ngudberre, wanjh kunu marneyime ngudberre, yehyeng rowk wanjh kabelemen ngudberre, yiman bu mankarre kahyo."

⁴² Mak Jesus yimeng, "Ngudda nawu Pharisees, kunrayek duninj kambembe ngudberre kore ngurrikurduyime! Bu ngudda ngurrikarme manbu manyahwuyahwurd duninj manbu yiman kunworr manbu kangeyyo mint, dja mak manbu rue, dja mak herb mankukubuyika rowk manbu kamanjarnbun manme. Bu yiman ten ngurrikarme wanjh mankudji ngurriwon God. Kamak. Dja med, ngaleng minj kunmak

ngurrbenmarneyime birribuyika bininj, dja minj mak ngurrimarnedjare God! Kuhni ngurrikurduyimeninj, ngurrbenmarneyimeninj birribuyika kunmak dja ngurridjareniwirrinj God, dja minj mak ngurribawoyi nawu ngokko ngurrikurduyime bu ngurriwon God.

⁴³ Yoh, ngayime kunrayek duninj kamebme ngudberre bu ngudda ngurridjare ngurriyerrkan kore kuwernhbolkkuken kore synagogue, dja ngurridjare birriwern ngundidjawan kore bininj kurobbe, kore bininj kabirrire dja kabirribayahme.

⁴⁴ Mak kunrayek duninj kamebme ngudberre bu ngudda ngurrikukyime yiman kunmidj rerrih kore bininj kahkukyo, nawu minj nangale kanan, dja bininj kabirriwarribomidjmelme, dja minj kabirribolhbur-rbun."

⁴⁵ Wanjh kunu nakudji nawu birriwernhburrbuni mankarre bimarneyimeng Jesus, "Ngudda nawu kanhbukkabukkan ngadberre, bu kuhni yihyime, wanjh ngad warridj kanyemikan."

⁴⁶ Wanjh Jesus yimeng, "Ngudda nawu ngurrihwhurrbun mankarre, wanjh kunrayek duninj kamebme ngudberre warridj bu ngudda yiman rerrih ngurrbenngorrrkenwon bininj mandulmak duninj manbu kabirribarabun, dja ngudda minj kundudji kunbid ngurriwohbidwayhme ba yimankek ngurrbenbidyikarrme.

⁴⁷ Mak kunrayek duninj kamebme ngudberre bu ngudda yiman ngurridulckname rerrih mandulmak kaddumkah kore kabirrikukyo nawu prophets, dja nawu mawahmawah ngudberre bedda wanjh bindibom bindikukkurrmeng.

⁴⁸ Kunu wanjh ngudda ngurrimulewarren bu ngurriburrbun bu nawu mawahmawah ngudberre bindibom, dja mak yiman ngurrbenmarnekodjdumeng rerrih bu kuhni birrihyimi. Dja bedda wanjh bindibom, dja ngudda ngurrbenmarnedulckname mandulmak kaddumkah kore kabirrihkukyo.

⁴⁹ Wanjh kunmekbekenh kunu God nawu Nadjalmayalimak Duninj yimeng, 'Ngaye kaluk ngabenmarnemunkewe bininj nawu prophet dja mak nawu apostles. Yikahwi kabindibun, yikahwi kabindinjirrhmiwon.'

⁵⁰ Kunmekbekenh kunu ngudda nawu bolckime ngurrimimbi, ngudda God kaluk ngundarrkidjadme ngudberre, kayime ngudda ngurrbenyikarremulewan kunkurlba bedberre rowk bininj nawu prophets, nawu yiman birridedjdjngmey bindibuni bu kerrngehkenh duninj God bolkmarnbom dja munguyh bindibuni.

⁵¹ Yiman bu kerrngehkenh duninj Abel bibom, dja mak birribuyika rowk, dja rerre duninj wanjh Zechariah nawu birribom kore kubulkayh manbu temple altar dja kururrdjamun duninj. Yoh, ngayime ngudberre, bininj nawu bolckime ngurrimimbi, God kaluk ngundjadme ngudberre bu kuhni yiman rerrih ngurrbenbom rowk bininj nawu prophets.

⁵² Kaluk kunrayek duninj ngunmarnebebme ngudberre nawu ngurriwernhburrbun mankarre! Ngudda ngurrikang key nawu karrangmarrhmanghen yiman kunrurrk rerrih ngarre bu bininj kabirriwernhburrburrbekkan God nuye kunwok. Ngudda minj ngurrimimeninj ngudmandeleng, dja mak ngurrbendenghkeyi birribuyika nawu birridjareni birringimeninj."

⁵³ Bu Jesus balhbolkbawoni kumekbe, wanjh bininj nawu bindibukkani mankarre, dja mak nawu Pharisees, wanjh birridedjdjngmey birrinjrrhkeng dja birrihdjaldungi munguyh, dja birridjawahdjawani kunwernkah.

⁵⁴ Birridjareni bu yimankek dukkarrimeninj bu kunwok nuye.

12

Jesus Benbengdayhkeng Dja Mak Benmurrngrayekwong Bininj Nuye

Luke 12:1-12

(Matthew 10:26-33)

¹ Bu kuhni birribalhyimi, wanjh bu birridjalmirndewernkenh duninj bininj birrimirndemornnamerreni birridengemelhmelerreni, wanjh nungka Jesus dedjdjimgmey benmarneyimi werkk bininj nuye nawu benhbukkabukkani, yimeng, "Pharisees wanjh kabirrihdjalkurrehkurren, kunu wanjh yiman manbu kanguklurke buriddi. Ngurrinaharrimen, wardi yuwn ngurriyimerran yiman bedda!

² Dja yehyeng rowk nawu bolkkime kabarrkbuyindi, wanjh rerre kawerrhme kabirrinan, dja nawu bolkkime kawarikkayindi, wanjh rerre bininj kabirriwohburrbun.

³ Kunu wanjh kunwok rowk nawu ngurriwokdi bu kukak, kaluk bininj kabirribekkan kore kabolkwolkayindi, dja nawu ngurringayawkme kore kururk manbu ngudberrekih, kaluk kabirriyolyolme kore birriwern kabirribekkan.

⁴ Dja ngayime ngudberre nawu karridabbolk, yuwn ngurrbenkengeme nawu ngundibun ngundikukkurrme bu kunburrkwi karrowen, dja minj baleh mak kunbuyika ngundimarnekurduyime.

⁵ Dja ngaye yingkih bengdayhke ngudberre bu nangale ngurrikengeme. Ngurrikengemen nawu ngunbun werkk ngunkukkurrme, dja kawohrnan warridj bu ngunkukburriwe kore kubolkwarre hell. Yoh, wanjh ngayawoyhyime ngudberre, namekbe ngurrikengemen.

⁶ Dja ngurriburrbun bu bininj kaweykan five nawu mayhmayh nawu djornhdjorndok, wanjh kabirrikarremulewan kunyahwurd duninj bu kunwardde, bulerri bokenh. Dja God minj kawohbengmidjdan nawohkudji nawu djornhdjorndok.

⁷ Kunu bonj, dja kunkodjmud warridj ngudberre God ngunkodjmu-drohrokmeng rowk. Yuwn ngurrikele, ngudda ngunwernhmarnedjare ngudberre, dja mayhmayh nawern wanjh minj mak kamarnedjare yiman ngudberre.

⁸ Dja mak ngayime ngudberre, birriwern rowk nawu kabirrimulewarren kore bininj kabirriyime bu ngaye ngandiwoybukwon, bedda wanjh ngaye nawu Bininj Duninj kaluk ngabenmulewan kore God nuye angels.

⁹ Dja nawu ngandimarneyakwarren kore bininj, bedda wanjh kaluk ngaye nawu Bininj Duninj ngabenmarneyakwarren kore God nuye angels.

¹⁰ Dja bininj rowk nawu kunwohokudji kunwok kabirriwohyime ngandiyiwirrihime ngaye nawu Bininj Duninj, bedda wanjh God kabenmarnebularrbun. Dja bininj nawu kunwok kunwarre kabirrimarneyime bu kabirriyiwirrihime nawu Namalngmakkaykenh, bedda wanjh God minj kabenmarnebularrbun.

¹¹ Dja bu ngundidorrorrke ngudberre kore synagogue kunurkk yiwarrudijkenh, kaluk kore kumirrk bedberre nawu ngundidjadme dja nawu kabirriwohrnawohrnan, wanjh yuwn ngurrinjlngwarre ngurriyingkih-burrbun bu yimankek kaluk baleh ngurriyime bu ngurrbenmarnekandemerrerren dja mak bu ngurrbenmarneyime.

¹² Dja nungka nawu Namalngmakkaykenh, kaluk wanjh nungka ngundjalbukkan bu baleh ngurrbenmarneyime, kaluk kundjalmekeberrih bu kabolkyime bu ngurriwokdi bedberre wanjh ngunbukkan mandjad duninj."

Jesus Biyolyolmi Nakuken Bininj Nawu Mayaliyak

Luke 12:13-21

13 Kaluk nakudji bininj nawu birrihmirnderri wanjh bidjawam Jesus, yimeng, "Ngudda nawu kanhbukkabukkan ngadberre, yimarneyimen nawu ngaye nganedanginj kalarlmang yehyeng bu Ngabbard nganbeney-ibawong, dja nganwon nawu ngardduk."

14 Dja Jesus bimarneyimeng, "Nawu ngarrdabolk, minj nangale ngankurmeninj ba yimankek ngaye benbenemarnekaremarnbun bu ngalarlmang ngorrewoneng."

15 Wanjh Jesus benmarneyimeng bininj nawu birrihmirnderri, "Wardi ngurriwernhnahnarrimen, yuwn bu njale ngurridjarewernworren. Dja minj kunu bininj kamimbi bu nadjalwern yehyeng kakarrme."

16 Wanjh Jesus benmarneyolyolmeng parable manbu kunwarlkkayken kunwok, yimeng, "Kaluk nakudji bininj nawu nakukenni, nungka bu dudji manme kore kabbal nuye, wanjh mandjalwernkenh duninj manme mangi.

17 Wanjh nungan kanjdjiwi burrbuhburrbuni marneyimerrinj, 'Kaluk baleh ngayime, dja minj ngakarrme kunrurrkkimuk bu ngakarekurrme manme ngardduk?'

18 Wanjh kalukburrk marneyimerrinj, 'A! Ngaburrbom, kuhni wanjh ngakurduyime, ngarurrkkudjjudj mang ngardduk, dja ngarurrkdun-dulubun kunrurrkkikhkimuk, kumekbe wanjh ngakarekurrme manbu manme ngardduk, dja mak yehyeng nawu ngardduk.

19 Wanjh ngayeman ngamarneyimerren, kamak rowk ngakarekarrme nawern ngardduk. Kadjalyo bu mandjewk nawern, wanjh minj ngayawoy-hdurkmirri, ngadjalni, ngangun, ngabongun, dja nganjilngmarnburren bu munguyh.'

20 Dja God bimarneyimeng, 'Yimayaliyak nguddanu, wanjh bolkkime kuninjkuwu kumunun yirrowen. Nangale kaluk kamanamang ke yehyeng nawu yihkarekurmi ke?'

21 Wanjh Jesus burnbom bu yolyolmeng bedberre, yimeng, "Kuhni kumekbe kayimerran nuye nawu nawern yehyeng kahkarekurme yiman kahkukenworren, dja kore God kahnan minj njale kabimarnekareyo, minj nakuken kore God."

Jesus Benmarneyimeng Bininj Nuye Bu God Kabennahn

Luke 12:22-34

(Matthew 6:19-21,25-34)

22 Wanjh Jesus benmarneyimeng bininj nuye nawu benhbukkabukkani, yimeng, "Kunmekbeken kunu ngayime ngudberre, yuwn bu ngurrijilngwarremen nawu manme ngurrihmang bu yimankek ngundarrkidwon. Yuwn bu mak ngurrihnjilngwarremen bu ngurrihmang kunmadj nawu ngurridjongburrenkenh.

23 Dja bu ngurrimimbi wanjh yiman karrokme dja manme rerre karri, dja mak kunburrk yiman karrokme dja kunmadj rerre karri.

24 Dja ngurriburrbu mayhmayh nawu wakwak, bedda minj kabirrim-imdudjeng, dja minj mak kabirridurkmirri bu manme kabirridurndiwe, minj kabirrikarrme kunrurrk kore kabirrikarekurme manme. Dja bedda minj kabirrimarrwe. God kabenwon manme. Dja ngudda wanjh God ngunwernharnedjare ngudberre, dja nawu mayhmayh wanjh nungka kadjalnahn, dja minj kabenmarnedjare yiman ngudha.

25 Kaluk nangale nawu ngurrihni bu kanjilngwarre mak kaburrbun ba yimankek kamarnburren kunkuyeng bu kamimbi?

²⁶ Wanjh bu minj ngurrikarme kundulkarre bu yiman kunmekbe ngurrikurduyime, nawu yiman kunyahwurd, njalekah ngurrinjilngwarre ngurriburrbun yehyeng nawu kunbubuyika?

²⁷ Ngurriburrbu warridj mannguyamak manbu kurralkwaken. Minj karrurkmirri, dja minj mak kamadjbibun, dja ngayime ngudberre, bu King Solomon warridj nawu namakmak duninj karrmihkarmi, dja wanjh manbu mannguy wanjh manwarnhmakkaykenh, dja nungka bu djongbuhdjongburreni wanjh yiman walakkih medjmakkaykenhni.

²⁸ Dja bu God kuhni kayime kamarnbun manmakkaykenh yiman kadjongbun rerrih mannguy manbu karri bolkkime kore kabbal, dja malaywi bininj kabirriburriwe karung kore kunak, wanjh ngudda ngunwarnhnahn nan ngudberre bininj, ngudda nawu walakkih ngurriwoybukwon.

²⁹ Wanjh yuwn munguyh ngurridjaldjare dja ngurridjalyawan bu njale ngurringun dja mak njale ngurribongun, dja yuwn bu kuhni ngurrinjilngwarre.

³⁰ Bininj nawu minj kabirriwoybukwon God nawu Kornkumo ngudberre, wanjh bedda munguyh maninjmanu kabirrirlobmerren bu kabirrihyawan, dja God ngudberre Kornkumo nawu ngudda ngudberre nungka wanjh kaburrbun bu manngale makka manbu ngurrimimbikenh ngudberre.

³¹ Yuwn bu maninjmanu ngurriyawan, dja kunihbu kunbuyika ngurrikurduyimen bu ngurriwarnhyawa bu nungka God ngunmarnewohnanken, dja maninjmanu manbubuyika wanjh ngunwon warridj.

³² Dja yuwn ngurrikele ngudda nawu yiman mayh ngurrimirndeyahwurd, dja Kornkumo ngudberre djareminj bu ngunngimewong ngudberre bu ngurridjarrkwohrnan bu kamarnbuyindan bu nungka Kawoornan rowk.

³³ Mah, wanjh ngurrimadjweyka nawu yehyeng ngurrikarme, dja kunwardde ngurrbenwo nawu birrimarladi. Dja ngurrimarnemarrimen yiman nawu kunwarddekenh ngurrikukdahkendong, nawu minj kakaremen. Ngayime namakmak dorreng kore heaven ngurrima, nawu minj kawohyakmen dja nawu kadjirdmadjirdmang minj kumekbe karrarnhre, dja mak minj mayh kayakwon.

³⁴ Dja bu baleh namakmak ngudberre ngunmarneyo, wanjh kumekbe rerrih kaluk ngudman ngurribolkburrbun ngurridjare ngurrire."

Jesus Benbengdayhkeng Bu Kabirriyingkihukmarnburren Kore Nungka Kamdurdengkenh

Luke 12:35-48

(Matthew 24:45-51)

³⁵ Mak Jesus yimeng bedberre, "Ngudda wanjh ngurriyingkihukmarnburrimen ngurridurkmirrikenh dja ngurriwurlhe ngudberre lamps,

³⁶ dja ngurriyimerran yiman bininj nawu kabirrimadbun nawu kabenmarnewoornan bu kamdurdeng, dja wam kore mulil bu bininj daluk kabenemarren. Kabirrimadbun ba bu kamre karurrdong, wanjh kabirrimanedangmarrhmang bu kundjalburrikudji rerrih.

³⁷ Kabirrinjilngmak birrimekbe bininj nawu kabirrihmarnedurkmirri nuye nawu kabenmarnewoornan, bu nungka kabenggalke kabirridjalwohrnan bu kamdurdeng. Woybukkih ngayime ngudberre, nungka wanjh kadjongburren nawu karrurkmirrikenh dja kabenmarneyime kabirriyerrkan kabirrineyhneykenhdi kabirringunkenh, dja nungka kamre kabenwon manne.

38 Dja bu nungka nawu kawohnan kamdurdeng bu yiman kumnunburrk, dja mak bu djarreh kamhbarrhbn, dja kabengalke kabirridjalwohrnan nawu kabirrihmarnedurrkmirri, wanjh bedda kunu kaluk kabirrinjilngmak.

39 Dja kuhni ngurriburrbu, bu bininj nawu kakarrme kunurrk, bu nungka kaburrbn bu baleh kayime kamre nawu kadjirdmang, wanjh nungka kawohnan ba minj kabimarnerrurkngimen kadjirdmangkenh.

40 Wanjh ngudda ngurriyingkihukmarnburrimen yiman ngurrimadbn rerrih, dja ngaye nawu Bininj Duninj ngamre bu ngudda ngurribekkarren ngurriyime bu minj ngambangmere."

41 Wanjh Peter bidjawam Jesus, yimeng, "Ngudda nawu kamarnewohnan, manih manbu parable manbu kunwarlkaykenh kunwok, yiddok kanmarneyolyolmeng ngadman ngadberre ngarrikudjiwi, dja yiddok bedda dorreng nawu birriwarlahken rowk?"

42 Wanjh Jesus nawu Kawohnan Rowk yimeng, "Mah, dja ngurriburrbu. Bininj nawu kabenkarme birriwern nawu kabirrimarnedurrkmirri nuye, wanjh bu kare waken, kabi djarrngbn nakudji nawu kabimarnedurrkmirri dja kabikurrme ba bu kabennahn birribuyika, dja kabenwon manme dja kabenkukwon mandjad kore kabenmarnekarremulewan bu kunkodjikebuyikakenh. Kaluk nangale bininj nawu nawoybuk dja nadjal-mak bu nawu kawohnan rowk kabi djarrngbn kabikurrme?"

43 Kaluk wanjh kanjilngmak namekbe nawu kunmekbe kakurduyime bu kabimarnedurrkmirri, bu nungan nawu kabenmarnewohnan kamdurdeng kablingalke kunmekbe bu kundjalma kahkurduyime.

44 Wanjh woybukkih ngayime ngudberre, kunu wanjh namekbe kabikurrme kanahn yehyeng rowk nuye nawu kabenmarnewohnan.

45 Dja kunbuyika ngurriburrbn, bu yimankek namekbe nawu kabimarnedurrkmirri bu nungan kanjdjiwi kamarneyimerren, 'Nawu nganmarnewohnan kunkuyeng kani, kunubewu yerreka nuk kamdurdeng.' Kunmekbe kamarneyimerren wanjh karredjdjimgang kabenwidjibhke birribuyika bininj dja daluk nawu kabirrihdurrkmirri, dja mak bu kawernhngun, kawernhbongun kunbang, dja wanjh kamayahme.

46 Wanjh nakimuk bininj nawu kabimarnewohnan kamdurdeng nuye bu nungka minj kabiyingkihmadbn dja warridj minj kaburrbn bu kabolkyime. Kunu wanjh kabibun dja kabikukmunkewe kore kabirridjarrkdi nawu minj God kabirriwoybukwon bininj.

47 Dja namekbe nanu bininj nawu bihmarnedurrkmirri nawu burrbom bu njale djareni nawu kawohnan nuye, dja minj biyingkihmarnebolkmarnbuyi, dja mak minj kurduyimeninj nawu nungka djareni, kaluk namekbe nanu kabiwidjibhke wernkih.

48 Dja bininj nawu minj burrbuyi bu njale djareni nawu kawohnan nuye, bu nungka kurduyimeng nawu kawohnan kawarnyak, wanjh nungka warridj kabiwidjibhke, dja djal walakkih, wanjh namekbe wak-wani wanjh kunu yeledj kabiwidjibhke. Kaluk bininj nawu God kabiwon kunwern wanjh nakka kaluk God kabiwidjawan kunwern warridj. Dja bu God kabikurrme bininj kanahn kunwern, wanjh kaluk nakka God kabiwidjawan kunwern duninj."

Jesus Yolyolmerrinj Bu Nungka Kabenmarnbn Bininj Kabirriyarlar-rmerren

Luke 12:49-53

(Matthew 10:34-36)

⁴⁹ Dja mak Jesus yimeng, “Ngaye ngamwam bu ngaworrhme kunak kondah bu kurorre, dja wanjh ngadjare bu korroko ngaye ngaworrhmeninj dja karung!

⁵⁰ Dja ngayembu ngamadnun bu yiman ngakukduhme rerrih bu ngakanjkurmerren. Dja ngakangewarre duninj bu ngamadnun kamarnbuyindan.

⁵¹ Yiddok ngurriyime bu yimankek ngamwam won ngudberre kunmodmikenh, ba kamak ngurrini kondah bu kurorre? Burrkyak, ngayime ngudberre, minj kunmodmikenh won ngudberre dja ngabenmarnbun bininj kabirriyarlarmerren kabirribebbehre.

⁵² Kunmekbe wanjh kaluk kakurduyimerran bu yiman five nawu birrimud kabirridjarrkni, wanjh kabirriyarlarmerren, bedman bokenh kabene bebbebeh, dja bedman danjbik.

⁵³ Yiman kuhni mak kabirriyarlarmerren, nawu kornkumo beywurd kabenebebbehre, ngalbadjan ngalyaw kabenebebbehre, dja ngalbinjmorne kabenebebbehre.”

Jesus yimeng, “Bu ngurrihnan nawu kurorrewaken, wardi minj ngurri-nan nawu God nuye.”

Luke 12:54-56

(Matthew 16:2-3)

⁵⁴ Kuhni warridj Jesus benmarneyimeng nawu birrimirndewern, “Bu ngurrinan kangolmarnburren bu karrikad, wanjh kunmekbe rerrih ngurriyime ‘Mandjewk kamre,’ dja kunmekbe kakurduyimerran.

⁵⁵ Dja bu ngurrinan kunmayorrk kamre bu walembeh, wanjh ngurriyime, ‘Kaluk karrungbangmen’, wanjh kunmekbe kakurduyimerran.

⁵⁶ Ngudda wanjh ngurrihdjalkurren. Ngudda bu ngurrinan kunrorrekenh dja mak kunngolkenh, dja ngurriburrbun bu baleh kakurduyimerran. Kaluk njalekah yimankek minj ngurrinan bu God bolkkime hakkurduyime, dja mak minj ngurriburrbun bu baleh kakurduyimerran?”

Jesus yimeng, “Ngunewokmarnburren nawu ngunwelengname.”

Luke 12:57-59

(Matthew 5:25-26)

⁵⁷ Dja mak Jesus yimeng, “Njalekah minj ngudman ngurridjadmerren bu kunmak ngurrikurduyime?

⁵⁸ Dja kuhni yina kayime, bu nawu ngunwelengname ngunedjarrkre kore bininj nawu ngundjadmekenh, wanjh bu ngunebalhre, yikebbabi yidjawan munguyh ba ngunewokmarnburren, ba marndi minj ngundorrorre kore nawu ngunwernhdjadme, dja nunganwali ngunbidkenwon kore nawu ngunkukburriwe kore prison, dja nunganwali ngundangbalhme.

⁵⁹ Ngayime ke, ngudda yidjaldangbalhmiyindi munguyh, minj yibangmebebme, dja yidjalwernhkarremulewan rowk werrek yirrundiwe, kunukka wanjh yibebme.”

13

Jesus Benbengdayhkeng Bu Kabirriwarnyakmulewarren Dja Kabirribawun Kunwarre

Luke 13:1-5

¹ Wanjh kunmekbe rerrih bu Jesus benmarneyolyolmi, yikahwi birridjarrkni nawu bindimulewam bininj nawu birrikang Galilee, nawu Pilate benbom bu mayh birribuni birrikinjeji God nuye bu birridi yiwarrudj dorreng, wanjh kunkurlba bedberre Pilate kurlbarawang kore mayh kunkurlba.

² Wanjh Jesus benmarneyimeng, “Bu kuhni kunwarre benmarnekurduyimerranj birrimekbe bininj nawu birrikang Galilee, yiddok kunu ngudda ngurriyime bu yimanek bedda bulkkidj birriyimi kunwarre, dja bindiyurhkeng birribuyika nawu birredbo kore kunwarre bedberre?”

³ Djal burrkyak ngayime ngudberre! Dja bu ngudda minj ngurribawon kunwarre ngudberre bu ngurrihyime, dja ngurriborledme kore God, wanjh ngurriwern rowk warridj ngurridowen.

⁴ Dja mak ngurriburrbun nawu eighteen bininj nawu birridoweng bu rurrkmankarrinj benngerrehmeng manbu manrurrkkuyeng kore Siloam. Yiddok ngudda ngurriyime bu yimanek bedda bulkkidj birriyimi kunwarre, dja bindiyurhkeng kore kunwarre nawu birribuyika rowk nawu birridjarrkni Jerusalem?

⁵ Djal burrkyak, ngayime ngudberre! Dja bu ngudda minj ngurribawon kunwarre ngudberre, ngurriborledme kore God, wanjh ngudda warridj ngurridowen, ngurriwern rowk.”

Jesus Yolyolmeng Manbu Manwarre Kundulk

Luke 13:6-9

⁶ Wanjh Jesus benmarneyolyolmeng maninjmanu parable manbu kunwarlkkaykenh kunwok, yimeng, “Kaluk nakudji bininj dulkdudji manbu yiman manmanawarn, kore dulkmirnderri mandulkbubuyika manbu kakarme manme. Wanjh kaluk namekbe bininj nawu nuye kabbal kumwam yawam manme kore manmekbe yiman manmanawarn, dja minj ngalkemeninj.

⁷ Wanjh bimarneyimeng nawu dulknahnani, ‘Kanbekka, marneyime, bu mandjewk danjbik ngaye ngamhrey ngahyawani manme kore maninjmanu yiman manmanawarn, dja minj ngangalkemeninj. Wanjh yirrukdjobkemen, dja wardi kabolkmang rowk mandulkmak bu djalburudjang.’

⁸ Wanjh bininj nawu dulknahnani yimeng, ‘Ngudda nawu yiwohrnan, yidjalbawo bu kuninjkuu mandjewk warridj, ba ngawernhbolkkarung, dja mak ngakurrmekurme mayh nuye kurdduk.

⁹ Dja bu kaluk rerrih manme karrangen bu mandjewkbuyika, kunu kamak, dja bu burrkyak, wanjh kanmarneyime ngarrulkdjobke.’ ”

Jesus Bimarnbom Daluk Ngalbu Bodmemurrngbarli

Luke 13:10-17

¹⁰ Kaluk bu kunbarnangarra manbu Sabbath, Jesus benbukkabukkani kore manrurrkkudji synagogue manbu kunrurrk yiwarrudjkenh.

¹¹ Kaluk kunmekbe ni daluk ngalbu downeni, namalngwarre bikarrmi bu mandjewk eighteen, wanjh bodmemurrngbarlini duninj, dja minj baleh yimeninj bu yimanek dangimeninj mandjad.

¹² Wanjh Jesus bu binang bikayhmeng bu kumwam kore kumirr kbedberre, dja bimarneyimeng, “Ngudda ngalbu daluk, ngungehkheng kore nawu ngunhbongkarrmi yihdowneni.”

¹³ Wanjh Jesus bidkurrmerrinj kore ngaleng wanjh kundjalburrikudjiwerrih rerrih bodmemurrngyirriyonginj, dja kamak rowk danginj dja biburlumi God.

¹⁴ Dja bininj nawu rurrknahnani kore synagogue, nungka yiddungi bu Jesus bimarnbom kore Sabbath kunbarnangarra seventh, wanjh benmarnerayekwong nawu birrimirnderri, yimeng, “Bu six kunbarnangarra kakarreyo ngurridurkmirrin, wanjh kunmekbewi kunbarnangarra ngurrimray kabenmarnbun bininj, dja yuwn kabenmarnbun bu kunbarnangarra seventh manbu Sabbath.”

¹⁵ Wanjh Jesus nawu Kawohrnan Rowk biwokmey, yimeng, “Ngudda ngurrihdjalkurren, dja bu Sabbath kunbarnangarra yarrkka, ngudda rowk wanjh ngurriyerrkke mayh ngudberre nawu bulikki dja mak donkey, ngurriyerrkke kore kabongdi, dja ngurrikan ba kukku kabongun.

¹⁶ Dja ngalinjgalu daluk ngalbu ngaleng dorreng Abraham Mawah djarrkkadberre, dja Satan nawu Namarnde Duninj yiman bibongkarrmi rerrih bu kunkuyeng eighteen mandjewk, yiddok minj ngurriyime bu kadjalmak bu ngayerrkkeng kore bongdihbongdi kore kunbarnangarra Sabbath?”

¹⁷ Bu kunmekbe yimeng wanjh birriwern rowk nawu birriwidnani Jesus wanjh benyemikang, dja nawu birrimirndewern bininj birriwarnmakni rowk bu kunwern kunmakmak Jesus kurduhkurduyimi.

Jesus Benbukkabukkang Bu God Kawohrnan Rowkkeh

Luke 13:18-21

(Matthew 13:31-33; Mark 4:30-32)

¹⁸ Wanjh mak Jesus yimeng, “Kaluk njale yiman karohrok bu kamarn-buyindan bu God Kawohrnan rowk? Kaluk njale ngayolyolme ba bu ngurriburrbun?

¹⁹ Wanjh bu kamarnbuyindan bu God Kawohrnan rowk wanjh yiman karohrok rerrih manmimyahwurd duninj kangeyyo mustard, manbu bininj mimmey mimburrriweng kore kabbal nuye, wanjh manmekbe mannim djordminj, yimerranj kundulk dja nawu mayhmayh birrired-marnbuni kore manyenhyende.”

²⁰ Dja Jesus yawoyhyimeng, “Kaluk njale ngayolyolme nawu yiman kamulewan bu kamarnbuyindan bu God Kawohrnan rowk?

²¹ Wanjh yiman karohrok rerrih mangguklurlmikenh manbu daluk mey dja mankimuk kandidjdjawa rawong, dja bawong, kaluk nguklurlkeng rowk.”

Jesus yimeng, “Ngurringimen kore kururkdangmayedjokkoh.”

Luke 13:22-30

(Matthew 7:13-14,21-23)

²² Jesus djahdjalley kore Jerusalem, dja bu kumekbe rey, wanjh regehrey kore kubolkkikhkimuk dja mak kubolkyahwuyahwurd dja benhbukkabukkani warridj.

²³ Kaluk nakudji bininj bimarneyimeng, “Ngudda nawu Yiwohrnan, yiddok nawu God kabennegehke wanjh djal birrimirndeyahwurd bininj?” Wanjh Jesus benmarneyimeng,

²⁴ “Ngurriwernhrohrokmen ba ngurringimen kore kururkdangmayed-jokkoh, dja ngayime ngudberre, birrimirndewern kabirribolkyawan ba kabirringimen, dja minj baleh kabirribolkgalke bu kabirringimen.

²⁵ Dja bu bininj nawu nuye kunrurrk bu karrolkkan karrangbalhme, wanjh ngudda ngurridedjdjingmang ngurridi kuberrkkah ngurriurrrk-dongohdong, wanjh ngurriyime, ‘Ngudda nawu Yiwohrnan ngadberre, kanmarnedangmarrhma ngadberre!’ Wanjh nungka ngunwokmang ngudberre, kayime, ‘Ngawakwan bu balehbeh ngudda ngurrimdolkang.’

²⁶ Kunu wanjh ngurridedjdjingmang ngurriyime, ‘Aba! Ngad karrid-jarrknguni dja karridjarrkbonguni, dja warridj ngudda kanbukkabukkani kore kunbolk ngadberre.’

²⁷ Dja nungka kayime ngudberre, ‘Ngayime ngudberre, ngaye minj ngaburrbun bu balehbeh ngurrimdolkang. Wanjh kandibawo ngudda rowk nawu ngurridurrkmirri kunwarrekeh.’

²⁸ Kumekbe wanjh ngurrinalkbun dja mak ngurriydmebayerren bu ngurrbennan Abraham, Isaac, Jacob, dja prophets rowk kore kabirridjar-rkni kore God Kawohrnan rowk, dja nguddabu kuberrkkah ngurridi bu ngunkukburriwe.

²⁹ Dja bininj birriwern kabirrimdolkkarren kore koyekbeh, karrikadbeh, kakkibeh dja mak walembeh, bu kabirrimre kabirringun mulil manmak-mak kore God Kawohrnan rowk.

³⁰ Dja kandibekka, marneyime ngudberre, yikahwi nawu bolkkime rerre kabirrihni wanjh kaluk bedda yiman kabirridokme, dja yikahwi nawu bolkkime kabirrihdokme wanjh kaluk bedda yiman rerre kabirriini."

Jesus Yolyolmerrinj Bu Ngokko Darnkih Kangimen Kore Jerusalem

Luke 13:31-35

(Matthew 23:37-39)

³¹ Wanjh kundjalmekbe rerrih bu Jesus yakwong bu benhmarneyimi, wanjh yikahwi Pharisees birrimwam dja birrimarneyimeng Jesus, "Wardi konhda yibolkbawo, dja yidjallay, dja King Herod kadjare ngunbun yirrowen."

³² Wanjh Jesus benmarneyimeng, "Ngurriray kandiwokmulewa namekbe king nawu yiman dalkken rerrih nawu kawernhkurren, wanjh ngurriyimen, bu ngaye ngayime nuye, 'Kanbekka, marneyime, bolkkime dja mak malaywi ngaye wanjh ngabenbekke ngabenmunkewe nawu namarnde nawern, dja mak bininj ngabenmarbun, dja bu malaywibuyika wanjh ngayakwon kore ngadjare ngakurduyime.

³³ Kunu bonj, dja ngadjalle bu bolkkime, dja malaywi dja mak malaywibuyika, dja wanjh kakarrewarre bu yimanek bininj nawu prophet bu kabirribun kubolkbuyika, dja kubolkkudji Jerusalem kabirribun."

³⁴ Wanjh kunu Jesus yiman rerrih benmarneyimeng bedberre nawu Jerusalem birrihni, yimeng, "Ngudda nawu ngurrihni Jerusalem, nawu ngurrbenbun ngurrbenkukkurrme prophet, dja ngurrbendong kunnwardde ngurrbenkukkurrme bininj nawu God kabenmunkewe ngudberre. Kunwernhkah wanjh ngaye ngadjareni bulkkidj mirndemornnameninj ngudberre, yiman bu mayhmayh ngalbadjan kabenmirndemornname yaw ngalengngarre kabenn gimowon kanjdji medjek kabenbarrkbun. Dja ngudda minj ngurridjareniwirrinj.

³⁵ Kandibekka, marneyime ngudberre, God wanjh yiman ngunbawong ngudberre bu ngudman yimanek ngurrinahnarren nungka yak, dja balwam ngunbawon. Dja mak ngayime ngudberre, ngudda minj kandiya-woyhnan dja med, kaluk kandinan bu ngurriyime, 'Karriburlumen nungka nawu kamre nawu Kawohrnan Rowk bimmunkeweng.'" [Psalm 118:26]

14

Jesus Bimarnbom Bininj Bu Kunbarnangarra Sabbath

Luke 14:1-6

¹ Kaluk kunkudjihkenh bu kunbarnangarra Sabbath, Jesus wam kangun kore kunrurrk nuye nakudji nawu nangeykimuk Pharisee. Wanjh bedda nawu kumekbe birrihni birriwernhnani kore njale Jesus kurduyimeninj.

² Kaluk kumekbe ni, kore kumirrk nuye, nakudji bininj nawu kundjak karrmi kuklukukurlmeng.

³ Wanjh Jesus wokdanj yimeng bedberre nawu Pharisees dja bininj nawu bindibukkabukkani mankarre, wanjh yimeng bedberre, "Baleh mankarre

kakarreyime Sabbath ngarre? Yiddok kunmak bu karrimarnbun bininj bu kunbarnangarra Sabbath, dja nuk burrkyak?"

⁴ Dja bedda wanjh birriwoyakni, minj baleh birriyimeninj. Wanjh Jesus bimey namekbe nawu downi dja bimarnbom, wanjh bimunkeweng.

⁵ Dja benmarneyimeng nawu birrihni, "Ngudda yimankek bu kunbarnangarra Sabbath dja beywurd ngudberre kawohmankan, dja mak bulikki kamankan kore kungad, wanjh minj nuk kunburrikudji rerrih ngurriwayhke bu Sabbath?"

⁶ Dja bedda minj baleh birriyimeninj birriwokmayi, birriwoyawarrinj.

Jesus Benbukkabukkang Bu Kabirriburlumerrenkenh

Luke 14:7-14

⁷ Wanjh bu Jesus bennang nawu namekbe nawu wohrnani benyingkihkhaymeng kabirringun, bu Jesus bennang bu birrihbolkdjarrngbuni kubolkkuken, wanjh nungka benmarneyolyolmeng, yimeng bedberre,

⁸ "Yarrkka bu bininj nguningkihkhayhme yimre mulil ngurringun bu bininj daluk kabenamarren, wanjh yuwn yiyerrkan kore kuwernholkkuken, wardi bininj nawu nawernhkuken nungka warridj kunubewu biyingkihkhaymeng.

⁹ Dja nawu ngunbenekayhmeng ngorrewoneng, kaluk kamre ngunmarneyime, 'Ngudda yibolkwo nanih nawu bininj.' Wanjh kunu ngudda yiyemidolkan yire yiyerrkan bu yiman rerre duninj.

¹⁰ Dja kuhni yina kayime bu bininj nguningkihkhayhme yimre ngurringun, wanjh yiray yiyerrkan kore yiman rerre duninj, ba bu nungka nawu ngunkayhmeng bu kamre wanjh ngunmarneyime, 'Ngarrdabolk, yiray kunukka kubolkkuken.' Wanjh kunu ngunkukenwon kore kumirrk bedberre nawu ngurridjarrkni ngurridjarrkngun.

¹¹ Kaluk birriwern rowk nawu kabirrikukenworren, wanjh God kabenmarladjwon, dja nawu kabirrimarladjworren, God kabenkukenwon."

¹² Wanjh mak Jesus yimeng nuye bininj nawu bikayhmeng kabirringun, yimeng, "Bu ngudda yimarnbun mulil bu barnangarra dja mak kukak, yuwn yibenkayhme nawu ngurridabolk, ngurridanginj, ngurrimud, dja mak nawu birrikuken nawu ngundidarnhmarneni. Wardi bedmanwali ngundikayhme, wanjh kunu yiman rerrih ngundikarremulewan.

¹³⁻¹⁴ Dja bu yimarnbun mulil, yibenkayhmen nawu birrimarladj, dja nawu birribirl, birriburriwarre, dja birrimimbunje, wanjh bedda minj baleh kabirriyime bu yiman ngundikarremulewan, wanjh kunu yinjilngmak, God ngunkarremulewan kore kabolkyime bu bininj nawu birrimak kabirridolkan kumidjbeh."

Jesus Yolyolmeng Bu God Kanyingkihkhaymeng Kore Mulil Mankimuk Nuye

Luke 14:15-24

(Matthew 22:1-10)

¹⁵ Wanjh bu kunmekbe bekkang nakudji nawu birridjarrknguni, wanjh bimarneyimeng Jesus, yimeng, "Kabirriwernhnjilngmak bininj nawu kabirringun manne manbu mulil kore God Kawohrn rowk."

¹⁶ Wanjh Jesus bimarneyimeng, "Kunkudjihkenh bininj marnbuhmarnbuni mulil mankimukkenh, wanjh benyingkihkhaymeng birriwern kaluk kabirrimre kabirringun.

¹⁷ Dja bu kunwam ngarre mulil birringuyi, wanjh nungka bimunkeweng bininj nuye nawu bihmarnedurrkmirri, benmarneyimi nawu benyingkihkhayhmeng, 'Ngurrimray, dja ngokko mulil marnbuyindanj ngurringun.'

18 Dja bedda kunkudjiwi birriwokwoni nawu benkimangi, birriyimi bu njalekenh minj kabirrimre. Nawu werrek bimarnebebmeng, yimeng, 'Ngaye ngakarremulewam bu ngabolkmey kabbal, dja ngadjalle ngabolkan, wanjh kunu yimarneyimen, bonj kanbawon bu minj ngamre.'

19 Dja nabuyika yimeng, 'Ngaye ngabayahmeng ten bulikki nawu bokenhbokenh kabenedororrke kundulk kabolkkarungkenh, wanjh ngare ngabenrohrokme, wanjh kunu yimarneyimen, bonj dja kanbawon bu minj ngamre.'

20 Dja nabuyika yimeng, 'Ngaye nganemarrinj daluk, wanjh kunu kakarrewarre, minj ngamre.'

21 Wanjh namekbe nawu bihmarnedurrkmirri kumwam kore nawu bimarnewohnani, dja kunmekbe rowk bimarnewulewam. Wanjh namekbe nawu marnbom mulil, wanjh yidduy, dja bimarneyimeng nawu bihmarne-durrkmirri, 'Yiray werkkwerkk kore manbolh manbu mankihkimuk dja mak manyahwuyahwurd kore kondanj kunu kubolkkimuk, dja yibenmang binihbininj nawu birrimarlaj, birribirl, birrimimbunje, dja mak nawu birriburriwarre, dja yibenngimowon kondah.'

22 Wanjh kaluk bu bedda benmey, wanjh namekbe nawu bihmarnedurrkmirri yimeng, 'Ngudda nawu kanmarnewohnan, ngabenkimey rowk bu ngudda kanmarneyimeng, wanjh minj birribolkmayi rowk.'

23 Wanjh nawu wohrnani bimarneyimeng nawu bihmarnedurrkmirri, 'Yiray, yibolkbawon kubolkkimuk, dja yibenmarneyime bininj nawu kabirriini djarreh kore manbolhbubuyika, dja mak kurralk kore kabirrid-jurlewan, yibenwokrayekwon birrimray, ba kabirringimen kabirribarlme kore kunrurrk ngardduk.

24 Dja ngayime ngudberre, birrimekbe nawu ngabenyingkihkhaymeng wanjh minj bedda kabirrimanjbekkan manbu manme kore mulil ngardduk.' "

Jesus Benbengdayhkeng Bininj Nawu Birridjareni Birrimunkekadjuji

Luke 14:25-33

(Matthew 10:37-38)

25 Wanjh birrimirndewern duninj birridjarrkrey Jesus, wanjh nungka borledmeng bedberre dja benmarneyimeng,

26 "Bininj nawu kamre kore ngaye, wanjh yiman benwidna rerrih nawu nungan nuye kornkumo, ngalbadjan, ngalbininj kobeng, wurdwurd, dja mak nawu birridangerrinj nuye, dja mak nungan naweleng yiman kanjwidnarrimen, dja ngaye werkk nganmarnedjarenin. Dja bu minj kunmekbe kakurduyime, wanjh minj kayimerran bininj ngardduk nawu ngabukkabukkan, dja kakarrewarre.

27 Kaluk bininj nawu minj karrulngorrrkan nungan nuye kundulk cross, kore yiman kakanjkurrmerren rerrih, dja mak minj ngaye nganmunkekadjung, wanjh namekbe nanu minj kayimerran bininj ngardduk nawu ngabukkabukkan, dja kakarrewarre.

28 Dja bu yimankek nakudji nawu ngurrihmirnderri kadjare karurrkname manurrkkuyeng kabolknanken djarreh, wanjh ngurriburrbun bu namekbe bininj kayerrkan werkk karohrokme bu baleh kayime kakarremulewan, ba kanan bu kakukkarrme rowk karurrknamekenh karurrkyakwon rowk.

29 Wardi bu minj kayingkihrohrokme, wanjh bu kaname manbu kanjdji karurrkayekwon wanjh kayawarren, minj kayakwon bu karurrkname, wanjh birriwern rowk nawu kabirrinan, bedda wanjh kabirridedjdjing-mang kabirridjekmiwon,

³⁰ kabirriyime, 'Nanih nawu bininj dedjdjngmey bu rurrknameninj dja yawarrinj, minj yakwoyi.'

³¹ Dja mak king nawu kabenmarnewohrnan bininj, bu yimankek kare kabirrabke nabuyika king nawu kabenmarnewohrnan birrimirndebuyika bininj nawu kabirrimre kabindibunkenh. Wanjh ngurriburrbun bu namekbe king kayerrkan werrek, kadjawarren kabekkarren bu yimankek nungka nuye bininj nawu ten thousand, kabirrikarrme kundulkarre kabindibun nabuyika king nuye nawu twenty thousand bininj, nawu kabirrimre kabindibunkenh.

³² Dja bu kabekkarren kakarrewarre, wanjh namekbe king kabenmunkewe yikahwi nawu nuye bininj, kabirridabke nabuyika king bu nungka djarreh kamhdi, dja birrikebbabi kabirridjawan nungka kakarremarnbun ba minj kabirriburren, dja kabirriini kamak rowk.

³³ Wanjh kadjalrohrok, bu nangale bininj kadjare ngaye nganmunkekadjung, wanjh bawo yehyeng rowk nuye bu kakarrme. Dja bu burrkyak, wanjh nungka minj kayimerran bininj ngardduk nawu ngabukkabukkan, dja kakarrewarre."

Jesus Yolyolmeng Bininj Yiman Manbu Djirla Manjyakminj

Luke 14:34-35

(Matthew 5:13; Mark 9:50)

³⁴ "Dja ngurriburrbun bu djirla wanjh kamak, dja bu kamanjyakmen, baleh kaluk yimankek kayawoyhmanjmarburren?"

³⁵ Dja kunu wanjh warreminj, minj bininj kabirrikurrme kore kunkulk kabolkmarbunkenh, dja minj mak kabirrirawon mayh kurdduk manbu kabolkmarbun. Bonj wanjh warreminj, kabirridjalburriwe. Bu ngurrikarrme kunkanem ngurribekkankenh, wanjh kandibekka."

15

Jesus Yolyolmeng Bu God Kabenyawan Bininj

Luke 15:1-7

(Matthew 18:12-14)

¹ Kunkudjihkenh birriwern bininj birrimiyakang Jesus dja birrimirnderri kore nungka bu kabirribekkan benhmarneyolyolmi. Bedda yiman birriwarre bininj, dja nawu tax kunwardde birrimangi.

² Kunmekbekenh kunu kaluk nawu Pharisee dja mak bininj nawu bindibukkabukkani mankarre, bedda wanjh birriwokihihnlunlunlukmi, birriyimeng, "Nahni bininj kabenhkimang birriwarre bininj, dja mak kabirridjarrkngun."

³ Wanjh kunu Jesus benmarneyolyolmeng manih parable manbu kunwarlkkayken kunwok, yimeng,

⁴ "Ngudda nawu ngurrihmirnderri, yimankek bu nakudji ngudberre kakarrme namirndewern mayh kangeyyo sheep, dja bu nakudji mayh kakubngwabun. Yiddok minj nahni bininj kabenmirndebawon nawu birriwern 99 sheep kore kabirridalkngun, dja nungka kare kayawan nadjalkudji mayh nawu kukbngwabom? Yoh. Woybukkih. Kadjalyawan munguyh dja kalukburrk kangalke.

⁵ Kaluk bu kangalke, wanjh kakuniwarnmakmen, dja kangormang kukarlang nuye.

⁶ Dja kangorran kuredwi. Wanjh bu kabebme kured, kabenkayhme nawu nuye birridabbolk dja nawu kabirriredbo bu kabirrimornamerren dja wanjh kakuniyime, 'Karridjarrkwarnmaknin, dja ngangalkeng sheep ngardduk nawu kukbngwabom.' "

⁷ Wanjh Jesus benmarneyimeng, “Wanjh yiman kunmekbe rerrih ngayime ngudberre, God nawu heaven kahni dja kumekbe rowk kahkarrme, wanjh kabirriwarnmakmen duninj bu nakudji nawu nawarre bininj kabawon nuye kunwarre, dja kaborledme kore God. Dja nawu birribuyika birridjalmak nawu yiman ninety nine bininj, nawu yimankek ngokkokenh birrimak, nanu wanjh bonj.”

Jesus Biyolyolmeng God Nawu Kabengalke Bininj

Luke 15:8-10

⁸ Wanjh Jesus yawoyhyolyolmeng, yimeng, “Dja mak bu daluk yimankek kakarrme ten kunwardde nawu namakmak silver, dja kawarrhke nakudji. Yiddok minj nuk kawurhke kamang lamp bu kakan dja kawernhyawan, kabolkbirrhmeh, kadjalyawan, kadjalyawan, kalukburrk kangalke?”

⁹ Bu kangalke, wanjh kabenkayhme nawu birridabbolk dja nawu birriredbo, kakuniyime, ‘Karridjarrkwarnmaknin, dja ngangalkeng kunwardde ngardduk nawu ngawarrhkeng.’ ”

¹⁰ Wanjh Jesus yimeng, “Wanjh yiman kunmekbe rerrih, ngayime ngudberre, God nuye angels wanjh kabirriwarnmakmen bu nakudji nawu nawarre kabawon nuye kunwarre dja kakarreborledme kore God.”

Jesus Benbeneyolyolmeng Beywurd Bokenh Nuye Nawu Benbenemarned-jareminj

Luke 15:11-32

¹¹ Mak Jesus yawoyhyolyolmeng, yimeng, “Nakudji bininj ni nawu benbenekarrmi bebeywurd bokenh.

¹² Wanjh nawu nawalawalak bimarneyimeng kornkumo, ‘Ngabba, yilarlma rowk nawu yehyeng yihkarrme ngarrewoneng, dja kanwo rowk nawu ngayeman ngardduk.’ Wanjh kornkumo berrewoneng larlmey rowk nawu karmihkarrmi, benbenebebbhwong.

¹³ Wanjh yonginj nawu nawalawalak, wanjh mey yehyeng rowk nawu nuye, dja dolkkang wam djarreh kore birridjenbubuyika bininj, wanjh kumekbe djalkukwarrehwarrewong duninj kunwardde nuye bu kund-jarekenh kurduyimi.

¹⁴ Kaluk bu kunwardde nuye yakminj rowk, wanjh djewkwarrewong duninj kumekbe kunred kore nungka ni, dja wanjh manme yakminj. Wanjh namekbe bininj kaluk dedjdjingmey yawahyawarreni.

¹⁵ Wanjh kunu nungka wam kore nakudji bininj nawu nakang kumekbe kunred bibelbmeng bu bimarnedurrkmirri, dja nungka bimunkeweng kore kabbal nuye, bu manme kabenwon bik nuye.

¹⁶ Kaluk namekbe bininj wurrmangi djareni nguyi worrkmeninj manme manwerkk manbu bik birrihnguni, dja minj nangale bininj birriwoyi njale bu nguyi.”

¹⁷ “Wanjh kalukburrk bengdayhmeng burrbobhburrbom, marneyimerinjin, ‘Nawu Ngabbard kabenhkarrme bininj birrimirndewern kabirrih-marnedurrkmirri, minj kabirrimarrwedowen, manwern manme kabirrihkarrme, minj nuk kabirringun kabirriyakwon, dja manwern duninj, dja ngaye konhda ngokko darnkih ngarrowen kunmarrwe.

¹⁸ Wanjh ngarrolkkan ngare kore Ngabbard, ngamarneyime, “Ngabba, ngaye kunwarre ngayimeng nuye God, dja mak ngudda warridj ngayimeng ke kunwarre,

¹⁹ ngaye wanjh bonj ngawarreminj, minj ngamak bu ngudda kanmarneyime beywurd ke, dja kanmarnbu yiman nawu ngundihmarnedurrkmirri.” ” ”

20 “Wanjh bu kunmekbe marneyimerrinj, namekbe bininj wanjh dolkkang balhdurdengi kore kornkumo nuye. Dja bu djarreh kumhrey kumhbebmi kured, kornkumo nuye bolknahbolknani dja binang kamhre, wanjh bikongibom, llobmeng, birrabkeng bimey, berlwakbom biwanjbimey dja bibunjhmej.

21 Wanjh nawu beywurd bimarneyimeng kornkumo, ‘Ngabba, ngaye kunwarre ngayimeng nuye God, dja mak ngudda warridj ngayimeng ke kunwarre. Ngaye wanjh bonj, ngawarreminj, minj ngamak bu ngudda kanmarneyime beywurd ke.’

22 Dja nawu kornkumo benmarneyimeng bininj nawu birrihmarnedurrkmirri, ‘Werrkwerrk ngurrimka manburra namak duninj ngurridjongbu, dja kunbidkenh ngurrimamen, dja kundengekenh ngurridengedjongbu.

23 Dja ngurriray ngurrimang nawu djurddudjurdduh bulikki yaw, ngurribu wanjh karringun mulil manbu karrinjilngmarnburren.

24 Kaluk nahnin nawu beywurd ngardduk yiman doweng rerrih dja bolkkime darrkidbebmeng, nungka kukbengwabom dja bolkkime kumngalmeng!’ Wanjh birridedjdjimgemey bu birrihngmarnburreni.

25 Kaluk nawu nabeywurd nabuyika nawu nawernwarre wanjh djaldurrkmihdurrkmirri kore kabbal, kaluk bu kumhdurdengi, kumhbebmi darnkih kured, bekkang kabirrihwayini kabirrihborrke.

26 Wanjh bikayhmeng nakudji nawu bihmarnedurrkmirri kornkumo, bidjawam, ‘Njale konhda kabirrihmang?’

27 Wanjh bimarneyimeng, ‘Nawu ngudda ngunedanginj kumdurndi, wanjh kornkumo ke bom djurddudjurdduh bulikki yaw, bu nungka kumdurndi kamak rowk.’

28 Wanjh nawu nawernwarre wanjh yidduy, birrahmeng minj mak balngimeninj. Wanjh kornkumo kumbemeng bimarneyolyolmeng, bimarrkdjawam yimankek bikangeborledkemeninj.

29 Dja namekbe nawu nawernwarre yimeng, ‘Yina, ngaye ngarrurrkmirranj ke mandjewk dja mandjewk, munguyh ngarrurrkmirri ke, dja ngaye minj wokwemeninj bu ngudda kanhwokrayekwoni. Dja minj ngudda kunkudjihkenh kanwoyi mayh nawu goat yaw bu ngabuyi ngadberre nawu ngarridabbolk ngarrinjilngmarnburrimeninj.

30 Dja nahnin nawu beywurd ke warrehwarrewong kunwardde ke, benhwoni daluk nawu kabirrikukweykaweykarren, wanjh bu kumdurndi djurddudjurdduh bulikki yaw yimarnebom.’

31 Wanjh kornkumo bimarneyimeng, ‘Korlonj, ngudda munguyh ngarrhdjarrkni, dja yehyeng rowk nawu ngaye ngakarrme nanu wanjh ngudda ke rowk.

32 Dja kuhni kundjalmak bu ngarrinjilngmarnburreni dja ngarriwarnmaknin duninj, dja nahnin nawu ngunedanginj wanjh yiman doweng rerrih, dja darrkidbebmeng, nungka kukbengwabom dja kumngalmeng.’⁹⁷

16

Jesus Kanbengdayhke Bu Karriwernhburrbun Kunkodjukludjad Dor-reng

Luke 16:1-12

1 Mak Jesus benmarneyolyolmeng bininj nuye nawu benhbukkabukkani, yimeng, “Nakudji bininj ni nawu nakukenni, dja nungka bikarrmi nakudji nawu bimarnedurrkmirri, bihmarnenahnani nuye yehyeng. Wanjh yikahwi bininj birrimarneyimeng nawu nakukenni,

birriyimeng, 'Bininj nawu ngunharnedurrkmirri, nakka wanjh kahkukwarrehwarrewon ngudda ke nawu yihkarrme.'

² Wanjh namekbe nawu nakukenni bikayhmeng nawu bihmarnedurrkmirri, dja bimarneyimeng, 'Njale kuhni ngahbekkan bu ngundihmulewan? Kanbukka rowk kore yihbimbuni bu kunwardde yihrohrokmi ngardduk, dja bonj yiburnbom, minj mak kanmarnedurrkmirri.'

³ Wanjh nahni bininj burrbuni dja marneyimerrinj, 'Kaluk baleh bolkkime ngakurduyime bu nungka nawu nganmarnewohrnan wanjh nganyirurrkmang, dja minj ngayawoyhmarnedurrkmirri? Ngaye minj ngangudjmak bu yimankek ngarrurrkmirri bu ngabolkkarung, dja mak kunyemi bu yimankek ngani ngabenkukydjanwohme kunwardde.'

⁴ A! Ngaburrbom bu baleh ngakurduyime, ba bininj kaluk ngandikimang ngandinahan kururrk bedberre bu ngabawon kore ngarrurrkmirri kondah.'

⁵ Kuhni bu burrbuhburrbuni wanjh benkayhmeng rowk nawu birrikarmi djurra bu birrikarremulewayikenh nawu nakukenni. Wanjh benbebbekayhmeng, dja nakudji nawu bebmeng werrk nungka bimarneyimeng, 'Ngudda kaluk baleh kayime kabimdi yikarremulewan nawu ngaye nganmarnewohrnan?'

⁶ Wanjh nungka yimeng, 'Kaluk ngakarremulewan one hundred djab-birlana kunkalkkid manbu olive oil.' Wanjh nungka yimeng, 'Yima nanih djurra ke dja yiyerrka yibimbu werrkwerrk bu fifty yidjalkarremulewan.'

⁷ Dja mak nabuyikawali bimarneyimeng, 'Dja ngudda kaluk baleh kayime kabimdi yikarremulewan?' Wanjh yimeng, 'Ngaye ngakarremulewan one thousand baladji manmim manbu kangeyyo wheat.' Wanjh bimarneyimeng, 'Yima nawu djurra ke, dja yibimbu eight hundred yidjalkarremulewan.'

⁸ Wanjh nawu nakuken wohburrbom kore nawu bihmarnedurrkmirri kurduyimi, dja wanjh biburlumeng namekbe bininj nawu bihmarnedurrkmirri nawu minj nawoybuk. Wanjh biburlumeng bu nungka yingkihkarremarnbom nungan nuye. Kaluk bininj nawu kabirrihburrbun kurorrekenh, bedda wanjh kabirriwernhburrbun bu kabirriyingkihkarremarnbun bedman bedberre kore bedda bedberre bininj. Dja bininj nawu kabirrihburrbun kore God kabenmarnewolkan, bedda wanjh walakkih kabirrihburrbun kabirriyingkihkarremarnbun bedman bedberre kore bedda bedberre bininj."

⁹ Wanjh Jesus yawoyhyimeng, "Dja ngaye ngayime ngudberre, bu ngurrikukkarrme nawern, wanjh ngurrbenmarnbun bininj nawu kurorrebeh ba ngurridabbolkmen. Kaluk bu money ngudberre kakukyakmen, wanjh ngurrire kore ngundikimang dja ngurriyo munguyh.

¹⁰ Dja bininj nawu nawoybuk nawu kanahan mandjad nawu kunyahwurd duninj, nungka mak nawoybuk bu mandjad kanahan kunkimuk. Dja bininj nawu minj nawoybuk nawu minj mandjad kanahan nawu kunyahwurd duninj, nakka minj mak nawoybuk dja minj mandjad kanahan nawu kunwern.

¹¹ Dja wanjh ngudda bu minj ngurriwoybukniwirrinj bu minj mandjad ngurrinahnayi kunwardde nawu kondah kurorrebeh, kaluk nangale yimankek ngunwoybukwon mak ngunkurrme ngudberre bu ngurrinahnan nawu nadjalmakmak duninj?

¹² Dja bu ngudda minj ngurriwoybukniwirrinj bu minj mandjad ngurrinahnayi nawu minj ngudberrekih, kaluk nangale yimankek ngunwon ngudberre nawu ngudman ngudberrekih?"

Jesus Yolyolmeng Moneykenh

Luke 16:13-15

(Matthew 6:24)

¹³ “Bininj nawu kabimarnedurrkmirri nakudji, wanjh minj mak kabimarnedurrkmirri nabuyika, wanjh kakarrewarre, minj bokenh kabemarnewohnan kabenbenemarnedurrkmirri, kunu wardi kaluk kabiwidnan nakudji dja nawu nabuyika kabimarnedjare. Dja kunbuyika wardi kaluk kabingulkngun nakudji dja nabuyika wanjh kabinjirrhmiwon. Dja wanjh kadjalkarrewarre bu yimankek ngurrimarnedurrkmirri God bu Kawohnan ngudberre, dja mak kunwardde ngurrimarnedurrkmirri bu yiman ngunmarnedokme ngudberre.”

¹⁴ Wanjh Pharisee nawu birridjareni money, bedda wanjh birribekkani rowk bu kuhni Jesus yolyolmeng, wanjh kunu birriwokdjekmiwong dja birrimarnekekwmeng.

¹⁵ Dja Jesus benmarneyimeng, “Ngudda wanjh ngurrimarnburren yimankek ngurrimak kore bininj ngundihnan. Dja God nungka ngunkanganan ngunkangeburrbun ngudberre. Dja njale kore bininj kabirrinan dja kabirriburlume, wanjh bu God kahnna, nungka kadjalwidnan duninj.”

Jesus Yolyolmeng Mankarre God Nuye

Luke 16:16-18

(Matthew 11:12-13)

¹⁶ Mak Jesus yimeng, “Manbu kabimdi kore mankarre dja mak nawu birribimbuni prophet nawu birriwokmulewani God, makka rowk birriwokmarrkmayi bu minj John bangmebebmeninj. Dja bu John bebmeng yolyolmi, wanjh kumwam bu ngaye ngabenbengdayhke bininj kunwok kunmak bu God Kawohnan rowk. Dja birriwern rowk kabirriwernhrohokme yiman rerrih kabirrirurrkbakke, ba yimankek kabirringimen kore God Kawohnan rowk.

¹⁷ Dja bu yimankek kaddum dja mak kurrorre kabolkyakmen rowk, kunu yiman kakelk, dja bu yimankek kabularrbuyindangen manwohkudji manbu kabimbuyindi kore mankarre, kunu minj kakarremak.

¹⁸ Dja bininj nawu kabikukmunkewe daluk nuye ngalbu kabenehni, dja kabimang ngalbuyika, namekbe wanjh kabakke God nuye mankarre bu bininj dalukkenh. Dja mak bininj nawu kabimang daluk ngalbu nabuyika bininj benehni bikukmunkeweng, wanjh namekbe nanu nawu kabimang wanjh kabakke God nuye mankarre bu bininj dalukkenh.”

Jesus Benyolyolmeng Parable Manbu Bininj Bokenh Bu Benedoweng

Luke 16:19-31

¹⁹ Mak Jesus benmarneyolyolmeng, yimeng, “Nakudji bininj ni nawu nakukenni, nawu djongbuhdjongbuyindi medjmakkaykenh duninj, dja djahdjalguni munguyh manme manwern manmakmak, dja djalnjilngmahnjilngmarnburreni.

²⁰ Dja kumekbe yoy kore kururrkdangmaye nuye kuberrkkah, bininj namarladj nawu birribuyika birrikurrmeng kumekbe. Nungka ngeyyoy Lazarus, dja nungka mokwernni duninj.

²¹ Wanjh nungka Lazarus wurrmangi djareni nguyi worrkmeninj manbu mankalawawerrk warrawarrhmi kore nakuken nuye ngunihguni. Dja warridj duruk birrimhrey birrimokbelenghmi nuye.

²² Wanjh kalukburrk doweng namekbe nawu namarladj, dja bu kumalng nuye wanjh angel birrimeng birrimalngkang birrimalngkurrmeng kore Abraham kungurrird nuye. Mak nunganwali baddoweng rerre nawu nakukenni, wanjh birrikukudji.

²³ Wanjh kunmalng nuye wam kore kubolkwarre Hades*, kumekbe djahdjalnalngkayhmi malngwahmalngwarredongi munguyh. Dja kumekbebeh kunmalng nuye balwohngang Abraham djarreh kumhmalngni, dja Lazarus benehdjarrkni.

²⁴ Wanjh bikayhmeng, yimeng, 'Mawah Abraham! Kankongibu, yimmunkewemen Lazarus, ba kamre kabidkebdjuhme kore kukku ba ngandjennjurke, dja ngayenu kondahnu ngahwernhdjakkbekkan duninj kore maninjmanu kunak manbirluwoldjen.'

²⁵ Dja Abraham yimeng, 'Ngudda nawu Mawah ngardduk, yiburru bu ngudda yihni kurorre ngudda wanjh yihmangi nawern namakmak ke, dja nawu Lazarus mangihmangi wanjh nawarreni. Nungka wanjh bolkkime kondanjunu kani kumak kore kabikangemarnmarnbun munguyh, wanjh ngudda yihdjakkbekkan dja yibadwarredoy.'

²⁶ Kunu bonj, dja kuhni warridj marneyime, kore ngad dja ngudda manbarrarnkimukken kahyo, ba bu nangale kore ngadbeh kabalmahmiran kabalre kore ngudda, minj ngunbalyikan, minj kadjowkke, kadjalkarrewarre, dja minj mak nangale nawu kumekbebeh kamdjowkke kore ngad kanyikan.'

²⁷⁻²⁸ Wanjh namekbe nawu nakukenni welengyimeng, 'Ngaye munguyh djalkebdjarrkme Mawah, bu yimunkewe Lazarus kore ngaye ngabbard nuye kunrurrk, kabenwernhbendung nawu ngaye ngarridangerrinj nawu five narahngem, dja marndi bedda warridj kabirrimre kondanjunu kore kunmalng kahwarredong.'

²⁹ Kaluk Abraham bibalmarneyimeng, 'Bedda kabirrihkarrme djurra nawu God kunwok nuye, dja mak Moses dja prophet birribimbom, wanjh kunmekbe kunwok birribalbekka!'

³⁰ Wanjh namekbe nakukenni yimeng, 'Burrkyak, Mawah Abraham, dja bu nakudji kumidjbeh kabenbalyikan wanjh kabirribawon bedberre kunwarre, dja kabirriborledme kore God.'

³¹ Wanjh Abraham yimeng, 'Bu minj kabirribekkan God nuye kunwok, dja minj mak kabirriwokmang kore Moses dja prophet birribimbom, minj mak bedda kunkange bedberre kabirriwernhwoybukwon bu nakudji karrolkkan kore kumidjbeh.' "

17

*Jesus Benbukkabukkang Bininj Nuye Bu Baleh Kabirrikurduyime Nuye
Luke 17:1-10*

(Matthew 18:6-7,21-22; Mark 9:42)

¹ Kaluk Jesus benmarneyimeng bininj nuye nawu benhbukkabukkani, yimeng, "Bonj, wanjh kamdjalle bu bininj kabenmarnbun kabirrimankan kore kunwarre, dja wanjh kunrayek duninj kambebme bedberre nawu kabindijurrkkan birribuyika bininj.

² Bininj nawu kabendjurrkkan birribuyika, wanjh bu birrikomdukkayi manwarddekimuk dorrengh bindikukburriwemeninj kore kurula, kunukka kamakniwirrinj, dja bu nawohkudji nawu nahni bininj nawu yiman birriyahwurdwurd, kabirridjurrkkan kamankan kore kunwarre, kunukka wanjh kaluk kadjalwarre duninj bedberre nawu kabirridjurrkkan.

* 16:23 Hades kamenyime "Hell" kore kanjdji.

³ Ngurriwernhnahnarrimen wanjh, dja bu nawu ngunedanginj ngunmarneyime kunwarre wanjh yirru, dja bu nungka kayime ke, 'Bonj, ngabawon bu kunmekbe kunwarre marneyime.' Wanjh kunu yimarnebengmidja kunwarre nuye.

⁴ Dja bu ngunmarneyime kunwarre kunwernhkah yiman seven bu kunbarnangarrakudji, dja bu kamborledme kunwernhkah yiman seven dja ngunmarneyime, 'Bonj, ngabawon bu kunmekbe kunwarre marnehmarneyime,' wanjh kunu ngudda yidjalbularrbu kunwarre nuye."

⁵ Kaluk wanjh Jesus nuye bininj nawu apostles birridjawam nuye nawu Kawohnan, birriyimeng, "Kanbidyikarmen dja kanmarnbu bu ngundiwernhwoybukwon ngudda!"

⁶ Wanjh nungka benwokmey, yimeng, "Bu ngudda walakkih duninj ngurriwoybukwoyi wanjh kunu ngurrimarneyimeninj manih manbu mandulkkimuk, ngurriyimeninj, 'Yirrolkka mandedjmad dorreng dja yirrudjindangimen kore kurrula,' wanjh ngunmarrkmayi."

⁷ Dja mak Jesus yimeng, "Ngudda nawu ngurrihmirnderri, bu yimankek nakudji ngudberre kabikarme bininj nawu kabihmarnedurrkmirri kore kabbal nuye, kabolkkaruhkarung dja nuk kanahnan mayh nawu sheep. Dja bu wolewoleh kaburnbun kore karrurkmirri kabbal, kamdurndeng kured. Wanjh nawu kabimarnewohnan minj nuk kabimarneyime, 'Mah, wanjh yimray werkkwerkk yingun manme.'

⁸ Dja wanjh burryyak kunu, dja kuhni yina kayime kabimarneyime, 'Yina nawu kanmarnedurrkmirri. Kanmarnemarnbu manne ngardduk, dja yidjongburrimen yirurkmirrikenh ba kannahnan, manne kanwon ngangun rowk mak ngabongun, dja wanjh kaluk rerre yinganwali yingun yibongun.'

⁹ Wanjh minj mak kabimanjbun nawu bininj nuye bu nungka kabidjalwokmarrkmang nawu kabimarneyime.

¹⁰ Dja yiman kunmekbe rerrih ngudda warridj bu ngurriwokmarrkmang rowk nawu God ngunmarneyime, wanjh ngurriyimen, 'Ngad nawu ngaridurrkmirri wanjh ngarriwarre, dja minj ngarrimak, minj baleh ngarrikurduyimeninj. Kaluk ngarridjalkurduyimeng bu kanmarnewokkurmerrij.'

Jesus Benmarnbom Ten Bininj Nawu Birrikulahwarreni

Luke 17:11-19

¹¹ Bu Jesus djahdjalley kore Jerusalem wanjh bolkyurrhkeyi kubulkayh kore Samaria dja Galilee.

¹² Wanjh bu nungka kumhbebmi darnkih kore kunbolkkudji kaluk kubolkyahwurd, kaluk kumekbe birridabkeng ten bininj nawu kundjak birrikarmi birrikulahwarreni, dja bedda djarrehwurd birrimdanginj.

¹³ Dja bedda birrikayhmeng birrimarneyimeng, "Jesus, ngudda nawu kanhbukkabukkan, kankongibu ngadberre!"

¹⁴ Bu Jesus bennang wanjh benmarneyimeng, "Ngurriyimen ngurrikukbukarrimen kore nawu priest kabirriini." Dja bu kumekbe birribalhrey, wanjh birrimakminj.

¹⁵ Kunu wanjh nakudji bu kuknarrinj makminj wanjh kumdurndengi bihburlumi God kunkayhmi dorreng.

¹⁶ Dja kukburriwerrinj mankang kore Jesus kurrenge nuye dja bihmanjbuni. Kaluk namekbe bininj wokbuyikani, nawu nakang Samaria.

¹⁷ Wanjh Jesus yimeng, "Yiddok minj ten ngabenmarnbuyi, dja nawu birribuyika nawu nine, baleh birriwam?"

18 Adju! Yiddok woybukkih nanih nadjalkudji nawu wokbuyika kumdurndi biburlumeng God, dja birribuyika nawu ngadkenh minj birrimrawinj birriburlumeninj?"

19 Dja Jesus bimarneyimeng namekbe bininj, "Yirrolkka wanjh yidjallay, bu ngudda kanwoybukwong, wanjh kunu yimakminj."

Jesus Yolyolmeng Kore God Kawohrnan Rowk Kamre Darnkih
Luke 17:20-37

(Matthew 24:23-28,37-41)

20 Kaluk bu Pharisees birridjawam Jesus bu baleh kabolkyime kamre bu kamarnbuyindan bu God Kadjalwohnrnan rowk. Wanjh Jesus benwokmey, yimeng, "Minj bininj kabirrinan nawu kayingkihmulewan bu kamre bu kamarnbuyindan bu God Kadjalwohnrnan rowk,

21 dja minj mak kabirriyime, 'Yina kuhni kamhre,' dja 'Kuhri yina kamhre.' Dja kandibekka, marneyime ngudberre, bu God Kawohrnan rowk, wanjh kunukka ngokko kawohrnan kore kukange ngudberre."

22 Wanjh Jesus benmarneyimeng bininj nuye nawu benhbukkabukkani, yimeng, "Kaluk kamre bu ngurridjare bulkkidj ngurrinan kunwohbar-nangarrakudji ngardduk nawu Bininj Duninj bu ngayawoyhbukkarren ngudberre, dja minj ngurrinan.

23 Dja kaluk bininj ngundimarneyime ngudberre kabirriyime, 'Ngurrina nanih kumwam,' dja 'Nakka ngurrina kumwam.' Dja yuwn bu ngurrben-bekkan dja ngurrire, yuwn mak ngurrbenkadjung.

24 Kaluk bu kuhni kabolkyime bu ngaye nawu Bininj Duninj ngamre, wanjh yiman namarrkon bu kamayhke, dja kunggol rowk kadjalwolka-yindan koyek mak karrikad, wanjh yiman kunmekbe rerrih kakurduyime bu mahni kunbarngarra.

25 Dja kunu med rerrih, dja kayingkihwokdjedjenyo bu ngaye ngadjak-bekkan duninj werrek kore bininj nawu bolkkime kabirrimimbi, mak bedda ngandikukmunkewe yiman ngaye ngayeng rerrih.

26 Dja bu kamre kunbarngarra ngardduk nawu Bininj Duninj ngayawoyhbukkarren, wanjh yiman karohrok rerrih bu Noah dorrengh birrini korroko.

27 Bedda nawu Noah birrihdjarrkni birrihdjalnguni mak birrihd-jalbonguni munguyh, bindihdjalmani dja mak bindihdjalwoni daluk munguyh, kaluk bu Noah bidbom kore kabbala ngimeng, wanjh mandjewk behmeng nakimukkenh duninj dja kundjurrh benkebngakkeng rowk.

28 Dja warridj yiman bu Lot ni korroko, nawu Lot birrihdjarrkni bedda wanjh birrihdjalnguni, birrihdjalbonguni munguyh, birrihdjalmani birrihdjalweykani munguyh, birrihdjalimidudjengi dja mak birrihdjalrur-rnkami munguyh,

29 dja bu Lot bolkbawong kunred Sodom, wanjh kundjalmeke kunbar-nangarra rerrih kunak dja mak manbang duninj mankalkkid mankarrinj kaddumbek benkukkinjeng rowk.

30 Wanjh yiman kunmekbe rerrih kayime bu kamre kunbarngarra ngardduk, bu ngaye nawu Bininj Duninj ngamyawoyhkukbukkarren.

31 Wanjh bu kunmekbe kunbarngarra kamre wanjh bininj nawu kahni kaddumkah kore kunrurrk nuye, dja bu yehyeng nuye kabimarne-madyo kanjdikah bu kururrk. Yuwn bu kakolung kamadjmang. Dja yiman kunmekbe rerrih bininj nawu karrurkmirri kore kabbal, yuwn kaborledme karrurdeng bu kamadjmang njalenjale nuye.

32 Dja wanjh ngurriburru bu baleh bimarnekurduyimerranj Lot nuye ngalbininj kobeng!

³³ Bininj nawu kadjare nungan kakanjngehkerren, wanjh nanu kaluk karrowen. Dja nawu nungan yiman kakanjkurmerren, nanu wanjh kanahnarren kadjaldarrkid.

³⁴ Dja ngayime ngudberre bu kunmekbe kamre, wanjh kaluk benebokenh kabenedjarrkyo bu kukak, wanjh nakudji God kabimang dja nabuyika kabibawon.

³⁵ Dja wardi benebokenh daluk kabenedjarrkdurrkmirri bu kabenemimarnbun, kaluk God ngalkudji kabimang, dja ngalbuyika kabibawon.

³⁶ Dja bu benebokenh bininj kabenedjarrkdurrkmirri kore kabbal, kaluk God kabimang nakudji dja nabuyika kabibawon."

³⁷ Wanjh kunmekbe bedda nawu bininj nuye birriyimeng, "Ngudda nawu kanmarnewohrnan, kaluk baleh?" Wanjh Jesus benwokmey, yimeng, "Kore mayh kakukyo, wanjh kumekbe nawurrkibil kamirndebeberren."

18

Jesus Benbukkabukkang Bu Munguyh Kabirridi Yiwarrudj

Luke 18:1-8

¹ Wanjh Jesus benmarneyolyolmeng parable manbu kunwarlkkaykenh kunwok kabenbukkankenh bu munguyh kabirridjaldi yiwarrudj munguyh, dja yuwn bu kabirrimarrkbaworren.

² Wanjh yolyolmeng, yimeng, "Kaluk bininj ni kore kunbolkkudji kubolkkimuk nawu bendjadmi bininj, dja nungka minj bimarnekeleniwirrinj God, dja mak minj bininj benbukkay.

³ Kaluk mak kore kumekbe kubolkkimuk ngalkudji daluk ni kaluk kamarrdjukunni, ngalbu munguyh kumhrey bihmarneyimi nawu bendjadmi, yimihyimi nuye, 'Kanmarnekarremarnbu kunmak bu nanih nawu bininj nganhduhbu.'

⁴ Wanjh namekbe nawu bendjadmi bininj wanjh bidjaldahmi kunkuyenghward, wanjh kalukburrk nungan marneyimerrinj, 'Bonj, madjamku ngaye minj ngamarnekele God dja mak minj bininj ngabenbekkan.

⁵ Dja ngalinjgalu kamarrdjukun minj kabawon bu ngandjurrkan, wanjh kunu bonj, ngamarnekarremarnbun kunmak, wardi nganwunjn-jibmingalke bu munguyh kamhre.'

⁶ Wanjh Jesus nawu Kawohrnan yimeng, "Yiddok ngurribek kang bu namekbe bininj yimeng nawu minj mandjad bendjadmeninj bininj?"

⁷ Dja minj nuk ngurriyime bu God kabenmarnekarremarnbun kunmak nungka nuye bininj nawu bendjarrngbom, nawu munguyh kabirrimarnekarayhme kunbarnangarra dja mak kukak? Dja yiddok ngurriyime bu nungka yiman kayime kunkuyeng kamadbun bu minj kabenbidyikarme?

⁸ Wanjh ngayime ngudberre, nungka God wanjh kabenmarnekarremarnbun kunmak, dja warridj djalwerrrkwerkk kabenbidyikarme. Kunu wanjh bonj, dja bu ngaye nawu Bininj Duninj ngamre yiddok ngabenggalke bu bininj ngandiwoybukwon kore kondah kurorre?"

Jesus Yimeng, "Bininj nawu kabirrimarladjworren, God wanjh kabenkukenwon."

Luke 18:9-14

⁹ Kaluk Jesus benmarneyolyolmi yikahwi bininj nawu birriburrburreni bu yimankek bedman birrimakni kore God, dja nawu birribuyika bedda wanjh bindihnjirrhmiwoni. Benmarneyolyolmi parable manbu kunwok kunwarlkkaykenh.

10 Wanjh yimeng, "Benebokenh bininj benewam kore temple kunrurrk yiwarrudjkenh, benedi yiwarrudj. Nakudji wanjh Phariseeni, dja nabuyika wanjh tax kunwardde benhmarnemangi dja benkukwong nawu government.

11 Kaluk namekbe nawu Pharisee dolkkang dingihdi yiwarrudj, yimeng, 'God, ngaye manjbun bu ngaye minj yiman birribuyika bininj nawu kabindikukuyimang kabindihdjuhun dorrengh nawu birrimungukenh, dja mak nawu birriwarre bininj nawu kabirribakke mankarre ke, dja mak nawu kabindikodjekmang daluk nawu birribuyika bininj kabirrihni. Dja warridj ngaye minj yiman nahn nawu bininj karri nawu tax kunwardde kamang.

12 Ngaye bu munguyh kunbubuyika djandi yarrkka wanjh bokenhkah ngahbawon manme, dja mak yehyeng rowk bu ngahmang wanjh bu yarrkka yiman ten ngamang wanjh munguyh djahdjawon nakudji.

13 Dja nawu bininj nawu tax kunwardde mangi, nungka wanjh danginj djarrehkah, minj mak nungka djareniwirrinj wohbolknayi kaddum, dja djahdjalberrekaldorreni wokkihyimi, 'God, kankongibu ngaye nawu ngadjalwarre, dja ngadjalkurduyime kunwarre.' "

14 Wanjh Jesus yimeng, "Ngayime ngudberre bu namekbe bininj wanjh dokmeng kured bu God bimarnbom namakni kore nungka, dja nawu nabuyika nanu wanjh burryakni. Dja birriwern rowk nawu kabirriburlumerren, wanjh God kabenmarladjwon, dja nawu kabirrimarladjworren, God kabenkukunwon."

Jesus Benmarnedjareminj Wurdwurd

Luke 18:15-17

(Matthew 19:13-15; Mark 10:13-16)

15 Kaluk yikahwi bininj dja daluk wurdwurd warridj bindimkang nawu birribarrken birridjareni Jesus benkarmeninj. Dja nawu bininj nuye Jesus nawu benhbukkabukkani, bu bedda bindinang wanjh bindidungi.

16 Dja Jesus benkimy dja birrikayhmeng nawu wurdwurd bu birrimwam kore nungka, dja yimeng, "Ngurrbenbawo wurdwurd, birrimray, ngandimyika, yuwn ngurrbendjangnan, dja bininj nawu kabirriyimerran yiman wurdwurd rerrih, wanjh bedda bedberre kore God kawohnan rowk.

17 Woybukkih ngayime ngudberre, bininj nawu minj kabirriyimerran yiman wurdwurd rerrih, bu minj kabirrikurrmerren God nuye bu Kawohnan rowk bedberre, wanjh bedda minj kabirringimen kore God Kawohnan rowk."

Jesus Kanbengdayhkeng Bu Money Wardi Kanngurdke bu Karringime kore Heaven

Luke 18:18-30

(Matthew 19:16-30; Mark 10:17-31)

18 Kaluk nakudji bininj nawu wohrnani kore bininj, wanjh bidjawam Jesus, yimeng, "Ngudda nawu yimak nawu kanbukkabukkan ngadberre! Kaluk baleh ngakurduyime ba kakarremarnbuyindan bu ngaye ngarrarkid kore God munguyh munguyh?"

19 Dja Jesus bimarneymeng, "Njalekenh ngaye kanmarneyime bu ngamak? Minj nangale namak, dja God nungka wanjh nadjalkudji nawu namak.

20 Ngudda wanjh yiburrbun God nuye mankarre bu wokkurrmerrinj, 'Yuwn yikodjekmang nawu nabuyika nuye daluk nawu kabenehni. Yuwn nangale yibun yikukkurrme. Yuwn njale yidjirdmang. Yuwn yikurren

bu yimulewan nabuyika. Dja mak yibenbenebekka dja yibenbenenahna kornkumo ke dja ngalbadjan.' " [Exodus 20:12; Deuteronomy 5:16-20]

²¹ Wanjh namekbe bininj yimeng, "Manih manbu rowk ngahdjalwok-marrkmangi bu ngayawurrinjni dja mak munguyh ngahwokmarrkmang."

²² Bu kuhni Jesus bibekgang wanjh bimarneyimeng, "Kunkudji minj yikurduyimeninj, kunih warridj yikurduyimen, yimadjweyka nawu yehyeng rowk nawu kekij, dja yilarlma yibenwo nawu birrimarladj, wanjh kunukka yimang kunmakmak kore heaven, dja mak yimray kanmunkekadju ngaye."

²³ Bu kuhni bekkang namekbe bininj wanjh njilngwarreminj duninj dja nungka wanjh nakukenni duninj.

²⁴ Jesus binang mak bimarneyimeng, "Bininj nawu nawern yehyeng kabirrikarme wanjh karayek bedberre bu yimankek kabirringimen kore God Kawohrnan rowk!"

²⁵ Wanjh camel nawu nakimuk mayh bu yimankek kangimen kare kore kunyarl kabirriyarlngimowon kore needle, kunukka yiman kakerlk, dja minj kakerlk bu bininj nawu nakuken yimankek kangimen kore God Kawohrnan rowk."

²⁶ Wanjh bininj nawu birribekgang birriyime, "Kaluk nangalehgale yimankek kakarremak bu God kabengehke?"

²⁷ Dja Jesus yimeng, "Nawu kore bininj kabirriyime kadjalkarrewarre, wanjh nungan God kadjalyime kakarremak."

²⁸ Wanjh Peter yimeng, "Yina, ngad ngarribawong rowk nawu ngadman ngadberrekih dja ngudda ngundihmunkekadjung."

²⁹ Wanjh Jesus benmarneyimeng, "Woybukkih ngayime ngudberre, ngurriwern rowk nawu ngurribawong kunrurrk, ngalbibininjkobeng, ngurridangerrinj, ngalbabadjan, kokornkumo, mak wurdwurd ngurrben-bawong ba ngurrimarnedurrkmirri bu God Kawohrnan rowkkeh,

³⁰ wanjh nunganwali ngunmarnedurndiwe nadjalwern bu bolkkime kurorre ngurrihni, dja mak kaluk bu kamre bu kamarnbuyindan, ngurrijalmimbi kore God munguyh munguyh."

Jesus Benyawoyhbengdayhkeng Bu Nungka Kadjakbekkankenh Dja Mak Karrolkkankenh

Luke 18:31-34

(Matthew 20:17-19; Mark 10:32-34)

³¹ Wanjh Jesus benmey nawu twelve bininj nuye, benmarneyimeng, "Kandibekk a, marneyime ngudberre, ngad karrihre kore Jerusalem, wanjh kumekbe kunwok rowk nawu prophet birribimbuni bu ngandiy-ingihmulewani ngaye nawu Bininj Duninj, wanjh kamarnbuyindan rowk.

³² Dja kaluk ngandiweykan kore birriwokbuyika bininj nawu minj kabirriwoybukwon God, wanjh bedda kaluk ngandidjekmiwon, ngandiyemikan, ngandikununjhwe, dja mak ngandiwidjbihe, ngandibun ngarrown,

³³ dja bu kunbarnangarra danjbik ngarrolkkan kumidjbeh ngayawoyh-mimbimen."

³⁴ Bu kuhni Jesus benmarneyimeng, bedda minj njale birriwernhburrk-burkkbekkayi, dja kunwok benmarnewarlkayindi, minj birriburrbuyi bu baleh benmarneyimeng.

Jesus Bimarnbom Nawu Mimbunjeni Bininj

Luke 18:35-43

(Matthew 20:29-34; Mark 10:46-52)

³⁵ Kaluk bu kumbembi darnkih kore kunred Jericho, nakudji bininj kumekbe ni kore darnkih manbolh. Kaluk namekbe bininj mimbunjeni dja benkukyidjanwohmi kunwardde.

³⁶ Wanjh bu nungka bekkang birrimirndewern birrihrey, wanjh bendjawam bininj, "Njale konhda kabirihmang?"

³⁷ Wanjh birrimarneyimeng, "Jesus nawu Nazarethbeh kahre."

³⁸ Wanjh namekbe bininj kayhmeng, yimeng, "Jesus, nawu David Mawah ke, kankongibu!"

³⁹ Wanjh bininj nawu birridokmi birriduy birrimarneyimeng, "Yidjalngurdmen nguddanu." Wanjh yiman djaldjamku, dja nungka djalwernhkayhmeng, yimeng, "Ngudda nawu David Mawah ke, kankongibu!"

⁴⁰ Wanjh Jesus danginj, dja benmarneyimeng, "Ngurrimka." Dja bu kumwam darnkih, Jesus bidjawam,

⁴¹ "Baleh yidjare marneyime?" Wanjh nungka yimeng, "Ngudda nawu Yiwohrnan, ngadjare ngayawoyhbolknan."

⁴² Wanjh Jesus bimarneyimeng, "Yiyawoyhbolkna wanjh. Ngudda kanwoybukwong, wanjh kunu yimakminj."

⁴³ Wanjh kundjalburrikudji rerrih nawu bunjeni yawoyhbolknang, dja bimunkekadjuy dja biburlumi God. Wanjh bininj nawu birriwern rowk bu birrinang, bedda warridj birriburlumeng God.

19

Jesus Bikayhmeng Nakudji Bininj Dja Nungka Warnyakmulewarrinj nuye Kunwarre

Luke 19:1-10

¹ Kaluk bu Jesus ngimeng kore kabolkngeyyo Jericho, dja balhdjalley,

² kaluk kumekbe ni bininj nawu ngeyyoy Zacchaeus, nawu wohrnani bedberre bininj nawu tax kunwardde birridjarrkmangi, dja nungka nakukenni.

³ Wanjh nungka bolkyawani djareni binayi bu nangale Jesus. Dja nungka dedjdjumbungni, wanjh minj bolknalkemeninj bu binayi dja birrimirndewernni.

⁴ Wanjh kunukka nungka rlobmeng yingkihdokmeng, dja dulkbidbom ba kaluk kabinan, dja wanjh manmekbe manbolh kaluk Jesus kumhre.

⁵ Wanjh Jesus bebmeng kumekbe, nungka bolknang kaddum, dja bingeybom bimarneyimeng, "Zacchaeus, werrkwerrk yimdjalokolu, dja wanjh bolkkime ngarrdjarrkre ngarrdjaldjarrkoyo kore kunred ke."

⁶ Wanjh Zacchaeus kumkoluy werrkwerrk, dja bikimey benewam kururrk nuye, dja kuniwarnmakni.

⁷ Dja bu bininj birrinang rowk wanjh manmolk birriyolyolmi, birriyiming, "Nungka wanjh benedjarrkngimeng bininj kabiyiyo nawu nawarre, nawu minj kawokmarrkmang God nuye mankarre."

⁸ Kaluk Zacchaeus dolkkang bimarneyimeng Jesus nawu Kawohrnan, yimeng, "Ngudda nawu Yiwohrnan, kanbekka, marneyime, ngaye bu yehyeng rowk ngakarame, wanjh kaluk ngawarlaybun rowk, ngabenwarlaywon nawu birrimarladj bininj, dja bu bininj yarrkka ngabenkukyimangi kunwardde ngabendjuhuni dorrengh nawu birrimungukenh, wanjh bedda kaluk bu yiman ten dollar ngabenbebbhekkukyimangi wanjh forty dollar ngabenbebbhemarnedurndiwe."

⁹ Wanjh Jesus yimeng, "Bolkkime wanjh God bennghekkeng nahnini bininj dja nawu kabirihdjarrkni, dja wanjh nungka warridj Abraham Mawah nuye.

10 Dja wanjh ngaye nawu Bininj Duninj ngamwam ngabenyawanken, dja mak ngabengehkekenh nawu birrikubengwabom.”

Jesus Yolyolmeng Parable Bu Karrimarnedurrkmirrikenh Nawu God

Luke 19:11-27

(Matthew 25:14-30)

11 Bu kuhni birribalbekkani, wanjh bu ngokko darnkih Jesus kumbembe Jerusalem, dja mak bininj birribekkarrinj bu yimankek kundjalmekbe rerrih kabirrinan bu God Kawohnan rowk. Wanjh kunmekbekenh kunu nungka yolyolmeng parable manbu kunwarlkayken kunwok.

12 Wanjh yimeng, “Nakudji bininj ni nawu ngeyukukenni, kaluk nungka mahmeng rawinj djarreh kubolkbuyika, ba kumekbe birrimarnbuyi king nawu kawohnan kore kubolkwernkenh, dja wanjh kaluk kamdurndeng kured.

13 Namekbe bininj benkayhmeng werrek ten nawu birrihmarnedurrkmirri, benbebbehwong kunwardde, yiman one thousand dollar benbebbehwong, dja benmarneyimeng, ‘Nanih nawu kunwardde wanjh ngurrikukwernwon bu ngurrimang dja ngurriweykan munguyh, dja kaluk ngamdurndeng.’

14 Dja bininj nawu birrimarnewohnani, bedda wanjh birriwidnani namekbe bininj, wanjh kunu bindimunkeweng yikahwi bininj nawu rerre birribemeng, nawu birriyimeng, ‘Ngad minj ngarridjare nahnani nawu bininj bu kayimerran king dja kanmarnewohnan ngadberre.’

15 Dja ngaleng madjamku, dja birridjalmarnbom namekbe bininj bu king yimerranj. Wanjh bu kumdurndi kured nuye, nungka benkayhmeng birrimekbe ten bininj nawu birrihmarnedurrkmirri, nawu korroko benbebbehwong one thousand dollar, ba kunu kabirrimarneyime bu baleh yimi birrikukwernwong bu birrihmangi dja birrihweykan.

16 Wanjh nawu werrek bimarnebebmeng yimeng, ‘Ngudda nawu yiwohnan, nawu one thousand dollar ke wanjh ngakukmarnbom dja kukwernhminj bu ten thousand dollars yimerranj.’

17 Wanjh kunu nawu king bimarneyimeng, ‘Ya, kamak, ngudda nawu kanhmarnedurrkmirri wanjh yimak, ngudda bu yiwoybukni yihnahnani mandjad nawu kunyahwurd duninj, wanjh kunukka kurrme ba bu yiwohnan kore ten kunred kubolkkihkimuk.’

18 Dja nabuyika kumwam yimeng, ‘Ngudda nawu yiwohnan, nawu one thousand dollar ke ngakukmarnbom five thousand dollars.’

19 Wanjh kunu bimarneyimeng, ‘Mak ngudda yiwohna kore five kunred kubolkkihkimuk.’

20 Kaluk nabuyikawali kumwam, yimeng, ‘Ngudda nawu yiwohnan, yina nanih wanjh one thousand dollar ke nawu ngahdjalkukkarrmi, dukkayindi kore manburra.

21 Dja ngaye kengemi ngudda bu ngaburrbun yikangerayek, ngudda wanjh yiman yibebbeke nawu minj ngudda yikurrmeninj, dja mak manme yirruhdurndiwe manbu minj ngudda yimimdudjemeninj.’

22 Wanjh kunu nawu wohrnani bimarneyimeng, ‘Yingan kekkih kunwok kore yiyimeng wanjh ngayime yingan yidjaldjadmerren, ngudda nawu yiwarre duninj nawu kanhmarnedurrkmirri. Ngudda yiyimeng bu yiburrbuni bu ngaye ngakangerayek, ngahbebbheke nawu minj ngaye ngakurrmeninj, dja manme ngarruhdurndiwe manbu minj ngaye ngamimdudjemeninj.’

23 Kunukka wanjh njalekah minj yikukkurrmeninj kunwardde ngardduk kore bank djalyuwirrinj, ba bu ngamdurndeyi ngamayi nawu kumekbe kukwernmeninj?’

²⁴ Dja namekbe nawu wohrnani benmarneyimeng nawu kumekbe birri-hdi birrihmarnedurrkmirri, yimeng, 'Ngurrikukyima nawu one thousand dollar dja ngurrikukwo bininj nawu kahkarrme ten thousand dollars.'

²⁵ Dja bedda birriyimeng, 'Ngudda nawu yiwohrnan, nungka wanjh ngokko kahkarrme ten thousand dollar!'

²⁶ Nungka yimeng, 'Ngayime ngudberre, bininj rowk nawu kabir-rikarrme, bedda wanjh kabirriyawoyhmang kunwern, dja bininj nawu minj kakarrme, wanjh namekbe nanu kabirriyimang rowk nawu nuyeni warridj.

²⁷ Kunu wanjh bonj, dja bininj nawu ngandihwidnani nawu minj birridjareniwirrinj ngaye king ngawohrnayi bedberre, ngurrbenma dja kondah ngurrbenbu ngurrbenkukkurrmen kore kumirrk ngardduk!' "

Bininj Birriwern Birriburlumi Jesus Bu Ngimeng kore Jerusalem

Luke 19:28-44

(Matthew 21:1-11; Mark 11:1-11; John 12:12-19)

²⁸ Bu kuhni Jesus yimeng, wanjh nungka dokmi bedberre bu rey Jerusalem.

²⁹ Kaluk bu kumbebmi darnkih kore kabolkngeyyo Bethphage dja mak Bethany kore kawarddengeyyo "Karrulkmirnderri manbu Olive Kundulk", wanjh Jesus benbenemunkeweng bokenh nawu bininj nuye nawu benhbukkabukkani, benbenemarneyimeng,

³⁰ "Ngunedjallay kore kunukka kubolkyahwurd, dja bu ngunehal-hngimen, kumekbe ngunengalke kakomdukkayindi narangem donkey yaw, nawu minj nangale bangmemorneniwirrinj. Nguneyerrkkemen dja ngunemkan konhda.

³¹ Bu bininj ngunenedjawan, 'Njalekenh ngunehyerrkke?' Wanjh kuhni nguneyimen, 'Kadjare nawu Kawohrnan.'

³² Wanjh benemekbe nawu benbenemunkeweng benewam benengalkeng rowk bu benbenemarneyimeng berrewoneng.

³³ Dja bu benebalhyerrkkeyi wanjh bininj nawu bedman bedberre namekbe donkey yaw, bedda wanjh bindimarneyimeng, "Njalekenh ngunehyerrkke nawu mayh?"

³⁴ Dja beneyimeng, "Kadjare nawu Kawohrnan."

³⁵ Wanjh benekang kore Jesus. Dja beneyerrkkeng nawu benehdjong-buyindi, benekurrmeng kore kubodme nuye donkey, wanjh kumekbe benewayhkeng Jesus, wanjh mornehmorneni.

³⁶ Wanjh bu Jesus kumhrey, bininj birrimelekurrmi kunmadj bedberre kore manbolh.

³⁷ Kaluk bu ngokko darnkih kumhbebmi Jerusalem, bu birrihkolungi manbolh kore kawarddengeyyo Olives, wanjh birrimirndewernkenh rowk nawu Jesus benhbukkabukkani, birridedjdjingmey birriwarnmakni dja birriburlumi God kunkayhmi dorreng, bu birriburrbuni kore birrihnani nawu nungka kurduhkurduyimi kundulkarre dorreng.

³⁸ Birriwokkihyimi, "Nungka karriburlume nahni nawu king kamhre kore kungey nuye God nawu Kawohrnan Rowk. [Psalm 118:26] Dja karridjare kunmodmikenh bedberre nawu heaven kabirrihni, dja bulkkidj duninj karriwernhburlumen God nawu kaddum kani!"

³⁹ Wanjh kore birrihmirnderri yikahwi nawu Pharisees birrimarneyimeng Jesus, birriyimeng, "Ngudda nawu kanhbukkabukkan ngadberre, yibenngurdkemen nawu ngudda ke bininj!"

⁴⁰ Wanjh Jesus benwokmey, yimeng, “Ngayime ngudberre, bu bedda kabirringurdme, kunukka wanjh kunwardde rowk kadjalkayhme ngardduk.”

⁴¹ Bu Jesus kumbemeng darnkih duninh kore kubolkkimuk Jerusalem, kaluk bu bolknang wanjh benmarnenalkbom nawu kumekbe birrihni,

⁴² dja wokkihyimi, “Ngudda nawu Jerusalem ngurrihni, ngadjare bulkkidj duninh bolkkime ngurriburrbuyi bu baleh ngurrikurduyimeninj ba kunmodmikenh bebmeninj ngudberre! Wanjh burrkyak, dja ngunmarnewarlkkayindi, minj ngurriburrrkburknaw.

⁴³ Dja kaluk kamre ngudberre bu bininj nawu ngundiwidnan kaluk kabirribolkkarung kabirridulumname werrk, rerre wanjh ngundidabke, minj baleh ngurriyime ngurribehme.

⁴⁴ Wanjh kumekbe ngundibun ngudberre ngundikuyakwon rowk wurdwurd dorreng, dja kunrurrk rowk kabirridjalurrrkbakbakke rowk, minj mak kabirribawon bokenh kunwardde kunrurrkkeh kabenebelbmiyindi. Kunmekbe kayimerran ngudberre bu ngudda minj ngurriburrbuyi bu God kunwam ngunnehkemeninj ngudberre.”

Jesus Benbekeng Yikahwi Bininj Kore Temple

Luke 19:45-48

(Matthew 21:12-17; Mark 11:15-19; John 2:13-22)

⁴⁵ Kaluk Jesus ngimeng kore temple kunrurrk manbu yiwarrudjkenh, dja dedjdjimgmey benmunkeweyi bininj nawu birrihweykani mayh,

⁴⁶ wokkihyimi bedberre, “Kawokbimdi kore God nuye mankarre, bu God yimeng, ‘Ngaye kunrurrk ngardduk, makka kunrurrk yiwarrudjkenh,’ dja ngudda ngurrimarnbom yiman kunwardderurrk kore ngudda nawu ngurrihdjirdmahdjirdmang ngurrihni.” [Isaiah 56:7; Jeremiah 7:11]

⁴⁷ Dja munguyh kunbarnangarrabubuyika rowk Jesus benbukkabukkani kore temple. Kaluk nawu birrikihkimuk priests dja bininj nawu bindibukkabukkani mankarre, dja mak nawu dabborrabbolk bininj bindimarnewohnani warridj, bedda wanjh birribolkyawani birridjareni birribuyi Jesus,

⁴⁸ dja mak bedda minj baleh birrikarremarnbuyi nuye birribuyikenh, dja bininj nawu birriwern rowk bedda wanjh birrihdjaldjareni munguyh birriwokbekkani Jesus.

20

Birridjawam Jesus Bu Balehbeh Nungka Kawohnankenh

Luke 20:1-8

(Matthew 21:23-27; Mark 11:27-33)

¹ Kaluk kunkudjihkenh bu nungka Jesus benbukkabukkani bininj kore temple kore kuberrkkah, mak kunwok kunmak benbengdayhkeyi, wanjh nawu birrikihkimuk priests, dja bininj nawu birribukkabukkani mankarre, dja mak dabborrabbolk dorreng, bedda wanjh birrimarnebebmeng.

² Dja birrimarneyimeng Jesus, “Ngudda kanmarneyimen ngadberre balehbeh ngudda yiwohnan, bu kuhni yarrkka yihkurduyime, dja nangale ngunmarnbom bu kuhni yihwohrnan?”

³ Wanjh Jesus benwokmey, yimeng, “Ngaye mak wohdjawan ngudberre, kaluk kandimarneyimen.

⁴ Bu John benkukduhkeyi, yiddok ngurriyime Godbeh kore kurduyimi, dja nuk ngurriyime bininjbeh?”

⁵ Wanjh bedman birrihdjavarreni, birriyimi, “Bu karriyime, ‘Godbeh,’ wanjh kunu nungka kayime, ‘Wanjh njalekenh ngudda minj ngurriwoy-bukwoyi John?’

⁶ Dja bu karriyime, ‘Bininjbeh,’ wanjh kunu birriwern rowk ngad bininj nawu Israel kankebmawahmeng kaluk kandidong kunwardde kandikukkurrme, dja bedda kabirriyime bu woymbukkih John wanjh prophetni duninjh.”

⁷ Wanjh kunu birriwokmey Jesus, birriyimeng, “Ngad ngarriwakwan bu balehbeh John benhkwokdjuhkeyi.”

⁸ Wanjh Jesus yimeng bedberre, “Ngaye minj mak marneyime ngudberre bu balehbeh ngaye ngawohnan bu kuhni yarrkka ngahkurduyime.”

Jesus Mulewarrinj Dja Benyolyolmi Nawu Birriwarnyakminj Nungka Luke 20:9-19

(Matthew 21:33-46; Mark 12:1-12)

⁹ Wanjh Jesus dedjingmey benmarneyolyolmeng bininj manih manbu parable manbu kunwarikkayken kunwok, yimeng, “Nakudji bininj dudji manrakel manwern kore kabbal nuye, dja benkurrmeng bininj kabirri-nahnan dja kabirrikarremulewan. Wanjh nungka wam kubolkbuyika, kaluk kumekbe ni kunkuyeng.

¹⁰ Kaluk bu kumwam ngarre manme kadjolengmen wanjh namekbe bininj bimunkeweng nakudji nawu bihmarnedurrkmirri, wam kore bininj nawu birrihmarnenahnani kabbal, ba bedda birriwoyi yikahwi manme manbu manrakelbeh, dja bedda nawu birriahnani wanjh birriwid-jbihkeng namekbe bininj, dja birrimunkeweng bidlarrkni.

¹¹ Wanjh nabuyikawali bimunkeweng nawu bihmarnedurrkmirri, dja nungka warridj birriwidjbihkeng birriyemikang, dja birrimunkeweng bidlarrkni.

¹² Dja mak nabuyikawali bimunkeweng, wanjh nungka warridj birribom birrikumarladjwong dja birrikukburriweng kuberrkkah.

¹³ Kaluk bininj nawu nuye kabbal djawarrinj, yimeng, ‘Kaluk baleh ngayime? Ngaye ngamunkewe ngardduk beywurd nawu ngamarnedjare duninj, wanjh kunubewu nungka wanjh kabirriwokmarrkmang.’

¹⁴ Dja birrimekbe bininj nawu birrihmarnenahnani kabbal bu birrinang nawu beywurd, wanjh kunu birrihdjavarreni, kaluk birriyimeng, ‘Nanih nawu wanjh beywurd nuye nawu kawohnan, kaluk kamang maninjmanu kabbal bu kornkumo kabiyiwakwan, wardi karribu ba ngadman karrimang nawu nuyeniwirrinj.’

¹⁵ Wanjh bedda birrikukburriweng kuberrkkah kore manrakel kahdud-jihdudjindi, wanjh kumekbe birribom birrikukkurrmeng.”

Wanjh Jesus yimeng, “Kaluk baleh kabenmarneyime nawu nuye kabbal?”

¹⁶ Nungka kamre kabenbun kabenyakwon rowk nawu birrihmarnenahnani kabbal, dja birribuyika kabenwon manmekbe kabbal kore manrakel kahdudjindi.”

Bu kuhni birribekking Jesus wanjh birriyimeng, “Yuwn nuk kunukka kakurduyimerran!”

¹⁷ Dja nungka Jesus bendjalnang bedberre dja yimeng, “Dja njale kamenmenyime bu kunih kawokbimdi kore God nuye kunwok bu yimeng, ‘Kunwardde kunrurrkkenh manbu bininj nawu birrirurrknami birriwarreweng, wanjh mandjalmekbe manbu kaluk yimerranj bu manwrnhkuken manbu kawernhdokme?’ [Psalm 118:22]

¹⁸ Dja birriwern rowk nawu kabirrimankan kore manmekbe kunwardde wanjh kabenkukdjalkdjalkmang, dja bu kunwardde ngalengman kamankan bininj kabenngerrehme wanjh kabenkukdjubulhme duninjh.”

19 Bu kuhni birribek kang bininj nawu bindibukkani mankarre dja nawu birrikihkimuk priests, wanjh birriburrbom bu Jesus yiman bedda benyolyolmeng kore parable yolyolmeng. Wanjh kunmekbekenh kunu bedda birribolkyawani birridjareni birrimayi bu kundjalmeke berrih, dja burrkyak, kaluk bindikengemeng bininj rowk.

Bininj Birridjawam Jesus Kunwardde Manbu Taxkenh
Luke 20:20-26

(Matthew 22:15-22; Mark 12:13-17)

20 Wanjh kunu bedda birriwernhnani birribolkyawani birrimayikenh, ba kabirriwon bininj nawu kumekbe wohrnani governor, bu nungka kabimarnewohrnan dja kabidjadme. Wanjh kunmekbekenh kunu bedda bindimunidj munkeweng yikahwi bininj nawu birrimarnburreni yimankek birrimakni, bedda wanjh birrimunidjmadbuni ba nungka kunwok nuye dukkarrimeninj.

21 Wanjh bedda nawu birrimunidjmadbuni birridjawam Jesus, birriyiming, "Ngudda nawu kanhbukkabukkan ngadberre, ngad ngarriburrbun bu ngudda mandjad yiwokdi dja mak kanhbukkabukkan, dja ngudda minj yikahwi bininj yibenmarnedjare dja birribuyika yibendjalbawon, dja ngudda kunwoybukkenh kanhbukkabukkan God nuye, bu baleh nungan kadjare bininj kakurduyime.

22 Wanjh djawan bu baleh kakarreyime, yiddok kunmak bu ngad tax kunwardde ngarririkukwon nawu Caesar?"

23 Dja Jesus burrbuni bu bedda kunu birrihdjalwernhkurreni dja benmarneyimeng,

24 "Kandibukka kunwardde nawu coin, kaluk nangale kumekbe kakebimindi, dja mak kangeybimindi?"

25 Wanjh bedda birriyiming, "Caesar wanjh." Wanjh nungka benmarneyimeng, "Kunmekbekenh wanjh Caesar ngurrikukwo nawu nungan nuyekih, dja mak God ngurriwo nawu nungan nuye."

26 Wanjh bu kunmekbe yimeng benwokmey, bedda birrimayahmeng dja birridjalngurdmeng, dja kore bininj birrimirndewern birrihni, bedda minj baleh birriyimeninj bu birrimarnbuyi Jesus nungan dukkarrimeninj bu kunwok nuye.

Jesus Yolyolmeng Bu Bininj Kabirridolkan Kore Kundowikenh
Luke 20:27-40

(Matthew 22:23-33; Mark 12:18-27)

27 Kaluk yikahwi bininj nawu Sadducees birrimwam kore Jesus, dja bedda nawu Sadducees kabirriyime bu bininj kabirridowen wanjh kunu bonj, minj kabirridolkan kumidjbeh kabirriyawoyhmimbimen. Wanjh bedda birridjawam birriyiming,

28 "Ngudda nawu kanhbukkabukkan ngadberre, Moses kanmarnebimbom yimeng bu bininj kabeneni daluk dja minj wurdyaw kayawbornan, wanjh bu nahni bininj karrowen, wanjh nabuyikawali nawu benedanginj kabi djalmang ngalmekbe daluk, ba bu kayawbornan wanjh yiman nuyeni-wirrinj benedanginj nawu werk benehni.

29 Wanjh kunkudjihkenh birrihni seven bininj nawu birridangerrinj, wanjh nawu nawernwarre bimey daluk, dja nungka doweng bu minj yawbornayi.

30 Wanjh nabuyikawali bimey dja doweng,

31 mak nabuyikawali, wanjh kunmekbe karohrok bu birrikurduyimi rowk, bedda nawu seven birridangerrinj birrimey ngalmekbe daluk dja birribebhdoweng bu minj wurdyaw birribornayi.

³² Wanjh kaluk yerrekah ngalengmanwali doweng warridj ngalbu daluk.

³³ Wanjh kunu bu ngurriyime kabirridolkkan kumidjbeh, kaluk baleh nanu kabeneyawoyhni ngalmekbe daluk, dja birrimekbe rowk nawu seven birribebbehni?"

³⁴ Wanjh Jesus yimeng, "Bu bininj kabirrihni kondah kurorre, wanjh kabindihmang dja mak kabindihwon daluk munguyh,

³⁵ dja nawu God kayime bedberre birrimak bu kaluk kabirrire heaven bu kabirridolkkan kumidjbeh, wanjh kumekbe bedda minj kabindimang daluk dja minj mak kabindiwon.

³⁶ Dja kumekbe mak kakarrewarre bu yimankek kabirriyawoyhdown warridj, dja wanjh bedda yiman kabirrirohrok rerrih angel kabirridjal-darrkid munguyh, dja mak bedda God nuye wurdwurd, dja mak bedberre bu kabirridolkkan kumidjbeh kabirriyawoyhmimbimen.

³⁷ Mak Moses warridj kanbukkang kadberre bu bininj kabirridowen wanjh kabirridolkkan kumidjbeh kabirriyawoyhmimbimen. Kunmekbe kanbukkang bu bimbom kore nang mandulkyahwurd, dja kumekbe wanjh bimulewam God nawu Kawohrnan rowk, yimeng bu nungka God bedberre nawu Abraham, Isaac, dja Jacob.*

³⁸ Dja nungka minj God bedberre bininj nawu birridoweng, nungka wanjh God bedberre nawu kabirrihmimbi. Dja God kabendarrkidnan bininj birriwern rowk kore kabirrimimbi dja kore birridowerrinj."

³⁹ Wanjh yikahwi bininj nawu birribukkani mankarre wanjh birriwok-burlumeng birriyimeng, "Ngudda nawu kanhbukkabukkan ngadberre, ngudda kamak rowk yihyime."

⁴⁰ Dja minj nangale mak birriyawoyhdjawayi bu njalehnjalekenh, dja birrikeleni.

Jesus Mulewarrinj Bu Nungka Nawu Christ

Luke 20:41-44

(Matthew 22:41-46; Mark 12:35-37)

⁴¹ Dja nungka benmarneyimeng, "Kaluk njalekah bininj kabirriyime bu Christ† nawu God kanberrebom, wanjh nungka David bikebmawah-meng?"

⁴² Ngurriburrbun David nungka naweleng bimbom kore djurra nawu Psalms, yimeng, 'God nawu Kawohrnan rowk bimarneyimeng nawu ngayekenh nawu nganmarnewohrnan, yimeng, "Yiyerrka yinin kore kubolkkuken kubidkun ngardduk,

⁴³ kumekbe yidjalnin bu ngaye ngawinhme, ngabenmarnbun nawu ngundiwidnan bu kabirriyimerran yiman kabirribongdi rerrih, dja ngudda yiwohrnan bedberre." ' [Psalm 110:1]

⁴⁴ Wanjh kumekbe kabindi bu David yimeng Christ kabimarnewohrnan nuye, wanjh baleh kayime bu yimankek David nuye Mawah?"

Jesus Benyolyomeng Bininj Nawu Bindibukkani Mankarre

Luke 20:45-47

(Matthew 23:1-36; Mark 12:38-40; Luke 11:37-54)

⁴⁵ Dja bu bininj birriwern rowk birrihbekkani, Jesus benmarneyimeng bininj nuye nawu benhbukkabukkani, yimeng,

⁴⁶ "Wardi yuwn ngurriyimerran yiman bininj nawu kabindibukkabukkan mankarre, dja beddanu kabirridjare kabirrire kabirridjongbuyindi nakuyengkuyeng yiman kabirrimulewarren bu birrikuken, dja kabirridjare birriwern kabindidjawan kurobbe kore bininj

* 20:37 Ngurrina kore Exodus 3:6 † 20:41 Christ kangeyrohrok "nawu Messiah".

birriwern kabirrimirndemornnamerren, dja kabirridjare kabirriyerrkan kore kuwernhbolkkuken kore synagogue kunrurrk yiwarrudjkenh, dja mak bu mulil kabirringun, wanjh kabirridjare kabirriyerrkan kore kuwernhbolkkuken.

⁴⁷ Dja mak bedda kabirridjirdmang yehyeng bedberre daluhdaluk nawu birrikamardjukun, kabindimarladjwon. Dja mak kabirridjalkurren bu yiwarrudj kabirridi mankarrekuyengkenh ba bu bininj kabindikurdunan. Bedda wanjh kaluk God kabenwernhdjadme.”

21

Jesus Biyolyolmi Kamardjukun Ngalbu Ngamarladjni

Luke 21:1-4

(Mark 12:41-44)

¹ Kaluk Jesus balbolknang bininj nawu birrikukenni dja birrihkurrmi kunwardde bedberre nawu God birrihwoni, kore temple kunrurrk yiwarrudjkenh.

² Dja mak binang ngalkudji kamardjukun ngalbu ngalwernhmarladjni duninj, dja ngaleng kurrmeng nayahwurd duninj, bulerri bokenh.

³ Wanjh Jesus yimeng, “Woybukkih ngayime ngudberre, ngalinjngalu kamardjukun ngalbu ngaldjalmarladj, ngaleng wanjh kurrmeng nawernhkimuk, dja bedda yiman nayahwurd birrikurrmeng.

⁴ Bedda rowk bu birrikurrmeng, wanjh nawern duninj kabirrikarme, dja ngaleng wanjh kadjalyawarren, dja kurrmeng rowk nawu karmihkarri, minj njale mak kabimarneyo kured.”

Jesus Yingkihmulewam Bu Manbu Temple Karurrkyakmen

Luke 21:5-6

(Matthew 24:1-2; Mark 13:1-2)

⁵ Kaluk bu yikahwi Jesus nuye nawu benbukkabukkani, wanjh birriyolyolmi temple kunrurrk yiwarrudjkenh, birriyimeng bu kunwardde manbu kunrurrkkenh birrirurrknangeng wanjh manwernhmak, dja mak yehyeng nawu bininj birrihwoni God bu birrinami, wanjh birrirurrkmarnbom kunrurrkmakkaykenh. Wanjh Jesus yimeng,

⁶ “Manih manbu kondah ngurrihnan, wanjh kaluk kamre bu minj bokenh kunwardde manbu kunrurrkkenh kabirribawon kabenebelbmiyindi, dja bininj kabirrirurrkbakbakke rowk.”

Jesus Benbengdayhkeng Nuye Bininj Bu Njale Kabenmarnekurduyimeran Bedberre

Luke 21:7-19

(Matthew 24:3-14; Mark 13:3-13)

⁷ Wanjh bedda birridjawam, birriyimeng, “Ngudda nawu kanbukkabukkan ngadberre, kaluk baleh kayime kuhni kakurduyimerran? Dja njale ngarrinan kayingkihmulewan ba ngarriburrbun darnkih kuhni kakurduyimerran?”

⁸ Dja Jesus yimeng, “Ngurrinahnarrimen, marndi ngurrbenwoybukwon nawu ngundikowe. Dja birriwern kaluk kabirrimre kabirrimarnburren yimankek ngaye, dja kabirriyime, ‘Ngaye wanjh nungka Christ nawu God ngunberrebbom.’ Dja mak kabirriyime, ‘Ngokko darnkih bu kamre bu kayiburnbunkenh.’ Wanjh ngudda yuwn ngurrbenmunkekadjung.

⁹ Dja mak bu ngurriwobekkan bu bininj kabirriburren, kaluk bedman nawu kubolkkudji kabirriini kabindibun nawu kabirriini kubolkbuyika, dja mak bu bininj nawu kubolkkudji bedberre, yikahwi kabirriwirrihme nawu kawohrnan bedberre, wanjh bedman nawu birriredbodeleng

kabirriyiburren. Bu kuhni ngurriwobekkan, yuwn ngundiwernehkelehme duninj. Dja wanjh kuhni rowk kadjalkurduyimerran werrek, dja minj kunburrikudji rerrih kayimerran bu kurorrekenh kayakmen rowk, dja med rerrih.”

¹⁰ Wanjh kuhniwali Jesus benmarneyimeng, “Bininj nawu bedman birriwokkudji kaluk kabindibun nawu bedman birriwokbuyika. Dja bininj nawu nakudji kabenmarnewohrnan kore kubolkwarlahbubuyika, kaluk kabindibun birrimirndebuyika nawu mak bedman nakudji kabenmarnewohrnan kore kubolkwarlahbubuyika.

¹¹ Dja warridj kayimerran bu bula kabebmerren mankihkimuk, dja kunukka yarrkka birriwern kabirringorengmankarren kundjakbubuyika kabenmang, dja warridj manme kabirriyawarren duninj, dja mak kabirrinan kore kungol nawu kabenwernehkelehme duninj, dja mak kunbubuyika kunkihkimuk kabirrinan kungol, nawu kayingkihmulewan nawu kamre rerre.

¹² Dja kunihbu rowk wanjh med rerrih, dja kuhni yina kayime kayimerran werrek, bininj ngundimang dja ngundimarneyime kunwarre dja ngundikan ngudberre kore bininj nawu kabirriwohrnan kore synagogue kunrurrk yiwarrudjkenh, dja mak ngundikurrme kore prison. Dja mak ngundikan kore kings nawu kabirriwohrnan kore kubolkwarlahbubuyika, dja mak governors nawu kubolkwarlahkudji kabirriwohrnan. Kuhni rowk ngundimarneyime ngayekah ngudda nawu kandingeymulewan.

¹³ Wanjh kunukka kaluk kayimerran ngudberre ngurrimulewarrenkenh bu ngaye kandiwoybukwon.

¹⁴ Kunmekbekenh kunu ngurriyikingkangedowimen ba minj ngurriburrbu, dja minj mak yimankek ngurrirohroke bu baleh kaluk ngurriyime bu ngurribenwokmang ngurriyakwarren.

¹⁵ Dja ngaye ngayeman won ngudberre kunwok dja mak kunmayali, ba minj nangale nawu ngundiwidnan kaluk ngundiwokwarrewe, minj mak ngundiwockurrenwan.

¹⁶ Dja kaluk ngalbabadjan kokornkumo ngudberre, dja mak nawu ngurridangerrinj, ngurrimud dja ngurridabolk, kaluk bedda warridj ngundikukweykan kore nawu ngundidjadme. Dja yikahwi ngundibun ngundikukkurrme,

¹⁷ dja bininj rowk ngundiwidnan ngudberre ngayekah.

¹⁸ Dja bonj, kamak rowk God ngunnahan bu yiman minj kunwohkudji kunkodj mud kayakmen ngudberre.

¹⁹ Dja ngudda bu munguyh kandiwoybukwon madjamku baleh, wanjh kunukka kaluk God ngunwon ngudberre ba ngurrimimbi duninj.”

Jesus Yingkihmulewam Bu Bininj Birriwarre Kabirribolkwarrewon Jerusalem

Luke 21:20-24

(Matthew 24:15-21; Mark 13:14-19)

²⁰ “Dja bu ngurrinan djuram kabirrimre kabirridabke Jerusalem, kunukka ngurriburrbu bu ngokko darnkih kamre ngarre bu kabolkwarrewarren duninj.

²¹ Wanjh kunu bininj nawu kabirriini kubolkwarlah Judea birrikelerlobmerrimen kore mandulunkimuk, dja nawu kabirriini kore kubolkkimuk Jerusalem wanjh birribemerrimen, dja nawu kabirriini kubehbeberrek kore kabbal yuwn kabirringimen kore Jerusalem.

²² Dja wanjh kunmekbe kamre bu God kabendung bininj nuye nawu Israel benkebmawahmeng, wanjh kunu yehyeng rowk nawu kawokbimidi

kore God nuye kunwok nawu kayingkihmulewan bu kuhni kayimerran wanjh kunmekbe kunwok kamarnbuyindan rowk.

²³ Dja bu kunmekbe kamre wanjh kadjalwarre bedberre nawu kabir-rimerlem, dja mak nawu wurdyaw kabindidjikkawon. Dja kondah kured rowk kawernhbolkwarrernen duninj, bininj kabirridjakkbekkan bulkkidj, dja nanih bininj nawu Israel benkebmawahmeng, God kabendung kabenk-inje.

²⁴ Kaluk bininj kabindidulubun mandjawak dorrengh kabindikukkur-me, dja mak kabindidukkan kabindikan kubolkbubuyika rowk kore birriwokbubuyika kabirrihni nawu minj kabirriwoybukwon God. Kaluk bininj nawu minj kabirriwoybukwon God wanjh kabirribolkmarradadjwon Jerusalem, kunmekbe kabirridjalyime munguyh, minj kabirribangme-burnbun, kaluk bu kamarnbuyindan rowk bedberre dja wanjh bonj, kabirriburnbun.”

Jesus Mulewarrinj Bu Nungka Nawu Bininj Duninj Kamdurdeng

Luke 21:25-28

(Matthew 24:29-31; Mark 13:24-27)

²⁵ Wanjh Jesus yimeng, “Dja bininj kabirrinan kunbubuyika kore kundung, dja kore dird, dja kore mankokkarrng nawu kayingkihmulewan bu baleh kaluk kakurduyimerran. Wanjh kondah kore kurorre bininj nawu kabirriini kubolkbubuyika kabirrikangewarremen duninj, dja mak kabirrikunikodjmayahme bu kabirribekkan kurrula kabidbun dja kahbun wernkih.

²⁶ Dja bininj kabirrikukmankan bu kunquele dorrengh bu kabirridjawan-ren njale kayimerran bedberre nawu kubolkwarlahkenh rowk. Dja nawu kabirriwohrnan kore kungol kaluk kubuyika kabirrire, minj mandjad kabirriwakbun.

²⁷ Wanjh kunmekbe kabolkyime, wanjh bininj ngandinan ngaye nawu Bininj Duninj ngamre kore kungolbeh, kundulkarre dorrengh, dja mak God nuye kunmakmak dorrengh kabolkbame duninj.

²⁸ Wanjh bu kuhni rowk karredjdjimgang kakurduyimerran, wanjh ngurridangimen dja ngurribolkna kaddum, dja wanjh kunukka ngokko darnkih kamre bu God ngunbebke ngudberre.”

Jesus Benbengdayhkeng Bu Karrimadbunkenh

Luke 21:29-36

(Matthew 24:32-35; Mark 13:28-31)

²⁹ Wanjh Jesus benmarneyolyolmeng warridj, yimeng, “Ngurriburrbu manmanawarn dja mak kundulkbubuyika rowk.

³⁰ Bu kunworr kabebmerren, wanjh ngudman ngurrinan dja ngurribur-rbun bu ngokko darnkih kabolkyimerran bu kurrung kamre.

³¹ Wanjh yiman kunmekbe warridj bu ngurrinan kunihbu kakurduy-imerran, wanjh kunukka ngurriburrbun bu kabolkyimerran bu darnkih kamre dja kamarnbuyindan bu God Kawohrnan rowk.

³² Woybukkih ngayime ngudberre, bininj nawu bolkkime ngurrihimbi minj ngurribangmeyakmen, dja med rerrih, kuhni rowk kakurduyimerran werrek.

³³ Kaddum dja mak kunrorre kabolkyakmen rowk dja kunwok ngardduk bu ngahyime minj ngawokyakmen munguyh munguyh.

³⁴ Dja ngurriwernhnarrimen, marni ngurridjalkadjung kore kun-burrk ngundjurrkan, mak ngurriwernhbongun ngurrimayahme, mak ngurriburrbun nadjalwern nawu ngarre kurorre, wanjh kunmekbe rowk

ngunkangedulmukwon, dja wanjh kunmekbe kunbarnangarra ngayolyolmi, wanjh kamre ngudberre bu minj ngurrimadbun, yiman ngundong rerrih.

³⁵ Dja wanjh kaluk kunmekbe kunbarnangarra kambembe bedberre bininj birriwarlahkenh rowk nawu kabirrini kubolkbubuyika rowk.

³⁶ Mah, wanjh yiman rerrih ngurriwohrna munguyh, ngurridjaldjawa God ngundulkarrewon, ba kaluk kamak rowk ngurribembe kore kuhni rowk nawu darnkih kakurduyimerran, dja ngurridi kamak rowk kore kumirrk ngardduk nawu Bininj Duninjh.”

Birriwern Birribekkani Jesus Nawu Munguyh Benbukkabukkani

Luke 21:37-38

³⁷ Wanjh bu kuninjkuu kunbarnangarra munguyh Jesus benbukkabukkani kore temple kunrurk yiwarrudjkenh. Dja bu kukak yarrkka nungka rey kore kawarddengeyyo Olives, dja kumekbe yoy.

³⁸ Dja bu kukabelni bininj nawu birriwernkenh rowk birrimalayyikani kore temple birriwokbekkani.

22

Judas Kodjukmeng Kabikukweykan Jesus

Luke 22:1-6

(Matthew 26:1-5,14-16; Mark 14:1-2,10-11; John 11:45-53)

¹ Kaluk bu darnkih kumhrey ngarre mulil mandulmuk kandidjdjawa manbu minj kakarme manngukdurlmikenh. Kaluk manmekbe mulil bu birriburrbuni bu korroko God bendarrkidbawong nawu mawahmawah bedberre.

² Wanjh nawu birrikihkimuk priest dja bininj nawu bindibukkani mankarre, birrikarreyawani baleh birrikurduyimeninj birribuyi Jesus, dja med, bindikengemi bininj nawu birriwern birrimirnderri.

³ Wanjh nawu Satan bimarnengimeng Judas nawu mak ngeyyoy Iscariot, nawu nungka dorrenghni Jesus nuyeni twelve bininj.

⁴ Kaluk nungka Judas wam kore birrikihkimuk priest, dja bininj nawu birriwohrnani bedberre djamun nawu birribolknahnani kore Temple. Bedda dja nungka birriwokdanj bu baleh kurduyimeninj bikukweykayi Jesus kore bedda.

⁵ Bedda birriwarnamkinj, dja birriberrebbom kabirriwon kunwardde.

⁶ Wanjh Judas kodjukmeng dja yawani bu baleh kab bolkyimeninj bibalkukweykayi Jesus benwoyi manmolk, ba bininj nawu birrimirndewern minj birriburrbuyi.

Jesus Benbenemunkeweng Kabenemarnbun Mulil Manbu Bendarrkidbawongkenh

Luke 22:7-13

(Matthew 26:17-25; Mark 14:12-21; John 13:21-30)

⁷ Kaluk wanjh kumwam kunbarnangarre ngarre mandulmuk kandidjdjawa, bu mankarre yoy birribuyi lamb dorrengh ngarre bu birriburrbuni bu kunkare God bendarrkidbawong nawu mawahmawah bedberre.

⁸ Wanjh Jesus benbenemunkeweng Peter dja John, benbenemarneyimeng, “Nguneray, nguneyingkihmanbu manbu mulil ngarre Bendarrkidbawongkenh ba karringun.”

⁹ Bedda benemarneyimeng, “Baleh kunu yidjare nganeyingkihmanbun?”

¹⁰ Nungka benbenemarneyimeng, “Kandibekka, benbenemarneyime, bu ngunebalre ngunebalngimen kumekbe kubolkkimuk Jerusalem, kumekbe ngurrimirrnarren bininj nawu kahbongorrkan kukku dorrengh budjdjurlung, ngunebalmunkekadju kore kururk kangimen.

¹¹ Ngunemarneyimen nawu nuye kunrurk, ‘Nawu nganbukkabukkan ngudberre kayime, “Baleh kunu kunrurk ngaye dja bininj ngardduk nawu ngabenhbukkabukkan ngarringun mulil manbu Bendarrkidbawongkenh?”’

¹² Nungka ngunbenerurkbukkan kunkimuk kaddum kore kayingkihyo yehyeng ngarre mulil, kumekbe nguneyingkihmarnbu mulil.”

¹³ Wanjh bedda benewam benengalkeng rowk bu Jesus benbenemarneyimeng berrewoneng. Wanjh bedda beneyingkihmarnbom mulil manbu Bendarrkidbawongkenh.

Jesus Dja Bininj Nuye Birridjarrknguneng Mulil

Luke 22:14-23

(Matthew 26:26-30; Mark 14:22-26; 1 Corinthians 11:23-25)

¹⁴ Wanjh bu kumwam ngarre mulil kabirringun, Jesus dja bininj nuye nawu apostle bedda dorrengh birridjarrkyerrkang birrineyhneykendi.

¹⁵ Nungka benmarneyimeng, “Ngaye ngadjareni bulkkidj duninj bu bolkkime karridjarrkngun manih mulil manbu bendarrkidbawongkenh nguddah dorrengh. Karringun werrek, rerre wanjh ngawelengdjakbekkan.

¹⁶ Dja ngayime ngudberre, ngaye mak minj rerre ngayawoyhngun manih manbu mulil, dja kaluk yerrekah bu mankarre kamarnbuyindan kore God kadjalwohrnan rowk, wanjh kunmekbe kabolkyime ngayawoyhngun dja mahni mulil warridj kamarnbuyindan.”

¹⁷ Kaluk Jesus mey banikkin, bimanjbm Kornkumo, wanjh welengyimeng, “Ngurrima, ngurribolarlmihlarlmirra,

¹⁸ dja ngayime ngudberre, ngaye minj mak ngayawoyhbongun manih manme mankalkkid kore manrakelbeh, kaluk yerrekah ngabongun bu kamre bu kamarnbuyindan bu God kadjalwohrnan rowk.”

¹⁹ Dja nungka lodmey kandidjawa, bimanjbom God, welengbakkeng, benwong, wokkihyimeng, “Mahni yiman ngardduk kunburk bu ngaburkweykarren ngudberre, wanjh kuhni ngurringu munguyh ba kandiburrbun.”

²⁰ Kunmekbe kunkudjiwi kurduyimeng, mey banikkin benwong bu birriyakwong manme, yimeng, “Nahni banikkin kayolyolme bu Ngabard God wokkurmerrinj kunwok kunkerrnge ngunberrebbun*, dja kawokrayekwon kunkurlba dorrengh ngardduk bu kayakburren ngudberre.

²¹ Dja kandibekka, marneyime ngudberre, nawu ngankukweykan nanu wanjh nungka dorrengh bolkkime nganedjarrkngun manme kondah kore karrihneykendi.

²² Dja bonj, ngaye nawu Bininj Duninj ngarrowen bu Ngabbard yingkihdjedjenkurmeng. Dja kunrayek duninj kambebme nuye nawu ngankukweykan.”

²³ Wanjh bedmandeleng birrihdjavarreni, bu nangale kab nanu nawu kaluk kunmekbe kakurduyime kabikukweykan.

Jesus Nuye Bininj Birridangwerreni Bu Birridjawarrinj Nangale Kabenmarnekukdokme

Luke 22:24-30

* **22:20** Jeremiah 31:31-34

²⁴ Wanjh bedda birridedjingmey birridangwerreni birridjavarreni bu nangale mak kore bedda bininj kabirriyime kabenmarnekukdokme nawu birribuyika.

²⁵ Wanjh Jesus benmarneyimeng, yimeng, "Kings nawu kabirriwohrnan bedberre bininj nawu minj Jews, bedda wanjh kabirrimarnburren birrikhkimuk, kabindikelehme bininj bedberre, dja nawu kabirriwohrnan bedberre kabirridjare bininj kabindiburlume, kabirriyime bu bedda kamak rowk kabindinahan.

²⁶ Dja ngudda yuwn yiman kunmekbe ngurrikurduyime. Dja kuhni ngurrikurduyimen kunbuyika. Ngurrikurme nawu nayahwurd duniinj ngudberre bu kakukdokme, dja nawu kawohrnan ngudberre, wanjh nungan yimerra yiman ngunmarnedurrkmirri ngudberre.

²⁷ Dja bu ngudda ngurrbenbenenan bininj bokenh, nakudji kani kangun dja nabuyika kabimarnedurrkmirri kabiwon manme. Yiddok minj ngurriyime bu nawu kani kangun nungka wanjh kabimarnekukdokme nabuyika? Yoh wanjh kunmekbe ngurriyime, dja ngaye wanjh ngamwam karridjarrkraworren, dja ngaye yiman nawu marnedurrkmirri ngudberre."

²⁸ "Ngudda wanjh minj kandibawoyi dja karrihdjarrkrey bu bininj nganhdjurrkkani dja nganhrohrokmi,

²⁹ wanjh bu Ngabbard ngayekenh ngankurrmeng ngaye bu ngawohrnan, wanjh ngayemanwali kurrme ngudberre bu ngurriwohrnawohrnan,

³⁰ ba ngudda kaluk karridjarrkngun dja karridjarrkbongun kore ngaye ngawohrnan rowk. Kaluk mak ngurriyerrkan ngurrini kubolkkuken ngurriwohrnankenh dja ngurrbendjadme nawu twelve birrimirndebubuyika nawu ngurridjarrkyime Mawah Israel."

Jesus Biyingkih bengdayhkeng Simon Bu Kabimarneyakwarren

Luke 22:31-34

(Matthew 26:31-35; Mark 14:27-31; John 13:36-38)

³¹ Jesus yimeng, "Simon, Simon, kanbekka marneyime, nawu Satan ngundjanwohmeng ngudberre, ba ngunrohrokme ngudberre yiman rerrih bu bininj kamimkarrhkarrhme manmim manbu wheat.

³² Dja ngaye ngahdi yiwarrudj ngudda ke, ngahdjaldjawan Ngabbard God ba minj yiwarnyakmen kore kanwoybukwon, dja kaluk bu yiyawoyhborledme kore ngaye, wanjh yibenkangerayekwon nawu ngurrihdangerinj."

³³ Wanjh Peter bimarneyimeng, yimeng, "Ngudda nawu Yiwohrnan, ngaye bonj nganjilngbekkarrinj bu ngarrdjaldjarrkre madjamku kandidjarrkdangbalhme kore prison, dja mak kandidjarrkbun ngarrdjarrkdown."

³⁴ Jesus yimeng, "Ngayime ke Peter, minj nakudji rooster kabangmekayhme bu bolkkime kuninjkunu kumunun, dja ngudda yiyakwarren ngarrdduk werrk, wanjh danjibikkah kanwaralkukwakwan."

Jesus Ben bengdayhkeng Bu Kabirriyingkih marnburren Kunyidkenh

Luke 22:35-38

³⁵ Dja Jesus benmarneyimeng, "Bu ngaye munkeweng ngudberre bu korroko, ngudda minj ngurrikayi nawu kunwarddekenh ngurrikukdahkendong, dja minj mak ngurrikayi baladji, dja minj ngurrikayi nabuyika nawu ngurridengedjongburrenkenh. Adju, yiddok yehyeng ngurriwohyawarreni?" Wanjh bedda birriyime, "Burrkyak. Minj njale ngarriyawarrimeninj."

36 Dja nungka benmarneyimeng, "Kunu bonj, dja wanjh bolkkime, bu ngurrikarme kunwarddekenh ngurrikukdahkendong wanjh ngurrika, dja warridj baladji. Dja nawu minj kakarme mandjawak, weyka kunmadj nawu kaddum kadjongburren dja mandjawak mak.

37 Dja ngayime ngudberre bu kawokbimdi kore God nuye kunwok, bu yimeng, 'Dja bininj birriyimeng bu nungka warridj nawarre, yiman bedda nawu birriwarre kabirribakke mankarre God nuye.' [Isaiah 53:12] Wanjh kunmekbe kunwok kamdjalmarbuyinda kore ngaye, dja mak kunwok rowk nawu ngaye nganyingkihmulewani, ngokko darnkih kawoybukkendan rowk."

38 Wanjh Jesus nuye disciples birriyimeng, "Yina, nawu Yiwohrnan, nanih mandjawak bokenh." Dja nungka benmarneyimeng, "Bonj."

Jesus Wam Danginj Yiwarrudj Kore Mandulum Kabolkngeyyo, "Karrulk-mirnderri Manbu Olives."

Luke 22:39-46

(Matthew 26:36-46; Mark 14:32-42)

39 Wanjh Jesus bebmeng bolkbawong Jerusalem dja wam yiman berreb-
boyen yimihyimi kore kawarddengeyyo Olives, dja disciples nuye wanjh
birrikadjudji.

40 Dja bu birribolkmey Jesus benmarneyimeng, "Ngurridin yiwarrudj ba
minj Namarnde ngundjurrkkan."

41 Wanjh Jesus benwobawong balwam djarrehwurd, barddurrukkurl-
hdanj dja dingihdi yiwarrudj, yimeng,

42 "Ngabba, ngawarnyak duninh bu ngadjakbekkan kunkimuk, yiman
kayime ngabongun kore manbu kunyidkenh banikkun, dja bu ngudda
yidjaremen wanjh yimang nahn banikkun nawu kanwong. Kunu wanjh
bonj, yuwn kakurduyimerran bu ngaye ngahdjare, dja kurduyimerra bu
yingan yidjare."

43 Wanjh bimarnebebmeng angel nawu kore heavenbeh dja bidjalka-
ngerayekwong.

44 Jesus wanjh kangewarreminj duninh, kunu wanjh wernkih dun-
inh danginj yiwarrudj, wanjh kurrngirnkimukminj yimerranj yiman
kunkurlba rerrih bu djeledjelhmi kore kurorre.

45 Wanjh bu yakwong yiwarrudj nungka dolkkang benyikang nawu
disciples, dja benngakeng birrihkeyoy bu kunnjilngwarre bennjudjwar-
rewong.

46 Dja nungka benmarneyimeng, "Njale ngurrihkeyo? Ngurridolka dja
ngurridin yiwarrudj, marndi Namarnde ngundjurrkkan."

Djamun Nawu Templebeh Birriberlmey Jesus

Luke 22:47-53

(Matthew 26:47-56; Mark 14:43-50; John 18:3-11)

47 Bu Jesus nungka balhwokdi wanjh birrimirndewern bininj birrimbe-
merrinj, dja nawu ngeyyoy Judas nawu nungka dorrenghni nawu twelve
bininj nuyeni Jesus, nungka wanjh dokmidokmi bedberre. Wanjh Judas
bimyikang Jesus kabibunjhmangkenh.

48 Dja Jesus bimarneyimeng, yimeng, "Judas, yiddok woybukkih ngudda
kanbunjhmang ba bu kankukweykan ngaye nawu Bininj Duninh?"

49 Wanjh bu bininj nawu Jesus birrikadjudji birrinang baleh kaluk
kakurduyimerran, wanjh birrimarneyimeng Jesus, birriyimeng, "Ngudda
nawu Yiwohrnan, yiddok yidjare ngarrbendulubun mandjawak dor-
rengh?"

⁵⁰ Dja wanjh nakudji bikanemdjokeng kunkanemkun nuye nakudji bininj nawu bihmarnedurrkmirri bininj nawu kabenmarnewohrnan priests.

⁵¹ Dja Jesus yimeng, "Bonj, ngurribawo!" Wanjh bikanemkarmeng bikanemmarbom.

⁵² Wanjh Jesus benmarneyimeng nawu birrihikimuk priests, dja bininj nawu birriwohrnani bedberre djamun ngalengngarre templekenh, dja mak nawu dabborrabbolk nawu birrimdjarrkwam kabirrimang. Wanjh yimeng bedberre, "Yiddok nguddanu ngurrimwam ngurrimkang mand-jawak dja kundulk dorrengh bu ngaye kandimang, yiman bu ngaye ngabenhbengbuyikahmi birriwarlahken bininj ba kabirrikarrebakke ngudberre mankarre?"

⁵³ Ngurriburrun ngaye karrihdjarrkni kunbarnangarrabubuyika munguyh kore temple kuberrkkah, dja ngudda minj kumekbe kandimayi. Dja wanjh bonj, bolkkime wanjh ngudberre bu kuhni ngurrikurduyime, kore kumunun wanjh kakimukmen dja yiman kanmarnewohrnan."

Peter Bimarneyakwarrinj Jesus

Luke 22:54-62

(Matthew 26:57-58,69-75; Mark 14:53-54,66-72; John 18:12-18,25-27)

⁵⁴ Wanjh bedda birrimey Jesus dja birrikang birringimowong kore kurrnk nuye nawu kabenmarnewohrnan priests. Peter bibalhmunkebuni Jesus djarrehbeh.

⁵⁵ Wanjh yikahwi bininj kunak birriworrhmeng kubulkayh kuberrkkah kore bininj birribalhgimi, wanjh birridjarrkyerrkang, dja Peter yerrkang kore bedda birrihni.

⁵⁶ Kaluk ngalkudji ngalyawk ngalbu bininj bihmarnedurrkmirri, wanjh binang Peter bu ni kore kunak bikukwolkani, wanjh ngaleng bidjalkuk-nani dja yimeng, "Nanih nawu bininj nungka warridj Jesus birrihdjarrkrey."

⁵⁷ Dja nungka yakwarrinj, yimeng, "Ngudda ngalbu daluk, ngakukwakwan namekbe bininj."

⁵⁸ Kaluk wurd nabuyika binang dja yimeng, "Ngudda warridj nanu nawu ngurrihraworreni." Dja Peter yimeng, "Ngudda minj yiyime, dja ngaye ngawid!"

⁵⁹ Kaluk yerrekah bu darnkih one hour, nabuyikawali bidjalrayekwong, yimeng, "Woybukkih wanjh nanih nawu bininj nungka warridj Jesus birrihdjarrkrey, dja nungka wanjh nakang Galileebeh."

⁶⁰ Dja Peter yimeng, "Ngudda yuwn bu yiyime, dja ngaye ngawakwan bu baleh ngudda yihyolyolme!" Wanjh kundjalburrikudji rerrih bu nungka balhwokdi wanjh rooster kayhmeng.

⁶¹ Dja Jesus nawu Kawohrnan borledmeng wanjh djurrmud binang Peter. Wanjh Peter burrbom kunwok nuye nungka nawu Kawohrnan bu bimarneyimeng, "Bu minj kabangmekayhme rooster bu bolkkime kuninjkuwu kumunun, wanjh ngudda werkk yiyakwarren ngardduk danjbikkah."

⁶² Wanjh Peter bebmeng kuberrk dja wernhkuknalkbom duninj.

Djamun Birridjekmiwoni Jesus Dja Birriwidjibhkeyi

Luke 22:63-65

(Matthew 26:67-68; Mark 14:65)

⁶³ Wanjh bininj nawu birrimey birrihkarmi Jesus, wanjh birridjekmiwoni, birriwidjibhkeyi,

64 dja warridj birrimimdukkang burudjang dja birridjawam, birri-marneyimeng, "Mah yimulewa yiman prophet duninj ngadberre, dja kanmarneyimen nangale ngunbom?"

65 Dja mak kunbubuyika kunwern kunwok kunwarre birrimarneyimi bu birrimarnbuyinj yemengalmeninj.

Nawu Birriwohrnawohnani Birridjadmeng Jesus

Luke 22:66-71

(Matthew 26:59-66; Mark 14:55-64; John 18:19-24)

66 Kaluk bu kukabel wanjh nawu dabborrabbolk bedberre bininj nawu Israel benkebmawahmeng, kaluk birrikihkimuk priest dja mak bininj nawu birribukkabukkani mankarre, bedda wanjh birridjarrkmirndemor-nnamerrinj. Wanjh djamun bedda birrikang Jesus kore kumirrk bedberre nawu council bininj.

67 Wanjh birridjawani Jesus bu birriyimeng, "Bu ngudda wanjh nungka nawu Christ† nawu God kanberrebbom wanjh kanmarneyimen ngadberre." Dja Jesus benmarneyimeng, "Bu ngaye marneyime ngudberre, ngudda minj kandiwoybukwon.

68 Dja bu ngaye djawayi ngudberre, ngudda minj kandiwokmang bu kandimulewayi.

69 Dja ngaleng bu bolkkime ngarredjingmang bu munguyh ngaye nawu Bininj Duninj ngayerrkan kore kubolkkuken kukun nuye God nawu Dulkarrekimuk Duninj."

70 Wanjh bedda nawu birriwern rowk birriyimeng, "Wanjh yiddok ngudda kaluk Beywurd nuye God?" Wanjh nungka benmarneyimeng, "Yoh. Nguddabu kunmekbe ngurrihyime!"

71 Wanjh bedda birriyimerreni, "Minj nangale mak karridjare kamre kabiyolyolme. Dja ngadman karribekkkang bu nungan naweleng yimeng."

23

Pilate Dja Herod Benebebbehdjawani Jesus

Luke 23:1-12

(Matthew 27:1-2,11-14; Mark 15:1-5; John 18:28-38)

1 Wanjh birrimekbe bininj nawu birriwohrnani birrimirndedolkkarrinj rowk, birrikang Jesus kore Pilate nawu wohrnani governor.

2 Bedda birridedjdjingmey birridjuhuni birriyimeng, "Ngad ngaringalkeng nahni bininj benhbengbuyikahmi ngadberre bininj, benmarneyimi, 'Yuwn ngurrikarremulewan tax kunwardde kore Caesar nawu kawohnan Emperor.' Dja mak nungka mulehmulewarreni yimi bu nungka kunu Christ* nawu king bu kawohnan."

3 Wanjh Pilate bidjawam Jesus, "Yiddok ngudda king yiwohrnan bedberre bininj nawu Jews?" Jesus biwokmey, yimeng, "Yoh. Ngudda kunmekbe yihyime."

4 Wanjh Pilate benmarneyimeng nawu birrikihkimuk priest dja bininj nawu birrimirnderri, yimeng "Ngaye minj ngangalkemeninj nahni bininj nuye kunwarre yimeninj."

5 Wanjh bedda birrirayekwoni bulkkidj duninj. Birriyimeng, "Nungka kabenhbengwarrewon bininj bu kare kabenhbukkabukkan, kondanjkuwu kubolkwarlahkenh Judea, wanjh kunmekbe kunu kumdedjdjingmey kore Galilee, wanjh kondanjkuwuali Jerusalem kumwam."

† 22:67 "Christ" kangeyrohrok "nawu Messiah".

* 23:2 (Dja warridj verses 35, 39) Christ kangeyrohrok "nawu Messiah".

⁶ Bu Pilate bekkang kunmekbe, nungka djawayhmeng, “Yiddok nahn bininj Galileebeh?”

⁷ “Yoh,” birriyimeng. Bu nungka bekkang Jesus kumdolk kang kore Galilee kore Herod wohrnawohrnani, wanjh bimunkeweng kore nungka, dja mak Herod nungan ningihni kore Jerusalem kunmekbe bolkyimi.

⁸ Herod warnmakminj duninh bu binang Jesus, dja korroko djareni binayi bu biwobekkani, dja djareni bikurdunayi marnbuyi kundulkarre duninh dorrengh.

⁹ Herod mak bidjawani Jesus bu kunwernhkah. Kaluk Jesus minj biwokmayi.

¹⁰ Nawu birrikihkimuk priest dja bininj nawu bindibukkabukkang mankarre, bedda warridj birridi kumekbe dja birridjalwernhdjuhbuni duninh Jesus.

¹¹ Kaluk Herod dja djamun nuye birrinjirrhmiwoni Jesus dja mak birridjekmiwoni. Rere wanjh birridjombom namak manburrba, dja Herod birrundiweng kore Pilate.

¹² Kaluk kundjalmekbe barnangarra Herod dja Pilate benemarnburrinj benedabbolkminj, dja kerngehkenhni benehwidnarreni.

Pilate Benyibawong Kabirribiddundulubun Jesus

Luke 23:13-25

(Matthew 27:15-26; Mark 15:6-15; John 18:39—19:16)

¹³ Wanjh Pilate benkayhmeng benmirndemornnameng, nawu birrikihkimuk priest, dja nawu birriwohnrani bedberre bininj nawu Israel benkebmawahmeng, dja mak nawu birriwern bininj,

¹⁴ dja benmarneyimeng, “Ngudda ngurrimkang nahn bininj kore ngaye, ngurriyimeng nungka benhbengbuyikahmi birriwarlahken bininj ba birrikarrebakkeyi kadberre. Dja wanjh ngaye ngadjawam ngakebdjarrkmeng ngudberre kumirrk, dja kandibekka, marneyime ngudberre, minj njale mak ngamarnengalkemeninj nahn bininj kunwarre yimeninj, nawu ngudda ngurrihdjuhbuni.

¹⁵ Dja mak Herod minj njale bimarnengalkemeninj, kunmekbe kunu bimdurndiweng kadberre. Kandibekka, marneyime ngudberre, nahn bininj minj njale warrowoyi ba kunu karrowen.

¹⁶ Wanjh kunukka ngawidjbihke werrek, dja ngamunkewe kare.”

¹⁷⁻¹⁹ Wanjh bedda birridjalwern birridjarrkkayhmeng rowk, “Ray, yibalka, dja kanmarnebekkemen ngadberre Barabbas.” Wanjh Barabbas nanu boyenni yidngahyidngalkeyi kumekbe kubolkkimuk Jerusalem, dja warridj bininj bibom bikukkurmeng, wanjh kunu birriburriweng kore prison.

²⁰ Pilate benyawoyhdjawam nawu birrimirnderri, dja nungka djareni bimunkewemeninj Jesus.

²¹ Dja bedda birriyawoyhkayhmi, birriyimi, “Yika, yibu, yibiddundulubu, yibiddundulubu kore kundulk.”

²² Wanjh Pilate yawoyhyimeng bedberre bu danjibikkah, yimeng, “Njalekah, njale yiddok warrewong? Ngaye minj njale kunwarre ngan-galkemeninj nuye ba kunu karrowen. Wanjh kunukka ngadjalwidjbihke werrek dja ngamunkewe kare.”

²³ Birridjalkayhmi kunrayek birrinami munguyh, “Yika, yibu, yibiddundulubu kore kundulk.” Kalukburk benkayhmimarrkmey.

²⁴ Wanjh Pilate wokkurrmerrinj kunmekbe kurduyimeng bu birrihdjawani.

²⁵ Dja bimunkeweng bininj nawu birridjanwohmeng nawu boyenni birriburriweng kore prison, bu nungka yidngahyidngalkeyi dja warridj bu bininj bibom bikukkurmeng. Nungka wanjh Pilate bibebkeng kore dangbalhmuyindi, dja nawu Jesus bibalweykan benyibawong bedberre, ba kabirrikurduyime bu baleh bedman birridjareminj nuye.

Jesus Birribiddundulubom Kore Kundulk Cross

Luke 23:26-38

(Matthew 27:32-44; Mark 15:21-32; John 19:17-27)

²⁶ Wanjh bu Jesus birribalhkan bedda birriwohnarrinj bininj kangeyyo Simon Cyrenebeh, nawu kumhrey kumdolkkan kuberrk kore kabbal. Bedda birridarrkidmey Simon dja birringorrwong cross kundulk, bimarnedulkngorrkani kore kumunke nuye Jesus.

²⁷ Dja birrimirndewern bininj birrimunkebuni Jesus warridj. Kore kumekbe kumirnde yikahwi morlehmorlenj nawu birrimarnenjinlgwarreni, birrihnalkbuni nuye mak birriberrekaldorrenihmirey.

²⁸ Jesus balborledmeng dja yimeng bedberre, "Ngudda daluhalduk nawu ngurrikang Jerusalem, yuwn gaye kandimarnenalkbun, dja ngudman ngurrimarnenalkburrimen, dja wurdyaw dorreng ngudberre ngurri-nalkkiray.

²⁹ Dja kandibekka, marneyime ngudberre, kaluk kamre bu bininj kabirriyime, 'Kabirrinjinlgmak daluk nawu birriwalirrngwarre, dja nawu minj birrimerlemkayi, dja mak nawu minj birridjikkawoyi.'

³⁰ Wanjh kumekbe kunu kabolkyimerran bu bininj kabirridedjdjang-mang kabirriyime ngarre kunwarddehikhimuk, 'Kanngerrehmen ngadberre!' Dja kabirrikayhme manduludulum, 'Kanbarrkbu ngadberre!'" [Hosea 10:8]

³¹ Mak Jesus yimeng bedberre, "Bu yiman kayime bolkkime kuhni ngandimarnekurduyime gaye nawu ngakukyime yiman mandulkdarrkid rerrih, kaluk baleh kakurduyimerran bedberre nawu kabirrikukyime yiman mandulkdarleh rerrih?"

³² Kaluk benebuyika bininj benebokenh mak bindikang nawu bedman benewarreni, bedda warridj bindikang kabindibunkenh kabenedowe, Jesus dorreng.

³³ Bu birrimbebmeng kore kunred kabolkngeyyo Kunkodjngalng, kumekbe birribiddundulubom Jesus kore cross kundulk, dja mak bedda dorreng namekbe benebokenh nawu benewarreni, bindibebbhuk-barnnameng kore danjbik kundulk cross berrewoneng. Bindikukbarnnameng nakudji nawu kukun kukbarndi, dja nabuyika kudjakku kukbarndi, dja nungka Jesus kubulkayh birrikukbarnnameng.

³⁴ Wanjh Jesus yimeng, "Ngabba, yibularrbu kunwarre bedberre, yibengmidjda dorreng bu kuhnikenh dja minj kabirriburrbun bu baleh kabirrikurduyime."

Kaluk bedda birrilarlmihlarlmirranj manburrba nuye nawu djongbuhd-jongbuyindi, birrihidirri nuye manburrba yiman kayime kunkod rerrih birrihidirri, wanjh yikahwi birriwinhmi, wanjh birriwelengmey namekbe manburrba nuyeni Jesus.

³⁵ Bininj birriwern kumekbe birrihdi birrihnani, dja mak nawu birriwohnani bedberre, dja bedda wanjh birrimarnekekwm birridjekmiwoni Jesus, birriyimeng, "Nungka benngehkeyi birribuyika bininj, wardi nunganwali ngehkerimen bu woybukkih nungka nawu Christ nawu God kanberrebbom, dja bu nungan God bidjarrngbom!"

³⁶ Djamun warridj birridjekmiwoni rerrih. Kaluk birriyikang birri-bowoyi manbu wine,

³⁷ dja birriwokkihyimi, “Bu ngudda woybukkih king yiwohrnan bedberre bininj nawu Jews, wanjh yidjalnghekkerrimen!”

³⁸ Dja ngokko yingkihbinbarndi kaddumkah kore kurrulk kukodj nuyeni wokkibombom yimeng, NAHNI BININJ WANJH KING BEDBERRE NAWU JEWS.

Bininj Nawu Birridjarrkbarndi Jesus Dorreng

Luke 23:39-43

³⁹ Kaluk nakudji nawu nawarreni kumhkukbarndi kunwarre bimarneyimeng Jesus bihdungi, yimeng, “Yiddok minj ngudda Christ nawu God kanberrebom? Yinghekkerrimen dja ngad warridj kanbenengehkemen.”

⁴⁰ Dja nawu nabuyika nawarreni kumhkukbarndi bimduy dja bimarneyimeng, “Yiddok minj ngudda yikengeme God, dja minj yinan bu kandidjarrkbom karrewoneng?”

⁴¹ Ngad wanjh bonj, kandidjadmeng ngarrku bu djal mandjad, kandi-marnekarremulewam bu ngarryimeng kunwarre, dja nanihnjanu bininj minj njale kunwarre yimeninj.”

⁴² Dja mak namekbe nakudjiwi nawu kumhwokdi bimarneyimeng Jesus, “Jesus, kanburru dja kankunikongibu bu yimdurndeng kore Yiwohrnan rowk.”

⁴³ Wanjh Jesus bimarneyimeng, “Woybukkih ngayime ke, djal-bolkkime kunbarnangarra ngudda ngaye kaluk ngarrdjarrkre kore kubolkmakkaykenh duninj.”

Jesus Nungan Ngolekbaworrinj Dja Doweng

Luke 23:44-49

(Matthew 27:45-56; Mark 15:33-41; John 19:28-30)

⁴⁴⁻⁴⁶ Wanjh bu kunmekbe birrihmarneyimerreni ngokko barnan-garraburrk, wanjh djalkakmankang rowk kore kumekbe kubolkwarlakenh rowk Israel, minj kundung bolkwolkayi. Kaluk manburra nawu barndihbarndi kururkburldjan ngarre temple kunurrrk yiwarrudjkenh, djalkmiwam kubulkayh bebbehwam.

Wanjh Jesus kayhmen wernkih duninj, yimeng, “Ngabba, kore kubid ngudda ke ngakurme ngardduk kunmalng.” Wanjh bu kunmekbe yimeng, balwelengngolekbaworrinj, wanjh doweng.

Kaluk burrk bu baldungborledmeng balhwolewolehmeni three oclock, wanjh dungbebmeng yawoyhbolkwolkang.

⁴⁷ Kumekbe nakudji nawu dingihdi nawu wohnani bedberre djamun, bu nang baleh kurduyimerranj, wanjh biburlumeng God, yimeng, “Woybukkih duninj nahn bininj nadjalmakni.”

⁴⁸ Birridjalmirndewernkenh birrimirndemornnamerrinj nawu birrimdjalwam rowk kumekbe bu kabirridjalwernhnang nawu baleh kabimarnekurduyimerranj. Bu bedda birrinang baleh kurduyimerranj, wanjh birridurderrinj kured bedberre birribalherrekaldorrenhmirey.

⁴⁹ Kaluk nawu birriwern rowk nawu birrikuburrbuni Jesus, dja morlehmorlenj dorreng nawu birrimunkekadjungi kore Galileebeh, birrimhdi djarreh birrinang bu kunwern kurduyimerranj.

Joseph Nawu Nakang Kunred Arimathea Bikukkurmeng Jesus Kore Kumidj

Luke 23:50-56

(Matthew 27:57-61; Mark 15:42-47; John 19:38-42)

⁵⁰⁻⁵¹ Kaluk kumekbe nakudji bininj di nawu nakang kubolkkimuk Arimathea. Kaluk kumekbe kunred bedberre bininj nawu Jews. Dja namekbe

bininj ngeyyoy Joseph, nungka dorreng birridjarrkwokdi council bedberre. Dja namakni dja minj kodjdukmeninj bu birriwokmarnburrinj dja mak bu birribuyi Jesus, dja nungka madbuni bu kayimerran kore God Kadjalwohrnan rowk.

⁵² Kaluk nungka wam kore Pilate bikukdjanwohmeng Jesus.

⁵³ Wanjh bu bikukkoluyhweng bikukmey, bikukdukkang manburrba, wanjh bikukkkang bikukkurrmeng kore kuwardderurrk birriwarddedadjkeng bu birrimarnbom kumidj. Kaluk minj nangale bangmekukyuwirrinj, kundjalkerrnge kunu.

⁵⁴ Kunmekbe wanjh Fridayni bu birriyingkihmarbnuni yehyeng Sab-bathkenh, kunbarnangarra seventh kunbarnangarradjamun God nuye bu minj birridurrrkmirriwirrinj. Wanjh Sabbath deddjingmey Fridayni bu dungyibmi. Wanjh ngokko darnkih dungyihdungyibmi.

⁵⁵ Wanjh morlehmorlenj nawu birrimdjarrkwam Jesus kore Galileebeh wanjh bedda birrikadjungi Joseph, birribolknang kumidj dja bu kore baleh yimeng bikukkurrmeng Jesus.

⁵⁶ Wanjh birriwelengdurndi kured birriyingkihmarbnuni namanjmak nawu kunkukkenh birrikudelkkemeninj. Wanjh bu Saturdayni manbu Sabbath kunbarnangarra seventh, bedda birrimarrkmangi mankarre bu God benwokrayekwong korroko, minj birridurrrkmirriwirrinj, birringud-jngehmi.

24

Daluk Birrimulewam Jesus Bu Dolkkang Kore Kumidjbeh

Luke 24:1-12

¹ Dja bu Sabbath kunbarnangarra seventh yakminj, kaluk Sunday bu djarreh kumhbarrhbuni, wanjh bedda nawu morlehmorlenj birriwam kore kumidj, birrikang nawu namanjmak manbu birriyingkihmarbnom kunkukkenh birrikudelkkemeninj.

² Wanjh kunwardde manbu kururrdangmaye bininj birrirurrdangmayebalhmeng bu Fridayni, wanjh manekke kunwardde birrinang warddewayhmeng, dja midjdangmayerurrkni.

³ Wanjh bu bedda birringimeng kore kumidj minj birrikukngalkemeninj Jesus.

⁴ Wanjh kundjalmekbe rerrih, bu bedda birrikodjmayahmeng kumekbe bindimarnebebmeng bininj bokenh nawu benemadjbami duninjh yiman namarrkon kamayhke.

⁵ Wanjh bedda nawu daluhdaluk bu birrikeleni wanjh birridjudkurlmi birridjalbolknani kanjdji kurorre. Wanjh bininj beneyimeng bedberre, "Njalekah nawu bininj karrarrkid ngudda ngurrihyawan kondah kore kumidj?"

⁶ Nungka minj konhda kakukyo. Nungka dolkkang yawoyhmimbiminj. Kaluk ngurriburrbu bu nungka ngunmarneyimeng ngudberre bu balhni kore Galilee,

⁷ bu yimeng bu nungka nawu Bininj Duninjh yingkihwokdjedjenyoy nuye bu kaluk kabirrikukweykan kore birriwarre bininj kabirribiddundulubun, dja kaluk kunbarnangarra danjbik nungka karrolkan kumidjbeh kayawoyhmimbimen."

⁸ Wanjh kunu birriburrbom bu nungka Jesus benyingkihmarneyimeng.

⁹ Bu birribolkbawong kumidj dja birridurndi, wanjh kuhni rowk bindimarnemulewam Jesus nuye eleven bininj dja mak birribuyika rowk nawu birrihdjarrkni.

¹⁰ Kaluk birrimekbe morlehmorlenj nawu kuhni bindimarnemulewam, bedda wanjh Mary ngalbu Magdalabeh, Joanna, dja Mary ngalbu ngalbadjan nuye James, dja morlehmorlenjbubuyika nawu bedda birrihdjarrkrey.

¹¹ Wanjh nawu birrimekbe bininj bedda bindidjalwokkewkmeng dja minj bindiwoybukwoyi. Dja birriyimi bu daluk birrikodjbengwabom.

¹² Dja nawu Peter dolkkang rlobmeng kore kumidj, wanjh bu boddanj bolknang, nungka nang manburrbawi yongohyoy, wanjh dokmeng dja mayahmeng bu baleh kurduyimerranj.

Jesus Benbenekukbukkarinj Berrewoneng Bininj Nawu Benehrey Kore Kunred Emmaus

Luke 24:13-35

(Mark 16:12-13)

¹³ Bu kunmekbe kunbarnangarra rerrih bu Jesus dolkkang kumidjbeh kaluk benebokenh bininj nawu Jesus benemunkekadjung, bu benebalrey kore kubolkyahwurd kabolkngeyyo Emmaus kuyawbolkdjarrehni Jerusalem yiman eleven kilometres.

¹⁴ Wanjh benehyolyolmi kunmekbe rowk nawu kurduyimerranj.

¹⁵ Wanjh bu benehyolyolmi dja benehdjavarreni, Jesus nungan beb-meng berrewoneng, wanjh birrihdjarrkrey.

¹⁶ Yiman rerrih yehyeng benbenemimbuyikawong ba minj benekukburknayi Jesus.

¹⁷ Wanjh Jesus benbenemarneyimeng, "Njale ngudda ngunehyolyolme bu ngunehre?" Wanjh bedda benedanginj benekebbumi.

¹⁸ Wanjh nakudji nawu ngeyyoy Cleopas biwokmey, yimeng, "Yiddok ngudda yidjalkudji nawu yimdjalwohwam Jerusalem dja yiwakwan bu baleh bolkkime kurduyimerranj kumekbe?"

¹⁹ Wanjh Jesus yimeng berrewoneng, "Baleh kurduyimerranj?"

Wanjh bedda benemarneyimeng, "Nawu Jesus birrimarnekurduyimeng nawu Nazarethbeh. Nungka nawu prophetni dja kurduyimi kore God djareni, dja mak bininj rowk ngarikurdunang kundulkarre dorrengh bu nungka kurduhkurduyimi dja mak bu kunwok nuye warridj.

²⁰ Dja bu ngad kadberre birrikihkimuk priest dja mak nawu kabirriwohrnan kadberre bedda birrikukweykang kore Pilate kabitjadme kabirribunkenh, wanjh birribiddundulubom.

²¹ Dja ngad ngarrinjilngmakni nuye bu ngarriyimi yimankek nungka wanjh namekbe nawu God kanberrebbom bu kandjalbebkemeninj kadberre bininj nawu Israel kankebmawahmeng. Kunu wanjh bonj, dja mak bu kunmekbe birrikurduyimeng birribom wanjh bolkkime kamarnbun kunbarnangarra danjbik.

²² Dja warridj yikahwi nawu ngad morlehmorlenj nawu ngarrihdjarrkrey Jesus, kandikangebarrhkeng ngadberre. Bedda birrikakdoj birriwam kore kumidj,

²³ dja minj nungka birrikukngalkemeninj. Dja birrimdurndi ngandimarneyimeng bu birrinang kunbuyika Godbeh angel bindimarnebebmeng nawu beneyimeng bu nungka Jesus karrarkid.

²⁴ Wanjh yikahwi nawu ngad ngarrihdjarrkrey wanjh birriwam kore kumidj, wanjh birrinang rowk kunmekbe bu morlehmorlenj birriyimeng, dja nungka minj birrikuknayi."

²⁵ Wanjh bu Jesus benbenebekkang rowk nungka benbenemarneyimeng, "Ngudda wanjh ngunemayaliyak, dja minj kunkange ngurrewoneng kabangmewoybukwon kunwok rowk nawu prophet birriyimi bu God birriwokmulewani.

26 Nguneburrbuyi bu Christ* nawu God ngunberrebbom biyingkih-marnedjedjenyoy bu kuhni kadjakbekkan werrek, ba kunu kangimen kore kunwernhmak duninjh nawu nuye kore heaven kayawoyhkukenmen."

27 Wanjh Jesus benbenewernhmarnemulewani kunwok nawu nungka biyingkih-mulewani kore bimbuyindi rowk. Dedjdjingmey kore Moses yingkih-bimbuni nuye, dja mak kore nawu prophets rowk birriyingkih-mulewam nuye.

28 Wanjh bu birribebmi darnkih kured kubolkyahwurd kore bedda benehrey, nungka Jesus yimankek djalrawinjwi.

29 Dja bedda benemaddi benedjanwohmeng, beneyimeng, "Yimray kanedjarrkyo, wanjh korroko wolewolehminj bu bolk kangokdan." Wanjh kunu nungka birridjarrkngimeng kumekbe birridjarrkyuwirrinj.

30 Wanjh bu birridjarrkni kabirringun, nungka lodmey kandidjdjawa biburlumeng Kornkumo, welengbakkeng wanjh benbenewong.

31 Wanjh kunmekbe nawu kerrngehkenh benbenemimbuyikawong wanjh yakminj dja benewernhkukburrrknang. Wanjh nungka djalyakminj berrewoneng.

32 Wanjh bedman benemarneyimerrinj, "Bu ngad kanemhrey wanjh ngarrkangerungi bu nungka kanhwernhmarnemulewani ngarrku God nuye kunwok kore kabimdi."

33 Wanjh kunmekbe rerrih bedda benedolkkan benedurndi Jerusalem bindingalkeng nawu Jesus nuye eleven bininj nawu birrimirndemorn-namerrinj dja mak birribuyika nawu birrihdjarrkni,

34 dja bedda birriyimi, "Woybukkih duninjh! Dolkkang kumidjbeh Jesus nawu Kawohnan, dja Simon bimarnekukbukkarinj."

35 Wanjh namekbe bokenh bindimarnemulewani bu baleh kurduyimer-ranj bu bedda birrihdjarrkrey, dja mak bu benewernhkukburrrknang bu nungka lodbakkeng kandidjdjawa.

Jesus Kukbukkarinj Bedberre Bininj Nuye Kore Jerusalem

Luke 24:36-49

(Matthew 28:16-20; Mark 16:14-18; John 20:19-23; Acts 1:6-8)

36 Bu kunmekbe benebalhmulewani, Jesus nungan dingihdi kore bedda birrihmirnderri, dja welengyimeng bedberre, "God nuye kunmodmikenh ngadjare ngunwon ngudberre."

37 Dja bedda wanjh birriwernhkeleminj duninjh birrideldemeng, bedda birriyimeng bu yimankek nawu birrihnani wanjh namalngkerrnge.

38 Dja nungka yimeng bedberre, "Njalekenh ngudda ngurrihnjilngwarre ngurrihdjawarren dja mak ngurrihkewkme kore kukange ngudberre?"

39 Kandididna dja mak kandidengena, dja wanjh ngaye. Kandikarmen dja kandikukburrrkna! Nawu namalngkerrnge minj kakarme kunkanj dja mak minj kunmurrng yiman ngaye kandihnan ngahkarme."

40 Bu kunmekbe yimeng wanjh benmarnebidbukkarinj, dja mak kundenge warridj.

41 Wanjh bedda minj birribangmewoybukwoyi bu kunmekbekenh birrihwarnmakni dja mak birrihmayahmi, wanjh nungka benmarneyimeng, "Yiddok konhda njale ngurrihkarme ba ngangun?"

42 Wanjh djenj djolengyoy bu birrikinjeng kuyirrkere, wanjh birribakkeng birriwong.

43 Wanjh nungan mey, nguneng namekbe djenj kore kumirrk bedberre.

* 24:26 (Dja kore verse 46 warridj) "Christ" kamenyime, "nawu Messiah".

⁴⁴ Wanjh benmarneyimeng, “Bu ngaye dorrengh karribalhdjarrkrey kuninjkunu wanjh kunmekbe bu marneyimeng ngudberre, bu ngayimeng, ‘Bu kunwok rowk kadjalmarnbuyindan nawu ngaye nganyingkihmulawani kore mankarre bu Moses bimbom, dja mak prophet birribimbuni, dja mak kore Psalms kabimdi.’ ”

⁴⁵ Wanjh nungka benmayalimarnbom ba birriwernhburrkburrkbekkang God nuye kunwok kabimbuyindi.

⁴⁶ Dja benmarneyimeng, “Kuhni kunmekbe bu kawokbimdi kore God nuye kunwok bu ngaye Christ nawu God ngunberrebbom ngudberre bininj, nganyingkihmulawani ngadjaldjakkankenh, dja mak bu kunbarnangarra danjbik ngarrolkkankenh kumidjbeh ngayawoyhmimbimen.

⁴⁷ Dja mak ngurrbendjalmarneyolyolmen bu bininj kabirribawon kunwarre bedberre dja kabirriborledme kore God, ba kabularrbun kunwarre bedberre dja kabengmidjan dorrengh kore ngaye Christ ngabenmarnekurduyimeng. Kunmekbe wanjh ngurrbenmarneyolyolmen bininj birriwokbubuyika rowk kore kubolkbubuyika rowk, ngurridedjdjingmang kondanjku kore Jerusalem.

⁴⁸ Ngudda wanjh ngurrinang kunmim ngudberre kuhni bu woybukkih kurduyimerranj, wanjh kaluk ngurrbenmarnemulewan birribuyika bininj.

⁴⁹ Dja kandibekka, marneyime ngudberre, ngaye ngamunkewe ngudberre nawu Ngabbard ngunberrebbom. Dja ngudda ngurridjalninh konhda kubolkkimuk, kaluk rerre ngurribolkbawon bu kaddumbek kundulkarre yiman ngundjongbun ngudberre.”

Jesus Benbawong Bininj Nuye Dja Dolkkang kore Heaven

Luke 24:50-53

(Mark 16:19-20; Acts 1:9-11)

⁵⁰ Wanjh Jesus benkang kuberrkkah kore Bethany, wanjh bidwayhmeng bidjawam God kabenmarnekurduyime kunmak.

⁵¹ Wanjh bu kuhni balhyimi, nungka Jesus benbawong bedberre, dja God biwayhkeng bikang kore heaven.

⁵² Wanjh bedda bu birriburlumi bu birriyimerreni, wanjh birridurnderinj kore Jerusalem birrikuniwarnmakni duninjh.

⁵³ Kaluk bedda munguyh birrihrey kore temple kururk yiwarrudjkenh birriburlumi God.

John

Jesus Christ Nawu Kangeyyo "Kunwok" Yimerranj Bininj Duninj *John 1:1-18*

¹⁻² Bu kerrngehkenh duninj minj bolkmarnbuyindangimeninj, wanjh nakudji nawu ngeyyoy Kunwok djalyingkihdi bu kerrngehkenhni. Bu nungka wanjh God benedjarrkdi dja mak nahni nawu Kunwok nungka wanjh God duninj. Nungka munguyh benedjalyingkihdi God bu ker-ngehkenh duninj.

³ Wanjh nungan marnbom yehyeng rowk kore God djareminj. Minj nangale mak nabuyika marnbuyi. Dja nungka nadjalkudjiwi namekbe nawu Kunwok bimarnemarnbom rowk.

⁴ Nungka nadjalkudjiwi nawu karrmi kundarrkid kore nungandeleng bu kandarrkidwong ngad bininj rowk kadberre. Kore nungka nuye kundarrkid wanjh ngad kanmarnebolkwolkan nawu karriwarlahkenh bininj rowk.

⁵ Kaluk nungka nawu Kunwok wanjh munguyh kandjalmarnebolkwolkan kadberre yiman kunak rerrih kore kubolkmunun karridi. Wanjh manbu kunkak minj kabirrirrombun nuye kore kahbolkwolkan kadberre munguyh.

⁶⁻⁷ Kaluk God bimmunkeweng nabadbuyika bininj nawu kangeyyo John. God bimunkeweng kore nungka benmarnemulewani kunwoybuk manbu kabolkwolkayindan kadberre, ba bu bininj nawu birriwokbekkani John birriwoybukwoyi kore Jesus nawu yiman kayime Kunwok nuye God.

⁸ Minj nungan John kanmarnebolkwolkayinj, dja nungka kumdjalwam bu mulewam kunwoybuk dorreng nawu kahbolkwolkankenh.

⁹ Wanjh namekbe nungka nadjalkudjiwi nawu kanmarnebolkwolkan kadberre rowk kaluk nungka kumwam kondah kurorre.

¹⁰⁻¹¹ Kaluk nawu Kunwok nungka kumwam yonginj kore nungka naweleng bolkmarnbom kondanjku kurorre kore God nungan djareminj. Dja bonj, bininj nawu birrikang kondanjku kurorre minj birriwernhkuk-burrknayinj bu nungka kumwam.

Nungka nawu benyikang nawu bininj nuye birriredboni nawu Jews, dja bedda minj birrimarnedjareniwirrinj.

¹² Dja yikahwi bininj birrikimey nawu bedda wanjh birringeyburrbom dja birriwoybukwong kore nungka. Wanjh nungka kunu benmarnekar-remarnbom birrimekbe bininj bu birriyimerranj bebeywurd nuye God.

¹³ Bininj nawarlahkenh kayawbornan nawern wurdyaw kore kadjare, dja minj bedda bindimarnbuyi bininj bu birriyimerrangimeninj bebeywurd nuye God. Dja ngaleng minj bininj birrimarnburrimeninj bedmandeleng bu birriyimerrangimeninj God nuye bebeywurd. Dja minj nangale mak bininj benmarnbuyi nuye wurdwurd bu birriyimerrangimeninj bebeywurd nuye God. God nawu nadjalkudji nungan benmarnbom nawu bininj bu birriyimerranj bebeywurd nuye.

¹⁴ Namekbe nawu kangeyyo Kunwok, nungka wanjh djalyimerranj bininj duninj, nawu kumwam karridjarrkni kore kunbolk kadberre. Kaluk nungka nawu munguyh kanwernhkongibun dja mak nungka kanmarneyime kunwoybukkenh nawu ngad kadberre. Ngad nawu karrinang bu nungka wanjh beywurd nadjalkudji nuye God nawu kornkumo, dja kakarrme nuye nadjalmakkaykenh duninj.

¹⁵ Nawu John benhmarnemulewani birriwern bininj kore kunwoybuk namekbekenh nawu beywurd nuye God. Nungka wokkidarrarrhmi bu benhmarneyimi, "Nanihnjanu wanjh bininj gaye yingkihmarne-mulewani ngudberre. Gaye marneyimeng ngudberre bu nungka kamhre yerre kumunke ngardduk. Kaluk nungka wanjh nadjalwernhkukenh duninjh nawu ngardduk. Nungka nadjalwernhyungkini, dja gaye yerre ngarranginj."

¹⁶ Dja namekbe nawu ngeyyoy Kunwok, nungka wanjh kukbarlmiyindi kunwern kunmakmak dja mak munguyh kandjalkongibun. Dja kunmekbekenh nungka wanjh kandjalwonowon kunmakmak munguyh munguyh kadberre.

¹⁷ Kunkareni wanjh God biwong Moses manbu mankarre nuye. Dja bu bolkkime God kanwon nawu Jesus Christ nawu kandjalwernhkongibun bulkkidj dja kanbukkabukkan kadberre bu djal kunwoybuk rowk nuye nawu God.

¹⁸ Nungka wanjh nadjalkudji birrarrkidnang God. Minj nangale bininj birrarrkidnaya God. Dja Jesus Christ, namekbe wanjh God duninjh rerrih, nungka wanjh nadjalkudji beywurd nuye Ngabbard God, dja kahdi kore kukange nuye. Wanjh nungka kankukbuk kang kadberre nawu Ngabbard God.

*John Nawu Benkukduhkeyi Bininj Bihmulewam Jesus Bu Yerre Kamre
John 1:19-28*

(Matthew 3:1-12; Mark 1:2-8; Luke 3:15-17)

¹⁹ Kaluk nawu Priests dja mak nawu Levites birriwam kore Jerusalem-beh dja birrimarnebebmeng John. Nawu birriwohrnani Jews bininj bindimunkeweng bedda kore John birridjawayi bu nangale nungka.

²⁰ Kuhni John yimeng, minj warlkkarrimeninj bu benhmarnemulewarreni djal woymbukkih duninjh djalmulewarreni bedberre, "Ngaye kunu minj Christ."

²¹ Wanjh kuhni birridjawam, birrimarneyimeng, "Dja kaluk baleh, yiddok ngudda kunu Elijah?" Nungka benmarneyimeng, "Ngaye ngawid." Wanjh birriyimeng, "Yiddok ngudda nawu namekbe nabuyika prophet nawu Moses biyolyolmeng?"* Dja nungka benwokmey, yimeng, "Bur-rkyak."

²² Kalukburk birrimarneyimeng, "Ngudda nangale? Kanmarnemulewarremen ngadberre ba ngarridurndeng ngarrbenmarneyime nawu kandimunkeweng bu nguddahkah."

²³ Wanjh John benwokmey, yimeng kore nawu prophet Isaiiah biyingkih-mulewani, yimeng,

"Ngaye nawu ngahkayhme kore kubolkdarleh, kore ngayime, 'Ngurriy-ingkihbolhmarnbu mandjad nuye nawu Kawohrn Rowk!' [Isaiiah 40:3]

Kuhni ngakurdyoyime yiman bu yimeng Isaiiah nawu prophet bu korroko biwokyolyolmeng nuye God."

²⁴ Kaluk yikahwi birribuyika birrihdi nawu Pharisees bindimunkeweng, dja birridjawani John.

²⁵ Wanjh birrimekbe birriyawoyhdjawam, birriyimeng, "Ngayh, bu ngudda minj nawu Christ, dja mak ngudda minj nawu Elijah, dja mak

* 1:21 Deuteronomy 18:15, 18; Malachi 4:5-6

ngudda minj namekbe nawu Prophet, dja njalekenh ngudda yibenkukduhke bininj?"

²⁶ John yimeng, "Ngaye ngabenkukduhke bininj kore kukku, dja kumekbe ngurridjarrkdi nakudji nawu ngudda minj ngurrikukburrbun.

²⁷ Dja nungka nawu yerre kamhre. Minj ngaye ngamak bu yimankek ngawohdengeyerre nuye nawu karrengedjongbuyindi."

²⁸ Kuhni rowk kurduhkurduyimerrangeni kore kabolkngeyyo Bethany kaluk kore borledmikenh mankabo Jordan kore John benhkukduhkeyi.

Jesus Yiman Kayime Lamb Nawu Godbeh

John 1:29-34

²⁹ Kunbarnangarrabayika John binang Jesus kumhrey kore nungka, wanjh John yimeng, "Ngurrina! Nahni nawu bininj wanjh mayh lamb nawu God bimunkeweng! Nungka wanjh kanmarnebularrbun kunwarre rowk kadberre ngad karriwarlahkenh bininj rowk.

³⁰ Nahni wanjh namekbe nanu nawu ngahmulewani bu ngayimeng, 'Nakudji bininj nawu kamhre yerre ngardduk wanjh nanu kawernhkuken duninj dja nganyurrhke. Dja nungka wanjh yingkihyingkihi bu ngaye ngayakni.'

³¹ Ngaye minj ngayeman ngakukburrbuyinj. Dja ngaye wanjh ngamwam kukduhkeyi ngudberre kore kukku ba bu ngudda bininj nawu Israel ngunkebmawahmeng, wanjh ngurrikukburrbun nungka nawu nangale."

³² Dja warridj John mulehmulewani yimeng, "Ngaye nganang Namalng-makkaykenh kumkoluy kaddum heavenbeh kore nungka, yiman kayime doddorok kamkolung, dja wanjh benedjarrkdi munguyh.

³³ Ngaye minj ngabangmekukburrbuyinj namekbe bininj. Dja God nawu nganmunkeweng bu ngabendjuhkeyi kukku dorrengh, korroko yimeng ngardduk, 'Yinan Namalngmakkaykenh kamkolung dja kayerrkan kore bininj. Namekbe nanu wanjh nungka kabenkukduhke Namalng-makkaykenh dorrengh.'

³⁴ Dja woybukkih ngaye nganang kumekbe kurduyimerranj rowk. Kumekbekenh kunu wanjh marneyime ngudberre woybukkih bu nahni bininj wanjh nawu Beywurd nuye God."

Jesus Benkayhmeng Yikahwi Bininj Bu Birrimunkekadjuy.

John 1:35-51

³⁵ Kunbarnangarrabayika John birridjarrkdi bininj nuye bokenh nawu benbenehbukkabukkani.

³⁶ Jesus regehrey wanjh John biwernhnang duninj dja yimeng, "Ngurrina! Nanihnjanu bininj nawu God bimmunkeweng. Nungka wanjh yiman kayime Lamb nuye God."

³⁷ Bu nawu John nuyeni bininj bokenh benebekkang kuhni John yimeng, wanjh bedda benemunkebom nawu Jesus.

³⁸ Wanjh Jesus borledmeng, benbenenang benhemunkekadjuj wanjh benbenedjawam, "Njale ngunehyawan?" Wanjh bedda benewokmey beneyimeng, "Rabbi, baleh ngudda yihreddi?" Kuhni kunwok "Rabbi" kayime "Nawu kanbukkabukkan".

³⁹ Wanjh benbenemarneyimeng, "Ngunemray dja ngunenang." Wanjh birridjarrkwam benenang kore Jesus yongohyoy. Kunu wanjh kumdungbidbom kaddumkah. Dja birridjarrkdi kumekbe bu kunbarnangarrakuyeng.

⁴⁰ Nakudji nawu kumekbe benebokenh benebekkang bu John yimeng wanjh benemunkekadjuy Jesus, nanu Andrew nawu Simon Peter benedanginj.

⁴¹ Kundjalburrikudji rerrih Andrew wam, bingalkeng nawu benedanginj ngeyyoy Simon, wanjh bimarneyimeng, "Ngad ngarringalkeng nawu Messiah." Kuhni kungey kayime "nawu Christ".

⁴² Wanjh Andrew bimey Simon, bikang kore Jesus. Wanjh Jesus biwernhnang Simon dja bimarneyimeng, "Ngudda nawu Simon, beywurd nuye John. Kaluk ngaye ngeykurme ngudda Cephas." Kunmekbe kungey bokenh Simon dja Cephas kamenyime, "Kunwardde."[†]

⁴³ Wanjh kunbarnangarrabuyika Jesus djareminj bu rawinj kore kubolkkimuk Galilee. Nungka kunyungki wam binang Philip, bimarneyimeng, "Ngaye kanmunkekadju."

⁴⁴ Philip nakka wanjh nakang kunred kabolkngeyyo Bethsaida. Kumekbe nawu birrirdboni warridj nawu Andrew dja Peter.

⁴⁵ Philip biyikang dja bimarneyimeng Nathanael, "Yiburrbun kore Moses bimbom kore mankarre bu biyingkihmulewani nahni nakudji bininj, dja mak prophets warridj birriyingkihmulewani kore birribimbuni. Namekbe wanjh ngad ngarringalkeng, dja nakka wanjh Jesus nawu Nazarethbeh, nawu beywurd nuye Joseph."

⁴⁶ Wanjh Nathanael yimeng, "Njale namak kambembe Nazarethbeh?" Wanjh Philip nunganwali biyawoyhmarneyimeng, "Yimdjallay dja yinan."

⁴⁷ Bu Jesus binang Nathanael kumhbebmi darnkih kore nungka, wanjh Jesus benmarneyimeng, "Ngurrina! Nahni nawu bininj kamhre, woybukkih bu nungka nawu Israel bikebmawahmeng. Nungka munguyh kahmulewan kunwoybuk dja minj kakurren."

⁴⁸ Nathanael wanjh bibekkang dja bimarneyimeng Jesus, "Balehbeh ngudda kanburrbun ngaye?" Wanjh Jesus biwokmey, yimeng, "Bu ngudda yidjaldjurlewani kore manmarnawarn, ngaye wanjh nang ngudda. Wanjh yerreh kunu Philip balwam ngunmey."

⁴⁹ Wanjh Nathanael kangebarrhmeng dja bimarneyimeng Jesus, "Rabbi, ngudda nawu Beywurd nuye God, dja warridj ngudda king kadberre nawu Israel kankebmawahmeng!"

⁵⁰ Wanjh Jesus bimarneyimeng, "Yiddok kuhni kanwoybukwon bu kumekbekenh kunu ngaye marneyimeng bu ngaye nang yihdjaldjurlewani kore manmarnawarn? Kaluk ngurrinan kundjalwernhkimuk duninjh."

⁵¹ Dja mak Jesus yimeng bedberre, "Woybukkih djalwoybukkih duninj marneyime ngudberre. Kaluk ngurrinan heaven kamarrhmire dja God nuye angels kabirribidburren dja kabirrimkolurren kore ngaye nawu Bininj Duninjh."

2

Jesus Birrikurdunang Bu Durrkmirranj Kundulkarre Dorreng Nuye John 2:1-11

¹ Kaluk bu kunkodjke bokenh wanjh nakudji bininj benemarrinj daluk. Kunmekbekenh birriwern bininj birrimarnbom mulil berrewoneng bu bindikalidjurrkkang. Kuhni bu birrimirndemornnamerrinj kabolkngeyyo kunred Cana kore kubolkkimuk Galilee. Jesus nuye ngalbadjan dorreng birridjarrknguni mulil kumekbe.

[†] 1:42 Nahni danjbik kungey, Peter, Simon dja Cephas, wanjh nakka karohrok kamenyime "Kunwardde".

² Dja mak birrimekbe bininj bindimarnekayhmeng Jesus dja nuye bininj nawu benbukkabukkani, wanjh bedda birriwam kore mulil birridjarrkarmeng.

³ Birriwern bininj birribonguni wine manbu manbarnem grape mankalkkid bu mulilkenh. Wanjh birribonguneng boyakminj. Wanjh Jesus ngalbadjan nuye bimarneyimeng, "Djedje, boyakminj manbu manbarnem grape mankalkkid manbu birribonguni."

⁴ Wanjh Jesus bimarneyimeng, "Yina, Karrang, yuwn bu kandjurrkdjurrkwon. Kuhni minj karremarnbuyindangimeninj ngaye ngardduk bu ngakurduyime."

⁵ Kumekbe birrihni bininj nawu birrimarnedurrkmirri nawu wohrnani mulilkenh. Jesus ngalbadjan nuye wam benmarneyimeng birrimekbe bininj, yimeng, "Ngurridjalkurduyimen rowk kore nungka Jesus ngunmarneyime ngudberre."

⁶ Kumekbe darnkih kore mulil birrihkarrmi wanjh six kunwardde di manbu birriwarddemelkarnbom birriwarddemelkdjorlok Wong kore kukku birriborrahkendongi. Mahni manbu kukkukenh ngalngkihkimukni, dja nawu Jews bininj birribokarrmi ba bu bedda birriwurbekkereni kore yiwarrudjkenh bedberre.

⁷ Wanjh Jesus wam benmarneyimeng nawu birrimarnedurrkmirri nawu kumekbe wohrnani mulilkenh, wanjh yimeng bedberre, "Ngurriborrahdahkendo kukku kore nahni manbu kukkukenh." Wanjh birriborrahkendoy bobarlumeng rowk kaddum duninj.

⁸ Wanjh Jesus benmarneyimeng, "Mah wanjh, ngurriboma dja ngurriboka ngurribowo bininj nawu kawohrnani mulilkenh." Wanjh bedda kumekbe birridjalkurduyimeng.

⁹ Namekbe bininj nawu wohrnani mulilkenh wanjh bonguneng bomanjbekkang kukku manbu bomanjborledmeng bu wine boyimerranj. Kaluk namekbe bininj minj burrbuyinj bu balehbeh kumbomarnbuyindanj. Dja nawu birrimhbokani birrimekbe birridjalburrbuni bu Jesus bomarnbom. Wanjh bu bonguneng bomanjbekkang wanjh bikayhmeng bininj nawu benemarrinj daluk.

¹⁰ Wanjh bidjawam, "Ngayh! Balehbeh mahni yibongalkeng manbomanjmak? Ngudda yikurduyimeng kunmak. Birriwern bininj bu kabirrimarren wanjh kabindibowon manbu manbomak werrek. Kaluk bu birriwern kabirriworromkan wanjh manbomanjwarre kabindibowon. Dja ngudda yikurduyimeng kunbuyika, dja bolkkime yibebkeng manbu manbomanjmakaykenh kore yihbokarrmi."

¹¹ Kuninjkuwu Jesus kurduyimeng bu wam kunred Cana kore kubolkkimuk Galilee. Bu kuhni wanjh dedjingmey bu durrmirranginj kundulkarre dorreng ba bu bininj birriburrbuyi bu nungka nadjalmakaykenh duninj. Wanjh kumekbe kunu nawu bininj benbukkabukkani birrinang wanjh birriwoybukwong.

Bu Jesus Bendungi Bininj Kore Kuberrkkah Manbu Temple

John 2:12-25

(Matthew 21:12-13; Mark 11:15-17; Luke 19:45-46)

¹² Kundjalmekbe rerrih bu birriyakwong mulil, Jesus wam kore kunred Capernaum. Kaluk birridjarrkwam ngalbadjan nuye, birridangerrinj dja bininj nawu benbukkabukkani. Wanjh bedda kumekbe waken birriyerrkang yiman kunkodjke danjbik.

¹³ Bu darnkih kumhrey ngarre mulilkenh bendarrkidbawongkenh nawu Jew bininj birrimarnbuni wanjh birribalburrbuni kunkareni bu God minj benbuyi nawu mawahmawah bedberre dja bendjaldarrkidbawoni. Wanjh

kunmekbekenh kunu Jesus wam karrkad kore kunred kururkweren Jerusalem.

14 Wanjh nungka wam ngimeng kore Temple kuberrkkaah. Nungka wanjh bendjalnang nawu bininj birriweykani nawern mayh nawu bulikki dja sheep dja mayhmayh nawu doddorok. Dja mak bennang bininj nawu birrihni birriweykani money kore balabbala.

15 Wanjh Jesus yarlmey manbu manyarlbiik, dja yarlmornnamornnameng bu yarlmarnbom ba bu kawidjbiikhe nawu mayh. Wanjh mirndedjirrkang mayh rowk mirndebebkeng kore kuberrkkaah Templebeh. Wanjh mayh nawu money, kukburriweng dja kuckyarlarmerrinj, dja mak balabbala borledkeng lambarrkurrmeng bedberre nawu bininj birrihni kore money birrihweykani.

16 Wanjh benmarneyimeng bininj nawu birriweykani korlobbok, "Mah, ngurribekemen naninjnanu mayhmayh. Konhda yiddok minj ngurribur-buyi bu ngardduk Ngabbard nuye kunrurk, dja ngudda ngurridjareminj ngurrimarnbuyi kuninjkuu kunrurk bu ngurriweykankenh. Ngudda nangale mayh?"

17 Bu Jesus kunmekbe kurduyimeng wanjh nawu bininj nuye benbukkabukkani birrinang, wanjh birriburrbom kore bimbuyindanginj korroko bu yimeng, "Ngaye ngarurknganenghme ngudda ke, dja mak ngakangewurhmenng." [Psalm 69:9]

18 Dja nawu birriwohrnani Jews bininj birrimwam kunyid dorreng birridjawam Jesus, birrimarneyimeng, "Njalekah ngudda kuhni yikurduyimeng yibebkeng dja yiburriburriweng ngadberre. Mah wanjh, kanbukka ngadberre kundulkarre ke bu yimankek yiyime ngudda yidjalwohrnan?"

19 Jesus benwokmey bu benmarneyimeng, "Bu ngudda ngurrirurk-bakke Temple ngurrikarme kondah, wanjh ngaye ngayawoyhrurkname kunkodjke danjbiik."

20 Wanjh nawu Jews bininj birrimarneyimeng, "Minj yiyawoyhrurk-marnbun bu kunkodjke danjbiik! Dja burrkyak. Mahni kunrurk benkang kunkuyeng forty six mandjewk bu birrimarnbom."

21 Kaluk bu Jesus nungan yolyohyolyolmi, wanjh menyimeng bu nuye kunburk wanjh yiman kunrurk Temple, wanjh kunukka nungan yolyohyolyolmerrinj kundarrkid nuye.

22 Kalukburk bu God birrolkkayhweng Jesus kore dowengbeh, wanjh nawu bininj nuye benbukkabukkani wanjh birriwohburrbom kore wokki-hwokkihyimi. Wanjh kunmekbe kunu birriwoybukwong kore Jesus yimeng dja mak kunwok manbu kabimbuyindi kore Bible.

23 Jesus dingihdi kore Jerusalem ngarre mulilkenh nawu manbu God kunkare bendjaldarrkidbawong. Wanjh kunmekbe birriwern bininj birrinani bu kunmak kurduyimi kundulkarre nuye dorreng, dja wanjh birriwoybukwong kore kunngeng nuye.

24-25 Dja ngaleng, Jesus minj benwoybukwoyi birrimekbe bininj. Dja nungka benkangeburrbuni bininj rowk kore bedda birrihburrbuni bay-baywi. Minj nangale mak bimarneyimeninj bu bedda birrihburrbuni. Dja nungan Jesus benkangeburrbuni bininj rowk.

3

Jesus Bimarneyolyolmi Nicodemus Bu Kayawoyhdangenkenh John 3:1-21

1-2 Kunkakkudjihni nakudji bininj wam benewokdanginj Jesus. Namekbe bininj ngeyyoy Nicodemus. Nawu nungka Phariseeni,

dja mak birriraworrinj bininj nawu bindiwohrnani kore council bedberre nawu Jews. Wanjh nungka bimarneyimeng Jesus, "Rabbi, ngudda nawu yibenhbukkabukkan bininj! Ngad ngarriburrbun bu God ngunmunkeweng kanbukkabukkankenh ngadberre. Ngad ngundikurdunani kundulkarre God nuye dorrengh, dja kunmekbekenh ngarriburrbun bu woybukkih God ngunehdjarrkre."

³ Wanjh Jesus biwokmey dja bidjalmarneyimeng Nicodemus, "Woybukkih, djal woybukkih duninh marneyime ngudda, bininj nawu minj kayawoyhdangen wanjh kunukka minj kanan kore God kawohrnan rowk."

⁴ Wanjh Nicodemus biwokmey, bimarneyimeng, "Kek! Ngaye nuk ngarrabbolkminj. Minj mak ngayawoyhgimen kore ngalbadjan ngardduk kuwarlirng ngarre bu nganyawoyhyawmang!"

⁵ Wanjh Jesus bimarneyimeng, "Woybukkih, djal woybukkih duninh marneyime, bu kerrngehkenh duninh yirranginj kore ngalbadjanbeh dja kunronj ngarre dorrengh, dja bonj, wanjh yiyawoyhdangimen kore Namalngmakkaykenh ngunmalngkerrngehme. Dja bu burrkyak, wanjh kunukka minj yingimen kore God kawohrnan rowk.

⁶ Bu ngudda ke kunburk wanjh ngundidarrkidwong kornkumo dja ngalbadjan. Dja bu kunmalng ke wanjh kunukka ngunmalngdarrkidwon Namalngmakkaykenh.

⁷ Wanjh yuwn bu bininj kabirribangmekangebarrhme bu ngaye ngayime bininj rowk birriyawoyhdangimen!

⁸ Yiman kayime kunmayorrk manbu kahmayorrkbun kore baleh yarrkka kahre. Kunu ngurrihbekkan dja minj ngurriburrbun kore baleh kabuhbuhme dja kore kamhdolkanbeh. Kunmekbe wanjh karohrok bu bininj nawu kabirriyawoyhdangen kore nawu Namalngmakkaykenh kabendarrkidwon."

⁹ Wanjh Nicodemus biwokmey yimeng, "Minj ngaye ngaburrbun bu baleh kuhni kayimerran."

¹⁰ Wanjh Jesus biyawoyhmarneyimeng, "Ngudda nuk nawu yidjalw-ernhkimuk dja yibenhbukkabukkan bininj rowk nawu Israel benkeb-mawahmeng, dja njalekah bu minj yiwernhburrkburrkbekkan kore ngaye marnehmarneyime?"

¹¹ Woybukkih, djal woybukkih duninh marneyime ngudda. Ngad wanjh ngundimarneyime bu ngad ngarriburrbun, dja ngad ngundimarnemulewan kore ngad ngarrinang. Dja ngaleng, ngudda kandiidalwokwirrihme!

¹² Ngaye bukkabukkang ngudberre kore nawu kurorrewaken, dja minj kandiwoybukwoyi. Dja bu ngaye marneyolyolme kore nawu heavenbeh wanjh kunukka minj nuk kandiwoybukwon.

¹³ Ngaye nawu Bininj Duninh ngadjalkudji ngamkoluy kore heavenbeh. Dja minj nangale nabuyika bininj bidbuyi ngimeninj kumekbe kore heaven."

¹⁴ "Yiburrbun bu Moses dingihdi kubolkdarleh dja marnbom wirlmur-rng nawu kukyimi nayin, dja kukbarnnameng kore kundulk wayhkeng kaddum.* Wanjh kunmekbe karohrok nganmarnekurduyimerran ngaye-manwali bu ngandikukwayhke ngaye nawu Bininj Duninh.

¹⁵ Bu kuhni nganmarnekurduyimerran ngardduk, wanjh birriwern bininj nawu ngandihwoybukwon wanjh kabirriwalngmimbi munguyh munguyh." Kuhni bu Jesus yolyolmeng bu mulewarreni.

* 3:14 Numbers 21:8-9

16 Wanjh Jesus biyawoyhmarneyimeng Nicodemus, bu yawoyhmulewarreni, wanjh yimeng, "God nawu benmarnedjareminj bininj birriwarlahkenh rowk wanjh kunmekbekenh kunu benwong bedberre nawu nuye beywurd nadjalkudji duninij, ba bu bininj nawu kabirrihwoybukwon, wanjh minj mak kabirrimalngdowen dja kabirridjalmaingmimbi munguyh munguyh.

17 Kaluk God bimunkeweng nawu beywurd nuye bu djareminj kabengehke birriwarlahkenh bininj rowk. Namekbe nawu beywurd nuye minj kumrawinj bu kabenwelengnamekenh bedberre.

18 Bininj nawu kabirriwoybukwon nawu beywurd nuye God, nakka wanjh God minj kabenwelengname. Dja nawu bininj minj kabirriwoybukwon, nakka wanjh God korroko benwelengnameng, dja minj kabirriwoybukwon kore kungey nuye nawu nadjalkudji beywurd nuye God."

19 "Wanjh kunekke nungka nawu beywurd nuye God bolkwolkang bedberre bininj, dja bedda minj birridjareniwirrinj. Dja kabirridjaldjare kabirridhaldji kore kubolkmunun dja kabirridjalkurduyime kunwarre. Kumekbekenh kunu God wanjh kabendjadme bu kabenwarrewan.

20 Bininj nawu kabirrihyime kunwarre bedda kabirribirluwidnan. Minj mak kabirridjare kabirrimre kore kabolkwolkan dja kabirriwarnyak nangale nawu kabennan kabirrihkurduyime kunwarrehwarre.

21 Dja bininj nawu kunwoybuk kahkarme, nungka wanjh kamre kore kabolkwolkayindi dja kadjare bininj birribuyika kabirriburrbun bu nungka kabiidjalwokmarrkmang God."

John Nawu Benkukdjuhkeyi Yolyolmerrinj Nungan Kore Bimulewani Jesus

John 3:22-36

22 Kundjalmeke rerrih Jesus dja bininj nawu benbukkabukkani, wanjh birribolkbawong Jerusalem kore kurralk ngarre. Dja birriwam kore kabolkngeyyo Judea, wanjh bedda birriyerrkang. Bu kumekbe Jesus birridjarrkdi dja mak benhkodjdjuhkeyi yikahwi bininj.

23-24 Mak nawu John benkodjdjuhkeyi bininj kore kubadbolkbuyika. Bu kuhni wanjh kerrngehkenhni yerre wanjh king bikurmeng John kore prison dukkahdukkayindi. Kaluk nungka benkodjdjuhkeyi kore kukku kunbowern boyoy, kumekbe bolkngeyyoy Aenon kore darnkih kunred Salim. Birriwern bininj birrirey munguyh kore John kumekbe benkodjdjuhkeyi.

25 Yikahwi binihbininj nawu John benhbukkabukkani birrihdangwerreni nabuyika bininj nawu Jew. Wanjh bu birridangwerreni kore bininj kabirrikudjirridjurrenkenh mandjad ba bu God kabenmarneyime bu bedda birrikangebele.

26 Wanjh John nuye binihbininj birrimwam birrimarneyimeng nawu John, "Yina Rabbi, nawu ngudda kanhbukkabukkan ngadberre, ngudda yiburrbun bininj nawu ngunehdjarrkdi kore bewhbeh mankabo Jordan nawu yihmulewani. Wanjh nungka kahbenkukdjuhke bininj dja birriwern kabirrimunkekadjung bolkkime. Dja bedda minj mak ngundikadjung ngudda."

27-28 Wanjh John benwokmey, benmarneyimeng, "Kamak bu naninjanu bininj nganmarnedokme. God nungan bimarnbom ba bu bininj birriwern kabirrimunkekadjung. God nungka nadjalkudji kakurduyime. Dja kandibekka. Ngaye kerrngehkenhni marneyimeng ngudberre bu ngaye

minj nawu Christ†. Dja God nganyingkihmunkeweng ngamarnedokmeng nungka nuye Jesus. Ngudda wanjh ngurriweleng kandibekkani bu kuhni wanjh woybukkih marneyimeng korroko ngudberre.

²⁹ Dja ngaye wanjh nganjilngmak bu Jesus kabirrimunkekadjung. Ngaye wanjh ngayingkihmarnekarremarnbom nuye. Dja ngurrina. Kuhni yiman bu daluk dja bininj kabenemarren, dja ngaye wanjh yiman kayime djawirna nuye namekbe nawu nakaliyi, dja Jesus yiman kayime bininj nawu kabimang daluk. Kaluk bu yiman nakaliyi kabimang daluk wanjh djawirna nuye kadjalnjilngmakmen bu kabenbenenan kabenemarren. Dja kunmekbe wanjh ngaye ngadjalwernhnjilngmakminj bolkkime bu nganan Jesus kabenmang birriwern bininj.

³⁰ Jesus wanjh nungka djalwernkukenmen dja ngaye ngamarladjworri-men.”

³¹ “Namekbe bininj nawu kumkoluy kaddumbek nungka wanjh nadjalwernhkuken. Ngaye wanjh ngamdolkkkan kurorrebeh, dja ngahdjalyolyolme kurorrewaken. Wanjh ngaye djal kurorrewaken. Dja nawu bininj kundolkkang heavenbeh nungka wanjh kabendjalyurhke rowk.

³² Bu nungka wanjh kayolyolme djal kunwoybuk kunmekbe kore nani dja bekkabekkani. Dja minj birriwern kabirriwoybukwon.

³³ Dja bu nangale bininj kabiwoybukwon, nakka wanjh kaluk kabenmarnemulewan birribuyika bininj bu God kayime djal kunwok kunwoybuk.

³⁴ Nahni wanjh namekbe bininj nawu God bimunkeweng, wanjh nakka kayolyolme God nuye kunwok. Dja God munguyh kabikukbarlmikenwon nuye Namalngmakkaykenh.”

³⁵ “God nawu kornkumo kabimarnedjare beywurd nuye, dja bibidnakenwong ba bu kakarume rowk.

³⁶ Bu bininj kabirriwoybukwon namekbe beywurd nuye God, wanjh kunu kabirrimalngmimbimen munguyh munguyh. Dja nawu kabirrihirihime nawu beywurd nuye God, nakka wanjh minj kabirrinan kundarrkid duninj, dja wanjh nungan God kabendjaldung munguyh.”

4

Nawu Pharisees Birriwarnyakminj Kore Jesus Kurdukurdyimi John 4:1-3

¹⁻³ Kalukburrk nungka Jesus bolkbawong Judea. Kuninjku bu yimerranj: Jesus nuye nawu benbukkabukkani wanjh bindikudjuhkeyi birriwern bininj. Jesus minj nungan benkukdjuhkemeninj, dja bininj nuyeni nawu bindibukkabukkani, bedda wanjh bindikudjuhkeyi. Wanjh nawu Pharisees birriwobekkang bu Jesus yimankek benmangi birriwern bininj dja benkukdjuhkeyi, dja nawu John minj benwernhmirndemayi bu benhkukdjuhkeyi bininj. Bu kunmekbe wanjh birridjalburrbuni nawu Pharisees wanjh kunu birriduy nawu Jesus. Wanjh kuhni bu Jesus benwokbekkang wanjh nungka bolkbawong Judea dja durndi kore kubolkkimuk Galilee.

Jesus Bimarneyolyolmerrinj Daluk Ngalbu Ngalkang Kunbolk Samaria. John 4:4-30

⁴ Jesus dja nuye bininj nawu benhbukkabukkani birribalhrey kore kunbolk Galilee, wanjh birriwongimeng kore kubolkkimuk Samaria, dja minj manbuyika manbolh diwirrinj.

† 3:27-28 “Christ” karohrok “nawu Messiah”.

⁵ Birriwam wanjh birribebmeng kore kunredkimuk kabolkngeyyo Sychar. Bu kunmekbe kunred korroko Jacob ni kore darnkih Sychar, wanjh bibolkwong Joseph, nawu nuye beywurd.

⁶ Wanjh kumekbe njilmi yoy kore Jacob ngadkaruy korroko nuyeni. Kaluk bu kunbarnangarrburk, Jesus dja nuye bininj nawu benbukkabukkani birribebmeng kore kungad, wanjh Jesus yerrkang kumekbe dja ngudjwarreminj bu kumhrey djarreh.

⁷⁻⁸ Wanjh kumekbe nawu benbukkabukkani birribawong nungka, dja birriwam kore kurrurkwern bu kabirribayahme manme.

Wanjh kundjalmekbe rerrih ngalkudji daluk ngalkang Samariabeh kumwam kabomang kukku kore kungad. Wanjh Jesus biboyidjawam ngalmekbe daluk.

⁹ Wanjh ngaleng bimarneyimeng, "Njalekah kanboyidjawam ngaye nawu daluk. Kanna, ngaye nuk ngaredbuyika, dja ngakang Samariabeh. Dja ngudda kunu yiredbuyika nawu Jew bininj?" Kaluk nawu bininj birrikang Samaria dja mak nawu Jew bininj minj birriraworrimentinj kukudji. Wanjh kunmekbeken kunu ngalmekbe daluk bu bimarneyimeng.

¹⁰ Wanjh Jesus bimarneyimeng, "Ngudda minj ngaye kanburrbun bolkkime nawu boyidjawan, dja mak minj yihburrbun kore God bu djal burudjang ngunwon. Bu ngudda yiburrbuyi kuhni, wanjh kandidjawayi ba bu ngaye bowoyi kukku manbu ngundarrkidwon."

¹¹ Wanjh ngahli daluk biwokmey, bimarneyimeng, "Yina! Ngudda nawu yikimuk, minj yikarrme djabbirlana ba bu yibomang dja kanjdji kangadkuyeng duninj, dja balehbeh yibomang kukku manbu kandarrkidwon?"

¹² Ngad ngadberre mawah Jacob nganyikurrmeng kuninjkuu kunngad. Nungka dja mak nuyeni nawu bebeywurd birridjarrkbonguni kuninjkuu kukku, dja mak mayh bedberreni. Yiddok ngudda yimankek yiyime bu yiwerhnyurrhke nawu Jacob?"

¹³ Wanjh Jesus bibadwokmey bimarneyimeng, "Bu nangale nawu kabogun maninjmanu kukku manbu mahni kunngad kahyo, wanjh kayawoyhkombukdownen.

¹⁴ Dja bu nangale kabogun manbuyika kukku manbu ngaye ngabowon, wanjh nakka minj kayawoyhkombukdownen bu munguyh. Manbu ngaye ngabowon kukku kaboyimerran yiman njilmi kaboyakburren dja kadjalborlobme kore kukange nuye wanjh kunukka kadjaldarrkidmen munguyh munguyh."

¹⁵ Wanjh ngalengmanwali bimarneyimeng, "Nawu yikimuk, kanbowo mahni manbu kukku ba minj ngayawoyhkombukdownen dja minj ngamyawoyhdurndeng mahni kukku ngabomang."

¹⁶ Wanjh nungka bimarneyimeng, "Yiray yikayhmen nabininjkobeng ke dja ngunemdjarrkdunden kondah."

¹⁷ Wanjh ngalengmanwali yimeng, "Ngaye minj nabininjkobeng ngakarreme." Jesus bimarneyimeng, "Ngudda woybukkikih yihyime bu minj nabininjkobeng yikarrme.

¹⁸ Ngudda yibenkarrmi kunbidkukudji bininj, dja namekbe nawu bolkkime ngunehni minj nabininjkobeng ke. Ngudda wanjh woybukkikih kanmarneyimeng."

¹⁹ Wanjh ngaleng yimeng, "Nawu yikimuk, ngaye wanjh bolkkime ngaburrbun bu ngudda nawu prophet.

²⁰ Ngad nawu mawahmawah ngadberre wanjh God birrimarneboddeni yiwarrudj kore kondanjkuu kuwarddekimuk. Dja ngudda nawu Jews bininj ngurriyime kore kunred Jerusalem kundjalmekbe kubolkkudji bu God karrimarneboddan nuye."

²¹ Jesus bimarnemulewam, yimeng, “Daluk, kanwoybukwo kore ngaye marneyime ngudda. Darnkih kuhni bu kamre bu minj mak konhda kore kuninjkuwu kunwardde, dja mak minj kore kuredkimuk Jerusalem bu ngurriyawohmarnebodan God nawu Kornkumo.”

²² Ngudda bininj nawu ngurrikang Samaria, minj ngurriwernhburrbun bu nangale nawu ngurrimarnebodan, dja ngad nawu Jews bininj ngarrihmarnebodan yiwarrudj kore ngarriburrbun. Kaluk nanu God kahdurkimirri kore ngad nawu Jews bininj ba bu nungka kabennegehe birriwarlahkenh bininj.

²³ Dja bolkkime wanjh bininj nawu kabirridjare kabirrimarnebodan yiwarrudj God nawu Ngabbard bu djal mandjad, wanjh bedda kabirrimarnebodan kore kukange bedberre dja kabirrikangewoybuk dorrengh. Kundjalmekbe wanjh God nawu Kornkumo kadjare bu bininj kabirrikurduyime kore kabirrimarnebodan nuye.

²⁴ Nawu God nungka Namalngmakkaykenh. Kumekbekenh kunu bininj nawu kabirridjare kabirrimarnebodan nuye, wanjh birridjaldin kore kunmalng bedberre dja mak birrikangewoybuknin.”

²⁵ Wanjh ngalmekbe daluk yimeng, “Ngaye ngaburrbun bu nawu Messiah kamhre dja nungan kanbukkabukkan rowk ngadberre.” (Messiah wanjh bininj kabirriyime kungeybuyika warridj, nawu Christ.)

²⁶ Wanjh Jesus yawoyhmulewarrinj, bimarneyimeng, “Ngaye wanjh nanu Messiah nawu ngaye bolkkime ngawokdi kore ngudda.”

²⁷ Kundjalmekbe rerihe Jesus nuye nawu benbukkabukkani birrimdurndi kore nungka. Bedda wanjh birridjalkangebarrhmenh bu bindinang Jesus benehwokdi ngalmekbe daluk. Dja bonj, minj nangale bidjawayi Jesus, “Adju. Boleh ngudda yiyime?” dja “Njalekenh ngudda ngunehwokdi ngalmekbe daluk?”

²⁸⁻²⁹ Wanjh ngalmekbe daluk ngalngbawong djabbirlana dja wam durndi kore rurrkimirderri. Ngaleng benmarnemulewam bu Jesuskenh. Wanjh benmarneyimeng nawu birrihni kumekbe, “Ngurrimray karrire dja ngurrina nawu bininj ngangalkeng. Nungka nganmarneyimeng kundjalwern rowk kore ngaye ngahkurduyimi korroko. Kunubewu nungka wanjh Christ.”

³⁰ Bu bedda birribekhang wanjh yikahwi bininj birribolkbawong kumekbe kunred dja birrihrey kore Jesus bu birriwokbekkayikenh.

Jesus Benbukkabukkang Nawu Disciples Bu Kabindimang Birriyuyika Bininj Nuye

John 4:31-38

³¹ Wanjh bu ngalmekbe daluk wam, nungka nuye benbukkabukkani birrimarneyimeng, “Nawu kanbukkabukkan. Njah! Ba yingun manme.”

³² Wanjh Jesus benmarneyimeng, “Ngaye ngakarreme manme bu ngahngun manbu ngudda minj ngurriburrbun.”

³³ Wanjh bininj nuye nawu benbukkabukkani birrimarneyimerrinj, “Kunubewu nangale korroko biwong manme?”

³⁴ Jesus benmarneyimeng, “Ngaye God nganmunkeweng kadjare ngayakwon nuye nawu nganwong bu ngahdurkimirrikenh kore nungka kadjare. Bu ngaye ngakurduyime rowk kore nungka kadjare, wanjh kunukka yiman yerreh ngangun manme manmak dja ngaworrkmiworren.

³⁵ Ngudda ngurriburrbun bu ngurriyime, ‘Med, karrimadbn manekke manme kabarnemdjolengmen bu dird kunkarrngbakmen.’ Dja ngaye bolkkime marneyime, ngurrina, ngurridjalwernhbolkna bu ngokko manme manbu djolengminj. Bu wanjh bolkkime karrimoyhmang.”

³⁶ Wanjh Jesus yawoyhyimeng bedberre, “Birribuyika bininj bolkkime kabirrihmoyhmang manme bu kabirrimarnedurrkmirri God, dja nungka kabenmarnekarremulewan. Ngayolyolme bu God kabenmang bininj ba bu kabirrimimbimen munguyh kore nungka. God kadjare bu ngudda bininj nuye ngurridjarrkmarrmarr, ngayime bininj nawu birridudji kunwok nuye yiman manmim birriweyi, dja mak ngudda nawu ngurrbenmang bininj, yiman bu ngurrimoyhmang manbu mandjoleng.”

³⁷ Kuhni mak Jesus benmarneyimeng, “Kunbadbuyika bu bininj kabirriyime, ‘Nakudji bininj karrudjeng dja nawu nabuyika kamoyhmang’. Bu kuhni wanjh kunwoybuk bu marnehmarneyime ngudberre.

³⁸ Ngaye wanjh munkeweng ngudberre ba bu ngurrimoyhmang manme kore birribuyika birridudji korroko. Nawu birribuyika bininj birridurrkmirranj korroko ngudda ngurrimang kore bedda birrihdurrkmirrikenh.”

Bininj Nawu Birrikang Samaria Birriwoybukwong Jesus

John 4:39-42

³⁹ Wanjh nawu birriwern bininj birrikang Samaria nawu birrihni kumekbe, bedda birriwoybukwong kore daluk benmarnemulewam, bu benmarneyimeng, “Nungka nganmarneyimeng kundjalwern rowk kore ngaye ngahkurduyimi.”

⁴⁰ Wanjh birrimirndeyormeng birriwam birrimarrkdjawam Jesus bu kabirridjarrkni. Wanjh Jesus yonginj bu kunkodjke bokenh marnbom.

⁴¹ Wanjh birridjalmirndewernkenh birrimekbe bininj birriwoybukwoni Jesus kore birrihbekkani nungka wokdihwokdi.

⁴² Wanjh bedda birrimarneyimeng ngalmekbe daluk, “Ngad minj mak ngundiyawoyhwokwoybukwon ngudda kore yihmulewani ngadberre, dja ngadman wanjh ngarrinang dja ngarriwokbekkang, wanjh ngarriwoybukwon. Wanjh bolkkime ngarriburrbun nanihnjanu bininj bu nungka kangehke karriwarlahkenh bininj rowk kore kondanjkuu kurorre!”

Jesus Wam Kore Galilee Dja Bimarnbom Nakudji Wurdyaw

John 4:43-54

(Matthew 8:5-13; Luke 7:1-10)

⁴³ Kaluk bu kunkodjke bokenh yakwong, Jesus bolkbawong dja wam kore kunbol Galilee.

⁴⁴ Jesus yingkihyolyolmerrinj bu bolkmulewam Galilee, bu yimeng, “Nawu prophet minj kabirriwokmarrkmang kore nungan nuye nawu birriredbodoleng kabirrihni bininj.”

⁴⁵ Dja bu bebmeng kore Galilee, bininj nawu birrikang kumekbe birrikimey. Bedda birridjalyingkihnani Jesus bu kurdukurduyimi kore Jerusalem bu mulil birrihkarrmi, kunmekbekenh kunu wanjh bedda birrikimey.

⁴⁶ Jesus yawoyhdurndi kore kunred bolkngeyyoy Cana kore Galilee. Kumekbe kunu Jesus kerrngehkenh wam, kukku boborledkeng bu boyimerranj wine manbu grapes mankalkkid. Wanjh nakudji bininj kumekbe dingihdi kore kunred Capernaum, darnkih kore Cana. Kaluk nungka bimarnedurrkmirri nawu wohrnani king. Wanjh namekbe bininj nuye beywurd bimarneyawdowneni kunkimuk kore kunred nuye Capernaum.

⁴⁷ Bu namekbe bininj biwobekakang Jesus kumwam Judeabeh dja bebmeng kore Galilee, wanjh nungka wam biwernhmarrkdjawam Jesus bu kabeneri kore Capernaum dja kabimarnbun namekbe bininj nuye darnkih karrowen.

⁴⁸ Jesus biwokmey namekbe bininj dja benmarneyimeng nawu birrihni kumekbe, “Adju. Yiddok ngudda ngurridjare munguyh kandihnan kore

ngaye ngakurdyime kundulkarre dorrengh bu marnbun ngudberre ngurrikangebarrhme. Dja bu burrkyak, wanjh kandidjalkewkme munguyh.”

⁴⁹ Wanjh namekbe bininj nawu biharnedurrkmirri nawu wohrnani king, bimarneyimeng Jesus, “Ngudda nawu yikuken, yimray werrknin dja wardi ngardduk beywurd kayawdownen.”

⁵⁰ Wanjh Jesus bimarneyimeng namekbe bininj, “Yiray, yirrokmenn kured. Nawu ngudda ke beywurd kamakmen bolkkime.” Nawu namekbe bininj biwokwoybukwong Jesus, dja wanjh baldjaldokmeng kured.

⁵¹ Wanjh bu balhrey kumekbe birriwohmirrknarrinj bininj nawu birrihmarnedurrkmirri, dja birrimarneyimeng, “Ngudda ke beywurd makminj dja minj dowimeninj.”

⁵² Dja nungka bendjawam, “Baleh dungyimi bu makminj nawu wurdyaw ngardduk?” Bedda birrimarneyimeng, “Wolehwolehni baldungdjerdkanginj wanjh kundjak bidjalmarneyakminj.”

⁵³ Wanjh nawu nakornkumo burrbom bu kuhni dungyimi bu Jesus yimeng, “Ngudda ke beywurd kamakmen.” Wanjh nungka dja nawu bininj nuye dja namud nuye rowk wanjh birriwoybukwong Jesus.

⁵⁴ Kuhni wanjh bokenhkah Jesus kurduyimeng God nuye kundulkarre dorrengh yerre wanjh bolkbawong Judea dja wam kore Galilee.

5

Jesus Bimarnbom Nawu Nabirlni Bininj Kore Manlabbarlyahwurd John 5:1-18

¹⁻² Kaluk yerrekah wanjh Jesus bolkbawong kore Galilee dja yawoyhdurndi karrkadh kore Jerusalem kore birrikarmi mulil bedberre nawu Jews bininj. Wanjh kumekbe birriwarddedjorlokmarbom kore kukku boyoy yiman yimi manlabbarlyahwurd. Bu bedda kunwok bedberre birringeybuni kumekke Bethesda*. Kaluk kumekke darnkih dangmayerurrkni mayhkenh nawu sheep bu ngimmereni. Dja mak kunbidkukudji djurledi kore kukadjid darnkih manbu manlabbarl.

³ Kumekbe wanjh bininj birriyoy nawu birridoweni dja mak nawu birrimidubbeni, dja mak nawu birribirlni, dja mak nawu birribidwarreni. Wanjh bedda birridarnhbonahnani bu birrinayi borokayi.

⁴ Bedda birriburrbuni bu angel nuye nawu Kawohrnann kumkolungi di wanjh birribonani burrnghurrng karmi. Kuninj kunu munguyh djalymerrangeni. Kaluk bu birrinani burrnghurrng karmi wanjh nakudji werkk bu kolungi wurlebmi wanjh kunukka namekbe bininj nadjalkudji makmeninj.†

⁵ Wanjh Jesus kumwam kumekbe kore birribonahnani. Nungka binang nakudji bininj nawu nabirlni bu thirty eight mandjewk yonginj.

⁶ Bu Jesus binang wanjh burrbuni bu kunkuyeng nungka birlni, wanjh Jesus bidjawam, “Ngudda kab yidjare bu yimakmen?”

⁷ Wanjh bininj nawu nabirlni yimeng, “Nawu yikimuk, yoh, wanjh ngadjare ngarrolkkan. Dja kunu burrkyak, minj ngarrolkkan bu kukku kaborokan dja minj werkk ngadjuhme dja munguyh ngandidjalyurrhke birribuyika bininj bu bedda werkk kabirridjuhme. Ngaye ngadjalbaraburren dja minj nangale nganwanjimbang bu ngandjuhke.”

* **5:1-2** Bethesda wanjh yikahwi birringeybom kunngeybuyika, “Bethzatha” dja mak “Bethsaida”.

† **5:4** Verses 3 dja 4 minj kabimbuyindi kore nayungkih djurra bu John bimbom kore Greek kunwok, dja kabimbuyindi kore nabubuyika djurra.

⁸ Wanjh Jesus bimarneyimeng, “Yirrolkka! Yimadjma ke, dja yimakmen ba yidjalre bu munguyh.”

⁹ Bu kundjalburrikudji namekbe bininj makminj, dolkkang, dja kunmadj nuye mey, wanjh nungka baldjalwam. Kaluk kunmekbe kunbarnangarra bu Jesus bimarnbom wanjh kunkodjke manbu Sabbath ngarreni.

¹⁰ Wanjh nawu birriwohrnani Jews bininj birrinang namekbe bininj madjkahmadjkani, wanjh birrimarneyimeng, “Buyh, nanih nawu bininj yihre, yiddok minj yiburrbuyi mankarre manü kahyo dja bolkkime Sabbath ngarre bu ngudda minj yihmadjkanakan?”

¹¹ Wanjh nungka benwokmey, yimeng, “Nawu bininj nganmarnbom nganmarneyimeng, ‘Yirrolkka! Yimadjma dja yiray!’ ”

¹² Wanjh birriyawoyhdjawam, “Nangale nawu bininj ngunmarneyimeng bu yirrolkkang yimadjmey dja yiwam?”

¹³ Dja namekbe bininj nawu makminj minj biburrbuyinj nawu Jesus. Jesus djalwam ngimeng kore kumirnde wanjh kumekbe kunu yakminj.

¹⁴ Wanjh kalukburrk Jesus bingnalkeng namekbe bininj kore kunrurrk manbu Temple. Nungka wanjh bimarneyimeng, “Yina, ngudda wanjh yimakminj. Yuwn bu yiyawoyhkurdyime kunwarre bu God yihwokwe wardi kunukka yidjalwernwarremen.”

¹⁵ Wanjh namekbe bininj bibawong bu benehwokdi Jesus dja wanjh marrkinrlombeng benmarnemulewam nawu Jews birriwohrnani, bu Jesus bimarnbom.

¹⁶ Wanjh nawu Jews birriwohrnani birridedjingmey birrinjirrhmiwoni Jesus bu kuninjkukenh nungka kunmekbe kurduyimeng bu kunbarnangarra Sabbath ngarre.

¹⁷ Wanjh Jesus wam mulewarrinj bedberre, yimeng, “Kandibekka bu ngaye marneyime ngudberre, nawu Ngabbard ngardduk nungka wanjh kadjaldurkmirri munguyh, dja ngaye warridj ngadjaldurkmirri munguyh.”

¹⁸ Nawu birriwohrnani Jews birribekkkang bu Jesus yimeng, dja wanjh birridjareni birribuyi bu karrowen. Bedda birriyimi yimankek kabakke mankarre manbu Sabbath ngarre dja mak birriwidnani Jesus bu nungka bimarneyimeng God nuye nakornkumo bu yimankek marnburreni yiman God rerrih.

Jesus Nungan Yolyolmerreni Bu Nungka Wanjh God Nuye Beywurd John 5:19-30

¹⁹ Wanjh Jesus benyawoyhmarneyimeng, “Woybukkih djal woybukkih duninj marneyime ngudberre. Ngaye nawu beywurd nuye God minj ngayeman ngadjalkurdyime. Dja ngadjalkurdyime kore nnganan God nawu Kornkumo ngardduk kakurdyime. Kore baleh yarrkka nnganan kahkurdyime, wanjh kundjalmeke ngaye nawu nuye beywurd ngakurdyime warridj.

²⁰ God nawu ngardduk Kornkumo nganmarnedjare bulkkidj duninj dja nganhbukkabukkan kore nungka kakurdyime rowk. Kaluk nungka wanjh ngandjalyawoyhbukkan kundjalwernhkimuk kore ngaye mak ngakurdyime ba bu ngudda wanjh kaluk ngurridjalkangebarrhme kore kandikurdunan.

²¹ God nawu Kornkumo wanjh kabendolkkayhwe nawu kabirrihdowerren bininj dja kabendarrkidwon, dja karohrok ngaye nawu nuye beywurd wanjh ngabenmimbiwon bininj nawu ngabenmarnedjaremen.

²² Dja mak God nawu Kornkumo minj nangale nungan kabidjadme dja wanjh ngaye nawu nuye beywurd nganmarnbom bu ngabendjadme birriwern bininj rowk.

²³ Kuhni kurduyimeng ba bu birridjalwernkenh bininj ngandiburlume ngaye nawu beywurd nuye God nawu Kornkumo. Bu ngaye minj kandiwokmarrkmang wanjh kunukka minj God nawu Kornkumo ngurriwokmarrkmang, dja nungka nawu nganmunkeweng.

²⁴ Woybukkih djal woybukkih duninj marneyime ngudberre, bu ngudda kandiwokbekkan ngaye dja ngurriwoybukwon God nawu nganmunkeweng, wanjh kunukka ngurridjalmimbimen munguyh munguyh. God minj mak ngunyawoyhwarrewe, dja mak minj ngurriyawoyhdowen.

²⁵ Woybukkih djal woybukkih duninj marneyime ngudberre. Darnkih kabolkyimerran bu bininj nawu birrimalngdoweng wanjh ngandiwokbekkan bolkkime ngaye, nawu beywurd nuye God. Kaluk bedda bu ngandiwokmarrkmang, wanjh kabirrimalngdarrkidmen.

²⁶ Dja God nawu Kornkumo nakka kakarrme kundarrkid nungandeleng, dja wanjh nganmarnbom ngaye nawu nuye beywurd, ba bu ngaye warridj ngadjalkarrme kundarrkid ngayemandeleng.

²⁷ Dja mak nungka nganmarneyimeng bu ngaye ngabendjadme birrimirndewarlahkenh bininj rowk, bu kunmekbekkenh ngaye wanjh nawu Bininj Duninj.

²⁸⁻²⁹ Yuwn bu ngurrikangebarrhme bu kandihwokbekkan bolkkime kuninjkuu marnehmarneyime ngudberre. Bu darnkih kabolkyimerran bu nawu birridowerrinj bininj rowk ngandiwokbekkan dja kabirrim-dolkkarren kore kumekbe kumidjbeh. Birrimekbe nawu birrihyimi kunmak wanjh nakka kabirridolkkarren dja kabirrimalngmimbimen, dja birribuyika bininj nawu birrihyimi kunwarre wanjh bedda kabirridolkkarren kore God kabendjadme dja kabenwarrewan.

³⁰ Kuhni minj ngayeman ngakurduyime. Dja ngabendjadme bininj kore God nganmarneyime. Kuhni wanjh mandjad ngayime bu ngabendjadme bininj kore God nawu Kornkumo nganmarneyime. God nganmunkeweng dja minj ngakurduyime kore ngayeman ngahdjare, dja ngadjare ngakurduyime kore nungka kadjare, dja kunmekbekkenh wanjh ngabendjadme bu djal mandjad duninj.

Jesus Yolyolmerrinj Nungandeleng *John 5:31-47*

³¹ Jesus benyawoyhmarneyimeng, "Bu ngaye yimankek ngadjalkudji ngamulewarren bu ngayeman, wanjh bonj, wardi kandikewkme. Dja kunu burrkyak, ngaye minj ngadjalkudji ngamulewarren.

³² Nabadbuyika bininj nawu nganyolyolme ngaye, wanjh ngaburrbun bu woybukkih nganmulewan.

³³ Bu nungka wanjh John nawu benkukduhkeyi. Dja ngudda ngurrbenmunkeweng bininj ngudberre bu birridjawam ngayekenh, wanjh John benmarneyimeng kunwoybuk yerreh bu ngaye nganmulewan.

³⁴ Dja bonj, kunukka minj ngadjare ngandimulewan djal bininj bedmandeleng. Dja ngaye ngadjalyolyolme Johnkenh kore nganhmulewani ba bu ngudda kandiwoybukwon dja wanjh God ngunngheke ngudberre.

³⁵ Nawu John wanjh yiman yimi bolkwolkani ngudberre wanjh ngurriwern ngurrimarnenjilmakni bu ngurriwokbekkani kundedjumbungkenh.

³⁶ John nganmulewani ngayekenh ngudberre bu kunwoybuk. Dja mak kunbadbuyika kunkimuk ngahkarrme kore ngurrinan ba bu kandiwoybukwon. Bu kumekbe ngaye nganyolyolme bu God nawu Kornkumo

ngardduk nganwong kore ngahmarnedurrkimirri dja ngayakwon nuye, dja kuhni ngadjalkurduyime. Bu kandikurdunan wanjh kuhni ngurriburrbu kunwoybuk kore ngayekenh. Dja mak ngurriburrbun bu God nawu Kornkumo nganmunkeweng.

³⁷ Dja nungka warridj korroko ngunbengdayhkeng kunwoybuk ngayekenh ngudberre bu nganmulewam. Minj ngudda korroko ngurriwokbekkayai dja mak minj ngurrinayai.

³⁸ Dja minj mak kandiwoybukwon ngaye nawu nungka nganmunkeweng, dja nungka nuye kunwok minj kani kukange ngudberre.

³⁹ Dja ngudda munguyh ngurridjalbinman kore God nuye kunwok manbu djurra bimbuyindanj, bu yimankek ngurriyime ngurringalke bu ngurrimalngmimbimenkenh. Dja nanihnjanu djurra bimbuyindanj nakka wanjh ngaye nganhyolyolme.

⁴⁰ Ngaye wanjh darrkidwoyi ngudberre bu kandimyikan, dja njalekenh ngudda kunu wanjh ngaye kandihwidnan?

⁴¹ Bonj, kunukka kamak bu minj nangale bininj ngandiburlume.

⁴² Dja ngaye wanjh kangeburrbun ngudberre, bu ngudda minj ngurrimarnedjare God kore kukange ngudberre.

⁴³ Ngaye ngamwam kore kungey nuye God nawu Kornkumo dja ngudda ngaye minj kandikimayai. Ngudda ngurridjaldjare bininj nawu kabirrikimukworren bu djal bedmandeleng.

⁴⁴ Ngudda ngurridjare bininj ngundiburlume, dja minj ngurridjare bu ngurrikurduyime kunmak ba bu God nadjalkudji ngunburlume ngudberre. Dja bonj, kunmekbe kunu wanjh ngudda minj kandiwoybukwoyi.

⁴⁵ Ngaye minj ngamulewan God nawu Kornkumo bu ngudda djuhun ngudberre. Dja nawu Moses, namekbe nawu ngurriyime yimankek ngurrimunkekadjung, wanjh nanu ngunwelengname ngudberre.

⁴⁶ Bu ngudda woybukkih ngurriwoybukwoyi Moses, wanjh kunukka ngayemanwali kandiwoybukwoyi, dja wanjh nungka bimbom ngayekenh bu nganhyingkihmulewani.

⁴⁷ Dja ngudda minj ngurriwokwoybukwoyi bu nungka bimbom korroko ngaye nganhmulewani, wanjh kunmekbekenh bu ngaye minj kandiwoybukwon kore marnemarneyime."

6

Jesus Benworrkmiwong Birrimirndewarlahkenhni 5000 Bininj

John 6:1-15

(Matthew 14:13-21; Mark 6:30-44; Luke 9:10-17)

¹ Kaluk burrk Jesus dja nawu bininj nuye wanjh birribolkbawong Jerusalem dja birridjowkkeng kurrula manbu kangeyyo Kurrula Galilee dja mak ngeybuyikani ngeyyoy Kurrula Tiberias.

² Wanjh birridjalmirndewernkenh bininj birrimunkekadjungi Jesus, dja birrihnani kundulkarre dorreng nuye kore benhmarnbuni bininj nawu birridoweni. Kumekbe wanjh kurdukurduyimi bu benmarnekukbukkarinj bedberre.

³⁻⁴ Kaluk darnkih kumhrey ngalenggarre mulil manbu God kunkare bendarrkidbawongkenh, manbu Jews bininj birrihkarmi munguyh. Wanjh Jesus wam bidbom kore kurrulum wanjh kumekbe yerrkang birridjarrkni nawu bininj nuye benbukabukkani.

⁵ Jesus kodjdolhmeng dja benmirndenang birriwern bininj birrimhyikani nungka dja bidjawam Philip, yimeng "Baleh kab buriddi

karribayahme ba bu kabirringun nanih nawu bininj kabirrimhmirndey-orrme?”

⁶ Jesus wenjhmeng bidjalwohmarrkdjawam Philip dja ngokko burrbuni bu nungka kabenmarnekurduyime bedberre.

⁷ Philip biwokmey yimeng, “Nanah nawu kabirrimhre, bu karrbenmarnebayahme yiman kayime nawernhkimuk kunwardde*^{karrikukkarrmenin} bu karrbenbebbewon yiman nadjalyahwurd manne!”

⁸⁻⁹ Wanjh nabadbuyika Jesus nuye bininj, ngeyyoy nawu Andrew, nawu Simon Peter benedanginj, kumyimeng, “Kondah nakudji wurdyaw kakarrme wurd manme kunbidkukudji manlod buriddi, dja wurd djenj bokenh. Dja nuk minj kabirriyikadjung dja nayahwurd.”

¹⁰ Wanjh Jesus benmarneyimeng nawu nuyeni bininj, “Ngurrbenmarneyimen binihbininj birriyerrkarrimen.” Kumekbe mandalkwernni dalkyoy kore birriyerrkarrinj. Wanjh birrimekbe bininj 5000.

¹¹ Wanjh Jesus lodmey manmekbe kandidjawa manbu wurdyaw nuyeni, wanjh bimanjbom God nawu Kornkumo dja benwoniwoni manme nawu bininj birrimirnderri, dja mak karohrok kurduyimeng bu mey djenj nuyeni namekbe nawu wurdyaw. Bedda bindidjalwoni mandjalwern bu bedda rowk birriyawoyhdjareni.

¹² Kaluk bu nawu bininj birriworrkminj rowk wanjh Jesus benmarneyimeng nawu bininj nuye, “Ngurrimoyhma manbu yikahwi birribawong dja koldanj bu minj karrilodwarrehwarrewon, dja karrilodkarekarrme.”

¹³ Wanjh bedda birrimoyhmangi manbu birriwarrhmeng nawu birriworrkmi bininj, dja birridahdahkendoy kore twelve kundjabarrk wanjh barlmeng rowk. Wanjh manmekbe manme koldanj manbu manlod kunbidkukudji kore marnbuyindanjbeh.

¹⁴ Bu kuninjkuu birrimekbe bininj birrinang bu Jesus kurduyimeng kundulkarre dorrengh, wanjh bedda birridedjingmey bu birriyimi, “Djal woybukkih, nahnai wanjh namekbe nanu propheth nawu kerrngehkenhni Moses bihmulewam, wanjh kumwam karridjarrkdi ngad bininj nawu karrihni kondah kurorre.”

¹⁵ Jesus burrbuni bu yimankek birrimrawinj birrimayi dja birridjur-rkkayi bu yimerrangimeninj king bedberre, wanjh kumekbekenh benbawong dja wam nungandeleng benmarnewarlkarrinj kore kunwardkimuk.

Jesus Wam Kurrenge Kore Kubokehkekeb Ngarre Manbokimuk

John 6:16-21

(Matthew 14:22-27; Mark 6:45-52)

¹⁶ Kaluk bu balngokdanj, nawu bininj nuye Jesus birrikoluy kore kukadjid ngarre kurrula Galilee.

¹⁷ Jesus minj kumbangmedurndeyi bedberre, dja bedda birribidburrinj kabbala wanjh birridjowkkeyi bewhbeh kore kunred Capernaum. Kaluk kunkak duninj yimerranj.

¹⁸ Wanjh kunmayorrrkimuk bebmeng benbuni, dja bomarnbom bobardkihkimukminj yiman bodjihkadjihkarmi.

¹⁹ Bedda birriboyenkarrikmi dja djarrehni six kilometres dja minj birribangmebolkdjorrngmayi. Kaluk bedda wanjh birrinang Jesus kumdjalley kumhbomelmelmi kore kuburrk. Kaluk darnkih benhmarnebebm kore bedda birrihrey kabbala, dja bu bedda birrinang, wanjh birriwernhkeleminj.

* 6:7 Kunubewu \$5000.

²⁰ Wanjh Jesus kumkayhmeng bedberre, “Ngaye! Dja yuwn bu ngurrikele.”

²¹ Kaluk bu bedda birriwokbekkang benmarneyimeng, wanjh bedda birrinjilmakminj dja birridahkendoy kore kabbala. Kaluk bu kundjalmeke yerreh bedda birribaldjalberrkmei kore birrihdjareni birriwam.

Birriwern Bininj Birriyawani Jesus

John 6:22-24

²² Kaluk kunbarnangarrabayika birridjalmirndewernkenh bininj nawu birringuni manme, wanjh birribalburrbom bu Jesus nuye bininj birriwam birribawong Jesus yerreh. Dja mak birriburbom bu kabbala manbuyika minj diwirrinj kumekbe.

²³ Kaluk birribadbuyika bininj birrimrey kabbala manwern kore kunred Tiberiasbeh. Birrikadjimey kore nawu Kawohnan Rowk bimanjbom God bu buriddikenh dja birriwern bininj birringuneng.

²⁴ Birrimekbe binihbininj rowk wanjh birrinang bu Jesus wam dja mak nawu nuyeni bininj birriwam, wanjh bedda birribidburrij manmekbe kabbala manwern manyahwuhayawurd dja birriwam birriyawani Jesus kore kunred Capernaum.

Jesus Yolyolmerrinj Bu Kabenmalngmimbiwon Bininj

John 6:25-34

²⁵ Wanjh bedda birringalkeng kore borledmikenh ngarre kurrula. Wanjh birridjawam, birriyimeng, “Rabbi, nawu kanbukkabukkan, baleh bolkyimi ngudda yimwam?”

²⁶ Jesus benwokmey, yimeng, “Woybukkih djal woybukkih marneyime ngudberre, ngudda kunu kandiawani ngaye bu worrkmiwong ngudberre, dja ngurridjare ngaye yawoyhwoyi ngudberre manme. Dja ngudda kunu minj ngurriwernhburrkburknayi bu njalekenh ngaye kundulkarre dorrengh ngakurduyimeng ngudberre.

²⁷ Ngudda wanjh ngurridjaldurrkmirri ba ngurrimang manme manbu kadjalnudmen! Wanjh kuhni ngurribawo. Dja yiddok minj ngurridurrkmirri ba bu ngurrimang manme manbu ngunmarnbun ngurridjaldar-kiddi munguyh munguyh. Ngaye nawu Bininj Duninj wanjh won ngudberre manmekbe manme. God nawu Kornkumo wanjh korroko ngunmarneyimeng ngudberre bu nungka nganmakwan dja nganburlume ngardduk.” Kuhni bu Jesus yolyolmerrinj kore benmarneyimeng bedberre.

²⁸ Wanjh bedda birridjawam, birriyimeng, “Baleh God kadjare ngarikurduyime ba bu ngarrimarnedurrkmirri nuye?”

²⁹ Wanjh Jesus benwokmey bedberre, yimeng, “God nawu nganmunkeweng ngaye, wanjh kadjare kandiwoybukwon dja kandiwokmar-kmang ngaye. Wanjh kuninjkuu God kadjare ngurrimarnedurrkmirri nuye.”

³⁰ Bedda wanjh birrimarneyimeng, “Wanjh ngudda baleh kunu kanmarnekurduyime ngadberre kundulkarre dorrengh ke, ba bu ngundiwoybukwon. Mah, wanjh baleh yikurduyime?”

³¹ Yiddok yikurduyime kore Moses benmarnekurduyimeng nawu kadberre mawahmawah kore kubolkdarleh bu birringuneng manbu manme kangeyyo manna. Ngudda yiburrbun bu bimbuyindanj, ‘Nungka benwong buriddi kore heavenbeh, dja birringuneng.’” [Psalm 78:24] Kuhni bu birrimarneyimeng Jesus.

³² Wanjh Jesus benyawoyhmarneyimeng, “Woybukkih djal woybukkih marneyime ngudberre. Moses nakka nawid. Nungka minj ngunwoyi

manekke buriddi kore heavenbeh. Dja nawu Kornkumo ngardduk ngunwon ngudberre buriddi duninj kore heavenbeh.

³³ God ngunwon nakudji bininj nawu yiman kayime buriddi duninj. Ngayime bu nungka kumkoluy kore heavenbeh dja kabendarrkidwon bininj rowk nawu birriwarlahkenh kondah kurorre.”

³⁴ Bedda wanjh birriyawoyhmarneyimeng, “Nawu yikimuk, kandjalwo manekke buriddi ngadberre munguyh.”

Jesus yimeng, “Ngaye mimbiwon ngudberre. Kaluk Ngaye wanjh Yiman Manme Yerreh Ngudberre.”

John 6:35-40

³⁵ Jesus wanjh mulewarrinj, dja benmarneyimeng, “Ngaye mimbiwon ngudberre. Kaluk ngaye wanjh yiman buriddi yerreh ngudberre. Nawu nangale kamre kore ngaye wanjh minj mak nakka kayawoyhmarrwe. Dja mak nangale nawu nganwoybukwon, wanjh minj mak kayawoyhkombukdownen.

³⁶ Dja ngundiawoyhmarneyime, ngudda wanjh kandinang dja minj kandiwoybukwoyi.

³⁷ Nawu Ngabbard nganwon bininj rowk wanjh nakka kabirrimre kore ngaye. Dja nawu nangale bininj kamre kore ngaye, woymbukkih, minj mak ngawidnan.

³⁸ Ngaye ngamkoluy heavenbeh ba bu ngakurduyime kore nawu nganmunkeweng kadjare. Ngaye minj ngadjare ngakurduyime bu ngayeman.

³⁹ God nawu Kornkumo ngardduk nganmunkeweng dja nungka kadjare ngardduk ba bu ngabenkarrme nawu bininj nungka nganwanjbiwon ba bu minj ngabenbarlanhmang yikahyika nawu bininj nganbidnakenwon. Wanjh ngabendolkkayhwe yerrekah kore kunbarnangarra manbu kay-iburnbunkeh kabolkyimerran.

⁴⁰ Ngaye marneyime ngudberre kore God nawu Kornkumo ngardduk kadjare. Nawu nangale ngandinan ngaye nawu Beywurd nuye God dja ngandiwoybukwon, dja mak ngandiwokmarrkmang, wanjh nakka kamalngmimbi munguyh munguyh kore ngaye. Dja kaluk ngayeman ngaweleng ngarrollkayhwe yerrekah kore kunbarnangarra manbu kay-iburnbunkeh kabolkyimerran.”

Jesus Benbukkabukkang Bininj Nawu Birrimarnewokkihjnurlukmi Nuye

John 6:41-51

⁴¹ Wanjh bininj birridedjingmey birriwokkinjurluhnurlukmi bu bir-ribek kang Jesus benmarneyimeng, “Ngaye nawu buriddi yerreh nawu ngamkoluy kore heavenbeh.”

⁴² Bedda birrimarneyimerreni bu birriyimi, “Njalekenh kuhni kayime kadberre yimankek bu nungka nawu kumkoluy kore heavenbeh? Karrbenbenemarneburrbun nuye ngalbadjan dja kornkumo. Nawu kornkumo nuye Joseph. Dja njalekenh kuhni kahyime?”

⁴³ Jesus benwokmey benmarneyimeng, “Ngurringurdmen bu ngurri-wokkinjurluhnurlukme.

⁴⁴ God nawu Kornkumo nganmunkeweng ngaye, kaluk nungka kabenkan bininj kore ngaye. Minj bedman bininj kabirrimdjalle kore ngaye. Djal God nawu Kornkumo nungan kabenkan. Wanjh ngaye ngabendolkkayhwe birrimekbe bininj kore kunbarnangarra manbu kay-iburnbunkeh rowk kabolkyimerran.

⁴⁵ Dja ngudda wanjh ngurriburrbun bu prophet bimbom ngudberre, kayime, ‘God kaluk kabenbukkabukkan birrimekbe bininj rowk’. [Isaiah

54:13] Nawu nangale bininj kabiwokbekkan God nawu Kornkumo, nakka kabibukkan wanjh nungka kamre kore ngaye.

⁴⁶ Minj nangale nabuyika bininj binayi God nawu Kornkumo, dja ngaye ngadjalkudji nganang nawu ngamdolkkangbeh kore nungka.

⁴⁷ Woybukkih djal woybukkih marneyime ngudberre, bu ngaye kandiwoybukwon wanjh kunukka ngudda ngurrimimbi munguyh munguyh.

⁴⁸ Ngaye mimbiwon ngudberre. Kaluk ngaye wanjh yiman buriddi duninj yerreh ngudberre.

⁴⁹ Dja ngudda nawu ngundikebmawahmeng ngudberre birringuni manme manbu ngeyyoy manna bu birrihrey kore kubolkdarleh. Kalukburk wanjh birriballey birridoweni. Minj birrimimbiniwirrinj.

⁵⁰ Dja ngaye ngahyolyolmerren bu ngaye yiman manbu manbuyika buriddi manbu kumkoluy heavenbeh ba bu ngurringun dja minj ngurridoweni.

⁵¹ Ngaye wanjh ngamkoluy kore heavenbeh. Kaluk ngaye yiman buriddi yerreh manbu kabenmimbiwon bininj, dja bu ngudda ngurringun maninjmanu buriddi, wanjh ngurridarrkidmimbi munguyh munguyh. Buriddi manu ngaye won ngudberre, wanjh makka ngaye ngardduk kunburrk bu ngakanjkurmerren. Kuhni ngakurduyime ba bu ngabendarrkidwon birriwarlahkenh bininj rowk kondah kurorrebeh."

Jesus yimeng, "Ngaye Ngabendolkkayhwe Bininj Bu Kabolkyimerran Kore Kayiburnbunkeh."

John 6:52-59

⁵² Wanjh bu bininj nawu Jews birribekkanng yimeng, wanjh birridangwerreni kunkimuk bedmandeleng. Wanjh yikahwi birriyimi, "Njalekenh kuhni yimeng? Minj nuk kunburrk nuye karringuyi?"

⁵³ Wanjh Jesus benyawoyhwoqmey, yimeng, "Woybukkih djal woybukkih marneyime ngudberre, ngaye nawu Bininj Duninj. Bu ngudda minj ngurringun ngardduk kunburrk dja mak minj kandikurlbabongun, wanjh kunukka minj ngurrimalmimbi.

⁵⁴ Nawu nangale kangun ngardduk kunburrk dja kabongun ngardduk kunkurlba, nakka wanjh kamalmimbi munguyh munguyh kore ngaye, dja mak ngarrollkayhwe yerrekah kore kunbarnangarra manbu kayiburnbunkeh kabolkyimerran.

⁵⁵ Manu kunburrk ngardduk makka wanjh yiman manme duninj dja mak kunkurlba ngardduk makka wanjh yiman kayime kukku duninj.

⁵⁶ Bininj nawu maninjmanu manme kangun dja kabongun ngardduk kunkurlba, wanjh kunukka ngamre ngani munguyh kore nungka nuye kukange, dja mak nganenim munguyh kore ngaye kukange ngardduk.

⁵⁷ God nawu Kornkumo wanjh kahdjaldarrkidmimbi munguyh, dja nungka nganmunkeweng dja nganmarnbom ngaye bu ngadjaldarrkidmimbi munguyh yiman nungka. Bu wanjh kunmekbe kadjalrohrokwi bu nangale bininj kangun kunburrk ngardduk, wanjh kunukka nungka karrarrkidmimbim bu ngayekenh.

⁵⁸ Maninjmanu buriddi manbu ngahyolyolme kumkoluy kore heavenbeh. Mahni minj karohrok buriddi yiman kayime mawahmawah ngudberre manbu birringuni dja birridowerrinj. Dja nangale nawu kangun maninjmanu buriddi kore ngahyolyolme, wanjh nakka kahdjaldarrkidmimbi kore ngaye munguyh munguyh."

⁵⁹ Jesus wanjh kuninjkuu benmarneyimeng bu benbukkabukkani bininj kore Synagogue kunrurk manbu yiwarrudjenh kore Capernaum.

*Yikahwi Bininj Wanjh Birrimunkebawong Nawu Jesus
John 6:60-71*

⁶⁰ Birriwern nawu bininj birrimunkekadjungu Jesus birriwokbekkang bu kuhni yimeng, wanjh birrinjilngwarreminj. Wanjh bedda birrimarneyimerrinj, "Kuhni nuk kunrayek kore kaHYIME kadberre minj nuk karridjare karribekkan, dja burrkyak, wanjh karriwarnyak."

⁶¹ Wanjh Jesus benkangeburrbuni bu bedda birriwokkihnjurluhn-jurlukmi bu birrimarneyimerreni nungkakenh, wanjh nungka benmarneyimeng, "Yiddok ngaye marnbuyinj ngurrikebbumeninj bu ngaye kunmekbe marneyimeng ngudberre?"

⁶² Dja bu kandinan ngaye nawu Bininj Duninj ngare kaddum kore kerrngehkenhni ngani, wanjh baleh yerreh ngudda ngurriburrbun?

⁶³ Nawu Namalngmakkaykenh kabendarrkidwon bininj. Bininj minj kabirridarrkidworren. Dja bu kandiwokmarrkmang kore marneyimeng, wanjh ngurrimang Namalngmakkaykenh dja ngurrimalngmimbimen.

⁶⁴ Dja yikahwi ngudda minj kandiwoybukwon." Kuhni bu Jesus yimeng. Nungka benburrbuni munguyh nawu minj birriwoybukwoyi. Dja mak Jesus burrbuni namekbe bininj nawu kaluk kabikukweykan yerrekah bu bininj kabirribiddundulubun.

⁶⁵ Wanjh Jesus benyawoyhmarneyimeng, "Ngurriburrbun bu kunmekbekenh ngaye marneyimeng ngudberre bu ngaye ngayimeng, 'Minj nangale bininj kamre kore ngaye dja nungan God nawu Kornkumo kabimarnedurrkmirri ba bu kamre.' "

⁶⁶ Kaluk kundjalmekbe rerrih birridjalwernkenhni bininj birrimunkebawong Jesus dja minj birriyawoyhdjarrkrawinj.

⁶⁷ Wanjh Jesus bendjawam nawu twelve nuye bininj, yimeng bedberre, "Adju, ngudda mak, ngurridjare kandibawon bu ngurrire?"

⁶⁸ Simon Peter biwokmey Jesus bimarneyimeng, "Nawu Yiwohrnan, ngad mak nangale ngarrikadjung. Dja ngudda yidjalkudji kanmarneyime ngadberre kunwok nawu kandarrkidwon ba karrimalngmimbi munguyh munguyh.

⁶⁹ Ngad wanjh ngundiwoybukwong dja mak ngarriwernhburrbun bu ngudda wanjh yidjalkudji God nuye bininj nawu yidjalmak duninj.

⁷⁰ Jesus benmarneyimeng, "Ngayemandeleng bebbehdjarrngbom ngudberre dja nakudji nawu karrihre kondanjkuu wanjh nakka namarnde!"

⁷¹ Jesus wanjh biyolyolmi Judas nawu beywurd nuye Simon Iscariot. Namekbe nawu Judas birridjarrkrey twelve bininj nuyeni Jesus wanjh kalukburrk bu yerrekah nungka wanjh kabikukweykan.

7

*Jesus Nawu Birridanginj Minj Birriwernhwoybukwoyi
John 7:1-10*

¹ Kaluk burrk Jesus regehrey kubolkwarlahbubuyika kore Galilee, dja minj nungka djareniwirrinj durndeyi kore Judea dja kumekbe birriwohrnani nawu Jews bininj birridi bu birridjareni birribuyi.

² Kaluk bu darnkih bolkyimi bu nawu Jews birrikarmi mulil manbu kundjurlekenh.

³ Wanjh Jesus nawu birridangerrinj birrihdjarrkni dja birrimarneyimeng, "Ngudda yibolkawoyi kondah dja yirawinj kore kunbolk Judea, ba bu bininj birriwern nawu ngundimunkekadjung kabirrinan kore yikurdukurduyime God nuye kundulkarre dorrengh.

⁴ Bu ngudda wanjh yidjareminj bininj ngundiburrbuyi, yuwn bu yiwarkarren. Yibebmen, yiray, yibenbukkan bedberre kore kurobbe. Dja yibenmarnekukbukarrimen birriwarlahkenh bininj ba bu ngundiburrbun.”

⁵ Bedda wanjh kuninjkunu birrimarneyimeng nawu Jesus birridangerin bu bedda minj birriwoybukwoyi.

⁶⁻⁷ Wanjh Jesus benmarneyimeng, “Kuhni minj ngaye ngardduk bu ngabangmekurduyime. Dja ngaleng ngudda wanjh kamak ngurridjalkurduyimen kore ngurridjare, dja bininj minj ngundidung ngudberre. Ngaye wanjh birriwarlahkenh bininj ngandidung bu kunwoybuk ngayolyolme bedberre kore bedda kunwarre kabirrikurduyime, wanjh kunmekbekenh kunu ngandiwidnan.

⁸ Mah. Ngudman ngurriray kumekbe kore mulil. Dja ngaye nuk minj ngabangmere, kore ngaye ngardduk minj bangmekarremarnbuyindangimeninj.

⁹ Dja Jesus wanjh yerrkani kore Galilee.

¹⁰ Kaluk nawu Jesus birridangerrinj birriwam kore Jerusalem kore mulil birrikarrmi. Dja wanjh Jesus birribawong yerrkang minj birridjarrkrawinj. Kaluk yerrekah nungan Jesus wam manmolk ba bu minj nangale binayi.

*Jesus Wam Jerusalem Dja Benbukkabukkani Kore Mulil Bedberre
John 7:11-24*

¹¹ Wanjh nawu Jews bininj birriwohrnani bindidjawani kumekbe kore mulil birrikarrmi, birridjawayhmeng, “Baleh nakka Jesus?”

¹² Birrimirndewernkenhni bininj kore mulil birrikarrmi dja birriwern birridjavarreni bu birringayawkmi kore birrimarneyimerrreni Jesuskenh. Yikahwi nawu birriyimi, “Jesus nakka namak.” Dja birribuyika bininj birriyimi, “Nakka nawarre, nawu kahkurren kahbenkowe bininj bu kunbuyika kabenmarneyolyolme bedberre.”

¹³ Kaluk minj nangale bimulewayi Jesus kore kurobbe, dja birrikunikeleni bedberre nawu birriwohrnani nawu Jews bininj.

¹⁴ Wanjh manekke mulil bu balhbularrbuyinj dangeni wanjh Jesus wam bidbom kore Temple kuberrkkah dja wanjh dedjingmey benmarneyolyolmi bininj.

¹⁵ Nawu birriwohrnani Jews wanjh birriwam birriwokbekkani Jesus. Wanjh bedda birridjalkangebarrhmeng birriwokbekkang bu yolyohyolyolmi. Wanjh birridjavarreni bedmandeleng, birriyimeng, “Ngayh, nahni baleh karrehkarrengalkeyi dja nungka kunu minj rawinj school kadberre?”

¹⁶ Jesus nungan benmarnemulewarrinj, yimeng, “Ngayeman minj marneyime ngudberre, dja God nawu nganmunkeweng namekbe wanjh ngandjurrkkang bu ngawokdi nuye.

¹⁷ Bu nangale bininj kadjare kabiwokmarrkmang nawu God, wanjh kunukka kawernhurrin bu ngaye wanjh ngahmarneweykan kunwok nuye God, dja kuhni minj ngayemandeleng bu ngahwokdi.

¹⁸ Ngurriburrbu. Nawu nangale bininj kawokdi kore nungan nuyekih kunmayali, wanjh nakka nungan kadjaldjare kabirriburlume birribuyika bininj. Dja ngaye ngadjare bininj kabirriburlume God nawu nganmunkeweng, wanjh kunmekbekenh kunu ngudda ngurriburrbun ngaye minj ngawarre bininj dja ngaye wanjh kunwoybuk ngahmulewan ngudberre, dja minj ngahkurren.

19 Yiddok ngudda minj Moses ngunwoyi manbu mankarre? Dja minj yikahwi ngudda wanjh ngurriwokmarrkmang manekke mankarre. Dja njalekah ngurrimborledme ngurridjare yimankek ngudda kandibun ngaye?"

20 Wanjh birridjalmirndewern bininj nawu birriwokbekkang bu kumekbe yimeng bedberre, wanjh yikahwi birriyimeng nuye, "Ngayh. Ngudda yiddok namarnde ngimeng kukange ke bu ngunwokborledkeng. Nangale yimankek yiyime ngunbun?"

21 Wanjh Jesus benyawoyhwokmarrkmey, benmarneyimeng, "Ngaye kunkudjikenh kandikurdunang ngakurduyimeng God nuye kundulkarre dorreng kore kunbarnangarra Sabbath ngarreni, dja ngurriwohnjilng-warreminj.

22 Dja ngudda mak ngurridurrkmirri bu kunbarnangarra Sabbath ngarre. Ngayime bu wurdyaw nawu barrken karrangen, wanjh ngurrimadbun kunbarnangarra kunbidkukudji dja danjbik kunkodjke wanjh nguririlakkayenwon bu ngarre kunkodjke Sabbath. Wanjh ngurriburrbu bu ngudda ngurrikurduyime kunmekbe. Ngudda yimankek ngurriyime ngurriwokmarrkmang Moses nawu ngunwong manekke mankarre manbu kabindilakkayenwonkenh. Kaluk manekke mankarre minj Moses nungan nuye, dja wurd ngudberre mawahmawah birridedjingmey bu birrilakkayenworrinj korroko.

23 Ngurrina! Ngudda ngurridjare ngurrimarrkmang manmekbe mankarre Moses nuye, dja kunmekbekenh kunu ngurridurrkmirri kore ngurribenlakkayenwon wurdwurd bu kunkodjke kunbidkudji dja danjbik kabirrikarme. Ngudda kunu ngurridjaldurrkmirri bu kunbarnangarra Sabbath ngarre, dja kunukka kundjalyahwurd kunmak ngurrikurduyime. Dja ngaye ngamarnbom bininj nuye kunburrrk bu makminj nawu dulkkihdulkkihyoy. Kunekke kunkimuk kunmak ngakurduyimeng, dja njalekenh mak ngaye kandihdung bu namekbe bininj ngarrollkayhweng bu kunbarnangarra kore Sabbath ngarre?

24 Ngudda kandidjadmeng kore ngandidjalkurdunangkenh, dja minj kandikangeburrbuyi. Kuhni minj mandjad. Dja bu kandiyawoyhdjadme, wanjh ngurriburrbu kore djal kunwoybukkenh." Kunmekbe Jesus benmarneyimeng nawu birriwohnrani bininj nawu Jews.

Bininj Birrimarneyimi Dja Birridjahwarreni Bu Jesus Nungka Yimankek Messiahni

John 7:25-31

25-26 Bu kunmekbe bolkyimi, wanjh birrimekbe bininj nawu birrini Jerusalem birridedjingmey bu birriyawoyhyolyolmi Jesus. Wanjh birridjawarrinj, "Ngurrina! Nahninjanu bininj yiddok kabirridjare kabirribun nawu kabirriwohnrnan? Dja wanjh nungka kuberrk kahdi kore birriwernkenh kabirrinan dja kahbenbukkabukkan. Dja nawu kabirriwohnrnan minj kabirringurdke. Yiddok kunubewu birriwohnburrbuyi bu nungka nawu Christ?"*

27 Dja yika birriyawoyhmarneyimerreni, birriyimeng, "Burrkyak. Nungka minj Christ. Ngad karriburrbun kore nungka Jesus kumdolkkanbeh. Dja bu nawu Christ kamre, minj nangale kaburrbun kore kamdolkkan kore kamre."

28 Wanjh Jesus benbukkabukkani kore kuberrkkah manbu Temple. Nungka wanjh benmarneyimeng wernkih wokdi, yimeng, "Ngudda kandiburrbun dja mak ngurriburrbun kore balehbeh ngamwam. Dja

* 7:25-26 Christ karohrok "nawu Messiah".

minj ngurriburrbun God nawu Nadjalwoybuk duninj, nawu nganmunkeweng? Minj ngayeman ngamrawinj, dja nungka nganmunkeweng.

²⁹ Ngaye wanjh ngaburrbun God nawu nganmunkeweng dja ngaye nganedjarrkni dja kumekbe ngamdolkkangben."

³⁰ Bu Jesus birribekkang kumekbe benmarneyimeng, wanjh bedda nawu birriwohrnani nawu Jews birrirohrokmi bu birridjaldarrkidmayi. Dja burrkyakni, minj nangale bikarrmenin, dja minj bolkyimerrangimeninj kuhni nungka nuyeniwirrinj bu dowimeninj.

³¹ Kaluk birriwern birribuyika nawu bininj, wanjh birridjareni birriwoybukwoyi Jesus dja nanihnjanu birriyimi, "Nahni wanjh kundulkarre dorreng durckmirranj kunwernhkah bu karrinang God nuye kunngudj. Wanjh kumekbe yerreh kayimerran bu nawu Christ kamre, wanjh kunubewu nanihnjanu wanjh nungka."

Nawu Birrikkimukni Bindimunkeweng Djamun Birriberlmayi Jesus

John 7:32-36

³² Nawu Pharisee bindibek kang birriwern bininj bu kuninjku bu birrihyolyolmi Jesus, wanjh priests birrikkimuk dja mak nawu Pharisees bindimunkeweng djamun nawu birribolknahnani Temple ngarre bu kabirriberlmang Jesus.

³³ Kaluk Jesus benmarneyolyolmerreni birriwern bininj, yimeng, "Ngaye med karridjarrkdi kundedjumbungkenh, kaluk kunu ngabaddurdeng kore God nawu nganmunkeweng.

³⁴ Ngudda kaluk kandiyawan dja minj kandingalke, dja ngudda kakarrewarre bu ngurrire kore ngaye ngare."

³⁵ Nawu Jews bininj birribekkang bu Jesus yimeng wanjh birridjawanreni, birrimarneyimerreni, "Kab nahni bininj baleh kare bu nungka yimeng ngad minj karringalke? Dja kunubewu karengahre kore nawu karriredbo birribebbehwabmeng, ba bu nungka kabenbukkabukkan bininj nawu minj Jew.

³⁶ Kaluk kuhni kab baleh kawokmenmenyime kore kamarneyimeng, 'Ngudda kaluk kandiyawan dja minj kandingalke, dja ngudda kakarrewarre bu ngurrire kore ngaye ngare'?"

Jesus Yolyolmeng Namalngmakkaykenh Nuye

John 7:37-39

³⁷ Kaluk kumekbeni bu mulil birriyiburnbom, kore kunkodjke kunbarngarradjamunkenhni, Jesus dolkkang danginj dja kumkayhmi dorreng bu benmarneyimeng, "Nawu nangale kakombukdownen, wanjh nanu kumray kore ngaye ba kabongun.

³⁸ Nawu nangale bininj ngaye nganwoybukwon, wanjh kabongalke kukku yiman kahborlobme kore kukangebeh nuye, maninjanu wanjh kukku kabenmimbiwon bininj munguyh munguyh. Kuninjku wanjh kabimbuyindi kore djurra[†]."

³⁹ Bu kuhni Jesus yimihyimi kore yolyolmeng kukkukenh, wanjh kunukka mulehmulewani Namalngmakkaykenh. Bu kumekbe bolkyimi bu Jesus yolyolmi, wanjh nawu Namalngmakkaykenh minj kumbangmerawinj[‡], dja Jesus minj bangmedurndeyi kore Ngabbard ba bininj kabirrimarneboddan. Kaluk yerrekah nawu bininj birriwarlahkenh birriwoybukwoni Jesus wanjh birrimangi namekbe Namalngmakkaykenh.

Bininj Birridangwerreni Bu Jesuskenh

John 7:40-44

[†] 7:38 Ngurrina Isaiah 58:11 [‡] 7:39 Ngurrina John 14:25-26

40 Wanjh yikahwi bininj nawu kuhni birribekkani wanjh birriyime, "Woybukkih, nahn nahn wanjh namekbe prophet nawu karrihmadbuni kumhrey."

41 Dja mak nawu yikahwi birribuyika bininj birriyimi, "Nahn wanjh Christ nawu kumwam kadberre." Dja nawu birribadbuyika bininj birriyimi, "Burrkyak, nawu Christ minj kamdolkkan kore kunred Galileebeh."

42 Dja mak kore djurra kahyime bu namekbe nawu Christ wanjh King David nuye namud, dja mak kamdolkkanbe kore kunred Bethlehem. Kumekbe wanjh King David yoy."

43 Wanjh nawu bininj birriwarlahken birridangwerreni bu Jesuskenh.

44 Yikahwi bedda birridjareni birridarrkidmayi. Dja burrkyakni, minj nangale mak bikulahkarmeninj.

Nawu Jews Bininj Birriwohrnani Birridangwerreni Bu Jesuskenh John 7:45-53

45 Dja wanjh nawu djamun birridurnderrinj kore priests birrikikhimuk dja mak kore Pharisees, dja birribidlarrkni. Wanjh bedda bindidjawam, "Njalekah minj ngudda ngurrimkayi nawu Jesus?"

46 Wanjh nawu djamun bindimarneyimeng, "Minj nangale nabuyika bininj kawokdi kore kundjalma yiman kayime nanihnjanu bininj kahwokdi."

47 Wanjh nawu Pharisees bindimarneyimeng, "Ngayh, ngaleng, ngudda warridj ngunkoweng ngudberre?"

48 Ngad yikahwi nawu ngarriwohrnahwohrnan, dja mak ngad yikahwi nawu Pharisees, minj nuk ngarriwoybukwoyi namekbe bininj.

49 Dja birrimekbe bininj nawu kabirriwoybukwon Jesus, wanjh bedda minj kabirriburrun kore mankarre kahyo, wanjh God bendjalwareram."

50 Kaluk kumekbe Nicodemus birridjarrkdi, nungka mak Phariseeni. Nungka nawu kerrngehkenhni Jesus benewokdi.

51 Wanjh benmarneyimeng nawu birribuyika Pharisees, "Kore mankarre kurrmeninj kadberre minj karribangmedarrkiddjadme, dja med, karribekkan yeledj kore baleh kawokkiyime dja karriburrun kore baleh nungka kakurduyime."

52 Wanjh bedda birrimarneyimeng, "Ngayh, ngaleng, ngudda warridj kunubewu Galileebeh? Yibimna kore djurra. Minj kayime bu prophet kamdolkkan Galileebeh."

53 Wanjh birriwern rowk birridokmerrinj kured. Kaluk wanjh Jesus wam mandulum kore kabolkngeyyo "Karrulkmirnderri manbu Olives Kundulk".

8

Jesus Bingehkeng Ngalarre Daluk John 8:1-11

1-2 Wanjh bu kunkabelbuyika Jesus yawoyhdurndi kore kuberrkakah manbu Temple. Dja birriwarlahken bininj birrimrindemornnamerrinj kore nungka, wanjh Jesus yerrkang dedjingmey benbukkabukkani.

3 Kumekbe bu benbukkabukkani wanjh birribuyika bininj birrimbeb-meng. Bedda bininj nawu mankarre birriburrun dja mak bininj nawu Pharisees, wanjh birrimberlkani ngalkudji daluk. Kaluk yikahwi bininj birringalkeng ngalmekbe daluk kore benehyoy nabuyika bininj nawu minj nabininj kobeng ngarriwerrinj. Birrinameng ngalmekbe daluk kore kumirrk bedberre nawu birrimrindewern birrihdi.

⁴ Wanjh birrimarneyimeng Jesus, “Ngudda nawu kanbukkabukkan, ngad ngarrinang ngahli daluk benehyoy bininj nawu minj nabininjkobeng ngalenggarre.

⁵ Dja yiburrbun kore mankarre kahyo manbu Moses bimbom. Manmekbe mankarre kanwokrayekwon bu daluk kuhni kakurduyime wanjh karridjalkodj Dong kunwardde dorreng, karribun karrikukkurrme. Dja ngudda baleh bolkkime yiyime bu ngarrikurduyime ngalenggarre?”

⁶ Kuhni birrimarneyimeng Jesus dja bedda birridjareni yimankek yimeninj kunwarre, kunmekbekenh wanjh ba bu nungka birriwelengnameninj nawu Jesus.

Wanjh Jesus minj benwokmayi, dja minj wokdiwirrinj. Djahdjaldi, wanjh kalukburk nungka boddanj bidyirriyonginj wanjh rorrebimbuni.

⁷ Wanjh bedda birridi birridjaldjawanj Jesus. Bu Jesus kumyawoyhdolk kang wanjh benmarneyimeng bedberre, “Mah wanjh, nangale kore ngudberre nawu minj kunwarre yimeninj kore kukange ke, wanjh namekbe nanu nungka werrek dokmen warddeburriwemen ngahli daluk birro.”

⁸ Mak Jesus yawoyhboddanginj, bidyirriyonginj yawoyhrorrebimbuni.

⁹ Bu kuhni birribekkang Jesus, wanjh bedda birridedjingmey birribebbehawong bu birrihdjalkudjihrey. Dabborrabolk werrek birridokmerreni. Wanjh Jesus dja ngalmekbe daluk bindidjalbawong kumekbe benedi. Kaluk ngalmekbe daluk dingihdi kore kumirrk nuye Jesus.

¹⁰ Jesus yawoyhdolk kang, dja bidjawam, “Daluk, baleh konhda nawu birriwam? Yiddok minj bedda birriyimeninj ke bu ngudda yirrowimeninj?”

¹¹ Ngalbu daluk yimeng, “Nawu yikimuk, minj nangale nganbuyi.” Jesus biwokmey, bimarneyimeng, “Ngaye mak minj warrewan ke. Dja yiray, mak yuwn yiyawoyhbakke God nuye mankarre dja kuhni yibawo kunwarre rowk.”

Jesus yimeng, “Ngaye nawu ngabenmarnebolkwolkan birriwarlahkenh bininj rowk.”

John 8:12-20

¹² Jesus dingihdi manbu kururk Temple kuberrkakah dja benmarneyolyolmi dja benhbukkabukkani birriwern bininj. Wanjh nungan yolyolmerrinj bu benmarneyimeng, “Ngaye nawu marnebolkwolkan ngudberre ngurriwarlahkenh nawu bininj rowk. Bu ngaye kandimunkekadjung wanjh kunukka woybukkih minj mak ngurrire kore kubolkmunun. Ngaye wanjh marnebolkwolkan kore mimbiwon ngudberre.”

¹³ Nawu Pharisee birribekkani bu yimiyimi wanjh bedda birrimarneyimeng, “Kuhni bu yingan ke kore yiwokmulewarren, bu ngad minj nuk kuhni ngundiwoybukwon. Minj nangale mak nabuyika ngunyolyolmeninj ba bu ngundiwoybukwoyi.”

¹⁴ Jesus benwokmey benmarneyimeng, “Kamak bu ngayemandeleng ngahwokdi bu ngudda ngurriyimeng ngardduk, dja kore ngahwokdi kunukka wanjh kunwoybuk. Dja ngaye ngaburrbun kore balehbeh ngamwam dja mak ngaburrbun kore ngare. Ngudda minj ngurriburrbun kore ngamdolk kangbeh dja kore baleh ngare.

¹⁵ Ngudda djal nawu binihbininj ngaye kandidarrkiddjadme, kunukka minj nuk kunmak. Dja ngaye minj nangale bininj ngahdarrkiddjadme.

¹⁶ Bu ngaye nangale nawu bininj ngadjadmeninj, wanjh kunukka kundjalmakniwirrinj bu ngadjaldjadmeninj namekbe nawu bininj, dja nganedjarrkdjadme ngaye dja mak God nawu Kornkumo nawu nungka nganmunkeweng.

17 Kore ngudberre mankarre kahyo bimbuyindanj, bu bininj benebo-kenh kabenemre kabenebbebehyme bu kadjalkudji, wanjh kunukka kunwoybuk kayongen.

18 Ngaye wanjh marneyime ngudberre kunwoybuk bu ngayekenh, dja God nawu Kornkumo nganmunkeweng, dja nungka mak ngunmarneyime ngudberre kunwoybuk bu ngayekenh."

19 Wanjh bedda birrimarneyimeng, "Baleh ngudda ke nawu nako-rnkumo?" Wanjh Jesus benwokmey benmarneyimeng, "Ngudda nuk minj ngaye kandiburrbun dja mak minj ngurriburrbun nawu kornkumo ngardduk. Bu ngaye kandiburrbuyi wanjh kunukka nungka mak ngur-riburrbuyi."

20 Kuninjkuu wanjh Jesus benmarneyimi, dja minj nangale mak birrarrkidmayi bu bingurdkemeninj. Minj bolkyimerrangimeninj bu nungka nuyeniwirrinj bu bangmedowimeninj.

Jesus Mulewarrinj Bu God Nawu Kornkumo Bimunkeweng *John 8:21-30*

21 Kaluk bu Jesus benyawoyhmarneyimeng, "Ngaye wanjh ngahre bu ngudda wanjh kandiyawan, dja larrk. Ngudda wanjh ngurridowen kore God minj kabengmidjan ngudberre kunwarre. Wanjh kunukka minj ngurrire kore ngaye ngare."

22 Wanjh nawu birriwohrnani Jews bininj bu birribekkkang wanjh bedmandeleng birrimarneyimerrinj, "Kuhni bu kahwokdi 'minj ngurrire kore ngaye ngare', yiddok kayime nungandeleng kaburren?"

23 Wanjh Jesus benyawoyhmarneyimeng, "Ngudda nawu wanjh kanjd-jiwaken, dja ngaye nawu wanjh kaddumwaken. Ngudda wanjh kondan-jiuku kurorrewaken, dja ngaye minj ngakang kondahbeh.

24 Kunukkakenh ngaye marnehmarneyimeng ngudberre, ngudda ngur-ridowen kore God minj kabengmidjan ngudberre kunwarre. Bu ngudda minj ngaye kandiwoybukwon kore ngaye ngahwokmulewarrinj wanjh woymbukkih kunukka ngurridowen kore God minj kabengmidjan ngud-berre kunwarre."

25 Wanjh bedda birrimarneyimeng, "Dja ngudda nangale mayh?" Wanjh Jesus benmarneyimeng, "Ngaye marnehmarneyimeng ngudberre kerngehenh.

26 Ngaye ngakarme kunwernkenh bu ngadjare djadmeninj ngudberre. Nungka nawu nganmunkeweng nakka wanjh kadjalwokdi bu kunwoybuk. Ngaye ngabenmarneyime birriwern bininj bu nungka kore kadjare ngabenmarneyolyolme, minj mak njale kunbubuyika ngayolyolme."

27 Bu birribekkani Jesus minj birriburrrburrkbekkeyi bu biyolyolmi God nawu Nakornkumo nuye.

28 Wanjh Jesus benyawoyhmarneyimeng, yimeng, "Ngurrina, bu ngaye kandikukwayhke kore kundulk cross, ngaye nawu Bininj Duninj, wanjh kunukka ngurriwohburrbun bu ngaye woymbukkih ngawokmulewarrinj. Dja mak ngudda wanjh ngurriburrbun bu minj mak ngayeman ngakur-duyime, dja ngadjalwokdi kore God nawu Kornkumo nganbukkabukkkang.

29 Nungka wanjh nganmunkeweng dja nakka nganedjarrkre. Minj nakka nganbawon bu ngahre ngakudji, dja ngaye munguyh ngakurduyime bu ngamarnbun nungka kanjilingmakmen."

30 Bu Jesus kuninjkuu yolyohyolyolmi wanjh birriwern birriwoybuk-wong, dja birriwokmarrkney nuye.

Jesus Birridangwerrinj Nawu Jews Bininj Bu Birriyimi Yimankek Birriwoybukwoni

John 8:31-47

³¹ Wanjh Jesus benmarneyimeng Jews bininj nawu birriyimi yimankek birriwoybukwong, yimeng, “Bu ngudda munguyh kandiwockmarrkmang, wanjh kunukka woymbukkih ngudda nawu bininj ngardduk.

³² Dja mak ngurriburrbun kore kunwoybuk, wanjh manekke kunwoybuk ngunbebke kore ngurridukkayindi.”

³³ Wanjh bedda birriwockmey, birrimarneyimeng, “Ngad ngadberre mawahmawah nuye Abraham, dja mak ngad kunu minj nangale kanbongnameninj. Dja njalekenh ngudda kunu kanmarneyime bu ngad ngarrimbebme kore ngarribongdibeh?”

³⁴ Wanjh Jesus benwockmey, benmarneyimeng, “Woybukkih djal woymbukkih marneyime ngudberre, bu ngudda munguyh kunwarre ngurrihkurduyime, wanjh kunukka kunwarrekenh ngurridjalmarnedurrkmirri munguyh, yiman kayime bu kunwarre ngunhbongname.

³⁵ Dja ngurrina, ngurriburrbu bu bininj nawu kabidjalmarnedurrkmirri nabuyika kore kabibongkarrme, nakka wanjh minj nungka nuye namud. Nakal bu kadjare wanjh kabikukburriwe. Dja beywurd nakornkumo nawu namud nuye, wanjh nakka kadjaldi munguyh munguyh.

³⁶ Ngaye wanjh God nuye beywurd, dja bu ngaye bebke ngudberre kore ngurribonghdi, wanjh kunukka ngudda woymbukkih bu minj mak ngurriyawoyhbongdi.

³⁷ Ngaye ngaburrbun bu ngudda bebeywurd nuye Abraham, dja njalekenh ngudda ngurridjaldjare kandibun dja kandiwocknjirrhmiwon munguyh.

³⁸ Ngaye ngayolyolme kore kornkumo ngardduk nganang, dja ngudda ngurrikurduyime kore ngurriwockbekkan nabuyika nawu kornkumo ngudberre.”

³⁹ Wanjh bedda birriwockmey birrimarneyimeng, “Ngad kunu ngadberre Abraham nakornkumo.” Jesus benmarneyimeng, “Bu woymbukkih ngudda Abraham nuye bebeywurd, wanjh ngurrikurduyimeninj yiman Abraham kurdukurduyimi.

⁴⁰ Ngaye ngadjalkudji bininj marneyimeng kunwoybuk ngudberre kore ngawokbekkang nawu God. Dja ngudda ngurridjare ngaye kandidatealibun mankarreburudjang. Abraham kuhni minj kurduyimeninj bu korroko.

⁴¹ Ngudda ngurridjaldjare ngurrikurduyime kore nakornkumo ngudberre kakurduyime.” Dja bedda birrimarneyimeng, “Ngad kunu minj nangale mak kornkumo nawu nganbornayi. Dja ngad kunu nadjalkudji God ngadberre nawu kornkumo.”

⁴² Wanjh Jesus yimeng bedberre, “Bu God nawu kornkumo ngudberre wanjh kunukka ngaye kandimarnedjareniwirrinj dja ngaye wanjh ngamdolkkang kore Godbeh. Ngaye ngamwam kondah minj ngayemandeleng bu ngamrawinj dja nungka nganmunkeweng bu ngamwam.

⁴³ Ngudda wanjh ngurridjalwidnan ngardduk kunwok, kunmekbekkenh kunu ngudda minj ngurriburrkburrkbekkan bu ngaye marnehmarneyime ngudberre.

⁴⁴ Dja ngudda kunu kornkumo ngudberre wanjh nawu Namarnde Duninj. Ngudda wanjh nuye bebeywurd bu ngurridjare ngurridjalwockmarrkmang kore nungka kahyime ngudberre. Nungka wanjh namarndeyini kerrngekenh duninj kore dedjingmey. Nungka minj kunwoybuk karrmeninj dja bolkkime kadjalkurrehkurren, dja kawidnan kunwoybuk munguyh. Kore nungka kawokdi, wanjh kunukka munguyh

kahdjalkurrehkurren kore kabenmarneyime bininj. Dja mak kabenmarnbun bu kahdjalkurren rowk.

⁴⁵ Dja gaye djäl kunwoybuk marneyime, dja bonj, minj kandiwoybukwon.

⁴⁶ Wanjh nangalehgale ngudda bininj ngurriyime bu gaye kandinayi bu yimankek ngakurduyimeng kunwarre? Burrkyak. Gaye wanjh ngadjalyolyolme kunwoybuk, dja njalekah minj kandiwoybukwon?

⁴⁷ Dja kandibekka! Nawu bininj nuye God, wanjh nakka kabiwokbekkan. Dja ngudda kunu minj God nuye bininj, dja kunmekbekenh minj ngurriwokbekkan nawu God."

Jesus benmarneyimeng, "Bu Abraham darrkihdarrkiddi, gaye wanjh kumekbe ngahyingkihi."

John 8:48-59

⁴⁸ Wanjh birrimekbe Jews bininj kunwarre birrimarneyimeng, "Ngudda kunu wanjh Samariabeh! Dja mak yikarreme namarnde kore kukange ke! Wanjh kunukka djälwoybukkih."

⁴⁹ Wanjh Jesus benwokmey, benmarneyimeng, "Burrkyak! Gaye kunu minj namarnde nganhkarreme. Gaye wanjh ngadjare ngaburlume Ngabbard ngardduk, dja ngudda kunu kandimarneyime gaye kunwarre.

⁵⁰ Gaye minj ngadjare ngabenmarnbun bininj ngandiburlume, dja mak nabuyika kadjare bu bininj birriwern ngandiburlume gaye. Dja mak nungka kanmulewan bu kandjadme kadberre rowk.

⁵¹ Woybukkih djäl woybukkih marneyime ngudberre, nawu nangale nganwokmarrkmang nakka wanjh minj munguyh kahdownen."

⁵² Bu birriwokbekkang, wanjh bedda birrimarneyimeng, "Ngad wanjh bolkkime ngarriwernhburrbun bu namarnde kahni kukange ke! Abraham doweng, dja mak nawu prophets birridoweng dja njalekenh ngudda kuhni yiyime bu nawu nangale ngunwokmarrkmang nakka wanjh minj karrowen?"

⁵³ Ngudda yimankek yidjalwernhkimukworren bu yiyurhke Abraham nawu nakornkumo ngadberre nawu doweng. Dja mak nawu prophets birridowerrinj. Ngudda yimankek yiyime nangale bu yiyimoworren?"

⁵⁴ Wanjh Jesus benwokmey yimeng, "Bu ngayemandeleng ngaburlumeren, wanjh kunukka djäl burudjang. Dja gaye nganburlume Ngabbard ngardduk, nawu ngudda ngurriyime God ngudberre, nakka wanjh gaye nganburlume.

⁵⁵ Dja ngudda kunu minj ngurriburrbuyi dja mak minj ngurridjalburrbun bu bolkkime. Gaye ngadjalburrbun nungka. Bu gaye ngayimeninj ngawakwayi wanjh kunukka ngakoweyi yiman kayime ngudda nawu munguyh ngurrikurren. Gaye ngaburrbun nungka dja mak ngakarreme nuye kunwok dja ngawokmarrkmang.

⁵⁶ Nawu ngudda ngudberre kornkumo Abraham, nakka wernhnjilngmakminj bu nganburrbuni gaye ngamhahmirranj. Nungka ngannang bu korroko, dja njilngmakminj duninj bu gayekenh."

⁵⁷ Wanjh bedda birriyawoyhmarneyimeng Jesus, "Ngudda nuk minj yirrabbolkkare yiman fifty mandjewk, dja njalekenh yimankek yiyimeng bu ngudda yinang Abraham?"

⁵⁸ Wanjh Jesus benmarneyimeng, "Woybukkih, djäl woybukkih marneyime ngudberre, bu kerrngehkenh duninj Abraham danginj dja gaye wanjh ngayungkih ngadjalyingkihi munguyh."

⁵⁹ Bu kuninjkuu Jesus benmarneyimeng nawu binihbininj wanjh bedda birriwarddemoyhmangi manyawwarddekihkimuk bu yimankek

birrikodjdoiy bu birridjareni birribuyi. Dja nungandeleng warlkkarrinj dja rurrkbawong kuberrkkah ngarre Temple.

9

Jesus Bimarnbom Nakudji Bininj Nawu Mimdubbeni Bu Danginj *John 9:1-12*

¹ Kaluk bu kunbarnangarra manbu Sabbath ngarreni, Jesus dja bininj nawu benhbukkabukkani birrihdjarrkrey, wanjh Jesus binang bininj nawu mimbunjeni bu danginj.

² Wanjh nawu bininj birrihrey birridjawam Jesus, "Ngudda nawu kanhbukkabukkan, njalekah nahni bininj danginj mimbunje? Yiddok nungka kunwarre yimeninj? Ngayh, yiddok ngalbadjan dja kornkumo kunwarre beneyimeninj?"

³ Wanjh Jesus benwokmey, benmarneyimeng, "Burrkyak. Minj kunukka kayime. Minj nungka kurduyimeninj kunwarre, dja mak nawu nako-rnkumo dja ngalbadjan nuye minj kunwarre benekurduyimeninj. Dja nungka mimbunjeminj ba bu birriwern bininj kabirrinan kore God kabimarnekurduyime nuye.

⁴ Bolkkime bu kuninjku barnangarra, wanjh karrihdjaldurrkmirrin kore kadjare nawu nganmunkeweng. Kaluk darnkih bu kumunun kayimerran, dja minj mak nangale kayawoyhdurrkmirri.

⁵ Bu ngaye wanjh bolkkime ngahdjaldi kondanjku kurorre, wanjh ngabenmarnebolkwolkan bininj rowk."

⁶ Bu kuninjku yimeng bedberre, wanjh rerreh boddanj, dja rorrenunjweng dja yiman marnbom kunkih yerreh. Wanjh mahni kunkih mey dja bimimbaruy kore kumim nuye bininj nawu mimbunjeni.

⁷ Wanjh Jesus bimarnyemeng namekbe bininj, "Yiray, wanjh yikukdjirridjurrimen kore manlabbarl Siloam." Wanjh kuninjku kunngey Siloam kayime, "Bimunkeweng". Wanjh nawu mimbunjeni bininj wam kukdjirridjurrineni, wanjh mimbayhmeng, dja durndi kured bu bolknabolknani.

⁸ Wanjh bininj nawu birridarnhyoy nuye birriburrbuni bu nungka ker-ngehkenhni mimbunjeni. Bedda dja birribuyika mak bininj birrihnani bu nungka korroko ningihni dja bendjawani bininj bu kunwarddekenh nawu money. Wanjh bedda birrikuburrknang bu nungka bolknang, dja birriyimeng, "Ngayh! Yiddok nanihnjanu bininj nawu kankukdjanwodjanwohmi kunwarddekenh?"

⁹ Yikahwi birriyimeng, "Yoh, wanjh nungkakih." Dja nawu birribuyika birriyimi, "Burrkyak. Nakka minj nungka, dja nawid. Kunubewu kabenekukrohrok." Dja nawu bininj namekbe mimbunjeni mulewarrinj dja benmarneyimeng, "Yoh, ngaye wanjh!"

¹⁰ Wanjh bedda birridjawam, "Ngayh, baleh yikurduyimeng bu yimimbayhmeng dja yibolknan bolkkime?"

¹¹ Wanjh nungka benwokmey benmarneyimeng, "Bininj nawu kabirringeybun Jesus, namekbe wanjh nanu nganmarnbom bu ngabolknan. Kaluk nungka marnbom kunkih wanjh nganmimbaruy dja nganmarneyimeng, 'Yiray, yikukdjirridjurrimen kore manlabbarl Siloam.' Wanjh ngaye ngawam, ngadjirridjurrinj, wanjh ngawohmimbayhmeng bu ngabolknan."

¹² Wanjh bedda birridjawam, "Kaluk baleh namekbe bininj wam nawu ngunmarnbom?" Wanjh bininj nawu bunjeni yimeng bedberre, "Ngawakwan. Baleh nuk wam?"

*Nawu Pharisee Birridjaldjawani Kunwernkah Namekbe Nawu Bunjeni
John 9:13-34*

13 Kaluk yikahwi bininj birrimey namekbe bininj nawu mimbunjeni, dja birrikang kore nawu Pharisees.

14-15 Nawu Pharisee birriwobekkang bu Jesus bimarnemarnbom kunkih, bimimbaruy namekbe bininj mimbunjeni bu bimarnbom bolknang wanjh kore kunbarnangarra manbu Sabbath ngarreni. Wanjh bedda birridjawam namekbe bininj, "Njalekenh bu ngudda yimimbayhmeng?" Namekbe bininj benmarneyimeng, "Jesus nungka wanjh marnbom kunkih ngardduk bu nganmimbaruy, dja ngakukdjirridjurrinj, wanjh ngabolknan."

16 Yikahwi Pharisees birriyimeng, "Nanihnjanu bininj nawu kangeyyo Jesus, nungka wanjh bakkeng mankarre Sabbath ngarre. Kunmekbekenh kunu ngad ngariyime nungka minj kumdolkayinj kore Godbeh." Dja nawu birribadbuyika Pharisees birriyimeng, "Burrkyak, nahnii bininj nungka namak. Bu nungka nawarreniwirrinj, wanjh kunukka minj kunmak durrkmirriwirrinj kundulkarre dorreng bu kanmarnbuyi karriburrbuyi God." Wanjh bedmandeleng Pharisees birridangwerreni.

17 Wanjh birriyawoyhdjawam namekbe bininj nawu mimbunjeni, "Ngudda baleh kab yimulewan namekbe bininj nawu ngunmimbayhkeng?" Dja nawu mimbunjeni bininj benmarneyimeng, "Nungka wanjh prophet."

18 Nawu Jew bininj birriwohrnani minj birriwernwoybukwoyi bu nanihnjanu bininj mimbunjeni korroko. Wanjh bindimarnewokmunkewerrinj ngalbadjan dja nakornkumo nuye bu benemwam.

19 Dja bindidjawam, "Yiddok nahnii ngurrewoneng wurdyaw? Dja mak yiddok nguneyime bu nungka danginj mimdubbeni? Dja njalekah bu nungka bolkkime mimbayhmeng kahbolknan?"

20 Wanjh bedda bindiwokmey, bindimarneyimeng, "Yoh. Nahnii wanjh wurdyaw ngad ngarrewoneng, mak nganeburrbun bu nungka danginj mimdubbeni bu minj bolknayi.

21 Dja minj nganeburrbun bu bolkkime mimbayhmeng dja kahbolknan. Ngad minj nganeburrbun bu nangale nawu bimimbayhkeng. Nungan ngurridjawa wanjh, dja nungka dabbolk bu nungan kawokdi kamulewan ngudberre."

22 Namekbe bininj nuye ngalbadjan kornkumo kuninjkuu beneyimeng dja benemkunikeleni bedberre nawu Jew bininj birriwohrnani. Birrimekbe Jews nawu birriwohrnani bu korroko birriyingkihkarremarnbom bu birriyimeng nangale bininj kayime Jesus nakka wanjh Christ* wanjh kabindidjirran dja kabindikukbebe kore Synagoguebeh.

23 Kumekbekenh kunu bedda bindimarneyimeng nawu ngalbadjan dja kornkumo, "Nakka wanjh dabbolk, ngurridjawa nungan bu kamulewarren."

24 Wanjh nawu Jews bininj birriwohrnani birriyawoyhmarnewokmunkewerrinj bu kamdurndeng nawu mimbunjeni bininj. Wanjh nungka kunwam bedberre dja birrimarneyimeng, "Mah, wanjh kunukka yidjalburlumen God! Jesus wanjh ngad ngarriburbun bu kunwarre kadjalkurduyime."

25 Wanjh namekbe bininj benwokmey, yimeng, "Ngaye minj ngaburbun bu namekbe Jesus kunubewu kunwarre kahkurduyime ngurrihnan. Dja

* 9:22 Christ karohrok "nawu Messiah".

ngaye ngadjalburrbun kundjalkudji. Kerrngehkenhni ngaye ngamimbunjeni minj njale mak nganayinj dja wanjh bolkkime ngamimbayhmeng dja ngabolknan."

²⁶ Bedda wanjh birridjawam, "Baleh yiddok kurduyimeng ke bu ngunmarnbom yimimbayhmeng?"

²⁷ Nungka benyawoyhmarneyimeng, "Ngayh. Ngaye wanjh kerrngehkenh marneyimeng ngudberre! Dja njalekah ngudda minj ngaye kandibekkayi? Yiddok ngurridjare yawoyhmarneyime ngudberre? Kunubewu ngurrimarnedjare ngudda warridj bu ngurrimunkekadjung wanjh bu kandidjawan munguyh?"

²⁸ Kaluk bu birribek kang kuninjku benmarneyimeng nungka, wanjh bedda birridjalmarneyimeng kunwok kunwarre nuye. Bu birrimarneyimeng, "Ngudda yingan yibalmunkekadju nawu Jesus! Dja ngad kunu ngarrimunkekadjung Moses.

²⁹ Ngad ngarriburrbun nawu Moses bu God bimarnewokdanj, dja minj ngad ngarriburrbun nahni Jesus kore balehbeh kumdolk kang."

³⁰ Wanjh nawu bininj mimbunjeni benwokmey benmarneyimeng, "Ngayh! Ngaye ngadjal kangebarrhmeng bu ngurriyimeng ngardduk. Yiddok ngudda yimankek ngurriyime ngurriwakwan nawu nahninjanu bininj Jesus kore kumdolk kangbeh. Jesus wanjh ngaye nganmimbayhkeng, wanjh kunmekbekenh kunu karriburrbun bu nungka kumwam kore Godbeh.

³¹ Dja mak ngad karriburrbun God minj kabenbekkan nawu birriwarre bininj nawu kunwarre kabirriyime. Dja kabendjalbekkan birridjalkudji nawu kabirriwoybukwon dja kabirriwokmarrkmang.

³² Bu kerrngehkenh duninj kondanjku kunred minj nangale mak karrikarmeninj bu benmimbayhkemeninj nawu birridanginj birrimimbunjeni bininj yiman ngaye.

³³ Bu Jesus minj kumdolk kayi kore God kahni, wanjh kunukka minj kundulkarre karmeninj bu kurduyimeninj kuninjku kunmak kore kurduyimeng ngardduk."

³⁴ Wanjh birrimarneyimeng, "Ngudda nawu yidjalwarre duninj bininj, dja mak kore yirranginj yidjalwarreni. Dja ngudda kunu yimankek yiyime kankadjehbukkan ngadberre kunmak." Wanjh birridarrkidmey dja birrikukburriweng kuberrk.

Jesus Yolyolmi Bedberre Nawu Yiman Birrimalngmimbunjeni

John 9:35-41

³⁵ Kalukburrk Jesus bekkang kunwok bu namekbe bininj birribek kang, wanjh nungka wam biyawani. Kaluk bu bingalkeng, wanjh bimarneyimeng, "Yiddok ngudda yiwoybukwon nawu Bininj Duninj?"

³⁶ Wanjh bimarneyimeng, "Nawu yikimuk, nakka nangale? Kab kanmarneyimen nangale nawu Bininj Duninj ba ngawoybukwon."

³⁷ Wanjh Jesus bimarneyimeng, "Wanjh ngaye namekbe nawu Bininj Duninj. Ngudda ngokko kannang, dja ngaye bolkkime ngarrwokdi."

³⁸ Dja namekbe bininj wanjh bimarneyimeng, "Nawu yiwohrnan, ngaye woymbukwon ngudda." Wanjh bimarneboddanj nuye.

³⁹ Wanjh Jesus benmarneyimeng bininj nawu kumekbe birrihimirnderri, "Ngaye ngamwam kondanjku kurorre ba bu ngabendjadme bininj rowk dja ngabenmarnarnbun. Kaluk nawu birrimimdubbe bininj nakka wanjh kabirribolknan, dja nawu kabirribolknan nakka wanjh kabirrimimdubberan."

40 Wanjh yikahwi nawu Pharisees birridjarrkni dja birribekgang bu Jesus yolyohyolyolmi benhmarneyimi, wanjh birrimarneyimeng Jesus, "Yiddok ngudda yiyime ngad mak ngarrimimdubbe, ayh?"

41 Jesus benwokmey, yimeng, "Bu ngudda ngurrimimdubbeniwirrinj bulkiidj duninj, God minj mak ngunwelengname ngudberre kore baleh ngurrikurduyime. Dja ngudda ngurrihdjalyime, 'Ngad ngarribolknan!' Wanjh kunmekbekenh kunu God minj bengmidjdangimeninj ngudberre kunwarre."

10

Jesus Benmulewam Bininj Nuye Bu Bedda Yiman Sheep Nuye

John 10:1-6

1-2 Wanjh Jesus yimeng, "Woybukkih djalwoybukkih duninj marneyime ngudberre. Bininj nawu kamirndenahnan nawu sheep nuye, wanjh kangimen kururrkdangmaye kore sheep kahmirderri. Dja nabuyika nawu bininj kabidbun kore kuwohngorrkakah wanjh nakka yiman kayime dedjdjorlkwern.

3 Bininj nawu kanahnan kururrk kore mayh nawu sheep kahyo, wanjh kabimarnedangmarrhmang bininj nawu mayh nuye bu nungka kamre. Dja namekbe nawu mayh nuye kamre, dja sheep kabirriwokburrbun bu kawokdi. Kabenbebbehngeyhngeybun wanjh kabenmirndeyorrke nawu mayh nuye bu kabenmirndekan kore kurralk kabirringun.

4 Wanjh bu kamirndebebeke nuye mayh rowk, wanjh karrokme bedberre wanjh kabirrimunkekadjung rerre dja bedda wanjh kabirriwokburrbun.

5 Nawu nabuyika bininj minj kabirriwokmenmenburrbun dja mak minj kabirrimunkekadjung nawu mayh, dja kabirrikelerlobmerren nuye."

6 Jesus yolyohyolyolmi bedberre yiman kayime bim yerreh benhbukkani dja minj birriwernhwokmayalimayi.

Jesus yimeng, "Ngaye yiman kayime namak bininj bu nganahnan sheep."

John 10:7-13

7 Wanjh Jesus benyawoyhmarneyimeng bu minj nungka birriwernhmayalimayi dja benmarneyimeng bedberre, "Woybukkih djalwoybukkih duninj marneyime ngudberre, ngaye nawu yiman kayime kunurrkdangmaye kore mayh nawu sheep kahngimerren.

8 Birribuyika bininj nawu birridokmerrinj ngardduk nawu mayh birrinahnani, bedda wanjh yiman kayime birridedjdjorlkwernni, dja birridjaldjareni birridjirdmayi nawu mayh, dja mayh nawu sheep minj bindiwokmayi.

9 Ngaye yiman kururrkdangmaye bedberre. Nangale bininj nawu kamngimen kore ngaye, nakka wanjh ngangehke. Nungka wanjh kangimen dja kabebme dja kangalke kunmakmak.

10 Bininj nawu birridedjdjolkwern kabirrimre kabirridjaldjare kabindidjirdmang mayh nawu sheep, dja kabindibun, kabindikuyakwon. Dja ngaye wanjh ngamdjalwam ba bu ngabenmimbiwon bedberre dja wanjh kabirridarrkiddi kore kundjalmak rowk."

11 "Ngaye nawu ngamak bininj nawu ngamirndenahnan mayh ngardduk mandjad duninj. Dja mak ngabenmarnekanjkurmerren ngarrowen mayh bedberre ba bedda kabirridarrkiddi.

12 Nabuyika bininj kamirndenahan mayh dja minj nuye, nungka kabimarnedurrkmirri bininj nawu nuye mayh. Bu namekbe bininj kanan duruk nabang kamre, wanjh kakelerlobme, kamirndebawon nawu sheep. Dja namekbe mayh nabang yiman kayime dalkken wanjh kabun nawu

yikahwi sheep dja nawu yikahwi kamirndeyarlarrke bu kakelerlobmerren.

¹³ Namekbe bininj wanjh kadjalkelerlobme, dja minj kawernhnahnan nawu sheep, dja nakka nanu kadjaldurrkmirri kunwarddekenh, dja minj kabenmarnedjare nawu sheep.”

Jesus Mulewarrinj Bu Nungka Kakanjkurrmerren Bedberre Nawu Bininj Nuy

John 10:14-21

¹⁴ Jesus yawoyhyimeng, “Ngaye nawu ngamak bininj nawu ngamirndenahnan sheep ngardduk mandjad duninj. Ngaye ngabenkukburrbun nawu ngardduk sheep, dja nawu sheep ngardduk ngandikukburrbun ngaye.

¹⁵ Kuhni wanjh kadjalrohrok bu yiman kayime God nawu Kornkumo nganburrbun dja ngayeman mak ngaburrbun nungka. Ngaye wanjh ngakanjkurrmerren bedberre nawu sheep ngardduk.

¹⁶ Ngaye mak ngakarme sheep nawu kabirridi kubolkbubuyika, nawu ngardduk yerreh. Kaluk ngare ngabenmang, ba ngabenmirndemornname. Bedda wanjh ngandiwokbekkan dja ngabenmarnbun ngardduk sheep rowk bu kabirrimirndekudjimen kore ngaye ngadjalkudjiwi ngabenmirndenahnan rowk.”

¹⁷ “Ngaye ngadjalkanjkurrmerren ngayemandeleng ba bu ngayawoyhdarrkidworren yerreh. Kunekekenh kunu God nawu Ngabbard ngardduk ngandjalmarnedjare bulkkidj duninj.

¹⁸ Minj nangale mak nganmarnbuyi bu ngarrownen. Dja ngayeman ngadjalkanjkurrmerren bu ngarrownen. Ngaye ngakarme bu ngarrownenkenh dja mak ngayawoyhdolkkanken. Kuninjkuwu wanjh God nawu ngardduk Ngabbard nganwokrayekwong bu ngakurduyime.”

¹⁹ Kaluk nawu Jews birriwohrnani birribekkan kuninjkuwu kunwok wanjh bedman birriyawoyhdangwerreni Jesuskenh.

²⁰ Yikahwi nawu birriwern birrimekbe bininj birriyimi, “Nahni nuk namarnede demon kahkarme dja mak kahbengwarrmen. Dja njalekenh ngudda ngurriyibekkan?”

²¹ Dja nawu birribuyika birriyimi, “Burrkyak. Minj kuhni kahkurduyime bininj nawu namarnde kakarme. Dja yiddok nawu namarnde kabenmimbayhke nawu birrimibunje bininj?”

Jesus Yolyolmerrinj Bu Nungka Dja God Nawu Kornkumo Benedjalkudji

John 10:22-39

²² Kaluk bu kuhni wanjh Jews bininj birrikarmi mulil manbu birriburbuni bu kunkareni birrirurrkbelewoni Temple manbu yiwarrudjkenh nuy God.* Kaluk kunukka wanjh yekkeni dja birrihni kukadje Jerusalem.

²³ Wanjh kunbarnangarrakudjini Jesus wohrehoyre kore Temple kuberrkkah, bolkngeyyoy kore Solomon nuyeni verandah.

²⁴ Nawu Jews bininj birriwohrnani birriwakbuyinguneng Jesus dja munguyh birridjawahdjawani. Wanjh bedda birriyimeng, “Ngarridjare wanjh kanmarneyimen mandjad duninj bu ngudda wanjh Christ†. Dja wanjh werkwerrk kanmarnemulewarrimen ngadberre, dja yuwn bu yidjalwoykyak ngadberre.”

²⁵ Jesus benwokmey bu benmarneyimeng, “Ngaye ngokko marneyimeng ngudberre dja minj kandiwoybukwoyi. Ngaye wanjh ngadjaldurrkmirri

* **10:22** Maninjmanu mankimuk mulil bedberre wanjh ngeyoy “Hanukkah” kore bedberre kunwok. † **10:24** Christ karohrok “nawu Messiah”.

kundulkarre dorreng kore kungey nuye God nawu ngardduk Ngabbard ngardduk bu kadjare. Ngudda wanjh kandihngang kore ngakurduyimi, dja wanjh ngurriburrbuyi bu ngaye nawu Christ.

²⁶ Kaluk ngudda kunu minj kandiwoybukwoyi, dja ngudda minj ngaye ngardduk sheep.

²⁷ Ngaye sheep ngardduk ngandiwoybekkan. Dja mak ngabenburrbun dja bedda ngandimunkekadjung.

²⁸ Ngaye ngabendarrkidwon dja kabirrimalnmgimbi munguyh munguyh kore ngaye, dja minj mak kabirriyawoyhdowen. Minj nangale mak nganbidyimang kore ngabenkarrme kubid ngardduk.

²⁹ Nawu Ngabbard ngardduk nganbidkenwong. Dja nungka narrulka-rrekimuk duninh, minj nangale mak kabibidyimang kore nungka kubid nuye.

³⁰ God nawu ngardduk Ngabbard dja ngaye wanjh nganedjalkudji.”

³¹ Nawu Jew bininj birriwohrnani birribekkan bu kuninjkuu benmarneyimeng, wanjh birriyawoyhwarddemangi bu birrikodjdoyi ba bu karrowen.

³² Jesus benyawoyhmarneyimeng bedberre, “Ngaye bukkabukkang kunwernkah bu marnekurduyimeng ngudberre kunmakmak kunwernkah kore God nawu Kornkumo nganmarneyimeng, kaluk yiddok kunmek-bekenh kandihibun?”

³³ Wanjh bedda birriwokmey, birrimarneyimeng, “Ngad kunu minj ngundibun bu kunmakkenh yikurduyimeninj. Dja ngaleng wanjh ngudda yimeng bu God ngunedjalkudji, dja kunu yihyime yimankek God. Dja kundjalwarre duninh yikurduyimeng dja ngudda wanjh kunukka djal bininj.”

³⁴ Jesus benhdjalyawoyhmarneyimeng bedberre, “Yiddok ngudda ngurriburrbun bu bimbuyindanj ngudberre mankarre kore God yimeng, ‘Ngaye wanjh ngokko ngayimeng ngudberre, bu ngudda yiman kayime gods.’ [Psalm 82:6]

³⁵ Ngad karriburrbun bu naninjnanu djurra bimbuyindanj wanjh minj nangale kabularrbun dja minj mak kaborledke. God nawu Ngabbard benmarneyimeng birrimekbe bininj bu bedda wanjh gods yerreh. Wanjh birrimekbe God benwong kunwok nuye.

³⁶ Dja njalekenh ngaye kandiwelengname bu kuninjkuu ngayimeng ngudberre ngaye nawu beywurd nuye God? Dja God nawu Kornkumo wanjh ngandjarrngbom wanjh nganmunkeweng ngamwam kondanjkuu kurore.

³⁷ Bu ngaye minj ngarrurrkmirri bu karohrok God nawu Ngabbard ngardduk kahdurrkmirri, wanjh yuwn kandiwoybukwon.

³⁸ Dja ngaye wanjh ngamarnedurrkmirri bu karohrok nungka, dja wanjh kunukka kandiwoybukwo. Bu minj kandiwoybekkan wanjh kunu kandidjalkurduna kore ngakurduyime bu ngahdurrkmirri kore nuye. Wanjh kunu ngurriburrbun dja ngurriwernhborlhmen bu God nawu Kornkumo kahni kore ngaye ngardduk kukange, dja mak ngaye ngahni kore kukange nuye God nawu Kornkumo.”

³⁹ Kuninjkuukenh Jesus benmarneyimeng, wanjh bedda birridjareni birridarrkidmayi, dja bonj, ngarrhmei kubid bedberre.

⁴⁰ Jesus wanjh wam renghehrey kore djowkkeng mankabo Jordan dja bolkmey kore John benkodjdjuhkeyi bininj kerrngehkenhni. Wanjh kumekbe Jesus yerrkang ni.

⁴¹ Birridjalwern bininj birrimarnebebmerrinj kumekbe, dja bedda birrimarneyimerrinj, "John nungan minj kurduyimeninj kundulkarre dorreng, dja woybukkih bu kanmarneyimeng kadberre bu nanihnjanukenh bininj."

⁴² Wanjh birridjalwernkenh bininj birrihni kumekbe birriwoybukwong Jesus.

11

Jesus Nawu Djawirna Nuyeni Ngeyyoy Lazarus Doweng

John 11:1-16

¹ Wanjh nakudji bininj benbenekarrmi ngaldahdaluk benebokenh. Namekbe narangem ngeyyoy Lazarus dja mak ngaldahdaluk bokenh benengeyyoy Mary dja Martha. Wanjh bedda Jesus birridabolkni. Kaluk kumekbe birridjarrkyoy rowk kore kunred kabolkngeyyo Bethany.

² Ngalekke ngaldjalkarewi Mary ngalbu birrengedjirridjbuni kalkkid-manjmak dorreng nawu Kawohrnan Rowk wanjh yerre birrengedborn-dungi kunngabek ngalengngarre. Wanjh nawu birridanginj Lazarus downi kunkimuk.

³ Wanjh nawu ngaldahdaluk benemarnewokmunkewerrinj nungka Jesus bu ningihni kubolkbuyika djarreh. Wanjh benemarneyimeng, "Ngudda nawu yiwohrnan, nawu bininj yihmarnedjare bulkkidj, wanjh kahdowne."

⁴ Kaluk kumekbe bu Jesus bekkang kunwok kore benemarnewokmunkewerrinj, wanjh benmarneyimeng nuye bininj nawu benhbukkabukkani, "Minj kuhni kundjak kabibun Lazarus bu karrownen. Kuhni bimarnekurduyimeng ba bu birriwernkenh bininj kabirriburrbun bu nungka God namakkaykenh dja narrulkarrekimuk. Dja mak kuninjkuunukenh ba bu bininj birriwarlahkenh ngandiburlume ngaye nawu beywurd nuye God, dja ngandiburrbun bu ngaye ngakarme kunmakmak dja kundulkarre dorreng."

⁵ Jesus wanjh benmarnedjareni nawu birrimekbe birridangerrinj Martha, Mary dja Lazarus.

⁶ Dja bonj, bu biwobek kang Lazarus bu dowehdowni wanjh Jesus balyawohyerrkang kunkodjkebokenh kore kumekbe ningihni.

⁷ Kaluk bu kunkodjkebokenh wanjh benmarneyimeng nawu nuye bininj benbukkabukkani, "Bonj, dja karriyawoyhdurnde kore Judea."

⁸ Dja nawu bininj nuye birrimarneyimeng, "Aba, ngudda nawu kabukkabukkan, ngudda wanjh yiburrbun bu nawu kabirriwohrnan Jews bininj ngundikodjdoyi bu ngundikuyinjbuyi kumekke kore karrihdi. Dja njalekenh ngudda yidjare yirrundereng?"

⁹ Wanjh Jesus yimeng bedberre, "Kuninjkuun karridjaldungkadjung bu karridurrkmirri. Bu nangale nawu kahre bu kahdungdi, minj kamankan dja kunukka kabolknan rowk kore kahbolkwolkayindi.

¹⁰ Nangale nawu kahkakkadjung, nakka wanjh kabibungkarrkbun kamankan, minj njale mak kakarme kore kabimarnebolkwolkan bu kahre."

¹¹ Jesus benyawoyhmarneyimeng bedberre, "Nawu ngad karridabolk Lazarus, nakka kahdjalkodjkeyo. Dja ngaye wanjh ngare ngadjurlhme."

¹² Wanjh Jesus nuyeni bininj birrimarneyimeng, “Nawu Yihwohrnan, bu ngudda yiyime nungka kahdjalkeyo, wanjh kunu kamak bu nungandeleng karrollkan.”

¹³ Jesus nungka yimeng bu korroko wanjh doweng, dja bedda minj birriwernwokmayalimayi. Bedda birriyimi yimankek nungka Lazarus djahdjalkeyyoy.

¹⁴⁻¹⁵ Wanjh Jesus bendarrkidmarneyimeng nawu nuyeni bininj, benmarneyimeng, “Lazarus nakka korroko doweng, kakukyo. Ngaye wanjh ngadjalnjingmak ngudda ngudberre bu ngaye minj ngarriwirrinj kumekbe kore nungka, dja bolkkime ngudda kandiwernhwoybukwon. Wanjh ngurrimray, karriray kore nungka kahkukyo.”

¹⁶ Thomas, nawu birrimarneyimi Didymus, wokdolkkang, benmarneyimeng nawu birribuyika bininj Jesus nuye. Yimeng, “Mah, wanjh karridjarrkray Jesus ba bu karridjarrkdowerren nungka dorrengh.”

Jesus yimeng, “Ngaye wanjh ngadjalkudji ngabendarrkidwon nawu bininj.”

John 11:17-29

¹⁷ Wanjh bedda birriwam rowk. Kaluk bu birrimbebmeng kore Bethany, Jesus bekkang bu birrimarneyimeng nawu Lazarus doweng bu kukyonginj kore kuwardderurrk bu kunkuyeng kunkodjke kunkarrngbakmg.

¹⁸⁻¹⁹ Kaluk kumekbe Bethany minj djarrehniwirrinj kore kunred Jerusalem*, wanjh birriwern bininj nawu birrikang Jerusalem bindimiyikani Martha dja Mary bu bindimarnenalkbunikenh bu narangemkenh doweng.

²⁰ Bu kundjalmekbe Martha biwobekkkang Jesus kumhrey, wanjh ngaleng djalwam bimirrkabkeng. Dja ngalbu Mary djahdjalni kururrk.

²¹ Wanjh bu Martha bimarnebebmeng Jesus bimarneyimeng, “Nawu Yiwohrnan, bu ngudda yiman yiniwirrinj kondanjkuu wanjh ngaye nganedanginj minj dowimeninj.

²² Dja bolkkime ngaburrbun bu yiman ngudda yidjawan God bu ngunwon yehyeng rowk nawu yidjare.”

²³ Wanjh Jesus bimarneyimeng ngaldaluk, “Ngudda nawu ngunedanginj, wanjh nakka kayawoyhdolkkan.”

²⁴ Martha bimarneyimeng Jesus, “Ngaye ngaburrbun bu nungka kaluk karrollkan kunbarnangarra yerrekah kore kayiburnbunkenh rowk, bu birriwern bininj kabirridjarrkdolkkarren kore kumidjbeh.”

²⁵⁻²⁶ Jesus bimarneyimeng ngalbu Martha, “Ngaye wanjh ngadjalkudji bu ngabendolkkayhwe dja ngabendarrkidwon birriwern bininj. Bu nangale nawu nganwoybukwon, bu mak karrownen, wanjh kadjalyawoyh-malngmimbimen. Bu nangale nawu kamimbi dja nganwoybukwon, wanjh minj mak kayawoyhdowen munguyh. Yiddok ngudda yiwoybukwon bu kuhni ngaye marneyime?”

²⁷ Martha biyawoyhmarneyimeng Jesus, “Yoh, woybukkih, nawu Yiwohrnan. Ngaye woybukwon dja ngaburrbun duninj bu ngudda nawu Christ†, nawu beywurd nuye God. Ngudda nawu yidjalkudji ngundihmadbuni ngad nawu bininj rowk bu yimwam kondanjkuu kurorre.”

²⁸ Bu kuninjkuu bimarneyimeng rowk, wanjh Martha durndi kured dja manmolk bimarneyimeng Mary ngalbu benedanginj, yimeng, “Nawu kabenbukkabukkan kondah kahdi dja nungka kadjare ngunnan bu ngunewokdi.”

* 11:18-19 Danjbik kilometres. † 11:27 Christ karohrok “nawu Messiah”.

²⁹ Bu Mary biwokbekkang Martha bimarneyimeng, wanjh djaldolk kang werkkwerkk dja wam kore Jesus.

*Jesus Nungka Wanjh Kangenalkbom Duninh
John 11:30-37*

³⁰ Kaluk Jesus minj kumbangmebebmenginj kured kore Bethany dja nungka djahdjaldi djarreh kore Martha bimirrkdbakeng kerrngehkenhni.

³¹ Nawu bininj bindikongi wani bindihmarnenalkbuni kumekbe kururrk manbu Lazarus nuyeni, wanjh bedda birrinang Mary dolkkang bu wam, dja bedda birrimunkekadjuy. Birriyimi yimankek wam kore kumidj kabimidjnalkyiwani.

³² Wanjh Mary kumbebmeng kore Jesus dja binang bidjalmarnekukburriwerrinj kore kurrenge nuye. Dja bimarneyimeng, "Nawu Yiwohrnan, bu ngudda karridiwerrinj kondah, wanjh nawu ngaye nganedanginj minj kunu dowimeninj."

³³ Jesus bennang Mary bu nalkbunalkbuni dja mak nawu Jews bininj birridjarrknalkyikadjungi ngaldaluk bu birridjarrknalkkirey, wanjh Jesus kangenalkbom dja kunikangewarreminj duninh dja mak balkunikangeyidduy.

³⁴ Jesus bendjawam, benmarneyimeng, "Baleh ngurrikukkurmeng?" Wanjh birriyimeng, "Nawu Yiwohrnan, yimray, yibolknan."

³⁵ Wanjh Jesus nalkbom.

³⁶ Bininj nawu Jews bu birrinang Jesus nalkbunalkbuni wanjh bedda birriyimeng, "Ngurrina! Nungka bidjalwernhmarnedjareni bulkkidj."

³⁷ Dja yikahwi nawu bininj birriyimeng, "Nungka bimimbayhkeng nabuyika bininj nawu danginj mimbunjeni. Dja kunubewu bingurdkeyi naninjanu bininj nawu bimarnedoweng."

Jesus Bimimbawong Lazarus Dja Birrolkkayhweng Kore Kumidjbeh Kukyokukyoy

John 11:38-44

³⁸ Jesus balwam darnkih kumekbe kore kumidj dja yawoyhkangewarreminj dja yiddungi. Kumekke kukyoy kore kuwardderurrk dja manbu mandjalwarddekimuk dangbalhmiyindi.

³⁹ Jesus benmarneyimeng, "Ngurriwarddedjirrkka." Dja Martha ngalbu benedanginj nawu yakminj, bimarneyimeng Jesus, "Nawu yiwohrnan, kuhni bu kayime warreminj kunkurrinj djilk kahbanj, dja nungka kunu kukyoy kunkarrngbakmeng kunkodjke."

⁴⁰ Jesus bimarneyimeng ngalmekbe ngaldaluk, "Ngaye wanjh ngokko marneyimeng, bu ngudda yiwoybukwon, wanjh yinan bu God nuye namakkaykenh duninh dja kundulkarrekimuk!"

⁴¹ Wanjh birriwarddedderrehkang. Jesus bolknang kaddum, wanjh yimeng, "Ngabba, manjbun bu ngudda ngaye kanbekkang."

⁴² Ngaye ngaburrbun bu ngudda ngaye munguyh kanhdjalwokbekkan. Dja ngaye wanjh ngayime bolkkime ba bu nanijnjanu bininj nawu kabirrimirnderri kabirriburrbun bu woybukkih ngudda ngaye kanmunkeweng."

⁴³ Bu kuninj kunu yimeng, wanjh Jesus kayhmeng wernkih duninh, dja yimeng, "Lazarus, yimbebmenni!"

⁴⁴ Wanjh namekbe nawu doweng yawoyhmimbiminj dja kumdarrkidbebmeng bu biddukkayindi dja dingedukkayindi manburrbawi. Dja mak kebbarrkbuyindi nawu kunmadj. Jesus benmarneyimeng, "Ngurrimarneyerrkkemen nawu manburriba dja ngurribawo kare."

*Nawu Birriwohrnani Jews Birrikarremarnbom Bu Birribuyi Jesus
John 11:45-57
(Matthew 26:1-5; Mark 14:1-2; Luke 22:1-2)*

45 Birriwern bininj nawu Jews bu birrimyikang Mary, dja bu birrinang Jesus kurduyimeng, wanjh yikahwi birriwern birridjalwoybukwong.

46 Dja yikahwi birribuyika bedberre birrimdurndi birridjarraywam kore nawu Pharisees bu bindimarneyimeng kore Jesus kurduyimeng.

47 Bu kuninjkuwu kunwok birribekakang nawu priests birrikikhkimuk dja nawu Pharisees wanjh birrimirndemornnamerrinj kore Sanhedrin bu birriyolyomeng dja birrikarremarnbom. Wanjh birrimarneyimerrinj, "Baleh kab karrikurduyime nuye nawu nahninjanu bininj? Nungka munguyh kahdjalkurduyime kundulkarre dorrengh.

48 Bu karribawon kuninjkuwu kahkurduyime, wanjh birridjalwernkenh bininj kabirrikadjung. Dja bininj nawu Romebeh wardi kandidung kadberre dja mak kabirrimre kabirrirurrkbakke kunrurrk manbu Temple kadberre dja mak kabirribolkbularrbun kunbolk rowk kadberre warridj."

49 Dja nakudji bininj ngeyyoy Caiphas nawu durrkmirri manmekbe mandjewk kore wohrnaworhnani priests wanjh wokdolkkang yimeng bedberre nawu birribuyika priests dja mak nawu Pharisees, benmarneyimeng, "Ngudda nuk minj ngurriburrbun rowk.

50 Yiddok minj ngurrikarremarnbuyi bu ngaye marneyime ngudberre, bu nadjalkudji bininj karrown bedberre rowk ba bu kubolkwarlahkenh minj kabirridowen. Wanjh kunu kundjalmak rowk ngad kadberre."

51 Wanjh namekbe nawu Caiphas minj nungandeleng kunmekbe yimeninj. Bu nungka wohrnani bedberre priest dja wanjh kumekbekenh kunu karreyimeng kore God nuye kunwok. Burrbuni bu Jesus woybukkih karrown bininj bedberre rowk nawu Jews bininj.

52 Minj birridjalmekbe birrikudjiwi bedberre. Dja Jesus kabendjal-durndiwe rowk nawu bebeywurd nuye God nawu yarlarmerrinj kubolkwarlahkenh dja kabenmarnbun kabirridjalkudjimen kore God.

53 Kaluk burrk bu kunmekbe wanjh birridedjingmey bu birriwokdjehd-jenkurmi bu birribuyi Jesus.

54 Kunmekbekenh kunu wanjh Jesus minj rayi kubolkwarlah kore nawu birriwohrnani Jews birrihningihni. Dja nungka djalwam kubuyika darnkih kore kubolkdarleh, dja kumekbe yerrkang birrihni nawu bininj nuye dorrengh kore kunred kabolkngeyyo Ephraim.

55 Kaluk wanjh kundjalmekbe rerrih, darnkih kumhrey ngarre mulil manbu nawu Jews bininj birriburrbuni bu God kunkare bendar-rkidbawong mawahmawah bedberre. Dja kerngeghkenh bininj birrikang kubolkbubuyika kubolkyahwurd wanjh birriyingkihdokmeng kore kunred kunkimuk Jerusalem birringimeng bu kabirriyingkihgangebele-worrenkenh ngalenggarre mulil.

56 Wanjh kunmekbe bininj bedda birrikohkokyiyirri nuye Jesus. Bininj birrihni kore Temple wanjh birrimarneyimerreni, "Adju. Kab ngudda yiburrbun bu Jesus kamre kore mulil?"

57 Nawu Priests dja Pharisees nawu bindimarneworhnani bindimarneyimeng kunwok kunrayek nawu bininj, "Kab ngurriburrbun bu baleh kore Jesus kahdi, wanjh ngurrimray bu kandimarneyime." Bu kunmekbe birriyimeng yimankek bu birridarrkidmayi.

12

*Ngalkudji Daluk Birrengebarungi Jesus Mankalkkidmanjmak Dorrengh
John 12:1-8*

(Matthew 26:6-13; Mark 14:3-9)

¹ Kore djandikudjini bu dedjingmey mulil manbu God kunkareni bendarrkidbawongkenh bedberre nawu Jews, wanjh Jesus kumbemeng kore kunbolk Bethany. Nawu Lazarus kumekbe dingihdi, namekbe nawu bininj Jesus birrolkkayhweng kunmidjbeh.

² Dja birrikarmi manme birridjarrknguni Jesus dorrengh bu nungka-
en. Wanjh Martha weyhweykani benwoni manme. Lazarus dja nawu Jesus nuye bininj birrineyhneykendi bu birringuni manme Jesus dorrengh.

³ Mary wam mey kalkkidmanjmak mokenmey nawu nadjalw-
ernhmakkaykenh manbu kabirrikukbarurrenkenh, manbu bayahmeng bu
nakimuk duninj kunwardde karremarnbom. Wanjh ngaleng kalkkidyak-
bom kore Jesus kurrenge nuye, wanjh birrengeborndungi kunngabekwi
ngalenggarre. Wanjh kumekbe kore kururk birrihni wanjh kalkkidman-
makbanjni.

⁴ Nawu Judas Iscariot nungka kumekbe dingihdi. Nanihnjanu wanjh
karremarnbuni bu yerrekah bikukweykayi Jesus. Wanjh nungka yimeng,

⁵ “Njale mak yiwarrewong nawu kalkkidmanjmak, dja karriweykayi
kunwardde ba ngarrimayi nawernkenh bu karrbenwoyi nawu birrimar-
ladj bininj?”

⁶ Bu kuninjkuu Judas yimeng, minj nungka benwernhkongibuyi nawu
birrimarladi bininj, dja nungka djaldjareni bu mayi kunwardde nungan
nuye. Nungka mak djalnahnani kunwardde bedberre nawu Jesus nuye
bininj, dja mak yikahwi balwohdjirdmangi bedberre.

⁷ Wanjh Jesus bimarneyimeng, “Yibawo ngalinjgalu daluk! Ngahli
kuninjkuu kakurduyime kayingkihmarbnun bu ngayekenh ngandiyyuk-
dudjengkenh.

⁸ Ngudda munguyh ngurhbenkarrme nawu birrimarladi, dja ngaye
minj munguyh kandiwerhkharrme.”

*Nawu Priests Birrikihkimuk Birrikarremarnbom Bu Birribuyi Lazarus
John 12:9-11*

⁹ Wanjh nawu birridjalwern Jews bininj birriwobek kang Jesus bu
kumekbe ningihni. Wanjh bedda birriwam kore Bethany bu birridjareni
birrinayi Jesus. Dja mak birridjareni birribalkuninayi Lazarus nawu Jesus
birrolkkayhweng kore kumidjbeh.

¹⁰ Dja nawu priests birrikihkimuk birrikarremarnbom bu birribuyi
Lazarus.

¹¹ Bedda birridjareni birribuyi Lazarus dja nawu birrihnani bu birriw-
ern bininj nawu Jews bindibawoni nawu priests dja wanjh birriwoybuk-
wong Jesus.

*Bininj Birriburlumi Jesus Bu Nungka Balhngimi Kore Jerusalem
John 12:12-19*

(Matthew 21:1-11; Mark 11:1-11; Luke 19:28-40)

¹²⁻¹³ Kaluk kunbarnangarrabuyika birrimirndewern bininj birrirey kore
Jerusalem kabirringimen mulilkenh manbu God bendarrkidbawongkenh.
Bu birriwobek kang nungka Jesus kamre kore kumekbe kubolkkimuk,
bedda birrimey marrunj manyende dja nungka birridabkeng. Dja wanjh
bedda birrihkaykakayhmi, “Hosanna!” Ngarridjare God kunmakmak

* **12:12-13** “Hosanna” kayime “Kanneghkemen” kore kunwok bedberre.

dorrengh kabimarneyime nahni bininj nawu kamhre kore kungey nuye God nawu Kawohrnan! Nahninjanu bininj wanjh king nawu kawohrnan rowk kadberre nawu Israel kankebmawahmeng!" [Psalm 118:25]

14 Jesus ngalkeng donkey yaw dja morneyerrkang. Kumekbe kore ngokko bimbuyindi kore djurra,

15 "Yuwn ngurrikele, ngudda nawu ngurrikang kunred kabolkngeyyo Zion. Ngurrina! Nawu king ngudberre kamhre. Nungka kamorneni kore donkey yaw" [Zechariah 9:9]

16 Jesus nawu nuye bininj benbukkabukkani, minj kunu birribangmekarreburrbuyi. Kaluk burrk bu Jesus yawoyhdolkang kore kumidjbeh dja durndi kore heaven wanjh kunu bedda birriburbom kore djurra bimbubimbuyindi bihmulewani Jesus, wanjh birrikarremenmenburrbuni kuhni wanjh birriwern bininj birrimarnekurduyimi nungka.

17 Nawu bininj birridjarrkdi Jesus birrinang bu bikayhmeng Lazarus kore kumidjbeh dja birrolkkayhweng kore kuwardderurrk bu biyawoyh-mimbuiwong, kuhni wanjh bedda bindimarnemulewani birribuyika bininj.

18 Kumekbekenh kunu birrimirndewern bininj birridabkeng Jesus, bu birriwobekgang nungka Jesus ngudjkimukni kuhni bu kurduyimi benmarnbuni bininj birriburrbuni God.

19 Nawu Pharisee bindinang bininj baleh birrihmarnekurduyimi Jesus, wanjh bedmandeleng birrimarneyimerrinj, "Ngurrina, minj baleh bolkkime karrikurduyime. Dja nawu nadjalwarlahkenh rowk nawu bininj nungka kabirrimunkekadjung."

Yikahwi Bininj Nawu Birriwokdi Greek Kunwok Birridjareni Birrinayi Jesus

John 12:20-26

20 Kumekbe mak birrihdi yikahwi bininj nawu minj Jews. Bedda wanjh birridjarrkmirnderaworrinj kumekbe kundjalkudji kore Jerusalem bu kabirridi yiwarrudj ngarre manbu mulil.

21 Bedda birrimiyang Philip nawu nakang kunred Bethsaida kore kubolkkimuk Galilee, wanjh bedda birridjawam, "Nawu yikimuk, kab kamak ngad ngarrinan Jesus?"

22 Wanjh Philip wam bimarneyimeng Andrew, dja benebalwam benemarneyimeng Jesus.

23 Wanjh Jesus yolyolmerrinj yimeng, "Kuhni wanjh bolkkime marnbuyindanj, bu God wanjh nganwernhkukenwon ngaye nawu Bininj Duninj ba bu birriwarlahkenh bininj ngandinan kunmakmak duninj ngardduk dorrengh.

24 Woybukkiah djalwoybukkiah duninj marneyime ngudberre, ngurriburrbun bu manmim kadudjindan kore kurorre dja yiman karrown, wanjh kayawoyhyimerran ba bu mankolhdebubuyika kawernmerren bu kabebbehme. Dja bu mahni manmim minj kadudjindan dja karrown, wanjh kunu minj mankolhdebuyika kabebhme.

25 Bininj nawu kabirridaldjare kabirridarrkidkarrmerren, bedda wanjh kabirribaldjaldowen. Dja birribuyika bininj kore konhda kunred bedda nawu yiman kabirriwidnarren dja kabirridowen, kunu wanjh kabirrimalngmimbi munguyh munguyh kore God.

26 Nangale nawu nganmarnedurrkmirri wanjh nanu nganmunkekadju. Kore ngaye ngahni, namekbe nawu nganmarnedurrkmirri wanjh kumekbe nganedjarrkdi. Dja nahni nawu ngaye nganmarnedurrkmirri, wanjh Ngabbard ngardduk kabiburlume."

Jesus Mulewarrinj Bu Baleh Kabolkyimerran Bu Nungka Karrowen Kore Cross

John 12:27-36

²⁷ Jesus yimeng, “Ngaye wanjh bolkkime ngakangewarremen. Dja bolkkime baleh ngamarneyime Ngabbard? Yiddok ngayime nungka, ‘Ngabba, kangehkemen bu kuninjkuu kakurduyimerran ngardduk bolkkime darnkih ngranmarnebebe.’ Yiddok kuninjkuu ngaye ngayime? Burrkyak. Ngaye wurra kunekkeken ngamwam ba bu ngrannekurduyimerran.”

²⁸ Wanjh Jesus dingihdi yiwarrudj, yimeng, “Ngabba, yibenmarnebukkarrimen ba bu ngundingeyburlume.” Wanjh kumwokbebmeng kaddumbek, yimeng, “Ngaye ngokko ngakurduyimeng, dja bolkkime ngayawoyhkurduyime yerreh.”

²⁹ Birridjalmirndewern bininj birrimornnamerrinj kumekbe wanjh birriwokbekkang bu kumwokdanginj kaddumbek. Yikahwi birriyimeng yimankek namarrkon ngurdulmeng. Dja yikahwi birriyimeng bu angel bimarnewokdanginj Jesus.

³⁰ Wanjh Jesus benmarneyimeng, “Kuhni kunwok ngurribekkang minj ngaye ngardduk, dja ngudda ngudberre.

³¹ Bolkkime wanjh God kabendjadme birriwarlahkenh bininj nawu kabirrihni kubolkwarlahkenh rowk. Dja mak bolkkime God kabikukburriwe namarnde nawu kawohrnan kondanjkuu kunrorre.

³² Dja ngaye kaluk bu bininj ngandikukwayhke kaddum kore kurorrebeh, wanjh kunukka ngabendjaldurndiwe birriwarlahkenh bininj rowk kore ngaye.”

³³ Bu kuninjkuu Jesus benmarneyimeng bininj wanjh mulewarrinj kore baleh yerrekah kabimarnekurduyimerran bu nungka karrowen kore cross kundulk.

³⁴ Birriwern bininj birriwokbekkang, wanjh birrimarneyimi, “Ngad ngarribimnang kore djurra kabimbuyindi mankarre kadberre, kayime nawu Christ[†]karrarrkiddi munguyh djalmunguyh. Dja njalekah ngudda yiyime nawu Bininj Duninj bu kabirrikukwayhke kore karrowen. Nangale nawu Bininj Duninj yihmulewan?”

³⁵ Wanjh Jesus benmarneyimeng bedberre, “Ngudda ngurridjalwohkarmerme nawu kabolkwolkan bu djal kundedjumbungkenh. Wanjh werrek ngurriway kore kabolkwokayindi, wardi yerreh kunkak ngunbarrkbun ngudberre. Dja nangale nawu kamununyame nakka wanjh minj kabolknan dja kabolkwakwan kore kahre.

³⁶ Bu ngaye kondanjkuu ngahni kabolkwolkan ngudberre, wanjh kandiwoybukwo. Wanjh kunukka ngudmanwali ngurriyimerran bu ngurribenmarnebolkwolkan birribuyika bininj kore ngurrire kubolkmunun munguyh.” Bu Jesus kuninjkuu benmarneyimeng rowk wanjh bendjalbawong dja wam warlkkarrinj bedberre.

Yikahwi Bininj Minj Birriwoybukwoyinj Jesus

John 12:37-43

³⁷ Bu Jesus kunwernhkah durrkmirri kundulkarre dorreng bu benbukkani. Dja birriwern bininj minj birriwoybukwoyi.

³⁸ Wanjh kunu woymbukkendanj kore nawu prophet Isaiah benmulewam bedberre bininj kore yingkihimbom, dja yimeng, “Ngudda nawu Yiwohnan, minj nangale kandiwoybukwoyi bu ngad ngundimulewam

[†] 12:34 Christ karohrok “nawu Messiah”.

bedberre. Dja minj nangale ngunnayi kore yibenbukkani kundulkarre ke." [Isaiah 53:1]

³⁹⁻⁴⁰ Mak Isaiiah yimeng, "God benmimdubbewong dja benmarnbom birrikangerayekminj, ba bu minj kabirrinan kore kunmim bedberre, dja mak minj kabirriburrrkburrrkbekkan kore kugange bedberre. God yimeng, 'Ngaye ngabenmarnekurduyimeng ba bu bedda minj kabirriborledme kore ngaye ngabenmarnbun.'" [Isaiah 6:10] Wanjh kunmekbekenh kunu minj birriwoybukwoyi nawu Jesus.

⁴¹ Bu kunkareni Isaiiah bimbom kuninjkuwu bu biyingkihnang Jesus bu nungka namakkaykenh duninj dja nawernhdulkarrekimuk, wanjh kunu biyolyolmeng.

⁴² Dja bu kunmekbe bolkyimi, wanjh birriwern birribuyika nawu yikahwi Jews birriwohrnani wanjh birriwoybukwong Jesus. Minj bedda bindimarneyimeninj birribuyika bininj dja bindimarnekeleni nawu Pharisees nawu wardi bindikukburriwemeninj kore Synagoguebeh bu birriwoybukwoyi Jesus.

⁴³ Bedda nawu Pharisees birridjareni bindiburlumeninj bedman bininjdeng. Dja minj birridjareniwirrinj kore God yimeng bedda birrimak.

Bu Jesus Nuye Kunwok Kabendjadme nawu Bininj

John 12:44-50

⁴⁴ Bu kumekbe wanjh Jesus kayhmeng bedberre wernkih duninj, yimeng, "Bu nangale bininj nganwoybukwon ngaye, wanjh minj ngaye ngadjalkudji, dja nakka kabiwoybukwon God nawu nganmunkeweng warridj.

⁴⁵ Nangale nawu ngaye ngannan, wanjh nakka kabinan nawu ngaye nganmunkeweng.

⁴⁶ Ngaye ngamwam ba bu ngabenmarnebolkwolkan birriwarlahkenh bininj rowk. Ba bu nangale nawu nganwoybukwon wanjh minj kare kahdi kore kubolkmunon.

⁴⁷⁻⁴⁸ Ngaye wanjh ngamwam kondanjkuwu kurorre ba bu ngabenengehke bininj rowk. Minj kunu ngabendjadmekenh. Bininj nawu ngandiwokbekkan dja ngandidjalwokburriwe, wanjh kunu God nungan kabendjadme bu yerrekah kore kayiburnbun rowk. Minj ngaye ngabendjadme, dja manbu kunwok ngawokdi wanjh yiman kabendjadme.

⁴⁹ Bu ngaye ngawokdi minj ngayeman ngardduk kore marnehmarneyime ngudberre. God nawu Kornkumo nganmunkeweng, nungka wanjh wokkurmerrinj nuye bu kuhni ngamulewan dja mak bu baleh ngayime bu ngawokdangen ngudberre.

⁵⁰ Ngaye ngaburrhun bu ngudda ngurriwokmarrkmang God nawu Kornkumo wanjh kunukka ngurridjaldarrkid munguyh munguyh. Wanjh kuninjkuwu marnehmarneyime ngudberre djalwoybukkih kore Ngabbard nganwokwong dja nganwokrayekwong bu baleh ngaye marneyime."

13

Jesus Bendengdjirridjbom Nawu Benbukkabukkani Bininj Nuye

John 13:1-17

¹ Bu darnkih kumhrey ngalengngarreni mulil manbu God bu kunkareni bendarrkidbawongkenh. Jesus burrbuni bu darnkih kumhrey nuye bu kabolkbawon kondanjkuwu kurorre dja kare kore God nawu Kornkumo. Nungka munguyh bendjalmarnedjareni bininj nuye nawu benkararmi rowk kore kondah kurorre, wanjh bendjalmarnedjareni bulkkidj duninj munguyh djalwam kore nungka doweng.

² Jesus dja nawu benbukkabukkani bininj wanjh birridjarrknguni manme. Judas Iscariot nawu beywurd nuye Simon, nungka dorrengh birridjarrkdi. Wanjh nawu Namarnde Duninhj kabikangedjurrkkang Judas bu babikukweykan Jesus.

³ Bu birrihnguni manme wanjh Jesus burrbuni bu God nawu Kornkumo bimarnbom bu kawohrnan rowk. Dja mak nungka burrbuni bu kumdolkkanng kore Godbeh dja mak karrurndeng kore God.

⁴ Wanjh nungka dolkkang kore birrihnguni manme, wanjh yerrkkerrinj kaddumkah nawu kukdjohkukdjongbuyindi kunmadj, wanjh ngardmorruckarrinj nawu manburrrba.

⁵ Wanjh ngalngmey banikkin dja kukku borrahkendoy wanjh dedjingmey bendengedjirridjbuni nawu bininj nuye. Dja mak bendengebornungi manburrbawi nawu ngardmohngardmorruckayindi.

⁶ Wanjh bu bibalhyikani darnkih kore Simon Peter, wanjh Peter yimeng, "Nawu yiwohrnan, njale mak ngudda yimhre kore ngaye bu kandengedjirridjbun?"

⁷ Jesus bimarneyimeng, "Ngudda minj yiburrbun bu ngaye kuninjkuu ngahkurduyime, kaluk yerrekah ngudda yiwernhburrbun."

⁸ Peter biyawoyhmarneyimeng, "Burrkyak, ngaye minj ngadjare kandengedjirridjbun. Ngudda wanjh yikuken dja ngaye djal ngamarladj. Dja kawarre bu ngudda kanhmarnedurrkmirri!" Jesus biyawoyhmarneyimeng, "Bu ngaye minj dingedjirridjbun ke, wanjh ngudda kunu minj ngaye ngardduk bininj."

⁹ Wanjh Simon Peter biwokmey, yimeng, "Mah, wanjh nawu yiwohrnan, yuwn bu djal kanhdengedjirridjbun kukudji, dja kunbid dja mak kunkodj ngardduk warridj."

¹⁰ Jesus yimeng, "Bu nangale ngokko djuhmeng wanjh nakka kundengewi kadjirridjbuyindan, dja bu kunwern kunburrrkenh kabele rowk. Ngudda wanjh ngokko ngurrikukbele, dja nakudji ngudberre burrrkyak."

¹¹ Jesus kuninjkuu yimeng, bu burrbuni nawu nakudji bininj kabikukweykan. Wanjh kunmekbekenh yimeng bedberre, "Nakudji minj ngurrikukbele."

¹² Wanjh bu bendengedjirridjbom benyakwong rowk, wanjh yawoyhdjongburrinj kunmadj nuye dja yawoyhkurrmerrinj kore balabbala. Wanjh yimeng bedberre, "Kab ngudda ngurriburrbun bu ngaye ngakurduyimeng ngudberre?"

¹³ Ngudda kandimarneyime ngaye 'Kanhbukkabukkan!' dja mak 'Yiwohrnan!' Wanjh kunukka woybukkih bu ngudda ngaye kandihmarneyime.

¹⁴ Ngaye nawu ngawohrnan dja bukkabukkan ngudberre, dja bonj, djaldengedjirridjbom ngudberre. Wanjh kunmekbe kunu ngudmanwali ngurrikurduyimen bu ngurridjalmarladjworrimen kore ngurridurrkmirrin dja ngurribidyikarmerrimen.

¹⁵ Ngaye bu djalwohbukkang ngudberre ba bu ngudmanwali ngurrikurduyime kore kandingunjjukan.

¹⁶ Woybukkih, djalwoybukkih duninhj marneyime ngudberre. Ngurriburrbun bu bininj nawu kabimarnedurrkmirri nabuyika bininj, nakka minj nawernhkuken namekbe nawu kabimarnewohrnan. Dja mak ngurriburrbun bu bininj nawu kare kore nabuyika bininj kabimunkewe, nakka minj nawernhkuken namekbe nawu kabimunkewe.

¹⁷ Bolkkime wanjh ngurriburrbun kuninjkuu kore marneyimeng, dja wanjh ngurridjalkurduyimen ba bu God ngunmarnekurduyime kunmak ngudberre."

Jesus Bikukburrbom Nakudji Nawu Kaluk Kabikukweykan

John 13:18-30

(Matthew 26:20-25; Mark 14:17-21; Luke 22:21-23)

¹⁸ Jesus benmarneyimeng, “Ngaye ngaburrbun ngokko bu ngabend-jarrngbom bininj nawu ngardduk, dja ngaye minj mulewan ngudberre ngurriwern. Nadjalkudji ngaye ngamulewan. Kore wokbimbuyindanj djurra wanjh kunukka kadjalkurduyimerran, kore yimeng, ‘Bininj nawu nganehdjarrknguneng manme ngardduk manbu ngawong, nakka wanjh kadjalnjinlgborledme ngardduk, dja ngandung.’ [Psalm 41:9]

¹⁹ Kaluk kumekbe kunwarre nganmarnekurduyime. Dja ngaye bend-dayhke bolkkime ba bu yerrehkah wanjh kandiwoybukwon dja ngurriburbun bu ngaye ngamulewarrinj ngudberre kunwoybuk dorrengh.

²⁰ Woybukkih, djalwoybukkih duninj marneyime ngudberre. Ngaye munkewe ngudberre wanjh nawu nangale ngunkimang nakka wanjh yiman kayime ngaye ngankimang. Dja nawu nangale bininj ngankimang ngaye, wanjh kabikimang God nawu ngaye nganmunkeweng.”

²¹ Bu kuninjkuu Jesus yimeng nungka bekkang njilngwarredoy, wanjh nungka bendarrkidmarneyimeng mandjad, “Woybukkih, djalwoybukkih duninj marneyime ngudberre! Nawu konhda kahni nakudji bininj kaluk ngankukweykan kore bininj birribuyika.”

²² Nawu bininj nuye benhbukkabukkani wanjh birrikunarrinj bu nangale nawu kakurduyime kunmekbe bu kuninjkuukenh.

²³ Wanjh nakudji nawu bininj benedjarrkneyhneykendi nawu Jesus bimarnejareni.

²⁴ Simon Peter nawu kumneyneyhkendi kubuyika wanjh biwayurdmeng nawu benehdjarrkdi Jesus darnkih, wanjh bidjawam, “Nangale nawu Jesus kabiyolyolme?”

²⁵ Wanjh nawu benedjarrkneyhneykendi Jesus kore kunnurrird nuye, wanjh bidarnhdjawam, “Yiwohrnan, nangale nawu ngudda yiyolyolme?”

²⁶ Jesus birrarnhmarneyimeng, “Kaluk yinan manbu manlod, ngalod-djuhke kore kunkalkkid, dja ngawon namekbe bininj. Wanjh namekbe nanu bininj ngankukweykan.” Wanjh mey manbu manlod, loddjuhkeng kore kunkalkkid dja biwong Judas beywurd nuye Simon Iscariot.

²⁷ Wanjh bu Judas lodmey manme, dja kundjalmekbe yerreh Satan nawu namarnde duninj balwohngimeng kore kukange nuye. Wanjh Jesus bimarneyimeng, “Baleh yidjare yikurduyime? Mah wanjh djalwerrkw-errknin yikurduyimen.”

²⁸ Minj nangale mak biwokmenmenburrknayi bu Jesus njalekenh bimarneyimeng Judas.

²⁹ Bu bedda wanjh birriburrbuni Judas nahnani kunwardde, kaluk yikahwi birriyimi yimankek Jesus bimarneyimeng, “Yiray wanjh manme yibayahme kadberre bu mulilkenh ba karringun.” Dja kunubewu, “Yibenbidyikarmen nawu birrimarladj bininj.”

³⁰ Bu Judas lodnguneng manme, wanjh kundjalmekbe yerreh benba-wong bu wam. Kunukka wanjh kumununni.

Jesus yimeng, “Ngurrimarnedjaremerrimen bu yiman kayime karohrok ngaye marnedjare ngudberre.”

John 13:31-35

³¹ Kaluk bu Judas wam, wanjh Jesus benmarneyimeng, “Bu kuninjkuu bolkkime birriwern bininj ngandiburlume ngaye nawu Bininj Duninj dja kabirriyime bu ngaye ngamakkaykenh duninj. Dja bu

bininj ngandiburlume ngaye nawu Bininj Duninj wanjh bedda kunu kabirriburlume God.

³² Dja bu kabirriburlume nawu God, wanjh God nungandeleng kabemarnbun birriwern bininj ba bu bedda ngandiburlume ngaye nawu nuye Beywurd. Wanjh nungka kadjalkurduyime kuninjkuu kundjalburrikudji bolkkime."

³³ Dja mak Jesus benmarneyimeng, "Wurdwurd, ngaye minj kunkuyeng karrihni dja kaluk ngare, dja kandidjalyawan. Ngaye wanjh ngokko ngabenyngkihmarneyimeng bininj nawu kabirriwohrnan Jews bu minj nangale kamre kore ngaye ngare bolkkime. Kaluk ngudda warridj ngaye marneyime bolkkime bu ngudda kandiyawan, dja bonj, minj ngurrimre kore ngaye ngare.

³⁴ Dja ngaye wanjh bolkkime won ngudberre mankerenge mankarre. Ngudda wanjh ngurrimarnedjaremerrimen. Ngaye wanjh marnedjareni ngudberre, wanjh karohrok ngudmanwali ngurrikurduyime, dja ngurrimarnedjaremerrimen.

³⁵ Bu kuninjkuu ngurrikurduyime bu ngurrimarnedjaremerreren rowk, wanjh birriwern bininj kabirriburrbun bu ngudda wanjh ngaye kandimunkekadjung."

*Jesus Biyngkihmarneyimeng Peter Bu Kabiwaralkukwakwankenh
John 13:36-38*

(Matthew 26:31-35; Mark 14:27-31; Luke 22:31-34)

³⁶ Simon Peter bimarneyimeng Jesus, "Yiwohrnan, baleh ngudda kanbawon yire?" Jesus bimarneyimeng Peter, "Kore ngaye ngare ngudda minj bolkkime kanmunkekadjung, kaluk yerrehkah wanjh ngudda kanmunkekadjung."

³⁷ Peter bidjawam Jesus, "Njalekah minj ngaye munkekadjung bolkkime? Ngaye wanjh ngare marnekanjkurmerren ke dja ngarrownen."

³⁸ Wanjh Jesus biyawoyhmarneyimeng Peter, "Kaluk ngudda yimankek yiyime woybukkih bu ngudda kanmarnedowen ngaye? Woybukkih, djalwoybukkih marneyime, bu bolkkime kunkak, ngudda wanjh ngaye kanwaralkukwakwan danjbikkah dja yidjalkelemen. Kuhni wanjh kaluk kakurduyimerran bu mayh nawu bawurl kakayhme bu kamkabel djarreh."

14

Jesus yimeng, "Ngaye nawu yiman manbolh, dja mak ngaye wanjh kunwoybuk dja mak kundarrkid."

John 14:1-14

¹ Jesus benmarneyimeng, "Yuwn bu ngurriyawoyhkele dja ngurrinjilngwarremen. Ngurridjalwoybukwo God dja mak ngaye warridj kandidjalwoybukwo.

² Kore ngardduk Ngabbard nuye kunurrk kunukka wanjh kabolkwarlah. Bu kuhni minj kunwoybukniwirrinj, wanjh kunukka minj marneyimeninj ngudberre. Dja wanjh ngare ngarrokme ngayingkihbolkmarnbun ngudberre.

³ Ngaye ngayingkihbolkmarnbun ngudberre ba bu ngayeman ngamdurndeng mang ngudberre, ba bu karridjarrkdi kore ngaye ngahni.

⁴ Ngudda ngurriburrbun manbu manbolh ngare bolkkime."

⁵ Thomas bimarneyimeng, "Yiwohrnan, ngad minj ngarriburrbun bu kore yire, dja ngad kunu minj ngarriburrbun manbu manbolh yire."

⁶ Jesus bimarneyimeng, “Ngaye nawu manbolh, dja mak ngaye nawu kunwoybuk dja mak kundarrkid. Nawu nangale yimankek kare kore God nawu Kornkumo, nakka wanjh kamre kore ngaye werrk, kumekbe wanjh kudjalkudjiwi kare kore God nawu Kornkumo.

⁷ Bu ngaye kandiwerhburrbuyi wanjh kunukka ngurriburrbuyi ngardduk Ngabbard warridj. Bolkkime wanjh ngudda munguyh ngurriburrbun, dja mak ngurrinang nungka.”

⁸ Philip bimarneyimeng, “Yiwohrnan, mah! Kanbukka ngadberre God nawu Kornkumo ba bu ngarrinan bolkkime. Kundjalmekbe ngad wanjh ngarridjare.”

⁹ Jesus bimarneyimeng, “Philip, ngaye bu korroko karridjarrkrey dja yiddok minj kankukburrbun ngaye? Nawu nangale ngannang ngaye, wanjh nakka binang God nawu Kornkumo. Dja njalekah ngudda yidjawayhme bu yiyime ‘Kanbukka God nawu Kornkumo’?”

¹⁰ Ngudda yiddok minj yiwerhburrbun bu ngaye ngahni kukange nuye God nawu Kornkumo, dja nungka kahni kukange ngardduk. Kuninjkuwu kunwok kore ngaye ngawokdi minj ngayeman ngardduk, dja God nawu Kornkumo kahni kukange ngardduk wanjh nungan karrurkmirri kore ngaye kore njale ngakurdyime.

¹¹ Kandiwoybukwo kore ngahyime ngudberre bu ngaye ngahni kore kukange God nawu Kornkumo, dja God nawu Kornkumo kahni kore kukange ngardduk. Dja mak ngurriburru kore kandikurdunang bu ngaye ngahmarnedurrkmirri God kundulkare dorreng, wanjh kaluk kandiwoybukwo ngaye.

¹² Woybukkih, djalwoybukkih duninj marneyime ngudberre, bininj nawu ngaye ngandiwoybukwon, wanjh bedmanwali kabirridurrkmirri bu karohrok yiman ngaye ngahdurkmirri. Dja warridj kabirridjalkurdyime kore kundjalwerhkimuk duninj bu ngaye ngandiyurrhke! Dja ngaye wanjh ngare kore God nawu Kornkumo.

¹³ Bu kuhni ngurrikurdyime wanjh bu njalehnjale ngurridjare ngunmarnekurdyimerran ngudberre wanjh kunukka ngurridjawan God nawu ngardduk Ngabbard kore kungey ngardduk, dja ngaye marnekurdyime kore ngurridjawan ba bu birriwarlahkenh bininj kabirriburlume God nawu ngardduk Ngabbard bu ngayekenh nawu beywurd nuye.

¹⁴ Bu ngudda ngurridjare njalehnjale nawu kandidjawan kore kungey ngardduk, wanjh kunukka ngaye ngadjalkurdyime kore kandidjawan.”

Jesus Kanberrebom Bu Kanwon Nuye Namalngmakkaykenh

John 14:15-31

¹⁵ Jesus benmarneyimeng bedberre, “Bu ngaye kandimarnedjare bulkkidj, wanjh kunukka kandiwokmarrkma.

¹⁶ Kaluk ngaye ngadjawan God nawu Kornkumo ba bu ngunwon ngudberre nabuyika nawu ngunbidyikarmekenh, nawu ngurridjarrkdi munguyh.

¹⁷ Nungka wanjh Namalngmakkaykenh nawu kabiyolyolme God bu djal kunwoybuk dorreng, ba bu ngurriburrbun. Bininj nawu birrikang kurorrewaken, wanjh bedda minj kabirrikimang Namalngmakkaykenh. Bedda minj kabirrinan dja minj kabirriburrbun. Dja ngudda ngurridjalkudji ngurriburrbun bu nungka ngurridjarrkre dja kani kukange ngudberre.

¹⁸ Ngaye minj bawon ngudberre bu ngurrikubengwabun yiman kayime ngurrimarlaj, dja kaluk ngaye werrkwerrk ngamdurndeng ngudberre.

¹⁹ Kuhni bu bolkkime darnkih kabolkyimerran bu minj mak ngandiya-woyhnawu bininj birrikang kurorrewaken. Dja ngudda ngaleng

ngurridjalkudji kandinan. Ngaye nawu ngadjaldarrkiddi, wanjh kaluk kunmekbekenh ngudmanwali ngurridarrkiddi.

²⁰ Kaluk bu kuhni kunbarnangarra kamre, wanjh ngudda kunukka ngurriburrbun bu ngaye wanjh ngani kore God nawu Kornkumo kukange nuye, dja mak ngudda ngurrini kore ngaye ngardduk kukange, dja mak ngaye ngani kore kukange ngudberre.

²¹ Nangale nawu bininj nganmarnedjare, nungka wanjh kaburrbun ngardduk mankarre, dja kanwokmarrkmang. Nawu nangale bininj nganmarnedjare ngaye, wanjh Ngabbard ngardduk nunganwali kabimarnedjare namekbe bininj, dja ngaye warridj ngamarnedjaremen dja ngamarnekukbukkarren kore nungka nuye." Kuhni bu Jesus yimeng.

²² Wanjh nawu Judas nawu nabuyika, yuwn nawu Judas Iscariot, bid-jawam Jesus, yimeng, "Yiwohnan, njalekenh bu ngudda yikukbukkarren ngadberre, dja birribuyika bininj kurorrewaken minj yibenmarnekukbukkarren?"

²³ Jesus yimeng, "Nangale nawu nganmarnedjare, wanjh nakka kakurduyime kore ngaye ngabukkabukkan. Dja nawu ngardduk Ngabbard wanjh kabimarnedjaremen nahni bininj. Kaluk ngaye dja ngardduk Ngabbard nganemyikan bu ngarridjarrkdi namekbe bininj.

²⁴ Bu nangale nawu minj nganmarnedjare, wanjh kunukka minj nganwokmarrkmang kore ngabukkabukkan. Kuninjkuwu kunwok bu ngawokdi, wanjh minj ngaye ngardduk, dja nakka nuye God nawu Kornkumo nawu nganmunkeweng.

²⁵ Ngaye marnemarneyime rowk ngudberre bu bolkkime karridjarrkdi.

²⁶ Kaluk yerreh, wanjh God nawu Kornkumo kabimunkewe ngudberre Namalngmakkaykenh bu ngunbidiyikarme dja mak ngunbukkabukkan ngudberre kunwern nawu ngayekenh, dja mak ngunbengdayhke ngudberre bu kunwok rowk ngaye ngokko marneyimeng ngudberre.

²⁷ Ngaye yibawon ngudberre kunmodmikenh. Ngaye won ngudberre kunmodmikenh ngardduk. Bininj nawu birrikang kurorrewaken minj ngundiwon ngudberre kunmodmikenh. Dja yuwn bu ngurrikangewarre, dja yuwn bu mak ngurrikelemen.

²⁸ Ngaye wanjh korroko marneyimeng ngudberre bu ngaye ngare bawon ngudberre, dja kaluk ngamyawoyhdurndeng ngudberre. Bu ngudda kandimarnedjare ngaye, kunu ngurrinjilngmakmen bu ngaye ngare kore God nawu Kornkumo nawu nadjalwernhkuken duninj ngardduk.

²⁹ Bolkkime wanjh ngaye bengdayhke ngudberre, ba bu ngurrinan yerreh nganmarnekurduyimerran, wanjh kunu kandiwoybukwon.

³⁰ Minj mak kunwern ngabalhwokdi ngudberre bolkkime. Dja narnande duninj nawu kawohnan kondanjkuwu kurorre, nungka ngokko kamhre darnkih. Kaluk minj nganmarnewohnan ngaye. Dja burrkyak!

³¹ Dja bininj nawu kondah kurorre kabirrihni wanjh birriborlhmen bu ngaye ngamarnedjare God nawu Kornkumo. Kunmekbekenh ngaye ngadjalwokmarrkmang rowk kore nawu ngardduk Ngabbard nganwokrayekwong.

Mah, dja wanjh karrimdolkka ba karriboldkbawon kondanjkuwu kunred dja wanjh karrire."

15

Jesus yimeng, "Ngaye wanjh nawu yiman kundulk manbu manbarnemak."

John 15:1-17

¹ Jesus benmarneyimeng, “Ngaye wanjh nawu yiman manrakel manbu manbarnemmak manmakkaykenh. Dja ngudda wanjh yiman manyehyende ngardduk manbu kundulk ngarre. Dja nawu Ngabbard ngardduk yiman nawu karrulknahnan manmekbe kundulk kore karrudjindi.

² Wanjh kunukka ngayekenh Ngabbard kabakke dja kadjalburriwe manbu manyende rowk minj kakarrme manbarnem. Dja nungka kanahnan manyende manbu kakarrme manme. Dja mak kadjalyendemarnbun manbu manyehyende ba bu kamarnburren manwern manme.

³ Ngudda wanjh ngokko ngurriyimerranj yiman manyendemak bu ngurribekkang kunwok kore ngaye marneyimeng ngudberre.

⁴ Kandidjalkukbelbmeng ngaye dja ngaye djalkukbelbme ngudberre. Manbu manyenhyende bu yiman kabakkerren dja kabawon manu kundulk, wanjh kunukka minj kakarrme manme. Dja bu ngudda kandi-marnekuyarlarrhme ngaye wanjh kunukka minj ngurrikurduyime kore kunmakmak.

⁵ Ngaye nawu yiman manbarnem duninh, dja ngudda yiman kayime manyenhyende ngardduk. Bu ngudda munguyh karrikukbelbmerren ngaye, wanjh kunukka kunwern kunmak ngurrikurduyime yiman kayime manyende kawernmerren manbarnemmak. Dja bu minj ngaye kandikar-me, wanjh kunukka minj baleh ngurrikurduyime, dja ngurridjalngud-jywarren.

⁶ Nangale nawu nganbawon bu minj nganeyawoyhkukbelbmerren, wanjh nakka God kabikukburriwe yiman kayime manyende kayended-jobke, kayendewe wanjh kayendedarlehmen. Kaluk nabuyika bininj kamre kayendemang kaburriwe kore kunak kahrung.

⁷ Dja bu ngudda kandikukbelbme ngaye, dja mak kandidjalwokkarrme kunwok ngardduk kore kukange ngudberre, wanjh kunu bu kandidjawan njalehnjale nawu ngurridjare, kuhni wanjh woybukkih kakurduyimerran ngudberre.

⁸ Bu ngudda ngurridjalkurduyime kunwern kunmakmak, wanjh kunukka bininj birriwern kabirriburrbun bu ngudda woybukkih ngaye kandi-humnekedjung. Wanjh kunukka bedda kabirriburlume Ngabbard ngardduk.

⁹ Ngaye wanjh marnedjare ngudberre yiman bu kayime God nawu Kornkumo nganmarnedjareni ngaye. Wanjh kunmekbe munguyh ngurridjalkurduyimen kore ngaye marnedjare ngudberre munguyh.

¹⁰ Bu ngudda kandiwokmarrkmang kore marneyime ngudberre, wanjh kunmekbe munguyh ngurridjalkurduyime kore ngaye marnedjare munguyh. Wanjh kunu kadjalrohrok yiman kayime ngaye ngawokmarrkmang Ngabbard ngardduk dja ngadjalkurduyime kore kadjare dja nungka ngandjal-marnedjare ngaye bu munguyh.

¹¹ Ngaye kuninjku marneyimeng rowk, ba bu ngaye ngawernhnjil-ngmak duninh ngudberre dja mak bu ngudda warridj ngurridjalwern-hwarnmakmen.

¹² Ngaye wanjh kuninjku wokwong ngudberre. Ngurrimarnedjare-merrimen yiman kayime ngaye marnedjareni ngudberre.

¹³ Nawu nangale bininj kabenmarnekanjurrmerren nawu djawirna nuye, wanjh nakka kabenmarnedjare bulkkidj duninh.

¹⁴ Dja ngudda bu kandiwokmarrkmang kore ngaye wokrayekwong ngudberre, wanjh kunukka ngurriyimerran ngardduk djawirna rowk.

¹⁵ Ngaye minj mak yawoyhmarneyime bu ngudda yiman nawu kandi-marnedurrkmirri bininj. Dja nawu kabirrimarnedurrkmirri minj kabirriburrbun nawu kawohrnan bedberre kore kahkurduyime. Bolkkime

ngaye marneyime ngudberre djawirna ngardduk nawu karridabolk, dja ngaye bukkabukkang ngudberre kunwern kore ngardduk Ngabbard nganmarneyimeng.

¹⁶ Ngudda ngaye minj kandidjarrngbuyi, dja ngaye djarrngbom ngudda ngudberre. Dja wong ngudberre bu ngurrikurduyime kunmakmak dorrengh, bu kunmekbe kakurduyimerran wanjh kunukka kunmak kadjalyo munguyh. Wanjh bu ngudda ngurridjawan njalehnjale God nawu Kornkumo kore kunngey ngardduk, wanjh nungka kadjalkurduyime ngudberre.

¹⁷ Ngaye wanjh kuninjkuwu wokrayekwon ngudberre, wanjh ngurri-marnedjaremerrimen.”

Jesus Kanbengdayhkeng Bu Kunyidkenh Kondanjkuwu Kunred Kakarrme Ngarre

John 15:18-27

¹⁸ Wanjh Jesus benmarneyimeng, “Bu bininj nawu kurorrewaken ngundiwidnan ngudberre, wanjh ngurridjalburru bu bedda ngokko ngaye ngandiwidnani.

¹⁹ Ngudda minj bedberre nawu birrikang kurorrewaken bininj. Dja bu ngudda ngurrikayi kurorrewaken yiman bedda, wanjh kunukka bininj nawu birrikang kurorrewaken ngundimarnedjaremeninj. Dja wanjh ngaye djarrngbom ngudberre bu bekkeng kondanjkuwu kurorrebeh. Wanjh ngudda minj mak ngurridjarrkdi bininj nawu kurorrewaken. Kumekbekenh wanjh ngundiwidnan.

²⁰ Ngudda ngurriburrbu bu marneyimeng ngudberre, bininj nawu kabirrimarnedurrkmirri nawu kawohrn, minj nakka birriwernhkuken. Bedda ngandinjirrhmiwong munguyh wanjh kunukka kadjalrohrok bu yiman kayime ngudda ngundidjalnjirrhmiwon. Dja nawu bininj ngandi-wokkarrme ngaye bu ngabenbukkabukkang, wanjh kunukka ngudda warridj ngundiwokmarrkmang ngudberre kore ngurrbenbukkabukkan.

²¹ Bedda kuninjkuwu kabirrikurduyime ngudberre bu ngayekenh. Dja minj kabirriburrbu God nawu nganmunkeweng.”

²² “Bu ngaye minj ngamawinj ngabenbengdayhkemeninj bedberre, wanjh kunukka God minj benwelengnameninj. Dja bonj, ngaye woy-bukkih ngamwam ngabenbengdayhkeng, dja bedda ngandiwokwirrhmi. Dja wanjh bolkkime bedda kabirrihdjalwenjhme bu kabirrihwenminguren bedmandeleng bu kunwarre kabirrihkurduyime munguyh.

²³ Bininj nawu ngannjirrhmiwon, wanjh kunukka Ngabbard ngardduk kabinjirrhmiwon warridj.

²⁴ Ngaye ngadjalkudji ngamwam ngabenmarnekurduyimeng kundjalwern kore ngandikurdunang. Dja bonj, bedda ngandidjalwirrhmeng, dja kunmekbekenh kunu God kabenwelengname. Bu ngaye minj ngaben-marnekurduyimeninj, wanjh God minj benwelengnameninj. Wanjh bolkkime ngandikurdunang dja ngandidjalnjirrhmiwong ngaye, dja mak Ngabbard ngardduk.

²⁵ Kuninjkuwu kabirridjalkurduyime dja wanjh kunmekbe kawoybuk-endan bu kayimerran kore bimbuyindanj mankarre bedberre bu yimeng, ‘Ngandidjalnjirrhmiwong bu djal burudjang.’” [Psalm 69:4]

²⁶ Ngaye ngamunkewe ngudberre nawu ngunbidyikarrmekenh. Ngamunkewe kore God nawu Kornkumobeh. Kaluk nungka namekbe Namal-ngmakkaykenh ngunmarneyime kore kunwoybuk. Nungka wanjh kamre

kore God nawu Kornkumobeh kamdolckkan, dja nungka nganmulewan bu djal kunwoybuk ngayekenh.

²⁷ Dja warridj ngudda ngurrbenmarneyimen birriwern bininj manbu kunwoybuk kore ngayekenh. Dja kerrngehkenhni ngudda karrihdjar-krey.

16

Jesus Benyengkih bengdayhkeng Nawu Bininj Nuye Bu Kunyiidkenh

John 16:1-4a

¹ Wanjh Jesus benmarneyimeng, “Ngaye wanjh kuninjkuu rowk marnehmarneyimeng ngudberre ba bu ngudda minj ngurrikukwurrhme bu yerrekah dja minj mak ngurringurdme bu ngaye kandiwoybukwon.

² Yikahwi nawu Jews bininj kaluk ngundikukbebke kore Synagogue kururkbeh. Bu ngokko darnkih kamhre nawu nangale ngunbun wanjh nakka kayime bu yimankek God kabihmarnedurrkmirri!

³ Bu kuninjkuu wanjh kabirrikurduyime ngudberre dja minj ngandiburrbun ngaye dja mak God nawu Kornkumo.

^{4a} Ngaye wanjh marneyime bolkkime ngudberre, kaluk bu baleh kakurduyimerran ngudberre yerrekah, wanjh ngurriburrbun kore yingkih bengdayhkeng.

Jesus Benmarneyimeng Bu Baleh Namalngmakkaykenh Kakurduyime Bedberre

John 16:4b-15

^{4b} Ngaye minj kunu bangmemarneyimeninj rowk ngudberre ker-ngehkenhni dja wanjh kunukka ngaye karridjarrkrey.

⁵ Bolkkime wanjh ngaye ngarrurdeng kore nungka nawu nganmunkeweng bu ngamwam. Ngudda minj kandidjawan ngaye kore baleh ngare.

⁶ Ngudda wanjh bolkkime ngurriwernhnjilngwarremen bu kuninjkuu ngaye marneyimeng ngudberre.

⁷ Dja ngaye marneyime ngudberre bu djal kunwoybuk, wanjh kunukka kunmak ngudberre bu ngaye ngare. Dja bu ngaye minj ngare, wanjh Namalngmakkaykenh nawu ngunbidyikarme minj kamre ngudberre. Dja bonj, ngaye wanjh ngare. Kaluk ngamdurndiwe ngudberre.

⁸ Kaluk bu nungka nawu Namalngmakkaykenh kamre, wanjh kabenmarnewokdi kunrayek birribuyika bininj nawu birrikang kurorrewaken. Dja mak nungka kabenbukkabukkan kore bedda kabirriburrbun kunbuyika kunmayali kore kunwarrekenh, dja mak kabenbukkabukkan bu minj kabirriburkburrkbeakkan mandjad kore ngaye ngardduk kunmak, dja mak minj kabirriwernhburrbun bu God kabenhdjadmekenh.

⁹ Bedda munguyh kabirriburrbun kunbuyika kore kunwarrekenh dja ngaye minj ngandiwoybukwoyi. Wanjh kunmekbekenh kunu Namalngmakkaykenh kabenmarnewokdi kunrayek dja kabenbukkabukkan.

¹⁰ Dja mak bedda munguyh kunbubuyika kabirridjalburrbun kore ngaye ngardduk kunmakmak, dja kabirridjalburrbun bu ngaye yimankek ngawarre. Dja ngaye ngare kore Ngabbard kore ngudda minj ngaye kandiawoyhnan. Wanjh kunmekbekenh kunu Namalngmakkaykenh kabenmarnewokdi bedberre kunrayek dja kabenbukkabukkan.

¹¹ Dja mak bedda munguyh kunbuyika kabirrimayaliyime bu minj kabirriwernhburrbun mandjad kore God kabenhdjadmekenh. Dja nungka God

korroko bidjadmeng namarnde duninjh nawu kawohrnan kore kondanjku kurorrewaken. Wanjh kunmekbekenh kunu Namalngmakkaykenh kabemarnewokdi kunrayek bedberre dja kabembukkabukkan.

¹² Ngaye ngadjare marneyime kunwern kunbuyika ngudberre dja ngudda minj ngurrimen mang bolkkime dja ngurrikangewarre.

¹³ Dja bu nungka kamre nawu Namalngmakkaykenh wanjh kunwoybuk kamulewan ngudberre. Kaluk nungka ngunmarnemulewan ngudberre kore kundjalwoybuk rowk bu munguyh. Nungandeleng minj kawokdi. Ngaye nganbekkan kore ngawokdi, wanjh kunmekbe kunwok ngunmarneyime. Nungka ngunmarneyime kore kaluk ngunmarnekurduyimerran bu yerrekah.

¹⁴ Bu nungka kamre, wanjh ngankukenwon ngaye. Nungka kamang ngardduk kunwok dja ngunwokwon ngudberre.

¹⁵ Yehyeng rowk nawu kahkarrne God nawu Kornkumo, nakka wanjh ngardduk. Wanjh kunmekbe kunu ngaye ngayimeng ngudberre nawu Namalngmakkaykenh kamang kore ngayebek kunwok dja ngunwokwon ngudberre."

Jesus Benyinkihbengdayhkeng Bu Kabirrinjilngwarremen Dja Kaluk Kabirriwernhmarr

John 16:16-24

¹⁶ Wanjh Jesus benyawoyhmarneyimeng, "Kaluk kuninjkunu kundedjumbungkenh minj kandinan, kaluk yerrekah wanjh kandiyawoyhnan."

¹⁷ Yikahwi bininj nawu benbukkabukkani Jesus, wanjh birridjwarreni, birriymarneyimerrani, "Baleh kuhni kahyime bu nungka yimeng, 'Kaluk bu kuninjkunu kundedjumbungkenh minj kandinan, kaluk yerrekah wanjh kandiyawoyhnan.' Dja warridj yimeng, 'Ngaye ngare kore Ngabard.' "

¹⁸ Dja mak birrimarneyimerrinj, "Baleh kab nahn kahwokmayaliyime bu yimeng 'kundedjumbungkenh'? Nuk, minj karriburrbun kore kahyime."

¹⁹ Jesus burrbuni njale nawu birrihdjareni birridjawayi, dja nungka benmarneyimeng, "Ngaye marneyimeng ngudberre, kaluk bu kuninjkunu kundedjumbungkenh minj kandinan, kaluk yerrekah wanjh kandiyawoyhnan. Yiddok kuninjkunu ngudda ngurridjwarrenkenh?"

²⁰ Woybukkih, djalwoybukkih duninjh marneyime ngudberre, bu kaluk ngurridjalnalkbun dja ngurridjalkongini. Dja nawu bininj birrikang kondah kurorrewaken nanu wanjh kabirridjalmarr. Kunu ngurrijilngwarremen kaluk yerrekah wanjh ngurriyawoyhnjilngmakmen dja ngurriwernhmarrmarmen.

²¹ Yiman kayime daluk bu darnkih kayawmang wurdyaw, wanjh kanjilngdurnhdurnhmang dja kanjilngwarre dja wanjh kunukka ngalenggarre kore darnkih kabimarnekurduyimerran. Dja kaluk bu wurdyaw kayawdangan, wanjh kadjakbengmidjan ngalengmandeleng ngarre wanjh kunukka kahnjilngmarrmarmen bu wurdyaw kaberrkmang.

²² Wanjh kunmekbe kunu kadjalrohrok kayimerran ngudberre. Bolkkime wanjh ngudda ngurrijilngwarremen. Kaluk bu yerrekah wanjh ngaye yawoyhnan ngudberre, wanjh ngurrijilngmakmen. Kunu minj nangale mak gunyawayhngurdke ngudberre bu ngurrijilngmakmen."

²³ "Bu kunmekbe kunbangarra ngaye ngarrurndeng kore ngardduk Ngabard, dja ngudda minj mak kandiyawoyhdjawan. Woybukkih, djalwoybukkih duninjh marneyime ngudberre, bu ngurridjawan ngardduk

Ngabbard bu njalehnjalekenh ngurridjare, wanjh ngunwon ngudberre bu ngaye kunngeykenh.

²⁴ Bu bolkkime minj mak ngurribangmedjawayi kore ngaye ngardduk kunngeykenh. Wanjh ngurridjawa dja ngunwon ngudberre ba bu munguyh ngurrinjlngmakmen bulkkidj duninjh."

Jesus benmarneyimeng, "Ngaye ngarrulkarreyakwong kunwarrehwarre kore kondanjkuu kurorre."

John 16:25-33

²⁵ Wanjh Jesus benmarneyimeng, "Ngaye wanjh marneyimeng ngudberre kore kunwok warlkkawarlkkayindi yiman bim. Bu kuhni wanjh darnkih minj mak ngayawoyhyolyolme bu kunmekbe ngudberre, dja bolkkime wanjh mandjad ngadjalyolyolme ngudberre kore Ngabbard ngardduk nuye.

²⁶ Bu kunmekbe kabolkymerran wanjh ngurridjaldjawan God nawu Kornkumo kore ngayekenh kunngey. Ngaye minj ngadjawan ngudberre, dja ngudman ngurridjawan.

²⁷ Nungan ngunmarnedjare ngudberre bu ngudda ngaye kandimarnedjareminj, dja kandiwoybukwong bu ngaye ngamwam kore nungkabeh nawu God.

²⁸ Ngaye ngamwam kore God nawu Kornkumobeh, bu ngamkoluy kore kondah kurorre. Dja wanjh bolkkime ngaye ngabolkbawon kondah kurorre ba ngarrurdeng kore God nawu Kornkumo."

²⁹ Nawu nuyeni bininj nawu benbukkabukkani birrimarneyimeng, "Ngayh, ngaleng! Kuninjkuu wanjh ngudda yiyime kore mandjad ngadberre. Dja minj yiyawoyhyime kore kunwok kahwarlkkayindi dja yiman kayime bu bim yiyolyolme.

³⁰ Bolkkime ngad wanjh ngarriburrbun kore ngudda yihburrbun rowk. Dja ngudda kanmayaliburrbun ngokko wanjh ngad yerreh ngundihdjaldjawan. Kunmekbekenh ngad ngarriwohburrbun ngudda yimdolkkang kore Godbeh."

³¹ Jesus benmarneyimeng, "A! Yiddok kuhni bolkkime ngudda kandidjalwoybukwon?"

³² Ngurrina! Kuhni wanjh ngokko kamhre darnkih bu kakurduyimerran ngudberre. Bu ngudda ngundiyarlarrke, dja ngurrine kore kunrurrk ngudberre ngurribebbehdi. Dja kandibawon ngadjalkudji ngahni. Kaluk ngaye minj ngadjalkudji ngahdi, dja ngardduk Ngabbard wanjh nganedjarrkdi.

³³ Ngaye marneyimeng kuninjkuu ngudberre ba bu ngudda ngaye karibelbmerren dja ngurrikarme ngardduk kunmakmak kunmodmikenh. Bu ngurrihni kondanjkuu kunred wanjh ngurrikarme kunwern kunyid. Dja ngurrina, ngurrikangemurrngayeknin, dja ngaye ngadjalkudji ngokko ngarrulkarreyakwong kunwarrehwarre kore kondanjkuu kurorrebeh."

17

Jesus Di Yiwarrudj Bidjawam God Nawu Kornkumo Nuye

John 17:1-5

¹ Bu Jesus yakwong kore wokdiwokdi bedberre, wanjh nungka bolknang kaddum kore heaven, dja dingihdi yiwarrudj. Nungka yimeng, "Ngabba, wanjh kuninjkuu bolkkime kumwam. Ngaye ngadjare ngudda yibenbukkan birridjalwern bininj ba bedda ngandiburlume ngaye, nawu beywurd ke. Wanjh kuninjkuu yikurduyimen ba bu ngaye ngabenbukkan bedberre ba bu ngandiburlume ngudda.

² Ngudda ngokko kankurrmeng ba bu ngabenmarnewohrnan birriwarlahkenh bininj nawu kabirrihni kore kubolkwarlahkenh rowk. Dja mak kanwong ngaye bininj nawu ngayeman ngardduk ba bu ngabendarrkid-won rowk bedberre dja kabirridjalmimbi munguyh munguyh.

³ Wanjh bedda kabirridjaldarrkid munguyh kore ngundiburrbun ngudda yidjalkudji nawu God yidjalwoybuk. Dja warridj ngandiburrbun ngaye Jesus Christ nawu ngudda kanmunkeweng bedberre.

⁴ Ngaye ngayakwong rowk kore ngudda kanwong bu ngarrurrkmirri ke. Wanjh bininj ngandikurdunang ngaye konhda ngahdi kurorre bu kumekbe ngakurduyimi ngudda ke, dja bedda wanjh ngundiburluburlume ngudda ke.

⁵ Ngabba, wanjh kanyawoyhdurndiwemen bolkkime kore ngudda, dja yibenbukka birriwarlahkenh bininj bu ngaye ngamakkaykenh duninj, yiman bu kadjalrohrok ngudda dja ngaye ngarrku bu ngarrdjarrkraworreni kerngehkenhni bu minj kunred bangmeyuwirrinj, kore ngarrdjarrk-makkaykenh duninj.”

*Jesus Benmarnedanginj Yiwarrudj Nawu Nuyeni Bininj Bedberre
John 17:6-19*

⁶ “Ngudda kanwong yikahwi bininj nawu birrikang kondanjkuu kurorrewaken. Yibenbekeng birrimekbe bininj dja kanwong. Bedda wanjh nguddah keni, dja wanjh ngudda ngaye kanwong. Bedda wanjh ngundiwokmarrkme y ngudda ke kunwok.

⁷ Wanjh bedda kabirriburrbun bolkkime bu ngudda kanwong ngaye rowk bu ngakarrme.

⁸ Ngaye ngabenmarneyimeng kunwok rowk kore ngudda kanwokwong ngaye. Birribek kang dja wanjh kabirriwokkarrme. Wanjh kunu birriburrbom bu woymbukkih duninj ngaye ngamwam kore nguddabeh. Dja mak birriyimi bu woymbukkih ngudda ngaye kanmunkeweng.

⁹ Ngaye wanjh ngahdi yiwarrudj bedberre. Ngaye minj ngabenhmarnedi birribuyika bininj nawu kondah kurorrewaken. Ngaye ngahdjaldi yiwarrudj bedberre bininj birridjalkudji nawu ngudda kanwong, dja bedda wanjh ngudda ke bininj.

¹⁰ Ngabba, nawu ngaye ngardduk bininj, nakka wanjh ngudda ke rowk, dja nawu ngudda ke bininj, nakka wanjh ngaye ngardduk rowk. Dja bu bedberrekenh wanjh birriwarlahkenh bininj nawu birribuyika warridj ngandiburlumeburlume ngaye.

¹¹ Bolkkime ngaye wanjh ngamre kore ngudda, dja ngabolkbawon kondanjkuu kurorre. Dja naninjanu bininj ngardduk, nakka wanjh kabirridjalni kondanjkuu. Ngabba, yidjalkudji nawu yidjalmakkaykenh, ngudda wanjh kanngeykurrmeng ngardduk, dja ngadjare yibennahnahnahninjanu bininj kore maninjanu kunngey ke manbu kakarrme kundukkarrekimuk, ba bu bedda kabirrikukbelbmerren dja kabirridjalkudjih-men yiman kayime ngudda dja ngaye ngarrdjalkudji.

¹² Ngudda kanwong nanihnjanu bininj, wanjh ngabennghekeyi kore ngudda yidjareminj bu bedda ngarridjarrkdi ngaye. Kaluk ngaye minj nakudji bininj ngawohbarlanhmayi, dja nadjalkudji bininj nawu warreworring naweleng. Dja kerngehkenhni bimbuyindanj djurra wanjh woymbukkihni kuninjkuu kurduyimerranj nuye.

¹³ Ngabba wanjh ngaye darnkih ngamhre kore ngudda. Dja ngaye djawahdjawan bu kondah ngahdi kurorre ba bu nahninjanu bininj kabirrikangemarrmarmen bu karohrok ngaye ngakangemarrmarma.

¹⁴ Ngaye ngabenwong kunwok ngudda ke, dja kubolkwarlahkenh bininj kabindidung. Nawu ngaye ngardduk nakka wanjh ngarrirohrok yiman kayime ngaye. Ngaye minj ngakang kurorrewaken, dja mak bedda minj birrikang kondah kurorrewaken. Kunmekbekenh nawu bininj nawu kabirrihni kubolkwarlahkenh wanjh kabindidjaldung munguyh.

¹⁵ Wanjh bolkkime ngaye ngabenmarnedi yiwarrudj bedberre nawu bininj ngardduk. Ngaye minj djawahdjawan bu yibenbebke kondanjkuu kurorrebeh, dja ngadjare yibendjalngehkemen kore nawu nawarre duninh kadjare kabenbun.

¹⁶ Nawu ngaye ngardduk bininj minj birrikang kurorrewaken. Dja kadjalrohrok yiman kayime ngaye minj ngakang kurorrewaken.

¹⁷ Ngabba, yibenbukka kunwok ngudda ke manbu kunwoybuk duninh, ba bu kabirriyemerran ngudda ke bininj duninh nawu ngudda yibenmakwan. Ngudda ke kunwok wanjh kundjalwoybuk duninh.

¹⁸ Bu ngudda kanmunkeweng ngaye ngamwam kore kondanjkuu kurorre, kundjalmekbe kadjalkudjiwi yerreh wanjh ngayemanwali ngabenmunkeweng nawu ngardduk bininj kore kondanjkuu kurorre kabirrirengehre.

¹⁹ Ngaye wanjh ngakurrmerren kore ngudda ke, ba bu ngabenbidiyikarme nawu ngardduk bininj bu bedmanwali kabirrikurrmerren kore ngudda ke bu djal woymbukkih duninh.

Jesus Benmarnedanginj Yiwarrudj Birribuyika Bininj nawu Yerreh Kabirriwoybukwon

John 17:20-26

²⁰ Bininj birribuyika wanjh kabindibekkan nanihnjanu ngardduk bininj bu ngandimulewan ngaye. Yikahwi birrimekbe nawu kabirribekkan dja wanjh ngaye ngandiwoybukwon dja kabirriaworren ngardduk bininj. Kaluk ngaye bolkkime ngabenmarnedi bedberre warridj.

²¹ Ngabba ngaye wanjh ngadjare bu kabirridjalkudjihmen rowk nawu ngardduk bininj, yiman kayime ngudda yihni kukange ngardduk dja ngaye ngahni kukange ke. Dja ngaye ngadjare nanihnjanu bininj bu kabirriini kore kukange ngarrku. Kuhni rowk ngadjare kakurduyimerran ba bu birriwarlahkenh bininj rowk wanjh kabirriburrun bu ngudda ngaye kanmunkeweng.

²² Ngabba, ngudda kanmarnbom bu ngayimerranj yiman kayime ngudda ngarrohrok. Dja ngaye ngabenmarnbom nanihnjanu bininj bu birriyimerranj yiman kayime ngaye ngarrirohrok. Ngaye kuhni ngabenmarnekurduyimeng ba bu kabirrikukkudjihmen yiman kayime ngudda ngaye ngarrdjalkudji.

²³ Ngaye ngahni kukange bedberre yiman kayime ngudda yihni kukange ngardduk. Ngaye wanjh ngadjare bu kabirrikukkudjihmen yiman kayime nadjalkudji ba bu birriwarlahkenh bininj rowk kabirriwohburrbun bu ngudda ngaye kanmunkeweng. Mak ngadjare birriwern bininj kabirriburrun bu ngudda yibenmarnedjare ngardduk bininj yiman kayime ngaye kanmarnedjare.

²⁴ Ngabba, nawu nanihnjanu bininj nawu kanwong ngaye, ngadjare ngarridjarrkni kumekbe kore ngaye ngamre. Wanjh ngaye ngadjare bu ngandinan nawu ngamakaykenh dja ngarrulkarrekimuk duninh kore ngudda kanngedyukenwong, dja kanmarnedjareminj bulkkidj duninh bu kerngekhenni minj kunbolk yibangmemarnbuyinj.

²⁵ Ngabba ngudda nawu yidjalkudji yihyime mandjad, dja warridj yihdjaldung kunwarrehwarre bu munguyh. Nawu bininj birrikang

kurorre minj ngundiwernhburrbun. Ngaye wanjh wernhkukburrbun ngudda. Dja ngaye nawu ngardduk bininj bedda kabirriburrbun bu ngudda ngaye kanmunkeweng.

²⁶ Ngaye ngabenmarnemulewam bu nguddakenh, dja wanjh munguyh ngabenhdjalmarnemulewan ba bu kabirridjalmarnedjaremerren yiman kayime ngudda ngaye kanhmarnedjare, dja mak bu ngaye ngani kukange bedberre."

18

Nawu Birribang Bininj Birrimey Jesus

John 18:1-11

(Matthew 26:47-56; Mark 14:43-50; Luke 22:47-53)

¹ Bu Jesus yakwong dingihdi yiwarrudj, nungka dja nuye bininj wanjh birribolkbawong dja birriwam. Birribalkoluhkoluy kore kudjorlokkimuk kabolkngeyyo Kidron dja birribalbidbom bewhbeh. Kaluk kumekbe dudjindi kundulk manbu olives dulkmirnderri. Jesus dja nuyeni bininj birriwam birringimeng kumekbe.

² Judas nawu bikukweykang Jesus, nungka wanjh korroko bolkburrbuni kore birriwam. Kaluk Jesus dja nuye bininj kunwernhkah birrihrey kumekbe kunred bu birrimrindemornnamerrinj.

³ Wanjh Judas benmirndeyorrhkeyi djamun nawu birrikang Rome, dja mak birribuyika djamun nawu priests birrikihkimuk dja nawu Pharisees bindimunkeweng. Bedda birribirlukani kunkong dja wurd ngalngkilelhk-ilelk nawu kunkalkkid rungi, dja mak mandjawak dja mankole birrikani yehyerreh.

⁴ Jesus nungka yingkihburrbuni rowk bu kakurduyimerran nuye, wanjh nungka benbalmirrkdkengkeng dja benmarneyimeng, "Ngudda nangale ngurrihyawan?"

⁵ Bedda birrimarneyimeng, "Ngad ngarrihyawan Jesus nawu Nazareth-beh." Jesus benmarneyimeng, "Ngaye wanjh nawu karrihwokdi." Judas nungka wanjh kumekbe birridjarrkdi nawu djamun.

⁶ Bu Jesus benmarnemulewarrinj, yimeng, "Ngaye wanjh kandi-hyawan." Wanjh bedda birridedjkenhdurndi dja birrimankarrinj kore kurorre.

⁷ Jesus benyawoyhmarneyimeng, "Nangale ngudda ngurrihyawan?" Wanjh bedda birriyawoyhmarneyimeng, "Jesus nawu Nazarethbeh."

⁸ Wanjh benyawoyhmarneyimeng bedberre, "Ngaye marneyimeng ngudberre, ngaye wanjh namekbe nawu karrihwokdi. Bu ngaye kandi-hyawani, wanjh ngurrina, dja med, ngurribenmunkewemen nanihnjanu bininj nawu ngaye ngardduk kabirrire."

⁹ Jesus kuninjkuu yimeng ba bu kunwoybuk kayimerran kore nungka yimeng kerrngehkenh kore dingihdi yiwarrudj, bu yimeng, "Ngaye minj nangale mak ngabarlanhmayi bininj nawu ngudda kanwong."

¹⁰ Nawu Peter karrmi mandjawak nawu djurrhkuyengni. Wanjh durrmengkore kungadmobeh kore dadbuhdadbuni, dja bingadji nakudji bininj nawu nakimuk priest bimarnedurrmirri, dja bikanemdjokeng kore kukun nuye. Nawu namekbe bininj ngeyyoy Malchus.

11 Wanjh Jesus bimarneyimeng Peter, “Yirrunrdiwemen namekbe mandjawak, yikurrmen kore kungadmo ke. Yibawo. Ngadjare nganmarnekurduyimerran kore Ngabbard kadjare. Kaluk nungka yiman yerreh nganbowong banikkin bu ngabongunkeh, dja wanjh bonj, ngabaldjalbongun nanihnjanu banikkin kore kaborrhakendi.”

Bedda Birrikang Jesus Kore Annas

John 18:12-14

(Matthew 26:57-58; Mark 14:53-54; Luke 22:54)

12 Nawu djamun birrikang Rome dja nawu benhmarnewohrnani, dja mak djamun nawu Jews birriwohrnani bedberre, wanjh birrimey Jesus dja birridukkang.

13 Bedda birrikang werrek kore nawu Annas. Nungka wanjh Caiaphas nuyeni binjdoy. Bu kundjalmekbeni mandjewk Caiaphas benmarnewohrnani bedberre priests.

14 Kaluk nungka Caiaphas nadjalkudji benmarneyimeng nawu birriwohrnani Jews bininj, yimeng, “Kunukka kundjalmak bu nadjalkudji karrown bedberre rowk nawu karriedbo.”

Peter Mulewarrinj Bu Minj Jesus Nuye Bininj

John 18:15-18

(Matthew 26:69-70; Mark 14:66-68; Luke 22:55-57)

15 Simon Peter benbalhmunkekadungi kore birrihkani Jesus dja birrikurrmeng kore kururrk nuye Annas, dja mak nabadbuyika bininj nawu Jesus nuyeni benedjarrkrey Peter. Nawu benmarnewohrnani priest, korroko biburrbuni namekbe nabuyika bininj dja wanjh nungka birridjarrkngimeng Jesus dorreng kore Annas kumhni kuberrkkah.

16 Dja nungka Peter minj ngimeninj kumekbe kururrk. Dja dingihdi kuberrk kore kururrkdangmayekah. Kaluk kumekbe ngalkudji ngalyawk di dja ngaleng bimarnerdurkmirri Annas. Dja ngaleng dangnahnani kore dangbalhmi. Namekbe nabuyika bininj nawu Jesus nuye, nawu benmarnewohrnani priest korroko bikuburrbuni, nungka wam bimarneyimeng ngalmekbe ngalyawk wanjh bimyingimeng nawu Peter.

17 Wanjh ngalmekbe ngalyawk bimarneyimeng Peter, “Ngayh, ngudda dorreng wanjh ngurridjarrkrey namekbe bininj nawu Jesus?” Wanjh yimeng nawu Peter, “Burrkyak. Ngaye nuk ngawid yina.”

18 Wanjh nawu djamun dja mak bininj nawu birrimarnedurrkmirri Caiaphas, wanjh birridjarrkdi kumekbe birrikukkuwani kunak bedberre dja kunbonjdjekkoni. Wanjh Peter balwam danginj kukwohkukwolngworreni.

Nawu Kabenmarnewohrnani Priests Bidjalwernhdjawani Jesus

John 18:19-24

(Matthew 26:59-66; Mark 14:55-64; Luke 22:66-71)

19 Annas nawu benmarnewohrnani priests bidjawani Jesus kunwern. Nungka djareni bu Jesus benmulewayinj nawu nuyeni bininj, dja mak djareni bu burrbuyinj baleh kunmekbe bu benhbukkabukkani birriwern bininj.

20 Jesus bimarneyimeng, “Ngaye ngabenbukkani kore kurobbe, minj ngabenyiwarlkkarrimeninj kore ngabenhmarneyolyolmi. Ngaye munguyh ngabendjalbukkabukkani kore synagogue dja Temple kore birriwern bininj nawu Jews birrimirndeyorrmu kubolkudjiwi kumekbe.

²¹ Njalekenh ngaye kuhni kanhdjawan? Nahni yibendjawa nawu ngandibekkabekkani bininj. Bedda wanjh kabirriburrbun kore ngabenhmarneyimi."

²² Bu kuninjkuu yimeng wanjh nakudji djamun biwidjbihkeng Jesus, dja warridj bimarneyimeng, "Yuwn kumekbe ngudda yihmarneyime nawu kabenmarnewohrnan priests."

²³ Jesus bimarneyimeng namekbe bininj, "Bu ngaye ngayimeninj kunwarre, wanjh kanmarneyimeninj. Dja kunukka burrkyak, ngaye ngadjalyimeng kunmak, dja njalekenh kanwidjbihkeng?"

²⁴ Kaluk burrk Annas bimunkeweng Jesus bu djahdaldukkayindi bu wam kore Caiaphas nawu benmarnewohrnani priests.

Peter Yawoyhmulewarrinj Bu Minj Bininj Nuye Jesus
John 18:25-27

(Matthew 26:71-75; Mark 14:69-72; Luke 22:58-62)

²⁵ Wanjh bu kuninjkuu yimerranj, Simon Peter dingihdi kumekbe kukwohkukwolngworreni kunak. Nawu bininj birrihni kumekbe birrimarneyimeng, "Ngayh, yiddok ngudda warridj namekbe bininj yimunkekadjungi?" Peter bimarnewirrihmerrinj Jesus dja yimeng, "Ngaye ngawid nuye!"

²⁶ Nakudji bininj di kumekbe nawu bimarnedurrkmirri nawu benmarnewohrnani priest. Kaluk nungka beneredboni namekbe bininj nawu Peter bikanemdadjkeng. Nungka bimarneyimeng Peter, "Ngayh. Ngaye wanjh nang ngudda dorrengh kumekbe ngurridi kore kundulk karrulkdudjindi bu ngurrihdi Jesus dorrengh!"

²⁷ Wanjh Peter bidjalyawoyhmarnewirrihmerreni Jesus. Wanjh kundjalmekeh rerrih, mayh nawu bawur! kayhngeng bu kumhkabelni djarreh.

Bininj nawu Benmarnewohrnani Jews Bidjawani Jesus
John 18:28-38

(Matthew 27:1-2,11-14; Mark 15:1-5; Luke 23:1-5)

²⁸ Bu kumekbe malahmalaywi kumboyendungmidjdi, kaluk yerreyerre Caiaphas binang Jesus, wanjh nawu Jews birrikang kore kururkkimuk nuyeni bininj nawu ngeyyoy Pilate. Nungka nawu Romebeh, dja minj Jewniwirrinj. Kaluk benmarnebolkwohrnani bedberre nawu Jew kore kunred Jerusalem.

Wanjh Jews birrikang Jesus, birrikurrmeng kore Pilate nuye kururkkimuk kuberrkkah. Bedda minj birringimeninj kumekbe kururkkimuk kore Pilate nuye, dja mankarre bedberre yimeng bu minj kabirrirarworren nawu minj Jews, dja kawarre bu yiman kabirrimarnburren bu kakarrewarre bu kabirringun mankimuk mulil manbu God bendarrkid-bawongkenh.

²⁹ Wanjh kumekbekenh Pilate bebmeng kuberrk benmarneyimeng, "Nahni bininj nakka njale mankarre bakkeng?"

³⁰ Bedda birrimarneyimeng, "Yina, bu nahni bininj namakniwirrinj, wanjh kunukka minj ngarrimkayi kore ngudda. Dja nungka wanjh wowarre."

³¹ Jesus Pilate benyawoyhmarneyimeng, "Mah, wanjh ngurrika, ba bu ngudman ngurridjadme kore ngudman ngudberre mankarre kahyo." Dja bedda birrimarneyimeng, "Ngudda nawu Romebeh ngurrikarremarnbom ba bu ngad bininj nawu Jews, minj ngarriyawoyhbun nawu bininj bu kabakke mankarre ngadberre."

³² Jesus ngokko benyingkihmarneyimeng bu karrowenkenh kore kundulk kabirrikukbarnname. Kunmekbekenh nawu Jews bininj minj

birrikodjdoyi kunwardde nawu Jesus. Wanjh kunu kunwoybuk yimerranj nuye.

³³ Wanjh Pilate yawoyhngimeng kururk dja bikayhmeng Jesus. Dja bimarneyimeng, “Ngudda yiddok king bu yiwohrnan bedberre nawu Jews bininj?”

³⁴ Wanjh Jesus bimarneyimeng, “Yiddok kuhni ngudda ke kunwok kanhdjawan, dja kunubewu birribuyika ngundimarneyimeninj bu ngayekenh?”

³⁵ Wanjh Pilate bimarneyimeng Jesus, “Yiddok ngaye Jew bininj? Dja nawu nguriredbo dja mak nawu birrikihkimuk priests ke, bu bedda ngandibidnakenwong. Kaluk baleh ngudda yikurduyimeng bedberre?”

³⁶ Jesus bimarneyimeng, “Kore ngaye ngawohrnan, wanjh minj kondanjkuu kurorre. Bu ngaye kingniwirrinj kondanjkuu kurorre, wanjh nawu ngardduk bininj ngandimarnedurrkmirri kunu wanjh birriburrimeninj bininj nawu birriwohrnani Jews bu ngandidarrkidmey. Dja ngaleng ngaye ngawohrnan kore kubuyikabeh.”

³⁷ Wanjh Pilate yimeng, “Ngayh, ngaleng. Ngudda djalwoybukkih nawu king?” Wanjh Jesus biwokmey, yimeng, “Kore yihyime wanjh kunu kunwoybuk kore ngayekenh bu ngaye nawu king. Kunmekbekenh bu ngaye ngamwam dja ngarranginj kondanjkuu kurorre, ba bu ngabenbukkan birriwarlahkenh bininj ba bu kabirriwernhburrbun kore kunwoybuk. Bininj nawu kabirridjare kunwoybuk duninj, nakka wanjh ngandiwokbekkabekkan ngaye.”

³⁸ Pilate yimeng, “Njale makka kab manbu kunwoybuk?” Wanjh Pilate yawoyhbebmeng kuberrk dja benmarneyimeng bininj nawu bindimarnewohrnani Jews, “Ngaye nuk minj njale ngamarnekarrenalke-meninj nahnini bininj.”

Bedda Nawu Birriwohrnani Jews Birridjareni Bu Jesus Karowen

John 18:39-40

(Matthew 27:15-31; Mark 15:6-20; Luke 23:13-15)

³⁹ Wanjh nawu Pilate benyawoyhmarneyimeng, “Dja kandibekka. Bolkkime wanjh ngudberre mulil manbu God Bendarrkidbawongkenh, djal karrikarme mankarre ngalenggarre manbu kayime ngaye marnebebeke nakudji bininj nawu karrukkayindi. Yiddok ngudda kunu ngurridjare ngabebke ngudberre nahnini nawu King ngunmarnewohrnan ngudda nawu Jews bininj?”

⁴⁰ Dja birriwernkenh bininj birrimdjalkaykahkayhmeng, birriyimeng, “Ngad ngarriwarnyak nakka nawu bininj! Dja yimbebkemen ngadberre nawu Barabbas!” Kaluk nawu Barabbas nakka nawarre bininj, dja benmirndekani bininj birriwarre bu bindiburriweyi nawu Romebeh bininj, nawu birribolkwohrnani kumekbe.

19

Nawu Pilate Benyibawong Jesus Bu Kabirribunkenh

John 19:1-16

¹ Wanjh Pilate benmarneyimeng bininj nuye wanjh kunyarl birrimy birriwidjbihkeyi Jesus kunwernhkah.

² Kaluk birrimy dja kinj manmirrhyi birrimarnbom birrikodjdjombom. Dja mak birridjombom manburra melekurlobakurlbah yiman kayime kunrodjbe rerrih.

³ Wanjh birrimirnderri kumirrk nuye dja birribebkangbuni mak birringarlbakwidjbihkeyi, wanjh birrimarneyimi, “Ngad ngundiburlume ngudda nawu king yiwohrnan bedberre bininj nawu Jews!”

⁴ Wanjh Pilate yawoyhbebmeng kuberrkkah bu benmarneyimeng nawu birriwohrnani bininj nawu Jews, “Ngurrina, ngaye wanjh ngambebeke nahni bininj ngudberre ba bu ngurriburrbun bu gaye minj ngamarnekar-rengalkemeninj kore nungka kurduyimeng.”

⁵ Wanjh Jesus kumbebmeng kunmadj dorreng djongbuhdjongbuyindi dja mak kinj manbu birrikodjdjombom. Pilate yimeng bedberre, “Nahni wanjh namekbe bininj ngurrikukna!”

⁶ Kaluk bu priests birrikihkimuk dja mak nawu bindimarnedurrkmirri birrinang Jesus, wanjh birrimkaykaykaymeng, birriyimi, “Yibu! Yikuk-barnnamen kore kundulk!” Pilate benmarneyimeng, “Ngudda wanjh ngurrika ngurribiddulubu. Gaye wanjh minj njale ngamarnengalke-meninj ba bu ngarryui.”

⁷ Birrimekbe nawu Jews bininj birrihni wanjh birriwokmey, birriyime-meng, “Nungka wanjh dowimen! Ngad kore mankarre kahyo bakkeng ngadberre dja yimeng nungka beywurd nuye God. Kunmekbe wanjh ngarridjare yibun.”

⁸ Bu kuhni kunwok Pilate bekkang wanjh nungka yawoyhkeleminj duninj.

⁹ Wanjh yawoyhngimeng kururrkkinimuk dja bidjawam Jesus, “Ngudda kab balehbeh yimdolkkanj?” Dja Jesus minj biwokmayi.

¹⁰ Wanjh Pilate bimarneyimeng Jesus, “Njalekah ngudda minj kanwok-mang? Yiddok minj yiburrbun ngaye ngakarre kundulkare bu munkewe yire dja bu kunbuyika wanjh kunu bun bu kukbarnname kore kundulk?”

¹¹ Jesus biwokmey bimarneyimeng, “Ngudda yiwid. Dja nabuyika nawu nawernhkimuk kahdokme, wanjh nungka kunmekbe kundulkarre ngunwong. Ngudda minj yikarme kundulkarre kore yingan ke kore ngayekenh kanbun. Dja nawu bininj ngankang kore ngudda, wanjh nakka nadjalwernhwarre dja ngunyurhke kore kunwarrekeh.”

¹² Bu kuninjku Pilate rohrokmi ba bu yimankek bimunkewemeninj Jesus rawinj kamak. Dja nawu Jews birrimyawoyhkaykaymeng, dja birriyimeng, “Bu ngudda nahni bininj yimunkewe kare, wanjh kunukka minj ngunedabolk Caesar nawu nadjalkudji king kadberre. Nanihnjanu bininj yimeng ngaye king, wanjh kaluk kunukka yiman kabenewidnarren nawu Caesar.”

¹³⁻¹⁴ Bu Pilate bekkang kuninjku kunwok, wanjh bimey Jesus bikang kuberrk, binameng. Bu kunukka wanjh darnkihi ngalenggarreni muli birrikarmi manu God bendarrkidbawongkenh kunkare. Wanjh kuninjku kunbarnangarra ngalenggarre bu birriyinkihkukmarnburreni nawu Jews bininj ba bu birrikarmeninj manmekbe muli bedberre. Bu baldungdjarlarrkminj, wanjh Jesus dja Pilate benebalbebmeng kuberrkkah kore warddeyoy bolkngeyyoy “Manwarddekorlhbalabala Birrimarnbom”. Kore kunwokbeh nawu Jews wanjh birribolkngeybuni “Gabbatha”. Wanjh Pilate yerrkang kore kahyingkihi kore kabendjadmekenh. Wanjh Pilate yawoyhyimeng bedberre nawu birriwohrnani Jews bininj, “Ngurrina! Nahni nawu ngudberre king!”

¹⁵ Dja birridjalyawoyhkaykaymeng, birriyimeng, “Yika! Yika dja yibun kore kundulk!” Pilate benmarneyimeng, “Ngudda ngurridjare bu ngabun ngudberre king kore kundulk ngakukbarnname?” Dja nawu priests birrikihkimuk birriyimeng, “Ngad kunu ngarrikarme nadjalkudji king, wanjh nawu Caesar.”

16 Wanjh Pilate benmarnekodjduhmeng bedberre bu nawu djamun kabirrikan Jesus kabirribun kore kundulk.

Bu Birrikukbarnameng Jesus Kore Kundulk Cross

John 19:17-27

(Matthew 27:32-44; Mark 15:21-32; Luke 23:26-43)

17 Wanjh birriwam kore mandulum manu dulumngeyyoy Golgotha. Wanjh kuninjkuu kunred nawu Jews bininj birribolkngeybom “Kunkod-jngalng” kore bedberre kunwok. Wanjh Jesus nungan dulkngorrkani cross kundulk nungan nuyeni.

18 Kaluk bu birribebmeng mandulum kumekbe, wanjh bindibiddundulubom Jesus dja mak nawu bininj bokenh, Jesus kubulkayh kukbarndi dja bedda djarrin rowk benebebbekukbarndi nawu bininj bokenh.

19 Pilate ngeybimnameng wanjh birribarnnameng kore kundulk. Kaluk kumekbe ngeydi, NAHNI BININJ NAWU JESUS NAKANG NAZARETHBEH. WANJH KING NAWU KABENMARNEWOHRNAN BININJ BEDBERRE NAWU JEWS.

20 Kuninjkuu yimerranj bimbuyindanj kunwok danjbik bedberre nawu Jews, dja mak nawu birrikang Rome, dja mak nawu Greek birriwokdi. Wanjh kumekbe kunred kore Jesus birribom wanjh darnkihni kore kubolkkimuk rurrkmirnderri kore bininj birrini. Kumekbe wanjh birriwern bininj birringeynani kunwok bedberre kore bimbuyindanginj.

21 Nawu priests birrikihkimuk birrimarneyimeng Pilate, “Njalekah kuhni kunngey bimbuyindanj bu yinameng nawu nahni bininj nakka wanjh king nawu kawohrnan Jews bedberre. Dja nuk yiyimeninj nahni bininj nungandeleng mulewarreni bu nungka yimankek king nawu kawohrnan bedberre nawu Jew.”

22 Wanjh nawu Pilate benmarneyimeng, “Bu gaye ngabimbom, wanjh djal bonj, kadjalngeybimdi.”

23-24 Bu djamun birriyakwong birribiddundulubom, wanjh birrikukwayhkeng kaddum, birrimey kunmadj nuye dja birribebbekmadjarlmarinjinj kunkarrngbakmeng, birribebbekarmikarmi nakudji. Bu birrinang madjkudjini nawu djongbuhdjongbuyindi manburra lodkudji. Wanjh birrimarneyimerrinj, “Minj mak karridjalkmirran nahni nawu kunmadj, dja wanjh karrimelekurrmen dja karridirri kunkod ba nangale kadberre kawinhme nahni kunmadj.”

Bu kuninjkuu yimerranj, ba kore yingkihimbuyindanj wanjh kunwoyuk yimerranj, kore yimeng, “Kaluk birrimadjarlmirranj nawu ngardduk kunmadj. Dja mak nawu kunmadj ngardduk, wanjh bedda birridirri ngarrekenh.” [Psalm 22:18] Kuninjkuu wanjh djamun birrikurduyimeng nuye.

25 Jesus nuye ngalbadjan dingihdi darnkih Jesus barndi kore cross kundulk, dja mak ngalu benedanginj, dja mak Mary ngalbininj kobeng nuye nawu Clopas, dja mak Mary ngalkang Magdalabeh.

26 Jesus benbenenang ngalbadjan nuye dja mak bininj nuyeni nawu bimarnedjareni benehdi darnkih, wanjh bimarneyimeng ngalbadjan nuye, “Ngalkohbanj, nahni wanjh ngudda ke nayaw, yihnan.”

27 Wanjh bibalmarneyimeng namekbe bininj nawu bimarnedjareni, “Ngahli wanjh ngudda ke ngalbadjan.” Kundjalmekbe rerrih namekbe bininj bikang ngalmekbe ngalbadjan kore kunred nuye dja munguyh benedjarrkdi.

*Bu Jesus Doweng**John 19:28-37**(Matthew 27:45-56; Mark 15:33-41; Luke 23:44-49)*

²⁸ Kaluk burrk Jesus burrbuni bu kuninjkuu bimarnekurduyimerranj rowk, kumekbe wanjh yimeng, "Ngaye wanjh ngakombukdownen." Kuninjkuu yimeng ba bu djurra kore kabimbuyindi wanjh kumwoybukhendanj.

²⁹ Kumekbe wanjh ngalngdi boni kunkalkkid wine manbu bomanjwarre. Nawu djamun birrimey mandjowh birridjuhkeng kore maninjmanu wine, wanjh birridjowhdukkang manbu mandulkkuyengni nawu hyssop, wanjh birridulkwayhkeng birridangkenhwong mandjowh kurrang nuye Jesus.

³⁰ Wanjh Jesus bonguneng mahni mankalkkid wanjh yimeng, "Bonj, bularrbuyindanj rowk." Wanjh yerre djudkurlmeng, dja nungan ngolek-baworrij bu welengmalngkurmerrinj.

³¹ Bu kerrngehkenhni birribiddunhdulubom Jesus kunukka kunbarnangarra bu birriyingkihmarburreni bu Sabbath ngalengngarreni. Nawu Jews bininj minj birridjareniwirrij munguyh birrikukbarndiwirrij nawu birridoweni bininj dja wanjh kunukka kunbarnangarra djamun duninj ngalengngarreni bu Sabbath. Kaluk kuhni bu Sabbath kunukka wanjh kundulumukni kunbarnangarra djamunni. Kunmekbekenh kunu nawu birrikihkimuk Jews birridjawam Pilate birridjareni djamun bindidadbakkemeninj ba bu birridowimeninj werkkwerkk dja mak yerre nawu Jew bindikukkayi.

³² Wanjh nawu djamun birriwam bindibebbehadmurrngbakkeyi nawu bininj bokenh benebebehkukbarndi djarrin nuye Jesus dja bedda benedjaldarrkidni wanjh kaluk benebaldoweng.

³³ Kaluk bu birrimkuyinwam kore Jesus wanjh birrinang korrokodoweng, wanjh minj birridadmurrngbakkemeninj.

³⁴ Wanjh nawu nakudji djamun mey mankole bingorrdjabmeng kore Jesus kungorrk nuye. Wanjh kundjalburrikudji kunkurlba dja mak kukku kumboyakarrburrij nuye.

³⁵ Nakudji bininj nawu ngunhmarneyime ngudberre, nakka wanjh binang kumim nuye, dja kaburrbun kore kunwoybuk. Dja wanjh kayolyolme kunwoybuk dorreng ba bu ngudmanwali ngurriwernhwoybukwon.

³⁶ Kuninjkuu yimerranj rowk nuye nawu Jesus ba bu kawoybukendan kore djurra kabimbuyindi kunwok kore yimeng, "Minj kunwohkudji kunmurrng nuye kabirribakke." [Psalm 34:20]

³⁷ Dja mak kore yimeng, "Kaluk bedda kabirrinan namekbe bininj nawu birridjabmeng mankoleyi." [Zechariah 12:10]

*Benebokenh Bininj Benekumarnbuni Jesus**John 19:38-42**(Matthew 27:57-61; Mark 15:42-47; Luke 23:50-56)*

³⁸ Nakudji bininj nawu ngeyyoy Joseph kumdolkkang Arimatheabeh. Kaluk nungka djal manmolk bimunkekadjungji Jesus bu minj birriwern birrinayinj nawu birriwohrnani Jews bininj, dja nungka benmarnekeleni. Nungka wam bikukyidjawam nawu Pilate. Wanjh Pilate bibawong Joseph bu bikukmey Jesus, dja wanjh bikukkang.

³⁹ Dja mak nawu Nicodemus benedjarrkwam bibidyikarmeng bu benedjarrkkukmey Jesus. Nicodemus namekbe nawu kerrngehkenhni Jesus benewokdi bu kunkakkudjini. Nicodemus kumkang manwern* mankalkkid manekke Myrrh, dja manduyh manbu Aloes.

* 19:39 Yiman 34 kilograms.

⁴⁰ Bedda benekukmey Jesus wanjh benekukbaruy mankalkkid dja manduyh, dja benedukgang manburriba kore benekukkurmeng. Kunneke munguyh birridjalyimi nawu Jews bininj bu bindikukdudjengi kore kumidj.

⁴¹ Kaluk kumekbe kore Jesus birribom, wanjh manme dudjindi. Kumekbe wanjh djalbolkkerrngehni kore kunmidj birriwardderurrk-marnbom. Minj nangale mak korroko kuckyuwirrinj, dja mandjalwarderurrkkerrngeni bu birrimarnbom.

⁴² Wanjh kumekbe kunu birrikukgang birrikukkurmeng kore kuwardderurrk, dja mak darnkihni bu birridarnhkukkurmeng. Bu werrkwerrkni birrikukkurmeng dja ngalenggarreni kunkodjke manbu Jews bininj birrimarnburrijni kore Sabbathkenh manbu kumhrey darnkih bu kunmekbe bolkburlerrngeni.

20

Daluk Dja Bininj Birribolknang Kore Nungka Kukyohkukyoy Wanjh Bolklarrkni

John 20:1-10

(Matthew 28:1-10; Mark 16:1-8; Luke 24:1-12)

¹ Kaluk bu djandini, Mary ngalbu Magdalabeh bolkdjahwong kore Jesus birrikukkurmeng. Wam bu kakyoy kumhkabelni djarreh, dja nang manbu kunwardde warddedangbalhmiyindi dja makka warddedjirrkarrinj kore kumidj bu dangmarrhmiwam.

² Dja wanjh marrkinrlobmeng durnhdurndi kured kore benedi Simon Peter dja mak namekbe bininj nawu Jesus bihmarnedjareni. Mary ngalbu Magdalabeh wanjh benbenemarneyimeng, "Bedda wanjh birrikukgang nawu kawohrnan kore kuckyokukyoy, dja ngad daluk minj ngarriburrbun kore baleh birrikukkurmeng!"

³ Wanjh Peter dja mak nabuyika bininj benerlobmeng bu benebolknang kore kuwardderurrk.

⁴ Benedjarrklobmi wanjh nawu nabuyika bininj wernkih murrmiwam dja bibawong Peter yerreh, wanjh nungka werrk bolkdjorngmey kore kuwardderurrk.

⁵ Wanjh nungka minj ngimeninj, dja boddanj roymeng nang djalmanburrbawi yongohyoy.

⁶ Wanjh Simon Peter kumbebmeng rerreh nawu djalngimeng kore kumekke kunwardderurrk, dja nang bu kunmadjwi djahdjalyoy.

⁷ Dja nawu manburriba birriyikodjdukkang, nakka wanjh djahdjalmadjoy djaldukkayindi bebbebeh.

⁸ Namekbe nabuyika nawu bininj kerrngehkenhni bolkmey kumekke kuwardderurrk, nungka warridj balngimeng, djalnang bu woybukihni dja wanjh woybukwong.

⁹ Dja minj bedda birribangmeburrburkmayi kore djurra biyingkihyolyolmi bu Jesus wanjh yawoyhdolka kore kundowikenh.

¹⁰ Wanjh bedda benedurndi kured benewoneng.

Jesus Bimarnekukbukarrinj Mary Ngalbu Ngalkang Magdalabeh

John 20:11-18

(Matthew 28:9-10; Mark 16:9-11)

¹¹ Dja ngalbu Mary dingihdi kuberrkakah kore kuwardderurrkdangmaye dja nalkbunalkbuni. Dja bu kunmekbe nalkbuni wanjh boddanj roymeng kore kuwardderurrk.

12 Dja benbenenang angels bokenh nawu benedjongbuyindi kunmadj nawu madjbeleni duninjh. Nakudji nawu ni kore kukodj dja nabuyika nawu ni kore kurrenge kore Jesus kukyohkukyoy kerrngehkenhni.

13 Wanjh bedda benemekbe angel benemarneyimeng Mary, "Ngudda ngalu daluk, njalekah bu yihnalkbun?" Mary benbenemarneyimeng benemekbe angel bokenh, "Aba. Ngaye ngahmarnenalkbun nawu ngan-marnewohrnan ngardduk, dja minj ngaburrbun kore baleh birrikukkang bu birrikukkurmeng."

14 Bu kuninjkuu yimeng wanjh ngaleng balborledkerrinj dja wanjh binang Jesus bu yawoyhmimbiminj, dingihdi kumekbe. Dja wanjh Mary minj biwernhkukburknayi nungka.

15 Jesus bimarneyimeng, "Ngudda ngalu daluk, njalekenh ngudda yihnalkbun, dja yihnalkyiyawan?"

Mary ngaleng burrbuni bu yimankek yimi nawu bininj kabolknahnan kore manme dudjihdudjindi. Dja ngaleng bimarneyimeng, "Ngayh, nawu yikimuk, bu ngudda yikukmey yikukkang, wanjh kanmarneyimen baleh kore yikukkurmeng, ba ngaye ngare ngakukmang."

16 Jesus wanjh bingeybom, bimarneyimeng, "Mary!" Wanjh Mary wohborledmeng dja bimarneyimeng, "Rabboni!" Bu Mary wokdanginj kunwok Hebrew, kunmekbe kunwok kayime "nawu kanbukkabukkan".

17 Jesus bimarneyimeng, "Yuwu bu kandjalkukkarrme munguyh, dja ngaye kunu minj ngabangmerawinj kaddum kore Ngabbard. Dja yiray yibenmarneyimen nawu ngaye ngarridanginj, yibenmarneyimen bu ngaye ngare kaddum kore ngardduk Ngabbard dja ngudda mak ngudberre Ngabbard, nawu ngaye ngardduk God dja mak ngudda ngudberre God."

18 Wanjh ngalbu Mary ngalbu Magdalabeh wam wanjh benmarnemulewam nawu bininj birrimunkekadjungi Jesus. Ngaleng yimeng, "Ngaye nganang nawu kawohrnan." Kaluk benmarneyolyolmeng rowk bu kunwok bimarneyimengkenh.

Jesus Wanjh Benmarnedarrkidbebmeng Nuye Bininj Nawu Disciples
John 20:19-23

(Matthew 28:16-20; Mark 16:14-18; Luke 24:36-49)

19 Kaluk kundjalmekbe kunbarnangarrakudjini manbu Djandi ngarre, bu kukak yimerranj, nawu bininj birrimunkekadjungi Jesus birrimornnamerrinj kore birridangbalhmerrinj dja birridangrayekwong. Bedda wanjh bindihkengemi nawu birriwohrnani Jews bininj. Kaluk kundjalmekbe rerrih Jesus bebmeng dja djaldanginj kubulkayh bedberre. Wanjh nungka benmarneyimeng, "Ngaye won ngudberre kunmodmikenh ngardduk."

20 Wanjh benmarnebukkarrinj kunbid bokenh dja mak kungorrr nuye. Wanjh bu birrinang nawu Kawohrnan Rowk, bedda wanjh birrimarmarminj duninjh.

21 Wanjh Jesus benyawoyhmarneyimeng bedberre, "Ngaye won ngudberre kunmodmikenh ngardduk. Dja kandibekka. God nawu kornkumo nganmunkeweng, wanjh kadjalrohrok yerreh bu ngayemanwali munkewe ngudberre."

22 Wanjh benwelengngolekwong bedberre dja benmarneyimeng, "Ngaye wanjh won ngudberre Namalngmakkaykenh. Ngurrikima.

23 Bu ngudda ngurrbenmarneyime nangale bininj bu God kabenmarnebengmidjan kunwarre bedberre, wanjh kunu bonj, kabularrbuyindan bedberre. Dja bu ngurrbenmarneyime yikahwi bininj bu God minj kabenmarnebengmidjan kunwarre bedberre, wanjh woybukkih,

kunukka minj kabularrbuyindan bedberre kunwarre.” Kuhni bu Jesus benmarneyimeng.

*Jesus Yawoyhkukbukkarinj Bedberre Kore Thomas Dorrengh Birridjar-
rkdarrkidnang*
John 20:24-29

²⁴ Kaluk Thomas nawu birringeybuni Didymus, nungka minj birridjar-
rkdawirrinj bu Jesus benmarnebebmeng bedberre nawu birribuyika nuye
bininj.

²⁵ Kaluk bedda birrimarneyimeng, “Ngad ngarrinang nawu ka-
wohrnan!” Wanjh nawu Thomas benmarneyimeng nawu binihbininj,
“Ngaye minj woybukwon ngudberre bu kandimarneyime. Dja ngaleng
ngaye ngayeman ngawoybukwon bu ngabidnan kore nails birribid-
dudulubom dja ngabidkurrmerren kore ngamorninjbekkan, dja mak
ngabidkurrmerren kore kudjorrk nuye.”

²⁶ Wanjh kunbuyika Djandini nawu bininj birrimunkekadjungu Jesus
birriyawoyhdangbalhmerrinj kore kururrk, dja nawu Thomas dorrengh
birridjarrkni. Kaluk kundjalmekebe rerrih Jesus bebmeng djaldanginj
kubulkayh bedberre. Dja benmarneyimeng, “Ngaye won ngudberre
kunmodmikenh ngardduk.”

²⁷ Wanjh kumekbe Jesus bimarneyimeng Thomas, “Yibidkurrmerri-
men kore kumorninj ngardduk dja kanbidna. Dja mak yibidkurrmerri-
men kore kungorrk ngardduk. Dja yuwn bu kanyawoyhkewkme kore
ngayekenh. Dja wanjh kunu kandjalwoybukwo ngaye munguyh.”

²⁸ Wanjh Thomas bimarneyimeng, “Ngudda nawu ngardduk kan-
marnewohrnan, dja mak ngudda wanjh ngardduk God.”

²⁹ Jesus bimarneyimeng, “Ngudda yiwoybukwong bu ngaye kannang.
God wanjh kabenmarnekurduyime kunmak bininj nawu ngandidjalwoy-
bukwon kore ngaye ngardduk dja minj bedda kandidarrkidnan.”

John Mulewarrinj Bu Njalekenh Bimbom Nahni Djurra
John 20:30-31

³⁰ Jesus wanjh kunwernkah djaldurkmirranj kundulkarre dorrengh
bu bininj nuye birrikurdunani, dja mak minj bimbuyindangimeninj kore
nanihnjanu djurra.

³¹ Dja kuninjkuwu kore bimbuyindanj ba bu ngudda ngurriwernhbur-
rbun bu woybukkih duninj nawu Jesus nungka wanjh Christ dja mak God
nuye Beywurd. Dja bu ngurriwoybukwon nuye wanjh kunukka ngudda
ngurrikarme kundarrkid nuye.

21

*Jesus Benyawoyhmarnebebmeng Nawu Bininj Nuye Kore Kurrula
Tiberias*
John 21:1-14

¹ Kaluk bu yerrehkah wanjh Jesus benyawoyhmarnekukbukkarinj
nawu bininj nuye. Kaluk kuhni yimerranj bedberre kore darnkih
kukadjid, kurrula bongeyyoy Tiberias*.

² Nawu yikahwi bininj birrimunkekadjungu Jesus kumekbe birrihdjar-
rkd. Bedda wanjh Simon Peter, Thomas nawu birringeybuni Didymus,
Nathanael nawu nakang kunred Cana kore kubolkkimuk Galilee, dja nawu

* **21:1** Kungeybuyika karmi, manbu “kurrula kore Galilee”.

bebeywurd nuye Zebedee benebokenh, dja mak benebadbuyika nawu bininj nuye Jesus.

³ Simon Peter benmarneyimeng nawu birrihdi, "Ngaye wanjh ngare djenj." Wanjh bedda birrimarneyimeng, "Wanjh karribaldjarrkray." Wanjh birridjalwam birribidburrij kabbala. Birrikakweyi walabbi kunkakkuyeng dja minj birrimayinj djenj.

⁴ Kaluk bu kumbarrhbuni wanjh Jesus kumdanginj kore kukadjid, wanjh nawu bininj nuyeni minj birrikukburknayi dja birrikukmidjbuni.

⁵ Jesus benmarnekayhmeng, "Wurdwurd! Yiddok minj ngurrimayi djenj?" Wanjh bedda birriyimeng, "Burrkyak, ngad minj ngarrimayi nawu djenj."

⁶ Wanjh Jesus benmarneyimeng, "Dja wardi ngurriwemen walabbi kore kukunkah ba ngurrimang djenj." Wanjh birriburriweng nawu walabbi kore kukun, dja birrimeng djenj nawern, dja minj mak birribidbuyhke-meninj manbu walabbi kore kabbala dja djenj mirdeldumukwong.

⁷ Nakudji bininj nuyeni Jesus nawu biwernhmarnedjareni duninj, wanjh nungka bimarneyimeng Simon Peter, "Ngayh! Nahni nawu Kawohrnan Rowk kahdi!" Nawu Simon Peter bibek kang yimeng kunjinkunu kunwok, wanjh yawoyhdjohdjongburrijin nawu kunmadj nuyeni kerrngehkenhni kuyerrkkerrinj bu durrmidurrrkmirri, wanjh dolkkang kabbalabeh djuhmi kore kukku.

⁸ Dja nawu birribuyika bininj nakka wanjh birrikadjungi dja birrib-alhberrkdjorrngmangi manbu walabbi barlmi djenj dorrengh. Darnkih wanjh birribalbebmi kore kunkadjid, yiman 90 metres. Dja nawu walabbi birridjaldorrorrkeyi djenj dorrengh.

⁹ Kaluk bu birribidbom kuberrk, wanjh birrinang kunak manbu yingkihrungi kunyirre dorrengh. Kaluk kumekbe rungi djenj dja manlod kandidjdjawa.

¹⁰ Wanjh Jesus benmarneyimeng, "Ngurrimka yikahwi nawu djenj ngurrimeng bolkkime."

¹¹ Nawu Simon Peter wam bidbom kabbala wanjh kumdorrorrkeyi djenj walabbi dorrengh kore kuberrkkah. Nawu walabbi ngerdkendjobmeng nawu nawern djenj nakihkimuk. Bu nakaberrkwernni one hundred dja fifty three dja bonj, nawu walabbi minj mirdedjalkmirawinj.

¹² Jesus benmarneyimeng, "Ngurrimray ba ngurrimalayngun manme." Yikahwi bininj nuye minj mak birribaldjawayi bu nangale nakka, dja birribalkunikeleni, dja wanjh bedda birriburrbuni bu nungka nawu Kawohrnan Rowk bedberre.

¹³ Jesus mey manlod kandidjdjawa dja benwonowong nawu nuyeni bininj, dja mak benwong djenj.

¹⁴ Kuhni wanjh danjbikkah bu Jesus kukbukkarrijin bedberre bininj nawu birrimunkeadjungi nuye yerrekah bu God birrolkkayhweng kore kundowibeh.

Jesus Benewokdanj Peter

John 21:15-19

¹⁵ Kaluk bu birringuneng manme birriyakwong, wanjh Jesus bimarneyimeng nawu Simon Peter, "Simon nawu beywurd nuye John, yiddok ngudda ngaye kanmarnedjare bulkkidj duninj bu ngudda yibendjalyurrrhke nahni bininj?" Peter bimarneyimeng, "Yoh, nawu yiwohrnan. Ngudda yiburrbun bu ngaye marnedjare." Wanjh Jesus bimarneyimeng, "Yibenwon manme nawu ngardduk bininj, dja bedda wanjh yiman kayime mayh kilekileh nawu lambs."

16 Wanjh Jesus biyawoyhmarneyimeng, “Simon nawu beywurd nuye John, yiddok ngudda ngaye kanmarnedjare bulkkidj duninjh?” Peter bimarneyimeng, “Yoh, nawu yiwohrnan. Ngudda yiburrbun bu ngaye marnedjare.” Wanjh Jesus bimarneyimeng, “Yibennahna nawu ngardduk bininj dja bedda yiman kayime mayh nawu sheep ngardduk.”

17 Wanjh Jesus bimarneyimeng nawu Peter, bu kuhni wanjh marnbom danjbikkah bu bimarneyimeng, “Simon nawu beywurd nuye John, yiddok ngudda ngaye kanmarnedjare bulkkidj duninjh?” Bu kuhni wanjh Peter njilngwarreminj bu bimarneyimeng danjbikkah, “Yiddok ngudda kanmarnedjare bulkkidj duninjh?” Wanjh bimarneyimeng Jesus, “Ngudda nawu yiwohrnan, yidjalwernhburrbun yehyeng rowk, dja mak kankangeburrbun bu ngaye marnedjare ngudda.” Wanjh Jesus bimarneyimeng, “Yibenwo manme nawu ngardduk bininj yiman kayime mayh nawu sheep ngardduk.”

18 “Woybukkih djal woybukkih marneyime. Bu ngudda yiyawurrinjni wanjh yimahmaworreni kunmadj bu yidjalrey kore yidjareni. Kaluk bu ngudda yikohbanreminj wanjh nabuyika bininj ngundukkan dja ngunberlkan kore minj yidjare yire.”

19 Bu kuhni Jesus yimeng yolyolmeng bu Peter kaluk karrowenkenh ba bu birriwern bininj kabirriburlume God. Wanjh Jesus bimarneyimeng, “Yimray, wanjh kankadju.” Wanjh bu benebalhwam.

*Jesus Biyolyolmeng Nabuyika Bininj Nuye nawu Bimarnedjareni
John 21:20-25*

20 Jesus dja Peter benebalhrey, wanjh Peter borledmeng dja binang namekbe bininj nawu Jesus bihmarnedjareni benbenemunkekadjungi. Namekbe nadjalkudjiwi bininj nawu bimarnenerrenkenhdanj kuberrekalk nuye Jesus bu birrihnguni kore manme, dja bidjawam, “Yiwohrnan, nangale nanu ngunkukweykan?”

21 Bu Peter binang namekbe bininj, wanjh bimarneyimeng Jesus, “Yiwohrnan, nahnai baleh kab kabimarnekurduyimerran nuye?”

22 Jesus bimarneyimeng Peter, “Bonj, yibawo. Bu ngaye ngadjareni-wirrinj bu nungka yimankek kadjaldarrkiddi kaluk yerrehkah ngamyawoyhdurdeng, dja kunukka minj ngudda ke. Dja ngudda yimray kandjalmunkekadju ngaye munguyh.”

23 Kaluk birribuyika nawu bininj nuyeni Jesus birribekhang bu Jesus wokdanj, wanjh bedda birriyimi kunubewu namekbe bininj minj karrowen. Dja bedda birriwokmidjbom. Jesus minj yimeninj bu nungka kadjaldarrkiddi kaluk bu Jesus kamdurdeng. Dja kuhni bu Jesus djalyimeng, “Bu ngaye ngamarnedjare kadjaldarrkiddi kaluk yerrehkah ngamyawoyhdurdeng, dja kunukka minj ngudda ke.”

24 Nahni wanjh bininj nadjalkudjiwi nawu kayolyolme kore kunwoybuk nang. Dja warridj nungka bimbom kuninjku rowk kunwok. Wanjh ngad ngarriburrbun nungka bu djal kunwoybuk kahmulewan.

25 Jesus yimihyimi kundjalwern duninjh bu kuninjku djourra kore minj bimbuyindangimeninj. Bu nangale bininj bimbuyi rowk kore Jesus kurduhkurduyimi wanjh kundjalwern dunindh, kaluk kunukka wardi nawernniwirrinj djourra bu kuninjku kondah kunred minj karmeninj!

Acts

Bu Njalekenh Luke Bimbom Nahni Djurra

Acts 1:1-5

¹ Ngaye nawu Luke, dja ngabimbom nahni djurra ngudda ke nawu Theophilus. Nawu kerrngehenkheni ngabimbom djurra nayungkihni kore Jesus kurduhkurduyimi dja benhbukkabukkanikenh bedberre nawu bininj.

² Ngaye ngabimbom rowk bu Jesuskenh kore dedjingmey dja kore nungka yiburnbomkenh wanjh yerre kunu Ngabbard biwelengdurndiweng kore kaddum heaven. Bu balhwirleni durndi kaddum nungka benbukkabukkani apostles nuye nawu bendjarrngbom. Nawu Namalngmakkaykenh benedjarrkdi Jesus bu benbengdayhkeng.

³ Kaluk bu Jesus doweng yawoyhmimbini, wanjh nawu apostles bedda birrinani bu nungka kunwerhkah benmarnekubbukkarreni kore birridjarrkrey kunkodjke forty kunbarnangarra ngarre. Wanjh bedda birrinani kore kurduhkurduyimi kunwern, wanjh birriburrbuni bu woybukkih duninj yawoyhdarrkidminj. Dja mak nungka benhmarnemulewam bu God kawohrnanken rowk.

⁴ Kunkudjihkenh bu birridjarrknguni manme, wanjh nungka benmarneyimeng bedberre, "Yuwn bu ngurribolkbawon Jerusalem. Dja ngurrimadbu nawu Ngabbard ngunberrebom ngudberre kore kerrngehenkhen ngamulewani ngudberre.

⁵ Nawu John benkukdjuhkeyi kukkuwi nawu bininj, kaluk bu kunkodjke-bubuyika ngurrimadbun, wanjh kaluk Ngabbard yiman ngunkodjdjuhke ngudberre Namalngmakkaykenh dorreng."

Jesus Djalwam Kore Kaddum Heaven

Acts 1:6-11

⁶ Nawu apostles birrimirndemornnamerrinj wanjh birridjawam Jesus, wanjh birriyimeng, "Nawu Yiwohrn, bolkkime yiddok ngad kanya-woyhmarnbun ngadberre bininj ngarriwarlahkenh nawu Israel ngankeb-mawahmeng ba bu ngarriyawoyhwohrnanken kondanjkuwu kunred?"

⁷ Wanjh Jesus benwokmey dja benmarneyimeng bedberre, "God nawu Kornkumo wanjh nakka nadjalkudji duninj bu ngayekah, kondah kore Jerusalem, dja mak kubolkwarlah ngarre Judea, dja mak kunred Samaria, dja mak kudjalbolkwarlahkenh rowk kore kondah kurorre."

⁸ Dja nawu Namalngmakkaykenh kamre kangimen kore ngudda ngudberre, wanjh nungka ngunwon kundulkarre ngudberre ba bu ngurrbenmarnemulewan woybukkih duninj bu ngayekah, kondah kore Jerusalem, dja mak kubolkwarlah ngarre Judea, dja mak kunred Samaria, dja mak kudjalbolkwarlahkenh rowk kore kondah kurorre."

⁹ Bu kuhni balyimi bedberre, bedda wanjh birridjalngan bu wayhmi-wayhmi rengehrey kaddum wanjh manbu kunkodjngol bikukbalabalmeng.

¹⁰ Wanjh bu bedda birridjalngolnani bu Jesus wam kaddum, wanjh kundjalmekbe rerrih benemdjanginj bininj bokenh, benemdjanginj kore birrihdi. Kaluk benemdjongbuyindi nawu madjbele duninj.

¹¹ Wanjh benemekbe bininj bindimarneyimeng, beneyimeng, "Bininj, ngudda nawu Galileebeh, njalekah ngudda ngurridjaldi dja ngurringolnan kaddum? Ngudda ngurrinang Jesus ngunbawong bu God bikang. Kaluk

nungka kamyawoyhdurdeng kundjalkarewi kadjalrohrok bu yiman ngurrinang wam kaddum kore heaven.”

*Nawu Apostle Birridurndi Kore Jerusalem Dja Birridjaldi Yiwarrudj
Acts 1:12-14*

¹² Kuhni wanjh yimerranj kore mandulum dulkmirnderri manbu olive kundulk. Kaluk minj djarrehniwirrinj kore kunred Jerusalem*. Wanjh nawu apostles birribolkbawong dja birridurnderrinj kore Jerusalem.

¹³ Wanjh bu birribalhbemeng kore kunrurrk mirndewernni, wanjh birribaldjalwam birringimeng manbu kaddum rurrkdi kore birrihyoy. Wanjh naninjnanu bininj bedda birringeyyoy Peter, John, James, Andrew, Philip, Thomas, Bartholomew, Matthew, James nawu beywurd nuye Alphaeus, Simon nawu benwidnani Romebeh bininj, dja Judas nawu beywurd nuye James. Bedda wanjh birridjarrkdi.

¹⁴ Wanjh bedda munguyh birrimirndemornnamerreni bu munguyh birridjaldi yiwarrudj, dja mak birribuyika birridjarrkdi. Mary ngalbadjan nuye Jesus dja birribuyika daluk, dja mak nawu birridanginj Jesus birridjarrkdi.

*Nawu Apostles Birridjarrngbom Matthias Bu Kabirriraworrenkenh
Acts 1:15-26*

¹⁵⁻¹⁶ Kaluk bu bedda birrimirndemornnamerrinj nawu birriwoybukwoni Jesus†, wanjh birriyolyolmi. Kaluk 120 bininj kumekbe birridi dja birriyolyolmi. Wanjh Peter dolkkang benmarneyimeng, “Ngudda nawu karriangerrinj, kandibekka. Kuninjkuwanj David bimbom kore djurra, bu Namalngmakaykenh biyingkihmulewani Judas nawu bikukweykang Jesus bu bininj birridarrkidmey. Wanjh God djareminj bu kumyimerranj bolkkime.

¹⁷ Bu nungka wanjh ngarridjarrkdurrkmirri dja mak ngarriraworreni.”

¹⁸ (Ngurriburrbun bu Judas birrikarremulewam kunwardde bu kuninjkuwu kunwarre kurduyimeng. Wanjh nungka kang namekbe kunwardde bolkbayahmeng kabbal nuye. Wanjh nungka djalkukmankang doweng kumekbe kore kunbolk nuye, dja kukbarrhbarrhmeng bu njambemerrinj rowk.

¹⁹ Birridjalwern bininj nawu birrihni Jerusalem wanjh birriwobek kang bu bimarnekurduyimerranj nawu Judas, wanjh kumekbe kunred birribolkngeykurrmeng Akeldama. Kumekbe kunwok bedberre kayime, “Kabolkkurlbayo”).

²⁰ Wanjh Peter yawoyhwokdi, yimeng, “Kore djurra nawu Psalms kangeyyo, kore bimbuyindanj wanjh yimeng nuye, ‘Kumekbe kunred nuye, wanjh bolkwarremen, Dja minj nangale mak kani.’ [Psalm 69:25] Dja mak kubadbuyika bimbuyindanj kore yimeng nuye, ‘Wanj nabuyika bininj kabimarnebolkmang kore nungka wohrnanikenh.’” [Psalm 109:8]

²¹⁻²² “Mah wanjh, kamak bu karringalke nawu nakerrnge bininj kamngimen ngarriraworren ngad nawu ngarrimulewan kore kunwoybuk bu Jesuskenh yawoyhdolkkang kumidjbeh. Ngarridjare bininj nawu ngarridjarrknani bu yimi Jesus nawu kawohrnan kankani ngadberre, bu dedjingmey kerngehkenh kore John dedjingmey benkodjdjuhkeyi bininj, djahdjawam kalukburrk God bidurndiweng Jesus kore heaven. Dja nangale kab bininj karringalke?” Wanjh kuninjkuwu Peter benmarneyimeng rowk.

* **1:12** Nakudji kilometre. Nawu Jews birriyimi, “yuwn bu djarreh, ba bu yidjalre kurrenge bu kunbarnangarra manbu Sabbath”. † **1:15-16** Greek kunwok kayime, “nawu birridangerrinj”.

²³ Wanjh bedda bindimarnedjareni bininj bokenh nawu Joseph Barsabas, dja kunbuyika kunngey ngeyyoy Justus. Dja nawu nabuyika bininj ngeyyoy Matthias.

²⁴⁻²⁵ Wanjh birridjaldanginj yiwarrudj, birriyimeng, “Nawu Yiwohrnan Rowk, ngudda kankangeburrbun rowk ngadberre nawu ngarriwarlahkenh bininj. Nawu Judas warnyakmulewarrinj kore durrrkmidurrrk-mirri ke, dja durndi kore nungan bolkdjareminj. Dja wanjh naninjnanu bininj benebokenh, kanbukka ngadberre nawu baleh nanu yimarnedjare yikurme bu kayimerran nawu apostle, dja karrurrrkmirri ke.”

²⁶ Wanjh bedda bindibebbehngeybimbom berrewoneng kore djurra bokenh, dja bindimarnekurrmeng djurra kore birridahkendoy, wanjh nakudji djurra birribekngeng, dja birringeyngalkeng nawu Matthias. Wanjh nungka yimerranj apostle birriraworrinj birribuyika eleven bininj nawu apostle.

2

Bu Namalngmakkaykenh Kumwam

Acts 2:1-13

¹ Bu kunbarnangarra Pentecost ngarre yimerranj, bu kundjalmekbeni, wanjh Jesus nuye binihbininj birridjalmirndemornnamerrinj kore kubolkkudji.

² Wanjh kundjalmekbe yerreh bedda birribekngang yiman kunmayorrrkimuk kumwam kore kunngolbeh, wanjh kumdulkarrewokdi, dja birribekngang rowk kore birrihni kururrrk.

³ Wanjh birrinang yiman yerreh manbirluworldjen kumwam dja benbebbehmarnedi bedberre kore birridi.

⁴ Wanjh bedda birrikukbarlmikendanj Namalngmakkaykenh dja birridedjngmey bu birriwokdanginj kundjenbubuyika, bu Namalngmakkaykenh nungan benbebbehmarnbom.

⁵ Bu kuhni bolkyimi, wanjh nawu birriwern Jews bininj birridi kore Jerusalem, nawu birrimdolkngang kubolkbubuyikabeh rowk. Birrimekbe bininj wanjh birriwernwoybukwoni God.

⁶ Bu bedda warridj bindibekngang nawu Jesus bininj birriwokdi, wanjh bindimarnemirndemornnamerrinj kumekbe kore bedda. Wanjh bindibebbehbekkani bu birriwokdanginj kunwokbubuyikabeh bedberre.

⁷ Wanjh bedda birridjalkangebarrabarrhmeng dja bedda birridjawar-
reni, birrimarneyimerrinj, “Ngurrbenna. Yiddok nahni bininj nawu kabirriwokdi kundjenbubuyika wanjh nawu birrikang Galileebeh?”

⁸⁻¹¹ Dja njalekah karrbenbebbehbekkan kabirriwokdi kore kadberre kunwokbubuyika bu ngad karribebbehwokdi ngad nawu ngarribolkbubuyikabeh? Ngad yikahwi karrimbebbehdolkngang kubolkbubuyikabeh, kore kabolkngeyyo Parthia, dja mak Media, dja Elam, dja mak kore Mesopotamiabeh, Judeabeh, Cappadociabeh, dja kubolkwernkenh, yiman Pontus, dja Asia, dja Phrygia, dja Pamphylia, dja kubolkkimuk Egypt, dja mak Libya ngaleng ngarre darnkih Cyrene. Yikahwi warridj ngad Romebeh nawu ngarridangeni Jews dja mak birribuyika bininj nawu birrimarnburrinj bu birriyimerranj Jews. Dja mak yikahwi karrimdolkngang kore kunred Cretebeh dja mak Arabiabeh. Wanjh kunu ngad wanjh karribebbehwokbubuyika rowk.

Kab njalekenh ngad karrbendjalbekkabekkan birrimekbe bininj bu kabirriwokdi kunwokbubuyika, kore kabirriyolyolme bu God kurduyimeg kundjalmak duninj kadberre bu kundulkarre dorrengh nuye?”

¹² Bedda wanjh birrikangebarrhmeng bu minj njale mak birriburrrbuyinj. Bedda birridjawarreni, “Kunu baleh kahmenmenyime bu bolkkime djalyimerranj kadberre?”

¹³ Dja yikahwi bedberre wanjh bindimalelmangi nawu apostles, dja birriyimeng, “Bedda birribonguneng kunwern manbu wine manbobang!”

Peter Benmarneyolyomeng Bedberre Nawu Bindimarnemorramerrinj Jesus Nuye Bininj

Acts 2:14-36

¹⁴ Wanjh Peter dja birribuyika eleven nawu apostles birridjarrkdolkkarinj. Nungka wanjh wernhwokdanginj bu benmarneyimeng nawu birrimirdewern bininj, wanjh yimeng, “Ngudda nawu karridabborrbolk nawu karridanginj Jews bininj, dja ngurriwern nawu ngurriyo kore Jerusalem, wanjh kandibekkekka ngaye bu ngayolyolme bu bengdayhke ngudberre bu kuninjkukenh.

¹⁵ Nahni bininj minj kabirriworromkan kore ngudda yimankek ngurriburrbun. Dja kuhni kadjaldungnelk yerreh!

¹⁶ Burrkyak! Kab ngudda ngurriburrrbu kore nawu prophet ngeyyoy Joel korroko bimbom, dja wanjh yolyolmeng kuninjkuu yimerranj bu bolkkime kondanjkuu kadberre. Kuhni bu bimbom,

¹⁷ God yimeng, “Kaluk yerrekah bu kayimerran kore kayiburnburnkenh, ngaye kaluk ngabendjalwon Namalngmakkaykenh ngardduk kore bininj birridjalwern rowk. Nawu ngurribenbornan ngudberre, narahrangem dja ngaldahdaluk, wanjh kabirriwokdi yiman nawu prophets dja ngandimulewan ngaye nawu God. Dja ngudberre nawu yawuhyawurrij, kaluk kabirriwaralnan kore ngaye ngabenbukkabukkan bedberre. Warridj nawu kohbakohbanj bininj ngudberre wanjh kabirikodjbukirrire kore ngaye ngabenbukkabukkan bedberre.

¹⁸ Woybukkih bu kunmekbe ngaye wanjh ngabenwon Namalngmakkaykenh ngardduk nawu ngandimarnedurrrmirri, bininj dja daluk, wanjh bedda kabirriweykan kore ngabenwon ngardduk kunwok ba ngandimulewan ngaye yiman nawu prophets.

¹⁹ Kaluk birriwarlahkenh bininj rowk ngandikurdunan kore ngaye ngakurduyime kundulkarre dorrengh kore kunngol dja mak kore kurorre. Wanjh bedda kunu kabirrinan kunkurlba, dja mak kunak, dja kundolngburlerrih kunwern kare bedberre.

²⁰ Wanjh manbu kundung kaburlerran, dja nawu dird nakka kamimkurlbakurlbahmen yiman kayime kunkurlba duninj. Kaluk kayimerran nawu Kawohrnan Rowk nuye kunbarnangarra ngarre, bu kunbarnangarrakukenmen kunbarnangarramak duninj.

²¹ Bu kunmekbe ngakurduyime wanjh nangale nawu bininj ngankayhme bu ngandjawankenh ngaye nawu Ngawohrnan Rowk, wanjh nakka ngangehke.” Kuhni bu God yimeng.” [Joel 2:28-32]

²² “Kuhni kunwok bu Joel bimbom. Mah wanjh kandibekka ngudda bininj nawu Israel ngunkebmawahmeng bu ngahmulewan ngudberre. Ngudda ngurribengan bininj nawu kumdollkang kore kunred Nazareth-beh nawu kangeyyo Jesus. God biwong kundulkarre nuye ba bu ngunmarnekurduyimeng kunmak ngudberre kunwern kore ngurrikurdunang dja ngurrikangebarrhmi. Dja mak ngurriwohburrbom bu God nungka wanjh bimakwam.

²³ Dja ngudda ngurridjalbom namekbe nawu bininj. Ngudda ngurribenwong bininj nawu minj Jews* bu birrikukbarnnameng dja birribiddundu-

* 2:23 Greek kunwok kayime, “bininj nawu minj kabirrikarreme mankarre”.

lubom kore cross kundulk. God yingkihburrbom dja yingkihkarremarnbom bu kuninjkuu ngudda ngurrimarnekurduyime nuye nawu Jesus.

²⁴ Kaluk God birrolkkayhweng Jesus kore kundowikenh, bibebkeng kore djakbekkangkeng dja kundowikenh, wanjh kumekbekenh kunu kundowikenh minj bibongkarrmeninj nawu Jesus."

²⁵ "Dja mak kuhni David benmarneyolyomeng bu Jesuskenh, kore yimeng, 'Ngaye munguyh ngadjalnani nawu Kawohrn Rowk kore kumirrk ngardduk. Nungka ngandarnhmededi kore kunbidkukun ngardduk, ba bu minj nangale nganwarrewon.

²⁶ Wanjh kumekbekenh ngaye ngakangemarrhmarrmen, dja mak ngayolyolme bu ngadjalnjlngmak nuye. Ngaye nawu djalbininj, dja ngadjalburrbun munguyh bu God nganmarnekurduyime kore kunmak.

²⁷ Ngudda nawu God, ngaburrbun ngudda minj kanbawon bu ngamalngdowe. Dja mak minj kanbawon bu ngakuknudmen kore kumidj. Dja ngaye wanjh ngadjalkudji ngadjalmarnedurrkimirri ngudda ke.

²⁸ Ngudda wanjh kanbukkabukkang mandjad duninj ba bu ngadjaldarrkiddi munguyh. Ngaye ngarrdjarrkdi ngudda dja kandjalnjilngmarnbun dja ngahmarrmarr munguyh.' Kuninjkuu bu David bimbom." [Psalm 16:8-11]

²⁹ "Nawu karridangerrinj, ngaye wanjh marneyime woybukkih duninj bu naninjnanu David nawu kankebmawahmeng kadberre, nungka wanjh doweng, kakukdudjindi kondanjkuu, dja mak karridjalmidjkarreme bolkkime.

³⁰ Kaluk David nungka wanjh prophetni, wanjh kumekbe kunu nungka bengkang bu God biwokrayekwong dja bimarnewokkurrmerrinj bu kaluk kabimarnbun nakudji nawu David mawahmawah nuye bu kayimerran king bu kadjalrohrok yiman nungka David nungan yimiyimi.

³¹ David yingkihburrbom korroko bu yerrekah Christ[†] kayawoyhdolkan. Kunmekbe kunu nungka biyingkihyolyomeng, bu yimeng God minj bibawoyi nawu Christ kore kangedowimeninj, dja minj mak bikukbawoyi kore kumidj, dja minj bibawoyi bu kuknudmeninj. [Psalm 16:10]

³² Wanjh nahninjanu Jesus Wanjh God birrolkkayhweng kore dowengbeh dja wanjh bolkkime nungka kahdarrkid. Ngad wanjh ngarridarrkidnang rowk dja kunu ngarriburrbun bu djalwoybukkih duninj yimerranj nuye.

³³ Dja mak God biwayhkeng nahninjanu Jesus kaddum duninj dja bikurrmeng kukun nuye kore heaven. God nawu kornkumo wanjh biwong Namalngmakkaykenh nawu Jesus wokkurrmerrinj bu nungka kanwon kadberre. Dja bolkkime kuninjkuu ngurrihan dja ngurrihbekkabekkan kore kakurduyimerran, wanjh kunukka ngadmanwali Jesus kanwon nuye Namalngmakkaykenh."

³⁴⁻³⁵ "Ngurribekka. Nahni David minj God biwayhkemeninj kore heaven bikurmeninj. Dja ngaleng David yimeng, 'Nawu Kawohrn Rowk bimarneyimeng nabuyika nawu nganmarnewohrn, "Yimray, yiyerrka kukun ngardduk, dja kanmadbu ngaye kaluk ngabenkurme nawu ngundjalwernhwhidnan kore kurrenge ke." ' [Psalm 110:1] Kuhni bu David yimeng."

³⁶ "Mah, wanjh kandibekkabekka, ngudda ngurriwarlahkenh bininj nawu Israel ngunkebmawahmeng! Ngudda wanjh ngurribiddundulubom nahni bininj Jesus kore cross kundulk. Wanjh bolkkime ngudda ngurridjalwernhburrbu bu God bimarnbom Jesus bu kawohrn rowk dja mak

[†] 2:31 Greek kunwok kayime, "Messiah".

nungka nawu Christ duninjh.” Kuhni wanjh Peter benhmarneyimeng bedberre.

*Nawu Bininj Birriwern Wanjh Birrikangedjaremulewarrinj
Acts 2:37-41*

³⁷ Bu birriwokbekkang kore Peter yimeng, wanjh birridjalwernhkange-warrewarreminj, wanjh kunu bindimarneyimeng Peter dja mak birribuyika nawu apostles, wanjh birriyimeng, “Aba! Ngudda nawu karridangerrinj, baleh kab ngad kunu ngarikurduyime?”

³⁸ Wanjh Peter benwokmey benmarneyimeng bedberre, “Ngudda ngurriwarlahkenh bininj rowk, wanjh ngurrikangeboredmen bu ngurriwarnyakkulewarren, dja mak ngurrikodjdjuhmen kore kungey nuye Jesus Christ, ba kunu God ngunmarnebenngmidjan ngudberre kunwarre. Wanjh kunu ngundjalwon ngudberre Namalngmakkaykenh nuye bu djalburudjang.

³⁹ God nguningkihberrebbom ngudberre, dja mak wurdwurd dorrengh ngudberre, dja mak nawu birriwarlahkenh bininj bedberre nawu djarreh duninjh kabirrihni. God nawu Kawohrn Rowk kadberre kanmarnewokkurrmerrinj ngad bininj rowk nawu nungka kankayhme.” Kuhni bu Peter benbengdayhkeng.

⁴⁰ Dja mak Peter benwernhwokrayekwoni bu kunbubuyika kunwok bu benhmarneyimi bedberre. Wanjh bendjalmarrkdjawan, yimeng, “God nungka wanjh kabenbun bininj nawu bolkkime kunwarre kabirriyime, dja kuhni wanjh ngurringekerrimen!”

⁴¹ Birriwern bininj birriwokmey kore Peter benmarneyimeng, wanjh nakka birrikodjdjuhmeng. Kaluk kumekbe kunbarnangarra, wanjh birridjalwern 3000 bininj birrimirnderaworrinj birribuyika nawu ngokko birriwoybukwoni Jesus.

*Kuhni Bedda Birrikurduyimi Nawu Birriwoybukwoni Jesus
Acts 2:42-47*

⁴² Wanjh bedda birridjalborlhmi munguyh kore nawu apostles bindibukkabukkani, dja mak birrimirndemornnamerrinj bu birridjarrknguni manme dorrengh dja birridi yiwarrudj.

⁴³ Nawu apostle bedda birrikurduyimi kunwern kundulkarre dorrengh ba bu birriwern bininj birriburruy God, wanjh birridjalwern bininj birrikangebarrhmeng God nuye.

⁴⁴ Wanjh bininj rowk nawu birriwoybukwoni Jesus birridjarrkdi munguyh dja mak birriweymakni dja birriyikadjurreni yehyeng rowk.

⁴⁵ Dja mak bedda nawu birrikarmikarmi bedberreni yiman kayime kunred, dja mak yehyeng rowk, wanjh kunu bedda birriweykani. Wanjh bedda birribidyikarmmereni. Bininj nawu birrikarmi kunwern wanjh bindiwoni bininj nawu birridjalmarladj.

⁴⁶ Bedda wanjh kunbarnangarra rowk birrimirndemornnamerreni kore kunrurrk manbu Temple kuberrkkah. Dja mak birriyikarreni kore kururk bedberre, bu birrilodbakkeyi buriddi dja birridjarrknguni manme. Bedda wanjh kunwoybuk dorrengh birridjalkangemakni bu birriworreni dja mak birrikuninjilngmakni.

⁴⁷ Dja munguyh birridjalburlumi God, dja nawu birribubuyika bininj bindinani dja bindimakwani. Nawu Kawohrn Rowk wanjh malaywibubuyika rowk bendjalngehkeyi binihbininj dja benkurrmeng kore birrimirnderaworrinj rowk.

3

*Peter Dja John Benemarnbom Bininj Nawu Nabirlni**Acts 3:1-10*

¹ Bu kundungkudjihkenh Peter dja John benewam kore Temple. Kaluk bedda benewam bu wolewolehni bu kumekbe birriwern bininj birrirey munguyh birridi yiwarrudj.

² Kumekbe nakudji bininj ni kore darnkih kururrkdangmayekah manbu Temple ngarre. Kaluk kumekke bolkngeyyoy “Manurrkdangmayemak”. Namekbe bininj birlni bu korrokokenh nungka wurdyawni. Wanjh kumekbe munguyh birrikang dja birrikurmi kore kururrkdangmaye ba bu benwohdjanwohmeninj bininj nawu birringimi kore kuberrkkah manbu Temple.

³ Kaluk bu benbenenang Peter dja John benebalkuyinngimeninj, wanjh nungka benbenewohdjanwohmeng kunwarddekenh.

⁴ Bu Peter dja John benedjalnang nungka, wanjh Peter bimarneyimeng namekbe nabirlni, “Kanbenena ngarrewoneng.”

⁵ Wanjh nawu nabirlni benbenenang djurrud, bu yimankek nungka yimi kunwardde kabenewon.

⁶ Dja Peter bimarneyimeng, “Ngaye minj ngakukkarrme nawu kunwardde, dja ngaleng ngahkarrme kunbuyika nawu ngadjare won. Ngaye djalmarneyime kore kungey nuye Jesus Christ nawu Nazarethbeh, wanjh yirrolkka, yiray!”

⁷ Wanjh Peter bibidmey kunbidkunbeh, dja birrolkkayhweng, wanjh kundjalburrikudji nawu bininj nuye kundenge dja kunmadburn djalmurgrayekminj.

⁸ Nungka dolkkang wanjh danginj nungandeleng, dja djalwohrewohrey. Wanjh birridjarrkwam Peter dja John kore Temple birringimeng kore kuberrkkah. Nungka wohrengehrey, wohkukdoldolkani warridj, dja bidjalkuniburlumi nawu God.

⁹⁻¹⁰ Birriwern bininj birrinani bu rengehrey dja bihburlumi God, kaluk bedda birribengkani namekbe nawu nabirlni bininj ningihni darnkih kore manurrkdangmayemakkaykenh nawu benkukyidjanwohmi kunwardde. Bedda birridjalkukburrnang wanjh birriwernhkangebarrhmeng duninh.

*Peter Benmarneyolyolmeng Bininj Kore Kuberrkkah Ngarre Temple Birrihni**Acts 3:11-26*

¹¹ Nawu namekbe bininj benbeneberlkarrmi Peter dja John bu birrimhdi kore Temple kuberrkkah manbu birrirurrkneybuni Solomon nuyeni verandah. Birriwern bininj bu birriwernhkangebarrhmeng wanjh birrirobmerrinj kore Peter dja John dja namekbe bininj.

¹² Bu Peter bennang wanjh benmarneyimeng, “Ngudda nawu mawah-mawah nuye Israel, njalekah bu ngudda ngurrikangebarrabarrhme? Dja njalekah ngad kandinanghnan ngarrewoneng? Yimankek ngudda ngurriburrbun bu ngadbeh kundulkarre dorreng nganemarnbom naninjnanu bininj, dja mak yimankek ngurriyime bu ngad nganedjalwernmak duninh bininj. Ngad kunu burrkyak duninh. Minj nganekarrme kundulkarre. Dja wanjh marneyime ngudberre.

¹³ God nawu kunkare birrimarneboddangeni Abraham, dja Isaac, dja Jacob, bu nungka wanjh bolkime kuninjku kurduyimeng. Dja ngad nawu kandikebmawahmeng, naninjnanu bedberreni God. Wanjh God kanbukkang ngad nawu bininj karriwarlahkenh rowk bu karriburlumekenh

nadjalkudji Jesus nawu munguyh kabimarnedurrkmirri God. Dja ngudda ngurribidnakenwong nahni nawu Jesus kore birribuyika bininj bu birribom doweng. Pilate nungka djareni bu bidjalbebkemeninj rawinj bu djalburudjang nawu Jesus, dja ngudda wanjh ngurrimarneyimeng Pilate bu ngurridjalwirriheng.”

14 “Jesus namekbe nawu nadjalkudjini God nuye bininj, dja mak nadjalmakni duninj. Dja ngudda ngurriyimeng minj ngurrimarned-jareniwirrinj. Ngudda ngaleng ngurridjawam Pilate bibekbeng ngudberre nabuyika bininj nawu namarndeyini.

15 Nungka wanjh Jesus nadjalkudjini kanhdjalmimbiwon ngad nawu karriwarlahkenh bininj, dja ngudda wanjh ngurridjalbom doweng! Dja kaluk God birrolkkayhweng kore kundowikenh. Ngad wanjh ngarrinang dja ngundihmarneyime bu kore kunwoybuk.”

16 “Ngad ngarridjalwoybukwon namekbe nawu Jesus, wanjh naninjnanu bininj nawu nabirlni makminj kore kundulkarre nuye Jesus, bu ngengeyboim kungey nuye. Ngudda ngurrikukburrbun naninjnanu bininj nawu nabirlni, dja wanjh ngurrikuknan bu murrngraykeminj. Yoh, ngad wanjh ngarridjalwoybukwong dja ngarridi kungey nuye nawu Jesus, wanjh kunmekbekenh kuno God bimarnbom kamak rowk, dja ngudda wanjh ngurrikurdunang.”

17 “Ngudda nawu karridangerrinj, ngaye ngaburrbun bu kunmekbe ngurrimarnekurduyimeng nawu Jesus dja minj ngudda ngurriwernhbur-rkburrbekkayi bu nangale nungka kore ngurrimarnekurduyimeng. Dja mak nawu ngudberre kabirriwohrnawohrn naninj njale mak birriwern-hburrburrbekkayi bu nangale nungka nawu birrimarnekurduyimeng kunwarre.

18 God nungka korroko yingkihwokkurmerrinj nuye bu kuninjkuu bimarnekurduyimerranj. Nungka benwong manekke mankarre nawu birriwarlahkenh prophetni nuye, bu birriyingkihbombom bu nawu Christ nuye kadjakbekkanken kore karrown. Wanjh kuninjkuu God marnbom yimerranj bu kunwoybuk duninj.”

19-20 “Mah wanjh, ngurrikangeboredmen kore God nuye dja ngurrikangedjaremulewarrimen ba bu God kabularrbun rowk kunwarre ngudberre dja ngunkangenjurlike ngudberre, dja mak kabimunkewe Jesus, nawu nungka nadjalkudji God bidjarrngbom bu ngudberre nawu Christ.”

21 “Dja med, Jesus kadjaldi kore heaven, kalukburk bu yerrekah nungan God kamarnbun yehyeng rowk bu kamakmen. God kanmarneyimeng korroko bu kuninjkuukenh kore benmarneyimi nawu prophet birridjal-makni nuye.

22 Ngudda ngurriburrbun kore Moses yimeng ngudberre, bu ker-ngehkenh mulewarrinj biyingkihburrbuni nawu Jesus, dja yimeng, ‘Nawu kawohrn naninj ngudberre God ngunwon nawu prophet yiman karohrok bu ngaye. Kaluk yerrekah wanjh kamre nungka nawu ngurrid-jaljud duninj. Dja wanjh ngurriwokmarrkmang kore ngunhmarneyime ngudberre.

23 Dja nawu nangale bininj minj kabiwokmarrkmang naninjnanu prophet, nakka wanjh kamarnekuklarlmarren nawu God nuye bininj, dja mak kamalngdown.’ Kuhni bu Moses yimeng ngudberre.” [Deuteronomy 18:15-19]

24 “Dja mak nawu Samuel prophetni nawu nayungkihni yolyolmi bu kuninjkuu bolkkime kahyimerranj. Yerre, nawu prophet birribubuyika birribalmulewani kundjalkudjiwi yerreh.

²⁵ Ngudda wanjh ngurriedbo duninj nawu prophet birrimulewani. Dja mak ngudda ngurrimey nawu God benyinkihberrebom nawu mawahmawah ngudberre bu bimarneyimeng Abraham, kore yimeng, 'Kaluk yerrekeh nakudji bininj nawu ngudda yikebmawahme, wanjh nungka kabenmarnekurduyime kundjalma duninj bedberre birriwarlahkenh bininj rowk.' [Genesis 22:18]

²⁶ Bolkkime wanjh God kanwong kadberre naninjnanu Jesus nawu kabimarnedurrkmirri nuye. God ngunmarnemunkeweng ngudda werkk ngudberre, ba bu ngunmarnekurduyime kunmak bu nungka ngunbebbekangeborledke kore kundjalwarre ngurrihkurduyime." Kuninjku rowk wanjh Peter benhmarneyimi bedberre.

4

Nawu Birriwohrnawohrnani Bindiberlmey Peter dja John Acts 4:1-4

¹ Bu Peter dja John bindibalhmarneyolyolmeng kore bininj birrimirnderri, wanjh birribadbuyika bininj nawu birrikihkimuk birrimwam kore bedda. Wanjh yikahwi birrimekbe bininj nawu priestni, dja mak nakudji bininj nawu wohrnani djamun kore Temple ngarre, dja mak yikahwi nawu Sadducees* birringeyyoy.

² Bedda wanjh bindimarnenjlngwarreminj nawu Peter dja John bu bindibukkabukkani dja bindimarneyolyolmi nawu birriwarlahkenh bininj bu yimanek kabirridolkkankenh kumidjbeh bu yiman yimeng Jesus dolkkang kore kumidjbeh.

³ Wanjh bindiberlmey nawu Peter dja John, dja bindikurrmeng kore prison. Kumekbe kurduyimerranj bu balngokdanj, wanjh bindibawong kaluk malahmalaywihi.

⁴ Birriwernkenh nawu bininj bindibekgang Peter dja John bu benehyolyolmi wanjh birriwoybukwong Jesus. Wanjh birridjarrkmirnderaworrij bu birrimarnburrinj birridjalwern 5000 bininj bu birriwoybukwong.

Nawu Birriwohrnawohrnani Bindidjawani Peter Dja John Acts 4:5-12

⁵ Bu malaywibuyikani wanjh nawu birrikihkimuk birriwokmarnburreni kore birrimirndemokendi nawu birriwohrnani, dja mak nawu dabborrabbolk, dja mak nawu bindibukkabukkani mankarre. Wanjh birrimirndemornnamerrinj kumekbe kore Jerusalem.

⁶ Bininj nawu benmarnewohrnani priests, nawu ngeyyoy Annas, nungka dorrengh kumekbe birridjarrkdi, dja mak nawu Caiaphas, dja mak nabuyika John, dja mak Alexander, dja mak birrimirndewernni namud nuye nawu benmarnewohrnani priest. Naninjnanu bedda bininj birridjalmirnderri rowk.

⁷ Bu bedda birrimirndemornnamerrinj, wanjh bindimkang nawu Peter dja John, bindinameng kore kubulkayh, dja bindidjawam, "Kuhni nangale ngunbenewong kundulkarre bu kuhni ngunekurduyimeng? Nangale kunngey nuye ngunehngeybom?"

⁸ Wanjh Peter nungka kukbarlmiyindanj Namalngmakkaykenh dja benmarneyimeng bedberre, "Ngudda nawu ngurribenmarnewohrnawohrnani bininj, dja mak ngudda nawu ngurridabborrabbolk, wanjh kandibekka.

⁹ Njale ngudda ngurriburrun bu kandiwidjawanken? Yiddok ngudda ngurridjare ngurriburrun kunmak bu bidjalmarnekurduyimerranj nawu

* **4:1** Nawu Sadducees minj birriyimi bu bininj kabirriyawoyhmalngdarrkidmen kaluk bu kabirridowe.

nabirlni bininj? Ngudda ngurridjaldjare ngurriburrbun nawu bimarnbom?

¹⁰ Ngad wanjh nganedjare ngudda ngurriwarlahkenh nawu Israel ngunkebmawahmeng bu ngurriburrbun naninjanu bininj nawu ngurrihan bolkkime, nungka wanjh makminj kore kunngey nuye Jesus Christ nawu Nazarethbeh. Nahni kunngey bimarnbom kundulkarre dorrengh. Ngudda wanjh ngurribiddundulubom Jesus kore kundulk cross bu doweng, dja God birrolkkayhweng kore dowengbeh.”

¹¹ “Jesus nungka wanjh yiman kayime kunwardde manbu ngudda ngurriwarlahkenh kore ngurriurrrkmarnbunikenh, wanjh bolkkime nungka marnburrinj yiman kayime manwarddekuken duninj kore kunrurrk kahdi.

¹² Nungka nadjalkudji Jesus wanjh kannghehke kadberre nawu karriwarlahkenh bininj rowk. God minj kanwoyi nabuyika bininj bu karrikayhme nuye kunngey ba bu yimankek kannghehke.” Kuninjku Peter benbengdayhkeng bedberre.

*Nawu Birriwohrnawohnani Bindiwohrayekwong Peter Dja John
Acts 4:13-23*

¹³ Bu kuninjku birribek kang wanjh nawu birriwohrnani bindinang bu Peter dja John minj benekeleniwurrinj. Dja mak bedda nawu birriwohrnani birriburrbuni bu Peter dja John minj benebangmerawinj kore bindikarrebukkabukkayikenh. Kaluk bedda bindidjalmarnekangebarrheng bu bindiwohrayekwong kore benehwokdi. Kaluk yerreh bedda birribalburrbom bu Peter dja John wanjh nakka birridjarrkrengehrey Jesus dorrengh.

¹⁴ Dja nawu birriwohrnawohnani birrinang namekbe bininj nawu nabirlni kumekbe birridjarrkdi wanjh minj mak bindibalyawoyhyolyolmeninj kore kunwarre bindimarneyimeninj nawu Peter dja John.

¹⁵ Dja ngaleng bindidjalbebkeng kuberrkkah bu kabindimadbun bu bedda bedmandeleng birriwohrmarnburreni nawu birriwohrnawohnani.

¹⁶ Wanjh birrimarneyimerrinj, “Baleh kab karbenbenemarnekurduyime berrewoneng? Birriwarlahkenh nawu Jerusalem karrihni wanjh kabirriburrbun rowk bu naninjanu bininj bokenh benekurduyimeng kuninjku bu kundjalmak duninj kore kundulkarre God dorrengh. Wanjh ngad minj mak karbenbenekewkme.

¹⁷ Dja karbenbenewokrayekwo bu minj mak kabeneyawoyhngeyyolyolme Jesus, ba bu minj kunngey nuye kangeywarlahmen kore birriwern bininj.”

¹⁸ Wanjh bindiyawoyhngimiweg Peter dja John, wanjh bindiwohrayekwong bu minj mak kabeneyawoyhngeyyolyolme dja mak minj kabindiyawoyhbukkabukkan kore kunngey nuye Jesus.

¹⁹ Wanjh Peter dja John bindimarneyimeng bedberre, “Baleh kore mandjad ngurriburrbun kore God kadjare? Yiddok ngudda ngundiwohmarrkmang? Kunukka djal burrkyak, dja ngad kunu nganedjalwokmarrkmang God.

²⁰ Minj mak ngad nganengurdme kore nganehmulewan Jesuskenh. Wanjh munguyh nganedjalyolyolme kore nganenani dja nganebekkani.”

²¹ Wanjh nawu birriwohrnawohnani bindiyawoyhwhernwokrayekwong, dja bindibawong bu benebebmeng benewam. Kunmekbekenh kunu bindibawong dja bindimarnekeleminj bininj birriwarlahkenh bu birribur-lumi God kore bindinang Peter dja John benekurduyimeng kunmak.

²² Kaluk namekbe bininj nawu Peter dja John benemdolkkayhweng kore kundulkarre nuye God, wanjh korroko birlni bu forty mandjewk wernwong.

²³ Peter dja John benedolkkang benewam kore berrewoneng bininj birriyngkihdi, dja bindimarnemulewam kunwern rowk kore bindimarneyimeng nawu birriwohrnawohrnani dja mak nawu dabborrabbolk.

Bininj Nawu Birriwoybukwoni Jesus Birridanginj Yiwarrudj

Acts 4:24-31

²⁴ Bu nawu birriwoybukwong Jesus bindiwokbekkang Peter dja John, wanjh birridjalmayalkudjihminj bu birridjaldanginj yiwarrudj kore God. Wanjh bedda birriyimeng bu birridi yiwarrudj, birriyimeng, “Ngudda nawu yidjalkudji Yiwohrn Rowk, dja ngudda nawu yimarnbom kunngol dja mak kurorre, dja mak kurrula dja mak yehyeng rowk, wanjh kanbekka ngadberre.

²⁵ Ngudda korroko kanmarneyimeng bu kuninjkuu bolkkime kamarnekurduyimerran ngadberre. Ngudda ke Namalngmakkaykenh biy-ingkihmarneyimeng David nawu ngunmarnedurrkmirri nawu ngankebmawahmeng ngadberre. Wanjh nungka bimbom kore Namalngmakkaykenh bimarneyimeng dja yimeng, ‘Njalekenh birriwern bininj nawu minj Jews kabirridjalyiddung? Dja mak njalekenh nawu birriwarlahkenh bininj kabirrikarremarnbun bu mankarreburudjang?

²⁶ Kings nawu birrikang birribolkbubuyikabeh kondah kurorre, wanjh kabirriyngkihmarnburren bu kabirridjalwirrihme God. Dja mak nawu kabirriwohrnawohrnani kabirrimirnderaworren bu kabindibunkenh God nawu kawohrnani rowk dja nuye nawu Christ.’† [Psalm 2:1-2]

²⁷ Kuninjkuu wanjh David yimeng kore bimbom. Wanjh bolkkime woybukkij djalyimerranj. King Herod dja mak Pontius Pilate, dja mak bininj nawu minj Jews wanjh birridjalmirnderaworrinj rowk bininj nawu Israel benkebmawahmeng kondah kore Jerusalem, wanjh birrikarremarnburrinj dja birribom Jesus. Nakka wanjh ngunmarnedurrkmirri kore kundjalmak duninj ngudda ke, dja mak yimarnbom bu ngudda ke Christ.

²⁸ Bu kuhni birrikurduyimeng, bedda birridjalkurduyimeng kore ngudda ngokko yiyingkihkarremarnbom, ngudda nawu yidjalkarme kundulkarre rowk.

²⁹ Yina nawu Yiwohrnani, bu bolkkime yimanek bedda kabirridjare ngandikelehme ngadberre nawu ngundimarnedurrkmirri ngudda. Kankangemarnbu ba bu minj ngarrikele bu ngarriweykan kunwok ke. Warridj kanbidiyikarmen ngadberre ba bu ngarrikangebuk.

³⁰ Dja kanwon ngadberre kundulkarre ke, ba bu ngarridjalkurduyime kunwern kore kunngey nuye Jesus nawu namakkaykenh ngundjalmarne-durrkmirri ngudda yidjalkudji ke. Kuhni bu ngarrbenmarnbun nawu kabirridulkkihyo, kore ngarikurduyime kundulkarre ke dorrengh ba bu bininj birriwern kabirrinan ngudda ke dja kabirrikangebarrhme dja ngundidjalburlume.” Kuhni birriyimeng bu birridi yiwarrudj.

³¹ Bu birriyakwong birridi yiwarrudj, kumekbe kore kunrurrk birrihni wanjh djalbolkrokarakani. Wanjh kunu bedda benyawoyhkukbarikeng Namalngmakkaykenh wanjh birridjalmulewani God nuye kunwok bu minj birrikeleniwirrinj.

Bininj Nawu Birriwoybukwoni Jesus Birriyikadjurreni Yehyeng Rowk

Acts 4:32-37

† 4:26 Christ kangeyrohrok, “nawu Messiah” dja nahni bokenh kunngey kamenyime, “nawu God bikodjdjuhkgeng”.

³² Bedda birridjalmirndewernkenh bininj nawu birriwoybukwoni Jesus, wanjh bedda birridjalmayalikudjini dja birridjalmarrkkudjihni. Minj nangale bininj warllkayi yehyeng nawu karmmikarmi nuye, dja birridjalbebbeworreni rowk.

³³ Nawu apostle birrikarmi kundulkarre kunkimuk kore bindimarneyimi nawu bininj bu djalwoybukkihni duninh Jesus nawu Kawohnan Rowk kumyawoyhdolkang kore kumidjbeh. Dja God bendjalmarnekurduyimeng kunmak duninh bedberre nawu birriwoybukwoni.

³⁴⁻³⁵ Birrinahnarrinj bu birriworreni nawu yehyeng rowk birrikarmi. Nawu nangale yiman karmi kunrurk dja mak kunred, wanjh weykani bu kunwardde wanjh benwoni nawu apostle, wanjh bedda bindibalwoniwoni nawu bininj birridjareni njalehnjale.

³⁶ Kunmekbe nakudji nawu birridjarrkwoybukwoni Jesus wanjh nungka ngeyyoy Joseph. Dja mak nawu apostle birribadngeybom Barnabas. Kaluk kumekbe kunngay kayime kabenbengyolyolmekenh. Nungka wanjh Levi bikebmawahmeng, dja kumdolkang kore kunbolk Cyprus.

³⁷ Wanjh nungka karmi kunred, bu bolkweykang, mey kunwardde dja benkukdadjuj nawu apostles ba bu bindiwoni bininj nawu minj njale birrikarremeninj.

5

Ananias dja Sapphira Benedjarrkdoweng

Acts 5:1-11

¹⁻² Nawu nabadbuyika bininj ni, nawu ngeyyoy Ananias, dja ngalbininj kobeng nuye ngeyyoy Sapphira. Bedda wanjh birridjarrkdi nawu yiwarrudj bedberreni bininj. Kaluk bedda kunred benekarmi bu benebolkweykang wanjh benemey nawu kunwardde. Wanjh Ananias wam yikahwi kunwardde benkukwong nawu apostle, dja mak yikahwi kukwarllkang nungan nuyeni. Kaluk ngalbininj kobeng burrbuni korroko bu benewokmarnburrinj.

³ Bu Ananias benkukwong manbu kunwardde, wanjh Peter bimarneyimeng, "Ananias, njalekenh bu ngudda yibawong Namarnde nawu Satan bu ngundjalmarnedurrkmirranginj bu yikoweng nawu Namalng-makkaykenh kore yikukwarllkang nawu kunwardde.

⁴ Bu kerngehenh ngudda yibolkkarmi, wanjh kunukka keni. Wanjh kunukka yidjalkukkarrmeninj nawu kunwarddekenh. Dja njalekenh mak kuhni yikurduyimeng? Ngudda minj kankowemeninj ngad nawu djal bininj, dja ngaleng ngudda wanjh yidjalkoweng God."

⁵ Bu kuninjkuwu Ananias bibek kang Peter yimeng, wanjh nungka djalkukwarrhmeng, bu ngolekdadjimeng doweng. Wanjh birriwern bininj birriwobek kang dja birrikeleminj duninh.

⁶ Yikahwi nawu yawuhyawurrinj bininj, birrimdolkang dja birrikukdukkang, birringorrrang kore kuberrk, wanjh birrikukudji.

⁷ Kalukburrrk wurd bu yerrekah wanjh ngalbininj kobeng nuye kumbad-bebmeng dja kumngimeng, kaluk minj burrbuyinj bu baleh kurduyimeranj nuye nawu nabininj kobeng ngalengngarre.

⁸ Peter bimarneyimeng, "Yiddok djalbonjni nanihnjanu kunwardde nadjalayahwurdni bu kunredkenh birribayahmeng dja ngundikukwong?" Wanjh Sapphira biwokmey Peter, yimeng, "Yoh, namekbeni nganed-jalkukkarmi."

⁹ Wanjh kunu Peter bimarneyimeng, "Njalekenh bu ngudda dja nabininj kobeng ke ngunewokmarnburrinj bu ngunerohromeng ngunedjurrkang

Namalngmakkaykenh nuye nawu Kawohrnan? Wanjh yibenna naninjananu bininj kabirrihni kuberrkkah, nawu birrikukdudji nabininjkobeng ke, wanjh bolkkime yinganwali bu ngundikukkan ngundikukdudjeng.”

¹⁰ Wanjh kundjalmekbe kundjalburrikudji, Sapphira djalkukwarrhmeng kore kurrenge nuye Peter dja wanjh ngolekdadjmeng doweng. Wanjh birrimekbe yawurrinj birrimngimeng birrikuknang bu doweng, wanjh birrikukkang kuberrk, dja birrikukdudji kore nabininjkobeng kungurrid nuye.

¹¹ Wanjh birridjalmirndewern bininj nawu birriwoybukwoni Jesus wanjh bedda birrikeleminj, dja mak birribadbubuyika bininj birridjarrkkeleminj rowk bu birriwobekkkang.

*God Bendjalmarnedurrkmirri Kore Apostles Bu Kundulkarre Nuye
Acts 5:12-16*

¹² Nawu apostles birrikurduyimi kunwern kundulkarre dorreng ba bu bininj birriburribuyi God. Dja nawu birriwoybukwoni wanjh munguyh birrimirndemornnamerreni kore Solomon nuyeni kuberrkkah ngarre Temple, dja mak birrimayalikusdijhni.

¹³ Wanjh birriwern bininj bindimarneyimi bu bindimakwani nawu birriwoybukwoni Jesus. Dja yikahwi birriwern bininj minj birridjareni-wirrinj bu birriaworrimeninj, dja bedda wanjh birrikeleni.

¹⁴ Wanjh birridjalwern nawu birribuyika bininj dja mak daluk wanjh birridjalwoybukwoni nawu Kawohrnan, dja bedda kunu birribalmirnderaworreni nawu birriyingkihwoybukwoni.

¹⁵ Birriwern bininj bu bindikurdunang kore nawu apostles birrikurduyimi, wanjh bindimkani birridulkkidulkkihni bininj dja bindikurrmeng kore kuberrkkah manbolh birrikeyoy kunmadj bedberre ba bu Peter kahre darnkih dja kunubewu kawoyikmankan yikahwi bedberre bininj nawu kabirridulkkihyo.

¹⁶ Wanjh birridjalwernmirndewern bininj nawu birrimdolkarrinj kubolkkilehkihbeh darnkih Jerusalem, dja birringimeng kore Jerusalem bu bindimkani nawu birridoweni kundjak dja mak nawu namalngwarre birrikarmi. Wanjh kunu bedda birridjalmakminj rowk.

*Angel Benbekkeng Nawu Apostles Kore Prisonbeh
Acts 5:17-24*

¹⁷ Wanjh priest nawu wernhwohnrani dja mak nuye bininj nawu birringeyyoy Sadducees, wanjh bindidjalnjirrkkeyi duninj nawu apostles.

¹⁸ Wanjh bindiberlmey dja bindikurrmeng kore birriwarre bininj birriyingkihni kore kururrk prison.

¹⁹ Kaluk bu kukakni angel nuye nawu Kawohrnan Rowk kumwam benmarnedangmarrhmey bedberre kore birriurrrkkendi prison.

²⁰ Wanjh nawu angel benmarneyimeng, “Ngurriray ngurridangimen kore kuberrkkah ngarre Temple dja ngurribenmarneyimen bininj nawu birriwernkenh kore kunwok rowk manbu kundarrkidkerrngehenh.”

²¹ Wanjh nawu apostle birribekkkang namekbe angel, wanjh birriwokmarrkmey dja birriwam kore kuberrkkah ngarre Temple. Kaluk djarreh kumkabelni, wanjh bedda birridedjingmey bu bindibukkabukkani.

Wanjh nawu priest wernhwohnrani bedberre dja mak bininj nawu birridjarrkrey wanjh birrimbebmeng kore birrimirndemornnamerrijn kerrngehenhni kore bedberre kunurrk. Wanjh bindikayhmeng rowk

nawu birriwohrnani dja nawu mak birrikukenni dabborrabbolk nawu Israel benkebmawahmeng.* Wanjh bindimunkeweng nawu bedberre bininj bu kabindibebke nawu apostles kore prisonbeh bindimurndiwemeninj kore nawu birrikihkimuk birrihni ba bu kabindidjuhunkenh. Dja mak birriburrbuni bu yimanke birrihdjaldi kore prison.

²² Wanjh nawu bininj birriwam kore prison dja minj bindingalkemeninj nawu apostles. Wanjh kunu birrimyawoyhdurndi kore dabborrabbolk nawu birrihwohrnani dja bindimarnemulewam.

²³ Wanjh birriyimeng, "Manbu prison dangballmikendi kore birridangrayekwong, dja nawu djamun kumekbe birridingihdi kururrkdangmaye kore kuberrkkah, kaluk bu ngad ngarrirurrdangmarrhmey wanjh ngarribolknang bolklarrkni dja minj nangale mak diwirrinj."

²⁴ Bu birribek kang kuninjkuu nawu birriwohrnawohrnani dja bininj nawu benmarnewohrnani djamun kore Temple birrihnahnani, wanjh birrimayahmeng. Bu birridjawarreni, "Kaluk baleh kuhni ngad kanmarnekurduyimerranj?"

Peter Dja Birribuyika Nawu Apostles Birrimulewarrinj Kore Sanhedrin Acts 5:25-33

²⁵ Bu kunmekbe birrihmarneyimerrinj, wanjh nabadbuyika bininj kumbemeng, benmarneyimeng, "Ngurrina! Kandibekka bu marneyime ngudberre. Nawu birrimekbe bininj ngudda ngurrbenkurmeng prison, wanjh nakka kabirridi kore kuberrkkah ngarre Temple bu kabindibalbukkabukkan nawu bininj!"

²⁶ Wanjh djamun nawu wernhwohrnani birridjarrkwam bininj nuye dja bindimey bindimurndiweng nawu apostles. Nawu djamun birrikeleni bindikengemi bininj nawu kumekbe birrimirnderri wardi bindikodjdoi bu birridowimeninj. Wanjh kumekbekenh kunu djalyalyalwi bindimdjalkani.

²⁷ Wanjh bindimkang nawu apostles bindinameng kubulkayh kore kumirrk bedberre nawu birriwohrnawohrnani. Nawu nakimuk benmarnewohrnani priest wanjh bendjawani nawu apostle.

²⁸ Wanjh nungka yimeng, "Ngad ngundiwokrayekwong bu minj mak ngurrire ngurrbenmarneyolyolme nawu birribadbuyika bininj kore namekbe bininj kungey nuye Jesus. Dja kandidatjalwokburriweng. Ngudda kunu ngurrbenbukkabukkan nawu birriwarlahkenh bininj kore kondanjkuu Jerusalem. Dja mak ngudda wanjh ngad kandihwelengname bu yimanke ngarribom nawu Jesus."

²⁹ Wanjh Peter dja mak birribuyika apostles bindiwokmey, bu bindimarnemimeng, "Ngad ngarridjalwokmarrkmang nadjalkudji God, dja ngudda nawu djalbininj minj mak ngundiwokmarrkmang ngudberre.

³⁰ Ngudda wanjh ngurrikukbarnnameng Jesus bu ngurribom doweng kore kundulk cross. Dja God birrolkkayhweng kore doweng. Namekbe nadjalkudjiwi God nawu kadberre mawahmawah birrikukburrbuni.

³¹ Kaluk naninjnanu namekbe Jesus, wanjh God bikukenmeng dja bikurrmeng kore kukun nuye, dja mak bimarnbom ba bu kanmarnedokme dja mak kanngheke. Kuninjkuu wanjh God djalkurduyimeng bu ngad bininj kadberre nawu Israel kankebmawahmeng, wanjh karrikangeborledmen ba bu God nungka kanmarnebengmidjdan kadberre kunwarre."

³² "Ngad wanjh woybukkih bihmarneyime ngudberre bu ngarrinang kuninjkuu kurduyimerranj, dja mak nawu Namalngmakkaykenh

* 5:21 Bu birrimirndemornnamerrinj wanjh bedda bedberre council ngeyoy "Sanhedrin".

ngunhmarneyime bu kunwoybuk dunijnh. God kabenwon namekbe Namalngmakkaykenh bedberre bininj nawu kabirriwokmarrkmang.” Kuninjkuu wanjh nawu apostles bindimarneyimeng bedberre nawu birriwohrnawohnani.

³³ Nawu birriwohrnawohnani bu bindibekakang kuninjkuu bindimarneyimeng, wanjh bedda birridjalyidduy dunijnh bu bindibuyikenh.

Nakudji Bininj Nawu Ngeyyoy Gamaliel Benmarnewokdi Dja Benmakwam Nawu Apostles
Acts 5:34-39

³⁴ Kundjalmekbe wanjh nakudji Pharisee nawu ngeyyoy Gamaliel dolkkang kore kubulkdjarn bedberre. Nungka benkarrebukkabukkani bininj, dja mak birriwern birrimarrkmangi. Nungka benmarneyimeng djaman bu bindibekakang nawu apostles bu kabirrihdi kundedjumbunkenh kuberrkkah ba nawu kabirriwohrnawohnan deleng kabirribekkarren.

³⁵ Wanjh Gamaliel benmarneyimeng bedberre, “Ngudda bininj nawu Israel ngunkebmawahmeng, ngurrinaharrimen kore ngudda kuninjkuu ngurrbenmarnekarremarnbun birrimekbe nawu bininj!

³⁶ Ngudda ngurribengkan nakudji bininj nawu ngeyyoy Theudas. Nungka kumdjalbebmeng bu marnburrinj kimukworrinj, wanjh 400 bininj birrimarnedjareminj bu birrimunkekadjungu. Kaluk birribadbuyika bininj birribom doweng, wanjh nawu birrimunkekadjungu bedda birribebbehayarlarmeng. Wanjh kumekbe kore kumhkuyinmarnburreni, djalngurdmerrinj.

³⁷ Dja mak ngurriburrbun nabadbuyika bininj nawu Judas. Nungka kumdolkkang kore Galileebeh kumekbe bolyimi bu bindingeynamikenh dja mak bindirohrokmi. Kundjalmekbeni yerreh bu nungka benmarnbom bininj birrimunkekadjuj. Wanjh kaluk nungka doweng, dja nawu bininj birrimunkekadjungu birridjalmirndeyarlarmeng.

³⁸ Wanjh kunu ngaye marneyime ngudberre bu ngurrbenbawo naninjnanu bininj nawu bolkkime ngurrbenbekkang. Dja ngurridjalbebbehdin. Kore djal bedda bedberre mankarre kabirrihburrbun wanjh makka kadjalyakmen.

³⁹ Dja kore mankarre nuye God kamre bedberre nawu kabirrimulewan Jesus, wanjh kunukka minj ngurrbenngurdke. Dja bu ngurrbendenghke wanjh kunukka yiman kayime ngurriwidnarren nawu God!” Kuhn bu Gamaliel benmarneyimeng.

Nawu Birriwohrnawohnani Bindiwidjbihkeng Nawu Apostles
Acts 5:40-42

⁴⁰ Bu bedda birribekakang yimeng bedberre, wanjh nungka birridjalwokmarrkmey kore benhmarneyimi. Wanjh bindiyawoyhkayhmeng nawu apostles kore birrihni kuberrkkah, wanjh birringimeninj. Wanjh nawu birriwohrnawohnani bedberre bininj bindiuidjbihwidjbihkeyi nawu apostles, dja mak bedda bindimarneyimeng bu minj mak kabirriyawoyngeyyolyolme nawu Jesus kunngey nuye. Wanjh bindimunkeweng.

⁴¹ Wanjh nawu apostles birridjalnjilngmakminj dunijnh dja bindibawong bu birribolkbawong birriwam. Kaluk bedda birridjalnjilngmakni bu kuninjkuu bininj bindiwarreweyi bu kunngeykenh nuye Jesus. Bedda birriyimi bu God benwerhnmarrkwam, dja kumekbekenh kunu nungka benmarnbom bindiwobekakang kore bindimarneyidduy nawu birrikihkimuk.

⁴² Wanjh bedda minj birringurdmeninij kore bindibukkabukkani nawu bininj. Djal munguyh kore kuberrkkah ngarre Temple bindidjalbukkabukkani dja mak kore kunrurrrkbubuyika bedberreni bininj, bu munguyh bindidjalmarnemulewani kunwok kunmak kore Jesus nawu nungka wanjh Christ.

6

Nawu Apostles Bindimarnebidkurrmerrinj Seven Bininj

Acts 6:1-7

¹ Wanjh birridjalmirndewernkenh bininj birridedjingmey bu birrimunkekadungi Jesus. Yikahwi bedda wanjh birriwokdi Greek kunwok, dja bu kunmekbe bolkyimi bedda birridangwerrinj birribadmirndebuyika nawu birrimunkekadungi Jesus. Kaluk bedda birriwokdi nawu Jews bedberre kunwok.

Nawu Greek birriwokdi bindimarneyimeng birribadbuyika bininj, dja birriyimeng, "Ngad nanihnjanu nawu kamahkamarrdjukun daluk minj kabirrimang manme manwern manbu ngurrihweykan boyenkahwi."

² Wanjh nawu twelve apostles bindikayhmeng bindimirndemornnameng bininj rowk nawu birrimunkekadungi Jesus. Dja bindimarneyimeng, "Kuhni minj kunmak bu ngarrimre ngundiwonowon bu ngarrihweykan manme ngudberre. Dja ngad kunu ngarridjaldurrkmirri bu ngarrihweykahweykan kore God nuye kunwok.

³ Dja kandibekka nawu karridangerrinj. Ngurrbenbebbhdjarrngbu seven bininj nawu ngudman ngudberre nawu ngurrbenmarnedjare. Nawu kunubewu birrimak, birridjalmayalimak, dja mak kabirrikukbarlmiyindi Namalngmakkaykenh. Wanjh bedda birrimekbe ngarbenkurrme bu kabirriwohrnan manmekenah ngudberre.

⁴ Ba bu ngad nawu apostle munguyh ngarridjaldi yiwarrudj dja mak ngarriweykan God nuye kunwok."

⁵ Wanjh birridjalmirndewarlahkenh birridjareni rowk bu kunmekbekenh birriyimeng, wanjh bindidjarrngbom seven bininj. Nakudji bininj nawu ngeyyoy Stephen nungka biwernhwoybukwoni Jesus dja mak kukbarlmiyindi Namalngmakkaykenh. Dja mak birribuyika nawu birringeyyoy Philip, Procurus, Nicanor, Timon, Parmenas dja Nicolas nawu kumdolkang Antioch, dja mak yimerranj Jew bininj.

⁶ Wanjh bindinameng kore kumirrk bedberre apostle, wanjh bedda bindimarnedanginj yiwarrudj dja bindimarnebidkurrmerrinj bedberre.

⁷ Kaluk birridjalmirndiwernkenh bininj wanjh birridjalbekkani God nuye kunwok. Wanjh nawu birrimunkekadungi Jesus birridjalmirndewernmerreni munguyh kore Jerusalem. Dja mak birrimirndewern nawu priests birriwoybukwoni dja mak birriwokmarrkmangi Jesus.

Nawu Jews Bininj Birriwidnani Nawu Stephen

Acts 6:8-15

⁸ God bidjalmarnekurduyimeng Stephen kundjalmak dunijnh, dja mak biwong kunkimuk kundulkarre nuye, wanjh nungka kurduyimeng kunwern kundulkarre dorrengh kore birriwern bininj birrihnani dja birrimarnekangebarrhmeng nuye.

⁹ Wanjh yikahwi nawu Jews bininj birridjareni birringurdkemeninj. Kaluk bedda birrimirndemornnamerrinj kore kunrurrk manbu synagogue bedberre, manbu birrirurrrkngeybuni *Ngalengngarre nawu bininj minj*

kabirribongdi. * Bedda nawu birrikang kunred Cyrenebeh dja mak kore kunred Alexandriabeh, dja kunbolc Ciliciabeh dja kunbolckkimuk Asiabeh.

Wanjh birrimekbe bininj birrimwam birrimirndeyarrkmarrinj nuye Stephen bu birridungi.

¹⁰ Nawu Namalngmakkaykenh bibidyikarmeng Stephen bu benhmarneyolyolmi kunmayalimak dorrenghni. Bu nungka nuye kunwok wanjh kundjalmurrnggrayekni duninj ba bu birrimekbe Jews bininj minj birribaldangwerrimeninj nungka.

¹¹ Wanjh bedda manmolc bindimey bininj birribuyika dja bindikarremulewam bu birrikurrinj bindikoweng Stephenkenh. Wanjh birriyiming, "Ngad ngarriwokbekkang namekbe bininj yimeng kunwarre benewoneng nawu Moses dja mak kore God."

¹² Wanjh birriwern bininj birrinjilngwarreminj bu kunmekbe kunwok birribekgang, dja birriduy Stephen. Wanjh nawu dabborrabbolk dja mak nawu bindikarrebukkabukkani birrimwam birridarrkidmey Stephen dja birrikang kore birrimirnderri Sanhedrin council birringeyburreni.

¹³ Dja mak bindimkang bininj nawu birrikurrenwam Stephen. Wanjh birriyiming, "Nahni bininj munguyh kadjalyime kunwarre duninj ngalengngarre manbu Temple dja mak kore Moses nuye mankarre.

¹⁴ Ngad ngarribekgang bimulewam Jesus nawu Nazarethbeh, djoying nungka kabun manbu Temple kunrurrk, dja kakarreboredke rowk kore Moses yimeng kadberre karrikurdyime. Kuninjkinu wanjh ngarribekgang Stephen mulehmulewani."

¹⁵ Wanjh nawu bininj kumekbe birridi bindibekkani, wanjh birridjalkebdarnhnani Stephen, nungka wanjh kebbuyikameni yiman angel yerreh kebyimi.

7

Stephen Benmarneyolyolmi Bedberre God Nuye Kunwok Acts 7:1-8

¹ Bininj nawu benmarnewohnani priests bidjawam Stephen, yimeng "Yiddok kuhni woybukkih ngudda yihyimi?"

² Stephen benmarneyiming nawu bininj birridi rowk, wanjh yimeng, "Kandibekka ngaye bu marneyime ngudberre bininj nawu karridangerinj dja mak nawu kandibornang. Nungka nawu Nawernhmakkaykenh kadberre God bimarnebebmeng Abraham nawu kankebmawahmeng bu kumekbe nungka ningihni kore kunred bolkngeyyoy Mesopotamia, wanjh yerrehkah nungka wabmeng kunred bolkngeyyoy Haran.

³ Wanjh God bimarneyiming Abraham, "Mah wanjh, yibolkbawo kunred ke dja mak namud ke. Yiray, kaluk bolkbukkan kore yini." [Genesis 12:1]

⁴ "Wanjh Abraham bolkbawong kore nawu Chaldeabeh bininj birrihni, dja wam yerrkang ni kore Haran. Kaluk bu Abraham nuye kornkumo doweng, wanjh God biwabkeng bikurrmeng kondah kunbolc kore ngad bolkkime karrihni."

⁵ "God minj bibangmebolkwoyi kunred kunbolkkilehkilek Abraham. Dja ngaleng God bidjalberrebom bu kabenbolkwon nawu Abraham kabenkebmawahme kondanjkinu kunred. Dja kunmekbeni bolkyimi Abraham minj yawkarrmeninj wurdyaw nuye.

* ⁶⁹ Kunkareni wanjh nahni bininj birribongdi bu bindimarnedurrkmirri birribuyika, dja bolkkime kamak kabirridjalre.

⁶ Kuhni wanjh God bimarneyimeng, 'Kaluk kundjalkudji yerrekah nawu yibenkebmawahme kabirrihni djarreh nawu minj kunred kabirri-bolkkarme. Wanjh nakka kabindimarnedurrkmirrikenh kunrayek nawu birribuyika bininj nawu kabindidjalbun munguyh bu kunkuyeng 400 mandjewk.

⁷ Kaluk ngaye kumekbe kunred ngabolkbun bedberre nawu kabindi-bongname bininj nawu ngudda ke yibenkebmawahme. Wanjh bedda kabirribolkbawon dja kabirrimre kondanjku bu ngandimarnedi yiwarrudj.' [Genesis 15:13-14] Kuninjku wanjh God bimarneyimeng Abraham."

⁸ "Wanjh God bimarnewokrayekworrinj bu biberrebbom Abraham. Wanjh bimarneyimeng nawu benkebmawahmeng rowk, nakka wanjh birribadmirndebuyika bu birridjalburrbuyi bu God korroko bendjalyingkihberrebom bedberre. Kaluk yerrekah wanjh Abraham biyawbornang Isaac, wanjh kunu biyawlakkayenwong bu kunbidkukudji dja danjbik kunkodjke kore danginbeh. Kaluk bu Isaac baldahbolkmunj wanjh beyurd bornarrinj nawu ngeyyoy Jacob, wanjh kunu nunganwali bilakkayenwong. Wanjh Jacob nunganwali benlakkayenwong nawu twelve bebeywurd nuyeni, nawu birriyimerranj kadberre mawahmawah."

Stephen Yolyolmeng Bu Josephkenh
Acts 7:9-16

⁹ Wanjh Stephen benyawoyhmarneyimeng, "Nakudji nawu birrimekbe twelve mawahmawah kadberre, wanjh nakka Joseph ngeyyoy, dja nawu birribadmirndebuyika nawu mawahmawah kadberreni, wanjh bedda birrimkirndanginj nuye. Wanjh kuhni bu bedda birrikukweykang bu birribuyika birribalkang kunbolk Egypt kore bongdihbondi durrkmi-durrkmi. Dja God nungka benedjaldjarrkrey.

¹⁰ God bibidyikarmeng rowk kore kunyid karmikarmi kumekbe, dja mak bimarnbom bu wernhmayalimakminj. Wanjh kumekbekenh Pharaoh nawu king bolkwornani kubolkwarlah Egypt, wanjh bimarnedjareni Joseph bu bimakwam dja mak bimarnbom bu nungka benmarnewohnani bedberre nawu birrihmarnedurrkmirri Pharaoh, dja bimarnbom bu djalwohrnani kubolkwarlahkenh ngarre Egypt."

¹¹ "Kaluk yerrekah kore kubolkwarlahkenh ngarre Egypt dja Canaan bolkdarlehminj rowk, minj mak manme djordmerrimeninj kumekbe. Wanjh birridjalmirndewern bininj birrihdjalmarrwedoweni. Nawu kadberre mawahmawah minj mak birrikarmeninj manme kore birrihni kunred Canaan.

¹² Wanjh Jacob wobekgang bu bedda birrikarekurrmi manbu manmim manme kore kunbolk Egypt. Wanjh nungka benmunkeweng nawu kadberreni mawahmawah bu birriwam kore Egypt bu kuhni wanjh kerngeghkenhni birriwam."

¹³ "Kaluk bu yerrekah bedda birriyawoyhwam, wanjh kumekbe kunu nungan Joseph benmarneyolyolmerrinj nawu mawahmawah kadberre birridangerrinj nuye. Wanjh Pharaoh benwobekgang nawu Joseph nuyeni namud.

¹⁴ Wanjh Joseph bimarnewokmunkewerrinj Jacob, nawu nakornkumo nuyeni, dja mak birridjalwernkenh nawu namud nuyeni birrimwam rowk kore Egypt. Kaluk bu bedda birridjalmirndewernni wurd 75 nawu birridangerrinj, ngalbihbininj kobeng, dja wurdwurd bedberre.

¹⁵ Wanjh Jacob nungka balkoluy kumekbe kore kunred Egypt, wanjh nungka doweng kumekbe, dja mak nawu twelve mawahmawah kadberreni bedda birridowerrinj rowk.

16 Kaluk bu yerrekah bedberre nawu namud bindikukkang kore kunred kabolkngeyyo Shechem, wanjh kumekbe bedda bindikukkurmeng kore yingkihbolkmidjidi manbu Abraham korroko yingkihbolkmangi bu benkarremulewam nawu beybeywurd nuye Hamor."

Stephen Yolyolmeng bu Moseskenh

Acts 7:17-22

17 Wanjh nawu Stephen benyawoyhmarneyimeng, "Nawu mawah-mawah kadberreni nakka wanjh birridjalwernmerreni kumekbe kore kunred Egypt. Kuningkunu bolkyimi wanjh God biberrebbom Abraham, dja wanjh darnkih yimerrangeni woybukkendanj.

18 Wanjh nakerrnge king bebmeng nawu wohrnawohnani kore kubolk-warlah ngarre Egypt. Nungka minj bikukburrbuyi namekbe Joseph, bu korroko doweng.

19 Wanjh namekbe nawu king benkoweiyi nawu mawahmawah kadberreni dja kunwarre benhmarneyimi bendjalkukmarladjwoni bedberre. Nungka kunwok kunrayek kurrmeng bedberre bu bindiyawbebkeyi kuberrk ba bu birriyawdowerreni."

20 "Bu kunmekbe bolkyimi bu nungka Moses danginj, dja nungka wanjh yawkukmakni. Bu dird danjbikni ngalbadjan dja kornkumo benedjalyawnahnani munguyh.

21 Bu bedda beneyawbebkeng kuberrk, wanjh ngalbeywurd nuye Pharaoh kumwam bimey biyawdjordmihweng yiman ngalengngarreni nawu namekbe wurdyaw.

22 Bu nungka djordminj, bedda nawu Egyptbeh bininj birribukkabukkang kundjalwern rowk kore bedda bedberreni. Bu nungka dabbolkminj nungka wokdi kunwok kunmak duninj dja mak kundulkarre karrmi bu njalehnjale kurduyimi." Kuhni bu Stephen yolyolmi bedberre.

Stephen Yolyolmeng Bedberre Bu Moses Kelerlobmeng

Acts 7:23-29

23 Wanjh Stephen benyawoyhmarneyimeng, "Bu Moses mandjewk nuyeni forty, nungka burrbuni bu kare kabennan bininj nawu nungka nuye namud, nawu Israel benkebmawahmeng.

24 Nungka wam binang nakudji bininj nawu Egyptbeh bimarnekurduyimeng kunwarre duninj kore nakudji bininj nawu Israel bikebmawahmeng. Wanjh Moses bibidyikarmeng. Wanjh kunu bibalbom doweng bininj nawu Egyptbeh.

25 Moses yimankek yimi birriburrbuni birrimekbe nawu birriredboni nuye bu nungka wanjh God bimunkeweng bu kabenneghekenh. Dja burrkyakni, bedda minj kuhni birriburrbuyi.

26 Kaluk bu kunkodjkebuyikani bu nungka bibom namekbe bininj, nawu Moses benbenenang benebuyika bininj nawu birriredboni Moses, bu bedda beneburreni. Nungka yimankek benbenengurdkemeninj, wanjh benbenemarneyimeng, 'Ngayh, ngudda nawu bininj bokenh, ngudda nuk ngunedanginj dja njalekah ngudda nguneburren?'

27-28 Wanjh nawu bininj bimarneyidngalkeng nungka bikukdjirrkang Moses, dja bimarneyimeng, 'Ngudda nangale ngunmarnbom bu kamarnewohnan dja mak kandjadme ngadberre? Yiddok ngudda yidjare kanbun ngaye yiman bu yibom namekbe bininj nawu Egyptbeh bu wolewolehkenh?' [Exodus 2:14]

29 Bu Moses bibek kang bimarneyimeng, wanjh nungka kelerlobmeng bolkbawong Egypt. Wanjh nungka wam kore kunred kabolkngeyyo

Midian, kumekbe wanjh ningihni yiman kayime nawokbuyika. Wanjh kumekbe nungka daluk mey dja mak beywurdbornarrinj benebokenh narahrangem.” Kuhni bu Stephen yolyohyolyolmi bedberre.

*Stephen Yolyolmeng Bu God Bimarnekukbukarrinj Nawu Moses
Acts 7:30-35*

³⁰ Wanjh nawu Stephen benyawoyhmarneyimeng bedberre, yimeng, “Kaluk bu mandjewk forty burnbom, wanjh Moses wam kore kubolkdarleh darnkih ngarre kunwarddekuyeng manbu bolkngeyyoy Sinai. Wanjh kumekbe kunred bimarnebebmeng angel nawu Kawohrnran Rowk nuye, kore manbirluwoldjen bu manngarre rungihrunji.

³¹ Bu Moses nang manmekbe manu ngarrerungi, wanjh nungka marmarrminj dja mak baldarnhwam darnkih bu yimankek balwernhnayi. Wanjh kumekbe nungka biwokbekkang nawu Kawohrnran Rowk bu kumwokbebmi.”

³² “Nawu kawohrnran bimarneyimeng, ‘Ngaye nawu God bedberreni nawu mawahmawah ke. Ngaye wanjh bedberre God nawu Abraham, dja nawu Isaac, dja mak nawu Jacob.’ [Exodus 3:6] Wanjh Moses deldelmingalmeng, mak minj bikuknayi dja keleminj duninjh.

³³ Wanjh nawu Kawohrnran Rowk biyawoyhmarneyimeng Moses, yimeng, ‘Yirrengeyerckerrimen nawu yihdengedjonghbuyindi dja kondah kore yihdi kubolkdamun duninjh ngardduk.

³⁴ Ngaye woybukkih ngabehnang nawu ngardduk bininj kunyid kabirikarme kunkimuk dja mak kabirridjakbekkan bulkkidj kore kunbolk Egypt, dja ngaye ngabehnalkbekkang, wanjh kunmekbekenh kunu ngamwam ngamkoluy ba bu ngabengehke bedberre. Wanjh kumekbekenh ngaye munkewe bu yirrunnden Egypt.’ [Exodus 3:5-10] Kuninjkunu nawu kawohrnran bimarneyimeng Moses.”

³⁵ “Naninjanu nawu nadjalkudji Moses minj birrimarnedjareniwirrinj nawu kandikebmawahmeng kadberre, bu birrimarneyimeng, ‘Ngudda nangale ngunmarnbom bu kanmarnewohrn dja kandjadme ngadberre?’ Dja bonj, wanjh nanihnjanu Moses wanjh God nungan bimunkeweng bu benmarnewohrnani dja mak bennehkeng, kore angel nuye bimarnewokdanj kumekbe kore ngarrehrungih.” Kuhni bu Stephen yolyohyolyolmi bedberre.

*Stephen Yolyolmeng Bu Moses Benbekkeng Bininj Nawu Israel Benkemawahmeng Kore Kunred Egyptbeh
Acts 7:36-44*

³⁶ Wanjh nawu Stephen benyawoyhmarneyimeng bedberre, yimeng, “Moses wam benbekkeng nawu birrimirnderri bininj kore Egypt. Nungka kurdukurduyimi kore birrihnani bu God nuye kundulkarre dorreng kore kunbolk Egypt, dja mak kore manu kurrula bongeyyoy Manbokurlba*, dja mak kore kubolkdarleh bu birridjalni munguyh forty mandjewk.”

³⁷ “Kunkare wanjh namekbe nawu Moses nadjalkarewi benhmarneyimi bedberre, ‘Kaluk burrk God ngunwon ngudberre nawu prophet yiman kayime ngaye rerrih. Kaluk nungka wanjh ngurridjalredbo duninjh.’ [Deuteronomy 18:15]

³⁸ Kaluk rerrihkah bedda nawu kadberre mawahmawah birrimirndemornamerrinj kore kubolkdarleh. Kaluk nanihnjanu Moses birridjarrkdi bedda dorreng. Wanjh angel bimarnewokdanj, bu wanjh nungka mey

* 7:36 Kungeybuyika ngarre wanjh, “Kurrula kore Kundalkkuyeng Dulkmirnderri”.

kunwok manbu kandarrdikwon, kaluk nungka wanjh kanwong kadberre manbu kunwok.”

³⁹ “Dja nawu kandikebmawahmeng kadberre minj bedda birriwokmar-kmayi Moses, dja bedda birriwidnani, birridjaldjareni birridurndeyi kore Egypt.

⁴⁰ Wanjh bedda birrimarneyimeng nawu Aaron, ‘Nungka Moses kan-marnedokmi bu kanbebkeng kore Egyptbeh, dja minj ngarriburrbun kore baleh nungka wam. Dja yimarnbu ngadberre yehyeng nawu yiman god yerreh, bu kanmarnedoknikenh ngadberre.’ [Exodus 32:1]

⁴¹ Wanjh bedda birrimarnbom bedberre idol yiman kayime kukbulikki nawu birrimarneboddangeni, wanjh bedda birrimarnekanu nawern nawu birrimarnekinjeji kalkkidmanjmak. Bedda birridjalburlumerreni bu birrimarnbom namekbe nawu yeng kubid bedberre, wanjh kunu mulil birrikarmeng.”

⁴² “Dja God benbodmekenhwong bedberre. Wanjh nungka benbawong birrihmarnedi yiwarrudj yiman kundung, dja mak dird, dja kinhkinh warridj. Minj mak benngurdkemeninj bedberre. Dja kunukka wanjh bimbuyindanj kore djurra nawu prophets birriwokbimbuni kore God nun-gan yimeng, ‘Ngudda bininj nawu Israel ngunkebmawahmeng, ngudda minj njale kandimarnekayi bu kandiwoyi nawu kandimarnekinjemenin-kenh, nawu ngurriwam ngurriyerrkang kore kubolkdarleh bu mandjewk nakuyeng forty.

⁴³ Dja burrkyak, ngudda ngurridjalngorrkani nawu dabburlin ba bu ngurrimarneboddanginj Molech nawu god ngudberre nawarre, dja mak namekbe ngurrikanahkani nawu kilehkileh ngurrimarnbom yiman kayime kinhkinh kangeyyo Rephan, nawu god ngudberre ngurrimarne-boddangeni. Nahni bokenh wanjh idols ngurrimarneboddanj. Wanjh kuninjku bu ngurrikurduyimeng ngaye munkewe ngudberre ngurri-re bewhkah kubolkbuyika kabolkngeyyo Babylon dja minj bawon bu ngur-ridurndeng kore ngudberre kunbolc.’ [Amos 5:25]

Kuninjku bu God benmarneyimeng nawu kandikebmawahmeng kadberre.”

⁴⁴ “Kaluk bu rerrihkah God bimarneyimeng Moses bu rurrkmarnbom mankimukkenh dabburlin ba bu bininj birrimarnedi yiwarrudj God nuye. Kundjalmekbe Moses marnbom bu God bibukkang. Wanjh kumekbe God nuye nadjamunkenh dabburlin rurrkdi kore kubolkdarleh, wanjh nungka God benmarnewokdi bedberre.” Kuhn bu Stephen yolyohyolyolmi bedberre.

Stephen Benbengdayhkeng Kore Kunkare God Yimeng Bedberre Acts 7:45-50

⁴⁵ Wanjh Stephen benyawoyhmarneyimeng, yimeng, “Kaluk bu rerrihkah Joshua nunganwali benmarnedokmi bedberre nawu kandikeb-mawahmeng bu birringimeng kore kubolkkerrnge bedberreni birribuyika bininj nawu God benbebkeng. Wanjh nawu kadberre kandikebmawah-meng birrikani God nuye dabburlin bu baleh yarrkka kore birrihrey. Bedda birridjalkarmi munguyh namekbe dabburlin wanjh kaluk bu yerrehkah David kumebmeng.”

⁴⁶ “Wanjh God bidjalmarnemakwam David. Kaluk David bidjawam God bu kabimarnerrurrkmarnbu nuye ba bu namekbe nawu nadjalkudjiwi God nawu Jacob nuye kamre kahyo.

⁴⁷ Dja burrkyakni, dja wanjh namekbe Solomon bimarnerurrkmarnbom God nuye.

48 Dja nungka nawu nadjalwernhkimuk duninj God minj nuk kahyo kunrurrk manbu kabirrirurrkmarnbun bininjbeh. Ngudda ngurriburrbun kore prophet bimbom, 'God nawu kawohnan yimeng,

49 "Heaven yiman kore ngaye ngayerrkan, dja kurorre yiman ngaye kore ngarrebbebarndi. Dja njalekah ngudda yimankek kandimarnerrurrkmarnbun ngaye nawu Ngawohnan Rowk? Ngaye minj mak baleh ngayo ba bu ngangudjnehme.

50 Wanjh ngurridjalwernhburrbu bu ngaye ngamarnbom yehyeng rowk." ' [Isaiah 66:1-2]

Kuhni wanjh God nawu kawohnan yimeng, kore kabimbuyindi nuye." Kuhni wanjh Stephen yolyohyololmi bedberre.

*Stephen Benmarneyimeng Bedberre Manbu Kunwok Kunrayek
Acts 7:51-53*

51 Bu Stephen munguyh bendjalmarneyimi bedberre, dja yimeng, "Ngudda nawu bininj minj ngurriwokbekkan dja ngurridjalkangemurrngarayek nuye God, dja mak minj ngurrikangeboredme, dja mak minj ngurriwokmarrkmang. Ngudda munguyh ngurriwokburriwe nawu Namalngmakkaykenh yiman kayime nawu mawahmawah ngudberre.

52 Ngudda ngudberre nawu mawahmawah wanjh nakka bindibuni nawu birridjalwern rowk prophets. Kaluk birrimkebe prophets birridjalyingkihyimi bu nawu God nuye Nadjalmakkaykenh wanjh kamre yerrekah. Wanjh woybukkihni nungka kumwam dja ngurrikukweyang, bu ngurribom doweng.

53 Yoh, dja wanjh God nuye angel birrimkang mankarre nuye bu ngundiwong ngudberre, dja burrkaykni, ngudda kunu minj ngurrimarrkmayi manbu mankarre nuye." Kuninjkuu wanjh Stephen wokdiwokdi bu benhmarneyimeng.

*Bedda Birribom Nawu Stephen
Acts 7:54-60*

54 Wanjh bu bedda nawu Jews bininj birriwokbekkani Stephen kore kuhni benhmarneyimi bedberre, wanjh birridjalwernhyidduy duninj bu bedda birridjalkuniyidmebayerrenj.

55 Kaluk nawu Stephen kukbarlmiyindi Namalngmakkaykenh, wanjh nungka bolknang kaddum kore heaven wanjh benbenedjarrknang God benemhni kunmakmak dorreng berrewoneng, dja nawu Jesus kumhdi kore kukun nuye God.

56 Wanjh yimeng, "Ngurrina! Ngaye ngahnan heaven bu dangmarrhmiwam, dja mak nawu Bininj Duninj kamhdi kore kukun nuye God."

57-58 Bu bedda birribekakang kuninjkuu yimeng bedberre, wanjh birridjaldjurrkworrinj bu birrikanembalmerrinj dja birridjalwernhkayheng. Wanjh birrirobmerrinj birridarrkidmey birridorrorkeng djarreh duninj kore kuberrkkah birribekang wanjh kunu birridedjingmey birrikodjdongi kuwardde.

Kaluk bedda birrimadjyerrkerrinj bedberre nawu birridjuhbuni bininj, dja birrimadjwong nawu nayawurrinj bininj ngeyyoy Saul ba nungka kabenmarnemadjnahan.

59 Bu bedda birribalhdjalkodjdongi munguyh Stephen danginj yiwarrudj, dja yimeng, "Nawu yiwohnan Jesus, yima kunmalng ngardduk!"

60 Wanjh nungka mankang dja barddurrkurlhdanj, dja kayhmeng wernkih duninj, "Nawu yiwohnan, yuwn yibendung nanihnjanu bininj bu kabirrihyime kunwarre ngardduk." Bu kuninjkuu nungka balyimeng, wanjh baldjalkeyonginj.

Kaluk kumekbe Saul dingihdi dja nungka njilngmakminj bu binang doweng.

8

Bu Kunyid Wernmerrinj Bedberre Nawu Birriwoybukwoni Jesus Acts 8:1-4

¹⁻² Yikahwi bininj nawu birriwokmarrkmangi God birrikukdujdi Stephen, wanjh birridjalkuknalkbom bu nungkahkenh. Kaluk kunekke kunbarnangarra bininj birriwern wanjh birridedjingmey bu bindimarnekurduyimi kunrayek duninj kore bininj nawu birrikodjkulumakni yiwarrudj bedberre kore kunred Jerusalem. Kunmekbekenh kunu nawu birrimekbe bininj nawu birrikodjkulumakni wanjh birrimirndeyarlarremeng kore kunbolk Judea dja mak kore kunbolk Samaria. Dja nawu apostles nakka birridjaldi kore Jerusalem.

³ Wanjh nawu Saul djareni benkukyakwoyi nawu birrimekbe birrikodjkulumakni bininj. Nungka djalrenghehrey kore kururrkbubuyika bu bendarrkidmangi bininj dja daluk, wanjh benkurrmi kore prison.

⁴ Kaluk birrimekbe bininj nawu birrimirndeyarlarremeng wanjh nakka birrirenghehrey kubolkbubuyika dja bindimarnemulewani birribuyika bininj rowk God nuye kunwok.

Nawu Philip Weykani God Nuye Kunwok Kore Kunbolk Samaria Acts 8:5-8

⁵ Wanjh Philip balkoluy kanjdjikanjdji kore kunred kubolkkimuk ngarre Samaria, wanjh benhmarnemulewani bininj bu Christkenh.

⁶⁻⁷ Kumekbe wanjh bininj birriwern birriwokbekkang Philip yimiyimi dja mak birrinani bu kurdurduyimi kore kundulkarre dorreng. Nungka benmarnbom birriwern bininj nawu birrimalngkarrmi namalngwarre, wanjh kunukka malngbebmerreni kayhmi dorreng. Dja mak birriwern nawu birribirni wanjh benmarnbom rowk. Kumekbekenh kunu bininj birriwern birridjaldjareni bu birridjalwernhwokbekkani kore mak mulehmulewani bedberre.

⁸ Wanjh bedda kunu bininj rowk birriwernhmarrminj kumekbe kunred.

Simon Nawu Nakurdangni Dedjingmey Bikadjungi Jesus Acts 8:9-13

⁹ Nakudji bininj nawu ngeyyoy Simon ni kore kubolkkimuk Samaria. Kaluk nungka nayungkih yingkihkurduyimi kore kunkurdangkenh kore kured bedberre, wanjh bedda birrinang birrikangebarrhmi nawu birrihni kumekbe kubolkwarlah. Dja nungka yimankek yimi namakni duninj bu burluburlumerreni.

¹⁰ Nawu birriwern bininj nawu birrikuken dja mak nawu birrimarladj wanjh munguyh birridjalbekkani Simon. Wanjh birriyimi, "Nanih wanjh kawernhkarme kundulkarre kunkimuk nuye God."

¹¹ Bedda birrihnani Simon bu kunkuyeng djalkurdangyini dja birrikangebarrhmeng, wanjh kunmekbekenh kunu birriwokbekkani munguyh bu yimiyimi.

¹² Kaluk bu Philip kumwam, wanjh benmarneyolyolmeng kunwok kunmak bu God kawohnanken rowk, dja mak kore kunngey nuye Jesus Christkenh. Wanjh birrimekbe bininj dja daluk nawu birrihni kumekbe birriwoybukwong Philip, wanjh kunu birridjalwern birrikodjdjuhng.

¹³ Nungka mak Simon woybukwong warridj dja kodjdjuhmeng. Wanjh nungka benedjaldjarrkrey Philip, wanjh bihnani kore kundulkarre dorrengh kurdukurduyimi bu benmarnbuni bininj birriburrbuni God, wanjh Simon djahdjalkangebarrhmi.

Peter dja John Benewam Kore Kubolkkimuk Samaria
Acts 8:14-25

¹⁴ Nawu apostles birridjaldi kore Jerusalem, dja bindiwobekkkang bininj nawu birrihni Samaria bu birrinjilngmakminj bu bedda birriwobekkkang God nuye kunwok. Wanjh bedda bindimunkeweng Peter dja John bu kabindinankenh. Wanjh bedda benewam.

¹⁵⁻¹⁶ Nawu birrimekbe bininj nawu birrihni Samaria, kaluk bedda birriyingkihkodjdjuhmeng kore kungey nuye Jesus nawu Kawohnnan Rowk, dja nawu Namalngmakkaykenh minj benbangmekukbarlkemeninj. Wanjh nawu Peter dja John bindimarnedanginj yiwarrudj bedberre ba bu kabirrimang Namalngmakkaykenh.

¹⁷ Dja mak bindimarnebidkurrmerrinj, wanjh kunu birrimey nawu Namalngmakkaykenh.

¹⁸ Bu Simon nawu nakurdangni bennang bininj birrimey Namalngmakkaykenh kore apostles bindimarnebidkurrmerrinj, wanjh nungka djareminj yimankek benbenekwoyi nawu apostles.

¹⁹ Nungka yimeng berrewoneng, "Mah, kandiwo maninjmanu kundulkarre, ba bu ngayemanwali ngabenmarnebidkurrmerren birribuyika bininj bu ngabenwon namekbe nawu Namalngmakkaykenh."

²⁰ Dja Peter bimarneyimeng, "Yibalkukka nawu kunwardde kekiah. Kaluk ngunedjarrkkukyakmen ngudda dja kekiah kunwardde! Ngudda nuk minj yibayahme nawu Namalngmakkaykenh nuye God, dja nungan kanwon ngad bininj bu djal burudjang.

²¹ Ngudda kunu minj karridjarrkraworren bu ngarridurrkmirrikenh, dja mak minj yikangewoybuk nuye God.

²² Mah, wanjh yikangeboredmen dja yibawo kunwarre kore yihkurduyime, dja yirrin yiwarrudj, yidjawa God ba bu yimankek ngunmarnebegmidjdan kore kunwarre yihburrbuni.

²³ Ngaye mayaliburrbun bu ngudda yikangenjirrhmiworren, dja mak yiman kayime kore kunwarre ngunhbongkarme."

²⁴ Wanjh Simon benbenemarneyimeng Peter dja John, "Benbenemanjbun ngorrewoneng bu kandimarnedi yiwarrudj, ba bu minj njale mak nganmarnekurduyimerran kore kandimarneyimeng."

²⁵ Kaluk bu Peter dja John beneyakwong bu bindihmarnemulewani bininj kore nawu Kawohnnan Rowkkenh, dja mak kore benehweykani kunwok nuye, wanjh bedda bindibawong dja benedurndi kore Jerusalem. Bu bedda benebalhrey wanjh benewohngimeng kore kubolkkilekileh ngarre Samaria, dja mak bindimarnemulewani kunwok kunmak kore bininj nawu birrihni kumekbe.

Philip Bimarnekareyolyolmeng Bininj Nawu Nakang Ethiopiabeh
Acts 8:26-40

²⁶ Kaluk angel nawu nuye Kawohnnan Rowk bimarnewokdanj Philip, wanjh bimarneyimeng, "Yirrolkka, yiray kore walem, dja yibolhkdaju manbolh manbu kamre Jerusalembeh dja kahre kore kunred Gaza." (Kaluk manmekbe manbolh kahre kore kubolkdarleh.)

²⁷ Wanjh Philip djaldolkang wam. Wanjh bu balhbolhkdajungi bininj binang nakang Ethiopiabeh reneghrey manbu wirlbarra dorrengh. Kaluk namekbe bininj dja kornwirlarrkyakni. Kaluk nungka durrkmirri,

bimarnenahnani kunwardde ngalengngarre queen ngalbu ngeyyoy Candice, ngalbu wohnani kubolkwarlahkenh kubolkkimuk Ethiopia. Kaluk nungka wam kore Jerusalem danginj yiwarrudj nuye God, wanjh nungka balyawoyhdurndengi kured.

28 Wanjh ningihni kore wirlbarra nuye manbu djarrang bihdorrorkkeyi. Kaluk nungka yerrkkeng djurra, dja binnahbimnani kore prophet Isaiah bimbom.

29 Nawu Namalngmakkaykenh bimarneyimeng Philip, "Kab yiray kore mahni wirlbarra dja yidjallay darnkih."

30 Wanjh Philip rlobmeng darnkih kore wirlbarra, wanjh bibekkkang namekbe bininj bu bimngeyhbimngeybuni kore prophet Isaiah bimbom. Wanjh Philip bidjawam, "Yiddok ngudda yiwernhburrbun bu yibimnan nanihnjanu nawu djurra?"

31 Wanjh namekbe bininj yimeng, "Ngaye nuk minj ngawernhburrk-burrkbekkan, dja nangale kab nganmarneyolyolme?" Wanjh nungka bimarneyimeng Philip bu bidbom benehdjarrkni kore wirlbarra.

32 Namekbe bininj bimngehbimngeybuni kore bimbuyindanj, dja yimeng, "Nungka wanjh yiman kayime sheep kabirribekke dja kabirribun. Nungka mak modmikenhni yiman kayime lamb nawu kabirrimuddjobke. Kumekbe yimi nawu minj kayhmeninj.

33 Nungka birridjalmarladjwong, dja mak bedda birridjadmeng bu burudjang birriwelengnameng. Nungka djaldoweng minj mak karrmeninj wurdyaw dja nawu namud nuye. Dja God bidjaldurndiweng kondanjkuwu kurorrebeh kore doweng." [Isaiah 53:7-8] Mahni kunwok binnaninani nawu namekbe bininj.

34 Wanjh namekbe bininj bidjawam Philip, bimarneyimeng, "Kanmarneyimen. Nahni nawu prophet nangale kabiyolyolme? Yiddok nungan kayolyolmerren, dja kunubewu nabuyika bininj kabiyolyolme?"

35 Wanjh Philip bimarnekarreyolyolmeng. Kerrngehkenh dokmeng biyolyolmeng kore prophet Isaiah bimbom nawu bininj bimngeybom, wanjh yerreh kunu bibalmarneyolyolmeng kunwok kunmak bu Jesuskenh.

36-37 Kaluk bu kore benehrey benebonang manlabbarl wanjh namekbe bininj bimarneyimeng Philip, "Yina, makka kaboyo kukku, dja yiddok minj kankodjdjuhkeyi bolkkime bu kondah?" Dja Philip biwokmey yimeng, "Bu yiwoybukwon kukange ke dorrengh, wanjh kamak yidjuhme." Dja nahni bininj yimeng, "Ngaye ngawoybukwon bu Jesus Christ nakka wanjh woybukkih God nuye Beywurd."*

38 Wanjh namekbe bininj dengkheng manbu wirlbarra benbenedorrorkkeyi, dja benehdjarrkkoluy kore kukku kumhboyoy, wanjh Philip bikodjdjuhkheng namekbe bininj.

39 Wanjh bu bedda benebidbom kore kukukkubeh, wanjh nawu Namalngmakkaykenh Kawohnan Rowk nuye, wanjh kundjalburrikudji bidjalme, bikang Philip. Kaluk namekbe bininj nawu nakang Ethiopia minj mak biyawoyhdarrkidnaya nawu Philip, dja wanjh nungan djaldurndi kured nuye bu kuninjilngmakni dja mak kunimarmarni dorrengh.

40 Wanjh Philip bebmeng djarreh kore kunred kabolkngeyyo Azotus. Kaluk nungka renehrey dja benmarneyolyolmi kunwok kunmak kore kunredbubuyika rowk kahdjalle kore Azotus dja bebmeng Caesarea.

* 8:36-37 Yikahwi nawu nakarekare djurra kore Bible birribimbuni wanjh birribawong verse 37.

9

*Jesus Nungan Bimarnekukbukarrinj Nawu Saul**Acts 9:1-9*

¹⁻² Saul dingihdi kore Jerusalem. Kaluk nungka munguyh benwaralbuni nawu birrikadungi Jesus nawu Kawohnan Rowk. Kunkudjikenh wanjh nungka djareminj rawinj Damascus ba bu kabenggalke bininj dja daluk nawu kabirrikadung manbolh nuye Jesus, dja wanjh kabendukkan kabenyirrunnden kore Jerusalem. Kumekbekenh kunu wam bidjawam bininj nawu benmarnewohnani priests bu kabimarnebimbun djurra ba bu kakan kabenwon bininj nawu kabirrirurrknahnan synagogue manbu kunredkimuk Damascus. Wanjh naninjanu bininj nakihkimuk biwong Saul nahni djurra.

³ Wanjh Saul bolkbawong Jerusalem dja wam kore Damascus. Bu nungka regehrey darnkih balhbebmi kore Damascus, kundjalburrikudjini kumdjalwolkayindanj nuye manbu kaddum heavenbeh bu biwolkang kore dingihdi.

⁴ Wanjh Saul mankang kore kurorre, dja biwokbekkang bu bihmarneyimeng, "Saul! Saul! Njalekah ngudda yidjare bu kandjaldung ngaye?"

⁵⁻⁶ Wanjh Saul yimeng, "Ngudda nangale nawu yiwohrnan?" Wanjh biwokmey nawu bimarnewokdanj, wanjh bimarneyimeng, "Ngaye wanjh Jesus nawu kanhdung. Dja yirrolkka, wanjh yiray kore kuredkimuk Damascus. Kaluk kumekbe nakudji bininj ngunmarneyime kore baleh yikurduyime."

⁷ Nawu bininj birridjarrkrey Saul bedda birriwokbekkang nawu bimarnewokdaninj, dja minj nangale mak birrinayi. Dja wanjh birrihdjaldi birridjalwokyak.

⁸ Bu Saul dolkkang kurorrebeh, wanjh mimbayhmeng dja minj yawoyhbolknayi. Dja bininj nawu birridjarrkrey wanjh birridjalbidmey Saul dja birrikang kore kured Damascus.

⁹ Bu kunkodjke danjbikni Saul minj bolknayi, dja mak minj manme nguyi dja kukku minj bonguyi.

*Bininj Nawu Ngeyyoy Ananias Bimarnewokdanj Nawu Saul**Acts 9:10-19*

¹⁰ Nakudji bininj kumekbe ni kore Damascus nawu ngeyyoy Ananias. Kaluk nungka bimunkekadungi nawu Jesus. Nungka bidjalmarnekukbukarrinj nawu Kawohnan Rowk, wanjh bingeybom, yimeng, "Ananias!"

Wanjh Ananias biwokmey, yimeng, "Mah! Ngaye kondah ngahni nawu Yiwohrnan."

¹¹ Wanjh nawu Kawohnan Rowk bimarneyimeng, "Yidjaldolka dja yiray kore kabirribolhngeybun 'Manbolhdjad'. Yidjallay kore Judas kunrurrk nuye dja yidjawa bu bininj kahni nawu kangeyyo Saul nawu nakang kunred Tarsusbeh. Nungka wanjh kumekbe kahdi yiwarrudji."

¹² Kaluk Saul ngokko nguningkihkebwaralnani bu ngudda yire yimarnebidkurmerren ba bu kayawoyhbolknan."

¹³ Wanjh Ananias biwokmey, yimeng, "Nawu Yiwohrnan, birriwern bininj ngandimarneyimeng bu nanihnjanukenh bininj, kore kunwarre benmarnekurduyimi benhbuni nawu ngudda ke namak bininj kore Jerusalem."

¹⁴ Nawu birrikihkimuk priest birriwong djurra nuye ba bu kabenyawoyhdukan nawu ngudda ngundingeybun kondanj kunu kore Damascus."

15-16 Wanjh nawu Kawohrnan Rowk bimarneyimeng Ananias, "Yidjallay. Ngaye ngokko ngadjarrngbom nawu Saul ba bu ngandjalmarnedurrk-mirri. Kaluk nungka kadjalrengere kabenmarneyime bu ngayekenh, bininj nawu minj Jews, dja mak nawu kabirriwohrnawohrnan kings, dja mak bininj nawu Israel benkebmawahmeng. Kaluk ngaye ngabukkan bu kadjakbekkankenh kore ngayekah ngardduk kunngey."

17 Wanjh Ananias wam ngimeng kore kunrurrk nuye Judas. Dja mak bimarnebidkurrmerrinj nawu Saul wanjh bimarneyimeng, "Saul nawu ngarrdanginj, nawu Kawohrnan Jesus nganmunkeweng ngamwam kore ngudda. Nungka wanjh namekbe nawu ngunmarnedarrkidbukarrinj kore yimhrey. Nungka nganmunkeweng ba bu yiyawoyhbolknan dja mak yikukbarlmiyindan Namalngmakkaykenh."

18 Kundjalmekbe yerreh, wanjh yiman djenj kunwerrk warrhmeng kore kumim nuye Saul, wanjh kunu yawoyhbolknang. Wanjh nungka dolkkang dja kodjdjuhmeng baptismkenh.

19 Dja mak manme nguneng bu yawoyhngudjdanginj.

Nungka birridjarrkni bu wurd waken nawu birrihmunkekadjungj Jesus kore Damascus.

*Saul Benmarnemulewani Kore Kunred Bokenh Damascus dja Jerusalem
Acts 9:20-25*

20 Kaluk kumekbe bolkyimi wanjh Saul dedjingmey bu ngimeng kore kunrurrkbubuyika manbu synagogues dja benmarneyolyolmi bu Jesuskenh. Nungka benhdjalmarneyimi, "Jesus, nakka nadjalkudji wanjh Beywurd duninj nuye God."

21 Wanjh birriwern bininj nawu birriwokbekkani, wanjh birrikangebarrhmeng, dja birrimarneyimerrinj, "Yiddok nanihnjanu bininj nawu benbuni bininj nawu birringeybuni Jesus kore Jerusalem? Dja wanjh bolkkime kumwam kondanj kunu wali kabendukkan kabenyirrunndiwe kore nawu priest birrikihkimuk."

22 Dja Saul wernhmurrngrayekminj. Bu benbukkabukkani Jews bininj nawu birrihni Damascus, dja benbengdayhkeng dja benbukkabukkang bu Jesus nungka wanjh woybukkih Christ. Wanjh nawu Jews minj mak birridangwerrimeninj Saul, dja bedda birrinang wokmurrngrayekminj dja wanjh nungka benngurdheng.

23 Kaluk rerrikah bu kunkodjkebabuyika yikahwi nawu Jews bininj birrikarremarnburrinj bu birridjaldjareni birribuyi nawu Saul.

24 Wanjh bedda birridjaldangmayenahnani kore mankimuk warnamyoy kunredkimuk Damascus. Birribolknani kunbarnangarrakuyeng dja kukakkuyeng ba bu birrimayi Saul. Dja Saul menmakminj bu birrikarremarnbom nuye.

25 Wanjh kunkakkudjini bininj nawu Saul benbukkabukkani birribidyikarrmeng bu birrikukdahkendoy kore kundjabarrk mankimuk manbu kunmadjkenh dja birrikoluyhweng kore yiman kayime kungarlkwarre.

*Saul Benbukkabukkani Bininj Kore Jerusalem
Acts 9:26-31*

26 Wanjh Saul bolkbawong Damascus wam kore Jerusalem, bu yimankek birriraworrimeninj bininj nawu birrimunkekadjungj Jesus, dja bonj, bedda birrikeleminj bu birrikengemi nungka. Kaluk birrikewkmi, minj birriwernhwoybukwoyi bu yimankek nungka dorrengh birridjarrk-munkekadjungj Jesus.

²⁷ Nawu nakudji bininj ni kore Jerusalem, nawu ngeyyoy Barnabas. Bu nungka wanjh wam bimey nawu Saul, bikang kore apostles dja bimulewam bedberre, yimeng, "Nanihnjanu bininj nawu Saul wanjh binang nawu Kawohrnan Rowk kadberre kore manbolh regehrey. Wanjh nawu Kawohrnan Rowk bimarnewokdanginj nuye, wanjh nungka woybukkih benmarneyolyolmeng kore kunngey nuye Jesus, dja minj nungka keleniwirrinj birribuyika bininj."

²⁸⁻²⁹ Wanjh Saul birridjarrkni nawu bininj birrimunkekadungi Jesus. Kaluk nungka regehrey kubolkwarlah ngarre Jerusalem bu benmarneyolyolmi kore kunngey nuye Jesus dja minj mak keleniwirrinj.

Nungka bendjalmulewani dja mak birridangwerreni yikahwi Jews bininj nawu birriwokdi Greek kunwok. Dja bedda birridjaldjareni birribuyi.

³⁰ Dja birribuyika bininj nawu birriwoybukwoni Jesus birribekkani bu kuninjkuu, wanjh birrikang Saul kore kunred kabolkngeyyo Caesarea, wanjh kumekkebeh birrimunkewerrinj, wam kore kubolkbuyika Tarsus.

³¹ Kaluk nawu bininj birrikodjkulumakni yiwarrudj bedberre wanjh birrikarmi kunmodmikenh bu minj nangale mak benbuyi kore kumekbe kunred birrihni Judea, Galilee dja Samaria. Wanjh nawu Namalng-makkaykenh benbidyikarmeng dja benmurrngrayekwoni. Bedda mak birrimarnekeleni nawu Kawohrnan Rowk, dja birridjalmirndewernhworreni.

Peter Benbenemarnbom Bininj Dja Daluk

Acts 9:32-43

³² Bu kumekbe bolkyimi wanjh Peter nungan dedjingmey regehrey kubolkwarlahbubuyika. Nungka wam benyikang God nuye bininj nawu birrikang kunred kabolkngeyyo Lydda.

³³ Kaluk kumekbe bingalkeng nakudji bininj nawu ngeyyoy Aeneas nawu nadjalwernbirlni. Bu minj kukrokarokayinj dja mak minj dolkkayi kore kumadjbeh kore djalyoy bu kunkuyengni kunbidkukudji dja danjbik mandjewk.

³⁴ Wanjh Peter bimarneyimeng namekbe bininj, "Aeneas! Yirrolkka, dja yimadjdukka ke kunmadj, bu nungka Jesus Christ ngunmarnbom." Wanjh Aeneas djaldolkkang kundjalburrikudjini bu bimarneyimeng.

³⁵ Birriwern bininj nawu birrihni kunred Lydda, dja mak kore kabbal bolkngeyyoy Sharon, bu birrinang nanihnjanu bininj makminj, wanjh kunu bedmanwali birribalkangeborledmeng bu birridjareminj nuye nawu Kawohrnan Rowk.

³⁶ Bu Peter dingihdi kore kunbolk Lydda, wanjh darnkih kubolkbuyika bolkngeyyoy Joppa. Wanjh ngalkudji daluk ni kumekbe kunred Joppa ngalbu bihmunkekadungi Jesus. Kaluk ngalngeybokenhni. Bu Hebrew kunwok birringeybuni "Tabitha", dja manbu Greek kunwok birringeybuni "Dorcas".*

Kaluk ngaleng kunmak djalkurduyimi dja benbidyikarmeng nawu birrimarladj bininj.

³⁷ Wanjh kunmekbe bolkyimi bu ngaleng dulkkihngalmeng, wanjh doweng. Dja bedda nawu birrihdjarrkdi birrikukdjirridjbom dja birrikukurmeng kore kaddumkah kunrurk kore yongohoy.

³⁸ Bu kuhni kaluk yimerranj wanjh nawu Peter nungka djahdjaldi kore kunred Lydda. Wanjh nawu birribadbuyika bininj nawu birrimunkekadungi Jesus kore kunred Joppa, bedda birriwobekkang Peter bu dingihdi kore darnkih kunred Lydda. Wanjh bindimunkeweng bininj bokenh

* **9:36** Kaluk Manekke kunngey bokenh kangeykenhkan mayh nawu deer

bu benemarrkinyikang Peter, wanjh benemarneyimeng, "Mah werrknin yimdjallay kore ngad."

³⁹ Wanjh Peter kumdjaldolkang dja birridjarrkwam. Bu bedda birrimbebmeng kore kunred Joppa, bedda wanjh birribaldjalkang birribalyibdbom kaddumkah kururk kore ngaleng kuyohkuyoy. Dja ngalbu daluhdaluk nawu kamahkamarrdjuhkunni birrimodjdjohmeng Peter, dja birrimirrkalkkiwam bu ngalmekbekenh daluk doweng, dja mak birrimadjmey kunmadj bu birrimadjbukkang Peter nawu ngalengman madjibbuni korroko.

⁴⁰ Wanjh Peter benbebkeng rowk kore kururkkeh, dja barddurrukkurlhdanj bu danginj yiwarrudj. Wanjh nungka mirrkborledmeng dja bimarneyimeng ngalbu kuyohkuyoy daluk, "Tabitha, yimdolka." Wanjh ngaleng mimbayhmeng, dja binang Peter bu dingihdi dja kumdolkang bu kumhni.

⁴¹ Wanjh Peter bibidmey, dja birrolkkayhweng. Dja benyawoyhkayhmeng bininj nawu birriwoybukwoni Jesus, dja mak daluk nawu kamahkamarrdjukun dja bendarrkidbukkang Tabitha bu ngaleng yawoyhmimbini.

⁴² Wanjh birridjalmirndewarlahkenh bininj rowk nawu birrihni kore Joppa birriwobekking, wanjh kunu bedmanwali birridjalwern bininj birriwoybukwong kore Jesus.

⁴³ Wanjh Peter balyerrkang wurd kunwern kunkodjke kore kunred Joppa. Bu benedjarrkni bininj nabuyika nawu ngeyyoy Simon, nawu kunkulah mayhkenh marnbuhmarnbuni.

10

Angel Bimarnewokdanginj Cornelius

Acts 10:1-8

¹ Kumekbe kore kunred bolkngeyyoy Caesarea, nakudji bininj ni nawu ngeyyoy Cornelius. Kaluk nungka benmarnewohnani djamun nawu birrikang Rome kore kubolkkimuk Italy.

² Cornelius dja nawu nuyeni namud bedda birrimakni dja birriwokmarrkmangi God. Nungka benkukwoni nawern kunwardde nawu birrimarladj bininj, dja mak dingihdi yiwarrudj bu kunbarnangarra rowk.

³ Kaluk bu balwolehwolehminj bu kundung danjbik yimerranj, wanjh Cornelius waralngang. Bu yiman yerreh bihwaralnani nawu angel kumhdjaldi. Wanjh nawu angel bingeybom, yimeng, "Cornelius!"

⁴ Wanjh Cornelius keleminj duninh bu bidjalwernhkuknang nawu angel, wanjh bidjawam, yimeng, "Nawu yiwohnan, njale yidjare?" Wanjh nawu angel bimarneyimeng, "God ngunwokbekking bu yidjawamkenh bu yihdi yiwarrudj, dja mak ngunnang bu yihbenkukwoni kunwardde nawu birrimarladj bininj, wanjh kumekbekenh kunu God ngunhburrbun ngudda.

⁵ Mah wanjh, yibenmunkewemen bininj nawu ke kabirrire kunred Joppa ba bu kabirrimang dja kabirrimyirrunnden Simon nawu birringeybuni kunngeybuyika Peter.

⁶ Nungka kabenehdi nabuyika bininj nawu kangeyyo Simon nawu kahreddi darnkih kore kurrula. Nungka wanjh kunkulah nawu mayhbeh kamarnmarnbun."

⁷ Bu angel bibawong Cornelius wanjh nungka benbenekayhmeng bininj bokenh nawu benemarnedurrrkmirri nuye, dja mak nabuyika bininj nuye nawu djamun, dja nahni bininj biwokmarrkmangi God.

8 Wanjh Cornelius benwernhbenyolyolmeng rowk wanjh yerre benmunkeweng birriwam kore kunred Joppa.

God Biwaralbukkang Bu Bibengdayhkeng Nawu Peter
Acts 10:9-23

9 Bu kunbarnangarrabayikani birrimmekbe bininj birribebmi darnkih kore Joppa, wanjh bu kundjalmekebeni bolkyimi Peter nungan bidbom kukodjurrk bu dingihdi yiwarrudj kore kururrk. Kaluk kumekbe bolkyimi kunbarnangarraburrk.

10 Wanjh bu nungka dingihdi yiwarrudj bekkarreni marrwedoweng, dja djareni manme. Kaluk nawu birridjarrkyoy bu bedda birriboyenmarnemarnbuni manme, bu nungka kumekbe ningihni, wanjh waralwaralnani kumim nuye. Minj keyuwirrinj dja yiman bukirriyoy.

11 Kaluk nungka nang kaddum heaven kumdangmarrhmiwam, dja kumkolungi yiman kayime manburra nakimukkenh kore kumirrk nuye.

12 Namekbe manburra dahkendi mayh nawern nakukbubuyika, dja mak nawu kahwakerren, dja yika nawu welyi.

13 Wanjh Peter wokbekkang bimarnewokdanj nuye, bu bimarneyimeng, "Yirrolkka Peter, dja yibu nawu mayh ba yingun."

14 Wanjh Peter biwokmey, yimeng, "Burrkyak, ngudda nawu Yiwohrnan. Ngaye kunu minj nganguyi korroko nanihnjanu mayh nawu kukbubuyika rowk, dja kore mankarre kahyo ngadberre minj ngarringun nahnii nawu mayhbubuyika."

15 Wanjh biyawoyhmarnewokdanj, bimarneyimeng, "God nungka marnbom nahnii mayh kukmakmak, dja yuwn bu ngudda yihwarrewa."

16 Bu kuninjkunu danjbikkah bimarnekurduyimerranj nawu Peter, dja nawu manburra mayh dorreng dahkedahkendi wanjh delengdurndi kore heaven.

17 Bu kuninjkunu Peter djahdjalburrbuni kore baleh kab kakarremenmenyime kore waralnang, wanjh birrimmekbe bininj birridanj bik nawu Cornelius benmunkeweng birrimwam birrirrkdngalkeng manbu Simon nuye kunrurrk dja birridanginj kore kururkdangmaye.

18 Wanjh birrikayhmeng bindidjawam bininj kumekbe, "Yiddok bininj nawu kunngay bokenh Simon Peter kondanj kunu kahni?"

19 Bu Peter kaddum djahdjalbarndi kukodjurrk, balhburrbuburrbuni kore waralnang kerngehkenh, wanjh nawu Namalngmakkaykenh bimarneyimeng, "Yina. Birridanj bik bininj ngundihyawan ngudda."

20 Mah, yikolu kanjdji kurorre, ba bu ngurridjarrkre bedda dorreng nawu ngundihmadbun. Kaluk yuwn bu yikangemarrkwarre, dja ngaye wanjh kunmekbekenh ngabenmunkeweng kore ngudda."

21 Wanjh Peter kumkoluy kore kaddum kumhbarndi, dja benmarneyimeng, "Ngaye wanjh namekbe bininj nawu kandihyawan. Dja njalekenh ngudda ngurrimwam?"

22 Birrimmekbe bininj birriwokmey, birrimarneyimeng, "Cornelius nawu kabenmarnewohrnan djamun birriwern, wanjh nungka nganmunkeweng ngadberre. Bu nungka wanjh namak bininj dja mak kabiwokmarrkmang God. Birriwern bininj nawu Jews, wanjh bedda rowk kabirridjalmakwan. Kaluk nawu God nuye angel namakni, wanjh bimarnewokdanj nawu Cornelius dja bimarneyimeng, 'Yimka nawu Peter kore ngudda ke kunrurrk, ba bu yiwokbekkan ngunmarneyime.' Wanjh kunmekbekenh Cornelius nganmunkeweng ngadberre."

23 Bu kuninjkunu Peter benwokbekkang birrimarneyimeng wanjh nungka benkimay dja birridjarrkyonginj. Wanjh bu kumkabel yimerranj

Peter birridjarrkwam birrimekbe bininj, dja mak yikahwi nawu birriwoy-bukwoni Jesus nawu birrikang Joppa birridjarrkwam bedda dorreng.

*Nawu Birriyungkih Bininj Nawu Minj Jews Birriwoybukwoyi Jesus
Acts 10:24-33*

²⁴ Wanjh kunkodjkebuyikani bedda birribebmeng kore Caesarea, dja wanjh nawu Cornelius benyengkihkebrokmadbuni bedberre. Nungka wanjh benyengkihormnameng kunrurrk nuye nawu nuye namud dja mak nawu djawirna duninj nuye.

²⁵ Bu Peter kumngimeng kore kunrurrk birrihni, wanjh Cornelius bimarnemakang kore kurrenge nuye.

²⁶ Wanjh Peter birrolkayhweng kore bimarnemakang, dja bimarneymeng, "Yirrolkka. Dja ngaye kunu djal bininj yiman kayime ngudda."

²⁷ Wanjh Peter dja Cornelius benebalhwokkihyingimeng kore kururrk, kaluk kumekbe kururrk Peter benmirndenang birriwern bininj bu birriy-ingihmirndemornnamerrinj nuye.

²⁸ Wanjh nungka yimeng bedberre, "Ngudda bininj nawu minj Jews, ngurriburrbun manu mankarre kahyo ngadberre nawu Jews bininj, manbu kahyime minj karriraworren ngudda nawu minj Jews, dja mak kahyime minj mak ngad ngundiyikan ngudberre. Dja bonj. Ngaye wanjh ngamdjalwam bolkkime bu karriraworren. Kaluk God nganwern-hbuk kang bu minj nangale bininj ngawarrewa bu ngayimerren wardi God kabiwarrewa dja nawarre.

²⁹ Wanjh kumekbekenh kunu bininj ngandikimey, bu minj ngabendangwemeninj. Mah wanjh, kandimarneyimen mandjad ba ngaburrbun njalekenh ngudda kandikayhmeng ngamwam?"

³⁰ Wanjh Cornelius bimarneymeng nawu Peter, "Bu kunkarrngbak-mengni kunkodjke ngaye wanjh ngahdi yiwarrudj kondanjkuu kore kururrk ngardduk. Kaluk kuninjkuu dungyimi wolehwolehni bu danjbikni kundung. Wanjh kundjalmekbeni bininj kumhdi kore kumirr ngardduk nawu madjkukbelebami djongbuyindi.

³¹ Wanjh nganmarneyimeng, 'Cornelius. God ngunwokbekkang bu yihdi yiwarrudj, dja mak ngunnang bu yihbenkukwoni kunwardde nawu birrimarladi bininj, wanjh kumekbekenh kunu God ngunhburrbun ngudda.

³² Mah wanjh, yibenmunkewemen bininj nawu ke kabirrire kunred Joppa ba bu kabirrimang dja kabirrimyirurnden Simon nawu kabirringeybun kungeybuyika Peter. Kaluk nungka kabenehdi Simon nawu kunkulah kamarnbumarnbun, nawu darnkih kurrula kahreddi.'

³³ Kuninjkuu angel nganmarneyimeng, wanjh kunu djalwerrkni ngabendjalmunkeweng kore ngudda, wanjh kunu kundjalmak bu ngudda yimwam. Wanjh bu bolkkime ngarridjarrkmirnderri kore kumirr nuye God, ba bu ngarribekkan kunwok manbu nawu Kawohrnan ngunmarneyimeng bu kanmarneyimekenh ngadberre."

*Peter Benmarneyolyolmeng Bininj Nawu Minj Jews
Acts 10:34-43*

³⁴ Wanjh Peter dedjingmey wokdiwokdi, bu benhmarneyimi, "Wanjh bolkkime ngaye ngawohburrbun bu woybukkih duninj God minj nangale kabenwidnan bininj nawu djenbubuyika kore kubolkbubuyikabeh.

³⁵ Nungka kabenmakwan bininj rowk nawu kabirrimarnekele dja mak kabirrikurduyime kore kunmak nuye."

³⁶ "Ngurriburrbun bu God benmarnewokmunkeweng bininj nawu Israel benkebmawahmeng. Kaluk maninjmanu kunwok kunmak kayime bu

Jesus Christ wanjh Kawohrnan Rowk kore birrimirndewarlahkenh bininj dja nungka kanwon kunmodmikenh kadberre.”

37 “Dja mak ngurriburrbun bu baleh yimerranginj kore kubolkwarlahkenh Judea. Bu dedjingmey kore Galilee bu John benmarneyolyolmi bininj kunmekbe birrihni ba bu kabirrikodjdjuhmikenh.

38 Dja mak ngurriburrbun nawu Jesus kumdolkkang Nazarethbeh, dja God bikodjdelhkeng Namalngmakkaykenh dja kundulkarre dorreng. Wanjh nungka regehrey kore kubolkbubuyika bu kurduhkurduyimi kundjalmak, dja benmarnbuni bininj nawu Namarnde Duninj benbhongkarmmi. Dja God bibidyikarmeng.”

39 “Ngad nawu Jews bininj wanjh ngarrihnang kundjalwern bu Jesus kurduhkurduyimi kore ngadberre kunbolc dja mak kore kukadjeh Jerusalem. Dja kunmekbe wanjh bininj birribom Jesus bu birrikukbarnameng kore kundulk.

40 Kunu bonj, dja bu kunbarnangarra danjbik, wanjh God biyawoyhdolckayhweng Jesus kore dowengbeh dja mak benyawoyhkukbukkang birriwarlahkenh bininj ba bu birridarrkidnang.”

41 “Minj birriwernniwirrinj bininj rowk birrinayinj Jesus bu yawoyhmimbiminj, dja wanjh God ngandjaldjarrngom ngad bu ngarridar-kidnang bu yawoyhdarrkidminjbeh. Ngad wanjh ngarridjarrkbonguni dja ngarridjarrknguni manme Jesus dorreng bu yawoyhdolckang kore kundowikenh.

42 God wanjh nganwokrayekwong ngadberre bu ngarrire ngarrbenmarnemulewan birriwern bininj bu woybukkih Jesus nakka nadjalkudji nawu God bidjaldjarrngom ba bu kabendjadmekenah bininj rowk, nawu kabirridarrkiddi dja mak nawu birridowerrinj.”

43 “Birriwern bininj nawu prophets birriyingkih mulewani kunwoybuk dorreng nuye nawu Jesus. Kaluk birrimulewani bu birriyimi, ‘Bu nangale bininj nawu kabiwoybukwon, wanjh nakka God kabimarnebhengmidjan kunwarre nuye kore kungey Jesus.’ ”

Namalngmakkaykenh Benbarrkbom Bininj Nawu Minj Jews

Acts 10:44-48

44-46 Bu Peter balhwokdi bu benmarneyolyolmi, wanjh Namalngmakkaykenh kumkoluy kore birriwern bininj rowk nawu birrihwokbekkani kunwok kore Peter benmarneyimeng, dja benmarnbom ba bu birriwokdanginj kunbubuyika kunwok dja birriburlumi God. Wanjh nawu bininj birrimdjarrkrey Peter nawu birriwoybukwoni Jesus, kaluk bedda bininj nawu Jews, dja bu bindibekkkang wanjh bedda birridjalkangebarrhmeng bu bindinang birrikukbarlmikendi Namalngmakkaykenh dorreng bininj nawu minj Jews.

47 Wanjh Peter benmarneyimeng nuye bininj nawu birridjarrkwam, “Minj nangale mak kabenngurde birrimekbe bininj bu kabirrikodjdjuhme kukku. Wanjh bedda birridjalmey Namalngmakkaykenh yiman kayime ngad nawu Jews bininj.”

48 Wanjh Peter benmarneyimeng bininj nuye bu kabindikodjdjuhke birrimekbe bininj nawu Cornelius birridjarrkni kore kungey nuye Jesus Christ. Kaluk yerrekah wanjh bedda birriyidjawam Peter bu kabirribalwohni bu waken.

11

Peter Benbengdayhkeng Bininj Kore Jerusalem Bu God Woybukkih Kabengehke Bininj nawu Minj Jews

Acts 11:1-18

¹ Nawu apostles dja mak birribuyika bininj nawu birriwoybukwong Jesus kore Judea, bedda bindiwobek kang bininj nawu minj Jews bu birriwokmarrkme God nuye kunwok.

² Kaluk Peter dja mak bininj nawu birridjarrkwam, wanjh birribebmeng kore Jerusalem. Kumeke birrilakkayen bininj nawu birriwoybukwong Jesus wanjh birridungi nawu Peter.

³ Bedda birrimarneyimeng, "Njalekenh ngudda yibenyikang bininj nawu minj birrilakkayen, bu ngurringimeng kurrambalk bedberre dja mak ngurridjarrknguneng manme?"

⁴ Wanjh Peter benmarnekarreyolyolmi bu benbukkang njalehnjale rowk bu kurduyimerranj.

⁵⁻⁶ Wanjh benmarneyimeng, "Bu ngaye ngahdi kore kunred Joppa, kaluk kumeke ngahdi yiwarrudj wanjh ngawaralnani yiman manburra kumkolungi kaddumbek kore heaven. Wanjh kumdjaldarnhkolungi darnkih kore ngaye. Wanjh ngaroyhmeng bu nganang mayh nadjalwern nawu nabang dja mak nawu kelebuk, dja mak nawu kawakewake dja mak nawu welyi.

⁷ Wanjh ngaye ngabek kang kunwok nganmarnewokdanginj bu nganmarneyimeng, 'Yirrolkka Peter, yibu mayh ba yingun.'

⁸ "Dja ngaye ngayimeng, 'Aba burrkyak, nawu Yiwohrnan! Ngaye minj korroko nganguyi nawu nanihnjanu mayh kukbubuyika dja kore mankarre kahyo ngadberre minj ngarringun nawu nawarre mayh.'

⁹ Dja kunwok kumyawoyhwokdanj kaddumbek bu nganmarneyimeng, 'God marnbom nanihnjanu mayh bu kukmak rowk, dja ngudda wanjh yuwn bu yiyawoyhwarrewe.'

¹⁰ "Kuhni nganmarnekurduyimerranj bu danjbikkah, wanjh manbu manburra balyawoyhdelengdurndi kore kaddum dja mayh nawarre warridj."

¹¹ "Kundjalmekbe yerreh birridanjbig bininj wanjh birrimdanginj kore kunrurrk ngahyoy. Kaluk bininj kore Caesarea bindimunkeweng.

¹² Dja Namalngmakkaykenh nganmarneyimeng, 'Ngurridjarrkay birimekbe bininj, dja yuwn bu yibendjalwarrewe.' Wanjh ngarridjarrkwam, dja mak nawu naninjanu six bininj nawu bolkkime ngarridi, wanjh nakka ngarridjarrkwam bedda dorreng kore kunrurrk nuye nawu bininj geyyoy Cornelius."

¹³ "Wanjh nungka Cornelius nganmarneyimeng ngadberre bu binang angel dingihdi kore kururrk nuye. Wanjh namekbe angel bimarneyimeng, 'Yibenmunkewemen ke bininj kore Joppa ba bu kabirrimang nawu bininj kangeyyo bokenh kungey Simon dja Peter, bu nungka wanjh kamre nganmarneyolyolme ngudberre.

¹⁴ Bu nungka wanjh kayolyolme ngudberre bu God ngundjarrkngheke ngudda dja nawu ke namud rowk.' Kuhni wanjh angel bimarneyimeng nawu Cornelius."

¹⁵ "Wanjh ngaye ngarredjingmey bu ngabenmarnemulehwani Cornelius dja mak nawu nuye namud, dja bu ngabalwokdi bedberre, wanjh nawu Namalngmakkaykenh kumkoluy kumwam bedberre, yiman yimi ngad kanmarnekurduyimerranj kadberre bu kerngehenhni."

16 “Bu kunmekbe wanjh ngaye ngabalwohburrbom kore nawu Kawohrnan Rowk yolyolmeng kadberre, bu yimeng, ‘Nungka John benkukduhkeyi bininj kore kukku, dja ngudda ngurrikodjdjuhme kore Namalngmakkaykenh.

17 Woybukkih, God benwong Namalngmakkaykenh bu kadjalrohrok yiman kayime ngad kanwong kadberre bu karriwoybukwong Jesus Christ nawu Kawohrnan Rowk. Wanjh kunmekbekenh ngaburrbom bu God durrmirranj bedberre. Dja minj mak ngaye ngarrenghkemeninj God kore nungka kurduyimeng bedberre.” Kuhni bu Peter benmarnekarremulewarrinj bedberre.

18 Bu bedda birriwobekkani kore Peter mulewarrinj, wanjh minj birriyawohyolyolmeninj, dja birridjalburlumeng God. Wanjh birriyimeng, “Wanjh kadjalmak bu God kadjare bininj nawu minj Jews bu kabirikangeborledme nuye ba bu kabirridarrkid munguyh kore nungka.”

Bininj Nawu Birrihni Kore Kunred Antioch Birribekkanj Kunwok kunmak

Acts 11:19-24

19 Kunmekbe bolkyimi bu nawu Stephen birribom, wanjh kunyid kumbemmerinj bedberre nawu birriwoybukwoni Jesus. Wanjh kunmekbekenh kunu birribebbehmirndeyarlahyarlarrmeng dja birriwam djarreh kore kubolkbubuyika. Yikahwi birriwam kubolkkimuk Phoenecia, dja mak birribadmirndebuyika birriwam kore manyunkurr kabolkngeyyo Cyprus, dja mak birribadmirndebuyika birriwam kore kunredkimuk Antioch.

Bu birrirey wanjh bedda bindidjalmarnemulewani God nuye kunwok bedmandeleng birridjalkudjiwi bininj nawu Jews.

20 Dja yikahwi birrimekbe bininj nawu birrimdolkkang kore manyunkurr kabolkngeyyo Cyprus, dja mak kubadbolkbuyika kunbolk Cyrene, wanjh kaluk birriwam kunred kabolkngeyyo Antioch dja bindimarneyimeng bininj nawu minj Jews nawu Greek kunwok birriwokdi bu bindimarneweykani kore birriyolyolmeng kunwok kunmak manbu Jesuskenh nawu Kawohrnan Rowk.

21 Wanjh nawu Kawohrnan Rowk benbidyikarmeng bu kuninj kunu birrimulewani, wanjh birridjalwern bininj nawu minj Jews bu bindibekkanj, wanjh bedda birridjaremulewarrinj nuye nawu Kawohrnan Rowk.

22 Bininj nawu birrikodjkulumakni yiwarrudj bedberre birrihni kore Jerusalem, wanjh bindiwobekkanj bu kuninj kunukenh, wanjh bedda birrimunkeweng Barnabas bu wam bennang bininj nawu benmarnekurduyimerranj nawu birrihni kore Antioch.

23-24 Barnabas wanjh namakni dja mak kukbarlmiyindi Namalngmakkaykenh bu biwernhwoybukwoni God.

Bu nungka bolkmey Antioch wanjh bennang bu God bendjalkongibom bininj nawu minj Jews, dja wanjh djalwernhnjilngmakminj dja benbengyolyolmi. Bu benmarneyimeng bedberre, “Yuwn bu ngurriwarnyakmulewarren, dja ngurridjalwokmarrkma dja ngurridjalwoybukwo nawu Kawohrnan Rowk.” Wanjh birridjalwern bininj birrimarneborledmeng birrimunkekadjuy nawu Kawohrnan Rowk.*

Barnabas Bingalkeng Nawu Saul Dja Bikang Kore Kunred Antioch Acts 11:25-26

* 11:23-24 Kore Greek kamenyime, “bu birriweykang, wanjh nawu Namalngmakkaykenh benkanj birriwern bininj kore nawu Kawohrnan”.

²⁵ Wanjh yerrekah Barnabas wam kore kunred kunkimuk kabolngeyyo Tarsus bu biyawani nawu Saul.

²⁶ Wanjh Barnabas bingalkeng Saul dja bimyirurndi kore kunred Antioch. Bu kunmekbe wanjh beneyerrkang mandjewk nakudjini, bu bindibengyolyolmi bininj nawu birrikodjkulumakni yiwarrudj bedberre. Bu munguyh bindibukkabukkani nawu birriwern bininj.

Kore kumekbe kunred Antioch wanjh kerrngehkenhni bu birriwern bininj bindingeykurmeng bininj nawu birrimunkekadjungu Jesus bu "Christians"†.

*Agabus Nawu Prophetni Benmarneyolyolmeng Bininj Kore Antioch
Acts 11:27-30*

²⁷ Kaluk kunmekbe bolkyimi yikahwi nawu prophet birrikang Jerusalembeh wanjh birriwam Antioch.

²⁸ Nakudji prophet bininj nawu ngeyyoy Agabus, dolkkang Namalng-makaykenh bibidyikarmeng bu wokdanginj. Wanjh yimeng, "Kuhni bu kakarrerayekmen kadberre nawu karrimirndewarlahkenh bininj nawu karrihni kubolkbubuyika rowk kore nawu Romans bininj kandiwohna-wohnan, dja wanjh manme kayakayakmen rowk kadberre." Kuhni bu Agabus nawu prophet yimeng. (Kaluk yerrekah wanjh woybukkih yimeranj bedberre bu nawu Claudius wohrnawohrnani kumekbe kunred.)

²⁹⁻³⁰ Wanjh nawu birrimunkekadjungu Jesus kore Antioch birrikarremarnburrinj bu bindibidyikarmeninj nawu birribuyika bininj nawu birriwoybukwoni Jesus kore birrihni kunred Judea. Dja mak bindimarne-munkeweyi kunwardde nawern bu bindibebbehbidyikarmi bedberre. Bu bedda rowk birribebbehkurmeng kore birribebbehkukkarmi. Wanjh bedda bindikukwong Saul dja Barnabas bu benekukkang bindikukwong daborrabolk kore nawu yiwarrudj bedberre bininj nawu birrihni Jerusalem.

12

*Nawu King Herod Agrippa Bendungi Bininj Nawu Jesus Birriwoybukwoni
Acts 12:1-4*

¹ Bu kunyimekbeni King Herod dedjingmey bendungi dja benbuni yikahwi nawu bininj birrikodjkulumakni yiwarrudj bedberreni, dja benkurmeng kore prison.

² Benmarneyimeng nawu djamun nuye bu birribom James mandjawakyi, dja birribom doweng. Namekbe nawu John benedanginj.

³ Herod bennang bu nawu Jews bininj birrinjilngmakminj bu kuninjkuu kurduyimerranj nuye James. Wanjh kunmekbekenh kunu Herod benmunkeweng bininj birridarrkidmey Peter warridj. Bu kuninjkuu wanjh ngalenggarreni mulil birrikarmi kore birringuni manlodweleberrk manbu minj karmeninj mankuklurmlikenh.

⁴ Wanjh nawu Herod nuyeni bininj birrimey Peter birrikang prison bindibalbidkenwong nawu sixteen djamun bu birrinahnani. Kaluk bedda birrimirndebebbendi kunkarrngbakmeng bininj. Herod djareni bikarmeninj Peter kaluk bu bularrbuyindanj mulil birrikarmeninj manbu God kunkareni bendarrkidbawonikenh bininj nawu Jews. Kaluk Herod djareminj bibebkeyi yerrekah bu bidjadmeninj kore kumirrk bedberre bininj nawu birrimirndewern.

† 11:26 "Christian" kameyime, "nawu Christ nuye bininj".

*Angel Bibebkeng Peter Kore Prisonbeh
Acts 12:5-11*

⁵ Peter djahdjalarurrkkendi kore prison, dja birribuyika bininj nawu birrikodjukulumak wanjh birridjalmarnedi yiwarrudj kore kururrkbuyika birrimirnderri, bu birridjawani God munguyh.

⁶ Wanjh darnkih kumhyimerrangeni bu Herod kabidjadmekenh Peter, kaluk kumekbe kukakni nungka keyohkeyoy kore prison bu dukkayindi wirlmurrng chain bokenh. Kaluk nawu djamun bokenh djarrirn djarrirn benebebehmarnedi, dja nawu birribubuyika djamun birridangnahnani kore prison.

⁷ Wanjh kundjalmekbe angel nawu Kawohrnan Rowk nuye djaldanginj kore prison kururrk, dja kumdjalurrkkwolkang. Nawu angel bidjurlhmeng Peter, dja bimarneyimeng, “Yimdolkka werrek!” Wanjh nawu wirlmurrng chain berlduberldukkayindi wanjh nakka djalyerrhmeng ngalengmandeleng.

⁸ Wanjh nawu angel bimarneyimeng, “Yidjongburrimen kunmadj dja nawu kundengekenh ke.” Wanjh Peter kurduyimeng bu djahdjaldjongburrij. Wanjh angel biyawoyhmarneyimeng, “Yidjongburrimen nawu kunbonjdjekkenh nawu kunmadj, dja kanmunkekadju.”

⁹ Wanjh nawu angel balbebmeng dja Peter bibalmunkekadjungi yerreh. Kaluk Peter minj burrbuyinj bu woybukkih kurduyimerranj nuye. Kaluk yimankek nungka yimi bukirri naninani.

¹⁰ Benebalwam beneyurrhkeng nawu nayungkih kumhdi djamun, wanjh benebalwam nabuyika beneyawoyhyurrhkeng djamun, wanjh kaluk benebebmeng kore kururrdangmayekimuk manbu wirlmurrngyi birridangmarnbom. Wanjh ngalengmandeleng kumdjaldangmarrhmiam berrewoneng, wanjh benebalbebmeng benewam kore rurrrkmirnderri. Bu benealhrey manbolhkudji, wanjh kumekbe angel bidjalwohba-wong nawu Peter.

¹¹ Wanjh kumekbe Peter djalbengdadjmeng bu burrbom. Wanjh marneyimerrinj nungandeleng, “Ngadjalburrbun woybukkih duninj nawu Kawohrnan Rowk bimmunkeweng ngardduk nawu angel nuye bu nganbebkeng kore Herod nganmarnbom ngahbondi, dja mak kore nawu Jews bininj birridjareni yimankek bu kunwarre nganmarnekurduyimerangimeninj.”

*Peter Wam Bebmeng Kore Bininj Nawu Birrimarnedi Yiwarrudj Nuye
Acts 12:12-17*

¹² Bu Peter wohburrbom wanjh nungka wam kore kunurrk ngalengngarre Mary ngalbu ngalbadjan nuyeni John nawu mak birringeybuni Mark. Bu kunmekbe kururrk wanjh birriwern bininj birrihni dja mak birrihdjaldi yiwarrudj.

¹³ Wanjh Peter kumhdangdongohdoy kore kuberrkkah kumhdi. Kaluk kumekbe ngalyawkyawk ngalbu durrrkmidurrrkmirri ngeyyoy Rhoda, kumwam bu karrangan nangale nawu kahdi kore kururrdangmaye.

¹⁴ Wanjh ngaleng biwokburrrkburrrkbebkang yiman Peter kumwokdanginj. Dja ngaleng minj bimarnedangmarrhmayi, dja wanjh djalkangebarrhmeng bu wernhnjilngmakminj duninj. Kunmekbekenh kunu minj burrbuyi bu dangmarrhmayi. Dja ngaleng werrek djaldurndi kore birrimirnderri dja benmarneyimeng, “Nawu Peter kamhdi kore kuberrk kore kururrdangmaye!”

¹⁵ Kaluk bedda birrimarneyimeng ngalmekbe ngalyawkyawk, “Njale bu yihbengwarmen.” Dja ngalengman munguyh bendjalmarneyimi bu

kunwoybuk. Wanjh bedda birriyawoyhmarneyimeng, “Kunubewu angel nuye yinang kumhdi.”

¹⁶ Peter kore kumhdi munguyh kumhdjaldangdongi. Kaluk burrk dja birrarnedangmarrhmay nuye, dja birridjaldarrkidnang Peter wanjh birridjalkangebarrhmeng duninj.

¹⁷ Peter wanjh benngurdengkunbidbewi nuye, dja benmarneyolyolmeng bu nawu Kawohrn Rowk bibebkeng kore prisonbeh. Wanjh benmarneyimeng, “Ngurrbenmarneyimen nawu James dja mak birribuyika nawu kabirriwoybukwon Jesus bu kuninjku kurduyimerranj ngardduk.” Wanjh kumekbe Peter benbawong dja wam kubolbukuyika.

Bu King Herod Doweng

Acts 12:18-25

¹⁸ Kaluk bu barrhbom nawu djamun birriwerhnjilngwarreminj duninj bu minj birriburruy bu baleh bimarnekurduyimerranj Peter.

¹⁹ Herod benmunkeweng birribuyika djamun bu birriyawani Peter, dja minj birringalkemeninj. Wanjh Herod bendjawahdjawam bedberre, wanjh bendjurrkkang nawu birribuyika bininj nuye dja bindidjalbom birrimekbe djamun nawu birrirurrknahnayi kore Peter ni.

Kaluk burrk King Herod wabmeng kore kunred Judea dja balwam bewh kuredkimuk Caesarea, dja kumekbe ningihni waken.

²⁰ Kaluk kunmekbeni King Herod benjirrhmiwoni bulkkidj duninj nawu birrihni kunred bokenh bolkngeyyoy Tyre dja mak Sidon. Wanjh bininj nawu birrihni kumekbe kunred bokenh birrimirndeyormeng kabirrinan kore King Herod ningihni. Bu kumekbe birribebmeng bedda wanjh birrimey birriyingkihwokdanj nakudji bininj nawu ngeyyoy Blastus. Kaluk nungka bimarnedurrkmirri dja bibidyikarrmi nawu King Herod, wanjh nungka karremakwam bu kabenewokdi King Herod bu kabenbidyikarmekenh birrimekbe bininj. Bedda birrarnedjareni Herod bu ngurdmeninj kore benhdungi ba bu bedda birrimayi manme kore nungkahbeh.

²¹ Kaluk kumekbeni kumhrey kunbarnangarrakuken ngarre bu yimeranj, wanjh King Herod djongburrij nawu madjmakkaykenh duninj, dja yerrkang kore bolkkuken king kabirrihni, wanjh benmarneyolyolmeng bininj rowk.

²² Bu bedda birribekgang wokdanginj, bedda birrikaykahkayhmeng kore kumirrk nuye, “Nahni wanjh nawu god wokdanj kadberre, bu minj nungka djalbininj.”

²³ Bu kunmekbe birrimarneyimeng, nawu King Herod minj biburlumeninj God, wanjh nawu angel nuye nawu Kawohrn Rowk bibom, bimarnbom dulkihgalmeng kunkimuk, dja yolknawern bebmerrinj bihdarrkidkanjguni, wanjh yerre baldoweng.

²⁴ Dja God nuye kunwok djahdjalwarlahmeni kumekbe kore birriwarlahkenh bininj birrihni.

²⁵ Wanjh bu Barnabas dja Saul beneyakwong benedurrkmirri kore Jerusalem, wanjh benedurndi kore Antioch. Benekang John nawu Mark ngeyyoy bu birridjarrkwam.

13

God Benbenedjarrngbom Barnabas Dja Saul Bu Benemarnedurrkmirrikenh

Acts 13:1-3

¹ Bininj nawu birrikodjukulumak yiwarrudj bedberre birrihni kore kunred kabolkngeyyo Antioch. Yikahwi bedberre nawu prophets dja mak bininj nawu bindibukkabukkani. Bedda birringeyoy nawu Barnabas, dja Simeon nawu birringeybuni Niger, dja mak Lucius nawu nakang Cyrenebeh, dja mak Manaen nawu benedjarrkdjordminj nawu Herod Antipas, dja mak nawu Saul.

² Bedda birridjarrkburlumi bu birrimarnewayini nawu Kawohrnan Rowk, dja mak birribawoni manme wurd waken ba bu birrimarnedi yiwarrudj. Wanjh bu birribalhdi nawu Namalngmakkaykenh benmarneyimeng bedberre, “Kandiwo Barnabas dja Saul kore ngaye ba bu kabenedurrkmirri ngardduk kore ngabenbenemarnedjare berrewoneng.”

³ Wanjh birriyawoyhdanginj yiwarrudj manme yak bu kunmekbekenh, dja bindiwelengmarnebidkurmerrinj kore Barnabas dja Saul, dja bindimunkeweng, benewam.

*Barnabas Dja Saul Benewam Kore Manyunkurr Kubolkkimuk Cyprus
Acts 13:4-12*

⁴ Bu Namalngmakkaykenh benbenemunkeweng nawu Barnabas dja Saul, kaluk kerrngehkenh benedjalwam kore kunbolk bolkgneyyoy Seleucia. Kumekbe wanjh bedda benebidbom kabbala benedjowkkeng manyunkurrkimuk kabolkngeyyo Cyprus.

⁵ Kumekbe bedda benemkoluy kore kabbalabeh wanjh benewam kunred bolkgneyyoy Salamis. Wanjh benengimeng kore kunrurrk bedberre bininj nawu Jews manbu synagogue dja beneweykani God nuye kunwok. Dja mak John Mark nungka wanjh benbenebidyikarmeng dja birridjarrkdi.

⁶⁻⁸ Wanjh bedda birribalwohrengehrey kubolkwarlah kore manyunkurr, kaluk bu birribebmeng manbebkalebuyika kore kunred bolkgneyyoy Paphos. Kumekbe nakudji bininj ni nawu ngeyyoy Bar-Jesus. Dja mak kunngeybuyika birringeybuni Elymas kore Greek bedberre kunwok. Kaluk nungka wanjh Jew bininj, dja mak weykahweykani kunwok yiman prophet nawu kakurrehkurren, dja mak nungka wanjh marrikidjuni. Nungka benedjarrkdarnhni nawu bininj ngeyyoy Sergius Paulus, nawu wohrnawohrnani kumekbe kunbolk. Wanjh nawu Sergius Paulus nungka wanjh mayaliwernni kore burrbuni mankarre. Nungka benbenemarnekayhmeng Barnabas dja Saul bu nungka djareminj bekkayinj God nuye kunwok.

Kaluk nungka Elymas djareni benbenengurdkemeninj beneweykani kunwok nuye God. Dja mak yimankek birrenghkemeninj nawu Sergius Paulus kore biwoybukwoyi Jesus.

⁹ Dja nawu Saul wanjh kukbarlmikendi Namalngmakkaykenh, dja mak kunngeybuyika birringeybuni nawu Paul kore Greek bedberre kunwok. Wanjh nungka bolknang, binang mandjad kore Elymas.

¹⁰ Dja bimarneyimeng, “Ngudda nawu beywurd nuye Namarnde Duninj! Ngudda yidjalwernhwidnan kore kunwern bu kunmakmak duninj. Dja warridj munguyh yibenmarnekarreborledke bininj bu yihbenkowaneh. Dja yiddok munguyh yidjalkarreborledke manbu kunwoybuk nuye nawu Kawohrnan Rowk?”

¹¹ Dja yina, bolkkime nawu Kawohrnan Rowk ngunngurdke. Nungka ngundjal mimkarrme bu yimimbunjemen ba bu minj yibolknan bu kundedjumbungkenh.”

Wanjh kundjalburrikudjini kunkak yonginj kore kumim nuye, wanjh djalwohrehwehrey djareni bu nangale nawu bibidmayi bu bikayi kore baleh yarrka.

¹² Bu Sergius Paulus binang kumekbe yimerranj nuye nawu Elymas, wanjh nunganwali kangebarrheng dja wernhburrbom kore Paul dja Barnabas benebukkabukkani bu nawu Kawohrnan Rowkkeh, wanjh nungka bidjalwoybukwong Jesus.

Paul Dja Barnabas Benewam Kubolkkimuk Pisia Dja Paul Benmarney-olyolmeng Yesuskeh

Acts 13:13-24

¹³ Wanjh Paul dja bininj nawu birridjarrkrey birribidbom kabbala dja birribolkbawong kunred Paphos, dja birridjowkkeng kore kurrula wanjh birribemeng kore kunred Perga ngalenggarre kubolkkimuk Pamphylia. Kumekbe wanjh John Mark bennebawong kore Perga, dja durndi kore Jerusalem.

¹⁴ Wanjh benebolkbawong Perga dja benewam kore kunred Antioch ngalenggarre kubolkkimuk Pisia. Kaluk kunbarnangarra Sabbath ngarreni wanjh benengimeng kore kunrurrk synagoge dja beneyerrkang.

¹⁵ Dja yikahwi bininj kore Synagoge wanjh birribimngeybuni kore mankarre manbu Moses bimbom dja mak kore nawu prophets birribimbom. Kaluk bu birriyakwong, wanjh nawu birriwohrawnawohnani synagoge bindimarnewokmunkewerrinj nawu Paul dja Barnabas, birriyimeng, "Ngudda nawu karridanginj, bu kunwok ngunehkarrme manbu kankangemarnbun ngad bininj, wanjh ngunedolkka dja kandiwohbengy-olyolmen ngadberre."

¹⁶ Wanjh Paul dolkkang berlwayhmeng bu kawokdikenh bedberre, dja yimeng, "Bininj nawu Israel ngunkebmawahmeng, dja mak ngudda ngurribuyika bininj nawu ngurrikele nuye God, wanjh kandibekka.

¹⁷ God ngadberre nawu Israel ngankebmawahmeng, wanjh bendjarngbom nawu ngadberre mawahmawah. Dja benmarnbuni bu birrim-irndewernerreni dja birrikukenminj bu birrihni kunred ngalenggarre Egypt. Kaluk nungka benbebkeng kore kumekbe kunred birrihbongdi, bu kundulkare kunkimuk dorreng huye.

¹⁸ Bu nungka benmarnmarnbuni bedberre bu yeledj bendjalkani bu kunkuyeng mandjewk forty kore kubolldarleh birrihrehgehye."

¹⁹ "God benbom bu benyakwong rowk nawu seven birribebbehwok-bubuyikani nawu birrihni kunred Canaan, dja benbolkwong mahni kunbolk nawu ngad ngadberre mawahmawah.

Kuninjkuu kurduyimerranj dja birrihni kumekbe bu kundjalkuyengni mandjewk 450.

²⁰ Kalukburkk God benwong bedberre nawu bininj bindidjadmikenh dja bindibebbehmarnewohnani bedberre rowk kaluk rerrikah wanjh Samuel nawu prophetni kumebmeng."

²¹ "Bu Samuel birrikarmi wanjh nawu bininj birridjawani God bu king benwoyi. Wanjh God benwong Saul nawu beywurd nuye Kish, nawu Benjaminj bikebmawahmeng. Saul wanjh king benmarnewohnani bu forty mandjewk.

²² Wanjh yerrekah God biwayhkeng nawu Saul dja bikurrmeng David bu king yimerranj bedberre. God bimakwam David, dja wanjh kuhni benmarneyimeng bedberre, 'Ngaye ngangalkeng David nawu Jesse nuye beywurd. Ngaye ngamarnedjare nawu namak dja nganmarnekurduyime kore ngaye ngadjare rowk nuye.'"

²³ "Wanjh bolkkime God bikurrmeng nakudji bininj nawu David bikebmawahmeng nawu kangeyyo Jesus, ba bu ngannghehke ngarriwern bininj

nawu Israel ngankebmawahmeng. Bu kuninjkuu God kanberrebom kadberre rowk.

²⁴ Bu yerre Jesus kumwam, nawu John werck benhmarnemulewani bininj rowk nawu benkebmawahmeng Israel, kore nungka benhmarneyimi, 'Ngurrikangeboredmen nuye God, wanjh kunu ngurrikodjdjuhme.'

²⁵ Bu darnkih yakwoyi rowk kore durrmihdurrkmirrikenh wanjh nungka benmarnemulewarrinj, yimeng, 'Ngudda baleh ngurriburrbun kore ngayekah? Ngaye nuk minj mak Christ. Nungka wanjh yerreh kamhre ngardduk. Ngaye minj ngamak bu yimankek ngarrengeyerckke nawu karrengedjongbuyindi nuye.'"

Paul Benbengdayhkeng Bu Jesuskenh.

Acts 13:26-41

²⁶ Wanjh Paul benyawoyhmarneyimeng, "Mah wanjh, ngad bininj nawu karribebeywurd nuye Abraham, dja mak ngudda nawu minj Jews bininj dja nawu ngurriburlume God, wanjh kandibekka. Bu God wanjh kanmarneyimeng kadberre rowk bu kanngehkekenh.

²⁷ Bininj nawu birrihni kore Jerusalem dja mak nawu bindimarnewohrnani bedberre, wanjh minj birriwernhkkuburrbuyi Jesus.

Bu kunbarnangarra rowk manbu Sabbath ngalenggarreni, wanjh bininj nawu birrihni Jerusalem bindimarnebimngeybuni munguyh kore prophets birrimarneyingkihimbuni nawu Jesus, dja bonj, bedda minj birriburkkuburkkekkayi kore bimbuyindanj kerrngehkenhni bu Jesuskenh, dja wanjh birridjalwelengnameng. Kaluk bu kuhni birrikurduyimeng wanjh birrimarnbom bu woybukkendanj kunwok bedberre nawu prophets birriyngkihkarreyolyomeng."

²⁸ "Bedda minj njale birrimarnekarrengalkemeninj Jesus bu birribuyikenh, wanjh bedda birridjaldjawam Pilate bu kabibunkenh bu djalburudjang.

²⁹ Bedda kuninjkuu birrimarnekurduyimeng rowk kore djurra yingkihimbuyindanj nuye. Kaluk bu birriyakwong, wanjh birrimkukkoluyhweng kore kundulk cross, dja birrikukkang kore kumidj kuwardderurk birrikukkurmeng.

³⁰ Dja nawu God birrolkkayhweng Jesus kore dowengbeh."

³¹ "Kaluk kuninjkuu kunkodjke kunwern, bininj nawu birrikang Galilee dja birriyngkihjdjarrkrey Jesus kore Jerusalem, wanjh bedda birridarrkidnang bu bebmeng bedberre. Wanjh birrimekbe bininj kabindimarnemulewan birriwarlahkenh bininj nawu Israel benkebmawahmeng."

³² "Kunmekbekenh ngad wanjh bolkkime ngundihmarnemulewan kunwok kunmak kore God benyngkihberrebom nawu mawahmawah kadberre.

³³ Dja mak bolkkime nungka birrolkkayhweng Jesus kore dowengbeh. Bu kunmekbe wanjh kunwoybuk yimerranj ngadmanwali. Kuhni kerrngehkenh bimbuyindanj kore djurra nawu Psalm, bu yimeng, 'Ngudda wanjh ngardduk beywurd. Bolkkime ngaye wanjh bornang ngudda'. [Psalm 2:7]

³⁴ God birrolkkayhweng Jesus kore dowengbeh. Bu minj mak kayawoyhdurdeng bu kakukdudjindan dja mak kakuknudmen. Wanjh kunu God yawoyhyimeng, 'Kaluk ngaye marnekurduyime ke kunmakmak duninj kore David ngayingkihberrebom kerrngehkenhni.' [Isaiah 55:3]

³⁵ Dja mak kore kubadbuyika djurra nawu Psalm bimbuyindanj kore yimeng, 'Ngudda minj yibawon bininj ke nawu nadjalwernmakkaykenh duninj bu kakuknudmen kore kumidj.' [Psalm 16:10]

³⁶ Kuninjkuunu bu David minj nungan mulewarrimeninj. Nungka wanjh bidjalmarnedurrkmirri munguyh kore God djareminj nuye, wanjh yerreh baldoweng dja birrikukurrmeng kore birrikebmanwahmeng nuye. Wanjh nungka kunburrr nuye kuknudminj kore kumidj.

³⁷ Dja nawu Jesus nakka God birrolkkayhweng, bu minj nungka kuknudmeninj kore kunmidj kukyoy.

³⁸⁻³⁹ Ngudda nawu karridangerrinj, ngadjare ngurriburrrburrrbekkan kore ngundihmarneyime ngudberre bu God ngunmarnebengmidjdan kunwarre ngudberre kore Jesuskenh. Manbu mankarre bimbom Moses makka minj ngunbebke kore kunwarre ngurrikurduyime dja ngurrih-bongdi, dja nawu nangale bininj kabiwoybukwon Jesus nakka wanjh God kabadjalmakwan.

⁴⁰ Mah, dja ngurrinaharrimen. Wardi mak ngundjalmarneyimerran bolkkime kore prophets birribimbom, bu birriyimeng,

⁴¹ 'Nawu kawohrnan yimeng, "Kandibekka, ngudda nawu bininj kandikewkme. Ngudda kaluk ngurrikangebarrhme dja ngurridowen. Kaluk ngaye ngakurduyime ngudberre yerrekah, ba bu ngurridjalka-angebarrhmekeh. Bu bininj ngundihyngkihmarneyime ngudberre kore ngaye marnekurduyime, wanjh minj ngudda kunu ngurriwoybukwon." [Habakkuk 1:5] Kuhni wanjh Paul benmarneyolyolmeng rowk nawu birrihni kore synagogue.

Paul Dja Barnabas Bindimarneyimeng Bininj Nawu Jews Bu God Kadjare Kabenngheke Birribuyika Bininj Warridj

Acts 13:42-52

⁴² Bu Paul dja Barnabas benebolkbawong synagogue wanjh bedda bindidjawam bininj bindimarneyimeng, "Kandiyawoyhmarnemulewanken bu kayimerran kunbuyika kunbarnangarra Sabbath ngarre."

⁴³ Kaluk bu birriyakwong birriwoddikenh, wanjh birriwern bininj nawu Jews bindidjalmunkekadjungi Paul dja Barnabas, dja mak yikahwi bininj nawu birriyimerranj Jews bu birriwokmarrkmangi God. Dja nawu Paul dja Barnabas munguyh bindidjalbengyolyolmi ba bu munguyh birridjalwoybukwoyi God nawu benkongibom.

⁴⁴ Kaluk bu kunbarnangarrabuyikani ngarre Sabbath, wanjh birriwarlahkenh bininj nawu birrihni kumekbe Antioch wanjh birrimirndemornnamerrinj bu birridjareni bindibekkani Paul dja Barnabas bindimarnemulewani kunwok nuye nawu Kawohrnan Rowk.

⁴⁵ Yikahwi Jews bininj nawu minj birriwoybukwoyi Jesus bedda bindimirndenang birrimirndemornnamerrinj, wanjh birridjalyidduy duninj bu minj birridjareniwirrinj bininj bindibawoyi. Wanjh bedda birridjalmarneyimeng kunwarrewarre Paul kore kurrangbeh birriyimi, dja birrimarneyimeng minj kunwoybuk bu nungka mulewam bedberre.

⁴⁶ Wanjh Paul dja Barnabas bindidjalmulehmulewani bu minj benekele-niwirrinj bedberre. Wanjh bindimarneyimeng Jews bininj nawu minj birriwoybukwoyi Jesus, bu beneyimeng, "Ngad ngundihmarnemulewan God nuye kunwok ngudda werrek nawu Jews. Dja ngudda minj ngurridjare ngurribekkan. Ngudda ngurriwelengnamerren yimankek ngurridjalwarre bu minj ngurridarrkkiddi munguyh. Wanjh bolkkime nganededjingmang ngarrbenmarneyime bininj nawu minj Jews.

⁴⁷ Nawu Kawohrnan Rowk kunkare kanyingkihmarneyimeng ngadberre bu ngarrikurduyime kuninjkuunu bolkkime. Wanjh yimeng kore bimbuyindanj, yimeng, 'Ngaye marnbun ngudberre yiman ngurrbenmarnebolk-wolkan bedberre bininj nawu minj Jews kore kubolkwarahkenh rowk kabirrihni. Kaluk ngudda ngurrbenbukkabukkan birribuyika bininj kore

kadjalbolkwarlahkenh rowk bu ngaye ngabenngehkekenh.'” [Isaiah 49:6] Kuhni bu Paul dja Barnabas bindimarneyimeng.

⁴⁸ Bininj nawu minj Jews birribek kang kuninjku Paul dja Barnabas kore bindimarneyimeng, wanjh bedda birridjalnjilngmakminj bu bulkkidj duninj, dja mak bedda birridjalburlumeng nawu Kawohnan Rowk bu kunwok nuye. Wanjh birriwernkenh bininj birridjalwoybukwong Jesus. Bedda wanjh birrimekbe nawu God benyingkihdjarrngbom bedberre ba bu kabirridjaldarrkiddi munguyh kore nungka nuye.

⁴⁹ Wanjh kunwok nuye nawu Kawohnan Rowk dja djalwarlahmeni kore birriwarlahkenh bininj birrihni kumekbe kore kubolkkimuk.

⁵⁰ Dja yikahwi nawu Jews minj birriwoybukwoyi Jesus, birriwam bindimarneyimeng nawu daluk birrikukenni nawu birriwokmarrkmangi God, dja mak bininj nawu birriwohnrani kumekbe kunred. Bedda bindimarnemulewani bu bindimarnekoweyi Paul dja mak Barnabas. Wanjh kumekbekenh yikahwi birriwern bindiuidnani berrewoneng dja bindibek kang kore kumekbe benehdi kunred.

⁵¹ Wanjh Paul dja Barnabas bindimarnedengedjulngwerrinj birrimekbe nawu birribangi Jews bu benebolkbawongkenh kore Antioch, dja benewam kore kunred Iconium.

⁵² Dja bininj nawu birrimunkekadungi Jesus, kumekbe bu Paul dja Barnabas bindibawong benewam, wanjh bedda munguyh birridjalnjilngmakni dja mak birrikukbarlmiyindi Namalngmakkaykenh.

14

Paul Dja Barnabas Benewam Kore Kunred Iconium *Acts 14:1-7*

¹ Bu bedda benebebmeng kore Iconium wanjh benedjalwam benengimeng kunrurrk synagoge manbu Jews bedberre, karohrok bu benekurdyuimeng kore Pisidia. Bedda benedjalwokdanginj bu kunmak rowk. Wanjh birridjalwern bininj nawu Jews dja mak bininj nawu Greek kundjen birriwokdi, wanjh birriwoybukwong Jesus.

² Dja yikahwi nawu Jews minj birriwoybukwoyi Jesus, bedda wanjh bindimarnbom bininj nawu minj Jews bu bindiuidnani bedberre nawu birridangerrinj kore Jesus.

³ Wanjh Paul dja Barnabas benehdjalni Iconium bu kunkuyeng beneyolyolmeng nawu Kawohnan Rowk bu minj benekeleniwerrinj bedberre. Bedda bindimarnyolyolmi bu nawu Kawohnan Rowk kabengkongbunkenh. Dja mak nungka benbenewong kore djareni ba bu benekurdyuimi kundulkare dorrenge kore bininj birrihni wanjh birribalburrbuni kore kunwoybuk duninj bindihmarneyolyolmi.

⁴ Wanjh kumekbe kunred kore birrihni birridangwerrinj nawu bininj. Yikahwi bedda birriworrinj nawu Jews nawu minj birriwoybukwoyi Jesus, dja yikahwi birribuyika bininj birriwoybukwoni kore nawu apostles bindimarnemulewam bedberre.

⁵ Yikahwi bininj birridjareni bindibuyi Paul dja Barnabas bu bindikodjoi berrewoneng. Birrimekbe bininj minj birriwoybukwoyi Jesus, bedda wanjh nawu Jews, dja mak nawu minj Jews, dja mak nawu birriwohnranohnrani kumekbe kunred.

⁶⁻⁷ Wanjh Paul dja Barnabas benekarrebek kang bu yimankek kabindibunkenh berrewoneng, wanjh bedda benebolkbawong Iconium dja benekelerlobmeng kore kunred bokenh, bolnggeyyoy Lystra dja Derbe, dja mak benewohrewohrey kore kubolkkimuk kunred Lycaonia. Wanjh kumekbe bedda benehdjalweykaweykani kunwok kunmak.

*Paul Dja Barnabas Benehdi Kore Kunred Bokenh Lystra Dja Derbe
Acts 14:8-18*

⁸ Kore kunred Lystra nakudji bininj nawu nabirlni ningihni, bu djalyidanginj nabirlni dja mak minj rawirawinj.

⁹ Nanihnjanu bininj biwokbekkani Paul bu benmarneyolyolmi bininj. Kaluk bu Paul bidjalnang mandjad, wanjh bidjalnjilngnang, burrbom bu namekbe bininj woybukwong bu God kabimarnbunkenh.

¹⁰ Wanjh Paul wokkiharrarrhmeng, yimeng, “Yirrolkka dja yimdan-gimen kundengeyi ke.” Wanjh nungka werkkwerrk djaldolkang bu djalwohwawohwam.

¹¹ Nawu birrimirnderri bininj birrinang bu Paul kurduyimeng bimarn-bom, wanjh bedda birrikaykahkayhmeng kore kunwokbeh bedberre, dja birriyimi, “Nanih bininj bokenh minj bininj duninj. Dja bedda wanjh nawu yiman god rerrih benemkoluy kore ngad, kaluk benemkukyimerranj yiman kayime ngad bininj.”

¹² Bu bedda bindibebbehng berrewoneng Paul dja Barnabas wanjh kunukka birriyimi yimankek bu bindibebbehkuknani god bokenh nawu Zeus dja Hermes. Kaluk bedda birriyimi bu yimankek nakudji nawu god bedberre nawu ngeyyoy Zeus, wanjh kuyimerranj Barnabas. Dja mak birriyimi bu yimankek god nabuyika bedberre nawu ngeyyoy Hermes, wanjh kuyimerranj Paul. Bu kuninjkuu Paul benmarnewokdi bedberre munguyh yiman kayime god bedberre nawu Hermes.

¹³ Kaluk manbu kunrurrk temple nuye Zeus nawu god bedberre, wanjh darnhrurrkdi kore bininj birrimirnderri. Wanjh bininj nawu priest bihmarnedurrkmirri nawu Zeus benbenemarnekani bulikki dja mannguy, wanjh kurmi kore kururkdangmaye kore rurrkmirnderri manrurkbubuyika. Nungka dja nawu bininj nuye birridjareni bu bindimarnekinjeyi berrewoneng Paul dja Barnabas.

¹⁴ Kaluk bu benemekbe benebokenh apostle Paul dja Barnabas beneb-urrrkburrbekgang kore bindikuyinjmarnekurduyimeninj berrewoneng, wanjh bedda benebebehmadjalkmarrinj bu benekunikangewarreminj dorreng, wanjh bedda benerlobmehrlombeng kore bininj birrimirnderri, dja benekayhmeng duninj, beneyimeng,

¹⁵ “Ngudda nawu bininj, njalekah ngudda kunu ngurrikurduyime ngar-rewoneng ngad nawu bininj deleng yiman kayime ngudda ngurrikukyime! Ngad bu nganemkang kunwok kunmak ba bu ngurrimirrkborledmen kore ngurrimarneboddi nawu nawarre, dja ngurrimarneborledmen kore God nawu nawoybuk dja kahdarrkid. Nawu nungka wanjh nadjalkudji nawu marnbom kaddum, dja mak kurorre, dja mak kurrula dja mak yehyeng rowk nawu nadjalwern kahdi kumekbe.

¹⁶ Bu kerrngehkenhni God bendjalbawoni bininj nawu birriwarlahkenh bu bedman birridjalkurduyimi kore bedman birridjareni.

¹⁷ Kaluk God munguyh kahdjalkurduyime ba bu ngurriburrbun bu nungka wanjh djaldarrkid duninj. Ngayime nungka ngunwon mandjewk ngudberre kore heavenbeh, dja mak manne ngunwon ngudberre kore nungan ngunmarnebolname ngudberre kore kadjordmenbeh wanjh kabirribarnemang, dja mak ngunnjilngmarnbun ngudberre.”

¹⁸ Kumekbe Paul dja Barnabas bindihmarneyimi bedberre, bu bindin-gurdkeng, wanjh yimankek bindikuyinjmarneboddayi berrewoneng.

*Bininj Nawu Jews Birribuni Paul
Acts 14:19-20*

¹⁹ Kaluk bu yerrehkah yikahwi Jews bininj nawu minj birriwoybuk-woyi Jesus wanjh birrimwam kore kunred Antiochbeh dja mak kore

kunredbuyika Iconiumbeh. Bedda bindimarnekarreyolyolmi bininj nawu birrimirnderri kore Lystra, dja bindimarnbom bu kabirriyiddung Paul dja Barnabas. Wanjh bedda birrikodjdongi Paul, dja mak birrikukdorrorrkeng birrikukbekkeng kumekbebeh kore rurrkmirnderri, dja birriyimi bu doweng.

²⁰ Wanjh nawu birrimunkekadjungi Jesus bedda birrimirndemornamerrinj bu Paul yongohoyoy kore kumirrk bedberre, dja nungka dolkkang wam durndi kore rurrkmirnderri. Kaluk bu barnan-garrabuyikani Paul dja Barnabas benebolkbawong dja benewam kore kubolkkimuk kunred Derbe.

Wanjh Paul Dja Barnabas Benedurndi Kore Kerrngehkenh Benergehrey
Acts 14:21-25

²¹ Wanjh Paul dja Barnabas benemulewani kunwok kunmak nawu bininj birrihni kunred Derbe, wanjh birriwern bininj bedda birriedjngmey birrimunkekadjungi Jesus. Kaluk benedurndi kore kunred Lystra, dja mak kore Iconium. Kaluk benebalbebmeng kore Antioch.

²² Bu kumekbe kunred bokenh benewam, bedda wanjh bindiyikang bininj nawu birrimunkekadjungi Jesus bu bindimurrnggrayekwongkenh, dja mak bindibidyikarmi bu munguyh birridjalwoybukwoyi nawu Jesus. Wanjh bedda bindimarneyimeng bedberre, "Ngad wanjh karrijdjakbekkan kunwern ba bu yerre karringimen kore God kadjalwohrnankenh."

²³ Kaluk bedda bindidjarrngbom bininj bu bindimarnbom bu kabirribehwohrnankenh kore yiwarrudj ngarre kubolkbubuyika rowk bedberre. Wanjh Paul dja Barnabas benengurdmeng manme benenguni ba bu bindimarnedanginj yiwarrudj bedberre nawu birriwohrnawohrnani, bu bindikurrmeng kunbid nuye nawu Kawohrnani Rowk, kore bedman birrikangekurrmerrinj.

²⁴ Wanjh Paul dja Barnabas benebolkbawong kumekbe kunred dja benewam kore kubolkwarlahbubuyika bolkngeyyoy Pisidia, dja mak benebemeng benengimeng kunred kubolkkimuk Pamphylia.

²⁵ Bedda benewam kore rurrkmirnderri bolkngeyyoy Perga, bu benemulewani bedberre bininj birrihni kumekbe, kunwok nuye God. Kaluk bedda benebalyawoyhwam benekoluy kore kurrula kumhyoy bolkngeyyoy Attalia.

Paul Dja Barnabas Benedurndi Kore Antioch Ngalenggarre Kubolkkimuk Syria
Acts 14:26-28

²⁶ Wanjh benebidbom kabbala benedjowkkeng benedurndi kore Antioch. Kumekbe kunred nawu bininj birrihni birrimunkekadjungi Jesus, bu kerrngehkenhni bindidjarrngbom Paul dja Barnabas, bindimarnedanginj yiwarrudj kore God benbenenahnankenh, wanjh bindimunkeweng bu kabenedurrrkmirrikenh. Wanjh Paul dja Barnabas beneyakwong bu kuninjkuu benedurrrkmirri.

²⁷ Bu bedda benebemeng kore Antioch, wanjh Paul dja Barnabas bindikayhmeng bu kabirrimirndemornamerrenkenh bininj nawu yiwarrudj bedberre. Wanjh bedda bindimarneyolyolmeng rowk kore God benbenemarnekurduyimeng berrewoneng, dja mak kore God benmarned-jareminj bininj nawu minj Jews bu birriwoybukwong Jesus.

²⁸ Wanjh Paul dja Barnabas beneyerrkang bu kunkuyeng birridjarrkni birrimekbe bininj nawu birrimunkekadjungi Jesus.

15

Nawu Birriwohrnani Yiwarrudj Ngarre Birrimirndemornnamerrinj Kore Jerusalem

Acts 15:1-6

¹ Wanjh yikahwi bininj birridolk kang kubolkkimuk Judeabeh dja birriwam kunred Antioch, wanjh birridedjingmey bindibukkabukkani nawu birrimunkekadjungu Jesus. Wanjh bindimarneyolyolmi kunbuyika bedberre. Kaluk bindimarneyimeng, “Kuhni bu kunkare Moses ngan-marneyimeng ngadberre bu ngad wanjh karrilakkayenworren rowk. Wanjh bolkkime bu ngudda minj ngurilakkayenworren, wanjh minj God kunukka ngungehke ngudberre.”

² Bu Paul dja Barnabas bindiwobek kang kuninjku bu birrihyimi bedberre bininj, wanjh bedda birridjaldangwerreni munguyh bu kuninjkukenh. Kaluk bu birridangwerreni wanjh bedda bindimunkeweng Paul dja Barnabas dja mak birribuyika bininj birridjarrkwam Jerusalem bu kabindimulewarren kumirrk bedberre nawu apostles dja mak nawu birriwohrnawohnani yiwarrudj ngarre.

³ Nawu bininj yiwarrudj bedberreni bindimunkeweng Paul dorrengh, bu birriwam. Wanjh bu bedda birribalhrey wanjh birriwohngimeng kore kunred kabolngeyyo Phoenecia. Wanjh yerreh kunu birribalwam birriyawoyhbebmeng kunredbuyika kore kubolkkimuk Samaria. Bu bedda birribalwohrehrey wanjh bindibebebmeng kore bininj nawu birridjarrkwoybukwoni Jesus, dja bindimarnemulewani bedberre nawu minj Jews bu birridedjingmey birrimunkekadjungu Jesus. Wanjh birridjalwern nawu birridangerrinj bedda birridjalnjilngmakminj duninj bu bindiwobek kang bedberre.

⁴ Bu Paul dja Barnabas dja mak bininj birridjarrkrey birrimbebmeng kunred kunkimuk Jerusalem, wanjh nawu apostle dja nawu birriwohrnawohnani yiwarrudjkenh, wanjh bindikimey bedberre dja mak birridjalwern bininj nawu yiwarrudj bedberre. Wanjh Paul dja mak nawu birridjarrkrey bininj bindimarneyolyolmeng kore God kurduyimi kore bedda bindiyolyolmi nuye kubolkbubuyika.

⁵ Yikahwi bininj nawu birriwoybukwong Jesus, wanjh bedda nawu Pharisees. Bu bedda bindibek kang Paul dja mak birribuyika bininj bu birriyolyolmi, wanjh birridolk kang dja birriyimeng, “Birrimekbe nawu bininj ngurbenmulewam nawu birrimarnedjaremulewarrinj Jesus, wanjh nakka minj Jews. Dja ngad karrbenlakkayenwo mak karrbenbukkabukka kore mankarre nuye Moses ba bu kabirrikarmekenh.”

⁶ Wanjh nawu apostles dja mak nawu birriwohrnawohnani birrimirndemornnamerrinj kumekbe bu birriyolyolmerrinj kuninjkukenh.

Bu Peter Benmarnewokdanj

Acts 15:7-12

⁷ Bu bedda birridangwerreni bu kunkuyeng, wanjh Peter dolkkang wokdanginj, dja benmarneyimeng, “Nawu karridangerrinj, ngudda ngurriburbu bu kerrngehkenh God ngandjarrngbom ngaye kore karrihnibeh, dja nganmunkeweng bu ngagak kunwok kunmak nuye kore bininj nawu minj Jews ba bu kabirriwoybukwon.

⁸ God nawu kankangeburrbu karriwarlahkenh bininj wanjh ngaye kanbukkang bu woymbukkih nungka kabenkimang bininj nawu minj Jews. Nungka kunu benwong nuye Namalngmakkaykenh yiman bu yimi ngad kanwong.

Kuhni bu karriburrbu bedda woymbukkih bedmanwali kabirrikadjung Jesus.

⁹ God nungka minj benmarnekurduyimeninj kunbuyika, dja kadjalrohrok kore ngad mak kanmarnekurduyimeng. Bu bedda birridjalwoy-bukwong, wanjh kunu nungka bendjalkangebelewong rowk.

¹⁰ Wanjh bolkkime njalekenh ngudda ngurridjare ngurribenmarnbun kabirriwokmarrkmang manbu mankarrekare kahyo? Dja makka manbu mankarrerayek. Ngad kunu minj munguyh karrimarrkmang mahni mankarre, dja mak nawu mawahmawah kadberre minj munguyh birri-marrkmayi, dja njalekenh ngudda ngurribenwon kuhni kunrayek? Bu kuhni ngudda ngurrikurduyime wanjh kunukka God ngundung ngudberre.

¹¹ Dja burryak. Ngad wanjh karriburru bu God kabengenheke bedberre yiman kayime ngad bu kanngheheng kadberre rowk. Jesus nawu kawohrnan rowk nungka kandjalkongibom kadberre, wanjh djal kunmekbekenh kunu God kanngheheng kadberre yiman bu kabengenheke bedberre." Kuninjkuwu kunwok wanjh Peter bendjalmarneyimeng bedberre.

¹² Birridjalwern bininj birridjalwokngurdmerrinj rowk bu birriwok-bekkani Barnabas dja Paul bu bedmanwali benehmulewarreni kore God benbenmarnekurduyimeng kundulkare dorrengh, kore bininj nawu minj Jews birrinang dja birrikangebarrhmeng duninj kore God nuye kundulkare.

Bu James Benmarnemulewam

Acts 15:13-21

¹³ Bu bedda beneyakwong benewokdi, wanjh James kumbadwokdanginj, dja benmarneyimeng nawu bininj birrimirndeni, wanjh yimeng, "Nawu karridangerinj, wanjh kandibekka!

¹⁴ Simeon* nungka kandjalmarneyimeng kadberre bu God kernghekenh kanbukwang bu nungka kabennahnan benyikang bininj nawu bedda minj Jews bu bendjarrngbom yikahwi bedberre bu kabirriyimerran nungan nuyekih.

¹⁵⁻¹⁸ Nawu prophet birriwern birridjalyingkihulewani rowk bu God kumekbe kakurduyime bedberre bu bolkkime. Dja ngurriburru kore kayingkihimbuyindi, bu yimeng, 'God nawu kawohrnan rowk yimeng, "Yerrekah kaluk ngaye ngamyawoyhdurdeng. Kaluk ngaye ngayawoyhrurrkname manbu David nuyeni rurrkbakmeng. Bu wanjh rurrkngarlahngarlmenng rowk, Dja wanjh ngaye kaluk ngayawoyhrurrk-marnbun. Kuhni ngakurduyime ba bu birridjalbuyika birriwarlahkenh bininj rowk ngandiyawan ngaye nawu ngawohrnan rowk. Birrimekbe bininj rowk nawu minj Jews bu ngandingeybun ngardduk. Nakka wanjh ngaye ngardduk." Kuhni kayime nawu Kawohrnan Rowk nawu yingkihulewarrinj kore bolkkime kakurduyime rowk.' [Amos 9:11-12]

¹⁹ Dja wanjh marneyimeng ngudberre kore ngaye ngahburru. Yuwn bu kab karrbenmarnekarrerayekwon birrimekbe bininj nawu minj Jews nawu birrimarnekangeboredmeng nuye God.

²⁰ Dja karrbenmarneyimen kore djurra, karrbenmarnebimbun bu kariyime, yuwn bu kabirringun manme manbu bininj birriwarrewoyi bu birriwoyi kore idols, dja wanjh makka kawarremen. Dja mak yuwn bu birriwohdjirdmarren. Mak yuwn bu kabirringun mayh nawu kunbidwi kabirrikudjuyime bu kabirribun. Dja mak yuwn kabirrikurlbabongun mayh nuye.† Kuninjkuwu wanjh karrbenmarneyime bu karribimbun djurra bedberre.

* **15:14** Simeon dja Peter, wanjh kangeyrohrok "Simon." † **15:20** Ngurrina kore Exodus 34:15-17; Leviticus 17:10-16; 18:6-23

²¹ Kuninjkuu ngayime bu kunmekbekenh. Ngurriburrbun bu Sabbath ngarre wanjh bininj kabirringimen kururrk kore synagogue dja kabirribekkan mankarre manbu Moses bimbom. Bu kunkare dja mak bolkkime bininj birriwern kabirridjalmulewan bu Moseskenh kore kubolkbubuyika rowk." Kuhni wanjh James benmarneyimeng bedberre.

Bedda Birrikarremakwam Rowk Bu Birribimbom Djurra
Acts 15:22-29

²² Bu bedda birribekakang kuninjkuu, wanjh nawu apostles dja mak nawu birriwohrnawohnani yiwarrudj ngarre, dja mak birribubuyika bininj bu birridjarrkkodjduhmeng bu birrikarremakwam. Wanjh bedda bindidjarrngbom bininj bokenh bu bindidjarrkmunkeweng Paul dja Barnabas birriwam kore Antioch. Benemekbe benengeyyoy Judas nawu ngeyyoy kungeybuyika Barsabbas, dja mak nabuyika nawu ngeyyoy Silas. Bedda nawu benewohnani bininj nawu birridangerrinj kore Jesus.

²³ Wanjh bindiwong djurra bu kabirrikan Antioch. Kuhni wanjh kore djurra birribimbom bu yimeng, "Nawu karridangerrinj, ngad wanjh nawu apostles dja mak ngarriwohrnawohnan ngalengngarre yiwarrudj. Ngad wanjh karridangerrinj ngudberre. Ngad ngarribimbom ngudberre nawu minj ngurribornayindangimeninj Jews bininj. Ngad wanjh ngarrinjilngmak ngudberre bu ngarribimbom ngudberre ngudda nawu ngurrihni kore Antioch, Syria dja mak Cilicia.

²⁴ Ngad wanjh ngarrbenwobekakang bininj birrimdolkakang kondanjkuu Jerusalem bu ngundimarneyimeng kunbubuyika ngudberre bu ngundikangewarrewong dja ngundibengwarrewong. Ngad minj ngarrbenmunkewemeninj birrimekbe bininj.

²⁵⁻²⁷ Ngad wanjh bolkkime ngarrimirndemornnamerrinj bu ngarriwodanginj dja ngarrikarremakwam. Wanjh ngad ngarrbenbenemey bininj bokenh nawu kabenengeyyoy Judas dja Silas. Dja ngarrbenbenemunkewe kore ngudda ngurrihni. Kaluk bedda ngundimarnemulewan werre kore kabimbuyindi naninjnanu djurra. Bedda wanjh kabirrimdjarrkre Paul dja Barnabas nawu karrbenbenemarnedjareminj. Kaluk benekuyindowimeninj darnkih bu benemarnedurrkmirri kore kungey nuye Jesus Christ nawu Kawohnan Rowk.

²⁸ Ngad wanjh ngarrikarremakwan rowk kore Namalngmakaykenh kadjare bu ngundimarneyime ngudberre kore yikahwi mankarre manbu mankuken ba bu ngurriwokmarrkmang rowk. Bu kuhni minj kunrayek.

²⁹ Yuwn bu ngurringun manme manbu bininj kabirriwon nawu idols kabirrihmarneidi yiwarrudj, dja wanjh makka kawarremen. Mak yuwn bu ngurringun mayh nawu kunbidwi kabirrikukdjuyime bu kabirribun. Dja mak yuwn ngurrikurlbabongun. Dja mak yuwn bu ngurriwohdjirdmarren.

Bu ngudda kuninjkuu ngurriwarnyakmulewarren rowk, wanjh kunukka kunmak duninj ngurridjalkurduyime. Bonj, kunmekbe ngundimarneyimeng ngudberre, dja wanjh bobo."

Kuninjkuu kore birribimbom djurra.

Paul Dja Barnabas, Dja Mak Judas Dja Silas Wanjh Birridjarrkwam Kore Kunred Antioch

Acts 15:30-35

³⁰ Wanjh nawu apostle dja nawu birriwohrnani yiwarrudj bedberre, bindibidkenwong nawu djurra dja bindimunkeweng birrikoluy kanjdji kore Antioch. Bu bedda birribolkmey kumekbe wanjh bindimirndenameng nawu yiwarrudj bedberreni rowk, dja bindiwong namekbe djurra.

³¹ Kaluk bedda bu birribimnang dja birribek kang kore djurra benmarneyimeng dja benkangerayekwong, wanjh kunukka birridjalwernhnjilngmakminj.

³² Nawu Judas dja Silas nakka wanjh bedda prophetni, dja bedman benehweykani kunwern kore Antioch, dja bindikangerayekwong dja bindimurrngayekwong birrimekbe bininj nawu birridangerrinj kore Jesus.

³³⁻³⁴ Kaluk bu bedda beneyerrkang kunkodjkewern, wanjh nawu birridangerrinj kore Jesus bindimunkeweng bu kunmodmikenh birrimarneyimeng. Wanjh benedurndi kore Jerusalem birrihni nawu bindimunkeweng kerrngehkenhni.

³⁵ Dja nawu Paul dja Barnabas benedjaldi kore Antioch bu birridjarrkraworinj bininj birriwern bu bindibukkabukkani dja mak birriweykani bedberre birribuyika bininj manbu kunwok nuye nawu Kawohrnan Rowk.

Paul Dja Barnabas Benedangwerrinj

Acts 15:36-41

³⁶ Bu bedda wanjh benedanginj kunkuyeng kore Antioch, wanjh kumekbe Paul bimarneyimeng Barnabas, "Ayh, kamak kab bu ngardurdndeng kore kubolkbubuyika kore kerrngehkenh ngarrwam bu ngarrbenhmarneyolyolmi nawu Kawohrnan Rowk nuye kunwok. Ba bu ngarrbennan kunubewu kamak kabirrihni."

³⁷ Dja nungka Barnabas djareni bikayi John nawu kunngeybuyika ngeyyoy Mark bu kabirridjarrkre.

³⁸ Dja nawu Paul minj burrbuyi bu kamak benekayi John Mark dja nakka nanu kerrngehkenhni benbenekukbawong kore kunbolk Pamphylia, bu minj birridjarrkdurrkmirriwirinj.

³⁹ Wanjh Paul dja Barnabas benedangwerrinj kunkimuk, wanjh kumekbe kunu benebebbewam. Wanjh Barnabas nungan bikang John Mark, dja benebidbom kabbala benewam kore kubolkkimuk kabolkngeyyo Cyprus.

⁴⁰ Dja nungan Paul bidjarrngbom nawu Silas. Wanjh nawu birridangerrinj kore Jesus birridjawam nawu Kawohrnan Rowk ba bu kabenbenenahnan bu kabenere. Wanjh benebolkbawong dja benewam.

⁴¹ Wanjh bedda benewohrengehgrey kunredbubuyika kore kubolkkimuk bokenh Syria dja mak Cilicia dja bindikangerayekwoni bininj nawu yiwarrudj bedberre kore kubolkbubuyika.

16

Paul Bingalkeng Nawu Timothy

Acts 16:1-5

¹ Wanjh Paul wam bebmeng kore kunred kabolkngeyyo Derbe, dja mak kubadbolkbuyika kabolkngeyyo Lystra. Kaluk kumekbe nakudji bininj ni nawu ngeyyoy Timothy, nawu bimunkekadjungi Jesus. Dja ngalbu ngalbadjan nuye ngalka wanjh Jew daluk mak biwoybukwoni Jesus. Dja nawu nakornkumo nuye nungka wanjh kunwok nuye Greek.

² Birriwern nawu birridangerrinj Jesus birrihni kore kunred Lystra dja mak kubadbolkbuyika kore Iconium, wanjh bedda birriyimi bu Timothy namakni.

³ Wanjh nawu Paul djareni Timothy bikayi bu benehdjarrkrawinj kubolkbubuyika. Wanjh nungka bilakkayenwong werrek bu benburrbom birrihni bininj kubolkbubuyika nawu Jews bininj bu wardi birriwohnayi

Timothy dja birriburrbuni bu nawu nakornkumo nuyeni nakka wanjh Greek.

⁴ Wanjh birribolkbawong kumekbe kunred dja birriwam bindinani bininj kunredbubuyika nawu birrihni. Wanjh bedda birrimarnemulewani kunwok manbu birrikarremarnbom bu birriwokdanginj kore Jerusalem birrimirndemornnamerrinj nawu apostle dja nawu birriwohrnawohnani ngaleng ngarre yiwarrudj. Dja benmarneyimeng bu kabirrimarrkmang mahni kunwok.

⁵ Wanjh kunu bininj nawu yiwarrudj bedberre birrimurrngayekminj dja birriwernwoybukwong Jesus, dja mak birrimirndewernworreni munguyh bu kunbarnangarrawern.

Paul Biwaralnang Bininj Nawu Macedoniabeh Kumhdi

Acts 16:6-10

⁶ Bu yakwoni benmarnemulewani bedberre, yerreh wanjh Namalng-makkaykenh benngurdkeng bedberre bu birrimulewayi God nuye kunwok kore kubolkkimuk kabolkngeyyo Asia. Wanjh bedda birridjalrenghey kore kubolkkimuk kumbolkyoy Phrygia dja mak kore kubadbolkbuyika Galatia.

⁷ Wanjh bedda yerreh birribalhbemmi darnkih ngaleng ngarre kubolkkimuk bolkngeyyoy Mysia. Bedda birridjareni birribalrawinj kore kunred bolkngeyyoy Bithynia, dja Namalngmakkaykenh nuye Jesus minj benbawoyi bu yimankek birringimeninj kumekbe kunred.

⁸ Wanjh bedda birribaldjalwamwi kore kubolkkimuk Mysia, wanjh birrikoluy kore Troas.

⁹ Bu kumekbe kunkak Paul bikebwaralnang bininj nawu Macedoniabeh kumhdi. Wanjh namekbe bininj bimhdjawani bimbunimanjbuni Paul, dja yimeng, "Yimray konhda kore Macedonia bu kanbidyikarmen ngadberre."

¹⁰ Bu Paul biwaralnang namekbe bininj, wanjh burrbom bu God ngankayhmeng ngadberre bu djareminj ngarrirawinj kumekbe kunbolk Macedonia bu ngarrbenmarnemulewan kunwok kunmak. Wanjh kunmekbekenh kunu ngarrimarnurrinj ngarridjalrawinj werkkwerrknirrinj kore Macedonia.

Ngalkudji Daluk Ngeyyoy Lydia Wanjh Bimarnedjaremulewarrinj Jesus

Acts 16:11-15

¹¹ Wanjh ngarrribdbom ngarridahkendanj kabbala dja ngarridjalwam mandjad ngarribebmeng kore kunred Samothrace. Wanjh kunkodjkebuyikani ngad ngariyawoyhdahkendanj kore kabbal dja ngarriwam kore kunred Neapolis.

¹² Kaluk ngad ngarribolkbawong Neapolis dja ngarribalwam kurrenge kore kunred Philippi ngarribebmeng. Kaluk kumekbe kukadje kunredkimuk ngarreni mahni kunbolk kore kubolkkimuk Macedonia. Bu kunkareni birriwernkenh bininj nawu Romebeh birriwabmeng dja birrini munguyh Philippi. Wanjh ngariyerrkang kumekbe bu kunbarnangarra waken.

¹³ Kaluk bu kunkodjke Sabbath ngarreni, wanjh ngarribebmeng kuberkkah kore kururrkwern, dja ngarribalkoluy kanjdjikanjdji kore mankabo. Kaluk ngad ngarrbenwobekgang bu birridi yiwarrudj kumekbe kanjdjikanjdji. Wanjh bu kumekbe ngad ngarikoluy ngarrbengalkeng daluhdaluk birrimirndemornnamerrinj, wanjh ngarrbenmarneyolyolmi bedberre.

¹⁴ Wanjh ngalkudji daluk ngalbu kumekbe nganbekgang ngadberre wanjh ngeyyoy Lydia, ngalbu kumdolkkang kunredkimuk kabolkngeyyo

Thyatira. Kaluk ngaleng madjweykani manbu kukpurple kunmadj. Dja mak bimarneboddangeni God nuye. Wanjh nawu Kawohrnan Rowk bikangedangmarrhmey bu ngaleng wokmarrkney kore Paul bu wokdi-wokdi.

¹⁵ Wanjh kunu ngaleng dja nawu namud ngarre birridjarrkkodjd-juhmeng rowk. Wanjh yerre kumwam ngandjaldjawani, bu ngan-marneyimeng, "Bu ngudda ngurriburrbun ngaye ngawoybukwon nawu Kawohrnan Rowk, wanjh ngurrimray karridjarrkni kore ngaye ngahyo." Wanjh ngarridjalkurduyimeng kore ngaleng nganmarnedjareminj ngad-berre.

Bindikurrmeng Paul Dja Silas Kore Prison
Acts 16:16-24

¹⁶ Bu kunkodjkebuyikani ngad ngarrirey kore yiwarrudj birrihkarmi, wanjh ngad ngarriwohmirrknarrinj ngalkudji ngalyawkyaw. Kaluk ngaleng karmi namalngwarre nawu bimarnbuni benhmarneyimi bininj bu yerrekah kumekbe kabenmarnekurduyimerran bedberre. Kaluk yikahwi bininj birribongkarmi ngalinjngalu ngalyaw, wanjh birribuyika birriwern bininj bindikarremulewani bedberre bu birridjareni birriwok-bekkani kore ngaleng wokdiwokdi.

¹⁷ Ngalmekbe ngalyaw nganhmunkekadjungki Paul dja ngad, bu balhkayhmirey, yimiyimi, "Nanihnjanu bininj nakka wanjh kabirrimarne-durrkmirri God nawu nawernhkimuk duninj. Kaluk bedda ngundimarneyime bu baleh yimankek God ngungehke ngudberre."

¹⁸ Ngaleng kuninjkuu ngandjalmarneyimi ngadberre bu kunbarnan-garrawern. Wanjh kunkudjikenh Paul wunjabmingaleng dja borledmeng duy namalngwarre nawu bihkarmi ngalmekbe ngalyaw, dja yimeng, "Ngaye djalmarneyime kore kungey nuye Jesus Christ wanjh yimdjalbe-men dja yibawo ngalinjngalu ngalyaw!" Wanjh kundjalburrikudji rerrih djalbebmeng namekbe namalngwarre.

¹⁹ Wanjh bininj nawu birribongkarmi ngalmekbe ngalyaw birrinjil-ngwarreminj duninj bu birriburrbom minj mak baleh nawu money yawoyhkukmarnbuyinj bedberre. Wanjh bindidarrkidmey nawu Paul dja Silas dja bindidorrrorkeng kore birriweykaweykani nawu yehyeng yongohyoy. Kaluk kumekbe birrihni bininj nawu birriwohrnani kumekbe kunred ngarre.

²⁰ Dja bindinameng kumirr bedberre kore bininj nawu bindidjad-mikenh. Wanjh bindimarneyolyolmeng, "Naninjnanu bininj bedda wanjh Jews dja mak kabirrimarnbumarnbun kunyid kondanjkuu kunred kad-berre.

²¹ Bedda yimankek kandihdjurrkkan bu karrikurduyime kore bedda kabirridjare, dja ngad Romebeh bininj minj kunukka karrikurduyime dja wardi karribakke mankarre kadberre." Kuhni bu birriyimeng nawu bindiwelengnameng Paul dja Silas.

²² Birriwernkenh nawu birribuyika bininj wanjh birriraworrinj bu bindidungi Paul dja Silas. Wanjh nawu bininj bindidjadmikenh wanjh bindimadjalkdjalkmey dja bindimarneyimeng birriwern bininj bed-berre, birriyimeng, "Ngurribenebu kundulkyi."

²³ Wanjh nawu birriwern bininj bu bindidjalbom berrewoneng bulkkidj duninj, dja bindidarrkidmey bindikuburrnani kore prison dja birri-marneyimeng nawu kumekbe wohrnawohrnani prison, "Yibenwernhbe-nenahna nanihnjanu bininj bokenh."

²⁴ Wanjh nawu bininj wohrnani prison kunrurrk bu benwokbekkang birrimarneyimeng, wanjh nungka benbenedjalwernhkurrmeng kore kururrkdubbe duninh dja benbenebebbhedgedukkang kundulk dorrengh.

Bula Mankimuk Bebmeng

Acts 16:25-34

²⁵ Kaluk bu kukakburlhdjan Paul dja Silas benehni yiwarrudj dja benewayini mankarre bu beneburlumi God. Birribuyika bininj nawu birridjarrkdukkayindi wanjh bindibekkani berrewoneng.

²⁶ Bu kundjalmekbe rerrih, bula mankimuk kumbemeng wanjh bolkwodjorrhmeng dja rurrkrokayhwong bu rurrkdangmarrhmiwam rowk. Dja mak nawu birridukkadukkayindi wirlmurrng nakka wanjh djalyer-rkmerrinj rowk kore kumad dja kubende bedberre bininj rowk nawu birribongdi kore prison.

²⁷ Bininj nawu wohrnawohrnani prison dolkkang nang dangruhrurrkni rowk, wanjh yimeng yimankek birrikelerlobmerrinj rowk, wanjh durrk-meng mandjawak nawu djurrhkuyeng, nawu dadbudadbuni kore kungadmo nuye, wanjh darnkih bu nungandeleng bu djalduluburrimeninj.

²⁸ Dja nungka Paul kumkayhmeng wernkih duninh nuye, dja bimarneyimeng, "Yuwn bu yirruburren, dja ngarridi rowk konhda!"

²⁹ Wanjh bininj nawu wohrnani prison, wanjh birlumey kunkong dja rlobmeng, ngimeng dja mangang kore kumirrk berrewoneng nawu Paul dja Silas, dja kunideldelmi dorrengh.

³⁰ Wanjh benbenebekkeng, dja nungka benbenedjawam, "Ngudda ngunekimuk bininj, kandimarneyimen bu baleh ngakurduyime bu nawu nangale nganngheke."

³¹ Bininj benemarneyimeng, "Yiwoybukwo Jesus nawu Kawohrnan Rowk, ba bu God ngunngheke ngudda dja mak namud ke."

³² Wanjh bindimarnemulewani nungka dja nawu namud nuye bu bindimarneyolyolmeng kunwok nuye nawu Kawohrnan Rowk.

³³ Bu kunmekbe bolkyimi kukakni wanjh nungka benbenekang benbenemornindjirridbom kore bindibuni. Wanjh yerreh kunu nungka dja nawu namud nuye birridjarrkkodjdjuhmeng rowk.

³⁴ Wanjh kundjalburrikudji benbenekang kore kunrurrk nuye dja benbenewong manme benenguneng. Nungka dja nawu namud nuye birridjalnjilngmakminj duninh bu birriwoybukwong God.

Nawu Bindidjadmi Bininj Bindiwokmarnburrinj.

Acts 16:35-40

³⁵ Wanjh malaywibuyikani nawu kabindihdjadme bininj bindimunkeweng djamun bu kabindibekke Paul dja Silas.

³⁶ Bininj nawu wohrnani prison wam bibengdayhkeng Paul, wanjh bimarneyimeng, "Nawu kabindihdjadme bininj birriyime bu ngudda wanjh ngunebebe ngunere. Mah wanjh ngunedolka nguneray bu kunmak rowk."

³⁷ Paul bendjarrkmarneyimeng bininj nawu wohrnani prison dja mak nawu djamun birrimwam, bu yimeng bedberre, "Birrimekbe bininj ngandidjalbuni ngarrewoneng kore kurobbe. Dja mak minj mandjadkenh ngandimarnekurduyimeninj kore ngandidjadmi ngarrewoneng nawu ngad wanjh nganekarme mankarre manbu Rome ngalenggarre. Dja bedda ngandidjalkurrmeng prison. Wanjh bolkkime yimankek kabirridjare ngandibekke ngarrewoneng manmol kore prisonbeh. Dja wanjh

burrkyak, ngurriray ngurrbenmarneyimen nawu kabindihdjadmekenh bininj bedman birrimray ngandibebke ngarrewoneng.”

³⁸ Wanjh nawu djamun birriwoyirurndi Paul dja bindiwokmulewam berrewoneng. Bu bedda nawu kabindihdjadme bininj bindiwobek kang bu Paul dja Silas benehkarmi manbu Rome ngaleng ngarre mankarre, wanjh bedda birrikeleminj.

³⁹ Wanjh bedda birriwam birriwokmarnburreni dja bindibek kang berrewoneng bu bindinjilngmarnbuyi, dja bindimarneyimeng, “Ngunebaldjalaywi ngunebolkbawo kondanjku kunred.”

⁴⁰ Wanjh Paul dja Silas benerurkbawong kore benerurkkendi prison, dja benewam benedjahwong Lydia dja bindinang birridjalwern bininj dja daluk nawu birridangerrinj kore Jesus. Bedda bindiwohmarneweykang bedberre bu bindikangerayekwong, wanjh benebolkbawong kumekbe kunred.

17

Paul Benbukkabukkani Bininj Kore Kunred Thessalonica *Acts 17:1-9*

¹ Wanjh Paul dja Silas benedjalley benebebmeng kore kunred bolkngeyyoy Amphipolis dja kubadbolkbuyika bolkngeyyoy Apollonia. Wanjh yerrekah kunu benebalbebmeng kore kunred bolkngeyyoy Thessalonica. Bininj nawu Jews birrihni dja birrikarmi kunrurk synagogue bedberre manbu yiwarrudjkenh.

²⁻³ Wanjh Paul wam ngimeng kumekbe synagogue. Kaluk Paul nungka munguyh djalngimi kurukkwern kore synagogue manbu birrikarmi kore kunred kubolkbubuyika rowk. Bu kumekbe ngimeng nungka benbengdayhkeng dja birridangwerreni nawu Jews bininj benhmarnekarreyolyolmi kore mankarre yingkihyoy kerngehkenhni bimbuyindanj. Bu nungka wanjh djandi danjbikni birridangwerreni dja benbengdayhkeng kore Bible kabimulewan nawu Messiah*. Bu nungka wanjh benmarnekarreyolyolmeng ba bu kabirriwernburrbun bu nawu Messiah djakbek kang, dja wawayhmimbiminj.

Wanjh benmarneyimeng bedberre, “Nanihnjanu nawu bininj ngaye ngayolyolme kangeyyo Jesus, nungka wanjh nawu Messiah.”

⁴ Yikahwi bininj nawu Jews birriwoybukwong Paul kore benmarnemulewani, wanjh bedda birriworrinj Paul dja Silas. Kumekbe kunred birrihni birriworrinj bininj nawu minj bedda Jews, dja yikahwi bedda warridj birridjalwoybukwoni God. Birrimekbe nawu birriwern, dja mak birriwern daluk nawu birrikukenni birriwoybukwoni warridj.

⁵ Yikahwi birribuyika nawu Jews minj birriwoybukwoyi Jesus dja wanjh birrinjirrhmiwoni nawu Paul dja mak birrinjilngwarreminj bu bindinang birribuyika birrimunkekadjung Paul. Wanjh bindimey bininj nawu birriwarreni, dja bindidjarrkmirndemornnameng kukudjiwi bu birrikayhmirey. Wanjh bindimarnbom birriwern bininj birrinjilngwarreminj nawu kumekbe kunred birrihni, dja birriwern kore kunrurk nuye nakudji namak bininj nawu ngeyyoy Jason. Bedda birridjareni bindingalkeyi bu bindimbebkebininj Paul dja Silas ba bu kabindiwelengname kuberrk kore bininj birrihni nawu birrimirndewernni.

⁶⁻⁷ Bininj minj bedda bindingalkemeninj kumekbe kururk. Wanjh nungka Jason dja mak nawu birridangerrinj kore Jesus kumekbe birrihni,

* **17:2-3** Paul yimeng “Messiah” dja kangeyrohrok “nawu Christ”.

wanjh bindimdorrorrkeng dja bindikurrmeng kore bininj nawu kabirriwohrnan kunred kumekke. Wanjh birridjalkayhmeng, birriyimeng, “Paul dja Silas bedda kabenemarnbumarnbun kunyid kore kunred kubolkwarlah kubolkbubuyika. Dja bedda benemwam kondanjkuwu bu nanihnjanu Jason benbenemkimew berrewoneng. Bedda kabenebakke mankarre nuye nawu Caesar. Dja bedda kabenemulewan bu yimankek nabuyika king kawohrnan nawu kangeyyo Jesus.”

⁸ Birridjalwern bininj dja mak nawu birriwohrnawohrnani bedda birrinjilngwarrehwarreminj bu birribek kang kuninjkuwu kunwok.

⁹ Wanjh bedda bindikukyirurrkmey kunwardde nawu Jason dja mak nawu birridjarrkdi kumekbe dja wanjh kumekbe bindibawong bu bindimunkeweng birriwam.

*Paul Dja Silas Benewam Kore Kunred Beroea
Acts 17:10-15*

¹⁰ Kaluk kunmekbeni balyimerranj kukakni wanjh nawu birridangerrinj kore Jesus bedda bindimunkeweng Paul dja Silas. Bu benewam kore kunred bolkngeyyoy Beroea. Bu kumekbe benebolkmey wanjh benebaldjalngimeng kore kunurrk synagogue manbu Jews bedberre.

¹¹ Nawu Jews bininj birrihni kore Beroea birridjal mayalimakni, minj bedda birrirohrokniwirrinj nawu bininj birrihni kore kunred Thessalonica, bu bedda wanjh birridjareni bindiwokbekkayi Paul dja Silas. Bedda bindibekkani mardabbabba duninj bu birrikunibimnani kore djurra bimbuyindanj bu woybukkih kore bindihmarnemulewani bedberre.

¹² Wanjh nanihnjanu nawu birriwern Jews bininj birriwoybukwong Jesus. Dja mak yikahwi bininj dja birrikukenni daluk nawu minj Jews birriwirrinj wanjh bedda birridjarrkwoybukwong Jesus Christ.

¹³ Wanjh Jews bininj nawu minj birriwoybukwoyi Jesus, nawu birrihni kunred Thessalonica wanjh bindiwobek kang bu Paul benmarneyolyolmi God nuye kunwok kore kunred Beroea. Wanjh bedda birriwam birribeb-meng Beroea bu wanjh kunyid bindimarnemarnbom nawu birrimirndewern bininj kumekbe. Dja mak bindimarnbom bininj birriyidduy duninj.

¹⁴ Wanjh nawu birridangerrinj kore Jesus djalwerrkni birriyikoluy Paul dja birrimunkeweng wam kore kurruladid. Dja nawu Silas dja Timothy wanjh bedda beneyerrkang kumekbe kunred Beroea.

¹⁵ Wanjh bininj nawu birribek kang Paul kore Bereabeh, wanjh birridjarrkwam djarreh kore kunredbuyika kabolkngeyyo Athens. Bu kumekbe bedda birribolkmey, wanjh Paul benmarneyimeng, “Ngurridurnden dja ngurrbenbenemarneyimen Silas dja Timothy bu ngadjare kabenemre werck.” Wanjh Paul benbenemunkeweng bu benebolkbawong Athens.

*Paul Wanjh Benmarneyolyolmi Kore Kunredkimuk Athens
Acts 17:16-34*

¹⁶ Wanjh Paul kumekbe benbenemadbuni Silas dja Timothy. Wanjh nungka bolknabolknani kumekbe kore kubolkkimuk dja nang nawern nawu yehyeng idols birrimarneboddangeni bu birrimarnedi yiwarrudj. Wanjh nungka djalwernhnjilngwarreminj duninj bu bennani kumekbe birrikurduyimi.

¹⁷ Wanjh nungka wam ngimeng kore Jews bedberre synagogue dja birridangerrinj nawu Jews dja mak bininj nawu minj Jews nawu birrimarneboddangeni nawu God. Nungka nunghuy djalrey kuberrk kore birriweykani yehyeng dja birridjaldangwerreni bininj nawu kumekbe birrihni.

18 Kumekbe birrihni kunred yikahwi bininj nawu birringeyyoy Epicureans dja mak birribuyika nawu birringeyyoy Stoics. Nawu bedda birridjaldjareni birridjalburrbuyi kunbubuyika kunwern bu djalbedman. Wanjh nanihnjanu bininj birringalkerrinj Paul dja birridedjingmey birridangwerrinj nungka dorreng. Yikahwi birriyimeng, "Nahni nawu wokwern njale kahmulewan kore kahyolyohyolyolme?" Yika nawu birriyimeng, "Kunubewu nungka kayolyolme nabubuyika gods nawu kunredbubuyikabeh." Bedda kuninjkuwu birriyimeng dja birribekkani Paul benmarnemulewani bu Jesuskenh dja mak bu nungka dolkkang kore kundowikenh.

19 Wanjh birrimey Paul dja birrikang kore birrimirndemornamerenikenh bolkngeyyoy Areopagus. Wanjh bedda birridjawam, "Kanmarneyimen ngadberre bu kuhni kunkerrnge kore yibenhbukkabukkan.

20 Ngudda kuhni yibenhmarneyolyolmi kore kundjalkerrnge duninj kunwok, dja ngad ngarridjare ngarrikarreburrbun."

21 Kaluk birriwern bininj nawu birrimdolkkang kubolkbubuyikabeh birriwam birriyerrkani munguyh kore Athens. Bedda dja mak bininj nawu birriyingkihni kumekbe wanjh birridjaldjareni birridjalmarneyolyolmerreni munguyh bu birriwokbekkarreni kore kunkerrngehkenh kunwok kumbemeng bedberre. Kunmekbekenh kunu birridjareni birribekkayi nawu Paul.

22 Wanjh Paul dolkkang danginj kubulkayh bedberre bininj nawu birrimirndemornamerrinj kore birribolkngeyyobom Areopagus, wanjh benmarneyimeng, "Ngudda nawu binihbininj ngurrikang Athens, ngaye bengan ngudberre bu ngudda munguyh ngurriburrbun gods ngudberre.

23 Bu ngaye ngawohrey kondanjkuwu kururkwern, wanjh ngahnani-nani ngudberre nawu idols ngurrimarneboddangen. Dja mak nganang manwarddebalabbala kahyo kore mayh ngurribun bu ngurrikarme yiwarrudj. Dja mak nganang warddebimbuyindi kore kayime, KONDANJKUNU WANJH KARRIMARNEDI GOD NAWU MINJ KARRIKUKBURRBUN. Dja wanjh ngaye ngayolyolme ngudberre naninjnanu God nawu ngudda ngurrimarneboddan dja minj ngurriwernhkukburrbun.

24 Wanjh nanihnjanu God nungka marnbom yehyeng rowk nawu kondanjkuwu kurorrewaken. Nungka wanjh kadjalwohrnan rowk kore kaddum dja kurorre. Nungka minj kahyo kore bininj kabirrirurkmarnbun kunbidwi bedberre.

25 Minj mak bininj kabirriwon yehyeng dja minj kabirribidyikarme. Nungka minj kadjare rowk nawu ngad karrikarme. Kaluk nungandeleng kabengolekwon dja kabendarrkidwon bininj dja mak mayh rowk.†

26 Nungka bimarnbom nakudji nawu nayungkih duninj bininj, dja bimarnbom namekbe nawu nadjalkudji bininj bu yimerranj birriwarlahkenh bininj rowk dja wanjh kanbebbekurmekurmeng kore kubolkbubuyika rowk kore kondah kurorre karriwarlahminj. Dja mak God nungan bolkdjarrngbuni kore kandibebbekurmeng, dja mak karremarnbom bu baleh kayime karriarrikiddi dja kore karriyirrowenkenh.

27 Nungka kuninjkuwu kurduyimeng rowk ba bu bininj kabirridjalyawam kaluk bedmandeleng wardi kabirribidyirriyo nuye. Dja ngaleng nungka wanjh darnkih karrarndi kadberre.

28 Ngudda ngurriburrbun nawu bininj ngudmandeleng yimeng, 'Ngad karridanginj dja karriwohre dja karridi kore God nungan nuye kundarrkid.' Dja mak ngurriburrbun birribadbuyika bininj ngudberre nawu

† 17:25 Ngurrina kore 1 Kings 8:27; Isaiah 42:5

birrikarremarnbuni mankarre kore ngurriwayinikenh, bu birriyingkih-bimbuni ngudberre, 'Ngad nawu karriwarlahkenh rowk karribebeywurd nuye God.'

²⁹ Mah wanjh. Bu ngad karribebeywurd nuye God, wanjh kunukka yuwn mak karriburrhun kore kunbubuyika nuye. Kaluk God, nakka minj marnbuyindangimeninj kore bininj kabirriburrhun bu kabirridjare kabirrimarnbunbeh nawu yiman gold dja silver dja mak kunwardde.

³⁰ Bu kunkareni minj bininj birriburrbuyi God, dja kunekkekenh minj nungka mak benwelengnameninj. Dja wanjh bolkkime nungka kadjare bininj rowk, nawu kabirrihni kubolkbubuyika rowk bu kabirrikangemulewarren dja kabirrikangeborledkerren kore nungka nuye.

³¹ Dja mak nungka yingkihkarremarnbom bu kunbarnangarrakudji kore kabimunkewe nakudji bininj nawu korroko nungan bidjarrngbom. Kaluk namekbe bininj kabendjadme birrimirndewarlahkenh bininj rowk kore mandjad duninj. God korroko birrolkkayhweng namekbe bininj kore kundowikenh kukyoy, ba bu karriwern bininj karriburrhun bu woybukkih namekbe bininj wanjh nawu God bidjarrngbom." Wanjh kuninjku Paul benmarneyimeng.

³² Bu bedda birriwokbekkang Paul benmarnemulewani bu yawoyh-mimbiminjbeh, wanjh yikahwi birrikudjekmiwong Paul. Dja mak yikahwi birribadbuyika birrimarneyimeng, "Kaluk kanyawoyhmarney-olyolme ngadberre yerrekah."

³³ Wanjh Paul benbawong kore birrimirnderri.

³⁴ Yikahwi nawu bininj birriraworrij dja birriwoybukwoni Jesus. Nakudji bininj nawu biwoykbukwong Jesus, wanjh ngeyyoy Dionysius, nawu birridjarrkdi bininj nawu Areopagus birrimirnderri. Dja mak ngalkudji daluk ngeyyoy Damaris. Dja mak yikahwi birribadbuyika bininj dja daluk birriwoybukwong Jesus.

18

Paul Yerrkani Kunkuyeng Kore Kunredkimuk Corinth Acts 18:1-8

¹ Kalukburrk Paul bolkbawong kore Athens dja wam kore kunred kabolkngeyyo Corinth.

² Kumekbe nakudji bininj ni nawu Jewni ngeyyoy Aquila. Nungka danginj kore kunred bolkngeyyoy Pontus. Ngalbu ngalbininj kobeng nuye ngeyyoy Priscilla. Bedda korroko beneni kunred kabolkngeyyo kukadjeh Rome kore kubolkkimuk Italy. Wanjh kunkudjikenh Claudius nawu kumekbe Italy wohrnawohnani wanjh nungka benbekkeng nawu birriwernkenh Jews bininj nawu birrihni kore Rome kunred. Wanjh kumekbeken Aquila dja Priscilla benewam kore Corinth.

Wanjh bu Paul kumwam kore kumekbe Corinth wanjh nungka wam benbenehyawani wanjh benbenengalkeng.

³ Wanjh kumekbe bedda birridjarrkni bu birridjarrkdurckmirri birrimarnbuni nawu dabburlin. Aquila dja Priscilla nakka wanjh benemarnbumarnbuni munguyh nawu dabburlin bu benebidmaksinj. Dja mak Paul manekke durckmirri korroko.

⁴ Bu kunkodjkewern manbu Sabbath ngarreni kumhrey, Paul munguyh djalrey kore kunrurrk synagogue ngimi bu djareni benmarnbuyi birriwoybukwoyi Jesus, bininj nawu Jews dja mak nawu Greek birriwokdi bininj.

⁵ Wanjh kumekbe bolkyimi Silas dja Timothy benebebmeng kumekbe kore Corinth. Bedda benemdolkkang Macedoniabeh. Wanjh kaluk Paul

munguyh bendjalmarneyolyolmi bininj bu nungka yimiyimi bedberre nawu Jews bu Jesus nungka wanjh woybukkih duninjh nawu Christ*.

⁶ Dja nahni Jews bininj kumekbe wanjh bedda birringurdkeyi dja mak birriyolyolmi kunwarrekenh nawu Paul. Wanjh nungka madjborrbordjerrinj kore kumirrk bedberre bu madjdjulngwerrinj, dja benmarneyimeng, "Ngaye bu yimankek bengdayhkeng ngudberre dja wanjh bonj, ngudda minj kandibekkayinj. Dja bu ngudda ngurridowen wanjh kunukka ngudman ngudberre. Ngaye minj mak God nganwelengname bu kunjknunukenh. Dja wanjh bu bolkkime ngaye ngabendjalmarneyolyolme bedberre bininj nawu minj Jews."

⁷ Wanjh kunmekbekenh kunu Paul benbawong, dja rurrkbawong manbu synagogue dja ngimeng kore kunrurrkbuyika manbu darnhrurrkdi kore synagogue kumhrurrkdi. Mahni kunrurrk nuye bininj minj Jew, nawu ngeyyoy Titius Justus dja nungka wanjh boddangeni nuye God. Nawu Paul wabmeng yoy kore nungka.

⁸ Bininj nawu rurrknahnani synagogue ngeyyoy Crispus. Nungka dja nawu nuye namud birridjarrkwoybukwoni Jesus nawu kawohrnan rowk. Dja mak birribuyika birriwern bininj nawu birrihni kumekbe Corinth, wanjh birribekkani Paul bu wokdiwokdi, wanjh bedda birriwoybukwong Jesus, dja mak birrikodjdjumeng.

*Nawu Kawohrnan Rowk Bimarnekebwawalbukkarinj Paul
Acts 18:9-11*

⁹ Kunkakkudjikenh nawu Kawohrnan Rowk bimarnekebwawalbukkarinj nawu Paul, dja bimarneyimeng, "Yuwn bu yikele, dja munguyh yidjalwokdin bedberre bininj. Dja yuwn bu yiwohwokngurdme.

¹⁰ Dja ngaye wanjh munguyh ngarrdjarrkre, bu minj nangale mak ngunwarrewon dja ngunbun. Dja ngaye ngabenkarme birridjalwern bininj kore kondjanjkuu kunred." Kuhn nawu Kawohrnan Rowk bimarneyimeng Paul.

¹¹ Wanjh Paul kumekbe yerrkang bu dird nawern eighteen bimarneyimerranj. Nungka munguyh bendjalmarneyolyolmi god nuye kunwok kore weykani bininj bedberre.

*Nawu Jews Bininj Birrimarnemarnbom Kunyi Nuye Paul
Acts 18:12-17*

¹² Bu kumekbe bolkyimi nakudji bininj nawu ngeyyoy Gallio bu dedjingmey wohrnani kumekbe kubolkkimuk kabolkngeyyo Achaia. Bu kundjalmekebeni, bininj nawu Jews birrimirndemornnamerrinj kudjalkudji ba bu birringurdkemeninj Paul kore weykaweykani. Wanjh birrimey Paul birrikang dja birrinameng kore kumirrk nuye Gallio ba bu kabidjadd-djame nungka.

¹³ Wanjh bedda birrimarneyimeng nawu Gallio, "Nanihnjanu bininj yimankek nungka kabenmarnbun bininj bu kabirrimarneboddangen God ba bu kabirribakke mankarre ngadberre."

¹⁴ Wanjh Paul yimankek kuyinwokdiwirrinj, dja wanjh Gallio nungka werrek wokdanginj kore benmarneyimeng bedberre nawu Jews bininj, "Mah, wanjh ngurrina ngudda nawu Jews, dja kandibekka. Bu ngudda ngurriyimeninj nahni bininj kunwarre duninjh yimeninj, dja nuk bu karrebakkeyi manbu mankarrekimuk, wanjh kunu ngadjadmeninj.

¹⁵ Wanjh mahnimanu ngudmandeleng mankarre. Ngurridjaldangwerren kunngeybubuyikakenh dja kunwokkenh ngudberre kore mandalkarreyekkeyekke ngudberre. Ngaye kunu minj ngadjare ngadjadme

* 18:5 "Christ" wanjh kangeyrohrok "Messiah".

nanihnjanu bininj. Wanjh ngurribalka dja ngudmandeleng ngurrimarn-burrimen.”

¹⁶ Wanjh Gallio benkukbebkeng rowk kore kururrk manbu kabindidjadmekenh.

¹⁷ Wanjh nawu Jews bininj birriwam birrimey nakudji namak bininj nawu ngeyyoy Sosthenes. Nungka nawu wohrnani kore synagogue. Wanjh birrimkang kore kunurrk manbu kabindidjadmekenh wanjh kumekbe bedda birridjalbuni. Wanjh birridjalbuni Sosthenes, dja bonj, nawu Gallio minj baleh kurduyimeninj bu benmarrkmayinj bedberre.

Paul Rengehrey Kabbala Kore Kubolkbubuyika

Acts 18:18-23

¹⁸ Bu kuhni wanjh yimerranj nawu Paul djahdjalni kunkuyeng kore Corinth. Wanjh kalukburrrk benwoknang nawu bininj yiwarrudj bedberre dja wam bidbom kore kabbala manbu bikang kore kubolkkimuk bolkngeyyoy Syria. Wanjh nawu Priscilla dja Aquila bedda dorrengh birridjarrkwam. Wanjh birridjarrkwam birribebmeng kore kunred kabolkngeyyo Cenchrea. Kaluk bu kumekbe birribebmeng kunred wanjh Paul ngabekdadjkerrinj nungandeleng kore bimarnewokkurrmerinj God.†

¹⁹⁻²¹ Wanjh bu birrihrey birribalbebmeng kore kunredbuyika kabolkngeyyo Ephesus. Wanjh Paul djalwam ngimeng kore kunurrk synagogue dja birridangwerreni nawu Jews bininj. Bedda birridjawam bu yimankek kunkuyeng birriniwirrinj, dja Paul yimeng burrkyak. Bu benbawong wanjh benmarneyimeng, “Bu God kadjare wanjh kunukka ngaye ngamdurdeng ngudberre.” Dja wanjh wam yawoyhbidbom kabbala, dja bolkbawong kumekbe kunred Ephesus. Dja nawu Priscilla dja Aquila benebolkmaddi kumekbe Ephesus.

²² Paul djahdjawalwam kabbala dja bebmeng mankabkalibuyika kore kabolkngeyyo Caesarea. Nungka kumkoluy kore kabbalabeh dja wam kurrenge kore Jerusalem, dja benbarnmeybarnmey bininj nawu yiwarrudj bedberre. Kaluk nungka benbawong wam kurrenge bu durndi kore Antioch.

²³ Wanjh nungka kumekbe woherkrang kunkuyeng. Kaluk nungka bolkbawong Antioch dja wam djalwohrengehrey kunredbubuyika kore kubolkkilehkielk ngarre kubolkwarlah kabenebolkngeyyo Galatia dja mak Phrygia. Bu nungka benkangerayekwoni bininj nawu birrimunkekadjungi Jesus.

Nawu Priscilla dja Nabininjkobeng Ngarre Aquila Benebukkabukkani Nakudji Bininj nawu Apollos

Acts 18:24-28

²⁴ Bu kuhni kurdukurduyimerranj, Priscilla dja Aquila bedda benedjaldi kumekbe Ephesus. Bedda kumekbe birrinarrinj nakudji bininj nawu ngeyyoy Apollos. Kaluk nungka danginj dja djordminj kore kunred bolkngeyyoy Alexandria, bu nungka kumwam yerrkang Ephesus. Nungka wokmenmenmakni dja burrbuni rowk kore bimbuyindi God nuye kunwok.

²⁵ Nungka kerrngehkenhni birribukkabukkani, bu burrbuni kore nawu Kawohrnan Rowk nuye. Nungka djaldjareni bu bimarnedurrkmirriwirrinj God. Nungka wanjh bendjalmarneyolyolmi bininj mandjad duninj bu Jesuskenh. Nungka wurd djalburrbuni kore John benkodjdjuhkeyikenh. Dja minj wernburrbuyinj bu bininj kabirridjuhme kore kunnge nuye Jesus.

† 18:18 Ngurrina kore Numbers 6:18

²⁶ Wanjh nungka dedjingmey benmarneyolyolmi bininj kore kunrurrk synagogue bu minj mak balkeleniwirrinj bedberre. Wanjh Priscilla dja Aquila benebekkang kore wokdiwokdi, wanjh benemey benekang kore bedda beneyoy dja benewernhmarneyolyolmeng kundjalwern kore Godkenh.

²⁷ Kaluk bu yerrekah wanjh Apollos djareni djowkkemeninj rawinj kore kubolkkimuk kabolkngeyyo Achaia. Wanjh birribuyika bininj birrihdjarrkni kore Ephesus nawu birridangerrinj kore Jesus, dja bedda birrinjilngmakminj nuye nawu Apollos. Bedda birribimbom djurra dja birribidnakenwong ba bu bininj nawu birrimunkekadjungi Jesus kabirrikimang kore kumekbe kunred Achaia.

Kaluk bu nungka wam bebmeng kumekbe wanjh benwernhbidyikarmeng bininj nawu God bendjalkongibom dja mak birriwoybukwong Jesus.

²⁸ Kaluk Apollos birridangwerreni nawu Jews bininj kore kurobbe dja benyurrhkeyi bedberre kundulkarre dorrengh. Nungka benbengdayhkeyi kore Bible bimbuyindi bu Jesus wanjh nungka nawu Christ.

19

Bu Namalngmakkaykenh Benkukbarlkeng Bininj Kore Ephesus Acts 19:1-7

¹ Nawu Apollos wam ningihni kore Corinth. Dja nungka Paul djahdjalley kore kubolkbubuyika kore kubolkkihkimuk. Kaluk yerrekah wanjh kumbemeng kore kunred Ephesus, dja benngalkeng bininj kumekbe nawu birrimunkekadjungi Jesus.

² Wanjh bendjawam bedberre, yimeng, “Yiddok ngudda ngurrimey nawu Namalngmakkaykenh bu ngurriwoybukwong?” Wanjh bedda birriyimeg, “Burrkyak, ngad kunu minj ngarringeywobekkayinj korroko nawu Namalngmakkaykenh.”

³ Wanjh Paul benmarneyimeg, “Njalekenh ngudda ngurrikodjdjuh-meng?” Wanjh birrimarneyimeg, “Ngad kunu ngarrikodjdjuh-meng bu yiman John benkodjdjuhkeyi kerngehkenhni.”

⁴ Wanjh Paul benwernhmarnekarreyolyolmi, yimeg, “Bu nungka John benkodjdjuhkeyi bininj, nungka benmarneyimi bu kabirrikangeborledme dja kabirriwoybukwon nawu yerreh kamhre. Bu nakka wanjh benmarnemulewani Jesus.” Kuhni bu Paul benmarneyimeg.

⁵ Bu bedda kunu birribekakang, wanjh kundjalburrikudji birridjuh-meng kore kunngey nuye Jesus nawu kawohrnan rowk.

⁶ Wanjh kundjalmekebe rerrih Paul benmarnebidkurrmerrinj, wanjh nawu Namalngmakkaykenh kumwam bedberre, wanjh birriwelengwok-danginj kunwokbubuyika dja birriwokmulewani God.

⁷ Kaluk kumekbe birrihni twelve bininj.

Paul Benmarneyolyolmeng Birriwern Bininj Kore Kunred Ephesus Acts 19:8-10

⁸ Kaluk Paul dingihdi Ephesus dja wanjh benbukkabukkani kore kururrk manbu synagogue bedberre bu munguyh. Kaluk nungka benbukkabukkani dja mak bendjaldjawani bu kabirringimen kore God nuye kawohrnankenh. Nungka djalyolyolmeng bu minj keleniwirrinj. Dja wanjh benbukkani bu dird danjibik yimerranj nuye.

⁹ Yikahwi bininj nawu birribekkani Paul wanjh bedda birridjalw-ernhkangerayekworrinj, dja minj birriwoybukwoyi Jesus. Wanjh bedda bindimarnemulewani birriwern bininj bu kurobbe bindihmarneyimi,

“Manbu manbolh nuye Jesus wanjh manbolhwarre.” Wanjh Paul benbawong, wam, dja mak birribadbuyika bininj bedda dorreng birridjar-kwam nawu birrihmunkekadjungi Jesus.

Kaluk yerreh Paul benbukkabukkani bininj munguyh kore manrur-rkkimuk ngarreni manbu bindibukkabukkanikenh. Kaluk nakudji bininj manmekbe kunrurk nuyeni nawu ngeyyoy Tyrannus.

¹⁰ Paul munguyh kuninjku bu djalkurduyimi bu mandjewk bokenh bikang. Wanjh birriwarlahkenh bininj nawu birrihni kubolkkimuk Asia, wanjh bedda birriwobek kang nawu kawohrnan nuye kunwok. Nawu bedda Jews bininj dja mak nawu minj Jews.

Bu God Nuye Kundulkarre
Acts 19:11-20

¹¹ God biwong Paul kundulkarre bu djalkurduyimeng kundjalwern-makkaykenh duninj.

¹² Nawu bininj birrimangi yiman kayime kunmadjbelh, birrikani kore Paul birrikulahkarmi namekbe kunmadjbelh dorreng. Wanjh birriyrurndengi kore bindikulahkarmi nawu birridulkkihoy, wanjh birrimakmeni, dja mak namarnde namalng bindibebbehawoni wanjh birribemerreni birrirey.

¹³ Kaluk yikahwi bininj nawu Jews birridjalrengerey bindimarnekuk-weyi nawu namarnde namalng. Dja yikahwi birridjareni yimankek birringeybuyi kunngey nuye Jesus nawu kawohrnan rowk. Bu kuhni bedda wanjh birriyimi, “Ngaye marneyime kore kunngey nuye Jesus nawu Paul kabihmulewan.”

¹⁴ Kaluk bedda wanjh seven bininj nawu birridangerrinj bu kuninjku birrikurduyimi. Dja nawu nakornkumo bedberreni ngeyyoy Sceva dja nungka nakimukni priest bedberreni nawu Jews bininj.

¹⁵ Bedda yimankek birrimarnekkubekemeninj nakudji bininj nawu bihkarmi namarnde namalng. Dja nawu namarnde benmarneyimeng, “Ngaye kunu ngadjalkukburrnun Jesus, dja mak ngawobek kang nawu Paul, dja ngudda ngurringalengale?”

¹⁶ Wanjh namekbe bininj nawu karmi nawu namarnde namalng, wohdolk kang benbuni birrimekbe nawu birridangerrinj. Bu bendjalbom benkumarmarlahmarladjwong, kunmadj warridj bom bedberre. Wanjh bedda birrikelerlobmerrinj bu birridjlarh dja birrikurlbarey dorreng.

¹⁷ Birriwern bininj birrihni kore Ephesus nawu Jews dja mak minj Jews, bedda wanjh bindiwobek kang nanihnjanu nawu birridangerrinj, wanjh kunu bedmanwali birrikeleminj rowk. Dja wanjh birridjalyimeng bu birringeyburlumeng kunngey nuye Jesus nawu kawohrnan rowk.

¹⁸ Wanjh birriwern bininj nawu birrimunkekadjungi Jesus birriwam birrihngamulewarrinj kore kunwarre birrikurduyimi.

¹⁹ Dja mak yikahwi nawu birrimarkkidjbuni birrimbebbekhanah kang rowk nawu djurra nawarre bedberre, wanjh birriburriweng kurobbe kore kunak rungirungi kore birriwern birrinani. Birrirohrokmeng namekbe djurra bu baleh yimi birrihmangi, wanjh marnburrinj nadjalwernhkimuk duninj yiman nawern million dollars wam.

²⁰ Wanjh kunwok nawu Kawohrnan Rowk nuye warlahwarlahminj dja dulkarrekimukminj warridj.

Kunyid Kunkimuk Benmarnebebmeng Bininj Nawu Birrimunkekadjungi
Jesus
Acts 19:21-29

²¹ Kuhni wanjh yerreh balyimerranj, Paul wanjh nungka djarehdjareni bu rawinj kubolkkimuk bokenh benebolkngeyyoy Macedonia dja Achaia, wanjh yerreh balrawinj Jerusalem. Dja mak yimeng, "Wanjh ngadjare yerreh ngayeman ngare ba bu ngabolknan kore kunred Rome."

²² Bu kerrngehkenhni nungka benbenemunkeweng benebokenh nawu benebidyikarmi bu benewam Macedonia, kaluk bedda benengeyyoy Timothy dja Erastus. Dja nawu Paul yerrkang bu waken kumekbe kunred Ephesus kore kubolkkimuk Asia.

²³ Bu kuninjkuu bolkyimi kunwern kunyid marnbumarnburreni bedberre bininj nawu birrimunkekadjungu Jesus nuye manbolh.

²⁴ Kaluk nakudji bininj nawu ngeyyoy Demetrius, nungka wanjh dedjingmey bu kunyid marnbom. Bu nungka wanjh marnbumarnbuni wirilmurung silverbeh manbu manrurrkkilehkilelk kore yoy Artemis ngalbu god bedberreni birringeybuni. Kaluk birriwern bininj birrimarnedurrkmirri dja birrimangi nawern money kore birriweykani manbu birrihmarnbuni.

²⁵ Wanjh Demetrius benmirndemey bininj nawu kumekbe birrimarnerdurrkmirri dja mak birribadmirndebuyika nawu manbubuyika waridj birrimarnbuni. Wanjh benmarneyimeng, "Kandibekka! Ngudda ngurriburbun bu ngad karrihmang nawern money bu karrihweykan maninjmanu kunrurrk manbu Artemis ngalengngarre dja mak ngalenjale ngarre.

²⁶ Ngudda ngurribengkan Paul nawu kadjalrengahre dja kabenmarneyime birriwern bininj bu nungka wanjh kahyime God duninj nawu minj bininj kabirrimarnbun kunbid bedberre. Wanjh birriwarlahkenh bininj kabirribekkan dja kabirrimarnemirrkborledme bu kandihbawon kabirrire. Paul kuninjkuu kakurduyime kubolkwern kore Asia dja mak kondanjkuu kore Ephesus.

²⁷ Dja kunbuyika mak marneyime. Ngurriburbun bu birriwern bininj nawu Asiabeh dja kore kubolkbubuyika rowk wanjh kabirrimre kondah ba bu kabirrimarneboddan ngalengngarre Artemis ngalbu god kadberre. Kaluk bu birrimkebe bininj kabirribekkan kore Paul kayolyolme, wanjh kunubewu minj kabirrimyawayohdurndeng kondah, dja bedda kabirridjalwarrewe kore ngad karridurrkmirri, dja mak manbu temple ngalengngarre Artemis, dja mak kabirridjalwarrewe Artemis bu bininj minj kabirriyawayohmarneboddan. Dja kuhni kundjalwarre rowk."

²⁸ Wanjh bu kuninjkuu birribekkan kore Demetrius benmarneyimeng, bedda birridjalwernhyidduy, dja birridedjingmey birrikaykahkayhmeng, bu birriyimi, "Ngad nawu Ephesusbeh karrikarme Artemis ngalbu ngalkimuk."

²⁹ Birridjalwern bininj nawu birrihni kumekbe wanjh bedda waridj birridjalkangawarreminj. Bedda birrirobmerrinj rowk kore birrimornamerrenikenh kubolkrobbeni. Bu bedda birribalngimi wanjh bindiberlmey bininj bokenh bindidorrorrkeng berrewoneng nawu benengeyyoy Gaius dja mak Aristarchus. Nahni bininj bokenh benemk-dolkkkang Macedoniabeh, bu bedda birridjarrkrey Paul.

Paul Djareminj Benmarnebebmeninj Bininj Nawu Birrikaykahkayhmi
Acts 19:30-34

³⁰ Paul djareni rawinj benmarnebebmeninj bedberre bininj nawu birrimirndeni kuberrkkah. Dja bininj nawu birrimunkekadjungu Jesus wanjh bedda birridabmeng, bu minj birrimunkewemeninj rawinj.

³¹ Yikahwi bininj nawu Paul birridabbolkn bedda nawu birriwohrnawohrnani ngarre kunred Asia, bedda birrimarnewokmunkewerrinj bu

birridjareminj birridenghkeyi, birriyimeng, “Yuwn bu yidjurrkdjurrkwo-
ren yire kumekbe kore kumirnde.”

³² Kaluk kumekbe kore kumirnde birridjalwern bininj birribebbhkayhmi, bu minj baleh birriburrbuyi kore njalekenh birrimornnamerrinj.

³³ Bininj nawu Jews birridjareni nakudji bininj nawu ngeyyoy Alexander bu benmarnewokdiwirrinj bininj nawu birrimirnderri kumekbe, wanjh yikahwi bininj nawu birridjurrkkang bu wam wokdiwirrinj. Nungka wanjh berlwaydanj bu djareni yimankek birriwokbekkayi kore benmarneyimeninj, “Ngad nawu Jews bininj minj ngarrimarnbuyinj kuhni kunyid ngudberre.”

³⁴ Bu bedda birridarrkidnang bu nungka wanjh Jewni, wanjh bedda minj birridjareniwirrinj birribekkayi. Dja bu kuhni kunkuyeng, bokenh hours birribaldanginj wanjh birridjalmirndekeyhmeng rowk, bu birriyimeng, “Ngad nawu Ephesusbeh karrikarme Artemis ngalbu ngalkimuk.”

Birrigurdmeng Nawu Birrikaykahkayhmi
Acts 19:35-41

³⁵ Wanjh nawu bininj kumekbe kunred wohrnani kumebmeng, dja benngurdheng. Wanjh benmarneyimeng, “Ngudda nawu bininj ngurrikang Ephesus, wanjh kandibekka. Birriwarlahkenh bininj kabirriburrbun bu ngad karridjalkudji karrinahnan kunrurrk ngalengngarre Artemis, dja mak ngalengngarre manbu manwarddedjamun manu kumwarddewarrhmeng kaddumbek.

³⁶ Kuhni bu birriwarlahkenh bininj kabirribengkan bu kunwoybuk, dja wanjh ngurridjalngurdmerrimen, dja ngurridjalyimen bu kunmak.

³⁷ Benemekbe bininj nawu ngurrbenbenemkang, bedda minj benedjirdmayi kore templebeh, dja mak minj benemarneyimeninj kunwarre ngalbu ngad kadberre god.

³⁸ Bu Demetrius dja bininj nawu kabirridjarrkmarnbun kabirridjare kabindiwelengname nanihnjanu bininj nawu kabiyolyolme, wanjh kunu kabirrikan kore djamun dja nawu kabindidjadmedjadme bininj. Wanjh kunu bedman kumekbe kabirriwokbekkabekkarren kore kabirriwelengnamerren.

³⁹ Dja bu kunbuyika kabirriburrbun wanjh kunukka birriray kore nawu government kabirrimirnderri dja kabirriyolyolme, ba bu nawu kabirriwohrawnawornan bininj kabirribekkarren bu kunwoybuk.

⁴⁰ Wanjh kandibekka, bu nawu birrikihkimuk kandidjadmedjadme bu ngundiwobekkan bolkkimekenh ngurrikurduyime, wanjh bedda kandidung kadberre rowk dja kandiwelengname, bu ngudda djalburudjang ngurrimirndemornnamerrinj kore ngurriyiddungikenh.”

⁴¹ Bu kuhni yimeng bedberre, wanjh kunu benmunkeweng birridokmer-
rinj kured bedberre.

20

Paul Rengehrey Kore Kubolkkimuk Danjbik Macedonia, Greece dja Asia
Acts 20:1-6

¹ Wanjh bu kunyid yakminj kore birridurreni kore Ephesus, Paul benkahymeng bininj nawu birrimunkekadjung Jesus bu nungka wanjh benkangemarnbom. Kaluk benwelengwoknang dja bolkbawong wam kore kubolkkimuk bolkgueyyoy Macedonia.

² Nungka djalrengheyy kubolkbubuyika kore Macedonia benbengdah-
bengdayhkeyi bu benkangemarnbom bininj nawu yiwarrudj bedberreni

kore kunred bedda birrihni. Kalukburrk balbebmeng kore kunbolkkunkimuk Greece.

³ Wanjh nungka yerrkang kumekbe bu dird danjbik. Wanjh nungka kaluk djareni bidbuyi kabbala bu rayinj kore kubolkkimuk kunred bolkngeyyoy Syria. Wanjh nungka benwobekkang bu bininj nawu Jews bedda birrikarremarnbuni bu birribuyikenh, dja wanjh burrbom bu durndi kurrenge kore kubulkbubuyika ngarre Macedonia.

⁴ Wanjh Paul birridjarrkraworinj bu birridjarrkrey yikahwi bininj nawu birringeyyoy Sopater nawu Bereabeh, nawu beywurd nuye Pyrrhus, dja mak Aristarchus dja mak Secundus nawu benemdolkang Thes-salonicabeh, dja mak nawu Gaius kumdolkang Derbebeh, dja mak nawu Timothy. Dja mak benebadbuyika Tychicus dja Trophimus nawu benemdolkang Asiabeh.

⁵ Wanjh Paul bendokmiweng birrimekbe bininj rowk bu birriyingkihdokmeng ba bu ngandidjalmadbun ngadberre kore kunred bolkngeyyoy Troas.

⁶ Ngad wanjh ngarridjarrkbebmeng Paul dorrengh kore Philipi. Bu kunmekbe bolkyimi nawu Jews bininj birrikarmi mulil bedberre manbu birringuni kandidjawa minj karrmeninj mannguklurlikenh. Kaluk bu yakminj rowk wanjh ngad ngarribolkbawong Philipi dja ngarrimey kabbala. Ngarrirey kunbidkukudji kunkodjke wanjh ngarrbenmarnebebmeng nawu birriyingkihdokmeng kumekbe kunred bolkngeyyoy Troas. Wanjh ngariyerrkang kunbidkukudji dja bokenh kunkodjke.

*Nakudji Yawurrinj Ngeyyoy Eutychus Mankang Kaddumbek Djarreh
Acts 20:7-12*

⁷ Bu Djandi kumunun yimerrangeni ngad ngarrimirndemornnamerrinj bu ngarrilodbakkeyi buriddi. Paul wanjh djareminj benmalaybawoyi dja wanjh nungka benmarnewokdanginj bu kukakkuyengni. Nungka djahdjalkakwokdanj kumununburrk yimerranj.

⁸ Kumekbe kore ngad ngarrimornnamerrinj kururk kaddumkah duninj, wanjh kunkong kongrunji manwern manbu bolkwolkanikenh ngadberre.

⁹ Nakudji yawurrinj ni nawu ngeyyoy Eutychus, wanjh ningihni kore wohrurrkni. Nungka bibekkani Paul bu wokdiwokdi, kaluk bu kunkuyeng djahdjalkwokdi wanjh Eutychus mimkodjkengalmeng bu baldjalkeyonginj duninj wanjh nungka baldjalkodjkemakang kore kaddumbek, bu bedda birrinang doweng.

¹⁰ Wanjh Paul koluy boddanginj dja bikukwanjbimey, wanjh benmarneyimeng bedberre, "Yuwn ngurrikangewarre, dja nungka kahdarrkid."

¹¹ Wanjh bedda birriyawoyhbidbom kaddumkah kore birrihni ker-ngehkenh kururk wanjh birrilodbakkeng buriddi dja birringuneng. Wanjh Paul djahdjalkwokdi bedberre bu kumbarrhbom. Wanjh malahmalaywihni nungka benbawong wam.

¹² Wanjh birridokmeng dja birrimey namekbe nayawurrinj nawu mankang kururk kaddumbek, wanjh birrinjilngmakminj bu birrinang yawoyhdarrkidminj.

*Paul Rengehrey Kabbala Bu Durndi Kore Kunred Ephesus
Acts 20:13-16*

13-14 Ngad ngarrikoluy kumekbe kanjdjikanjdji ngarribidbom kabbala, dja ngarriwam kunred bolkngeyyoy Assos. Nawu Paul minj ngarrimd-jarrkrawinj, dja nungka djareminj djahdjalley kurrenge wanjh ngarrim-irrharrinj kumekbe kore Assos. Wanjh kumekbe Assos ngarriyawoyhraworinj Paul dorreng, wanjh ngarridjarrkbidbom kabbala dja ngarriwam kunred bolkngeyyoy Mitylene.

15 Wanjh ngad kumekbe ngarribolkbawong dja ngarriwam kabala. Kaluk kunbarnangarrabuyikani ngad ngarribolkmey kore kunred bolkngeyyoy Chios. Kaluk kunbarnangarrabuyikani ngarrirey kabbala bu ngarridjowkkeng dja ngarribebmeng kore kunred bolkngeyyoy Samos. Bu kumekbe ngarribolkbawong dja ngarridjalrey kabbala. Kaluk kunbarnangarrabuyikani ngarribebmeng kore kunred bolkngeyyoy Miletus.

16 Kumekbe Miletus darnkihni kunred ngarreni Ephesus. Paul minj djareniwirrinj bu balrawinj kore Ephesus. Nungka djaldjareni werk rawinj kore Jerusalem ba bu birridjarrkkarmininj kunkodjke manbu Pentecost ngalengngarre nungka dorreng. Kaluk kumekbekenh nungka minj djareniwirrinj bu yerrkayi kore kubolkkimuk Asia.

Paul Benmarnewokdanj Bininj Nawu Ephesusbeh Nawu Birriwoybukwoni Jesus

Acts 20:17-24

17 Wanjh bu ngad ngarribolkmey kore Miletus, Paul wokmunkewerrinj bedberre nawu birriwohrawnawohnani yiwarrudj ngarre kore Ephesus bu kabirrimre kore nungka.

18 Bu bedda birrimarnebebmeng nungka wanjh bendjalmarnewokdanj kore kunwok kunrayek.

Wanjh benmarneyimeng, "Ngudda ngudman ngurriburrbun kore ngaye ngakurduyimi munguyh bu karridjarrkni bu kerrngehkenh ngaye ngamwam kondanj kunu kubolkkimukkenh.

19 Ngaye ngadjalmarnedurrkmirri nawu Kawohnan Rowk nuye, bu minj ngaye ngakimukworrimeninj dja yikahwi mak nganalkbuni. Dja nawu Jews bininj ngandimarnekaremarnbuni kunwarre ngardduk dja kunrayek ngakarmi. Dja bonj, minj ngamarrkbaworrimeninj.

20 Dja mak ngurriburrbun bu ngaye munguyh bukkabukkani kundjalwern duninj kore kangerayekwoni ngudberre. Bu bukkani ngudberre kore kurobbe dja mak kore kunrurk ngudberre ngurribebbehoyoyoy.

21 Ngaye kunwoybuk marnemarneyimeng ngudberre bininj nawu Jews, dja ngudda nawu minj Jews. Ngaye marneyimi ngudberre bu ngurrikangeboredme kore God bu ngurrikangeboredkerren, dja mak ngurriwoybukwon Jesus Christ nawu kawohnan rowk.

22 Mah wanjh bolkkime kandibekka. Nawu Namalngmakkaykenh ngandjurrkkan bu ngare kore Jerusalem, bu minj ngaye ngaburrbun bu baleh nganmarnekurduyimerran kore kumekbe ngani.

23 Wanjh ngawernhburrbun nawu Namalngmakkaykenh nganmarneyimeng bu baleh yarrkka ngaye ngare, wanjh kunyid nganyawoyh-marnebebe dja mak wardi ngandiyawoykurrme dja ngarrukkayindan-gen kore prison.

24 Dja bonj. Ngaye minj ngayawoyhburrburren bu kuninj kunu ngarowenkenh. Dja ngaleng kundjalkudji bu ngahdjalkarme bu ngadjare ngayakwon bu ngahmarnedurrkmirri Jesus nawu kawohnan rowk. Ngayime bu nungka nganwong kore ngahbenmarneyime birriwern bininj manbu kunwok kunmak bu kayime God kankongibun rowk." Kuhni bu Paul benmarneyimeng.

Paul Mulewarrinj Dja Benbengdayhkeng Bininj Nawu Ephesusbeh Nawu Birriwoybukwong Jesus
Acts 20:25-38

²⁵ Wanjh Paul yawoyhyolyolmeng, yimeng, “Wanjh bolkkime kandibekka. Ngaye ngaburrbun bu ngudda minj kandiyawoyhkebnan ngaye nawu marnehmarneyimi ngudberre kore God nuye kawohrnan rowk.

²⁶⁻²⁷ Ngaye korroko marneyimeng ngudberre kundjalwern rowk kore God nuye kunwok kore kadjare, dja bu nangale nawu karrownen kunwarre dorrengh, wanjh kunukka minj ngaye ngardduk.

²⁸ Dja ngurrihdjalnahnarrimen ngudmandeleng, dja mak ngurrbendjal-nahna nawu bininj ngudberre. Kaluk nawu Namalngmakkaykenh ngunwong ngudberre kuninjku bu ngurrbennahnankenh yiman kayime shepherd namak kabenmirndenahnan nawu sheep. Birrimekke bininj nakka wanjh nawu Kawohrnan Rowk nungan nuyekih. Nungka wanjh kurlbawarrhmeng nuyekih kunkurlba ba bu kabenbebke nuye bininj.

²⁹ Ngaye ngaburrbun bu bolkkime bawon ngudberre, wanjh birriwarre bininj kabirrimbebme kabindibularrrbularrbun yikahwi bininj ngudberre yiman kayime duruk nawu nabang duninj.

³⁰ Ngaye mak ngaburrbun yikahwi bininj wanjh kabirrimbebme yerakah dja ngurriraworren bu yimankek kunwarre kabindibukkabukkan bininj nawu kabirrimunkekadjung Jesus ba bu kabindimarnbun kabindimunkekadjung bedberre.

³¹ Wanjh kunu ngurrinahnarrimen. Dja mak ngurridjalburru kore ngaye korroko ngakurduyimi ngudberre. Ngaye munguyh djahdjalmarneyimi mandjad duninj ngudberre bu kukak yimerrangin dja mak benbekad, djal munguyh ngakurduyimi kumekbe kunmimnalk dorrengh.

³² Dja wanjh bolkkime ngadjare God ngunnahnan ngudberre. Nungka ngunwong kunwok nuye bu ngundjalkongibom ngudberre. Bu nungka ngunmurrngrayekwon ngudberre, dja ngunwon ngudberre kunmakmak kore benyinkihmarnewokkurmerrinj bininj nawu kabirriyimerran bu djal nungan nuyeni bininj.

³³ Bu ngaye karridjarrkrey munguyh minj ngadjareniwirrinj bu ngaye yikukmayi nawu money dja kunmadj ngudberre.

³⁴ Ngudda ngurriburrbun bu ngaye ngadjaldurrrkmirranginj ba ngabayahmeng ngayemandeleng nawu kunmadj dja manme manbu ngarddukni dja mak nawu ngarridjarrkrey bininj bedberre. Kunmekbekenh kunu ngahdurrrkmirri kunbuyika bu ngahmangi kunwardde.

³⁵ Ngaye kuninjku ngakurduyimi rowk ba bu ngudmanwali ngurrikurduyime. Wanjh ngudman ngurridurrrkmirri ba bu ngurrbenbidyikarme birribuyika bininj nawu birrimarladj. Dja mak ngurribalburru kore Jesus nawu kawohrnan rowk yimeng, ‘Bu ngudda ngurrbenwon birribuyika bininj nawu njalehnjale ngurrihkarme, wanjh kunukka ngurridjalnjilngmakmen.’

Bonj. Kunmekbe ngadjareminj marneyimeng ngudberre.” Wanjh kuninjku Paul yimeng bedberre.

³⁶ Bu Paul nungka yakwong kore benhmarneyimi bedberre, wanjh barddurrukurlhdanj dja birridjarrkdanginj yiwarrudj.

³⁷ Wanjh bedda birrimarnenalkbuni rowk, dja birribarnmey dja birribunjhme nawu Paul.

³⁸ Bedda wanjh birriwernnjilngwarreminj kore benmarneyimeng, "Ngaye minj mak kandiyawoyhkebnan." Dja wanjh bedda birribalyikoluy kanjdjikanjdji kore kabbala mankimuk dingihdi.

21

Paul Wam Kabbala Kore Kubolkkimuk Syria

Acts 21:1-7

¹ Wanjh ngad ngarrbenbawong bedberre, kunmimnalk dorrengh kore kunred Miletus dja ngarridjalwam kabbala djurrud duninj wanjh ngarribebmeng kore manyungkurr bolkngeyyoy Cos. Kaluk kunkodjkebuyikani wanjh ngariyawoyhwam kabbala ngarribebmeng kore manyungkurrbuyika bolkngeyyoy Rhodes. Wanjh kumekkebeh ngarridjalwam ngariyawoyhbebmeng kore kunred bolkngeyyoy Patara.

² Wanjh kumekke ngariyawoyhkoluy dja ngarribidbom manbuyika kabbala manbu renehrey kunred bolkngeyyoy Phoenecia. Wanjh ngarribaldjalwamwi.

³ Wanjh bu ngarridjalrey ngariwobholkyuyurrhkeyi manyungkurr bolkngeyyoy Cyprus kore walemkah. Wanjh ngarribaldjalwamwi ngarribebmeng kunred bolkngeyyoy Tyre kore kubolkkimuk Syria. Wanjh birridelengkoluyhweyi manbu kabbala delenghdelengkani.

⁴ Wanjh ngarrikolurrinj kore kabbalabeh, dja ngariwam ngarrbenngalkeng bininj nawu birrimunkekadjungi Jesus kumekbe kunred. Dja ngarridjarrkyerrkang bu kunkodjke seven. Wanjh Namalngmakkaykenh benwokwong birrimekbe bininj bu birrimarneyimeng Paul, "Yuwn bu yire Jerusalem."

⁵ Bu darnkih ngad ngariwirleni ngarrirawinj, wanjh birrimekbe bininj dja mak nawu bedberre ngalbihbininj kobeng dja mak wurdwurd dorrengh, ngarridjarrkbebmeng kore kubolkkimuk kuberrkkah. Wanjh ngad kumekbe ngarribarddurrungkulhdanj kore adbud bu ngarridanginj yiwarrudj dja ngarribebbehwoknarrinj. Dja bedda birridokmerrinj kured.

⁶ Bu ngad kumekbe wanjh ngarridahkendanj kabbala wanjh ngariwam, dja bedda wanjh birridokmerrinj kunred.

⁷ Ngarridjalwam kabbala wanjh ngarribebmeng kore kunred bolkngeyyoy Ptolemais. Ngarrikoluy kore kabbala, dja ngariwam kurrenge ngarrbenmarnebebmeng dja mak ngarridjalwohwoknarreni nawu ngarridangerrinj kore Jesus, wanjh kumekbe ngarridjarrkyerrkang kunkodjkekudji.

Paul Dingihdi Kore Kunred Caesarea

Acts 21:8-14

⁸ Wanjh kunkodjkebuyikani ngad ngarribolkbawong kumekbe dja ngariwam ngarribebmeng kore kunred bolkngeyyoy Caesarea. Wanjh ngad ngariwam ngarringimeng kunrurrk nuye nawu nakudji bininj ngeyyoy Philip, dja wanjh kumekbe ngarihyoy. Nungka nawu namekbeni nakudjini seven bindidjarrngom kore Jerusalem. Nanihnjanu nawu Philip nungka reyi benbengdayhkeyi bininj kunwok kunmak.

⁹ Kaluk nungka benkarmi kunkarrngbakmeng ngalbebeywurd nuye nawu birridjadmudni. Bedda yiman prophets dja birrimulewani God nuye kunwok kore benmarneyimeng.

¹⁰ Ngad ngariyerrkang kumekbe kunkodjkewern wurd. Wanjh bininj nawu ngeyyoy Agabus, kumkoluy mandulumbeh kore kubolkkimuk bolkngeyyoy Judea. Nungka wanjh prophetni.

11 Nungka kumwam kore ngad, dja bimarnemey nawu ngard-modukkayindi Paul nuye kunmadj, wanjh nungandeleng maddukkarrinj dja mak mendedukkarrinj. Kaluk nungka bihmulewani nanihnjanu Paul bu kaluk kabimarnekurduyimerran, bu yimeng ngadberre, "Nawu Namalngmakkaykenh nganarneyimeng nawu bininj nuye nanihnjanu kunmadj, nakka wanjh kare kore Jerusalem, dja bininj nawu Jews kabirrimang, kabirridukkan wanjh kabirribidkenwon birribuyika bininj nawu minj Jews."

12 Bu ngad ngarribekakang kuninjkuu wanjh ngarridjalwernhdjawani Paul bu minj kare kore Jerusalem. Dja mak birribadbuyika bininj nawu birrihni kururk, wanjh birridjawam warridj.

13 Wanjh Paul nganwokmey ngadberre, dja yimeng, "Njalekenh ngudda kandimarnehalkbu? Ngudda kandimarnbuu ngaye ngadjalwernhnjilngwarremen duninj. Ngaye wanjh ngadjalmahme bu ngadjare ngare kore Jerusalem, dja kunu bonj, bu ngandikurme kore prison dja mak bu ngandibun ngarrowen, dja kunu bonj, ngadjalre kore kungey nuye Jesus nawu kawohrn rowk."

14 Wanjh bu ngad ngarrinang Paul minj mayaliborledmenin, wanjh ngad ngarridjalbawong. Dja ngarrimarneyimerrinj, "Bonj. Kamak kaluk nawu Kawohrn Rowk nungan kakurduyime kore nungka kadjare."

Paul Wam Bolkmey Jerusalem

Acts 21:15-17

15 Kalukburk wanjh ngarriwam Jerusalem.

16 Yikahwi bininj nawu birrimunkekadjungu Jesus nawu birrikang kore Caesareabeh, wanjh bedda dja ngarridjarrkwam kore Jerusalem. Ngandikang kore ngarringimeng kunurk nuye nakudji bininj nawu ngeyyoy Mnason nawu nakang Cyprusbeh. Nungka bidjalmunkekadjuy Jesus korroko duninj. Wanjh ngarrihni kore kunurk nuye.

17 Nawu birridangerrinj kore Jesus birrihdi Jerusalem ngandikimey bu birrikuninjilngmakminj.

Paul Dja Nawu Birriwohnrnawohrnani Yiwarrudj Bedberre Birriyolyolmi

Acts 21:18-25

18 Wanjh kunkodjkebuyikani ngad ngarriwam Paul dorrengh dja ngarrinarrinj James. Dja mak birribuyika birridjarrkni bininj nawu birriwohnrnawohrnani yiwarrudjkenh.

19 Wanjh Paul benmarneyimeng, "Ngudda kamak ngurrihni." Wanjh benyawoyhmarneyimeng bedberre kore kundjalwern God benmarnekurduyimi bininj nawu bedda minj Jews bu Paul rengheyre bihmulewani Jesuskenh bedberre.

20 Bu bedda birribekakang kuninjkuu Paul yimeng, wanjh birridjalburlumeng God. Wanjh birrimarneyimeng Paul, "Mah, yina nawu karridangerrinj. Dja kanbekka. Yiburribun birridjalwernhdewern duninj bininj nawu Jews wanjh bedda warridj birriwoybukwong Jesus. Dja bedda kabirridjaldjare munguyh kabirridjalwernhkarrme kore mankarre kadberre kahyo.

21 Bedda korroko ngundiwobekakang bu birrikarrebekakang ngudda ke. Yikahwi bininj ngundihmulewan bu ngudda yimankek yibenmarneyime bininj nawu Jews kabirrihni kubolkbuyika bu kabirrikarrebawon mankarre manbu Moses bimbom, dja mak bu minj kabindilakkayenwon bedberre wurdwurd, dja mak manbubuyika kabirribawon manbu mankarre kabirrikarrme.

22 Kuninjkuu wanjh bedda kabirriyime djaying. Bu bedda ngundiwobekkan bu ngudda yihni kondanjkuu Jerusalem, wanjh bedda kunu

ngundiyiddung. Wanjh ngad ngarrikarremarnbun ke, ba bu minj ngundiyawoyhdung nawu birrimekbe bininj.”

²³ “Mah, wanjh ngarridjare kanwokkarmen ngadberre kore ngundih-marneyime. Wanjh kandiwokekka. Ngad ngarrbenkarme kunkarrng-bakmeng bininj nawu Jews ngarridjarrkdi kondanjunu. Bedda birri-wokkurmerrini kunrayek nuye God. Kaluk bolkkime wanjh kayiburnbun bedberre, dja kabirrikangemarnburren kore Temple kabirringime.

²⁴ Ngudda bu yidjare wanjh yibenkan nanihnjanu binihbininj kore Temple ba bu ngurridjarrkkangemarnburren. Ngudda kaluk yiben-marnekarmulewan rowk ba bu kabirringabekdadjme. Bu ngudda kun-injkunu yikurduyime, wanjh birriwern bininj nawu Jews kabirriburrbun bu ngudda minj yibakke maninjmanu mankarre kadberre ba bu minj ngundiyawoyhwokbengkan.*

²⁵ Dja Mak kunbuyika marneyime ngudberre. Bu ngad minj ngarridjare bininj nawu minj Jews kabirrikarme mandjalwern manbu mankarre kadberre. Kaluk ngad ngarrbenmarnebimbom djurra, dja ngarrben-marneyimeng, ‘Yuwn bu ngurringun manme manbu bininj kabirriwon nawu idols kabirrihmarnedi yiwarrudj, dja wanjh makka kawarremen. Dja mak yuwn ngurrikurlbabongun. Mak yuwn bu ngurringun mayh nawu kunbidwi kabirrikukdjuyime bu kabirribun. Dja mak yuwn bu ngurriwohdjirdmarren.’ Bonj, wanjh kunmekbe ngarrbendjalmarneyi-meng bedberre nawu minj Jews bininj.” Kuhni bu birrimekbe bininj birrimarneyimeng nawu Paul.

Bininj Nawu Jews Birridjareni Birribuyinj Nawu Paul
Acts 21:26-31

²⁶ Wanjh Paul benmey birrimekbe kunkarrngbakmeng bininj benkang kore Temple. Wanjh bu kunkodjkebuyikani bedda birridjarrkkangemarn-burrinj. Kalukburrk nungka Paul ngimeng kore Temple kururk ba bu kabenmarneyime nawu birriwohrnawohrnani bu baleh kabolkyime kabenkarremulewan bedberre nawu bininj nuye.

²⁷ Dja medni, bedda birrimadbuni kunkodjke seven. Bu ngokko darnkih yakmeyakmenin, yikahwi Jews bininj nawu birrimdolkang Asiabeh, birrinang Paul kore Temple kururk ni. Wanjh bedda birriwam bindimirndemey bininj birribuyika bu birrimwam birridarrkidmey Paul.

²⁸ Wanjh birridjalkaykayhmeng, birriyimeng, “Bininj nawu Israel ngunkebmawahmeng ngudberre, kandimbidyikarmen. Dja nanihnjanu bininj kahre kubolkbubuyika kabenhmarneyimeyime birriwern bininj bu kandiwarrewe ngad bininj nawu Jews, dja kabirribakke mankarre kadberre. Dja mak nungka kunwarre kahyime maninjmanu Temple ngarre. Dja ngad kunu ngarrinang nawu Greek bininj benyingimeng kore Temple, dja birrimekbe bininj nawu minj Jews, wanjh kunmekbekenh nungka rurrkwarrewarrewoni kadberre kore kubolkdjamun.”

²⁹ Kaluk bedda birrikarrewarrewong. Bu birrinang Paul benedjarrkdi kore kubolkbuyika kururkwrern bininj nawu minj Jew nawu Ephesusbeh, nawu ngeyyoy Trophimus, dja bedda yimankek birriyimi Paul biyingi-meng kore kururk Temple. Dja burrkyakni, bedda birridjalwelengna-meng.

³⁰⁻³¹ Nawu bininj birrimirndewern birrihni Jerusalem birrinjilngwar-reminj dja birrirlobmeng rowk kore Temple. Bedda birridarrkidmey Paul dja birridorrohdorrorkeng kuberrkkah, dja kundjalburrikudjini

* 21:24 Ngurrina kore Numbers 6:13-21

birridangbalhmeng manbu Temple ngarre gates. Bedda wanjh birridjaldjareni birribuyi werrk nawu Paul. Kaluk kunmekbe wanjh birriwern djamun birridi kore Jerusalem, nawu birrimdolkkang kore Romebeh. Wanjh bu kunyid ngalmeng bininj nawu djamun benmarnewohnani benwobek kang bu birriwern rowk bininj birriyiddungi kunkimuk kore kukadjeh Jerusalem.

Nawu Djamun Birringehkeng Paul
Acts 21:32-36

³² Wanjh nawu benmarnewohnani djamun benmey bininj nuye dja mak nawu bindiwohrnawohnani, dja werrkwerrk birrirobmeng birrikoluy kore Jews bininj birribuni Paul. Bu bedda nawu Jews bininj bindinang djamun birrimhrey, wanjh birridjalngurdmeng rowk.

³³ Wanjh bininj nawu wohrnani kunwam hiberlmey Paul. Benmarneyimeng nuye bininj, "Ngurridukka wirlmurrng kurrenge dja kumende." Wanjh bendjawam bininj nawu birribuni Paul, "Nangale nakka bininj? Dja njale kurdukurduyimeng?"

³⁴ Wanjh yikahwi bininj bebbebbebhkayhmi kuhrikuhri nuye, wanjh nawu wohrnani bu minj mak benbekkayi kore birrihmarneyimi dja kunngalwowski birribengbom, wanjh nungka benmarneyimeng nuye djamun, "Mah, ngurriyidurnden kore kururk kadberre."

³⁵⁻³⁶ Wanjh djamun birrikang Paul. Wanjh bu bedda birrimbebmeng kore darnkih kabirribidbunkenh wanjh bedda birrikukngormey Paul kaddum, dja nawu Jews bininj birridarnhmirnderri darnkih bu bedda birriwernhyiddungi duninh. Dja mak bedda birrikaykahkayhmi kunngalwowski dorreng, birriyimeng, "Ngurribalka, ngurribu!"

Bu Paul Kayolyolmerren Dja Kabenmarneyolyolme Bininj
Acts 21:37-40

³⁷⁻³⁸ Bu bedda birribalhkuysinngimi kore djamun bedberre kunurk, wanjh Paul bimarneyimeng nawu wohrnawohnani djamun, "Kamak bu ngaye ngarrwokdi?" Kaluk Paul wokdanginj kunwok Greek.

Wanjh nawu bininj wohrnani djamun bedberre bimarneyimeng, "A! Yiddok ngudda kunu Greek yihwokdi? Dja ngaye ngayimeng yimankek bu ngudda nabuyika bininj nawu marnbuni kunyid kumekbe bu bindibuni nawu birriwohrnawohnani kunred Egypt. Dja yimankek ngaye ngayimi ngudda yibenkang 4000 bininj nawu bindibuni birribuyika bininj kore kumekbe kubolkdarleh Egypt. Yiddok ngudda namekbe?"

³⁹ Wanjh Paul biwokmey nunganwali bimarneyimeng, "Burrkyak. Ngaye kunu nawu Jew bininj, dja ngarranginj kore kunred kabolkngeyyo Tarsus kore kubolkwarlah Cilicia. Kaluk kubolkkukenni. Dja ngaye wanjh djawan ngudda ngadjare bu ngabenmarnewokdi nanihnjanu bininj nawu ngandibuyi."

⁴⁰ Wanjh nawu bininj wohrnani bedberre djamun bidjurrkkang Paul bu kabenmarnewokdi birrimmekbe bininj nawu Jews. Wanjh Paul dolkkang dja benmarneberlwayhmeng rowk. Wanjh birridjalwern bininj birridjalngurdmerrinj rowk, wanjh Paul dedjingmey benmarnewokdanginj kore Hebrewbeh kunwok.

1 Paul benmarneyimeng, "Ngudda binihbininj nawu karridangerrinj, dja mak ngudda nawu dabborrabbolk, kandibekka ngaye bu ngayolyolmerren ngudberre."

2 Bu bedda birribekkang bu benhmarnewokdi kore kunwokbeh Hebrew, wanjh bedda birridjalwernhngurdmerrinj rowk. Wanjh Paul yimeng bedberre,

3 "Ngaye wanjh Jew. Dja ngarranginj kore kunred Tarsus ngarre bu kubolkkimuk Cilicia. Kaluk ngaye ngamwam kondanjkuu Jerusalem dja ngarrabbolkminj bu kondah. Wanjh ngaye nganbukkabukkani namekbe bininj nawu kangeyyo Gamaliel. Ngaye nganbukkabukkani mankarrerayek manbu mawahmawah kadberre kandiwong. Ngaye ngad-jaldjareni munguyh bu ngadjalwokmarrkmangi God, yiman bu ngudda ngurrihime.

4 Dja ngaye mak ngabenbuni bininj dja daluk nawu birrimunkekadjungu Jesus kore manbolh nuye. Ngabendukkani ngabenkurrmi kore kunrurrk prison. Dja mak yikahwi birribaldoweni.

5 Nawu priest nakimuk kadberre dja mak nawu kabirriwohrnawohrn kore council kadberre, wanjh bedda rowk ngundimarneyime kunin-jkunukenh bu kunwoybuk.

Bedda wanjh ngandiwong djurra dja ngakang kore kunred Damascus yimankek ngabenwoyi nawu karridangerrinj bininj nawu Jews birrihni kumekbe. Dja mak ngadjareni ngabendukkadukkayi bininj nawu birrikad-jungu Jesus, ba bu ngabenyirrundeyi kore Jerusalem bu kabindibunkenh."

6 Wanjh Paul yimeng, "Wanjh ngarrirey kore Damascus dja bu barnangarraburrkni ngarribalhbebmi darnkih, kaluk kundjalmekebeni wanjh kundjalbolkwolkayindanj ngardduk kaddumbek bu kunkimukkenh.

7 Ngaye wanjh ngamankang kurorre wanjh ngawokbekkang bu kum-wokdanj ngardduk, wanjh yimeng, 'Saul, Saul! Njalekenh ngudda ngaye munguyh kanhdung?'

8 Wanjh ngawokmey, ngayimeng nuye, 'Ngudda yingale ngudda nawu yiwohrnan?' Wanjh nungka nganmarneyimeng, 'Ngaye wanjh Jesus nawu ngakang Nazarethbeh, nawu ngudda munguyh kanhdung.'

9 "Wanjh nawu bininj ngarridjarrkrey bedda birribirlunang kore kum-wolkayindanj ngadberre, dja minj birriwokburrbuyi nawu kumhwokdi ngardduk.

10 Dja wanjh ngadjawam, ngayimeng, 'Ngudda nawu yiwohrnan, baleh ngakurduyime ke?' Wanjh nawu Kawohrnan Rowk nganmarneyimeng, 'Yirrolkka, dja yiray kore kunred Damascus. Kaluk kumekbe nakudji bininj ngunmarneyime rowk kore ngaye ngayingkihkarremarnbom ke yikurduyimekenh.'

11 "Minj ngaye ngabolknayi dja ngandjalmimkinjeng kore kumwolkayin-danj kore heavenbeh. Wanjh nawu bininj ngarridjarrkrey ngandibidmey ngandikani kore Damascus.

12 Kaluk nakudji bininj ni kunmekbe nawu ngeyyoy Ananias. Nungka marrkmangi manwern mankarre kadberre, wanjh nawu birribuyika Jews bininj birridjalmakwani nuye.

13 Nungka kumwam ngannang kore ngaye ngahyoy, dja danginj kore djarrirn ngardduk, dja nganmarneyimeng, 'Saul nawu ngarrdanginj, yiyawoyhbolkna!' Wanjh kundjalburrikudjini ngaye ngayawoyhbolkngang dja mak ngadarrkidnang nungka Ananias."

14 "Dja mak nungka nganmarneyimeng, 'God nawu kadberreni mawah-mawah ngarrku, nungka ngunjaldjarrngbom bu yiwernburrbun kore

nungka kadjaldjare, dja mak djareminj ke bu yinan nawu nadjal-makkaykenh duninj nuye dja mak bu yiwokbekkan bu nungka ngun-marnewokdi nungan nuye kurrang dorrengh.

¹⁵ Kuhni ngunmarnekurduyimerranj ba bu ngudda yire yimulewan nuye bedberre bininj kore ngudda yinang kumim ke dja mak kore yiwokbekkang nuye.

¹⁶ Njale mak yihmadbum? Wanjh yirrolkka ba yikodjdjuhme kore ngunkangedjirribun kunwarrenh ke, dja yikayhmen nuye kunngey.' Kuninjkuu wanjh Ananias nganmarneyimeng ngardduk."

¹⁷⁻¹⁸ Wanjh Paul yimeng, "Kalukburk wanjh gaye ngamdurndi kore Jerusalem. Kaluk kunkudjihkenhni gaye ngahdi yiwarrudj kore kur-rurk Temple. Wanjh kumekbe ngadjalkodjworromkang bu nganang nawu Kawohrn Rowk dja nganmarneyimeng, 'Werrk, yidjalbolkbawo kondanjkuu Jerusalem, dja nawu bininj birrikang kondanjkuu minj ngundiwoybukwon kore gaye kanhmulewan.'

¹⁹ Wanjh gaye ngamarneyimeng, 'Nawu yiwohrn, bedda kabirribur-rbun bu gaye ngawohrewohrey kore kururkbubuyika synagogue dja ngabendarrkidmey birribuyika bininj nawu ngudda ngundiwoybukwoni. Ngaye ngabendangbalhmi kore prison dja mak ngabenbuni.

²⁰ Dja bu bedda birribom Stephen nawu ngunhmulewani ngudberre, wanjh gaye kumekbe ngahdi ngahbennani bu birrikodjdongi kunwardde. Dja gaye ngamakwam bu birribom doweng. Dja mak ngabenmarnemad-jnahnani nawu bininj birribuni.' Kuhni ngamulewarrinj bu ngamarneyi-meng Jesus.

²¹ Wanjh nawu Kawohrn Rowk nganwokmey, nganyawoyhmarneyi-meng, yimeng, 'Yiray, yidjalbolkbawo kondanjkuu. Gaye munkewe, ba yire kore bininj nawu minj bedda Jews.' " Kuhni bu Paul yolyolmerrinj bedberre.

²² Birrimkebe bininj nawu birribekkabekkani rowk kore Paul mulewar-reni bedberre, wanjh bu birriwokbekkang kore benmulewani bininj nawu minj Jews, wanjh birrikayhmeng, birriyimeng, "Nanihnjanu bininj wanjh djaldowimen! Ray, dja nakka nawarre. Karridjare karribun karrownen!"

²³ Wanjh bedda birridjalkayhmi dja birrimadjyerrkerrinj bedberre dja mak kundjulng birridjulngweyi kaddum.

Nawu Djamun Birridjareni Birriwidjbihkemeninj Nawu Paul Acts 22:24-30

²⁴ Wanjh nawu benmarnewohrnani djamun benmarneyimeng nuye bin- inj, "Mah, wanjh ngurrimka kore kururk kadberre. Dja ngurriwidjbihke ba bu kamulewan mandjad kore nungka baleh kahkurduyime wanjh nawu bininj Jews kabirriwidnan."

²⁵ Wanjh bedda birrikang birridukkarrukkang bu yimankek birriwid- jbhkemeninj. Wanjh Paul bimarneyimeng nawu djamun nabalkimukni, bimarneyimeng, "Bu ngudda kanwidjbihke gaye, wanjh kunukka yibakke mankarre, dja gaye ngahkarme mankarre manbu Romebeh, dja gaye kunu minj ngandiwoybekkayi ba mandjad marneyimeninj ngudberre."

²⁶ Wanjh bu namekbe nawu djamun biwokbekkang Paul bu yimeng, wanjh nungka baldjalwam bimarneyimeng bininj nawu wernhwohnrani djamun rowk, bimarneyimeng, "Yina, minj mak karribun nahni bininj dja nungka kahkarme mankarre manbu Romebeh, dja baleh ngudda yikurduyime?"

²⁷ Wanjh nawu wernhwohrnani djamun wam bidjawam Paul, “Kanmarneyimen mandjad, yiddok woybukkih ngudda yihkarrme mankarre manbu Romebeh?” Wanjh Paul biwokmey yimeng, “Yoh”.

²⁸ Wanjh namekbe djamun bimarneyimeng, “Ngayh, ngaleng. Wanjh ngaye ngabenkarremulewam nawern money bu ngamey mankarre manbu Romebeh.” Dja nungka Paul bimarneyimeng, “Ngaye ngamey maninjmanu mankarre kore ngayirranginjbek.”

²⁹ Wanjh kundjalburrikudji bininj birribawong nawu yimankek birwidjibhkemeninj dja birridjawayi. Wanjh nawu benmarnewo hrnani djamun keleminj bu burrburrbuni kore birrukkang wirilmurrng chains dorreng bininj nawu karrmi mankarre manbu Romebeh.

³⁰ Dja mak nungka djareni djalwernburrbuyi bu njalekenh nawu Jews bininj birriwelengnameng Paul. Kaluk bu kunkodjkebuyikani nungka biyerrkkeng Paul. Wanjh nungka welengwokmunkewerrinj bedberre bininj nawu priests birrikihkimukni dja mak bininj rowk nawu birrimirnderri kore council bedberre nawu Jews, bu kabirrimirndemornnamerren kore kubolkkudji. Wanjh bu bedda birrimirndemornnamerrinj rowk, wanjh nungka bikang Paul dja binameng kore kumirrk bedberre.

23

Paul Benmarnewokdanj Bininj Nawu Birriwohrnawo hrnani Kore Jerusalem.

Acts 23:1-5

¹ Paul bendjalwernhkuknani bininj nawu birrimirndemornnamerrinj, dja yimeng, “Nawu karridangerrinj, ngaye munguyh ngadjalwokmar- rkmangi mankarre nuye God. Ngaye ngaburrburren bu minj njale ngabakkemeninj.”

² Wanjh Ananias nawu benmarnewo hrnani priests, benwokrayekwong bu benmarneyimeng bininj nawu birridarnhdi Paul bu birridangwid- jibhkeng.

³ Wanjh Paul bimarneyimeng Ananias, “Kaluk God yinganwali ngunbun ngudda nawu yidjalwohkurrehkurren. Bu ngudda kandjaldjubom yimankek ngabakkeng mankarre, dja ngudda yibendjaldjurkkang nahn- injanu bininj ke bu ngandidangwidjibhkeng, wanjh kunukka yingandeleng yidjالبakkeng mankarre manbu kadberre.”

⁴ Wanjh nawu bininj kumekbe birridi birrimarneyimeng Paul, “Yuwn bu kunwarre yimarneyime, dja nakka God bikurrmeng bu kabem- marnewo hrnan priest bedberre.”

⁵ Wanjh Paul benmarneyimeng, “Ngudda nawu karridangerrinj, ngaye minj ngaburrbuyinj bu nahni kawo hrnan bedberre nawu priests. Dja wanjh ngaye ngaburrbun kore kabimbuyindi yimeng, ‘Yuwn bu yiy- ime kunwarre bedberre bininj nawu ngundihmarnewo hrnan.’” [Exodus 22:28] Kuhni bu Paul benmarneyimeng.

Paul Benmarnebom Bu Bininj Birribebbekhdangwerrinj

Acts 23:6-10

⁶⁻⁸ Wanjh Paul benwohburrbom bu bininj kumekbe birrimirndebo- kenhni, yikahwi nawu Phariseeni dja yika nawu Sadduceeni. Wanjh nawu bininj Sadducee birriyimeng minj nuk nangale kamyawoyhdarrkiddurn- deng bu karrown. Dja mak birriyimeng angel minj karri, dja minj mak kunmalngbubuyika kabirrihni. Dja nawu Pharisee bedda birriyimi bu munguyh kabirrihni nawu angel dja mak kunmalngbubuyika, dja mak birriyimi bu woybukkih bininj kabirridolkkan kore kumidjbek.

Kunmekbekenh kunu Paul wokdanj wernkih duninjh, yimeng, “Nawu karridangerin, ngaye wanjh Pharisee, dja mak nakornkumo ngarddukni nakka wanjh Phariseeni. Dja mak ngaye ngaburrbun bu bininj nawu kabirridowarren kabirrimyawoyhdarrkiddurdeng, wanjh kumekbekenh ngaye kunyid ngamey bu bolkkime ngandidjuhbenikenh.”

Bu kuninjkuwu yimeng bedberre, wanjh kunyid kummarnbuyindanj bu bedmandeleng birridangerreni nawu Pharisees dja Sadducees. Wanjh birridjalbebbemirndeyarlarmerrinj.

⁹ Wanjh bedda birridjalwernhwokwernmerrinj. Yikahwi bininj Pharisee nawu birriwernhkarreburrbuni mankarre, wanjh birridolk kang birriyime, “Nahni bininj minj nuk kurduyimeninj kunwarre. Dja kunubewu nakudji nawu angel dja nuk kunubewu namak kunmalng bimarnewokdanj nuye.”

¹⁰ Wanjh birridjalwern bininj birridjalwernhyiddurrinj duninjh, wanjh nawu bininj benmarnewohrnani nawu Romebeh djamun, wanjh nungka burrbom wardi Paul birribuyi birrikukdjalkdjalkmayi. Wanjh nungka benmunkeweng nawu bininj nuye bu birribekeng Paul dja kabirrikan kore kururrk bedberre.

*Nawu Jews Bininj Birrikarremarnbom Bu Kabirribunkenh Nawu Paul
Acts 23:11-15*

¹¹ Bu kumekbe kunkak nawu Kawohrnan Rowk Jesus kumwam bimarnewohrnanginj kurlirri nuye kore Paul, dja bimarneyimeng, “Yikangerayeknin, yuwn bu yikele. Ngudda yibenbengdayhkeyi bininj bu ngayekenh kondanjkuwu kore Jerusalem, dja wanjh bolkkime ngaye munkewe yire Rome ba bu yibenmarnemulewan ngayekenh.” Kuhni bu Jesus bimarneyimeng.

¹² Kaluk malayiwibuyikani wanjh yikahwi nawu Jews bininj birriyingkihkarremarnbom. Bedda birriwernwokrayekworrinj bu minj birribonguyi dja mak minj birringuyi manme, dja med birrimarneyimerrinj, “Ngad karribu Paul werrek, wanjh yerreh karringun manme dja karribongun.”

¹³ Kaluk birridjalwernni bininj yiman fortyini nawu birriwokkurrmerinj nuye.

¹⁴ Wanjh bedda birriwam kore nawu priests birrikihkimuk dja nawu birriwornawohrnani, wanjh bindimarneyimeng, “Ngad ngarrimarneyimerrinj bu kunwok kunrayek ngarriwokmarnburrij, bu ngariyimeng ngad minj ngarringun manme dja minj ngarribongun dja med ngad ngarribun Paul werrek.

¹⁵ Wanjh kandibekka. Ngudda dja nawu birribuyika bininj kabirriwornawohrnan kore council, wanjh ngurridjarrkwokmunkewerrimen bininj nawu kabenmarnewohrnani djamun bu kabirrimkan Paul kore ngudda, bu yimankek ngurridjalwohkurren ngurriyawoyhdjawan. Wanjh ngad ngarridjalyingkihdi ba bu ngarribun werrek wardi yerreh kambembe kondanjkuwu.”

*Paul Nuye Nayaw Korroko Bibengdayhkeng Nawu Djamun
Acts 23:16-22*

¹⁶ Nawu Paul nuye nayaw wobek kang kuninjkuwu bu birrikarremarnbom, wanjh nungka wam ngimeng kore kunurrk bedberre djamun, dja bibengdayhkeng Paul nawu nabadjan.

¹⁷ Wanjh bu Paul bekkang kuninjkuwu kunwok wanjh nungka bikayheng nakudji djamun nawu nabalkimukni, dja bimarneyimeng, “Yika nahni nawu nayawurrinj kore nawu nakimuk kahni ba bu kabimarnekareyolyolme kore kahkarme.”

18 Wanjh nawu djamun bikang namekbe nayawurrinj kore namekbe nawu benhmarnewohrnani djamun rowk, dja bimarneyimeng, "Paul nawu kahrurrkkendi ngankayhmeng nganmarneyimeng bu ngamkan nahn nawu nayawurrinj ba bu ngunmarnemulewan kore kahkarrme."

19 Wanjh nawu kawohrnani djamun bibidmey bidjarrirnameng namekbe nayawurrinj dja bidjawam manmol, "Mah, njale kanmarnemulewan?"

20 Wanjh nungka bimarneyimeng, "Nawu Jews bininj birriyingkihkarremarnbom bu ngundidjawanken Paul bu yikan malahmalaywi kore council kabirrimirndemornamerren, bu yimankek bedda kabirriyawoy-hdjawan. Dja kabirridjalkurren.

21 Dja yuwn bu yibenwokmarrkmang. Dja kumekbe forty bininj kabirriyingkihdi ba bu kabirribunkenh. Bedda korroko birriyingkih-wokrayekworrinj bu minj manme kabirringun dja minj kabirribongun dja bedda med kabirribun werrek Paul. Bedda bolkkime birrimarnburrinj dja kabirridjalmadbun ngudda ke kunwok."

22 Wanjh nawu kawohrnani djamun bedberre bimarneyimeng mandjad nawu nayawurrinj, bu yimeng, "Yuwn bu yibenmarneyime birriwern bu ngudda ngaye kanmarneyimeng." Wanjh bimunkeweng, wam.

Wanjh Nawu Benmarnewohrnani Djamun Bimbom Djurra Bu Paulkenh Acts 23:23-30

23-24 Kaluk bu nayawurrinj wam, wanjh namekbe nawu benmarnewohrnani djamun benbenekayhmeng benebokenh djamun nawu benebalkihkimukni, dja benbenemarneyimeng, "Mah, nguneray ngur-rbenbebbehmang bininj birriwern yiman 200 djamun nawu birrik-ihkimuk, dja mak two hundred nawu birribadbuyika djamun mankole dorrengh kabirrikan, dja mak seventy djamun nawu kabirrimorneni djarrang. Dja mak ngunemarnema djarrang nawu Paul kamorneni. Wanjh ngurribolkbawo kondanjkuwu bu nine oclock kukak, dja ngurrika Paul kore kunred Caesarea, dja ngurribalbidnakenwo Felix nawu kawohrnani kumekbe kubolkkimuk."

25 Wanjh nawu benmarnewohrnani djamun yerrkang dja bimbom djurra. Kuninjkuwu wanjh nungka yimeng,

26 "Ngaye ngangeyyo Claudius Lysias. Wanjh nganjilngmak duninj bu marnebimbun ngudda ke, Felix nawu yimakkaykenh yiwohrnani kumekbe kunred.

27 Ngaye ngabalmunkewe nahn nawu bininj. Nawu Jews bininj birridarrkidmayi dja birrikuyinbuyi. Wanjh ngaye dja ngardduk bininj ngarriwam ngarrikanjnghekkeng kore birribuyi, dja ngawokbekkang bu nungka karrekarmi mankarre manbu Romebeh.

28 Dja nganj ngadjareni bu ngaburrbuyi njalekenh birriwelengnami bininj nawu bedda Jews, wanjh kumekbekenh kunu ngakang kore council bedberre birrimirndemornamerreni.

29 Dja nawu Jews minj birriyimeninj bu nahn bininj bakkemeninj mankarrekimuk kadberre ba bu ngarribunkenh dja mak ngarrikurme prison. Dja bedda birridjalyimi bu Paul yimankek benmarnekarrebakkeyi mankarre bedberre bininj nawu Jews.

30 Wanjh yerrekah ngaye ngabekkang bu yikahwi bininj birrikarremarnbom bu yimankek birribuyinj nanihnjanu Paul, wanjh kumekbekenh kunu ngaye ngadjalmunkeweng kore ngudda ke. Wanjh nawu bininj kabirriwelengname, bedda warridj ngabenmarneyimeng kabirrimre kore ngudda ngurriwokdi."

Wanjh kuninjkuu nungka yimeng kore wokbimbom djurra nawu benmarnewohrnani djamun.

Bu Djamun Birrikang Paul Kore Kunredkimuk Caesarea
Acts 23:31-35

³¹ Wanjh nawu djamun birridjalkurduyimeng kunmekbe kore benmarneyimeng nawu benmarnewohrnani. Bedda birridjalkakkang Paul kunmak rowk dja birrikakbebmeng kore kunred bolkngeyyoy Antipatris.

³² Wanjh bu malahmalaywihni nawu djamun kurrenge birrihrey wanjh bedda birribaldjaldurderrinj kururk bedberre kore Jerusalem. Dja nawu birribuyika djamun nawu birrimorneni djarrang, bedda wanjh birribaldjalkang Paul kore kunred bolkngeyyoy Caesarea.

³³ Bu bedda birribolkmey kumekbe kubolkkimuk Caesarea, wanjh birriwong nawu Felix nahni djurra nawu birrimkani, dja birrikurmmeng Paul kore kumirrk nuye.

³⁴ Felix binnang djurra wanjh bidjawam Paul, yimeng, "Balehbeh ngudda kubolkkimuk yimdolkkang?" Wanjh Paul biwokmey bimarneyimeng, "Ngaye ngamdolkkang kore kubolkkimuk kabolkngeyyo Cilicia."

³⁵ Wanjh nawu Felix yimeng, "Mah, ngaye kaluk wokbengyirri ke bu kabirrimre birrimmekbe bininj nawu ngudda ngundihdjuhbnun." Wanjh benmarneyimeng bininj nuye, "Ngurrikurmen nahni nawu Paul kore kunrurkkimuk nuyeni King Herod rurkmarbnom korroko, dja wanjh ngurridjalnahna munguyh ba minj kare."

24

Bininj Nawu Birrimwam Kore Caesarea Dja Birrihdjuhbnun Paul
Acts 24:1-9

¹ Kaluk bu kunkodjke kunbidkukudjihni Ananias nawu benmarnewohrnani priests dja mak nawu yikahwi birrikihkimuk, wanjh bedda birrimdjarrkkoluy kumekbe Caesarea. Dja birrimkang nakudji bininj ni nawu benmarnewokdi bedberre nawu ngeyyoy Tertullus. Bedda birrimarneyimeng Felix kundjalwern rowk bu birriyimarneyimi kore Paulkenh.

² Wanjh Felix binkang Paul, dja kundjalmekbe rerrih Tertullus bidjaldjuhbnom Paul, dja bimarneyimeng Felix, "Felix, ngudda nawu yidjal-makkaykenh, bu ngudda kanmarnewohrnani kadberre, wanjh kunukka ngad ngarridjalwernhnjilngmak, dja kunmodmikenh ngarridjalkarreme kore ngudda kunmak kunkerrngekenh yikurduyime ngadberre.

³ Ngad wanjh ngarridjalwernhnjilngmak rowk, dja wanjh ngarriwern ngarridjare ngundidjalmanjbun ngudda kunmak yiyime ngadberre.

⁴ Minj ngad mak ngarridjare bu kunjern ngundimarneyime, dja yiddok minj ngudda kankongibun bu kundedjumbungkenh kanwohwokbekkayi ngadberre?

⁵ Nanihnjanu bininj nawu Paul, ngad ngarrimarneyime nadjalwarre duninj dja nabang, kunyid kamarnbumarnbnun ngadberre bininj nawu Jews kore kubolkwarahkenh rowk ngarrihningihni. Nungka nawu kawohrnan bedberre nawu ngarrbenhngyebun 'Bininj nawu birrikang Nazarethbeh'.

⁶⁻⁸ Dja mak nungka warridj rurkwarreweyi ngadberre Temple, dja ngad ngarridjaldarrkidmey bu ngarringurkeng. Dja bu bolkkime yingan yidjawa nanihnjanu bininj, wanjh kunu yiwokbekkan kore ngad ngarridjuhbnunikenh."

⁹ Bu Tertullus ngurdmeng kore wokdiwokdi, wanjh nawu birridjalwern bininj Jews birriwokworrinj nuye Paul bu birridjuhbon, dja birriyimeng bu woybukkih.

Paul Bimarnemulewarrinj Felix Nawu Governor

Acts 24:10-23

¹⁰ Felix nawu wohrnani kunmekbe kubolkkimuk, wanjh bimarnekodjdukmeng bu bimarneyimi Paul. Wanjh Paul bimarneyimeng, "Ngaye ngaburrbun bu ngudda kandjadmi ngadberre ngarriwarlahkenh bininj kondah kubolkkimuk bu kunwern kudjewk. Wanjh kunmekbekenh ngaye nganjilngmak bu marnemulewarren bu ngakandenamerren kore kumirrk ke.

¹¹ Bu yidjare yingan yibendjawan birribuyika bininj bu woybukkih ngayekenh. Bu twelve kunkodjkeni ngaye ngabidbuni kore karrkad Jerusalem bu ngamarnedi God yiwarrudj.

¹² Ngaye minj ngarridurrimeninj nangale nawu bininj, dja mak minj ngabenmarnbuyi kore kumirnde birridurrimeninj. Ngaye minj ngakurduyimeninj kore kunrurrk Temple, dja kore synagogue kunrurrk dja mak kore kubolkwern rowk ngalengngare Jerusalem. Nanihnjanu bininj minj ngandinayi nawu njale ngabenmarnewarrewoyi bedberre.

¹³ Bedda kabirriyingkihkarreburrbun kore kabirrihyime ke bu minj kunwoybuk. Dja burrkyak. Minj bedda ngandimulewayi kunwoybuk ngayekenh bu ngandidjuhbon.

¹⁴ Dja ngaye wanjh djalmarnemulewarren kundjalwohkudji kore ngaye ngakurduyimeng. Ngaye wanjh ngahmunkekadjung Jesus kore nuye manbolh. Dja nanihnjanu bininj yimankek kabirrihyime bu kunukka kundjalwarre duninj bu ngarrimunkekadjung Jesus. Dja bu ngaye ngamunkekadjung Jesus, wanjh kunu ngadjalmarnedi yiwarrudj nadjalkudji nawu God bedberreni nawu ngandikebmawahmeng. Dja mak ngaye ngawoybukwon rowk kore bimbuyindanj mankarre korroko, dja mak nawu prophet birribalbimbom.

¹⁵ Dja ngaye ngawernwoybukwon bu kaluk God kabendolkkayhwe birriwarlahkenh bininj nawu birrimak dja mak nawu birriwarre. Dja nawu nanihnjanu bininj nawu ngaye ngandidjuhbon bedda dorrenggh kabirriwoybukwon kuninjkuu kunwok.

¹⁶ Wanjh kunmekbekenh kunu ngayeman nganahnarren bu minj kunwarre ngayime bedberre birribuyika bininj dja mak God nuye.

¹⁷ Dja ngaye ngadjare marnemulewan kore Templebeh ngandimey. Korroko ngaye ngabolkbawong kore ngardduk kunred. Kaluk bu mandjewkbuyikani ngaye ngamyidurndengi money nawu ngandiwoni burudjang birribuyika bininj ba bu ngabenwon bininj nawu Jews bu birrimarladj. Dja mak ngadjareni ngawoyi mayh kore nungka God.

¹⁸ Ngaye kumekbekenh kunu ngangimeng kore kururrk Temple. Wanjh kumekbe ngahdi bu ngakangemarnburreni nuye God, bu wanjh minj bininj birriwern ngarriidwirrinj, dja kumekbe djalyidyakni.

¹⁹ Yikahwi bininj birrihinu nawu Jews birridolkkang kore kubolkkimuk Asia. Wanjh birrimekbe nanu ngandiwelengnameng, dja minj birrimrawinj ba bu ngundimarneyimeninj bolkkime kore mandjad ke.

²⁰ Dja yiddok minj yibendjawan nanihnjanu bininj ngundimarneyime kore baleh nawu kabirriwohrnawohrnann birriyimeng bu ngandidjadmiken kore kumirrk bedberre bu council birrimirnderri.

²¹ Ngaye ngadjalburrburru kunkudji kore ngabenmarneyimeng, bu ngarranginj kumirrk bedberre dja ngakayhmeng, bu ngayimeng, 'Ngaye ngandidjadme bolkkime bu ngayime bininj kabirriyawoyhdolkkarren

kore kumidjbeh.' Kunmekbe ngaye ngayimeng bedberre kore birrihmirn-derri." Kuninjkuu wanjh Paul wokdanj bu bimarnemulewarreni Felix.

²² Kaluk nawu Felix ngokko yingkih Bengkani bu bininjkenh nawu birrimunkekadjungi Jesus kore manbolh nuye. Wanjh benmarneyimeng bininj nawu birridungi Paul bu bedda kabirridjalmadbun. Wanjh benmarneyimeng, "Ngaye med, ngamad bun Lysias, bininj nawu kabemarnewohrnan djamun, bu nungka kamre wanjh kunu ngayemandeleng bekkabekkan ngudberre dja ngadjadme nahni bininj."

²³ Wanjh bimarneyimeng nawu djamun nabalyawkimukni, "Yiw-ernhnahna Paul. Yirrahdahkendong kore prison, dja yuwn bu yikarererayekwon nuye. Dja yibenbawo kabirrimre kabirrinan nawu birridab-bolk ba bu kabenbidyikarme."

Paul Ni Kore Kunrurrkmak Manbu Prison

Acts 24:24-27

²⁴ Kaluk bu kunkodjkebuyikani Felix kumwam kore kunrurrk prison. Dja bimkang ngalbininj kobeng nuye ngalbu ngeyyoy Drusilla. Ngalbu ngaleng Jew daluk. Wanjh bibekeng Paul dja benebek kang bu nungka benbenemarneyolyolmi kore kunwok kunmak. Benbenemarneyimeng bu benewoybukwoyinjkenh nawu Jesus Christ.

²⁵ Dja mak Paul benbenebengdayhkeng bu kabenekurduyime kundjal-mak, dja mak bu kabenekunihnahnarrenkenh, dja benbenemarneyimeng bu kalukburrk God nungan kabenedadjadmekenh. Bu Paul benbenemarneyolyolmi kuninjkuu, wanjh Felix nungka djalwernhkange-warreminj, dja kunikeleminj dorrengh. Wanjh nungka bimarneyimeng Paul, "Mah, wanjh yiray. Kaluk yerrekah bu ngabekkarren, wanjh yawoyhkayhme bu yimdurndeng kanyawoyhmarneyolyolme."

²⁶ Kaluk nawu Felix burrburrbuni bu bimolhwoyi money ba bu bibekmeninj Paul kore rurrkkehrurrkkendi. Kaluk kumekbekenh munguyh bidjalkayhmi bu benewokdi Paul.

²⁷ Kuhn kurduyimerrangeni bu mandjewk bokenhni. Wanjh Felix burnbom kore durrkmidurrkmirri. Wanjh nabuyika nakerrnge bininj kumwam nawu wohrnani kubolkkimuk. Nungka ngeyyoy Porcius Festus. Wanjh Felix djareminj benmarnbom nawu Jews bu birrinjilngmakmeni nuye, wanjh kumekbekenh bidjalbawong Paul kore prison rurrkkehrurrkkendi.

25

Paul Djareni Rawinj Kore Kunredkimuk Rome

Acts 25:1-12

¹ Kaluk nakerrnge nawu bininj ngeyyoy Porcius Festus dedjingmey wohrnani kumekbe kubolkkimuk bolkngeyyoy Judea. Nungka kumwam ni kore kunred bolkngeyyoy Caesarea. Kaluk bu kunkodjke danjbikni nungka wam kore Jerusalem.

² Wanjh nawu priests birrikihkimuk dja nawu birriwohrnawohrnani bedberre nawu Jews bininj, wanjh birriwam kore Festus dja birrimulewam Paul kore birriyingkihdjuhunikenh.

³ Bedda birridjurkwoyi bu birridjawani Festus bu Paulkenh, dja birriyime ng, "Yimunkewemen kumray kore Jerusalem." Bedda birrikarremarnbuni bu yimankek birriwohbuyi kore wohkah manbolh bu kumrawinj.

⁴⁻⁵ Wanjh Festus benmarneyimeng, "Paul nawu karurrkkendi prison kore Caesarea. Kaluk ngayeman ngare ngaweleng, dja mak nawu ngudda ngurriwohrnawohrnani, wanjh karridjarrkre. Kaluk kumekbe

ngudda kandimarneyime bu nungka yimankek baleh kurdukurduyimi kore kunwarrekenh.”

⁶ Festus birridjarrkyerrkang kunkodjkewern nawu kumekbe birrihni kore Jerusalem, kalukburrk nungka balyawoyhkoluy durndi kore kunred Caesarea. Kaluk kunkodjkebuyikani nungka wam ngimeng yerrkang kore kabirriwokdi kabendjadmikenh, dja benwokrayekwong bu Paul kabirrimbebke kore prisonbeh.

⁷ Wanjh Paul kumngimeng dja danginj. Birriwernkenh bininj birrihni nawu Jews birrimdjarrkkoluy Porcius Festus dorrengh nawu birrimdolkkgang kore Jerusalembeh. Bedda wanjh birriborledminguneng nawu Paul dja birridjalwelengnami. Birriyimi bu nungka kurduyimi kunwern kunwarre kunkimuk. Dja bedda minj birrikarrengalkemeninj mandjad nuye nawu Paul.

⁸ Wanjh Paul dolkkang yolyolmerrinj nungandeleng bu kandenamerrinjenh, dja bimarneyimeng Porcius Festus, “Ngaye minj ngabakkemeninj nawu Jews bedberre mankarre, dja mak minj ngawarrewemeneninj kunrurrk manbu Temple, dja minj ngawarrewemeninj mankarre nuye Caesar, nawu nakuken bininj kawohrnan kubolkwarahkenh rowk.”

⁹ Wanjh Porcius Festus djareni bennjilngmarnbuyi bininj nawu Jews, dja bimarneyimeng Paul, “Adju, yiddok ngudda yidjare yibidibun kore Jerusalem, ba bu ngaye kumekke ngamre djadme kore birrimekbe bininj nawu ngundiwelengname?”

¹⁰ Wanjh Paul biyawoyhmarneyimeng, “Kaluk Caesar nguningkihmarnbom ngadberre bu kandjadmekenh. Wanjh bu yidjare kondanjkuu kandarnhdjadme. Dja yina, ngudda yihdjalyingkihburrbun bu minj ngaye ngabenmarnekurduyimeninj kundjalwarre birrimekbe bininj nawu Jews.

¹¹ Mah wanjh, bu ngaye yimankek ngayimeng kunwarre kunkimuk ba bu kunubewu kankanjkurme ngandibun, wanjh kunu bonj, bu ngadjaldowen. Djal burrkyak duninj! Ngaye minj baleh mak ngakurduyimeninj kore ngandiwelengnamikenh. Yiburrbun minj kakarremak bu nangale ngankurme kore birrimekbe bininj bu ngandibun ngaye. Wanjh bonj, ngaye ngadjare ngare Rome ba bu namekbe nawu Caesar ngandjadme.”

¹² Kaluk Porcius Festus bu nungka bibekkgang Paul bimarneyimeng kumekbe, wanjh nungka benmirndemornnameng bininj nuye wanjh birriwokdanj. Kaluk yerrekah Porcius Festus bimarneyimeng Paul, “Mah, yiyimeng bu ngudda yidjare yire kore Caesar ngundjadme, wanjh ngaye munkewe yire kumekbe.”

*Porcius Festus Dja King Agrippa Beneyolyolmi Paul
Acts 25:13-22*

¹³ Kaluk bu kunkodjkewernni wurd Agrippa nawu kingni kore kubolkbuyikabeh ngarre benemdjarrkwam yabok nuye ngalbu ngeyyoy Bernice. Bedda benedjareni benedjalwohnayi Porcius Festus.

¹⁴ Wanjh bedda benedjalwohyerrkang bu kunkuyeng kumekbe kore Caesarea. Wanjh Porcius Festus bimarneyolyolmeng Agrippa bu Paulkenh rurkkkehrurrkkendi dja benbenemarneyimeng, “Nawu Felix bibawong nakudji bininj kondanjkuu priester kore kahbondi.

¹⁵ Kaluk bu ngaye ngawam Jerusalem nawu birrikihkimuk priest dja nawu kabirriwohnrnawohrnan bedberre nawu Jews bininj, bedda ngandimarnemulewani nanihnjanu bininjkenh. Bedda ngandikunidjurrkkani bu yimankek ngakanjkurmerrimeninj.

¹⁶ Wanjh ngabenmarneyimeng nawu binihbininj bu ngad nawu Romebeh, wanjh karrikarrekarrme mankarre kayime kadberre manbu karriwokdi kurobbe bu karribebbehmirrharren.

17 Kalukburrk birrimekbe nawu Jews birrimwam kondanjkuu, wanjh kundjalburrrikudjini ngaye ngawam ngangimeng kore ngabendjadmekenh, wanjh ngawokmunkewerrinj bu birrimbekkeng Paul birrinameng kore kumirrk ngardduk.

18 Wanjh birridjalmekebe bininj birridolkkang dja birridjuhuni Paul. Ngayimeng bu yimankek bedda birrimulewayi bu kunwarre duninj yimeninj. Dja kunu burrkyak.

19 Dja bedda birridjalwernhdjareni birridangwerrimeninj kore bedmandeleng birriburrbuni birrihmalyiyimi bu kunwarre. Dja mak birringeyyolyolmi kore nakudji bininj nawu ngeyyoy Jesus. Bu nungka doweng dja Paul benmarnemulewam bu nungka yawoyhdarrkidminj.

20 Bu minj ngaye ngaburrbuyi bu baleh kab ngakurduyimeninj bedberre, wanjh kunu ngaye ngadjawam Paul bu rawinj Jerusalem ba bu kumekbe ngadjadmeninj.

21 Dja Paul djaldjareni rurrkkendiwirrinj kondanjkuu Caesarea bu bu yimankek ngamunkewemeninj Rome kore Caesar kabidjadme. Wanjh ngaye ngabenmarneyimi djamun ngardduk bu kabirrinahnan kore karurkkendi prison kaluk ngayeman ngamunkewe bu kare kore Caesar.”

22 Wanjh nawu King Agrippa bimarneyimeng Porcius Festus, “Ngaye ngadjare ngayeman ngawokbekkan nahni nawu bininj.” Wanjh Porcius Festus bimarneyimeng, “Kaluk malaywi yiwokbekkan.”

Paul Yawoyhngimeng Kore Kabirrikarreyolyolmekenh Acts 25:23-27

23 Bu malaywibuyikani, wanjh Agrippa dja Bernice benewam benengimeng kunrurrkkimuk kore bininj birrimirndemornnamerrinjenh. Bedda benedjongburrinj kunmadj manu manmadjkuken, dja birriwern bininj birriyimeng bu kuhni kukuken yimerranj. Djamun nawu birrikihkimuk birrihni dja mak nawu birriwohrnawohrnani kumekbe kunred. Wanjh birrimirndemornnamerrinj bu birriyerrkang. Wanjh nawu Porcius Festus benmarneyimeng nuye bininj, “Ngurrimka nawu Paul.”

24 Wanjh Porcius Festus wokdanginj yimeng bedberre, “King Agrippa, dja mak nawu ngurridjalwern bininj kondanjkuu ngurrihni, kandiwokebekka bu marneyime ngudberre. Nahni nawu bininj ngurrihnan. Wanjh birriwarlahkenh bininj nawu Jews ngandidjawanikenh munguyh kore Jerusalem dja mak kondanjkuu Caesarea bu bedda ngandidjalmarneyimi bu birrikayhmi dorreng, birriyimi kunwernkeh bu minj mak nungka kunkuyeng kahdarrkid.

25 Dja ngaye minj ngakarrengalkemeninj kunwarre nuye bu bu kabirribun bu karrownen. Dja nungan djareminj kare kore Caesar bu kabidjadme. Wanjh kunu ngaye ngadjare ngamunkewe, kare.

26 Dja med rerrih. Ngayenu ngabimbun djurra werrek nuye Caesar nawu nakunen bininj nganmarnewohrnan, dja minj ngaburrbun bu baleh ngamarneyime nuye nahni bininj. Wanjh kunmekbekenh kunu ngaye ngamkang kondanjkuu ba bu karridjarrkwokbekkan rowk kore kumirrk kadberre dja ngadjaldjareminj bu ngudda nawu King Agrippa bu yiwokbekkabekkan nahni nawu bininj. Kaluk bu karribekkan, wanjh kumekbe kunu ngaburrbun bu ngawokbimbun kore djurra.

27 Bu Kuhni kundjalwarre duninj bu ngamunkewe nahni bininj kare Rome bu minj njale ngakarrengalkemeninj nuye.” Kuhni wanjh Porcius Festus bimarneyimeng King Agrippa dja mak nawu birridjarrkmirnderri.

26

King Agrippa Biwokbekkang Nawu Paul

Acts 26:1-11

1 Wanjh King Agrippa bimarneyimeng Paul, "Kuninjku bu yingan-deleng ziyoyolmerren." Wanjh Paul djalberlwayhmeng, dja wokdanginj bedberre bu kandenamerrinj, dja yimeng.

2 "Ngudda nawu King Agrippa, ngaye ngadjalnjlngmakminj bu ngudda kanwokbekkan ngaye bu wanjh marneyime kore birrimekbe nawu bininj Jews ngandidjuhuni munguyh.

3 Ngudda kanyingkihburrbun kadberre nawu Jews bininj kore munguyh ngarrikurduyime dja mak kore ngarridangwerrenkenh. Ngaye wanjh djawan bu ngudda kandjalwernhbekkkan kore marneyime bolkkime.

4 Bu ngaye ngayahwurdwurdni wanjh munguyh ngarridjaldjarrkrey Jews bininj nawu ngaye ngarriredboni. Dja mak bu ngarridjarrkreddi nawu Jews bininj bu kunkuyeng kore Jerusalem. Wanjh bedda kunu nawu birridjalwern Jews kabirriburrbun rowk kore ngaye ngakurduyiyimi.

5 Bedda kabirriburrbun rowk bu ngaye wanjh Phariseeni, bu ngadjalmarrkmangi ngadberre mankarre manbu ngarriwoybukwon. Kaluk ngad nawu Pharisees makka munguyh ngarridjalkarrekarrme mankarre kore mandjad kahyime ngadberre. Bu nanihnjanu bininj nawu Jews yibendjawa bu ngundimarnemulewan mandjad bu ngayekenh.

6 Bu kuninjkukenh ngaye kandidjadme bolkkime, bu ngaye ngawoybukwong God kore benwokrayekwong nawu ngandikebmawahmeng.

7 Ngad nawu Jews bininj, nawu twelve ngarribebbehmud, wanjh kunu ngarridi yiwarrudj barnangarakuyeng dja mak bu kunkakkuyeng. Ngad ngarridjalmadbn kore God yingkihwokkurmerrinj ngadberre. Dja mak ngaye ngadjare God bu kakurduyime ngadberre kore wokkurmerrinj kerrngehkenhni. Dja med yerreh, njalekenh bu birridjalmekbe nawu Jews bininj bedda ngandidjaldung munguyh?"

8 Wanjh Paul benmarneyimeng bininj rowk nawu birrihni, yimeng, "Dja njalekah ngudda minj ngurriwoybukwon bu God kakarrme kundulkarre bu kabendolkkayhwe bininj nawu kabirrihdowerren?"

9 Wanjh Paul biyawoyhmarneyimeng king Agrippa, yimeng, "Bu ngaye kerrngehkenh yimanek ngahyimi kunmak bu ngabenngurdkeyi bininj nawu birridjalngaybuni kunngey nuye Jesus nawu Nazarethbeh.

10 Wanjh kuhni ngaye ngakurduyimeng bu ngabenngurdkeyi bedberre kore Jerusalem. Nawu priest birrikihkimukni birrikarremakwam ngardduk kore ngadjalkurduyimi munguyh. Wanjh ngaye ngabenkurm birriwern nawu God nuye bininj kore kunurrk prison. Dja mak ngarrbenmarneyolyolmi bu ngarrbenbunikenh, wanjh ngadjaldjareni birridowimeninj, dja ngaye ngabenmakwani bininj nawu bindibuni."

11 "Ngaye ngarey munguyh kore kururrkbubuyika synagogue bu ngabenngalkeyi wanjh ngabenmangi. Dja ngabenmarnbuyi bu yimanek birrimarneyimeninj kunwok kunwarre nuye Jesus! Ngaye ngabendjalwernyidungi duninj bedberre, wanjh kumekbekenh kunu ngaye ngahren-gerey kore kubolkbubuyika ngabenyawani bu ngabenbuni." Kuninjku Paul bimarneyolyolmerrinj rowk kore King Agrippa.

Paul Benmarnemulewarrinj Bu Jesus Bingalkeng

Acts 26:12-23

12 Wanjh Paul yawoyhyimeng nuye nawu king Agrippa, yimeng, "Kunkudjihkenh ngaye ngawam bu yimanek ngabenyawani bininj nawu birrimunkekadjungi Jesus kore kunred Damascus. Kaluk nawu priest

birrikarremakwam ngardduk dja ngandimukeweng kunwok bedberre dorrengh.

13 Dja yina ngudda nawu King Agrippa, bu kunbarnangarraburrkni ngaye nganan nganwolkang ngadberre nawu bininj ngarddukni. Kaluk kunwolkayindanj kaddumbek kore heaven dja nganmimkinjeng duninjh manbu kundung makka walakkih.

14 Wanjh ngad ngarridjalmankarrinj kore kurorre, dja ngaye ngabek kang kumwokdanginj ngardduk kore kunwok Hebrewbeh. Wanjh nganngaybom yimeng, 'Saul! Saul! Njalekah ngudda ngaye kanhdjalbun? Dja ngudda yihdjalle warrekah ngardduk munguyh, wanjh kunukka yingandeleng yiwarreworren.'

15 Wanjh ngaye ngadjawam, 'Ngudda yingale ngudda nawu yiwohrnan?' Wanjh nawu Kawohrnan Rowk yimeng, 'Ngaye wanjh Jesus nawu ngudda kanhbun.

16 Dja yirrolkka yirrangimen. Ngaye marnebebme bu kuninjkunukenh bu djarrngbom ba bu kanmarnedurrkmirrikenh. Kaluk ngadjare yire yibenmarnemulewan birribuyika bininj bu ngayekenh ngudda kandar-kidnan bolkkime, dja mak kore ngaye yerrekah bukkabukkan ke.

17-18 Ngaye marnebebme ngudda bu ngehke kore bininj nawu Jews, dja mak bininj nawu bedda minj Jews. Kaluk ngaye munkewe yire kore birrimekbe bininj nawu minj Jews, ba bu ngudda yibenmimbayhke, dja mak kabirrimborledme kore kumununbeh dja kore kahbolkwolkayindi. Dja mak kabirrimbebme kore namarnde duninjh nawu Satan kahben-bongkarrme, dja mak kabirrire kore God kabenmarnebengmidjdankenh kore kunwarre bedberre. Dja mak ngadjare birrimekbe bininj nawu minj Jews kabirriraworren bininj ngardduk rowk nawu bedda ngandiwoybuk-won, dja kunu God kabenmakwan.'"

19 "Nawu King Agrippa, kuninjkunu nawu Jesus nganmarnekukbukkar-rinj kaddumbek heaven, wanjh kumekbekenh kunu ngaye ngawokmarr-mey.

20 Bu kerrngehkenh ngaye ngabenmarnemulewam Jesuskenh nawu bininj birrihni kore Damascus. Wanjh yerreh kunu ngabenmarnemule-wan bininj kore Jerusalem, dja mak kubolkbubuyika rowk kore Judea ngarre. Dja mak ngabenmarnemulewam bininj nawu minj bedda Jews. Ngabendjalmarneyimeng bininj rowk ba bu birrikangemulewarrimeninj dja birrikangeborledmeninj, dja bu woybukkih kabirrikangeborledme, wanjh birrikurduyimen kunmak kore God kadjare.

21 Kunmekbekenh bedda nawu Jews bininj ngandidjaldarrkidmey kore kunrurrk Temple dja birridjareni ngandibuyi."

22 "Dja wanjh God nganbidyikarrmeng, mak munguyh ngandjal-bidyikarrme. Dja wanjh bolkkime ngaye ngahdi kondanjikunu kore marnehmarnewokdi ngudberre nawu ngurrikihkimuk dja mak nawu minj ngurrikuken bu kunwoybukkenh. Ngaye kuhni djalmarneyime ngudberre kore Moses dja mak nawu prophet birriyingkihyimeng bu bolkkime kanmarnebolkyimerran kadberre.

23 Bedda birriyingkihyimeng bu nawu Messiah nungka kadjakbekkan dja karrown. Kaluk nungka kadjalkukdokme bu kamyawoyhmimbimen, ba bu kabenmarnebolkwolkan birridjalwern bininj nawu birrimud nuye, dja mak birribuyika bininj nawu minj Jews."* Kuninjkunu Paul benmar-neyimeng kore kumirnde nawu bininj.

* 26:23 Ngurrina kore Isaiah 42:6; 49:6

Paul Bimarneyimeng King Agrippa Bu Kakodjulumakmenkenh

Acts 26:24-29

²⁴ Bu Paul kuninjkuu yolyohyolyolmerreni, wanjh Porcius Festus kumkayhmeng wernkih duninj, bu yimeng, "Paul, ngudda yiddok yibengwarrmen bu kumekbe yihyime ngadberre. Ngudda kunu kunwern yihburrbun manbu ngunmarnbom yibengwarr."

²⁵ Wanjh Paul biwokmey bimarneyimeng Porcius Festus, "Yina, ngaye minj ngabengwarr nawu ngudda yukuken Porcius Festus. Dja ngaye djalmarneyime mandjad duninj ke kore kunwoybuk."

²⁶ Nahni nawu King Agrippa nungka kuninjkuu kaburrbun rowk, dja ngaye ngahyolyolme mankarredjad nuye. Kuhni kore ngayolyolmeng wanjh kurobbe marnbuyindanj bu birriwern bininj kabirriburrbun, dja mak King Agrippa karrebek kang korroko.

²⁷ Nawu ngudda King Agrippa, yiddok ngudda yiwoybukwong kore nawu prophets birriyimeng? Ngaye ngaburrbun bu ngudda yiwoybukwong."

²⁸ Wanjh King Agrippa bimarneyimeng Paul, "A! Yiddok ngudda Paul kanmarnbun ngaye ngamunkekadjung Jesus nawu Christ bu djal-bolkkime? Ngudda nuk kanhmarneyimi bu kundjaldedjumbung."

²⁹ Wanjh Paul biyawoyhwokmey nawu king, "Kunu bonj, kuhni bu kundjalwohdeddjumbungkenh dja nuk bu kuhni kunkuyeng, ngaye ngadjawan God bu ngudda dja nawu birriwern bininj ngandihbekkan bolkkime, wanjh ngurriyimerran rowk yiman kayime ngaye bu ngahmunkekadjung Jesus. Dja yuwn bu kandingunjdjikan bu ngaye ngarrukkayindi nanihnjanu wirlmurrng chains." Kuhni wanjh Paul bimarneyimeng King Agrippa.

King Agrippa Dja Porcius Festus Beneyawoyhyolyolmeng Paul

Acts 26:30-32

³⁰ Bu Paul yimeng kuninjkuu kunwok, wanjh nawu King Agrippa dolkkang. Dja mak Porcius Festus, Bernice, dja mak birribuyika bininj nawu birridjarrkyerrkang, wanjh birridolkkarrinj rowk.

³¹ Wanjh birribalmirndebebmerrinj kuberrk dja birribebbehjawarrinj, birriyimeng, "Nahni bininj minj nuk kunwarre yimeninj ba bu kahdukkayindi dja mak bu karrowenkenh."

³² Wanjh King Agrippa bimarneyimeng Porcius Festus, "Nanihnjanu bininj Paul, nungka namak. Nawu karribekkeyi kore prisonbeh bu nungka minj djareniwirrinj rawinj kore Rome ba bu Caesar kabidjadme."

27

Paul Bidbom Kabbala Bu Rawinj Kore Kunredkimuk Rome

Acts 27:1-8

¹ Wanjh Porcius Festus nganmarneyimeng ngadberre bu ngarrirawinj kore kunred Rome kore kubolkkimuk kabolkngeyyo Italy. Nungka bikurrmeng Paul bu birridjarrkraworrinj birribuyika bininj nawu birriyingkihdukkayindi. Dja bimarnbom nakudji djamun nawu ngeyyoy Julius bu bennahnani. Julius nungka nawu nabalkimukni djamun dja bimarnedurrkmirri Caesar.

² Ngad wanjh ngarrribidurrinj manbu kabbala kumdolkkang kore kunred bolkngeyyoy Adramyttium. Manbu birriyingkihmarbnom ba bu kadjalwohrehgehre kubolkwern kore kuraladihirrid kore kubolkkimuk bolkngeyyoy Asia mankebhakale birridjalley. Dja mak nabadbuyika bininj kumbidbom ngarridjarrkwam kabbala, nawu ngeyyoy Aristarchus

nawu kumdolkkang kore kunred Thessalonica kore kubolkkimuk bolkngeyyoy Macedonia. Wanjh ngarriboldkbawong bu ngarriwam kabala.

³ Ngad ngarridjalkakwam kabbala dja bu malamalaywihni ngarribalbebmi darnkih kore kabolkngeyyo Sidon. Bu kunmekbe ngarriboldkmey wanjh Julius nawu djamun, bikongibom Paul dja bimunkeweng Paul bu bennang nawu birridabbolkn kumekbe kunred kore birribidyikarmi.

⁴ Wanjh ngarriyawoyhbidburrinj kabbala dja ngarriburrkyameng. Wanjh manbu kunmayorrk ngandjirrkani ngadberre warrekah, wanjh kunmekbekenh kunu ngarriborledminguneng manu manyunkurr bolkngeyyoy Cyprus.

⁵ Wanjh ngarribalhdjalrey kore kurrula kuboburldjarn dja kumbolkyoy darnkih bolkngeyyoy Cilicia dja mak Pamphylia. Kaluk ngarrimbebmenng kore kunred bolkngeyyoy Myra, kore kubolkkimuk ngarre Lycia wanjh birrikolurrinj.

⁶ Bu kumekbe ngarriboldkmey wanjh ngarribawong kabbala manbu ngarrimrey. Wanjh nawu Julius wam manbuyika kabbala ngalkeng wanjh nganbidbuyikeng ngadberre. Manekke kabbala kumdolkkang kore kunred Alexandriabeh, manbu ngandjalkanwi kore Italy.

⁷ Wanjh ngarriboldkbawong kore Myra dja ngarrihrey yeleyeledj bu kunkodjkewernni, wanjh ngarribebmenng darnkih kore kunred bolkngeyyoy Cnidus. Wanjh ngad yimanek ngarridjareni ngarrirawinj djurrud, dja mayorrkwarreni bu nganmirrkdahmi, wanjh kunu ngarriwakkom kore manyunkurrbuyika manbu bolkngeyyoy Crete, darnkih kore kunred bolkngeyyoy Salome.

⁸ Wanjh ngarridjalkebkalekadjungu kunrayek dorrengh kumekbe kore Crete, wanjh ngarribalbebmenng kore kumekbaleyyoy bolkngeyyoy Fair Havens, darnkih kore kunred bolkngeyyoy Lasea.

Paul Madjamku Benbengdayhkeng Bu Minj Birrirawinj
Acts 27:9-12

⁹⁻¹⁰ Bu ngad yeledj ngarrihdjareny munguyh, wanjh kunukka bolkyimerrangeni bu korroko nawu Jews birrikarmi mulil manbu God benmarnebenngmidjdangenikenh.* Wanjh manbu kunngol kodjngolwarreminj bu kunmayorrk. Wanjh Paul benbengdayhkeng bininj nawu kabbala nahnani, dja mak nabadbuyika nawu nuyeni kabbala, dja nawu Julius, wanjh benmarneyimeng, “Ngurrina, ngaye ngahburrbun bu ngad karidjalle bolkkime, wanjh wardi karribalanhmang nawu yehyeng rowk kahdahkendi kore kabbala, bu kabbala dorrengh kayibme, dja ngad mak bininj karringakmerren.”

¹¹ Wanjh Julius minj biwokbekkayi Paul, dja nungka benbenewokenkadjungu nawu kabbala nuyeni dja mak nawu kabbala kanemkarmi.

¹² Kaluk kumekbe minj kubolkmak bu kabbala karrangen bu yekke yimerrangeni dja yakmeni, wanjh birriwern bininj birridjareminj birribolkbawoyi dja birriwayinj bu birriburrkyameninj kore kurrula. Dja bedda birriyingkihbolkburrbuni bu birribolkmayi kore kunred bolkngeyyoy Phoenix kore manekke manyunkurr manbu Crete ngarre. Wanjh kumekbe kunred kubolkmakni bu kabbala karrangen bu yekke kayimerran, dja minj kunmayorrkkimuk kabun manbu kabbala bu kahdi kumekbe darnkih kuwarddekebkale.

* **27:9-10** Nawu birriwokdi Hebrew birriyimi, “Yom Kippur”. Birrikarmi mahni mulil bu dird October karredjingmang. Yikahwi wanjh kunmayorrkkimuk bebmi bu kumekbe bolkyimi.

Bu Kunmayorrkkimuk Benbuni

Acts 27:13-20

¹³ Wanjh kumekbeni bu bolkyimi manbu kunmayorrk kumhmayorrk buni bu walakkih kore walembeh, wanjh bedda birriyimeng, “Mah, kamak karrire.” Wanjh bedda birridurrkmey wirlmurrng nawu kabbala bihrayekwoni, wanjh birriwam birrikebkalekadjungi kore manyunkurr ngarre Crete.

¹⁴ Wanjh kundjalburrikudji kunmayorrkkimuk kumbebmeng bedberre kore manberrkkeh manbu djalmayorrkraworrijn kakkibeh dja koyekbeh.

¹⁵ Bu ngad minj ngarrikebborledkemeninj manbu kabbala bu mayorrkmirrkmayinj, dja ngarridjalbawong kunmayorrk kandjaldjirrkani ngadberre wernkih duninj.

¹⁶ Wanjh kunmayorrk kandjaldjirrkang ngadberre wanjh ngarribebmeng manyunkurryahwurd manbu bolkngeyyoy Cauda, wanjh ngarriborledminguneng manekke manyunkurr ba bu kunmayorrk minj nganwernhbuyi ngadberre. Ngad ngarrikebbongkani kabbala manyahwurd, wanjh ngarridurrkmey ngarribarnnameng kore kabbala mankimuk manbu ngarrihrey. Bu kuhni ngarridjalwernhdurkmirranginj kunkimuk duninj.

¹⁷ Wanjh ngarridjarrkngorrkdukkang kunyarlwi manbu mankimuk kabbala kore kanjdji dja kaddum bu ngarringorrkrayekwong. Dja nawu birridurkmirri kabbala birrimarneyimerrinj, “Wardi kunubewu kunmayorrk kandjirrkkan kore adjbud manbu kurrula bawong.” Wanjh kumekbekenh kunu ngarriyerrkkeng nawu karruru dja ngarridjalbawong ngalengman kunmayorrk ngandjirrkani.

¹⁸ Wanjh kunmayorrkkimuk ngandjalwernhbuni ngadberre kunkimuk bu munguyh, kaluk kunkodjkebuyikani birriweyi birridjuhdjuhkeyi yikahwi nawu dahkehdakehndi kore kabbala.

¹⁹ Wanjh munguyh kunmayorrk ngandjaldjirrkani ngadberre bu kunkodjke danjbik yimerranj. Wanjh birridjalweyi nawu yehyeng rowk manbu mandulmuk nawu kabbala ngarreni.

²⁰ Wanjh manbu kunmayorrk ngandjalkani bu kunkodjkewern. Bu minj ngad ngarridungnayi dja mak minj ngarrinayi kinhkinh dja kunkodjngolwernni. Bu ngarriyimeng wanjh bonj, ngarridjaldowerren rowk.

Wanjh Paul Benkangemarnbom Kore Kabbala

Acts 27:21-26

²¹ Bu kunmekke bolkyibolkyimi ngad minj ngarringuyi manme. Wanjh Paul wokdanginj benmarneyimeng, “Nawu ngudda binihbininj, kandibekka bu ngaye marneyime ngudberre. Ngudda minj ngaye kandibekkayi bu marneyimeng kerrngehkenhni ngudberre kore Crete bu karrihdi, dja wanjh bolkkime ngurrina baleh yimerranj kadberre.

²² Dja med, bolkkime yuwn bu ngurrikangewarre. Dja ngaye ngaburrbun bu mahni kabbala kaluk kayibme, dja bonj, ngad nawu bininj minj karridowen.

²³ Ngaye mak ngaburrbun bu kuhni woybukkih duninj. Nawu ngaye wanjh God nuye bininj, dja mak ngamarnedurkmirri. Wanjh kukakni, God nuye angel kumwam danginj dja nganmarneyimeng,

²⁴ ‘Paul, yuwn bu yikele. God kadjare ke bu yire yirri kumirr kuye Caesar. Dja yina, God ngunwong nanihnjanu bininj nawu ngurridjarrkdahkendi mahni kabbala dja nungka wanjh kabenkongibun.’

²⁵ Kuninjkuwu angel nganmarneyimeng. Dja ngurridjalnjilngmaknin. Bu ngaye ngawoybukwon God bu kadjalkurduyime mandjad kore nganmarneyimeng.

26 Wanjh kaluk karrirorredong manyunkurr.” Kuhni bu Paul benmarneyimeng.

Yikahwi Bininj Birridjareni Yimankek Birrikelerlobmerrinj
Acts 27:27-32

27 Manu kunmayorrk munguyh ngandjaldjirrkkang bu djandi bokenhni kore manbu kuboburlhdjan kurrula ngarre kadjalngeyyo “Kurrula manbu Adriatic”. Kaluk bu kukakburrburlhdjan bininj nawu birridurkmirri kore kabbala bedda birriyimi yimankek birribebmi manberrk ngarre.

28 Wanjh birridedjingmey birriborohrokmi kore kuburkkah, dja birrinang thirty seven metres kore kanjdji kukku, dja kundedjumbung bolkyimi birribalderrehmeng birriyawoyhborohrokmi dja birrinang bu twenty seven metres.

29 Wanjh bedda yimankek birriyimi kab birriwarddedoyi kunwardde, wanjh kunu birrikoluyhweng kunkarrngbakmeng wirlmurrng nawu kabbala kahdenghke. Wanjh kunu birridangeni yiwarrudj kumbarbhuyikenh.

30 Wanjh yikahwi bininj nawu birridurkmirri kore kabbala yimankek birridjorkmeninj. Bedda birrikoluyhweng birridjuhkeng manbu kabbala manyahwurd, dja birrikurreni bu yimankek birrikoluyhweyi wirlmurrng kore kumirrk ngarre kabbala nawu kahdenghkekenh.

31 Wanjh Paul benmarneyimeng Julias dja birribuyika nawu djamun nuye, wanjh yimeng, “Bu nanihnjanu bininj minj kabirridi kore kabbala, wanjh kunu ngudda ngurridjarrkdowerren rowk.”

32 Wanjh nawu djamun birriyarldadjkeng manbu kabbala manyahwurd ngarre, dja birridjalbawong baldjalwam.

Bininj nawu Birridahkendi Kabbala Wanjh Birringuneng Manme.
Acts 27:33-38

33 Wanjh bu darnkih barrhbuni, Paul benmarneyimeng, “Ngudda munguyh ngurridjalnjilngwarreni bu djandi bokenhni, dja minj njale mak ngurringuyi.

34 Ngaye wanjh marneyime ngudberre mandjad, ngurringu manme bolkkime ba bu ngurrimurrnggrayekmen. Dja minj nangale nakudji kawohdown kore ngurrihni.”

35 Bu Paul yimeng bedberre, wanjh nungka lodmey buriddi karmikar-rmi, dja bimanjbom God kore kumirrk bedberre, wanjh lodbakngeng, nguneng.

36 Bu bedda birrinang kumekbe kurduyimeng, wanjh birridjalwernjilngmakminj, dja birringuneng manme bedmanwali.

37 Wanjh maninjmanu manbu kabbala kore ngarridi nawu bininj 276 bu ngarrirohokmerrinj.

38 Bu bedda birriworrkminj rowk bu manme birringuneng, wanjh bedda birridelengweyi manmim manbu wheat, dja mak birridjuhkeng nadjalwern kore kabbala dahkehdahkendi ba birrimarnbom kabbala bu wobmeninj wurd.

Manbu Kabbala Bakkabakmerrinj
Acts 27:39-44

39 Kaluk bu kumbarrhbuni bedda birribolkngang manbu manberrk, dja minj birribolkburrknayi. Dja birrikebkaleburrknang kore adjbud ngalengngarre kumhyoy, wanjh bedda birridjareni kabbala birribidbuyhkemeninj kumekbe kukayalanj.

⁴⁰ Wanjh bedda birriyarldadjkeng bu birridjalbawong nawu wirlmur-rng, dja mak birriyerrkkeng kunyarl manbu kabbala birrikanemkar-rmikenh. Wanjh bedda birriwayhkeng bu birridjabnameng nawu kar-rurru nawu kumirrk dingihdi, wanjh bendjalkani kore adjbud kumhyoy.

⁴¹ Wanjh birribalhdjalburriobmeng birridoy kunkulk kandji kabbala kore kumhyawbukni birribukdoy. Wanjh kore kukeb ngarre kabbala wanjh kebdoy kunkulk wanjh minj mak yawwoyhrokayi. Dja manu kurrula bard kumbuni bu dedjbakbakkeng manbu kabbala.

⁴² Wanjh nawu djamun birrikarremarnbom bu bindibuyi nawu bininj bindikani, ba minj birringamkayi bu birridjorlkmeninj birrirawinj.

⁴³⁻⁴⁴ Dja nawu Julius, nawu benmarnewohrnani djamun, minj djareni-wirrinj Paul bu dowimeninj, wanjh nungka benngurdengkeng nawu djamun nuye yimankek bindibuyi bininj nawu bindikani. Wanjh Julius benmar-neyimeng, "Bu nangale bininj kaburrbun bu kangamkan, wanjh ngudda werkk ngurridjuhmen, dja ngurribebbehngamngamka ngurriberrkmang kore adjbud. Dja nawu ngudda ngurribuyika, wanjh ngurridjuhmen dja kundulk manbu kabbalabeh, ngurridulkkarrkarmen ba bu ngur-ringamkan minj ngurriyibme." Wanjh kumkebe bedda birridjalkurduy-imi rowk, dja birriberrkmei bu kamak rowk.

28

Bu Paul Bibayeng Nabang Nayin

Acts 28:1-6

¹ Wanjh kumekbe ngarribolknngalkeng ngarribidburrij bu kunmak rowk dja wanjh ngarriborlhmeng bu mahni manyunkurr kabolkngeyyo Malta.

² Nawu bininj birrihni kumekbe bedda ngandidjalkongibuni ngad-berre. Kaluk munguyh djalnjilknjilkmi dja mak kunbonjdjek dorrengh kumwakeyi, wanjh bedda ngandikimey dja ngandimarneworrhmeng ngadberre kore ngandikimey.

³ Wanjh Paul wam yerrngmey yimankek worrhmeninj dja mandulklor-rhni kaluk kumekbe nayin nabang kumhyingkihyoy. Kaluk bu balkuy-injcurrmeng bu manbirluwoldjen, wanjh nahni nayin kumdolkkang bibiddjarrkmeng dja djahdjaldangkaridi kore kubid nuye.

⁴ Bu bininj nawu birrihni kumekbe birrinang nayin bu kadjalbarndi kore kubid nuye Paul, wanjh birriyimeng, "Ngayh, nahni nuk bininj kunubewu namarndeyi. Minj njale bibuyi kore kurrula bu dowimeninj, dja wanjh bolkkime nungka karrowen. Wanjh kunukka kundjalmak."

⁵ Wanjh Paul bidbedjekmerrinj bu nayin kukburriweng kore kunak, dja minj dulkkihngalmeninj.

⁶ Wanjh nawu bininj birrimadbuni, bu birriyimeng kakuklurlme dja mak kakukmankan bu karrowen. Kaluk bedda birridjalnahnani bu kunkuyeng. Wanjh birrinang bu minj njale bimarnekurduyimeninj, wanjh birrimayaliborledmeng dja birrimarneyimeng, "Kunubewu nahninjanu yiman nakka god."

Paul Bimarbnom Nakudji Nakohbanj Nawu Dulkkihyoy.

Acts 28:7-10

⁷ Kaluk kumekbe kore darnkih ngarrihni, wanjh bolkyoy kabbal kunwern nuye nawu nakudji bininj ngeyyoy Publius. Nungka nawu benmarnewohrnani kore manyunkurr ngarre. Nungka ngankimey ngad-berre kore kumekbe kunred nuye, dja mak ngannahni bu kunkodjke danjbikni.

⁸ Kaluk kunmekbeni Publius nakornkumo nuyeni doweddowneni. Nungka wanjh djalwernhkukwurlwurhmeni, dja mak wurrkardi karrmi. Wanjh Paul wam binang bimarnedanginj yiwarrudj nuye, dja bimarnebid-kurmerinj. Wanjh nungka makminj.

⁹ Kaluk yerreh bu kurduyimerranj wanjh birridjalwern bininj nawu birrihni kumekbe manyunkurr; wanjh nawu birridoweni birriwam kore Paul dja benmarnbuni bedberre.

¹⁰ Birrimekbe bininj ngandimakwam dja ngandiwong nawern namak-mak. Kaluk bu ngad ngarrimarnburreni bu ngarribolkbawoni, bedda birridahkedahkendoy nawern nawu ngadberre kore kabbala.

Paul Bebmeng Kore Kunred Rome.

Acts 28:11-16

¹¹ Wanjh ngad ngarriyerrkang kumekke kore manyunkurr bu dird danjibik yimerranj. Wanjh ngad ngarribidbom kabbala manbu kumdolk-kang kunred Alexandria. Maninjmanu kabbala kore kumirrk ngarre wanjh benewaralkebdi nawu benedanginj bokenh. Kaluk manbu kabbala dingihdi munguyh kore Malta bu kunbonjdjek yimiyimi.

¹² Wanjh ngarridahkendanj maninjmanu kabbala dja ngarriwam ngarribebmeng kunred kabolkngeyyo Syracuse. Wanjh ngarriyerrkang kumekbe bu kunkodjke danjibikni.

¹³ Wanjh ngarribolkbawong Syracuse dja ngarriwam ngarribebmeng kore kunred kabolkngeyyo Rhegium. Wanjh kunkodjkebuyika kunmay-orrk kumbembeng walembeh. Wanjh ngarridjalley, dja bu balyimerranj malaybuyikani wanjh ngarribalbebmeng kore kunred kabolkngeyyo Pute-oli.

¹⁴ Wanjh kunmekbe ngarrbenngalkeng yikahwi nawu birridangerrinj kore Jesus dja ngandidjawam ngadberre bu ngarriwohyerrkang bu djandi nakudji.

Kaluk yerrekah wanjh ngarribebmeng kore kubolkkimuk Rome.

¹⁵ Wanjh bininj kumekbe nawu birridangerrinj kore Jesus ngandi-wobek-kang bu ngarribalhrey, dja bedda ngandimkebrokdabkeng djar-rehbeh kore kabolkngeyyo Manbolh nuye nawu Appius. Kumekbe kore danjibik kunrurrk di manbu kabirriyongoyo nawu kabirrire. Bu Paul bennang bedberre bininj nawu Romebeh, wanjh nungka bimanjbom God dja wanjh kangerayekminj duninj.

¹⁶ Bu ngad ngarribebmeng kumekke kore kukadje Rome, wanjh Caesar bibawong Paul bu nungan djalyoy kore manrurrkkudji. Kaluk kumekbe nakudji djamun benehdi nawu binahnani.

Paul Benmarneyolyolmi Nawu Jews Bininj Birriwohrnawohrnani

Acts 28:17-22

¹⁷ Bu Paul dingihdi kumekbe bu kunkodjke danjibik nungka ben-kay-meng bininj nawu birriwohrnawohrnani Jews bininj bedberre kore Rome birrihni. Kaluk bu bedda birrimirndemornnamerrinj, nungka benmarneyimeng, "Ngudda nawu karridangerrinj. Ngaye minj njale ngabenmarnewarrewoyi nawu bininj kadberre kabirrihni kore Jerusalem, dja mak minj ngabakkemeninj mankarre kadberre kore mawahmawah kandyibawong. Dja bonj bedda ngandidarrkidmangi ngandikurrmeng kore bininj nawu Romebeh ngakang.

¹⁸ Birrimekbe bininj nawu Romebeh ngandibek-kang dja minj ngandi-marnekarrengkakemeninj kore ngandibunkenh bu ngarrowen, dja bedda birridjaldjareminj ngandidjalbawoyi.

19 Dja bininj nawu Jews kumekke birrihni bedda birridjaldjareni ngandibuyi, wanjh kunu ngabendjawam bininj nawu Romebeh bu ngandimkang kondanjunu ba bu ngandjadme nawu Caesar. Dja ngur-rina, gaye minj ngayeman ngabenwelengnameninj birrimekbe bininj nawu karredbo bininj nawu Jews kumekbe.

20 Kumekbekenh gaye djawam ngudberre bu ngurrimwam marne-marneyime. Ngad nawu Israel kankebmawahmeng, wanjh ngad kar-ridjalmadbun God kanmarnekurduyime kore kanberrebbom korroko. Ngaye mahni ngakarrewoybukwon mankarre, bu kumekbekenh bolkkime ngarrukkayindi nanihnjanu wirlmurrng dorrengh."

21 Wanjh bu Paul benhmarneyimi bedberre, wanjh bedda birriwokmey, birrimarneyimeng, "Ngad minj ngarrimayi djurra ke kore Judeabeh bu birribimbuyi ngandimulewayi bu nguddakenh kunwarre yikurduyimi. Dja nawu karridangerrinj bu birrimwam kore Judeabeh minj ngundimule-wayi, dja minj mak ngundidjuhbuyi.

22 Dja yina, ngad ngarridjare bu yingan kanmarnemulewarren ngad-berre. Ngad ngarriburrbun ngudda yimunkekadjung Jesus, dja kore kubolkwern wanjh birriwern bininj kabirrikangewarre bu bininj kabir-rimunkekadjung nuye."

*Paul Yerrkani Mandjewk Bokenh Kore Kunred Rome
Acts 28:23-31*

23 Wanjh nawu bedda Jews birrikarremarnbom bu kabirribekkankenh Paul bu kabenmarnewokdi bedberre. Bu kunmekbe bolkyimerranj bir-mirirndewern bininj birrimirndewam kore Paul kunrurrk nuye. Nungka benbukkabukkani bu kunkodjkekuyeng bu yimanek benmarnebuyi bir-riwoybukwoyi. Nungka benmarnemulewani kore God kawohrnankenh rowk. Dja mak nungka benhmarneyimi kore Moses dja mak nawu prophets birriyngkihmulawani Jesus.

24 Wanjh yikahwi birriwoybukwong, dja yikahwi minj birriwoybukwoyi dja birriwokburriweng.

25-29 Wanjh Paul benyawoyhmarneyimeng kunkudji, bu yimeng, "Nawu Namaingmakkaykenh benyolyolmi kunwoybuk dorrengh nawu ngandikebmawahmeng kore kunwok nuye Isaiah nawu prophetni bim-bom, dja yimeng, 'Yiray yibenmarneyimen birrimekbe bininj, "Ngudda munguyh ngurriwokbekkabekkan dja minj ngurriwernhburrkburrk-bekkan! Mak ngudda munguyh ngurribolknabolknan, dja minj mak ngur-riwernhburrkburrknan. Ngudda wanjh ngurridjalkangerayekminj. Dja ngurridjalkanemdubberranj dja mak ngurrimimburdmeng. Bu ngudda minj kandiwoybekkayiy gaye. Wanjh kunu ngurrimborledmeninij kore gaye, dja mak kandiwoybekkabekbayi kunkanem ngudberre dorrengh, wanjh ngurrikangemakmeninij dja kandiwoykenmenburribuyi. Dja bu ngurriborledmeninij kore gaye, wanjh gaye marnbuyi ngudberre.'" Kuhni bu yimeng nawu Kawohrnan Rowk." [Isaiah 6:9-10]

"Kundjalmekbekenh gaye ngadjare ngurriwernhburrbun bu God kabenngeheke bininj nawu minj bedda Jews. Bedda wanjh kabirriwok-bekkan."

Bu kuninjkuwu Paul benmarneyimeng, wanjh bedda nawu Jews bir-ridolkarrinj birriwam bu bedman birribalhdangwerreni bu birribal-wohrengehrey.

30 Paul yerrkang mandjewk bokenh kore kunrurrk manbu karremule-wanikenh, dja mak benkimangi birridjalwern bininj nawu birriyikani.

31 Nungka munguyh bendjalmarnemulewani bu God kawohrnankenh rowk. Dja mak munguyh benbukkabukkani bininj bu Jesus Christkenh

nawu kawohrnan rowk. Kuhni wanjh munguyh djalkurduyimi bu minj kelenwirrinj, dja minj nangale mak bingurdkemeninj.

Romans

Ngaye Paul Ngabimbom Nahni Djurra Romans 1:1-7

¹ Ngaye Paul wanjh ngabimbun nahni djurra ngudberre nawu bininj ngurrihni kore kunred Rome, ngudda nawu God ngunmarnedjareminj ngudberre. Ngaye munguyh ngadjalmarnedurrkmirri nuye nawu Christ Jesus. God ngankayhmeng ngaye dja mak nganmarnbom ngayimerranj nuye apostle. Nungka nganwong mahni kore ngarrurrkmirri ba bu ngabenmarnemulewan bininj manbu manmak kunwok kore Godbeh.

² Mahni manmak duninjh kunwok kabimbuyindi kore God benyingkih-wokwong nawu birriyungkihni prophets ba bu birribimbuni djurra kore God kunwok nuye.

³ Mahni kunwok manmak kabimulewan nawu beywurd nuye God, nawu yimerranj bininj duninjh, bu kore David bikebmawahmeng nawu nuye namud.

⁴ Dja nungka wanjh dolkkang kore kundowikenh, dja nuye Namalng-makkaykenh wanjh kabimulewan dja karriwoybukwon bu nungka wanjh God nuye Beywurd nawu kundulkarre rowk kakarme, Jesus Christ nawu Kawohnan Rowk kadberre.

⁵ Wanjh God kankongibom rowk kadberre dja nganmarnbom apostles, ba bu ngarrbenmarnemulewan birridjalwern bininj nawu bedda minj Jews bu kabirriwoybukwon Jesus kore kabirriwokmarrkmang nungka, dja mak kabirringeyburlume nuye.

⁶ Ngaye wanjh marneharneyime ngudda ngudberre nawu ngurrini kore kunred Rome dja God ngunkayhmeng ngudberre, ba ngurriyimerran warridj Jesus Christ bininj nuye.

⁷ Nungka nawu ngunmarnedjare ngudberre dja mak kadjare ngudda nuyekih bininj. Ngaye ngadjare God nawu Ngabbard, dja mak nawu Kawohnan Rowk Jesus Christ bu ngunmarneyime kunmak duninjh dja mak ngunwon kunmodmikenh nuye dorreng.

Paul Kadjare Bu Kabendjahwon Nawu Yiwarrudj Bininj Kore Rome Romans 1:8-15

⁸ Kuhni bu ngahdokmiwe werrek kore ngadjare marneyime ngudberre kuninjkunu. Birriwarlahkenh nawu bininj ngundiwoyekkang ngudberre bu ngurriwoybukwon nawu Jesus Christ, wanjh ngaye ngahdi yiwarrudj kore kunngay nuye dja ngaye ngadjalmanjbun God bu ngudda ngudberre.

⁹⁻¹⁰ Ngaye ngadjalnjlngmak duninjh bu kuninjkunukenh kore ngaw-ernhdurkmirri nuye God bu munguyh ngabenmarnemulewan bininj bu beywurdkenh nuye. Dja mak God kaburrbun bu ngaye ngayime kunwoybuk duninjh bu ngamulewarren. Kaluk ngaye ngahdi yiwarrudj ngudberre munguyh. Ngaye kaluk ngadjawan God bu kadjare bolkkime nganmunkewe kore ngudda. Wardi bu nganmarnebolhmarnbun ba ngamre.

¹¹ Ngaye wanjh ngadjaldjare bu nan ngudberre, ba bu won ngudberre yehyeng nawu Namalngmakkaykenh kanwon kadberre, manbu ngunmur-rngayekwon.

¹² Bu ngaye kuhni ngayime, ngaburrbun nawu ngad karribengyoly-olmerrimen kore karrimarneyimerren bu karriwernhwoybukwon Jesus.

¹³ Mah nawu karridanginj, kandibekka, ngaye ngadjare bu kuninjkuu ngurriburrbun bu ngaye wanjh ngadjaldjareni bu yimankek ngamrawinj kerrngehkenh, dja kunwern bu ngandahmeng. Wanjh ngaye ngadjare ngabenmarnbun nawu bininj ngurrihni kunmekbe kore Rome ba bu kabirrimunkekadjung Jesus, yiman kayime korroko ngabenmarnbuni birriwern bininj nawu bedda minj Jews.

¹⁴ Kaluk God nganmarnewokkurrmerrinj bu ngaye ngabenmarnemulewan kunwok kunmak bedberre bininj nawu kabirriwokdi Greek kunwok dja mak bininj nawu kabirriwokdi kunwokbubuyika kunwok. Nungka wanjh nganmarnedjareminj ngaye ngabenyikan nawu bininj birriwernhmayaliwern duninj dja mak bininj nawu birrimayaliyak.

¹⁵ Bu kunmekbekenh kuninjkuu ngaye ngadjare ngamre ngudberre nawu ngurrihni kore Rome bu marnemulewan kunwok kunmak.

*Manbu Kunwok Kunmak, Makka Kakarrme Kundulkarre Rowk
Romans 1:16-17*

¹⁶ Ngaye minj ngayemengalme bu ngabenbengdayhke birriwern bininj mahni kunwok kunmak. Maninjmanu kunwok kakarrme kundulkarre nuye God, wanjh kabengehke bininj nawu kabirriwokbekkan dja kabirriwoybukwon. Ngayime nawu Jew bininj nayuhyungkih, dja yerrekah bininj nawu minj bedda Jews.

¹⁷ Mahni kunwok kunmak kumdolkkang kore Godbeh. Bu bininj kabirriwoybukwon kunwok kunmak, wanjh kunukka God kabenmakwan birrimekbe nawu bininj, dja kabenmarnmarnbun ba bu bedda birrimak munguyh munguyh. Kunmekbekenh bu kuninjkuu kabimbuyindi kore kahyime, "Bu nangale bininj kabiwoybukwon God, wanjh nakka God kabimarneyime namak, dja mak nungka kabimalngkerrngehme." [Habakkuk 2:4]

*God Kandung Kadberre Karriwarlahkenh Bininj Rowk
Romans 1:18-31*

¹⁸ God kanbukkabukkan kadberre kore heavenbeh bu bolkkime wanjh nungka kabendung bininj nawu minj kabirridjare kore nungka dja mak kabirridjalyime kunwarrehwarre duninj. Birrimekbe birriwarre bininj wanjh yiman kayime kabirriwokwarlkan manbu kunwoybukkenh.

¹⁹ Birriburrbuyi God, bu nungka benbukkabukkani bedberre bu djal mandjad, wanjh woymbukkih, kabirridjalburrbun.

²⁰ God marnbom kondah kunrorre dja mak yehyeng rowk. Dja bininj rowk birrinang kore nungka marnbom, wanjh birriburrbuni bu God dingihdi, dja kundulkarrekimukni duninj. Minj birridarrkidnayinj, dja med, birridjalburrbuni bu woymbukkih God kahdi. Dja bonj, minj bedda birriwokmarrmayinj bu djal burudjang.

²¹ Bedda birriburrbuni nawu God, dja ngaleng minj bedda birriburlumeninj nuye, dja mak minj birrimanjbuyinj kore nungka. Dja ngaleng bedda birrimayaliwarreworinj dja birridjalburrbuni yiman kayime birrihni kore kubolkmunun.

²² Bedda birridjalwernhburlumerreni bu bedmandeleng birriyimi birrikodjkuludjadni. Dja ngaleng bedda kunu birridjalbengwar.

²³ Bedda minj birrimarnediwirrinj yiwarrudj kore namakkaykenh duninj God nawu kahdjaldarrkid munguyh munguyh. Burrkyak. Bedda birrimarnbuni nawu bedman bedberre gods yiman kabirrikukrohrok bininj nawu kabirridowarren, dja mak mayhmayh, dja mayh rowk dja mak yiman nayin!

²⁴ Kunmekbekenh bu God bendjalbawong bedberre ba bu birrikurduyimi kore bedman birridjareni, dja kunburrk bedberre birriwarreworreni bu kunwarre birridjaldjareni kore kunburrk djareni.

²⁵ Njalekenh bu kuhni kurduyimerranj? Kunmekbekenh bedda birribawong kunwok manwoybukni manbu God kabiyolyolme, dja birriwoybukwoni manu benkoweng bedberre. Bedda birrimarneboddangeni yeng kurorrekhenh nawu God marnbom, dja wanjh birrimarnedurrkmirri. Minj kabirrimarnedurrkmirri dja minj kabirrimarneboddan God nawu marnbom yehyeng rowk, nawu karriburlumen bu munguyh munguyh. Amen.

²⁶ Wanjh kunmekbekenh bu kuninjkuwu God bendjalbawong bedberre kore kabirridjalkurduyime kunwarrehwarre. Kaluk daluk warridj bindibawong binihbininj, dja wanjh birrimarreni bedmandeleng bu kunwarre birriyimi dalukdeleng.

²⁷ Dja mak binihbininj bindibawong daluk, dja birridjaldjareni birridjirdmarreni bu birriyoy bu djalbininjdeleng. Bedda birridjaldjareni kore birrikurduyimi kore kunwarrekhenh. Bedda birrikurduyimi kundjalwarre duninj kore kunburrk bedberre, dja wanjh birridowerrinj, kore God bendungi.

²⁸ Wanjh bedda yimankek birriyimerrinj God nawu djalburrkyak, wanjh God bendjalbawong bedberre bu birrimayaliwarreminj dja wanjh birrikurduyimi kunwarre duninj kore God minj kadjare.

²⁹ Bedda birridjalwernhmayaliwernminj duninj kore kunbubuyika kunwarrehwarrekhenh. Bolkkime bedda nawu kabirridjaldjarewern, dja mak kabirrikirnerren. Bedda wanjh birrimarndeyi. Kaluk kabirridjare kunyid, dja mak kabirridjalkurrehkurren, dja mak kabirridjare kabindiwarrewon birribuyika bininj. Bedda mak kabindidjalyolyolme nawu birribuyika.

³⁰ Bedda mak kabirrikowerren kore bininj birribuyika, dja mak kabirriwidnan God. Kabirriyime bu bedda yimankek birringeykimuk, dja kabirridjalbangmen. Bedda mak kabirridjalburlumerren bu bedmandeleng, dja kabirriywarren bu kunwarre kunkerngekenh kabirriyime. Bedda minj kabindiwokmarrkmang nawu bedberre kornhkornkumo dja ngalabadjan.

³¹ Bedda wanjh yiman birrimayaliyak, dja kabirrikurren kore kabirriyime. Bedda nawu birrimimkongiyak dja mak minj kabindikongibunkenh bedberre.

³² Kaluk bedda kabirriburrbun kore baleh God kayime bu kabendjadme kore mandjad duninj bininj nawu kuhni kabirrikurduyime. Nungka yimeng bu bininj nawu kakurduyime bu kuninjkuwu wanjh nakka kadjaldowen. Dja bonj, bedda kabirridjalkurduyime kunwarre, dja mak kabindiburlume nawu birrimekbe bininj kore bedda warridj kabirrikurduyime kunwarre.

2

God Kandjadme Kore Mandjad Dja Mak Kunwoybuk Dorreng Romans 2:1-16

¹ Dja ngaye yolyohyolyolme ngudda ngudberre, yiddok ngudda wanjh ngurrbenyolyolme dja ngurrbendjadme nawu birribuyika bininj nawu kabirrikurduyime kore kunwarre? Wanjh ngudda ngurrirohrok! Kuhni ngurridjadmerren! Woybukkiah, kuhni kunwarre ngurrikurduyime bu ngudmandeleng.

² Karrisurrbun bu God kabendjadme nawu birriwarre bininj kore kunmakkenh, kore mandjad duninj dja kore kunwoybuk.

³ Dja ngudda kunu minj ngurrirohrok God! Kunubewu ngudda yimankek ngurrbendjadme bininj nawu kabirrikurduyime kunwarre dja ngurriyime God minj ngundjadme ngudberre. Dja God wanjh ngundjadme ngudberre warridj ngudda bu kunmekbekenh kore karohrok rerrih ngudda bu kunwarre ngurrikurduyime.

⁴ Kandibekka, God ngunkongibun ngudberre, nungka bu ngundjalmbun munguyh dja mak nungka minj ngunbangmedung. Wardi ngurriyime bu God minj ngundjadme, dja mak kawokyakmen. Dja burryak, nungka wanjh ngunmadbun ba bu ngurrimulewarren kore kunwarrekenh bu ngurribawon ngudberre.

⁵ Kaluk ngudda wanjh ngurridjalkangerayek dja minj ngurriwarnyak-mulewarren bu ngurribawon kore kunwarre ngudberre, wanjh kunbarnangarra kamre bu God wanjh ngundjalwernhdung. Bu kunmekbe kambolkyimerran, wanjh karriwarlahkenh bininj rowk karrisurrbun bu God kandjadme bu djal mandjad duninj nuye.

⁶ Ngurriburrbun kore kabimbuyindi, "God wanjh kabenbebbewon bininj kore bedda birribebbhkurduyimi." [Psalm 62:12]

⁷ Bininj nawu kabirridurkmirri munguyh kore kunmakkenh ngarre, dja kabirridjaldjare God kabenburlume bedberre dja wanjh kabirridjarrkni nungka bu munguyh munguyh. Wanjh God kabenmarnbun nawu birrimekbe bininj bu kabirrimalngmimbi kore nungka bu munguyh munguyh.

⁸ Bininj nawu kabirriyanganenghmerren, dja mak bedda minj kabirriwokmarrkmang kore kunwoybuk kunwok, wanjh kunukka yiman bedda kabirriwokmarrkmang nawu kunwarre. Wanjh kunukka God kabendjal-dung dja mak kabenwernhdung bedberre.

⁹ Kaluk ngudda bininj nawu Jew dja mak ngudda nawu minj Jew bininj, bu ngudda wanjh munguyh ngurridjalkurduyime kore kunwarrehwarre, wanjh God ngunwon ngudberre kunyid bu wanjh kunukka ngudda ngurridjalwernjilngwarrehwarremen.

¹⁰ Kuhni bu karohrok yerreh, bu ngudda Jew bininj dja mak ngudda nawu minj Jew, bu ngudda ngurridjalkurduyime kore kunmakkenh munguyh, wanjh kunukka God ngunmakwan dja ngunburlume ngudberre bu kunmekbekenh kuninjkuu, dja mak ngunwon nuye kunmodmikenh.

¹¹ Kaluk God kabenbebbehdjadme bininj rowk bu mandjad duninj, dja birriwarlahkenh bininj rowk birribakkeng nuye mankarre.

¹² Bininj nawu Jew, bedda kabirrikarrme mankarre kore Mosesbeh. Bu yiman bedda kabirribakke manmekbe mankarre wanjh kunukka God kabenwelengname bedberre, bedda nawu kabirriyime kunwarre. Dja bininj nawu minj Jews, wanjh minj kabirrikarrme maninjmanu mankarre, dja ngaleng, bu kabirrikurduyime kunwarre, wanjh kunu God kabenbularrbun bedberre kore kuninjkuukenh.

¹³ Bininj nawu kabirribekkan manbu mankarre nuye God, dja minj kabirrikurduyime bu kuninjkuu, wanjh kunukka God kawarrewan. Dja ngaleng bu ngudda ngurrimarrkmang kore mahni mankarre kayime, wanjh God kunukka ngunmakwan ngudberre.

¹⁴ Bininj nawu minj Jews, kunubewu yikahwi kabirrimarrkmang manbu mankarre bu yiman minj kabirriburrbun manbu maninjmanukenh. Wanjh kunukka kamak, wanjh yiman bedmandeleng kabirrikarremarnburren wanjh manbu mankarremak.

¹⁵ Bu kunmekbe kabirrikurduyime, wanjh karriburrbun yiman kayime mankarre kabimbuyindi kore kukange bedberre. Bedda wanjh kabirriburrbun kunmak dja kunwarre kore kukange bedberre. Wanjh kunukka kabirriburrbun bu kabirribengkan kore kabirrikurduyime kunmak dja kunwarre.

¹⁶ Ngaye ngayolyolme mahni kunbarnangarra bu God kabimunkewe Jesus Christ bu kandjadme kadberre bininj rowk. Nungka kandjadme kore kunmayali kahwarlkayindi kore kukange kadberre. Ngaye ngabenmarneyime bininj bu kuninjkukenh bu mak ngabenmarnemulewan kore kunwok kunmakkenh.

*Nawu Jews Bininj Kabirribakke God Nuye Mankarre
Romans 2:17-29*

¹⁷ Kandibekka ngudda binihbininj nawu Jew. Ngudda ngurriwernhkarreme manmekbe mankarre, dja mak ngurriburlumerren bu kore kuninjkunu God ngurribelbmerren.

¹⁸ Ngudda ngurriyime bu yimankek ngurriwernhburrbun kore nungka kahdjare, ngudda wanjh ngurriburrbun manbu mankarre, dja ngudda kunu ngurriburrbun ba bu ngurrini kamak rowk.

¹⁹ Wardi ngudda ngurriburlumerren bu yimankek ngurrbenkan nawu birrimimbunje bininj bu ngurridjarrkre, dja mak yimankek ngurrbenmarnebolkwolkan nawu bininj kabirrihni kore kubolkmunun,

²⁰ Dja mak ngurriyime bu yimankek ngudda ngurrikarreme mankarre manbu ngunmayaliwernwong kore kunwoybuk, wanjh kunmekbekenh kunu ngurrbenbukkabukkan nawu birrikukbengwarr bininj dja mak nawu birrimayaliyak.

²¹ Mah. Bu ngudda ngurrbenbukkabukkan birribuyika bininj, dja njalekenh minj ngurribukkarren bu ngudmandeleng? Bu kunubewu ngurrbenmarneyolyolme nawu birribuyika bininj, "Yuwn bu ngurridjirdmang." Dja mak bu ngudda kunubewu warridj ngurridjirdmang.

²² Ngudda ngurrbenbengdayhke nawu birribuyika, "Yuwn bu ngurridjirdmarren bu kunwarrekenh kore daluk dja bininj kabirrimarren." Kunubewu kunmekbe mak ngudda ngurrikurduyime warridj. Ngudda yimankek ngurriwidnan idols nawu god nawarrewarre nawu yeng, dja mak kunubewu bu ngurringimen kore kururrk manbu yiwarrudj bedberre ba bu ngurridjirdmang njalehnjale.

²³ Ngudda ngurriburlumerren bu manmekbekenh manbu mankarre ngurrikarreme, dja ngudda wanjh ngurribakkabakke. Kaluk kuninjkunukenh bininj ngurrbenmarnbun kabirriyime bu God minj namak.

²⁴ Ngurriburrbun kore bimbuyindanj djurra bu yimeng, "Bininj nawu minj Jew, bedda ngundikurdunan kore ngurrikurduyime wanjh bedda kabirrimarneyime kunwarre kore God." [Isaiah 52:5]

²⁵ Ngudda binihbininj nawu Jews, ngudda ngurrilakkayen bu kunmekbekenh ngudda nawu bininj nuye God, dja wanjh kamak. Dja bu ngudda ngurridjalbakke manbu mankarre, wanjh kunukka yiman ngudda minj ngurrilakkayendangimeninj.

²⁶ Dja karohrok bu nawu bininj minj Jews, nawu minj birrilakkayen, dja ngaleng bu kabirrihdjalkurduyime kunmak kore mankarre kahyime, wanjh kunukka yiman kayime bedda birrimarnburrinj bu yiman birrilakkayenworrimeninj.

²⁷ Ngudda nawu ngurrilakkayen kore kuburrk ngudberre, dja ngurrikarreme manmekbe mankarre kore kabimbuyindi, wanjh ngudda wanjh ngurridjalbakke maninjmanu mankarre. Dja birrimekbe bininj minj

birrilakkayen kore kuburk bedberre dja mak kabirrimarrkmang manbu mankarre, wanjh yiman kayime ngundidjadme ngudberre!

²⁸ Bininj nawu Jew duninh, wanjh minj kunburkwi. Bu kayimerran Jew duninh, wanjh yiman kayime lakkayendan kore kukange nuye warridj. Nakka wanjh Jew duninh.

²⁹ Bu bininj kabirrilakkayenworren kore mankarre kabimbuyindi, bu djal kunburkwi, wanjh nakka minj Jew duninh. Dja bininj nawu Jew duninh, bedda wanjh yiman kabirrilakkayenworren kore kukange bedberre. Kaluk Namalngmakkaykenh kabenlakkayenwon kore kukange, dja yuwn bu kore bininj kabirridjalmunkekadjung kore kabimbuyindi. Dja bininj nawu Jew duninh, minj birribuyika bininj kabirriburlume, dja nungan God kabidjalburlume nuye.

3

God Kandjalmarnekurduyime Kore Nungka Yingkihwokkurrmerrinj Kadberre

Romans 3:1-8

¹ Bu kuhni bininj wanjh nawu Jews, yiddok kamak, dja mak yiddok kunmak kabirrikarrme? Nawu birrilakkayen, yiddok kunmak?

² Yoh, kuhni bu kunmak kunwern kabirrikarrme bedda nawu Jews. Bedda wanjh birriyungkih bininj nawu God benwong nuye kunwok ba kabirrikarrenahan. Dja kunu kunkimuk.

³ Dja yikahwi nawu Jews minj birriwernhwoybukwoyi dja minj birriwokmarrkmayinj God. Wanjh njalekenh bu kunmekbe, dja ngaleng, God nungan kadjalkurduyime munguyh kore wokkurrmerrinj, dja bininj burryak!

⁴ Woybukkih. Bu bininj rowk nawu kabirrihni kondanjku kabirridjalkurrehkurren, God nakka nungan kadjalyime kunwoybuk munguyh. Kunmekbekenh bu kore bimbuyindanj, yimeng, "Ngudda God, kore baleh yarrka yiyime wanjh djal kunwoybuk dja mak kunmak. Bu yiman ngudda kandjadme ngadberre, ngudda wanjh munguyh yidjalwinhme." [Psalm 51:4]

⁵ Kaluk nawu bininj yimankek kabirriyime, "Adju! Bu ngaye ngakurduyime kunwarre, wanjh kunukka birriwern bininj kabirriburrbun bu nungka God namakkaykenh duninh. Mah, God nganbawon ba bu ngahkurduyime kunwarre. Nungka njalekenh bu ngaye ngandhung." Kuninjku kore bininj wanjh kabirriyime kore kunmayali bedberre.

⁶ Wanjh yuwn bu kumekbe ngad karriyime! God wanjh nungan kandjaldjadme karriwarlahkenh bininj rowk kondah kurorre bu mandjad duninh dja mak kunwoybuk dorrengh.

⁷ Kunubewu nabuyika bininj kayime, "Med wardi bu ngaye ngakurrehkurren, bininj wanjh kabirriburrbun nawu God nakka nadjalkudji kanmarneyime kore kunwoybuk, bu bedda wanjh kabirriburlume nungka. Dja njalekenh bu God ngandjadme ngaye, dja nganmarneyime ngawarre bininj?" Kuhni yikahwi bininj kabirriyime, wanjh kakarrewarre.

⁸ Kunbuyika mak yikahwi bininj kabirriyime bu kuninjku, "Mah, ngad kabirridjalkurduyimen kunwern kore kunwin, ba bu God kakurduyime kunmak kunwern kadberre!" Yikahwi bininj kabirriyime yimankek bu ngad ngaridjalyolyolmeninj ngadmandeleng. Dja ngad minj karriyimeninj kunmekbe, bedda wanjh ngandidjalyolyolme bu ngad. Bu, wanjh bonj, kunmekbe wanjh kundjalwarre duninh, dja bu bininj kabirriburrbun kunmekbekenh wanjh kunukka God mandjad kabenmarneyime bu bedda birriwarre.

Minj Nangale Bininj Kakurduyime Kore Kunmak

Romans 3:9-20

⁹ Mah wanjh, kunbewu ngudda ngurriyime bu nawu ngad Jew ngarbenyurrhke nawu birribuyika bininj. Burrkyak, ngad nawu ngarridjalwarre warridj. Nangale ngayimeng kerrngehkenhni bu karridjalwernkenh bininj nawu ngad karribakkeyi manbu God nuye mankarre ngad nawu bininj Jew, dja mak ngudda ngurribuyika bininj nawu minj Jew.

¹⁰⁻¹² Kuhni wanjh bimbuyindanj kore kuninjkuu, yimeng, “Minj nangale bininj nadjalmak. Minj nadjalkudji! Minj nangale bininj mandjad kabiwernhburrbun nawu God. Minj nangale kabiyawan nawu God. Birriwarlahkenh bininj rowk birrimarnemirrkborledmeng kore nungka. Birridjalwarworrinj bu minj njale kunmak kabirrikurduyime. Minj nadjalwohkudji namak bininj nawu kayime kunmak.” [Psalm 14:1-3]

¹³⁻¹⁴ “Bu bedda kabirriwokdi, wanjh yiman kabirriyolyolme, wanjh manbu kundowikenh kamre darnkih. Bu bedda kabirriwokdi, wanjh kunu bedda kabirridjalkurren. Manbu bedberre kunwok yiman manbang reriirh. Bedda kabindidjaldung dja mak kabindidjalmarneyime kore kunwok kunrayek.” [Psalms 5:9; 140:3; 10:7]

¹⁵⁻¹⁷ “Bedda kabirridjaldjurrkarren bu kabindibun nawu bininj. Kudjalbolkwarahkenh kore kabirrire, bedda wanjh kabindidjalnjilngwarrewon bininj dja mak kabindimarnemarnbun kunyid bedberre. Bedda minj kabirriburrbun bu kabirrire kore kunmodmikenh dorrengh.” [Isaiah 59:7-8]

¹⁸ “Bedda nawu bininj minj kabirrimarnekele nawu God.” [Psalm 36:1]

¹⁹ Mah wanjh, ngad karriburrbun nawu karrikarme manbu mankarre, wanjh mahni mankarre kanbengdayhke nawu karridjalwarlahkenh rowk! Karriwernniworrinj bu karrimarrkmayinj manbu mankarre. Kunmekbekenh bu God wanjh kandjadme karridjalmirndewarahkenh bininj rowk nawu karrihni kondanjkuu kurorre, dja karridjalngurdme, bu minj karriwirrihme nawu God.

²⁰ Bu karriwokmarrkmayinj God nuye mankarre bu bulkkidj dunijnh, wanjh nungka kanmarneyimeninj bu ngad kunu karrimakniworrinj bininj. Dja bonj, ngad nawu karriwarlahkenh bininj rowk minj karriwernhmarkmayi maninjmanu mankarre. Dja ngaleng manbu mankarre wanjh kanbukkabukkan ba karriburrburren ngad wanjh karrikurduyime kunwarre.

God Kanmakwan Bu Karridjalwoybukwon Jesus Christ

Romans 3:21-31

²¹ Bu bolkkime wanjh, God kanbukkang kadberre kore kundjalbuyika, ba bu nungka kanmarneyime karrimak kore nungka. Mankarre minj kanmarnbun bininj ba bu God kanmarneyime bu kanmakwan. Dja ngaleng mahni mankarre kandjalmarnemulewan kore kunbuyikakenh, dja warridj nawu prophets bedda korroko birridjalyingkihyolyolmi.

²² Kuhni bu kunbuyika ngarre, bu nangale bininj kabiwoybukwon nawu Jesus Christ, wanjh nakka God kabimakwan. God kabenmarnekurduyime birridjalwern bininj rowk nawu kabirriwoybukwon. Dja wanjh ngad karridjarrkrohok.

²³ Ngad karridjalwarlahkenh bininj rowk karribakkebakeng God nuye mankarre, dja minj karrimak kore nungka nawu nadjalwernhmakkaykenh dunijnh. Ngad kunu minj karriwernhmak yiman nungka.

²⁴ Nawu God kandjalkongibun kadberre rowk, wanjh nungka kanwong bu djalburudjang nuye, bu yimeng ngad karrimak kore Christ Jesus nawu kanbonyerrkkeng kadberre.

²⁵ God nungan bikanjcurrmeng Christ Jesus bu kanmarnedoweng kadberre. Bu kurlbawarrhmeng kadberre, wanjh God kanmarneyime bu ngad karrimak bu karriwoybukwon kore Jesus. Bu kunmekbe kurduyimeng, wanjh God kanmarnebukkarinj kore nungka kandjadme munguyh mandjad duninj. Bininj rowk birridjalkurduyimi kunwarre bu kerrngehkenhni, dja God minj benbularrbuyinj bu nungka wanjh bednjalmadbuni.

²⁶ God madbuni bedberre ba bu ngad bolkkime karridjalan nuye kundjalmak kore kandjadme. Bu bolkkime, karriburrbun nungka wanjh nadjalmak, dja nawu kayime birrimak nuye, bininj nawu kabirriwoybukwon Jesus.

²⁷ Mah wanjh, bonj, ngad minj karriyawoyhburlumerren bu karriy-imerrimeninj bu karrimak bininj, dja minj manbu manmekbe mankarre karriwernhwokmarrkmayi. Dja mak ngad minj karriburlumerren kore ngadmandeleng, bu kunmekbekenh ngad karriwoybukwon kore Jesus.

²⁸ Baleh kab ngad karrikurduyime ba bu God kayime ngad karrimak kore nungka? Yiddok bu karridjalkarrme manbu mankarre? Burrkyak. Minj kunukka mandjad duninj. Bu kuhni wanjh mandjad duninj kore ngad karridjalwoybukwon nawu nungka Jesus.

²⁹ Ngabenyolyolme bininj rowk. Nawu Jews bininj yiddok bedda birridjalkudji kabirrikarrme nawu God? Burrkyak, God kandjarrkkarrme ngad nawu nuyekih bininj, Jew bininj dja bininj nawu minj Jews.

³⁰ Kaluk nawu nungan nadjalkudji God wanjh kandjalmarnekurduyime kore kadjalrohrok bininj rowk, bu bedda nawu yiman birrilakkayen dja mak minj birrilakkayen. Karridjalrohrok. Bininj nawu kabiwoybukwon Jesus, wanjh kunukka God kayime bu nakka namak bininj kore God.

³¹ Bu ngad karriwoybukwon Jesus, wanjh kunukka yiddok ngad karriwe manmekbe mankarre? Burrkyak. Bu yiman ngad karriwoybukwon Jesus, wanjh kunukka ngad karriyime bu God nuye mankarre wanjh mandjalmak duninj.

4

Abraham Nawu Bidjalwoybukwong God Dja Kumekbekenh Kunu God Nungan Bimakwam

Romans 4:1-25

¹ Ngaye ngadjare ngayolyolme nawu Mawah kadberre, nawu Abraham. Ngudda ngurriburrbun bu baleh kurduyimerranj nuye. Bu ngad karridjarrkurrbun nungka, wanjh kunukka ngad karriborlhmen kore ngadmandeleng kadberre.

² Njalekenh kuhni bu God bimarneyimi Abraham nungka namakni kore nungka? Yiddok Abraham kurduyimi kunmak kore wokmarrkme y God nuye mankarre, dja durrrkmirri munguyh ba bu burlumerrimeninj kore bininj? Yiddok kunmekbekenh kunu? Burrkyak. God minj biburlumeninj Abraham bu kuhni kurduyimi. Dja Abraham minj kuhni bimarnbuyinj kore God yimeninj nungka bimakwam.

³ Ngurriburrbun kunmekbe kore kabimbuyindi nuye bu yimeng, "Abraham biwoybukwoni God, kunmekbekenh God bimarneyimeng nungka wanjh namakni kore nungka." [Genesis 15:6]

⁴ Baleh kuhni kamenmenyime? Ngurriburrbu bu kunmekbekenh marneyime. Bu bininj kahdurrrkmirri kunrayek duninj, wanjh nawu kabimarnewohrnan kabikarremulewan money bu kunmekbe. Namekke nawu money minj kamang bu djal burudjang, dja nungka kamang kore karrurrkmirrikenh.

⁵ Kuhn bu kunbuyika nuye kore God. Ngad bininj minj karrimarnedur-
rkmirri God ba karrimarnbun nungka kanmakwan. Kuhn bu burrkyak.
Kaluk bu karridjalwoybukwon God wanjh kunmekbekenh nungka kand-
jalnakwan kadberre. Kuhn wanjh God kadjare kakurduyime kadberre.

⁶ Nawu David warridj benyolyolmeng bu God nungan benmakwani
bininj nawu minj birriyingkihduurkmirriwirrinj nuye nawu God. Bedda
birridjalwoybukwoni nuye, nawu bedda birriwernhnjilngmakminj.

⁷ Kore bimbom nawu David, “Kadjalnjlilngmak bininj nawu Kawohnan
Rowk kabimarnebengmidjan nuye kunwarre, dja mak kabimarnebular-
rbun kunwarre nuye.

⁸ Kadjalnjlilngmak nawu bininj bu nawu Kawohnan Rowk minj kabiya-
woyhdujhun bu kunwarrekenh nuye.” [Psalm 32:1-2]

⁹ Nawu David yiddok bendjalyolyolmi birridjalkudji bininj nawu bir-
rilakkayen? Burrkyak. God kabenmarnekurduyime kunmak bu mak
kadjalrohok nawu birribuyika bininj warridj. Ngudda ngurriburrbun bu
ngad karriyimi, “Abraham biwoybukwoni God, kunmekbekenh God bu
bimarneyimeng nungka wanjh namakni kore nungka.”

¹⁰ Bolkkime ngurriburrbun bu kuninjkukenh. Yiddok God bimar-
neyimeng Abraham bu namakni kore nungka bu korroko lakkayen-
meninj? Burrkyak. Abraham biyingkihwoybukwoni God bu nungka minj
bangmelakkayenworrimeninj dja God bidjalmarneyimi bu nungka wanjh
namakni kore nungka.

¹¹ Kuhn bu kaluk bu rerrekah wanjh God bibengdayhkeng bu nungka
welenglakkayenworrinj. Kaluk menburrburreni bu woymbukkih nungka
namakni kore God. Njalekenh kuhni bimarnekurduyimerranj nawu
Abraham? Ba bu nungka yiman kayimerran nawu mawahmawah
bedberre birribuyika bininj rowk nawu kabirridjarrkwoybukwon God,
nawu birrilakkayen dja mak nawu minj birrilakkayenworrimeninj.

¹² Dja mak bimarnekurduyimerranj Abraham ba bu nungka yimerranj
mawahmawah bedberre birrilakkayen bininj bu bedda yiman kabir-
ringunjdjikan Abraham nawu mawah kadberre rowk. Bedda nawu
kabirriwoybukwon God yiman Abraham kurduyimeng kerrngehkenhni
bu nungka welenglakkayenworrinj.

¹³ God biberrebbom nawu Abraham bu nungka kabibolkwon kore
kubolkwarlahkenh rowk kondah kurorre, nawu nungka, dja mak nawu
benkebmawahmeng bininj nuye. Njalekenh bu God benmarnewokkur-
merrinj? Yiddok Abraham nakka wernhmarrkmangi manbu mankarre?
Burrkyak. Dja ngaleng nungka bidjalwoybukwoni God. Wanjh God
bidjalmarneyimi bu nungka namakni, wanjh kunmekbekenh kunu God
bimarnewokkurmerrinj nuye.

¹⁴ Kaluk bininj nawu kadjare kamang kore God kabiberrebbun, baleh
nungka kakurduyime? Bu kawernhrohokme kawernhkarrme mankarre
nuye God, wanjh kadjalbarabun, kadjalbakke manbu mankarre munguyh.
Kunmekbekenh kunu God kadjare bininj kabidjalwoybukwon.

¹⁵ Bu minj karrikarrmeninj manbu mankarre, wanjh minj karribarabuy-
inj bu karriwokmarrkmayi, dja mak God minj kanduyi kadberre. Dja bonj,
mahni mankarre kayo dja wanjh karribakke.

¹⁶ Kunmekbekenh kunu God wokkurmerrinj bu nungka wanjh kaben-
makwan nawu birridjalmirndewern bininj bu kabirridjalwoybukwon
nungka. Nungka kandjalwernhkongibun, dja kadjare ngad nawu karrid-
jalwern karrimaksin kore God bu ngad wanjh karringunjdjikan Abraham,
yikahwi ngad nawu karrikarrme manmekbe manbu mankarre, dja
mak yikahwi ngad nawu minj karrikarrme. Wanjh kunmekbe kunu

kamenmenyime nawu Abraham yiman kornkumo kadberre rowk bu karriwoybukwon God yiman nungka.

17 Kunmekbekenh, wanjh kuhni bu kabimbuyindi, nawu God bimarneyimeng Abraham, "Ngaye wanjh marnbom ngudda bu yiyimerran mawah duninj bedberre bininj nawu birridjalmirndewarlahkenh nawu birriwokbubuyika bininj." [Genesis 17:5] Dja God bimarbnom Abraham yimerranj yiman kayime kornkumo kadberre rowk, nawu biwernhwoybukwoni God nawu kabendarrkidwon bininj nawu birridoweng, dja mak bu kadjalwokdi, wanjh kamarnbun yehyeng rowk kore minj njale bangmediwirrinj.

18 God bimarneyimeng Abraham bu nungka wanjh kabimarnbun kabenkarme bininj birridjalwernkenh duninj nawu kabenkebawahme yiman namud nuye. Dja mak bimarneyimeng, "Birridjalmirndewernkenh duninj nawu ngudda ke mawahmawah." [Genesis 15:5] Abraham bidjalwoybukwoni kore kunwok nuye dja minj marrkbaworrimeninj.

19 Nungka kukburrburreni kore kunburrk nuye bu darnkih karrowen. Nungka bu mandjewk nuyeni 100 bu wanjh nungka kohbanjminj duninj, dja mak biburrbuni ngalbu ngalbininj kobeng nuye Sarah wanjh walirrngwarreni. Dja nungka ngaleng, Abraham bidjalwoybukwoni God, bu minj marrkbaworrimeninj.

20 Nungka minj bikewkmeninj God, dja biburrbuni munguyh kore God bimarnewokkurmerrinj nuye, dja mak bidjalwernhwoybukwoni. Wanjh kunu djalmurrnggrayekminj, dja mak bikuniburlumi God.

21 Nungka wernhburrbuni bu woybukkih, nawu God kabendjalwon kore benmarneyingkihwokkurmerrinj bu nungka kadjalkurduyime kore kundulkarre nuye.

22 Nungka bidjalwernwoybukwoni God, bu kunmekbekenh wanjh bimbuyindanj, "God bimarneyimi namakni kore nungka." [Genesis 15:6]

23 Manmekbe manu mahni kunwok kabimbuyindi, wanjh minj kunukka kabiyolyolme nawu Abraham nadjalkudji.

24 Mahni kabimbuyindi bu ngadkenh kadberre warridj. Ngad nawu karriwoybukwon God nawu birrolkkayhweng Jesus nawu Kawohrnan Rowk kadberre kore dowengbeh, wanjh kunmekbekenh God wanjh kanmarneyime bu ngad karrimak.

25 Jesus wanjh doweng bu God kumekbekenh bikurrmeng benbidkenwong bininj bu birribom, dja wanjh doweng bu kunwarrekenh ngad kadberre. Kalukburrk God birrolkkayhweng ba bu nungka kanmarneyime ngad karridjalmak bininj kore nungka.

5

God Kanmakwam Kadberre Dja Kanwong Nuye Kunmodmikenh Romans 5:1-11

1 Bolkkime ngad nawu karriwoybukwon Jesus Christ nawu Kawohrnan kadberre, wanjh kunmekbekenh kunu God kanmarneyimeng bu ngad nawu karrimak bininj nuye. Nungka wanjh kanmarnbom ba minj karriyawoyhidko kore Jesus Christ nuye.

2 Ngad karriwoybukwong nungka, dja kunmekbekenh kunu karridjaldi bolkkime kore God kandjalwernkongibun duninj, dja karriwernhnjilngmarmarr bu karriburrbun kaluk yerrekah karridjarrkdi kore heaven nungka dorreng.

³ Dja kunbuyika mak bu bolkkime ngad karridjalnjilngmakmen munguyh bu kunyid kanmarnebebme kadberre! Yoh, dja karriyime bu manbu kunyid wanjh kanmurrngayekwon kadberre ba minj karriwarnyakmulewarren.

⁴ Bu ngad minj karriwarnyakmulewarren kore karridjalkurduyime kunmak, wanjh kunukka God kanmarnenijlmgak duninh kadberre. Dja kuhnikenh karriburrbun bu nungka kaluk yerrekah kakurduyime kunmak kadberre.

⁵ Ngad wanjh karriburrbun kuhni kunwoybuk duninh. God korroko kanwong kadberre nawu Namalngmakkaykenh nuye, wanjh kunmekbekenh kunu nungka kandjalmarnedjare, yiman kayime kandjalkangebarlike kadberre.

⁶ Kandibekka! Bu Christ doweng kadberre, wanjh njalekenh? Yiddok kunmak karriyimeninj munguyh? Burrkyak! Ngad nawu karringudjwarreni duninh dja ngad minj karrimarnedjareniwirrinj nawu God, wanjh kunmekbe djalyimerranj kore nungka bolknameng, wanjh Christ doweng kadberre.

⁷ Yiddok nakudji bininj kabidjalmarnedowen nabuyika? Kunubewu kabidjalmarnedowe nabuyika bininj nawu nadjalmak duninh, dja kunubewu burrkyak.

⁸ Dja Christ doweng kadberre. Kandjalmarnedoweng kadberre rowk ngad bu karridjalwarreni bininj, nawu munguyh karribakkeyi mankarre nuyeni God. Kunmekbekenh kunu karriburrbun bu God nawu kandjalmarnedjareminj bulkkidj duninh kadberre.

⁹ Dja mak kunbuyika karriburrbun. Jesus nungan kanjkurmerrinj kadberre, kanmarnekurlbawam ba bu God kanmakwam kadberre. Wanjh bolkkime karriburrbun nungka Jesus nawu kannghehkeng wanjh kanyawoyhngheke kore God nuye kandungeh.

¹⁰ Bolkkime, ngurriburrbu bu kuninjkukenh. Ngad wanjh karriwidnarreni God bu kerrngehkenhni, dja Jesus, nawu beywurd nuye, wanjh doweng kadberre, ba bu kunukka God kanyawoyhmarnbun kadberre karridabbolk kore nungka. Bolkkime Jesus nungka nawu kadjaldarrkid munguyh, wanjh kunmekbekenh ngad karriwernhburrbun kuhni wanjh kundjalwoybuk duninh bu kannghehkenh munguyh.

¹¹ Bolkkime wanjh Jesus Christ nawu Kawohrnan Rowk kadberre kanmarnbom bu karridabbolkminj kore God. Ngad minj karriyawoyhidko, wanjh bolkkime ngad karrihdjalnjilngmarmarr!

Ngad Wanjh Karridowerren Rowk Yiman Nawu Nayungkih Adam Dja Jesus Kanmimbiwon

Romans 5:12-21

¹² Nadjalkudji bininj nawu Adam biwokweng God bu kerrngehkenh duninh kondah kore kurorre wanjh doweng. Kunwarre kumwam, dja kunmekbebeh manbu kundowikenh kumwam dja warlahminj. Bininj birriwarlahkenh rowk kabirrikurduyime kunwarre wanjh kunmekbekenh kabirridjaldowerrinj rowk.

¹³ Bu kunkareni, bininj minj birrikarmeninj mankarre dja wanjh minj birribangmebakmeninj. Kaluk yerrekah God kanwong nuye mankarre. Dja kunkareni, bininj minj birribakkemeninj manbu mankarre kore kunmekbe minj karreyuwirrinj, dja ngaleng bedda birridjalyimi kunwarre munguyh.

¹⁴ Kunmekbekenh kunu manbu kundowikenh benmarnewohrnani bininj kerrngehkenh bu Adam kurduyimeng kunwarre, kunmekbe bolkyimi bu Moses kumwam. Kaluk bininj rowk birridoweng. Bedda ngaleng

birrikurduyimi kore kunbubuyikakenh ngarre kunwarre, minj karohrok kore Adam kurduyimi, dja bonj, birribaldjaldoweng. Kalukburrk, nabuyikawali bininj kumwam yerre, nawu Jesus Christ, dja minj nakka benerohrokniwirrinj nawu Adam. Wanjh bolkkime ngaye ngadjare ngabenbeneyolyolme benemekbe nawu benebokenh bininj, Adam dja Jesus.

15 Adam nungan nadjalkudji nawu bininj, dja kalukburrk nungka biwokweng nawu God, wanjh kumekbekenh karriwernkenh ngad nawu bininj rowk ngad kunu karribaldjarrkdowerrinj. Jesus Christ nawu nadjalkudjini wanjh kundjalbuyika duninj kurduyimeng. Bu nungka wanjh kandjalkongibuni kadberre wanjh God kanwon kundarrkid manbu ngad bininj kadberre bu djalburudjang. God nuye kunmakmak yurrhkeng rowk kore Adam kurduyimeng.

16 God kanwong kunmakmak bu djal burudjang, minj karohrok kore Adambeh. Adam nakka nadjalkudji wanjh kunwarre kurduyimi, dja kumekbekenh God bidjadmeng, wanjh Adam doweng. Wanjh ngad warridj karrirohrok nawu Adam kore karribakkabakke mankarre rowk manbu God nuye. Dja ngaleng God kandjalwong Jesus, wanjh kumekbekenh kunu kanmakwan ngad nawu karridjalwern bininj rowk!

17 Namekbe nakudji bininj bakkeng God nuye mankarre, bu wanjh kumekbekenh ngarreni, wanjh kundowikenh kabenmarnewohrnanken bu bininj rowk. Nawu nabuyika bininj, Jesus Christ, nadjalkudji kanmarnbom bu kanmalngmimbawong kadberre, wanjh bu bolkkime ngad yiman karrimarnewohrnanken ngarre kore karridarrkiddi. God kandjalkongibom bulkkidj duninj kadberre bu njalekenh kunu, bu nungka wanjh kanmarneyime ngad karrimak bininj bu nungka minj kangung, yiman kanmarnekurduyimeng bu djalburudjang.

18 Nawu bu nakudji bininj bakkeng God nuye mankarre bu kernghekenhni, wanjh kumekbebeh God kanwarrewam ngad bininj karidjalwern rowk. Dja nawu nabuyika bininj Jesus Christ biwokmarrkmey God dja mak kurduyimi kunmak duninj bu kuninjkunukenh, wanjh kumekbebeh God kanmarneyime nawu karridjalwern bininj karrimak dja mak minj kanbun kadberre, ba bu ngad karridjalmalngdarrkid.

19 Nakudji bininj nawu Adam, biwokweng God wanjh kumekbekenh kunu nawu bininj birriwern bu birridjalwarreminj. Nawu nabuyika bininj, Jesus, nakka nadjalkudji biwokmarrkmey God wanjh kunukka nungka kabenmarnbun birriwern bininj ba bu kabirriyimerran bu God kabenmarneyime birrimak.

20 God benwong bininj manbu mankarre nuye, ba bu yimankek birrirohrokmerreni kore birrikurduyimi. Dja bedda wanjh birridjalbakkeyi mahni mankarre nuye, dja bedda birridjalwernhwarreworreni! Wanjh kunu birriburrrurrinj bu bedda birridjalwarre bininj. Dja bu bedda birriwarreminj, God wanjh wernhdjareminj benwernhkongibuni munguyh.

21 Maninjmanu kunwarre wanjh benmarnewohrnani bedberre dja yiman bendungi wanjh birridoweng. Wanjh bolkkime God kanmarnewohrnani bu kunbuyikakenh nuye. Nungka kandjalkongibun, bu kumekbekenh kunu ngad karriwoybukwong Jesus Christ nawu Kawohrnani kadberre, dja God kanmakwan dja ngad karridjalmimbi munguyh kore nungka.

Kunwarrekenh Kanbun Dja Nawu Christ Kandarrkidwon

Romans 6:1-14

¹ Kunubewu nawu nangale bininj nawu mayaliwarre kayime, “Ngaye wanjh ngadjalkurduyime kore kunwarre ba bu ngaye ngamarnbun God nganbidyikarme munguyh bu kuninjkunukenh kore nungka ngankongibun.”

² Kuhni burrkyak! Dja kunukka ngad minj karriyime kore kunmekbekenh ngarre. Ngaleng ngadmandeleng kuhni karrimarneyimerren, “Ngaye kunu yiman ngadjaldoweng, wanjh kunukka ngaye minj ngayawoyhyime kore kunwarre bu bolkkime.”

³ Ngurrina, bu ngudda ngurrihmunkekadjung Christ Jesus dja mak bu ngudda ngurrikodjdjuhmekenh kore nungka, wanjh kunukka yiman ngurridjarrkdoweng bu nungka dorreng. Kuhni wanjh ngurriyingkih-burrbun.

⁴ Bu karridjarrkkodjdjuhmeng nungka Jesus dorreng, wanjh yiman ngad warridj kandidjarrkkukkurmeng kumidj bu nungka dorreng. Ngad yiman karridjarrkdoweng bu nungka dorreng. Kaluk God nawu Kornkumo, nawu nungka namakkaykenh duninh dja mak narrulkarrekimukkenh, wanjh birrolkkayhweng nungka kore kundowikenhbeh. Kaluk kuhni rowk kanmarnekurduyimerranj ba bu ngad dorreng karidjarrkdarrkidkerrngehme kore nungka.

⁵ Ngaye marneyime ngad bolkkime karridjarrkraworren kore nungka nawu kanmarnedoweng, wanjh kunukka woybukkih ngad wanjh karikukbelmerrinj dja mak karridjarrkdolkan bu nungka dorreng.

⁶ Kaluk karriburrbun yiman bu ngad karrimalngdoweng kerngeghenh, wanjh karridjarrkkukbarndanginj kore kundulk bu nungka dorreng, wanjh manbu kunburk kadberre yiman bularrbuyindanj ba bu ngad minj karriyawoyhbongdi kore karriyawoyhkurduyime kunwarrekenh kore kunburk ngarre.

⁷ Ngaye marneyime bu ngad yiman karridoweng, wanjh minj mak kunwarre kanyawoyhkarrme bu kanmarnbun karriyime kunwarrekenh.

⁸ Bu nawu ngad karridjarrkdoweng bu Christ dorreng, wanjh kunukka ngad karriwernhburrbun bu karrihdarrkidmimbi munguyh kore nungka.

⁹ Bu kuhni wanjh karrihburrbun bu God birrolkkayhweng nawu Christ kore dowengbeh, ba bu minj nungka kayawoyhdowe. Manbu kundowikenh minj kabiyawoyhmang nuye nawu Christ.

¹⁰ Nungka doweng bu kundjalkudjikenh bu kunwarrekenh, dja bolkkime wanjh nungka kadjalmimbi munguyh munguyh bu nungka kabenedjarrkdarrkidmimbi kore God.

¹¹ Wanjh kuninjkunu bu ngudda ngurriburrbu kore ngudmandeleng. Wanjh ngurrimarneyimerren, “Ngaye wanjh yiman ngarroweng, ba bu minj ngayawoyhyime kunwarre. Bolkkime wanjh ngaye nganedjarrkmimbi Christ Jesus dorreng ba ngaye ngakurduyime kore God kadjare.”

¹² Manbu kunwarre minj kayawoyhwohrnan ngudberre! Dja bolkkime, yuwn ngurrimarrkmang kore kunburk ngundjurrkan ngudberre. Ngurriburrbun manbu kunburk karrowen bu yerrekah, dja yuwn bu ngurrikurduyime kore kunwarrehwarre bu ngurrihdaldjare ngudmandeleng.

¹³ Yuwn bu mak ngudmandeleng munguyh ngurrimarnburren bu ngurrimarnedurrkmirri nawu nawarre kore ngurrikurduyime kunwarre bu kunburk ngudberre kadjare. Ngudda ngaleng ngurrikurmerimen kore God kadjare, nawu ngundolkayhweng kore kundowikenh, dja mak

ngurrimarnburrimen ba bu ngurrimarnekurduyime kore kunmakkenh nuye bu kunburrrk kadjare ngudberre.

¹⁴ God ngunkongibom ngudberre bulkkidj duninj, dja mak ngunmarnebgundjdanj kunwarre ngudberre. Kerrngehkenh wanjh ngurriwokmarrkmangi mahni mankarre, dja ngurridjalbarabuni kore kunwarrekenh ngunmarnewohrnang. Bolkkime burrkyak.

*Bu Ngad Karridjalkurduyime Kunmakkenh Kore God Kadjare
Romans 6:15-23*

¹⁵ Yikahwi nawu birrimayaliwarre bininj kabirriyime, “Mah, ngad wanjh karridjalkurduyime kunwarre bu kuninjkukenh kore God kandjalkongibun kadberre bu ngad minj karridowen.” Kuhni kabirriyime, dja burrkyak duninj!

¹⁶ Ngayolyolme ngudberre. Ngurriburru. Bininj nawu munguyh kabiwokmarrkmang nawu nakimuk bininj, wanjh yiman kayime nungka kakurrmerren kore kabongdikenh mahni bininj nawu kawohrn nuye. Wanjh karohrok bu ngudda ngurrimarrkmang kunwarre, wanjh kunu ngurribongdi, dja mak ngurridowen. Dja ngaleng bu ngurrikurrmerren kore God ngunbongkarrme, wanjh ngurrimarrkmang kunwok nuye, wanjh kunu nungka ngundjalmakwan.

¹⁷ Bu kerrngehkenhni, ngudda nawu ngurribongdi kore ngurrimarnedurrkmirri manbu kunwarre. Bu ngudda ngurribekgang mahni manbu kunwok kore Christbeh, wanjh ngudda ngurriwokmarrkmey kunkange dorreng. Ngadjalmanjbun God bu kuhni kunmekbekenh!

¹⁸ Nungka ngungehkenh kore ngurribongdi manmekbe manbu kunwarrekenh, dja wanjh bolkkime ngudda ngurrimarnedurrkmirri kore kunmakkenh, yiman kayime ngurribongdanginj kore God nuye kunmakmak.

¹⁹ Ngudda minj ngurriwerhnmurrngayekniwirrinj kore kukange, dja kunmekbekenh ngaye ngayolyolme kore bininjkenh nawu bedda kabirrihni kondah kurorre. Wanjh kandibekka, bu kerrngehkenh ngudda ngurrihdjalmarnedurrkmirri kunrayek kore kunwarrehwarre duninj, dja ngudmandeleng ngurriwarworreni bu ngurribakkeyi mankarre kore kunburrrk ngudberre. Wanjh bolkkime, ngaye ngadjare bu ngudda ngurrimarnburrimen ba bu ngurridurrkmirri kore kunmakkenh bu kunburrrkenh ngudberre, ba bu God ngunmarnbun dja ngurriyimerran ngurrimak bininj.

²⁰ Bu kunkare ngudda nawu ngurribongdi dja ngurrimarnedurrkmirri kore kunwarre, wanjh ngudda kunukka minj nangale ngunmarnbuyinj bu ngurridurrkmirriwirrinj kore kunmakkenh.

²¹ Kunmekbe ngurriyimi, dja ngurrikurduyimi manbu bolkkime ngudda ngurriyemengalmen, dja njale mak ngudda ngurringalkeng kore ngurrih-marnedurrkmirrikenh? Bininj nawu kuhni kabirridjalkurduyime, wanjh kunukka kabirrimalngdownen, dja wanjh bonj.

²² Bolkkime wanjh ngurribongyerrkmeng kore kunwarrebeh. Ngudda ngurriyimerranj yiman ngurribongdi bu ngurrih-marnedurrkmirri nuye God. Ngudda bolkkime djal God nuyekih bininj, dja kuhni wanjh nungka kunmak ngunwon ngudberre ba bu ngurridjarrkmalngmimbi nungka dorreng munguyh munguyh.

²³ Ngurrina, bininj nawu kabirrimarnedurrkmirri kunwarre, wanjh kunwarre kabenkarremulewam. Dja minj kabenwon kunmak! Dja ngaleng ngundjalwon kundowikenh. Dja kunbuyika kore God nuye wanjh ngunwon kundjalmak bu djal burudjang ngudberre! Nungka ngunwon ngudberre kundarrkid, bu ngurriyawoyhmalngmimbimen munguyh

munguyh nawu ngudda ngurridjarrkraworrinj kore Christ Jesus dorrengh nawu Kawohrnan Rowk kadberre.

7

Yuwn Karriyawoyhkurrmerren Kore Kunwarrekenh

Romans 7:1-6

¹ Kandibekka nawu karridangerrinj, ngaye ngadjare ngamulewan manbu manmekbe mankarre. Ngudda nawu ngurrihkarrme manmekbe mankarre bu ngudda wanjh ngurriburrbun kore kunmekbe ngaye ngahwokmenyime. Kaluk manbu mankarre wanjh kabenmarnewohrnan kore bininj bedberre nawu kabirridarrkid nawu minj birridowimeninj.

² Wanjh ngurriburrbu bu kuninjkukenh. Ngalbu daluk kabeneyo nawu nabininj kobeng. Manbu mankarre kore kayime ngaleng bu wanjh ngalbininj kobeng nuye nawu nungka kabimarnedarrkid. Bu namekbe nabininj kobeng karrownen, wanjh kunukka ngalbu ngalbininj kobeng nuye kadjalkurduyime kore ngalengman kadjare.

³ Bu nabininj kobeng kahdjaldarrkid, wanjh ngalbu daluk yuwn bu kabenemarren nawu nabuyika bininj, dja wardi kunukka bininj birriwern kabirrimarneyime ngalmekbe daluk ngalwarre duninj. Dja bu ngarre nabininj kobeng karrownen, wanjh kunukka ngalbu ngalbininj kobeng ngarre kamak bu kabimang nabuyika nawu bininj, kunukka kunmak. Manbu mankarre minj kabiwelengname.

⁴ Mah, wanjh nawu karridangerrinj, ngaye marnehmarneyolyolme kore kahkarremenmenyime manbu kumekbe kayime ngudberre bolkkime. Ngudda ngurrikukbelmerrinj nawu Christ, dja wanjh doweng kore kundulk cross, wanjh yiman kunukka ngudda dorrengh ngurridjarrkdoweng, wanjh kunukka manbu manmekbe mankarrekare minj ngunyawoyhkarrme ngudberre. Wanjh God birrolkkayhweng Christ kore kundowikenh, dja bolkkime ngudda yiman kayime ngalbininj kobeng nuye. Wanjh kunmekbekenh kunu karrikurduyime kunmakkenh nuye nawu God. Mahni mankarre minj mak kanwernhkarrme yiman kayime bininj kabikarrme ngalbu ngalbininj kobeng nuye.

⁵ Kerrngehkenhni, ngad wanjh karridjareni kore kunburrk kadberre djareni munguyh. Ngad karridjaldjareni karrikurduyimi kore kundjalwarre duninj, dja mak ngad karridjareni karridjalbakkeyi manbu mankarre, wanjh kunukka ngad karridoweng munguyh.

⁶ Manmekbe manbu mankarrekare ngad yiman kanbongkarrmi yerreh, wanjh bu bolkkime ngad minj karriyawoyhbongdi. Ngad wanjh yiman karridoweng kore mankarrebeh, wanjh manbu mankarre minj kanyawoyhkarrme kadberre bolkkime. Kaluk ngad karridjaldarrkidminj kore God bu bolkkime, nawu ngad yiman karrimarnebongdi nuye, bu karrimarnedurrkmirri nawu nungka kore kunkerrngehkenh Namalng-makkaykenh nuye dorrengh, dja minj karriyawoyhmarnedurrkmirri kore mankarrekare manbu God nuye kabimbuyindi.

Karrimarnburrimen Karridjalbawon Kunwarre

Romans 7:7-13

⁷ Baleh kuhni bu kakarremenmenyime? Yiddok mankarre kanmarnbom kadberre karrikurduyime kore kunwarrekenh? Burrkyak. Kaluk manbu mankarre kanbengdayhke ba bu karriburrbun bu njalekenh manbu kunwarre. Bu yiman manbu mankarre yakniwirrinj, wanjh kunukka ngaye minj ngaburrbuyinj bu ngakurduyimeninj kunwarre. Manbu mankarre kore kahyime, "Yuwn bu ngurrimanjgun yehyeng nawu

birribuyika bininj bedberre.”* Wanjh bu bolkkime ngaye ngahburrbun bu kuhni ngakurduyimekenh, wanjh ngaye djal kunwarre ngayime.

⁸ Bu ngaye ngaburrbun kunmekbe kunmayali ngarre, wanjh kunukka yiman kunwarre ngandjurrkkan ngaye. Wanjh mankarre nganwon kore kunmayalibeh, dja mak kunwarre kore nganmarnbun ngamanjngun yehyeng nawu birribuyika bininj bedberre. Yiman karreyakniwirrinj God nuye mankarre, wanjh kunukka yiman kunwarre minj nganbuyinj.

⁹ Kerrngehkenhni bu ngaye minj ngaburrbuyinj mahni mankarre, wanjh ngayimeng yimankek ngandarrkidwoyi. Dja bu mankarre kumwam, wanjh kunu kunwarre kumwam warridj bu kunmekbekenh ngaye ngabakkeng manmekbe manbu mankarre, wanjh ngaye ngabaldjal-doweng.

¹⁰ Wanjh manbu mankarre yimankek ngandarrkidwoyinj, dja burrkyakni. Wanjh kunukka yiman ngandjalbom bu ngarroweng.

¹¹ Manbu kunwarre ngandjalkoweng. Ngaye ngayimeng yimankek manbu mankarre wanjh ngandarrkidwon bu ngaye ngaburrbuni manmekbe mankarre. Wanjh kunukka yiman ngandjalbom ngaye kore manmekbe mankarre kabimbuyindi, wanjh ngaye ngandjadmeng, dja ngabalmalngdoweng.

¹² Kaluk manmekbe mankarre mandjalmakni duninj. God kurmeng mahni mankarre nuye nawu ngad bininj kadberre, ba bu karriburrbun kore mandjadkenh nuye.

¹³ Wanjh manmekbe manbu manmakni mankarre, yiddok ngaye nganbom? Bu burrkyak. Bu mahni mankarre wanjh kanbukkang kadberre bu manmekbekenh kunwarre wanjh mandjalwarre duninj. Ngad karribakkeng manbu mankarremak duninj. Wanjh kunmekbekenh kunu karridoweng. Manmekbe mankarre kanbengdayhke bu kunwarrekenh wanjh kanwarrewon.

*Bu Paul Kayolyolmerren Wanjh Kunu Kabenyolyolme Bininj Rowk
Romans 7:14-25*

¹⁴ Karriburrbun mak bu manmekbe mankarre wanjh kore Godbeh, ngad wanjh djalbininj duninj bu karridarrkiddi kore kunburrk kadberre. Wanjh kunukka yiman karrimarnedurrkmirri, dja kandjalbongkarrme kunwarrekenh manbu ngalengngarre.

¹⁵ Kaluk ngaye minj ngawernhburrbun bu njalekenh ngaye ngakurduyime. Ngaye minj ngadjare bu ngakurduyime kunwarre. Dja bonj, ngadjalkurduyime kore kunwarrekenh ngarre. Kaluk ngayeman ngawirrihime bu kumekbekenh ngakurduyime.

¹⁶ Bu ngaye ngahkurduyime kunwarre dja minj ngaye ngadjare ngakurduyime, wanjh ngaye ngayime, “Yoh, manbu mankarre wanjh mandjal-mak, wanjh kunmekbekenh ngaye ngadjaldjare.”

¹⁷ Mah wanjh, bu ngayolyolmerren wanjh kuhni ngayime, “Bu bolkkime ngakurduyime kore kunwarre, wanjh kunukka minj ngayemandeleng, dja kunwarre manbu nganmarneni kore kukange ngardduk, wanjh makka kakurduyime.”

¹⁸ Kaluk ngaye ngaburrbun bu ngaye nawu djalbininj duninj, nawu munguyh ngakurduyime kore kunwarre. Minj ngakarreme manbu kunmayalimakkenh. Ngaye ngadjare ngakurduyime kore kunmakkenh ngarre, dja burrkyak. Kuhni ngaye ngadjalbarabun munguyh.

* 7:7 Exodus 20:17

¹⁹ Ngaye ngadjare ngakurduyime kore kunmak, dja djalburryak, minj ngaye ngayime kunmekbe. Ngaye minj ngadjare ngayime kore kunwarre, dja ngaleng wardi ngadjalkurduyime bu kunmekbe!

²⁰ Ngaye ngadjalkurduyime njalehnjale kore minj ngawernhkukdjare kore ngakurduyime. Kunukka minj ngayemandelengbeh, dja kunubewu bu kunwarre ngranmarneni kore kukange ngardduk.

²¹ Bu kuhni munguyh kahdjalkurduyimerran ngardduk, bu ngahdjare ngakurduyime kore kunmak, wanjh nawu nawarrewarre kamdjalre bu darnkih munguyh kore ngaye.

²² Dja ngaleng, ngabekkarren bu kanjdji baybaywi, kore ngaye ngardduk kukange, wanjh ngahdjalnjilngmak duninj manbu mankarremakkenh kore God nuye.

²³ Dja ngamayalinarren bu manbu kunburrk ngardduk kadjare kunbuyika bu kayime kore kunwarre. Wanjh kunukka yiman kore ngardduk kunburrk dja kunmayalibeh, wanjh yiman kayime kabenedurren! Bu kunmekbekenh kunwarre kunmayali kore ngaye ngahkarrme, wanjh minj nganbawon bu ngare. Ngaye yiman kayime ngahbongdi!

²⁴ Mahni kawarre duninj! Wanjh kunukka ngaye ngadjalnjlilngwarremen bu kuninjkukenh, bu ngaye ngaburrbun, minj nangale bininj nganngheke kore mahni manbu kunburrk bu ngankan kore kundowikenh?

²⁵ Mah, wanjh karrimanjbun God. Jesus Christ nawu Kawohrnan Rowk kadberre wanjh nganngheke ngaye. Ngurrina wanjh, kore ngaye ngahburrbun. Ngaye ngadjaldjare ngahdurkmirri kore mankarre nuye God. Dja ngaleng manbu kunburrk ngardduk kadjare kakurduyime kore kunwarre, wanjh kunukka yiman ngaye ngadjalngongdi, dja yikahwi ngadjalmarnedurkmirri kore kunwarre.

8

Nawu Namalngmakkaykenh Kanwon Nuye Kundarrkid

Romans 8:1-17

¹ Ngudda nawu ngurrikukbelbmerrinj nawu Christ Jesus, wanjh kunukka God minj ngunyawoyhwelengname bu kunwarrekenh ngunbunkenh ngudberre.

² Kaluk nawu Namalngmakkaykenh kanwon mankerengeh mankarre kadberre. Bu nungka kanmalngmimbiwon kadberre bu ngad nawu karridjarrkkukbelbmerrinj kore Christ Jesus. Bu bolkkime ngad karribongyerrkmengbeh kore manmekbe manbuyika mankarre manbu kundowikenh ngarre, manbu ngad kanwarrewam dja wanjh kunu ngad kanmarrebom bu karrimalngdoweng.

³ Manmekbe manbu mankarrekare minj kanbidyikarmeninj kadberre. Bu njalekenh? Kaluk bininj rowk kabirridjaldjare kabirrikurduyime kore djalbedmandeleng, wanjh manmekbe mankarre minj baleh mak bedda kabirriwokmarrkmang. Wanjh bu bolkkime, God bimmunkeweng nawu beyward nuye bu yimerranj bininj duninj yiman kayime nawu ngad karridjalwernhwarre duninj bininj. God bikanjkurrmeng ba bu kuhni kanmarnebengmidjan kunwarrekenh kadberre. Kunmekbe kurduyimeng bu ngudjyakwong kunwarrekenh kore bininj kadberre rowk.

⁴ Kaluk God kuhni kurduyimeng ba bu bolkkime ngad karridjalngurdmen kore kunmayali kadberrekih kanmarneyime, dja mak ngad karryime kore mandjad duninj nawu Namalngmakkaykenh kayime,

wanjh kunukka ngad nawu bininj nuye karridjalyimerran karrimak dja karrikurduyime mandjad kore mankarre kanhmarneyime.

⁵ Nangale nawu bininj kahdjalburrbun kore nungan kadjaldjare, wanjh kunukka kahdjalkadjung kore nungan nuye kunmayali kore kunwarre. Dja bu ngad karriburrbun kore Namalngmakkaykenh kanbengdayhke, wanjh kunukka nungka kanbukkabukkan mandjad duninj kadberre manbu ngad karrijdare.

⁶ Nangale bininj munguyh kadjalburrbun kore nungan kadjare kore kunmayali kunwarre, wanjh kunukka kabaldjaldowen. Dja bu ngad karridjalburrbun munguyh manu kunmayali kamdolkkkan kore Namalngmakkaykenhbeh, wanjh kunukka ngad kanmarnbun kore karrimalngkerneghemen dja mak karrikarme kunmodmikenh dorrengh nuye.

⁷ Bininj nawu kahburrbun kore kunmayali kunwarre munguyh, wanjh nakka God kabeneyidko. Namekbe bininj minj nawu kabiwokmarrkmang God, wanjh nungka minj kakarrme kore kabiwokmarrkmangkenh nawu God.

⁸ Bininj nawu kadjalkurduyime kore djal nungan kadjare, wanjh minj kakarme kundulkarre nuye bu yimankek kabinjilngmarnbun nawu God.

⁹ Ngudda bonj, minj ngurrikadjung kore ngudman ngudberre kore kunwarre kunmayali duninj. Burrkyak, ngudda wanjh ngurrikukbelbmerrinj nawu Namalngmakkaykenh. Ngunmarneni kore kukange ngudberre. Woybukkih, bu Christ nuye Namalngmakkaykenh minj kabimarneni nawu nangale bininj, wanjh kunukka nawu bininj minj nuye nawu Christ.

¹⁰ Ngudda ngudberre, manbu kunburrk wanjh ngurribaldjaldowe kore kunmekbekenh bu ngurribakkeng manbu mankarre nuye God. Dja Christ kani kore kunkange ngudberre, wanjh kumekbekenh kunu God kayime ngudda ngurrimak dja mak kunmalng ngudberre ngurrimalngkernegheminj.

¹¹ God birrolkkayhweng Jesus kore dowengbeh. Yoh, nungka wanjh birrolkkayhweng Christ kore kundowikenhbeh, wanjh karohrokwi nuye Namalngmakkaykenh bu ngunmarneni kore kukange ngudberre, wanjh kunu nungka ngundarrkidwon manbu kunburrk ngudberre kore kundowikenh.

¹² Mah wanjh, nawu karridangerinj rowk ngardduk, bu bolkkime ngad wanjh karrimayaliborledmen, dja minj karriyawoyhkurduyime kore ngadman kadberre kunmayali kunwarre bu kanmarneyime munguyh.

¹³ Bu ngad yiman karridjalkurduyime kore kunwarre kunmayali kanmarneyime kadberre, wanjh kunukka ngad karribaldjaldowen. Dja ngad karriyimen kunbuyika. Nawu Namalngmakkaykenh nakka wanjh kanbidiyikarme kadberre bu ngad kunburrk kadberre karridjalrayekworrimen ba minj karriyawoyhkurduyime kunwarre, wanjh kunukka karrimalngmimbi munguyh.

¹⁴ Kaluk bu God nuye Namalngmakkaykenh nungan kabidjalkan bininj, wanjh nungka wurdyaw nuye God.

¹⁵ God ngunwong ngudberre nawu Namalngmakkaykenh nuye, dja nungka minj kadjare ngunbongkarme ngudberre bu ngurrimarnedurrkmirri kore kuntele. Kuhn bu burrkyak duninj. Namalngmakkaykenh ngunmarnbun bu ngurriyimerran bebeywurd nuye God, bu ngudda kunu ngurribalmarnekayhme kore God ngurriyime, "Ngabba! Ngudda nawu kanbornang ngaye."*

* 8:15 Nawu kore Aramaic birriyimi, "Abba!" dja kamenyime "Ngabba!"

16 Nawu God nuye Namalngmakkaykenh kanmarneyime kore ngad kadberre kunmalng bu kayime woybukkih ngad wanjh wurdwurd nuye God.

17 Bolkkime wanjh ngad wurdwurd nuye God wanjh nungka Christ karridangerrinj. Dja God kanberrebbom kadberre kore nuye kunmakmak nawu kurrmeng kadjedjenyo Christ nuye. Bu karriraworren Christ dja mak karohrok karridjakkbekkan yiman nungka yimeng, wanjh kaluk God kankurrme ba bu ngad karridjarrkdi Christ dorrengh kore kubolkmak. Bolkkime, wanjh kuhni bu kundjalyahwurd dunijnh bu ngad karrirohrokme kore kunmakkenh mandulmuk bu God kanmarnekurduyime yerrekah.

*Kaluk Yerrekah God Kankan Kore Kunmakkenh Nungka Nuye
Romans 8:18-27*

18 Ngaye ngaburrbun bu kunyid karrikarme bu bolkkimekenh wanjh kundjalyahwurd. Dja bonj, karridjalburrbu bu kaluk God kanmarnekurduyime kunwernhmak dunijnh.

19 Nawu yehyeng rowk ngarre God marnbom kadjare kandiburrbun, ngad nawu nuye wurdwurd. Bu bolkkime, wanjh kabirridjalmadbun bu nungka kankurrme kumekbe kore kurobbewarradj.

20 Nawu God wokkurmerrinj bu yimeng kondah djal kurorre, dja yehyeng rowk nawu God marnbom, dja warreminj dunijnh. Dja kubolkwarlahkenh kahdjalmadbun kalukburrk bu yerrekah God nungan kabolkkerrngehme. Wanjh God kayawoyhbolkmarnbun bu yerrekah.

21 Kaluk yerrekah bu God kakurduyime kundjalmak dunijnh kadberre, kore wurdwurd nuyekih bu ngad kanmarnbun kadberre karrini kore kundjalmak. Wanjh kunukka kore kubolkwarlahkenh ngarre kamarnbuyindan bu kunmak rowk, minj njale mak bu kabalyawoyhdowerren. Kuhni karohrok bu God kanbongyerrkke ngad nawu nuye wurdwurd dja mak karrire kore kunmakkenh nuye kore kunmakmak.

22 Wanjh kunukka yiman kore kudjalbolkwarlahkenh rowk yiman kahdjakkbekkan munguyh. Mahni yiman kayime daluk kadjakkbekkan bu kayawmang nawu wurdyaw. Kunmekbe kunu kuhni bu kadjalkurduyimerran bu bolkkimekenh ngarre munguyh.

23 Wanjh ngad kunmekbe kadjalrohrok warridj kore karrikurduyime ngadmandeleng. Ngad wanjh ngokko karrihkarme nawu Namalngmakkaykenh. Namekbe wanjh Nayungkihni bu God kanwong kadberre. Bu ngad wanjh munguyh karrihdjalnalkkini bolkkime kore ngadmandeleng bu karrihdjalmadbun nawu God bu kanmarnbun kadberre ngad nawu nungan karribebeywurd nuyekih kore mandjad nuye, dja mak kanmarnbun kadberre bu kanyawoyhkerrngehme.

24 Ngad nawu karriwoybukwong God nungka nawu kanngheheng kadberre. Bolkkime ngad karridjalwoybukwo munguyh dja mak karrihdjalmadu kore nungka kayakwon rowk. Bolkkime ngad wanjh ngarrimadbun bu nungka kanmarneyakwon rowk. Dja ngaleng ngad ngokkokenh karriyingkihngangi kore karrimadbun.

25 Med kuhni, God minj bangmeyakwoyinj rowk. Bu ngad karriwoybukwon God wanjh kunukka ngad karrihdjalmadbun bu nungka yerrekah kore kakurduyime.

26 Ngad nawu karrihgudjwarre dunijnh nawu nuye Namalngmakkaykenh kanbidyikarme kadberre. Ngad minj karriwernhburrbun kore mandjad dunijnh bu karrimarnedi yiwarrudj nuye God. Wanjh nawu

Namalngmakkaykenh nuye kabenewokdi nungan God kore ngad kadberrekenh, bu kabimarnenalkbunkenh kore God dja mak kabimarnekayhme, nungka minj njale kawokkiyime kore nungan kakarrenceybun.

²⁷ Kaluk God nungan kankangenan kore kukange kanjdji baybaywi kadberre, dja mak nungka ngokko kaburrbun kore nungan Namalngmakkaykenh kayime bu kadjaldi yiwarrudj kadberre kore God kadjare.

God Kanwernehkarrme Kadberre Ba Karridjarrkni Kore Nungka Munguyh Munguyh
8:28-39

²⁸ Ngad karriwernehburrbun bu kuhni woybukkih duninj God kankayhmeng kadberre kore kerngeghkenhni nungan yingkihkarremarnbom, ngad nawu karrimarnedjareminj. Kaluk God kanmarnekurduyime kumak kadberre kore njalehnjale kanmarnekurduyimerran, dja mak wardi kunyidkenh kambembe kadberre.

²⁹ Bu kunyungkihni wanjh God kanyingkihburrbuni ngad kadberre dja mak nungka kanyingkihmarnekarrremarnbuni kore ngad kadberreni, bu kuhni nungka kanmarnbom kadberre ba bu karriyimerranj karridjarrkrohrok nawu Beywurd nuye, nawu nungka kayimerran nawernwarre duninj kadberre nawu karriwarlahkenh bininj nuye.

³⁰ Yoh, nungka wanjh kandjarrngbom dja kankurmeng kore nungka kore yingkihkarremarnbom. Nungka wanjh kankayhmeng kadberre, wanjh kanmarneyimeng ngad nawu karrimak kore nungka. Nungka kayime bu ngad karrimak bininj, bu nungka nawu kanmarnekurduyimeng kundjalmak duninj nuye.

³¹ Wanjh baleh ngad karriyime bu kuninjkunukenh God kanmarnekurduyimeng? God nungan kanmakwan kadberre, minj nangale nabuyika kanwarrewan kadberre.

³² Karriburrbun bu nungka bibawong nawu beywurd nuye bu doweng ngadkenh kadberre rowk. Nungka bidjalbawong doweng. Wanjh kunu karriburrbun nungka nawu mimkongiwern dja mak kanwon yehyeng rowk nawu kadberre bu Christ dorrengh.

³³ God nangandeleng kandjarrngbom kadberre! Wanjh minj nangale mak bininj kanwelengname kadberre. God nungan wanjh kanmarneyime bu ngad karrimak bininj nuye!

³⁴ Wanjh minj nangale bininj kandjadme bu bolkkime. Christ Jesus minj kandjadme! Nungka djaldoweng dja mak kumekbekenh nungka God birrolkayhweng kumidjbeh, wanjh bikurmeng kore kukun nuye God, dja mak Jesus kanhmarnekareyolyolme kore God bu ngadkenh kadberre.

³⁵ Wardi ngurridjalburrbu bu kuninjkunukenh. Minj nangale mak kanyerrkke kore God kanmarnedjareminj duninj. Bu yiman ngad karrihkarrme mandjalwern kunyid, yiddok kanyerrkke ngad kore God kankarrme? Burrkyak, minj njale mak kanyerrkke. Dja mak bu kunrayek kawernmerren kadberre, kunubewu mak bininj kandiwidnan kadberre, dja mak ngad minj karrikarrme manbu manme dja kunmadj, bu kunubewu bininj karridjare kandibun kadberre, bu yiman kumekbe kamarnekurduyimerran kadberre rowk, wanjh bonj, minj njale mak kankuklarlmang bu kuninjkunukenh kore God kanmarnedjare bulkkidj duninj.

³⁶ Ngurriburrbun manmekbe kunwok kore bimbuyindanj yimeng, "Ngudda nawu God. Bininj kandidjaldung kadberre munguyh kore nguddakenh. Bedda yimankek kabirridjalyime ngad yiman mayh nawu sheep bu kandidjalbun munguyh." [Psalm 44:22]

³⁷ Bonj. Wanjh Christ nungan kandjalmarnedjare kadberre munguyh munguyh, ba bu ngad wanjh karridjalwinhme. Minj njale mak kanyur-rhke dja mak minj kanbularrbun yerrekah.

³⁸⁻³⁹ Ngaye wanjh ngawernhburrbun kuhni bu kunwoybuk kore God kandjalmarnedjare kadberre bu djal munguyh munguyh. Bu ngad karridarrkiddi dja mak bu karridowerren, nungka munguyh kandjalmarnedjare kadberre. Minj nangale mak kabingurdke God bu kandjalmarnedjare. Nawu angels nuye God minj bedda kabirringurdke. Dja mak nawu namarnde rowk minj kabirringurdke. Yehyeng nawu bolkkimekenh, dja mak nawu kambebme bu kaluk yerrekah wanjh minj kabingurdke kore kanmarnedjare. Dja mak nawu birridulkarrekimukkenh duninj minj kabirringurdke. Nawu mak yehyeng rowk kondanjkuu kororre kahdi minj kabingurdke nawu nungka. Nawu yehyeng rowk nawu kahdi kore heaven minj kabingurdke. Yehyeng nawu mak kahdi kore kanjdji duninj minj kabingurdke God bu nungka kandjalmarnedjare. Bonj, minj njale mak kabingurdke God bu kandjalmarnedjare bulkkidj duninj. Nungka wanjh kandjalmarnedjare bu kunmekbekenh kore karridjalbelbmiyindi kore Christ Jesus nawu Kawohrnan rowk kadberre.

9

Bu Paul Benmarnenalkbuni Nawu Jews Bininj Nuye

Romans 9:1-5

¹ Ngaye bininj nuye Christ marneyime ngudberre bu kunwoybuk duninj. Ngaye minj ngakurren dja nawu Namalngmakkaykenh ngan-marneyime kore kukange ngardduk bu ngawokdi bu djal kunwoybuk.

² Ngayolyolmerren bu ngaye ngadjalwernhnjlingwarreminj bulkkidj duninj bu ngabenburrbun nawu ngarridangerrinj ngardduk, dja bedda nawu kabirriwirrihme Jesus Christ. Ngaye wanjh ngabendjalmarnenalkbun bedberre munguyh.

³ Ngaye ngadjare bu ngardduk ngarrimud dja mak nawu ngarriedbo bu bininj birriyimerra nuye Christ. Ngadjare God kabenmarnbun bu kabirribelbmerren nawu Christ. Wardi God ngankukburriwe kumekbekenh kore ngaye nganebelbmerren ba bu bedda mak kabirridjarrkbelbmerren. Bonj, ngakanjurrmerren bedberre! Wardi God nungan nganwarrewan ba bu bedda kabirridjarrkbelbmerren nawu Christ.

⁴ Bedda wanjh Israel nawu bedberreni mawahmawah. God benmarneberrebburrinj bu benmarnedjareminj benmey. Wanjh benmarnbom wurdyaw nuye. Warridj God benmarnekukbukarrinj bu birrinang nungka bu Namakkaykenh duninj. God benmarnewokkurrmeng bedberre, dja mak benwong kore mankarre nuye, dja benbukkang bu bedda birrimarneboddangeni kore kunrurrk Temple ngarre. Nungka wanjh benberrebbuni nawu Messiah kabimunkewe bedberre.

⁵ Nawu Mawahmawah bedberre wanjh God bendjarrngbom. Dja bedda wanjh mawahmawah nuye nawu Christ kumwam danginj yiman kayime bininj yimerranj duninj. Kaluk nungka wanjh God duninj nawu kahbenmarnewohrnan bininj kore kubolkwarlahkenh rowk. Wanjh karridjalburlumen munguyh munguyh, wanjh Amen!

Njalekenh Yikahwi Bininj Minj Kabirriwoybukwon Nawu Christ?

Romans 9:6-29

⁶ God nungka yingikarremarnbom dja mak wanjh kurduyimerranj rowk. Minj kunwok nuye yakmeninj. Dja kandibekka! Abraham wanjh bikebmawahmeng nawu Israel, wanjh bonj, yikahwi bininj nawu Israel

benkebmawahmeng, nakka wanjh minj woybukkihniwirrinj bu nuyeni bininj duninjh.

⁷ Dja mak yikahwi nawu Abraham benkebmawahmeng nuye nakka wanjh minj nungka nuye kore kukangebeh bedberre. Kuhni wanjh God bimarneyimeng Abraham, bu yimeng, "Isaac nawu yibornan, wanjh nungka namekbe nanubeh ngurrbenmeng nawu ngurrbenkebmawahme bininj kore kunngey ke." [Genesis 21:12]

⁸ Kuninjkuwu bu ngahyime. God biyingkihberrebbom nawu Abraham bu nungka kabibornan Isaac, dja nawu Isaac kabenbalkarrme birridjalwern bininj nawu mawahmawah mak nuye. Wanjh kurduyimmerranj, dja nawu bininj benkebmawahmeng Isaac wanjh nakka woybukkih duninjh benkebmawahmeng Abraham. Birrimekbe wanjh birridjalkudji nawu God benyolyolmeng, dja nawu birribadbuyika birrinamudni nuye nawu benkebmawahmeng wanjh nakka nanu minj Abraham nuye duninjh. Dja bedda God nakka minj benmarnewokkurrmerrinj bedberre.

⁹ Ngurriburrbu kore God yimeng bu kerrngehkenhni bimarnewokkurrmerrinj kore Abraham, bu yimeng, "Kaluk yerrekah bu ngarrungname ke wanjh ngamayowhdurndeng, bu ngalbininj kobeng ke Sarah kayawmang narangem." [Genesis 18:10]

¹⁰ Dja mak Rebekah benbeneyawkwang nararangem bu benedjarrkdanginj kore nadjalkudji kornkumo benewoneng, nabininj kobeng ngarre Isaac nawu kankebmawahmeng kadberre.

¹¹⁻¹² Bu Rebekah minj benbenembangmeyawmayinj, dja benedjarrkmokenni kore kuwarlirng ngarre, wanjh God bimarneyimeng, "Nawu nawernwarre wanjh nakka kabimarnedurrkmirri nawu nayahwurd". [Genesis 25:23] Benemekbe wurdwurd bokenh minj mak benebangeyimeninj kore kunmakkenh dja kore kunwarrekenh. Kab kaluk kunukka njalekenh God kumekbe benbenemarneyimeng berrewoneng? Kunukka God nungan kanbukkan bu nungan kabenyinkinghdjarrngbun bininj nawu kabirriyimmerran nuye. Bininj minj kabirrimarnburren bedmandeleng bu kabirriyimmerran bininj nuye, dja nungka ngaleng wanjh kabendjalmarnbun.

¹³ Ngaye ngayolyolme kore mankarre bimbuyindanj bu yimeng, "Ngaye ngadjalmarnedjareni Jacob, dja minj ngamarnedjare Esau." [Malachi 1:2-3]

¹⁴ Kaluk baleh kab ngad karriyime? Yiddok kunubewu God minj namak bu kandjadme? Burrkyak. Yuwn kunmekbeh karriyime.

¹⁵ Kariurrbu bu baleh God bimarneyimeng Moses, "Ngaye wanjh ngabendjalkongibun nawu bininj bu ngabenmarnedjare, dja mak ngabendjalkongibun bininj nawu ngaye ngabendjarrngbom." [Exodus 33:19]

¹⁶ Wanjh God nungandeleng kabendjalkongibun bininj. Bininj minj kabirrinjilngmarnbun nungka dja mak minj bedda kabirridjirrkkan nungka, dja nungan kore kadjalkurduyime nungandeleng nuye.

¹⁷ Dja kariurrbu God bimarneyimeng nawu Pharaoh kore bimbuyindanj djurra yimeng, "Ngaye marnbom ngudda yingeykimukmen dja mak yibenmarnewohrnan birriwern bu kuhni burudjang, dja ngaye wanjh bu bularrbun rowk, ba bu birriwarlahkenh bininj kabirrinan ngardduk kundulkarre bu ngaye wernhyurhke duninjh. Dja mak ngandingeyburlume kunngey ngardduk kore kubolkwarlahkenh rowk." [Exodus 9:16]

¹⁸ Wanjh kunukka kariurrbun bu God kabenkongibun bininj kore nungan kadjare. Dja bu kadjaremen kore kunnjilng nuye, wanjh kabenmarnbun nawu bininj ba bu kabirrimarnebangmen kore nuye.

19 Med rerrih, dja kunubewu ngudda kandidjawan ngaye, “Adju, God nungan kabimarnbun nangale bininj kawarremen, wanjh kunukka minj God kabiwelengname namekbe bininj. Bu God bimarnbom namekbe warreminj, wanjh nahni bininj minj bidyikarmerrimeninj nungandeleng, dja God nungan nawernhdulkarrekimuk duninjh.”

20 Yuwn bu ngad kumekbeh karriyime, dja ngad kunu djal bininj duninjh. God nungan kanmarnbom, dja wanjh kakarrewarre bu karri-marneyime, “Ngayh! Ngudda njalekenh kanmarnbom kore yidjareni? Dja ngaye wanjh ngawarre!”*

21 Nawu bininj kamang manbu delek, bu nungka kamarnbun kore kunbid nuye nawu nawern nawu yiman kukbubuyika yiman banikkin yarrkka. Nakudji kukmakkaykenh dja nawu nabuyika wanjh nakka walakkih kukwarre. Dja woybukkih nahni bininj nuye bu kamarnbun kore nungka kadjare.

22 Kunnekke nungan God yiman kakurduyime. Kunubewu nungan God kabendjalbawon birrimekbe bininj bu kunwarre kabirridjalkurduyime bedman kabirridjalle kunkuyeng. Dja God nungka kabendjaldung bu kunmekbekenh, dja kabendjalmadbun yelehyeledj, wanjh yerreh kunu kabenbalbun kabenbularrbun rowk kore nungka benyinkihmarnekar-remarnburrinj. Kaluk bininj rowk wanjh kabirrikurdunan dja kabir-rimarneborlhme bu nungka narrulkarrekimuk dja warridj kabendung bininj kore kunwarrekenh bedberre.

23 Dja God kurduyime ng adkenh kadberre warridj nawu nungka kankongibun, dja kanmarneyinkihkarremarnbom bu karridjarrkni kore nungka nuye bu kunmakkaykenh nuye dorreng. Dja kunu karriburrbun bu nungka Namakkaykenh duninjh!

24 Yoh, bu ngadkenh, ngad nawu nungka wanjh kankayhmeng rowk kadberre, ngad nawu Jew dja bininj nawu minj Jew, wanjh nungka kandjarrkkayhmeng rowk.

25 Karriburrbu kore prophet nawu Hosea wanjh biwokbimbom kore God wokmulewarrinj, “Birrimekbe nawu bininj nakka minj ngaye ngardduk, wanjh bolkkime ngaye ngabendjalmarneyime, ‘Ngardduk bininj!’ Kaluk ngalmekbe daluk nawu ngaye minj ngamarnedjareniwurrinj, wanjh bolkkime ngaye ngamarneyime, ‘Ngaye marnedjareminj ngudda!’” [Hosea 2:23]

26 Dja mak kore kabimbuyindi, God wanjh kayime, “Kaluk birrimekbe bininj bu korroko birribekkani maninjmanu kunwok bu yimi, ‘Ngudda minj ngaye ngardduk bininj’, wanjh ngabenngeyibun, ‘Bebeywurd nuye God nawu karrarrkid munguyh munguyh.’” [Hosea 1:10]

27 Dja mak kabimbuyindi kore Isaiah, bu kayhmeng bu maninjmanu kunwok kore yime ng Israelkenh, yime ng, “Birridjalwern nawu Israel benkebmawahmeng, wanjh bedda birridjalmirndiwernminj duninjh, yiman kayime kunkayalanj manbu kore adjbud kahyo! Kaluk kunukka bonj, dja God kabendjalngehke birrimirndeyahwurd nawu nungka nuyekih.

28 Yoh, kaluk nawu Kawohrn Rowk kabendjadme dja kabenbun bininj rowk nawu kore kondanjku kurorre, dja werkwerrk kore nungan kakurduyime, dja mak kayakwon rowk.” [Isaiah 10:22-23]

29 Dja mak Isaiah yingkihburrbuni dja bimbom, yime ng, “Nawu Kawohrn Rowk, nawu Narrulkarrekimuk Duninj wanjh benbawong yikahwi bininj nawu karribenkebmawahmeng. Dja bu burryakniwurrinj, wanjh ngad karrikuyimerrangemeninj yiman kayime bininj nawu bir-

* 9:20 Ngurrina Isaiah 29:16

rikang kunred Sodom dja Gomorrah nawu God benbularrbom rowk.” [Isaiah 1:9]

*Bininj Nawu Minj Jews Birriwoybukwong Jesus
Romans 9:30-33*

³⁰ Kaluk baleh kuhni ngad karriyime bu kuninjkukenh? Birrimekbe bininj nawu minj Jews minj birridjareniwirrinj bu bedda minj birriwokmayi God nuye mankarre, dja bolkkime bedda kabirridjalwoybukwon God. Yiddok kunu nungka bolkkime kayime bedda birrimak bininj kore nungka?

³¹ Dja bininj nawu Israel benkebmawahmeng, munguyh birridjareni bu yimankek birrimakniwirrinj, kore birriwokmayi God nuye mankarre, dja minj God benwernhmarneyimeninj bu bedda birrimakni kore nungka.

³² Njalehkenh nawu Israel benkebmawahmeng wanjh minj birrimayinj kore God kabenmakwan kore nungka? Wanjh nakka nanu birrirohrokmenj bu birridjalkurduyimi kore mankarre birriwernhmarrkmangi, dja minj bedda birridjalwoybukwoyi God bu bengehkemeninj. Bedda yiman kayime birridjareni bu birrinjilngmarnbuyi God, dja kumekbekenh birridjalwokmarrkmangi manbu mankarre. Bedda yiman yerrih birridengedorreni dja mak birrimankarrinj kore kuwardde manbu kabenbungkarrkbunkeh.

³³ Kaluk maninjmanu manbu kunwok bimbuyindanj kore God yimeng, “Ngurrina! Ngaye wanjh ngakurrme bininj ngardduk kore kunred Zion. Nungka yiman kayime manwarddekimuk. Namekbe bininj nawu ngardduk, wanjh kabenbungkarrkbun bininj yiman kayime mahni manwarddekimuk, wanjh kabenmarnbun bu kabirrimankan. Dja nawu bininj kabirriwoybukwon nahni nawu bininj ngakurrme, wanjh nakka nanu minj kadjalyeme bu munguyh. Wanjh bonj.” [Isaiah 28:16]

10

*Nangale Bininj Nawu God Kabenngheke?
Romans 10:1-21*

¹ Nawu ngad karridangerrinj, ngaye wanjh djalmarnedjare bulkkidj duningh ngudberre, dja mak ngaye ngamarrkdjawam God bu kabenngheke bininj rowk nawu Israel nungan benkebmawahmeng.

² Ngaye wanjh ngabenmulewan bu bedda kabirridjalmarnedurrkmirri kunrayek duningh kore God nuye. Dja minj kabirriburrrkburrrkbekkan kore nungka kahdjare.

³ Minj bedda birriburrrbuyi bu God djareni bedberre bu kabirridjalwoybukwon ba bu nungka kabenmakwan. Wanjh bedda yimankek kabirrimarnburrimen bu bedmandeleng birrimak bininj. Kaluk yiman rerrih birridjalwoybukwoni manbu bedberre mankarre yoy bedmandeleng, dja minj birridjalwoybukwoyinj nungka God.

⁴ Mah, wanjh nangalengale God kabenmakwan? Wanjh bininj nawu kabirriwoybukwon nawu Christ, wanjh God kabenmakwan. Kunmekbekenh kunu God kanwong nuye mankarre, ba bu karriwoybukwon Christ.

⁵ Kaluk Moses benyolyolmeng bininj nawu kabirridjare bu God kabenmakwan kore kabirrimarrkmang nuye mankarre, dja kabimbuyindi, “Bininj nawu kadjare God kabimalngmimbiwin, wanjh nakka munguyh kadjalkurduyime rowk kore mankarre kayime.” [Leviticus 18:5]

⁶ Dja ngad wanjh karridjalwoybukwon Christ, wanjh kunu God kanmakwan. Wanjh kunukka ngad mandjad karriburrrbun, kore minj karriyime,

“Ngaye ngare kaddum Heaven ba bu ngahdurndiwe Christ kondanjkuu kurorre*.” Kunukka yuwn kunmekbe karriyime kore kukange kadberre.

⁷ Dja mak yuwn karriburrbun bu karriyime, “Ngaye wanjh ngahkolung kanjdji duninjh ba bu ngaye yimankek ngarrolkkayhwe Christ kore nungka dowengebhe.” Yuwn bu karriyime.

⁸ Kunmekbe djal burrkyak. Ngudda ngaleng ngurridjalburrbun kore kunbuyika bimbuyindanj kayime, “Manbu kunwok nakka karrarnhdi ngudda kore kurrangmayewel dja mak kore kukange ke.” [Deuteronomy 30:14]

Ngahyolyolme maninjmanu manbu kunwok manmak bu ngarrbenmarneyime birriwarlahkenh bininj ba bu bedda kabirridjalwoybukwon God.

⁹ Ngayime bu ngudda ngurrimulewarren kore kudjenbeh, bu ngurriyime, “Jesus nakka Kawohnan Rowk”, dja mak ngurridjalwoybukwon kore kukange ngudberre bu God birrolkkayhweng Jesus kore kundowikenh, wanjh God ngungehke ngudberre.

¹⁰ Kaluk bu nangale bininj kabiwoybukwon kore kukange nuye, wanjh God kabimarneyime bu nadjalmak. Dja mak bu kahmulewarren kore kundjen nuye, wanjh God kabingehke.

¹¹ Mahni djurra kayime, “Nawu nangale bininj kabiwoybukwon mak kabimarnekurrmerren kore nungka, wanjh minj mak kabalyawoyhyeme munguyh.” [Isaiah 28:16]

¹² Wanjh kuhni ngurriburrbun ngad bininj karriwarlahkenh rowk, wanjh karridjalrohrok. Yikahwi ngad nawu Jews, dja yikahwi minj Jews. Dja nadjalkudji nawu Kawohnan Rowk wanjh kandjarrkmarnewohnan kadberre rowk. Nawu nangale bininj kabikayhme kore nungka bu kabidjawan, wanjh kunu kabiwon kunmakmak nawern nuye.

¹³ Ngurriburrbun kore kabimdi kayime, “Bininj nawu kabingeykayh-mekenh nawu Kawohnan Rowk bu kabidjawan, wanjh God kabingehke.” [Joel 2:32]

¹⁴ Bolkkime wanjh ngudda ngurridjawanren bu yikahwi bininj minj birriwobekkayi nawu Kawohnan Rowk, bu kuninjkunkeh minj mak kabirriwoybukwon dja wanjh kunmekbekenh minj kabirrikayhme nuye. Minj nangale mak benmarneyolyolmeninj bedberre bu nungkakenh, wanjh kunmekbehkenh minj bedda kabirriburrbun nungka.

¹⁵ Wanjh kunubewu minj nangale mak benmunkewemeninj bininj ba bu benmarneyolyolmeninj bedberre bu nungkakenh! Ngudda ngurriburrbun bu kabimdi, kayime, “Ngad wanjh karridjalwernhnjilngmakminj bulkkidj bu birrimekbe bininj birrimwam, kandimarnemulewam kunwok manmakaykenh duninjh.” [Isaiah 52:7]

¹⁶ Kaluk birriwern nawu Israel benkebmawahmeng wanjh birribek kang maninjmanu kunwok manmak kore Kawohnanbeh. Wanjh yikahwi birriwoburriweng manbu kunwok nuye. Isaiah bimbom bu yimeng, “Yiwohrnan, birrimekbe bininj nakka minj kandiwoybukwon ngarrbenmarneyime bu ngarriweykan kunwok ke.” [Isaiah 53:1]

¹⁷ Bininj nawu minj birribangmengeybekkayinj God, wanjh minj bedda kabirriwoybukwon. Dja bu kabirribekkan kunwok nuye manbu Christkenh, wanjh bedda kabirriburrbun nawu God, dja mak kabirriwoybukwon.

¹⁸ Med, yiddok woybukkih birrimekbe bininj minj birriwobekkayi nawu God? Burrkyak, wanjh birribek kang rowk! Kaluk kahbimbuyindi bu kayime, “Mahni kunwok manmak makka wanjh yarlarmeng kubolkwarahkenh rowk. Birriwarlahkenh bininj rowk nawu kabirriini kondanjkuu

* 10:6 Deuteronomy 30:13

kurorre nakka wanjh birribek kang manbu maninjmanu kunwok nuye." [Psalm 19:4]

¹⁹ Dja ngaye ngadjawarren, njalekenh bininj nawu Israel benkebmawahmeng minj birriwoybukwoyi kore birribek kang mahni kunwok? Wardi bedda minj birriburrrkburrrbekkayi? Karriburrrbu bu Moses yimeng bedberre bu kuninjkunukenh kore kabimbuyindi, "God yimeng ngudberre, 'Ngaye marnbu ngudberre ba bu ngurrikirndangan bedberre birribuyika bininj nawu minj Jews. Kaluk ngaye marnbu ngudberre ngurriyiddung bu ngurribennan baleh kabenmarnekurduyimerran birrimekbe nawu birrimayaliyak bininj.'" [Deuteronomy 32:21]

²⁰ Dja mak Isaiah benyolyolmeng ngudberre nawu Jews, bu nungka djalyimeng mahni mandjad, kore kabimbuyindi, "Bu God yimeng, 'Bininj nawu minj ngandiyawayinj ngaye, wanjh nakka ngandidjalngalkeng. Ngaye wanjh ngabenmarnekukbukkarinj bininj nawu minj ngandingalkemeninj.'" [Isaiah 65:1]

²¹ Dja mak God yimeng bedberre nawu Israel benkebmawahmeng, kore kabimbuyindi, "Kunbarnangarrakuyeng bu ngaye ngahdjaldiyiriyongeni munguyh kore ngudda ngudberre. Dja mak minj ngaye kandimarrkmayi kunwok. Dja minj mak kandibek kayi dja mak minj kandimarnemayaliborledmeninj." [Isaiah 65:2].

11

Yikahwi Bininj Nawu Israel Benkebmawahmeng Bedda Birridjalwoybukwong Christ

Romans 11:1-10

¹ Kunubewu ngudda nawu ngurriburrrbu bu ngurriyime yimankek God benbodmekenhwong nuyeni bininj. Dja burrkyak duninj! Israel dja Abraham wanjh mawahmawah ngardduk, dja mak kore ngarranginj bu ngabornayinjdang kore Benjaminj nuye birrimud.

² Burrkyak, God minj munguyh benmarnemirrkborledmeninj kore nawu bininj nuye. Nungka benmarneyingkihkarremarnbom bu kunkare duninj. Kunubewu ngudda kunu ngurrbengmidjdang kore kabimbuyindi manbu kabiyolyolme nawu prophet Elijahkenh bu nungka bidjawan God bu kabidyikarmekenh, kaluk bininj nawu Israel benkebmawahmeng nawu bedda birriwarnyakminj dja mak birridjaldungi nungka.

³ Nawu Elijah mulewarrinj yimeng, "Ngudda nawu Yiwohrnan Rowk, naninjnanu nawu bininj wanjh nakka bindibom bindikukkurrmeng nawu ngudda ke prophets, dja warridj birribakkeng dja birriwarrewong manbu ngudda ke altar. Dja ngaye wanjh ngadjalkudji ngahdarrkiddi. Wanjh ngayemanwali kunubewu ngandibun bolkkime." [1 Kings 19:10-18]

⁴ Dja yiddok ngurriburrrbu baleh kab God bimarneyimeng bu biwokmey nungka Elijah. Nungka bikangerayekwong bu yimeng, "Ngaye ngabenkarrme ngayeman ngardduk nawu 7000 bininj nawu minj birrimarneboddangimeninj bu birrimarnediwirrinj yiwarrudj nahni nabuyika god kangeyyo Baal." [1 Kings 19:18]

⁵ Mah, bolkkime wanjh kadjalrohrok. Bolkkime wanjh kabirridjaldi birridjalkudji yikahwi bininj nawu Israel benkebmawahmeng nawu God nuye duninj. God nawu wernhmimkongiwern duninj dja kunmek-bekenh kunu nungka bendjarrngbom.

⁶ Nungka wanjh bendjalmarnedjareminj bu djalburudjang, wanjh kunu bendjarrngbom. Minj benkayhmeninj bu birrimarnedurrrkmirrikenh bedberre bu birrikurduyimeninj kunmak. Burrkyak. Nungka wanjh

bendjalmarnedjareni, wanjh kundjalmekbekenh kunu benkayhmeng bu birriyimerranj nuye bininj.

⁷ Adju, yiddok kuhni kunmak? Bininj nawu Israel benkebmawahmeng wanjh birriwernhyawarreni bu birridjareni bu God kabenmakwan, dja larrk, minj birrimayi! God wanjh bendjalmey yikahwi bininj nawu djareminj bu benkarmeng. Kaluk nungka benmarnbom nawu birribuyika bu birrikangerayekminj kore nungka.

⁸ Bu kuhni wanjh kabimbuyindi, kayime, "God benmarnbom bu yiman birribengwarrminj yerreh. Dja mak benmarnbom kunmim bedberre minj birriwernhnayi. Mak kuncanem bedberre benkanemdubbewong ba bu minj birribekkayi. Wanjh yiman bolkkime kuninjkuwu kabendjalkurduy-imerran." [Isaiah 29:10]

⁹⁻¹⁰ Ngurriburrbun kore David bu yiwarrudj dingihdi, bu benyolyolmi nawu birriwarre bininj. Kuhni bu kabimbuyindi bu nungka bidjawam nawu Kawohnan Rowk, "Ngaye wanjh ngadjare yingan yibendarrkidmang kore mulil kabirridjarrkdi, yiman kayime mayh yimang bu yimarnbun kunyarl manbu yiman kayime walabbi rerrih bu djenj karrihdurkmang. Dja mak ngadjare yibenbungkarrkbun ba bu kabirrimankan. Kuninjkuwu wanjh God kakurduyime bu kunwarrekenh bedberre, bu kabenbun. Dja mak ngadjare kabirrimimburlerran ba bu minj kabirriwernhbolknan, dja mak ngadjare kabirriwernhdurkmirri kore kunrayek duninj bu munguyh." [Psalm 69:22-23]

Baleh Nungan God Benmarneyingkihkarremarnbom Nawu Israel Benkebmawahmeng Nuye Romans 11:11-15

¹¹ Mah, bu ngad karridjaldjavarren, yiddok nawu Israel benkebmawahmeng kabirridjalyo kore birrimankang, ba minj mak kabirriyawoyhdolkkan? Burrkyak duninj, dja God yingkihkarremarnbom bedberre. Kandibekka. Bu Israel nuye bininj birriwarrewong, wanjh kunu God bennghekkeng birribuyika bininj nawu minj Jews, ba bu kabenmarnbun nawu Israel nuye bininj wanjh kabirrikirndangan.

¹² Adju, dja njalekenh God kakurduyime? Ngurriburrbun bu kuhni. Israel nuye mawahmawah birrikurduyimi kunwarre, dja ngaleng God bendjalmarnekurduyimi kunmak duninj bedberre birriwern birribuyika bininj nawu minj Jew. Kunmekbekenh nawu Jew birrimankani, wanjh God yiman bendjalkukenwong bedberre bininj nawu minj Jews. Wanjh kamak! Dja ngaleng, kaluk bu Israel nuye mawahmawah kabirriwoybukwon nawu Christ, wanjh kundjalmak duninj kadberre rowk.

¹³⁻¹⁴ Mah, dja bolkkime ngaye marnehmarneyime ngudberre ngudda bininj nawu minj Jews. Nawu Kawohnan Rowk nganmarnbom apostle, dja nganmunkeweng bu marneyime ngudberre ngudda bininj nawu minj Jew ngawokmulewan ngudberre nuye kunwok. Dja mak ngahdjalburlumerrinj bu kuhniken ba bu ngaye ngardduk bininj ngarrimud wanjh ngabenmarnbun kabirrikirndangan ba bu kunubewu bedmanwali kabirriwoybukwon nawu Jesus Christ, ba kabenggehke bedberre.

¹⁵ Kuhni nawu God kayime benburriweng nawu ngayekenh bininj. Dja kunu benmarnbom birribuyika bininj nuye kabirridabbolk kore nungka nawu kubolkwarlahkenh kabirri rowk. Bu ngayeman ngayime bu yiman God kabundurdiwe nawu Israel nuye bininj kore nungka kabirridjarrkdi, wanjh kunukka nungka kabendjalmarnbun birribuyika bininj nawu minj Jews bu kabirriyawoyhdarrkidmen.

God Yingkihkarremarnbom Kadberre Bu Karrikukbelmerren Rowk Kore Jesus

Romans 11:16-24

¹⁶ Ngaye kab wohmarneyime ngudberre manbuyika kore ngad karriburrbun bu kuninjkukenh. Bu bininj kamarnbun buriddi, dja kabimarnekurme kunyahwurd kore God, wanjh manbu buriddi rowk yerre nuye wanjh kahloddjamunmen bu nuye nawu Kawohrnan Rowk. Dja mak kunbuyika bu manbu mandedjmad kundulk makka nuye God, mak manbu mandulkyende kore maninjmanu kundulk, wanjh makka mak God nuye warridj.

¹⁷ Ngaye wanjh ngahyolyolme ngudberre bu ngudda minj Jews. Ngudda wanjh kayime mankerengekerrnge manbu bu manyende manbu namerinj kore kundulk. Ngudda yiman mankolhdebuyikabeh, dja bolkkime wanjh ngurriaworrinj nawu manyendekare, dja ngurridjarrkbongun manbu mandedjmadkenh mandjalkudji. Dja bininj nawu Israel benkebmawahmeng, wanjh bedda yiman kayime manyendekarehkare manbu God yendebakkeng. Wanjh ngudda yiman ngurrbenmarnebolkmang birrimekbe bininj nawu minj birriwoybukwoyi Jesus.

¹⁸ Dja ngudda nawu minj Jews, yuwn bu ngurriburlumerren bu yimankek ngurriyime ngudda ngurrimak dja ngurrbenmarneyime birribuyika nawu yiman kayime kundulk manyeyende warridj. Burrkyak, dja ngurridjalburru bu ngudda minj mandedjmad manbu kore kundulk ngarre manbu wanjh ngunkarme bu kaddum ngurridi dja ngurridjordmen. Yuwn bu ngudda ngurriyurrhke manbu mandedjmad. Ngudda minj ngurrbenkarre birrimekbe bininj ba kabirini.

¹⁹ Kunubewu ngudda ngurriyime, "God bakngeng manekke manbu manyende dja ngad wanjh kankurrmeng kumekbe kore kundulk ngarre ngarribelmerrinj."

²⁰ Wanjh woybukkih benbakkabakkeng bedberre nawu minj birriwoybukwoyi nawu Christ. Dja ngaleng ngudda wanjh ngurriwernhwoybukwon, wanjh kunmekbekenh ngudda yiman ngurridjalmaingbelmerrinj nungka. Dja ngaleng yuwn bu ngurribalburumerren ngudmandeleng. Dja ngaleng ngurridjalmarnekelenin nungka God.

²¹ Ngurriburru bu God benbakkeyi benkukburriweyi birrimekbe bininj nawu Israel benkebmawahmeng, nawu nuyeni birriyungkih bininj. Wanjh bu ngudda minj ngurrimarrkbaworren dja minj ngurriwoybukwon, wanjh ngudda warridj ngunbalkukburriwe ngudberre.

²² Mah. Wanjh bolkkime ngurriburru God nungka wanjh kandjal-marnedjare, dja warridj kadjarayek kore mandjad kandjadme. Yiman bu nungka benmarnewokrayekworrinj bedberre nawu birriwokweyi dja birrimunkebawong. Kaluk nungka mimkongiwern dja ngunbidyikarme ngudberre. Dja wardi ngurridjalnahnarrimen ngudmandeleng ba bu minj kunukka ngurrimarnemirrkborledmen kore nungka. Dja bu burryyak, wanjh ngudda warridj ngunkukburriwe yiman kayime kayendebakke.

²³ Dja bu birrimekbe bininj nawu Israel benkebmawahmeng kabirriyawoyhdedjingmang bu kabirriyawoyhwoybukwon nawu Christ, wanjh kunukka God kabenyawoyhbelme kore kundulk nuye. God wanjh dulkarrekimuk bu kuhni kakurduyime.

²⁴ Yoh. God ngaleng ngunmey ngudda nawu yiman kayime manyende ngarre kundulk kore kurralkbeh, dja ngunbelbmeng ba ngurriyimerranj manyende ngarre kundulk manbu manmak yiman kayime olive kundulk. Minj nakka ngudberre, dja wanjh nuye. Ngudda minj ngurrimrawinj kore kundulk manbu manmak bu kerngehkenhni. Wanjh kunukka kamak duninh bu God kabendurndiwe manyende kore kundulkare

kore birribakmeng ba bu kabirriyawoyhbelmerren. Wanjh ngaye kunu ngabenhyolyolme birrimembe Israel nuye bininj.

*Kaluk God Kabenngheke Bininj Rowk Nawu Israel Benkebmawahmeng
Romans 11:25-32*

²⁵ Ngudda nawu karridangerrinj, ngaye ngadjare bu ngudda ngurriwernhburrbun kuninjkuu rowk ba bu minj ngurriburlumerren. Dja ngadjare kab marneyime ngudberre bu kunmekbe kunwok manbu warlkkayindi. God benmarnbom yikahwi nawu Israel benkebmawahmeng bu birrikangerayekminj duninj ba bu kaluk yerreh bininj nawu minj Jews kabirrimre rowk kore God.

²⁶⁻²⁷ Wanjh kalukburk nungka wanjh kabenngheke nawu Israel benkebmawahmeng rowk, kore kabimbuyindi, yimeng, "Nawu ngunbebke ngudberre wanjh nakka kamdolkan kore kunred Zionbeh. Nungka wanjh kabenmarnbun bininj nawu Jacob ngunkebmawahmeng ba bu kabirrikangeborledkerren kore God nuye. Ngaye wanjh ngamarnbom mankarre ngardduk bu ngawernhwokrayekworren bu ngahkurduyime kunmak bedberre. Wanjh ngaye ngabenmarneburriwe kunwarre bedberre bu ngahbendjalmarnebegmidjdan." [Isaiah 59:20-21; Jeremiah 31:33-34]

²⁸ Yoh, bedda nawu Israel benkebmawahmeng wanjh birridjalwidnani God nuye kunwok manmak. Wanjh kunmekbehkenh kunu bu God ngudda ngunmarnbom ngudberre ngurridabbolk kore nuye. Dja ngaleng God bolkkime kabenmarnedjare nawu Israel bininj warridj, dja bendjarngebom warridj, kunmekbekenh kunu bu nungka bendjalarnedjareni bu kunkare nawu mawahmawah bedberre nawu Israel.

²⁹ Yoh, ngudda bininj nawu minj Jews, wanjh ngurriburru kuhni. Bu God yimeng nungka kakurduyime kunwern kunmakmak, dja minj kamayaliborledme. Dja mak bu kabenkahyme bininj kuhni wanjh nungan God kadjalkurduyime bu kadjalkurduyimerran rowk. Nungka minj kamayaliborledme bu kunmekbekenh.

³⁰⁻³¹ Ngudda korroko ngurriwokweyi minj ngurriwokmarrkmayi kore God yiman kayime mak bininj nawu Jews birriwokburriweyi yerreh. Wanjh kunmekbe kunu nungka benbawong dja mak ngunkongibun ngudberre nawu minj Jew. God kuninjkuu kurduyimeng ba bu bedda kabirriburrburren bu birriwarre bininj, dja wanjh kabirriborledkerren kore God ba bu kabendjalwernhkongibun bedmanwali.

³² Kaluk birriwarlahkenh bininj rowk kabirridjalwokburriwe God. Nungka wanjh kadjare kabenkongibun bedberre rowk. Wanjh kunmekbekenh kunu kabenbongkarrme ba bu kabirriburrbun kunwarre bedberre.

*Bu Ngad Karridjalburlume God
Romans 11:33-36*

³³ Mah wanjh, baleh kariyime? God nungka namakkaykenh duninj. Nungka kaburrbun yehyeng rowk. Nungka kahkarrme kunmayali bu kunmakkaykenh duninj. Dja ngad kunu djal bininjwi, kaluk minj njale karriburkburrkbekkan kore nungka kaburrbun bu nungka kandjadme djal kamak kore ngad bininj. Nungka wanjh kebrokbuyika duninj dja mak kebrokkudji, dja minj nangale kaburrbun kore nungka kahre.

³⁴⁻³⁵ Kunmekbeh bimbuyindanj nuye, kahyime, "Nangale kab kaburrbun kore God nuye kunmayali? Nangale kab nanu kabimayaliwon nuye bu kabibengdayhke nawu God? Nangale nanu kabiwon God nawu namak bu kabimarnbun kabimarnekarrremulewan nuye?" [Isaiah 40:13, Job 41:11]

³⁶ Minj nangale bininj kabimarnekurduyime kore God, dja nungan nuye rowk nawu njalehnjale. Nungka wanjh yehyeng marnbom rowk. Nungka kanwon kadberre nawu njalehnjale, dja mak yehyeng rowk wanjh djal nungan nuye. Ngad kunu bininj wanjh nakka nanu karridjalburluburlumen nungka bu munguyh munguyh. Amen.

12

Bu Ngad Karrikanjcurrmerimen kore God

Romans 12:1-2

¹ Ngudda nawu karridangerrinj, wanjh marrkdjawahdjawan bolkkime ngudberre bu ngurrikurrmerren kore kunburrk ngudberre kore God nawu God nuye, bu kuninjkukenh nungka kanyingkihkongibom kadberre. Wanjh yiman ngurridarrkidcurrmerimen dja mak ngurridjalkurduyimen kundjalmak, ba bu ngurrinjilngmarnbun nawu God. Kunukka wanjh yiman kayime ngurrimarneboddan nuye God kore kukange ngudberre.

² Yuwn bu mak ngurrbenbaldjirrkkan birribuyika bininj nawu kondanjkuu kurorre kabirrihni. Kunukka burrkyak. Ngudmandeleng ngurridjalburru bu God bu munguyh. Kaluk nungan ngundjalmayalikerrngehme ngudberre, ba bu ngurrikarremenmennan manbu kunmayali manbu kunmakkenh nungka kore kadjare. Wanjh kunukka nungka kanjilngmak bu kuninjkuu kore ngurrihmarneburrrkmirrikenh kundjalmak nuye.

Karridjarrkdurrkmirri Kore Karribebbehkarrme Dja Karribidyikarmerren

Romans 12:3-8

³ God nungka nganmarneyimeng kunmak bu djalburudjangkenh, wanjh kunmekbekenh ngaye marnehmarneyime ngudberre rowk, yuwn bu ngurriburlumerren kore ngudmandeleng. Dja ngaleng ngurridjalburru bu ngudmandeleng kore mandjad. Kaluk God nungka kandjarrkbidyikarmeng karridjalwern bu karriwoybukwon kore mandjad duninj nuye.

⁴ Kaluk ngad karriwern nawu karriwoybukwon Jesus wanjh karridjalbubuyika! Ngad wanjh karriyimerranj manburrrkkudji. Ngurriburru manbu kunburrk ngayolyolme, wanjh karrikarrme kunwern kundjalbubuyika bu karworrenkenh kore kabirribebbehdurrrkmirri kabirribidyikarmerrenkenh, wanjh kunu kabirriyimerran ngarre manburrrkkudji ba bu karridarrkidkudjihmen.

⁵ Wanjh karohrok ngad bininj nawu karriraworren nuye Christ, wanjh yiman kayime karriyimerranj kunburrrkkudji nuye. Bu ngad karriraworren nuye Christ wanjh karridjarrkbelbmerren dja karrikarmerren.

⁶ God bu kankongibuni, wanjh kanbebbehwonowong kadberre kunmakmak nuye ba bu karrimarneburrrkmirrikenh nungka nuye. Bu kanbebbehwonowon nawu kunbubuyikakenh. Nungka benwong yikahwi ngad bininj ba bu kabirriyimerran yiman prophet. Wanjh birrimarnewokda nuye kore bedda kabirriwernhwoybukwon.

⁷ Nungka benmarnbom yikahwi kore ngad bininj bu kabindibidyikarmerre nawu birribuyika bininj. Mah, bedda wanjh bindidjalbidyikarmerren! Dja mak yikahwi bininj benmarnbom bu kabindibukkabukkan nawu birribuyika bininj nuye. Bedda wanjh, bindidjalbukkabukka!

⁸ Yikahwi mak benmarnbom bu kabindimurrngrayekwon bedberre birribuyika kore ngad. Mah, bedda wanjh bindimurrngrayekwo! Dja mak yikahwi benmarnbom bu kabindikukwon money dja manme bedberre bininj nawu birrimarladjdja. Mah, bedda wanjh birridjalkurduyimen bu birridjalweymaknin. Dja mak yikahwi benkurrmeng bu kabirridurrrkmirri

bu kabindimarnewohrnan birribuyika nawu bininj kore ngad kadberre. Mah, bedda wanjh birriwernhkurduyimen bu djal mandjad dunijn! Dja mak yikahwi benmarnbom bu kabindidjalkongibun nawu birribuyika bininj. Wanjh bedda kunu birridjalkurduyimen kore kunnjilngmak dorreng.

Bu Ngad Karrimarnedjaremerren

Romans 12:9-21

⁹ Ngurridjaldjaremerren bulkkidj dja mak ngurridjalwidna nawu nawarrewarre. Ngurridjalkarrmen kore kunmak munguyh.

¹⁰ Ngurrimarnedjaremerren bu yiman kayime karridjalmud dunijn nawu karridanginj. Yuwn bu ngurribalburluburlumerren yimankek bu ngurriyurhkerren.

¹¹ Yuwn kab ngurringudjmulewarren kore ngurriwernhdurkmirri nuye nawu Kawohrnan Rowk. Ngurridjalnjilngmaknin munguyh dja mak ngurridjaldjaremen munguyh bu ngurriwokmarrkmang nuye kore ngurrimarnedurrkmirri munguyh nungka nuye kore kukange dorreng ngudberre.

¹² Bu ngudda ngurridjalburrbun baleh God ngunbidyikarme yerrehkah, wanjh kunukka ngurridjalnjilngmakmen munguyh. Dja mak bu kunrayek kambebme ngudberre dja mak kunyid dorreng kamwermerren, yuwn mak ngurrihgurdme bu ngurrire dja ngurridjalle munguyh. Ngurridjaldin yiwarrudj munguyh, dja mak yuwn bu ngurriwarnyakmulewarren.

¹³ Ngurribenwo money dja manme nawu birribuyika yiwarrudj bedberre bininj nawu minj kabirrikarme bu ngurribenbidyikarmen. Dja mak bu nawu birriwern bininj nawu yiwarrudj bedberre kabirrimhre nawu kubolkbuyikabeh, wanjh ngurribendjalnahna bu ngurribendjalbidyikarmen dorreng.

¹⁴ Bu nangale yiman kayime ngunwon kunrayek kunwok dja ngunmarneyidngalke baleh yarrkka, wanjh ngurridjaldjawa God ba bu kabinahnan dja kunmak kabimarneyime namekbe bininj. Dja ngaleng yuwn bu ngurridjawan God bu yimankek kabirrun!

¹⁵ Bu nangale bininj kore ngudberre nanu kanjilngmak wanjh nakka nanu ngurridjarrknjilngmaknin. Dja nawu nangale bininj kanalkbun ngarre kundowikenh, wanjh nakka nanu ngurridjarrknalkbu bu ngudda dorreng.

¹⁶ Ngurridjarrkmayalikudjinin nawu ngad bininj ba mandjalkudjiwi ngurridjarrkburrbu, dja minj ngurridangwerren. Dja yuwn bu ngurriburlumerren. Dja ngurridjarrkdn bininj nawu yiman kayime namarladj dja mak ngurriingeyyahwurdworrimen. Yuwn bu mak ngurribalburrbun bu ngudda yimankek ngurriyurhkerren.

¹⁷ Nawu nangale kayime kunwarre ke, wanjh yuwn mak yidjalkarmen wangbol nuye, dja yuwn bu mak yinganwali yikurduyime kunwarre nuye namekbe bininj bu yiman kunmekbekenh. Dja ngurridjalkurduyimen kunmak ba bu birriwern bininj ngundikurdunan bu kunmekbe kunmak rowk.

¹⁸ Ngurrimarnburrimen dja ngurridabbolknin nawu bininj rowk kundomikenh dorreng. Dja bu bedda ngundidjalwidnan, wanjh kunu bonj, bedmandeleng.

¹⁹ Nawu ngaye karridabbolk, yuwn bu ngurrimayaliborledme bu ngurrirohrokme ngurribenbun bininj nawu ngundimarnekurduyime kunwarre. Ngaleng ngurridjalmadbu God nungan kabendung bedberre. Ngudda ngurriburru kuhni bu bimbuyindanj yimeng, "Nawu Kawohrnan yimeng, 'Ngaye ngadjalkudji nawu ngabenbun nawu birriwarre bininj.

Ngaye wanjh ngadjalkudji bu kunmekbeh ngakurduyime bedberre.''' [Deuteronomy 32:35]

²⁰ Burrkyak! Ngaleng kundjalbuyika bu ngurrbenmarnekurduyime, kore kabimbuyindi bu kayime, "Ngurrbendjalbidyikarrmen bininj nawu bedda ngundiwirrihme ngudberre. Bu kabirrimarrwedowen, wanjh ngurrbendjalwo manme dja bu bedda kabirrikombukdownen wanjh kukku ngurrbendjalbowon. Kuhni kunmekbe ngurridjalkurduyime, wanjh kunukka bedda kabirridjalkangebarrhme." [Proverbs 25:21-22]

²¹ Yuwn bu nawarrewarre nawu ngunmarnbun bu ngurrihwarnyakmulewarren, dja munguyh ngurridjalkurduyimen kore kunmakkenh ba bu wanjh nakka ngurridjalbularrbun nawu nawarrewarrekenh.

13

Bu Ngad Karrbenwokmarrkmang Nawu Kabirriwohrnawohrnan Kondah Kurorrekenh

Romans 13:1-7

¹ Ngad karriwarlahkenh bininj rowk wanjh karrbenwokmarrkma nawu kabirriwohrnan kore government ngarre bu kabirrikarremarnbun mankarre kadberre. God nungan kabenkurrme bininj nawu kabirriwohrnawohrnanken kadberre. Wanjh karriwokmarrkma nuye mankarre kore nungka benkurrmengkenh.

² Wanjh bu ngad karrikarrewarrewen mankarre manbu government karremarnbom kadberre, wanjh yiman kayime karriwokburriwe God warridj nawu benkurrmeng birrimekbe bininj nawu kabirriwohrnan kore government kadberre. Wanjh kunukka nawu government kandjaldung kadberre rowk.

³ Bininj nawu kabirriwohrnan kadberre, bedda minj kabirridung bininj nawu kunmak kakurduyime, wanjh nakka nuk minj kakele. Dja ngaleng, bininj nawu kunwarre kayime, wanjh kadjalkelemen bu nawu kabirriwohrnan bedda kabirriwelengname. Yiddok minj ngurridjare bu ngurrbenmarnekelemen bedberre nawu kabirriwohrnan kondanjku kadberre? Wanjh ngurridjalkurduyimen kore kunmakkenh, ba bu bedda wanjh ngundidjalmakwan.

⁴ Nakka wanjh kabirrimarnedurrkmirri kore God bu ngundibidyikarmekenh. Dja bu ngurrikurduyime kunwarre, nawu kabirriwohrnawohrnan bininj kabirrikarme manbu kundulkarre dja mak ngundibunkenh! Dja God benwong manbu mankarre bu kabirrikurduyime ba ngurrimarnekelemen nuye.

⁵ Mah wanjh, karridjalwokmarrkma nawu kandinarnewohrnan kondah kurorre. Wanjh kunukka God minj mak kandung kadberre. Wanjh ngad ngurridjalyidburnbu kore ngurribekkarren kunmakkenh ngurrikurduyime.

⁶ Karohrok bu tax kunwardde karrbenkarremulewan kore government. Ngurriburrbu bedda wanjh kabirriwohrnawohrnan nawu government wanjh munguyh nawu kabirridjalmarnedurrkmirri God nuye. Kuhni wanjh nungka benwong bu kabirrimarnekurduyime.

⁷ Dja ngaleng ngad wanjh karrbenkarremulewan bininj rowk nawu kandiwon nawu njalehnjale. Kaluk ngad karrbendjalkarremulewan nawu tax. Dja mak ngad karrbendjalkarremulewa bininj birribuyika kore njalehnjalekenh. Dja warridj karrbendjalwokmarrkmang dja mak karrbenwokbenyirri birrimekbe bininj bu baleh kabirriyime kore kunmakkenh kadberre. Dja mak karrbendjalbulumen dorrengh bininj nawu birrimak.

Bu Ngad Karriidjalkurduyimen Kunmak

Romans 13:8-14

⁸ Bu yiman yikarrme bulk nawu bininj ngunwon waken, wanjh nungka njale yimarnedurndiwemen nungka. Bu ngad karriyimen kunbuyika duninj, bu ngad wanjh karriidjalnarnedjaremerrimen. Bu nangale bininj kabenmarnedjare nawu birribuyika bininj, wanjh kunukka kadjalkurduyime kore mankarre rowk God nuye.

⁹ Ngudda ngurriburrbun manbu mankarrekuken kahyo kore kahyime, “Yuwn bu nguneyo nawu nabuyika bininj dja mak ngalbuyika daluk. Dja ngaleng ngurridjalyuwn ngalbu ke ngalbininj kobeng duninj, dja nawu nabininj kobeng ke duninj.” Dja mak kore kayime, “Yuwn bu yibun bininj yikukkurme.” Dja mak kayime, “Yuwn yire yimarnedjirdmang nabuyika bininj nawu njalehnjale nuye.” Dja mak, “Yuwn yikirndangan bu nabuyika bininj nawu kakarrme nuye nawu yidjare.” Dja mak manbadbubuyika mankarre warridj. Makka wanjh manu mankarrekilehkilelk rowk, dja manu mankimuk mankarre kahyo wanjh makka mahni manmekbe ngunmarneyime ngudberre. Kayime, “Yibenwernhmarnedjarenin birribuyika bininj yiman kayime yingandeleng bu yihmarnedjaremerren.” [Exodus 20:13-17; Deuteronomy 5:15-21; Leviticus 19:18]

¹⁰ Bu nangale bininj kabenmarnedjare birribuyika bininj wanjh minj mak kunwarre kabenmarnekurduyime bedberre. Kaluk bu yibenmarnedjare birribuyika bininj wanjh kunukka yiwokmarrkmang manmekbe mankarre rowk.

¹¹ Kuhni ngad karrikurduyime rowk dja mak karriwernhburrbun bu bolkkime ngarre kabolkyimerran kadberre wanjh kabalhyakmen darnkih bu ngalenggarre. Dja wanjh ngurridjolkka bolkkime kore yiman kayime ngurrikodjkeyo. Ngad wanjh karriidjalwoybukwoni nawu God bu kunkuyengni, dja bolkkime wanjh darnkih bu kabolkyimerran kore nungan kannggehke kadberre.

¹² Yoh, bolkkime wanjh ngad yiman kayime karridi kore kunkak ngarre. Dja wanjh bolkkime kamre kadberre manbu kumhkabel ngarre darnkih duninj kore kunbarnangarra ngarre. Wardi kab karriidjalbawo manbu kunwarrewarre kore bininj kabirrikurduyime, dja kunukka yiman kayime bulbolkmunun rerrih. God kanmarnebolkwolkan kadberre, dja wanjh bolkkime ngad karriidjongburrimen nawu kunmadj ba bu karriyimerran yiman kayime soldier nuye.

¹³ Ngaye ngayime bu ngad karriidjalkurduyimen kunmak bu yiman kuhni kayime benbekad kore karridi kurobbe. Wanjh yuwn bininj nawu ngad karrimirndemornamerren bu kundjalwarre ngarre bu kabirridjare bininj, yiman kabirribongun manbang manbu kabenmarnbun kabirriworromkan munguyh, dja mak bu bininj dja daluk kabirridjirdmarrendeleng. Dja mak yuwn bu ngad karriwidnarren dja mak yuwn bu karrimarnekirnwerrinj.

¹⁴ Dja ngaleng mahni kunbuyika bu karriidjarrkyime. Ngurridjalngunjdjika Jesus Christ nawu Kawohnan rowk, dja yuwn bu ngurriyawoyhburrbun kore kunwarre manbu ngurridjare.

14

Yuwn Bu Ngad Karriwarreworren Kore Yiwarrudj Karriraworren

Romans 14:1-12

¹ Yikahwi bininj nawu yiwarrudj ngudberre, nakka wanjh minj birriwernhmurngrayek kore bedda kabirriwoybukwon. Wanjh yuwn bu mak ngurrbendjaddadme bedberre nawu birrikerngekernge dja nawu

minj kabirriwernhwoybukwon, dja ngaleng kundjalyahwurdnin, dja mak ngurrbendjalkima.

² Ngudda ngurriburrbun bu birriwern bininj nawu yiwarrudj kadberre kabirringun manbu manbubuyika manwern manme. Dja yikahwi mak birribadbuyika bininj kore kadberre yiwarrudj, wanjh kabirriyime, "Yuwn bu karringun kunkanj!" Bedda minj kabirriwernhburrbun kore njalehnjalekenh bu karriwokmarrkmang nawu God, wanjh kunmekbekenh kabirridjalngun manbu manme kore mankolhdebeh.

³ Dja yuwn bu ngad karridjadmerren. Bininj nawu kahdjalnjilngmak bu kangun manme manbu manbubuyika, yuwn bu kabenwelengname nawu birribuyika bininj! Dja mak bininj nawu minj kangun nawu njalehnjale, wanjh yuwn bu kabiwelengname nabuyika nawu nungan kahngun manbu manme rowk. Wardi ngurriburrbu bu God nungka kandjarrkkimey karriwarlahkenh bininj rowk bu nungka kanmakwam kadberre rowk.

⁴ Yuwn kab ngad karrbendjadme birribuyika bininj nawu kabirrimarne-durkmirri nakudji bininj nawu kondah kurorrewaken, dja namekbe bininj nawu kawohrnan, wanjh nungan bu kabendjaldjadme nuyekih bininj. Kaluk karohrok bu God nawu Kawohrnan Rowk kandjarrkdjadme ngad nawu karriwarlahkenh bininj rowk, wanjh kanmarneyime bu ngad karrimakni bininj! Kunmekbekenh kunu, God nungka kandjarrkdolkkay-hwe ngad bininj rowk!

⁵ Dja mak kunbuyika marneyime ngudberre. Yikahwi bininj nawu yiwarrudj kaddjarrkberre kabirridi, wanjh kabirriburrbun bu kuhni kunbarnangarrakudji makka wanjh yiman manbu mankuken rerrih, wanjh kunbarnangarradamun. Dja mak birribuyika nawu yiwarrudj kadberre bininj kabirriburrbun bu kabirriyime kunwern manbu kunbarnangarra wanjh makka kadjalrohrok rowk. Wanjh karridjalwern karriburrbu bu njale kunmak, wanjh karribebbehkurduyimen kore karrinan kunmakkenh.

⁶ Bu bininj nawu kayime mahni kunbarnangarrakudji wanjh mankuken, wanjh namekbe bininj djaldjarenin bu djalkurduyimen kore nawu Kawohrnan Rowk kadjare. Bininj nawu kangun kunkanj, wanjh nakka djaldjarenin djalkurduyimen kore nawu Kawohrnan Rowk kadjare, dja mak kabi-djalmanjbun warridj bu kuhnikenh. Bininj nawu kabawon kore kunkanj kahngun, wanjh nakka djaldjarenin bu djalkurduyimen kore nawu Kawohrnan Rowk kadjare, dja mak bidjalmanjbun warridj bu kuhnikenh.

⁷ Dja kunukka ngad minj karrihbebbehdarrkid. Dja bu ngad karrid-owen, wanjh kunukka yiman karridjarrkdowen. Kunukka minj nangale mak nadjalkudji karrarrkid, dja ngad kunu karridjarrkdarrkid, dja ngad mak karridjarrkdowen. Ngad wanjh rowk karridjalbelbmerrinj kore Jesus nungka nuye.

⁸ Wanjh yiman bu ngad karridarrkiddi, ngad wanjh karridjaldarrkid nuye nawu Kawohrnan Rowk. Dja bu ngad karridowe wanjh karrid-jaldowe kore nungka. Wanjh kunmekbeh kadjalrohrok. Bu karridar-rkiddi dja mak bu karridowe, ngad kunu nungka nuye munguyh nawu Kawohrnan Rowk.

⁹ Wanjh kunmekbehkenh kunu Christ doweng dja mak yawoyhmimbim-inj ba bu nungka kadjalwohnan kadberre rowk bininj nawu karridjaldar-rkiddi dja mak nawu birridowerrinj rowk.

¹⁰ Mah. Wanjh bu ngurridjadmerren nawu ngurridangerren, wanjh njalekenh? Mak kunubewu ngurrbenbalmarneyime nakka minj bedda birrimak? Kunukka yuwn ngad karriyime, dja minj ngad kadberre. Kaluk

karridjarrkdangen rowk kore kumirrk nungka nuye kore nawu God dja mak kandjarrkdjadme rowk kadberre.

¹¹ Kunmekbekenh kabimbuyindi kore kayime, "Nawu Kawohrnran Rowk yimeng, 'Ngaye wanjh ngahdjalkudji nawu ngahdarrkiddi munguyh munguyh. Dja ngaye wanjh ngahyime ngurridjalwern ngurriwarlahkenh bininj rowk, wanjh yerrekeh kandimarnebarddurrukkurldan rowk, dja mak kandimulewan rowk, bu ngurriyime ngaye wanjh nawu God woybukkih duninh.' " [Isaiah 45:23]

¹² Dja yerrekeh wanjh karriwarlahkenh bininj rowk karribebbe-hwarnyadmulewarren kore God.

*Yuwn Bu Karrimarnerayekworren
Romans 14:13-23*

¹³ Wanjh ngad kunu yuwn karrbenbalmarneyime bu ngad karridjadmerren ngadmandeleng. Dja yuwn kunbuyika karriburrbu bu kuninjkunukenh. Yuwn mak karrbenbalmarnbun nawu karridangerrinj bu kabirriwokburriwe nawu God. Yuwn bu mak karribennurgurde kore nungka kabirriwokmarrkmangkenh.

¹⁴ Ngaye wanjh nganekukbelbmerrinj nawu Jesus nawu Kawohrnran Rowk, wanjh bonj, ngayime ngudberre bu kuhni kunwoybuk. Bu ngad karridjalngun manbu manme manbubuyika, dja wanjh kamak kore nawu Kawohrnran Rowk. Dja kunbuyikakenh, med, bu nangale bininj kabalburrbun kore kunwarrekenh yimankek kangun nawu njalehnjale kore manmekenh, wanjh kunukka yuwn kangun maninjmanu manme. Bu kuninjkuwu nungka kakurduyime kunukka kunwarre kore Kawohrnran Rowk.

¹⁵ Ngudda bininj, kunubewu ngudda yiburrbun kamak bu yingun manbubuyika manbu manme. Wanjh nawu ngudda ngunedanginj ngunkurdunan dja kahwernhnjilngwarremen, wanjh yidjalnarned-jarenin nungka, dja wanjh yibawon kore yingun. Kaluk wanjh nawu ngudda ngunedanginj bu nunganwali ngunngundjikan, nungka wanjh kakurduyime kore kaburrbun bu kunwarre kore God nuye. Yidjalburrbu, Christ nungka bimarnedoweng namekbe nawu bininj warridj. Dja wanjh yuwn yimarnekarrarayekwon bu kore yidjare yingun nawu njalehnjale.

¹⁶ Ngudda nawu kunubewu yiburrbun kamak bu njalehnjale yingun dja yibongun. Dja bonj, bu nawu ngunedanginj kawarnyak bu nungka kakurduyime, wanjh yuwn bu mak yimarnengun dja yimarnebongun kore ngudda yinjingwarrewon dja kahyime ngudda kunwarre yiyime.

¹⁷ Mah, dja kandibekka. Karridjalburrbun bu kuhni God nungka kanmarnewohrnran kadberre rowk, dja minj mak karriburrbun kore manbu manme karringunkenh dja manbu karribongunkenh. Kuhni burrkyak. Dja nawu nawernhkukenh nakka wanjh Namalngmakaykenh nawu kanmarnbun bu kundjalwernmak duninh, dja mak kanwon nuye kunmodmikenh dorreng, dja mak kanmarnbun bu karridjalnjilngmarrmarr.

¹⁸ Bu ngudda kuhni ngurrimarnedurrkmirri Christ nuye, wanjh God nungka kanjilngmak ngudberre, dja mak birribuyika bininj kabirriyime bu ngudda ngurrimak.

¹⁹ Mah, wanjh kunmekbekenh kunu ngad karrimarnburrimen bu karridjarrknin kore kunmodmikenh dorreng, dja mak ngad ba bu karridjordmiwerren.

²⁰ Ngayawoyhyime, yuwn karrbenwarrehwarrewon kore God nuye kabirrimarnedurrkmirri bu karridjare karringun nawu njalehnjale. Wanjh kunukka karridjalngu manbu manbubuyika manme, wanjh kamak

kore God nuye. Dja ngaleng bu karringun manme manbu kabenmarnbun nawu karridangerrinj bu kabirriwokwe nawu God, wanjh kunu kunukka kunwarre karryime kore God nuye!

²¹ Wanjh bu ngudda ngurridjare ngurringun mahni kunkanj dja mak ngurribongun wine, wanjh kunukka ngurbendjalburrbu nawu ngurridangerrinj, bu wardi ngurrbenwarrewon dja kabirrimankan kore kunwarrekenh. Dja yuwn bu ngurrikurduyime. Wanjh kuhni ngudda ngurridjalbawo manmekbe ngurringun dja ngurribongun dja kunukka ngudda ngurrikurduyime kundjalmak.

²² Wardi ngurridjawan nawu God dja mak ngurridjawanren bu njale ngurrikurduyime kore kurobbe. God kabimarnekurduyime kunmak nuye bininj nawu kamarnburren bu kamak kadjalkurduyime. Bu ngurrikurduyime kore kunwarre, wanjh yiman ngurriyimerren bu ngurriwarre bininj.

²³ Bininj nawu minj kawernhburrbun kore God kadjare, bu nungan kadjalngun yikahi manme, wanjh God kabidjadme. Kaluk namekbe bininj minj nguyinj manme kore kaburrbun bu God kayime kamak. Bu ngad karrikurduyime njalehnjale kore minj karriwoybukwon God, wanjh kadjalwarre, dja mak karriwokburriwe kore nungka nuye.

15

Bu Ngad Karridjarrkdurrkmirri Dja Karridjarrkahnarrimen Kore Christ Nuye

Romans 15:1-13

¹ Ngudda bininj nawu ngurriyimerranj bu ngurrimurngrayekminj kore yiwarrudj ngurrire, wanjh kab ngurrbenbidyikarrmen birrimekbe bininj nawu kabirridjalngudjwarre bu bolkkime, dja yuwn kab ngudmandeleng kore ngurrihdjaldjare bu ngurrikurduyime.

² Ngad wanjh karridjalmarnedjaremerren munguyh nawu yiwarrudj kadberre ba bu ngad karrinjilngmarnburren, dja mak warridj karrimurngrayekworrimen.

³ Ngurriburrbu, nungka Christ minj nungandeleng njilngmarnburrimeninj. Burrkyak, ngurriburrbu kore bimbuyindanj nungkakenh, bu yimeng, "Nawu birrimekbe bininj ngundimalelmang, wanjh nakka ngaye werrek ngandiyingkihmalelmangi." [Psalm 69:9]

⁴ Mahni mankarre rowk makka wanjh yingkihimbuyindanj bu kunkare duninj, bu ngad kadberre bolkkime, ba bu ngad karriborlh-mekenh. Kaluk nawu Bible kandjalmurngrayekwon, ba bu minj karriwarnyakmulewarren, bu karrinjilngmak bu karriburrbun kaluk God kanmarnekurduyime.

⁵ God minj kamarrkbaworren nungandeleng, dja munguyh kandjalmurngrayekwon kadberre ba bu minj ngad karrimarrkbaworren. Ngaye wanjh ngadjare bu nungka ngunmarnbun ngudberre ba bu ngurridjal-mayalikudjihmen kore ngurrimunkekadjung nungka nawu Christ Jesus.

⁶ Wanjh kunukka ngudda ngurrikangekudji, dja mak ngurridjalkudjiwi rowk bu ngurridjarrkburlumen God nawu Kornkumo nuye Jesus Christ nawu Kanmarnewohrnan kadberre rowk.

⁷ Kuhni wanjh ngudda ngurrikimarrimen munguyh yiman kayime bu Christ ngunkimey rowk, ba bu ngurridjarrkburlume God.

⁸ Ngaye marneyime ngudberre kunwokbuyika bu Christkenh. Nungka djalmarnburrijnj bu durrkmirridanginj bininj bedberre nawu birri-lakkayen, nawu bedda bininj Jew. Dja kunmekbekenh kanbuk kang kadberre rowk, bu kundjalwoybuk yonginj kore nungan God wokkurmerrinj.

Nungka kuninjkuu kurduyime kore God kunkare wokkurrmerrinj bedberre nawu mawahmawah.

⁹ Dja mak kuhni kurduyime ba bu bininj nawu minj Jews kabirriburrbu bu God mimkongiweri duninj, wanjh kabirriburlume nuye, kore kabimbuyindi bu kahyime, “Bu kumekbekenh ngaye wanjh ngundidjar-rkurlume kore ngarridjarrkdi bininj nawu minj Jews dorrengh, dja mak ngaye ngawayini bu ngeyburuburlume ngudda.” [Psalm 18:49]

¹⁰ Dja mak kahyime, “Ngudda bininj nawu minj Jews wanjh ngurrikuk-belbmerrinj nawu God nuye bininj ba bu kunukka wanjh ngurridjalnjilngmakmen duninj!” [Deuteronomy 32:43]

¹¹ Dja mak kahyime, “Ngudda nawu bininj minj Jews ngurridjalbur-lumen nawu Kawohran Rowk! Mah, wanjh nawu ngurriwarlahkenh bininj rowk ngurridjalburumen nuye!” [Psalm 117:1]

¹² Dja mak Isaiiah biyingsihmulewani Jesus bu yime, “Nakudji kaluk karrangen kore Jesse nawu birrimud nuye. Nungka wanjh kamre dja kahwohrnan rowk bedberre bininj nawu minj Jews. Kaluk bedda kabir-riwoybukwon nungka dja mak kabirrimadbun bu nungka kakurduyime kunmak bedberre.” [Isaiiah 11:10]

¹³ Mah wanjh, karriburrbu bu God kanmarnekurduyime kore kanmarneyingkihwokkurrmerrinj. Wanjh ngaye ngadjawan bu nungka ngunkangebarlike kore kunmodmikenh nuye dorrengh, dja mak ngun-nerhnjilngmarbun kore ngudda ngurridjalwoybukwon. Wanjh kunukka nawu Namalngmakkaykenh nungan karrurrrkmirri kore ngud-berre kukange, bu kundulkarre dorrengh, ba bu ngurridjalwoybukwon God dja mak ngurridjalmbun kore nungan kakurduyime kore wokkurrmerrinj.

Paul Kabenmarneyime Bininj Nawu Bedda Minj Jews Ba Bu Kabirriwoy-bukwon Jesus

Romans 15:14-21

¹⁴ Ngudda karridanginj ngaye wanjh kuninjkuu ngadjalyime bu kore woymbukkih. Bu kuninjkuukenh ngadjalburrbun. Bu ngudda wanjh ngurridjalma duninj bininj. God ngunbukbang ngudberre kunwern kunmakmak ba bu ngudmanwali wanjh ngurribenbukkankenh.

¹⁵⁻¹⁶ Dja wanjh bonj, ngaye bu ngahbimbom naninjnanu djurra bu yawoyhbengdayhke ngudberre kore ngudda ngurriyingsihborlhmeng. Njalekenh ngaye yiman wokrayekwong bu marneyime ngudberre? Wanjh ngurriburrbu bu God nungka ngandjalmarnekurduyime kunmak bu djalburudjang, dja nganmarbom ngamarnedurrkmirri Christ Jesus kore bininj nawu minj bedda Jews. Ngaye wanjh ngahdurrkmirri yiman kayime nuye priest bu ngahweyan bedberre manbu kunwok manmak kore Godbeh. Dja mak God nungan kadjare nawu Namalngmakkaykenh kabenmarbun bininj nawu bedda minj Jews bu kabirrimakmen nuye dja mak kabirrikurmerrenkenh kore nungka God kanjilngmakmen.

¹⁷ Ngaye wanjh nganekukbelbmerrinj kore Christ Jesus, dja kuhni wanjh ngadjalnjilngmak bu ngaye ngarrurrrkmirri mahni manbu God nuye.

¹⁸ Kaluk ngaye minj ngayolyolme manbuyika. Ngadjaldjare ngayolyolme nawu Christ bu nganmarnedurrkmirri ngaye! Nungka wanjh nganmunkeweng ba bu ngabekang bininj nawu bedda minj Jews kore nungka. Bedda wanjh ngandikurdunang dja mak ngandibekang ngaye, wanjh kabirriwokmarrkmang kore God.

¹⁹ God nuye Namalngmakkaykenh nganwon kundulkarre nuye ba bu ngaye ngakurduyime ba bu bedda birrikangebarhmi kore birri-wohburrbuni God. Wanjh kunmekbehkenh kunu ngaye ngawohrewohrey

kore Jerusalem werrk, dja djarreh kore kunbolkkimuk kabolkngeyyo Yilyricun, bu ngahbendjalbengdayhkeyi duninj bu kunwok manmak rowk manbu Christkenh.

²⁰ Kuninjkuu wanjh ngaye ngadjareni bu ngabenmarneyimi nawu bininj bu Christkenh kore yarrkka kabirrihni nawu bedda bininj minj ngokko birriyingkihbekeyi kore nungka Christkenh. Kaluk ngawarnyakni bu ngaweykayi kore nabuyika bininj nuk yolyolmeninj bedberre, bu nungka ngaweko dedjingmayi bu kunukka nungka marnbuyi.

²¹ Ngaye kunu wanjh ngahburrbun kore bimbuyindanj, manbu kayime, "Bininj nawu minj nangale korroko benmarnemulewayi kore nungkakenh, kaluk bedda wanjh kabirridjalnan nungka. Dja mak nawu bininj minj korroko biwokbekeyi wanjh kunu kabirriburrrburrrbekkan." [Isaiah 52:15]

*Paul Kadjare Kabendjahwon Bininj Kore Kunredkimuk Rome
Romans 15:22-33*

²² Kuhni wanjh ngadjaldurrkmirri munguyh, wanjh kunmekbehenh kunu ngaye minj ngamrawinj bu kerngehenh kore ngudda ngurrihni kore Rome.

²³ Kaluk bolkkime wanjh ngaye ngayakwong rowk kore ngarrurrkmirri kore kondanjkuu kunred, dja wanjh bolkkime ngadjaldjare ngamre kore ngudda ngurrihni kumekbe. Kaluk ngaye wanjh ngadjaldjareni bu ngamrawinj kore ngudda kore mandjewk nawernni.

²⁴ Bolkkime wanjh ngare kore kunbolk Spain, dja ngadjare ngad karridjarrkdi bu waken, dja mak ngad karridjarrkkarmen manbu kunmakkenh. Wanjh yerreh kunu ngudda kandidjal munkewe bu ngare kore kunbolk Spain.

²⁵ Dja med. Ngaye ngare werrk kore Jerusalem bolkkime ba bu ngahbendiyikarme nawu God nuye bininj kunmekbeh.

²⁶ Ngayime bu ngaye ngabenkukwon kunwardde nawu ngakukkarme ngandiyinkihkukwong bininj nawu yiwarrudj bedberre birrikang kunbolk Macedonia dja Achaia. Wanjh ngandikukwong ngaye bu ngabenkukwonkenh nawu birrimarladj bininj nawu kabirrihni kore Jerusalem.

²⁷ Yoh, wanjh bedda birridjalningmakminj bu kuninjkuu kabirrikurduyime, yiman kayime bu kabindikarremulewanken! Bu djalwoybukkih kuninjkuu birridjalkurduyimeng kore mandjad duninj. Bedda nawu bininj minj Jews birribekgang kunwok manbu Yesuskenh bu nawu Jews bininj bindibalwokwong. Kunmekbekenh God nuye Namalngmakkaykenh benmarnekurduyimeng kunmak, karohrok bu yingkihkurduyimeng bedberre nawu Jews bininj. Wanjh bedmanwali bininj nawu bedda minj Jews kabirriyime bu bedmanwali kabindibalkarremulewan kondanjkuu kurorre ngarre.

²⁸ Wanjh ngaye kunu ngare kore Jerusalem werrk bu ngabenkukwon nawu naninjnanu kuwardde nawu money. Wanjh yerreh kunu ngahballe kore kunbolk Spain. Wanjh kunu ngaye ngamre kore ngabolkmokdung werrk kore ngudda ngurrihni.

²⁹ Wanjh bu ngaye ngamre kore ngudda ngaye ngaburrbun nawu Christ kadjalkurduyime kunwern kunmakmak kore ngad kadberre rowk.

³⁰ Bolkkime wanjh ngaye djawahdjawan ngudberre nawu ngad karri-danginj bu kandimarnedi yiwarrudj! Kuhni wanjh karridjarrkdurrkmirri bu kunwern duninj. Ngaye djawan ngudberre kunmekbekenh bu nawu Namalngmakkaykenh ngunmarnbun bu ngaye bu kandimarnedjare. Dja mak djawahdjawan ngudberre kore Jesus Christ nawu Kawohrnare Rowk kadberre.

³¹ Kaluk bu ngurridi yiwarrudj ngardduk, wanjh ngurridjawa God bu ngandjalnahan kore kunbolk Judea bu bininj nawu minj kabirriwoybukwon Jesus wanjh minj ngandibun. Dja ngadjaldjare ngabenbidyikarme bulkkidj duninj nawu God nuye bininj kore Jerusalem.

³² Kaluk yerrehkah wanjh God nganmarnbun ngaye bu ngamre kore ngudda ngudberre, kore nungka kadjare. Ngaye wanjh ngahdjalmarmarr bu ngamre kumekbeh kore ngudda karridjarrkni, ba bu ngudda wanjh karridjalngehme.

³³ Ngaye wanjh ngadjare God nawu kandjarrkwon kore kunmodmikenh nuye wanjh kunukka nungka dorreng ngurridjarrkni rowk. Amen.

16

Paul Benmarneyimeng Bobo Nawu Yiwarrudj Bininj Birrihni Rome Romans 16:1-21

¹ Nawu karridangerrinj, ngaye ngadjare bu ngurrikimang ngalkudj daluk kangeyyo Phoebe, ngalbu karridanginj, bu kamre kore ngudda. Ngaleng kahdurckmirri bedberre bininj nawu yiwarrudj kabirrikarme kore kunbolk Cenchrea.

² Ngudda Nawu God nuye bininj, wanjh kunmekbekenh ngadjare ngurridjalkimang kore nawu Kawohrn Rowk bu djal kunmak dorreng dja mak ngurribidyikarmen. Ngaleng benbidyikarmeng birriwern bininj, dja mak ngaye warridj. Dja wanjh ngurridjalwo nawu njale yiman kadjare.

³ Ngaye ngadjare mak ngabenbenemarnewokmunkewerren bu ngurbenbenemarneyimen berrewoneng ngalbu Priscilla dja mak nawu nabinj kobeng ngarre Aquila nawu ngarridjarrkdurckmirri bu karridjarrkelbmerrinj Christ Jesus.

⁴ Bu birriwern bininj birridjareni bu yimankek ngandibuyi, wanjh bedda ngandinahnani ngaye, dja kunu bedda warridj darnkih bindikuyinjbuyinj berrewoneng. Birriwern bininj nawu bedda minj Jew wanjh bolkkime kabirribebbekarme manbu yiwarrudjkenh bedberre, dja bedda, dja ngaye mak ngarrbendjarrkmanjbun ngalbu Priscilla dja nawu Aquila berrewoneng.

⁵ Wanjh ngadjare mak ngabenmarnewokmunkewerren bu ngurbenmarneyimen kunwok ngardduk kore bininj nawu yiwarrudj bedberre nawu kabirrimindemornnamerren kore kunurck bedda berrewoneng. Dja mak ngamarnewokmunkewerrinj kore Epenetus, ngardduk djawirna nawu ngaye ngahmarnedjare. Kaluk nungka wanjh nayungkihi bu bimarnekangemulewarrinj nawu Christ kore kubolkwarlahkenh kunbolk ngarre Asia.

⁶ Dja mak ngadjare ngamarnewokmunkewerren ngurrimarneyimen ngalbu Mary, ngalbu wernhdurckmirri ngudberre.

⁷ Dja mak ngadjare ngabenbenemarnewokmunkewerren bu ngurriyime ngardduk naninjnanu bininj bokenh, Andronicus dja Junias, nawu ngardduk ngariredbo duninj, nawu ngarridjarrkni kore prison. Kaluk bedda benedjalkuken kore mak nawu birribuyika apostles. Bedda werck birrikubelmerrinj Jesus wanjh yerre ngayemanwali.

⁸ Dja warridj ngamarnewokmunkewerren bu ngurriyime Amplitus nawu ngaye ngamarnedjareminj kore Kawohrn Rowk.

⁹ Dja warridj ngabenbenemarnewokmunkewerren bu ngurbenbeneyime nawu Urbanus, nawu karridjarrkdurckmirri kore Christ, dja mak nawu Stachys, nawu ngardduk djawirna nawu ngahmarnedjare.

¹⁰ Dja mak ngamarnewokmunkewerren bu ngurrimarneyime Apelles. Ngad wanjh karriburrbun rowk bu nungka nuye Christ namak bininj. Dja mak ngurrbenbalmarneyime kore ngabenmarnewokmunkewerren nawu birrimud duninjh nuye Aristobulus.

¹¹ Dja ngaye ngamarnewokmunkewerren kore ngurrimarneyimen Herodian ngalbu ngardduk nganemud. Dja mak ngurrbenmarneyimen bu ngayekenh nawu Kawohnan nuye bininj nawu kabirrihni kore namud nuye Narcissus.

¹² Ngadjare mak ngabenbenewokmunkewerren bu ngurrbenbenemarneyimen nahni daluk bokenh, Tryphena dja Tryphosa, nawu kabene-marnedurrkmirri wernkih duninjh kore nawu Kahwohrnan Rowk. Dja mak ngurrimarneyimen ngalbuyika daluk kangeyyo Persis, ngalbu ngaye ngamarnedjare. Kaluk ngaleng bimarnedurrkmirri kunwernkah kore nawu Kawohnan Rowk.

¹³ Ngahdjare mak ngamarnewokmunkewerren bu ngurrimarneyime nawu Rufus. Kaluk naninjanu bininj nawu God nungan bidjarrngbom. Dja mak ngalbadjan nuye, ngalbu yiman kayime ngaye mak ngalbadjan ngardduk rerrih!

¹⁴ Dja mak ngabenmarnewokmunkewerren bu ngurrbenmarneyimen nawu Asyncritus, dja mak Phlegon, Patrobus dja Hermas, dja nawu karridangerrinj kumekbe nawu kabirridjarrkni.

¹⁵ Dja mak Philologus, Julia, Nereus dja mak daluk ngalbu benedanginj nuye, dja mak Olympas dja mak nawu God nuye bininj nawu kumekbeh kabirridjarrkdi.

¹⁶ Wanjh ngudda ngurrikimarrimen dja ngurribunjhmarren dorreng kunmakkenh kore God nuye kadjare. Birriwern nawu yiwarrudj bedberre bininj nawu Christ nuye, kore kubolkbubuyikabeh wanjh bedda kabirridjaldjare ngundimarnewokmunkewerren kore kunmakkenh ngudda ngudberre.

¹⁷ Ngaye wanjh mandjad balmarneyime ngudberre nawu ngad karridangerrinj bu ngurrbennahna nawu bininj ngundimarnbun ngudberre bu ngudda ngurridangwerren dja mak ngundibebbehkukyarlarrke kore ngundibukkabukkan manbuyikakenh kunwok kore manbu ngudda ngurriyingkihborlhmeng. Wanjh yuwn darnkih ngurrbendarnhyikan nawu birrimekbe bininj nawu birrimayalibuyika.

¹⁸ Nawu bedda minj kabirrimarnedurrkmirri Christ nawu Kawohnan rowk kadberre. Burrkyak, dja bedda kunu yiman kabirridjalmarnedurrkmirri kore kabirridjaldjare bedmandeleng. Bedda kabirriwokdi yimankek bedda birridjalmak bininj. Dja nakka nanu bedda kabirridjalkurrehkurren bininj nawu minj bedda birrikodjkuludjad.

¹⁹ Ngaye wanjh ngadjalwernhkangemarrma duninjh bu ngudda burrbun ngudberre! Birridjalwern bininj wanjh bedda ngundiwobekkan bu ngudda ngurriwokmarrkmang nawu Kawohnan Rowk. Ngaye ngadjare bu ngudda ngurridjalwernhburrbu bu ngurrimayalimakin kore kunmakmakkenh ngarre. Dja ngaye ngadjare warridj ngudda bu minj ngurriwernhburrbu kore kunwarrekenh ngarre.

²⁰ God kanwon kadberre kunmodmikenh nuye, dja darnkih duninjh bu kabolkyimerran nungka kabikurrme namarnde nawu Satan kanjdji kore kurrenge ngudberre ba bu ngurrimelme dja mak ngurrikukdjubulhme.

Ngadjare Jesus Christ nawu Kawernhwohrnan kadberre bu nungka wanjh ngundjalkongibun ngudberre munguyh!

²¹ Nawu Timothy kadjare ngunmarnewokmunkewerren ngudberre. Nungka wanjh kondanjkuwu nganedjaldurrkmirri. Dja mak warridj bininj

nawu ngarridi, yiman Lucius, Jason, dja mak nawu Sosipater, nawu ngaye ngarriredbo.

Bininj Yolyolmerrinj Nawu Paul Biwokbimbuni

Romans 16:22

²² Ngaye wanjh ngangeyyo Tertius ngabimbun naninjnanu djurra kore Paul nganmarneyime. Wanjh ngaye ngamarnewokmunkewerren ngudberre kore nawu Kawohnan Rowk.

Paul Danginj Yiwarrudj Dja Yakwong Mahni Manbu Djurra

Romans 16:23-27

²³⁻²⁴ Dja mak nawu Gaius kadjare ngunmarnewokmunkewerren, kaluk kondah nungka ngannahnangaye. Dja mak kabenbidyikarme bininj nawu yiwarrudj bedberre kondanjunu. Nabadbuyika bininj nawu Erastus, nawu kanahnan kunwardde ngalengngarre council kondah kore kubolkkimuk, dja mak nungka kadjare bu ngunbalmarnewokmunkewerren ngudberre, dja mak Quartus, nawu ngad karridanginj kondah kahdi.

²⁵ God djalkarmeng kuninjkuu kunwok kunmak nuye manbu warlkwarlkayindi bu kunkuyeng duninh. Kaluk bolkkime wanjh ngaye bengdayhke maninjmanu kunwok kunmak manbu kabiyolyolme Jesus Christkenh ba bu God ngunmarnbun kore kundulkarrewi nuye ba ngurridjarrkdi munguyh kore nungka.

²⁶ Yoh, wanjh bolkkime God kanbukkang manbu warlkwarlkayindi kore kunkarekenh. God nawu kahdarrkid munguyh munguyh wanjh benmarnewokrayekwong dja benmarnbom nawu prophets birribimbom maninjmanu kunwok ba bu bolkkime karriburrbun kore kanbengdayhkeng. Wanjh kadjare karriwoybukwon dja karriwokmarrkmang ngad nawu karriwarlahkenh bininj rowk nawu karriedbubuyikabeh rowk.

²⁷ Yoh, God nungka nadjalkudji nawu kawernhburrbun yehyeng rowk. Birriwern bininj kabirridjalburlumen munguyh munguyh kore nungka Jesus Christkenh. Amen.

1 Corinthians

Paul Bimbom Nahni Djurra

1 Corinthians 1:1-3

¹ Ngaye wanjh Paul. God ngankayhmeng dja nganmarnbom ba ngayimerranj apostle nuye Christ Jesus. Kuninjkuwu God djareminj bu kurduyimeng ngardduk.

Ngaye nganedjarrkdi nabadbuyika bininj nawu karridanginj, nawu kangeyyo Sosthenes.

² Ngaye ngahbimbun nahni djurra ngudberre bininj nawu ngurrihni kore Corinth, ngudda nawu God nuye Church. Ngudda nawu God ngunkukbelbmeng ngudberre kore Christ Jesus, dja kunmekbekenh God ngunmakwan ngudberre kore nungka. Nungka wanjh ngunkayhmeng dja ngunmarnbom bu nungan nuyekih bininj, yiman kayime birribuyika bininj nawu kabirrihni kubolkwarlahkenh bu kabirrikayhme kungey nuye Jesus Christ nawu Kawohrn Rowk. Kaluk nungka nawu kadjalwernhwohrnan kadberre dja mak bedberre.

³ Ngaye ngadjare God nawu kadberre Ngabbard dja mak Jesus Christ nawu Kawohrn Rowk bu ngundikongibun ngudberre dja mak ngundiwon kunmodmikenh nuye.

Paul Bimanjgom God

1 Corinthians 1:4-9

⁴ Nawu ngaye ngardduk God ngunkongibom ngudberre bu nungka ngunkukbelbmeng kore Jesus Christ, wanjh kunmekbekenh kunu ngaye ngadjalmanjbum munguyh nungka.

⁵ Bu ngudda ngurrikukbelbmerrinj Christ Jesus, wanjh kunukka ngurriyimerranj yiman ngurrikukenmen bu ngurrikarme kunmakmak nuye. Ngaye bu ngahyolyolme ngudberre ngurriwernhburrkburrkbekkan kore God nuye kunwok, ba bu ngudmanwali ngurriyolyolme mandjad duninj.

⁶ God kuninjkuwu kurduyimeng ngudberre ba bu ngurridjalwernhwoy-bukwong kore kunwok nuye Christ bu ngundimarneyimeng ngudberre.

⁷ Yoh, kunukka wanjh Namalngmakkaykenh ngunwong rowk ba bu ngurrimarnedurrkmirri God, dja ngurridjalmaddi kunnjilngmak dorreng kore kabolkymerran bu birriwarlahkenh bininj kabirridarrkidnan Jesus Christ nawu kawohrnnan kadberre.

⁸ Dja mak God ngunmurrngrayekwon ngudberre kaluk bu yerrekah kore kayiburnbunkenh. Nungka kuninjkuwu kakurduyime ba bu Jesus Christ nawu kawohrnnan kadberre kamre bu kandjadmekenh karriwarlahkenh bininj, dja kunu nungka minj ngunwelengname ngudberre.

⁹ Yoh, wanjh woybukkih ngudda ngurriburrbum, God kuninjkuwu munguyh kakurduyime kore kawokkurrmerren. Nungka ngokko nguny-ingkikayhmeng ngudberre dja ngunkurrmeng ngudberre ba bu ngurridjarrkraworren nawu beywurd nuye, Jesus Christ nawu kawohrnnan rowk kadberre.

Paul Benwokrayekwong Bininj Nawu Kabirridangwerren Kore Yiwarrudj

1 Corinthians 1:10-17

¹⁰ Wanjh kunbadbuyikawali ngaye ngadjare marneyime ngudberre. Ngaye kunrayek duninj marnehmarneyime ngudberre kore kungey

nuye Jesus Christ nawu kawohrnan rowk kadberre. Wanjh ngurringur-dmen bu ngurridangwerren. Dja burrkyak. Ngurridjalkangekudjinin, dja mak ngurrimayalikudjihnin kore ngurrikarremarnbun.

¹¹ Nawu karridagerrinj, ngaye marnehmarneyime ngudberre kunin-jkunukenh yikahwi bininj nawu Chloe ngalenggarre namud ngundimule-wam bu ngudda munguyh ngurridangwerren.

¹² Wanjh kuninjkuu ngaye ngayime, yikahwi ngudda ngurriyime, “Ngad wanjh Paul nuye bininj!” Dja mak ngurribuyika ngurriyime, “Ngad wanjh Apollos nuye bininj.” Dja mak ngurribadbuyika ngurriyime, “Ngad wanjh bininj nuye Cephas*.” Dja mak ngudda ngurribadbuyika ngurriyime, “Ngad nawu Christ nuye bininj.”

¹³ Wanjh kunukka minj kunmak bu ngurrihime! Ngudda kunu ngur-ribebbekukyarlarmeng bu ngurrimunkekadjung Christ. Yiddok ngur-rikukdadjdadjkeng nawu Christ? Dja njalekenh ngudda nawu yikahwi ngurriyime ngaye ngardduk bininj? Yiddok ngaye ngarroweng ngudberre kore kundulk cross? Ngudda ngurrikodjdjuhmeng kore kungey nuye Jesus, dja minj ngaye ngardduk kore kungey.

¹⁴⁻¹⁵ Ngaye kunu ngabenbenekodjdjuhkeng benebokenh bininj kore nguddabeh, nawu kabenengeyyo Crispus dja mak Gaius. Wanjh kunu ngadjalmanjbun God bu minj birriwern bininj ngabenkodjdjuhkemeninj, ba bu minj birriwern bininj kabirriyime bu birrikodjdjuhmeng kore ngaye kungey ngardduk.

¹⁶ (A, yoh!) Wurra, ngaye mak ngabenbadkodjdjuhkeng Stephanas dja mak nawu nuye namud. Dja mak ngabalburrbun minj nangale ngakodjdjuhkemeninj nabadbuyika bininj.)

¹⁷ Ngaye ngadjalnjilngmak bu minj ngaye kodjdjuhkeyi ngudda nawu ngurridjalwern bininj, dja Christ minj nganmunkewemeninj bu kodjd-juhkemeninj ngudberre. Nungka nganmunkeweng bu ngadjalmulewan kunwok kunmak bu djal mandjad duninj marneyime ngudberre. Nungka minj djareniwirrinj ngahmulewayi ngudberre kore bininj kabirriburrbun bu ngaye yimankek ngamayaliwern. Dja burrkyak. Bu ngaye kunmekbe ngayimeninj ngudberre, wanjh kunukka minj ngamulewayinj mandjad ngudberre bu Jesus doweng kore kundulk cross. Manekke kunwok mandjalkudji manbu manmurrngayek balhbeh kahyo.

Christ Kanbukkan God Nuye Kundulkarre Dja Mak Kunmayali

1 Corinthians 1:18-25

¹⁸ Bininj nawu kabirrimalngdown, bu kabirribekkan kuninjkuu kunwok manbu kundulk crosskenh, wanjh bedda kabirridjalwokwarrewe. Dja ngad bininj nawu God kangehke, bu mahni kunwok karribekkan, wanjh God kanmarnewokdan kadberre kundulkarre dorreng nuye.

¹⁹ Kuninjkuu wanjh God yimeng kore kabimbuyindi, “Nawu bin- inj yimankek kabirriburrbun bu bedda birrimayaliwern, kaluk ngaye ngabenmayaliyakwon bedberre. Dja nawu bininj kabirriyime yimankek birriwernhkodjkuludjad, wanjh ngaye ngabenmayalingurdke bedberre.” [Isaiah 29:14]

²⁰ Mah wanjh, nawu bininj yimankek kabirriyime kabirriburrbun kunwern kunmayali ngarre, yiddok kunukka woybukkih? Dja mak bininj nawu yimankek kabirriburrburkbekkan mankarrekenh ngarre, yiddok bedda birrimak? Dja mak nawu bininj kabirriyolyolme bu yimankek kabindiwokmayalibekkan birriwern bininj nawu bolkkimekenh, yiddok bedda birrimak? Bonj, wanjh bininj nawu birrikang kondanjkuu

* 1:12 Kunmekbe kungey karohrok “Peter”.

kurorrewaken yimankek kabirriyime bedda kabirriwernhmayalidokme. Dja God nungka kanbukkang kadberre bu kuninjkuwu kunmayali ngarre wanjh kamayaliwarre duninj.

²¹ Kuhni wanjh ngadjare bu wernhbengyolyolme kab ngudberre. Bininj nawu birrikang kondanjkuwu kurorre yimankek bedda birrimayaliwern, dja minj bedda birridjalwernhburrbuyi God. God benngurdengkeng bedberre bu wardi birriburrbuyi, kunukka wanjh nungan nuye God kunmayali. Kunmekbekenh kunu God karremarnbom kabengehkekenh bedberre bininj bu kabirriwoybukwon kadberre kunwok karrbenmarnemulewan.

²² Nawu Jews bininj kabirriwidnan kuninjkuwu kunwok dja bedda kabirridjaldjare kabirrinan kundulkarre ba bu kabirriwoybukwon. Dja nawu bininj minj Jews bedda warridj kabirriwidnan kuninjkuwu kunwok, dja kabirridjaldjare kunwernhkimuk kunmayali kabirrimang ba bu kabirriwoybukwon.

²³ Dja ngad karrbendjalmarnemulewan bu Christ doweng kore kundulk cross. Wanjh nawu Jews bininj kabirridjalwernhwidnan kuninjkuwu kunwok dja minj kabirriwoybukwon. Dja nawu bininj bedda minj Jews kabirridjalkarrewarrewe.

²⁴ Dja God nungka kabenkayhme yikahwi bininj nawu Jews dja nawu yikahwi minj Jews. Bedda bu kabirribekkan kore karrbenmarnemulewan, wanjh kunu kabirridjalwernhburrbun Christ, nawu kakarme kundulkarre rowk nuye God, dja mak kunmayali nuye kunmakmak kakarme.

²⁵ Bu yimankek bininj kabirriyime kabirriwernhburrbun rowk, dja burrkyak, nungka God kadjalwernhburrbun rowk. Dja mak yimankek bu bininj kabirriyime kabirriwernhmurrnggrayek, dja burrkyak yerreh, nungka God djalwernhdulkarrekimukkenh duninj. God wanjh kabenyurhke bininj rowk.

Bu Karriburlume Nadjalkudji Nawu Kawohran Rowk

1 Corinthians 1:26-31

²⁶ Nawu ngad karridangerinj, wardi ngurriburrbu bu baleh kernegehkenh ngurrihyimi bu God ngunkayhmeng ngudberre. Ngudda nawu minj ngurriwernmayaliwernniwirrinj, dja djal yikahwi nawu ngurrimayaliwern bu bininj ngundimayaliburlumeng ngudberre. Dja mak ngudda nawu minj ngurrimurrnggrayekniwirrinj, dja djal yikahwi ngudberre ngurrimurrnggrayekni bininj. Ngudda nawu minj ngurrikukenniwirrinj, dja djal yikahwi ngudberre nawu ngurridangereni kore namud ngudberre nawu birringeykikhkimukni.

²⁷ Dja kunukka bonj, God bendjarrngbom bininj nawu minj birriwernhkodjkuluwern ba bu bininj nawu birriwernmayalikimuk, wanjh kabirriyemengalme bedmandeleng. Nungka bendjarrngbom nawu birringudjwarre bininj ba bu bininj nawu birridjalngudjmak, wanjh bedda kabirriyemengalme.

²⁸ Dja mak God nungka bendjarrngbom bininj nawu minj birrikuken, dja mak bendjarrngbom bininj nawu birringeyyahwurd. Dja mak bendjarrngbom bininj nawu birridjalmarladj. Kaluk yiman kayime djarrngbom njalehnjale nawu djal yakni, ba bu kanbukkan bu njalehnjale nawu karrinan, wanjh yiman djal yeng.

²⁹ God kuninjkuwu yimeng rowk, ba bu minj nangale mak bininj kabimarneburlumerren kore God nuye kumirrk.

³⁰ Wanjh God nungan nadjalkudji nawu ngunkukbelbmeng ngudberre kore Christ Jesus. Wanjh kunmekbekenh ngad karriburrbun kore God nuye kunmayali. Dja mak Christ Jesus wanjh kanmarnbom ba bu God

kanmakwam kadberre, dja mak kanbidyikarme ba bu karridjalkurduyime kore kunmakkenh, dja mak nungka kanbebke kore karribongdibeh.

³¹ Kuhni wanjh kurduyimerranj kadberre, ba bu kawoybukkendan kore kabimbuyindi, kore kayime, "Nangale bininj nawu kadjare kaburlumeren, wanjh nanu bidjalburlumen nawu Kawohrnan Rowk kore baleh bimarnekurduyimeng." [Jeremiah 9:24]

2

Njalekenh Paul Wokdanginj Bedberre Bu Wokyekeyekeni.

1 Corinthians 2:1-5

¹ Ngad nawu karridabbolk, bu kerrngehkenhni ngaye ngamwam ngamulewani ngudberre God nuye manwarlkkaykenh kunwok, wanjh kunukka minj ngaye ngawokdiwirrinj bu kunmakniwirrinj, dja minj ngawokmenmenyimeninj bu yiman kayime bininj nawu wokmayaliwern.

² Dja burrkyakni, ngaye bu karridjarrkdi, wanjh ngadjalburrbuni bu ngamulewam kundjalkudjiwi. Ngaye ngadjaldjareni ngamulewam Jesus Christ nawu doweng kore kundulk cross. Kuninjkuu ngadjalmulewam ngudberre.

³ Yoh, bu ngaye karridjarrkdi wanjh ngabekkarrinj ngangudjwarremeninj, dja mak ngakunikeleni, dja mak ngadeldelmi kunkimuk.

⁴ Minj ngayeman marnbuyi ngudberre bu ngurriwoybukwoyinj Jesus. Ngaye yiman ngawokyekeyekni wurd. Dja bonj, nawu Namalngmakkaykenh ngunmarnewokdanginj ngudberre kundulkarre dorrengh, wanjh kunu ngurriwoybukwong bulkkidj.

⁵ Bu ngudda yimanek ngurriwoybukwoyi Jesus kore ngurridjalbekkayi djalbininjbeh kunmayali, wanjh kunukka minj kunmak. Dja God ngunmarnbom bu ngurriwoybukwong kore nungan nuye kundulkarre. Wanjh kunu kundjalmak duninj. Wanjh kunmekbekenh kunu ngaye marnewokdi kunngudjwarre dorrengh.

God Nuye Namalngmakkaykenh Kanbukkabukkan God Nuye Kunmayali Manwarlkkaykenh

1 Corinthians 2:6-13

⁶ Wanjh bu ngad ngarrbenbukkabukkan bininj nawu kabirriwernhwoybukwon nawu Jesus, wanjh ngarriwernhkarreyolyolme djal God nuye kunmayali. Bininj birribuyika nawu birrikang kondanjkuu kurorrewakenh bolkkimekenh, bedda minj kabirriburrbun maninjmanu kunmayali, dja mak nawu kabindimarnewohrnawohrnan bedberre minj mak kabirriburrbun. Bedda wanjh kabirridjalyakmen.

⁷ Kuhni kunmayali kore ngarriwokdi wanjh God nganwong rowk. Kuhni wanjh manwarlkkaykenh kunmayali manbu God warlkkang. Kaluk mahni korroko yingkihkarremarnbom yerre wanjh kunu welengmarnbom kunred, ba bu ngad karriyimerran yiman nungka nawu nadjalwernhmakkaykenh duninj.

⁸ Bininj nawu kabirriwernawohrnan kore kondanjkuu kurorre, wanjh minj birrimenmayi kuninjkuu kunmayali. Bu bedda birriburribuyi kerrngehkenhni bu Jesus nangka wanjh nawu Kawohrnan Rowk, dja Nadjalwernhmakkaykenh duninj, wanjh kunu minj bedda birribiddundulubuyinj.

⁹ Dja burrkyakni, minj bedda birrimenmenburribuyinj. Wanjh kumekbekenh kunu kabimbuyindi, kore kayime, "God nungka yingkihkurrmeng nawu namakmak duninj kadberre nawu nungka karrimarnedjare bulkkidj nungka. Minj nangale nabuyika bininj nayinj dja wobekkayi, dja

mak minj wernhburrbuyi yehyeng nawu namakmak kore kayingkihkar-me kadberre.” [Isaiah 64:4]

¹⁰ Dja God bimmunkeweng nawu Namalngmakkaykenh kadberre ba kanbukkabukkang kuninjkuwu kundjalwern. Nawu Namalngmakkaykenh nungan kaburrbun rowk nawu kawarlkwarlkkayindi, dja kaburrbun rowk kore God kahmayaliyime.

¹¹ Kandibekka. Bininj minj kaburrbun bininj nabuyika kore kahmay-aliyime, djal nungan kunmalng nuye kaburrburren. Kuhni wanjh kad-jalrohrok, nawu God nuye Namalngmakkaykenh nadjalkudji bu nungan kaburrburren namayaliwern God nuye.

¹² Ngad minj karrikukbarlmikendangimeninj kunmalng nawu kon-danjkuwu kurorrewaken! Dja ngaleng God nuye Namalngmakkaykenh kanwong, ba bu karrimayalibayhme njale bu God burudjang kanwong kadberre kunmakmak nuye.

¹³ Kuhni wanjh karriyolyolme. Bininj nawu birrikang kurorrebeh minj kandibukkayinj kadberre kunwok kunmayali. Dja burrkyak. Nun-gan Namalngmakkaykenh kandjalbukkan kunwok kunwoybuk nuye ba karriwokdi, dja kanwon kore mandjad karrbenmarneyime bininj bu Namalngmakkaykenh kahdi kukange bedberre.

Bininj Nawu Kabirrikarme Namalngmakkaykenh Nakka Wanjh Kabir-riburkburrkbekkan God Nuye

1 Corinthians 2:14-16

¹⁴ Bininj bu Namalngmakkaykenh minj kahdi kukange bedberre, wanjh minj kabirridjare kabirribekkan God kore kunmalng bedberre kabenhmarneyime. Wanjh nakka kabirridjalwokburriwe, dja kabirri-wokwarrewan. Minj kabirriwernhburrkburrkbekkan kore kunmekbe kunmayali dja minj kabirrikarme nawu Namalngmakkaykenh kore kukange bedberre.

¹⁵ Bininj nawu kabirrikarme Namalngmakkaykenh, wanjh bedda kabirrimenmenmang maninjmanu rowk. Dja nawu birribuyika bin-inj minj kabirrikarme nawu Namalngmakkaykenh, wanjh bedda minj kabindimenmenmang birrimekbe bininj nawu Namalngmakkaykenh kahdi kukange bedberre.

¹⁶ Kunmekbekenh kunu bimbuyindanj, bu yimeng, “Minj nangale bininj kaburrbun kore nawu Kawohrnna Rowk kahmayaliyime. Dja mak minj nangale bininj bibukkayinj.” [Isaiah 40:13]

Dja ngad kunu karriidjalburrbun kore kunmayalikudjihwi nuye nawu Christ.

3

Paul benmarneyimeng bedberre, “Ngurringurdmen bu ngurriwurdyaw-worren.”

1 Corinthians 3:1-4

¹ Nawu karridangerinj, kandibekka bu marneyime. Bu ngaye karrid-jarrkdi kunyungkih ngamulewani ngudberre, ngudda yimankek ngurriy-imi minj ngurrikarmeninj Namalngmakkaykenh, dja ngurriyimi yiman kayime bininj nawu kondah kurorrebeh. Ngudda ngurrikukbelmerrinj nawu Christ, dja ngudda ngurridjaldjareni bu yiman kayime ngurriwur-dyawworreni munguyh!

² Wanjh bu ngaye ngahmulewani ngudberre, kunukka wanjh yiman kay-ime manme mankelkelk woniwoni. Minj mak bangmewoyi ngudberre

manrayek manme, dja ngudda minj kunu ngurribangmedjordmeninj. Kaluk ngudda kunu munguyh kumekbe ngurridjalyime!

³ Ngudda bolkkime wanjh ngurridjalkurduyime yiman kayime bininj kore kondah kurorrebeh! Ngayime ngudda ngurriyikirnwerren dja mak ngurridangwerren. Wanjh kunukka ngurrikurduyime yiman kayime djal bininj birriwarlahkenh rowk nawu kondah kurorrebeh.

⁴ Kuhni bu ngahyime ngudberre, yikahwi ngurrihyime, “Ngad ngadberre Paul nuye bininj.” Dja mak yikahwi ngurriyime, “Ngad ngadberre Apollos nuye bininj.” Bu kuninjkuu ngurrikurduyime, wanjh kunukka yiman ngurriyime bininj nawu kabirridjaldjare bedman bedberrekhih kore kabirrikurduyime.

Paul dja Apollos Benedjalmarnedurrkmirri Nuye God

1 Corinthians 3:5-9a

⁵ Njalekenh ngudda ngurridangwerren ngadkenh ngarrewoneng? Kunubewu ngudda minj ngurriwernhburrbun bu ngadkenh. Ngaye dja nawu Apollos ngad kunu wanjh nganedjalmarnedurrkmirri nadjalkudji God nuye. Nungka wanjh kanbenebebbhwong kore nganemarnedurrkmirrikenh. Kunmekbekenh ngundimarnemulewam ngudberre ba bu ngurriwoybukwong Jesus.

⁶ Nungka wanjh nganwong kuninjkuu bu ngahmarnedurrkmirri bu ngaye nawu ngayungkihni ngahmulewani ngudberre Jesuskenh. Ngaye wanjh yiman bininj nawu karrudjeng manmim manmekenhih kore kunkulk! Kalukburrk Apollos kumwam ngunbidyikarmeng ngudberre kore yiwarrudji ngarre. Wanjh nungka yiman kayime bininj nawu kadjuhdjuhke kore mankolhde kahdi. Kaluk nungan God nadjalkudji ngunmarnbom bu ngurridjordmeng yiman kayime manrakelkihkimuk manbu kadjordmerren.

⁷ Bininj nawu kamimdudjeng dja mak nabuyika bininj nawu kukku kabowon, nakka minj bedda benewernhkuken. God nungka nadjalkudji nawernhkuken nawu kamarnbun yehyeng rowk bu kadjordmerren.

⁸ Kaluk benemekbe bininj, nakudji nawu kakolhdedudjeng, dja nabuyika nawu kakolhdedjuhdjuhke, wanjh bedda kunu kabenedjarrkmarnedurrkmirri rowk nawu nadjalkudji God. Kaluk nungka yiman kabenebebbekarremulewan berrewoneng.

^{9a} Wanjh kunmekbe yiman Apollos dja ngaye nganekurduyime. Ngad kunu nganedjalmarnedurrkmirri God nadjalkudji. Dja ngudda kunu yiman kayime mankolhde kahdi manbu God nuye.

Nawu God Nuye Bininj Nakka Wanjh Yiman Kunrurrk nawu Nungka Karurrkname

1 Corinthians 3:9b-15

^{9b} Dja mak kunbadbuyika bu ngayime, ngudda wanjh yiman kayime kunrurrk manbu God karurrkname.

¹⁰ Dja ngaye yiman kayime ngamarnerurrkmarnbun nuye. Nungka God ngankongibom ngaye dja mak nganmarnbom bu ngamayaliwernminj bu yiman ngarurrkmarnmarnbun. Wanjh kunmekbekenh ngaye ngamwam kore ngudda, ba bu ngawernhdedjrayekwong kanjdji kore ngalengngarre kunrurrk kahdi. Ngudda bolkkime yiman kayime nabuyika bininj wanjh ngunmarnbun kore kaddum ngarre. Dja ngurrina! Nawu bininj bu kayakwon karurrkmarnbun mahni kunrurrk, wanjh nakka nahnarrimen bu djalwernhmarnmarnbu bu kunmak rowk.

11 Bu ngaye kerrngehkenhni ngahmulewani ngudberre bu Jesuskenh, wanjh ngawokkurreng ngudberre yiman kayime kore yingkiward-dekolhoyoy. Minj baleh mak manwarddekolhbuyika bu yimankek ngurrikurreme. Djal nungan nadjalkudji Jesus yiman kayime kunward-dekolhrayek kanjdji kore kururrk.

12 Bu ngudda ngurrikurduyime kore God kadjare, wanjh yiman kayime kunurrk ngurriurrkname. Bu ngudda ngurriwokmarrkmang God munguyh, wanjh yiman kayime ngurriurrkmarnbun manmakmak dorreng kunwarddemak, dja mak gold dja silver. Dja bu minj ngurrikurduyime kunmak kore God nuye, wanjh kunukka yiman kayime ngurriurrkmarnbun kundulk dja kurralk manbu karrarlehmen dorreng.

13 Kaluk yerrekah nungan God karohrokme kunurrk kore ngurriurrkname ngudberre. Bu kuhni kakurduyime nungan nuye bu kayiburnbunkeh wanjh karurkwrulhe ba bu kanan bu kunwarre dorreng ngurriurrkname. Bu kunmekbe God karohrokme rowk kunak dorreng, dja bu kunmak dorreng ngurriurrkname, wanjh kunukka minj karurkrung.

14 Dja bininj nawu karurrkname kunmak dorreng, wanjh kunurrk minj mak karurkrung. Wanjh kunukka God kabiwon nahni bininj namakmak nawu kakarme nuye.

15 Dja bu kunurrk nuye karurkrung dja karurkyakmen, wanjh kunukka nunganwali kakarremulewan. God nungka kabingehke namekbe bininj yiman kayime bu kabiurrkme kore kunakbeh nungka kakuyin-jrung.

Ngad Wanjh Yiman Kayime Manurrkdjamun Nuyekih God
1 Corinthians 3:16-17

16 Yiddok minj ngudda bininj ngurriburrbun kuninjkunu? Bu ngudda yiman kayime God nuye manurrkdjamun, dja nungan nuye Namalng-makkaykenh kahyo kore kukange ngudberre.

17 Nawu nangale bininj kabimarnerurrkbnun God nuye manurrkdjamun, wanjh kunukka nunganwali God kabiurdjalbun namekbe bininj. Dja manekke kunurrk makka wanjh mandjaldjamunkenh nungan nuye. Wanjh kunekke ngudda ngurriyimerranj yiman kayime manurrkdjamun nuye.

Ngad wanjh Christ Nuye
1 Corinthians 3:18-23

18 Ngaye minj ngadjare ngudda ngurriwokkurrekuren bu kuninjkunukenh. Ngudda ngurriburrbun yimankek kunwern kore bininj kamayaliyime kore kondanjunu kurorrebeh, wanjh kunukka ngurribaldjalbawo, ngurrimarnburrimen yiman ngurribengwar, dja wanjh ngurridjalburrbu kore mandjad nuye nawu God. Wanjh nungka ngunmayalimakwan.

19 Bininj nawu birrikang kondah kurorrebeh yimankek bedda kabirridjalwernhburrbun, dja God kahyime bedberre nakka kabirridjalburlumeren yiman bu birridjallurliwern! Wanjh kunmekbekenh kunu kabimbuyindi, kore kahyime, "Bininj nawu yimankek kabirriyime birrimayalikhkimuk, kaluk nungan God kabenmayaliyakwon, bu minj njale mak kabirriburrbun." [Job 5:13]

20 Dja mak kunbadbuyika kore kabimbuyindi, kahyime, "Nawu Kawohnan Rowk kabeburrbun rowk bininj nawu yimankek kabirriwernmayalirrokme. Bu wanjh nungka kaburrbun bu bedda birridjalmayaliwarre dja djal burudjang kabirriyime." [Psalm 94:11]

21-22 Wanjh kunmekbekenh ngaye marnehmarneyime ngudberre, yuwn bu ngurrbenburluburlume nawu kabirrihdokmerrokme ngudberre. Dja bedda kunu djalbininj. Kaluk bedda wanjh ngudberrekih bininj rowk.

Kaluk ngaye warridj ngudberre bininj, dja mak Apollos dja Peter. Dja mak nadjalwern rowk kore kurorre kahyo, wanjh nakka ngudberre rowk. Kundarrkid dja kore kundowikenh wanjh ngudberre rowk. Wanjh kuhni rowk ngudberre bu bolkkime dja mak yerrekah bu kayimerran.

23 Dja ngudda wanjh bininj nawu Christ nuye, dja mak nawu Christ nakka wanjh God nuyekih.

4

Nawu Kawohrnan Rowk Nadjalkudji Kandjadme Ngad Nawu Karriwarlahkenh Bininj

1 Corinthians 4:1-5

1 Ngudda nuk ngurriburru bu ngaye dja mak Apollos nganehmarne-durrkmirri nawu Christ. Ngad wanjh nganedjalyahwurd. Kaluk ngad nganemarnenahn God nuye manbu kawarllkayindi.

2 Bu nangale bininj kabimarnenahn yehyeng nuye nabuyika nawu nakimuk bininj, wanjh nanu bidjalmarnenahn mandjad. Wanjh kunekke kadjalrohrok bu yiman Apollos dja ngaye nganemarnedurrkmirri God.

3 Dja ngudda yikahwi ngurrihyime yimankek ngaye minj ngaw-ernharnedurrkmirri. Dja kunukka bonj, ngaye minj ngamarrkwar-remen bu kuninjkuu kandidjadmekenh dja nuk birribuyika bininj bu ngandidjadme. Ngaye minj ngakangewarre bu ngare kore ngandid-jadmekenh nawu bininj kabirri kore kururrk courtkenh. Dja mak ngayemandeleng minj kunu ngadjadmerren.

4 Ngaye bu ngahburrbun minj kunu kunwarre dorreng ngahdur- rkmirri. Dja kunukka bonj, ngaye minj ngamulewarren. Dja God nungka nadjalkudji nawu kayime kore ngaye ngakurduyime kunmak dja kunubewu kunwarre.

5 Wanjh yuwn karribangmedjadmerren ngadmandeleng. Dja med, kar-rimadbu nawu Kawohrnan Rowk bu kamre. Nungka kanbukkan kadberre kore baleh karribebbehkurduyimi dja mak karriburbuni kore baybaywi, kukangebeh kadberre. Kumekbe kabolkyime bu God kanbebbehburlume kadberre.

Bu Paul Benbengdayhkeng Bu Djal Mandjad

1 Corinthians 4:6-13

6 Mah, nawu ngaye karridangerrinj. Ngaye wanjh kuninjkuu ngay- imeng ngudberre bu Apollos dja ngayekenh, bu marnehmarneyime ngudberre kore bidyikarme. Ngaye ngadjare ngudberre bu ngurriwern- hurbun ngadkenh, ba bu ngurriwernhmenmenburrbun kunwok manbu bimbuyindanj, yimeng, "Ngaleng ngurridjalkurduyimen kore ngokko bimbuyindanj." Dja yuwn bu ngurribebbehburlume bu ngurribendjadme bininj ngudberre nawu kabirriwohrnawohrnan yiwarrudjkenh.

7 Yiddok ngudda yimankek ngurridjalyime bu ngurrimak dja mak ngurrbenyurhke birribuyika bininj nawu mak kabirrimunkekadjung Jesus? Kaluk nangale yimankek ngunmarnbom ngudberre bu ngur- ridjalwernhmak? Nawu God nungan ngunwong ngudberre yehyeng rowk. Minj ngudmandeleng ngurriworrimeninj, dja njalekah kuhni bu ngurrihburlumerren? Ngudda yimankek ngurriyime ngudmandeleng ngurriharnburren!

8 Yoh! Ngudda ngurriyime yimankek ngokko ngurrihkarrme rowk nawu ngurridjareni, dja mak ngudda ngokko ngurrikukenminj. Ngudda yiman ngurriymerranj yiman kings rerrih! Dja ngad nawu apostles, wanjh kandidjalbawong. Kaluk ngaye ngadjalwernhdjareni bu ngurriymerrangimeninj woybukkihniwirrinj kings ba bu ngad dorreng karridjarrkbebbewohnayi.

9 Ngaye ngahburrbun God yimankek ngankurrmeng ngadberre nawu apostles yerre yiman nawu bininj kabindikan kore kurobbe, ba bu kabindibun, bu kumekbekenh manbu court kabenwarrewam. Kunubewu nungan God kadjare bu ngandidjalkukan ngadberre, ngayime nawu birriwarlahkenh angel nuye dja bininj namirndewarlahkenh rowk.

10 Woybukkih. Bininj kabirriyime bu ngad ngarribengwarr nuye Christ. Dja ngudda ngaleng, nawu yimankek ngurriyime ngurridjalwernhburrbun bu ngurrikukbelmerrinj nawu Christ. Ngad wanjh ngaringudjwarre, dja ngudda yimankek ngurriyime ngurridjalmurrngayek. Bininj wanjh kunu kabirriyime ngudda ngurridjalwernhkuken, dja ngad ngandiwarrewe ngadberre.

11 Yoh. Ngad kunu munguyh ngarridjalmarrwedowen dja mak ngarikombukdownen. Dja kunmadj ngadberre warrehwarreminj. Bininj ngandibunj ngadberre, dja mak minj kunrurrk ngarrikarrme bu ngariyuwirrinj.

12 Ngad mak ngarridurrkimirri kunrayek duninj kunbidwi ngadberre, dja ngaringudjwarreminj. Kaluk bu bininj ngandimalelmang ngadberre, wanjh ngad ngarridjaldjawan God bu kabendjalmarnekurduyime kunmak bedberre. Bu bedda ngandimarladjwon ngadberre, wanjh ngarridjaldi.

13 Bu bedda kabirrikurrewan kore ngandihmulewan ngadkenh, wanjh ngad djal yeledj ngarrbenwokmang bedberre. Bolkkime wanjh nawu bininj birriwern kondanjkuunu kunred, kabirridjare ngandikukburriwe ngadberre, yiman yehyeng nawu nawarrewarre nudminj!

*Bu Paul Benbengdayhkeng Yiman Nawu Wurdwurd Nuye
1 Corinthians 4:14-21*

14 Ngaye minj ngadjare ngurriyime bu kuninjkuunu ngabimbom. Kunukka burrkyak. Ngaye djalmarnedjare ngudberre yiman kayime nawu wurdwurd ngardduk rerrih. Ngadjaldjare kukmarnbun ngudberre kore mandjad, kumekbekenh kunu ngambimbom naninjanu djurra.

15 Birriwern bininj ngundihnahnann ngudberre kore ngurrimunkekadjung Christ, dja nawu ngaye ngayungkihni marnemulewam ngudberre kunwok kunmak. Wanjh bu ngudda ngurrikukbelbmerrinj nuye nawu Christ, wanjh kunu yiman kayime ngaye ngayimerranj kornkumo ngudberre kore Christkenh.

16 Kumekbekenh kunu ngudda wanjh munguyh kandingunjdjika ngaye kore baleh yarrka ngayime.

17 Mah, wanjh kunmekbekenh kunu ngaye ngamunkeweng Timothy ngudberre. Nawu nungka warridj yiman kayime wurdyaw ngardduk nawu ngamarnedjare, dja nungka munguyh ngandjalwokmarrkmang ngaye kore nawu Kawohrnan Rowk. Nungka wanjh kamre dja ngunbengdayhke ngudberre ngayekenh kore ngahyime, ba bu mandjad ngurrikurduyime kore ngurrikukbelbmerrinj nawu Christ Jesus. Kaluk nungka ngunbukkabukkan ngudberre yiman bu ngaye ngabenbukkabukkani birriwarlahkenh bininj rowk kore yiwarrudj ngarre kore kubolkbubuyika rowk.

¹⁸ Ngaye korroko ngaburrbun bu yikahwi ngudda bininj ngurribangminj dja ngurriyime yimankek ngurrikimukworren, bu ngudda ngurridjalyime bu ngaye minj ngamre kumekbe.

¹⁹ Dja bu nawu Kawohrnan Rowk kadjare, wanjh kunukka ngamdjalle ngudberre werkk. Wanjh kunu ngayeman ngabennan nawu kabirrik-ihkimukworren dja nganan bu kunubewu kundulkarre kabirrikarme, dja kunubewu kunbuyika kunwokwi kabirrihdjalyime.

²⁰ Ngudda ngurriburrbun bu ngad karridi kore God kanmarnewohrnan kadberre, wanjh kunukka minj kunwokwi karridjalyime, dja ngad kunu karrikarme kundulkarre nuye.

²¹ Kandibekka. Bu ngaye ngamre ngudberre, yiddok ngurridjare ngamkan kundulk bu dung ngudberre? Dja mak yiddok ngurridjare ngamre bu marneyime kunmak ngudda nawu ngaye djalmarnedjare?

5

Nakudji Bininj Kurduyimeng Kunwarre Duninh

1 Corinthians 5:1-5

¹ Ngaye ngabek kang kundjalwarre duninh kunwok ngudberre. Bu ngawobek kang nakudji bininj kore kumekbe yiwarrudj ngudberre, wanjh kabeneyo nawu nakornkumo nuye ngalbininj kobeng, dja wanjh kundjalwarre duninh. Birribuyika bininj nawu kabirrimarnebodan idols, minj kabirrikurduyime kunwarre yiman namekbe bininj!

² Dja njalekenh ngudda ngurridjalburlumerren? Dja nuk ngurrinjilngwarremeninj dja mak ngurrikukburriwemeninj namekbe bininj bu minj ngurriyawoyhraworren nuye?

³⁻⁵ Ngaye minj kumekbe karridjarrkdi, dja yiman kayime kunkange ngardduk kumekbe marnewokdi ngudberre. Wanjh bengdayhke kore kunngey nuye Jesus, nawu Kawohrnan Rowk bu ngaye ngokko ngay-ingkihwarrewam nahni bininj nawu mahni kunwarre kurduyimeng. Mah, wanjh bolkkime ngurrimirndemornnamerrimen dja ngaye ngardduk kunkange yiman kumekbe karridjarrkdi. Dja kumekbe wanjh Jesus nawu Kawohrnan Rowk ngunwon ngudberre kundulkarre, ba bu ngurribidnakenwon naninjanu bininj kore nawu Satan. Kaluk nungka kunburrk nuye karrown. Dja yerrekah bu kunbarnangarra kabolkyime kore nawu Kawohrnan Rowk kamdurndeng, wanjh kabimalngengehke namekbe nawu bininj.

Paul benmarneyimeng bedberre, "Ngurrikangebeleworrimen!"

1 Corinthians 5:6-8

⁶ Ngudda munguyh ngurrihdjalburlumerren, dja kunukka minj kunmak. Ngurrina! Ngurriburrbun bininj kabirriyime, "Manbu manyahwurd kahkuklurmlikenh ngurrikurme kore kandidjawa manduyh wanjh kamarnbun kalodkimukmen rowk manbu kandidjawa".

⁷ Kuhni bu ngaye ngayime. Wanjh kunukka kunyahwurd kunwarre kayongen kore ngudda ngudberre, wanjh kunukka ngundjalwarrewon rowk ngudberre nawu kumekbe ngurrihni kore yiwarrudj. Dja wanjh ngurridjalwemen. Dja mak kunbadbuyika kore ngaye marnemulewan ngudberre. Ngudda wanjh ngokko yiman buriddi manlodkerrnge, dja wanjh manbu manlodkare ngurrihkarme, wanjh makka ngurriodwemen, ba bu ngurridjalkerrngemen manbu yiman minj kakarme kahkuklurmlikenh. [Exodus 12:5]

Dja ngudda ngurribalburrbu mulil manbu karribengkan bu korroko duninh God bendarrkidbawong nawu mawahmawah kadberre. Wanjh

kunmekbe karohrok bu yiman manlodkare karrihlodburriwe. Kaluk nawu ngad mawahmawah kadberre birribuni mayh nawu ngeyyoy lambs, ba bu God bendarrkidbawoni. Dja wanjh bolkkime Christ doweng kadberre rowk ba bu God kandarrkidbawon kadberre.

⁸ Dja wanjh karridjalnjilngmaknin bu karrikarme maninjmanu mulil. Yuwn mak bu karrinjirrhmiworren dja minj mak karrihmarnekurduyime kunwarre munguyh. Bu kunmekbe karrikarduyime, wanjh kunukka yiman kayime manlodkare buriddi manbu kakarme mankuklurlmikenh. Ngad wanjh karrimarneyimerrimen kunwoybuk, dja yuwn bu karrikow-erren. Wanjh kunukka yiman kayime manlodkerrnge buriddi karrihngun kore mulil ngarre manbu mankuklurlmikenh yak. [Exodus 13:7]

Paul benmarneyimeng bedberre, "Yuwn ngurriraworren bininj nawu kunwarre kabirridjare."

1 Corinthians 5:9-13

⁹ Ngaye wanjh ngokko ngayingkihimbom ngudberre kore nabuyika djurra bu bengdayhkeng, marneyimeng yuwn bu ngurriraworren birribuyika bininj nawu kabirrimunkekadjung Jesus bu bedda kabirridjaldjare kabirriwohdjirdmarren daluk dja bininjkenh.

¹⁰ Ngaye minj ngabenyolyolmeng bininj nawu birrikang kondanjkuu kurorre, nawu munguyh kabirriwohdjirdmadjirdmarren daluk dja bininj, dja mak kabirridedjwarlah bu kabirrimanjgun yehyeng rowk, dja mak nawu kabirridedjolkjyiwake, dja mak nawu kabirrimarneboddaboddan nawarrewarre nawu idols. Bu ngudda ngurridjareniwirrinj ngurrbenbawoyi birrimekbe bininj, wanjh yimankekni ngurridjalbolkbawoyi kondanjkuu kunred kurorre.

¹¹ Dja burrkyak, ngaye ngabimbom bu marnehmarneyime ngudberre yuwn ngurriraworren bininj nawu kabirriyime yimankek ngurridanggerinj kore nawu Kawohnan Rowk, dja bedda kabirridjalkurduyime kuninjkuu kunwarre, yiman kabirriwohdjirdmadjirdmarren daluk dja bininj, dja mak kabirrimanjgun yehyeng rowk, dja mak nawu kabirrimarneboddaboddan nawarrewarre bedberre gods, dja mak kabindiyolyolme birribuyika, dja mak kabirridjalworromkan munguyh, dja mak kabirridedjolkjyiwake. Yiman bu nangale bininj kumekbe kakurduyime, wanjh nakka yuwn ngurridjarrkngun manme, dja ngurridjalbawo.

¹² Ngad karrbendjadme birrimekbe bininj kore yiwarrudj karridjarrkdi, dja minj karrbendjadme bininj nawu kondah kurorrebeh, nawu minj kabirrimunkekadjung Jesus. Kuhni minj kadberre. Dja nawu ngad karridjarrkdi kore yiwarrudj, nakka wanjh ngadmandeleng karridjadmerren.

¹³ God nadjalkudji nawu kabendjadme birriwern bininj nawu kuberrk kore yiwarrudj. Ngad wanjh karridjalkurduyime kore bimbuyindanj korroko, dja kayime, "Ngurrbenkukburriwemen bininj nawu ngurrihni bu kundjalwarre kabirridjalkurduyime." [Deuteronomy 17:7]

6

Paul benmarneyimeng, "Yuwn bu ngurridangwerren kore court."

1 Corinthians 6:1-8

¹ Ngaye mak ngokko ngabekkan kunbadbuyika kunwarre kore ngurrikurduyime. Yikahwi ngudda ngurridangwerrij dja ngurrikurmerrij kore court. Dja kawarre. Yuwn bu ngurrikurmerren kore court. Bininj nawu ngundjadme kunmekbe, nakka minj kabirriwoybukwon Jesus. Ngudda ngaleng ngurrikurmerrij kore kumirrk bedberre birribuyika bininj nawu God nuye ba bu ngundidjadme ngudberre.

² Ngudda nawu God nuye bininj, kaluk yerrekah ngudda ngurrbendjadme birriwarlahkenh bininj nawu kondanjkuu kurorrebeh. Minj ngudda ngurriburrbuyi bu kuninjkuukenh. Kuhni bu kundjalw-ernhkimuk ngurriyime bu ngurrbendjadme birriwern bininj. Wanjh kunu kamak bu ngurridjadmerren kore ngurridangwerrenkenh. Kunukka wanjh kundjalwohyahwurd!

³ Yiddok minj ngurriburrbun bu angels warridj karrbendjadme? Dja wanjh kamak bu karridjadmerren kore kondah kurorrekenh.

⁴⁻⁵ Dja njalekah ngudda ngurridjaldjare ngundidjadme bininj nawu minj yiwarrudj bedberre kore ngurridangwerren bu kunyahwurdkenh? Bonj, wanjh ngurrbenkurrmen yikahwi ngudberre bininj bu ngundidjadme. Kaluk bininj nawu minj birrikuken kore ngudda, wanjh kamak bedda kabirridjadme ngudberre.

Ngudda wanjh ngurriyemengalmimen kore marnehmarneyime ngudberre! Kandibekka. Bu benebokenh bininj ngudberre nawu kabene-munkekadjung Jesus kabenebebbhdangwerren, wanjh bedda benedjawa nabuyika namak bininj nawu kabimunkekadjung Jesus ba bu nungka kabenenedjadme berrewoneng.

⁶ Dja burrkyak. Kunukka minj ngurrikurduyime. Dja ngudda kunu ngurrire kore court ba bu bininj nawu minj kabirrimunkekadjung Jesus, wanjh kunu bedda ngundidjadme. Dja wanjh kuhni kundjalwarre duninj!

⁷ Kandibekkabekka. Yuwn bu ngurrimunkewerren bu ngurrihre kore court. Bu kunmekbe ngurrikurduyime wanjh kunukka yiman kayime ngokko ngurriyingkihwarreworinj. Bonj, bu nabuyika bininj nawu kabimunkekadjung Jesus ngunkowe, dja nuk ngunwarrewon, wanjh yidjalbawo, dja yuwn bu yikan kore court, wardi yimarnebengmidjda.

⁸ Dja ngudda kundjalbuyika ngurrikurduyime, ngudda nawu bininj ngurrimunkekadjung Jesus. Njalekenh ngudda kunwarre ngurridjal-marnekurduyimerren, dja mak ngurriwarreworren munguyh? Dja njalekenh, ngudda wanjh ngurridangerrinj?

Paul benmarneyimeng, "God nuye Namalngmakkaykenh ngunkangedjir-ridjbom."

1 Corinthians 6:9-11

⁹⁻¹⁰ Yiddok minj ngurriwernhburrbun, bininj nawu munguyh kunwarre kabirridjalkurduyime, wanjh minj bedda kabirringimen kore God kabenmarnewohrnan nawu bininj nuye? Yuwn bu ngurrbenbekkan birribuyika bininj nawu ngundihkowe kuninjkuukenh. Bininj dja daluk nawu kabirridjalwohdjirdmadjirdmarren minj kabirringime kore God kabenmarnewohrnan nawu bininj nuye. Dja mak bininj nawu kabirrimarnebodnan nawu idols bedberre, dja mak nawu bininj dja daluk kabenebidyikadjurren nawu minj nuye nabininjkobeng dja ngalbinin-jkobeng, wanjh bedda rowk minj kabirringime kore God kawohrnan kore nuye bininj. Warridj bininj nawu kabirriweykarren ba bu daluk kabindibayahme kore kabeneyokenh, minj bedda kabirringime. Dja mak nawu bininbininj kabirrimarren bedman bininjdeleng, dja mak bininj nawu birridedjdjolkwern, dja mak nawu kabirrimanjngun yehyeng rowk, dja mak bininj nawu kabirriworromkan munguyh, dja mak bininj nawu kabindimarnekowe birribuyika, dja bininj nawu kabindikowe birribuyika ba bu kabindimarnedjirdmang kunwardde. Birrimekbe bininj rowk nawu kuhni kabirrikurduyime, wanjh minj kabirringime kore God kabenmarnewohrnan nawu bininj nuye.

¹¹ Dja ngudda yikahwi ngudberre wanjh kunmekbe kunwarre ngurrikurduyimi. Dja bonj, bolkkime burrkyak! God ngunkukdjirridjbon ngudberre dja ngunmarnbom ngudberre yiman nungan nuyekih bininj, ba bu ngurrikurduyime kore nungka kadjare. Dja mak ngunmakwam ngudberre, bu yimeng ngudda minj mak ngurriyawoyhwarre. Kuhni God ngunmarnekurduyimeng rowk ngudberre kore kungey nuye Jesus Christ nawu Kawohrnan Rowk, bu bimmunkeweng nuye Namalngmakkaykenh bu ngunmarneni ngudberre.

Paul benmarneyimeng, "Ngudda ngudberre kunburrk, wanjh makka God nuye."

1 Corinthians 6:12-20

¹² Ngaye ngaburrbun yikahwi ngudda ngurriyime, "Ngaye God nuye bininj, wanjh kunukka ngadjalkurduyime kunwern kore ngadjare." Dja med, bu ngudda yimankek ngurrikurduyime kunwarre, wanjh kunukka ngurridjalwarreworren. Yoh, bu ngudda ngurriyime, "Ngaye wanjh nuye God, wanjh kunukka ngadjalkurduyime kunwern kore ngadjare." Wanjh ngurriyimerimen, "Nghanahnarrimen, ba bu minj njale mak nganyawoyhbongkarme ngaye."

¹³ Kunbadbuyika mak yikahwi bininj ngudda ngurriyime, "Manbu manme makka wanjh mannjam ngardduk ngalenggarre. Dja manu mannjam ngardduk, makka wanjh manmekenh ngarre." Kunukka yoh, kamak, dja marneyime ngudberre kaluk God kabularrbun rowk manme dja mak mannjam bu yerrekah. Bu kuhni ngudda ngurriburrkyolyolmerren wanjh kunubewu ngudmandeleng ngurrihmarneyimerren, "Wanjh kunekke karohrok manbu kunburrkkenh ngardduk, wanjh nganedjaldjirdmarren bininj dja daluk." Bu kuhni wanjh kunwarre ngurriyime. Manbu kunburrk ngudberre God ngunwong bu ngurriwokmarrkmang nuye, wanjh yuwn bu ngurriwohdjirdmadjirdmarren. Dja nawu Kawohrnan Rowk nungka wanjh ngunmarnewohrnan manbu kore kunburrk ngudberre.

¹⁴ Ngurriburrbu bu God birrolkkayhweng nawu Kawohrnan Rowk kore kundowibeh, kundulkarre dorreng nuye. Kaluk ngadmanwali kandolkkayhwe kadberre kunburrk dorreng kore kundowibeh.

¹⁵ Yiddok minj ngudda ngurriburrbun manbu kunburrk ngudberre makka wanjh ngurrikukbelbmerrinj nawu nungan Christ? Ngudda ngudberre kunburrk, wanjh kabirriraworren dja birriyimerranj yiman Christ nuye kunburrk. Wanjh bu ngudda daluk nguneyuwirrinj ngalbu ngalwarre duninj, wanjh kunukka yiman kayime yimarnbuyi kabenekukbelbmerren Christ dorreng! Kunukka kundjalwarre duninj.

¹⁶ Wardi minj ngudda ngurriburrbun, bu ngudda ngunehyo ngalbu daluk ngalwarre duninj, wanjh kunukka yiman nguneburrkkukudjihmen. Wanjh kunmekbekenh kunu bimbuyindanj, dja yimeng, "Bu bininj dja daluk kabenemarren, wanjh kunukka kabeneburrkkudjihmen." [Genesis 2:24]

¹⁷ Dja bu nangale bininj kabenebelbmerren nawu Kawohrnan Rowk wanjh kunukka kabenedjalmalngkudjihmen.

¹⁸ Bonj wanjh, ngurriborledmen dja ngurribawo munguyh kunwarre kore ngurridjirdmarrenkenh. Dja bininj nawu kabirriwohdjirdmarren, wanjh yiman kunu kayime kunburrk bedberre kabirrikukwarreworren. Bininj bu kunbubuyika kunwarre kabirriyime, wanjh kunukka minj kunburrkkenh bedberre, dja ngaleng kore kabirridjirdmarrenkenh, wanjh kunukka kabirrikukwarreworren.

¹⁹ Yiddok minj ngudda ngurriburrbun manbu kunburrk ngudberre nakka yiman kayime kunrurrk manbu Temple? God ngunwong ngudberre nawu Namalngmakkaykenh ba bu kahyo kore kukange ngudberre. Wanjh ngudda kunu minj ngudmandeleng ngudberre dja ngudda God nuyekih bininj!

²⁰ Nungka ngunmarnekarremulewam bu ngunbebkengkenh. Ngudda wanjh ngurridjalkurduyimen djal kunmak kore kunburrk ngudberre dorreng ba bu bininj ngurrbenmarnbun dja wanjh kabirriburlume God.

7

Bu Bininj Dja Daluk Kabenemarrenkenh

1 Corinthians 7:1-7

¹ Ngamey djurra nawu ngurribimbom dja ngurrimunkeweng ngardduk, dja bolkkime ngaye marnebimbun ngudberre bu bengdayhke kunmek-bekenh.

Ngudda kandiyyidjawam, wanjh ngurriyime, “Yiddok kuhni kunmak bu bininj kadjare munguyh kadjaldi nadjadmud?” Wanjh marneyime woybukkih, yoh, kamak bininj minj kadjare kabeneyo daluk bu munguyh.

² Dja nawu bininj dja daluk minj kabirrimarren, wanjh kunukka wardi kabirridjaldjirdmarren. Kunmekbekenh ngaye marnehmarneyime ngudberre, bininj dja daluk ngurrbenbebhkarrme ngudberre nabininjkobeng dja ngalbininjkobeng.

³ Wanjh nawu nabininjkobeng njilngmaknin bu kabeneyo ngalbininjkobeng nuye, dja mak ngalbu ngalbininjkobeng njilngmaknin bu kabeneyo ngarre nabininjkobeng.

⁴ Kunekke bu ngurrikurduyime, wanjh kunukka kunmak. Kaluk ngalbininjkobeng kunburrk ngarre, wanjh nabininjkobeng kabimarnewohrnan, dja nawu nabininjkobeng kunburrk nuye, wanjh ngalbininjkobeng nuye kabimarnewohrnan.

⁵ Kunubewu nabininjkobeng dja ngalbininjkobeng kabenewokmarnburren, wanjh kabeneyime, “Yuwn kab ngarryo, dja med, ngarrdjaldin yiwarrudj waken.” Kuhni wanjh kamak, kaluk yerrekah wanjh kunu beneyawoyhyuwn. Dja bu burrkyak, wanjh kunu Satan nawu namarnde duninjh kabenebebhjurrkkan kore kunmayali benewoneng dja wardi kabenekurduyime kunwarre.

⁶ Ngaye minj kuhni wokrayekwon ngudberre, dja djahdjalmarneyime ngudberre bu kuninjkunu ba bu ngurridjalnjilngmak munguyh.

⁷ Ngurriburrbun ngaye wanjh nawu ngadjadmud bininj, dja ngadjareniwirrinj ngurriwernkenh ngurridjadmudniwirrinj yiman ngaye. Dja kunukka bonj bu minj ngurridjadmudniwirrinj, wanjh God kanbebbewong kadberre kunmak kunbubuyika kore karribebhekurduyime nuye.

Bu Nabininjkobeng Dja Ngalbininjkobeng Kabenebaworrenkenh.

1 Corinthians 7:8-16

⁸ Ngudda nawu ngurridjadmudjadmud dja nawu ngurrikodjmohkodj-mong, bu ngudda ngurridjare ngurridjaldjadmuddi yiman ngaye, wanjh kunukka kamak.

⁹ Dja bu ngudda minj ngurringurdme kore ngurriburrbun ngurrihyokenh, wanjh kunukka ngurridjalmarrimen, ba bu ngurriyo kamak rowk. Dja bu minj ngurrimarren wanjh kunukka munguyh ngurrijilngwarremen kore ngurriburrbun munguyh.

¹⁰ Mah, ngudda warridj, nawu ngokko ngurrimarrinj. Ngadjare kunwok kunrayek marneyime ngudberre. Kuhni minj ngaye ngardduk

kunwok, dja kuninjkuwu nawu Kawohrnan Rowk nuye. Daluk ngalbu ngalbininj kobeng yuwn bu kabibawon nabininj kobeng ngalengngarre.

¹¹ Dja bu yiman kabibawon nabininj kobeng ngarre, wanjh ngaleng djalyawoyhdurnde kore nungka, dja minj mak kabimang nawu nabuyika bininj. Kuhni wanjh kadjalrohrok rerrih bu bininj nawu nabininj kobeng, wanjh yuwn bu kabibawon ngalbininj kobeng nuye. [Matthew 5:32; Mark 10:11-12; Luke 16:18]

¹² Ngadjare mak marnemarneyime ngurribuyika bininj warridj. Kuhni kunwok minj nawu Kawohrnan Rowk nuye, dja ngayeman djalmarneyime ngudberre. Nangale bininj nawu kabiwoybukwon Jesus dja ngalbininj kobeng nuye minj kabiwoybukwon Jesus, wanjh yuwn bu kabiwalbawon. Bu ngaleng kadjare kabenehdjalni munguyh, wanjh nahni bininj minj kabibawon ngahil daluk.

¹³ Dja mak kadjalrohrok ngudda daluhdaluk nawu ngurrihwoybukwon Jesus. Ngalngale daluk ngalbu kabikarrme nabininj kobeng nawu minj kabiwoybukwon Jesus, bu nahni bininj kadjare kabenehdjarrkni munguyh, wanjh kunukka yuwn kabibawon.

¹⁴ Bu ngalbininj kobeng kabiwoybukwon Jesus, wanjh God kayime kamak bu kabeneyo ngarre bininj nawu minj kabiwoybukwon Jesus. Dja karohrok bininj nawu kabiwoybukwon Jesus, wanjh God kayime kamak bu kabeneyo ngalbininj kobeng nuye ngalbu minj kabiwoybukwon Jesus. Dja bu kabeneyo munguyh, wanjh God kayime bu wurdwurd berrewoneng, wanjh nuyekih.

¹⁵ Bu nabininj kobeng nawu minj kabiwoybukwon Jesus kadjare kabibawon daluk nuye, wanjh bonj, ngalmekbe ngalbininj kobeng bidjalbawo bu kare. Dja kamak. Dja karohrok bu ngalbininj kobeng minj kabiwoybukwon Jesus, dja kadjare kabibawon bininj, wanjh nabininj kobeng bibawo kare. Bonj, dja kamak. Ngaye kuninjkuwu marneyime ngudberre, dja God ngunkayhmeng ba bu ngurrikarrme kunmodmikenh nuye.

¹⁶ Dja med, ngaleng kuhni kunbuyika ngurriburru! Bu ngudda nguneyo bininj dja nuk daluk nawu minj kabiwoybukwon Jesus, dja bu ngunedjalyo munguyh, wanjh kunubewu God kabingehke nawu ke nabininj kobeng dja ngalbininj kobeng ke.

Bu Bininj Kabirrilakkayenwonkenh

1 Corinthians 7:17-20

¹⁷ Bu karriwoybuwon God, yiddok kamak bu ngurridjare karriwernhbuyikaworren? Kandibekka. Wanjh God ngunbebbekayhmeng ngudberre dja mak ngunbebbehwong namak nuye. Kaluk kadjare ngurribebbekurduyime kore nungka ngunbebbehmarneyime ngudberre. Wanjh ngurridjalwokmarrkma dja mak ngurrikurduyimen kore kadjare nawu Kawohrnan Rowk. Ngaye ngabenbukkabukkan mahni mankarre bedberre birriwern bininj nawu yiwarrudj rowk kabirrikarrme.

¹⁸ Bu ngudda ngokko ngurrilakkayenminj bu God ngunkayhmeng ngudberre, wanjh kunukka kamak, yuwn bu ngurribalborledkerren bu yimankek minj ngurrilakkayenworrimeninj. Dja ngurribuyika bininj nawu ngudda minj ngurrilakkayen bu God ngunkayhmeng ngudberre, yuwn bu ngurridjare ngundilakkayenmen.

¹⁹ Kunukka bonj, bu ngudda ngurrilakkayen, dja mak minj nawu ngurrilakkayen, bonj, minj kundulmuk. Dja kundjalkudji kunkimuk duninj, bu ngudberre rowk ngurridjalwokmarrkmang God nuye mankarre munguyh.

²⁰ Mah, wanjh ngurridjalbebbehdin kore ngurridi kerrngehkenh bu God ngunkayhmengbeh ngudberre.

Bu Ngudda Slaves Nawu Ngurribongdi

1 Corinthians 7:21-24

²¹ Bu ngudda ngurrbenmarnedurrkmirri birribuyika nawu ngundibongkarrmi ngudberre bu kumekbe bolkyimi God ngunkayhmeng, wanjh yuwn kunu ngurrikangewarre. Bu ngudda ngundibekke ngudberre birrimekbe bininj, wanjh kunukka kamak, ngurribaldjalraywi. Dja bu burrkyak, wanjh yuwn bu ngurriburrbun.

²² Bu ngudda bininj nawu ngundibongkarrmi bu nawu Kawohnran Rowk ngunkayhmeng, wanjh nungka ngunbekkeng kore kunwarrekenh, dja ngurriyimerranj nuyekih bininj, bu ngurridjalle kunmak rowk. Dja ngaleng, bininj nawu minj kabirribongdi, bu God kabenkayhme, wanjh kunukka yiman kabirriyimerran bu Christ kabenbongkarrme.

²³ God ngunbekkeng ngudberre kore ngunmarnekarremulewam, dja wanjh ngurridjalyimerranj nuye bininj. Wanjh yuwn bu ngurrikurrmerren kore djal bininj ngundibongkarrme.

²⁴ Nawu karridangerrinj, ngurridjaldin kore kerrngehkenh ngurridi bu God ngunkayhmeng. Nungka wanjh nadjalkudji bu ngurriwokmarrmang.

Bolkime Ngad Karridi Kore Kayiburnbunkenh Kamre Darnkih

1 Corinthians 7:25-35

²⁵ Ngudda kandidjawam kunbuyikakenh kore ngurribimbom djurra bu nawu birridjadmud bininj dja daluk. Dja marneyime ngudberre. Nawu Kawohnran Rowk minj nganwoyinj kunwok bu kunmekbekenh. Dja ngaleng djalmarneyime ngayeman kore ngaburrbun. Kaluk nawu Kawohnran Rowk ngankongibom ngaye, dja mak nganmarnbom bu ngamarnedurrkmirri nuye, wanjh kunmekbekenh kandibekkan kore marnemarneyime ngudberre.

²⁶ Kuhni bu ngaye ngahburrbun. Bolkime wanjh kunrayek dunijnh kamhre darnkih kadberre, wanjh kunmekbekenh kunu karridjalre dja minj karriborledkerren.

²⁷ Ngayime bininj dja daluk bu benemarrinj, wanjh yuwn mak kabenebaworren. Dja nangale nawu kahdjaldjadmud, yuwn bu kayawarren bu kabenemarrenkenh.

²⁸ Dja ngaleng, bu ngudda ngurrimarren, wanjh kunukka minj kunwarre, dja kundjalmak. Dja bu ngalyawk ngalbu kabenemarren nabininjkobeng bu kerrngehkenh dunijnh, wanjh kunukka kunmak, minj kuhni kunwarre. Dja med, ngurribekka, bu ngudda ngurrikaliyimen, wanjh kunukka kunrayek kunkimuk ngurringalke kore kondah kurorre ngurridi, dja minj ngaye ngadjare kunmekbe ngunmarnekurduyimerran.

²⁹ Nawu karridangerrinj, kuhni ngayime. Bu darnkih kamhre bu God nungan yingkihkarremarnbuni. Wanjh bu yikarme ngalbininjkobeng ke, yuwn bu yidjalburrbun munguyh kore ngunemarrenkenh, dja wanjh yidjalburrbu kore God kadjare ke bu yikurduyime nuye.

³⁰ Yuwn bu mak ngurrimarnenalkbun bu nangale ngunmarnedowe. Ngurridjalngurdmen. Dja bu nangale bininj nawu kadjekme, wanjh ngurdmen nanu dja kaburrbun bu kunnjilngwarre. Nangale mak nawu bininj kahbayahme nawu yehyeng, wanjh nanu marnburrimen yiman namarladj yerreh.

³¹ Yikahwi nawu ngudda bininj ngurridjalburrbun kore kondanjkuwu kurorrewaken, wanjh kunukka minj munguyh ngurriwernhburrbun. Dja yikahwi ngurribolknan kondanjkuwu kunred, wanjh makka kaluk kadjalyakmen rowk.

³² Ngaye minj ngadjare bu ngudda ngurrikangewarre bu njalehnjale ngurriburrbun. Bininj nawu djadmud, nakka munguyh kadjalburrbun bu kabimarnedurrkmirri nawu Kawohnnan Rowk nuye ba bu kabinjilng-marnbunkenh.

³³ Dja nawu kaliyi bininj wanjh nakka munguyh kadjalnjlngwarre bu kahni kondanjkuu kunred ba bu kabimarnbun ngalbininj kobeng nuye kanjilngmakmen.

³⁴ Kaluk nungka yiman kamayaliyarlarreme!

Kaluk kadjalrohrok, ngalbu kamarrdjukun daluk, dja daluk ngalbu ngaldjadmud, bedda wanjh kabirridjalburrbun bu kabirridjalmarnedurrkmirri nawu Kawohnnan Rowk. Bedda wanjh kabirridjaldjare bu kabirridjalkurduyime kunmak munguyh kore kunmayali dja kunburrk bedberre. Dja ngalbu ngalkaliyi daluk, ngalka munguyh kadjalburrbun nawu kurorrewaken dja bu kabimarnbun ngarre nabininj kobeng kanjilngmakmen.

³⁵ Ngaye minj ngadjare kunrayek ngamarnbun ngudberre. Dja djahdjalmarneyime ngudberre ba bu bidyikarmekenh. Ngadjare bu ngurrimarnekurduyime kunmak duninj kore ngurrimarnedjare nawu Kawohnnan Rowk, bu minj mak kunbuyika ngurriburrbun.

Bu Kabiriberrebburrenkenh

1 Corinthians 7:36-38

³⁶ Ngadjare marneyime ngudberre binihbininj nawu ngundiberrebbun ngudberre daluk nawu beneyimerrinj med, dja minj benemarrimeninj. Bu ngalmekbe daluk kabekkarren bu kunkuyeng kabenemadbun, dja namekbe bininj kadjaldjare kabeneyo, wanjh benedjalmarrimen, dja yuwn bu kabenedjalmadbun bu kunkuyeng. Wanjh kunmak. Minj kabenewokburriwe God.

³⁷ Dja bu namekbe bininj bu kamarrkmarnburren dja minj kadjare kabenemarren daluk, bu kadjalkangerayek, dja bu minj nangale nabuyika kabiyurrhke, wanjh kamak bu kadjaldi djadmud. Minj kabenemarren, dja wanjh kunmak.

³⁸ Dja bu nangale nawu bininj kabenemarren ngalbu birriberrebbuni daluk, wanjh kunu kunmak warridj. Dja bu kadjare kadjadmuddi, wanjh kunukka kundjalwernhmak.

Bu Kamahkamarrdjukunkeh Daluk

1 Corinthians 7:39-40

³⁹ Kuhni mak kunbadbuyika ngadjare ngayolyolme ngudberre. Ngalbu ngalbininj kobeng benedjalnin munguyh nawu nabininj kobeng ngarre kaluk yerrekah bu karrowen. Kaluk bu nungka karrowen, wanjh ngalmekbe kamak kabimang nabuyika bininj. Dja med, ngaleng bidjalma bininj nawu Kawohnnan Rowk nuye.

⁴⁰ Dja bu yiman ngalmekbe kamarrdjukun kadjaldjadmuddi, wanjh ngaye ngayime bu ngalmekbe daluk kadjalnjlngmak. Ngaye bu kuhni ngayime wanjh djal ngaye ngardduk kunwok, dja bonj, ngaye warridj ngahkarrme Namalngmakkaykenh nuye God.

8

Nawern Gods Nawu Kurorrewaken Dja Nadjalkudji God Nawu Nadjalwoybuk

1 Corinthians 8:1-6

¹ Ngaye yawoyhmarneyime ngudberre kunbadbuyika kore ngudda ngaye kandimarnebimbom bu kandidjawam manbu manmekenh nawu birribuyika bininj birrimarnekurrmeng kore bedberre nawu idols.

Yikahwi ngudda ngurriyime, “Ngad ngarridjalburrbun yehyeng rowk!” Bu ngudda ngurriyime yimankek ngurriburrbun rowk, wanjh kunukka ngurridjalburlumerren. Kawarre. Wanjh kunbuyika ngurrikurduyimen. Ngurbenmarnedjaremen birribuyika bininj nawu kabirriwoybukwon Jesus, wanjh kunukka ngurbenmurrngayekworren.

² Nangale bininj kayime kaburrbun yehyeng rowk, wanjh minj kunu nungka kawernhkarreburrbun bulkidj.

³ Dja bu nangale bininj kabimarnedjare God, wanjh kunukka God nungan kabiburrbun naninjanu bininj.

⁴ Kuninjkunu wanjh ngaye ngahyime ngudberre. Ngad wanjh karriburrbun bu idols nawu bininj kabirrimarnebodan, wanjh minj woybukkih duninj god. Dja ngaleng ngad kariyime nawu nadjalkudji God nawu nawoybuk duninj.

⁵ Kaluk bininj kabirriyime nadjalwern nawu gods kabirridi kore heaven dja mak kore kondanjku kurorre. Wanjh kunu woybukkih kabirribadime nawern yimankek god dja mak nawu yimankek kabirriwohrnawohnan kondah kurorre.

⁶ Dja ngad kunu karridjalburrbun nadjalkudji God nawu Kornkumo, nawu marnbom yehyeng rowk. Dja mak ngad warridj kankunimarnbom kore djareminj kadberre, wanjh ngad karridjare kariyimerran nuyekih bininj.

Dja mak Jesus Christ wanjh nadjalkudji nawu Kawohnan Rowk. Nawu nungka bimarnemarnbom yehyeng rowk kore God djareminj, dja ngad warridj kanmimbiwon kore karridjaldarrkid.

Yuwn Bu Karrbenmarnbun Bininj Bu Kabirrikurduyime Kunwarre
1 Corinthians 8:7-13

⁷ Yikahwi nawu bininj kabirrimunkekadjung Jesus minj kabirriwernhburrbun bu kuninjkunukenh. Dja kabirridjalburrbun munguyh kore idolskenh. Dja ngaleng bu kabirringun manme, wanjh kabirriyime bu birribuyika bininj kunubewu ngokko birrikurmi maninjanu manme kore kumirrk nuye idol. Kaluk bu bedda kabirringun manmekbe manme, wanjh kunu kabirriburrbun bu yimankek kabirrikurduyime kunwarre, dja kunu kabirriyimerren bu birriwarre.

⁸ Dja kawarre! Kuhni ngurriburru. Manbu djal manme minj kankan darnkih kore God. Dja mak minj kanmarnbun bu karriwarre. Wanjh woybukkih, bu karridjalngun njalehnjale manbuyika manme wanjh kamak karrire darnkih kore God.

⁹ Kunu wanjh kamak bu ngurridjare ngurringun mandjalbubuyika manme, dja bonj, ngaleng ngurrinahnarrimen. Bu ngudda bininj yimankek ngurriyime kamak bu ngurringun manme manbu birribuyika bininj ngokko birrikurmi kore kumirrk nuye idols, wanjh kamak. Dja med, wardi ngurbenbalburru birribuyika bininj nawu ngurridjarrkdi yiwarrudj. Yikahwi minj kabirriwernhwoybukwon Jesus dja kabirridjalnjilngwarre bu idolskenh. Yuwn bu ngurbenwarrewon birrimekbe nawu ngurridangerrinj!

¹⁰ Ngayime bu ngundihnan ngurrihngun kore kumekbe birribuyika bininj kabirrimarnebodan idols, dja kabirriyime ngudberre, “Ngayh! Birrimekbe bininj nawu birrikodjkulumak yiwarrudj bedberre, wanjh kabirribalngun manmekbe manme. Wanjh kunubewu kamak bu ngad

warridj karringun.” Wanjh kunu bedda bu kabirringun, wardi kabirrib-albengkan bu yimankek kunwarre kabirrikurduyime.

¹¹ Wanjh ngurribekka. Bu bedda ngundibalngunjidikan ngudda, wanjh kunukka ngurrbendjalmarnekurduyimeng kundjalwarre duninj. Bu yimankek ngurriyime ngurriburrbun rowk dja kunukka ngurrbendjalw-ernhwarrewon birrimekbe nawu ngurridangerrinj kore Christ. Ngudda ngurrbenmarnbun kabirrikurduyime kunwarre bu kabirridjalnjilngwarre kore idolskenh. Kaluk Christ nawu nungka doweng bedberre birrimekbe bininj.

¹² Nawu birridjalmekbewi bininj ngudberre nawu kabirridjalw-erhkanngwarre idols, wanjh kunukka ngudda ngurrbendjalmarbun kabirrikurduyime kunwarre dja wanjh kabirriyemekarremulewarren. Bu ngudda kuninjkuu ngurrbenhmarnekurduyime nawu kabirrihwoybuk-won Jesus, wanjh kunukka kadjalrohrok bu ngudda ngurrimarnekurduy-ime kunwarre kore Christ nuye.

¹³ Mah wanjh, kunukka kab ngudmandeleng, ngurrimarneyimerrimen, “Bu ngaye ngangun maninjmanu manme, wardi birribuyika nawu kar-ridangerren ngandingungdikan dja kunu kabirrikurduyime kunwarre. Wanjh bonj, kunukka minj ngayawoyhngun maninjmanu manme. Dja ngadjalhawon munguyh ba bu minj ngabenmarnbun kabirrikurduyime kunwarre.”

9

Paul Benmarnemulewarrinj Bu Nungka Apostle Duninj

1 Corinthians 9:1-18

¹ Kandibekka. Yikahwi binihbininj ngaye ngandikukmarnmarnbun. Ngaye wanjh ngadjare ngayolyolme kunmekbekenh. Bonj, wanjh ngaye minj ngayawoyhbongdi! Dja woybukkih ngaye wanjh apostle duninj, dja ngaye nawu nganan Jesus nawu Kawohnan Rowk kadberre. Dja mak ngaye ngamarnedurrkmirri nungka nuye, wanjh kunmekbekenh kunu ngudda bolkkime ngurriyimerranj nuyekih rowk bininj.

² Wanjh ngudda ngurriburrbun bu ngaye wanjh apostle nuye nawu Kawohnan Rowk. Kunubewu birribuyika bininj minj kabirribadburrbun, dja nawu ngudda wanjh ngurriwernhburrbun. Ngudda ngurribelbmerrinj nawu Kawohnan Rowk, wanjh kunmekbekenh kunu ngurriwernhbur-rbun bu ngaye apostle nuye.

³ Yikahwi bininj wanjh ngaye ngandidjadme. Wanjh kuhni ngayime bedberre bu ngayolyolmerren bu ngabenwokdurdiwe bedberre.

⁴ Yiddok ngaye dja mak birribuyika ngad bininj nawu apostles minj kunmak bu manme ngarringun, dja nuk ngarribongun?

⁵ Yiddok minj kunmak bu ngad nawu apostles ngarrbenkan ngalbi-hbininj kobeng ngadberre ngalbu kabirriwoybukwon Jesus bu ngarrid-jalwohrehwore? Ngurriburrbun bu yikahwi nawu birribuyika apostles kabindikarrme ngalbihbininj kobeng, ngayime nawu Kawohnan Rowk birridangerrinj, dja mak nawu Peter* warridj.

⁶ Dja kunbuyika djawahdjawan. Ngudda kandibawon ngaye dja mak Barnabas, bu nganedurrkmirri ba bu nganedjalbayahme manbu manme ngarrewoneng! Dja njalekenh? Nawu birribuyika apostles kuhni minj kabirrikurduyime, dja njalekah minj kandimarnekaremulewayi ngadberre?

* 9:5 Kore Greek kabimbuyindi “Cephas”.

⁷ Adju. Bu ngad ngarridjamunniwirrinj, wanjh kunu ngarrimayi kunwardde bu kandimarnekarremulewankenh. Bu ngaleng ngad bu ngarridudjeyi manbu manrakel grapes, wanjh kunukka ngarringuyi kaluk bu kadjolengmen. Dja bu ngad ngarrinahnyai mayh nawu nanikud, wanjh kunukka ngad warridj ngarribonguyi manbu milk ngarre!

⁸ Kuhni ngayime bu minj djalbininjenh. Dja ngokko kuhni bimbuyindanj kore mankarre kadberre.

⁹ Ngurriburrbun kore Moses bimbom maninjmanu mankarre, dja yimeng, "Yuwn mak ngurridangdukan nawu bulikki narangem kore kahmimmelmelme manbu wheat manme." [Deuteronomy 25:4]

Yiddok ngurriburrbun God yimankek karremarnbom maninjmanu mankarre bu kongibuyi namekbe nawu bulikki?

¹⁰ Dja burrkyak, nungka karremarnbom kuninjkukenh kandarrkid-burrbuni ngad nawu bininj. Yoh, wanjh manekke mankarre bimbuyindanj bu God kannahnan ngad bininj. Mah wanjh, ngurriburrbu, bu yiman bininj kahdurrrkmirri kunrayek, kore kahbolkkarung manme kahdujdjindi, wanjh kunukka kunmak bu kadjalburrrbun bu yerrekah kamang yikahwi manbu manme. Dja bu bininj kahbenmarnedurrrkmirri kunrayek kore kahmimmoyhmang manmim manbu wheat bedberre nawu kabirrihwohrnawohrnan, wanjh kunukka kunmak bu kaburrbun bu kamang mahni manme nungandeleng bu yerrekah.

¹¹ Wanjh kunmekbe kadjalrohrok ngad nawu apostles ngarrikurdyime. Ngad wanjh ngarridurrrkmirri bu yiman ngarriweykani kunwok nuye God ngudberre dja kunmekbe yiman ngad ngarribolkkaruyi, dja ngarrimindudjengi manmim kore kurorre. Wanjh bolkkime ngudda ngurrimalngmakminj, dja ngurridjordminj yiman kayime manrakel. Wanjh kunubewu ngudmanwali kandikarremulewayi ngad nawu apostles.

¹² Ngudda wanjh ngurrbenkarremulewan birribuyika bininj nawu ngundibidyikarme ngudberre, dja ngad ngaleng kandiwerhkarremulewayi nawern. Wanjh kunu kunmakniwirrinj ngurrikurdyimeninj ngadberre. Dja ngad minj ngundiyingkihjdjawayi.

Bonj, ngad minj ngarrinjilngwarre bu ngarrikoldan. Wardi bu ngad ngundidjawayi kunwarddekenh, dja med, kunukka nganewarreworrimeninj kore ngarrbenmarnemulewayi birribuyika bininj kunwok kunmak manbu Christkenh.

¹³ Yiddok minj ngudda ngurriburrbun bu birrimekbe bininj nawu kabirridurrrkmirri kore Temple, wanjh kabirrimang manme bedberre kore Templebeh. Bu mayh kabindimarnekinje bedberre nawu kabirriwon nuye God, wanjh birrimekbe warridj kabirrimang manme bedberre kore kabirridurrrkmirri kumekbe. [Deuteronomy 18:1]

¹⁴ Mah, wanjh kuhni kadjalrohrok, nawu Kawohrnan Rowk kanwokrayekwong bu yimeng bininj nawu kabirrimulewan kunwok kunmak nuye, wanjh nawu kabindibekkabekkan bininj wanjh bindidjalkarremulewa. [Matthew 10:10]

¹⁵ Mah, wanjh, ngurrina! Ngaye yimankek kuyinj djawayi ngudberre kunwardde bu marneyolyolmi ngudberre bu Jesuskenh, dja burrkyakni, ngaye minj bangmedjawayinj nawu kandimarnekarremulewayikenh. Dja mak bolkkime minj yawoyhdjawan ngudberre bu ngahbimbun naninjnanu djurra. Burrkyak. Ngaye ngadjare ngamulewan God nuye kunwok kunmak bu djalburudjang, ba bu yiman ngaburlumerren bu ngaye minj ngadjareniwirrinj bininj ngandikarremulewayi.

¹⁶ Bu ngaye ngahmulewan bedberre bininj kunwok kunmak, wanjh minj ngayeman bu ngakurdyime. Dja burrkyak. God nungan nganwokrayekwong ngamulewan kunwok kunmak, dja bu minj ngakurdyime

kunmekbe, wanjh kunukka God nungan ngandjaldung ngaye, dja ngakele. Kunmekbekenh kunu minj ngaburlumerren, dja ngadjalwokmarrkmang nuye.

¹⁷ Bu ngaye ngamulewayi manbu kunwok kunmak bu djal ngayekenh kore ngadjareniwirrinj, wanjh kunukka yiman kakarremakmen ngardduk bu bininj kandimarnekarremulewan bu kunmekbekenh. Dja bonj, ngaye ngadjalwokmang God kore nungka kadjare, dja nganwong bu ngayolyolme nuye kunwok kunmak.

¹⁸ Yiddok ngudda ngurriburrbun nawu ngahyolyolme? Wanjh kunu ngaye ngadjalwernhnjilngmakmen bu ngabenmarnemulewan bininj God nuye kunwok kunmak bu djalburudjang. God nganmakwan ngaye bu ngakurduyime, dja kuhni wanjh ngannjilngmarnbun. Nungka yimeng bu yimankek kamak bu bininj ngandikarremulewayi kunwardde, dja bonj, ngayeman ngadjalnjlilngmakni bu minj ngabendjawayi kunwarddekenh.

Paul Kadjare God Kabenngheke Birridjalwern Bininj

1 Corinthians 9:19-23

¹⁹ Ngaye minj nangale bininj nganhbongkarme bu kuninjkunukenh ngahdurrmirri bininj bedberre. Dja ngaleng ngaye kunu ngadjalkurmerren kore ngabenmarnedurrmirri birribuyika bininj yiman kayime bu ngandibongkarme, ba bu kunubewu ngabenmarnbun kabirriwoybukwon Jesus.

²⁰ Bu ngaye ngarridjarrkni nawu Jews bininj, wanjh kunukka ngaye ngayimerranj yiman kayime bedda nawu Jews bininj, bu ngabenmarnbuyi yikahwi bedda bu kabirriwoybukwon Jesus. Dja bu ngarridjarrkdi Jews bininj wanjh kunukka ngayimerranj yiman kayime bedda nawu kabirrikarme mankarrekare. Kaluk minj ngaye ngakangewarre kore manekke manbu mankarrekare, dja ngadjalyimerranj yiman bedda ba bu ngabenmarnbuyi bu kabirriwoybukwon Jesus.

²¹ Dja bu ngaye ngarrihdjarrkdi bininj nawu minj Jews, nawu minj kabirrikarme mankarre manbu Jews bedberre, wanjh ngayimerranj yiman bedda rerrih. Dja ngaye kunu minj ngabawoyi God nuye mankarre, dja ngaleng ngadjalmarrkmang Christ nuye mankarre. Dja bonj, ngayimerranj yiman bedda nawu minj kabirrikarrekarme, ba bu ngabenmarnbuyi kabirriwoybukwon Jesus.

²² Bu ngaye ngarridjarrkdi bininj nawu birringudjwarre, wanjh ngayemanwali ngamarnburrinj bu ngangudjwarreni, ba bu ngaye nakka ngabenkangeborledke.

Kaluk ngaye wanjh munguyh ngadjalyimerrangeni yiman birribubuyika binihbininj nawu ngarrihbebeddjarrkni, ba bu ngaye ngabennghekeneninj bedberre. Kuhni ngadjaldjareni bu munguyh.

²³ Yoh, ngaye kuninjkunu ngadjalkurduyime rowk ba bu kabirribekkan birriwern bininj manbu kunwok kunmak, dja mak bu kabirriwoybukwon nawu Jesus. Wanjh kunu God kabenmarnekurduyime kunmak bedberre, dja mak ngaye warridj nganmarneyime kunmak nuye.

Yuwn Bu Karriwarnyakmulewarren Kore Karrimarnedurrmirri God

1 Corinthians 9:24-27

²⁴ Kandibekka. Ngudda ngurriburrbun bu bininj nawu kabirrirlobme bu kabirringudjrohrok, kaluk nadjalkudji bininj kabendjalyurrhke birribuyika rowk. Wanjh ngudda munguyh ngurridjalrohrokmen bu yiman ngurridjalrlobmen kore Christ, ba bu kaluk yerrekah ngurrimang nawu God ngunwon.

²⁵ Dja kunbuyika. Bininj nawu yiman kayime kabirridirri kore sports, nakka wanjh munguyh kabirridjalngudjrohrokmerren. Bedda wanjh kabirridjare kabirrimang njalehnjale namak bu kabirriwinhme, nawu kahyngkihyo bedberre. Dja nakka minj kunkuyeng kahyo. Ngad ngaleng karridurrkmirri ba bu karrimang nawu kahdjalyngkihyo kadberre nawu minj kayakmen dja kadjalyo munguyh munguyh.

²⁶⁻²⁷ Wanjh kunmekbekenh ngaye minj djal warrewarrekah bu ngarrurrkmirri. Ngaye ngaleng ngaburrkrayekworren kunburrk ngardduk ba minj ngawarreworren kore ngarrurrkmirrikenh.

Ngaye wanjh ngaburrkmarnburren bu ngamurrngrayekmen dja ngamarnburren bu ngadjaldurrkmirri munguyh. Ngaye ngabenhmarneyolyolme birribuyika bininj, dja bonj, kaluk bu wardi ngangudjwarremulewarremeninj, wanjh kunu ngaye ngakoldayi nawu kayingkihdjehdjenyo ngardduk, dja minj mak ngamayi.

10

Nawu Mawahmawah Kadberre Birriwokburriweyi God

1 Corinthians 10:1-5

¹ Ngudda nawu karridangerrinj, ngadjare ngurriwernhburrbun bu kunkareni wanjh nawu kadberre mawahmawah birrirey rowk kore manbu kunkodjngol benmikani, dja mak birridjowkkeng rowk kore kurrula bodjalkniwam.

² Bedda wanjh birrimunkekadjungu nawu Moses kore kurrula dja kanjdji kore kunkodjngol. Kuhni yiman kayime bu bedda birrikodjdjuhmi baptism nuye Moses.

³ Dja mak birridjarrknguneng rowk mandjalkudji manme manbu God benwong bedberre kundulkarre nuye dorreng,

⁴ dja mak birridjarrkbonguneng rowk mahni kukku manbu God benwong bedberre kundulkarre nuye dorreng. Nawu Christ nungan birrihdjarrkrey kore kubolkdarleh bu birrihrey. Wanjh nungka yiman kayime kunwardde mankimuk rerrih manbu kukku bokarmi kore birribonguni. [Exodus 16:35; 17:6]

⁵ Dja bonj, kunu God bendjaldungi yikahwi birriwern bedberre nawu kandikebmawahmeng, wanjh kumekbekenh birridoweng dja birrikukyoy kumekbe kore kubolkdarleh birrirey. [Numbers 14:29-30]

Yuwn Bu Karrbenngunjdjikan Nawu Mawahmawah Kadberre

1 Corinthians 10:6-13

⁶ Wanjh kunu karriburrbu bu kunkareni benmarnekurduyimerranj bedberre, ba bu karrinahnarren, dja minj mak karrbenngunjdjikan kore kunwarre birridjaldjareni.

⁷ Wanjh yuwn bu karrimarneboddan nawu idols, yiman yikahwi bedda birrikurduyimi. Ngudda ngurriburrbun kore bimbuyindanj bedberre, dja kayime, "Birrimekbe bininj birriyerrkang bu birringuneng manme dja birribonguneng, dja mak birridolkang bu birrimarlelmarlelni kore kunwarre birrikuniyimeng." [Exodus 32:6]

⁸ Kaluk yuwn bu ngad karriwohkaliyongohyo yiman bedda. Yikahwi kunmekbe birrikurduyimi nawu mawahmawah kadberre, wanjh kunmekbekenh kunu bininj nawu nadjalmirndewerkenhni rowk birridjaldowerinj bu kundungkudjini. [Numbers 25:1-18]

⁹ Dja mak yuwn bu ngad karrirohrokme bu karridjurrkkan nawu Kawohnan Rowk, yiman bu yikahwi kunmekbe birrikurduyimeng. Wanjh

kunu nabang nayin wernmerrinj dja wanjh benbom birrimekbe bininj. [Numbers 21:5-6]

¹⁰ Dja mak yuwn bu ngad karrimarnedjarokdi God bu karridjalnjwkmire. Wanjh kunmekbe kunu yikahwi birrihyimi yikahwi nawu kankeb-mawahmeng bininj, wanjh kunu God nuye angel nawu kundowikenh, wanjh benbularrbom bedberre. [Numbers 16:41-49]

¹¹ Yoh, kuninjkuwu rowk wanjh kurduyimerranj bedberre ba bu minj ngad mak karrbengunjdjikan bu karridurdoyime kunwarre. Kuninjkuwu wanjh bimbuyindanj ba bu karriborlhme, ngad nawu bolkkime karribaldarrkiddi bu kayiburnbunkenh kabolkyime ngare kondanjkuwu kurorre.

¹² Bu ngudda yimankek ngurrimurrngayekworren bu ngurridi, wanjh ngurrinaharrimen kore kunubewu ngudda warridj ngurriyawoyhkurduyime kunwarre.

¹³ Kunwarre kandjurrkkan kadberre karriwarlahkenh bininj rowk. Wanjh kuninjkuwu kadjalrohrok kore ngudda ngudberre. Dja bonj, God nungan ngunbidyikarme, dja minj ngunbawon bu ngunmarnekurduyime kore kunwarre duninj ngunwernhdjurrkkan bu ngunwarrewoyi. Dja burrkyak, bu kuhni kunwarre ngundjurrkkan kunkimuk, wanjh God ngunbidyikarme kore yingkihwokkurrmerrinj, ba bu minj ngurrikurduyime kore kunwarrekenh ngundjurrkkan.

Yuwn Bu Karrimarneboddan Nawu Idols

1 Corinthians 10:14-22

¹⁴ Mah, nawu ngaye marnedjare ngudberre, wanjh kandidjalbekka. Ngurrbendjalmarneyarlarmen werck kore bininj nawu kabirrimarneboddan nawu idols.

¹⁵ Ngaye ngaburrbun bu ngudda ngurridjalmayaliwern bininj, ba bu wanjh ngaye marneyime mandjad ngudberre. Kandibekka ngaye ba bu ngudmandeleng ngurriburrburen bu yiddok ngaye kunwoybuk marnemarneyime.

¹⁶ Bu ngad karridjarrkboyikadjurren rowk nangalngkudji banikkin, wanjh kunu karrimanjibun rowk God nawu kunmak kurduyimeng kadberre. Wanjh kunu karrikukbelmerren nawu Christ, dja karridjarrkkurlbabongun manbu kunkurlba nuye. Wanjh kunu kadjalrohrok manbu buriddi manlodkudji karribakke, ba karrikukbelmerren Christ bu karridjarrkngun kunburrk nuye.

¹⁷ Maninjmanu buriddi, wanjh mandjallodkudji. Ngad karriwern karridjarrkyikadjurren rowk, wanjh kunmekbekenh kunu yiman karriburrkkudjihmen.

¹⁸ Kunbadbuyika mak bu marneyime. Wardi ngurrbenbalburrbu bininj nawu Israel benkebmawahmeng. Bu birribuni dja birrikinjeng mayh kore altar, wanjh birridjarrknguneng birriyakwong maninjmanu kunkanj, dja kunu yiman benmarnbom bininj nawu birridjalmarneboddan nawu God. [Leviticus 7:6]

¹⁹ Kunubewu minj ngudda nuk kandiwockburrburkbekkan kore ngaye marnemarneyime ngudberre. Wanjh ngad karriburrbun nawu idols nakka wanjh minj nawoybuk gods, dja djal yeng, dja mak manbu manme bu bininj kabirrihkurrme kore idols, wanjh minj kakukenmen.

²⁰ Bininj nawu minj kabirriwoybukwon God duninj, bu kabirriwon manme nawu idols, wanjh nakka kabindiwon namarnde bedberre, dja nakka minj God kabirriwon. Wanjh kunmekbekenh yuwn ngurriraworren birrimekbe nawu kabirrimarneboddan idols, wardi kunubewu ngurrikukbelmerren nawu birriwarre bininj, dja mak nawu namarnde.

21 Ngudda ngurridjarrkbongun nawu banikkin nuye nawu Kawohrnan Rowk. Dja yuwn bu mak ngurribongun warridj nawu banikkin namarnde bedberre. Ngudda ngurridjarrkngun manme kore nawu Kawohrnan Rowk nuye kunred. Dja yuwn bu mak ngurringun manme manbu namarnde bedberre kore bedda.

22 Dja bu ngad kunmekbe karrikurduyimeninj nuye, wanjh kunukka karrimarnbuyi nawu Kawohrnan Rowk bu kakirndangen kadberre. Kaluk bu nungka kandung, minj mak ngad karrikuniyurme bu yimankek karribuyi.

Karrinaharrimen Kore Nawu Kawohrnan Rowk

1 Corinthians 10:23-33

23 Yikahwi ngurriyime, "God nganyerrkkeng kore ngabongdibeh, wanjh bolkkime ngadjalkurduyime kore ngayeman ngadjare." Dja ngaleng marneyime ngudda kunubewu ngurrbenkangewarrewon nawu birribuyika bininj bu kuninjkuwu ngurrikurduyime. Dja ngaye marnemarneyime ngudberre, bu munguyh ngurrbenbidyikarmen ngudda nawu ngurrimunkekadjung Jesus.

24 Yuwn bu ngudmandeleng ngurrihdjalbebbehnahnarren, dja kab ngurrinaharrimen ba ngurridjarrkdi kamak rowk.

25 Kuhni wanjh ngurrikurduyimen bu ngurrikanjmang kunkanj manbu birribuyika bininj ngokko birriyingkihkanjwoni nawu idols. Bu ngudda ngurribayahme mankanjbubuyika kore shopbeh, wanjh kunu ngurridjalkinjemen, dja ngurringun kamak rowk. Yuwn mak ngurribaldjawan bininj nawu shop kahdurkmirri bu yimankek kurrmeng kore idols nuye. Yuwn bu ngurribalkarreburrbu bu kuninjkuwukenh ngarre.

26 Dja manbu kunkanj makka wanjh nawu Kawohrnan Rowk nuye. Kunmekbekenh kunu bimbuyindanj, dja yimeng, "Manbu kunred dja yehyeng rowk kondanjkuwu kurorrebeh, makka wanjh nungka nuye nawu Kawohrnan Rowk." [Psalm 24:1]

27 Dja bu bininj nawu minj kabiwoybukwon Jesus ngunkimang bu ngunedjarrkngun manme kore nungka nuye kunrurrk, wanjh kunukka yidjalngun warrebo manbu manme bu ngunwon. Yuwn bu ngurribalkarreburrbu bu kuninjkuwukenh ngarre.

28 Dja med, bu nangale bininj nawu kakangewarre kore idolskenh, ngunmarneyime, "Mahni manme wanjh birrikurrmeng kore idols," wanjh kunukka minj yingun. Dja bu yingun, wanjh namekbe bininj nawu kuhni ngunmarneyimeng, wanjh kabalburrbun bu kamak nungka kakurme manme kore idols, dja wanjh kayemengalme.

29 Ngudda minj ngurriyemengalme bu ngurringun kuninjkuwu kunkanj. God ngokko ngunyerrkkeng ngudberre ba bu ngurringun dja minj mak ngurriyemengalme. Dja nawu nabuyika bininj wanjh nakka kunubewu kayemengalme bu kangun.

Dja yuwn bu mak ngurridjalyime, "Aba, ngaye kamak ngadjalngun kore ngadjare, dja minj ngayemengalme. Dja njalekenh ngaye ngaburrbu nabuyika bininj bu kayemengalmekenh?"

30 Dja yuwn bu mak baybaywi ngurriyimerren, "Kunukka wanjh kunmak bu ngahngun manme rowk, kore ngayingkihmanjbun God. Minj kunukka kunwarre! Wanjh minj nangale nganyolyolme ngaye." Burrkyak, yuwn bu kuhni ngurriyime.

31 Wanjh bu ngurringun dja ngurribongun, dja mak kunwern ngurrikurduyime, wanjh ngurrbenmarnbu bininj rowk bu kabirriburlume God.

³² Dja yuwn bu mak ngurrbenbengwarrewon bininj rowk, yiman Jews dja birribuyika nawu minj Jews. Dja mak yuwn bu yibenbengwarrewon God nuye bininj nawu yiwarrudj bedberre.

³³ Kandingunjdjika ngaye. Ngaye munguyh ngadjare ngabenmarnbun bininj ba bu kabirriburrbun kore ngaye ngakurduyime kundjalmak. Ngaye minj kuhni ngakurduyime bu djal ngayeman ngardduk, dja ngadjare God kabennegehke yikahwi bininj bu ngaye ngandikurdunan.

11

Baleh Daluk Dja Bininj Kabirribebbehkurduyime Kore Yiwarrudj

1 Corinthians 11:1-16

¹ Ngaye ngadjare ngudda munguyh kandidjalngunjdjikan ngaye, yiman kayime bu ngaye munguyh ngahngunjdjikan nawu Christ.

² Ngaye wanjh ngayime ngudberre ngudda ngurrimak, bu munguyh ngurridjalburrbun rowk kore ngaye bukkabukkang, dja mak ngudda munguyh ngurriwokmarrkmang mankarre ngadberre manbu ngaye bidnakenwong ngudberre.

³ Dja bolkkime ngaye wanjh kunbuyika warridj bengdayhke. Ngaye ngadjare ngudda ngurrimenmang bu God nungka kabimarnewohnan nuye Christ, dja wanjh kunmekbe kadjalrohrok bu Christ kabemarnewohnan nawu nabihbininj kobeng rowk. Wanjh nabihbininj kobeng, bedda kabindindibebbehmarnewohnan ngalbu ngalbihbininj kobeng bedberre.*

⁴ Kumekbekenh kunu ngayime bu nangale bininj nawu kahdi yiwarrudj dja kabiwokmulewan God nuye kore yiwarrudjenh kabirrimirnderri, wanjh kunukka minj mak njale kakodj Jongbuyindi. Dja bu yiman kakodj Jongbuyindi njalenjale, wanjh kunukka yiman kayime minj mandjad kabimarneboddan nawu Christ.

⁵ Dja bu daluk kahdi yiwarrudj dja mak kabiwokmulewan God nuye kore bininj kabirrimirnderri, ngaleng wanjh kodjbarrkbuyinda. Dja bu burrkyak, wanjh kunukka yiman kakodjwarreworren, dja mak kabiwarrewu nawu nabininj kobeng ngarre. Ngaleng wanjh yiman kayime daluk ngalbu kangabekdjoberren rowk!

⁶ Bu daluk minj mak kadjare kakodjbarrkburren, wanjh kunukka ngalengan ngabekdjoberren rowk. Wanjh kunu kayemengalme, dja bonj, wanjh kodjbarrkburren manburrbayi.

⁷ Bininj, wanjh burrkyak, yuwn bu bininj bedman kabirrikodjbarrkburren. Kaluk ngaye wernhbengdayhke ngudberre. God kabemarnbun bininj bu yiman nungka rerrih ba bu birriwarlahkenh rowk kabirridjalburlume God. Kaluk karohrok bu bininj kabirrikuknan daluk, wanjh birriburlumen nawu nabininj kobeng ngarre.

⁸ Wanjh kuhni ngayime. Ngurriburrbu. Nawu nayungkihni bininj minj kumkukbebmeninj kore dalukbeh, dja ngaleng ngaldjalyungkihni daluk ngalu kumbemeng kore namekbe nawu bininjbeh.

⁹ Nawu God bimarnekumarnbom ngalmeke daluk ba bu biwong namekbe bininj, bu kuhni minj God bimarnekumarnbuyinj bininj bu biwoyi ngahli daluk.†

¹⁰ Wanjh kunmekbekenh kunu daluk wanjh birrikodjbarrkbuyindin bu kahdi yiwarrudj, dja kabirriwokmulewan God nuye. Bu kabirrikodjbarrkburren, wanjh kamenmenyime bu kabirrimarnewokdi kore

* 11:3 Ephesians 5:21-33 † 11:9 Genesis 2:18-23

nawu Kawohnan Rowk. Dja mak marneyime bu angels dorreng kabindikurdunan!

¹¹ Dja ngaleng ngurridjalburru warridj bu ngad rowk binihbininj dja daluhdaluk karridjarrkkukbelmerrinj nuye nawu Kawohnan Rowk, wanjh minj mak bininj dja daluk karriyawoyhbebbehyurrhkerren.

¹² Kuhn wanjh gaye ngayime ngudberre. God bimarnbom ngalyungkihni daluk kore kuburkkeh nuye nawu nayungkihni bininj, wanjh kumekbekenh kunu kariyime bu daluk kabirrimdolkkan kore bininjbeh. Dja med. Kadjalrohrok, bininj kabirrimdolkkan kore dalukbeh! Bu daluk kabindiyawmang narahrangem wanjh daluk kabirrikimukmen bu kabirriyimerran bininj nawu dabbolk. Nungka God kahdjalmarnbun nawu yehyeng rowk munguyh, dja mak kanmarnbun ngad bininj dja daluk.

¹³ Kuhn wanjh ngudman ngurriburru, dja baleh ngurriyime, bu ngalngale daluk kahdi yiwarrudj kore bininj kabirrimirndemornamerren, yiddok kuhni bu kunmak bu ngaleng minj kakodjarrkbuyindi? Burrkyak!

¹⁴ Birriwarlahkenh bininj kabirriyime bu bininj nawu nangabekkuyeng, wanjh nakka yemengalmimen.

¹⁵ Dja mak birriwern bininj kabirriyime daluk ngalbu ngalngabekkuyeng, wanjh ngalkukmak, dja birriwern kabirriburlume. Kaluk God kabenhmarnbun daluk bu birringabekkuyeng munguyh ba bu yiman kabirrikodjbalhmiyindikenh.

¹⁶ Kunubewu gaye kandiyolyolme bu kuninjkuu gaye ngahmulewan kore dalukkenh. Gaye ngahdjalwohmulewan ngudda bu ngarikurduyime munguyh gaye dja mak nawu ngurridjarrkdurrkmirri. Gaye ngahdjalmulewarren kore ngad ngarikurduyime, gaye dja mak God nuye bininj nawu yiwarrudj bedberre kore kubolkubuyika rowk, wanjh kuhni kabirridjalyime rowk.

Baleh Ngurriyime Bu Ngurridjarrkngun Dja Ngurridjarrkbongun Bu Ngurriburru Kore Jesus Doweng

1 Corinthians 11:17-22

(Matthew 26:26-29; Mark 14:22-25; Luke 22:14-20)

¹⁷ Dja mak gaye wanjh ngadjare bengdayhke kore ngurrimirndemornamerrenkenh bu ngurribongun dja ngurringun kore nawu Kawohnan Rowk kanbukang. Wanjh kuhni ngudda kunu minj mandjad ngurridjalkurduyime dja ngurriwarreworren, wanjh kunu gaye minj mak burlume ngudberre.

¹⁸ Gaye wobekkan ngudberre bu kuninjkuukenh, wanjh djawoybukkik kunukka. Ngudda djaying bu ngurrimirndemornamerren kore yiwarrudj, wanjh ngurribebbebbehni dja mak ngurribebbedangwerren.

¹⁹ Yuwn bu kundjalmak. Dja bonj, wardi bu ngurridangwerren wanjh kunubewu God kunukka ngunbukkan kore kunwoybuk nuye, dja nangale nawu kabenmakwan kore ngudberre.

²⁰ Bu ngurrimirndemornamerren ngurridjarrkngun manbu maninjmanu manme nawu Kawohnan Rowk nuye, kunubewu ngudda kunu ngurridjalkurren, dja ngurridjalngun ngudberrekenh.

²¹ Ngudda ngurriburru bu ngahyime. Ngudda wanjh ngurribebbehnun, dja birribadmirndebuyika nawu ngurridjarrkdi kumekbe wanjh minj bedda kabirrikarreme manbu manme. Kaluk yikahwi ngudberre wanjh kabirriworrroman. Bu kuhni minj kunmak!

²² Bu ngudda kuhni ngurridjare ngurringun dja ngurribongun ngudberrekenh, wanjh kunukka ngudmandeleng ngurridjalkurduyime kured-bubuyika ngudberre. Njalekah ngudda ngurrikurduyime kunwarre kore maninjmanu manmekenh bu ngurrimirndemornamerren ngudda bininj nawu yiwarrudj ngurrikarme? Dja njalekenh mak minj ngurriweykarren birrimekbe bininj nawu minj kabirrikarme manme? Bu ngudda yimankek ngurrbenmarladjwon nawu manme yak. Kaluk yimankek ngurriyime ngaye burlume ngudberre kumekbe kore ngurrikurduyime? Dja burrkyak duninj!

*Bu Kerrngehkenh Jesus Nawu Kawohrnan Rowk Marnbom Mulil Nuye
1 Corinthians 11:23-34*

²³ Ngaye wanjh ngadjare mankarre won ngudberre ba bu ngurrikarme munguyh. Nawu Kawohrnan Rowk nganwong maninjmanu mankarre, bu bolkkime marnehmarneyime ngudberre. Kuninjkuu kurduyimeng Jesus nawu Kawohrnan Rowk bu yirredjdjimgmey kore kunmekbeni kunkak bu nakudji bininj bikukweykang nuye.

Wanjh kunu Jesus lodmey buriddi,

²⁴ dja bimanjbom God nawu Kornkumo dja welenglodbakkeng. Wanjh yerre benmarneyimeng bininj nuye nawu birridjarrkni, bu yimeng, "Mahni manbu buriddi, yiman kunburrk ngardduk. Kaluk bu ngurridjarrklodbakke manbu buriddi, wanjh kunu ngurridjalburrbu bu ngaye marnekanjkurmerren ngudberre."

²⁵ Kaluk bu bedda birriyalkwong bu birringuni manme, wanjh kundjalmeke yerreh, Jesus ngalgngmey banikkin manbu wine borrahkendi dorreng, dja yimeng bedberre, "Mahni manbu wine, yiman kayime kunkurlba ngardduk. Kaluk bu ngurridjarrkbongun, wanjh kunu ngurriburrbu bu ngaye ngakurlbawarrhmeng ba bu kawoybukkendan kore God yingkihwokkurmerrinj ngudberre."[‡]

²⁶ Wanjh bu ngudda munguyh ngurriodngun buriddi dja ngurribongun wine manbu kaborrahkendi kore banikkin, wanjh kunu ngurrbenbukkan birriwarlahkenh bininj bu nungka nawu Kawohrnan Rowk doweng kadberre. Dja kuninjkuu munguyh karridjalkurduyime kaluk bu nungka kamdurndeng.

²⁷ Wanjh ngaye kuninjkuu bengdayhke ngudberre. Bu nangale nawu bininj kangun maninjmanu buriddi dja kabongun maninjmanu wine dja minj kabiwernhburrbun bu nawu Kawohrnan Rowk bimarnedoweng, wanjh kunukka yiman kabiborrkbun kore nuye kunkurlba dja kunburrk.

²⁸ Mah, wanjh marneyime ngudberre kore kunmak ngurrikurduyime bu ngurriodngun mahni buriddi dja ngurribongun mahni wine. Bu ngurriyngkihmarnburren wanjh, med, ngurribebbehurrbu bu baleh ngurrikurduyimi kunwarre. Wanjh kaluk yerreh ngurriodngun buriddi dja wine ngurribalbongun.

²⁹ Bu ngurringun dja ngurribongun, wanjh ngurriwernhburrbu nawu Kawohrnan Rowk nuye kunburrk. Dja bu burrkyak, wanjh God ngundjadme dja ngundung.

³⁰ Wanjh yikahwi ngudberre minj ngurriburrbun bu kunmekbe. Kunmekbekenh kunu birriwern bininj kore ngudberre wanjh kabirrihgudjywarren dja birridulkkihngalmeng, dja mak yikahwi ngudberre wanjh birridowerrinj.

[‡] 11:25 Exodus 24:6-8; Jeremiah 31:31-34; Luke 22:20

³¹ Bu werkk karrikangebekkarren kore karringun dja karribongunkenh, wanjh kunu yiman karriyingkihdjadmerren, dja wanjh God minj nungan kandjadme bu karringun dja karribongun nuye.

³² Dja kunbuyika mak marneyime. Bu nawu Kawohnan Rowk nungan kandjadme dja kandung kadberre, wanjh nungka kanmarnewokrayekwon ba bu kanmarnbun karridjalkurduyime kunmak munguyh. Nungka wanjh bolkkime kanhdung walakkih, kaluk bu yerrekah wanjh minj kanbun kadberre bu kabendjadme birriwarlahkenh bininj rowk, dja mak bu kabenbun rowk.

³³ Mah nawu ngad karridangerrinj, bu ngudda ngurrimirndemor-namerren kudjalkudji rowk bu ngurridjarrkngunkenh, wanjh kunu ngurridjalmadburrimen!

³⁴ Dja bu ngudda yikahwi ngurribekkarren ngurrimarrwedowen, wanjh kunu ngurringu manme werkk kore kured, ba bu minj ngurrikurduyime kunwarre dorrengh kore yiwarrudj ngarre, dja minj mak ngurrimarnbun God kayiddung bu ngundjadmeken.

Kaluk yerrekah yawoyhbukkabukkan ngudberre bu ngamre kumekbe kore ngudda ngurrihni.

12

Nawu Namalngmakkaykenh Kahdurrmirri Kore Kukange Kadberre

1 Corinthians 12:1-3

¹ Wanjh kandibekka ngudda nawu ngaye karridangerrinj. Ngaye ngadjare bu ngudda ngurriwernhburrkburrkbekkan bu bolkkime marneyime, wanjh kandiwernehbekka bu ngamulewan kore nawu Namalngmakkaykenh kahdurrmirri kore kukange ngudberre.

² Ngudda ngurriburrbun kerngeghkenhni bu minj ngurriwoybukwoyi Jesus, dja ngudda ngurribenngundjijang birribuyika bininj, dja ngurrimarneboddangeni idols nawu minj kabirriwokdi.

³ Ngaye wanjh ngadjare bukkabukkan bolkkime ngudberre. Bu nakudji bininj kayime, "Ngadjare bu God kabinjirrhmiwon Jesus", wanjh namekbe bininj nakka minj kamulewan kore Namalngmakkaykenh kabiwokwonkenh. Dja ngaleng nadjalkudji Namalngmakkaykenh kanwokwon bu kariyime, "Jesus nakka wanjh Kawohnan Rowk." Dja bu Namalngmakkaykenh minj kanbidyikarrme, wanjh kunu minj kariyime.

Namekbe Nadjalkudjiwi Namalngmakkaykenh Kanbebbehwonowon Kore Karridurrmirrikenh.

1 Corinthians 12:4-11

⁴ God kandjalwong nadjalkudji nawu Namalngmakkaykenh wanjh bu bolkkime ngad karridjalbebbdurrmirri kore kunmakkenh.

⁵ Ngad karriwern bininj wanjh karrimarnedurkmirri nuye nadjalkudji duninj nawu Kawohnan Rowk.

⁶ Nadjalkudji God kadberre, nungka wanjh kanbebbehngudjwon kore karrimarnedurkmirri nuye bu kunbubuyika kunwern karribebebkurduyime.

⁷ God nuye Namalngmakkaykenh kanbebbehwon kunmakmak nuye ba bu karribidyikarrmerren.

⁸ Nawu Namalngmakkaykenh kabenmarnbun yikahwi bininj kore ngad ba bu birrimayaliwern duninj kore Jesuskenh, ba bu kabindibal-marnemulewan bininj. Dja mak namekbe Namalngmakkaykenh kabenmarnbun yikahwi birribuyika bininj kore ngad bu kabirriburrbun kunwern dja kabindimarneyolyolme birribuyika bininj.

⁹ Nahni Namalngmakkaykenh kabenmarnbun yikahwi birribadbuyika bininj kore ngad bu kabirriwernwoybukwon God, dja mak kabenmarnbun birribadbuyika yerre ba bu kabindimarnbun nawu kabirridulkkihyo.

¹⁰ Dja mak yikahwi birribuyika bininj kore ngad wanjh namekbe Namalngmakkaykenh kabenmarnbun ba bu kabirrikurduyime God nuye kundulkarre dorreng. Dja mak kabenmarnbun birribadbuyika bininj kore ngad bu kabirriwokmulewan God nuye kunwok. Dja mak kabenmarnbun birribadbuyika bininj kore ngad bu kabirrirohrokme nawu namalngmak dja nuk namalngwarre bu kabirribebme kore kadberre. Dja namekbe Namalngmakkaykenh kabenmarnbun yikahwi bininj kore ngad bu kabirriwokdiwokdi kundjenbubuyika, dja mak nawu birribadbuyika yerre kore ngad kabenmarnbun bu kabirriwokburrrkburrkbekkan manin-jmanu kore kunwokbubuyika dja mak kanbengdayhke ba bu ngad warridj karrimenmenbekkan kore baleh kamenyime.

¹¹ Yoh, wanjh nadjalkudjiwi Namalngmakkaykenh kanmarnekurduyime kadberre kuninjku rowk. Nungka wanjh kanbebbewon rowk kadberre kore nungan kadjare.

Ngad Nawu Kariukbelmerrinj Kore Christ Wanjh Karriyimerranj Yiman Kunburrk Nuye

1 Corinthians 12:12-13

¹² Wardi karriburrbun bu kunburrk kadberre manbu karribebbehkar-me, wanjh kakarme kunwern kunkilehkilelh, bu wanjh karaworren rowk kayimerran kunburrrkudji. Wanjh kunmekbe kadjalrohrokwi, bu ngad karrijalwern karriwoybukwon Christ, wanjh karriraworren bu kariukudjihmen wanjh kunu karriyimerran yiman Christ nuye kunburrk.

¹³ Adju, yiddok minj karribebbehkububuyika? Yoh. Yikahwi ngad nawu Jew bininj, dja mak yikahwi ngudda nawu minj Jew. Dja mak yikahwi ngad nawu karribongdi yiman slave, dja yikahwi ngad yiman minj karribongdi. Dja kunu bonj, dja ngad kunu karrijalkukudjiwi rowk bu nungan God kandjalkukudjuhkenng nawu Namalngmakkaykenh dorreng nuye. Dja mak God kanwong nawu namekbewi Namalng-makkaykenh bu kankangebaworrkmiwong.

Ngad Wanjh Yiman Karribebbehbubuyika Yiman bu Mankilehkilelh Kunburrrkudji Ngarre

1 Corinthians 12:14-26

¹⁴ Wardi karriyawoyhburrbu kunburrk kadberre wanjh karrih-bebbehkarme kunwern kunkilehkilelh, dja kabirribelmmerrren dja wanjh kundjalburrrkudjiwi ngarre.

¹⁵ Bu yiman kundenge ke kayime, “Ngaye minj kunbid, wanjh ngaye kunu minj ngakukbelmiyindi kunburrk ngarre.” Bu kundenge kunmekbe kayime, yiddok kunu kunwoybuk? Burrkyak, manbu kundenge makka wanjh djal ngalengman kabelmiyindi kore kunburrk ngarre.

¹⁶ Dja bu kunkanem ke kahmarneyimmerren, “Ngaye minj kunmim, wanjh kunukka minj kunburrk ngabelmiyindi” Djal bonj, manbu kunkanem ke kadjaldi kore kuburrk.

¹⁷ Bu ngudda ke kunburrk kayimerran mankimuk kunmim mand-jalkudji, wanjh kunukka minj ngudda njale mak yibekkan! Dja mak bu yiman kunburrk ke kayimerran kunkanemkudji, wanjh ngudda yiman kebyak, dja kunu minj njale mak yinome!

18 Kaluk God kanmarnbom bu kanwon kunburrrk kadberre manbu kakarme kunkilehkilelh kunwern kore nungan djareminj kanyimarnbom, dja kunwern kunkilehkilelh belbmerrinj rowk ba bu karibebbekarme kunburrrk duninjh.

19 Wanjh kunmekbekenh kunu minj ngad karrirohrok bu karridurrk-mirri. Dja bu yiman karridjalrohrok dja minj karribubuyika, wanjh kunukka minj ngad karrikukbelbmerrimeninj bu karriyimerran kundjalkudji kunburrrk.

20 Dja ngaleng kuhni wanjh woybukkih bu karrikukbelbmiyindi kunburrrkudjiw nawu ngad karridjalwern karribebbebubuyika.

21 Kaluk kunwern kunburrrkkilehkilelh manbu kunburrrk ngarre kore bininj wanjh kunu kabirribidyikarrmerren rowk. Dja yuwn bu kunmim kabimarneyime kunbid, "Ngaye minj ngadjare bu kanbidyikarme." Dja yuwn bu mak kunkodj kabimarneyime kundenge, "Yuwn bu kanyikarme, ngaye marnewarnyak."

22-23 Kaluk manbu kunburrrk ngarre karrikarme mankilehkilelh dja bu karribalanhmang manbu manwohyahwurd kore kunburrrk kadberre, wanjh kunukka karriwarreworren. Manbu mankilehkilelh kore kadberre kunburrrk, dja bu karriyime bu djalngudjwarre, wanjh karrinahnan, yiman karrinahnarren. Dja yikahwi mankilehkilelh kore kunburrrk wardi karriyime mankukwarre, wanjh karribarrkbun bu minj karriyemengalme.

24 Manbu yikahwi mankilehkilelhbuyika kunburrrk wanjh mankukmak, dja kamak kadjaladi.

Mah, wanjh bolkkime karriburrbun manbu kunburrrk nuye Christ. God kandjalmarnekurduyime kundjalkudjiw ngad bininj nawu Christ nuye manburrrkkilehkilelh. Dja mak yikahwi ngad nawu minj karrikukenni-wirrinj, dja bonj, nungan God kandjalbebbemarnekurduyime kadberre ba bu minj karriyemengalme.

25 Wanjh kunmekbekenh yuwn bu karrilarlmarren bu karribebbehmirn-derri, dja ngaleng, karridjalwernhnahnarrimen kaddjarrkberre rowk kore karrikukudjihmen.

26 Wanjh bu nangale nakudji bininj kadberre kabimarnbebme kunyid, wanjh kunu yiman kayime ngad rowk karridjarrkkarme mahni kunyid. Dja bu yiman nakudji kakukenmen, wanjh kunukka karridjalnjilngmakmen rowk.

Ngad Wanjh Karribebbehmarnedurrkmirri Kunbubuyika Rowk God Nuye

1 Corinthians 12:27-31

27 Ngudda wanjh ngurrikukbelbmerrinj bu ngurriyimerranj kundjalburrrkudji nawu Christ nuye kunburrrk, dja ngaleng ngudda ngurribebbehmarnedurrkmirri kunbubuyika nuye.

28 Dja mak God ngunbebbemarnbom kore mandjalkudji yiwarrudj nuye, bu ngudda yikahwi apostles ngurriyimerranj nawu ngurridokme, dja mak yerre ngunmarnbom yikahwi bu ngurriyimerranj prophets, dja mak yerre yikahwi ngunmarnbom ngurriyimerranj nawu kabindibukkabukkankenh. Dja mak yikahwi ngunmarnbom nawu ngurrikurduyime kundulkarre dorrengh nuye, dja yikahwi ngunmarnbom bu ngudda ngurrbenmarnbun nawu kabirridulkkihyo bininj. Dja mak yikahwi ngunmarnbom ngudda ba bu ngurrbenbidyikarmekenh, dja yikahwi ngudda ngunmarnbom ba bu ngurrbenmarnekarremarnbunkenh. Dja mak yikahwi ngunmarnbom bu ngurriwokdi kunwokbubuyika.

²⁹ Minj mak birriwern rowk kabirriyimerran apostles. Dja minj mak birriwern rowk kabirriyimerran prophets. Dja minj mak birriwern rowk kabirriyimerran nawu kabindibukkabukkan. Dja minj mak birriwern rowk kabirriyimerran nawu kabirrikurduyime kundulkarre dorrengh bu God nuye.

³⁰ Dja minj mak birriwern rowk kabirriyimerran nawu kabindimarnbun bininj nawu kabirridowen. Dja minj mak birriwern rowk kabirriyimerran nawu kabirriwokdi kunwokbubuyika. Dja minj mak birriwern rowk kabirriyimerran bu kabirriburrrkburrkbekkan kunwokbubuyika.

³¹ Dja ngaleng kunkudji kunbubuyika bu Namalngmakkaykenh ngunbebbewonowon. Dja bolkkime wanjh bengdayhke bu munguyh ngurridjaldjawa God ba bu ngunwon ngudberre kunwernhmak nuye kore ngurrimarnedurrknirrikenh, manbu kahyurrhke manbubuyika bu ngunyingkih Wong. Mah, wanjh bolkkime bukkabukkan manmakkaykenh ba bu ngurrimang.

13

Karriidjalmarnedjaremerrimen Munguyh

1 Corinthians 13:1-3

¹ Kuhni wanjh munguyh karriidjalmarnedjaremerrimen. Dja bu yiman karriwokdi kundjenbubuyika rowk, yiman bininj dja mak nawu angels bedberre kunwok, kaluk kunu bonj, bu minj karrimarnedjaremerran. Wanjh kunukka yiman kayime karriidjalebngburren ngadmandeleng, bu yiman kayime karrihbun wirlmurrng bu kawokngoyowhme!

² Kunubewu God kanwon kadberre bu karriyimerran prophets, dja kunubewu kunbuyika karriyimerran karrimayalikimukmen, dja mak kunubewu karribengan kunmayalimak manbu kawarllkayindi. Dja mak kunubewu karriwernhwoybukwon bulkkidj God ba bu karriwardded-jirrkkan. Bonj, bu ngad minj karrimarnedjaremerran, wanjh kunukka yiman karriyimerran yiman djal yeng.

³ Dja wanjh kunubewu karriweykaweykan nawu njalehnjale karrihkar-me bu karribenwon nawu birrimarladj bininj, dja mak kunubewu karrikanjkurmerren bu karrimarnedowe nuye God. Bonj, bu ngad minj karrimarnedjaremerran, wanjh kunukka ngad minj njale karrikurduyime kunmak.

Kaluk Bu Karrimarnedjaremerran Wanjh Baleh Karrikurduyime?

1 Corinthians 13:4-7

⁴ Bu ngad yiman woybukkih duninh karrimarnedjaremerran, wanjh kunu karriidjalmadburren, dja mak karriidjalkongiburren munguyh. Dja yuwn bu karrikinwerren. Dja mak yuwn karribebbehburumerran, dja yuwn bu mak karriidangwerren bu nangale karrokme kadberre.

⁵ Bu ngad yiman woybukkih duninh karrimarnedjaremerran, wanjh kunukka minj karrinjilngwarrewarreworren. Minj mak karriidjalkurduyime kore karribebbehjdare. Dja mak yuwn bu karriidurren bu njalenjalekenh munguyh, dja karrimarnebengmidjdarrimen kore kunwarrekenh karrinjilngwarreworren.

⁶ Bu ngad yiman woybukkih duninh karrimarnedjaremerran, wanjh kunukka minj ngad karrinjilngmakmen bu kunwarre kambembe. Kaluk ngad karriidjalnjilngmakmen bu karribekkan kore kunwoybuk duninh.

⁷ Ngad nawu karrimarnedjaremerran wanjh munguyh karrinaharren, dja mak karrikangekurmerren munguyh. Warridj karriidjalburrbun munguyh kore God kanyingkihberrebom, wanjh kunmekbe munguyh

karridjalmadbun bu God nungan kanngheke kadberre. Wanjh yuwn bu mak kuhni karrimarrkbaworren.

*Bu Karrimarnedjaremerren Wanjh Makka Mandjalkarrekuken Duninj
1 Corinthians 13:8-13*

⁸ Ngad bu karrimarnedjaremerren bolkkime bu kondanjkuwu kurorre karrihni, wanjh karridjalmarnedjaremerren bu munguyh dja djal munguyh. Wanjh kandibekka. Kaluk yerrekah ngad minj mak karriyawoyhwokdi kunwokbubuyika, dja wanjh bonj, kayiburnbun. Dja mak minj ngad karriyawoyhmang kunmayali kunwern. Kuhni wanjh kayakmen rowk.

⁹ Kaluk bolkkime karrihburrbun kundjalyahwurd, dja mak karriwokmulewan bu djal kunyahwurd kunwok manbu prophecy nuye God.

¹⁰ Yoh, minj kadjalwernhmak kadberre bolkkime. Kaluk yerrekah kuninjkuwu God kanbidkenwon kundjalmak kunwern rowk.

¹¹ Bu wanjh kerngekenhni ngad yiman wurdwurd yerreh, dja karriyolyolmi yiman kayime wurdwurd, minj karrimenmenkadjuwi rowk, dja karridjalbengdi yiman djalwurdwurd. Bolkkime wanjh ngad yiman karridabbolkmunj, wanjh kunu minj karriyawoyhkurduyime kore wurdwurd kabirriburrbun, dja karridjalbawong rowk.

¹² Kuhni mak kunbadbuyika bu karribadyolyolme. Bu bolkkime ngad karrihnun God yiman yerreh karrimimbuyumi. Kaluk bu yerrekah wanjh kunu ngad karrimimbayhme bu karridjalkebnarren God, nungka dja ngad. Bolkkime ngad kunu karridjalburrbun kundjalyahwurd nuye, kaluk bu yerreh ngad kunu karridjalwernhburrbun bu yiman nungka kanhburrbun kadberre bulkkidj duninj bu bolkkimekenh.

¹³ Ngayolyolme danjbik mankarre manbu kahdjaldi munguyh. Kaluk kuhni werrk, bu karriwoybukwon God. Dja mak manbadbuyika bu karridjalmadbun kore nungan kadjalkurduyime kore wokkurmerrinj. Dja manbu manwernhkarrekuken duninj kakarrehyo, wanjh kunu ngad karridjalmarnedjaremerren bu munguyh.

14

*Karrinaharrimen Bu Karrimornnamerren Kore Yiwarrudj
1 Corinthians 14:1-25*

¹ Ngudda wanjh munguyh ngurrimarnedjaremerren, dja mak ngurriwernhdjawa God ba bu Namalngmakkaykenh ngunwon ngudberre kunmakmak nuye. Dja ngaleng ngurriwernhdjawa God ba bu ngunmarnbun yiman prophet ngurriyimerran.

² Bu Namalngmakkaykenh kabiwon nangale bininj ba bu kawokdi kundjenbuyika manbu kunwok, wanjh kunukka namekbe bininj kabidjalmarneyime kore God. Minj mak kabenmarnewokdi kore birribuyika bininj. Minj birribuyika bininj kabirriburrbun kore nungan kahwokdi, dja nawu Namalngmakkaykenh kabimarnbun bu kawokdi kore kunwarlkkaykenh ngarre.

³ Dja kuhni kunbadbuyika bu yiman nangale bininj kahmulewan kunwok nuye God. Wanjh nungka kabenmurngrayekwon bininj kore kabenbengolyolme, dja mak kabenkangemarnbun, dja mak kabennjilngmarnbun nawu bedda kabirridjalwernhkwangwarre duninj.

⁴ Bu nangale bininj kawokdangen kundjenbuyika kunwok, wanjh kunukka nungandeleng kadjalbidyikarmerren. Dja nawu nangale bininj

kaweykan kunwok nuye God yiman prophet, wanjh nakka kabenbidyikarme bininj birriwern nawu kabirridi yiwarrudj.

⁵ Ngaye wanjh nganjilngmak bu ngudda rowk yiman ngurriwokdi kundjenbuyika kunwok. Dja ngaleng ngaye ngadjalwernhnjilngmak duninj bu ngudda ngurriweykan God nuye kunwok yiman bu prophet ngurridurkmirri. Bininj nawu kawokdi kunwok nuye God, wanjh kunukka nakuken bu karrokme kore bininj nawu kabirriwokdi kundjenbuyika kunwok. Dja med, bu namekbe bininj nawu kawokdi kundjenbuyika dja mak kabenmarnewokborledke bininj rowk nawu yiwarrudj bedberre ba bu kabenbukkabukkan, wanjh nungka warridj nadjalkuken.

⁶ Nawu karridangerrinj, kaluk ngaye ngadjare ngawernhmulewan ngudberre. Bu yiman nakudji bininj kamre kadjalwokdangen kundjenbuyika kunwok, wanjh kunukka minj ngunbidyikarme ngudberre. Dja bu yiman kawokdi kunwok ngudberre, wanjh kunu ngunmarneyime ngudberre yiman kunwokkerrnge kore God biwokwong, dja warridj ngunbukkabukkan, dja kunubewu manbu prophecy kore Godbeh, dja mak ngunmarnbun bu njalenjale ngurriborlhme.

⁷⁻⁹ Bu nangale bininj yiman kawokdi kundjenbuyika kunwok, wanjh kunu minj bininj birriwern kabirrimenbekkan kore kawokdi. Wanjh yiman kadjalwokdi nungandeleng. Ngurriburrbun yiman bu bininj nawu soldiers bu kabirribekkan trumpet kabenmarnebuhme bu kawokwarrewon, wanjh bu kabirribekkan minj kabirriburrbun bu kamenmenyime, dja wardi minj kabirrimarnburren bu kabirriburrenkenh. Dja mak karohrok bu yiman nakudji bininj kabenmarnedihdirri manbu gitar bedberre bininj, dja kakuniwokwarrewon, wanjh minj bedda kabirriburrbun kore mankomkenh kabirriwayini ngarre. Wanjh kadjalrohrok bu yiman ngurriwokdi kundjenbuyika kunwok.

¹⁰ Karriwarlahkenh bininj rowk wanjh karribebbehwokdi kore kondonjuku kurore rowk. Dja bininj nawu kabirridjarrkwokdi kunwok kunkudjiwi, wanjh nakka kabirrimenmenbekkarren.

¹¹ Dja bininj nawu kabirribebbehwokdi kunwokbubuyika, wanjh bedda minj kabirribebbehmarnebekkarren. Dja wanjh kunu yiman kabirrimarneyimerran nawu birridjenbubuyikabeh bininj.

¹² Wanjh kunmekbe kadjalrohrok yiman ngudda. Kamak bu ngudda wanjh ngurridjare nawu Namalngmakkaykenh ngunwon kunmakmak ba bu ngurrimarnedurkmirri God. Wanjh kamak duninj bu ngurridjaldjarenin bu ngunwon njalehnjale kunmakmak ngudberre, ba bu ngurrimurrngayekworren ngudda bininj rowk nawu yiwarrudj ngudberre.

¹³ Kunmekbekenh kunu ngaye wanjh marneyime ngudberre, bu nangale bininj kawokdi kunwok kunbuyika, wanjh kunu nungan bidjaldjawa God ba bu kabenmarnewokborledke kunwok bedberre nawu yiwarrudj bininj ba bu kabirrimenmenbekkan.

¹⁴ Bu yiman ngaye ngayeman ngahdi yiwarrudj kundjenbuyika manbu minj ngaye ngaburrrkburrbekkarren. Wanjh kunu kunmalng ngardduk kahdi yiwarrudj, dja manbu kunmayali ngardduk minj karri yiwarrudj, dja minj njale ngawokmenmenburrburren kore ngawokdi.

¹⁵ Adju! Baleh ngakurduyime? Bu ngaye ngahdi yiwarrudj kore kunkangebeh ngardduk, wanjh ngawokdi ngardduk kundjen, ba bu ngahdi yiwarrudj kore kunmayali ngarddukkih warridj. Dja mak bu yiman ngawokiywayini wanjh ngawokdi ngardduk kundjen ba bu ngawayini kore kukangebeh ngardduk, dja warridj kore kunmayalibeh warridj.

16 Bu ngurrihmornamerren, wardi ngurriwokdi kundjenbubuyika kore ngurriburluburlume nawu God. Bu nangale bininj kamre kore ngurrimirnderri, dja nungka minj ngundiwokmenmenbekkan kore ngurriwokdi. Minj nungka kayime, "Yoh, kuhni wanjh kunwoybuk," dja minj mak kaborlhme kore kunmak.

17 Kunu ngudman ngurridjalmanjbun God bu djal kunmak, dja ngaleng minj ngurrbenbidyikarme birribuyika bininj.

18 Ngaye God nganmarnbom ba bu ngawokdi kundjenbuyika kunwok kunwern, dja ngarrokme ngudberre.

19 Dja ngaleng ngaye bu ngabenbukkabukkan bininj kore yiwarrudj bedberre, wanjh ngaye kunu ngadjare ngadjalwokdi manbu kunwok ngandimenmenbekkan rowk. Dja yuwn bu ngadjare ngayolyolme bedberre kore kunwern kunwok kunbuyika manbu minj kabirrimenadjung.

20 Nawu ngaye karridangerrinj, yuwn bu munguyh ngurridjalburrbun kore yiman wurdwurd kabirrihbengan. Ngudda wanjh dabborrabolk duninh, wanjh ngurriwernhmayalibekkarren. Dja med, ngurrbenngunj-djikan wurdwurd kore minj kunwarre ngurriwernhburrbun yiman bedda.

21 Ngudda wanjh ngurriburrbun mahni mankarre kore djurra yingkih-bimbuyindanj, kayime,

"Nawu Kawohrn Rowk yimeng, 'Ngardduk bininj minj ngandiwok-bekkabekkan. Wanjh ngabenmunkewe birribuyika bininj nawu birridjenbuyika bu ngandiwokmulewan bedberre. Dja bonj, ngardduk bininj minj ngandijalwobekkabekkan.'" [Isaiah 28:11-12]

22 Wanjh karohrok, bu ngudda nawu ngurriwoybukwon Jesus ngurriwokdi kundjenbubuyika, wanjh bininj nawu minj kabiwoybukwon Jesus ngunbekkan ngudberre, wanjh minj kabiwoybukwon kore God. Kuhni wanjh kamenyime nuye. Dja ngudda nawu ngurriwoybukwon Jesus, bu God nuye Namalngmakkaykenh ngunmarnbun ba bu ngurrimarnewokdi kore Godbeh, yiman prophets, wanjh ngurribekkan kore God kawokdi ngudberre.

23 Mah, bu ngudda ngurrihmornamerren rowk kore yiwarrudj ngurridi, dja ngurriwokdi rowk kundjenbuyika kunwok, wanjh baleh kabirriyime bininj nawu kabirringimen nawu yikahwi minj kabirriwoybukwon Jesus, dja kunubewu kabirriwoybukwon kundjalyahwurd? Wanjh bu ngundibekkan ngudberre ngurriwokdi kundjenbuyika kunwok, wanjh bedda ngundimarneyime ngudberre bu ngudda kunu ngurribengwarr!

24-25 Bu bininj kamngimen nawu minj kabiwoybukwon Jesus, dja nuk bininj nawu minj kaburrrkburrrkbekkan kore God kayime, bu ngudda ngurrimulewan rowk manbu God nuye kunwok manbu prophets kabirriyime, wanjh nungka namekbe bininj ngunbekkan bu ngudda ngurrimarneyime bu kunwarre nungka kurduyimi, wanjh yiman ngurridjadme, dja wanjh kawaryakmulewarren dja kakangeborledkerren kore God. Wanjh nungka kabiburlume God bu kabikangeburrbun nuye kunkange, dja kabiwoybukwon bu kabiburlume nuye, dja kakuniyime, "Woybukkih, God ngurridjarrkni kondah ngudberre dorrengih!"

Baleh Karrikurdyime Kore Yiwarrudj Bu Kunmakkenh

1 Corinthians 14:26-33

26 Ngad nawu karridangerrinj, ngudda baleh ngurrikurdyime kore ngurrimirndemornamerrenkenh? Yikahwi bininj ngudberre kabirriwayini manbu kabirrikarremarnbun. Dja mak yikahwi bininj ngudberre kabirridjare kabindibukkabukkan birribuyika ngudberre. Yikahwi mak nawu birrimey kunwok kore Godbeh ba bu kabindimarnemulewan birribuyika bininj. Yikahwi mak kabirriwokdi kundjenbuyika kunwok,

dja mak yikahwi kabirriwokborledke mahni kunwok kore ngudberrekih. Kuhni rowk wanjh kundjalmak dunijnh! Dja ngaleng, munguyh ngurrimurrnggrayekworrimen kore baleh ngurribebbehkurduyime.

²⁷ Dja bu yikahwi ngudda ngurridjare ngurriwokdi kundjenbuyika kunwok, wanjh kunukka kunubewa ngunebokenh dja nuk ngurridanjbig bu kabirribebbehwokdi nakudji nakudji. Dja nabuyika bininj wanjh wokborledkemen kunwok manbu kabirriwokdi, dja kabenbengyolyolme birriwern ba bu kamenmenyime.

²⁸ Dja bu minj nangale kawokborledke manekke kunwokbuyika, wanjh kunukka yuwn nangale mak kawokdi kundjenbuyika kunwok bu kurobbe. Dja djalwokdin baybaywi nungandeleng bu yiman kabenewokdi nungka dja nawu God.

²⁹ Kunubewu benedjalbokenh dja nuk birridjaldanjbig bininj bu kabindimarneyolyolme kunwok manbu God nuye yiman prophets. Dja mak nawu birribuyika bininj bedda wanjh bindiwernhmayalibekkan bedberre dja kabirriyime bu kamak dja nuk kawarre.

³⁰ Kaluk bu God kabimarneyime nangale bininj nawu kayerrkan wokyak kumekke kore kabirridjarrkni, wanjh nayungkih bininj nawu kawokdi djalngurdmen, dja namekke nawu nakerrnge bininj kamhni kamdolikkan bu nunganwali kamulewan God nuye kunwok.

³¹ Wanjh kamak bu ngudda kunu ngurribebbehwokdiwokdi God nuye kunwok, dja ngurrimarnemulewarren, ba bu ngurriwern ngurriborlhme dja ngurrimurrnggrayekworren.

³² Bu prophet kakarrme God nuye kunwok, wanjh nungan kamarnburren kore kawokdi, dja kore kangurdme kore kawokdi. Wanjh kunu nungandeleng kamalnghnarren.

³³ Wanjh ngurridjalburru. God kadjare bu karridjarrkkurduyime kunmak dja kunmodmikenh dorrengh kore yiwarrudj karrihni. Yuwn bu kadjare bu karribengwarreworren kore karrihni. Kunmekbekenh kuninjkuwu ngahmulewan ngudberre, dja kuhni kakurduyimerran kore God nuye bininj nawu kabirrimirnedmornnamerren kubolkbubuyika rowk.

Bu Daluk Kabirridokmiwerren Dja Kabirriwokdi Kore Yiwarrudj

1 Corinthians 14:34-35

³⁴ Kunbuyika mak marneyime. Yuwn bu daluk kabirridokmiwerren ba bu kabirriwokdi kurobbe kore ngurrihmirdemornnamerren. Bedda wanjh kabindiwokmarrkmang nabihbininjjobeng bedberre. Kuhni kayime manbu mankarre ngadberre nawu Jews.

³⁵ Bu daluk yimankek bu kadjawayhme, wanjh bidjaldjawa nabininjjobeng ngarre kore kured. Dja bu daluk ngalengman karrokmiwerren dja kawokdangen kore yiwarrudj ngarre, wanjh kunu kayemengalme.

Bu Ngaburnbun Mahni Kunwok Rowk Manbu Bengdayhke

1 Corinthians 14:36-40

³⁶ Kunubewu ngudda minj ngurrinjilngmak kore ngaye ngahyime ngudberre. Dja minj ngurriwohburru. Ngudda kunu minj ngurriyungkihniwirrinj bu ngurribenmarneyimeninj ngurribenmarnemulewayi God nuye kunwok. Dja mak ngudda minj ngurridjalkudji nawu ngurribekkayi maninjmanu kunwok.

³⁷ Dja kandibekka, bu ngudda yimankek ngurringeyburren nawu prophet, dja yimankek ngurriyime ngudda ngurrikarrme kore Namalngmakkaykenh ngunwon, wanjh kunukka ngurriburru bu ngaye wokwowokwon ngudberre manbu mankarre nawu Kawohnan Rowk nuye.

³⁸ Dja nangale nawu nganwokwarrewe ngaye, wanjh kunukka birriwern bininj kabirribadwokwarrewe nuye.

³⁹ Mah, ngad nawu karridangerrinj, kunukka wanjh kundjalmak duninj bu ngurridjare ngurriyimerran yiman prophet dja mak ngurrikuniweykan God nuye kunwok. Dja yuwn bu ngurribengurdke bininj nawu kabirridjare kabirriwokdi kundjenbuyika kunwok.

⁴⁰ Wanjh ngurridjalkurduyimen kunmak rowk kore ngurriyingkihmarburren, dja yuwn bu ngurribengwarreworren.

15

Christ Doweng Dja Yawoyhdarrkidminj

1 Corinthians 15:1-11

¹ Nawu karridangerrinj, ngaye wanjh ngadjare yawoyhbengdayhke ngudberre manbu kunwok kunmak bu ngaye kerngeghkenhni mulewani ngudberre. Ngudda wanjh ngurriwokmarrkmei dja ngurriwoybukwong, dja mak munguyh ngurridjaldi bu kuninjkuu.

² Bu ngudda munguyh woybukkih ngurridjalwokkarme, dja mak ngurridjalwoybukwon, wanjh kunu God ngungehke ngudberre. Dja bu ngudda ngurridjalwokbawon mahni kunwok kunmak, wanjh kunukka yiman ngurriwoybukwong bu djal burudjang.

³ Ngaye korroko marneyimeng ngudberre manbu mankarrekuken duninj kahyo kore ngaye ngaborlhmeng. Bu nungka Christ kanmarnedoweng kore kunwarrekenh kadberre. Kuhni wanjh yingkihkarrebimbuyindanj nuye kore djurra nawu Bible.

⁴ Wanjh nungka kukdudjindanj, kaluk God biyawoyhkukdolkkayhweng bu kunbarnangarra danjbik bolkyimerranj, kore yingkihkarrebimbuyindanj nuye kore Bible.

⁵ Kaluk bu nungka yawoyhdarrkidminj, wanjh kunu bimarnekekubukkarrinj nawu Peter*, wanjh yerre kunu benmarnekukbukkarrinj birrimekbe nawu twelve bininj nuye.

⁶ Kaluk yerrekah benmarnekukbukkarrinj birriwern bininj nawu karridangerrinj kore birrimirndemornnamerrinj. Bedda wanjh birridjalwern, yiman 500 bininj, dja birribuyika warridj birriraworring bedberre dja birridjarrkmarnburrinj yiman 600. Wanjh birridjarrkkuknang bu kundjalkudjikenh. Kaluk yikahwi birrimekbe bininj bedda birridjaldarrkid bolkkime, dja mak nawu yikahwi bedda ngokko birrikeyonginj.

⁷ Kaluk benmarnekukbukkarrinj warridj James dja birribuyika rowk nawu apostles.

⁸ Kaluk rerre duninj wanjh ngayemanwali nganmarnekukbukkarrinj. Ngaye wanjh nawu ngayerrini duninj, yiman nawu ngaye ngarranginj kore kunbuyika duninj nganmarnekurduyimerranj.

⁹ Ngaye ngayime bu minj ngawernhkuken yiman bu bedda birribuyika nawu apostles, dja bedda ngandiyurrhke rowk. Kuhni God njalekenh nganmarnbom apostle, dja ngaye kunu ngabenhbuni nawu God nuyeni bininj nawu yiwarrudj bedberreni.

¹⁰ Dja ngaleng, God ngandjalkongibom wanjh kunu kunmekbekenh bu bolkkime ngaye ngayimerranj apostle. Dja ngaye kunu ngadjalwernhmarndurrrimiri bu kunmurrngrayek dorreng, bu ngabenyur-rhke birribuyika bininj nawu apostles. Kuhni minj ngayeman ngadjalkurduyimeng, dja nungan God ngankongibom bu nganbidyikarmeng kore kukange ngardduk.

* 15:5 Peter kangeyrohrok Cephas.

11 Dja kunukka bonj, bu ngaye dja mak nuk birribuyika apostles, wanjh ngad ngarridjarrkmulewani God nuye kunwok, manbu ngudda ngurriwoybukwong.

Bu Karriyawoyhdarrkidmenkenh

1 Corinthians 15:12-19

12 Ngaye wanjh ngaburrbun bu ngudda yikahwi ngurriyime minj ngad bininj karriyawoyhdolkkan kore kundowikenh. Ngudda ngokko ngurriyingkihbeccakani bu God birrolkkayhweng Christ kore dowengbeh, dja njalekah ngudda ngurriyime minj bininj kabirriyawoyhdarrkidmen?

13 Wardi ngurriburrbu. Bu kuhni woymbukkih minj bininj kabirriyawoyhdarrkidmen, wanjh kunu minj Christ mak kumyawoyhdarrkidmeninj.

14 Dja bu minj Christ kumyawoyhdarrkidmeninj, wanjh kunukka ngad ngarridjalbolkmayi munguyh bu ngarriboenyolyolmeninj, dja mak ngudda wanjh djal burudjang ngurriwoybukwoyinj.

15 Dja kunbuyika mak. Kunubewu bininj ngandimarneyime bu ngarridjalkurrekurren bu ngurriyime woymbukkih God birrolkkayhweng Christ kore dowengbeh. Kaluk njalekenh ngurriyime bu God minj kabendolkayhwe bininj?

16 Bu kuhni woymbukkih minj bininj kabirriyawoyhdarrkidmen, wanjh kunu minj Christ mak kumyawoyhdarrkidmeninj. Wanjh kunmekbekenh ngudda yikahwi yimankek ngurriyime.

17 Wanjh kandiwernehbekka. Bu God minj birrolkkayhwemeninj nawu Christ kore dowengbeh, wanjh kunukka ngudda kundjalbuyika ngurriwoybukwoyi, dja mak munguyh ngurridjalbongdiwirrinj kore kunwarre ngare.

18 Dja mak bininj nawu birriwoybukwoni Christ, dja ngokko birridowerrinj, wanjh kunu bedda kumekbe birridjalbularrbuyindangimeninj.

19 Bu ngad karriwoybukwon Christ, wanjh kunu karriburrbun bu God kanyawoyhdolkayhwe kadberre kore karrirowenkenh. Bu kuhni minj kunwoybuk karrikarrmeninj, wanjh kunukka ngad wanjh karridjalnjilngwarreniwirrinj duninjh.

Balah Kaluk Kabolkyimerran Bu Yerrekah?

1 Corinthians 15:20-28

20 Kuhni wanjh kundjalwoybuk duninjh bu God birrolkkayhweng Christ kore dowengbeh. Bu wanjh nungka nadjalyungkih duninjh bedberre nawu birridowerrinj bininj bu kaluk kabirrimyawoyhdolkkarren. Kunmekbekenh bu karriburrbun kore kunwoybuk.

21 Bu kerrngehkenhni nakudji bininj, nawu ngeyyoy Adam, wanjh doweng. Dja kunmekbekenh karriwarlahkenh bininj rowk wanjh karriowerren. Kaluk nabuyika bininj, nawu Christ, wanjh kanmarnbun karriweren bininj bu karriidolkkarren kore kundowikenh.

22 Karriwarlahkenh bininj rowk ngad karringunjdjikan nayungkihni bininj nawu ngeyyoy Adam, wanjh kunu ngad karriidaldowerrin yiman nungka. Dja bu ngad yiman karrikukbelmerren kore Christ nuye, wanjh kunukka God kaluk kandjarrkimbiwon kore Christ.

23 Balah God kakurduyime kadberre? Bu nungka werck Christ biyingkihdolkayhweng. Kaluk bu yerrekah Christ kamdurndeng, dja kunmekbe kabolkyime God kandolkayhwe kadberre rowk nawu Christ nuye bininj.

24 Kaluk kuhni wanjh kayiburnbunken rowk ngalengngarre. Nungan Christ kabularrbun rowk nawu kabenbongkarrme bininj, dja nawu nawarrewarre nawu birringeykihkimuk, dja nawu nawarrewarre kundulkarre kabirrikarrme. Bu kayakwon kuhni rowk, wanjh Christ

kabibidnakenwon yehyeng rowk kore God nawu Kornkumo ba bu nungka kawohrnan rowk yiman king duninjh.

²⁵ Christ nungan kadjalwohrnan rowk kaluk yerreh wanjh kabenmang nawu birriyidko nuye rowk, wanjh kabenkurrme kanjdji kore kurrenge nuye.

²⁶ Kaluk nawu nayidko nuye Christ wanjh nanu kangeyyo “kundowikenh”, kaluk yerre wanjh kabularrbun rowk, dja kundowikenh kadjalyakmen.

²⁷ Kuhni wanjh kabimbuyindi, “God bimarnekurrmeng yehyeng rowk kore kurrenge nuye.” [Psalm 8:6] Dja ngaleng minj nungan kurrmerri-meninj kore Christ nuye kurrenge! Dja God bimarnekurrmeng yehyeng rowk kore Christ nuye kurrenge.

²⁸ God biyingkihmarnekurrmeng nawu beywurd nuye bu kadjalwohrnankenh rowk. Kaluk bu yerrekah nawu Christ kadjalwohrnan rowk, wanjh nungka kadjalkurrmerren kanjdji nuye God ba bu nungan kadjalwohrnan rowk duninjh.

Bu Christ Kumyawoyhdarrkidminj

1 Corinthians 15:29-34

²⁹ Ngaye ngadjare djawan bu kuhnikenh. Bu ngurriyime yimankek bininj nawu kabirriyawoyhdolkan kore kundowikenh, wanjh njalekenh yikahwi bininj kabirridjare kabindimarnekodjdjuhme bedberre nawu birridowerrinj bininj? Bu minj woybukkih kabirrimdolkan kore kundowikenh, wanjh bonj, djal djamku kabirrikurduyime.

³⁰ Bu Christ minj kumyawoyhdarrkidmeninj wanjh kuhni njalekenh bu ngad nawu apostles ngarridurrkmirri munguyh bu kunkunrayek duninjh kore darnkih ngandiyibuyi nawu birriwarre bininj, wardi bu ngarridowen?

³¹ Nawu karridangerrinj, kandibekkabekka! Ngaye marneyime kunwoybuk duninjh. Ngudda ngurriburrbun bu woybukkih ngaye burluburlume ngudberre kore Christ Jesus nawu kawohrnan kadberre bu ngundimulewan ngudberre kore birribuyika bininj. Dja karohrok wanjh ngurriburrbun ngamulewarren kunwoybuk dorreng ngaye ngakuyindowe bu kunbarnangarrawern rowk.

³² Kuhni ngayime. Wardi bu ngabenbuyi mayh nabang kore kunred kabolknggeyyo Ephesus bu djal ngayeman, baleh ngamayi? Larrk. Bu God minj kandolkkayhwe dja kandarrkidwon, wanjh kunu ngad karrimarneyimerren ngadmandeleng. Wardi karridjalyimerren, “Mah wanjh karringu manme dja mak karribongu manbang, wanjh karridowen bu djalmalaywi.” [Isaiah 22:13] Aba, yuwn bu kunmekbe karryime!

³³ Yuwn bu ngurrbenbawon nawu birriwarre bininj bu ngundidjalkan kore kunwarrekenh. Kaluk bu ngudda munguyh ngurrihraworren bininj nawu birriwarre, wanjh kunu ngudmanwali kunmekbe ngurrikurduyime.

³⁴ Dja wanjh ngurridedjingma kore ngurriburrbun bulkkidj duninjh, dja mak yuwn bu ngurriyawoyhkurduyime kunwarre. Dja yikahwi ngudda bininj bolkkime minj ngurriwernhburrbun God, dja kuhni wanjh ngurriyemengalmimen.

Bu Ngad Karrikudolkan Kore Kundowikenh Wanjh Baleh Karrikuyimerran?

1 Corinthians 15:35-50

³⁵ Kunubewu yikahwi ngudda kandidjawan, “Baleh kuhni bu God kanyawoyhdolkkayhwe kore karridowenbeh, dja mak baleh bu karrikuyimerran?”

³⁶ Yuwn bu ngurriwenjme! Dja ngurriburrbu kuninjkuu ngamulewan. Ngudda yiman ngurridudjeng manmim kore kunkulk. Wanjh werkk kamindowen. Kaluk bu yerrekah manmekbe manmim kayawoyhdarrkidmen, dja kakolhebebbe.

³⁷ Bu manmekbe manmim ngurrimimdudjeng kurorre, wanjh kakukbuyika minj mak karohrok bu yiman mankolhde ngarre. Wanjh manbu manmim karrudjindan wanjh kunukka kayimerran karrullkkimukmen, yiman kayime wheat manmim dja njalenjale.

³⁸ God kabenbebbehmarbun manbu kundulk dja mak manmim ba bu bebbehukkubuyika rowk kore nungan kadjare.

³⁹ Yiman nawu yehyeng rowk nawu karrarkid, wanjh nakka warridj kabebbehukkubuyika rowk. Bininj, nungan darrkidkukkudjihwi, dja mak nawu mayh nungan darrkidkukkudjihwi, dja mak mayhmayh, dja mak djenj rowk wanjh darrkidkukkubuyika.

⁴⁰ Dja mak nawu yehyeng rowk kaddum kore heaven nakka wanjh kukmakkaykenh, dja mak nawu yehyeng kurorrebeh nakka minj kakukrohrok nawu kore kaddum, dja bonj, djalkukmakkaykenh warridj.

⁴¹ Manbu kundung, dja dird, dja kinjkinj, wanjh bedda birribebbehukkumakkaykenh rowk. Dja mak kinjkinj birribebbehukkubuyika dja birridjalkukmak rowk.

⁴² Kaluk kadjalrohrok bu God kandolkkayhwe kore kundowikenhbeh. Bu karridowen wanjh kandikukudjeng kore kurorre, wanjh kunu kunburrk kadberre karrikuknudmen. Dja bu nungan kandolkkayhwe wanjh kunukka kunburrk kadberre minj karriyawoyhkuknudmen bu munguyh munguyh.

⁴³ Dja bu kandikukkurrme kurorre, wanjh karridjalkukwarre. Dja bu nungan God kandolkkayhwe wanjh kunukka kunburrk kadberre karridjalwernhkukmakmen duninj. Yoh, bu kandikukkurrme kurorre, wanjh karrikukngudjyak. Dja bu nungan God kandolkkayhwe wanjh kunukka kunburrk kadberre karridjalwernhmurngrayekmen duninj.

⁴⁴ Bu kandikukkurrme kurorre, wanjh kunburrk kadberre yiman kayime manmim kore kurorre bu karrikuyongen. Dja bu nungan God kandolkkayhwe wanjh kunukka kunburrk kadberre kabuyikahmen duninj kore karrimalngkerrngehmen. Ngad wanjh karrikarrme kunburrk kore kurorre ngarre, dja mak kaluk yiman karrikarrme kunburrkbuyika bu karrimalngkerrngehmen.

⁴⁵ Kunmekbekenh bu bimbuyindanj kadberre, yimeng, "Nawu nayungkih duninj bininj nawu ngeyyoy Adam wanjh nakka God bimarnbom karrarkid." [Genesis 2:7] Dja nawu yerre kumhrey bininj nawu Christ, wanjh nakka kanmalngdarrkidwon ngad kadberre rowk. Nawu Christ yiman Adam nakerrnge duninj.

⁴⁶ Kuhn bu kunburrk kundarrkid werkk dokmeng, nawu kurorre ngarre. Wanjh yerre kunburrk kumwam nawu kunmalng dorreng.

⁴⁷ Wanjh nawu nayungkihni bininj nakka wanjh kurorrebeh kumdolkang, dja marnbuyindanj kore kundjulngbeh. Dja nawu nayerre kumhrey nakka wanjh kore kaddumbeh heaven.

⁴⁸ Ngad nawu bininj rowk karrimarnbuyindanj kore kundjulngbeh, wanjh yiman karridjalrohrok nawu namekbe nayungkihni bininj. Dja bolkkime ngad wanjh karriyimerran bu karrirohrok yiman namekbe nawu bininj kumwam kore heavenbeh.

⁴⁹ Ngad kunu karridjalrohrokni namekbe bininj nawu marnbuyindanj kundjulngbeh. Wanjh kadjalrohrok bu ngad wanjh karriyimerran bu karridjalrohrok yiman namekbe bininj nawu heavenbeh.

⁵⁰ Ngad nawu karridangerrinj, ngaye marnemarneyime ngudberre mandjad dunijnh, ngad kadberre kunburrk, yiman kunkanj dja kunkurlba, wanjh minj kangime kore God nungan kawohrnan rowk nuye. Mahni kunburrk wanjh karrown, dja kunmekbekenh minj kare kore karridjaldarrkiddi dja minj mak karridowen bu munguyh munguyh.

Kuninjkuu Wanjh Kabolkyimerran Bu Yerrekah Ngarre

1 Corinthians 15:51-58

⁵¹ Mah, wanjh ngurridjalwernhbekka bulkkidj dunijnh kore mulewan ngudberre manbu manwarlkkayindi. Wanjh minj karriwern karridjalkeyo bu kore karridowen. Dja wanjh karriwarlahkenh kunu God nungan kankukkerrngehme bu karrikukbuyikahmen.

⁵² Kuhni bu kadjalkurduyimerran werkkwerkk dunijnh. Nawu trumpet kawokdi bu kamenyime kayiburnbunkenh rowk. Bu nahni trumpet kakayhme, wanjh nungan God kabendolkkayhwe rowk bininj nawu birriyingkihdowerreni dja minj mak kabirriyawoyhkukwarremen. Wanjh kunu karridjalkukkerrngehmen rowk dja mak minj karriyawoyhdowen.

⁵³ Kaluk bu kunmekbe kakurduyimerran wanjh kunukka God kanya-woyhkukkerrngehme kadberre ba bu minj kunburrk karrikukwarremen dja minj karriyawoyhdowen munguyh munguyh.

⁵⁴ Yoh. Bolkkime ngad karrikukwarremen, dja yerrekah wanjh minj karriyawoyhkukwarremen. Bolkkime wanjh karridowerren rowk, dja yerrekah minj karriyawoyhdowe. Bu kuninjkuu God kakurduyime rowk, wanjh kunukka kawoybukdangen kore kayingkihimbuyindi kore Bible kayime, "Manbu kundowikenh wanjh nawu Kawohrnan Rowk korroko bom." [Isaiah 25:8]

⁵⁵ Wanjh karrimarneyimen, kore kabimbuyindi, "Ngudda nawu kundowikenh, nangale ngundulkarreyakwong, dja njalekenh ngudda minj kanyawoyhbun?" [Hosea 13:14]

⁵⁶ Bu kunwarre karrikurduyimi, wanjh kunwarre kanbom dja karridoweng. Karribakkeng manbu mankarre, dja kunmekbekenh manbu kunwarre kanbongkarmi kundulkarre dorrengh ngarre.

⁵⁷ Dja bu bolkkime karridjalmanjbu God! Nungka wanjh kanmarnbom bu karriwinhme kore nungan kankukbelbmeng kore Jesus Christ nawu kawohrnan kadberre.

⁵⁸ Mah, wanjh nawu karridangerrinj, nawu ngaye marnedjare ngudberre, wanjh ngurrimurrngayekworrimen ba bu minj njale ngundjir- rkan ngudberre. Munguyh ngurridurrkmirrin wernkih dunijnh nawu Kawohrnan Rowk nuye. Dja mak ngurridjalburrbu, bu ngurrimar- neddurrkmirri nawu Kawohrnan Rowk, wanjh kunukka kunmak, bu minj djaldjamku ngurridurrkmirri.

16

Bu Karrbenwonkenh Bininj Kadberre Kore Yiwarrudj Nawu Birrimarladj
1 Corinthians 16:1-4

¹ Ngaye wanjh ngadjare ngayolyolme kunwarddekenh nawu money bu ngurribenwon birribuyika bininj birrimarladj nawu yiwarrudj bedberre. Ngaye ngadjare ngurrikurduyime bu karohrok kore ngaye ngayingkih- bengdayhkeng bedberre bininj nawu yiwarrudj bedberre kabirrihni kore kabolkngeyyo Galatia.

² Kuhni bu kundungkudji ngarre bu djandi kayimerran, wanjh ngudda nawu binihbininj kab ngurribebbehkurrmekurrmen kunwardde manbu money, bu yiman yikahwi ngurribebbehkukkarmekarme. Kaluk bu

ngaye ngamre wanjh kunu kandimbebbewonohwon nawu ngokko ngurriyingkihkkurrmi, dja yuwn bu ngurridjalyawarren bu kunmekbe kabalokyime.

³ Bu ngaye ngambebe ngudberre, wanjh kunukka ngurrbendjarrngbu yikahwi bininj nawu benemak ba bu kabenekukkanakan nanihnjanu money kore Jerusalem bu kabindikukwon birrimekbe bininj. Dja mak ngurrbenbenewon djurra bu kabenekan dja kabenenemulewan bu bedda benemak bininj.

⁴ Bu ngudda kandibengdayhke, wanjh kunukka ngarridjarrkre nahni bininj bokenh, ngaye dorrengh.

Paul Djareni Benyikayi Kubolkwern Ngarre Rowk

1 Corinthians 16:5-12

⁵ Ngaye wanjh ngadjare ngarengahre werrek kore kubolkwarlah Macedonia ngarre, kaluk yerrekah ngamre nan ngudberre.

⁶ Kunubewu ngaye karridjarrkni waken, nuk kaluk bu yekkewi, kaluk-burrk wanjh ngaye ngudda kandibidyikarrme bu kandimunkewe kore baleh yarrkka ngadjalle.

⁷ Ngaye minj ngadjare bu ngamdjalwohre nan ngudberre bolkkime, wanjh yerreh kunu ngahbalwirle. Ngaye ngadjare ngahdi kunkuyeng bu nawu Kawohnan Rowk ngandjalbawon.

⁸ Dja ngaleng werrek ngadjalni kondah kore kunbolk Ephesus kaluk bu kayimerran kunkodjke manbu Pentecost ngarre.

⁹ Ngaye ngakarrme kunmakmak dorrengh bu ngayirurrkmirri kore Ephesus, dja mak birriwern bininj yimankek kabirridjare ngandingurdke ngaye bu ngabenbukkabukkan kumekbe.

¹⁰ Kaluk nawu Timothy kare ngunyikan ngudberre, dja ngurrikima bu kunmak ngurridjarrkni. Kaluk nungka wanjh kabimarnedurrkmirri nawu Kawohnan Rowk yiman kayime ngaye bu ngamarnedurrkmirri.

¹¹ Wanjh yuwn bu ngurridahme. Kaluk bu yerrekah kandimarnedurndiwemen kunmodmikenh dorrengh bu kamdurndeng kore ngaye ngahni. Ngaye wanjh ngahmabun nungka, dja mak nawu birribuyika nawu karridjarrkdangerrinj.

¹² Dja ngaye mak ngokko ngawernhmarneyimeng nawu karridanginj nawu Apollos, bu ngunyikan ngunnan ngudberre, birribuyika nawu karridangerrinj dorrengh. Dja nungka minj kadjare bu ngunyikan ngudberre bolkkime dja med. Kaluk yerrekah ngunyikan ngudberre bu kamak nuye.

Paul Benwoknang Bu Yiburnbom Rowk Nanihnjanu Djurra

1 Corinthians 16:13-24

¹³ Mah wanjh, ngurridjalwernhnahnarrimen. Dja yuwn bu ngurringurdme bu ngurriwernhwoybukwon Jesus. Ngurridjalwernhkangebuknin, dja mak ngurrimurrngayeknin.

¹⁴ Bu kundjalwern rowk kore ngurrikurduyime, wanjh kunukka munguyh ngurridjalmarnedjaremerrimen.

¹⁵ Nawu ngaye karridanginj, ngudda ngurriburrbun nawu Stephanas dja mak nawu namud nuye wanjh bedda birridjalyungkihni bu birrikangeborledmeng Jesuskenh, kore kubolkwarlah kubolkkimuk Achaia. Bedda munguyh birridjaldurrkmirri bu kunrayek dorrengh bindibidyikarrmi God nuyekih bininj.

¹⁶ Wanjh marneyime bu djal mandjad, ngudda nawu karridangerrinj, bu ngurrbenmunkekadju birrimekbe bininj, dja mak birribadbuyika nawu

kabirridjalwernhdurrrkmirri kunrayek dorrengh kore nawu Kawohnnan Rowk.

¹⁷ Ngaye wanjh ngadjalwernhnjilngmakminj bu nahni birridanjibik bininj, nawu Stephanas, dja mak nawu Fortunatus, dja mak nawu Achaicus bu birrimwam dja ngandiyinang. Ngaye nganjilngwarreminj walakkihward, bu ngudda minj ngurrimrawinj ngardduk, dja ngaleng nganjilngmakminj bu bedda ngandimdjahwong.

¹⁸ Bedda wanjh ngandimalngyarrayarrowong ngaye, yiman bu ngudda ngudberre ngundinjilngmarnbom. Wanjh kunu ngurrbendjalmakwan birrimbekbe nawu bininj.

¹⁹ Bininj nawu yiwarrudj bedberre kabirrihni kore kubolkwarlah kubolkkimuk Asia, bedda birriwokmunkewerrinj bu kunmak ngundimarneyime ngudberre. Dja mak nawu Aquila dja Priscilla* kabenekarme yiwarrudj kore kunurrk berrewoneng, kaluk birrimbekbe bininj rowk kabirridjare kabirriyime kunwok kunmak ngudberre nawu ngurrikukbelbmerrinj kore nawu Kawohnnan Rowk.

²⁰ Nawu bininj birridangerrinj rowk nawu kondah ngarridjarrkdi, bedda wanjh birriwokmunkewerrinj kunwok kundjalmak duninj ngudberre. Mah, ngurrikimarrimen bu ngurribunjhmarrimen bu djal kunmak dorrengh.

²¹ Ngaye nawu Paul ngahbimbun kuninjkuu kunwohyahward kondah kore ngayeman ngarddukkih kunbid, ba bu marnewokmunkewerren ngudberre kunwok dorrengh.

²² Bu nangale nawu bininj minj kabimarnedjare nawu Kawohnnan Rowk, wanjh kunukka ngaye ngadjare bu God kabidjalwarrewan.

Mah, ngudda nawu Yiwohnnan Rowk ngadberre wanjh yimray!†

²³ Dja mak ngadjare bu Jesus, nawu Kawohnnan rowk bu ngundjalkongibun ngudberre.

²⁴ Ngaye wanjh djalwernhmarnedjare ngudberre rowk nawu karridjar-rkkukbelbmerrinj kore Christ Jesus. Wanjh bonj.

* **16:19** Kore Greek kabimbuyindi Prisca, nawu kangeyrohrok Priscilla. † **16:22** Nawu Aramaic kunwok birriyimi, "Marana Tha"

2 Corinthians

Paul Benmarnebimbom Nahni Nabuyika Djurra Bedberre God Nuye Bininj Kore Kunred Corinth

2 Corinthians 1:1-2

¹ Ngaye Paul ngabimbom nahni djurra. God nganmarnbom ngaye apostle nuye Christ Jesus, kore God djareminj. Ngaye nganehdi nungka Timothy dorreng, nawu karridangerrinj kadberre. Ngaye marnebimbom nahni djurra ngudberre bininj nawu ngurriyimerranj God nuye Church kore Corinth, dja mak nawu ngurridjalwern nawu God nuye bininj kore kubolkwarlah kabolkngeyyo Achaia.

² Ngaye ngadjawan God kadberre nawu Kornkumo, dja mak Jesus Christ nawu Kawohnran Rowk, bu ngundikongibun ngudberre, dja mak ngundiwon kunmodmikenh.

God Munguyh Kankangemarnbun Kadberre

2 Corinthians 1:3-11

³ Karriburlumen God nawu kornkumo nuye Jesus Christ nawu kawohnran rowk kadberre. God nawu kornkumo kadberre, wanjh kankongibun bulkkidj duninj, dja mak kankangemarnbun munguyh.

⁴ Nungka kankangemarnbun kadberre djalmunguyh kore ngad karrikarme kunyid, ba bu ngadmanwali karrbenkangemarnbun birribuyika bininj nawu kabirrikarme kunyid. Kaluk karrbenmarnekurduyime karohrok yiman bu God ngokko kankangemarnbom kadberre.

⁵ Christ yingkihkarri kunyid kunwern, dja ngad yerrih karrikarme nuye kunyid. Wanjh kundjalmeke kakudjiwi, Christ kankangemarnbom kadberre bulkkidj duninj.

⁶ Bu ngad ngarrikarme kunyid, wanjh kunu God ngunkangemarnbun ngudberre, dja ngungehke dorreng. Dja karohrok kakudjiwi, bu God ngankangemarnbun ngadberre, wanjh ngudda kaluk ngurrikangemakmen warridj. Kuhn ngunbidyikarme ngudberre ba bu ngurridjaldi kunmodmikenh dorreng kore ngurridjakkbekkan yiman ngad bu karridjarrkkarme kunyid.

⁷ Wanjh ngad minj ngundikewkme ngudberre. Ngarriwernhburrbun nguddakenh, bu karridjarrkdjakkbekkabekkan, wanjh karridjarrkkangemakmen warridj.

⁸ Nawu karridangerrinj, ngad ngarridjare bu ngurriburrbun kore kunrayek bebmeng ngadberre bu ngarridi kore kubolkkimuk Asia. Kunyid kunwern wanjh ngandidjurrkwoni ngadberre, dja ngandingudjyakwoyi rowk. Ngad wanjh ngarribekkarreni bu ngarrikuyindowimeninj.

⁹ Djalwoybukkih, kanjdji ngadberrekah kukange wanjh ngad ngarriyimi bu mahni kunyid kunkimuk wanjh kandikuyinjbuyi bu ngarridjaldowimeninj. Dja bonj, kunmekbe yimerranj ngadberre ba minj ngarrinah-narrimeninj ngariweleng, dja bu ngariwernhwoybukwon kore nungka God nawu kandolkkayhwe ngad bininj rowk kore kundowikenh.

¹⁰ Nungka nganngengkeng ngadberre kore mahni kunyid kundowikenh kunwernhbang, dja nungka kunmekbe kunu nganyawoyhngheke kadberre. Ngad wanjh ngarridjalkangewoybukwon nungka nawu munguyh kandjalngheke kadberre ngad.

¹¹ Wanjh nguddanu kandibidyikarmeng ngadberre bu ngurridi yiwarrudj. Kaluk God ngunwokmey kore ngurriwern kandimarnedi

yiwarrudj ngadberre, wanjh nganmarnekurduyiming kundjalmakkenh kore djalwernhmimkongiwern duninjh. Wanjh kunmekbekenh kunu birriwarlahkenh bininj kabirriwanjbun nawu God.

Paul Djareni Bu Benyikayi Nawu Kabirrihni Corinth

2 Corinthians 1:12-24

12 Kandibekka. Ngad ngarribekkarren dja ngarrimulewarren bu djalwoybukkijh marneyime. Ngad munguyh ngarridjalkurduyimi ngudberre kore nungan God kadjare. Kumekbekenh kunu minj ngundikowe, dja ngundidjalmarneyime bu djal mandjad duninjh. Ngad minj ngarikarme kunmayali yiman kayime bininj nawu kondah kurorrebeh! Dja minj ngundimarnekurduyimeninj ngudberre yiman kayime nawu kurorrebeh bininj. Ngundidjalkurduyimi ngudberre kore God kanmarnedjare kadberre rowk.

13-14 Ngad ngarribimbom ngudberre ba bu ngudda ngurribimnan dja ngurriburrrburrbekkan kore ngariyime, dja wanjh minj ngundimarnbun bu ngundibengmayahme. Dja ngaye ngayime woymbukkijh bu kunubewu ngudda ngurriwernhborlhmen dja ngurriburrrburrbekkan yika kunwern kore ngadkenh. Kaluk bu kabolkyimerran kunmekbe kunbarnangarra nuye Jesus nawu Kawohrn Rowk, wanjh ngadjare ngudda dja ngad wanjh karriidjarrkmulewarren bu djal kunmakkenh kore kumirrk nuye.

15-16 Ngaye ngayewoyhmarrkmarrkmang bu kuninjkunukenh kore ngaye ngakarremarnbom ngamdurndi bu yikayi ngudberre bokenhkah, dja mak woyi ngudberre kunmakmak bu bokenhkah. Ngaye ngakarremarnbom bu karrinarrimeninj bu kuwirle dja ngahre kore kunred Macedonia, dja mak yawoyhmarneyimeninj bu kuhni beh ngamdurndeyi. Kaluk ngadjareni ngudda kandibidyikarremeninj bu kandimunkewemeninj bu ngarawinj kore kubolkkimuk Judea.

17 Adju! Yiddok ngudda ngurriburrrbun bu ngaye ngamarnbom mahni mankarre yimankek minj kakarremenmendi? Mak kunubewu ngudda ngurrihburrbun ngaye ngamarnbom mankarre yiman bininj kabirrikurduyime bu kondanj kunu kurorrekenh? Dja kunubewu ngurriyime bu ngaye ngayime, "Yoh! Yoh!" Dja kundjalkudjiwi rerrih ngayime, "Burrkyak! Burrkyak!"

18 Yuwn bu kuhni ngaye ngayime. Ngarringundjikan nawu God nawu minj kankowe dja minj kadjalmayaliborledme. Dja ngad kunu minj bihmarneyime ngudberre, "Yoh! Dja med, wurra, ngariyime burrkyak!" Minj kuhni ngariyime.

19 Ngurriburrrbun bu nawu Silas* dja mak Timothy dja mak ngaye ngundimarnemulewam bu ngarrihyolyolmi ngudberre kore Jesus Christkenh nawu beywurud nuye God. Wanjh minj ngurribekkan nungka kayime, "burrkyak!" dja ngurridjalbekkan munguyh bu God kahyime, "Yoh! kore Jesus Christ."

20 Wanjh God kunwernkenh kunbubuyika kanberrebbom kadberre bininj rowk. Dja nawu Christ, wanjh kamarnbun bu kawoybukendan rowk kore kayime "Yoh!" Wanjh ngadmanwali karriidjalyime, "Amen!" dja karriidjalburluburlume nawu God.

21-22 Ngurriburrrbu, God nungka kandjarrkmarnbom kadberre, ngudda dja ngad, bu karrimurrngrayekmen kore Christ. God kanmarnbom ngad bu karriyimerranj djal nuye bininj. Nungka wanjh kanwernhkarrme dja kayime kore kurobbe ngad wanjh nuye nungka nawu nadjalkudji. Kunmekbekenh nungka kurrmeng Namalngmakkaykenh nuye kore kunkange

* 1:19 Silas kangeyrohrok Sylvanus.

kadberre, ba bu karriyingkihburrbun bu woybukkih duninj nungka kaluk kanmarnekurduyime kore nungka kanyingkihmarneyimeng.

²³ Kunbadbuyika mak gaye marneyime ngudberre kuninjku. Dja God nungan kaburrbun bu gaye ngamulewarren bu djal kunwoybuk. Njalekenh bu gaye minj korroko ngamdurndeyi kore Corinth? Wanjh gaye minj ngadjareniwirrin njilngwarrewoyi ngudberre bu nuk ngayid-duyi ngudberre!

²⁴ Woybukkih, ngad minj ngarridjare ngundimarnewohrnan ngudberre, dja karriidjarrkwoybukwon bu kunkudjiwi. Ngudda ngokko ngurriwoy-bukwong dja kunmekbekenh kunu ngurridjaldi bu minj ngurrimankan. Dja ngadkunu ngarrihdjaldurrkmirri ngudda ngudberre ba bu ngurrimar-marr.

2

Paul Yolyolmerrinj Bu Benmarnenalkbuni

2 Corinthians 2:1-4

¹ Bu kerrenghekenhni yikang ngudberre gaye wanjh wernhnjilngwarrewong. Dja gaye ngawarnyak bu yawoyhwarrewon bu ngamdurndeng kore ngudda.

² Bu gaye wernhnjilngwarrewoyi ngudberre, wanjh nangale mak nganjilngmarnbun ngardduk? Ngudda wardi kandimarnenjilngwarre kore gaye njilngwarrewoyi?

³ Kunmekbekenh gaye minj ngamrawinj, dja ngaleng gaye marnebimbom nahn nabuyika djurra ngudberre, ba bu gaye minj kandinjilngwarrewoyi kore ngamre yikan ngudberre. Gaye ngadjaldjareni ngamar-marremeninj ngudberrekenh. Ngurriburrbun bu woybukkih, bu gaye nganjilngmak, wanjh ngudda warridj, dja wanjh karriidjarrkmarmarr!

⁴ Yoh, bu gaye ngabimbom kunyungkih kore nahn nabuyika djurra, gaye kunyid ngakarmi dja ngawernhkangewarreni kore kukange ngardduk, dja gaye ngahbimbuni kunmimnalk dorreng. Gaye ngabimbom bu minj njilngwarrewoyi ngudberre, dja djalbengdayhkemeninj ngudberre bu gaye wernhmedjare ngudberre bulkkidj duninj.

Paul Benmarneyimeng Bu Kabirrimarnebengmidjan Nakudji Bininj

2 Corinthians 2:5-13

⁵ Ngayolyolme nanihnjanu bininj kumekbe ngurrihdjarrkdi nawu ngunjilngwarrewong ngudberre. Gaye burrkyak, minj gaye ngannjilngwarrewoyi. Dja wardi ngurridjalmirndewernkenh ngudda, dja wardi minj ngurriwern duninj. Gaye ngawarnyak bu ngamulewan bu kunrayek dorreng nuye.

⁶ Ngudda ngurriwern wanjh korroko ngurridungi kunkimuk, dja bonj, karribawon nanihnjanu bininj.

⁷ Bolkkime ngudda ngurrimarnebengmidjda nuye dja ngurrinjilngmarnbu. Dja bu burrkyak, wardi kawernhnjilngwarremen dja kadjalmar-rgbaworren.

⁸ Kunu gaye wanjh marneyime mandjad ngudberre bu ngudda ngurrimarneyimen bu ngurridjalmarnedjare nungka.

⁹ Gaye ngayingkihimbom nahn nayungkih djurra ngudberre bu rohrokmeng, dja ngadjareni kurduyay bu kunubewa ngudda munguyh kandiwokmarrkmang rowk kore bengdayhkeng ngudberre.

¹⁰ Kandibekka. Bu ngudda ngurrimarnebengmidjan nangale bininj nawu ngurridjarrkdi, wanjh gaye warridj ngamarnebengmidjan nuye.

Bu nangale nganmarnekurduyime kunwarre, wanjh ngaye ngabengmidj-danj nuye kore kumirrk nuye Christ nawu karrihdjarrkdi kadberre. Dja kuhni ngayime ba bu bidyikarrme ngudberre.

¹¹ Ngaye kuhni ngakurduyime ba bu nawu Satan minj kanyurrhke kungudj dorreng kore njalehnjalekenh kadberre ngad. Dja wanjh ngad karriwernhburrbun bu nawu Satan kanmarnekarremarnbun.

¹² Med, dja kunbuyika mak marneyime. Kunmekbe ngaye ngawam kore kunred Troas bu ngayolyolmeng kunwok kunmak bu Christkenh, wanjh ngawohburrbom bu nawu Kawohnan Rowk nganwong ngaye kunmak bu ngakurduyime kumekbe.

¹³ Kaluk ngaye minj ngakarmeninj kunmodmikenh dja ngaye minj ngangalkemeninj nawu ngardduk nganedanginj Titus kore kunmekbe kunred. Kunu ngaye ngayimeng bobo bedberre bininj kore Troas kabirrini dja ngadjalrey kore kubolkkimuk Macedonia.

Bu Christ Kahdjalwinhme Munguyh

2 Corinthians 2:14-17

¹⁴ Bonj, karridjalmanjbun God! Christ wanjh winhmeng rowk, dja ngad karriraworren nuye! God kanyikarrme kore birriwarlahkenh bininj kandinan kore kubolkbubuyika rowk, dja wanjh kabirriburrbun nawu Christ. Wanjh kunu kunmayali nuye kawarlahmen yiman manjmak perfume kahbanj.

¹⁵⁻¹⁶ Birriwern bininj rowk kandibekkan bu karriyolyolme nawu Christ. Yikahwi namekbe bininj wanjh God kabenngheke, dja yikahwi birribuyika, wanjh burrkyak, kabirridjalmaingdowe dja bedda wanjh kabirriyime bu ngad karridjalkukbanj yiman kundowikenh! Dja bininj nawu God kabenngheke, wanjh nungka kabengolekwon, dja bedda kabirriyime bu ngad karrikukmanjmak. God wanjh kankuknome, dja kayime ngad yiman kayime mankalkkidmanjmak manbu Christ kukrunji kore nungka kanjkurmerrinj. Kuhni rowk God kanwong bu karrimarne-durrkmirri. Dja wanjh kunkimuk duninj, dja wardi ngadman wanjh karringudjywarren!

¹⁷ Yikahwi birriwern bininj wanjh kunwarre kabirriyime bu kabirridjalyolyolme God nuye kunwok. Bedda kabirridjaldjaldjare kabirrikuken-worren bu bininj kabindikarremulewan! Ngadkunu burrkyak duninj. God nungan kanwong nuye kunwok dja kanmunkeweng. Wanjh ngad karribelbmerrinj nawu Christ, dja karriyolyolme bu djal kunwoybukkenh kore kumirrk nuye God.

3

Nawu Namalngmakkaykenh Kahdurrkmirri Kore Kukange Kadberre

2 Corinthians 3:1-6

¹ Yiddok ngurriyime bu ngad ngarridedjdjimgmey ngarrihyawoyh-burlumerren ngadmandeleng? Dja ngurriyime nuk ngad ngundidjawan bu kandimarnebimbun djurra ngadberre kore nguddahkah bu kandimak-wan? Yikahwi bininj wanjh kuhni ngundidjawan.

² Burrkyak! Ngudda ngurriweleng yiman kayime djurra nawu kandimulewan ngadberre. Bininj birriwern ngundikurdunan dja yiman kayime ngundibimngeybun! Ngudda kunu yiman kayime djurra nawu kabimbuyindi kore kukange ngadberre!

³ Ngad ngundimarneyolmi kunwok kunmak ngudberre, dja wanjh ngurriyimerranj Christ nuye. Wanjh bininj birriwern bu kuhni ngundi-wobekkan, wanjh yiman kayime kabirribimngeybun kunwok nawu Christ

bimbom. Yuwn bu bimbuyindangimeninj kore djurra, dja yuwn bu kore manwarddebalabala. Dja God nawu karrarrkid munguyh, wanjh bimunkeweng nuye Namalngmakkaykenh ba kabimbun kunwok nuye kore kukange ngudberre.

⁴ Ngadkunu kunmekbe ngarriyimeng, dja minj njalekenh ngadberre. Wanjh kore Christ ngad ngarribekkarren ngarriywarren kore God.

⁵ Ngad kuninjku minj ngarrimarnekurduyime nuye God bu djala ngalengman. Ngad minj ngarriweleng kore ngarridurrkmirri, dja wanjh nungka kahdurrkmirri munguyh kore ngad ngarrimarnedurrkmirri.

⁶ Nungka kanmarnbom ngadberre ngarrikurdumakmen ba bu ngarrimarnedurrkmirri kore kunwokkerrnge wokkurmerrinj. Kuninjku kunkerrnge kunwok minj mankarre manbu kabimbuyindi, dja nungka nuye Namalngmakkaykenh wanjh kanwon maninjmanu kunwok. Manbu bimbuyindanj mankarre makka kamkan kundowikenh! Dja nawu Namalngmakkaykenh wanjh kanmalngmimbiwon.

Bu God Kakurduyime Kunkerrngehkenh Nuye

2 Corinthians 3:7-11

⁷ Ngurriburrbu bu God kerrngehkenh biwong Moses manbu mankarre bimbuyindanj kore manwarddebalabala. Dja kumekbe bolkyimi God kukbukkarrinj nuye namakmak duninj. Kaluk bu Moses nang, wanjh nuye kungek wernhwaydi, dja bininj nawu Israel benkebmawahmeng wanjh minj birriwernhkebnayi, kalukburk yerrekah bu minj kebbameninj. Mah, wanjh ngurriburrbu bu maninjmanu mankarre kumkang kundowikenh, dja bonj, God biwong bu namakmak duninj dorrengh! [Exodus 34:29]

⁸ Kaluk bu Namalngmakkaykenh karrurrkmirri dja yuwn bu kore mankarrekare, wanjh kunu nadjalwernhmakmak duninj!

⁹ Maninjmanu mankarrekare kandjadme bininj kore kunwarrekenh karrikarme, dja wanjh karridowe. Dja bonj, God kanwong maninjmanu mankarrekare dja nuye namakmak nuye dorrengh. Dja wanjh bolkkime wanjh God kanwon Christ nawu kanmarnbun bininj bu karrimak kore God, wanjh karrinan kunkimukkenh kundjalmakmak duninj God nuye, dja kayurrhke manbu mankarrekenh mankarre.

¹⁰ Manmekbe mankarrekare wanjh manmakmak, dja bolkkime wanjh karrulkarreyawarrinj, bu karrinan mankerenge manbu kadjalwernhmakmak duninj manbu kahyurrhke manbu mankarrekenh.

¹¹ Bu maninjmanu mankarrekare kumwam kunwernhmakmak dorrengh bu djala waken, dja djalyakminj. Bolkkime manbu mankerenge kumwam dja kadjaldi munguyh munguyh, wanjh kadjalwernhmakmakaykenh duninj dja minj kayakmen.

God Nawu Namalngmakkaykenh Kanmarnbun

2 Corinthians 3:12-18

¹² Mah, wanjh. Bu ngad karriburrbu bu woybukkih duninj God kanmarnedjare, wanjh minj mak karriyawoyhkele.

¹³ Ngad minj karrirohrok nawu Moses bu kebbamibami. Wanjh mahni kunmakmak djahdjalyakmeni dja wanjh Moses minj djareniwirrinj bininj nawu Israel benkebmawahmeng birrinayi bu balngurdmeng kore kebbami. Kunmekbekenh kunu nungka kebbarrkburrinj manburrbawi. [Exodus 34:33]

¹⁴ Kaluk bedda birrimayalidubbeni dja wanjh bolkkime bedda minj kabirridjalmenmenbekkan bu kabirribekkan kore kabimbuyindi kunwok

manbu God benmarneyingkihwokkurrmerrinj bedberre, mahni mankarrekare. Minj kabirrimayalimarnburren, dja nadjalkudji nawu Christ kabenmayalibayhke bu kabirribelbmerren nuye dja med, minj birribang-mebelbmeninj.

¹⁵ Kunmekbekenh bolkkime bu bedda kabirribimngeybun mankarre manbu Moses bimbom, wanjh minj kabirriwernhmang, dja yiman kayime kabirrimayalibarrkbuyindi.

¹⁶ Dja ngaleng, bu nangale bininj kaborledkerren dja kabimunkekadjung nawu Kawohnan Rowk, manmekbe manbu kahmayalibarrkbuyindi wanjh kayakmen ba bu kamayalimakmen.

¹⁷ Nawu Kawohnan Rowk nakka wanjh Namalngmakkaykenh. Dja kore Namalngmakkaykenh nawu Kawohnan Rowk nuye kamre kahdi bininj nuye kukange, wanjh kabibebke nahni bininj nawu yiman bongdibongdibeh ba bu karengehre kamak rowk.

¹⁸ Wanjh kunu kadberre kunkeb minj mak karriyawoyhbarrkbuyindi. Bininj bu kandinan wanjh kabirrinan nawu Kawohnan Rowk nuye kunwernhmakmak kunkimukkenh manbu kanwong. Nungka wanjh kanmarnhmarnbun walakkihwalakkih bu karriyimerran karrirohrok nungka, kunmakmak kunkimuk nuye dorreng. Kuhni rowk Kawohnan Rowk kahkurduyime, dja nakka nawu Namalngmakkaykenh.

4

God Kawolkan Kore Kukange Kadberre

2 Corinthians 4:1-6

¹ God kankongibom dja wanjh kanwong maninjmanu kadberre bu karriidurrkmirrikenh. Wanjh kunu ngad yuwn bu karrikangewarremen dja karrimarrkbaworren.

² Dja ngadkunu karrimirrkbordledmeng dja karribawong kore karriyimi manmolk dja kunyemi dorreng. Minj kuhni karriyawoyhkurduyime. Mak ngad minj karrikurren, dja minj mak karriwokbuyikawon kore kunwok nuye God. Kunu burrkyak! Ngad kunu karribenbukkabukkan bininj manbu djal kunwoybuk ba bu bedda kabirriburrbun kore kanjdji kukange bedberre bu ngad karrimak bininj nuye God.

³ Kaluk yikahwi bininj minj kabirrimenmenbekkan maninjmanu manmakkaykenh kunwok manbu ngad karrihyolyolme. Wanjh kawarllkayindi bedberre birrimekbe bininj nawu kabirriyakayakmen.

⁴ Birrimekbe bininj wanjh minj kabirriwoybukwon God, dja god nayahwurd bedberre nawu bolkkimekenh karrurrkmirri kondanjkuwu kurorre, wanjh kabenmayalidubbewon, dja minj kabirrinan kore manmakkaykenh kunwok kahwolkayindi. Manbu manmakkaykenh kunwok kabiolyolme kunmakmak nuye Christ, nawu nungka kabenedjalrohrok duninj nawu God.

⁵ Ngad kuninjkuwu minj karrikarme ngadman ngadberrekih, dja ngaleng ngarrihdjalmulewan bu Jesus Christ nungka nawu Kawohnan Rowk. Wanjh kunmekbekenh ngad kunu ngudda bihmarnedurrkmirri kore nuye Jesus.

⁶ Bu kerngeghkenh duninj God yimeng, "Wardi bolkwolkayinda bolkba-men kurobbe kore kahbolkmunundi!" [Genesis 1:3] Nahni nadjalkudjiwi God kanmarnnewolkang kore kukange kadberre, ba bu karriwernhburrbun bu God wanjh nawernhmakmak duninj, dja kawaralbukkarren bu karrinan kore kukeb nuye Christ.

Kunburk Kadberre Wanjh Karrowen

2 Corinthians 4:7-15

⁷ God wanjh kankangebarlkeng nuye kunmakmak kunkimuk dorreng. Dja ngad wanjh djalyeng! Yiman yerrih bu God kurrmeng nuye kunmakmak duninh kore ngalng djabirlana bu kahdahkendi. God kuhni kurduyimeng kadberre, ba bu bininj rowk kabirrinan djal nuyekih kundulkarre duninh, dja minj kunu ngadbeh.

⁸ Ngad wanjh karrikarme kunyid kunwern dja kandjokkohme kadberre, dja med, minj kandjalberelhmeninj. Ngad minj karriwernhburrhun bu baleh karrikurduyime, dja ngaleng yuwn bu karrimarrkbaworren kore karrikangewarremen.

⁹ Dja mak bininj kandidjuhun, dja God nungka minj kanbawon kadberre. Dja mak yika kandikukburriwe bu karrimankan, dja med, minj kandibularhun.

¹⁰ Bu kunbarnangarra rowk ngad karribadkanjabang munguyh kore kuburk kadberre dja yikahwi ngad karridowen, ba bu bininj rowk kandinan dja kabirriburrhun kore Jesus warridj doweng. Dja kandinan ngad nawu karridarrkiddi, dja karrikurduyime kore Jesus, wanjh kunu kabirriburrhun bu nungka karrarrkid warridj.

¹¹ Yikahwi ngad wanjh birriwarre bininj kandidarrkidmang dja karribun karridowe. Kuhni kanmarnekurduyimerran kore kuburk kadberre ba bu Jesus kakebwaraldangen bu karribalhdowen. Ngad wanjh karridowe, dja nungka wanjh kahdjaldarrkid.

¹² Yoh, wanjh kundowikenh kahdurckmirri manbu kanhbun ngadberre, dja manu kundarrkid kahdurckmirri kore kukange ngudberre.

¹³ Manekke bimbuyindanj kore djurra nawu Bible, kayime, "Ngaye ngawoybukwong God, wanjh kunmekbekenh kunu ngayolyolme." [Psalm 116:10] Ngad bolkkime wanjh karrirohrok kore karriwoybukwon, wanjh kunu ngad karridjare karriyolyolme.

¹⁴ Yoh, karriburrhun bu God birrolkkayhweng Jesus nawu Kaworhnan Rowk kore dowengbeh, dja nungka kaluk kandelkkayhwe kadberre kore Jesus dorreng. Kaluk nungan kanmirndemornname kadberre ngudda dorreng, wanjh ngad kaluk karridjarrkdi kumirrk nuye.

¹⁵ Kundjalwern kuninjkuwu rowk wanjh ngudda ngudberre kurduyimerranj. Dja God kabenmarnedjare birriwern bininj, dja kawarlahmen dja birridjalwern bininj kabirriburluburlume nungka nawu nawernhmakkaykenh duninh kore kabirridi yiwarrudj dja mak kabirrimanjmanjibun.

Yuwn Bu Karrikangewarremen Dja Karrimarrkbaworren

2 Corinthians 4:16-18

¹⁶ Kunmekbekenh kunu wanjh ngad yuwn mak karrimarrkbaworren. Kunburk kadberre, wanjh kakaremen dja karringudjywarren. Dja kore kukange kanjdji kadberre, wanjh God kanhdjalkangekerngehme kunbarnangarra rowk.

¹⁷ Ngad karridjalwohmang kunyid bu djal bolkkimekenh, dja bu bolkkime kunrayek kanwarrewon, wanjh djalwob! Wanjh maninjmanu bolkkimekenh kunyid kanhdjalkan kadberre kore kunwernhmak duninh nuye God, kore karridi munguyh munguyh.

¹⁸ Wanjh karrihkokoyirri bu karrihbolknan djarreh, dja yuwn bu karrinan nawu kondah kurorreh. Karriwernhnan nawu bininj minj kabirrinan kondah kurorreh. Yehyeng nawu kondah kurorreh, wanjh kayakayakmen, dja nawu minj bolkkime karrinan, wanjh kahdjaldi munguyh munguyh.

5

*Kaluk Bu Karridi Kore Heaven**2 Corinthians 5:1-10*

¹ Ngad karriburrbun manbu kadberre kunburrr makka yiman kayime kunrurrk kore karridjalwohni waken kondanjkuu kurorre manbu kaluk kayakmen. Bu kunmekbe kayimerran, God nungan kahkarmme kunrurrk kadberre manbu minj bininj birrirurrkmarnbuyi. Dja mahni kunrurrk kadjaldi munguyh munguyh kore heaven.

² Wanjh bolkkime ngad karrikayhme kunnjilngwarre dorrengh kore kondanjkuu kurorre karrihni. Ngad ngarridjaldjare God kankan ba karriyo kore kunred heaven.

³ Wanjh kunu nungan kankukdjongbun kadberre wanjh minj mak munguyh karrikuklarrkdi.

⁴ Bu yiman ngad bolkkime karrihni kundarrkid kunburrr, wanjh karrihngorrkan kunwarre, kunmekbe kunu ngad karrikayhme. Karridjare karriye kore heaven. Wanjh kuninjkuu kondahbeh kunburrr kaluk karrown, dja karridarrkidkerrngehme kore heaven.

⁵ Kumekbe wanjh God kadjare kakurduyimerran kadberre. Nungka kanyingkihmarbom bu kuhnikenh. Dja nungka kanyingkih Wong kadberre Namalngmakaykenh nuye ba bu karriwernhburrbun kunwoybuk dorrengh kore yerrekah bu kanmarnekurduyimerran.

⁶ Wanjh kunmekbekenh kunu ngad munguyh karrikangemak kore karriburrbun woymbukkih duninj ngad djali waken karrihdjalwohni kondanjkuu kurorre bu karrihdarrkiddi kore kadberre kunburrr, dja ngad kunu djareh karrihdi nuye nawu Kawohrnan Rowk.

⁷ Minj karridarrkidnan bolkkime kore kunburrr karrihni, dja med, karridjalwoybukwon nungka.

⁸ Wanjh ngaye ngayawoyhyime, yoh, karriwernhwoybukwon. Ngad karridjaldjare bu karribawon maninjmanu kunburrr dja karridjarrkyo munguyh kore nawu Kawohrnan Rowk.

⁹ Wanjh kunmekbekenh karriwernhrohrokme bu karrinjilngmarnbun God bu kondah karrihni kore kunburrr, dja nuk bu karribawon manbu kunburrr.

¹⁰ Kaluk ngad karridjalwernkenh rowk karridolkarren karridi nuye kumirr Christ dja kanbebbehdjadme kadberre kore baleh karrikurduyimi kore kunburrr, bu kunwarre dja nuk kunmak karrikurduyimi, dja nungka wanjh yiman kanbebbehkarremulewan kore kunmakkenh dja yika kunwarrekenh kadberre.

*God Kadjare Birriwarlahkenh Bininj Bu Kabirrikangeborledkerren Kore Nungka**2 Corinthians 5:11-17*

¹¹ Wanjh ngad ngarrikengehme nawu Kawohrnan Rowk, dja mak ngarriburrbun kore baleh kakarremenmenyime. Wanjh kunmekbekenh kunu ngarrirohrokme bu ngarrbenmayalimarnbun bininj rowk ba bu bedda kabirrikengehme warridj. God kanburrbun bu ngad baleh ngarrihyime, dja ngaye ngadjare ngudda bu kandimakwan kore kanjdji kungkange ngudberre.

¹² Ngad kunu minj ngarrihyawoyhburlumerren ngadmandeleng kore ngudda ngudberre, dja burrryak. Dja ngad bihmarneyime ngudberre ba bu kandimakwan ngarriweleng. Kaluk ngudda ngurbenwokmang bininj nawu kabirridjalkuknan kore kunburrrkenh kore kabirriburlumerren, dja minj kabirriburrbun kunmayali kore kanjdji kungkange.

¹³ Yoh, dja yikahwi kabirriyime bu ngad ngarrimayaliyakmen dja ngarribengwarr! Bonj, bu woybukkih, wanjh kunukka kore God nuye. Dja bu ngad karrikarme mandjad kunmayali, wanjh kunukka ba bu bihbidyikarme ngudberre.

¹⁴ Kuhni ngayime. Kaluk ngad karriwernhburrbun Christ kand-jalmarnedjare, dja kunmekbekenh kunu karrikurduyime kore nungka kadjare. Minj kunbuyika karridjare. Ngad karriwernhburrbun nungka nadjalkudji doweng kadberre rowk, wanjh kamenyime bu ngad karridjal-wern karridowerrinj warridj.

¹⁵ Nungka wanjh doweng kadberre karriwarlahkenh bininj rowk ba bu nawu kabirrihdjaldarrkiddi bininj wanjh minj munguyh kabirrikur-duyime kore djal bedman bu kabirridjare. Dja birridjaldjaremen bu kabirridjaldwokmang nungka nawu doweng bedberre, dja nawu God birrolkkayhweng kore dowengbeh.

¹⁶ Wanjh kunu bolkkime ngad yuwn mak karriyawoyhburrbun yiman kondanjkunubeh bu karrbennan bininj rowk. Ngad korrokoni karrimay-aliwarreni, yiman bu kondanjkuwu kurorrebeh, dja minj karriwernhburr-buyinj nawu Christ. Dja bolkkime burrkyak.

¹⁷ Dja wanjh bolkkime, bu nangale bininj kabenebelbmerren nawu Christ, wanjh God kabimarnbun bu kayimerran nakerrnge duninjh. Nawu nakareni bininj wanjh yakminj; nungka wanjh nakerrnge duninjh.

God Kabularrbun Kunyid Manbu Kanyarlarrkeng Ngad Bininj Dja Nawu God

2 Corinthians 5:18-21

¹⁸ Kuhni rowk wanjh kumwam kore Godbeh. God wanjh kanbelbmeng kore Christ dja kunu kanmarnbom ngad nawu karriyidkoni nuye God ba bu karriyimerranj nuye djawirna duninjh. Dja marnbom kunmodmikenh kore ngad dja nungan naweleng. Wanjh God kanwong ngad bu karrben-marnbun birribuyika bininj ba bu bedda warridj kabirriraworren nuye bu kunmodmikenh dorreng.

¹⁹ Ngayime bu God bimarnedurrkmirri kore bimarneni Christ, ba bu kurrmeng kunmodmikenh nuye kore birriwarlahkenh rowk bininj dja kore nungan naweleng. Bu karribelbmerren nawu Christ, wanjh kunu God minj kanmarneburrbun ngad bininj kore kunwarrekenh. Dja nungka wanjh kanwong kadberre maninjmanu manmakkaykenh kunwok manbu kayolyolme bu karriraworren nawu God, kunmodmikenh dorreng.

²⁰ Wanjh ngad kunu Christ kanmunkeweng bu karrire karrben-marnemulewan nuye. Bu karrimulewan, wanjh bininj kabirribekkan nuye kunwok bu kayime, "Ngundiwernhmarrkdjawan ngudberre bu Christkenh. Ngurrimdurndeng kore God bu ngunmarnbun djawirna duninjh nuye!"

²¹ Kaluk Christ minj kurduyimeninj kunwarre, dja God bimarnbom nungka bu ngorrkang kadberre kunwarre dja kunmekbekenh God biwarrewam, ba bu ngad nawu karribelbmerren Christ wanjh karriyimerran bu God kanmakwan kore nuye kundjalmak.

6

Bu Karrikangeborledmen Bolkkimekenh

2 Corinthians 6:1-2

¹ Ngad wanjh bimarrkdjawan ngudberre bu bolkkimekenh. Ngad karridjarrkdurrkmirri rowk, God dorreng, kunmekbekenh ngad bimarrkdjawan ngudberre, yuwn bu ngurribarlanhmang kunmakmak God

nuye ngurrikarme. Nungka wanjh ngunwernhkongibom dja yuwn ngurrimarnbun bu djal burudjang.

² Ngurriburrbun bu God yimeng, "Bu kunmekbe bolkyimi ngaye marnedjareni ngudberre, wanjh ngaye ngabekkgang ngudberre. Dja kunmekbe bolkyimi wanjh ngaye ngehkgeng ngudberre." [Isaiah 49:8] Wanjh ngaye marneyime ngudberre bu kabolkyimerran! Bolkkime, djal bolkkime duninj, God kanmarnedjare, dja kunbarnangarra nuye kore kanngehke.

Paul Yolyolmerrinj Bu Kunrayek Duninj Bimarnebebmeng

2 Corinthians 6:3-13

³ Bu ngarrimarnedurrkmirri God, wanjh yuwn bu yiman ngarrben-dengedong bininj nawu kandibekkan. Dja mak ngarridjare ngarridurrkmirri bu djal mandjad ba bu bininj nawu kandikurdunan wanjh minj kandikewkme dja wardi kabirriwokwirrihime kore ngarriyolyolme.

⁴ Wanjh kundjalbuyika ngarriyime. Bu ngarridurrkmirri wanjh munguyh ngarrbenmarnebukkarrren birribuyika bininj ba kabirriburrbun bu ngad wanjh woybukkih ngarridjalmarnedurrkmirri nawu God. Ngayime ngarrihmang kunwern kunrayek kunyid, kore kadjalwernhkar-rerayek, dja kundjalwernkimuk kahkarreyo, dja bonj, bu ngarrinjlngwar-remen, ngad minj ngarrimarrkbaworren kore ngarridurrkmirri.

⁵ Ngad kunu kandibun dja kandikukburriwe kururrk ngarrirurrkknhdangen. Bininj nawu ngandiwirrihime wanjh kabirrimirndemorn-namerren ngadberre dja ngandimarnekayhime. Ngad ngarridurrkmirri kunrayek dja minj ngarringehme, mak yika ngad minj ngarrikodjkeyo mak ngarridi manmeyak.

⁶ Ngad woybukkih ngarridjalmarnedurrkmirri nuye God dja karridjalkurduyimi kunmak. Ngarrbenburrburrkbekkan bininj rowk. Ngad wanjh ngarrbenkongibun, dja ngarrbendjalmadbun, mak ngarridurrkmirri kore Namalngmakkaykenh, dja woybukkih ngad ngarrbenmarnedjare birribuyika bininj.

⁷ Ngarrimulewan bu kundjalwoybuk, dja ngarridjaldurrkmirri God nuye kundulkarre dorreng. Minj ngarrbenbun bininj, dja ngaleng ngarrbenbengdayhke kore God kadjare kabenmakwan kore nungka. Dja bu bedda kabirridjare kanbun, wanjh bonj, ngarrbenyawoyhbengdayhke kore God kadjare kabenmakwan.

⁸ Yika bininj kandimakwan ngadberre, mak birribuyika kandiwe-lengname ngadberre. Birribuyika bininj kandimarnewokdi kabirriyime kunwarrehwarre ngadberre, dja birrimirndebuyika kunmak kandi-marnewokdi. Ngad wanjh ngarrihdjalmulewan bu kunwoybuk duninj, dja bonj, yikahwi bininj kandiwalkowe.

⁹ Birriwern bininj kandiburrbun rowk, dja yikahwi wanjh minj kabirridjare kandibekkabekkan. Ngad yiman ngarrihdowen yerreh, dja kunu ngarridjaldarrkiddi. Ngad kandikukmorroy, dja minj kandibuyi bu kandikukburriwemeninj.

¹⁰ Yikahwi wanjh ngarriwernhnjlngwarre, dja ngad kunu munguyh ngarridjalburlume nawu God. Ngad yiman ngarrimarladj, dja ngarrben-marnbun birriwern bininj bu yiman kabirrikukenmen. Ngad minj njale ngarriwernhkarme, kunu woybukkih ngad ngarrikarme yehyeng rowk.

¹¹ Kandibekka ngudda bininj nawu ngurrihni kore Corinth nawu bimarnedjare! Bonj, ngad wanjh bimarneyimeng kunwern kore kanjdji kukange ngadberre, dja ngarridangmarrhmey ngadberre kukange ngudberre.

12 Minj bibawon ngudberre, dja bidjalmarnedjare munguyh, dja njalekenh ngudda minj kandihmarnedjare ngadberre?

13 Ngaye marneyime ngudda ngudberre bu ngudda yiman ngardduk wurdwurd. Ngurrikurduyimen yiman ngad bu ngarrikurduyimeng. Ngaye ngurridangmarrharrimen ngudberre kunkange kore ngad.

Yuwn Bu Karriselbmerren Bininj Nawu Minj Kabirriwoybukwon Jesus Christ

2 Corinthians 6:14-18

14 Ngudda minj ngurrirohrok bininj nawu minj kabirriwoybukwon Jesus. Dja yuwn mak ngurriraworren birrimekbe bininj bu ngurridjarrkduurkmirri. Nawu kunmak dja kunwarre, nanu minj kabirriaworren. Manbu kabolkwolkan dja manbu kunkak minj kabeneraworren.

15 Minj nuk Christ kabenewokmarnburren nawu Namarnde Duninjh?*" Ngudda nawu ngurriwoybukwon Jesus, wanjh njale ngurridjarrkkarme bininj nawu minj kabirriwoybukwon Jesus?

16 Kunurrk manbu temple, kore bininj kabirrimarneboddan God, wanjh minj kakarme idols yiman gods kukkilehkileh manbu kabirrimarneboddan bininj nawu kunbuyika duninjh kabirriwoybukwon. God nawu kahdarrkid munguyh munguyh wanjh kanmirndekurmeng kadberre bu karryimerranj yiman kayime Temple nuye. Ngurriburrbun bu God nungan yimeng, "Ngaye ngarridjarrkni ngardduk bininj, dja ngarridjarrkre bedda dorreng. Dja ngaye bedberre God, dja bedda ngardduk bininj." [Leviticus 26:12; Jeremiah 32:38; Ezekiel 37:27]

17 Dja mak nawu Kawohrnan Rowk yimeng, "Ngurrbenbawo birrimekbe bininj dja ngurrikuklarharrimen! Yuwn ngurrikarme njale nawu minj bele, kunu ngaye wanjh kimang ngudberre." [Isaiah 52:11]

18 Dja mak nawu Kawohrnan Rowk nawu Narrulkarrekimuk yimeng, "Ngaye ngudberre kornkumo dja ngudda ngardduk bebeywurd dja ngalbebeywurd." [2 Samuel 7:14; Isaiah 43:6]

7

Paul Benmarrkjawan Bininj Nawu Kabenmarnedjare

2 Corinthians 7:1-16

1 Ngardduk karridabbolk nawu ngaye marnedjare, ngad karrihkarme kore God kanberrebbom. Wanjh ngadkunu karrimarnburrimen ngadmandeleng dja karruwe yehyeng rowk nawu kankangeburlerriwon, dja mak njale manbu kanhmarnbun bu karryime kunwarre. Ngad kab karrirohrokmen bu karryimerran karrikukdjammunnin kore karrikengehme nawu God dja wanjh karridjalwokmarrkmang nuye.

2 Ngad ngarridjare bu ngudda ngurridangmarrharrimen ngudberre kunkange kore ngad. Ngurriburrbun bu ngad minj kunwarre ngarryimeninj nuye nangale kore ngudda, dja minj nangale ngarriwarrewoyi, dja minj nangale mak ngarrikaybuyi kore ngarrikowimeninj. Burrkyak.

3 Ngaye ngahyime kuhni dja minj djuhbn ngudberre. Ngaye marneyimeng ngudberre kunyngkih bu ngad bimarnedjare ngudberre kunkimuk ba bu karridjarrkdarrkid mak karridjarrkdowe.

4 Ngaye wanjh burlume ngudberre dja makwan bu mulewan ngudberre. Ngudda kandiwerhnjilngmarnbom kore kunyid nganmarnewernmerrinj, kunrayek dorreng. Dja bonj, ngaye ngadjalwerhnmarrduninj!

* **6:15** Kore Greek kayime Belial, dja nakka kangeyrohrok "Satan".

⁵ Bu ngad ngarribebmeng kunred Macedonia, ngad minj ngaringehmeninj. Ngarringalkeng kunwern kunyid kanwakbuyinguneng ngadberre. Ngad ngarriburreni kuberrkkah birribuyika bininj, dja ngarikeleni kore kanjdji kukange ngadberre.

⁶ Dja God nawu kabennjilngmarnbun nawu birrinjilngwarre bininj, wanjh kannjilngmarnbom ngadberre bu nawu Titus kumwam. Ngad wanjh ngarribalnjlilngmakminj.

⁷ Dja mak Titus ngunmulewam ngudberre bu ngudda ngurrikangemarnbom nungka, dja bu kuhni ngundiwobekgang, wanjh ngad ngarribalnjlilngmakminj. Dja mak Titus yimeng bu ngudda ngurridjare wernkih bu karriyawoyhnahnarren, dja bu ngurridjare kandiyime bu kandimarneyakwarre ngayekenh. Dja mak yimeng bu kandimakwan bu kandiyolyolme. Wanjh bu ngaye ngabekgang kuninjkunu rowk, ngaye ngadjalwernhnjlilngmakminj.

⁸ Yiman bu ngardduk nayungkih djurra ngunnjlilngwarrewong ngudberre, wanjh bonj, minj mak ngakongiburren kore ngabimbom. Bu kerrngehkenhni nganjilngwarreminj, yiman marnbom ngudberre bu ngurrinjlilngwarreminj bu djal kundedjdjumbungkenh.

⁹ Ngaye nganjilngwarreminj bu marnbom ngudda ngurrinjlilngwarreminj! Dja bolkkime wanjh nganjilngmakminj bu kuhnikenh ngudda kunkongi ngudberre wanjh ngunmarnbom ngurrikangeboredkerrinj, dja wanjh kamak rowk. Ngudda ngurrinjlilngwarreminj kore nungan God djareminj. Wanjh kunu minj ngurrikanjbabang kore ngadbeh, dja burryak.

¹⁰ Kaluk ngurriburrbun bu kuhnikenh. God kadjare bininj rowk kabirihnjilngwarremen ba bu kabenkangeboredke dja kabengehke kore kunwarrekenh bedberre. Dja karrinjlilngmak bu kumekbe. Kunbuyika duninh bu karridjalnjilngwarre kore kondanjbeh kurorrewaken, dja kuhni wanjh kankan kore kundowikenh.

¹¹ Ngurrikangenarrimen! God ngunwong kunnjlilngwarre, dja njalehkenh? Nungka ngunmarnekurduyimeng ba bu ngurridjaldjare ngurrikurduyime kundjalmak ba bu nungka ngunmakwan. Kunmekbekenh ngudda wanjh bolkkime ngurrikangeyiddung dja ngurrimarnekelemen nungka. Ngudda ngurrikangewurhlheng, dja ngurrimarnekurrmerrinj nuye, dja ngurridjare bu ngurribendung bininj nawu kabindiwarrewon birribuyika! Yoh. Ngudda ngurriweleng wanjh ngurrimungukenh kore kumekbe ngunmarnekurduyimerranj rowk.

¹² Dja njalekenh ngaye ngabimbom namekbe nayungkih djurra? Ngaye minj ngabenmarnebibmuyinj berrewoneng bu nungkakenh bininj nakudji nawu yimeng kunwarre, dja nabuyika bininj nawu biwarrewong. Burryak, dja ngabimbom ngudberre ba bu ngurriwernhburrbun bu woybukkih kandimarnedjare bulkkidj duninh ngadberre, dja mak ngurriburrbun bu God kankangenan kadberre rowk kukange.

¹³ Kunmekbekenh kunu ngad ngarrinjlilngmakminj. Dja mak bu ngarrinang nungka Titus bu djalnjilngmakni kore ngudda ngurrikangengehkenh nuye, wanjh ngad warridj ngarrinjlilngmakminj.

¹⁴ Bu ngaye mulewam ngudberre bu Titus nganewokdi, wanjh burluburlumeng ngudberre bu kunkimukkenh, dja ngudda ngurribukkarinj nuye dja wanjh kaburrbun bu ngaye ngayimeng kunwoybuk. Ngad wanjh ngarridjalyime bu djal kunwoybuk bu ngundimarneyime munguyh, dja bu ngundiolyolmeng kore Titus ngarriwokdi, wanjh ngarridjalyimi kunwoybuk dorreng.

¹⁵ Titus wanjh nunganwali ngundjalmarnedjare dja kawernmerren. Nungka kaburrbun bu kerrngehkenhni ngudda ngurrikimey, dja bu ngurribekkabekang, wanjh ngurrikeleni dja ngurrikukdeldelmi dja wanjh ngurriwokmarrkme y kore nungka ngunbukkabukang.

¹⁶ Mah. Wanjh ngadjalnjlngmak duninj bu kunmekbekenh kunu ngaye wanjh ngawernhburrbun ngudda ngurridjalmak bininj.

8

Bu Karriyurrhkerren Kore Karriweykarrenkenh 2 Corinthians 8:1-15

¹ Mah, nawu karridangerrinj, ngad ngarridjare ngudda ngurriburrbun manbu kunmakmak rowk God benwong bininj nawu yiwarrudj bedberre nawu kabirrihni kunredbubuyika kore kubolkkimuk Macedonia.

² Bedda wanjh birrikarmi kunrayek kunkimuk dja benrohrokmeng bedberre wernkih duninj. Bedda warridj wanjh birridjalmarladj duninj. Dja kunu, bonj, bedda wanjh birridjalnjlngmakni dja mak birridjalweymak duninj bu kunwern bindikukwoni birribuyika bininj.

³ Ngaye woybukkih marneyime bu bedda minj birrikukenni, dja bonj, bindidjalwong kunwern. Minj nangale bendjurrkwoyi, djal bedman birrikurduyimi.

⁴ Kaluk bedda kandidjawadjawam ngadberre dja birridjaldjareni bu ngariyikadjurrinj bu ngarrbenbidyikarmeng nawu God nuye bininj.

⁵ Bedda wanjh birrikurduyimi bu djal kunmak dja ngandijnjlngmarnbom ngad kore ngarrikangebarrhmeng. Bedda kerrngehkenhni birrikurmerrij werrek kore nungka nawu Kawohnan Rowk dja mak yerre wanjh birrikurmerrij kore ngad. Kunmekbe kunu rowk kore God djareminj.

⁶ Titus nungan nayungkih bu durrkmirri kore kunmekbekenh. Dja wanjh ngarrimarrkdjawan bu ngunbidyikarme ba bu ngurriyakwon kore kerrngehkenhni nungka ngurridedjdingmey. Kuhn wanjh kunmak bu ngurrikurduyime kunkongi dorreng.

⁷ Ngudda wanjh ngurrbenyurrhke birribuyika kore kunwernkenh. Ngurrbenyurrhke rowk kore ngurriwoybukwon nawu God, dja mak bu ngurrihmulewan nuye kunngudj dorreng, dja mak kore ngurriburrbun kunwern, dja kore ngurridurrkmirri wernkih duninj, dja kore kandi-marnedjare ngadberre. Mah, wanjh bolkkime ngurrimarnburrimen bu ngurriwernweymaknin dorreng kore ngurrbenkukwon nawu birrimarladj bininj nawu God nuye.

⁸ Ngaye minj ngawokrayekworren ngudberre bu wokwon ngudberre. Dja ngaye ngadjaldjare nan ngudberre bu woybukkih ngurrbenmarnedjare birribuyika bininj. Yikahwi birribuyika nawu karridangerrinj wanjh ngokko bindikukwoni kunwern nawu birrimarladj bininj, dja kunubewu ngudda wanjh ngurrbenkukwon kundjalwern duninj!

⁹ Ngurridjalburru bu Jesus Christ nawu Kawohnan Rowk bu kanwernhkongibun! Nungka wanjh nawernhkukenni, dja bonj, nungka marnburrinj marladjminj, dja kunmekbekenh kunu nungka kukmarladjworrinj ngudberre ba bu ngudda ngurriwernhkukenen.

¹⁰ Kuninj kunu ngaye bu ngahburrbun ngudda ngurrikurduyime bu kunmakkenh. Ngurriburru mandjewkbuyika bu ngudda wanjh ngurridjalyungkih ngurrbenkukwong. Dja mak ngudda ngurriyungkihni bu ngurridjareni ngurrbenkukwoyi.

11 Mah, wanjh bolkkime ngurriyakwo manbu manmekbe ngudda ngurridjdjingmey kore ngurridjareni. Ngurrbenwo manbu ngurrikarrme dja kore ngurridjare.

12 Bu ngurrikarrme kunyahwurd, wanjh ngurrbenwo kunyahwurd. Bu ngurrikarrme kunwern, wanjh ngurrbenwo kunwern. Bu woybukkih ngurridjare ngurrbenwon kore kukange ngudberre, wanjh God kanjilngmak ngudberre.

13 Ngad minj ngarridjare ngudda ngurriwarreworren bu ngurrbenwon birribuyika bininj dja ngurrbengehke, dja ngarridjare ngurribebbehkarrme ba bu ngurrirohok.

14 Bu bolkkime ngudda ngurrikarrme nawern ba bu ngurrbenwon kore kabirridjare. Kaluk yerrekah, bu bedda kabirrikarrme nawern, kunu bedda ngundibidyikarrme ngudda bu njale ngurridjare, wanjh kunu ngurridjalrohok rowk.

15 Kumekbe kayimerran kore wokbimbuyindanj kore djurra, kayime, "Nawu bininj namekbe mangimangi nawern, dja bonj, minj kundjalwern duninh bu karrmeninj. Dja bininj nawu mornnameng walakkih, wanjh nanu djalkarrmeng kore djareni, dja minj nayahwurd." [Exodus 16:18]

Paul Kabimunkewe Titus Kore Corinth

2 Corinthians 8:16-24

16 Ngaye ngamanjbun God bu nungka bikurrmeng kore kukange nuye nawu Titus ba bu ngunmarnedjare ngudberre yiman kayime ngaye marnedjare ngudberre.

17 Titus yingkihdjareminj bu ngad ngarridjawam nungka bu kakurduyime ngudberre. Nungka mak kadjare bulkkidj bu kamre kore ngudda, kaluk kuhni nungan nuye kunmayali bu ngunbidyikarrme.

18 Ngad wanjh ngarrimunkewe warridj nakudji nawu karridangerrinj. Nungka nawu kabirriburlume kubolkwern kore kabenmarnedurrkmirri bininj nawu yiwarrudj bedberre kore kahmulewan manbu kunwok kunmak.

19 Dja mak birrimekbe bininj birridjarrngbom dja birrikurrmeng ba ngarridjarrkrengehre kore ngarrbenwonowon birribuyika nawu birrimarladj bininj nuye God. Ngad kuhni ngarridurrkmirri ba bu bininj rowk kabirriburlume nawu Kawohrn Rowk, dja mak kabirriburrbun bu ngad ngarridjare ngarrbenbidyikarrme God nuye bininj.

20 Ngad wanjh ngarridjalwernhkukmarnburren ba minj nangale kankewkme ngadberre kore maninjmanu ngad ngarrihkarrme mankimukkenh money manbu ngarrbenwon bu djal burudjang.

21 Ngad ngarrihrohokme kunrayek bu ngarrihkurduyime mandjad kore kumirrk nuye nawu Kawohrn Rowk dja mak kore bininj ba bu kabirriburrbun wanjh mandjad ngarrikurduyime.

22 Kunmekbekenh kunu ngad mak ngarrimunkewe nabadbuyika bininj nawu karridangerrinj bu kabirrimdjarrkre kore ngudda. Ngarrikurdunani nahn bininj kunwernkenh, dja ngarriburrbun nungka yingkih-marnburrinj bu kawernhdurrkmirri. Nungka wanjh ngunmakwan bu ngudda ngurridjare kunmak ngurrikurduyime.

23 Nawu Titus, nungka wanjh ngaye nganedabolk kore nganehdjarrkdurrkmirri nawu bu bibidyikarrme ngudberre. Dja mak birribuyika nawu karridangerrinj, wanjh nawu yiwarrudj bedberre bininj kabindimunkewe, dja birriwern kabirriburlume nawu Christ bu beddak-enh.

24 Kaluk bu kabirrimre kore ngudda, wanjh ngurrbenmarnedjarenin bedberre ba bu birriwern bininj nawu yiwarrudj bedberre rowk kore

kubolkbubuyika, wanjh kabirriyime ngudda ngurrimak, yiman bu ngad ngundimakwan ngudberre.

9

Bu Karriwoybukwon Jesus Wanjh Karribidyikarrmerren

2 Corinthians 9:1-5

¹ Ngaye minj ngadjare ngahbimbun ngudberre kuninjkukenh bu ngunbidyikarrme nawu God nuye bininj.

² Ngaye ngokko ngaburrbun ngudberre ngurridjare ngurrbenbidyikarrme. Ngaye wanjh mulewam ngudberre kuninjkukenh nawu bininj kabirrihni kunred Macedonia, bu burlumi ngudberre. Ngayimeng, "Nahni bininj kore kunbolk Achaia, wanjh ngokko birrimarnburrinj bu birriwong mandjewk nabuyika." Dja bolkkime wanjh birriwern kore bedda kabirridjare ngundingunjdjikan ngudberre.

³ Wanjh ngaye bolkkime ngabenmunkewe kadberre karridangerrinj kore ngudda bu ngunbidyikarrme ngurrikurduyime kore ngurridjare bu ngurriwymakkenh. Bu ngurriyingkihmarburren bu ngurriyime, wanjh kawoybukkendan kore ngad byingkihburumen ngudberre.

⁴ Ngaye mak ngamre yerrekah bu nan ngudberre, dja yikahwi bininj ngarrimdjarrkre dorrengh nawu kondahbeh kubolk Macedonia. Bu ngarrimre ngundingalke minj ngurrimarnburrimeninj, wanjh kawarre! Ngudda dja ngaye warridj, wanjh karridjarrkyemengalmeninj! Dja mak nawu ngarrimdjarrkre kunubewu ngandiyolyolme bu kuhnikenh ngaye yingkihburumeng ngudberre.

⁵ Bonj, dja kunmekbekenh ngaye ngamarrkdjawam birrimekbe nawu karridangerrinj bu ngandimarnedokme kabirrire kore ngudda. Bedda ngurridjarrkdurrkmirri bu ngurrimarnburrimen moneykenh bu ngurriyingkihkurme, kaluk bu ngaye ngamre yerreh. Kuhni bu ngurrikurduyime, wanjh birriwern kabirriburrbun bu ngudda ngurriwymak, dja minj ngurridjalkurduyime kore djal bininj ngundidjurrkwon.

God Ngunkukenwon Ngudberre Ba Bu Ngurrbenbidyikarrme Birribuyika Bininj

2 Corinthians 9:6-15

⁶ Ngurriburrbun bu ngurrimenmenbekkan kuninjkuu. Nawu bininj karrudjeng mandjalkudjikudji manmim, kaluk bu mankolhde kadjordmen wanjh manyahwurd manme kamang. Dja nawu bininj karrudjeng manwern manmim, kaluk bu kadjordmen wanjh manwern manme kamang.

⁷ Ngayime bu ngudda ngurriweyka bu ngurriwon ngudman bu ngurridjare kore kukange ngudberre, dja yuwn bu mak ngurribalnjlilngwarremen bu ngurriweykan dja mak yuwn bu ngurriweykan kore bininj ngundidjurrkwon. Dja kuhni burrkyak. God wanjh kabenmarnedjare bininj nawu kabandiwon bu kabirridjaldjekme kore kabirrikurduyime.

⁸ God nungan ngundjalmarnekurduyime kunmak kunwern kore njalehnjale ngurridjare. Wanjh kunu munguyh ngurridjalmang bu kahwernmerren ngudberre ba bu ngurrbenmarnekurduyime kunmakmak kunwern bedberre nawu birribuyika bininj.

⁹ Kunmekbekenh kabimbuyindi kore djurra bu kayime, "God kabenwon kunmak kunwern bu djal burudjang nawu birrimarladj bininj kore kubolkwarlahkenh rowk. Nungka wanjh kadjalkurduyime bu djal kunmak munguyh munguyh." [Psalm 112:9]

¹⁰ God kabenwon birriwarlahkenh bininj manbu yehyeng rowk. Kabenwon manmim ba bu kabirridudjeng. Kabenwon manme ba bu kabirringun. Nungka wanjh ngunwon ngudberre manwern manmim, ba bu ngurrbenmarnekurduyime kunmak birribuyika birridjalwern bininj.

¹¹ Ngayime bu nungka ngunmarnbun bu ngurridjalkuken munguyh ba bu ngurriweymakmen munguyh. Ngad ngarrikan nawu ngudda kandiwon bedberre birribuyika nawu karridangerrinj, dja bedda bu kabirrimang, wanjh kabirrimanjibun nawu God.

¹² Kuhni bu ngurrbendjalbidyikarme nawu God nuye bininj. Dja kunbuyika warridj. Wanjh kunu birriwern bininj kabirridjalmanjibun God.

¹³ Bininj birriwern ngundikurdunan kore ngurriweykan moneykenh, dja wanjh kabirriburrbun ngudda ngurriwoybukwon God. Kaluk bedda wanjh kabirriburlume God bu kuninjkukenh bu ngurriwokmarrkmei kunmak kunwok manbu Christbeh. Ngurrimulewarren bu Christkenh, dja mak ngurriweymak kore ngurrbenbidyikarme nawu birridjalwern bininj. Kumekbekenh wanjh kabirridjalburlume God.

¹⁴ Dja mak ngundimarnedjare ngudberre bulkkidj duninj, dja kabirridi yiwarrudj ngudberre dja bu kuninjkukenh kore kunmakmakkenh God ngunwong ngudberre.

¹⁵ Mah, wanjh karridjalmanjibu God bu kanwong manbu naw-ernhakkaykenh nuye, nawu minj karribayahme!

10

Paul Benbengdayhkeng Bininj Nawu Birriyolyolmi Nuye

2 Corinthians 10:1-6

¹ Bolkkime ngaye Paul wanjh ngayolyolmerren dja marrkdjawan ngudberre. Ngaye ngangundjikan nawu Christ bu ngayime djajalyal, dja minj mak ngaburlumerren, dja kunmekbekenh ngaye djawahdjawan ngudberre. Yikahwi ngudberre bininj kabirriyime bu ngaye ngawokweldan ngudberre bu ngamre kore ngudberre, dja mak ngakangebuk bu ngaye djarreh ngahdi.

² Dja wanjh burrkyak duninj. Bu ngaye ngamre wardi ngabendung birrimekbe bininj. Bedda kuhni kabirriburrbun bu yimankek ngad ngarrbenngundjikan bininj nawu kondah kurorrebeh. Dja ngaye marrkdjawardjawan ngudberre bu minj kandimarnbun bu ngaye ngakangebukworren dja ngabangmen bu ngamre ngabenmarnewokdi birrimekbe bininj kore ngudberre. Ngaye minj ngadjare kunmekbe ngakurduyime bedberre.

³ Ngad wanjh karrihni rowk kore kondah kurorre bu bolkkimekenh, dja wanjh minj karridangerren dja minj karriburren bu karohrok yiman kayime bininj nawu kondah kunred ngarre bu kabirriburren.

⁴ Bu ngad yiman karriburren wanjh kunbuyika duninj. Kaluk ngad nawu karrikarme yiman mankole manbu kakarme kundulkarre God nuye dja kanwon ba bu karribularrbun kunmayali kunwarre. Ngad mak karriburriwe kunwok manbu minj kunwoybuk.

⁵ Bu bininj kabirrikarme kunmayali kunwarre manbu kabenmarnbun bu bedman kabirriburlumerren dja kabirriwokburriwe nawu God, wanjh ngarrimayalibularrbun kore kabirridjalbengan. Ngad wanjh ngarrbenbukkabukkan birrimekbe bininj ba bu kabirrimayaliborledkerren dja kabirrimayalikerrngehmen ba bu kabirriwokmarrkmang nawu Christ.

⁶ Ngad ngarriburrbun bu ngudda ngurriwokmarrkmang Christ munguyh munguyh kore kukange ngudberre rowk. Kaluk bu woymbukkih

ngurriyime, wanjh ngad ngarrbendung yikahwi birribuyika bininj nawu minj kabirriwokmarrkmang nawu Christ.

*Paul Yolyolmerrinj Bu Karrurkmirrikenh
2 Corinthians 10:7-18*

⁷ Ngudda nawu kandidjadme, wanjh yuwn bu ngurridjalburrbu kore kurobbe ngurrinan. Ngurriwernhburrbu kore kanjdji. Yiddok ngurriyime bu ngudda woybukkih bininj nuye Christ? Wanjh ngurriburrbu ngad mak bininj nuye Christ yiman kayime ngudda. Mah, wanjh ngurriyawoyhburrburru.

⁸ Yikahwi ngudda kunubewu ngurriyime bu ngaye yimankek ngaburlumerren ngardduk, dja bonj, ngaye minj ngayeme. Kunubewu ngaburlumerren bu kunyahwurd bu ngayolyolme kore nawu Kawohnnan Rowk kanwon ngadberre kundulkarre. Kaluk nungka kanwong ba bu ngudda ngundimurrngayekwon dja minj ngundimarrkwarrewon.

⁹ Ngaye minj ngadjare bu kehleme ngudberre bu kuhni ngabimbun kore djurra ngudberre.

¹⁰ Yikahwi bininj kunubewu kabirriyime, "Paul nuye djurra bu kabimbun nakka kundulkarre dorreng dja mak nakuken, dja bu kamre karridjarrkdi wanjh kunukka kangudjwarremen, dja mak bu kawokdi, wanjh djal larrk."

¹¹ Nakka minj kunwoybuk. Bininj nawu kuhni kayime, wanjh wohburru bu woybukkih ngad ngarrikurdyuime kore ngarriyingkihimbom. Bu ngarridi djarreh kore ngarribimbun djurra, dja bu ngarrimre kore ngudda karridjarrkdi, wanjh ngarrikurdyuime kore ngarriyingkihimbom.

¹² Karrbenburrbu yikahwi bininj nawu kabirringeykimukworren. Ngad minj ngarriraworren dja minj mak ngarridjare ngarriyimerran yiman bedda nawu birribengwarr. Bedda wanjh kabirrikarremarnburren kore kabirridjaldjadmerren ba bu bedman kabirrimakwarren.

¹³ Dja ngad minj ngarriburlumerren munguyh, dja ngarridjalburlumerren bu kore God nganwong manbu ngarriyidurrkmirrikenh ngadberre, yiman kore bu ngarridurrkmirri ngudberre.

¹⁴ God wanjh kanwong ngadberre bu ngarridurrkmirri nuye kore kerrngehkenh ngarrimwam kore ngudda bu ngundimarnekang kunmak kunwok manbu Christkenh. Minj ngarriburlumerremeninj bu minj kunmekbekenh ngarrikurdyuimeninj.

¹⁵ Kuhni ngarridjalburlumerremen bu ngadman ngarridurrkmirri manbu ngadberre kore God kanwong. Dja minj ngarriburlumerremeninj kore birribuyika bininj kabirrikurdyuime. Ngad ngarridjaldjare bu ngurriwernhborlhme kore ngurriwoybukwon God, dja mak bu kawernmerren kore ngarriyawoyhdurrkmirri kunkimuk kore ngudberre. Kuhni wanjh God kanwong ngadberre, dja minj kunbuyika ngarriyime.

¹⁶ Kaluk yerrehkah wanjh ngarribalre bu ngarrbenmarnemulewan mahni kunmak kunwok kore kubolkbubuyika kore bewhkah ngudberre, kore minj nangale nabuyika karrurkmirri. Dja kuhni minj ngarridjare ngarriburlumerren kore nabuyika bininj ngokko bimarnedurrkmirri God.

¹⁷ Ngurriburrbu kore kabimbuyindi bu kayime, "Nangale kadjare bu kaburlumerren, wanjh nakka bidjalburlumen nawu Kawohnnan Rowk." [Jeremiah 9:24]

¹⁸ Nawu Kawohnnan Rowk wanjh nadjalkudji kabimakwan bininj, dja minj mak kabimakwan bininj nawu nungan kaburlumerren.

11

Yikahwi Bininj Nawu Bedman Kabirringeyburren Apostles

2 Corinthians 11:1-15

¹ Bolkkime ngaye bengdayhke ngudberre dja wardi ngurriyime bu ngaye yiman ngabengwarr. Dja bonj, djawan bu kandibekkabekkan dja yuwn bu kandimarnedjekme!

² Ngaye wanjh ngayimerranj yiman kayime kornkumo ngudberre, dja ngaye yiman ngaberrebbom nawu Christ bu ngudda ngunemarrenkenh, yiman ngalyawk duninh. Dja bolkkime yiman ngakirndangen ngudberre bu ngudda ngurriyimerranj yiman kayime ngalwarre ngalyawk dja Christ kunubewu kakirndangen ngudberre.

³ Ngudda yiman kayime ngalyungkih daluk ngalbu Eve. Ngalka wanjh bidjalwokmey nawu nayin kodjkuluwern dja bimayaliborledkeng. Kaluk kunmekbe ngakele wardi karohrok bu ngurribawoyi nawu Christ, nawu woybukkih nadjalkudji ngurrimarnedjare. [Genesis 3:1-5]

⁴ Kuhni ngayime. Ngad ngundimarnemulewam bu Jesuskenh, dja ngudda ngurriwokmey, dja mak ngurrimey nawu Namalngmakaykenh. Dja bolkkime ngudda kunu ngurrbenbekkan birribuyika bininj nawu ngundimarnemulewan nabuyika Jesus, dja mak ngurrimang namalngbuyika kore warridj manbuyika kunwok ngurribekkan. Kab njalekenh ngurridjalwoybukwon kunwokbuyika manbu minj kunwok kunmak duninh?

⁵ Bininj nawu ngundimarnemulewam maninjmanu kunbuyika kunwok, wanjh minj bedda apostles duninh. Wardi ngurriyime bu bedda yimanke birrikihkimuk apostles, dja bonj, minj bedda birrimak yiman kayime ngaye nawu apostle duninh.

⁶ Kunubewu ngurridjare ngurrbenbekkan bu kabirriwokdi bu ngurriyime birriwokmak. Dja ngaye minj ngaborlhmeninj bu ngadjalwokmak. Dja ngaleng ngawernhborlhmeng kore kunmayali manbu kunwoybuk. Kaluk ngad ngandibengdayhkeng kunwernkah dja ngurriburrbun bu kunwoybuk ngarrikarme.

⁷ Mah, dja kandibekkabekkan bolkkime. Ngamulewam God nuye kunmak kunwok ngudberre manbu minj ngurrikarremulewayi. Ngaye-mandeleng ngamarladjorrinj ngudberre dja marnbom ngudda ngurrikenmen. Yiddok ngudda ngurriyime kunukka ngakurduyimeng ngudberre?

⁸ Nawu money kunwardde ngandikukwong birribuyika bininj nawu yiwarrudj kabirrikarme bedberre, wanjh ngakang money nawu kunwardde kore beddabah ba bu ngaye wanjh munguyh ngarrurkimirri bu bidyikarmeng ngudberre.

⁹ Dja bu yiman njale nawu ngadjareniwirrinj bu kumekbe karrihni. Wanjh kunukka minj warrewoyinj ngudberre bu djawahdjawayi. Kaluk nawu karridanginj bininj birrimwam kore kunred Macedoniabeh wanjh ngandiwong rowk nawu ngadjareni. Ngaye minj marrkebbuyi ngudberre kore baleh yarrkka, dja mak minj mak bolkkime djanwohime.

¹⁰ Yoh. Ngaye ngaburlumerren bu kunmekbe ngakurduyimeng ngudberre. Minj nangale nawu walembek kore kunred Greece ngangurdke bu ngaburlumerren kuninjkunukenh. Nawu Christ ngakarme kore kukange ngardduk, dja kunmekbekenh ngaye ngadjalyime kunwoybuk.

¹¹ Dja njalekenh ngaye ngayolyolmerren bu kuhni rowk? Ayh? Yiddok ngudda ngurriyime ngaye minj marnedjare ngudberre? Dja God kaburrbun bu ngaye woybukkih marnedjare ngudberre bulkkidj duninh.

12 Ngaye wanjh munguyh kuhni ngadjalkurduyime kore ngakurduyime ngakurduyime, ba ngadjare ngabengurdke birrimmekbe bininj nawu kabirringeyburren apostles. Bedda kabirridjare kabirriburlumerren bu kabirriyime yimankek kabirridurkimirri karohrok yiman kayime ngad nawu apostles duninj.

13 Wanjh birrimmekbe bininj nakka minj woybukkih duninj apostles dja nakka nanu kabirridjalkurren bu kabirridurkimirri, bedmandeleng kabirrikukborledkerren yimankek apostles duninj nuye Christ.

14 Kuhni minj ngad karrikangebarrhme bu kuhniken. Kariurrbun nawu Satan nakka kakukborledkerren nungandeleng yiman kayime angel nawu kakukbame.

15 Kaluk ngad kuhni minj kankangehbarrhke kadberre bu bininj nawu kabirrimarnedurkimirri Satan, nakka mak kabirrikukmarnburren bedmandeleng bu yimankek kabirridurkimirri kore kunmakmak. Kaluk bu kayiburnbunkenh, wanjh nakka kabirridjalmang rowk kore baleh yarrkka kabirrikurduyime bu bolkkime.

Paul Yolyolmerrinj Bu Nuye Djakbekkabekkangenh

2 Corinthians 11:16-33

16 Ngaye yawoyhmarneyime ngudberre, yuwn nangale kaburrbun bu ngaye yiman walakkih ngabengwarr. Dja bu ngudda ngurriyime ngaye woybukkih ngaye ngabengwarr; wanjh kandikimang dja kandibawon ba ngaye kunu ngabalburlumerren bu djal kundedjumbung.

17 Kuhni bu kab ngayeman ngahdjalwohburlumerren, ngaye minj ngayolyolme yiman kayime nawu Kawohrn Rowk kahwokdi dja ngadjalwokdi yiman ngabengwarr.

18 Birriwern bininj kore ngudda kabirrihburlumerren yiman kayime nawu kurorrewaken bininj kabirriburlumerren. Mah, wanjh ngayemanwali ngaburlumerren warridj.

19 Ngudda ngurriyime yimankek ngurrikodjkludjad, dja kunmekbekenh kunu ngurrbenbawon nawu birribengwarr bininj bu kabirriburlumerren bedman.

20 Kaluk ngudda ngurrbenbawon bininj bu ngundibongkarme, dja mak ngundimarnedjirdmang, dja mak ngundimarladjwon dja mak kabirrikurmerren bu ngundimarnedokme, dja mak ngundikiyarrkwidjbihek! Ngudda yiman ngurrbenmakwan birrimmekbe bininj!

21 Kunukka wanjh ngadjalyemekarrinj ngaye bu ngayime ngadkunu ngarringudjwarreni dja minj karohrok ngarikurduyimeninj kunmekbe ngudberre!

Mah, wanjh kandibekka bu ngayolyolme yiman kayime ngabengwarr! Birringale bininj birrikelebuk kore kabirriburlumerren, wanjh ngaye warridj kunu ngamelebukmen bu ngaburlumerren.

22 Bedda yiddok Hebrew bininj? Mak ngaye wanjh! Yiddok bedda nawu Israel benkebmawahmeng? Mak ngaye nanu! Yiddok bedda kabirriyime Abraham bu mawah duninj bedberre? Wanjh ngaye mak!

23 Yiddok bedda kabirrimarnedurkimirri nawu Christ? Ngaye warridj, dja ngabenyurrhke kore ngamarnedurkimirri! Ngaye ngayime bu ngabengwarr bu kuhni ngahyime, dja bonj, kuhni kunwoybuk! Ngaye ngarrurkimirranj kunrayek minj kunu bedda. Ngaye mak ngarurkkendi kunwernhkah dja bedda burrkyak, wardi kundjalkudjikenh nuk bokenhkah. Ngaye mak ngakanjbabangni bu ngandihbuni, dja bedda kundjalyahwurd. Ngaye darnkih ngarowimeninj bu djal kunwernhkah.

24 Kunbidkukudji ngaye kandihkukmorrongi nawu Jews bininj mak thirty nine kunmorninj ngakarmi kore ngandihwidjbiheki.

²⁵ Mak danjbikkah wanjh gaye ngandibuni kundulk kunkimuk dorrengh. Kunkudjikenh gaye ngandikodjdooy kunwarddewi bu ngarrow-imeninj. Mak danjbikkah bu ngawam kabbala dja nganmarneyibmeng. Kunkudjikenh kumekbe yimerranj gaye ngawurlebmi kukakkudji dja kunbarnangarrakudji kore kurrula bu djarreh duninj kore kukadjid. [Acts 16:22]

²⁶ Ngaye munguyh ngadjalrenghey kubolkbubuyika dja minj baleh ngadjaldiwirrinj bu kunkuyeng. Ngakuyinngakmeninj kore manwern mankabomak. Yikahwi wanjh birribang bininj nawu birridedjolkwern wanjh ngandibuyi bu ngarrowimeninj. Yikahwi nawu ngarriredboni, wanjh ngandikoweng dja birridjareni ngandibuyi. Yikahwi bininj nawu minj Jews birridjareni ngandibuyi. Ngaye mak ngawarredongi kore kunred kubolkkihkimuk mak kore kurralk, dja mak kore kurrula. Dja mak gaye ngahdjalngalkeng kunrayek kore bininj nawu kabirrikurrehkurren bu kabirriyime kabirriwoybukwon Jesus.

²⁷ Dja mak gaye ngarrurrkmirri munguyh kunrayek dorrengh, dja mak ngangudjwarreminj kore ngahdurrrkmirri, dja yikahwi gaye minj ngakeyuwirrinj. Ngaye yikahwi mak ngamarrwedoweni dja mak ngakombukdowneni, mak kundjalwernhkah bu ngarey manmeyak. Mak gaye ngabonjdjekdowneni kunmadj yak, dja minj ngakarrmeninj.

²⁸ Dja kunbuyika warridj ngahkarrme. Kumekbe gaye munguyh ngangorrkan yiman kundulmuk kore ngabenburrbun nawu yiwarrudj bedberre bininj kore kubolkwern kabirribebbehdi.

²⁹ Bu nakudji kangudjwarremen, wanjh gaye mak ngabekkarren bu ngangudjiwarren. Bu nawu namarnde duninj kabiidjurkkwon nangale bininj dja kabimarnbun kakurduyime kunwarre, wanjh gaye mak ngabekkarren ngawernhngawarremen.

³⁰ Mah wanjh, bu gaye ngahni kunred Damascus, dja nawu governor biwokmarrkmangi nawu King Aretas, wanjh djareni ngandukkayi gaye, wanjh nungka benkurrmekurrmeng bininj nawu kabirrihbolknahnan kumekbe kore kubolkkimuk ba bu ngandidarrkidmayi.

³¹ God kaburrbun gaye minj ngakurren. Nungka wanjh God dja Kornkumo nuye Jesus nawu Kawohnan Rowk, dja mak nungka karburuburlumen munguyh.

³² Korroko bu gaye ngahni kunred Damascus, dja nawu governor biwokmarrkmangi nawu King Aretas, wanjh djareni ngandukkayi gaye, wanjh nungka benkurrmekurrmeng bininj nawu kabirrihbolknahnan kumekbe kore kubolkkimuk ba bu ngandidarrkidmayi.

³³ Dja ngardduk nawu djawirna ngandikoluyhweng gaye kore basket ngahdahkendi kumekbe kore rurkni warnamyoy manbu mankimuk. Wanjh kunu gaye ngabebmeng kore namekbe governor nawu bolkwornang kumekbe.

12

Paul yimeng, "Bu gaye ngangudjwarremen, wanjh kunu gaye woybukkiah ngamurrngayek."

2 Corinthians 12:1-10

¹ Ngaye minj ngangurdme kore ngahburlumerren. Bu kuhni wanjh minj njale ngurrimang, dja bonj, gaye kunu ngayolyolmerren kore nawu Kawohnan Rowk ngandjalwong gaye bu ngabukirrinani dja mak kore nganbukkabukkang.

² Ngaye ngaburrbun nakudji bininj nawu benebelmerrinj Christ, nawu wam kaddum kore Heaven duninj. Wanjh korrokoni bimarnekurduy-imerranj yiman fourteen mandjewk. Ngaye minj ngawernhburrbun kunubewu bu kunburkwi wam dja kunubewu djal kunmalngwi nuye. Nadjalkudji God kaburrbun bu bimarnekurduyimerranj!

³⁻⁴ Dja ngaye ngawernhburrbun bu naninjnanu bininj wanjh God bikang kaddum kore kubolkmakkaykenh kabolkngeyyo paradise* God nadjalkudji kaburrbun bu nahni bininj wam kunburkwi, dja nuk kunmalngwi. Dja ngaleng ngaye ngahburrbun bu nahni bininj bekkang kunwern kunmakmak duninj. God minj kabibawon bu kabalmulewan kunwern kore bininj bedberre.

⁵ Kuhni rowk nganmarnekurduyimerranj! Dja ngaye minj ngayeman ngaburlumerren. Ngaye wanjh ngadjalburumerren bu ngamulewarren kore ngangudjwarrekenh.

⁶ Dja bu ngaye ngadjareniwirrinj ngaburlumerremeninj ngayeman, wanjh ngaye kunu minj ngabengwarr, dja kunu ngayolyolmeninj bu djal kunwoybuk. Dja bonj, ngaye wanjh minj ngakurduyolyolmerren bu ngaburlumerren. Ngadjare bininj bu ngandidjalkurdunan dja ngandidjal-wokbekkan, dja djal kunmekbekenh ngandiburlume.

⁷ Wanjh kunu minj ngaye ngawernhburlumerren kore kunmekbe kunmakkaykenh duninj nganbuk kang ngaye, dja God kanngurdengkeng bu nungka nganwong kunyid dja nganmarnbom bu yiman kayime ngakanjabang. Nahni kunyid makka yiman kayime kunwok nuye namarnde munkeweng ngardduk. Bu kunmekbekenh wanjh ngaye minj ngaburlumerremeninj kore kundjalmak ngahnanikenh.

⁸ Ngaye danjbikkah ngamarrkdjawam nawu Kawohnan Rowk bu kamang maninjmanu kunyid ngardduk ba bu ngangehme.

⁹ Dja bonj, nungka nganmarneyimeng ngaye, "Yidjaldjareninj ngardduk kunmakmak ngaye won bu djalburudjang. Bu ngudda yiwernhgudjwarre, wanjh ngaye ngardduk kundulkarrekimuk won ngudda." Wanjh kunmekbekenh kunu ngaye ngadjalwernhmarrmarr bu ngayolyolmerren bu ngangudjwarre bu ngaburlumerren. Kunu Christ kundulkarre nuye kani kore ngaye.

¹⁰ Bu kuninjkukenh ngaye ngamarmarr kore ngahkarrme kungudjwarre ngardduk, dja mak kore ngandiwirrihme, dja kore kunrayek ngan-marnebebbe, dja mak bu bininj ngandiyolyolme bu kunwarre dorrengh, dja ngandinjirrhmiwon, dja mak kore kunwern kunyid ngamang rowk bu kunmekbekenh nganebelmerrinj nawu Christkenh dja ngamarnedurrk-mirri nuye. Kunmekbekenh kunu bu ngaye ngangudjwarremen, wanjh kunu ngaye woybukkih ngadjalmurrngrayek.

*Paul Kabenmardjare Bininj Nawu Yiwarrudj Bedberre Kore Corinth
2 Corinthians 12:11-21*

¹¹ Mah, ngaye ngayolyolmerrinj yiman kayime ngabengwarr, dja njalekenh? Wanjh ngudda minj kandimarneyimeninj bu kunmak, dja wanjh ngayeman ngayolyolmerrinj. Ngudda ngurriyime bu ngaye wanjh ngamarladj yiman yeng ngaye. Dja bonj, birrimekbe bininj nawu ngurribenneybu "Nawu birrikikhimuk apostles!" wanjh ngaye mak ngarrirohrok!

* **12:3-4** "Paradise" kamenyime God nuye kubolkmakkaykenh. Ngurrina kore Luke 23:43 dja Revelation 2:7.

¹² Ngurriburrbu kunwern ngakurduyimi kundulkarre dorreng ngudberre kore karridjarrkni. Dja God ngunmarnbom bu ngurrikangebarrhmeng kore durckmirranginj kore ngaye. Ngaye minj ngamarrkbaworinj! Dja njalekenh minj ngurriburrbun ngaye wanjh apostle duninjh?

¹³ Ngurriburrbun kuninjku warridj. Yiddok ngurrimak? Dja nuk yiddok bedberre bininj nawu yiwarrudj kabirrikarrme kore kubolkbubuyika ngundiyurrhke ngudberre? Dja mankudji kawohbuyika. Ngaye minj njilngwarweyoi bu djanwohmeninj ngudberre. Aba, kandimarnebengmidja bu kuhnikenh!

¹⁴ Ngaye wanjh bolkkime ngamarnburrinj bu balyawoyhyikan ngudberre danjikkah. Ngaye minj ngadjare bu kandingorrkan bu kandikukwon njalehnjale. Burrkyak. Ngaye minj ngadjare njale kore ngudda. Ngaye djal ngudda marnedjare ngudberre, dja ngudda yiman kayime ngardduk wurdwurd. Ngurriburrbun bu wurdwurd minj kabirrihkarekurrme bu kabindiwon ngalbadjan dja kornkumo. Dja wanjh bedda ngalbadjan dja kornkumo kabindiwon berrewoneng wurdwurd nawu njale kabenehkarrme.

¹⁵ Wanjh ngaye ngamarmarr bu won njalehnjale nawu ngahkarrme ngudberre yiman ngayemandeleng. Ngaye ngarrurrkimirri ngudberre kaluk bu ngangudjyakworren. Ngaye ngayime bu kunmekbekenh ngayewernharnedjare ngudberre! Kab ngudda yiddok ngaye kandimarnedjare bu djal walakkih?

¹⁶ Bonj, ngaye minj warweyoi ngudberre bu djanwohmeninj yiman bu kandingorrkani. Dja yikahwi ngurriyime ngaye yimankek koweyi ngudberre, bu ngakurreni bu darrkidmeyi ngudberre.

¹⁷ Burrkyak! Bu ngaye ngabenmunkeweng bininj bu ngundibidyikarmeng, yiddok bedda ngundikoweng bu ngundimarnbuyi ngaye ngandikukwoyi? Burrkyak.

¹⁸ Ngaye ngadjawam Titus bu kamre kore ngudda, dja mak ngamunkeweng nawu ngad karridanginj benemdjarrkwam. Yiddok Titus ngunkowimeninj ngudberre? Yiddok? Burrkyak. Ngudda ngurriburrbun bu woybukkih Titus dja ngad ngarrirohrok bu ngarridjarrkdurckmirranj dja ngarridjarrkkarrme kunmayalikudji.

¹⁹ Ngudda nawu karridabbolk ngadberre, wanjh ngaye marnedjare. Yiddok ngudda ngurriyime bu ngad ngarridjalyolyolmerren ba bu ngarrimakwarren kore ngudda? Dja burrkyak, ngad kunu ngarriwokdi kore ngarribelbmerrinj nawu Christ, dja kore God kannan. Ngad wanjh ngarridjare munguyh ngundimurngrayekwon ngudberre kore ngarriwokdi dja ngarrikurduyime ngudberre.

²⁰ Nganjilngwarre bu ngamre karriyawoyhnarren, wardi karribekkarren dja karrinjlngwarreworren. Wardi karriyimerren bu minj karridjalma bininj. Dja mak nganjilngwarre bu yikahwi ngudberre wardi ngurridangwerren, dja nuk ngurrikirnwern, dja nuk ngurriyidwern. Dja kunubewu ngurriyarlarckerren, mak bu ngurriyolyolmerren, dja ngurriburlumerren, dja wardi minj ngurrimarnburren bu mandjadkenh.

²¹ Yoh. Bu ngamyawoyhdurndeng dja karriyawoyhnarren, wanjh ngamre kunnjilngwarre dorreng. Dja ngayime kunu nawu ngardduk God nganmarnbun ngayemengalme kore ngudda ngudberre. Ngaye wanjh nganjilngwarre bu ngabengalke birriwern bininj kore ngudda nawu kabirriyime kunwarre yiman kabirrimayaliwarre, dja kabirridjirdmarren bininj dja daluk, dja kabirridjalyo kore kunwarre duninj. Dja bu bedda minj birriwarnyakmulewarrimeninj bu birribawoyi kore kunwarrekenh wanjh kunu ngaye ngayemengalme.

13

Paul Benbengdayhkeng
2 Corinthians 13:1-10

¹ Ngaye wanjh ngamre bu danjbikkah yikan ngudberre. Ngadjare ngurriyingkihburrbun kuhni bu kabimbuyindi, "Bu benobokenh dja nuk birridanjik bininj kabirribebbeholyolme bu kundjalkudji birrikurdunang, wanjh karrbenwoybukwon." [Deuteronomy 19:15]

² Kunmekbe bolkyimi bu ngaye ngamwam bokenhkah ngudberre, wanjh ngayingkihbenbengdayhkeng ngudberre kore ngudberre bininjkenh nawu kunwarre birrikurduyimi. Dja wanjh bolkkime ngaye ngaya-woyhbengdayhke bu ngahdi djarreh. Kuhni ngayime, bu bolkkime ngamdurdeng wanjh kunukka minj mak ngaye ngabenmarnekelkdan bininj nawu kunwarre birrikurduyimi bu kunkare, dja mak birribuyika nawu kabirridjalkurduyime kunwarre bu bolkkime.

³ Yiddok ngudda ngurridjare ngurriwoybukwon bu Christ nganmarnewokdi ngaye ba bu ngaye marneyime nuye kunwok? Wanjh ngaye woybukkijh ngayime nawu nungka minj kangudjywarren bu ngundjadme ngudberre, dja nungka nawu nawernhdulkarrekimuk duninhj kore ngudberre.

⁴ Ngurriburrbun bu Christ nungka ngudjywarrenj bu birribom kore kundulk cross, dja wanjh bolkkime kahdarrkid kore God nuye kundulkarre. Wanjh karohrok bu ngad ngarringudjwarre yiman Christ nawu ngarribelbmerrinj, dja wanjh ngad kunu ngarridjarrkmimbiminj Christ, kore God nuye kundulkarre ba bu ngundimarnedurrkimirri ngudberre.

⁵ Wanjh kab ngudman ngurrikangenarrimen bu yiman ngurrikangewoybuk nawu Christ. Ngurrirohrokmerrimen. Ngudda wanjh ngurriburrbu woybukkijh bu Christ Jesus kahni kore kukange ngudberre. Dja med, yiddok ngurrikurrinj? Ngaye ngayingkihbenbengan bu Christ kahdi kukange ngudberre.

⁶ Dja ngad warridj, bu ngudda kandirohrokme wanjh ngurriburrbun bu woybukkijh Christ Jesus kahdi kore kukange ngadberre warridj, dja minj ngarikurren.

⁷ Bolkkime ngad wanjh ngarrimarnedi yiwarrudj dja ngarridjawan God ba bu minj ngudda kunwarre ngurrikurduyime. Kuhni minj kuninjkukenh bu bininj kandimakwan ngadberre, dja bonj, minj kunkimuk. Dja bu bininj kabirriyime yimankek ngarribarabom, wanjh bonj, ngad kunu ngarridjaldjare bu ngudda minj ngurribarabun, dja ngurridjalkurduyime kunmak.

⁸ Dja ngad minj ngarriwokwe kore kunwoybuk dja wanjh ngarridjalkurduyime kore kunwoybuk kayime.

⁹ Bu ngudda yiman ngurrimurrngrayek dja ngad ngarridjalngudjywarren, wanjh bonj, ngarridjalmarmarr. Wanjh kunukka ngundimarnedi yiwarrudj ngudda ba bu ngurriwerhmakmen kore God.

¹⁰ Ngaye ngayingkihimbun nahni djurra ngudberre kondah, kore ngahni djarreh. Ngakarrme kundulkarre kore nawu Kawohrnan Rowk nganwong, dja ngadjare ngurriyingkihmarbnurren ba bu ngamre yikan ngudberre bu djal kamak rowk, dja minj ngayiddung ngudberre dja minj mak ngarrangrayek bu nan ngudberre. Ngurriburrbun nawu Kawohrnan Rowk nganwong mahni manbu kundulkarre bu ngarrurrkimirrikenh nuye ba bu murrngrayekwon ngudberre, dja minj ngadjare kukwarhke ngudberre bu ngurrimankan.

*Paul Benmarneyimeng Bobo**2 Corinthians 13:11-14*

¹¹ Nawu karridanginj, ngaye wanjh woknan bu bobo marneyime ngudberre. Wardi ngurrirohrokmen bu ngurridjalkurduyimen kunmak rowk ngurriyakwon. Dja kandiwokmang kore ngaye bengdayhkeng dja marrkdjawam ngudberre. Ngadjare ngurridjarrkmayalikudjinin mak kunmodmikenh dorreng bu ngurridjarrknin. Wanjh God nawu ngunwon nuye kunmodmikenh, dja nawu ngundjalmarnedjare, wanjh ngurridjarrkdi munguyh.

¹² Ngurribunjhmarrimen bu djal kunmakkenh kore ngurrimirndemor-namerren.

¹³ Nahni nawu God nuye birriwarlahkenh bininj wanjh ngundibal-marnemunkewe kunwok kunmak ngudberre.

¹⁴ Ngadjare Jesus Christ nawu Kawohrnan Rowk bu ngundjalkongibun munguyh, dja mak God ngunmarnedjarenin, dja mak Namalng-makkaykenh ngurridjarrkdi ngudberre rowk.

Galatians

Ngaye Paul Ngabimbom Nahni Djurra

Galatians 1:1-5

¹⁻² Ngaye Paul ngarrihdjarrkdi nawu karridangerrinj kore kondah. Ngaye ngabimbun nahni djurra ngudberre nawu ngurrihre Yiwarrudj kore kunred Galatia. Ngaye nawu ngayimerranj nawu apostle nawu nungan God nganmunkeweng. Minj nangale bininj nganwoyi mahni kore ngahdurkmirri, djal nungan God nganmarnbom ngamarnedurkmirri. Jesus Christ dja mak God nawu birrolkkayhweng kore dowengbeh, wanjh benemekbe benebokenh wanjh ngandimunkeweng ngaye.

³ Ngaye ngadjare God nawu Kornkumo kadberre dja mak Jesus Christ nawu Kawohrnan Rowk bu ngundidjalkongibun ngudberre dja mak biwon kunmodmikenh.

⁴ Nungka kanjkurmerrinj dja doweng bu ngadkenh kunwarre kadberre ba bu kanngehke kadberre kore kondanjkuwu kore kubolkwarre duninj bolkkime kunred karrihni. Kuhni wanjh God nawu Ngabbard djareminj bu djalkurduyimeng.

⁵ Wanjh karriwarlahkenh bininj rowk karridjalburluburlumen nungka bu djalmunguyh munguyh. Kuhni woybukkiah.

Ngaye Nganjilngwarreminj Duninj Bu Ngudda Ngurriwokmey Manbuyika Kunwok!

Galatians 1:6-10

⁶ Ngaye wobekkanh kore ngudda ngurridjalbawong God, wanjh ngakangebarrhmeng, dja ngadjalnjlngwarreminj duninj! Nawu God ngunkayhweng kore Christ nungan ngunkongibom ngudberre, dja wanjh njalekenh bolkkime ngurridjalbawong bu kundeddjumbungkenh ngudda ngurriyarlarmerrinj nuye, dja manbu ngurrihwoybukwon manbuyika kunwok kore ngudda yimankek ngurriyime kunwok manbuyika manmak?

⁷ Kunukka wanjh kundjalwid. Makka kunwok kunmak nuye Christ, wanjh mandjalkudjiwi kahdi manbu Christkenh nuye.

Dja ngaleng yikahwi birribuyika bininj nawu bedda ngundikangewarrewon, wanjh kabirridjare kabirriborledke dja kabirriwarrewon manbu manmakaykenh kunwok nuye Christ.

⁸ Kunwok manmak duninj manbu Jesuskenh, wanjh mandjalkudji. Kandibekka, bu ngaye kore ngarredjingmayi ngamulewayi mankarre manbuyika kunwok bu Jesuskenh, wanjh ngadjare God kunukka nganwirrihme dja ngandjalkukburriwe munguyh. Dja mak yiman nawu angel kamre kore heavenbeh bu kamulewan kunwok manbu mankarrebuyika bu Jesuskenh, wanjh ngadjare God namekbe kabiwirrihme dja kabikukburriwe munguyh!

⁹ Dja bolkkime ngaye yawoyhmarneyime ngudberre kore ngaye kernegehkenh marneyimeng, nangale nawu kahmulewan yimankek manbuyika kunwok manmak duninj bu Jesuskenh, manbu minj karohrok kore ngudman ngokko ngurriwoybukwong, wanjh ngadjare God kabirung nawu namekbe bininj dja kabibularribun bu munguyh.

¹⁰ Wanjh kandimarneyimen ngudda kore Galatia ngurrihni. Yiddok ngaye ngadjare bininj ngandiburlume ngaye? Burrkyak, ngadjaldjare ngaye ngamarnbun bu God kanjilngmak, dja bininj nakka burrkyak. Bu ngadjareniwirrinj yiman bininj ngandimarnedjareniwirrinj ngaye, wanjh

ngaye kunukka minj ngamarnedurrkmirriwirrinj nuye nawu Christ yiman nganbongkarrme.

Paul yimeng, "Jesus wanjh ngankangeborledkeng dja mak ngankayhmeng."

Galatians 1:11-24

¹¹ Ngardduk nawu karridangerrinj, ngadjare ngurriwernhburrbun bu manmekbe manu manmakkaykenh kunwok ngaweykang ngudberre, wanjh minj bininj bedda birrimarnbuyinj.

¹² Minj nangale bininj nganwoyi manmekbe kunwok. Minj nangale bininj nganbukkayi. Dja Jesus Christ nungan naweleng nganbukkang ngaye bu kanmarnekukbukkarrinj.

¹³ Kunubewu kandiwoyekkang bu ngayekenh. Ngaye wanjh Jew duninj bininj. Ngaye wanjh munguyh ngabendjaldungi God nuye bininj kore yiwarrudj birridi. Dja mak ngadjaldjareni ngabenbuyi ngabenkukyakwoyi rowk.

¹⁴ Ngaye ngawernharnedjareni mankarre manbu ngardduk Mawah-mawah bedberreni, dja ngabenyurrhkeyi birribuyika Jews nawu ngardduk ngarridabbolk nawu ngaye ngadjalwernhwoybukwoni kore mankarre bedberre.

¹⁵ Dja God nungka nadjalmakni, dja ngankayhmeng ngaye. Nungka nganyingkihmarnekarremarnbom ngaye korrokoni, kore ngahni ngalbu ngalbadjan ngardduk kuwalirng ngarre.

¹⁶ Wanjh God djareminj nganbukkang nuye beywurd, ba bu ngabenmarneyime bininj nawu bedda minj Jews. Kaluk ngaye minj nangale nganewokdiwirrinj nawu bininj bu kunmekbekenh.

¹⁷ Dja ngaye minj mak ngabidbuyinj kore Jerusalem bu ngabennayi birrimekbe bininj nawu birriyungkini apostles birrihyimi rerre ngaye ngabalyimerranj. Dja kundjalburrikudji ngaye ngawam kore kunbolk ngarre Arabia, dja wanjh rerre ngabaldurndi kore kunred Damascus.

¹⁸ Wanjh kumekbeni bu mandjewk danjbik burnbom, ngaye ngabidbom karrkadkah kore Jerusalem wanjh kumekbe nganewokdanginj nawu Peter*, dja ngayerrrang waken djandi bokenh† kore nungka.

¹⁹ Ngaye minj nganewokdiwirrinj nangale nabuyika nawu apostles, dja nadjalkudji nawu James, nawu benedanginj Jesus nawu Kawohrn Rowk.

²⁰ Kandibekka! God nungka nganhburrbun bolkkime ngaye minj ngakurren bu ngahbimbun nahn djurra, kore kuhni bu kunwoybuk.

²¹ Wanjh yerre ngawam kore kubolkkimuk kabolkngeyyo Syria dja mak kunbolk Cilicia.

²² Nawu yiwarrudj bedberre birrihni kore kunred Judea nawu birri-raworrinj nawu Christ, wanjh bedda minj ngandibangmekukburrbuyinj ngaye.

²³ Dja kunu ngandidjalwobekkani kore bininj ngandimulewani, birriyimi, "Nungka bu korroko kankadungi dja kanbuni kadberre munguyh, wanjh bolkkime kahweykan kunwok dja mak kabenhmarneyime bininj ba bu kabirriwoybukwon! Korrokoni nahninjanu bininj kanhwiwnani ngad nawu karriwoybukwon Jesus!"

²⁴ Wanjh kumekbekenh kunu bedda birridjalburlumeng God bu ngayekenh ngardduk.

* 1:18 Peter kangeyohrok Cephas. † 1:18 Kore Greek kayime, "fifteen kunbarnangarra".

2

*Nawu Birribuyika Apostles Wanjh Birrikimey Paul
Galatians 2:1-10*

¹ Bu fourteen mandjewk yimerranj, ngaye ngayawoyhbidbom karrkad-kah kore kunred Jerusalem, bu Barnabas dorreng. Dja mak nawu Titus nganekimey bu ngarridjarrkwam.

² God nganbukkang nuye kunmayali, bu kunmekbekenh ngaye ngawam kore kaddum kunred Jerusalem, bu ngaye ngamulewarrinj bedberre. Ngadjareni ngabenbukkayi kunwok manmak manbu ngabenmarneyime bu bolkkime bininj nawu minj Jews. Ngahkarrmi kunwok bu ngarriwokdanginj birrimekbe nawu ngaye ngahburrbuni kore bedda kabirrihwohrnani kore ngarre Yiwarrudjkenh. Ngaye yiman manmolk rerrih ngabenmarneyimi kore ngahburrbuni, ba bu bedda ngandimarneyimeninj kunubewu bu ngahyimeninj yimankek kunwarre ngahkurduyimeninj.

³ Kaluk birrimekbe nawu bininj minj ngandidjadmeninj ngaye. Burrkyak. Nakka Titus dorreng nganehdjarrkrey ngaye, nawu nungka Greekni dja mak minj lakkayenniwirrinj, dja bedda minj birridjirrkayinj bu birrilakkayenwoyi.

⁴ Ngarrilyolyolmi kunmekbe bu kuninjkukenh yikahwi bininj nawu birrihmolkngimi birrihbekkani kunwok kore ngarrihwokdi. Nawu bedda yimankek birriyimi bu ngarridjarrkwobukwoni. Kaluk bedda birridjaldjareni birringalkemeninj kore ngarribukkarren bu Christ Jesuskenh, kore nungka kanyerrkkeng kadberre kore karrihbongdi. Dja nahni bininj yimankek kandyawoyhmanbuyi ngarriyawoyhbongdi yerrih, yiman karbenmarnedurrkmirrikenh.

⁵ Dja ngad minj ngarrikurduyimeninj kore bedda birridjaldjareni birriwokkurmerrinj. Minj bu kundedjdjumbungenh diwirrinj. Burrkyak, dja ngaye ngadjareni bu ngudda ngurridjalkarmeninj manmekbe manmakkaykenh kunwok manbu manwoybuk duningh.

⁶ Kaluk ngaye ngabenmarnewokdanginj nawu kunubewu birriwohrnawohrnani kore yiwarrudjkenh. Ngaye minj ngawernhburrbun bu bedda kunubewu birringeykimukni dja mak kunubewu burrkyak. Bonj, dja ngaye minj nganjilngwarreniwirrinj. God kandjaldjadme ngad nawu bininj bu karrirohrok rowk kore nungka kankangenan, dja yuwn bu kandjadme kore bininj kandinan kurobbe. Kaluk birrimekbe bininj minj bedda mak ngandiwoyinj manbu mankarre mankerenge.

⁷ Bedda wanjh birridjalnjilngmakni ngardduk. Bedda birriburrrburrbekbang bu God nganwong manmakkaykenh kunwok bu ngabenmarneyime bininj bedberre nawu minj bedda Jews. Kuhni karohrok, yiman kayime God biwong Peter bu benmarneyimi nawu Jews bininj, nawu birrilakkayen rowk.

⁸ Kaluk God bimarnedurrkmirranginj Peter bu nungka yimi apostle bedberre nawu birrilakkayen bininj. Wanjh kadjalrohrok nawu God karrurkmirri kore ngaye warridj, nawu apostle bedberre bininj nawu bedda minj Jews.

⁹ Kunmekbekenh birrimekbe birridanjik bininj nawu James, Cephas nawu Peter, dja John, dja mak bininj rowk birrihyimi bu bedda wanjh birriwohrnani kore yiwarrudjkenh, kunu wanjh birriburrrburrbekbang bu God nungka nganmarnekurduyimeng kunmak dja nganwong manmakkaykenh bu ngahdurkmirri nuye. Wanjh bedda birribidwayheng kunbidkun kore Barnabas dja ngaye, wanjh ngarridjarrkaworrinj bu ngarrikudjihminj. Dja warridj ngarridjarrkwokmarnburrij bedda dja

ngad ba bu ngarrire ngarrbenyikan bininj nawu bedda minj Jews, dja bedman kabindiyikan bininj nawu birrilakkayen.

¹⁰ Bedda kandidjaldjawam ngadberre kundjalkudji nawu bedda ngandi-marnedjareni bu ngarrbennahnawu minj birrikuken bininj bedberre. Ngaye mak ngaweleng ngadjareminj bu kunmekbe ngakurduyimeninj.

*Ngaye Ngadjalkukyolyolmeng Nawu Cephas Peter
Galatians 2:11-14*

¹¹ Kumekbe ngarriwam kunred Antioch kore ngarrihdjarrkni, wanjh kumbebmeng Cephas nawu Peter. Nungka kurduyimeng kunbuyika kore nungan burrbuni. Wanjh ngaye ngamarneyimeng kore kurobbe bu nungka warreworinj.

¹² Kaluk bu kerrngehkenhni nungka birriraworinj bininj nawu minj Jews dja birridjarrknguni manme. Wanjh kalukburrk yikahwi bininj birrimbebmeng nawu James benmunkeweng, nawu birridjareni bindilakkayenwoyi bininj rowk. Cephas benmarnekeleni, dja wanjh kunu bendjalbawong bininj nawu minj bedda Jews, dja minj mak birriya-woyhraworrimeninj.

¹³ Birribadbuyika nawu bedda Jews bininj wanjh birriraworinj Cephas dorreng, dja bindibawong rowk bininj nawu bedda minj Jews. Wanjh minj kunmakniwirrinj. Bedda birrikurreni rowk. Wanjh birribaldjurrkwong nawu Barnabas bu benkadjuj kore birriraworinj Peter dorreng.

¹⁴ Ngaye ngabennang bu birrihyimi. Dja bu ngayeman ngaburrbuni kore bedda birribawong manbu manmakkaykenh dja manwoybuk kunwok. Wanjh ngaye ngamarneyimeng mandjad Peter kore kumirr bedberre nawu birribuyika bininj, bu ngamarneyimeng, "Ngudda bininj nawu Jew duninj, dja kondah ngudda yikurduyimeng ngudda yiman kayime bininj nawu minj bedda Jews bu ngurriaworinj. Dja bolkkime njalekenh ngudda wanjh yimayaliborledkerrinj dja yidjareminj yibendjirrkang bininj nawu minj bedda Jews bu kabirrihkurduyime yiman Jews rerrih?" Kunmekbe wanjh ngaye ngadjalmarneyimeng Cephas.

*Bu Ngahdjalmulewan Christ Nawu Doweng Kadberre
Galatians 2:15-21*

¹⁵ Ngad bininj nawu ngarridanginj Jews, wanjh ngarrbenmarneyime birribuyika bininj, nawu minj bedda Jews, bu bedda birridjalwarre dja mak kabirribakke God nuye mankarre.

¹⁶ Dja med rerrih! Ngad bolkkime karriburrbun bu God nungka kanmakwan ngad bininj rowk bu karriwernhwoybukwon Jesus Christ. Yuwn bu God kabimakwan bininj nawu kunubewu kayime, "Ngaye ngawokmarrkmang God munguyh, minj ngabakkemeninj mankarre nuye God." Ngad wanjh ngokko karriwoybukwong Jesus Christ dja karrihmunkekadjung. Kunu wanjh God kanyime, "Ngudda nawu ngurrimak bininj kunmekbekenh bu ngurrihwoybukwon Christ." Minj karriburlumeren bu kumekbekenh karriyime kore God nuye, bu karriyime, "Ngad ngarridjalkurduyimeng kore mankarre kabimbuyindi, dja mak minj ngarribakkemeninj mankarre ke." Bu nangale bininj kayime kunmekbe, wanjh minj God nakka kabimakwan.

¹⁷ Yoh, woybukkih, karriwoybukwon Christ ba bu God kanmakwan. Ngad wanjh karrikurduyimi kunwarre, dja mak karriidjalkurduyime kunwarre. Yiddok Christ nakka kadjare bu kunwarrekenh karriyime? Burrkyak!

¹⁸ Bu nangale bininj karrurndeng kore karohrokme bu kadjalwokmar-
rkmang God nuye mankarre rowk, wanjh nakka kawarreworren, dja mak
bonj, nungka kadjalbakbakke.

¹⁹⁻²⁰ Minj mak karryawoyhdurndeng kumekbe kore mankarre manbu
korroko karribakkeng rowk, wanjh kunmekbekenh kunu karrimalng-
doweng. Dja wanjh bolkkime ngad wanjh karridjaldarrkiddi kore God
nungan kadjare.

Ngaye nawu yiman nganedjarrkdoweng Christ dorrengh kore kundulk
cross. Ngaye minj ngadjaldarrkid bu ngayeman. Dja nungka bolkkime
wanjh kahni kore kukange ngardduk. Ngaye munguyh ngadjalwoybuk-
won God nuye beywurd nawu nganmarnedjareminj dja kanjurrmerrinj
bu doweng ngayekenh ngardduk. Kunmekbe kunu ngaye ngarrarrkid kore
kunburk ngardduk bu kondanjkunukenh kurorre.

²¹ God kandjalkongibun dja kandjalmarneyime kunmak bu munguyh
munguyh. Minj ngad karringehkerren bu kunmak karrikurduyimeninj.
Bu ngad karringehkerrimeninj, dja mak bu karrimarnburrimeninj wanjh
njalekenh Christ kanmarnedoweng? Yiddok bu djalburudjang nungka
doweng? Burrkyak, mankarre minj kangehke kadberre. Wanjh
kunmekbekenh kunu ngaye minj ngadjalburriwe Christ nuye.

3

Ngaye Bengdayhke Ngudberre Mandjad

Galatians 3:1-5

¹ Ngudda nawu ngurrihni kore kunbolk Galatia, yiddok ngudda ngur-
ribengwarrminj nuk! Ngudda nawu nuk ngurriwobekkanj dja mak wanjh
ngurriburrbuyi kunwoybuk bu nawu Jesus Christ kukbarndanginj kore
cross kundulk. Dja bolkkime minj ngurriwernhburrbun, yiman kayime
marrkidjbu nawu ngunkodjkulubuyikawong ngudberre!

² Wardi kandidjalmarneyimen kundjalkudjikenh. Boleh bolkyimi ngur-
rimey nawu Namalngmakkaykenh? Yiddok ngudda ngurrimarrkmangi
rowk manbu mankarrewern? Burrkyak, dja ngaleng wanjh ngurridjal-
wohwoybukwoni kore ngurrihbekkani.

³ Dja wanjh njalekenh bolkkime ngurribengwarreworreni? Kore
kerrngehkenhni bu ngurridedjingmey kamak rowk kore Namalng-
makkaykenh dorrengh. Dja njalekenh bolkkime ngudda ngurridjare
yimankek ngurrimarnburren ngudmandeleng kore God kayime ngudda
ngurrimak? Kunukka wanjh kadjalkarreyak.

⁴ Ngudda ngurrihkarmi kunwern kunyid. Yiddok minj ngurriwern-
hburrbuyi bu kunu burudjang? Yuwn bu kuhni ngurriwarrawarrhke
rowk.

⁵ Ngurridjalburrbu God nungka ngunwong ngudberre Namalng-
makkaykenh nawu kahkurduyime kunmakmak kundulkarre dorrengh
ngudberre. Njalekenh nungka kuhni kurdukurduyimi ngudberre? Yiddok
ngudda ngurrimarrkmey rowk manu mankarre? Burrkyak, ngudda
ngurridjalwoybukwong manmekbe kunwok kore ngurribekkani.

Ngudda Ngurringunjdjika Nawu Abraham

Galatians 3:6-9

⁶ Mah wanjh, ngurriburrbu kore bimbuyindanj djurra bu Abrahamkenh
kore kabimbuyindi, kayime, "Abraham nungka biwoybukwong God.
Wanjh kunu God yimeng nungka namak bininj". [Genesis 15:6]

⁷ Kunmekbe kunu wanjh bolkkime ngurriburrbun nawu bininj kabirri-
woybukwon God, nanu wanjh Abraham nuye wurdwurd.

⁸ Ngokko kore Bible kandjalyingkih Bengdayhkeng kadberre korroko kore God nungan kayime nawu bininj minj bedda Jews, nakka wanjh birrimak kore nungka bu bedda karriwoybukwon God. Kunmekbekenh kunu God bimarnemulewam manbu manmakkaykenh kunwok kore Abrahamkenh. Nungka yimeng, "Ngaye marnbun ngudda kunu ngaye kore ngakurduyime kunmakkaykenh nawu birridjalwern rowk bininj bedberre nawu bedda minj Jews." [Genesis 12:3]

⁹ Kaluk Abraham biwoybukwoni God dja nungan God bidjalmarnekurduyime ngunmak. Dja wanjh kadjalkudjiwi kunmekbe bu karohrok bolkkime. Bu nangale bininj kabiwoybukwon God, wanjh kunu God kabimarneyime ngunmak nunganwali yiman bimarnemuyime Abraham nawu biwoybukwong God.

Bu Nangale Kabiwoybukwon God, Wanjh Kunu God Kabimarneyime Namak Dja Kabimimbiwon

Galatians 3:10-14

¹⁰ Kuhni kunbuyika marneyime ngudberre. Bu nangale bininj kadjare kamarnburren nungandeleng namak bininj kore yimankek kawokmarrk-mang God nuye mankarre, wanjh kadjalbarabun, dja kadjalkarrewarre. Kore kabimbuyindi bu kayime, "Bininj nawu minj munguyh kamarrk-mang mankarre rowk manbu kabimbi kore djurra mankarre, wanjh kunukka God kabiharrewan namekbe bininj dja minj kabimakwan." [Deuteronomy 27:26]

¹¹ Dja wanjh bolkkime ngurriburrbun, minj nangale bininj kadjalwokmarrk-mang rowk manmekbe mankarre ba bu God kabimakwan. Bu kunmekbekenh kunu, kore karribimngeybun kore kayime, "Bu nangale kabiwoybukwon God, kunu wanjh God kayime nungka namak dja kadjalimbi." [Habakkuk 2:4]

¹² Adju, bu ngurridjare ngurrijilngmarnbun God, baleh ngurrikurduyime? Ngurriburrbun kore kabimbuyindi, kayime, "Bu bininj kamarrk-mang munguyh God nuye mankarre, wanjh kunmekbekenh kunu kadjalimbi." [Leviticus 18:5]. Kaluk ngad bininj minj karriwernhmarck-mang rowk, dja ngaleng karridjalbakke mankarre nuye nawu God. Dja nungka wanjh kadjare bu karridjalwoybukwon.

¹³ Christ nawu kanngehkeng kadberre. Kanbekeng kore mankarre yiman kanbongkarmeng kore kundowikenh ngarre. Bu nungan naweleng kanjkurmerrinj, ba God nungan birruy, dja wanjh biwarrewam nawu Christ, wanjh kunu kanmakwam kadberre. Kumekbekenh kunu kabimbuyindi kore kayime, "Nangale nawu kabirrikukbarnname kore kundulk, wanjh God kabidjadme namekbe bininj dja mak kabidjalwarrewan." [Deuteronomy 21:23].

¹⁴ Kuhni wanjh Christ Jesus kurduyime ngadberre, ba bu kunwok manmak nuye God biyingkihmarnewokkurmerrinj nawu Abraham, ba bu kawoybukkenhdangen, bu God nungka kabenmarnekurduyime ngunmak bedberre bininj nawu minj bedda Jews karohrok kore bimarnekurduyimi Abraham. Wanjh bolkkime bu karridjalwoybukwon Christ, wanjh kunu karrimang nuye Namalngmakkaykenh nawu God korroko kanyingkihberrebbom kadberre.

Bu God Kanmarnewokkurmerrinj Kadberre

Galatians 3:15-18

¹⁵ Ngudda nawu karridangerrinj ngardduk! Ngaye ngayolyolme mandjad ngudberre ba bu ngurriburrkburrbekkan. Ngurriburrbun bu bininj kabimbun wanjh kangeybimurren ba bu yehyeng nuye wanjh kabiwon

nabuyika. Wanjh minj nangale bininj kamre kaborledke manmekbe kunngey nuye kore kabimbuyindi, dja mak minj kabimbun kunbuyika.

¹⁶ Kundjalmekbe karohrok kore God wokkurmerrinj bu biberrebbom Abraham, dja yimeng nungan bu kaluk kunmak kabimarnekurduyime nuye nakudji nawu Abraham kaluk kabikebmawahme. Minj mak benbalyolyolmeninj nawu birriwern bininj. Nungka bihdjalyolyolmi nakudji bininj nawu Christ.*

¹⁷ Dja marneyime ngudberre bu God kanyingkihberrebbom kunyungkih bu wokkurmerrinj nungan naweleng bu kerngehkenhni. Kaluk yerrekah, yerre 430 mandjewk, nungka kanwong manmekbe mankarre. [Exodus 12:40] Maninjmanu mankarre minj bularrbuyi God nuye kunwok kore korroko kanberrebbom. Wanjh mahni kunwok nuye kadjaldi munguyh.

¹⁸ God minj yimeninj, "Ngabenmarnekurduyime kunmak bedberre nawu kabirrihkarme ngardduk mankarre." Burrkyak! God nawu djalmimkongiwernni, wanjh kunmekbekenh bimarnewokkurmerrinj Abraham bu kaluk bimarnekurduyimi bu kunmakkenh.

Njalekenh God Kanwong Kadberre Mankarre.

Galatians 3:19-22

¹⁹ Njalekenh God kanwong kadberre mankarre? Nungka kunmekbe kurduyimeng ba bu ngad karriburrburren bu woybukkih ngad karriwarre bininj. Dja wanjh manmekbe mankarre djalam, yakminj bu Christ kunwam. Nungka wanjh nadjalkudji namekbe nawu God bihmulewani bu nungka biberrebbom Abraham. Kaluk nawu angels birriwong Moses manbu kanwong mankarre kadberre ngad. Nungka yiman kayime dingihdi kore kubulkayh ngad dja mak God.

²⁰ Kaluk bininj nawu kubulkayh kahdi, wanjh kabenebidyikarme bokenh, dja minj nadjalkudji kabimarnedurrkmirri. Dja ngaleng God nadjalkudji nungan naweleng, dja minj nangale bininj nadjalmak bu kahdi kubulkayh kore God dja ngad.

²¹ Kaluk yiddok manmekbe mankarre kabiwokburriwe manbu kunwok kore God kanberrebbom? Burrkyak wanjh! Kunukka minj woybukkih. Bu manmekbe mankarre kanmarnbuyi karridarrkidmeninj, wanjh kunukka God kanmarneyimeninj, "Ngudda ngurrimak bininj." Dja bonj, manmekbe mankarre minj kandarrkidwoyi kadberre.

²² Dja kore Bible kahyime ngad minj karrimarrkmayi manbu mankarre nuye God, dja makka kunwarre kanhbongkarme kadberre karriwarlahkenh bininj rowk. Kunmekbekenh kunu nungan God kanmarnekurduyime kadberre kore wokkurmerrinj bu kanberrebbom bu ngad karidjalwoybukwon nawu Jesus Christ.

Manbu Mankarre Kankan Kore Christ.

Galatians 3:23-25

²³ Bolkkime ngad karriwoybukwon Jesus. Dja bu kunyungkih, manbu mankarre yiman kanbongkarmi, dja mak yiman karrihbongdi prison yerrih. Kaluk God kanbukkang kadberre bu ngad wanjh karridjalwoybukwon nungka.

²⁴ God kanmarnekurmeng nuye mankarre ba bu kankan kore Christ, ba bu karriwoybukwon nungka, wanjh God kayime ngad karrimak bu kunmekbekenh.

* 3:16 Genesis 12:7

²⁵ Korroko bu manmekbe mankarre kannahnani kadberre yiman kayime ngad wurduhwurdwurd yerreh. Dja bolkkime ngad karrihwoybukwon Jesus, wanjh manmekbe manbu mankare minj kanyawoyhnahnani.

Ngad Karriraworrij Rowk kore Christ, dja wanjh God Kandjarrkborang Kadberre Rowk.

Galatians 3:26-29

²⁶ Mah, wanjh bolkkime ngudda nawu ngurriwoybukwong Christ Jesus, wanjh ngurriyimerranj God nuye bebeywurd.

²⁷ Bu ngudda ngurrikodjdjuhmeng kore Christ, wanjh ngudda yiman ngurriaworrij nawu Christ dja wanjh ngudda ngurriyimerranj yiman nungka.

²⁸ Kaluk bolkkime ngudda ngurridjalaworrij rowk kore Christ, yiman kayime ngudda ngurrirohrok. Kunukka bonj, minj munguyh ngurridjalbebbendi bu yikahwi ngudda nawu Jew dja Greek, yikahwi ngudda nawu ngurribongdi dja nawu ngurribongyerkmeng, dja mak minj yikahwi ngudda binihbininj dja daluhdaluk.

²⁹ Dja mak kunbadbuyika. Wanjh ngudda Christ nuye bininj dja ngudda ngurriyimerranj Abraham nuye Mawahmawah warridj. Wanjh kunu God ngunwon ngudda warridj namekbe nawu namakkaykenh nawu nungka biberrebbom kore Abraham.

4

Bolkkime Ngad Wanjh Karrisbeywurd Nuye God

Galatians 4:1-7

¹ Ngurridjalburru kuhni. Yiman bininj kabenberrebbun bu kabenwon nuye wurdwurd kunbolk ba kabirribolkkarme yerrekah bu kabirridjordmen. Wanjh woybukkih bedda kaluk kabirrimang, dja med, bu kabirridjalyahwurd, wanjh minj kabirribangmewohrnan. Bedda yiman kabirrirohrok birribuyika bininj nawu kabindimarnedurrkmirri nawu kornkumo bedberre.

² Bedda wanjh kabindimarrkmang daborrabolk nawu bedberre kabindinahnan. Bedda kunu kabirridjalmadbun kaluk yerrekah bu kabirridabolkmen kore nungan kornkumo bedberre yingkihwokkurmerrinj.

³ Kadjalrohrok kadberre. Korroko ngad wanjh yiman wurdwurd rerrih dja nawu namalngwarrewarre nawu bedda kabirriwohrnan kondanjkuu kurorre, wanjh karbenwokmarrkmangi kore kandihbongkarmi kadberre.

⁴ Ngad kumekbe karridjarrkdi. Bu yerrekah bolkyimerranj, God bimmunkeweng nuye beywurd. Nungka nawu biyawmey ngalbadjan, dja mak nungka djordminj dja mak marrkmangi manmekbe mankarre warridj.

⁵ Nungka kumwam bu kanyerrkkeng kadberre kore karribongdi ngarre, ba bu ngad karriyimerranj God nuye wurdwurd duninj, dja mak karrimang namekbe nawu kanberrebbom.

⁶ Mah. Wanjh bolkkime ngudda nuye wurdwurd. God nungka bimunkeweng Beywurd nuye Namalngmakkaykenh, dja nungka kumwam ngimeng kore kukange kadberre, dja mak kanmarnbun karrikayhme God nawu Kornkumo kadberre, bu karriyime, "Abba!"*

⁷ Ngudda minj mak ngurriyawoyhbongdi kore ngurrimarnedurrkmirri yiman slaves munguyh. Djal burrkyak. Bolkkime ngudda ngurriyimerranj

* 4:6 Nawu Aramaic kundjen birriwokdi, wanjh Abba kamenyime, "Ngabba!"

nuye wurdwurd duninjh. Dja kunu nungka ngunwon ngudberre nadjalwern nawu nungka korroko ngunyingkihberrebbom.

Ngaye Nganjilngwarreminj Ngudberre

Galatians 4:8-20

⁸ Korroko bu ngudda minj ngurriburrbuyi God, ngudda nawu kunrayek ngurribenmarnedurrkmirri bedberre nawu birridjalwern namarnde nawu bedda minj kabirrihdarrkid duninjh yiman God.

⁹ Dja bolkkime ngudda ngurriburrbun God. Dja kunbuyika mak, ngayime God nungka ngunburrbun ngudberre! Dja kunu njalekenh ngudda ngurridjare ngurriyawoyhdurndeng kumekbe kore kunmayali kunwarrekenh manbu mangudjwarre duninjh dja minj njale mak ngunwon. Yiddok ngurridjare ngurrikurmerren kumekbe kore ngurriyawoyhbongdikenh?

¹⁰ Njalekenh ngurrihkadjung bedberre mandjamunkenh benbekadkenh dja dirddenh, dja yiman kudjewkkenh, dja yekkekenh dja mak njalehnjalekenh?

¹¹ Ngaye ngahnjilngwarre dja ngakele ngudberre, bu kunubewu ngaye ngahdjaldurrkmirri bu djalburudjang kunrayek bu nguddakenh ngudberre!

¹² Nawu karridangerrinj, ngaye woybukkih djaldjawahdjawan ngudda bu bolkkime, dja mak manjbun dorrengh ngudberre, kandingunjdiika ngaye. Korroko bu ngaye karridjarrkni ngaye dorrengh ngarohrokni bu ngayimerrangeninj yiman ngudda rerrih. Dja ngudda minj kunwarre kandimarneyimeninj bu kunmekbeni.

¹³ Ngurriburrbun bu kerngehkenhni ngaye ngayolyolmi ngudberre, ngaye woybukkih ngarroweni dja kunmekbekenh kunu karridjarrkni kore ngudda dorrengh, dja mak ngaye bengdayhkeng kunwok kunmak ngudberre.

¹⁴ Ngaye ngahburrbuni ngudda yimankek kandihwidnani ngaye bu kunmekbekenh ngarrulkkihyoy, dja ngudda minj kandiyolyolmeninj bu kunyid dorrengh, bu kandikukwemeninj kuberrk. Dja burrkaykni. Ngudda kandikimangi ngaye yiman nawu kayime ngaye angel nawu Godbeh, dja mak kandikimey ngaye yiman Jesus Christ nungan naweleng!

¹⁵ Wanjh bolkkime, njalekenh ngudda ngurrimayaliborledkerrinj dja mak ngudda minj kandimarnenjilngmak ngaye? Ngaye ngaburrbun kunu woybukkih, ngudda munguyh kandimarnedjareni ngaye kerngehkenhni. Nguddanu ngurrirohrokmeninj bu ngurribebkemeninj kunnim ngudberre dja kanwoyi ngaye! Nguddanu kunu ngurrirohrokni kandinahnani dja kandimarnekurduyimi kunwern. Dja bu bolkkime wanjh larrk.

¹⁶ Yiddok ngaye nawu karridjalyidko bu ngayimerranjkenh ngudberre? Ngaye djalmarneyimeng ngudberre kunwoybuk, yiddok kunmekbekenh ngudda ngurrimayaliborledmeng?

¹⁷ Kandibekka! Birrimekbe birribuyika bininj nakka ngundiburlume ngudda, dja ngurrinahnarrimen bedberre! Bedda kabirridjare kandikukdjalkmang ngudda kore ngad, kunmekbekenh bedda ngundimarnedjare ngudda bu ngurribenmunkekadjung.

¹⁸ Kamak rowk bu ngurridjare ngurrikurduyime njalehnjale bu ngurrimarnedurrkmirri nuye God. Ngurrikurduyimen kunmak munguyh! Yuwn bu ngaye kandimadbun bu karridjarrkkurduyime.

¹⁹ Ngardduk wurdwurd, ngaye ngahbekkarren ngudberre yiman ngalbu daluk kabihbun darnkih bu kayawmang wurdyaw! Ngaye ngadjalyawoyhnjilngwarreminj ngudberre bu ngamadbun ngurriyimerran yiman Christ kore kukange ngudberre.

²⁰ Ngaye ngadjare ngamrawinj karridjarrkniwirrinj bolkkime ba kunu ngayolyolmeninj ngudberre yeleyeledj. Dja ngaye ngahnjilngwarre kunmekbekenh ngudberre.

*Ngaye Ngabenbenebbeholyolme Hagar dja mak Sarah
Galatians 4:21-31*

²¹ Ngudda nawu ngurrihyime ngurridjare ngurrimarrkmang mankarre nuye God ba ngurrinjilngmarnbun nungka, kunu kamak rowk dja ngaye marnemulewan ngudberre manbu kunwoybuk kunwok kore maninjmanu mankarre, ba ngudda ngurriburrbun bu kuninjknunukenh.

²² Manmekbe kunwok kawokbimidi nawu kabiolyolme Abrahamkenh. Nungka benbenebornang nabebeywurd bokenh, Ishmael, nawu nawernwarre, dja nawu Isaac nakka wanjh nawalawalak. Nawu nawernwarre ngalka wanjh ngalyawyawkni ngeyyoy Hagar biyawmey, ngalbu bongdi kore Sarah bimarnedurrkmirri. Dja nawu Isaac, nakka biyawmey ngalbu daluk minj bongdiwirrinj ngalmekbe Sarah. [Genesis 16:15; 21:2]

²³ God korroko biberrebbom bu kabiwon Abraham nawu beywurd dunijnh nuye, dja Abraham minj balmadbuyi kunmekbekenh wanjh nungka bimey ngalyawk ngalbu bimarnedurrkmirri Sarah, dja bibornang beywurd. Kaluk yerrekah nungka bibornang nuyekih beywurd ngalbu Sarah ngarreni, ngalbu minj bongdiwirrinj. Kaluk namekbe wurdyaw nawu God kunyungkih biberrebbom Abraham.

²⁴ Mahni kunwok kore kamenmenyime mankarredulmuk. Mahni kabenbeneyolyolme daluk bokenh, dja kayolyolme warridj bokenhkah kore God kunyungkih bu wokkurmerrinj. Ngalmekbe ngalyawk ngalbu djalbongdi, ngalka wanjh Hagar, wanjh benbalyawmey wurdwurd nawu bedda kabirridjalbongdi munguyh. Kaluk yiman kanbengdayhke kadberre bu kerngehenh God kanmarnewokkurrinj nuye mankarre kore mandulumkimuk kabolkngeyyo Sinai.

²⁵ Dja kunbuyika warridj kabiolyolme yiman Hagar karohrok kumekbe mandulumkimuk kabolkngeyyo Sinai kore kubolkkimuk Arabia, dja mak karohrok rerrih kore kunred Jerusalem nawu bininj kahmirnderri bolkkime. Mahni yiman kunwok Hagar ngarre, wanjh kamenmenyime warridj bu Jerusalem yiman kayime ngalbadjan rerrih, dja mak wurdwurd ngalenggarre yiman kabirridjalbongdi bolkkime.

²⁶ Dja ngad bolkkime wanjh karrimdollkkang kore kunbuyika Jerusalem kore kaddum heaven ngarre, dja yiman kayime ngalbadjan kadberre, wanjh ngad karringehme, minj karriyawoyhbongdi.

²⁷ Kuhni bu bimbuyindanj ngarre, kayime, "Ngudda daluk ngalwarlirngwarre, bolkkime ngudda wanjh yinjilngmakmen dunijnh! Ngudda daluk nawu minj yidjakbekkayi wurdyawkenh, kaluk ngudda yiwernhmarrmarr; dja yiwernhkayhme bu kunmakkenh! Dja mak ngalbu ngaldjadmudni daluk ngalbu minj wurdyaw yawmayi, ngaleng bolkkime kakarme birridjalwern dunijnh wurdwurd dja kabiuyurrhke yiman kayime daluk ngalbu bininj kahkarme." [Isaiah 54:1]

²⁸ Nawu karridangerrinj! Ngudda bolkkime nawu ngurridjalrohrok yiman kayime Isaac, nawu wurdyaw God biberrebbom nuye Abraham.

²⁹ Ngudda ngurriburrbun manmekbe kunwok kore nawu nawernwarreni bimarladjwong nawu nayerre. Namekbe nawu nawernwarre wanjh bibornang kore bininjbeh djareni wurdyaw. Dja nawu nayerre bu danginj, wanjh Namalngmakkaykenh kurduyimeng kundulkarre nuye dorrengh. Bu kadjalrohrok kahkurduyimerran kore kadberre bolkkime.

³⁰ Dja ngad wanjh karriburrbun manmekbe kunwok kore kabimbuyindi, kore kayime, “Yibenbenekukmunkewemen ngalmekbe daluk ngalbu Hagar kahbondi dja mak ngarre nayaw nawu Ishmael. Nahni wurdyaw minj kamang namekbe namakmak nawu kadjehdjenyo nuye nayaw ngarre daluk Sarah, ngalbu minj bongdiwirrinj.” [Genesis 21:9-10]

³¹ Bonj, nawu karridangerrinj, ngad wanjh daluk ngalbu minj bongdiwirrinj wanjh ngalmekbe kanyawmey, dja yuwn bu ngalbuyika ngalbu bongdibongdi minj ngaleng kanyawmayi.

5

Nawu Ngad Nuye Christ Wanjh Minj Ngad Karriyawoyhbongdi Kore Kunwarrekeh

Galatians 5:1-6

¹ Christ kanbongyerrkkeng kadberre ba bu minj ngad karriyawoyhbongdi kore kunwarrekeh. Dja bolkkime ngad karrihni kamak rowk, yuwn mak ngurriyawoyhdurdeng kore ngurriyawoyhbongdi.

² Mah, wanjh kandibekka! Ngaye marneyime ngudberre kore ngaye ngaburrbun, wanjh ngurrbenbawon bininj ngundilakkayenwon ba bu God ngunmakwan. Wanjh kunukka ngurridjalbawon kore ngurriwoybukwon nawu Christ, wanjh kunukka minj nungka ngunbidyikarme bu kunmekbekenh.

³ Ngaye ngayawoyhyime ngudberre, kuhni bu woybukkih, bu nangale bininj kabenbawon birribuyika kabirrilakkayenwon, wanjh namekbe bininj wanjh djalmarrkma manbu mankarrebubuyika manbu mandjalwern rowk, dja bu kunukka burrkyak minj mak kamarrkmang rowk, wanjh God minj nakka kabimakwan.

⁴ Bu bininj kayime, “Ngaye ngamarrkmang manwern mankarre, ba kunu God nganmakwan”, wanjh nakka kabidjalnjirrhmiwon nawu Christ. Namekbe bininj wanjh djalbawo kore God kabikongibunkeh.

⁵ Kunukka ngad minj karrikurdyime kunmekbe. Dja Namalng-makkaykenh nuye kanmarneyimeng kadberre bu ngad karrihwoybukwon God, wanjh nungka kanmarneyime ngad karrimak. Dja wanjh karrihdjalburrbu munguyh bu kunmekbe God nungka kadjalkurdyime kadberre ngad.

⁶ Bolkkime ngad karriraworrinj nuye Christ Jesus. Wanjh minj karriyawoyhlakkayenworren nuye, kuhni burrkyak. Manbu karrilakkayenworrenkeh, wanjh djal larrk. Dja karridjalwoybukwon God dja mak ngadmanwali karrimarnedjaremerrimen. Manmekbe wanjh manu mankimuk duninj.

Bininj Nawu Kabirrihmarnbun Kunyi Ngudberre

Galatians 5:7-12

⁷ Ngudda ngurrihrehrey bu kamak rowk, dja bolkkime nangale ngunmarnebolkkarrewon bu ngudda ngurringurdmeng bu ngurrimarrk-mangi manbu kunwoybuk?

⁸ God ngunkayhmeng ngudberre nungan naweleng, nungka minj yimeninj ngudberre bu ngurilakkayenworren!

⁹ Yuwn bu ngurriyawoyhbekkan nangale bininj nawu ngunwong kunbuyika kunmayali. Dja ngurriburrbu yiman kayime mankudji manyahwurd manbu kamarnbun kahnguklurlike buriddi, wanjh kakukborledke rowk manbu buriddi.

¹⁰ Dja ngudda bininj nawu Kawohrnan Rowk nuye, wanjh kunu ngaye burrbun ngudberre bu minj ngurriwoybukwon manbu manbuyika manmekbe kunmayali. Nangale nakka nawu kadjare ngunbukkan manmekbe kunmayali? Nungka wardi yimankek nakimuk, dja bonj, nakka wanjh God kaluk kabidjaldung.

¹¹ Nawu karridangerrinj, ngaye minj marneyimeninj ngudberre bu ngurrikuklakkayenworren. Ngaye ngadjalyolyolme Jesuskenh bu doweng kore cross kundulk. Yikahwi bininj kabirriwokwirrihme mahni kunwok, dja bedda kabirridjare ngaye ngayolyolme bu ngurrikkayenworren. Kumekbekenh kunu ngandiwirrihme.

¹² Nahni nawu kunwarre kabirrimarnbun ngudberre, wanjh ngadjare bedmandeleng kabirriwernhkurduyime kore kabirridjare, dja wanjh kabirridjaldjamundadjkerren!

Karrimarrkma Nawu Namalngmakkaykenh Kore Kanmarneyime

Galatians 5:13-26

¹³ Yoh, nawu ngad karridangerrinj, God ngunkayhmeng ngudda dja ngunmarnbom ba minj ngurriyawoyhbongdi kore manmekbe mankarre. Wanjh ngudda yuwn kunmekbe ngurriyimerren, "Mah, God ngan-marnebgmidjanj, wanjh bonj, ngaye ngayawoyhkurduyime kunwarre." Burrkyak, ngudda kunbuyika ngurriyimen bu ngurrimarnedjaremerren kore ngurribidyikarmerrenkenh.

¹⁴ Ngurriburrbun manmekbe mankarre mandjalwernhkukenh duninj manbu kayurrhke rowk manbubuyika mankarre manwern, kore kayime, "Ngudda yibenmarnedjarenin birribuyika bininj yiman bu yingandeleng yiwernhmarnedjaremerren." [Leviticus 19:18]

¹⁵ Dja bu ngudda ngurridedjdjimgang ngurriburren dja mak ngurridangwerren, wanjh ngurrinaharrimen! Marndi ngurridjalkukyakworren ngurriweleng.

¹⁶ Mah, wanjh kunmekbekenh ngaye marneyime bu ngurridjalkurduyimen kore Namalngmakkaykenh ngunmarneyime, wanjh kunu minj baleh ngurrikurduyime kore yimankek kunwarre ngurridjare ngurrikurduyime, wanjh kunmekbe burrkyak.

¹⁷ Ngudda ngurriweleng ngurridjare kunwarre, dja nawu Namalngmakkaykenh kadjare ngudda ngunngurdke ngudda. Yiman kayime karrihburren baybaywi kore kukange kadberre rowk!

¹⁸ Dja bu ngurribawon nawu Namalngmakkaykenh ngunkan kore kunmak yikurduyime wanjh kunukka manbu mankarre minj mak ngundjadme.

¹⁹ Bu nangale nawu kahdjalkurduyime kunwarre kore nungan kahdjare, ngad wanjh karrbenkurdunan dja karriburrbun rowk bu baleh kayimerran, yiman kayime kabirrikalikarren, kabirrimayaliwarremen, kabirridjalborrkun.

²⁰ Bedda mak kabirrimarnebodan Mawahmawah bedberre nawu djang, dja mak kabirrihmarrkidjworren, dja mak kabirrinjirrhmiworren kore kunyid kabirrimarnburren, dja mak kabirrikirnwerrren, dja mak bu djalburudjang kabirrikangeyiddung, kabirribebbehkimukworren, kabirridjaldangwerren munguyh, dja mak kabirriyarlarmerren.

²¹ Dja mak kunyid kabirriwernmerren, mak kabirribongun manbang bu kabirribengmayahme, dja mak kunwarrekenh kabirrimarnburren kore mulil ngarre, dja njalehnjale kore kabirrikurduyime. Ngaye yingkihmarneyimeng ngudberre bu kerrngehkenh mak ngaye yawoyhmarneyime ngudberre bolkkime, nangale nawu kahkurduyime kunmekbe kunwarre, wanjh nanu minj kangimen kore God kawohrnan rowk nuye.

²² Nawu Namalngmakkaykenh wanjh kunbubuyika nungan ngunmarnbun yiman kayime kundulk manbu kakarme manbarnemwern manmakmak duninj. Wanjh kunukka ngurrimarnedjaremerren, dja mak ngudda ngurridjalmarr marr duninj, dja mak ngudda ngurridjalkarme kunmodmikenh. Warridj ngudda mak yeledj ngurrbenmadbun nawu birribuyika bininj, dja mak ngudda ngurrbendjalkongibun. Dja mak ngudda ngurrimaknin dja minj mak ngurrikurren.

²³ Ngudda mak ngurridjalmadburrimen, dja mak ngurrikongiburrimen. Dja munguyh ngudda ngurrimayalimarnburrimen bu kamak rowk. Dja minj mak ngurrikowerren.

Bu ngudda ngurrikurduyime kuhni rowk, ngudda minj ngurribakke manbu mankarre nuye God.

²⁴ Ngad Christ Jesus bininj nuye, wanjh yiman karohrok ngad karridundulubom kadberre kunwarre dja kore karridjareni bu karrikarmi, wanjh yiman dowerrinj rowk.

²⁵ Nawu Namalngmakkaykenh kandarrkidwong, wanjh kunmekbekenh karrimunekadju kore kanmarneyime nungka kadberre kore baleh kariyime dja mak baleh kore karrikurduyime.

²⁶ Dja yuwn bu mak ngad karriyawoyhburuburlumerren kore ngadmandeleng karrinjilngwarreworren kore karridjare karrikukenmen.

6

Bu Karribidyikarmerrenkenh

Galatians 6:1-6

¹ Nawu karridangerrinj, ngudda nawu ngurrihbekkan nungka Namalngmakkaykenh, bu ngurrinan nangale bininj nawu ngurrihni bu kahyime kunwarre, wanjh ngudda yalyal ngurribidyikarmen namekbe ba bu nungka karrurndeng kore kunmakkenh. Dja ngaleng, ngurrinahnarri-men! Wardi ngudda mak ngundjurrkan ngudberre warridj.

² Wanjh ngudda ngurribidyikarmerrimen munguyh bu kunyid kahyo ngudberre. Bu ngudda kunmekbe ngurrikurduyime, ngudda wanjh ngurrimarrkmang manwern mankarre manbu kore nungan Christ kanwong.

³ Nangale nawu kahyime nungka yimankek nakuken, wanjh nungka kahdjalkowerren nungan naweleng. Wanjh yiman yimerra kayakkenhworrimen rerrih.

⁴ Kaluk bu ngudda ngurrimarnedurrkmirri nuye nawu Ngabbard, wanjh ngurribebbehrohrokmerren, dja ngurridjalnahnarrimen ba bu ngurridurrkmirri mandjad, wanjh kunukka ngurrinjilngmakmen, dja yuwn bu ngurribebbehnarren bu ngurridjadmerren.

⁵ Karribebbekarme kore karridurrkmirri. Minj nabuyika kahdurrrkmirri manbu ngudda ke.

⁶ Nawu nangale ngunhbukkabukkan ngudda God nuye kunwok, ngudda wanjh ngurridjalweyka rowk manbu kunmakmak nuye.

Ngurridjalkurduyimen Kunmak Bu Munguyh

Galatians 6:7-10

⁷ Yuwn nangale ngunwon kunbuyika kunmayali bu ngunkowe. Ngurribekka, kuhni woybukkih, minj nangale kabikowe God. Ngurriburru bu kuninjkukenh! Bu bininj karrudjeng manmim, manmekbe kadjalkudjiwi karohrok manbu mankolhde kadjorden nuye.

⁸ Kaluk marneyime kore baleh kahmenyime. Bu nangale kakurduyime kore nungandeleng kahdjare, yiman kayime karrudjeng manwarre manmim. Kaluk namekbe bininj kabaldowen. Dja bu nangale kakurduyime

kore Namalngmakkaykenh kahyime, wanjh yiman karrudjeng manmak manmim, wanjh kunu Namalngmakkaykenh kabidjaldarrkidwon munguyh munguyh.

⁹ Dja wanjh ngad yuwn karrimarrkbaworren kore munguyh karidurrkmirrin kore kunmak. Dja bu kambahre ngarre kundung wanjh kunu kandarrkidwon kadberre munguyh munguyh. Yiman kayime karrihmadbun mankolhde bu kadjordmen dja kakarrme manbarnem.

¹⁰ Mah wanjh, karrbenmarnekurduyime kunmak bedberre birribuyika bininj. Bu bolkkime wanjh karriyime, dja kaluk yerrekah nuk wanjh kabolkyakmen kadberre. Dja karrbenbidyikarrmen werrk nawu kadberre yiwarrudj bininj karridjarrkdi yiman namud rerrih.

*Wanjh God Kanyawoyhmarnbun Bu Ngad Karrikerrngehmeng
Galatians 6:11-18*

¹¹ Kandina ngaye ngabimbun nahni djurra kunwok ngardduk kore kunbid ngardduk, ngurrina mahni manbimkihkimuk kore ngardduk!

¹² Wanjh ngurrina! Birrimekbe nawu bihdjurrkkan ngudberre bu kabirridjare ngudberre ngurrilakkayenmen, wanjh bedda kabirridjaldjare birribuyika bininj kore kabindiburlumekenh. Bedda minj kabirridjare birribuyika bininj kabindinjirrhmiwon. Kunmekbekenh kunu minj kabirriyolyolme nawu Christ bu doweng kore kundulk cross.

¹³ Kaluk birrimekbe bininj nawu birrilakkayen, beddanu minj kabirriwernhmarrkmang mankarre rowk, bedmandeleng bedberre birriweleng. Bedda bihdjaldjurrkkan ngudberre, bu kabirridjare ngudda ngurrbenwokmarrkmang manbu bedda bedberre mankarre nawu kabirrihburlumerrenk ngudberre kore kunburkkkenh ngarre.

¹⁴ Ngaye, wanjh minj ngadjare ngaburlumerren, dja ngadjalburlume Jesus Christkenh nawu Kawohrnan Rowk kadberre bu doweng kore kundulk cross. Nungka kunu ngankuklarlme y kore kondanjkuu kunred, wanjh minj njale kondahbeh kore kurorre ngankarrme ngaye, yiman kayime ngaye ngokko ngarroweng kore cross kundulk.

¹⁵ Yuwn bu karriyawoyhburrbun bu karrilakkayenworrenkenh, dja karridjalburrbun bu God kankerrngehmeng. Mahni mankarre wanjh karrokme rowk kadberre.

¹⁶ Bininj rowk nawu kuhni kabirriyime, dja mak bininj rowk nuye God nawu Israel benkebmawahmeng, wanjh ngaye ngadjare God kabenwon kunmodmikenh nuye dja kabenkongibun.

¹⁷ Ngaye ngahkarrme kunmorninj kunburk ngardduk kunmekbekenh ngaye Jesus nuye bininj. Wanjh kunu bininj ngandidjalbawo, dja minj nangale nganyawoyhwon kunyid.

¹⁸ Nawu karridangerrinj, ngaye ngadjare Jesus Christ nawu kawohrnan rowk kadberre nawu ngudda ngunmarnedjare dja karrarnhdi ngudberre kore kukange. Djalwoybukkih.

Ephesians

Paul Bimbom Nahni Djurra Bedberre nawu Birrini kore Kunred Ephesus Ephesians 1:1-2

¹ Ngaye wanjh Paul ngabimbom nahni djurra ngudberre. Ngaye ngay-immerranj apostle nuye Christ Jesus kore God djareminj ngardduk. Ngaye wanjh ngamunkewe naninjnanu djurra ngudberre nawu God nuye bininj ngurrihni kore kunred Ephesus. Ngudda wanjh ngurrikukbelbmerrinj kore Christ Jesus dja munguyh ngurridjalmunkekadjung.

² Ngaye ngadjare God nawu Kornkumo kadberre dja mak Jesus Christ nawu Kawohnan Rowk, bu ngundiwernhkongibun, dja mak ngundiwon kunmodmikenh.

Bu Kuhni God Yingkihkarremarnbom Kore Jesuskenh Ephesians 1:3-14

³ Karriburluburlumen nawu God! Jesus Christ nawu kanmarnewohnan kadberre wanjh kabiyimarneyime God bu Kornkumo nuye. Nungka wanjh kanmarnbom bu karrikukbelbmerren nuye Christ, dja kunmekbekenh kunu kanwong nawu Namalngmakkaykenh ba bu karrimang kunmakmak rowk kore kaddum heaven.

⁴ Kunyungkih bu God minj bangmebolkmarnbuyi kondah kurorre, wanjh bu kunmekbe bolkyimi, nungka yingkihkarremarnburrinj bu kankukbelbme kore Christ, ba bu karriyimerran djal nuyekih bininj nawu nungka kandjalmakwan kore kumirrk nuye.

Nungka wanjh kanmarnedjareminj kadberre.

⁵ Dja kunmekbekenh kanmarneyingkihkarremarnburrinj bu kanmarnbun karribebeywurd nuye, kore karrikukbelme nawu Jesus Christ. God kuninjkuu djareminj bu djal nungan kanjilngmarnburren.

⁶ God wanjh kuninjkuu kanmarnekurduyimeng rowk ba bu karriburlume nungka nawu nadjalmakkaykenh dja narrulkarrekimuk kore wernhmimkongiwerun duningh, dja kunu nungka kanwong bu djal burudjang ba bu karribelbmerrinj Jesus Christ nawu nungan God kabimarnedjare.

⁷ Nungka kurlbawarrhmeng kadberre ba bu kanbekeng kore kunwarre karrihbongdi. Ngayime bu God kanmarnebgmidjan kadberre kore kunwarre karrihyime. God burudjang djalkurduyimeng bu wernhmimkongiwerunminj kadberre.

⁸ Nungka wanjh kuhni kunmak kanmarnekurduyimeng bu kunkimuk duningh, dja mak kanmayalibayhkeng ba bu kariwernhburrbun rowk kore nungka.

⁹ Bu kuhni wanjh nungka kanbukkabukkang kadberre manbu warlkkahwarlkkayindi nuye, ba bu karriburrkburrkbekkan kore yingkihkarremarnburrinj. Ngayime bu Christ kanmarnekurduyime kunmak kore God kadjare kadberre.

¹⁰ Kuninjkuu God karremarnbom, bu nungan kamdurndiwe yehyeng rowk kore heavenbeh dja mak kurorrebeh ba bu Christ kadjalwohrnawohnan rowk. Kuhni wanjh nungka kayakwon kore kayiburnbunkenh kabolkyime.

¹¹⁻¹² God kahdurrmirri dja kamarnbun bu kayimerran nawu yehyeng rowk kore nungan kadjare. Kunukka nungan munguyh kadjalkurduyime kore kakarremarnbun.

Wanjh God korroko kanyingkihdjarrngbom ngadberre nawu Jews bininj dja kunukka ngarridjalyungkihni bu ngarriwoybukwoni dja ngar-rimunekadjudngi nawu Christ. God kuhni kurduyimeng ba bu birrid-jalwern bininj kabirriburlume bu nungka nawu God nadjalmakkaykenh duninjh.

¹³ Mah, wanjh ngudmanwali nawu minj Jew bininj, ngudda wanjh ngurrikukbelbmerrinj nawu Christ bu ngurribekakang kunwok kunwoy-buk nuye. Ngudda ngurribekakang kunwok manmak kayolyolme bu God ngungehkekenh ngudberre. Wanjh ngudman ngurriwoybukwong Christ, dja nungka ngunwong Namalngmakkaykenh nuye, kore kerrngehkenh kanyingkihberrebom ba bu ngurriwernhburrbun bu woymbukkih duninjh ngudda wanjh God nuye bininj.

¹⁴ God kanwon nawu Namalngmakkaykenh kadberre ba bu karriwern-hburrbun bu woymbukkih nungka kanmarneyingkihkarrme kadberre kore wokkurmerrinj, dja karridjalmbun kore kayakwon bu kanbebkekenh ngad nawu bininj nuye kore karribongdibeh. Nungka wanjh kuhni kakurduyime ba bu birriwarlahkenh bininj kabirridjalburlume nawu nungka nadjalmakkaykenh duninjh.

Bu Paul Dangingi Yiwarrudj Bedberre Bininj Nawu Birriwoybukwong Jesus.

Ephesians 1:15-18

¹⁵⁻¹⁶ Mah wanjh. Ngaye ngamanjbun God bu kunbarnangarrawern kore ngudberrekenh dja mak ngadjaldi yiwarrudj ngudberre bu munguyh. Kuhni ngarredjimgemey bu ngaye wobekakang ngudda bu ngurriwoybuk-wong Jesus nawu kawohrnran rowk, dja mak bu ngurrbenmarnedjare birribuyika nawu God nuye bininj rowk.

¹⁷ Ngaye wanjh munguyh ngadjaldi yiwarrudj bu ngahdjawahdjawan God nawu Nadjalmakkaykenh Kornkumo. Nungka nawu God nuye Jesus Christ nawu kawohrnran kadberre. Ngaye ngadjawan bu ngunwon Namalngmakkaykenh ba bu ngurrimayalimakmen dja mak ngurriwern-hburrbun dja ngurriwernhborrhme nawu God.

¹⁸ Dja ngaye mak ngahdjawan God bu ngunmayalibayhke ngudberre ba bu ngurriwernhburrbun bu yerrekah kundjalwernhmakkaykenh kam-behme ngudberre nawu nuye bininj kore nungan ngunkayhmeng. Dja mak ngurriwernhburrbun bu God nungan kanwon kumakkaykenh rowk kore kanyingkihberrebom ngad nawu bininj nuye.

Christ Nungan Kadjalwohrnan Rowk

Ephesians 1:19-23

¹⁹⁻²⁰ Ngadjawan mak ba bu ngurriburrbun bu God kahdurrrkmirri kadberre kunwernhdulkarrekimuk dorreng ngad nawu karrihwoybukwon nungka nuye. Manmekbe mandjalkarewi kundulkarre durrrkmirranj bu God birrolkkayhweng nawu Christ kore kundowibeh, dja bikurmeng kore heaven, bu kahyerrkan kore kukun nuye.

²¹ Kaluk kumekbe nungka Christ kawohrnran rowk dja kabenyurrrhke birribuyika nawu kabirriwohrnawohrnran dja mak nawu birringeykihkimuk rowk, dja mak nawu mankarre kabirrikarremarnbun, dja mak nawu birridulkarrekimuk rowk. Wanjh Christ nuye kunngey karrokme dja kabenngeyyurrrhke rowk manbu manbubuyika kunngey bu bolkkime dja mak djalmunguyh.

²² Dja God bimarnekurmeng yehyeng rowk kore kanjdji kurrenge nuye nawu Christ, dja bimarnbom bu kawohnan rowk kore nawu birriwarlahkenh bininj nuye kore yiwarrudj ngarre.

²³ Ngad nawu bininj nuye Christ wanjh karribelbmerrinj karriyimerran yiwarrudj nuye, yiman kayime nungan nuye kunburk. Nungan naweleng kankukbarlke bu kamngimen kani kore kukange kadberre. Wanjh nahni kunburk nuye nawu kahdarrkid, wanjh nakka kahdi kore kubolkwarlahkenh rowk kanjdji dja mak kaddum kore nungka nawu Christ wanjh kadjalwohrnawohnan rowk.

2

God Djalwernhmimkongiwernminj Kadberre Dja Kundjalmekbekenh Kanngehkeng

Ephesians 2:1-10

¹ Ngudda wanjh kerngehenhni ngurrimalngdoweng bu ngurriwokweyi God dja mak ngurridjalkurduyimi kunwarre.

² Ngudda kunmekbe ngurridjalkurduyimi yiman kayime birriwarlahkenh bininj nawu kondah kurorrebeh. Dja mak ngurrimunkekadjungu nawu namalngwarre duninj, nawu kabenmarnewohnan nawu namalngbubuyika kondanjku kurorrewaken. Nungka wanjh kahdurkmirri kore bininj bedberre kukange nungka kabirriwokburriwe God.

³ Ngad warridj, wanjh karrikurduyimi kunwarre yiman kayime bininj nawu kondah kurorrebeh bu karriraworrinj. Ngad wanjh karridjareni bu karridjalkurduyimi kunwarre kore ngadman kunburk dja mak kore kunmayali kadberre. Ngad wanjh karriwarreni, dja karrirohrokni birribuyika bininj rowk, dja kunu God wanjh nungka kandjalwernhdungi kadberre dja wardi kandjalbuyi.

⁴⁻⁵ Dja burrkyakni, minj nungka kanbuyi kadberre. Ngad wanjh ngokko karrimalngdoweng kore karriwokweyi God, dja nungka wanjh djalwernhmimkongiwernminj kadberre bu kanmarnedjareminj bulkkidj duninj, kaluk kunmekbekenh bimimbiwong Christ dja kunu ngad dorrengh kandjarrkmimbiwong kadberre. God wanjh djalwernhmimkongiwernminj kadberre, dja kundjalmekbekenh kanngehkeng.

⁶ Dja mak God kandolkkayhweng kadberre bu karridjarrkdolkkan Christ dorrengh, dja mak kankurmeng kore karridjarrkyerrkan Christ Jesus dorrengh kore kaddum heaven.

⁷ God wanjh kuninjku kurduyimeng kadberre ba bu yerrekah wanjh birriwarlahkenh bininj kabirrinan bu baleh nungka kurduyimeng kore kanmarnedjareminj kadberre kore Christ Jesus. Wanjh kunukka kabirriburrbun bu nungka wanjh nadjalwernhmimkongiwern bulkkidj duninj.

⁸⁻⁹ Yoh. God ngunnehkeng bu djal burudjang ngunkongibom dja mak mimkongiwernminj ngudberre. Bu ngudda ngurriwoybukwong wanjh kunmekbekenh nungka ngunnehkeng ngudberre. Minj ngudmandeleng bu kuhni ngunmarnekurduyimerrangimeninj, dja God wanjh djalburudjang ngunmarnekurduyimeng. Ngad bininj minj ngadmandeleng karringehkerrimeninj, wanjh minj nangale bininj kaburlumerren bu yimankek kangekerrenkenh. Ngudda minj ngurridurkmirrangimeninj ba bu yimankek ngurrimarnbuyi God bu ngunnehkengkeyi.

¹⁰ Kaluk God nungan durrmirranj dja mak nungka djalkurdumak duninj! Dja nungan God nadjalkudji kankangemarnbom kadberre bu

kankukbelbmeng kore Christ Jesus, dja kanmarnbom ba bu karrihydur-
rkmirrikenh kunmakmak nuye kore nungka kayingkihkarreme kadberre
bu kanwonkenh.

*Nawu Christ Kurlbawam Dja Kanmarnbom Bu Karriidjalkukudji
Ephesians 2:11-18*

¹¹ Ngudda bininj nawu minj Jews, ngurriburrbu bu kerngehenk
kore ngurrihkurdyimi. Bu ngudda minj ngundibornayi kore Jews
bininj. Wanjh kunmekbe ngad nawu Jews bininj ngundimarneyimi
ngudberre, "Ngudda minj ngurrikkayen!" Dja ngad bininj nawu Jews
ngarrimarneyimerrinj, "Ngad nawu ngarrilakkayen!" Bu kumekbe ngad
ngarriyime, wanjh ngarrikukyolyolmerrinj djal kunburkwi.

¹² Ngudda ngurriburrbu bu korroko ngudda minj ngurriaworrime
nawu Christ, dja ngurridjaldi djarreh nuye, dja mak ngudda minj bininj
nuyeniwirrinj God, yiman ngad bininj nawu ngarringeyyo "nawu Israel
kankebmauwahmeng".

Wanjh God wokkurmerrinj, dja nganberbbom ngadberre nawu
Jews bininj, dja ngudda minj njale ngurrimayi, ngudda yiman nawu
ngurribolkbubuyikabeh. Ngudda ngurrihi kore kondah kurorre bu
kunjilngwarre dorreng, kore minj ngurriburrbuyinj God, minj mak
ngurriburrbuyi kore nungka kunmak ngunmarnekurdyime bu yerrekah.

¹³ Bolkkime wanjh, ngudda nawu korroko ngurridi djarreh nuye God
wanjh ngurribelbmerrinj kore Christ Jesus. Bu nungka wanjh kurlbawam
ngudberre wanjh kunukka ngunkang ngudberre darnkih kore ngad.

¹⁴ Christ nungan kanwong kadberre kunmodmikenh nuye dja kanmarn-
bom kadberre karrikukudjihminj ngad bininj nawu Jews dja ngudda
nawu minj Jews. Minj karriyawoyhdurren dja nungka wanjh bakkeng
manbu bulkayh warnahwarnamhyoy manbu kanhbebbekuknam.

¹⁵ Ngad nawu Jews bininj wanjh ngarriidjalkadungi mankarre manwern
manbu mankihkihlele dja mankihkimuk bu ngarrikarmi ngadberre.
Kaluk manmekbe mankarre kanbebbekuknameng. Dja bu Jesus doweng
kore kundulk cross, wanjh nungka bularrbom rowk manbu mankarre, dja
kanmarnbom kadberre bu karriidjalkudjihminj ngad bininj nawu Jews
dja ngudda nawu minj Jews, yiman kayime bininj bokenh kabeneraworren
dja kabeneyimerran nadjalkudji. Kaluk kankukbelbmeng kadberre rowk
nungka dorreng. Kunukka nungka kanmarnbom ba bu minj mak
karriyawoyhdurren dja wanjh kanwong kadberre kunmodmikenh nuye.

¹⁶ Jesus nadjalkudji kanjurmerrinj kore manbu cross kundulk, dja
doweng, wanjh kunu nungka kanmarnebularrbom kunyid kadberre,
ba bu karrimarnedjaremerren, dja mak kandjarrkdurndiweng kadberre
rowk kore God.

¹⁷ Christ wanjh kunwam yolyolmi kadberre rowk ba bu kunmodmikenh
kanwong. Nungka yolyolmi ngudberre bininj yiman nawu ngurridi
djarreh, dja mak kore ngad bininj nawu yiman ngarriidjaldarnkih.

¹⁸ Christ kuninjku kurduyime kadberre rowk, wanjh bolkkime bu
ngad karriidjarrkkarreme nadjalkudji nawu Namalngmakaykenh ba bu
karriidjarrkredarnkih kore Ngabbard God.

*Bu God Kanmarnmarnbun
Ephesians 2:19-22*

¹⁹ Mah wanjh, bolkkime ngad nawu Jews bininj minj ngundiya-
woyhngaybun bu ngudda nawu minj Jews yiman ngurridjalwokbuyika
duninj. Dja wanjh bolkkime ngurrimwam darnkih dja karriraworrinj

karridjarrkymerranj God nuye bininj, dja mak karridjalmudkudjihminj nuye kore God.

²⁰⁻²¹ Ngad nawu God nuye bininj ngariyime yiman kayime kunwardde-wardde bu nungka kanbebbehmang dja kankurrmekurrme, kanhmarnbun yiman kayime kunrurrk nuye. Dja nawu apostles dja mak nawu prophets nakka wanjh bedda werrk benyngkihkurrmeng yiman kayime kunwardde kahyo manbu karayekwon wanjh yerreh kunrurrk karrangen.

Jesus Christ nakka wanjh yiman kayime kunwarddekorlh manwarddekuken kore kunrurrk kayirrangenh. Bu karribelbmerren kore nungka, wanjh kanbebbekarrme dja kankurrmekurrme ba bu karridjalkudjihmen yiman kayime kunrurrk manbu manrurrkdjamun djal nungka nuyekih nawu Kawohrn Rowk.

²² Ngudda warridj, ngudda nawu minj Jews bininj. Wanjh kuninjkuu God kanhmarnbun karridjarrkymerran walakkih walakkih yiman kayime kayirurrkdangen manbu kunrurrk kore kahyo God nawu Namalngmakkaykenh.

3

Paul Kabenmarnemulewan Jesus Kore Bininj Nawu Minj Jews Ephesians 3:1-13

¹ Ngaye Paul ngabimbun nahni djurra kondah kore jail ngabongdi. Ngaye ngamarnedurrkmirri nawu Christ Jesus ba bu ngurriwoybukwon nungka, ngudda nawu minj Jews bininj. Dja yikahwi birribuyika bininj nawu ngandibekang kore ngayolyolmi, wanjh kunu ngandiberlmey dja ngandikurrmeng kondah jail.

² Ngudda woybukkih korroko kandiwoyekang ngaye bu God nawu kandjalkongibun bulkkidj duninj dja nganmarnbom ngaye bu ngamarnedurrkmirrikenh ba bu marneyolyolme ngudberre bininj nawu minj Jews.

³ Kuninjkuu wanjh ngaye ngahyime. God kumwam nganbukhang kore mankarre nuye manbu warlkkahwarlkkayindi. Dja korroko ngabimbom kunyahwurd ngudberre bu kunmekbe nganmarnekurduyimerranj.

⁴ Kaluk bu ngudda ngurribimnan nahni djurra, wanjh ngurriwernhburrburkbekkan manbu mankarre warlkwarkkayindi kore Christkenh bu God nganbukhang.

⁵ God minj yingkihkarreyolyolmerrimeninj bininj nawu kunkareni birridarrkiddi. Dja wanjh bolkkime nawu Namalngmakkaykenh nganmarnemulewan ngadberre nawu God nuye bininj nawu apostles dja mak nawu prophets nuye.

⁶ Kuninjkuu wanjh mankarre warlkwarkkayindi manbu yongohyoy, wanjh bolkkime marneyime ngudberre. Ngudda bininj nawu minj Jews bu ngurriwoybukwon maninjmanu kunwok kunmak, wanjh kunukka ngurrikukbelbmerren rowk kore Christ Jesus. Wanjh bolkkime karrikukkudjihmen ngad bininj nawu Jews, dja mak ngudda nawu minj Jews, dja kaluk karridjarrkarrme kore God kanmarnewokkurrmerrinj kadberre, dja mak karridjarrkyikadjurren rowk nawu namakmak kore God kanberbbom kadberre.

⁷ God nganmarnedurrkmirri kore kukange ngardduk bu kundulkarre dorrengh nuye, wanjh nganmarnbom bu ngamarnedurrkmirri nuye, ba bu ngayolyolme nuye kunwok kunmak.

⁸ Ngaye nawu yiman ngamarladj, minj ngakuken bu bedberre bininj nawu nuye God. Ngaye yiman djal yeng! Dja God nungan wanjh nganmarnemakwam bu nganwong ngamarnedurrkmirrikenh nuye. Kuhni

bu bolkkime ngaye bengdayhke ngudberre bininj nawu minj Jews, ba bu ngurriwoybukwon Christ nawu kanwon kunmakmak kundjalwern duninj, kore minj ngad karriwernhburrrburrrknan nuye.

9 God nawu kahmarnbun yehyeng rowk, wanjh nganwong bu ngaye ngabenbukkabukkan bininj rowk ba bu kabirriburrrbun bu baleh God kahkurduyime bolkkime kore nuye mankarre manbu nungka yingkih-warlkkang kerrngehkenhni, dja kunkuyeng warlkkawarlkkayindi kore nungka.

10 God wanjh kahdjare kabenbukkabukkan nawu kabindiwohrnawohrnan angels, dja mak nawu birrikihkimuk nawu kabirriini kore heaven. Wanjh kahdjare bedda kandinan kadberre, ngad nawu yiwarrudj karrikarme, dja wanjh kabirriburrrbun bu God nungka kakarme kunmayali kunwernkenh rowk.

11 God karremarbob dja mahni mankarre nuye kahdjaldi munguyh munguyh kaluk nungka kadjalyakwon rowk kore kakarremarnbun. Kuhni rowk wanjh Christ Jesus nawu kawohrnan kadberre bimarnekurduyime.

12 Wanjh ngad karriwoybukwong Christ dja mak karrikukbelbmerrinj kore nungka, wanjh bolkkime minj karriyawoyhkele kore God dja wanjh kamak bu karrihre darnkih kore nungka.

13 Kunmekbekenh kunu ngaye ngahyime ngudberre, yuwn bu ngurrijingwarremen bu ngayekenh kunrayek dja kunyid. Bu ngaye kuninjkuwu nganmarnekurduyimerranj kore ngadjakbekkan, dja kuhni wanjh ngaye bidyikarme ngudda ngudberre, wanjh kunmekbekenh ngurrijingmagnin kore God.

*Paul Kayolyolmerren Bu Nungka Kahdi Yiwarrudj
Ephesians 3:14-21*

14 Kunmekbekenh kunu ngayolyolme ngudberre, wanjh ngaye ngabardurrukkurlhdan kore kumirrk nuye Ngabbard God.

15 Nungka nadjalkudji Kornkumo duninj nawu kanmarnbom dja kanbebbehwon kunngay duninj, ngad bininj rowk kore karribebbehmud karrihni kurorre dja mak kore kaddum heaven.

16 God nungka nawu namakkaykenh dja kakarme kunwern kunmakmak, wanjh ngaye ngadjawan ba bu nungka nuye Namalngmakkaykenh karrurrrmirri kore kukange ngudberre, dja mak ngunwon ngudberre kundulkarre ba bu ngurrikangemurrngayekmen.

17 Dja mak ngadjawan Christ bu kamre kahdjalni kore kukange ngudberre nawu ngurridjalwoybukwon nungka munguyh. Nungka wanjh ngunwernhmarnedjare, wanjh kunukka ngurriyimerran yiman kayime kundulk manbu kahdukdedjmaddjuhmiyindi kore kahboyoyome, dja wanjh ngurridjaldi munguyh kore ngurriburrrbun nungka ngundjal-marnedjare.

18-19 Dja kunu ngaye ngadjawan God bu ngunmarnbun ngudda ngudberre dja mak nawu birribuyika bininj rowk nawu God nuye, ba bu ngurridjarrkburrrkburrrbekkan kore Christ nungka ngundjalwernhmarnedjare bulkkidj duninj munguyh munguyh, yiman kayime kaddum dja kurorre dja kubolkwarlah rowk. Kaluk minj djalbininjbeh bu ngurridjalburrrbun. Dja mak ngadjawan God ba bu ngudda ngurrikubarlmiyindan dja ngurriyimerran yiman God rerrih.

20 Mah, wanjh ngadjare bu birriwern bininj kabirriburluburlume God! Bu nungka wanjh kahdurrrmirri kundulkarre dorrengh kore ngad

kukange kadberre. Nungka wanjh kadjalwernhkurduyime kunkimuk duninh kore minj karridjawan dja mak kore minj karriburrbun.

²¹ Dja mak ngadjare ngad nawu nuye bininj kore yiwarrudj karrini, wanjh karridjalburluburlume nawu God. Dja mak ngadjare birriwarlahkenh bininj rowk bu kabirriburluburlume God bu Christ Jesuskenh. Wanjh kunu birridjalburluburlumen God, bu bolkkime, dja mak djal-munguyh munguyh. Amen.

4

Bu Karrikukkudjihmen Kore Nawu Christ

Ephesians 4:1-6

¹ Ngaye ngabongdi kore ngandikurrmeng jail bu kunmekbekenh ngaye ngamarnedurrkmirri nawu Kawohnan Rowk. Wanjh kunu ngaye wernhbengdayhke ngudberre, bu ngudda wanjh ngurrini kunmak rowk kore God kadjare nawu ngunkayhmeng ngudberre.

² Wanjh yuwn bu ngurrikimukworren. Ngurridjalmodmikenhnin dja yeleyedj kore baleh yarrka ngurriyime. Kab ngurridjalma dburrimen kore ngurrimarnedjaremerren.

³ Dja mak ngurriwernhrohrokmen bu ngurridjalkudjihnin kore Namalngmak kaykenh ngunmarnbun bu ngunwon ngudberre kunmodmikenh nuye.

⁴ Ngad wanjh karriyimerranj bu karriburrkkudji kore nadjalkudji Namalngmak kaykenh karridjarrkkarrme. Dja God kankimey rowk kadberre ba karridjarrkburrbun nawu God kanmarnekurduyime kunmak rowk.

⁵ Nungka nadjalkudji nawu Kawohnan Rowk, dja ngad karridjarrkwoy-bukwon nuye. Dja mak karrikodjdjuhmeng kore nawu nadjalkudji nuye.

⁶ God bu nungka wanjh nadjalkudji dja mak nungka wanjh nawu nadjalkudji Kornkumo kadberre rowk ngad nawu karriwarlahkenh bininj. Nungka wanjh kadjalwohnan rowk kaddum dja kurorre, dja wanjh kahdurrmirri kore kadberre bininj rowk, dja wanjh kahdjalni kukange kadberre rowk.

Bu Christ Kanbebbewon Kore Karridurrkmirrikenh

Ephesians 4:7-16

⁷ Christ wanjh bu djal burudjang kanbebbewong rowk kundjalwern kunmakmak kore nungka djareminj.

⁸ Bu kuninjkuwu wanjh bimbuyindanj korroko kore djurra, wanjh kayime, "Bu nungka dolkkang wam kaddum, wanjh ben kang birriwern nawu nungka bendarrkidmey dja bendukkang. Dja ngad nawu nuye bininj, wanjh kanwong kunmakmak nawu kanhmarnekarrmi." [Psalm 68:18]

⁹ Kaluk kuhni baleh kakarremenmenyime bu kahyime, "Nungka dolkkang wam kaddum"? Wanjh kuhni kahyime bu kerngehenhni nungka koluy werrek kanjdji duninh kore kondanjkuwu kurorre.

¹⁰ Wanjh namekbe nadjalkudjiwi nawu kumkoluy, wanjh yawoyhdurndi kaddum bewh kore heaven, dja wanjh bolkkime nungka kadjaldi kaddum duninh kore kubolkwarlahkenh dja kunnngol rowk.

¹¹ Nungka nawu Christ, dja nungandeleng wanjh kanwong kundjal mak rowk.

Nawu Christ benmarnbom yikahwi bininj nuye bu birriyimerranj nawu apostles. Dja mak benmarnbom yikahwi birribuyika nuye bininj bu birriyimerranj nawu prophets. Dja mak yikahwi birribadbuyika wanjh benmarnbom bu birriyimerranj nawu kabirriyolyolme manbu kunwok

kunmak. Dja mak birribadbuyika benmarnbom wanjh birriyimerranjanawu bininj kabindinahnan dja nawu kabindibukkabukkan.

¹² Nungka kuninjkuwu kurduyime nguruk bu bu bininj nawu nuyeye God wanjh kabirridjarrkdurkmirrikenh dja kabirribidyikarmerren, bu bu Christ nuyeye kunburk wanjh kamurrngayekmen.

¹³ Kaluk bu ngad karrimayalikudjihmen kore karridjarrkwoybukwon, bu karriwernhburrbun Christ nawu Beywurd nuyeye God, wanjh kunukka karriyimerran yiman kayime wurdyaw nawu kamhdjaldjordmen wanjh kabalhyimerran kahdabbolkmen, wanjh kunukka karridjalyimerran bu karrirohrok yiman Christ rerrih.

¹⁴ Bu kunmekbe karriyimerran, wanjh minj mak karriyawoyhmayalياهوwurdmen kore kerrngehkenhni karridedjingmey karriwoybukwong. Dja wanjh karrimayalidjordmen bu bu karriwernburrbunkenh kundjalwoybuk kore Christkenh. Dja mak minj karriwokbekkan bininj nawu kanbukkan bu kanhkowekenh dja nawu kabirriwohkurrehkurren dja minj kabirrimulewan kore kunwoybuk.

¹⁵ Dja kunbuyika karriyime, bu karridjalmarneyimerrimen kundjalwoybuk kore karrihwernhmarnedjaremerren, dja mak karrikangemarnburren rowk bu bu karriyimerran yiman karrirohrok nawu Christ. Ngad nawu Christ nuyeye bininj, wanjh yiman kayime nuyeye kunburk. Dja nungka nawu Christ yiman kayime kunkodj yerreh wanjh kunu kanmarnewohnan ngad nawu kunburkkilehkelekbubuyika nuyeye.

¹⁶ Ngurriburrbun manbu kadberre kunburk kakarreme kunkilehkelekbubuyika manbu kabirriraworren wanjh kabirrimurrngayekworren. Wanjh karohrok bu ngad nawu karribelbmerrinj bu karriyimerranjan yiman kunburk nuyeye Christ, wanjh karriyikarmerren rowk bu karrimarnedjaremerren. Wanjh kunmekbekkenh kunu ngad wanjh bebbebeh karridjarrkdurkmirri kore nungka.

*Karrikangeborledkerren Kore God Nuyeye
Ephesians 4:17-32*

¹⁷ Mah wanjh! Ngaye kuhni wernhbengdayhke ngudberre kore kungey nuyeye nawu Kawohnan Rowk, ngurringurdmen kore ngurrikurduyime yiman kayime bininj birribuyika nawu minj kabirriwoybukwon God. Nawu bedda wanjh birrimayaliyak dja minj njale kabirriburrbun.

¹⁸ Kuhni wanjh kurduyimerranjan bedberre bu birrikangerayekni nuyeye God. Dja wanjh birrimayaliburlerranjan dja mak birridjalmayaliyakminj. Wanjh kunukka minj kabirridarrkid kore God kabendarrkidwonkenh.

¹⁹ Wanjh bedda yimankek birriyemiyakminj kore kabirrikurduyime kunwarre. Bedda kabirridjare bu munguyh kabirriwernhkurduyime kundjalwarre bu bininj dja daluk kabirrihwohdjirdmarrenkenh. Bu bedda kabirrimayaliwarreworren dja kabirridjaldjare munguyh kabirridjalkurduyime kunwarre kunwern.

²⁰ Ngudda wanjh kerrngehkenh minj ngurriwernhborlhmeninj kuninjkuwu kunwarre bu ngurribekkan kore Christkenh.

²¹ Ngudda woybukkih ngurriwokbekkan nawu Christ bu ngundibukkang nungkahkenh kore ngurrimey kunwoybuk nuyeye Jesus.

²² Ngudda wanjh kerrngehkenh ngurridarrkiddi kore kunwarre. Ngundibukkang kore yiman ngurridjalmayaliwerrinj nawu yiman kayime ngurrikangekare kore korroko ngurrikangewarreworrij bu ngurridjalbekkarrinj ngurrikowerrinj kore ngurridjaldjareni kunwarrekenh.

²³ Dja wanjh bolkkime ngurribawo God nungan ngunkangekerrngehme dja ngunmayalikerrngehme ngudberre.

²⁴ Dja ngurriborlhmeng kore ngurrimarnburren bu ngurrikerrngehmen kore God nungan ngunkangekerrngehme ngudberre ba bu ngurriyimmeran yiman kayime nungka, dja ngurridjalkurduyime kore nungka ngunmakwan bu ngudda woybukkih djal nuyekih bininj.

²⁵ Yuwn bu mak ngurriwokkurren munguyh kore ngurridi. Ngad nawu Christ nuye bininj wanjh karrimarneyimmerimen kunwoybuk dja wanjh ngad kunu karriburkkudjiwi rowk kore nungka.

²⁶ “Bu ngudda yiyiddung, yuwn bu yikurduyime kore kunwarre. Dja yuwn bu yidjalkangeyidbabi bu yiyiddung munguyh. Kaluk bu karrungyibme, wanjh ngurridjalbawo.” [Psalm 4:4]

²⁷ Dja yuwn bu ngurrikimang nawu Namarnde Duninj bu ngurridi.

²⁸ Ngudda yikahwi nawu kerrngehkenhni ngurridjirdmangi njalehnjale, wanjh ngurribawo, dja ngurridedjingma ngurridurrrkmirri kunbidwi ngudberre, ba bu ngurrimang kunwardde kore kunmakkenh. Kaluk wanjh ngurriweykan bedberre kore birribuyika bininj nawu yiman kayime birrimarladj nawu minj birrikuken.

²⁹ Dja yuwn bu mak kundjen kunwarre ngurriwokdi, dja kunwok kunmaknin ngurridjalyimerren, ba bu ngurribidyikarmerren dja ngurrimurrngayekworren yikahwi ngudberre bininj nawu birrinjilngwarre dja nuk nawu kunrayek kabenmarnewernmerren.

³⁰ Nawu God nuye Namalngmakkaykenh nakka wanjh kani kukange ngudberre kore ngudmandeleng ba bu ngunwernhkarrme kaluk bu kunbarnangarra kore God ngunbebke ngudberre kore kunwarrekenh. Wanjh yuwn bu ngurrijilngwarren namekbe nawu Namalngmakkaykenh.

³¹ Yuwn bu ngurrijilngwarren, dja yuwn bu mak ngurriyiddurren dja ngurriwirriherren. Yuwn bu mak ngurringarlahmikarren dja mak ngurribenyolyolmerren. Dja yuwn bu ngurridjalburrbun bu ngurriwarworren.

³² Dja wanjh burrkyak. Wanjh ngudda ngurridjalkongiburrimen dja ngurrijilngmarnburrimen. Ngurrimarnebengmidjdangerrimen munguyh karohrok bu kore God nungka ngokko ngunmarnebengmidjdanj ngudberre kore ngurribelbmerrinj nawu Christ.

5

Karringunjrika God Nawu Kanbornang Dja Kanmarnedjare Kadberre Ephesians 5:1-20

¹ Mah wanjh, bolkkime ngudda wurdwurd nuye God nawu ngunmarnedjare bulkkidj duninj ngudberre. Wanjh ngurriyimerrangimen yiman nungka. Dja ngurridjalkadju yiman kayime wurdwurd kabirrikadjung nawu kornkumo bedberre.

² Dja munguyh ngurridjalmarnedjaremerrimen yiman bu kayime Christ kanmarnedjareminj kadberre rowk. Kaluk nungka wanjh kanjkurrmerrij bu doweng kadberre kore kumirrk nuye God, wanjh kuhni bu God njilngmakminj duninj dja kanmarnebengmidjdanj kunwarre kadberre.

³ Yuwn bu mak ngurriyime kunwarre bu ngurribidyikadjurren bininj dja daluk. Dja mak yuwn bu ngurrikodjkuluwarren dja mak yuwn yehyeng ngurrihdjalmanjngun munguyh. Kaluk kunmekbe kundjalwarre duninj, dja yuwn ngurriburrbun bu ngurriyolyolme kunmekbekenh. Ngudda wanjh God nuye bininj, dja kunmekbekenh kunu minj ngurriya-woyhkurduyime.

⁴ Dja yuwn bu ngurriyolyolme kore kunwarrewarre, dja minj mak ngurriwokmarlellhmarlellhmarren bu ngurrimarneyimerren kore kunwok kunwarre. Bu kuninjkuwu minj kunmak kore ngudda ngurrimarneyimerren. Wanjh kunbuyika ngurriyimen, bu munguyh ngurridjalmanjbu God.

⁵ Bu kuhni ngudda ngurrihburrbun kore kunwoybuk. Wanjh bininj dja daluk nawu kabenemarneyimerren kunwarre munguyh, dja mak nawu kabirrihburrbun kunwarre, wanjh minj kabirringimen kore God dja Christ berrewoneng kore kabenewohrnan. Dja nawu bininj kadjalmanjngun yehyeng rowk nuye nabuyika bininj, nakka wanjh yiman kabimarneboddan namekbe nawu kadjalmanjngun, kaluk namekbe bininj minj kangimen kore God dja Christ berrewoneng kore kabenewohrnankenh.

⁶ Wanjh woymbukkih, God nungka kadjalwernhyiddung kabendung nawu bininj kabirrikurduyime kuninjkuwu kunwarre. Dja bu nawu bininj kabirridjare ngundikowe bu kabirriyime kamak bu ngurriyime kunmekbe kunwarre rowk, wanjh nakka yuwn bu ngurrbenbekkabekkan.

⁷ Dja yuwn bu ngurriraworren birrimekbe bininj.

⁸ Bu kerrngehkenhni ngudda yiman ngurridi kore kubolkmunun. Dja bolkkime wanjh ngudda ngurriyimerran nawu Kawohrnan Rowk nuye bininj. Wanjh ngurridjalkurduyimen kunmak kore nungka ngunhkangewolkan ngudberre kore ngurrihni.

⁹ Bu ngunkangewolkan ngudberre, wanjh kunukka ngurriyimerran yiman kayime kundulk manbu kakarrme manme manmakmak. Wanjh kunmekbe ngurrikarrme kunmakmak dja kunwoybuk, dja ngurridjalkurduyime kunmak munguyh.

¹⁰ Kab ngurridjawa nawu Kawohrnan Rowk ba bu ngurriburrbun bu ngurrinjilngmarnbunkenh nuye.

¹¹ Dja nawu bininj kabirridi kore kubolkmunun wanjh nakka kabirrikurduyime kunwarre. Kaluk bu kunmekbe kabirrikurduyime wanjh minj kunukka kunmak kamarnbuyidan. Dja yuwn mak ngurrbenkadjung dja ngurriraworren bedberre dorreng. Dja ngaleng ngurrbenmulewa kurobbe bu kunukka kunwarre kabirrikurduyime.

¹² Kunmekbe kunwarre bu bedda kabirrikurduyime manmolk, wanjh kundjalwarre duninh. Bu ngad minj mak ngarriwernhyolyolme, wardi kunukka karriyemikarren.

¹³ Bu karribolknan kore kabolkwolkayindi wanjh karrinan kore njale bu kunmak dja kore kunwarre.

¹⁴ Bu kambolkwolkayidan, wanjh karrikuknan njalenjale. Kumekbekenh yuwu bininj kabirriyime, "Yirrolkka, ngudda nawu yihkeyo! Wanjh jindolkka kore yirrowengbeh! Kaluk Christ ngunmarnebolkwolkan!"

¹⁵ Mah, wanjh ngurrinahnrarimen kore ngudda ngurrikurduyime. Yuwn bu ngurriburrbun yiman birribuyika bininj nawu birrikodjku-luwarre. Dja ngurridjalkurduyimen kore bininj yiman kayime nawu birrikodjkulumak.

¹⁶ Yuwn bu munguyh ngurribolkmang, dja ngurridjalmarnedurrkmirri nuye God munguyh. Dja kuhni wanjh bolkkime bu kunwarre kahwernerren bu kamhhebmerren.

¹⁷ Wanjh yuwn bu mak ngurribalkodjku-luwarremen, dja munguyh ngurriburrrkburrbekka kore God kadjare.

¹⁸ Dja yuwn bu ngunkangebarlke manbu manbang manbu ngunmarnbun ngurriworromkan dja ngurrikurduyime kunwarre. Dja ngaleng ngundjalkangebarlkemen God nuye NamaIngmakkaykenh.

19 Dja bu ngurriwokdi ngurrimarneyimerrimen kunmakmak kore ngurriwayini Psalms dja mak hymns dja mak mankong manbu God ngunwon. Ngudda ngurrimarnewayini kunkange dorreng kore nawu Kawohrn Rowk.

20 Munguyh ngurridjalyimanjbu yehyeng rowk God nawu Kornkumo kore kungey nuye Jesus Christ nawu Kadjalwohrnan Rowk kadberre.

*Bu Karridjarrkmarrkmang Nawu Christ
Ephesians 5:21-33*

21 Yuwn bu ngurribebbehdokmiwerren, dja wanjh ngurrimarrkmarrimen kore ngurridjalmarrkmang nawu Christ.

22 Ngudda nawu ngalbihbininj kobeng, wanjh ngurribenwokmarrkma nawu nabihbininj kobeng ngudberre yiman bu kayime Christ ngurriwokmarrkmang.

23 Dja nawu nabininj kobeng nakka kabiwohrnawohrnan ngalbu nuye ngalbininj kobeng karohrok bu Christ kanmarnewohrnan ngad bininj rowk nuye nawu kangehengkeng, dja kanmarnbom bu karriyimerranj yiman nuyekih kunburk. Ngad wanjh nuye Church, manbu yiwarrudj duninj.

24 Ngad bininj dja daluk kore yiwarrudj, wanjh karriwokmarrkmang munguyh nawu Christ, wanjh kunmekbe kundjalkudjiwi karohrok bu ngalbihbininj kobeng munguyh kabirriwokmarrkmang nabihbininj kobeng bedberre.

25 Ngudda nawu nabihbininj kobeng, wanjh ngurringundjika nawu Christ. Ngurribenmarnedjarenin ngalbihbininj kobeng ngudberre wanjh kadjalrohrok yiman Christ bu kanmarnedjareninj kadberre, dja mak kanmarnekanjkurmerrinj ngad nawu karriyimerranj nuye yiwarrudj manbu Church.

26 Kuhni nungka kurduyimeng bu kunmekbekenh djareni kankangemarnbom ba bu karrikurduyime kundjalmak nuye. Bu karriwokwoybukwong nuye kunwok kunmak, wanjh kunu yiman kayime kankangedjirridjombon kukku dorreng.

27 Dja mak Christ kadjare ngad nuye bininj bu karriyimerran yiman kayime ngalbininj kobeng ngalbu ngalkukmakkaykenh nuye. Dja mak kadjare bu minj karriyawoyhkarme kunwarre kore kukange kadberre, dja wanjh karridjalkangemaknin nuye.

28 Wanjh kunmekbe kadjalkudjiwi nawu nabihbininj kobeng bindimarnedjarenin ngalbihbininj kobeng. Dja mak bindidjalnahna yiman bu kayime bedmandeleng kabirrikuknaharren. Bininj nawu kabimarnedjare ngalbininj kobeng bulkkidj, wanjh yiman kayime nungan bu kahmarnedjaremerren.

29 Bininj minj kabirrikukwidnarren manbu kunburk bedberre. Dja wanjh manme kabirriworren dja kabirriburrknaharren. Wanjh kunmekbe kadjalrohrok bu Christ kanmarnekurduyime ngad bininj nawu nuye yiwarrudj duninj.

30 Dja ngad kunu wanjh karrikukbelbmerrinj dja karriyimerranj nungka nuye kunburk.

31 Ngurriburrbu kore kayime, "Wanjh kunmekbekenh kunu bininj kabenbenebawon ngalbadjan dja kornkumo nuye, dja wanjh kabimarnekkurmerren kabenekukbelbmerren ngalbininj kobeng nuye bu yiman kabeneburkkudjihmen." [Genesis 2:24]

32 Kuhni bu ngaye ngahyime kundjalwerhkimuk duninj kore kahwarlkkayindi. Wanjh kadjalrohrok yiman Christ dja Church nawu nuye yiwarrudj duninj.

³³ Bonj, wanjh ngaye ngadjare bebbehmarneyime ngudberre. Ngudda nawu binihbininj, ngurrbenmarnedjarenin ngalbihbininj kobeng ngudberre yiman ngudman bu ngurrimarnedjaremerren. Dja nawu ngudda ngalbihbininj kobeng ngurrbenwokmarrkma nawu nabihbininj kobeng ngudberre.

6

Karribebhekkurduyimen Kunmak Kore Nawu Kawohnan Rowk Ephesians 6:1-9

¹ Ngudda nawu wurduhwurdwurd, wanjh ngurrbenwokmarrkma ngalbabadjan dja kornhkornkumo ngudberre ba kunu ngurriwokmarrkmang nawu Kawohnan Rowk. Kuninjkuu wanjh kunmekbe mandjad ngurrikurduyimen nuye.

²⁻³ Ngudda wanjh ngurridjalburrbun kore mankarre kahyo manbu kayime, "Ngurrbenwokmarrkma ngalbabadjan dja kornhkornkumo ngudberre. Bu ngudda ngurrbenwokmarrkmang, wanjh ngunmarnekurduyimerran kunmak dja ngurrini kunkuyeng kore kondanjkuu kunred." [Exodus 20:12] Maninjmanu mankarre wanjh manyungkih manbu kanarnewokkurrmerren bu kanberrebbun kadberre.

⁴ Dja ngudda nawu kornhkornkumo, yuwn bu ngurrbendjurrkdjurkron nawu ngurrbenbornang bu munguyh kabirriyiddungkenh. Dja ngaleng bu ngurrbendjordmiwe, wanjh ngurrbenwernhbukkabukkan dja ngurrbenbidiyikarmen ba bu kabirriwokmarrkmang nungka nawu Kawohnan Rowk.

⁵ Ngudda bininj nawu birrikihkimuk ngundihbongkarrme nawu ngurrbenmarnedurrkmirri yiman slaves kondanjkuu kurorre, wanjh ngurrbenwokmarrkma mandjad duninj nawu ngundihkarrme, yiman bu kayime Christ ngurriwokmarrkmang. Dja yuwn bu ngurrbenkowe bu ngurridjalkurren.

⁶ Ngudda munguyh ngurridjaldurrkmirrin dja yuwn bu nawu ngunmarnewohnan ngunkurdunan bu ngunburlume ngudberre. Dja ngurridjaldurrkmirrin kungudj dorreng ngudberre kore nawu God kadjare. Kuninjkuu munguyh ngurridjalkurduyimen dja ngad wanjh Christ kanhkarrme kadberre rowk bu karrihmarnedurrkmirrikenh yiman slaves nuye.

⁷ Ngurridjalmaknin kore ngurrbenmarnedurrkmirri nawu bininj, yiman kayime bu ngudda ngurrimarnedurrkmirri nawu Kawohnan Rowk.

⁸ Kuhni bu ngudda wanjh ngurrikarreburrbun bu kuninjkuu, nawu Kawohnan Rowk wanjh yiman kayime kabenwon namakmak nangale bininj nawu kabirrikurduyime kunmak nuye. Bonj, nawu Kawohnan Rowk kabiwon namakmak bedberre rowk, yikahwi nawu yiman kayime kadjaldurrkmirri kore bininj kabirrikarremulewan, dja mak karohrok bininj nawu kahbondi dja kadjalkurduyime kunmakkenh.

⁹ Dja ngudda bininj nawu ngurrbenhkarrme nawu ngundihmarnedurrkmirri, ngudda warridj ngurrbenmarnekurduyimen bedberre mandjad nuye God. Dja yuwn bu ngurrbendjaldung. Ngurriburrbu bu nawu Kawohnan Rowk kaddum kore heaven, nungka wanjh ngundjarrkkarrme ngudda dja bedda. Dja nungka ngundjadme ngudberre bu djald mandjad, karohrok bu kabendjadme bininj ngudberre.

*Bu God Yiman Kankukdjongbun Ba Bu Karribun Nawu Namarnde
Ephesians 6:10-18*

¹⁰ Kuninjkuwu wanjh kunwok ngadjare ngawohmulewan ba bu ngay-
iburnbunkenh kore ngahyolyolme ngudberre. Wanjh ngudda ngurrikuk-
belbmerrinj nawu Kawohrnan Rowk, dja bolkkime ngurriwernnhkarrmen
nuye kundulkarre ba bu ngurrimurrngrayekmen dja kamak ngurridjaldi.

¹¹ God ngunwong ngudberre kunmadj nawu ngurridjongburrenkenh bu
nawu Namarnde Duninjh kadjare ngunbun. Wanjh naninjnanu kunmadj
ngurridjongburrimen rowk, ba bu ngurridjaldi dja ngurriyurrhke kore
nawu Namarnde Duninjh ngunbun.

¹² Ngurriburru ngad minj karriburren djal bininj deleng, dja ngad kunu
karriburren namardebubuyika nawu kundulkarre kabirrikarrme, dja
nawu kabindimarnewohrnan bininj nawu kabirrihni kondanjkuwu kore
kubolkmunun. Dja mak karriburren warridj nawu birrimalngwarre kore
kunggol kaddumkah.

¹³ Kunmekbekenh kunu ngurridjongburrimen kunmadj rowk nawu
ngurriburrenkenh nawu God ngunwong ngudberre, ba bu kunmekbe
kunbarnangarra bu kunwarre kambembe ngudberre, wanjh kunu ngudda
ngurridangen dja minj mak ngungudjyurrhke. Wanjh bu kayakmen
wanjh ngudda ngurridjaldi kamak kumekbe.

¹⁴ Mah, wanjh ngurridjaldin dja minj njale ngunrokayhwe. Ngurriw-
ernhkarrmen kunwoybuk duninjh nuye God, yiman kayime ngurringard-
modukkarren nawu kunngadmokenh. Dja mak God ngunmakwan ngud-
berre, wanjh kunu yiman kayime ngurriberrekalkbarrkbuyindi nawu
wirmurrng duninjh.

¹⁵ Bu ngudda ngurrikarrme kunwok kunmak manbu kayolyolme God
nuye kunmodmikenh, dja munguyh ngudda ngurrbenmarneweykan
nawu bininj, wanjh kunukka yiman kayime kundengekenh nawu ngurri-
dengedjongbuyindi ba bu minj ngurridengeyirrebme kore ngurriburren.

¹⁶ Dja mak kunbadbuyika marneyime manbu kore mankarrekuken
kahyo. Bu ngurriwernhwoybukwon God, wanjh yiman kayime ngur-
rikarrme kubid ngudberre nawu ngurrikandenamerrenkenh. Wanjh
nawu Nawarre Duninjh minj mak ngunyame bunarra nuye manbu
manbirluwoldjen dorrengh.

¹⁷ Dja mak ngurriburru bu God ngungehkenh, wanjh yiman kayime
nungan ngunwong nawu ngurrikodjdjongbuyindikenh ngunkodjbalhme
ngudberre. Wanjh munguyh ngurrikodjdjongbuyindin.

Nawu Namalngmakkaykenh ngunwon ngudberre manbu kunwok nuye
God. Kaluk maninjmanu kunwok yiman kayime mandjawak bu karribur-
renkenh nawu Namarnde Duninjh. Wanjh ngurrima dja ngurrikarrmen.

¹⁸ Dja mak nawu Namalngmakkaykenh ngunbidiyikarrme bu ngurridi yi-
warrudj, dja wanjh munguyh ngurridjaldin yiwarrudj kunwernkenh kore
God dja mak ngurridjawadlawan. Mah, dja ngurridjalburru munguyh
dja mak ngurridjalbengyirrin. Yuwn bu ngurriwarnyakmulewarren. Dja
mak munguyh ngurrbenmarnedin yiwarrudj nawu bininj rowk nuye God.

Paul Yakwong Bimbom Nahni Djurra

Ephesians 6:19-24

¹⁹ Dja mak ngaye kandidjalmarnedin yiwarrudj. Ngurridjawa God bu
nganwon kunwok nuye ba bu ngadjalyolyolme, dja minj mak ngakele bu
munguyh ngabendjalmarneyime bininj kore God nuye kunwok kunmak
manbu kore yingkihwarlkkahwarlkkayindi.

²⁰ Nungka God nganmunkeweng ngaye bu ngare kubolkbubuyika,
ba bininj ngabenhbukbukkan manbu warlkkahwarlkkayindi kore
Christkenh. Wanjh kunmekbekenh kunu ngaye bolkkime ngahdjald-
dukkayindi kore prison bu wirmurrng dorrengh. Dja wanjh ngurridjawa

God ngardduk ba bu ngankangerayekwon kore ngabenmarneyime bininj. Kuhni wanjh nganwong ngakarrme bu ngamarnedurrkmirri.

²¹⁻²² Dja ngaye wanjh ngamunkewe nawu Tychicus ngudberre ba bu ngunbengdayhke ngudberre kore ngaye baleh ngakurduyime kondanjku kore ngahni. Nungka nawu ngaye nganedanginj kore Christ, dja ngadjalmarnedjare. Nungka munguyh nganbidyikarrme kore nganemarnedurrkmirri nawu Kawohrnna Rowk. Nungka wanjh ngunmarneyolyolme ngudberre ba bu ngunkangemarnbun dja ngurrinjilngmakmen. Kunmekbekenh ngaye ngamunkewe nahni bininj ngudberre.

²³ Nawu ngaye karridangerrinj, kandiwozbekka. Ngadjare God nawu Kornkumo dja Jesus Christ nawu Kawohrnna Rowk bu ngundiwon ngudberre kunmodmikenh dja ngundibidyikarrme ba bu ngurrimarnedjaremerren kore ngurriwernhwoybukwon nawu God.

²⁴ Dja ngadjare God kabenmarnekurduyime kunmak bu kabenkongibun duninj birrimekbe bininj nawu kabirriharnedjare Jesus Christ nawu kawohrnna kadberre, bu minj mak kabirringurdke bu munguyh munguyh.

Philippians

Paul Bimbom Bedberre Nawu God Nuye Bininj kore Kunred Philippi Philippians 1:1-2

¹ Ngaye nawu Paul ngabimbun nahnı djurra. Dja nganedjarrkdi nawu Timothy kondah, nawu ngad nganebokenh nganedjalmarnedurrkmirri nuye Christ Jesus. Ngaye ngabimbom ngudberre bininj nawu God nuye, ngudda nawu ngurribelbmerrinj Christ Jesus dja ngurrihni kore kunred Philippi. Nahnı djurra bedberre warrıdj birrimekbe bininj kore ngudda nawu kabirriwohrnahwohrnan* dja mak nawu kabirridurrkmirri kore yiwarrudj ngarre.

² Ngaye ngadjare God nawu karriyime Ngabbard, dja mak Jesus Christ nawu Kawoornan Rowk bu ngundıdjalkongibun dja mak ngundiwon kunmodmikenh.

Ngaye Paul Ngahdjaldi Yiwarrudj Ngudberre Munguyh Philippians 1:3-11

³ Ngaye hurrbun ngudberre munguyh dja wanjh ngahdjalmarnıj bun God bu nguddakenh ngudberre.

⁴ Bu ngaye ngahdı yiwarrudj ngudberre, wanjh ngadjalnıj lıngmak munguyh.

⁵ Yoh, ngad karrıdjarrkkarrme manbu yiwarrudj bu ngad wanjh karrıdjarrkyıkadjurren mahni kunwok kunmak dunınjh kore kerrngehkenhni dja mak bu bolkkime munguyh.

⁶ God dedjıngmey kurduyımeng kundjalmak dunınjh ngudberre, wanjh nungka kayakwon kore kadjaldurrkmirri kukange ngudberre kore kunbarnangarra bu Christ Jesus kamdurndeng kabolkyıme. Ngaye kuhni ngaburrbun bu djalwoybukkıh dunınjh.

⁷ Ngaye djalburrbun ngudberre rowk bu kunıjnkunukenh, kore kuhni mandjad dunınjh. Kunmekbekenh ngudda munguyh karrme ngudberre kore kukange ngardduk. God kankongibun kadberre munguyh, ngudda dja mak ngaye. Bolkkime ngaye wanjh ngahrurrkkendi kore prison, dja yıkahwi mak ngaye ngabenmarnemulewan bininj manbu kunwok kunmak dunınjh dja ngabenbukkabukkan kore kunmekbekenh ba bu bedda kabirriwoybukwon. Bonj, dja wanjh kaddjarrkberre rowk.

⁸ Ngaye wanjh marnedjare ngudberre yıman kayıme Christ Jesus kanmarnedjare. God ngankangenan kore kunwoybuk ngayıme.

⁹ Bolkkime ngaye ngahdjaldi yiwarrudj dja ngahdjaldjawan God bu kunmekbekenh ba nungka ngunmarnbun ngudberre bu ngurrimarnedjaremerren bulkkıdj dunınjh, dja warrıdj ngurriwerınhborlhmen nungka, dja mak bu ngurridjalburrbun bu djal mandjad.

¹⁰ Dja ngadjawan bu nungka ngunmarnbun ba bu ngurridjalburrbun kore kunmayalı mandjad. Wanjh kunukka kalukburk bu kabolkyımerran Christ nuye kunbarnangarra, ngudda ngurridjalmaknı kore nungka, dja mınj ngunwelengname bu njalehnjalekenh.

¹¹ Dja mak Jesus Christ ngunmarnedurrkmirri ngudberre bu ngunmarnbun ngurridjalmak nawu bininj kore ngurridjalkurduyıme kunmak, ba

* **1:1** Yıkahwi bininj kabındıngeybun bininj nawu kabındıwohrnan birrıbuyıka kore yiwarrudj "bishop".

bu birribuyika bininj rowk kabirriyime bu God nawu namakkaykenh duninjh, dja kabirriburlume nungka.

*Bu Paul Kayolyolmerren Kore Kahrurrkkendi Manbu Prison
Philippians 1:12-19*

¹² Ngardduk nawu karridangerrinj, ngaye ngadjare ngudda ngurribur-rbun bu kuninjkunukenh. Ngaye bu kunwarrekenh nganmarnekurduy-imerranj ngaye dja bu ngandikurrmeng kore ngahrurrkkendi manbu prison. Dja bonj, bu ngahdi kondah wanjh manbu kunwok kunmak nuye Jesus kahdjalwarlahmen!

¹³ Ngayime bu birriwern bininj ngandiwobekgang ngaye bu bolkkime ngahdi. Djamun nawu kabirrirurrknahnan kondah kore kunrurrkkimuk, dja mak nawu birribuyika bininj rowk, wanjh kabirriburrbun bu ngaye ngandikukkang wirlmurrng rayek duninjh dorrengh kunmekbekenh bu Christkenh ngabenmarnemulewan birriwern bininj.

¹⁴ Dja mak birriwern bininj nawu ngad karridangerrinj kore nawu Kawohrnun Rowk, bedda kabirriburrbun bu ngaye ngahdukkayindi, wanjh kabirrikangebukmen ngayekenh dja kabindimarnemulewan bininj bu Jesuskenh, minj mak kabindikengehme.

¹⁵ Kumekbe nawu yikahwi bininj birribuyika kabindimarnemulewan bu Christkenh kore minj kunmakkenh, kunubewu bedda kabirrikirworren bu ngayekenh dja mak kabirridjaldjare yimankek ngandiyurrhke ngaye. Dja yikahwi nawu birribuyika kabirrimulewan nawu Christ kore kunmakkenh.

¹⁶ Bedda wanjh ngandimarnedjare ngaye, dja kabirriburrbun bu God ngankurrmeng kondah ba bu ngamarnemulewan kunwok kunmak duninjh kore ngabenbukkabukkan nawu birriwarlahkenh bininj rowk.

¹⁷ Birrimekbe bininj nawu kabirrihmulewan bu minj kunmakkenh, wanjh kabirriyime bu djal bedmandeleng kore bedberrekih ba bu kabirriburlumerren. Bedda mak kabirridjaldjare ngandimarnekarrerayekwon ngaye bu ngarrukkayindi wirlmurrng dorrengh kondah.

¹⁸ Bonj. Marneyime ngudberre. Ngaye ngadjalnjlilngmak duninjh bu kunmekbekenh nawu birriwern bininj kabirrimulewan bu Christkenh. Yikahwi kore kunmakkenh, yikahwi kabirriyime kore kunwarrekenh. Dja bonj! Bu bedda kabirriyolyolme nawu Christ, wanjh kunwernhkuken, dja ngadjalnjlilngmak.

Yoh, dja ngaye ngadjalnjlilngmarmarr munguyh.

¹⁹ Ngaye ngaburrbun bu ngudda kandimarnedi yiwarrudj, dja mak nawu Namalngmakaykenh nuye Jesus Christ nganbidyikarme ngaye. Wanjh kumekbebeh, ngaye ngadjalburrbun kunmak nganmarnekurduy-imerran, dja ngabongyerrkme.

*Bu Ngandibun Ngarrowen Nuye Jesus, Wanjh Kunukka KundjalmaK
Philippians 1:20-26*

²⁰ Kore kahdokme nawu njalehnjale ngadjare, ngaye munguyh ngadjalburrbun kore kuninjkunukenh. Bu ngaye ngahdjaldarrkiddi, ngaye munguyh ngahdjare ngahkurduyime kore kunmakkenh nuye Christ. Bu bolkkimekenh, ngaye wanjh ngadjare bu ngakangebukmen dja mak minj ngakele bu ngabenmarnemulewan nungkakenh. Bu ngaye ngadjaldarrkid dja mak yiman bu ngarrowen, wanjh ngaye ngabendjalmadbun bu bininj kabirriburlume Christ.

²¹ Dja bu ngaye ngadjaldarrkid, wanjh kunukka ngaye munguyh Christ nganebelbmiyindi. Dja bu ngarrowen, wanjh kunukka kunwernhmk duninjh.

²² Bu yiman kunburrk ngardduk ngadjaldarrkid, wanjh kuhni ngaye ngadjalkurduyime kunmak nuye kore Christ. Nawu ngaye ngadjalnjlngmak bu yiman ngarrarrkid dja mak bu ngarrowen. Adju, baleh ngadjare nganmarneyimerran?

²³ Ngaye minj ngadjarrngbun bu baleh manbu karrokme kore ngaye ngardduk. Ngaye ngadjaldjare ngabawon mahni kundarrkid dja ngare nganeni nawu Christ. Kunmekbe wanjh kunukka kundjalmak duninj.

²⁴ Dja ngaleng bu ngadjaldarrkid wanjh kunukka ngaye ngarrurrkmirri kore bidyikarrme ngudberre.

²⁵ Nakka kunwoybuk, dja kunmekbekenh kunu ngaye ngaburrbun bu ngadjaldarrkiddi bolkkime ba bu kunmekbekenh karridjarrkni rowk ba bu karridjarrkmurrnggrayworren kore ngurriwoybukwon Jesus dja bu kuhni ngurrimarmarr dorreng.

²⁶ Wanjh kaluk bu ngaye ngamre yawoyhnan ngudberre, wanjh ngudda ngurriwerhnljngmakmen duninj kore ngurribelbmerren nawu Christ Jesus bu nganmarnekurduyimerran ngardduk.

Ngurrikurduyime Mandjad Nuye Jesus

Philippians 1:27-30

²⁷ Kububuyika kunwern kambebme kadberre, dja njalehnjale ngunmarnekurduyimerran. Bonj, wanjh ngurridjalyime kunmakkenh kore maninjmanu kunwok kunmak manbu Christkenh. Kuhni wanjh ngaye bu minj ngamre yikan, dja ngaleng djalwobekkan ngudberre bu djarehbeh, wanjh yiman ngudda ngurrihni kunmak. Wanjh ngaye burrbun ngudberre nawu ngudda ngurrihdjalmurrnggrayek kunmekbekenh ngudda ngurriyimerran yiman ngurridjalkangekudjihni dja mak ngurridjarrk-mayalirohroki bu ngurridjaldjarrkyime kore ngurrbenmarnemulewan bininj rowk manbu kunwok manmak duninj kore kabiyolyolme Jesus.

²⁸ Dja minj ngurrbenkengehme bininj nawu kabirridjare ngundingur-dke. Kaluk bu bedda ngundinan ngudda ngurrikeleyak, wanjh bedda kabirriwohburrbun God nungan kabenbularrbun bedberre, dja mak nungka ngungehke ngudberre. God kakurduyime rowk.

²⁹ God nungka nawu ngundjalkongibun dja mak kunmak ngunmarnekurduyimeng ngudberre, dja ngunmarnbom ngudberre bu ngurriwoybukwong kore Christ, dja mak ngunmarnbun ngudberre bu ngurridjakkakkan yiman kayime Christ nuye. God wanjh kuhni kakurduyime bu Christkenh.

³⁰ Yoh, ngudda nawu ngurringalke kunwern kunyid bu kamarnbuyin-dan dja mak manbu karohrok ngaye ngahkarmi. Ngudda kandi-wobekkan bu kerrngehkenhni ngakarmi kunwern kunyid. Dja mak ngurrihdjalburrbun bu ngaye bolkkime ngahdjalkarrme maninjmanu kunyid.

2

Bu Ngurribelbmerren Christ, Wanjh Ngurrimarnedjaremerrimen

Philippians 2:1-4

¹ Ngudda nawu ngurribelbmerrinj Christ, wanjh nungka ngunkange-marnbom. Dja mak nungka ngunmarnedjareminj, dja kunu ngun-njlngmarnbom ngudberre. Ngurridjalkarrme rowk nawu Namal-ngmakkaykenh dja wanjh ngurribelbmerrinj kore ngurrikudjihminj. Ngudda mak ngurrikongiburren dja ngurridjalyimerren bu kunkongi dorreng kore ngudmandeleng.

² Mah wanjh, ngaye ngadjalmarrmarr duninj bu ngudda ngurridjar-rkwokmarnburren kundjalkudji bu ngurrimayalikudjihnin, bu ngudda ngurrimarnedjaremerren nawu ngudmandeleng dja mak ngurridjarrky-imerran yiman ngurridjalkangekudjihnin dja mak ngurrimayalikudjihnin rowk.

³ Yuwn bu ngudmandeleng ngurriburlumerren, dja yuwn ngurridjare bu ngurriyurrhkerren. Ngurrimarladjworrimen. Yuwn bu ngudda kuninjkuu ngurrimayaliburlumerren. Bu ngurribebbehmayalibubuyika, wanjh kunu ngudman ngurrimayalibekkarimen.

⁴ Yuwn ngudmandeleng bebbebeh ngurridjalburrburren kore ngudberre, dja ngurridjalbidyikarmerren.

*Ngad Karringunjjukan Nawu Kawohran Kadberre Christ Jesus
Philippians 2:5-11*

⁵ Ngudda ngurrimarnburrimen ba bu ngurrimayalirohrok yiman kayime Christ Jesus.

⁶ Nungka wanjh God duninj, dja minj djareniwirrinj bu marnburrimenin kundulkarre dorreng nuye ba bu burlumerrimenin yiman God rerrih.

⁷ Djal burrkyakni. Nungka djalbawong rowk dja marnburrinj yiman kayime djal yeng. Dja nungandeleng marnburrinj bu yimerranj nawu bininj kabimarnedurrkmirri God. Wanjh kunu nungka yimerranj bu djalbininj duninj.

⁸ Kunmekbeken wanjh nungka danginj bu kurduyimerranj. Wanjh djalmarnburrinj nungandeleng kukmarladjworrinj. Nungka bidjalwernhwokmarrkmangi God dja kunu wanjh doweng. Kaluk nungka kurrmerrinj bu djaldoweng kore kundulk cross.

⁹ Wanjh kunmekbeken kunu God bidjalwernkukenwong duninj, dja mak bingeywong manmekbe kungey manbu manngeykuken duninj bu kabengeyyurrhke manbu birringeybubuyika rowk.

¹⁰ Kaluk bu yerrekah karridjalmirndewarlahkenh bininj karrimarnebarddurrukkurlhdan nuye Jesus, ngad bininj nawu karrihni kore kondah kuror, dja nawu birridjalwernkenh kabirrihni kore heaven warridj, dja mak nadjalwern duninj nawu kabirridi kore kanjdji ngarre kurorre.

¹¹ Dja mak karridjalmulewan rowk bu Jesus Christ wanjh nungka kadjalwohrnan rowk duninj, wanjh kunu karrikuniburlume God nawu Kornkumo.

*God Ngunmarnedurrkmirri Kore Kukange Ngudberre
Philippians 2:12-18*

¹² Mah wanjh ngudda nawu ngaye marnedjareminj ngudberre, ngudda wanjh kandiwokmarrkmangi munguyh bu kerrngehkenhni, bu ngaye karridjarrkni kore ngudda dja bu bolkkime ngaye ngahni djarreh, wanjh ngudda munguyh kandidjalwokmarrkmang ngaye. Bu bolkkime wanjh ngurridjalmarnedurrkmirrin God ba bu nungka karrurrkmirri nawu ngungehke ngudberre bu yerrekah. Ngudda wanjh ngurrimarnekelenin yiman ngurrimarnekekdelme kore nungka nuye!

¹³ Yoh, God nungan kahdurrkmirri kore kukange ngudberre, dja nungka mak ngunmayaliborledke ngudberre ba bu ngudda ngurridjare ngurriwokmarrkmang kore nungka. Wanjh kunukka ngunwon ngudberre kundulkarre nuye ba bu ngudda ngurrikurduyime kunmakkenh kore nungka kadjare.

¹⁴ Mah wanjh, ngurrijilngmaknin kore ngurridjalmarnedurrkmirri nuye. Yuwn bu ngurriwokkihnlurluhnurlukmi, dja yuwn bu mak ngurridangwerren.

¹⁵ Ngurriburrbu, ngad karriyimerranj wurdwurd nuye God. Dja ngurrikangebelenin dja mak ngurridjalkurduyimen kunmak munguyh bu ngurridjalmaknin. Wanjh kunukka ngurrikukbame yiman mankokkarrng kore kondah kubolkmunun, kore birribuyika bininj kabirrikurduyime kundjalwarre duninj munguyh.

¹⁶ Dja wanjh ngudda munguyh ngurriyingkihkarreme kunwok manbu ngunmalngdarrkidwon. Wanjh kunu ngaye ngaburlumerren ngaye-mandeleng bu ngudda ngudberre kore kunbarnangarra nuye Christ, dja kunukka ngaburrbu bu ngaye minj ngadjalbolkmayi kore ngaye ngarrurrkmirranginj kore ngudda ngudberre.

¹⁷ Dja wanjh ngudda ngurriwernhwoybukwong God, dja ngurriyimer-ranj yiman kayime ngurrikanjcurrmerrij nuye, dja mak ngurrimarne-durrkmirri nuye. Wanjh kunmekbekenh kunu ngaye wanjh ngadjalmar-marr. Dja bu ngaye wardi ngarrown yiman kayime ngakanjcurrmerren kore God, ngarridjarrkmarrmarr bu ngudda dorreng.

¹⁸ Wanjh kunu kadjalrohrok, bu ngudda wanjh karridjarrkmarrmarr bu ngaye dorreng.

*Paul Benbeneyolyolmi Bininj Bokenh Nawu Timothy dja Epaphroditus
Philippians 2:19-30*

¹⁹ Bu Jesus nawu Kawohnan Rowk nganbidyikarreme, wanjh ngadjare bu ngamunkewe Timothy ngudberre bu baleh nuk kabolkyime, ba bu ngaye nganjilngmakmen bu ngayemandeleng wobekkan ngudberre kore Timothy ngunmulewan.

²⁰ Nungka ngunmarnedjare ngudberre dja kadjare munguyh bu ngurridi kunmak. Wanjh kunmekbekenh nungka nadjalkudji bu ngayawoyh-munkewe kore ngudberre.

²¹ Birribuyika bininj kore bedmandeleng kabirridjare, dja minj kabir-riburrbu munguyh kore Jesus Christ kadjare.

²² Ngudda wanjh ngurriburrbu nawu namekbe Timothy bu nungka nadjalmak bininj. Nungka wanjh nganedjarrkdurrkmirri ngaye yiman nabeywurd bu nganedjarrkmulewani manbu kunwok kunmak.

²³ Wanjh kunmekbekenh kunu ngaye ngabalmunkewe nungka. Dja med rerrih, ngaye nganan werrek bu baleh kakurduyimerran ngardduk.

²⁴ Ngaye ngahdjalmadbun nawu Kawohnan Rowk bu nganbidyikarreme wanjh kunukka ngayeman ngamyikan ngudberre, wanjh darnkih kabolky-ime.

²⁵ Dja mak ngaye ngadjare ngayolyolme warridj nabadbuyika bininj. Ngudda wanjh ngurriburrbu nawu kangeyyo Epaphroditus nawu nganedanginj. Nungka nawu nganedjarrkdurrkmirri ngaye, dja nganebidyikarmerren bu ngad yiman kayime djuram* nawu Christ nuye. Ngudda wanjh ngurrimunkeweng nungka bu kunwam kore ngaye bu nganbidyikarreme kore kunyid ngahkarri. Wanjh bolkkime ngaye ngaburrbu bu ngabaldurndiwe ngudberre.

²⁶ Nungka wanjh njilngwarreminj bu ngudda ngurriyingkihwbekkan bu nungka dulkkihdkkhiyoy, wanjh nungka bolkkime kadjare kabal-durndeng ngudberre, dja wanjh ngundjalmarnedjare.

* 2:25 "Djuram" kamenyime "nawu soldier".

²⁷ Nungka wanjh woybukkih djakkimukni bu darnkih dowimeninj, dja God bidjalkongibom nungka bu bidjalmarnbom. Nawu God ngandjalkongibuni ngaye warridj. Bu Epaphroditus dowimeninj, wanjh kunukka ngaye ngahdjalnjlngwarremeninj duninj.

²⁸ Wanjh kunmekbekenh ngaye ngadjare bulkkidj bu ngabalmunkewe bolkkime ngudberre ba bu ngudda ngurrinjilngmakmen bu ngurrinan, dja ngaye minj mak ngayawoyhkgawarre.

²⁹ Ngurrikima nungka bu kamre, bu kuninjkukenh ngudda ngurrikukbelmerrinj kore nawu Kawohnan Rowk bu ngurridjalnjilngmaknin. Ngudda wanjh munguyh ngurrbenburlumen bininj birrimak yiman kayime Epaphroditus.

³⁰ Nungka kuyindowimeninj bu nungka bidjalmarnedurrkmirri kore Christ. Nungka wanjh nganmarnekuyindowimeninj ngardduk bu nganbidyikarmeng, bu kunmekbekenh ngudda djarreh ngurrihni, dja ngudda minj kandibidyikarmeninj.

3

Ngurriburlumen Nawu Christ, Dja Yuwn Ngudmandeleng Ngurriburlumerren

Philippians 3:1-11

¹ Mah wanjh, nawu karridangerrinj, ngurridjalnjilngmaknin bu ngudda ngurridjarrkraworren bu kuninjkukenh kore nawu Kawohnan Rowk! Ngaye ngabimbun nahnj djurra bu yawoyhbengdayhke ngudberre nawu kore ngaye ngokko bukkabukkang. Ngaye wanjh nganjilngmak bu ngakurduyime kuhni, wanjh kunukka ngudda ngunbidyikarrme ngudberre bu ngurrinahnarrenkenh.

² Kab ngurrinahnarren! Birrimekbe nawu birriwarre bininj, wanjh ngaye ngayime bedda yiman duruk nabang! Bedda nawu kabirridjare ngundikanjdadjadke ngudberre kore kunburk ngudberre ngundilakkayenwon.

³ Ngudda dja ngaye, ngad wanjh yiman karrilakkayen duninj kore kunmalng kadberre, bu kunmekbekenh kunu nawu Namalngmakaykenh kumwam Godbeh bu kanmarnbun ngad karridi yiwarrudj God kore mandjad duninj. Ngad wanjh karridjalburluburlume nadjalkudji nawu Christ Jesus. Dja yuwn bu karriwoybukwon njalenjale kore djal bininjkenh.

⁴ Dja ngaleng, bu ngaye ngadjareniwurrinj wanjh ngaburlumerrimeninj ngayemandeleng kore ngakurduyime bu djalbininjkenh! Nawu ngaye ngadjalkurduyimeng kunmak kunwernkenh bu ngabenyurrhkeng nawu birribuyika bininj.

⁵ Ngaye wanjh ngandilakkayenwong bu ngaye wurdyawni bu kunkodjkeni eight. Ngaye ngarranginj kore namud nawu Israel benkebmawahmeng, dja mak ngarriedboni kore mawahmawah ngardduk Benjamin namud nuyeni. Dja mak ngardduk namud kore Hebrew dja mak ngaye warridj. Wanjh ngaye ngayimerranj Pharisee bu ngarriwernhkarrenahani manbu mankarre ngadberreni, ngad nawu Jews bininj.

⁶ Ngaye ngawernhdurrkmirri maninjmanu mankarrekenh, wanjh kunmekbekenh ngaye munguyh ngabendjalbuni nawu yiwarrudj bedberreni. Ngaye munguyh ngamarrkmayi manbu manmekbe mankarre dja ngaye minj ngabakkemeninj manmekbe manu Jews ngadberre.

⁷ Ngaye yimankek ngayimi manmekbe manu mankarre bu nganmarnbuyi bu ngakukenworrimeninj kore God. Dja burrkyak, wanjh bu bolkkime manmekbe minj manyawoyhkuken kore ngaye. Kaluk

ngaye wanjh ngadjalwarnyakminj rowk, dja bolkkime ngadjaldjare ngaye ngamunkekadjung nawu Christ.

⁸ Yoh, ngaye ngadjalbawong yeheyng rowk bu bolkkime ngaye ngabur-rbun Christ Jesus nawu nganmarnewohnan ngardduk. Kuhni wanjh kunkimukkenh. Nawu nungka nadjalmak duninj kore yeheyng rowk, nawu nungka nawernhkuken duninj kore yeheyng rowk. Ngaye wanjh ngaweng rowk nawu ngahkarmi ba bu ngadjalwernhkarme nawu Christ. Bu bolkkime ngaye ngadjalyime nawu namekbe nabubuyika yiman kayime nawarre duninj, nawu minj karriyawoyhdjare.

⁹ Wanjh bu bolkkime ngaye nganekukbelmerrinj munguyh. Bolkkime minj ngaburlumerren bu ngahkarme manbu mahni mankarre, manbu minj nganmarnbun bu ngamak nuye God. Burrkyak. Bolkkime God nungandeleng nganmulewan bu ngaye ngamak bu kunmekbekenh ngaye ngadjalwoybukwon nawu Christ. Djal bonj.

¹⁰ Yoh, ngaye ngadjaldjare warridj bu ngadjalburrbun Christ, dja mak ngadjare ngaburrbun God nuye kundulkarre kore birrolkkayhweng nawu Christ kore dowengbeh. Dja mak ngaye ngadjare nganekukbelmerrin nuye bu nganedjakkbekkan Christ dorreng, dja ngadjare yiman kayime ngarrownen yiman nungka kurduyimeng.

¹¹ Kunmekbekenh ngadjare bu Christ dja ngaye kore nganedjarrk-doweng wanjh ngaye ngarrollkan bu yiman Christ dolkkang kore kundowikenh.

Bu Christ Kanmey Kadberre

Philippians 3:12-17

¹² Ngaye kuhni minj nganbangmekurduyimerrangimeninj ngardduk, dja med. Minj nganbangmemarnbuyinj bu ngadjalmakniwirrinj duninj, dja med. Ngaye wanjh munguyh ngadjalrohrokme kunrayek dorreng bu kuninjkukenh kore ngayemandeleng. Christ Jesus korroko ngandarrkidmey wanjh ngaye ngawernhrohrokme ba bu ngamang nawu kahdjdjehnyo kore nungka kurrmeng ngardduk.

¹³ Mah, nawu karridangerrinj! Minj ngabangmemayinj nawu kayingki-hyo ngardduk. Dja ngaleng ngaye ngadjalkurduyime kundjalkudji. Ngaye wanjh ngahdjalbengmidjdanj njalehnjale rowk kore ngakurduyimi ker-ngehkenhni dja ngadjalrohrokme ba bu ngamang nawu God kakarme ngardduk.

¹⁴ God ngankayhmeng ngaye bu nganebelmerrinj nawu Christ Jesus, ba ngare kore kubolkmak heaven. Kunmekbekenh kunu ngaye ngadjaldjare ngare kore namakkaykenh duninj kadjdjehnyo ba bu kalukburk ngahmang.

¹⁵ Karridjalwern ngad bininj nawu karrikodjukulmak, wanjh karribur-rbun bu mandjad kunmayali kadberre. Dja nangale kadberre kaburrbun kore kunbuyika kunmayali, wanjh kabitdjawan God nawu kabibengdayhke ba kabengkan mandjad.

¹⁶ Ngad wanjh ngokko karriburrbun kore mandjad duninj karrihni, wanjh kunmekbe ngad munguyh karridjalkurduyimen.

¹⁷ Nawu karridangerrinj, ngaye wanjh munguyh ngahngunjdjikan nawu Christ, wanjh ngudda ngurriraworrinen birribuyika bininj dorreng nawu ngandingunjdjikan ngaye. Ngurriwernhkurdunan bininj rowk nawu kabirrikurduyime mandjad yiman ngaye bukkabukkang ngudberre.

Ngad Karridjalwadun Nawu Christ

Philippians 3:18-21

¹⁸ Birridjalmirndewern bininj kabirriwidnan Christ nuye kundulk cross, nawu bedda kabirridjalkurduyime kunwarre. Ngaye yingkihmarneyimeng bu ngabenyolyolmi kunwernhkah ngudberre, dja wanjh bolkkime ngaye wanjh ngayawoyhnalkbun bu ngabenmulewan bedberre.

¹⁹ Nawu bedda wanjh yerrekah kabirribularrbuyindan rowk. Yimankek bedda kabirriyime manbu kundjare bedberre, makka wanjh bedberre god. Minj bedda kabirriyime, dja ngaleng kabirridjalburlumerren yimankek birriyemiyak kore baleh kabirrikurduyime kunwarrekenh bedmandeleng. Munguyh kabirridjalburrbun yehyeng nawu kondah kurorrekenh.

²⁰ Bu ngad, wanjh karridjalburrbun kore kadberre kunred heaven. Wanjh karridjalmadbun dja mak karridjare bu Jesus Christ nawu Kawohnnan Rowk bu kamyawoyhdurdeng kore heavenbeh bu mak kangehke kadberre.

²¹ Nungka nawu nawernhdulkarrekimuk duninh dja kamarnbun yehyeng rowk kayimerran kore nungka kadjare. Wanjh nungka kankukkerrngehmen manu kunburrk kadberre bu kanyemikang kadberre. Nungka kankukmarnbun kadberre bu karriburkymerran yiman kayime nungka kunburrk nuye nawu namakkaykenh kore heaven.

4

Kunwok Berrewoneng Ngalbu Daluk Bokenh

Philippians 4:1-3

¹ Mah nawu karridangerrinj rowk, ngaye nawu djalwernmarnedjare ngudberre, dja mak kunmekbekenh bu ngaye ngadjare yawoyhnan ngudberre. Ngudda nawu ngaye kandidjalnjilngmarnbun dja mak ngaye ngaburlumerren bu ngudberrekenh! Ngurridjalnin kore ngurridjalbelbmerrinj nawu Kawohnnan Rowk, yuwn bu ngurriwarnyakmulewarren. Bu ngaye wanjh munguyh djalmarnedjare ngudberre.

² Ngaye ngadjare benbenemarnewokdi ngunewoneng nawu daluk bokenh kunmekbe nawu ngunehni, ngudda ngalbu Yuwodia dja mak ngudda ngalbu Djintikki. Ngaye ngadjaldjare benbenedjawan ngunewoneng ngunemayalikudjinin bu kuninjkunukenh ngudda ngurrikukbelbmerrinj nawu Kawohnnan Rowk.

³ Yoh, dja djawan ngudda yimak nawu ngarrdurckmirri munguyh, bu ngudda yibenbenebidyikarmen benemekbe daluk bokenh nawu ngarridjarrdurckmirri bu ngaye dorreng kore kunrayekni duninh, kunmekbekenh bu bedda ngandibidyikarmeng ngaye kore ngahdurckmirri manbu manmak kunwokkenh. Bedda dorrengni dja nawu Clement dja mak nawu birribuyika karridurckmirri. Bedda nawu kabirringeybimbuyindi kore God nuye djurra bu kabenmulewan bedda nawu kabirridjalmimbi munguyh munguyh.

God Ngunwon Kunmodmikenh Nuye

Philippians 4:4-9

⁴ Mah! Munguyh ngurridjalnjilngmaknin kore nawu Kawohnnan Rowk! Ngaye yawoyhmarneyime ngudberre bu ngurridjalnjilngmaknin!

⁵ Munguyh ngurrimarneyimerrimen djal yelehyeledj ba bu birriwern bininj ngundikurdunan ngudberre kore ngurriyime. Kunmekbe bu ngurriburrbu nawu Kawohnnan Rowk wanjh darnkih kamre.

⁶ Yuwn bu ngurrikangewarremen munguyh kore njalehnjalekenh ngarre. Dja ngaleng ngurridjaldi yiwarrudj dja ngurridjaldjawa God bu ngurriyimanjbu munguyh kore nungka.

7 Wanjh God ngunwon ngudberre kunmodmikenh nuye. Minj nangale bininj kaburrrbun manmekbe kunmodmikenh, dja nungka ngundjalwon bu ngudda ngurriwoybukwon nawu Christ Jesus, wanjh kunukka kore manu kunkange dja kunmayali ngudberre wanjh nungka ngunwernhnahan.

8 Njalewali mak ngadjare ngayime ngudberre nawu karridangerinj. Baleh kab nguddabu kuninjkukenh ba bu ngurriburrrbun dja ngurrimayalimarnburren? Wanjh ngurridjalburrrbun kore kunwoy-bukkenh kunmayali ngarre, dja ngurriburrrbun kore ngurrikurduyime kunmakkenh, dja mak ngurriburrrbu manbu kunmayali manu kankuk-belewon, dja manbu mandjalmakkaykenh. Kab ngurrbenburrrbu kore nawu bininj birrikurdumak, dja kore manbu mandjalmakkaykenh, dja bininj nawu kabirrikurduyime manbu njalekenh bininj birribuyika kabindiburlume. Kuninjkukenh wanjh kunmekbe ngudda ngurridjalburrrbu munguyh.

9 Dja mak ngudda wanjh ngurridjalkurduyimen kore ngurriborlhmeng ngayekenh manbu wong ngudberre, dja kore kandibekkabekakang, dja nuk kandikurdunang ngaye. Wanjh ngurridjalkurduyimen rowk. Wanjh God nawu ngunwon kunmodmikenh ngudberre bu ngurridjarrkre.

*Paul Yolyolmerrinj Bu God Kabimurrngrayekwon Munguyh
Philippians 4:10-13*

10 Ngaye wanjh ngawernhnjilngmak duninh bu bolkkime ngudda kandiburrrbun ngaye munguyh. Ngudda kandiburrbuni ngaye bu ker-ngehkenhni ngudda nawu djarreh ngurridi, bu minj njale kandi-marnekurduyimeninj.

11 Ngaye wanjh kamak ngahni. Ngaye minj mak ngayawoyhkukbur-burren ngayemandeleng. Bu kuninjkukenh ngaye ngahborlhmi bu ngadjalnjlngmak bu ngaye minj ngamayi nawu ngadjareni.

12 Dja mak yikahwi minj ngaye ngawernhnmayinj, yikahwi ngaye ngakarrme wurd nawern. Djal bonj yiman baleh yarrkka, bu yiman kakurduyimerran ngardduk, wanjh kunukka ngaye ngahdjalnjlngmak munguyh. Kunubewu bu mak ngakarrme manwern manme, dja mak yiman bu ngamarwedowe, wanjh kunukka kunu ngadjalnjlngmak duninh. Ngaborlhmeng maninjmanu manbu kunmayaliwarlkkayindi!

13 Nawu Kawohrn Rowk ngandjalwon kunngudj nuye ba bu ngaye ngadjalmarnekurduyime njalenjale rowk munguyh.

*Paul yimeng, "Manjbn Ngudberre bu Kandibidyikarmengkenh."
Philippians 4:14-20*

14 Bu kuhni wanjh kunmak bu ngudda ngurridjareminj kandibidyikar-rmi kore kunyidkenh ngardduk.

15 Dja kunbuyika ngayime. Ngudda nawu ngurrihni kore kabolkngeyyo Philippi, ngudda ngurriburrbuni bu kunmekbe ngaye nganmarnekur-duyimerrangi kore kerrngehkenh bu ngarredjingmey ngahyolyolmi manbu kunwok kunmak ngudberre. Bu kunmekbe bolkyimi, ngaye wanjh ngahbolkbawong kore kunred Macedonia, dja minj nangale bininj nawu yiwarrudj bedberre ngandikukwoyinj nawu money. Dja ngaleng ngudda ngurridjalkudjini nawu yiwarrudj ngudberre bu kandibidyikarrmi ngaye.

16 Dja warridj, bu ngaye ngadjalni kore kunred Thessalonica dja money yak, wanjh ngudda kandimarnemunkeweyi money bu ngaye kandidjalbidyikarrmi bu bokenhkah dja mak bu danjbikkah.

¹⁷ Ngaye minj djahdjawan bu kunwarddekenh ngudberre bu bolkkime. Dja ngaleng ngaye ngadjaldjare God ngunmarnbun ngudberre bu ngunwon nuye namakmak kore ngudda ngurridjalweymakmen munguyh.

¹⁸ Kaluk ngaye wanjh kamak bu ngahkarrme bolkkime kore nguddakenh, kunubewu mak ngakarrme nawu wurd nawern! Namekbe nawu Epaphroditus bu ngurrimunkeweng wanjh kumkang nawu ngurrikukwong ngaye ngardduk wanjh nganwong rowk. Wanjh kunukka yiman kayime ngudda ngurriwon God burudjang rerrih, nawu namakkaykenh nuye yiman kayime manjmakkenh duninjh kahmarnerung kore nungan nuye.

¹⁹ Yiddok ngudda mak ngurridjare bu ngudmandeleng ngudberrekih, wanjh God nawu ngardduk kahkarrme namakkaykenh duninjh nawu yehyeng rowk kore heavenbeh, wanjh ngunwon ngudberre kore ngurribelbmerrinj nawu Christ Jesus.

²⁰ Mah. Ngad wanjh karridjalburlumen God nawu Kornkumo kadberre bu munguyh djal munguyh. Wanjh bonj.

Paul Benmarneyimeng Kunmakkenh

Philippians 4:21-23

²¹ Ngurrbenmarneyimen kunwok kunmak bedberre birribuyika nawu bininj nuye God nawu nungan nuyekih Christ Jesus. Nawu karridangerrinj rowk kondah ngarridjarrkni ngaye dorreng ngundimarnewokmunkewerren bu kunwok kunmak ngudberre.

²² Birriwern bininj nuye God ngundimarneyime kunwok kunmak ngudberre. Ngayime bininj nawu kabirrihni kore kunrurrk nuye nawu Caesar.

²³ Ngaye ngadjare Jesus Christ bu kahni kore kunmalng ngudberre. Amen.

Colossians

Ngad Ngundimarnebimbom Ngudda Nawu Karridangerrinj kore Christ Colossians 1:1-2

¹ Ngaye nawu Paul ngabimbom nahni djurra. Ngaye wanjh apostle nuye Christ Jesus bu kuninjkunukenh God nganmarnedjareminj ngakurduyime. Ngaye nganedjarrkdi nahni Timothy nawu karridanginj.

² Ngaye ngabimbom nahni ngudda ngudberre nawu ngurrihni kore kunred Colossae ngudda nawu nungan nuyekih God dja mak nawu ngurriwoybukwon nungka munguyh. Ngad wanjh karrikukbelbmerrinj kore Christ nawu ngudda ngaye karridanginj. Ngaye ngadjare God nawu kornkumo kadberre ngundjalkongibun ngudberre dja mak ngunwon kunmodmikenh nuye.

Ngad Munguyh Nganemanjibun God Bu Ngudda Ngudberre Colossians 1:3-14

³ Ngad wanjh munguyh ngundimarnedi yiwarrudj ngudberre bu kuninjkunukenh nganedjalmanjibun God nawu kornkumo nuye Jesus Christ nawu kawohrnran rowk kadberre.

⁴ Ngad wanjh ngundiwoyekkang bu ngudda ngurriwoybukwong dja mak ngurriwokmarrkmey nawu Christ Jesus, dja mak ngudda ngurrbenmarnedjare rowk nawu God nungan nuye bininj.

⁵⁻⁶ Kuhni rowk ngudda ngurrikurduyime bu kuninjkunukenh God ngunmarnedjehdjenkurrmeng nawu kahyo ngudberre kore heaven. Ngudda ngurriyingkihbekkang manu mahni manmakkaykenh kunwok bu kerngeghkenhni kumwam ngudberre, manbu mandjalwoybuk kunwok. Mahni kunwok manmak wanjh kayolyolme kaluk God ngunmarnekurduyime ngudberre bu yerrekah.

Mahni kunwok manmak wernhwarlahminj, yiman kayime manbu kundulk kamarnburren bu dja kakarme manbarnemmak kore kubolkbubuyika rowk kondah kurorre. Dja karohrok kore ngudda. Kuhni dedjingmey kerngeghkenhni bu ngurriyingkihbekkang manbu kunwok manwoybuk dja ngurrimenmenbekkang bu woymbukkih duninj God ngundjalarnedjare ngudberre bulkkidj duninj.

⁷ Nahni Epaphras nawu karrimarnedjare, nungka korroko ngunmarneyimeng manbu kunwok manmak bu ngurriborlhmeng. Nungka kabimarnedurrkmirri God yiman slave nawu kabibongname, bu yiman ngad warridj. Nungka kabimarnedurrkmirri kunmak nuye Christ bu kadberrekenh.

⁸ Wanjh nungka ngunmulewam ngudberre bu nganmarneyimeng nawu Namalngmakkaykenh ngunmarnbom bu ngurribalarnedjaremerren.

⁹ Wanjh bu ngad kore kerngeghkenhni ngundiwoyekkang, wanjh ngarrihdjaldi yiwarrudj ngudberre. Wanjh munguyh ngarridjaldjawan nawu God ba bu ngunmayalibarlke ngudda ngudberre ba bu ngurrikurduyime kore nungka kadjare, dja mak ngarridjawan God bu nawu Namalngmakkaykenh ngunbidyikarme bu ngurriwernhburrbun mandjad kore kunmakkenh.

¹⁰ Mak ngarridi yiwarrudj ngudberre, ba bu ngurridjalkurduyime munguyh kore nawu Kawohrnran Rowk kadjare, kore nuye kunmak, dja kore ngurrijilngmarnbun munguyh. Mak ngarridi yiwarrudj ngudberre, bu ngurridurrkmirrikenh kunwernhmak, nawu yiman kayime kundulk

manbu kakarrme manwern manme, dja wanjh ngurridjalborlhme nawu God.

¹¹⁻¹² Kaluk ngad nghanedjare God ngunmurrngrayekwon ngudberre. Nungka nawu wernhdulkarrekimukkenh kore yehyeng rowk. Wanjh ngudda ngurridjalmadbu yeledj bu mak kunyid kunwern ngurrikarrme, wanjh bonj, ngurridjalnjilngmaknin dja ngurridjalmanjbu God nawu Ngabbard. Nungka wanjh ngunmarnekarremarnbom ngudberre ba bu ngurriraworrinj birribuyika nawu nungan nuyekih bininj dja ngurrihdjarrkkarrme nawu yingkihdjehdjenkurrmeng ngudberre, kore kahmarnebolkwolkayindi dja kawohrnan rowk munguyh.

¹³ Yoh, nungka nawu kanbebkeng kadberre kore kubolkmununbeh karridangbalhmiyindi, wanjh nungka kankurrmeng kadberre kore nawu beywurd nuye kadjalwohrnan rowk. Kaluk nungka kabi djalmarnedjare.

¹⁴ Bolkkime ngad karribelmerrinj dja kanngkehng bu kanmarnebengmidjdanj kadberre kore kunwarrekenh karriyimi.

*Christ Nawu Kadjalwernhwohrnan Rowk
Colossians 1:15-20*

¹⁵ Minj nangale birrarrkidnayinj God, dja bu karrinan Jesus, God nuye beywurd, wanjh kunukka yiman karrikuknan nawu God. Kaluk Jesus yiman nadjdjaman nawu karridangerrinj kadberre bininj, dja kayurrhke rowk kore yehyeng God marnbom.

¹⁶ Jesus, nawu God nuye beywurd, wanjh nungka marnbom yehyeng rowk kore heavenbeh dja mak kondah kurorrewaken, nadjalwern nawu ngad karrihnan dja mak nawu minj karrinan. Nawu nungka benmarnbom kings, dja bininj nawu kabindimarnewohrnan birribuyika, dja mak benmarnbom nawu birriwernhdulkarrekihkimuk bininj. Nawu yehyeng rowk marnbom bu kore nungan djareni.

¹⁷ Jesus nungan djalyingkihi bu kerrngehkenhni duninj wanjh yerreh yehyeng rowk bebmerrinj. Nawu nadjalwern yehyeng rowk nungka wanjh kahwernhkarrme. Dja bu burrkyak, wanjh kunukka kahdjalyakayakmen rowk.

¹⁸ Ngad bininj nuye Jesus, wanjh yiman kayime karriyimerranj nuye kunburk, dja nakka wanjh yiman kunkodj ngarre yiwarrudj rowk. Nungka nawu nadjalkudji wanjh marnbom yehyeng rowk bu dedjingmeybeh. Nungka mak nadjalyungkihi nawu yawoyhmimbiminj kore kundowikenh, ba bu nungka nadjalkudji kawernhkukmen kore kubolkwarlahkenh rowk dja mak kahwernhkukdokme duninj kore bininj kadberre.

¹⁹ Nawu God bimarneni Jesus kore nungka bu benedjalkangekudjini kore God djareminj. Wanjh Jesus nakka God duninj.

²⁰ Dja God djareminj kanmarnbom karridjalwern nawu bininj rowk bu karriyawoyhdabbolkmen kore nungka nuye, ngad nawu bininj kondah karrihni kurorre dja mak nawu kabirrini kore heaven. Wanjh kunmekbekenh bu Jesus kurlbawarrhmeng kore kukbahkukbarndi kundulk cross, dja kunu God kanwong kunmodmikenh nuye.

*Christ Kunmak Ngunmarnekurduyimeng Ngudberre
Colossians 1:21-23*

²¹ Ngurriburrbu bu kerrngehkenh ngudda wanjh ngurrimarnekuklarlarrinj kore God, dja ngurrimhdi djarreh duninj, bu ngudda ngurriyidkoni God kore kunmayali ngudberre dja bu ngurrihdjalkurduyimi kunwarre.

²² Dja bu bolkkime, Jesus ngunmarnbom ngudda ngurridabbolkminj kore God, bu nungka doweng. Yoh, Jesus nungan wanjh kanmarnekanjkurrmerrinj nuye kunburryki. Jesus doweng kore God djareni, ba bu ngunmarnbom dja ngunkurrmeng kore God, bu ngurriyimerranj nuye bininj ngurrimak, ba minj nangale ngunyawoyhwwidjung.

²³ Kuhni wanjh ngunmarnekurduyimerran ngudberre bu ngurridjalwoybukwon mahni kunwok, dja yuwn mak ngurrimayaliborledme bu ngurribawon mahni kunwok manmak kore ngurribekkang, dja ngurridjalmadbun bu yerreh God ngunmarnekurduyime. Maninjmanu kunwok manmak wanjh ngurribekkang, dja wanjh birridjalwern bininj nawu kabirrini kondah kore kubolkwarlahkenh rowk wanjh bedda warridj birribekkang. Ngaye nawu Paul ngayimerranj ngahmarnedurrkmirri God bu ngabenmarneyime bininj mahni kunwok manmak.

Ngaye Ngahmarnedurrkmirri Christ Kore Nuye Bininj

Colossians 1:24-29

²⁴ Kunmekbekenh bu kuhni gaye ngadjalnjlngmak dja mak kunyid bu ngahkarrme bu nguddakenh ngudberre. Christ wanjh ngokko djakbekkang ngudberre, dja bolkkime gayemanwali ngahdjaldjakbekkan kore kunburrk ngardduk bu kuninjkukenh gaye ngadurrkmirri kore yiwarrudjkenh nawu nungka yiman kunburrk nuye. Ngaye wanjh kuhni ngadjalnjlngmak munguyh.

²⁵ Mahni manu ngahdurrkmirri kore yiwarrudj bu God gaye nganwong kore ngamarnehdurrkmirri nuye. Nungka djareminj bu marnemulewan ngudberre ba bu ngurriburrbun mahni kunwok rowk bu nungkakenh kore kawokdi.

²⁶ Bu kunkareni duninj minj nangale burrbuyinj mahni manbu warlkkayindi kunwok. Dja bu bolkkime wanjh God kanbukkang kadberre ngad nawu nungan nuye bininj.

²⁷ God karremarnbom bu kanmarneyimeng ngad nawu bininj nuye, ba bu bedda nawu minj Jews bininj kabirriburrbun manbu warlkkayindi manmakaykenh kunwok. Mahni kabiyolyolme Christ nawu kamre kani kore kukange ngudberre, ba ngudda ngurriyimerran yiman nungka. Kuhni bu ngudda ngurrimadbun bu ngunmarnekurduyimerran kore heaven.

²⁸ Wanjh nungka Jesus nadjalkudjiwi bu karrbenmarnemulewanken kore bininj rowk. Ngad karrbenwokrayekwon bedberre dja karrbenbukkahbukkan kunwern ba bu kabirriburrbun nuye kunmayali. Wanjh karridjare karrbenbidyikarme bininj rowk, ba bu kabirridjordmen mandjad duninj kore Christ kabirriraworren.

²⁹ Mahni wanjh ngardduk kore ngadjare ngahdurrkmirri. Nungka nawu nganmurrngrayekwon dja nganwon kundulkarre nuye ba bu ngarrurrkmirri kore kunrayek nuye munguyh.

2

Ngaye Ngadjare Bengyolyolme Ngudberre

Colossians 2:1-5

¹ Ngaye ngadjare ngudda ngurriburrbun bu gaye wanjh ngahngalke kunrayek kore ngudda ngudberre dja mak kore nawu birrikodjkkulumak bininj kabirrihi kore Laodicea, dja mak nawu birridjalwern bininj nawu minj gaye ngandibangmenayinj.

² Ngaye ngadjare kangemurrngrayekwon ngudberre, dja mak ngadjare bu ngurrimarnedjaremerren yiman ngurridjalkudjiwi. Bu kuninjku

wanjh ngurriwernhburrbun God, wanjh kunukka ngurridjalnjilngmak. Ngudda wanjh ngurriburrrkburrrkbekkan God nuye manbu manwarlkaykenh kunwok, wanjh ngayolyolme nungka nawu Christ.

³ Ngudda bu ngurringalke Christ, wanjh kunukka yiman ngurringalke nawu kahwarlkkayindi namakmak duninh, wanjh ngudda ngurriyimerran ngurriburrbun kundjalwern ba ngurriwernhburrbun kore God kahyime.

⁴ Ngaye wanjh marnehmarneyime ngudberre bu kuninjku ba minj nangale bininj ngunbengbuyikahme ngudberre bu bedda kabirriyime yimankek kabirriwokmenmenmak kore kabirriwokdi.

⁵ Ngaye ngaburrbun ngudda ngurriwoybukwon duninh nawu Christ bu ngudda wanjh ngurrijilngmak duninh bu nungka ngurriwokmarrkmey. Kunmekbekenh kunu ngaye ngahdjalnjilngmak. Ngaye wanjh ngahni kondah djarreh duninh, dja ngaleng kunukka yiman ngaye karridjarrkdi kumekbe bu bolkkime.

Munguyh Ngurridjalwokmarrkma Nawu Jesus

Colossians 2:6-10

⁶ Ngudda nawu ngurrikimey Christ Jesus dja ngurriyime bu nungka nawu Kawohrnun Rowk, wanjh ngurridjalnin munguyh kore nungka, dja ngurridjalkurduyimen kore nungka kadjare.

⁷ Ngaye ngadjare bu ngurridjordmen dja mak ngurrimurrngayeknin bu kuninjku ngudda ngurrikukbelbmerrinj nawu Christ Jesus. Munguyh ngurridjalburrbun kore nungka dja mak ngurriwoybukwo munguyh nungkahkenh kore ngokko ngundibukkang. Dja mak ngurrimanjmanjbu God bu djal munguyh.

⁸ Wanjh ngurriahnarrimen. Yuwn bu ngurribekkan bininj nawu kabirridjare ngunkowe dja ngunbongkarrme kore kunmayali manbu kambembe kore kondanjku kurorrebeh, wardi ngunkowe ba bu ngunbengbuyikahme. Manmekbe kunmayali minj kambembe kore Christbeh, dja djalbininj bedberre.

⁹ Ngurriburrbun bu Jesus wanjh God duninh, dja nungka danginj kunburrr dorreng. Kaluk nakka bininj duninh, dja mak God duninh.

¹⁰ Dja wanjh nungka ngunmarnbom ngudda bu ngurriyimerranj Christ nuye, wanjh yiman kayime ngurriyimerrangimeninj Christ duninh. Nungka wanjh kadjalwohrnan rowk dja kawernhdokme rowk, dja kakarme kundulkarre rowk.

God Kanmarnebengmidjanj Kadberre Kunwarre Kore Jesus Christkenh

Colossians 2:11-15

¹¹ Bu ngudda ngurrikukbelbmerrinj kore Christ, wanjh kunukka yiman kayime nungka ngunlakkayenwong ngudberre. Mahni minj ngaye ngahyolyolmeken manu bininj kabindilakkayenwon bu kabindidjobke kore kunburrr. Ngaye ngayime bu kore Christ ngunmarnekurduyimeng bu ngunkangeboredkeng dja kunwarrekenh ngudberre wanjh djalburriweng.

¹² Ngudda bu ngurrikukduhmi kore baptism, wanjh kunukka ngudda yiman ngurridjarrkdoweng dja ngurridjarrkkukdudjindi nawu Christ. Wanjh bu God birrolkkayhweng nawu Christ kore kundowikenhbeh, wanjh ngudda ngundolkkayhweng kore Christ dorreng. God kurduyimeng kuhni ngudberre ngudda nawu ngurriwoybukwong, dja mak ngudda ngurriburrbuni bu nungka wernhdulkarrekimukni.

¹³ Yoh, ngudda wanjh ngurrimalngdoweng. Kuhni bu ngaye ngahyime, ngudda nawu munguyh ngurriwokweyi God, wanjh kunukka yiman

ngudda minj ngurrikangelakkayenniwirrinj, nawu ngudda minj nuyeni-wirrinj God. Wanjh nungka ngundarrkidmarnbom bu ngurridjarrkmal-ngdarrkiddi kore Christ dorreng, bu God kanmarnebengmidjdanj kore kunwarrekenh kadberre.

¹⁴ Ngad wanjh karribakkeng mankarre, dja mahni bimbuyindi kore kanwiddjungi kadberre, wanjh bolkkime God bularrbom rowk. Nungka weng namekbe djurra nawu mankarre karrmi manbu ngad karribakkeyi, wanjh nungka yiman barnnameng kore kundulk cross, wirmurrng nails dorreng.

¹⁵ Kuhni ngayime bu Christ doweng kore kundulk cross, wanjh weng kundulkarre bedberre nawu birriwarre birrikihkimuk dja nawu kabindimarnewohrnan kore kunwarrekenh. Bu nungka kukbarndanginj kore kundulk cross, wanjh benbom rowk dja benyemikang.

Ngurridjalmunkekadju Jesus Dja Yuwn Ngurrbenbekkan Birribuyika Bininj

Colossians 2:16-23

¹⁶ Mah wanjh, yuwn ngudda ngurrinjilngwarremen bu manme manbu ngurringun dja mak ngurribongun, bu mak baleh kabolkyimerran ngudberre bu ngurrikarme manbu God nuye mulil dja mak bu yiwarrudj ngurridi yiman kayime Sabbath kunbarnangarrakenh. Yuwn ngurriburrbun bu bininj ngundidjadme ngudberre bu kuhnikenh.

¹⁷ Maninjmanu kore ngayimi, minj mahni mankuken. Dja makka kadjalmenyime bu nawu yerrekah kaluk kamre nakuken duninj nawu Christ.

¹⁸ Yikahwi bininj kabirriyime yimankek birrimodmikenh, dja mak kabirriyime yimankek kabindimarneboddan nawu angels, dja mak bedda kabirriyolyolmerren dja kabirriburlumerren bu kabirrinan kunmayali kore Godbeh. Wanjh kunu bedda kabirridjalburlumerren bedmandeleng, bu kunmekbekenh bedda kabirriburrbun kore bininjkenh kabirrikurduyime. Yuwn bu birrimekbe bininj ngundibengbuyikahme dja mak ngundinjilngwarrewon ngudberre.

¹⁹ Birrimekbe bininj bedda birribengmidjdanj nawu Christ. Ngad wanjh karrikukbelmerrinj nungka yiman karriburrkkudjihminj. Nungka nawu yiman kunkodj bu ngad karribelbmerrinj. Wanjh God kanmarnbun kadberre karridjordmerren dja karrikarmerren yiman kunburk Christ nuye duninj karriyimerran bu karrikudjihmen.

²⁰ Ngudda wanjh ngurribelbmerrinj Christ, wanjh kunukka ngurridjarkdoweng nungka dorreng. Wanjh yuwn bu ngurriyawoyhkurduyime kore birribuyika bininj kabirrikurduyime kondanj kunu nawu kabirrihni. Ngudda yuwn ngurriyime bolkkime.

²¹ Bininj nawu birrikang kondanj kunu kurorre, bedda kabirrikarme manwern mankarre dja kabirrihime, "Yuwn bu ngurrikarme nakka! Yuwn ngurringun makka! Kab yuwn mak kuhni ngurrikurduyime!" Kunmekbe bedda kabirriyime munguyh.

²² Dja bedda kabirriyolyolme nawu kaluk kadjalyakmen yerrekah dja mahni mankarre kumbemeng kore bininjbeh. Bedda ngundibukkahbukkan kore bedmandeleng, dja minj Godbeh. Bedda kabirridjare ngudda ngurrbenkadjung kore kabirrikurduyime.

²³ Bu ngudda ngurrbenmunkekadjung wanjh kunukka ngudda ngurrikowerren bu ngurriyime ngurrimarnburren bu kamak rowk. Dja kawarre! Kuhni bu djal kunburkwi, dja bininj kabirrikurduyime ba bu

kabirridjalburlumerren. Bu ngurrikurduyime wanjh minj ngurrikangemarnburren kunburrk ngudberre bu ngurridjalkurduyime kunmak kore God kadjare.

3

Karrikangekerrngehmen Kore Christ

Colossians 3:1-4

¹ God ngundjarrkdolkayhweng ngudberre Christ dorreng, bolkkime ngudda wanjh munguyh ngurridjalburrbu nawu yehyeng kore kaddum, kore Christ yerrkang kahni kore kukun nuye God.

² Yoh, yuwn ngurriburrbun kunmayali manbu ngarre kondanjkuu kurorre, dja ngaleng ngurriburrbu kunmayali manbu kaddumben.

³ Yiman ngudda ngurridoweng, dja bu kuhni ngudda ngurriyawoyhmalngdanginj kore ngurrikukbelmerrinj nawu God, wanjh ngudda dja Christ ngurridjarrkmalngmimbi kore bininj minj kabirrinan bolkkime.

⁴ Kaluk bu yerrekah, bu Christ kamdurndeng, wanjh birriwern bininj kabirrinan, wanjh kunukka bedda ngundinan ngudda ngurridjarrkni kore nungka, kundjalmakmak nuye dorreng.

Ngurribawo Manbu Kunkarekenh Ngarre

Colossians 3:5-11

⁵ Mah wanjh, ngurribaldjalbawo rowk manbu kunwarrehwarre kunmayali ngudberre manu kondanjkuu kurorrebeh. Ngaye ngayolyolme kore ngurridjaldjare ngurrikurduyime kore kunwarre, yiman bu ngurridjirdmarren daluk dja bininj, dja bu ngurridjalburrbun kunwarre, dja bu ngurrihmanjgun nadjalwern yehyeng, wanjh yiman kunukka ngurrimarnedi yiwarrudj nawu nawarre idol.

⁶ God kabenwernhdung birrimekbe bininj nawu kunmekbe kabirrikurduyime.

⁷ Kerrngehkenhni ngudda wanjh kunmekbe ngurrikurduyimi, bu ngurrihni.

⁸ Dja bu bolkkime, ngudda wanjh ngurribawo manbu kunwarre rowk. Yuwn bu ngurrikangeyidbabi dja mak bu ngurrbenwidnan bininj, dja yuwn ngurriburrbun bu yiman ngurrbenmarnekangewarre bedberre. Yuwn bu mak kunwok kunwarre ngurriyime bu ngurrbenyolyolme, dja mak yuwn ngurriwokdi bu kundangwarrekenh kunwok. Yuwn mahni kunwok kambebme kore kurrangbeh ngudberre.

⁹ Dja mak yuwn bu ngurrikowerren ngudmandeleng. Bu ngudda wanjh kunmekbe kunu ngurrikurduyimi kerrngehkenhni, dja ngudda wanjh ngurrikangeborledkerrinj.

¹⁰ Ngudda wanjh ngurrikerrngehminj bininj. God nungan ngunker-ngehmeng kore ngurriborlhme kunwern ba bu ngudda ngurriyimerran yiman nungka nawu ngunmarnbom.

¹¹ Mah wanjh yuwn bu ngurrikuklarlmarren munguyh, yuwn ngurriburrbun kuninjkuu yikahwi ngad nawu bininj Greek, dja mak ngad bininj nawu Jew, dja ngad nawu ngarrilakkayen, dja yikahwi minj birrilakkayen, dja mak yikahwi ngad nawu minj ngarribongdi dja mak yikahwi nawu kabirribongdi. Yika ngarriwokdi Greek, dja birribuyika kabirriwokdi kunwokbubuyika. Yika ngad kondahbeh, yika mak kubolkbubuyikabeh. Yuwn bu kunmekbe ngurriyime. Burrkyak, kuni bolkkime kabuyika bu Christ kandjarrkkarrme kadberre rowk, wanjh kunukka ngad karridjalkudji kore nungka.

*Baleh Karrikurduyime?**Colossians 3:12-17*

12 God ngundjarrngbom ngudberre dja nungka nawu ngunmarnedjareminj ngudberre ba bu ngudda wanjh djal nuyekih bininj, wanjh bolkkime ngudda ngurrikangeborledmen. Ngurribebbehkongiburrimen, kore ngurribidyikarmerren, yuwn bu ngurriburluhburlumerren nawu ngudda yimankek ngurriwerhkukenworren dja ngaleng ngurrbendjal-madburren, dja ngurriyimerren bu djal yeledj.

13 Yuwn bu ngurridurren, dja ngurrimarnebengmidjdarrimen kore ngudberre, karohrok bu nawu Kawohnan Rowk nungka ngokko ngun-marnebengmidjdanj.

14 Kuhni rowk ngurriyimen, dja mahni wanjh mankuken kunmayali bu ngudda munguyh ngurrimarnedjaremerren. Bu kuhni ngurrikurduyime wanjh kunukka ngudda ngurridjalkukkudji bu kunmak rowk, minj mak ngurribalwarreworren.

15 Christ ngunwong kunmodmikenh kore kukange ngudberre, bu munguyh nungka ngurriwokmarrkmang, dja ngurridjalkangekudjinin kore nungka kahdjare. Nungka wanjh ngunkayhmeng ngudberre bu ngurrimraworrij kore ngurrini kunmak rowk. Ngudda wanjh munguyh nungka ngurridjalmanjbu.

16 Ngudda ngurridjarrkborlhmen munguyh kore kunwok nuye Christ dja mak ngurridjalburru kunmakmakkenh kore nungan yimeng. Ngur-ribukkahbukkarimen ngudmandeleng kore kunmak, dja ngurrimayal-ibekkarimen kore kunmakkenh kunmayali. Ngudda ngurridjalmanjbu God kore kukange ngudberre dja mak ngurriwayini kore Psalm dja hymns dja mankarre manu ngurriyiburlumekenh nawu God.

17 Bu baleh yarrkka ngudda ngurrikurduyime dja mak ngurriyime kore njalehnjalekenh, wanjh ngurridjalkurduyimen rowk kore kungey nuye Jesus nawu Kawohnan Rowk, dja ngurridjalmanjbu bu nungkakenh kore God nawu kornkumo nuye.

*Karridjarrkdi Mandjad Kore Namudbubuyika Kadberre**Colossians 3:18-21*

18 Ngudda nawu ngalbihbininj kobeng wanjh ngurrbendjalwokmarrkma nawu nabihbininj kobeng ngudberre. Kuninjkuwu wanjh kunmak bu ngudda ngurrimunkekadjung nawu Kawohnan Rowk.

19 Dja nawu ngudda nabihbininj kobeng wanjh ngurrbenmarnedjarenin ngudberre ngalbihbininj kobeng. Yuwn bu kunrayek kunwok ngurrben-marneyime.

20 Ngudda nawu wurdwurd, wanjh ngurrbenwokmarrkma munguyh nawu ngalbabadjan dja kornhkornkumo. Nawu Kawohnan Rowk kunmekbe wanjh kanjilngmak bu ngurrikurduyime.

21 Ngudda nawu kornhkornkumo, yuwn bu kunrayek kunwok dorrengh ngurrbenbengdayhke nawu wurdwurd ngudberre. Wardi kunukka kabirridjalwarnyakmulewarren.

*Yikahwi Ngudda Nawu Yiman Slaves Bu Ngurridurrkmirri**Colossians 3:22-25*

22 Nawu ngudda ngurrihbongdi, nawu yiman bininj ngundi-marnewohnahwohrnan ngudberre, wanjh bedda kunu djal bininj, minj bedda kunu God. Dja bonj, ngaleng munguyh ngurrbendjalwokmarrkma. Yuwn ngurrbendjalurrkmirri bu bedda ngundidjalnan, minj ngurrbenkowe ba bu ngurrbenmarnbuyi bu ngundimarnedjare. Bu

ngurrbenmarnedurrkmirri kunukka wanjh ngudda ngurriwokmarrkma God, dja kore ngudda ngurridjalmarnekele.

²³ Ngudda wanjh munguyh ngurridjaldurrkmirrin kunrayek duninj dja kukange dorreng, yiman kayime ngudda ngurrimarnedurrkmirri nawu Kawohnan Rowk, bu kuhni minj bininjkenh.

²⁴ Ngudda wanjh woybukkih ngurrimarnedurrkmirri rowk nuye Christ nawu Kawohnan Rowk. Wanjh kunmekbekenh nungka ngunmarnekarmulewan kore nungan wokkurrmerrinj korroko kore kadjehdjenyo ngudberre.

²⁵ Dja bu ngaleng bininj kunwarre kahkurduyime, wanjh nawu Kawohnan Rowk kabikarmulewan warridj. Nungka wanjh kandjadme ngad karriwarlahkenh bininj bu mandjad duninj.

4

Nangale Ngurrimarnedurrkmirri?

Colossians 4:1

¹ Ngudda nawu ngurrbenkarrme bininj nawu slaves yiman kabirri-bongdi yerreh, nawu ngundimarnedurrkmirri ngudberre, kuhni wanjh ngurribekka. Ngudda wanjh ngurrbenkarremulewa mandjad duninj, dja mak yuwn bu ngurrihdjalkukkarrme money nawu kunwardde bedberre. Kaluk ngurriburrun ngudda mak yiman slaves nuye nawu kawohnan kore heaven.

Ngaye Yawoyhbengdayhke Ngudberre

Colossians 4:2-6

² Mah, wanjh ngudda ngurriwern rowk, ngurrihdjaldin yiwarrudj munguyh, dja ngurriahnarrimen, dja mak ngurridjalmanjibun God.

³ Dja mak ngurridin yiwarrudj ngadberre warridj. Ngurridjawa God ba bu minj njale nganwarrewon ngadberre bu ngarrire ngarrbenmarnemulewan bininj manbu kunwok warlkkahwarlkkayindi manbu kayolyolme Christkenh. Ngaye wanjh bolkkime ngahrurrkendi kore kururrk prison, kunmekbekenh bu kuhni ngahbenmarneyolyolme birriwern bininj.

⁴ Mak kandimarnedin yiwarrudj ba bu mandjad ngabenmarnemulewan bininj dja kabirrimenmenbekkan kore ngahwokdi bedberre. Kaluk kumekbe ngakarrme bu ngakurduyime.

⁵ Ngudda wanjh kunmak ngurrikurduyimen bedberre bininj nawu minj kabirrihwoybukwon God, yuwn bu munguyh ngurridjalbolkmang, dja mak ngurrbenmarnewokdin kunmak bedberre bu munguyh.

⁶ Kaluk bu ngurriwokdi, wanjh ngurriwokmayalimaknin dja kunmak dorreng ngurriyime, ba bu ngudda ngurrbenwokdurndiwe mandjad birriwern rowk nawu ngundidjawadjan.

Ngabenbenemunkewe Benebokenh Bininj Bu Ngundinan Ngudberre

Colossians 4:7-9

⁷ Nakudji namak bininj nawu kangeyyo Tychicus kamre ngunmarnemulewan ngudberre bu ngayekenh. Nungka nawu nganedjarrkduurrkmirri kore Kawohnan Rowk nuye, dja ngaye ngamarnedjare namekbe nawu nganedanginj ngardduk. Nungka wanjh namakkaykenh nawu kabenmarnedurrkmirri bininj kore yiwarrudj bedberre.

⁸ Ngaye wanjh ngabalmunkewe ngudda ngudberre ba nganhmulewan kunwoybuk dorreng kore baleh nganmarnekurduyimerran, dja mak bu nungka wanjh ngunkangerayekwon.

⁹ Nungka wanjh kabenedjarrkre nabuyika namak bininj nawu kangeyyo Onesimus, nawu ngaye ngamarnedjare, dja nakka wanjh kadjalwoy-bukwon nawu Kawohrnan Rowk. Kaluk nungka wanjh nguddabeh bininj. Nahni bininj bokenh kaluk ngundimarnemulewan manbu ngadbeh kunwok rowk.

*Bininj Birribalwokmunkewerrinj Kunwok Kunmak Ngudberre
Colossians 4:10-18*

¹⁰ Nakudji bininj nawu nganedjarrkni kore kururk prison, nawu kangeyyo Aristarchus, wanjh nungka ngundjalmarneyime kunmak kunwok ngudberre. Dja mak Mark, nawu Barnabas nuye benemodjarrkdor-rinj. Ngudda wanjh ngurriyingkihburrbun bu ngurrimarnekurduyimen nawu Mark, dja bu nungka kamre kore ngudda, wanjh ngurrikima.

¹¹ Nahni nabuyika bininj kunngey bokenh kakarrme kangeyyo Jesus dja Justus, nungka warridj wanjh ngunmarnewokmunkewerren kunwok kunmak ngudberre.

Birrimekbe nawu birridanjik bininj, wanjh birridjalkudjini Jew bininj nawu ngarridjarrkmarnedurrkmirri kore God kawohrnan rowk. Bedda nawu ngandinjilngmarnbun ngaye.

¹² Ngurriburrbun mak ngudberre bininj nawu kangeyyo Epaphras, nawu kore nguddabeh. Kaluk nungka kabidjalmarnekururkmirri nawu Christ Jesus. Nungka wanjh ngunmarnewokmunkewerrinj kunwok kunmak kore kondabeh ngad. Nungka kahdi yiwarrudj munguyh ngudberre, kabiwernhdjawan God ba bu ngurrimurrngarayekmen dja ngurrikurduyime rowk kore God kadjare, yiman bu ngurridjalmayalidjordmen, dja minj ngurriwokkewkme nawu God.

¹³ Ngaye wanjh marneyime bu woybukkih nungka kahdurkmirri kunrayek bu ngudda ngudberre dja mak bedberre bininj nawu kabirrihni kunred kore Laodicea dja mak kore kunred Hierapolis.

¹⁴ Ngurriburrbun mak nawu djawirna kadberre Luke nawu doctor, nawu karrimarnedjare. Nungka dja mak nawu Demas, wanjh ngundi-marnewokmunkewerrinj kunmak kunwok ngudberre.

¹⁵ Dja mak ngurribenmarneyimen kore kunwok kunmak ngawok-munkewerrinj ngayebah nawu karridangerrinj bininj kabirrihni kore kunred Laodicea. Dja mak ngayime ngawokmunkewerrinj kunmak kunwok nawu mak kabirrihni kore ngahli daluk kangeyyo Nympha, dja mak binihbininj nawu kabirrimirndemornamerren bu kabirridi yiwarrudj kore kunurk ngalenggarre.

¹⁶ Naninjnanu djurra, bu ngudda ngurribimnan dja ngurriyakwon ngurribimngeyibun, wanjh ngurribenwon nawu birrikodjulumak bininj nawu kabirrihni kore kunred Laodicea ba bu bedmanwali kabirribimnan. Bedda wanjh kabirrikarme nabuyika djurra bedberre. Wanjh nahni ngurrima nawu beddabeh bu ngurribimnan ngudmanwali warridj.

¹⁷ Ngaye ngahkarrme kunwok nuye nawu bininj kangeyyo Archippus nawu ngurridjarrkni kunmekbe. Wanjh ngurrimarneyimen, "Kuhni yidjalyakwo kore yihmarnedurrkmirri nawu Kawohrnan Rowk nuye bu ngunwong."

¹⁸ Kuhni bu ngaye ngabimbun ngaye nawu Paul, kore kunbid ngard-dukkih ngabimbun kondah bolkkime. Ngaye ngadjare ngabalwok-munkewerren mahni kunwok kunmak ngayime ngudberre rowk. Kandidjalburbu ngaye bu ngahdukkayindi nawu narayek duninj wirlmurrng chain. Wanjh ngadjawan God bu ngundjalkongibu ngudberre rowk.

1 Thessalonians

Bu Paul Dorreng Birribombom

1 Thessalonians 1:1-3

¹ Ngaye Paul ngarridjarrkni bininj bokenh nawu kabenengeyyo Silvanus* dja Timothy. Ngad ngarribimbom nahni djurra ngudberre, ngudda bininj nawu yiwarrudj ngurrikarme kore ngurrihni kunred Thessalonica. Ngudda wanjh ngurrikukbelmerrinj kore God dja mak Jesus Christ nawu Kawohrnan Rowk, wanjh ngad ngarridjare bu God ngundjalkongibun dja mak ngunwon nuye kunmodmikenh.

² Ngad wanjh munguyh ngarridjalmanjbun God bu nguddakenh, dja mak ngundidjalburrbun munguyh, bu ngarridi yiwarrudj ngudberre.

³ Bu ngad munguyh ngarrimarnedi yiwarrudj God nawu kadberre kornkumo, dja mak ngarriburrbun bu ngurriwoybukwon nungka, dja kunmekbekenh ngurrimarnedurrkmirri dja mak ngudmandeleng ngurrimarnedjaremerren. Dja ngurriburrbun mak bu ngudda minj ngurriwarnyakhmulewarren bu kunmekbekenh ngurridjalwoybukwon Jesus Christ nawu kawohrnan kadberre.

Ngudda Wanjh Ngurriwernhwoybukwong Nawu Kawohrnan Rowk

1 Thessalonians 1:4-10

⁴ Ngudda wanjh karridangerrinj nawu God ngunmarnedjare. Ngad ngarriburrbun bu nungka nguningkihdjarrngbom ngudberre.

⁵ Kunmekbekenh kunu bu ngudda ngurriwernhwoybukwong kore kundjalwoybuk duninj bu ngundimarnemulewani mahni kunwok kunmak. Kaluk ngad minj ngundimarneyimeninj manbu kunwokwi, dja ngundimarneyimeng bu kundulkarre dorreng God nuye, dja mak kore Namalngmakkaykenh ngunbukkabukkang.

Wanjh ngudda ngurribalburrbun kore ngad ngundimarnekurduyimi ngudberre kore karridjarrkni ba bu ngundibidyikarmeng.

⁶ Ngudda wanjh kandingunjdkang ngad dja mak ngurringunjdkang nawu Kawohrnan Rowk. Birribuyika bininj ngundiwarrewong dja kunyid wernmerrinj ngudberre, dja bonj, ngurridjalwokmarrkmey manbu kunwok dja nawu Namalngmakkaykenh ngunwernhnjilngmarnbom ngudberre.

⁷ Wanjh kunmekbekenh bininj nawu kabirriwoybukwon Jesus kore kunred Macedonia dja Achaia, bu ngundiwobek kang ngudberre wanjh bedmanwali birridjareminj bu kunmekbe birrikurduyimeninj bu yiman kore ngudda ngurrikurduyimeng.

⁸ Yoh, wanjh birriwern bininj nawu kabirrihni kore kubolkbubuyika rowk birriwernhbekani kore ngudda ngurrimulewam kunwok nawu Kawohrnan Rowk nuye. Birriwern wanjh ngundiwobek kang ngudberre bu ngurriwoybukwong nuye nawu kabirrihni kunred bokenh Macedonia dja Achaia dja mak kore kunbolkbubuyika warridj. Kaluk wanjh ngad minj ngundimulewan bedberre bu nguddakenh, dja bonj, korroko ngundiwobek kang!

⁹ Bedda wanjh bedman ngundimulewan ngudberre kore kandikimey bu ngarrimwam ngudberre. Dja mak bedda ngundiholyolme bu ngudda kerrngehkenh ngurrimarneboddangeni nawu nawarrewarre gods nawu

* 1:1 Kungey "Silvanus" kangeyrohrok "Silas".

idols, dja wanjh ngurriwohbawong dja bolkkime ngurrimarnedurrkmirri nawu God duninj, nawu kahdjalmimbi munguyh.

¹⁰ Wanjh kunu ngudda bolkkime ngurridjalmadbun nungka nuye Beywurd nawu kamre heavenbeh, nawu God birrolkkayhweng kore dowengbeh. Ngaye wanjh ngayolyolme naninjnanu nawu Jesus, nawu nungka kanngenhke kadberre kaluk bu God kamdurdeng dja kayiddung kunwarrenh kadberre nawu karriwarlahkenh bininj rowk.

2

Paul Kayolyolmerren Bu Baleh Kabimarnekurduyime Nawu Christ Nuye 1 Thessalonians 2:1-12

¹ Ngudda nawu ngad karridangerrinj, ngurriburrbun bu ngarrimwam ngundidjahwong wanjh kamak, dja minj ngarribarabuyi kore ngundimarnedurrkmirri.

² Ngurriburrbun mak bu ngokko wanjh ngarrimey kunrayek kore kunred Philippi. Nawu birrimmekbe bininj birrikang kumekbe kunred nakka wanjh ngandimarneyimi kunwarre, dja birriwernhdjareni bu ngandiwohgurdkeyi. Wanjh yerre kunu ngarrimwan kore kunred Thessalonica bu ngundimarnemulewan God nuye kunwok kunmak. Nungka wanjh ngandjalmarnbom bu ngarrikangebukminj, dja minj ngad ngarribalkeleniwirrinj bu ngarriweykangkenh kore birriwern bininj ngandingurdkeyi.

³ Wanjh bu ngad ngundimarnemulewan God nuye kunwok wanjh ngarriyolyolme mandjad. Minj mak ngarrikurren bu ngundikowemeninj ngudberre, dja mak kunmayali kunwarre minj ngarrikarrme, bu yimankek ngurriyime ngad ngundimarnekarreborledke.

⁴ Burrkyak. God ngandjarrngbom ngadberre bu nganwong mahni mankarre manbu nungka nuye kunwok kunmak. Wanjh munguyh ngarridjalwokdi kore manmekbe kunwok manbu nuye bu ngarrihweykan ngudberre. Ngad ngarridjaldjare ngarrimarnbun God bu kanjilngmak ngadberre, dja minj ngarribalnjlilngwarremen bu djal bininj ngandiwidnan ngadberre. Nungka God kaburrbun kore ngad ngarriburrbun kanjdji kore kukange ngadberre.

⁵ Ngad minj ngarriyimeninj bu yimankek ngundimarnbuyi ngudda bu ngad kandimarnedjareniwirrinj, dja mak ngad minj ngundikoweyi bu kumekbe ngarridjaldjareniwirrinj nawu ngudberre money. Kuhni kunwoybuk, dja God wanjh kankangeburrbun dja kankurdunan.

⁶ Dja mak ngad minj ngarridjareniwirrinj bu ngudda kandiburlumeninj, dja mak bininj birribuyika ngarriwarnyakni bu bedda warridj ngandiburlumeninj.

Ngad nawu Christ nuye apostles, dja bonj, minj ngarridjareniwirrinj bu ngudda kandinahnayi bu kandiwoyinj njalenjale yiman bu ngarriedjwarlah. Burrkyak.

⁷ Dja ngaleng ngad kunu yeleyedj ngundimarnekurduyimi ngudberre yiman kayime ngalbadjan ngalbu kabennahnann garre wurdwurd.

⁸ Ngad wanjh ngundimarnedjareni kunkimuk, dja kunu ngundidjalwong manbu kunwok kunmak nuye God, bu karriweykarren, dja warridj ngarrikurrmerren bu karridjarrkdi kore ngudda nawu bolkkime ngundimarnedjareni.

⁹ Nawu karridangerrinj, ngudda ngurriburrbun woymbukkih bu ngad wanjh kunrayek ngarridurrkmirri kore karridjarrkni dja mak ngundimarneyolyolmi kunmak kunwok manbu Godbeh. Ngad ngarridurrkmirri

kukak dja benbekad ba bu wurd ngadmandeleng ngarrikarremulewarren. Dja minj ngarridjareniwirrinj ngudda kandinahnayinj bu kunkimuk.

¹⁰ Ngudda kandikurdunang, dja mak God ngandikurdunang, bu ngad ngarridjalyimi kunmak, dja minj ngarriyimeninj kunwarre bu ngarrimwan karrihni kore ngudda nawu ngurriwoybukwong Jesus dja minj nangale ngudberre ngandiwidjuyi.

¹¹ Ngurriburrbun bu ngad ngundibebbehahnani yiman kayime nawu nakornkumo kabennahnani nuye wurdwurd.

¹² Ngad wanjh ngundimarnewokdi kore mandjad duninh, ba bu ngundikangemurrngayekwong, dja ngundikangemarnbom, ngundimar-rkdjawanj warridj bu ngudda ngurridjalyime mandjad kore God nawu ngunkayhme dja kadjare ngurringimen kore nungka kawohrnani rowk bu kunwernhmak duninh nuye.

Yikahwi Bininj Nawu Birriwokwong God

1 Thessalonians 2:13-16

¹³ Wanjh ngad munguyh karridjalmanjbun nawu God bu ngudda wanjh ngurribekakang manbu kunwok Godbeh bu ngundimarneyimeng, dja ngudda ngurriwokmey, dja mak ngurriburrbom maninjmanu kunwok minj bininjbeh. Dja woybukkih wanjh, mahni kunwok makka wanjh Godbeh, dja wanjh ngurriwokmarrkmey. Dja maninjmanu kunwok wanjh bolkkime kahdurkmirri kore kukange ngudberre nawu ngurriwoybukwong nungka.

¹⁴ Nawu karridangerrinj, ngudda wanjh ngurridedjingmey ngurrben-ngunjdjikan God nuye bininj kore yiwarrudj bedberre nawu kabirrihni Judea. Ngayime ngudda warridj ngurribelbmerrinj Christ Jesus yiman bedda. Dja mak ngudda warridj ngurrikarme kunyid yiman bedda. Nawu birriredbo bedberre nawu Jews bininj wanjh bindiwirrihmeng dja nawu ngurriredbo warridj ngundiwirrihme ngudberre.

¹⁵ Kaluk nawu Jews bininj wanjh nakka birrimekbe birribom Jesus nawu Kawohrnani Rowk, dja mak bindibom nawu prophets. Bedda wanjh ngandiwirrihmeng ngadberre warridj. Bedda wanjh kabirrinjilngwarrewon nawu God, dja kabindiwirrihme birribuyika bininj rowk.

¹⁶ Bedda yimankek ngandingurdkemeninj ngadberre bu ngarriyolyolmi kore bininj bedberre nawu minj Jews ba bu God kabenngehekkeh. Bedda djalmunguyh kabirrikurduyime kunwern kunwarre. Dja bonj, God wanjh bolkkime kayiddung bedberre.

Paul Kadjare Kabennan

1 Thessalonians 2:17-20

¹⁷ Nawu karridangerrinj, ngad wanjh bolkkime karridjalbebbehdi bu kundjaldedjdjumbungkeh. Kaluk yiman ngad wanjh ngarridjalmar-ladjni, dja wanjh ngarridjare bu ngundiyawoyhkebnan ngudda. Mak ngad ngundidjalburrbun kore kukange ngadberre. Ngad wanjh ngarri-wernhrohrokmenj bu ngarrimrawinj ngundidjahwoyi.

¹⁸ Wanjh woybukkih ngad bu ngarridjareni ngarrimrawinj kumekbe kore ngudda ngurrihni. Ngaye Paul wanjh woybukkih ngadjareni ngamrawinj. Ngarrirohrokmeni kunkudjikenh nuk dja bokenhkah nuk, dja wanjh namarnde duninh nawu Satan ngandenghkeng ngadberre.

¹⁹ Ngad wanjh ngarriwernhnjilngmak bu ngudberrekeh, dja kunu ngarridjalmadban Jesus nawu kawohrnani rowk bu kamirra ba bu ngarrid-jalburlumerran ngudberrekeh bu ngarridi kore kumirra nuye, dja minj njale mak ngarribalyolyolmerren.

²⁰ Yoh. Nungka wanjh ngad ngandjalburlume ngadberre bu nguddakenh. Dja ngudda kandidjalmarbun ngad bu ngarridjalwernhnjilngmakmen duninj.

3

Paul Bimunkeweng Timothy Bu Kabennahan

1 Thessalonians 3:1-5

¹⁻² Kunmekbekenh ngad ngarridjare bu ngarribekkan kunwok kore nguddabeh. Ngad wanjh ngarrinjlngwarreminj bu minj ngarriburrbuyi nawu bininj ngurrini kamak rowk, wanjh ngad kunu ngarrimunkeweng nawu Timothy kore ngudda, dja ngad wanjh ngarrihni kondah kore kunredkimuk Athens. Timothy wanjh nakka ngad karridanginj, dja mak nungka ngarridjarrkdurrrkmirri nuye God, bu ngarrbenmarneyime birriwarlahkenh bininj kunwok kunmak manbu Christkenh. Nungka wanjh ngarrimunkeweng balwam kore ngudda ba bu ngunbengyolyolme dja mak ngunmurrngayekwon ngudda ngudberre kore ngurriwoybukwong Christ.

³ Nungka kuhni kakurduyime ngudberre ba minj ngurridjalmarrkbaworren kore kunrayek manbu wernmerrinj bolkkime ngudberre dja yiman ngunrohrokme. Kaluk ngudda ngokko kerngeghkenhni ngurriburrbuni bu manbu kunyid makka wanjh munguyh karridjalmang ngad nawu kariwoybukwon Jesus Christ.

⁴ Kab ngudda ngurriburrbun bu ngad kumekbe kunred karridjarrkni wanjh ngundimarneyimeng ngudberre kaluk yerrekah wanjh kunrayek kanmarnewernmerren, wanjh bolkkime ngurrinan bu kunyid kumbemeng ngudberre.

⁵ Wanjh bu ngaye Paul wobekkan bu kuhni ngunmarnekurduyimeranj, ngaye ngadjalnjlngwarreminj duninj. Ngaye kunu ngadjalyimi bu namarnde duninj nawu kandjurrkwon rowk, wardi ngunkayinj ngudberre kore kunwarre ngurriyimeninj, dja wardi ngarridjalbolkmayi bu karridjarrkdurrrkmirri. Wanjh kuninjkuu ngaburrbuni bu ngabal-munkeweng nawu Timothy bu balwam djawayhmeng ngudberre bu munguyh ngurridjalwoybukwon nawu Christ.

Bu Timothy Durndi Dja Benmulewam

1 Thessalonians 3:6-13

⁶ Dja wanjh bolkkime Timothy kumdurndi dja nungka nganmarneyimeng ngadberre kore kundjalmak kunwok bu ngunmulewam ngudda ngurridjalwoybukwon Jesus, dja mak ngurrimarnedjaremerren warridj! Dja mak ngudda kandidjalburrbun kunmakkenh, dja ngurridjare bulkkidj bu kariyawoyhnarren. Ngad warridj ngarridjare!

⁷ Nawu karridangerrinj! Ngad mak kunwern kunyid kondah ngar-rimangi kore bininj kandiwirrihmeng, dja bu ngundiwobekkan kore ngurridjalwoybukwon Jesus, wanjh ngarriwernhkangemurrngayekminj.

⁸ Bolkkime wanjh ngad ngarriburrbun bu ngudda ngurrimurrngayek-minj kore ngurrimunkekadjung nawu Kawohnan Rowk, wanjh kunukka ngad yiman ngariyawoyhdarrkidminj!

⁹ Ngudda kunu wanjh kandidjalnjilngmarbom ngad. Wanjh kunu ngarridjare ngarrimanjbn God bu kundjalwern munguyh, ngad nawu karrihni kore kumirri nuye.

¹⁰ Ngad ngarridi yiwarrudj benbekad dja kukak rowk bu ngarriwernhd-jawadjawan God ba nganbidyikarme bu ngarrimre ngundidarnhkebnan

ngudberre, dja ngundibidyikarrme ba bu ngurriwernhwoybukwon Jesus Christ bu djal mandjad duninj.

¹¹ Mah, wanjh. Ngad holkkime ngarridjare God nungan nawu kadberre kornkumo, dja mak Jesus nawu kawohrnan kadberre bu ngandikurrme kore manbolhmak dja ngandimunkewe ba ngarrimre ngundinan ngudberre.

¹² Dja mak ngarridjare nawu Kawohrnan Rowk bu ngunmarnbun ngudberre ba bu ngudda ngurrimarnedjaremerren bulkkidj duninj, dja mak bu ngurrbenmarnedjare birribuyika bininj bulkkidj duninj, yiman kayime ngad ngundimarnedjare ngudberre.

¹³ Dja mak ngadjare nungka ngunkangerayekwon, ba bu ngurriyimeran ngurridjalmak bininj, dja ngunmakwan bu ngudda wanjh djal nuye bininj. Wanjh bu kunmekbe ngurridi kore kumirrk nuye God nawu kornkumo kadberre bu kunmekbe kunbarnangarra kore Jesus nawu kawohrnan kadberre kamdurndeng, dja nuye birriwern bininj rowk nawu birrimak dorreng kabirrimre.

4

Bu Karrinjinlgmarnbun Nawu God

1 Thessalonians 4:1-8

¹ Ngardduk nawu karridangerrinj, ngadjare kunwohkudji kab marneyime ngudberre. Korroko ngundibukkabukkang kore baleh ngurriyime ba bu ngurrinjinlgmarnbun nawu God. Dja wanjh ngarriburrbun bu bolkkime kuhni ngurridjalkurduyime. Bolkkime wanjh ngundimarrkdjawan kore kungey nuye Jesus nawu kawohrnan rowk bu ngurriwernhkurduyimen munguyh bu God ngurrinjinlgmarnbun.

² Ngudda ngurriburrbun kunwok manbu ngad ngundiwokrayekwong kore Jesusbeh nawu Kawohrnan Rowk.

³ God kadjare ngudda bu ngurriwernkurduyime kundjalmak, dja yuwn bu bininj dja daluk ngurridjirdmarren.

⁴ Ngudda nawu nabihbininj kobeng wanjh ngurriyo ngalbininj kobeng ngudberre bu djal kunmakkenh, dja minj kunwarrekenh.

⁵ Ngudda kab ngurriburrbu kore ngudman kunburrk ngudberre ngurrikumarnburrimen kore mandjad dja kunmak ba bu ngurrikukkarrme kunburrk ngudberre bu djal kamak rowk. Dja yuwn bu ngurrirohrok birriwarre bininj kore kubolkbubuyikabeh nawu minj kabirriburrbun God.

⁶ Ngad ngokko ngundibengdayhkeng kore ngundiwernhwokrayekwong, bu nawu Kawohrnan Rowk kabenbun bininj nawu kabirriyime kunwarre kore kabindijirdmang ngalbininj kobeng nuye nawu benedanginj kore Christ. Dja yuwn bu kuhni ngurriwarreworren.

⁷ Nungka God kankayhmeng kadberre ba bu djal kunmak karrikurduyime, dja minj kunwarre.

⁸ Mah, bu nangale bininj nawu kawirrihme maninjmanu kunwok, wanjh nakka nanu minj djal bininj kabiwokburriwe, dja wanjh nakka kabiwokwirrihme nawu God, nawu ngunwong ngudberre Namalngmakaykenh nuye.

Bu Karrimarnedjaremerren Dja Karridjalyime Kunmak

1 Thessalonians 4:9-12

⁹ Kandibekka, ngad minj ngarriyawoyhbimbun djurra ngudberre bu kuhnikenh, dja wanjh ngudda woybukkih ngurrimarnedjaremerren nawu

ngurridjarrkwoybukwon God. Dja ngokko ngunbukkang ngudberre bu ngurridjalmarnedjaremerrenkenh.

¹⁰ Kaluk ngudda ngokko ngurrbenmarnedjareminj nawu ngurridan-gerrinj kore kubolkwarlah kabolkngeyyo Macedonia. Dja ngaleng ngad ngundiwernhmarrkdjawan ngudberre, bu kuninjkuu kab ngurri-wernhkurduyimen munguyh.

¹¹ Ngudda kab ngurridjalmodmikenhnin, ngudman ngudberre ngur-ridjalnahnarrimen, dja mak ngurridurrrkmirrin kunrayek kore kubid ngudberre, bu yiman ngad ngokko ngundimarneyimeng.

¹² Bu kuhni ngurriyime, bininj nawu minj kabirriwoybukwon Jesus, nakka wanjh kabirrinjilngmak ngudberre, dja kamak rowk ngurridjalnah-narren dja minj nangale mak ngurrbendjanwohme.

Bu Nawu Kawohrnan Rowk Kamdurndeng

1 Thessalonians 4:13-18

¹³ Nawu karridangerrinj, ngad wanjh ngarridjare ngundimarnemule-wan ngudberre manbu kunwoybuk bu bininj kabirridjalkeyo kore kundowikenh. Wanjh ngad ngarridjare bu kuhni ngurriwernhburrkbekkan, ba bu minj ngurrirohok bininj nawu minj kabirriburrbun bu nungan God kaluk kanmarnekurduyime kunmak. Bedda wanjh kabindimarnen-jilngwarremen duninj bedberre nawu kabirridowe. Ngudda bonj, minj ngurriyawoyhwernhnjilngwarre duninj kore kundowikenh.

¹⁴ Ngad wanjh karriwernhburrbun bu Jesus doweng dja yawoyh-dolkkan, wanjh kunmekbekenh kunu karriburrbun warridj bu God kabendolkkayhwe bininj nawu birriwoybukwong Jesus dja kaluk birrid-oweng, ba bu nungka kabendurndiwe Jesus dorreng kore nungka.

¹⁵ Nawu Kawohrnan Rowk nungan kuhni kanmarneyimeng ngadberre kore wokkurmerrinj, dja wanjh marneyime. Ngad bininj nawu karrid-jaldarrkiddi bu nungka kamdurndeng, wanjh minj karridokme bedberre bininj nawu yiman birridjalkeyuwirrinj kore kundowikenh.

¹⁶ Kaluk kuninjkuu kakurduyimerran bu nawu nawernhkimuk angel wanjh wernkih kamkayhme, dja mak kamwernhwokdangen nawu God nuye trumpet. Wanjh bu kunmekbe kabolkyime nungan nawu Kawohrnan Rowk kamkolung kore heavenbeh dja kanmarnewokrayekwon kadberre rowk, bu dangwok wernkih duninj. Dja nawu bininj nawu ngokko birribelmerrinj Christ, nawu korroko birridoweng, wanjh bedda werrek kabirrimdolkan kore kundowikenh.

¹⁷ Wanjh yerreh, ngad bininj nawu karridjaldarrkid dja karridjalma-dbun nungka, wanjh God kandjarrkdarrkidmang ngad dja mak nawu birridowerrinj, dja wanjh kandjarrkkukdolkkayhwe kore kaddum kungol, ba bu kunmekbe karrinarren nawu Kawohrnan Rowk. Wanjh kaluk karridjarrkni nawu Kawohrnan Rowk bu munguyh munguyh.

¹⁸ Mah wanjh ngurrikangemurrngrayekworrimen bu maninjmanu kun-wok ngurriburrbun.

5

Karrimarnburrimen Kore Nawu Kawohrnan Rowk Kamre

1 Thessalonians 5:1-3

¹⁻² Nawu karridangerrinj! Ngad minj ngarridjare bu ngundimarnebim-bun djurra bu ngundimarneyime baleh kab kabolkyime mahni kunbar-nangarra bu nawu Kawohrnan Rowk kamre. Ngudda wanjh ngokko

ngurriburrbun bu nungka kamdurndeng bu kundjalburrikudji, dja karringkiharnemarnburren, kaluk minj karriburrbun ngad bu baleh kabolkkyime nungka kamre.

³ Bu darnkih kabolkymerran yikahwi bininj wardi kabirriyime, “Ngad ngarrimak, dja kamak rowk!” Wanjh kundjalmekbe rerrih nawu Kawohnan Rowk kabenbularrbun dja minj nangale kakelerlobme. Wanjh woybukkih kuninjkunu kadjalkurduyimerran werrkwerkk yiman kayime wurdyaw kahhibun daluk bu darnkih karrangen, dja minj nangale kahngurdke.

Karridjalkurduyimen Mandjad Kore God Kadjare

1 Thessalonians 5:4-11

⁴ Dja ngudda nawu karridangerrinj, wanjh minj ngurridi kore kukak, kaluk minj ngurrikangebarrhme bu nawu Kawohnan Rowk kamdurndeng bu kundjalburrikudji.

⁵ Ngudda wanjh wurdwurd nawu ngurridanginj kore kabolkwolkayindi dja ngurridjaldi kore benbekad. Minj karrikang kore kumunun, dja ngad minj kukak ngalenggarre.

⁶ Mah, dja wanjh karridjallorrhmiyuwn, dja yuwn bu karohrok birribuyika bininj bu kabirridjalkeyo munguyh. Ngad wanjh karridjalbolzna, dja karridjalmarnburren munguyh.

⁷ Ngurriburrbu bu kukak wanjh kunukka bininj kabirrikeyo dja mak kabirriworrromkan bu manbang kabirribongun.

⁸ Dja nawu ngad bininj wanjh nakka karrbenbekadwekenh, wanjh kunu karrimayalimarnburren. Dja munguyh karridjalburrbu kore mandjad bu karrikurduyime. Wanjh karriwernhwoybukwon nawu Kawohnan Rowk, dja mak karrimarnedjaremerrimen. Bu kuhni kariyime wanjh yiman kayime karridjongburren narayek kunmadj manbu karriburrenkenh nawu nawarre. Dja mak bu karriboyenmadbun kore God kannghekekenh kadberre, wanjh kunukka yiman kayime narayek nawu kunkodjkenh bu ngad karrikodjcongbuyindi, ba bu minj njale nawarre kanbun.

⁹ Dja God wanjh yingkihkarremarnbom bu nungka kanngheke kadberre. Minj karremarnbuyi bu nungka kanbun kore kayiddung kadberre, dja minj djareniwirrinj bu kanbuyi. Wanjh kunmekbekenh djalkarremarnbom bu kannghekekenh, kore nawu kawohnan kadberre Jesus Christ kanmarnekurduyimeng.

¹⁰ Nungka wanjh doweng kaddjarrkberre, ba bu karrimalngdarrkid rowk kore nungka, ngad nawu bolkkime karridjarrkdi, dja mak nawu ngokko birridowerrinj.

¹¹ Wanjh, kab ngurribengyolyolmerrimen, ba bu ngurrimurrngayekworren, bu yiman ngokko ngudda ngurrikurduyime bolkkime.

Bu Karrinahnarrenkenh

1 Thessalonians 5:12-22

¹² Nawu karridangerrinj, bolkkime ngad ngundidjawan ba bu ngurbekkabekkan bininj nawu ngudda ngundimarnedurrkmirri wernkih duninjh. Nawu Kawohnan Rowk benkurrmeng ba bu ngundibengdayhke dja ngundikan ngudberre kore nungka.

¹³ Bedda wanjh kunrayek duninjh bu ngundimarnedurrkmirri, dja wanjh kunmak ngurbendjalmarnnekurduyimen dja mak ngurbenmarnedjarenin, yuwn bu ngurridurren, dja ngurridjarrkmodmikenhnin.

¹⁴ Dja mak kunbuyikakenh ngad ngundibengdayhke ngudda nawu karridangerrinj. Yikahwi bininj ngudberre nawu minj kabirridjare

kabirridurrrkimirri, wanjh ngurrbenbengyolyolmen. Mak nawu bininj ngudberre nawu kabirrikele, wanjh ngurrbenmurrnggrayekwon. Dja mak bininj nawu kabirringudjywarren, wanjh ngurrbenbidyikarmen. Dja ngurrimadburren, dja yuwn bu ngurridjalyimerren, “Werrkwerrk!”.

¹⁵ Yuwn bu mak ngurrbenbawon bininj bu kabindibalmarnedurndiwerren kore kunwarrekenh, dja munguyh ngurrimarnburrimen bu ngurrikongiburrimen ngudberre, dja mak ngurrbenkongibun nawu birribuyika bininj.

¹⁶ Munguyh ngurriwernhmarrmarrnin!

¹⁷ Dja mak munguyh ngurridjaldin yiwarrudj dja yuwn ngurringurdme!

¹⁸ Kab munguyh ngurridjalmanjbu nawu God bu njalehnjalekenh. Kuninjkuwu wanjh ngurridjalkurduyimen kore God kadjare ngudberre, ngudda nawu ngurrikukbelbmerrinj nawu Christ Jesus.

¹⁹ Nawu nungka Namalngmakkaykenh nakka yiman kunak kahni kore kukange ke. Wanjh yuwn bu yibirludombun manbu kunak!

²⁰ Nawu nangale bininj kakarrme kunwok kore nawu Kawohnnan Rowkbeh, wanjh kunu yuwn bu ngurriwokwirrihme.

²¹ Kab ngurrirohrokmen manbu kunwokmayali rowk bu ngurribekka kamak. Dja wanjh kunu ngurriwokmang kore kunwoybuk ngurribekkan.

²² Dja bu ngurribekkan kore kunwok kunwarre, wanjh kunu yuwn bu ngurribalkurduyime dja ngurridjalbawo kunwarre rowk.

Paul Yakwong Nahni Djurra.

1 Thessalonians 5:23-28

²³ Ngad ngarridjare God nawu kanwon kunmodmikenh nuye, bu nungka ngunwernhkangebelewo duninh ngudberre kore kanjdji kukange. Dja mak ngarridjare nungka ngunnahnan kore kunkange, dja kunmalng dja kunburk ngudberre, ba bu kore kunbarnangarra bu nawu kawohnnan kadberre Jesus Christ kamre, wanjh minj ngunbalwelengname kore njalenjalekenh rowk.

²⁴ Nawu God ngunmarnekurduyime ngudberre. Nungka kerrngehkenh ngunkayhmeng, dja munguyh kadjalkurduyime kore wokkurmerrinj.

²⁵ Nawu ngad karridangerrinj, kab kandidjalmarnedin yiwarrudj munguyh ngadberre rowk.

²⁶ Bu kandimulewan ngad ngarrbenmarnewokmunkewerren nawu karridangerrinj kumekbe, wanjh ngurrikunibunjmarrimen kore djal kunmakkenh.

²⁷ Ngaye Paul wanjh wokrayekwon ngudberre bolkkime, kore kungey nuye nawu Kawohnnan Rowk, wanjh ngudda ngurrbenmarnebimngeybu nahni djurra kore nawu karridangerrinj rowk.

²⁸ Ngaye ngadjare bu Jesus Christ, nawu kawohnnan kadberre, bu ngundjalmarnekurduyime kore ngundjalkongibun ngudberre munguyh.

2 Thessalonians

Bu Paul Dorrengh Birribom Bedberre Bininj nawu Birrihni Kore Kunbolk Thessalonica

2 Thessalonians 1:1-2

¹ Ngaye Paul ngarridjarrkni bininj bokenh nawu kabenengeyyo Silvanus* dja Timothy. Ngad ngarribimbom nahni djurra ngudberre, ngudda bininj nawu yiwarrudj ngurrikarrme kore ngurrihni kunred Thessalonica. Ngudda wanjh ngurrikukbelbmerrinj kore God dja mak Jesus Christ nawu Kawohnan Rowk.

² Ngad ngarridjare bu God nawu Kornkumo dja mak Jesus Christ nawu Kawohnan Rowk ngundimarnekurduyime kunmak ngudberre, dja mak ngundiwon kunmodmikenh.

Nungka God Kabendjadme Bininj Rowk Kore Kunmakkenh Nuye

2 Thessalonians 1:3-10

³ Ngudda nawu karridangerrinj! Ngad wanjh munguyh ngarrimanjbun God bu nguddakenh. Yoh, kuninjkuu wanjh ngarridjalkurduyimen, bu kunmekbe ngarriburrbun ngudda wanjh ngurrimurrngayekmen kore ngurriwoybukwon God, dja mak bu ngurridjalmarnedjaremerren ngudberre munguyh dja wanjh kawernmerren.

⁴ Wanjh kunmekbekenh ngad ngundiburlume ngudda bu ngarrbenmarneyime God nuye bininj nawu yiwarrudj kabirrikarrme kore kubolkbubuyika. Kaluk ngarrbenmarnemulewam nguddakenh, dja ngarrbenmarneyime bu ngudda ngurrihmang kunrayek kore birriwarre bininj, dja mak kunyid dorrengh kambembe ngudberre, dja ngudda minj ngurrimarrkbaworren kore munguyh ngurrihdjalwoybukwon nawu God.

⁵⁻⁶ Dja njalekenh God ngunbawon bu kunyid ngunmarnebebme ngudberre? Wanjh kakarrme bokenh mankarre. Bu ngurridjalwoybukwon kore ngurrikarrme kunyid, wanjh ngurriwernhburrbun bu God ngunyngkihmarbn bu ngurringimen kore nungka kawohnan rowk bu munguyh munguyh. Dja mak ngurriburrbun bu God kabenbun birrimekbe bininj nawu ngundiwarrewon. Nungka wanjh kabendjadme bu djal mandjad duninj. Kaluk kuhni bu kanmarnerayekminj ba bu God kanbukkabukkan ngad karriwarlahkenh bininj rowk.

⁷ Kaluk yerrekeh wanjh God nungan ngunbidyikarrme kore ngurrihengeh ngudberre nawu ngurrikarrme kunyid, dja mak ngad warridj ngannghehe nawu God. Kuhni kakurduyimerran kore kabolkuyime bu birriwern bininj kabirridarrkidnan Jesus nawu Kawohnan Rowk kamre kore heavenbeh yiman kayime kunak manbu manbirlikimuk duninj, dja mak angels birridulkarrekimuk nuye kabirrimdjarrk.

⁸ Wanjh kunmekbe nungka kabendjadme dja kabenbun bininj nawu minj kabirridjare kabirriburrbun God, dja minj mak kabirriwokmarrmang kore birribek kang kunwok kunmak manbu nungka nuye Jesus nawu Kawohnan Rowk.

⁹ Birrimekbe bininj wanjh God kabendung, kaluk bedda wanjh kunrayek duninj kabirrimang bu munguyh munguyh. Dja nungan God kabenkurme djaldjarreh duninj ba bu minj kabirrikebnan nawu Kawohnan Rowk, dja mak minj kabirrinan nuye kundulkarre dja nuye kunmakmak.

* 1:1 Kunngey "Silvanus" kangeyrohrok "Silas".

¹⁰ Kuhni kakurduyimerran kore kunmekbe kunbarnangarra bu nawu Kawohrnan Rowk kamre ba bu nuyekih bininj kabirriburluburlume. Dja mak birriwarlahkenh bininj nawu kabirriwoybukwon nungka, wanjh kabirridjalkurdunan bu nuye kundulkarre dorreng. Dja bedda wanjh kabirrikuninjilngmak dorreng. Ngudda warridj wanjh ngurridi kumekbe, bu kunmekbekenh kunu kandiwoybukwong bu ngarrimwam dja ngundimarnemulewam mahni kunwok kunwoybuk duninj Jesus nungka nuye.

Bu Paul Dorreng Bindimarnedi Yiwarrudj Bedberre

2 Thessalonians 1:11-12

¹¹ Wanjh kuninjkukenh ngad ngundimarnedi yiwarrudj ngudberre bu munguyh. Ngad ngarridjawan God ba bu ngunmarnbun ngurriyimerran ngurrimak bininj kore nungan ngunkayhmeng ngudberre. Ngudda wanjh ngurridjare kunwern kunmakmak ngurrikurduyime, kore ngurriwoybukwonkeh. Dja ngad ngarridjawan God bu ngunbidyikarme kundulkarre dorreng nuye, ba bu ngurriyakwon rowk.

¹² Kuhni ngarridjawan God ngudberre ba bu nawu bininj ngundinan ngudberre kore kunmak ngurrikurduyime, dja kunmekbekenh bedda kabirringeyburlume Jesus Christ nawu Kawohrnan Rowk. Dja mak bedda ngundibalburlume bu nungkakenh. Karriburrbun bu God, dja mak Jesus Christ nawu kawohrnan kadberre, wanjh kandidjalmarnekurduyime kunmak dja munguyh kandikongibun kadberre rowk.

2

Kunwarre Kawernmerren Dja Yerre Wanjh Jesus Kamre

2 Thessalonians 2:1-12

¹⁻² Kandibekka nawu karridangerrinj, ngad ngundibengdayhke ngudberre bu kunmekbekenh. Ngurriburrbun bu karrimadbun Jesus Christ nawu kawohrnan rowk kadberre bu kamyawoyhdurndeng dja kamirnderawon kore nungka. Yuwn bu ngurrinjilngwarremen dja nuk ngurrikangewarremen bu ngurribekkan kunbuyika kore birribuyika bininj ngundimarneyime bu nawu Kawohrnan Rowk ngokko kumdurndi. Wardi kabirriyime bu kunubewu prophet benbengdayhkeng, dja nuk kabirriyime bu ngad ngarrbenmarnebimbom djurra. Bonj, wanjh nakka yuwn ngurrbenwoybukwon.

³ Wanjh nakka yuwn ngurrbenbawon bu ngundikowe! Wanjh bu kunmekbe kunbarnangarra kabolkyimerran, bu nawu Kawohrnan Rowk kamdurndeng kabolkyimerran, wanjh yerrekah bu karrinan nabuyika kambembe werrek nawu munguyh kabakkabakme God nuye mankarre. Nakka wanjh kabeneyidko God, dja bonj, nungka karrownen.

⁴ Wanjh namekbe bininj kabenwirrihime birribubuyika idols nawu bininj birriwarlahkenh kabirrimarnebodan, dja nungan kahdjal dokmiwerren. Dja mak kayime nawu bininj rowk nakka wanjh kabirrimarnebodan nungka, dja mak kabalkurrmerren kore God nuye manrurrkdjamun bu wanjh kayime yimankek nungka nawu god duninj. [Daniel 11:36; Ezekiel 28:2]

⁵ Ngurridjalburrbu kore ngaye marneyimeng ngudberre bu kuninjkukenh, bu kumekbe ngaye dorreng karrihdjarrkdi.

⁶ Wanjh bolkkime ngurriburrbun nakudji nawu kabingurdke namekbe nawarre, dja kaluk bu yerrekah kamre ba bu bininj rowk kumekbe nungka kabirridarrkidan.

⁷ Ngokko nawu nawarrehwarre kahmarnbuyindan kore kahkurduyimerran bu djal manmolk, wanjh ngokko kahmunidjre. Dja bolkkime

God nawu nadjalkudji kabingurdke, kaluk nungka wanjh kabibawon kare kurobbe.

⁸ Dja bu kunmekbe kabolkyimerran wanjh nawu nawarre duninj wanjh kabebme kore birridjalwern bininj kabirrinan. Wanjh Jesus nawu Kawohnan Rowk kabibularrbun nahni nawarre duninj bu kabibun bu kabimarnengolekbuhmerren kunngolek nuye dorrengh. Yoh, bu Jesus kambebme kunmakmak kunkimuk dorrengh nuye, wanjh nawu namekbe nawarre kadjaldarrkidkukyakmen. [Isaiah 11:4]

⁹ Bu namekbe nawarre kamre wanjh nungka kahkarrme kundulkarre nuye nawu namarnde duninj Satan, dja nungka kabenkowe bininj kore kakurduyime kunwern bu kundulkarre nuye ba bu bininj kabirrikangebarrhme nuye.

¹⁰ Wanjh mahni kunwarre kunwern kabenkowe bininj nawu kabirrimalngdowen. Birrimekbe bininj wanjh birriwokweng manbu kunwoybuk, dja minj birridjareniwirrinj. Dja maninjmanu kunwoybuk wanjh bengekemeninj. Kunmekbekenh kunu wanjh bedda kabirridjalmalngdowe.

¹¹ Kaluk kunmekbekenh God benkoweng birrimekbe bininj bu kundulkarre nuye dorrengh, ba bu kabirriwoybukwon nawu nawarre bu kabenkowe.

¹² Kunukka wanjh God kabenwelengname dja kabenwarrewe bininj nawu minj birriwoybukwoyi manbu kunwok kunwoybuk, dja ngaleng birridjaldjareni manbu kunwarrekenh.

God Ngunkayhmeng Ngudberre ba bu Ngunngheke.

2 Thessalonians 2:13-15

¹³ Dja ngudda nawu karridangerrinj, wanjh munguyh ngarridjalmanjbu God bu nguddakenh, ngudda nawu Kawohnan Rowk ngunmarnedjare. Yoh, God ngokko ngundjarrngbom bu ngudda ngurriyungkih bininj nuye, dja mak ngunnghekkeng ngudberre. Nungka kuhni kurduyimeng ngudberre bu nawu Namalngmakkaykenh nuye ngunkangemarnbom ba bu ngurriyimerranj nuyekih bininj, dja mak wanjh ngurriwoybukwong manbu kunwoybuk.

¹⁴ Nungka ngunkayhmeng kore kandibekkkang bu ngad ngarriyolyolmeng ngudberre manbu kunwok kunmak. Dja nungka kadjare bu ngurridjarrkdi Jesus Christ nawu kawohnan rowk kadberre kore kunmakmak kunkimuk nuye.

¹⁵ Mah, wanjh nawu karridangerrinj, yuwn ngurrimarrkbaworren bu kuninjkunukenh, dja munguyh ngurriwernhburrbu kore ngad ngundinakenwong bu ngundibukkabukkang dja mak ngarrihbimbuni ngudberre kore djurra.

Ngurrikangemarnburrimen Kore Jesus Christ Dja God Nawu Kornkumo

2 Thessalonians 2:16-17

¹⁶⁻¹⁷ Ngabbard God kandjalmarnedjareni rowk dja mak kunmak duninj bu kanmarnekurduyimeng bu kanmarnbom karrimurrnggrayek munguyh munguyh dja mak munguyh karridjalmadbun nungka kunnjilngmak dorrengh kore nungka kaluk kakurduyime kadberre.

Wanjh bolkkime ngaye ngadjawan God dja mak Jesus Christ nawu Kawohnan Rowk, bu ngundibengyolyolme kore kukange ngudberre ba ngundimarnbun ngurrikangemakmen bu ngurridurrrkmirri kore kunmakkenh dja mak kore ngurriyolyolme bu bininj ngurrbenmarneyime.

3

*Ngudda Kandimarnedin Yiwarrudj Ngadberre.**2 Thessalonians 3:1-5*

¹ Kuhni mak wanjh ngarridjare ngundidjawan nawu karridangerrinj. Ngarridjare bu kandimarnedi yiwarrudj ngadberre ba bu kunwok manbu kore nawu Kawohnnan Rowk kanwong wanjh werkkwerkk kawarlahmen ba birriwern bininj kabirriwernhwokmang kore ngarrbenmarneyolyolme, yiman bu ngokko kurduyimerranj ngudberre.

² Dja mak ngurrihdjaldjawa God bu yiwarrudj ngurrihdjaldin ba kannggehke ngadberre kore bininj nawu birriwernhwarre duninj. Dja minj birridjalwern rowk bininj kabirriwoybukwon God.

³ Dja nawu Kawohnnan Rowk wanjh kannahnan kore wokkurmerrinj kadberre, dja minj mak kanbawon, kaluk nungan ngunmurrngayekwon ngudberre, dja mak ngunkukbalhme kore nawu nawarre duninj.

⁴ Ngad wanjh ngarriwernhwoybukwon nawu Kawohnnan Rowk, dja wanjh kunmekbekenh ngarriburrbun bu ngudda munguyh ngurridjalkurduyime kore ngad ngundimarnewokrayekwong.

⁵ Ngad ngarridjawan nawu Kawohnnan Rowk bu ngunkangemarnbun ba bu ngurriwernhburrbun kore nungka God ngundjalmarnedjare ngudberre, dja mak bu ngurriyimerran yiman nungka Christ bu minj ngurrimarrkbaworren.

*Ngurriwernhdurckmirri Dja Yuwn Ngurringudjywarren**2 Thessalonians 3:6-15*

⁶ Ngad wanjh mandjad duninj ngundimarneyime nawu karridangerrinj mahni kunrayek kunwok manbu kumwam kore Jesus Christ nawu Kawohnnan Rowk kanwong. Yuwn bu ngurriaworren bininj yiwarrudj bedberre nawu munguyh kabirrihbolkmang, dja nawu kabirriwokkewkme kore ngad ngundibukkabukkang ngudberre.

⁷ Ngudda kab ngurriburrbun bu ngad kunrayek ngarridurckmirranginj ngudberre kore kumekbe karridjarrkni. Dja wardi kunmekbe ngurrikurduyimen bu yiman ngad ngarrihkurduyimi. Minj mak ngarridjalbolkmangi.

⁸ Minj ngarringuyi manme kore nabuyika bininj nuye bu minj ngarrikarremulewayi nuye, dja ngaleng ngarridjaldurckmirri wernkih bu barnangarra dja mak kukak ba bu ngarrikukkarrmi, dja minj njale ngundiwidjadjawani munguyh.

⁹ Kamak bu ngundidjawayi bu njalehnjalekenh, dja burrkyak. Ngarribawong, dja ngaleng ngarridjareni bu ngudda kandingunjdjikan ngadberre bu ngudda mak ngurriyime.

¹⁰ Ngurriburrbun manbu mankarre ngundiwong korroko bu karridjarrkdi bu ngarriyimi, "Nangale bininj nawu minj kadjare karrurckmirri, wanjh nakka yuwn bu kangun manme."

¹¹ Kunbuyika mak ngarrbenwobekkkang, bu yikahwi bininj nawu ngurridjarrkdi minj kabirridjare kabirridurckmirri. Bedda minj birrikurduwern, dja kabirridjaldjare kabindikilekme birribuyika bininj.

¹² Bolkkime wanjh ngad ngarrbenmarneyime birrimekbe bininj mandjad duninj kore Jesus Christ nawu Kawohnnan Rowk. Birridjalnin kamak rowk dja kabirridurckmirri wernkih ba bu kabirribayahme manme bu kabirriworckmiworren.

¹³ Ngad nawu karridangerrinj, yuwn ngurringudjywarren bu munguyh ngurridjalkurduyime kore kunmakkenh.

¹⁴ Ngurrbenwernhna bininj ngudberre nawu minj kabirrimarrkmang kunwok manbu kabimbuyindi kore nahninjanu djurra. Yuwn ngurrbenyawoyhraworren birrimekbe ba bu bedman kabirriyemengalme.

¹⁵ Yuwn mak ngurrbendung yiman nawu ngurriyidko bininj, dja ngurrbenbengdayhkemen yiman bu ngurridangerrinj rowk.

Ngaye Ngadjare God Kunmak Duninj Ngunmarneyime Ngudberre

2 Thessalonians 3:16-18

¹⁶ Bonj. Wanjh ngadjare nawu Kawohrnan Rowk nawu nungan nadjalkudji kamarnbun kunmodkmikenh rowk, bu nungan ngunwon kunmodmikenh nuye munguyh munguyh, kore baleh yarrkka ngurrini. Dja mak ngadjare bu nungka dorreng munguyh ngurridjarrkre rowk.

¹⁷ Ngaye Paul ngabimbun nahni djurra kore ngayeman kunbid ngardduk, wanjh ngadjare kunwok kunmak ngayime ngudberre. Kuninjkunu ngahdjalngeynamerren munguyh kore djurra nawern bu ngabimbun. Wanjh ngurriwernhna kore ngabimbun kondah.

¹⁸ Ngaye ngadjawan Jesus Christ nawu Kawohrnan Rowk bu ngunkongibun bu ngurrihdjarrkre ngudberre rowk.

1 Timothy

Bu Paul Bimarnebimbom Nawu Timothy

1 Timothy 1:1-2

¹⁻² Ngaye Paul ngabimbom nahnı djurra ngudda ke Timothy. Ngudda yiwoybukwong Jesus, dja kunmekbekenh ngudda yiyimerranj ngardduk beywurd! God nawu kanngengkeng rowk dja mak Christ Jesus nawu karrimadbun, bedda wanjh ngandiwokrayekwong dja ngaye kunu ngayimerranj apostle nuye Christ Jesus.

Wanjh ngaye ngadjare God nawu Kornkumo dja mak Christ Jesus nawu kawohrnan kadberre bu ngundimarnekurduyime kunmak bu djal burudjang, dja mak ngundikongibun dja mak ngundiwon kunmodmikenh.

Yibengdayhkemen Bininj Nawu Kunbuyika Kabindibukkabukkan

1 Timothy 1:3-7

³ Bu ngaye ngabalhrey kore kubolkkimuk Macedonia, wanjh ngaye ngokko marneyimeng mandjad ngudda kunmekbe yidjalnin kore kunred Ephesus. Bolkkime ngaye wanjh yawoyhmarneyime yidjalnin kunmekbe dja yibenwokrayekwo dja yibengurdkemen birrimekbe bininj nawu kabindibukkabukkan kore mankarrebuyika manbu kabenkebrokwarerewon bininj.

⁴ Ngudda kab yibenmarneyimen bu birribawo manmekbe manbu mankarre manbu minj kunwoybuk. Dja mak birribawo manbu kabirrikadjung nawu kore mawahmawah bedberre nawu naninjnanu kabirringeydingeydi, kornkornkumokenh dja mawahmawahkenh dja mak nawu bindikebmawahmeng. Birribawo kunmekbe kore kabirriburrbun. Bu kabirridjalburrbun manmekbe manu, wanjh kunu kabirridjaldangwerren. Dja kab wardi birridjalwoybukwo God ba bu kabirriburrbun kore nungka kadjare.

⁵ Bu ngad ngarrbenbukkan bininj kore yiwarrudj, baleh kab karriburrbun kore ngarrbenmarnekurduyime bedberre? Wanjh ngarrbenmarnbun bu kabirriini yiman kabirrikangebele yerreh dja minj mak kunwarre kabirriyawoyhkurduyime. Bu kuhni wanjh kabirriwoybukwon God bu minj kabirrihkurren, wanjh kunukka kabirridjalmarnedjaremerren mandjad duninj.

⁶ Yikahwi bininj wanjh birribawong kunmekbe rowk. Bedda birridurndi kore kabirridjalwokdi kunwarrekenh.

⁷ Bedda kabirridjare kabindibukkabukkan birribuyika bininj kore God nuye mankarre kahyo. Bedda wanjh kabirriyime bu bedda djal mandjad kabindibukkabukkan bininj, dja med, bedmandeleng minj kabirriwernhburrkburrkbeakkan kore baleh yarrkka kabirriwokdi dja kabindimarneyolyolme.

Njalekenh God Kanwong Kadberre Mankarre Nuye?

1 Timothy 1:8-11

⁸ Ngad karriburrbun bu manbu mankarre nuye God wanjh manmak, dja bininj birriwernhmarrkma kore mandjad duninj.

⁹⁻¹⁰ Dja mak karriburrbun bu God kurrmeng mankarre nuye nawu bininj birriwarre bedberre, dja manu mankarre minj kabendjuhun nawu birrimak bininj. Dja manbu mankarre kahyo bedberre birrimekbe bininj kore bedman munguyh kabirridjalkurduyime kunwarre. Ngaye

ngabenholyolme bininj nawu kabirridjalwe dja kabirridjalbakke maninjmanu mankarre, dja mak nawu kabirrimarnewarnyak nawu God dja kabirridjalkurduyime kunwarre munguyh. Dja mak bininj nawu minj kabirrimarnekele God dja kabirridjalkewkme kore yiwarrudj. Bedda yikahwi nawu kabindihbun kabindihkukkurreme yiman kayime nawu nakornhkornkumo dja ngalbabadjan bedberre dja mak bininj birriwern nawu namarndeyi kabirribebbehymerran. Ngayime warridj bininj dja daluk nawu kabirridjirdmarren, dja mak bininj nawu kabindikukweykan birribuyika bininj kore kabindibongkarmekenh kore kabindimarnedurrkmirri bedberre. Wanjh nakka nanu bininj kabirridjalkurren dja mak nawu kabirrihwokkurrehkurren bu kabirrihre kore court.

Kaluk ngaye ngabenholyolme bininj nawu kandiyiwirrihme mankarre ngarrku munguyh kore ngarrbenbukkabukkan mankarre manbu manmak.

¹¹ Dja kore kunmak duninh ngarrbenbukkan kore djal kunmak kunwok kore manbu Godbeh, nawu ngad karridjalburlume rowk. Nungka nganwong ngaye bu kunwok kunmak ngawoknahnann.

Ngaye Ngamanjibun Christ Jesus Nawu Kawohnnan Kadberre
1 Timothy 1:12-17

¹² Ngaye munguyh ngahdjalmanjibun Christ Jesus nawu kawohnnan kadberre. Nungka wanjh ngaye nganmarnemakwam, nawu nungka nganmurrngrayekwong dja ngankurrmeng bu kuninjkuu ngahmarnerdurkmirrikenh kore nungka nuye.

¹³ Bu korroko ngaye wanjh ngadjalwarreni duninh, dja ngamarneyimi nuye kunwok kunwarre munguyh. Dja mak ngaye ngabenhbuni nawu bininj birrikodjikulumakni yiwarrudj bedberre bu djal kunrayek duninh ngabenmarnekurduyimi. Kunukka kunu ngadjaldjareni. Wanjh nungka Christ Jesus ngandjalkongibom bulkkidj duninh. Kuhni bu minj ngaye ngawernhburrbuyi bu ngaye baleh ngahkurduyimi, dja ngaye minj ngawoybukwoyi nungka.

¹⁴ Dja nawu kawohnnan kadberre wanjh kundjalmak duninh ngandjalmarnekurduyimeng. Nungka nganmarnbom bu ngaye nganebelbmerrinj Christ Jesus dja mak ngabenmarnedjareminj birribuyika bininj.

¹⁵ Wanjh ngadjare kanbekka! Ngudda wanjh yidjalwoybukwo bu kuhni woybukkih duninh Christ Jesus kumwam kondanjkuu kurorre ba bu kangehke ngad nawu karriwarre bininj. Ngaye wanjh nawu ngahdjalwernhwarreni duninh bu ngabenyurhkheng birribuyika birriwarre bininj.

¹⁶ Yoh, ngaye ngadjalwernhwarreni duninh, dja bonj, kundjalmekbekenh Christ Jesus ngandjalmaduni ngaye, dja nungka kunmak djalkurduyimi ngardduk. Kunmekbe kurduyimeng ba bu birribuyika bininj ngaye ngandinan bu wanjh ngandingunjdjikan, ba bu bedmanwali kabirriwoybukwon dja nungka kabenmarnbun bu kabirridarrkid munguyh munguyh.

¹⁷ Mah, wanjh karriwarlahkenh bininj karriwokmarrkma nungka dja karriburlumen munguyh munguyh nungka nawu king duninh. Nungka nawu kadjalwohrnan yehyeng rowk djal munguyh munguyh, dja nungka minj karrowen dja kadjaldarrkid munguyh. Minj nangale bininj kaidarrkidnan, dja nungka nadjalkudji nawu God duninh. Wanjh karridjalburlumen! Amen.

Ngaye Won Maninjmanu Kunwok Bu Yirruurkmirrikenh
1 Timothy 1:18-20

¹⁸ Timothy, ngudda nawu ngardduk wurdyaw, ngudda yiburrbun God ngunmarnemunkeweng kunwok manbu prophecies kore bininj bedberre bu nguddakah, bu wanjh ngundimulewani ke. Ngaye bolkkime wanjh yawoyhmarneyime kore bedda ngundiyingkihmulawam ba bu ngudda yiyimerran yiman kayime namak soldier nuye God.

¹⁹ Mah, wanjh yidjalwernhwoybukwo munguyh kore Christ Jesuskenh. Yuwn bu yiburrbun kore kunwarrekenh. Yiburrbun bu yikahwi birribuyika bininj birriwokwirrimeng God dja kunu birriwarreworinj ba bu minj kabirridjalwoybukwon kore nungka.

²⁰ Bu kuhni wanjh benbenemarnekurduyimerranj bininj bokenh nawu kabenengeyyo nawu Hymenaeus dja mak nawu Alexander. Ngaye wanjh ngabenbenekurmeng kore nawu Namarnde Duninj ngabidkenwong. Ngaye ngadjare nahni bokenh bininj kabeneborlhme bu minj kabeneya-woyhwokdi kunwok kunwarre nuye God.

2

Bu Ngurridi Yiwarrudjenh

1 Timothy 2:1-7

¹ Kuhni wanjh ngahdjare ngarrokmihwe werrek. Ngaye ngadjare ngudda yibenmarnbun birriwern bininj bu kabirridi yiwarrudj dja birridjawa God nawu yehyengkenh rowk. Bindimarnedin yiwarrudj bedberre birribuyika bininj dja mak birrimanjbu God bu kunwern kahkurduyimerran.

² Bindimarnedin yiwarrudj nawu bininj birrikihkimuk nawu yiman kayime kings dja mak nawu kabirriwohrnawohrnan. Ngurrbenmarnedin ba bu kunukka wanjh karrini kunmak, dja mak karrini kunmodmikenh rowk. Wanjh kunukka yiman kayime kunmak bu karridjaldi yiwarrudj nuye God dja mak karridjarrkni kore nungka yiman kunmakmak kabebke kadberre.

³ Kuninjku rowk wanjh kundjalmak, dja God nawu kangehke wanjh kadjare bu karrikurduyime.

⁴ Nungka wanjh kadjare bu kabengehke birriwarlahkenh bininj, dja mak kadjare kabirriborlhme kore kunwoybukkenh.

⁵⁻⁶ Ngaye wanjh kuninjku ngadjalyololme bu God nakka nadjalkudji, bu minj nangale mak nabuyika God. Dja nungka nadjalkudji wanjh nawu God kadberre. Jesus Christ nungka wanjh nadjalkudji nawu kanmarnewokdi kadberre kore God. Kaluk nungka nawu nadjalkudji djal bininj duninj kadberre nawu kangeyyo Christ Jesus, nawu kanmarnekanjcurrmerrinj kadberre rowk. Wanjh kunmekbekenh kunu God minj kanbuyinj kadberre. Kuninjku wanjh nungan God dungnameng kore karremarnbuyindanj dja wanjh bolkkime karriwarlahkenh bininj wanjh karriwernhburrbun bu kunmak kurduyimerranj kadberre.

⁷ Kuninjkukenh God nungka ngankurmeng bu ngarrurrkmirri, dja nganmarnbun nuye apostle, bu nganmunkeweng bu birriwern ngabenmarneyime nuye kunwok. Ngaye ngahyime kunwoybuk. Ngaye minj ngahkurren kuninjku bu ngahyime. Yoh, dja nungka wanjh ngaye nganmunkeweng bu ngabenmarneyime bininj nawu minj Jews bu kabirriburrbun kunwoybuk dja kabirriwoybukwon nungka nadjalkudji.

Mankarre Bedberre Daluhdaluk Dja Binihbininj Kore Yiwarrudj

1 Timothy 2:8-15

⁸ Wanjh ngaye ngadjare birriwern binihbininj kore kubolkwarlahkenh bu kabirridjalbidwayhmen kaddum bu kabirridi yiwarrudj. Nawu bininj nungka God nuye wanjh nakka nanu birriwernhkukmarnburrimen bu

kabirridi kore kunrayek nuye. Dja kunukka minj kunmak bu yiman kabirridangwerren dja mak kabirrihdurren.

⁹ Dja ngaye ngadjare daluk rowk nawu yiman kayime morlehmorlenj bu wanjh birriwernehkumarnburren bulkkidj duninj. Kaluk minj ngaye ngadjare nawu yiman kayime kunmadj kabirribayahme kore nawern money. Dja mak minj ngaye ngadjare daluhdaluk kabirrikukmarnmarnburren kunmak dja kabirrinamerren nawu gold dja mak pearls dja mak kabirringabekmarnmarnburren bu kabirrikukbuyibuyikahworren.

¹⁰ Dja wanjh kunukka burrkyak. Ngaye wanjh ngadjare bu kabirridjalkurduyime kunmak bu bedberre birribuyika. Kunukka wanjh kundjalkarremak duninj ngalbu daluk kadjare kakurduyime bu yiman kahdi yiwarrudj dja kabiwokmarrkmang ngarre God.

¹¹ Dja ngalbu daluk ngalka wanjh birriborlhmen bu yeledj kabirrikurduyime, dja minj mak kabirribalkimukworren bedberre birribuyika.

¹² Ngaye minj ngadjare daluk bu kabindibukkabukkan binihbininj. Dja bedda minj kabindimarnewohrnan nawu yiman binihbininj. Dja daluk wanjh birridjalngurdmen bu kunmekbe.

¹³ Bu kuninjkuu wanjh yiburrbu kore nawu Adam werrek dokmeng bimarnbom God. Yerreh wanjh bimarnbom ngalbu daluk ngeyyoy Eve. [Genesis 2:7; 21-22]

¹⁴ Wanjh Namarnde Duninj bikoweng ngalbu daluk dja nungka nawu Adam nawid. Dja ngaleng wanjh Eve bakkeng mankarre nuye God. [Genesis 3:1-6]

¹⁵ Kunu bonj, bu daluhdaluk kabirridjalwoybukwon, dja mak kabindimarnedjare birribuyika, dja mak bu kabirridjalkurduyime kunmak, bu minj kabirriburlumerren, wanjh nungan God munguyh kabendjalngehke dja kabenbidyikarme kore wurdyaw kabindihyawmang.

3

Bininj Nawu Kabirriwohrnan Kore Yiwarrudj

1 Timothy 3:1-7

¹ Kanbekka bu kunwoybuk marneyime. Ngudda yiburrbun bininj yika kabirrihyime, "Nawu nangale kadjare karrokniwerren kore kawohrnan yiwarrudjkenh, wanjh bonj kunukka kunmak."*. Wanjh kuninjkuu kabirriyime bu kore kundjalwoybuk kunwok kahyo.

² Nawu nangale yimankek kadjare kahdurckmirri bu kawohrnan manbu yiwarrudj, namekbe nanu wanjh bininj nadjalmaknin munguyh bu kunmak kahkurduyime. Mak bikarrmen ngaldjalkudjinin ngalbininj kobeng nuye. Nungka marnburrimen bu kore kunmak kadjalkurduyime dja mak kaburrbun kore kunmak yalyal kakurduyime. Dja mak mandjadnin bu kakurduyime kore kabennahnan birribuyika bininj, dja mak kabenkimang nawu bininj kubolkbubuyikabeh. Nungka wanjh nadjalmaknin bu kabenbukkabukkan kore kabenbidyikarme birribuyika bininj.

³ Yuwn bu mak kabongun kunwern kunbang. Yuwn bu mak kunwarre kabenmarnekurduyime bu kabendung nawu birribuyika bininj, dja kabenmarnekurduyime birriwerne bu kunmodmikenh dorrengh. Dja mak yuwn bu nawu bininj yiman kayime kabendangwe munguyh kabenhmarneyidngalke, dja yuwn bu mak kamanjngun kunwardde nawu money.

⁴⁻⁵ Nahni bininj wanjh bennahna nawu nungka nuye namud. Kaluk kabenmarnbun nawu wurdwurd nuye nakka kabirriwokmarrkmang dja

* **3:1** Dja kunbuyika kabimbuyindi, "Nawu nangale kadjare kayimerran bishop."

kabirriwokbekkan kore kabenhmarneyime bedberre. Dja bininj nawu minj kabenwernhnahnann nuye namud wernkih duninj, yiddok kabenahnann bininj kore God nuye yiwarrudj?

⁶ Yuwn bu nakka nakerrnge bu karredjingmang kabimunkekadjung Jesus bu kundedjdjumbungkenh. Nanu wanjh minj kayimerran bu kawohnnan njalenjale kore manbu yiwarrudjkenh. Wardi kunubewu wanjh kahburluburlumerren. Kunu wanjh kawarreworren nungandeleng dja kayimerran yiman Namarnde Duninj namekbe nawu God bidjadmeng bu burluhburlumerreni.

⁷ Dja kunbuyika warridj, nanih bininj wanjh ngeymaknin, bu birribuyika bininj nawu kuberrk kabirridi, wanjh bedda kabirrimakwan, ba bu minj Namarnde Duninj kabikukwarrhke kore kunwarre kahyime, dja kawowarreworren.

Bininj Nawu Kabirriyimerran Nawu Deacons

1 Timothy 3:8-13

⁸ Dja mak nawu nabuyika yiman deacons wanjh nakka nanu kundjalmeke kadjalrohrok. Wanjh nakka nanu kundjalmeke yerreh djalkurduyimen bu djala mandjad, dja yuwn bu kawohkurrekurren. Dja yuwn bu mak kabongun kumbang bu kamayahme. Dja mak bu kamanjngun njalenjale nawu yiman kayime kadjirdmang kunwardde money bedberre.

⁹ Nakka nanu wanjh kawernhkarme manbu mankarremak, kore kabirriwoybukwon God. Dja yuwn bu mak kawohburrbun kore kunwarrekenh.

¹⁰ Yibenkurduna yibenrohrokmen werrek naninjnanu nawu bininj kabirridjare deacons kabirriyimerran. Bu yibennan kunmekbe kabirrikurduyime kore kunmak rowk, wanjh kunu yibenkurreme kore kabindimarnedurkmirrikenh bu kabirriyimerran deacons.

¹¹ Bu nahni bininj kabikarme ngalbininj kobeng, wanjh yirohrokmen warridj. Wanjh kunmekbe rowk kadjalkarreyime kakarrerohrok rowk bu kayimerran ngalenggarre. Wanjh kunmekbe djalkurduyimen ngalmekbe daluk kore mandjad duninj. Bu minj kabenbalyolyolme nawu birribuyika daluk dja bininj. Dja djalmarnburrimen bu kundjalmak kadjalkurduyime munguyh. Dja mak munguyh kadjalkurduyime kore kawokkurrmerren.

¹² Nawu nangale kadjare kayimerran deacon, wanjh nakka nanu bidjalkarmen ngaldjalkudjinin ngalbininj kobeng nuye. Dja mak bendjalnahna wurdwurd nuye rowk. Dja mak nawu namud nuye bu kunmak rowk kabennahnann.

¹³ Nawu nangale karrurrkmirri kunmak rowk bu yiman deacon kayime, wanjh birriwern bininj nawu kabirrinan kabirrimarnewarnmakmen nuye. Wanjh kunukka namekbe bininj kamurrngayekmen bu kore kabenmarneyolyolme birriwern bininj bu kabiyolyolme Christ Jesus.

Bu God Nuye Kunwok Manbu Kahwarlkayindi

1 Timothy 3:14-16

¹⁴⁻¹⁵ Kaluk ngaye wanjh ngadjare ngambadre kore ngudda. Dja bolkkime ngaye ngayingkihimbun ngudberre mahni kunwok bu bengdayhke ngudberre. Dja bu yiman minj ngamre bu kunkuyeng, wanjh kunukka yingan yibimnan nahni djurra, dja yiburrbun manbu baleh bininj kabirrikurduyime kore nawu namud nuye God. Ngaye ngabenyolyolme bininj nawu yiwarrudj bedberre. Kaluk God nawu kahdjalmimbi munguyh wanjh kabenkarme nuye bininj, nawu bedda kabirrikarme manbu kunwoybuk kunwok manbu mandulumuk duninj kadberre karriwarlahkenh bininj rowk.

¹⁶ Yoh, wanjh kuninjkuu kundjalwoybuk duninj. Kuhni bu kawar-
lkkawarlkkayindi mankarre manbu kayolyolme bu karriwoybukwon God.
Wanjh kunukka mandjalkarrekuken duninj. Dja yiburrbun mahni
kunwok manbu kayime, “Nungka wanjh kumwam kunburrk dorreng
bu yimerranj ngad bininj duninj, wanjh birridjalwern bininj birrinang
nungka rowk. Nawu Namalngmakkaykenh benbukkang nawu birrinang
bu woymbukkih duninj nungka God. Dja mak nawu Angels warriidj
nakka birrinang. Kaluk bininj birriwam kore kubolkwarlakenh rowk
dja bindimarneyolyolmi bininj nawu minj Jews. Dja birridjalwern bininj
kondah kurorre wanjh birriwoybukwong nuye. Dja God bikang kaddum
birrurndiweng kore nungandeleng nuye.”

4

Yikahwi Bininj Kabindibukkan Manbu Kabenwarrewon Bininj

1 Timothy 4:1-6

¹ Nawu Namalngmakkaykenh kandjalmarneyimeng kurobbe kore
mandjad duninj, kaluk bu yerrekah kuninjkuu kunred darnkih ka-
balyakmen, wanjh yikahwi bininj nawu yiwarrudj bedberre wanjh
kabirrimayaliborledme kore kabirriwoybukwon. Dja wanjh bedda kabir-
ribekkan nawu nawarre kunmalng nawu kahkurren, dja mak namarnde
nawu kabenbukkabukkan kore kunwarre.

² Yoh, yikahwi bininj kabindibalbukkan birribuyika bininj kore kun-
mekbe kunwarrekenh. Birrimekbe bininj nakka wanjh yiman kabir-
ridjalkurren, bu kabirridjalwohkurrekkurren yimankek bedda nawu
yiwarrudj bedberre. Kaluk kunmayali bedberre wanjh mayaliwarreminj
duninj dja wanjh minj kabirriyawoyhburrbun bu kunmakkenh.

³ Nahni kabirrikurrekkurren bininj kabirriyime, “Ngudda minj ngur-
rimarren!” Dja mak kabirriyime, “Yuwn bu ngurringun yikahwi
maninjmanu manme.” Dja med, God marnbom manbu manme bu
karringunkenh, dja bu ngad karriwoybukwon wanjh karridjalburru kore
kunwoybuk ba bu ngad karrimanjibunkenh bu karringun.

⁴ Nawu yehyeng rowk God marnbom nakka wanjh namak rowk. Dja
ngurridin yiwarrudj, ba bu ngurringunkenh bu kamak rowk.

⁵ God yimeng nahni nakka namak, dja bu ngudda ngurridi yiwarrudj
ngurrimanjibun God, wanjh nungka kayime kunukka kamak bu ngur-
ringun.

⁶ Mah, ngudda Timothy wanjh yibenmarneyimen nawu bininj yiwarrudj
bedberre mahni manbu kunmayali rowk makka wanjh kore ngayebeh.
Bu kuhni yibenbukkabukkan, wanjh kuninjkuu yibendjalbukka, wanjh
kunukka ngudda kunmak yidjaldurrkmirri nuye nawu Christ Jesus.
Ngudda korroko yidjalmurrngayekminj bu yibekbang kunwok kunmak
kore ngundibukkani, wanjh yiwoybukwong kore nungka wanjh kunmek-
bekenh kunu ngudda yidjalwoybukwon maninjmanu kunwok.

Bu Ngudda Ngurrimarnedurrkmirri Christ Jesus Bu Kamak Rowk

1 Timothy 4:7-11

⁷ Yuwn kab yibekkan kunwok manbu kabirrimalemarren, dja mak
kunmayali manbu minj kamdolkkkan kore Godbeh. Dja mak yuwn
bu yibenbekkan nawu birriwarre bininj kore kabirriyime, dja ngaleng
yingan yidjalbukarrimen kore yikurduyime bu yidjalmunkekadjung dja
yihdjalwoybukwon nawu God.

⁸ Ngudda yiburrbun nawu yikahwi bininj nawu kabirrimurrngayek-
worren ba bu kabirrikukmarnburren nawu kunburrk bedberre, wanjh

kunukka wurd kamak, dja bu mak kabirrimurrngrayekworren kore kabirrimunkekadjung nawu God, wanjh kunukka kundjalmak kore kundarrkid wanjh kaluk yerrekah kunu kabirribaldarrkiddi kore God.

⁹⁻¹⁰ Bolkkime ngaye ngadjare marneyime ngudda kore kunwoybuk ba bu yiwoybukwon dja ngad wanjh karridurrkmirri kore kunrayek duninj bu karridjalrohrokme kore kadjalkudjiwi munguyh. Ngad wanjh karridjalwoybukwon God nawu woymbukkih duninj kadjaldarrkid munguyh, nawu nungka kabengehke bininj rowk. Kaluk ngaye kunu ngabenyolyolme bininj nawu kabirriwoybukwon nuye.

¹¹ Yibenmarneyimen birriwern bininj kore mandjad ba bu kabirriwokmarrkmang manbu maninjmanu kunwok, kunmekbe bedda yibendjalbukkabukka bu munguyh.

Paul Bibengdayhkeng Timothy Kore Karrurrkmirrikenh

1 Timothy 4:12-16

¹² Bu ngudda yirrurrkmirri manbu yiwarrudj ngarre, yuwn yibenbekkan bininj nawu kabirriyime ke bu ngudda ngundiyawurrinjwan. Yuwn yibenburrbun, dja yidjalwokdin kore mandjad duninj, yidjalkurduyimen kunmak, yibenmarnedjarenin birribuyika bininj, dja mak yidjalwoybukwo God munguyh. Yuwn bu yibalkurduyime kore kunwarre. Kab yidjalkurduyimen kore kunmak yinin ba bu bininj nawu yiwarrudj bedberre wanjh kunu ngundidjalngunjikan.

¹³ Kaluk ngaye ngamre yerrekah kore ngudda. Dja bolkkime med, yidjaldurrkmirrin, dja yibimngeybu djurra nawu Bible bedberre kore kurobbe bu ngurrimrnderri kore yiwarrudj. Dja mak yiweyka bedberre bu yiyolyolme ba bu mandjad yibenbukkabukkan.

¹⁴ God korroko ngunwong ngudberre kuhni kundjalmak duninj, bu nungka ngunmarnbom yibenmarnewohrnan bininj. Bu bininj nawu kabirriwohrnawohrnan birrimirndemornnamerrinj wanjh kunu ngundimarnebidkurrmerrinj kore kukodj ke bu ngundikodjarkarmeng, dja God benwong prophcy manbu kunwok bu nguddahkenh. God ngunwong mahni djalburudjang bu yirrurrkmirrikenh. Mah, wanjh yidjaldurrkmirrin!

¹⁵ Kab yidjaldurrkmirrin munguyh kore mahni manbu yikarrme, dja wernkih yirohrokmen, ba bu birribuyika bininj ngundinan bu ngudda yidjalmurrngrayekmen.

¹⁶ Kab yidjalnahnarrimen bu minj kunwarre yikurduyime, dja mak kore kunwok yihweykan wanjh djal mandjadnin. Wanjh kuninjkuwu yidjalkurduyimen munguyh ba bu kunukka wanjh yingehkerren, dja mak yibenengehke bininj nawu ngundihbekkan.

5

Yibenmarnewokdin Bininj Kore Mandjad

1 Timothy 5:1-2

¹ Bu ngudda yibenmarnewokdi nawu bininj yiwarrudj bedberre, wanjh yuwn bu kunrayek kunwok yibenmarnewokdi bedberre binihbininj nawu kohbakohbanj. Dja yibenmarnewokdin yiman kayime kohkorknomo ke. Dja nawu yahyawurrinj wanjh yibenmarnewokdin yiman kayime ngurridangerrinj yerreh.

² Dja morlehmorlenj nawu kohbakohbanj wanjh yibenmarnewokdin bedberre yiman kayime yerreh ngalbabadjan ke. Dja daluhdaluk nawu birribalngudjmakmak, wanjh nakka yibenmarnewokdin yiman kayime yerreh ngurridangerrinj. Yuwn mak bu yiborrkbu bedberre.

*Ngaye Ngabenyolyolme Kohbakohbanj Daluk Ngalbu Birrikamarrdjukun
1 Timothy 5:3-10*

³⁻⁴ Ngalngale daluk ngalbu ngalkamarrrdjukun, kaluk minj nangale ngalbu kabinahnan, wanjh kunmak yidjalmarnekurduyimen. Dja bu yiman kakarrme wurdyaw nawu ngarreki, dja nawu benyawdjumdoy, wanjh bedmanwali birrinahna yiman bu ngaleng yimi bennahnani bu birrihwurdyawni. Dja yuwn bu bedda djal kunwokwi kore yiwarrudj. Nawu God kadjare kabirrinahnarren nawu bedman birrimud deleng. Bu kunmekbe kabirrikurduyime, wanjh kunu nungka God kanjilngmak duninh bedberre.

⁵ Mak yikahwi daluhdaluk kamarrdjukun ngalu minj nangale kabinahnan bu kabibidyikarrme wanjh kabiidjalmadbun nawu God, dja mak kabiidjalwoybukwon nungka dja munguyh kabiidjalmarnedi yiwarrudj benbekad dja kukak.

⁶ Dja yikahwi kamarrdjukun nawu daluhdaluk wanjh nakka bedman kabirridjaldjare kore kabirrikurduyime ba bu bedman kabirridjalnjilngmarnburrenkenh. Kaluk bedda kunu wanjh yiman birrimalngdoweng rerrih.

⁷ Kuninjkuwu rowk wanjh yibenbengdayhkemen ba bu minj kunwarre kabirribalkurduyime.

⁸ Nawu bininj minj kabennahnan nuye birrimud nawu kabirriyo kore nuye kunrurrk, wanjh nakka nanu yiman kayime kabawon yiwarrudj. Dja kadjalwernhwarremen bu yiman kayime birribuyika bininj nawu minj kabirriwoybukwon God.

⁹⁻¹⁰ Ngudda yibendjalnahan nawu kamahkamarrdjukun duninh. Kaluk birringalengale? Nawu birridjalwernhkohbanj duninh nakka wanjh minj nabininjakobeng kabirriyawoyhmang. Dja yimankek birribuyika bininj kabindimakwan. Dja ngokko bedda bindidjordmiweng wurdwurd bedberre, dja mak bindikimangi nawu birriwokbuyikani, dja mak bindinahnani bininj nawu yiwarrudj bedberre, dja mak bindibidyikarmeng bu kunyid kumbebmeng bedberre, wanjh munguyh birridjalkurduyimi bu bindinahnani kore birribuyika bininj. Wanjh birrimekbe nawu morlehmorlenj kamahkamarrdjukun, yibenngeyname-namen birringeydin kore djurra ba bu ngurrbenbidyikarrme.

Ngabenyolyolme Ngalbu Birribalngudjmak Kamahkamarrdjukun

1 Timothy 5:11-16

¹¹⁻¹² Bolkkime ngaye wanjh ngadjare ngahyime nawu daluhdaluk birribalngudjmakmak kamahkamarrdjukun. Yuwn bu yibenngeyname kore djurra. Bu yingeyname ngalkudji kore djurra wanjh wardi kawokkurmerren bu kayime, "Ngaye ngahdjaldurrkmirri nuye nawu Christ." Kaluk rerrekah wanjh kunukka bininj kabimang bu kabenemarren. Wanjh manmekbe manbu kunwok kore wokkurrmerrinj wanjh kabakke manbu mankarre. Wanjh kunukka kunwarre. Dja bonj, kuhni wanjh yuwn yibenngeykurrme nawu kamahkamarrdjukun kunngey kabirringeydi nawu birringudjmak daluk.

¹³ Nawu birringudjmakmak kamahkamarrdjukun daluhdaluk nakka bu minj kabirridurrkmirri, wanjh kunukka kabirridjalngudjwarremulewarren munguyh. Kabirridedjingmang bu kabindiyolyolme birribuyika dja kabirrire kore kunrurrk manwern dja kabindimarneyime kunwarre, dja mak kabirriyolyolme nawu njalehnjale nawu minj kunmak.

¹⁴ Wanjh kunmekbekenh kunu ngaye ngahyime nawu birringudjmakmak kamahkamarrdjukun wanjh nakka nanu birrimarrimen nawu bininj ba bu kabirrimang wanjh wurdyaw kabindinahan. Dja bu burrkyak,

wanjh kunubewu Namarnde Duninjh nawu kanwidnan rowk wanjh kabenmarnbun bininj bu kandiyolyolme kadberre.

¹⁵ Yikahwi daluhdaluk ngokko wanjh birriborledkerrinj dja birimunekadjuy nawu Namarnde Duninjh.

¹⁶ Kunubewu yikahwi daluhdaluk nawu yiwarrudj bedberre kabiridjarrkyo nawu kamahkamarrdjukun, bindinahna bedmandeleng dja nawu yiwarrudj bininj nakka minj kabindinahnan birrimekbe daluhdaluk. Bininj nawu yiwarrudj bedberre kabindinahnan birribuyika nawu kamahkamarrdjukun nawu minj nangale nabuyika kabenbidiyikarme.

*Ngaye Ngabenyolyolme Bininj Nawu Yiwarrudj Kabirriwohrnawohran
1 Timothy 5:17-21*

¹⁷ Ngudda wanjh yibenbenwokrayekwon bininj nawu yiwarrudj bedberre bu kabindikarremulewan bininj nawu kabirriwohrnan kore yiwarrudjkenh, dja bedda kunmakkenh kabirriwernhdurkmirri. Dja mak yibenmarneyimen bu bindiburlumen nawu birrimak bininj kabirriweykan dja kabindibukkabukkan God nuye kunwok.

¹⁸ Yiburrbu kore Bible djurra kahyime, "Bu bulikki kamimmelhelme manme manbu wheat, ba bu kamimyarlarmerren, wanjh yikahwi ngurribawo kangun. Yuwn bu ngurridabke." [Deuteronomy 25:4] Dja mak kabimbuyindi kore kahyime, "Wanjh kunmekbe ngayime bu bininj nawu karrurkmirri ngudberre wanjh nakka nanu ngurrikarremulewa." [Luke 10:7]

¹⁹ Bu nangale bininj kahyime, "Nahni bininj nawu kawohran kore yiwarrudjkenh, wanjh ngaburrbun bu kunwarre kurduyimeng!" Wanjh yuwn kab yiwoybukwon manmekbe mankarre nawu nakudji ngunmarneyime, dja yidjalbawo. Dja ngaleng benebokenh dja nuk birridanjik bininj bu kabirrimre ngundimarneyime bu kunmekbe kundjalkudjiwi kunwok, wanjh kunukka kunu yiwoybukwo manmekbe kunwok.

²⁰ Bu woybukkih namekbe bininj nawu yiwarrudj kawohran kurduyimeng kunwarre, yidjaldung kore kumirrk kurobbe ba bu birriwern kabirribekkan dja bedmanwali kabirrikelemen yiman kunmekbe kabirrihurduyime.

²¹ Kuninjkuwu wanjh ngaye bu marneyime rowk. God dja nawu Christ Jesus wanjh kandihnan bolkkime dja mak angels nawu God bendjalme. Wanjh ngaye bengdayhke kuninjkuwu ngayimeng ke. Kunmekbe ngadjalkurduyime ke kore ngaye marneyimeng. Dja yuwn mak yibenbalmarnekurduyime birribuyika bininj kunwarre, dja yibendjarrk-nahna rowk bininj nawu yiwarrudj bedberre. Ngayime bedda wanjh birriraworinj yikahwi nawu birrikuken, yikahwi nawu birrimarlanj, nawu birrikihkimuk dja nawu kabirridjaldi. Bonj, yibendjalnahna bu yiman kabirrirohrok.

*Yibekka Kuninjkuwu Kunmayali Ngudda Ke
1 Timothy 5:22-25*

²² Bu ngudda yibalburrbun bu baleh yarrkka kore bininj nawu kayimerran yiman kawohran yiwarrudj ngarre, wanjh kunukka yeled yidjalmarbun nahni bininj. Yuwn mak yibangmebidkurrmerren bu werkwerrk nuye, dja med yimadbu, yuwn bu yibangmekukmurrmiwerren.

Dja yuwn bu mak ngurriwararren nawu bininj birriwarre. Yidjalnah-narrimen ba bu yidjalkurduyimen kore God nuye.

²³ Ngaye ngaburrbun bu ngudda yirroweni kunwernkah, dja kunukka bonj kamak dja walakkih yibongu manbu wine ba bu ngunnjammarnbun. Dja yuwn mak yidjalbongun manbu kukkuwi.

²⁴ Yikahwi bininj nawu kabirrikurduyime kore kunwarre, wanjh birriwern bininj kabirriburrbun kore kabindihnan bu kabirrihkurduyime. Kaluk bu kabindidjadmekenh, wanjh kunukka minj ngad karrikangebarhme. Dja birribuyika bininj nawu kabirriyime kunwarre, kaluk minj nangale kabennan. Wanjh bu yerrekah kore kabindidjadmekenh, wanjh karridjalwern karrinan bu kunmekbe birrihkurduyimi.

²⁵ Wanjh kunmekbe kadjalrohrok bu kunmakkenh. Bininj birriwern ngundinan kore ngudda yihkurduyime kunmakmak dorrengh. Yika bininj minj kabirriburrbun bu kore ngudda yihkurduyime kunmakmak. Kaluk yerrekah, wanjh birriwern ngundinan kore ngudda yikurduyimi kore kundjalmakni.

6

Bu Bininj Nawu Slaves Kabirriwoybukwon Jesus

1 Timothy 6:1-2

¹ Ngaye ngadjare yibenmarneyime bininj nawu yiman kabirrihbongdi bu kabirrihdurckmirri kunrayek nawu nuye nakudji bininj. Kunukka wanjh kunmak bu yiman kabirridjalwokmarrkmang bininj nawu kawohnan bedberre, dja birridjalkurduyimen ba bu birriwern bininj kabirriyime kunmak nuye God dja minj kandikewkme kore ngundihbukkan kore yiwarrudj.

² Yiddok namekbe bininj nawu kabenmarnewohnan nawu slaves nungka warridj kabiwoybukwon Jesus? Wanjh bininj nawu kabirrimarne-durckmirri yiman slaves, bu bedda kabirriwoybukwon Jesus, wanjh yuwn bu bedmandeleng kabirrimarneyime, "Dja ngaleng nuk karridangerrinj dja minj mak ngundimarnedurckmirri." Yuwn bu kuhni kabirriyime. Dja birriburru nahni nawu kawohnan bedberre kabihwoybukwon God warridj, dja wanjh kabirrimarnedjaremen. Dja ngaleng kunu kabirrimarnedurckmirri bu kunmak. Wanjh kuhni rowk yibendjalwern-hbukkabukkan manbu ngaye marneyimeng, bu yibenbengyolyolmen ba kabirriwokmarrkmang.

Yikahwi Bininj Kabirridjarewern Nawu Kunwardde Money

1 Timothy 6:3-10

³ Kunubewu yikahwi bininj wanjh kabindibalbukkan kunbubuyika kunmayali. Bedda wanjh kabirrihbekkan kunmakmak kamhbebermen kunmayali nuye Jesus Christ nawu kawohnan kadberre, dja bedda kabirribalwokwarrewu nuye. Wanjh birrimekbe bininj minj mandjad kabirriwernhbekkan kore kunmayali nuye God.

⁴ Bininj nawu kabirrikurduyime wanjh kabirrimarnburren bedmandeleng bu kabirrihkimukworren. Bedda minj njale kabirrimenmenbekkan. Bedda wanjh kabirridjaldjare kabirrihdangwerren munguyh. Kunubewu kabirridjare kabirriburren bu mankarrekudjikenh kore kahkarremenmenyime. Kunukka yiman kabenmarnbun bininj bu kabirrikirnerren bu kabirrihbekbehmarneyimerren munguyh. Bu bedda minj kabirriwoybukworren bu bininj dja kabirriwokmarrkmaren dja kunukka kundjalwarre bu kabirrihwokkodjkenhmarren.

⁵ Bu naninjnanu bininj wanjh kabirridjalburrbun kunwarrehwarre kore kunmayali dja kabirrihburrbun kore kunkodjulu bedberre. Dja bedda minj kabirrihburrbun kore kunwoybuk. Wanjh bedda munguyh kabirridjalwarreworren bu kabirriyime bu kabirrimarnedurckmirri nuye God ba bu kabirridjalkukenmen!

⁶ Wanjh kanbekka, bu ngudda yidjalwoybukwon munguyh nuye God, wanjh kunukka yiman kayime ngudda yikarrmen nawern namakmak. Ngayime yibekkarren bu ngudda yikarrme kunmodmikenh kamak yikuknonmang.

⁷ Kuhni wanjh bu ngaye kanhmayalimidjbun bu ngahyime, ngad bininj wanjh minj njale karrimkayinj bu kondanjkuu kurorre, bu kore karriyirranginj. Ngad minj njale mak karrikan bu karribawon kondanjkuu kore kurorrebeh.

⁸ Bu yiman kayime ngad karringun manme dja mak karrikarrme kunmadj bu karridjohdjongbuyindi, nakka wanjh yiman kayime kamak bu karrikarrme waken.

⁹ Bininj nawu kabirridjare bu kabirrikarrme yehyeng nawern money bu kabirrikuenworren, nakka wanjh yiman kayime kabirridjalwernhwarremen bu minj njale kabirriburrbun kore kunmak ngarre. Bedda yiman kabirriwarreworren dja wanjh kabirridjalmalngdowe.

¹⁰ Nawu nangale bininj bu kamanjungun yiman kunwardde nawu money, nakka wanjh namekbe bininj karredjingmang kunwern kunwarre kakurduyime. Yikahwi bininj nawu yiwarrudj bedberre birrimanjguni money, dja birribawong kore kunwoybuk nuye God kore birrimunkekadjungi. Wanjh kunu birrimarnburrinj bu birrimayahmi bedmandeleng dja birriwernhnjilngwarreworring.

Bu Ngaye Wokrayekwon Ngudda

1 Timothy 6:11-16

¹¹ Timothy, ngudda nawu God nuye bininj, dja yidjalbawo rowk kunmekbe kunwarre. Dja ngaleng yidjalkadju kunmak munguyh. Yidjalmunkekadju God nuye, dja yidjalwoybukwon bu munguyh. Dja mak yibendjalmarnedjarenin birribuyika bininj. Yuwn bu yiwarnyakmulewarren bu kuhni rowk yikurduyime. Dja mak yeledj yibenmarneyime birribuyika bininj yibennahan.

¹² Ngudda yiwoybukwong God nuye, dja munguyh yidjalkukyiburrimen nuye. Wanjh kunukka God ngunmarnbun nungan bu yidjaldarrkid munguyh. Dja yuwn bu mak yibawon kore God ngunkayhmeng ba bu ngunmarnbun yidjalmalngmimbi munguyh. Kuhni yiyimeng kore birribekakang birriwern bininj bu yimulehmulewarring. Wanjh kuhni yidjalwernhkarrmen.

¹³ Dja ngaye wanjh ngakurrme mandjad mankarre ngudda ke. God marnbom yehyeng nawu darrkid dja nungka wanjh kanbekkan bolkkime. Dja mak Jesus Christ nawu bimarnemulewarring Pontius Pilate ba bu nungka birriburrbom birriwarlahkenh nawu bininj.

¹⁴ Ngaye wanjh marneyime ngudda mandjad. Dja yuwn bu yibakke manu mankarre. Dja yidjalkurduyimen mandjad duninj munguyh kaluk yerrekah God kabimdurndiwe Jesus Christ nawu kawohrnan rowk kadberre.

¹⁵ God wanjh kuhni kakurduyime kore nungan kadjare karrungname. Bu nungka wanjh nawu nadjalwernhmakkaykenh. Nungka wanjh nadjalkudji nawu kawohrnan kubolkwarlahkenh rowk. Nungka nawu king kabenyurrhke binihbininj nawu kings. Dja mak nungka nadjalkudji nadjalkimuk duninj nawu kabenmarnewohrnan bininj nawu kabindihmarnewohrnan birribuyika bininj.

¹⁶ Nungka wanjh nadjalkudji nawu minj karrowen. Dja mak minj nangale bininj bikunayinj kore kahni. Ngad minj karridarndi nuye bu karrinan kore kahni, dja kunmakmak duninj nuye kore kawarlkayindi

wanjh yiman kabiwakbuyingun. Dja karriwarlahkenh wanjh karridjalwoybukwo bu karridi yiwarrudj nuye. Ngad wanjh karridjare nungka kawohrnran rowk kundulkarre dorrengh bu munguyh munguyh. Amen.

Yibenbengdayhkemen Nawu Birrikuken Bininj

1 Timothy 6:17-19

¹⁷ Ngaye wanjh ngadjare ngabenyolyolme bininj nawu yiwarrudj bedberre nawu kabirrikarrme nawern namakmak kore kondanjkuu kurorrebeh. Kunubewu yikahwi kabirriburlumerren bu yimankek kabirriyime, “Ngaye ngahkarrme nawern money nawu ngaye nganengehke.” Kunu kunwarre. Bonj, dja kunubewu kabirrikukbalanhmang manbu money bedberre dja wardi kadjalyakmen. Yoh, ngudda yibenwokrayekwo bu kuninjkuu kabirrihburrbu birringurdmen. Dja ngaleng birridjalburrbu nadjalkudji God dja birridjalwoybukwo munguyh. Bu nungka wanjh nadjalkudji nawu kanwon yehyeng rowk namakmak kadberre ba bu kore karridjalnjilngmak munguyh.

¹⁸ Dja yibenmarneyimen birrimekbe bininj bindimarnedjalkurduyimen kunmak birribuyika bedberre bininj, dja bindikongibu bu yehyeng kabirriworren namakmak kore kabirrihnjilngmarnburrenkenh munguyh.

¹⁹ Bu kunmekbe yiman kabirrihkurduyime, wanjh kunukka yiman kabirrimang nawern namakmak kore kahyo heaven. Kaluk kore kubolkmak kaddum kabirridarrkid, wanjh kunukka kabirridjalnjilngmak munguyh. Wanjh kumekbe kabirrimang kore kundarrkid duninj munguyh munguyh.

Kuhni Kunkudji Ngadjare Marneyime Bu Ngayiburnbunkeh

1 Timothy 6:20-21

²⁰ Timothy ngadjare bu wanjh kandjalwernhbekkan wernkih duninj. Dja ngudda wanjh yimey nakuken nawu kahyo ke. Dja yidjalwernhnahna, dja yuwn bu yibenkadjung bininj nawu kabirrihdjalyolyolmerren bedberrekenh. Bedda yiman kabirrihdjaldangwerren bu bedda wanjh kabirriyime bu kabirriburrbu yimankek kunmayali God nuye. Dja burrkyak, bedda minj kabirriwernhburrbu kunwern kunmayali kore kunmakkenh kahyo.

²¹ Yikahwi bininj birriburrbuni kuninjkuu dja nakka wanjh birribarlanhmey mankarre nuye God bu minj birriwernhkarrmeninj kore birrihwoybukwoni. Bonj. Dja ngaye wanjh ngadjare kunmak ngundjalmarneyime God nuye munguyh. Wanjh bonj, kumekbe ngangurdme.

2 Timothy

Ngaye Paul Ngabimbom Ngudda Ke Nawu Timothy

2 Timothy 1:1-2

¹⁻² Ngaye Paul ngabimbun nahni djurra ngudda ke Timothy nawu marnedjare bulkkidj duninj dja ngudda yiman kayime ngardduk beywurd. Yiburrbun ngaye wanjh apostle nuye Christ Jesus nawu nganmunkeweng kore God kadjare ba bu ngaye ngabenmarneyime birriwern bininj bu Christ Jesuskenh nawu kanmalngdarrkidwon kore ngarribelbmerren nuye, yiman God kore nungan wokkurmerrinj bu kerrngehkenh. Ngaye wanjh ngadjare God nawu Kornkumo, dja mak Christ Jesus nawu kawohrnan rowk kadberre bu kunmak ngundimarneyime kore ngudda dja mak ngundinahnan dja ngundiwon kunmodmikenh.

Ngaye Ngadjare Kangemarnbun Ke

2 Timothy 1:3-7

³ Ngaye ngadjalmanjbun God munguyh bu ngahmarnedurrkmirri mandjad, kore djal kunmak ngakurduyime yiman kayime nawu ngandikebmawahmeng. Ngaye munguyh ngadjalburrbun dja ngadjalmanjbun kore ngarri yiwarrudj ngudda ke, kukak dja mak benbekad.

⁴ Ngaye ngaburrbun ngudda yinalkbuni ngardduk bu ngaye bawong, dja ngadjare bulkkidj duninj bu yawoyhnan ba ngawernhnjilngmakmen duninj.

⁵ Dja ngaye burrbun ngudda munguyh kore yiwernhwoybukwon God bu minj mak yiwokkurren, yiman kayime ngalkinjbarlen ke ngalbu Lois. Ngaleng werrk wanjh biwoybukwong God, wanjh yerreh ngudda ke ngalbadjan Eunice ngalengmanwali biwoybukwong. Wanjh bolkkime ngudda yidjalwoybukwon warridj. Ngaye ngaburrbun bu woybukkih ngudda kunmekbe yidjalkurduyime.

⁶ Kunmekbekenh ngaye wanjh yawoyhmarneyime bolkkime bu God manmekbe ngunwong manbu kore yihdurrkmirrikenh bu ngaye ngabidkurmerrinj kore ngudda. Wanjh yiwurkemen mahni kunak manbu karung kore kanjdji kukange ke.

⁷ Bu kuninjku God kanwong kadberre nawu Namalngmakkaykenh ba bu karrikarme kundulkarre kore nungkabeh dja karrimarnedjaremerren, dja mak bu karrimarnburren karrikurduyime kore kunmak, dja minj mak karriyawoyhkele.

Yuwn Yikele!

2 Timothy 1:8-14

⁸ Mah wanjh, kamak bu ngudda yibenmarneyime bininj kore kunwoybuk, yibenmarneyolyolme kawohrnan rowk kadberre. Yuwn yibalyeme! Dja yuwn bu mak yiyeme bu ngaye ngahdjaldi prison kore nungkakenh. Dja ngaleng ngarrdjarrkkarrmen kunyid kore ngarrdjarrkdurrkmirri kunwok kunmak ngarrbenbengyolyolme. Bu kunmekbe God kanwon kundulkarre nuye ba kuhni ngarrdjarrkkurduyime.

⁹ Dja nungka korroko kannggehkenh dja kankayhmeng bu karrini kunmak duninj kore nungka. Njalekenh bu nungka kanmarnekurduyimeng? Yiddok kankurdunang bu kunmak karridjalkurduyimeninj? Burrkyak. Minj karrimarnbuyinj bu kanmarnekurduyimeng. Kuninjku nungka

kurduyimeng kore nungan djareminj. Bonj. Wanjh kanwernhmarned-jareminj bulkkidj kadberre. Bu kunkareni duninjh, mak kuninjkunu kurorre yerreh wanjh marnbuyindanj bu kerngehkenh kandjalmarned-jareni. Kumekbehkenh kanwong kadberre kore Christ Jesus.

¹⁰ Wanjh bolkkime ngad karriburrbun bu karrinan Christ Jesus kumwam, nawu kannggehkenh kadberre. Nungka wanjh bularrbom kundowikenh kadberre. Bu karribekkan kunwok nuye kunmak, wanjh karriwohburrbun nungka kanmarnbun kadberre karridarrkid munguyh munguyh dja minj karriyawoyhmalngdownen.

¹¹ God kumekbehkenh kunu nganwong mahni bu ngahdurrrkmirri ba ngabenmarneyime birriwern bininj mahni kunwok kunmak ngamulewan. Wanjh kunmekbekenh gaye ngayimerranj apostle, dja mak kore ngabenbukkabukkan bininj.

¹² Dja kunmekbekenh kunu manbu kunyid djalmarbuyindanj ngardduk bolkkime bu kunkimuk. Dja bonj, gaye minj ngabalyeme. Dja ngaburrbun nungka nawu ngadjalwoybukwong. Gaye ngaburrbun nungka nawernhdulkarrekimuk duninjh dja nungka kanahnan gaye ngardduk kore kadjalle kaluk yerrekah kore kunbarnangarra nuye bu kamdurndeng.

¹³ Bu kuninjkunu wanjh ngudda yiwernhkarrmen mahni kunmayali kunmak kore gaye bukkabukkani. Ngudda nguneraworrinj Christ Jesus dja nungka ngunmarnbun yiwernhwoybukwon, dja yibenmarnedjarenin bininj nuye.

¹⁴ Nawu Namalngmakkaykenh wanjh nakka karridjarrkdi kore kukange. Bu nungka ngunbidyikarme, wanjh yiwernhnahna mahni manmakkaykenh kore ngunwong.

Birribadbuyika Bininj Ngabenyolyolme Wurd

2 Timothy 1:15-18

¹⁵ Ngudda korroko kanwobekgang bu kuninjkunukenh gaye ngahni kondah kore kubolkkimuk Asia. Kunmekbe wanjh nahn bininj rowk nawu kondahbeh, wanjh ngandidjalbawong, minj ngandibidyikarmeninj. Benemekbe warridj bininj bokenh nawu kabenengeyyo Phygelus dja mak nawu Hermogenes.

¹⁶ Dja nabadbuyika bininj nawu kangeyyo Onesiphorus, wanjh nakka namak. Wanjh gaye ngadjare nawu Kawohrnan kabimarneyime dja kabinahnan nahn bininj dja nawu nuye birrimud. Nungka minj yemengalmeng bu kumwam kore gaye ngahdukkayindi nawu wirimurrng chains. Nungka kumdjalley munguyh bu nganbidyikarmi kunwernhkah.

¹⁷ Kaluk bu nungka kumwam kore Rome wanjh nganhdjalyawani gaye kaluk werrkwerrk nganngalkeng.

¹⁸ Gaye ngadjare nawu Kawohrnan Rowk bu kapidjalnahan bu kunmak kabimarnekurduyime ba minj kapidjadme bu kunmekbe kunbarnangarra bu kamdurndeng kandjadmeken bininj rowk. Dja mak ngudda yiburrbun bu nungka Onesiphorus durrrkmirranginj kunrayek kondanjkuu kunredkimuk Ephesus.

2

Ngaye Bengdayhke Kore Ngudda Yirrurrrkmirrikenh

2 Timothy 2:1-7

¹ Timothy, ngardduk beywurd, ngudda nawu yibelbmeng Christ Jesus, wanjh yidjalmurrnggrayeknin kore nungka nawu ngundjalwernhkongibun bulkkidj duninjh.

² Ngudda kanbekkabekkang bu ngaye ngabenmarneyolyolmi birriwern bininj. Wanjh bolkkime yinganwali yibenbukkabukka maninjmanu kunwok kunmak kore yikahwi bininj nawu birrimak, ba bu bedmanwali kabirriyingkihmarburren dja kabindibukkabukkan birribadbuyika bininj.

³ Ngudda wanjh yiman kayime nawu namak soldier nuye Christ Jesus, bu kahre kabirriburren nuye. Wanjh kunmekbekenh kunu kunrayek kawernmerren ke. Bonj, ngudda karriraworren ngadberre warridj, dja yuwn bu kunukka yimarrkbaworren.

⁴ Dja yiburrbun nawu soldiers nakka minj kabirrikurduyime kunkilehklek yiman kayime birribuyika bininj nawu kabirriyime. Dja nakka kabirridjaldjare kabirrinjilngmarnbun nawu kabimarnewohrnan kore army.

⁵ Dja mak kunbadbuyika ngayolyolme bu nguddakenh. Bu nangale bininj nawu karohrokme kahwinhme kore yiman sports, wanjh nakka kadjalwokmarrkmang mankarre kore ngalengngarre manbu sport. Dja bu burrkyak, wanjh minj kawinhme.

⁶ Dja mak kunbadbuyika bu kuhni karriburrbun. Yiburrbun bininj nawu farmer, bu kawernhdurkmirri munguyh kore manme kadjordmiwe. Wanjh nungka werrk kamang manme manbu kadjolengmen.

⁷ Mah, wanjh. Kuninjkuwu yidjalburru kore ngaye marnehmarneyime, dja nawu Kawohrnan Rowk ngunmayalibayhke ba yiburrkburrkbekkan.

Yidjalburru Nawu Jesus Christ

2 Timothy 2:8-10

⁸ Yidjalburru Jesus Christ. Ngaye ngabenmarneyime birriwern bininj kore kunwok kunmak bu ngabenmarnemulewam. Ngadjalyolyolme Jesus Christ nawu kumdolkkan kore David nuye namud. Kaluk God birrolkkayhweng kore dowengbeh.

⁹ Kunyid marnbuyindanj ngardduk bolkkime bu kunmekbekenh ngabenmarneyime bininj bu nungkakenh. Ngaye wanjh ngarrukkayindanj nawu wirlmurrng chain yiman kayime bininj nawu wowarre duninj. Dja ngaleng, manbu kunwok nuye God minj karrukkayindi!

¹⁰ Dja bonj. Kore kuninjkuwuwan wanjh ngaye minj ngamarrkbaworren, dja munguyh ngahdjalkurduyime. Ngaye ngadjare ngahdjalle kore ngahdjaldurkmirri bedberre bininj nawu God bendjarrngbom. Nungka wanjh kadjare bu kabirribelbmerren kore Christ Jesus, yiman ngaye dorreng, ba bu kabengenheke, dja mak kabirridjarrkni kore God bu kunmakmak dorreng nuye munguyh munguyh.

Kuhni Kundjalwoybuk Duninj Kunwok Kore Christ Jesus Nuye

2 Timothy 2:11-13

¹¹ Mahni kunwok makka kunwoybuk duninj. Dja wanjh kanbekka. Ngad nawu karridjarrkdoweng Jesus Christ dorreng, wanjh kunukka karridjarrkmimbimen kore nungka.

¹² Bu minj karrimarrkbaworren wanjh kunukka karridjarrkwohrnan nungka dorreng yiman king duninj. Dja bu karriwaralkukwakan nungka, wanjh kunukka nunganwali kanwarnyakmen kadberre.

¹³ Ngad minj munguyh karrikangwoybuk nuye, dja ngaleng nungka minj kankowe. Nungka wanjh munguyh kanmarneyime bu djal kunwoybuk, dja minj mak kamayaliborledme.

Ngudda Yimarnburrimen Bu Yimarnedurkmirri God Bu Kamak Rowk

2 Timothy 2:14-26

14 Wanjh kuninjku yibenmarneyolyolmen munguyh nawu yibenbukkabukkan. Dja mak yibenbengdayhkemen kore kungey nuye God ba bu minj kabirridangwerren kore kunwok manyahwurdkenh bu baleh nuk kahkarremenmenyime. Wanjh kunukka kunwarre dja kabenwarrewon bedberre nawu birribuyika bininj bu kabindibekkan.

15 Yidjalwernhrohrokmen munguyh bu yihdurrrkimirrikenh kunmak rowk kore God nuye kumirrk, ba kunukka minj yiyeme. Dja nungka ngunburlume kore yibenbukkabukkan bininj mandjad kore kunwok kunwoybukkenh nuye.

16 Mak yuwn ngurriaworren bininj nawu kabirriyolyolmerren kunwarrehwarre, dja minj kabirriburribun God. Wardi kunukka kabirrimarnburren bu minj kabirriwokmarrkmang God.

17 Wanjh makka bedberre kunwok yiman kayime kunmok manbu kawarlahmen kore kunkulah, dja nawu kabirribekkan, wardi kabirriyimeran yiman kayime kabirrikangenudmen. Bininj bokenh nawu kabenengeyyo Hymenaeus dja Philetus, bedda wanjh kabeneolyolme maninjmanu kunwok kunwarre.

18 Dja bedda benebawong manbu kunwoybuk mankarre kore kahyo. Dja bedman kabenehdjalyime bu yimankek korroko karrihkarmi manbu kunburrk kunkerrnge kore Heavenbeh. Bedda kunmekbe kabeneyime wanjh ngokko bindimarnbom yikahwi bininj bu birrikangewarreminj kore birriwoybukwong nawu Christ.

19 Kunukka bonj, dja God benmarnekurmeng nawu bininj nuye kore kadjedjenyo kanjdji, yiman kayime manwarddebalabala kore kabirrihdi. Wanjh kuhni bimbuyindanj kore mankarre kahyime, "Nawu Kawohnan Rowk kabenburribun bininj nawu nungan nuye." [Numbers 16:5] Dja mak kunbadbuyika kore bimbuyindanj, kahyime, "Birriwarlahkenh bininj bu kabirringeyburlume nawu Kawohnan Rowk, wanjh nakka birribawo kunwarre dja birriborledkerrimen nuye."

20 Kunbadbuyika ngayolyolme bu kuhniken. Kore yiman manrurrrkimuk kunurrrk wanjh kumekbe nawern kahyo nawu yiman kayime plates dja cups mak nabubuyika rowk nawu marnbuyindanj gold dja silver mak kundulkbeh, dja mak delekbeh marnbuyindanj. Yikahwi nawu namakkaykenh dja nakuken, dja mak yikahwi nawu djal yeng, dja minj namak.

21 Wanjh kunmekbe kayime, nawu nangale bininj bu kakangebeleworrimen kore kunwarrekenh, wanjh nakka kayimeran yiman gold dja silver, kore kabimarnedurrrkimirri bininj nawu kawohnan nuye bu kunmak dorrengh. Wanjh ngokko karredjingmang bu kakurduyime kore kunmak ngarre.

22 Ngudda Timothy, yiman yiyawurrinjini wardi yidjaldjareni bu yikurduyimeninj kunwern kore kunwarre. Wanjh kunukka yiwernhbawo rowk, dja yuwn yiyawoyhkurduyime. Dja yidjalkurduyimen God kayime bu kunmak. Dja mak yiwernhwoybukwo nawu Kawohnan Rowk. Dja mak yibenmarnedjarenin birribuyika bininj dja mak munguyh yidjalkarremen kunmodmikenh kore God ngunwon. Wanjh ngurridjarrkkurduyimen nawu birriwern bininj bu kabirringeykayhime nawu Kawohnan Rowk, bu birrikangewoybuk dorrengh.

23 Yuwn bu mak ngurridangwerren birribuyika bininj kore njalehn-jalekenh manbu mandjalyahwurdkenh. Wardi kunukka kabirrimarnburren bu kabirribalwidnarren.

24 Yuwn mak yibaldjareni bu ngurridurren dja ngurridangwerren ngudda dja birribuyika nawu ngurrimarnedurrrkimirri nawu Kawohnan Rowk, dja kawarre! Dja ngaleng yidjalmaknin bedberre. Yibenbukkabukka kore

mandjad dja mak yikarrmen kunmodmikenh munguyh. Yibenmadbu bu yeledj yibenmarnekurduyimen.

²⁵⁻²⁶ Bu bininj ngundidangwe wanjh yalyal yibendjalbengdayhke bu mandjad. Yuwn bu yibenyidung bu kunrayek yibenwon. Kaluk God nungan kabenbidyikarrme bu kabirriwarnyakmulewarren dja kabirri-borlhme nuye kunwoybuk ba bu kabirriwohburrburren dja kabirri-marnekelerlobme kore nawu namarnde duninh benbongkarrmi dja benmarnbuni bu birriwokmarrkmangi nuye.

3

Kaluk Kunwarre Kawernmerren

2 Timothy 3:1-9

¹ Kanbekka. Ngaye wanjh bengdayhke bu baleh kakurduyimerran kore kunbarnangarrawern bu darnkih kayiburnbunkenh rowk. Kaluk kunwarre kawernmerren.

² Bininj birriwern wanjh bedmandeleng kabirribebbehmarnedjaremerren dja mak kabirriwernhmarnedjare kunwardde nawu money. Bedman munguyh kabirridjalburluburlumerren bu yimankek kabirriyimerren birringeykihkimuk. Dja mak bedda kabirriwirrihmerren, dja minj kabindibekkan bedberre ngalbabadjan dja kokornkumo, warridj minj kabirrimanjbnun nawu God, mak minj kabirrikurduyime kore God kadjare.

³ Mak bedda minj kabindimarnedjare birribuyika bininj. Minj mak kabirrimarnebengmidjdarren. Kabirridjalyolyolmerren bu djal kabirrikurrehkurren. Kabirrikurduyime kunwarre kore kunburrk kadjare bedberre dja bedda yiman kayime nawu nabang mayh kunmekbe bedda kabirriyime. Wanjh kabirridjalwirrihme manbu kunmakkenh.

⁴ Dja kabindimarnekarreboredke birribuyika bininj bu kabindikowe. Wanjh bedda werkkwerkk kabirrikurduyime kunwarre dja minj kabirriyingkihmayalibekkarren. Bedda wanjh kabirridjalburrburren dja minj birribuyika bininj kabirriburrbun. Kabirridjalmanjakadjung kore bedman kabirridjare kabirrikurduyime dja minj kabirriwernhmarnedjare nawu God.

⁵ Warridj bedda kabirrikurren bu yimankek kabirrimarnedi yiwarrudj nuye God, dja kore kukange bedberre nakka kabirriyime nawu God minj kakarrme kundulkarre.

Yibekka, Timothy, ngudda wanjh yibendjalbawo birrimekbe bininj.

⁶ Birrimekbe bininj wanjh manmolkk kabirringime namud bedberre bininj bu kabirriraworren dja wanjh kabindidjurrkwon kabindimarrkborledke daluhdaluk nawu birrimayaliyak dja nawu kabirringudjyawarren. Birrimekbe daluk nawu ngokko birrinjilngwarreminj bu kunwarrekenh bedberre, dja ngaleng kabirridjaldjare kunwarrebubuyika kabirriyime.

⁷ Birrimekbe daluk munguyh kabirrikarreyawan mankarrekerrnge, dja minj kabirridjare kabirriwoybukwon manbu kunwoybuk duninh.

⁸ Nahn birriwarre bininj ngabenyolyolme wanjh kabirrirohrok bininj bokenh nawu benengurdkeyi Moses bu kunkare duninh. Nakka wanjh benengeyyoy Jannes dja Jambres*. Dja birrimekbe birriwarre bininj bolkkime wanjh karohrok. Bedda birrimayaliyimerranj ba bu kabirridjalburrbun kore kunwarre duninh. Wanjh kunu God kebenwarrewan dja minj kabirriyawohwoybukwon nuye.

* 3:8 Exodus 7:11

⁹ Bu nawu Jannes dja Jambres benengurdkeyi nawu Moses, wanjh birribuyika bininj kumekbe bindikurdunang bu bedda benewarreworinj. Wanjh bolkkime kundjalkudjiwi yerreh kabenmarnekurduyimerran bir-rimekbe birriwarre bininj nawu ngabenyolyolme.

Kandjalngunjdjika Kore Ngaye Ngahkurduyime

2 Timothy 3:10-14

¹⁰ Timothy, ngudda wanjh kankurdunani. Dja mak kanburrbun bu mahni mankarre kore ngahbenbukkabukkani birriwern bininj. Dja mak yiburrbun kore ngahni kunmak dja kore ngahkurduyime kunmak. Ngudda mak yiburrbun kore ngaye ngahwernhwoybukwon God mak yiburrbun bu ngaye marnedjare ngudda, dja ngaye minj djurrkwon. Dja mak yiburrbun bu ngaye minj ngahmarrkbaworren kore ngahdjalkurduyime.

¹¹ Dja mak ngudda yiburrbun bu bininj ngaye ngandiwidnani dja kunyid marnbuyindanj ngardduk kumekbe kunred danjbik yiman Antioch, Iconium dja Lystra. Djal bonj, minj ngamarrkbaworreninij bu ngandiwidnani. Dja nawu Kawohnan Rowk nungka ngandjalnghekkeng kore kunrayek rowk ngahkarrmi.

¹² Yoh. Kuhnii wanjh djalwoybukkih. Bu nangale bininj nawu kabenebelmerrren Christ Jesus, dja kadjare bu kabimunkekadjung God, wanjh nawu birribuyika kabirriwidnan namekbe bininj, dja kabirridung bu kuninj kunukenh.

¹³ Kaluk birriwarre bininj, dja nawu kabirrikurrehkurren, nakka wanjh kabirriwarremen, bu kunkimuk duninj kunwarre kabirrikurduyime. Warridj kabindikowe birribuyika, dja mak kabirrikowerren bedmandeleng.

¹⁴ Dja ngudda Timothy, yingan munguyh yidjalkurduyimen kunmak kore ngokko yiwernhmayalimey kore ngad bu ngundibukkang kerngehkhni, dja kore yiwernhwoybukwong. Dja mak kandiwoybukwoni ngad rowk nawu ngundibukkang.

Ngayolyolme Kore Djurra Nawu Bible

2 Timothy 3:15-17

¹⁵ Yoh, Timothy, bu ngudda yiyahwurdni wanjh yirredjingmey bu yiburrbuni kore mahni kunwok bimbuyindanj nuye God. Nahni djurra kanwon kunmayalimak ba bu karriwernhwoybukwon Christ Jesus dja wanjh God kanngeheke.

¹⁶ Mahni mankarre manbu kahyo kore Bible, wanjh makka kumdolkkang kore God kurrangbeh yiman kungolek nuye. Nawu Bible nakka wanjh kanbukkabukkan ngad bininj rowk, mak kanbidyikarrme bu karribengdayhkerren kore yiwarrudj, dja bu kanbengdayhke bu kunmakkenh, dja warridj kanmarnbun ba mandjad karrre, dja mak kanbukkabukkan kore karrikurduyime kunmak bu djal mandjad.

¹⁷ Dja Bible kanmarnbun ngad nawu God nuye bininj bu karrikurdumak kore karrimarnedurrknirri nuye bu djal mandjad, kore karrikurduyime kunwern kore kunmakkenh.

4

Yidjalweyka Munguyh Manbu Kunwok Kunmak.

2 Timothy 4:1-5

¹ Timothy, kanbekkabekka. Ngaye bengdayhke ngudda bolkkime kore God dja mak Christ Jesus karrihdjarrkdi. Christ Jesus nawu kandjadme

karrriwarlahkenh bininj rowk, nawu karridarrkiddi dja nawu birridower-rinj. Kaluk karriwern karridarrkidnan bu nungka kamdurndeng ba bu kadjalwohrnan rowk. Dja kunmekbehenh kunu ngaye marnehmarneyime kuhni kunwok kunrayek. Mahni makka mankarrekuken duninj.

² Ngudda wanjh yiweyka munguyh manbu kunwok nuye God. Yiben-marneyolyolmen bininj bu djal munguyh, dja yuwn mak yiwokngurdme bu yekke dja kore kurrungbang. Yuwn yimarrkbaworren. Yibeng-dayhke nawu kabirriwarreworren dja nuk kabirribarabun. Yibendung nawu kunwarre kabirriyime. Dja mak yibenkangemurrnggrayekwo bu yiyolyolme bedberre. Dja yeleyedj dja yalyal ba bu kabirriwernhmen-menmang.

³ Kaluk yerrekah wanjh yikahwi bininj minj ngundibekkan kore mandjad yibenbukkabukkan bedberre kore kunwoybukkenh. Dja nakka kabindiyawan birriwern bininj ba kabindibukkabukkan manbu kabirridjare kabirribekkan.

⁴ Wanjh kabirridjalbawon kore kunwoybuk dja kabirriborledme bu kabirridjalbekkan bininj nawu kabindimarneyolyolme mankarre manbu djal bininjbeh.

⁵ Yingan ngaleng yidjalburrbu mahni kunwok kunmak. Yuwn yimarrkbaworren bu kunyid ngunmarnebebme. Yiweyka bedberre birriwern bininj manbu kunwok kunmak. Yidjaldurrkmirrin rowk kore yihkarrme, bu yibenbidyikarrme bininj kore yiwarrudj ngalengngarre.

“Ngaye ngadjalmadbun nawu Kawohrnan Rowk bu kanmarrkwan.”

2 Timothy 4:6-8

⁶ Ngaye wanjh, ngakurrmerrinj kore God, dja ngokko ngaburnbom rowk kore ngarrurrkmirrikenh. Dja kuhni darnkih bu ngaye ngare.

⁷ Mak nganeburreni nawu namarnde dja wanjh kamak rowk. Ngaye wanjh ngayakwong kore ngahkarrmi bu ngarrurrkmirrikenh. Wanjh ngadjalwoybukwoni munguyh God dja minj ngabawoyinj.

⁸ Dja kundjalkudji ngaye ngahmadbun manbu kunbarnangarra bu Christ Jesus nawu Kawohrnan Rowk kamre bu kandjadme karridjalwarlahkenh bininj. Nungka wanjh kandjadme kore mandjad duninj. Wanjh kumekbe nungka nganmarneyime bu ngaye ngamak kore nungka, dja kunukka wanjh nganwon nawu yiman crown ngakodj Jongbuyindi. Minj ngaye ngadjalkudji nganwon, dja mak birriwern bininj nawu kabirridjare wernkih duninj bu kabirrinan nungka kambebme.

Ngaye Paul Bu Ngamulewarren

2 Timothy 4:9-18

⁹ Wardi kab yimray werrkwerkk ba bu ngarrkebnarren.

¹⁰ Nahni bininj nawu Demas nakka nganwohbawong dja wam Thesalonica. Nungka kadjaldjare njalehnjale nawu kondah kurorrewaken. Dja nabadbuyika bininj nawu kangeyyo Crescens, nakka wanjh wam kore kunbolk Galatia. Dja mak Titus wam kore kunbolk Dalmatia.

¹¹ Dja nawu Luke wanjh nakka nadjalkudji nganehdjarrkdi kondah. Dja mak yima nawu Mark dja yimka. Ngunemdjarrkray ba nungka nganbidyikarrme bu kuninjkukenh ngahdurrkmirri.

¹² Ngaye ngamunkeweng nahni bininj nawu Tychicus, dja wam kore kunred Ephesus.

¹³ Wanjh bu yimre, yimka wurd kunmadjkuyeng ngardduk nawu kumekbe ngayibawong bininj kangeyyo Carpus kore kunred Troas. Dja mak yimka nawu djurra ngardduk kore kabimbuyindi. Nakudji djurra

nawu kahdordi* dja mak ngadjare nabadbuyika djurra nawu birrimarnbom parchmentkenh†.

¹⁴ Dja kunbuyika marneyime. Ngudda yiburrbun Alexander nawu kahdurrrkimirri kore wirlmurrngkenh. Nakka wanjh kunkimuk kunyid marnbuni ngardduk. Kaluk God nungan kabikarremulewan nahni bininj kore baleh nungka nganmarnekurduyimeng.

¹⁵ Dja wanjh yinahnarrimen bu nungka ngunmarnebebme. Nungka kadjare kangurdke kunwok kunmak kore ngarryolyolme.

¹⁶ Bu kerrngehkenhni ngaye ngakandenamerrinj bu ngabenwokdurndiweng birriwarre bininj nawu ngandiwelengnameng, wanjh ngaye ngadjalkudjini. Dja bininj bu ngayekenh minj nangale mak nganbidyikar-rmeninj. Dja bedda wanjh ngandibawong birrikelerlobmerrinj. Wanjh ngadjaldi yiwarrudj bu God kaluk kabenmarnebengmidjdan bedberre.

¹⁷ Dja ngaleng nawu Kawohnran Rowk nganehdjarrkdi dja mak kungudj nganwong. Wanjh ngamurrngrayekminj bu ngayolyolmeng mahni kunwok rowk nuye. Dja bininj nawu minj Jews birriwokbekkang warridj. Nawu Kawohnran Rowk nganbekkeng kore nawu birriwarre bininj ngandikuyinbuyi.

¹⁸ Yoh, dja nawu Kahwohrnan Rowk ngandjalngehke munguyh kore yehyeng nawu nawarrehwarre bu kadjare kanbun ngardduk. Kaluk nungka ngankan kore nungka kawernhwohrnan rowk kore heaven ba bu ngangehme. Wanjh karriwarlahkenh bininj rowk karriburluburlumen nungka bu munguyh munguyh. Amen.

Paul Wanjh Benwoknang

2 Timothy 4:19-22

¹⁹ Timothy wanjh ngadjare yibenwoknang ngayekenh ngalbu Priscilla dja mak nawu Aquila, dja mak birribadbuyika bininj birrimud nuye nawu Onesiphorus.

²⁰ Dja nawu Erastus nakka wanjh kabolkmaddi kore kunred Corinth. Dja nabadbuyika, nawu Trophimus, ngabawong kore kunred Miletus dja nungka wanjh dowehdoweni.

²¹ Kab wardi yibekarrimen bu yimre werkkwerkk wardi kunukka yekke kayimerran. Birriwern nawu kondah kabirrihi wanjh kabirridjare ngundimarnemunkewe kunwok kunmak bedberre. Nakka nawu Eubulus dja benebokenh bininj kabenengeyyo Pudens dja mak Linus. Dja mak ngalkudji daluk ngalbu Claudia, dja mak nawu karridangerrinj rowk.

²² Mah, wanjh ngadjare nawu Kawohnran Rowk ngunedjarrkni kore kukange ke, dja mak ngunkongibun warridj.

* **4:13** Kayime “scrolls” manbu djurra nakuyeng bu birridornnamenameng. † **4:13** Nakka “parchment” yiman kayime djurra nawu birrimarnbom kore kurralkkuyeng manbu papyrus.

Titus

Ngaye Paul Ngabimbom Nahni Djurra Bu Ngudda Ke Nawu Titus

Titus 1:1-4

¹ Ngaye nawu Paul ngabimbom nahni djurra. Ngaye nawu ngahmarnedurrkmirri nuye God, dja mak ngaye nawu apostle nuye Jesus Christ nawu nungka nganmunkeweng. Ngaye ngabenbidyikarme nawu bininj nuye God bendjarrngbom ba bu bedda kabirriwernhwoybukwon nungka dja mak kabirriburrbun mahni manwoybuk kunwok ba bu kabirridjalkurduyime kore nungka God kadjare.

² Ngad wanjh karriburrbun bu kuninjkukenh nawu ngad karridjarrkni nawu God bu munguyh munguyh. Kunmekbekenh bu ngad karrikharmme mahni manbu manwoybuk kunwok kore nungkabeh. God minj kanmarneyime ngad bu kakurren, nawu nungka yingkihkurrmeng kunwok nuye bu kerngekhkenhni yerreh wanjh welengbolkmarnbom kunred, bu kerngekhkenh dedjingmey, nawu nungka yimeng bu ngad kanmarnbom karridjarrkni nungka dorreng bu djal munguyh munguyh.

³ Wanjh bu kalukburrk, kunmekbe bolkyimerranj, God nganbukkang ngardduk manmekbe kunwok. Kaluk nungka nganwong ngaye manbu kunwok ba bu ngaye ngabenmarneyolyolme nawu bininj manu manmekbe kunwokkenh nuye. God nawu kanngekhengk kadberre, nungka wanjh nganwokrayekwong ngardduk bu ngandjalwong ba bu nungka ngahmarnedurrkmirri nuye.

⁴ Mah, wanjh bolkkime ngaye ngabimbom nahni djurra nawu ngudda ke, Titus. Ngudda nawu yiman beywurd duninh ngardduk, kunmekbekenh bu ngudda dja ngaye ngarrdjarrkwoybukwon Christ Jesus. Ngaye nawu ngahdjaldjawan God nawu Ngabbard, dja mak Christ Jesus nawu kanngekhengk kadberre bu ngunkongibun dja mak ngunwon nuye kunmodmikenh.

Bu Nangale Bininj Kadjare Kawohnan Kore Yiwarrudjkenh

Titus 1:5-9

⁵ Ngaye nawu bawong kore kunmekbe kunbolc Crete ba bu ngudda yiyakwon kore yirrurkmirrikenh, yikarremarnmarnbun kore yehyeng ngarre dja mak yibenkurreme bininj nawu kabirriwohrnawohnan yiwarrudjkenh bebbehbeh kore kubolkbubuyika bedberre. Yiburrbu ngaye marneyimeng ngudda kore mandjad.

⁶ Yibendjarrngun bininj dja yiburrbun bu bininj nawu kawohnan kore yiwarrudj ngarre wanjh nakka nanu namaknin, nungka wanjh bidjalkarmen ngaldjalkudjini ngalbu daluk nuye, dja mak wurdwurd nuye birridjalwoybukwo nawu Jesus, dja yuwn bu bedda kabirriwokwe nawu kornkumo. Bedda wanjh birrimaknin nawu wurdwurd, ba bu birribuyika bininj kabindimakwan bu bedda kunu birrimak.

⁷ Kaluk nawu bininj kabennahnan birribuyika kore yiwarrudj ngarre*, wanjh nakka djalnahna kore God nungan kabimarnedurrkmirrikenh nuye. Wanjh nakka nanu maknin, yuwn bu nawarre. Nungka yuwn bu kamarnburren yimankek kadjalwernhwohrnan duninh, bu werrek kabendung. Nungka yuwn bu mak kamarnburren bu kaworromkan bu

* **1:7** Kore English kunwok, wanjh yikahwi kabindingeybun bininj nawu kabenmarnewohnan yiwarrudj, "bishop".

manbang kabongun, dja mak yuwn bu kayawan kunyid, dja mak yuwn bu kamanjngun nawu money.

⁸ Nungka wanjh kunbuyika djalkurduyimen, yiman kabenkimang nawu birribuyika bininj kore kundjalmakkenh, dja mak nungka djalburrbu munguyh kore kunmakkenh. Kaluk nungka djalmarnburrimen nungan-deleng djalmarrkkurrmerrimen kore God nuye, kore wanjh mandjad kadjalyime, dja mak kare kore God nuye bininj, dja kamarnburren bu kakurduyime kore mandjad duninj.

⁹ Mak nahni bininj wanjh munguyh djalburrbu djalyolyolmen manbu manmekbe mankarre kore manwoybuk kunwok, bu nungka borlhmeng, dja mak minj kawokborledke manmekbe kunwok. Wanjh nungka weyka bu djal mandjad, bu kabembukkabukkan bininj kore mankarre duninj ngarre ba bu bedda kabemurrngrayekwon. Wanjh kunu nungka kabembengdayhke nawu yikahwi bininj kabirriwirrihme manmekbe mankarre.

*Yibengurdkemen Bininj Nawu Kabirriyime Kunwarre Kore Yiwarrudj
Titus 1:10-16*

¹⁰ Ngaye ngabenyolyolme nawu birriwern bininj nawu minj kabirriwok-marrkmang manbu mankarweoybuk, dja kabindimarneyime birribuyika bu kabindikowekenh dja kabindimarnbun bedberre bu kabirrihburrbun kore kunwarrekenh ngarre. Nawu birriwarre bininj nawu ngaye ngabenyolyolme wanjh kabirriyime bu bedda kabindilakkayenwon bininj rowk kore yiwarrudj.

¹¹ Ngad wanjh ngarrbenngurdkemen kore kabirriyolyolme kuninjkuwu kore minj mandjad. Bedda wanjh kabindinjilngwarrewon nawu birriwern kore namud nawern bu bedda kabindibukkabhukkan bedberre kore kunwarrekenh kunmayali ngarre, dja bedda kabirrikurduyime kore djal money kabirridjare.

¹² Ngudda yiburrbun nawu nakudji bininj kumdolkakang kunmekbebeh kunred Crete nawu prophetni dja nungka yimeng, "Bininj nawu birridolkarrinj kore Cretebeh munguyh bedda kabirridjalkurren. Bedda wanjh yiman mayh rerrih kore bedman kabirrikurduyime kunwarre. Nawu bedda birringudjwarre dja mak bedda birriedjwarre nawu kabirridjaldjare kabirringun dja kabirridjالبونغون munguyh".

¹³ Namekbe nanu nungka benmarneyimi kore bininj nuye, bu kuhni kunwoybuk. Kunmekbekenh ngaye marnehmarneyime ngudda wanjh yibembengdayhkemen kore mandjad duninj, ba bu bedda kabirriedjing-mang kabirriwoybukwon mandjad nungka kore God.

¹⁴ Bedda mak kabirribawon manmekbe manbu minj mandjadniwirrinj mankarre kore birrimekbe bininj nawu bedda Jews, dja birringurdmen kore kabirriwoybukwon mankarre manbu birrikarremarnbom bininj nawu kabirriwidnanu manwoybuk.

¹⁵ Bu bininj munguyh kabirridjالبurrbun kore kunmakkenh, wanjh kunukka nawu yehyeng kabirrinan dja kabirribekkan wanjh kabemmarneyimerran kunmak kore bedda. Ngaleng yiman bininj kabirridjالبurrbun kore kunwarrekenh, dja mak minj kabirriwoybukwon God, wanjh kunukka nawu yehyeng ngarre wanjh kadjalwarrehwarremen bedberre. Wanjh bedda kunu minj mandjad kabirriwernhburrbun dja mak bedda minj kabirriyawoyhburrbun kore kunmakkenh ngarre.

¹⁶ Bedda yimankek kabirrimulewarren bu kabirriwernhburrbun nawu God. Dja burrkyak. Bedda kabirridjalkurduyime kore kunwarrekenh ngarre yiman bu kabirridjالبurrbun nawu bedda kabirridjالبurrbun God nuye wanjh bedda kabindiarrewan nawu bedda kabirridjالبurrbun God nuye

mankarre. Bedda wanjh minj njale kunmak kabirrikurduyime, dja minj kabirriwernhburrbun.

2

Bu Ngudda Yibenbukkabukkan Mandjad

Titus 2:1-8

¹ Dja yingandeleng, bu ngudda yibenbukkabukkan kore ngad karriwernhburrbun mankarre ngarre mandjad.

² Bininj nawu bedda kohbahkohbanj ngudda wanjh yibenbukkabukkan ba bu kabirrinahnarren dja bedmandeleng kabirrimarnburrenkenh, dja mak minj bedmandeleng kabirrimalemarren, bu bedda kabirriwernhburrbun manwoybuk duninh kore kabirriwoybukwon. Dja mak bindimarnedjarenin nawu birribuyika bininj, dja mak yuwn bu mak kabirringudjywarren.

³ Kuhni wanjh kadjalrohrok, nawu morlehmorlenj kohbahkohbanj yibenbukkabukkan munguyh kabirridjalyime kunmak kore God. Yuwn bu mak bedda wanjh kabindimarnekurren birribuyika, dja yuwn bu mak bedda kabirriworromkan. Dja bedda bindidjalbukkahbukka nawu birringudjbang daluk kore kunmak kunmayali ngarre.

⁴ Mak kabindibidyikarrme kore kabindibukkan nawu birrimekbe yawkyahyawkyawk daluhdaluk ba bu bedda kabindidjalmarnedjare munguyh nabibininjkobeng bedberre dja mak wurdwurd nawu bedberre.

⁵ Dja mak bedda birrimarnburrinen, dja yuwn bu kabirriwernhburrbun kore kunwarrenkenh. Bedda wanjh bindinahna namud bedberre, dja mak bindidjalkongibu duninh, dja mak bindiwokmarrkma nawu nabibininjkobeng bedberre, ba bu minj nangale kawarrewan God nuye kunwok.

⁶ Kuhni wanjh kadjalrohrok bu yibenmurrngrayekwo nawu birringudjmakmak bininj bu bedmandeleng birrimarnburrinen, dja yuwn bu kabirrikodjkuluwarrenen.

⁷ Bu yingandeleng yirrurrkmirrin munguyh kunrayek kore manbu kunmak yikurduyime, ba bu bedda wanjh ngundingunjdjikan ngudda. Dja bu ngudda yibenbukkabukkan wanjh yibendjalmarneyime kore kunwoybuk, dja mak bu ngudda yikangewoybuknin, dja yuwn bu yikukmalehmalel.

⁸ Dja yibendjalmarneyolyolmen kore kunmakkenh, ba bu minj ngundiwelengname ngudda kore yikurduyimi kunwarre. Nawu ngudda ngundinjirrhmiwon bedda kabirriyemengalme bu kuninjkukenh nawu bedda minj birrikarrengalkeminj bu kandiwelengnamekenh kadberre.

Bu Ngudda Yibenbukkabukkan Bininj Nawu Slaves Rerrih Kabirribongdi

Titus 2:9-10

⁹⁻¹⁰ Bininj nawu kabirriwoybukwon Jesus, dja nawu kabirribongdi rerrih, wanjh yibenbukkabukka ba bu munguyh kabindiwokmarrkma nawu kabindimarnnewohnahwohrnan bedberre ba bu kabindimarnbun kabindimarnenjilngmak. Dja mak yibenbukkabukkan ba bu minj kabirridangwerren dja mak minj kabindimarnedjirdmang nawu bedda bedberre. Wanjh birridjalkurduyimen kore kunwoybuk ba nawu kabindimarnnewohnawohrn bininj wanjh munguyh kabindidjalwoybukwon bedberre. Dja kuhni mak kabindimarnbun birribuyika bininj bu bedmandeleng kabirridjaremen kabirribekkan kunwok manbu kabiolyolme God nawu kangehkenh kadberre rowk.

Yibendjalbukkabukkan Ba Bu Kabirrimadbun Nawu Jesus

Titus 2:11-14

¹¹ God nungan kukbukkarinj kadberre karriwarlahkenh bininj rowk, wanjh kunu bolkkime ngad karriburrbun nungka nawu kandjalwernkongibun kadberre dja mak nungka kadjare kanngheke.

¹² Nungka kanbukkan kadberre bu ngad karringurdkerren bu karriwokwe nawu God. Dja mak kanbukkan bu karribawon kunwarre rowk manbu kondah kurorrebeh. Dja mak kanbukkan bu ngad karrimarnburren dja karrikurduyime kunmak kore God kadjare bolkkime kore karridi kurorre.

¹³ Kunmekbe wanjh ngad karrikurduyime bu karrimadbun nawu namekbe namakkaykenh duninjh nawu ngad karrihburrbun bu kanmarnekurduyimerran kadberre. Yoh, ngad kaluk karridarrkidnan Jesus Christ bu kanmarnekukbukkarren, nawu nungka nangeyimuk duninjh God nawu kadberre, dja mak nawu kannghekkeng kadberre.

¹⁴ Nungka kanjkurmerrinj nungandeleng yiman bu kanmarnekarremulewam bu kanbebkekengkenh kadberre kore kunwarrekenh rowk karribongdi. Dja nungka mak kankangedjirridjbom ba bu ngad karrimak bininj nuye. Wanjh kunu ngad munguyh karriidjarenin bu karridurrkmirri kunrayek kore kunmak karrikurduyime.

Yibendjalbukkabukkan Dja Yuwn Yibawo

Titus 2:15

¹⁵ Mah wanjh, yibendjalbukkabukka bininj manbu manmekbekenh kunmayali. Yibendjalwokrayekwo bedberre, warridj yibendung nawu bedda kabirriyime kunwarre. Ngudda yibenmarnewohrnan kore yibembukkabukkan, wanjh yuwn yibenbawon bu kunmekbe ngundimalelmang.

3

Yibenbukkabukkan Bu Bolkkime Ngad Karrikurduyime Kunmak Kore God Nuye

Titus 3:1-3

¹ Yibengdayhkemen bininj kore ngudda, ba bu bedda wanjh bindiwokmarrkma nawu kabirriwohrnan nawu government dja mak birribuyika binihbininj nawu kabirrimarnbun manbu kurorre ngarre mankarre. Dja mak yibenbukkabukkan bu birriwokmarrkma nawu God dja mak munguyh birridjalkurduyimen kore kunmakkenh.

² Dja mak yibenbukkabukkan ba bu minj kabindimarneyolyolme kunwarre nawu birribuyika bininj. Bedda yuwn bu mak kabirridangwerren bedmandeleng, wanjh bedda birridjalmarneyimen bu djal yalyal dja mak warridj kabindikongibun birribuyika, dja yuwn bu mak kabindidjalmarneburluburlumerren.

Yibenbukkabukkan Kore God Kanmarnekurduyimeng Kadberre

Titus 3:3-8

³ Yiburrbun ngad wanjh karriidjalmayaliwarreni dja warridj karriwokweyi nawu God. Yoh, nawu namarnde duninjh wanjh kankoweng kadberre, dja karriidjalkurduyimi kore kunburrkwi, yiman bu ngad kanbongnami munguyh. Ngad wanjh karriedjwarreni, dja mak karrikniborrkbuni. Karriknwerreni, dja mak karriwidnarreni duninjh.

⁴ Bu kunmekbe karriyimi, God wanjh kannghekkeng, bu kanmarnekukbukkarinj kadberre. Nungka nawu kandjalwernhmarnedjare kadberre dja mak nungka nawu kandjalwernhkongibun.

⁵ Njalekenh kanmarnekurduyimeng bu nungka kannghekkeng kadberre? Yiddok kunubewu ngad karrikurduyimeninj kunmak kore nungka? Burrkyak, ngad minj karrikurduyimeninj kunmak. Nungka wanjh

kandjalkongibom burudjang kadberre, bu kunmekbekenh nungka nawu kanngheheng kadberre. Nungka wanjh kankangedjirridjboom kadberre ba bu ngad karryawoyhmalngdanginj kore nawu Namalngmakkaykenh bu kanmarnbom karrikerrngehminj.

⁶ Bu Jesus Christ kanngheheng wanjh kunu God yiman nungan kankang-barlkeng nuye namekbe Namalngmakkaykenh bu kunwernkah kadberre.

⁷ Nungka kanwernhkongibuni ba bu kunu nungka kanmarneyime bu ngad karrimak bininj kore nungka. Dja kuhni mak ngad karrimang nawu nungan kanberrebom bu yerrekeh nuye kabolkyimerran, wanjh kunu ngad karridjarrkni nungka dorreng bu munguyh munguyh.

⁸ Kuninj kunu kore ngaye ngabimbom, wanjh kunukka kundjalwoybuk duninj! Ngaye ngadjare bu yibenmarneyimen rowk bu mahni kunwok wanjh mankarrekenh duninj ba bu bininj nawu kabirriwoybukwon God wanjh kabirriahnarren dja kabirrikurduyime bu djal kunmakkenh nuye. Wanjh kunukka kunmakkenh bu kabindibidyikarme birridjalwern bininj.

Yibenwokrayekwo Bininj Nawu Kabenlarlmang Nawu Birribuyika Kore Yiwarrudjkenh

Titus 3:9-11

⁹ Yibenngurdkemen nawu kabirridangwerren manbu manbubuyika kunmayali bedberre, dja bu mak nawu kabirriyolyolmerren bedmandeleng boyenkahwi nawu bedberre mawahmawah. Dja mak bu kabirridangwerren manbu mankarrekenh. Kunmekbe wanjh yiman kayime munguyh bedmandeleng kabirribengwarreworren dja mak kunubewu djamku.

¹⁰ Bu yiman nangale bininj kakurduyime kunmekbe, nawu kabenmarnbun birribuyika bininj bu kabirridjadmerrenkenh, wanjh ngudda yiwernhwokrayekwon duninj. Bu minj ngunbekkan bu kerrngehkenh yimarneyime, wanjh kunukka yiyawoyhmarneyime, dja bu nungka munguyh kadjalkurduyime kunmekbe, wanjh kunu yidjalbawo, yuwn bu ngudda nguneyawoyhraworren namekbe bininj.

¹¹ Kuhni bu woybukkih duninj, bininj nawu kabirrihkurduyime, nawu kabindikuklarlmang birribuyika, wanjh nakka birrimayaliwarreminj, dja mak kabirridjalware kore kunwarre kabirrikurduyime. Bedda wanjh kabirridjalwarreworren bedmandeleng wanjh kunukka God kabenwengname bedberre.

Yikahwi Mankarrekilehkilelk Manbu Yikurduyimen Ngaye Ngardduk

Titus 3:12-15

¹² Ngaye kaluk ngabalmunkewe ngudberre nawu Artemas, dja nuk kunubewu nabuyika bininj nawu Tychicus. Kaluk nakudji ngabalmunkewe bu kabalre ngudberre. Kaluk bu yerrekeh, wardi yirohrokme bu ngudda yime ba bu ngarrnarren ngaye kore kunred Nicopolis. Ngaye ngadjare ngarri kunmekbe bu kabolkyimerran yekke kayiburnbun.

¹³ Wardi kab yibenbenebidyikarmen nawu benemekbe bininj bokenh bu kabenewohrenghe, bedda nawu Zenas nawu mankarre kahburrbun, dja mak nawu Apollos. Yibenbenewo nawu yehyeng bu berrewoneng nawu ngudda yimarnekarme.

¹⁴ Bininj kadberre birriwern wanjh bedda birridurkmirrin kunrayek dja kore mak kunmak, ba bu bedda kabirribayahme manme dja mak kunmadj, ba bu kabirrikarme bedberre, dja yuwn bu kabirridjalni minj kabirribidrokan.

¹⁵ Nawu birriwern bininj nawu ngarrihni kondah, bedda ngundi-marnewokmunkewerrinj kunwok kunmak kore ngudda. Dja ngudda

yibenmarneyimen manu kunwok kunmak ngardduk nawu ngurrihni bininj, nawu karrimarnedjaremerren kore karriwoybukwon Jesus. Ngadjaldjare nawu God bu ngundjalwernhkongibun ngudberre rowk.

Philemon

Paul Bimarnebimbom Nahni Djurra Philemon Nuye

Philemon 1:1-3

¹ Ngaye wanjh Paul nganedjarrkdi Timothy nawu karridanginj. Bu ngaye ngamarnedurrkmirri Christ Jesus, wanjh kunmekbekenh kunu ngandikurrmeng kore prison. Ngad wanjh nganebimbun ngudberre nahni djurra, ngudda Philemon, nawu ngundimarnedjareminj, nawu ngad karridjarrkdurrkmirri.

² Dja mak nawu ngudda Apphia ngalbu karridanginj, dja mak ngudda Archippus nawu karribidyikarrmerren bu karridjarrkdurrkmirri, dja mak nawu ngurrimirndemornnamerren yiwarrudj kore ngudda ke kunrurrk, nawu ngudda Philemon.

³ Ngadjare God nawu Kornkumo kadberre dja mak Jesus Christ nawu Kawohrnan Rowk bu ngundiwon ngudberre kunmakmak kore kunmodmikenh dorrengh.

Paul Bimanjbom God Nawu Philemonkenh

Philemon 1:4-7

⁴ Ngaye burrbuhburrbun ngudda bu ngahdi yiwarrudj ke, wanjh ngaye ngadjalmanjbun ngardduk God bu nguddakenh munguyh.

⁵ Bu kuhni ngaye wobek kang bu ngudda yiwernhwoybukwon Jesus nawu Kawohrnan Rowk, dja mak yibenmarnedjare rowk nawu birrimak bininj nuye God.

⁶ Bu ngahdi yiwarrudj ke, wanjh ngaye ngadjawan God ngunmarnbun bu ngudda yibenmarneweykan birribuyika bininj bu yimulewarren kore ngudda ke kunwoybuk, ba bu ngudda yiwernhburrbun kunmakmak rowk manbu karrikurdyuime kore Christ kanwongkenh bu karribelbmerrinj.

⁷ Yina, nawu ngarrdanginj, ngudda wanjh yibenmarnedjareminj nawu God nuye bininj, dja mak ngudda yibenkangemarnbom bulkkidj duninj. Kuhni wanjh ngaye warridj kankangemurrnggrayekwong dja mak kannjilngmarnbom bulkkidj duninj.

Paul Biyolyomeng Bininj Kangeyyo Onesimus

Philemon 1:8-22

⁸⁻¹² Mah wanjh. Djawan ngudda bu nawu Onesimuskenh*. Bu kerrngehkenhni nungka wanjh bongdi rerrih dja mak ngunmarnedurrkmirri ke. Kaluk minj njale kunmak kurduyimeninj ke bu nungka ngundjalbawong kelerlobmeng. Ngaye wanjh ngarrurndiwe bolkkime bu karrurdeng kore ngudda ngunedjarrkdi. Dja wanjh bolkkime nungka makminj ngarrku, kore ngudda dja ngaye. Ngaye djawan bu yikurdyuime kunmak nuye bu yikimang.

Ngudda nawu ngarrdjarrkbelbmerrinj kore Christ dorrengh, dja kuninjkukenh ngaye nuk minj djurrkan, dja bonj. Ngaye yeheyeledj djawadjawan ngudda. Bu ngad ngarmarnedjaremerren, wanjh kunmekbekenh bu djawahdjawan ngudda bu yikurdyuime ngardduk. Yina, yiburrbun ngaye, nawu Paul, wanjh ngokko ngakohbanjminj, dja mak yiman ngabongdi nuye Christ Jesus. Ngaye mak yidjawan ngudda Onesimus nawu yiman kayime ngardduk beywurd rerrih. Kaluk ngaye bolkkime

* **1:8-12** Nawu kungey Onesimus kamenyime "karrurrkmirri kore kunwernkenh".

ngayimerranj kornkumo nuye nawu ngaye ngarrukkendi wirlmurrng nawu narayek dorreng kondah kore prison.

Dja nganjilngwarre bu ngamunkewe nahni bininj!

13 Ngaye ngadjare nungka nganedi ba bu nganbidyikarme kondah kore prison ngahni bu kunmekbekenh ngaye ngayolyolmi bedberre bininj kunwok manmak. Bu nungka nganbidyikarmeng bu ngudda minj yimrawinj.

14 Dja burrkyak, dja ngaye minj ngadjareniwirrinj bu djurrkkayi bu ngudda kanwoyinj nungka. Kunubewu minj yidjareniwirrinj bu kanwoyi, dja minj ngadjareniwirrinj bu djurrkkayi ngudda. Wanjh ngamunkewe ba bu yikimang ngunedjaldi munguyh.

15 Kunubewu Onesimus wanjh ngunbawong wam waken yerrkang, bu yerrekah wanjh nungka kamyawoyhdurndeng wanjh ngunedjarrkdi munguyh munguyh.

16 Dja wanjh bolkkime minj yiyawoyhmarnbun bu kabongdi ke, dja kayimerran nawu ngudda ngunedanginj nawu ngunemarnedjaremerren duninj. Ngaye warridj ngamarnedjare duninj dja ngudda wanjh yiwernhmarnedjarenin bulkkidj duninj. Kaluk ngudda yimarnedjare nahni bininj yiman kayime ngunedangerrinj rerrih kore nawu Kawohnan Rowk.

17 Mah wanjh, bu ngudda kanburrbun ngaye ngarrdabbolk, wanjh yikima nawu Onesimus yiman bu ngaye kankimang.

18 Dja bu nungka wardi kurduyimeninj ke yehyeng kore kunwarrehwarre, wanjh kunukka kanwelengnamen ngardduk. Dja mak bu bulk kakarme nawu yehyeng ke wanjh kunukka kandjawa ngardduk ba bu marnekarremarnbun.

19 Dja yina. Ngaye, nawu Paul, kuhni wanjh ngayeman kunbid ngardduk bu ngahbimbun nahni djurra. Kaluk ngaye ngakarremulewan nawu Onesimus bulk kahkarme nawu yehyeng. Dja mak ngaye minj djawayinj bu kanwon nawu bulk yikarme ngardduk, ngayime bu ngaye bidyikarmeng bu yiwoybukwong Jesus dja wanjh bolkkime yimalngdarrkiddi.

20 Nawu ngudda ngaye ngarrdanginj, ngaye kuhni djawan ba bu yikurduyime ngardduk kore Kawohnan Rowk kadberre. Djawan bu kankangemarnbom bu Christkenh.

21 Ngaye ngahbimbun nahni djurra, bu kuninjkukenh ngaburrbun yikurduyime kore ngaye djawahdjawani dja mak kunbuyika kunwern ngudda kore kanmarnekurduyime.

22 Mak mahni mankudji manbuyika manbu ngurriyingkihbolkmarnbu ngardduk ba bu ngaye ngamre ngayo kore ngudda. Ngaye ngayime woybukkih God wanjh ngunbekkan ngudda bu yirri yiwarrudj. Wanjh kunu ngaye ngamdurndeng ngudberre.

Paul Dja Birribuyika Bininj Kabirriwokmunkewerren Kunwok Manmakkenh

Philemon 1:23-25

23 Nawu Epaphras nungka wanjh nganedjarrkdukkayindi Christ Jesuskenh, wanjh nungka kunwok kunmak ngunmarnewokmunkewe ngudberre.

24 Dja mak nawu Mark, dja mak Aristarchus, kaluk Demas, dja Luke dorreng, wanjh birriwokmunkewerrinj kunmak ngudberre. Bedda wanjh ngarridjarrkdurrrimiri.

25 Bonj. Ngaye ngadjare Jesus Christ nawu Kawohnan Rowk ngundjalmarnekurduyime kunmak rowk kore ngudberre kukange.

Hebrews

God Kanmarnewokweng Beywurd Nuye Ba Bu Nungka Kanmarnekuk-bukkarrinj Kadberre

Hebrews 1:1-3

¹ Bu kunkare wanjh God benmarnewokdanj nawu mawahmawah kadberre bu benmunkeweng nuye prophets birribubuyika nawu birriwernni. Bedda nawu prophets wanjh birribebbehwokdi bu bindibengdayhkeyi bebbehbeh bu mandjewkbubuyikani.

² Wanjh bolkkime bu darnkih kayiburnbunkenh, wanjh God nungan yawoyhwokdanginj kadberre bu nungan bimmunkeweng beywurd nuye kore ngad, yiman kayime nuye kunwok bu kanmarnewokmunkewerrinj kadberre. God bikurmeng namekbe nawu Beywurd nuye ba bu kawohrnan rowk dja mak nungan kadjalkarme yehyeng rowk kaluk bu yerrekah. Nahni nawu God nuye Beywurd, wanjh bimarnemarnbom yehyeng rowk kore God nuye bu kerrngehkenh duninjh, yiman kondah kurorre kubolkwarlahkenh rowk dja mak kore kunwernhkenh rowk kore kaddumkenh ngarre.

³ Nawu Beywurd nuye God wanjh kabenerohrok God kore baleh yarrkka kayimerran. Bu karrinan nahni nawu Beywurd, wanjh kunukka karrinan God kore kunwernhmakmak nuye. Nawu Beywurd wanjh nungka God duninjh. Bu nungka kawokdi, wanjh kakarme God nuye kundulkarre dorreng, dja kadjalmarnbun kadjaldi munguyh yehyeng rowk kore kaddum heaven dja mak kanjdji kurorre.

Nawu Beywurd wanjh kanjcurrmerrinj kadberre kore ngad kankanged-jirridjbom ba bu God kanmarnebengmidjdanj ngad bininj rowk kore kunwarrekenh kadberre. Kaluk bu kunmekbe kanmarnekurduyimeng, nungka wam wanjh yerrkang kore kukun nuye God nawu nadjalw-ernhkimuk dja mak kadjalwernhwohrnawohrnan rowk.

Nawu God Nuye Beywurd, Nungka Kawernhdokme Bedberre Nawu Angels Rowk

Hebrews 1:4-14

⁴ Nahni nawu Beywurd nuye God, wanjh nakka yimerranj nadjalw-ernhkuken duninjh bedberre kore angels. Kumekbekenh God biwong manbu kunngey mankuken duninjh nawu kore angels bedberre.

⁵ Karriburrbu kore God yimeng, "Ngudda ngardduk beywurd bolkkime wanjh ngaye ngayimerranj kornkumo ke." [Psalm 2:7] God minj kuhni yimeninj bedberre nawu angels, dja God biyolyolmeng nawu nadjalkudji Beywurd nuye. Bu yimeng, "Ngaye wanjh kornkumo ke. Ngudda wanjh beywurd ngardduk." [2 Samuel 7:14] Mahni kunwok minj nungka benmarneyimeninj birrimekbe nawu angels.

⁶ Bu God bimunkeweng Beywurd nuye nawu nadjalyungkih duninjh nadjaman kore kondanjkuu kurorre, wanjh kuninjkuu God yimeng, "Nawu angels rowk nakka wanjh kabirrimarnebodan kore yiwarrud-jkenh nuye nawu ngaye ngardduk Beywurd."

⁷ Kaluk bu God benyolyolmeng nawu angels nuye, wanjh yimeng, "God benmarnbom nuye angels yiman kayime kunmayorrk. Dja nawu bedda kabirrimarnedurrkmirri, nungka benmarnbom birriyimerranj yiman kayime manbirluwoldjen manbu kunak dorreng karung." [Psalm 104:4]

⁸ Kaluk kunbuyika bu God wokdanj biyolyolmeng nawu nuye Beywurd, bu bimarneyimeng nungka, “Ngudda wanjh God nawu yidjalwohrnan bu munguyh munguyh. Ngudda yibennahnan bininj kore mandjad duninj dja kore kunmak rowk.

⁹ Ngudda nawu yidjare kore kundjalmak dja yiwarnyak kore kunwarre. Kunmekbekenh bu ngaye nawu djarrngbom. Ngaye nawu God duninj ngudda ke. Ngaye wanjh kurrmeng ba yibenyurrhke rowk nawu ngurridangerrinj, dja mak nawu ngaye njilngmarnbom ba yidjalwernhmarmarr duninj.” [Psalm 45:6-7]

¹⁰ Mak kuhni kunbuyika nungka yimeng kore bimarneyimeng Beywurd, “Ngudda nawu Yiwohrnan! Kore yirredjingmey yimarnbom kunred kubolkwarlahkenh rowk. Ngudda yingan yimarnbom kunnngol ngudda ke kunbidyi.

¹¹ Kaluk yerrekah bu kayakmen rowk, dja nawu ngudda yidjaldi munguyh. Yehyeng rowk kadjalwarremen yiman kayime kunmadj nakare.

¹² Ngudda yidjalburriwe rowk yiman kayime kunmadj nawu kakaremen. Dja ngudda yidjaldi munguyh munguyh. Minj yirrowen, dja yingandeleng yidjaldarrkiddi.” [Psalm 102:25-27]

¹³ Kuhni mak bimarneyimeng Beywurd nuye, bu yimeng, “Yimray ngarrdjarrkyerrkan, ngudda kondah kore ngaye ngardduk kukun, ba bu yimadbun bu kore ngaye ngabenkoluyhwe nawu ngudda ke ngundiwidnan ba bu ngudda yibenbodmemelmelme.” [Psalm 110:1] Kuhni nungka minj benmarneyimeninj nawu angels!

¹⁴ Kaluk birrimekbe nawu angels baleh bu kabirriyime? Bedda wanjh namalng rerrih nawu kabirrimarnedurrkimirri kore God. Nungka kabenmunkewe bu kabindibidyikarmekenh birrimekbe bininj nawu God nungan kabengehke ba bu kabirrimalngdarrkid munguyh munguyh kore nungka.

2

God Kanbengdayhke Kunwok Nuye Ba Bu Ngad Karriwernhburrkburrkbekkan

Hebrews 2:1-4

¹ Wanjh kunmekbekenh ngad karrimayalinahnarrimen dja karriwernhwokkarrmen manbu kunwok nuye. Dja bu burrkyak, wardi walakkih wurd bu karridjalbawon nungka Jesus.

² Ngurriburrbin bu kunkareni angels bindimarneyimeng bininj manbu kunwok kore Godbeh, wanjh makka manu woybukkih God nungan nuyeni kunwok, dja nawu bininj minj birriwokmarrkmayinj dja minj bedda birriwernhkurduyimeninj kunmak, wanjh God benbuni bu djal mandjadni.

³ Kunmekbe wanjh kayimerran kadberre kuhni woybukkih. Bu ngad karribekkan kunwok nuye manbu kore kannggehkekenh kore Godbeh, dja bu karriwokwirrihme, yiddok kunukka kamak? Burrkyak, God kanbun kadberre.

Jesus nawu kawohrnan duninj wokdanj kadberre kerrngehkenh manbu kunwok kunmak bu God kannggehkekenh. Bu kerrngehkenh bininj birribekkan dja kandimarneyimeng bu woybukkih, ba bu ngad karriwoybukwong maninjmanu kunwok.

⁴ God kurduyimi kunwern kunmakmak bu kundulkarre dorrengh, dja mak Namalngmakaykenh benwoni bininj kunmakmak kore God djareni bedberre. Kunmekbekenh karriwernhwoybukwong manbu kannggehke kunwok.

Jesus Nawu Ngad Karridangerrinj

Hebrews 2:5-18

⁵ Bolkkime wanjh ngad karryiolyolme kore God kamarnbun bu kayimeran kore ngad karrihni yerrekah, dja nawu angels minj benkurrmeninj bu yimankek kabirriwohrnawohrnan kunmekbe.

⁶ Kaluk ngurriburribun kore nakudji bininj yimeng, kuhni wanjh bimbuyindanj kore djurra, bu kayime, "Ngad nawu bininj kore nganbornanbeh, dja njalekenh ngudda kanburribun ngadberre. Njalekenh ngudda kannanhan ngad nawu bininj nganbornang?"

⁷ Dja ngaleng, wanjh ngudda kanmarnbom ngad bininj ke bu ngariyimerranj bu ngad wanjh darnkih ngarrbendjalyurhke nawu angels. Dja ngudda kanngeykimukwong dja kanmarnbom ba bu ngarrimak kore ngudda.

⁸ Dja kanmarnekurmeng yehyeng rowk ba ngad ngarriwernhwohrnan bedberre." [Psalm 8:4-6]

Yoh. Wanjh God benkurrmeng bininj bu kabirriwohrnan yehyeng rowk kondanjkuu kore kurorre kayo. Minj njale mak yibawoyi. Dja med, bolkkime minj karrinan bu yehyeng rowk kanwokmarrkmang ngad nawu djal bininj duninj.

⁹ Dja med, bolkkime wanjh karridjalan nawu Jesus! God bikurrmeng nungka bu yimerranj djal bininj duninj bu djal kundedjumbung wanjh nawu angels birriyurhke! Dja God wanjh kanwernhkongibom kadberre dja kunmekbekenh nungka Jesus nungan doweng kadberre ngad karriwarlahkenh bininj rowk. Wanjh kunmekbekenh kunu bolkkime nungka wernhkimukminj duninj dja mak kahni king nadjalmakkaykenh kadberre kore heaven.

¹⁰ God nawu marnbom yehyeng rowk nawu kadjalkarme munguyh kore nungka kadjare, wanjh kadjare kabenmarnbun nuye wurdwurd ba bu kabirridjarrkre kore kaddum kubolkmak heaven. Kunmekbekenh wanjh nungka bikurrmeng Jesus bu djakbedjakkabekkabekkani ba bu kayakwon karrurrkmirri kore kannghehkekenh ngad nawu God nuye wurdwurd.

¹¹ Kaluk Jesus, nawu kanmarnbun bininj bu karridjalmak kore God, dja mak ngad bininj nawu kanmarnbom kore God kanmakwan, wanjh yiman ngad kunukka karridjalkukudji. Kunmekbekenh Jesus minj kayemengalme bu kanmarneyime ngad bu karridangerrinj nuye.

¹² Kuhni bu Jesus kabimarneyime God nawu Kornkumo, "Ngaye wanjh djalngemulewan ngudda bu ngabenmarneyime nawu ngarridangerrinj. Bu ngarrimirdemornamerren kore yiwarrudj, wanjh ngaye ngawayini bu djalburluburlume ngudda." [Psalm 22:22]

¹³ Kuhni mak yimeng, "Ngaye ngadjalwoybukwon God." Dja mak yimeng, "O God, kanna ngaye dja nawu wurdwurd ngudda kanwong." [Isaiah 8:17-18]

¹⁴ Ngad yiman wurdwurd nuye, dja ngad bininj duninj nawu karrikarme kunkulah dja kunkurlba kore kunburrk. Kunmekbekenh kunu Jesus yimerranj bininj duninj bu kunburrk dorrengh, ba yerreh wanjh doweng. Kaluk bu doweng, wanjh nungka bidjalngudjyakwong nawu Namarnde Duninj nawu munguyh kanbuni ngad nawu bininj warridj.

¹⁵ Bu Jesus doweng, wanjh kannghehkeng karriwarlahkenh bininj nawu kore karridjalkeleni munguyh bu kundowikenh ngarre, ba bu ngad karribehme kore yiman kayime kanbongkarmi manbu kundowikenh.

¹⁶ Jesus kumwam bu minj benbidyikarmeninj nawu angels. Burrkyak. Nungka kumwam bu kanbidyikarme ngad bininj nawu Abraham kankeb-mawahmeng.

¹⁷ Wanjh kunmekbekenh nawu God bimarnbom Jesus yiman karohrok ngad nawu karridangerrinj nuye ba bu nungka yimerranj priest nakimuk duninj kadberre, bu kankongibom kadberre dja mak biwokmarrkme y mandjad kore kabimarnedurrkmirri nawu God.

Nungka wanjh kanjurrmerrinj bu kanmarnedoweng ba bu God kanmarnebegmidjdan kadberre ngad nawu bininj rowk.

¹⁸ Dja mak Jesus nungan wanjh karrmi kunrayek kunkimuk kore nawu Namarnde Duninj bidjurrhdjurrkkani kore kukange nuye. Kunmekbekenh bolkkime kanbidyikarrme ngad bininj bu yimankek nawu nawarrewarre kankuyindjurrkkan kadberre.

3

Jesus Kawernhmarnekudokme Nawu Moses

Hebrews 3:1-6

¹ Nawu karridangerrinj, ngudda nawu God nuye bininj, ngad wanjh kankayhmeng rowk kadberre. Ngurridjalburrbu nawu Jesus. Nawu nungka wanjh yiman apostle duninj yimerranj dja mak nawernhkimuk priest kadberre rowk. Ngad wanjh karrbenmarneyime birriwern bu ngad karriwoybukwon.

² Jesus nungan bidjalwokmarrkmangi nungka God nawu bimunkeweng. Nungka nawu yiman kabenerohrok Moses nawu bihmarne-durrkmirri kore God nuye namud.

³ Kaluk Jesus nakka bibalyurrhkeyi Moses. Yiman Moses bimarne-durrkmirri God nuye kore kunrurrk manbu yiwarrudj nuye, dja yiman Jesus nungan rurrkmarnbom kunrurrk God nuye. Kumekbekenh bininj kabirriburlume Jesus kunkimukkenh, dja Moses yerre.

⁴ Kaluk bininj kabirrirurrkname, dja minj ngalengan karurrknameren! Dja ngaleng God nakka nadjalkudji kahname nawu yeheyng rowk!

⁵ Moses nungka minj wernhwohrnani. Nungka kunu djadjaldurrkmirri kunmak dorreng kore God nuye nawu namud, bu yiman yingkihmulewam bu baleh God kaluk yerrekah nungan kanmarneyimeng rowk.

⁶ Christ wanjh nawu Beywurd nuye God nungka wanjh kawohrn rowk kore nahni namud nuye bu nungka kabiwokmarrkmang. Bu munguyh ngadman karridjalwoybukwon God, dja mak karriwernhburrbun kore nungka kanmarnekurduyime bu yerrekah, wanjh kunukka ngad karriy-imerranj yiman God nuye namud duninj.

Yuwn Bu Karrikewkme God Nuye Kunwok Manbu Nungka Kanwong

Hebrews 3:7-19

⁷ Kaluk nawu Namalngmakkaykenh kayime, "Bolkkime bu kandiwo-bekkan ngawokdi,

⁸ wanjh yuwn bu ngurrikangerayekworren kore kunwok ngardduk, yiman kayime nawu mawahmawah ngudberre korroko birrikurduyimeng kumekbe bu birribekkan kunwok manbu ngaye ngardduk. Bedda wanjh birriwokwirrihmi, nawu bedda ngandirohrokmi bu birrirey kore kubolkdarleh.

⁹ Dja kumekbe bu bolkyimi bu ngudberre mawahmawah wanjh ngaye ngandikurdunani, dja bedda ngandidjalrohrokmeng dja ngandiwokekewmeng bu benkan nawu 40 mandjewk ngarre bu ngandikurdunani.

¹⁰⁻¹¹ Kunmekbekenh kunu bu ngaye ngahbendungi birrimekbe bininj dja mak ngamarneyimerrinj ngayemandeleng bu bedda wanjh kabirridjalkurren kore ngaye ngandimunkekadjung, dja minj nuk ngandiwernhburrbun

bu mandjad duninjh. Ngaye wanjh ngayidduy bedberre bu ngaben-marnewokkurmerrinj, 'Birrimekbe bininj minj munguyh kabirringime kore ngaye ngabenmarbnun ba kabirringehme, dja kuhni bu burrkyak duninjh.'" [Psalm 95:7-11]

¹² Mah, wanjh bolkkime nawu karridangerrinj, karrinaharrimen, dja yuwn bu kunwarre karridjare kore kukange kadberre, dja yuwn bu mak karrikangeborledkerren kore kunwoybuk. Wardi kunukka ngurribawon God duninjh nawu kahdarrkiddi munguyh munguyh.

¹³ Bolkkime ngaleng wanjh ngurrikangerayekworrimen munguyh bu kunbarnangarrakenh rowk. Kunmekbe bu ngurrikurduyime wanjh kunwarrekenh minj ngunkowe dja minj ngunmarbnun bu ngurri-marnekangerayekmen nuye God.

¹⁴ Kaluk kerrngehkenh karriwernhwoybukwong nawu Christ, wanjh karridjalwoybukwo munguyh. Wanjh kunukka kawoybukkendan bu karrikukbelmiyindanj kore Christ dorrengh.

¹⁵ Ngurriburrbun kuhni wanjh kore djurra yimeng, "Bolkkime bu ngurribekkan God kawokdi, wanjh yuwn bu ngurriwidnan manmekbe kunwok yiman birriyimi nawu mawahmawah ngudberre bu kerrngehkenh birridungi God dja birriwokwirrihmi." [Psalm 95:7-8]

¹⁶ Nangale binihbininj nawu birriwokbekkani God dja birridjalwokburriweyi? Kaluk birrimekbe bininj nawu birrimbolkbawong kunbolk Egyptbeh bu birrimunkekadjungi Moses nawu nungka benkang.

¹⁷ Dja birringale bininj nawu God yidduy bedberre bu 40 mandjewk ngarre? Birridjalmekbe bininj nawu birrikurduyimi kore kunwarre nakka wanjh birridowerrinj rowk, dja kunburk bedberre kabirrimurrngyo kore kubolkdarleh.

¹⁸ Wanjh God benmarnewokkurmerrinj bu yimeng bedberre, "Ngaye wanjh nahni bininj minj ngabenwon manbu bedda yimankek kabirringehmekenh." Nakka birrimekbe bininj nawu bedda birriwokweyi God.

¹⁹ Mah, wanjh karrbenburrbun kore birrikewkmi God, dja kunmekbekenh kunu minj birringimeninj kore nungka benbolkwong nuye ba bu bedda birringehmeninj rowk. [Numbers 14:1-35]

4

God Kankangengehke Rowk Kore Kunbarnangarra Manbu Sabbath Nuye Hebrews 4:1-13

¹ Karriburrbun bu kadjaldi God nuye kunwok kore wokkurmerrinj bu yimeng kadberre karringimen karringehme kore nungka. Kunmekbekenh ngurrinaharrimen ba bu minj nangale bininj namekbe kamankan dja mak minj kangimen.

² Ngad warridj, karribek kang manbu kunwok manmak bu bininj birriyolyolmeng kadberre. Dja kunkare wanjh bininj nawu birridowerrinj nawu birribek kang maninjmanu kunwok manmak, dja ngaleng minj mandjad birriwoybukwoyi, wanjh djalburudjang bedda birribekkani!

³ Dja nawu yiman karriwoybukwon wanjh karringimen kore God nuye kawohrnan kore kumekbe wanjh karridjalngehme. Kuhni mak God yimeng, "Ngaye ngayidduy bu ngawokkurmerrinj, bu ngayimeng, 'Minj mak kabirringimen kore yimankek bu bedda birringehmeninj.'" [Psalm 95:11] Kaluk nungan God yakwong bu kunmekbeni kore bolkmahbolkmarnbuni kondah kunred.

⁴ Kore djurra wokkurmerrinj bu yolyolmeng dja yimeng, "Bu kunbarnangarra ngarre seventh wanjh kunukka God ngudjngehmeng kore nungan durrkmirridanginj rowk." [Genesis 2:2]

⁵ Kuhni mak God yawoyhyimeng kore nahni djurra, “Birrimkebe bininj minj kabirringimen kore ngaye, bu kore kabirringudjngehmekenh.” [Psalm 95:11]

⁶ Kaluk kuhni wanjh woybukkih yikahwi bininj kabirringimen. Dja nawu bininj birriyungkih birribekkani wanjh nakka minj kabirringimen kumekbe kore kabirringudjngehmekenh, dja wanjh bedda kunu minj birriwernhwokmarrkmayi bu birribek kang mahn kunwok manmak.

⁷ Bu kunmekbeken God yingkihkarremarnbom kore bolknameng bu ngeybon “bolkkime”. Kaluk yerrehkah, nungka yolyolmeng bu kundjalmekebeni kunbarnangarra bu kore David dorrenghni wanjh bimbom, bu yimeng, “Bolkkime wanjh ngurribekka kore nungka kahyime, dja yuwn bu ngurridjalkangerayekworren.” [Psalm 95:7-8]

⁸ Ngad karriburrbu bu nameke bininj nawu ngeyyoy Joshua. Kaluk minj bennghekeyi birrimkebe nawu Abraham benkebmawahmeng bininj. Dja wanjh God nungan wokdanginj bu yimeng kaluk bu yerrekah kore kunbarnangarrabayikakenh ngarre. [Deuteronomy 31:7; Joshua 22:4]

⁹ Wanjh bolkkime karriburrbu God kanngheke ngad nawu nuye bininj, yiman kayime nungka bu ngudjngehmeng kore Sabbath nuye.

¹⁰ Nawu nangale kangimen kore God kannghekekenh, wanjh nahni bininj kangudjngehme warridj kore nuyekih durrrkmidurrrkmirri, karohrok bu yiman God kurduyimeng kore durrrkmidurrrkmirri wanjh nungka djalgudjngehmeng rowk. [Genesis 2:2]

¹¹ Kab wardi karridjalrohrokmen ba karringimen kore God nuye kanwon ba bu ngadmanwali karringudjngehme, dja mak minj karribennunjdjikan bedda nawu birriyungkih bininj nawu birriwokburriweyi God, dja kunukka ngad warridj karrimankan yiman bedda.

¹² Kaluk God nuye kunwok, makka wanjh kahdarrkid dja kahdurrrkmirri yiman kayime mandjawak nawu mirrhak duninj bokenh. Wanjh yiman kayime kadjobke dja kalarlmang kore kunmalng dja kunkange kore kalarlmarren kadberre yiman kayime warridj kalarlmang kore kunmurrng karaworren, dja kunkalk kanjdji kore kuburrr kadberre. Kaluk God nuye kunwok kandjadme kore kunmayali dja kukange kadberre.

¹³ Karriburrbu bu God kanan rowk manbu nungka kore marnbom kondah kanjdji dja mak kore kaddum duninj. Minj njale kabimarnewarllkayindi nuye. Nawu yehyeng rowk wanjh kayingkihdangmarrhmire nuye. Wanjh kunu yerrekah ngad bininj karrimulewarren kore nungka, dja karriyolyolmerren bu baleh karrikurduyimi rowk.

Jesus Nawu Kadjalwernwohrnan Kadberre Rowk Kore Yiwarrudjkenh Hebrews 4:14-16

¹⁴ Ngad wanjh karrikarrme priest nakimuk nawu kadjalwernwohrnan, nakka wanjh Jesus nawu beywurd nuye God. Nawu nungka wam kaddum kore heaven, dja wanjh ngad nawu bininj karriwernhwoybukwo nungka dja mak minj karribarlanhmag, dja wanjh karriwernhkarrmen.

¹⁵ Kaluk Jesus nawu kadjalwernwohrnan priest kadberre kaburrbu bu ngad nawu bininj karringudjwarre duninj. Bu nungka ningihni kondah kurorre, manbu kunwarrehwarre rowk bimiyikani darnkih nuye dja bikuyinjdurrrkayinj, yiman bolkkime ngad nawu bininj kandjurrrkan. Dja ngaleng nungka minj kunwarre kurduyimeninj, dja burrrkyak.

¹⁶ Mah. Kab karribekkarrimen bu kamak karriidarnhre bolkkime bu djal kuntele yak, dja karrimarnemankan darnkih kumirrr nuye God nawu kabarndi kore kandjadmekenh. Bu kunmekbe karriwernhburrrbu nungka kadjare kankongibun dja mak kanngheke ngad bininj nawu kunwarre kandjalmarnewernmerrinj munguyh.

5

Jesus Nawu God Nuye Beywurd Dja Mak Priest Duninj Kadberre Bu Djal Munguyh Munguyh

Hebrews 5:1-10

¹ Bininj bedmandeleng kabirridjarrngbun nakudji bininj bu kayimerran priest nakimuk nawu kabenmarnewohrnan birribuyika nawu priests, ba bu kabenmarnedi yiwarrudj bedberre bininj rowk, kore kahdurrkmirrikenh God nuye. Kaluk kabiwon nawu namakmak bedberre kore God nuye dja mak kabenmarnekinje mayh kore God kadjare ba bu nungka kabenmarnebngmidjan kunwarre bedberre nawu birribuyika bininj.

² Namekbe nawu priest nakimuk wanjh nakka djal bininj duninj. Kunmekbekenh kunu kabenkongibun birribuyika bininj nawu minj kabirriwrnhkarreburrnawu nawu kabirridjalbarabun. Wanjh nungan warridj kangudjywarren dja yika nungka mak kayime kunwarre.

³ Wanjh kunmekbekenh nungka kabun mayh kore God kadjare bu nungan nuye kore kunwarrekenh werrek, kaluk yerre kabenmarnekanjkurrme mayh bedberre kore kunwarrekenh nawu birribuyika bininj warridj bedberre.

⁴ Kaluk minj nangale bininj kakurrmerren bu kawohrnan bedberre nawu priests dja kahngeykimukworren nungandeleng. Burrkyak. Dja nungan God kabidjalkayhme bu kabimarnbun yiman kunkare bu nungan God bidjarrngbom nawu Aaron. [Exodus 28:1]

⁵ Dja kunmekbe karohrok, nawu Christ minj nungandeleng djarrngburrimeninj bu yimerrangimeninj nawu kawohrnankenh kore priests, wardi bininj birriburlumeninj. Dja ngaleng, God nungan bidjaldjarrngbom. Kuhni wanjh God bimarneymeng, "Ngudda nawu beywurd ngardduk. Dja wanjh bolkkime ngaye djal bornang nawu ngudda ngardduk." [Psalm 2:7]

⁶ Mak kunbuyika kabimbuyindi kore God yimeng, "Ngudda wanjh nawu priest djal munguyh munguyh, yiman kayime ngunerohrok nawu Melchizedek* kore nungka nawu priestni bu kunkareni durrrkmidurrrkmirri." [Psalm 110:4]

⁷ Bu Jesus dingihdi kondah kurorre nungka bidjalmarnedi yiwarrudj nuye God bidjawani dja bikayhmi bu kabibidyikarmekenh. Nungka dingihdi yiwarrudj bu kunmimnalk dorreng dja wernkih bu bikayhmeng bidjawani God nawu nadjalkudji bingehkeyi kore kundowikenh. Kaluk Jesus munguyh bidjalwokmarrkmangi God, dja minj nungan burlumerri-meninj. Kunmekbe kunu God wanjh bibekkabekkani bu yiwarrudj di.

⁸ Jesus nungka wanjh Beywurd duninj nuye God. Dja bu nungka kunmekbe djakbehdjakkabekkani, wanjh bonj, nungka djalmarnburreni bu nungandeleng bidjalwokmarrkmangi nawu Kornkumo nuye.

⁹ Nungka wanjh djalkurduyimi kore kundjalwernmak duninj, bu yakwong rowk. Wanjh kuhni djalkurduyimerranj nuye nadjalkudji nawu kabenngeheke birriwrn bininj rowk nawu kabirriwokmarrkmang ba kabirrimalnngmimbimen bu munguyh munguyh.

¹⁰ Bu kuhni wanjh God bimarnbom Jesus bu nakimuk duninj priest yiman yimi Melchizedek nawu God bimarnbom priest nuyeni bu kunkareni duninj.

Karrimarnburrimen Ba Bu Ngad Karridjorden Kore God Kadjare

Hebrews 5:11-14

¹¹ Ngad minj ngundibalmarneymeninj rowk bu kuninjkukenh dja mak minj ngundibengyolyolmeninj kore kunwern, dja wurd karrerayek

* 5:6 Ngurrina kore Genesis 14:17-20

bu minj ngudda ngurriwernhburrkburrkbekkan. Ngudda minj ngurri-
borlhme bu werrkwerrk.

¹² Ngudda wanjh ngurriyimerrangimeninj bu ngurrbenbukkabukkan
nawu birribuyika bininj, dja ngaleng ngurridjalyawan nawu ngunyawoy-
hbukkankenh manbu God nuye kunwok, yiman kore mankerengehkenh.
Ngudda wanjh ngurriyime yiman kayime wurdwurd kabirridjalbongun
manbu kundjikka, dja minj ngudda ngurribangmenguyinj manbu manme
manrayek.

¹³ Bininj nawu yiman kayime wurdyaw nawu kadjalbongun kundjikka
wanjh nakka minj kawernhburrbun kunmakmak bu kaborlhme kunwern
kore God kadjare.

¹⁴ Manbu manme manrayek wanjh makka bedberre nawu bininj
kabirriwernhburrbun dja mak yiman ngokko bedda birridabbolkminj.
Kaluk bedda munguyh bedmandeleng kabirrirohrokmerren bu baleh
kunmak dja nuk kore kunwarre.

6

Karriwernhkarmen Kore Nungka Kariiborlhme Nuye

Hebrews 6:1-12

¹ Wanjh bu karridjordmen dja mak karrimurrngayekmen kore kar-
riiborlhmekenh. Ngudda nawu ngokko ngurriiborlhmeng kore ngurri-
warnyakmulewarren dja mak kore ngurribawong kunwarre ngudberre
manbu ngunkang kore kundowikenh. Dja mak ngurriiborlhmeng kore
ngudman ngurridjalwoybukwon God.

² Ngudda ngokko ngurriiborlhmeng kore ngurrikukdjuhmi rowk, dja
mak kore ngudda ngundimarnebidkurrmerren. Ngudda mak ngokko
ngurriiborlhmeng bu ngurriyawoyhdolkkan kore kundowikenhbeh, dja
kore God kandjadme ba bu karridjarrkdi munguyh munguyh kore nungka
dorrengh.

³ Bonj, wanjh minj karringurdme kore kariiborlhme, dja karridjallay ba
bu karridjaldjordmen kore God nungan kanbidyikarme.

⁴ Kaluk yikahwi bininj nawu kabirriwarnyakmen nawu Christ, wanjh
bedda kabirriyime bu yerrekah yimankek kabirriyawoyhkangemulewar-
ren nuye kore God. Dja kunukka burrkyak, kadjalkarrewarremen, dja
minj kunukka kabirriyime. Ngurriiburrbu. Bininj nawu kabirriwern-
hburrbun kore God kabenmarnebolkwolan, dja mak birridedjdjingmangi
birrimangi kore God nungan benwoni namakmak kore heavenbeh, dja
mak birriraworinj kore Namalngmakkaykenh dorrengh nuye,

⁵ dja mak birrimanjnguneng kore God nuye kunwok manbu man-
wernhmakkaykenh duninj, dja mak kabirriiburrbun bu nawu Ka-
wohrnan Rowk kamre bu yerrekah kore kundulkarre dorrengh nuye.

⁶ Bu birrimekbe bininj kabirrimarnemirrkborledmen Christ nuye,
wanjh yiman kayime kabirriyawohbiddundulubun nawu Beywurd nuye
God kore kundulk cross, dja mak yiman kabirrimarnbun bu nungka
yimankek kayawoyhyemengalme kore kurobbe. Wanjh bedda kunu
kabirridjalwarworren bu kunkimukkenh duninj, dja minj nangale mak
kabendurndiwe kore kabirriyawoyhkangemulewarrenkenh.

⁷ Manbuyika bim ngayolyolme ngudberre. Yikahwi bininj wanjh yiman
kayime kunbolk nawu kamang manwern mandjewk. Wanjh manbu
kunkulk kamarnbun manwern manme kore kabirridurrkmirrikenh bin-
inj, dja mak God kakurduyime kunmak kore mahni kunred.

⁸ Dja nawu birribuyika bininj nakka wanjh yiman yerrih kunbolk kore
kadjordmerren manbu mankarddird dja mak manbu mandalkbang bu

wanjh kadjalwernbolkwarreman, wanjh God kunu kayiddung, dja wanjh kunukka karralkwurlhke rowk.

⁹ Nawu karridabbolk nawu ngaye marnedjare ngudberre, kuhni ngad ngundimarneyime kore kunmakenh ba bu ngudda ngurridjalre kore mandjad nuye nawu kannghehkeng rowk.

¹⁰ God kayime mandjad munguyh. Nungka minj ngunbawon ngudberre, dja mak minj kabengmidjdan kore ngurridurrkmirri dja mak kore ngurrimarnedjare. Dja mak kaburrbun kore ngurribenbidyikarmeng bininj nuye bu kunkareni dja mak bolkkimekenh.

¹¹ Ngad ngarridjare bu ngudda kunmekbe ngurribebbehkurduyimen kore kunrayek ngurridurrkmirri bu djal munguyh. Kaluk ngurribadman manbu ngudda ngurridjare kakurduyimerran ngudberre kore God kakarme.

¹² Kaluk ngad minj ngarridjare bu ngudda ngurringudjyawarren kore ngudda ngurrikurduyime. Dja ngurribendjalngunjdjika nawu birriyungkih kore birridjalwoybukwoni God, dja bedda birridjalmadbuni nuye. Kuhni wanjh ngurridjalkurduyimen ba bu ngudda warridj ngurrimang nawu God ngunberrebbom ngudberre.

*God Kanmarnewokkurmerrinj Nuye Kunwok Manbu Kadjaldi Munguyh
Hebrews 6:13-20*

¹³ Bu God bimarnewokkurmerrinj nawu Abraham, wanjh minj nangale nabuyika bibekayinj ba bu kabimulewan. Kaluk minj nangale kahdi nawu nawernhkimul bu God bingeybuyi kore wokkurmerrinj, wanjh djal God ngandangleng nadjalkudji bu wokkurmerrinj.

¹⁴ Kore yimeng, "Ngaye nawu woymbukkih marnekurduyime kundjalwernmak duninj bu won nadjalwern bininj nawu ngudda ke yibenkebmawahme." [Genesis 22:17]

¹⁵ Nungka Abraham munguyh bidjalwokkarrmi kore God bimarnewokkurmerrinj, dja mak djalmadbuni bu kunkuyeng, wanjh yerre mey rowk kore God nungan biberrebbom.

¹⁶ Bu nangale bininj kadjare kawokkurrmerren, wanjh kabikayhme dja kabingeybun kore kunngey nawu nabuyika bininj nuye nawu nawernhngeykimuk. Kuhni kayime ba bu birribuyika bininj kabirriwoybukwon nuye kunwok, dja minj mak kabirriyidurren.

¹⁷ God nungan yiman kayime ngeyburrinj nungan nuye kunngey bu kunkare duninj kore wokkurmerrinj bu biberrebbom Abraham. Kuhni kurduyimeng nungan bu djareminj ngad bininj nawu Abraham nuye mawahmawah, wanjh karriwernhburrbun bu God kadjalkurduyime kore yingkihwokkurmerrinj, dja mak minj kakarborledme nuye.

¹⁸ Kaluk God kanwong mahni bokenh mankarre manbu minj mak kaborledme. God minj kawokkurren. Dja mak nungka wokkurmerrinj kore kunngey nungan nuyekih. Mah, wanjh ngad nawu karrimarn-erlobmeng kore nungka, nawu ngad karridjalwokkarrme nungka, bu bolkkime karridjalwernhmurrngrayekmen kore karriburrbun bu nungka nawu kanmarnewokdanginj.

¹⁹ Ngad wanjh bolkkime karriwernhkarrme God nuye kunwok kore wokkurmerrinj. Wanjh mahni kunwok nuye, yiman kayime kanhmalngkarrme, dja minj mak kanbawon. Kandjalwernhkarrme yiman kayime kunyarl manbu God nungan kakarrme kore nuye kubolkdjamun duninj. [Leviticus 16:2]

²⁰ Bu Jesus yingkihwam kadberre kore kaddum heaven, wanjh nungka djalyimerranj bu kadjalwernwohrnan duninj nawu priest duninj munguyh kadberre rowk yiman karohrok rerrih Melchizedek bu kunkareni. [Psalm 110:4]

7

Melchizedek Nawu Priest Duninj Bu Kunkareni Hebrews 7:1-10

¹ Nahni bininj nawu ngeyyoy Melchizedek wanjh kingni, dja wohrnan bedberre kore kunred Salem dja mak bimarnedurrkmirri nuye God nawu nungka nawernhkimukni duninj. Kaluk bu Abraham kumdurndengi bu benbom nawu kunkarrngbakmeng kings, wanjh nungka Melchizedek bimirrkdbkeng bimarneyimeng kore kunwok kunmak nuye. [Genesis 14:17-20]

² Wanjh Abraham biwong Melchizedek manbu tithe* kore yehyeng nuyeni rowk nawu karrmi. Kaluk Abraham rohrokmeng yehyeng rowk nawu nuyeni karmihkarrmi, dja kuklarlmey kore ten bebbehkurmeng, dja wanjh djarrngbom nakudji bu biwong Melchizedek. Kaluk kungey nuye Melchizedek kamenyime bokenh, "King nawu Mandjad Kabendjadme Bininj Kore Kunmakkeh." Dja mak kunbuyika bu nungka wanjh king nawu kawohnawohrnan kore kunred Salem, dja mak kayime "King nawu kabenwon kunmodmikenh."

³ Minj nangale bininj burrbuyi nawu Melchizedek kornkumo dja ngalbadjan nuye dja mak kore baleh kumdolkkangbeh, dja kore danginj dja mak kore doweng. Melchizedek nungka wanjh kahdjaldurrkmirri priest bu munguyh munguyh yiman kayime nawu Beywurd nuye God.

⁴ Ngurriburrbun bu Melchizedek nungka wanjh nakimukni. Kunmekbekenh kunu Abraham nawu kornkumo kadberreni rowk wanjh biwong manbu tithe kore yehyeng rowk manbu mangimangi namakmak kunmekbekenh kore benbuni nawu kings.

⁵ Ngurriburrbu manbu mankarre kore nawu Levi nuyeni namud, bedda wanjh birriyimerranj priests. Dja bu bedda birrimangi manbu tithe kore bininjbeh nawu bedman bedberreni namuddeleng. Kaluk nawu birrimekbe priests dja bininj nakka wanjh birrimdolkkarrinj rowk kore Abrahambeh namud. [Numbers 18:21]

⁶ Dja nawu Melchizedek nakka minj kumdolkkayi kore Levibeh namud, dja ngaleng djalmey manbu tithe kore Abrahambeh, dja mak bimarneyimeng kunmak nawu Abraham, nawu namekbe bininj God biyingkihberrebuni.

⁷ Adju, baleh kuhni kahmenyime? Karriburrbun bu nawu nawernhkuken bininj kabimarneyime kunmak nawu nabuyika bininj nawu minj nawernhkuken.

⁸ Dja kunbuyika mak karriburrbun. Nawu priests birrimangi manbu tithe, dja bedda bininjwi nawu birribaldarrkiddi wanjh yerre kunu birribaldoweni. Dja nawu Melchizedek mangi tithe kore Abrahambeh, dja mak kore Bible kayime bu nungka Melchizedek wanjh karrarrkid munguyh.

⁹ Ngad wanjh karriyimen bu Levi namud nuye nawu benkebmawahmeng priests, nawu mangimangi manbu tithes, wanjh ngokko yiman yimi biwong Melchizedek manbu tithe, dja ngaleng Levi wanjh nakka Abraham

* ^{7:2} "Tithe" kamenyime bu yikarrme ten njalenjale, dja yiwon God nakudji yiman kayime "offering".

bikebmawahmeng dja danginj yerrekah bu Abraham bikarremulewam nawu Melchizedek.

¹⁰ Nawu Levi minj bangmengalmeninj bu dangimeninj bu kumekbe bolkyimi. Dja nungka djalyakni dja ngaleng namawahmikenh djaldar-kiddi bu Melchizedek bimarnebebmeng Abraham. Kaluk Levi yiman kayime ngokko kanjdji di kore Abraham nuye kunburrrk.

Melchizedek dja Jesus
Hebrews 7:11-28

¹¹ Bu kerrngehkenh God benwong bininj manbu mankarre nuye, dja warridj benbengdayhkeng bu kabindimarnbun Aaron dja nuye namud bu kabirriyimerran nawu priests bedberre. Bedda wanjh Levi benkebmawahmeng, dja nawu birridurrrkmirri kore God kurrmeng nuye mankarre. Dja mahni mankarre minj benwernhgehkemeninj nawu bininj rowk! Wanjh kunmekbekenh kunu God kandjalwong Jesus nabuyika priest duninh, nawu yiman kayime Melchizedek dja yuwn bu karohrok nawu Aaron.

¹²⁻¹³ Ngad wanjh karrimulewan bu Christkenh, dja minj nangale bininj kore namud nuye durrrkmirriwirrinj kore kunwardde manbu altar. Bedda minj namud bedberre kore Levi nuye mawahmawah. Kaluk bu Jesus nawu nakerrnge priest kumbemeng, wanjh mankarrekerrnge warridj kumbemeng.

¹⁴ Kaluk Jesus nawu kahwohrnan kadberre kumdolkkang namud kore nawu Judah nuye. Dja nawu Moses minj mak baleh yimeninj bu priestskenh nawu Judah nuyeni namekbe namud.

¹⁵ Kaluk kunbuyikakenh warridj God karrekarrmi bu bimarnbom Jesus bu priest kadberre yiman yimi nawu Melchizedek.

¹⁶ Jesus minj yimerrangemeninj priest kore bininj birrimarnekarremarnbuyi nuye nawu mawahmawah, dja ngaleng nungan karrmi kundulkarre dorreng kore kundarrkid nuye manbu wanjh kadjalle munguyh. Kumekbe bokenhkah nawu Jesus yimerranj priest.

¹⁷ Kuhni God nungka bidjalyingkihmulawani bu yimeng, "Ngudda wanjh nawu priest yiyimerran djalmunguyh munguyh, yiman priest yimihyimi nawu Melchizedek." [Psalm 110:4]

¹⁸ Kaluk manbu mankare mankarre wanjh makka ngokko djarrirnkendanginj, dja wanjh makka manu manngudjwarre dja mak minj kurduyimeninj kore kunmak.

¹⁹ Manbu mankarrekanre wanjh minj nangale bininj biwernhmarnbuyi bu namakniwirrinj. Wanjh God kanwong mankarremak duninh manbu mankarrekerrnge manbu kankan darnkih kore nungka.

²⁰ Kuhni wanjh nungan God bu wokkurrmerrinj manbu mankarrekuken duninh. Kaluk birribuyika bininj minj nungka wokkurrmerrimeninj bedberre bu birriyimerrangemeninj priest.

²¹ Dja nadjalkudji Christ yimerranj priest kore God nungan bimarnewokkurrmerrinj bulkkidj duninh, bu yimeng, "Ngaye nawu Kawo hrnan Rowk ngawokkurrmerrinj, dja minj mak ngamayaliborledme, bu kuhni ngayime ngudda yiyimerran priest bu djalmunguyh munguyh." [Psalm 110:4]

²² Baleh wanjh kuhni kakarreyime? Kaluk God bimarnewokkurrmerrinj kore Jesuskenh, wanjh bolkkime karriburrbun bu nungka kanmarnekduyime kore kunwok nuye manbu kahdjaldi. Wanjh Jesus yiman nakka wanjh nanu kanbengdayhke bu God kanmarnewokkurrmerrinj manbu mankarrekerrngekenh dja mak kunwok nuye mandjalmak duninh.

²³ Birriwern bininj nawu bedda birrikareni priests wanjh birridjal-bebbehadoweng rowk, kaluk nakka minj bedda birridarrkiddiwirrinj munguyh. Djal bonj.

²⁴ Dja nawu Jesus nakka wanjh kadjaldarrkid bu munguyh munguyh. Nungka minj kangurdme nuye bu priest yimerranj.

²⁵ Bu kunmekbekenh nungka munguyh kabennegehke bulkkidj duninj nawu bininj rowk nawu kabirrimre kore nungka ba bu kabirrire kore God. Jesus nawu kahdjaldarrkid, dja munguyh kabidjawan God bu kabenbidyikarmekenh nawu birrimekbe bininj nuye rowk.

²⁶ Jesus kannahnan nawu nungka nakimuk priest nawu wanjh ngad karridjalmarnedjare munguyh. Nungka nawu nadjamun duninj, minj kunwarre kakurduyime, dja mak nadjalwernmakkaykenh duninj. Minj nungka karrirohrok ngad bininj nawu karriwarre duninj, dja mak God biwayhkeng kaddum duninj ba kawernhwohrnan rowk kore heaven nuye.

²⁷ Nungka Jesus minj kakurduyime yiman birribuyika priest kore birrikurduyimi. Birrimekbe priest birriwern wanjh birrikurduyimi bu munguyh birribuni mayh dja birrikinjeji wanjh kunmekbekenh kunu God benmarnebgmidjanganen kore kunwarre bedberreni nawu priest kore birrikurduyimi, dja mak birridjalwernni bininj nawu kumekbeh birridi. Dja nawu Jesus kundjalkudjikenh bu nungan djalkanjkurmerrinj kore doweng kadberre nawu karriwarlahkenh bininj rowk. Wanjh God kunu munguyh kanmarnebgmidjdan kore kunwarre kadberre kore nungkabeh beywurd nuye. [Leviticus 9:7]

²⁸ Manbu mankarrekare wanjh makka kerrngehkenhni bu benkurmeng bininj nawu birringudjwarreni kore priest birridurrkmirri. Kaluk yerrekah bu God wokkurmerrinj nuye, wanjh bimarnbom nawu beywurd nuye, nawu marnburrinj nadjalmak duninj bu yimerranj priest bu djal munguyh munguyh.

8

Jesus Nakka Nakimuk Duninj Priest Duninj Kadberre Bu Munguyh Munguyh

Hebrews 8:1-13

¹ Adju, baleh kamenmenyime? Ngad karrikarme nakimuk priest nawu kahni kore kukun nuye God nawu king duninj kawohrnan kore kaddum heaven. [Psalm 110:1]

² Nawu ngad kadberre nakimuk priest wanjh kahdurrrkmirri kore kubolkdjamun duninj, kore kumekbeh kabolkwoybuk duninj bu karridi yiwarrudj kore nungan God karremarnbom. Mahni kunbolk minj bininj birribolkmarnbuyi.

³ Nawu nangale bininj bu kayimerran nakimuk priest bu karrurrkmirri, wanjh kakan njalehnjale namakmak bu kabimarnekurrme kore God nuye, dja mak mayh warridj bu kabimarnekinje nuye. Kaluk Jesus, nawu kadberre nakimuk priest duninj wanjh nungka warridj kabimarnekan kore kabiwon God.

⁴ Kondah kore kurorre, bininj nawu priests kabirridjalwon God nuye kore mankarre kayime. Jesus nawu nakimuk duninj priest kadberre wanjh karrurrkmirri kore heaven. Dja yuwn bu yiman priests nawu kurorre kabirridurrkmirri.

⁵ Kaluk birrimekbe priests kabirridurrkmirri kore kubolkdjamun manbu kondahbeh. Dja mahni kunbolk kondah, bu karrinan, wanjh yiman ngad karriwaralbolknan kore kubolkdjamun duninj heaven.

Wanjh kunmekbekenh God biwokrayekwong nawu Moses bu rurrknami manbu dabburlin, bu bimarneyimi, “Bu kunmak yidjalkurduyimen nawu njalehnjale yimarnbun kore ngaye bukkahbukkang kondanjkuu kore kunwardde.” [Exodus 25:40]

⁶ Dja bolkkime manbu kabirridurrrkmirri priestkenh, wanjh makka God biwong Jesus nawu nadjalwernhkimuk duninj dja mak kabenyurrrhke nawu birribubuyika priests kore kabirrimarnedurrrkmirri. Bedda birridurrrkmirri kubulkayh kore God dja mak kore bininj, kore God wokkur-merrinj bu kerrngehkenh duninj. Dja bolkkime God wokkur-merrinj bu manwokkerrnge nuye, dja Jesus karrurrrkmirri kubulkayh kore God dja mak kore ngad. Wanjh kunu kawernhmakmen rowk.

⁷ Ngurriburru. God wokkur-merrinj kerrngehkenh, kumekbekenh kunu bu djareni bininj rowk birriwokmayi. Dja larrk. Bedda birridjalwarnyakni nuye kunwok. Kaluk kumekbekenh God djareminj yawoyhwokkur-merrinj.

⁸ Dja God benwarrewam bininj nawu birriwarnyakni kore nungka benmarnewokkur-merrinj. Dja yimeng, “Ngurrina, kuhni wanjh ngokko darnkih kamre, ngaye nawu ngawohrnan rowk ngayime, kaluk ngaye ngawokkurmerren kunkerrngehkenh bedberre bininj nawu Israelbeh dja mak bininj nawu Judahbeh.

⁹ Minj kuhni rohroknwirrinj bu kunkare ngaye ngawokkur-merrinj nawu kore mawahmawah bedberreni bu ngabenkani kore kubid ngardduk dja ngabenbekeng kore kunbolk Egyptbeh. Kaluk bedda wanjh birridjalwokweyi kore ngaye ngabenmarnewokkur-merrinj bedberre. Wanjh kunu ngayemanwali ngabenmarnemirrkborledmeng bedberre, kuninjkuu wanjh ngaye nawu ngawohrnan rowk wanjh marneyime.”

¹⁰ “Maninjmanu wanjh ngaye ngawokkur-merrinj bedberreni bininj nawu Israelbeh, ngaye nawu ngawohrnan rowk wanjh marneyime. Kaluk ngaye ngakurme mahni mankarre dja kunwok ngardduk kore kukodjkulu dja mak ngabimbun kore kukange bedberre. Ba bu ngaye wanjh ngadjalkudji God bedberre, dja mak bedda ngardduk bininj.

¹¹ Wanjh bininj minj mak kabindibalbukkan nawu darnkih kabirrid-jarrkni dja mak nawu namud bedberre bu bedda ngandiburrbun ngaye nawu Ngawohrnan, dja ngaye ngokko bedda ngandiburrbun rowk, nawu birrikihkimuk dja mak nawu minj birrikuken bininj.

¹² Ngaye ngabengmidjan kunwarre bedberre kore birrikurduyimi dja mak minj ngayayoyhburrbun kore kunwarrekenh bedberre.” [Jeremiah 31:31-34]

¹³ God yimeng bu kanmarnewokkur-merrinj, wanjh makka mankarrekerrnge. Wanjh kore manbu mankarrekareni wokkur-merrinj bu kunkareni, kaluk makka wanjh minj kayayoyhdi munguyh, dja kakarrewarremen mak kamre darnkihkenh bu kayakmen.

9

*Bu Birrimarneboddangeni God Kore Dabburlin Manbu Manrurrdjamun Kondah Kurorre
Hebrews 9:1-10*

¹ Manbu kunwok kore God kerrngehkenhni wokkur-merrinj wanjh bedda benbengdayhkeyi kore birrirey birrimarnedi yiwarrudj dja mak kore kubolkdamun birrirurrrkmarnbom kondah kurorre.

² Kaluk manbu dabburlin birrirurrrknami, wanjh kumekbe kore dabburlin birribalngimi, wanjh di nakimuk lamp, dja balabala manbu table,

dja mak buriddi manbu birrimarnbom mandjamunni nuyeni God. Mahni kunbolk birribolkngeybuni “Kubolkdjamun.”*

³ Kaluk kumekbe kore dabburlin kubodmekenh wanjh kunmadj nakimuk madjbarndi bu warnamyoy, dja bewhkah kore borledmikenh, wanjh birribolkngeybuni “Kudjalwernhbolkdjamun Duninjh.”

⁴ Kumekbe yongohoy manbu balabala birrimarnbom wirlmurrng nawu gold duninjh, kore birrikinjeyi nawu incense namanjmakni duninjh dja mak manbu Ark barrkbuyindi rowk manbu gold duninjh. Wanjh mahni Ark birrimarnbom kore God wokkurmerrinj. Dja mak kumekbe kore Ark kanjdji mak dahkendi ngalng banikkin manbu goldwi dorreng, warridj manme buriddi dorreng lod dahkendi, dja mak Aaron nuyeni kunkarndudj dulkdahkendi manbu kunmalaworr bebmeng kore kundulkbek, dja mak manwarddebalabala dahkendi manbu bimbuyindi God nuyeni kunwok kore wokkurmerrinj.

⁵ Kaluk manbu Ark karrmi manbu birridangbalhmi, nawu birringeybuni, “Kore God nungan kayerrkan dja mak kanmarnebengmidjan kunwarre kadberre.” Dja kore kaddunkah, wanjh birrikukmarbom nawu Cherubim† bokenh dja birrikurmeng bu benebebbekbarndi. Bu bininj birrinani nawu Cherubim, wanjh bedda birridjalburrbuni bu God Namakkaykenh Duninjh kadjaldi munguyh. Bonj, ngaye minj bengdayhke bu kuhnikenh rowk bolkkime, dja ngadjare bukkabukkan kunbuyika.‡

⁶ Bu njalehnjale birrikurmi kore rowk kore dabburlin, wanjh nawu priests djalmunguyh birringimi kore kunurrk manbu kumrurrkdokmi bu birrimarnedurrkmirri God nuye.§

⁷ Kaluk minj birringimeninj kore Kudjalwernhbolkdjamun Duninjh. Dja ngaleng nadjalkudji nawu nawernhkimuk priest ngimi kumekbe, dja nungka ngimi bu djal kunkudjikenh bu nakudji mandjewk ngarre. Kaluk nungka wanjh kani kunkurlba dorreng kumekbe kore God bidjalmarnekurmi. Wanjh kunu God bimarnebengmidjanganeni kore kunwarre nungka nuye dja mak bedberre birribuyika bininj rowk, nawu minj bedda birriburrbuyi kore kunwarre birrikurduyimi.*

⁸ Kaluk nawu Namalngmakkaykenh wanjh bendjalbukkani bu bedda birriyngkihburrbuyi kaluk yerrekah bu kayimerran. Bu birrinang nawernhkimuk priest ngimi kore kudjalwernhbolkdjamun, wanjh bedda birriburrbuni bu kaluk yerrekah God karrangmarrhmang kore kubolkdjamun duninjh nuye. Dja med yerrih, dja nawu dabburlin kumekbe kahdjaldi, dja kaluk yerrekah kayakmen.

⁹ Kuhni bu birrikurduyimi, wanjh bolkkime kanbukkan ngad kadberre bu baleh kadjalkurduyimerran karrihnan. Kaluk kuhni bu kakarremenmenyime bu birriwoni njalehnjale kore God, dja mak bu mayh birribuni wanjh kunkurlba birriwoni nuye, kaluk makka minj benwernkangebeleyoi bedberre nawu birridi yiwarrudj kumekbe.

¹⁰ Kaluk kumekbe birrikurduyimi bu manmekenh, dja bu birribonguni njalehnjale, dja mak bu birrikudjirridjburreni kore mankarre yoy bedberre, wanjh mankarrewernni rowk bedberre wanjh djal mankarrekehkilek kore kurobbe bu birriyimi bu birrimadbuni kore kalukburrr nungan God nungan kakarrekerrngehmen rowk.

*Bu Christ Nungan Kandjalmarnekurlbawarrhmeng Kadberre Rowk
Hebrews 9:11-28*

* 9:2 Exodus 25:23-40; 26:1-30 † 9:5 Exodus 25:18-22 ‡ 9:5 Exodus 25:8-9; 26:31-34 § 9:6 Numbers 28:3 * 9:7 Exodus 30:10; Leviticus 16:15, 34

11 Dja bu Christ kumwam nawu nungka nadjalwernhkimuk duninj priest, kaluk kunmak duninj kurduyimerranj kadberre rowk, dja nungka wanjh bolkkime ngad karrikarrme. Nungka wanjh ngimeng manbu kunrurrk temple mandjamun duninj, dja yawu bu nawu dabburlin manbu kurorrebeh temple manbu bininj birrimarnbuni.

12 Ngurriburrbun bu nangale bininj nawu kurorrebeh nawu priest kayimerran nakimukni, wanjh ngimi kore kumekbe kubolkdjamun duninj, kunkurlba kurlbakani manbu mayh nuye nawu nenikud, dja mak bulikki yaw ngarre. Dja Jesus nungan ngimeng kumekbe, wanjh nungka kundjalkudji ngimeng, dja minj yikayi kunkurlba manbu mayhbeh, dja ngaleng nungandeleng kurlbawarrhmeng wanjh ngimi kadberre nawu karriwarlahkenh ngad bininj rowk dja kanmarnekarremulewam ba bu ngad karriidjarrkdi kore nungka munguyh.

13 Kaluk ngurriburrbun nawu priest nakimuk kang manbu kunkurlba mayhbeh dja mak kunburle kore yaw mayhbeh nawu bulikki dja kabenkukdjuhke nawu bininj kabirridjare kabirridi yiwarrudj, ba bu kabirrikangebelemen. Dja makka kabendjaldjirridjibun kore djal kunbur-rkwi ngarre.

14 Dja Christ wanjh kurduyimeng kunwernhkimuk duninj. Nungka minj kurduyimeninj kunwarre, dja ngaleng nungka bikarrmi nawu Namalngmakkaykenh nawu karrarrkid munguyh munguyh, dja Christ nungandeleng kanjurrmerrinj kadberre. Dja kumekbekenh kunu nawu Christ nuye kunkurlba makka wanjh kanmarnbun karrikangebelemen ba bu minj karrikurduyime kore kunwarre bu karriwarremen dja mak minj karrimalngdowe. Dja karriidjaldurrkmirri nuye God nawu nungka karrarrkid munguyh munguyh.

15 Mah, wanjh ngurriburrbu kore Christ kurduyimeng! Bu kunkareni God kanmarnewokkurrmerrinj kadberre, wanjh karriidjalwokweyi rowk. Wanjh God kandjalkayhmeng, dja kadjare kanwon namakmak duninj nawu nuye munguyh munguyh. Kunmekbekenh nungka kanmarnewokkurrmerrinj manbu manwokkerrnge kadberre. Kaluk Christ wanjh kanmarnekanjurrmerrinj ba bu kanbebkeng kore kunwarre karrikurduyimi bu karriwokweyi kore God bu kunkareni wokkurrmerrinj. Wanjh bolkkime God kanwon kore nungka manbu kanberrebbom kadberre.

16 Kuhni wanjh mandjalwern dja kundulmuk, bu ngayolyolme kuhni bu marneyime. Ngurriburrbun bu yikahwi bininj kabirribekkarren bu darnkih kabirriyakmen, wanjh kabirriyingkihimburren mankarre kore kabirridjare birribuyika bininj kabirriweykarren nuye kunmadj rowk kaluk yerrekah bu bedda kabirridowen. Minj nangale mak kabindimarnekurduyime bu bedda kabirrihdjaldarrkidd. Dja kaluk yerrekah nakudji bininj karrowen, wanjh kabirriyawarren bu woybukkih nungka yakminj, kaluk bu kabirrimadjarlmgang kore nungan yingkihwokkurrmerrinj nuye.

17 Kaluk nahnai djurra bu bininj kabimbun kore kamulewarren bu kundowikenh nuye, wanjh minj baleh kabangmekurduyimerran bu nungka kahdjaldarrkid. Kaluk bu nungka karrowen, wanjh bininj wardi kabirriyime kore nahnai djurra kayime.

18 Kunmekbekenh kunu bu kunwok nuye God mankareni bu wokkurrmerrinj wanjh djahdjalyingkihdi, dja minj dedjingmayi, kalukburrk bu kunkurlba mayhbeh kurlbawarrhmeng.

19 Wanjh kunmekbekenh kunu, kaluk yerrekah bu nawu Moses bengdayhkeng nawu bininj rowk kore mankarre yoy, wanjh yerre bu yakwoni, nungka mangi kunkurlba manbu mayhbeh nawu bulikki yaw

dja mak nenikud, manbu boraworreni kukku dorrengh, dja mangi kurlbakurlba nawu manburrba, dja mak manyende kundulk manbu karrulkngeyyo hyssop. Manbu kunmalaworr dorrengh bu djuhkeyi dja bedjehbedjekmi bu delkdellkeng djurra manbu kore mankarre bim-buyindi, dja mak bininj benkukdelkdellkkeyi rowk.

²⁰ Nungka yimeng bedberre, “Mahni kunkurlba manbu kamenmenyime bu God nungan wokkurmerrinj kore ngad, wanjh kadjare ngurriwokmar- rkmang maninjmanu kunwok nuye.” [Exodus 24:8]

²¹ Kore karohrok Moses kurduhkurdyimi bu kunkurlba bedjehbed- jekmi delkdellkkeyi manbu dabburlin ngarre nawu nadjamunni dja mak njalehnjale nawu kunmekbe yongohyoy kore dabburlin kururrk kore birridi yiwarrudj nuye God. [Leviticus 8:15]

²² Ngurriburrbun bu God nuye mankarre kayime bu kabirridelkke yehyeng rowk kunkurlbawi wanjh kunu nungka kanjilngmak. Dja bu kurlbayakniwirrinj, wanjh God nungan yimeng minj kabengmidjdan kunwarre bedberre nawu bininj rowk. Kunmekbekenh bu birrikurl- bawarrhkeyi nawu mayh. [Leviticus 17:11]

²³ Njalekenh birridelkkeyi kunkurlba dorrengh nawu yehyeng rowk bu kondah birrikarmi kore kurorre? Wanjh nakka njalehnjale birridelkkeyi rowk wanjh God benmarnbuyi ba bu birriwernhburrbuyinj kore nawu manwoybuk duninj kahni kore heaven. Kunmekbekenh kunu bir- ridelkkeng kunkurlbawi kore mayh birrimarnebunikenh kore God djareni. Kaluk nawu nawernhwoybuk duninj, nawu kahdi kore heaven, wanjh nakka nanu nadjalwernmakkaykenh nuye God, dja kunkurlba manbu mayhkenh minj manmak kore heaven bu kore God kadjare.

²⁴ Nungka Christ ngimeng kore heaven duninj, minj nungka ngimeninj manbu kore God nuye kunurrk kondah kurorrebeh, manbu bininj birrimarnbom bu bedda birridjalngunjdikang nawu manwoybuk kore heaven kahdi. Burrkyak. Nungka wanjh wam nungandeleng, ngimeng kore heaven duninj wanjh kumekbe kahdi kore kumirrk nuye God dja bolkkime wanjh kandjalmarnewokdikenh ngad kadberre rowk.

²⁵ Kaluk nawu nakimukni priest nawu kondah kurorrebeh, wanjh ngimi kumekbe kore kubolkdjamunni duninj, wanjh nakudji mandjewk yimer- rangeni ngimi, dja kani mayh kunkurlba, dja minj nungan nuyeniwirrinj kunkurlba. Kore nawu Christ, wanjh minj karohrok. Nawu priest minj ngimeninj heaven bu kunmekbe kurduyimeninj kunwernkah bu djalkanjkurmerrimeninj mandjewk dja mandjewk.

²⁶ Dja burrkyak! Kunukka minj kurduyimeninj nawu Christ. Nungka minj kanjbabangniwirrinj kunwernhkah munguyh kore kondah kurorre bolkmarnbuyindanjbeh bu bolkkime! Dja bolkkime bu darnkih kay- iburnbun rowk, wanjh kunu Christ kumdjalwam bu kunkudjikenh nungandeleng kanjkurmerrinj kore God bu bularrbom rowk manbu kunwarre kadberre karriwarlahkenh bininj rowk.

²⁷ Bininj karriwarlahkenh rowk karridowen bu kundjalkudjikenh dja yerre wanjh God kandjadme kadberre rowk.

²⁸ Kunmekbekenh kunu wanjh Christ bu djalkanjkurmerrinj kund- jalkudjikenh bu kang kunwarre kadberre bininj rowk. Kaluk yerrekah nungka kamyawoyhdurdeng, minj mak nungka kayawoyhkanjkurmer- renkenh bu karrown kore kunwarrekenh kadberre, dja kamdjalle bu ngad kangehke kadberre nawu nungka karrimadbun. [Isaiah 53:12]

10

Christ Nawu Kanmarnedoweng Djal Kundjalkudjikenh Bu God Kanmarnebegmidjdan

Hebrews 10:1-18

¹ Mahni mankarrekare wanjh benyingkihbukani bininj kore Christ nungan kakurduyime bu yerrekah. Dja bonj, mahni mankarrekare wanjh minj kurduyimeninj kore nawu Christ kumwam kurduyimeng. Kunkareni, bininj birridjareni bedmandeleng birrimarnburrimeninij yimankek birrimakni bininj kore God, dja mak birrikanjkurmi mayh bu munguyh munguyh, mandjewk dja mak mandjewkbuyika. Dja larrk, kuhni minj benmarnbuyi bu bedda birriwerhmakniwirrinj.

² Ngurridjalburrbu, bu mahni mankarre benmarnbuyinj bininj birriwerhmakniwirrinj kore God, wanjh njalekenh nawu priest birriyawoyhkurduyimi bu mandjewk dja mandjewkbuyika? Birrimekbe bininj nawu birridi yiwarrudj, bu birrikangebeleworeni, wanjh minj mak birriyawoyhyemengalmeninj kore kunwarrekenh.

³ Dja ngaleng bu kuhni birrikurduyimi kore mandjewkbuyika ngarre bu nawu mayh kore God birriwoni, wanjh kunukka benbengdayhkeyi ba bu birriyawoyhburrbuni bu bedda birridjalkurduyimi kunwarre.

⁴ Dja kunkurlba mayh nawu bulikki dja nenikud ngarre, wanjh djalkarrewarreni bu yimankek kanmarnebularrbun kunwarre kadberre ngad nawu bininj rowk.

⁵ Kunmekbekenh kunu bu Christ kumwam kondah kore kurorre, dja nungka bimarneyimeng God, "Ngudda minj yidjareniwirrinj bininj bu kabirriyawoyhkinje bu ngundiwon nawu mayhbeh, dja minj mak yidjareniwirrinj bininj bu ngundiwon njalehnjalekenh kore yiwarrudjkenh, dja ngaleng ngudda yiyingkihmarbom kunburrr ngardduk.

⁶ Bininj kondahbeh ngundiwoni mayh nawu birrimokenkinjei kore manbu altar, dja mak njalenjale nawu ngundimarnekurrmi kore kunwarrekenh bedberre, dja ngudda minj yibenmarnebegmidj dangimeninj bedberre kunwarre, ngudda ngundidjalnjilngwarrewoni kore birridjalkurduyimi.

⁷ Kuhni wanjh ngaye ngadjalyime, 'Kanbekka! Ngaye bu ngahdi. Ngamdjalwam ba ngakurduyime kore ngudda yidjareminj, nawu God!' Nahni djurra kore ngandimarnebimbom bu ngaye ngandiyolyolmi." [Psalm 40:6-8]

⁸ Christ werkk bimarneyimeng God, "Bininj nawu kondahbeh ngundiwon nawu njalehnjale ngundimarnekurrme, dja mak birrimokenkinjei mayh, dja mak ngundimarnekurrmi njalenjale bu yibenmarnebegmidj dangimeninj bedberre kunwarre, dja ngudda yidjalnjilngwarreni bedberre." Kuhni yimeng bu yolyolmi manbu mankarre bu benwokrayekwong bedberre kore birrikurduyimi.

⁹ Kaluk kuhni warridj Jesus yolyolmerrinj bu yimeng, "Kanna ngudda nawu God, ngaye wanjh ngamwam ba ngadjalkurduyime kore ngudda yidjare." Wanjh bu kuhni Jesus yimeng, God wanjh nurgdkeng rowk kore kerngekenh birrimarnekankinjeng nuye, dja marnbom dedjingmey bedberre manbu manwokkerrnge manbu kore Jesuskenh bu nungan nadjalkudji kakanjcurrmerren kore God.

¹⁰ Wanjh Jesus Christ kurduyimeng kore yolyolmerrinj, bu kanjcurrmerinj kore kunburrr nuye kundjalkudjikenhni, wanjh God bolkkime djal munguyh kanmakwan kadberre bu nungka kayime ngad karridjalmak bininj dja mak djal nuye bininj.

11 Bu kunkareni kunbarnangarrawern rowk, djalmunguyh nawu priests birridjaldi bu yiwarrudj birrimarnedurrkmirri. Munguyh bu mayh birribuni dja birrikanjkurmi kore kumirrk nuye God. Kaluk namekbe mayh bu birribuni minj mak manbu kunwarre wernhwemeninj.

12 Kaluk yerrekah wanjh nawu Christ nungan kumwan nawu priest duninj, dja kanmarnekanjcurmerrinj kundjalkudjikenh kore kunwarrenk kadberre rowk, bu djalmunguyh munguyh, wanjh yerre wam yerrkang kore kukun nuye God.

13 Kaluk yerrekah wanjh Christ kabenmelme bininj nawu kabirri-wirrihme, dja bolkkime kamadbun bu baleh kabolkyimerran bu God kabenkurrme birrimekbe bininj kore kanjdji.

14 Dja nungka Christ nadjalkudji kanjcurmerrinj bu djal kunkudjikenh, wanjh kanmarnbom rowk kadberre ba bu God kanmakwan, ngad nawu nungka munguyh kanmarnbun bu karridjalyimerran kore karrimak bininj nuye.

15 Nawu Namalngmakkaykenh kuhni mak kahmulewan, bu kunwoybuk kanbengdayhke kadberre. Bu werrek nungka yimeng,

16 "Nawu kawohnan rowk yimeng, 'Kuhni ngaye ngawokkurrmerren bu kaluk yerrekah kayimerran bedberre. Kaluk darnkih bu kabolkyimerran ngaye ngakurrme manbu mankarre rowk ngardduk kore kukange bedberre. Dja mak ngabimbun mankarre rowk ngardduk kore bedberre mak kunmayali.'" [Jeremiah 31:33]

17 Wanjh yerre kunu yimeng, "Kore kunwarre bedberre bu birrikurduyimi wanjh ngaye minj ngayawoyhburrbun munguyh." [Jeremiah 31:34]

18 Bolkkime wanjh bu kanmarnebengmidjdanj kore kunwarre kadberre, wanjh minj nangale mak kayawoyhkanjcurmerren kore kunwarrenk kadberre.

Yuwu Bu Karribawon Kore Karriwokmarrkmang Nawu God Hebrews 10:19-25

19 Mah, wanjh nawu karridangerrinj, ngad wanjh bonj, kamak bu karringimen kore kundjalwernhbolkdjamun duninj nuye God, minj mak karribalkele dja kankumarnbom kunkurlba nuye Jesus nawu doweng.

20 Nungka dangmarrhme kore manburrba warnahwarnamyoy kandabkeng. Ngayime bu nungka kanmarnekanjcurmerrinj kunburk nuye, wanjh dangmarrhme kadberre bu karringimen dja karrimalngmimbi munguyh.

21 Wanjh bolkkime ngad karrihkarrme nawu nawernhkimuk duninj priest nawu kanmarnewohnan kore ngad nawu God nuye bininj.

22 Ngad wanjh karriray darnkih kore God bu karrikangewoybuknin duninj, dja mak karridjalwernhwoybukwon nuye. Nungka kankangedelkkeng kunkurlba nuye ba minj karriyawoyhyemengalme, dja mak karrikukbelenin bu kankukdjirridjibun kukku dorrengan manbu manbobele duninj.

23 Wanjh karriwernhwoybukwo nawu God. Nungka munguyh kakurduyime kore kawokkurrmerren. Kunmekbekenh wanjh karriwernhburrbun bu karrimadbun God nawu minj kakurren, wanjh kanmarnekurduyime kadberre.

24 Dja mak ngad munguyh karridjalbengyolyolmerrimen, karribidyikarmerrimen, dja mak karrimarnbun bu karrimarnedjaremerren dja karrikurduyime kore kunmakkenh rowk.

25 Mah, wanjh karrimirndemornnamerrimen munguyh. Yikahwi nawu bininj birribengmidjdanj bu minj kabirrimirndemornnamerren bu karridi

yiwarrudj. Kawarre. Dja karrimurrngarayekworrinen munguyh. Dja wanjh ngurriburrbun bu kuhni ngokko darnkih kabolkyimerran manbu kunbarnangarra kore nawu Christ kamdurndeng.

*Bu Karriwokwe Manbu Manwoybuk Nuye God
Hebrews 10:26-31*

²⁶ Bu bininj kadjare munguyh kayawoyhkurduyime kunwarre yerrekah kore borlhmeng manbu manwoybuk, wanjh minj nangale nabuyika bininj bu kabimarnewokdi bu kabidjawan kore God bu kabimarnebengmidj-dankenh.

²⁷ Bu nangale kuhni kakurduyime, wanjh kunukka kadjalmadbun kunkele dorrengh nuye bu God kabidjadme dja mak kabikukburriwe kore kunak manbu kadjalrung munguyh, dja mak kabenburlarrbun nawu kabirrihydiko nawu God.

²⁸ Ngurriburrbu bu kunkare, nawu bininj wirrihmeng mahni mankarre manbu Moses bimbom, wanjh nakka nanu djaldoweng. Bokenh dja nuk danjbik bininj birrimulewam namekbe bininj dja minj nangale bikongibuyi bu kuhnikenh.

²⁹ Dja ngurriburrbu bu kunyid kawernhrayekmen duninj bedberre bininj nawu minj kabirriwokmarrkmang nawu Beywurd nuye God dja kunukka kabirridjalmelhelme nungka? God wanjh kawernhyiddung birrimekbe bininj. Bedda wanjh kabirrinan kunkurlba nuye Jesus kore wokkurmerrinj manbu benkangedjirridjbom, wanjh kabirridjalkurlbawarrewa yiman mankurlbawarre yerrih. Dja mak bedda kabirriyime kunwarre nuye kore Namalngmakaykenh nawu nungka kabenkongibun.

³⁰ Kaluk ngad wanjh karriburrbun bu God yimeng, "Kaluk ngaye wanjh ngabenbun bininj nawu kunwarre kabirrikurduyime. Bu ngaye wanjh ngabenmarnekurduyime kunwarre bedberre nawu birrikurduyimi kunwarre." [Deuteronomy 32:35] Kuhni mak kunbuyika nungka yimeng, "Nawu kawohrnan rowk wanjh kabendjadme nuye bininj." [Psalm 135:14]

³¹ Kuhni bu ngad karriwernhkelemen duninj bu God nawu kahdar-kiddi munguyh wanjh kandjadme rowk.

*Yuwn Bu Ngad Karrimarrkbaworren Kore Karriwoybukwon Nawu God
Hebrews 10:32-39*

³² Kab ngurriburrbun bu kerrngehkenhni God nungan ngunmarnebolkwolkang ngudberre, dja mak kore kunrayek ngurrimangi wanjh kunukka munguyh ngudda ngurridjalmurrngarayekni.

³³ Kaluk yikahwi ngundibuni ngudberre kore bininj birrimirndewernni, dja mak ngundidjekmiwoni kore kurobbe. Dja bu kunbarnangarrabuyika, ngudda ngurrikurmerrinj bu ngurridjarrkdi birribuyika bininj nawu kunrayek benmarnebebmeng yiman karohrok bu ngudda ngurrikarmi.

³⁴ Dja mak ngudda ngurrbendjalkongibuni nawu bininj birrihni kore kunurrk prison, dja mak ngudda ngurridjalnjilngmakni nawu yikahwi bininj birridjaldjirdmangi njalenjale nawu kondah kurorrebeh ngudberre, kaluk ngudda ngurridjalburrbuni kore kunmakkenh ngudberre nawu ngurrikarme bu kadjalle munguyh.

³⁵ Wanjh yuwn bu bolkkime ngurribawon kore ngundibengyolyolmi kerrngehkenhni, manbu ngurriwernhwoybukwon. Wanjh ngurridjalle kaluk ngurrimang nawu God kahkarme ngudberre.

³⁶ Yuwn bu ngurrimarrkbaworren kore ngurrikurduyime kore God kadjare ngudberre, dja mak ngurrimang kore nguningkihberrebbom.

³⁷ Kuhni bu kundjaldedjdjumbungkenh kamre, kore kabimbuyindi bu kayime, "Wanjh nakudji nawu kamyawoyhdurndeng kaluk yerrekah wanjh kunmekbeh kadjalyimerran bu werkkwerrkni.

³⁸ Kaluk bininj nawu ngaye ngamakwan, nakka wanjh kadjalminbi munguyh munguyh. Dja mak bu kamirrkborledkerren bu kakelemen, wanjh ngaye minj namekbe ngamarnenjinlgmak nuye." [Habakkuk 2:3-4]

³⁹ Dja ngaleng ngad minj karrirohrok yiman birribuyika bininj nawu bedda birrimirrkborledmeng dja mak birribularrbuyindanj. Dja ngad bininj nawu karrikangewoybuk nuye God wanjh kunukka kanngheke.

11

Karbenngunjdiakan Bininj Nawu Birridjalwoybukwoni God Bu Kunkareni

Hebrews 11:1-39

¹ Yiddok karriwernhwoybukwon God? Minj karrikuknan, dja kunubewu minj nungka bangmekurduyimeninj kunwern kore nungka kanmarnewokkurmerrinj, dja bonj, karridjalmadbun, karridjalburrbun nungka munguyh.

² Kunkare, wanjh yikahwi bininj birriburrbuni nawu God, dja mak birridjalmadbuni, wanjh kunu nungka benmarneyimi bu benmakwam bedberre.

³ Wanjh ngad kuhni karridjalwoybukwon dja mak karriburrkurrkna bu kuninjkuu kunred dja kunngol bolkmarnbuyindanj kore nungan God nuye kunwokbeh. Nungka marnbom yehyeng nawu karrinan kore manbu bolkyakni, manbu kerrngehkenh ngokko minj nangale nayi.

⁴ Ngurriburrbu nawu Abel. Nungka bidjalwoybukwong God, wanjh burrbuni bu mayh nawu namakkaykenh kinjeji dja biwoni God. Dja nawu benedanginj nuye, nawu ngeyyoy Cain, nakka minj kunmekbe kurduyimeninj. Wanjh nawu God bidjalmarnejinlgmakni Abel kore biwoni nawu kinjeji mayh dja warridj bimarneyimeng nungka nawu bininj namakni. Kaluk bu Abel kohbanjminj dja doweng, wanjh kore nungka biwoybukwoni wanjh bolkkime yiman ngad bininj karrikurdunang nuye dja mak yiman kanbengdayhke. [Genesis 4:3-10]

⁵ Dja nawu Enoch bidjalwoybukwong God, djal wam kore kaddum heaven nawu nungka darrkidni, dja mak minj nangale biyawoyhngalke-meninj. Nawu God bikang. Kaluk bu yerreh wam, dja kore djurra kahyime nungka namakni dja binjilngmarnbuni nawu God. [Genesis 5:21-24]

⁶ Bininj nawu minj kabiwoybukwon God, wanjh kunukka minj God kanjinlgmak nuye. Dja bu nangale kadjare kamre kore God wanjh nungan kayime, "Yoh, God wanjh woymbukkih kahdi!" Dja kabimarneyime God, "Ngaye ngaburrbun ngudda yidjare bininj nawu ngunwernhyawan, ba bu ngudda yiwon namakmak ke."

⁷ Dja mak ngurriburrbu nawu Noah bu nungka bidjalwoybukwoni nawu God. Nungka bidjalbekkani kore bibengdayhkeyi dja minj binayi kore God nungan djalkurduyimeninj. Nungka biwokmarrkmey God wanjh marnbom mankimukkenh manbu kabbala bu benngheheng nawu nuye namud. Noah bidjalwoybukwoni God, dja mak benbukang bininj rowk nawu birridjarrkni kondah kurorre, nawu bedda wanjh bedmandeleng birriwarreworinj. Nawu Noah nadjalkudjini biwoybukwong God, wanjh kumekbekenh nawu God bimakwam bu namakni bininj. [Genesis 6:13-22]

⁸ Dja mak ngurriburrbu nawu Abraham warridj nawu bidjalwoybukwoni. Nungka wanjh biwokmarrkmangi nawu God bu bikayhmeng,

dja wam kore kubolkbuyika kore nungan God biyingkihbolkberrebbom. Abraham wanjh bolkbawong kore nuyeni kunred, kaluk nungka minj burrbuyi kore baleh rengheyey. [Genesis 12:1-5]

⁹ Bu nungka bidjalwoybukwoni God, wanjh wabmeng yonginj munguyh kore kumekbe kunred manbu God biyingkihbolkberrebbom. Kaluk nungka yoy kumekbe yiman kayime nakka nakang bolkbuyikabeh. Dja nungka yongohoyoy kore kunrurrk manbu dabburlin dja mak birridjarrkyoy Isaac dja Jacob bu bedda dorreng birridjarrkmangi kore God benberrebbuni bedberre rowk. [Genesis 35:27]

¹⁰ Abraham wanjh djalwernhburrbuni manbu kunred kunrurrkwern manbu nungan God kore bolkmarnbom dja mak rurrknemeng, manbu manmekbe wanjh kahrurrkdi munguyh munguyh. Dja Abraham bidjal-madbuni nawu God.

¹¹ Kaluk Abraham nungka wanjh nakohbanjni dja mak minj karmeninj wurdyaw, mak ngalbu ngalbininj kobeng Sarah minj ngaleng mak karmeninj wurdyaw, dja bedda beneyawyakni. Bonj, nawu Abraham djalwoybukwoni God bu biberrebbom wurdyawkenh, wanjh kunmekbekenh kunu wanjh God bimarnbom bu nungka biyawbornang wurdyaw. [Genesis 18:11-14; 21:2]

¹² Nawu Abraham nakka djal nakudji bininj, nawu kohbanjminj bu darnkih yakmeninj, wanjh marnbuyindanj nuye nawu benkebmawahmeng wanjh nakka mirndemarnbuyindanj yiman mankokkarrng nawu kahdi kore kungol dja mak kunkayalanj manbu kore adjbud kahyo manbu minj nangale karohrokme. [Genesis 15:5; 22:17; 32:12]

¹³ Ngabenyolyolmi bininj nawu birriyungkihni nawu birriwoybukwoni God. Bedda wanjh birridowerrinj rowk, wanjh birridjalwoybukwoni. Kaluk minj birrimayi nawu God nungan benberrebbuni bu bedda birridar-kidni. Dja ngaleng birridjalnani bu kumhrey bedberre djarrehbeh kore yingkihyoy wanjh kunu bedda birrinjilngmakmeni. Kaluk bedda kuhni birriyimulewarreni bu yiman birridjalwohni waken kore kondah kurorre. Dja yiman kayime bininj nawu bininj nawu birrikang kubolkbuyikabeh.

¹⁴ Bu kuhni bininj kabirriyime, wanjh kunukka yiman bedmandeleng kabirribolkyawan kunred bu munguyh kabirriyo.

¹⁵ Minj birridjareniwirrinj bu birridurndeyi kore kunred bedberre. Bu birridjareniwirrinj, wanjh kunukka birriyawoyhdurndeyi.

¹⁶ Dja ngaleng birridjal-madbuni manbu kunred manmakkaykenh dun-inj. Kaluk manbu kore kaddum kunred kahdi. Kunmekbekenh kunu God minj mak kayeme bu bedda kabirrimarneyime nungka nawu bedberre God duninj. Kaluk nungka yingkihrurrknemeng bedberre kore kubolkmak kaddum heaven.

¹⁷ Kaluk ngad karriyawoyhyolyolme Abraham nawu nungka bidjalwoybukwoni God. Bu God birohrokmeng nawu nungka nawu Abraham yimankek bikanjkurmeninj nawu Isaac, bu bidurndiwemeninj kore God. Abraham mangi rowk kore God nungan bimarnewokkurrmerrinj bu biberrebbom, wanjh Isaac danginj nuye. Dja bonj, Abraham biwokmarrmey God dja bikuyinjbuyinj Isaac, nawu nadjalkudji beywurd nuye.

¹⁸ Bu kuhni kurduyimerrangeni Abraham burrbuni kore God ngokko bidjalmarnewokdi nungka, "Ngudda nawu yibornan nawu Isaac, wanjh nungka kabenkebmawahme birridjalwern nawu bininj rowk ke." [Genesis 21:12]

¹⁹ Kaluk Abraham yingkihburrbuni bu God kabendolkkayhwe nawu kabirridowen bininj, mak yiman kayime Isaac dorreng bu God kabidurndiwe kore kundowikenh. [Genesis 22:1-18]

²⁰ Kaluk yerrekah, wanjh Isaac benbenemarnedi yiwarrudj kore beybeward nuye benebokenh nawu Jacob dja Esau, bu bidjawani ba bu God kabenbenemarnekurduyime bu kunmakkenh. Kuhni yimeng nawu Isaac kore nungka bidjalwoybukwoni God. [Genesis 27:27-29, 39-40]

²¹ Nahni Jacob nawu nungka warridj bidjalwernhkwangewoybukwoni nawu God. Wanjh bu nungka darnkih baldoweni, wanjh nungka bidjawam God bu kabenbenemarnekurduyime kunmak berrewoneng nawu benbenekebmawahmeng nawu bokenh beybeward nuye Joseph. Kaluk nungka danginj yiwarrudj kore kunberl karrmi nuye kore kunkarndudj dorreng. [Genesis 47:31; 48:1-20]

²² Joseph warridj, bidjalkangewoybukwoni God. Wanjh kunu nungka mak balngolekwarremeni, wanjh nungka yingkihburrbom dja mak benmarneyolyolmi bininj nawu Israel benkebmawahmeng bu kalukburrkabirribolkawon kore Egypt, dja mak benwokrayekwong bu baleh kabirrimurrngyimowon manbu kunmurrng nuye. [Genesis 50:24-25]

²³ Ngurriburrbun warridj nawu Moses. Nuye nawu ngalbadjan dja nakornkumo wanjh bedda benewoybukwoni God warridj, dja mak bu beneyawwarlkang Moses bu dird danjbikni. Bu bedda beneyimi bu nungka wanjh nayawmakkaykenhni. Dja bedda minj benekemeninj kore Pharaoh nawu king nuye kunwok bu wokkurmerrinj. [Exodus 2:2]

²⁴ Moses bu nungka djordminj wanjh nungka wirrihmerrinj bu nungka minj nayaw ngalenggarreniwirrinj ngalbu ngalbeward nawu Pharaoh nuye. Dja nungka Moses bidjalwoybukwoni God.

²⁵ Kuhni nungan djareminj bu birriraworrinj nawu God nuye bininj bu kore Egyptbeh bininj bindibuni. Kaluk Moses minj djareniwirrinj bu nungan njlmgarnburrimeninj kundjalwohdedjdjumbungkenh, wanjh nungka kurrmerrinj birriraworrinj birrimekbe nawu bedda birriwoybukwoni God.

²⁶ Moses burrbuni nawu namakmak namekbe birrikarrmi kore Egyptbeh, minj nakka nawernmakniwirrinj, dja nungka kunu djaldjareni bu djakbekkani kore Christkenh, dja mak burrbuni bu yerrekah bu kamang nawu nawernmakkaykenh duninj nawu kabiyingkihmedjedjenyo kore God.

²⁷ Moses wanjh bidjalwoybukwoni God, wanjh kunmekbekenh bu bolkbawong kore kunbolk Egypt, dja mak minj bimarnekeleniwirrinj nawu king bu yidduhyiddungi. Nungka Moses minj bimarnemarrkba-worrimeninj, bu kunmekbekenh nungka yiman binang God nawu minj nangale kabadarrkidnan.

²⁸ Bu God biyingkihbgendayhkeng Moses bu mulikenh manbu bendarrkidbawongkenh kunkare, wanjh nungka bidjalwoybukwong God, dja mak bidjalwokmarrkmangi. Wanjh nungka marnbom mulil dja mak delkkeng kunkurlba dorreng kore kunrurrdangmaye rowk, wanjh bu angel nawu kundowikenh kumwam bu benbuni nawu birriwernhwarreni bininj, wanjh bendarrkidbawong nawu bininj nuye Israel benkebmawahmeng rowk. [Exodus 12:21-30]

²⁹ Kaluk yerrekah, bininj nawu Israel benkebmawahmeng bedda manbu birridjowkkeng kurrula manbu manbokurlbani kore wernhbolkbukni rowk. Kuhni benmarnekurduyimerranj rowk kore bedda birridjalwoybukwoni God. Dja bininj nawu Egyptbeh birrirohrokmeng bu yimankek birridjowkkemeninj dja wanjh bedda birridjalkebngakmeng rowk. [Exodus 14:21-31]

³⁰ Dja warridj, kaluk yerrekah, bininj nawu Israel benkebmawahmeng bedda birribolkmey kore kunredkimuk kabolkngewyo Jericho. Bedda

birriwoybukwong God, dja birrimirndewohrehworey kore birriborled-
minguni kumekbe kunred kore kubolkkimuk, wanjh yerre kunu kunkod-
jke balyimerranj bu kunbidkukudji dja bokenh kunbarnangarra, wanjh
kunwardderayek kore warnawarnamyoy, wanjh djalwarrhmerrinj rowk,
dja bedda birridjalngimerrinj rowk kunmekbe. [Joshua 6:12-21]

³¹ Kaluk ngalkudji daluk ni kore kumekbe kunred Jericho, ngalbu
ngeyyoy Rahab. Ngalbu ngalwarreni dja munguyh kukweykarreni kore
bininj bedberre. Dja ngaleng bidjalwoybukwong God dja ngaleng
benenewarlkang bininj bokenh nawu Israelbeh nawu benemolngimeng
kore Jericho. Wanjh kunmekbekenh nawu Israel bedberre djuram bu
birringimeng, wanjh minj birribuyinj ngalmekbe daluk Rahab. Kaluk
bedda bindibuni birridjalwern bininj nawu minj birriwokmarrkmayi God.
[Joshua 6:22-25]

³² Yiddok ngaye birribuyika mak ngabenyolyolme? Ngaye minj
munguyh bengdayhke ngudberre, dja wardi mak ngabenyolyolmeninj
nawu birriwern bininj yiman kayime nawu Gideon, dja mak nawu Barak,
dja mak Samson, dja mak Jephthah, dja mak David, dja mak Samuel dja
mak nawu birriwern prophets.

³³ Bedda wanjh birridjalwoybukwoni God, dja mak kunukka kore
kubolkbubuyikabeh kunred bindibuni bindikukyakwoni rowk, wanjh bir-
rimangi kore God nungan benberrebbuni. Yikahwi mak birridangbalhmi
kundang nawu nabang mayh nakimuk lions. [Daniel 6:1-27]

³⁴ Yikahwi bininj manbu rungi manbirlukimuk kunak bedda birribirlu-
dombom. Dja mak bedmandeleng birringehkerrinj wardi bindibuyi nawu
bininj birribang mandjawak dorrengh. Yikahwi mak birringudjyawarrinj,
wanjh yerre kunu birriyawoyhgudjdanginj bu birrimurrngayekminj dja
bindibom nawu birribangni bininj kore kubolkbubuyikabeh, dja mak
bindikukyakwong.

³⁵ Nawu yikahwi mak daluhdaluk birridjalwoybukwoni God, nawu
bedberreni bininj bu birridoweng, wanjh bedda birriyawoyhdarrkidminj.

Dja nawu birribuyika minj birridjaremeninj bu birrikelerlobmeninj
dja bedmandeleng birridjareminj kore mankimuk kundjak birrikarri
kaluk bedman kabirridolkkkan kore kundowikenhbeh wanjh kunukka
kundjalmak kabirrimimbi kore kubolkmakkaykenh.

³⁶ Kaluk bininj nawu birribang wanjh bindikukdjekmiwoni dja mak
bindiwiidjbihkeyi nawu birriwoybukwoni God, mak yikahwi bindidukkani
nawu wirlmurrng chains dja mak bindikurrmi kore kunrurrk prison.

³⁷ Dja mak yika bindikodjdongi kunwardde wanjh birridoweni, yika
mak bindikukdjobkeyi, dja yika nawu bindidjalbuni mandjawak dorrengh
bu birridowerrinj. Kaluk yika nawu bindidjongbuni kunkulah mayh
sheep dja nenikud, bu bedda birriyimerrangeni birrimarlajni. Bininj
rowk wanjh bindidjalbuni, bu kuhni bedda bindidjalmarnekurduyimi
kore kundjalwernhwarre duninj.

³⁸ Kaluk mahni kunred bu kondah kurorre, minj kunmakniwirrinj kore
bedberre nawu birridjalmakni bininj. Dja bedda birridjalwohrey kore
kubolkdarleh dja mak kore kuwarddehwardde, dja mak birridjaloyoy kore
kuwardderurrk dja mak kore kubolkdjorlokdjorlok.

³⁹ Naninjnanu binihbininj birridjalwoybukwoni God, wanjh kuhni ngad
karrbenburlumekenh nawu bedda bedberre, dja ngaleng bedda minj njale
mak birrimayi kore God benberrebbuni.

⁴⁰ Dja med. God yingkikarremarnbom nawu kaluk kanwon kadberre
nawu namakkaykenh duninj, bu kaluk karridjarrkmang ngad dorrengh
dja mak birrimekbe bininj warridj. Kuhni bu yerrekah kabolkyimerran

kore God nungan kayakwon kore kandjarrkmarnbun bu karriyimerran rowk bu karridjalmak kore God kadjare.

12

God Nungan Kandung Dja Mak Ngad Kanmurrngrayekwon Nawu Wurdwurd Nuyeye

Hebrews 12:1-13

¹ Karrbenburrbun birridjalwern bininj nawu birriwoybukwoni God, dja minj bedda birrimarrkbaworrineninj. Kaluk ngad karrbenkadjung rerrih. Mah wanjh, karridjalbawo kunwarrewarre manbu ngad kanhkebrokwarrewon dja mak kanhdurndiwe kadberre. Wanjh karrimarnellobme kore nungka God kanmarneyimeng, ba bu minj karriyawoyhngudjywarren.

² Wanjh ngad karridjalna Jesus munguyh, nawu nungka kanmarnbom bu karridjalwoybukwon bulkkidj duninj dja mak kanbidyikarme munguyh kore nungka karriwoybukwon nuyeye. Nungka wanjh kurrmerinj bu doweng kore kundulk cross. Minj nungka karmneninj bu kunyeme. Kaluk korroko burrbuni bu nungka wanjh kawernhnjilngmakmen duninj bu bolkkime kahni kore kukun nuyeye God.

³ Wanjh ngad karriburrbu nawu Jesus. Nawu birriwarre bininj bedda birridjalwirrihmi dja mak bedda yimankek birringurdkeyi. Dja ngad wanjh karringunjdjika nungka, ba bu ngad minj karringudjywarren dja mak minj karrimarrkbaworren.

⁴ Ngudda wanjh ngurrikarmi manbu kunrayek duninj bu darnkih ngunbun ngudberre manbu kunwarre. Dja ngaleng minj ngudda ngurrikurlbawarrhmeninj bu ngurridowimeninjkenh, dja yuwn bu ngurrimarrkbaworren.

⁵ Dja ngudda kunu ngurridjalbawong bu ngunbengyolyolmeng kunwok nuyeye God bu ngudda yiman wurdwurd rowk nuyeye, kore nungka kayime, "Ngudda nawu ngardduk wurdyaw duninj, yuwn bu yiwokborrkwan kore nawu Kawohrn Rowk bu ngundung kore kunwarrekenh yiyime, dja mak yuwn bu yiwerhnjilngwarremen bu nungka kore ngundung.

⁶ Nawu Kawohrn Rowk kabenbengdayhke bininj nawu kabenmarnedjare, dja mak bininj nawu nungan kabenbun kore kabenmarneyime bu nungan nawu nuyeye wurdwurd." [Proverbs 3:11-12]

⁷ Dja wanjh ngurridjalkarmen bu ngudda ngurridjakkakkan kore God nungan ngunbukkabukkan, wanjh kunukka yiman kayime God nawu nungka Kornkumo ke wanjh ngunbukkan ngudda nawu ngunmarneyime wurdwurd nuyeye. Bininj nawu kabimarnedjare wurdyaw nuyeye, wanjh kabiwidjibihke bu kunwarre kakurduyime.

⁸ Kuhni wanjh kabenmarnekurduyimerran nawu bininj rowk. Bu bininj nuyeye kornkumo minj kabirrunge kore kunwarre kayime, wanjh kunubewu nakka minj woymbukkih nuyeye wurdyaw!

⁹ Karriburrbun ngad wanjh karrbenkarme nawu kornhkornkumo kadberre kurorrewaken, nawu bedda kandidate kadberre, wanjh kumekbekenh bu karribalwokmarrkmey. Wanjh kumekbeh karohrok bu karriwokmarrkmang God, nawu Kornkumo kadberre nawu nungka kanmalngdarrkidwon kadberre, ba bu ngad karridjaldarrkiddi.

¹⁰ Nawu kornhkornkumo kadberre nawu birrikang kurorrewaken, bu ngad kandidate dja kandibukkabukkan kundedjumbunkenh bu kore bedman birriburrbuni kunmak. Dja nawu God nungka kandjaldung dja kanbukkabukkan ba bu karriborlhme kore kunmakkenh kadberre, wanjh

kunukka ngad karriyimerran bininj nuye karrikukdjamunmen yiman kayime nungka.

¹¹ Kaluk kuhni minj karrinjinlgmak bu God nungan kandung dja mak bu kanbukkabukkan, yiman bu karrikanjbabangmingalme, kaluk bu yerrekah ngad karrimakmen. Wanjh kunukka ngad karriwernborlhme, dja mak karrikarrme kunmodmikenh nuye, bu kore karrikurduyime mandjad duninjh.

¹² Mah wanjh. Ngudda nawu ngurringudjwarreminj wanjh ngurriya-woyhmurrngrayekworrimen.

¹³ Dja ngurrihdengeyirrebme manbu manbolh manmak ba kamak ngurrire kurrenge ngudda nawu ngurribirl wanjh minj ngurriyawoyhwarremen, dja ngaleng ngudda ngurrimakmen bu ngurrire. [Proverbs 4:26]

Karrikelenin Nuye God Dja Yuwn Bu Ngad Karriwokwe
Hebrews 12:14-29

¹⁴ Kab ngurridin bu nuye kunmodmikenh dorreng kore birribuyika bininj bedberre rowk. Dja mak kundjalmak ngurridjalkurduyimen munguyh. Bininj nawu minj kunmak kakurduyime, wanjh nakka minj kabinan nawu Kawohrnran Rowk.

¹⁵ Ngurrinahnarrimerren ba bu minj nangale bininj kawarnyakmen kore kunmakmak God nuye bu djalburudjang kanwon. Dja mak yuwn ngurribawon nangale bininj bu kabangmen dja wanjh kamarnbun kunyid, ba bu birribuyika bininj nawu kabirrikurduyime kore kunwarre.

¹⁶ Dja mak yuwn ngurribawon nangale bu kadjare kabiidjirdmang daluk. Yuwn bu nangale bininj kadjalbengmidjan nawu God, yiman bu Esau kurduyimeng. Nungka nawu nawernhwarreni, dja nawu Isaac biberrebbuyi kore kunmakmakkenh nuyeni, dja bonj, nungka wanjh djalweykang rowk ba bu nuye manme nguni.*

¹⁷ Ngurriburru bu yerrekah baleh Esau bimarnekurduyimerranj. Bu nungka wanjh yerre balburrbom manbu kunmakmakkenh kore nawu Jacob biwoyi, bu yimankek djareni durndiwemeninj. Wanjh minj baleh kurduyimeninj bu bimayaliborledkeyi nawu kornkumo nuye, bu nungka bidjawadjawam kunminnalk dorreng.

¹⁸⁻²¹ Mah, wanjh karridi yiwarrudj kore God nuye dja karriyimanjbun nungka nuye. Ngurriburru bu kunkareni, nawu mawahmawah kadberre birriwam kore mandulumkimuk manbu kabolkngeyyo Sinai, ba bu bedda birrimarnediwirrinj yiwarrudj kore God. Mahni mandulum makka kunak rungi kunkimukkenh, dja mak kunkak duninjh bolkbarrkbom kumekbe, dja mak ngolwernmerrinj kore kaddum, dja mak kunmayorrk dja mandjewk wernmerrinj dorreng.†

Dja bininj nawu kumekbe birrihni wanjh bedda birriwokbekkani nawu trumpet bu wernhwokdi. Mak birribekkani kunwok dorreng bu wokdi wanjh birridjareni bu ngurdmeni bu benbengdayhkeyi, wanjh bedda birriwernhdjawam bu nungka ngurdkemeninj.

Kumekbeh bedda birrimarneyimi dja minj birridjareniwirrinj bu birriwokmarrknayi kore God yimeng, "Bu mayh kadjalle karrulummeleme kore mahni mandulum, wanjh nakka ngurrikodjdong nawu mayh kunwardde dorreng." [Exodus 19:12-13]

Kaluk bu kunmekbeh birrinahnani kurduyimerrangeni wanjh bedda birriwernhkeleni duninjh, dja wanjh Moses nungan yimeng, "Ngaye wanjh ngahdeldelme bu kuhni kunquele dorreng." [Deuteronomy 9:19]

* 12:16 Genesis 27 † 12:18-21 Exodus 20:18-21

Dja ngudda bolkkime minj ngurrimrawinj kore maninjmanu mandulum manbu kurorre. Burrkyak. Ngudda wanjh ngurrimdjalam kore God.

²² Ngudda ngaleng, ngurrimwam bolkkime kore mandulumbuyika, manbu kuwarddekimuk kabolkngeyyo Zion. Ngurrimwam kore manredkimuk Jerusalem manbu kahdi kore heaven, dja wanjh God nuye, nawu nungka kahdarrkiddi munguyh munguyh. Kaluk ngurrimwam kore birridjalwernhmirdewernkenh duninjh nawu bedda angels kabirridjalningmak munguyh.

²³ Yoh, ngudda ngurrimwam kore bininj birrimrindemornnamerrinj rowk nuye nawu yiman bedda rowk nadjjaman nuye God. Bedda nawu birringeybimbuyindanj kore heaven.

Dja mak ngurrimwam kore nungka God, nawu kandjadme ngad nawu karriwarlahkenh bininj rowk. Kaluk ngudda ngurrimwam kore bininj birrimak nawu kabirrimalngdarrkiddi, nawu God benmarnbom nawu bedda birrimalngmakkaykenh duninjh.

²⁴ Dja wanjh ngudda ngurrimwam kore Jesus nawu nungka nadjalkudji kamarnbun God nuye mankarrekerrnge bu kanmarnekurduyimerran kadberre. Kaluk ngurrimwam kore kunkurlba nuye delhdelkkeng manbu yiman nungan kawokdi manmakkaykenh kunwok nuye, manbu yiman minj Abel kunkurlba nuye.

²⁵ Wanjh kunu, yuwn bu ngurriwokwe God nungan kawokdi. Ngurriburrbun nawu birriyungkih bininj bu birriwokweyi God nuye kunwok kore Moses benwong kore Godbeh, dja birrimekbe bininj bedda wanjh birriwarreworinj dja mak birridowerrinj rowk. Kuhni bu kondah kurorre benmarneyimerranj! Bolkkime God kanbengdayhke kore heavenbeh, dja bu ngad karribawon kunwok nuye, wanjh kunukka kadjalwarre duninjh, dja mak minj ngad karrimarnewarlkkarren nuye.

²⁶ Bu kunkare God wokdanj nuye kunwok wanjh bolkrokayhwong kunrorre, wanjh bolkkime bu nungan yawoyhwokkurmerrinj, yimeng, "Ngaye kaluk ngayawoyhyime dja ngabolkrokayhwe kore kondah kurorre rowk, dja mak kore heaven warridj ngarokayhwon." [Haggai 2:6]

²⁷ Manbu kunwok kore God yimeng, "ngayawoyhyime", wanjh kamentenyime nawu njalehnjale nawu nungka marnbom rowk, wanjh kayakwon, dja kadjalbawon njale nakka nanu kadjaldi munguyh, nawu minj kayawoyhrokan.

²⁸ Dja ngad karridjalmanjbu God dja ngad kanwon kunred kore minj kabolkrokan, kore nungka nuye kawohrhan rowk. Ngad wanjh karrimarnebodda dja karridjalmarnedin yiwarrudj kore nungka kadjare kadberre karrikurduyime. Dja mak karridjalmarrkma dja mak karrimarnekelenin kore God nuye.

²⁹ Kaluk karrirbun kore Bible kayime, "Nawu nungka kadberre God, yiman kayime nungka kunak bu wanjh kawurlhke dja mak nungan kayakwon nawu njalehnjale yehyeng rowk!" [Deuteronomy 4:24]

13

Balah Mak Kunwern Kunmak Bu Karrikurduyime

Hebrews 13:1-17

¹ Wanjh karridjalmarnedjaremerrimen munguyh, nawu ngad karridan-gerrinj rowk.

² Karridjalburrbu bu karrbenkimang nawu birriredbuyika bininj bu kabirrimbebme kore kunred kadberre. Bu kuhni karrikurduyime, wanjh kunukka kunmak duninjh. Yiman yikahwi kunkareni nawu bininj bu

bindikimangi birribuyika bininj, dja minj bindikukburrbuyi bu bedda wanjh angels duninj. [Genesis 18:1-8]

³ Dja mak karrbenburrbu bininj nawu kabirrirurkkehndi kore prison. Wanjh nakka yiman nawu kunrayek kabirrikarme, wanjh karrbenkongibu yiman kayime bu ngad mak karridjarrkbongdiwirrinj. Dja mak karrbenburrbun bininj nawu birribuyika kabindibunkenh, wanjh karbenkongibu yiman kayime bu ngad warridj karridjarrkkarmeninj kore kunrayek.

⁴ Bininj dja daluk nawu kabenemarren, wanjh minj birribuyika bininj dja daluk bu kabindidjirdmang bu bedda kabeneyokenh. Ngurrinahnarri-men ba bu minj kunmekbe kunwarre ngurrikurduyime. Kaluk God wanjh kabendjaldjadme nawu kabirridjirdmarren nawu kunwarre kabirriyime kore bininj dja dalukkenh.

⁵ Yuwn bu mak ngurrikangeborledme bu ngurriwerhdjaremen nawu nawern money. Dja wanjh ngurrinjilngmaknin dja nawu ngokkokenh ngurrikarme, nawu namakmak. Dja kuhni wanjh God yimeng kadberre, "Ngaye minj bawon ngudberre, dja mak minj bengmidjdan ngudberre." [Deuteronomy 31:6]

⁶ Dja wanjh ngad karryimen, "Ngaye minj ngakele, dja nawu Kawohnan Rowk wanjh nungka nganbidyikarme munguyh, kaluk nawu bininj minj baleh bedda kunwarre ngandimarnekurduyime." [Psalm 118:6-7]

⁷ Yuwn bu ngurrbenbengmidjdan nawu yiman ngundimarnewohnan ngudberre. Bedda wanjh ngundibukkani ngudberre manbu God nuye kunwok. Wanjh ngurrbenburrbu bu bedda kabirrikurduyime kunmakkenh. Wanjh ngudmanwali ngurrbenngunjdjika bu yiman bedda birriwoybukwoni God.

⁸ Nawu Jesus Christ minj nakka kabuyikahmen, dja nungka kadjal-rohrokwi bu bolkkime, dja mak munguyh munguyh.

⁹ Yuwn manbu manbubuyika kunwok ngundibukkan wardi ngunkan kubuyika dja ngurridjalkangedjadnin kore ngokko nungan God ngunkongibom. Wanjh yuwn ngudda ngurridjalmarrkmang manbu mankarre kore manmekenh dja bu manbu mayhkenh. Mahni manbu mankarre makka minj kabenbidyikarme bininj nawu kabirriwokmarrkmang.

¹⁰ Ngad wanjh bolkkime minj mak karrikarme manbu mankarrekare. Jesus kanjukurrmerrinj kore kundulk cross, dja nungka marnburrinj bu yiman kayime altar duninj. Dja nawu bolkkime kabirridurkmirri kore Jews bedberre Temple, wanjh minj kabirringun manbu mayhkenh manme kore mahni kadberre altarbeh.

¹¹ Kaluk nawu nakimuk priest wokmarrkmey rowk manbu mankarrekareni, dja mak kang manbu kunkurlba mayhbeh bu kore kunwarrekenh dja bimarnekurmeng God ba bu nungka kabenmarnebengmidjdan kunwarre rowk. Dja nawu namekbe mayhbeh kunburrk, wanjh nakka birrikang dja birrikinjeng kore kurobbe, kuberrkkah kore bedda bininj birriyoy. [Leviticus 16:27]

¹² Mak nungka Jesus doweng kore kubolkkimuk kaluk kuberrkkah ba bu nungan nuye kunkurlba wanjh makka kabenmarnbun nawu bininj bu kabirrikukdjamunmen.

¹³ Mah, wanjh karriray kore Jesus, ba bu ngadmanwali karrire kore kuberrkkah yiman nungka kurduyimeng bu wam kore kuberrk doweng bu kunyemi dorrengh. Kaluk karringunjdjikan bu kunyemi dorrengh.

¹⁴ Kaluk kondah bolkkime karrihni kore kurorre minj karrikarme manbu manbolkkimuk manbu kahdjalbolkdi munguyh munguyh, dja mak

karriboyenmadbun manbu manbolkkimuk wanjh kaluk yerrekah kamre kadberre.

¹⁵ Wanjh kore Jesus karrimarnekurmmerrimen ngad bininj nuye God. Wanjh kamenmenyime bu ngad munguyh karridjalburlumen kore kungey bu karringeybun mak karringeyburlume.

¹⁶ Dja mak yuwn bu ngurribengmidjdan bu kunmak ngurrikurduyime, dja ngurridjarrkyikadjurrimen yehyeng kore birribuyika bininj. Wanjh kuhni rowk yiman karrimarnekurmerren kore God ba bu karrinjilngmarnbun.

¹⁷ Dja mak ngurrbenwokmarrkma bininj nawu kabirriwohrnahwohrnan ngudberre, bu kore baleh yarrkka ngundimarneyime, kaluk bedda munguyh ngundidjalnahan bu God kabenkurdunan dja mak bu kabendjadme, dja yuwn bu ngurrbennjilngwarrewon, dja ngurrbendjalnjilngmarnbu munguyh ba bu bedda ngundibidyikarme ba bu God ngunmakwan.

*Karridjarrkin Yiwarrudj Ba Bu Ngad Karribobohmerren Rowk
Hebrews 13:18-25*

¹⁸ Wanjh munguyh kandidjalmarnedin yiwarrudj ngadberre. Dja ngad ngarrikurduyimi bu kore kunmakkenh ngarre, dja mak ngarridjare ngarrikurduyime rowk kore mandjad duninh.

¹⁹ Ngaye wanjh djawahdjawan ngudberre ngudda bu kandidjalmarnedi yiwarrudj wanjh kunukka God werkkwerkk ngandurndiwe ngudberre.

²⁰⁻²¹ Jesus nawu Kawohran Rowk kadberre, nungka wanjh shepherd kadberre nawu nadjalwernhkimuk duninh, dja mak kannahan ngad bininj rowk yiman kayime nuye mayh sheep. Bu nungka kurlbawarrhmeng, wanjh kunu God nawu kanwong kunmodmikenh nuye, nawu birrolkkayhweng kore dowengbeh. Jesus kurlbawarrhmeng, wanjh God birrolkkayhweng kore yingkihwokkurmerrinj manbu kunwok kahdjaldi munguyh munguyh. Ngaye wanjh ngarri yiwarrudj ngudberre, ngadjawan God bu ngunwon kunwern kunmakmak rowk ba bu ngurridjalkurduyime kore nungka kadjare, dja mak ngadjare karrurrkimirri kore ngad ba bu karrinjilngmarnbun. Ngadjawan nungka kore kungey nuye Jesus Christ ba bu karridjalburluburlumen bu munguyh munguyh. Woybukkih.

²² Ngudda nawu ngaye karridanginj, ngaye ngabimbuni nahni djurra ngudberre wurd kundjalwohdedjdjumbungkenh bu ngadjare wohbengyolyolme ngudberre, dja bu kuhni ngayime ngudberre wanjh ngadjare kandiwernhwokbekkan duninh kore baleh marneyime ngudberre.

²³ Ngudda wanjh bolkkime ngurridjalburrbu nawu ngad karridanginj nawu Timothy, wanjh nungka bebmeng kore prisonbeh. Bu kondah kabolkmang werkkwerkk, wanjh kunukka nganemdjarrkre bu ngudda ngundimikian ngudberre.

²⁴ Kuhni kunwok manmak bu ngudda ngurriwokmunkewerrinj bedberre nawu kabirriwohrnan ngudberre, dja mak birriwern nawu God nuye bininj rowk. Nawu bininj birrimdolkkanng kore kunbolk Italy ngundimarnewokmunkewerrinj ngudberre manbu bedda bedberre kunwok manmak.

²⁵ Dja wanjh ngaye ngarri yiwarrudj ba bu God ngundjalnahan ngudberre kore kunmakmak dorrengh dja mak kore nuye kunkongi dorrengh nuye!

James

Yuwn Bu Ngurrimarrkbaworren bu Ngurringudjywarren James 1:1-4

¹ Ngaye wanjh James nawu ngamarnedurrkmirri nuye God dja Jesus Christ nawu Kawohrnna Rowk. Bu ngaye ngabimbom nahni djurra ngudberre nawu twelve bininj ngurrimud nawu ngudda ngurribebbehkukyarlarmeng, dja bu ngurribebbehningihni kore kunred bedberre nawu birridjenbubuyika bininj rowk. Ngaye nganjilngmak bu mahni kunwok ngardduk ngabalmunkewe ngudberre.

² Nawu karridangerrinj, bu ngudda ngurrikarme kore kunbubuyika kunwern kunrayek, bu ngurrimang, wanjh kunukka ngudda ngurridjal-njilngmaknin duninj.

³ Ngurriburrbu maninjmanu kunyid makka wanjh ngunkangemurngrayekwon ngudberre ba bu minj ngurrimarrkbaworren kore ngurriwernhwoybukwon God. Kaluk bu ngudda kunmekbe ngurrikurduyime, wanjh kunukka minj ngurribawon kore ngurriwoybukwon.

⁴ Dja yuwn ngurrimarrkbaworren, wanjh kunukka ngudda ngurridjal-murrngrayekmen kore God nuye, bu ngurrikarme namakmak nawern kore nungkabeh, dja mak minj ngurriyawarren kore ngarre kunmakkenh.

Ngurridjawa God Ba Ngunwon Kunmayali Manmakkenh James 1:5-8

⁵ Kunubewu ngudda minj kunmayali kunmak ngurrikarme kore God-beh. Dja wanjh ngurridjawa nungka God ba ngunwon kore kunmak bu ngudda ngurriburrbun. Kaluk nungka nawu kanbidyikarme karriwarlahkenh bininj rowk bu djal burudjang! Dja minj mak kandjadme bu karridjawan kore nungka.

⁶ Dja ngaleng yuwn bu ngurrikewkme bu ngurridjawan. Dja ngurridjalwoybukwo nungka bulkkidj duninj. Bu ngudda minj ngurriwoybukwon, wanjh kunukka yiman ngurriyimerran kukku manbu kurrula kaboyime, bu kamayorrbun dja kadjirrkan kore baleh yiman yarrkka kare.

⁷ Dja bu ngudda minj ngurriwernwoybukwon nawu Kawohrnna Rowk wanjh kunukka minj ngunwon nawu nungka njalehnjale kore kahkarme.

⁸ Bininj nawu nungan kadjalmayaliborledkerren munguyh, nakka wanjh kunukka yiman kakarme bokenh manbu kunmayali nuye, wanjh kunu kadjalmarrkbaworren rowk.

Yuwn Bu Ngudda Ngurriburlumerren James 1:9-11

⁹ Nawu nangale bininj nawu ngad karridangerrinj kore Jesus, bu nungka djal yiman namarladij, wanjh nakka kadjalburrbun bu God kabimakwan dja mak nakuken kore nungka.

¹⁰ Dja nangale nawu karridangerrinj kore Jesus, bu yiman nakuken bininj, wanjh nakka yuwn bu nungan kaburluburlumerren. Kuhni burrkyak, dja nungka wanjh mulewarrimen bu God bimarnbom yiman nayahwurd rerrih. Kaluk yerrekah bininj nawu birrikuken wanjh nakka kabirridjalyakmen yiman kayime manbu mannguy bu kanguyhdowen kore kurralk.

¹¹ Bu kundung kambembe wanjh karrungbangmen. Kaluk kundalk kadarlehmen dja manbu mannguy mak makka wanjh kanguywarremen,

dja mak kanguywarrhwarmerren. Wanjh kunmekbe kadjalrohrok bininj bedberre nawu yiman kabirrikukenworren bu yimankek bedda kunwern kore kabirrikurduyime, bu yiman kabirridarrkid wanjh kunukka bedda kabirribaldjaldowen.

*Bu God Nungan Kanrohrokme Kadberre
James 1:12-18*

¹² Bu kunyid dja kunwarre ngunmarnewernmerren ngudberre, wanjh munguyh ngurridjalyime kore kunmak. Wanjh God nungan ngundjalmarnekurduyime kunmak nuye. Ngayime bu yerrekah kaluk God ngunwon nawu njale kakarme ke, mak ngundimarnbu bu ngurridarrkid kore nungka bu munguyh munguyh. Nungka wokkurmerrinj bu kunmekbe kakurduyime bedberre nawu kabirrimarnedjare.

¹³ Dja bu ngurrikarme njalehnjale gunnjilngwarrewon bu ngundjirrkan, wanjh yuwn nangale bininj kayime, "Kunubewu God nakka ngandjurrkan bu kunwarre ngayime!" Kunukka wanjh djal minj kunwoybuk. God minj kaburrbu bu kakurduyime kore kunwarrekenh. Dja mak nungka minj nangale kadjurrkan kore kunwarre kayime nawu bininj.

¹⁴ Kaluk njale nawu ngundjurrkan ngudda nawu bininj? Wanjh kunukka, djal yingan kore kunmayali ke. Ngudda kunu ngurridjaldjare ngurrikurduyime kunwarre. Wanjh kunmekbekenh kunu ngudmandeleng ngurridjurrkarren.

¹⁵ Ngudda nawu ngurriyingkihburrbun kore kunwarre werrk. Wanjh kunu ngurribalbakke manbu mankarre God nuye. Wanjh bu God nuye mankarre ngurribakke dja mak bu kunwarre kawernmerren, wanjh kunukka ngudmandeleng ngurribaldjaldowen.

¹⁶ Mah, kandibekka ngudda nawu karridangerrinj, nawu ngaye marnehmarnedjare munguyh. Yuwn nangale ngunkowe kore manbuyika mankarre ngarre, bu kuninjkukenh.

¹⁷ God nawu kahdi kaddum heaven wanjh nadjalkudji nawu kanwon namakmak nuye dja mak nawu kunwernhmak kore kakurduyime kadberre. Nungka God nawu Nakornkumo marnbom kundung, dird dja mak kinjkinj. Dja nungka minj kamayaliborledme. Dja minj kankurrme kore kubolkmunun.

¹⁸ Nungka wanjh kanmarnekurduyimeng kadberre kore nungka wernhdjareminj, wanjh kanmarnbom bu karriyawoyhmalngdanginj bu ngad karribekkang kore manwoybuk kunwok nuye, ba bu bolkkime ngad wanjh ngarriymerranj bu karriwernhyurrheng yehyeng rowk kore nungka marnbom.

*Ngurrinaharrimen Kore Ngurriwokdi
James 1:19-27*

¹⁹ Kandibekka, nawu ngaye marnedjare munguyh ngudda nawu karridangerrinj. Wardi kab ngurribekkarrimen, dja minj ngurridjare munguyh ngurriwokdi bu ngurriyolyolmerren. Yuwn bu mak ngurridjare kore ngurriyiddungkenh, dja djal yeledjin.

²⁰ Bu ngudda nawu djal bininj ngurriyiddung, wanjh kunukka kakarrewarremen bu yimankek ngudda ngurrimarnekurduyime kore God kadjare.

²¹ Mah wanjh, ngurrimarnburrimen bu ngurrikangebelemen dja mak ngurriburriwemen kunmayali manwarre manbu manwern duninj

kahyo. Yuwn bu mak ngurriburlumerren, dja ngaleng ngurridjalkurrmerren kore ngurridjalmang God nuye kunwok manbu nungka kurrmeng kore kukange ngudberre bu ngungehke.

²² Dja bu ngudda ngurribekkan mahni kunwok, wanjh kunukka ngurribalwokmarrkmang. Yuwn bu ngurridjalbekkan bu djalburudjang, yiman ngurridjalkurren, burrkyak.

²³ Bu nangale bininj kawokbekkan manbu kunwok manwoybuk, dja minj kabalkurduyime kore wokbekkabekkan, wanjh kunukka yiman kayime kakebwaralnarren kore baddumang,

²⁴ wanjh rerre kare nungan kaluk kakebwaralngmidjdarren bu baleh nungka kakebyime!

²⁵ Dja bu ngudda munguyh ngurridjalwernhnan manmekbe manbu manwernmak mankarre manu ngunbekkeng ba bu ngurridjalre, dja bu minj ngurribengmidjdan munguyh kore ngurribekkan kunwok, wanjh God munguyh ngunmarnekurduyime kunwernmak ngudberre kore ngudda ngurridjalwokmarrkmang.

²⁶ Dja nawu nangale bininj bu nungan kayolyolmerren, kayime, "Ngaye ngamak, dja mak ngahdi yiwarrudj!" Dja bu kadjalwokdi kunwarrekenh, wanjh nakka kadjalkurren, dja minj mandjad kayime kore God kadjare.

²⁷ God nawu Ngabbard kadberre wanjh kadjare karrbennahnannan birrimarladi dja mak ngalbu birrikamarrdjukunk daluk, dja mak karbenbidyikarme bu kunrayek kabebme bedberre. Dja mak God kadjare bu ngad karrbendjalbawon bu karrbenbalngundjikan birribuyika bininj nawu kabirridi kondah kurorre nawu kabirrikurduyime kunwarre. Kaluk bu ngad karrrikurduyime kuhni rowk, wanjh God kayime bu ngad wanjh karridjalkangebele, dja djal mandjad karridi kore yiwarrudj nuye.

2

Yuwn Bu Ngurrbenyarlarre Nawu Bininj Kore Yiwarrudj James 2:1-13

¹ Nawu karridangerrinj, bolkkime ngudda ngurriwernhwoybukwon Jesus Christ nawu Kawohrnan kadberre, nawu nungka nadjalwernhmakkaykenh duninj. Wanjh yuwn bu ngurrbendjadme bininj bu ngurriyime, "Bininj nawu birrikuken dja mak nawu birrikukmak wanjh nakka birrimak bedda kabindiyurrhke nawu birribuyika bininj."

² Kandibekka. Baleh kab ngudda ngurrikurduyime bu benebokenh bininj kabenengimen kore yiwarrudj ngudberre, kaluk nakudji nawu nakuken kadjongbuyindi kunmadj namadjmakkaykenh dja nawu nabuyika kadjongbuyindi namadjwarre duninj?

³ Wanjh kunubewu nawu bininj nakuken ngurrimarneyime, "Kab, yiyerrka kondah kore kuwohbolkmak!" Dja nawu nabuyika bininj namarladi ngurrimarneyime, "Ngudda kab yirrin kunukka!" Dja mak wardi ngurrimarneyime, "Kab yimyerrka kondah kore kurrenge ngardduk."

⁴ Bu ngudda kunmekbe ngurrikurduyime, wanjh kunukka yiman ngurribenkukarlmarren kore yiwarrudj, dja mak ngurrimarburren ngurrimayalwarremen kore ngurrbendjadmekenah nawu bininj.

⁵ Mah, kandibekka nawu karridangerrinj, nawu ngaye marnehmarnedjare munguyh! Ngurriburrbu. God ngokko bendjarrngbom nawu bininj birrimarladi bu kabirriyimerran nungan nuyekih bininj. Minj bedda kabirrikarme nawon bu kondah kurorre kabirriini. Kaluk bedda yiman kabirrikarme kunwoybuk kunwern nawu nuye God, wanjh nungka kabenwon nawu nadjalwernhmakkaykenh duninj kore nungka nuye

kawohrnan rowk, nawu benberrebbom birriwern bininj nawu kabirri-marnedjare nungka.

⁶ Njalekenh ngudda yimankek ngurribenmarneyime kunwarre bedberre nawu birrimarladj? Yiddok ngurribengmidjdanj bu nawu birrikuken bininj, nakka wanjh ngundimarnemarnbun kunyid ngudberre munguyh! Bedda wanjh ngundikukdorrorkke bu ngundikurrme ngudberre kore court.

⁷ Dja mak nawu kabirringeywarrewan Jesus nuye kungey manmak duninh, nawu ngurridjarrkmunkekadjung ngudda dorreng h nawu bininj nuye.

⁸ Ngudda kab ngurriwokmarrkma mankarre manbu God nawu king duninh kanwong ngad bininj kadberre nawu nungka kanmarnewohrnan rowk. Kaluk manmekbe mankarre makka wanjh kore djurra kabimbuyindi bu kayime, "Ngudda yibenmarnedjarenin nawu birribuyika bininj yiman kayime yingan bu yimarnedjaremerren." [Leviticus 19:18] Bu kunmekbe ngudda ngurrikurduyime wanjh kunukka djal kunmak ngurriyime.

⁹ Dja bu ngudda ngurribenylarrke bininj bu ngurribenmarneyime yimankek birrikuken dja nuk birrimarladj, wanjh kunukka ngurriyime kunwarre! Kaluk God nuye mankarre kayime bu ngudda ngurribakkeng mahni mankarre, dja wanjh makka ngudda ngunwarrewan!

¹⁰ Ngurriburrbu bininj nawu kamarrkmang mankarre rowk, dja kunubewu kabalbakke mankudji mandjalyahwurd mankarre, wanjh bonj, kunukka mak naweleng kadjalyemekarren, dja karohrok bu nungka karrebakkeng manbu mankarre rowk.

¹¹ Kuhni ngayime. Nawu God yimeng, "Yuwn bu ngurribun nabuyika bu ngurrikurduyme." Dja mak God yawoyhyimeng, "Yuwn bu ngurribendjirdmang nawu ngalbihbininj kobeng dja nabihbininj kobeng minj ngudberre." [Exodus 20:13-14] Bu bininj kabakke mankudji mankarre, yiman bu kabibun nawu nabuyika bininj, dja minj kabakke manbuyika, wanjh bonj, namekbe nanu kadjalbakke manbu God nuye mankarre rowk. Dja mak nungka wanjh kayemengalme.

¹² Dja bonj, God nuye mankarre wanjh kanbebke kore karribongdi. Kaluk yerrekah God nungan kandjadme kadberre rowk manbu kore mankarrekenh nuye. Wanjh kuhni ngurriwokdin dja ngurrikurduyimen kore maninjmanu mankarre kayime.

¹³ Bu bininj kabimarnekurduyime nabuyika bu kunwarre, dja minj mak kabikongibun, wanjh God minj mak kabibalkongibun bu kabidjadmeken nuye. Dja ngaleng, bu ngad karrbenkongibun birribuyika bininj, wanjh kunmekbekenh kunu God nungan kandjalkongibun ngad, dja wanjh nungka mak kanmarnemimkongiwernmen bu kandjadme.

Bu Ngurriwoybukwon God Wanjh Ngurrikurduyimen Kore Nungka Kadjare

James 2:14-26

¹⁴ Ngaye bu kuhni mak ngayime, nawu ngardduk karridangerinj, yiman bu nakudji bininj kayime, "Ngaye wanjh ngawernwoybukwon God!" Dja kaluk namekbe bininj minj kakurduyime kunmak kore God kadjare, yiddok nungka kangehkerren? Burrkyak. Dja nungka minj woymbukkih kabiwoybukwon nawu God.

¹⁵ Ngurriburrbu bu ngudda ngurrian yiman bininj dja daluk nawu ngurridangerinj, bu bedda yiman kunyid manwern kabenekarrme, bu bedda kunubewu minj kunmadj kabenekarrme dja mak minj manme kabewernhkarrme.

¹⁶ Kaluk kunukka baleh kab ngudda ngurrikurduyime? Bu yiman ngurridjalyime, “Mah, kamak yiray! Yimadjdjongburrimen nawu namadjmak dja yingu manne manwern bu yiworrkmen.” Kaluk minj njale ngurriwon manne dja kunmadj, yiddok kunukka kamak? Djal burrkyak! Minj njale mak ngurriwoyi kore kuburk bedberre.

¹⁷ Wanjh karohrok bu bininj kayime nungka kabiwoybukwon God, dja minj mak kabimarnedurrkmirri kore kunmak nuye God, wanjh bonj, nakka minj woybukkih kabiwoybukwon kore nawu God.

¹⁸ Bu nangale bininj kayime, “Ngaye ngawernhwoybukwon God”, dja minj kakurduyime kunmakkenh, wanjh karriyime namekbe bininj minj kabiwoybukwon God. Bu djal burrkyak. Dja bonj, bininj nawu kabiwernhwoybukwon God, wanjh kunmekbekenh kunu nungka kabibal-marnedurrkmirri dja kakurduyime kunmakkenh.

¹⁹ Bu nangale bininj kaburlumerren dja kayime, “Ngaye wanjh ngawoybukwon bu God nawu nadjalkudji kahdi!” Wanjh kunukka kamak, dja med! Kaluk nawu namarnde rowk kadjalrohrok bu bedda kabirriwoybukwon bu nungka God kahdi! Nawu bedda namarnde kabirriburrbun nawu God nakka nawoybuk, dja mak bedda kunu kabirrikunikele dja mak kabirrikukdeldelme nuye God!

²⁰ Bu ngudda minj ngurrikurduyime kunmak kore God kadjare, wanjh kunukka ngudda bu djalburudjang ngurriwernhwoybukwon nuye. Adju. Yiddok ngudda ngurribengwar? Kandibekka.

²¹ Wardi ngurriwernhurrbun Abraham, nawu ngad Mawah kadberre. Baleh bolkyimi bu God bimulewam Abraham bu namakni bininj nuye? Wanjh kuhni bolkyimi bu Abraham bikanjurmeng dja mak bikuyinbom Isaac, nawu beywurd nuye, kore kunwardde manbu altar kore mayhkenh birrikinjei God nuye.

²² Nawu Abraham biwernhwoybukwong God wanjh kunmekbekenh kunu biwokmarrkmey nungka. Bu nungka bokenhkah kore kurduyimeng bu nungka biwoybukwoni God, dja mak biwokmarrkmangi nungka.

²³ Wanjh kunmekbekenh maninjmanu mankarre woybukkenhdanj, kore kabimbuyindi bu kayime, “Abraham bidjalwoybukwoni God, wanjh kunmekbekenh kunu God nungan bidjalmakwam nungka.” [Genesis 15:6] Wanjh Abraham bu yimerranj God benedjaldabbolkn munguyh. [Isaiah 41:8]

²⁴ Yiddok kandiwokmenbekkan kore ngaye bengdayhke? God kabemakwan bininj nawu kabirriwoybukwon bu bedda kabirrikurduyime kunmak kore nungka. Dja yuwn bu bininj kabirridjalyolyolmerren bedmandeleng bu baleh kabirriwoybukwon.

²⁵ Ngudda yiddok ngurriburrbun mankarre manbu kabiwoyolme ngalbu Rahabkenh. Ngalmekbe daluk wanjh ngalwarreni dja ngaleng benahnani bininj nawu manmolk birribolknani kumekbe kore kukadje kunredkimuk Jericho, dja birriwam kore ngaleng ngarre kunrurk. Dja mak benmunkeweng bu birriwam kore manbolh manbuyika. Wanjh kunmekbekenh God bimarneyimeng ngaleng ngalmakni. [Joshua 2:1-21]

²⁶ Dja mak ngurriburrbu. Bu bininj nuye kunmalng kabawon kore kunburk nuye, wanjh kunukka nungka bonj, kahdjaldowen. Wanjh kaluk kunmekbe kadjalrohrok, bu bininj minj kunmak kakurduyime God nuye, wanjh namekbe bininj kabiwoybukwon bu mankarreburudjang.

3

*Bu Karrinahnarren Kore Baleh Ngad Karriwokdi
James 3:1-12*

¹ Nawu karridangerrinj, yuwn bu ngurriwern ngudda bininj bu ngurriyimerran yiman ngurrbenbukkabukkankenh nawu birribuyika bininj. Ngurriburrbu bu woybukkih, ngad nawu ngarrbenbukkabukkan bininj, wanjh God ngandjadme ngad werck bu mankarre mardabbabba duninj, yiman kayime minj kabendjadme nawu birribuyika bininj.

² Ngad bininj rowk, wanjh yikahwi karridjalwarreworren ngadmandeleng. Bu yiman nangale bininj kawokdi dja minj kawarrewon wanjh nakka nadjalmak bininj duninj! Kaluk yiman nungandeleng bu kamarnburren bu kunmak kakurduyime kore kunburck nuye rowk.

³ Bu ngad karrihwokdi, wanjh baleh manbu kundjen kayimerran kadberre? Wanjh yiman kayime bu yihmorneni kore djarrang dja mak yimarnbu manbu kunyarl karrangdukkayindi bu yiyarlkarre dja mak yikanemkarre kore yikan djurrud, kore yikebrokborleborledke.

⁴ Dja mak ngurriburrbu bu kabbala. Wanjh yika mankimuk duninj, dja kunmayorck kunkimuk kawe. Dja ngaleng, bininj nawu kakanemkarre kore kakebrokborledke nawu kulinj, wanjh karokayhwe rudder nawu nayahwurd, ba bu kakeborledke mahni kabbala manwernhkimuk.

⁵ Wanjh kunmekke kadjalrohok manbu kundjen kadberre manuwanjh manyahyahwurd kore kunburck kadberre dja ngaleng yimankek kaburlumerren bu kundulkarre kakarre! Makka yiman kayime kunak bu kawurlhme manyahwurd wanjh kadjalle kabalbirlikimukmen bu karrung kore kubolkwern.

⁶ Ngayime bu ngad karriwokdangen, wanjh kunukka yiman kayime karridedjingmang bu karriwurlhke manbu kunak. Kaluk kunwok kadberre makka wanjh manwarre duninj, dja mak kanmarnbu bu ngad karriwarreworren bu munguyh. Kunubewu nawu Namarnde Duninj nungan kandjenwurlhke kadberre!

⁷ Nawu bininj kabirrimarnbu nawern mayh bu kakelebukmen dja mak kabenwokmarrkmang, yiman kayime mayh, mayhmayh, dja mak nayin, dja mak nawu kahdi kore kurrula. Ngad wanjh bininj karbenmarnbu nawu mayh rowk ba bu kandiwokmarrkmang.

⁸ Dja manbu kundjen kadberre, makka minj karrimarnbu bu kanwokmarrkmang. Kaluk manbu kundjen kadberre yiman kayime mayh nabang nawu minj kelebuk dja yiman kayime mak mandjalwarre nawu kabenbu bininj yiman manbang boddjin kayime.

⁹ Bu ngad yikahwi karriburlume Ngabbard nawu Kawohrn Rowk kadberre bu manbu kundjen kadberre dorrengh, dja mak yikahwi karriwokdi bu karriwokwarrewe bedberre bininj nawu God benmarnbom yiman kayime nungka rerrih!

¹⁰ Ngad wanjh karribebhekarrme manbu kundang mandjalkudji, kaluk karriwokkiyime kore karriburlume God, dja mak karriwokkihyime kore karriyime kunwarre. Nawu ngad karridangerrinj, minj nuk kunukka kunmak!

¹¹ Kuhni ngayime! Bu kukku kambowayhme kore kanjdjibeh kunngad, wanjh minj bokenh kabomanjrohok bu kabomanjmak dja mak kabomanjbahng, dja ngaleng kadjalbomanjkudji.

¹² Mak ngalengman manbu kundulk manbarnemkenh, yiddok kabebhekarrme bokenh manme, manbu yiman kayime mandjardduk dja warridj mandudjmi? Yiddok manraket manbu grapes kabarnemandingin manme manbuyika? Wanjh minj mak kukku manbu manbomanjmak kabeneboraworren manbu kukku manbodjirlawi.

¹³ Bu ngudda ngurriwernhburrbun God dja wardi ngurriwernhburrk-burrkbekkan kore nuye kunmayali, wanjh kunukka kamak, dja ngurrid-jalkurduyimen kundjalma kore bininj ngundikurdunan, dja yuwn bu mak ngurriburlumerren, dja ngaleng, ngurridjalkurduyime kore God nuye kunmayali manbu ngurriburrbun mandjad duninj.

¹⁴ Dja bu yiman ngurrikirn dja ngurrimanjgun kore kukange ngudberre, mak bu ngudmandeleng ngurriburluburlumerren, wanjh yuwn bu ngurrikurren bu ngurriyime God nuye kunwoybuk wanjh nakka yeng, dja minj kunwoybuk.

¹⁵ Kunukka wanjh kundjalwarre rowk. Kaluk ngudda mahni kunmayali minj ngurrimayi kore heavenbeh! Dja makka kunmayali wanjh kondah kore kurorrebeh, minj ngudda mak ngurrimayi kore Namalngmakaykenhbeh, dja makka wanjh kore Namarnde Duninj.

¹⁶ Bu bininj yiman kabirrikirn dja mak kabirriwohkdjdjohme bu kabirridokmiwerren rowk, wanjh kunukka kadjalwernhwarremen rowk dja mak kunwarre duninj bu kadjalmarburren kore bedda kakurduyimerran.

¹⁷ Dja manbu kunmayali kunwernmakmak duninj ngurrimang wanjh makka kore heavenbeh. Kaluk manekke mandjalma, dja minj manwarre, dja makka manu ngunmarbun bu ngurridjare kore kunmodmikenh dorreng. Mak ngunmarbun bu ngurribenmarnekurduyime bininj birribuyika bu djal yeledj dja mak yalyal. Mak ngunmarbun bu ngurribendjalmadbun birribuyika, dja mak ngurribenkongibun bininj, bu ngurridjaldurrkmirri kore God kadjare. Mak ngunmarbun ba bu ngudda ngurribendjadmekenh bininj bu djal mandjad. Mak God nuye kunmayali ngunmarbun bu minj mak ngurrikurren kore ngurriwokkurmerren.

¹⁸ Ngudda wanjh ngurridurrkmirrin bu ngurrimaribun kore kunmodmikenh munguyh, dja mak ngurribenmarbun bininj bu kabirrimarned-jaremerren, wanjh kunukka kunmak kawernmerren kore God kadjare.

4

Ngurridjalkurmerrimen Kore God Dja Ngurriwokmarrkma Nuye. James 4:1-10

¹ Njalekenh yika ngudda nawu bininj ngurriburren dja ngurridangwerren munguyh? Ngudda ngurridaldjare kunwern manbu ngurrikarme kore kukange ngudberre, wanjh kunwarre rowk! Kuhni bu kunmayalikenh ngarre kore kukangebeh ngudberre.

² Kunubewu ngudda ngurridjare njalehnjale nawu minj ngurrimang, dja mak kunubewu ngudda ngurridjare ngurribun dja mak ngurrikirnwerren. Dja bonj, minj nakka ngurrimang njalehnjale kore ngurridjare. Ngudda ngurridangwerren dja mak ngurriburren munguyh. Wanjh kandibekka. Njalekenh minj ngurrimang nawu njalehnjale? Bu kunmekbekenh kunu minj nawu ngurridjawayi nawu God.

³ Kunubewu bu ngurridjawan, nawu God minj ngunwon ngudberre dja nungka nguningkihmayaliburrbun, dja ngudda kunu ngurridaldjare nawu nawarrehwarre, ba bu ngudda kunu ngurridjare kumekbekenh malehmalal ngurrikurduyime.

⁴ Ngudda wanjh ngurribodmewong nawu God. Ngudda wanjh ngurridaldjare nawu njalehnjale nawarre kore kondah kurorre kahdi, wanjh kunukka ngurriwidnan nawu God. Bu ngurridjare ngurribenngunjdjikan bininj nawu kondah kurorrebeh, wanjh kunu ngurrimarburren ngudmandeleng bu ngurriyidko nawu God.

⁵ Kunubewu ngudda minj ngurriwernhburrbun kore djurra nawu Bible kayime bu God nuye NamaIngmakkaykenh, nawu God kanmarnekurrmeng kore kukange kadberre, wanjh nungka kakirn kunkimuk kadberre bu minj ngad karrimarnedjare nawu God.

⁶ Dja ngaleng mak nungka kankongibun bu kanhbidyikarme ngad kadberre munguyh bu djalburudjang. Wanjh kunmekbekenh kore Bible kayime, "God kabennurdke nawu bininj kabirrikimukworren, dja nawu mak kabirriburluburlumerren. Dja ngaleng, kabennahnan dja mak kunmak kabenmarnekurduyime bininj nawu minj kabirriburlumerren." [Proverbs 3:34]

⁷ Mah, wanjh munguyh ngurridjalkurmermen dja ngurridjalwokmarma nawu God. Dja nawu Namarnde Duninh, wanjh ngurridjalwokwemen dja mak ngurridu, wanjh kunukka nungka kakelerlobme, ngunbawon ngudberre.

⁸ Ngurrimray darnkih kore God ba nunganwali kamre darnkih kore ngudda. Ngudda nawu ngurribakkeng mankarre nuye God, wanjh yiman kunukka yiman ngurribiddjirridjurrimen. Ngudda nawu ngurridjalkurren bu ngurriyolyolme God, wanjh ngurrikangebeleworrime warridj!

⁹ Dja mak ngurringurdmen bu ngurrihmalelhmalelwon, dja wanjh ngurringurdmen bu ngurrimarrmar, wanjh ngurridjalnjilngwarrenin. Yoh, bu ngudda kunmekbe ngurrikurduyime, wanjh kunu ngurridjalwernhkgawarrenin. Ngurrikuninjlilngwarrenin dja mak ngurriwernhnalkbu.

¹⁰ Mah, wanjh ngurrimarnburrime bu yiman ngurriyahwurdnin kore kumirrk nuye God, ba kunu wanjh nungka ngundjalwayhke kore nungka.

*Yuwn Bu Ngurridjadmerren Ngudmandeleng Nawu Ngurridanginj
James 4:11-12*

¹¹ Nawu karridanginj, yuwn kab ngurribebbehkukyolyolmerren. Bu yiman ngurrbenkukyolyolme nawu ngurridanginj bininj, dja mak bu ngurrbendjadme, wanjh kunukka yiman ngudda ngurridjadme manbu mankarre dja mak ngurridjalwarnyak mahni mankarre! Bu ngudda kunmekbe ngurriyime, wanjh kunukka minj ngurriyawoyhmarrkmang manbu mankarre. Dja bonj, ngudda yimankek ngurrikurmerren bu ngurridjaldjadme manbu mankarre.

¹² Kaluk nungka nadjalkudji nawu kanwon manbu mankarre, dja wanjh nungka nadjalkudji nawu kandjadme! Nungka nawu wernhdulkarrekimuk kore kannghehe dja mak bu kanbularrbun. Kaluk baleh yimankek ngudda bu ngurriburrbun bu ngurrbendjadmekenh nawu birribuyika bininj?

*Yuwn Bu Ngurriburlumerren Kore Ngurrikarremarnbun Bu Malaywibuyikakenh
James 4:13-17*

¹³ Kunubewu ngudda kuhni ngurriburrbun bu ngurriyime, "Wanjh bolkkime dja malaywi ngaye kab ngare kore kubolkbuyika, ba ngani kumekbe mandjewk nakudji dja ngarrurrkmirri bu ngamarnbun nawern kunwardde nawu money." Wanjh kunubewu kunmekbekenh bu ngurriburrbun.

¹⁴ Kadjalwarre! Dja ngudda minj ngurriburrbun bu baleh ngumarnekurduyimerran bu malaywibuyika! Ngudda nawu djalbininj, dja ngudda yiman kayime manbu kunkarndum bu kahdi, wanjh kaluk kunu kabalyakmen.

¹⁵ Dja kuhni bu mak kunbuyika ngurriyimen, “Bu yiman nawu Kawohnnan Rowk kadjare ngardduk, wanjh kunu ngaye ngarrarrkiddi ba bu ngakurduyime kuhni kore nungka kadjare.”

¹⁶ Mah, dja ngudda wanjh ngurringurdmen dja yuwn bu ngurriburlumerren kore ngurridjare ngurrikurduyime. Dja bu kunmekbe ngurriburlumerren wanjh kunukka kundjalwarre duninjh.

¹⁷ Kaluk bininj nawu kaburrbun kunmak manbu God kadjare kakurduyime, dja mak minj kabalkurduyime bu kunmekbe, wanjh nakka kabakke God nuye mankarre.

5

Yuwn Bu Bininj Nawu Birrikuken Kabindiwarrewon Nawu Birrimarladj Bininj

James 5:1-6

¹ Kandibekka, ngudda bininj nawu ngurrikuken. Wardi ngurrinalkkihni dja mak ngurrikayhme wanjh kuhni kunu ngurribadkelemen bu kuninjkunu ngurriburrbun kunyid duninjh bu kambebme kayimerran ngudberre.

² Kaluk nawu kunwardde money ngudberre wanjh nakka kukwarreminj, dja mak manbu kunmadj dorreng ngudberre, makka wanjh karrukduhme kore maybheh nguninguni.

³ Dja nawu yiman kunwardde silver dja gold, nakka wanjh kadjalwernhwarremen, dja mak ngunmarnbun manbu kunkulah ngudberre wanjh makka kanudmen warridj. Kaluk ngunkulahwarrewon yiman kayime kunak ngunkulahkinje! Ngudda kunwarre bu ngurriyimeng, kore ngurridjalmangi kunwardde nawern kore yimankek ngurrikurmekurme kore kadjehdjenyo ngudberre, dja bolkkime bu kunbarnangarra kayiburnburnkenh rowk!

⁴ Ngurrina! Ngudda kunu ngurrbendjalkoweyi birrimekbe bininj nawu ngundimarnedurrkmirri ngudberre kore birrimangi manme dudjindi ngudberre. Minj ngurrbenkarremulewayi bedberre, dja nawu Kawohnnan Rowk nawu Narrulkarrekimuk benbekkani kore birrikayhmi bu nguddakenh.

⁵ Ngudda nawu ngurridi kondah kurorre kore ngurridjaldjareni, dja mak ngurriworreni nawu namakmakkenh rowk, dja mak ngurridjalkurduyimi kore ngudman. Dja mak ngudmandeleng ngurrimarnburreni bu wanjh bolkkime ngurriyimerran yiman kayime mayh yiman balemamak nawu bininj kabirribun mayh karrown wanjh kunkanj kabirrimang.

⁶ Ngudda ngurrbendjalwarrewam dja mak ngurrbenbun bininj nawu minj kunwarre ngundimarnekurduyimeninj, nawu minj birrimur-ngrayek yiman ngudda!

Bu Ngudda Kunrayek Kawernmerren Ngudberre Wanjh Kunukka Ngurridjalmadbu Nawu God

James 5:7-12

⁷ Nawu karridangerrinj, kab ngurridjalmadbu nawu Kawohnnan Rowk bu kamdurdeng. Ngurriburrbu yiman kayime bininj nawu karrudjeng manme bu kadjalmadbun manbu manbarnem bu kadjordmen. Nungka wanjh kadjalmadbu mandjewk bu karredjingmang kadjaldung dja mak kore kayingurdme wanjh kunukka kamang manme manmak.

⁸ Wanjh kunmekbe kadjalohrok, bu munguyh karridjalmadbu nawu Kawohnnan Rowk, dja minj mak ngurribawon. Kuhni wanjh nungka darnkih duninjh bu kamdurdeng kabolkyimerran.

⁹ Dja yuwn bu mak ngurriwokmenmenburren ngudmandeleng. Wardi kunubewu nawu Kawohnnan Rowk ngundjaldjadme bu kuhnikenh. Ngurrina dja nungka ngokko darnkih kamdurndeng bu ngad karriwarlahkenh bininj wanjh kandjadme rowk.

¹⁰ Nawu karridangerinj, ngudda kab ngurrbenburbu dja ngurrbenn-gunjdjikan birrimekbe bininj nawu prophetni bu kore korroko birriwokdi kore kunngey nuye nawu Kawohnnan Rowk. Wanjh nakka bedda kundjalrayek birrimangi. Kaluk munguyh birridjalmadbuni nawu Kawohnnan Rowk.

¹¹ Kaluk bininj nawu minj birrimarrkbaworrimeninj, bu kunwern kore kunrayek birrimangi dja mak kunyid dorreng, wanjh God woybukkih bendjalmarnekurduyimi kore kunmakkenh bedberre. Dja mak ngurribur-rbu nawu Job. Nungka minj marrkbaworrimeninj dja bidjalmadbuni nawu Kawohnnan Rowk, dja nungka wanjh kaluk bimarnekurduyimeng kunmakkenh nuye namekbe bininj. Dja nawu Kawohnnan Rowk wanjh munguyh nawu nungka kanbidyikarme dja kannahan dja mak kandjal-marnedjare bu kandjalkongibun dorreng. [Job 1:21-22; 2:10]

¹² Nawu karridangerinj! Bu bolkkime marneyime kore mankarre mankimuk duninj. Ngurridjalwokdin bu kunwoybuk duninj. Bu yiyime "Yoh", wanjh yidjalyimen, "Yoh". Bu yiyime "Burrkyak", wanjh yidjalyimen, "Burrkyak". Yuwn bu yiwokkurmerren bu yiyime, "Ngaye ngawernhwokkurmerren kuhni ngardduk kore God nganbekkan, dja mak kore njalehnjale kondahbeh ngawokkurmerren ngardduk." Bu kuhni yiyime, wanjh God ngundjaldung.

Munguyh Ngurridjaldin Yiwarrudj
James 5:13-20

¹³ Yiddok birringale bininj bu kunrayek kabenmarnebebme? Wanjh kab bedda birridjaldin yiwarrudj. Dja mak nangale bininj kahmarrmarr? Wanjh kunu djalwayinin bu kabiburlumekenh nawu God.

¹⁴ Dja mak yiddok yikahwi bu ngurridulkkihyo? Wanjh ngurriwok-munkewerrimen bedberre kore bininj nawu kabirrimarnedurrkmirri yiwarrudj ngarre, ba bu kabirrimre ngundimarnedi yiwarrudj dja mak ngundibarung nawu kunkalkkid oil kore kunngey nuye nawu Kawohnnan Rowk.

¹⁵ Kaluk birrimekbe bu kabirrimarnedi nawu Kawohnnan Rowk bu bedda kabirriwoybukwon, wanjh kunukka nungan ngunmarnbun ba bu kamak rowk, dja mak bu kunwarre ngurrikurduyimi kerngeghkenhni, wanjh kunukka nungka ngunmarnebengmidjan.

¹⁶ Bu kunmekbekenh ngudda ngurribekkarren bu ngurriwarnyak-mulewarren kore kunwarre ngudberre, dja mak ngurridin yiwarrudj ngudberre ba bu kunu God nungan ngunmarnebengmidjan dja mak ngunmarnbun kore ngurridulkkihngalmeng. Dja mak ngudda ngurrimak bininj, dja mak bu ngudda ngurriwoybukwon God, bu ngurridangen yiwarrudj, wanjh kunu God nungan kahdurkmirri kundulkarre nuye bu ngunwon ngudberre kore ngurridjawamkenh.

¹⁷ Kab ngurridjalburru nawu Elijah, bu kunkareni nungka nawu God nuye prophet. Kaluk nungka djal bininjni, yiman kayime ngad karrirohrok. Wanjh nungka munguyh djahdjaldi yiwarrudj bu wernkih bidjawani God ba bu minj djakduyi kore kunbolk birrihni bedberre, dja mak minj djakduyinj mandjewk kunmekbe bu kunkuyeng, yiman 42 dird.

¹⁸ Wanjh kalukburk nungka yawoyhdanginj yiwarrudj wanjh kunu mandjewk kunwam kore heavenbeh dja marnbom mandjalwern manne wanjh djolengminj kore kurorre. [1 Kings 17-18]

¹⁹ Nawu karridangerrinj, bu nakudji bininj nawu kahdi kore kumekbe ngurrihni, wardi nungka kadjalbawon kore kunwoybuk dja mak kaborledme kore kunwarre kakurduyime, wanjh kunu ngudda ngurrimdurndiwemen kore kunwoybukkenh.

²⁰ Bu ngudda kunmekbe ngurrikurduyime wanjh kunu kunmak. Ngurridjalburrbu kuninjkunu. Bu ngudda ngurrimdurndiwe bininj nawu kunwarre kore kare, wanjh kunukka ngurringehke ba bu kunmalng nuye minj mak karrown, dja wanjh God kabimarnebularrbun kore kundjalwern kunwarre kurduhkurduyimi.

1 Peter

Ngaye Peter Ngabimbom Nahni Djurra

1 Peter 1:1-2

¹⁻² Ngaye wanjh Peter nawu apostle nuye Jesus Christ. Ngaye ngabimbom nahni djurra ngudda ngudberre nawu God ngundjarrngbom. Nungka God nawu Kornkumo yingkihkarremarnbom bu ngundjarrngbom. Namalngmakkaykenh nuye ngunmarnbom bu ngurriyimerranj God nungan nuyekih bininj. Kuhni nungka ngunmarnekurduyimeng ngudberre ba bu ngurriwokmarrkmang Jesus Christ nawu ngunkukdjuhkeng ngudberre nuye kunkurlbawi.

Bolkkime wanjh ngurribebbedhi bu ngurriyarlarmeng kore kubolkbubuyika kubolkkimuk kabolkngeyyo Pontus, dja mak Galatia, dja mak Cappadocia, dja mak Asia dja mak Bithynia. Ngurribebbedhi kumekbe yiman kayime bu ngurriredyak kondah kurorre.

Ngaye ngadjare God munguyh ngundjalmarnekurduyime kunmak nuye, dja mak kunmodmikenh dorreng bu kundjalwern ngunwon ngudberre.

Kuhni Wanjh God Ngundjalmarnekurduyime

1 Peter 1:3-9

³ Ngad wanjh karridjalwernhburlumen God nawu Kornkumo nuye Jesus Christ nawu kadjalwohrnan kadberre. Nungka God kandjalwernhkongibun, dja birrolkkayhweng nawu Jesus Christ kore dowengbeh, wanjh kunmekbekenh ngad karriyawoyhmalngkerrngehminj. Bu bolkkime ngad karrihdjalnjilngmak bu karriburrbun kaluk nungan God kandjalmarnekurduyime bu yerrekah.

⁴ Yoh, kaluk yerrekah God kanwon namakmak nawu nungan kahkarme kadberre kore heaven, nawu minj kawarremen dja mak minj kakaremen.

⁵ Kaluk bu ngurriboyenmadbun wanjh God ngundjalnahnan munguyh kore nuye kundulkarre dorreng ngudberre nawu ngurrihwoybukwon. Kaluk bu yerrekah nungka ngungehke bu kayiburnburnkenh rowk kore birriwarlahkenh bininj kabirrikurdunan kore nungka kakurduyime.

⁶⁻⁷ Bolkkime wanjh kunyid kunwern kamarnbuyindan ngudberre bu kundjalwohdedjdjumbungkenh ngarre. Dja ngurridjalmarrrmarr duninj! Kamak bu bolkkime ngurrimang kunyid ba bu kunukka ngurridjalwernhwoybukwon Jesus Christ bulkkidj duninj dja ngurriwokmarrkmang dorreng. Kaluk yerrekah wanjh birriwarlahkenh bininj rowk kabirrihan Jesus Christ bu kamdurndeng, wanjh God ngundjalburlume ngudberre dja mak ngundjalmakwan. Kuhni wanjh ngadjare ngamulewan.

Kab ngudda ngurriburrbun kuhni bu nawu bininj karohrokme nawu gold bu kakinje kore kahrung, wanjh kanan bu woybukkih yiman gold duninj. Wanjh kunmekbe kadjalrohrok bu kunyid kanrohrokme kadberre bu yiman ngad karridjalwernhwoybukwon duninj. Kaluk nawu gold nakka kayakmen, dja ngad bininj nawu karridjalwoybukwon God, wanjh minj karriyakmen.

⁸ Ngudda minj ngurridarrkidnaya nawu Jesus Christ, dja ngaleng ngudda ngurridjalmarnedjare! Dja mak minj bolkkime ngurridarrkidnan, dja ngudda munguyh ngurridjalwoybukwon, bu ngurrikunimarrmarr dja mak ngurrikuninjinlgmak dorreng. Ngudda wanjh ngurriwernhmarrr bulkkidj duninj kore nungkakenh!

⁹ Kuhni ngurribekkarren bu ngudda ngurrihwalwoybukwon wanjh kunmekbekenh God nungan ngunmalngnehke ngudberre.

*Nawu Prophets Korroko Birriyingkihmulewani Jesus Christ
1 Peter 1:10-12*

10 Bu kunkare wanjh God benwoni kunwok nuye nawu prophets dja birrimarnewokdi. Dja bedda minj birriwernhburrburkbekkeyi kore God yerrekeh kabenngehkekenh nawu bininj nuye. Bedda birridjareni birrikarregalkemeninj bu kuninjkukenh dja wanjh birrimalayiyawarinj.

11 Nawu Christ nuye Namalngmakkaykenh benhmarneni kukange bedberre kore prophets, dja benyingkihmulewani nawu Christ bu kadjakbekkan dja bu yerrekeh kadjaldi kore heaven dja mak birriwarlahkenh bininj wanjh kabirrimarnebodan kondah kurorre. Wanjh nawu prophets birridjareni birriburrbuyi bu nangale nawu Christ, dja mak baleh kabolkyimerran bu kuhni rowk kakurduyimerran.

12 God benbukkabukkani birrimekke nawu prophets bu minj bedmandeleng bedberreniwirrinj. Bedda wanjh birridurrrkimirri bu ngudda ngudberreni. Wanjh bu bolkkime ngudda ngurribekkan kunwok kunmak bu birribuyika bininj birrimwam birrimulewani ngudberre. God bimunkeweng nuye Namalngmakkaykenh kore heavenbeh wanjh benhmarnedurrkimirri nawu bininj bu ngundihmarnemulewani ngudberre. Kaluk angels bedmanwali kabirridjare kabirriburrburkbekkan rowk kore God ngunmarnekurduyimeng ngudberre.

*Ngad Wanjh Karrimarnburren Kore God Kadjare Kadberre
1 Peter 1:13-21*

13 Mah wanjh, ngurrikodj kulubayhmen ba bu ngurriwernhburrbun mak ngurridjalwernhwoybuknin. Ngurrimarnburrimen ba bu ngurridjalkurduyime kunmak. Dja mak ngurriburrbun kundjalkudjiwi bu nungka Jesus Christ kamdurndeng kurobbe dja ngunmarnekurduyime kunmak duninj.

14 Ngudda ngurriyimerranj God nuye wurdwurd, wanjh ngurridjalmarckmang munguyh. Bu kerrengehkenhni ngudda minj ngurriburrbuyinj dja ngudman ngurridjalkurduyimi kore kunwarre ngurridjareni. Wanjh yuwn bu bolkkime ngurriyawoyhkurduyime.

15 God nawu ngunkayhmeng ngudberre, nungka wanjh nadjalwernhkukdjamun duninj, nawu minj kunwarre kabeneraworren. Wanjh kunmekbe ngudmanwali ngurridjalkurduyimen bu ngurrikukdjamunworrimen dja mak minj kunwarre ngurriaworren.

16 Kuhni bu yingkihimbuyindanj kore djurra bu kanbengdayhke, kore kayime, "God yimeng, 'Ngaye wanjh munguyh ngadjalkukdjamun, wanjh ngudmanwali ngurridjalkukdjamunnin.'" [Leviticus 11:44-45, 19:2]

17 Ngudda ngurridi yiwarrudj nuye God, bu ngurrimarneyme, "Ngabba!" Nungka wanjh kanbebedjadme kadberre rowk bu djal mandjad kore kunmakkenh ngarre. Dja wanjh ngurridjalwernhmarnekenin bu kondah kurorre ngurrihni, yiman kayime bu ngurridjenbuyika duninj.

18 Ngudda kab ngurriburrbun bu kerrengehkenhni ngurrihdjalni, minj njale mak kunmak ngurrikurduyimeninj. Kaluk ngudda ngurriborlhmeng bu nawu mawahmawah ngudberre birrihkurduyimi korroko. Dja wanjh bolkkime God nungan ngungehkenh ngudberre. Kaluk nungka minj ngunmarnekarremulewayi nawu money kunwarddewi. Wanjh namekbe nawu money kawarrewarren dja kayakayakmen.

19 Dja bonj, kuhni bu nungan God ngunmarnekarremulewam ngudberre kore Christbeh nuye kunkurlbawi manbu kunkurlbamak nuye. Nungka

doweng yiman yimi mayh nawu lamb kukmakkaykenh duninj bu bininj birrimarnekinjeng God.

²⁰ God kerrngehkenhni yingkihkarremarnbuni bu Christkenh wanjh yerreh welengbolkmarnbom, wanjh bu bolkkime kore kayiburnburnkenh, nungka ngunkukbuk kang nawu Christ ba bu ngungehke ngudberre.

²¹ Bu ngudda ngokko ngurriwoybukwong Christ, wanjh kunukka ngurribalwoybukwong God kore nungka, nawu birrolkkayhweng kore dowengbeh dja kankukbuk kang ngad nawu bininj rowk bu nungka Christ wanjh God duninj. Wanjh bu bolkkime ngudda ngurridjalburrbun dja mak ngurridjalmadbun God munguyh.

Ngudda Wanjh Ngurridjalwernhmarnedjaremerrimen

1 Peter 1:22-25

²² Ngudda wanjh ngurribek kang kore kunwoybuk dja ngurriwokmar-kmey, wanjh ngudda ngurrimalngbeleworrin ba bu ngurrbenmarned-jaremerrin bulkkidj duninj nawu ngurridangerrin kore yiwarrudj ngudberre. Wanjh kumekbekenh kunu ngurridjalmarnedjaremerrimen bulkkidj duninj bu djalmunguyh.

²³ Ngudda wanjh ngurriyawoyhmalngkerrngehminj, dja kunu minj djal bininjbeh nawu kayakmen. Dja nawu ngunmalngdarrkidwong ngudberre minj nakka karrown. Dja God nuye kunwok wanjh ngunmalngmimb-iwon ngudberre, manbu minj kayakmen, dja kadjaldi munguyh munguyh.

²⁴ Kuhni bu bimbuyindanj kore djurra kayime, "Nawu bininj karri-warlahkenh rowk, yiman kayime ngad kundalk. Dja mak kunmakk mak kadberre yiman kayime mannguy manbu karrangen kore kabbal. Kaluk bu kundalk karrown, dja manbu mannguy wanjh kawarrawarrhmerren. Wanjh kunmekbe kayimerran kadberre bu karridowen.

²⁵ Dja manbu kunwok nuye nawu Kawohrn Rowk, makka kadjaldi munguyh munguyh." [Isaiah 40:6-8] Wanjh maninjmanu kunwok manbu bininj birrim kang bu ngundimarnemulewam ngudberre.

2

Ngurrimarnedjarenin Manbu God Nuye Kunwok

1 Peter 2:1-3

¹ Mah. Ngudda wanjh ngurringurdmen bu ngurribebbehnjirrkkerren. Yuwn bu mak ngurrikowerren. Dja mak yuwn bu ngurridjalwohkur-rehkurren. Yuwn bu mak ngurribebbehkirnwerren, dja mak yuwn bu ngurriyolyolmerren.

²⁻³ Dja wanjh ngokko ngurrimey kore nawu Kawohrn Rowk ngun-wong ngudberre kore kunmakk mak nuye, wanjh ngurribengan nungka nadjalmakkaykenh. Wanjh kunmekbekenh ngurrimarnedjarenin kunwok nuye manbu ngunhbukkan kunmak. Dja ngurriyimen yiman kayime barrken nawu kahdjaldjare kahbongun kundjikka, ba bu kunukka ngud-mandeleng ngurridjordmiwerren kore God ngungehengkeng ngudberre.

Ngad Wanjh Karribelbmerren Nawu Christ

1 Peter 2:4-8

⁴ Ngurrimkurrmerrimen kore Jesus Christ nawu nungka yiman kayime manwarddekuken manbu kahdarrkiddi munguyh. Bininj birriwirrihmi, dja God nungan bidjarrngbom bu yimeng nungka wanjh namakkaykenh duninj.

⁵ Dja ngudda wanjh ngurrikangemarnburrimen kore God nuye. Bu nungan wanjh karrurkmirri bu karurkmarbnun yiman kunurruk nuye

kore Namalngmakkaykenh kahdi, kaluk ngunkurrmekurrme ngudberre yiman kayime bricks manbu kunwardde kabelebelbmiiyindan wanjh kamarnburren kunrurrk.

Wanjh kunu God ngunmarnbun bu ngurriyimerran priests nuye, ba bu ngurrimarnedi yiwarrudj kore Jesus Christkenh, dja ngurridurrkmirri kore Namalngmakkaykenh dorreng bu ngurriwon God kore nungka kadjare.

⁶ Ngurriburru bu kore kahmulewan djurra, bu kahyime, "God yimeng, 'Ngurrina! Ngaye wanjh ngakurme manwarddekuken duninj kore kunred Zion. Kaluk manmekbe kunwardde makka wanjh manwarddekuken duninj kore kunrurk ngarre temple kahyo. Kaluk ngaye ngay- ingkihdjarrngom nakudji bininj nawu yiman kayime manbu manwarddemakkaykenh duninj. Bu nangale bininj kabiwoybukwon namekbe bininj, dja mak kabiwokmarrkmang, wanjh nakka minj mak kayemengalme.'" [Isaiah 28:16]

⁷ Ngaye ngayolyolme Jesus, nawu yiman kayime manekke manwarddekuken. Dja ngudda nawu ngurriyingkihwoybukwong nuye, wanjh kunmekbekenh ngurriburru bu nungka namakkaykenh duninj dja ngurrimarnedjare. Dja nawu birribuyika bininj nawu minj kabirriwoybukwon nuye, wanjh kunu kabenmarnekurduyimerran bedberre kore djurra kahbimbuyindi, bu kahyime, "Bininj nawu birrirurkmarnbuni, wanjh birriwirihi manmekbe kunwardde, dja wanjh bu bolkkime manekke kunwardde wernhkukenminj duninj kore kunrurk kahdi." [Psalm 118:22]

⁸ Dja mak kubadbuyika kore bimbuyindan djurra, bu yimeng, "Mahni kunwardde kabenbungkarrkbun nawu bininj bu kabirrimankan." [Isaiah 8:14] Kaluk birrimekbe bininj nawu minj nakka kabirriwernhwokmarrkmang God nuye kunwok, dja kunmekbekenh kabirrimankan. Kuhni wanjh God yingkiharremarnbom kore kabenmarnekurduyimerran bedberre.

Bu God Kandjarrngom Dja Karriyimerran Nuye Bininj

1 Peter 2:9-10

⁹ Dja ngudda wanjh God ngundjarrngom ngudberre, dja ngunmarnbom bu ngurrikudjamun nuye. Ngudda wanjh ngurriyimerran priests bu ngurrimarnedurrkmirri God, nawu nakimuk duninj king. Ngudda ngurriwarlahkenh wanjh djal God nuye bininj rowk. Nungka wanjh ngundjarrngom ngudberre ba bu ngurribenmarnemulewan birribuyika bininj ba bu kabirriburlume nuye. Wanjh kunu ngurriyolyolmerren bedberre kore nungka wanjh ngunbekeng ngudberre rowk kore kubolkmunun ngurridi, dja ngunkurrmeng kore kabolkwolkayindi kunmakmak dorreng nuye.

¹⁰ Bu kerrngehkenhni ngudda wanjh ngurridjalbengmayahmi bininj. Bolkkime wanjh ngudda God nuyekih bininj! Yoh, bu kerrngehkenhni ngudda minj ngurriburru buyi God nawu mimkongiwern duninj. Dja bolkkime wanjh nungan God ngundjalkongibom ngudberre.

Ngurridjalkurduyimen Kore God Kadjare Bu Kondanjkuu Kurorre Ngurridi

1 Peter 2:11-17

¹¹ Ngudda nawu ngaye marnedjare, ngad wanjh God nuye bininj nawu karridi kondah kurorre. Dja ngad minj kurorrewaken bininj. Kaluk yerrekeh wanjh karrire kore nungka karridjarrkdi. Bu bolkkime ngad yiman kubolkbuyikabeh. Ngaye wanjh djawahdjawan ngudberre bu ngahyime kab yuwn bu munguyh kunwarre ngurrikurduyime kore

kunburrkenh ngurridjare. Dja bu kunmekbe ngurrikurduyime wanjh kunukka kunmalng ngudberre ngurriwarreworren ngudmandeleng.

12 Ngudda mak ngurriburrbun nawu bininj ngurridjarrkdi, dja yikahwi minj kabirriwoybukwon Jesus. Dja bedda kunubewu ngundidjalyolyolme. Dja kunukka bonj. Dja ngaleng wanjh ngurridjalkurduyimen kunmak, ba bu birrimekbe bininj ngundikurdunan, wanjh kunukka kabirriburlume God bu kunmekbe kabolkyimerran bu nungka kamre.

13 Ngudda kunu ngurrbenwokmarrkma bininj nawu kabirriwohrnawohrnan kunred kondah kurorre, dja mak manbu mankarre rowk ngalenggarre. Kuhni wanjh ngurrikurduyimen nuye nawu Kawohrnan Rowk. Dja mak ngurriwokmarrkma bininj nawu kawohrnan kubolkkimuk kore ngurrihdi.

14 Dja mak ngurrbenwokmarrkma nawu kabindidjadme bininj kore court. Bedda kabindimarnedurrkmirri nawu government bu kabindidung nawu birriwarre bininj, dja mak kabindiburlume bininj nawu kunmak kabirrikurduyime.

15 God kadjare kunmak ngurrikurduyime ba bu ngurrbenwokngurdke bininj nawu kabirridjalyolyolme kunwarrekenh, dja minj njale kabirriburrbun.

16 Ngudda wanjh minj njale mak ngunbongkarmme ngudberre, dja ngaleng ngurridjalmarnedurrkmirrin nawu God, dja yuwn ngurriburlumerren bu ngurriyime, "Ngaye wanjh God nganbebkeng bu minj ngayawoyhbongdi, dja bolkkime ngaye wanjh ngadjalkurduyime kore ngayeman ngadjare."

17 Dja ngurrbendjalmarneyimen kunmak nawu birriwarlahkenh bininj. Mak ngurrbenmarnedjarenin nawu ngurridangerren bininj kore ngurridjarrkwoybukwon. Dja mak ngurrimarnekelenin nawu God. Dja mak ngurriwokmarrkma bininj nawu kawohrnan kondanjkuwu kubolkkwarlahkenh rowk garre.

*Dja Ngad Wanjh Karingunjdjika Nawu Jesus Kore Kurdukurduyimi
1 Peter 2:18-25*

18 Ngudda nawu bininj ngurribongdi kore ngurrbenmarnedurrkmirri birribuyika bininj, wanjh yikahwi nawu ngundimarnewohrnan ngudberre nakka birrimak, dja mak birribadbuyika nawu ngundimarnewohrnan, nakka wanjh ngundimarnekarrerayekwon. Wanjh kunu bonj, ngaleng ngurrbendjalwokbekkan dja ngurrbenwokmarrkmang birrimekbe bininj kore ngundihmarneyime ngudberre.

19 Mah, kandibekka. Bu kunrayek kabimarnebebme nangale bininj bu djal mankarreburudjang, dja bu namekbe bininj kadjaldi kamak dja nungka munguyh kadjalburrbun God, wanjh kunukka God nungan kabimakwan namekbe bininj.

20 Bu bininj kunwarre kakurduyime, wanjh kunukka nawu kawohrnan bininj bedberre wanjh kabikukmorrong, wanjh kunukka minj nangale mak kabiburlume dja nungan warreworrij bu kunrayek bimarnekurduyimerran.

Dja ngudda bu yiman kayime ngundidjuhbnun ngudberre bu djal mankarreburudjang, wanjh kunukka ngurridjalbawo ngunmarnekurduyimerran, ba bu nungan God ngundjalburlume.

21 Kuhni wanjh God kadjare ngurrikurduyime. Wardi ngurridjalburrbu bu Christ kanjbangminj bu djakbekkabekkan ngudberre. Kuhni wanjh nungka bolkkime kadjare ngurridjalngunjdjikan munguyh bu ngurridjalmunkekadjung.

²² Ngurriburru bu kuhni bimbuyindanj, yimeng, “Nawu nungka minj kurduyimeninj kunwarre, dja mak minj njale yimeng manbu minj kunwoybuk kunwok.” [Isaiah 53:9]

²³ Bu bininj birridungi, wanjh nungka minj baleh benmarneyimeninj bu benduyi. Kore nungan djakbekkani, minj nungka benwohduyi nawu birrimakbe bininj bu birrimarnekurduyimi kore birribuni. Nungka bendjalbawong kaluk yerrekah nungan God kabendjadme dja nungan nawu kabendjadme bininj rowk bu djal mandjad.

²⁴ Yoh, ngad wanjh karriwokweng God. Dja Jesus nungan kanmarne-doweng kadberre kore kundulk cross dja kuhni wanjh ngorrkang kunwarre rowk kadberre. Nungka kuhni kurduyimeng ba ngad karribawon kunwarre bu munguyh, dja minj karriyawoyhwokwe God. Dja ngaleng, karridjalkurduyimen munguyh kore nungka kayime kunmak. Bu kuhni nungka djakbekkang kore nungka nuye kunmorninj, wanjh kunukka kanmarnbom bu karrimakminj kore God.

²⁵ Nungka wanjh kuninjkuu kurduyimeng ngudberre bu ngudda ngurrikukbengwabom yiman kayime nawu sheep rerrih. Wanjh bolkkime ngudda ngurrimdurndi kore nungka nawu ngunnahnan, yiman bu kayime bininj nawu kadjalmirndenahnan mayh nuye sheep. Kaluk nungka ngunmalngnahnan ngudberre.

3

Ngudda Nawu Nabihbininj kobeng Dja Ngalbihbininj kobeng Wanjh Ngur-inanarrimen

1 Peter 3:1-7

¹⁻² Ngaye ngadjare marneyime ngudberre ngudda daluhdaluk nawu ngurribenbebbekarrme nabihbininj kobeng. Wanjh ngurribenwokmar-rkma nawu nabihbininj kobeng ngudberre. Kaluk yikahwi nawu bir-rimekbe nabihbininj kobeng minj kabirriwokmarrkmang God nuye kun-wok, dja bu ngundinan ngurrikurduyime kunmak duninj, wanjh kunukka bedmanwali kabirrimarnedjaremulewarren nuye God. Minj ngurribengdayhke djal kunwokwi ngudberre, dja bedda ngundikur-dunan wanjh kunmekbekenh kabirriwoybukwon God nuye kunwok.

³ Dja yuwn bu ngurrikukmahmaworren yiman bu ngurringabekmarn-burren, dja yiman ngurribendedukarren gold, dja mak ngurridjohdjong-burren nawu namakmak kunmadj. Kuhni wanjh yiman kunburrkwi kore ngalengman ngarre.

⁴ Dja ngaleng ngurrikangemarnburrimen bulkkidj duninj kore kukange ngudberre kanjdji baybaywi, dja mak ngurrimodmikenhnin. Kunmekbe kunu wanjh God kadjare, wanjh kunu ngunmakwan.

⁵ Wardi ngurribenbalburru bu birrimakni daluhdaluk korroko bir-riyungkihni bu birridjalwoybukwoni God munguyh. Bedda wanjh birrid-jalkangemarnburreni dja mak bindiwokmarrkmangi nabihbininj kobeng bedberre. Wanjh kunmekbe ngurribenngunjdjika bu ngurrikurduyimen.

⁶ Ngalbu Sarah wanjh biwokmarrkmangi Abraham nawu nabinin-jkobeng ngarre, bu bimarneyimi, “Ngudda nawu kanmarnewohrnan.” Wanjh bu bolkkime ngudda ngurrikurduyimen kunmak, dja yuwn mak ngurrikele, ba bu kunukka ngurriyimerran yiman Sarah ngalyayaw ngalengngarre.

⁷ Dja ngudda bininj nawu ngurrbenkarrme ngalbihbininj kobeng, wanjh ngudda ngurridjalkurduyimen kunmak. Ngurrbennjilngmarnbu ngalbihbininj kobeng ngudberre. Mak ngurrbennahna dja bedda minj birrimur-rngarayek yiman kayime bininj. Wanjh ngurriburrbu God ngunmimbiwon dja ngunwon ngudberre kunmakmak ngudda nawu nabihbininj kobeng dja mak ngalbu ngalbihbininj kobeng kore ngurriyo. Dja ngaleng nguned-jalyuwn ngalbininj kobeng ke, bu yidjalnahna. Dja bu burrkyak, wanjh God minj ngunwokbekkan bu yihdi yiwarrudj.

Bu Karrimarnburren Kore Kunmakkenh

1 Peter 3:8-12

⁸ Bonj. Wanjh kunwern marneyimeng, dja med, kunbuyika mak ngayime. Kab ngurridjal mayalikudjihnin, dja mak ngurrikongiburrimen. Kab ngurrimarnedjaremerrimen yiman kayime ngurridangerrinj rowk, dja ngaleng, ngurrinahnarrimen. Yuwn ngurribebbehburlumerren ngudmandeleng.

⁹ Mah, dja kandibebbehbekka. Bu nangale bininj ngunmarnekurduyime kunwarre, wanjh yuwn yiyurmidung bu yimankek yibunkenh. Dja bu nangale ngundangwe, wanjh yuwn bu yiborledme yirrangwe bu ngunebaldangwerren. Dja ngaleng yidjalmarneyimen, "Ngadjare God ngunmarnekurduyime kunmak!" Kuhn God kadjare nawu ngunkayh-meng ba bu nunganwali ngunmarnekurduyime ngudberre kunmak dunjh.

¹⁰ Kuninj kunu ngudda ngurriburrbu kore kabimbuyindi, dja kayime, "Nawu nangale bininj kadjare kundjalmak kabimarnekurduyimerran nuye, bu kahni kunkuyeng, wanjh yuwn bu kayolyolme kunwarrekenh, dja mak minj kakurren.

¹¹ Nungka wanjh kaborledkerren bu kabawon kunwarre rowk, dja wanjh kakurduyime bu djal kunmak. Dja mak djaldjarenin munguyh kore God nuye kunmodmikenh.

¹² Nawu Kawohrn Rowk kabennahnan nawu birridjalmak bininj, dja kabennarnebengyirri kore kabirrihdi yiwarrudj nuye. Dja nangale nawu kadjalkurduyime kunwarre, wanjh nawu Kawohrn Rowk nunganwali kabibodmekenhwon." [Psalm 34:12-16]

Baleh Karriyime Bu Kunyid Kambebme Kadberre Ngad Nawu Karriwok-marrkmang God?

1 Peter 3:13-22

¹³ Bu ngudda ngurridjare ngurridjalkurduyimen kunmak munguyh, yiddok birriwern bininj kunukka ngundidung? Burrkyak.

¹⁴ Dja med, baleh ngurriyime bu ngudda ngurridjalkurduyime kunmak dja yikahwi bininj ngundiwirrihme dja kunyid ngunmarnebebme. Wanjh yuwn bu ngurrikelemen yiman bedda. Bedda wanjh kabirrikengehme yehyeng rowk, dja ngudda burrkyak!

¹⁵ Ngudda wanjh ngurridjalburru Christ nawu Kawohrn Rowk kore kukange ngudberre. Dja bu nangale ngundjawan kuninj kunukenh bu ngundinan ngurridjalwernhwoybukwon God, wanjh ngurrben-marnemulewarrimen bedberre. Munguyh ngurridjalyingkih marnburri-men bedberre bininj bu ngurrbenmarneyolyolmekenh kunwok kunmak. Dja ngaleng, ngurrbenbengdayhke bu djal yelehyeledj dja yuwn ngudmandeleng ngurriburlumerren.

¹⁶ Dja wardi yikahwi bininj ngundiolyolme manburudjang, bu ngudda kunmak ngurrikurduyime nuye Christ. Wanjh ngurridjalkurduyimen

kunmak duninjh, dja yuwn bu mak ngurrikurduyime kore yimankek ngurriburrbun kunwarre. Wanjh kunukka birrimekbe bininj kabirriyemengalme bu bulkkidj duninjh.

¹⁷ Bu kunyid kamarnbuyindan ngudberre kore kunwarre ngurrikurduyime, wanjh bonj, kunukka wanjh ngudman ngudberre. Dja bu ngurrikurduyime kunmak duninjh dja ngurridjalngalke kunyid, wanjh kunukka kamak. Kunubewu God nungan ngunbawon bu kunyid kambebme ngudberre.

¹⁸ Kunmekbe wanjh Christ bimarnekurduyimerranj bu doweng kadberre. Kaluk kunmekbeni bu doweng kundjalkudjihkenh, wanjh nungka djalbularrbom kunwarre kadberre rowk bu djalmunguyh munguyh. Nungka nawu minj kunkudjihkenh kunwarre kurduyimeninj, dja doweng bu ngadkenh karriwarlahkenh bininj nawu karriwokweng God bu kunwernhkah. Nungka kuninjkunu kurduyimeng ba bu kandurndiwe kadberre rowk kore God. Bu nungka Jesus doweng, kukyoy, wanjh nawu Namalngmakkaykenh biyawoyhmimbiwong.

¹⁹ Dja bu Jesus kunburk kuyonginj, wanjh malngdarrkiddi dja wam benbengdayhkeyi bedberre bininj nawu birrimalngdarrkiddi kore birridangbalhmiyindi.

²⁰ Kaluk birrimekbe bininj nawu birriwarreni nawu kerngehenhni birriwokweyi God bu nungka bendjalmadbuni munguyh, bu kunmekbe bolkyimi Noah marnbuhmarnbuni kabbala manbu ngeyyoy ark. Kaluk birridjalmirndekudjini bininj nawu kunbidkukudji dja danjbik birringimeng kore mahni kabbala, wanjh birrimekbeni bininj nawu God bengehkeng bu bomunkeweng kundjurrhkimuk wam ngakkeng kunred yakwong rowk.

²¹⁻²² Kuhni bu benmarnekurduyimerranj, wanjh yiman kayime bu bolkkime God ngungehkenh ngudberre bu ngurrikukdjuhmi kukku kore baptism ngudberre. Kaluk manmekbe kukku minj ngunwernhkukbelewoyi kunburkkenh ngudberre, dja ngaleng bu ngurrikodjdjuhmi wanjh ngurridjawam God bu ngunkangebelewon bulkkidj duninjh kukange ngudberre dja wanjh kunukka ngunmakwan ngudberre. Kuninjkunu God kanmarnekurduyimeng bu Jesus Christ dolkkang kore dowengbeh bu wam kore heaven. Bolkkime wanjh nungka kahni kore kukun nuye God dja kadjalwohrnan rowk bedberre nawu angels, dja mak nawu birrikuken dja nawu birrikihkimuk kore heaven kabirrihni. Bedda wanjh kabirriwokmarrkmang nungka nawu kabenyurrhke rowk.

4

Ngurribawo Kunwarre Rowk Kore Birribuyika Bininj Kabirridjare *1 Peter 4:1-6*

¹ Christ nungka djakbekkang dja kanjbabangminj kore kunburk nuye. Wanjh ngudda ngurrimayalimarnburrimen yiman nungka yimiyimi. Bu ngudda yiman ngurrikanjkurrmerren wanjh kunukka ngurridjalbawon kunwarre bu munguyh.

² Wanjh bolkkime minj ngurriyawoyhkurduyime kore birriwarlahkenh bininj kabirridjalkurduyime kunwarre, dja munguyh ngurridjalkurduyimen kunmak kore God kahdjare.

³ Ngudda korroko ngurridjalkurduyimi kunwarre, yiman birribuyika bininj nawu kabirrimarneboddan nawu nawarrekenh idols. Bu ngudda ngurridjalwohdjirdmarreni, dja munguyh ngurridjaldjareni kunwarre. Ngudda wanjh ngurrihbonguni kunbang bu ngurriworrromkani munguyh,

dja mak ngurrimirndemornnamerreni bu ngurridjarrknguni manme kore kunwarrekenh, dja mak ngurridjarrkbonguni dja ngurridjarrkboyikad-jurreni munguyh, dja mak ngudda ngurrireng ngurrimarneyidngalkerreni ngudmandeleng. Dja mak ngurriaworinj bu ngurrimarnedi nawarrewarre nawu idols, wanjh kunukka kundjalwarre duninj!

⁴ Dja bolkkime ngudda ngurrbenbawong dja minj mak ngurriya-woyhraworren birrimekbe bininj bu munguyh kabirridjalyime kunwarre duninj. Wanjh bedda bolkkime ngundimarnekangebarrhme dja ngundidjalmarneyime kunwarre.

⁵ Bedda wanjh yerrekah kabirrimarnemulewarren nuye nawu Christ. Bu nungka kayingkihmarnburren wanjh kandjarrkdjadme ngad nawu karridarlahkenh bininj nawu karridjaldarrkiddi, dja mak nawu korroko birriworrinj.

⁶ Kunmekbekenh kunu Christ wam benbengdayhkeng bininj nawu korroko birriworeng kore kunburkwi. Bedda nawu birribuyika korroko bindidjadmeng kore kunburkkeh. Dja Christ djareni bu bedda kunubewu kabirrimalngdarrkiddi kore God.

Bu Ngad Karrihbalni Kore Kayiburnbunkeh Kabolkyimerran
1 Peter 4:7-11

⁷ Bolkkime wanjh darnkih kore kayiburnbunkeh, wanjh ngurribeng-maknin dja ngurrimayalimarnburrimen ba bu kunukka ngurridjaldi yiwarudj mandjad.

⁸ Maninjmanu mankarrekuken duninj manbu kahdokme, wanjh kahyime munguyh ngurridjalbebbemarnedjaremerrimen. Wanjh ngurribur-rbu kore kabimbuyindi kayime, "Nawu nangale bininj yimarnedjare wanjh kunu munguyh yimarnebengmidjda nuye kore kunwarre ngun-marnekurduyime." [Proverbs 10:12.]

⁹ Dja mak munguyh ngurrikimarrimen kore kunred ngudberre, wanjh kuninjku bu ngurridjalkurduyimen bu ngurrijilngmaknin dorreng, dja yuwn bu ngurriwokkihjurluhnjurlukme ngudmandeleng.

¹⁰ God ngunbebbehwonowong kunmakmak ngudberre ba bu ngurri-marnedurrkmirri nuye. Nungka kadjare bu kamak ngurridurrkmirri kun-bebbehbuyika kore kunmakkeh rowk bu ngurribidyikarmerrenkenh.

¹¹ Ngayime bu nangale bininj kawokdi kore ngurrimirndemornnamerren, wanjh nungka mandjad duninj djalweyka kore God nuye kunwok duninj. Dja bu mak nangale kabenbidyikarme birribuyika bininj, wanjh bidjawa nungan God ba bu kabimurrngayekwon kore karrurkmir-rikenh. Wanjh bininj ngundinan kore ngurrikurduyime kuninjkukenh, wanjh bininj kabirridjalburlume God bu kunmekbekenh Jesus Christ nuye nawu nawernhmakkaykenh duninj dja nadjaldulkarrekimuk duninj bu munguyh munguyh. Amen!

Ngurridjalnjilngmaknin Munguyh Bu Kunyiid Kambebme Ngudberre
1 Peter 4:12-19

¹² Ngudda nawu gaye marnedjare, wanjh kandibekka. Bu kunwern kunyid kamre ngudberre, yiman kayime kunak kawurlhmerren ngud-berre, kaluk yuwn bu ngurribangmekangebarrhme. Minj kuhni bu kunkerngehenh, dja ngaleng kuhni ngunrohrokme.

¹³ Bu kuninjku bu kakurduyimerran ngudberre, wanjh ngurridjalw-ernnjilngmaknin duninj, bu ngudda ngurridjakkakkan yiman ngurri-aworren Christ kore yingkihdkabekkabekkang korroko. Wanjh yerrekah bu birriwern bininj kabirrikukan dja kabirriwohburrbu bu Jesus

nadjalmakkaykenh dja nadjalmakmak duninj, wanjh kunukka ngudda ngurridjalwernhnjilngmakmen duninj.

¹⁴ Dja bu birribuyika bininj ngundiyolyolme bu ngurrihngeykayhme nawu Christ, wanjh kunukka God kadjalkurduyime munguyh kunmak duninj ngudberre. Yoh wanjh, ngurridjalnjilngmaknin, dja God nungan nuye Namalngmakkaykenh ngunmarneni kore kukange ngudberre.

¹⁵ Dja bu nangale ngudda bininj yikurduyime kunwarre, mak bu kunukka yingalke kunyid, wanjh djal yingan. Bu yiman yibun bininj, dja mak bu yidjirdmang njalenjale nuye, dja mak bu yimarnbun kunyid bedberre, wanjh kunukka yingan djal ke.

¹⁶ Dja kunbuyika bu ngudda ngurringeyyo “Christian” dja kunmekbekenh kunu kunyid kamarnbuyindan ngudberre kore Christkenh, wanjh yuwn mak ngurriyeme! Dja ngaleng ngurridjalburlumen God bu kunmekbekenh bininj kabirriyime ngudda nawu ngurringeyyo “Christ nuye bininj.”

¹⁷ Christ nungka yingkihdedjingmey bu kabendjadme nawu bininj rowk. Nungka kandjadme ngad werrk nawu bininj nuye karrihni. Dja woybukkih, nungka dedjingmey bolkkime bu kandjadme nawu nuyekih bininj, wanjh kunukka kawernhkarrerayekmen duninj bedberre birribuyika bininj nawu minj kabirriwokmarrkmang manbu kunwok kunmak nuye!

¹⁸ Dja ngurriburrbu kore djurra bimbuyindanj, bu yimeng, “Nawu namak bininj bu kakuyindowe, wanjh God kaluk nungan kabingehke kore darnkih karrownenkenh. Dja bininj nawu minj kabiwokbekkan God nuye kunwok wanjh bonj dja mak kunwarre kadjalkurduyime, wanjh minj God kabingehke namekbe bininj.” [Proverbs 11:31]

¹⁹ Mah wanjh, bu God ngunbawon ngudberre bu kunyid ngunmarnebebm, wanjh kunu ngurridjalkurduyimen djal kunmak munguyh, dja ngaleng ngurrikurrmerren bu God nungan ngunmalngnahan ngudberre. Ngurriburrbu bu nungka ngunmarnbom, dja mak minj kangurdme bu munguyh ngundjalnahan ngudberre.

5

Bininj Nawu Kabirriwohrnan Kore Yiwarrudj Ngudberre

1 Peter 5:1-5a

¹⁻² Mah, wanjh ngaye ngadjare wohbengyolyolme ngudberre nawu ngurriwohrnan yiwarrudj ngalengngarre. Ngaye mak ngawohrnan ngarre yiwarrudj, dja mak nganang kore Christ djakbekkabekkan. Kaluk yerrekah bu God kankukbukkan Christ kadberre karriwarlahkenh bininj rowk, wanjh ngaye karridjarrknan bu nungka wanjh God duninj.

Kunmekbekenh ngaye djawahdjawan ngudberre bu ngudda djal mandjad ngurrbenmarnewohrnahwohrnan bedberre bininj nuye God. Dja mak ngurrijilngmak dorreng bu ngurrikurduyimen. Dja yuwn bu ngurridjaldurrrkmirri kunwarddekenh ngalengngarre yiman kayime nawu money ngurrihngang. Dja yuwn bu mak ngudmandeleng ngurrikongiburren kore ngurridurrrkmirri. Ngudda wanjh yiman kayime bininj nawu kahmirndenahan mayh nawu sheep. Wanjh God nungandeleng ngunwong ngudberre bininj nawu ngurrbennahan, wanjh ngurrbendjalmarnenjlilngmaknin bedberre.

³ Dja mak yuwn bu ngurrimarnburren bu ngurriburluburlumerren bedberre birribuyika bininj, dja ngaleng kunmaknin ngurrbendjalmarnekurduyimen ba bu bedmanwali ngundingunjdikan wanjh kunmak kabirrikurduyime.

⁴ Ngad wanjh karrbennahn Christ nuye bininj yiman kayime shepherds, dja nungka wanjh kawohnan rowk kadberre, yiman kayime ngad bu sheep yayaw nuye. Bu ngudda mandjad ngurrbennahn nanawu bininj nuye, wanjh kunukka Christ ngunkarremulewan nawu kahkarrme ngudberre bu nungan kayawoyhkukbukkarren kadberre. Nungka ngundjalkarremulewan bu ngunwon nuye namakkaykenh duninj nanawu minj kayakmen.

^{5a} Ngaye mak ngadjare marneyime ngudberre nawu bininj ngurringudjmakmak. Bu ngurrbenwokmarrkma birridabbolk bininj nawu yiwarrudj kabirriwohrnawohnan.

Ngurriyibawo Kore Nungan God Ngunbidyikarmekenh

1 Peter 5:5b-11

^{5b} Bu ngudda wanjh ngurrimarladjdaworrime bu minj ngurribebbehburlumerren kore ngudberre. Dja ngurriburrbu kore bimbuyindanj, "God kabendenghe nawu kabirriburlumerren bininj, dja bininj nawu kabirrimarladjworren, wanjh kabennahn." [Proverbs 3:34]

⁶ Mah, wanjh. Ngurrimarladjworrimen dja ngurrikurmerrime kubid nuye God nawu wernhdulkarrekimuk duninj ba bu yerrekah nungan ngundolkkayhwe kore nungan kabolkname.

⁷ Nungka wanjh kadjare ngundjalwernhnahn ngudberre munguyh, wanjh ngurrimarnemulewarrime nawu njalenjale rowk bu ngunkangewarrewon munguyh.

⁸ Munguyh ngurridjalburrbu bu kahkurduyimerran ngudberre, dja mak ngurrinahnarrime rowk. Nawu namarnde duninj ngundjalwidnan bulkkidj, dja yiman kayime mayh nabang duninj wanjh kabalwokkihere kabolkwayawawan bu kadjare wanjh ngunkukngun kaworrkmiworren. Kunmekbe ngurridjalnahnarrime rowk!

⁹ Dja bu yiman kamre kore ngudda, yuwn bu yimarnekelerlobme, dja yidjaldin, yidjalwernhwoybukwo God. Mak yibenbalburrbu nawu birbuyika bininj ngurridjarrkwoybukwon God kore kubolkbubuyika rowk, wanjh karohrok kunyid kabenmarnekurduyimerran bedberre kunmekbe yerreh.

¹⁰ Bu ngudda ngurridjalwohdjakkbekkan bu kundedjumbungkenh, wanjh nungka God nawu mimkongiwern duninj ngundjalwernhkongibun ngudberre, kaluk nungan ngunmarnbun dja ngunkurrme ngudberre kore kunmak rowk, wanjh ngunmurrngrayekwon munguyh munguyh dja kumekbe minj njale ngunrokayhwe. God nungan ngunyinkihkayhmeng bu ngunmey ngudberre dja ngunkukbelbmeng kore Christ ba bu ngurridjarrkd kore nungka munguyh munguyh, wanjh kunukka kundjalwernhnmak kayimerran ngudberre.

¹¹ Ngaye wanjh ngadjare bu nungka kadjalwernhwohrnan kore yehyeng rowk bu munguyh munguyh. Wanjh bonj.

Ngaye Ngadjare Woknan Ngudberre

1 Peter 5:12-14

¹² Nungka Silas* nganbidyikarmeng bu ngabimbom nanihnjanu nayahwurd djurra ngudberre. Ngaye wanjh ngamarneyime nungka nawu yiman nganedjaldanginj duninj, nawu munguyh nganbidyikarrkarme. Ngaye kuninjkuwu ngabimbom bu murrngrayekwon ngudberre dja marnemulewam kore God kanwernhkongibun kadberre. Kuhni wanjh woymbukkih duninj, dja wanjh ngurridjaldin kore kuhni ngurriwoybukwon.

* 5:12 Silas kangeyrohrok Silvanus.

¹³ Ngaye ngarrihdjarrkni kondah kore yiwarrudj bedberre bininj kore kunred kabirribolkngeybun "Babylon". Bu bedda ngundimarnedjawayhmeng kunwok kunmak dorreng kore ngundimarneyimeng ngudberre. God bendjarrngbom bedda warridj. Dja mak nawu Mark, nawu yiman ngaye ngardduk beywurd, ngunmarneyimeng ngudberre kunwok kunmak.

¹⁴ Wanjh ngurrikunibunjhmarrimen kore ngurrimarnedjaremerrenkenh. Ngaye ngadjare God ngunwon kunmodmikenh ngudberre ngudda bu ngurribelbmerrinj nawu Christ.

2 Peter

Ngaye Peter Ngabimbom Nahni Djurra

2 Peter 1:1-2

¹ Ngaye Simon Peter, nawu ngamarnedurrkmirri nuye Jesus Christ, dja mak nganmunkeweng ngaye bu apostle nuye. Ngaye dja nawu bininj ngarrihni kondah ngarriwernhnjilngmak duninh kore ngarriwoybukwon Jesus Christ nawu God kadberre bu kannghehkeng rowk. Nungka wanjh nadjalmak duninh, dja kandjadme bu mandjad duninh. Bolkkime nungka ngunmarnbom ngudberre warridj ba bu ngurriwoybukwon nungka yiman ngad dja karridjarrkkarme mahni kunwoybuk mandjal-mak duninh. Wanjh ngaye ngabimbun nahni djurra ngudberre.

² Ngaye ngarri yiwarrudj ngudberre ba bu munguyh God ngundjalwon nuye kunmodmikenh dja mak ngundjalkongibun ngudberre, bu ngurri-borlhme nawu God dja mak Jesus nawu kawohran kadberre.

Ngurrimarnburrimen Kore Ngurrimunkekadjung Nawu Christ

2 Peter 1:3-11

³ Nawu God dulkarrekimuk duninh wanjh nungka kanwong nawern nawu namakmak ba bu karridarrkiddi kunmak dorreng, dja mak bu ngarrimarnekurduyime mandjad nuye kore karriborlhme nuye. Nungka wanjh God duninh nawu nadjalwernhmak, dja nawu kundjalmak kakur-duyime, wanjh kunmekbekenh kankayhmeng kadberre.

⁴ Yoh, God wanjh najdalwernhmak dja munguyh kakurduyime bu djal kunmak. Kunmekbekenh kunu nungka kanwong kadberre kunwern nawu namakmak kore kanmarnewokkurmerrinj. Kunukka bolkkime wanjh yiman karribelbmerren nawu God, dja karriyimerran yiman nungka, dja wanjh karridjalbawon munguyh manbu kunwarre kore bininj nawu kondah kurorrebeh kabirrimarnbun bu kabirridjaldjare kunwarre duninh.

⁵ Wanjh kunmekbekenh ngudda ngurridjalkangewoybuknin, dja ngur-rirohokmen bu ngurriyimerran ngurridjalmak bininj. Dja mak munguyh ngurriborlhmen nawu God.

⁶ Munguyh ngurridjalborlhmen dja mak ngurrimarnburrimen ba bu kunmak ngurriyime, dja yuwn bu kunwarre. Yuwn bu mak ngurriwarnyakmulewarren, dja wanjh ngurridjalngunjdjika nawu God munguyh.

⁷ Bu ngurringunjdjikan nawu God, wanjh ngurridjaldabbolknin warridj nawu birribuyika bininj bu ngurridangerrinj kore Christ, dja mak ngurri-marnedjaremerrimen.

⁸ Bu kuhni rowk ngurridjalkurduyime munguyh, wanjh kunukka minj ngurringudjywarren, dja wanjh ngurriwernhdurrkmirri dja ngurrikur-duyime kunmak kore ngurridjalborlhmen kore Jesus Christkenh nawu Kawohran Rowk.

⁹ Dja nawu nangale bininj bu minj kunmekbe kakurduyime wanjh nakka nanu yiman kayime bininj nawu mimbunje, dja minj bu kawernhbolknan mandjad duninh, dja wardi balkunibengmidjdanj kore God ngokko bikangedjirridjibom kore kunwarrekenh nuye.

¹⁰ Nawu karridanganj, kunmekbekenh wanjh marnehmarneyime ngud-berre, kab ngurridjaldurrkmirrin kore kunrayek dja minj ngurrimarrk-bawarren. Ngurridjalwernhburrbu munguyh bu God ngunkayhmeng dja

nguningkihdjarrngbom, dja kunmekbekenh kunu ngurridjalkurduyimen rowk kore ngaye bolkkime bengdayhkeng, dja wanjh kunukka minj ngurriyawoyhmankan kore kunwarre.

¹¹ Dja mak Jesus Christ nungan ngunkimang ngudberre ba bu ngurringimen nuye kore nungka kawohrnan rowk munguyh munguyh. Nungka nawu kanngehkheng dja kawohrnan rowk kadberre.

Ngaye Wanjh Yawoyhbengdayhke Bu Kuninjkunukenh Rowk

2 Peter 1:12-15

¹² Wanjh ngaye munguyh bengdayhke ngudberre bu kuninjkunukenh kore kunwoybukkenh rowk. Dja ngaye ngaburrbun bu ngudda ngokko ngurriborlhmeng dja mak bolkkime ngurriwernhwoybukwong manbu kore kunwoybuk ngundimarnemulewani bu ngurribekkani.

¹³ Ngaye ngayime kamak bu ngaye munguyh djadjalbengdayhke ngudberre bu ngahdjaldarrkiddi, wanjh yerre kunu ngabaldowen, dja bonj.

¹⁴ Jesus Christ nawu kawohrnan kadberre nganmarneyimeng mandjad, dja ngaye ngaburrbun bu darnkih kamre bu ngabawon ngardduk kunburrk manbu karrownen.

¹⁵ Kuhni wanjh kundjalwernhrayek duninjh bu ngahdurrkmirri ngudberre ba bu minj ngurribengmidjdan kuninjkunu rowk wanjh yerre kunu ngarrownen.

Ngaye Marneyime Bu Woybukkih Duninjh Jesus Christ Wanjh God Nuye Beywurd

2 Peter 1:16-18

¹⁶ Ngad wanjh ngundimarnemulewam bu Jesus Christ nawu kawohrnan kadberre kumwam, kundulkarre kunkimuk dorreng. Kuhni bu wanjh djalwoybukkih duninjh kore ngundimarneyimeng ngudberre. Kaluk ngad minj ngundimarneyimeninj kore bininjbeh mankarre, yiman bu bininj birrikodjkuludjad kabirrikarremarnbun manbu minj kunwoybuk bu kabirriyolyolme. Burrkyak, dja ngad kunu kunmim ngadberre ngarrihnang nawu Jesus dja mak ngarriwohburrbom bu nungka nawu nadjalwernhkimuk dja wanjh king duninjh.

¹⁷ Ngad wanjh ngarribekkkang bu Ngabbard God nawu Nadulkarrekimuk duninjh dja Nawernhmakkaykenh wanjh wokdanj, biburlumeng dja mak bimakwam Jesus bu biyolyolmeng, yimeng, "Nanihnjanu bininj wanjh ngaye ngabornang. Ngaye ngamarnedjare, dja mak ngadjalnjingmak nuye munguyh." [Matthew 17:5; Mark 9:2-7; Luke 9:28-35]

¹⁸ Bu kunmekbe Jesus ngankang ngadberre bu ngarridjarrkdi kore kurulum manbu kubolkdjamun. Wanjh kunmekbe ngadman ngarriweleng ngarriwokbekkkang bu kumwokdanginj kore heavenbeh.

Karriwoybukwon Kore Bible Kabimbuyindi

2 Peter 1:19-21

¹⁹ Wanjh kunmekbekenh kunu karriwernhwoybukwon manbu kunwok kore prophets birrimulewani. Makka manu mandjalwoybuk duninjh. Kab munguyh ngurridjalburrbu manmekbe kunwok, manbu yiman kunak kahrung dja kabolkwolkan kore kubolkmunun. Kahdjalarung kadberre kunkakkuyeng, kaluk bu Christ kamdurneng yiman kayime kunbarnan-garrakerrnge kambarrhbun kore kukange ngudberre.

²⁰ Dja mak manbu kundulumuk marneyime. Bu ngudda ngurribimnan kore nawu prophets birribimbom, wanjh kunukka minj nawu prophets bu bedmanwali birrimayalimarnbuyi kore birribimbom.

²¹ Burrkyak. Nawu prophets minj bedman birribimbuyi kore birridjareni, dja mak kore bedman minj birriburrbuyi. Dja wanjh nanu nungan

Namalngmakkaykenh benmarnbuni bu birridjalwokdi mandjad manbu kunwok kore Godbeh.

2

Yikahwi Bininj Nawu Ngunbukkabukkan Wanjh Kabirrikurrehkurren

2 Peter 2:1-3

¹ Bu kunkare, yikahwi nawu prophets birridjalkurreni bu bindidjalkoweyi nawu birribuyika bininj yimankek birriyimi bedda woybukkih prophets, dja bedda kunu birridjalkurreni. Mak yikahwi nawu bininj kabirrimre kore ngudda ngudberre wanjh yimankek bedda kunu nawu bininj kabindibukkabukkan dja wanjh nanu manmolok ngundihdjalkowe ngudberre bu ngundimarneyolyolme kore kunwok kunwarre. Kaluk bedda kabirridjalwirrihme nawu Kawohnan Rowk, nawu king duninj, nawu nungan benkukkarremulewam bedberre! Wanjh kunukka werkkwerrk kabirridjalbularrbuyindan.

² Birriwern bininj wanjh kabindimunkekadjung birrimmekbe nawu kabindibukkabukkan kunwarrekenh kunyeme dorrengh. Kaluk nawu birribadbuyika bininj bu kabindikurdunan bedberre, wanjh kunu kabirriwirrihme manbu kunwok kunwoybuk.

³ Bedda nawu birriwarre bininj bu kabindibukkabukkan wanjh kabirri-manjngun nawu njalehnjale rowk ngudberre, dja mak bedda ngundikowe bu ngundimarneyolyolme mankarre manbu djal bedberre, dja minj kunwoybuk. God wanjh nungka korroko yingkihkarremarnbom bu kaluk kabenbun, dja nawu nungka minj kakeyo!

Bu God Kayiddung Dja Kabenbun Birriwarre Bininj

2 Peter 2:4-9

⁴ Ngurriburrbu kore God kurduyimi bu kunkare. God minj benbawoyi nawu angels bu birrikurduyimi kunwarre, dja bendjalkukburriweng kanjdji kore kabolkngeyyo hell. Wanjh benkukdukkan wirlmurrng nawu chains kore kumekbeh kubolkmunun. Kaluk yerrekah wanjh nungka kabenwarrewan ba bu kabirrimalngdowe.

⁵ Bu kunkare duninj nawu bininj birriwern minj birrimarnedjareni-wirrinj God. Wanjh kunu nungka benbom rowk bu kukku mandjur-rkkimuk bomunkeweng bedberre kore kondah kurorre, kaluk nungka minj benkongibuyi bedberre. Dja nungka bendjalnghehkeng yikahwi bininj birrimak, kaluk seven bininj nawu birridjarrkni Noah, nawu benmarneyolyolmi manbu mandjad dja kunmak kore birribuyika bininj. [Genesis 6:1—7:24]

⁶ Dja mak God benwarrewam birriwern bininj kore kunred bokenh bolkngeyyoy Sodom dja Gomorrah dja wanjh bolkbularrbom bu kun-rurrkweren yimerranj yiman kunburle. Nungka kuhni kurduyimeng ba bu birriwarlahkenh bininj kabirriburrbun bu kunmekbeh kayimerran bedberre bininj nawu kabirriwirrihme nawu God. [Genesis 19:24]

⁷ Kaluk bu kunmekbeni God bingehkeng nadjalkudjini nawu ngeyyoy Lot. Nawu nungka namakni dja mak njilngwarreni bu birribuyika bininj nawu birribakkeyi manbu mankarre dja wanjh kundjalwarre duninj birriyimi munguyh. [Genesis 19:1-16]

⁸ Nungka nawu Lot, wanjh nadjalmakni bu kumekbeh birridjarrkni nawu bininj dja bennani mak benbekkani munguyh bu birribakkeyi manbu mankarre. Kaluk kore kukange nuye wanjh djareni bu kunmak birrikurduyimeninj, wanjh nungka munguyh djalinjngwarreni.

⁹ Mah, wanjh kuhni karriburrbun kore God bendjadmeng dja benbuni. Dja mak ngad karriwohburrbun bu nawu Kawohnan Rowk wanjh

kanngehke kadberre ngad nawu karriwokmarrkmang nuye kore kunyid kawernmerren kadberre. Dja nawu birriwarre bininj, wanjh nakka kaluk kabenwarrewan bu kabirrimalngdowe, dja kabenbongkarrme kaluk bu kumnekbeh kunbarnangarra kabolkyimerran kore nungka kandjadme ngad nawu karriwarlah bininj rowk.

Yikahwi Bininj Nawu Kabirrikurduyime Kunwarre Kore Yiwarrudj
2 Peter 2:10-19

¹⁰ Ngayolyolme nawu birridjalwernwarre bininj nakka wanjh God kabenbun. Bedda wanjh kabirridjalkurduyime kore kundjare ngarre kondah kurorrekenh, dja minj mak kabirriwokmarrkmang nuye nawu Kawohnan Rowk. Bedda kabirriwernhkimukworren dja birridjalbang. Minj kabirrimarnekele birridjalmak nawu kabirrihyo kore heaven. Dja ngaleng kabirribolkdung dja kabindimarneyime kunwarre bedberre.

¹¹ Dja ngurriburrbun nawu angels nakka wanjh kabirrikarrme kundulkarre kunkimuk bu kabindiyurrhke birrimekbe nawu kabirrikur-rehkurren bininj, dja bonj, minj bedda kabindiwokdurndiwe kunwok kunwarre dorreng bedberre nawu kabirrikurrekurren kore kumirrk nawu Kawohnan Rowk nuye!

¹² Birrimekbe nawu birriwarre bininj ngabenyolyolme wanjh yiman kayime mayh nawu nabang, nawu bininj kabindimang dja kabindibun. Kabirridjalkurduyime njalehnjale bu mayaliyak. Kabirridjalyime kunwarre kore God, bu kabirriwirrihime kunwern kore minj kabirriburrrkbur-krbekkan. Wanjh nakka nanu kaluk kabirribularrrbuyindan rowk yiman kayime mayh nabang.

¹³ Kaluk yerrekah wanjh manmekbe manbu kunwarre bedberre kaben-marnekarremulewan, wanjh bedmanwali kabenwarrewon. Bolkkime wanjh bedda kabirriyime kunwarre kore kunburk bedberre, dja bu benbekad dja kore kurobbe, wanjh kunu kabirrinjilngmarnburren! Bu bedda ngurriwarren kore mulil ngurridjarrkngun, wanjh kabirridjalburrbun kunwarrekenh!

¹⁴ Bedda wanjh munguyh kabirrikuknarren ba bu kabirrikaliyo kore kunwarrekenh. Munguyh kabirridjare kunwarre kabirrikurduyime dja mak kabindikowe bininj nawu minj birrikangerayek. Dja mak bedda kabirriwernhburrbun bu kabirrimanjngun nawu njalehnjale. God wanjh benwarrewam dja kabendjalwarnyak.

¹⁵ Birrimekbe nawu kabirrikurrehkurren wanjh yiman birribolkbawong manbu manbolhdjad dja birridjalley kore kunwarrekenh. Bedda mak yiman kabirringunjajikan bininj nawu ngeyyoy Balaam, nakka wanjh prophetni dja nawu beywurd nuye Beor. Dja nungka djaldjareni kore kunwarre kurdukurduyimi ba bu njalehnjale nawu mayi rowk.

¹⁶ Wanjh God mandjad duninj bidjalmarneyimeng kore kunwarre kurduyimeng. Kaluk bu kundjalmekebeni wanjh nawu nungan nuyeni mayh nawu donkey bimarnewokdanj yiman bininj yerre kunkommelk. Kaluk namekbe djal mayhni dja wanjh nakka nanu bibengdayhkeng dja mak bingurdkeng bu kore Balaam yiman bengwarminj dja kurdukurduyimi kunwarre. [Numbers 22:4-35]

¹⁷ Nahni nawu bininj ngabenyolyolme, nakka wanjh bedda yiman kayime njilhmi manbu minj kabokarrme kukku, dja mak yiman kayime kunkarndum nawu kunmayorrrkimuk kaburriwe. Kaluk God kabenkurme kore kadjalwernhbolkburlerri kore kadjalkak duninj, kore kayingkihbolkyo bedberre munguyh.

¹⁸ Kaluk nahni bininj wanjh kabirribengwarre kore kabirridjalyolyolme dja kabirridjalburlumerren. Bedda mak kabirrikurduyime kunwern kore

kunburrk bedberre kabenmarnbun, ba bu yiman kabindidarrkidmang bininj nawu birridedjingmey bu kabindibawon dja kabirrikelerlobme kore bedberre nawu kabirrimayaliwarre.

¹⁹ Nawu birriwarre bininj kabindimarneyime bedberre, “Ngad wanjh ngundibeke dja ngundimarnbun ba kamak ngurrire!” Dja kunukka kabindikowe. Bedda kunu wanjh bedman kabirridjaldukkayindi kore kunwarrewarre manbu bendangbalhmi dja bolkkime kabirrimarnedurrk-mirri manbu kunwarre. Ngurriburrbu bininj rowk wanjh kabirrimarne-durrkmirri njalehnjale nawu kabenbongkarrme.

Bu Bininj Kabirrimunkebawon Nawu Jesus

2 Peter 2:20-22

²⁰ Wanjh ngaye ngabenyawoyhyolyolme birrimekbe bininj nawu ngokko birriyngkihburrbom nawu kawohnan kadberre Jesus Christ nawu kan-gehkeng rowk, dja mak birribebmerrinj dja birribawong kunwarre rowk kore kondah kurorrebeh. Dja ngaleng, yikahwi nawu kabirriyawoyh-durnden bu kabirriyawoyhbonnamerrinj kore maninmanu kunwarre. Wanjh nahninjanu bininj kabirridjalwernhwarremen duninh bu yiman kerrngehkenhni kunyid birrikarrmi.

²¹ Manbu God nuye kunwok wanjh makka manu mandjamun duninh bu birribuyika bindinakenwong bedberre, dja kunu birriburrbom kore kabirriyime kunmak kore God kadjare. Birriburrbom kuninjkunu rowk, dja ngaleng, bonj, wanjh birribawong dja birrimirrkborledmeng. Wanjh kunukka kunwarre duninh kadjalwernhyimerran bedberre.

²² Ngudda ngurriburrbun bu bininj kabirriyime, “Nawu duruk kar-rurndeng bu kayawoyhngun manbu kore wehmeng nuyekih.” [Proverbs 26:11] Dja mak bininj kabirriyime, “Bu ngudda yikukdjirridjibun nawu bik, wanjh kaluk kayawoyhdurndeng kore kukih bu kabowkmerren kakukburlerriworren.” Wanjh kunmekbe kabirrikurduyime bininj nawu kabirrimirrkborledme nuye God.

3

Nawu Kawohnan Rowk Kamdurndeng

2 Peter 3:1-10

¹ Nawu karridabbolk, ngudda nawu ngaye marnedjare, nahni djurra nawu bokenhkah ngabimbom ngudberre. Bu ngaye wanjh ngadjare ngurridjalburrbun kore kunwoybuk duninh nawu ngaye bengdayhkeng ngudberre, dja ngadjare ngurrimayalimarnburren kore kunmakkenh.

² Mah, wanjh ngurriburrbu bu mahni manu kunwok nawu God nuye prophets bu kunkareni birriwokdi kore birriyolyolmi, dja mak ngurriburrbu bu nawu kawohnan dja kannghehkeng kadberre kan-marnewokrayekwong. Mahni mankarre nuye wanjh nawu apostles ngudberre ngundiwong.

³ Mah, wanjh ngarredjingmang bu bengdayhke ngudberre bu kunin-jkunukenh. Bu kondanjkuu kurorre darnkih kayakmen bu kayiburn-bunkenh, wanjh yikahwi bininj ngundimalelmang ngudberre. Bedda mak kabirridjare kore bedman kabirrikurduyime kunwarrekenh.

⁴ Kaluk ngundimarneyime, “Ngudda yimankek yiyime nawu Kawohnan Rowk wokkurrmerrinj bu kamdurndeng. Adju! Kab njalekah minj ngokko kumrawinj? Dja nawu birriyngkih dabborrabbolk nawu wanjh korroko birridowerrinj, dja minj njale mak marnburrimeninj, dja wanjh kadjalrohrok kore kamyidedjingmangbeh.” Wanjh kunmekbeh kunu bedda ngundimarneyime.

⁵ Bedda wanjh kuhni kabirriyolyolme dja minj kabirridjare bu kabirriburrbun kore kunwoybuk. Bedda kabirriburrbun manbu kunggol makka wanjh munguyh kumekbeh kadjaldi kore God wokdanj, dja mak nuye kunwok manbom kukku dja mak kunrorre bu kumbebmeng kore kukkubeh. [Genesis 1:6-9]

⁶ Kaluk yerre wanjh God munkeweng maninjmanu kukku manbu kundjurrh kore kubolkwarlahkenh rowk, dja bularrbom yehyeng rowk manbu dingihdi kumekbe bolkyimi.

⁷ Wanjh God yawoyhwokdanj, bu heavenkah dja kurorreka wanjh makka kadjalmadbun bu kunak kamre. God kadjalmadbun manbu kunbarnangarra ngarre bu nungka kaluk kandjadme ngad nawu bininj rowk. Wanjh kunmekbeh kunu kabenbularrbun bininj nawu kabirridjal-wirrihme nawu God.

⁸ Nawu karridabbolk, ngudda nawu ngaye marnedjare, ngad wanjh karridjalburrbu kore kundjalkudjiwi. Nawu Kawohrnan Rowk, wanjh nakka nabuyika duninh, dja nungka kayime manbu mandjalkudji kunbarnangarra wanjh yiman kayime mandjalwern 1000 mandjewk! Dja mak kayime bu mandjalwern 1000 mandjewk wanjh kunukka yiman kayime kunbarnangarrakudji. [Psalm 90:4]

⁹ Kaluk nawu bininj yimankek kabirriyime nawu Kawohrnan Rowk kayime yeledj bu kakurduyime kore nungan wokkurmerrinj nuye. Dja burkyak. Minj yeledj kakurduyime, dja nungka kunu ngundjalmbun ngudberre, dja kabenmbun birriwern bininj kabirriwarnyakmulewarren dja kabirrikangeborledkerren kore nungka ba bu minj kabenbularrbun!

¹⁰ Dja bonj, kundjalmekbe kabolkyimerran, wanjh nuye kunbarnangarra kambebe kundjalburrikudji duninh bu nungka kamdurndeng dja kabolkwarren manbu kurorre dja yehyeng rowk kahdi. Kaluk ngad minj karriburrbun bu baleh kabolkyime, dja wanjh karridjalkangebarhme bu kayimerran dja manbu kunggol wanjh makka kadjalyakmen dja kanbengbun kunwok kunkimuk, dja mak yehyeng rowk kore kondah kurorre wanjh kayakmen rowk bu karung manbu manbirlukimuk kunak dorreng. [Matthew 24:43; 1 Thessalonians 5:2; Revelation 16:15]

Bu Karrimarnburrenkenh Dja Mak Karrinahnarrenkenh

2 Peter 3:11-18

¹¹ Mah wanjh, bu kuhni wanjh kayimerran nawu njalehnjale wanjh kabularrbuyandan rowk, wanjh ngurridjalburrbu kore kunmak bu bolkkime ngurrihni, bu ngurrihwokmarrkmang nuye God dja mak kunmak ngurridjalmarnekurduyimen nuye munguyh.

¹² Wanjh ngurridjalmbun kaluk God nuye kunbarnangarra kamre, dja ngurridjare werknin kayimerran. Kore mahni kunbarnangarra wanjh manbu kungol kawurrlhme dja kayakmen, dja mak yehyeng rowk kore kurorre, wanjh mahni kunak kunkimuk kabularrbun rowk.

¹³ Wanjh karriburrbu bu nungka wokkurmerrinj, wanjh karridjalmbun kore nungka kanwon kubolkkerrnghe kaddum kore heaven dja mak kondah kore kurorre. Kaluk karrihni munguyh kumekbe ngad nawu God kanmakwan dja minj kunwarre kahdi. [Isaiah 65:17; Revelation 21:1]

¹⁴ Mah, nawu karridabbolk nawu ngaye marnedjare, ngaburrbun ngudda munguyh ngurridjalmbun kaluk kuhni kakurduyimerran, wanjh ngurriwernhrookmen ba bu minj kunwarre ngurriyawoyhkurduyime, ba bu nawu Kawohrnan Rowk wanjh ngunnan ngudda bu munguyh ngurridjalmak nuye. Kab kuhni ngurrimodmikenhworrimen kore nungka.

¹⁵ Wanjh ngurridjalburrbu bu nawu Kawohrnan Rowk kandjalmadbun, ba bu kanngheke.

Dja karohrok kore nawu Paul ngundimarnebimbom warridj. Nungka wanjh karridangerrinj dja karrimarnedjare. Bu nungka mak kuhni bimbom kore God biwong kunmayalimak.

¹⁶ Wanjh nungka munguyh kabimbun bu kuhnikenh kore djurra nawern nuye, dja kayolyolme bu maninjmanukenh. Kaluk nuye kabimbuyindi wanjh wurd karayek dja karrirohrokme wernkih ba bu karriburrrkburrrkbekkan kore kamenyime. Wanjh yikahwi bininj nawu minj kunwern kabirriburrbun dja nawu kabirrimayaliwern, wanjh bedda kabirrimayaliworren kore kunwarrekenh ngarre. Bedda kunmekbeh kabirrimarneyime nawu kabimbuyindi kore Bible rowk, wanjh kunmekbekenh kabirridjalbularrbuyindan.

¹⁷ Nawu karridabbolk, nawu ngaye marnedjare, ngudda ngurriburrbun bu kuhni rowk. Wanjh kunu ngurrinahnarrimen ba minj ngurrbenbalngunjdjikan bininj nawu kabirribakke manbu mankarre manwern, dja wardi kunubewu ngudmanwali ngurrikukwarrhme kore bolkkime ngurridjaldi kore kunmakkenh.

¹⁸ Wanjh ngurridjordmiwerrimen kore ngurrikongiburrimen dja mak ngurriwernhborlhmen Jesus Christ nawu kanmarnewohrnan dja nawu kannghekeng kadberre. Wanjh karridjalwarlahkenh nawu bininj rowk bu nungka wanjh karridjalwernhburlumen nuye bu bolkkimekenh, dja mak munguyh munguyh. Wanjh bonj.

1 John

Jesus Nawu Yiman Kunwok Manbu Kanmimbiwon Kadberre 1 John 1:1-4

¹ Ngad ngarribimbom nahni djurra ngudberre ba bu ngundibengdayhke kunwoybuk dorreng, nawu kerrngehkenh bu djahdjalyingkihi. Nawu ngad ngarribekkani, dja mak ngarrikokweleni bu ngarrinani, ngarridar-rkidnani kunmim ngadberre, nawu ngadman ngarridjalnani munguyh. Dja mak ngarrikarrmi kunbidwi ngadberre. Ngad wanjh kunmekbekenh ngarribimbom ngudberre bu ngarrimulewan nungka nawu Kunwok manbu Kandarrkidwon Ngad bininj rowk.

² Nungka nawu kundarrkid kanwon, wanjh nungan darrkidbukkarrinj kadberre bu ngad ngarrinang, dja wanjh ngad ngundidjalmarneyime ngudberre bu djal kunwoybuk duninj. Dja mak ngad ngundimarneyime bu nungka nuye kundarrkid, wanjh kadjaldi bu munguyh munguyh kadjaldarrkid. Naninjanu nadjalkudjiwi nawu kanwon kadberre kundarrkid, wanjh benedjarrkni God nawu Kornkumo dja bolkkime kanmarnekubukkarrinj kadberre.

³ Dja bolkkime ngad ngarridjare bu ngundimarneyime kore ngarrihnani, dja ngarrihbekkani. Bu ngad wanjh ngarridjare ngudda dorreng bu karridjarrkkarme yiwarrudj manbu kadberre rowk. Mahni yiwarrudj bu karridjarrkwarren kore God nawu Kornkumo, dja mak Beywurd nuye, Jesus Christ.

⁴ Ngad ngarribimbom nahni djurra ngudberre ba bu ngudda ngurridjal-njilngmarmarr karohrok bu ngad dorreng ngarridjalwernhnjilngmar-marr duninj.

Bu God Kanmarnebengmidjan Kunwarre Kadberre 1 John 1:5-10

⁵ Nawu Jesus biwokmulewani God, dja wanjh bolkkime ngundihbeng-dayhke ngudberre. Mahni kunwok kayime bu God nungka kahdjalbame dja kahdjalbolkwolkan munguyh munguyh, dja mak nungka minj kunkak kabenerawarren.

⁶ Bu yimanek ngad karriyime bu karridi yiwarrudj nuye God, dja karrihdjaldi kore kubolkmunun, wanjh kunukka yiman ngad karrihdjalkurren. Ngad minj karridjalwernhkadjung kore kunwoybuk duninj.

⁷ God nungka kahdjalni kore nungan kahbame kore kadjalbolkwolkan. Ngad wanjh kunmekbe karridiwirrinj kore God kamhbolkwolkan. Dja bu ngad karridi kore kabolkwolkayindi, wanjh kunu karriyikadjurren yiwarrudj kore karridjarrkdi kamak rowk, dja kunkurlba nuye Jesus nawu Beywurd nuye God, wanjh kanmarbnun bu karrikangebelemen bulkkidj duninj, ba bu minj njale mak karriyawoyhkarme kunwarrekenh.

⁸ Bu ngad karriyime minj kunwarre karrikarme, wanjh kunu yiman ngadman karridjalkurren, dja minj kunwoybuk kahni kore kukange kadberre.

⁹ Dja bu ngad karriwarnyadmulewarren kunwarrekenh kadberre, wanjh God kanmarnebengmidjan manbu kunwarre kadberre, dja mak kanmarbnun bu kankangebeleon kore kunwarre rowk. Nungka wanjh kadjalkurduyime munguyh kore kawokkurmerren, dja mak djal kunmak kadjalkurduyime rowk.

¹⁰ Dja bu ngad yiman karridjalyime minj ngad karrikarrme kunwarre, wanjh kunu yiman kayime karrikewkme God, dja karriyime yiman nungka kakurren, dja mak ngad minj karriwernhkarrme kunwok kunwoybuk nuye manbu Christkenh.

2

Jesus Nungka Kanbidyikarrme Kadberre

1 John 2:1-6

¹ Ngardduk wurdwurd, nawu ngaye marnedjare, ngaye marnebimbom nahni nawu djurra ngudberre bu ngunbengdayhkekenh, ba bu minj kunwarre ngurriyawoyhyime. Bu yiman kunwarre ngurriyime, wanjh kunu Jesus Christ kanmarnewokdi dja kanmarnekarreyolyolme kadberre kore God nawu Kornkumo kabenewokdi. Nungka nawu Jesus Christ wanjh nadjalmak, minj kunwarre kurduyimeninj, dja nakka nadjalkudji kadjalkurduyime kunmak rowk.

² Nungka kanjkurmerrinj dja doweng kadberre ba bu God kanmarnebengmidjan bu kunwarrekenh karrikurduyime. Minj ngad karridjalkudjiwi kanmarnedoweng, dja mak benmarnedoweng bininj nawu birriwarlahkenh rowk nawu kondah kurorre.

³ Bu ngad karriwokmarrkmang God nuye kunwok kore kanmarnewokrayekwong, wanjh kunukka djalwoybukkih bu karriburrbun nawu God.

⁴ Bu nangale bininj kayime, “Ngaye ngaburrbun God”, dja minj kawokmarrkmang God nuye mankarre, wanjh nakka yiman kahdjalkurren, minj kunwoybuk kabimarneni kore nungan nuye kukange.

⁵ Dja bu nangale bininj kawokmarrkmang God nuye mankarre, wanjh karriburrbun bu namekbe bininj woymbukkih kabimarnedjare God kore kukange nuye. Wanjh kunukka woymbukkih karriburrbun bu namekbe bininj kabimunekadjung God.

⁶ Nawu nangale bininj kayime, “Jesus nganmarneni kore kukange ngardduk”, wanjh namekbe bininj bidjalkadju Jesus, dja mak djalkurduyimen yiman kayime bu Jesus kurdurduyimi.

Ngaye Bengdayhke Ngudberre Mankarrekenh Kore Godbeh

1 John 2:7-11

⁷ Nawu karridabbolk, nawu ngaye marnedjare ngudberre, ngaye mahni ngabimbom minj mankerenge kore ngudda ngudberre. Dja mahni mankarre yawoyhmarneyime ngudberre kore ngurriyingkihbeccakani kerengekenhni kore dedjingmey.

⁸ Mahni wanjh ngabimbun ngayawoyhkarrekerrngehme mankarre manbu mandjalwoybuk duninj. Ngurrinan kunwoybuk kore Jesus dja mak kore ngudmandeleng ngurrikarrme. Kaluk yiman manbu kunkak, wanjh makka kare, dja manbu manbiruwoybuk duninj, wanjh makka ngokkokenh kamhyingkihwolkayindan.

⁹ Nawu nangale bininj kayime, “Ngaye ngahdi kore kahbolkwolkayindi”, dja mak bu kabihdjaldan nuye nawu benedanginj, wanjh nakka nanu yiman kahdjaldi kore kubolkmunun.

¹⁰ Nawu nangale kabimarnedjare nawu benedanginj, wanjh nanu karri kore kamhbolkwolkayindi. Dja minj mak njale kabibalbengwarrewon bu kunwarre kayime.

¹¹ Dja nawu nangale kabiwidnan nawu benedanginj, wanjh nakka kadjaldi kore kubolkmunun. Kaluk minj kaburrbun kore baleh nuk kahre

dja wanjh manmekbe kunkak kabimarnbun kakokburlerran kore kukange nuye.

Ngaye Marnewokdi Bebbehbeh Ngudberre nawu Binihbininj
1 John 2:12-14

¹² Wurdwurd, ngudda ngokkokenh kunwarre ngudberre bularrbuyindanj, kore kungey nuye Jesus Christ, wanjh kunmekbekenh kunu ngaye marnebimbom nahni djurra ngudberre.

¹³ Dja mak ngudda nawu kohkorkumo, ngudda nawu yiman ngurriwernhburrbun nungka nayungkihni nawu korroko kore dedjingmeybeh. Kunmekbekenh kunu ngaye ngabimbom nahni djurra ngudberre.

Yawyawurrinj! Ngudda wanjh ngurringudjyurrrheng nawu Nawarre Duninj. Kunmekbekenh kunu ngaye ngabimbom nahni djurra ngudberre.

Wurdwurd nawu ngaye marnedjare, ngudda ngurriburrbun God nawu Kornkumo nawu djarrk kadberre rowk. Kunmekbekenh kunu ngaye ngabimbom ngudberre.

¹⁴ Mak ngaye ngabimbom ngudda ngudberre nawu kornhkorkumo, dja ngudda ngurriburrbun nawu nakudji nayungkihni yingkihdi kore kumdedjdjingmeybeh.

Dja ngudda yawyawurrinj, ngaye ngabimbom ngudberre nawu ngudda ngurrimurrngrayek, bu wanjh kunwok nuye God kani ngudberre kore kukange. Nawu ngudda wanjh ngurringudjyurrrheng nawu Nawarre Duninj.

Ngaye Wernhwokrayekwon Duninj Ngudberre
1 John 2:15-17

¹⁵ Yuwn bu ngurrimarnedjare kurorrekenh, nawu kahdi. Nawu nangale kahdjarewern kore kurorrewaken, wanjh kunukka namekbe bininj minj kabimarnedjare God nawu Kornkumo, wanjh kunukka minj mak kabimarneni kore kukange nuye.

¹⁶ Kaluk nanihnjanu nawu nawarrewarre kahdi kore kondah kurorre, wanjh nawu kabirridjarewern bedmandeleng bininj. Kore kunburk bedberre kabirrihdjurrkarren bu kabirrikurduyime kunwarre munguyh. Dja mak kabirridjare kunwarre kabirrikurduyime kore nawu yehyeng kabirrinan. Dja mak kabirrikuniburluburlumerren nawu yehyeng kore kabirrihkarrme. Kaluk nahninjanu rowk nawu yehyeng nawarrewarre minj kumdolkkayi kore Ngabbard Godbeh. Dja nakka nanu wanjh kumdolkkarrinj rowk kore kondanjku kurorrebeh.

¹⁷ Manbu maninjmanu kunrorre, wanjh makka kayakmen, kabularbuyindan. Dja mak njalenjale yehyeng rowk nawu bininj kabirrihdjare kore kondanjku kurorre nawu kahyo, wanjh nakka kayakmerren rowk. Dja nawu bininj kabiwokmarrkmang kore Ngabbard God kabimarneyime kore kadjare nungan, wanjh nakka kabimalngmimbiwon kore God bu munguyh dja munguyh.

Karrimarneyarlarrerren Bedberre Nawu Kabirrimarnewarnyak Christ
1 John 2:18-25

¹⁸ Wurdwurd, nawu ngaye marnedjare, kuhni bu wanjh darnkih kamhre bu kayiburnjenh rowk. Ngudda ngokko ngurribek kang namekbe nawu kabihnjirrhmiwon nawu Christ. Wanjh ngokko kamhre. Dja mak birriwern nawu kabirriwirrihme Christ, wanjh ngokkokenh kondanjku kabirrihdi. Kunmekbekenh wanjh ngurriburrbu bu kuhni wanjh darnkih kamhre kore kayiburnbunh.

19 Kaluk birrimekbe nawu kabirrihwirrihme Christ, wanjh nakka nanu kondanjkuu karridjarrkdi. Kaluk birriwam, kandibawong, wanjh nakka nanu minj ngad kadberre bininj. Bu birrimekbe bininj bolkkime kadberreniwirrinj, wanjh kunukka bedda karridjarrkniwirrinj kondah kore ngad. Bu birriwam wanjh kunukka karriburrbun bu minj ngad kadberre birrimekbe bininj.

20 Ngudda ngaleng, ngurrikarme nawu Namakkaykenh Jesus Christ nawu nungan Nakukdjamunkenh ngundjarrngbom ngudberre dja ngudda ngurriburrbun rowk kore kunwoybuk.

21 Dja njalekenh mak ngaye ngabimbom nahnı djurra ngudda ngudberre? Yiddok ngaye ngabimbom ngudberre bu minj ngudda ngurriburrbun kunwoybuk? Burrkyak. Wanjh ngokko ngudda ngurriburrbun kore kunwoybuk. Dja mak ngudda ngurriburrbun bu kuninjkuukenh kore kabirrikurren minj kambebme kore kunwoybukbeh.

22 Kaluk nangale nawu kahwokkurrehkurren? Kaluk namekbe bininj nawu kayime, "Jesus nakka minj God nuye Christ", dja mak kabiwidnan, kabinjirrkke bu kabikuniwirrihme dorreng, bu kayime minj nungka Christ. Nungka mak minj kabenbenewoybukwon God nawu Kornkumo dja mak nawu beywurd nuye.

23 Nawu nangale minj kabiwoybukwon nawu Beywurd nuye God, wanjh nakka minj mak kabihkarme God nawu Kornkumo. Dja nawu nangale kabihwokmulewan nawu Beywurd, wanjh nakka nawu Kornkumo dorreng kabenbenedjarrkkarme.

24 Mah, wanjh ngurrinaharrimen. Ngurridjalwoybuknin ngurriburrbu munguyh ngurridjalkadjung kore ngundibukkani ngudberre, bu ngurribekkang kore kerrngehkenh duninj. Bu ngudda munguyh ngurridjalkadjung kore ngundibukkabukkani, wanjh kunukka ngurridjarrkraworrinj kore nawu Beywurd nuye, dja mak nawu Kornkumo.

25 Wanjh kuninjkuu nawu Beywurd nungka kanberrebom kadberre, ba bu karridjalmangdarrkiddi bu nungka dorreng munguyh munguyh.

Ngaye Ngadjare Mayalimarnbun.

1 John 2:26-29

26 Ngaye ngabimbom nahnı djurra ngudberre ba bu bengdayhke kore ngabenolyolme birrimekbe bininj nawu kabirrirohrokmerren bu yimanek ngundidjirrkkan kore kunwarrekenh.

27 Kaluk Christ korroko ngunwong ngudberre nawu Namalng-makkaykenh. Kaluk ngurridjalkarme nahninjanu nawu Namalng-makkaykenh ba bu minj bininj ngundibukkabukkan ngudberre. Dja nawu Namalngmakkaykenh ngunbukkabukkan ngudberre kore yehyeng rowk kore nungan kaburrbun. Kaluk nungka wanjh nakka nadjalwoybuk duninj, minj mak kankowe. Dja wanjh munguyh ngurridjalmunkekadju, dja ngurridjaldin kore nungka.

28 Yoh, ngudda nawu ngardduk wurdwurd nawu ngaye marnedjare, wanjh ngurridjallay kore nungka dja minj ngurribawon. Bu kuninjkuu karrikurduyime, wanjh kunukka minj karryawoyhkarme kunktele dja kunyeme bu nungka kamyawoyhdurdeng kadberre.

29 Ngudda ngurriburrbun nawu Christ nungka wanjh Nadjal-makkaykenh Duninj. Kumekbekenh kunu ngudda ngurriburrbun bu nangale bininj kadjalkurduyime kunmak, wanjh nakka God biborang.

3

*Ngad Wanjh God Nuye Wurdwurd**1 John 3:1-3*

¹ God nawu Kornkumo nakka wanjh kanmarnedjare bulkkidj duninj, dja nungka ngad kanmarneyime karribebeywurd nuye. Djalwoybukkih bu ngad nungka nuye wurdwurd. Kaluk bininj nawu kabirrihdi kondanjunu kurorre minj kabirriwernhkukburrbun God. Kumekbekenh kunu minj kandiwernhkangeburrbun kadberre.

² Ngudda nawu karridabbolk, bolkkime wanjh ngad karribebeywurd nuye God. Ngad minj karriburrbun bu yerrekah kore baleh ngad karribalyimerran. Dja karridjalburrbun bu Christ kaluk kamyawoyhdurn-deng dja wanjh karridarrkidnan ba karriwernhkukburrbun, dja kunukka karriyimerran yiman nungka.

³ Bolkkime wanjh ngad rowk karrimadbun kabolkyime bu kanmarnekurduyimerran. Christ wanjh nadjalmak duninj, dja minj kunwarre kakarme, wanjh bolkkime karrikangemarnburren ba bu karriyimerran karridjalmak yiman nungka.

*Wurdwurd Nawu God Nuye Dja Mak Wurdwurd Nuye Nawu Namarnde Duninj**1 John 3:4-10*

⁴ Bininj nawu kabirrikurduyime kunwarre, wanjh nakka kabirribakke God nuye mankarre. Yoh, kunwarre bu kabirridjalyime, wanjh kunukka God nuye mankarre kabirridjalwarnyak.

⁵ Wanjh ngudda ngurriburrbun bu Christ kumwam ba bu kakan rowk kunwarre kadberre kore karrikurduyimeng. Nungka Christ minj karmeninj kunwarre nungandeleng.

⁶ Bininj nawu kabirriraworren Jesus Christ dorrengh, wanjh minj mak kabirridjalyime kunwarre. Bininj nawu munguyh kahdjalkurduyime kunwarre, wanjh nakka minj binayinj nawu Christ, dja mak minj biburrbuyinj.

⁷ Ngardduk wurdwurd, ngudda nawu marnedjare, yuwn ngurribawon nangale bininj ngunkan ngudberre kore kunwarrekeh. Jesus Christ wanjh nadjalmak, dja nungka minj kunwarre kurduyimeninj. Ngudda wanjh ngurridjalkurduyimen yiman nungka, wanjh kunukka ngurridjalyimerran ngurrimak bininj.

⁸ Nawu Namarnde Duninj nakka wanjh kunwarre kurdukurduyimi kerrngehkenhbeh dja mak bolkkime warridj kadjalkurduyime. Nawu nangale bininj munguyh kunwarre kadjalkurduyime, wanjh nakka Namarnde Duninj nuye bininj. God nuye Beywurd kumwam ba bu kabularrbun kunwarre rowk manbu nawu Namarnde Duninj marnbom.

⁹ God kanbornang ngad nuye bininj, wanjh kunu minj karridjalyime kunwarre. Burrkyak, dja wanjh God munguyh kankangekerrngehmen. Bolkkime ngad wanjh karriyimerranj God nuye wurdwurd, wanjh minj karriyawoyhyime kunwarre.

¹⁰ Bininj nawu kadjalwarnyak bu kunmak kakurduyime, nakka wanjh minj wurdyaw nuye God. Dja mak bininj nawu minj kabimarnedjare nawu benedanginj bininj, wanjh nakka nanu minj wurdyaw nuye God. Kunmekbekenh kunu kabebbehbuyika, bu ngad wanjh karrbenburrbun nangale nawu God nuye wurdwurd, dja mak karrbenburrbun nangale nawu Namarnde Duninj nuye wurdwurd.

Karrimarnedjaremerrimen

1 John 3:11-18

11 Maninjmanu wanjh kunwok manbu ngurribek kang kore ker-
ngehkenhni, bu wanjh ngad karrimarnedjaremerrimen.

12 Yuwn bu karrikurduyime yiman kayime bininj nawu ngeyyoy Cain,
nawu Nawarre Duninj nuye bininj, dja bibom bikukkurmeng nawu
benedanginj. Njalekenh bibom? Nungka wanjh bibom nawu benedanginj
bu Cain kunwarre kurdukurduyimi, dja nawu nungka benedanginj, wanjh
nakka kundjalma kurdukurduyimi.

13 Ngudda nawu karridangerrinj, yuwn bu ngurrikangebarrhme bu
bininj nawu kondanjku kurorrebeh ngundidjalnjirrhmiwon.

14 Ngad wanjh bolkkime karrimarnedjaremerrimen nawu karridangerrinj
kore Christ. Kunmekbekenh kunu karriburrbun ngokko karribawong kore
kundowikenhbeh, dja karrimardjalwam kore karrimalngdarrkid munguyh.
Dja nawu nangale bininj minj kabenmarnedjare birribuyika nawu birri-
dangerrinj, wanjh nakka kahdjaldi kore kundowikenh.

15 Bininj nawu kabiwirrihme nawu benedanginj bininj, wanjh nakka
yiman namarndeyi, dja ngudda ngurriburrbun nawu namarndeyi bininj
minj kamalngdarrkid kore God.

16 Jesus kanmarnekanjcurrmerrinj kadberre bu doweng. Kunmek-
bekenh kunu karriburrbun bu nungka nawu kanwernharnedjare
bulkkidj duninj kadberre. Wanjh ngadmanwali karrimarnedjaremerrimen
ngad karridangerrinj bininj, dja wardi karrikanjcurrmerren kadberre.

17 Nawu bininj kakarme yehyeng namakmak, baleh kab kakurduyime
bu kabikongibun nawu benedanginj nawu kadjalkukyakkenworren? Bu
minj kabikongibun nawu benedanginj, wanjh nakka nanu minj mak
kabimarnedjare nawu God.

18 Ngardduk wurdwurd nawu ngaye marnedjare, wanjh kandibekka.
Bu ngad karrimarnedjaremerrimen, wanjh yuwn bu djal kunwokwi, dja
karrimarnedjaremerrimen bu djal woybukihnin duninj karribidyikar-
merren.

Bu Karrinjalngmarnbu Nawu God

1 John 3:19-24

19 Bu karrimarnedjaremerrimen, wanjh kunukka karriburrbun bu ngad
wanjh God nuye bininj nawu kanbukkabukkan nuye kunwoybuk, dja mak
bu karriki kore kumirrk nuye wanjh minj karrikele.

20 Ngad kunubewu baybaywi karriyimerren yimankek ngad karridjal-
warre bininj, yiman bu karriwarwarren. Dja bonj, minj ngadman.
Dja nungka God nadjalkudji kankangedjadme. Nungka wanjh kaburrbun
rowk dja wanjh kankangeburrbun.

21 Mah. Ngudda karridabbolk nawu ngaye marnedjare, bu ngad
karribekkarren kore kukange kadberre bu minj kunwarre karriyime,
wanjh kunukka minj kunkele karrikarme bu karrire kore God nuye
kumirrk.

22 Bu ngad karridjalkurduyime kore karrinjalngmarnbu nawu God,
wanjh kunmekbekenh kunu nungka kanwon rowk kore karridjawankenh.

23 Kuninjku God nuye mankarre kahyime bu ngad karriwoybukwon
Jesus Christ nawu beywurd nuye, dja mak karrimarnedjaremerrimen kore
nungka kanyingkihwokrayekwong kadberre.

²⁴ Bininj nawu kabirriwokmarrkmang God nuye mankarre, wanjh kabirridjaldarrkiddi kore kabirriraworren nungka. Dja God nungandeleng kahdi kore kukange bedberre. God kanwong kadberre Namalng-makkaykenh nuye, wanjh kunmekbekenh karriburrbun bu God kahni kore kukange kadberre.

4

Nawu Birriwarre Bininj Kabirrikurrehkurren

1 John 4:1-6

¹ Ngudda karridabbolk nawu ngaye marnedjare, wanjh kandibekka. Birriwern bininj nawu kabirridjalwokkurrehkurren, nakka wanjh kondanjkuu kurorre kabirrihni. Bedda wanjh birringeykurmerrinj prophets, dja kabirridjalkurrehkurren. Kaluk ngurriwernhrohokme namekbe bininj dja ngurrinan bu wardi kamhre kore Godbeh. Wanjh yuwn bu ngurriwoybukwon bininj nawu namalngwarre kakarrme.

² Wanjh kunukka ngudda ngurridjalburrbun bu God nuye Namalng-makkaykenh karri kore kukange nuye bininj, bu kahyime "Ngaye ngawoybukwon Jesus Christ bu kumwam Godbeh, dja yimerranj bininj duninj kore kondanjkuu kurorre." Wanjh Namalngmakkaykenh kumekbe kayime bu kabimulewan God.

³ Nabuyika nawu namalngwarre nawu kahni kore kukange bedberre yikahwi bininj, wanjh kabimulewan Jesus bu kahyime, "Jesus minj kumarawinj kore Godbeh." Wanjh namekbe namalngwarre minj kamdolkan kore Godbeh, dja wanjh nakka kabeneyidko nawu Christ. Ngudda ngurriwobekkan nawu kabeneyidko Christ, nakka wanjh kumwam. Wanjh bolkkime nungka kondanjkuu kahdi kurorre.

⁴ Ngudda wurdwurd nawu ngaye marnedjare, ngudda woybukkih wanjh nuyekih God bininj. Wanjh kumekbekenh kunu ngudda ngurribenngurdkeyi bininj nawu kabirrikarrme namekbe namalngwarre kore kukange bedberre. Yoh, ngudda ngurrikarrme kundulkarre nuye Namalng-makkaykenh, dja nungka wanjh nawernhdulkarrekimuk dja kabiyurrhke nawu Namarnde Duninj nawu kahdi kondanjkuu kurorre.

⁵ Birrimekbe bininj wanjh kondanjkuu bedberre kunred, dja kore baleh kabirriyime, wanjh kunukka djaj ngalengngarre kurorrebeh. Dja warridj birriwern bininj nawu kondanjkuu kunredbeh wanjh bedman kabindidjalbekkabekkan.

⁶ Dja ngad wanjh Godbeh. Nawu bininj birridjalkudji kabirriburrbun God, nakka wanjh ngad kandihbekkabekkan. Dja bininj nawu minj Godbeh, nakka wanjh minj ngad kandibekkan. Wanjh kunmekbe ngad karriburrbun nawu Namalngmakkaykenh nawu kadjalyime kunwoybuk, dja mak nawu namalngwarre nakka wanjh kadjalkurrehkurren bu kabenhkowe bininj.

Karriburrbun Bu God Kanmarnedjare Bulkkidj Duninj

1 John 4:7-12

⁷ Mah, ngudda nawu ngaye marnedjare, kab ngad wanjh karrimarnedjaremerrinen! Bu ngad karrimarnedjaremerrinen, wanjh kunukka yiman kayime kundjalmak duninj kamdolkan kore Godbeh. Nawu bininj kabirrimarnedjaremerrinen wanjh nakka yiman God nuye wurdwurd, dja kabirriwernhburrbun God.

⁸ God nungka wanjh kabemarnedjare birriwarlahkenh bininj rowk bu munguyh. Nangale nawu bininj minj kabemarnedjare birribuyika

bininj, nakka wanjh yiman minj kabiburrbun nawu God, dja mak minj kabimarnedjare.

⁹ Kuninjkuwu wanjh God kanbukkang bu kanmarnedjare kadberre rowk bu nungka bimmunkeweng beywurd nuye nawu nadjalkudji duninj. Dja nahni nawu Beywurd nuye God kumwam kondanjkuwu kurorre dja kanwon kadberre kundarrkid, ba bu karrimalngdarrkidmen kore nungka.

¹⁰ Kerrngehkenh ngad minj karrimarnedjareniwirrinj God. Nungka werck wanjh kandjalmarnedjareminj kadberre rowk, dja bimmunkeweng beywurd nadjalkudji nuye nawu kanmarnekanjcurmerrinj ba bu God kanmarnebenngmidjan kadberre kunwarrekenh.

¹¹ Nawu ngaye marnedjare, kandibekka. Kuhni wanjh bulkkidj duninj God kanmarnedjareminj kadberre, wanjh ngadmanwali karridjalmarnedjaremerren.

¹² Minj nangale bininj birrarrkidnayinj God. Dja bu yiman karridjalmarnedjaremerren bulkkidj duninj, wanjh kunukka God kahdi kukange kadberre. Wanjh kunukka yiman karrimarnedjaremerren woybukkih, wanjh kunu kayimerran rowk kore God kadjare bu nungka kanmarnedjare.

Bu God Kandjalmarnedjare

1 John 4:13-21

¹³ Ngad wanjh karridjalburrbun kunwoybuk nuye God Bu nungka wanjh kanwong kadberre Namalngmakkaykenh nuye. Kunmekbekenh kunu karriburrbun bu karrihdjarrkdi nawu God, dja nungka mak God kahni kore ngad.

¹⁴ Dja mak karrikurdunang kore God nawu Kornkumo bimmunkeweng beywurd nuye kondanjkuwu kurorre bu kanngheke karriwarlahkenh bininj rowk. Wanjh kunmekbekenh kunu karribenmarneyolyolme bedberre birriwarlahkenh bininj.

¹⁵ Bu bininj nawu kamulewarren kore kurobbe, wanjh kayime, "Ngaye ngamulewan Jesus bu woybukkih nungka Beywurd nuye God", wanjh kunu nunganwali God kani kore kukange nuye, dja namekbe bininj, nanu wanjh kabenedjarrkni nawu God.

¹⁶ Ngad wanjh karriwarnhburrbun bu God wanjh kandjalmarnedjare kadberre, dja mak karridjalwoybukwon nuye. God nungka kanmarnedjare bulkkidj. Nawu nangale kabenmarnedjare birribuyika bininj, wanjh nakka yiman kayime God kabeneraworren, dja nungan God mak kani kukange nuye.

¹⁷ God kanmarnedjare wanjh kunu kandjalkangemarnbun bulkkidj duninj kadberre. Wanjh kunu minj karrikarme kunkele bu nungka kamdurndeng nawu God bu kanyidjadme ngad bininj rowk. Wanjh kunu kunkele kadjalyakmen kadberre. Kaluk marneyime ngudberre bu kondanjkuwu karrihdi kurorre, wanjh kunukka ngad nungka yerre God karringunjdikkan.

¹⁸ Kore God kanmarnedjare kadberre, wanjh kunukka minj mak karriyawoyhkele. Dja nungka minj kanbun kore kadberre kunwarrekenh. Dja burrkyak, minj karrikelemen nuye God dja munguyh karridjalburrbun nungka kanmarnedjare bulkkidj duninj.

¹⁹ Nawu nungka werck God kanmarnedjareminj ngad kadberre rowk. Kunmekbekenh wanjh ngad ngadmanwali karrimarnedjaremerren.

²⁰ Bu yiman nakudji bininj kayime, "Ngaye ngamarnedjare God," dja bu kundjalmekbe yerreh kabinjirrhmiwon nawu benedanginj, wanjh nakka yiman kadjalkurren. Bu nahni bininj kabinan nawu benedanginj nuye

dja mak kabidjalnjirrhmiwon kore kukangebeh nuye, wanjh nakka minj kabimarnedjare nawu God, nawu minj kabinan.

²¹ God kanwong kadberre maninjmanu mankarre, bu nangale nawu kabimarnedjare God, wanjh kunu bidjalmarnedjarenin bininj nawu benedanginj nuye.

5

Ngad Wanjh Kariibebeywurd Nuye God

1 John 5:1-5

¹ Bu nangale bininj kayime nakudji Jesus nakka wanjh Christ, wanjh namekbe bininj nanu God nuye wurdyaw. Nangale bininj nawu kabimarnedjare nawu Kornkumo, wanjh kunu kabibalmarnedjare nawu Beywurd nuye dorrengh.

² Bu ngad karrimarnedjare God, dja mak karriwokmarrkmang mankarre nuye wanjh kunukka karriburrbun bu karrbenmarnedjare God nuye wurdwurd rowk.

³ Bu karrimarrkmang God nuye mankarre, wanjh kunukka woybukkih karrimarnedjare God. Dja manbu mankarre nuye minj karayek kadberre.

⁴ Kaluk ngad karriwarlahkenh bininj nawu God kanbornang, wanjh karriyurrhke kunwarre kore kurorrewaken. Ngad karriwoybukwon God dja kunmekbekenh kanmurrngayekwong ba bu karriyurrhke kunwarre kore kurorrewaken.

⁵ Ngad bininj nawu karriyime, "Jesus wanjh nungka beywurd nuye God," wanjh ngad karridjalkudji karridulkarreyakwon nawu kondanjunu kurorre ngalenggarre.

Bu Karriwokmarrkmang God Nuye Beywurd

1 John 5:6-13

⁶ Jesus Christ nungka wanjh kumwam. Bu kumwam kukku dorrengh, dja mak kunkurlba nuye dorrengh. Nungka minj kumdjalrawinj kumkayinj djalkukkuwi. Nungka kumwam bu kumkang bokenh, manbu kukku, dja kunkurlba nuye. Nawu Namalngmakkaykenh nuye yimeng kuninjkuwu wanjh kunwoybuk. Kaluk Namalngmakkaykenh nakka wanjh Nadjalwoybuk duninj.

⁷ Bu kuhni wanjh djaldanjibik kandimarneyime kadberre, bu kabirriyolyolme Jesuskenh nuye ba bu ngad karriburrbun nungka wanjh God nuye beywurd.

⁸ Bu kabirriyolyolme danjibik. Nawu Namalngmakkaykenh nuye, dja mak kukku, dja mak kunkurlba, mahni manekke danjibik mankarre wanjh kabirrimulewan bu kabirribebhehyolyolme karohrok rowk.

⁹ Ngad karrbenwoybukwon bininj bu kabirriyime njalehnjale bu woybukkih, dja bu nungka God kore kayime wanjh kunukka nadjalwernhkuken duninj, kore kanbengdayhkekenh ngad kadberre, dja mak yimeng kunwoybuk kore nabeywurdkenh nuye.

¹⁰ Nangale nawu kabiwoybukwon kore Beywurd nuye God, wanjh nanu kakarme kunwoybuk bu God bimarneyimeng kore kukange nuye. Nangale bininj nawu minj kabiwoybukwon God, wanjh nakka kabidjalkewkme God. Nungka minj kabiwernhwoybukwon God kore kabimulewan nabeywurdkenh bu kunwoybuk dorrengh.

¹¹ Kuninjkuwu wanjh God kanmarneyimeng kadberre bu djal kunwoybuk, God wanjh kanmalngmibiwon ba karridarrkid kore nungka munguyh munguyh. Kaluk mahni kundarrkid nuye, wanjh karrimang kore karriraworren nawu Beywurd nuye.

¹² Nawu nangale bininj kabikarrme nawu Beywurd nuye God, wanjh nakka kakarrme kundarrkid duninjh warridj. Dja bu bininj minj kabikarrme nawu Beywurd nuye God, wanjh minj kundarrkid kakarrme.

¹³ Ngaye ngabimbom nahninjanu djurra ngudberre nawu ngudda ngurriwoybukwon Jesus Christ nawu Beywurd nuye God. Ngaye ngabimbom nahni djurra ba bu ngurriwernhburrbun bolkkime bu God ngundiwoy kundarrkid nuye ba bu ngurridjalmimbi kore nungka bu djal munguyh munguyh.

Karribebbehmarnedangerrimen Yiwarrudj

1 John 5:14-17

¹⁴ Ngad bu karrire kore kumirrk nuye God bu karridjawanken, wanjh minj mak karrikewkme dja minj karrikele. Bu karridjawan njalehnjale kore nungka kadjare, wanjh nungka kanbekkan.

¹⁵ Ngarriburrbun bu God kandjalbekkan kadberre munguyh bu karriidjawan kore nungka. Wanjh kunu karriburrbun bu nungka kanwon kadberre nawu njalehnjale kore karriyidjawanken nungka.

¹⁶ Bu nakudji bininj kabinan nawu benedanginj kore Christ, bu nungka kunwarre kakurduyime, wanjh namekbe bininj nanu bimarnedin yiwarrudj nawu namekbe benedanginj ba bu God kabiwon nawu namekbe benedanginj bu kabiyawoyhmalngdarrkidwon.

Ngaye ngabenyolyolme nawu bininj bu kakurduyime kunwarre nawu minj kabenkan kore kabirridowenkenh. Dja med, yikahwi bininj wanjh kabirridjalkurduyime mankudji manbu kundjalwarre duninjh, wanjh kunukka kabendjalkan bu kabirrimalngdownen munguyh. Yoh, nawu bininj kabirriyime kunmekbe kunwarre, wanjh kabirrimalngdownen bu munguyh. Wanjh ngaye minj marneyime bu ngurridjawan God bu kabenmarnebenngmidjdan birrimekbe bininj.

¹⁷ Kunwarre rowk, wanjh kunukka God kawarnyak. Dja yuwn bu manmekbe kunwarre duninjh. Bu karrikurduyime kunwarre dja karriwarnyakmulewarren, wanjh God kanmarnebenngmidjdan.

John Yakwong Nahni Djurra

1 John 5:18-21

¹⁸ Ngad karriburrbun nawu nangale God nuye wurdyaw kayimerran, wanjh minj kunwarre kahyime munguyh. Dja nawu Beywurd nuye God kabikarrme dja kabinahnan munguyh. Wanjh nawu Nawarre Duninj minj mak kabiwarrewon namekbe bininj.

¹⁹ Ngad karriburrbun bu ngad wanjh God nuye wurdwurd. Dja nawu Nawarre Duninj, nakka wanjh kawohnran rowk kore kondanjku kurorre.

²⁰ Ngad mak karriburrbun nawu Beywurd nuye God kumwam dja kanwong nuye kunmayali, bu karriwernhmayalibayhme. Wanjh kunu bolkkime karriburrbun God nawu nawoybuk duninjh. Wanjh bolkkime karriraworrinj nuye Beywurd, Jesus Christ, nawu nungka nadjalwoybuk. God, nawu kanwon kundarrkid nuye ba karrimimbi kore nungka munguyh munguyh.

²¹ Mah, ngudda nawu wurdwurd ngardduk nawu ngaye marnedjare, wanjh ngurridjalnahnarrimen, dja ngurridjallay djarreh bu ngurribawon nawu idols.

2 John

Ngaye Ngayolyolme Ngudberre Kunwoybuk Dorreng 2 John 1-4

¹ Ngaye nawu John dja ngawohrnan yiwarrudj ngarre, dja ngaye wanjh marnebimbun ngudda ngalbu daluk ngundjarrngbom God, dja mak wurdwurd dorreng nawu ke. Ngaye wanjh marnedjare ngudberre bu kunmekbekenh karridjarrkburrbun kore kunwoybuk. Dja mak birriwarlahkenh bininj nawu kabirriburrbun kunwoybuk, wanjh bedda warridj ngundidjalmarnedjare.

² Kuninjkuu wanjh kundjalwoybuk kurrmerrinj kore ngad bu kadjaldi kore ngad kukange kadberre munguyh munguyh.

³ Ngadjare God nawu Kornkumo dja mak Jesus Christ nawu Beywurd nuye bu kunmak kabenedjalkurduyime kadberre, dja mak kandidjalkongibun dja mak kandihdjalnahnan bu kandiwon kunmodmikenh dorreng. Dja ngadjare mak bu karrikarme kunwoybuk kore kanmarnedjare.

⁴ Ngalbu ngudda daluk, ngaye wanjh ngadjalnjlngmakminj bu ngabenwobekkanng nawu wurdwurd ke kore birriwoybukwong mankarrewoybuk duninj nuye God, dja mak kabirriini kore kunmak munguyh. Kuhni bu Ngabbard kanwokrayekwong kadberre.

Karrimarnedjaremerrimen 2 John 5-6

⁵ Bolkkime wanjh ngaye ngadjare wokrayekwon ngudberre. Mahni mankarre minj mankerengehenh, dja ngurridjalyingkihburrbuni bu kerengehenhni. Wanjh kab karrimarnedjaremerrimen bu bulkkidj duninj.

⁶ Bu ngad karrimarnedjaremerrimen kore kuhni karrikurduyime kore nungan God kanyingkihwokrayekwong bu kanwong mankarre nuye. Ngudda ngokko ngurriyngkihbekekani kunyungkihni, bu mankarre nuye kayime bu karridjalmarnedjaremerrimen.

Ngabenyolyolme Bininj Nawu Kabirrikurrehkurren 2 John 7-11

⁷ Birridjalwern bininj nawu kabirriwohkurrekurren ngokko kandibawong dja birriwam birriyarlarmerrinj kore kubolkwarlahbubuyika kabirridi. Bedda wanjh kabirriyime yimankek Jesus Christ minj kumarwinj bu bininj duninj yimerrangimeninj. Bininj nawu kabirriyime kunmekbe wanjh nakka kabirrikurrehkurren dja kabirridjalwirrihme nawu Christ.

⁸ Wanjh ngurrinaharrimen ngudmandeleng ba bu ngurrimang kunmakmak nawu God nguningyngkihberrebom. Kaluk nungan ngunkarremulewan ngudberre kore ngurrimarnedurrkmirri. Dja yuwn bu ngurriwarrhke!

⁹ Bininj nawu minj mandjad kabirrikurduyime kore Jesus kanbukbukkanng kadberre, bedda kabirribalkurduyime kunbubuyika, wanjh bedda kunu minj kabirriraworren nawu God. Bininj nawu kabirrikurduyime kore Jesus kanbukbukkanng kadberre, wanjh nakka bedda kabirriraworren God nawu Ngabbard dja Beywurd nuye nawu Jesus.

¹⁰ Bu yiman nangale bininj kamre kore ngudda yimankek ngunbukkabukkan kore kunbuyika kunmayali, wanjh nakka nanu yuwn yikimang bu minj kangime kore kunrurrk ke.

¹¹ Namekbe bininj yiman yikimang, wanjh kunukka yibalngunjdjikan, bu ngunebaldjarrkkurduyime kore kunwarre.

Ngaye Ngadjare Djahwon Ngudberre.

2 John 12-13

¹² Ngaye wanjh kunwern marnebimbuyinj ngudberre, dja minj ngadjare ngahbimbun munguyh kore djurra, dja ngadjaldjare ngamre karrinarren bu karriwokdi darnkih, ba bu karridjarrknjilngmak rowk.

¹³ Ngudda ngunedanginj ngalbu God bidjarrngbom, wanjh ngalengngarre wurdwurd bedda ngundimarnewokmunkewerrinj kore kunwokmak dorrengh ke.

3 John

Ngaye Ngayolyolme Manbu Kunwoybukkenh

3 John 1-4

¹Ngaye John nawu ngawohrnan yiwarrudj ngarre, wanjh marnebimbun nahni djurra ke, ngudda Gaius, nawu marnedjareminj. Ngaye wanjh marnedjare bu kunmekbekenh kore ngarrdjarrkurrbun kunwoybuk duninj.

²Ngaye marnedjare ngudda nawu ngarrdabbolk. Ngaye wanjh marnedi yiwarrudj ba bu kamak yini, bu minj yidjakngalme, dja mak kunmak ngunmarneyimerran munguyh. Ngayingkihurrbun ngudda bu yidjalkangemak.

³Ngaye wanjh ngawernhnjilngmakminj bu yikahwi nawu karridangerinj kore Jesus bu birrimwam ngundimulewam birriyimeng bu yiwernhkarrme manbu kunwoybuk, dja kore yidjalkurduyime munguyh bu kunwoybuk dorreng.

⁴Bu ngaye kuhni ngabekkang nawu wurdwurd ngardduk bu kunwoybuk kabirrikarrme, wanjh ngandidjalnjilngmarnbun duninj. Kunmekbekenh kunu nganjilngmak. Minj njale mak nganwernhnjilngmarnbun.

Nawu Karridjarrkdabbolk

3 John 5-8

⁵Ngudda ngarrdabbolk nawu marnedjare, ngaburrbun ngudda munguyh ngurrbenbidyikarrme birribuyika nawu karridangerinj kore Jesus, dja nawu mak minj ngurrbenkukurrbun. Kuhni kamak rowk bu ngurrikurduyime kore God kadjare.

⁶Birrimekbe bininj ngandimarneyimeng ngaye dja mak nawu yiwarrudj ngarridjarrkre bu ngudda yibenmarnedjareni birribuyika bininj. Bedda wanjh ngundimiyikang ba bu yibenbidyikarrme bu baleh kore kabirriwohrehore. Kunukka wanjh kundjalmak duninj kore God kanjilngmak.

⁷Mak ngudda ngurrbennahnani nahni bininj nawu kabirriwohrehore kore kunngey nuye Christ. Bedda minj bindimarnedjareniwiringinj bu birribuyika bininj nawu minj kabirriwoybukwon Christ bu bindibidyikarrmeninj bedberre.

⁸Wanjh kumekbekenh yimankek karrbenbidyikarrmeninj bedberre nawu kabirrimarnedurrkmirri nawu Kunwoybuk, ba bu kunukka karriy-emrangementinj bu ngad warridj karridjarrkdurrkmirriwiringinj nuye.

Ngabenbeneyolyolme Nakudji Nawu Nawarre Bininj Dja Mak Nabaduyika Nawu Namak

3 John 9-12

⁹Ngaye ngabimbom nahni djurra bedberre bininj nawu yiwarrudj kabirrikarrme, dja nakudji bininj nawu kangeyyo Diotrefes, nungka minj nganwokbekkayi, dja kadjaldjare nungan kahdjalkukdokmihwerren.

¹⁰Wanjh bu ngaye ngamre, wanjh ngabenmarnewohmulewan birriwern kore baleh nungka kakurduyime. Nungka wanjh kabendjalkowe ngadberre bu kunyid dorreng. Dja mak kunbuyika kunwarre kayime, bu minj kabenkimang birribuyika bininj nawu karridangerinj kore Jesus. Yikahwi birribuyika bininj birridjareni bindikimayi birrimekbe nawu karridangerinj bininj, dja Diotrefes benngurdkayi, dja benburriweng kore yiwarrudj bedberre.

¹¹ Ngudda ngarrdabbolk, nawu ngaye marnedjare, yuwn mak yibaln-gunjdjikan nawu kunwarrekenh. Djal kore kunmakkenh yiwernhngun-jdjika. Bininj nawu kabirrikurduyime kunmak, nakka wanjh God nuye bininj. Bininj nawu kabirridjalkurduyime kore kunwarre ngarre, wanjh nakka minj birridarrkidnayinj God.

¹² Nawu nabuyika bininj nawu Demetrius, nakka wanjh namakni. Birriwern bininj kabirrimarnekarremakwan. Dja nungka wanjh kadjalkar-rme kore kunwoybuk. Ngad warridj ngarrikarremakwan, dja ngudda ngurriburrbun ngad minj ngarrikurren.

Ngaye Ngadjare Djahwon Ngudberre

3 John 13-15

¹³ Ngaye wanjh ngakarrme kunwern kore minj marnebimbuyinj ngud-berre, dja minj ngadjare kore djal djurra ngabimbun.

¹⁴ Kaluk ngayeman bu ngadjare werrek ngambalhre bu ngarrkebnarren ba bu ngarrwokdikenh.

¹⁵ Ngadjare God nungan ngunwon kunmodmikenh nuye. Nawu djawirna ngabenkarrme kondah wanjh ngundimarnewokmunkewerren. Kaluk yibenbebbehmarneyime kore ngabenmarnewokmunkewerren bed-berre nawu djawirna ngarrku.

Jude

Ngaye Jude Ngabimbom Nahni Djurra Ngudberre Nawu Ngurriwoybukwon Christ

Jude 1-2

¹ Ngaye nawu Jude, nawu James ngaye nganedanginj. Ngaye ngahmarnedurrkmirri Jesus Christ. Ngabimbun nahni nawu djurra ngudberre rowk nawu God ngunkayhmeng. Nungka wanjh Kornkumo dja ngunmarnedjareminj, dja ngudda wanjh ngurringehme kore Jesus Christ ngunkarrme ngudberre.

² Ngadjare nungka ngundjalkongibun ngudberre, dja mak ngunwon nuye kunmodmikenh kore ngundjalmarnedjare bulkkidj.

Yikahwi Ngurriworrinj Bininj Nawu Minj Kabirrikadjung Jesus

Jude 3-16

³ Ngudda nawu karridabolk nawu marnedjare ngudberre. Ngadjareni bulkkidj duninj bu ngabimbuyi ngudberre bu ngayolyolme God nawu kanngehkheng kaddjarrkberre rowk. Dja kunu bonj, dja kunbadbuyika werrek ngabimbun kore bengdayhke ngudberre. Bolkkime ngaye ngadjare bengyolyolme ba bu ngurrikangemurrngrayekmen kore kunwarre ngurribun bu kunwoybuk ngurriwernhkarrme kore God kunkudjikenh kanwong ngad kadberre nawu bininj nungan nuyekih.

⁴ Ngaye bengdayhke bu yikahwi birriwarre bininj wanjh manmolk birringimerreni dja ngurriworrinneninj ngudberre. Kerngehkenh duninj nawu prophets birribimbom bu naninjnanukenh bininj bu bedda wanjh God ngokko benkangedjadmeng. Bedda wanjh kabirridjalwokwe God nuye, dja wanjh kabirriyime, "God nakka kandjalmarnekurduyime kunmak. Bonj, wanjh, karrikurduyimen kunwarre kore karridjare." Dja mak kabirriwarrewan Jesus Christ nawu nadjalkudji kadberre king dja nawu kanmarnewohrnan rowk.

⁵ Ngaye ngadjare bengdayhke ngudberre njalehnjale yehyeng ngudda nawu korroko ngurriyingkihburrbun. Ngudda ngurriburrbun nawu Kawohrnan Rowk bennehkheng nuye bininj bu benbebheng dja benkheng kore kunred Egyptbeh. Kaluk bu yerrekah, wanjh benbom yikahwi bininj bedberre nawu minj birriwoybukwoyi.

⁶ Dja mak ngurrbenburrbu nawu yikahwi angels nuye wanjh God benduy. Bu kerngehkenhni bedda birriwohrnawohrnani, wanjh birrikimukworrinj, dja birridjalbolkbawong kore birrihni kore heaven. Wanjh kumekbekenh kunu nawu Kawohrnan Rowk benkurrmeng kore kanjdji kore kubolkmunun kabirribongdi dja mak benbongnameng wirlmurrng nawu narayek duninj nawu minj kahyerrkme, kaluk bu kunbarnangarrakudji kunkimuk kamre wanjh God kabendjaldung.

⁷ Mak kunbuyika karohrok kore kunred bokenh Sodom dja Gomorrah dja mak kuredbubuyika kumekbe kunred ngarre. Bininj nawu kumekbe birrihni wanjh birridjareni kunwarre birrikurduyimi bu djal munguyh. Kaluk bedda wanjh birriwarreworrinj, dja bedman bininjdeleng birrikaliyoy. Kumekbekenh bedda kabirridjakkbekkan bu kunrayek kabebme bedberre bu kabirrirung kunak munguyh munguyh. Wanjh

kuhni kandjalbengdayhke kadberre ba bu karrihnan rowk kore baleh kurduyimerranj bedberre kunkare.

⁸ Kuningkunu wanjh kadjalrohrok nahninjanu bininj nawu bolkkime kabirringime kore ngudda ngurrimirndemornamerren. Bedda wanjh yiman kunkodjbukirri kabirrimang bu djal bedberrekih. Bedda wanjh kabirriwarreworren bedberre kunburrk. Dja mak kabirrihwe God nuye kunwok manbu mandulkarrekimuk, dja wanjh kunwarrekenh kabindiwarrewe nawu birridjalmak angels kore heavenbeh.

⁹ Dja kawarre! Ngurriburrbun nawu angel kangeyyo Michael, nawu kabenmarnewohrnan birribuyika angels, wanjh minj kuhni nungka kurduyimeninj yiman kayime nahnin bininj bolkkimekenh. Nungka benedurreni nawu namarnde kore nangale bikukkarmeninj nawu Moses bu korroko doweng. Dja Michael minj nunganwali bidjubuyi nawu namarnde. Nungka bidjalmarneyimeng, "Nawu Kawohrnan Rowk ngudda ngundung."

¹⁰ Dja birrimekbe birriwarre bininj nawu ngurriraworrinj, bedda wanjh kabirrimarneyime bu kunwarre kore kunwern minj bedda kabirrimen-mengang. Wanjh kabirridjalwirrihwe nawu kundjalmak. Dja kunyahwurd kabirridjalburrbun yiman kayime mayh nawu kadjalborlhme kundjalyahwurd. Ngayime bu minj kabirridjalburrbun nadjalwarre nawu kabenbularrbun rowk.

¹¹ Wanjh kunukka ngadjare kunyid duninj benmarnekurduyimerra bedberre. Kaluk bedda yiman kabirrimarnebolhkadjung nawu Cain bu kabirringunjajikan nuye. Dja kunbuyika, bu yiman birrikurduyimi kunwarre yiman bu nawu Balaam kurduhkurduyimi ba bu birrikukmayi kunwardde nawu money. Mak bedda kabirriwokwe nawu God yiman kayime nawu bininj Korah dorreng bu kunkareni birriwokburriweng kore God nuye kunwok.

¹² Kaluk bedda wanjh ngunwarrewon ngudberre bu ngurridjarrkngun manme kore ngurrimarnedjaremerrenkenh. Bedda dja ngudda dorreng ngurridjarrkngun bu minj mak kabirriyeme. Kaluk bedmandeleng kabirridjalkuknahnarren. Dja mak bedda yiman kayime kunkodjngol manbu minj mandjewk kakarrme. Bu kunmayorrk kamre wanjh kunukka kahrokan manbu kunkodjngol. Dja mak bedda yiman kayime kundulkdarleh manbu minj kakarrme manme. Kaluk bu kunmayorrk kamre, wanjh kunu karredjmaddurrkmire kore maddudjindi kuroorrebeh. Wanjh kunu kahdowen bokenhkah.

¹³ Bedda wanjh birriwarre duninj nawu minj kabirriyemengalme. Ngayime bu ngudda ngurrinan kunmayorrk kabun kurrula, dja wanjh djarna kawernmerren, bedda wanjh karohrok. Dja mak bedda yiman kayime mankokkarrng manbu ngalengman kadjalwohrehwehre. Kaluk kabirribonghdangen kore kunred korroko yingkihbolkmarnbuyindanj wanjh kunukka kabolkmunun munguyh munguyh.

¹⁴ Ngurriburrbun Enoch nawu Adam bikebimahwameng, nungka wanjh benmulewani naninjanu birriwarre bininj kore God biwokwong, bu yimeng, "Ngurrihna! Nawu Kawohrnan Rowk kamre kaluk kabenkan birridjalwernhmirdewernkenh nawu birridjamunkenh angels nungan nuye.

¹⁵ Wanjh nungka kandjadme karriwarlahkenh bininj rowk, dja wanjh kabenwarrewan nawu kabirriwirrihwe God dja kabirrimarnekurduyime

kunwarre nuye. Kaluk nungka kabenbun bedberre rowk bu kabirriwidnan God dja kabirridjalmarneyime kunwarre nuye." Kunmekbe yimeng nawu Enoch bu korroko duninj.

¹⁶ Kaluk naninjnanu birriwarre bininj nakka wanjh munguyh kabirridjarokdi dja mak kabindihwelengname birribuyika bininj. Dja mak bedda munguyh kabirridjalkurduyime kore bedman kabirridjaldjare nawu yehyeng nawernhwarre rowk. Mak bedda kabirridjalburluburlumerren bedmandeleng dja mak kabindikowe bu kabindikelehkilehme birribuyika bininj bu kabindimarneyime, "Ngudda yimak. Dja wanjh kanmarnekurduyimen kore ngaye ngadjare." Kuhni wanjh kabindimarneyime.

Yuwn Bu Ngurrimarrkbaworren

Jude 17-23

¹⁷ Ngudda nawu karrihdabbolk dja nawu ngaye marnedjare, kab ngudda ngurriburrbun nawu apostles nuye nawu ngad kadberre kawohrnan Jesus Christ bu bedda birriyingkihmulawam.

¹⁸ Kaluk bedda birriyiming, "Kaluk yerrekah bu darnkih kamkuyinjiyiburnburnkenh rowk, wanjh nawu bininj kabirridjekmiwon God. Bedda kabirridjaldjare kunwarrenkore kore God kawarnyak." [2 Peter 3:3]

¹⁹ Wanjh naninjnanu bininj nawu ngundikuklarlmang ngudberre. Kaluk bedda kabirridjaldjare kore kunwarre bedberrekih kabendjurrkkan bu kabirrikurduyime. Kaluk bedda minj kabirrikarme nawu Namalngmakkaykenh.

²⁰ Dja ngudda, nawu ngaye karrihdabbolk dja nawu marnedjare, wanjh ngurridjalkangewoybuknin bulkkidj duninj kore God, dja mak ngurrimurrngayekworrimen. Dja mak yiwarrudj ngurridjalmarnedin munguyh kore Namalngmakkaykenh ngunbidyikarme.

²¹ Dja mak ngurridjalmarnedjaremerrimen yiman bu God kandjarrkmarnedjare rowk. Ngurriwernhburrbu Jesus Christ nawu kawohrnan kadberre bu kamre kanmimkongibun duninj bu kandarrkidwon munguyh munguyh.

²² Ngurribendjalkongibu nawu bininj ngudberre bu minj kabirriwernhwoybukwon God.

²³ Ngurribennghehkemen birribadbuyika, yiman kayime yibenbebken kore kunak kahrung! Mak birribadbuyika bininj wanjh yiman ngurribenkumanjwidnarren kore kunwarrehwarre benkukwarrehwarrewong, dja bonj, ngaleng ngurribendjalkongibu.

Bu Karridjalburlumen God

Jude 24-25

²⁴ Nungka God nakka wanjh djalmurrngayek duninj dja ngunbidyikarme ngudberre bu minj ngurriyawoyhmankan kore kunwarre. Mak ngunkerrngehmen bu ngudda kunwarre yak, ba bu ngunkurrme darnkih kore kumirrk nuye, nawu nawernhmakkaykenh duninj bu ngurridjalwernhmarrmarr duninj.

²⁵ Nungka nadjalkudji duninj God nawu kanngehkeng kadberre rowk. Wanjh karriwernhburluburlumen nuye kore Jesus Christ nawu kawohrnan kadberre bu karriyime bu God wanjh king duninj, dja mak nungka narrulkarrekimuk duninj, dja wanjh kadjalwohrnawohrnan rowk kondanjkuu kurorre dja mak kore kaddum heaven kore kerengehkenhbeh, dja mak bu bolkkime, kaluk munguyh munguyh! Amen.

Revelation

John Kayolyolmerren Bu Njalekenh Bimbom Nahni Djurra

Revelation 1:1-3

¹⁻² Nahni nawu djurra kayolyolme bu God bibukkang nawu Jesus Christ. Kaluk bu nungka mey kunwok, wanjh benbalbukkang bininj nawu kabirrihmarnedurrkmirri nuye kore baleh kabolkyimerran dja mak bu darnkih kayimerran. Dja Jesus bimunkeweng nawu angel nuye dja nganbukkang ngaye John bu ngahdurrkmirri Jesus. Wanjh ngaye bolkkime ngamulewam kunwoybuk dorreng kore njalehnjale kore ngaye nganang dja ngabekkkang. Ngaye ngayolyolme kore God nuye kunwok dja mak kore Jesus Christ nungan mulewarrinj kore kunwoybuk nuye.

³ Kanjilngmak bininj nawu kabidjalbimngey bun kore kawokbimbuyindi nahni djurra manbu God nuye kunwok, dja warridj kabirrinjilngmak bininj nawu kabirribekkan dja kabirribalkurduyime kore kawokbimbuyindi nuye. Dja wanjh ngokko darnkih kamhre nuye bu kuhni ngad kanmarnekurduyimerran rowk.

Jesus Kanmarnekurduyimeng Kunwern Kore Kunmakkenh

Revelation 1:4-8

^{4-5a} Ngaye John ngamunkewe mahni kunwok kore bininj nawu yiwarrudj ngudberre ngurrihni kore kuredbubuyika seven kore kubolkkimuk ngarre Asia. Ngurriburrbun God nawu djalyingkihni kerrngehkenh duninj, dja mak kadjaldi munguyh munguyh, dja mak nungka kadjaldarrkid munguyh. Dja ngurriburrbun seven birrimalngmakkaykenh nawu kabirrihdi kore kumirrk nuye God, kore nungka kahyerrkan kaddum duninj. Dja ngurriburrbun Jesus Christ nawu nawoybuk kore kabihmarnewokdi nawu kornkumo kadberre, dja mak nawu nayungkih bu yawoyhdolkkang kore kundowibeh. Nungka mak kadjalwohrnan bedberre kings rowk nawu kabirriwohrnawohran kore kubolkwarlahkenh rowk kondah kurorre. Wanjh ngadjare Jesus Christ dja nawu God dja nawu birrimalngmak kabirridi kumirrk nuye, bu ngundidjalkongibun kore kunmodmikenh dorreng ngundiwon ngudberre.

^{5b-6} Jesus Christ nawu kanmarnedjareminj dja kurlbawarrhmeng kadberre bu ngad kanbekng kore kunwarre karribonghdi. Dja mak kanmarnebom bu karriyimerranj nuye bininj kore kanmarnewohrnankenh, dja mak ngad karriyimerranj priests ngad nawu karriwern rowk, bu ngad karrimarnedurrkmirri God nawu Kornkumo nuye Jesus Christ. Mah, wanjh ngadjare karridjarrkburuburlmen nungka nawu nawernmakkaykenh duninj dja mak nawernhdulkarrekimuk duninj bu djal munguyh munguyh! Wanjh bonj.

⁷ Ngurrina! Jesus nungka kamhre kore kaddum kunngolbeh, dja birriwarlahkenh bininj rowk kabirridarrkidnan, dja mak bininj nawu birringorrdjabmeng warridj. Dja birriwarlahkenh bininj nawu kondah kurorre kabirrihni, kaluk bedda kabirrimarnenalkebun wernkih duninj bu nungkakenh.

Yoh! Kuhni wanjh kadjalkurduyimerran! Wanjh bonj.

⁸ God nawu Kawohran Rowk kayime, "Ngaye nawu Alpha dja Omega. Ngaye wanjh ngadjalkudji nawu ngayingkihdi bu kunkare duninj, dja mak ngadjaldi bolkkime, dja mak ngaye nawu ngadjaldarrkid munguyh munguyh. Ngaye nawu ngadjalwernhdulkarrekimuk duninj."

*John Birrarrkidnang Jesus Kore Kundulkarre Dorreng
Revelation 1:9-20*

⁹ Ngaye John nawu ngudda karridangerrinj. Ngad karriyikadjurren Christ dorreng bu karridjarrkdjakbekkankenh, dja mak kore karrimarnerdurkrmirri God nawu kawohrnan rowk, dja mak karrihdjalmadbun bu karrihdjalle munguyh kore kunmakkenh. Ngaye nawu ngahweykani kunwok nuye God dja mak ngaye ngahmulewani kore Jesus yimeng kadberre manbu kunwoybuk dorreng, dja wanjh kunmekbekenh bininj ngandikurrmeng kore manyunkurr kabolkngeyyo Patmos.

¹⁰ Kaluk bu kunbarnangarra nuyeni nawu Kawohrnan Rowk, ngaye ngakang nawu Namalngmakkaykenh, wanjh ngabek kang yiman wokkimukni bu kumwokdanj kore kubodmebeh ngardduk, kaluk wokyimi yiman trumpet.

¹¹ Wanjh yimeng, “Bu ngudda yinan kore bukkabukkan, wanjh yibimbu kore djurra nawu scroll, kaluk yibenmarnemunkewemen nawu bininj nawu yiwarrudj bedberre kore kunredbubuyikabeh manbu seven kabebbehbolkngeyyo Ephesus, Smyrna, Pergamum, Thyatira, Sardis, Philadelphia, dja Laodicea.”

¹²⁻¹³ Bu ngaborledmeng ba bu nganayi nangale nawu nganhmarneyimi. Kaluk bu ngaborledmeng, nganang seven golden lampstands di, dja bininj kumekbe dingihdi nawu kuyimi yiman “Bininj Duninj”. [Daniel 7:13] Nawu nungka djongbuyindi nawu nawernhmadjkuyengkenh dja mak golden manburra berrekalkdukkayindi.

¹⁴ Mak kukodj nuye dja kunngabek nakka belebami duninj yiman snow dja mak wool manbu manbele duninj, dja kunmim nuye nakka mimbami yiman manbirluwoldjen ngarre kunak.

¹⁵ Dja kurrenge nuye, nakka yiman wirlmurrng manbu bronze rungi kore kunak dja kukbami yiman bu bininj kaborndung. Mak bu nungka kumwokdi, wanjh wokyimi yiman kukku kumdjalwernhborlobmi.

¹⁶ Nungka nganang karmi seven mankokkarrng kore kubidkun nuye, dja kore kurrangbeh nakka djurrbokenh mandjawak kumbebmeng, mak kunkeb nuye kebbami yiman kundung rerrih manbu kawernhdungbangmen bu barnangarraburldhjarn ngarre.

¹⁷ Kaluk bu kunmekbe nganang, wanjh ngamakang kore kurrenge nuye yiman bininj nawu kadjaldowen bu kakukyo. Dja nungka nganarnebidkurrmerinj manbu kunbidkun nuye dja mak ngankarrmeng, wanjh yimeng, “Yuwn bu yikele. Ngaye nawu ngadjalkudji ngahdokme dja mak ngamre yerre.

¹⁸ Mak ngaye nawu ngahdjaldarrkiddi munguyh; ngaye ngarroweng, dja yina, wanjh ngaye ngahdjaldarrkid munguyh munguyh! Dja mak ngahkarrme nawu keys kore kundowikenh ngarre dja mak kore bininj nawu birridowerrinj kabirribongdi.

¹⁹ Wanjh yibimbu nawu yinang, dja mak kore yinan kakurduyimerran bolkkime dja mak bu yerrekah.

²⁰ Mak ngayolyolme kore kamenmenyime manbu seven mankokkarrng bu kanyinang ngahkarmi kore kubidkun ngardduk, dja mak manbu seven golden lampstands. Kaluk makka rowk wanjh manwarlkkaykenh. Nawu seven mankokkarrng, nakka wanjh seven angels bedberre kore seven Churches, dja nawu seven lampstands nakka wanjh yiman kayime seven Churches bu kabirribekbhkarrme.”

2

*Jesus Benbengdayhkeng Bininj Nawu Yiwarrudj Bedberre Kore Kunred Ephesus**Revelation 2:1-7*

¹ Wanjh Jesus nganbengdayhkeng, yimeng, "Nahni yibimbu nahni nawu angel nuye, nawu kakan bu kabenwon bininj nawu yiwarrudj bedberre kabirrihni kore kabolkngeyyo Ephesus, 'Namekbe nawu kahkarrme seven mankokkarrng kore kubidkun nuye, wanjh nakka kahre kore seven gold lampstands kahdi, kaluk kuhni bu kayime ngudberre,

² "Ngaye ngaburrbun kore ngudda ngurrihkurduyime, dja mak kore ngurrihmarnedurkmirri bu kunkimuk, dja minj ngurribawon kore kumakkenh ngurrihre. Dja mak ngaye burrbun ngudberre bu minj ngurbenwokmarrkmang kunwok bedberre nawu birriwarre bininj. Dja mak ngurrbenrohrokmen birrimekbe nawu kabirrihyime yimankek bedda apostles duninj, dja ngurrburrbun bu bedda wanjh kabirrihkurrekurren,

³ Ngudda ngurrihdjallay kore yimankek kunrayek bebmni ngudberre bu ngayekenh kunngey ngardduk, dja minj ngurrimarrkbaworrineninj."

⁴ "Dja ngaleng, kuhni djalwohbengdung ngudberre; ngudda minj kandidjalmarnedjare yiman bu kerrngehkenhni.

⁵ Wanjh ngurriburrbu kore kerrngehkenh ngurrihrey kunmak rowk dja kunukka yerre bu kunwarre ngurriyimeng. Dja wanjh ngurrikangeborledmen dja mak ngurridurnde kore kerrngehkenh kunmakni rowk ngurrihrey. Dja bu minj ngudda ngurrikangeborledme, kunukka wanjh ngaye ngamre dja ngamang ngakan nawu lampstand ngudberre.

⁶ Dja ngaleng kunkudji kore kunmak ngurrikurduyime. Ngudda ngurbenwidnan bininj nawu Nicolaitans kore kunwarre kabirrihkurduyime, yiman ngaye mak ngabenwidnan rerrih."

⁷ "Bu ngudda ngurrikarrme kuncanem, wanjh ngurridjalbekka kore baleh nawu Namalngmakaykenh nungan kabenmarneyime bininj nawu yiwarrudj bedberre. Bininj nawu kabirriyurrhke kore ngayekenh kore kunwarre ngarre, wanjh ngabenbawon bu kabirringun manme manbu kabenmalngmimbawon. Kaluk mahni manbarnem wanjh kundulkbeh makka manbu karrudjindi kore God nuye kubolkmakaykenh."'"

*Jesus Benbengdayhkeng Bininj Nawu Yiwarrudj Bedberre Kore Kunred Smyrna**Revelation 2:8-11*

⁸ Jesus nganyawoyhbengdayhkeng ngaye nawu John, bu yimeng, "Kuhni yibimbu nuye angel nawu kakan kore yiwarrudj bedberre nawu kabirrihni kore kabolkngeyyo Smyrna, 'Namekbe nawu dingihdi bu kerrngehkenh duninj, dja mak yerrekah kadjaldarrkid munguyh, nahni nawu doweng dja kumyawoyhmimbiminj, wanjh namekbe nawu kamulewarren, kayime,

⁹ "Ngaburrbun bu kunrayek kahbebme ngudberre. Mak ngaburrbun bu ngudda yimankek ngurrimarladi, dja ngaleng djalmarneyime bu woybukkij ngudda ngurridjalkuken duninj! Mak ngaburrbun bu yikahwi bininj ngundimarneyime bu ngundiwelengname kore kunwarrekenh. Bedda yimankek nawu kabirringeyburren Jews bininj, dja burrkyak, bedda minj woybukkij nawu bininj Jew. Bedda wanjh namarnde nawu Satan nuye bu kabirridjalmirndemornnamerrenkenh."

¹⁰ "Bolkkime bu kamre kunrayek dja wanjh ngurridjaldjakbekkan. Dja yuwn ngurrikele kore kumebekenh. Ngaye marneyime ngudberre, nawu namarnde duninj wanjh ngunkurrme yikahwi ngudberre kore

prison bu ngunrohrokme ngudberre, wanjh ngurriwohdjakkbekkan bu ten kundung kunbarnangarra. Dja ngurridjalkangewoybuknin, dja mak bu ngundibun ngurridowen kaluk ngaye wanjh malngmimbiwon ngudberre ba ngurrimalngmimbi munguyh.”

11 “Bu ngudda ngurrikarme kunkanem wanjh ngurridjalbekka kore baleh Namalngmakkaykenh kabenmarneyime nawu yiwarrudj bininj bedberre. Wanjh birrimekbe nawu kabirriyurrhke nakka wanjh minj kabirrire kore kubolkwarre bu minj kabirriyawoyhmalngdowenkenh.””

Jesus Benbengdayhkeng Bininj Nawu Yiwarrudj Bedberre Kore Kunred Pergamum

Revelation 2:12-17

12 “Kuhni yibimbu nuye angel nawu kakan kore nawu yiwarrudj bedberre nawu kabirrihni kore kabolkngeyyo Pergamum, Namekbe nawu kahkarme mandjawa nakimuk djurmak duninj, kaluk nakka djurrbokenh duninj wanjh kuhni kayime,

13 “Ngaye ngabolkburrbun kore ngudda ngurrihni. Kaluk kumekbe kore namarnde nawu Satan kahni kore nungan kunred kabolkwohrnan. Dja ngudda ngurrihdjalkangewoybukni kore kandingeymulewani. Dja mak ngudda minj ngurrikeleniwirrinj bu ngaye kandiwoybukwong kore kunrayek behmi ngudberre kumekbe kore kubolkkimuk nawu namarnde Satan kahdi. Kumekbe bolkyimi bu birribom nawu Antipas nawu nungka kangewoybukni, dja ngardduk kunwok weykahweykani.”

14 “Dja mak ngaye ngakarme yikahwi kore bengdung ngudberre. Wanjh yikahwi ngudda ngurrihmunkekadjung bininj nawu Balaam* nawu benbukkani bininj bu kunkareni. Kaluk nungka bibukkang nabuyika bininj nawu Balak bu benbalborledkeyi nawu Israel benkebmawahmeng kore kunwarre birriyimi bu manme birringuneng manbu birridjalwoni kore idols dja mak birridjirdmarreni daluk bininj bu kunwarrekenh.

15 Dja warridj yikahwi ngudberre bininj kabirridjalkadjung kore nawu Nicolaitans kabindibukkabukkan bedberre.

16 Dja wanjh ngurrikangeborledmen! Dja bu minj ngurrikangeborledme, wanjh kunukka ngamre ngarriburren birrimekbe nawu Nicolaitan bininj, mandjawa dorrengh ngardduk bu ngambekbe kore kurangbeh ngardduk.”

17 “Nawu bedda kunkanem kabirrikarme wanjh birribekka kore Namalngmakkaykenh kabenmarneyime nawu yiwarrudj bedberre. Wanjh birrimekbe nawu kabirriyurrhke kore ngayekenh, nakka ngabenwon manbu manwarlkkaykenh manme manbu manna.† Dja mak ngabenbebbewon manwardebele duninj manbu manngeykerrnge duninj kore kabebbehngyimbuyindi. Minj nangale mak kangeyburrbun, dja nakka nadjalkudji kaburrbun nawu kangeymang.””

Jesus Benbengdayhkeng Bininj Nawu Yiwarrudj Bedberre Kore Kunred Thyatira

Revelation 2:18-29

18 Mak Jesus nganyawoyhbengdayhkeng, yimeng, “Kuhni yibimbu nuye angel kakan kore nawu yiwarrudj bedberre kabirrihni kore kabolkngeyyo Thyatira, Nawu Beywurd nuye God, nawu kunmim nuye yiman kayime kunak kahrung, dja kore kurrenge nuye nakka yiman wirilmurrng nawu bronze bu kahbame duninj, wanjh nakka kuhni kayime,

* 2:14 Numbers 22:5-7; 25:1-3; 31:16 † 2:17 Exodus 16:14-15; 16:33-34; John 6:48-50; Isaiah 62:2; 65:15

19 “Ngaye ngaburrbun kore ngudda ngurrihkurduyime mak ngaburrbun bu ngudda kandimarnedjare dja kandidjalwoybukwon, dja mak ngaburrbun kore kandiwerhnmarnedurrkmirri, dja mak minj nguringudjywarren. Dja ngadjalburrbun bu ngaye ngurrikurduyime kunwern bolkkimekenh, bu ngurriyurrrheng kore ngurridedjingmey bu kerrngeghkenhni.”

20 “Dja ngahkarrme kunwarre ngudberre ngalmekbekenh daluk Jezebel ngalbu ngalwarre. Ngalbu kahmarnburren yimanek ngaleng prophet. Ngalka wanjh bendjalbengwarrewong nawu ngaye ngandihmarnedurrkmirri ba bu birridjirdmarreni bininj dja daluk, dja mak bu birringuni manme manbu birrihwoni nawu idols bedberre. Njalekenh ngurribawon bu kuhni kakurduyime rowk?”

21 “Ngaye ngadjalbwong ba warnyakmulewarremeninj kore kunwarre kurduhkurduyimi, dja ngaleng minj kadjare bu kabawon manbu kunwarre.

22 Kunukka wanjh ngaye ngakukburriwe kore kubolkwarre duninj. Mak birrimekbe warridj nawu birrihdjarrkkurduyimi kunwarre ngaleng dorrengh, wanjh nakka kabirriwerhndjarrkdjakbekkan kunkimuk duninj. Dja bonj, bu ngaleng kabirrimunkebawon kore kunwarre kabenhbukkan, wanjh kunukka minj ngabenmarnekurduyime kumekbe.

23 Kaluk ngabenbun nawu ngaleng kabirrimunkekadjung. Wanjh birriwern bininj nawu yiwarrudj bedberre ba kabirriburrbun rowk bu ngaye ngadjalkudji nawu ngabenkangeburrbun dja mak ngabenmayaliburrbun bininj nawern, dja ngaye bebbekarremulewan ngudberre rowk kore baleh yarrkka ngurrikurduyimeng.”

24 “Dja ngudda ngurrimirndebuyika nawu ngurrihni kore kunbolk Thyatira minj ngurrikadjuji kore benhbukkani birribuyika bininj, dja ngudda minj mak ngurriborlhmeninj mahni kunwok manbu kabirringeybun manwarlkkaykenh manbu namarnde nawu Satan nuye mankarredulmuk. Mah wanjh, minj mak ngabalyawoyhkurme kunwern ngudberre, bu wardi kunukka ngundulmukwon ngudberre.

25 Dja ngurridjalwerhkharrmen wernkih manbu kunmakkenh bukkang ngudberre kaluk ngaye ngamre.”

26 “Kaluk bininj nawu kabirrihyurrrhke bu ngayekenh, dja mak kakurduyime kore ngaye ngadjare kore kayiburnbunkeh rowk, wanjh ngakurme bu kabindimarnewohrnan kundulkarre dorrengh kore bininj nawu birriwarlahkenh rowk.

27 Dja birrimekbe bininj wanjh kabirriwohrnan rowk kore birribuyika bininj bedberre, bu djal kunrayek duninj. Dja mak kabindidjalkukburriwe yiman plate rerihi dja wanjh kabindidjalbakabakme. [Psalm 2:9] Mahni mandjalkudjiwi kundulkarre kore nganwong nawu Kornkumo ngardduk.

28 Dja warridj ngadjalwon nahni bininj manbu mankokkarrng kamhdjalbame bu kamhkabel kamre.”

29 “Birriwern nawu kabirrikarrme kunkanem wanjh birribekka bu baleh Namalngmakkaykenh nungan kabenmarneyime nawu yiwarrudj bedberre.””

3

Jesus Benbengdayhkeng Bininj Nawu Yiwarrudj Bedberre Kore Kunred Sardis

Revelation 3:1-6

1 Wanjh Jesus nganyawoyhbengdayhkeng, yimeng, “Kuhni yibimbu nuye angel nawu kakan kore nawu yiwarrudj bedberre kabirrihni kore kunbolk kabolkngeyyo Sardis, ‘Namekbe nawu nungan kahbenkarrme seven kunmalng dja seven mankokkarrng, wanjh kuhni kayime, “Ngabur-rbun kore baleh ngudda ngurrihkurduyime. Dja bininj kabirriyime bu ngudda yimankek ngurrihdarrkid, dja burrkyak, ngudda woybukkih ngurridowerrinj rowk.

2 Wanjh ngurrimdolkkarrimen! Dja mak ngurrimarnburrimen mak ngurrimurrnggrayeknin. Ngudda kunyahwurd kunngudj ngurrihkarrme, wardi kunukka mak ngurribalngudjdownen. Bu nganang nawu ngudda minj ngurriwernhmarrkmang nawu God ngardduk.

3 Wanjh ngurriwernhkarrimen nawu ngokko ngurrimey mak kore ngurribekkanbeh. Dja wanjh ngurridjalmarrkma, dja mak ngudda ngurrikangeborledmen. Bu ngudda minj ngurriiorrhmiyo, wanjh kunukka ngaye ngamre yiman bininj nawu manmolk kamre kangimen kore kurrambalk wanjh kamadjjirdmang wanjh ngaye kunmekbe ngayime bu ngamre. Kaluk ngudda minj ngurriburrbun kore baleh kabolkyime bu ngamre.”

4 “Yikahwi bininj nawu ngurrihni kore kunbolk Sardis bedda minj birrikangeburlerriworrimeninj bu kunwarre birriyimi. Kaluk bedda ngarridjarrkre ngaye dorrengh dja mak kunmadj bedberre madjbele duninj kabirridjongbuyindi, wanjh nakka birrimak bininj.

5 Bininj nawu kabirriyurrhke wanjh nakka warridj kabirridjongbuyindi nawu kunmadj madjbele duninj. Dja kore kabirrihngeydi nakka minj ngabenngeybularrbun kore djurra nawu kabirrimimbikenh munguyh, wanjh ngamarneyime Kornkumo ngardduk dja mak angels nuye bu bedda nawu birrimekbe bininj wanjh ngardduk djawirna.”

6 “Birriwern nawu kabirrikarrme kunkanem wanjh birribekka kore baleh Namalngmakkaykenh nungan kabenmarneyime kore nawu yiwarrudj bedberre.””

Jesus Benbengdayhkeng Bininj Nawu Yiwarrudj Bedberre Kore Kunred Philadelphia

Revelation 3:7-13

7 “Kuhni mak yibimbu nuye angel nawu kakan kore nawu yiwarrudj bedberre nawu kabirrihni kore kabolkngeyyo Philadelphia, ‘Kuhni kayime nawu nakukdjaman duninj dja nawu nawoybuk, dja mak nawu kahkar-me key nawu David nuye. Kaluk nungka kadjaldangmarrhmang manbu door, wanjh minj nangale mak karrangbalhme, wanjh minj nangale mak karrangmarrhmang kore nungka karrangbalhme, dja kayime,

8 “Wanjh ngaye ngaburrbun kore ngudda ngurrihkurduyime. Mak ngarrangbawong manbu minj nangale karrangbalhme. Ngaburrbun bu ngudda ngurridjalngudjwarre. Dja ngaleng ngurridjalwoybukwong ngardduk kunwok. Dja mak minj ngurrikele bu ngaye kandingeymulewan.”

9 “Birrimekbe bininj nawu namarnde Satan nuye, nakka wanjh kabirrihime yimankek bedda Jews, dja nakka kabirrihkurren, minj bedda woybukkih bininj nawu Jew. Ngaye ngabenmarnbun bu kabirrimre kore ngudda dja mak kabirribodan kore kurrenge ngudberre. Wanjh kabirrimulewarren bu ngaye marnedjare ngudberre.

10 Ngudda kandiwokmarrkmey ngaye dja minj ngurrimarrkbaworri-meninj. Wanjh ngaye djalkarmeng ngudberre rowk kore kaluk kunrayek

kunkimuk duninj kambembe bu kayimerran yerrekah kore kubolkwarlahkenh rowk bedberre. Kaluk kabenrohrokme bininj rowk nawu kondah kurorre ngurridjarrkni.”

11 “Ngaye bolkkime ngamyawoyhdurdeng. Dja wanjh ngurrihdjalw-rnhkarmen nawu ngokko ngurrimey, ba bu kunukka minj nangale mak ngunyimang nawu kore God ngunwon bu ngunmakwanken ngudberre.

12 Bininj nawu ngandihdjalwoybukwon munguyh wanjh nakka ngabenmarnbun bu kabirrimurrngayekmen dja mak ngabengkurrme kore God ngardduk temple nuye. Kaluk bedda minj kabirribolkbawon dja kumekbe kabirridjaldi munguyh. Mak ngangeybimbun kukange bedberre manbu kungey nuye God ngardduk, dja mak kungey ngalenggarre kunbolkkimuk nuye. Kaluk kabolkngeyyo Jerusalem Mankerrnge, dja mak kamkolung kaddumbek kore God ngardduk kahni. Dja mak ngabenmarnengeybimburren manngeykerrnge ngardduk kore kukange bedberre.”

13 “Bininj nawu kabirikarme kunkanem wanjh birribekka kore Namalngmakkaykenh nungan kabenmarneyime kore nawu yiwarrudj bedberre.””

Jesus Benbengdayhkeng Bininj Nawu Yiwarrudj Bedberre Kore Kunred Laodicea

Revelation 3:14-22

14 “Ngaye nawu ngahngeyyo Amen, dja ngaye ngamulewan bu kundjalwoybuk dorreng. Ngaye wanjh ngawohrnan rowk kore God marnbom. Wanjh yibimbu nahni ngardduk kunwok nuye angel nawu kakan kore nawu yiwarrudj bedberre kabirrihni kore kabolkngeyyo Laodicea. Kuhni ngayime,

15 “Ngaye ngaburrbun kore ngurrihkurdyime, bu ngudda minj ngurrikangerung dja mak minj ngurrikangebonjdjek. Wanjh ngadjare bu ngurrikangebonjdjeknin dja nuk ngurrikangerung!

16 Dja wanjh ngudda minj ngurrikangerung, mak minj ngurrikangebonjdjek, wanjh ngaye kukbekke kore kurrangbeh ngardduk yiman kayime ngawehme rerihi.

17 Ngudda ngurrimarneyimerren, “Ngad wanjh karrikuken mak karridjalme kunwern, dja minj njale mak karriyawoyhdjare!” Adju, bonj, minj ngurriburrburren bu ngudda ngurridjalwarre bininj nawu ngurrimarladj, dja mak ngurrimidubbe dja mak ngurrikuklahlarrk.

18 Wanjh ngaye bengdayhke ngudberre ngurrimray ba ngaweykan ngudberre gold nawu marnbuyindanj kore kunakbeh ba bu ngudda ngurriwernhkukenmen. Mak ngurrimray won ngudberre kunmadjbele ba bu ngurridjongbuyindi mak ngurrikukbalhmerren ba bu minj ngurriyawoyhyemengalme. Mak ngurrimray ba won medicine ngudberre bu ngurrikurrme kore kumim ngudberre wanjh ngurriwernhbolknankenh.’

19 “Ngaye ngabenbengyolyolme mandjad dja ngabendung nawu bininj rowk nawu ngabenmarnedjare. Wanjh ngurrimayalibekkarimen ba ngurribawon kunwarre kore ngurrihyime.

20 Ngaye kondah ngahdjaldi! Ngahdi kore kurrangmaye manbu door dja mak ngahdjaldangdong. Bu ngaye kandiwokebkan dja ngurridangmar-rhmang, wanjh kunukka ngamngimen wanjh karridjarrkngun manme.’

21 ‘Bininj nawu kabirriyurrhke wanjh nakka ngarridjarrkni kore ngardduk throne, yiman bu ngaye ngawinhmeng bu namarnde nawu Satan ngadjalngudjyakwong bu kunu nganehdjarrkni ngardduk Kornkumo kore nungka nuye throne.’

²² 'Bininj nawu kabirrikarrme kunkanem wanjh birribekka kore baleh nawu Namalngmakkaykenh nungan kabenmarneyime bedberre nawu yiwarrudj bedberre."

4

John Wohbolknang Heaven Bu Dangmarrhmiwam Nuye Revelation 4:1-11

¹ Bu kunmekbe nganang, wanjh ngayawoyhwaralngan kunbuyika. Nganang kore kumirrk ngardduk manbu dangmarrhmiwam kore heaven. Dja namekbe nakudjini nawu korrokoni nganmarnewokdanginj nawu wokymeng yiman trumpet rerrih, wanjh nganmarneyimeng, "Yimray kondah kore kaddum, dja djalbukkan ngudda bu baleh kaluk kakurduy-imerran yerrekah."

² Wanjh kundjalmekebe rerrih nawu Namalngmakkaykenh ngankang, dja kore kumirrk ngardduk nganang throne manbu kadjalyingkihdi kore heaven, kaluk kumekbe nawu bininj yerrkang.

³ Dja namekbe nawu ningihni kore throne nakka kunburrk nuye wanjh kuyimi yiman manbu manwarddemakkaykenh, yiman jasper dja carnelian. Kore biborledminguni manmekbe manbu throne makka medjyimi ngalbu ngalyod kamedjyime, nawu medjmakkaykenh duninj yiman kayime manbu emerald.

⁴ Mak manbu Throne birriborledminguneng twenty-four thrones kaluk birrini twenty-four daborrabbolk. Mak bedda birridjongbuyindi nawu madjbele duninj kunmadj dja mak gold crowns nawu birrikodjdjong-buyindi.

⁵ Namarrkon mayhkeyi dja ngurdulmi kore kumekbe throne. Kore kumirrk ngarre manmekbe throne seven lamps rungi manbirlukimuk dorrengh. Kaluk nakka seven kunmalng nuye God.

⁶ Dja mak kumekbe kore kumirrk ngarre throne manbu kurrula makka kaluk glass bobelebami yiman crystal.

Dja kore kuburldjarn dja manmekbe throne birriborledminguni nakka kunkarrngbakmeng mayh nawu kabirrihdjaldarrkid, nawu bedda kabirrimimdi kore kumirrk dja kubodme bedberre.

⁷ Nawu nayungkihni mayh nakka kuyimi yiman lion. Nabuyika nakka kuyimi yiman bulikki. Nabadbuyika nakka yiman kebyimi djal bininj. Nawu nabuyika nakka kuyimi yiman nawurrbir bu nungka dolkani.

⁸ Kaluk birrimekbe kunbarnangarra mayh nawu birridarrkiddi, wanjh birribebbehkarmi six kunwel dja birrimiwern kabirrimimdi kore kubuhbuburrk kabirrimimdi kore kubuhbuburrk kanjdji kaddum bedberre. Kaluk kunkarrngbakmeng nawu mayh kabirridjalyime kunbarnangarrakuyeng dja kumunukuyeng, dja minj kabirringurdme, wanjh kabirrihyime, "Nakukdjaman! Nakukdjaman! Nakukdjamunkenh nawu Kawernhwohrnan God Nawernhdulkarrekimuk Duninj! Nawu ker-ngeghkenh djalyingkihdi, dja mak nawu kahdjalni bolkkime mak bu munguyh munguyh."

⁹ Birrimekbe nawu mayh kabirrihdjaldarrkiddi kabirriburloburlume dja kabirrimakwan, dja mak kabirrimanj bun nadjalkudji nawu kahni kore throne dja mak nawu kahdarrkidmimbi munguyh munguyh.

¹⁰ Wanjh nawu twenty four dabborrabbolk munguyh kabirridjal-marneboddan kumirrk nuye nawu kahni kore throne, mak kabirridjal-burluburlume nawu kadjaldarrkidmimbi munguyh munguyh. Mak kabirrikodjyerrkkarren kabirrikurme crowns nawu kabirrikodjongbuyindi bedberre kore kumirrk ngarre throne dja kabirrimarneyime,

¹¹ “Ngudda nawu yidjalwernhkimuk duninj nawu Yiwohrnan God ngadberre, wanjh kunmekbekenh ngad ngundidjalburlume, dja ngundimakwan dja ngundimulewan bu ngudda yirrulkarrekimuk duninj. Yoh, ngudda yimarnbom yehyeng rowk, mak kore yiwokiyimeng wanjh djalmarnbuyindanj rowk dja kahdjaldi kore ngudda yidjareminj.”

5

Nawu Birriwern Rowk Birriburlumi Jesus kore Kubolkmak Heaven Revelation 5:1-14

¹ Wanjh nganang djurra nawu scroll dornnameng kore kubid nuye namekbe nawu kahni kore throne. Kaluk namekbe scroll ngeybimbuyindi kore kumirrk dja kubodme dja dangbalhmiyindi kore seven seals manbu belbmeng.

² Wanjh nganang angel nawu dulkarrekimukken kumwokdanginj wernkih, yimeng, “Nangale nawu bininj namak bu kabakke nahni seals wanjh karrangmarrhmang nawu djurra scroll?”

³ Dja minj nangale nawu kahni kore heaven dja kore kurorre dja mak kanjdji duninj kurorre bu burrbuyinj dja mak dangmarrhmayi namekbe scroll dja minj mak wokbimnaya kore kawokbimbuyindi.

⁴ Wanjh ngaye wernkih nganalkbom dja minj nangale namakniwirrinj bu dangmarrhmayi nawu djurra scroll bu binnayinj kore kururrk.

⁵ Wanjh nakudji nawu dabbolk duninj nganmarneyimeng ngaye, “Yuwon yinalkbun! Yina! Nakudji bininj kamre nawu munguyh kabenbun rowk dja mak kawinhme, dja nungka yiman kayime nabang mayh nawu lion. Kaluk namekbe danginj kore namud nuye Judah, dja mak David bikebmawahmeng nuye. Nungka wanjh karrangmarrhmang nawu djurra scroll.”

⁶ Wanjh nganang nawu Lamb dingihdi kore kuburldjarn darnkih manbu throne ngarre, dja kukyimi yiman ngokko bininj nawu birribom. Dja nganang warridj kunkarrngbakmeng mayh nawu kabirridarrkiddi, dja mak nawu twenty-four dabborrabbolk wanjh bedda rowk birriborled-minguni nawu Lamb. Nungka wanjh karmni seven kuncanemdulk, dja mak seven kunmim, nakka wanjh nawu seven kunmalng nuye God nawu benmunkeweng kore kubolkwarlahkenh ngarre kurorre.

⁷ Wanjh nawu Lamb kumwam dja mey namekbe djurra scroll kore kubidkun nuye nawu nungka yerrkani kaddum duninj.

⁸ Bu kunmekbe mey nawu djurra scroll, nawu kunkarrngbakmeng mayh nawu kabirridjalmimbi, dja nawu twenty-four dabborrabbolk birrimarne-boddanginj kore kumirrk nuye nawu Lamb. Kaluk birribebbehkarmmi nawu harps dja gold banikkinnawu dahkendi mankalkkidmanjmak duninj, kaluk makka yiwarrudj ngarre nawu God nuye bininj bedberreni.

⁹ Dja birriwayiniyerrkang manbu mankarrekerrnge nuye Lamb, birriyimi, “Ngudda yiwernhmakkaykenh duninj ba bu yimang nawu djurra scroll dja yirrangmarrhmang ngarre manbu seals, dja ngudda wanjh kerrngehkenh yirroweng bu ngundibom, dja mak kore kunkurlba ke ngudda yibendurndiweng rowk nawu bininj kore God, bedda nawu birridjalmudbubuyika, dja mak birridjenbubuyika, dja mak birrikurlah-bubuyika, dja mak nawu kubolkbubuyikabeh.

¹⁰ Ngudda yibenmarnbom birrimmekbe bininj bu kabirriyimerran priests nuye kabirrimarnedurrkmirri nawu kadberre God, wanjh bedda kaluk yerrekah bedda kabirriwohrnawohrnan kondah kore kurorre.”

¹¹⁻¹² Wanjh ngaye ngabolknang, dja ngabendjalbeccakang birridjalwern nawu angels, nawu bindiborledminguneng nawu kunkarrngbakmeng mayh nawu bedda kabirrihdjaldarrkidmimbi munguyh, dja mak dabborrbolk nawu kabirrihdjarrkdi rowk darnkih kore throne nuye. Bedda nawu angels wanjh birridjalmirndewernkenh duninjh yiman millions dja millions, wanjh birriwayini wernkih duninjh, birriyimeng, “Nahni Lamb nawu birribom nakka nadjalwernhmakkaykenh duninjh bu kakarrme kundulkarre rowk, kakukenmen duninjh, dja mak kakarrme kunmayali kunmak duninjh dja mak kunngudj dorrengh, bu kangeykimukworren duninjh, ba ngad karriwernhburluburlume duninjh dja wanjh nakka djal God!”

¹³ Kaluk ngabenbeccakang birriwern rowk birriwayini, nawu God benmarnbom nungan, bu kabirrihni kaddum kore kubolkmak heaven, dja mak kondah kurorre dja mak kanjdji duninjh kore kunrorre ngarre, dja mak kore kurrula ngarre, wanjh bedda birridjalwayini, “Nuye nawu kahni kore throne, dja mak nawu Lamb, wanjh karrbenbenedjalburluburlumen, dja mak bedda benewernhngeykuken duninjh nawu kabenedjalmang kore kunmakmak dja mak kundulkarre bu kabenedjalwohrnawohrnankenh rowk, munguyh dja munguyh.”

¹⁴ Wanjh nawu kunkarrngbakmeng mayh nawu kabirrihdjaldarrkidmimbi birriyimeng “Amen!” Dja mak nawu dabborrbolk nakka birriboddanginj dja mak bindiburluburlumi.

6

Wanjh Jesus Dangmarrhmey Djurra Nawu Scroll Bu Wernhdangbalh-miyindi

Revelation 6:1-17

¹ Wanjh nawu Lamb nganang dangmarrhmey nakudji seal. Dja ngabekkkang nakudji mayh nawu kadjaldarrkidmimbi wokdanj kore wokyimi yiman kayime nawu namarrkon, bu yimeng, “Yimray!”

² Wanjh ngaye ngabolknang, dja kumekbe kore kumirrk ngardduk, djarrang di nawu kukbeleni. Bininj nawu mornehmorneni kore djarrang karrmi bunarra, mak crown birriwong, wanjh nakka wam, bebmeng kore djarrang nuye. Kaluk nungka nabang nawu kadjalwinhme munguyh dja mak kadjaldjare kabenbun bininj rowk kore kabirriburrenkenh.

³ Kaluk nawu Lamb bu dangmarrhmey nawu nabadbuyika seal wanjh ngabekkkang nabuyika mayh nawu kahdjaldarrkidmimbi yimeng “Yimray!”

⁴ Wanjh nabuyika djarrang kumyawoyhbebmeng, nawu kukkurlba duninjh. Nawu nuye bininj nakka birriwong kundulkarre bu kamangkenh rowk kunmodmikenh kore kurorre dja mak kabenmarnbun bininj bu kabirriburren dja mak birriwong manbu sword mandjawak nakimukkenh.

⁵ Dja mak nawu Lamb yawoyhdangmarrhmey nabuyika yerrih seal, dja mak ngabekkkang nabadbuyika mayh nawu kahdjaldarrkidmimbi yimeng, “Yimray!” Wanjh ngabolknang nganang djarrang nawu kukburlerrini kumhdi kore kumirrk ngardduk, dja mak nawu bininj nuye nakka karrmi scales kore kubid nuye ba karohrokme njalehnjale.

⁶ Dja ngabekkkang nawu yiman kumwokdanj kore kuburldjarn bedberre mayh nawu kabirrihdjaldarrkidmimbi munguyh. Bu wokdanj

yimeng, “Nakudji kilo ngarre manbu wheat makka ngundikarremulewan bu kundjalbarnangarrakudji, mak manbu barley makka mak danjbik kilos bu kunbarnangarrakudji ngundikarremulewan rerreh, dja yuwn yiwarrewon nawu olive kunkalkkid dja mak wine!”

7 Mak kunyawoyhkudji nawu Lamb yawoyhdangmarrhmei nawu seal. Dja mak ngabek kang kumwokdanj nawu kunkarrngbakmeng kahmarnbun namekbe mayh nawu kahdjaldarrkidmimbi bu yimeng, “Yimray!”

8 Wanjh ngawohrnang, dja nganang djarrang nawu medjyimi walakkih yiman kulahburlerri wurd, dja nawu bininj kabihmornekan nakka ngeyyoy “Kundowikenh” bu kunmekbeken kaluk nungka benmunkeweng bininj kore kumidj. Dja bininj nawu birrikang kanjdji kore hell, wanjh birrimunkekadjungj yerre. Kaluk God benwong ba kabindibun birriwern bininj nawu kabirrihni kore nakudji quarter ngarre kore kondah kurorre. Yikahwi kabindibun bu mandjawak dorreng. Yikahwi wanjh kabindimarnbun bu kabirridowen kore kunmarrwekenh. Yikahwi mak kore kundjak mankimuk. Dja mak mayh nabang nawu kurorrebeh wanjh kabenbun birribuyika bininj.

9 Wanjh nawu Lamb yawoyhdangmarrhmei nabuyikawali seal, wanjh ngabolknang kanjdji kore altar kunmalng bedberre birrimekbe nawu bindibom nawu birrihwoybukwoni God nuye kunwok dja mak nawu birrihweykani kunwok nuye.

10 Wanjh birrimekbe manbu kunmalng bedberre birrikayhmeng wernkih, birriyimeng, “Nawu nakukdjamon nawu nawoybuk kawohrnan duninj, baleh kore kabolkyimerran bu yibendjadme bininj nawu kurorre kabirrihni dja yibenbun kore ngadkenh ngandibom ngadberre?”

11 Wanjh bindibebbehwonowong kunmadj nawu nakuyeng kaluk madjbeleni dja bindimarneyimeng bu kaluk kabirribalbengyirri nawu birridangerrinj rowk kabirridowerren warridj, bedda nawu kabirridjarrkarnedurrkmirri God nuye. Kaluk bininj kabindibun yiman birrimekbe nawu birrimarnekeyhmi. Kuhni wanjh kaburnbun.

12 Mak ngahdjalnani nawu Lamb bu dangmarrhmei nawu sixth seal, wanjh dja hdjalbolkrokahrokani wernkih duninj. Dja mak manbu kundung makka mimburlerriminj yiman manburra nawu wernhburlerri duninj, dja nawu dird kukbuyikahminj bu kukkurbakurlbahminj yiman kunkurlba rerrih.

13 Dja nawu mankokkarrng kore kungolbeh makka mimwarrawarhmerrinj kore kurorre yiman manme manbu figs bu kadjolengmen wanjh kumhwarrawarhmerren kore kurrulkebeh bu kunmayorrk kamayorrk-bun dja mak karrulkrokayhwon.

14 Manbu kunngol makka djalyakminj yiman djurra nawu scroll bu bininj kabirridornnadornname, dja mak manbu mandulum rowk, dja mak manyunkurr rowk makka bebbehdjirrkarrinj kore kububuyika.

15 Wanjh bininj nawu kabirriwohrawnawohrnan birrikihkimuk kondah kore kurorre dja mak nawu armies kabindiwohrawnawohrnan, dja nawu birrikuken bininj, dja nawu birridulkarrekimuk, dja mak nawu kabirrihbongdi bininj rowk, dja mak birribuyika nawu minj kabirribongdi, wanjh bedda rowk birriwarlkkarrinj kore kuwardderurrk dja kore kuwarddehwardde kore manduhdulul ngarre.

16 Dja birrimarnekeyhmeng manbu kunwardde bu birriyimeng, “Yimwarddewarhmen dja kanbarrkbu. Dja mak kanwarlka ngadberre kore God nawu kahdi kore throne, dja kore nawu Lamb bu bedda ngandidjaldung!

¹⁷ Dja manmekbe kunbarnangarra ngokko wanjh kumwam! Bu God dja mak nawu Lamb kabenebebke kunkangeyid berrewoneng, kaluk nangale kamirrkang berrewoneng manmekbe manbu kunkangeyid?"

7

John Benmirndenang 144000 Bininj Nawu Israel Benkebmawahmeng Revelation 7:1-8

¹ Bu kunmekbe ngabennang nawu kunkarrngbakmeng angels bir-ribebbehdi kungurrird manbu kunkarrngbakmeng ngarre kurorre, dja birrimayorrkdabkeng ba bu minj mayorrkbuyinj kore kurorre ngarre, dja mak kore kurrula dja mak kore kundulkwernkenh.

² Wanjh nganang nabuyika angel kumhrey koyekbeh kaluk karrmi seal nuye God nawu kahdjaldarrkidmimbi. Wanjh benkayhmeng wernkih duninh nawu birribuyika angels nawu God benwong kundulkarre nuye ba bu kabirribolkwarrewarrewon kore kurorre dja mak kore kurrula rowk.

³ Wanjh namekbe angel yimeng bedberre, "Yuwn ngurribangmebolkbun kore kurorre, dja mak kurrula dja mak kundulk, dja med rerrih, bu ngad ngarrbenmilhbelbme werrk nawu bininj kabirrimarnedurrrkmirri nuye nawu ngad kadberre God."

⁴ Kaluk ngabekkang bu baleh kabirrimirndeiyime bininj kore bindirohrokmeng bu birrimilhbelbmiyindi manbu seal. Nakka wanjh one hundred dja forty-four thousand kore namud rowk nawu Israel benkebmawahmeng.

⁵⁻⁸ Nawu birrimilhbelbmiyindi bininj nawu birrimdolkarrinj kore namud nuye Judah nakka wanjh bindirohrokmeng twelve thousand, mak nawu birrimdolkangkang kore namud nuye Reuben, nakka wanjh twelve thousand yerrih, mak nawu birrimdolkangkang namud nuye Gad, nakka twelve thousand bininj yerrih, mak nawu birrimdolkangkang kore Asher namud nuye, nakka twelve thousand, mak nawu kore Naphtali namud nuye, nakka twelve thousand dja kore Manasseh namud nuye, nakka twelve thousand, dja mak kore Simeon namud nuye, nakka twelve thousand, dja mak kore Levi nakka twelve thousand, dja mak kore Issachar nakka twelve thousand, dja mak kore Zebulun nakka twelve thousand, dja kore Joseph, nakka twelve thousand, dja kore Benjaminj nakka twelve thousand. Nawu bedda rowk birrimilhbelbmiyindi manbu seal dorreng.

Bininj Nawu Birrikang Kubolkbubuyika Rowk Bedda Birrimarneboddanj Kore Jesus Kumirrk Nuye Revelation 7:9-17

⁹ Kunmekbe wanjh ngaye ngabolknang dja ngabennang birrimirndewernni duninh nawu birridjalwern bininj, kaluk minj nangale mak bininj kabenmirnderohrokme, dja nakka birridjalmirndewernni duninh. Nawu bedda birrimdolkarrinj kore kubolkbubuyika rowk, mak birringuyabubuyika rowk, dja mak birrikulahbubuyika rowk dja mak nawu birridjenbubuyika rowk, nawu kondah kore kurorrebeh birrimdolkangkang-beh. Wanjh birrimirndedangerrinj rowk kore kumirrk ngarre throne, dja mak kore nawu Lamb. Kaluk birridjongbuyindi nawu namadjkuyengkenh kunmadj dja madjbelebami warridj dja birribebbehkarrmi manyende manbu marrunj kore kubid bedberre.

10 Dja bedda birrikayhmi wernkih duninh, birriyimi, "God nawu kadberre kahyerrkan kore throne, dja mak nawu Lamb warridj, wanjh kabenekarme kundulkarre bu ngad kandingehke kadberre."

11 Wanjh birriwern angels rowk birrihdi bu birriborledminguni mankebe throne dja nawu dabborrabbolk mak mayh nawu kabirridjaldar-rkidmimbi, wanjh birriboddangerrinj rowk kore kumirrk ngarre throne. Dja nawu dabborrabbolk mak mayh nawu kabirridjaldarrkidmimbi munguyh birriboddangerrinj dja birrikebnani kanjdji, kore kumirrk ngarre throne dja mak birriburlumi God bu birriyimi,

12 "Wanjh bonj! Ngudda nawu God ngadberre, wanjh ngudda ngundiburlume, dja ngundimarneyime kunmak, ngudda nawu yimakkaykenh duninh, dja mak yidjalwernhburrbun rowk, dja ngundiman-jbun dja ngundiwokmarrkmang, ngudda nawu yidulkarrekimuk duninh, dja yikarrme kunngudj rowk, makka djal ngudda ke rowk bu djalmunguyh munguyh! Wanjh bonj!"

13 Kaluk nakudji nawu dabborrabbolk ngaye ngandjawam, "Nahni birringale bininj nawu kabirrihdjongbuyindi kunmadjbele? Bedda baleh birrimdolkang?"

14 Wanjh ngaye ngawokmey, "Ngudda nawu yikimuk, wanjh ngudda yiburrbun." Wanjh nahni nawu dabbolk nganmarneyimeng, "Nahni bininj nakka birrimbebmeng kore birrihwernhdjakekkani. Mak kunmadj bedberre birridjirridjbom birrimadjbelewoni kore kunkurlba nuye nawu Lamb.

15 Wanjh kuninjkunukenh bedda kabirrihdi kore kumirrk ngarre throne kore God kahyerrkan, dja mak kabirrihmarnedurrkmirri nuye munguyh bu barnangarrakuyeng dja kumununkuyeng kore Temple nuye. Dja nawu kahni kore throne nakka kabendjalbarrkbun yiman kayime dabburilin rerrih bu kumekbe kabirrihdjarrkdi nungka dorreng.

16 Bedda minj kabirriyawoyhmarrwedowen, mak minj kabirriya-woyhkombukdowen, dja mak manbu kundung minj kabenkukkinje dja mak minj kabirrikuklardmen.

17 Wanjh nawu Lamb bu kahdi kubulkayh kore throne, namekbe nanu wanjh shepherd bedberre. Nungka kabenkan kore kukku manbu njilhmi kahyo manbu kabendarrkidmimbiwon bininj. Mak God kabenmimnalkborndung ba minj kabirriyawoyhmimnalkbunkeh."

8

John Bennang Seven Angels Kore Kubolkmak Heaven

Revelation 8:1-5

1 Bu Lamb dangmarrhmey nawu seventh seal, wanjh nawu birriwarlahkenh rowk birrihni kore heaven birridjalngurdmerrinj bu dungyimi thirty minutes.

2 Wanjh bu kumekbe ngabennang nawu seven angels nawu birrihdi kore kumirrk nuye God dja nungka benwong seven trumpets.

3 Mak nabuyika angel kumwam danginj kore altar, dja karrmi golden banikkin nawu ngaleng ngarreni mankalkkidmanjmak. Nungka birriwong nawernni nawu mankalkkidmanjmak bu kakurrme mak nawu yiwarrudj bedberreni rowk nawu God nuye bininj. Ba kakurrme kore gold altar nawu kahdi kore kumirrk ngarre throne.

4 Manbu kundolng kore ngarre mankalkkidmanjmak dolngwam kad-dumkah kore kumirrk nuye God, kore kubid nawu karmihkarrmi angel. Kaluk yiwarrudjkenh bedberreni nawu God nuye bininj.

⁵ Bu kunmekbe kurduyimerranj rowk nawu angel dahdahkendoy kore banikkin kaluk kunak dorrengh kore altar wanjh burriweng kanjdji kondah kore kurorre. Wanjh kunmekbe dedjingmey namarrkon bu wokdanginj, dja mak mayhkeyi, dja mak wernhgurdulmi, dja mak kunbolk wanjh kunukka bolkrokahrokani.

*Nawu Seven Angels Birribuhmi Manbu Trumpets
Revelation 8:6-13*

⁶ Kaluk nawu seven angels nawu birrihkarrmi manbu seven trumpets wanjh birrimarnburrinj bu kabirribuhmekenh.

⁷ Nawu nayungkih angel buhmeng manbu nuye trumpet, wanjh manyirrkerrk manbu kunkurlba dja kunak raworrij, kaluk yiman kunwardde wanjh djakduy wernkih duninj kore kurorre, wanjh kubolkkimuk ngarre kunrorre ruy, dja mak kunwern manbu kundalk dja mak kundulk, wanjh makka djalruy rowk.

⁸ Wanjh angel nabuyika buhmeng nuye trumpet, wanjh makka njale yiman kunwardde manwarddekimukkenh, kaluk kunak dorrengh rungi, bu burriwerrinj kore kurrula ngarre. Wanjh manbu manwern kore kurrula wanjh kunkurlba duninj yimerranj,

⁹ nawu djenj dja mak njalenjale mayh nawu birridjuhmuyindi kumekbe kore maninjmanu kukku, wanjh dowerrinj rowk. Dja mak manwern kabbala manbu dingihdi, makka yakminj rowk.

¹⁰ Wanjh nabadbuyika nawu angel danjbikni, wanjh buhmeng nuye trumpet, dja nawu nakimukkenh mankokkarrng, manbu runghrunji yiman kundjakkorl rerrih, kumwarrhmeng kaddumbek. Kaluk kumwarrhmeng kore mankabo mandjalwern ngarre dja mak kore njilhmi manbowern kahyo.

¹¹ Kaluk manmekbe mankokkarrng kangeyyo "Manmanjwarre". Wanjh mandjalbowern kukku makka bomanjwarreminj, dja birriwern bininj birridowerrinj bu manmekbe kukku birribonguneng.

¹² Wanjh nawu kunkarrngbalmeng angel buhmeng trumpet nuye, wanjh manbu kundung wanjh dungwarreminj walakkih, dja dird warridj kukwarreminj wurd. Dja mak yikahwi mankokkarrng makka kokburleranj. Dja kunbarnangarraburrk wanjh yikahwi bolkburlerranj, dja mak kore kunkak ngarre wanjh minj njale bolkwolkayinj bu yarrkka.

¹³ Bu kunmekbe ngahnani, dja ngabekkani nawurkbirl kaddum regehrey kaluk kayhmeng wernkih duninj, dja yimeng, "Kunyd, kunyd, kunyd kahyo bedberre bininj nawu kabirrihni kore kurorre, kunmekbekenh kaluk kabirribuhme trumpets bedberre nawu birribuyika birridanjbik angels!"

9

*Bu Birriwern Bininj Kabirridowerrin
Revelation 9:1-21*

¹ Wanjh nawu kunbidkukudji angel buhmeng nuye trumpet, dja nganang mankokkarrng warrhmeng kaddumbek dja mankang kore kurorre. Kaluk manmekbe mankokkarrng karrmi key nawu ngarre mandjorlokkimuk kore kahre kanjdji duninj.

² Kaluk bu dangmarrhmey manbu mandjorlokkimuk, wanjh mandolngburlerriwi manwern bebmg yiman kayime manwurk mankimukkenh. Wanjh manbu kundolng marnbom kundung dja kunngol bu burlerranj rowk.

³ Kaluk mayh mirndebebmerrinj kore kundolngbeh dja mak birrim-irndekolurrinj kore kurorre. Kaluk yiman djaddedde birrikuyimi. Dja birrikarmi kundulkarre kore kurorre ngarre, manbu yiman kayime marla kahkarre.

⁴ Mak birrimekbe mayh birrikarmi kunwok bu minj birribuyi kundalk, mankolhde dja mak kundulk kore kurorre ngarre. Dja nakka birrihdjalkarmeng kunwok bu bininj kabindidjalwarrewon nawu minj birrikarmeninj God nuye seal kore kumilh bedberre.

⁵ Birrimekbe mayh nawu djaddedde minj bindibuyi bu birridowimeninj dja nakka bindidjalmarnbom bu birridjaldjakkbekkani bu kunbidkudji dird ngarre. Manbu birridjakkbekkani makka yiman bu marla kabirrong nawu bininj.

⁶ Bu kunmekbe kunbarnangarrawern bininj wanjh kabirribolkyawan bu baleh bedda kabirridjare kabirriyime ba bu kabirridowen, dja bedda minj kabirribolngalke. Kunukka kabirridjare bu kabirridowen, dja nakka kundowikenh kabenawon kakelerlobme.

⁷ Birrimekbe djaddedde nakka yiman kayime djarrang birrimarnmarnburreni bu kabirriburrenkeh. Kore kukodj bedberre nakka birrikodjdjongbuyindi gold crowns, dja kore kungeb bedberre nakka birrikebyimi kungeb bedberre nawu bininj.

⁸ Dja mak kunggabek bedberre nakka yiman daluk kayime, dja kunyidme bedberre nakka yiman mayh nawu lion kabirriyidmeyime.

⁹ Dja mak birriberrekaldjongbuyindi bedberre yiman kayime wirlmurrng narayek birrikarmi, dja mak birriwelwokdi yiman kayime djarrang kabirrihdulkarrewokdi bu kabirrihrlombe wirllarra dorreng kore kabirriburrenkeh.

¹⁰ Dja mak birrikarmi kore kurredj nawu bendongi yiman marla rerrih, dja makka birrikarmi kundulkarre bu bindidjudmi nawu bininj wanjh birrikanjbabangni bu kunbidkudji dird.

¹¹ Dja mak birrikarmi nawu kawohnan bedberre kaluk nakka angel wohrnani ngarre manbu kudjorlok mankimuk kore kurorre dja kanjdji duninj. Mak ngeyyoy bu Hebrew kungey Abaddon dja bu Greek nakka Apollyon.*

¹² Kuhni kore ngamulewam, manbu kunyid kunyungkih ngarre, wanjh yakminj. Kaluk yerrekah manbuyika bokenh kunyid kamre rerrih.

¹³ Wanjh nawu sixth angel buhmeng nuye trumpet, dja ngabek kang wokdanj kaluk kumwokbebmi kore kunkanemdulk ngarre golden altar manbu kahdi kore kumirrk nuye God.

¹⁴ Kaluk bimarneyimeng nawu sixth angel nawu karmihkarmi trumpet, "Yibenbawo ba kabirrire nawu kunkarngbakmeng angels nawu birrihdukkayindi kore mandjalkabokimuk Euphrates."

¹⁵ Kaluk birrimekbe nawu angels bu bindibekeng, kore bedda bu birrihdukkayindi dja mak birrimadbuni kuhnikenh hour, dja kuhni barnangarra, dja mak bu dirdkenh ngarre, dja mahni mandjewk ba kabindibun nawu yikahwi birriwern nawu bininj kondah kurorre.

¹⁶⁻¹⁷ Kaluk ngabenwaralnani bininj birriwern nawu soldiers bu birrimorneni kore djarrang, dja ngabenbek kang bu bedda wanjh two hundred million! Birrimekbe nawu djarrang dja nawu bindihmornekani bininj wanjh nakka kuhni birrikuyimi, wanjh bedda berrekalkbalhmi wirlmurrnggrayek nawu kurlbakurlbahni, mak nawu burleri blue, dja mak yellow yiman kayime manbu sulphur. Dja nawu djarrang nakka

* **9:11** Abaddon dja Apollyon. Nahni kungey bokenh kamenmenyime "nawu kabenbularrbun rowk".

birrikodjyimi yiman lions, kaluk nganang kunak, kundolng, dja sulfur bebmerrinj kore kurrangbeh bedberre.

¹⁸ Wanjh mahni kunak, dja kundolng dja mak sulphur manbu bebmeng rowk kore kurrangbeh nawu djarrang, wanjh benbom yikahwi birriwern bininj, yiman kayime kundjak mankimukkenh bu kabenbun.

¹⁹ Mak kundulkarre nawu djarrang bedberre, makka yoy kore kurrang dja mak kore kuberd bedberre. Kaluk kore kuberd bedberre nakka yiman nayin dja mak kunkodj di kore kabindibun bininj.

²⁰ Bininj nawu birribubuyika nawu minj benbuyi mahni kundjak nakka minj birrikangeborledmeninij kore kunwarre dja mak minj birribawoyi kore birrihkurduyimi. Bedda minj birringurdmeninij bu birriboddangeni bedberre nawu namarnde dja idols kore birrimarnbuni manbu gold dja silver, wirlmurrng manbu bronze, dja mak kunwardde dja mak kundulk. Kaluk njalehnjale nawu minj kawokdi, dja mak minj kabenbekkan, dja mak nawu minj karokan.

²¹ Minj mak birrikangeborledmeninij bu kunwarre bedberre birrihyimi kore birriburreni birrikukkurmerreni, dja kore mankurdangkenh birriyimi, mak kore kunwarrekenh bu birriyidjirdmarreni, dja mak nawu birridjirdmangi.

10

Nakudji Angel Dja Nayahwurd Scroll Djurra Revelation 10:1-11

¹ Wanjh nganang nabuyika angel nawu dulkarrekimuk kunkolungi kore heavenbeh. Kaluk nakka yiman yimi kukdjongbuyindi manbu kungolwi, dja mak ngalyod kaddum bimarnedi kore kaddum kukodj nuye. Dja kunkeb nuye nakka kukyimi yiman kundung rerrih, dja kore kunkarre nuye nakka djalkukyimi bu kunak karrerungi.

² Kaluk nungka karrmi kore kubid nuye nawu nayahwurd djurra scroll, bu dangmarrhmiyindi. Kumekbe nawu angel dingihdi dja kore kurrengkun wanjh bolkmelmeng kore kurrula, dja bu kurrengedjaku nuye nakka bolkmelmeng kore kurorre.

³ Wanjh kayhmeng wernkih duninj yiman kayime lion kawokdi. Dja bu nungka kayhmeng, wanjh seven namarrkon wanjh ngurdulmng warridj.

⁴ Bu nawu namarrkon seven wokdanj, wanjh ngarredjingmayi bu ngabimbuyi kunwok bedberre. Dja med, ngawokbekkang kumwokdanginj kore heavenbeh bu nganmarneyimeng, "Makka yiwarlka kore nawu birriyimeng, dja yuwn yibimbun."

⁵ Wanjh nawu angel nganang dingihdi kore kurrula dja kore kurorre berlwayhmeng kore kunberlkunbeh nuye kore heaven.

⁶ Dja wokkurrmerrinj kore God kungey nuye God nawu kamimbi munguyh munguyh, dja nawu marnbom kaddum kungol rowk, dja mak njalehnjale nawu kungolwaken dja mak marnbom kurorre rowk dja nawu kabirihni kumekbe, dja mak nawu marnbom manbu kurrula, dja mak nawu yehyeng rowk nawu kurrulawaken. Wanjh yimeng, "Wanjh minj mak karribaldjalmadburren!

⁷ Bu bolkkime kayimerran kore nawu seventh angel bu kayingkihuk-marnburren bu kabuhme manbu trumpet, wanjh God nuye manwarlkkaykenh kadjalyakwon kore God yingkihkarremarnbom. Kaluk bu God benyingkibengdayhkeng nawu prophets nuye nawu birrihmarnedurrk-mirri nuye."

⁸ Wanjh ngabek kang nadjalkudjiwi kumyawoyhwokdang kore heaven, bu nganmarneyimeng, “Yiray dja yika nawu dangmarrhmiyindi djurra nawu scroll kore nawu angel kahkarrme nawu kahdi kore kurrula dja mak kurorre.”

⁹ Wanjh ngayikang namekbe angel ba nganwon nawu djurra nawu scroll kahkarrme. Dja nganmarneyimeng, “Yima dja yingu. Kaluk kamanjwarremen kore kunjam ke, dja kore kurrang ke nakka kamanjmakmen yiman mankung.”

¹⁰ Wanjh ngayimey nawu scroll djurra nayahwurd nawu angel nuye kubid, dja nganguneng. Kaluk kore kurrang ngardduk nakka manjmakni yiman mankung rerrih. Dja bu nganguneng wanjh ngabek kang kore kunjam ngardduk makka wanjh manjwarreminj.

¹¹ Wanjh nganmarneyimeng, “Yiyawoyhmulewa God nuye kunwok kore kunmekbekenh nawu bininj bedberre birriwern, nawu birriredbubuyika, birridjenbubuyika dja mak kore nawu kabirrihwohrnawohrnan.”

11

Nawu Bininj Benebokenh Prophets

Revelation 11:1-14

¹ Wanjh nakudji nganwong manyendebik yiman kayime ruler nakuyeng kore kabirrirohrokmenh. Dja nganmarneyimeng, “Yiray kore temple nuye God dja yirohrokmen manmekbe temple dja mak altar dja yibenrohrokmen bininj nawu kumekbe kabirrihmarnebodan nuye God.

² Dja yuwn yibolkrohrokmen kore kuberrkakah, makka yibawo, kaluk makka God benbolkwong birriwarre bininj nawu minj bedda Jews. Mak yerreh wanjh bedda kabirribalmehmelme kore kunredkimuk kubolkdjamun bu forty-two dird.

³ Wanjh ngaye kundulkarre ngabenbenewon benebokenh bininj nawu ngandimulewan ngaye ngardduk kunwoybuk dorrengh. Bu kunkuyeng kabenedjolyolme yiman danjbik mandjewk dja mak dird ngarre six.* Mak kabenedjongbuyindi manburrba kore kundowikenh.”

⁴ Kaluk nahni nawu bininj bokenh yiman kayime bokenh olive kundulk dja mak bokenh lampstands nawu kabenedi kore kumirrk nuye nawu kawohrnan rowk kore kurorre.

⁵ Dja bu nangale bininj yimanke kabenbenebun, makka kunak kabebme kore kurrang berrewoneng dja mak kabindikukkinje nawu kabindinjirrhmiwon bininj. Kaluk bu nangale bininj kadjare kabenebenun kore baleh kakurduyime berrewoneng wanjh nakka kunkudjiwi kakurduyimerran nuye namekbe bininj nuye.

⁶ Mak benemekbe bininj nawu God nuye, kabenekarrme kundulkarre bu kabenedangballhme kunngol ba mandjewk minj kadjakdung bu bedda kabenedjalyolyolme. Mak bu kabenedjare wanjh kabenedjalboborledke manbu kukku ba kabokurlbamen, dja mak kabenemunkewe manbubuyika kundjak nawu kabenbun bininj kore kurorre kabirrihni.

⁷ Kaluk bu benengurdmeng benehweykani kunwok kunwoybuk, wanjh nahni mayh nawarre kambebme kore mandjorlokkimuk manbu kanjdjibeh ngarre kurorre wanjh namekbe kabirriburren. Wanjh nungka kabenedjalbun.

⁸ Kaluk manbu kunburrk berrewoneng bedda kabenedjalkukyo kore manbolh ngaleng ngarre kubolkngeykimuk kore nawu kawohrnan berrewoneng wanjh birribom kore cross kundulk. Kaluk kumekbe

* 11:3 Forty-two dird. Karohrok danjbik kudjewk dja six dird.

kubolkngeykimuk kamenmenyime yiman kore kabolkngeyyo Sodom dja mak kabolkngeyyo Egypt.

⁹ Wanjh birriwern bininj kabirrimre bu kabindikunan berrewoneng. Bedda nawu birriredbubuyikabeh, dja mak nawu birringuyabubuyika, dja mak nawu birridjenbubuyika dja mak nawu birrimdolkkarrinj birribolk-bubuyikabeh. Wanjh kabindidjalkuknan bu kunkodjke danjbik, dja kore kunkodjke kunkarrngbakmeng bu kunbarnangarraburrk. Wanjh bedda kabirriyime, "Yuwn bu karrbenbenekukdudjeng!"

¹⁰ Bininj nawu kondah kurorre kabirrihni nakka wanjh kabirrimarrmarrmen dja kabirriburlumerren warridj, bu kunmekbekenh nawu prophets bokenh kabenedowen. Mak kabirriworren namakmak ba bu kabirriburlumerrenkenh kore benbenemarnekurduyimerranj. Kaluk kumekbekenh nahni prophets bokenh wanjh bindidjalnjilngwarrewoni bininj rowk nawu birrihni kore kurorre.

¹¹ Dja med! Kaluk bu yakminj manbu kunbarnangarra danjbik, dja bewh kore kunkodj kunkarrngbakmeng, God nuye kunngolek benbeneyawoyhngolekwong benemekbe bokenh bininj. Wanjh beneyawoyh-dolkang, bu nawu birriwern bininj bindinang wanjh birriwernhkeleminj duninj.

¹² Wanjh benewokbekkang kumwokdanj wernkih duninj, kore heavenbeh yimeng, "Kondah ngunemray!" Wanjh bedda benebalwam heaven kore kunngol dorrengh, dja bininj nawu birrinjirrhmiwoni, nakka wanjh birrihdi bindihnani bu benewam.

¹³ Bu kunmekbe kunkudjiwi bolkyimi, wanjh kundjalkimuk bu bolkrokahrokani wernkih, dja yikahwi kore kubolkkimuk makka wanjh rurrkwarrahrrheng. Seven thousand bininj birridowerrinj kore manbu wernhbolkrokani duninj, dja mak yikahwi bininj nawu minj birridowimeninj, wanjh birriwernhkeleni, dja birridjalburlumeng God nawu heaven kahni.

¹⁴ Manbu bokenh marnbuhmarnbuni kunyid makka wanjh manmekbe djalyakminj. Dja wanjh bolkkime kambadre manbuyikawali kunyid manbu danjbik kahmarnburren.

Nawu Nayerre Angel Buhmeng nuye Trumpet

Revelation 11:15-19

¹⁵ Wanjh nawu seventh angel buhmeng nuye trumpet. Dja birriwokdi wernkih duninj kore heaven, birriyimeng, "Manbu kundulkarre ngarre kondah kurorre makka wanjh djalyakminj rowk. Bolkkime God wanjh kawohrnan rowk, dja nuye nawu Christ, dja nungka nawu kadjalwohrnan munguyh munguyh."

¹⁶ Mak nawu twenty-four dabborrabbolk, nawu kabirrihni kore thrones bedberre kore kumirrk nuye God, wanjh bedda birridjalmankarrinj dja birribolknani kanjdji dja birridjalwernhburlumi God.

¹⁷ Dja birriyimi, "Ngundimanjbun ngudda nawu Yiwohrnan God Yir-rulkarrekimuk, nawu yihdjalni munguyh, ngudda yirrurrkmirri kore kundulkarre ke dja yirredjdjngmey bu yihdjalwernhwohrnan rowk!"

¹⁸ Birriwarlahkenh bininj nawu birrikang kondah kurorre birriyid-dungi, dja ngudda yibenmarneyidduy bu kunkimukkenh. Wanjh ngokko kumwam ngarre bu yibendjadme nawu birridowerrinj dja yibenwon namakmak prophets nawu birrihdurrkmirri ke, mak bininj ke nawu ngundihngeyburlume, nawu birrikihkimuk dja nawu minj birrikuwen. Dja ngokko kumwam bu yibenbularrbn bininj nawu rowk birribolkwarrewoni kondah kurorre!"

¹⁹ Wanjh God nuye temple kore heaven makka wanjh dangmarrhmi-wam. Wanjh nganang manbu Ark kore kahwokkarrme kunwok nuye kore God nawu benmarnewokkurmerrinj nawu nuye bininj. Kaluk kumekbe-beh wanjh kumdjalmayhkeng nawu namarrkon, dja mak kumhngurdulmi, dja mak bolkkrokan dja mankimukkenh manyirrkerrr djakdungi.

12

Namarnde Duninj Nawu Kakukyime Mayh Nabang Nakimukkenh Revelation 12:1-18

¹ Wanjh njale nawu namakkaykenh kumbebmeng kore heaven bu kunmakkaykenh kurduyimerranj ba ngad kanbukkabukkan. Kaluk daluk ngalbu kukdjongbuyindi kundung dorrengh, dja mak kurrenge ngarre karrmi dird, dja mak nawu kodjdjongbuyindi crown nakka karrmi twelve mankokkarrng.

² Kaluk ngaleng mak merlemni kayhmidorrengh bu djakbekkani, bu wurdyaw mahmimahmirri.

³ Mak kunmekbe rerrih kunmakmak yawoyhkurduyimerranj kore heavenbeh ba ngad kanbukkabukkan. Nakka kumbebmeng nakimukkenh kukkarlba nawu dragon nawu karrmi seven kunkodj mak kodjdjongbuyindi seven crowns. Mak karrmi ten kunkanemdulk warridj.

⁴ Dja manbu kunberd nuye makka dorrorrkeng manbu mandjalwern mankokkarrng kore kungolbeh wanjh burriweng rowk kanjdji kore kurorre. Wanjh nawu dragon borledmeng binang ngalmekbe daluk, bu nungka danginj kore kumirrk ngaleng ngarre, bihmadbuni bu bihmarneyawmahmirri ba bu kabimarneyawngun bu kayawdangen.

⁵ Wanjh ngalmekbe daluk yawmey narangem nawu kaluk kawohrnan kore kuredbubuyika kaluk wirlmurrnggrayek dorrengh nawu kings kabirribebhkarreme bedberre. Dja wanjh God bidjalme y nahni wurdyaw dja bikurrmeng kore nungan nawu God kayo, dja kore throne nuye kahni.

⁶ Dja ngalbu daluk ngalka kelerlobmeng kore kubolkdarleh kore God bimarnebolkmarnbom dja mak kore kabidjalnahnan bu kunkodjkewern, yiman mandjewk danjbik dja six nawu ngarre dird.

⁷ Kaluk kumekbe kore heaven wanjh birrihburreni kunkimuk duninj, yiman war rerrih. Wanjh Michael dja nawu nuye angels birrihburreni nawu Namarnde Duninj dja mak angels nawu birriwarre.

⁸ Dja nawu dragon dja mak nuye angels minj birriwernhmurrnggrayekni-wirrinj dja wanjh Michael dja nuye angels bedda birriwinhmeng, wanjh kunu nawu Dragon dja mak nuye angels bedda birridjalbolkbawong heaven, wanjh benmarnekarrewarreminj bu bedda birridjalniwirrinj kumekbe.

⁹ Wanjh Michael dja nawu angels nuye wanjh bindidjalkukburriweng kore kurorre kanjdji duninj kore nawu dragon, dja mak nawu angels nuye dorrengh. Kaluk namekbe nawu kangeyyo dragon wanjh nawu namarnde duninj nawu Satan, nawu nungka kabenmayaliwarrewarrewon birriwarlahkenh bininj rowk kore kurorre.

¹⁰ Wanjh ngabekkang kumwokdanj wernkih duninj kore heaven bu yimeng, "Bolkkime wanjh God nawu bininj kabengehke rowk, nawu kakarrme kundulkarre rowk, nawu nungka kadjalwohnan rowk! Dja mak nuye nawu Christ wanjh ngad karridjalwokmarrkma! Dja namarnde nawu Satan nawu benhdjubuni bininj nawu ngad ngarridangerinj bu kumununkenh dja barnangarrakenh, wanjh nakka Michael dja nuye angels birrikukburriweng kanjdji duninj.

¹¹ Kaluk bedda birriwinhmeng kore kunkurlba nuye Lamb, dja mak kore manbu kunwok nuye manwoybuk birridjalweykani. Dja minj mak bedda birrikeleniwirrinj bu birridoweng dja wanjh birridjalkanjkurrmerreni.

¹² Dja wanjh ngurrinjilngmaknin ngudda nawu heaven ngurrihni rowk! Dja kadjalwarre bedberre nawu kurorre kabirrihni dja mak kore kurrula, dja nahn namarnde wanjh nakka kumkoluy kore ngudda nawu kurorre ngurrihni! Dja nungka kaburribun bu ngokko nuye kahdedjdjumbunghen kabolkymerran bu kayakmen, kaluk kunmekbekenh nungka yidduy duninjh.”

¹³ Bu kunmekbekenh nawu dragon wohburrbom bu nungka birrikuk-burriweng kore kurorre, wanjh nungka wam bihdjalkadungi ngalbu daluk wurdyaw kore yawmey.

¹⁴ Dja God biwong ngalmekbe daluk kunwel bokenh yiman nawu marram nakimukkenh karrmihkarrmi ba karrolkan kare kore God bimarnebolkmarnbom kaluk kore kubolkdarleh duninjh. Wanjh kumekbe kore kabinahnan bu kunkuyeng wurd, mandjewk danjbik dja mak six ngarre dird dja Satan, nawu nakimuk nayin, wanjh minj mak kabibun.

¹⁵ Wanjh nahn nakimuk nayin, nawu Satan, wanjh bowehmeng kukku kore kurrangbeh nuye, dja marnburrinj mankabo duninjh, dja djareni bu daluk kabikan manmekbe kundjurrh.

¹⁶ Dja mak kunrorre bibidyikarrmeng ngalbu daluk bu bolkdjalkmiwam ngarre dja bowarrhmeng kanjdji manbu mankabo kumhborlobmi kore kurrangbeh nuye nawu dragon.

¹⁷ Wanjh kunukka nawu dragon wernhyidduy duninjh bu binjirrhmiwong ngalmekbe ngalbu daluk, wanjh nungka kuniwam benyikang nawu birribuyika ngaleng ngarre wurdwurd. Kaluk birrimekbe wurdwurd nakka wanjh God nuye nawu kabirrimarrkmang nuye mankarre, dja mak bedda nawu birrihmulewani kore kunwok nuye kunwoybuk nawu Jesus.

¹⁸ Wanjh nawu dragon djaldanginj kumekbe kore kukadjid ngarre kurrula.*

13

Mayh Nawu Nawarre Duninjh Kumwam Kore Kurrulabeh

Revelation 13:1-10

¹ Kaluk nganang mayh nakimuk kumhrey kore kurrulabeh. Nakka karrmi ten kunkanemdulk dja seven kunkodj, mak crown dorrengh bebbekodjdjongbuyindi kore ten kunkanemdulk nuye. Mak bebbehngey-bimbuyindi kunngay kore seven kunkodj nuye, dja mahni kunngay rowk wanjh kunwok kunwarre bu bimarneyimi nawu God.

² Dja mak namekbe nawu mayh kukyimi yiman leopard, dja mak kundenge nuye yiman bear kukyimi, dja mak manbu kundang nuye nakka dangyimi yiman lion. Wanjh nawu Dragon biwong nahn mayh kundulkarre nuye, dja mak bikurrmeng kore throne nuye, dja warridj bimarnbom ba bu yimankek kawohrnanken rowk.

³ Kaluk mankudji kunkodj nuye namekbe mayh, nakka wanjh ngorengni kaluk yiman rerrih bininj birribom rerrih dja mak minj bangmedow-imeninj. Wanjh bininj nawu birrihni kurorre birrikangebarrhmeng dja mak bedda birrimunkemey namekbe nawu mayh nawarre.

⁴ Dja mak nawu Dragon, wanjh birrimarneboddangeni bu nungka wanjh kundulkarre biwong nawu mayh nakimuk. Mak warridj birriboddangeni

* **12:18** Chapter 13 karredjingmang.

nuye dja birriyimi, “Nangale nahni kabenerohrok nawu mayh? Mak nangale nahni kabeneburren?”

⁵ Nungan God bibawong namekbe mayh bu kadjalmarneyimerren manbu manburlumikenh kunwok nuye, dja mak kabimulewan God bu kunwarrekenh. Dja mak God bibawong bu kawohrnan kumekbe kunkuyeng wurd yiman danjbik kudjewk dja six ngarre dird.

⁶ Wanjh kore kurrangbeh nuye nawu mayh, wanjh bimarneyimi kunwarre kunwok kore God. Dja kurrehkurrinj bu ngeyyolyolmeng God nuye kunngey dja mak kore bimarnebolkyolyolmi kore God kahni. Mak benmarneyimi kunwok kunwarre dorreng nawu kumekbe heaven kabirrihni.

⁷ Mak nungka dragon biwong nahni mayh nawarre kundulkarre ba yimankek kabirriburren God nuye bininj dja bu yimankek nungka kabenbun. Dja warridj biwong kundulkarre ba yimankek kabemarnewohrnan bedberre bininj nawu birringuyabubuyika, dja mak nawu birrikulahbubuyika, dja mak nawu birridjenbubuyika, dja mak nawu kore kubolkbubuyikabeh.

⁸ Kaluk birriwern nawu kondah kurorre kabirrihni wanjh nakka kabirridjalmarneboddan namekbe nawu mayh. Bedda wanjh minj birringeydiwirrinj kore nahni djurra nawu kabemulewan bininj nawu kabirridarrkid munguyh. Namekbe djurra bimbuyindanj kerrngehkenh duninj kore God nungan bolkmarnbom kurorre. Dja nahni djurra djal nuye Lamb nawu nungka birribom doweng.

⁹ Mah, wanjh nangale nawu kakarrme kunkanem wanjh ngurribekka!

¹⁰ Bu ngudda yiman ngundidukkan, wanjh nakka ngundidjalduka, mak bu yiman mandjawak dorreng ngundibun, nakka wanjh mandjawak dorreng ngundidjalbun bu yirrowen. Kaluk kuhni kamenmenyime nawu God nuye bininj bu kabirrihdjalkangewoybuk dja mak kabirrihdjalbengyirri, dja mak minj kabirrikele bu kabindibunkenh.

*Nabuyika Mayh Nawu Nabang Kumebmeng Kore Kurorrebeh
Revelation 13:11-18*

¹¹ Wanjh kumekbe nganang nabadbuyika mayh bebmihbebmi kore kurorrebeh. Kaluk karrmi kunkanemdulk bokenh nawu yiman lamb, dja nakka wokdi yiman dragon.

¹² Kaluk nawu nayungkih mayh wanjh biwong kundulkarre nuye ba bu kabimarnedurrkmirri. Wanjh kundulkarre karohrok berrewoneng. Dja nawu nayerre mayh wanjh benmarnbom bininj kore kurorrebeh bu kabirrimarneboddangen nawu nayungkih mayh, nawu ngorengmakminj kore bininj birribom bu dowimeninj.

¹³ Dja nawu nayerre mayh nakka kurduyimi kunwern kundulkarre dorreng bu bininj birrikangebarrheng. Kaluk nungka marnbom kunak kumwarrhmerrinj kaddumbek kore kurorre nawu bininj rowk bu birrinang.

¹⁴ Kaluk namekbe nayerre mayh bimarnedurrkmirri nawu nayungkihni mayh bu benkoweyi bininj nawu kurorre kabirrihni. Nawu nayungkihni mayh biwong kundulkarre ba kurduyimi dja benkangebarrhkeyi bininj nawu birrihni kurorre. Wanjh nawu nayerre mayh bendjurrkkang birrimekbe bininj bu kabirrimarnbun idol ba bu kabirrimarneboddangen nawu nayungkih mayh, nawu ngorengni kore mandjawakbeh birribuni, dja minj dowimeninj.

¹⁵ Mak nawu nayungkihni mayh biwong kundulkarre nawu mayh nayerre bu kahdarrkidwon nawu idol, ba namekbe idol kawokdi. Wanjh

nahni idol yimeng bu bininj nawu kawarnyakmen bu kaboddan nuye nawu idol, wanjh nakka birribu dja birrikukburriwemen.

¹⁶ Kaluk namekbe mayh bendjurrkkang nawu birriwern bininj rowk bu kabirribidbimbuyindan kore kubidkukun bedberre, dja mak wardi kore kumilh bu kabirrimilhbimbuyindan bedberre. Nawu bedda birriwarlahkenh bininj rowk, yiman nawu birringeyyahwurd, dja mak nawu birringeykimuk, dja mak nawu birrikuken, dja mak nawu birrimarladj, dja mak nawu bedmandeleng bindimarnedurrkmirri birribuyika, dja mak nawu birridjalley kore bedman.

¹⁷ Kaluk nungka benngurdengkeng bininj nawu minj bedda birrikarmenin namekbe mark bu birridjareni birribayahmenin dja birriweykayi nawu njalenjale. Kaluk namekbe nawu mark wanjh kunngey nuye namekbe mayh dja mak kunngey ngalenggarre manbu number nuye.

¹⁸ Wanjh ngurriwernhburrbu kore mandulmuk dorrengh kore baleh mahni kunwok kamenmenyime. Kaluk nangale bininj nawu kodjkuludjad wanjh kaburrbun kore kakarremenmenyime nawu numberkenh, dja wanjh namekbe number nakka wanjh 666, dja nakka wanjh bininj nuye kunngey.

14

Nawu Lamb Kabendjalkarrme Birriwern Bininj

Revelation 14:1-5

¹ Wanjh ngabolknang dja ngadjalwohnang nawu Lamb dingihdi kore Mandulum manbu kabolknageyyo Zion. Kaluk birrihdjarrkdi nawu one hundred dja forty-four thousand bininj nawu bedda birrimilhbimbuyindi kunngey berrewoneng nawu Lamb dja mak Kornkumo nuye.

² Wanjh ngabekkkang kore heaven yiman kumhdulkarrewokdi manbu kukku borlobmirlobmi, dja mak yiman namarrkkon rerrih kumhngurdulmire. Wanjh ngabekkkang yiman warridj birriwern bininj birrihdirri harps.

³ Dja bedda birriwayiniyerrkang manbu mankarrekerrnge kore kumekbe kunmirrk ngarre throne, dja mak nawu kunkarrngbakmeng mayh nawu kabirrihdjaldarrkidmimbi, dja mak bedberre nawu dabborrabolk. Minj nangale mak borlhmenin manmekbe manbu mankarrekerrnge dja ngaleng kabirridjalburrbun nawu birrimekbe one hundred dja forty-four thousand bininj nawu kurorrebeh, nawu bedda benmarnekarremulewam dja benbekkeng nawu Lamb.

⁴ Kaluk birrimekbe minj kunwarre birrikurduyimeninj dalukkenh dja bininjkenh, dja mak bedda birridjalmakni. Mak bedda kabirridjalkadjung nawu Lamb kore nungka baleh kare. Nawu Lamb benmarnekarremulewan dja nungandeleng benwong God nawu bedda birriyungkih duninj nawu kabirriyawoyhdarrkidmen bininj kore kundowikenh.

⁵ Minj mak bedda birrikowimeninj, nawu bedda wanjh birridjalmakni duninj.

Nawu Birridanjibik Angels

Revelation 14:6-13

⁶ Kaluk nganang nabuyika angel renehrey kaddum kore kungol nawu karrmi Manmakkaykenh Kunwok manbu minj munguyh kayakmen, dja nungka kayolyolme bedberre bininj rowk nawu bedda kabirrihni kore kurorre dja nawu birrimdolkangkang kore kunbolk kubolkbubuyikabeh, dja mak kore birriredbuyikabeh, dja mak nawu birridjenbuyikabeh, dja mak nawu birrikurlahbuyikabeh.

⁷ Dja wernkih yolyolmeng bu yimeng, “Ngurrimarnekenin nawu God dja mak ngurridjalburlumen, kunmekbekenh bu bolkkime kabolkyimerran bu God kabendjadme nawu birriwern bininj rowk. Dja mak ngurrimarnebodda nuye God nawu bolkmarnbom kaddum dja mak kurorre, mak kurrula dja mak kore njilhmi.”

⁸ Wanjh nabadbuyika angel bimunkekadjuy nawu nayungki dja wokdanj wernkih, yimeng, “Kore kunred kubolkkuken duninjh Babylon makka wanjh bolkwarreminj! Bolkwarreminj bu kunmekbekenh bininj nawu kumekbe birrihni nawu birriyimi kunwarre duninjh, dja wanjh bininj rowk kore birribolkbubuyika wanjh bindimunkekadjuj, dja birriyidjirdmarreni bininj dja daluk. Yiman kayime nawu Babylon bininj bindibowoni manbu manbang duninjh ba bu kabirrikodjmayahme.”

⁹ Wanjh nawu nabadbuyika angel benbenehunkekadjuj nawu beneyungkih angel benedokmi wanjh wokdanginj wernkih duninjh, yimeng, “Nangale bininj nawu kabimarnebodan nawu mayh nawarre dja nuye idol, dja mak nawu kahkarrme bim nuye mark kore kumilh dja nuk kubid nuye,

¹⁰ nakka bininj wanjh God kabihdung wernkih duninjh, kunkangeyid dorrengh nuye kore kundulkarre nuye warridj. Dja mak namekbe nawu bininj kadjakbekkan bu kakukrung manbu sulphur dorrengh kore kumirrk bedberre angels nawu God nuye, dja mak nawu Lamb.

¹¹ Kaluk manbu kundolng kore kumekbe kabirrihdjakbekkakan wanjh makka kahdjaldolngre munguyh dja munguyh. Birrimekbe bininj minj mak kabirringehme bu kunbarnangarra munguyh dja mak bu kumunun munguyh, nawu bolkkime kabirrimarnebodan nawu mayh nawarre dja mak nawu idol nuye, nawu bedda kabirridjare kabirrikarrme nawu mark nuye mayh nawarre duninjh ngarre kunngeykenh nuye.”

¹² Mah, wanjh nawu bininj nuye God birriwernhburrbu bu birridjalbengyirrin, dja mak birrimarrkma God nuye kunwok, dja mak birriwoybuknin kore Jesus.

¹³ Wanjh ngabekkang kumwokdanginj kore heavenbeh, yimeng, “Kuhni yibimbu, “Bu bolkkime dja munguyh, bu nawu Kawohnan Rowk kabemarnekurduyime kunmak bedberre bininj nawu kabirridowerren kore nungka.” Wanjh nawu Namalngmakkaykenh kayime, “Yoh, bedda kaluk kabirridjalngehme kore kunkimuk birridurkmirranginj, dja kabirridjal-mang nawu kahdjehdjenyo bedberre.”

Bedda Nawu Birribadbuyika Angels

Revelation 14:14-20

¹⁴ Ngaye nganang kore kumirrk ngardduk kunngol manbu ngolbeleni, dja kore kunmekbe ningihni kore kunngol namekbe nawu kukyimi yiman Bininj Duninjh.* Kaluk nungka kodjdjongbuyindi gold nawu crown, dja mak kore kubid nakka karmi nawu mandjawak djurrmak duninjh manbu kangeyyo sickle.

¹⁵ Wanjh nabuyika angel kumbebmeng kore kunrurrk manbu templebeh wanjh kayhmeng wernkih duninjh nawu ningihni kore kunngol, bimarneyimeng, “Yiyiray mandjawak dorrengh, bu yibenmanama bininj kore kurorre dja ngokko wanjh kumwam ngarre bu yibendjal-mang nawu birridjalwern bininj.”

¹⁶ Wanjh namekbe nawu ningihni kore kunngol wanjh benmangi birriwern bininj kore kanjdji kurorrebeh yiman kayime bininj nawu karralkdjobke manbu mandjawakkimukwi.

* **14:14** Bininj duninjh. Ngurrina kore Daniel 7:13

¹⁷ Wanjh nabadbuyika angel kumbemeng kore kunrurrk manbu temple kore heaven, nungka mak karrmi djurrmak nawu sickle.

¹⁸ Mak nabadbuyika angel dingihdi warridj, nawu wohrnani ngarre kunak kumekbe. Nungka kumbemeng kore altar di, dja bikayhmeng wernkih duninj angel nawu djurrmak mandjawk sickle karrmihkarrmi, yimeng, "Ngokko kumwam ngarre bu yibenmang nawu birriwarre bininj kore kurorre. Yibenma yiman kayime yirradjdadjke grapes manbu wernhdjolengminj."

¹⁹ Wanjh nawu angel wam benmey nawu birriwarre bininj, Dja benkukburriweng kanjdjikh kore mandjorlok kore God kabenkukmelme yiman kayime bininj kahmelme manbu grapes.

²⁰ Kunmekbe wanjh kuberrkakah kore kubolkkimuk nuye God. God benbuni birrimekbe birriwarre bininj yiman benkukdjubudjuburlhme yiman bininj kadjalmelme manbu grapes. Wanjh manbokurlba duninj kambebmerrinj dja manbu marnburrinj yiman mankabo, dja mak mankabokuyeng boyimerranj nakka 300 kilometres, mak boburrkminj bodjorlokminj yiman kore djarrang kahkornamyime.

15

God Nuye Manbu Kunkangeyid

Revelation 15:1-8

¹ Kaluk nganang kaddum kore heaven, bu kunmakkaykenh kurduyimeranj ba bu ngad kanbukkabukkan. Nawu seven angels birrihni, nawu birrihkarrmi seven kundjakkenh manbu manyerre duninj. Kaluk bu God kamunkewe mahni kundjak rowk, wanjh minj kayawoyhyiddung bu yerrekah.

² Dja mak nganang kurrula yiman kayime glass, kaluk rawoyindanj kunak dorreng, dja bininj birrihdi kore kukadjid ngarre. Kaluk birrimekbe nawu birribom mayh nawarre, dja nawu idol nuye, dja mak birribom number manbu kore kungey nuye. Mak birrikarrmi kore God nungan benwong manbu harps.

³ Dja mak birrihwayinidanginj mankarrebokenh. Mankudji manbu Moses nuye nawu bimarnedurrkmirri God, dja manbuyika manbu Lamb nuyeni. Wanjh birriyimi, "God, ngudda nawu yidjalwohrnan rowk, dja yiwernhdulkarrekimuk duninj! Ngudda yidjalkurduyime kunwernhkimuk dja kundjalwernhmakkaykenh duninj! Ngudda yidjalkurduyime kore kunwoybuk dorreng, dja mak mandjad duninj! Kaluk ngudda yidjalwernhwohrnan rowk bu munguyh munguyh, minj kadjobme ke.

⁴ Bininj rowk ngundikengehme ngudda, dja mak ngundingeyburlume! Dja ngudda yidjalkudji nawu yidjalwernhkukdjamunkenh. Birriwarlahkenh bininj kore kubolkbubuyika rowk, wanjh kabirrimre kumirrk ke, ba bu bedda ngundimarneboddan. Dja mak yibenbukkabukkang kore djal mandjad duninj yikurduyime."

⁵ Yerre wanjh, nganang kaddum kore heaven dabburlin nawu birrimarbom yiman temple yerreh kore God kahdjalmulewarren, wanjh dangmarrhmiwam nuye.

⁶ Wanjh seven angels birrimhkani seven kundjak birrimyibemeng kore dabburlinbeh. Mak birridjongbuyindi manmadjmak nawu nakuyengkenh dja madjbami warridj. Kaluk bedda birriberekalkdukkayindi nawu manburba manbu yiman gold kunmadj.

⁷ Wanjh nakudji kore kunkarrngbakmengbeh nawu kabirridjarrkidmimbi, wanjh benwong nawu seven angels seven golden banikkin manbu

barlmeng manbu kunkangeyid nuye nawu God, nawu kahdjaldarrkiddi munguyh munguyh.

⁸ Kaluk kore temple makka dolngbarlmeng kore manbu kunmakmak dja mak kundulkarre nuye God, dja minj nangale mak ngimeninj kore temple dja ngaleng bu kadjalyakmen manbu seven kundjakkenh nawu seven angels birrikani.

16

Banikkin Manbu Kunkangeyidkenh Barlmeng Nuye God

Revelation 16:1-21

¹ Wanjh ngabek kang kumwokdanginj kore temple wernkih duninj bu yimeng bedberre nawu seven angels, "Nguriray dja ngurriyakarrbu namekbe seven banikkin nawu God nuye kunkangeyid kore kurorre."

² Wanjh nawu nayungkih angel wam dja yakarrbom nawu banikkin nuye kore kurorre ngarre, dja wanjh birriwern bininj birrikukmok-wernminj. Kaluk birrikulahwarreminj dja warridj birridjakbekkani. Birrimekbe bininj wanjh nawu birringeykarmi nawu nawarre mayh nuye, dja warridj birrimarneboddangeni nawu idol nuye.

³ Wanjh nabuyika angel wam dja yakarrbom nuye banikkin kore kurrula, dja wanjh bokurlbaminj kunkurlba duninj. Kaluk boyimerranj yiman kunkurlba nuye bininj nawu doweng. Wanjh yehyeng rowk nawu darrkiddi kore kurrula yongohyoy, wanjh nakka dowerrinj rowk.

⁴ Kaluk nabadbuyika angel yakarrbom nawu banikkin nuye kore mankabohkabo dja mak kukku kore njilhmi kahyo, wanjh bokurlbaminj rowk.

⁵ Wanjh ngabek kang angel nawu kore kawohrnan ngarre kukku bu yimeng, "Nawu Yikukdjaman duninj, ngudda nawu yihdjaldi kore kerrngebeh dja mak yidjaldi munguyh. Ngudda wanjh djal mandjad kore yibendjadme nawu bininj rowk. Ngudda wanjh kunmak yiyimeng kore yibendjadmeng nawu birrimekbe bininj.

⁶ Bedda bindihbuni nawu kore birrihdurrrkimirri ke dja mak nawu prophets ke. Wanjh bolkkime yikurduyime djal mandjad bu yibenbowon kunkurlba ba kabindikurlbabongun manbu kunmekbekenh kunu kunwarre bedberre."

⁷ Wanjh kore altar nakka ngabek kang kumwokdanginj yimeng, "Yoh, ngudda God, dja mak yidjalwohrnan rowk, ngudda nawu yirrukarrekimuk duninj. Ngudda yibendjadme kunwoybuk dja mandjad duninj!"

⁸ Wanjh nabadbuyika angel yakarrbom banikkin nuye kore kundung, mak nungka wong kundulkarre ba bu kabenkukkinje yiman manbu kunak karung.

⁹ Wanjh bedda birriwernhkuulahruy, dja birrimarneyimi kunwarre kore kungey nuye God, nawu nungka munkeweyi manmekbe kundjak manbu benbuni. Dja bonj, bedda birridjalwarnyakni bu birrikangeborledmeninj dja mak birriburlumeninj kore kunmakmak nuye God.

¹⁰ Wanjh nabuyika angel, nawu kunbidkudjikenh, yakarrbom nuye banikkin kore thronebeh nuye namekbe mayh nawu nawarre, bu kunkak benbarrkbom kumekbe kore bedda birrihni. Wanjh bininj birridjenbay-erreni kore birridjakbekkabekkani.

¹¹ Mak bedda birriyimi kunwarre bu birridungi God nawu heaven kahni bu kunmekbekenh kore birrihkanjabangni dja mak kunmok birrihkarmi. Dja mak birridjalwarnyakminj bu birrikangeborledmeninj bu birribawoyinj kore kunwarre birrihkurduyimi.

12 Wanjh nabadbuyika angel yakarbbom banikkin nuye kore mankabokimuk kabongeyyo Euphrates. Wanjh bokoluy dja wanjh marnburrinj yiman kayime manbolh bedberre kings nawu kabirriwohrnawohrnan bu kabirrimre kaluk nakka kabirrimdolkan koyek.

13 Wanjh ngabennang birridanjik nawu birrimalngwarre, birrikukyimi yiman kordborlobok. Birrimhbebmi kore kurrangbeh nuye dragon, dja kore kurrangbeh nawu nawarre mayh, dja mak kore kurrangbeh prophet nawu kahkurrekurren.

14 Kaluk birrimekbe nawu birrimalngwarre duninjh, nakka kunmalng bedberre nawu namarnde, dja kabirridjalkarme kundulkarre bu kabirrikurduyime kunkimuk ba bu bininj kabirrikangebarrhme. Mak bedda kabirrire kore kubolkwarlahkenh kurorre wanjh kabindikimang kings nawu kabirriwohrnawohrnan ba kabirriburren kore kunbarnangarra God nuye nawu Wernhdulkarrekimuk.

15 Wanjh Jesus yimeng, "Wanjh kandibekka! Ngaye ngamre yiman bininj nawu dedjdjorklwern nawu kamre manmolok bu kadjirdmang! Kabirrinjilngmak nawu kabirrilorrhmiyo dja mak nawu kabirrihdarnhmadjkarme kunmadj, manbu kabirridjongburren namekbe kunmadj ba bu minj mak kabindiyemikan bu kabirrire kore kurobbe birrikuklarrk."

16 Wanjh nawu birrimalngwarre duninjh bindimornnameng birrimekbe kings kore kabolkngeyyo kunred Armageddon, kaluk makka kunwok ngarre Hebrew.

17 Wanjh nawu nayerre angel yakarbbom banikkin nuye kore kungol. Kaluk wokkimukkenhni wokdanj kore temple, kaluk kore throne, yimeng, "Bonj, wanjh djal burnbom rowk!"

18 Wanjh kumekbe namarrkon mayhkeyi, dja ngurdulmi, dja mak bolkrokani wernkih duninjh, manbu korroko minj bolkrokayi bu kore kerrngehkenh duninjh bininj nawu birrihni kondah kurorre. Makka wanjh manwernhkimukkenh bu bolkrokarakani.

19 Mak kore kubolkkimuk Babylon, makka danjibik marnburrinj bolkdjalkmiwam, dja mahni kubolkkimukkenh kore kubolkbubuyika wanjh djal rurrkwarrawarrhmeng rowk kunmekbe. Wanjh God burrbom kore kunwarrekenh birrihyimi nawu birrimekbe bininj birrihni kore kunred Babylon, wanjh kunmekbekenh nungka yiman kayime bendjalbowong nawu banikkin borlbarlmiyindi nungka nuye kunyid mankimuk duninjh, wanjh bolkbularrbom manmekbe kunred bedberre nuye kunkangeyid.

20 Mak manyunkurr manwern makka wanawam, dja manbu manwarddekimuk makka djalwarddeyakminj.

21 Mak mankihkimuk manyirrkerrk manbu yiman kayime kunwardde kaluk birrirohromeng forty kilos, warrawarrhmerrinj kaddumbek kore bininj birrihni. Wanjh bedda birridungi God dja birrimarneyimi kunwarre bu kunmekbekenh manbu benmarnemunkeweng bedberre, dja mak manmekbekenh bendjalbom nawu bininj rowk benwarrehwarrewong.

17

Ngalwarre Daluk Kamenyime Kunwarrekenh Kabenwarrewon Bininj Revelation 17:1-18

1 Wanjh nakudji angel kore seven angels birrihdjarrkdi nawu bedda birrikarmi seven banikkin, kumwam nakudji kore gaye dja nganmarneyimeng, "Yimray, dja bukkun kunred yiman kayime daluk ngalbu ngalwarre duninjh bu kabirribun ngalbu kahdi darnkih kore kukku mankabowern. Kaluk kunmekbe wanjh kahbolkyolyolme kunred kunkimuk Rome.

² Nawu kings kabirriwohrnawohrnan kore kurorre wanjh kunwarre birridjarrkyimi ngalmekbe daluk dorreng. Mak birriwern bininj rowk nawu kurorre birrihni birribelbmerrinj ngahli daluk bu birridjarrkkurduyimi kunwarre. Wanjh mahni kunwarrekenh benmarnbom yiman birridjalworromkani.”

³ Wanjh nawu Namalngmakkaykenh nganmarnbom bu namekbe angel nganmey dja nganwayhkeng djarreh kore kubolkdarleh. Wanjh kumekbe nganang ngalbu daluk barndihbarndi kore mayh nawu nakimuk yiman kukkarlbani duninj. Kaluk ngeydingeydi kore kunkulah nuye namekbe mayh, wanjh kunwokwarre bimbuyindi manbu bimulewani God bu kunwarrekenh. Nahni mayh karrmi seven kunkodj dja mak ten kunkanemdulk.

⁴ Wanjh ngalmekbe daluk djongbuyindi manburra nawu purple dja mak kurlbakurlbah nawu kunmadj, dja djongbuyindi mak nawu gold nawernni duninj, dja nabadbuyika namakmak jewels, dja mak pearls nawu djongbuyindi. Ngaleng mak karrmi gold banikkin kore kubid ngarre. Nawu banikkin dahkendi njalehnjale nawern nawu nawarrehwarre, dja mak kunwarrekenh ngalenggarre.

⁵ Dja kore kunmilh ngarre makka ngeybimindi manbu kunwok kawarlkayindi. Kaluk mahni manbu ngeybimbuyindi NGALMEKBE DALUK NGALWERNHKIMUKKENH NGALBU KANGEYYO BABYLON, NGALBU BENYAWMEY BIRRIDJALWARRE DALUK ROWK, DJA MAK MARNBOM KORE KUNWARREKENH NGARRE ROWK KORE KURORRE.

⁶ Wanjh ngawohnang bu nganang ngalmekbe daluk bu worromkang kore ngaleng benkurlbabonguneng nawu God nuye bininj dja mak kunkurlba bedberre nawu birridowerrinj kore kunwoybukkenh birrimulewani nuye Jesus. Bu nganang ngalmekbe daluk wanjh ngaye ngakangebarrhmeng.

⁷ Wanjh nawu angel nganmarneyimeng “Njalekenh ngudda yihkangebarrhme? Dja ngaye bengdayhke manbu kahwarilkayindi ngaleng ngarre ngahli daluk dja mak mayh nawu kahmorneni nawu kahkarrme seven kunkodj dja mak ten kunkanemdulk.

⁸ Namekbe mayh nawarre nawu yinang korroko, nakka bu kerrngehkenhni nungka darrkidni, dja bolkkime minj karrarrkid. Dja kaluk kambebme kore kudjorlok kanjdji kurorre wanjh kare bu kadjalyakmen munguyh. Mak bininj nawu kumekbe kabirrihni kore kurorre wanjh bedda kabirikangebarrhme bu kabirrinan nahni nawu mayh nawarre duninj, dja nungka darrkidni bu kerrngehkenh, dja mak minj nungka karrarrkid, dja kaluk yerrekah kamyawoyhdarrkiddurdeng. Kaluk birrimekbe bininj nawu minj kabirringeybimbuyindi kore djurra nawu kabenngeykarre bininj nawu kabirrimimbi munguyhkenh bu kerrngehkenh duninj minj bolkmarnbuyindanj kondah kurorre.

⁹ Wanjh ngurrimayaliwernnin ba bu kuhni wanjh yidjalburrbun. Nawu seven kunkodj kore nawu mayh nuye, namekbe yiman kayime wanjh seven mandulum kore ngalmekbe daluk kahbarndi.

¹⁰ Mak kamenyime nakka warridj seven kings nawu kabirrihwohrnawohrnanken. Nawu kunbidkukudji nakka wanjh ngokko bindibom, nakudji nawu kadjaldarrkid, dja nabadbuyika, nakka wanjh minj kumbangmerawinj. Dja bu kamre, nakka kadjalwohni kundedjdjumbungkenh.

¹¹ Mak namekbe mayh nawarre nawu darrkidni bu kerrngehkenhni, dja bolkkime wanjh minj kadjaldarrkidmimbi, wanjh nakka nabadbuyika king nawu kahmarnbun eight. Nungka kabirriraworren nawu birriyungkihni seven kings, dja nungka mak kare bu kadjalyakmen.”

¹² “Mak nawu ten kunkanemdulk yinang makka kamenyime bininj nawu ten kings, nawu minj birribangmededjingmayi bu kabirriwohrnankenh, dja kaluk bedda kabirrimang manbu kundulkarre bu kabirridjarrkwohrnan nawu mayh nawarre dorrengh bu nakudji hour.

¹³ Birrimekbe ten kings bedda kabirridjaldjare bu kundjalkudji, kaluk bu bedda kabirriwon manbu kundulkarre bedberre kore nawu mayh nawarre.

¹⁴ Kaluk bedda kabirridjaldjare kabirribun nawu Lamb. Nawu nungka Kawoornan Rowk nawu bedberre kabirriwohrnawoornan dja nungka nawu king duninh, dja mak kawoornan bedberre nawu birribubuyika kings rowk bedberre. Wanjh Lamb dja nawu bininj rowk nuye dorrengh wanjh bedda kabirridjarrkwinhme, nahni nawu Lamb nungka benkayhmeng kore bendjarrngbom nawu kabirridjalkadjung munguyh.”

¹⁵ Kaluk bu kuhni yimeng, wanjh nawu angel nganyawoyhmarneyimeng, “Manbu mankabobubuyika manbu yibonang, kore ngalmekbe daluk ningihni, nakka wanjh bininj nawu birrimdolkkang nawu birridjalkulahbubuyika, dja mak nawu birrimirdebubuyika, dja mak nawu birredbubuyika, dja mak nawu birridjenbubuyika.

¹⁶ Nawu birrimekbe nawu bininj ten kings, dja mak mayh nawarre nawu yinang, nakka wanjh kabirrinjirrhmiwon ngalmekbe daluk ngalwarre. Bedda kaluk kabirriyimang rowk nawu njalehnjale kahkarrme dja kabirridjalbawon ngalmekbe daluk bu ngalkukworrrworrr kahdi. Mak kabirridjalkanjngun ngalenggarre kunburk manbu kunkanj, wanjh kabirribalkukkinje kore kunak karung.

¹⁷ Kaluk God benmarnbom nawu birrimekbe bininj nawu ten kings bu kabirridjare kabirrikurduyime kore nungka God kadjare! Kumekbekenh bedda birridjareni bu birriwong kundulkarre bedberre kore nawu nawarre mayh, ba bu nungka kadjalwohrnankenh bedberre, kaluk mak kore baleh God yingkihmulewani, wanjh woybukkenhdanginj.

¹⁸ Wanjh ngalmekbe ngalbu daluk yinang nakka wanjh ngarre kunbolkkimukkenh manbu kawoornan bedberre kings nawu kabirriwohrnawoornan kore kurorre.”

18

Kore Manrurkwern Kabolkngeyyo Kunred Babylon Rurrkbakabakmer-rinj

Revelation 18:1-24

¹ Kaluk yerre bu kuhni ngahnani rowk, wanjh nganang nabadbuyika angel kumhkolungi kore heavenbeh. Kaluk wernhdulkarrekimukni, dja manbu kunmakmak nuye nakka wernhbolkwolkani kore kurorre.

² Wanjh dahdarrhmeng bu kundulkarre dorrengh nuye, yimeng, “Bolkwarrehwarreminj kore kubolkkimukkenh kunred Babylon! Kaluk wanjh yimerranj kunred bedberre nawu namarndehmarnde bedberre dja mak kore kabirrihdi nawu birridjalmaingwarre duninh, dja mak nawu birriwarre mayhmayh, dja nawu mayh nawern rowk.

³ Bininj rowk nawu birrihni kubolkbubuyika rowk wanjh bedda birriraworrinj ngalmekbe daluk ngalwarre, dja kunwarre birrihdjarrkkurduyimi, yiman bedda birridjarrkworromkani. Birriwern kings warridj, nawu kurorre kabirridjalwohrnan, wanjh kunwarre birrihyimi ngaleng dorrengh. Dja bininj nawu kabirriweykan nawu njalehnjale kore kurorrebeh, nakka birrikuenminj kore ngalenggarre kundjalwern kore bayahmeng bedberre.”

4 Wanjh ngabekkang nabuyika kumwokdanj kore heavenbeh yimeng; “Nawu binihbininj ngardduk! Ngurrimbebmerrimen kore kumekbe kunred ba kunukka minj ngurriaworren kore kunwarre kabirrihyime, mak kunukka minj ngurrimang manbu kundjak kamre bedberre birrimekbe bininj.

5 Dja manbu kunwarre ngalenggarre makka wernmerrinj yiman kungol kawernmerren duninj yiman kayime kaddum kore kungol ngarre, dja God minj bimarnebengmidjdayinj kunwarre ngalenggarre kore kurduyimeng.

6 Ngalmekbe ngalbu ngaldjalwarre daluk wanjh ngunwarrewong ngudberre ngurridjalwern. Mah, ngurrikarremulewa bokenhkah kore ngunmarnekurduyimeng. Ngurrimarnebomarnbu wine ngalenggarre ba bu kabongun, manbu manwernhbobang duninj, kayurrhke rowk manbu benmarbnom birribuyika bininj bu birribonguneng.

7 Ngahli daluk djalkukenworreni dja namakmak ngalengman worreni bu karrmi rowk. Wanjh bolkkime ngurriwo kundjak dja kunnjilngwarre dorrengh. Ngaleng mak kamarneyimerren, ‘Ngaye nawu ngahdjalkimuk queen dja mak ngawohrnar duninj! Ngaye minj ngamarrkdjukun, dja yuwn bu mak ngamarnenalkbun bininj nawu karrowen ngardduk.’

8 Wanjh kumekbekenh kunu kundjak kamre ngalenggarre bu kunbarngarrakudji, kaluk kundowikenh mak kambebme, dja mak kore kanalkbunkenh, dja mak kundjalkimuk duninj bu kahmarrwedowen bu manme kayakmen kunmekbe. Wanjh kunak manbirdulmuk kabidjalkukyakwon. Kaluk God nawu Kawohrnar Rowk nawu nungka kabidjadme, nakka wernhdulkarrekimuk duninj.”

9 “Bininj nawu kings kondah kurorrebeh, nawu kunwarre birridjarrkkurduyimi kore ngaleng dorrengh, dja birriyikadjurreni nawu namakmak ngarre, wanjh nakka kaluk kabirrinan kundolng kamdjalbebmerren kore kahbolkrung ngalenggarre, wanjh kabirrimarnenalkbun dja kabirrinjilngwarremen bu kabirrinan karrowen.

10 Dja birrimekbe bininj wanjh kabirriwernhkelemen bu kabirrinan kadjakbekkankenh wanjh djarreh kabirrimdjaldangen dja kabirrikayhme, ‘Kawarre! Kawarre ngudda ke, ngudda nawu yidjalbolkkimuk, dja mak yirrulkarrekimuk kunred manbu Babylon, wanjh bolkkime bu nakudji hour ke bu yidjalyakmen!’”

11 “Mak nawu bininj rowk nawu kabirriweykan kunwern nawu kondah kurorre kabirrihni, nakka kaluk kabirrinalkbun dja kabirrinjilngwarremen bu ngalengkenh, dja bolkkime minj nangale mak kabayahme bedberre kore yehyeng nawu kabirrimkan kore kabbalabeh.

12 Bedda birrikarrmi nadjalwern njalehnjale nawu birrimkang kore kabbala, nawu gold, silver, jewels, pearls, namakmak kunmadj, dja mak manburrba, silk, nawu karlba manburrba meleyimi. Dja mandulkbubuyika kundulk manbu manmanjmakni. Dja mak nabubuyika kore birrimarnbuni ivorybeh dja manmakmak kundulk, dja wirlmurrng dorrengh manbu bronze dja iron, dja mak kunwardde manbu marble.

13 Dja mak birrikarrmi manbu manmekenh, yiman cinnamon dja spice. Dja mak mankalkkidmanjmak, dja myrrh dja frankincense. Dja mak birrimkang manbu wine, dja mankalkkid manbu oliveskenh, dja manmak kandidjawa dja mak manbu wheat. Dja mak birrikarrmi bulikki, sheep, djarrang dja wirlbarra manbu wheel bokenh karrmi. Bedda warridj bindikarrmi bininj nawu bindibongkarrmi ba bu kabindihkukweykankenh kore birribuyika bininj.”

14 Birrimekbe bininj nawu kabirriweykaweykan wanjh kabirriyime, “Ngudda kunred Babylon, nawu namakmak yihdjareni munguyh nakka wanjh wam rowk dja yidjalbarlanhmayi rowk. Nawu ngunkukenwoni nakka wanjh yakayakminj rowk. Minj ngudda mak minj yiyawoyhmang.”

15 Birrimekbe bininj nawu birriweykaweykani namekbe yehyeng rowk, dja mak nawu birrimarnekukenworreni bu ngalengkenh, wanjh bedda birriwernhkeleminj bu birrinang ngaleng djakbakkabekkani, wanjh bedda birrimarnedangen djarrehkah. Kaluk kabirrimarnenalkbun dja kabirrimarnenjingwarremen bu ngaleng doweng.

16 Bedda wanjh kabirrikayhme, “Kadjalwarre! Kadjalwarre ngarre manmekbe kubolkkimuk! Ngaleng djongbuyindi namak manburrba, nawu purple dja karlba duninj manburrba. Mak kukbami gold dorreng, dja mak namakmak nawu jewels, dja mak pearls dorreng.”

17 Wanjh bolbularrbuyindanj rowk bu kundjalburrikudji! Naninjnanu namakmak kore bibalkukenwoni wanjh warreminj rowk!” Birriwern bininj rowk nawu birriwohrnani ngarre kabbala kore kurrula, dja nawu birridjalwohrewohrey kore kabbal, dja nawu birridurkmirri kore kabbala, dja mak nawu birrikumarnbuni kunwardde kore birrireyi kurrula, wanjh bedda rowk kabirridangen djarreh kore kunred Babylon.

18 Bu kabirrinang kundolng kore kahrung, wanjh wernkih kabirrikayhme bu kabirriyime, “Baleh kunbolkbuyika benebebbehbolcrohrokniwirrinj yiman mahni kubolkkimuk kunred Babylon?”

19 Wanjh manbu kundjulng kabirrikodjodudjerren dja kabirrikayhme, kore kunminnalk dorreng dja kunnjingwarre dorreng, bu kabirriyime, “Kawarre! Kadjalwarre ngarre mahni kubolkkimuk kunred Babylon! Birriwern rowk nawu birrikarmi kabbala kore kurrula, wanjh birrikunworreni kore ngalenggarre. Dja bolkkime wanjh bolkwarreminj duninj bu kundjalmeke rerrih!”

20 “Dja ngurrinjilngmaknin bu kuninjkukenh, ngudda nawu ngurrihni kore heaven! Ngurrinjilngmaknin, nawu God nuye bininj, dja nawu apostle dja mak prophets nuye! God wanjh bidjadmeng dja biwarrewam bu kunmekbekenh ngaleng ngunmarnekurduyimeng ngudberre.”

21 Wanjh nawu dulkarrekimuk angel mey manwarddekimuk, yiman manwarddekimuk manbu kabirrimindjubulhmekeh manbu manmim, dja nakka wanjh burriweng kore kurrula. Dja yimeng, “Kunmekbe rerrih bu Babylon bu kayimerran wanjh minj bininj kabirriyawoyhngalke.

22 Bininj rowk kabirringurdme rowk kore harps kabirrihidirri kore kunred Babylon, mak nawu kabirridirri nabubuyika instruments, yiman flutes dja trumpets. Nakka minj kayawoyhwokbehme, dja minj kabirriyawoyhbekkan kore ngudda kunred Babylon. Dja mak bininj rowk nawu kunbubuyika kore kabirrihdurkmirri, wanjh kabirridjalngurdme, minj mak kabirriyawoyhdurkmirri kore ngudda ke. Dja mak minj nangale bininj kabirriyawoyhbekkan kore bininj nawu kabirridjubulhme kore manwarddekimuk manbalabala.

23 Ngudda nawu kunred Babylon. Lamp manbu kore kabirriwurlhke minj kahyawoyhbolkwolan kore ngudda ke. Nangale mak minj kabirriyawoyhmarren bininj dja daluk kore ngudda. Bininj nawu ngudda ke nawu birriweykaweykani, nakka birringeykihkimukni bininj, dja bu bolkkime burrkyak! Ngudda wanjh yibendjalkoweyi nawu bininj kunredbubuyikabeh manbu mankurdangkenh ke.

24 Ngudda wanjh yibenbuni nawu God nuye prophets dja nawu God nuyeni bininj, dja mak birriwern rowk nawu birridowerrinj kore bindihbuni kondah kurorre.”

19

Birriwern Duninjh Nawu Kabirrihni Kore Heaven Kabirriburlume God Revelation 19:1-10

¹ Bu kuhni yakminj rowk, wanjh ngabek kang yiman bininj birrimirndewern duninjh kore heaven bu birrikayhmi, dja birriyimi, "Hallelujah! God ngadberre wanjh nadjalkudji nawu Nadjalmakkaykenh Duninjh, dja mak Narrulkarrekimuk Duninjh!"

² Nungka kandjadme makka manwoybuk dja mandjad duninjh! Nungka bidjadmeng dja bidjalwarrewam ngalmekbe ngawarre duninjh daluk ngalbu benbengwarrewong birriwarlahkenh bininj rowk kore kurorre, wanjh birridjalwarreminj duninjh. Nungka bibom bu benkarremulewam bedberre nawu birrimarnedurrkmirri nuye God."

³ Wanjh bininj kore heaven birrihni birriyawoyhkayhmeng, bu birriyimeng, "Hallelujah! Ngalmekbe daluk kahrung, wanjh kundolng ngarre makka kayahme munguyh dja munguyh."

⁴ Kaluk birrimekbe nawu bininj twenty-four dabborrabbolk dja mak nawu kunkarrngbakmeng mayh nawu kabirridarrkidmimbi, birrimarne-boddangerrinj kanjdji nuye God nawu kahni kore throne dja mak birriburluburlumi. Kaluk bedda birriyimi, "Wanjh bonj! Hallelujah!"

⁵ Wanjh kumwokdanj kore yerrkayerrkani throne nuye yimeng, "Ngurridjalwernhburlumen kadberre God, nawu ngudda ngurriharnedurrkmirri dja mak nawu ngurridjareni ngurriwokmarrkmang, ngudda nawu ngurriyahyahwurd dja mak ngudda nawu ngurrikihkimuk!"

⁶ Wanjh ngabek kang yiman bininj birrimirndewern birrihkayhmi wernkih duninjh, bu wokiyimi yiman kukku manbu kumbowarrhmi, dja mak wokiyimi yiman namarrkon bu ngurdulmi. Wanjh birriyimi, "Hallelujah! God nawu kadberre nawu Narrulkarrekimuk Duninjh dja mak Kawohrnran rowk!"

⁷ Wanjh karrimarrmarrnin dja karrinjilngmakin mak karrimulewan bu God namakkaykenh dja narrulkarrekimuk duninjh. Nawu Lamb bu yiman kabenemarren ngalbu daluk ngokko kumwam, dja ngalmekbe ngalbininj kobeng nuye wanjh biyinkihmarnemarnburrinj nungka nuye.

⁸ Kaluk nungka bidjalwong kunmadj nawu nadjalmak manburrba manbu linen nawu kamadjbame dja madjbele duninjh, ba bu ngaleng kabimarnedjongburren." Kaluk nawu namadjmak linen manburrba, makka kamenmenyime kore njalehnjale kore kunmak birrikurduyimeng nawu God nuye bininj.

⁹ Wanjh nawu angel nganyawoyhmarneyimeng, "Kuhni yibimbu rowk, 'Kabirrinjilngmak nawu bininj bu Lamb kabenkimang bu kabirringimerren dja mak manme kabirridjarrkngun kore mulil kabenemarrenkenh, nawu Lamb dja daluk nuye!'" Wanjh nawu angel yawoyhyimeng, "Mahni makka manwoybuk duninjh kunwok nuye God."

¹⁰ Dja kuhni ngabek kang, wanjh ngamankang kore kurrenge nuye angel bu ngaboddanginj, dja nungka nganmarneyimeng, "Yuwn ngaye kanmarneboddan! Ngaye nakka ngahdjalduurrkmirri nuye, yiman ngudda dja mak nawu ngurridangerrinj nawu ngurrihwerhkharrme kunwok manwoybuk nuye Jesus. Mah, God yidjalmarnebodda, dja mak bu ngurrimulewa manbu Jesus nuye kunwok manwoybuk, dja wanjh Namalngmakkaykenh kerrngehkenh benyinkihwong nawu birriyungkihni prophet warridj."

*Nakudji Bininj Nawu Morneni Djarrang Nawu Kukbeleni
Revelation 19:11-21*

¹¹ Wanjh nganang heaven dangmarrhmiwam, dja kore kumirrk ngarduk nakka djarrang dingihdi nawu kukbeleni. Dja bininj nawu barndihbarndi kore djarrang, nungka nawu ngeyyoy, "Nawu nadjalkangewoybuk", dja warridj ngeyyoy, "Nawu nadjalwoybuk duninjh". Nungka wanjh kabendjadme bininj rowk kore mandjad duninjh dja mak kabenbun nawu birriwarre bininj.

¹² Kore kumim nuye makka yiman kunak kahrung dja kore kukodj makka kakodjongbuyindi nawern nawu crowns. Mak kunngey nuye kangeybimbuyindi kore nungka, kaluk minj nangale mak kaburrbun dja nungka nadjalkudji kadjalburrbun.

¹³ Nungka djongbuyindi nawu madjkuyeng kunmadj nawu kunkurlba dorreng djuhmi, dja mak nahni bininj kangeyyo "Kunwok nuye God".

¹⁴ Nawu army kabirrihni heaven, nawu God nuye djuram rowk, bedda wanjh birrimunkekadjungi nahni bininj nawu nungka mornemorneni kukbele djarrang. Bu bedda warridj birribebbehbarndi nawu birrikukbele djarrang, dja mak birridjongbuyindi namakkaykenh linen, nawu madjami dja nawu madjbelebami duninjh.

¹⁵ Kaluk kore kurrangbeh nuye namekbe bininj nakka bebmi manbu mandjawak sword nawu djurmak duninjh, nawu kakarrme ba kabenbun bininj nawu birriredbubuyika rowk. Kaluk nungka kabenmarnewohnan bedberre yiman nungka kakarrme kundulk wirlmurrngrayek iron dorreng*. Nungka kabenbun bininj yiman bininj kadjuburlhme manbu grapes kore manbu winepress. Nungka kakurduyime kore kunkangeyid nuye God nawu Nawernhdulkarrekimuk Duninjh.

¹⁶ Kaluk kore nawu kahdjongbuyindi, dja mak kore kunkarre kadunkah nuye, makka kahngeybimbuyindi, "Nawu kabenmarnewohnan kings rowk nawu kabirriwohrnan kore kurorre, dja mak kabenmarnewohnan bininj rowk nawu bedda kabirriwohrnawohnan kore kondah kurorre."

¹⁷⁻¹⁸ Wanjh nganang angel dingihdi kore kundung, dja kayhmeng wernkih duninjh bedberre mayhmayh nawu birrihrey kore kungol, "Ngurrimray ngurrimornnamerrimen kore mankimuk mulil manme nuye God. Ba bu ngurribenkukngun bininj nawu kings, dja mak nawu birriwohrnani kore armies, dja mak nawu birrikihkimuk bininj. Dja mak ngurribenkukngun nawu djarrang dja mak nawu bininj bindihmornekani, dja mak kunburrk bedberre bininj nawu minj kabirribongdi, dja mak nawu kabirrihdjالبongdi, dja mak bedda nawu minj birrikihkimuk, dja mak nawu birrikihkimuk bininj warridj."

¹⁹ Wanjh ngabennang mayh nawu nawarre, dja nawu kings kabirriwohrnawohnan kondah kurorre. Dja mak bininj nawu bedberre birrimirndedjalmornnamerrinj ba bu kabirriburran namekbe nawu bininj kahbarndi kore djarrang nawu kukbele, dja mak nuye nawu binihbininj.

²⁰ Dja nahni nawu mayh nawarre dja mak prophetni nawu kakurrehkurren, wanjh Jesus nuye bininj bindidarrkidmey. Kaluk namekbe prophet bimarnedurrkimirri nawu nawarre duninjh mayh, bu kurduyimi kundulkarre dorreng bu benkangebarrhkeyi bininj, dja mak benhkoweyi bininj nawu birrikarrmi mark nuye mayh nawu nawarre, dja nawu birriboddangeni nuye idol. Wanjh bonj, nahni bokenh wanjh bindidar-kidkukburriweng kore kunak mankimuk duninjh, manbu kahdjalurung munguyh kaluk sulphur dorreng.

²¹ Dja nawu army bedda benewong, nakka nawu barndihbarndi kore djarrang nawu kukbele, wanjh benbom rowk mandjawak dorreng nawu

* 19:15 Psalm 2:9

kumbembi kore kurrangbeh nuye. Kaluk mayhmayh kore kunngolbeh birrimkolurrinj, wanjh bindikuknguneng bu birriworrkminj.

20

Baleh Kakurduyimerran Bu Yerrekah?

Revelation 20:1-6

¹ Kaluk wanjh nganang angel kumhkolongi kore heavenbeh. Dja karrmi key nawu ngarre kudjorlok mankimuk kore kahre kanjdji duninjh. Dja mak nakimukkenh karrmi wirmurrnggrayek chain kore kubid nuye.

² Wanjh nawu angel birrarrkidmey mayh nawu dragon, namekbe nayin nadjalkareni nawu namarnde duninjh Satan, dja bidjalkukdukkang bu kani mandjewk ngarre nakudji thousand.

³ Wanjh bikukburriweng kore kanjdji duninjh, dja mak bimarneboldangbalhmeng, dja mak bimarneboldanggrayekwong. Kaluk nawu angel kunmekbe kurduyimeng ba namekbe Satan minj kabenyawoyhkowe bininj nawu kabirriini kurorre dja kaluk kayakwon manbu mandjewk ngarre nakudji thousand. Bu mandjewk ngarre kayakmen wanjh nawu angel kabibebke bu kawohni kunwohdedjungbungkenh.

⁴ Wanjh nganang thrones dja bininj birribarndi kumekbe nawu God benwong kundulkarre bu kabindidjadmekenh. Mak ngabenmalngnang bininj nawu birridoweng kore bininj nawu birriwarre bindikodjdjobkeng nawu bedda birrimulewani nuye Jesus dja mak kore God nuye kunwok. Mak bedda minj birrimarneboddangimeninj nuye nawu mayh nawarre, mak nawu idol nuye, dja mak minj birrikarremeninj kungey nawu mayh nawarre nuye kungey kore kumilh dja kubid bedberre. Wanjh nakka birriyawoyhmalngmimbiminj bu kabirrihdjarrkwohrnankenh Christ dorrengh bu mandjewk ngarre nakudji thousand.

⁵ Bedda nawu birriyungkih bininj bu kaluk kabirriyawoyhmalngmimbiminen nawu birridowerrinj. Kaluk birribuyika bininj nawu birridowerrinj minj kabirriyawoyhmalngdarrkidmen kaluk bu mandjewk ngarre thousand kayakmen.

⁶ Bedda wanjh kabirrinjilngmak dja birriwarnhmakni, nawu birriyungkihni nawu birriyawoyhmalngmimbiminj. Kaluk kundowikenh manbu yerrekahkenh, wanjh minj kabenbun, minj kabirriyawoyhmalngdowen. Kaluk birrimekbe bedda kabirriyimerran priests nuye nawu God dja mak nuye Christ. Mak kabirridjarrkwohrnan Christ dorrengh bu mandjewk ngarre thousand.

Nawu Nawarre Duninjh Satan Kakukrung Munguyh Munguyh

Revelation 20:7-10

⁷ Bu manmekbe mandjewk ngarre thousand kayakmen, wanjh Christ kabibawon nawu Satan kamebme kore karurrkkehndibeh.

⁸ Wanjh Satan kare kabenhkowe bininj kore kubolkwarlahkenh kurorre rowk. Nawu Satan kabenneyebun bininj rowk nawu Birrigog, dja nawu Birrimagog bininj warridj. Wanjh kabenmirndemornname bu kabirriburrenkenh. Kaluk bininj nawu birridjalmirndemorn duninjh yiman kunkayalanj rerrih manbu kahyo kore kurrula kukadid ngarre.

⁹ Dja birrimekbe nawu Satan nuye bininj rowk nakka birrihni kubolkbubuyikabeh kore kurorre wanjh birrimornnamerrinj dja bindimarnebebmeng kore bedda birrihyoy nawu God nuye bininj dja kore kubolkkimuk manbu God kabolkmarnedjare duninjh. Dja makka kunnak kumwarrhmeng kore heavenbeh wanjh benkukkinjeng dja mak birrikukruy rowk nawu Satan nuye bininj.

¹⁰ Dja nahni Namarnde, nawu benkoweng, nakka wanjh birrikuk-burriweng kore kunak manbu sulphur dorreng ruy, kore kabirridjarrkkukrung nawu mayh nawarreni duninj dja mak nawu kahkurren prophet. Wanjh kumekbe kore kabirridjaldjakkanken kore kumun-nun ngarre dja barnangarra ngarre bu munguyh dja munguyh.

Nawu Birriwarlahkenh Rowk Bininj Nawu Birridoweng, Wanjh God Nungan Kabendjadme

Revelation 20:11-15

¹¹ Wanjh nganang throne mankimukkenh dja mak mankukbele, dja nawu nakudji barndihbarndi kumekbe. Kondah kurorre rowk dja mak nawu kunnol makka djalkelerlobmerrinj nuye dja yakayakminj.

¹² Mak ngabennang nawu birridowerrinj nawu birrikihkimukni dja mak birriyahwuyahwurdni, birrihmirnderri kore kumirrk ngarre manmekbe manbu throne. Wanjh djurra nawern dangmarrhmiwam. Mak nabad-buyika djurra warridj, nawu kabimbuyindi bu kabenyolyolme kore God kabendarrkidwon bininj, nakka mak dangmarrhmiwam. Wanjh nawu birridowerrinj bininj benhdjadmeng kore baleh birrihkurduyimi, kore baleh djurra benmarnebimbuyindi birrikurduyimi.

¹³ Bedda nawu birriwarlahkeng rowk nawu birridoweng bu birrikeb-gakmi kore kurrula, dja birrikukkolurrinj kanjdji kore kukku kuboburl-hdjan, mak nawu birrikukkolurrinj kore kunbolk ngarre kundowikenh. Birriwern bininj rowk nawu birridi kore kundowikenh ngarre, wanjh birribebmeng bu kabendjadmekenh.

¹⁴ Yerre manbu kundowikenh dja mak kunmidj rowk, wanjh nungka benkkurriweng kore kunak manbu kahdjaltung munguyh. Maninj-manu kunak yiman kayime kurrula manbu manbirlukimukkenh duninj. Mahni wanjh kundowikenh manbu ngarre bu yerrekah duninj.

¹⁵ Nangale bininj nawu minj kangeydi kore djurra nawu kayolyolme kore kundarrkidkenh, wanjh nakka kabikukburriwe kore kunak manbu manbirlukimukkenh duninj.

21

Bu Kabolkkerrngehmenkenh Kaddum Kore Heaven, Dja Mak Kanjdji Kore Kurorre

Revelation 21:1-5

¹ Wanjh ngabolknang kaddum kore heaven dja kanjdji kore kurorre, dja wanjh bolkkerrngehminj rowk kore kaddum dja kurorre. Dja manbu manyungkih makka wanjh yakminj rowk, dja mak kurrula warridj.

² Wanjh nganang kunbolkkerrnge nawu Jerusalem ngarre, manbu manbolkdjamun duninj, kumhkolungi kaddumbek, kore Godbeh bolkmunkeweng. Kaluk makka yiman daluk ngalbu djongbuyindi namakkaykenh manburra, bu kukmahmaworrinj bininj nuye ba bu kabimirrkmanawu nabininj kobeng ngaleng ngarre nawu kabenemaren.

³ Wanjh ngabekkang Jesus wokdanginj kore yerrkang throne nuye, wokkimukminj bu kayhmeng, "Bolkkime wanjh God kabirridjarrkni bininj dorreng, kaluk kumekbe kabirridjarrkyo. Bedda wanjh kabirriyimerran nuyekih bininj rowk, bu God nungan kadjaldi nawu bedberre God.

⁴ Nungka kabenmimmalkborndung rowk. Bedda minj kabirriyawoyh-dowen, dja minj mak kunnjilngwarre kabirriyawoyhkarrme, dja minj mak kabirriyawoyhnalkbun, dja minj kabirriyawoyhkangebawang. Dja manbu mankarekare rowk, makka wanjh yakminj munguyh munguyh."

⁵ Kaluk namekbe nawu kahni kore throne yimeng, “Ngurrina! Nawu njalehnjale wanjh nakka ngaye ngamarnbun kakerrngehmen rowk!” Wanjh yimeng, “Kuhni yibimbu, dja mahni kunwok kunwoybuk dja kaluk kakurduyimerran kore ngayime.”

God Yolyolmerrinj Bu Nungka Kabendjadmekenh Nawu Bininj

Revelation 21:6-8

⁶ Kaluk nganmarneyimeng, “Bonj, wanjh djalkurduyimerranj rowk. Ngaye nawu ngangeyburren “Nawu Ngarrokme munguyh dja mak nawu Ngayiburnbun Rowk”*. Mak ngaye ngahdjalyingkihdi kore kunyungkih duninjh, dja ngadjaldi kaluk yerrekah kore kayiburnbunkenh rowk. Dja ngaye kaluk kukku ngabenbowon bu djal burudjang kore njilhmibeh manbu kabendarrkidwon nawu bininj.

⁷ Bininj nawu kadjaldi dja minj kamarrkbaworren kore ngaye ngardduk, wanjh ngabalwon mahni kunmakmak manbu ngaye ngardduk rowk, dja ngaye ngayimerran God nuye, bu nungka wanjh kayimerran beywurd ngardduk.

⁸ Dja yuwn bu bininj nawu kabirridjalkelerlobme, dja nawu minj ngaye ngandiwoybukwon, dja mak nawu birrimayaliwarre duninjh, dja mak nawu kabirridjaldjirdmarren kunwarrekenh, dja mak bininj nawu namarndeyi, dja mak bininj nawu birrikurdang warridj, dja mak nawu kabirrimarnebodan kore idols bedberre, dja mak nawu bininj kabirrikur-rehkurren. Bedda rowk, wanjh ngabenkukburriwe kore kurrula manbu kadjalrung munguyh yiman kayime sulphur rerrih karung. Mahni makka kundowikenh manbu yerrekah duninjh kayimerran.”

John Nang Kore Kubolkdjamun Jerusalem Bu Bolkkerrngehminj

Revelation 21:9-27

⁹ Wanjh nakudji kore seven angels nawu birrikarrmihkarrmi seven banikkin seven kundjak dorrengh, wanjh nganyikang dja nganmarneyimeng, “Yimray, ngarrdjarrkre dja bukkan ngalbu ngalbininj kobeng nuye Lamb kabenemarren.” (Kaluk namekbe angel benhmulewam bininj nawu kabirrihwoybukwon Jesus.)

¹⁰ Wanjh nawu angel nganmey, bu Namalngmakkaykenh dorrengh ngankang kore manwarddekuyeng dja manwarddekimukkenh duninjh. Dja kumekbe nganbolkbukkkang manbu kore kubolkdjamun Jerusalem kumhkolungi kore God kahni heavenbeh.

¹¹ Kaluk bolkwolkayindi kunmakmak dorrengh nuye God dja bolkbami yiman kayime namakkaykenh jewels yiman Jasper, dja wernhbolkbeleni yiman crystal.

¹² Dja kumekbe kubolkkimuk makka karrmi manbu kadjalwarnamy, dja makka mankuyengkenh dja mankimukkenh, dja mak kakarrme twelve gates bu karrangmarrkmangkenh. Kaluk nawu twelve angels birribebbehdi kore kurrangmayebubuyika. Dja kore manbu gates wanjh birribebbehngyimbubuyindi twelve namud bedberre nawu Israel benkebmawahmeng.

¹³ Kaluk manbu danjbik gates bebbehdi kore koyekkah, mak danjbik kore kakkibakah, dja mak danjbik kore walemkah, dja mak danjbik kore karrikadkah.

¹⁴ Dja kore wall manbu kawarnamy ngarre kumekbe kubolkkimuk, wanjh kunwardde bebbehdi nakka twelve manwardde balabala kore

* **21:6** Kore Greek kunwok Jesus mulewarrinj yimeng “Ngaye yiman alpha dja mak nawu omega”. Ngad wanjh karriyime letter A dja letter Z kore alphabet.

kanjdjikh ngarre kawarnamyoy. Kaluk kore mahni kunwarddebubuyika rowk, wanjh birribebbehgeydi twelve apostles nawu nuyeni Lamb.

¹⁵ Wanjh namekbe angel nawu nganehwokdi karrmi rod nawu rohrokmikenh, nakka wanjh wirlmurngrayek nawu gold. Wanjh bolokhrokmeng kumekbe kubolkkimuk, dja rohrokmeng warridj manbu gateskenh ngarre bu kabirringimerren ngarre, dja mak manbu warnamyoy manbu ngaleng ngarre.

¹⁶ Kaluk manmekbe kunbolkkimuk makka kukyimi kore square kore birribolkmarnbom. Kurrird kunkarrngbakmeng wanjh karohrok rowk. Wanjh namekbe angel bolokhrokmeng bu nawu rod karrmihkarrmi, dja nang bu warlahni 2200 kilometres, dja kumirrk kore kurredj, wanjh 2200 kilometres, dja mak kanjdji kore kaddum, wanjh karohrok, 2200 kilometres.

¹⁷ Mak nawu angel rohrokmeng manbu warnamyoy warridj, dja nang bu sixty five metres bu kaddumkah. Kaluk nawu angel rohrokmeng kore nawu bininj kabirriyime yiman metres.

¹⁸ Kaluk manbu warnamwarnamyoy, bu birrimarnbom wanjh birrikurmi manbu jewel nawu yiman jasper, dja manmekbe kunred makka wanjh gold duninj manbu birrimarnbom yiman glass rerrih kukbami.

¹⁹ Dja manwarddebalabala kore kanjdji ngalengngarre warnamwarnamyoy kumekbe kore kubolkkimuk, nakka wanjh jewels nawu nabubuyika birrikurmikurmi ba bebbehdi. Manbu kore mankudji manwarddebalabala karrmi jasper, dja manbuyika karrmi sapphire, manbadbuyika wanjh karrmi chalcedony, manbuyika manbu karrmi nawu emerald.

²⁰ Mak manbuyika manwarddebalabala manbu karrmi manmak kunwardde manbu ngeyyoy onyx, dja mak manbadbuyika karrmi manbu carnelian, dja mak manbuyika karrmi chrysolite, manbuyika karrmi beryl, manbuyika karrmi topaz, manbuyika karrmi chrysopease, manbuyika karrmi jacinth, dja mak manbu yerre makka amethyst.

²¹ Dja manbu twelve gates kore kayirrangmarrkmiyindan, makka twelve mankimuk pearls kaluk bebbehdi bedberre kore gate mankudji bedberre. Dja manbu kurrorre ngarre manbolh makka mankimuk kore kumekbe kubolkkimuk, makka wanjh gold duninj, manbu yiman kayime glass nawu kabelebame duninj.

²² Mak manbu temple makka minj ngawernhnayinj kore kumekbe kubolkkimuk dja nakka wanjh God nawu Dulkarrekimuk Duninj dja Kawohnan Rowk, dja nawu Lamb, wanjh yiman kayime bedda temple duninj ngarre kumekbe.

²³ Kaluk kumekbe nawu dird dja kundung minj kabenebolkwolkan, dja larrk. Wanjh nakka God nuye kunmakmak kadjalbolkwolkan kumekbe, dja mak nawu Lamb, nakka wanjh yiman nakka lamp kahrung bu kabolkwolkan kumekbe.

²⁴ Wanjh bedda kabindimarnebolkwolkan nawu birriwarlahkenh bininj rowk kore kurorre ba bu bedda kabirrire kunmak rowk. Dja kings nawu kabirrihwohrnawohnan kondah kurorre wanjh kabirrimkan nawu kunmakmak bedberre kumekbe.

²⁵ Manbu gates ngarre kumekbe kore kubolkkimuk makka minj karrang-balhmiyindan bu kunbarnangarra rowk ngarre dja mak manbu kunkak minj karri kumekbe.

²⁶ Kaluk njalehnjale nawu namakmak, dja mak ngeykimuk dorreng wanjh bininj kabirrimkan kore birrimdolkkang kunredbubuyika nakka kabirriyime kumekbe.

²⁷ Dja ngaleng, njale nawu nawarre dja bininj nawu kunwarre kabir-rikurduyime mak nawu kabindihkowe birribuyika, nakka wanjh minj kabirringimen kumekbe. Birridjalkudji nawu kabirringeydi kore Lamb nuye djurra nawu kabendarrkidwonkenh, wanjh birridjalmekbe bininj kabirringimen.

22

Kore Kubolmak Heaven Mankabo Manbu Kabendjaldarrkidwon Bininj Revelation 22:1-5

¹ Wanjh nawu angel nganbukkang mankabo manbu bininj kamimbiwon. Kaluk manbobeleni yiman crystal rerrih dja kumdjalborey kore God nuye throne dja mak Lamb nuye.

² Wanjh balborlobmi kore kuburldjarn manbolh mankimukkenh bu kore kunredkimuk. Dja kundulk manbu kabenmimbiwon bininj makka bebbehdi kore mankabo borlobmi kuburldjarn. Dja bu manme kayawoyh-marnburren kore dird bokenh rowk. Dja manbu kunmalaworr ngarre kore manmekbe kundulk makka kabenmarnbun nawu bininj rowk kore birriredbubuyikabeh.

³ Bininj nawu God kabenwarrewan, wanjh minj kumekbe kabirrihni bedda. Njalehnjale nawu God nungan kawernhwidnan, wanjh makka minj kahdi kumekbe. Manbu God nuye throne kahdjaldi, dja nawu Lamb wanjh bedda kumekbe kabenehdi, dja bininj nawu kabirrimarnedurrk-mirri, wanjh bedda kabirridjalmarnebodan nuye kumekbe.

⁴ Kaluk bedda kabirrikebnan, dja mak kunngey nuye makka kangeydi kore kumilh bedberre.

⁵ Dja mak manbu kunkak makka minj kamre kumekbe. Mak bininj nawu kumekbe kabirrihni minj mak kabirribirluyawan yiman kundung dja mak lamp. Dja God nawu kawohrnan rowk wanjh nungan kaben-marnebolkwolk bedberre. Nawu bedda wanjh kabirridjalwohrnan yiman kings rerrih bu munguyh munguyh.

Jesus Yimeng, "Ngaye bolkkime ngamre!" Revelation 22:6-21

⁶ Kaluk nawu angel nganmarneyimeng, "Mahni kunwok wanjh mandjalwoybuk, dja ngurriwokmarrkmang. Nawu Kawohrnan Rowk, nungka God bedberre nawu kabenwon Namalngmakkaykenh nuye prophet, nawu bimunkeweng angel nuye ba kabenbukkabukkan nawu kabirrihmarne-durrkmirri kore baleh bolkkime kakurduyimerran.

⁷ Wanjh Jesus yimeng, 'Ngurribekka! Ngaye bolkkime ngamre! Ngaye kunmak ngamarneyime nangale bininj nawu kawernhkarrme kunwok ngardduk nawu kore nahni djurra kawokbimbuyindi.' "

⁸ Ngaye, John wanjh ngaweleng nawu ngawokbekkang dja nganani kore njalehnjale rowk ngabimbom. Bu kunmekbe nganang dja ngabekkang, wanjh ngadjalmakang kore kurrenge nuye, dja ngakuyinburlumeng nuye angel nawu nganhbukkani kore ngahnani.

⁹ Dja ngaleng nawu angel nganmarneyimeng, "Yuwn ngaye kan-marnebodan! Ngaye nakka ngahdurrmirri yiman ngudda, dja nawu ngurridangerrinj nawu prophets dja bininj rowk nawu kabirrimarrkmang kunwok nawu kore djurra kawokbimbuyindi. Dja ngaleng yidjalmarne-bodda nuye God!"

¹⁰ Wanjh nawu nganyawoyhmarneyimeng ngardduk, "Manmekbe manbu yihbimbuni kore djurra makka minj yiwarlkkan dja ngokko wanjh darnkih kamhre ngarre bu kuhni rowk kakurduyimerran.

11 Wanjh nangale bininj nawu kahdjalkurduyime kore kunwarre wanjh nakka kunwarre djahdjalkurduyimen, dja mak nangale nawu kahdjalkangeburlerri munguyh, nakka wanjh djahdjalkangeburlerri nin munguyh. Dja nangale nawu kahdjalkurduyime kunmak wanjh nakka kunmak bu djahdjalkurduyimen, mak nangale nawu kahdjalkukdjamunworren wanjh djalkukdjamunnin munguyh.”

12 Wanjh Jesus yimeng, “Wanjh kandibekka! Ngaye wanjh bolkkime ngamyawoyhdurdeng! Kaluk ngamkan nawu bedberre bininj rowk nawu kahyngkihdjedjenyo bu ngabenwonowon bedberre kore baleh bedda birrihkurduyimi.

13 Ngaye nawu ngangeydi ‘Ngarrokme rowk, dja mak ngayiburnbun rowk’. Ngaye ngayungkih duninj, ngarrokme dja mak ngamre yerreh! Ngamarnbom dedjingmey rowk, dja mak ngamarnbun kore kayiburnbunkenh rowk.

14 Ngabenmarnekurduyime kunmak nawu kunmadj kabirrimadjdjirrid-jburren bedberre ba bu kabirringun manbu manbarnem manme kore kundulkbeh bu kahbenmalngdarrkidwon, dja mak kabirringimen kore kunrurkdangmaye ngarre mahni kured kubolkkimuk.

15 Dja kore kuberrkkah kubolkkimuk nawu kabirrihdi nawu birriwarre bininj, dja mak bininj nawu bedda birrikurdangni dja mak nawu kabirridjirdmarren bininj daluk, dja mak bininj nawu namarndeyi, dja mak bininj nawu idols kabirrimarnebodan, dja nawu kabirrihkurrehkurren bu kabindikowe birribuyika bininj.”

16 “Ngaye Jesus ngamunkeweng ngardduk angel bu kayolyolme kuhnikenh kunwoybuk kore nawu yiwarrudj bedberre. Ngaye nawu David nuye mawahmawah, dja ngaye ngarranginj kore nuye namud, dja ngaye yiman kayime mankokkarrng manbu kawernhkukbame bu kamhkabel djarreh.”

17 Wanjh Namalngmakkaykenh kayime, “Yimray!” Dja ngalmekbe daluk ngalbu kammahme kore nabininjkobeng ngarre wanjh kahyime, “Yimray!” Dja ngurriwern nawu kandibekkan, wanjh ngurriyimen, “Yimray!” Dja ngaleng ngaye marneyime ngudda nawu ngurrikombukdown, wanjh ngurrimdjallay. Nawu nangale bininj kadjare, wanjh kamre kabongun kukku manbu kabimalngdarrkidwon, wanjh nakka minj njale kakarremulewan.

18 Wanjh ngaye ngabenbengdayhke nawu kabirribekkan kunwok kore maninjmanu djurra kawokbimbuyindi nawu prophecy. Bu nangale kabalkarrewernwon manbu kunwok nuye, wanjh nakka God kabadjal-marnbn kadjakekkanen kundjak kore nahni djurra kahbimbuyindi kayolyolme mahni kundjakkenh.

19 Mak nangale kawokburriwe manmekbe kunwok kore kahbimbuyindi, wanjh God nakka kabadjalkaybun manmekbe mandjoleng kore kundulkbeh manbu kahbenmalngdarrkidwon bininj, dja mak minj namekbe bininj kangimen kore kubolkdjamun nuye, manbu nahni djurra kahbolkmulewan.

20 Kaluk Jesus, kuhni mulewam wanjh kunwok makka manwoybuk duninj, wanjh kayime, “Yoh, bolkkime ngaye ngamyawoyhdurdeng.”

Dja ngaye nawu John ngayime, “Mah wanjh. Yimray, ngudda nawu Jesus yiwohnan rowk!”

21 Wanjh ngaye ngadjare Jesus nawu Kawohnan Rowk bu ngundjalkongibun ngudberre, dja mak ngurridjarrkdi nawu God nuye binihbininj rowk. Wanjh Bonj.